

Nduudu N'dai Yeⁿ'e Ndyuūs

El Nuevo Testamento
de Nuestro Señor Jesucristo

en el cuicateco de Tepeuxila



La Liga Bíblica

Las Sagradas Escrituras para Todos

El Nuevo Testamento
en el cuicateco de Tepeuxila

La Liga Bíblica 1M primera edición 1974 [cux]
La Liga Bíblica versión electrónica 2009

Publicado por

© La Liga Bíblica 1974

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

PRÓLOGO

El Nuevo Testamento fue escrito originalmente en griego. Pronto se empezó a traducir a otros idiomas para que las personas que no hablaban griego pudieran leerlo en su propia lengua. A lo largo de casi dos mil años ha sido traducido a más de quinientos idiomas. Entre las traducciones más recientes se encuentra la presente en el idioma cuicateco, tal como se habla en el municipio de Tepeuxila, estado de Oaxaca.

A pesar de que la gramática y el vocabulario del cuicateco son distintos a los del griego, el cuicateco posee construcciones gramaticales y formas retóricas que pueden expresar con igual hermosura el significado original del mensaje del Nuevo Testamento. Existen palabras del griego que no pueden ser traducidas al cuicateco con una sola palabra; lo mismo sucede en el sentido inverso: hay frases del griego que pueden ser mejor expresadas en cuicateco en forma más abreviada. En ambos casos se tuvo que buscar la traducción más adecuada para lograr una interpretación fiel y a la vez presentar una narración natural y fluída en cuicateco.

El texto se presenta tanto en cuicateco como en español para el deleite de todos aquellos que hablen uno u otro idioma, o bien ambos.

Aclaraciones acerca del Alfabeto Cuicateco

La mayoría de las letras del alfabeto cuicateco son las mismas que se encuentran en el alfabeto español. Sin embargo, en el cuicateco existen algunos sonidos y peculiaridades que no hay en español y que tienen sus respectivos símbolos. Estas características del alfabeto cuicateco son las que a continuación exponemos:

1. El tono. Cada vocal puede pronunciarse de tres modos:

--con tono alto, indicado por el acento agudo (á)

--con tono bajo, indicado por una pequeña raya sobre la vocal (ā)

--con tono medio, sin indicación alguna (a)

ejemplos: cúú ‘culebra’ (tono alto)
 cūū ‘campana’ (tono bajo)
 cu'u ‘plato’ (tono medio)

2. El signo (!), o saltillo. Indica el cierre instantáneo de la garganta, como sucede en las siguientes palabras:

 'cūū ‘este’
 ca'á ‘mi pie’

3. La vocal ε. Se pronuncia como en las palabras que siguen:

 nguεε ‘no’
 ndεεche ‘siete’

4. La nasalización. Para poder distinguir entre las vocales orales y las nasalizadas, se escribe una ⁿ después de la vocal nasalizada. Este signo se utiliza con cualquier vocal nasalizada. Si después de la vocal nasalizada hay un saltillo seguido de otra vocal, la segunda vocal será también nasalizada.

ejemplos:

naá ⁿ	‘mi cara’	ché ⁿ	‘corral’
na ⁿ ’á	‘leña’	ne ⁿ ’é	‘quiero’
ti ⁿ	‘mi cabeza’	yu ⁿ	‘mazorca’
ch ⁿ ’i ⁿ ’í	‘manifesté’	nyu ⁿ ’u	‘cinco’

Índice

SAN MATEO.....	1
SAN MARCOS.....	78
SAN LUCAS	125
SAN JUAN	204
HECHOS.....	253
ROMANOS.....	318
1 CORINTIOS	354
2 CORINTIOS	388
GÁLATAS.....	411
EFESIOS.....	424
FILIPENSES.....	437
COLOSENSES	446
1 TESALONICENSES	454
2 TESALONICENSES	462
1 TIMOTEO.....	466
2 TIMOTEO.....	476
TITO	483
FILEMÓN.....	488
HEBREOS	490
SANTIAGO	517
1 PEDRO	526
2 PEDRO	536
1 JUAN	542
2 JUAN	549
3 JUAN	551
JUDAS	553
APOCALIPSIS	556

NDUUDU N'DÁÍ CHÍ DÍNGUŪⁿ APÓSTOL MATEO

Yeⁿé 'iiⁿyāⁿ chi ndaata yeⁿē
Jesucristo chí vmnááⁿ vmnaaⁿ
(Lc. 3.23-38)

1 Chuū chí lista yeⁿe ndaata yeⁿe Jesucristo, ndíí na ndaata Abraham ndíí na ndaata David ndíí tiempo chí ch'iindiyáāⁿ Jesucristo.

²Abraham miiⁿ ch'iindí daiya sa chí nguuvi Isaac. Isaac miiⁿ ní ch'iindí daiya sa chí nguuvi Jacob. Jacob miiⁿ ní ch'iindí daiya sa Judá ndúúcū tanáⁿā 'díínu yā. ³Judá miiⁿ ní ndúúcū Tamar chí ndaataá yeⁿē sa ch'iindí daiyá yā chí cuates chí nguuvi Fares ndúúcū Zara. Fares miiⁿ ní ch'iindí daiya sa Esrom. Esrom miiⁿ ní ch'iindí daiya sa Aram. ⁴Aram miiⁿ ní ch'iindí daiya sa Aminadab. Aminadab miiⁿ ní ch'iindí daiya sa Naasón. Naasón miiⁿ ní ch'iindí daiya sa Salmón. ⁵Salmón ndúúcū Rahab chí ndaataá yeⁿē sa ní ch'iindí daiyá yā Booz. Booz miiⁿ ndúúcū Rut chí ndaataá yeⁿē sa ní ch'iindí daiyá yā Obed. Obed miiⁿ ní ch'iindí daiya sa Isaf. ⁶Isaf miiⁿ ní ch'iindí daiya sa rey David. Rey David miiⁿ ní ch'iindí daiyá yā Salomón taachi caneé yā ndúúcū ndaataá chí

vmnááⁿ vmnaaⁿ ní ndaataá yeⁿe saⁿā Urías.

⁷Salomón miiⁿ ní ch'iindí daiya sa Roboam. Roboam miiⁿ ní ch'iindí daiya sa Abías. Abías miiⁿ ní ch'iindí daiya sa Asa. ⁸Asa miiⁿ ní ch'iindí daiya sa Josafat. Josafat miiⁿ ní ch'iindí daiya sa Joram. Joram miiⁿ ní ch'iindí daiya sa Uzías. ⁹Uzías miiⁿ ní ch'iindí daiya sa Jotam. Jotam miiⁿ ní ch'iindí daiya sa Acáz. Acáz miiⁿ ní ch'iindí daiya sa Ezequías. ¹⁰Ezequías miiⁿ ní ch'iindí daiya sa Manasés. Manasés miiⁿ ní ch'iindí daiya sa Amón. Amón miiⁿ ní ch'iindí daiya sa Josías. ¹¹Josías miiⁿ ní ch'iindí daiya sa Jeconías. Jeconías miiⁿ ndúúcū tanáⁿā vi'i yā ch'iindiyáāⁿ yā taachi chiidá yā ndúúcū cheecú yā ní preso yā ndúúcū tanáⁿā 'iiⁿyāⁿ yeⁿe ndaata Israel ní taachi cueⁿé yā na cyúúni na yáⁿāa Babilonia.

¹²Cuayiivi chí cho'ó yā na yáⁿāa Babilonia, Jeconías miiⁿ ní ch'iindí daiya sa Salatiel. Salatiel miiⁿ ní ch'iindí daiya sa Zorobabel. ¹³Zorobabel miiⁿ ní ch'iindí daiya sa Abiud. Abiud miiⁿ ní ch'iindí daiya sa Eliaquim. Eliaquim miiⁿ ní ch'iindí daiya sa Azor. ¹⁴Azor miiⁿ

ní ch'iindí daiya sa Sadoc. Sadoc miiⁿ ní ch'iindí daiya sa Aquim. Aquim miiⁿ ní ch'iindí daiya sa Eliud. ¹⁵Eliud miiⁿ ní ch'iindí daiya sa Eleazar. Eleazar miiⁿ ní ch'iindí daiya sa Matán. Matán miiⁿ ní ch'iindí daiya sa Jacob. ¹⁶Jacob miiⁿ ní ch'iindí daiya sa José, 'iiⁿ'yāⁿ chí isáⁿā yeⁿe María. Ní daiya ta ní Jesús chí nguuví Cristo.

¹⁷Tíicā nducuéⁿē ndaata yeⁿe Abraham ndíí rey David ní ndiichicúūⁿ ndaata yeⁿé yā o generaciones. Ní ndíí rey David miiⁿ ndíí taachi cueⁿe nducyáácá 'iiⁿ'yāⁿ ndaata yeⁿe yā na país Babilonia ní ndiichicúūⁿ ndaata yeⁿé yā. Ní ndíí taachi cheⁿe yā na yáⁿāa Babilonia ndíí taachi ndaā Cristo iⁿ'yéⁿdi 'cūū ní ndiichicúūⁿ ndaata yeⁿé yā.

'Túucā ch'iindiyāāⁿ Jesucristo

(Lc. 2.1-7)

¹⁸'Túucā ch'iindiyāāⁿ Jesucristo. Taachí María miiⁿ chí cheecu Jesús miiⁿ caⁿa yā chí 'caandavaacú yā ndúucú José níicú taachi 'āā cuéé 'caandavaacú yā ndúucú vi'i, véé 'áámá daiya yā cheetí yā cucáávā Espíritu N'dai yeⁿé Ndyuūs. ¹⁹José miiⁿ ní neⁿé yā 'caandavaacu yā ndúucú María miiⁿ. Ní José miiⁿ ní neéné n'dai yā. Ní cuayiivi nguéé neⁿé yā 'caandavaacú yā ndúucú táⁿā cucáávā chí véé dacua'a cheetí yā. Ní nguéé neⁿé yā yaa'vi yā 'iiⁿ'yāⁿ yeⁿe yāāⁿ miiⁿ'ya yeⁿe María chí nguéé n'daācā ti nguéé neⁿé yā chí María cuuví 'cuinaaⁿ yā. ²⁰Ní taachí José miiⁿ nacadínuuⁿ yā chí cu'neeⁿ yā María miiⁿ, cuayiivi ní taachí cyaadu yā, 'áámá ángel yeⁿe

Señor Ndyuūs che'enaáⁿ yā yeⁿé yā ní caⁿ'a yā chíí yā José miiⁿ: Díí, José, saⁿā yeⁿe ndaata rey David, nguéé 'va'a di cuuví n'daataá yeⁿe di María, ti dacuá'ā yeⁿé tá chí véé cheeti tá nguéé yeⁿe 'iiⁿ'yāⁿ ti yeⁿé Espíritu N'dai yeⁿe Ndyuūs. ²¹Ní táⁿā miiⁿ ní 'cuundiyāāⁿ daiya tá 'áámá saⁿā 'lííⁿ. Díí ní cu'neeⁿ di chí ngúúví sá JESÚS caati cucáávā Jesús miiⁿ ní nadanguáⁿ'ai 'iiⁿ'yāⁿ yeⁿé iⁿ'yeeⁿ'dí 'cūū ní nadich'ecúú yā nuuⁿndi yeⁿe nducyaaca 'iiⁿ'yāⁿ.

²²Tanducuéⁿē chuū ní 'tíicā chíí ndúucú María ní 'íicú cuuvi cuaacu chí caⁿ'ā profeta yeⁿe nduudu yeⁿé Ndyuūs ndíí cuaaⁿ vmnaaⁿ, nduudu chí canéé nguūⁿ na libro yeⁿé Ndyuūs 'tíicā:

²³Níicú n'diichí nī. Tá 'cūū 'áámá chí cuiinuú tá 'cuúndí daiya tá. Taachí 'cuundiyāāⁿ 'áámá daiya tá ní cu'neeⁿ chí duuchi Emanuel chí neⁿe caaⁿ'maⁿ Ndyuūs ndúucú s'uúúⁿ.

²⁴Cuayiivi miiⁿ ní taachi José miiⁿ nanduuchí yā, tuu'mi ní dííⁿ yā tan'dúucā chí ngaⁿ'ā ángel yeⁿe Señor Ndyuūs níicú ch'iindivaacú yā ndúucú María miiⁿ. ²⁵Naati José miiⁿ nguéé n'diichi sá María miiⁿ ndíí ch'iindiyāāⁿ daiya tá, ní José s'neeⁿ sá chí ngúúví dacua'āa miiⁿ dúúchí JESÚS.

Yeⁿé 'iiⁿ'yāⁿ magos chí cheⁿe sa n'diichi sa Jesús

2 Taachi Jesús ch'iindiyāāⁿ yā na yāāⁿ Belén yeⁿe yáⁿāa Judea, tiempo miiⁿ ní saⁿ'a Herodes miiⁿ ní rey yeⁿe yáⁿāa Judea. Ní n'duuví magos, 'iiⁿ'yāⁿ chí déenu ca yā yeⁿe 'ííⁿ'nyúⁿ ndiicá yaⁿ'ái yā ndíí

cuaaⁿ ná ícan'daā 'yáⁿā. Ní magos ndaa yā na yāāⁿ Jerusalén. ²Magos ní ndaa yā nanááⁿ rey Herodes miiⁿ ní ntiinguuneeⁿ yā rey: ¿Tíí cánée 'iiⁿyāⁿ chí rey yeⁿe 'iiⁿyāⁿ Israel chí 'niindiyáaⁿ yā? Nús'uū ní n'diichí 'nū 'áámá 'ííⁿnyúⁿ ch'εεε cuááⁿ ná ícan'dáá 'yáⁿā 'ííⁿcú chííⁿ chí cuchíí 'nū. Nííⁿcú ndaa 'nū chí cu'téénú 'nū saⁿā 'lííⁿ rey miiⁿ.

³Taachí rey Herodes miiⁿ ch'iindiveéⁿ yā chuū, chistaⁿā vaanicadííⁿūⁿ yeⁿe yā. 'Tiicá ntúúⁿ nducyaaca 'iiⁿyāⁿ yeⁿe yāāⁿ Jerusalén taachi ch'iindiveéⁿ yā. ⁴Ní rey Herodes miiⁿ ní nádaamá yā nducyaaca chíidūu n'gεεtē chí ngaⁿa ntiiⁿnyúⁿ yā yeⁿe yaācū Israel ndúúⁿcū 'iiⁿyāⁿ chí ng'iⁿcuééⁿ ley 'iiⁿyāⁿ yeⁿe Israel. Ní itiinguuneeⁿ yā 'iiⁿyāⁿ s'eeⁿ: ¿Tíí 'niindiyáaⁿ Cristo? ⁵'Iiⁿyāⁿ s'eeⁿ ní caⁿa yā chíi yā rey miiⁿ: 'Cuundiyáaⁿ yā na yāāⁿ Belén yeⁿe yáⁿāa Judea caati 'tíicā canéé nguūⁿ na libro yeⁿe Ndyuūs cucááⁿvā saⁿa profeta:

⁶Ndís'tií 'iiⁿyāⁿ yeⁿe yāāⁿ Belén yeⁿe yáⁿāa Judá, ¿'áá nguéé yāāⁿ yeⁿe ní chí 'lííⁿ cá nguaaⁿ nducuéⁿē yāāⁿ yeⁿe yáⁿāa Judá naachi 'iiⁿyāⁿ ndíí tiiⁿ ngaⁿa ntiiⁿnyúⁿ yā? Nguéé chí 'tíicā, caati nguaaⁿ ndís'tií chí yeⁿe yāāⁿ Belén can'dáá 'áámá sáⁿā chí ngaⁿā ntiiⁿnyuⁿ sá yeⁿe nducyáácá 'iiⁿyāⁿ Israel chí judíos chí 'iiⁿyāⁿ s'eeⁿ chí Ndyuūs ndεεve yā.

⁷Tuu'mi ní rey Herodes yaaⁿvi n'dééí yā saⁿā magos ní ntiinguuneeⁿ cá yā saⁿa s'eeⁿ: ¿Dε'ē tiempo n'diichi ní 'ííⁿnyúⁿ miiⁿ? ⁸Ní

rey miiⁿ ní caⁿa yā chíi yā saⁿa s'eeⁿ: Ndís'tií magos, cueⁿe ní na yāāⁿ Belén ní in'nuūⁿ n'daāca ní dacua'a 'lííⁿ miiⁿ. Ní taachí ndaaca ní dacua'a mííⁿ, nanguεεcunéeⁿ ní ní caaⁿmaⁿ ní yeⁿé. Maaⁿ nííⁿcú 'úú ntúúⁿ ní cuuvi caⁿá cu'teenú dacua'a 'lííⁿ miiⁿ.

⁹Magos ní ch'iindiveéⁿ yā nduudu yeⁿe rey miiⁿ ní cúnaⁿa yā. Cuin'diichí ní. 'Ííⁿnyúⁿ chí 'iiⁿyāⁿ magos n'diichi yā cuaaⁿ na ícan'daa 'yáⁿā, 'ííⁿnyúⁿ mííⁿ cueⁿé nanááⁿ yeⁿe magos taanduvéé ndaā ní cānee lugar naachi canéé dacua'a 'lííⁿ. ¹⁰Ní taachi magos 'āā n'diichí yā 'ííⁿnyúⁿ miiⁿ, yéénú taaví yā. ¹¹Ní taachi sndaá yā vaāí miiⁿ, n'diichí yā saⁿā 'lííⁿ dacua'ā miiⁿ ndúúⁿcū chεεcu sá María. Ní chíintií'yá yā nanááⁿ dacua'ā miiⁿ ní s'téenu yā. Taachi n'guaaⁿ yā caja naachi snéé regalos yeⁿe yā, tuu'mi ní ca'á yā yeⁿe dacua'ā miiⁿ. Regalos ní 'dííⁿnguaāⁿ ndúúⁿcū yáⁿā chí n'dεeve ngééⁿ ndúúⁿcū mirra chí diitū taavi n'dai ngééⁿ. ¹²Cuayivi miiⁿ ní Ndyuūs yaaⁿvi yā magos na 'yúúⁿdúyaaⁿ yeⁿe yā chí 'āā ntéé naⁿa yā nanááⁿ rey Herodes miiⁿ. Nííⁿcú magos cunaⁿa yā na vaacu yā na taama yúúⁿí.

Cueⁿe yā ngéenu yā na yáⁿāa Egipto

¹³Taachi magos cunaⁿa yā, tuu'mi ní Ndyuūs dicho'ó yā 'áámá ángel nííⁿcú ángel miiⁿ ní ndaa yā nanááⁿ José miiⁿ taachi cyaadú yā ní caⁿa yā chíi yā José: Díí José, nducueeⁿ di ní cuta'a di saⁿā 'lííⁿ ní cueⁿe di cáanū di ndúúⁿcū chεεcu sa ndíí yáⁿāa Egipto. Ní 'cuεetinée ní miiⁿ ndíí taachi 'úú caaⁿmáⁿ caati canéé

chí rey Herodes miiⁿ ní nan'nuúⁿ yā saⁿá 'lírⁿ chí 'caaⁿnúⁿ yā saⁿá.

¹⁴José miiⁿ ní nanduuchí yā. 'Tiicá ntúúⁿ chæecu sa. Ní sta'a yā saⁿá 'lírⁿ miiⁿ ní nguiinū mííⁿ nūuⁿ cueⁿe yā ndúúcū chæecu sa na yáⁿáa Egipto. ¹⁵Níicú miiⁿ ch'æetinée yā ndíí chí ch'ií rey Herodes. Níicú cúúnú ca'a chíⁿ chí Señor Ndyuūs caⁿa yā na libro yeⁿe yā ndii cuááⁿ vmnaaⁿ cucáávⁿ saⁿa profeta miiⁿ taachi caⁿa yā 'tíicā: Ná yáⁿáa Egipto 'caí daiyá.

Rey Herodes caⁿa ntiiⁿnyúⁿ yā chí 'caaⁿnúⁿ yā dacuaⁿáa ngaiyáá

¹⁶Taachí rey Herodes miiⁿ tuumicadínuuⁿ yā chí 'iiⁿyāⁿ magos chinnche'éeí yā 'iiⁿyāⁿ, tuu'mi ní nduuvi taáⁿ n'dai yā. Ní rey miiⁿ ní caⁿa ntiiⁿnyuⁿ yā ní dichóó yā soldados chí ch'iiⁿnuⁿ yā nducyáácá dacuaⁿáa chí saⁿá ndíí cuaacu 'uúví nduüyū chí véé na yááⁿ Belén ndúúcū tanáⁿá yááⁿ chí na niiⁿnuúⁿ. 'Tíicā rey miiⁿ diiⁿ cuenta yā ti cho'oo 'uuvi nduüyū chí magos n'diichí yā 'ííⁿnyúⁿ ch'æete miiⁿ yeⁿe nanguuvi. ¹⁷Tuu'mi ní cho'oo chuū chí cuuvi cuaacu tan'dúúcā chí canée nguūⁿ na libro yeⁿe Ndyuūs cucáávā chí caⁿa saⁿá profeta Jeremías cuááⁿ vmnaaⁿ 'túúcā:

¹⁸Na yááⁿ Ramá ch'iindiveéⁿ

'iiⁿyāⁿ chí ngæecu yā ní n'gái yā ndúúcu 'áámá vaadi ya'ai ch'æeté cucáávā daiya yā chí ch'ií. N'daataá yeⁿe Israel s'eeⁿ ngæecu yā cucáávā daiya yā chí ch'iiⁿnūⁿ rey tan'dúúcā chí táⁿá Raquel ngæecu yā cucáávā daiya yā chí ch'ií. Ní nguée chí ndaacā n'daataa s'eeⁿ 'viich'æetínūⁿ miiⁿ.

¹⁹Cuayiiivi taachí ch'ií rey Herodes miiⁿ, José miiⁿ ní 'áá canee yā na yáⁿáa Egipto. Tuu'mi ní Señor Ndyuūs dicho'o yā 'áámá ángel ní ángel che'enaáⁿ yā yeⁿe José taachi cyaadú yā. ²⁰Ní ángel miiⁿ caⁿa yā chí yā José: Díí José, nducueeⁿ di ní cuta'a di saⁿá 'lírⁿ dacuaⁿáa ní cuinaⁿa di ndúúcū chæecu sa na yáⁿáa Israel caati ch'ií 'iiⁿyāⁿ chí neⁿe yā 'caaⁿnuⁿ yā saⁿá 'lírⁿ.

²¹Tuu'mi ní José ncueeⁿ yā. 'Tiicá ntúúⁿ chæecu sa. Ní sta'a yā saⁿá 'lírⁿ miiⁿ ní cueⁿe yā ndúúcū chæecu sa na yáⁿáa yeⁿe 'iiⁿyāⁿ Israel.

²²Taachí José miiⁿ ch'iindiveeⁿ yā chí saⁿá Arquelao canée lado yeⁿe rey Herodes chí chiida sa, tuu'mi ní José miiⁿ ní 'va'á yā chí caⁿa yā na yáⁿáa Judea chí yáⁿáa yeⁿe 'iiⁿyāⁿ Israel. Naati tan'dúúcā chí ángel che'enaáⁿ yeⁿe yā na 'yuudiyaan yeⁿe yā, cueⁿe yā yáⁿáa Galilea chí yáⁿáa yeⁿe 'iiⁿyāⁿ Israel ntúūⁿ. ²³Ní ndaá yā na yáⁿáa mííⁿ ní cueⁿe yā ch'æetinee yā na yááⁿ Nazaret yeⁿe yáⁿáa Galilea. Ní 'iicu cuuvi cuaacu chí caⁿa profetas vmnááⁿ vmnaaⁿ yeⁿe Jesús chí 'túúcā: Canée chí cuuvi nguúví yā 'iiⁿyāⁿ nazareno yā cucáávā chí cueⁿe yā na yááⁿ Nazaret.

Yeⁿe chí Juan cueédínuūⁿniⁿ yā ní ngaⁿa yā nduudu cuaacu

(Mr. 1.1-8; Lc. 3.1-9, 15-17; Jn. 1.19-28)

3 Tiempo miiⁿ chiicá Juan chí cueédínuūⁿniⁿ yā na lugar naachi nguée ch'æetinée 'iiⁿyāⁿ. Lugar miiⁿ chí yeⁿe yáⁿáa Judea ní mííⁿ ngaⁿa Juan nduudu cuaacu. ²Juan miiⁿ ní ngaⁿa yā chí 'túúcā: Ndís'tii, ndaacadaamí ní yeⁿe chí

diíⁿ nī chi nguéé n'dai caati 'āā ndaā niiⁿnuúⁿ nguuvi miiⁿ naachi Ndyuūs ngaⁿa ntiíⁿnyúⁿ yā na va'ai cheeti nguuvi. ³Nífcú yeⁿe Juan 'cūū ní saⁿa profeta Isafás caⁿa yā yeⁿe yā vmnááⁿ vmaaⁿ taachí caⁿa yā 'túucā:

'Caandiveéⁿ nī. 'Áámá saⁿā ngaⁿā yuudu sa 'túucā na yáⁿāa cuūⁿmáⁿ naachi nguéé ch'etinéé 'iiⁿyāⁿ: 'Cuundiyaáⁿ nī yúúⁿí yeⁿe Señor Ndyuūs caati cúchii yā. Nan'guáaⁿ nī yúúⁿí cuaacu caavá yā. Dideevé nī staava yeⁿé nī ní cuuvi cuaáⁿ nī 'iiⁿyāⁿ miiⁿ taachi ndaa yā.

⁴Catecai Juan miiⁿ ní nin'dai ndúú^c yuūdū yeⁿe 'iiti camello. Ní cinturón yeⁿe sa ní diiⁿmaⁿ 'iiti. Nífcú chí che'e sa ní 'iiti langostas ndúú^c n'di'i yeⁿe 'iiti 'yáaiⁿ chí veε cuéeti. ⁵N'deeé 'iiⁿyāⁿ can'daa yā chí 'caandiveéⁿ yā nduudu yeⁿe Juan miiⁿ. Ní can'daa yā yeⁿe yáāⁿ Jerusalén, yeⁿe yáⁿāa Judea, ní yeⁿe yáⁿāa chí cuaaⁿ 'diitúú yeⁿe yífcú Jordán. ⁶'Iiⁿyāⁿ ní caⁿa yā nuuⁿndi yeⁿé yā nanááⁿ Ndyuūs nífcú Juan miiⁿ ní cheedínuūⁿnīⁿ sá 'iiⁿyāⁿ miiⁿ na yífcú Jordán miiⁿ.

⁷Taachí Juan miiⁿ n'diichī sa chí neené 'yaaⁿ 'iiⁿyāⁿ fariseos ndúú^c 'iiⁿyāⁿ saduceos neⁿé yā chí cuēdínúūⁿnīⁿ sa 'iiⁿyāⁿ, Juan miiⁿ caⁿa sa chí sa 'iiⁿyāⁿ miiⁿ: Ndíⁿ'tīi tan'dúú^cá cúú, 'tífcā ndíⁿ'tīi. ¿Du'ú chí 'cuééⁿ ndíⁿ'tīi chí cuuvi cáanu nī yeⁿe castigo taaⁿ chí cuchii?

⁸N'daāca díⁿ nī maaⁿ nífcú 'cuuⁿmíⁿ nī 'iiⁿyāⁿ chí 'āā ndaacadaamí nī yeⁿe nuuⁿndi yeⁿe nī. ⁹Ndíⁿ'tīi ní 'āā ntéé nadacádíínuuⁿ nī chí n'dai

nī caati ndaata yeⁿe Abraham ndíⁿ'tīi. Naati 'úú ní ngaⁿá ngīi ndíⁿ'tīi chí Ndyuūs cuuvi díⁿ yā chí tuūu s'tīi ní cuuvi daiya Abraham.

¹⁰Cutíiⁿ miiⁿ 'āā canéé na dii'yu yáⁿá. Nducyaaaca yáⁿá chí nguéé n'dáacā ngīi n'gui'i yeⁿe canee chí 'caata yáⁿá miiⁿ ní cūnuuⁿ na yaⁿā. ¹¹'Úú ní cuaacu níⁿnyúⁿ chí ngeēdínúūⁿnīⁿ ndíⁿ'tīi ndúú^c nuūⁿnīⁿ caati 'āā ndaacadaamí nī yeⁿe nuuⁿndi yeⁿe nī. Naati ndáá táámá 'iiⁿyāⁿ cuayiivi yeⁿe 'úú chí ch'ete taavi cá poder yeⁿe yā nguéé ti 'úú. 'Úú ní nguéé neené n'dai 'úú chí cuuvi candéé ndaacuú yeⁿe yā. 'Iiⁿyāⁿ miiⁿ ní n'dai taavi cá yā chí cuuvi 'úú. 'Iiⁿyāⁿ miiⁿ ní cuēdínúūⁿnīⁿ yā ndúú^c Espíritu N'dai yeⁿé Ndyuūs ndúú^c yāⁿā. ¹²Ní taachi ndaa 'iiⁿyāⁿ miiⁿ chí nguuvi Jesús díⁿ yā tan'dúú^cá 'áámá 'iiⁿyāⁿ chí didēevé yā trigo 'tífcā díⁿ yā ndúú^c 'iiⁿyāⁿ. Ní sta'á yā zaranda yeⁿe yā ní nadidaamá yā trigo na cheeti díínuūⁿ. Ní dēecú miiⁿ ni'neeⁿ yaⁿa yā ná nguuchí yaⁿā chí 'āā ntéé n'tuūvi. Dēecú miiⁿ ní tan'dúú^cá 'iiⁿyāⁿ chí nguéé i'téenu yā Ndyuūs.

Juan cheedínuuⁿnīⁿ sa Jesús

(Mr. 1.9-11; Lc. 3.21-22)

¹³Tuu'mi ní Jesús chiicá yā na yáⁿā Galilea ní ndaá yā na yífcú Jordán naachi canee Juan chí Juan miiⁿ ní cuēdínúūⁿnīⁿ sa Jesús miiⁿ.

¹⁴Juan miiⁿ ní nguéé 'cuuⁿ sa. Ní caⁿa sa chí sa Jesús miiⁿ: 'Úú ní neⁿé chí dii cuēdínúūⁿnīⁿ di 'úú. ¿Áá dii cuchii di nanáaⁿ 'úú?

¹⁵Jesús nan'guēcútaⁿa yā: Diiⁿ dí maaⁿ 'tífcā; ní diiⁿ yú tan'dúú^cá

chi Dendyuūs neⁿe yā chi diiⁿ yú.
Tuu'mi ní Juan 'cuūⁿ sa.

¹⁶Cuayiivi taachi 'āā chēedínúuⁿnīⁿ
Juan miiⁿ Jesús miiⁿ, tuu'mi ní
Jesús ní nan'dáa yā na nuūⁿnīⁿ.
Cuayiivi ní nanguaāⁿ nanguuvi. Ní
Juan n'diichí sa Espíritu N'dai yeⁿé
Ndyuūs miiⁿ chi tan'dúucā paloma
'túicā. Chiica yeⁿē na va'ai chēeti
nguuvi ní ndaā vmnaaⁿ yeⁿe Jesús
miiⁿ. ¹⁷Tuu'mi ní n'g'iindiveéⁿ yā
'áámá nduudu yeⁿē nanguuvi chí
ngaⁿa: Saⁿa 'cūū Daiyá chí neⁿe
taaví. Ní yeenú taaví cáávā sáⁿa
'cūū.

**Yáá'n'guiinūuⁿ neⁿe sa tuu'vi neeⁿ sa
Jesús**

(Mr. 1.12-13; Lc. 4.1-13)

4 Tuu'mi ní Espíritu N'dai yeⁿé
Ndyuūs candēē Jesús miiⁿ
ná yáⁿ'āa cuūⁿmáⁿ naachi nguéé
ch'ēetinéé 'iiⁿyāⁿ chi yáá'n'guiinūuⁿ
neⁿe sa chi Jesús díⁿ yā nuuⁿndi.

²Jesús canée yā miiⁿ 'uūvū ngēecu
nguuvi ní 'uūvī ngēecu n'gaaⁿ ní
nguéé che'é yā. Ní cuayiivi ní
cuiicú yā. ³Yáá'n'guiinūuⁿ ní ndaā
sa nanaáⁿ Jesús chí n'diichineeⁿ sa
'iiⁿyāⁿ. Ní caⁿ'ā sa: Dii Jesús, nduuti
chi dii chi Daiya Dendyuūs dii,
caaⁿmaⁿ dí cuuvi dí tuū 'cūū chi
nduuví pan. Ní nduuvi pan ní cuuvi
che'e di.

⁴Jesús miiⁿ nan'guēecútaⁿa yā
ní caⁿ'a yā: 'Túucā canee nguūⁿ na
libro yeⁿé Ndyuūs: Nguéé dámaaⁿ
pan che'é 'iiⁿyāⁿ ní cunduūchi
yā caati ndúúcū tanducuéⁿē
nduudu chi ngaⁿa Ndyuūs ní 'iiⁿyāⁿ
cunduūchí yā nduuti chi cu'téenu yā.

⁵Tuu'mi ní yáá'n'guiinūuⁿ miiⁿ
candēē sa Jesús na yááⁿ Jerusalén

chi yááⁿ yeⁿe Ndyuūs. Ní chin'duu
sá 'iiⁿyāⁿ na yáácú yeⁿe yaácū. ⁶Ní
yáá'n'guiinūuⁿ caⁿ'a sa chii sa Jesús:
Nduuti chi dii chi Daiya Dendyuūs
dii, cáávā di ndii 'múúⁿ ndii na
yáⁿ'āa; caati 'túucā canéé nguūⁿ na
libro yeⁿé Ndyuūs:

Ndyuūs dich'ó yā ángeles yeⁿe
yā chi diiⁿ yā cuidado yeⁿē
di. Ní ángeles cundēē yā dii
ndúúcū ta'á yā, ní nguéé cuuvi
ya'ai ca'a di na tuū.

⁷Jesús nán'guēecútáⁿa yā: 'Tuucá
ntúúⁿ canéé nguūⁿ na libro yeⁿé
Ndyuūs: Nguéé diiⁿ di mar 'áámá
cosa chi n'diichineeⁿ di Señor
Ndyuūs yeⁿē di.

⁸Tuu'mi candēē yáá'n'guiinūuⁿ
miiⁿ Jesús miiⁿ na 'áámá yīicū yáácú
ní ch'iⁿi sa tanducuéⁿē naciones
yeⁿē iⁿ'yeeⁿdí 'cūū ndúúcū chí ngaⁿ'á
ntiiⁿnyuⁿ sa yeⁿē ndúúcū dendú'ū
chí n'gēete chi véé yeⁿē. ⁹Ní caⁿ'a
sa chii sa Jesús miiⁿ: Tanducuéⁿē
chuū téé dii nduuti chi caantí'ya dí
nanaáⁿ ní cu'téenu di 'úú.

¹⁰Tuu'mi ní Jesús miiⁿ caⁿ'a yā
chii yā saⁿ'ā miiⁿ: Dí yáá'n'guiinūuⁿ,
cuví di nanaáⁿ caati 'túucā canéé
nguūⁿ na libro yeⁿe Dendyuūs:
Cu'téenu di Señor Ndyuūs yeⁿē di ní
'caandiveeⁿ di yeⁿe 'iiⁿyāⁿ míⁿ nūuⁿ.

¹¹Tuu'mi ní yáá'n'guiinūuⁿ miiⁿ
diví sa yeⁿe Jesús, ní níndaā
ángeles ní dichí'v'e yā Jesús miiⁿ.

**Jesús tucá'a yā ntiiⁿnyuⁿ yeⁿe yā na
yáⁿ'āa Galilea**

(Mr. 1.14-15; Lc. 4.14-15)

¹²Taachi ch'iindiveéⁿ Jesús miiⁿ
chi Juan chi ngēedinuūⁿnīⁿ 'iiⁿyāⁿ
canúúⁿ sá vácūū, nanguēecunée
yā cunaⁿ'a yā na yáⁿ'āa Galilea.

13 Chiicá yā na yáāⁿ Nazaret ní ndaa yā canee yā na yáāⁿ Capernaum. Yáāⁿ miiⁿ ní niiⁿnuúⁿ na nuūⁿnīⁿyáⁿā canee, ní canee na yáⁿāa yeⁿe Zabulón ndúúⁿcū yáⁿāa yeⁿe Neftalí. 14 Ní cuuvi cuaacu nduudu yeⁿe saⁿā profeta Isaías chí caⁿa sa cuááⁿ vmaāⁿ 'tíicā:

15 Ná yáⁿāa yeⁿē Zabulón ndúúⁿcū na yáⁿāa yeⁿe Neftalí chí canee na yúúⁿ chí ngeⁿe ná nuūⁿnīⁿyáⁿā ndúúⁿcū na yáⁿāa chí canee taama lado yeⁿe yíicú chí nguuví Jordán. Mííⁿ canee yáⁿāa Galilea yeⁿe 'iiⁿyāⁿ chí nguéeⁿ yeⁿē ndaata 'iiⁿyāⁿ Israel.

16 Iiⁿyāⁿ chí sneé na maāiⁿ ti nguéeⁿ yeⁿe Ndyuūs, 'iiⁿyāⁿ s'eeⁿ n'diichí yā 'áámá dæeve ch'æete. Ní chíi dæevé miiⁿ naachi sneé 'iiⁿyāⁿ s'eeⁿ.

17 Ndíí tuuⁿmi tucáⁿ Jesús caⁿa yā nduudu cuaacu ní caⁿa yā: Ndaacadaamí ní yeⁿe nuuⁿndi yeⁿé ní caati tiempo chí Ndyuūs ngaⁿa ntiiⁿnyúⁿ yā na va'ai chæeti nguuví 'āā ndaa niiⁿnuúⁿ.

Jesús yaa'vi yā cuūⁿ saⁿa chí itungááⁿ 'yaācā

(Mr. 1.16-20; Lc. 5.1-11)

18 Cuayiivi ní Jesús miiⁿ cachiicá yā cuaaⁿ 'diituu nuūⁿnīⁿyáⁿā chí nguuví Galilea, ní n'diichí yā na 'uuví saⁿā 'dínu sa vi'í. 'Áámá saⁿa ní Simón Pedro nguuví sa. Táámá saⁿā ní 'diinu sa ní Andrés nguuví sa. Saⁿā s'uuⁿ ní n'gaa nuuⁿ sa yáānā yeⁿé 'yaācā miiⁿ na nuūⁿnīⁿyáⁿā ti saⁿā s'eeⁿ itungááⁿ sa 'yaācā na nuūⁿnīⁿyáⁿā ti ntiiⁿnyuⁿ yeⁿē sa. 19 Jesús caⁿa

yā chíi yā saⁿā s'eeⁿ: Cuchí ní nduucú, ní 'úú ní dííⁿ chí in'nuúⁿ ní 'iiⁿyāⁿ chí cuuvi caⁿá yā nduucú. Ní tan'dúúⁿcā chí tungaáⁿ ní 'yaācā yeⁿe nuūⁿnīⁿyáⁿā, 'tíicā in'nuúⁿ ní 'iiⁿyāⁿ chí caⁿá yā nduucú.

20 Hora mííⁿ nuūⁿ ní saⁿā s'eeⁿ s'neeⁿ sa yaānā yeⁿē sa ní cueⁿe sa ndúúⁿcū Jesús miiⁿ.

21 Tuuⁿmi ní Jesús miiⁿ cueⁿe ca yā ní n'diichi yā taama 'uuví saⁿā chí 'diinu sá vi'í chí nguuví sa Jacobo ndúúⁿcū Juan. Ní saⁿā s'uuⁿ ní daiya Zebedeo. Ní snee sa na barco miiⁿ ndúúⁿcū chíida yā Zebedeo miiⁿ ní n'diyaatá yā yáānā yeⁿe yā. Jesús 'cai yā Juan ndúúⁿcū Jacobo miiⁿ.

22 Tuuⁿmi nuūⁿ ní saⁿā s'uuⁿ ní s'neeⁿ sa barco miiⁿ ndúúⁿcū chíida sa, ní cueⁿe saⁿā s'uuⁿ ndúúⁿcū Jesús miiⁿ.

Jesús ngi'cuéeⁿ yā 'yaaⁿ taavi 'iiⁿyāⁿ

(Lc. 6.17-19)

23 Jesús cachiicá yā núúⁿmáⁿ ná yáⁿāa yeⁿe Galilea ní ngi'cuéeⁿ yā na yaacū sinagogas na yáāⁿ yeⁿē yáⁿāa miiⁿ. Ní caⁿá yā nduudu cuaacu yeⁿé naachi Ndyuūs ngaⁿa ntiiⁿnyúⁿ yā. Jesús miiⁿ ní dííⁿ yā chí nduūvā yeⁿé 'iiⁿyāⁿ yeⁿe nducuéⁿē naaⁿ ca'ái ndúúⁿcū 'iiⁿyāⁿ yeⁿe nducuéⁿē chí ya'ai yeⁿe yā.

24 Ní nducyáácá 'iiⁿyāⁿ yeⁿe núúⁿmáⁿ yáāⁿ yeⁿe yáⁿāa Siria ch'iindiveéⁿ yā yeⁿe Jesús miiⁿ. Ní candée yā 'iiⁿyāⁿ chí ya'ai yeⁿē, ndúúⁿcū 'iiⁿyāⁿ chí n'dee nááⁿ ca'ai ndii yā, ndúúⁿcū 'iiⁿyāⁿ chí canee yā ndúúⁿcū espíritus yeⁿe yááⁿn'guiinūⁿ, ndúúⁿcū 'iiⁿyāⁿ chí ndistáⁿā vaanicádiinūⁿ yeⁿē, ndúúⁿcū 'iiⁿyāⁿ ndúúⁿcū ca'ái chí in'dúuví cuerpo yeⁿe yā. Ní Jesús dííⁿ yā

chi nducyaaca 'iiⁿyāⁿ nduūvā yeⁿé yā. ²⁵Neené 'yaaⁿ 'iiⁿyāⁿ cueⁿé yā ndúúcū Jesús miⁿ. 'Iiⁿyāⁿ s'eeⁿ ní yeⁿe yáⁿāa Galilea, ndúúcū distrito yeⁿé Decápolis chi véé ndíichi yáⁿ yeⁿé, ndúúcū yáⁿā Jerusalén, ndúúcū yáⁿāa yeⁿe Judea, ndúúcū yáⁿāa chi snéé táamá lado yeⁿé yíicú Jordán.

Jesús ngaⁿa yā nduudu cuaacu na 'áamá yiicu
(Lc. 6.20-23)

5 Taachi Jesús n'diichí yā chi n'deee n'dái 'iiⁿyāⁿ cueⁿe yā ndúúcu yā tuuⁿmi ní Jesús cueⁿe yā 'áamá yiicū. Taachi Jesús miⁿ ch'iindí yā tuuⁿmi ní discípulos yeⁿe yā ní ndaa yā nanááⁿ yā. ²Jesús ní caⁿa yā ní ng'i'cuéⁿ yā 'iiⁿyāⁿ s'eeⁿ.

³De'e chúucā n'dai 'iiⁿyāⁿ chi deenú yā na staava yeⁿé yā chi neⁿe deenu cá yā yeⁿe Ndyuūs, caati cuuvi yeⁿé yā yeⁿe naachi Ndyuūs ngaⁿa ntiⁿnyúⁿ yā ná va'ai chēeti nguuvi.

⁴De'e chúucā n'dai 'iiⁿyāⁿ chi ndaachi 'iinú yā cáávā chi i'téenu yā Ndyuūs maaⁿ, caati cuayiivi ní Ndyuūs ca'á yā 'viich'et'ínūⁿ 'iiⁿyāⁿ.

⁵De'e chúucā n'dai 'iiⁿyāⁿ chi ndiicúuⁿ yā na staava yeⁿe yā, ti 'iiⁿyāⁿ s'eeⁿ cuuvi ndaācá yā de'ē chi cuuvi yeⁿe yā chi Ndyuūs caⁿa yā chi ca'a yā 'iiⁿyāⁿ s'eeⁿ.

⁶De'e chúucā n'dai 'iiⁿyāⁿ chí neⁿe ca yā diiⁿ yā chi n'daācā tan'dúúcā chi neⁿe Ndyuūs. Ní Ndyuūs cúnnee yā 'iiⁿyāⁿ s'eeⁿ.

⁷De'e chúucā n'dai 'iiⁿyāⁿ chi 'nuūⁿ ndii ya'ai 'iinú yā cáávā tanáⁿā 'iiⁿyāⁿ, caati Ndyuūs 'nuūⁿ ndii ya'ai 'iinú ntúuⁿ yā cáávā 'iiⁿyāⁿ s'eeⁿ.

⁸De'e chúucā n'dai 'iiⁿyāⁿ chi deeve staava yeⁿé yā, ti 'iiⁿyāⁿ s'eeⁿ ní snaaⁿ yā Ndyuūs.

⁹De'e chúucā n'dai 'iiⁿyāⁿ chi diiⁿ yā chi nguéé 'caavá 'iiⁿyāⁿ, ti tanáⁿā 'iiⁿyāⁿ caaⁿmáⁿ yā yeⁿé 'iiⁿyāⁿ chi daiyá Dendyuūs 'iiⁿyāⁿ.

¹⁰De'e chúucā n'dai 'iiⁿyāⁿ chi n'geenú yā ngii cáávā chi díⁿ yā chíⁿ chi Ndyuūs neⁿé yā, caati véé parte yeⁿe yā naachi Ndyuūs ngaⁿa ntiⁿnyúⁿ yā ná va'ai chēeti nguuvi.

¹¹De'e chúucā n'dai ndís'tii taachi 'iiⁿyāⁿ díⁿ yā chi ndís'tii 'cuenú nī cuuvi cucáávā 'úú, ní taachi 'iiⁿyāⁿ taáⁿ yā ndúúcū ndís'tii ní n'deee n'dái caaⁿmáⁿ yā nduudu yaadi yeⁿe ndís'tii cucáávā 'úú. ¹²Cuuvi yeenu taaví nī caati cuuvi ndaācá nī chí ch'ēete yeⁿé nī ná va'ai chēeti nguuvi. 'Túúcā 'iiⁿyāⁿ can'daa yā ndíí cuaaⁿ vmnaaⁿ 'iiⁿyāⁿ profetas chi ndéé yā nduudu yeⁿe Ndyuūs. Ní profetas ch'eenú yā chii.

Yiimā yeⁿé yáⁿāa

(Mr. 9.50; Lc. 14.34-35)

¹³Jesús caⁿa yā: Ndís'tii, nduuti chi i'téenu nī chi 'úú chí Cristo, tuuⁿmi ni ndís'tii, tan'dúúcā yiimā yeⁿé yáⁿāa 'tiicá nī. Nduuti chí yiimā nguéé n'daācā sabor yeⁿé, 'de'ē cuuvi díⁿ nī? Nguéé de'ē vee dichí'vē yiimā miⁿ. 'Áa taanduu rá chí cungéé 'iiⁿyāⁿ na yáⁿāa ní n'diivi neeⁿ ca'a yā.

Déévé yeⁿe iⁿ'yeeⁿdí 'cūū

¹⁴Ndís'tii chi i'téenu nī chi 'úú chí Cristo, tan'dúúcā deeve yeⁿe iⁿ'yeeⁿdí 'cūū 'tiicá nī, ti caⁿá nī ch'iⁿi nī deeve yeⁿé Ndyuūs nanááⁿ 'iiⁿyāⁿ. 'Áamá yáⁿ chi canduūu

na 'áámá yíicū nguéé cúúví cunuuⁿ n'de'ēi. ¹⁵Ndíí nguéé ndúú 'iiⁿyāⁿ ra 'cuuⁿmiⁿ yā 'áámá lámpara ní cu'nuúⁿ yā maaⁿ 'áámá caja; naati cun'duúⁿ yā na 'áámá mesa, ní íícú cuuví deεve yeⁿē nducyaaca 'iiⁿyāⁿ chi snée yā chεeti va'āi. ¹⁶Tan'dúúccā 'áámá lámpara chí ngii ndεεve, 'tíícā cuuvi n'daācā vida yeⁿé nī nanááⁿ 'iiⁿyāⁿ chi snée yā iⁿ'yeeⁿdí 'cūū. Ní 'íícú 'iiⁿyāⁿ s'eeⁿ cuuvi snaaⁿ yā ntiiⁿnyuⁿ chí n'daācā chi idííⁿ nī. Ní 'iiⁿyāⁿ s'eeⁿ caaⁿ'máⁿ yā: De'ε chúúccā ch'εete Ndyuūs chi Chiidá nī, Ndyuūs chi canée yā ná va'ai chεeti nguuvi.

**Jesús ngaⁿa yā yeⁿe ley
yeⁿe 'iiⁿyāⁿ Israel**

¹⁷Nguéé nadicádíínuuⁿ ndís'tií chi 'úú chi Jesús ní cúchíí chi divíí ley yeⁿe Moisés ndúúccū nduudu yeⁿe profetas chi canée nguūⁿ ndíí cuaaⁿ vmnaaⁿ. 'Úú nguéé ndaá chí divíí ti ndaá chí dicuaācú yeⁿē. ¹⁸Ti cuaacu níⁿ'nyúⁿ ngaⁿ'á ngii ndís'tií: Neⁿe chi canée cá nanguuvi ndúúccū iⁿ'yeeⁿdí 'cūū nguéé cuuvi ch'ó'oo mar 'áámá punto 'lífⁿ ndíí nguéé ndúú mar 'áámá coma yeⁿe ndúúduⁿ yeⁿe ley, nuuⁿ'maⁿ neⁿe chi tanducuéⁿē 'āā cuéé cuuvi cuaacu taanduveε chí canée nguūⁿ na libro yeⁿe Ndyuūs. ¹⁹Tíícā 'āā du'ú nūuⁿ 'iiⁿyāⁿ chi nguéé dííⁿ yā cumplir 'áámá mandamiento 'lífⁿ ní 'tíícā ngi'cueeⁿ yā 'iiⁿyāⁿ chi dííⁿ yā tan'dúúccā maáⁿ yā diiⁿ yā, 'lífⁿ 'lífⁿ cá nūuⁿ cuuvi tuneⁿ yā naachi Ndyuūs ngaⁿ'a ntiiⁿ'nyúⁿ yā na va'ai chεeti nguuvi nguéé tan'dúúccā tanáⁿ'ā 'iiⁿyāⁿ. Naati 'iiⁿyāⁿ chi n'daāca idííⁿ yā ní

ngi'cueeⁿ yāⁿ 'iiⁿyāⁿ tááccā chi cuuvi diiⁿ n'daācā yā, 'iiⁿyāⁿ miíⁿ cuuvi tuneⁿ yā dendu'ū chi n'daācā ná va'ai chεeti nguuvi naachi Ndyuūs ngaⁿ'a ntiiⁿ'nyuⁿ yā. ²⁰'Úú ní ngaⁿ'á ngií ndís'tií: Nduuti chi ndís'tií nguéé n'daācā ca idííⁿ nī chi cuuvi 'iiⁿyāⁿ chi ngi'cueeⁿ ley ndúúccū 'iiⁿyāⁿ fariseos, tuuⁿ'mi ní ndís'tií nguéé cuuvi cundaa nī na va'ai chεeti nguuvi naachi Ndyuūs ngaⁿ'a ntiiⁿ'nyúⁿ yā.

**Jesús ngaⁿa yā yeⁿe chi nduuvi tááⁿ
'iiⁿyāⁿ**

(Lc. 12.57-59)

²¹Maaⁿ ní ch'ííndiveeⁿ nī chí caⁿ'a yā chíí yā 'iiⁿyāⁿ ndii cuááⁿ vmnaaⁿ chí 'túúccā: Nguéé 'caaⁿ'nuⁿ di 'iiⁿyāⁿ. Du'u chí 'caāⁿ'nūⁿ 'iiⁿyāⁿ véé nuuⁿ'ndi yeⁿe yā nguuvi chí Ndyuūs caaⁿ'maⁿ yā yeⁿe nuuⁿ'ndi. ²²Naati 'úú ní ngaⁿ'á ngií ndís'tií 'tíícā: 'Āā du'ú nūuⁿ chí nduuvi taaⁿ yeⁿē vi'í, véé nuuⁿ'ndi yeⁿe yā nguuvi chí Ndyuūs caaⁿ'maⁿ yā yeⁿē nuuⁿ'ndi. 'Āā du'ú nūuⁿ chí caaⁿ'maⁿ cuuvi vi'í 'tíícā: De'ē ch'úúccā chεechí tiíⁿ di, véé nuuⁿ'ndi yeⁿe yā nanááⁿ juez. 'Āā du'ú nūuⁿ 'iiⁿyāⁿ chí caaⁿ'maⁿ yā 'tíícā: De'ē ch'úúccā zonso dii, caⁿ'á yā na infierno naachi canée 'áámá nguuchi yaⁿ'ā.

²³Nduuti chí diiⁿ di tan'dúúccā costumbre yeⁿē di ní ndεε di ofrenda yeⁿē di ní ca'a di Ndyuūs vmnááⁿ nátaí yeⁿe yaācū templo, ní hora mííⁿ nūuⁿ ninán'gaacu di chí vi'í di ní véé vaadi 'caa'va yeⁿē di ndúúccū sa; ²⁴tuuⁿ'mi ní cu'neeⁿ di ofrenda yeⁿē di niiⁿ'nuúⁿ nátaí. Ní cueⁿ'e di ntun'dáá n'dai di ndúúccū vi'í di. Cuayiivi ní cuuvi

ngueecundí di ní ca'a di ofrenda yeⁿē di nátai.

²⁵Tundáa ndai di ndúucū 'āa du'u nūnⁿ 'iiⁿyāⁿ chi taaⁿ yeⁿe di maāⁿncheē^ēē nūnⁿ taachi canúu di yúúni ndúucu yā, 'aatiⁿ caⁿa yā canguu yā dii nanááⁿ juez. Ní juez míiⁿ nca'a yā dii ta'ā policia. Ní policia miⁿ ní cu'nuūⁿ sa dii vácūū. ²⁶Cuaacu níⁿnyúⁿ ngaⁿá ngii dii chi nguéé nan'daā di vácūū neⁿe chí nguéé 'cuiinu nadíⁿvē di tanducuéⁿē chí can'diicu di.

Jesús ngaⁿa yā yeⁿe adulterio

²⁷N'giindiveéⁿ nī chí caⁿa 'iiⁿyāⁿ yeⁿē nuuⁿndi chí adulterio 'túucā: Ndís'tii chí n'giindivaacú nī, nguéé in'nuúⁿ nī n'daataá o isaⁿā chí nguéé yeⁿē di. ²⁸Naati 'úú, Jesús ní ngaⁿá ngii ndís'tii 'tíicā: 'Āā du'ú nūnⁿ chí n'giⁿnyūⁿ ndúucū 'áámá saⁿā o n'daataá ní neⁿe yā cuuvi n'dái yā ndúucū vi'i, 'āā diiⁿ nuuⁿndí yā na staava yeⁿe yā tan'dúucā chí 'āā 'tíicā yā ndúucū vi'i. Ní 'āā díiⁿ yā adulterio.

²⁹Chuū ngaⁿá: Nduuti chí nduutináaⁿ di lado tá cuaācú di diiⁿ chí diiⁿ di nuuⁿndi, 'caaca di nduutināaⁿ di ní cun'dāa di. Ti n'dáacā ca chí cuuvi ndai di 'áámá parte yeⁿe cuerpo yeⁿē di, nguéé ti tanducuéⁿē cuerpo yeⁿē di caⁿa na infierno. ³⁰Ndúuti chí ta'ā cuaācú di idiiⁿ chí diiⁿ dí nuuⁿndi, 'caaca di ní cun'dāa di. Ti n'dáacā ca chí cuuvi ndāi 'áámá parte yeⁿe cuerpo yeⁿē di, nguéé ti núúⁿmáⁿ ch'ēete cuerpo yeⁿē dii caⁿa na infierno.

Jesús ngaⁿa yā yeⁿe chí i'teēchi vi'i yā

(Mt. 19.9; Mr. 10.11-12; Lc. 16.18)

³¹Tiempo chí ch'ó'ōo 'iiⁿyāⁿ caⁿa yā 'túucā: 'Āā du'ú nūnⁿ 'iiⁿyāⁿ chí

'teēchi n'daataá yeⁿé yā, canéé chí ca'a yā 'áámá caaca yeⁿē chí 'teēchi vi'i yā. ³²Naati 'úú ní ngaⁿá ngii ndís'tii 'tíicā: Nduuti chí 'áámá saⁿā chí 'teēchi sá n'daataá yeⁿē sa, nguéé cáávā chí véé saⁿā chí n'dai ndúucu tá, tuu'mi ní diiⁿ sa chí n'daātāa cuuvi adulterio tá. 'Āā du'ú nūnⁿ saⁿā chí 'caandavaacu sá ndúucū n'daataa chí i'nééⁿ isaⁿā yeⁿe ta táⁿā, saⁿā miⁿ idiiⁿ ntúūⁿ sa nuuⁿndi chí adulterio.

Jesús ngaⁿa yā yeⁿē nduudu chí 'tíicā o nguéé 'tíicā

³³Ndís'tii ní ch'iindiveéⁿ nī chí caⁿa yā chii yā 'iiⁿyāⁿ tiempo chí 'āā ch'ó'ōo 'tuucā: Nguéé caaⁿmaⁿ nī nduudu, “por Ndyuūs”, cáávā cosa chí cuaacu níⁿnyúⁿ chí díiⁿ nī ní nguéé 'tíicā diiⁿ nī. Taachi caaⁿmáⁿ nī nduudu, “por Ndyuūs”, diiⁿ cuaacú nī tan'dúucā chí díiⁿ nī cáávā Ndyuūs. ³⁴Naati 'úú ní ngaⁿá ngii ndís'tii: Nguéé caaⁿmáⁿ nī nduudu, “por Ndyuūs”, yeⁿē mar 'áámá naaⁿ. Ndíi nguéé caaⁿmáⁿ nī nduudu, “cucáávā nanguuvi”, ti miⁿ canéé trono yeⁿe Dendyuūs. ³⁵Ndíi nguéé ndúu caaⁿmáⁿ nī nduudu, “cáávā yāⁿā 'cūū”, ti chíiⁿ chí banco 'líiⁿ yeⁿē ca'a Ndyuūs; ndíi nguéé ndúu 'áámá nduudu, “cáávā yāⁿ Jerusalén”, ti chiiⁿ chí yāⁿ yeⁿē Rey Ndyuūs chí ch'ēete yā. ³⁶Ndíi nguéé ndúu caaⁿmáⁿ nī nduudu, “cáávā tíiⁿ nī”, ti nguéé cúúví diiⁿ nī chí cuuvi cuéē naachi cuáiⁿ mar 'áámá yuūdū tíiⁿ nī. Ní nguéé cuuvi díiⁿ nī chí cuuvi cuáiⁿ naachi cuéē mar 'áámá yuūdū tíiⁿ nī. ³⁷Naati ndís'tii caaⁿmáⁿ nī, “'tíicā”, nduuti chí 'tíicā; o nduuti chí nguéé 'tíicā,

tuu'mi ní caaⁿmaⁿ nī, “nguee 'tíicā”, caati nduuti chi caaⁿmaⁿ nī nduudu, “por Ndyuūs” o cááv táámá yeⁿe chuū, tuu'mí ní nduudu miiⁿ ní nguéeⁿ n'daācā chi caaⁿmaⁿ nī.

**Dinéⁿe nī 'iiⁿyāⁿ chi nguéeⁿ ngí
n'diichí yā ndís'tii**

(Lc. 6.29-30)

³⁸Jesús caⁿa yā: Ndís'tii ní ch'iindiveéⁿ nī chí caⁿa 'iiⁿyāⁿ tiempo chi chó'o yeⁿe ley chi 'tíicā: Nduuti chi 'áámá 'iiⁿyāⁿ tun'dáa yā nduutinaaⁿ taama 'iiⁿyāⁿ, 'tiicá ntúūⁿ 'iiⁿyāⁿ miiⁿ ní cuuví tun'daá yā nduutinaaⁿ 'iiⁿyāⁿ chí diiⁿ nduucú yā 'tíicā. Ní 'áámá 'iiⁿyāⁿ chí tun'dáa yā 'diiⁿyuⁿ táámá 'iiⁿyāⁿ, 'tiicá ntúūⁿ cuuví tun'daá yā 'diiⁿyuⁿ 'iiⁿyāⁿ chí diiⁿ nduucú yā 'tíicā. ³⁹Naati 'úú ní ngaⁿá ngí ndís'tii: Nguéeⁿ 'cuuⁿmaⁿ nī ndúúcu 'iiⁿyāⁿ chi yaadii'yá yā. 'Āā du'ú nūⁿ 'iiⁿyāⁿ chí 'cueⁿé yā tiicūnáaⁿ nī ti duuchineéⁿ yā yeⁿe nī 'cuuⁿ nī chí díⁿ yā taama vnnéⁿēe nduuti chi neⁿe yā. ⁴⁰Ní nduuti chi 'aama 'iiⁿyāⁿ chí in'nuúⁿ yā vaadi 'caa'va ndúúcu nī, ní neⁿe yā diví yā tiinuⁿ yúudūu yeⁿe nī, ca'a ntúūⁿ nī cotón yeⁿe nī. ⁴¹Ní nduuti chi 'aama 'iiⁿyāⁿ chí cuuví yā ndís'tii chí a fuerza canéé chí cándēe nī chéédí yeⁿe yā tan'dúúcā 'uūvi kilómetros 'tíicā yaⁿai ca candēe nī yeⁿe yā ndii cuūⁿ kilómetros. ⁴²Taachí caaca 'iiⁿyāⁿ ndís'tii 'āā dē'é nūⁿ cosa ca'a nī 'iiⁿyāⁿ cosa miiⁿ. Nguéeⁿ nguēcundí nī cuadáámí nī yeⁿe yā.

Dinéⁿe nī 'iiⁿyāⁿ chí taaⁿ ndúúcu nī

(Lc. 6.27-28, 32-36)

⁴³Ndís'tii ní ch'iindiveéⁿ nī chí caⁿa 'iiⁿyāⁿ tiempo chi 'āā chó'oo:

Dinéⁿe di 'iiⁿyāⁿ na niiⁿnuúⁿ vaacu dí. Nguéeⁿ dinéⁿe di 'iiⁿyāⁿ chí taáⁿ yā ndúúcu di. ⁴⁴Naati 'úú ní ngaⁿá ngí ndís'tii: Dinéⁿe nī 'iiⁿyāⁿ chí taaⁿ yā ndúúcu nī. N'dáacā caaⁿmaⁿ nī yeⁿe 'iiⁿyāⁿ chí nguéeⁿ n'daācā ngaⁿa yā yeⁿe nī. N'daācā díⁿ nī ndúúcu 'iiⁿyāⁿ chí nguéeⁿ neⁿe yā ndís'tii. Caaⁿmaⁿnguaⁿá nī yeⁿe 'iiⁿyāⁿ chí 'cueⁿe ndís'tii ní nguéeⁿ n'daācā idiíⁿ yā ndúúcu nī ní idiíⁿ yā chí ndís'tii n'geenú nī ngii. ⁴⁵Ní ndís'tii ní 'cuuⁿmiⁿ nī 'iiⁿyāⁿ s'eeⁿ chí ndís'tii ní daiya Dendyuūs ndís'tii. Chiida yú chí cánéé na va'ai cheeti nguuvi idiíⁿ yā chí ican'daa 'yáⁿā naachi snéé 'iiⁿyāⁿ chí n'dai ndúúcu 'iiⁿyāⁿ chí nguéeⁿ n'daācā díⁿ yā. Ní Ndyuūs idiíⁿ yā chí n'geenú cuūvi yeⁿe 'iiⁿyāⁿ chí n'daācā idiíⁿ yā ndúúcu 'iiⁿyāⁿ chí nguéeⁿ n'daācā idiíⁿ yā. ⁴⁶Ndúúti chí ndís'tii dinéⁿe nī 'iiⁿyāⁿ chí neⁿe yā ndís'tii, 'dē'é premio chí ndaacá nī? 'Āá nguéeⁿ 'tiicá ntúūⁿ idiíⁿ 'iiⁿyāⁿ chí cobrador yā? ⁴⁷Nduuti chí ndís'tii díⁿ nī saludar dámaaⁿ hermanos yeⁿe nī, 'dē'é premio chí ndaacá nī? 'Āá nguéeⁿ 'tiicá ntúūⁿ idiíⁿ 'iiⁿyāⁿ chí nguéeⁿ yeⁿe ndaata Israel chí nguéeⁿ i'téenu yā Ndyuūs? ⁴⁸N'daācā n'dai ca díⁿ ndís'tii chí díⁿ nī tan'dúúcā chí diiⁿ Dendyuūs, Chiida yú, chí canéé na va'ai cheeti nguuvi.

**Jesús ngaⁿa yā yeⁿe chí
nginnee yú 'iiⁿyāⁿ**

6 Ndís'tii nguéeⁿ díⁿ nī dendu'ū chí n'daācā yeⁿe yaacū nanááⁿ 'iiⁿyāⁿ caati snaaⁿ yā chí diiⁿ nī chí nadacadiiⁿúúⁿ yā chí ndís'tii ní n'daāca nī. Nduuti chí 'túúcā idiíⁿ nī, tuu'mi ní Ndyuūs Chiida yú nguéeⁿ

tée yā chi cuuvi yeⁿe nī yeⁿē chi díⁿ nī taachi ndaa nī ná va'ai cheeti nguuví. ²Taachi ndís'tiī ca'a nī ofrenda yeⁿe nī, nguée díⁿ yuudú nī nícu nguée cuuvi cadínuuⁿ 'iiⁿyāⁿ. 'Tíicā idiīⁿ náⁿā 'iiⁿyāⁿ chi 'uūví naaⁿ 'uūví cheendí yā taachi snée yā na yaacū sinagoga ndúúcū na cuaaⁿ cyúúni. Ní 'íicú 'iiⁿyāⁿ ní cuuvi snaaⁿ yā ní caaⁿmaⁿ yā chi 'iiⁿyāⁿ s'eeⁿ ní nn'dai yā. Cuaacu nííⁿnyúⁿ 'úú ngaⁿá ngii ndís'tiī, chi 'iiⁿyāⁿ s'eeⁿ ní vee chi 'āā ndaāca yā yeⁿe chi díⁿ yā na iⁿyeeⁿdí 'cūū. ³Taachi ndís'tiī ní ca'á nī cosas chi inneé nī 'iiⁿyāⁿ chi nguée yeⁿe yā, nguē ca'a nī chi tuumícadíinuⁿ ta'á 'cueé nī chi díⁿ tá'á cuaacú nī. ⁴'Tíicā ca'a n'de'ei nī cosas miiⁿ yeⁿe nī ní 'iiⁿyāⁿ nguē cuuvi snaaⁿ yā; 'íicú Chiida yú chi cánée ná va'ai cheeti nguuví inaaⁿ yā chi nguée n'diichi 'iiⁿyāⁿ s'eeⁿ. Ní Chiida yú tée yā chi cuuvi yeⁿe nī nanááⁿ 'iiⁿyāⁿ.

**Jesús ngi'cueeⁿ yā yeⁿē chí
ngaⁿānguá'āa**

(Lc. 11.2-4)

⁵Taachi ndís'tiī caaⁿmaⁿngua'á nī, nguée díⁿ nī tan'dúúcā 'iiⁿyāⁿ chí 'uūví naaⁿ 'uūví cheendí yā, caati 'iiⁿyāⁿ s'eeⁿ inee yíinú yā chi n'g'etíndii yā na yaacū sinagogas ndúúcū cuaaⁿ cyúúni ní 'íicú 'iiⁿyāⁿ ní snaaⁿ yā 'iiⁿyāⁿ s'eeⁿ. Cuaacu nííⁿnyúⁿ ngaⁿá ngii ndís'tiī, chi 'iiⁿyāⁿ s'eeⁿ ní 'āā véé chí cuuvi yeⁿé yā na iⁿyeeⁿdí 'cūū. ⁶Ndís'tiī, taachi caaⁿmaⁿngua'á nī, cundáa nī na cuarto 'lííⁿ yeⁿe va'ai yeⁿe nī ní n'gaadí nī cheendi va'āi cuarto 'lííⁿ miiⁿ. Ní caaⁿmaⁿngua'á nī ndúúcū

Chiida yú chí inaaⁿ n'de'ei yā. Ní Chiida yú ntée yā chi cuuvi yeⁿe nī nanááⁿ 'iiⁿyāⁿ.

⁷Ní taachi caaⁿmaⁿngua'á nī, nguée dachíⁿ dachíⁿ caaⁿmaⁿ nī tan'dúúcā chí díⁿ náⁿā 'iiⁿyāⁿ chí 'uūví naaⁿ 'uūví cheendí yā chí nguée i'téenu yā Ndyuūs ní nguē yeⁿe ndaata Israel yā. Ní 'iiⁿyāⁿ s'eeⁿ nadicadínuuⁿ yā chí Ndyuūs ca'a yā 'caandiveéⁿ yā nduudu yeⁿé yā ti neené n'deēe nduudu nga'a yā. ⁸Nguée díⁿ nī tan'dúúcā chí idiīⁿ 'iiⁿyāⁿ s'eeⁿ ti Chiida yú 'āā déenu yā dendu'ū chí neⁿe nī taachi 'āā cuée caaca nī. ⁹Ní taachi ndís'tiī caaⁿmaⁿngua'á nī, 'túúcā caaⁿmaⁿngua'á nī:

N'diī Chiidá nducyaaca 'nū, n'diī chí caneé nī ná va'ai cheeti nguuví. De'e chúúcā dēeve chí ngúúví nī.

¹⁰Canée chí ndaa tiempo naachi chí nga'a ntiiⁿnyuⁿ nī. Cúúví tan'dúúcā chí n'diī neⁿe nī tan'dúúcā ná va'ai cheeti nguuví 'tiicá ntúūⁿ na yáⁿāa 'cúú.

¹¹Tée nī chí cuuví che'é 'nū nguuví 'cūū.

¹²Nadich'ecú nī nuuⁿndi yeⁿe 'nū tan'dúúcā chí nús'uu inadich'ecú 'nū yeⁿe 'iiⁿyāⁿ chí nguē n'daācā díⁿ yā nduucú 'nū.

¹³Nguée 'cuáaⁿ nī chí ndaā nanaáⁿ 'nū cosas chí chechi ca chí díⁿ chí díⁿ 'nū nuuⁿndi naati nadanguáⁿai nī nús'uu yeⁿé nducuéⁿe chí nguē n'daācā. Ti yeⁿé nī naachi nga'a ntiiⁿnyúⁿ nī ndúúcū poder ndúúcū dēeve chí n'dái taavi

ca ye^{'n}e nī ndúúcu nducue^{'n}ē
nduuyū cue^{'n}e daā^{'n}ma^{'n}. 'Tíicā
cuuvi.

¹⁴Nduuti chi ndís'tiī nadich'εécú
nī ye^{'n}e 'ii^{'n}yā^{'n} chi nguée^{'n} n'daācā
idií^{'n} yā nducú nī, tuu'mi ní Chiida
yú chi cánée yā ná va'ai cheeti
nguuvi nadich'εécú ntúu^{'n} yā ye^{'n}é
nī. ¹⁵Ndúúti chi ndís'tiī nguée^{'n}
nadich'εécú nī ye^{'n}e 'ii^{'n}yā^{'n} chi nguée^{'n}
n'daācā idií^{'n} yā ndúúcu nī, 'tiicā
ntúú^{'n} Chiida yú nguée^{'n} nadich'εécú
yā nuu^{'n}ndi ye^{'n}é nī.

**Jesús nga^{'n}a yā ye^{'n}e chi 'ii^{'n}yā^{'n}
nguée^{'n} ca'diinú yā tiempo
chí nga^{'n}angua'á yā**

¹⁶Taachi nguée^{'n} nga'dií^{'n}nú^{'n} nī
caati nga^{'n}angua'á nī nguée^{'n} nduuví
ndaachií naá^{'n} nī tan'dúúca 'ii^{'n}yā^{'n}
chi 'uūví naa^{'n} 'uūví cheendí yā chí
ne^{'n}é yā chi taná^{'n}ā 'ii^{'n}yā^{'n} snaa^{'n} yā.
'Ii^{'n}yā^{'n} s'ee^{'n} idiví yā catecai vmnáá^{'n}
yā ní 'cuu^{'n}mí^{'n} yā taná^{'n}ā 'ii^{'n}yā^{'n}
chi nguée^{'n} nga'dií^{'n}nú^{'n} yā. Cuaacu
níf^{'n}nyú^{'n} nga^{'n}á ngií ndís'tiī, chí
'ii^{'n}yā^{'n} s'ee^{'n} ní 'āā véé chí ndaācā
ye^{'n}e yā na i^{'n}yee^{'n}dí 'cūū. ¹⁷Naati
ndís'tiī, ní taachi nguée^{'n} nga'dií^{'n}nú^{'n}
nī, 'cuiīnī aceite tií^{'n} nī ní náá^{'n}nú^{'n}
nī naa^{'n} nī. ¹⁸Ní nguée^{'n} 'cuu^{'n}mí^{'n}
nī nanáá^{'n} 'ii^{'n}yā^{'n} chí nguée^{'n} nge^{'n}é
nī naati Chiida yú chí cánuu^{'n} yā
nán'de'ei snaá^{'n} yā. Ní Chiida yú
chí snaá^{'n} yā chí^{'n} chí dií^{'n} nī taachi
cánúú^{'n} nī nán'de'ei ní téé yā nanáá^{'n}
'ii^{'n}yā^{'n} de'ē chí cuuví ye^{'n}e nī.

**Vée^{'n} vaadi 'cuiica ná va'ai cheeti
nguuvi
(Lc. 12.33-34)**

¹⁹Ca^{'n}a Jesús: Ndís'tiī ní nguée^{'n}
díí^{'n} nī chí cuuvi 'cuiica nī ná

i^{'n}yee^{'n}dí 'cūū naachi véé 'iyéevē
chí dí'tuuví tí ndúúcu che'e
yá^{'n}āa chí tuuvii ní naachi véé
chí duucu ní diduucú sa. ²⁰Naati
n'dáacā chí díí^{'n} nī chí 'cuūndí
ye^{'n}e nī ná va'ai cheeti nguuvi
naachi nguée^{'n} véé 'iyéevē chí
dí'tuuví tí ndíí nguée^{'n} ndúú che'e
yá^{'n}āa chí tuuvii, ndíí nguée^{'n}
ndúú cuuvi cundaā chí duucu ní
diduucú sa. ²¹Caati naachí cánée
vaadi 'cuiica ye^{'n}é nī, mii^{'n} canee
staava ye^{'n}e nī chí nadicadiinúú^{'n}
nī ye^{'n}e tanducue^{'n}ē.

**Chídeevē ye^{'n}e cuerpo ye^{'n}e yú ní
nduutinaa^{'n} yú**

(Lc. 11.34-36)

²²Ca^{'n}a Jesús chí chídeevē
ye^{'n}e cuerpo ye^{'n}e yú chíí^{'n} chí
nduutinaa^{'n} yú. Ndúúti chí
nduutinaa^{'n} nī n'daācā, tuu'mi
ní núú^{'n}má^{'n} ncheete cuerpo
ye^{'n}e nī ní inaa^{'n} chí deevē. ²³Ní
nduuti chí nduutinaa^{'n} nī nguée^{'n}
n'dai, tuu'mi ní núú^{'n}má^{'n} ncheete
cuerpo ye^{'n}é nī cunée na maāi^{'n}.
'Tíicā nduuti chí deevē chí cánee
nduucú nī nguée^{'n} n'daācā, tuu'mi
ní cánée nī na maāi^{'n} chí díítūu
n'dái.

**Jesús nga^{'n}a yā ye^{'n}e chí 'cuiica 'ii^{'n}yā^{'n}
(Lc. 16.13)**

²⁴Mar 'áamá 'ii^{'n}yā^{'n} nguée^{'n} cuuvi
dichíí'vé yā 'uūví 'iivi yā caati
diné^{'n}e yā 'aama yā ní nguēe
diné^{'n}e yā taama yā. Ní n'dáacā
nadicádíinu^{'n} yā ye^{'n}e 'aama yā
ní nguée^{'n} n'daācā nadicádíinu^{'n} yā
ye^{'n}e taama yā. Nguée^{'n} cuuvi in'nuú^{'n}
nī vaadi 'cuiica ye^{'n}é nī ní dichíí'vé
nī 'iivú Ndyuūs.

**Ndyuūs idííⁿ yā cuidado yeⁿe 'iiⁿyāⁿ
yeⁿe yā**

(Lc. 12.22-31)

²⁵Chuū ngaⁿá ngí ndís'tií: Nguéé nadicadíínuuⁿ nī yeⁿe vida yeⁿe maaⁿ nī, o yeⁿe chí che'é nī, o yeⁿe chí cu'u nī, ndíí nguéé ndúú cáávā chí neⁿe cuerpo yeⁿe nī chí 'cuēetinúu nī. ¿Áá nguéé yaⁿai ca vida yeⁿe nī nguéé ti chí ngé'e nī? ¿Áá nguēε yaⁿai ca chí'vē cuerpo yeⁿe nī nguéé ti catecai nī? ²⁶Cuin'diichí nī 'yaada yeⁿe nanguuvi. Nguéé ngiinú tī ndaata, ndíí nguéé ngii cosecha yeⁿe tī, ndíí nguéé ndúú ín'guain'dáí tī yeⁿe tī. Chiida yú chí cánée ná va'ai cheeti nguuvi ngá'a yā chí nge'e tī. ¿Áá nguéé yaⁿai cá chii'vē ndís'tií nguéé ti 'yaada? ²⁷¿Cheé ndís'tií chí néené n'dai tííⁿ nī cúúví iintiineeⁿ nī 'áámá yuūchí yeⁿe chí yaācu nī?

²⁸¿De'ē cáávā chí ínadicadíínuuⁿ nī yeⁿe catecai nī? Nadacadíínuuⁿ nī yeⁿe naāndā cuēε yeⁿe cuēeti táácā chí n'giita. Nguéé dííⁿ ntiiⁿnyuⁿ ndíí nguéé ndúú idin'dáí hilo. ²⁹Naati 'úú ní ngaⁿá ngí ndís'tií, chí rey Salomón miiⁿ ní ndúúcu tanducuéⁿe catecai yā chí n'déévé n'dai ndii tuunu ngii 'yáⁿā naati nguéé neené n'dεevéé tan'dúúca yeⁿe naāndā s'eeⁿ. ³⁰Ndúútí chí Ndyuūs idííⁿ yā cuidado yeⁿe yáatā chí vεe cuēeti chí maāⁿ ní canee ní cavyaaⁿ ní ntíⁿ ní n'hee yaⁿā 'iiⁿyāⁿ. ¿Áá nguéé diiⁿ cá Ndyuūs cuidado yeⁿe ndís'tií, 'iiⁿyāⁿ chí duū'vii 't'éénu nī Ndyuūs? ³¹Nguéé nadicadíínuuⁿ ndís'tií, ní caaⁿmaⁿ nī 'tíicā: ¿De'ē che'é 'nū? o ¿de'ē cu'ú 'nū? o ¿de'ē 'cuēetinúu

'nū? ³²'Iiⁿyāⁿ chí nguéé yeⁿe ndaata Israel in'nuúⁿ yā dendu'ú chí 'túúca. Chiida yú chí cánée yā ná va'āi cheeti nguuvi déénu yā tanducuéⁿe dendu'ú chí necesidades neⁿe yú.

³³Naati ndís'tií ní canee chí in'nuúⁿ nī vmnááⁿ vmnaaⁿ yeⁿe náachi Ndyuūs ngaⁿa ntiiⁿnyúⁿ yā ndúúcu vaadí cuaacu yeⁿe Ndyuūs, ní 'íicú tanducuéⁿe dendu'ú 'cūú ní ntiineeⁿ yā yeⁿe nī. ³⁴Nguéé nadicadíínuuⁿ nī yeⁿe cavyaaⁿ caati cavyaaⁿ ní táámá nguuvi ndúúcu yeⁿe, ní 'íicú nguuvi ní 'āā véé nūuⁿ chí véé. Dámaāⁿ nadacadíínuuⁿ nī yeⁿe maaⁿnguuvi, 'āā 'tiicá nūuⁿ.

**'Túúca ngaⁿa Jesús: Nguéé tun'daá ní
nuuⁿndi yeⁿe táámá 'iiⁿyāⁿ**

(Lc. 6.37-38, 41-42)

7 Jesús caⁿa yā: Ndís'tií ní nguéé caaⁿmaⁿ néeⁿ nī yeⁿe táámá 'iiⁿyāⁿ maaⁿ ní 'íicú Ndyuūs nguéé caaⁿmáⁿ yā nuuⁿndi yeⁿe nī. ²Caati ndúúti chí ndís'tií caaⁿmaⁿ nī nuuⁿndi yeⁿe 'iiⁿyāⁿ, 'tiicá ntúūⁿ Ndyuūs caaⁿmáⁿ yā nuuⁿndi yeⁿe nī. Nduuti chí n'deeé n'dáí caaⁿmáⁿ nī, 'tiicá ntúūⁿ caaⁿmáⁿ Dendyuūs yeⁿe nī. Nduuti chí duu'ví nūuⁿ, 'tiicá ntúūⁿ Ndyuūs caaⁿmáⁿ yā yeⁿe nī. ³¿De'ē cúúví chí maaⁿ nch'εeté nūuⁿ n'gíínu nī nuuⁿndi chí diiⁿ tanáⁿā 'iiⁿyāⁿ ní nguéé inaaⁿ nī nuuⁿndi ch'εete chí dííⁿ nī? ⁴¿De'ē cúúví chí caaⁿmáⁿ nī 'iiⁿyāⁿ yeⁿe chí dííⁿ yā chí nguεε n'daācā nduuti chí ndís'tií dííⁿ nī cosas chí nguéé n'daācā? 'Caandivééⁿ nī. Véé nuuⁿndi yeⁿe nī chí ch'εete chí nguéé ndaacadaamí nī yeⁿe. ⁵Ndís'tií 'iiⁿyāⁿ 'uúví naaⁿ 'uúví cheendi nī. Dííⁿ cá maáⁿ nī

ndaacadaamí nī yeⁿe nuuⁿndi chi dííⁿ nī ní 'íicú cuuvi caaⁿmaⁿ nī yeⁿe 'iiⁿ'yāⁿ chi canéé chí din'daācá yā ní ndaacadaamí yā yeⁿe nuuⁿndi chi dííⁿ yā.

⁶Nguéé ca'a nī dendu'ū chí yeⁿe Ndyuūs 'yaānā s'eeⁿ ti 'yaānā s'eeⁿ cuuvi contra yeⁿe nī. Ní caⁿ'á tī che'e tī ndís'tiī chi pedazos cánéé nī. Nguéé 'cuíi nī cosas yeⁿe nī chi dichí'vē tan'dúúccā perlas nanááⁿ puercos ti cuuvi nanguεεcúndii tī ní ca'a ta'á tī ní ndís'tiī canéé nī maaⁿ ca'a tī.

Caacá nī, in'nuúⁿ nī, ní yaa'ví nī cheendi va'ai

(Lc. 11.9-13; 6.31)

⁷Caⁿ'a Jesús: Caacá nī Ndyuūs, ní Ndyuūs téé yā yeⁿe nī. In'nuúⁿ nī ní ndaāca nī. Yaa'ví nī cheendi va'āi ní nan'guaaⁿ yeⁿ'é nī. ⁸Caati nducyaaca 'iiⁿ'yāⁿ chí ngiica Ndyuūs ní Ndyuūs ca'a yā yeⁿe yā. Ní nducyááccá 'iiⁿ'yāⁿ chí in'nuuⁿ yā, ní inndaaca yā. Ní nducyááccá 'iiⁿ'yāⁿ chí yaa'vi yā cheendi va'āi, ní nan'guaaⁿ yeⁿ'é yā.

⁹¿Cheé yeⁿe ndís'tiī taachi caaca daiya nī 'aama pan, ca'a nī 'áámá tuūu? ¹⁰O nduuti chi caaca daiyá nī 'áámá 'yaācā, ¿'áá ca'á nī 'áámá cúú? ¹¹Nduuti chi ndís'tiī chí cúⁿncheeⁿ nī deenú nī ca'a nī cosa chí n'daācā daiya nī, ndii 'tεε cá Chiida yú chí canéé yā na va'ai cheeti nguuví ca'á yā cosas chí n'dááccā n'dai cá 'iiⁿ'yāⁿ chí caaca yā Ndyuūs.

¹²Tíicā chí tanducuéⁿe chí neⁿ'é nī chí dííⁿ 'iiⁿ'yāⁿ ndúúcu nī, chuū ntúūⁿ dííⁿ nī ndúúcu 'iiⁿ'yāⁿ. Chuū chí ley yeⁿe Moisés ndúúcu chí canéé nguūⁿ yeⁿe profetas s'uuⁿ ndíí cuááⁿ vmaaaⁿ.

Cheendi va'āi chí 'tuúcuú

(Lc. 13.24)

¹³Caⁿ'a Jesús: Cundáa nī chééndí va'āi chí 'tuúcuú, tí cheendi va'ai ch'εε'nū ndúúcu yúúni ch'εε'nū, chíiⁿ chí candéé 'iiⁿ'yāⁿ chí caⁿ'a yā na infierno. Nééné 'yaaⁿ 'iiⁿ'yāⁿ chí ndaa yā chééndí va'ai chí ch'εε'nū miiⁿ. ¹⁴Naati chééndí va'āi 'tuúcuú miiⁿ ní yúúni cuééⁿ miiⁿ chí candéé 'iiⁿ'yāⁿ chí caⁿ'a yā na vida cueⁿe daāⁿmaⁿ. Ní duu'ví 'iiⁿ'yāⁿ chí ndaāca yā chééndí va'āi miiⁿ.

Yáⁿ'á ní cucááavā n'gui'i yeⁿ'ē tuumicádíínuuⁿ nī

(Lc. 6.43-44)

¹⁵Caⁿ'a Jesús: Dííⁿ nī cuidado ndís'tiī yeⁿe 'iiⁿ'yāⁿ profetas chí falsos yā chí ngaⁿ'a yā chí ndεε yā nduudu cuaacu yeⁿ'é Ndyuūs naati nguεε 'tíicā. Taachi nndaa yā nanááⁿ ndís'tiī cuaaⁿ dáámí 'iiⁿ'yāⁿ miiⁿ tan'dúúccā catecai 'iiti cuúchī naati cuááⁿ cheéti yā tan'dúúccā 'yáá'yāⁿ ngaātāá chí taaⁿ tī. ¹⁶Ní yeⁿe chí dííⁿ yā tuumicádíínuuⁿ nī yeⁿe yā. ¿'Áá cuta'a 'iiⁿ'yāⁿ uvas yeⁿe yááⁿ? o ¿'Áá cuta'a 'iiⁿ'yāⁿ n'guiidii yaaⁿ nguuví yeⁿe yááⁿ? Nguεε 'tíicā. ¹⁷Tíicā, nducyaaca yáⁿ'á chí n'dái, n'daācā ngíi n'gui'i n'dáacā yeⁿ'ē, naati yáⁿ'á chí nguéé n'daācā ní nguéé n'dai n'gui'i yeⁿ'ē. ¹⁸'Áámá yáⁿ'á chí n'daācā nguéé 'cuūndi n'gui'i chí nguéé n'daācā, ndíi nguéé ndúú yeⁿ'e chí nguéé n'daācā 'cuūndi n'gui'i chí n'daācā yeⁿ'ē. ¹⁹Nducyaaca yáⁿ'á chí nguéé n'daācā ngíi n'gui'i yeⁿ'ē, 'iiⁿ'yāⁿ ní 'cáaca yā ní 'cuii yā na yaⁿ'ā. ²⁰Tiicá ntúūⁿ ndís'tiī tuumicádíínuuⁿ nī

yeⁿe 'iiⁿ'yāⁿ cáāvā cosas chi dííⁿ yā yeⁿe chi n'daacā o yeⁿe chi nguéé n'daacā.

**Nguéé cuuví cundaa nducyaaca
'iiⁿ'yāⁿ na va'ai cheeti nguuvi**

(Lc. 13.25-27)

²¹Jesús ngaⁿa yā 'tíicā: Nguéé nducyaaca 'iiⁿ'yāⁿ chi ngaⁿá yā yeⁿe 'úú: N'díí Señor, Señor, ní cuuví cundaa yā naachí Ndyuūs ngaⁿa ntiíⁿ'nyuⁿ yā, dámaaⁿ 'iiⁿ'yāⁿ chi dííⁿ yā tan'dúúicā chi neⁿe Chiidá chi canee yā na va'ai cheeti nguuvi. ²²Nééné 'yaaⁿ 'iiⁿ'yāⁿ caaⁿ'maⁿ yā cuuvi yā 'úú nguuví yeⁿe juicio N'díí Señor, Señor, ¿'áá nguéé caⁿ'a n'ū nduudu cuaacu ndúúicū chi duuchí ní ní tun'dáa n'ū yááⁿ'nguiinūⁿ yeⁿe 'iiⁿ'yāⁿ ndúúicū chi duuchí ní? Ní nééné n'deē vaadi n'gínú idííⁿ n'ū ndúúicū chi duuchí ní. ²³Tuu'mi ní 'úú Cristo caaⁿ'máⁿ cuaacú cuuví 'iiⁿ'yāⁿ s'eeⁿ: 'Úú nguéé n'diichí tandíí ndís'tii. Cuví ní yeⁿe 'úú, ndís'tii chi nguéé n'daacā dííⁿ ní.

**Yeⁿe ndúú 'uúví cimientu yeⁿe va'ai
s'eeⁿ**

(Lc. 6.47-49; Mr. 1.22)

²⁴Ní caⁿ'a ntúūⁿ Jesús: 'Áā du'ú nūⁿ 'iiⁿ'yāⁿ chi n'giindiveéⁿ yā ndúúúú 'cūū yeⁿe níicú idííⁿ yā chεε chi 'úú ngaⁿá, 'iiⁿ'yāⁿ miiⁿ ní tan'dúúicā 'áámá saⁿā chí n'dēēvee nadicádíínuuⁿ sa. Saⁿā miiⁿ din'dái sa vaacu sá na 'áámá yáává. ²⁵Níicú chééⁿ cúúví naⁿā ní ch'iita yíicú. Ní chéenu 'yúúné taaⁿ contra yeⁿe va'āi miiⁿ ní nguéé chindεeve caatí n'daacā chéendii na yáává miiⁿ. ²⁶'Áā du'ú nūⁿ 'iiⁿ'yāⁿ chi

n'giindiveéⁿ yā nduudú 'cūū yeⁿe ní nguéé idííⁿ yā tan'dúúicā chi ngaⁿá, 'iiⁿ'yāⁿ miiⁿ ní tan'dúúicā 'aama saⁿā chí nguéé n'daacā inadicádíínuuⁿ sa. Saⁿā miiⁿ ní din'dái sa vaacu sa na yáⁿ'āa ndúútii. ²⁷Ní cheeⁿ cuuví naⁿā ní ch'iita yíicú miiⁿ. Ní chéenu 'yúúné taaⁿ contra yeⁿe va'āi miiⁿ ní va'āi chidεeve ní ntuūvii.

²⁸Taachí Jesús miiⁿ ch'iinu caⁿ'a yā ndúúúú 'cūū, 'iiⁿ'yāⁿ míⁿ cheⁿe yiinú yā yeⁿe chíⁿ chí ngi'cueeⁿ Jesús. ²⁹Caati Jesús miiⁿ ngi'cueeⁿ yā 'iiⁿ'yāⁿ s'eeⁿ tan'dúúicā 'áámá 'iiⁿ'yāⁿ chí déenu o 'áámá 'iiⁿ'yāⁿ chí ngaⁿa ntiíⁿ'nyúⁿ yā nguéé tan'dúúicā 'áámá maestro chi ngi'cueeⁿ ley yeⁿe yā.

**Jesús idííⁿ yā chi nduūvā yeⁿe 'áámá
saⁿā yeⁿe ca'āi chí nguuvi lepra chí
ín'duuti yuūtē yeⁿe sa**

(Mr. 1.40-45; Lc. 5.12-16)

8 Taachí Jesús cuch'eeⁿ yā na 'áámá yīicū, nééné 'yaaⁿ 'iiⁿ'yāⁿ cueⁿ'é yā ndúúúú yā. ²N'diichí ní. Nanááⁿ Jesús ndaaⁿ 'áámá saⁿā chí ndíí sa 'áámá ca'ai chí nguuvi lepra chí ín'duuti yuūtē yeⁿe sa. Ní chintii'ya sa nanáaⁿ yā ní s'teenu sá ní caⁿ'a sa chii sa 'iiⁿ'yāⁿ: N'díí Señor, nduuti chí neⁿe ní, ní dííⁿ ní chí nduūvā yeⁿe.

³Jesús ní n'doó yā ta'á yā ní tuu'ví yā saⁿā miiⁿ ní caⁿ'a yā chii yā saⁿā: 'Úú neⁿ'é. Nduūvā yeⁿe di. Tuu'mí nūⁿ ndúúvā n'daacā yeⁿe sa ní nduūvī dεeve sa. ⁴Tuu'mi ní Jesús ní caⁿ'a yā chii yā saⁿā miiⁿ: Cuéⁿe di ní 'cuuⁿ'míⁿ dí cuerpo yeⁿe di nanááⁿ chiidúú ní ca'a di ofrenda nanááⁿ Ndyuūs tan'dúúicā chí ngaⁿa na ley chí dinguuⁿ Moisés. 'Tíicā ní

chiiduú caaⁿmaⁿ cuaacú yā yeⁿē di nanááⁿ nducyaaca 'iiⁿyāⁿ, ní nguéé 'cuuⁿmiⁿ di yeⁿē chí chii ndúúcu di mar 'áámá 'iiⁿyāⁿ.

Jesús díiⁿ yā chi nduūvā yeⁿe 'aama mozo yeⁿe capitán romano

(Lc. 7.1-10)

⁵Taachí Jesús cáámá ndaa yā na yāāⁿ Capernaum, ndaā 'áámá saⁿā capitán yeⁿe ndaata yeⁿe 'iiⁿyāⁿ romanos nguéé yeⁿe ndaata Israel. Ní ndaā sa nanááⁿ Jesús miiⁿ ní di'cuútu sa 'iiⁿyāⁿ. ⁶Ní caⁿa sa chii sa Jesús: N'díi Señor, mozo yeⁿé candíití sá na cama ndúúcu ca'āi chí in'dúúví cuerpo yeⁿē sa. Nééné yā'āi ngiitā sa.

⁷Jesús caⁿa yā chii yā saⁿā: 'Úú ní caⁿá ní díiⁿ chí saⁿā ní nduūvā yeⁿē sa.

⁸Saⁿā capitán nan'guεεcútaⁿa sa ní caⁿa sa chii sa Jesús miiⁿ: N'díi Señor, 'úú nguéé neené n'dai 'úú chí cundaa ní chéétí va'āi yeⁿé. Dámaāⁿ chí caaⁿmaⁿ núuⁿ ní saⁿā mozo yeⁿé ndúúvā yeⁿē sa. ⁹'Úú ní saⁿā chí véé saⁿā ndíi tiiⁿ yeⁿé, ní ngaⁿā ntiⁿnyúⁿ yā yeⁿē 'úú. 'Úú ntúūⁿ ní ngaⁿá ntiⁿnyúⁿ yeⁿē cien soldados chí maaⁿ poder yeⁿé. 'Úú ní ngaⁿá ngií 'aama sa: Cúnaⁿā di, ní inaⁿā sa. Ní ngaⁿá ngií taama sa: Cuchí di, ní chii sa. Ní ngaⁿá ngií mozo chí diiⁿ mandado yeⁿé: Diiⁿ di ntiⁿnyúⁿ 'cūū, ní diiⁿ sa.

¹⁰Taachi Jesús ch'iindiveéⁿ yā chuū cheⁿé yiinú yā. Ní caⁿa yā chii yā 'iiⁿyāⁿ chí ndúúcu yā: Cuaacu níⁿnyúⁿ ngaⁿá ngií ndis'tii chí 'úú nguéé īndaacá 'iiⁿyāⁿ chí i'téenu n'dai yā mar 'áámá 'iiⁿyāⁿ yeⁿe ndaata Israel tan'dúúcā

saⁿá 'cūū. ¹¹Ní ngaⁿá ngií ndis'tii, chí neené 'yaaⁿ yā chí caaca yā cuaaⁿ ná ícan'daa 'yáⁿā ndúúcu cuaaⁿ na ngiia 'yáⁿā ní 'cuéeté yā ná va'ai cheeti nguuvi ndúúcu Abraham, ndúúcu Isaac, ndúúcu Jacob. ¹²Naati n'dee n'dái daiyá 'iiⁿyāⁿ yeⁿe ndaata Israel chí canéé chí 'cuéetinée yā naachí Ndyuūs ngaⁿa ntiⁿnyuⁿ yā ná va'ai cheeti nguuví, Ndyuūs tun'dáa yā 'iiⁿyāⁿ s'eeⁿ chuva'āi naachí maāⁿ. Míiⁿ ní cuεecu yā ní che'e 'diiⁿyuⁿ yā ti nguéé i'téenu yā Dendyuūs.

¹³Tuu'mi ní Jesús miiⁿ caⁿa yā chí yā capitán miiⁿ: Cunaⁿā di. Tan'dúúcā chí i'téenu di chí 'úú idiíⁿ chí nduūvā yeⁿe mozo yeⁿē di, 'tíicā cuuví ndúúcu mozo yeⁿē di. Ní hora miiⁿ nūuⁿ nduūvā yeⁿe mozo yeⁿē sa.

Jesús díiⁿ yā chi nduūvā yeⁿe indáⁿā Pedro

(Mr. 1.29-31; Lc. 4.38-39)

¹⁴Cuayivi ní ndaā Jesús ná va'ai yeⁿē Pedro miiⁿ ní n'diichí yā chí indáⁿā Pedro miiⁿ candiiti yā na cama. Ndeē 'iiⁿnūⁿ taán táⁿā miiⁿ. ¹⁵Jesús tuu'ví yā ta'ā tá ní 'iiⁿnūⁿ miiⁿ ní chivii. Tuu'mi ní táⁿā miiⁿ ní nducueeⁿ tá ní diiⁿ ta mandado yeⁿé 'iiⁿyāⁿ s'eeⁿ ní ca'a ta chí che'e yā.

Jesús díiⁿ yā chi nanduūvā yeⁿē n'dee n'dái 'iiⁿyāⁿ

(Mr. 1.32-34; Lc. 4.40-41)

¹⁶Taachi chí 'da'a nguuvi miiⁿ, tuu'mi ní 'iiⁿyāⁿ yeⁿe yāāⁿ miiⁿ ndaa yā chí ndéē yā 'yaaⁿ n'dái 'iiⁿyāⁿ nanááⁿ Jesús. Ndeē yā 'iiⁿyāⁿ chí snée yā ndúúcu espíritus yeⁿe

yáá'n'guiinūuⁿ. Jesús caⁿa yā 'áámá nduudu nūuⁿ ní tun'dáa yā espíritus yeⁿe yáá'n'guiinuuⁿ yeⁿe 'iiⁿyāⁿ. Ní dííⁿ yā chí nduuva yeⁿe nducyáácá 'iiⁿyāⁿ s'eeⁿ chí ngííta yā. ¹⁷Tííca ní cuuví cuaacu chí caⁿa saⁿā profeta Isaías ndíí cuaaⁿ vmnaaⁿ taachí caⁿa yā 'túúcā: 'Iiⁿyāⁿ maáⁿ yā sta'á yā ca'āi yeⁿe yú ní candéε yā vaadi yā'ai yeⁿe yú.

'Iiⁿyāⁿ āā neⁿe yā caⁿa yā ndúúcū Jesús

(Lc. 9.57-62)

¹⁸Taachi Jesús n'diichi yā nducyaaca 'iiⁿyāⁿ cuaaⁿ diitú yā caⁿa yā chíi yā discípulos yeⁿe yā chí cho'ó yā táámá lado yeⁿe nuūⁿnīⁿyáⁿā. ¹⁹Áámá saⁿā chí ngi'cueeⁿ ley ndaā sa nanááⁿ Jesús ní caⁿa sa chíi sa 'iiⁿyāⁿ: N'díí Maestro, caⁿá ndúúcu ní 'āā tíí nūuⁿ naachi cáⁿa ní.

²⁰Jesús caⁿa yā chíi yā saⁿā miiⁿ: 'Yuunééⁿ ní véé yiivi yáává yeⁿe tí. 'Yáádá yeⁿe nanguuvi véé 'dééce tí naati 'úú chí Saⁿā chí Daiya Dendyuūs nguéé va'ai chí vaacú naachi cundiití tííⁿ.

²¹Táámá discípulo yeⁿe yā caⁿa sá chíi sa Jesús: N'dii Señor, vmnááⁿ vmnaaⁿ téé ní lugar 'úú tí caⁿá 'cuūchí chíidá ní caⁿa yú.

²²Jesús ngaⁿa yā ngii yā saⁿā: Cuchí di ndúúcū 'úú. Cu'neeⁿ dí 'iiⁿyāⁿ chí nguéé i'téenu yā chí 'cuuchí yā tináⁿā chí chíida di. Tí 'iiⁿyāⁿ s'eeⁿ tan'dúúcā tináⁿā 'tííca yā.

Jesús chí'neeⁿ 'dííⁿ yā olas yeⁿe nuūⁿnīⁿyáⁿā nduūcū 'yúúné chí tááⁿ

(Mr. 4.35-41; Lc. 8.22-25)

²³Jesús sndaa yā na 'áámá barco ní discípulos yeⁿe yā cueⁿe yā

ndúúcu yā ní sndaa yā na barco miiⁿ. ²⁴Hora mííⁿ nūuⁿ ní ndaā 'áámá 'yúúné tááⁿ chí olas yeⁿe nuūⁿnīⁿyáⁿa miiⁿ ní ch'εεte cá chí ndaā nuūⁿnīⁿ cheeti barco miiⁿ. 'Téé 'téé nūuⁿ nguéé cánduūu ná barco. Jesús miiⁿ ní cyaadu yā. ²⁵Discípulos yeⁿe yā ndaa yā nanááⁿ Jesús ní nanduūchí yā 'iiⁿyāⁿ miiⁿ ní ngaⁿa yā ngii yā Jesús: N'dii Señor, nadanguáⁿai ní s'uūúⁿ caati 'cuūvi yú. 'Āā 'cuεεchi yú cuaaⁿ maaⁿ nuūⁿnīⁿyáⁿā.

²⁶Jesús caⁿa yā chíi yā discípulos yeⁿe yā: ¿De'ε cúuví chí 'va'á ní? Ndís'tií ní dúú'vií i'téenu ní. Tuu'mi ní Jesús nducueeⁿ yā ní yaa'vi yā 'yúúné mííⁿ ndúúcū nuūⁿnīⁿyáⁿā chí cu'nééⁿ 'diiíⁿ. Ní hora mííⁿ nūuⁿ canee 'diiíⁿ. ²⁷Discípulos ní cheⁿe yiínú yā ní caⁿa yā nguaaⁿ vi'í: ¿Du'u sáⁿā chí 'túúcā, tí ndii 'yúúné ndíí nuūⁿnīⁿyáⁿā 'ngiindiveééⁿ yeⁿe sa?

Saⁿā s'eeⁿ yeⁿe yáⁿā Gadara chí véé espíritus yeⁿe yáá'n'guiinūuⁿ ndúúcu sa

(Mr. 5.1-20; Lc. 8.26-39)

²⁸Taachi Jesús ndúúcū discípulos yeⁿe yā cho'ó yā nuūⁿnīⁿyáⁿā miiⁿ ní ndaá yā niiⁿnuúⁿ na yáⁿā Gadara miiⁿ, snéé na 'uuvi saⁿā chí snéé sa ndúúcū espíritus yeⁿe yáá'n'guiinūuⁿ ní nacan'dáa sa na yiive yáává chí nguaaⁿ yáinyāⁿ. Ní nééné taaⁿ sa chí mar 'áámá 'iiⁿyāⁿ nguéé ngíí ngo'ó yā yúúní miiⁿ. Saⁿā s'eeⁿ ní ndaa sa nanááⁿ Jesús. ²⁹Ní 'cai yiicu sa: N'dii Jesús Daiya Dendyuūs, ¿d'éε canéé yeⁿe ní ndúúcū nús'uu? ¿Áá ndaá ní 'muuⁿ chí di'vaachí ní yeⁿe nús'uu taachi

'āā cuéé cúnúú ca'a tiempo taachi Dendyuūs ca'a yā castigo?

³⁰Ní naachi snéé saⁿā s'eeⁿ ní yaⁿai 'téé na 'áámá yīicū. Ní niiⁿnuúⁿ saⁿā s'eeⁿ snéé 'yaaⁿ n'dái puercos, chi nge'é tī. ³¹Ní espíritus yeⁿe yááⁿ'nguiniūⁿ miiⁿ ní di'cuíftu sa Jesús miiⁿ: N'dii Jesús, ndúúti chi tun'dáa nī nús'uu yeⁿe saⁿā s'uuⁿ, 'cuáaⁿ nī chi cundaa nū chēeti puercos miiⁿya. ³²Jesús miiⁿ caⁿa yā chii yā espíritus yeⁿe yááⁿ'nguiniūⁿ: Cuéⁿe nī. Tuu'mi ní espíritus yeⁿe yááⁿ'nguiniūⁿ cándaa sa ní cueⁿe sa chēeti puercos. Cuin'diichí nī. Nducyaa puercos chéenu tī na yīicū miiⁿ ní chingéé nuúⁿ tī nguááⁿ nuūⁿnīⁿ'yáⁿā ní chí lí nuúⁿ tī nguááⁿ nuūⁿnīⁿ miiⁿ.

³³Iiⁿ'yāⁿ chi diiⁿ cuidado puercos miiⁿ cunaⁿá yā ngéenu yā na yáāⁿ miiⁿ ní caⁿa yā tanducuéⁿē chí chii tan'dúucā chí chó'oo yeⁿe 'iiⁿ'yāⁿ chí snéé ndúúcu espíritus yeⁿe yááⁿ'nguiniūⁿ. ³⁴Nducyaa 'iiⁿ'yāⁿ yeⁿe yáāⁿ miiⁿ cheⁿe yā n'diichi yā Jesús. Taachí ndaa yā naachi canéé Jesús miiⁿ, 'iiⁿ'yāⁿ s'eeⁿ ní di'cuíftu yā Jesús miiⁿ chí cuévíi yā yeⁿe yáāⁿ vaacú yā.

Jesús diiⁿ yā chi nduuvā yeⁿe 'áámá saⁿā ndúúcu ca'āi chí in'dúuví sá

(Mr. 2.1-12; Lc. 5.17-26)

9 Tuu'mi ní Jesús miiⁿ sndáa yā na barco, ní cueⁿé yā táamá lado yeⁿe nuūⁿnīⁿ'yáⁿā ní cueⁿe yā ní ndaa yā yáāⁿ vaacú yā. ²Tuu'mi ní ndaa nanááⁿ Jesús 'iiⁿ'yāⁿ ní ndee yā 'áámá saⁿā ndúúcu ca'āi chí in'dúuví cuerpo yeⁿe sa. Candúu sa na 'áámá yiive. Taachí Jesús miiⁿ tuumicadínuuⁿ yā chí saⁿā s'eeⁿ

i'téenu sa yeⁿe yā, tuu'mi ní caⁿa yā chii yā saⁿa miiⁿ: Nduuví tiinú di daiyá. 'Úú 'āā nadach'ēecú nuuⁿndi yeⁿe di.

³Tuu'mi ní náⁿā saⁿā s'eeⁿ chi ngi'cueeⁿ ley chí snee sa miiⁿ tucáa sa nadacadínuuⁿ sa nguaaⁿ maāⁿ sa: Sáⁿa 'cūū ní ngaⁿa taaⁿ sa contra yeⁿe Nduyuūs. ⁴Jesús miiⁿ tuumicadínuuⁿ yā vaanicadínuuⁿ yeⁿe sa ní caⁿa yā chii yā saⁿā s'eeⁿ: ¿De'ē cuuvi chí nguéé n'daācā inadicadínuuⁿ nī na staava yeⁿe nī? ⁵¿Chee cá chí nguéé ngiⁿ'ii chí caaⁿ máⁿ cuuví sáⁿa 'cūū: Nuuⁿndi yeⁿe di nch'ēecú o chí caaⁿ máⁿ: Ndúcuééⁿ dí ní caaca dí? ⁶Tíicā ngaⁿá chí ndís'tii cadínuuⁿ nī chí Saⁿā chí Daiya Dendyuūs ní véé poder yeⁿe sa na iⁿ'yeeⁿdí 'cūū chí nadach'ēecú sa nuuⁿndi yeⁿe 'iiⁿ'yāⁿ. Tuu'mi ní caⁿa yā chii yā saⁿā ndúúcu ca'āi chí in'dúuví sá: Nducueeⁿ di ní nta'a di yiive yeⁿe di ní cunaⁿā di na vaacu di.

⁷Tuu'mi ní saⁿā miiⁿ ní nducuééⁿ sá ní cúnaⁿā sa na vaacu sa.

⁸Taachí 'iiⁿ'yāⁿ s'eeⁿ n'diichí yā chuū cheⁿe yiinú yā ní caⁿa yā: De'e chúucā ch'ēete Dendyuūs chí ca'á yā poder 'cūū saⁿā iⁿ'yeeⁿdí cūū.

Jesús yaa'vi yā saⁿā chí nguuví Mateo

(Mr. 2.13-17; Lc. 5.27-32)

⁹Jesús cho'ó yā miiⁿ, ní cachiicá yā ní n'diichí yā 'áámá saⁿā chí nguuví sa Mateo. Mateo miiⁿ ní vee sa na cuarto naachi nadí'vē 'iiⁿ'yāⁿ yeⁿe yáⁿāa yeⁿe yā. Jesús caⁿa yā chii yā saⁿā: Díí, cuchí di caⁿā di nduucú. Ní Mateo miiⁿ nducueeⁿ sa ní cueⁿe sa ndúúcu Jesús.

¹⁰Taachí Jesús vee yā na mesa ná va'āi yeⁿe Mateo miiⁿ, hora mífⁿ néené 'yaaⁿ 'iiⁿyāⁿ publicanos chi cobradores chí inn'guee yā yeⁿe impuesto ndúúcu 'iiⁿyāⁿ nuūⁿndíí ní ndaa yā ní ch'ēté yā na mesa ndúúcu Jesús ndúúcu discípulos yeⁿe yā. ¹¹Taachí 'iiⁿyāⁿ fariseos n'diichí yā chuū, caⁿ'a yā chii yā discípulos yeⁿe Jesús: ¿De'ē cúuví chí nge'e maestro yeⁿe nī ndúúcu saⁿ'ā publicanos chi cobradores chí inn'guee yā yeⁿe impuesto ndúúcu 'iiⁿyāⁿ nuūⁿndíí?

¹²Taachí Jesús ch'iindiveeⁿ yā chuū, caⁿ'a yā chii yā 'iiⁿyāⁿ s'eeⁿ: 'iiⁿyāⁿ chí nguéé ngiitā nguéé neⁿe yā 'aama médico, dámaaⁿ 'iiⁿyāⁿ chí ngiitā. ¹³Cueⁿe nī ní tuumicádiinuⁿ nī de'e chí canéé nguūⁿ na libro yeⁿe Ndyuūs ndúúcu chí neⁿ'ē caaⁿ'maⁿ chí 'tíicā: 'Úú neⁿ'é chí 'iiⁿyāⁿ nduuvi ya'āi 'iinú yā ndúúcu ví'i. 'Úú ní nguéé neⁿ'é chí 'caaⁿ'nuⁿ yā 'iiti ní ca'á yā 'iiti tan'dúúcā ofrenda cucáávā 'úú. Ní 'úú ní nguéé cuchii iⁿ'yeeⁿ'dí 'cūú chí yaa'ví 'iiⁿyāⁿ chí nadacádiinuⁿ yā chí n'dáaca yā ti nguéé dinuuⁿndí yā, naati 'iiⁿyāⁿ chí véé nuuⁿndi yeⁿe yā ní 'íicú ndaacadaamí yā yeⁿ'ē nuuⁿndi yeⁿe yā.

'Iiⁿyāⁿ ntiinguuneeⁿ yā yeⁿ'e chí nguéé ca'diiⁿ'núⁿ yā ti caaⁿ'maⁿngua'a yā
(Mr. 2.18-22; Lc. 5.33-39)

¹⁴Tuu'mi ní discípulos yeⁿe Juan chí ch'ēdínuūⁿniⁿ yā ndaa yā nanááⁿ Jesús miiⁿ ní caⁿ'a yā: N'dii Jesús, ¿de'ē cúuví chí nús'uu ndúúcu 'iiⁿyāⁿ fariseos néené n'dee cuūví nguéé nga'diiⁿ'núⁿ nū ní discípulos yeⁿe nī nga'dííⁿ'núⁿ yā?

¹⁵Jesús caⁿ'a yā chii yā 'iiⁿyāⁿ s'eeⁿ: ¿Áá cuuví 'cuētinéé 'iiⁿyāⁿ ndúúcu catecai 'cuáiⁿ tinaⁿ'ā taachí caⁿ'á yā naachi n'giindivaacu 'iiⁿyāⁿ neⁿ'e chí saⁿ'ā chí n'giindivaacu miiⁿ canéé sá? Naati ndaa nguuvi chí isaⁿ'ā yeⁿ'e yā ní cuavíi sa yeⁿ'é yā ti 'cuūví sa; tuu'mi ní nguēe ca'diiⁿ'núⁿ yā.

¹⁶Mar 'áámá 'iiⁿyāⁿ nguéé cúuví cuta'á yā 'áámá tiinūⁿ ngai chí nguéé naaⁿ'nu yā chí n'dyaatá yā na catecai ndiicúu yeⁿ'e yā. Nduuti chí 'tíicā diíⁿ yā, caātā ndu'ū tiinūⁿ ndiicúu. Ní cuuvi ch'ēete ca naachí ndíí nteeⁿ tiinūⁿ ndiicúu. ¹⁷Ndíí nguéé ndúú caaⁿ'yúⁿ 'iiⁿyāⁿ vino ngai ch'ééti bolsa yiiⁿ'maⁿ ndiicúu tan'dúúcā chí diíⁿ 'iiⁿyāⁿ tiempo chí chó'oo caati yiiⁿ'maⁿ ndiicúu miiⁿ ní cúteeⁿ ní vino miiⁿ ní cungéé. Ní cuuvi ndái yiiⁿ'maⁿ. Caaⁿ'yúⁿ yā vino ngai ch'ēeti bolsa yiiⁿ'maⁿ ngai; ní cuaví'i nduu 'uūví n'dáacā canéé yeⁿ'ē.

**Jesús diíⁿ yā chí nanduūvā yeⁿ'e
'uūví n'daataá**

(Mr. 5.21-43; Lc. 8.40-56)

¹⁸Taachí Jesús miiⁿ ngaⁿ'a yā ndúúdu 'cūú, 'áámá saⁿ'ā chí ngaⁿ'a ntiíⁿ'nyúⁿ yā yeⁿ'e yáacū sinagoga ndaa sa nanááⁿ Jesús, ní chiintii'ya sá ní chi'teenú sa. Ní caⁿ'a sa chíi sa 'iiⁿyāⁿ: N'dii Jesús, miniiⁿ'yuⁿ chíi daiyá; naati cuchíi nī ní cun'duu nī ta'a nī vmnaaⁿ yeⁿ'ē tá ní nnduuchi tá.

¹⁹Ní Jesús nducueeⁿ yā ní cueⁿ'e yā ndúúcu discípulos yeⁿ'e yā ní ndaa yā ndúúcu saⁿ'ā miiⁿ na vacu sá. ²⁰Tuu'mi ní 'áámá n'daataa chí canéé ndúúcu 'áámá ca'ai, chí

ican'dáa yuuúⁿ yeⁿe cuerpo yeⁿe tá 'āā ndiichúví nduūyū ndaa niiⁿnuⁿ tá cuaaⁿ dáámí Jesús. Tuū'vi tá naachí ndeētúú yeⁿe catecai Jesús miiⁿ. ²¹Ti taⁿā miiⁿ maāⁿ tá nadicádiinuⁿ tá 'tíicā: Ndúúti chi 'úú tuū'ví dámaaⁿ catecai yā, tuu'mi ní nduūvā yeⁿé. ²²Tuu'mi ní Jesús nguēecúndii yā ní n'diichi yā táⁿā, ní caⁿa yā chii yā táⁿā: Cúúví dítiiⁿú di, díí daiyá; 'āā nanduuvā yeⁿe di ti i'téenu di 'úú. Hora míⁿ nūuⁿ táⁿā miiⁿ nánduūvā yeⁿe tá.

²³Taachí Jesús miiⁿ sndaa yā na va'ai yeⁿe sáⁿā chi ngaⁿa ntiⁿnyuⁿ yā yeⁿe yáacū sinagoga tuu'mi ní n'diichi yā 'iiⁿyāⁿ chi i'tiiví yā flauta, ndúú^cū 'iiⁿyāⁿ chi n'gai yā, ndúú^cū 'iiⁿyāⁿ chi ngeēcū yā ní snéé yā naachi candíftí tináⁿā. ²⁴Ní Jesús caⁿa yā chii yā 'iiⁿyāⁿ s'eeⁿ: Cuvíi ní; ti ta'díí miiⁿ nguéé n'dii tá, cyaadu tá. 'iiⁿyāⁿ s'eeⁿ ní ch'ííⁿnyuⁿneeⁿ yā Jesús miiⁿ. ²⁵Taachi tun'dáa yā 'iiⁿyāⁿ miiⁿ cheeti va'āi, Jesús ndaa yā va'āi ní sta'á yā ta'ā n'daataa 'lííⁿ miiⁿ, ní n'daata 'lííⁿ miiⁿ ní nducueeⁿ tá. ²⁶Chuū chí diiⁿ Jesús ní ndōō fama miiⁿ nuuⁿmaⁿ ná yááⁿ naachí chii chuū.

**Jesús dííⁿ yā chi nanduūvā
'uuví 'iiⁿyāⁿ chí ngueenááⁿ**

²⁷Taachi Jesús cho'ó yā yeⁿe miiⁿ, ní 'uuví saⁿā chí ngueenááⁿ can'dáa sa 'iiⁿyāⁿ. 'Cai yiicú sá ní caⁿa sa: N'díí Daiya David, cunéé ya'ai 'iinu ní nús'uu.

²⁸Taachi Jesús cueⁿé yā ndaa yā na va'ai tuu'mi ní ndaa ndúú 'uūví saⁿā ngueenááⁿ miiⁿ nanááⁿ Jesús. Jesús caⁿa yā chii yā saⁿā s'eeⁿ:

¿'Áá i'téenu ní chí 'úú cuuvi dííⁿ chí nanduūvā yeⁿé ní? Saⁿā s'eeⁿ ní caⁿa sa: 'Tíicā Señor.

²⁹Tuu'mi ní Jesús tuū'ví yā nduutinááⁿ saⁿā s'eeⁿ ní caⁿa yā: 'Tíicā cuuvi tan'dúú^cā chí i'téenu ní yeⁿé.

³⁰Nduutinááⁿ saⁿā s'eeⁿ ní n'guaaⁿ ní nduuvā yeⁿe sa. Ní Jesús caⁿa yā chii yā saⁿā s'eeⁿ: Nguéé ca'a ní chí cadíínúⁿ 'iiⁿyāⁿ yeⁿe chuū.

³¹Naati saⁿā s'eeⁿ ní cueⁿe sa núúⁿmáⁿ ná yáⁿāa miiⁿ, ní caⁿa sa nducuéⁿe chí Jesús miiⁿ dííⁿ yā.

**Jesús dííⁿ yā chí nduūvā
yeⁿe 'áámá 'díí'mí**

³²Taachi Jesús ndúú^cū 'iiⁿyāⁿ s'eeⁿ nan'daa yā na va'ai miiⁿ, ndaa saⁿā s'eeⁿ nanááⁿ Jesús ní ndéé sa 'áámá 'díí'mí chí canee sa ndúú^cū espíritu yeⁿe yááⁿn'guiinūⁿ. ³³Ní taachi Jesús miiⁿ tun'dáa yā espíritu yeⁿe yááⁿn'guiinūⁿ miiⁿ, tuu'mi ní 'díí'mí miiⁿ ní chíí caⁿa sa. 'Iiⁿyāⁿ ní cheⁿe yiínú yā ní caⁿa yā: Nguéé indíichí dendu'ū chí 'túú^cā nguaaⁿ 'iiⁿyāⁿ yeⁿe Israel.

³⁴Naati 'iiⁿyāⁿ fariseos caⁿa yā: Saⁿā miiⁿ ní tun'dáa sa espíritu yeⁿe yááⁿn'guiinūⁿ cáávā saⁿā chí ngaⁿa ntiⁿnyuⁿ sa yeⁿe espíritus yeⁿe yááⁿn'guiinūⁿ.

Jesús ya'ai 'iinú yā 'iiⁿyāⁿ

³⁵Jesús cachiica yā nuuⁿmáⁿ na yááⁿ n'geete ndúú^cū yaāⁿ n'gaiyáá, ní ngí'cueeⁿ yā na yáacū sinagogas yeⁿe 'iiⁿyāⁿ Israel. Ní ngaⁿa yā nduudu cuaacu yeⁿe naachí Nduyūs ngaⁿā ntiⁿnyúⁿ yā na va'ai cheeti nguuvi. Ní dííⁿ yā chí nduūvā yeⁿe nducyaaca 'iiⁿyāⁿ yeⁿe nducuéⁿe

naaⁿ ca'ai yeⁿe yā ndúúcū 'iiⁿ'yāⁿ
 chi ya'ai yeⁿé yā. ³⁶Ní taachi Jesús
 ndiichi yā nducyaaca 'iiⁿ'yāⁿ s'eeⁿ,
 tuu'mi ní yá'ai 'iinú yā caava 'iiⁿ'yāⁿ
 s'eeⁿ, ti iiⁿ'yāⁿ s'eeⁿ ndicúunu yā
 ni snée yā tan'duucā 'iiti cuūchí
 chi nguéé du'ú chi idiiⁿ cuidado
 'iiti. 'Tiicá yā. ³⁷Tuu'mi ní Jesús
 miiⁿ caⁿa yā chii yā discípulos yeⁿe
 yā: Cuaacu níⁿ'nyúⁿ chí ngíi yeⁿé
 nééné n'deēe chí diiⁿ yú cosechar
 naati 'iiⁿ'yāⁿ chí idiiⁿ ntiⁿ'nyuⁿ nguéé
 'yaaⁿ yā. ³⁸Cáávā chuū cáácá ní
 Ndyuūs chí véé cosecha yeⁿe yā chí
 dicho'ó yā mozos ní nadidáámá yā
 cosecha yeⁿé yā.

**Jesús yaa'vi yā ndu'u ndiichúúví
 discípulos**

(Mr. 3.13-19; Lc. 6.12-16)

10 Tuu'mi ní Jesús yaa'ví yā
 ndu'ū ndiichúúví discípulos
 yeⁿe yā chí ndaa yā nanáaⁿ yā. Ní
 Jesús miiⁿ ca'a yā poder discípulos
 chí tun'daá yā espíritus yeⁿe
 yááⁿ'nguiinūⁿ yeⁿé 'iiⁿ'yāⁿ, ní
 dííⁿ yā chí nduūvā yeⁿé 'iiⁿ'yāⁿ chí
 ngiitā yeⁿe nducuéⁿē naaⁿ ca'ai
 yeⁿe yā ndúúcū 'iiⁿ'yāⁿ chí ya'ai
 yeⁿé yā.

²Túucā duūchi ndu'u ndiichúúví
 apóstoles; Simón chí nguuvi Pedro
 ndúúcū Andrés 'díinu sa, Jacobo
 ndúúcū Juan 'diinū sa chí daiya
 Zebedeo; ³ndúúcū Felipe, ndúúcū
 Bartolomé, ndúúcū Tomás, ndúúcū
 Mateo chí sáⁿ'a publicano chí
 cobrador; ndúúcū Jacobo saⁿ'ā daiya
 Alfeo; ndúúcū Lebeo chí nguuvi
 Tadeo; ⁴ndúúcū Simón yeⁿe yáⁿ'āa
 Caná; ndúúcū Judas Iscariote saⁿ'a
 miiⁿ chí cuayiivi ch'iⁿ'i sá du'u chí
 Jesús miiⁿ chí cuuvi 'caaⁿ'núⁿ yā 'yā.

Ntiiⁿ'nyuⁿ yeⁿé ndiichúúví apóstoles

(Mr. 6.7-13; Lc. 9. 1-6)

⁵Jesús dicho'ó yā ndu'ū
 ndiichúúví apóstoles ní caⁿ'a yā
 chii yā 'iiⁿ'yāⁿ taacā chí canee chí
 dííⁿ yā. Ní Jesús caⁿ'a yā: Nguéé
 caⁿ'á ní cuaaⁿ yúúni yeⁿé 'iiⁿ'yāⁿ chí
 nguéé ndaata yeⁿé Israel chí judíos.
 Nguéé cundaa ní yááⁿ vaacú 'iiⁿ'yāⁿ
 Samaritanos. ⁶Naati ndís'tií ní
 caⁿ'a ní nanááⁿ 'iiⁿ'yāⁿ Israel s'eeⁿ tí
 'iiⁿ'yāⁿ s'eeⁿ tan'dúucā 'íiti cuuchi chí
 nín'dái tí na icyáⁿ'ā, 'tíica yā. ⁷Ní
 taachi caⁿ'á ní 'túucā caaⁿ'maⁿ ní
 nduudu cuaacu ní caaⁿ'maⁿ ní yeⁿé
 naachí Dendyuūs ngaⁿ'a ntiⁿ'nyúⁿ
 yā na va'ai cheeti nguuvi chí 'āā
 ndaa niiⁿ'nuúⁿ. ⁸Dííⁿ ní chí nduūvā
 yeⁿé 'iiⁿ'yāⁿ chí ngíita. Dííⁿ ní chí
 nduuchi 'iiⁿ'yāⁿ chí ndíí chí tináⁿ'ā.
 Dííⁿ ní chí nduūvā ní nduuví deeve
 cuerpo yeⁿe 'iiⁿ'yāⁿ chí véé vaadi
 ya'ai chí nguuvi lepra chí in'duuti
 yuūtē yeⁿe yā. Ní dííⁿ ní chí divíi
 ní espíritus yeⁿé yááⁿ'nguiinūⁿ chí
 snée ndúúcū 'iiⁿ'yāⁿ. Ndís'tií ndaacá
 ní poder 'cūū yeⁿé Dendyuūs, ní
 nguéé cuta'a ní tuumí cáávā chuū.
 Chuū chí dííⁿ ní ndúúcū 'iiⁿ'yāⁿ
 nguéé cuuvi cún'di'i yeⁿé yā.

⁹Nguéé candée ní 'dííⁿ'nguaaⁿ, ndíí
 nguéé ndúú 'dííⁿ'nguae, ndíí nguéé
 ndúú tuumí cheeyē ra. ¹⁰Nguéé
 candée ní morral yeⁿe ní cuaaⁿ
 cyúúni chí cáⁿ'a ní. Ndíí nguéé ndúú
 'uūvī ra catecai ní candée ní. Ndíí
 nguéé ndúú candu ndaacuú yeⁿé
 ní, ndíí nguéé ndúú in'daacuú rá
 yeⁿe ní, ti 'iiⁿ'yāⁿ chí dííⁿ ntiⁿ'nyuⁿ,
 na ntiⁿ'nyúⁿ chí dííⁿ yā ní ndaacā
 chí ch'é yā ndúúcū necesidades chí
 neⁿe yā.

11 'Āā tíí nūuⁿ yáāⁿ n'gɛɛte ndúúcu yáāⁿ n'gaiyaá naachí cundáa nī tínguuneeⁿ nī du'ú 'iiⁿyāⁿ yeⁿē yáāⁿ miiⁿ chí n'dai yā ní cunée nī na vaacú yā ndii n'dáá cá nī. 12 Taachí ndaá nī na vaacu 'iiⁿyāⁿ: Ndaí ndís'tií, caaⁿmáⁿ nī, tan'dúúca costumbre yeⁿe nī. 13 Ndúúti chí 'iiⁿyāⁿ yeⁿé va'āi miiⁿ n'dai yā tuu'mi ní vaadi 'diiⁿ yeⁿe nī cunée ndúúcu yā. Nduuti chí nguée n'dai yā o nguée vaadi 'diiⁿ ndúúcu yā, nacan'dáa nī va'āi miiⁿ ndúúcu 'áamá nduudu n'dai. 14 Nduuti chí 'iiⁿyāⁿ s'eeⁿ nguée 'cuaaⁿ yā ndís'tií ndíí nguée ndúú 'caandiveeⁿ ra yā nduudu yeⁿe nī nan'dáa nī va'ai miiⁿ o yeⁿe yáāⁿ miiⁿ ní n'dáádi nī iyaácáa yeⁿe ca'á nī ti nguée n'giindiveeⁿ yā yeⁿé nī. 15 Cuaacu níⁿnyúⁿ cuaacu níⁿnyúⁿ ngaⁿ'á ngii ndís'tií chí taachi ndaá nguuvi chí Ndyuūs n'diichí yā nuuⁿndi yeⁿe yáāⁿ, castigo yeⁿe 'iiⁿyāⁿ yeⁿe yáāⁿ 'cūū cunncáa ca chí cuuví castigo yeⁿe 'iiⁿyāⁿ yeⁿe yáāⁿ Sodomá ndúúcu yáāⁿ Gomorra chí yáāⁿ s'eeⁿ yeⁿé 'iiⁿyāⁿ chí nguée dííⁿ yā chí n'dai ndíí nguée 'iiⁿyāⁿ yeⁿe ndaata Israel yā.

**Ndaá nguuvi chí 'iiⁿyāⁿ
dín'gíínu yā nduucú nī**

16 Cun'diichí nī. 'Úú ní dicho'ó ndís'tií tan'dúúca chí ndís'tií ní 'iiti cuūchí náávtaⁿā yeⁿē 'yáaⁿyāaⁿ n'gaātāā, 'tiicá nī. Canée chí dííⁿ nī chí listo nī tan'dúúca 'aama cúú. Ní canée chí din'daacá nī ní canée manso nī tan'dúúca 'áamá paloma. 'Tíicá dííⁿ nī. 17 Candée nī cuidado caati 'iiⁿyāⁿ s'eeⁿ ní nca'á yā ndís'tií nanááⁿ 'iiⁿntyēⁿē yeⁿe

yaacū sinagoga. Ní cúúví 'cueⁿé yā ndís'tií na yaacū sinagoga miiⁿ. 18 Ní 'iiⁿyāⁿ s'eeⁿ candée yā ndís'tií nanááⁿ gobernadores ndúúcu nanááⁿ reyes cucáāvā 'úú. Ní 'íicú ndís'tií cuuví caaⁿmáⁿ nī nduudu cuaacu yeⁿē 'úú nanááⁿ 'iiⁿyāⁿ s'eeⁿ ndúúcu 'iiⁿyāⁿ chí nguée yeⁿe ndaata Israel. 19 Ní taachi 'iiⁿyāⁿ nca'a yā ndís'tií nanááⁿ 'iiⁿyāⁿ s'eeⁿ, nguée nadicádíínuuⁿ nī yeⁿe chí caaⁿmáⁿ nī ti hora mííⁿ nūuⁿ ní Ndyuūs téé yā nduudu chí caaⁿmáⁿ nī. 20 Ti nguée ndís'tií chí caaⁿmáⁿ nī naati Espíritu N'dai yeⁿé Ndyuūs Chiida yú. Espíritu miiⁿ caaⁿmáⁿ yā cáāvā ndís'tií ti canée yā nduucú nī.

21 Nguaaⁿ 'dínū sa caⁿ'a sa caaⁿ'maⁿ sa contra yeⁿē ví'í chí canée chí 'cuūví sa. 'Tiicá ntúūⁿ chiidá yā caⁿ'a yā caaⁿ'maⁿ yā contra yeⁿē daiya yā chí canée chí 'cuūví yā. 'Tiicá ntúūⁿ daiyá yā ní caⁿ'á yā dííⁿ yā ndúúcu chiidá yā ti ndís'tií candée nī nduudu yeⁿé. 22 Ní nducyáácá 'iiⁿyāⁿ nguée cuuvi n'diichí yā ndís'tií cucáāvā 'úú ti cueⁿé nī nduucú. 'Iiⁿyāⁿ chí cuchée yā tanducuéⁿē chuū nducuéⁿē nguuvi yeⁿé yā 'iiⁿyāⁿ miiⁿ chí nanguaⁿ'ai yā. 23 Taachí 'iiⁿyāⁿ can'daá yā ndís'tií chí neⁿe yā chí ndís'tií 'cureenú nī cuuvi, na 'áamá yáāⁿ, tuu'mi ní caⁿ'ā nī cáanu nī ná taama yáāⁿ ti cuaacu níⁿnyúⁿ ngaⁿ'á ngii ndís'tií chí Saⁿ'ā chí Daiya Ndyuūs miiⁿ nndaa sá taama vmnéⁿēe vmnaaⁿ chí ndís'tií cuuvi caaⁿ'maⁿ nī nduudu cuaacu yeⁿé nuuⁿ'maⁿ na yáⁿ'āa Israel. 24 Mar 'áamá discípulo ní nguée n'gɛɛte ca ntiiⁿnyuⁿ sá chí cuuvi maestro yeⁿē sa, ndíí nguée ndúú

mar 'áámá mozo ní ng'εete ca sa chí cuuvi 'iivi sa. ²⁵N'dáacā chí discípulo miiⁿ diiⁿ sa tan'dúúcā chí idiiⁿ maestro yeⁿe sa ní mozo miiⁿ diiⁿ sa tan'dúúcā chí diiⁿ 'iivi sa. Ndúúti chí 'iiⁿyāⁿ chí ngaⁿa ntiiⁿnyuⁿ yeⁿe va'ai chí nguuví Beelzebú chí yááⁿnguiinūⁿ, tuu'mi ní tanáⁿā 'iiⁿyāⁿ chí nguéé yeⁿe familia yeⁿe Beelzebú miiⁿ cunnccā caⁿa yā caaⁿmáⁿ yā yeⁿe 'iiⁿyāⁿ yeⁿe Beelzebú.

Du'ū chí cuuvi 'va'ā yú

(Lc. 12.2-9)

²⁶Tuu'mi ní ndís'tii nguéé 'va'á nī 'iiⁿyāⁿ ti nguéé 'áámá chí canúúⁿ n'de'ei chí nguéé cuuví snaaⁿ yú, ndíi nguéé ndúú canee 'áámá secreto chí 'iiⁿyāⁿ nguéé cuuvi cadíinuⁿ yā. ²⁷Iicu chíiⁿ chí 'úú ngaⁿá ngíi ndís'tii yeⁿe nduūdū n'de'ei chí nguéé ituumicádíinuⁿ 'iiⁿyāⁿ, ndís'tii caaⁿmaⁿ nī nduudu chí túúmícádiinuⁿ 'iiⁿyāⁿ. Níicú de'e chí ngaⁿá ngíi ndís'tii ní 'cuai nī ndii na yaacú yeⁿe tiiⁿ va'āi ní túúmícádiinuⁿ 'iiⁿyāⁿ nduudú cūū. ²⁸Nguéé 'va'á nī 'iiⁿyāⁿ chí 'caāⁿnūⁿ cuerpo yeⁿe nī ní nguéé cuuvi 'caaⁿnúⁿ yā alma yeⁿe nī. Di'va'á ca nī Dendyuūs chí cuuvi 'caaⁿnúⁿ yā alma yeⁿe nī ndúúcū cuerpo yeⁿe nī chí caⁿá nī na infierno.

²⁹¿Áá nguéé in'díicui yā na 'uūvī 'yaada cáávā 'aama tuūmī? Mar 'áámá 'yáádá s'ééⁿ nguéé 'cuuvá ti na yáⁿāa 'cūū nūúⁿmáⁿ neⁿe chí nguéé déenu Ndyuūs Chiida yú. ³⁰Níicú nducyaaca yuudu tifⁿ nī ní ndii dúúché ndúúcū Ndyuūs. ³¹Nguéé di'vá'a ndís'tii caati ch'εete cá nī chí cuuvi 'yaaⁿ ndái 'yaada.

**'Iiⁿyāⁿ chí ngaⁿá yā iintiiⁿnaáⁿ yā
Cristo nanááⁿ 'iiⁿyāⁿ**

(Lc. 12.8-9)

³²Áā du'ú nūūⁿ chí ngaⁿa chí iintiiⁿnaaⁿ 'úú nanááⁿ 'iiⁿyāⁿ, 'úú ntúūⁿ ní caāⁿmáⁿ chí iintiiⁿnaáⁿ 'iiⁿyāⁿ s'eeⁿ nanááⁿ Chiidá chí canée yā na va'ai cheeti nguuvi. ³³Áā du'ú nūūⁿ chí caāⁿmáⁿ chí nguéé in'diichi 'úú nanááⁿ 'iiⁿyāⁿ, 'úú ntúūⁿ ní caāⁿmáⁿ chí nguéé in'diichi 'iiⁿyāⁿ s'eeⁿ nanááⁿ chiidá chí canée yā na va'āi cheeti nguuví.

**Cáávā Jesús miiⁿ vée divisiones
nguaaⁿ 'iiⁿyāⁿ**

(Lc. 12.51-53; 14.26-27)

³⁴Nguéé nadicádíinuⁿ nī chí 'úú, Jesús, ndaá chí ndeé vaadi 'diíiⁿ 'iiⁿyāⁿ na iⁿ'yeeⁿdí 'cūū. Nguéé ndaá chí ndeé vaadi 'diíiⁿ caati ndeé vaadi 'caaⁿva ní tan'dúúcā chí candéé 'áámá machete chí 'caāiⁿ nduu 'uuví lados. ³⁵Tí ndaá chí 'iiⁿyāⁿ ní nguéé cuuvi n'diichí yā chiidá yā, ní n'daataá nguéé cuuvi n'diichi tá cheecu tá, n'daataá nguéé cuuvi n'diichi ntúūⁿ tá indáⁿa tá. ³⁶Caati 'áámá 'áámá yā ní enemigos yā yeⁿe yā ví'i na vaacu yā.

³⁷'Iiⁿyāⁿ chí neⁿe cá yā chiidá yā o cheecu yā nguéé ti 'úú, nguéé neene n'dai yā chí cuuvi yeⁿe 'iiⁿyāⁿ. 'Iiⁿyāⁿ chí neⁿe cá yā daiyá yā saⁿā o daiyá yā n'daataá nguéé ti 'úú, nguéé neene n'dai yā chí cuuvi yeⁿe 'iiⁿyāⁿ. ³⁸Ní 'iiⁿyāⁿ chí nguéé neⁿe yā 'cueenú yā cuuvi cucáávā 'úú chí tan'dúúcā chí cuta'á yā cruz yeⁿe yā ní caⁿa yā nduucú, nguéé neené n'dai yā chí cuuvi yeⁿe 'iiⁿyāⁿ. ³⁹'Iiⁿyāⁿ chí neⁿe cá

yā vida yeⁿe yā cáávā cosas chi véé ná iⁿyeeⁿdí cūū nguéé ti 'úú, tuuⁿmi ní táámá vida ní dindaí yā. 'Iicú 'iiⁿyāⁿ chí dindaí yā vida yeⁿe yā na iⁿyeeⁿdí cūū cucáávā 'úú, ti dííⁿ yā chi 'úú neⁿé ní ndaacá yā táámá vida yeⁿé yā.

Yeⁿe chi ndaācā yeⁿé yú

(Mr. 9.41)

⁴⁰Iiⁿyāⁿ chi 'cuaaⁿ yā ndís'tií, 'cuaaⁿ yā 'úú. 'Iiⁿyāⁿ chi n'gúuⁿ yā 'úú, n'gúuⁿ yā 'iiⁿyāⁿ chi dichó'o yā 'úú. ⁴¹Iiⁿyāⁿ chi n'gúuⁿ yā 'áámá saⁿa profeta caati profeta miiⁿ chíí yā lado yeⁿe Ndyuūs 'iiⁿyāⁿ ní cuta'á yā premio chí ndaacā yeⁿé chi tunééⁿ 'iiⁿyāⁿ chi profeta. 'Iiⁿyāⁿ chí n'gúuⁿ yā 'áámá 'iiⁿyāⁿ chí n'dai caati 'iiⁿyāⁿ miiⁿ ni n'dai yā, 'iiⁿyāⁿ ní cuta'á yā premio chí tunééⁿ 'iiⁿyāⁿ chí n'dai. ⁴²Áā du'ú nūⁿ 'iiⁿyāⁿ chí ca'a 'áámá vaso nuūⁿnī 'iiche 'áámá 'iiⁿyāⁿ caati i'téenu yā 'úú, cuaacu níⁿnyúⁿ ngaⁿá ngii ndís'tií chi véé premio yeⁿe 'iiⁿyāⁿ miiⁿ chí cuuvi ndaācā yā yeⁿe yā.

Juan chí cheédínuūⁿnīⁿ sa dichó'o sa 'iiⁿyāⁿ nanááⁿ Jesús

(Lc. 7.18-35)

11 Taachí Jesús ch'íínúⁿ chíí yā ndu'u ndiichúúví discípulos yeⁿe yā táácā chí canéé chí dííⁿ yā tuuⁿmi ní Jesús chíicá yā yááⁿ miiⁿ ní cueⁿé yā na tanáⁿá yááⁿ s'eeⁿ chí ca'cueeⁿ yā ní caaⁿmaⁿ yā nduudu cuaacu yeⁿé Ndyuūs.

²Juan chí cheédínuūⁿnīⁿ sa 'iiⁿyāⁿ canúúⁿ sá vácūū. Ní taachi ch'iindiveeⁿ sá taacā idiiⁿ Jesús miiⁿ, tuuⁿmi ní dichó'o sa ná 'uuví discípulos yeⁿe sa nanááⁿ Jesús.

³Ní 'iiⁿyāⁿ s'eeⁿ ndáa yā ní ntiinguuneeⁿ yā Jesús miiⁿ: 'Áá n'dií chí Cristo chí canee chí ndaa o cunee ngíínúⁿ nūⁿ taama yā?

⁴Jesús miiⁿ nán'gueécútaⁿa yā yeⁿe 'iiⁿyāⁿ s'eeⁿ ní caⁿa yā: Ndís'tií cúnaⁿa ní ní cuuvi ní Juan miiⁿ yeⁿé dendu'ú chí inaaⁿ ní ndúúⁿcū chí n'giindiveeⁿ ní. ⁵'Iiⁿyāⁿ chí ngueenááⁿ ní inaaⁿ yā, 'iiⁿyāⁿ chí nguéé ngii ngiicá ní ngiicá yā, 'iiⁿyāⁿ chí ndíí ca'ai lepra chí in'duuti yuūtē yeⁿe yā ní nduuva dæeve yeⁿé yā, 'iiⁿyāⁿ chí chæétúū ní n'giindiveeⁿ yā, 'iiⁿyāⁿ chí n'díí ní nnduuchí yā yeⁿe nguaaⁿ tináⁿā, níicú 'iiⁿyāⁿ chí ndaachíí snee yā ch'iindiveeⁿ yā nduudu cuaacu yeⁿé Ndyuūs chí nadanguáⁿai 'iiⁿyāⁿ ti 'iiⁿyāⁿ candæ yā nduudu cuaacu miiⁿ nanááⁿ yā. ⁶Dæ'ē chúúⁿcā n'dai 'iiⁿyāⁿ chí nguéé cunncaā ch'æenú yā 'úú ndúúⁿcū nduudu yeⁿé.

⁷Taachi cuinaⁿa yā 'iiⁿyāⁿ s'eeⁿ, Jesús tucá'a yā caⁿa yā chíí yā 'iiⁿyāⁿ yeⁿe Juan chí chæédínuūⁿnīⁿ miiⁿ: 'Dæ'ē cheⁿe ndís'tií n'diichi ní na yáⁿāa cuūⁿmáⁿ naachi nguéé ch'æetinéé 'iiⁿyāⁿ? 'Áá 'áámá ndúú chí n'giídi 'yúúné? ⁸O 'dæ'ē tuuⁿmi cheⁿe ní n'diichí ní? 'Áá 'áámá saⁿā chí cánuuⁿ sa catecái n'dai sa? Cuin'diichí ní. 'Iiⁿyāⁿ chí snúuⁿ yā catecai n'dai yā snee yā ná va'ai yeⁿé rey. ⁹Tuuⁿmi ní 'dæ'ē cheⁿé ní n'diichi ní? 'Áá 'aama profeta chí ngaⁿa nduudu cuaacu yeⁿe Ndyuūs? 'Tíicā nduudu cuaacu. Ní 'úú ní ngaⁿá ngii ndís'tií 'tíicā. Cheⁿé ní n'diichi ní 'áámá 'iiⁿyāⁿ chí ch'æete ca yā chí cuuvi profeta. ¹⁰Chuū cánéé nguūⁿ yeⁿe Juan miiⁿ náⁿ libro yeⁿé Ndyuūs ndii cuááⁿ vmnaaⁿ:

Cuin'diichí nī. 'Úú ní dicho'ó
'áamá saⁿā chí caaⁿmaⁿ sa
nduudu cuaacu yeⁿé nanáaⁿ
di. Saⁿā miiⁿ ní nuūⁿnūⁿ
cuaacú sa yúúni cáávā di.

¹¹Cuaacu níⁿnyúⁿ ngaⁿá ngíi
ndís'tii: Nguááⁿ nducyaaca 'iiⁿyāⁿ
chí n'giindiyáaⁿ yā yeⁿé n'daataá
nguée taama yā chí ch'ēete ca yā
ti Juan miiⁿ chí chēdínūⁿnī sa.
Naati 'iiⁿyāⁿ chí ndiicuúⁿ ca yā
naachí Ndyuūs ngaⁿa ntiiⁿnyuⁿ yā
ní ch'ēete ca yā nguée ti Juan miiⁿ.

¹²Caati ndíi tiempo chí
ch'iindiyāⁿ Juan chí chēdínūⁿnī
sa ndíi maaⁿ yeⁿe naachí Ndyuūs
ngaⁿa ntiiⁿnyuⁿ yā ndúúⁿcū 'iiⁿyāⁿ
chí yeⁿé Ndyuūs ní n'geenu cá yā
ngii. Ní 'iiⁿyāⁿ chí nguⁿu yā contra
yeⁿe Ndyuūs neⁿe yā caaⁿmaⁿ
ntiiⁿnyúⁿ yā yeⁿe naachi Ndyuūs
ngaⁿa ntiiⁿnyúⁿ yā. ¹³Ní nducyaaca
'iiⁿyāⁿ profetas ndúúⁿcū ley yeⁿe
Moisés ngaⁿā nduudu cuaacu yeⁿé
naachi Ndyuūs ngaⁿa ntiiⁿnyuⁿ yā
ndíi tiempo chí ndāá Juan miiⁿ ná
iⁿyeeⁿdí 'cūū. ¹⁴Ndúúti chí ndís'tii
neⁿe ní 'caandiveeⁿ ní nduudu yeⁿe
profetas ndúúⁿcū nduudu yeⁿe ley
miiⁿ, tuu'mi ní cadíinuⁿ ní chí
Juan miiⁿ ní saⁿā chí profeta Elías
dinguuⁿ yā chí canée chí ndaa sa.
¹⁵Ndís'tii chí véé veéⁿ ní 'caandiveeⁿ
ní yeⁿé.

¹⁶¿De'é tan'dúúⁿcā 'iiⁿyāⁿ chí snée
yā na iⁿyeeⁿdí 'cūū maaⁿ? 'iiⁿyāⁿ
s'eeⁿ tan'dúúⁿcā saⁿā n'gaiyāá chí
n'gēētēe nii'vēē ní duūchi sa ní n'gai
sa compañeros yeⁿe sa. ¹⁷Ní ngaⁿa
sa: 'Tiiví 'nū flauta cáávā baile
naati nguée inde'éei nī. Ní chiita
'nū canción chí ndaachíi tan'dúúⁿcā
canciones cáávā tináⁿā naati nguée

chēēcu nī. ¹⁸Juan chí chēdínūⁿnīⁿ
sa ndāá sa. Nguée che'e sa pan,
nguée chí'i sa vino ní ndís'tii ngaⁿá
ní chí saⁿā miiⁿ ní canee sa ndúúⁿcū
espíritu yeⁿe yááⁿn'guiinūⁿ. ¹⁹'Úú
ní ndāá, 'úú chí Saⁿā chí Daiyá
Ndyuūs 'úú. Ní nge'é ní ngíi. Tuu'mi
ní ndís'tii ngaⁿa ní yeⁿé: Cuin'díichí
nī. 'Áamá saⁿā chí n'deēe n'dái nge'e
sa ní ngíi taavi sá vino. Ní ngaⁿá
ní chí 'úú ní saⁿā chí n'dai ndúúⁿcū
'iiⁿyāⁿ publicanos chí cobradores
chí inn'guēē yā yeⁿe yáⁿāa ndúúⁿcū
'iiⁿyāⁿ chí dinuuⁿndi yā. Nducyaaca
'iiⁿyāⁿ deenu yā chí vaadī deenu
miiⁿ ní yeⁿé Ndyuūs. Ní 'iiⁿyāⁿ
ch'iⁿí yā vaadī deenu miiⁿ cáávā
dendu'ū chí n'daācā chí díⁿ yā ti
yeⁿé Ndyuūs 'iiⁿyāⁿ.

**De'e chúúⁿcā ya'āi 'iiⁿyāⁿ yeⁿe yááⁿ
naachi nguée indaacadaamí yā yeⁿé
nuuⁿndi yeⁿé yā**

(Lc. 10.13-15)

²⁰Jesús tuc'áa yā díⁿ yā regañar
'iiⁿyāⁿ s'eeⁿ na yááⁿ s'eeⁿ naachi
diiⁿ yā néené n'deēe vaadī n'giinu
ti 'iiⁿyāⁿ yeⁿe yááⁿ miiⁿ 'āā cuée
ndaacadaamí yā yeⁿé núúⁿndi yeⁿe
yā. Ní ngaⁿa yā 'tíicā: ²¹De'ē chúúⁿcā
ya'āi yeⁿé ndís'tii 'iiⁿyāⁿ yeⁿe yááⁿ
Corazín. De'ē chúúⁿcā ya'āi yeⁿé
ndís'tii 'iiⁿyāⁿ yeⁿe yááⁿ Betsaida
ti ndúúti chí chíi vaadī n'giinu
na yááⁿ Tiro ndúúⁿcū yááⁿ Sidón
tan'dúúⁿcā chí chíi nguaaⁿ ndís'tii,
tuu'mi ní 'iiⁿyāⁿ yeⁿe yáⁿāa s'eeⁿ 'āā
'naaⁿ tiempo ndaacadaamí yā yeⁿe
nuuⁿndi yeⁿé yā. Ní chíⁿí yā 'iiⁿyāⁿ
tan'dúúⁿcā costumbre yeⁿé yā chí
neené ya'ai yā. Ní ch'ēetinūⁿ yā
catecaí yā yeⁿe chí díⁿnūⁿ ní ch'ēetē
yā nguaaⁿ yayiáá. ²²'Úú ngaⁿá

ngíi ndís'tií ti nguuvi chí Ndyuūs caaⁿ máⁿ yā nuuⁿ ndi yeⁿé 'iiⁿ yāⁿ nguéé ya'āi ca 'cueenú yā cuuvi 'iiⁿ yāⁿ yeⁿé yáⁿ āa Tiro ndúúcu 'iiⁿ yāⁿ yeⁿe yáⁿ āa Sidón nguéé ti ndís'tií. ²³Ndís'tií 'iiⁿ yāⁿ yeⁿe yáⁿ āa Capernaum, ¿'áá cuuvi caⁿ á nī na va'ai cheeti nguuvi? Nguéé cuuvi. Caⁿ á nī infierno ti nguéé i'téenu nī nduudu cuaacu yeⁿé ndúúcu vaadi n'giinu chí diiⁿ Ndyuūs. Ndúúti chí chíi vaadi n'giinu na yáⁿ āa Sodoma tan'dúúca chí chíi nguuaⁿ ndís'tií tuuⁿ mi ní 'iiⁿ yāⁿ yeⁿe yáⁿ āa cūū 'āā i'téenu yā. Ní yáⁿ āa cūū 'āā canéé ndíí maaⁿ. ²⁴Úú ngaⁿ á ngíi ndís'tií ti nguuvi chí Ndyuūs caaⁿ máⁿ yā nuuⁿ ndi yeⁿe 'iiⁿ yāⁿ nguéé ya'āi ca 'cueenú yā cuuvi 'iiⁿ yāⁿ yeⁿe yáⁿ āa Sodoma nguéé ti ndís'tií.

Cuchíí nī nanaaⁿ 'úú ní ntaavi'tuunúúⁿ nī

(Lc. 10.21-22)

²⁵Ní tiempo miiⁿ ní Jesús nan'guεεcútaⁿ a yā yeⁿe yā ní caⁿ a yā: N'dií Chiidá chí 'iiví nī yeⁿé va'ai cheeti nguuvi ndúúcu yáⁿ āa 'cūū, 'úú ca'á gracias n'dií caati snuuⁿ n'dé'ei nī nduudu 'cūū yeⁿe 'iiⁿ yāⁿ chí déenu ca yā ndúúcu 'iiⁿ yāⁿ chí n'dee n'dái tuumicádífnuuⁿ yā, ní ca'a nī chí cadífnuuⁿ 'iiⁿ yāⁿ chí ndiicúuⁿ yā chí nguéé n'dee cá déenu yā. ²⁶Tííca dííⁿ nī Chiidá ti 'tííca neⁿe nī chí n'daācā diiⁿ nī ti n'daācā.

²⁷Ní Jesús caⁿ a yā chíi yā discípulos yeⁿe yā: Chiidá ní teé yā 'úú tanducueⁿ é dendu'ū. Mar 'áámá 'iiⁿ yāⁿ nguéé deenu yā táacā 'áámá n'dyáⁿ ā Daiya Dendyuūs, dámaāⁿ Chiidá yā. Mar 'áámá 'iiⁿ yāⁿ

nguéé deenu yā táacā Dendyuūs Chiida yú, dámaāⁿ 'áámá n'dyáⁿ ā Daiyá yā ndúúcu 'āā du'ú nūuⁿ 'iiⁿ yāⁿ chí Daiyá Ndyuūs neⁿé yā 'cuuⁿ miⁿ yā Chiida yā. ²⁸Cuchíí nī nanáaⁿ 'úú, ndís'tií, chí véé n'dee n'dái cuidado yeⁿe nī chí tan'dúúca 'áámá carga yeⁿé nī ní 'úú ní diiⁿ chí ntaavi'tuunúúⁿ nī. ²⁹Ní dííⁿ nī tan'dúúca chí can'déé nī yugo yeⁿé chí 'tííca. 'Cueeⁿ nī yeⁿé 'úú caati 'úú ní ndiicúuⁿ 'úú ní néené n'dai staava yeⁿé, tuuⁿ mi ní ndaācā nī vaadi ntaavi'tuunúuⁿ yeⁿe alma yeⁿe nī. ³⁰Caati yugo yeⁿé chí teé ndís'tií nguéé ngiⁿ ií. Candéé nī cheedí yeⁿé ní nguéé cuuvi n'gii yeⁿe nī.

Discípulos yeⁿe Jesús sta'á yā trigo nguuvi chí ntaavi'tuunúúⁿ 'iiⁿ yāⁿ

Israel

(Mr. 2.23-28; Lc. 6.1-5)

12 'Áámá nguuvi sábadu chí ntaavi'tuunúúⁿ 'iiⁿ yāⁿ Israel, Jesús cueⁿ e yā ndúúcu discípulos yeⁿe yā cuaaⁿ naachí 'iiⁿ yāⁿ 'āā ndííⁿ ntiinnyúⁿ yā ní mííⁿ ní véé trigo. Discípulos yeⁿe Jesús miiⁿ chíi cuiicú yā ní sta'á yā trigo ní che'e yā. ²'Iiⁿ yāⁿ fariseos n'diichí yā chuū, ní caⁿ a yā chíi yā Jesús miiⁿ: Cuin'diichí nī, discípulos yeⁿe nī ní nguéé dííⁿ yā tan'dúúca chí ngaⁿ a ley yeⁿe nguuvi chí ntaavi'tuunúúⁿ 'iiⁿ yāⁿ.

³Jesús caⁿ a yā chíi yā 'iiⁿ yāⁿ s'eeⁿ: ¿'Áá nguéé n'geeⁿ nī táacā diiⁿ David miiⁿ ndúúcu 'iiⁿ yāⁿ chí cueⁿ e ndúúcu sa taachi chíi cuiicú yā?

⁴David miiⁿ sndáa yā ná yáacú yeⁿe Ndyuūs ní sta'á yā pan chí canéé na mesa yeⁿé nátaí. Ní che'é yā ní ca'a

yā chi che'e 'iⁿyāⁿ chi nduucú yā. Pan miiⁿ dámaāⁿ chiiduú s'eeⁿ cuuvi che'é yā. Ní tan'dúúcā chí ngaⁿa na ley miiⁿ nguéé canéé chí che'e rey David ní nguéé canéé chí che'é 'iⁿyāⁿ chi ndúúcu yā. ⁵¿Áá nguéé n'geeⁿ ndís'tií na ley yeⁿe Moisés chi diiⁿ chííduú s'eeⁿ? Nguéé ntaavi'tuunúúⁿ yā yeⁿe ntiiⁿnyuⁿ yeⁿe yaācū tínnūⁿ nguuvi chi ntaavi'tuunúúⁿ 'iⁿyāⁿ. Chiidu s'eeⁿ nguéé diíⁿ yā tan'dúúcā chí ngaⁿa ley yeⁿe Moisés ní nguéé nuuⁿndi yeⁿe yā. ⁶Úú ngaⁿá ngii ndís'tií chi véé 'áámá 'iⁿyāⁿ chi ch'εete ca yā chi yaācū templo ní canee yā ndúúcū ndís'tií. ⁷Ndís'tií nguéé déenu nī d'ε chi neⁿe caaⁿmaⁿ chi canéé nguūⁿ na libro yeⁿe Ndyuūs yeⁿe chuū: Neⁿe chí 'iⁿyāⁿ ya'āi 'iinú yā 'iⁿyāⁿ caavā 'úú. Nguéé neⁿe chí 'caaⁿnuⁿ yā 'iiti ní tée yā 'iiti caavā ofrenda yeⁿe 'úú. Nduuti chí cadínnuⁿ nī tuuⁿmi ní nguéé diíⁿ nī condenar 'iⁿyāⁿ chí nguéé nuuⁿndi yeⁿe yā. ⁸Tíicā Saⁿā chí Daīyá Dendyuūs miiⁿ véé ntúúⁿ poder yeⁿe sa yeⁿe nguuvi chí ntaavi'tuunúúⁿ 'iⁿyāⁿ.

Saⁿā chí ntí'i ta'ā sa

(Mr. 3.1-6; Lc. 6.6-11)

⁹Quayiivi ní Jesús cheⁿe yā na yaācū sinagoga yeⁿe 'iⁿyāⁿ yeⁿe yaāⁿ miiⁿ. ¹⁰Quin'diichí nī. Miiⁿ ní canéé 'áámá saⁿā chí ntí'i ta'ā sa. Snéé 'iⁿyāⁿ miiⁿ chí tiinguunéeⁿ yā Jesús miiⁿ ní caⁿa yā: ¿Áá canéé na ley yeⁿe yú chí nduuvā yeⁿe 'iⁿyāⁿ nguuvi chí ntaavi'tuunúúⁿ 'iⁿyāⁿ? Chuū ní caⁿa yā ti neⁿe yā cuuvi caaⁿmaⁿ yā núúⁿndí yeⁿe Jesús miiⁿ.

¹¹Jesús caⁿa yā chíi yā 'iⁿyāⁿ s'eeⁿ: ¿Dú'u 'aama saⁿā nguaaⁿ

ndís'tií chí véé 'áámá 'iiti cuūchí yeⁿe sa? Ní ndúúti chí cun'daa nuúⁿ tí na 'áámá yiivi yāⁿaa nguuvi chí ntaavi'tuunúúⁿ 'iⁿyāⁿ, ¿áá nguéé ntuun'dáa sa 'iiti nguuvi miiⁿ? ¹²¿Áá nguéé yaⁿai ca chíi'vē 'áámá 'iⁿyāⁿ nguéé tí 'áámá 'iiti cuūchí? 'Tíicā diiⁿ yú chí n'daācā nguuvi chí ntaavi'tuunúúⁿ 'iⁿyāⁿ.

¹³Tuuⁿmi ní Jesús caⁿa yā chíi yā saⁿā chí ya'āi yeⁿe sa: N'doo dí ta'a di. Saⁿā miiⁿ ní n'doō sá ta'ā sa ní ta'ā sa nduūvi n'dáācā tan'dúúcā taama. ¹⁴'iⁿyāⁿ fariseos nan'dáa yā ch'εeti yaācū ní nduuvidaamá yā chí caⁿa yā contra yeⁿe Jesús miiⁿ ti neⁿe yā 'caaⁿnúⁿ yā 'iⁿyāⁿ.

'Áámá nduudu chí caaⁿmaⁿ yeⁿe Jesús

¹⁵Taachí Jesús chicadínnuⁿ yā chuū nan'daa yā miiⁿ. Neené 'yaaⁿ 'iⁿyāⁿ cueⁿe yā ndúúcū Jesús miiⁿ ní Jesús miiⁿ idiíⁿ yā chí nduūvā yeⁿe nducyáácá 'iⁿyāⁿ. ¹⁶Ní caⁿa yā chíi yā 'iⁿyāⁿ s'eeⁿ chí nguéé caaⁿmaⁿ yā cuuví yā tanáⁿā 'iⁿyāⁿ du'u yā. ¹⁷Ní 'iicu cuaacu chí profeta Isaías miiⁿ caⁿa yā ndii cuááⁿ vmnaaⁿ taachí dinguuⁿ yā 'tíicā. Ndyuūs ngaⁿa yā:

¹⁸Sáⁿa 'cūū nī idichí'vē 'úú. 'Úú chínndeēvē saⁿá 'cūū chí neⁿe ní neene yeenú ndúúcu sa. 'Úú ní cu'neéⁿ Espíritu N'dai yeⁿe vmnááⁿ yeⁿe sa. Saⁿá 'cūū caaⁿmaⁿ sa yeⁿe ley yeⁿe nanááⁿ nducyáácá naciónes na iⁿ'yeeⁿdí 'cūū.

¹⁹Nguéé 'cuuⁿmaⁿ sa ndíí nguéé ndúú 'cuāi ra sa. Mar 'áámá 'iⁿyāⁿ na yúúní nguéé 'caandiveéⁿ yā nduudú yeⁿe

sa ti nguée caaⁿmaⁿ yúúdu sa
cuaaⁿ na yúúni.

²⁰ Saⁿá 'cūū ngingee sa 'iⁿyāⁿ
chi véé ca cuidados yeⁿe yā,
'iⁿyāⁿ chi tan'dúúca 'áámá
taaⁿ ndúú chí 'aa ndeētúú 'tēē
'téé, 'tiicá yā. Ndíí nguée ndúú
chí ntuūvi sa 'aama mecha
yeⁿe yā quinque chí ican'dáā
ca 'yaāⁿmⁿ yeⁿe. Ndíí nguée
candée sa nduudu cuaacu
yeⁿe Ndyuūs ndii taachi a
fuerza 'āā cuéé de'ē vee chí
cuchee sa ndúúcu vaadi
cuaacu miⁿ yeⁿe tanducuéⁿē.

²¹ Ní 'íicú nducyáácá 'iⁿyāⁿ yeⁿe
naciones yeⁿe iⁿyeeⁿdí 'cūū
cūnee ngíínú yā yeⁿe saⁿá
'cūū chí cu'téenu yā yeⁿe sa.

**'Iiⁿyāⁿ ngaⁿá yā chí Jesús véé poder
yeⁿe yááⁿ'nguiinūⁿ ndúúcu yā**

(Mr. 3.19-30; Lc. 11.14-23; 12.10)

²² Tuu'mi ní 'iⁿyāⁿ ndaa yā nanááⁿ
Jesús ní ndéē yā 'áámá saⁿá chí
caneē sa ndúúcu espíritu yeⁿe
yááⁿ'nguiinūⁿ yeⁿe chí ngeenáaⁿ
sa ndúúcu chí nguée ngii ngaⁿa
sa. Jesús miⁿ dííⁿ yā chí nduūvā
yeⁿe sa. Ní saⁿá chí ngeenáaⁿ
miⁿ ní inaaⁿ sa ní ngíí ngaⁿā sa.
²³ Nducyaaca 'iⁿyāⁿ ngeⁿe yiinú yā
ní ngaⁿa yā: ¿Áá sáⁿa 'cūū Daiya
'iⁿyāⁿ chí ndaataa yeⁿe David?

²⁴ Ní taachi 'iⁿyāⁿ fariseos
ch'iindiveéⁿ yā chuū ní caⁿa yā:
Sáⁿa 'cūū nitun'dáa sa espíritu yeⁿe
yááⁿ'nguiinūⁿ cáávā Beelzebú, chí
Satanás chí ngaⁿā ntiiⁿnyuⁿ sa yeⁿe
espíritus yeⁿe yááⁿ'nguiinūⁿ.

²⁵ Jesús miⁿ déenu yā chí
nadacadíinūⁿ 'iⁿyāⁿ s'eeⁿ ní caⁿa
yā chii yā 'iⁿyāⁿ s'eeⁿ: 'Áámá

gobierno chí ngaⁿa ntiiⁿnyúⁿ yā
yeⁿe yáⁿāa chí véé 'uūvi partido
yā chí nguⁿu yā 'áámá yā ndúúcu
taama yā, tuu'mi ní nguēē
cuuvi 'naaⁿ chí 'iⁿntyéⁿe yā. Ní
nducuéⁿē yáⁿāa o va'ai naachi
'iⁿyāⁿ véé 'uūvi vaanicadíinūⁿ
yeⁿe yā nguée cuuvi nduuvidaamá
yā. ²⁶ Tiicá ntúūⁿ nduuti chí
yááⁿ'nguiinūⁿ tun'dáa sa espíritus
yeⁿe yááⁿ'nguiinūⁿ véé 'uūvi
vaanicadíinūⁿ yeⁿe sa ní cuáácú
chí nguⁿu sa yeⁿe maaⁿ sa ní véé
'uūvi partido yeⁿe sa ní 'cuiinu
sa. ²⁷ Ndís'tií ní ngaⁿa ní chí 'úú
itun'dáa espíritu yeⁿe yááⁿ'nguiinūⁿ
yeⁿe 'iⁿyāⁿ ndúúcu poder yeⁿe
Beelzebú chí Satanás chí ngaⁿa
ntiiⁿnyuⁿ sa yeⁿe espíritus yeⁿe
yááⁿ'nguiinūⁿ. Ndúúti chí 'tíicā
tuu'mi ní, ¿ndúúcu du'ū rá poder
yeⁿe tun'dáa 'iⁿyāⁿ chí ndúúcu ní
espíritu yeⁿe yááⁿ'nguiinūⁿ? Chííⁿ
chí díiⁿ 'iⁿyāⁿ chí ndúúcu ní 'ngiⁿi
yā chí nguée 'tíicā chí ngaⁿá ní.
²⁸ Ndúúti chí 'úú itun'dáa espíritus
yeⁿe yááⁿ'nguiinūⁿ cáávā poder
yeⁿe Espíritu N'dai yeⁿe Dendyuūs,
cuaacu níⁿnyúⁿ naachí Ndyuūs
ngaⁿa ntiiⁿnyúⁿ yā ndaa nanááⁿ
ndis'tií.

²⁹ Mar 'áámá 'iⁿyāⁿ nguēē cuuvi
cundaa yā va'ai yeⁿe 'aama saⁿá chí
véé fuerzas yeⁿe sa ní divíi yā chí
vee yeⁿe sa. ¿Canée chí cachiihí yā
saⁿa vmnááⁿ vmnaaⁿ? Cuayiivi ní
cuuví dííⁿ yā tun'dáa yā dendu'ū chí
snúūⁿ va'ai yeⁿe sa.

³⁰ 'Iiⁿyāⁿ chí nguée canée yā lado
yeⁿe, 'iⁿyāⁿ miⁿ canée yā contra yeⁿe.
'Iiⁿyāⁿ chí nguée dáámá dííⁿ yā cosechar
nduucú, tuu'mi ní dííⁿ yā tan'dúúca chí
ingée tanducuéⁿē cosecha.

³¹Chíⁿ chí nduudu cuaacu chí 'úú ngaⁿá ngíí ndís'tií: Tanducuéⁿē nuuⁿndi chí díⁿ 'iíⁿyāⁿ ndúú^cū nduudu taaⁿ chí nguéé n'dáacā chí ngaⁿa yā contra yeⁿe Ndyuūs, Ndyuūs nadach'εεcú yā yeⁿe yā. Naati 'iíⁿyāⁿ chí ngaⁿa yā nduudu taaⁿ chí nguéé n'dáacā chí contra yeⁿe Espírítu N'dai yeⁿe Ndyuūs ní nguéé nch'εεcū yēⁿe yā maaⁿ ní tiempo chí cuchíi. ³²Áa du'ú nūⁿ chí caaⁿmaⁿ nduudu chí nguéé n'dáacā contra yeⁿe Saⁿā chí Daiyá Ndyuūs ní cuuvi nach'εεcu yeⁿe yā. Naati 'iíⁿyāⁿ chí nguéé n'daācā ngaⁿa yā contra yeⁿe Espírítu N'dai yeⁿe Ndyuūs ní nguéé cuuvi nach'εεcū yeⁿe yā ndíí nguéé ndúú na iⁿ'yeeⁿdí 'cūū ndíí nguéé ndúú táámá iⁿ'yeeⁿdi chí cuchíi.

'Áámá yáⁿá ní ngíⁿi cucáāvā n'guíⁱ yeⁿē

(Lc. 6.43-45)

³³Tiicá ntúūⁿ caⁿa Jesús: Ndúúti chí véé 'áámá yáⁿá chí n'dáacā yeⁿē ní tuuⁿmi ní cuuvi n'guíⁱ n'dáacā yeⁿē. Níicú ndúuti chí véé 'áámá yáⁿá chí nguéé n'daācā yeⁿē ní nguεε n'dáacā cuuvi n'guíⁱ yeⁿē. Cáāvā n'guíⁱ yeⁿe yáⁿá ituumicadínúuⁿ yā táácā yáⁿá nduuti chí n'dai o nduuti chí nguéé n'dai. ³⁴Ndís'tií, tan'dúú^cā ndaata yeⁿē cúú 'tiicá ní. ¿Táácā ngaⁿa ní cosas chí n'daācā ní idíⁿ ní chí nguεε n'daācā? Tí chííⁿ chí ngaⁿa ní ndúú^cū cheendí ní ngiica na staava yeⁿē ní. ³⁵Saⁿā chí n'dái idiiⁿ sa dendúúⁿ chí n'daācā chí nadacadínúuⁿ sa na staava yeⁿe sa chí n'daācā. Saⁿa chí cunncaā idiiⁿ sa tanducuéⁿē chí nguεε n'daācā

nadacadínúuⁿ sa caati staava yeⁿe sa nguéé n'dáacā. Nduudu chí ngaⁿā sa ngiica sa yeⁿē chí ndiituú na staava yeⁿe sa. ³⁶Naati 'úú ní ngaⁿá ngíí ndís'tií: Nducuéⁿē nduudu chí nguéé de'ε vεε chíí'vē chí 'iíⁿyāⁿ ngaⁿa yā, nducyáaca yā ní cánéé chí ncaⁿá yā cuenta yeⁿe nduudu chí nguεε n'daācā chí caⁿa yā nguuvi chí Ndyuūs caaⁿmaⁿ yā yeⁿe nuuⁿndi yeⁿe yā. ³⁷Tí cáāvā nduudu yeⁿe ní chí n'daācā nduuví n'dai ní ní 'iicu cáāvā nduudu yeⁿē ní nduuti chí nguéé n'dáacā cuuví ní castigo.

'Iíⁿyāⁿ chí nguéé n'daācā néⁿe yā snaaⁿ yā señales

(Mr. 8.12; Lc. 11.29-32)

³⁸Tuuⁿmi ní n'duuvi maestros yeⁿe ley ndúú^cū n'duuvi saⁿā fariseos ngaⁿa sá ngii sa Jesús miíⁿ ní caⁿa sa: N'díí maestro, néⁿe n'ū snaaⁿ n'ū 'áámá señal chí dííⁿ ní.

³⁹Jesús nán'guεεcútaⁿa yā yeⁿe saⁿā s'eeⁿ ní caⁿa yā: 'Iíⁿyāⁿ cunncaā ndúú^cū 'iíⁿyāⁿ chí nguéé i'téenu yā Ndyuūs neⁿe yā snaaⁿ yā señal naati señal nguéé snaaⁿ yā. Dámaaⁿ snaaⁿ yā señal yeⁿe profeta Jonás chí ndíí cuaaⁿ vmnaaⁿ canee nguūⁿ na libro yeⁿe Ndyuūs. ⁴⁰Tí tan'dúú^cā Jonás canúúⁿ sá chεeti 'yaācā ch'εete i'inū nguuvi i'inū n'gaaⁿ 'tíicā canee chí cūnee Saⁿā chí Daiyá Ndyuūs mááⁿ yáⁿā 'cúú i'inū nguuvi i'inū n'gaaⁿ. ⁴¹Na nguuvi yeⁿe juicio 'iíⁿyāⁿ chí ch'εetinée yā na yáāⁿ chí nguuvi Nínive nducuéⁿē yā contra yeⁿe 'iíⁿyāⁿ chí snéé maaⁿnguuvi taachí Ndyuūs caaⁿmáⁿ yā yeⁿē nuuⁿndi yeⁿe 'iíⁿyāⁿ, ní cuuví yā

condenado. 'Tíicā tí 'iiⁿ'yāⁿ yeⁿ'e yááⁿ Nínive ní ndaacadaamí yā taachi profeta Jonás miiⁿ ndii cuááⁿ vmnaaⁿ caⁿ'a sá nduudu cuaacu yeⁿ'e Ndyuūs. Cuin'diichí nī 'áámá saⁿ'ā chi ch'ēete ca nguéé tí profeta Jonás miiⁿ canee sa 'muuⁿ na lugar 'cūū. ⁴²'Tiicá ntūūⁿ nguuvi yeⁿ'e juicio n'daataá reina chí tiempo chí ch'óo ngaⁿ'ā ntiⁿ'nyuⁿ tá yeⁿ'e lado yeⁿ'e Sur caⁿ'a tá nducueeⁿ tá contra yeⁿ'e 'iiⁿ'yāⁿ chí snée yā maaⁿnguuvi taachi Ndyuūs caāⁿ'máⁿ yā nuuⁿ'ndi yeⁿ'é 'iiⁿ'yāⁿ. Ní táⁿ'ā miiⁿ ní diiⁿ tá condenar 'iiⁿ'yāⁿ chí snée yā maaⁿnguuvi ti táⁿ'ā miiⁿ ndaā tá ndíí na yaⁿ'ai taavi yeⁿ'ē yáⁿ'āa. Ní ngiica tá ní ch'iindiveeⁿ tá yeⁿ'ē vaadi deenu yeⁿ'e rey Salomón. Cuin'díichí nī 'áámá saⁿ'ā chí ch'ēete ca vaadi deenu yeⁿ'e sa canee sa 'muuⁿ nguéé ti Salomón miiⁿ.

Espíritu yeⁿ'e yááⁿ'nguiniūⁿ chí nanguēecunée na saⁿ'ā

(Lc. 11.24-26)

⁴³Caⁿ'a Jesús: Taachí espíritu yeⁿ'e yááⁿ'nguiniūⁿ nacan'daa na 'áámá saⁿ'ā cachiica na yáⁿ'āa cuūⁿ'máⁿ naachi nguēe ch'ēetinée 'iiⁿ'yāⁿ ní n'nuūⁿ naachi cuuvi ntaaviⁿ'tuunūⁿ ní nguéé ndaācā. ⁴⁴Tuuⁿ'mi ní espíritu yeⁿ'e yááⁿ'nguiniūⁿ ngaⁿ'a: Nanguēecuneeé na vaacú naachi chiicá. Taachí nguēēcunée ní ndaā na vaacu miiⁿ ndaācā saⁿ'a miiⁿ ní tan'dúúⁿcā 'aama va'āi chí n'dai ní nduuvi deevé ndúúⁿcū nducuéⁿ'e na lugar yeⁿ'ē. ⁴⁵Tuuⁿ'mi ní espíritu miiⁿ cueⁿ'e ní in'nuuⁿ tá ná ndēēchē espíritu chí cunncaā ca chí cuuví maāaⁿ. Ní ndaā espíritu miiⁿ ndúúⁿcū ndēēchē espíritu ní

ch'ēetinée na saⁿ'ā miiⁿ. Cuayiivi ní n'geenu sa ngii taavi ca ní cunncaā ca canee sa nguéé ti vmnaaⁿ. 'Tiicá ntūūⁿ 'cuenú yā cuuvi 'iiⁿ'yāⁿ chí snée yā maaⁿ ti nguēe n'daācā idiíⁿ yā.

Chēecú Jesús miiⁿ ndúúⁿcū 'dínu yā

(Mr. 3.31-35; Lc. 8.19-21)

⁴⁶Taachí Jesús miiⁿ índee yā ndúúⁿcū 'iiⁿ'yāⁿ, tuuⁿ'mi ní ndaā niiⁿ'nuúⁿ chēecú yā ndúúⁿcū 'dínu yā ní snée yā chuva'āi. Ní neⁿ'e yā ndeé yā ndúúⁿcū Jesús miiⁿ. ⁴⁷'Áámá 'iiⁿ'yāⁿ caⁿ'a yā chii yā Jesús miiⁿ: N'dii Jesús, cuin'díichí nī. Chēecú ní ndúúⁿcū 'dínu nī snée yā chuva'āi ní neⁿ'e yā ndee yā ndúúⁿcū nī.

⁴⁸Jesús nan'guēecútaⁿ'a yā ní caⁿ'a yā chii yā saⁿ'a miiⁿ: '¿Dú'ú chí chēecú miiⁿ? o '¿dú'ú chí 'diinú miiⁿ?

⁴⁹Ní n'doó yā ta'á yā naachi snée discípulos ní caⁿ'a yā: Cuin'diichí nī, 'iiⁿ'yāⁿ s'ūuⁿ ní tan'dúúⁿcā chí chēecú ndúúⁿcū 'diinú, 'tíica yā. ⁵⁰Tí 'āa du'ú nūuⁿ 'iiⁿ'yāⁿ chí diíⁿ yā tan'dúúⁿcā chí neⁿ'e Chiidá chí canee yā ná va'ai chēeti nguuvi tuuⁿ'mi ní 'iiⁿ'yāⁿ s'eeⁿ chí 'diinú ndúúⁿcū víí ndúúⁿcū chēecú.

'Áámá ejemplo yeⁿ'ē sáⁿ'ā chí ngiinū ndaata

(Mr. 4.1-9; Lc. 8.4-8)

13 Nguuvi miiⁿ Jesús can'daa yā va'āi miiⁿ ní ch'iindi yā niiⁿ'nuúⁿ ná nuūⁿ'niⁿ'yáⁿ'ā. ²Ní nééné n'deēe 'iiⁿ'yāⁿ ndúúvidaamá yā naachi canée Jesús. Tuuⁿ'mi ní Jesús ndaa yā na 'áámá barco ní ch'iindí yā. Nducyáácá 'iiⁿ'yāⁿ snée yā 'diituu núuⁿ'niⁿ naachi vee yáⁿ'āa ndúútií. ³Ní Jesús caⁿ'a yā nééné

n'deēe nááⁿ ndúúcu parábolos chí ejemplos tan'dúúca dendu'ū chí véé iⁿ'yeeⁿdí cūū. Ní caⁿ'a yā chuū: 'Áámá saⁿ'ā chí ngiīnū ndaata can'dáa sa chiīnū sa ndaata. ⁴Taachí chiīnū sa, 'áámá duutu ndaata míiⁿ ní chiīya cyúúni. Ndaā 'yaadá ní chiīnu che'e tī. ⁵Náⁿ'ā duutu ndaata miiⁿ ní chiīya na tuūu naachi nguéé ch'ēete yáⁿ'āa. Maaⁿ'ncheeté nūuⁿ can'dáa ti nguéé ch'ēete yáⁿ'āa yeⁿ'ē. ⁶Can'dáa 'yáⁿ'ā ní yaata miiⁿ ní ti'í ti nguéé dii'yu yeⁿ'ē. ⁷Iicu náⁿ'ā duutu ndaata miiⁿ ní chiīya nguuaⁿ yááⁿ. Yááⁿ miiⁿ ní chiīta ní di'vaāchí yeⁿ'ē yaata miiⁿ. ⁸Iicu náⁿ'ā duutu ndaata miiⁿ ní chiīya na yáⁿ'āa n'dáacā ní n'dáacā chiī cosecha yeⁿ'ē. 'Áámá ní chiī 'áámá ciento yeⁿ'ē, taama ní chiī 'iīnū ngeecu yeⁿ'ē, ní táámá ní chiī ndíícu ndiichi yeⁿ'ē. ⁹Iiⁿ'yāⁿ chí véé veéⁿ yā ní 'caandiveéⁿ yā nduudu yeⁿ'é.

Chííⁿ chí neⁿ'ē caāⁿ'māⁿ ejemplo miiⁿ

(Mr. 4.10-20; Lc. 8.9-15)

¹⁰Tuu'mi ní discípulos ndaá yā nanááⁿ Jesús miiⁿ ní caⁿ'a yā chíi yā Jesús: ¿De'e cáávā chí ndúúcu ejemplos ngi'cueeⁿ ní 'iiⁿ'yāⁿ?

¹¹Jesús nan'g'uēcútaⁿ'a yā ní caⁿ'a yā chíi yā discípulos yeⁿ'e yā: 'Āā ndís'tíi nūuⁿ ndaācā chicadíínuuⁿ ní dendu'ū chí canúúⁿ n'de'ei yeⁿ'e naachí Ndyuūs ngaⁿ'a ntiiⁿ'nyúⁿ yā ná va'ai chēti nguuvi, naatí tanáⁿ'ā 'iiⁿ'yāⁿ s'eeⁿ nguéé canéé chí cadíínuuⁿ yā. ¹²Iiⁿ'yāⁿ chí véé yeⁿ'e yā Ndyuūs ca'a cá yā ní n'deēe cá cuuvi yeⁿ'e yā. 'Iiⁿ'yāⁿ chí nguéé véé yeⁿ'e yā, 'áará chí dúú'ví nūuⁿ chí nadacádíínuuⁿ yā chí véé yeⁿ'e yā chuū ní Ndyuūs ndivíi yā yeⁿ'e yā.

¹³Cáávā chííⁿ chí ngaⁿ'á ngií 'iiⁿ'yāⁿ ndúúcu ejemplos caati inaaⁿ yā naati n'g'eetinée yā tan'dúúca chí nguéé inaaⁿ yā. Ní n'giindiveéⁿ yā naati n'g'eetinee yā tan'dúúca chí nguéé n'giindiveéⁿ yā ndíí nguéé ndúú tuumicadiinuuⁿ yā. ¹⁴Ní 'íícu cuuvi cuaacu yeⁿ'e 'iiⁿ'yāⁿ s'eeⁿ chííⁿ chí caⁿ'a profeta Isafás ndii cuááⁿ vmnaaⁿ taachi caⁿ'a yā 'túúca ní canéé nguúⁿ na libro yeⁿ'e Ndyuūs: Ndúúcu veéⁿ yā 'caandiveéⁿ yā ní nguēe tuumicadíínuuⁿ yā; ní snaaⁿ yā ní nguéé ca'a yā cuenta yeⁿ'ē.

¹⁵Caati staava yeⁿ'e 'iiⁿ'yāⁿ s'eeⁿ ní chēechi. Ndúúcu veéⁿ yā n'giindiveéⁿ yā naati nguéé tuumicadíínuuⁿ yā n'daācā. 'Iiⁿ'yāⁿ s'eeⁿ ní n'gaadí yā nduutinaaⁿ yā caati nguéé snaaⁿ yā ndúúcu nduutinaaⁿ yā; ní nguéé 'caandiveéⁿ yā ndúúcu veéⁿ yā, ndii nguēe ndúú ituumicadiinúúⁿ yā ndúúcu staava yeⁿ'é yā, ndii nguéé ndúú ndaacadaamí yā yeⁿ'ē nuuⁿndi yeⁿ'e yā chí 'úú cuuví nadich'ēécú nuuⁿndi yeⁿ'é yā.

¹⁶De'e chúúca n'dai ndís'tii ti véé nduutinaaⁿ ní chí inaaⁿ ní ní veéⁿ ní chí n'giindiveéⁿ ní. ¹⁷Ti cuaacu níⁿ'nyúⁿ 'úú Jesús ngaⁿ'á ngií ndís'tii chí neené 'yaaⁿ 'iiⁿ'yāⁿ profetas ndúúcu 'iiⁿ'yāⁿ chí n'dai neⁿ'é yā snaaⁿ yā chííⁿ chí ndís'tii inaaⁿ ní naati nguéé n'diichi yā. Neⁿ'e yā 'caandiveéⁿ yā chííⁿ chí ndís'tii n'giindiveéⁿ ní naati nguéé ch'iindiveéⁿ yā.

¹⁸'Caandiveeⁿ ndís'tii ejemplo yeⁿ'e saⁿ'ā chí ngiīnū ndaata.

19 'Iiⁿyāⁿ chí n'giindiveéⁿ yā nduudu yeⁿe naachí Ndyuūs ngaⁿ'a ntiiⁿnyúⁿ yā yeⁿe va'ai cheeti nguuví ní nguéé ituumicadínuuⁿ yā, 'iiⁿyāⁿ s'eeⁿ tan'dúucā duutu ndaata chí chiiya cuaaⁿ cyúúni. Ndaa yááⁿ'n'guiinūⁿ ní sta'lā sa nduudu yeⁿ'é Ndyuūs chí canéé na staava yeⁿ'é yā. 20 Ndaata chí chiiya nguaaⁿ tuūu ní tan'dúucā 'iiⁿyāⁿ chí n'giindiveéⁿ yā nduudu yeⁿ'é Ndyuūs. Ní taachí n'giindiveéⁿ yā nduudu miiⁿ ní yeenú n'dai yā, 21 naati nguéé 'áámá cānee na staava yeⁿ'é yā ní nguéé 'nááⁿ tiempo cūnee. Taachí n'géenu yā ngii ti 'iiⁿyāⁿ cándaa yā 'iiⁿyāⁿ s'eeⁿ cáavā nduudu yeⁿ'é Ndyuūs, tuu'mí nūⁿ diví yā nduudu miiⁿ ní nguéé canéé na staava yeⁿ'é yā. 22 Ndaata chí chiiya nguaaⁿ yááⁿ ní tan'dúucā 'iiⁿyāⁿ chí ch'iindiveéⁿ yā nduudu miiⁿ naati neⁿe cá yā nducuéⁿē yeⁿ'ē iⁿ'yeeⁿdí cūū ndúucú chí véé. Ní nginnche'éei yā 'iiⁿyāⁿ. Ní vaadi 'cuiica miiⁿ di'vaachíi yeⁿ'ē nduudu miiⁿ ní diiⁿ chí nguéé dichí'lvē nduudu miiⁿ na vida yeⁿ'e 'iiⁿyāⁿ s'eeⁿ. 23 Ndaata chí chiiya na yáⁿ'āa n'dáacāá chíⁿ chí tan'dúucā 'iiⁿyāⁿ chí n'giindiveéⁿ yā nduudu yeⁿ'é Ndyuūs ní tuumicadiinúⁿ yā ní i'téenu yā nduudu miiⁿ. Ní n'daācā idiíⁿ yā. Ní nduudu miiⁿ tan'dúucā chí chíi 'aama ciento yeⁿ'ē o chí chíi 'iinū ngeecu yeⁿ'ē o chí chíi ndiicú ndiichi yeⁿ'ē. 'Tíicā chíi cosecha yeⁿ'ē nduudu miiⁿ.

Ejemplo yeⁿ'é yaātā chí nguéé n'daācā chí véé nguaaⁿ trigo

24 Jesús miiⁿ ngaⁿ'a yā ngii yā 'iiⁿyāⁿ s'eeⁿ: Cuuví ndís'tii táámá ejemplo. Ní caaⁿ'máⁿ yeⁿ'e naachí

Ndyuūs ngaⁿ'a ntiiⁿnyúⁿ yā yeⁿ'ē na va'ai cheeti nguuví ní tan'dúucā 'áámá saⁿ'ā chí ngiinū sa ndaata yeⁿ'e trigo chí n'daācā na campo yeⁿ'ē sa. 25 Taachí mozos cyaadu sa, tuu'mi ní saⁿ'ā chí enemigo yeⁿ'ē sa ndaā sa ní chiinū sa 'daaⁿ'nuⁿ trigo na campo yeⁿ'e saⁿ'ā miiⁿ nguaaⁿ trigo chí n'daācā miiⁿ, ní cúnaⁿ'a sa. 26 Taachí can'daa yaata yeⁿ'ē ní chíi trigo, tuu'mi ní can'daā nguuví 'daaⁿ'nuⁿ trigo miiⁿ. 27 Tuu'mi ní mozos chí idiiⁿ sa ntiiⁿnyuⁿ na campo miiⁿ ndaa sa nanááⁿ saⁿ'a chí 'iivi yeⁿ'e campo miiⁿ ní caⁿ'a sa chíi sa 'iivi: N'díi Señor, ¿'áá nguéé chiinū ndaata yeⁿ'e trigo chí n'daācā na campo yeⁿ'e ní? ¿Tíi chíicā ndaata 'daaⁿ'nuⁿ trigo? 28 Saⁿ'ā 'iivi miiⁿ ní caⁿ'a sa chíi sa mozos chí idiiⁿ ntiiⁿnyuⁿ: 'Áámá saⁿ'ā enemigo yeⁿ'é niinū sa. Mozos ní caⁿ'a sa chíi sa 'iivi sa: ¿'Áá neⁿ'e ní chí caⁿ'a 'nū ní tiicu 'nū yaātā miiⁿ chí nguéé n'daācā? 29 'Ivi miiⁿ ní caⁿ'a sa chíi sa mozos chí idiiⁿ ntiiⁿnyuⁿ: Nguéé tiicú di 'daaⁿ'nuⁿ trigo miiⁿ caati cuuví tiicú ntúuⁿ di trigo chí n'daācā miiⁿ. 30 Ca'a di lugar chí dáámá 'cuiita ndíi taachi ndaa tiempo yeⁿ'e cosecha miiⁿ, tuu'mi ní 'úu caaⁿ'máⁿ cuuvi 'iiⁿyāⁿ chí 'caacá yā trigo miiⁿ chí 'caacá yā vmnááⁿ vmnaaⁿ 'daaⁿ'nuⁿ trigo miiⁿ ní dichiihí yā caadi ticuaá ní 'neeⁿ yaⁿ'a yā. 'Cuiinu maaⁿ ní nandéé yā trigo miiⁿ ní 'cuíi yā cheeti dífnūⁿ.

'Áámá ejemplo yeⁿ'ē ndaata yeⁿ'ē yiivē ntí'iyāa

(Mr. 4.30-32; Lc. 13.18-19)

31 Táámá ejemplo Jesús caⁿ'a yā chíi yā 'iiⁿyāⁿ s'eeⁿ: Naachí Ndyuūs ngaⁿ'a

ntiiⁿnyúⁿ yā na va'ai cheeti nguuví ní tan'dúú^{cā} 'aama nduutií yeⁿe yíivē ntíí'yāa chí 'áámá saⁿā sta'á sa ní chiinū sa na yáⁿāa yeⁿe sa. ³²Ndaata yíivē ntíí'yāa 'cūū ní 'liiⁿ ca nguéé ti tanducuéⁿe ndaata. Taachí n'giita yaātā miiⁿ, tuu'mi ní ch'ēete ca chí cuuvi tanáⁿā yaātā. Ní chíi yáⁿá. Ní ndaá 'yáádá yeⁿe nanguuvi ní din'dái tī 'deēce tī na dúuⁿnē yáⁿá miiⁿ.

Ejemplo yeⁿe levadura yeⁿe pan

(Lc. 13.20-21)

³³Táámá ejemplo Jesús caⁿa yā chíi yā 'iiⁿyāⁿ s'eeⁿ: Naachí Ndyuūs ngaⁿa ntiiⁿnyúⁿ yā yeⁿe na va'ai cheeti nguuví ní tan'dúú^{cā} 'áámá tááⁿ levadura yeⁿe pan. 'Áámá n'daataá sta'a tá levadura miiⁿ ní chistaⁿā tá nguuaⁿ 'iinū medida yeⁿe harina ndíí chí nan'guiita tanducuéⁿe yaāchí yeⁿe.

Chuū chí ngaⁿā Jesús miiⁿ ndúú^{cū} ejemplos

(Mr. 4.33-34)

³⁴Tanducuéⁿe chuū ngi'cúeeⁿ Jesús ní caⁿa yā chíi yā 'iiⁿyāⁿ s'eeⁿ ndúú^{cū} ejemplos. Ni nduuti chí nguéé ndúú^{cū} ejemplos yeⁿe chí véé iⁿyeeⁿdí 'cuū, nguéé ngi'cúeeⁿ yā 'iiⁿyāⁿ s'eeⁿ. ³⁵Ní 'iicu cuuvi cuaacu chí caⁿa profeta ndii cuááⁿ vmaaaⁿ taachí caⁿa yā 'túú^{cā}. Ní cané nguūⁿ ná libro yeⁿe Ndyuūs 'túú^{cā}:

Caaⁿmáⁿ ndúú^{cū} ejemplos.

Ca'cúeéⁿ dendu'ū chí canúⁿ n'de'ei ndíí taachi Ndyuūs din'dái yā iⁿyeeⁿdí.

Jesús ngaⁿa yā yeⁿe chí neⁿe caaⁿmāⁿ ejemplo yeⁿe trigo

³⁶Tuu'mi ní Jesús yaa'vi yā 'iiⁿyāⁿ s'eeⁿ chí cunaⁿá yā na vaacú yā.

Jesús ntúúⁿ cunaⁿa yā ní snda a yā 'áámá va'ai. Discípulos yeⁿe yā nnda a yā nanááⁿ Jesús, ní caⁿa yā chíi yā 'iiⁿyāⁿ: N'dií, Jesús, ca'cuééⁿ ní chí neⁿe caāⁿmaⁿ ejemplo yeⁿe 'daaⁿnuⁿ trigo chí véé nguuaⁿ trigo na campo.

³⁷Jesús nan'guεεcútaⁿa yā ní caⁿa yā chíi yā 'iiⁿyāⁿ s'eeⁿ: 'Iiⁿyāⁿ chí ngiinu ndaata chí trigo chí n'dáacā, 'iiⁿyāⁿ miiⁿ chí Saⁿā chí Daiya Ndyuūs. ³⁸Campo miiⁿ ní tan'dúú^{cā} iⁿyeeⁿdí 'cūū. Ndaata chí n'dáacā miiⁿ ní tan'dúú^{cā} nducyáácá 'iiⁿyāⁿ chí daiya Ndyuūs ní yeⁿe naachi Ndyuūs ngaⁿa ntiiⁿnyúⁿ yā. Yaātā yeⁿe ndaata chí nguéé n'daācā ní tan'dúú^{cā} 'iiⁿyāⁿ chí nguéé n'daācā idiíⁿ yā, 'iiⁿyāⁿ s'eeⁿ chí daiya yááⁿn'guiinūⁿ. ³⁹Saⁿā chí chíinū sa 'daaⁿnuⁿ trigo miiⁿ ní tan'dúú^{cā} maāⁿ yááⁿn'guiinūⁿ. Ní cosecha yeⁿe miiⁿ ní tan'dúú^{cā} chí 'cuiinu iⁿyeeⁿdí. Saⁿā s'eeⁿ chí ita'a sa cosecha miiⁿ ní tan'dúú^{cā} ángeles. ⁴⁰Tan'dúú^{cā} chí tiicú yā 'daaⁿnuⁿ trigo ní nadidáámá yā ní 'neeⁿ yaⁿa yā, 'tíicā cuuvi tiempo taachi 'cuiinū iⁿyeeⁿdí 'cūū. ⁴¹Saⁿā chí Daiya Ndyuūs ní dich'ó yā ángeles yeⁿe yā chí nadidáámá yā 'iiⁿyāⁿ chí yeⁿe naachi Ndyuūs ngaⁿa ntiiⁿnyúⁿ yā. Niicú tun'dáa yā nducyaaca 'iiⁿyāⁿ chí díⁿ yā chí náⁿa yā idiíⁿ nuuⁿndí yā ndúú^{cū} 'iiⁿyāⁿ chí idiíⁿ chí nguεε n'daācā. ⁴²Ní cu'nuúⁿ yā 'iiⁿyāⁿ na nguuchí yaⁿā. Mííⁿ 'iiⁿyāⁿ s'eeⁿ ní cuεεcú yā ní che'e 'diiⁿyúⁿ yā. ⁴³Tuu'mi ní 'iiⁿyāⁿ chí n'dái nanááⁿ Ndyuūs cuuvi deevé yā ngii tan'dúú^{cā} 'yáⁿā taachi 'āā snéé yā naachi Ndyuūs Chiidá yā ngaⁿa ntiiⁿnyúⁿ yā na

va'ai cheeti nguuvi. Ndís'tii chí vée véeⁿ ní 'caandiveéⁿ ní nduudu yeⁿé.

Ejemplo yeⁿe vaadi 'cuiica chí canúⁿ n'de'ei

⁴⁴Caⁿa ca Jesús miiⁿ táamá ejemplo: Naachí Ndyuūs ngaⁿa ntiiⁿnyúⁿ yā yeⁿé va'ai cheeti nguuvi ní tan'dúú^{cā} vaadi 'cuiica chí canúⁿ n'de'ei na 'áamá campo. 'Áamá saⁿā ní ndaācā sa vaadi 'cuiica miiⁿ ní cunuuⁿ n'dé'ei ntúⁿ sa lugar miiⁿ. Yeenú taavi sa. Cunaⁿa sa ní n'diicui sa tanducuéⁿē chí vée yeⁿé sa ní cuái sa campo miiⁿ.

Ejemplo yeⁿé 'áamá perla chí yaⁿai taavi chí'vē

⁴⁵Tiicá ntúⁿ. Naachí Ndyuūs ngaⁿa ntiiⁿnyúⁿ yā na va'ai cheeti nguuvi ní tan'dúú^{cā} 'áamá saⁿā chí n'diicui sa chí in'nuuⁿ sa perlas chí yaⁿai taavi chí'vē. ⁴⁶Taachí ndaācā sa 'áamá perla chí n'deēveé ní yaⁿai taavi chí'vē, tuuⁿmi ní cuinaⁿā sa ní n'diicui sa tanducuéⁿē chí vée yeⁿé sa nícuí cuai sa perla miiⁿ.

Yeⁿe ejemplo yeⁿe yaānā

⁴⁷Tiicá ntuūⁿ. Naachí Ndyuūs ngaⁿa ntiiⁿnyúⁿ yā na va'ai cheeti nguuvi ní tan'dúú^{cā} 'áamá yaānā chí saⁿā n'gaa nuúⁿ sa na nuūⁿnīⁿyáⁿā ní ita'aa nducuéⁿē naaⁿ 'yaācā. ⁴⁸Taachí 'āā ndiituú yaānā miiⁿ, intun'dáa yā cuaaⁿ 'diituú nuūⁿnīⁿyáⁿā miiⁿ. Ní n'daaviyaí yā ní nan'guaáⁿ yā 'yáacā chí n'daācā. N'giū yā 'iiti 'cuéétē. Ní 'iiti chí nguée n'dáacā miiⁿ nginngée yā 'iiti. ⁴⁹Tiicā cuuvi taachi 'cuiiūⁿ iⁿ'yeeⁿdí 'cūū. Nandaā ángeles

ní tun'dáa yā 'iiⁿyāⁿ chí n'dai yā nguuaⁿ 'iiⁿyāⁿ chí nguē n'dáacā idiíⁿ yā. ⁵⁰Ní 'cuí yā 'iiⁿyāⁿ chí nguée n'daācā ná nguuchi yaⁿā. Mííⁿ 'iiⁿyāⁿ s'eeⁿ cueⁿe daāⁿmaⁿ cuēcú yā ní cueⁿe daāⁿmaⁿ chéé 'diiⁿyuⁿ yā.

Ejemplo yeⁿé vaadi 'cuiicá ngai ndúú^{cū} chí ndiicúⁿ

⁵¹Jesús tiinguuneeⁿ yā 'iiⁿyāⁿ s'eeⁿ: ¿Áá tuumicádíínuuⁿ ndís'tii tanducuéⁿe dendu'ū chí 'túú^{cā}? 'Iiⁿyāⁿ s'eeⁿ ní n'guēcútaⁿa yā: 'Tíicā Señor.

⁵²Jesús ní caⁿa yā chí yā 'iiⁿyāⁿ s'eeⁿ: 'Áámá 'aama maestro yeⁿé ley chí'neeⁿ yā yeⁿe naachi Ndyuūs ngaⁿa ntiiⁿnyúⁿ yā na va'ai cheeti nguuvi, maestro miiⁿ ní cuuví yā tan'dúú^{cā} 'áamá patrón chí vée vaadi 'cuiica yeⁿe sa na va'ai yeⁿé sa. Ní deenu sa táacā tun'dáa sa yeⁿe vaadi 'cuiica yeⁿé sa dendu'ū cosa chí ngai ndúú^{cū} cosa chí ndiicúⁿ.

Jesús canee yā na yáāⁿ Nazaret

(Mr. 6.1-6; Lc. 4.16-30)

⁵³Taachí Jesús miiⁿ chííⁿú caⁿá yā nduudu 'cūū, cueⁿé yā yeⁿé miiⁿya. ⁵⁴Ní ndaá yā yáāⁿ vaacú yā chí nguuvi Nazaret ní ngi'cueeⁿ yā yaācū sinagoga miiⁿ. 'Iiⁿyāⁿ s'eeⁿ ní cheⁿe yiinú yā yeⁿe chí chí'cueeⁿ Jesús. Ní ngaⁿa yā: ¿Tíí ndiicaá vaadi déenu yeⁿé saⁿá 'cūū? ¿Táacā cuuvi diiⁿ sa vaadi n'giinu chí idiíⁿ sa? ⁵⁵Sáⁿa 'cūū chí daiya 'viichiyáⁿā ní María nguūví cheecu sa. Ní 'dínú sa ní Jacobo, ndúú^{cū} José, ndúú^{cū} Simón, ndúú^{cū} Judas. ⁵⁶Víⁿi ntúⁿ sa snee yā ndúú^{cū} yú. ¿Tíí ndiicaá

tanducuéⁿē vaadi deenú 'cūū chí ng'ícuéⁿ sa? ⁵⁷Ní cáávā chuū 'iiⁿyāⁿ yeⁿe yáāⁿ miiⁿ cuncáā caⁿa yā yeⁿe Jesús miiⁿ, ní nguéé 'ítéenu yā yeⁿe yā. Naati Jesús ní caⁿa yā chíi yā 'iiⁿyāⁿ s'eeⁿ: Nguéé véé mar 'áámá profeta chí candε nduudu yeⁿé Ndyuūs chí 'iiⁿyāⁿ yeⁿe yáāⁿ vaacú yā ndúúcu 'iiⁿyāⁿ na vaacu yā dinéⁿe yā profeta miiⁿ.

⁵⁸Jesús miiⁿ nguéé neenē n'deēe vaadi n'giinu díⁿ yā miiⁿ caati 'iiⁿyāⁿ s'eeⁿ nguéé s'téenu yā yeⁿe Jesús miiⁿ.

Ch'iiⁿnúⁿ yā Juan chí ngeedínuūⁿnīⁿ

(Mr. 6.14-29; Lc. 9.7-9)

14 Tiempo 'cūū saⁿa rey Herodes, chí gobernador yeⁿe yáⁿā Galilea, ch'iindiveeⁿ sá tan'dúúca chí 'iiⁿyāⁿ ngaⁿa yā yeⁿe Jesús miiⁿ. ²Ní rey miiⁿ caⁿa sa chíi sa mozos yeⁿe sa: Sáⁿā Jesús 'cūū ní Juan chí ngeedínuūⁿnīⁿ chí nduuchi sá yeⁿe nguaaⁿ tináⁿā. Ní cáávā chuū véé poder yeⁿe sa chí idiinⁿ sa vaadi n'giinu.

³Rey Herodes miiⁿ ní 'iiⁿyāⁿ chí caⁿa ntiiⁿnyúⁿ yā chí soldados sta'a sa Juan miiⁿ ní cāchiichí sa Juan ndúúcu cadenas ní chi'nuuⁿ sa Juan vácuū. 'Tíicā díⁿ rey miiⁿ cucáávā n'daataá yeⁿe yā chí nguuvi Herodías ti vmnáⁿ vmnāⁿ n'daataá miiⁿ ní n'daataá yeⁿe Felipe chí 'dínu rey miiⁿ. Ní diví rey miiⁿ táⁿā miiⁿ yeⁿe Felipe. ⁴'Tíicā díⁿ rey ndúúcu Juan chí ngeedínuūⁿnīⁿ ti Juan miiⁿ ngaⁿa sá ngii sa Herodes miiⁿ chí tan'dúúca chí ngaⁿa na ley, nguéé canee chí cuuvi n'daataá yeⁿé yā n'daataá miiⁿ.

⁵Rey Herodes miiⁿ ní neⁿe yā 'caaⁿnuⁿ yā Juan miiⁿ, naati 'va'á yā 'iiⁿyāⁿ yeⁿe yáāⁿ miiⁿ; ti 'iiⁿyāⁿ s'eeⁿ ní s'téenu yā chí Juan miiⁿ ní 'iiⁿyāⁿ profeta chí dich'ó Ndyuūs.

⁶Taachí 'iiⁿyāⁿ díⁿ yā 'viicu yeⁿe cupleaños yeⁿe Herodes miiⁿ, n'daataá 'lírⁿ daiya táⁿā Herodías miiⁿ nde'ei tá naavtaⁿā yeⁿe 'iiⁿyāⁿ s'eeⁿ. Ní rey Herodes miiⁿ ní chíi yeenú yā chí nde'ei tá ní caⁿa yā: ⁷Dii, n'daataá 'lírⁿ. 'Úú ngaⁿá ndúúcu nduudu, “por Dios”, chí teé dii 'āā de'é nūuⁿ chí neⁿe di.

⁸Chεεcu tá ni caⁿa yā chíi yā n'daataa 'lírⁿ miiⁿ de'ē chí caaca tá. Ní n'daata 'lírⁿ caⁿa ta chíi tá rey miiⁿ: N'dii rey, téé ní 'úú tiiⁿ Juan chí ngeedínuūⁿnīⁿ cu'nuúⁿ chεeti 'áámá cu'u.

⁹Tuu'mi ní rey Herodes miiⁿ s'neeⁿ ndaachii yiinú yā; naati rey miiⁿ caati 'āā caⁿa yā ndúúcu nduudu, “por Dios”, ní ch'iindiveeⁿ 'iiⁿyāⁿ chí snée yā ndúúcu yā na mesa miiⁿ, caⁿa yā chí 'āā ca'a núúⁿ yā chíⁿ chí ngiica táⁿā miiⁿ. ¹⁰Caⁿa ntiiⁿnyúⁿ yā chí 'caatā daandu Juan chí ngeedínuūⁿnīⁿ chí canúuⁿ sa vácuū. ¹¹Ní ndee sa tiiⁿ yā miiⁿ sn'núúⁿ chεeti cu'u ní ca'a sa n'daata 'lírⁿ miiⁿ. Ní táⁿā miiⁿ ní ca'a tá chεecu tá.

¹²Tuu'mi ní discípulos yeⁿe Juan chí ngeedínuūⁿnīⁿ ndaá yā ní sta'á yā cuerpo yeⁿe Juan miiⁿ ní ch'iichi yā. Ní cheⁿe yā chíi yā Jesús miiⁿ tan'dúúca chí chíi.

Jesús ca'á yā che'e nyuⁿu mil 'iiⁿyāⁿ

(Mr. 6.30-44; Lc. 9.10-17; Jn. 6.1-14)

¹³Taachí Jesús miiⁿ ch'iindiveeⁿ yā chuū, cueⁿé yā ní sndáa yā na

'áamá barco, ní cueⁿe yā na 'áamá lugar cueeti naachi nguéé 'iⁿyāⁿ. Taachí 'iⁿyāⁿ s'eeⁿ ch'iindiveéⁿ yā chuū, can'dáa yā yeⁿe yāāⁿ s'eeⁿ ní cueⁿe yā ndúúcu Jesús. ¹⁴Ní taachí Jesús miiⁿ nan'dáa yā ná barco miiⁿ, n'diichí yā n'dee n'dái 'iⁿyāⁿ, ní nnee ya'ai 'iinu yā 'iⁿyāⁿ s'eeⁿ. Ní dííⁿ yā chi nduūvā yeⁿé 'iⁿyāⁿ chi ngíitā chi ndaā ndúúcu 'iⁿyāⁿ chi candee yā 'iⁿyāⁿ s'eeⁿ. ¹⁵Ní taachí 'āā chiinu discípulos yeⁿe Jesús miiⁿ ndaā yā nanááⁿ Jesús ní caⁿ'a yā chii yā 'iⁿyāⁿ: 'Āā chi chíinū maaⁿ, ní 'muuⁿ nguéé n'geetinéé 'iⁿyāⁿ. Yaa'ví ní 'iⁿyāⁿ s'tíi chí caⁿ'á yā cuááⁿ na yāāⁿ n'gaiyāā ní cuái yā chi che'e yā.

¹⁶Jesús caⁿ'a yā chii yā discípulos: 'Iⁿyāⁿ s'tíi nguéé cánéé chí náⁿ'a yā. Ndís'tiī ca'a ní chi che'e yā.

¹⁷Discípulos ní caⁿ'a yā: Nguéé tunééⁿ chi che'e yā. Dámāāⁿ nyuⁿ'u panes ndúúcu na 'uūvī 'yaacā véé.

¹⁸Jesús caⁿ'a yā chii yā discípulos: Candée ní panes ndúúcu 'yaacā 'muuⁿ.

¹⁹Cuayiivi ní Jesús chii yā 'iⁿyāⁿ s'eeⁿ chí ch'etéⁿ yā ná yaātā miiⁿ. Jesús ní sta'á yā nduu nyúⁿ'ú panes miiⁿ ndúúcu 'uūvī 'yaaca ní n'diichí yā nanguuvi ní ca'a yā gracias Ndyuūs Chiidá yā. Cuayiivi ní n'dee yā panes ní ca'a yā discípulos yeⁿe yā. Discípulos miiⁿ ní ca'a yā 'iⁿyāⁿ chi snéé miiⁿ. ²⁰Nducyáácá yā che'e yā ní chiitu 'iⁿyāⁿ. Ní discípulos nān'guaáⁿ yā chí nángaāva panes yeⁿe miiⁿ ndúúcu 'yaacā miiⁿ ní chiitu tá ndiichúví 'cueētēe. ²¹'Iⁿyāⁿ chí che'e miiⁿ nyuⁿ'u mil ngii yā, ndii nguéé chiduūche n'daataá, ndíi nguéé ndúú da'caiyā ra.

**Jesús ngiicá yā cuááⁿ vmnaaⁿ
nuūⁿnī'yáⁿā**

(Mr. 6.45-52; Jn. 6.16-21)

²²Cuayiivi ní Jesús caⁿ'a yā chii yā discípulos yeⁿe yā chi cundaa yā na barco ní caⁿ'á yā táámá 'díítuú nuūⁿnī'yáⁿā, 'naaⁿ chí Jesús miiⁿ dííⁿ yā despedir yeⁿé 'iⁿyāⁿ. ²³Jesús dííⁿ yā despedir yeⁿé 'iⁿyāⁿ s'eeⁿ ní divíi yā yeⁿe yā ní cuchee yā na 'áamá yīicū ní caⁿ'angua'á yā. Taachí chii 'da'a, 'āā dámaaⁿ Jesús canée yā miiⁿ. ²⁴Barco miiⁿ ní 'āā cānduūu naavtaⁿ'ā yeⁿe nuūⁿnī'yáⁿā miiⁿ naachi olas yeⁿe nuūⁿnīⁿ miiⁿ neⁿe 'cuuchii na yaānūuⁿ yeⁿe nuūⁿnī miiⁿ. 'Yúúné ní ngeēnū taaⁿ ní diitu n'dái n'geⁿe na barco miiⁿ. Ní barco miiⁿ nguéé ngii ngíicá. ²⁵Taachi 'da'a ca táámá nguuvi tan'dúúca n'geecu cuūuⁿ o n'geecu nyuⁿ'u, Jesús ndaā yā nanááⁿ discípulos ní ngíicá yā cuaaⁿ vmnaaⁿ nuūⁿnī'yáⁿā miiⁿ. ²⁶Taachí discípulos ní n'diichí yā Jesús miiⁿ chi ngiicá yā cuaaⁿ vmnaaⁿ nuūⁿnī'yáⁿā miiⁿ ní dii'yá yā chii. Ní chistaⁿ'a vaanicadiinūuⁿ yeⁿé yā. Ní 'cai yā: Chuū ní 'áámá bulto. Ní caⁿ'á yā ndúúcu vaadi 'va'a.

²⁷Cuayiivi miiⁿ ní Jesús yaa'ví yā discípulos ní caⁿ'a yā: Ndís'tiī cúúví ditiinú ní caati 'úú. Nguéé di'va'á ní.

²⁸Tuu'mi ní Pedro nān'guēecútaⁿ'a sa ní caⁿ'a sa: N'díi Señor, ndúúti chí n'diī caaⁿ'maⁿ n'tiīnyúⁿ ní chi caⁿ'á naachi canee ní ní caacá cuaaⁿ vmnaaⁿ nuūⁿnī'yáⁿā.

²⁹Jesús miiⁿ ní caⁿ'a yā chii yā: Pedro, cuchí di. Pedro miiⁿ ní nan'dáa sa na barco miiⁿ ní tucá'a sa ngiica sa cuaaⁿ vmnaaⁿ nuūⁿnīⁿ

miiⁿ. Ní cueⁿē sa naachi canéé Jesús miiⁿ. ³⁰Taachí Pedro miiⁿ n'diichi sa 'yúúné taaⁿ miiⁿ di'vá'a sa ní 'āa tucá'a chεechi sa nguaaⁿ nuūⁿniⁿ miiⁿ. Tuuⁿmi ní cáí yiicu sa ní caⁿ'a sa: Señor, nadanguáⁿai ní 'úú.

³¹Hora míⁿ nūuⁿ, Jesús miiⁿ n'doó yā ta'a yā ní sta'á yā ta'a Pedro ní caⁿ'a yā chii yā Pedro: Dii saⁿ'ā chi dúú'vii i'téenu di, ¿de'ē cúúví chí nadi'uúví di staava yeⁿ'ē di ní nguéé i'téenu di?

³²Ní taachí Jesús ndúúcu Pedro sndáa yā na barco miiⁿ, canee 'diiⁿ 'yúúné míⁿ. ³³Tuuⁿmi ní discípulos chí snúuⁿ yā na barco miiⁿ ní ndaa yā nanááⁿ Jesús ní s'téenu yā 'iiⁿyāⁿ. Ní caⁿ'a yā: N'dii Jesús, cuaacu nííⁿnyúⁿ chí Daiya Ndyuūs n'dii.

Jesús diíⁿ yā chi nduuvā yeⁿ'e 'iiⁿyāⁿ yeⁿ'e yáⁿ'āa Genesaret

(Mr. 6.53-56)

³⁴Tááchí chíinu cho'ó yā táamá lado yeⁿ'e nuūⁿniⁿyāⁿ'ā miiⁿ ní ndaa yā na yáⁿ'āa Genesaret. ³⁵'Iiⁿyāⁿ s'eeⁿ yeⁿ'e yáⁿ'āa miiⁿ taachi tuumicádíínuuⁿ yā chí Jesús canéé yā miiⁿ, tuuⁿmi ní 'iiⁿyāⁿ s'eeⁿ caⁿ'á yā ní chii yā 'iiⁿyāⁿ yeⁿ'e núúⁿmáⁿ cuaaⁿ yááⁿ n'gaiyāá chí snéé niíⁿnuúⁿ chí Jesús canéé yā miiⁿ. Níícu 'iiⁿyāⁿ s'eeⁿ cándéé yā nducyaaca 'iiⁿyāⁿ chí ngííta yā nanááⁿ Jesús miiⁿ. ³⁶Ní 'iiⁿyāⁿ s'eeⁿ di'cuútu yā Jesús miiⁿ chí 'cuáaⁿ yā chí 'iiⁿyāⁿ s'eeⁿ tuuⁿ'ví yā naachi n'déétíí yeⁿ'ē catecaí yā. Ní nducyaaca 'iiⁿyāⁿ chí tuuⁿ'ví yā catecaí Jesús miiⁿ ní nduūvā yeⁿ'e yā.

Yeⁿ'e chí diiⁿ chí vεε nuuⁿndi yeⁿ'e 'iiⁿyāⁿ

(Mr. 7.1-23)

15 Tuuⁿmi ní duuⁿ'vi maestros chí ngi'cueeⁿ ley ndúúcu

'iiⁿyāⁿ fariseos chí chíicá yā yááⁿ Jerusalén ndaa yā nanááⁿ Jesús miiⁿ, ní caⁿ'a yā chí yā 'iiⁿyāⁿ:

²¿De'ē cúúví chí discípulos yeⁿ'e ní nguéé diíⁿ yā tan'dúúca costumbre yeⁿ'ē 'iiⁿyāⁿ ndiicúú? ¿De'ē cúúví chí nguéé inaaⁿnu yā ta'á yā taachi 'āa cuéé che'e yā pan?

³Jesús nan'guεεcútaⁿ'a yā ní caⁿ'a yā chí yā 'iiⁿyāⁿ s'eeⁿ: ¿De'ē cúúví chí ndís'tii ní nguéé diíⁿ ní tan'dúúca chí ngaⁿ'a ley yeⁿ'é Ndyuūs ní diíⁿ ní tan'dúúca costumbre yeⁿ'ē 'iiⁿyāⁿ ndiicúú? ⁴Ti Ndyuūs ní ca'á yā ley yeⁿ'e yā ní caⁿ'a yā: Diíⁿ ní honrar chíidá ní ndúúcu chεecu ní. 'Iiⁿyāⁿ chí nguéé n'daacā ngaⁿ'a yā yeⁿ'e chíidá yā o yeⁿ'ē chεecu yā ní 'cuūvi yā. ⁵Naati ndís'tii ní ngaⁿ'a ní chí 'āa du'ú nūuⁿ 'iiⁿyāⁿ chí caaⁿ'máⁿ yā cuuvi yā chíidá yā ndúúcu chεecu yā 'tíicā: Nducuéⁿ'ē chí teé n'dii maaⁿ ní ca'á lado yeⁿ'é Ndyuūs caava ofrenda yeⁿ'e yā. ⁶'Iiⁿyāⁿ 'āa ntéé idiíⁿ yā chí neⁿ'é yā chíida yā ndúúcu chεecu yā. 'Tíicā caavā costumbre yeⁿ'é ní diíⁿ ní chí 'āa ntéé idichíí'vε ley yeⁿ'é Ndyuūs yeⁿ'e yú. ⁷Ndís'tii 'uūvi naaⁿ 'uuvi cheendí ní. N'daacā caⁿ'a profeta Isaías miiⁿ yeⁿ'é ní taachi caⁿ'a sa ndíí vmnaaⁿ ní canéé nguūⁿ na libro yeⁿ'e Ndyuūs 'tíica:

⁸'Iiⁿyāⁿ s'uuⁿ ní i'téenu yā 'úú ndúúcu nduudu yeⁿ'e yā, naati staava yeⁿ'é yā yaⁿ'ai canee yeⁿ'ē 'úú.

⁹Nguéé de'ē vεε dichíí'vε chí i'téenu yā 'úú, caati chí ngi'cueeⁿ yā ní ley yeⁿ'e saⁿ'ā yeⁿ'e iⁿ'yeeⁿ'dí 'cūú nguéé yeⁿ'é Ndyuūs.

¹⁰Jesús n'gai yā n'dee n'dái 'iiⁿyāⁿ chí ndaa yā nanááⁿ yā. Ní caⁿ'a yā

chii yā 'iiⁿyāⁿ s'eeⁿ: 'Caandivéeⁿ
nī ní tuumicadíínuuⁿ nī. ¹¹Nguéé
tanducuéⁿē chí ng'e'e saⁿā chí ndaā
cheendi saⁿā idivaatí saⁿā naati
nduudu chí ican'daā cheendi saⁿā,
chííⁿ chí diiⁿ chí véé nuuⁿndí yeⁿē
saⁿā.

¹²Tuu'mi ní discípulos yeⁿe
Jesús ndaá yā nanáaⁿ yā ní caⁿa
yā chii yā Jesús miiⁿ: 'ÁÁ nguéé
déenu nī chí 'iiⁿyāⁿ fariseos taachí
ch'iindiveéⁿ yā nduudú 'cūū nduuví
taáⁿ yā?

¹³Naatí Jesús miiⁿ nan'guεεcútaⁿa
yā ní caⁿa yā: Taanduvéé yaāta chí
nguéé chíichi Chiidá chí canéé yā
na va'ai chēeti nguuví canee chí
tiicūu ndii dí'yú. ¹⁴Áā s'nééⁿ rá
'iiⁿyāⁿ s'eeⁿ chí tan'dúúca 'iiⁿyāⁿ chí
ngueenááⁿ chí candéε yā táámá
'iiⁿyāⁿ chí ngueenááⁿ ndúúcu
yā. Nduuti chí 'áámá 'iiⁿyāⁿ chí
ngueenááⁿ candéε yā táámá 'iiⁿyāⁿ
chí ngueenááⁿ ndúúcu yā, nduu
'uuví yā cungeé nuúⁿ yā na yiivi
yáⁿāⁿ.

¹⁵Tuu'mi ní Pedro miiⁿ ní
nan'guεεcútaⁿa sa ní caⁿa sa chíi
sa Jesús miiⁿ: Cúuví nī nús'uu d'e'e
néⁿé caāⁿmāⁿ ejemplo 'cūū.

¹⁶Jesús caⁿa yā: 'ÁÁ 'tiicá ntúūⁿ
nguéé ituumicadíínuuⁿ nī? ¹⁷'ÁÁ
nguéé ituumicadíínuuⁿ nī chí
tanducuéⁿē chí indaā cheendi
saⁿā ngeⁿe chēēti sa ní cungeé
cuaaⁿ chūva'āi? ¹⁸Naati nduudu chí
ícan'daa cheendi sa chí níngiica na
staava yeⁿē sa, chūū idiiⁿ chí véé
núúⁿndí yeⁿē sáⁿā. ¹⁹Caati yeⁿe na
staava yeⁿe 'iiⁿyāⁿ ngiicá dendúú
chí nguéé n'dáacā chí inadicadíínuuⁿ
yā. Chūū ní inadicadíinúúⁿ yā yeⁿē
chí 'caāⁿnuⁿ yā 'iiⁿyāⁿ, ndúúcu yeⁿē

chí caⁿá yā ndúúcu isaⁿā o n'daataá
chí nguéé yeⁿe yā, ndúúcu chí
n'diichí yā 'aama saⁿā o n'daataá
chí duuchí vi'í, ndúúcu yeⁿē chí
ididuucú yā, ndúúcu yeⁿē chí
testigo yā ní caaⁿmáⁿ yā nduudu
yaadi, ndúúcu yeⁿē chí caaⁿmaⁿ taáⁿ
yā contra yeⁿe Ndyuūs. ²⁰Dendúú
'cūū chí ídiiⁿ chí véé nuuⁿndí yeⁿē
sa naati chí che'e sa taachi nguéé
naaⁿnú sa ta'a sa, chíiⁿ ní nguéé
idinuuⁿndí sa.

**Yeⁿe 'áámá n'daataá chí nguεε yeⁿe
ndaata Israel ní i'téenu tá Jesús
(Mr. 7.24-30)**

²¹Jesús chíicá yā yeⁿē yáāⁿ miiⁿ
ní cueⁿe yā na yáⁿāa yeⁿe Tiro
ndúúcu Sidón. ²²Cuin'díichí nī.
'Áámá n'dáátāa yeⁿe yáⁿāa Canaán
chí can'daā tá yeⁿe yáāⁿ vaacu tá.
N'gai yiicu tá ní ngaⁿa tá ngii tá
Jesús miiⁿ: N'díí Señor chí Daiya
David, nnéé ya'ai 'iinu nī 'úú.
'Áámá espíritu yeⁿe yááⁿnguiniūuⁿ
idindúú taaví táⁿā daiyá.

²³Jesús nguéé nan'guεεcútaⁿa yā
yeⁿē tá. Tuu'mi ní discípulos yeⁿē
Jesús miiⁿ ndaá yā nanáaⁿ yā ní
di'cuíftu yā Jesús ní caⁿa yā chíi yā
'iiⁿyāⁿ: N'dii Jesús, dííⁿ nī despedir
yeⁿē ta ti táⁿa 'cūū ní n'gai tá
cūchiitá cuaaⁿ daami yú.

²⁴Jesús nan'guεεcútaⁿa yā ní caⁿa
yā: Dendyuūs dicho'ó yā 'úú cucáávā
'iiⁿyāⁿ yeⁿe Israel chí tan'dúúca 'iiti
cuūchí chí nindái, 'tiicá yā.

²⁵Tuu'mi ní taⁿā miiⁿ ndaā ta
nanááⁿ Jesús ní chiintii'ya tá ní
caⁿa tá chíi tá 'iiⁿyāⁿ: N'díí Señor,
cunneé nī 'úú.

²⁶Jesús miiⁿ ní nan'guεεcútaⁿa
yā yeⁿē tá ní caⁿa yā chíi yā táⁿā:

Nguéé n'daācā chí divíí pan yeⁿé daiyá 'nū ní ca'á chi che'e 'yaānā.

²⁷Táⁿā miiⁿ ní caⁿā ta: 'Tíicā Señor, naati 'yáanā miiⁿ ngé'e tí yeⁿé cheeyéé chi ngéé yeⁿé na mesa yeⁿé 'iiví tí.

²⁸Tuu'mi ní Jesús miiⁿ nan'guēcútaⁿa yā ní caⁿa yā chii yā táⁿā: Díí n'daataá, dé'e chúucā ch'ēete vaadí i'téénú yeⁿé di. Cuuví ndúucu di tan'dúucā chi neⁿé di. Daiya tá miiⁿ ní hora mííⁿ nūⁿ nduuva yeⁿé ta.

**Jesús idííⁿ yā chi nduūvā
yeⁿe 'yaaⁿ n'dai 'iiⁿyāⁿ**

²⁹Jesús chiicā yā yeⁿé yáⁿāa miiⁿ ní ndaá yā 'diituú nuūⁿníⁿyáⁿā Galilea. Cuayiivi ní cuchée yā ná yiicū miiⁿ ní ch'iíndi yā. ³⁰Nééné 'yaaⁿ 'iiⁿyāⁿ ndaā miiⁿnuúⁿ yā nanááⁿ Jesús miiⁿ ní ndéé yā 'iiⁿyāⁿ chí ngāá yó'oo, ndúúcū 'iiⁿyāⁿ chí ngueenááⁿ, ndúúcū 'iiⁿyāⁿ 'díí'mí, ndúúcū 'iiⁿyāⁿ chí ló'ó ta'á yā o ca'a yā, ndúúcū 'yaaⁿ n'dái 'iiⁿyāⁿ chí véé cá tanáⁿā ca'ai chí ndíi yā. Ní s'neeⁿ yā 'iiⁿyāⁿ s'eeⁿ nanááⁿ Jesús miiⁿ. Ní Jesús dííⁿ yā chí nduūvā yeⁿe 'iiⁿyāⁿ s'eeⁿ. ³¹Nducyáácā 'iiⁿyāⁿ cheⁿe yiinú yā taachí n'diichi yā chí 'iiⁿyāⁿ 'díí'mí ní ngíí ngaⁿa, ní 'iiⁿyāⁿ chí ló'ó ta'á yā o ca'a yā nduuva yeⁿe yā, ní 'iiⁿyāⁿ chí nguéé ngii ngiicā, ngiica yā; ní 'iiⁿyāⁿ ngueenááⁿ, inaaⁿ yā; ní tuc'áa yā caⁿa yā: Dē'ē chúuca ch'ēete Nduyūs yeⁿe 'iiⁿyāⁿ Israel.

**Jesús ca'a yā chí che'e cuūuⁿ mil
'iiⁿyāⁿ**

(Mr. 8.1-10)

³²Jesús 'caí yā discípulos yeⁿé yā ní caⁿa yā chii yā discípulos: Yá'ái

cáávā 'iiⁿyāⁿ s'tíí tí 'āā 'iinū nguuví snée yā nduucú ní 'muuⁿ ní nguéé de'ē vee chí che'e yā. Nguéé neⁿé nadicho'ó 'iiⁿyāⁿ chí nguéé che'e yā. 'Áátií cuuví cúunu yā cuaaⁿ cyúúni chí náⁿa yā.

³³Tuu'mi ní discípulos yeⁿe yā caⁿa yā chii yā Jesús: 'Tíí cáⁿa 'nū nguai 'nū pan chí n'dee n'dái chí ch'éé nducyaaca 'iis'tíí na lugar 'cūū naachi nguēe ch'ēetinée 'iiⁿyāⁿ?

³⁴Jesús caⁿa yā chí yā discípulos: 'Áá 'yaaⁿ ca pan yeⁿé ní vee? Discípulos caⁿa yā: Ndeēchē panes ndúúcū n'duuví 'yaācā n'gaiyāá vee.

³⁵Jesús ca'a yā orden 'iiⁿyāⁿ s'eeⁿ chí 'cuēeté yā na yáⁿāa miiⁿ.

³⁶Tuu'mi ní Jesús sta'á yā ndu'ū ndeēchē panes miiⁿ ndúúcū 'yaācā miiⁿ. Ní ca'a yā gracias Nduyūs cáávā panes miiⁿ. Ní n'dee yā panes miiⁿ ní ca'a yā discípulos yeⁿe yā. Ní discípulos ní ca'a yā 'iiⁿyāⁿ chí snée miiⁿ. ³⁷Nducyáácā yā che'e yā ní chiitu 'iiⁿyāⁿ. Discípulos ní nān'guaáⁿ yā chí nángaāva ní chiitu tá ndeēchē 'cuéétē. ³⁸'iiⁿyāⁿ chí che'e yā miiⁿ ní taandu cuūuⁿ mil ngii sáⁿā. Nguéé diduuche yā n'daataá ndíí nguéé ndúú da'caiyāa. ³⁹Tuu'mi ní Jesús yaa'ví yā 'iiⁿyāⁿ s'eeⁿ chí cunaⁿá yā. Ní Jesús ndaá yā na barco miiⁿ ní cueⁿe yā na yáⁿāa yeⁿe Magdala.

'iiⁿyāⁿ s'eeⁿ ngiica yā vaadí n'giinu
(Mr. 8.11-13; Lc. 12.54-56)

16 'iiⁿyāⁿ fariseos ndúúcū 'iiⁿyāⁿ saduceos ndaá yā nanááⁿ Jesús chí neⁿe n'diichíneeⁿ yā Jesús. Ní chiica yā Jesús 'áámá vaadí n'giinu yeⁿé va'ai cheeti nguuví.

²Naati Jesús nan'guēcútaⁿa yā yeⁿé 'iiⁿ'yāⁿ s'eeⁿ ní caⁿ'a yā: Taachí ngii chíinū ní nanguuvi ní ndíí cuá'aa, ndís'tii ní ngaⁿ'á nī chi n'dáacā diiⁿ tiempo. ³Ní cuá'án ná nguētyaaⁿ taachí meēⁿ ngíí cuá'aa, ndís'tii ngaⁿ'a nī chi nguéé n'dáacā diiⁿ tiempo maaⁿ. Ndís'tii 'uūvī naaⁿ 'uūvī cheendí nī chi déenu nī de'ē chí cúuví yeⁿ'ē nanguuvi naati nguéé tuumicadínuuⁿ nī de'ē chí cuuvi tiempo 'cūū ndúúcū señales chí inaaⁿ nī. ⁴Iiⁿ'yāⁿ chí cuncnáá idiíⁿ yā ndúúcū 'iiⁿ'yāⁿ chí nguéé i'téenu yā Ndyuūs 'iiⁿ'yāⁿ miiⁿ néⁿ'e yā snaaⁿ yā 'áamá vaadī n'giinu naati señal miiⁿ nguéé ndaāca yā. Dámaāⁿ cánéé señal yeⁿ'e profeta Jonás chí ndíí cuaaⁿ vmnaaⁿ chí canéé nguuⁿ na libro yeⁿ'e Ndyuūs. Jesús s'néeⁿ yā 'iiⁿ'yāⁿ s'eeⁿ ní cueⁿ'e yā.

Levadura yeⁿ'e 'iiⁿ'yāⁿ fariseos

(Mr. 8.14-21)

⁵Discípulos yeⁿ'e Jesús ndaá yā táamá lado yeⁿ'e nuūⁿ'nīⁿ'yáⁿ'ā ní chinaáⁿ yā chí cāndeē yā pan. ⁶Jesús ca'a yā chíi yā 'iiⁿ'yāⁿ s'eeⁿ: Cundēē ndís'tii cuidado yeⁿ'e levadura yeⁿ'e 'iiⁿ'yāⁿ fariseos ndúúcū 'iiⁿ'yāⁿ saduceos ti levadura miiⁿ ní chíiⁿ chí chí'cueeⁿ yā. ⁷Discípulos ní tuca'á yā caⁿ'a yā nguaaⁿ maaⁿ yā. ¿Áá chí nguéé ndeē yú pan chíiⁿ chí 'tíicā ngaⁿ'a yā? ⁸Jesús miiⁿ tuumicadínuuⁿ yā yeⁿ'ē chí inadacíinūuⁿ discípulos ní caⁿ'a yā chíi yā discípulos: ¿De'ē cúuví chí inadacadínuuⁿ nī 'túucā na staava yeⁿ'é nī chí cáávā chí nguéé ndeē nī pan? Ndís'tii ní dúúvīi i'téenu nī. ⁹¿Áá nguéé

ituumicadínuuⁿ nī, ndii nguēē ndúú inangaacú nī yeⁿ'ē nyuⁿ'u panes chí che'e nyuⁿ'u mil saⁿ'ā? ni ¿Áá n'deēē 'cuééteē ca panes nángaāva? ¹⁰¿Áá ndíí nguéé nduu inangaacú nī yeⁿ'ē ndeēchē panes chí che'ē cuūuⁿ mil saⁿ'ā? ni ¿Áá n'deēē 'cuééteē ca panes nángaāva? ¹¹¿De'ē cuuvi chí nguēē ituumicadínuuⁿ nī chí nguéé cáávā pan miiⁿ chí caⁿ'á chí cundee nī cuidado yeⁿ'e levadura yeⁿ'e 'iiⁿ'yāⁿ fariseos ndúúcū 'iiⁿ'yāⁿ saduceos?

¹²Tuu'mi ní discípulos tuumicadínuuⁿ yā chí Jesús miiⁿ nguéé caⁿ'a yā chíi yā chí discípulos nguéé cundee yā cuidado yeⁿ'e levadura yeⁿ'e pan ti yeⁿ'e chí chí'cueeⁿ 'iiⁿ'yāⁿ fariseos ndúúcū 'iiⁿ'yāⁿ saduceos.

Pedro miiⁿ caⁿ'a sa nduudu cuaacu chí Jesús chí Cristo yā

(Mr. 8.27-30; Lc. 9.18-21)

¹³Jesús ndaá yā yeⁿ'e yáⁿ'āa yeⁿ'e Cesarea yeⁿ'e yáⁿ'āa yeⁿ'e Filipo ní itinguuneéⁿ yā discípulos yeⁿ'e yā ní caⁿ'a yā: ¿Du'ú 'úú ngaⁿ'a 'iiⁿ'yāⁿ yeⁿ'ē 'úú chí Saⁿ'ā chí Daiya Dendyuūs 'úú?

¹⁴Discípulos ní caⁿ'a yā: Náⁿ'a yā ní ngaⁿ'a yā chí díí chí Juan chí cheedinuūⁿ'nī díí. Náⁿ'a yā ní ngaⁿ'a yā chí díí chí profeta Elías miiⁿ díí. Níicú náⁿ'a yā ní ngaⁿ'a yā chí díí profeta Jeremías o 'āā du'ú nūuⁿ profeta.

¹⁵Jesús caⁿ'a yā chíi yā discípulos: ¿Du'ú 'úú ngaⁿ'a ndís'tii?

¹⁶Simón Pedro miiⁿ nan'guēcútaⁿa sa ní caⁿ'a sa: N'dii ní Cristo chí Daiya Dendyuūs chí cānduuchi cueⁿ'e daāⁿmaⁿ.

¹⁷Tuu'mi ní Jesús miiⁿ nan'gueecútaⁿa yā yeⁿē sa ní caⁿa yā: De'ē chúucā n'dai dii Simón, daiya Jonás, ti 'úú nguéé ch'iⁿí dii ndii nguēe nduu táámá 'iiⁿyāⁿ, naati Chiidá chi canée yā ná va'ai chēeti nguuvi ch'iⁿí yā dii. ¹⁸Úú ntūⁿ ngaⁿá ngí dii chi dii ní nguuvi Pedro dii ní nguuvi di neⁿe caaⁿmaⁿ tuūu. Ní vmaaⁿ 'áámá tuūu ch'etēé 'cūū chí neⁿe caaⁿmaⁿ Cristo, ní 'úú din'daí yaācū yeⁿé. Ní ndíí mar 'áámá poder yeⁿe yáá'n'guiinūⁿ nguéé cuuvi din'nú'u tuūu miiⁿ. ¹⁹Úú teé dii, Pedro, poder tan'dúucā chi teé dii llaves yeⁿe va'ai chēeti nguuvi yeⁿe naachí Ndyuūs ngaⁿa ntiⁿnyúⁿ yā 'tíicā díⁿ. Ní tanducuéⁿē chi cachiichí di na iⁿ'yeeⁿdí 'cūū cuchiichi ntūⁿ ná va'ai chēeti nguuvi. Ní tanducuéⁿē chi n'gúuⁿ di na iⁿ'yeeⁿdí 'cūū 'cuaāⁿ ntūⁿ ná va'ai chēeti nguuvi.

²⁰Tuu'mi ní Jesús ca'á yā chii yā discípulos yeⁿe yā chi nguéé caaⁿmaⁿ yā cuuvi yā mar 'áámá 'iiⁿyāⁿ chi Jesús miiⁿ chi Cristo yā.

Jesús caⁿa yā chí canee chi 'cuūvi yā

(Mr. 8.31-9.1; Lc. 9.22-27)

²¹Tuu'mi ní Jesús miiⁿ tucá'a yā ch'i'cueeⁿ yā discípulos yeⁿe yā. 'Úú cánéé chi caⁿá na yáāⁿ Jerusalén ní cánéé chí 'cueenu taaví cuuvi nééne n'deēe dendu'ū yeⁿé 'iiⁿyāⁿ ndiicūū chi ngaⁿā ntiⁿnyuⁿ yeⁿe yaācū miiⁿ, ndúucū chiiduú n'gēetē, ndúucū yeⁿe maestros yeⁿe ley. Cuayiivi ní 'iiⁿyāⁿ s'eeⁿ 'caaⁿnúⁿ yā 'úú. Ní 'cuūví. Ndiichi ndii 'ínú nguuvi ní 'úú nduūchí yeⁿe nguaaⁿ tináⁿā. ²²Tuu'mi ní Pedro miiⁿ ní cueⁿe sa ndúucū Jesús 'áámá lado ní caⁿa

sa chii sa Jesús: N'díí Señor, nguéé 'cuááⁿ ní Ndyuūs 'iivi yú ndii mar 'áámá naaⁿ chi cuuvi chuū ndúucu nī.

²³Jesús nan'gueecútaⁿa yā yeⁿe Pedro miiⁿ ní caⁿa yā chii yā saⁿa: Diví di nanaáⁿ, dii chí tan'dúucā yáá'n'guiinūⁿ. Dii ní nguéé nadicadíinuuⁿ di tan'dúucā Ndyuūs nadicadíinuuⁿ yā ti nadicadíinuuⁿ di yeⁿe dendu'ū yeⁿe iⁿ'yeeⁿdí 'cūū.

²⁴Tuu'mi ní Jesús caⁿa yā chii yā discípulos yeⁿe yā: Nduuti chí 'áámá 'iiⁿyāⁿ néⁿe yā caⁿá yā nduucú, canée chí cu'neeⁿ maáⁿ yā tanducuéⁿē dendu'ū chí véé yeⁿe yā ní cuta'á yā cruz yeⁿe yā chí tan'dúucā chí 'cueenu taaví yā cuuvi cucáāvā 'úú. Ní 'íicú caⁿa yā nduucú. ²⁵Tí nducyáácá 'iiⁿyāⁿ chí neⁿe yā nadanguáⁿai maáⁿ yā vida yeⁿe yā na iⁿ'yeeⁿdí 'cūū ní dindaí yā táámá vida yeⁿe yā nanááⁿ Ndyuūs. Ní nducyáácá 'iiⁿyāⁿ chí dindaí yā vida yeⁿe yā cucáāvā 'úú ní nandaācá yā táámá vida yeⁿe yā nanááⁿ Ndyuūs. ²⁶¿De'e dichí'vē yeⁿe saⁿā ndúuti chí diiⁿ sa ganar nducuéⁿē chí véé núúⁿmáⁿ iⁿ'yeeⁿdí 'cūū ní dindaí sa alma yeⁿe sa? ¿Áá n'deēe cuuvi nadí'vē sa 'áámá 'iiⁿyāⁿ cucáāvā alma yeⁿe sa? ²⁷Naati 'úú chí Saⁿá chí Daiya Dendyuūs 'úú ní ndaá ndúucū dēevē ch'ēete n'dai yeⁿe Chiidá chí canée yā na va'ai chēeti nguuvi. Ní ndaá ndúucū ángeles yeⁿé. Tuu'mi ní 'úú díⁿ chí nadí'vē ca'áámá ca'áámá yā tuunu tuunu ca chí ndíⁿ yā. ²⁸Cuaacu níⁿnyúⁿ ngaⁿá ngí ndís'tii chí véé náⁿa nī chí snéē nī 'muuⁿ chí nguéé 'cuūvi nī taanduvéé ndíí snaaⁿ nī Saⁿa chí Daiya Dendyuūs ndaa

sá chi caaⁿmaⁿ ntiiⁿnyuⁿ sa yeⁿe tanducuéⁿē.

Jesús n̄dáaⁿ yā cuerpo yeⁿe maaⁿ yā
(Mr. 9.2-13; Lc. 9.28-36)

17 Chó'ōo jaāⁿ nguuvi, ní Jesús candéε yā Pedro ndúúcu Jacobo ndúúcu Juan chi 'dínū Jacobo. Ní Jesús cueⁿé yā ndúúcu saⁿā s'eeⁿ na 'áamá yiicū yaacu. ²Ní Jesús n̄dáaⁿ yā cuerpo yeⁿe maáⁿ yā nanááⁿ saⁿā s'eeⁿ. Ní chín'gai naaⁿ yā tan'dúúcā 'yáⁿā 'iicu catecai yā ní nduuví cuéε tan'dúúcā dεεε. ³Cuin'diichí nī. Tuu'mí nūuⁿ che'enaāⁿ Moisés ndúúcu profeta Elías. 'Iiⁿyāⁿ s'eeⁿ chi n'díí ndíí cuaaⁿ vmnaaⁿ ní nndeé yā ndúúcu Jesús miiⁿ. ⁴Tuu'mi ní Pedro caⁿa sá chii sa Jesús: Señor, de'ε chúúca n'dáacā yeⁿe yú chí 'cuεtinée yú 'muuⁿ. Ndúúti chí neⁿé nī din'dai nū ná 'iinū va'ai n'gaiyāá, 'áamá ní yeⁿé n'dií, táamá ní yeⁿe Moisés, táamá ní yeⁿe profeta Elías.

⁵Taachí Pedro ngaⁿa sá chuū, 'áamá meēⁿ cuéε chí ngii yáⁿāa ndii sn'díí 'iiⁿyāⁿ s'eeⁿ ní discipulos ch'iindiveéⁿ yā 'áamá nduudu ná meēⁿ miiⁿ chí ngaⁿā: Sáⁿa 'cūū Daiyá chí neⁿe taaví ní yeenú cáávā sáⁿa 'cūū. 'Cu'neeⁿ veéⁿ nī yeⁿē sa.

⁶Taachí discipulos ch'iindiveéⁿ yā nduudu 'cūū candiitín'dií yā ní dii'yaa n'dái yā chií. ⁷Tuu'mi ní Jesús miiⁿ ndaa niiⁿnuúⁿ yā ní tuu'ví yā discipulos ní caⁿa yā: Nducueeⁿ nī. Nguéé 'va'a nī.

⁸Taachí nducueeⁿ discipulos 'āā ntéé n'diichí yā du'ū vε caati 'āā dámaāⁿ Jesús miiⁿ n'diichi yā.

⁹Taachi nangua'á yā yeⁿe yiicū miiⁿ ní na yúúni naachí cunaⁿa yā,

Jesús caⁿa yā chii yā 'iiⁿyāⁿ s'eeⁿ chí nguéé cuuví yā mar 'áamá 'iiⁿyāⁿ yeⁿe chí n'diichí yā ndíí taachi Saⁿā chí Daiya Ndyuūs nduuchí yā yeⁿe nguuaⁿ tináⁿā.

¹⁰Tuu'mi ní discipulos ntiinguunéeⁿ yā Jesús ní caⁿa yā: ¿De'ε cúuví chí ngaⁿa maestros yeⁿe ley chí canéé chí profeta Elías miiⁿ ndaa sa vmnaaⁿ?

¹¹Jesús miiⁿ nán'guεεcútaⁿa yā ní caⁿa yā chii yā discipulos: Cuaacu níⁿnyúⁿ profeta Elías miiⁿ ndaaá sa vmnááⁿ vmnaaⁿ ní 'cuundiyāⁿ sa tanducuéⁿē. ¹²Naati 'úú ní ngaⁿā ngii ndís'tií chí profeta Elías miiⁿ ní 'āā ndaa yā. Ní 'iiⁿyāⁿ s'uuⁿ nguéé tuumicadínuuⁿ yā yeⁿe yā du'u chí Elías miiⁿ naati diíⁿ yā ndúúcu Elías miiⁿ tan'dúúcā chí neⁿe yā ní n'geenu sá ngii. 'Tiicá ntúūⁿ Saⁿā chí Daiyá Ndyuūs 'cuenu sá cuuvi yeⁿe 'iiⁿyāⁿ s'uuⁿ.

¹³Tuu'mi ní discipulos tuumicadínuuⁿ yā chí Jesús ngaⁿa yā ngii yā discipulos yeⁿe Juan chí cheedínuuⁿnī.

Jesús idiíⁿ yā chí nduūvā yeⁿe 'áamá saⁿā 'dííⁿ chí ndii sa ataques

(Mr. 9.14-29; Lc. 9.37-43)

¹⁴Taachí ndaa Jesús ndúúcu discipulos yeⁿe yā naachi snéé n'dee n'dái 'iiⁿyāⁿ, tuu'mi ní ndaa 'áamá saⁿā nanááⁿ Jesús ní chiintii'ya sá ní caⁿa sá: ¹⁵Señor, nnéé ya'ai 'iinú nī daiyá ti sta'a ataques daiyá ní neené n'geenu sá ngii. Nééné n'dee cuūvi in'dáa nuūⁿ sa na yaⁿā ní 'āā neené n'deē cuūví chí in'dáa nuūⁿ sa nguuaⁿ nuūⁿnī. ¹⁶Ní 'āā chí nguú saⁿā nanááⁿ discipulos yeⁿe nī naati nguéé ngii dííⁿ yā chí nduūvā yeⁿe sa.

17 Jesús nan'gueecútaⁿa yā ní caⁿa yā chii yā saⁿā: Ndís'tií 'iiⁿyāⁿ chi nguεe i'téenu nī ndíí nguéé ndúú idiiⁿ n'daacá nī. ¿Áá 'naaⁿ tiempo cánéé chi cunee ndúúcu nī? ¿Áá 'naaⁿ cuhéé ndúúcu ndís'tií? Candée nī 'muuⁿ saⁿā 'dííⁿ.

18 Jesús miiⁿ yaaⁿvi neeⁿ yā espíritu yeⁿe yááⁿnguiniūⁿ ní espíritu miⁿ nan'dáa yeⁿe saⁿā 'dííⁿ miiⁿ ní tuuⁿmí nūuⁿ ndúuvā yeⁿe sa.

19 Tuuⁿmi ní discípulos ní ndaa yā nanááⁿ Jesús na 'áámá lado naachi nguéé snée 'iiⁿyāⁿ ní caⁿa yā chii yā Jesús: ¿De'ē cúúví chí nús'uū nguéé chí tun'dáa 'nū espíritu yeⁿe yááⁿnguiniūⁿ miⁿ yeⁿe saⁿā 'díí?

20 Jesús miiⁿ ní caⁿa yā chii yā discípulos: Nguéé ch'εete vaadī i'téenu yeⁿe nī. Cuaacu níⁿnyúⁿ ngaⁿá ngíí ndís'tií chi nduuti chí véé vaadī i'téenu yeⁿe nī ní tan'dúúca 'áámá duuti yeⁿe yīivē ntíí'yaá chí 'lííⁿ ca cuuvi nī yīicū 'cúú: Yīicū, cuvī ndii 'muuⁿ ní cuéⁿé ndíí taama lugar. Ní yīicū ní caⁿā. Tanducuéⁿe cuuvi dííⁿ nī nduuti chí cuaacu chí i'téenu nī. 21 Naati tanducuéⁿe espíritus yeⁿe yááⁿnguiniūⁿ chí 'túúca nguéé nan'daā yeⁿe 'iiⁿyāⁿ chí 'tiicā nūuⁿ caati dámaāⁿ ndúúcu chí ngaⁿangua'a yā ndúúcu chí nguεe 'āa ca'diiⁿnúⁿ yā nguuvi chí ngaⁿangua'á yā.

Jesús caⁿa ntuúⁿ yā táámá yeⁿe chí 'cuūvi yā

(Mr. 9.30-32; Lc. 9.43-45)

22 Taachi 'iiⁿyāⁿ s'eeⁿ snée yā na yáⁿā Galilea Jesús caⁿa yā chii yā discípulos yeⁿe yā: Saⁿā chí Daiya Ndyuūs ní 'iiⁿyāⁿ canéé chí ca'a

yā saⁿā na táá 'iiⁿyāⁿ. 23 Ní 'iiⁿyāⁿ 'caaⁿnuⁿ yā saⁿā miiⁿ naati saⁿa miiⁿ ndii chííⁿ ndii 'íínú nguuvi nduuchi sa yeⁿe nguaaⁿ tināⁿā. Discípulos ní s'neeⁿ ndaachi yīinú yā.

Yeⁿe chí nadíí'vε yā yeⁿe yáacū templo

24 Taachí ndaa Jesús ndúúcu discípulos yeⁿe yā na yáāⁿ Capernaum, 'iiⁿyāⁿ s'eeⁿ chí indaaca tuumī yeⁿe yaacū templo ní ndaa yā nanááⁿ Pedro miⁿ. Ní caⁿa yā chii yā saⁿā: ¿Áá nguéé nadíí'vε maestro yeⁿe nī tuumī chí cáávā yeⁿe yaacū templo?

25 Pedro miⁿ ní caⁿā sa chí 'tíicā va. Taachí sndaā yā va'ai yeⁿe sa Jesús miⁿ caⁿa yā ndúúcu Pedro: ¿Táácā chí ngíí yeⁿe dí, díí Simón Pedro? ¿Du'ú nadíí'vε impuestos yeⁿe yáⁿā nanááⁿ reyes yeⁿe iⁿ'yeeⁿdí 'cūú? ¿Áá daiya 'iiⁿyāⁿ yeⁿe yáⁿā naachi rey ngaⁿa ntiⁿnyúⁿ yā nadíí'vε sa o 'iiⁿyāⁿ chí cuchii táámá lado?

26 Pedro miⁿ nan'gueecútaⁿa sa ní caⁿa sa chí sa Jesús: 'Iiⁿyāⁿ chí chiica táámá lado nadíí'vε yā. Jesús caⁿa yā chí yā Pedro: Daiya 'iiⁿyāⁿ yeⁿe yáⁿā naachi rey ngaⁿa ntiⁿnyúⁿ yā miiⁿ ní nguéé canéé chí nadíí'vε sa.

27 Nguéé neⁿe yú chí nduuvi taaⁿ yā. Maaⁿ ní cueⁿe di ná nuūⁿniⁿ'yáⁿā ní caⁿnuuⁿ di 'áámá gancho yeⁿe 'yaacā nguaaⁿ nuūⁿniⁿ. 'Yaacā chí ndaacā di vmnááⁿ vmnāaⁿ cutá'a di ní nn'guaaⁿ di cheendí tí. Mííⁿ ní ndaacā di 'aama tuumī. Ndúúcu tuumī miⁿ ní caⁿa di cá'á di yeⁿe 'úú ndúúcu yeⁿe maaⁿ di chí nadíí'vε yú yeⁿe yaacū templo.

¿Du'ú 'iiⁿyāⁿ chí ch'εete ca yā?

(Mr. 9.33-37; Lc. 9.46-48)

18 Nguuvi mííⁿ discípulos yeⁿe Jesús ndaa yā nanááⁿ

yā ní caⁿa yā chii yā Jesús: N'dií Jesús, ¿du'u cá chi ch'ēete cá naachi Ndyuūs ngaⁿa ntiⁿnyuⁿ yā na va'ai chēeti nguuví?

²Jesús 'cai yā 'áámá saⁿā 'lííⁿ ní ch'lííndi yā saⁿā 'lííⁿ náávtaⁿa yeⁿe discípulos. ³Ní caⁿa yā: Cuaacu nííⁿnyúⁿ ngaⁿá ngíí ndís'tií. Ndúúti chi ndís'tií nguéé dííⁿ nī tan'dúúcā 'áámá saⁿā 'lííⁿ nguéé cuuvi ndaa nī naachí Ndyuūs ngaⁿa ntiíⁿnyúⁿ yā na va'ai chēeti nguuvi. ⁴Tííca 'āā du'ú nūuⁿ 'iiⁿyāⁿ chi ndiicūⁿ maáⁿ yā tan'dúúcā saⁿa 'lííⁿ 'cūū, 'iiⁿyāⁿ 'cūū chi ch'ēete ca yā naachí Ndyuūs ngaⁿa ntiíⁿnyúⁿ yā na va'ai chēeti nguuvi. ⁵Āā du'ú nūuⁿ 'iiⁿyāⁿ chi 'cuaáⁿ yā 'áámá saⁿā 'lííⁿ ndúúcū chi duuchí, tuu'mi ní 'cuaáⁿ yā 'úú.

Dendu'ū chi idiíiⁿ chí 'iiⁿyāⁿ dínuuⁿndí yā

(Mr. 9.42-48; Lc. 17.1-2)

⁶Ní caⁿa Jesús: Āā du'ú nūuⁿ 'iiⁿyāⁿ chí dííⁿ yā chí 'áámá chēe chí n'gaiyāā chí i'téenu yā 'úú dínuuⁿndí yā n'daācā ca cáāvā 'iiⁿyāⁿ miiⁿ chí 'iiⁿyāⁿ s'eeⁿ cāchiichí yā 'áámá tuūu yúúú chí íngúú 'iiⁿyāⁿ na daandú yā ní canuúⁿ yā 'iiⁿyāⁿ miiⁿ naachi yāanūuⁿ yeⁿe nuūⁿníⁿyáⁿā ní 'iiⁿyāⁿ miiⁿ cun'dáá nuúⁿ yā. ⁷Dē'e chúúca ndaachíí yeⁿe 'iiⁿyāⁿ yeⁿe iⁿ'yeeⁿdí 'cūū cáāvā dendu'ū chí 'túúca chí diíⁿ chí cuuvá yā na nuuⁿndi. Āā véé nūuⁿ cosas chí 'tííca naati dē'e chúúca ndaachíí yeⁿe 'iiⁿyāⁿ chí dííⁿ yā chí táámá 'iiⁿyāⁿ cuuva yā na nuuⁿndi.

⁸Ní nduuti chí ta'a di o ca'a di idiíiⁿ chí dínuuⁿndí nī, 'caacá nī ta'a di o ca'a di ní divíí di. N'dáacā ca chí ndaa di lóō ta'a di o lóō

ca'a di na vida cueⁿe daāⁿmaⁿ ní nguéé chí caⁿa di ndúúcū 'uūvi ta'a di o nduu 'uūvi ca'a di na infierno naachí nguuchi yaⁿā chí 'áámá cūnee. ⁹Nduutí chí nduutináaⁿ di idiíiⁿ chí idínuuⁿndí di, tun'dáa di ní divíí di. N'daācā ca chí cūnee di ndúúcū 'áámá nduutináaⁿ di nguéé ti chí cūnee di ndúúcū nduu 'uūvi nduutináaⁿ di ní caⁿa di ná nguuchi yaⁿā chí 'áámá cānee cueⁿe daāⁿmaⁿ.

'Áámá ejemplo yeⁿe 'iiti cuūchí chí nindái

(Lc. 15.3-7)

¹⁰Ní caⁿa Jesús: Tandii ra dííⁿ nī ndúúcū mar 'áámá da'caiyāa n'gaiyāā ní dííⁿ nī chí cuuvi dínuuⁿndí nī. Nguéé cunncaā dííⁿ nī yeⁿe ti 'úú ngaⁿá ngíí ndis'tií chí ángeles yeⁿe da'caiyāa snée yā ná va'ai chēeti nguuvi nanááⁿ Chiidá nī inaaⁿ yā cucáāvā da'caiyāa. ¹¹Ti Saⁿā Daiyá Ndyuūs miiⁿ ní ndaa sa chí nadinguáⁿai sa chííⁿ chí nindái.

¹²¿Dē'ē inadiciadiinuuⁿ ndís'tií? Nduuti chí 'áámá saⁿā véé 'áámá ciento 'iiti cuūchí yeⁿe sa ní cuuvi ndái 'áámá ti 'áá nguéé cū'neeⁿ sa 'iiti chí cuūⁿ ngēcú ndítiiⁿ'yuⁿ cuúⁿ tī ní caⁿa sa cuááⁿ yiicū miiⁿ ní cun'nuuⁿ sa 'áámá 'iiti chí nindái miiⁿ. ¹³Ndúúti chí ndaācā sa 'iiti, cuaacu nííⁿnyúⁿ ngaⁿá ngíí ndís'tií ti yeenú taavi sa cáāvā 'iiti chí nindai nguéé ti ndu'ū chí cuūⁿ ngēcú ndítiiⁿ'yuⁿ cuúⁿ tī chí nguéé chí nindái tī. ¹⁴Tííca Chiidá yú chí canée yā ná va'ai chēeti nguuvi nguéé neⁿe yā chí mar 'áámá chí n'gaiyāā s'ūuⁿ cuuvi ndái.

'Iiⁿyāⁿ canee chí nadich'eécú yā yeⁿ'ē
v'íi

(Lc. 17.3)

15'Tiicá ntúūⁿ ngaⁿá ngíí ndís'tií:
Ndúúti chí 'dífnū di díiⁿ sa chí nguéé
n'daācā ndúúcu di, cueⁿ'e di ní
ndee di ndúúcu sa nguaaⁿ maáⁿ nī
yeⁿ'e chí nguēē n'daācā chí díiⁿ sa.
Nduuti chí cu'neeⁿ veeⁿ sa yeⁿ'e di,
'āā nan'dāā n'dái di ndúúcu 'dífnū
di. 16'Naati nduuti chí nguéé cu'neeⁿ
veeⁿ sa yeⁿ'e di 'cuai di ná 'uūvi
o 'iīnu 'iiⁿyāⁿ. Ní chíi yā na 'uūvi
yā o na 'iīnu yā chí 'caandiveéⁿ yā
tanducuéⁿ'ē chí caaⁿ'maⁿ di ní véé
testigos yeⁿ'é di tan'dúúca chí canéé
nguūⁿ na ley. 17'Ndúúti chí 'díinu
di nguéé cu'nēēⁿ veeⁿ sa yeⁿ'é yā
ndúúcu yeⁿ'e di cúúví dí 'iiⁿyāⁿ chí
ngaⁿ'a ntiīⁿnyúⁿ yā yeⁿ'ē 'iiⁿyāⁿ chí
i'téenu yā Ndyuūs. Ndúúti chí 'dínu
di miiⁿ nguéé cu'nēēⁿ veeⁿ sa yeⁿ'é
'iiⁿyāⁿ chí ngaⁿ'a ntiīⁿnyúⁿ yā yeⁿ'e
'iiⁿyāⁿ chí i'téenu yā Ndyuūs, cu'neeⁿ
di 'dífnū di tan'dúúca 'áámá 'iiⁿyāⁿ
ndiica yáⁿ'ái chí nguéé yeⁿ'ē ndaata
yeⁿ'e di o tan'dúúca chí 'aama saⁿ'ā
chí inn'guēē sa yeⁿ'ē yáⁿ'āa.

18'Cuaacu níⁿnyúⁿ ngaⁿ'á ngíí
ndís'tií: Tanducuéⁿ'ē chí nguéé 'cuaaⁿ
nī chí 'iiⁿyāⁿ díⁿ yā na iⁿ'yeeⁿ'dí
'cūū Ndyuūs chí canéé ná va'ai
chéeti nguuvi nguéé 'cuaaⁿ ntuúⁿ yā.
Tanducuéⁿ'ē chí 'cuáaⁿ nī chí 'iiⁿyāⁿ
díⁿ yā na iⁿ'yeeⁿ'dí 'cūū Ndyuūs chí
canéé ná va'ai chéeti nguuvi 'cuaaⁿ
ntuúⁿ yā.

19'Taama vmnéⁿ'ēē ngaⁿ'á ngíí
ndís'tií: Nduuti chí ná 'uūvi ndís'tií
nduuvidaamá nī ná yáⁿ'āa 'cūū
yeⁿ'e 'āā de'é nūⁿ chí caacá nī yeⁿ'ē
Chiidá chí canéé yā na va'ai chéeti

nguuvi, Chiidá téē yā ndís'tií. 20'Tií
naachí snéé 'uūvi o 'iīnu 'iiⁿyāⁿ
chí nduuvidaama yā cucáāvā chí
duuchí, miiⁿ caneeⁿ nduucú yā.

21'Tuu'mi ní ndaā Pedro miiⁿ
nanááⁿ Jesús ní caⁿ'a yā chíi yā
'iiⁿyāⁿ: N'díí Señor, 'áá n'deēē cuūvi
caneé chí nádich'eécú yeⁿ'ē 'diīnú
chí nguéé n'daācā idiīⁿ sa nduucú?
'Áá ndēēchē cuūví?

22'Jesús caⁿ'a yā chíi yā Pedro:
Nguéé ngaⁿ'á ngíí díi chí ndēēchē
cuuvi tií 'iīnú ngēēcu ndiichi veces
chí ndēēchē ngaⁿ'á ngíí díi.

Ndúú 'uūví 'iiⁿyāⁿ chí sn'diicu yā

23'Ní caⁿ'a Jesús: 'Tíicā naachí
Ndyuūs ngaⁿ'a ntiīⁿnyúⁿ yā ná va'ai
chéeti nguuvi ní tan'dúúca 'áámá
rey chí neⁿ'e yā tun'dāa yā cuenta
ndúúcu mozos yeⁿ'é yā. 24'Taachí
neⁿ'e yā tuca'a yā tun'daa yā cuenta,
candēē yā 'áámá mozo yeⁿ'é rey
nanáaⁿ yā chí can'diicū sa n'deeē
n'dái mil tuūmī. 25'Mozo miiⁿ ní
nguéé cuuvi díiⁿ sá nadíⁿ'vē sa.
Tuu'mi ní rey chí 'iiví sa caⁿ'a yā
chii yā táámá mozo miiⁿ chí n'diicui
sa mozo ndúúcu n'daataā yeⁿ'ē sa
ndúúcu daiya sa ndúúcu tanducuéⁿ'ē
chí véé yeⁿ'ē sa ní nadíⁿ'vē mozo miiⁿ
chí can'díicū sa yeⁿ'é yā. 26'Tuu'mi
ní mozo miiⁿ candiitīn'díí sa nanááⁿ
'iivi sa ní di'cuútu sa 'iiⁿyāⁿ ní caⁿ'a
sa chíi sa 'iiⁿyāⁿ: N'díí Señor, cunee
ngíínū nī 'áámá tiempo ní 'úú ní
nadíⁿ'vē tanducuéⁿ'ē yeⁿ'é nī. 27'Iivi
sa miiⁿ ní nneé ya'ai 'iīnu yā saⁿ'ā
ní caⁿ'a yā chíi yā saⁿ'ā: Cunaⁿ'ā di
ní 'āā ntéē cun'diicū di yeⁿ'é. 28'Sá'a
'cūū cúinaⁿ'a sa ní nan'daā sa ní
ndaācā sa mozo chí daama idiīⁿ sa
ntiīⁿnyuⁿ ndúúcu sa. Táámá mozo

miiⁿ can'dífcu ntúūⁿ sa 'aama ciento tuūmī yeⁿē sa. Ní mozo miiⁿ chita'ā sa daandu sáⁿā miiⁿ ní tucá'a sa chiī sa yaācū sa ní caⁿa sa: Nadí'vē di chi can'dífcu di. ²⁹Tuu'mi ní mozo miiⁿ candiitín'diī sa nanáaⁿ sa ní caⁿa sa chiī sa: Cunee ngíínú dí 'tée ní nadí'vé yeⁿē di. ³⁰Naati saⁿā miiⁿ nguéé 'cuūⁿ sa. Cheⁿe sa chiica sa nuūⁿndī yeⁿe mozo miiⁿ ndúúcu sa ní s'nuúⁿ yā mozo vácūū ndíí nadí'vē sa chi cándífcu sa.

³¹Tanáⁿā mozos ndúúcu sa n'diichi yā chi chiī ní s'neeⁿ ndaachi yiinú yā. Ní cheⁿe yā nanáaⁿ 'iivi yā ní caⁿa yā chiī yā 'iiví yā tanducuéⁿē chí chiī. ³²Tuu'mi ní 'iiví mozos 'cai yā mozo 'cūū chi ndaa sa nanáaⁿ yā. Ní caⁿa yā chiī yā mozo miiⁿ: Dii mozo, nguéé n'daācā di. Tanducuéⁿē chí can'dífcu di yeⁿé 'āā chíí dii chí 'āā ntéé nadí'vē di ti di'cuítu di 'úú. ³³¿Áá nguéé nnee ya'āi 'iinu di mozo ndúúcu di tan'dúúcā chí 'úú nnee ya'ai 'iinú dii? ³⁴Tuu'mi ní nduuví taáⁿ 'iivi sa ní chiicá yā nuūⁿndī yeⁿē sa. Ní cueⁿe sa vácūū chí ch'eⁿé yā saⁿā ní miiⁿ canee sa ndii nadí'vē sa tanducuéⁿē chí can'dífcu sa yeⁿe yā.

³⁵'Tiicá ntúūⁿ Chiidá chí canéé na va'ai chēēti nguuví 'tíicā díⁿ yā ndúúcu ndís'tiī nduuti chí ndís'tiī ní nguéé nadich'ēcū nī ndúúcu nuuⁿmaⁿ staava yeⁿe nī yeⁿe 'áámá 'áámá 'dífnu nī yeⁿe chí nguéé n'daācā ndííⁿ yā ndúúcu nī.

Jesús ngí'cueeⁿ yā yeⁿē chí 'teechí vi'i 'iiⁿyāⁿ

(Mr. 10.1-12; Lc. 16.18)

19 Taachí Jesús ch'íínú caⁿa yā ndúúúⁿ 'cūū chíicá yā

na yáⁿā Galilea ní cueⁿe yaⁿai cá yā na yáⁿā yeⁿe Judea chí táámá lado yeⁿe yíicú Jordán. ²Nééné 'yaaⁿ 'iiⁿyāⁿ cueⁿé yā n'daa yā Jesús miiⁿ ní Jesús díⁿ yā chí nduūvā yeⁿe 'iiⁿyāⁿ s'eeⁿ chí ngiitā.

³Tuu'mi ní 'iiⁿyāⁿ fariseos ndaa yā nanáaⁿ Jesús miiⁿ ti neⁿé yā chí n'diichíneeⁿ yā Jesús miiⁿ. Ní ngaⁿa yā ngii yā 'iiⁿyāⁿ: N'diī Jesús, ¿'áá canéé ná ley chí saⁿā ní cu'neeⁿ sa n'daataa yeⁿē sa chí nguéé ch'ēete de'ē chí ndiīⁿ tá?

⁴Jesús miiⁿ nan'guēcútaⁿa yā ní caⁿa yā chí yā 'iiⁿyāⁿ s'eeⁿ: ¿'Áá nguéé n'geeⁿ nī naachi canéé nguūⁿ na libro yeⁿé Ndyuūs naachí ngaⁿa chí Ndyuūs din'dái yā taanduvéé cosas ndíí cuááⁿ vmnaaⁿ ní din'dái yā saⁿā ndúúcu n'daataa? ⁵Ní caⁿa yā: Chííⁿ chí saⁿā cu'neeⁿ sá chiida sa ndúúcu chēecu sá ní nduūvidaama sa ndúúcu n'daataa yeⁿē sa ní nduu 'uuví yā ní nduūvī 'aama yā nduucū vi'i. ⁶Tuu'mi ní 'āā ntéé 'uuví ngii yā tí 'āā 'aama núúⁿ yā. Chííⁿ chí Ndyuūs nádaama yā, 'iiⁿyāⁿ nguēe cánéé chí idiví yā.

⁷'Iiⁿyāⁿ fariseos caⁿa yā chí yā Jesús: ¿De'e cáāvā chí Moisés caⁿa ntiīⁿnyuⁿ sa chí ca'á yā carta chí i'tēchi vi'i yā ní cu'neéⁿ yā n'daataa yeⁿe yā?

⁸Jesús caⁿa yā chí yā 'iiⁿyāⁿ fariseos: Moisés miiⁿ ní 'cuūⁿ sa chí s'neeⁿ saⁿā n'daataa yeⁿe sa cucáāvā chí staava yeⁿe sa ní nééné chēechi. Naati cuááⁿ vmnaaⁿ naachi chí nga'a, nguēe 'tíicā chíí. ⁹Úú ní ngaⁿá ngii ndís'tiī chí 'āā du'ú nūūⁿ saⁿā chí cu'neeⁿ sa n'daataa yeⁿē sa ndúúti chí nguéé cáāvā chí cueⁿe tá ndúúcu taama saⁿā ní

saⁿā miiⁿ cunee sa ndúúcu taama tá, véé nuūⁿndi yeⁿē sa. Sáⁿā chi 'caandavaacu sa ndúúcu n'daataá chi s'neeⁿ tá isaⁿā yeⁿē tá, véé ntúūⁿ nuuⁿndi yeⁿē sa chi adulterio.

¹⁰Tuu'mi discípulos yeⁿe Jesús ní caⁿa yā chii yā Jesús: Ndúúti chi saⁿā miiⁿ cú'neeⁿ sa n'daataá yeⁿē sa tuu'mi ní n'daācā ca chi nguéé 'caandavaacu sa.

¹¹Tuu'mi ní Jesús miiⁿ caⁿa yā chii yā discípulos: Nguéé nducyaaca 'iiⁿyāⁿ cuuvi deenu yā chuū naati 'āā dámaāⁿ 'iiⁿyāⁿ chí Ndyuūs nca'a yā chuū. ¹²Véé 'yaaⁿ razones chi nguéé 'caandavaacu saⁿā. Véé saⁿa chí ndii taachi n'giindiyáaⁿ sa yeⁿē chæecu sa 'āā nguéé cuuvi 'caandavaacu sa. Ní véé ntúūⁿ saⁿā eunucos chi 'iiⁿyāⁿ idiíⁿ yā chi nguéé cuuvi 'caandavaacu sa. Véé ntúūⁿ saⁿā chi maaⁿ sa nguéé neⁿe sa 'caandavaacu sa cáāvā chi diiⁿ sa ntiiⁿnyuⁿ yeⁿe naachí Ndyuūs ngaⁿa ntiiⁿnyúⁿ yā. Nduuti chi 'iiⁿyāⁿ cuuvi ca'cueeⁿ yā nduudú 'cūū tuu'mi ní 'āā deenú yā.

Jesús idi'viicú yā dá'caiyāa

(Mr. 10.13-16; Lc. 18.15-17)

¹³Tuu'mi ní ndaa 'iiⁿyāⁿ chi ndee yā da'caiyāa nanááⁿ Jesús. Ní 'íicú Jesús miiⁿ cun'du'ú yā ta'a yā vmnááⁿ yeⁿē da'caiyāa s'eeⁿ ní caⁿ'angua'á yā yeⁿē dá'caiyāa. Discípulos yaa'vi néeⁿ yā 'iiⁿyāⁿ chí índaa ndúúcu dá'caiyāa. ¹⁴Jesús miiⁿ ní caⁿa yā chii yā discípulos: 'Cuaáⁿ nī chí chii da'caiyāa nanaáⁿ. Nguéé caaca taaⁿ nī yeⁿē da'caiyāa s'tíi ti naachí Ndyuūs chi canéé na va'ai chæeti nguuvi ngaⁿa ntiiⁿnyúⁿ yā ní yeⁿē da'caiyāa s'tíi. 'Tííca chii.

¹⁵Ch'iinu chin'du'ú ta'á yā vmnaaⁿ yeⁿē da'caiyāa s'eeⁿ ní chiicá yā lugar miiⁿ.

Saⁿā 'dííⁿ chí 'cuiica ní indeē sa ndúúcu Jesús

(Mr. 10.17-31; Lc. 18.18-30)

¹⁶Tuu'mi ní ndaā 'áámá saⁿā 'dííⁿ nanááⁿ Jesús miiⁿ ní caⁿa sa chii sa Jesús: N'dií maestro chí n'dai, ¿De'ē chí n'dáacā chi cuuví dííⁿ ní cuuví ndaācá vida cueⁿe daāⁿmaⁿ chí cuuvi yeⁿé?

¹⁷Jesús caⁿa yā chii yā saⁿā 'dííⁿ miiⁿ: ¿De'ē cúuví chí ngaⁿā di chí n'dai 'úú? Mar 'áámá 'iiⁿyāⁿ nguéé n'dai yā ti dámaáⁿ Ndyuūs. Naati ndúúti chí neⁿe di cundaā di na va'ai chæeti nguuvi naachí Ndyuūs ngaⁿa ntiiⁿnyuⁿ yā, idiíⁿ di tan'dúúcu chí ngaⁿa mandamientos.

¹⁸Saⁿā 'dííⁿ mííⁿ ní caⁿ'a sa: ¿Chéé chííⁿ? Jesús caⁿa yā: Nguéé 'caāⁿnūⁿ di. Nguéé caⁿ'a di ndúúcu 'aama n'daataá chí nguéé yeⁿē di. Nguéé diduucú di. Nguéé caaⁿ'maⁿ di nduudu yaadi yeⁿé mar 'áámá 'iiⁿyāⁿ. ¹⁹Dinéⁿe di chæecu di ndúúcu chiida di. Dinéⁿe di 'iiⁿyāⁿ na niiⁿnuúⁿ vaacú di tan'dúúcu chí neⁿe di maāⁿ di.

²⁰Saⁿā 'dííⁿ miiⁿ ní caⁿ'a sa: Tanducuéⁿē chuū 'āā idiíⁿ ndíi taachi saⁿā 'lííⁿ 'úú. ¿De'ē cá indai yeⁿé?

²¹Jesús caⁿa yā chii yā saⁿā: Ndúúti chí neⁿe di chí cúuví n'dai ca di tuu'mi ní cueⁿe di ní ndiicui di tanducuéⁿē chí véé yeⁿē di ní ca'a di 'iiⁿyāⁿ chí nguéé yeⁿe yā. Tuu'mi ní ndaācā chí véé vaadi 'cuiica yeⁿē ná va'ai chæeti nguuvi

chi cuuví yeⁿē di. Ní cuchíi di ní caⁿa di nduucú.

²²Taachí saⁿā 'dííⁿ miiⁿ ch'iindiveeⁿ sa chuū, cunáⁿa sa ní s'neeⁿ ndaachi yiinú sa ti neené 'cuiica sa.

²³Tuu'mi ní Jesús caⁿa yā chii yā discípulos yeⁿe yā: Cuaacu nííⁿnyúⁿ ngaⁿá ngíí ndís'tií chí ngíⁿii chí cundaā 'áámá saⁿā 'cuiica naachí Ndyuūs ngaⁿa ntiíⁿnyúⁿ yā na va'ai chēeti nguuvi. ²⁴Táámá cosa ngaⁿá ngíí ndís'tií chí 'ááma iti camello chí ch'ēete ca nguéé ti 'yuudū 'tiicá tī, nguéé ngíⁿii ca chí cho'ó tī na nduutinááⁿ 'iini chí cheendi va'ai 'lííⁿ nguéé ti 'áámá 'iiⁿyāⁿ 'cuiica cu'téenu yā Ndyuūs ní cundáa yā naachí Ndyuūs ngaⁿa ntiíⁿnyúⁿ yā na va'ai chēeti nguuvi.

²⁵Taachí ch'iindiveeⁿ discípulos yeⁿe yā chuū, néené nadicádíínuuⁿ yā ní caⁿa yā nguááⁿ maaⁿ yā: ¿Du'u cuuví nanguaⁿāi?

²⁶Jesús ch'íínu yā discípulos ní caⁿa yā: Saⁿā yeⁿe iⁿ'yeeⁿdí cūū ní nguéé cuuví diiⁿ sa chuū naati Ndyuūs cuuví dííⁿ yā tanducuéⁿē.

²⁷Tuu'mi ní Pedro miiⁿ ní nan'guēecútaⁿa sa ní caⁿa sa chii sa Jesús: N'dií Señor, cuin'diichí nī. Nús'ūū ní sn'neeⁿ 'nū tanducuéⁿē chí véé yeⁿé 'nū ní cuchíí 'nū ndúúcu n'dií. ¿De'é ndaācā yeⁿé 'nū?

²⁸Jesús caⁿa yā chii yā discípulos: Cuaacu nííⁿnyúⁿ, ngaⁿá ngíí ndís'tií, chí tiempo chí cuchii taachí nducuéⁿē nduuví ngai ní Saⁿa chí Daiyá Dendyuūs 'cuūndi sa na trono yeⁿē sa ndúúcu deēve ch'ēete yeⁿe maaⁿ sa ní 'cuai sa ndís'tií chí cueⁿe nī ndúúcu sa. Ní ndís'tií ní 'cuēeté nī na ndiichuuvi tronos ní dííⁿ nī

juzgar ndu'u ndiichúúví ndaata yeⁿe 'iiⁿyāⁿ Israel chí judíos yā.

²⁹Āā du'ú nūuⁿ chí cu'neeⁿ ná vaacu yā o 'díínu yā o ví'i yā o chiidá yā o chēecú yā o n'daataá yeⁿe yā o daiya yā o yáⁿāa yeⁿe yā cáávā chí duuchí, 'iiⁿyāⁿ miiⁿ ndaāca cá yā táámá ciento más cá. Ní Ndyuūs ca'á yā 'iiⁿyāⁿ miiⁿ vida cueⁿe daāⁿmaⁿ yeⁿe yā ná va'ai chēeti nguuvi. ³⁰Nééne 'yaaⁿ 'iiⁿyāⁿ chí maaⁿ snée yā cuááⁿ chí vmnaaⁿ ní 'iiⁿyāⁿ s'eeⁿ 'cuēetinée yā cuaaⁿ chí cuayiivi ní nééne 'yaaⁿ 'iiⁿyāⁿ chí maaⁿ snée yā cuaaⁿ chí cuayiivi ní 'iiⁿyāⁿ s'eeⁿ 'cuēetinée yā cuaaⁿ chí vmnaaⁿ.

Ejemplo yeⁿe 'iiⁿyāⁿ chí dííⁿ yā ntiíⁿnyuⁿ

20 Caⁿa Jesús: Naachí Ndyuūs ngaⁿa ntiíⁿnyúⁿ yā yeⁿe na va'ai chēeti nguuvi ní tan'dúúca 'áámá dueño chí véé yáⁿāa yeⁿe yā. Dueño miiⁿ ní can'dáa yā cuaaⁿ ná nguēetiyaanⁿ chí in'nuuⁿ yā mozos chí diiⁿ ntiíⁿnyuⁿ naachi véé díí'yú uvas yeⁿé yā. ²Ní indeé yā ndúúcu mozos taaca chí nadíí'vé yā mozos. Ní caⁿa yā chí ca'a yā 'aama caadi plata nguuvi miiⁿ ní dicho'ó yā mozos miiⁿ chí diiⁿ sa ntiíⁿnyuⁿ naachi véé díí'yú uvas yeⁿé yā. ³Dueño miiⁿ can'dáa yā na vaacu yā taandúú cuááⁿ nááⁿ n'gēecú nuuuⁿ nguēetiyaanⁿ ní cuéⁿe yā cuaaⁿ nii'vēē ní n'diichi yā ta n'duuví sáⁿā chí snée sa chí nguéé ndaācā ntiíⁿnyuⁿ yeⁿe sa. ⁴Ní caⁿa yā chii yā saⁿā s'eeⁿ: Ndis'tií, cuéⁿe nī dííⁿ nī ntiíⁿnyuⁿ yeⁿé naachi véé díí'yú uvas yeⁿé. 'Úú ní nadíí'vé ndís'tií tan'dúúca chí tuumicadiinúúⁿ chí

n'daācā. Saⁿā s'eeⁿ ní cueⁿe sa diiⁿ sa ntiⁿnyúⁿ miiⁿ. ⁵Ní can'dáá ntuuⁿ yā taandúú cuááⁿ naaⁿ ingyáⁿā. 'Tiicá ntúūⁿ cun'daa yā táánduu cuaaⁿ nááⁿ n'gēcúú 'línú chiinū, 'tiicá ntúūⁿ diiⁿ yā n'nuúⁿ yā mozos chi diiⁿ sa ntiⁿnyuⁿ. ⁶Ní taandúū n'gēcúú juⁿu chiinū cueⁿe ntúuⁿ yā ní ndaācá yā taanduu 'uuvi saⁿā chi nguéé 'indaācā ntiⁿnyuⁿ yeⁿe sā. Ní caⁿa yā chii yā saⁿā s'eeⁿ: ¿Dē'ē cúúví chí ndís'tiī snéé nī 'muuⁿ ní núúⁿmáⁿ nguuvi chi nguéé ntiⁿnyuⁿ chí idiíⁿ nī? ⁷Saⁿā s'eeⁿ caⁿa sa: Ti mar 'áámá 'iiⁿyāⁿ nguéé tee yā ntiⁿnyuⁿ yeⁿé nū. Dueño miiⁿ caⁿa yā chii yā saⁿā s'eeⁿ: Ndis'tiī, cueⁿé nī diiⁿ nī ntiⁿnyuⁿ naachi véé dí'yú uvas yeⁿé ní nadii'vé ndís'tiī tan'dúúcā chi ituumicádiinúúⁿ chí n'daācā. ⁸Taachí cueⁿe yā 'yáⁿāa, dueño miiⁿ naachí véé dí'yú uvas miiⁿ caⁿa yā chii yā saⁿa chí ngaⁿa ntiⁿnyuⁿ sa yeⁿe mozos: 'Cuai dí mozos ní nadí'vē di mozos chí ndaa sa cuayiivi. 'Cuiinu maaⁿ ní nadí'vē di mozos chí ndaa sā cuayiivi. 'Cuiinu maaⁿ ní nadí'vē di mozos chí ndaa sā vmnaaⁿ. ⁹Ndaa mozos chí cheⁿe sā na ntiⁿnyuⁿ miiⁿ taanduu na n'gēcúú juⁿu chiinū ní nadí'vē sa mozos. 'Áámá 'áámá sā ndaācā sā 'áámá caadi plata yeⁿé sā. ¹⁰Taachí ndaa mozos chí cheⁿe sā vmnaaⁿ ná ntiⁿnyuⁿ miiⁿ, nadacádiinuuⁿ sā n'deēe cá tuūmī ndaācā sā. Mozos ntúūⁿ ndaācā sā 'áámá caadi tuūmī yeⁿe sā. ¹¹Taachí nadí'vē sā mozos ní neené n'deeē caⁿa mozos yeⁿe dueño yeⁿe naachi véé dí'yú uvas miiⁿ. ¹²Mozos ní

caⁿa sa: Sáⁿa s'tiī ti 'āā 'ai chiinū ndaā sa ní 'áámá hora nūuⁿ diiⁿ sa ntiⁿnyuⁿ ní dáámá nūuⁿ nadí'vē nī sáⁿa s'tiī ndúúcū nús'uū. Nús'uū ní diiⁿ 'nū ntiⁿnyuⁿ ní ch'etinéé 'nū na 'yáⁿā. ¹³Dueño miiⁿ ní nan'guēcútaⁿá yā ní caⁿa yā chii yā 'áámá chee mozos: Ndis'tiī saⁿā chí n'dai nduucú, nguéé nduuví taaⁿ di nduucú. Nguéé cunncaā idiíⁿ nduucú ndís'tiī. ¿Áá nguéé ndeē ndúúcu nī chí nadii'vé ndís'tiī 'áámá caadi plata ní 'āā canéé yiinú nī? ¹⁴Cutaⁿá nī chí tunééⁿ ndís'tiī ní cunaⁿa nī. 'Úú ní nadicádiinúúⁿ chí nadii'vé mozos chí ndaa sa cuayiivi tan'dúúcā chí nadii'vé ndís'tiī. ¹⁵¿Áá nguéé cuuvi diiⁿ 'úú tan'dúúcā chí neⁿé ndúúcu tuūmī yeⁿé? ¿Áá ngíí nguee nī ti 'úú ní n'daí? ¹⁶Túúcā 'iiⁿyāⁿ chí snéé cuááⁿ vmnááⁿ 'cuētinée yā ndii cuaaⁿ cuayiivi. 'Iiⁿyāⁿ chí snéé cuayiivi ní 'cuētinée yā cuáaⁿ vmnaaⁿ ti néené 'yaaⁿ n'deēé 'iiⁿyāⁿ chí 'cai Ndyuūs naati duu'vii 'iiⁿyāⁿ chí ndeēve Ndyuūs.

Jesús ngaⁿa ntuuⁿ yā yeⁿe chí 'cuūvi yā

(Mr. 10.32-34; Lc. 18.31-34)

¹⁷Jesús cuchee yā na yāāⁿ Jerusalén ní cueⁿé yā ndúúcu ndu'ū ndiichúúví discípulos yeⁿé yā 'áámá lado. Ní Jesús caⁿa yā chii yā discípulos taachi ngicá yā: ¹⁸Ndis'tiī ní maaⁿ ní cuchee yú na yāāⁿ Jerusalén miiⁿ. 'Úú chí Saⁿā chí Daiya Dendyuūs 'iiⁿyāⁿ s'eeⁿ ncaⁿá yā 'úú tá'āa chiidúú n'gēeté ndúúcu maestros chí ngi'cueeⁿ ley. 'Iiⁿyāⁿ s'eeⁿ ní diiⁿ yā condenar 'úú ní 'cuūvi. ¹⁹Ní ncaⁿá

yā 'úú ta'a 'i'i'yāⁿ chi nguéé ndaata ye^{'e} 'i'i'yāⁿ Israel. 'I'i'yāⁿ s'eeⁿ ní 'cáá'nyuⁿneeⁿ yā 'úú ní 'cue^{'e} yā 'úú ní cu'neeⁿnga'á yā 'úú. Ní 'úú chí Sa^{'ā} chí Daiya Ndyuūs miiⁿ nanduuchí ndiichi ndii 'íínú nguuvi ye^{'ē} nguaaⁿ tiná^{'ā}.

**Chí cheecu Jacobo ndúúcu Juan
chiica tá ye^{'ē} 'áámá naaⁿ**

(Mr. 10.35-45)

²⁰Tuu'mi ní ndaaⁿ ndaataá ye^{'e} sa^{'ā} Zebedeo nanááⁿ Jesús miiⁿ ndúúcu daiya tá ní chiintii'ya tá nanááⁿ Jesús miiⁿ ní dich'εete tá 'yā ní chiica ta 'áámá favor. ²¹Jesús ní ca^{'a} yā: ¿Dé'ε ne^{'ē} di? Tá^{'ā} miiⁿ ní ca^{'a} tá: Taachí ndaa di naachí caa^{'n}maⁿ ntiiⁿnyuⁿ di, caa^{'n}maⁿ ntiiⁿnyuⁿ di chí ndúú 'uūví sa^{'ā} daiyá 'cúεete sa 'diituu dí, 'aama sa ní lado tá cuaacu di ní taama sa ní lado tá 'cuéé di.

²²Tuu'mi ní Jesús nan'guεεcúta^{'n}a yā ní ca^{'a} yā chí yā 'i'i'yāⁿ: Nguéé déénu nī de'ē chí ngiica nī. ¿Áá cuuvi diiⁿ nī chí cú'u nuúⁿ nī ye^{'e} chí n'geeⁿ ye^{'e} vaso chí ye^{'ē} chí 'cuenú cuuvi? ¿Áá cuuvi cuta'á nī maaⁿ ngeédínuⁿnīⁿ chí cuta'á? Juan ndúúcu Jacobo miiⁿ ní nga^{'a} yā chí cuuvi dí^{'n} yā. ²³Jesús miiⁿ ca^{'a} yā chí yā 'i'i'yāⁿ s'eeⁿ: Cuaacu níⁿnyúⁿ canéé chí cú'ú nī ye^{'e} vaso ye^{'é} ye^{'e} chí 'cuenú cuuvi ní canéé chí cuta'á nī chí cheédínuⁿnīⁿ chí 'úú ita'á. Naati nguéé tunééⁿ 'úú chí ca'á du'ú chí 'cuundi lado tá cuaācu o lado tá 'cuée. Lugar 'cūú ní Ndyuūs ca'á yā 'i'i'yāⁿ chí Ndyuūs 'cuundiyaáⁿ yā cáávā 'i'i'yāⁿ.

²⁴Taachí ndu'u ndííhí discípulos ch'iindiveéⁿ yā chuū, nduuvi taáⁿ yā

ye^{'e} nduu 'uūví discípulos chí daiya sa^{'ā} Zebedeo. ²⁵Tuu'mi ní Jesús yaa'ví yā discípulos ní ca^{'a} yā chí yā 'i'i'yāⁿ s'eeⁿ: 'Áá deenu ndís'tií chí 'i'i'yāⁿ ye^{'e} naciones chí nga^{'a} ntiiⁿnyuⁿ vεε poder ye^{'é} yā nguaaⁿ 'i'i'yāⁿ ye^{'e} naciones ye^{'é} yā. Ní 'i'i'yāⁿ chí n'geete cá ye^{'ē} naciones ní nga^{'a} ntiiⁿnyúⁿ yā ye^{'e} taná^{'a} yā. ²⁶Naati nguéé 'tíicā cuuvi nguaaⁿ ndís'tií. Sa^{'ā} chí ne^{'e} sa cúúví ch'εete sa nguaaⁿ ndís'tií canéé chí dichí'vεe sa ndís'tií. ²⁷Sa^{'ā} chí ne^{'e} sa cūnee cuaaⁿ vmnaaⁿ ca ye^{'e} ndís'tií canéé chí dichí'vεe ca sa ndís'tií. ²⁸Naati Sa^{'ā} chí Daiya Ndyuūs nguéé ndaa sa chí 'í'i'yāⁿ dichí'vεe yā sa^{'ā} ti maāⁿ sa dichí'vεe sa 'i'i'yāⁿ, ní chí ca'a sa vida ye^{'ē} maaⁿ sa tan'dúúcā chí precio ye^{'ē} nuuⁿndi cáávā chí nadangua^{'n}ai yā 'yaaⁿ n'dái 'i'i'yāⁿ.

'Uūví chí ngueenááⁿ nduūvá ye^{'ē} sa

(Mr. 10.46-52; Lc. 18.35-43)

²⁹Taachí Jesús ndúúcu discípulos ye^{'é} yā can'daa yā ye^{'e} yááⁿ Jericó nééné 'yaaⁿ 'i'i'yāⁿ can'daa yā 'i'i'yāⁿ s'eeⁿ. ³⁰'Uuvi sa^{'ā} chí ngueenááⁿ chí vεεte sa niiⁿnuúⁿ cyúúní taachí ch'iindiveeⁿ sa chí Jesús cho'ó yā miiⁿ, 'cai yiicú sa ní ca^{'a} sa: N'dii Señor, Daiya David, nneeⁿ ya'ai 'iinu nī nús'uu.

³¹Nééné 'yaaⁿ 'i'i'yāⁿ yaa'vi neeⁿ yā sa^{'a} s'eeⁿ chí cunēē 'diiiⁿ cheendi sa naati sa^{'a} s'eeⁿ ní n'gai yiicú cá sa: N'dii Señor, Daiya David, nnéé ya'ái 'iinu nī nús'uu.

³²Jesús miiⁿ cheendii yā ní 'cai yā sa^{'ā} s'eeⁿ ní ca^{'a} yā chí yā sa^{'ā} s'eeⁿ: ¿De'ε ne^{'é} nī chí 'úú diiⁿ ndúúcu nī?

³³ Saⁿā s'eeⁿ ní caⁿ'a sa: N'dií Señor, dííⁿ nī chí snaaⁿ 'nū.

³⁴ Tuuⁿ'mi ní Jesús, Daiya David, nnéé ya'ai 'línu yā saⁿā s'eeⁿ ní tuuⁿ'ví yā nduutináaⁿ sa. Ní hora mííⁿ nūuⁿ nduutináaⁿ sa nnguaaⁿ ní chíi snaaⁿ sa. Saⁿā s'eeⁿ ní cueⁿ'e sa ndúúúú Jesús.

Jesús sndaa yā na yāāⁿ Jerusalén tan'dúúúú 'áámá rey

(Mr. 11.1-11; Lc. 19.28-40; Jn. 12.12-19)

21 Taachi Jesús ndaa niiⁿnuúⁿ yā na yāāⁿ Jerusalén ní ndaa yā ná yīicū chi nguuví Olivos chí yeⁿ'ē yāāⁿ 'lííⁿ chi nguuví Betfagé, dich'ó yā na 'uūvī discípulos yeⁿ'é yā. ²Ní caⁿ'a yā chíi yā discípulos: Cueⁿ'e nī na yāāⁿ 'lííⁿ chí canéé niiⁿnuúⁿ. Miiⁿ ní ndaaca nī 'áámá burra chí n'dēēchiichí tī ndúúúú daiya tī. Ndís'tií ní n'daatí nī 'iiti ní candéé nī 'iiti 'muuⁿ. ³Ní ndúúúú chí 'áámá 'iiⁿyāⁿ yaaⁿ'vi yā ndís'tií yeⁿ'e 'iiti miiⁿ, caaⁿ'maⁿ nī cuuvi nī 'iiⁿyāⁿ ti Señor yeⁿ'e yú neⁿ'e yā 'iiti miiⁿ. Ní 'iiⁿyāⁿ miiⁿ caama nadicho'ó yā 'iiti.

⁴Tanducuéⁿ'ē 'túúúú chíi ní 'iicu cuuví cuaacu chí caⁿ'a profeta chí ndēē yā nduudu yeⁿ'é Ndyuūs ndii cuááⁿ vmaaaⁿ taachí dinguúⁿ yā chuú na libro yeⁿ'e Ndyuūs:

⁵ Cuuví nī 'iiⁿyāⁿ chí snéé yā na yāāⁿ Sión 'tííúú. Cundiichí nī, Rey yeⁿ'e nī cuchíí yā nanáaⁿ nī. Rey miiⁿ ní ndiicuúⁿ yā ní canduú yā burra 'lííⁿ. Ní burra 'lííⁿ ní daiya 'iiti chí candéé.

⁶ Discípulos cueⁿ'e yā ní dííⁿ yā tan'dúúúú chí Jesús miiⁿ dich'ó yā 'iiⁿyāⁿ s'eeⁿ. ⁷Ní candēē yā burra miiⁿ ndúúúú daiyá tī. Ní sn'duú yā

cotón yeⁿ'é yā vmaááⁿ yeⁿ'ē burra 'lííⁿ. Ní Jesús miiⁿ ní canduú yā 'iiti. ⁸'Iiⁿ'yāⁿ chí n'dēēē ndáiⁿ ndoo yā cotón yeⁿ'é yā cuaaⁿ cyúúúú. Tanáⁿ'a yā chíiica yā dúúⁿ'nē yáⁿ'á ní ndoo yā cuaaⁿ cyúúúú. ⁹'Iiⁿ'yāⁿ chí cueⁿ'e yā cuááⁿ vmaaaⁿ ndúúúú 'iiⁿ'yāⁿ chí cueⁿ'e yā cuaaⁿ dáámí yā tucá'a yā 'cai yīicú yā, ní caⁿ'a yā: Dē'ē chúúúú ch'ēete n'dai 'iiⁿ'yāⁿ chí Daiya rey David. Dē'ē chúúúú n'dai 'iiⁿ'yāⁿ chí cuchii ndúúúú chí duuchi Señor miiⁿ. Dich'ēete yú Ndyuūs chí snéé ná va'ai cheēti nguuví.

¹⁰ Taachí Jesús miiⁿ sndaa yā na yāāⁿ Jerusalén nducyááá 'iiⁿ'yāⁿ yeⁿ'e yāāⁿ miiⁿ tuumicadínuuⁿ yā ní caⁿ'a yā nguaaⁿ maaⁿ yā: ¿Du'u rá sáⁿ'a 'cūú?

¹¹ 'Iiⁿ'yāⁿ mííⁿ ngaⁿ'a yā: Sáⁿ'a 'cūú saⁿ'a profeta Jesús chí cuchii sá cuaaⁿ na yāāⁿ Nazaret yeⁿ'e yáⁿ'āa Galilea.

Jesús inadideevé yā yaacū templo

(Mr. 11.15-19; Lc. 19.45-48; Jn. 2.13-22)

¹² Jesús miiⁿ sndáa yā ná yaacū templo yeⁿ'é Ndyuūs ní tun'dáa yā nducyaaaca 'iiⁿ'yāⁿ chí indiiicui yā ndúúúú 'iiⁿ'yāⁿ chí ngái yā na yaacū miiⁿ. Ní chēecundaa yā mesas yeⁿ'e 'iiⁿ'yāⁿ chí n'dáaⁿ yā tuūmí yeⁿ'e 'iiⁿ'yāⁿ. Ní chēecú yā sillas yeⁿ'é 'iiⁿ'yāⁿ s'eeⁿ chí indiiicui yā 'yááá palomas. ¹³Ní Jesús caⁿ'a yā chíi yā 'iiⁿ'yāⁿ s'eeⁿ: Na libro yeⁿ'e Ndyuūs naachi canéé nguūⁿ 'túúúú ngaⁿ'a: Vá'ai yeⁿ'é canéé chí duuchi va'ai naachi 'iiⁿ'yāⁿ caaⁿ'maⁿngua'á yā, naati ndís'tií ní dííⁿ nī chí yīivi yááá yéⁿ'e 'iiⁿ'yāⁿ chí díduucu.

¹⁴ Ní chēeti yaacū miiⁿ ndáa nanááⁿ Jesús 'iiⁿ'yāⁿ chí nguenaáⁿ

ndúúcu 'iiⁿyāⁿ chi ngaā yó'oo, ní Jesús miiⁿ dííⁿ yā chí nduūvā yeⁿe nducyaaca yā. ¹⁵Naati chiiduu n'gɛɛtɛē ndúúcu maestros yeⁿe ley nduuvu taáⁿ yā taachí n'diichi yā chí 'tíicā idiiⁿ Jesús miiⁿ ní chiindiveéⁿ yā chuū. Ní saⁿā dácaiyāa n'gai sa ní caⁿa sa: Dɛ'ē chúucā ch'ɛete saⁿā chi Daiya rey David miiⁿ. ¹⁶Ní 'iiⁿyāⁿ s'leeⁿ caⁿa yā chii yā Jesús miiⁿ: ¿Áá n'giindiveéⁿ ní chí saⁿā dácaiyāa ngaⁿā sa? Jesús caⁿa yā: N'giindiveéⁿ. ¿Áá nguéé n'geeⁿ ndís'tii Nduudu yeⁿe Ndyuūs naachi canéé nguūⁿ? Ní ngaⁿa 'túúca:

Áā diiⁿ di chi dácaiyāá ndúúcu dacua'áa caata yā chí n'daāca n'dai yeⁿé Ndyuūs.

¹⁷Jesús ní nan'daa yā yeⁿe yaācū miiⁿ. Ní nan'daa yā yeⁿe yāāⁿ miiⁿ ní cueⁿe yā na yāāⁿ 'lííⁿ chí nguuvu Betania. Ní mííⁿ canee yā nguūinū miiⁿ.

Jesús ngaⁿa yā chí nguɛɛ n'dáacā yāⁿá yeⁿe n'guúidii yaaⁿ nguuvu chí nguéé n'gui'i yeⁿé

(Mr. 11.12-14, 20-26)

¹⁸Chidéévé táámá nguuvu, ní Jesús ndaa ntúⁿ yā ná yāāⁿ miiⁿ ní chii cuiicú yā. ¹⁹Cuaaⁿ cyúúni ní n'diichi yā 'áámá yáⁿá yeⁿe n'guúidii yaaⁿ nguuvu niiⁿnuúⁿ cyúúni, ní cueⁿe yā naachí cut'áa yā n'guiidii miiⁿ, ní nguéé ndaaca yā n'gui'i yeⁿé, dámaāⁿ tá'aa. Ní Jesús caⁿa yā chii yā yáⁿá 'túúca: Dii yáⁿá, 'āā ntéé nguɛɛcunéé 'cuūndi n'gui'i yeⁿé di. Tuu'mí nūⁿ yaⁿá miiⁿ nti'i. ²⁰Taachí discípulos n'diichí yā chuū, ngeⁿē yiinú yā yeⁿé ní caⁿa yā: ¿Dɛ'ē cúúví chí maāⁿncheɛtɛ nuūⁿ nti'i n'guúidii yaaⁿ nguuvu?

²¹Jesús nán'guɛɛcútaⁿa yā ní caⁿa yā chii yā discípulos: Cuaacu nííⁿnyúⁿ ngaⁿá ngíí ndís'tii, ndúúti chí ndís'tii i'téenu ní ní nguéé n'deéé nadicádíínuuⁿ ní, nguéé dámaāⁿ chuū cuuvi dííⁿ ní yeⁿé n'guúidii yaaⁿ nguuvu naati cuuvi dííⁿ ní ndúúcu yíicū 'lííⁿ 'cūū chí caaⁿmaⁿ ní cuuvi ní: Dii yíicū, cuvíí dí 'múúⁿ ní cueⁿe di cundáá nuūⁿ di ná nuūⁿniⁿyáⁿā, ní cuuvi. ²²Tanducuéⁿē chí caaca ní naachi caaⁿmaⁿnguaⁿá ní, ndúúti chí cul'téenu ní, ní ndaācā yeⁿe ní.

Jesús ngaⁿa ntiíⁿnyúⁿ yā tan'dúúca 'iiⁿntyéⁿé

(Mr. 11.27-33; Lc. 20.1-8)

²³Taachí Jesús miiⁿ ndaa yā cheɛti yaācū templo miiⁿ, chiiduu n'gɛɛtɛ ndúúcu 'iiⁿyāⁿ ndiicúú chí ngaⁿa ntiíⁿnyúⁿ yā yeⁿe yaācū ndaa yā nanááⁿ Jesús miiⁿ taachí ngi'cueeⁿ yā, ní caⁿa yā chii yā Jesús: ¿Du'ú 'ííⁿntyéⁿé ngaⁿa yā chí 'túúca idiiⁿ ní? ¿Du'ú 'iiⁿyāⁿ tee yā poder chí caaⁿmaⁿ ntiíⁿnyúⁿ ní 'túúca?

²⁴Nan'guɛɛcútaⁿa Jesús miiⁿ ní caⁿa yā chii yā 'iiⁿyāⁿ s'leeⁿ: 'Úú ntúūⁿ ní intiinguuneeⁿ ndís'tii. Nduuti chí nan'guɛɛcútaⁿa ní yeⁿé, tuu'mi ní cuuví ndís'tii du'ú 'iiⁿntyéⁿé tee yā poder 'úú chí idiiⁿ dendú'u chuū. ²⁵Yeⁿé chí cheɛdinúⁿniⁿ Juan, ¿ti chí chīcā? ¿Áá yeⁿe Ndyuūs chí canéé na va'ai cheɛti nguuvu o yeⁿe saⁿā iⁿyeⁿé dí 'cūū? Tuu'mi ní 'iiⁿyāⁿ s'leeⁿ ndeé yā nguááⁿ maáⁿ yā ní caⁿa yā: Nduuti chí caaⁿmaⁿ yú chí yeⁿé nanguuvu, tuu'mi ní Jesús caaⁿmaⁿ yā cuuvi yā s'uūⁿ: ¿Dɛ'ē cuuví chí nguéé s'teenu ní yeⁿe chí ngaⁿa Juan

miiⁿ? ²⁶Ní nduuti chi caaⁿmaⁿ yú chi yeⁿe saⁿā iⁿyeedí 'cūū, 'va'a yú 'iiⁿyāⁿ yeⁿe yāāⁿ ti nducyaaca yā ní déénu yā chi Juan chí cheedínuūⁿnīⁿ ní 'aama profeta yeⁿe Ndyuūs.

²⁷Ní nan'gueecútaⁿa yā yeⁿe Jesús miiⁿ ní caⁿa yā: Nguéé déénu 'nū. Jesús miiⁿ ní caⁿa ntúuⁿ yā: 'Tiicá ntúūⁿ 'úú ní nguéé cuuví ndís'tiī du'u 'ííⁿntyeⁿe tee yā poder 'úú chí idiiⁿ chuū.

'Áámá ejemplo yeⁿe 'uuví daiya yā

²⁸Jesús caⁿa yā: ¿Dē'ē inadacadiinúūⁿ ndís'tiī yeⁿe chuū? Caⁿá caaⁿmaⁿ ndúúcu ndís'tiī yeⁿe 'áámá saⁿā chí véé 'uūví daiya sa. Ndaā sa nanááⁿ 'áámá daiya sa ní caⁿa sa: Díí daiyá, cuéⁿé di ní diiⁿ dí ntiíⁿnyuⁿ naachi véé díí'yú uvas yeⁿe. ²⁹Daiya sa ní nan'gueecútaⁿa sa ní caⁿa sa: Nguéé neⁿé. Ch'iinu maaⁿ ní nadicadíínuuⁿ sa chí nguéé n'daācā diiⁿ sa ní cuéⁿe sa diiⁿ sa ntiíⁿnyuⁿ miiⁿ. ³⁰Ní cueⁿe ntúuⁿ saⁿā miiⁿ ní yaa'vi sa táámá daiya sa, ni 'tiicá ntúūⁿ caⁿa sa chí sa daiya sa. Ní daiya sa mííⁿ nán'gueecútaⁿa sa ní caⁿa sa: 'Tíicā, n'diī chiidá, caⁿá. Naati nguéé cueⁿe sa diiⁿ sa ntiíⁿnyuⁿ. ³¹¿Dē'ē inadacadiinuuⁿ ndís'tiī? Naachi 'uūví daiya yā ¿chee chí diiⁿ tan'dúúca chí neⁿe chiidá yā? 'Iiⁿyāⁿ s'eeⁿ caⁿa yā: Saⁿā chí yaa'ví yā vmnaaⁿ. Jesús caⁿa yā chí yā 'iiⁿyāⁿ s'eeⁿ: Cuaacu nííⁿnyúⁿ ngaⁿá ngíí ndís'tiī, chí 'iiⁿyāⁿ chí inn'guéé yeⁿe impuestos ndúúcu n'daataá chí véé cá saⁿā yeⁿe tá caⁿá yā vmnaaⁿ yeⁿe ní naachí Ndyuūs ngaⁿa ntiíⁿnyúⁿ yā. ³²Ti Juan chí cheedínuūⁿnīⁿ ndaā

sa vmnááⁿ ndís'tiī. Chiica sá na 'áámá yúúni cuaacu ní ngaⁿa sa yeⁿe yúúni cuaacu yeⁿe Ndyuūs ní nguéé s'téénu ní yeⁿe sa. Naati saⁿā publicanos chí inn'guéé yeⁿe impuestos ndúúcu n'daataá chí véé saⁿā s'ee ndúúcu tá s'téénu yā nduudu yeⁿe sa. Ndís'tiī, taachí n'diichí ní chuū chí 'āā diiⁿ Juan, nguéé ndaacadaamí ní yeⁿe nuuⁿndi yeⁿe ní nguéé s'téénu ní chíiⁿ chí ngaⁿa Juan miiⁿ.

'Áámá ejemplo yeⁿe 'iiⁿyāⁿ chí nguéé n'dáácā idiiⁿ yā ntiíⁿnyuⁿ

(Mr. 12.1-12; Lc. 20.9-19)

³³Tuu'mi ní caⁿa Jesús: 'Caandiveéⁿ ní táámá ejemplo chí 'tee nguéé dáámá. Canéé 'áámá 'iiⁿyāⁿ chí véé yáⁿā yeⁿe yā ní chíinu yā diiⁿyu yeⁿe uvas na yáⁿā yeⁿe yā. Ní din'dái yā 'áámá cheeⁿ yeⁿe yáⁿá 'lííⁿ núúⁿmaⁿ cuaaⁿ 'diituú. Din'dái yā 'aama tanque naachi cuuví tun'dáa yā nuūⁿnīⁿ yeⁿe uvas miiⁿ. Ní din'dái yā 'áámá torre nguaaⁿ diiⁿyu uvas naachi mozos yeⁿe yā 'cueetinéeⁿ sa diiⁿ sa cuidado n'gui'i uvas miiⁿ. Dueño miiⁿ ca'a yā yáⁿā yeⁿe yā saⁿā s'eeⁿ chí diiⁿ sa ntiíⁿnyuⁿ miiⁿ ní cueⁿe yā táámá país. ³⁴Taachí snuū ca'a yeⁿe tiempo yeⁿe n'gui'i uvas miiⁿ chí túúmá yā, dueño dicho'ó yā mozos yeⁿe yā chí saⁿā s'eeⁿ nca'a sa n'gui'i uvas yeⁿe yáⁿā, parte yeⁿe n'gui'i chí tuneⁿ dueño. ³⁵Saⁿā chí diiⁿ ntiíⁿnyuⁿ na yáⁿā miiⁿ sta'a sa mozos. 'Áámá ní ch'eⁿe sa, táámá ní ch'iiⁿnuⁿ sa ní táámá ní chíituu sa. ³⁶Dueño miiⁿ dicho'ó yā taandúú 'uūví mozos, 'āā ví'í mozos chí cheⁿe vmnaaⁿ. 'Tiicá ntúūⁿ diiⁿ sa ndúúcu mozos.

³⁷ Cuayivi míiⁿ dichó'o yā daiya yā ti dueño miiⁿ ní ngaⁿa yā: Saⁿā s'eeⁿ ní diiⁿ sa honrar daiyá.

³⁸ Taachí saⁿā s'eeⁿ chí diiⁿ sa ntiiⁿnyuⁿ yeⁿe yáⁿāa miiⁿ n'diichi sa daiya dueño miiⁿ, caⁿa sa nguááⁿ maaⁿ sa: Sáⁿa 'tīi chí cuuví yeⁿe sa yáⁿāa 'cūū. 'Caaⁿnuⁿ yú sáⁿā miiⁿ ní ndúúcu chí véé naaⁿ chí cuuví yeⁿe sa ní cuuví yeⁿe yú. ³⁹ Ní staⁿa sa daiya dueño miiⁿ ní tun'daa sa saⁿā 'áámá lado yeⁿe chééⁿ yeⁿe dí'yú uvas miiⁿ ní ch'iⁿnuⁿ sa saⁿā.

⁴⁰ Taachí ndaā dueño yeⁿe dí'yú uvas 'de'ē diiⁿ yā ndúúcu saⁿā chí ídiiiⁿ ntiiⁿnyuⁿ na yáⁿāa yeⁿe yá?

⁴¹ Iiⁿyāⁿ s'eeⁿ ní caⁿa yā: Dueño miiⁿ ní 'caaⁿnúⁿ yā saⁿā chí cúuncheeⁿ sa diiⁿ sa. Ní ca'á yā yáⁿāa yēⁿe yā naachi véé dí'yú uvas táámá 'iiⁿyāⁿ chí diiⁿ yā ntiiⁿnyuⁿ na yáⁿāa miiⁿ, 'iiⁿyāⁿ chí ntée yā uvas chí tuneéⁿ yā na tiempo yeⁿe n'gui'i.

⁴² Jesús caⁿa yā chii yā 'iiⁿyāⁿ s'eeⁿ: 'Áá nguéé n'geēⁿ ndís'ti naachi canéé nguūⁿ na libro yeⁿe Ndyuūs chí ngaⁿa 'túúca:

Tuūu chí 'iiⁿyāⁿ chí idin'dái yā va'ai sta'á yā ní ch'ēēcú yā 'áámá lado ti nguéé neⁿe yā. Tuūú 'cūū tuūú ch'ēete ní dichí'vē ca ní canéé tuūu ch'ēetē esquina yeⁿe va'āi. Chuū ní Señor Ndyuūs díiⁿ yā. Chuū ní 'áámá chí ngeⁿe yiinu yú taachí inaaⁿ yú yeⁿe.

⁴³ Chíⁿ chí 'túúca nga'á ngiiⁿ ndís'ti, chí naachí Ndyuūs ngaⁿa ntiiⁿnyúⁿ yā divíi yā yeⁿe ndís'ti ní ca'á yā táámá 'iiⁿyāⁿ chí ca'á yā n'gui'i chí tuneēⁿ lado yeⁿe Ndyuūs. ⁴⁴ 'Áā du'ú nūuⁿ 'iiⁿyāⁿ chí cun'dáá ndúú yā

vmnaaⁿ na tuūu 'cúú ní caātū 'ííni yeⁿe yā. Naati 'āā du'ú nūuⁿ 'iiⁿyāⁿ chí cun'dáá ndúú tuūu 'cúú vmnaaⁿ yeⁿe yā, 'cuííni ndúúvi yuūni yā.

⁴⁵ Taachí 'iiⁿyāⁿ chiiduú n'geetē ndúúcu 'iiⁿyāⁿ fariseos chíiindiveéⁿ yā chuū, 'iiⁿyāⁿ s'eeⁿ tuumicadíínuuⁿ yā chí yeⁿe yā ngaⁿa Jesús miiⁿ.

⁴⁶ Nadicadíínuuⁿ yā taacā chí cuta'á yā Jesús miiⁿ naatí 'va'a yā 'iiⁿyāⁿ yeⁿe yáāⁿ tí 'iiⁿyāⁿ s'eeⁿ i'téenu yā Jesús miiⁿ tan'dúúca chí 'áámá profeta chí ngaⁿa nduudu yeⁿe Ndyuūs.

'Áámá ejemplo yeⁿe 'viicu chí n'giindivaacú yā

22 Jesús tuca'á yā ndee yā taama vmnéⁿēe ndúúcu ejemplos, ní caⁿa yā: ² Naachí Ndyuūs ngaⁿa ntiiⁿnyúⁿ yā yeⁿe va'ai cheeti nguuvi tan'dúúca 'áámá rey chí chiica yā 'viicu chí chíiindivaacu saⁿa daiya yā. ³ Ní dichó'o yā mozos yeⁿe yā chí yaa'vi sa 'iiⁿyāⁿ chí ndíi yā invitado naati 'iiⁿyāⁿ s'eeⁿ nguéé néⁿe yā caⁿa yā. ⁴ Ní dichó'o yā tan'duuví mozos ní caⁿa yā chí yā mozos: Caaⁿmaⁿ ní cuuvi ní 'iiⁿyāⁿ chí ndíi yā invitado 'tíicā. 'Áā véé yaāaⁿ comida miiⁿ. 'Áā ch'iⁿnuⁿ i'tiindu yeⁿe ní 'iiti chí 'viicheé. Tanducuéⁿē 'āā véé yaāaⁿ. Cuchií ní 'viicu. ⁵ Naatí 'iiⁿyāⁿ s'eeⁿ nguéé diiⁿ yā cuenta. 'Áámá yā ní cueⁿe yā cuéétí yeⁿe yā. Taama yā ní cueⁿe yā negocio yeⁿe yā. ⁶ Tanáⁿa yā ní sta'á yā mozos. Cuⁿu yā ndúúcu sa ní ch'iⁿnuⁿ yā mozos. ⁷ Taachi rey miiⁿ chíiindiveéⁿ yā chuū, ndúúvi taaⁿ yā. Ní dichó'o yā soldados yeⁿe yā ní caⁿa ntiiⁿnyúⁿ yā chí 'caaⁿnuⁿ sá 'iiⁿyāⁿ chí

ch'iinuⁿ yā mozos yeⁿé yā. Ní 'neeⁿ yaⁿā sa yāāⁿ vaacú 'iiⁿyāⁿ s'eeⁿ.

⁸Tuu'mi ní caⁿa yā chii yā mozos yeⁿé yā: Cuaacu níⁿnyúⁿ 'viicu miiⁿ ní 'āā véé yāāāⁿ caavā 'iiⁿyāⁿ chí chii yā invitado naati nguéé n'dai taaví yā chí cuchii yā. ⁹Maaⁿ ní cueⁿe nī na yúúⁿ chí can'daā yeⁿe yāⁿāā yāāⁿ ní díⁿ nī invitar 'iiⁿyāⁿ chí chii yā na 'viicu, 'iiⁿyāⁿ chí ndaāca nī. ¹⁰Mozos ní can'daa sa ní cueⁿe sa cuaaⁿ cyúúⁿ ní nadaama sa nducyaaca 'iiⁿyāⁿ chí ndaāca sa, 'iiⁿyāⁿ chí cúúncheeⁿ yā ndúúⁿcū 'iiⁿyāⁿ chí n'dai yā. Ní ndaā nducyaacá 'iiⁿyāⁿ s'eeⁿ chí mozos 'cai sa ní ndeēe n'dáá 'iiⁿyāⁿ ndaá yā 'viicu miiⁿ.

¹¹Ní rey miiⁿ cheⁿe yā n'diichi yā 'iiⁿyāⁿ chí ndii yā invitado ní ndaācá yā 'áámá saⁿā chí nguéé cánúúⁿ sá catecai sa yeⁿe naachi n'giindivaacu yā. ¹²Ní caⁿa yā chii yā saⁿā: N'dii amigo, 'taācá chí ndāa nī 'muuⁿ chí nguéé canúúⁿ nī catecai nī yeⁿe chí n'giindivaacú 'iiⁿyāⁿ? Saⁿā miiⁿ ní nguéé nan'guεεcútaⁿa sa yeⁿe yā. ¹³Tuu'mi ní rey miiⁿ caⁿa yā chii yā mozos yeⁿe yā: 'Caāchiichí nī ca'a sa ndúúⁿcū ta'a sa ní diví nī saⁿā ndii 'múúⁿ ní 'cuεεcú nī saⁿā cuaaⁿ chuvá'āi na maāⁿ. Míⁿ cuεεcu sa ní ch'éé 'diiⁿyuⁿ sa cueⁿe daāⁿmaⁿ. ¹⁴Jesús caⁿa ntúuⁿ yā chuū: Nééné 'yaaⁿ yā chí Ndyuūs 'cuai yā naati duu'ví yā chí Ndyuūs ndeévé yā.

Chíⁿ chí ntiinguuneeⁿ yā yeⁿe asunto yeⁿe impuestos

(Mr. 12.13-17; Lc. 20.20-26)

¹⁵Tuu'mi ní 'iiⁿyāⁿ fariseos cueⁿé yā ní nduuvidaamá yā. Ní ndeé yā

nguaaⁿ maáⁿ yā táacā cuuvi díⁿ yā chí Jesús miiⁿ cástaⁿa nduudú yeⁿe yā chí caaⁿmaⁿ yā 'áámá nduudu yaadi. ¹⁶Ní fariseos dicho'ó yā 'iiⁿyāⁿ yeⁿe yā ndúúⁿcū 'iiⁿyāⁿ yeⁿe Herodes miiⁿ chí caaⁿmaⁿ yā Jesús: N'dii maestro, déenu 'nū chí n'dii ní 'áámá saⁿā chí n'dai. N'dii ní díⁿ nī chí n'dáacā. Ní cuaacu níⁿnyúⁿ ngi'cueeⁿ nī yúúⁿ yeⁿe Ndyuūs. Ní nguéé 'va'a nī 'iiⁿyāⁿ ti nguéé indeé nī cuidado táaca 'iiⁿyāⁿ. ¹⁷Maaⁿ ní cúúví nī nús'uu: 'Deē inadacádíinuⁿ nī? 'Áá canéé nguūⁿ na ley chí nadí'vé 'nū emperador César tuūmī yeⁿé 'nū o nguéé?

¹⁸Jesús tuumicádíinuⁿ yā chí 'iiⁿyāⁿ s'eeⁿ ní díⁿ yā chí nguéé n'daācā ní caⁿa yā chii yā 'iiⁿyāⁿ s'eeⁿ: 'Deē cúúví chí neⁿe nī n'diichineéⁿ nī 'úú? N'dís'tii ní véé 'uūví chí nadacádíinuⁿ nī. ¹⁹Tée nī tuūmī chí nadí'vé nī yeⁿe impuesto. 'Iiⁿyāⁿ s'eeⁿ ní ch'iⁿi yā 'áámá tuūmī Jesús miiⁿ. ²⁰Tuu'mi ní Jesús miiⁿ caⁿa yā chii yā 'iiⁿyāⁿ s'eeⁿ: 'Du'u nááⁿ chí canéé ná tuūmī? 'Du'ū chí ngúúví cánéé nguūⁿ?

²¹'Iiⁿyāⁿ s'eeⁿ ní caⁿa yā: Naaⁿ emperador César cānee. Ní Jesús caⁿa yā chii yā 'iiⁿyāⁿ s'eeⁿ: Nca'a nī tuūmī emperador César chíⁿ chí yeⁿe sa ní ca'a nī Ndyuūs chí yeⁿe Ndyuūs.

²²Taachí ch'iindiveéⁿ yā chuū, cheⁿe yiinu yā ní cueⁿe yā.

Chiiⁿ chí ntiinguuneeⁿ yā yeⁿe chí 'iiⁿyāⁿ nduuchi yā yeⁿe nguaaⁿ tináⁿā

(Mr. 12.18-27; Lc. 20.27-40)

²³Nguuvi miiⁿ 'iiⁿyāⁿ saduceos ndaá yā nanááⁿ Jesús miiⁿ. 'Iiⁿyāⁿ

saduceos nga^{na} a yā chí nguéeé índuuchi 'iiⁿⁱyāⁿ ye^{ne} nguaaⁿ tiná^{na}. Ní ntiinguunéeⁿ yā Jesús, ²⁴ní ca^{na} a yā: N'dii maestro, Moisés miiⁿ ca^{na} a sá chí 'āā du'ú nūⁿ sa^{na} a chí 'cuūví sa ní nguéeé ch'iindí daiya n'daataá ye^{ne} sa tuu'mi ní 'diinū sa 'caandavaacu sa ndúúcu n'daataá míⁿ. Ní sa^{na} a miiⁿ ní 'cuūndí daiya sá lado ye^{ne} 'dínu tiná^{na}. ²⁵Maaⁿ ní véé ndēēchē sá^{na} a nūⁿ ye^{ne} chēcú sa ye^{ne} chiidá sa. Sá^{na} a vmnaaⁿ miiⁿ ní ch'iindivaacu sa ní ch'li sa. Ní nguéeé daiya n'daataá ye^{ne} sa. Ní canee n'daataá ye^{ne} sa. Ní 'dínu sa ní canee sá ndúúcu tá. ²⁶Tiicá ntúūⁿ chó'oo ye^{ne} ndii chiiⁿ ndii 'uuvi sa^{na}. 'Tiicá ntúūⁿ chó'oo ye^{ne} sa^{na} a chí ndii 'iinū. 'Tiicá ntúūⁿ chó'oo ye^{ne} sa^{na} a s'eeⁿ nduu ndēēchē sa. ²⁷Ndíí ná ch'iinū ní ch'li ntúūⁿ n'daataá miiⁿ. ²⁸Taachí nduuchi 'iiⁿⁱyāⁿ ye^{ne} nguaaⁿ tiná^{na}, naachí ndēēchē sa^{na} a s'eeⁿ ní 'chēe sa chí n'daataá ye^{ne} sa tá^{na} caati nducyaaca sá canee sá ndúúcu tá? ²⁹Tuu'mi ní Jesús miiⁿ ní nan'guēcúta^{na} a yā ní ca^{na} a yā chii yā 'iiⁿⁱyāⁿ s'eeⁿ: Ndí'stii ní nguéeé n'daācā nadicádiinuⁿ nī, ti nguéeé déenu nī taacā nga^{na} a na libro ye^{ne} Ndyuūs naachi canée nguūⁿ. Ndíí nguéeé ndúú déenu nī poder ye^{ne} Ndyuūs. ³⁰Ti naachí nduuchi 'iiⁿⁱyāⁿ ye^{ne} nguaaⁿ tiná^{na}, nguéeé 'caandavaacú yā. Ndíí nguéeé ca'a ra yā chí 'caandavaacu daiya yā ti cuuví yā tan'dúúca ángeles chí dichí'vē Ndyuūs chí canée yā na va'ai chēetí nguuví. ³¹Naati ye^{ne} chí nduuchi yā ye^{ne} nguaaⁿ tiná^{na}, 'áá nguéeé n'geeⁿ nī chí maáⁿ Ndyuūs ca^{na} a yā ye^{ne} taachí ca^{na} a yā 'túúca?:

³²Úú ní Ndyuūs ye^{ne} Abraham ndúúcu Isaac ndúúcu Jacob. Ndyuūs miiⁿ ní nguéeé Ndyuūs ye^{ne} tiná^{na} ti ye^{ne} 'iiⁿⁱyāⁿ chí sндуuchi.

³³Taachí nducyaaca 'iiⁿⁱyāⁿ ch'iindiveeⁿ yā chuū, che^{ne} e yiinú yā ye^{ne} nduudu ye^{ne} Jesús miiⁿ tan'dúúca chí ngi'cueeⁿ yā.

Mandamiento chí ch'ēete ca

(Mr. 12.28-34)

³⁴Tuu'mi ní sa^{na} a fariseos taachí ch'iindiveeⁿ yā ye^{ne} chí Jesús díí yā, 'iiⁿⁱyāⁿ saduceos 'āā ntéé ca^{na} a yā ndúúcu Jesús miiⁿ, fariseos miiⁿ nduuidaama yā. ³⁵'Áamá sa^{na} a fariseo abogado chí ngi'cueeⁿ sa chí nga^{na} a ley miiⁿ ne^{ne} sa n'diichinéⁿ sa Jesús ní ntiinguunéeⁿ sa 'iiⁿⁱyāⁿ. Ní ca^{na} a sá chii sa Jesús: ³⁶N'dii Maestro, 'chéé mandamiento chí ch'ēete n'dai ca ye^{ne} na ley ye^{ne} Moisés?

³⁷Jesús ca^{na} a yā chii yā sa^{na}: Diné^{ne} di Señor Ndyuūs ye^{ne} di ndúúcu núúⁿ máⁿ stáává ye^{ne} di ndúúcu núúⁿ máⁿ alma ye^{ne} di ndúúcu núúⁿ máⁿ vaanicadínnūⁿ ye^{ne} di. ³⁸Chuū chí vmnaaⁿ ní ch'éētē ca chí cuuvi taná^{na} mandamientos. ³⁹Ndiichi ndii 'úúví tan'dúúca chí vmnááⁿ vmnaaⁿ: Diné^{ne} di 'iiⁿⁱyāⁿ na niiⁿ nuúⁿ vaacú di tan'dúúca chí ne^{ne} dí maáⁿ di. ⁴⁰Ye^{ne} ndúú 'uuví mandamientos miiⁿ canee tanducué^{ne} ye^{ne} ley Moisés miiⁿ ndúúcu nduudu chí nga^{na} a profetas ndii cuááⁿ vmnaaⁿ.

'Du'u 'iiⁿⁱyāⁿ chíí daiya Cristo?

(Mr. 12.35-37; Lc. 20.41-44)

⁴¹Taachí 'iiⁿⁱyāⁿ fariseos ndiidáamá yā Jesús ntiinguuneeⁿ yā

fariseos, ⁴² ní caⁿ'a yā chii yā 'iⁿ'yāⁿ s'eeⁿ: ¿De'ē nadicádíínuuⁿ ndís'tií yeⁿ'e Cristo? ¿Du'lú daiyá 'iⁿ'yāⁿ 'cúú? Ní fariseos caⁿ'a yā chii yā: Daiya David miiⁿ.

⁴³ Ní Jesús caⁿ'a yā chii yā fariseos: ¿Táácā cuuvi David miiⁿ na espíritu yeⁿ'e sa ní caⁿ'a sa chi Cristo ní Señor? Ní caⁿ'a yā chuú:

⁴⁴ Caⁿ'a Señor Ndyuūs miiⁿ chii yā Señor Cristo yeⁿ'é: 'Cuundi di lado tá cuaacú chi lado yeⁿ'e honor ndíí 'úú cu'neéⁿ 'iⁿ'yāⁿ chi contra yeⁿ'é di cuaaⁿ ndii yā na ca'a di tan'dúúcā chi enemigos ní 'áámá banco lííⁿ.

⁴⁵ Maaⁿ ní nduuti chi David miiⁿ caⁿ'á yā yeⁿ'e Cristo chi Señor yeⁿ'é yā, ¿táácā cuuvi chii chi Señor miiⁿ ní daiya David 'iⁿ'yāⁿ?

⁴⁶ Mar 'áámá 'iⁿ'yāⁿ nguéeⁿ cuuvi nan'gueécútaⁿ'a yā yeⁿ'é mar 'áámá. Ndíí nguuvi miiⁿ s'neeⁿ naaⁿ yā ntiinguuneeⁿ yā Jesús miiⁿ.

Jesús ngaⁿ'a yā chi dííⁿ yā cuidado yeⁿ'e maestros chi ngi'cueeⁿ ley ndúúcū 'iⁿ'yāⁿ fariseos

(Mr. 12.38-40; Lc. 11.37-54; 20.45-47)

23 Jesús yaa'vi yā 'iⁿ'yāⁿ ndúúcū discípulos yeⁿ'e yā ní caⁿ'a yā: ²Maestros chi ngi'cueeⁿ ley ndúúcū 'iⁿ'yāⁿ fariseos, 'iⁿ'yāⁿ s'uuⁿ deenu n'dai yā ní ngi'cueeⁿ yā ní caaⁿ'maⁿ cuaacú yā ley yeⁿ'e Moisés. ³Tiicá ntúūⁿ cu'téenu ndís'tií ní dííⁿ nī tan'duucā 'iⁿ'yāⁿ s'eeⁿ ngaⁿ'a yā, naati nguéeⁿ dííⁿ nī tan'dúúcā 'iⁿ'yāⁿ s'eeⁿ idiíⁿ yā tí 'iⁿ'yāⁿ s'eeⁿ ní ngaⁿ'a yā yeⁿ'e ley naati nguéeⁿ 'tíicā idiíⁿ yā. ⁴'Iⁿ'yāⁿ s'eeⁿ ní dííⁿ yā tan'dúúcā chi 'caachiichí yā cheedi chi n'gii taavi

chi 'iⁿ'yāⁿ nguéeⁿ cuchée yā ní ngaⁿ'a yā chi 'iⁿ'yāⁿ canéeⁿ chí cuchée yā. Naati 'iⁿ'yāⁿ s'eeⁿ maán yā ndíí nguéeⁿ neⁿ'é yā 'neeⁿ nduutitá'a yā chi tuu'vi yā cheedi miíⁿ ní dííⁿ yā. ⁵'Iⁿ'yāⁿ s'eeⁿ ní idiíⁿ yā nducueⁿ'ē ntiíⁿnyuⁿ yeⁿ'e yā caati tanáⁿ'ā 'iⁿ'yāⁿ snáaⁿ yā ní n'diichí yā táácā idiíⁿ yā. Neⁿ'é yā candee yā chí canéeⁿ nguuⁿ chí yeⁿ'é Nduudu yeⁿ'e Ndyuūs ní s'neeⁿ yā 'áámá caja lííⁿ ní dich'iichí yā 'áámá yiiⁿmaⁿ ní s'neeⁿ yā maaⁿ ta'a yā ní ncheeté yā. Ní n'geeti núuⁿ yā vestido yeⁿ'e yā chí n'geē 'nūuⁿ ca. ⁶'Iⁿ'yāⁿ s'eeⁿ ní neⁿ'e yā 'cuundi yā sillas chí yeⁿ'e 'iⁿ'yāⁿ ch'ete taachi caⁿ'á yā 'áámá 'viicu chí che'é yā. Ní neⁿ'e yā 'cuundi yā sillas yeⁿ'e honor chi vmaán vmaⁿ ná yáacu sinagogas. ⁷Ní neⁿ'e yā chí tanáⁿ'ā 'iⁿ'yāⁿ dííⁿ n'daacá yā ní dííⁿ yā saludar 'iⁿ'yāⁿ taachi sneeⁿ yā cuaaⁿ nií'véeⁿ ní neⁿ'e yā chí 'iⁿ'yāⁿ caaⁿ'máⁿ yā, maestro, maestro, taachi dííⁿ yā saludar 'iⁿ'yāⁿ.

⁸Naati ndís'tií ní nguéeⁿ neⁿ'e nī chí caaⁿ'maⁿ 'iⁿ'yāⁿ yeⁿ'e nī maestro ti 'áámá 'iⁿ'yāⁿ nūuⁿ chí maestro ní 'iⁿ'yāⁿ miiⁿ chí Cristo. Ní nducyaaca ndís'tií ní hermanos yeⁿ'e nī vi'í. ⁹Nguéeⁿ caaⁿ'maⁿ nī yeⁿ'é mar 'áámá 'iⁿ'yāⁿ yeⁿ'e yán'āa 'cúú: N'dii chiiduú padre, ti dámaaⁿ 'áámá chi Chiida yú chí Ndyuūs chí canéeⁿ na va'ai cheeti nguuvi. ¹⁰Ndíí nguéeⁿ ndúú caaⁿ'maⁿ rá yā yeⁿ'e nī: Maestro, ti 'áámá chí maestro yeⁿ'e nī chí Cristo. ¹¹'Iⁿ'yāⁿ chí ch'ete ca yā yeⁿ'é nī canee chí dichí'v'e yā ndís'tií. ¹²Ní 'iⁿ'yāⁿ chí dííⁿ yā chí cuuví ch'ete maán yā, 'iⁿ'yāⁿ miiⁿ cuuví ndiicúúⁿ yā. 'Iⁿ'yāⁿ chí idiíⁿ

yā chí maáⁿ yā ndiicuúⁿ yā, cuuví ch'èeté yā.

**Jesús caaⁿ máⁿ yā yeⁿe nuuⁿ ndi yeⁿe
'iiⁿ yāⁿ fariseos**

(Mk. 12.40; Lc. 11.39-42, 44, 52; 20.47)

¹³Naati de'ε chúúcā ya'ai yeⁿé ndis'tiī, maestros chi ngi'cueeⁿ ley ndúúcu 'iiⁿ yāⁿ fariseos, ndís'tiī 'uūví naaⁿ 'uūví cheendí nī, ti nguéé ngi'cueeⁿ nī yeⁿe naachí Ndyuūs ngaⁿa ntiīⁿ nyúⁿ yā nanááⁿ 'iiⁿ yāⁿ yeⁿe iⁿ yeeⁿ dí' cūū. Ndíí nguéé ndúú maaⁿ ndís'tiī cundáa nī va'ai cheeti nguuvi. Ndíí nguéé n'guúⁿ nī tanáⁿ ā 'iiⁿ yāⁿ chí neⁿe ndaa yā chí cūndaa yā.

¹⁴De'ε chúúcā ya'ai yeⁿé ndís'tiī, 'iiⁿ yāⁿ chí dinguūⁿ ní ngi'cueeⁿ nī ley ndúúcu 'iiⁿ yāⁿ fariseos, ti ndís'tiī 'uūví nááⁿ 'uūví cheendí nī, ti ndiví nī va'ai yeⁿé n'daataá nguáⁿ ā. Ní néené n'deéé ngaⁿa nī taachi ngaⁿ angua'á nī nanááⁿ nducyaaca 'iiⁿ yāⁿ. 'Úú ngaⁿ á chi ch'èete ca castigo yeⁿe nī nguuvi yeⁿe juicio.

¹⁵De'ε chúúcā ya'ai yeⁿé ndís'tiī, maestros chi ngi'cueeⁿ ley ndúúcu ndís'tiī 'iiⁿ yāⁿ fariseos ti ndís'tiī 'uūví naaⁿ 'uūví cheendí nī. Ndís'tiī ní chiicá nī ndíí yáⁿ āa yaⁿ ai táámá lado nuūⁿ nīⁿ yáⁿ ā ní díⁿ nī chí 'áámá 'iiⁿ yāⁿ i'téenu yā tan'dúúcā ndís'tiī. Ní taachí 'iiⁿ yāⁿ cu'téenu yā tan'dúúcā ndís'tiī neⁿé nī, idíⁿ nī chí 'iiⁿ yāⁿ miiⁿ ní 'uūví tanto cuuví yā yeⁿé daiya infierno nguéé ti chí ndís'tiī. ¹⁶De'ε chúúcā ya'ai yeⁿe ndís'tiī, chí ngi'cueeⁿ nī tan'dúúcā 'iiⁿ yāⁿ chí ngueenááⁿ. De'ε inadacádíínuuⁿ ndís'tiī. Nduuti chí 'áámá 'iiⁿ yāⁿ caⁿ a yā chí díⁿ yā

'áámá cosa ní 'cuai yā, “cáávā yaacū templo”, tuuⁿ mi ní nguéé de'ε vee nacadíínuuⁿ nī yeⁿe chuū, naati nduuti chí 'iiⁿ yāⁿ 'cuai yā, “cáávā 'diiⁿ nguaaⁿ” chí véé cheeti yaacū templo miiⁿ, tuuⁿ mi ní 'iiⁿ yāⁿ miiⁿ canee cuuⁿ miⁿ chí díⁿ yā chí caaⁿ máⁿ yā chí caⁿ a yā chí diiⁿ yā. ¹⁷Ndís'tiī ní 'iiⁿ yāⁿ chí nguεε deenu ti tan'dúúcā 'iiⁿ yāⁿ ngueenááⁿ 'tiicá nī. ¿Cheε cá ch'èete ca? ¿'Áá 'díⁿ nguāⁿ miiⁿ o yáacū miiⁿ chí diiⁿ chí didεeve 'díⁿ nguāⁿ miiⁿ cucááva Ndyuūs? ¹⁸'Tiicá ntúūⁿ ndís'tiī: Ndúúti chí 'áámá 'iiⁿ yāⁿ caⁿ a yā chí díⁿ yā 'áámá cosa, ní n'gai yā, “cáávā nátaī”, nguéé de'ε vee nacadíínuuⁿ nī yeⁿé. Naati ndúúti chí 'iiⁿ yāⁿ n'gai yā, “cáávā ofrenda” chí candúú vmnááⁿ yeⁿé nátaī, tuuⁿ mi ní 'iiⁿ yāⁿ miiⁿ canee cúúⁿ míⁿ chí díⁿ yā chí caⁿ a yā chí diiⁿ yā. ¹⁹Ndís'tiī ní tan'dúúcā 'iiⁿ yāⁿ chí chechí tiiⁿ o 'iiⁿ yāⁿ chí ngueenááⁿ, 'tiicá nī ti ¿cheé ca chí ch'èete ca? ¿'Áá ofrenda miiⁿ o nátaī chí diiⁿ chí ofrenda miiⁿ ní didεeve cucáávā Ndyuūs? ²⁰'Tíicá. 'iiⁿ yāⁿ chí n'gai yā, “cáávā nátaī”, n'gai yā cáávā nátaī ndúúcu tanducuéⁿ chí canduū nátaī. ²¹'iiⁿ yāⁿ chí n'gai yā, “cáávā yaacū templo”, nguéé dámaāⁿ ngaⁿ a yā cáávā yaacū templo miiⁿ naati cáávā mááⁿ Ndyuūs chí canéé na yaacū templo miiⁿ. ²²'iiⁿ yāⁿ chí n'gai yā, “cáávā va'ai cheeti nguuvi”, n'gai yā cáávā trono yeⁿe Ndyuūs ní cáávā Ndyuūs chí véé yā na trono miiⁿ.

²³De'ε chúúcā ya'ai yeⁿe ndís'tiī, maestros chí ngi'cueeⁿ yā ley ndúúcu 'iiⁿ yāⁿ fariseos, ndís'tiī 'uuvi naaⁿ 'uūví cheendí nī. Ndís'tiī

ní nga'á nī Ndyuūs 'áámá ndiichi parte ye^{'e} yaātā chí yiivií, ndúúcū yaāta anís, ndúúcū yaātā comino. Ní ndís'tiī ní s'néeⁿ nī 'aama lado cosas chí n'geete ca ye^{'e} na ley, chíⁿ chí n'diichí nī nuuⁿndi ye^{'e} 'iiⁿ'yāⁿ ndúúcū vaadī cuaacu ndúúcū vaadī ya'ai 'iinu ndúúcū vaadī i'téenu. Chuū canee chí diíⁿ nī ní diíⁿ nī táámá naaⁿ dendu'ú. ²⁴Ndís'tiī 'iiⁿ'yāⁿ chí tan'dúúcā chí n'guenááⁿ chí candee nī 'iiⁿ'yāⁿ. Diíⁿ nī tan'dúúcā chí i'yaáⁿ nī 'áámá 'yaácū ye^{'e} nuūⁿnīⁿ chí cu'ú nī naati cu'ú nī 'iiti camello chí ch'εete.

²⁵De'ε chúúcā ya'ai ye^{'e} ndís'tiī, maestros ye^{'e} ley ndúúcū 'iiⁿ'yāⁿ fariseos, ndís'tiī ní 'uūví naaⁿ 'uūví cheendí nī, ti inadεevé nī cuaaⁿ daami ye^{'e} vaso ndúúcū cu'u, chí tan'dúúcā cuerpo ye^{'e} maáⁿ nī, naati cuááⁿ cheētí nī ní ndiituú ndúúcū chí diduucú nī ndúúcū tanducué^{'e} chí n'gueε n'daācā. ²⁶Caandiveéⁿ nī ndís'tiī 'iiⁿ'yāⁿ fariseos chí tan'dúúcā chí n'guenááⁿ. Diíⁿ cá nī chí didεevé nī chí cuaaⁿ cheeti vaso ní 'tiicá ntūūⁿ cu'u, tuu'mi ní cuuvi dεevé nī cuaaⁿ chuváⁿāi vaso miiⁿ.

²⁷De'ē chúúcā ya'ai ye^{'e} ndís'tiī, maestros ye^{'e} ley ndúúcū 'iiⁿ'yāⁿ fariseos, ndís'tiī 'uuvi naaⁿ 'uūví cheendí nī, ti ndís'tiī ní tan'dúúcā yaānyāⁿ 'cuéē chí cuaaⁿ daami mííⁿ n'dεevéé chí nne^{'e} yaāchí caaca, ti cuaacu níⁿ'nyúⁿ cuááⁿ cheētí miiⁿ ndiituú 'iini ye^{'e} tináⁿā ndúúcū taanduvéé cosas chí vaati. ²⁸Tífcā ndís'tiī ti cuaacu níⁿ'nyúⁿ n'g'iⁿi nī 'iiⁿ'yāⁿ chí ndís'tiī ní saⁿā chí n'dai ndís'tiī naati cuaaⁿ cheētí nī ndiituú

ndúúcū nduudu yaadi ndúúcū nuuⁿndi.

²⁹De'ε chúúcā ya'ai ye^{'e} ndís'tiī, maestros ye^{'e} ley ndúúcū 'iiⁿ'yāⁿ fariseos, 'iiⁿ'yāⁿ 'uūví naaⁿ 'uūví cheendí nī, ti idin'dái nī yaānyāⁿ ye^{'e} profetas ní n'dεeve nī yaānyāⁿ ye^{'e} 'iiⁿ'yāⁿ chí n'dai taachi snée yā iⁿ'yeeⁿdí 'cūū. ³⁰Ndís'tiī ní ngaⁿ'á nī 'tíicā: Ndúúti chí nús'uu ch'εetinée 'nū tiempo chí ch'εetinée chiidá 'nū cuááⁿ vmnaaⁿ, nguéé chinnee 'nū ch'iíⁿnúⁿ 'nū profetas taachi cungéé yuūūⁿ ye^{'e} yā. ³¹Tífcā ndís'tiī ní ngaⁿ'á nī nduudu cuaacu ye^{'e} maáⁿ nī ti ndís'tiī ní dáiyá 'iiⁿ'yāⁿ chí ch'iíⁿnuⁿ yā profetas. ³²Ndís'tiī ní canéé chí diíⁿ nī tan'dúúcā chiidá nī.

³³Ndís'tiī ní tan'dúúcā cúú 'tíicā ndáátá ye^{'e} nī. ¿Táácā cuuvi nguáⁿ'ai nī ye^{'e} castigo ye^{'e} infierno? ³⁴Cáávā chuū 'úú ní dicho'ó nanááⁿ ndís'tiī profetas chí candee yā Nduudu ye^{'e} Ndyuūs, ndúúcū 'iiⁿ'yāⁿ chí déenū, ndúúcū 'iiⁿ'yāⁿ chí ng'i'cueeⁿ ley. N'dúúví 'iiⁿ'yāⁿ s'eeⁿ ní ndís'tiī ní chita'á nī 'iiⁿ'yāⁿ ní chí'neeⁿnga'á nī 'iiⁿ'yāⁿ. Tá n'duuvi yā ní che^{'e} nī 'iiⁿ'yāⁿ na yaácū sinagogas ye^{'e} nī ní can'dáa nī 'iiⁿ'yāⁿ ndii na 'áámá yāāⁿ táámá yāāⁿ chí ch'eenú yā chii. ³⁵Ní ndís'tiī ní ca'á nī cuenta ye^{'e} nducué^{'e} yuūúⁿ ye^{'e} 'iiⁿ'yāⁿ chí n'dai chí 'iiⁿ'yāⁿ ye^{'e} nī chí'iiⁿnúⁿ yā 'iiⁿ'yāⁿ na yáⁿ'āa 'cūū ndii yuūúⁿ ye^{'e} Abel chí saⁿā n'dai ndii yuūúⁿ ye^{'e} Zacarías daiya saⁿā Berequías chí ndís'tiī chí'iiⁿnuⁿ nī náavtaⁿā ye^{'e} yaácū miiⁿ ndúúcū nátaí miiⁿ. ³⁶Cuaacu níⁿ'nyúⁿ ngaⁿ'á ngíí ndís'tiī: Castigo ye^{'e} tanducué^{'e}

chuū canee vmnaaⁿ 'iiⁿ'yāⁿ chi snée
yā maaⁿ tiempo 'cūū.

**Jesús ngeεcu yā cáāvā 'iiⁿ'yāⁿ yeⁿe
yāāⁿ Jerusalén**

(Lc. 13.34-35)

³⁷Ní ngaⁿa Jesús: Ndí's'tiī 'iiⁿ'yāⁿ
yeⁿe yāāⁿ Jerusalén, ndís'tiī 'iiⁿ'yāⁿ
yeⁿe yāāⁿ Jerusalén, chí ch'iīⁿ'núⁿ nī
'iiⁿ'yāⁿ profetas ní chi chiitúú nī 'iiⁿ'yāⁿ
chí Ndyuūs dicho'ó yā nanáaⁿ nī.
Néené n'deēe 'cuūví neⁿ'é nadaamá
daiya nī tan'dúúcā tū'ū chí inadáámá
tī daiya tī maaⁿ ngeεchi tī ní
nguéeⁿ 'cuuⁿ nī. ³⁸Ndí's'tiī, n'diichí nī.
Ndyuūs chí'neeⁿ yā ndís'tiī ndúúcu
vaacú nī dámaāaⁿ. ³⁹Ti 'úú ní ngaⁿ'á
ngií ndís'tiī, ti ndii maaⁿ ní 'āā ntéé
snaaⁿ nī 'úú ndíí ndaā tiempo taachí
caaⁿ'maⁿ nī: De'ε chúúcā n'dai 'iiⁿ'yāⁿ
chí cuchii yā ndúúcu chí duuchi
Señor chí Daiyá Dendyuūs miiⁿ.

**Jesús ngaⁿ'a yā chí yaācū templo miiⁿ
ní ntuuví**

(Mr. 13.1-2; Lc. 21.5-6)

24 Taachí Jesús miiⁿ nan'dáa yā
yeⁿe yaācū templo cueⁿ'é yā.
Discípulos yeⁿ'é yā ní ndaa yā nanáaⁿ
yā ní n'giⁿ'i yā Jesús miiⁿ va'ai s'eeⁿ
yeⁿe yaācū templo miiⁿ. ²Jesús miiⁿ
ní n'gueεcútaⁿ'a yā ní caⁿ'a yā: ¿Áá
inaaⁿ ndís'tiī nducyáácá chuū? Cuaacu
níⁿ'nyúⁿ ngaⁿ'á ngií ndís'tiī, chí nguéeⁿ
cunee tuūu cuaaⁿ vmnaaⁿ yeⁿe ví'í chí
nguéeⁿ ntuuví.

**Jesús ngi'cueeⁿ yā de'ē chí cuuvi
taachi 'āā ndaa niiⁿnuúⁿ nguuví chí
'cuiinu iⁿ'yeēⁿ'di**

(Mr. 13.3-23; Lc. 21.7-24; 17.22-24)

³Jesús véé yā ná yiicū chí nguuvi
Olivos. Discípulos ndaa yā nanáaⁿ

yā taachi canee yā damáaⁿ yā ní
caⁿ'a yā chí yā Jesús: Cúúví nī
nú's'uu tíí cuaⁿ'ā cuuví chuū. ¿De'ε
señal 'cuuⁿ'miⁿ nī taachi 'āā ndaa
nī taama vmnéⁿ'ēe ní taachí 'cuiinu
iⁿ'yeēⁿ'di?

⁴Jesús nan'gueεcútaⁿ'a yā yeⁿe yā
ní caⁿ'a yā: Cundée nī cuidado chí
mar 'áámá 'iiⁿ'yāⁿ nguéeⁿ canche'éeí
yā ndís'tiī. ⁵'Yááⁿ n'dái 'iiⁿ'yāⁿ ndaa
yā ndúúcu chí duuchí ní caaⁿ'maⁿ
yā 'tíicā: 'Úú chí Cristo 'úú. Ní
canche'éeí yā 'yaaⁿ n'dái 'iiⁿ'yāⁿ. ⁶Ní
'caandiveéⁿ nī chí véé caandaá ní
'caandiveéⁿ nī chí 'cuūndí caandaá.
Cundée nī cuidado chí 'iiⁿ'yāⁿ s'eeⁿ
nguéeⁿ castaⁿ'a vaanicádiinúúⁿ yeⁿe
nī ti canee chí chíⁿ nducuéⁿ'ē
dendu'ū chí 'túúca cuuvi, naatí 'āā
cuéeⁿ chí 'āā 'cuiinu iⁿ'yeēⁿ'di. ⁷Ti
'áámá nación 'cuuⁿ'maⁿ ndúúcu
taama nación, ní 'áámá rey ndúúcu
nducuéⁿ'e país naachi ngaⁿ'a
ntiiⁿ'nyuⁿ yā contra yeⁿ'e taama rey
ndúúcu nducuéⁿ'e país naachi chí
ngaⁿ'a ntiiⁿ'nyuⁿ yā. Ndaá tiempos
chí cuiicu ndúúcu tiempos chí
'iiⁿ'yāⁿ 'cueenú yā cuuvi cáāvā chí
ya'ai yeⁿ'é yā, ní ndúúcu tiempos
chí inuⁿ'u yáⁿ'āa n'dee cuááⁿ n'dai.
⁸Taachí cuuví dendú'ū chí 'túúca
ní chí tuuⁿ'mi ní cáámá cúūⁿ'nga'a
vaādi ya'ai.

⁹Tuuⁿ'mi ní 'iiⁿ'yāⁿ s'eeⁿ ní nca'a yā
ndís'tiī na ta'a 'iiⁿ'yāⁿ chí 'cueenu
nī cuuvi ní 'caaⁿ'núⁿ yā ndís'tiī. Ní
nducyáácá 'iiⁿ'yāⁿ nguéeⁿ cuaaⁿ yā
ndís'tiī caavā chí ngaⁿ'a nī chí
duuchí. ¹⁰Ní tiempo miiⁿ neené
'yaaⁿ 'iiⁿ'yāⁿ chí 'āā i'téenu yā yeⁿ'e
'úú ní 'cueenú yā cuuvi. Ní 'áámá
yā caaⁿ'máⁿ yā contra yeⁿ'e taama
yā chí i'téenu yā. Ní 'āā ntéé neⁿ'é

yā vi'i. ¹¹Ní neéné 'yaa' 'ii'ⁿyāⁿ profetas falsos chí nguéé ngaⁿa yā nduudu cuaacu yeⁿ'é Ndyuūs ndaa yā ní canche'éi yā 'yaa' n'dáí 'ii'ⁿyāⁿ. ¹²Ní cáávā chí 'ii'ⁿyāⁿ neené dinuuⁿndí yā. 'Āā ntéé neⁿ'e yā 'áámá yā táámá yā vi'i. ¹³'Ii'ⁿyāⁿ chí cuchéé yā ní 'áámá i'téenu yā yeⁿ'é Ndyuūs ndii tiempo chí 'cuūvi yā ní nguáⁿ'ai yā. ¹⁴Ní nduūdū cuaacú 'cūū chí ngai yeⁿ'é naachi Ndyuūs ngaⁿ'a ntiinⁿnyúⁿ yā 'ii'ⁿyāⁿ canéé chí caaⁿ'maⁿ yā nanááⁿ nducueⁿ'ē iⁿ'yeeⁿdī. Ní nduudu cuaacu yeⁿ'é Ndyuūs ní cūnee chí 'caandiveéⁿ 'ii'ⁿyāⁿ yeⁿ'e tanducueⁿ'ē nación yeⁿ'e núúⁿmáⁿ iⁿ'yeeⁿdī tuuⁿ'mi ní ndaa chí 'cuiinu iⁿ'yeeⁿdī.

¹⁵Taachí ndís'tii snaaⁿ nī tanducueⁿ'ē chí cuncáā ca tan'dúucā chí dinguuⁿ profeta Daniel ndii cuááⁿ vmnaaⁿ taachi cheendí yā na cuaaⁿ chí santo tuuⁿ'mi ní ndís'tii ndúúcū 'ii'ⁿyāⁿ chí n'geeⁿ yā túúmícadíínuuⁿ yā yeⁿ'ē. ¹⁶Ní tiempo yeⁿ'e chúū, 'ii'ⁿyāⁿ chí snée yā na yáⁿ'āa Judea cáánu yā caⁿ'á yā cuaaⁿ yīicū. ¹⁷Ní 'ii'ⁿyāⁿ chí sndúu yā tííⁿ va'āi nguéé ngua'áí yā chí cuta'á yā 'tē chí snūūⁿ chēeti va'āi ti cáánu yā. ¹⁸'Ii'ⁿyāⁿ chí canée yā cuēeti nguéé nguēecundí yā na vaacu yā chí cuta'á yā tiīnuuⁿ yeⁿ'e yā ti cáánu yā. ¹⁹De'e chúucā ya'ai yeⁿ'ē n'daataá chí véé daiya tá chēeti tá ndúúcū n'daataá chí ngiicu dacua'āa yeⁿ'ē tá nguuvi s'eeⁿ chí cáánu yā. ²⁰Caaⁿ'maⁿ'ngua'á nī chí taachí ndaa nguuvi chí cáánu nī, nguéé tiempo chí 'iiche ndíí nguéé ndúú nguuvi sábadó chí ntaaviⁿ'tuunúúⁿ nī. ²¹Tuuⁿ'mi ní ndaa nguuvi chí neéné 'cueenu cá

nī cuuvi chí nguéé n'diichi nī, ndíí nguéé ndúú ndíí naachi chinga'ā yeⁿ'e iⁿ'yeeⁿdī, ndíí mááⁿ, ndíí nguéé ndúú snaaⁿ ra nī cuayiivi. ²²Ndúúti chí Ndyuūs nguéé 'āā diduuⁿ'ví yā tiempo chí 'cueenu cá nī cuuvi mar 'áámá 'ii'ⁿyāⁿ nguéé nguaⁿ'ai yā. Naati cáávā 'ii'ⁿyāⁿ chí Ndyuūs dēeve yā, Ndyuūs diduuⁿ'ví yā tiempo miiⁿ.

²³Tuuⁿ'mi ní ndúúti chí 'áámá 'ii'ⁿyāⁿ caaⁿ'maⁿ yā cuuvi yā ndís'tii: Cuin'diichí nī, 'muuⁿ canee Cristo, o cuin'diichí nī, miiⁿ canéé Cristo miiⁿ'ya, nguéé cu'teenú nī 'ii'ⁿyāⁿ miiⁿ. ²⁴Ti ndaa 'yaa' n'dáí 'ii'ⁿyāⁿ chí nga'á yā chí Cristo yā naati nguéé Cristo 'ii'ⁿyāⁿ s'eeⁿ. Ndaá 'yaa' n'dáí profetas falsos chí nguéé caaⁿ'máⁿ yā nduudu cuaacu yeⁿ'é Ndyuūs. Ní 'ii'ⁿyāⁿ s'eeⁿ idiíⁿ yā señales chí n'gēete ndúúcū vaadi n'giinu. Ní canche'éi yā 'ii'ⁿyāⁿ ndíí 'ii'ⁿyāⁿ chí Ndyuūs ndēeve yā nduuti chí cuuví yā. ²⁵Caandiveéⁿ nī. Āā ndíí vmnaaⁿ, 'āā nga'á ngíi chuū ndís'tii. ²⁶Ndúúti chí 'ii'ⁿyāⁿ caaⁿ'maⁿ yā cuuvi yā ndís'tii 'tíicā: Cuin'diichí nī, Cristo canée yā na yáⁿ'āa cuūⁿmáⁿ, nguéé caⁿ'á nī miiⁿ. O nduuti chí caaⁿ'máⁿ yā: Cuin'diichí nī, Cristo canée yā ná 'aama cuarto chēeti va'ai, nguéé cu'téenu nī. ²⁷Tan'dúúcā 'cuai chí ngiia cuááⁿ naachi ican'daa 'yáⁿ'ā ní inaaⁿ yú ndíí taachi ndaa cuaaⁿ na ngiia 'yáⁿ'ā, 'tiicá ntúūⁿ cuuvi taachí 'úú nndaá, 'úú chí Saⁿ'ā chí Daiya Ndyuūs. ²⁸Tí 'āā tíí nūuⁿ naachi candiiti cuerpo yeⁿ'e tináⁿ'ā, mííⁿ nduuvidaama luutí.

Taaca ndaa Saⁿ'a chí Daiya Ndyuūs

(Mr. 13.24-37; Lc. 21.25-28)

²⁹Jesús caⁿ'a yā: Tuuⁿ'mi ní taachi 'cuiinu 'cueenu yā cuuvi ní ch'ó'oo

tiempo miiⁿ, tuu'mi ní 'yáⁿá ní cuuvi maāiⁿ, ní 'iyyū miiⁿ ní nguéé cunuūⁿ deevε. 'Iiⁿnyuⁿ ní cun'daā yeⁿē nanguuvi ní nanguuvi ní nuⁿu ndúúcu poder yeⁿē. ³⁰Tuu'mi ní snaáⁿ yā señales nanguuvi chi yeⁿe Saⁿā chi Daiya Ndyuūs. Ní nducyáácá 'iiⁿyāⁿ yeⁿe nducuéⁿē naciún yeⁿē iⁿ'yeeⁿdí ní cuεécú yā ní snaaⁿ yā chí ndaá Saⁿā chi Daiya Ndyuūs na meééⁿ yeⁿē nanguuvi ndúúcu poder yeⁿe yā ndúúcu chídeevé n'dai yeⁿe maáⁿ yā. ³¹Taachí dichó'o yā ángeles yeⁿe yā, tuu'mí nūuⁿ áámá yā ní dí'cuεécú yā trompeta yeⁿe yā. Ní ángeles miiⁿ nadáámá yā 'iiⁿyāⁿ chi yeⁿe Cristo chí Cristo ndeεε yā yeⁿē cuaaⁿ núuⁿmáⁿ yáⁿāa 'cūū ndii 'áámá 'diituú ndii táámá 'diituú yeⁿē nanguuvi.

³²Cuayiiivi miiⁿ ní Jesús caⁿa yā: 'Cueéⁿ nī ejemplo yeⁿē yáⁿá yeⁿe n'guíídi yaaⁿ nguuvi taachí ínnguaaⁿnu duūⁿnē n'gaiyāá ní ican'daā tá'āā 'āā déenu nī chí 'āā cuchii yāāⁿ. ³³Tiicá ntūūⁿ, ndís'tiī, taachí snaaⁿ nī tanducuéⁿē chūū, 'āā deenú nī chí 'āā cháā ndaa Saⁿā chi Daiya Dendyuūs. Ní 'āā neené niiⁿnuúⁿ cánéé tiempo chi ndaa sa. ³⁴Cuaacu nííⁿnyúⁿ ngaⁿá ngií ndís'tiī, chí 'iiⁿyāⁿ chí snée yā maaⁿ nguéé 'cuūvi yā neⁿe chí 'āā cuéé cuuvi tanducuéⁿē chūū. ³⁵Nanguuvi ndúúcu yáⁿāa 'cūū chó'oo naati nduudu yeⁿé nguεε chó'oo.

³⁶Naati nguuvi miiⁿ ndúúcu hora miiⁿ taachí ndaa Saⁿā chí Daiya Dendyuūs, nguεε véé mar 'áámá 'iiⁿyāⁿ chí deenú yā yeⁿē, ndíí nguéé ndúú ángeles yeⁿe va'ai chεeti nguuvi, ti dámaaⁿ Ndyuūs Chiidá deenú yā.

³⁷Tan'dúúca chí chíí tiempo chí 'āā chó'oo taachi canéé Noé miiⁿ tiempo taachi chó'oo diluvio, 'tíscā cuuvi taachí ndaā Saⁿā chí Daiya Dendyuūs. ³⁸Ní tiempo taachi 'āā cuéé chó'oo diluvio chí cueeⁿ taaⁿ cuūvi, 'iiⁿyāⁿ ní ngé'e yā, ní ngi'i yā, ní n'giindivaacu yā, ní nga'a yā daiya yā chí n'giindivaacu, ndíí nguuvi chí Noé miiⁿ sndaā yā na arca chí barco ch'εεtε ca chí din'dái yā. ³⁹Ní 'iiⁿyāⁿ yeⁿe tiempo yeⁿe Noé nguéé s'neeⁿ veéⁿ yā ndíí taachi cheeⁿ taaⁿ cuūvi ní ch'iinū nducyáácá 'iiⁿyāⁿ ti chí'í yā. 'Tiicá ntūūⁿ cuuvi taachí ndaa Saⁿā chí Daiya Ndyuūs. ⁴⁰Tuu'mi ní nguuvi taachi nndaa Daiya Ndyuūs snée 'uūvi saⁿā na cuεeti. 'Aama saⁿā ní Cristo candée yā saⁿā, taama saⁿā ní cūnee sa. ⁴¹Ní na 'uūvi n'daataá snee ta ingúú tá 'áámá va'ai naachi inguú yā. 'Aama tá ní candεε yā táⁿā, taama ta ní cūnee ta.

⁴²Ndís'tiī cundée nī cuidado, ti nguεε déenu nī de'ē hora chí nndaá Señor yeⁿe nī. ⁴³Naati déenu nī chūū. Ndúúti chí saⁿā n'dai chí vaacu sa miiⁿ déenu sa de'ē hora ndaa chí duucu tuu'mi ní canduuchi sa. Ní nguéé ca'a sa lugar chí diduucu yā chí véé chεeti vaacu sa. ⁴⁴Chííⁿ chí ndís'tiī ní 'cuεetinéé yaaⁿ nī ti Saⁿā chí Daiya Ndyuūs miiⁿ ndaa yā hora chí ndís'tiī nguéé déenu nī.

Ejemplo yeⁿe mozo chí n'daācā ní yeⁿe mozo chí nguéé n'daācā

(Lc. 12.41-48)

⁴⁵Caⁿa Jesús: ¿Du'ú dueño caⁿa yā ntiiⁿnyuⁿ chí s'nee yā vmnaaⁿ yeⁿe va'ai yeⁿé yā nduuti chí nguéé 'aama mayordomo chí n'daācā n'dai

ní deenu sa ní ca'a sa chi che'e mozos yeⁿé yā hora chi che'e sa? ⁴⁶De'e chúucā n'dai mayordomo miiⁿ chí díiⁿ sa ntiⁿnyuⁿ taachi dueño miiⁿ ní ndāa yā ní ndaaca yā mayordomo chí díiⁿ sa tan'dúucā chi neⁿe yā. ⁴⁷Cuaacu níⁿnyúⁿ ngaⁿá ngíi ndís'tii, chí dueño miiⁿ cu'neeⁿ yā mayordomo miiⁿ chí caaⁿmaⁿ ntiⁿnyuⁿ sa yeⁿé chí véé yeⁿe yā. ⁴⁸Ndúúti chi mayordomo miiⁿ ní nguéé n'dáacā idiiⁿ sá ní 'íicú nacádíinuⁿ sa na staava yeⁿé sa chí dueño cuuvi 'náaⁿ yā ní ndaa yā. ⁴⁹Ní tucá'a sa che'e sa mozos chí idiiⁿ sa ntiⁿnyuⁿ ndúúcu sa ní ngé'e sa ní ng'i sa ndúúcu amigos yeⁿe sa ní cuu'vi sa. ⁵⁰Dueño miiⁿ ní ndaa yā nguuvi chí nguée canéé ngíinu sa ní hora chí nguée deenu sa. ⁵¹Ní dueño miiⁿ ní ca'á yā 'aama castigo cheete mayordomo miiⁿ. Ní 'caacá yā mayordomo chí cheeyē ní cu'neeⁿ yā mayordomo miiⁿ chufa'āi ndúúcu 'iiⁿyāⁿ 'uuvi nááⁿ 'uūvi cheendi yā. Lugar miiⁿ ní cuéecu sa ní che'e 'diiⁿyuⁿ sa cueⁿe daaⁿmaⁿ.

**Ejemplo yeⁿe ndiichi
n'daataá chí cuíinuú**

25 Jesús caⁿa yā taama ejemplo: Naachí Ndyuūs ngaⁿa ntiⁿnyúⁿ yā na va'ai cheeti nguuvi tan'dúucā ndiichi n'daataa chí cuíinuú chí sta'á yā lámparas yeⁿe yā ní can'dáa yā. Ní cueⁿe yā ndaāca yā saⁿā chí 'caandavaacu sa. ²Ní nyuⁿu yā candéē n'daāca yā cuidado ti lista yā. Tá nyuⁿu yā nguéé candéé yā cuidado ní díiⁿ yā tan'dúucā chí n'daataá tonta yā. ³N'daataa chí cuíinuú chí nguéé candéé yā cuidado, candéé yā

lámparas yeⁿe yā ní nguéé candéé yā petróleo yeⁿé. ⁴Ní nyuⁿu yā ní candéé n'daacá yā cuidado, candéé yā botellas yeⁿe petróleo ndúúcu yā ndúúcu lámparas yeⁿe yā. ⁵Ní chí'naaⁿ saⁿā miiⁿ chí ndaa sa chí 'caandavaacu sa. Ní taachi 'āa cuéé ndaa sa, n'daataá s'eeⁿ chí ndaa yááⁿ nááⁿ yā ní ch'eti yaadú yā. ⁶Chí maⁿā yaaⁿ, chí'indiveéⁿ yā 'áamá nduudu chí 'caí. Ní ngaⁿa yā: Ndaa sáⁿā chí 'caandavaacu sa. Can'dáa nī ní díiⁿ nī recibir saⁿā. ⁷Tuu'mi ní nducyaaca chí cuíinuú s'éeⁿ nducueeⁿ yā ní nuuⁿmí yā lámparas yeⁿe yā. ⁸Chí cuíinuú chí nguéé lista yā caⁿa yā chíi yā chí cuíinuú chí lista yā: Téé nī 'téé petróleo yeⁿé nī nús'uu ti lámparas yeⁿé nū 'āā cháā 'āā n'tuuvi. ⁹Chí cuíinuú chí candéé yā petróleo n'guécútaⁿa yā ní caⁿa yā chíi yā tanáⁿa yā: Nguéé cuuvi teé 'nū ndís'tii. Nús'uū ní neⁿe cá 'nū petróleo chí candéé 'nū ní 'íicú 'áátii nguéé cuuvi falta yeⁿe yú. N'dáaca ca yeⁿe ndís'tii chí caⁿa nī naachí n'diicuí yā petróleo ní cuái nī yeⁿé nī. ¹⁰Neⁿe chí n'daātā s'eeⁿ chí nguée lista yā cueⁿe yā cuái yā petróleo miiⁿ, saⁿā chí 'caandavaacu sa ndaa sa ní chí cuíinuú chí candéé n'daacá yā cuidado cueⁿé yā ndúúcu saⁿā naachí n'giindivaacu 'iiⁿyāⁿ. Ní saⁿā miiⁿ nan'gaādí sá cheendi va'āi miiⁿ. ¹¹Cuayiivi miiⁿ ní ndaa tanáⁿā chí cuíinuú s'eeⁿ ní caⁿa yā: N'diī Señor, Señor, nan'guaaⁿ nī yeⁿé 'nū. ¹²Naati saⁿā miiⁿ chí 'caandavaacu sa ní nan'guécútaⁿa yā ní caⁿa yā: Cuaacu níⁿnyúⁿ nga'á ngíi ndís'tii, 'úú ní nguéé n'diichí ndís'tii.

¹³Maaⁿ ní nducyaaca ndís'tii candéé nī cuidado ti nguéé déenu nī

de'ē nguuvi o de'ē hora chi Saⁿā chi Daiya Dendyuūs nndaa sa.

Ejemplo yeⁿe tuūmī

¹⁴Tuuⁿmi ní caⁿa Jesús: Naachí Ndyuūs ngaⁿa ntiⁿnyuⁿ yā na va'ai cheeti nguuvi tan'dúúcā 'áámá saⁿā chi caⁿā yaⁿái yā ndii táámá yáⁿāa ní 'cai yā mozos yeⁿe yā ní nca'a yā mozos miiⁿ dendú'u chi véé yeⁿe yā, chi diiⁿ sa cuidado yeⁿe.

¹⁵Aama mozo ní ca'a yā nyuⁿu mil caadi, táámá mozo ní 'uūví mil caadi, táámá mozo ní 'aama mil caadi. Ní ca'a yā 'áámá 'áámá mozo tan'dúúcā chi chee sa. Ní cueⁿē yaⁿái yā. ¹⁶Mozo chí staⁿā nyuⁿu mil caadi cunaⁿā sa ní diiⁿ sa negocio ndúúcū tuūmī miiⁿ. Ní ndaācā sa tá nyuⁿu mil caadi yeⁿe daiya túumī miiⁿ. ¹⁷Tiicá ntúūⁿ mozo chí sta'a sa ná 'uūví mil caadi miiⁿ ndaācā sa ná 'uūví mil caadi yeⁿe daiya tuūmī miiⁿ. ¹⁸Mozo chí staⁿā sa 'aama mil caadi cheⁿe sa ní s'neeⁿ sa tuūmī miiⁿ cheeti 'áámá 'cuutií cuééé ní ch'i sa maaⁿ yáⁿāa. 'Tíicā chinuuⁿ n'dé'ei sa tuūmī yeⁿe 'iiví sa.

¹⁹Chi 'naáⁿ ní ndaā 'iivi mozos miiⁿ ní tun'dáa yā cuenta ndúúcū mozos. ²⁰Ndaā mozo chí nca'a yā nyuⁿu mil caadi nanáⁿ yā. Ndée sa ta nyuⁿu mil caadi yeⁿe daiya tuūmī miiⁿ. Ní caⁿa sa chii sa 'iiví sa: N'dii señor, nyuⁿu mil caadi tee nī 'úú. 'Íngaā. Ndaācā ta nyuⁿu mil caadi daiya tuūmī yeⁿe nī. ²¹Iivi mozo miiⁿ ní caⁿa yā chii yā saⁿā: Dii mozo yeⁿe chí n'daācā ní n'dai, n'daācā n'dai ndíiⁿ di. Maaⁿ ti 'āā n'daācā diiⁿ di ndúúcū chí duū'vi, maaⁿ ní caaⁿmaⁿ ntiⁿnyuⁿ di yeⁿe

n'deē cá teé dii. Cho'o di cuaaⁿ cheeti va'āi ní cueⁿe daāⁿmaⁿ cuuvi yeenú di nduucú. ²²Ndaā ntúūⁿ nanáⁿ yā mozo chí nca'a yā na 'uūví mil caadi. Mozo miiⁿ ní caⁿa sa chii sa 'iivi sa: N'dii señor, 'uūví mil caadi tee nī 'úú. 'Íngaā tuūmī yeⁿe nī. Ndaācā ta na 'uuvi mil caadi daiya tuūmī miiⁿ. ²³Iivi sá caⁿa yā chii yā saⁿā: Díi mozo yeⁿe chí n'daācā ní n'dai, ní n'daācā diiⁿ di. Nguéé cheete teé dii ní n'daācā diiⁿ di. Maaⁿ ní caaⁿmaⁿ ntiⁿnyuⁿ yeⁿe n'deē ca chí teé dii. Cho'o di cuaaⁿ cheeti va'āi ní cueⁿe daāⁿmaⁿ cuuvi yeenú di nduucú. ²⁴Ndaa nanáⁿ yā mozo chí nca'á yā 'áámá mil cáádí, ní caⁿa sa chii sa 'iivi sa: N'dii Señor, deenú tí n'dii ní cheechí nī, ní diiⁿ nī cosechar ndúúcū tuūmī yeⁿe nī chí nguéé ngiinū nī, ní 'naaⁿ trigo ngaáⁿ nī naachí nguéé ngiinū nī ti yeⁿe nī. ²⁵Chíiⁿ chí diiⁿ ti 'va'á. Ní cheⁿé ní s'nuuⁿ n'de'ei tuūmī yeⁿe nī na 'áámá yiivi yáává maaⁿ yáⁿāa. 'Íngaā tuūmī yeⁿe nī chí tee nī 'úú. ²⁶Iivi sa míiⁿ nan'guēcútaⁿ yā ní caⁿa yā chii yā mozo miiⁿ: Díi mozo chí nguēe n'dáacā ní 'daān'di dii. Ní nguéé n'dáacā ídiⁿ. Díi ní déenu di chí ntā'a cosecha naachi nguéé ndíiⁿ ntiⁿnyuⁿ ní nn'guaáⁿ trigo naachi nguéé ngiinú ti yeⁿe. ²⁷¿De'ē cúúví chí nguéé s'neeⁿ di tuūmī yeⁿe na banco? Ní taachi 'úú ndaá cuuvi ntee di tuūmī yeⁿe ndúúcū daiya tuūmī miiⁿ. ²⁸Iivi miiⁿ caⁿa yā ndúúcū 'iiⁿyāⁿ chí snéé miiⁿ: N'dii, diví nī tuūmī yeⁿe sa ní ca'a nī tuūmī mozo chí ndeē ndiichi mil caadi. ²⁹Ti 'iiⁿyāⁿ chí véé yeⁿe yā, ní ndaācā ca yeⁿe yā. Ní 'iiⁿyāⁿ miiⁿ n'deē cá vee yeⁿe yā. 'Iiⁿyāⁿ

chi nguée yeⁿe yā, ta 'lírⁿ duū^{vi}
chi véé yeⁿe yā ní divíⁱ yā yeⁿe yā.
³⁰Mozo chi nguée dichí^í'vé ní cuta^á
ní ní cuⁿuuⁿ ní cuaaⁿ chuva^á
ná maaiⁿ. Míⁿ cuéecu sa ní che^e
'díⁿ'yúⁿ sá cueⁿe daāⁿmaⁿ.

N'diichi Jesús nuuⁿndi yeⁿe nacies

³¹Ní caⁿ'a Jesús: Taachí ndaa
Saⁿ'ā chi Daiyā Dendyuūs tan[']dúúca
Rey chí ch'ete ca ní n'deeve taavi
ndúúcu tanducuéⁿ'ē ángeles yeⁿe
yā, tuu[']mi ní saⁿ'ā miiⁿ 'cuūndi sa na
trono yeⁿe sa. ³²Ní nduuvidaama
nanááⁿ Rey miiⁿ 'iiⁿ'yāⁿ yeⁿe
nducyaaca nacies ní Rey miiⁿ
divíⁱ yā 'iiⁿ'yāⁿ, 'áámá yā yeⁿe
táámá yā tan[']dúúca chi 'iiⁿ'yāⁿ
pastor chi idiiⁿ yā cuidado yeⁿe
'iiti cuūchí divíⁱ yā chiivu nguaaⁿ
'iiti cuūchí. ³³Ní cuⁿ'neeⁿ yā 'iiti
cuūchí lado tá cuaacú yā ní chiivú
miiⁿ lado ta 'cueé yā. ³⁴Tuu[']mi
ní Rey miiⁿ caaⁿ'máⁿ yā cuuvi yā
'iiⁿ'yāⁿ lado ta cuaacu yā: Ndí[']tii
chi Chiidá ngaⁿ'a yā yeⁿe ní ndái
taavi ní. Cuchíⁱ ní. Ííngā parte chi
ituneⁿ ndí[']tii yeⁿe naachí Ndyuūs
ngaⁿ'a ntii[']nyúⁿ yā ní nguaiⁿ'ndai
yā yeⁿe ndí[']tii ndí['] taachi Ndyuūs
'āā cuéé din[']dái yā iⁿ'yeeⁿdí. ³⁵Tí
taachí cuiicú, ní tee ní chi che^e. Ní
taachí chi yaācá, ní tee ní chí chí[']í.
Ní taachí canú['] yúúní tan[']dúúca
'iiⁿ'yāⁿ chí ndiicá yā táámá yáāⁿ,
ndí[']tii 'cuúⁿ ní 'úú. ³⁶Ní taachi 'āā
ntéé catecaí, ní tee ní catecaí. Ní
taachi chí[']tā 'úú, dicuéénaaⁿ ní 'úú.
Ní taachi cheⁿ'é vácūū, ní ndaa ní
n'diichi ní 'úú. ³⁷Tuu[']mi ní 'iiⁿ'yāⁿ
chi ndái yā nan[']guēcútaⁿ'a ní caⁿ'a
yā cuuvi yā 'iiⁿ'yāⁿ: N'dií señor, 'tí[']
cuaⁿ'ā n'diichi 'nū n'dií chí cuiicu

ní ní tee 'nū chi che^e ní, o yaacá
ní ní tee 'nū chi chí['] ní? ³⁸'Tí[']
cuaⁿ'ā n'diichi 'nū n'dií cuaaⁿ cyúúní
ní nta[']á 'nū n'dií na vaacú 'nū, o
nguée catecaí ní ní tee 'nū catecaí
ní? ³⁹O 'tí['] cuaⁿ'ā n'diichi 'nū n'dií
chi ngíta ní o vácūū canuuⁿ ní, ní
níndaá 'nū nanáaⁿ ní? ⁴⁰Rey miiⁿ ní
nan[']guēcútaⁿ'a yā ní caⁿ'a yā chii
yā 'iiⁿ'yāⁿ s'uuⁿ: Cuaacu ní[']nyúⁿ 'úú
ngaⁿ'á ngí ndí[']tii, tí taachi dí['] ní
'tíicā ndúúcu 'áámá hermano 'áará
chi ndí[']cúúⁿ cá yā, tuu[']mi ní 'tiicá
ntúúⁿ dí['] ní nduucú.

⁴¹Tuu[']mi ní Rey caaⁿ'maⁿ ntúúⁿ
yā cuuvi yā 'iiⁿ'yāⁿ chi snée lado ta
'cueé yā: Cuvíⁱ ní yeⁿe 'úú, ndí[']tii,
'iiⁿ'yāⁿ condenado chi nguée n'daācā
idí['] ní. Ní caⁿ'a ní ná nguuchi
yaⁿ'ā chí 'áámá ngiichi cueⁿ'e
daāⁿmaⁿ. Lugar 'cūū ní n'dai cáava
yááⁿ'guinūūⁿ ndúúcu ángeles yeⁿe
sa. ⁴²Tí taachí cuiicú, nguée tee
ní chi che^e. Chií yaācá, ndí['] nguée
ndúú tee ní chí chí[']. ⁴³Canú[']
yúúní, ndí['] nguée ndúú 'cuúⁿ ní
'úú. 'Áā ntéé catecaí, ndí['] nguée
ndúú tee ní catecaí. Chí[']tā 'úú ní
canú['] vácūū, ndí['] nguée ndúú
dicuéénaaⁿ ní 'úú. ⁴⁴Tuu[']mi ní 'iiⁿ'yāⁿ
s'eeⁿ nan[']guēcútaⁿ'a yā ní caⁿ'a yā:
N'dií señor, 'tí['] cuáⁿ'ā n'diichi 'nū
n'dií chí cuiicú ní, o yaācá ní, o
canú['] ní yúúní, o nguée catecaí ní,
o ngíta ní, o vácūū canuuⁿ ní, ní
nguée dichí[']'ve 'nū n'dií? ⁴⁵Tuu[']mi
ní Rey miiⁿ nan[']guēcútaⁿ'a yā ní
caaⁿ'maⁿ yā cuuvi yā 'iiⁿ'yāⁿ s'eeⁿ:
Cuaacu ní[']nyúⁿ ngaⁿ'á ngí ndí[']tii,
tan[']dúúca chi nguée dí['] ní ndúúcu
'áámá chí ndí[']cúúⁿ cá 'tiicá ntúúⁿ
'úú, nguée dí['] ní nduucú. ⁴⁶'iiⁿ'yāⁿ
s'eeⁿ ní caⁿ'a yā na 'áámá castigo chí

'áamá canee ní 'iiⁿ'yāⁿ chí n'dáí yā caⁿ'á yā ná vida cueⁿ'e daāⁿmaⁿ.

'Iiⁿ'yāⁿ ní n'nuuⁿ yiinú yā táácā cuta'á yā Jesús

(Mr. 14.1-2; Lc. 22.1-2; Jn. 11.45-53)

26 Taachí Jesús ch'iinu caⁿ'a yā tanducueⁿ'ē nduudú 'cūū, caⁿ'a yā chii yā discípulos yeⁿ'e yā: ²Áā déenu ndís'tii ná 'uūví nguuví maaⁿ cuūvā 'viicu yeⁿ'ē pascua. Íícu 'úú Saⁿ'ā chi Daiya Dendyuūs 'úú ní 'iiⁿ'yāⁿ nca'a yā 'úú ní cuⁿ'ééⁿnga'a yā 'úú.

³Tuu'mi ní chiiduú n'geete ndúúcu maestros yeⁿ'e ley ndúúcu 'iiⁿ'yāⁿ ndiicúú s'eeⁿ chí ngaⁿ'a ntiiⁿnyuⁿ yeⁿ'é yaācū nduuvidaamá yā na palacio yeⁿ'ē chiiduú ch'eté ca chí nguuví Caifás. ⁴Ní ndeé yā taācā cuuvi canche'elí yā Jesús ní cuta'á yā 'iiⁿ'yāⁿ ní 'caaⁿ'núⁿ yā 'iiⁿ'yāⁿ. ⁵Ní caⁿ'a yā: Nguéé diiⁿ yú nguuví 'viicu ti 'iiⁿ'yāⁿ yeⁿ'e yāāⁿ Jerusalén miiⁿ didáⁿ'a yā ní díⁿ yā vaadí 'caaⁿ'va ndúúcu nús'uu.

Ch'eēndáa yā aceite vmaāⁿ tiiⁿ Jesús na yāāⁿ Betania

(Mr. 14.3-9; Jn. 12.1-8)

⁶Jesús canéé yā na yāāⁿ Betania ná va'ai yeⁿ'e Simón chi canéé ca'ai lepra chi in'duuti yuūtē yeⁿ'ē sa. ⁷Ní ndaā 'áámá n'daataá nanááⁿ Jesús miiⁿ chí ndéē tá 'áámá frasco tuūu alabastro chí s'néēⁿ aceite perfume chí yaⁿ'ai n'dai chí'vē. Ní ch'eēndáa ta perfume miiⁿ na tíⁿ Jesús taachí vee yā na mesa. ⁸Ní discípulos taachi n'diichí yā chūū nduuví taáⁿ yā. Ní caⁿ'a yā: ¿De'ē cúúví chí chingéē aceite 'cūū? ⁹Cuuví n'diicui ta chuū ti yaⁿ'ai n'dai chí'vē chuū

ní ca'a tá tuūmí miiⁿ 'iiⁿ'yāⁿ chí nguéé yeⁿ'e yā.

¹⁰Jesús tuumicadínuuⁿ yā chí discípulos ngaⁿ'a yā 'tífcā, ní caⁿ'a yā chii yā discípulos: ¿De'ē cúúví chí n'gaa'va ní ndúúcu n'daataá 'tíí? Táⁿ'a 'tíi n'dáacā diiⁿ tá nduucú. ¹¹Ti 'iiⁿ'yāⁿ chí nguéé véé yeⁿ'é yā ní 'áámá cánée yā nduucú ní, naati 'úú ní nguéé 'aama cunee nduucú ní. ¹²Taachi tá 'tíi ch'eēndáa ta perfume vmaāáⁿ cuerpo yeⁿ'é, ndaā ta 'úú tí taachí 'cuuví 'āā canee listo cuerpo yeⁿ'é chí 'cucēchí. ¹³Cuaacu níⁿ'nyúⁿ ngaⁿ'á ngii ndís'tíi, chí 'āā tíí nūuⁿ chí caaⁿ'máⁿ yā ndúúdu ngai yeⁿ'e chí nanguaⁿ'ai 'iiⁿ'yāⁿ na núúⁿmáⁿ iⁿ'yeēⁿdí, caaⁿ'maⁿ ntuúⁿ yā chí tá 'tíi diiⁿ tá chuū ní n'gacu yā yeⁿ'e tá.

Judas miiⁿ ngaⁿ'a maaⁿ sa chí nca'a sa Jesús

(Mr. 14.10-11; Lc. 22.3-6)

¹⁴Tuu'mi ní 'áámá discípulo yeⁿ'ē naachi ndiichúúví yā chí nguuví sa Judas Iscariote, cheⁿ'e sá nanááⁿ chiiduú n'geeté. ¹⁵Ní caⁿ'a sa chii sa 'iiⁿ'yāⁿ s'eeⁿ: ¿De'ē tée ní 'úú ní 'cuuⁿ'míⁿ ndís'tíi du'u chí Jesús? 'Iiⁿ'yāⁿ s'eeⁿ ní caⁿ'a yā chí nadii'vé yā Judas miiⁿ ndiicū ndiichi caadi 'díⁿ'nguee. ¹⁶Ndíí tuu'mí nūuⁿ in'nuuⁿ yíínú Judas miiⁿ de'ē tiempo ní táácā chí nca'a sa Jesús miiⁿ.

Jesús yaa'ví yā yeⁿ'ē chí che'e nguiinú yā 'viicu pascua

(Mr. 14.12-25; Lc. 22.7-23; Jn.

13.21-30; 1 Co. 11.23-26)

¹⁷Nguuví vmaāáⁿ vmaāⁿ yeⁿ'e 'viicu pascua, nguuví yeⁿ'e pan chí nguéé levadura yeⁿ'ē, discípulos

ní ndaa yā nanááⁿ Jesús ní caⁿa yā chii yā 'iiⁿyāⁿ: ¿Tií neⁿe nī chi in'nuúⁿ nū chi che'e nguínū yú mááⁿ yeⁿe 'viicu yeⁿe pascua?

¹⁸Níicú Jesús caⁿa yā chii yā discípulos: Cueⁿé nī na yááⁿ Jerusalén nī ndaacá nī 'áámá saⁿā ní caaⁿmaⁿ nī cuuvi nī saⁿā: Maestro yeⁿe yú caⁿa yā 'túúcā: Tiempo yeⁿe chí 'cuúví 'āā snee niiⁿnuúⁿ ní neⁿé dííⁿ 'viicu yeⁿe pascua ndúúcū discípulos yeⁿé na va'ai yeⁿé nī.

¹⁹Discípulos dííⁿ yā tan'dúúcā chi Jesús dicho'ó yā chí dííⁿ yā. Ní in'nuúⁿ yā chí che'e yā yeⁿe 'viicu yeⁿe pascua.

²⁰Taachi 'āā chii chiinū miiⁿ, Jesús ch'iindi yā na mesa ndúúcū ndu'u ndiichúví discípulos. ²¹Ní taachí veeté yā ní nge'e yā Jesús caⁿa yā: Cuaacu nííⁿnyúⁿ ngaⁿá ngíí ndís'tií, chí 'áámá chéé ndís'tií díí nī entregar 'úú.

²²Discípulos s'neeⁿ ndaachi yiinú yā. 'Áámá 'áámá yā ní tuc'á yā caⁿa yā: N'díí Señor, ¿'áá 'úú?

²³Tuu'mi ní Jesús nan'guεεcútaⁿa yā ní caⁿa yā: 'Iiⁿyāⁿ chí nduucú ní dí'caandá yā pan yeⁿé yā na cú'ú 'cūū nduucú, 'iiⁿyāⁿ 'cúú ní nca'a yā 'úú. ²⁴Cuaacu nííⁿnyúⁿ cuuvi ndúúcū Saⁿā chí Daiya Dendyuūs tan'dúúcā chí canéé nguūⁿ yeⁿé sa na libro yeⁿé Ndyuūs, naati de'e chúúcā ya'āi yeⁿe saⁿā chí nca'a sa 'úú chí Saⁿā chí Daiya Dendyuūs. N'dáacā ca yeⁿé sa nduuti chí nguéé ch'iindiyáaⁿ sa.

²⁵Tuu'mi ní Judas, saⁿa chí neⁿe nca'a sa Jesús, ní caⁿa sa: ¿'áá 'úú, Maestro? Jesús caⁿa yā chii yā Judas: Díí, ngaⁿa di 'tíicā.

²⁶Taachí 'iiⁿyāⁿ s'uuⁿ nge'e yā, Jesús miiⁿ sta'á yā pan ní ca'á yā gracias Ndyuūs cáávā pan miiⁿ. Ní n'deé yā pan ní ca'a yā discípulos yeⁿe yā. Ní caⁿa yā: Cuta'á nī, che'e nī pan caati tan'dúúcā cuerpo yeⁿé 'tíicā.

²⁷Ní Jesús sta'á yā taza ndúúcū jugo yeⁿe uvas ní ca'á yā gracias Ndyuūs cáávā nuūⁿnīⁿ uvas miiⁿ, ní ca'a yā discípulos yeⁿe yā. Ní caⁿa yā: Nducyaaca ndís'tií, cu'u nī nuūⁿnīⁿ uvas yeⁿe taza 'cūū, ²⁸ti jugo nuūⁿnīⁿ uvas miiⁿ ní tan'dúúcā yuūūⁿ yeⁿé ní yeⁿé compromiso chí ngai yeⁿé. Yuūūⁿ yeⁿé chí cungéé cáávā 'yaaⁿ n'dai 'iiⁿyāⁿ, 'tíicā. Yuūūⁿ yeⁿé chííⁿ chí nch'εεcú nuuⁿndi yeⁿe nducyaaca 'iiⁿyāⁿ. ²⁹'Úú ní ngaⁿá ngíí ndís'tií chí 'āā ntéé cu'ú jugo nuūⁿnīⁿ yeⁿé uvas na iⁿ'yeeⁿdí 'cūū ndii nguuvi chí cu'ú ndúúcū ndís'tií naachi Chiidá ngaⁿa ntiíⁿnyúⁿ yā.

Jesús ngaⁿa yā Pedro miiⁿ chí cuééⁿdíitu sa chí nguéé n'diichi sa Jesús

(Mr. 14.26-31; Lc. 22.31-34; Jn. 13.36-38)

³⁰Taachí ch'iinu chiita yā 'áámá canción yeⁿé Ndyuūs nan'dáa yā va'āi ní cueⁿé yā na yiicū chí nguuvi Olivos. ³¹Tuu'mi ní Jesús caⁿa yā chii yā discípulos: Nducyáácá ndís'tií cuuví 'cuináaⁿ nī yeⁿe 'úú maaⁿnguínū. Caati ngaⁿa naachi canéé nguūⁿ na libro yeⁿé Dendyuūs 'túúcā: 'Úú Ndyuūs 'nuūc'ái ní 'caaⁿnúⁿ saⁿā chí idiíⁿ sa cuidado 'iiti cuūchí, ní 'iiti s'eeⁿ ní caⁿá 'múúⁿ caⁿá miiⁿ ti ní cuuví ndai ti. ³²Taachí 'úú nduuchí nguaaⁿ tináⁿā, caⁿá vmnaaⁿ yeⁿe ndís'tií na yáⁿā Galilea.

³³Tuu'mi ní Pedro miiⁿ ní nan'guëecútaⁿ a sa ní caⁿ a sa chii sa Jesús: 'Áará chi nducyaaca yā cuuvi 'cuinaaⁿ yā cáávā n'dií 'úú nguéé cuuvi 'cuinaáⁿ mar 'aamá naaⁿ.

³⁴Tuu'mi ní Jesús caⁿ a yā chii yā Pedro: Cuaacu níⁿnyúⁿ ngaⁿ á ngií dii chi maaⁿnguínū taachi 'āā cuéé 'cuai túsaⁿā, dii ní 'āā 'iinū cuuvi cueeⁿdiitū di yeⁿē 'úú chi nguéé in'diichi di 'úú.

³⁵Naati Pedro miiⁿ caⁿ a sa: Ndúúti chi canéé chí 'cuūví nduucú nī maestro ní 'cuūví. Nguéé caaⁿ máⁿ chi nguéé n'diichi n'dií. Ní nducyaaca discípulos ní 'tiicá ntúūⁿ caⁿ a yā.

Jesús ngaⁿ angua'á yā na jardín chi nguuvi Getsemaní

(Mr. 14.32-42; Lc. 22.39-46)

³⁶Tuu'mi ní ndaā Jesús ndúúcé discípulos yeⁿé yā na 'áámá cuaaⁿ chi nguuvi Getsemaní ní caⁿ a yā chii yā discípulos yeⁿ e yā: 'Cuëeté nī 'muuⁿ. 'Úú ní caⁿ a niiⁿnuúⁿ miiⁿ ní caaⁿ maⁿ ngua'á.

³⁷Jesús miiⁿ cueⁿ e yā ndúúcé Pedro ndúúcé nduu 'uuvi saⁿ ā daiya Zebedeo. Tuu'mi ní Jesús s'neeⁿ ndaachi yiínú yā. ³⁸Ní caⁿ a yā chii yā 'iiⁿ yāⁿ s'uuⁿ: Alma yeⁿ é ní nééné ndaachí yiínú chi ya'āi chí 'cuūví. 'Cuëetinée nī 'muuⁿ ní 'cuëeti nduuchí nī nduucú.

³⁹Jesús ní cueⁿ é yā ta 'línⁿ cuááⁿ vmnaaⁿ. Candiitin'dií yā ní caⁿ angua'a yā ní caⁿ a yā: N'dií Chiidá, ndúúti chi cuuvi, nguéé dííⁿ nī chí 'cureenú cuuvi prueba 'cūū naati nguéé cuuvi tan'dúúcé chí 'úú neⁿ é naati tan'dúúcé chí n'dií neⁿ é nī.

⁴⁰Tuu'mi nūuⁿ ndaá yā naachi snéé discípulos yeⁿ e yā ní ndaāca yā 'iiⁿ yāⁿ chí stiyaadú yā. Ní caⁿ a yā chí yā Pedro: 'Áá 'tíicā nguéé íchéé dí chí induūchi dí nduucú 'áámá hora? ⁴¹Ndís'tií ní candée nī cuidado ní caaⁿ maⁿ ngua'á nī níicú nguéé dííⁿ nī nuuⁿ ndi. Cuaacu níⁿnyúⁿ espíritu yeⁿ e nī neⁿ e diiⁿ n'daacāā naati cuerpo yeⁿ é nī 'āā dūūvā.

⁴²Jesús cheⁿ e chí ndií 'úúví cuuvi ní caⁿ angua'á yā ní caⁿ a yā: N'dií Chiidá, ndúúti chí neⁿ é nī, dííⁿ nī chí nguéé 'cureenú cuuvi prueba 'cuu chí n'daācā tuu'mi ní 'tíicā dííⁿ nī, naati cuuvi tan'dúúcé chí neⁿ e nī.

⁴³Jesús nndaa ntuuⁿ yā táámá vmnéⁿ ēe naachi snéé discípulos yeⁿ é yā ní ndaaca ntúūⁿ yā 'iiⁿ yāⁿ stiyaadú yā ti 'iiⁿ yāⁿ s'eeⁿ 'āā ntéé ichēe yā nduutināaⁿ yā chí yaāⁿ nnāaⁿ yā. ⁴⁴Jesús miiⁿ ní nguéé yaa'vi yā discípulos ní s'neeⁿ yā 'iiⁿ yāⁿ chí stiyaadú yā. Ní cueⁿ e ntúūⁿ yā ní caⁿ angua'á ntúūⁿ yā ndií chí ndiíⁿ 'ínú cuuvi ní caⁿ a ntuuⁿ yā tan'dúúcé chí 'āā ngaⁿ a yā. ⁴⁵Cuayiivi ní ndaa ntuuⁿ yā nanááⁿ discípulos ní cáⁿ a yā chí yā discípulos: 'Cuëetiyaadú nī ní ntaavi'tuunúúⁿ nī. Cuin'diichi nī tí 'āā ndaā hora yeⁿ e 'úú chí Saⁿ ā chí Daiya Dendyuūs. 'Iiⁿ yāⁿ nca'a yā 'úú tá'a saⁿ ā s'eeⁿ chí véé nuuⁿ ndi yeⁿ e sā. ⁴⁶Nducueeⁿ ndís'tií ní cúⁿ u yú. 'Āā cuchii niiⁿ nuúⁿ saⁿ ā chí nca'a 'úú.

Sta'á yā Jesús ní candée yā 'iiⁿ yāⁿ presos

(Mr. 14.43-50; Lc. 22.47-53; Jn. 18.2-11)

⁴⁷'Naaⁿ chí Jesús indee yā, ndaā Judas miiⁿ, 'áámá saⁿ ā yeⁿ ē ndu'u

ndiichúúví discípulos. Ní nééné 'yaa' 'iiⁿyāⁿ ndaa yā ndúúcu Judas miiⁿ ndúúcu machetes 'uūví lados 'caāiⁿ ndúúcu yáⁿá. Chiiduú n'geeté ndúúcu 'iiⁿyāⁿ ndiicúú s'eeⁿ chí ngaⁿa ntiiⁿnyuⁿ yeⁿe yaācū dich'óo yā 'iiⁿyāⁿ s'eeⁿ. ⁴⁸Judas miiⁿ chi nca'a sá Jesús 'iiⁿyāⁿ s'eeⁿ, ca'a sa 'áámá seña ní 'túúca caⁿa sa: 'Iiⁿyāⁿ chí 'úú chí'neeⁿ cheendí, 'iiⁿyāⁿ miiⁿ chí 'iiⁿyāⁿ chí cuta'a nī chí preso yā.

⁴⁹Tuu'mi ní Judas miiⁿ ní ndaa sa nanááⁿ Jesús miiⁿ ní caⁿa sa: Tavacho'onoó nī, n'diī Maestro. Ní 'neeⁿ cheendi sá Jesús. ⁵⁰Jesús miiⁿ ní caⁿa yā chíi yā Judas: Díí, amigo yeⁿé, ¿de'ē cáávā chí cuchii dí? Tuu'mi ní 'iiⁿyāⁿ s'eeⁿ ní ndaa yā nanááⁿ Jesús miiⁿ ní sta'á yā Jesús ní candéé yā 'iiⁿyāⁿ preso.

⁵¹Naati 'áámá saⁿā chí canéé sá ndúúcu Jesús miiⁿ ní tun'dáa sa machete 'uūví lados 'caāiⁿ ná cheēti vaacu ní 'nuucá'ai sa 'áámá mozo yeⁿé chíiduú ch'ēeté ca ní ch'iica sa veēⁿ mozo miiⁿ. ⁵²Tuu'mi ní Jesús caⁿa yā chíi yā saⁿā: 'Nuūⁿ di machete 'uūví lados 'caāiⁿ yeⁿé di vaacu. Nducyaaaca 'iiⁿyāⁿ chí ita'á yā machete 'uūví lados 'caāiⁿ ní ndúúcu machete 'uūví lados 'caāiⁿ 'cuūví. ⁵³¿Áá nguéé déénú dí chí 'úú cuuví caaⁿmaⁿnguā'á ní caacá Chiidá ní miⁿníⁿyúⁿ miⁿniiⁿnyuⁿ cho'ó yā nanááⁿ 'úú taandu ngo'oo ndiichúúví taāⁿ ángeles ní chiidá cuuvi dííⁿ yā? ⁵⁴Naati maaⁿ ní nduuti chí dííⁿ chuu 'táácā cuuvi cúúnú ca'a naachi canéé nguūⁿ na libro yeⁿé Ndyuūs, chí canéé chí cuuvi 'tíicā?

⁵⁵Hora miiⁿ Jesús caⁿa yā chíi yā 'iiⁿyāⁿ s'eeⁿ: ¿De'ē cúúví chí can'daa

nī ndúúcu machetes 'uūví lados 'caāiⁿ ndúúcu yáⁿá s'eeⁿ tan'dúúca chí 'úú 'iiⁿyāⁿ chí duucu 'úú chí sta'á ní 'úú? Nguuvi nguuvi chí'indí ndúúcu ndís'tiī na yaācū templo ní ngi'cueeⁿ ndís'tiī ní nguéé sta'á ní 'úú. ⁵⁶Tanducuéⁿē chuū cuuví ní cúúnú ca'a yeⁿé chí canéé nguūⁿ na libro yeⁿé Ndyuūs cáávā profetas ndii cuááⁿ vmnaaⁿ. Tuu'mi ní nducyaaca discípulos s'neeⁿ yā Jesús miiⁿ ní chéénu yā.

Jesús nanááⁿ 'iiⁿntyéⁿē yeⁿe yaācū templo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷'Iiⁿyāⁿ chí sta'á yā Jesús miiⁿ candéé yā 'iiⁿyāⁿ miiⁿ nanááⁿ chíiduú ch'ēeté ca chí nguuvi Caifás. Mííⁿ nduuvíáámá maestros yeⁿe ley ndúúcu 'iiⁿyāⁿ ndiicúú s'eeⁿ chí ngaⁿa ntiiⁿnyúⁿ yā yeⁿe yaācū. ⁵⁸Pedro miiⁿ cueⁿe ntúúⁿ sa ní ndáa yaⁿai sa cuaaⁿ dáámí Jesús ndíí ch'ua'āi yeⁿé va'ai ch'ēete yeⁿé chíiduú ch'ēete cá. Ní ndaa sa na patio ní chí'indí sa ndúúcu policías chí dííⁿ yā cuidado yeⁿe va'āi miiⁿ. Pedro neⁿe sa snaaⁿ sa táacā chí dííⁿ yā ndúúcu Jesús miiⁿ.

⁵⁹Chiiduú n'geeté ndúúcu 'iiⁿyāⁿ ndiicúú s'eeⁿ chí ngaⁿa ntiiⁿnyuⁿ yā yeⁿe yaācū ndúúcu nducyaaca 'iiⁿyāⁿ chí ngaⁿa ntiiⁿnyuⁿ yā in'nuúⁿ yā 'áámá testigo chí nguéé ngaⁿa cuaacu yeⁿé Jesús miiⁿ. Ní 'íicú cuuvi nca'a yā Jesús miiⁿ chí 'cuuvi yā. ⁶⁰Nguéé ndaaca yā mar 'áámá naaⁿ taācā chí 'caaⁿnuⁿ yā Jesús miiⁿ. 'Áará chí neené 'yaaⁿ 'iiⁿyāⁿ caⁿa yā nduudu yaadi yeⁿe Jesús miiⁿ. Cuayiivi miiⁿ ní ndaa ntúūⁿ

tanaaⁿ 'uūvī testigos chí ngaⁿa yā nduudu yaadi. ⁶¹Testigos ní caⁿa yā: Sáⁿa 'cūū ní caⁿa sa: 'Úú ní cuuvi díⁿ chuū. Natuūví yáacū templo 'cūū chí yeⁿé Ndyuūs naati cheeti 'iinū nguuvi nadan'daí.

⁶²Chiiduú ch'εεε cá miiⁿ ní ncueeⁿ yā ní caⁿa yā chii yā Jesús: 'Áá nguée nan'guεεcútaⁿa nī mar 'áámá nduudu yeⁿe de'ε chí ngaⁿa 'íís'tiī yeⁿe ní?

⁶³Naati Jesús nguée de'ε vee caⁿa yā. Tuu'mi ní chiiduú ch'εεε cá miiⁿ caⁿa yā: 'Úú ní n'gaí, “por Ndyuūs chí canduuchí”. Cuuvi nī nús'uu ndúúti chí n'diī chí Cristo, Daiya Ndyuūs chí cánduuchi.

⁶⁴Jesús miiⁿ ní caⁿa yā chii yā chiiduú ch'εεε cá miiⁿ: 'Úú tan'dúúca chí n'diī ngaⁿa nī. Ngaⁿá ca ngíí ndís'tiī, chí ndiī maaⁿ snaaⁿ nī Saⁿá chí Daiya Ndyuūs 'cuūndi sa lado yeⁿe honor yeⁿé Ndyuūs chí véé tanducuéⁿē poder yeⁿé yā ní ndaa sa na meēⁿ yeⁿē nanguuvi.

⁶⁵Tuu'mi ní chiiduú ch'εεε cá miiⁿ chíín'cuúⁿ yā catecai yā ní caⁿa yā: Sáⁿa 'cūū ní ngaⁿā sa contra yeⁿé Ndyuūs. 'De'ε ca diiⁿ yú testigos chí in'nuuⁿ yú? Cui'ndííchí nī. Maaⁿ ní ndís'tiī ní n'giindiveéⁿ nī táácā ngaⁿa sa contra yeⁿe Ndyuūs.

⁶⁶'De'ε nadacádíínuuⁿ ndís'tiī? 'Iiⁿyāⁿ s'eeⁿ ní nan'guεεcútaⁿa yā ní caⁿa yā: Véé nuuⁿndi yeⁿe sa chí canée chí 'cuūví sa.

⁶⁷Tuu'mi ní ca'a nee daiⁿ yā naaⁿ Jesús miiⁿ ní ch'eⁿé yā Jesús. Ní n'gaadi yā nduutináaⁿ sa ndúúcu tiinūⁿ. Ní tanáⁿa yā ch'eⁿé yā 'iiⁿyāⁿ ndúúcu ta'á yā. ⁶⁸'Iiⁿyāⁿ s'eeⁿ ní caⁿa yā: N'diī chí Cristo, cuuví nī nús'uu, 'du'ū chí ch'eⁿé n'diī?

Pedro miiⁿ ní ngaⁿa sa chí nguée n'diichi sa Jesús miiⁿ

(Mr. 14.66-72; Lc. 22.56-62; Jn. 18.15-18, 25-27)

⁶⁹Pedro miiⁿ ní vee sa na patio yeⁿe va'āi ch'εεε chiiduú ch'εεε cá ní ndaa niiⁿnuúⁿ 'áámá táⁿā chí canée caadi 'iiyū. Ní táⁿā miiⁿ ní caⁿā tá chí tá Pedro miiⁿ: Diī ntúūⁿ ní canee di ndúúcu Jesús yeⁿe yáⁿā Galilea.

⁷⁰Naati Pedro miiⁿ ní chéeⁿdiitu sa nanááⁿ 'iiⁿyāⁿ s'eeⁿ ní caⁿa sa: Nguεε deenú chí ngaⁿā di.

⁷¹Ní taachí ndaā Pedro miiⁿ cheendi va'āi yeⁿe patio miiⁿ, táámá táⁿā chí canée caadi 'iiyu n'diichi ntuūⁿ tá saⁿā miiⁿ ní caⁿa tá chí tá 'iiⁿyāⁿ chí snée miiⁿ: 'Tiicá ntúūⁿ sáⁿa 'cūū ní canee sa ndúúcu Jesús yeⁿe yáāⁿ Nazaret.

⁷²Pedro miiⁿ ní cheeⁿdiitu ntúūⁿ sa, ndíí túúnú 'caí sa, “por Ndyuūs”. Ní caⁿa sa: 'Úú ní nguée in'diichí sáⁿa 'cūū.

⁷³Cuayiivi 'tee 'téé ní 'iiⁿyāⁿ chí snée yā cuaaⁿ na niiⁿnuúⁿ miiⁿ ndaa yā nanááⁿ Pedro miiⁿ. Ní caⁿa yā chí yā Pedro: Cuaacu níⁿnyúⁿ dii ntúūⁿ ní cachiica dí ndúúcu 'iiⁿyāⁿ s'eeⁿ ti tan'dúúca chí ngaⁿa di ní n'giⁿi di yeⁿe di chí dii ní nguaaⁿ 'iiⁿyāⁿ s'eeⁿ.

⁷⁴Tuu'mi ní Pedro miiⁿ ní tucá'a sa caⁿa taaⁿ sa, ní 'caí sa, “por Ndyuūs”, ní caⁿa sa chí sa 'iiⁿyāⁿ miiⁿ: Nguée in'diichí sáⁿa 'cūū. Tuu'mi nūuⁿ 'caí tusáⁿā. ⁷⁵Tuu'mi nūuⁿ ní Pedro miiⁿ ní n'gaacū sa nduudu yeⁿé Jesús taachí caⁿa yā 'túúca: Taachi 'āā cuée 'cuai tusáⁿā, 'āā cheeⁿdiitu di 'iinū cuuvi

chi nguée n'diichi di 'úú. Ní Pedro miiⁿ ní can'daa sa na lugar 'cūú ní cheecu taaví sa ti ya'ai staava yeⁿe sa.

Jesús nanááⁿ Pilato

(Mr. 15.1; Lc. 23.1-2; Jn. 18.28-32)

27 Taachí 'āā chīdeēve, nducyáácá chiiduú n'geete ndúúcū 'iiⁿyāⁿ ndiicūú chí ngaⁿa ntiⁿnyuⁿ yeⁿe yaācū nduuvidaamá yā chí ndeé yā taācā díⁿ yā ndúúcū Jesús miiⁿ ní nca'a yā 'iiⁿyāⁿ chí 'cuūvi yā. ²Ní n'deéchiichí yā Jesús miiⁿ ní candée yā ní nca'a yā Jesús miiⁿ Poncio Pilato, 'iiⁿyāⁿ gobernador.

Judas miiⁿ ch'ii sa

³Tuu'mi ní Judas miiⁿ, saⁿa chí nca'a Jesús miiⁿ, taachí n'diichí sa chí Jesús miiⁿ chíí yā condenado chí 'cuuví yā, ndaacadaamí sá yeⁿe nuuⁿndi chí díⁿ sa. Ní cheⁿe sa nanááⁿ chiiduú n'geeté ndúúcū 'iiⁿyāⁿ ndiicūú chí ngaⁿa ntiⁿnyuⁿ yeⁿe yaācū ní nca'a sa ndu'ū ndiicu ndííchí caadi 'diiⁿnguee 'iiⁿyāⁿ s'eeⁿ. ⁴Ní caⁿa sa chíi sa 'iiⁿyāⁿ s'eeⁿ: 'Úú ní díⁿ 'áámá nuuⁿndi. Nca'á 'áámá 'iiⁿyāⁿ chí nguée nuuⁿndi yeⁿe yā. 'Iiⁿyāⁿ s'eeⁿ caⁿa yā: ¿Dé'ē ínneeⁿ nús'uú chíi? Chuū chí maaⁿ di cand'ícu di.

⁵Tuu'mi ní Judas chingée sa tuūmī miiⁿ cheeti yaācū ní cunaⁿa sa. Ní dicuái yaacu sa maaⁿ sa. Ní Judas ní ch'ii sa.

⁶Chiiduú n'geeté n'guáaⁿ yā tuūmī ní caⁿa yā: Na ley miiⁿ ní ngaⁿā chí nguée 'cuii yú túmī 'cūú na caja yeⁿe ofrendas yeⁿe yaācū, ti túmī 'cūú ní túmī yeⁿe yuúúⁿ yeⁿe 'aama 'iiⁿyāⁿ.

⁷Ch'iinu chuū ní nduuvidaama yā chí cáí yā 'áámá tááⁿ yáⁿāa ndúúcū tuūmī chí cuuvi panteón cáávā 'iiⁿyāⁿ chí snúúⁿ yúúní. Miiⁿya yaⁿāa chí nguuvi Alfarero chí neⁿe caaⁿmaⁿ yáⁿāa yeⁿe chí 'iiⁿyāⁿ din'dái 'cuūtií cueēe. ⁸Chíⁿ chí yáⁿāa chí panteón cánée chí dúúchí ndíí mááⁿ, Yáⁿāa yeⁿe Yuūuⁿ.

⁹Tíicā ní cuunúú ca'a chí profeta Jeremías ca'a yā chuū ndii cuááⁿ vmaaaⁿ taachí dinguuⁿ yā na libro yeⁿe Ndyuūs 'tíicā: Ní sta'á yā ndu'u ndiicu ndííchí caadi 'diiⁿnguee. Tuūmī miiⁿ ní saⁿā s'eeⁿ canée yiinu sa chí ca'a sa Judas cucáávā chí ch'iiⁿnūⁿ sa Cristo. ¹⁰Ní ca'a yā tuūmī miiⁿ yeⁿe yáⁿāa chí nguuvi Alfarero, tan'dúúcā Señor yeⁿe yú caⁿa yā chíi yā 'úú.

Pilato intínguuneeⁿ yā Jesús

(Mr. 15.2-5; Lc. 23.3-5; Jn. 18.33-38)

¹¹Jesús chéendii yā nanááⁿ gobernador Pilato ní gobernador intínguuneeⁿ yā 'iiⁿyāⁿ ní caⁿa yā chíi yā 'iiⁿyāⁿ: ¿Áá díí chí Rey yeⁿe 'iiⁿyāⁿ Israel chí judíos? Jesús caⁿa yā chíi yā gobernador: N'dii ngaⁿa cuaacú ní ti 'tíicā.

¹²Chiiduú n'geeté ndúúcū 'iiⁿyāⁿ ndiicūú chí ngaⁿa ntiⁿnyúⁿ yā yeⁿe yaācū caⁿa yā chí véé nuuⁿndi yeⁿe Jesús naati Jesús miiⁿ ní nguée nan'gueecútaⁿa yā mar 'áámá nduudu. ¹³Tuu'mi ní Pilato miiⁿ caⁿa yā chíi yā Jesús: ¿Áá nguée n'giindiveeⁿ di tanducuéⁿe chí ngaⁿa yā yeⁿe di?

¹⁴Naati Jesús miiⁿ nguée nan'gueecútaⁿa yā mar 'áámá nduudu. Tuu'mi ní gobernador miiⁿ cheⁿe yiinu taavi yā yeⁿe Jesús ní

nguée déenu yā táacā nadacádínuuⁿ
yā yeⁿē.

Jesús canéé chí 'cuūvi yā

(Mr. 15.6-20; Lc. 23.13-25; Jn. 18.38-19.16)

¹⁵Maaⁿ ní nguúví 'viicu miiⁿ véeé
'áámá costumbre chi gobernador
miiⁿ canéé chí ín'dééché yā 'áámá
saⁿā chi canúⁿ sa vácūū 'viicu
yeⁿe pascua 'aama saⁿā chi preso
sa chi 'iiⁿyāⁿ Israel neⁿe yā.

¹⁶Ní canúⁿ 'aama saⁿā vácūū chi
nguuvi Barrabás. Nducyáácá 'iiⁿyāⁿ
ní déenu yā táacā idiiⁿ Barrabás
miiⁿ. ¹⁷Ní taachi 'iiⁿyāⁿ yeⁿe yáāⁿ
Jerusalén miiⁿ nduvidaamá yā,
gobernador Pilato miiⁿ ní caⁿa yā
chii yā 'iiⁿyāⁿ s'eeⁿ: ¿Duⁿu neⁿe
nī chi 'úú n'deēchí? ¿Áá neⁿe nī
Barrabás o Jesús chi nguuvi Cristo
chi 'úú caⁿá libre 'iiⁿyāⁿ?

¹⁸Pilato miiⁿ ní deenu yā chi
cáávā vaadī ngeee 'iiⁿyāⁿ s'eeⁿ
nca'a yā Jesús chi preso yā.

¹⁹Taachí Pilato miiⁿ ní vee yā na
silla yeⁿe juez miiⁿ, n'daataá yeⁿe
yā ní dich'ó tá 'áámá 'iiⁿyāⁿ chi
caⁿa yā chii yā Pilato miiⁿ nduudú
'cūū: Nguée de'ē vee dííⁿ nī ndúúcū
saⁿā n'dái 'cūū ti taachí cyaadú
néené n'deē ch'eenú chii taachí
ch'iinú cáávā sáⁿa tīi.

²⁰Naati chiiduú n'gēete ndúúcū
'iiⁿyāⁿ ndiicúú chí ngaⁿa ntiiⁿnyúⁿ
yā yeⁿe yaacū néené n'deē caⁿa yā
chii yā 'iiⁿyāⁿ yeⁿe yáāⁿ Jerusalén
miiⁿ chi caaⁿmaⁿ yā chi Pilato miiⁿ
n'dééchii yā Barrabás miiⁿ ní 'cuūvi
Jesús miiⁿ. ²¹Gobernador miiⁿ caⁿa
yā chii yā 'iiⁿyāⁿ s'eeⁿ: ¿Naachí na
'uuvi yā ní cheé yā chi neⁿe nī chi
n'deēchí? 'Iiⁿyāⁿ s'eeⁿ ní caⁿa yā:
Barrabás.

²²Pilato miiⁿ ní caⁿa yā chii yā
'iiⁿyāⁿ s'eeⁿ: ¿De'ē dííⁿ ndúúcū Jesús
chi nguuvi yā Cristo? Nducyaa
yā nan'guēcútaⁿa yā ní 'cai yā:
Cu'nééⁿnga'á yā.

²³Gobernador miiⁿ caⁿa yā chii yā
'iiⁿyāⁿ s'eeⁿ: ¿De'ē nuuⁿndi yeⁿe yā
vee? Naati 'iiⁿyāⁿ s'eeⁿ ní n'gái yicú
yā ní caⁿa yā: Cu'nééⁿnga'á yā.

²⁴Taachi Pilato miiⁿ n'diichí yā chi
nguée de'ē vee chi dííⁿ yā ndúúcū
'iiⁿyāⁿ ti yuudu n'dái ca n'gai yā,
tuu'mi ní sta'á yā nuūⁿnīⁿ ní naaⁿnu
yā ta'a yā nanááⁿ nducyaaca 'iiⁿyāⁿ
yeⁿe yáāⁿ Jerusalén miiⁿ. Ní ngaⁿa
yā: Limpia canéé 'úú yeⁿe asunto
'cūū. 'Úú ní nguée nuuⁿndi yeⁿe chí
'cuūvi sáⁿa 'cūū ti n'dai sa. Nds'tií
deenu nī táacā dííⁿ nī ndúúcu sa.

²⁵Nducyaaaca 'iiⁿyāⁿ
nan'guēcútaⁿa yā ní caⁿa yā: Yuuúⁿ
yeⁿe sáⁿa 'cūū 'āā cūnee dáámí rá
'nū ndúúcū daiya 'nū.

²⁶Tuu'mi ní Pilato miiⁿ ní
n'deēchii yā Barrabás miiⁿ ní caⁿa
ntiiⁿnyuⁿ yā chi soldados ch'eⁿe
yā Jesús. Ch'íínú ch'eⁿe yā ní nca'a
Pilato miiⁿ Jesús miiⁿ 'iiⁿyāⁿ chí
cu'neeⁿnga'á yā 'iiⁿyāⁿ.

²⁷Tuu'mi ní soldados romanos
yeⁿe gobernador can'dée sa Jesús
na vaacuyāāⁿ yeⁿe gobernador ní
nducyáácá soldados nduvidaama
sa nanááⁿ Jesús miiⁿ. ²⁸Ní divíi sa
catecaí vmaāⁿ Jesús ní s'nuuⁿ sa
tíínūⁿ morado cu'āā Jesús miiⁿ.
²⁹Ní s'nuuⁿ sa tiiⁿ Jesús 'áámá
corona chi ndeenyú ndúúcū yaaⁿ. Ní
sn'duuⁿ sa 'áámá taaⁿ ndúú ná ta'ā
cuaacú Jesús. Tuu'mi ní chíintii'ya sa
nanááⁿ Jesús miiⁿ ní ch'ííⁿnyuⁿneeⁿ
sa 'iiⁿyāⁿ. Ní caⁿa sa: Cūnduuchí nī
n'dií Rey yeⁿe 'iiⁿyāⁿ yeⁿe Israel.

³⁰Ní ca'a nee daiⁿ sa cuerpo yeⁿē Jesús ní sta'a sa 'áámá tááⁿ ndúú chí ndeε sa ní ch'eⁿe sa tiiⁿ Jesús. ³¹Ch'íínú ch'íiⁿnyuⁿneeⁿ sa Jesús miiⁿ ní ndivíi sa tíínúⁿ yā chí morado cuá'āa ní chí'nuuⁿ sa catecai yā. Ní candεε sa Jesús chí cu'néeⁿnga'a sa 'iiⁿyāⁿ.

S'néeⁿnga'a yā Jesús miiⁿ ní ch'ii yā

(Mr. 15.21-32; Lc. 23.26-43; Jn. 19.17-27)

³²Taachí can'daa yā ní cueⁿe yā na yúúni naachi cu'néeⁿnga'a yā ndaaca yā 'áámá saⁿā yeⁿe yāāⁿ Cirene chí nguuvi sa Simón. Ní a fuerza soldados di'cuiitu sa Simón 'cūū chí candée sa cruz yeⁿe Jesús.

³³Ní taachi ndaá yā na táámá lado yeⁿe yāāⁿ Jerusalén lugar chí nguuvi Gólgota chí neⁿe caaⁿmaⁿ, Lugar yeⁿē 'Iini Nga'ai Tíiinⁿ, ³⁴saⁿā ca'a sa Jesús vinagre ndístaⁿa ndúúcu nuuⁿníⁿ yeⁿē yáatā yaāa cáávā chí nguεε cueenu cá cuuvi Jesús chí chí'i Jesús miiⁿ. Taachí Jesús n'diichineeⁿ yā, nguéeⁿ 'cuuⁿ yā chí'i yā.

³⁵Taachí 'āā s'neeⁿnga'a sa Jesús, soldados ní tun'dáa sa suertes na catecai Jesús miiⁿ chí ca'a sa 'áámá sa nduúcu taama sa. Ní 'iicu cúúnúú ca'a tan'dúúca chí caⁿa profeta ndii cuááⁿ vmaaaⁿ ní canéeⁿ nguúⁿ na libro yeⁿē Ndyuūs 'túúca: Tun'daá yā suerte na catecai Jesús miiⁿ ní nca'á yā nguaaⁿ 'iiⁿyāⁿ s'eeⁿ. ³⁶Miiⁿ ch'eētεε soldados ní diiⁿ sa cuidado 'iiⁿyāⁿ chí s'néeⁿnga'a. ³⁷Ni 'áámá nduudu naaⁿ tíⁿ cruz miiⁿ chí canéeⁿ nguūⁿ 'túúca: Jesús miiⁿ chí Rey yeⁿe 'iiⁿyāⁿ yeⁿe ndaata Israel. Ní nduudu miiⁿ ngaⁿā dε'ε cáávā chí chí'ii Jesús miiⁿ.

³⁸Tuu'mi ní miiⁿ ntúūⁿ s'neeⁿnga'a yā ndúúcu Jesús miiⁿ 'uúvi chí duucu, 'áámá ní lado ta cuaacu yā, taama ní lado tá 'cuee yā. ³⁹'Iiⁿyāⁿ chí cho'ó yā naachi canee cruz miiⁿ chí'iiⁿnyuⁿneeⁿ yā Jesús miiⁿ. Ní idiⁿnúⁿu yā tíiⁿ yā. ⁴⁰Ní caⁿa yā: N'dii chí ngaⁿá nī chí maáⁿ nī cuuvi nada'tuúvi nī yaācu templo ní cheēti 'iinū nguuvi nadan'dái nī, nadinguáⁿāi maáⁿ nī maaⁿ. Ndúúti chí Daiya Dendyuūs n'dii, nch'éeⁿ nī yeⁿē na cruz.

⁴¹Tiicá ntúūⁿ chiiduú n'geete ndúúcu 'iiⁿyāⁿ fariseos chí dingúuⁿ yā ní ngi'cueeⁿ ley, ndúúcu 'iiⁿyāⁿ ndiicúú chí ngaⁿa ntiⁿnyúⁿ yā yeⁿe yaācu templo chí'íiⁿnyuⁿneeⁿ yā Jesús miiⁿ ní ngaⁿa yā yeⁿe yā: ⁴²Tanáⁿā 'iiⁿyāⁿ ní nadinguáⁿai yā naati nguéeⁿ cuuvi maaⁿ yā nguáⁿai yā. Ndúúti chí 'iiⁿyāⁿ miiⁿ ní Rey yeⁿe 'iiⁿyāⁿ Israel maaⁿ ní nch'éeⁿ yā yeⁿe na cruz ní cu'téenu 'nū 'iiⁿyāⁿ miiⁿ. ⁴³Jesús miiⁿ ní i'téenu yā Ndyuūs. Maaⁿ ní Ndyuūs nadinguáⁿai yā 'iiⁿyāⁿ nduuti chí cuaacu chí 'cuaáⁿ yā 'iiⁿyāⁿ. 'Iiⁿyāⁿ ngaⁿá yā 'tíicā ti Jesús ngaⁿa yā: 'Úú ní daiya Dendyuūs 'úú.

⁴⁴Tiicá ntúūⁿ chí'iiⁿnyuⁿneeⁿ chí duucu s'eeⁿ chí s'néeⁿnga'a sa dáámá ndúúcu Jesús.

Jesús chí'ii yā

(Mr. 15.33-41; Lc. 23.44-49; Jn. 19.28-30)

⁴⁵Ndíí maⁿa nguuvi miiⁿ ndíí taanduú n'geεcu 'iinu chíinū chíí maāiⁿ núú'máⁿ iⁿyeⁿē'di. ⁴⁶'Āā tááanduú n'geεcu 'iinu, Jesús 'caí yiicú yā: Elí, Elí, ¿lama sabactani? Nduudu hebreo 'cūū ní neⁿē caaⁿmaⁿ Ndyuūs yeⁿē, Ndyuūs yeⁿē, ¿dε'ε cuuvi chí s'neeⁿ nī 'úú damaáⁿ?

⁴⁷N'duuvi 'iiⁿyāⁿ chi snée yā 'miiⁿ taachí ch'iindiveéⁿ yā chí caⁿa Jesús miiⁿ ní caⁿa yā: Sáⁿa 'cūū n'gāi sa profeta Elías.

⁴⁸Hora míⁿ nūuⁿ 'áámá chéé 'iiⁿyāⁿ s'eeⁿ chéⁿe yā ngeenu yā sta'a yā 'áámá esponja ní di'caāndá yā ndúúcu vinagre ní s'neeⁿ yā esponja miiⁿ na 'áámá táán ndúú ní ca'a yā chí chí'i Jesús miiⁿ. ⁴⁹Tanáⁿa yā ní ngaⁿa yā: 'Āā canee ra yā. N'diichi yú 'áá chíi Elías miiⁿ nadinguáⁿai yā 'iiⁿyāⁿ?

⁵⁰Naati Jesús miiⁿ 'caī ntúuⁿ yā taama vmnéⁿēe ní maaⁿ yā nca'a yā espíritu yeⁿe yā na ta'a Ndyuūs ní chíi yā. ⁵¹Hora míⁿ nūuⁿ chí chíi Jesús, cortina yeⁿe yaācū templo s'teeⁿ naavtáⁿā ndii cuaaⁿ 'niiⁿnuúⁿ ndíí cuááⁿ ndiiyā. Ní n'nuⁿu yáⁿāa ní tuūu ní índee. ⁵²Tuu'mi ní yáinyāⁿ s'eeⁿ ní nguaaⁿ ní nééné 'yaaⁿ cuerpos yeⁿe 'iiⁿyāⁿ chí n'díí chí i'téenu yā Ndyuūs ndii cuááⁿ vmnaaⁿ nandáa yā chēeti yaínyāⁿ s'eeⁿ. ⁵³Ní 'iiⁿyāⁿ s'uuⁿ chí 'āā ndii miiⁿ taachi 'āā nduuchi Jesús miiⁿ yeⁿe nguaaⁿ tináⁿā 'iiⁿyāⁿ s'uuⁿ ní nandaa yā chēeti yaínyāⁿ s'eeⁿ ní cueⁿe yā cachiica yā na yāāⁿ Jerusalén chí Ndyuūs dēeve yā. Ní 'yaaⁿ n'dái 'iiⁿyāⁿ chinaáⁿ yā 'iiⁿyāⁿ chí 'āā n'dii.

⁵⁴Saⁿa capitán ndúúcu soldados chí snée yā ndúúcu yā ní díⁿ yā cuidado yeⁿe cuerpo yeⁿe Jesús taachi s'neeⁿ yā na cruz. Soldados miiⁿ, taachi n'diichí yā chí n'nuⁿu yáⁿāa ndúúcu dendu'ú chí chíi, neené di'va'á yā ní caⁿa yā: Cuaacu níⁿnyúⁿ, sáⁿa 'cūū ní Daiya Dendyuūs saⁿā.

⁵⁵'Yaaⁿ n'dái n'daataá snée yaⁿai yā ní n'gínu yā tanducuéⁿē

chí chó'oo yeⁿe Jesús. N'daataá s'eeⁿ cachiica yā ndúúcu Jesús ndii na yáⁿāa yeⁿe Galilea ní dichí've yā Jesús miiⁿ. ⁵⁶Ní nguaaⁿ n'daataá s'eeⁿ, miiⁿ canéé ta María Magdalena ndúúcu María chí chēecu Jacobo ndúúcu José. Ní canéé ntúuⁿ tá chēecuú da'cáiyā yeⁿe sáⁿā Zebedeo.

Ch'iichí yā cuerpo yeⁿe Jesús chēeti yáinyāⁿ

(Mr. 15.42-47; Lc. 23.50-56; Jn. 19.38-42)

⁵⁷Taachí chíinu nguuví miiⁿ ndāā 'áámá saⁿā chí nguuví José chí yeⁿe yáāⁿ Arimatea. Saⁿā miiⁿ ní 'cuiica sa ní discípulo yeⁿe Jesús. ⁵⁸Sáⁿa 'cūū ní cheⁿe sa nanááⁿ Pilato miiⁿ ní chíica sa cuerpo yeⁿe Jesús miiⁿ. Tuu'mi ní Pilato caⁿa ntiiⁿnyúⁿ yā chí caⁿa capitán yeⁿe soldados chí ca'á yā cuerpo yeⁿe Jesús miiⁿ José miiⁿ. ⁵⁹Tuu'mi ní José sta'ā sa cuerpo yeⁿe Jesús ní ch'ēēcū sa 'áámá sá'bana dēeve tan'dúúcā chí costumbre yeⁿe 'iiⁿyāⁿ s'eeⁿ. ⁶⁰Ní s'nuúⁿ sa cuerpo yeⁿe Jesús na 'áámá yáinyāⁿ yeⁿe maaⁿ sa chí ngai chí maaⁿ sa níⁿnuⁿ sa na 'aama yaava. Ch'íínú chíiichi sa cuerpo yeⁿe Jesús, s'neeⁿ sa 'áámá tuūu chí nééné ch'ēete naachí níndaa yā yeⁿe cheendi yaínyāⁿ miiⁿ. Ní cunáⁿa sa. ⁶¹Míⁿ véé María Magdalena ndúúcu táámá María niiⁿnuúⁿ ná yaínyāⁿ.

Soldados ní idíí yā cuidado yáinyāⁿ miiⁿ

⁶²Chó'oo nguuví chí in'nuúⁿ yā yeⁿe 'viicu yeⁿe pascua ní chidēeve táámá nguuví chí sá'bado ní chíiduú n'gēetē ndúúcu 'iiⁿyāⁿ fariseos ní

nduuvidaamá yā ní cheⁿe yā nanááⁿ Pilato miiⁿ. ⁶³Ní caⁿa yā chii yā Pilato: N'dií Pilato, n'gaacú 'nū chí saⁿā chí n'dií chí chinnche'ei sa taachí canee sa iⁿ'yeeⁿdí 'cūū ní caⁿa sa 'túúcā: 'Cuínū 'iinu nguuvi ní nduūchí nguuaⁿ tináⁿā. ⁶⁴Maaⁿ ní dich'óo nī soldados chí diiⁿ yā cuidado yáinyāⁿ miiⁿ ndíí 'cuiinu 'iínū nguuvi. ¿Áátíí ndaá discípulos yeⁿe yā n'gaaⁿ ní diiⁿ iduucú yā cuerpo yeⁿe Jesús? Ní caaⁿmaⁿ yā cuuvi yā 'iiⁿ'yāⁿ chí sáⁿā miiⁿ ní nanduuchi sá yeⁿe nguuaⁿ tináⁿā. Ní cunncaā ca nduudu yaadi miiⁿ nguéé ti chí 'āā chó'oo.

⁶⁵Pilato miiⁿ ní caⁿa yā chii yā 'iiⁿ'yāⁿ s'eeⁿ: 'Ingaā 'áámá taaⁿ soldados. Cueⁿe nī ní diiⁿ nī cuidado yáinyāⁿ miiⁿ tan'dúúcā chí déenu nī chí n'daācā.

⁶⁶Tuu'mi ní 'iiⁿ'yāⁿ s'eeⁿ ní cheⁿe yā yáinyāⁿ miiⁿ ní diíⁿ yā cuidado yáinyāⁿ miiⁿ. S'neeⁿ yā 'áámá sello na tuūu ch'eté ní s'neeⁿ yā soldados chí diiⁿ sa cuidado yáinyāⁿ miiⁿ.

Jesús nduuchi yā yeⁿe nguuaⁿ tináⁿā

(Mr. 16.1-8; Lc. 24.1-12; Jn. 20.1-10)

28 Chó'oo nguuvi sábadó chí ntaavi'tuunúúⁿ yā ní chidēeve táamá nguuvi chí domingo, nguuvi chí ngaⁿa yú chí nguuvi vmnááⁿ vmnaaⁿ yeⁿe ndeetē, ní tá María Magdalena ndúúcū taama tá María cheⁿe ta n'diichí tá na yaínyāⁿ yeⁿe Jesús. ²Ní nééné díttū nuⁿu yáⁿāa ti 'aama ángel yeⁿe Señor Ndyuūs chiiya yā yeⁿe va'ai chēeti nguuvi. Ní taachi ndaa yā, divíí yā tuūu ch'etē miiⁿ yeⁿe cheendi yaínyāⁿ ní ch'iindi yā vmnaaⁿ yeⁿe tuūú miiⁿ. ³Ángel miiⁿ tan'dúúcā chí

inááⁿ 'cuai 'tíicā máaⁿ yā chí dēeve yā. Ní catecai yā ní cuéé tan'duucā yaāⁿ. ⁴Soldados chí idiíⁿ yā cuidado yáinyāⁿ miiⁿ in'dúúví yā chí 'va'a yā. Ní nduuví yā tan'dúúcā chí ch'ii yā. ⁵Naati ángel miiⁿ caⁿa yā chii yā n'daataá s'eeⁿ: Nguéé 'va'a ndís'tií; ti 'úú ní deenú ti in'nuúⁿ nī Jesús chí cā'neeⁿnga'ā. ⁶Áā ntéé 'iiⁿ'yāⁿ miiⁿ ti nduuchi yā yeⁿe nguuaⁿ tináⁿā tan'dúúcā chí caⁿa yā. Cuchíí nī ní n'diichí nī naachí cānuuⁿ cuerpo yeⁿe Señor miiⁿ. ⁷Cuayiivi ní ngaⁿa ángel chí yā n'daataá s'eeⁿ: Cuinaⁿa núuⁿ nī maāⁿncheētē ní caaⁿmaⁿ nī cuuvi nī discípulos yeⁿe yā chí nduuchi Jesús miiⁿ yeⁿe nguuaⁿ tináⁿā. Cuin'diichí nī. Jesús miiⁿ caⁿa yā vmnááⁿ ndís'tií na yáⁿāa Galilea. Mííⁿ snaaⁿ nī 'iiⁿ'yāⁿ. Chúú chí ngaⁿá ngií ndís'tií.

⁸Tuu'mi ní n'daata s'ééⁿ nan'dáa yā chēeti yáinyāⁿ miiⁿ ní dií'yá yā chí ní duuvi yeenu yā. N'daata s'ééⁿ ní cueⁿe yā ngéenu yā ní caⁿa yā chí yā discípulos yeⁿe Jesús tan'dúúcā chí n'diichí yā. ⁹Tuu'mi ní taachi cueⁿe yā chí yaa'ví yā discípulos cuin'diichí nī, Jesús miiⁿ ndaá yā chí nndaacá yā n'daata s'eeⁿ ní caⁿa yā: Tavacho'onóo nī ndís'tií n'daata s'eeⁿ. Ní n'daata s'eeⁿ ní ndáá niiⁿnúⁿ yā Jesús miiⁿ ní túmaⁿa yā ca'a Jesús miiⁿ ní s'téenu yā 'iiⁿ'yāⁿ. ¹⁰Tuu'mi ní Jesús caⁿa yā chí yā n'daataá s'ééⁿ: Nguéé 'va'a nī. Cuéⁿe nī cuuvi nī hermanos yeⁿe chí n'diichí nī 'úú. Ní hermanos caⁿa yā na yáⁿāa Galilea ní miiⁿ snaáⁿ yā 'úú.

Soldados ngaⁿa yā ngii yā chiiduú n'geete s'eeⁿ tan'dúúcā chí chí

¹¹Nch'óo n'daata s'uuⁿ cunaⁿá yā ní nduuvi soldados chí dííⁿ yā

cuidado yeⁿe yáinyāⁿ cheⁿé yā na yááⁿ Jerusalén ní caⁿ'a yā chii yā chiiduú n'gēete yeⁿé tánducueⁿē chí chíi. ¹²Chiiduú n'gēete nadidaamá yā ndúúcū 'iiⁿ'yāⁿ ndífcuū chi ngaⁿ'a ntiⁿ'nyuⁿ yeⁿe yaācū. Ní nduuvidaamá yā ní néené n'deēe túumī ca'a yā soldados. ¹³Ní caⁿ'a yā chíi yā soldados: Ndís'tiī ní 'túúcā caaⁿ'maⁿ nī: Taachi yaaⁿ stiyaadú 'nū discípulos yeⁿe Jesús ndaá yā ní diduucú yā cuerpo yeⁿe Jesús. ¹⁴Ní nduuti chi gobernador 'caandíveéⁿ yā chífⁿ chí ndís'tiī caaⁿ'maⁿ nī, nús'uu yaaⁿ'vi neeⁿ 'nū 'iiⁿ'yāⁿ ní nguaⁿ'āi ndís'tiī.

¹⁵Soldados ní sta'á yā tuūmī miiⁿ ní dífⁿ yā tan'dúúcā chi chiiduú n'gēete caⁿ'á yā chíi yā soldados. Chífⁿ chí ndii maaⁿ ní 'iiⁿ'yāⁿ yeⁿe ndaataá Israel ngaⁿ'á yā 'tífcā.

Jesús idichó'o yā discípulos yeⁿe yā

(Mr. 16.14-18; Lc. 24.36-49; Jn. 20.19-23)

¹⁶Ndu'ū ndiicháámá discípulos cueⁿé yā na yáⁿ'āa Galilea ní

ndaá yā ná yiicū naachí Jesús miiⁿ dichó'o yā 'iiⁿ'yāⁿ s'eeⁿ.

¹⁷Taachí discípulos n'diichí yā Jesús miiⁿ, s'téenu yā 'iiⁿ'yāⁿ 'áará chí ná'a yā ní 'uūvī vaanicádiinūⁿ yeⁿe yā. ¹⁸Jesús ní ndaa niiⁿ'núⁿ yā ní yaaⁿ'vi yā discípulos ní caⁿ'a yā: Chiidá ní tee yā 'úú nducueⁿ'e poder chí caaⁿ'maⁿ ntiⁿ'nyúⁿ na va'āi cheeti nguuvi ndúúcū na iⁿ'yeeⁿ'dí 'cūū. ¹⁹Maaⁿ ní cueⁿ'e nī ní ca'cueéⁿ nī nuuⁿ'maⁿ naciones, ní cuuvi nī discípulos yeⁿé. 'Iiⁿ'yāⁿ chí i'téenu yā nduudu cuaacu yeⁿé, ndís'tiī cueédínuūⁿ'niⁿ nī 'iiⁿ'yāⁿ miiⁿ ndúúcū chi duuchi Ndyuūs Chiida yú, ndúúcū Daiya yā, ndúúcū Espíritu N'dai yeⁿé Ndyuūs. ²⁰Cá'cueeⁿ nī 'iiⁿ'yāⁿ s'eeⁿ chí dífⁿ yā tanducueⁿ'ē dendu'ū chí 'úú ngaⁿ'á ngíí ndís'tiī. Ní cadíínuuⁿ nī chí 'úú ní canee ndúúcū ndís'tiī nducueⁿ'ē tiempo ndíí ntuuví iⁿ'yeeⁿ'dī. 'Tífcā cuuvi.

NDUUDU N'DÁÍ CHÍ DÍNGÚŪⁿ APOSTÓL MARCOS

**Yeⁿe chi ngaⁿa Juan chi
ngeedínuūⁿniⁿ**

(Mt. 3.1-12; Lc. 3.1-9, 15-17; Jn. 1.19-28)

1 'Túúcā chí ngaⁿa nduudu ngai
yeⁿe Jesucristo chí Daiya
Dendyuūs.

²Iiⁿyāⁿ profeta Isaías miiⁿ chí
ngaⁿa nduudu yeⁿé Ndyuūs ndíí
cuááⁿ vmnaaⁿ dinguúⁿ yā tan'dúúcā
chí caⁿa Ndyuūs, 'tíícā:

'Úú dicho'ó 'aama 'iiⁿyāⁿ chí
caaⁿmáⁿ yā nduudu yeⁿé
nanááⁿ ndís'tií.

³Iiⁿyāⁿ miiⁿ ní caⁿa yā ndúúdú
ngai na yáⁿāa cuūⁿmáⁿ naachi
nguée ch'etinéé 'iiⁿyāⁿ. Ní
caⁿa yā: Cuundiyaáⁿ nī yúúní
yeⁿe Señor Ndyuūs caati
cuchii yā. Nan'guáaⁿ nī yúúní
cuaacu caavá yā Didéevé nī
staava yeⁿé nī ní cuuvi 'cuaaⁿ
nī 'iiⁿyāⁿ miiⁿ taachi ndaa yā.

⁴Tíícā Juan miiⁿ ní cheedínuūⁿnīⁿ
sa 'iiⁿyāⁿ s'eeⁿ na yáⁿāa cuūⁿmáⁿ
naachi nguée ch'etinéé 'iiⁿyāⁿ.
Ní caⁿa cuáácú sá chí 'iiⁿyāⁿ
ndaacadáámí yā yeⁿé nuuⁿndi
yeⁿé yā ní cuedínúⁿnīⁿ sa 'iiⁿyāⁿ
chí n'giindiveéⁿ yā nduudu yeⁿe
sa, naati Ndyuūs nadich'ecú yā

nuuⁿndi yeⁿé yā. ⁵Ní n'dee 'iiⁿyāⁿ
yeⁿe yáⁿāa Judea ndúúcū 'iiⁿyāⁿ
yeⁿe yáāⁿ Jerusalén can'dáa yā
chí 'caandiveéⁿ yā chí ngaⁿa Juan
miiⁿ. Ní taachi 'iiⁿyāⁿ s'eeⁿ caⁿa yā
nuuⁿndi yeⁿé yā nanááⁿ Ndyuūs
níícú Juan miiⁿ ní cheedínuūⁿnīⁿ sa
'iiⁿyāⁿ miiⁿ na yíícú Jordán.

⁶Catecai Juan miiⁿ ní nín'dai
ndúúcū yuūdú yeⁿe 'iiti camello.
Ní cinturón yeⁿé sa ní dííⁿmáⁿ 'iiti.
Ní chí che'ē sa ní 'iiti langostas
ndúúcū nīd'i yeⁿé 'iiti 'yáaiⁿ chí
véé cueeti. ⁷Juan miiⁿ ngaⁿa sa
nduudu cuaacu yeⁿé Ndyuūs. Ní
caⁿa sa: Cuayiivi yeⁿe 'úú cuchii
'áámá 'iiⁿyāⁿ chí ch'ete taavi cá
poder yeⁿé yā nguée ti 'úú. 'Úú ní
nguée neené n'dai 'úú chí cuuví dííⁿ
n'daatií yííⁿmáⁿ yeⁿé ndaacú yeⁿe
yā. ⁸'Úú ní ngeedínuūⁿnīⁿ ndís'tií
ndúúcū nuūⁿnīⁿ naati 'iiⁿyāⁿ miiⁿ ní
cuedínuūⁿnīⁿ yā ndúúcú Espiritu
N'dai yeⁿé Ndyuūs.

Juan miiⁿ cheedínuūⁿnīⁿ sa Jesús

(Mt. 3.13-17; Lc. 3.21-22)

⁹Nguuvi s'eeⁿ Jesús miiⁿ chíicá yā
yeⁿe yáāⁿ Nazaret yeⁿe yáⁿāa Galilea
ní ndaa yā na yíícú Jordán. Ní Juan
miiⁿ ní cheedínuūⁿnīⁿ sa Jesús miiⁿ na

yíicú Jordán. ¹⁰Taachi Jesús can'daa yā na nuūⁿnīⁿ miīⁿ, cuin'diichí nī. N'diichí yā chí nanguaaⁿ nanguuvi ní Espíritu N'dai yeⁿ'é Ndyuūs ní cuch'éeⁿ vmnaaⁿ yeⁿ'é yā tan'dúucā 'áámá paloma tíicā. ¹¹Ch'iindiveeⁿ Jesús 'áámá nduudu chi chiicā yeⁿ'é nánguuvu chi caⁿ'a: Díí Daiyá chi neⁿ'e taavi ní yeenú taavi cáávā dii.

**Yáá'n'guuinūⁿ neⁿ'e sa n'diichineeⁿ
sa Jesús**

(Mt. 4.1-11; Lc. 4.1-13)

¹²Cuayiivi miīⁿ ní Espíritu N'dai yeⁿ'é Ndyuūs candéē Jesús na 'áámá yáⁿ'āa cuūⁿmáⁿ naachi nguéeⁿ ch'ēetinéⁿ 'iiⁿ'yāⁿ. ¹³Jesús miīⁿ ní canée yā miīⁿ 'uuvi ngeεcu nguuvi naachi véé 'iiti chí taaⁿ. Ní yáá'n'guuinūⁿ miīⁿ ní n'diichineeⁿ sa Jesús chí dííⁿ yā nuuⁿ'ndi naati nguéeⁿ dinuuⁿ'ndí yā. Níicú ángeles ndaá yā ní dííⁿ yā cuidado Jesús miīⁿ.

**Jesús tucá'a yā ntiiⁿ'nyuⁿ yeⁿ'é yā na
yáⁿ'āa Galilea**

(Mt. 4.12-17; Lc. 4.14-15)

¹⁴Cuayiivi taachi s'nuúⁿ yā Juan chí cheedinuūⁿnīⁿ 'iiⁿ'yāⁿ vácūū, Jesús miīⁿ ndāa yā na yáⁿ'āa Galilea, ní caⁿ'a yā nduudu cuaacu chí ngai yeⁿ'e naachi Ndyuūs ngaⁿ'a ntiiⁿ'nyuⁿ yā. ¹⁵Jesús miīⁿ ní caⁿ'a yā: 'Āā snuū ca'a tiempo naachí ngaⁿ'a ntiiⁿ'nyuⁿ Ndyuūs ní 'āā ndaá niiⁿ'nuúⁿ. Nandaacadaamí nī yeⁿ'é nuuⁿ'ndi yeⁿ'é nī ní cu'teenú nī nduudu cuaacu chí ngai chí yeⁿ'e Cristo.

**Jesús yaa'ví yā cuūúⁿ saⁿ'ā chí
itungááⁿ 'yaacā**

(Mt. 4.18-22; Lc. 5.1-11)

¹⁶Jesús miīⁿ ní cachiicá yā cuaaⁿ 'diitúú nuūⁿnīⁿ'yáⁿ'ā chí nguuvi

Galilea, taachí n'diichí yā Simón ndúucū 'díínū sa Andrés. Sáⁿ'ā s'eeⁿ ní saⁿ'ā chí itungááⁿ 'yaacā, ní ngii sa yaānā yeⁿ'é sa cheeti nuūⁿnīⁿ'yáⁿ'ā ti saⁿ'ā s'eeⁿ itungááⁿ sa 'yaacā na nuūⁿnīⁿ'yáⁿ'ā. ¹⁷Ní Jesús ngaⁿ'a yā ngii yā saⁿ'ā s'eeⁿ: Cuchíí nī, caⁿ'á nī nduūcú ní 'úú ní dííⁿ chí in'nuúⁿ nī 'iiⁿ'yāⁿ chí cuuvi caⁿ'á yā nduucú. Ní tan'dúucā chí ndís'tii tungaáⁿ nī 'yaacā yeⁿ'e nuūⁿnīⁿ'yáⁿ'ā 'tíicā ngaⁿ'a nī ndúucū 'iiⁿ'yāⁿ chí caⁿ'á yā nduūcú.

¹⁸Hora mííⁿ nūuⁿ saⁿ'a s'uuⁿ' s'neeⁿ sa yaānā yeⁿ'é sa ní cueⁿ'e sa ndúucū Jesús.

¹⁹Tuu'mi Jesús miīⁿ ní cueⁿ'é yā 'tēε 'tēé ní ndaacá yā saⁿ'a chí nguuvi Jacobo ndúucū Juan chí 'diinū sa. Saⁿ'ā s'eeⁿ ní daiya Zebedeo ní snee sa na 'aama barco ní n'diyaata sá yaānā yeⁿ'é sa.

²⁰Jesús 'caí yā saⁿ'ā s'eeⁿ. Saⁿ'ā s'eeⁿ ní nan'dāa sa na barco naachi snée sa ndúucū chiida sa n'diyaata sá yaānā yeⁿ'é sa. Ní s'neeⁿ sa chiida sa Zebedeo ndúucū mozos yeⁿ'e yā ní cueⁿ'e sa ndúucū Jesús.

**'Áámá saⁿ'ā chí vεε espíritu yeⁿ'e
yáá'n'guuinūⁿ**

(Lc. 4.31-37)

²¹Jesús miīⁿ ní ndaá yā na yááⁿ Capernaum ndúucū saⁿ'ā s'eeⁿ. Ní ca'áámá ca'áámá sáábado, nguuvi chí ntaavi'tuunúúⁿ 'iiⁿ'yāⁿ s'eeⁿ, Jesús cueⁿ'é yā na yaacū sinagoga ní chí'cueeⁿ yā 'iiⁿ'yāⁿ. ²²'Iiⁿ'yāⁿ s'eeⁿ ngeⁿ'e yiinu yā yeⁿ'e chí Jesús ngaⁿ'a yā; tí ngí'cueeⁿ yā tan'dúucā 'iiⁿ'yāⁿ chí ngaⁿ'ā ntiiⁿ'nyúⁿ yā, nguéeⁿ tan'dúucā 'áámá maestro yeⁿ'é ley. ²³Ní cheeti yaacū sinagoga mííⁿ

canéé 'áámá saⁿá chí véé espíritu yeⁿe yááⁿn'guiinūⁿ ndúúcu sa. Ní espíritu miiⁿ n'gai yeⁿe sá: ²⁴N'dií Jesús yeⁿe yááⁿ Nazaret, cu'néeⁿ nī nūs'uu. ¿D'é'ē canéé yeⁿe 'ē nū nduucú nī? ¿Áá ndaa nī chí di'cuiinú nī nūs'uu? 'Úú ní n'diichí du'ú n'dií. N'dií ní 'iiⁿyāⁿ chí n'dai chí daiya Dendyuūs n'dií.

²⁵Jesús miiⁿ ní yaa'vi néeⁿ yā espíritu yeⁿe yááⁿn'guiinūⁿ, ní caⁿa yā: Dii espíritu n'gáádí dí cheendi di, ní cú nan'dáa di yeⁿe saⁿá tīi.

²⁶Tuu'mi ní espíritu yeⁿe yááⁿn'guiinūⁿ diiⁿ chí chitá'āa 'áámá ataque sáⁿa c'ūū. Ní 'cai yiicú espíritu miiⁿ, ní nan'daā espíritu miiⁿ ná cuerpo yeⁿe sáⁿa c'ūū. ²⁷Ní nducyáácá 'iiⁿyāⁿ cheⁿe yiinu yā yeⁿe chuū ní tiingūneeⁿ yā nguaaⁿ maaⁿ yā ndúúcu vī'i: ¿D'é'ē chuū? ¿D'é'ē chí ngai chí ngi'cueeⁿ 'íiⁿyāⁿ 'cúū? 'Íiⁿyāⁿ 'cúū ní véé poder ca yeⁿe yā ní ngíi ngaⁿa ntiiⁿnyúⁿ yā yeⁿe espíritu yeⁿe yááⁿn'guiinūⁿ ní n'giindivééⁿ espíritu yeⁿe yā.

²⁸Maāⁿnch'etéⁿ nuūⁿ nducyaaca 'iiⁿyāⁿ n'giindivééⁿ yā yeⁿe chí diiⁿ Jesús miiⁿ, 'iiⁿyāⁿ yeⁿe núúⁿmáⁿ ná yāⁿāa yeⁿe yáⁿāa Galilea.

Jesús díiⁿ yā chí nduūvā yeⁿe indáⁿā
Simón Pedro

(Mt. 8.14-15; Lc. 4.38-39)

²⁹Taachí n'daā Jesús na yaacū sinagoga Jesús miiⁿ ní cueⁿe yā ndúúcu Jacobo, ndúúcu Juan ná vaacu Simón ndúúcu Andrés. ³⁰N'daataá chí indáⁿā Simón miiⁿ ní ngíita yā. Ndéē 'íiⁿnūⁿ 'iiⁿyāⁿ miiⁿ ní candiití yā. Ní 'iiⁿyāⁿ na vaacu yā caⁿa yā chíi yā Jesús

miiⁿ chí n'daataá miiⁿ ní ngíita yā.

³¹Tuu'mi ní Jesús miiⁿ ní ndaa yā nanááⁿ n'daataá míⁿ ní sta'á yā ta'ā tá ní nadicuéeⁿ yā táⁿā. Ní cú chivii 'iiⁿnūⁿ miiⁿ hora miiⁿ taachi nadicuéeⁿ yā n'daataa miiⁿ, ní tucá'a tá diiⁿ tá mandados yeⁿe 'iiⁿyāⁿ s'eeⁿ chí che'e yā.

Jesús miiⁿ ní diiⁿ yā chí nééné 'yaaⁿ
'iiⁿyāⁿ nduūvā yeⁿe yā

(Mt. 8.16-17; Lc. 4.40-41)

³²Cuayiivi taachí 'āā chíiya 'yáⁿā ní 'āā 'da'a miiⁿ, 'iiⁿyāⁿ s'eeⁿ ní ndaa yā nanááⁿ Jesús miiⁿ ndúúcu nducyaaca 'iiⁿyāⁿ chí ngíita yā ndúúcu 'iiⁿyāⁿ chí véé espíritu yeⁿe yááⁿn'guiinūⁿ ndúúcu yā. ³³Ní nducyáácá 'iiⁿyāⁿ yeⁿe yááⁿ miiⁿ ní ndaa yā na cheendi va'āi naachi canéé Jesús miiⁿ. ³⁴Ní Jesús miiⁿ ní diiⁿ yā chí nanduuva yeⁿe 'yaaⁿ n'dái 'iiⁿyāⁿ chí véé n'deeé nááⁿ n'dai ca'ai yeⁿe yā. Ní divii yā n'deeé n'dái espíritu yeⁿe yááⁿn'guiinūⁿ yeⁿe 'iiⁿyāⁿ s'eeⁿ. Nguéé 'cuúⁿ yā chí espíritu s'uuⁿ caāⁿmaⁿ, caati espíritu s'uuⁿ ní deenu du'ū chí Jesús miiⁿ.

Jesús ngaⁿa yā nduudu cuaacú yeⁿe
Dendyuūs na yáⁿā Galilea

(Lc. 4.42-44)

³⁵Táámá nguētiyaaⁿ 'da'ā ca, Jesús miiⁿ ní ncuéeⁿ yā ní can'dáa yā na yááⁿ Jerusalén miiⁿ ní cueⁿe yā 'áámá lado yeⁿe yááⁿ miiⁿ naachi nguéé 'iiⁿyāⁿ ní miiⁿ caaⁿmaⁿngua'á yā. ³⁶Simón miiⁿ ndúúcu tanáⁿā compañeros yeⁿe sa cheⁿe yā n'nuúⁿ yā Jesús. ³⁷Taachí ndaaca yā Jesús miiⁿ, tuu'mi ní caⁿa yā chíi yā Jesús: N'dií Jesús, nducyáácá 'iiⁿyāⁿ in'nuúⁿ yā n'dií.

³⁸ Jesús miⁿ ní caⁿa yā chii yā 'iiⁿyāⁿ s'eeⁿ: Caⁿā yú tanáⁿā yāāⁿ chí snéé na niⁿnuúⁿ, ní 'tiicá ntúūⁿ caaⁿmaⁿ yú nduudu cuaacu yeⁿ'é Ndyuūs miⁿ ti cáávā chuu chí cuchíí.

³⁹ Jesús miⁿ ní cachiicá yā núúⁿmáⁿ yāāⁿ cuaaⁿ na yáⁿāa Galilea. Ní ngaⁿa yā nduudu cuaacú yeⁿ'é Ndyuūs miⁿ na yáacū sinagogas yeⁿ'e yāāⁿ s'eeⁿ. Ní divíi yā espíritu yeⁿ'e yaaⁿ'n'giinūⁿ yeⁿ'e 'iiⁿyāⁿ.

Jesús díiⁿ yā chí nduūvā yeⁿ'e 'áámá saⁿā ndúúcu ca'ai lepra

(Mt. 8.1-4; Lc. 5.12-16)

⁴⁰ Áámá saⁿā chí canéé ca'ai chí ín'duuti yuutē yeⁿ'ē sa ndaa sa nanááⁿ Jesús, ti neⁿ'e sa caaca sa 'áámá favor yeⁿ'é yā. Ní chíintii'ya sa ní caⁿa sa: N'dii Jesús, ndúúti chí n'dii neⁿ'e nī, díiⁿ nī chí nduūvā yeⁿ'é.

⁴¹ Jesús ní nduuvi ya'āi 'íínu yā saⁿā miⁿ, ní tuu'ví yā saⁿā ndúúcu ta'a yā ní caⁿa yā: Táácā nguēē. 'Úú neⁿ'é. Dii saⁿā, 'āā nduuvá yeⁿ'ē di.

⁴² Taachí caⁿa Jesús 'tuucā, chivii ca'ai chí ín'duuti yuute yeⁿ'ē sa ní nduūvā yeⁿ'ē sa, ní dēeve sa.

⁴³ Tuu'mi ní Jesús miⁿ ní yaa'vi yā saⁿā miⁿ chí cunaⁿa sa na vaacu sa, naatí néé ca'á yā cuidado saⁿa miⁿ ní yaa'ví yā saⁿa miⁿ: ⁴⁴ Díí, cun'díichí dí, nguéé cuuvi di mar 'áámá 'iiⁿyāⁿ chí nanduūvā yeⁿ'e di. Cueⁿ'e di ní 'cuuⁿ'miⁿ di maaⁿ cuerpo yeⁿ'e di nanááⁿ chiiduú chí nduūvā yeⁿ'ē di. Ní ca'a di ofrenda tan'dúúcā chí ngaⁿa ley yeⁿ'e Moisés miⁿ cáávā chí nduūvā yeⁿ'ē di ní cáávā chí dēeve cuerpo yeⁿ'ē di.

'Tíicá nducyáácá 'iiⁿyāⁿ snaaⁿ yā chí 'āā nduuvá yeⁿ'ē di.

⁴⁵ Tuu'mi ní saⁿā miⁿ ní cunaⁿa sa ní caⁿa sa chíi sa n'dee n'dái 'iiⁿyāⁿ tan'dúúcā chí chíi ndúúcu sa. Ní cáávā chí diiⁿ sa 'túúcā, Jesús miⁿ ní 'āā ntéé cheⁿ'e nguūvi yā mar 'áámá yāāⁿ, ti 'iiⁿyāⁿ s'eeⁿ snaaⁿ yā 'iiⁿyāⁿ. Ní Jesús cueⁿ'é yā yeⁿ'e yāāⁿ miⁿ, ní cachiicá yā 'áámá lado yeⁿ'e yāāⁿ s'eeⁿ naachi nguéé ch'etinéé 'iiⁿyāⁿ; naati 'iiⁿyāⁿ yeⁿ'e nducuéⁿ'ē yāāⁿ ní n'dáa yā chí n'diichi yā Jesús miⁿ.

Jesús diiⁿ yā chí nduūvā yeⁿ'e 'áámá saⁿā chí nguéé ngii inuⁿ'u sa

(Mt. 9.1-8; Lc. 5.17-26)

2 Cho'ōo nguuvi s'uuⁿ, Jesús miⁿ ní nguēecunéé yā nndaa yā na yāāⁿ Capernaum. Ní 'iiⁿyāⁿ ngaⁿa yā chí Jesús canéé yā na va'ai miⁿ. ² Maaⁿ'nch'etē nūⁿ na va'ai naachi canéé Jesús miⁿ nduuvidaamá 'yaaⁿ n'dái 'iiⁿyāⁿ, ní 'āā ntéé tunéé cheendi va'āi miⁿ chí ch'etii nūⁿ 'iiⁿyāⁿ s'eeⁿ. Ní Jesús miⁿ ngaⁿa yā nduudu yeⁿ'e Ndyuūs. ³ Tuu'mi ní ndaa na cuūuⁿ sáⁿā ndēe yā 'áámá saⁿā ndúúcu ca'ai chí ín'duuví cuerpo yeⁿ'e sa. ⁴ Nguéé chíi sndaa yā naachi canéé Jesús miⁿ ti neené n'deēe 'iiⁿyāⁿ snúuⁿ yā. Cuchéé yā cuaaⁿ tíiⁿ va'ai ni nadvíi yā na n'duuvi táátá tíiⁿ va'āi miⁿ. Ch'íínú n'guaaⁿ yā miⁿ'ya dich'óo yā saⁿā ndúúcu ca'āi chí ín'duuví cuerpo yeⁿ'e sa na yiive yeⁿ'ē sa ní ndēē sa naachi cheendii Jesús miⁿ. ⁵ Taachi Jesús n'diichí yā chí 'iiⁿyāⁿ s'eeⁿ véé vaadi i'téenu nanáaⁿ yā, caⁿa yā chíi yā saⁿā ndúúcu ca'āi chí ín'duuví cuerpo yeⁿ'e sa: Díí, daiyá, núúⁿndí yeⁿ'ē di 'úú ní nch'ēcú.

⁶N'duuvu maestros yeⁿe ley miiⁿ chí v̄et̄é yā miiⁿ, nadacádíínuuⁿ yā 'tíicā na staava yeⁿé ya. ⁷¿De'ē cúuví chí 'tíicā ngaⁿa sáⁿa 'tíi? Ngaⁿa sa yeⁿe dendu'ū chí nguéé n'daācā chí contra yeⁿe Ndyuūs, ti mar 'áámá 'iiⁿ'yāⁿ nguéé cuuví díⁿ yā nadach'εεcú yā nuūⁿndi yeⁿe 'iiⁿ'yāⁿ, ti dámaaⁿ Ndyuūs. ⁸Jesús miiⁿ ní deenu yā de'ē chí nadacádíínuuⁿ saⁿá s'eeⁿ, ní caⁿa yā chíi yā 'iiⁿ'yāⁿ: ¿De'ē cúuví chí 'tíicā nadacádíínuuⁿ ndís'tíi na staava yeⁿé ní? ⁹¿Áá nguéé ngiⁿ'ii ca chí caaⁿ'máⁿ cuuvi saⁿa ndúucū ca'āi chí in'dúuví cuerpo yeⁿe sa: Nuuⁿndi yeⁿe di ní 'āā ncheεcú yeⁿe di, o 'úú caaⁿ'máⁿ: Ndúcuééⁿ di, ní nadícuééⁿ di yiive yeⁿe di ní caaca di? ¹⁰Ní caāvā chí ndís'tíi inaáⁿ nī chuū, níicú cadiinuⁿ nī chí Saⁿá chí Daiya Dendyuūs ní véé poder yeⁿé yā na iⁿ'yeeⁿdí 'cūū chí nadach'εεcú ya nuuⁿndi. Tuu'mi ní caⁿa yā chíi yā saⁿá ndúucū ca'āi chí in'dúuví cuerpo yeⁿe sa: ¹¹Dí saⁿá, nducuééⁿ di, ní nadacuéeⁿ di yiive yeⁿe di ní cunaⁿa di na vaacu di.

¹²Saⁿa chí ngiitā miiⁿ nducueeⁿ sa, ní nadacuéeⁿ sa yiive yeⁿe sa, ní nan'daa sa miiⁿ. Ní nducyaaca 'iiⁿ'yāⁿ n'diichí yā chuū ní cheⁿe yiinú yā ní dich'εet̄é yā Ndyuūs. Ní ngaⁿ'a yā: Mar 'áámá vmnéⁿ'ēe nguéé n'diichi yú dendu'ū chí 'tuucā.

**Jesús yaa'ví yā 'áámá saⁿá chí
nguuvi Leví**

(Mt. 9.9-13; Lc. 5.27-32)

¹³Cuayiivi Jesús miiⁿ cheⁿe yā cuaaⁿ 'díitúú nuūⁿnīⁿ'yáⁿā. Ní taachi nducyaaca 'iiⁿ'yāⁿ ndaá yā nanáaⁿ yā, ní Jesús miiⁿ ní chí'cuéeⁿ yā

'iiⁿ'yāⁿ s'eeⁿ. ¹⁴Ní taachi cachiicá Jesús miiⁿ, n'diichí yā 'áámá saⁿá chí nguuvu Leví, chí daiya Alfeo. Véé sá naachi véé 'iiⁿ'yāⁿ chí inn'gueε yeⁿe impuestos. Ní Jesús caⁿa yā chíi yā saⁿá miiⁿ: Dí saⁿá, cuchíi di caⁿá di nduucú. Tuu'mi ní Leví miiⁿ nducueeⁿ sa ní cueⁿe sa ndúucū Jesús miiⁿ.

¹⁵Tuu'mi ní Leví miiⁿ diiⁿ sa invitar Jesús miiⁿ chí caⁿá yā na vaacu sa ní che'e yā ndúucū sa. Neené 'yaaⁿ 'iiⁿ'yāⁿ chí inn'gueε yeⁿe impuestos ndúucū 'iiⁿ'yāⁿ chí véé nuuⁿndi yeⁿe yā ndaā ntúuⁿ yā. Ní 'yaaⁿ n'dáí yā ch'εet̄é yā na mesa daama ndúucū Jesús ndúucū discípulos yeⁿe yā ti neené 'yaaⁿ 'iiⁿ'yāⁿ chí cueⁿe yā ndúucú yā. ¹⁶Ní taachi maestros yeⁿe ley ndúucū 'iiⁿ'yāⁿ fariseos n'diichí yā chí Jesús ní nge'e yā ndúucū nducyaaca 'iiⁿ'yāⁿ s'eeⁿ, tuu'mi ní caⁿa yā chíi yā discípulos yeⁿe Jesús: ¿De'ē cúuví chí maestro yeⁿé ní véé yā nge'e yā ní ngi'i yā ndúucū 'iiⁿ'yāⁿ chí inn'gueε yeⁿe impuestos ndúucū 'iiⁿ'yāⁿ nuuⁿndi?

¹⁷Taachí Jesús chíiindiveéⁿ yā chuū, tuu'mi ní caⁿa yā chíi yā 'iiⁿ'yāⁿ s'eeⁿ: 'Iiⁿ'yāⁿ chí nguéé ngíita yā nguéé neⁿe yā 'aama médico. Dámaaⁿ 'iiⁿ'yāⁿ chí ngiitā neⁿe yā chí cuuvi yíicú yā. 'Úú ní nguéé cuchíi chí yaa'ví 'iiⁿ'yāⁿ chí nadacadiinúⁿ yā chí ch'εete maaⁿ yā chí nguéé dinuuⁿndí yā caati chí yaa'ví 'iiⁿ'yāⁿ chí véé nuuⁿndi yeⁿe yā.

**'Iiⁿ'yāⁿ nítiinguuneeⁿ yā Jesús miiⁿ
yeⁿe chí nguεε ca'diinú yā**

(Mt. 9.14-17; Lc. 5.33-39)

¹⁸Áámá tiempo taachi discípulos yeⁿe Juan miiⁿ ndúucū fariseos

ca'diinúⁿ yā, náⁿá 'iiⁿ'yāⁿ ndaa yā nanááⁿ Jesús miiⁿ ní ntinguunéeⁿ yā Jesús: ¿Dē'ē cuuvi chí ca'diinúⁿ discípulos yeⁿe Juan miiⁿ ndúúcu 'iiⁿ'yāⁿ fariseos miiⁿ naati discípulos yeⁿé nī nguéé ca'diinúⁿ yā?

¹⁹Jesús nan'guεεcútaⁿ a yā 'iiⁿ'yāⁿ s'eeⁿ: ¿Áá ca'diinúⁿ 'iiⁿ'yāⁿ chí ndíi yā invitado naachí n'giindivaacu 'iiⁿ'yāⁿ 'naaⁿ chí sáⁿá chí n'giindivaacu sa canée sá ndúúcu yā? Ndúúti chí canée saⁿá chí n'giindivaacu sa miiⁿ, nguéé cuuví ca'diinúⁿ yā. ²⁰Naati cuchii tiempo taachí ch'ii saⁿá chí n'giindivaacu sa tuuⁿmi ní cuuvi ca'diinúⁿ yā.

²¹Mar 'áámá 'iiⁿ'yāⁿ nguéé cuta'á yā 'áámá tááⁿ tiinūⁿ ngai chí 'āā nguéé naaⁿnu yā chí 'iind'yaatá yā yeⁿē na catecai ndiicúú yeⁿe yā. Ndúúti chí dííⁿ yā 'tíicā, maáⁿ tiinūⁿ ngai miiⁿ ní cáancuūⁿ cú'teeⁿ tiinūⁿ ndiicúú miiⁿ. Níicú cuuví ch'εεte ca naachí ndíi n'teeⁿ. ²²Tiicā ntuūⁿ mar 'áámá 'iiⁿ'yāⁿ nguéé caaⁿ'nyúⁿ yā vino ngai na bolsa yííⁿmáⁿ ndiicúú yeⁿe vino tan'dúúcā chí díiⁿ 'iiⁿ'yāⁿ ndiicúú. Nduuti chí dííⁿ yā 'tíicā vino ngai miiⁿ ní dí'cuuní yííⁿmáⁿ ndiicúú miiⁿ ní cuuvi ndai vino miiⁿ ndúúcu yííⁿmáⁿ. Chííⁿ chí vino miiⁿ canée chí 'cueēⁿ na bolsa yííⁿmáⁿ ngai.

Discípulos yeⁿe Jesús miiⁿ ní tiicú yā trigo nguuvi sábadó chí ntaavi'tuunúúⁿ 'iiⁿ'yāⁿ Israel

(Mt. 12.1-8; Lc. 6.1-5)

²³Áámá nguuvi chí sábadó chí ntaavi'tuunúúⁿ 'iiⁿ'yāⁿ Israel Jesús miiⁿ ndúúcu discípulos yeⁿé yā cho'ó yā 'áámá campo naachi véé trigo ní discípulos yeⁿé yā ní

tucá'a yā tiicú yā yááⁿ miiⁿ yeⁿe trigo taachi cho'ó yā. ²⁴Tuuⁿmi ní 'iiⁿ'yāⁿ fariseos ní caⁿ'a yā chíi yā Jesús miiⁿ: N'dií cuin'díicá nī, ¿d'é'ē cúúví chí dííⁿ discípulos yeⁿe nī chí nguεε canée chí díiⁿ yú nguuvi chí ntaavi'tuunúúⁿ 'iiⁿ'yāⁿ?

²⁵Naati Jesús miiⁿ ní caⁿ'a yā chíi yā saⁿá fariseos: ¿Áá nguéé n'geēⁿ ndís'tií chí díiⁿ David miiⁿ ndúúcu 'iiⁿ'yāⁿ chí cachiiica ndúúcu yā taachi cuiicu yā? ²⁶David miiⁿ ní sndáa yā ná yáacū yeⁿé Ndyuūs taachi saⁿá chí nguuvi Abiatar ngaⁿ'a ntiíⁿnyuⁿ sa yeⁿē chiiduú ch'εεte ca. Ní David che'é yā panes yeⁿe nátai yeⁿé Ndyuūs chí dámaāⁿ chiiduú s'eeⁿ cuuvi che'é yā. Ní David miiⁿ ca'a yā pan miiⁿ 'iiⁿ'yāⁿ chí snée ndúúcu yā. Ní che'e yā.

²⁷Jesús miiⁿ ní caⁿ'a yā chíi yā 'iiⁿ'yāⁿ: Nguuvi chí ntaavi'tuunúúⁿ yā canée chí cuuví yeⁿe saⁿá yeⁿe iⁿ'yeeⁿdí 'cūū naati nguéé saⁿá chí cuuvi yeⁿē nguuvi chí ntaavi'tuunúúⁿ saⁿá. ²⁸Cáávā chuū chííⁿ chí Saⁿá chí Daiyá Dendyuūs cuuví caaⁿ'maⁿ ntiíⁿnyúⁿ ntúúⁿ sa yeⁿē nguuvi chí ntaavi'tuunúúⁿ 'iiⁿ'yāⁿ.

Saⁿá chí ntí'í ta'a sa

(Mt. 12.9-14; Lc. 6.6-11)

3 Jesús miiⁿ ní chindáá ntúúⁿ yā na yáacū sinagoga. Ní miiⁿ canee 'áámá saⁿá ndúúcu ta'á sa chí ntí'í. ²Iiⁿ'yāⁿ fariseos ní neⁿé yā n'diichi yā nduuti chí Jesús miiⁿ chí ndúúvā yeⁿē saⁿá miiⁿ caati nguuvi sábadó chí ntaavi'tuunúúⁿ 'iiⁿ'yāⁿ. Ní fariseos cuuví caaⁿ'máⁿ yā nuuⁿndi yeⁿe Jesús. ³Tuuⁿmi ní Jesús miiⁿ ngaⁿ'a yā ngii yā saⁿá

chí ntí'i ta'ā sa miiⁿ: Nducuééⁿ dí ní cueendii di naavtaⁿ'a yeⁿ'e 'iiⁿ'yāⁿ.

⁴Jesús miiⁿ ní ntinguuneeⁿ yā saⁿ'ā s'eeⁿ ní caⁿ'a yā: ¿D'é'ē diiⁿ yú nguuví chi ntaaviⁿ'tuunúuⁿ yú? ¿Áá cuuvi chi diiⁿ yú cosas chi n'daācā o cosas chi nguéé n'daācā? ¿Áá n'daācā chí nguaⁿ'āi yú vida yeⁿ'e 'iiⁿ'yāⁿ o chi 'caaⁿ'nūⁿ yú 'iiⁿ'yāⁿ? 'Iiⁿ'yāⁿ s'eeⁿ ní ch'etinéé 'dííⁿ yā. ⁵Tuuⁿ'mi ní Jesús miiⁿ ní n'diichi yuudú yā saⁿ'ā s'eeⁿ ní s'neeⁿ ndaachi yiinú yā ti nguéé neⁿ'e cu'téenu sá yeⁿ'e yā. Ní Jesús caⁿ'a yā chii yā saⁿ'ā miiⁿ: N'doō di ta'a dí. Ní saⁿ'ā miiⁿ n'doō sa ta'ā sa, ní ta'ā sa ní nduūvā n'daacā tan'dúúccā taama. ⁶Tuuⁿ'mi ní can'dāá 'iiⁿ'yāⁿ fariseos ní ndee yā ndúúccū 'iiⁿ'yāⁿ yeⁿ'e Herodes ní 'íicú n'diichí yā táácā dííⁿ yā ní 'íicú cuuvi 'caaⁿ'núⁿ yā Jesús miiⁿ.

**Nééné 'yaaⁿ 'iiⁿ'yāⁿ snée yā
na 'diituú nuūⁿ'niⁿ'yāⁿ'ā**

⁷Jesús miiⁿ ndúúccū discípulos yeⁿ'e yā cueⁿ'é yā cuaaⁿ na 'díttuú nuūⁿ'niⁿ'yāⁿ'ā. Nééné 'yaaⁿ 'iiⁿ'yāⁿ yeⁿ'e yáⁿ'āa Galilea ndúúccū yáⁿ'āa Judea cheⁿ'e yā can'dāa yā Jesús miiⁿ. ⁸Taachi 'iiⁿ'yāⁿ yeⁿ'e yáⁿ'āa Galilea chicadínuuⁿ yā yeⁿ'é dendu'ū chi n'gæte n'dai chi Jesús dííⁿ yā, nééné 'yaaⁿ 'iiⁿ'yāⁿ ndaa yā n'diichi yā Jesús miiⁿ. 'Iiⁿ'yāⁿ s'eeⁿ ní 'iiⁿ'yāⁿ yeⁿ'e yáⁿ'āa Judea, ndúúccū 'iiⁿ'yāⁿ yeⁿ'e yááⁿ Jerusalén, ndúúccū 'iiⁿ'yāⁿ yeⁿ'e yáⁿ'āa Idumea, ndúúccū 'iiⁿ'yāⁿ yeⁿ'e táámá 'diituú yíicú Jordán, ndúúccū 'iiⁿ'yāⁿ yeⁿ'e yáⁿ'āa Tiro ndúúccū yáⁿ'āa Sidón. ⁹Cáāvā chi ndaa n'dee n'dái 'iiⁿ'yāⁿ, Jesús caⁿ'a yā chii yā discípulos

yeⁿ'e yā chi cu'nee yaáⁿ yā 'áámá barco yeⁿ'e yā, níccú cuuví cuchée yā barco miiⁿ chi 'yaaⁿ n'dái 'iiⁿ'yāⁿ nguéé 'cueti núūⁿ chiichi yā yeⁿ'e Jesús miiⁿ. ¹⁰Ní Jesús dííⁿ yā chí 'yaaⁿ n'dái 'iiⁿ'yāⁿ nduūvā yeⁿ'e yā. Ní nducyáácá 'iiⁿ'yāⁿ chí ngiitā neⁿ'é yā tuu'ví yā Jesús. ¹¹Ní 'iiⁿ'yāⁿ chí canee yā ndúúccū espíritu yeⁿ'e yááⁿ'nguiniūⁿ, espíritu miiⁿ díiⁿ chí 'iiⁿ'yāⁿ s'uuⁿ ndaa yā nanááⁿ Jesús ní espíritu ní 'cai yeⁿ'e 'iiⁿ'yāⁿ: Díí ní Saⁿ'a chí Daiya Dendyuūs.

¹²Jesús caⁿ'a yuudu yā espíritu s'uuⁿ 'túúccā: Nguéé caaⁿ'maⁿ dí du'u 'iiⁿ'yāⁿ 'úú.

**Jesús ndeeve yā ndu'u ndiichúúví
discípulos**

(Mt. 10.1-4; Lc. 6.12-16)

¹³Cuayivi miiⁿ ní Jesús cuchée yā na 'áámá yiicū, naachí yaa'ví yā 'iiⁿ'yāⁿ chí neⁿ'e yā, ní 'iiⁿ'yāⁿ s'eeⁿ ndaa yā nanááⁿ Jesús miiⁿ. ¹⁴Ní nduuvidaamá ndu'ū ndiichúúví discípulos chí canee yā ndúúccū yā. Ní dicho'ó yā 'iiⁿ'yāⁿ s'eeⁿ chí caaⁿ'máⁿ yā nduudú yeⁿ'e Ndyuūs chí nduudu cuaacu yeⁿ'e yā. ¹⁵Ní Jesús ca'a yā poder discípulos yeⁿ'e yā chí cuuvi dííⁿ yā chí nduūvā yeⁿ'e 'iiⁿ'yāⁿ ní chí diví yā espíritus yeⁿ'e yááⁿ'nguiniūⁿ yeⁿ'e 'iiⁿ'yāⁿ. ¹⁶'Iiⁿ'yāⁿ s'eeⁿ ní ndiichúúví discípulos: Simón, chí duuchi ntúúⁿ sa Pedro, ¹⁷ndúúccū Jacobo ndúúccū Juan 'diinú sa ní 'uūví sáⁿ'a s'eeⁿ chí daiya Zebedeo, ní saⁿ'ā s'eeⁿ ní Jesús s'neeⁿ yā nguuvi sa Boanerges chí neⁿ'e caaⁿ'maⁿ Daiya Dæevé; ¹⁸tanáⁿ'a yā ní nguuvi Andrés, ndúúccū Felipe, ndúúccū Bartolomé, ndúúccū Mateo, ndúúccū

Tomas, ndúúcū Jacobo chi daiya Alfeo, ndúúcū Tadeo, ndúúcū táámá Simón chi yeⁿe 'iiⁿ'yāⁿ yeⁿe yaⁿ'āa Canaan, ¹⁹ndúúcū Judas Iscariote, saⁿ'ā chi cuayiivi míⁿ ch'iⁿ'i sá du'u chi Jesús miiⁿ chi cuuvi 'caaⁿ'núⁿ yā 'yā. Ní Jesús ndúúcū ndiichuuví discipulos yeⁿe yā cueⁿe yā ní snda yā na 'áámá va'āi.

Ngaⁿa yā chi Jesús canée yā ndúúcū poder yeⁿe yááⁿ'nguiinūⁿ

(Mt. 12.22-32; Lc. 11.14-23; 12.10)

²⁰Cuayiivi ní Jesús cueⁿe yā na vaacu yā. Táámá vmnéⁿ'ēe néené n'deēe 'iiⁿ'yāⁿ ndaa yā nanááⁿ Jesús miiⁿ chi nguée vée yaāⁿ chí che'e yā pan. ²¹Taachí 'iiⁿ'yāⁿ yeⁿe familia yeⁿe Jesús chicadínuuⁿ yā yeⁿe Jesús, yeⁿe chi 'iiⁿ'yāⁿ ngaⁿ'a yā chi Jesús ní nduuví loco yā, ndaa yā chi nandée yā Jesús.

²²Tiicá ntúūⁿ maestros chí ng'i'cueⁿ ley chí chiicá yā yeⁿe na yáāⁿ Jerusalén ní caⁿ'a yā: Sáⁿ'a 'cūū canée sá ndúúcū espíritu chi nguuví Beelzebú chi Satanás chí ngaⁿ'a ntiiⁿ'nyuⁿ sa yeⁿe espíritus yeⁿe yááⁿ'nguiinūⁿ, ní cáávā poder yeⁿe espíritu miiⁿ chí tun'daá yā espíritus yeⁿe yááⁿ'nguiinūⁿ yeⁿ'é 'iiⁿ'yāⁿ.

²³Tuu'mi ní Jesús miiⁿ ní yaa'vi yā 'iiⁿ'yāⁿ s'eeⁿ ní s'neeⁿ yā 'áámá ejemplo. Ni caⁿ'a yā: ¿Táácā cuuví diiⁿ' yááⁿ'nguiinūⁿ diví sa yááⁿ'nguiinūⁿ? ²⁴Ndúúti chi 'áámá gobernador chi ngaⁿ'a ntiiⁿ'nyúⁿ yā yeⁿe yáāⁿ naachi vée 'uūvi partido chi nguⁿ'u ná 'aamá yā ndúúcū yeⁿe taama yā 'iiⁿ'ntyéⁿ'ē miiⁿ nguée cuuvi 'nááⁿ yā chí 'iiⁿ'ntyéⁿ'e yā.

²⁵Ndúúti chi n'deēe nadacadínuuⁿ

yā na 'áámá familia chi vée partido yeⁿ'ē, familia miiⁿ ní nguée cuuvi nduuvíáámá yā. ²⁶Tiicá ntúūⁿ, ndúúti chi yááⁿ'nguiinūⁿ diiⁿ' sa contra yeⁿ'e maaⁿ sa, nguée cuuví cūnee sa ti chūū diiⁿ' chí 'cuiinu sa.

²⁷Mar 'áámá 'iiⁿ'yāⁿ nguée cuuvi cundaa yā na vaacu 'áámá saⁿ'ā chí vée fuerzas yeⁿ'ē sa ní diví yā dendu'u yeⁿ'ē sa. Canée chí caāchiichí yā saⁿ'ā vmnááⁿ vmnaaⁿ. Cuayiivi ní cuuvi diiⁿ' yā diví yā dendu'ū chí snúūⁿ va'ai yeⁿ'ē sa.

²⁸Nduudu cuaacu 'úú ngaⁿ'á ngí ndís'ti. Tanducuéⁿ'e nuuⁿ'ndi chí diiⁿ' 'iiⁿ'yāⁿ yeⁿ'e iⁿ'yeeⁿ'dí 'cūū ndúúcū nduudu taaⁿ chí 'iiⁿ'yāⁿ s'eeⁿ ngaⁿ'a yā contra yeⁿ'e Ndyuūs, Ndyuūs nadich'ēecú yā nuuⁿ'ndí yeⁿ'é yā.

²⁹Naati 'iiⁿ'yāⁿ chí ngaⁿ'a yā nduudu taaⁿ chí nguēe n'dáacā yeⁿ'e Espíritu N'dai yeⁿ'é Ndyuūs, ní nguée nch'ēecú yeⁿ'é yā maaⁿ ní tiempo chí cuchii.

³⁰Tiicá Jesús ngaⁿ'a yā ti náⁿ'ā 'iiⁿ'yāⁿ ngaⁿ'a yā chí Jesús míⁿ ní vée espíritu yeⁿ'e yááⁿ'nguiinūⁿ nduucú yā.

Chēcú Jesús ndúúcū 'dínu yā

(Mt. 12.46-50; Lc. 8.19-21)

³¹Cuayiivi ní ndaā chēcú Jesús miiⁿ ndúúcū 'dínu yā, ní ch'ēetinée yā cuaaⁿ chūva'āi. Ní dichó'o yā 'áámá saⁿ'ā chí yaa'vi sa Jesús chí cuchii yā nanááⁿ yā. ³²'Yááⁿ 'iiⁿ'yāⁿ ní veeⁿ'é yā cuaaⁿ 'diitúú Jesús miiⁿ ní caⁿ'a yā: Chēcú nī ndúúcū 'diinú nī ní in'nuúⁿ yā n'dii cuaaⁿ chūva'āi.

³³Jesús miiⁿ ní caⁿ'a yā chí yā saⁿ'ā miiⁿ: ¿Dú'ū chí chēcú miiⁿ? o ¿dú'ū chí 'diinú miiⁿ?

³⁴Tuu'mi ní Jesús n'gíinu yā 'iiⁿ'yāⁿ chí veeⁿ'é yā cuaaⁿ 'diitúú yā

ní ngaⁿa yā ngii yā 'iⁿ'yāⁿ s'eeⁿ:
N'diichí nī. 'Iⁿ'yāⁿ chí snée yā
nduucú miiⁿ, 'iⁿ'yāⁿ s'eeⁿ tan'dúúcā
chí chεεcú ndúúcú 'diinú. ³⁵Ní 'āā
du'ú nūⁿ chí diiⁿ chíⁿ chí Ndyuūs
neⁿe yā chí díⁿ yā, 'iⁿ'yāⁿ s'eeⁿ chíⁿ
ví'í, 'iⁿ'yāⁿ s'eeⁿ chíⁿ 'diinú, ndúúcú
chεεcú.

**'Aama ejemplo yeⁿe 'aama saⁿā chí
ngiinū sá ndaata**

(Mt. 13.1-9; Lc. 8.4-8)

4 Taama vmnéⁿēe Jesús miiⁿ
ní tucá'a yā chí'cueeⁿ yā
cuaaⁿ 'diituú nuūⁿ'nī'yáⁿā. Ní
nduuvídáámá n'deeē n'dái 'iⁿ'yāⁿ
naachi canéé Jesús miiⁿ ndíí 'āā
ntéé lugar chí cuééndii Jesús. Ní
chindáa yā na 'aama barco chí
canuuⁿ vmnaaⁿ nuūⁿ'nī'yáⁿā miiⁿ.
Ní miiⁿ chí'iindí yā chí ca'cueeⁿ yā.
Nducyáácá 'iⁿ'yāⁿ ch'εetinée yā na
'diituú nuūⁿ'nī miiⁿ. ²N'deēē n'dái
parábolos caⁿ'a Jesús 'iⁿ'yāⁿ s'eeⁿ
chí ejemplos chí tan'dúúcā dendu'u
chí véé iⁿ'yeeⁿdí'cūū. Ní taachí
ngi'cueeⁿ yā caⁿ'a yā ndúúcú 'iⁿ'yāⁿ
s'eeⁿ 'tíicā. ³Ndís'tií ní 'caandiveéⁿ
nī chuū. 'Áámá saⁿ'ā chí ngiinū
ndaāta ní cuéⁿe sá cuūnū sa ndaata
miiⁿ. ⁴Taachi chíinū sa ní 'áámá
duutu ndaata míⁿ chíiya na 'diituú
yúúní ní ndāā 'yáádá ní che'e
tī. ⁵Náⁿ'ā duutu ndaata ní chíiya
nguaaⁿ tuúú naachi nguéé dáana
n'deēē yáⁿ'āa véé. Duutu ndaata
miiⁿ núúⁿ cān'daa tí yáⁿ'āa miiⁿ
ngueē daanáá yáanūⁿ. ⁶Ní taachi
can'daa yaatū miiⁿ ní tí'i caati nguéé
yāanūⁿ snúú dí'yú. ⁷Náⁿ'ā duutu
ndaata miiⁿ chíiya nguaaⁿ yááⁿ.
Yááⁿ s'eeⁿ ní chíiita ní di'vaāchi
yéⁿē. Chíⁿ chí ndaata miiⁿ ní nguéé

dichíí'vē. ⁸Náⁿ'ā duutu ndaata míⁿ
na yáⁿ'āa n'dáacā chíiyā. Can'dāā
ní chíiita n'deeē n'dái cosecha yeⁿē.
N'duuví ní ch'εetinée tanduu ndiicu
ndiichi ndaata yeⁿē. Tan'duuví ní
'iinū ngeēcu ndiichi ndaata yeⁿē ní
tan'duuví ní 'áámá ciento ndaata
yeⁿē.

⁹Tuu'mi ní Jesús caⁿ'a yā chíi yā
'iⁿ'yāⁿ s'eeⁿ: Ndís'tií chí véé veéⁿ nī,
'caandiveéⁿ nī.

Chíⁿ chí neⁿē caāⁿmāⁿ ejemplo miiⁿ

(Mt. 13.10-23; Lc. 8.9-15)

¹⁰Cuayivi taachí nduūví
dámaáⁿ yā ndaa nanááⁿ Jesús
náⁿ'ā 'iⁿ'yāⁿ chí snée niiⁿ'núⁿ yā
ndúúcú ndiichúúví discípulos ní
ntiinguunéeⁿ yā Jesús: ¿Dε'ē neⁿe
caaⁿ'maⁿ ejemplo 'cūū?

¹¹Ní Jesús caⁿ'a yā chíi yā 'iⁿ'yāⁿ
s'eeⁿ: Ndís'tií ní canéé chí cadiinuuⁿ
nī chí canúúⁿ n'de'ei yeⁿ'é naachi
Ndyuūs ngaⁿ'a ntiiⁿ'nyúⁿ yā. Naati
tanáⁿ'ā 'iⁿ'yāⁿ chí nguéé sneé
yā nduucú, 'úú ní ngaⁿ'á ngii
tanducueⁿ'ē 'iⁿ'yāⁿ s'eeⁿ ndúúcú
ejemplos. ¹²Níicú 'iⁿ'yāⁿ s'eeⁿ snaaⁿ
yā naati ch'εetinée yā tan'dúúcā
chí nguéé inaaⁿ yā, ní 'caandiveéⁿ
yā naati ch'εetinée yā tan'dúúcā
chí nguéé 'caandiveéⁿ yā, ní nguee
tuumicadíinuuⁿ yā. Ndíí nguéé
ndaacadáámí yā ní cu'téenu yā
Ndyuūs ní nch'εēcú nuuⁿ'ndi yeⁿe yā.

¹³Tuu'mi ní Jesús caⁿ'a yā chíi
yā discípulos yeⁿe yā: ¿Áá nguéé
ituumicadíinuuⁿ nī yeⁿ'ē ejemplo
'cūū? ¿Táácā, túú'mí, cádíinuuⁿ nī
yeⁿ'ē tanáⁿ'ā ejemplo? ¹⁴'Iⁿ'yāⁿ
chí ngiinú yā ndaata miiⁿ
tan'dúúcā 'iⁿ'yāⁿ chí candεe yā
nduudu cuaacu yeⁿ'é Ndyuūs.

15 N'dúúví 'iiⁿyāⁿ ní tan'duūcā ndaata chí chiiya cyúúní míⁿ, 'tiicá yā ch'iindiveéⁿ yā nduudu yeⁿé Ndyuūs. Ní cuayiivi taachí ch'iindiveéⁿ yā, chíi yááⁿn'guiinūⁿ ní divíi sa nduudu chí ch'iindiveéⁿ yā chí canéé na staava yeⁿe yā. 16 Tán'duuvi yā ní tan'dúúccā ndaata chí chiiya nguaaⁿ tuúú, 'tiicá yā. N'giindiveéⁿ yā nduudu cuaacu yeⁿé Ndyuūs ní yeenú n'daí yā nduūcū. 17 Naati nguée 'áámá cānee na staava yeⁿe yā ní nguée 'nááⁿ tiempo cūnee. Taachi ndaa tiempo chí 'cueenu yā cuuvi o neⁿe chí n'gíⁿ'nyuⁿneeⁿ 'iiⁿyāⁿ yeⁿé yā cáávā nduudu cuaacu miiⁿ, 'āā ntéé candii yā chí n'daacā miiⁿ. 18 Tán'duuvi yā ní tan'dúúccā ndaata chí chiiya nguaaⁿ yááⁿ miiⁿ, 'tiicá yā. N'giindiveeⁿ n'daacā yā nduudu cuaacu yeⁿé Ndyuūs. 19 Naati neené neⁿe cá yā dendu'ū yeⁿe iⁿ'yeeⁿdí 'cūū ndúúccū chí véé. Ní nginnche'éei yā 'iiⁿyā. Ní 'iiⁿyāⁿ s'eeⁿ ní dineⁿe yā cosas chí véé yeⁿe taama 'iiⁿyā. Tanducuéⁿē chuū ní ndaá ní di'vaachíi yeⁿe nduudu cuaacu yeⁿé Ndyuūs. Ní diiíⁿ chí nguée dichí've nduudu miiⁿ na vida yeⁿe 'iiⁿyāⁿ s'eeⁿ. 20 Naati tán'duuvi yā ní tan'dúúccā ndaata chí chiiya na yáⁿāa n'daacā, 'tiicá yā. N'giindiveeⁿ yā nduudu cuaacu yeⁿé Ndyuūs ní i'teenu n'daacā yā, ní véé n'gui'i yeⁿē. N'duuví yā ní tan'dúúccā ndaata chí chíi ndiicū ndiichi yeⁿē yeⁿe 'aama 'aama. N'duuví yā tan'dúúccā chí chíi 'iinu ngēecu ndiichí yeⁿē, o tan'dúúccā chí chíi 'aama ciento yeⁿē.

**Tanducuéⁿē chí cunuúⁿ n'de'ei
cunduú nguuví**

(Lc. 8.16-18)

21 'Tiicá ntúūⁿ caⁿa Jesús táámá ejemplo chí 'téé nguée dáámá. ¿'Áá ndee yā 'áámá lámpara chí cu'neeⁿ yā maaⁿ 'aama caja o maaⁿ 'aama cama? ¿'Áá nguée cu'neeⁿ yā lámpara miiⁿ na yaacu, 'íicú 'iiⁿyāⁿ cuuvi snaaⁿ yā? 22 Mar 'áámá cosa chí canúúⁿ n'de'ei nguée cunee chí nguée snaaⁿ 'iiⁿyāⁿ, ndíi nguée ndúú 'áámá cosa chí cánúúⁿ n'de'ei chí nguée cadiínuuⁿ 'iiⁿyāⁿ. 23 Du'ū chí véé veéⁿ ní 'caandiveeⁿ.

24 Ní Jesús caⁿa ntúūⁿ yā 'iiⁿyāⁿ s'eeⁿ: Cunndéē ndís'tií cuidado yeⁿe chí n'giindiveeⁿ nī. Ndúúccū caādī chí ndís'tií idiíⁿ nī juzgar 'iiⁿyāⁿ, caadi míⁿ ntúū Dendyuūs idiíⁿ yā juzgar ndís'tií. Ní n'deēe cá n'daacā yeⁿē ndís'tií taachi Ndyuūs idiíⁿ yā juzgar ndís'tií. 25 'Iiⁿyāⁿ chí véé yeⁿe yā Ndyuūs ca'a cá yā 'yā. 'Iiⁿyāⁿ chí nguée ca yeⁿe yā, Ndyuūs ndivíi yā 'téé chí 'āā véé yeⁿe yā.

Ejemplo yeⁿe ndaata chí ngiita

26 Jesús caⁿa ntúūⁿ yā: Naachi Ndyuūs ngaⁿa ntiiⁿnyúⁿ yā ní tan'dúúccā 'áámá saⁿā chí ngiinu sa ndaata na yáⁿāa yeⁿe sa. 27 Saⁿā miiⁿ ngiinū sa ndaata na yáⁿāa. Ní chíi maáⁿ ní cyaadú sa ní nducueeⁿ sa taachí chideeve. Cuayiivi ní cho'ōo nguūví cho'ōo n'gááⁿ ní ndaata miiⁿ ní can'daa ní ch'iita naati saⁿā miiⁿ ní nguée deenu sa táácā ch'iita. 28 Yáⁿāa miiⁿ ngii maáⁿ yéⁿē. Vmnaáⁿ vmnaaⁿ ican'dáa ta'ā n'gaiyáā. Cuayiivi ní can'daā yááⁿ miiⁿ yeⁿe. Cuayiivi ní ngiita ní ngii

trigo chí ndiitūu n'daāca na yááⁿ miiⁿ. ²⁹Taachí trigo miiⁿ 'āā ntí'i, tuu'mi ní ngeⁿe 'iiⁿyāⁿ chí yeⁿe ní n'giica yā, ti 'āā snuū ca'a chí 'caātā.

Tan'dúúccā ejemplo nduutií yeⁿe yíivē ntí'yāa

(Mt. 13.31-32; Lc. 13.18-19)

³⁰Jesús miiⁿ ní ca'a ntúuⁿ yā: ¿De'é tan'dúúccā naachí ngaⁿa ntiiⁿnyuⁿ Ndyuūs miⁿ? o ¿de'é nduucū chi nadidáámá yú? ³¹Chuū tan'dúúccā nduutií yeⁿe yíivē ntí'yāa chí 'lííⁿ cá yeⁿe tanducuéⁿe nduutií chí véé iⁿ'yeeⁿdí 'cūū. Chíⁿ chí chiinu 'iiⁿyāⁿ na yáⁿ'āa yeⁿe yā. ³²Taachí 'āā niinú yā ndaata miiⁿ ní ngíi n'geete yeⁿe tanducuéⁿe yāātā. Ní dúuⁿnē miiⁿ ní n'geete n'dái ngii chí 'yáádá ngíi í'neeⁿ tī 'dééce tī na 'cuutií yeⁿe.

Taama ejemplo chí ngi'cueeⁿ Jesús

(Mt. 13.34-35)

³³Tíicā ngi'cueeⁿ Jesús 'iiⁿyāⁿ s'eeⁿ nduudu cuaacu yeⁿe Ndyuūs ndúúccū n'dee n'dái ejemplos tan'dúúccā chuū, tanducuéⁿe chí cuuvi cadiiinuⁿ yā. ³⁴Ní ngaⁿa yā ngii yā nducyaaca 'iiⁿyāⁿ ndúúccū ejemplos, naati taachi canee yā dámaāⁿ ndúúccū discípuulos yeⁿe yā tanducuéⁿe miiⁿ n'giⁿ'i yā discípuulos yeⁿe yā de'e chí neⁿe caaⁿ'maⁿ ejemplos chí 'āā caⁿ'a yā.

Jesús chí'neeⁿ 'diiⁿ yā 'yúúné ndúúccū nuūⁿnīⁿyáⁿ'ā

(Mt. 8.23-27; Lc. 8.22-25)

³⁵Taachi chí'da'á nguuvi miiⁿ, Jesús miiⁿ ngaⁿa yā ngii yā discípuulos yeⁿe yā: Caⁿ'ā yú táámá 'diituú nuūⁿnīⁿyáⁿ'ā.

³⁶Tuu'mi ní s'neeⁿ yā miiⁿ ní discípuulos ní candée yā Jesús miiⁿ

na barco chí 'āā canéé na 'diituú nuūⁿnīⁿyáⁿ'ā ní cueⁿ'é yā. Miiⁿ ntúūⁿ canéé tanáⁿ'ā barcos. Ní 'iiⁿyāⁿ yeⁿe tanáⁿ'ā barcos cueⁿ'é ntúūⁿ yā. ³⁷Tuu'mi ní chéenū 'áámá 'yúúné taaⁿ ní nuūⁿnīⁿyáⁿ'ā miiⁿ sndaā yaacú. Ní sndaā yaanūⁿ barco miiⁿ, ní chiitūu nuūⁿnīⁿ barco naachi canéé Jesús miiⁿ. ³⁸Ní Jesús miiⁿ ní cyáádu yā cuaaⁿ 'diituú barco miiⁿ, ní candiitinee yā na cojín. Ní discípuulos ní nanduūchí yā Jesús miiⁿ ní caⁿ'a yā chii yā: N'dii Maestro, ¿'áá nguéé de'e vee inee ní chí 'cuuvi yú?

³⁹Tuu'mi ní Jesús miiⁿ ní nducueeⁿ yā ní yaaⁿ'vi yā 'yúúné miiⁿ ní caⁿ'a yā chii yā nuūⁿnīⁿyáⁿ'ā miiⁿ 'túúccā: 'Diiⁿ nūuⁿ cunee di. Hora míⁿ nūuⁿ 'yúúné miiⁿ ní canee 'diiⁿ ní nducuéⁿe canee 'diiⁿ 'diiⁿ. ⁴⁰Tuu'mi ní Jesús miiⁿ ní caⁿ'a yā chii yā discípuulos yeⁿe yā: ¿De'é cuuvi tátii 'va'a ní? ¿De'e cúuví chí nguéé cu'téenu cá ní?

⁴¹Ní discípuulos yeⁿe yā neené dii'yá yā chí, ní ngaⁿa yā ngii yā nguaaⁿ maáⁿ yā ndúúccū v'i: ¿Du'urá 'iiⁿyāⁿ 'cúú, chí ndii 'yúúné ndíi nuūⁿnīⁿyáⁿ'ā chí'indiveéⁿ yeⁿe yā?

Saⁿ'ā yeⁿe yáⁿ'āa Gadara chí canéé sá ndúúccū espíritus yeⁿe yááⁿ'nguiinūⁿ

(Mt. 8.28-34; Lc. 8.26-39)

5 Jesús ndúúccū discípuulos ndaa yā na táámá lado 'diituú nuūⁿnīⁿyáⁿ'ā miiⁿ yeⁿe yáⁿ'āa chí nguuvi Gadara. ²Tuu'mi ní Jesús nan'daá yā na barco miiⁿ, ní ndaa 'áámá saⁿ'ā chí canéé ndúúccū espíritus yeⁿe yááⁿ'nguiinūⁿ. Ní ngiicá sa ná vaacu sa chí 'áámá yiivi yáává chí canéé nguaaⁿ yaínyāⁿ

ní ndaa sa nanááⁿ Jesús. ³Saⁿá
 miiⁿ ní mar 'áámá 'iiⁿyāⁿ nguéé chi
 cuuví cuta'á yā saⁿā ní cachiichí yā
 saⁿā, ndii nguéé ndúúcu cadenas.
⁴Nééné n'deēe cuuví 'iiⁿyāⁿ s'eeⁿ
 cachiichí yā saⁿā miiⁿ ndúúcu
 cadenas ca'a sa ndúúcu ta'ā sa, náátí
 ch'lica sa cadenas miiⁿ, ní dicheeyéi
 sa cadenas miiⁿ. Ní mar 'áámá
 'iiⁿyāⁿ nguéé ichée yā ndúúcu sa.
⁵Cué'é daāⁿmaⁿ cachiica sá n'gai sa
 cuaaⁿ ná yiicū ndúúcu cuaaⁿ nguaaⁿ
 yáinyāⁿ ndíí nguuví ndíí n'gaaⁿ, ní
 'nuu cá'ai maāⁿ sa sáⁿā ndúúcu tuūu.
⁶Ní taachi n'diichi yá'áí sa Jesús
 miiⁿ, cueⁿe sa ngéenu sā nanááⁿ yā
 ní chiintii'ya sa nanááⁿ yā. ⁷Ní caⁿa
 sa chii sa Jesús miiⁿ ní 'cái yiicu sá:
 ¿De'ē cuuví chi ndaa nī nanaáⁿ, n'dii
 Jesús, Daiya Dendyuūs chi canee yā
 na va'ai chēeti nguuví? Ngii'cá cáávā
 chi dúúchí Ndyuūs chi nguéé tée nī
 vaadi 'caa'va 'úú.
⁸Saⁿā miiⁿ ní caⁿa sa chuū
 caati Jesús miiⁿ ní caⁿa yā chii
 yā espíritus yeⁿe yááⁿn'guiinūuⁿ:
 Ndís'tiī, nan'dáa nī yeⁿe sáⁿa 'cūū.
⁹Jesús miiⁿ tiinguuneeⁿ yā saⁿā:
 ¿De'ē nguuví dí? Ní espíritus yeⁿe
 yááⁿn'guiinūuⁿ chi canéé ndúúcu
 sáⁿa 'cūū nan'guuecútaⁿa sa: Legión
 nguūví, caati neené 'yaaⁿ 'nū.
¹⁰Ní espíritus neené di'cuíftuū
 ca Jesús miiⁿ chi nguéé tun'dáa yā
 espíritus chi caⁿā yaⁿai yeⁿe yáⁿāa
 miiⁿ. ¹¹Ní neené n'deēe puercos
 nge'e tī cuaaⁿ na níⁿnúⁿ yiicū miiⁿ.
¹²Ní espíritus yeⁿe yááⁿn'guiinūuⁿ
 idi'cuiitu Jesús: N'dii, dicho'ó nī
 nús'uu chi caⁿa 'nū chēeti puercos
 miiⁿ.
¹³Tuu'mi ní Jesús ní ca'a yā
 permiso, ní espíritus yeⁿe

yááⁿn'guiinūuⁿ chínan'dáa sa
 yeⁿe saⁿā miiⁿ chí ndáa sa chēeti
 puercos. Ní véé tan'duu 'uūvi mil
 puercos miiⁿ. Ní taachi espíritus
 yeⁿe yááⁿn'guiinūuⁿ sndáa sa
 chēeti puercos tuu'mi ní cheenu
 nducyaaca tī ní chingéé nuúⁿ tī
 chēeti yaāi miiⁿ. Ní chingée tī
 nguaaⁿ nuuⁿniⁿyáⁿā. Ní chiitu
 nuūⁿnīⁿ veéⁿ tī duutu tī cheendi tī
 ní ch'ii tī nguaaⁿ nuūⁿnīⁿ miiⁿ.
¹⁴'Iiⁿyāⁿ chi idiiⁿ cuidado puercos
 cueⁿe yā ngéenu yā chi cuuvi yā
 'iiⁿyāⁿ ná yááⁿ miiⁿ ndúúcu 'iiⁿyāⁿ
 chi snéé na cue'etí chí chíi miiⁿ. Ní
 'iiⁿyāⁿ s'eeⁿ can'daa yā n'diichi yā
 chí chíi. ¹⁵Taachí ndaa yā niiⁿnuúⁿ
 nanááⁿ Jesús miiⁿ, ní taachí n'diichí
 yā saⁿā chi canéé sá ndúúcu
 espíritus yeⁿe yááⁿn'guiinūuⁿ chi
 maaⁿ ní vee sa 'diiⁿ ndúúcu catecai
 sa ní 'āā n'daācā sa tuu'mi ní dí'va'a
 yā. ¹⁶'Iiⁿyāⁿ s'eeⁿ chi n'diichí yā
 chí diiⁿ Jesús miiⁿ, ní caⁿa yā chíi
 yā táácā chíi ndúúcu saⁿā miiⁿ chí
 canéé sá ndúúcu espíritus yeⁿe
 yááⁿn'guiinūuⁿ, ní tan'duucā chí chíi
 ndúúcu puercos. ¹⁷Tuu'mi ní 'iiⁿyāⁿ
 s'eeⁿ di'cuíftu yā Jesús miiⁿ chí cáⁿa
 yā táámá lado yeⁿe yááⁿ miiⁿya.
¹⁸Jesús cueⁿe yā. Ní taachi ndaa
 yā na barco miiⁿ ndaa saⁿā chí
 vmnaaⁿ canéé sá ndúúcu espíritus
 yeⁿe yááⁿn'guiinūuⁿ. Ní saⁿā miiⁿ
 chiica sa Jesús chí caⁿa sa ndúúcu
 yā na barco miiⁿ. ¹⁹Jesús ní nguéé
 'cuuⁿ yā naatí caⁿa yā: Cunaⁿa dí
 ná vaacu di ndúúcu 'iiⁿyāⁿ yeⁿe di,
 ní cuuvi di 'iiⁿyāⁿ chí ch'ēete n'dai
 dendu'ū chí Señor 'iivú Ndyuūs miiⁿ
 díⁿ yā ndúúcu dii, ní tan'dúúcā
 Señor 'iivú Ndyuūs miiⁿ chí nduuví
 ya'āi iinú yā dii.

²⁰Saⁿā miiⁿ ní cunaⁿā sa, ní tucá'a sa chii sa 'iiⁿyāⁿ nuuⁿmaⁿ yáāⁿ cuaaⁿ 'diituú chí nguuvi Decápolis yeⁿe dendu'ú chí n'geete n'dai chí Jesús dííⁿ yā ndúúcu sa. Ní nducyaaca yā che'e yiinú yā.

Táⁿā daiya sáⁿā Jairo, ndúúcu n'daataá chí tuū'vi tá catecai Jesús

(Mt. 9.18-26; Lc. 8.40-56)

²¹Taachí Jesús miiⁿ nanguεεcunée yā ní cho'ó yā táamá lado yeⁿē nuūⁿnuⁿyáⁿā ní ndaa yā na yáⁿāa 'diituú nuūⁿniⁿyáⁿā, neené n'deē 'iiⁿyāⁿ ndaa yā naachi Jesús canee yā. ²²Ní ndaa 'áámá saⁿā chí nguuvi sa Jairo, saⁿa chí ngaⁿa ntiíⁿnyuⁿ sa yeⁿe yáacū sinagoga. Taachí n'diichi sa Jesús miiⁿ candiitin'díi sa na ca'a yā. ²³Ní neené dí'cuítu sa Jesús miiⁿ ní caⁿa sa: Daiyá ní neⁿē 'cuūvi tá. Cuchíi ní ní cún'du'u tá'a ní vmnaaⁿ yeⁿē tá, ní cuuví nduūvā yeⁿe tá ní nguéé 'cuūvi tá.

²⁴Tuu'mi ní Jesús miiⁿ ní cuéⁿe yā ndúúcu sa. Neené 'yaaⁿ 'iiⁿyāⁿ can'daa yā Jesús ní néené chiiⁿ'nu chiichí yā Jesús. ²⁵Ní nguaaⁿ nducyaaca 'iiⁿyāⁿ miiⁿ canée 'áámá n'daataá chí ngiitā tá, chí 'āā ndiichúúví nduūyū canee tá ndúúcu ca'ai chí nguuvi nguuvi ngee yuuúⁿ yeⁿe cuerpo yeⁿe tá. ²⁶Néené n'geenu tá ngii ndúúcu médicos, ní 'āā ch'iinu díiⁿ tá gastar tanducueⁿē chí véé yeⁿē tá, naati nguéé du'ū vεε dichí'vε yeⁿē tá ti dáyíicándíí cá ca'ai yeⁿē ta cuaaⁿ vmnaaⁿ. ²⁷'Āā ch'iindiveeⁿ tá yeⁿe Jesús miiⁿ chí dííⁿ yā chí nduūvā yeⁿe 'iiⁿyāⁿ chí ngiitā. Ní cueⁿe tá nguaaⁿ 'iiⁿyāⁿ s'eeⁿ cuaaⁿ daamí Jesús ní tuū'vi tá catecai yā. ²⁸Caati nadicádíínuuⁿ tá

maāⁿ tá 'tíicā. Ndúúti chí dámaāⁿ tuū'ví catecai yā, ní nduūvā yeⁿē.

²⁹Hora mííⁿ nūuⁿ chí tuū'vi tá catecai Jesús miiⁿ 'tíicā canée naaⁿ chí ngeē yuuúⁿ yeⁿē tá. Ní chicadiinuⁿ tá na cuerpo yeⁿe tá chí 'āā nduūvā yeⁿē tá. ³⁰Tuu'mi ní Jesús miiⁿ tuumicádíínuuⁿ yā chí 'āā nduūvā yeⁿē 'áámá 'iiⁿyāⁿ ndúúcu poder yeⁿē yā. Ní nguεεcundíi yā ní n'diichi yā náávtaⁿā yeⁿe 'iiⁿyāⁿ ní ntiinguuneeⁿ yā: ¿Du'u túu'vii catecai?

³¹Tuu'mi ní discípulos yeⁿe yā caⁿa yā: Cuin'diichí ní 'iiⁿyāⁿ chí i'nūuⁿ chiichí yā s'uūúⁿ miiⁿ ní maaⁿ ní ntiinguuneeⁿ ní: ¿Du'u tuū'vii 'úú?

³²Naati Jesús ní nguεεcúndii yā n'giinu yā 'áámá lado taama lado, ní 'iicu cuuvi snaaⁿ yā du'ū tuū'vi 'iiⁿyāⁿ. ³³Tuu'mi ní n'daataá miiⁿ, ní in'duuvi tá chí 'va'á tá. Deenū tá de'ē chí chii. Cheⁿe tá ní chiíntii'ya tá nanááⁿ Jesús. Ní caⁿa tá chíi tá 'iiⁿyāⁿ tanducueⁿē chí nduudu cuaacu. ³⁴Jesús ngaⁿa yā ngii yā táⁿā: Díí daiyá, nduūvā yeⁿē dí cáávā chí i'téenu di 'úú. Díí 'diiíⁿ nūuⁿ cunáⁿa di, ní ndúúvā yeⁿē di yeⁿē ca'ai chí ndii di.

³⁵Ngaⁿa Jesús miiⁿ ndúúcu táⁿā miiⁿ, taachí ndaa yā ná va'ai yeⁿe saⁿā Jairo chí ngaⁿa ntiíⁿnyuⁿ sa yeⁿē 'iiⁿyāⁿ na yáacū sinagoga miiⁿ. Ní 'iiⁿyāⁿ yeⁿē va'ai miiⁿ ní caⁿa yā Jairo: Daiya dí 'āā n'dii tá. ¿DÉ'ε cuuví chí idindú'ū ca di maestro?

³⁶Naati Jesús miiⁿ, ní ch'iindiveeⁿ yā chí caⁿá yā yeⁿē saⁿā chí ngaⁿa ntiíⁿnyuⁿ sa. Ní caⁿa yā chíi yā saⁿā miiⁿ chí ngaⁿā ntiíⁿnyuⁿ sa yeⁿe 'iiⁿyāⁿ na yáacū sinagoga: Nguéé 'va'a di naati cu'téenu dí.

³⁷ Jesús nguéé 'cuuⁿ yā nducyaaca 'iiⁿyāⁿ chi cueⁿe ca yā cuaaⁿ cheeti va'ai ndúucu yā, ti dámaāⁿ Pedro, ndúúcū Jacobo, ndúúcū Juan, saⁿā 'diinū Jacobo. ³⁸Taachí ndaa yā va'ai yeⁿe sáⁿā chi ngaⁿa ntiinⁿnyuⁿ yeⁿe 'iiⁿyāⁿ yeⁿe yaacū sinagoga miiⁿ, n'diichí yā 'iiⁿyāⁿ. Ní ch'iindiveéⁿ yā chí n'gai yā ní ngeecu yā. ³⁹Tuu'mi ní taachi sn'daa yā cuaaⁿ cheeti va'āi miⁿ, caⁿa yā: ¿De'ē tātii yuudu idiíⁿ ní? ¿De'ē cúuví chí ngeecu ní? Tádíiⁿ nguéé n'dii tá, tí cyaadu tá.

⁴⁰Iiⁿyāⁿ s'eeⁿ ní n'gíiⁿnyūⁿneeⁿ yā yeⁿe Jesús miiⁿ. Tuu'mi ní Jesús miⁿ dííⁿ yā chi can'daa nducyaaca yā. Ní Jesús can'deē yā chiida tá ndúúcū cheecu tá ndúúcū discípulos chi canéé ndúucu yā ní s'ndaa yā naachi candíftí ta'dííⁿ chí n'dii tá ní tináⁿā. ⁴¹Ní sta'á yā ta'ā tá ní caⁿa yā: Talita cumi, chi neⁿe caāⁿmaⁿ na nduudu yeⁿe yú, díí n'daata 'lííⁿ, 'úú ngaⁿá ngíí dii, ndúucueeⁿ di.

⁴²Hora mííⁿ nūuⁿ ta'dííⁿ miiⁿ ní nduucueeⁿ tá ní cachiica tá. N'daata 'lííⁿ miiⁿ ní ngii tá ndiichuuvi nduūyū. Tuu'mi ní 'iiⁿyāⁿ s'eeⁿ cueⁿe yiinú yā. ⁴³Jesús mííⁿ yaa'vi yuudú yā 'iiⁿyāⁿ chi nguéé caaⁿmaⁿ yā cuuvi yā chííⁿ mar 'áámá 'iiⁿyāⁿ. Ní caⁿa Jesús chi ca'a yā yuündú chi che'e n'daata 'lííⁿ miiⁿ.

Jesús canee yā na yáāⁿ Nazaret

(Mt. 13.53-58; Lc. 4.16-30)

6 Jesús ní ndaācá yā miiⁿ ní cunaⁿá yā na yáāⁿ Nazaret chi yáāⁿ vaacú yā, ní discípulos yeⁿe yā ní cueⁿe yā ndúucu yā. ²Taachí ndaa nguuvi sábadó chí ntaavi'tuunúúⁿ 'iiⁿyāⁿ, Jesús tucá'a yā chí'cueeⁿ yā na yaacū

sinagoga miiⁿ. Néénéé 'yaaⁿ 'iiⁿyāⁿ ch'iindiveéⁿ yā chí caⁿa Jesús, ní cheⁿe yiinú yā. Ní caⁿa yā: ¿Tíí ch'eēⁿ sáⁿa 'cūū tanducueⁿē chuū? ¿De'ē vaadi déénú chí ca'a yā 'iiⁿyāⁿ miiⁿ, ndúúcū vaadi n'giinu chí dííⁿ yā chūū? ³¿Áá nguéé sáⁿa 'cūū daiya saⁿā 'viichiyáⁿá miiⁿ, daiya María miiⁿ, saⁿā chí 'diinū Jacobo, ndúúcū José, ndúúcū Judas, ndúúcū Simón, ndúúcū v'íi yā chí snée yā miiⁿ nguaaⁿ s'uūuⁿ? Cáāvā chí yeⁿe yáāⁿ miiⁿ chííⁿ chí nguéé s'teenu yā 'iiⁿyāⁿ. ⁴Tuu'mi ní Jesús caⁿa yā chii yā 'iiⁿyāⁿ s'tíi: Nducyáácá 'iiⁿyāⁿ dinéⁿe yā profetas naati nguéé dinéⁿe yā 'áámá profeta yeⁿe yáāⁿ vaacú yā. Ní nguéé dinéⁿe 'iiⁿyāⁿ yeⁿe yā ndúúcū 'iiⁿyāⁿ na vaacu yā profeta miiⁿ. ⁵Jesús ní nguéé chidííⁿ yā mar 'áámá vaadi n'giinú miiⁿ, dámaaⁿ chí sn'duú yā ta'a yā v'naaⁿ yeⁿe n'duuvi 'iiⁿyāⁿ chí ngíítá ní nduūvā yeⁿe yā. ⁶Ní cheⁿe yiinu Jesús tí 'iiⁿyāⁿ s'eeⁿ ní nguéé s'téenu yā. Cuayivi miiⁿ ní Jesús cachiicá yā cuaaⁿ na yáāⁿ na niiⁿnuúⁿ ní ngí'cueeⁿ yā 'iiⁿyāⁿ.

Jesús dichó'o yā discípulos yeⁿe yā chí caaⁿmaⁿ yā nduudu yeⁿe Ndyuūs

(Mt. 10.5-15; Lc. 9.1-6)

⁷Ní Jesús yaa'vi yā ndu'ū chí ndiichuuvi discípulos, ní tucá'a yā dicho'o yā 'iiⁿyāⁿ 'uuvi yā 'áámá 'áámá yáāⁿ. Ní ca'a yā poder discípulos chí tun'dáa yā espíritu yeⁿe yáāⁿ n'guuinūuⁿ yeⁿe 'iiⁿyāⁿ. ⁸Ní caⁿa yā chii yā discípulos chí nguéé de'ē vee candéē yā chí cuuví yeⁿe yúuní yeⁿe yā, dámaaⁿ in'daacuú. Nguéé canéé chí candéē yā ndii mar 'áámá moral, ndíí

nguéé ndúú pan ra, ndíí nguéeé ndúú tuúmi ra na bolsa. ⁹Cunúúⁿ ca'a yā ndaacuú ndaachíí, ní 'áámá nūuⁿ catecai yā, nguéeé 'uūvi. ¹⁰Ní caⁿa Jesús: Ndí's'tií, taachi cúndaa nī chēeti 'áámá va'āi, 'cuēetinée nī miiⁿ taanduvéé ndii taachí nan'dáa nī yeⁿe yáāⁿ miiⁿ. ¹¹Nduuti chi ndaá nī 'áámá yáāⁿ ní 'iiⁿyāⁿ s'eeⁿ nguéeé 'cuaáⁿ yā 'cuēetinée nī miiⁿ, ndíí nguéeé ndúú neⁿe ra yā chi 'caandiveéⁿ yā yeⁿe nī, tuu'mi ní nan'dáa nī yeⁿe yáāⁿ miiⁿ. Ní n'dáadi nī yaācā yeⁿe ca'a nī. Chuū ní 'áámá señal chi 'cuuⁿmⁱ nī chi nguéeé n'daācā idiíⁿ yā ti contra yeⁿe nī. Cuaacu níⁿnyúⁿ ngaⁿ'á ngíí ndí's'tií, chi nguuvu yeⁿe juicio duu'vi cá castigo yeⁿe 'iiⁿyāⁿ yeⁿe yáāⁿ Sodoma ndúúcu 'iiⁿyāⁿ yeⁿe yáāⁿ Gomorra, chi ndíí cuaáⁿ vmnaaⁿ, ní nguéeé ti 'iiⁿyāⁿ yeⁿe yáāⁿ naachí nguéeé 'cuúⁿ yā ndí's'tií.

¹²Tuu'mi ní discípulos ican'dáa yā, chí caⁿa yā nduudu cuaacu yeⁿe Ndyuūs yeⁿe chí ndaacadáámí 'iiⁿyāⁿ yeⁿe nuuⁿndi yeⁿe yā. Ní chi n'daaⁿ yā chí cuuvi 'cuēetinée n'daāca yā. ¹³Tuucá ntúūⁿ discípulos divíí yā neenē n'deeē espíritus yeⁿe yáāⁿnguiniūⁿ yeⁿe 'iiⁿyāⁿ. Ní chí'ii yā aceite n'deeē n'dái 'iiⁿyāⁿ chi ngítā ní nduūva yeⁿe 'iiⁿyāⁿ.

Juan chí ngeēdinuūⁿnī ní chí'ii sa

(Mt. 14.1-12; Lc. 9.7-9)

¹⁴Rey Herodes ch'iindiveéⁿ ntúuⁿ yā chuū chí núuⁿmáⁿ íⁿyeēⁿdi miiⁿ ní ch'iindiveéⁿ yā chí diíⁿ Jesús miiⁿ. Rey Herodes míⁿ caⁿa yā: 'Āā nduūchi Juan chí ngeēdinuūⁿnīⁿ nguuaⁿ tináⁿ'ā, chíⁿ chí saⁿ'ā ní véé taavi poder yeⁿe sa.

¹⁵Naⁿ'a 'iiⁿyāⁿ ní ngaⁿ'a yā: Jesús miiⁿ ní Elías chí profeta ndíí vmnaaⁿ. Naⁿ'a 'iiⁿyāⁿ ní ngaⁿ'a yā: Jesús miiⁿ ní 'áámá profeta tan'dúúca profetas chí ch'ēetinée ndii cuaaⁿ vmnaaⁿ.

¹⁶Taachí Herodes miiⁿ ch'iindiveéⁿ yā chuū, tuu'mi ní caⁿa yā: Juan sáⁿ'a 'cūū, chí 'úú chí caⁿ'a ntiíⁿnyúⁿ chí chíicá yā daandu sá ní 'āā nduuchi sa yeⁿe nguuaⁿ tináⁿ'ā.

¹⁷Ti Herodes miiⁿ caⁿ'a ntiíⁿnyúⁿ yā soldados chí sta'a sa Juan ní chíicā chíichi sa ndúúcu cadenas ní chí'núuⁿ sa saⁿ'ā vácūū cáávā n'daataá Herodías. Táⁿ'ā miiⁿ chí chíi n'daataá yeⁿe Felipe cuaáⁿ vmnaaⁿ ní canée tá ndúúcu sa. Ní Felipe miiⁿ ní 'diinu Herodes.

¹⁸Juan miiⁿ ní caⁿ'a sa chíi sa Herodes miiⁿ: N'dii rey nguéeé canée chí cunee nī ndúúcu n'daataá yeⁿe 'diinu nī.

¹⁹N'daataá yeⁿe Herodes miiⁿ nguéeé canee yīinū tá ndúúcu chí caⁿ'a Juan miiⁿ. Ní neⁿe tá 'caaⁿ'nuⁿ tá Juan miiⁿ naati nguéeé ngii diíⁿ tá. ²⁰Herodes miiⁿ ní deenu yā chí Juan ní n'dai sa ní yeⁿe Ndyuūs saⁿ'ā miiⁿ. Ní rey miiⁿ 'va'a yā Juan miiⁿ. Chíⁿ chí nguéeé n'guuⁿ rey miiⁿ chí táⁿ'ā miiⁿ diíⁿ daño tá ndúúcu Juan. Ní rey miiⁿ s'neeⁿ veéⁿ yā n'daacā ní ch'iindiveéⁿ yā yeⁿe nduudu Juan 'áará chí nguéeé tuumicadiinúⁿ yā nducuéⁿ'ē chí ngaⁿ'a Juan miiⁿ. ²¹Naati n'daataá yeⁿe rey miiⁿ nguuvu tá Herodías ní ndaāca tá táācā chí diíⁿ tá. Herodes miiⁿ díⁿ yā 'áámá 'viicu nguuvu cumpleanos yeⁿe yā. Díⁿ yā 'áámá 'viicu yeⁿe chí ngeé yā chí cheé 'iiⁿyāⁿ chí ngaⁿ'a ntiíⁿnyuⁿ, ndúúcu

saⁿā s'eeⁿ chi 'neéⁿ vmnaaⁿ yeⁿe soldados, ndúúcu 'iiⁿyāⁿ yuudu yeⁿe yáⁿāa Galilea. ²²Ní taachí nge'e yā n'daatāa 'lííⁿ daiya táⁿā Herodías miiⁿ sndaā tá naachi nge'e yā. Ní nde'ei tá. Rey Herodes ndúúcu 'iiⁿyāⁿ chi snée yā ndúúcu sa chii yeenú yā chi nde'ei tá. Ní miiⁿ caⁿa yā chii yā n'daataa 'lííⁿ miiⁿ: Dii, n'daataa 'lííⁿ, caaca di 'úú chi neⁿe dí ní 'úú ní teé dii.

²³Ní caⁿa yā, “por Ndyuūs” chi ca'a yā n'daatāa 'lííⁿ miiⁿ 'āā de'é nūuⁿ chi neⁿe tá, 'áará chí ná maⁿa yeⁿe yáⁿāa chi ngaⁿa ntiⁿnyúⁿ yā. ²⁴N'daatāa 'lííⁿ mííⁿ ní can'daā tá ní caⁿa tá chii tá cheecu tá: Mamá, ¿de'é caacá? Ní cheecu tá ní caⁿa yā chii yā táā: Caaca di tííⁿ Juan chi cheedínuūⁿnīⁿ.

²⁵Maaⁿncheēté nūuⁿ sndaā ta'dííⁿ miiⁿ naachi canúúⁿ rey miiⁿ, ní caⁿā tá: Neⁿé chi maaⁿnguuví nūuⁿ teé ní 'úú cheeti 'áámá cu'u tííⁿ Juan chí cheedínuūⁿnīⁿ. ²⁶Tuu'mi ní rey miiⁿ ní s'neeⁿ ndaachi nuúⁿ yā naati cáávā chi caⁿa yā, “por Ndyuūs”, ni cáávā 'iiⁿyāⁿ chi snée yā ndúúcu rey miiⁿ, nguée chi diiⁿ nuuⁿ yā cheeⁿdiitú yā yeⁿe chi ngiica ta'dííⁿ miiⁿ. ²⁷Hora mííⁿ nūuⁿ caⁿa ntiⁿnyuⁿ rey miiⁿ 'áámá soldado chí cheⁿe sa 'caāca sa daandu Juan chí cheedínuūⁿnīⁿ ní nguāi sa tííⁿ yā. ²⁸Soldado miiⁿ ní cheⁿe sa ná vácūú ní chiica sa daaⁿdu Juan miiⁿ. Ní s'nūuⁿ sa tííⁿ Juan miiⁿ cheeti 'áámá cu'u. Ní ndee soldado miiⁿ ní ca'a sa ta'dííⁿ miiⁿ. Ní ta'dííⁿ miiⁿ ní ca'a tá cheecu tá.

²⁹Taachí discípulos yeⁿe Juan miiⁿ ch'iindiveéⁿ yā chuū, cheⁿé yā chi nguai yā cuerpo yeⁿe Juan miiⁿ. Ní candéé yā chí 'cuuchi yā.

Jesús ca'a yā chi che'e nyuⁿu miiⁿ 'iiⁿyāⁿ

(Mt. 14.13-21; Lc. 9.10-17; Jn. 6.1-14)

³⁰Cuayiivi miiⁿ ní apóstoles ní nduvidaamá yā ndúúcu Jesús miiⁿ ní caⁿa yā chii yā Jesús tanducuéⁿe chí diíⁿ yā, ndúúcu chí chí'cueeⁿ yā. ³¹Jesús caⁿa yā chii yā apóstoles: Cuchíí ní, ní caⁿa yú ntaavi'tuunúuⁿ yú na 'aama lugar chí 'aama lado yeⁿe yāāⁿ naachi nguée 'iiⁿyā. Ngaⁿa yā 'tíicā, caati n'dee n'dái 'iiⁿyāⁿ indaá yā nanááⁿ Jesús ndúúcu n'dee n'dái 'iiⁿyāⁿ chí inaⁿa, ndíí maaⁿ rá chí nge'e yā, nguée ngii. ³²Tuu'mi ní Jesús miiⁿ ndúúcu apóstoles yeⁿe yā cueⁿé yā dámaáⁿ yā na 'áámá barco na 'áámá lugar chí nguée snée 'iiⁿyāⁿ. ³³Naati nééné 'yaaⁿ 'iiⁿyāⁿ n'diichí yā Jesús ndúúcu apóstoles, ní déénu yā du'u yā ní taachí cueⁿe yā. Ní nducuéⁿe 'iiⁿyāⁿ yeⁿe yāāⁿ s'eeⁿ cueⁿe yā chiicá yā na yáⁿāa naachi ndaá Jesús ní vmnaaⁿ cá ndaa yā. Ní cuayiivi ndaa Jesús miiⁿ ndúúcu apóstoles yeⁿe yā. ³⁴Taachí Jesús nan'dáa yā na barco, n'diichí yā neené n'deeé 'iiⁿyāⁿ ní neené ya'ai 'iinú yā 'iiⁿyāⁿ s'eeⁿ, ti snée yā tan'dúúcā 'iiti cuūchí chí nguée du'ú chí idiíⁿ cuidado 'iiti, 'tíica yā. Ní Jesús tucá'a yā chí'cueeⁿ yā 'iiⁿyāⁿ s'eeⁿ n'dee n'dái dendu'ú. ³⁵Taachí chí chiinū, discípulos yeⁿe yā ní ndaá yā nanáaⁿ yā ní caⁿa yā: N'dii Jesús, 'āā chiinū ní mar 'áámá 'iiⁿyāⁿ nguē snée yā na yáⁿāa 'cūū. ³⁶Yaa'ví ní 'iiⁿyāⁿ, ní caⁿá yā yāāⁿ n'gaiyāā ndúúcu yaāⁿ n'geete chí snée na niiⁿnuúⁿ ní cuái yā pan, ti nguée ndée yā chí che'e yā.

³⁷Naati Jesús ní nan'gueécútaⁿa yā yeⁿe yā ní caⁿa yā: Ndí's'tiī, ca'á nī che'e yā. Discípulos ní caⁿa yā: ¿'Áá cuuvi diiⁿ nús'uu chi caⁿa 'nū cuái 'nū 'uuvi ciento caadi pan, ní ca'á 'nū che'e yā?

³⁸Jesús caⁿa yā chii yā discípulos: ¿'Áá n'dee panes yeⁿe ndí's'tiī vee? Cueⁿe nī n'diichi nī. Taachí 'āā n'diichí yā, tuu'mi ní yaa'ví yā: Véé nyuⁿu panes ndúúcu 'uuvi 'yaācā.

³⁹Tuu'mi ní caⁿa ntiīⁿnyuⁿ Jesús chí ch'eté 'iiⁿyāⁿ s'eeⁿ caadi cuááⁿ caadi cuááⁿ naachí vee yuuni cueēe. ⁴⁰Ní naachí ch'etee yā 'áámá ciento yā ní naachi ch'éētē tá 'uūví ngeecu ndiichí yā. ⁴¹Tuu'mi ní Jesús miiⁿ ní sta'á yā ndu'ū nyuⁿu panes miiⁿ ndúúcu 'uuvi 'yaācā. Ní ch'εnaaⁿ yā nanguuvi ní ca'a yā gracias Ndyuūs cáāvā pan miiⁿ ndúúcu 'yaācā. Ní ch'iinu ní n'dee yā panes miiⁿ ní nca'a yā discípulos yeⁿe yā chi ca'a yā che'e 'iiⁿyāⁿ s'eeⁿ. Discípulos ca'a yā nducyaaca 'iiⁿyāⁿ s'eeⁿ 'yaācā miiⁿ ndúúcu pan miiⁿ. ⁴²Nducyáácá yā che'e yā ní chiitu 'iiⁿyāⁿ. ⁴³Ní nanngaáⁿ yā chí ningaavā miiⁿ ní chiitu ndiichúví 'cueētē ndúúcu chí ningaāva miiⁿ yeⁿe pan ndúúcu 'yaācā miiⁿ. ⁴⁴Nducyaaca saⁿā chí che'e sa panes miiⁿ ní ngii nyuⁿu mil sa.

Jesús ngíica yā vmnááⁿ nuūⁿnīⁿyáⁿā

(Mt. 14.22-27; Jn. 6.16-21)

⁴⁵Tuu'mi ní caⁿa Jesús chii yā discípulos yeⁿe yā chí cundaa yā na barco miiⁿ ní ndaá yā táámá lado yeⁿe nuūⁿnīⁿyáⁿā miiⁿ vmnaaⁿ yēⁿe yā chí caⁿa yā na yáāⁿ Betsaida, nuuⁿmaⁿ neⁿe chi Jesús dííⁿ yā despedir 'iiⁿyāⁿ s'eeⁿ.

⁴⁶Taachí Jesús dííⁿ yā despedir yeⁿe 'iiⁿyāⁿ s'eeⁿ, cueⁿé yā na yiicū miiⁿ chí caaⁿmaⁿngua'á yā.

⁴⁷Taachí chii 'da'a miiⁿ, barco miiⁿ ndúúcu discípulos 'āā cachíicá vmnaaⁿ yeⁿe nuūⁿnīⁿyáⁿā miiⁿ ní náávtaⁿa nuūⁿnīⁿyáⁿā miiⁿ canéé. Ní 'āā dámaāⁿ Jesús miiⁿ canee yā na yáⁿāa miiⁿ. ⁴⁸Ní Jesús n'diichí yā chí discípulos ní ch'eenu yā chii chí dííⁿ yā chí chiica barco miiⁿ ti 'yúúné miiⁿ ní contra yeⁿe naachí cachiica barco miiⁿ. Na nguētiyaaⁿ 'da'a ca, Jesús ndaa yā nanááⁿ discípulos, ní ngiicá yā vmnaaⁿ nuūⁿnīⁿ miiⁿ. Ní neⁿé yā cho'o daamá yā. ⁴⁹Taachí discípulos yeⁿe yā n'diichí yā Jesús chí ngiica yā cuaaⁿ vmnaaⁿ nuūⁿnīⁿ miiⁿ, discípulos nadacádíínuuⁿ yā chí 'áámá bulto ch'etee ní 'cai yiicu yā. ⁵⁰Ti nducyáácá discípulos n'diichí yā Jesús, ní dii'yá yā chí. Naati Jesús ní yaa'ví yā 'iiⁿyāⁿ s'eeⁿ ní caⁿa yā: Ndí's'tiī saⁿā, nguéé 'va'á nī ti 'úú.

⁵¹Ní Jesús miiⁿ cuchée yā na barco miiⁿ naachi snúuⁿ discípulos. Ní canéé 'diííⁿ 'yúúné. Ní discípulos nadicádíínuuⁿ yā. De'e chúúca ch'etee Ndyuūs. Ní che'e yiínú yā. ⁵²Vaanicadíínnūⁿ yeⁿe discípulos ní cheechí caati nguéé tuumicádíínuuⁿ yā vaadi n'giinu yeⁿe panes miiⁿ.

Jesús dííⁿ yā chí nduūvā yeⁿe 'iiⁿyāⁿ chí ngítá na yáⁿā Genesaret

(Mt. 14.34-36)

⁵³Cho'ó barco miiⁿ ndúúcu yā táámá lado yeⁿe nuūⁿnīⁿyáⁿā miiⁿ ní ndaá yā ná yáⁿāa Genesaret, naachí cachiichí yā barco miiⁿ cuaaⁿ 'diitúú nuūⁿnīⁿyáⁿā. ⁵⁴Ní

taachi nacan'daa yā na barco miiⁿ, 'iiⁿyāⁿ s'eeⁿ chí 'āā ndaá yā miiⁿ ní ntiinaáⁿ yā Jesús miiⁿ. ⁵⁵Ní 'iiⁿyāⁿ s'eeⁿ caⁿá yā chíi yā 'iiⁿyāⁿ yeⁿe núúⁿmáⁿ cuaaⁿ na yáāⁿ n'gaiyáá chí snéé niⁿnuúⁿ chí Jesús canéé yā. Ní 'iiⁿyāⁿ s'eeⁿ chinguai yā 'iiⁿyāⁿ chí ngítā. Ní tuca'a yā ndaa yā ndúúcu 'iiⁿyāⁿ chí ngítā na cama yeⁿé yā ní candee yā 'iiⁿyāⁿ nanááⁿ Jesús miiⁿ. ⁵⁶Ní 'āā de'é nūuⁿ lugar naachi cueⁿe Jesús miiⁿ, nduuti chí na yáāⁿ n'gaiyáā, o na yáāⁿ n'geete, o na campo, 'iiⁿyāⁿ ní íneeⁿ yā 'iiⁿyāⁿ chí ngítā cuaaⁿ cyúúni. Ní di'cuítu yā Jesús chí ca'á yā lugar 'iiⁿyāⁿ chí ngítā chí cuuvi tuu'ví yā maaⁿ rá naachí ndeetií yeⁿé catecai Jesús. Ní nducyaaca 'iiⁿyāⁿ chí tuu'ví yā tiinūⁿ yeⁿe yā, nduūvā yeⁿe yā.

Chíⁿ chí diiⁿ chí ngii nuuⁿndi 'iiⁿyāⁿ

(Mt. 15.1-20)

7 Tuu'mi ní 'iiⁿyāⁿ fariseos ndúúcu n'duuvi maestros yeⁿe ley n'daa yā na yáāⁿ Jerusalén, ní ndaa yā nanááⁿ Jesús. ²'Iiⁿyāⁿ s'eeⁿ ní n'diichi yā chí discípulos yeⁿe Jesús miiⁿ ngé'e yā ndúúcu ta'a yā chí vaatí, ní vee nuuⁿndi yeⁿe yā ti nguéé inaaⁿnu yā ta'a yā taachí āā cuéé che'e yā tan'duucā chí ngaⁿa ley yeⁿé yā. ³Chúu chíi caati 'iiⁿyāⁿ fariseos ndúúcu nducyáácá 'iiⁿyāⁿ Israel candí yā costumbres yeⁿé 'iiⁿyāⁿ ndiicúu s'eeⁿ chí nguéé che'e yā ndúúti chí nguéé n'deée cuuvi nnaaⁿnú yā ta'a yā. ⁴Taachí indaa yā niivēē, nguéé che'e yā nduuti chí nguéé nnaaⁿnu yā ta'a yā n'deée cuuvi. Véé cá costumbres chí 'iiⁿyāⁿ s'eeⁿ icandiica yā, chí nnaaⁿnu yā vasos chí n'geē chí ngi'i yā, ndúúcu

jarros, ndúúcu taza yeⁿe cūū, ndúúcu mesas. ⁵Tuu'mi ní 'iiⁿyāⁿ fariseos ndúúcu maestros yeⁿe ley miiⁿ itinguunéeⁿ yā Jesús: ¿De'é cúúví chí nguéé candí discípulos yeⁿe ní costumbres yeⁿe 'iiⁿyāⁿ ndiicúu s'eeⁿ? Nge'é yā ndúúcu ta'a yā chí vaatí.

⁶Jesús nan'guεεcútaⁿa yā: N'dáacā caⁿa profeta Isaías miiⁿ ndii cuááⁿ vmnaaⁿ yeⁿe ndís'tií chí 'uūvi naaⁿ 'uūvi cheendí ní. Chuū caⁿa yā taachí dingúuⁿ yā 'túúca:

'Iiⁿyāⁿ s'uúⁿ ní dich'eté yā 'úú ndúúcu cheendi yā, naati staava yeⁿe yā yaⁿāi canee yeⁿe 'úú.

⁷Nguéé de'é vee dichí'vē chí diiⁿ yā chí dich'eté yā 'úú, ti chííⁿ chí ngi'cueeⁿ yā ní ley yeⁿe saⁿā yeⁿe iⁿ'yeeⁿdí cūū.

⁸Naati ndís'tií ní chí'néeⁿ ní leyes yeⁿe Ndyuūs ní candí ní costumbres yeⁿe saⁿā yeⁿe iⁿ'yeeⁿdí cūū. Chííⁿ chí neené n'deée cuuvi nnaaⁿnu yā jarros ndúúcu vasos naachi ngi'i nuúⁿ yā, ndúúcu chí diíⁿ yā ndúúcu neené n'deée cá dendu'ū. Tanducuéⁿē chuū ní nguéé dichí'vē.

⁹Tíicā caⁿa Jesús chíi yā 'iiⁿyāⁿ s'eeⁿ: Nds'tií ní cándii ní costumbres maáⁿ ní ní cáávā chuū i'neéⁿ ní 'áámá lado ley yeⁿé Ndyuūs. ¹⁰Moisés caⁿa yā ley 'cūū: Dííⁿ ní honrar chiidá ní ndúúcu cheécú ní ní 'iiⁿyāⁿ chí nguéé n'dáacā ngaⁿa yā yeⁿe chiidá yā o yeⁿé cheécú yā canéé chí 'cuūvi yā. ¹¹Naati ndís'tií ní ngaⁿa ní chí nga'a ní permiso 'aama saⁿā chí caaⁿmaⁿ sá cuuvi sa chiida sa o cheecu sa, 'tíicā: 'Úú ní nguéé cuuvi neé n'dií, caati nducuéⁿē chí

yeⁿé ní Corbán. (Nduudu Corbán miiⁿ ní neⁿe caaⁿmaⁿ chi ca'á yā Ndyuūs.) ¹²Ndúúti chi saⁿā ngaⁿa sa 'túúcā, tuu'mi ní ndís'tiī ngaⁿa nī chi 'āā ntéé nga'a nī lugar chi cunnee sá chiida sá ndúúcu chεεcu sá. ¹³Ndís'tiī ní diíⁿ nī chi 'āā ntéé dichíí'vē Nduudu yeⁿé Ndyuūs cáávā costumbre chi ngo'ó yeⁿē 'áámá nī taama nī. Nééné n'deēe dendú'u diíⁿ nī tan'dúúcā chuū.

¹⁴Caⁿa ntúūⁿ Jesús chii yā 'iiⁿyāⁿ taama vmnéⁿēē ní caⁿa yā: Cu'neeⁿ veeⁿ nducyaaca nī yeⁿé, ní tuumicadiinuuⁿ nī. ¹⁵Mar 'áámá dendu'u chi nge'e saⁿā chi 'āā cuéé che'e sa cuuví diiíⁿ chi 'āā ntéé dεεve sa. Chííⁿ chi nadicádíínuuⁿ saⁿa na staava yeⁿē sa ní ican'dāā na staava yeⁿē sa chííⁿ idiííⁿ chi 'āā ntéé dεεve sa. ¹⁶Ndís'tiī chi véé veéⁿ nī, 'caandiveéⁿ nī.

¹⁷Taachí Jesús s'neeⁿ yā 'iiⁿyāⁿ miiⁿ ní sndaa yā va'ai yeⁿé discípulos yeⁿe yā, discípulos yeⁿé yā ní itiinguuneeⁿ yā: ¿Dε'ε néⁿé caaⁿmaⁿ ejemplo 'cūū?

¹⁸Ní caⁿa Jesús chii yā discípulos: ¿Áá 'tiicá ntuūⁿ ndís'tiī nguéé ituumicadíínuuⁿ nī? ¿Áá nguéé deenu nī chi tanducuéⁿē chi nge'e saⁿā ní cungéé cuaaⁿ chuva'āi ní nguéé cuuví diiíⁿ chí saⁿā miiⁿ ní vaati sa, ¹⁹ti nguéé indaā na staava yeⁿē sa naati na cheētī sa? Ní cuayiivi míⁿ nan'dāā na cuerpo yeⁿē sa. 'Tíicā ní nducuéⁿē chi ngé'é saⁿā ní dεεve. Ní nguéé diiíⁿ chi dinuuⁿndí yā. ²⁰Ní caⁿa Jesús: Chííⁿ chí can'dāā na staava yeⁿē sa chííⁿ chi diiíⁿ chi véé nuuⁿndi yeⁿē sa. ²¹Ti chiiⁿ cuaaⁿ cheētī sáⁿā chí neⁿe caaⁿmaⁿ chi yeⁿē na staava yeⁿē

sa, ican'dāā yeⁿē vaanicadíínuuⁿ yeⁿe sa chi nguéé n'daācā. Nadacadíínuuⁿ yā yeⁿe chi caⁿa sa ndúúcu 'aama n'daataá o isáⁿā chi nguéé yeⁿe yā, ndúúcu yeⁿe chi n'diichí yā 'áámá saⁿā o n'daataá ní duuchinééⁿ vi'í yā, ní ndúúcu chi 'caaⁿnúⁿ yā 'iiⁿyāⁿ, ²²ndúúcu yeⁿē chi ididuucú yā, ndúúcu yeⁿe chi neⁿe yā cosas chi véé yeⁿē taama yā, ndúúcu yeⁿē dendú'u chi yeⁿe yáá'n'guiinūuⁿ, ndúúcu yeⁿe chi nginnche'éf yā 'iiⁿyāⁿ, ndúúcu vicios, ndúúcu n'daataá chi caⁿā tá ndúúcu n'daataá chi duuchinee tá vi'í, ndúúcu yeⁿē sáⁿā chi caⁿa sa ndúúcu saⁿā chi duuchinee sa vi'í, ndúúcu yeⁿē chi n'diichí yā cosas chi nguéé n'daācā, ndúúcu yeⁿē chi caaⁿmaⁿ taáⁿ yā contra yeⁿe Ndyuūs, ndúúcu yeⁿe chi dich'εεtē maáⁿ yā 'iiⁿyāⁿ, ndúúcu nduudu chi nadicádíínuuⁿ yā tan'duucā chi loco yā. ²³Tanducuéⁿē dendú'u 'cūū chi nguéé n'daācā ican'dāā yeⁿē na staava yeⁿé yā. Chííⁿ chi diiíⁿ chi véé nuuⁿndi yeⁿé yā.

'Áámá n'daataá chi nguéé n'daataá

Israel tá chi i'teenu tá Jesús

(Mt. 15.21-28)

²⁴Nan'dāā Jesús miiⁿ ní cunaⁿa yā na yáⁿāa Tiro ndúúcu Sidón. Ní chindāā yā na 'áámá va'ai. Ní nguéé neⁿé yā chi 'iiⁿyāⁿ s'eeⁿ cadíínuuⁿ yā naachi cánéé yā naati nguéé chii canúúⁿ n'de'ei yā. ²⁵Maaⁿncheētē tuumicadiinuuⁿ 'áámá n'daataá chi véé 'áámá n'daataá 'lííⁿ daiya tá chi cánéé ndúúcu espíritu yeⁿe yáá'n'guiinūuⁿ. N'daata miiⁿ ní ndāā tá ní chiintii'yā tá ná ca'a Jesús miiⁿ. ²⁶N'daata mííⁿ ní nguéé yeⁿē

ndaata ye^{ne} 'iiⁿyāⁿ Israel naati ye^{ne} ndaataá ye^{ne} 'iiⁿyāⁿ ye^{ne} yáⁿāa Sirofenicia. Ndaā tá ní chiiica tá Jesús miiⁿ chí tun'dáa yā espíritu ye^{ne} yááⁿ'nguiinūⁿ ye^{ne} 'ē n'daataá 'lííⁿ daiya tá. ²⁷Naati Jesús miiⁿ ní caⁿ'a yā chii yā n'daataá miiⁿ: Ca'a di lugar chi che'e daiyá 'iiⁿyāⁿ Israel vmnááⁿ vmnaaⁿ ti nguéeⁿ cánéeⁿ chí divií pan ye^{ne} daiyá 'nū ní ca'á 'nū chi che'e 'yaānā.

²⁸Táⁿā miiⁿ ní nan'guεεcútaⁿā tá: 'Tíicā, Señor, naati 'yaānā chi snée tī maaⁿ mesa miiⁿ nge'é tī cheeyéi pan chi ngéeⁿ ye^{ne} 'ē da'caiyāā.

²⁹Tuu'mi ní Jesús miiⁿ ní caⁿ'a yā chii yā táⁿā: Dii n'daataá n'daācā ngaⁿ'a di. 'Āā cuuví naⁿ'a di. Espíritu ye^{ne} yááⁿ'nguiinūⁿ 'āā nan'dáā ye^{ne} 'ē daiya di.

³⁰Taachí ndaā tá na vaacu tá, n'daataá 'lííⁿ miiⁿ ye^{ne} 'ē tá canee tá na cama ní candiiti tá. Ní espíritu ye^{ne} yááⁿ'nguiinūⁿ ní 'āā nan'dáā ye^{ne} 'ē n'daata 'lííⁿ miiⁿ.

Jesús dííⁿ yā chi nduūvā ye^{ne} 'áámá sáⁿā chi nguéeⁿ ngaⁿ'a sa ndíí nguéeⁿ ndúú n'giindiveeⁿ rá sá

³¹Jesús nan'daa ntuuⁿ yā ye^{ne} yáⁿāa Tiro ndúú^{cū} yāⁿāa Sidón ndúú^{cū} na yāāⁿ s'eeⁿ ye^{ne} yāⁿāa Decápolis. Ní ndaa yā na yáⁿāa chí 'díítuu nuūⁿniⁿ'yáⁿā Galilea. ³²Miiⁿ ní ndaa 'iiⁿyāⁿ ndúú^{cū} 'áámá saⁿā chí cheetúú chí nguéeⁿ ngii ngaⁿ'ā sa n'dáacā. Ní chiiicá sá Jesús chí cun'duú yā ta'a yā vmnaaⁿ ye^{ne} 'ē sa.

³³Jesús candée yā saⁿā miiⁿ 'áámá lado naachi 'āā ntéeⁿ snée 'iiⁿyāⁿ ní tingúúⁿ ndutá'a yā na veeⁿ sá ní chiidaiⁿ yā ní s'neeⁿ nduta'á yā na ch'iia sa. ³⁴Ní ch'íinu yā nanguuvi,

ní ndaa niiⁿnúⁿ yā ní caⁿ'a yā: Efata, chí ne^{ne} caaⁿ'maⁿ na nduudu ye^{ne}'é, n'guaaⁿ di.

³⁵Ndúú^{cū} chuū ní n'guaaⁿ veeⁿ sá ndúú^{cū} ch'iia sa ní nduūvā ye^{ne}'ē sa. Ní 'āā chí caⁿ'a n'dáacā sā. ³⁶Jesús ní caⁿ'a yā chí yā 'iiⁿyāⁿ s'eeⁿ chí nguéeⁿ cuuvi yā mar 'áámá 'iiⁿyāⁿ. 'Áará chí neenē ca'a cuidado yā 'iiⁿyāⁿ s'eeⁿ chí nguéeⁿ cuuvi yā 'iiⁿyāⁿ, 'iiⁿyāⁿ s'eeⁿ ní caⁿ'a yā chí yā n'dee n'dái 'iiⁿyāⁿ. ³⁷Ní 'iiⁿyāⁿ s'eeⁿ ní neene che^{ne}'e yiinú yā, ní caⁿ'a yā: 'Íiⁿyāⁿ miiⁿ ní tanducue^{ne}'ē idin'daacá yā, ndíí 'iiⁿyāⁿ chí cheetúú ní idííⁿ yā chí n'giindiveeⁿ yā. Ní 'iiⁿyāⁿ chí nguéeⁿ ngaⁿ'á yā ní dííⁿ yā chí ngíí ngaⁿ'a yā.

Jesús ca'á yā che'e cuūⁿ mil 'iiⁿyāⁿ
(Mt. 15.32-39)

8 Tiempo 'cūū neenē 'yááⁿ 'iiⁿyāⁿ nduuvidaama yā ndúú^{cū} Jesús. Nguéeⁿ de'ē chí ca'á yā chí che'e 'iiⁿyāⁿ s'uuⁿ. Tuu'mi Jesús 'caí yā discípulos ye^{ne} yā, ní caⁿ'á yā chí yā discípulos: ²'Úú ní ya'ái cáávā 'iiⁿyāⁿ s'tíí, tí 'āā 'iinu nguūvi snée yā nduucú na lugar 'cūū ní nguéeⁿ de'ē vee chí che'é yā. ³Ndúú^{tí} chí nadicho'ó 'iiⁿyāⁿ na vaacu yā ní nguéeⁿ che'é yā, 'áátíi cuuvi cúúnú yā cuaaⁿ cyúúnú chí naⁿ'a yā tí náⁿ'a yā ní yaⁿ'āi ndiicá yā.

⁴Discípulos ní nan'guεεcútaⁿ'a yā: ¿Taaca ca'á ní chí ch'éⁿ 'iiⁿyāⁿ na lugar naachi nguéeⁿ ch'εetinéeⁿ 'iiⁿyāⁿ?

⁵Jesús miiⁿ ntiinguuneeⁿ yā discípulos: ¿Áá n'dee cá panes ye^{ne}'é ní véé? Discípulos ní caⁿ'a yā: Tá nde'echē vee.

⁶Tuu'mi ní chí Jesús 'iiⁿyāⁿ s'eeⁿ chí 'cueteté yā na yáⁿāa miiⁿ. Ní

Jesús sta'á yā ndeēchē panes miiⁿ. Ca'á yā gracias Ndyuūs cáávā panes miiⁿ. Ní n'dee yā panes miiⁿ ní ca'á yā discípulos yeⁿé yā. Ní discípulos ca'á yā che'e 'iiⁿyāⁿ s'uuⁿ. ⁷Véé ntúūⁿ n'duuvi 'yaācā. Jesús sta'á yā 'yaācā ní ca'á yā gracias Ndyuūs cáávā 'yaācā ní ca'á yā discípulos chi ca'á ntúūⁿ yā 'yaācā 'iiⁿyāⁿ s'uuⁿ. ⁸Nducyaaca 'iiⁿyāⁿ che'e yā ní chiitu 'iiⁿyāⁿ. Ní nin'guaáⁿ yā tá ndeēchē 'cueētēe chí nángaava. ⁹'Iiⁿyāⁿ chi che'e yā ní ngii yā tan'dúú cuūⁿ mil 'iiⁿyāⁿ. Tuu'mi ní Jesús miiⁿ ní dííⁿ yā despedir yeⁿé 'iiⁿyāⁿ s'uuⁿ. ¹⁰Ní Jesús ndaa yā na 'aama barco ndúúcu discípulos yeⁿe yā ní cueⁿé yā na yáⁿāa chi nguuvi Dalmanuta.

'Iiⁿyāⁿ fariseos chiica yā Jesús chi ch'iⁿi yā 'aama vaadí n'giinu

(Mt. 16.1-4; Lc. 12.54-56)

¹¹Tuu'mi ní ndaā 'iiⁿyāⁿ fariseos ní tucá'a yā caⁿ'a yā n'dee n'dái ndúúcu Jesús. Neⁿé yā n'diichi yā táacā caaⁿ'maⁿ Jesús. Chiica yā Jesús 'áámá vaadí n'giinu yeⁿé na va'ai cheeti nguuvi. ¹²Jesús nandaa yiinu yā tí ndaachí 'iinu yā na staava yeⁿé yā, ní caⁿ'a yā: ¿De'ē cúuví chí ngiica 'iiⁿyāⁿ s'uuⁿ 'áámá señal yeⁿé vaadí n'giinu? Úú ngaⁿ'á cuaacu chi nguéé ca'á mar 'áámá señal 'iiⁿyāⁿ s'uuⁿ.

¹³Cuayiivi chi caⁿ'a yā chii yā 'iiⁿyāⁿ s'uuⁿ chuū, Jesús nanguεεcunée yā sndaa yā na barco miiⁿ. Ní cueⁿe yā taama lado nuūⁿníⁿyáⁿā miiⁿ.

Levadura yeⁿe 'iiⁿyāⁿ fariseos

(Mt. 16.5-12)

¹⁴Discípulos chinaáⁿ yā chi candεε yā chi che'e yā, naati ndéε

yā 'aama n'dyáⁿā pan ndúúcu 'iiⁿyāⁿ s'eeⁿ na barco miiⁿ. ¹⁵Tuu'mi ní Jesús caⁿ'á yā chii yā discípulos: Cuin'diichí ní, cundéε ní cuidado yeⁿe levadura yeⁿe 'iiⁿyāⁿ fariseos ndúúcu levadura yeⁿe rey Herodes. Levadura miiⁿ ní chííⁿ chí dííⁿ yā chi nguéé n'daācā.

¹⁶Discípulos ní tucá'a yā caⁿ'a yā nguuaⁿ maáⁿ yā: ¿Áa chí nguεε ndéε yú pan chiiⁿ chí 'tiicā ngaⁿ'a yā?

¹⁷Jesús miiⁿ ní déénu yā chí ngaⁿ'ā discípulos nguuaⁿ maáⁿ yā ní caⁿ'a yā: ¿De'ē cúuví chí ngaⁿ'a ní chí cáávā chí nguéé ndéε ní pan? ¿Áa cuéé tuumicadiinúúⁿ ní? ¿Áa cuéé i'téénu ní na staava yeⁿe ní?

¹⁸¿Áa nguéé inaaⁿ ndís'tii ndúúcu nduutináaⁿ ní, ndíí nguéé ndúú n'giindiveeⁿ rá ní ndúúcu veéⁿ ní? ¿Áa nguéé inan'gaacú ní? ¹⁹Taachí n'deé ndu'u nyuⁿ'u panes miiⁿ chí che'e nyuⁿ'u mil 'iiⁿyāⁿ, ¿áa n'deéε 'cuéētēε ca pan nángaáva? ¿Áa nin'guaáⁿ ní? 'Iiⁿyāⁿ s'eeⁿ ní caⁿ'a yā: Ta ndiichuuví.

²⁰Ní caⁿ'a Jesús: Taachí ca'á ndeēchē panes miiⁿ che'e cuūⁿ mil 'iiⁿyāⁿ, ¿áa n'deéε 'cueētēε ca nin'guaáⁿ ní? Discípulos ní caⁿ'á yā: Tá ndeēchē.

²¹Tuu'mi ní Jesús caⁿ'a yā: ¿Áa cuéé tuumicadiinúúⁿ ní?

Jesús dííⁿ yā chi nduūvā yeⁿe 'áámá 'iiⁿyāⁿ chi nguenaáⁿ na yááⁿ Betsaida

²²Cuayiivi miiⁿ mí ndaā Jesús ndúúcu discípulos yeⁿe yā na yááⁿ Betsaida. Náⁿ'ā 'iiⁿyāⁿ ní ndéε yā 'áámá chí nguenaáⁿ nanááⁿ Jesús ní ngiicá yā Jesús chí tuu'vi yā 'iiⁿyāⁿ chí nguenaáⁿ. ²³Jesús

sta'á yā ta'ā chi ngueenááⁿ ní tun'dáa yā 'iiⁿyāⁿ 'áámá lado yeⁿe yáāⁿ lííⁿ miiⁿ. S'neeⁿ yā nuuⁿnīⁿ daiⁿ yā na nduutinááⁿ sa ní snduu tá'a yā vmnaaⁿ yeⁿe saⁿāⁿ miiⁿ ní itiinguunéeⁿ yā saⁿāⁿ ndúúti chi 'āā inaaⁿ sa 'tεε. ²⁴Chi ngueenááⁿ miiⁿ ní ch'liinu sa, ní caⁿā sa: Inaaⁿ 'áámá saⁿā tan'dúúca chi 'áámá yáⁿā 'tíicā saⁿā, naati ngiicá sá.

²⁵Tuu'mi ní Jesús miiⁿ ní sn'duu ntúuⁿ yā ta'a yā na nduutinááⁿ saⁿā miiⁿ. Saⁿā miiⁿ ní ch'líinu n'daācā sa ní nduuví n'dai nduutinááⁿ sa. 'Āā tanducuéⁿē inaaⁿ n'dáacā sa. ²⁶Tuu'mi ní Jesús miiⁿ dichó'o yā saⁿā chí cuinaⁿa sa na vaacu sa. Ní caⁿa yā: Díí, nguée cundaā di núúⁿmáⁿ na yáāⁿ miiⁿ ní cuuvi di chuū mar 'áámá 'iiⁿyāⁿ.

Pedro ní caⁿā cuaacu sá chí Jesús chí Cristo yā

(Mt. 16.13-20; Lc. 9.18-21)

²⁷Cuayiivi miiⁿ Jesús ndúúcu discípulos yeⁿé yā cheⁿé yā na yáāⁿ s'eeⁿ yeⁿe yāⁿāa Cesarea ndúúcu yáāⁿ s'eeⁿ yeⁿe yāⁿāa Filipo. Taachí snúuⁿ yā yúúni ntiinguuneeⁿ Jesús miiⁿ discípulos yeⁿe yā, ní caⁿa yā: ¿Du'ū 'úú ngaⁿa 'iiⁿyāⁿ?

²⁸Discípulos nan'guεεcútaⁿa yā: Náⁿā 'iiⁿyāⁿ ní ngaⁿa yā chí díí chí Juan chí cheedínuuⁿnīⁿ díí. Náⁿa yā ní ngaⁿa yā chí díí chí profeta Elías díí. Náⁿa yā ní ngaⁿa yā chí díí chí 'áámá profeta díí.

²⁹Tuu'mi ní Jesús ntiinguunéeⁿ yā discípulos: ¿Du'ū 'úú ngaⁿá ndís'tíi?

Tuu'mi ní Pedro miiⁿ ní caⁿā sa: N'díi chí Cristo chí yeⁿe Ndyuūs.

³⁰Jesús ní caⁿa yā chí nguée cuuvi yā mar 'áámá 'iiⁿyāⁿ chuū.

Jesús ngaⁿa yā yeⁿe vaadi n'gii yeⁿe maáⁿ yā

(Mt. 16.21-28; Lc. 9.22-27)

³¹Tuu'mi ní Jesús tuca'á yā chí'cueeⁿ yā yeⁿē Saⁿā chí Daiya Dendyuūs. Ní neené 'cueenu sa cuuvi. 'Iiⁿyāⁿ chiidúú n'geeté ndúúcu 'iiⁿyāⁿ ndiicúú chí ngaⁿā ntiiⁿnyuⁿ yeⁿē yáacu miiⁿ ndúúcu maestros yeⁿe ley, 'āā ntéé neⁿe yā saⁿā. Ní caⁿa yā chíi yā 'iiⁿyāⁿ s'eeⁿ chí 'caaⁿnúⁿ yā saⁿā, naati saⁿā miiⁿ ní cheeti 'iínú nguuvi nduuchi sa yeⁿe nguaaⁿ tináⁿā. ³²'Úú ní ngaⁿá cuaācú chuū. Tuu'mi ní Pedro miiⁿ ní cueⁿe sa ndúúcu Jesús 'áámá lado ní tucá'a sa yaa'vi neeⁿ sa Jesús. ³³Naati Jesús nan'guεεcundií yā ní n'diichí yā discípulos ní yaa'vi neeⁿ yā Pedro ní caⁿa yā: Díí, Pedro, tan'dúúca yááⁿn'guiinūuⁿ, 'tíicā dii. Cuvíi di yeⁿē 'úú, ti dii ní nguée nadicádíinuuⁿ di tan'dúúca Ndyuūs nadicádíinuuⁿ yā, ti nadicádíinuuⁿ di yeⁿe dendu'ū yeⁿe iⁿ'yeeⁿdí'cūú.

³⁴Tuu'mi ní Jesús yaa'vi yā discípulos yeⁿe yā ndúúcu tanáⁿā 'iiⁿyāⁿ, ní caⁿa yā chíi yā 'iiⁿyāⁿ s'uuⁿ: Ndúúti chí 'áámá 'iiⁿyāⁿ neⁿe yā caⁿa yā nducú, cané chí cu'néⁿ maáⁿ yā tanducuéⁿe dendu'ū chí véé yeⁿe yā ní cuta'á yā cruz yeⁿé yā chí tan'dúúca chí 'cueenu taaví yā cuuvi cucáāvā 'úú 'iicu caⁿá yā nducú. ³⁵Tí nducyáácá 'iiⁿyāⁿ chí neⁿe yā nadanguáⁿāi yā vida yeⁿe maáⁿ yā na iⁿ'yeeⁿdí'cūú ní dindaí taama vida yeⁿé yā nanááⁿ Ndyuūs. Ní nducyáácá 'iiⁿyāⁿ chí dindaí yā vida yeⁿe yā cucáāvā 'úú ní cucáāvā nduudu cuaacu chí nguaⁿai 'iiⁿyāⁿ,

tuu'mi ní nandaacá yā vida yeⁿe
yā nanááⁿ Ndyuūs. ³⁶¿De'ē dichíí'vē
yeⁿe saⁿā ndúúti chí diiⁿ sa ganar
nducuéⁿē chí véé iⁿ'yeeⁿdí' cūū
ní dindaí sa alma yeⁿē sa? ³⁷¿Áá
n'deēē cuuvi nadíí'vē sa 'áámá 'iiⁿ'yāⁿ
cucáávā alma yeⁿē sa? ³⁸Nduuti chí
'áámá 'iiⁿ'yāⁿ cuuvi 'cuináaⁿ yā yeⁿe
'úú ndúúcu nduudu yeⁿé nanááⁿ
'iiⁿ'yāⁿ chí véé nuuⁿndi yeⁿe yā, ní
nguéeⁿ n'daācā idiíⁿ yā, 'tiicá ntúūⁿ
'úú chí Saⁿ'a chí Daiyá Ndyuūs,
cuuví 'cuináaⁿ yeⁿe yā taachi ndaa
ndúúcu dēēve ch'ēēte n'dai yeⁿē
Chiidá ndúúcu ángeles chí dēēve yā.

9 Jesús ní caⁿ'a yā chíi yā 'iiⁿ'yāⁿ
s'eeⁿ: Cuaacu níⁿ'nyúⁿ ngaⁿ'á,
chí véé ná'a nī chí snée nī 'muuⁿ chí
nguéeⁿ 'cuuví nī taanduvéeⁿ ndii snaaⁿ
nī naachí Ndyuūs ngaⁿ'a ntiⁿ'nyúⁿ
yā yeⁿē chí ndaa yā ndúúcu poder
yeⁿé yā.

Jesús n'daaⁿ yā cuerpo yeⁿe maáⁿ yā

(Mt. 17:1-13; Lc. 9:28-36)

²Cho'ó jaāⁿ nguuvi, ní Jesús
candéē yā Pedro, ndúúcu Jacobo,
ndúúcu Juan. Ní cheⁿe yā ndúúcu
'iiⁿ'yāⁿ s'eeⁿ na 'áámá yiicū yaacu. Ní
miiⁿ ní Jesús n'daaⁿ yā cuerpo yeⁿe
yā nanááⁿ 'iiⁿ'yāⁿ s'eeⁿ. ³Catecai
yā nguēecundāā ngii n'gai ní cuéē
tan'dúúcā nieve. Mar 'áámá 'iiⁿ'yāⁿ
yeⁿe iⁿ'yeeⁿdí' cūū nguéeⁿ cuuvi
naáⁿ'nú yā 'áámá tīnūūⁿ táátii cuéē.
⁴Ní che'enaāⁿ sáⁿ'ā profeta Elías
ndúúcu Moisés, 'iiⁿ'yāⁿ s'eeⁿ chí
ch'ii ndíí cuááⁿ vmnaaⁿ. Ní ndeé
yā ndúúcu Jesús. ⁵Tuu'mi ní Pedro
miiⁿ ní caⁿ'a sá chíi sá Jesús: N'díí
Maestro, de'ē chúúcā n'daācā yeⁿe
yú chí 'cuēetinée yú 'muuⁿ. Din'dái
n'ū iinū va'ai lííⁿ: 'Áámá yeⁿé nī,

táámá yeⁿe Moisés, táámá yeⁿe
profeta Elías.

⁶Discípulos ní di'yáá yā chíi. Ní
Pedro miiⁿ nguēē deenu sa de'ē chí
ngaⁿ'a sa. ⁷Tuu'mi ní ndaa vmnááⁿ
yeⁿe 'iiⁿ'yāⁿ s'eeⁿ 'áámá meēēⁿ ní
sn'dii 'iiⁿ'yāⁿ s'eeⁿ. Ní discípulos
ch'iindiveéⁿ yā 'áámá nduudu chí
ngaⁿ'a nguaaⁿ meēēⁿ miiⁿ chí ngaⁿ'ā:
Sáⁿ'a 'cūū Saⁿ'ā Daiyá chí neⁿe n'dái.
Cu'neeⁿ veēⁿ nī yeⁿē sa.

⁸Hora mííⁿ nūūⁿ, taachi discípulos
n'diichí yā, 'āā ntéé du'ū vee snée
ndúúcu yā, 'āā dámaāⁿ Jesús miiⁿ
nduucú yā.

⁹Taachí nangua'á yā yeⁿe yiicū
miiⁿ na yúúní miiⁿ naachi cunaⁿ'a
yā Jesús caⁿ'a yā chíi yā 'iiⁿ'yāⁿ
s'eeⁿ chí nguéeⁿ caaⁿ'máⁿ yā yeⁿe
chí n'diichi yā, ndíí taachi Saⁿ'a
chí Daiya Ndyuūs nduuchi sa
yeⁿē nguaaⁿ tináⁿ'ā. ¹⁰Cáávā chuū
nanguaín'daí yā chí canúúⁿ n'de'ei
nguaaⁿ maáⁿ yā, naati ntiinguunéeⁿ
yā nguaaⁿ maáⁿ yā ¿de'ē chí 'túúcā
chí nduuchi sa yeⁿē nguaaⁿ tináⁿ'ā?
¹¹Tuu'mi ní discípulos ntiinguunéeⁿ
yā Jesús ní caⁿ'a yā: ¿De'ē cúúví chí
ngaⁿ'ā maestros yeⁿe ley chí Elías
miiⁿ canéeⁿ chí ndaa vmnaaⁿ sa?
¹²Jesús miiⁿ nan'guēecútaⁿ'a
yā ní caⁿ'a yā chíi yā discípulos:
Cuaacu níⁿ'nyúⁿ chí Elías miiⁿ 'āā
ndaá sá vmnááⁿ vmnaaⁿ ní diiⁿ sa
n'neē sa tanducuéⁿē yeⁿé Ndyuūs.
¿De'ē ngaⁿ'ā naachi canéeⁿ nguūⁿ na
libro yeⁿe Ndyuūs yeⁿe Saⁿ'ā chí
Daiya Ndyuūs? Ngaⁿ'a chí canéeⁿ chí
'cuenu sá cuuvi ní 'iiⁿ'yāⁿ s'eeⁿ dííⁿ
yā despreciar saⁿ'ā ní nguéeⁿ neⁿe
yā saⁿ'ā. ¹³Naati maaⁿ ní ngaⁿ'á chí
'āā ndaa profeta Elías miiⁿ ní 'iiⁿ'yāⁿ
s'eeⁿ 'āā dííⁿ yā chí neⁿe yā ndúúcu

sa, tan'dúucā chí ngaⁿa naachi canéé nguūⁿ na libro yeⁿ'é Ndyuūs yeⁿ'ē chí canéé chí chó'ōo.

Jesús divii yā espíritu yeⁿ'e yááⁿ'nguiniūⁿ yeⁿ'ē 'aama saⁿ'ā 'dííⁿ

(Mt. 17.14-21; Lc. 9.37-43)

¹⁴Cuayiivi mííⁿ Jesús ndaa yā naachi snéé discípulos yeⁿ'e yā. N'diichí yā neené n'deēe 'iiⁿ'yāⁿ cuaaⁿ 'diituú discípulos yeⁿ'é yā. Véé ntūūⁿ maestros yeⁿ'e ley miiⁿ chí ndeé yā n'deēe n'dáí ndúúcū discípulos. ¹⁵Ní taachi n'dííchi nducyaaca yā Jesús miiⁿ cueⁿ'e yiinu yā ní ngéenu yā ní ndáa yā nanááⁿ Jesús chí dííⁿ yā saludar Jesús. ¹⁶Tuu'mi ní Jesús ntiinguuneeⁿ yā 'iiⁿ'yāⁿ s'eeⁿ: ¿De'é ngaⁿ'a nī ndúúcū 'iiⁿ'yāⁿ s'tíí?

¹⁷Áámá chéé 'iiⁿ'yāⁿ s'eeⁿ chí snéé yā miiⁿ nn'guaacútaⁿ'a yā: N'díí Maestro, ndeé 'aama daiyá, chí canéé sá ndúúcū 'áámá espíritu yeⁿ'e yááⁿ'nguiniūⁿ chí dííⁿ chí nguéé ngíí ngaⁿ'ā sa. ¹⁸Āā tíí nūūⁿ naachi canéé sá espíritu 'cūū ní sta'a sáⁿ'ā ní n'geēcu sáⁿ'ā ná yáⁿ'āa. Ní saⁿ'ā miiⁿ ní ican'dáa yáíⁿ cuaaⁿ cheendi sa. Ní n'geecu r'íí 'dííⁿ'yúⁿ sá. Chííⁿ chí neené nduuví duūvā sa. Āā ngíí discípulos yeⁿ'e nī chí tun'dáa yā espíritu yeⁿ'e yááⁿ'nguiniūⁿ, naati nguéé cuuvi dííⁿ yā.

¹⁹Jesús nan'guæcútaⁿ'a yā yeⁿ'e 'iiⁿ'yāⁿ s'eeⁿ: Ndís'tíí, 'iiⁿ'yāⁿ chí nguéé i'téenu nī. ¿Áá 'naaⁿ tiempo canéé chí cuneé ndúúcū ndís'tíí? ¿Áá 'naaⁿ tiempo canéé chí cucheé ndúúcu nī? Candée nī 'muuⁿ saⁿ'ā 'dííⁿ.

²⁰Cheⁿ'e yā nguai yā saⁿ'ā 'dííⁿ miiⁿ. Ní taachí n'diichi espíritu

yeⁿ'e yááⁿ'nguiniūⁿ Jesús miiⁿ, yááⁿ'nguiniūⁿ miiⁿ chindæeve saⁿ'a 'dííⁿ miiⁿ. Chæecu ndáa sa ní n'gee yáíⁿ cuááⁿ cheendi sa. ²¹Tuu'mi ní Jesús ntiinguuneeⁿ yā chiida saⁿ'ā 'dííⁿ: ¿Áá 'naaⁿ canee sa ndúúcū ca'ai 'cūū? Chiida sa miiⁿ ní caⁿ'a yā: Ndií chí 'lííⁿ sa. ²²Nééné n'deēe cuuvi espíritu yeⁿ'e yááⁿ'nguiniūⁿ miiⁿ ní n'gaanuuⁿ sáⁿ'ā nguaaⁿ nguuchi yáⁿ'ā ní nguaaⁿ nuūⁿnīⁿ va, chí neⁿ'e 'caāⁿ'nūⁿ saⁿ'ā. N'dií Jesús, ndúúti chí cúúví dííⁿ nī 'tæe de'ē chí cunnee nī nús'uu, ní nuuⁿ nnee ya'āi 'iinú nī nús'uu ní cunnee nī nús'uu.

²³Jesús caⁿ'a yā chíí yā saⁿ'ā miiⁿ: Nduuti chí cuuvi cu'téenu di, tuu'mi ní tanducuéⁿ'ē ní cuuvi cáávā 'iiⁿ'yāⁿ chí i'téenu yā.

²⁴Tuu'mi ní chiida sa nééné 'caí ní ngeæcú yā. Ní caⁿ'a yā: 'Úú cu'teenú. Cunnee nī 'úú ní cuuvi cu'teenú ca.

²⁵Taachí Jesús n'diichí yā chí neené n'deēe 'iiⁿ'yāⁿ nduuvidaamá yā, ngaⁿ'a diitú yā ndúúcū espíritu yeⁿ'e yááⁿ'nguiniūⁿ ní caⁿ'a yā: Díí espíritu chí dííⁿ chí nguéé ngíí ngaⁿ'a ní nguéé n'giindiveéⁿ 'úú cuuvi díí chí nan'dáa di yeⁿ'e cuerpo yeⁿ'e saⁿ'ā 'dííⁿ 'cūū, ní 'āā ntéé ngeæcunee di cundaā di na cuerpo yeⁿ'ē sa.

²⁶Espíritu miiⁿ ní chindæeve saⁿ'ā 'dííⁿ miiⁿ ní chæcundáa saⁿ'ā taama vmnéⁿ'ēe ní nan'daā yeⁿ'ē sa. S'neeⁿ saⁿ'ā 'dííⁿ miiⁿ tan'dúucā chí ch'ii sa. Taachí 'iiⁿ'yāⁿ s'uuⁿ n'diichí yā saⁿ'ā 'dííⁿ miiⁿ neené 'yaaⁿ yā caⁿ'a yā chí n'díí sá. ²⁷Naati Jesús miiⁿ ní sta'á yā ta'ā sa, ní nadicúeeⁿ yā saⁿ'ā. Saⁿ'ā 'dííⁿ miiⁿ ní chéendii sa.

²⁸Cuayiivi ní Jesús sndaa yā na 'áámá va'ai, ní discípulos yeⁿ'e yā

ntiinguunéeⁿ yā Jesús taachi snée yā 'áámá lado: ¿De'ē cúúví chí nús'uu nguéé chitun'dáa 'nū espíritu yeⁿe yáá'n'nguiinūⁿ yeⁿe saⁿ'ā 'díí'?

²⁹Ní Jesús caⁿ'a yā: Espíritu 'cūū chí 'túúcā nguéé nan'daā yeⁿe 'iiⁿ'yāⁿ chí 'tiicá nūⁿ caati dámaāⁿ chí ngaⁿ'angua'á yā ndúúcu chí nguéé 'āā ca'diinú yā nguuvi chí ngaⁿ'angua'á yā.

Jesús ngaⁿ'a ntúuⁿ yā yeⁿe vaadi n'gii yeⁿe yā

(Mt. 17.22-23; Lc. 9.43-45)

³⁰Taachí can'daā Jesús ndúúcu discípulos na yáāⁿ miiⁿ, cho'ó yā na yá'āa Galilea. Jesús miiⁿ nguéé neⁿe yā chí cadiinuuⁿ mar 'áámá 'iiⁿ'yāⁿ chí canee yā miiⁿ, ³¹ti Jesús miiⁿ ní ngi'cueeⁿ yā discípulos yeⁿe yā chí Saⁿ'a chí Daiya Dendyuūs miiⁿ ní canéé chí ca'a yā sáⁿ'ā na ta'āa 'iiⁿ'yāⁿ. Ní canéé chí 'caaⁿ'núⁿ yā saⁿ'ā. Ní taachí 'āā 'cuuví sa ch'etí 'iinū nguuvi canéé chí nduuchi sa yeⁿe nguaaⁿ tináⁿ'ā. ³²Naati discípulos ní nguéé túúmícadíinuuⁿ yā chí ngaⁿ'a Jesús. Ní 'va'a yā chí ntíinguuneeⁿ yā yeⁿe chūū.

¿Du'ū cá chí ch'ete ca?

(Mt. 18.1-5; Lc. 9.46-48)

³³Tuu'mi ní ndaa Jesús ndúúcu discípulos yeⁿe yā na yáāⁿ Capernaum; ní taachí ndaa yā 'áámá va'ai, Jesús ntiinguuneeⁿ yā discípulos: ¿De'é ngaⁿ'a ndís'tii cuaaⁿ cyúúní?

³⁴Discípulos ní 'āā ntéé caⁿ'á yā mar 'áámá ti cuaaⁿ cyúúní mííⁿ ntíinguuneeⁿ vi'i yā ch'é ca yā chí ch'ete ca yā. ³⁵Tuu'mi ní Jesús miiⁿ

ch'iindí yā ní yaa'ví yā ndiichúúví discípulos yeⁿ'é yā chí cuchii yā nanáaⁿ yā. Ní cāⁿ'a yā: Ndúúti chí 'áámá ndís'tii neⁿe ní cuuví ní cuááⁿ vmnaaⁿ, canéé chí cuuví ní ndii cuayiivi yeⁿ'ē nducyáácá yā ní ndiicuuⁿ ca ní. Ní canéé chí dichíí'v'ē nducyaaca 'iiⁿ'yāⁿ.

³⁶Tuu'mi ní Jesús sta'á yā 'áámá saⁿ'ā 'lííⁿ ní s'neeⁿ yā naavtáⁿ'ā yeⁿ'e discípulos. Ní sta'á yā saⁿ'a 'lííⁿ miiⁿ ní ca'nuúⁿ yā saⁿ'ā. Ní caⁿ'a yā chii yā discípulos yeⁿ'e yā: ³⁷'Iiⁿ'yāⁿ chí 'cuaáⁿ yā saⁿ'ā 'lííⁿ 'túúcā, nduūcū chí duuchí, 'iiⁿ'yāⁿ miiⁿ ní 'cuaáⁿ yā 'úú. 'Iiⁿ'yāⁿ chí 'cuaáⁿ yā 'úú, nguéé dámaāⁿ 'úú cuaáⁿ yā, naati 'cuaáⁿ ntúuⁿ yā 'iiⁿ'yāⁿ chí dich'ó yā 'úú.

Yeⁿe 'iiⁿ'yāⁿ chí lado yeⁿ'e Jesús

(Mt. 10.42; Lc. 9.49-50)

³⁸Tuu'mi ní Juan miiⁿ ní caⁿ'a sa chii sa Jesús: N'díí Maestro, n'diichí 'nū 'áámá saⁿ'ā chí divíí sa espíritus yeⁿ'e yáán'nguiinūⁿ yeⁿ'e 'iiⁿ'yāⁿ ndúúcu chí dúúchí ní, naati sáⁿ'ā miiⁿ ní nguéé cachiicá sá ndúúcu nús'uu. Nguéé 'cuúⁿ 'nū chí diiⁿ sa 'tíicā.

³⁹Jesús caⁿ'a yā chii yā discípulos: Ndís'tii 'cuaáⁿ ní chí diiⁿ sa 'túúcā; ti nguéé véé mar 'áámá 'iiⁿ'yāⁿ chí dííⁿ yā vaadi n'giinu ndúúcu chí duuchí, ní cuayiivi cúúví caaⁿ'máⁿ yā chí 'úú ní nguéé n'daācā 'úú. ⁴⁰Ti 'iiⁿ'yāⁿ chí nguéé idiíⁿ yā contra yeⁿ'e s'uūⁿ, ní yeⁿ'é yā favor yeⁿ'ē yú. ⁴¹Āā du'ú nūⁿ 'iiⁿ'yāⁿ chí téé yā ndís'tii 'áará chí 'áámá vaso nuūⁿ'niⁿ ndúúcu chí duuchí, ti ndís'tii yeⁿ'e Cristo ndís'tii, cuaacu níⁿ'nyúⁿ 'iiⁿ'yāⁿ miiⁿ ní véé chí ndaācā chí cuuvi yeⁿ'e yā ná va'ai cheeti nguuvi.

**Yeⁿe dendu^u chi diiⁿ chi 'iiⁿ'yāⁿ diiⁿ
nuuⁿndi yā**

(Mt. 18.6-9; Lc. 17.1-2)

⁴²Tuu'mi ní caⁿa Jesús: 'Āā du'ú nūuⁿ 'iiⁿ'yāⁿ chi diíⁿ yā chi 'áámá chee chi n'gaiyāā chi i'téenu yā 'úú diíⁿ yā nuuⁿndi, n'daācā ca cáávā 'iiⁿ'yāⁿ miiⁿ chi 'iiⁿ'yāⁿ s'eeⁿ cāchiichí yā 'áámá tuūu yúúúú chí inguú 'iiⁿ'yāⁿ na daandu yā ní canuúⁿ yā 'iiⁿ'yāⁿ miiⁿ naachí yaānuúⁿ yeⁿe nuūⁿnīⁿ'yáⁿā. ⁴³Ní ndúúti chi ta'ā di idiiⁿ chí dinuuⁿndi di, n'daacā ca chí 'caaca di ta'a di ní divíi di. N'daacā ca chí ndaā di ndúúcu 'aama ta'á nūuⁿ di ná vida cueⁿe daāⁿmaⁿ, ní nguéé chi caⁿ'ā di ndúúcu 'uūvī ta'a di na infierno, naachí nguūchí yaⁿ'ā miiⁿ ní nguéé ín'tuūvī. ⁴⁴Lugar miiⁿ naachi nguéé n'gii n'daāā ní nguuchi yaⁿ'ā miiⁿ ní 'āā ntéé n'tuūvī. ⁴⁵Ndúúti chi ca'a di idiiⁿ chí dinuuⁿndi di 'caaca ntúuⁿ di ní divíi di. N'daacā ca chí ndaa di lo'ō di na vida cueⁿe daāⁿmaⁿ miiⁿ, nguéé ti chí caⁿ'ā di ndúúcu 'uuvī ca'a di na infierno naachí nguuchi yáⁿ'ā miiⁿ chi nguéé ín'tuūvī. ⁴⁶Lugar miiⁿ ní naachi nguéé n'gii n'daāā ní nguuchi yáⁿ'ā miiⁿ 'āā ntéé ín'tuūvī. ⁴⁷Ndúúti chi nduutināⁿ di diiⁿ chí idinuuⁿndi di, tuu'mi ní tun'dáa di; ti n'dáácā ca chi ndáa di ndúúcu 'áámá nduutināⁿ naachi Ndyuūs ngaⁿ'a ntiⁿ'nyúⁿ yā, nguéé ti chí caⁿ'a di ndúúcu nduu 'uuvi nduutināⁿ di na infierno, ⁴⁸naachi n'daāā mííⁿ nguéé n'gíí tī ní nguuchi yáⁿ'ā miiⁿ 'āā ntéé ín'tuūvī tan'díi nūuⁿ.

⁴⁹Ti nducyaaca 'iiⁿ'yāⁿ chi i'téenu yā canéé chí n'diichi nééⁿ

yā 'cuenú yā cuuvi tan'dúúcā chi cho'ó ná nguuchi yaⁿ'ā, ní tanducuéⁿ'ē 'iiti chí 'iiⁿ'yāⁿ 'caaⁿ'núⁿ yā cáávā ofrenda yeⁿ'é Ndyuūs, diíⁿ yā preparar 'iiti miiⁿ ndúúcu yīimā. ⁵⁰Yīimā ní n'dai. Ní nduuti chí nguēē ndaācā sabor yeⁿ'ē, ¿d'é'ē cuuvi diíⁿ nī, ní cuuvi ndaācā sabor yeⁿ'ē? Ndís'tiī cuneé nī tan'dúúcā chí yīimā, 'tíica cuneé nī, ní canéé n'daaca nī 'aama nī taama nī ndúúcu vi'ī.

**Jesús ngi'cueeⁿ yā yeⁿe divorcio chí
i'teachií vi'ī 'iiⁿ'yāⁿ**

(Mt. 19.1-12; Lc. 16.18)

10 Jesús can'daa yā yeⁿe yāāⁿ Capernaum, ní cueⁿ'e yā na yáⁿ'āā Judea ndúúcu yáⁿ'āā chí canee táámá lado yeⁿ'ē yíícu Jordán. Miiⁿ ní nduuvidaama ntúuⁿ 'iiⁿ'yāⁿ naachi canéé Jesús miiⁿ. Jesús tuca'a yā chí'cueeⁿ yā 'iiⁿ'yāⁿ s'eeⁿ tan'dúúcā costumbre yeⁿe yā. ²Tuu'mi ní n'duuvi 'iiⁿ'yāⁿ fariseos ndaā yā nanáāⁿ Jesús ti neⁿ'é yā n'diichíneeⁿ yā Jesús miiⁿ. Ní ntiinguunéⁿ yā Jesús ndúúti chí n'daācā chí saⁿ'ā n'teachi sá n'daataa yeⁿ'ē sa. ³Jesús miiⁿ ní nan'guēcútaⁿ'a yā: ¿D'é'ē caⁿ'a Moisés chii sa ndís'tiī na ley yeⁿ'e yú?

⁴Fariseos ní caⁿ'a yā chii yā Jesús: Moisés miiⁿ ní 'cuūⁿ sa chí ca'a sá n'daataa miiⁿ 'áámá caaca yeⁿ'e chí i'teachi vi'ī yā. Tuu'mi ní cu'neeⁿ sa táⁿ'ā sa.

⁵Tuu'mi ní Jesús caⁿ'a yā chii yā fariseos: Moisés miiⁿ tee sa mandamiento 'cūū, ndís'tiī, caati ndís'tiī ní neené cheechi staava yeⁿ'é nī. ⁶Naati ndíí cuaaⁿ

vmnaaⁿ, taachi Ndyuūs din'dái yā tanducueⁿē dendu'ū, din'dái yā sáⁿā ndúúcū n'daataá. ⁷Chííⁿ chí saⁿā miiⁿ cun'néeⁿ sa chiida sa ndúúcū cheecu sá ní ndūūvidaama sa ndúúcū n'daataá yeⁿē sa, ⁸ní nduu 'uuví yā ní nduūví 'aama yā ndúúcū ví'í. Chííⁿ chí 'āā ntéé 'uūvi yā tí 'āā 'aama núúⁿ yā. ⁹Chííⁿ chí saⁿā miiⁿ nguéé canee chí nadvíi sa chí Ndyuūs nadaamá yā.

¹⁰Cuayiivi miiⁿ taachí 'āā snée Jesús ndúúcū discípulos yeⁿe yā cheetí 'áámá va'āi, miiⁿ discípulos nguεεcunée yā ntiinguuneeⁿ yā Jesús yeⁿe nduudu 'cūū. ¹¹Jesús caⁿa yā chíi yā discípulos: Saⁿā chí cu'neeⁿ sá n'daataá yeⁿē sa ní 'caandivaacu sa ndúúcū táámá n'daataá, saⁿā miiⁿ ní idinuuⁿndi sa chí véé táámá n'daataá yeⁿē sa. ¹²Ní ndúúti chí 'áámá n'daataá cu'neeⁿ ta isáⁿā yeⁿe tá ní 'caandivaacu tá ndúúcū táámá saⁿā, 'tiicá ntūūⁿ n'daataá miiⁿ idinuuⁿndi tá chí véé taama isáⁿā yeⁿe tá.

Jesús di'viicú yā dá'caiyāa

(Mt. 19.13-15; Lc. 18.15-17)

¹³Tuu'mi ní 'iiⁿyāⁿ s'eeⁿ níndeé yā da'caiyāa nanááⁿ Jesús, chí Jesús tuu'ví yā da'caiyāa miiⁿ; naati discípulos ní yaa'vi néeⁿ yā 'iiⁿyāⁿ s'eeⁿ chí ndéé da'caiyāa s'eeⁿ. ¹⁴Taachí Jesús n'diichi yā chuū, yaa'vi néeⁿ yā ní caⁿa yā chíi yā discípulos: 'Cuaaⁿ nī chíi da'caiyāa nanaáⁿ, ní nguéé ndivíi nī yeⁿé, tí na va'ai cheeti nguuví naachi Ndyuūs ngaⁿa ntiiⁿnyúⁿ yā ní yeⁿē da'caiyāa s'tíi, 'tíicā. ¹⁵Cuaacu nííⁿnyúⁿ ngaⁿá ngíi ndís'tíi, 'iiⁿyāⁿ chí nguéé cu'téenu yā yeⁿe

naachi Ndyuūs ngaⁿa ntiiⁿnyúⁿ yā tan'dúúcā chí i'teenú 'aama dá'caiyāa, nguéé cuuví cundaa yā naachi Ndyuūs ngaⁿa ntiiⁿnyúⁿ yā.

¹⁶Ní Jesús sta'á yā da'caiyāa miiⁿ ní ca'nuú yā ní di'viicú yā. Ní s'neeⁿ yā sn'duú tá'a yā vmnaaⁿ yeⁿē.

Yeⁿe saⁿa 'dííⁿ chí 'cuiica

(Mt. 19.16-30; Lc. 18.18-30)

¹⁷Taachí Jesús candíi yā yúúní yeⁿé yā, ndaā 'áámá sáⁿā. Ngeenu sa nanááⁿ Jesús ní chíintii'ya sa nanááⁿ yā ní ntíinguuneeⁿ sa: N'dii Maestro chí n'dái nī, 'de'e dííⁿ ní ndaacá vida cueⁿe daāⁿmaⁿ chí cuuvi yeⁿé?

¹⁸Jesús caⁿa yā chíi yā saⁿā: 'De'e cúuví chí ngaⁿā dí chí n'dai 'úú? Mar 'áámá 'iiⁿyāⁿ nguéé n'dai yā tí dámaaⁿ Ndyuūs. ¹⁹Dii ní deenu di chí canéé nguūⁿ na ley chí 'tuucā: Nguéé caⁿa di ndúúcū tááma n'daataá chí nguéé yeⁿe di. Nguéé 'caāⁿnuⁿ di. Nguéé diduucú di. Nguéé caaⁿmaⁿ nduudu yaadi yeⁿē mar 'áámá 'iiⁿyāⁿ. Nguéé canche'ei di 'iiⁿyāⁿ. Dinéⁿe di chiida di ndúúcū cheecu di.

²⁰Saⁿā miiⁿ ní nan'guεεcútaⁿā sa: N'dii Maestro, tanducueⁿē chuū 'āā idiíⁿ ndíi taachi saⁿā 'lííⁿ 'úú.

²¹Jesús ní chíinu yā saⁿā 'dííⁿ ní dinéⁿe yā saⁿā. Ní caⁿa yā: Véé táámá chí indái yeⁿē di. Cuéⁿé dí n'diicú dí tanducueⁿē chí véé yeⁿē di, ní ca'a di 'iiⁿyāⁿ chí nguéé yeⁿe yā. Tuu'mi ní ndaācā chí véé vaadi 'cuiica yeⁿe na va'ai cheeti nguuví chí cuuvi yeⁿē di. Tuu'mi ní cutá'a di cruz yeⁿē di chí yeⁿē chí 'cueenu di cuuvi ní cuchii di ní caⁿa di nduucú.

²²Naatí taachi ch'iindiveeⁿ sá chuū, néené s'neeⁿ ya'āiⁿ iinu sa ní neene ndaachi i'inú sa. Ní cunaⁿa sa ti neené 'cuiica sa.

²³Tuu'mi ní Jesús ch'iinu yā cuaaⁿ 'diitúú yā ní caⁿa yā chii yā discípulos yeⁿe yā: De'ē chúucā ngíⁿ'ii chi cundaā 'iiⁿ'yāⁿ 'cuiica naachí Ndyuūs ngaⁿa ntiiⁿ'nyúⁿ yā.

²⁴Discípulos ní nge'e yiinu yā yeⁿe nduudu yeⁿe yā; naati Jesús ní caⁿa ntúuⁿ yā: Ndís'tií daiyá, de'e chúucā ngíⁿ'ii chi 'iiⁿ'yāⁿ chi idinéⁿe ca yā chi véé yeⁿe yā chí cundaā yā naachí Ndyuūs ngaⁿa ntiiⁿ'nyúⁿ yā. ²⁵Nguéé ngíⁿ'ii cá chi 'áámá 'iiti camello, chi ch'εεte cá nguéé ti 'yúúduu chi cho'ó tī na nduutinááⁿ 'iini, chi cheendi va'ai lííⁿ nguéé ti 'áámá 'iiⁿ'yāⁿ 'cuiica i'téenu yā Ndyuūs ní cundáa yā naachí Ndyuūs ngaⁿa ntiiⁿ'nyúⁿ yā.

²⁶Taachí discípulos ch'iindiveeⁿ yā chuū, nadicádínuuⁿ taavi ca yā ní nguaaⁿ maaⁿ yā ntínguunéeⁿ yā vi'í. Tuu'mi ní ngaⁿa yā: ¿Du'ú cuuvi nanguaⁿ'āi?

²⁷Jesús miiⁿ ch'iinu yā discípulos ní caⁿa yā: Saⁿ'ā iⁿ'yeeⁿ'dí cūū nguéé cuuvi diiⁿ sa chuū, naati Ndyuūs cuuvi dííⁿ yā caati nanááⁿ Ndyuūs nguéé de'ē vee chi nguéé cuuvi dííⁿ yā.

²⁸Tuu'mi ní Pedro miiⁿ tuca'a sa caⁿ'a sa ní caⁿ'a sa chii sa 'iiⁿ'yāⁿ: Nús'uu ní s'neéⁿ 'nū tanducuéⁿ'ē chi véé yeⁿ'é 'nū, ní cuchíí 'nū nduucú nī.

²⁹Jesús nan'guεεcútaⁿ'a yā: Cuaacu nííⁿ'nyúⁿ ngaⁿ'á ngíí ndís'tií. 'Āā du'ú nūuⁿ 'iiⁿ'yāⁿ chí cu'neéⁿ yā vaacu yā, o 'díínu yā, o ví'í, o chεécú yā, o chiidá yā, o n'daataá

yeⁿ'é yā, o daiya yā, o yáⁿ'āa yeⁿ'e yā, cáávā 'úú ní cáávā chi candee yā nduudu chi nguaⁿ'ai 'iiⁿ'yāⁿ, ³⁰cuta'á yā na iⁿ'yeeⁿ'dí cūū 'áámá ciento cúúví cá chí n'dee ca dendu'ū yeⁿ'e va'ai s'eeⁿ ndúúcú 'díínu yā ndúúcú 'cεε'vε yā ndúúcú vi'í yā, ndúúcú chiidá yā, ndúúcú chεεcú yā, ndúúcú daiya yā, ní yeⁿ'ē yáⁿ'āa yeⁿ'e yā. Ní canée chí n'géénú yā ngii chí 'iiⁿ'yāⁿ idiíⁿ yā naati ná iⁿ'yeeⁿ'dí chí cuchii ndaācā vida cueⁿe daāⁿmaⁿ yeⁿ'e yā. ³¹Nééné 'yaaⁿ 'iiⁿ'yāⁿ chí maaⁿ snée yā cuaaⁿ vmnaaⁿ 'iiⁿ'yāⁿ s'eeⁿ 'cuεetinée yā cuaaⁿ chi cuayiivi. Ní neené 'yaaⁿ 'iiⁿ'yāⁿ chí maaⁿ snée yā cuaaⁿ chí cuayiivi, 'iiⁿ'yāⁿ s'eeⁿ 'cuεetinée yā vmnaaⁿ.

Jesús ngaⁿa ntúuⁿ yā yeⁿ'e chí 'cuúví yā

(Mt. 20.17-19; Lc. 18.31-34)

³²Jesús ndúúcú discípulos yeⁿ'e yā snúúⁿ yā yúúní ní cucheε yā na yááⁿ Jerusalén. Jesús cueⁿ'é yā vmnááⁿ discípulos. Ní discípulos nadicádínuuⁿ yā ní cueⁿ'e yiinú yā ní va'a yā. Tuu'mi ní Jesús miiⁿ nguεecunée yā ní yaa'vi ndiichúúví discípulos yeⁿ'e yā ní tuca'a yā caⁿ'a yā chii yā discípulos yeⁿ'e chí canée chí 'cuúví yā. ³³Ní caⁿ'a yā Cun'diichí nī, caa yú na yááⁿ Jerusalén, naachí 'úú chí Saⁿ'a chí Daiya Dendyuūs miiⁿ ní 'iiⁿ'yāⁿ nca'a yā 'úú chiiduú n'geete ndúúcú maestros yeⁿ'e ley. Ní 'iiⁿ'yāⁿ s'eeⁿ caacá yā yeⁿ'e 'úú chí 'cuúví. Ní nca'á yā 'úú 'iiⁿ'yāⁿ chí nguéé ndaata yeⁿ'ē Israel. ³⁴Ní 'caaⁿ'nyuⁿ néeⁿ yā 'úú. Ní 'cueⁿ'é yā 'úú ní ca'a neeⁿ daiⁿ yā 'úú. 'Cuiinu chuū ní 'caaⁿ'núⁿ yā

'úú. Naati ndiichi ndii 'íínú nguuví miiⁿ, nduuchí yeⁿē nguaaⁿ tináⁿā.

Jacobo ndúúcu Juan ngíicá sá 'áámá favor

(Mt. 20.20-28)

³⁵Tuu'mi ní Jacobo ndúúcu Juan, chí daiya Zebedeo, ndaá yā nanááⁿ Jesús miiⁿ ní caⁿa sa: N'diī Maestro, neⁿé nū chi dííⁿ nī 'áámá favor chí ngiica nū.

³⁶Tuu'mi ní Jesús ntinguuneéⁿ yā: ¿De'ē neⁿe nī chi dííⁿ?

³⁷Tuu'mi ní caⁿa sa chii sa Jesús miiⁿ: 'Cuááⁿ dí chi 'cueēté nū 'áámá nū lado tá cuaācú di ní táámá nū ní lado tá 'cueē di taachi 'āā ndaá hora yeⁿe chí ngaⁿa ntiinⁿyuⁿ dí yeⁿe nducuéⁿē.

³⁸Tuu'mi ní Jesús miiⁿ caⁿa yā: Ndís'tiī nguéé déenu nī de'ē chí ngiica nī. ¿Áá cuuvi diiⁿ di cu'u nuúⁿ nī yeⁿē chí n'geēⁿ cheeti vaso chí yeⁿe chí 'cuenú cuuvi? ¿Áá cuuvi cuta'á nī maaⁿ chí ngeēdínuūⁿnī chí cuta'á?

³⁹Juan ndúúcu Jacobo miiⁿ ní nan'gueecútaⁿa yā: Cuuvi dííⁿ nū. Tuu'mi ní Jesús caⁿa yā chii yā 'iiⁿyāⁿ s'eeⁿ: Cuaacu níⁿnyúⁿ canéé chí cu'ú nī yeⁿe vaso chí yeⁿe chí 'cuenú cuuvi ní canéé chí cuta'á nī chí ngeēdínuūⁿnī chí 'úú ita'á. ⁴⁰Caati nguéé ituneeⁿ 'úú chí ca'á du'ú chí 'cuūndi lado tá cuaacú o lado ta 'cueēé. Lugar 'cūū ní Ndyuūs ca'á yā 'iiⁿyāⁿ chí Ndyuūs dííⁿ yā 'cundiyaáⁿ yā cáávā 'iiⁿyāⁿ.

⁴¹Taachí ch'iindiveéⁿ ndu'u ndiichí discípulos chuū, nduuvi taáⁿ yā ndúúcu Jacobo ndúúcu Juan miiⁿ.

⁴²Jesús ní yaa'vi yā discípulos ní caⁿa yā: Tan'dúúca chí ndís'tiī

deenu nī, 'iiⁿyāⁿ chí ngaⁿa ntiinⁿnyúⁿ yā yeⁿe naciones véé poder yeⁿé yā nguaaⁿ 'iiⁿyāⁿ yeⁿe nación yeⁿe yā ní 'iiⁿyāⁿ chí n'geete cá yeⁿē naciones ngaⁿa ntiinⁿnyúⁿ yā 'iiⁿyāⁿ s'eeⁿ. ⁴³Naati nguaaⁿ ndís'tiī, nguēé 'tíicā. 'Iiⁿyāⁿ chí neⁿe cuuvi ch'ēete yā nguaaⁿ ndís'tiī canéé chí dichíí'vé yā 'iiⁿyāⁿ. ⁴⁴Áā du'ú nūūⁿ ndís'tiī chí neⁿe nī cunee nī cuaaⁿ vmnaaⁿ yeⁿe ndís'tiī canéé chí dichíí'vé nī nducyaaca 'iiⁿyāⁿ. ⁴⁵Naati Sáⁿā chí Daiya Dendyuūs nguéé ndaā sa chí 'iiⁿyāⁿ dichíí'vé yā saⁿā, ti maaⁿ sa dichíí'vé sa nducyaaca 'iiⁿyāⁿ, ní ca'a sa vida yeⁿe maāⁿ sa tan'dúúca precio yeⁿē nuuⁿndi cáávā chí nanguaⁿ'ai yā n'dee n'daí 'iiⁿyāⁿ.

Jesús n'guaáⁿ yā nduutinááⁿ saⁿā Bartimeo

(Mt. 20.29-34; Lc. 18.35-43)

⁴⁶Tuu'mi ní ndaā Jesús ndúúcu discípulos na yáāⁿ Jericó. Ní taachí can'daa yā yáāⁿ Jericó ndúúcu 'yaaⁿ n'daí 'iiⁿyāⁿ 'áámá sáⁿā chí ngeuenááⁿ chí nguuvi Bartimeo, daiya Timeo, véé sá niiⁿnuúⁿ cyúúni ní ngiica sá limosnas. ⁴⁷Ní taachí ch'iindiveeⁿ sa chí Jesús yeⁿe yáāⁿ Nazaret cho'o yā miiⁿ, saⁿa ngeuenááⁿ miiⁿ tuca'a sa 'caí sa ní caⁿa sa: Jesús, Daiya David, nnéé ya'āi 'iinú nī 'úú.

⁴⁸Néénéé 'yaaⁿ yā yaa'vi neeⁿ yā saⁿā miiⁿ chí cunēé 'diiⁿ sa cheendí sa, naati saⁿā miiⁿ ní n'gaí yiicú cá sá: N'diī Daiya David, nnéé ya'āi 'iinu nī 'úú.

⁴⁹Tuu'mi ní Jesús cheendii yā ní caⁿa yā: Yaa'vi nī saⁿā chí cuchii sa 'muuⁿ. Ní cheⁿé yā ní chii yā saⁿā

chi ngeuenáán miiⁿ: Canéé diitu di ní cáániicū di ndúcueeⁿ di ti Jesús n'gai yā dii.

⁵⁰Tuu'mi ní sn'dáa sa cotón yeⁿē sa ní nadacueeⁿ sa ní chéⁿé sa ndaā sa nanááⁿ Jesús miiⁿ. ⁵¹Tuu'mi ní Jesús ntiinguunéeⁿ yā saⁿā: ¿De'ē neⁿé di chi díⁿ ndúúcū dii? Sáⁿā chi ngeuenáán miiⁿ ní caⁿa sa: N'diī Maestro díⁿ nī chi snaáⁿ.

⁵²Jesús caⁿa yā: Cunaⁿā di. 'Āā inaaⁿ di, ti s'téenu di. Hora 'cūū nūuⁿ chi ngeuenáán miiⁿ ní snaaⁿ sa ní cueⁿe sá ndúúcū Jesús miiⁿ na yúúni.

Jesús ndaa yā na yāāⁿ Jerusalén

(Mt. 21.1-11; Lc. 19.28-40; Jn. 12.12-19)

11 Taachí Jesús ndúúcū discípulos ndaa yā niiⁿnuúⁿ na yāāⁿ Jerusalén, ndaa yā na yāāⁿ Betfagé, ndúúcū yāāⁿ Betania, niiⁿnuúⁿ na yiicū chi nguuví Olivos. Ní Jesús dich'ó yā na 'uūví discípulos yeⁿe yā. ²Ní caⁿa yā: Cuéⁿe nī na yāāⁿ lífⁿ chi canéé niiⁿnuúⁿ ní taachí ndaa nī miiⁿ ndaaca nī 'áámá burro n'déēchiichí tī. Burro miiⁿ ní mar 'áámá 'iiⁿyāⁿ 'āā cuéé cunduú yā 'iiti. N'daatí nī 'iiti ní candéé nī 'iiti 'múúⁿ. ³Ndúúti chi 'áámá 'iiⁿyāⁿ tínguuneeⁿ yā ndís'tii: ¿De'ē cúúví chí 'tíicā idifⁿ nī? Caaⁿmaⁿ nī cuuvi nī 'iiⁿyāⁿ tí Señor yeⁿe yú neⁿe yā 'iiti miiⁿ. Ní caama nadicho'ó yā 'iiti.

⁴'Iiⁿyāⁿ s'eeⁿ ní 'tíicā cheⁿe yā, ní ndaāca yā burro miiⁿ n'déēchiichí tī na cyúúni niiⁿnuúⁿ cheendiva'āi. Ní n'daati yā 'iiti. ⁵N'dúúví 'iiⁿyāⁿ chi snée yā miiⁿ ní caⁿa yā chii yā discípulos: ¿De'ē idifⁿ nī? ¿De'ē cúúví chí in'daatí nī burro?

⁶Tuu'mi ní discípulos ní nan'gueecútaⁿa yā tan'dúúcā chi Jesús caⁿa yā chii yā 'iiⁿyāⁿ. Ní 'cuuⁿ yā chi discípulos cueⁿe yā ndúúcū burro miiⁿ. ⁷Tuu'mi ní cueⁿe yā ndaá yā ndúúcū burro miiⁿ nanááⁿ Jesús miiⁿ. Ní sn'duú yā cotón yeⁿe yā vmnááⁿ yeⁿē burro miiⁿ ní Jesús canduú yā 'iiti. ⁸Taachí 'āā cueⁿe yā cuaaⁿ cyúúni miiⁿ, nééné 'yaaⁿ 'iiⁿyāⁿ n'doó yā cotón yeⁿe yā cuaaⁿ cyúúni miiⁿ. Tanáa yā ch'iiicā yā dúuⁿnē yáⁿá ní chintaaví yā cuaaⁿ cyúúni.

⁹Nééné 'yaaⁿ ca yā chí cueⁿe yā cuááⁿ vmnaaⁿ miiⁿ yeⁿe Jesús ndúúcū 'yaaⁿ n'dai yā chí cuchii yā cuaaⁿ daami yā 'cai yā: De'ē chúúcā ch'εεε Ndyuūs. Ndyuūs di'viicú yā 'iiⁿyāⁿ chí cuchii yā ndúúcū chí dúúchí Señor miiⁿ. ¹⁰De'ē chúúcā n'dai naachi ngaⁿa ntiiⁿnyuⁿ Ndyuūs. Cúchii tiempo maaⁿ chí tan'dúúcā yeⁿē chiida yú David ngaⁿa ntiiⁿnyúⁿ yā ndii cuááⁿ vmnaaⁿ. Hosanna. Nduudu miiⁿ ní nduudu Israel chí neⁿe caaⁿmaⁿ na nduudu yeⁿe yú, chí ch'εεε n'dai Ndyuūs chí canéé na va'ai cheeti nguuví.

¹¹'Tíicā sndaā Jesús na yāāⁿ Jerusalén. Ní ndaá yā na yaacū templo yeⁿē yāāⁿ Jerusalén miiⁿ. Ch'íinu yā tanducueⁿē dendu'ū nuuⁿmáⁿ cuaaⁿ 'diituú yā. Cueⁿe ntúuⁿ yā na yāāⁿ Betania ndúúcū ndu'ū ndiichuuví discípulos caati 'āā chí chiiⁿnū.

Jesús ngaⁿa yā ngii yā yáⁿá n'guíidii yaaⁿ nguuví miiⁿ

(Mt. 21.18-19)

¹²Chidēve táámá nguuví miiⁿ, taachí Jesús ndúúcū discípulos

yeⁿé yā can'daa yā na yaāⁿ Betania, Jesús miiⁿ chí cuiicu yā. ¹³Ní n'diichi yaⁿái yā 'áamá yáⁿá yeⁿe n'guídii yaaⁿ nguuvu chí véé tá'āa. Ní cueⁿé yā n'diichi yā chí 'áá snéé n'gui'i yeⁿē. N'diichí yā chí nguéé ndaācā n'gui'i yeⁿē ti ta'á nūⁿ, ti nguéé tiempo yeⁿē. ¹⁴Tuu'mi ní Jesús miiⁿ caⁿa yā chí yā yáⁿá mífⁿ, 'túucā: Dii yáⁿá, mar 'áamá 'iiⁿyāⁿ nguéé ch'ée yā n'gui'i yeⁿē di, tanducuéⁿē tiempo. Discípulos yeⁿe yā ch'iindiveéⁿ yā tanducuéⁿē chí caⁿa yā.

Jesús nadεεvé yā yaācū ch'εete

(Mt. 21.12-17; Lc. 19.45-48; Jn 2.13-22)

¹⁵Cuayiivi mífⁿ 'iiⁿyāⁿ s'eeⁿ ndaá yā na yāāⁿ Jerusalén miiⁿ. Taachí Jesús ndaá yā na yāacū templo miiⁿ, tucá'a yā tun'dáa yā 'iiⁿyāⁿ na yaācū miiⁿ, 'iiⁿyāⁿ chí in'diicui yā ndúúcū 'iiⁿyāⁿ chí ngai yā. Ch'εecundáa yā mesas yeⁿe 'iiⁿyāⁿ chí n'dáaⁿ yā tuūmi. Ní ch'εecundáa yā sillas yeⁿe 'iiⁿyāⁿ chí in'diicui yā palomas. ¹⁶Ní dííⁿ yā chí 'āā ntéé candée 'iiⁿyāⁿ na yaācū miiⁿ mar 'áamá cosa. ¹⁷Ní chí'cuééⁿ yā 'iiⁿyāⁿ ní caⁿa yā: Naachi canéé nguūⁿ na libro yeⁿé Ndyuūs ní 'túucā ngaⁿá: Va'ai yeⁿé canéé chí duuchi va'ai naachi caaⁿmaⁿngua'á 'iiⁿyāⁿ yeⁿē nducuéⁿē nación. Naati ndís'tii ní dííⁿ nī chí yiive yáává yeⁿe 'iiⁿyāⁿ chí diduucu.

¹⁸Chiiduú n'gεete chí ngaⁿa ntiiⁿnyuⁿ ndúúcū maestros yeⁿe ley ch'iindiveéⁿ yā chuū, ní tucá'a yā n'nuuⁿ yiinú yā taacā chí 'caaⁿnuⁿ yā Jesús, naati 'va'á yā 'iiⁿyāⁿ. Ní nducyaaca 'iiⁿyāⁿ ngeⁿe yiinú yā yeⁿē chí ngi'cueeⁿ Jesús

miiⁿ. ¹⁹Taachí chí 'da'a, Jesús miiⁿ can'dáa yā na yāāⁿ Jerusalén miiⁿ ní cueⁿé yā táámá yāāⁿ 'lííⁿ chí niiⁿnuúⁿ.

Yáⁿá in'guídii miiⁿ ntí'i

(Mt. 21.20-22)

²⁰Chidεeve táámá nguuvu, ní Jesús ndúúcū discípulos cho'ó yā na yúúní ní n'diichí yā 'áamá yáⁿá n'guídii yaaⁿ nguuvu chí 'āā ntí'i ndii díí'yú yeⁿē. ²¹Tuu'mi ní Pedro miiⁿ ní nn'gaacu sa chí 'āā chó'oo ní caⁿa sa chí sa Jesús miiⁿ: N'dii Maestro, cuin'diichí nī. N'guídii chí nguéé n'daācā caⁿa nī yeⁿē 'āā ntí'i.

²²Jesús miiⁿ nan'gueεcútaⁿa yā ní caⁿa yā: Ndís'tii, cuuvi cūnee chí véé confianza yeⁿe nī ndúúcū Ndyuūs. ²³Cuaacu nííⁿnyúⁿ ngaⁿá ngíí ndís'tii: 'Āā du'ú nūⁿ 'iiⁿyāⁿ chí caaⁿmán yā cuuvi yā yiicū 'cúú 'tíficā: Dii yiicū, cuvii di 'muuⁿ ní cundaā di nguaaⁿ nuūⁿnīⁿyáⁿā. Ní nduuti chí nguéé 'uūvi vaanicádiinūⁿ yeⁿe yā ní i'téenu yā chí chííⁿ chí ngaⁿá yā chí cuuví cuaacu, tuu'mi ní cuuvi 'tíficā. ²⁴Chííⁿ chí maaⁿ ngaⁿá ngíí ndís'tii: Tanducuéⁿē chí ndís'tii ngiicā nī Ndyuūs taachi ngaⁿangua'á nī, nduuti chí cu'téenu nī chí ndaācā yeⁿe nī, tuu'mi ní tanducuéⁿē ní ndaāca nī. ²⁵Ní taachí ngaⁿangua'á nī, nduuti chí 'áamá 'iiⁿyāⁿ idinuuⁿndí yā contra yeⁿé nī, nadach'εecú nī yeⁿe yā, 'tiicá ntúūⁿ Chiida yú chí canée yā na va'ai cheeti nguuvu nádich'εecú yā nuuⁿndi yeⁿé nī. ²⁶Ndúúti ndís'tii nguéé nadich'εecú nī nuuⁿndi yeⁿé 'iiⁿyāⁿ, 'tiicá ntúūⁿ Chiida yú chí canée yā na va'ai cheeti nguuvu

nguée nadich'ëecú yā nuuⁿndi yeⁿe nī.

Jesús ní ngaⁿa ntiⁿnyúⁿ yā

(Mt. 21.23-27; Lc. 20.1-8)

²⁷Tuu'mi ní Jesús ndúúcu discipulos nndaa yā na yáāⁿ Jerusalén. Taachí Jesús chiicá yā na yaacū templo, chiiduú n'geete ndúúcu maestros chi ng'icúeⁿ ley ndúúcu 'iiⁿyāⁿ ndiicúu chi ngaⁿa ntiⁿnyúⁿ yā yeⁿe yaacū miiⁿ chindaá yā n'diichí yā Jesús. ²⁸Ní ntiinguuneⁿ yā Jesús: ¿Du'ú 'iiⁿntyēⁿē diiⁿ nduucú nī chuū? O ¿du'ú tee poder dii chí idiⁿ nī chuū?

²⁹Jesús nan'guëecútaⁿa yā: 'Úú ntúúⁿ ní tiinguuneⁿ ndís'tiī, ní ndúúti chí cuuví n'guëecútaⁿa nī yeⁿé, tuu'mi ní cuuví ndís'tiī du'ú 'iiⁿntyēⁿē tee yā poder 'úú chí idiⁿ dendú'u 'cūū. ³⁰Chí ngeēdínuuⁿnī Juan miiⁿ ¿tíí chiicā chí? ¿Áá yeⁿe sáⁿā iⁿyeeⁿdí 'cūū o yeⁿē va'ai chëeti nguuví? Nan'guëecútaⁿa nī yeⁿé.

³¹Tuu'mi ní tucá'a yā caⁿa yā nguááⁿ maáⁿ yā ní caⁿa yā chíi yā vi'i: ¿Taacá caaⁿmaⁿ yú? Ndúúti chí caaⁿmaⁿ yú chí yeⁿē nanguuvi, 'iiⁿyāⁿ miiⁿ ní nan'guëecútaⁿa yā yeⁿē yú 'tíicā: ¿De'ē cúuví chí nguée'it'éenu nī? ³²Ní ndúúti chí caaⁿmaⁿ yú, chí yeⁿē saⁿā iⁿyeeⁿdí 'cūū tuu'mi ní 'va'a yú 'iiⁿyāⁿ s'eeⁿ caati nducyáácá 'iiⁿyāⁿ deenu yā chí Juan chí chëedínuuⁿnī miiⁿ ní 'áámá profeta chí cuaacu. ³³Ní nan'guëecútaⁿa yā yeⁿe Jesús miiⁿ ní caⁿa yā: Nguée cuuví nī n'diī. 'Tíicā caⁿa yā chíi yā Jesús: Nguée deenú 'nū. Tuu'mi ní Jesús caⁿa yā chíi yā 'iiⁿyāⁿ s'eeⁿ: 'Tiicá ntúū 'úú

nguée cuuví ndís'tiī du'ú 'iiⁿntyēⁿē idiⁿ ndúúcu chuū.

Ejemplo yeⁿe 'iiⁿyāⁿ chí nguée n'daācā diíⁿ yā ntiⁿnyuⁿ

(Mt. 21.33-46; Lc. 20.9-19)

12 Jesús miiⁿ tucá'a yā caⁿa yā 'iiⁿyāⁿ s'eeⁿ ndúúcu ejemplos chí 'téé nguée dáámá. Ní caⁿa yā: Véé 'áámá 'iiⁿyāⁿ chí chíinu yā dí'yú uvas na yáⁿāa yeⁿé yā. Ní din'dái yā 'áámá cheⁿ yeⁿē yáⁿāa 'líí. Ní din'dái yā 'áámá tanque naachí cuuvi tun'dáa yā nuūⁿnī yeⁿe uvas miiⁿ. Ní din'dái yā 'áámá torre nguuaⁿ yáⁿāa uvas naachi mozos yeⁿé yā 'cuëetinée sa diiⁿ sa cuidado n'gui'i uvas miiⁿ. Cuayiivi ní ca'a ya yáⁿāa miiⁿ mozos chí diíⁿ yā ntiⁿnyuⁿ yeⁿe yáⁿāa, ní cueⁿe yáⁿái yā. ²Taachí ndaā tiempo yeⁿe cosecha yeⁿe uvas miiⁿ, dueño miiⁿ dich'óo yā 'aama mozo yeⁿé yā nanááⁿ mozos chí idiⁿ sa ntiⁿnyu yeⁿe yáⁿāa yeⁿé yā chí nguai nca'a sa n'gui'i uvas parte yeⁿe cosecha chí itúneeⁿ dueño miiⁿ. ³Mozo miiⁿ ní cueⁿe sa, naati mozos ní sta'a sa mozo miiⁿ ní cheⁿe sa ní nadacho'o sa mozo miiⁿ ní nguée de'ē vee ca'a sa mozo. ⁴Tuu'mi ní dueño yeⁿē yáⁿāa miiⁿ nguëecunée yā dich'óo yā taama mozo. Mozos ní chíi tuu sa mozo miiⁿ ní 'nuūca'ai sa tiī sa ní chíi taaⁿ sa saⁿā miiⁿ. ⁵Dueño yeⁿe yáⁿāa miiⁿ dich'óo yā táámá mozo. Mozo miiⁿ, mozos chí diiⁿ ntiⁿnyuⁿ na yáⁿāa miiⁿ ch'iīⁿnuⁿ sa. Cuayiivi miiⁿ ní 'yaaⁿ ndái mozos dich'óo yā. Mozos ní náⁿa mozos miiⁿ ní cheⁿe sa saⁿā, tanáⁿā sa ní mozos miiⁿ ch'iīⁿnuⁿ sa saⁿā.

⁶Cánée cá daiya yā chí neⁿe taavi yā. Cuayiivi míⁿ ní dueño miiⁿ dich'óo yā daiya yā ní nadicadífínuuⁿ yā 'tíicā. Saⁿā daiyá ní diiⁿ sa honrar daiyá. ⁷Naati mozos chi idiíⁿ sa ntíiⁿnyuⁿ na yáⁿāa yeⁿé yā caⁿa sa nguaaⁿ maaⁿ sa: Sáⁿa 'cūū chi canee chi cuuví yeⁿé sa yáⁿāa herencia 'cūū. 'Caāⁿnuⁿ yú saⁿā ní cúuví yeⁿé yú yáⁿāa ndúucū chi véé yeⁿé. ⁸Tíicā ní sta'a sa saⁿā ní ch'iíⁿnuⁿ sa saⁿā ní tun'daa sa cuerpo yeⁿé sa 'áámá lado yeⁿe yáⁿāa miiⁿ.

⁹Tuu'mi ní Jesús ntiinguuneeⁿ yā 'iiⁿyāⁿ s'eeⁿ: ¿De'ē ra diiⁿ dueño yeⁿé yáⁿāa 'cúú? Ndaá yā ní 'caāⁿnúⁿ yā mozos chi idiíⁿ ntiiⁿnyuⁿ, ní ca'á yā yáⁿāa tánaⁿa 'iiⁿyāⁿ.

¹⁰¿Áá nguéé n'geeⁿ ndís'tií naachi canéé nguūⁿ na libro yeⁿe Ndyuūs? Ngaⁿa 'túucā:

Tuūu chi 'iiⁿyāⁿ dindái yā va'ai miiⁿ ní sta'á yā ní ch'εεcú yā 'áámá lado ti nguéé neⁿe yā. Tuūu 'cúú chí tuūu ch'εεte ní canéé tuūu ch'εεte yeⁿé na esquina yeⁿe va'ai.

¹¹Chuū ní Señor Ndyuūs diíⁿ yā, chuū ní 'áámá cosa chí ngeⁿe yiinu yú taachi inaaⁿ yú yeⁿé.

¹²Tuu'mi ní 'iiⁿyāⁿ s'eeⁿ nadacádíínuuⁿ yā chi cuta'á yā Jesús miiⁿ ní diíⁿ yā preso 'iiⁿyāⁿ ti déenu yā chí Jesús miiⁿ caⁿa yā ejemplo 'cūū chí 'téé nguéé dáámá chí yeⁿe yā. Naati 'va'á yā 'iiⁿyāⁿ yeⁿe yááⁿ miiⁿya, ní s'nééⁿ yā Jesús ní cueⁿe yā.

Chúū chi yeⁿé impuestos

(Mt. 22.15-22; Lc. 20.20-26)

¹³Cuayiivi miiⁿ 'iiⁿyāⁿ chí ngaⁿa ntiiⁿnyuⁿ yeⁿe yācū dich'óo yā

'iiⁿyāⁿ yeⁿe Herodes ndúucū n'duuvi 'iiⁿyāⁿ fariseos nanááⁿ Jesús miiⁿ.

Ní neⁿé yā chí Jesús castáⁿa yā nduudu yeⁿe yā ní caaⁿ máⁿ yā 'áámá nduudu yaadi. ¹⁴'Iiⁿyāⁿ s'eeⁿ ndaá yā nanááⁿ Jesús miiⁿ, ní caⁿa yā: N'dii Maestro, déenu 'nū chí n'dii ní ngaⁿa nī nduudu cuaacu ní nguéé diíⁿ nī cuenta yeⁿe chí ngaⁿa 'iiⁿyāⁿ yeⁿé. Ní nguéé ndéé nī cuidado táacā idinááⁿ 'iiⁿyāⁿ iⁿ'yeeⁿdí 'cūū naati ngi'cueeⁿ nī ndúucū nduudu cuaacu yúuní yeⁿé Ndyuūs. ¿Áá canéé chí nadí'í've 'nū na emperador César tuūmī yeⁿe recaudación yeⁿe yáⁿāa o nguéé?

¹⁵Jesús miiⁿ ní déenu yā chí nguéé n'daācā chí 'iiⁿyāⁿ s'eeⁿ diíⁿ yā. Ní caⁿa yā chí yā 'iiⁿyāⁿ s'eeⁿ: ¿De'ē cúuví chí neⁿé nī chí castaⁿá nī nduudu yeⁿé? Candéé nī 'áámá tuūmī, chí snaáⁿ.

¹⁶'Iiⁿyāⁿ ndéé yā tuūmī. Ní Jesús miiⁿ n'diichí yā ní tinguuneeⁿ yā 'iiⁿyāⁿ s'eeⁿ: ¿Dú'u naaⁿ chuū? ¿Du'ū chí duuchi canéé nguūⁿ? 'Iiⁿyāⁿ s'eeⁿ ní n'guεεcútaⁿa yā: Nááⁿ emperador César cānee.

¹⁷Tuu'mi Jesús miiⁿ ní caⁿa yā chí yā 'iiⁿyāⁿ s'eeⁿ: Nca'á nī tuūmī yeⁿe recaudación o impuestos chí yeⁿe emperador César miiⁿ chííⁿ chí yeⁿé sa, ní nca'a nī Ndyuūs chí yeⁿé yā. 'Iiⁿyāⁿ s'eeⁿ ní cueⁿe yiinu yā yeⁿé chí n'guεεcútaⁿa Jesús miiⁿ.

'Iiⁿyāⁿ ntíingúúneeⁿ Jesús yeⁿé chí iiⁿyāⁿ nnduuchi yā nguaaⁿ tináⁿa

(Mt. 22.23-33; Lc. 20.27-40)

¹⁸Tuu'mi ní ndaā n'duuvi 'iiⁿyāⁿ saduceos nanááⁿ Jesús. 'Iiⁿyāⁿ s'eeⁿ ní nguéé s'teenu yā chí tináⁿa ní nduuchi yā. Ní ntiinguuneeⁿ yā

Jesús chuū: ¹⁹N'díí Maestro, Moisés miiⁿ ní s'neeⁿ nguuⁿ yā yeⁿe s'uuúⁿ tí chuū: Nduuti chí 'áámá saⁿā 'cuūví sa ní cu'neeⁿ sa n'daataá yeⁿe sa ní nguéeⁿ daiya sa, tuu'mi ní 'dínū sā cuuví 'caandavaacu sá ndúúú n'daataá miiⁿ. Ní saⁿā miiⁿ ní 'cuūndī daiya sa lado yeⁿe 'dínū tináⁿā. ²⁰'Áámá saⁿā véé ndēēchē 'dínū sa ndúúú sa. Saⁿā miiⁿ chí vmnááⁿ vmaaaⁿ ch'iidivaacu sá ní ch'ií sa ní nguéeⁿ ch'iindī daiya sa ndúúú n'daataá yeⁿe sa. ²¹Saⁿā ndii chííⁿ ndii 'úúví mííⁿ ch'iindivaacu sa ndúúú n'daataá yeⁿe tináⁿā ní saⁿā miiⁿ ch'ií ntúúⁿ sa ní nguéeⁿ ch'iindi daiya sá ndúúú n'daata miiⁿ. 'Tiicá ntúúⁿ ch'ēenu saⁿā ndii chííⁿ ndii 'íínú. ²²Ndu'ū ndēēche sá ch'iindivaacu sá ndúúú tá ní mar 'áámá sá nguéeⁿ s'neeⁿ sa daiya sa ndúúú tá. Cuayiivi ní ch'ií ntúúⁿ n'daataá miiⁿ. ²³Tuu'mi ní taachí nduuchí yā nguaaⁿ tináⁿā, ¿chéé yā chí n'daataá yeⁿe yā taⁿā miiⁿ, caati ndu'u ndēēche yā ch'iindivaacú yā ndúúú tá? ²⁴Tuu'mi ní Jesús mííⁿ nan'guēcútaⁿa yā 'iiⁿyāⁿ s'eeⁿ: Ndís'tií ní nguéeⁿ déenu nī chí ngaⁿa nī, ti nguéeⁿ n'diichí nī naachi canée nguūⁿ na libro yeⁿe Ndyuūs yeⁿe chuū, ndíí nguéeⁿ ndúú n'diichi rá nī poder yeⁿe Ndyuūs. ²⁵Taachí 'iiⁿyāⁿ nanduuchí yā yeⁿe nguaaⁿ tináⁿā, ndíí nguéeⁿ ndúú n'daataá rá, ndíí nguéeⁿ ndúú saⁿā rá 'caandavaacu sa. 'Iiⁿyāⁿ s'eeⁿ 'cuētinée yā tan'dúúca ángeles yeⁿe va'ai cheeti nguuvi chí nguéeⁿ ch'iindivaacu yā. ²⁶Chuū chí yeⁿe tináⁿā miiⁿ chí nanduuchi yā nguaaⁿ tináⁿā, ¿'áá nguéeⁿ n'geēⁿ ndís'tií na libro yeⁿe Ndyuūs chí

dinguuⁿ Moisés tan'dúúca Ndyuūs yaa'ví yā Moisés, ndíí taachi canee sa nanááⁿ yáⁿá 'lííⁿ chí ngiichi? Ní 'túúca caⁿa Ndyuūs chii yā Moisés miiⁿ: 'Úú ní Ndyuūs yeⁿe Abraham, ndúúú Isaac, ndúúú Jacob. ²⁷Ndyuūs miiⁿ nguéeⁿ Ndyuūs yeⁿe tináⁿā ti yeⁿe 'iiⁿyāⁿ chí sндуuchi. Chííⁿ chí ndís'tií nguéeⁿ déenu nī chí ngaⁿa nī.

Mandamiento chí ch'ēete ca

(Mt. 22.34-40)

²⁸'Áámá maestro yeⁿe ley chí ch'iindiveéⁿ yā chí ndēē 'iiⁿyāⁿ saduceos s'eeⁿ, déenu yā chí Jesús miiⁿ nan'guēcútaⁿa n'daaca yā. 'Iiⁿyāⁿ miiⁿ ní ntiinguuneeⁿ yā Jesús: ¿Chéé mandamiento chí canee nguūⁿ chí ch'ēete n'dai ca?

²⁹Jesús nan'guēcútaⁿa yā: Mandamiento vmnááⁿ vmaaaⁿ miiⁿ ní chuū: 'Caandiveéⁿ nī, ndís'tií 'iiⁿyāⁿ yeⁿe Israel miiⁿ, Señor Ndyuūs yeⁿe yú ní 'áámá n'dyáⁿā Señor miiⁿ. ³⁰Canée chí dineⁿé nī Señor Ndyuūs yeⁿe nī ndúúú nuuⁿmaⁿ staaava yeⁿe nī, ndúúú nuuⁿmaⁿ alma yeⁿe nī, ndúúú nuuⁿmaⁿ vaanicadínūⁿ yeⁿe nī, ndúúú nducuéⁿē fuerzas yeⁿe nī. Chuū chí mandamiento chí vmnááⁿ vmaaaⁿ. ³¹Mandamiento chí canée nguūⁿ chí ndii chííⁿ ndii 'úúví mííⁿ tan'dúúca chí vmnááⁿ vmaaaⁿ 'āā 'tiicá ntúúⁿ: Dinéⁿe di 'iiⁿyāⁿ na niiⁿnuúⁿ vaacú di tan'dúúca chí neⁿe dí maāⁿ di. Nguéeⁿ 'áámá mandamiento chí canée nguūⁿ chí ch'ēete ca nguéeⁿ ti mandamientos s'uuⁿ.

³²Tuu'mi ní maestro yeⁿe ley caⁿa yā chii yā Jesús miiⁿ: N'dii Maestro,

cuáácú ngaⁿa nī. Cuaacu níⁿnyúⁿ chí ngaⁿa nī chí vee 'aama n'dyáⁿā Ndyuūs. Nguéé táámá 'āā tanduu rá 'iiⁿyāⁿ miiⁿ. ³³Níícú 'iiⁿyāⁿ canéé chí dinéⁿe yā Ndyuūs ndúúⁿcū nuuⁿmaⁿ staava yeⁿe yā, ndúúⁿcū nuuⁿmaⁿ vaanicadínūⁿ yeⁿe yā, ndúúⁿcū nuuⁿmaⁿ alma yeⁿe yā, ndúúⁿcū tanducuéⁿe fuerzas yeⁿe yā. Ní dineⁿe yā 'iiⁿyāⁿ na miiⁿnuúⁿ vaacú yā tan'dúúⁿcā chí neⁿé yā maáⁿ yā. Chuū chí n'daācā ca nguéé ti n'giiⁿnúⁿ 'iiti chí nga'a yā 'iiti lado yeⁿe ofrenda yeⁿé Ndyuūs ní yeⁿé tanducuéⁿe ofrenda chí ngicyáⁿā nátai.

³⁴Tuu'mi ní taachi ch'iindiveeⁿ Jesús tan'dúúⁿcā chí n'guεεcutaⁿa cuaacu sa chí caⁿa sa, Jesús caⁿa yā chí yā saⁿā miiⁿ: Nguéé yaⁿai canee di yeⁿe naachí Ndyuūs ngaⁿa ntiⁿnyuⁿ yā. Cuayiivi miiⁿ ní 'iiⁿyāⁿ 'āā ntεε candii cá yā ntiinguuneeⁿ ca yā Jesús mar 'áámá.

¿Du'u chíí Daiya Cristo miiⁿ?

(Mt. 22.41-46; Lc. 20.41-44)

³⁵Jesús ngi'cueeⁿ yā chεeti yaācū templo ní ngaⁿa yā: ¿Dε'ε cúúví chí maestros yeⁿe ley ngaⁿá yā chí Cristo miiⁿ ní daiya David? ³⁶Caati maaⁿ David miiⁿ caⁿa sá taachi yaaⁿvi Espíritu N'dai yeⁿé Ndyuūs chuū chí canéé nguūⁿ na libro yeⁿe Ndyuūs:

Señor miiⁿ caⁿa yā chí yā Señor yeⁿé: 'Cuundi dí lado ta cuaācú chí lado yeⁿe honor, ndíí taachi 'úú cu'neéⁿ 'iiⁿyāⁿ chí contra yeⁿe di ndii cuaaⁿ ndiyya maaⁿ ca'ā di tan'dúúⁿcā chí 'aama banco 'lífⁿ, 'tiicá yā.

³⁷David miiⁿ ngaⁿa sa chuū yeⁿe Señor yeⁿé yā. Maaⁿ ní 'táácá

cuuvi chíí chí Cristo miiⁿ ní daiya David miiⁿ? Nééné n'deēe 'iiⁿyāⁿ ch'iindiveeⁿ yā yeⁿe Jesús ndúúⁿcū vaadi yeenú.

Jesús ngaⁿa yā nuuⁿndi yeⁿe 'iiⁿyāⁿ chí ngi'cuéeⁿ yā yeⁿe ley

(Mt. 23.1-36; Lc. 11.37-54; 20.45-47)

³⁸Jesús ngaⁿa yā chuū taachi ngi'cueeⁿ yā: Cundée di cuidado yeⁿe maestros yeⁿe ley. 'Iiⁿyāⁿ s'eeⁿ ní n'gεētineé yiinú yā chí n'geenūu catecai yā. Ní taachi chíicá yā cuaaⁿ cyúúⁿ neⁿe yā chí 'iiⁿyāⁿ díⁿ yā saludar 'yā ndúúⁿcū respeto n'daācā. ³⁹Ní neⁿé yā sillas vmnááⁿ vmnaaⁿ yeⁿe honor taachí 'cuundi yā na yaācū sinagogas ndúúⁿcū lugar chí ch'εete taachi cheⁿe yā naachi véé 'viicu chí cheⁿe yā. ⁴⁰Ní ndivii yā va'ai yeⁿe n'daataá nguá'āa. Ní 'íícú cuunuuⁿ n'dé'ei yā chí idiíⁿ yā miiⁿ nduucú nééné n'deēe ngaⁿangua'á yā. 'Iiⁿyāⁿ s'eeⁿ ní ch'εete ca castigo yeⁿé yā nguuvi yeⁿe juicio.

Ofrenda yeⁿe n'daataá nguá'āa

(Lc. 21.1-4)

⁴¹'Áámá vmnéⁿēe Jesús véε yā na yāacū templo niiⁿnuúⁿ na cajas naachí 'iiⁿyāⁿ n'gíú yā ofrendas. N'gíúnu yā tan'dúúⁿcā chí díⁿ 'iiⁿyāⁿ táácā n'gíú yā tuumí lado yeⁿe ofrenda na cajas. N'diichí yā chí 'yaaⁿ n'dái 'iiⁿyāⁿ 'cuiica neené n'deēe tuumí ca'a yā. ⁴²Tuu'mi ní ndaā 'áámá n'daataá nguá'āa chí neene ndaachí canee tá. Táⁿā miiⁿ ní s'nuūⁿ tá na caja miiⁿ na 'uūví centavos chí cobre. ⁴³Tuu'mi ní Jesús yaa'vi yā discípulos yeⁿe yā ní caⁿa yā chí yā 'iiⁿyāⁿ s'eeⁿ: Cuaacu níⁿnyúⁿ ngaⁿá ngií ndís'tii

chí n'daataá nguá'aa 'cúu ch'εete ca nga'ā tá, nguéé ti taná'a yā chí s'nuúⁿ yā tuúmi na cajas. ⁴⁴Tí 'iiⁿyāⁿ s'eeⁿ ní nga'a yā yeⁿe chí ngaava yeⁿe yā; naati n'daataá míⁿ ní neené ndaachíí canee tá ní ca'ā tá tanducuéⁿe chí yeⁿe tá chí che'e tá.

Jesús nga'a yā chí yaacū templo miiⁿ ní ntúúvíí

(Mt. 24.1-2; Lc. 21.5-6)

13 Taachí Jesús miiⁿ nan'dáa yā yaacū templo miiⁿ 'áámá discípulo yeⁿe yā ní caⁿa yā chí yā Jesús: N'díí Maestro, n'diichí ní d'e'ē chúúcā n'gεete tuū s'eeⁿ ní d'e'ē chúúcā n'gεete va'ai s'eeⁿ yeⁿe yaacū templo.

²Jesús nán'guεεcútaⁿa yā: ¿Áá inaaⁿ nī va'ai templo? 'Muuⁿ ní nguéé cunee mar 'áámá tuū cuaaⁿ vmnááⁿ yeⁿe vi'í ti tanducuéⁿe ní cundεεve.

Jesús nga'a yā yeⁿe chíⁿ chí 'cuuⁿmiⁿ taachí 'āā cuéé 'cuiinu iⁿyēēⁿdi

(Mt. 24.3-28; Lc. 21.7-24; 17.22-24)

³Tuuⁿmi ní cheⁿé yā 'áámá yiicū chí nguuví Olivos, chí canéé niiⁿnuúⁿ na yaacū templo miiⁿ. Ní taachi Jesús vεé yā miiⁿ, Pedro ndúúcū Jacobo, ndúúcū Juan, ndúúcū Andrés ndaa yā nanáaⁿ yā chí caⁿa n'de'ei yā 'áámá nduudu ndúúcū Jesús. ⁴Ní caⁿa yā: N'díí Señor, néⁿe nū chí cuuví nī nús'uu ítíí cuaⁿā cuuví chuū? ¿D'e'ē senal 'cuuⁿmíⁿ nī nús'uu yeⁿe tiempo chí cuuvi tanducuéⁿe 'túúcā?

⁵Jesús nán'guεεcútaⁿa yā: Cundée nī cuidado chí mar 'áámá 'iiⁿyāⁿ nguéé canche'éí yā ndís'tií. ⁶Ti neéné 'yááⁿ 'iiⁿyāⁿ chí yā ndúúcū

chí duuchí ní canche'éí yā 'iiⁿyāⁿ ní caaⁿmáⁿ yā: 'Úú Cristo 'úú. 'Iiⁿyāⁿ s'eeⁿ ní canche'éí yā 'yaaⁿ n'dái 'iiⁿyāⁿ.

⁷Taachi ndís'tií 'caandiveéⁿ nī caandaá ní 'iiⁿyāⁿ 'va'a yā chí chíí caandaá nguéé idií'yá nī cuuvi ti 'tíícā canéé chí cuuvi. Naati chííⁿ ní 'āā 'cuéé tiempo chí ntuuvíí íⁿyeēⁿdí. ⁸Ti 'áámá nación ní 'cuuⁿmaⁿ ndúúcū táámá nación nī 'áámá gobierno ní 'cuuⁿmaⁿ yā ndúúcū táámá gobierno. Ní neéné n'deeε cuaaⁿ nuⁿ'u yáⁿā. Ní ndaa vaadi 'cuiicu ndúúcū dendu'ū chí dí'vaachií. Taachí cuuví dendu'ū chí 'túúcā ní chííⁿ ní cáámá cuunngá'á vaadi ya'ai.

⁹Dííⁿ nī cuidado maáⁿ nī ndís'tií ti 'iiⁿyāⁿ nca'a yā ndís'tií tá'āa 'iiⁿntyéⁿē. Tuuⁿmi ní 'cueⁿé yā ndís'tií na yaacū sinagogas. Ndís'tií nī canee chí caⁿ'á nī nanááⁿ 'iiⁿyāⁿ chí ngaⁿ'a ntiíⁿnyuⁿ yā ndúúcū reyes cáávā ntiíⁿnyuⁿ yeⁿé. Ní 'íícú cuuvi caaⁿmáⁿ nī yeⁿé ní 'caandiveéⁿ yā nduudu cuaacu. ¹⁰Taachí 'āā cuéé ndaa chí 'cuiinu iⁿyeēⁿdí, nduudu cuaacu 'cūū canéé chí caaⁿmaⁿ nanááⁿ nducyaaca 'iiⁿyāⁿ yeⁿe naciones yeⁿe núúⁿmáⁿ íⁿyeēⁿdí.

¹¹Taachí candée yā ndís'tií chí nca'a yā ndís'tií vmnááⁿ 'iiⁿntyéⁿē, nguéé nadicádínuuⁿ nī yeⁿé chí caaⁿmaⁿ nī. Nguéé diíⁿ núúⁿ yíiⁿnuⁿ nī yeⁿé. Caaⁿmaⁿ nī tan'dúúcā Espíritu N'dai yeⁿé Ndyuūs caaⁿmaⁿ cuuvi ndís'tií hora miiⁿ; ti nguéé ndís'tií chí caaⁿmáⁿ nī ti Espíritu N'dai yeⁿé Ndyuūs. ¹²Ní yeⁿe tiempo miiⁿ nguaaⁿ 'díínu yā nca'a vi'í yā chí 'cááⁿnúⁿ yā 'iiⁿyāⁿ. Ní 'íícú chíidá yā ní ca'a yā daiya yā. Ní daiya yā ní

ca'a yā chiidá yā ndúucū chεεcú yā ní 'caaⁿnúⁿ yā 'iiⁿyāⁿ. ¹³Nducyáácá 'iiⁿyāⁿ nguéé cunee yiinú yā chi ndís'tiī dííⁿ nī ntiíⁿnyuⁿ caavā 'úú. Naati 'iiⁿyāⁿ chi cuchéε yā ní 'aama canée yā ndúucū chi i'teenu yā yeⁿe Ndyuūs ndíí tiempo chi 'cuūvi yā ní nnguáⁿai yā. ¹⁴Taachí ndís'tiī 'āā snaaⁿ nī dendu'ū chi 'túúcā chi saⁿā profeta Daniel dinguúⁿ yā na libro yeⁿe Ndyuūs tiempo chi ch'óo tuu'mi ní 'iiⁿyāⁿ chi snée yā na yáⁿāa Judea canée chi caⁿá yā caanu yā ná yiicū n'geεε. ('Iiⁿyāⁿ chi 'cueēⁿ chuū canée chi cuuvi deenú yā yeⁿe chuū.) ¹⁵Nguuvi miiⁿ ní ndúúti chi 'áámá 'iiⁿyāⁿ canduú yā tííⁿ va'āi ní nguéé cuuvi núúⁿ nch'eeⁿ yā ní ndaa yā va'ai ní tun'dáa yā dendu'ū yeⁿe yā. ¹⁶Ní ndúúti chi 'áámá 'iiⁿyāⁿ canée yā na campo, ní nguéé cuuvi núú ndaa yā va'ai yeⁿe yā ní nta'a yā cotón yeⁿe yā. ¹⁷De'ε chúúcā yaⁿai yeⁿe n'daataá chi véé daiya tá chεeti tá ndúucū n'daataá chí ngiicu dacuá'āa yeⁿe tá nguuvi chi cáanu yā. ¹⁸Ndís'tiī, caaca nī Ndyuūs chi nguéé ch'óo chuū tiempo chi 'iiche. ¹⁹Ti nguuvi miiⁿ ní nééné 'cueenu 'iiⁿyāⁿ cuuvi tan'dúúcā chi mar 'áámá vmnéⁿēē 'āā cuéé cuuvi 'tíícā ndíí taachí Ndyuūs din'dái yā íⁿyeēⁿdí. 'Āā ntéé ndúú cuayiivi ra chí snaaⁿ yā dendu'ū chi 'tíícā. ²⁰Ndúúti chi Señor miiⁿ nguéé nadidúú'vi yā tiempo miiⁿ mar 'áámá 'iiⁿyāⁿ nguéé nnguuaⁿai yā. Naati ndiiⁿ nadidúú'vi yā cáávā 'iiⁿyāⁿ chi yeⁿé yā ti 'iiⁿyāⁿ miiⁿ Señor ndεεve yā.

²¹Tuu'mi ní ndúúti chi 'áámá 'iiⁿyāⁿ caaⁿmaⁿ yā cuuvi yā ndís'tiī: Cuín'dííchí nī, 'íngaā Cristo miiⁿ, o

cuín'dííchí nī, miiⁿ canee Cristo miiⁿya, nguéé cu'téénu nī 'iiⁿyāⁿ miiⁿ. ²²Ti ndaa 'iiⁿyāⁿ chi cristos chi falsos yā ndúucū 'iiⁿyāⁿ chi profetas chi falsos yā. Ní dííⁿ yā señales ndúucū vaadí n'giinu. Ní 'íícú cuuvi canche'éi yā 'iiⁿyāⁿ, ndíí 'iiⁿyāⁿ chí Ndyuūs ndεεve yā ndúúti chi chuū cuuvi dííⁿ yā. ²³Naati ndís'tiī ní 'cuεetinéé yaaⁿ nī. Ngaⁿá ngií ndís'tiī tanducuéⁿē chuū 'nááⁿ chí 'āā cuéé ndaa.

Táácā ndáá Saⁿa chi Daiya Ndyuūs

(Mt. 24.29-35, 42-44; Lc. 21.25-36)

²⁴Cho'óo chúú ní nguuvi miiⁿ chi 'cueenu nī cuuvi, 'yáⁿāa miiⁿ ní cúúví maāⁿ ní 'iīyū miiⁿ ní 'āā ntéé cuuvi dεεve. ²⁵Iiⁿnyuⁿ miiⁿ ní cun'dáa yeⁿē nanguuvi ní nducuéⁿē chi véé nanguuvi ní nuⁿu. ²⁶Tuu'mi ní snaaⁿ yā Saⁿā chi Daiya Ndyuūs chí ndaa sa nguaaⁿ meēēⁿ ndúucū poder yeⁿē sa chí ch'εεte taavi ní ndεεvé n'dai ngíi n'gai maāⁿ sa. ²⁷Tuu'mi ní Ndyuūs dicho'ó yā ángeles yeⁿe yā chí nadidáámá 'iiⁿyāⁿ yeⁿé yā chi Ndyuūs ndεεve yā yeⁿē núúⁿmáⁿ íⁿyeeⁿdí, ndii na yáⁿāa nducuéⁿē n'dai yeⁿe yáⁿāa ndúucū ndii na nducueⁿe nanguuvi.

²⁸Maaⁿ ní 'cueéⁿ nī yeⁿe ejemplo yeⁿe n'guíidíi yaaⁿ nguuvi: Taachí inguaaⁿnu duūⁿnē n'gaiyāá ní ican'daa tá'āa, 'āā déenu nī chí 'āā cuchíi tiempo yaāáⁿ. ²⁹Tiicá ntúúⁿ taachi snaaⁿ ndís'tiī chi cuuvi dendú'ū chi 'túúcā, 'āā deenú nī chí 'āā sneeⁿ niiⁿnuⁿ tiempo chi ndaa Saⁿā chi Daiya Ndyuūs. Ní 'āā nééné niiⁿnuⁿ cánee tiempo 'cūū. ³⁰Cuaacu níⁿnyúⁿ ngaⁿá ngií ndís'tiī: 'Iiⁿyāⁿ s'eeⁿ chi snée yā

maaⁿ 'āā cuéé 'cuūví yā neⁿe chi 'āā cuéé cuuví tanducuéⁿē chuū.
³¹Nánguuví ndúúcu ná yáⁿ'āā 'cūū ní chó'oo, naati nduudu yeⁿ'é nguéé cho'oo.

³²Naati yeⁿ'ē nguuví miiⁿ ndúúcu hora miiⁿ nguéé véé mar 'áámá 'iiⁿ'yāⁿ chi deenu yeⁿ'ē. Ndíí nguéé ndúú ángeles, yeⁿ'e va'ai chēeti nguuví ndíí nguéé ndúú Sáⁿ'ā chi Daiya Dendyuūs deenú yā yeⁿ'ē. Dámaāⁿ Chiida yú chi canée yā na va'ai chēeti nguuví deenu yā.

³³Chííⁿ chí ndís'tií ní 'cuētinéé yaaⁿ nī. Dicuéénaaⁿ nī ní caaⁿ'ma'ngua'á nī, ti nguéé déénu nī tíí cuaⁿ'ā ndaa hora miiⁿ. ³⁴Ejemplo chuū tan'dúúca 'áámá 'iiⁿ'yāⁿ chí caⁿ'a yā yaⁿ'ai. Taachi 'āā cuéé can'dáa yā na vaācu yā, caⁿ'a yā chii yā mozos yeⁿ'é yā chí ca'a yā ntiiⁿ'nyuⁿ 'áámá 'áámá mozo yeⁿ'ē sa. Ní cuuvi yā saⁿ'ā chí idiiⁿ cuidado yeⁿ'e cheendi va'āi miiⁿ chi cunéé yaaⁿ sa. Ní cueⁿ'e yā. ³⁵Maaⁿ ní ndís'tií 'cuētinéé yaáⁿ nī, ti nguéé déénu nī tíí cuaⁿ'ā ndaa dueño yeⁿ'e va'āi miiⁿ. Nguéé déénu nī nduuti chi ndaa yā n'gaaⁿ, o yaaⁿ chēete, o taachí 'cuaí tú'u, o cuaaⁿ na nguētiyaaⁿ. ³⁶Áá tií dácanaaⁿ ndaa yā ní nndaāca yā ndís'tií chí styaađu nī. ³⁷Chííⁿ chí ngaⁿ'á ngíí ndís'tií, ní ngíí nducyaaca 'iiⁿ'yāⁿ: 'Cuētinéé yaáⁿ yā.

Saⁿ'ā s'eeⁿ nadacádiinūⁿ sa taacā cuta'a sa Jesús

(Mt. 26.1-5; Lc. 22.1-2; Jn. 11.45-53)

14 Ná 'uūví nguūví ní cuuvā 'viicu yeⁿ'e pascua chí 'viicu yeⁿ'ē pan chí nguéé levadura yeⁿ'ē. Chiiduú n'gēete ndúúcu maestros

yeⁿ'e ley 'nuúⁿ yā taacā chí cuuvi cannche'elí yā Jesús ní cuta'á yā 'iiⁿ'yāⁿ ní 'caaⁿ'núⁿ yā 'yā. ²Naati caⁿ'a yā: Nguéé diiⁿ yú nguuví 'viicu tí 'iiⁿ'yāⁿ yeⁿ'e yāāⁿ Jerusalén miiⁿ didáⁿ'a yā ní diíⁿ yā vaadi 'caa'va ndúúcu nús'uu.

'Áámá n'daataá n'gií tá aceite na cuerpo yeⁿ'e Jesús

(Mt. 26.6-13; Jn. 12.1-8)

³Jesús canee yā na yāāⁿ Betania na vaacu Simón chí canée sá ndúúcu ca'ai chí nguuví lepra chí in'duuti cuerpo yeⁿ'ē sa. Taachí Jesús miiⁿ véé yā na mesa, ndaā 'áámá n'daataá nanáaⁿ yā. Táⁿ'ā miiⁿ ní ndēē tá 'áámá frasco yeⁿ'e alabastro ndiituú ndúúcu aceite perfume yeⁿ'e nardo chí ndēeve ngeeⁿ ní neené ya'ai chí'vē. Ní 'cuūⁿ tá frasco miiⁿ ní ch'eendaa tá aceite miiⁿ na tiíⁿ Señor Jesús miiⁿ. ⁴N'duuví discípulos chí snée yā miiⁿ nduuví táaⁿ yā ní caⁿ'a yā nguaaⁿ maaⁿ yā: ¿Dē'ē cuuví chí chingééⁿ ta aceite 'cūū? ⁵Ti cuuvi n'diicui yú ní ngo'o 'iinū ciento caadi ní cuuvi ca'a yú 'iiⁿ'yāⁿ chí nguéé yeⁿ'e yā. Ní nduuví taáⁿ yā ndúúcu tá.

⁶Naati Jesús miiⁿ ní caⁿ'a yā: 'Āā canee ra tá. Nguéé yaa'vi ní táⁿ'ā. ¿Dē'ē cúúví chí yaa'vi ní táⁿ'ā? Tá 'tii ní n'daācā idiiⁿ tá nduucú. ⁷'Iiⁿ'yāⁿ chí nguéé yeⁿ'e yā ní 'aama ca cánée yā ndúúcu nī. Ní ndís'tií ní cuuvi din'daacá nī nduucú yā taachi neⁿ'e nī; naati 'úú nguéé 'aama cunéé ndúúcu nī. ⁸Tá 'cūū ní diiⁿ tá tan'dúúca chí ch'ii tá perfume cuerpo yeⁿ'é maaⁿ chí 'āā cuéé 'cuūví, 'tíicā diiⁿ tá. Ní 'āā nnee 'cuií ta chuū 'úú taachí 'āā cuéé

'cueechí. ⁹Cuaacu níⁿnyúⁿ ngaⁿá ngí ndís'tii: 'Áā tíí nūuⁿ chí 'iiⁿyāⁿ caaⁿmáⁿ yā nduudu ngai yeⁿé yeⁿé chí nanguaⁿ'ai 'iiⁿyāⁿ na nūúⁿmáⁿ íⁿ'yeeⁿdī caaⁿ'maⁿ ntuúⁿ yā chí diiⁿ n'daataa 'cūū ní n'gaacú yā yeⁿé tá.

Judas Iscariote nca'a sa Jesús

(Mt. 26.14-16; Lc. 22.3-6)

¹⁰Tuu'mi ní Judas Iscariote, 'áámá chéé 'iiⁿyāⁿ naachi ndiichuuví discípulos, cheⁿe sá nanááⁿ chiiduú n'geete. Ní ngaⁿ'a sa táácā chí cuuvi ncaⁿā sa Jesús miiⁿ ná ta'a 'iiⁿyāⁿ s'eeⁿ. ¹¹Taachí 'iiⁿyāⁿ s'eeⁿ ch'iindiveéⁿ yā chuū, neené yeenú yā, ní caⁿ'a yā chí ca'a yā tuumí Judas miiⁿ cáávā chuū. Judas ní in'nuuⁿ sa de'ē hora chí nca'a sa 'iiⁿyāⁿ s'eeⁿ Jesús miiⁿ.

Naachí che'e nguiinū yeⁿe Señor Jesús miiⁿ

(Mt. 26.17-29; Lc. 22.7-23; Jn. 13.21-30; I Co. 11.23-26)

¹²Ndaā nguuví vmnāáⁿ vmnaaⁿ yeⁿe 'viicu chí che'é yā pan chí nguéé levadura yeⁿé, 'viicu taachi n'giiⁿnúⁿ yā 'iiti cuūchī yeⁿe pascua miiⁿ. Ní discípulos yeⁿe Jesús miiⁿ ntiinguuneéⁿ yā Jesús: 'Tíí neⁿe dí chí caⁿ'á nū in'nuúⁿ 'nū chí che'e nguiinū yú yeⁿe 'viicu pascua?

¹³Tuu'mi ní Jesús dicho'ó yā na 'uūví discípulos yeⁿe yā, ní caⁿ'a yā chí yā 'iiⁿyāⁿ: Ndís'tii cueⁿé nī yáāⁿ Jerusalén. Miiⁿ ní ndaacá nī 'áámá sáⁿā chí ndéé sa 'áámá 'cuuti cuééé nuūⁿnīⁿ. Can'dáa nī saⁿ'ā. ¹⁴Naachí ndaa sa va'ai miiⁿ, ní cuuví nī sáⁿ'ā chí yeⁿé va'ai miiⁿ: Maestro yeⁿe yú ngaⁿ'a yā 'tíicā: 'Tii canéé cuarto naachi che'e nguiinū yeⁿe pascua

ndúúcu discípulos yeⁿé? ¹⁵Tuu'mi ní chíⁿ'i yā 'áámá cuarto ch'ete ná ndiichi ndii 'úúví piso miiⁿ chí 'áá véé yaāⁿ. Miiⁿ ní in'nuúⁿ nī chí che'e yú.

¹⁶Discípulos cueⁿe yā ní ndaa yā ná yáāⁿ Jerusalén miiⁿ ní ndaāca yā tanducuéⁿé tan'duucā chí Jesús ngaⁿ'a yā. Ní 'iiⁿyāⁿ s'eeⁿ in'nuúⁿ yā chí che'e nguiinū yā yeⁿe 'viicu yeⁿe pascua miiⁿ.

¹⁷Taachí 'āā chíi chíinū míⁿ ndaā Jesús ndúúcu ndiichuuví discípulos yeⁿe yā. ¹⁸Taachí veteé yā na mesa miiⁿ chí che'e yā Jesús caⁿ'a yā chíi yā 'iiⁿyāⁿ s'eeⁿ: Cuaacu níⁿnyúⁿ ngaⁿ'á ngí ndís'tii, chí 'áámá chéé ndís'tii chí nge'é nī nduucú dííⁿ nī entregar 'úú.

¹⁹Tuu'mi ní discípulos ní s'nee ndaachi núúⁿ yā ní tuca'a yā tiinguuneeⁿ yā Jesús ca'áámá ca'áámá yā: 'Áá 'úú? Ní táámá yā ngaⁿ'a ntúuⁿ yā: 'Áá 'úú rá?

²⁰Jesús nan'gueecútaⁿ'a yā: 'Áámá chee naachi ndiichúúví chí dí'caāndá yā pan yeⁿé yā na cú'ú 'cūū nduucú caⁿ'á yā diiⁿ yā 'tíicā. ²¹Cuaacu, chí Saⁿ'ā chí Daiya Dendyuūs caⁿ'a sa 'cuenú sa cuuvi tan'dúúca chí ngaⁿ'a yeⁿé yā naachi canéé nguūⁿ na libro yeⁿé Ndyuūs. De'e chúúca y'ai yeⁿe saⁿ'ā chí nca'a sa 'úú chí Saⁿ'ā chí Daiya Ndyuūs. N'dáácā ca yeⁿé sa ndúúti chí nguēe ch'iindiyaāⁿ sa.

²²Taachí veteé yā nge'e yā, tuu'mi ní Jesús sta'á yā pan, ní nca'a yā gracias Ndyuūs cáávā pan miiⁿ. Ní n'deé yā pan ní ca'a yā discípulos. Ní caⁿ'a yā: Che'é nī pan caati tan'dúúca cuerpo yeⁿé 'tíicā.

²³Ní Jesús sta'á yā taza ndúúcu nuūⁿnīⁿ yeⁿe uvas. Ní taachi

nca'a yā gracias Ndyuūs, ca'a yā discipulos yeⁿé yā. Ní caⁿ'a yā. Nducyaaca ndís'tiī cu'ú nī nuūⁿnīⁿ uvas yeⁿe taza 'cūū. ²⁴Ní caⁿ'a yā chii yā 'iiⁿyāⁿ s'eeⁿ: Nuūⁿnīⁿ uvas miiⁿ tan'dúúca yuūⁿ yeⁿ'é, ní yeⁿ'e 'áámá compromiso chi ngai yeⁿ'é. Yuūⁿ yeⁿ'é chí cungeeⁿ ní cáávā 'yaaⁿ n'dái 'iiⁿyāⁿ. ²⁵Cuaacu níⁿnyúⁿ ngaⁿ'á ngíí ndís'tiī, chí 'āā ntéé cu'ú nuūⁿnīⁿ yeⁿ'e uvas na iⁿ'yeeⁿdí 'cūū ndíí nguuvi chí cu'ú naachí Ndyuūs ngaⁿ'a ntiiⁿnyúⁿ yā.

Jesús ngaⁿ'a yā chí Pedro ní caaⁿ'maⁿ sa chí nguéé in'diichi sa Jesús

(Mt. 26.30-35; Lc. 22.31-34; Jn. 13.36-38)

²⁶Taachí chíinu chiita yā himno, chí canción yeⁿ'e Ndyuūs nand'áa yā va'āi ní cueⁿ'é yā na yiicū chí nguuvi Olivos. ²⁷Tuu'mi ní Jesús caⁿ'a yā chii yā discipulos: Nducyaaca ndís'tiī cuuví 'cuinaáⁿ nī yeⁿ'é 'úú maaⁿnguínū caati ngaⁿ'a naachi canéé nguūⁿ na libro yeⁿ'é Ndyuūs 'túúca: 'Nuūcá'ai yā 'caaⁿ'núⁿ yā saⁿ'ā chí idiīⁿ sa cuidado 'iiti cuūchī ní 'iiti cuūchī s'eeⁿ ní caⁿ'á 'muuⁿ caⁿ'á miiⁿ tí. ²⁸Taachi 'úú nduuchí yeⁿ'e nguaaⁿ tináⁿ'ā, caⁿ'á vmnaaⁿ yeⁿ'é ndís'tiī na yáⁿ'āa Galilea.

²⁹Tuu'mi ní Pedro miiⁿ ní caⁿ'a sa chii sa 'iiⁿyāⁿ: 'Áará chí nducyaaca yā cuuví 'cuinaáⁿ yā, 'úú ní nguéé cuuví 'cuinaáⁿ.

³⁰Tuu'mi ní Jesús ní caⁿ'a yā chíiya Pedro: Cuaacu níⁿnyúⁿ ngaⁿ'á ngíí dii chí maaⁿnguīinu taachi 'āā cuéé 'cuaī tusáⁿ'ā 'uūvi cuuvi, 'iinū cuuvi cueeⁿdíftu di ngaⁿ'a di yeⁿ'é 'úú chí nguéé in'diichi di 'úú.

³¹Naati Pedro miiⁿ ní cheeⁿdiitū caⁿ'a sa: 'Áará chí 'cuūvi ndúucu nī, Maestro, nguéé ngaⁿ'á chí nguéé in'diichi N'dii. Ní nducyaaca discipulos ní 'tiicá ntúūⁿ caⁿ'a yā.

Jesús ngaⁿ'angua'á yā na jardín chí nguuvi Getsemaní

(Mt. 26.36-46; Lc. 22.39-46)

³²Tuu'mi ní ndaa yā na 'áámá jardín chí nguuvi Getsemaní, ní Jesús caⁿ'a yā chii yā discipulos yeⁿ'e yā: 'Cuéeté nī 'muuⁿ, neⁿ'e chí 'úú caⁿ'á caaⁿ'māⁿngua'á.

³³Ní Jesús candéε yā Pedro, ndúucū Jacobo, ndúucū Juan. Ní neené nadicádiinuⁿ Jesús ní néené s'neeⁿ ndaachí yiinú yā. ³⁴Ní caⁿ'a yā chii yā 'iiⁿyāⁿ s'eeⁿ: Alma yeⁿ'é neené ndaachi yiinú chí ya'āi chí 'cuūvi. 'Āā snéé núúⁿ nī 'muuⁿ, ní nguéé 'cuéeti yaadú nī.

³⁵Tuu'mi ní Jesús cueⁿ'e yā ta 'lííⁿ cuááⁿ vmnaaⁿ, ní candiitín'dii yā na yáⁿ'āa ní caⁿ'angua'á yā ní caⁿ'a yā: N'diī Chiidá, ndúúti chí cuuví ní nguéé dííⁿ nī yeⁿ'e chí 'cuenú cuuvi yeⁿ'e prueba 'cūū chí canéé chí cuuvi hora chí cuchii. ³⁶Tuu'mi ní naachí caⁿ'angua'á yā ní caⁿ'a yā: N'diī Chiidá, n'diī cuuvi dííⁿ nī tanducueⁿ'é. Nadinguáⁿ'ai nī 'úú yeⁿ'e chí 'cuenú cuuvi prueba 'cūū. Naati nguéé cuuví tan'dúúca chí 'úú neⁿ'é, naati tan'dúúca chí n'diī neⁿ'e nī.

³⁷Tuu'mi ní ndaa ntúúⁿ yā naachi snee discipulos yeⁿ'é yā, ní ndaāca yā discipulos chí stiyaadú yā. Ni Jesús caⁿ'a yā chí yā Pedro miiⁿ: Díí Simón, ¿Áá cyaadu di? ¿Áá nguéé icheé di cánduuchi di mar 'áámá hora? ³⁸Ndís'tiī 'cuéeti

nduuchí nī ní caaⁿmaⁿngua^a ní ní nguéé dííⁿ nī nuuⁿndi. Cuaacu níⁿnyúⁿ espíritu yeⁿe nī neⁿe diiⁿ n'daacáá, naati cuerpo yeⁿe nī ní 'āā duūvā.

³⁹Tuu'mi ní Jesús cueⁿe ntúuⁿ yā ní ngaⁿangua'a yā, ní caⁿa ntúuⁿ yā tan'dúucā chí caⁿa yā vmnaaⁿ.

⁴⁰Ní nguεεcunée yā ndaa ntúuⁿ yā naachi snée discipulos, ní ndaaca ntúuⁿ yā 'iiⁿyāⁿ s'eeⁿ stiyaadú yā. Ní 'āā ntée ngii ichεε yā ndúucū yaaⁿ ti nduutináaⁿ yā chí yaaⁿ náaⁿ yā. Ní 'iiⁿyāⁿ s'eeⁿ ní nguéé déenu yā chí n'guεεcútaⁿa yā. ⁴¹Cueⁿe yā ndii chiiⁿ ndii 'íínú cuuvi, ní ngaⁿangua'á yā. Ní taachi ndaa yā naachi snee discipulos, caⁿa yā: Ndí's'tií 'cuεetiyaadú nī ní ntaavi'tuunúúⁿ nī. 'Āā tiiní cā. 'Āā ndaā hora chí 'iiⁿyāⁿ nca'a yā 'úú Saⁿ'ā chí Daiya Dendyuūs na tá'ā saⁿ'ā s'eeⁿ chí dinuuⁿndi. ⁴²Nducueeⁿ ndí's'tií ní cuⁿ'ū yú. 'Āā cuchiiⁿ niiⁿnuúⁿ saⁿ'ā chí nca'a 'úú.

Chiichí yā Jesús ní candée yā 'iiⁿyāⁿ preso

(Mt. 26.47-56; Lc. 22.47-53; Jn. 18.2-11)

⁴³Naaⁿ chí Jesús indée yā ndaa Judas chí saⁿ'ā 'áámá yeⁿe ndiichuuví discipulos. Ní ndaa sa ndúucū n'dee n'dái 'iiⁿyāⁿ ndúucū machete 'uūví lados 'caāiⁿ ndúucū yáⁿ'á. Chiiduú n'gεete ndúucū maestros yeⁿe ley, ndúucū 'iiⁿyāⁿ ndiicúú chí ngaⁿa ntiiⁿnyuⁿ yeⁿe yaācū dichó'o yā 'iiⁿyāⁿ s'eeⁿ. ⁴⁴Judas miiⁿ chí nca'a sa Jesús 'iiⁿyāⁿ s'eeⁿ, ní ca'a sa 'aama seña. Ní caⁿa sa 'túucā: 'Iiⁿyāⁿ chí 'úú chí'neeⁿ cheendí, 'iiⁿyāⁿ miiⁿ chíí. Cuta'á nī 'iiⁿyāⁿ ní candée nī 'iiⁿyāⁿ ní din'daacá nī seguro 'iiⁿyāⁿ.

⁴⁵Taachí ndaā Judas nanááⁿ Jesús ní caⁿa sa: N'dií Maestro, Maestro. Ní 'neeⁿ cheendi sa 'iiⁿyāⁿ. ⁴⁶Tuu'mi ní sta'á yā Jesús ní candée yā preso 'iiⁿyāⁿ. ⁴⁷Naati 'áámá chéeⁿ 'iiⁿyāⁿ chí snée miiⁿ itun'dáa yā machete chí 'uuvi lados 'caāiⁿ yeⁿe yā ní 'nuucá'ai yā mozo yeⁿe chiiduú ch'εete ca ní chí'ica sa veēⁿ mozo miiⁿ. ⁴⁸Tuu'mi ní Jesús caⁿa yā chii yā nducyaaca 'iiⁿyāⁿ s'eeⁿ: 'Áá can'daā ndí's'tií ndúucū machete chí 'uūví lados 'caāiⁿ ndúucū yáⁿ'á chí cuta'á nī 'úú tan'dúucā chí 'úú 'áámá duucu 'úú? ⁴⁹Nguuvi nguuvi caneé na yáacū templo miiⁿ nguaaⁿ ndí's'tií chí ngi'cueéⁿ ní ndí's'tií ní nguεε sta'á nī 'úú. Chūú canée chí cuuvi ní cuuvi cunnuú ca'ā naachi canée nguūⁿ na libro yeⁿe Ndyuūs. ⁵⁰Tuu'mi ní nducyaaca discipulos s'neeⁿ yā Jesús miiⁿ dámaáⁿ yā ní cheenu yā.

Saⁿ'ā 'díí chí cueⁿe ngéenu

⁵¹Naati 'áámá saⁿ'ā 'dííⁿ ndaā sa ní cueⁿe sa ndúucū 'iiⁿyāⁿ s'eeⁿ. Ndeecu sa 'áámá n'dyáⁿ'ā sá'bana. 'Áámá yā sta'á yā saⁿ'a 'díí miiⁿ.

⁵²Naati saⁿ'ā 'dííⁿ miiⁿ ní s'neeⁿ sa sá'bana ní cueⁿe sa dácaa yuúcu sa.

Jesús nanááⁿ 'iiⁿntyéⁿe chí n'gεete ca yeⁿe yaācū

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Tuu'mi ní candée yā Jesús miiⁿ nanááⁿ chiiduú ch'εete ca. Ní miiⁿ nduuvidaamá yā nducyaaca chiiduú n'gεeté ndúucū 'iiⁿyāⁿ ndiicúú chí ngaⁿa ntiiⁿnyuⁿ yeⁿe yaācū ndúucū maestros yeⁿe ley. ⁵⁴Pedro miiⁿ ní cueⁿe yaⁿ'ai sa ndáa sa Jesús miiⁿ.

Ní ndaa sa ndii ch'v'āi yeⁿe va'ai chiiduú ch'ēete ca ní ch'iindí sa ndúúcu policías ní in'taavi cuutú sa dáámá ndúúcu yā ti miiⁿ ní ngiichi yaⁿā yeⁿé yā.

⁵⁵Chiiduú n'gēete ndúúcu nducyaaca yā chí nduvidaama in'nuúⁿ yā 'áámá prueba contra yeⁿe Jesús miiⁿ chí díiⁿ yā condenar Jesús chi 'caaⁿnúⁿ yā Jesús; naati nguéé ndaaca yā. ⁵⁶Neené 'yaaⁿ 'iiⁿyāⁿ ngaⁿa yā nduudu yaadi yeⁿe Jesús miiⁿ naati mar 'áámá yā nguéé dáámá ngaⁿa yā. ⁵⁷N'duuví yā ní ncueeⁿ yā ní caⁿa yā nduudu yaadi, ní caⁿa yā: ⁵⁸Nús'uu ní ch'iindiveeⁿ 'nū chí Jesús caⁿa yā 'túúcā: 'Úú ní nadituúv'í yáacu 'cūú chi saⁿā yeⁿe iⁿ'yeeⁿdí 'cūú din'dái sa. Ní ch'eti 'iinū nguuv'í nadin'dái taama chi nguéé saⁿā iⁿ'yeeⁿdí 'cūú din'dái sa.

⁵⁹Naati nguéé nduuv'idáámá nduudu yā yeⁿe chí ngaⁿa yā.

⁶⁰Tuu'mi ní chiiduú ch'ēete ca chi ngaⁿa ntiⁿ'nyuⁿ yeⁿe tanáⁿā chiidūu, ndúcueeⁿ yā nguaaⁿ nducyáácā 'iiⁿyāⁿ s'eeⁿ ní ntiinguuneeⁿ yā Jesús miiⁿ: 'Áá nguéé de'ē vee nan'g'uēcútaⁿa ní? 'De'ē chí ngaⁿá yā yeⁿe ní? 'De'ē ngaⁿa ní maáⁿ ní yeⁿe ní?

⁶¹Jesús míiⁿ 'āā ntéé caⁿa yā. Ní nguéé n'guéécútaⁿa yā yeⁿe mar 'áámá. Chiiduú ch'ēete ca miiⁿ ntiinguuneeⁿ ntúuⁿ yā Jesús, ní caⁿa yā: 'Áá dii Cristo, Daiya Dendyuūs chí n'dai taavi?

⁶²Jesús caⁿa yā chíi yā 'iiⁿyāⁿ s'eeⁿ: 'Tíicā 'úú. Ndís'tii ní caⁿa ní snaaⁿ ní Saⁿā chí Daiya Dendyuūs chí 'cuūndi sa lado yeⁿe honor yeⁿé Ndyuūs chí véé tanducuéⁿ poder yeⁿe yā. Ní ndaa sa nguaaⁿ meééⁿ yeⁿe nanguuvi.

⁶³Tuu'mi ní chiiduú ch'ēete ca chíin'cuūⁿ sa catecai sa, ní caⁿā sa: 'De'ē ca diiⁿ yú testigos chí n'nuuⁿ yú? ⁶⁴'Áá ch'iindiveeⁿ ní denduú chí ngaⁿā sa contra Ndyuūs. 'Táácā tuumicadíinuⁿ ní? Nducyaaca 'iiⁿyāⁿ ngaⁿa yā chí condenado Jesús chí 'cuuví yā.

⁶⁵Tuu'mi ní n'duuví yā ní ca'a nee daíⁿ yā Jesús ní n'gaad'í yā nduutináaⁿ yā ndúúcu tíinūⁿ. Ní policías ndúúcu tá'á yā ch'eⁿe yā naaⁿ Jesús. Ní caⁿa yā: Caaⁿmaⁿ dí 'duú' ch'eⁿe dii?

Pedro miiⁿ ní ngaⁿā sa chí nguéé n'diichi sá Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶Pedro miiⁿ ní canee sa ch'v'āi cuaaⁿ ndiiyā. Ní ndaa 'áámá n'daataá chí díiⁿ mandado yeⁿe chiiduú ch'ēete ca nanááⁿ Pedro miiⁿ. ⁶⁷Ní n'diichi tá chí in'taavi cúutū sa na yaⁿā. Ní cānee táⁿā miiⁿ ní ch'iinu tá Pedro. Tuu'mi ní caⁿa tá: Dii ntúūⁿ di canee dí ndúúcu Jesús yeⁿe yāāⁿ Nazaret.

⁶⁸Naati Pedro miiⁿ cheeⁿdiitū sa, ní caⁿā sa: 'Úú ní nguéé in'diichi 'iiⁿyāⁿ, ndíi nguéé deenú chí ngaⁿā di. Ní can'dáa sa cuaaⁿ ch'v'āi naachi indaa yā. Tuu'mi ní 'caí tusáⁿā. ⁶⁹Táⁿā chí idiiⁿ mandado miiⁿ ch'íinú ntúūⁿ ta sáⁿā, ní caⁿa tá chíi tá 'iiⁿyāⁿ chí snée yā miiⁿ: Sáⁿa 'cūú 'áámá ch'éé saⁿā chí cachiica ndúúcu Jesús.

⁷⁰Naati Pedro miiⁿ ní nngueēcunee sa cheeⁿdítu sa. Cuayiivi miiⁿ ní 'iiⁿyāⁿ chí snée yā miiⁿ ní caⁿa ntúūⁿ yā Pedro: Cuaacu chí dii ní dáámá chí

cachiica di ndúucū Jesús ti dii ní ye^{ne} yá^{na}aa Galilea, ní nduudu ye^{ne} di tan'dúucā 'iiⁿyāⁿ s'eeⁿ.

⁷¹Tuu'mi ní Pedro miiⁿ ní 'caa'va sa, ní cunncaā ca^{na} sa. Ní 'cái sa “por Ndyuūs”: Nguéé n'diichí 'íiⁿyāⁿ 'cúu.

⁷²Tuu'mi ní túsa^{na} miiⁿ 'cai ntúuⁿ tī ndii 'úuví cuuvi. Ní Pedro miiⁿ ní n'gaācu sa chi Jesús ca^{na} yā chii yā sa^{na}: 'Naaⁿ chi 'āā cuéé 'cuaí túsa^{na} 'uūví cuuvi, 'āā 'íínú cuuvi cheeⁿdiitu di chí nga^{na} di chi nguéé n'diichi di 'úú. Taachi n'adícādíínuuⁿ sa chuū, ní cheēcū sa.

Jesús nanááⁿ Pilato

(Mt. 27.1-2, 11-14; Lc. 23.1-5; Jn. 18.28-38)

15 Taachí chidεεve, chiiduú n'geeté ní nduuvi daamá yā ndúucū 'iiⁿyāⁿ ndiicūu chi nga^{na} n'tiiⁿnyuⁿ ye^{ne} yaācū, ndúucū maestros ye^{ne} ley, ndúucū nducyaaca 'iiⁿyāⁿ n'geete. Ní ndēē chiichí yā Jesús ní candée yā 'iiⁿyāⁿ nanááⁿ gobernador Pilato. ²Tuu'mi ní Pilato miiⁿ intiinguuneeⁿ yā Jesús: ¿Áá díí Rey ye^{ne} 'iiⁿyāⁿ Israel s'eeⁿ chí judíos? Ní Jesús nan'guεεcúta^{na} yā: N'dii nga^{na} cuaacú nī ti 'tíicā. ³Chiiduú n'geete ní neené n'deeē nááⁿ chí nga^{na} yā contra ye^{ne} Jesús naati Jesús nguéé nan'guεεcúta^{na} yā ye^{ne} mar 'áámá. ⁴Tuu'mi ní Pilato miiⁿ ní nan'guεεcunée yā ntiinguunéeⁿ yā Jesús miiⁿ: ¿Áá nguéé de'ē vee nán'guεεcúta^{na} nī? Cuin'díichí nī ye^{ne}é tanducué^{ne} chí nguéé n'daacā nga^{na} yā ye^{ne} nī.

⁵Naati Jesús miiⁿ ní nguéé de'ē vee nan'guεεcúta^{na} yā. Chíⁿ chí Pilato miiⁿ che^{ne} yiinú yā ní nguéé déenu yā de'ē n'adícādíínuuⁿ yā.

Pilato ca^{na} yā chí 'íiⁿyāⁿ s'eeⁿ candée yā Jesús chí 'caaⁿnúⁿ yā 'iiⁿyāⁿ

(Mt. 27.15-31; Lc. 23.13-25; Jn. 18.38-19.16)

⁶Canée 'áámá costumbre ye^{ne} 'iiⁿyāⁿ Israel s'eeⁿ chí n'dεechi yā 'áámá sa^{na} chí canuuⁿ vácūu nguuvi 'viicú ye^{ne} pascua. 'Áámá sa^{na} chí preso sa chí 'iiⁿyāⁿ Israel ne^{ne} yā, 'tíicā canee chí diiⁿ Pilato miiⁿ. ⁷Ní canuuⁿ 'áámá sa^{na} vácūu chí nguuvi Barrabás ndúucū ta n'duuvi sa^{na} chí 'niiⁿnuⁿ sa 'iiⁿyāⁿ taachi 'āā diiⁿ caandá yā contra gobierno miiⁿ. ⁸Ní 'iiⁿyāⁿ Israel s'eeⁿ ní ndaa yā nanááⁿ Pilato miiⁿ, ní chiica yā chí Pilato ní dííⁿ yā tan'dúucā costumbre ye^{ne} yā. ⁹Ní Pilato miiⁿ nan'guεεcúta^{na} yā: ¿Áá ne^{ne} nī chí n'dεēchí Rey ye^{ne} 'iiⁿyāⁿ Israel?

¹⁰Tí Pilato miiⁿ deenu yā chí chiiduú n'geete nca'á yā Jesús miiⁿ cáāvā vaadi ngueéé. ¹¹Naati chiiduú n'geete chinuú yā 'iiⁿyāⁿ ye^{ne} yāāⁿ Jerusalén chí caaca yā Barrabás ti n'daacā chí n'dεechii yā sa^{na} chí nguuvi Barrabás. ¹²Tuu'mi ní Pilato miiⁿ intiinguuneeⁿ yā: ¿De'ē ne^{ne} nī chí dííⁿ ndúucū 'iiⁿyāⁿ chí ndís'tii nga^{na} nī Rey ye^{ne} 'iiⁿyāⁿ Israel?

¹³'Iiⁿyāⁿ s'eeⁿ nan'guεεcúta^{na} yā ní 'cai yiicú yā: Cu'neeⁿnga'á nī 'iiⁿyāⁿ.

¹⁴Pilato miiⁿ ní ca^{na} yā chii yā 'iiⁿyāⁿ s'eeⁿ: ¿De'ē chí nguéé n'daacā ndííⁿ sá^{na} 'cūu? Naati 'iiⁿyāⁿ s'eeⁿ ní nan'guεεcunée yā 'cai yā: Cu'neeⁿnga'á nī 'iiⁿyāⁿ.

¹⁵Tuu'mi ní Pilato miiⁿ chí nguéé ne^{ne} yā chí nduuvi táaⁿ 'iiⁿyāⁿ s'eeⁿ ye^{ne}é yā, n'dεechii sá Barrabás miiⁿ. Cuayiivi ní ca^{na} n'tiiⁿnyuⁿ sa chí

'cueⁿé yā Jesús miiⁿ. Ch'iinu ch'eⁿé yā Jesús miiⁿ ní nca'a sa Jesús miiⁿ 'iiⁿyāⁿ chí cu'nééⁿnga'á yā.

¹⁶Tuu'mi ní soldados romanos candéé sa Jesús vaacuyááⁿ na cuarto yeⁿe palacio miiⁿ chí nguuvi Pretorio, ní yaa'ví yā tanáⁿá soldados ní nduuvidaamá yā miiⁿ.

¹⁷Ní s'nuúⁿ yā catecai morado cu'áa Jesús miiⁿ. Ní s'nuúⁿ yā tiiⁿ Jesús miiⁿ 'áamá corona chi ndeenyú ndúúcū yaaⁿ. ¹⁸Tuu'mi ní tucá'a yā 'cai yā: Cunduuchi ní n'dií, Rey yeⁿe 'iiⁿyāⁿ Israel.

¹⁹Ní ch'eⁿé yā tiiⁿ yā ndúúcū 'áamá taaⁿ nduu. Ní ca'a nee dáíⁿ yā Jesús ní nchiinti'yá yā nanáaⁿ yā, ní diíⁿ yā honrar 'iiⁿyāⁿ. ²⁰Ch'iinu ch'iiⁿnyuⁿnééⁿ yā yeⁿe Jesús 'tííca, ndivíi yā catecai chí morada ní 'nuuⁿ 'nuūⁿ ntúuⁿ yā catecai maáⁿ yā. Cuayiivi tun'dáa yā Jesús ní s'neeⁿnga'á yā 'iiⁿyāⁿ.

S'nééⁿnga'á yā Jesús

(Mt. 27.32-44; Lc. 23.26-43; Jn. 19.17-27)

²¹'Áamá saⁿá yeⁿe yáⁿáa Cirene chí nguuvi sa Simón, chí chiidá Alejandro ndúúcū Rufo, ndáa sa cheⁿe sa cueti. Taachí cho'o sa cyúúni miiⁿ, soldados a fuerza di'cuítu yā saⁿá chí candéé sa cruz yeⁿe Jesús miiⁿ.

²²Ní candéé yā Jesús 'áamá lado yeⁿe yáaⁿ Jerusalén na lugar chí nguuvi Gólgota chí neⁿe caaⁿmaⁿ nduudu yeⁿe yú, Lugar ní 'Iini Nga'ai Tiííⁿ. ²³Ní ca'á yā chí chí'i Jesús vino chí staⁿa yā ndúúcū yaātā yaāa chí nguuvi mirra, naati Jesús nguéé chí'i yā. ²⁴Tuu'mi ní chí'neeⁿnga'á yā Jesús. Ní soldados ní tun'dáa yā suertes yeⁿé yā

ndúúcū na catecai Jesús miiⁿ, ní n'diichí yā cheē chí candéé 'aama 'aama yā.

²⁵N'geecú nuuⁿ yeⁿe ngéetiyaⁿ miiⁿ taachí s'neeⁿnga'á yā 'iiⁿyāⁿ.

²⁶Ni s'nééⁿ yā 'áamá letrero na tiiⁿ cruz yeⁿe Jesús miiⁿ. Ní letra chí cánéé nguūⁿ na tabla miiⁿ ní ngaⁿá yeⁿe nuūⁿndi yeⁿe yā. Ní cánéé nguūⁿ chuū: Rey yeⁿe 'iiⁿyāⁿ yeⁿe ndaata Israel. ²⁷Dáamá ndúúcū Jesús s'neeⁿnga'á yā 'uūvi sáⁿá chí duucu. 'Áamá ní lado tá cuaacú yā táamá ní lado ta 'cueé yā. ²⁸Tííca ní chí cuaacu naachi canéé nguūⁿ na libro yeⁿé Ndyuūs 'tííca: Chídídúúché yā ndúúcū 'iiⁿyāⁿ chí véé nuuⁿndi yeⁿe yā.

²⁹'Iiⁿyāⁿ chí ngo'ó yā nanáaⁿ cruz miiⁿ cunncaá ngaⁿa yā yeⁿe Jesús. Idi'nú'u yā tiiⁿ yā ní cunncaá n'dai cheendi yā ní ngaⁿa yā: Díí chí ndiituú'ví di yaācū ní nadacueéⁿ di cheeti 'iinū nguuvi, ³⁰nadanguáⁿāi maāⁿ di. Dii ní nch'eeⁿ di na cruz.

³¹Tiicá ntúūⁿ chiiduú n'geete ndúúcū maestros yeⁿe ley duuchinéeⁿ yā Jesús. Ní ngaⁿa yā nguaaⁿ maáⁿ yā: 'Iiⁿyāⁿ miiⁿ nadinguáⁿai yā táamá 'iiⁿyāⁿ naati maāⁿ ní nguéé ngí nadinguáⁿai yā maāⁿ yā 'iiⁿyāⁿ. ³²Ndúúti chí 'iiⁿyāⁿ miiⁿ chí Cristo miiⁿ snaaⁿ yú 'iiⁿyāⁿ nch'éeⁿ yā na cruz maāⁿ. Tuu'mi ní cu'téenu yú. Ní ndíí 'iiⁿyāⁿ chí ca'neeⁿnga'á yā daama ndúúcū Jesús miiⁿ ní cunncaá ngaⁿa yā yeⁿe yā.

Jesús chí'i yā

(Mt. 27.45-56; Lc. 23.44-49; Jn. 19.28-30)

³³Taachí chíi maⁿa nguuvi miiⁿ chí maāⁿ núúⁿ máⁿ íⁿyeéⁿdi ndii ná

n'geecu 'íínú chiinū. ³⁴Āā táánduū n'geecu 'iinu Jesús miiⁿ ní 'cai yiicú yā: Eloi, Eloi, ¿lama sabactani? (chí neⁿe caaⁿmaⁿ nduudu yeⁿē yú: N'díí Ndyuūs yeⁿé, n'díí Ndyuūs yeⁿé, ¿de'ē cuuvi chí s'neé nī maaⁿ 'úú dámaáⁿ?)

³⁵N'dúú'ví 'iiⁿyāⁿ chí snee yā miiⁿ ní ch'iindiveéⁿ yā ní caⁿ'a yā: 'Caandiveéⁿ nī, n'gai yā yeⁿe profeta Elías miiⁿ.

³⁶Ní ndaā 'áámá soldado ngeenu yā ní taachi chiitu 'áámá esponja yeⁿe vinagre s'néeⁿ yā esponja miiⁿ na 'áámá ndúú ní ca'a yā chí chí'i Jesús. Ní caⁿ'a yā: Āā canee rá yā. N'diichi yú nduuti chí 'áá chí profeta Elías miiⁿ ní nádich'eēⁿ sa 'iiⁿyāⁿ.

³⁷Tuu'mi ní Jesús 'cai yiicú yā ní chí'i. ³⁸Ní cortinas yeⁿe yaacū templo chíi 'uuvi taāⁿ, steēⁿ naavtáⁿā ndíí cuááⁿ 'niⁿnúⁿ ndíí cuááⁿ ndiiyā. ³⁹Ní 'áámá saⁿā romano chí ngaⁿ'a ntiⁿnyuⁿ yeⁿē cien soldados chééndii sa nanááⁿ Jesús miiⁿ. Taachí n'diichī sa ní ch'iindiveēⁿ sa taacá 'cai Jesús ní taacá chíi yā, soldado miiⁿ ní caⁿ'a sa: Cuaacu níⁿnyúⁿ chí sáⁿ'a 'cūū ní Dáiyá Dendyuūs saⁿā.

⁴⁰Snée ntúūⁿ n'duuvi n'daataá n'giinu yaⁿ'ai tá. Ní ndúúcū n'daata s'ééⁿ míⁿ canee ta María yeⁿe yāāⁿ Magdala, ndúúcū tá María chí chæcuú José ndúúcū Jacobo chí nguuvi Menor, ndúúcū n'daataá chí nguuvi Salomé. ⁴¹N'daata s'ééⁿ ní can'dáa yā Jesús miiⁿ ní dichí'vé yā Jesús taachi cachiicá yā yáⁿāa Galilea. Ní neené 'yaaⁿ ca n'daataá snée yā miiⁿ, n'daataá chí ngaⁿ'a yā daama ndúúcū Jesús miiⁿ na yáāⁿ Jerusalén.

Ch'iichí yā cuerpo yeⁿe Jesús miiⁿ
(Mt. 27.57-61; Lc. 23.50-56; Jn. 19.38-42)

⁴²Taachí chiinū nguuvi miiⁿ chí viernes chí ch'iindiyaáⁿ yā cáāvā 'viicu pascua miiⁿ nguuvi chí cuuvi dæeve nguuvi chí ntaavi'tuunúúⁿ yā 'iiⁿyāⁿ, ⁴³ndaā José yeⁿe yāāⁿ Arimatea. Saⁿ'ā miiⁿ ní saⁿ'a ch'æete yeⁿe Junta Ch'æete yeⁿe 'iiⁿyāⁿ Israel. Ní cunee ngiinu sa nguuvi chí Ndyuūs ndaa yā ní ngaⁿ'a ntiⁿnyuⁿ yā. Ní ndúúcū valor ndaā sa nanááⁿ gobernador Pilato miiⁿ. Ní caⁿ'a sa Pilato miiⁿ chí nca'a yā cuerpo yeⁿe Jesús. ⁴⁴Pilato miiⁿ ní cueⁿe yiinú yā chí 'āā chíi Jesús miiⁿ ní yaa'vi yā saⁿ'ā chí ngaⁿ'a ntiⁿnyuⁿ yeⁿe soldados chí cuchii sa nanááⁿ yā. Taachí ndaa sa ní 'iicu tiinguuneeⁿ yā saⁿ'ā: ¿Áa cuaacu chí chíi Jesús? ⁴⁵Taachí soldado centurión miiⁿ ngaⁿ'a sa chí cuaacu, tuu'mi ní Pilato miiⁿ ca'a yā orden chí ca'a sa cuerpo yeⁿe Jesús miiⁿ José miiⁿ. ⁴⁶Cuayiivi ní José cái sa 'áámá sávana chí fina ní nadicheeⁿ sa cuerpo miiⁿ ní sta'a sa ní ch'æcū sa cuerpo miiⁿ ná sávana miiⁿ. Ch'iinu maaⁿ ní s'nuūⁿ sa cheeti 'áámá yáinyāⁿ ní níⁿnuúⁿ canee 'áámá tuūu ch'æeté. Ní s'nuúⁿ yā tuūu ch'æete cheendi yáinyāⁿ miiⁿ. ⁴⁷Tá María Magdalena ndúúcū María chí chæcuú José cueⁿé yā ní n'diichí yā naachí ch'æēchi Jesús miiⁿ.

Jesús nduuchi yā yeⁿē nguuaⁿ tináⁿā
(Mt. 28.1-10; Lc. 24.1-12; Jn. 20.1-10)

16 Taachi chó'oo sábadu, nguuvi chí ntaavi'tuunúúⁿ yā, María yeⁿe yāāⁿ Magdala, ndúúcū María chí chæcuú Jacobo,

ndúúcu n'daata chi Salomé cai yā perfumes chi cueendái yā vmnááⁿ yeⁿē cuerpo yeⁿē Jesús miiⁿ ní cueⁿe yā. ²Neené tyaaⁿ yeⁿē nguuvi vmnááⁿ vmnaaⁿ yeⁿé ndēēte chi domingo taachí can'dáá 'yáⁿā n'daatā s'eeⁿ ndaá yā na yáinyāⁿ miiⁿ. ³Ní ngāⁿa yā nguááⁿ maáⁿ yā: ¿Du'ū ndivíi tuū yeⁿē yú taachí ndaā yú cheendi yáinyāⁿ?

⁴Taachí ndaa yā, tuu'mi ní n'diichi yā chi tuū ch'etē n'dai miiⁿ 'āā ntéé canéé na lugar yeⁿē. ⁵Ní taachí ndaa yā ch'etē yáinyāⁿ, miiⁿ n'diichi yā 'áámá saⁿā 'dííⁿ vee sa lado tá cuaācú ní canúúⁿ sá catecai ch'éenū sa ní cuéē. Ní n'daata s'eeⁿ dii'yá yā chíi. ⁶Sáⁿā miiⁿ ní caⁿā sa: Nguéé dii'yá ní cuuvi. Ndís'tii ní in'nuúⁿ nī cuerpo yeⁿe Jesús yeⁿe yáāⁿ Nazaret, 'iiⁿyāⁿ chí iiⁿyāⁿ s'eeⁿ ca'nééⁿnga'a yā. Náátí 'iiⁿyāⁿ miiⁿ ní 'āā ndúúchí yā yeⁿē nguaaⁿ tináⁿā ní nguéé yā 'muuⁿ. Cuin'diichi nī naachí canuúⁿ yā. ⁷Ndís'tii cuinaⁿā nī ní cuuvi nī discípulos yeⁿe yā, ndúúcu Pedro, chí Jesús miiⁿ ní caⁿā yā vmnááⁿ ndís'tii na yáⁿāa Galilea. Mííⁿ snaáⁿ nī 'iiⁿyāⁿ tan'dúúca chí Jesús caⁿa yā chíi yā ndís'tii ndúúcu tanáⁿā 'iiⁿyāⁿ.

⁸N'daata s'eeⁿ ní cunaⁿā yā ngeenu yā yeⁿe na yáinyāⁿ, ti neené cueⁿe yiinú yā ní yiinduuví yā. Nguéé de'ē vee caⁿā yā chíi yā mar 'áámá 'iiⁿyāⁿ, ti 'va'á yā.

Jesús che'enaáⁿ yā yeⁿe ta María Magdalena

(Jn. 20.11-18)

⁹Taachí Jesús nduuchi yā chidēve nguuvi domingo chí nguuvi vmnááⁿ vmnaaⁿ yeⁿe ndēēte

miiⁿ, vmnááⁿ vmnaaⁿ che'enaáⁿ yā nanááⁿ María Magdalena, n'daataa chí nn'divíi yā ndēēchē espíritus yeⁿe yááⁿnguiinūⁿ yeⁿē ta. ¹⁰Táⁿā miiⁿ ní caⁿa tá ní chíi tá 'iiⁿyāⁿ chí chíicá yā ndúúcu Jesús miiⁿ. Ní ngeecú 'iiⁿyāⁿ s'eeⁿ chí neené ndaachíi yiinu yā. ¹¹Ní taachí 'iiⁿyāⁿ s'eeⁿ ch'iindiveéⁿ yā chí Jesús miiⁿ nduuchi yā yeⁿe nguaaⁿ tináⁿā ní chí táⁿā miiⁿ n'diichi tá Jesús, nguéé s'teenú yā.

Jesús che'enaáⁿ yā yeⁿē 'uūvi discípulos yeⁿe yā

(Lc. 24.13-35)

¹²Cho'ōo chúū, ní Jesús che'enaáⁿ yā yeⁿē 'uuvi 'iiⁿyāⁿ chí cueⁿé yā na yúúni. Ní Jesús dííⁿ yā tan'dúúca chí nguē déenu yā yeⁿe chí ch'ó'ōo. ¹³Ní cuayiivi 'iiⁿyāⁿ s'eeⁿ ní cunaⁿā yā ní caⁿa yā chíi yā tanáⁿā discípulos. 'Tiicá ntúū discípulos ní nguéé s'teenú yā.

Jesús idich'ó'o yā 'iiⁿyāⁿ apóstoles yeⁿe yā

(Mt. 28.16-20; Lc. 24.36-49; Jn. 20.19-23)

¹⁴Chii chíinū nguuvi domingo miiⁿ, ní Jesús che'enaáⁿ yā yeⁿē ndu'ū ndiicháámá discípulos yeⁿe yā, taachi 'iiⁿyāⁿ s'eeⁿ v'etē yā na mesa. Ní Jesús tuūvi iinú yā ndúúcu yā ti discípulos nguéé s'teenú yā ní ch'echi staava yeⁿé yā ti discípulos nguéé s'teenú yā 'iiⁿyāⁿ chí ngaⁿa yā chí n'diichi yā Jesús chí 'āā nduuchi yā yeⁿē nguaaⁿ tináⁿā. ¹⁵Ní caⁿa yā chíi yā discípulos: Cuéⁿe nī núúⁿmán nación yeⁿe íⁿyeeⁿdí ní caaⁿmán nī ndúúdu cuaacu yeⁿē chí nanguáⁿai yā nanááⁿ nducyaaca 'iiⁿyāⁿ. ¹⁶'Iiⁿyāⁿ chí i'teenú yā ní ngeedínúⁿniⁿ yā,

ní nanguaⁿai yā yeⁿe nuuⁿndi yeⁿe yā. Naati 'iiⁿ'yāⁿ chi nguéé i'téénu yā cuuví yā condenado. ¹⁷Níícu señales yeⁿe poder miiⁿ canéé ndúúcū 'iiⁿ'yāⁿ chi i'téénu yā 'úú. Ndúúcū chi duūchí tun'daá yā espíritus yeⁿe yááⁿ'nguiinūⁿ yeⁿe 'iiⁿ'yāⁿ ní cuuví caⁿ'á yā táámá davaacu chí ngai. ¹⁸Ní nduuti chí cuta'á yā ndúúcū ta'a yā 'áámá cúú ní nguéé de'ē daño diíⁿ tī ndúúcu yā. Ní nduuti chí cu'ú yā de'ē chí veneno miiⁿ nguéé diiⁿ daño 'iiⁿ'yāⁿ. Ní cun'duú yā ta'a yā vmnaaⁿ yeⁿe 'iiⁿ'yāⁿ chí ngítā ní 'iiⁿ'yāⁿ s'eeⁿ ní nduūvā yēⁿe yā.

Jesús cundáa yā va'ai cheeti nguuvi

(Lc. 24.50-53)

¹⁹Ch'íínú caⁿ'a Señor Jesús ndúúdu' cūū ndúúcū discípulos yēⁿe yā ní cundáa yā na va'ai cheeti nguuvi. Ní ch'iindí yā lado yeⁿe honor yeⁿ'é Ndyuūs. ²⁰Discípulos ní cueⁿe yā, ní caⁿ'a yā nduudu cuaacu yeⁿ'ē chí nanguaⁿai yā ndu'ū cuaaⁿ. Maaⁿ Señor Jesucristo ngiinnee yā discípulos 'íícu canee n'daācā ndúúdu' yeⁿe yā cáávā señales ndúúcū vaadī n'giinu chí diíⁿ yā. 'Tíícā chii.

NDUUDU N'DÁÍ CHÍ DÍNGUŪⁿ APÓSTOL LUCAS

Yeⁿe cáávā chí idingúúⁿ yā carta 'cūū

1 Nééné 'yaaⁿ 'iiⁿ'yāⁿ nguaaⁿ s'uuúⁿ neⁿ'é yā idingúúⁿ yā dendú'ū chí chíi, chííⁿ chí s'uuúⁿ deenu yú chí nduudu cuaacu. ²Tíicā tan'dúúcā chí 'iiⁿ'yāⁿ s'eeⁿ n'diichí yā tanducuéⁿ'ē ndíí taachí chí nga'ā, 'iiⁿ'yāⁿ s'eeⁿ ní chí'cueeⁿ yā s'uuúⁿ. 'Iiⁿ'yāⁿ s'eeⁿ candée yā nduudu cuaacu yeⁿ'é Ndyuūs ní ngaⁿ'á yā nduudu miiⁿ. ³Úú, Lucas, idingúúⁿ yeⁿ'é díí Teófilo cáávā chí deenú chí díí ní n'dai di. 'Tiicā ntúūⁿ 'úú ní nadicádiinúúⁿ chí idingúúⁿ yeⁿ'ē di tanducuéⁿ'ē chí chíi. Díiⁿncā n'diichí tanducuéⁿ'ē ndúúⁿcū cuidado ndíí taachí nga'ā. ⁴Túúⁿcā idingúúⁿ ní tuumicadínuuⁿ di chεε chí nduudu cuaacu yeⁿ'ē dendú'ū chí 'iiⁿ'yāⁿ chí'cueeⁿ yā díi.

Yeⁿe chí ángel yaaⁿ'vi yā
chí ch'iindiyāⁿ Juan

⁵Tiempo miiⁿ chí 'iiⁿ'yāⁿ Herodes miiⁿ chí chíi yā rey yeⁿ'e yáⁿ'āa Judea, canée 'áámá chiiduú chí nguuví yā Zacarías. Chiiduú miiⁿ ní yeⁿ'e grupo yeⁿ'e Abías. Ní n'daataá yeⁿ'e Zacarías ní nguuvi tá Elisabet. Ní Elisabet miiⁿ ní yeⁿ'e ndaata

yeⁿ'e Aarón. ⁶Ndúú 'uuví yā ní n'dai taaví yā nanááⁿ Ndyuūs. 'Iiⁿ'yāⁿ s'eeⁿ nguée de'ē vee dííⁿ yā chí nguée n'daacā ndúúⁿcū 'iiⁿ'yāⁿ caati s'neeⁿ veéⁿ yā nducuéⁿ'ē nduudu chí ngaⁿ'a 'iivú Ndyuūs. ⁷'Iiⁿ'yāⁿ s'eeⁿ nguée daiyá yā, ti Elisabet miiⁿ nguée taaví yā daiyá yā. Ní nduu 'uuví yā ní 'āā ndiicú yā.

⁸'Áámá nguuvi, taachi tuneⁿ turno yeⁿ'e grupo yeⁿ'e Zacarías chí díiⁿ ntiiⁿ'nyuⁿ yeⁿ'e chiiduú chí dichí'íve yā na yáacū templo yeⁿ'é Ndyuūs, 'tíicā dííⁿ Zacarías ntiiⁿ'nyuⁿ yeⁿ'e chiiduú nanááⁿ Ndyuūs. ⁹Ní tan'dúúⁿcā costumbre yeⁿ'e chiiduú s'eeⁿ, tuneⁿ Zacarías miiⁿ chí cunndaa yā na yáacū templo yeⁿ'e Ndyuūs ní 'neeⁿ yaⁿ'a yā incienso. ¹⁰Ní nducyaaca 'iiⁿ'yāⁿ snée yā cuaaⁿ ch'va'āi yáacū templo ní ngaⁿ'angua'á yā neⁿ'e chí ngiichi incienso chεeti yaacū templo. ¹¹Zacarías miiⁿ canee yā na yaacū. Ní che'enaāⁿ yeⁿ'e Zacarías miiⁿ 'áámá ángel chí Ndyuūs dichó'o yā. Ní ángel mííⁿ chééndii yā lado tá cuaacu yeⁿ'ē nátaí naachi n'giichi incienso miiⁿ. ¹²Ní taachi Zacarías miiⁿ n'diichí yā ángel miiⁿ 'āā ntéé deenú yā de'ē chí dííⁿ yā ní díi'ya

taaví yā chii. ¹³Naati ángel miiⁿ ní caⁿa yā: N'dií Zacarías, nguéé 'va'á nī, ti Ndyuūs ní ch'iindiveéⁿ yā chí caⁿ'angua'á nī. Ní 'cuundiyaāⁿ 'áámá daiya n'daataá yeⁿ'é nī Elisabet miiⁿ, ní cu'neéⁿ nī nguuvi sa Juan. ¹⁴Ní cuuvi yeenu taaví nī cáávā saⁿ'ā 'lííⁿ. Ní 'yaaⁿ n'dái 'iiⁿ'yāⁿ cuuvi yeenu yā cáávā chí 'cuundiyaāⁿ dacua'ā miiⁿ. ¹⁵Caati daiyá nī miiⁿ ní cuuvi ch'eete sa nanááⁿ Ndyuūs. Nguéé cu'u sa vino ndíí nguéé ndúú cu'u sa de'ē vee chí cuuvi cu'v'i sa. 'Āā canee sa ndúúcu Espíritu N'dai yeⁿ'é Ndyuūs ndíí taachi 'āā cuéé 'cuundiyaāⁿ sa. ¹⁶Saⁿ'ā miiⁿ ní diiⁿ sa chí 'yaaⁿ taavi ca daiyā 'iiⁿ'yāⁿ Israel nguεεcunee yā ní i'téenu yā Ndyuūs yeⁿ'e yú. ¹⁷Daiyá nī, Juan 'cūū, ní caⁿ'a sa vmnaaⁿ yeⁿ'ē Señor Jesucristo. Ní canee sa ndúúcu espíritu ndúúcu poder tan'dúúca chí canee profeta Elías ndii cuááⁿ vmnaaⁿ. Saⁿ'ā miiⁿ ní diiⁿ sa chí 'cuεetinéé n'daācā 'iiⁿ'yāⁿ chí n'geete ndúúcu daiya yā. Nífcú 'iiⁿ'yāⁿ cuuvi cu'téenu yā tan'dúúca Ndyuūs neⁿ'é yā chí cu'téenu yā, ní tan'dúúca tanáⁿ'ā 'iiⁿ'yāⁿ chí n'dai i'téenu yā. Ní 'tífcā caⁿ'a sa diiⁿ sa chí 'iiⁿ'yāⁿ s'eeⁿ 'cuεetinéé yaáⁿ yā chí cuuvi cu'téenu yā Señor Jesús taachi ndaa yā.

¹⁸Tuu'mi ní Zacarías miiⁿ ní tiinguuneeⁿ yā ángel miiⁿ: ¿Táácā cu'teenú chí ngaⁿ'a nī? caati 'úú ní 'āā ndiicúú 'úú, 'tiicá ntúūⁿ n'daataá yeⁿ'é.

¹⁹Angel miiⁿ n'guεécútáⁿ'a yā ní caⁿ'á yā: 'Úú ángel chí nguuvi Gabriel chí canee chí dííⁿ ntiíⁿ'nyuⁿ nanááⁿ Ndyuūs. Dendyuūs dich'ó yā 'úú. Ní 'úú yaa'ví n'dií ní cuuvi

nduudu n'dái 'cūū n'dií. ²⁰Maaⁿ ní cuuvi 'díí'mi nī ní 'āā ntéé cuuvi caaⁿ'máⁿ nī ndii chó'oo chúū taachi cunuuⁿ ca'ā tiempo yeⁿ'ē, ti nguéé chí'teenú nī nduudu yeⁿ'é taachi ngaⁿ'á chí chuū chí cuuvi.

²¹Neⁿ'e chí chíi chuū, 'iiⁿ'yāⁿ s'eeⁿ chí snée yā chuva'ai yáacū templo chí snée ngiinu yā Zacarías miiⁿ cueⁿ'e yíínú yā chí Zacarías miiⁿ ní chí'naáⁿ yā cheeti yaacū templo yeⁿ'é Ndyuūs. ²²Taachi Zacarías miiⁿ ní nan'dáa yā cheeti yaacū 'āā ntéé ngii ngaⁿ'a yā. 'Iiⁿ'yāⁿ s'eeⁿ ní tuumicadíínuuⁿ yā chí véé 'áámá visión chí n'diichí Zacarías miiⁿ taachí canee yā cheetí yaacū templo. Zacarías miiⁿ díta'á yā de'ē chí neⁿ'e caaⁿ'máⁿ yā ti chíi 'díí'mi yā.

²³Taachí chí'inū turno chí 'áámá ndeete yeⁿ'e servicio chí diiⁿ yā ntiíⁿ'nyuⁿ cheeti yaacū templo Zacarías miiⁿ ní cunaⁿ'á yā na vaacu yā. ²⁴Cho'ó tiempo 'cūū ní n'daataá yeⁿ'é yā chí Elisabet miiⁿ ní chí'indi dácu'a yeⁿ'é yā ní 'áámá canúuⁿ ta na vaacu ta nyuⁿ'u 'iyyū. Ní neené nacadíínuuⁿ ta. Ní ngaⁿ'a ta maaⁿ ta: ²⁵Chuū chí Señor Ndyuūs miiⁿ ní dííⁿ yā nduucu na nguuví 'cūū ní dííⁿ yā chí 'āā ntéé 'cuinaáⁿ nanááⁿ 'iiⁿ'yāⁿ.

Angel caⁿ'á yā chí 'cuundiyaāⁿ Jesús

²⁶Cuayiivi chí ch'íínú jaaⁿ 'iyyū chí Elisabet miiⁿ chí'indi dácu'a yeⁿ'e tá ní Ndyuūs dich'ó yā ángel Gabriel taama vmnéⁿ'ēe. Ní cueⁿ'é yā na 'áámá yáāⁿ chí nguuvi Nazaret chí yeⁿ'ē yáⁿ'āa Galilea. ²⁷Ndyuūs dich'ó yā ángel Gabriel miiⁿ nanááⁿ 'áámá n'daataá chí

cuiinú chi nguuvi tá María. María miiⁿ ní caⁿá yā chi 'caandavaacú yā ndúúcū 'aama saⁿā chi nguuvi José. Saⁿá 'cuū ní yeⁿe ndaata yeⁿe rey David chi ndí tiempo chi 'āā ch'ó'oo. ²⁸Angel miiⁿ ní sndaa yā naachi canéé María ní caⁿa yā: N'diī, María, yeenú taavi nī chi Ndyuūs neⁿe taavi yā n'diī. Señor Ndyuūs caneé yā ndúúcū n'diī. Ndyuūs di'viicu cá yā n'diī nguaaⁿ nducyaaca n'daataá yeⁿe iⁿ'yeeⁿdí 'cūū.

²⁹Taachi María miiⁿ ch'iindiveéⁿ yā chuū, cueⁿe yiinú yā ní chistaⁿa vaadi cadíinuⁿ yeⁿe yā yeⁿe nduudu yeⁿe ángel miiⁿ. Ní nadicádiinuⁿ yā: ¿D'é'ē neⁿe caaⁿ'maⁿ nduudú 'cūū? ³⁰Tuu'mí ángel miiⁿ ní caⁿa yā: N'diī, María, nguéé 'va'a nī, ti véé taavi favor yeⁿe nī nanááⁿ Ndyuūs, ti Ndyuūs dineⁿé yā n'diī. ³¹Ní cuuvi daiyá nī ní 'cuūndi 'áámá saⁿā daiyá nī, ní cuuvi nguuví yā JESÚS.

³²Daiyá nī cuuvi ch'ēete n'dai yā ní 'iiⁿ'yāⁿ s'eeⁿ ngaⁿá yā chi daiyá nī ní Daiyá Dendyuūs chi ch'ēete taavi ca. Ní Señor Ndyuūs caⁿa yā díⁿ yā chi daiyá nī ní cuuví yā rey lado yeⁿe rey David tan'dúúcā nguuvi chí 'āā cho'oo. ³³Ní caaⁿ'maⁿ ntiⁿ'nyúⁿ yā yeⁿe 'iiⁿ'yāⁿ yeⁿe Israel cueⁿe daāⁿ'maⁿ. Ní naachi caaⁿ'maⁿ ntiⁿ'nyúⁿ yā ní 'áámá cūnee.

³⁴Tuu'mi ní María caⁿá yā chii yā ángel: ¿Taaca cuuví chuū, ti 'úú ní nguéé isaⁿā yeⁿe?

³⁵Angel miiⁿ ní nan'guēcútaⁿá yā: Ndúúcū poder yeⁿe Ndyuūs chi canéé na va'ai ch'ēeti nguuvi Espíritu N'dai yeⁿe Ndyuūs ní ndaaⁿ yā vmnaaⁿ yeⁿe n'diī. Ní cu'neéⁿ yā

'daaⁿ'núⁿ yā tan'dúúcā meēéⁿ vmnaaⁿ yeⁿe n'diī ní 'licu cuuvi ch'ó'oo yeⁿe nī chí dacuaⁿ'á 'líⁿ chí 'cuundiyaāⁿ miiⁿ 'tíicā cunée yā yeⁿe Ndyuūs ní cuuvi nguuví yā 'iiⁿ'yāⁿ chí d'ēeve chí Daiya Dendyuūs 'iiⁿ'yāⁿ. ³⁶Ní n'diichí nī. Prima yeⁿe nī chí nguuví Elisabet miiⁿ, 'cuundii ntúūⁿ 'áámá daiyá yā maaⁿ chí 'āā ndiicú yā. 'Áā jaaⁿ 'iiyu daiyá yā ch'ēetí yā, n'daataa miiⁿ chí 'iiⁿ'yāⁿ s'eeⁿ ngaⁿ'a yā chí nguēe 'cuūndi daiya yā. ³⁷'Tíicā diiⁿ Ndyuūs caati 'iivú Ndyuūs cuuvi díⁿ yā tanducueⁿe chí neⁿe yā díⁿ yā.

³⁸Tuu'mi ní María miiⁿ ní caⁿá yā: 'Úú criada chí ngaⁿ'ā ntiⁿ'nyuⁿ 'iivú Ndyuūs yeⁿe. Maaⁿ ní Ndyuūs díⁿ yā nduucú tan'dúúcā chí caⁿ'a yā chí díⁿ yā. Taachi ch'iinu caⁿ'a yā chuū, ángel miiⁿ ní cunaⁿ'a yā.

María miiⁿ cheⁿé yā n'diichi yā Elisabet

³⁹Nguuvi s'eeⁿ María miiⁿ nūuⁿ cueⁿe yā na yúúní ní ndāa yā na yāāⁿ Judá. ⁴⁰Ní ndāa yā na vaacu Zacarías miiⁿ ní yaa'ví yā Elisabet. ⁴¹Taachi Elisabet miiⁿ ch'iindiveéⁿ yā nduudu yeⁿe María dacuaⁿ'āá miiⁿ ní nuⁿ'u ch'ēeti Elisabet miiⁿ. Ní Elisabet míⁿ chiitu Espíritu N'dai yeⁿe Ndyuūs táⁿ'ā. ⁴²Ní caⁿ'a yā ndúúcū nduudu dítuú: D'é'ē chúúcā n'dai n'diī nguaaⁿ nducyaaca n'daataá. Ní n'dai taavi daiyá nī chí 'cuūndi yā. ⁴³¿Du'ú 'úú chí ndāa ch'ēecu Señor Ndyuūs yeⁿe chí yaa'ví yā 'úú? ⁴⁴Ti taachi ch'iindiveéⁿ nduudu yeⁿe nī, dacuaⁿ'ā yeⁿe nuⁿ'u ch'ēetí tan'dúúcā chí yeenu taavi yeⁿe. ⁴⁵D'é'ē chúúcā n'dai dii chí chí'téenu di caati cúúví

cuaacu tan'dúucā chi Señor Ndyuūs caⁿa yā.

⁴⁶Tuu'mi María ní caⁿa yā:

Alma yeⁿé i'teenú taavi Ndyuūs ní dich'εεté Ndyuūs.

⁴⁷Ní staava yeⁿé ní yeenú n'dai chi i'teenú Ndyuūs. Ní Ndyuūs nadinguáⁿai yā 'úú yeⁿe nuuⁿndi yeⁿé.

⁴⁸Ti Ndyuūs n'diichí yā 'úú chi pobre 'úú ní dichii'vé Ndyuūs, ti ndíí maaⁿ nducyáácá 'iiⁿyāⁿ caaⁿmaⁿ yā yeⁿe 'úú: Dε'ε chúucā n'dai 'úú.

⁴⁹Ti Ndyuūs chi véé taaví poder yeⁿé yā dííⁿ yā nduucú cosas chí ch'εεte n'dai. Ní Ndyuūs ní dεēvē taaví yā.

⁵⁰Ní Ndyuūs ya'ai 'iinu taaví yā caavā nducyaaca 'iiⁿyāⁿ chi i'téenu yā yeⁿe yā tiempo chi chó'oo, 'tiicá ntúūⁿ tiempo maaⁿ, ní 'tiicá ntúūⁿ tiempo chi cuchii.

⁵¹Dendyuūs 'āā diiⁿ yā vaadi n'dai ch'εεte ndúucū poder yeⁿé yā, níícú dííⁿ yā ganar yeⁿe staava yeⁿé 'iiⁿyāⁿ chi dich'εεté yā maáⁿ yā.

⁵²Ndyuūs divíí yā 'iiⁿntyéⁿē chi ngaⁿa ntiiⁿnyuⁿ yeⁿe trono yeⁿé yā, ní dich'εεté yā 'iiⁿyāⁿ ndiicúúⁿ.

⁵³Ndyuūs ca'á yā cosas chi n'dai taavi 'iiⁿyāⁿ chí ch'iindiveéⁿ yā yeⁿe yā. Ní nguéé dííⁿ yā dε'ε vεε cáávā 'iiⁿyāⁿ s'eeⁿ chi nguéé neⁿé yā chi Ndyuūs nnee yā 'iiⁿyāⁿ s'eeⁿ.

⁵⁴Ndyuūs chinnee yā s'uuúⁿ chi 'iiⁿyāⁿ yeⁿe Israel ti dichíí'vé yú 'iiⁿyāⁿ. Ní nn'gaacú yā yeⁿe s'uuúⁿ ní nduuví ya'ái taaví yā yeⁿe s'uuúⁿ.

⁵⁵Ndyuūs cueⁿe daāⁿmaⁿ idiíⁿ yā tan'dúucā chi caⁿa yā 'iiⁿyāⁿ yeⁿe ndaata yeⁿe yú, ní ndúucū chiida yú Abraham ndúucū 'iiⁿyāⁿ yeⁿé yā ndíí cuaaⁿ vmnaaⁿ.

'Túucā ngaⁿa María miiⁿ.

⁵⁶Tuu'mi ní María miiⁿ canée yā ndúucū Elisabet tan'dúucā 'íínú 'iiyū. Cuayiivi ní cunaⁿá yā na vaacu yā.

Yeⁿé chí ch'iindiyāāⁿ Juan chí cheedínuūⁿníⁿ

⁵⁷Taachí snuū ca'ā 'iiyū yeⁿe dacua'ā miiⁿ, Elisabet miiⁿ ch'iindiyāāⁿ 'áámá daiya yā chí saⁿā.

⁵⁸Iiⁿyāⁿ na niiⁿnuúⁿ va'āi ndúucū 'iiⁿyāⁿ yeⁿé yā yeenú n'dai yā ndúucū yā taachí ch'iindiveéⁿ yā chí Ndyuūs ní ya'ai taaví yā Elisabet miiⁿ. ⁵⁹Ch'iinū dacua'ā 'lífⁿ niiⁿníⁿ nguuví, ní 'iiⁿyāⁿ ndāa yā na vaacú Elisabet chí diiⁿ yā circuncidar dacua'ā miiⁿ. Níícú 'iiⁿyāⁿ s'eeⁿ neⁿé yā cu'neeⁿ yā chí cuuví nguuví sá Zacarías tan'dúucā chí nguuví chiida sa Zacarías. ⁶⁰Naati cheecu sa mííⁿ caⁿa yā: Nguéé 'tíicā. Juan cuuví ngúúví sá.

⁶¹Tuu'mi caⁿa 'iiⁿyāⁿ s'eeⁿ chíí yā cheecu sá miiⁿ: ¿Dε'ε cáávā? Mar 'áámá 'iiⁿyāⁿ yeⁿe ní nguéé nguuví yā 'tíicā.

⁶²Ndúucū chí dit'a yā ntiinguunéeⁿ yā chíida sa taacā néⁿe yā chí cuúví ngúúví sá.

⁶³Zacarías miiⁿ ní 'neeⁿ ta'á yā naachi canee 'áámá caaca ní dingúúⁿ yā chuū: Chí Juan duuchi sa. Tuu'mi ní nducyaaca 'iiⁿyāⁿ ní cueⁿe yiinú yā. ⁶⁴Caati hora mííⁿ nūūⁿ, Zacarías miiⁿ nacan'dāa nduudu yeⁿe yā. Níícū tuu'mi tuca'á

yā caⁿa yā: De'ē chūúcā ch'ēete Dendyuūs. ⁶⁵Ní nducyáácá 'iiⁿyāⁿ niiⁿnuúⁿ va'ai 'di'ya taavi cá yā chií. Ní yeⁿe chi chó'ōo, chuū ní caⁿa nducyáácá 'iiⁿyāⁿ na yāⁿ chi snúⁿ cuaaⁿ yaⁿ'āi yeⁿe chi snéé na yiicū s'eeⁿ yeⁿe yáⁿ'āa Judea. ⁶⁶Ní nducyáácá 'iiⁿyāⁿ chi cadiinuuⁿ yā yeⁿe chuū ní nacádiinuuⁿ yā na staava yeⁿe yā. Ní caⁿa yā 'áámá yā ndúúcū taama yā: ¿De'ē cuuvi ndúúcū dacua'a lííⁿ chi 'tíicá? Caati 'tíicā Dendyuūs miiⁿ ní canéé ndúúcū dacua'ā miiⁿ.

Zacarías caⁿa yā yeⁿe chi Dendyuūs caⁿá yā diiⁿ yā ndúúcū dacua'āa miiⁿ

⁶⁷Zacarías, chiídāa dacua'āa miiⁿ, chiitúú 'iiⁿyāⁿ ndúúcū Espíritu N'dai yeⁿé Ndyuūs ní caⁿa Zacarías nduudu chí caⁿa Ndyuūs chí caaⁿ máⁿ yā. Ní caⁿa yā tan'dúúcā 'áámá profeta chi candēe nduudu yeⁿé Ndyuūs:

⁶⁸De'ē chūúcā n'dai Señor Ndyuūs yeⁿe 'iiⁿyāⁿ Israel chi ndāa yā nanaaⁿ s'uuúⁿ chi nadinguáⁿ'ai yā s'uuúⁿ, ní yeⁿé yā s'uuúⁿ.

⁶⁹Ní tee yā s'uuúⁿ 'áámá 'iiⁿyāⁿ chi nééné vee poder yeⁿe yā chi nadinguáⁿ'ai yā s'uuúⁿ chi 'iiⁿyāⁿ miiⁿ yeⁿe ndaata yeⁿe rey David chi dichíí'vē Ndyuūs ndíi cuaaⁿ vmnaaⁿ.

⁷⁰Ní Ndyuūs diíⁿ yā chí cuaacu tan'dúúcā chi caⁿa yā cáávā nduudu yeⁿe profetas chí caⁿa yā tiempo chi 'āā 'naaⁿ n'dai.

⁷¹Ní caⁿa yā chi Ndyuūs nadinguáⁿ'ai yā s'uuúⁿ yeⁿe 'iiⁿyāⁿ chi tááⁿ yā yeⁿe yú. Ní nadinguáⁿ'ai yā s'uuúⁿ yeⁿe

nducyáácá 'iiⁿyāⁿ chi nguée ngii n'diichí yā s'uuúⁿ.

⁷²Ní neene ya'ai 'iinú Ndyuūs 'iiⁿyāⁿ yeⁿe yú ndíi cuaaⁿ vmnaaⁿ, ní nan'gaacú yā yeⁿe chí caⁿa yā chí diiⁿ yā chí n'daacā ndii cuááⁿ vmnaaⁿ.

⁷³Chuū ní compromiso chi Ndyuūs caⁿ'ā cuaacu yā ndúúcū chiida yú Abraham chí tee yā s'uuúⁿ.

⁷⁴Taachi Ndyuūs nadanguáⁿ'ai yā s'uuúⁿ yeⁿe 'iiⁿyāⁿ chi nduuvi tááⁿ yā yeⁿe yú, diíⁿ yā 'túúcā caati dichíí'vē yú Ndyuūs ní nguée nduúcū vaadi 'va'a.

⁷⁵Tanducuéⁿ'ē vida yeⁿe yú ní dichíí'vē yú Ndyuūs, ní diiⁿ yú tan'dúúcā 'iiⁿyāⁿ chí dēeve ní n'dai nanááⁿ Ndyuūs.

⁷⁶Díí, saⁿ'ā lííⁿ chí daiyá, cūnee chí dúúchí dí profeta yeⁿé Ndyuūs chí ch'ēete n'dai chí canéé na va'ai chēeti nguuví caati caⁿ'ā di cuááⁿ vmnaaⁿ yeⁿe Señor Jesucristo. Ní 'cuūndiyāⁿ di 'iiⁿyāⁿ s'eeⁿ chí 'cuēetinéé ngiinu yā taachi ndaa Jesús.

⁷⁷Ní diiⁿ di chí 'iiⁿyāⁿ cadiinúúⁿ yā yeⁿe chí nguaⁿ'ai yā yeⁿe nuuⁿ'ndi yeⁿe yā ní Ndyuūs nadich'ēecú yā yeⁿe yā.

⁷⁸Ní cucáávā Ndyuūs yeⁿ'ē yú nééné ya'ai 'iinú yā s'uuúⁿ tee yā 'áámá dēeve yeⁿe yā s'uuúⁿ, dēeve chí chiicá yeⁿe va'ai chēeti nguuvi.

⁷⁹Ní chí dēeve miiⁿ chíí Ndyuūs ní cuuvi dēevé yā yeⁿe nducyaaca 'iiⁿyāⁿ chí snéé yā na maāiⁿ ndúúcū nuuⁿ'ndi yeⁿé yā. Ní Ndyuūs nacandée

yā s'uuúⁿ na yúúní yeⁿe vaadi 'diiⁿ.

⁸⁰Ní saⁿá 'lííⁿ ní ch'iita sa ní 'āā deenū sa ní ditiinū sa na espíritu yeⁿē sa. Ní taachi 'āā ch'ēete sa, saⁿá miiⁿ ní cueⁿe sa cuēeti ní canee sa miiⁿ ndii ndaa tiempo taachi caⁿa sa nduudu cuaacu yeⁿē Ndyuūs nanááⁿ 'iiⁿyāⁿ yeⁿe Israel.

Yeⁿe chi ch'iindiyáaⁿ Jesús

(Mt. 1.18-25)

2 Nguuvi s'eeⁿ emperador Augusto César caⁿa ntiiⁿnyúⁿ yā chi 'cuēetinéⁿ nguūⁿ nducyaaca 'iiⁿyāⁿ yeⁿe núúⁿmáⁿ yáⁿāa naachi caⁿa ntiiⁿnyúⁿ yā. ²Ní taachi Cirenio ní gobernador yā yeⁿe yáⁿāa Siria, 'āā diíⁿ yā chuū chí n'gēetinéⁿ nguūⁿ yā. ³Ní nducyaaca 'iiⁿyāⁿ snaⁿa yā na yāāⁿ naachi ch'iindiyáaⁿ yā ní ca'a yā chi ngúúví yā. ⁴Tííca chií José miiⁿ ní n'dāa yā na yāāⁿ Nazaret miiⁿ yeⁿē yáⁿāa Galilea ní ndaá yā na yaāⁿ Belén yeⁿe yáⁿāa Judea. Yáāⁿ miiⁿ ní duuchi Yáaⁿ yeⁿe David caati José miiⁿ ní na ndaata yeⁿē rey David miiⁿ 'iiⁿyāⁿ. ⁵Cueⁿe José miiⁿ ndúúⁿcū María ti chiida tá ndúúⁿcū chēecu tá diiⁿ yā prometer chi 'caandavaacu tá ndúúⁿcū José miiⁿ. María miiⁿ ní véé daiya tá chēeti tá. Miiⁿ ní ndaá yā ca'a yā ngúúví yā. ⁶Taachi miiⁿ snéⁿ yā, snuū ca'a nguuví yeⁿē María miiⁿ chi 'cuundiyaāⁿ daiya yā. ⁷Miiⁿ ch'iindiyāāⁿ saⁿa 'lííⁿ, daiya tá chi vmnááⁿ vmnaaⁿ, ní chēecú yā tíínūuⁿ saⁿa 'lííⁿ, ní sn'diití yā saⁿá 'lííⁿ miiⁿ naachi snúúⁿ 'iiti. Ní ch'ēetinee yā miiⁿ caati nguéé ndaacá yā va'āi chi n'dai.

Angeles ndeé yā ndúúⁿcū 'iiⁿyāⁿ chí idiíⁿ cuidado 'iiti cuūchí

⁸Ná campo yeⁿē yáāⁿ Belén miiⁿ véé 'iiⁿyāⁿ chí snéé cuidado 'iiti cuūchí. Ní n'gēetí nduuchí yā n'gaaⁿ na cuēeti cucáāvā 'iiti cuūchí miiⁿ. ⁹Ní n'gaaⁿ miiⁿ 'áámá ángel chí Señor Ndyuūs dichō'o yā che'enaáⁿ yā nanááⁿ 'iiⁿyāⁿ s'eeⁿ chí snéé cuidado 'iiti cuūchí. Ní chí dēeve ch'ēete n'dai yeⁿē Ndyuūs chiiya nanáaⁿ yā ní 'dii'yā n'dái yā chii. ¹⁰Angel miiⁿ ní caⁿa yā chii yā 'iiⁿyāⁿ s'eeⁿ: Ndís'tií, nguēe 'va'á nī tí 'úú nindeé 'áámá nduudu chí n'dai nííⁿcú cuuvi yeenu taavi ndís'tií ndúúⁿcū nducyaaca 'iiⁿyāⁿ. ¹¹Tí maaⁿ ní na yāāⁿ yeⁿe David ch'iindiyāāⁿ cáava ndís'tií 'áámá saⁿa 'lííⁿ chí nadanguáⁿ'ai yā 'iiⁿyāⁿ yeⁿē nuuⁿndi yeⁿe yā. Saⁿá 'lííⁿ mííⁿ ní CRISTO chí Señor chí Ndyuūs dichō'ó yā. ¹²Ní deenū nī chí cuaacu ndúúⁿcū señal 'cūū. Ndís'tií ní nndaaca nī dacua'a mííⁿ ndēecu tíínūu ní candiiti sa na lugar naachi snúúⁿ 'iiti.

¹³Hora mííⁿ nūuⁿ n'deeⁿ n'dái ángeles yeⁿē va'ai chēeti nguuvi che'enaáⁿ yā naachi canéé ángel miiⁿ. Angeles ní ngaⁿa yā chí ch'ēete n'dai Ndyuūs miiⁿ. 'Tííca ngaⁿa yā:

¹⁴Ch'ēete n'dái Ndyuūs chí canéⁿ na va'ai chēeti nguuvi. Ní véé vaadi 'diiíⁿ na yáⁿāa nguaaⁿ 'iiⁿyāⁿ chí cunéé n'daacā n'dai ti snéⁿ yā ndúúⁿcū favor yeⁿē Ndyuūs.

¹⁵Cho'oo chúú ní ángeles s'eeⁿ cunaⁿ'á yā va'ai chēeti nguuvi. Saⁿa chí snéé cuidado 'iiti cuūchí miiⁿ

caⁿa sa chii sa vi'i: Cú'u yú maaⁿ na yááⁿ Belén ní n'diichi yú chuū chi Señor Ndyuūs miiⁿ chii yā s'uūúⁿ.

¹⁶Maaⁿnch'εεté nūuⁿ cueⁿe yā. Ní ndaacá yā María ndúúcu José, ndúúcu saⁿá lííⁿ dacua'a miiⁿ cándiiti sa na lugar naachi snúuⁿ 'iiti. ¹⁷Ní taachi n'diichí yā saⁿá lííⁿ mííⁿ, caⁿa yā chii yā 'iiⁿyāⁿ tan'dúúca ángel caⁿa yā chii yā maáⁿ yā yeⁿé dacua'a miiⁿ. ¹⁸Nducyáácá 'iiⁿyāⁿ chi ch'iindiveéⁿ yā chuu chí caⁿa 'iiⁿyāⁿ chi snéé cuidado 'iiti cuūchí cueⁿé yiinu taaví yā yeⁿe chuū.

¹⁹Naati María miiⁿ ní nguain'dai yā nducuéⁿe chuū na staava yeⁿe tá. Ní nacadífnuuⁿ yā dε'ε cuuvi.

²⁰Iiⁿyāⁿ chi snéé cuidado 'iiti cuūchí cuínaⁿa yā ní ngaⁿa yā chi ch'εete n'dai Dendyuūs. Ní s'téenu yā Ndyuūs yeⁿe tanducuéⁿe chi ch'iindiveéⁿ yā ní n'diichi yā ti tan'dúúca chi ángel miiⁿ caⁿá yā chii yā 'iiⁿyāⁿ.

Yeⁿe saⁿá chi nguuvi Simeón ní yeⁿe 'áámá n'daataá chi nguuvi tá Ana

²¹Ch'iinu dacuaⁿá miiⁿ nííⁿníⁿ nguuvi ní ndaa nguuvi chi dííⁿ yā circuncidar dacuaⁿá miiⁿ. Ní s'néeⁿ yā chi nguuvi JESÚS, tan'dúúca chi caⁿa ángel miiⁿ cuááⁿ vmnaaⁿ ndíi taachi 'áá cuéε sa cheeti María.

²²Taachí snuū ca'a niiⁿniⁿ nguuvi chi 'aama n'daataá ní canéé dεeve taachi véé dacua'a lííⁿ yeⁿe tá tan'dúúca chi canéé nguūⁿ na ley yeⁿe Moisés, tuu'mi ní José ndúúcu María candéε yā dacuaⁿá miiⁿ na yááⁿ Jerusalén. Candéε yā chi dííⁿ yā presentar dacuaⁿá miiⁿ nanááⁿ Señor 'iivú Ndyuūs. ²³Tífcā caⁿa

yā dííⁿ yā ti canéé nguūⁿ na ley yeⁿe 'iiví Ndyuūs chi tanducuéⁿe dacuaⁿá, chi vmnááⁿ vmnaaⁿ chi 'cuundiýááⁿ yeⁿé chéécūu chi sáⁿá canéé lado yeⁿé Ndyuūs. 'Tífcā chiiⁿ chi dííⁿ yā chuū. ²⁴Ní cheⁿe yā ca'a yā ofrenda yeⁿe 'áámá n'daataá chi 'cuundiýááⁿ daiya tá tan'dúúca chi ngaⁿa ley yeⁿe Señor 'iivú Ndyuūs. Ofrenda miiⁿ ní ná 'uūví 'yaada palomas o na 'uūví 'yaada pichones.

²⁵Na yááⁿ Jerusalén miiⁿ canee 'aama saⁿá chi nguuvi sa Simeón. Sáⁿa 'cūū ní nééne n'dai sa ní chiⁿi sá chi i'téenu sa Ndyuūs, ní yeⁿé Ndyuūs saⁿá. Canéé Espiritu N'dai yeⁿé Ndyuūs ndúúcu sa. Ní cánéé ngiinu sa 'áámá 'iiⁿyāⁿ chi nadanguáⁿá 'iiⁿyāⁿ yeⁿe ndaata Israel. ²⁶Espiritu N'dai yeⁿé Ndyuūs chii yā saⁿá 'cūū chi nguéé canéé chi 'cuūví sa neⁿe chí 'áá cuéé n'diichi sá Cristo chi Señor Ndyuūs dich'ó yā íⁿyeéⁿdí 'cūū. ²⁷Ní Espiritu N'dai yeⁿé Ndyuūs canéé ndúúcu Simeón miiⁿ. Ní diiíⁿ guiar Simeón miiⁿ. Ní cueⁿé yā na yaacū templo taachi José miiⁿ ndúúcu María ndaa yā na yaacū templo ndúúcu saⁿa 'lííⁿ Jesús miiⁿ. Ní 'ífcū cuuvi dííⁿ yā presentar dacua'a miiⁿ nanááⁿ Ndyuūs tan'dúúca chi ngaⁿa ley miiⁿ. ²⁸Tuu'mi ní Simeón miiⁿ caⁿnuúⁿ yā Jesús ní caⁿa yā chi ch'εete n'dai Dendyuūs. 'Túúca caⁿa yā:

²⁹Maaⁿ ní n'dii Señor Ndyuūs, dííⁿ ní chi cuaacu tan'dúúca chi ngaⁿá nduudu yeⁿe ní. Maaⁿ ní dííⁿ ní chí cuuví 'cuūví nduucú n'dai, 'úú chí dichiiⁿvé n'dii.

³⁰Caati 'áá n'diichí ndúúcu nduutinaáⁿ 'iiⁿyāⁿ chi dich'ó ní chi inadanguáⁿá nús'uu.

³¹ 'Iiⁿyāⁿ miiⁿ chíⁿ chíⁿ s'néeⁿyaáⁿ
nī chi cáávā nducyaaca 'iiⁿyāⁿ
chí nadanguáⁿai yā 'iiⁿyāⁿ
yeⁿe nuuⁿndí yeⁿé yā.

³² 'Iiⁿyāⁿ miiⁿ chíⁿ deeve ní cuuví
deeve yeⁿé nducyaaca 'iiⁿyāⁿ
chi nguéé yeⁿé ndaata Israel.
Ní ca'a yā honor 'iiⁿyāⁿ yeⁿe
nī chi 'iiⁿyāⁿ Israel yā.

³³ José ndúúⁿcū María ngeⁿe yiinu
yā yeⁿe chi Simeón ngaⁿa yā yeⁿe
saⁿá 'lírⁿ Jesús miiⁿ. ³⁴Simeón miiⁿ
dí'viicú yā María ndúúⁿcū José. Ní
caⁿa yā chíi yā chεecu sa María:
'Caandiveeⁿ nī. Saⁿá 'lírⁿ 'cūū ndaā
sa chi neené 'yaaⁿ 'iiⁿyāⁿ na yāⁿāa
nguéé i'téenu yā ní 'tiicá ntúúⁿ
'yaaⁿ 'iiⁿyāⁿ cu'téenu yā. Ní saⁿa
'lírⁿ 'cūū 'áámá seña ti néené 'yaaⁿ
'iiⁿyāⁿ caaⁿmaⁿ yā contra yeⁿé sa.
³⁵Chuū ní díiⁿ chi 'iiⁿyāⁿ cuuvi
cádiinuuⁿ yā yeⁿe ca'áámá cā'aama
'iiⁿyāⁿ taacā nadicádiinuuⁿ yā na
staava yeⁿe yā. Chuū ní tan'dúúⁿcā
'áámá machete 'uūvī lados 'caāiⁿ chi
cho'ōo alma yeⁿe n'dii María.

³⁶Ná yaacú templo 'cūū, míⁿ
ntúúⁿ canee 'áámá n'daataá n'dai chi
nguuvi Ana. Ní ngaⁿa tá dendu'ū
chi cuchii. N'daataá miiⁿ ní daiya
Fanuel, chí yeⁿe ndaataá yeⁿe
Aser. Ní Ana miiⁿ 'āā neené ndiicúⁿ
ta. Ch'iindivaacu tá taachi 'lírⁿ tá
ní ndēēchē ndúuyū nūⁿ cánee
tá ndúúⁿcū isaⁿá yeⁿe tá. Maaⁿ ní
'āā n'daataá nguá'á tá. ³⁷'Āā cuūⁿ
ngeecú cuūⁿ nduuyūⁿ chi nduuví
tá n'daataá nguá'āa. Áámá canee
tá na yáacū templo yeⁿé Ndyuūs
ní canéé tá ndíⁿ guuvi ndii n'gaaⁿ
ní dichíⁿ've tá Ndyuūs. Ní ndii
ngueε nga'diinúⁿ tá ti dámaaⁿ chí
ngaⁿāngu'a tá. ³⁸Hora míⁿ nūⁿ

Ana miiⁿ cheⁿe tá yaacū templo
ní ndee tá nduucú Dendyuūs,
'tíicā ngaⁿa ta: N'dii, Ndyuūs teé
gracias n'dii cáávā dacua'a 'lírⁿ
miiⁿ. Cuayiivi ní caⁿa ta chíi ta
nducyáácá 'iiⁿyāⁿ chí canéé ngiinu
'áámá 'iiⁿyāⁿ chí nadinguáⁿai yā
'iiⁿyāⁿ Israel yā yeⁿé saⁿá 'lírⁿ miiⁿ.

**José ndúúⁿcū María ndúúⁿcū dacua'a
'lírⁿ nandaá yā na yááⁿ Nazaret**

³⁹Taachi José ndúúⁿcū María
ch'iinu díⁿ yā nducuéⁿé chi ngaⁿa
ley yeⁿe Señor Dendyuūs, tuu'mi ní
cueⁿe ntuúⁿ yā ndúúⁿcū saⁿá 'lírⁿ na
yááⁿ vaacú yā chí guuvi Nazaret
yeⁿe yáⁿāa Galilea. ⁴⁰Saⁿá 'lírⁿ
Jesús miiⁿ ngiita sa ní ngii ditiinu
sa. Néené deenu sa. Ní Ndyuūs
dí'viicú taavi cá yā saⁿá 'lírⁿ miiⁿ.

**Saⁿá 'lírⁿ Jesús cheeti yáacū yeⁿe
Ndyuūs ndúúⁿcū maestros**

⁴¹Nduuyu nduuyu taachi ndaā
tiempo yeⁿe 'viicu yeⁿe pascua, tuu'mi
ní chíida Jesús ndúúⁿcū chεecu sa
ngeⁿe yā yááⁿ Jerusalén. ⁴²Ní taachi
Jesús chíi yā ndiichúvúⁿ nduuyū,
'iiⁿyāⁿ s'eeⁿ cueⁿe ntúúⁿ yā na yááⁿ
Jerusalén ndúúⁿcū Jesús miiⁿ tan'dúúⁿcā
chí 'āā ngeⁿe yā nduuyu nduuyu cáávā
'viicú míⁿ. ⁴³Cho'ōo 'viicú miiⁿ, ní
José ndúúⁿcū María miiⁿ ní cunaⁿa yā.
Nguéé tuumicadíinuuⁿ yā chí saⁿá 'lírⁿ
Jesús miiⁿ canee sá na yááⁿ Jerusalén.
⁴⁴'Iiⁿyāⁿ s'eeⁿ ní nadicadíinuuⁿ yā
chí Jesús miiⁿ ní cunaⁿa sa ndúúⁿcū
'iiⁿyāⁿ parientes yeⁿe yā. 'Iiⁿyāⁿ s'eeⁿ
núúⁿmáⁿ guuvi ní chíica yā. Tuu'mi
nan'núⁿ yā Jesús nguuaⁿ 'iiⁿyāⁿ yeⁿe
yā ndúúⁿcū 'iiⁿyāⁿ chí n'dai nduucú
yā, ⁴⁵naati nguéé ndaacá yā saⁿá 'lírⁿ
Jesús miiⁿ. Ní nguεecunéé yā snaⁿa yā

na yāⁿ Jerusalén miiⁿ chi n'nuúⁿ yā Jesús miiⁿ.

⁴⁶Ndíí ch'iinu 'iinū nguuvi ní ndaacá yā Jesús na yáacū templo. Véé sá ndúucū maestros chí ng'cuééⁿ yā ley. Jesús miiⁿ ní í'neeⁿ veeⁿ sa chí ngaⁿa yā ní tiinguuneeⁿ sá maestros yeⁿe chí ngaⁿa yā. ⁴⁷Nducyáácá 'iiⁿyāⁿ chí n'giindiveéⁿ yā chí ngaⁿa saⁿa 'línⁿ Jesús miiⁿ ngeⁿe yínúⁿ yā yeⁿe sa chí déénu sa ní nan'guεεcútaⁿ sa chí ítiingúúneeⁿ yā saⁿa 'línⁿ miiⁿ. ⁴⁸Taachí chíídá sá ndúucū chεεcu sa n'diichí yā Jesús miiⁿ cueⁿe yiinúⁿ yā yeⁿe sa. Tuuⁿmi ní chεεcu sa ní caⁿá yā chíi yā saⁿa 'línⁿ: Díí, daiyá, ¿de'ē cuuvi chí 'tíicá díiⁿ di nduucú 'nū? Cuin'díichí dí. Chíida di ndúucū 'úú yā'ái n'dai staava yeⁿe 'nū 'íicú chíicá 'nū in'nuúⁿ 'nū díi.

⁴⁹Tuuⁿmi ní nan'guεεcútaⁿ sa yeⁿe yā: ¿Dé'ē vee? ¿Dé'ē cúuví chí in'nuúⁿ ní 'úú? ¿Áá nguéé deenu ndís'tií chí 'úú ní canéé chí cūnéé ndúucū dendu'ū yeⁿe Chíidá?

⁵⁰Iiⁿyāⁿ s'eeⁿ ní nguéé tuūmicadiinúúⁿ yā nduudu chí caⁿa daiyá yā Jesús miiⁿ chíi sá 'iiⁿyāⁿ.

⁵¹Tuuⁿmi ní cunaⁿa Jesús nduucú yā na yāⁿ Nazaret miiⁿ ní 'neeⁿ veeⁿ sa yeⁿe yā. Chεεcu sa miiⁿ ní nadacadiinúúⁿ yā tanducuéⁿe na staava yeⁿe yā. ⁵²Jesús miiⁿ ní n'giita sa ndúucū n'dee n'dái vaadi deenu, níicú véé favor yeⁿe sa nanááⁿ Ndyuūs ní nanááⁿ 'iiⁿyāⁿ na iⁿyeeⁿdí 'cū. Níicú 'āā ngéénū nduuyu yeⁿe sa.

Juan chí ngεεdínúúⁿnīⁿ sa ngaⁿa sa chí ndaacadaamí 'iiⁿyāⁿ yeⁿe nuuⁿndi yeⁿe yā

(Mt. 3.1-12; Mr. 1.1-8; Jn. 1.19-28)

3 Saⁿa chí nguuvi Tiberio César, 'āā ndíitiiⁿyuⁿ nduuyū chí

ngaⁿa ntiⁿnyúⁿ yā chí emperador yā. Ní saⁿa chí nguuvi Poncio Pilato, ní gobernador yā yeⁿe yáⁿāa Judea. Saⁿa chí nguuvi Herodes ní rey yā yeⁿe yáⁿāa Galilea. 'Íicú 'diiⁿū Herodes miiⁿ chí nguuvi Felipe ní rey yā yeⁿe yáⁿāa Iturea ndúucū yáⁿāa Trachonite Ní saⁿa chí nguuvi Lisaniás ní rey yā yeⁿe yáⁿāa Abilinia. ²Ní saⁿa Anás ndúucū Caifás, saⁿa 's'uuⁿ ní chíiduú n'gεεε ca yeⁿe yaacū yeⁿe 'iiⁿyāⁿ Israel. Tiempo miiⁿ ní Ndyuūs ní ca'á yā 'áámá nduudu n'dai Juan, chí daiya Zacarías. Juan miiⁿ canee sa na yáⁿāa cuūⁿmánⁿ naachi nguéé ch'εetinéé 'iiⁿyāⁿ. ³Juan miiⁿ ní cachii ca sa nducuéⁿe yáⁿāa chí snéé niiⁿnuúⁿ ná yíicú Jordán. Ní Juan miiⁿ chíi sá 'iiⁿyāⁿ chí canéé chí cuεedínúúⁿnīⁿ yā níicú ndaacadaamí yā yeⁿe nuuⁿndi yeⁿe yā, níicú Ndyuūs nadich'εεcú yā nuuⁿndi yeⁿe yā. ⁴Chuū ní chíi tandúucā chí profeta Isaías dingúúⁿ yā ndii cuaaⁿ vmnaaⁿ na libro yeⁿe Ndyuūs yeⁿe:

'Caandiveeⁿ yú nduudu yeⁿe 'áámá 'iiⁿyāⁿ chí caaⁿmánⁿ yā yuudū na yáⁿāa cuūⁿmánⁿ naachi nguéé ch'εetinéé 'iiⁿyāⁿ ní caⁿa yā 'tuuca: Cuundiyaáⁿ ní yúúni yeⁿe Señor Ndyuūs caati cuchii yā; nan'guáaⁿ ní 'aama yúúni cuaacu caavá yā. Dideevé ní staava yeⁿe ní ní cuuvi 'cuaaⁿ ní 'iiⁿyāⁿ miiⁿ taachi ndaa yā.

⁵Naachi yaanúú ní nduūtī, núúⁿmánⁿ icyaⁿā ndúucū nducyaaca yíicú nduuví neⁿe, yúúni 'cuéé nduuví cuaacu, yúúni chí nguéé neⁿe ní nduuví neⁿe.

⁶ Nducyaaca 'iiⁿyāⁿ snaaⁿ yā
'iiⁿyāⁿ yeⁿe Ndyuūs, 'iiⁿyāⁿ
chí nadinguáⁿai yā nducyaaca
'iiⁿyāⁿ.

⁷ Juan miⁿ ní ngaⁿa sá ngii sa
'iiⁿyāⁿ chí ndaá yā chí cuēédínuūⁿnīⁿ
sa 'iiⁿyāⁿ: Ndís'tiī ní tan'dúúcā cúú
'tíicā ndís'tiī. ¿Du'ú chi 'cueeⁿ ndís'tiī
chi cuuvi cáanu nī yeⁿe castigo
taaⁿ chí cúchiī? ⁸ Díiⁿ nī dendu'ū
chi n'dáacā maaⁿ níicú 'cuuⁿmí
nī 'iiⁿyāⁿ chí 'āā ndaacadaamí nī
yeⁿe nuuⁿndi yeⁿ'é nī. Nguēε tucáa
nī caaⁿmaⁿ nī nguaaⁿ maaⁿ nī chi
Abraham miⁿ ní chiidá nī caati
'úú ngaⁿ'á ngii ndís'tiī chi Ndyuūs
ní cuuvi díiⁿ yā chí tuūu s'eeⁿ ní
chi cuuvi daiya Abraham. ⁹ Ní
cutiīiⁿ míiⁿ ní 'āā canéé na dii'yu
yáⁿ'á. Nducyaaca yáⁿ'á chi nguéé
ngii n'gui'í n'daacā yeⁿ'ē canee chi
'caaca yáⁿ'á míiⁿ ní cūnuuⁿ na yaⁿ'ā.
'Tiicā ntúūⁿ Ndyuūs díiⁿ yā juzgar
nducyaaca 'iiⁿyāⁿ.

¹⁰ 'Iiⁿyāⁿ s'uuⁿ ntiinguuneeⁿ yā
Juan miⁿ: ¿De'ē cuuví díiⁿ 'nū?

¹¹ Juan miⁿ ní nan'guēēcútaⁿ'ā sa:
'Iiⁿyāⁿ chí 'uuví catecai yā, canéé
chi ca'a yā 'áámá catecai 'iiⁿyāⁿ chí
nguéé yeⁿ'e yā. 'Iiⁿyāⁿ chí véé chi
nge'e yā, canéé chí ca'a yā 'iiⁿyāⁿ
chí nguéé yeⁿ'é yā.

¹² Ndaá ntúūⁿ 'iiⁿyāⁿ chí
inn'guēε yeⁿ'e yáⁿ'āā chí Juan miⁿ
cuēédínuūⁿnīⁿ sa 'iiⁿyāⁿ. Ní 'iiⁿyāⁿ
s'eeⁿ caⁿ'a yā chíi yā Juan: N'díi,
maestro, ¿de'ē cuuví díiⁿ 'nū?

¹³ Juan miⁿ ní caⁿ'a sa chíi sa
'iiⁿyāⁿ: Nguéé caaca nī chí mar
'aama ndo'o tan'dúúcā chí ngaⁿ'a na
ley.

¹⁴ Tuu'mi ní soldados tiinguunééⁿ
sá Juan: Nús'uu, ¿de'ē cuuví díiⁿ

'nū? Ní Juan caⁿ'a sa chíi sa 'iiⁿyāⁿ:
Nguéé diduucú nī yeⁿ'ē mar 'áámá
'iiⁿyāⁿ. Nguéé cunncáā caaⁿ'maⁿ nī
yeⁿ'ē tanáⁿ'ā 'iiⁿyāⁿ. Níicú 'cuēetinéé
nī ndúúcū vaadi yeenú ndúúcū chí
inadí've yā ndís'tiī.

¹⁵ 'Iiⁿyāⁿ s'uuⁿ snee yiinu yā Juan
ní nducyaaca yā ní nadicádíinuūⁿ
yā na staava yeⁿ'e yā chí 'áá
nguéé Juan chí Cristo? ¹⁶ Tuu'mi
ní Juan miⁿ ní caⁿ'a sa chíi sa
nducyaacá yā: Cuaacu níiⁿnyuⁿ 'úú
ní ngeédínuūⁿníⁿ ndúúcū nuūⁿnīⁿ;
naati cuayiivi cuchii taamá yā chí
n'dáacā n'dai ca ndúúcū poder yeⁿ'é
yā chí ch'εete taavi nguéé ti 'úú. Ní
'úú ní nguéé n'daacā ca chí cuuvi díiⁿ
n'daatií yíiⁿmáⁿ yeⁿ'e ndaacuú yeⁿ'é
yā. 'Iiⁿyāⁿ miⁿ ní cuēédínuūⁿnīⁿ yā
ndúúcū Espíritu N'dai yeⁿ'é Ndyuūs
ndúúcū yaⁿ'ā. ¹⁷ 'Iiⁿyāⁿ miⁿ ndéε
yā ní diiⁿ yā tan'dúúcā 'iiⁿyāⁿ chí
dideεvé yā trigo. 'Tíicā díiⁿ yā
ndúúcū 'iiⁿyāⁿ. Ndáa yā ndúúcū
zaranda na ta'a yā. Naachí nadεεvé
yā trigo miⁿ, divíi yā trigo miⁿ ní
nguain'dai yā ch'εeti dínūuⁿ. Ní 'neeⁿ
yáⁿ'a yā dεécú miⁿ na nguuchí yaⁿ'ā
chí 'āā ntée n'tuūvi. Dεécú miⁿ ní
tan'dúúcā 'iiⁿyāⁿ chí nguéé i'téenu
yā Ndyuūs.

¹⁸ 'Túúcā ní ndúúcū n'dee n'dái
ca chí caⁿ'ā Juan miⁿ, caⁿ'a sá chí
'cueeⁿ sa nduudu n'dai chí ngai
'iiⁿyāⁿ s'eeⁿ. ¹⁹ Tiempo miⁿ Juan
miⁿ ní yaa'vi neeⁿ sa rey Herodes
miⁿ chí canéé sá ndúúcū n'daataá
yeⁿ'ē dínū sa ní yeⁿ'e tanducueⁿ'ē
chí nguēε n'daacā chí díiⁿ yā.
N'daataá miⁿ ní nguuvi tá Herodías.

²⁰ Tuu'mi ní rey Herodes miⁿ ní díiⁿ
yā táámá nuuⁿndi chí ch'εete ca ní
s'nuūⁿ chíichí yā Juan vácū.

Juan miiⁿ cheedinúuⁿniⁿ yā Jesús

(Mt. 3.13-17; Mr. 1.9-11)

²¹ Cuayivi taachí Juan ngeedínúuⁿniⁿ yā n'dee n'dáí 'iiⁿyāⁿ, cheedinúuⁿniⁿ ntúuⁿ yā Jesús miiⁿ. Ní taachi Jesús miiⁿ ngaⁿ'angua'á yā nánguuví ní nánguāⁿ. ²² Ní ndaā Espíritu N'dai yeⁿ'é Ndyuūs vmnaaⁿ yeⁿ'é yā tan'dúúcā 'áámá paloma. Ní 'iiⁿyāⁿ s'eeⁿ ch'iindivéeⁿ yā 'áámá nduudu yeⁿ'ē va'ai ch'æti nguuví chí ngaⁿ'ā: Díí, daiyá chí neⁿ'e taaví ní yeenú taavi cáāvā díí.

'Iiⁿyāⁿ vmnááⁿ vmnaaⁿ yeⁿ'e ndaata yeⁿ'ē Jesús

(Mt. 1.1-17)

²³ Jesús miiⁿ ní chíí yā ndíicú ndiichi ndúuyū taachí tucá'a yā ntíí'nyúⁿ yeⁿ'é yā. Ndaata yeⁿ'e Jesús ní 'tíicā: 'Iiⁿyāⁿ nadicádíinuⁿ yā chí Jesús miiⁿ ní daiya José. José miiⁿ ní daiya Elí. ²⁴ Elí miiⁿ ní daiya Matat. Matat miiⁿ ní daiya Leví. Leví miiⁿ ní daiya Melqui. Melqui miiⁿ ní daiya Jana. Jana miiⁿ ní daiya José. ²⁵ José miiⁿ ní daiya Matatías. Matatías miiⁿ ní daiya Amós. Amós miiⁿ ní daiya Nahum. Nahum miiⁿ ní daiya Esli. Esli miiⁿ ní daiya Nagai. ²⁶ Nagai miiⁿ ní daiya Maat. Maat miiⁿ ní daiya Matatías. Matatías miiⁿ ní daiya Semei. Semei miiⁿ ní daiya José. José miiⁿ ní daiya Judá. ²⁷ Judá miiⁿ ní daiya Joana. Joana miiⁿ ní daiya Resa. Resa miiⁿ ní daiya Zorobabel. Zorobabel miiⁿ ní daiya Salatiel. Salatiel miiⁿ ní daiya Neri. ²⁸ Neri miiⁿ ní daiya Melqui. Melqui miiⁿ ní daiya Adí. Adí miiⁿ ní daiya Cosam. Cosam miiⁿ ní daiya Elmodam. Elmodam miiⁿ ní daiya Er. ²⁹ Er miiⁿ ní daiya Josué. Josué miiⁿ ní daiya Eliezar. Eliezar miiⁿ ní

daiya Jorim. Jorim miiⁿ ní daiya Matat. ³⁰ Matat miiⁿ ní daiya Leví. Leví miiⁿ ní daiya Simeón. Simeón miiⁿ ní daiya Judá. Judá miiⁿ ní daiya José. José miiⁿ ní daiya Jonán. Jonán miiⁿ ní daiya Eliaquim. ³¹ Eliaquim miiⁿ ní daiya Melea. Melea miiⁿ ní daiya Mainán. Mainán miiⁿ ní daiya Matata. Matata miiⁿ ní daiya Natán. ³² Natán miiⁿ ní daiya David. David miiⁿ ní daiya Isái. Isái miiⁿ ní daiya Obed. Obed miiⁿ ní daiya Booz. Booz miiⁿ ní daiya Salmón. Salmón miiⁿ ní daiya Naasón. ³³ Naasón miiⁿ ní daiya Aminadab. Aminadab miiⁿ ní daiya Aram. Aram miiⁿ ní daiya Esrom. Esrom miiⁿ ní daiya Fares. Fares miiⁿ ní daiya Fares. Fares miiⁿ ní daiya Judá. ³⁴ Judá miiⁿ ní daiya Jacob. Jacob miiⁿ ní daiya Isaac. Isaac miiⁿ ní daiya Abraham. Abraham miiⁿ ní daiya Taré. Taré miiⁿ ní daiya Nacor. ³⁵ Nacor miiⁿ ní daiya Serug. Serug miiⁿ ní daiya Ragau. Ragau miiⁿ ní daiya Peleg. Peleg miiⁿ ní daiya Heber. Heber miiⁿ ní daiya Sala. ³⁶ Sala miiⁿ ní daiya Cainán. Cainán miiⁿ ní daiya Arfaxad. Arfaxad miiⁿ ní daiya Sem. Sem miiⁿ ní daiya Noé. Noé miiⁿ ní daiya Lamec. ³⁷ Lamec miiⁿ ní daiya Matusalén. Matusalén miiⁿ ní daiya Enoc. Enoc miiⁿ ní daiya Jared. Jared miiⁿ ní daiya Mahalaleel. Mahalaleel miiⁿ ní daiya Cainán. ³⁸ Cainán miiⁿ ní daiya Enós. Enós miiⁿ ní daiya Set. Set miiⁿ ní daiya Adán. Adán miiⁿ ní yeⁿ'e Dendyuūs.

Yáá'n'guiinūuⁿ neⁿ'ē sá tuu'vineeⁿ sa Jesús

(Mt. 4.1-11; Mr. 1.12-13)

4 Jesús ní ndiituú yeⁿ'e Espíritu N'dai yeⁿ'é Ndyuūs 'iiⁿyāⁿ ní n'daa yā na yíicú Jordán. Espíritu N'dai yeⁿ'e Ndyuūs candéé yā Jesús

na yáⁿāa cuūⁿmáⁿ naachi nguéé ch'εetinéé 'iiⁿyāⁿ. ²Uūvī ngεecu nguuvī caneeé yááⁿ'n'guiinūⁿ nanááⁿ Jesús miiⁿ chí n'diichineeⁿ sa 'iiⁿyāⁿ. Nguéé de'ē vee che'é Jesús nguuvī s'eeⁿ. Cuayivi mííⁿ chii cuiicú yā. ³Tuu'mi ní yááⁿ'n'guiinūⁿ caⁿ'a sa chii sa Jesús: Dii Jesús, ndúúⁿtí chi dii chi Daiya Dendyuūs dii caaⁿ'maⁿ dí cuuvi dí tuūu 'cúú chi nduuví pan. Ní nduuví pan ní cuuvi che'e di.

⁴Jesús nan'guεεcúⁿtáⁿ'a yā: 'Túucā cánéé nguūⁿ ná libro yeⁿ'é Dendyuūs: Nguéé dámaāⁿ pan che'é 'iiⁿyāⁿ ní cunduūchí yā caati ndúúⁿcū tanducuéⁿ'ē nduudu chi ngaⁿ'á Ndyuūs cunduuchí yā nduuti chi cu'téenu yā.

⁵Yááⁿ'n'guiinūⁿ candée sa Jesús na 'áámá yiicū yáácú. Maaⁿ nch'εeté nūⁿ ch'iⁿ'i sa Jesús tanducuéⁿ'ē naciones yeⁿ'é íⁿ'yeeⁿ'dí cūū.

⁶Tuu'mi ní yááⁿ'n'guiinūⁿ caⁿ'a sa chii sa Jesús. 'Úú ní teé dii nuuⁿ'maⁿ iⁿ'yeeⁿ'dí cuū chi cuuví yeⁿ'ē di chi caaⁿ'maⁿ ntííⁿ'nyuⁿ dí yeⁿ'ē ndúúⁿcū nuuⁿ'máⁿ ch'εete naciones 'cūū ndúúⁿcū chi ngaⁿ'a ntiiⁿ'nyuⁿ yeⁿ'ē caati poder 'cūū yeⁿ'é. 'Áā du'ú nūuⁿ chi neⁿ'é chííⁿ chí ca'á. ⁷Ndúúⁿtí chi caantiiⁿ'ya di nanaáⁿ nííⁿcú cu'téenu di 'úú cuuví yeⁿ'ē di tanducuéⁿ'ē chuū.

⁸Jesús caⁿ'a yā chii yā saⁿ'ā miiⁿ: Dii yááⁿ'n'guiinūⁿ cuví di nanaáⁿ caati 'túucā caneeé nguūⁿ na libro yeⁿ'e Dendyuūs: Cu'téenu di Señor Ndyuūs yeⁿ'ē di, ní dámaāⁿ 'caandiveeⁿ di yeⁿ'é 'iiⁿyāⁿ mííⁿ nūuⁿ.

⁹Cuayivi candée yááⁿ'n'guiinūⁿ Jesús miiⁿ na yāāⁿ Jerusalén ní cuheε sá ndúúⁿcú yā na yáácú yeⁿ'ē

yáacū templo. Ní caⁿ'a sa: Nduuti chi dii chi Daiya Dendyuūs dii, cáávā di ndii 'múúⁿ ndii na yáⁿ'āa.

¹⁰Caati 'túucā caneeé nguūⁿ cuááⁿ vmaaaⁿ na libro yeⁿ'é Ndyuūs:

Ndyuūs dich'óⁿ yā ángeles yeⁿ'e yā chí dííⁿ yā cuidado yeⁿ'ē di.

¹¹Ní ángeles cundéε yā dii ndúúⁿcū ta'á yā, ní nguéé cuuvi ya'ai ca'a di na tuūu.

¹²Jesús miiⁿ nán'guεεcúⁿtáⁿ'a yā: 'Tuucā ntúúⁿ caneeé nguūⁿ na libro yeⁿ'é Ndyuūs: Nguéé diiⁿ di mar 'áámá cosa chí n'diichineeⁿ di Señor Ndyuūs yeⁿ'ē di.

¹³Taachí ch'iinu chi diiⁿ yááⁿ'n'guiinūⁿ chí n'diichineeⁿ sa Jesús divii sa yeⁿ'é yā 'áámá tiempo.

Jesús tucá'a yā ntiiⁿ'nyuⁿ yeⁿ'é yā na yáⁿ'āa Galilea

(Mt. 4.12-17; Mr. 1.14-15)

¹⁴Jesús miiⁿ nngueεcúnée yā na yáⁿ'āa Galilea ní caneeé poder yeⁿ'e Espíritu N'dai yeⁿ'e Ndyuūs ndúúⁿcú yā. Nducyáácá 'iiⁿyāⁿ chicadíínuuⁿ yā na nuuⁿ'máⁿ na yáⁿ'āa cuaaⁿ 'diituú yeⁿ'e chí n'daācā n'dai idiíⁿ Jesús. ¹⁵Ní Jesús ngi'cueeⁿ yā na yaācū sinagogas yeⁿ'e 'iiⁿyāⁿ Israel yeⁿ'e nducuéⁿ'ē yāāⁿ ní nducyaaca 'iiⁿyāⁿ idich'εeté yā Jesús.

Jesús canee yā na yāāⁿ Nazaret

(Mt. 13.53-58; Mr. 6.1-6)

¹⁶Ndaá Jesús na yāāⁿ Nazaret naachí ch'iita yā. Ní tan'dúúⁿcā chi costumbre yeⁿ'é yā, nguuvī sábadó chí ntaavi'tuunúúⁿ 'iiⁿyāⁿ yeⁿ'e ndaata Israel ndāa yā na yaācū sinagoga miiⁿ ní Jesús chééndii yā ní ch'eeⁿ yā yeⁿ'e libro yeⁿ'e Ndyuūs. ¹⁷Ní nan'guááⁿ yā libro miiⁿ naachi

nga^a yeⁿē profeta Isafás. Taachí nan'guaaⁿ yā libro miiⁿ, ndaacá yā naachi canéé nguūⁿ chúu:

¹⁸ Espíritu yeⁿé Ndyuūs canée yā nduucú, tí Espíritu N'dai yeⁿé Ndyuūs ndeévé yā 'úú chi 'úú ní caaⁿ máⁿ nduudu chí ngai yeⁿé Ndyuūs nanááⁿ 'iiⁿ yāⁿ chí ndaachí sneeⁿ ndúúcū nuuⁿndi yeⁿe yā. Dicho'ó yā 'úú chí díⁿ chí nduūvā yeⁿe 'iiⁿ yāⁿ chí yaⁿ'ai staava yeⁿe yā, ní caaⁿ máⁿ chí nánguaⁿ'ai 'iiⁿ yāⁿ yeⁿe nuuⁿndi yeⁿé yā chí tan'duucā chí ca'á libertad 'iiⁿ yāⁿ chí snúúⁿ vácū, ní díⁿ chí inaaⁿ 'iiⁿ yāⁿ cosa chí n'daacā chí nguéé déénu yā yeⁿē caati maaⁿ canee yā tan'dúúcā 'iiⁿ yāⁿ chí ngeenááⁿ, 'tiicá yā. Ní nadan'guaí 'iiⁿ yāⁿ chí nguéé n'daacā idiiⁿ ndúúcu yā caati cuuvi n'daacā idiiⁿ ndúúcu yā.

¹⁹ Ní caaⁿ máⁿ yeⁿe tiempo chí n'dai taavi chí Ndyuūs ndeévé yā chí caaⁿ máⁿ, yeⁿē vaadi n'dai taavi yeⁿé yā.

²⁰ Tuu'mi ní Jesús nan'gaadi yā libro yeⁿé Ndyuūs ní nanc'a yā 'iiⁿ yāⁿ chí díⁿ yā ntiⁿnyuⁿ yeⁿe yaacū sinagoga miiⁿ. Ní cuayiivi Jesús chí'indí yā. Nducyaaca 'iiⁿ yāⁿ snee yā n'gíinu yā yeⁿe Jesús.

²¹ Jesús tucá'a yā caⁿ'a yā 'iiⁿ yāⁿ s'eeⁿ: Maaⁿ cunuuⁿ ca'a chuū chí canee nguūⁿ cuááⁿ vmnaaⁿ chí yeⁿe ndís'tií, chuū chí ch'iinu chí'iindiveéⁿ ní.

²² Nducyáácá 'iiⁿ yāⁿ n'dáácā ngaⁿ'a yā yeⁿe Jesús. Ngeⁿe yíínú yā yeⁿē nduudu chí n'dai chí ngaⁿ'a Jesús miiⁿ ní ngaⁿ'a yā: ¿Áá nguéé sáⁿ'a 'cūú daiya José?

²³ Ní caⁿ'a Jesús miiⁿ: Ndís'tií ní cuuví ní nduudu 'cūú 'úú. N'dií 'iiⁿ yāⁿ chí déénu ní diíⁿ yiicú ní 'iiⁿ yāⁿ, diíⁿ yiicú maáⁿ ní n'dií. Tanducueⁿé chí chí'iindiveéⁿ 'nū chí díⁿ ní na yááⁿ Capernaum, 'tiicá ntúúⁿ díⁿ ní 'muuⁿ yááⁿ vaacú ní.

²⁴ Naati 'uu ní caⁿ'a chíi ndís'tií: Cuaacu níⁿnyúⁿ mar 'áámá profeta ní nguéé ngíí inee yā na yááⁿ vaacú yā. ²⁵ Cuaacu níⁿnyúⁿ ngaⁿ'á ngíi ndís'tií: Tiempo chí chó'oo neené 'yaaⁿ n'daataá nguá'aa vεε tá nguaaⁿ 'iiⁿ yāⁿ Israel taachi profeta Elías cānee yā iⁿ'yeeⁿdí 'cūú ní 'āā ntéé cheeⁿ cuuvi 'iinu ndúuyū canéé maⁿ'a tiempo miiⁿ. Ní chí'iidí cuiicu nuuⁿmáⁿ yáⁿ'āa yeⁿe 'iiⁿ yāⁿ Israel. ²⁶ Ní Ndyuūs nguéé dich'óo yā Elías miiⁿ nanááⁿ nducyaaca n'daataá nguá'āa, dámaāⁿ 'áámá n'daataá nguá'āa yeⁿe táámá nación. Ní canee tá na yááⁿ Sarepta chí niiⁿnuúⁿ na yáⁿ'āa Sidón. ²⁷ Ní tiempo taachi canéé profeta Eliseo na iⁿ'yeeⁿdí 'cūú, 'tiicá ntúúⁿ neéne 'yaaⁿ 'iiⁿ yāⁿ ndúúcū ca'ai chí lepra chí in'duuti yúutē yeⁿe yā naati nguéé nducyaaca 'iiⁿ yāⁿ s'eeⁿ nduuva yeⁿe yā, dámaāⁿ saⁿ'ā Naamán yeⁿe táámá nación chí yeⁿe yáⁿ'āa Siria.

²⁸ Taachí 'iiⁿ yāⁿ chí'iindiveéⁿ yā chuū nducyaaca yā na yaacū sinagoga miiⁿ neené nduuvi taaⁿ yā. ²⁹ Ní chí'eti ndii yā tí neⁿé yā tun'daa yā Jesús cuaaⁿ chuva'āi yááⁿ miiⁿ ní candéε yā Jesús miiⁿ ndii na yaacu n'dai yeⁿe yiicū chí yaacú ca yeⁿe yááⁿ miiⁿ. Ní 'iicu cuuví cun'dáa yā Jesús miiⁿ. ³⁰ Naati nguéé cuuví díⁿ yā ti Jesús miiⁿ ní chó'ó yā náávtaⁿ'ā yeⁿe 'iiⁿ yāⁿ s'eeⁿ ní cunaⁿ'a yā na vaacu yā.

**'Áámá saⁿā chi canéé sa ndúúcū
espíritu chi nguεε n'daācā yeⁿe
yááⁿ'nguiniūⁿ**

(Mr. 1.21-28)

³¹ Cuayivi Jesús nangua'ái yā na yāáⁿ Capernaum yeⁿe yáⁿ'āa Galilea ní miiⁿ ngi'cueeⁿ yā 'iiⁿ'yāⁿ nguuvu sábadu chi nguuvu chí ntaavi'tuunúúⁿ yā. ³² Ní 'iiⁿ'yāⁿ na yāáⁿ miiⁿ ngeⁿe yiinú yā yeⁿe chi ngi'cueeⁿ Jesús, ti ngi'cueeⁿ yā ndúúcū poder tan'dúúcā 'áámá 'iiⁿ'yāⁿ chí ngaⁿ'ā ntiⁿ'nyúⁿ yā.

³³ Ní taachi snee Jesús na yaacu sinagoga míⁿ canee 'áámá saⁿā ndúúcū espíritu yeⁿe yááⁿ'nguiniūⁿ. Espíritu miiⁿ diiⁿ chi saⁿ'ā miiⁿ neené yuudu 'caí sa. ³⁴ Ní espíritu miiⁿ ní caⁿ'ā: N'dii, Jesús, yeⁿe yāáⁿ Nazaret, cu'néeⁿ nī nús'uu. ¿D'éε canee yeⁿ'é nū nduucú ní? ¿'Áá ndāa nī chi di'cuiinú nī nús'uu? 'Úú n'diichí du'ú n'dii. N'dii ní 'iiⁿ'yāⁿ chí N'dai chi Daiya Dendyuūs n'dii.

³⁵ Jesús ní yaa'vineeⁿ yā ní caⁿ'a yā: Dii espíritu n'gáádí dí cheendi di ní nan'dāa di yeⁿe sá 'tīi. Tuu'mi ní espíritu yeⁿe yááⁿ'nguiniūⁿ chíndeεve sa sáⁿ'a 'cūū náávtaⁿ'ā yeⁿe 'iiⁿ'yāⁿ s'eeⁿ ní nan'dāa sa yeⁿ'e sáⁿ'a 'cūū. Nguéé de'ε vεε diiⁿ sa ndúúcū sáⁿ'a 'cūū. ³⁶ Nducyaaca yā ní ngeⁿe yiinú yā ní ngaⁿ'a yā ngii yā vi'i: ¿D'éε nduudu chi 'túuca? 'Iiⁿ'yāⁿ 'cūū ngaⁿ'a ntiⁿ'nyúⁿ yā espíritu yeⁿe yááⁿ'nguiniūⁿ ndúúcū poder tan'dúúcā 'áámá 'iiⁿ'ntyéⁿ'ē. Ngaⁿ'á yā chí nan'dāa espíritu yeⁿe yááⁿ'nguiniūⁿ ní nacan'dāa.

³⁷ Ní nducyaaca 'iiⁿ'yāⁿ ngaⁿ'a yā yeⁿe Jesús miiⁿ nducuéⁿ'ē cuaaⁿ nducuéⁿ'ē yāáⁿ cuááⁿ 'diituú.

**Jesús díⁿ yā chi nduūvā yeⁿe indáⁿ'a
Simon Pedro**

(Mt. 8.14-15; Mr. 1.29-31)

³⁸ Tuu'mi ní Jesús miiⁿ nan'dāa yā yaācū sinagoga miiⁿ ní ndaa yā va'ai yeⁿ'ē Simón Pedro. Ní indáⁿ'ā Simón Pedro miiⁿ ndéε 'aama 'iiⁿ'nūⁿ taaⁿ n'daataá ní 'iiⁿ'yāⁿ yeⁿ'e vaacu tá di'cuútu yā Jesús miiⁿ chí cunee yā ní nanduūvā yeⁿ'ē tá. ³⁹ Jesús can'dii yā naachi canéé n'daataa miiⁿ ní caⁿ'a yā chí cuavii 'iiⁿ'nūⁿ miiⁿ. Hora miiⁿ 'iiⁿ'nūⁿ miiⁿ chivii yeⁿ'ē tá. N'daataa miiⁿ ní hora miiⁿ ncuueⁿ nuuⁿ tá ní diiⁿ tá mandados yeⁿ'é 'iiⁿ'yāⁿ s'eeⁿ ní ca'a tá chí che'e yā.

**Jesús díⁿ yā chi nduūvā yeⁿe 'yaaⁿ
n'dái 'iiⁿ'yāⁿ chí ngiitā**

(Mt. 8.16-17; Mr. 1.32-34)

⁴⁰ Taachí chiiya 'yáⁿ'ā, 'yááⁿ n'dái 'iiⁿ'yāⁿ ndéε yā 'iiⁿ'yāⁿ chí ngiitā nanááⁿ Jesús. Nééné n'dee naaⁿ ca'ai ndii yā. Jesús miiⁿ ní yiin'duu tá'a yā vmnaaⁿ ca'áámá ca'áámá 'iiⁿ'yāⁿ ní 'tíicā nduuvā yeⁿ'e yā. ⁴¹ Ní yeⁿ'ē 'yaaⁿ 'iiⁿ'yāⁿ chí ngííta yā yinan'dāa espíritus yeⁿ'e yááⁿ'nguiniūⁿ chí 'caí yā ní ngaⁿ'a yā: N'dii ní Daiya Dendyuūs n'dii. Tuu'mi ní Jesús miiⁿ ní yaa'vineeⁿ yā espíritus yeⁿ'e yááⁿ'nguiniūⁿ ní nguéé 'cuúⁿ yā chí caaⁿ'maⁿ sa ti espíritus yeⁿ'e yááⁿ'nguiniūⁿ ní deenu sá chí Jesús miiⁿ chí Cristo.

**Jesús ní caⁿ'a yā nduudu yeⁿ'é
Ndyuūs na yáⁿ'āa Judea**

(Mr. 1.35-39)

⁴² Chidεeve táámá nguuvu Jesús miiⁿ ní cueⁿ'e yā chuva'ai yāáⁿ miiⁿ na 'áámá lugar naachi nguéé

ch'ëetinéé 'iiⁿyāⁿ. Ní 'iiⁿyāⁿ s'eeⁿ yeⁿe yááⁿ miiⁿya inⁿnuúⁿ yā Jesús ní ndaa yā naachi canéé Jesús miiⁿ. Ní dí'cuiitú yā chi nguéé cuvii Jesús yeⁿe yā. ⁴³Naati Jesús miiⁿ ní ngaⁿa yā ngii yā 'iiⁿyāⁿ s'eeⁿ: Canéé chíⁿ chi 'úú ní caaⁿmáⁿ yeⁿe nduudu ngai yeⁿe naachi Ndyuūs ngaⁿa ntiⁿnyúⁿ yā, nanááⁿ 'iiⁿyāⁿ yeⁿe tanáⁿā yááⁿ ti yeⁿe chúū chí Dendyuūs dichoó yā 'úú.

⁴⁴Ní Jesús miiⁿ cueⁿé yā yááⁿ ndíí yááⁿ yeⁿe yáⁿā Galilea ní ngaⁿá yā nduudu yeⁿe Ndyuūs na yaacū sinagogas naachi cueⁿé yā.

Ndúúcu vaadi n'giinu yeⁿe chi itungaaⁿ yā 'yaacā

(Mt. 4.18-22; Mr. 1.16-20)

5 'Áamá tiempo taachi Jesús canéé yā niiⁿnuúⁿ ná nuūⁿnīⁿyáⁿā chi nguuvi Genesaret, nééné 'yaaⁿ 'iiⁿyāⁿ ndaa yā nanááⁿ yā ní chiitu yā chi cuuvi 'caandiveéⁿ yā nduudu yeⁿe Dendyuūs. ²Jesús n'diichi yā ná 'uūvi barcos chi snéé níⁿnuúⁿ na nuūⁿnīⁿyáⁿā. 'Iiⁿyāⁿ chi itungaaⁿ 'yaacā miiⁿ 'āā nan'daá yā na barco s'eeⁿ ní cueⁿé yā naaⁿnú yā yáanā yeⁿe 'yaacā na nuūⁿnīⁿyáⁿā. ³Tuu'mi Jesús sndaa yā na 'áamá barco chi yeⁿe Simón Pedro miiⁿ ní chii yā Simón Pedro chí 'āā caⁿa rá barco miiⁿ ndíí niiⁿnuúⁿ 'diituú nuūⁿnīⁿ miiⁿ. Tuu'mi ní Jesús ch'iindii yā na barco miiⁿ ní chí'cueeⁿ yā 'iiⁿyāⁿ. ⁴Taachi Jesús ch'iinu chí'cueeⁿ yā 'iiⁿyāⁿ, tuu'mi ní caⁿa yā chii yā Simón: Cueⁿe di ndúúcu barco ndíí ná yáanūⁿ ní 'caanuⁿ dí yaanā yeⁿe di nguaaⁿ nuūⁿnīⁿ ní tungaaⁿ dí 'yaacā.

⁵Simón miiⁿ ní nan'guεεcútaⁿa yā ní caⁿa yā chii yā Jesús: N'dii Maestro, 'āā núúⁿmáⁿ yaaⁿ ch'ëeti nduuchí 'nū ní díⁿ ntiⁿnyúⁿ 'nū ní nguéé de'ε vεε ndaāca 'nū; naati ndúúcu nduudu yeⁿe ní 'caanuúⁿ 'nū yaānā yeⁿe 'nū chëeti nuūⁿnīⁿ miiⁿ.

⁶Taachi 'caanuúⁿ yā yaānā miiⁿ chiitu 'yaacā chëeti yaānā miiⁿ chí yaānā miiⁿ ndiituú nuūⁿ chííteeⁿ. ⁷Tuu'mi ní dita'a yā yeⁿe tanáⁿa 'iiⁿyāⁿ chi snúúⁿ yā chëeti taamá barco miiⁿ chí caⁿa yā ní cunneé yā Simón. 'Iiⁿyāⁿ s'eeⁿ ní ndaa yā ní chiitu 'yaacā nduu 'uuvi barcos chí nduu 'uuvi barcos neⁿe 'cuεεchi ndii mááⁿ nuūⁿnīⁿ. ⁸Taachi Simón Pedro n'diichi yā chuū chíntii'yā yā nanááⁿ Jesús miiⁿ ní caⁿa yā chii yā Jesús miiⁿ: N'dii Señor, 'úú nguéé n'daācā 'úú chí cuchíí nanááⁿ n'dií, ti 'úú ní 'iiⁿyāⁿ nuūⁿndí 'úú.

⁹Simón Pedro miiⁿ ní nééné ngeⁿe yiinú yā. 'Tiicá ntúūⁿ 'iiⁿyāⁿ chí snéé yā ndúúcu sa ngeⁿe yiinú yā cáávā yeⁿe chí díⁿ Jesús chí 'iiⁿyāⁿ s'eeⁿ itungaaⁿ yā 'yaacā chí 'yaaⁿ taaví ti. ¹⁰'Tiicá ntúūⁿ Jacobo ndúúcu Juan, chí daiya Zebedeo, chí dáámá díⁿ yā ntiⁿnyuⁿ ndúúcu Simón, díⁿyā yā chíí. Ní Jesús caⁿa yā chii yā Simón: Díí, Simón, nguéé 'va'a di; ndii maaⁿ ní tan'dúúca chí ituungaaⁿ di 'yaacā yeⁿe nuūⁿnīⁿ, 'tíicā maaⁿ ní 'úú idíⁿ chí in'nuuⁿ dí 'iiⁿyāⁿ chí cuuvi caⁿá yā nduucú.

¹¹Taachi ndaa yā ndúúcu barco miiⁿ niiⁿnuúⁿ 'diitú nuūⁿnīⁿ, tuu'mi ní 'iiⁿyāⁿ s'eeⁿ s'neeⁿ yā ntiⁿnyuⁿ yeⁿe yā ndúúcu barco miiⁿ ndúúcu nducuéⁿe chí snúúⁿ chëeti barco miiⁿ ní cueⁿe yā ndúúcu Jesús.

Jesús diiⁿ yā chi nduūvā yeⁿe 'áámá saⁿā ndúúcu ca'ai lepra

(Mt. 8.1-4; Mr. 1.40-45)

¹²Taachi Jesús miiⁿ ndaa yā na 'áámá yāāⁿ ní canée yā miiⁿ, ndaa nanááⁿ Jesús 'áámá saⁿā chi ndii sa 'áámá ca'ai chi nguuvī lepra chi ín'duuti yuūtē yeⁿe sa. Taachí saⁿā miiⁿ n'diichi sa Jesús miiⁿ, chííntii'ya sa can'diī sa ndii na yāⁿāa nanááⁿ Jesús miiⁿ. Ní chiica sa Jesús: N'díí Señor, ndúúti chi n'diī neⁿe nī, ní dííⁿ nī chí nduūvā yeⁿe.

¹³Tuu'mi ní Jesús miiⁿ n'doo ta'á yā ní tuu'ví yā saⁿā ní caⁿa yā: 'Úú ní neⁿe chí nduūvā yeⁿe di. Tuu'mí nūuⁿ ndúúvā yeⁿe sa ní nduūvī dēeve sá. ¹⁴Ní Jesús caⁿa yā chíi yā saⁿā miiⁿ: Nguéé cuuvi di mar 'áámá 'iiⁿyāⁿ chi nduuva yeⁿe di. Cueⁿe di ní 'cuuⁿmiⁿ di maaⁿ cuerpo yeⁿe di nanááⁿ chiiduú. Ní ca'a di nanááⁿ Ndyuūs ofrenda yeⁿe di yeⁿe chí nanduuva yeⁿe di tan'dúúca chí ngaⁿa ley yeⁿe Moisés. Ní 'iicu cadíínuuⁿ nducyaaca 'iiⁿyāⁿ chí nduūvā yeⁿe di.

¹⁵Yeⁿe chí dííⁿ Jesús miiⁿ dāndoō ca, ní neené 'yaaⁿ 'iiⁿyāⁿ ndaa yā chí 'caandiveéⁿ yā nduudu yeⁿe Jesús miiⁿ. Ní Jesús dííⁿ yā chí nduūvā yeⁿe 'iiⁿyāⁿ. ¹⁶Jesús cueⁿe yā na lugar naachi nguéé ch'etinéé 'iiⁿyāⁿ chí caaⁿmaⁿngua'á yā.

Jesús diiⁿ yā chi nduūvā yeⁿe 'áámá saⁿā chí in'dúuví cuerpo yeⁿe sa

(Mt. 9.1-8; Mr. 2.1-12)

¹⁷Áámá nguuvī Jesús ní ngi'cueeⁿ yā 'iiⁿyāⁿ ní miiⁿ vēē 'iiⁿyāⁿ fariseos

chí dingúuⁿ leyes ndúúcu maestros chí ngi'cueeⁿ ley. 'Iiⁿyāⁿ s'eeⁿ ní ngiicá yā yeⁿe táámá yāāⁿ ní yeⁿe nducyáácá yaāⁿ yeⁿe yáⁿāa Galilea ndúúcu yáⁿāa Judea, nífcú yeⁿe yāāⁿ Jerusalén. Jesús miiⁿ cuuvi dííⁿ yā chí nduūvā 'iiⁿyāⁿ s'eeⁿ ti poder yeⁿe Ndyuūs canée nduucú yā.

¹⁸Tuu'mi ní ndaa ntúūⁿ n'duuvī saⁿā chí n'diichí yā Jesús. Ní saⁿā s'eeⁿ ní ndeε yā 'áámá saⁿā ndúúcu ca'āi chí in'dúuví cuerpo yeⁿe sa na 'áámá camilla. Ní n'diíⁿ yā chí ndaa saⁿā miiⁿ chēeti va'āi nanááⁿ Jesús miiⁿ. ¹⁹Nguéé ndaāca yā taacā cundāa yā ndúúcu saⁿa miiⁿ ti neené n'deeé 'iiⁿyāⁿ snuuⁿ yā. Tuu'mi ní 'iiⁿyāⁿ s'eeⁿ ní chεε yā tííⁿ va'āi ní divíi yā n'duuvī táátá tííⁿ va'āi. Ní di'cua'ái yā saⁿā na yiive naachi candííti saⁿā miiⁿ nanááⁿ Jesús. ²⁰Taachí Jesús miiⁿ tuumicadíínuuⁿ yā chí véé vaadi i'teenu yeⁿe saⁿā s'eeⁿ caⁿa yā chíi yā saⁿā: Díí saⁿā, 'úú nadach'εecú nuuⁿndí yeⁿe di.

²¹Tuu'mi ní 'iiⁿyāⁿ chí ngi'cueeⁿ ley ndúúcu 'iiⁿyāⁿ fariseos tuca'a yā nadicadíínuuⁿ yā ní caⁿa yā: 'Du'u sáⁿa 'cūū chí duuchineeⁿ yā yeⁿe Ndyuūs? 'Du'ū nadich'εecu nuuⁿndi yeⁿe yú? Dámaaⁿ Ndyuūs cuuvi dííⁿ yā 'tíicā.

²²Jesús tuūmicadiinúúⁿ yā chí nadicadíínuuⁿ 'iiⁿyāⁿ s'eeⁿ. Tuu'mi ní caⁿa yā chíi yā 'iiⁿyāⁿ s'eeⁿ: Ndís'tiī, 'd'éē cúúví chí 'tíicā inadicadíínuuⁿ ndís'tiī na staava yeⁿe ní? ²³'Chεe cá nguéé ngi'ii chí caaⁿmáⁿ: 'Āā nuuⁿndi yeⁿe di ní nch'εēcu o ndúúncuéeⁿ dí ní caaca dí? ²⁴'Túúca caⁿá chíí saⁿā chí ndís'tiī cuuvi déenu nī ti 'úú ní Saⁿa chí Daiyá Dendyuūs 'úú. Ní véé poder iⁿ'yeeⁿdí

'cūū chi inadach'ēēcū nuuⁿndi.
Tuu^mi ní Jesús caⁿ'a yā chíi yā saⁿ'a
miiⁿ: Ncueeⁿ di, nta'a di yiive yeⁿ'ē
di ní cunaⁿ'ā di na vaacu di.

²⁵Tuu^mi ní saⁿ'ā miiⁿ chí ndii chí
ca'āi sa 'āā ndúúvā yeⁿ'ē sa ní sta'ā
sa yiive yeⁿ'ē sa naachi cándiiti sa
ní ngaⁿ'a sa: Dē'e chúúcā ch'ēete
Dendyuūs. Ní cunaⁿ'ā sa naavtaⁿ'ā
yeⁿ'ē 'iiⁿ'yāⁿ s'eeⁿ. ²⁶Nducyáácá
'iiⁿ'yāⁿ cheⁿ'e yiinú yā ní neene
d'íva'á yā ní caⁿ'a yā: Dē'ē chúúcā
ch'ēete Dendyuūs. Ní caⁿ'a yā: Maaⁿ
ní n'diichi yú dendu'ū chí nguéé ta
nn'diichi yú chí caⁿ'a yiinu yú.

Jesús yaa'ví yā saⁿ'ā chí nguuvi Leví

(Mt. 9.9-13; Mr. 2.13-17)

²⁷Cho'ōo chúū, ní Jesús miiⁿ
can'daa yā cachiicá yā ní n'diichi
yā 'áámá saⁿ'ā chí inn'guēe yeⁿ'ē
impuestos yeⁿ'e yáⁿ'āa chí nguuvi
sa Leví. Saⁿ'ā miiⁿ ní vee sa naachi
n'gēeteé saⁿ'ā chí inn'guēe yeⁿ'ē
impuestos. Jesús miiⁿ ní yaa'ví yā:
Dii, sáⁿ'ā, cuchíi di caⁿ'a di nduucú.

²⁸Tuu^mi ní s'neeⁿ sá ntiiⁿ'nyuⁿ
yeⁿ'ē sa ndúúcū nducuéⁿ'ē dendu'ū
ní ndúcueeⁿ sá ní cueⁿ'ē sa ndúúcū
Jesús.

²⁹Saⁿ'a Leví miiⁿ caⁿ'a ntiiⁿ'nyuⁿ sá
chí in'nuūⁿ 'áámá comida ch'ēete
n'dai na vaacu sa. Na vaacu sa
miiⁿ véé 'yááⁿ saⁿ'ā chí inn'guēe
yeⁿ'e impuestos ndúúcū tanáⁿ'ā
saⁿ'ā. Nducyaa ca yā ní vēētē yā
ndúúcū Leví na mesa miiⁿ. ³⁰Tuu^mi
maestros chí ngi'cueeⁿ ley miiⁿ
ndúúcū 'iiⁿ'yāⁿ fariseos chí dííⁿ yā
ley cunncaá caⁿ'a yā yeⁿ'e discípulos
yeⁿ'e Jesús ní caⁿ'a yā: ¿Dē'ē cúúví
chí ndís'tii ndúúcū Jesús nge'é ní ní
ngi'i ní ndúúcū 'iiⁿ'yāⁿ chí inn'guēe

yeⁿ'e impuestos ndúúcū 'iiⁿ'yāⁿ
nuuⁿndi? Chuū nguéé n'daācā.

³¹Jesús ní n'gūeēcútaⁿ'a yā: 'Iiⁿ'yāⁿ
chí nguéé ngiitā nguéé neⁿ'e yā chí
cuuvi yíícú yā. Dámaāⁿ 'iiⁿ'yāⁿ chí
ngiitā neⁿ'e yā chí cuuvi yíícú yā.

³²Úú nguéé cuchíí chí yaa'ví 'iiⁿ'yāⁿ
chí nadacadiinúúⁿ yā chí n'dááca
yā chí nguéé dinuuⁿndí yā naati
'iiⁿ'yāⁿ chí véé nuuⁿndi yeⁿ'e yā ní
íícú ndáácadáámí yā yeⁿ'e nuuⁿndi
yeⁿ'e yā.

**Jesús ngaⁿ'a yā yeⁿ'e chí nguéé
ca'diinúú 'iiⁿ'yāⁿ**

(Mt. 9.14-17; Mr. 2.18-22)

³³Tuu^mi ní 'iiⁿ'yāⁿ s'eeⁿ
tiingūnééⁿ yā Jesús: ¿Dē'ē cúúví
chí discípulos yeⁿ'e Juan chí
ngēedínúúⁿndí ndúúcū discípulos
yeⁿ'e fariseos nééné n'deēe cuúví
ní ca'diiⁿ'núⁿ yā ní ngaⁿ'angua'á yā
ní discípulos yeⁿ'e ní nge'e yā ní
ngi'i yā?

³⁴Jesús ní caⁿ'a yā chíi yā 'iiⁿ'yāⁿ:
¿Chēe yeⁿ'ē maáⁿ ní cuuvi dííⁿ ní
chí nguéé che'e 'iiⁿ'yāⁿ chí nandaa
naachi n'giindivaacu saⁿ'ā neⁿ'e chí
canéé saⁿ'ā chí n'giindivaacu sa miiⁿ
ndúúcu yā? Nguéé cuuvi ní. ³⁵Naati
ndaá nguuvi chí 'cuúví sá ní 'āā
ntéé sa ndúúcu yā, tuu^mi ní 'iiⁿ'yāⁿ
ca'diiⁿ'núⁿ yā nguuvi miiⁿ.

³⁶Caⁿ'a ntúūⁿ Jesús chíi yā 'iiⁿ'yāⁿ
táámá ejemplo chí 'tēe nguēe
daama: Mar 'áámá 'iiⁿ'yāⁿ nguéé
'caaca yā 'áámá 'taaⁿ tiinūⁿ ngai chí
nguéé 'āā naaⁿ'nu yā chí n'dyaatá yā
'áámá catecaí yā ndicúú caati tiinūⁿ
ngai miiⁿ ní cū'teeⁿ tíínūⁿ ndiicúú.
Ní ndiicúú miiⁿ nguéé n'daacá dinááⁿ
diiⁿ naachi nn'dyaatá ndúúcū chí
ngai miiⁿ. ³⁷Tiicá ntúūⁿ mar 'áámá

'iiⁿyāⁿ nguéé ca'nuúⁿ yā vino ngai cheeti bolsa dííⁿmáⁿ 'iiti chi ndiicúū tan'dúúca chi diiⁿ 'iiⁿyāⁿ ndiicúū ti vino ngai miiⁿ ní chó'oo yaadi yeⁿē ní diiⁿ chi 'cááncuūⁿ yííⁿmáⁿ ndiicúū. Ní vino miiⁿ ní cungéé ndíí yííⁿmáⁿ miiⁿ tuuvíí. ³⁸Cáávä chuū ca'nuúⁿ yā vino ngai miiⁿ cheeti bolsa dííⁿmáⁿ ngai ní nduu 'uuvi ní n'daācā canee yeⁿē. ³⁹Mar 'áámá 'iiⁿyāⁿ chí ngí'i yā vino ndiicúū neⁿé yā cu'u yā vino ngai cuayiivi caati ngaⁿa yā chi vino chi ndiicúū chííⁿ chí n'dai nguéé ti vino ngai.

Discípulos yeⁿe Jesús sta'a yā trigo nguuvi chí ntaavi'tuunúúⁿ 'iiⁿyāⁿ Israel
(Mt. 12.1-8; Mr. 2.23-28)

6 'Áámá nguuvi sábadó chi ntaavi'tuunúúⁿ 'iiⁿyāⁿ Israel, Jesús cho'ó yā ndúúcu discípulos yeⁿé yā 'áámá campo naachi véé trigo. Discípulos yeⁿe yā ní sta'a yā trigo ní chii yā tiíiⁿ ndúúcu ta'á yā ní che'e yā trigo. ²Tuu'mi ní n'duuvi fariseos caⁿa yā chii yā discípulos yeⁿe Jesús: ¿De'ē cúúví chí ndís'tií dííⁿ nī cosas chi nguéé canee chí dííⁿ nī ti contra yeⁿe ley yeⁿe nguuvi chí cánéé chí ntaavi'tuunúúⁿ?

³Jesús nan'guēecútaⁿa yā: ¿'Áá nguéé n'geēⁿ ndís'tií na libro yeⁿé Ndyuūs tan'duucā chí diiⁿ rey David ndúúcu 'iiⁿyāⁿ chí snéé ndúúcu yā taachi cuíicu yā? ⁴David sndáa yā yaācū ndúúcu 'iiⁿyāⁿ chí snéé ndúúcu yā ní David sta'a yā pan chí canéé nátaí yeⁿe Ndyuūs ní che'e yā ní ca'á yā chí che'e 'iiⁿyāⁿ chí snéé ndúúcu yā. David miiⁿ nguéé canee chí che'e yā pan ndúúcu 'iiⁿyāⁿ chí snéé ndúúcu yā ti dámaaⁿ chiiduú s'eeⁿ canee chí che'e yā pan miiⁿ.

⁵Ní Jesús caⁿa yā chii yā 'iiⁿyāⁿ s'eeⁿ: 'Úú ní Saⁿā chí Daiya Dendyuūs ní 'úú ngíí ngaⁿá ntiiⁿnyuⁿ yeⁿe nguuvi chí ntaavi'tuunúúⁿ 'iiⁿyāⁿ.

Jesús diiⁿ chí nduuvā yeⁿe saⁿā chí ndíí cheechi ta'ā sa
(Mt. 12.9-14; Mr. 3.1-6)

⁶Táámá nguuvi sábadó chí ntaavi'tuunúúⁿ 'iiⁿyāⁿ Israel, Jesús miiⁿ ní ndaa yā na yaācū sinagoga ní chí'cueeⁿ yā 'iiⁿyāⁿ. Mííⁿ canee 'áámá saⁿā chí ntí'i ta'a sa ta cuaācú sa. ⁷Maestros yeⁿe ley ndúúcu 'iiⁿyāⁿ fariseos ngeenu yā Jesús miiⁿ caati neⁿe yā n'diichi yā nduuti chí idiíⁿ Jesús chí nduuva yeⁿe sa nguuvi chí intaavi'tuunúúⁿ yā, ní 'tíicā cuuvi caaⁿmáⁿ yā nuuⁿndi yeⁿe Jesús miiⁿ. ⁸Naati Jesús miiⁿ déenu yā yeⁿē chí nadicádiinuuⁿ 'iiⁿyāⁿ ní caⁿa yā chii yā saⁿa chí ntí'i 'áámá ta'ā sa: Díí saⁿā, nducueeⁿ dí ní cuééndii di náávtaⁿā yeⁿe 'iiⁿyāⁿ s'eeⁿ. Saⁿā miiⁿ ní cuééndii sa náávtaⁿā yeⁿe 'iiⁿyāⁿ s'eeⁿ. ⁹Tuu'mi ní Jesús miiⁿ caⁿa yā chii yā 'iiⁿyāⁿ s'eeⁿ: 'Úú intiinguunééⁿ ndís'tií. ¿De'ē chí cuuvi diiⁿ yú nguuvi chí ntaavi'tuunúúⁿ 'iiⁿyāⁿ? ¿'Áá diiⁿ yú cosas chí n'daacā o cosas chí nguéé n'daacā? ¿'Áá n'daacā chí nanguaⁿāi yú vida yeⁿe 'iiⁿyāⁿ o 'caaⁿnuⁿ yú 'iiⁿyāⁿ?

¹⁰Jesús ch'iinu yā nducyaaca 'iiⁿyāⁿ chí snéé yā cuaaⁿ 'diitú yā ní caⁿa yā chii yā saⁿā: N'doo di ta'ā di. Saⁿā miiⁿ ní n'doo ta'ā sa ní ta'ā sa mííⁿ 'āā nduūvā yeⁿē sa. ¹¹'Iiⁿyāⁿ s'eeⁿ ní n'duuvi taaⁿ n'daí yā ní yaa'vi yā v'i: ¿D'Éé diiⁿ yú chí cuuvi tun'daa yú nuuⁿndi yeⁿe Jesús miiⁿ?

**Jesús ndeεve yā ndu'u chí ndiichúví
discípulos yeⁿe yā**

(Mt. 10.1-4; Mr. 3.13-19)

¹²Nguuvi s'eeⁿ Jesús cueⁿe yā 'áámá yīcū chí caaⁿmaⁿngua'á yā ní Jesús miiⁿ ní núúⁿmáⁿ yaaⁿ caⁿangua'á yā. ¹³Ní taachí chidεεve Jesús yaaⁿvi yā discípulos yeⁿe yā ní ndeεve yā ndiichúví 'iiⁿyāⁿ yeⁿe nguuaⁿ discípulos s'uuⁿ ní caⁿa yā chí ndiichúví 'iiⁿyāⁿ s'eeⁿ chí apóstoles. ¹⁴'Iiⁿyāⁿ s'eeⁿ ní 'túúcā nguuvi yā: Simón chí nguuvi ntúúⁿ yā Pedro; ndúúcū Andrés chí 'dīinū Simón Pedro miiⁿ, ndúúcū Jacobo, ndúúcū Juan, ndúúcū Felipe, ndúúcū Bartolomé, ¹⁵ndúúcū Mateo, ndúúcū Tomás, ndúúcū Jacobo chí saⁿa daiya Alfeo, ndúúcū Simón chí nguuvi sa Zelote, ¹⁶ndúúcū Judas chí 'dīinū Jacobo ndúúcū Judas Iscariote chí cuayiivi chíⁿi sá du'ū chí Jesús miiⁿ chí cuuvi 'caaⁿnúⁿ yā 'yā.

Jesús chí'cuéⁿ yā 'yaaⁿ tááví 'iiⁿyāⁿ

(Mt. 4.23-25)

¹⁷Jesús nangua'ái yā yeⁿe yīicū miiⁿ ndúúcū apóstoles yeⁿe yā ní ndúúcū n'deēe n'dái discípulos yeⁿe yā ní cueⁿe yā 'áámá yáⁿāa chí yúúdūu. Ní canee ntúúⁿ nduucú yā n'deēe n'dái 'iiⁿyāⁿ yeⁿe yáⁿāa Judea ndúúcū yāáⁿ Jerusalén ní yeⁿe yāáⁿ s'eeⁿ 'diituú nuúⁿnīⁿyáⁿā ní yeⁿe yáⁿāa Tiro ndúúcū yáⁿāa Sidón. 'Iiⁿyāⁿ s'eeⁿ ní 'āā ndāa yā chí 'caandiveéⁿ yā yeⁿe chí ngí'cueeⁿ Jesús miiⁿ. Ní 'iiⁿyāⁿ chí ngííta yā neⁿe yā chí Jesús diiⁿ chí nduūvā yeⁿe yā. ¹⁸Ní 'iiⁿyāⁿ chí snée yā ndúúcū espíritu yeⁿe yááⁿ'nguiinūⁿ

ní Jesús diiⁿ yā chí nacan'dáá yeⁿe 'iiⁿyāⁿ s'eeⁿ ní ch'εenuu chíi yeⁿe 'iiⁿyāⁿ s'eeⁿ. Ní 'iiⁿyāⁿ s'eeⁿ nduuvā yeⁿe yā. ¹⁹Ní nducyáácá 'iiⁿyāⁿ chí ngiitā neⁿe yā tuuⁿvi yā Jesús miiⁿ ti véé cá poder yeⁿe yā chí diiⁿ yā chí nanduūvā yeⁿe yā.

**Yeⁿe vaadi yeenú ndúúcu yeⁿe chí
nguée vaadi yeenú**

(Mt. 5.1-12)

²⁰Tuuⁿmi ní Jesús n'diichí yā discípulos yeⁿe yā ní caⁿa yā chíi yā 'iiⁿyāⁿ s'eeⁿ: D'éε chúúcā n'dai ndís'tií chí nguée d'ε vεε yeⁿe ní ti yeⁿe ndís'tií cuuví naachí Ndyuūs ngaⁿa ntiiⁿnyúⁿ yā na va'ai chεeti nguuvi.

²¹D'ε chúúcā n'dai ndís'tií chí 'cueeⁿ cá ní libro yeⁿe Ndyuūs chí n'daācā ca canee staava yeⁿe ní. D'ε chúúcā n'dai ndís'tií chí maaⁿ ní nngεεcu ní nanááⁿ Ndyuūs ti neⁿe dííⁿ ní nducuéⁿe chí cuaacu ti Ndyuūs ya'āi 'iinú yā ndís'tií.

²²D'ε chúúcā n'dai ndís'tií taachi 'iiⁿyāⁿ yeⁿe iⁿ'yeeⁿdí 'cūū nguée cuuvi snaaⁿ yā ndís'tií ní taachi 'iiⁿyāⁿ s'eeⁿ cuví yā yeⁿe ndís'tií. Ní cunncāá dííⁿ yā ndúúcū ndís'tií. Ní 'āā ntéé neⁿe yā 'caandiveéⁿ yā chí duuchí ní. Caaⁿmáⁿ yā chí nguée n'daaca ndís'tií cucáávā 'úú chí Saⁿā chí Daiyá Ndyuūs. ²³Ndís'tií canée chí yeenú n'dai ní ní nguuvi miiⁿ cuuví yeenú n'dai ca ní caati Ndyuūs téε yā chí cuuvi yeⁿe ní dendu'ū chí ch'εεtε n'dai taachi ndaa ní na va'ai chεeti nguuvi. Ti ndii cuááⁿ vmnaaⁿ 'tiicá ntúúⁿ idiíⁿ 'iiⁿyāⁿ cosas chí nguée n'daācā ndúúcū 'iiⁿyāⁿ profetas chí candée yā nduudu yeⁿe Ndyuūs.

²⁴De'e chúucā ndaachii ye^{ne}ē ndís'tiī chi véé cá ye^{ne} e nī caati 'āā yeenú nī ye^{ne} e nducue^{ne}ē ye^{ne} i^{ne} yee^{ne} dí 'cūū.

²⁵De'e chúucā ndaachii ye^{ne} e ndís'tiī chi nadacádíínuuⁿ nī chí n'daācā canee nī nanááⁿ Dendyuūs ní nguéé n'giindiveéⁿ nī nduudu ye^{ne}é Ndyuūs ti cuayiivi naachi ne^{ne}é nī 'caandiveéⁿ nī ní nguéé cuuví 'caandiveéⁿ nī. De'e chúucā ndaachii ye^{ne} e ndís'tiī chi maaⁿ ní n'gííⁿnyuⁿ nī ti cuayiivi ní cuēcú nī ti ndaāchii nī.

²⁶De'e chúucā ndaachii ye^{ne} e ndís'tiī taachi nducyaaca 'ii^{ne}yāⁿ caaⁿmaⁿ n'daācā ye^{ne} e nī. Caati ndíí cuááⁿ vmaaaⁿ 'tíicā ngaⁿa 'ii^{ne}yāⁿ ye^{ne} e 'ii^{ne}yāⁿ profetas chi falso yā ní nguéé profetas ye^{ne}é Ndyuūs, ní nguéé candēe yā nduudu ye^{ne}é Ndyuūs.

Dine^{ne} e yú 'ii^{ne}yāⁿ chi taaⁿ yā nduucú yú

(Mt. 5.38-48; 7.12)

²⁷Úú, Jesús, ní ngaⁿá ngii ndís'tiī chi n'giindiveéⁿ nī nduudu chi ngaⁿá: Diné^{ne} e ntúūⁿ nī 'ii^{ne}yāⁿ 'áará chi taāⁿ yā ye^{ne} e nī. Ní diiⁿ n'daacá nī ntúūⁿ ndúucú 'ii^{ne}yāⁿ 'áará chi nguéé ne^{ne} e yā ndís'tiī. ²⁸Di'viicú nī 'ii^{ne}yāⁿ 'áará chi caⁿa cuncnáa yā ndúucu nī. Ní caaⁿmaⁿnguaⁿ nī caavā 'ii^{ne}yāⁿ 'áará chi nguéé n'daacā dííⁿ yā ndúucu nī. ²⁹Nduuti chi 'áámá 'ii^{ne}yāⁿ duuchineeⁿ yā ye^{ne} e nī ní n'ge^{ne} e yā 'áámá tiicuaa náaⁿ nī, 'cuúⁿ nī chi dííⁿ yā táámá vmné^{ne}ēe nduuti chi ne^{ne}é yā. 'Ii^{ne}yāⁿ chi divíí yā cotón ye^{ne} e nī, ca'ā ntúūⁿ nī catecai nī. ³⁰Āā du'ú nūuⁿ 'ii^{ne}yāⁿ chi caaca yā cosa ye^{ne}é nī

caavā necesidades ye^{ne} e yā, ca'á nī. 'Ii^{ne}yāⁿ chi cuta'á yā chi ye^{ne} e nī, 'āā ntéé nguēecunéé nī ndaaca nī. ³¹Tan'dúucā chi ndís'tiī ne^{ne} e nī chi tanáⁿā saⁿā miíⁿ n'daacā diiⁿ sa nduucú nī, 'tiicā ntúūⁿ diiⁿ ndís'tiī ndúucú saⁿā s'eeⁿ.

³²Ndúúti chi ndís'tiī diné^{ne} e nī 'ii^{ne}yāⁿ chi ne^{ne} e ndís'tiī, 'dédé^{ne} e chi n'daacā idiíⁿ nī? Caati 'ii^{ne}yāⁿ chi nguéé n'daacā, 'tiicā ntúūⁿ idiíⁿ yā. ³³Ndúúti chi ndís'tiī n'daacā idiíⁿ nī ndúucú 'ii^{ne}yāⁿ chi din'daacā nduucú nī, 'dédé^{ne} e chi n'daacā idiíⁿ nī? Caati 'ii^{ne}yāⁿ chi nguéé n'daacā, 'tiicā ntúūⁿ idiíⁿ yā. ³⁴Tiicā ntúūⁿ, nduuti chi dííⁿ nī prestar chiíⁿ chi ye^{ne}é nī 'ii^{ne}yāⁿ ní cunee ngiinú nī chi 'ii^{ne}yāⁿ miíⁿ caⁿá yā tee yā chiíⁿ chi ye^{ne}é nī, 'dédé^{ne} e cuuvi chi 'ii^{ne}yāⁿ téé yā gracias ndís'tiī? 'Tiicā ntúūⁿ idiíⁿ 'ii^{ne}yāⁿ chi nguēe n'daacā. ³⁵Ndís'tiī dine^{ne} e nī 'ii^{ne}yāⁿ s'eeⁿ chi taáⁿ yā ye^{ne} e nī. 'Tíicā din'daacá nī ndúucú 'ii^{ne}yāⁿ chi nguéé ngii n'diichí yā ndís'tiī. Dííⁿ nī prestar cosa chi ye^{ne}é nī ní nguéé de'e vee nadacadiinuuⁿ cá nī ye^{ne}é. Ní Ndyuūs téé yā ndís'tiī cosas chi dendu'ū chi ch'ēete ca ye^{ne}é yā taachi caⁿa nī na va'ai ch'ēeti nguuví ní cuuví ndís'tiī daiyá Dendyuūs chi ch'ēete taavi ca. 'Tíicā Ndyuūs téé yā cosas chí n'daacā 'ii^{ne}yāⁿ chi cuncnáa chi nguéé caaⁿmáⁿ yā: N'dii Ndyuūs gracias. ³⁶Tiicā ntúūⁿ yá'ai 'iinú nī cááva 'ii^{ne}yāⁿ tan'dúucā Chiidá nī Ndyuūs ya'ái 'iinú yā ndís'tiī.

Nguéé caaⁿmaⁿ nī nuuⁿndi ye^{ne} e mar 'áámá 'ii^{ne}yāⁿ

(Mt. 7.1-5)

³⁷Nguéé caaⁿmáⁿ nī nuuⁿndi ye^{ne}é 'ii^{ne}yāⁿ ní Ndyuūs ní nguéé

caa^mmaⁿ ntúuⁿ yā yeⁿé nī. Nguéé dííⁿ nī condenar 'iiⁿyāⁿ ní Ndyuūs nguéé dííⁿ yā condenar ndís'tiī. Nadich'εεcú nī nuuⁿndi yeⁿe 'iiⁿyāⁿ ní Ndyuūs nadich'εεcú yā nuuⁿndi yeⁿe nī. ³⁸Ca'á n'daacá nī 'iiⁿyāⁿ chí véé necesidades yeⁿé yā ní 'íícú Ndyuūs téé yā ndís'tiī ní dicaadi n'dááca yā chí cúúnú chíichi ndíí tuunu cungeé na morral yeⁿé nī, caati Ndyuūs dicaadi yā ndís'tiī ndúúcu maaⁿ caadi chí dicaadi nī.

³⁹Jesús ngii yā 'iiⁿyāⁿ s'eeⁿ 'áámá ejemplo yeⁿe 'áámá nduudu chí 'téé nguεε daama. ¿'Áá cúúví dííⁿ 'áámá chí ngeuenááⁿ candēē táámá chí ngeuenááⁿ? ¿'Áá nguεε cun'dáá nūⁿ nduu 'uuví yā na yiivi yáⁿ'áa? ⁴⁰'Áámá discípulo miiⁿ ní nguéé ch'εete cá yā nguéé ti maestro yeⁿe yā. 'Áā du'ú nūⁿ chí neⁿe cuuvi Maestro, canee chí 'cuiinu 'cueeⁿ yā din'daaca yā ní cuuví yā tan'dúúca maestro yeⁿe yā.

⁴¹Táácā cuuví chí maaⁿ nch'εeté nūⁿ n'gíínu nī nuuⁿndi chí dííⁿ tanáⁿ'ā 'iiⁿyāⁿ ní nguéé inaaⁿ nī nuuⁿndi ch'εete chí dííⁿ nī. ⁴²Nguéé n'daacā chí caa^mmaⁿ nī 'iiⁿyāⁿ yeⁿe chí dííⁿ yā chí nguéé n'daacā nduuti chí ndís'tiī dííⁿ nī cosas chí nguεε n'daacā. N'daacā ca chí ndaacadaam nī yeⁿe nuuⁿndi chí dííⁿ nī ní 'íícú cuuvi caa^mmaⁿ nī yeⁿe 'iiⁿyāⁿ chí canéé chí din'daacá yā.

'Áámá yáⁿ'á ní ngíⁿ'í cucáávā n'gui'i yeⁿé

(Mt. 7.17-20; 12.34-35)

⁴³N'gui'i yeⁿe yáⁿ'á chí n'dai, n'daacā chí cuuví n'gui'i yeⁿé ní yáⁿ'á chí nguéé n'dai ní nguéé

n'daacā n'gui'i yeⁿé. Naati yáⁿ'á chí nguéé n'daacā nguéé cuuvi n'gui'i chí n'daacā yeⁿé. ⁴⁴Tíicā ti tuunu tuunu ca yáⁿ'á n'giⁿ'i n'gui'i yeⁿé. Nguéé n'giichi yā yaaⁿ chí 'cuúndi n'guúdíi yaaⁿ nguuvi yeⁿé, ndíí nguéé ndúú tuūⁿmá yā uvas yeⁿé díi'yu nduuti yaaⁿ. ⁴⁵Tiicā ntúūⁿ saⁿ'ā chí n'dai idiiⁿ sa dendu'ú chí n'daacā chí nadacadíínuuⁿ sa na staava yeⁿé sa chí n'daacā. Saⁿ'ā chí cunncaā idiiⁿ sa tanducuéⁿé chí nadacadíínuuⁿ sa na staava yeⁿé sa caati staava yeⁿé sa nguéé n'daacā. Nduudu chí ngaⁿ'ā sa ngiica yeⁿe chí ndiituu na staava yeⁿé sa.

Yeⁿé ndúú 'uúví cimientos yeⁿé nduu 'uuvi va'āi

(Mt. 7.24-27)

⁴⁶Caⁿ'a ntúūⁿ Jesús: ¿De'e cúúví chí ndís'tiī ngaⁿ'á nī ngiiⁿ nī 'úú: N'diī, Señor yeⁿé, n'diī, Señor yeⁿé, ní nguéé 'caandiveéⁿ nī chí ngaⁿ'á? ⁴⁷'Úú cuuví ndís'tiī, du'ú 'iiⁿyāⁿ chí chíi nanaáⁿ ní n'giindiveéⁿ nduudu yeⁿé ní n'daacā idiiⁿ yā tan'dúúca chí ngaⁿ'á, ⁴⁸'iiⁿyāⁿ miiⁿ tan'dúúca 'áámá saⁿ'ā chí din'dái sa vaacu sá. Chiinú yáanūⁿ n'daacā sá ní s'nūūⁿ sa cimiento yeⁿé vmnaaⁿ 'áámá yáává. Ní taachi chíiya 'áámá cuuvi naⁿ'ā ní ch'iita yíicú ní díitūu n'dái cheⁿé nuūⁿnīⁿ miiⁿ. Ní nuūⁿnīⁿ miiⁿ nguéé cuuvi díiⁿ di'núⁿ'u va'āi miiⁿ tí n'daacā candúúu na yáává miiⁿ. ⁴⁹Naati 'iiⁿyāⁿ chí nguéé ch'iindiveéⁿ yā nduudu yeⁿé ní nguéé idiiⁿ yā tan'dúúca chí ngaⁿ'á 'iiⁿyāⁿ miiⁿ tan'dúúca 'áámá saⁿ'ā chí din'dái sa vaacu sa na yaⁿ'á ndúútii ní nguéé ndúúcu cimiento. Ní díitūu n'dai cheⁿé nuūⁿnīⁿ miiⁿ ní va'āi

miiⁿ maaⁿ nch'eté nūⁿ chindēeve ní cunncaá ntuūvī va'āi miiⁿ.

Jesús idíⁿ yā chi nduuvā yeⁿe 'áámá mozo yeⁿe capitán romano

(Mt. 8.5-13)

7 Taachí Jesús ch'íínú ngi'cueeⁿ yā 'iiⁿyāⁿ, tuu'mi ní cueⁿ'é yā na yaāⁿ Capernaum. ²Ná yāāⁿ miiⁿya canéé 'áámá saⁿ'ā capitán romano yeⁿe soldados. Ní na vaacu capitán miiⁿ cánéé 'áámá saⁿ'ā mozo chi idiiⁿ mandado yeⁿe sa. Néené neⁿe sa mozo yeⁿe sa ni néené ya'āi 'iinu sa ti mozo ní neené ya'āi ngítā sa. 'Āā cháā 'cuūvī sa. ³Taachi capitán miiⁿ ch'iindiveeⁿ sa chi Jesús miiⁿ dííⁿ yā vaadi n'giinu, capitán miiⁿ dicho'o sa n'dúúví 'iiⁿyāⁿ Israel chi caaⁿ'maⁿ ntiiⁿnyúⁿ yā na yaacū yeⁿe 'iiⁿyāⁿ Israel chi 'iiⁿyāⁿ s'eeⁿ di'cuíftu yā Jesús miiⁿ chi caⁿ'a yā na vaacu sa ní dííⁿ yā chi nduūvā yeⁿe mozo yeⁿe sa. ⁴'Iiⁿ'yāⁿ s'eeⁿ cueⁿ'e yā nanááⁿ Jesús miiⁿ. Ní di'cuíftu yā Jesús, ní caⁿ'a yā chii yā 'iiⁿyāⁿ: N'dií Jesús, 'caandiveeⁿ nī caati capitán yeⁿ'é 'nū ní neené n'dai yā chi dííⁿ nī chí nduūvā yeⁿe mozo yeⁿe yā. ⁵Caati capitán romano miiⁿ ní idinéⁿe yā 'iiⁿyāⁿ yeⁿe yú chi yeⁿe ndaata Israel, ní din'dái yā yáacū sinagoga yeⁿe yú.

⁶Tuu'mi ní Jesús miiⁿ cueⁿ'e yā ndúúcū 'iiⁿyāⁿ s'eeⁿ. Ní taachi 'āā cháā ndaa niiⁿnuúⁿ yā ná va'ai yeⁿ'é sa, capitán miiⁿ dicho'o sa n'duuvī amigos yeⁿe sa chi caaⁿ'máⁿ yā cuuvi yā Jesús mii: N'dií, Señor, nguéé tuuviínúⁿ nī ti 'úú nguéé neené n'dai 'úú chi cundaa nī chēeti va'ai yeⁿ'é. ⁷Maaⁿ ní deenú

chi mar 'áámá 'iiⁿ'yāⁿ ní neené n'dai chi cuuvi ndaa nanáaⁿ nī. Dámaāⁿ chi caaⁿ'maⁿ ntiiⁿnyuⁿ núúⁿ nī ní nduūvā yeⁿ'e mozo chi dííⁿ mandado yeⁿ'é. ⁸'Āā dē'e nuūⁿ chi caaⁿ'maⁿ ntiiⁿnyúⁿ nī yeⁿ'e tuu'mi ní cuuvi chó'ōo. 'Tiicá ntúūⁿ 'úú ní véé 'iiⁿ'yāⁿ chí ngaⁿ'a ntiiⁿnyúⁿ yā yeⁿ'é. 'Úú ní capitán ní ngaⁿ'a ntiiⁿnyúⁿ yeⁿ'e soldados chi canee maaⁿ poder yeⁿ'é. Ngaⁿ'á ngií 'áámá sa: Cunaⁿ'a di, ní inaⁿ'a sa. Ní ngaⁿ'á ngií taama sa: Cuchíi di, ní chii sa. Ní ngaⁿ'á ngií mozo chi dííⁿ mandado yeⁿ'é: Dííⁿ di ntiiⁿnyúⁿ cūū, ní dííⁿ sa.

⁹Ní taachí Jesús ch'iindiveeⁿ yā nduudu yeⁿ'e sa chi ngaⁿ'a amigos yeⁿ'e capitán miiⁿ chéⁿ'é yiinu yā yeⁿ'e capitán. Ní nguεεcundíi yā n'diichi yā 'iiⁿ'yāⁿ chi snée yā cuaaⁿ daami yā ní caⁿ'a yā. 'Úú ní ngaⁿ'á ngií ndís'tií: 'Úú nguéé indaacá mar 'áámá 'iiⁿ'yāⁿ yeⁿ'e ndaata Israel chi i'teenú n'dai cá yā Nduyūs tan'dúúccā capitán miiⁿ.

¹⁰Taachí ndaa 'iiⁿ'yāⁿ s'eeⁿ va'ai chi capitán miiⁿ dicho'o sa, 'iiⁿ'yāⁿ s'eeⁿ n'diichí yā chí mozo miiⁿ chí néené ngítā sa ní 'āā nduuvá yeⁿ'é sa.

Jesús nadanduuchí yā daiya 'áámá n'daata nguá'āa chi 'āā tináⁿ'ā sa

¹¹Cuayivi, Jesús miiⁿ cheⁿ'e yā na yāāⁿ Naín ndúúccū discípulos yeⁿ'e yā ndúúccū 'yaaⁿ n'dái 'iiⁿ'yāⁿ chí cueⁿ'e ndúúccū yā. Ní chúú chíi.

¹²Taachí Jesús ndaa yā niiⁿnuúⁿ ná cheendi va'āi yeⁿ'e yaāⁿ miiⁿ, n'diichí yā chí ndē' 'iiⁿ'yāⁿ 'áámá caja tináⁿ'ā canuúⁿ yúúní chí cueⁿ'e yā cuēchi yā. Tináⁿ'ā miiⁿ 'áámá n'dyáⁿ'ā sa yeⁿ'e chēecú sá. Ní

n'daata miiⁿ ní n'daataá ngua'a yā. Ní neené 'yaaⁿ 'iiⁿ'yāⁿ yeⁿ'e yāāⁿ miiⁿ snee yā ndúúcu yā. ¹³Taachí Jesús n'diichi yā n'daataá miiⁿ, néené ya'ai 'iinú yā n'daataá ní caⁿ'a yā chii yā n'daataá miiⁿ: Nguéé cueécú di.

¹⁴Tuu'mi ní Jesús miiⁿ ní cueⁿ'e ndaa yā ní tuu'ví yā caja yeⁿ'e tinaⁿ'ā. Ní 'iiⁿ'yāⁿ chi ndéé yā caja miiⁿ ch'εetindii yā. Ní Jesús caⁿ'a yā: Saⁿ'ā 'dííⁿ 'úú yaa'ví dii, nducueeⁿ di.

¹⁵Tuu'mi ní 'nuūⁿndi saⁿ'ā 'dííⁿ chi n'dii ní tucá'a sa ndeē sa. Ní Jesús miiⁿ ní nca'á yā saⁿ'a 'dííⁿ chεεcu sa. ¹⁶Nducyaaca 'iiⁿ'yāⁿ di'va'á yā yeⁿ'e chi n'diichi yā ní caⁿ'a yā: De'ē chúúcā ch'εete Ndyuūs. Ní caⁿ'a yā chi 'áámá profeta ch'εete ndāa yā nguaaⁿ nús'uu chí Ndyuūs dichó'ó yā caati ya'ai 'iinú yā yeⁿ'e s'uuúⁿ chi nación yeⁿ'é yā.

¹⁷Tíicā ngaⁿ'a 'iiⁿ'yāⁿ s'eeⁿ yeⁿ'e Jesús miiⁿ. Ní caⁿ'a yā chuū núúⁿmáⁿ na yáⁿ'āa Judea ndúúcu nuuⁿmáⁿ yāāⁿ cuaaⁿ 'diituú.

Juan chi ngeedínuūⁿnīⁿ dichó'ó yā nduu 'uuvi 'iiⁿ'yāⁿ nanááⁿ Jesús

(Mt. 11.2-19)

¹⁸Discípulos yeⁿ'e Juan chi ngeedínuūⁿnīⁿ caⁿ'a yā chii yā Juan miiⁿ yeⁿ'é tanducuéⁿ'ē dendu'ú chi diiⁿ Jesús. Tuu'mí Juan miiⁿ yaa'vi yā 'uuvi discípulos yeⁿ'e yā nanáaⁿ yā. ¹⁹Ní dichó'ó yā discípulos s'eeⁿ chí ntinguuneeⁿ yā Jesús miiⁿ chuū: ¿Áá n'dií Cristo chí canéé chí ndaā o 'āā cūnee ngíínú 'nū taama yā? ²⁰Discípulos yeⁿ'e Juan miiⁿ cueⁿ'e yā ní ndaá yā nanááⁿ Jesús miiⁿ ní caⁿ'a yā chii yā Jesús: N'dií Señor, Juan chí ngeedínuūⁿnīⁿ

dichó'ó yā nús'uu chí ntíngúúneeⁿ 'nū n'dií: ¿Áá n'dií chí canéé chí ndaā o 'āā cūnee ngíínú 'nū taama yā?

²¹Tiempo miiⁿ Jesús dííⁿ yā chí nnduūvā yeⁿ'e 'yaaⁿ n'dai 'iiⁿ'yāⁿ yeⁿ'e ca'ai chí ndíí yā ní yeⁿ'e ca'ai chí véé espíritu yeⁿ'e yááⁿ'n'guiinūⁿ ndúúcu yā. 'Tiicá ntúūⁿ dííⁿ yā chí snaaⁿ 'iiⁿ'yāⁿ chí ngeenaáⁿ.

²²Tuu'mi Jesús nán'ngueécútaⁿ'a yā yeⁿ'e nduu 'uuvi discípulos yeⁿ'e Juan miiⁿ ní caⁿ'a yā: Ndíí'tií, cunaⁿ'a nī ní cuuvi nī Juan miiⁿ yeⁿ'e nducuéⁿ'ē chí n'diichi nī ndúúcu chí n'giindiveéⁿ nī. 'Iiⁿ'yāⁿ chí ngeenaááⁿ ní inaaⁿ yā, 'iiⁿ'yāⁿ chí nguéé ngii ngíicá yā ní ngiica yā, 'iiⁿ'yāⁿ chí ndíí ca'ai chí lepra chí in'duuti yuūtē yeⁿ'é yā ní nduuva yeⁿ'é yā, 'iiⁿ'yāⁿ chí chεetúū ní n'giindiveéⁿ yā, 'iiⁿ'yāⁿ chí n'díí ní nnduuchí yā yeⁿ'e nguaaⁿ tináⁿ'ā, ní 'iiⁿ'yāⁿ chí ndaachí snee yā 'úú ní ngaⁿ'á nanáaⁿ yā nduudu yeⁿ'é Ndyuūs, nduudu ngai chí yeⁿ'e chí nanguaⁿ'āi 'iiⁿ'yāⁿ. ²³De'ē chúúcā n'dai 'iiⁿ'yāⁿ chí nguéé cunncaā ch'eenú yā 'úú ndúúcu nduudu yeⁿ'é.

²⁴Taachi cueⁿ'e discípulos yeⁿ'e Juan chí dichó'ó Juan miiⁿ, tuu'mi ní Jesús tucá'a yā caⁿ'a yā chii yā 'iiⁿ'yāⁿ chí snee yā ndúúcu yā yeⁿ'e Juan chí ngeedínuūⁿnīⁿ miiⁿ: ¿De'ε cheⁿ'e nī n'diichi nī na yáⁿ'āa cuuⁿ'maⁿ naachi nguéé ch'εetinéé 'iiⁿ'yāⁿ? ¿Áá 'áámá ndúú chí idin'núⁿ'u yúúné? Nguée 'tíicā. ²⁵¿Du'ú cheⁿ'e nī n'diichi nī tuu'mi? ¿Áá 'aama saⁿ'ā chí canúⁿ sa catecai n'dai sa? Deenu nī chí 'iiⁿ'yāⁿ chí n'daācā catecai yā nguéé n'geenu yā ngii ní snée yā na va'ai

yeⁿé rey. ²⁶¿Du'ú cheⁿé nī n'diichí ní tuu'mi? ¿Áá 'áámá profeta chí ngaⁿa nduudu cuaacu yeⁿé Ndyuūs? 'Úú ní ngaⁿá ngíí ndís'tiī chí 'tíicā. Cheⁿé nī n'diichí nī 'áámá 'iiⁿyāⁿ ch'ēete ca yā nguéé ti tanáⁿā profetas. ²⁷Chuū canéé nguūⁿ yeⁿe Juan miiⁿ na libro yeⁿé Ndyuūs ndii cuááⁿ vmaaaⁿ:

Cun'diichí nī. 'Úú ní dicho'ó 'áámá saⁿā chi caaⁿmaⁿ sā nduudu cuaacu yeⁿé nanááⁿ dii. Ní saⁿā miiⁿ ní 'cuundiyaáⁿ sa yúúni cáávā dii.

²⁸'Úú ní ngaⁿá ngíí ndís'tiī chí nguaaⁿ nducyaaca saⁿā chí ch'iindiyāⁿ sa na iⁿyeeⁿdí' cūū nguéé táámá saⁿā chí ch'ēete ca sa ti 'āā Juan miiⁿ chí ch'ēedínuūⁿnīⁿ sa. Naati 'iiⁿyāⁿ chí ndiicuúⁿ ca yā naachí Ndyuūs ngaⁿa ntiⁿnyúⁿ yā ní ch'ēete cá yā nguéé ti Juan miiⁿ.

²⁹Neené n'dai 'iiⁿyāⁿ ndúúcu 'iiⁿyāⁿ chí inn'guee yeⁿe yáⁿāa chí iindiveéⁿ yā nduudu chí ngaⁿa Jesús. Ní 'iiⁿyāⁿ s'eeⁿ chí'téenu yā nduudu yeⁿe Juan miiⁿ ní díⁿ yā tan'duucā Ndyuūs neⁿe yā. Ní Juan miiⁿ ch'ēedínuūⁿnīⁿ yā 'iiⁿyāⁿ. ³⁰Naati 'iiⁿyāⁿ fariseos miiⁿ ndúúcu maestros yeⁿe ley, 'iiⁿyāⁿ s'eeⁿ nguéé neⁿe yā Juan ndíí nguéé s'téenu yā nduudu yeⁿe Juan miiⁿ. Ní nguéé ch'ēedínuūⁿnīⁿ yā. ³¹Jesús miiⁿ caⁿa yā chíi yā 'iiⁿyāⁿ: ¿D'ēē cuuví nadidaamá ndúucu tan'dúúca 'iiⁿyāⁿ chí snéé yā na iⁿyeeⁿdí' cūū maaⁿ? ¿D'e'ē tan'duucá yā? ³²'iiⁿyāⁿ s'eeⁿ tan'dúúca saⁿā ngaiyāá chí n'gēēte sa nii'vēē ní duūchí sa ndúúcu vi'i ní ngai sa compañeros yeⁿe sa. Ní ngaⁿá sa ngii sa vi'i: Tiiví 'nū flauta cáávā baile ní nguéé

nde'éi nī. Ngiita 'nū canciones chí ndaachií ní nguéé ch'ēecu nī. ³³Ní ndaā Juan chí ngeedínuūⁿnīⁿ chí 'aama 'iiⁿyāⁿ chí nguéé che'e yā pan ní nguéé chí'i yā vino ní ndís'tiī ní ngaⁿa nī yeⁿe yā: Juan miiⁿ ní cánée yā ndúúcu espíritu yeⁿe yááⁿ'nguiniūⁿ. ³⁴'Úú ní ndaá, 'úú Saⁿā chí Daiya Dendyuūs 'úú. Ní nge'é ní ngí'í ní ndís'tiī ngaⁿa nī yeⁿe 'úú: 'Cuin'díichí nī, 'iiⁿyāⁿ chí n'deēe nge'é yā ní yaāⁿ n'dáí ngí'í taaví yā vino. Ní ngaⁿa ntuúⁿ nī chí 'úú 'áámá amigo yeⁿe 'iiⁿyāⁿ chí inn'guee yeⁿe yáⁿāa ndúúcu 'iiⁿyāⁿ chí diiⁿ nuuⁿndi. ³⁵Caati nducyaaca 'iiⁿyāⁿ deenu yā chí vaadī deenu miiⁿ ní yeⁿe Ndyuūs. Ní 'iiⁿyāⁿ chí'i'í yā vaadī deenu miiⁿ cáávā dendu'ū chí n'daācā chí díⁿ yā ti yeⁿe Ndyuūs 'iiⁿyāⁿ.

Jesús cueⁿe yā na vaacu

Simón chí saⁿā fariseo

³⁶'Áámá saⁿā fariseo di'cuítu sa Jesús chí ch'éé yā ná váacu sá. Tuu'mi ní Jesús sndaa yā ná va'ai yeⁿe saⁿā fariseo miiⁿ ní chí'iindi yā na mesa ndúúcu sa. ³⁷Tuu'mi ní 'áámá n'daataá chí véé nuuⁿndi yeⁿe ta chí canee tá yeⁿe yāāⁿ miiⁿ, taachí chicádíínuuⁿ tá chí Jesús miiⁿ canée yā na va'ái yeⁿe saⁿā fariseo ní vee yā na mesa, n'daataá míⁿ ndaa ta ní ndée ta 'áámá caja yeⁿē aceite perfume. ³⁸N'daataa míⁿ chíínti'ya tá na ca'a Jesús ní ngeecu tá. Ní ndúúcu nuūⁿnīⁿ nduutináⁿ tá naaⁿnu tá ca'a yā ní nadidēēve tá ca'a yā ndúúcu yuūdū tiⁿ tá. Ní 'neeⁿcheendi ta ca'a yā ní chíi tá aceite perfume ca'a yā. ³⁹Taachí sáⁿā fariseo miiⁿ n'díichi sa chí diiⁿ

n'daataá miiⁿ, tuu'mi nadicádíínuuⁿ sa ní caⁿá sa nguááⁿ maāⁿ sa 'tíicā: Ndúúti chí sáⁿa 'cūū profeta sa, tuu'mi ní deēnū sa du'ū n'daātaa 'cūū chí ituu'vī tá saⁿā ti véé nuuⁿndi yeⁿē tá. ⁴⁰Tuu'mi ní Jesús miiⁿ caⁿa yā chíi yā saⁿa fariseo miiⁿ: Dii, Simón, véé de'ē chí cuuvi dii. Simón miiⁿ ní n'guēcútaⁿa sa ní caⁿa sa: Maestro, caaⁿmaⁿ nī.

⁴¹Jesús caⁿa yā ejemplo 'cūū: 'Uūvī 'iiⁿyāⁿ can'díicu yā yeⁿe 'áámá saⁿā. 'Áámá yā ní can'díicu yā nyuⁿu ciento caadi, taama yā ní 'uūvī ngeecu ndiichi caadi. ⁴²Naati 'iiⁿyāⁿ s'eeⁿ ní nguéé tuūmī miiⁿ yeⁿe yā chí nadí've yā. 'Āā ntéé ndaaca yā tuūmī. Sáⁿā chí chinnee miiⁿ ní nadach'ēecú sa yeⁿē ndúú 'uuvī sa. Maaⁿ ní cuuvi di 'úú, ¿chéē cá saⁿā s'eeⁿ neⁿe cá yā 'iiⁿyāⁿ miiⁿ?

⁴³Simón miiⁿ nan'guēcútaⁿa yā: 'Úú inadacáíinúúⁿ chí dinéⁿe ca yā saⁿā chí n'deēe ca can'díicū miiⁿ. Jesús nan'guaacútaⁿa yā: N'daācā inadacádíínuuⁿ di.

⁴⁴Tuu'mi ní nguēcundíí Jesús naachi canéé n'daataá mííⁿ ní caⁿa yā chíi yā Simón: ¿'Áá ínaaⁿ di chí diiⁿ n'daātāa 'cūū? 'Úú indaá na vaacu di ní nguéé tee di nuūⁿnīⁿ chí naaⁿnú ca'á tan'dúúccā costumbre yeⁿē yú naati n'daātāa 'cūū ní cheendāa tá nuūⁿnīⁿ nduutinaaⁿ tá ca'á ní nadidēeve tá ca'á ndúúccū 'yuūdū tiiⁿ ta. ⁴⁵Taachí ndaá ní nguéé 'neeⁿcheendi di 'úú tan'dúúccā costumbre yeⁿe yú naati n'daātāa 'cūū 'áámá l'neeⁿcheendi tá ca'á, ndíí taachi sndaá. ⁴⁶Ndíí nguéé ndúú cheendāa di aceite perfume tííⁿ tan'dúúccā costumbre yeⁿe yú naati n'daātāa 'cūū cheendaa tá aceite

perfume na ca'á chí diiⁿ tá honrar 'úú. ⁴⁷Chuū ngaⁿá ngíí, dii Simón; ti tanducuéⁿe nuuⁿndi chí n'deēe n'dáí yeⁿe tá nadach'ēecú yeⁿē tá caati neené neⁿe ta 'úú, ní diiⁿ tá 'túúccā cáávā chí nadach'ēecú yeⁿē tá. Ní 'iiⁿyāⁿ chí duū'vī neⁿe yā 'úú ní duū'vī nadich'ēecú yeⁿe yā.

⁴⁸Tuu'mi Jesús caⁿa yā chíi yā táⁿā: Díí n'daataá 'úú nadich'ēecú nuuⁿndi yeⁿē di. ⁴⁹'Iiⁿyāⁿ chí veēté yā na mesa miiⁿ tucáa yā caⁿa yā chíi yā vī'i: ¿Du'u sáⁿā chuū chí nadicádíínuuⁿ sa chí cuuvi nadich'ēecu sa nuuⁿndi yeⁿe 'iiⁿyāⁿ?

⁵⁰Tuu'mí Jesús miiⁿ caⁿa yā chíi yā n'daataá míí: Cáávā chí i'téenu di 'úú, ndiiⁿ chí nanguáⁿai di. Maaⁿ ní cunaⁿā di ndúúccū vaadi 'diiíⁿ.

N'daataa s'eeⁿ chí chinneé yā Jesús

8 Cuayiivi miiⁿ, ní cheⁿe Jesús nuuⁿmáⁿ yáāⁿ n'geete ndúúccū nuuⁿmáⁿ yáāⁿ lííⁿ ní ngaⁿa yā nduudu cuaacu yeⁿé Ndyuūs yeⁿe naachí Ndyuūs ngaⁿa ntiiⁿnyúⁿ yā. Ní ndu'u ndiichúúví apóstoles yeⁿe Jesús miiⁿ cueⁿe yā ndúúcu yā. ²'Tiicá ntúūⁿ n'duuvī n'daataá chí Jesús dííⁿ yā chí nanduúvā yeⁿe ca'ai yeⁿe yā ní chí dííⁿ yā chí nacan'dáá espíritu yeⁿe yááⁿn'guiinūuⁿ yeⁿe náⁿā n'daataa s'eeⁿ. Ní nguaaⁿ n'daataa s'eeⁿ canee María yeⁿe yáāⁿ Magdala. N'daata miiⁿ ní Jesús dííⁿ yā chí nán'daā ndēēchē espíritus yeⁿe yááⁿn'guiinūuⁿ yeⁿē ta. ³Cueⁿe ntúūⁿ Juana chí n'daataa yeⁿe saⁿā chí nguuvī Chuza chí ngaⁿa ntiiⁿnyuⁿ sá yeⁿe cosas yeⁿe rey Herodes, ndúúccū táⁿā Susana,

ndúúcu 'yaa' n'dái ca n'daataá chí ca'a tá tuumí yeⁿē tá ní cuai tá 'āa de'é nūuⁿ chí neⁿe Jesús.

**'Áámá ejemplo chi nguuvi parábola
chi yeⁿe 'áámá saⁿā chí ngiñū sa
ndaata**

(Mt. 13.1-9; Mr. 4.1-9)

⁴Taachí nduuvidaama 'yaa' n'dái 'iiⁿyāⁿ chí chiica yā yeⁿe 'yaa' n'dai yááⁿ tuu'mi ní ndaa yā nanááⁿ Jesús. Ní Jesús yaa'vi yā 'iiⁿyāⁿ s'eeⁿ ndúúcu 'áámá ejemplo tan'dúúca 'áámá dendu'ū chí véé iⁿyééⁿdi 'cūū. Ní caⁿa yā 'tíicā: ⁵'Áámá saⁿā chí cuñū ndaata míⁿ cuéⁿe sa cuñū sa. Taachí chiñū sa 'áámá duutu ndaata chiya 'diitú cyúúni ní ch'iinca'a 'iiⁿyāⁿ ní 'yaada ní che'e tī. ⁶Duutu ndaata ní chiya naachi véé n'dee n'dái tuū. Taachí can'daā, ní tī' ti nguéé ya'ai yeⁿē. ⁷Duutu ndaata ní chiya nguaaⁿ yááⁿ. Yááⁿ miiⁿ chí dáámá ch'iita ndúúcu yaatá ní di'vaachí yeⁿē vi'ī. ⁸Náⁿā duutu ndaata ní chiya na yáⁿā n'dáacā ní taachí can'daā n'dee n'dái cosecha chii yeⁿē. Ní yeⁿē 'áámá ndaata ní chi' 'aama ciento ndaata yeⁿē. Taachí Jesús caⁿa yā nduudú 'cūū, yuūdú n'dái caⁿa yā, ní caⁿa yā: Ndís'tī chí véé veéⁿ nī, ní 'caandiveéⁿ nī.

**Jesús caⁿa yā yeⁿe chí neⁿē caāⁿmāⁿ
ejemplo miiⁿ**

(Mt. 13.10-23; Mr. 4.10-20)

⁹Tuu'mi ní discípulos yeⁿe Jesús caⁿa yā chii yā Jesús: ¿D'é néⁿé caaⁿmaⁿ nduudú 'cūū?

¹⁰Jesús miiⁿ ní caⁿa yā: Ndís'tī ní maaⁿ ní cuuvi déenu nī chí cánuuⁿ n'de'ei yeⁿe Ndyuūs naachi

ngaⁿa ntiiⁿnyúⁿ yā naati 'úú ní ngaⁿá ndúúcu nduudu chí 'tee nguée dáámá. Ní taachi 'iiⁿyāⁿ s'eeⁿ snaaⁿ yā nguéé cuuvi snaaⁿ n'daaca yā, ní taachí 'caandiveeⁿ yā nguéé tuumicadíinuuⁿ yā yeⁿē.

¹¹Chuū chí neⁿe caāⁿmāⁿ ejemplo miiⁿ. Ndaata miiⁿ ní chíⁿ chí tan'dúúca nduudu yeⁿe Ndyuūs.

¹²Duutu ndaata chí chiya ná 'diitū cyúúni, chíⁿ chí tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā. Daacá nūuⁿ ndaa yááⁿnguiinuuⁿ miiⁿ ní diví sa nduudu miiⁿ na staava yeⁿe 'iiⁿyāⁿ ti nguéé cuuvi cu'téenu yā ní nguéé ndúú cuuvi nnguaⁿai yā.

¹³Ndaata chí chiya nguaaⁿ tuū chí nguéé dii'yu yeⁿē ni tan'dúúca nduudu cuaacu yeⁿé Ndyuūs chí 'iiⁿyāⁿ n'giindiveeⁿ yā ní yeenú taavi yā. Cánéé yā tan'dúúca 'áámá milpa chí nguéé véé dii'yu yeⁿē.

'Iiⁿyāⁿ s'eeⁿ ni 'áámá tiempo nūuⁿ i'téenu yā ní taachí ndaa nguuvi chí chíⁿnyúⁿnééⁿ 'iiⁿyāⁿ yeⁿe yā chí 'cuináaⁿ yā cáavā nduudu miiⁿ ní 'iiⁿyāⁿ s'eeⁿ diví yā nduudu miiⁿ na staava yeⁿe yā. ¹⁴Dúútú ndaata chí chiya nguaaⁿ yááⁿ tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā. Ní 'iiⁿyāⁿ s'eeⁿ damáāⁿ nadacadiinúúⁿ yā yeⁿe vaadi 'cuiica ndúúcu dendu'ū chí idi'vaachí yeⁿe iⁿyeeⁿdí 'cūū ndúúcu dendu'ū chí vicio yeⁿe yā. Nducuéⁿē di'vaachi nduudu miiⁿ ní diiⁿ chí nguéé dichí'vé nduudu miiⁿ na vida 'iiⁿyāⁿ s'eeⁿ. ¹⁵Duutu ndaata chí chiya na yáⁿā n'dáacā chíⁿ chí tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā ní din'daacá yā ndúúcu 'viich'etínūⁿ.

Ní i'téenu yā nduudu miiⁿ na staava yeⁿé yā. Ní ch'iⁿí yā tanáⁿā 'iiⁿyāⁿ chi i'téenu yā nduudu cuaacu miiⁿ.

'Áámá ejemplo yeⁿe 'áámá lámpara

(Mr. 4.21-25)

¹⁶Ní Jesús ch'iⁿcueeⁿ yā 'túucā: 'Áámá 'iiⁿyāⁿ nguéé ng'iⁿ yā 'áámá lámpara ní cu'nuuⁿ yā maaⁿ 'áámá 'cuééⁿ o cu'nuúⁿ yā maaⁿ 'áámá cama ti cu'nuúⁿ yā na 'áámá mesa ní 'iiⁿyāⁿ chi cundáa yā ní snaaⁿ yā. ¹⁷Tiicá ntúúⁿ, nducuéⁿē chi nguéé deenu 'iiⁿyāⁿ yeⁿe chi cunúúⁿ n'de'ei nguéé cunee chi nguéé snaaⁿ yā. Ní nguéé chi cunúúⁿ n'de'ei chi nguée cadíinuⁿ 'iiⁿyāⁿ yeⁿē.

¹⁸Caandiveeⁿ n'daacá nī cáávā chi cuuvi deenu nī ti 'iiⁿyāⁿ chi véé yeⁿe yā ní Ndyuūs ca'a cá yā ní n'deē cá cuuvi yeⁿe yā. Ní 'iiⁿyāⁿ chi nguéé yeⁿe yā 'áará chi dúú'ví nūⁿ chi nadacádiinúúⁿ yā chi véé yeⁿe yā, chuū ní Ndyuūs divíi yā yeⁿe yā.

Chæecu Jesús miiⁿ ndúúcū 'díínu yā chi ndāa yā

(Mt. 12.46-50; Mr. 3.31-35)

¹⁹Tuu'mi ní 'díínu Jesús ndúúcū chæecú yā neⁿe yā ndaá yā nanááⁿ Jesús naati nguéé cuuvi ndaa yā caati neené 'yaaⁿ n'dai 'iiⁿyāⁿ snéé yā miiⁿ. ²⁰Ní 'áámá 'iiⁿyāⁿ cueⁿe yā nanááⁿ Jesús ní caⁿa yā: N'dii Jesús, chæecú nī ndúúcū 'díínu nī snéé yā cuaaⁿ chufa'āi ní neⁿe yā snaaⁿ yā n'dii.

²¹Tuu'mi ní Jesús miiⁿ caⁿa yā chii yā 'iiⁿyāⁿ s'ee: 'Iiⁿyāⁿ chí n'giindiveéⁿ yā nduudu yeⁿé Ndyuūs ní i'téenu yā 'iiⁿyāⁿ, 'iiⁿyāⁿ s'eeⁿ chí chæecú ní 'iiⁿyāⁿ s'eeⁿ chí 'diinú.

Jesús chin'neeⁿ 'dííⁿ yā 'yúúné ndúúcū nuūⁿnī'yáⁿā

(Mt. 8.23-27; Mr. 4.35-41)

²²Chúū chii. 'Áámá nguuvi Jesús miiⁿ sndaá yā na 'áámá barco ndúúcū discípulos yeⁿe yā ní caⁿa yā chii yā 'iiⁿyāⁿ s'eeⁿ: Cho'o yú táámá 'díítuú nuūⁿnī'yáⁿā. Ní cueⁿe yā. ²³Taachí chiica yā na barco miiⁿ, Jesús miiⁿ ní cyaadu yā. Chéenu 'aama 'yúúné taaⁿ ní diiⁿ chí chindaā nuūⁿnīⁿ chæeti barco miiⁿ ti barco miiⁿ neⁿe 'cuæchi nguááⁿ nuūⁿnīⁿ. Ní discípulos 'va'a yā. ²⁴Tuu'mi ní discípulos s'eeⁿ ndaa yā naachi canéé Jesús miiⁿ ní nadin'duuchí yā 'iiⁿyāⁿ ní caⁿa yā: N'dii Maestro, n'dii Maestro, 'cuæchi yú nguááⁿ nuūⁿnīⁿ. Taachi Jesús miiⁿ nduuchi yā, tuu'mi ní caⁿa yā chi cūnéé 'diiⁿ 'yúúné miiⁿ ndúúcū nūⁿnīⁿ, ní canéé 'diiⁿ. Tuu'mi ní 'āa ntéé chéenu 'yúúné miiⁿ ní canéé 'diiⁿ ní n'daacā cueⁿe yā ndúúcū barco miiⁿ. ²⁵Jesús ní caⁿa yā: ¿De'e cúúvi chi nguéé cu'téenu cá nī? Discípulos ní 'va'a n'daí yā ní cheⁿe yiinú yā ní ngaⁿa yā ngii yā vi'i: ¿Du'u sáⁿa 'cūū chí ngaⁿā ntiⁿnyuⁿ sa yeⁿē 'yúúné ndúúcū nuūⁿnīⁿ ní n'giindiveéⁿ yeⁿē sa?

Jesús dííⁿ yā chi nanduūva 'áámá saⁿa yeⁿe yáⁿāa Gadara chi canéé sá ndúúcū espíritus yeⁿe yááⁿ'nguiinūⁿ

(Mt. 8.28-34; Mr. 5.1-20)

²⁶Jesús ndúúcū discípulos yeⁿe yā cueⁿe yā na yáⁿāa Gadara. Yáⁿāa miiⁿ ní canee 'diitúú nuūⁿnī'yáⁿā Galilea. ²⁷Taachí Jesús nacan'dáa yā na barco miiⁿ ní ndaa yā na yáⁿāa,

ndaā nīⁿnuúⁿ Jesús mīⁿ 'áámá saⁿā yeⁿe yáⁿāa mīⁿ. 'Āā 'naaⁿ tiempo canéé sá ndúú^cú espíritus yeⁿe yááⁿ'nguiinūⁿ. Nguéé catecai sa ndíí nguéé ndúú canúúⁿ rá sá va'āi ti na yiivi yáává cānuuⁿ sa. Ní ndaā sa ní ndaāca sa Jesús mīⁿ. ²⁸Ní taachi sáⁿa 'cūū n'dííchi sa Jesús mīⁿ chiintī'ya sá nanáaⁿ yā ní 'cai yiicú sa: N'dii Jesús, Daiya Ndyuūs chí ch'ēete n'dai poder yeⁿe nī, ¿de'ē dííⁿ nī nduucú? 'Úú di'cuiitú n'dii chí nguéé dííⁿ nī chí dííⁿ sufrir.

²⁹Túúcā caⁿa sa ti Jesús caⁿa ntīiⁿnyúⁿ yā chí nan'daā espíritus yeⁿe yááⁿ'nguiinūⁿ yeⁿe sáⁿā mīⁿ. 'Āā néené 'naaⁿ tiempo chí espíritus ichéé ndúú^cú saⁿā mīⁿ. 'Iiⁿ'yāⁿ s'eeⁿ yeⁿe yááⁿ mīⁿ ní ngāā chíichí yā saⁿā mīⁿ ndúú^cú cadenas naati chí'ica sá cadenas ní espírítu yeⁿe yááⁿ'nguiinūⁿ candée sa saⁿā naachi nguéé 'iiⁿ'yāⁿ. ³⁰Tuu'mi ní Jesús tiinguunééⁿ yā saⁿā mīⁿ: ¿D'ēē nguuvi di? Saⁿā mīⁿ ní caⁿa sa: Legión nguūví. 'Tíicā ngaⁿa 'iiⁿ'yāⁿ yeⁿe sa ti neené 'yaaⁿ espíritus yeⁿe yááⁿ'nguiinūⁿ canee ndúú^cú sa. ³¹Ní espíritus idi'cuítū Jesús chí nguéé dich'ó^o yā na abismo chí canéé cuaaⁿ maaⁿ yáⁿāa. ³²Ní nīiⁿnuúⁿ ná snée yā néené n'deēe cuuchí vεε ti 'cuēeti mīⁿ chí in'nuúⁿ ti chí ch'é^e ti. Ní espíritus di'cuítū Jesús mīⁿ chí ca'á yā lugar chí cundāā ch'ēētī cuuchí s'eeⁿ. Jesús mīⁿ ní 'cuúⁿ yā. ³³Tuu'mi ní espíritus yeⁿe yááⁿ'nguiinūⁿ nan'dāā na cuerpo yeⁿe saⁿā mīⁿ ní sndaā na cuerpo yeⁿe cuuchi s'eeⁿ. Ní 'iiti s'eeⁿ ní ch'éenu ti na yiivi yaavā yeⁿe yiicū mīⁿ ní chingéé nuúⁿ ti nguuaaⁿ nuūⁿnīⁿ ní ch'íi nuúⁿ ti nguuaaⁿ nuūⁿnīⁿ mīⁿ.

³⁴'Iiⁿ'yāⁿ chí idiiⁿ cuidado cuuchí s'eeⁿ taachí n'diichí yā chuū, cueⁿ'é yā ngéenu yā ní cuuvi yā 'iiⁿ'yāⁿ na yáāⁿ ndúú^cú 'iiⁿ'yāⁿ chí snée na 'cuēeti nducuéⁿ'ē chí chíi. ³⁵'Iiⁿ'yāⁿ yeⁿe yááⁿ mīⁿ ní cheⁿe yā n'diichi yā chí chíi. Ndaā yā nanááⁿ Jesús mīⁿ ní n'diichí yā saⁿa chí nacan'daā espíritus yeⁿe yááⁿ'nguiinūⁿ. Saⁿā mīⁿ ní véé sa na ca'a Jesús. Canúúⁿ sá catecai sa ní 'āā n'daāca idiiⁿ sa. 'Iiⁿ'yāⁿ s'eeⁿ ní dii'yá yā chíi. ³⁶Ní 'iiⁿ'yāⁿ s'eeⁿ chí n'diichí yā nducuéⁿ'ē chí chó'oo caⁿa yā 'iiⁿ'yāⁿ chí caama ndaa yā táacā espíritus yeⁿe yááⁿ'nguiinūⁿ nan'dāā na cuerpo yeⁿe saⁿā mīⁿ. ³⁷Tuu'mi ní nducyáácá 'iiⁿ'yāⁿ yeⁿe yáⁿāa Gadara di'cuítū yā Jesús chí cuēvī yā yeⁿe 'iiⁿ'yāⁿ s'eeⁿ ti neené 'va'á yā. Tuu'mi ní Jesús ndaa yā barco mīⁿ. ³⁸Ní saⁿā chí nān'daa espíritus yeⁿe yááⁿ'nguiinūⁿ di'cuítū sa Jesús mīⁿ chí cundāā sa na barco mīⁿ ndúú^cú yā. Jesús yaa'vi yā saⁿa mīⁿ ní caⁿa yā: ³⁹Cunaⁿā di ná vaacu di ní caaⁿmaⁿ di cuuvi di 'iiⁿ'yāⁿ dendu'ū chí ch'ēete n'dai chí Ndyuūs dííⁿ yā ndúú^cú di. Saⁿā mīⁿ ní cunaⁿa sa ní caⁿa sa chíi sa 'iiⁿ'yāⁿ núúⁿmáⁿ na yáāⁿ dendú'ū chí ch'ēete n'dai chí Jesús dííⁿ yā ndúú^cú sa.

Yeⁿe daiya Jairo chí ngiitā ní yeⁿe n'daataá chí tuu'vi tá catecai Jesús
(Mt. 9.18-26; Mr. 5.21-43)

⁴⁰Taachí Jesús cueⁿ'e yā cho'o yā táámá 'diitú nuūⁿnīⁿyáⁿā, ní ndaa yā yáāⁿ mīⁿ, 'iiⁿ'yāⁿ 'cuúⁿ yā Jesús ndúú^cú vaadi yeenú ti n'deeē n'daí 'iiⁿ'yāⁿ ní snee ngiinu yā Jesús mīⁿ. ⁴¹Miiⁿ cánéé 'aama saⁿa chí nguuvi

sa Jairo. Saⁿa miiⁿ ngaⁿa ntiⁿnyuⁿ sa yeⁿē yaācū sinagoga ní ndaā sa nanááⁿ Jesús ní chiintii'ya sa na ca'a Jesús miiⁿ. Ní di'cuítú sa 'iiⁿyāⁿ chí cundáa yā na vaācū sa, ⁴²caati 'áámá n'dyáⁿā daiya sa 'āā 'nááⁿ tá tan'duu ndiichúúví nduūyū tá 'āā cháá 'cuuvi tá. Taachí cueⁿe Jesús miiⁿ neenē n'deeē 'iiⁿyāⁿ cueⁿe yā ndúúcu yā ní ndii tuunúúⁿ ngeenúū chiichi yā.

⁴³Nguaaⁿ 'iiⁿyāⁿ s'eeⁿ canéē 'áámá n'daataá chí 'āā ndiichúúví nduūyū canee tá ndúúcu 'áámá ca'āi chí ngéē yuuúⁿ yeⁿe cuerpo yeⁿē ta. 'Āā diiⁿ tá gasta ndúúcu médicos tanducuéⁿē chí vε yeⁿē tá. Mar 'áámá médico nguéé ngii diyiiicū yā táⁿā miiⁿ. ⁴⁴Ndaā niiⁿnuⁿ tá cuaaⁿ daami Jesús ní tuū'vi tá naachi n'dεē tíí yeⁿe catecai Jesús miiⁿ. Tuu'mí nūuⁿ canéē naaⁿ chí ingéē yuuúⁿ yeⁿe cuerpo yeⁿē tá.

⁴⁵Tuu'mí ní Jesús miiⁿ caⁿa yā: ¿Du'u tuū'vi 'úú? Nducyáácá 'iiⁿyāⁿ ní caⁿa yā: Nguε 'úú. Pedro miiⁿ ní caⁿa sa: N'dii Maestro, 'iiⁿyāⁿ miiⁿ ní i'nuuⁿ chiichí yā n'dii ní táácā chí ngaⁿa nī: ¿Du'ú tuū'vi 'úú?

⁴⁶Jesús caⁿa yā: Véé du'ū chí tuū'vi 'úú. 'Úú ní deenú chí ndúúcu poder yeⁿé nduūvā yeⁿe 'áámá 'iiⁿyāⁿ.

⁴⁷Taachi n'daata mííⁿ tuumicádiinuuⁿ tá chí Jesús deenú yā in'duuví n'dai tá ní ndaā tá nanááⁿ Jesús miiⁿ ní chiintii'yā ta nanááⁿ yā. Ní caⁿa cuaacu tá nanááⁿ nducyáácá 'iiⁿyāⁿ dε'ē cáávā chí tuū'vi tá catecai Jesús. Ní hora mííⁿ nūuⁿ chí tuu'vi ta nduūvā yeⁿē tá. ⁴⁸Jesús miiⁿ ní caⁿa yā: Díí, daiyá, cáávā chí i'teenú di 'úú, ní nduūvā

yeⁿē di. Maaⁿ ní cunaⁿa di na vaacu di ndúúcu vaadi 'diiíⁿ.

⁴⁹Ní taachi Jesús ngaⁿa yā chuū ndaā 'áámá saⁿā yeⁿe na vaacu saⁿā chí ngaⁿa ntiⁿnyuⁿ yeⁿē yaācū sinagoga. Ndaā sa nanááⁿ Jairo ní caⁿa sa: 'Āā chíí daiya di. 'Āā ntéé yaa'vi di Maestro.

⁵⁰Jesús miiⁿ chíindiveéⁿ yā nduudu 'cūū ní caⁿa yā: Nguéé 'va'ā di. Cu'téenu di 'úú ní nanduūchi ta yeⁿē nguaaⁿ tináⁿā.

⁵¹Tuu'mí ní Jesús sndaā yā na vaacu Jairo. Nguéé 'cuuⁿ yā chí nducyaaca 'iiⁿyāⁿ sndaá yā ndúúcu yā cuaaⁿ cheeti va'āi miiⁿ, dámaāⁿ Pedro ndúúcu Jacobo, ndúúcu Juan, ndúúcu cheecu n'daata 'lííⁿ, ndúúcu chíida tá. ⁵²Nducyaaca yā cuaaⁿ chuva'āi ch'εetinée yā ní ngeecu yā ní n'gai yā ti ya'ái yā caavā tá. Ní Jesús caⁿa yā: Nguéé cuεεcū nī. Nguéé n'dii tá ti cyaadu tá.

⁵³'Iiⁿyāⁿ s'eeⁿ ní taachi n'giindiveéⁿ yā nduudu yeⁿe Jesús miiⁿ chííⁿnyuⁿneeⁿ yā yeⁿe Jesús miiⁿ ti 'āā deenú yā chí 'āā n'dii tá. ⁵⁴Tuu'mí ní Jesús ndaa yā cuaaⁿ cheeti va'āi ní st'alá yā ta'ā tá ní caⁿa yuudú yā: Dii, ta'dííⁿ, nducueeⁿ di.

⁵⁵Hora mííⁿ nūuⁿ espíritu yeⁿē ta'dííⁿ mííⁿ ngeuecunéē ndúúcu ta. Tuu'mí nūuⁿ nducueⁿē tá. Jesús caⁿa ntiⁿnyúⁿ yā chí ca'á yā chí che'e tá. ⁵⁶Chiida tá ndúúcu cheecu tá neenē ngeⁿe yiinu yā ní Jesús caⁿa yā chíi yā 'iiⁿyāⁿ s'eeⁿ chí nguéé cuuvi nī chí nduuchi tá yeⁿe nguaaⁿ tináⁿā.

Jesús dichó'o yā ndu'u ndiichúúví discípulos yeⁿe yā

(Mt. 10.5-15; Mr. 6.7-13)

9 Jesús yaa'ví yā ndu'u ndiichúúví discípulos yeⁿé

yā ní ca'a yā poder. Ní caⁿa yā chí tun'dáa yā espíritus yeⁿe yááⁿnguiinūⁿ yeⁿe 'iiⁿyāⁿ ní díⁿ yā chí nduūvā yeⁿe 'iiⁿyāⁿ chí ngiitā. ²Ní Jesús dichó'o yā discípulos chí caaⁿmaⁿ yā nduudu n'dai yeⁿe naachí Ndyuūs ngaⁿa ntiⁿnyúⁿ yā ní díⁿ yā chí nduuvā yeⁿe 'iiⁿyāⁿ chí ngiitā. ³Ní caⁿa yā chíi yā discípulos yeⁿe yā: Ndís'tii nguéé de'ε vεε candée nī cuaaⁿ cyúúni. Nguéé ndúú in'daacuú, ndíi nguéé ndúú morral, ndíi nguéé ndúú pan ra, ndíi nguéé ndúú tuūmi ra, ndíi nguéé nduu candée nī 'uūvī catecai. ⁴Ní 'āā tíí nūⁿ va'ai naachi ndaa nī 'cuεetinée nī miiⁿ ní ndíi taachi ndaa nī ndíi taachi nan'dáa nī yeⁿe yāāⁿ miiⁿ. ⁵Ní naachi ndaa nī 'áámá yāāⁿ ní 'iiⁿyāⁿ nguéé 'cuaáⁿ yā ndís'tii, tuu'mi ní nan'dáa nī yeⁿe yáāⁿ miiⁿ ní ndáádi nī yaācāⁿ yeⁿe ca'a nī. Chuū ní 'áámá señal chí 'cuuⁿmiⁿ nī chí nguéé n'daacā idiiⁿ yā ti contra yeⁿe nī.

⁶Discípulos ican'dáa yā ní cheⁿé yā nuuⁿmáⁿ cuaaⁿ yáāⁿ s'eeⁿ ní nduu cuááⁿ ní ngaⁿa yā nduudu ngai yeⁿe Ndyuūs, nduudu chí nanguaⁿāi 'iiⁿyāⁿ. Ní díⁿ yā chí nduūvā yeⁿe 'iiⁿyāⁿ chí ngiitā.

Rey Herodes nguéé s'teenu yā yeⁿe Jesús

(Mt. 14.1-12; Mr. 6.14-29)

⁷Ch'iindiveeⁿ rey Herodes tanducuéⁿe chí Jesús miiⁿ idiiⁿ yā ní 'āā ntee déénu yā de'ε nadicadínuuⁿ yā. Ní véé 'uūvī vandiicadiinúúⁿ yā caati náⁿa 'iiⁿyāⁿ ní ngaⁿa yā chí Jesús chí Juan miiⁿ chí nduuchi yā yeⁿe nguaaⁿ tináⁿā. ⁸Náⁿa yā ní ngaⁿa yā chí profeta

Elías miiⁿ ní 'āā che'enaáⁿ yā. Náⁿa yā ní ngaⁿa yā chí 'áámá profeta chí ndíi yā ndíi yeⁿe tiempo chí 'āā 'naaⁿ nandúúchi yā yeⁿe nguaaⁿ tináⁿā. ⁹Ní rey Herodes miiⁿ ní caⁿa yā: 'Úú caⁿā ntiⁿnyúⁿ chí 'chiitā daandu saⁿā chí Juan chí cheédínuūⁿnīⁿ sa. ¿Dú'ū chí saⁿā miiⁿ chí ch'iindiveeⁿ tanducuéⁿe yeⁿe sa? 'Úú neⁿe cadiinúúⁿ ní neⁿe snaáⁿ sáⁿa 'cūū.

Jesús ca'a yā che'e nyuⁿu mil 'iiⁿyāⁿ

(Mt. 14.13-21; Mr. 6.30-44; Jn. 6.1-14)

¹⁰Taachi discípulos ndaa yā naachí canee Jesús, tuu'mi ní caⁿa yā Jesús tanducuéⁿe chí díiⁿ yā. Cuayivi ní Jesús cueⁿé yā ndúúcu discípulos yeⁿe yā níⁿnuúⁿ na yáāⁿ Betsaida ní cueⁿé yā cuεeti yeⁿe yáāⁿ miiⁿya. ¹¹Taachí 'iiⁿyāⁿ cadíínuuⁿ yā yeⁿe Jesús miiⁿ, cueⁿé yā n'dáa yā 'iiⁿyāⁿ. Ní Jesús 'cuuⁿ yā 'iiⁿyāⁿ s'eeⁿ ní caⁿa yā chíi yā 'iiⁿyāⁿ s'eeⁿ yeⁿe naachí Ndyuūs ngaⁿa ntiⁿnyúⁿ yā. Ní díⁿ yā chí nduūvā yeⁿe 'iiⁿyāⁿ chí ngiita yā.

¹²Taachí chí chiinū, ndu'u chí ndiichúúví yā ndaa yā nanááⁿ Jesús ní caⁿa yā chíi yā Jesús: Yaa'vi nī 'iiⁿyāⁿ s'eeⁿ chí caⁿa yā cuaaⁿ yáāⁿ s'eeⁿ, ní cuaaⁿ yáāⁿ 'lííⁿ naachi snée 'iiⁿyāⁿ ní véé naachi 'cuεetinée yā ní ndaaca yā chí che'e yā, ti nguéé de'ε vεε naachi snée yú.

¹³Jesús caⁿa yā chíi yā discípulos: Ndís'tii ní ca'a nī chí che'e yā. Discípulos ní caⁿa yā: 'Āā ntée n'deée yeⁿe 'nū véé ti táá nyuⁿu nūⁿ pan ndúúcu 'uūvī 'yaacā. Nguéé cuuvi díⁿ 'nū cuái 'nū chí che'e nducyaaca 'iiⁿyāⁿ s'tíi.

¹⁴Miiⁿ ní snée taanduu nyuⁿu mil saⁿā. Tuu'mi ní Jesús miiⁿ caⁿá yā

chii yā discipulos yeⁿe yā: Caaⁿmaⁿ ntiⁿnyúⁿ nī 'iⁿyāⁿ s'eeⁿ chí 'cueeté yā 'uūvi ngeecu ndiichí yā 'aama 'áámá cuaaⁿ.

¹⁵Tíicā díⁿ discipulos ní ch'eteté nducyaaca 'iⁿyāⁿ s'eeⁿ. ¹⁶Tuu'mi ní Jesús miiⁿ sta'á yā ndu'u nyuⁿu pan ndúúcu nduu 'uuví 'yaacā. Ní 'iicu n'diichí yā nanguuvi ní ca'á yā gracias Dendyuūs cáávā pan ndúúcu 'yaacā miiⁿ. Cuayiivi ní Jesús n'deé yā pan ndúúcu 'yaacā ní ca'a yā discipulos yeⁿe yā. Ch'iinu ní discipulos ca'a ntúⁿ yā 'iⁿyāⁿ s'eeⁿ chí che'e yā. ¹⁷Che'e nducyaaca yā ní chiituú 'iⁿyāⁿ. Cuayiivi ní discipulos nan'gaáⁿ yā chí n'ingaavā ní chiituú tá ndiichuuvi 'cueētēē chí n'ingaāvā.

Pedro miiⁿ ní caⁿā cuaacu sa chí Jesús miiⁿ chí Cristo yā

(Mt. 16.13-19; Mr. 8.27-29)

¹⁸Áámá nguuvi taachí Jesús ndúúcu discipulos yeⁿe yā canée yā 'aama lado ní ngaⁿāngua'á yā, tuu'mi ní Jesús itiinguunéⁿ yā discipulos: ¿Du'ū 'úú ngaⁿā 'iⁿyāⁿ?

¹⁹'iⁿyāⁿ s'eeⁿ ní n'gueécútaⁿā yā: Náⁿā yā ní ngaⁿā yā chí dí Juan chí cheédínuuⁿnī sa díí. Náⁿā yā ní ngaⁿā yā chí díí ní profeta Elías díí; ní náⁿā yā ní ngaⁿā ntúⁿ yā chí díí ní 'aama profeta chí 'āā 'naaⁿ tiempo chí n'dii ní nduuchí yā yeⁿe nguuaⁿ tinaⁿā.

²⁰Jesús miiⁿ ní caⁿā yā: Ndís'tii, tuu'mi, ¿du'ū 'úú ngaⁿā nī? Tuu'mi ní Simón Pedro nan'gueécútaⁿā yā ní caⁿā yā: N'dii chí Cristo yeⁿe Ndyuūs.

²¹Jesús chii yā 'iⁿyāⁿ s'eeⁿ chí nguéeⁿ cuuvi yā chuū mar 'áámá 'iⁿyāⁿ.

Jesús ngaⁿā yā yeⁿe chí taacā 'cuūvi yā

(Mt. 16.20-28; Mr. 8.30-9.1)

²²Tuu'mi ní Jesús caⁿā yā: Cánée chí 'úú chí Saⁿā chí Daiyá Ndyuūs n'dee n'dái 'cuenú cuuvi ní 'íicú saⁿā ndiicúú chí ngaⁿā ntiⁿnyuⁿ yeⁿe yaacū ndúúcu chiiduú n'geete chí ngaⁿā ntiⁿnyúⁿ yā ndúúcu maestros yeⁿe ley ní nguéeⁿ neⁿe yā snaaⁿ yā 'úú chí Saⁿā chí Daiya Ndyuūs. Ní canée chí 'caaⁿnúⁿ yā 'úú. Ní 'úú nduuchí yeⁿe nguuaⁿ tináⁿā ndii 'cuífnú 'iinū nguuvi.

²³Cuayiivi ní Jesús ngaⁿā yā ngii yā nducyáácá 'iⁿyāⁿ: Ndúúti chí 'áámá 'iⁿyāⁿ neⁿe yā caⁿā yā nduucú, canée chí cu'néeⁿ maáⁿ yā tanducuéⁿe dendu'ū chí véé yeⁿe yā, ní nguuvi nguuvi cuta'á yā cruz yeⁿe yā chí tan'dúúca chí 'cuenú taavi yā cuuvi cucáávā 'úú ní caⁿā yā nduucú. ²⁴Caati nducyaaca 'iⁿyāⁿ chí neⁿe cá yā nadanguáⁿai yā vida yeⁿe maaⁿ yā na iⁿ'yeeⁿdí 'cūú dindaí yā táámá vida yeⁿe yā nanááⁿ Ndyuūs. Ní nducyaaca 'iⁿyāⁿ chí dindaí yā vida yeⁿe yā cucáávā 'úú ndaāca yā táámá vida yeⁿe yā nanááⁿ Ndyuūs. ²⁵¿De'e dichí'vē saⁿā ndúúti chí diiⁿ sa ganar nducuéⁿe chí véé na iⁿ'yeeⁿdí 'cūú ní díⁿ sa chí dindaí sa vida cueⁿe daāⁿmaⁿ chí táámá vida yeⁿe yā ní idituuví sa maāⁿ vida yeⁿe sa? ²⁶Ní 'iⁿyāⁿ chí cuuvi 'cuinaáⁿ yā yeⁿe 'úú nanááⁿ 'iⁿyāⁿ ndúúcu nduudu yeⁿe tuu'mi ní 'úú chí Saⁿā chí Daiya Dendyuūs cuuví 'cuinaáⁿ yeⁿe 'iⁿyāⁿ 'cūú taachi 'úú ndaá taama vmnéⁿēē tan'dúúca Rey ndúúcu poder yeⁿe Chiidá ndúúcu

poder yeⁿē maáⁿ ní ndúúcū ángeles.
 27'Úú nga^a cuaacú ndúúcū ndís'tií,
 chí veε ná^a nī chí snee nī 'muuⁿ
 chí nguéé 'cuūvi nī taanduvéé ndíí
 snaaⁿ nī yeⁿe naachí Ndyuūs nga^a
 ntiiⁿnyúⁿ yā.

Jesús n̄'daaⁿ yā cuerpo yeⁿe maáⁿ yā
 (Mt. 17.1-8; Mr. 9.2-8)

28 Ch'íínú níⁿníⁿ nguuví chí Jesús
 caⁿa yā nduudu 'cūū, Jesús cueⁿe
 yā ndúúcū Pedro, ndúúcū Juan
 ndúúcū Jacobo ní cheε yā na yīcū
 chí caaⁿmaⁿngua^á yā. 29 Ní taachi
 Jesús ngaⁿangua^á yā, n̄'dááⁿ naaⁿ
 yā ní catecai yā nduuví cuéē ní ngii
 n'gai. 30 Ní tuu^mí nūⁿ che'enaāⁿ
 na 'uuví saⁿā ndúúcū Jesús. Saⁿā
 s'eeⁿ chíⁿ Moisés ndúúcū profeta
 Elías chí 'āā 'naaⁿ tiempo chí n'dií
 yā. 31 Nduu 'iinú yā ní na chideεve
 chí ngí n'gai yeⁿē va'ai cheeti
 nguuví snée yā. Ní nga^a yā yeⁿē
 chí 'cuūvī Jesús ní 'cueenu taaví yā
 na yāāⁿ Jerusalén. 32 N'dáá rá chí
 cyaadu Pedro ndúúcū Juan ndúúcū
 Jacobo nadacueéⁿ yā ní n'diichi yā
 chí ngí n'gai naaⁿ Jesús ndúúcū
 saⁿā s'eeⁿ chí canee ndúúcū yā.
 33 Ní taachí Elías ndúúcū Moisés
 chiví yā yeⁿe Jesús ní 'āā cuéé caⁿa
 yā, tuu^mí ní Pedro miiⁿ ní caⁿa
 yā chí yā Jesús: N'dií Maestro,
 de'e chúúcā n'daācā yeⁿe yú chí
 'cuεetinée yú 'muuⁿ. Ní din'dái 'nū
 'iinū va'ai n'gaiyā; 'áámá yeⁿe nī,
 'áámá yeⁿē Moisés, nī 'áámá yeⁿē
 Elías. Pedro miiⁿ ní nguéé déenu
 yā de'ē chí nga^a yā. 34 Ní neⁿe chí
 nga^a Pedro miiⁿ ndaā 'áámá meēeⁿ
 ní sn'díí 'iiⁿyāⁿ s'eeⁿ ní 'va'a yā chí
 ndaa meēeⁿ vmnaaⁿ yā. 35 Tuu^mí ní
 chí'iindiveéⁿ yā 'áámá nduudu chí

ngaⁿā nguaaⁿ meēeⁿ: Sáⁿa 'cūū ní
 Daiyá chí neⁿe taaví. Cu'neeⁿ veéⁿ
 nī nducueéⁿ chí nga^a sa.

36 Ch'íínú chí'iindiveéⁿ yā nduūdū
 miiⁿ ní discípulos n'diichí yā chí Jesús
 miiⁿ caneeⁿ yā dámaaⁿ yā nduucú yā.
 Ní discípulos ch'εetinee 'diíiⁿ cheendí
 yā nguuví s'eeⁿ ní nguéé chíi yā mar
 'áámá 'iiⁿyāⁿ yeⁿē chí n'diichi yā.

Jesús dííⁿ yā chí nanduūvā yeⁿe
'áámá saⁿā 'lííⁿ yeⁿe espíritu yeⁿe
yááⁿn'guiinūⁿ

(Mt. 17.14-21; Mr. 9.14-29)

37 Táámá nguuví cuayiivi, 'iiⁿyāⁿ
 s'eeⁿ ní nangua^á yā yeⁿe yīcū
 miiⁿ ní nééné 'yaaⁿ 'iiⁿyāⁿ can'dáa
 yā na yāāⁿ ní cueⁿé yā chí ndaacá
 yā Jesús. 38 Tuu^mí ní 'áámá saⁿā
 chí caneeⁿ ndúúcū 'iiⁿyāⁿ s'eeⁿ 'cái
 sa: N'dií Maestro di'cuítū n'dií
 chí snaaⁿ nī daiyá tí 'áámá n'dyáⁿā
 daiyá. 39 Tí 'áámá espíritu yeⁿe
 yááⁿn'guiinūⁿ ita' saⁿā ní ndáaca
 naāⁿ nn'gai sa ní 'caí diitú sa ní
 ican'daā yáíⁿ cuaaⁿ cheendi sa ní
 n'dee n'dái tiempo chí nééné taaⁿ
 idiiⁿ espíritu yeⁿe yááⁿn'guiinūⁿ
 ndúúcū sa ní nguéé ngii vii espíritu
 yeⁿe yááⁿn'guiinūⁿ yeⁿe sa. 40 Ní
 'āā dííⁿ 'cuítúú discípulos yeⁿe nī
 chí diví yā espíritu miiⁿ yeⁿē daiyá
 naati nguéé cuuvi dííⁿ yā.

41 Jesús nan'guεecútaⁿa yā:
 Nds'tií, 'iiⁿyāⁿ chí nguéé i'téenu
 nī ndíí nguéé ndúú idiiⁿ n'daacá nī.
 ¿'Áá 'naaⁿ tiempo caneeⁿ chí cuneé
 ndúúcū ndis'tií? ¿'Áá 'naaⁿ tiempo
 ní caneeⁿ chí cucheé ndúúcū ndis'tií?
 Ní nga^a yā ngii yā sáⁿā miiⁿ:
 Cuchí di nanaáⁿ ndúúcū daiya di.

42 Taachí saⁿā 'dííⁿ miiⁿ ndaa
 niiⁿnuúⁿ sá nanááⁿ Jesús miiⁿ,

espíritu yeⁿe yááⁿ'nguiinūⁿ
miiⁿ chindeēve saⁿ'ā 'díí miiⁿ ní
ch'ēcundāā saⁿ'ā. Ní Jesús
yaa'vinéeⁿ yā espíritu yeⁿe
yááⁿ'nguiinūⁿ chí divíi yeⁿe
saⁿ'a 'dííⁿ miiⁿ, ní nanduūvā yeⁿ'ē
sa. Tuu'mi ní Jesús nca'á yā saⁿ'ā
'dííⁿ miiⁿ chiida sa. ⁴³Nducyáácá
'iiⁿ'yāⁿ ngeⁿ'e yiinu yā yeⁿ'ē poder
yeⁿ'e Dendyuūs chí ch'ēete n'dai. Ní
taachi nducyaaca yā cheⁿ'e yiinu yā
yeⁿ'e tanducueⁿ'ē chí diiⁿ Jesús miiⁿ,
Jesús caⁿ'a yā.

**Jesús caⁿ'a yā táámá cuuvi yeⁿ'ē chi
'cuuvi yā**

(Mt. 17.22-23; Mr. 9.30-32)

⁴⁴Ní chii yā discípulos yeⁿ'e
yā: 'Caandiveéⁿ nī n'daācā yeⁿ'e
tanducueⁿ'ē nduudu chí caaⁿ'máⁿ
ní nguéeⁿ cuuvi naáⁿ nī yeⁿ'ē. 'Úú
Saⁿ'ā chí Daiya Ndyuūs 'úú ní 'iiⁿ'yāⁿ
caneé chí naca'a yā 'úú ta'ā 'iiⁿ'yāⁿ.

⁴⁵Discípulos ní nguéeⁿ
tuumicádiinuuⁿ yā nduudu chí
ngaⁿ'a Jesús. Canúúⁿ n'de'ei
nduudú 'cūū yeⁿ'e yā. Ní nguéeⁿ
túumicádiinuuⁿ yā. Ní 'va'á yā chí
ntiinguuneeⁿ yā Jesús de'ē neⁿ'e
caaⁿ'maⁿ nduudú 'cūū.

Nduudu yeⁿ'e du'ū chí ch'ēete ca

(Mt. 18.1-5; Mr. 9.33-37)

⁴⁶Tuu'mi ní discípulos yeⁿ'e yā
tucá'a yā caⁿ'a yā ndúúcu v'i: 'Du'ū
ca chí ch'ēete ca nguaaⁿ s'uúúⁿ?

⁴⁷Jesús tuumicádiinuuⁿ yā táácā
chí discípulos nadicádiinuuⁿ yā na
staava yeⁿ'e yā ní sta'á yā 'áámá
saⁿ'ā 'lííⁿ ní s'neeⁿ yā saⁿ'ā nanáaⁿ
yā. ⁴⁸Ní caⁿ'a yā chii yā discípulos
yeⁿ'e yā: 'Āā du'ú nūⁿ'n 'iiⁿ'yāⁿ chí
'cuaaⁿ yā saⁿ'ā 'lííⁿ 'cūū ndúúcu chí

duuchí 'cuaáⁿ yā 'úú. 'Āā du'ú nūⁿ'n
'iiⁿ'yāⁿ chí 'cuaáⁿ yā 'úú 'cuaáⁿ yā
'iiⁿ'yāⁿ chí dichó'o yā 'úú. 'Iiⁿ'yāⁿ chí
ndiicuuⁿ ca yā nguaaⁿ ndis'tii ní
'iiⁿ'yāⁿ 'cúú, ní ch'ēete ca yā nguaaⁿ
ndis'tii.

**'Iiⁿ'yāⁿ chí nguéeⁿ contra yeⁿ'ē yú ní
snée yā favor yeⁿ'ē yú**

(Mr. 9.38-40)

⁴⁹Tuu'mi ní Juan caⁿ'a yā chii yā
Jesús: N'dií, Maestro, 'āā n'diichí
'nū 'áámá saⁿ'ā chí divíi sa espíritus
yeⁿ'ē yááⁿ'nguiinūⁿ yeⁿ'e 'iiⁿ'yāⁿ
ndúúcu chí duuchí nī; ní nguéeⁿ cuúⁿ
'nū ti nguéeⁿ canee sa ndúúcu yú.

⁵⁰Jesús caⁿ'a yā chii yā Juan:
'Cuaáⁿ nī chí diiⁿ sa 'túúca; ti 'iiⁿ'yāⁿ
chí nguéeⁿ dííⁿ yā contra yeⁿ'e s'uúúⁿ,
'iiⁿ'yāⁿ miiⁿ snée yā favor yeⁿ'ē yú.

**Jesús yaa'vineeⁿ yā 'uūvi
discípulos yeⁿ'e yā**

⁵¹Taachi snuū ca'a nguuvi miiⁿ
chí Jesús miiⁿ canée chí caⁿ'á yā
na va'ai ch'ēeti nguuvi, Jesús 'āā
deenú yā de'ē chí dííⁿ yā ní cueⁿ'e
yā ndúúcu valor na yāāⁿ Jerusalén.

⁵²Ní dichó'o yā na 'úúví saⁿ'ā
vmnááⁿ yeⁿ'e yā. Saⁿ'ā s'eeⁿ ní
cueⁿ'ē sa ní sndaā sa na 'áámá yāāⁿ
yeⁿ'e yáⁿ'āa Samaria chí in'nuuⁿ sa
nááchí 'cuetinée yā. ⁵³Ní 'iiⁿ'yāⁿ
samaritanos nguéeⁿ 'cuuⁿ yā Jesús
miiⁿ ti chicádiinuuⁿ yā chí Jesús
caⁿ'a yā yāāⁿ Jerusalén. ⁵⁴Taachí
discípulos yeⁿ'e yā n'giindiveéⁿ yā
chuū, Jacobo ndúúcu Juan caⁿ'a
yā: N'dií, Señor, 'áá neⁿ'e nī chí
caaⁿ'maⁿ n'tiiⁿ'nyuⁿ yú chí cun'geéⁿ
yaⁿ'ā yeⁿ'ē nanguuvi ní di'cuinú
yú 'iiⁿ'yāⁿ 'muuⁿ tan'dúúca chí diiⁿ
profeta Elías miiⁿ tiempo chí chó'o

caati 'iiⁿyāⁿ s'eeⁿ nguéé neⁿé yā
'cuaāⁿ yā s'uúúⁿ?

⁵⁵Tuu'mi ní Jesús miⁿ yaa'vineeⁿ
yā Jacobo ndúúcu Juan ní caⁿa yā
chii yā saⁿá s'eeⁿ: Ndís'tii ní nguéé
tuumicádiinuuⁿ nī de'e espíritu yeⁿē
chi ngaⁿa nī. ⁵⁶'Úú, ní Saⁿá chi
Daiyá Ndyuūs. 'Úú ní nguéé cúchí
chí dindaí vida yeⁿe 'iiⁿyāⁿ s'eeⁿ
naati chí nadinguaⁿái vida yeⁿe
'iiⁿyāⁿ s'eeⁿ. Tuu'mi ní cho'ó yā yāāⁿ
miiⁿ ní cueⁿe yā táamá yāāⁿ.

**Yeⁿe 'iiⁿyāⁿ chí neⁿe yā caⁿa yā
ndúúcu Jesús**

(Mt. 8.19-22)

⁵⁷Taachi snúuⁿ yā yúúni, 'áámá
saⁿá ní caⁿa sa chii sa Jesús miⁿ:
N'díí, Señor, caⁿá nduucú nī 'āā tíí
núuⁿ naachi caⁿa nī.

⁵⁸Jesús caⁿa yā chii yā saⁿá miiⁿ:
'Yuunéé nī véé yiivi yáává yeⁿe tí
ní 'yaada ní véé 'dééce tí; naati 'úú,
Saⁿá chi Daiya Dendyuūs, nguéé
mar 'áámá cuaaⁿ naachi cundiití tííⁿ.

⁵⁹Ní caⁿa yā chii yā 'áámá saⁿá:
Cuchí nī nduucú. Ní saⁿá miiⁿ ní
caⁿa sa: N'dííⁿ Señor, téé nī lugar
'úú tí caⁿá 'cuúchí chiidá ní caⁿá yú.

⁶⁰Jesús caⁿa yā: Cu'neeⁿ dí 'iiⁿyāⁿ
chi nguéé i'téenu yā chí 'cuúchí yā
tinaⁿá yeⁿe yā tí 'iiⁿyāⁿ s'eeⁿ chí
tan'dúúca tinaⁿá miiⁿ, 'tiicá yā. Dii
ní cueⁿe di ní caaⁿmaⁿ di nduudu
yeⁿé Ndyuūs yeⁿe naachi Ndyuūs
ngaⁿa ntiiⁿnyúⁿ yā.

⁶¹Tuu'mi ní táamá saⁿá caⁿa sa chii
sa Jesús miⁿ: N'díí, Señor, 'úú neⁿé
caⁿá nduucú nī naati téé nī lugar
'úú tí caⁿá yaa'ví 'iiⁿyāⁿ chí snúuⁿ yā
ndavaacú chí caⁿá ndúúcu nī.

⁶²Jesús caⁿa yā chii yā saⁿá
miiⁿ: 'Āā du'ú núuⁿ saⁿá chí cuúndū

tá'a sa na laatú ní 'cuínu sa cuaaⁿ
dáámí sá, nguéé dichí'vē sa chí
cuuvi sa caⁿa sa nduucú ní diiⁿ
sa ntiiⁿnyuⁿ yeⁿé naachi Ndyuūs
ngaⁿa ntiiⁿnyúⁿ yā.

**Jesús dichó'o yā 'iinū ngēecu
ndiichí discípulos yeⁿe yā
chí ngaⁿá nduudu cuaacu**

10 'Cuiinú chúu ní Jesús
nandēeve yā tá 'iinū ngēecu
ndiichi discípulos yeⁿe yā ní dichó'o
yā cá'uúvi ca'uuví yā. Ní cueⁿe
yā cuááⁿ vmnaaⁿ yeⁿe Jesús cuaaⁿ
nducyáácá yāāⁿ ndúúcu nduu cuaaⁿ
naachi Jesús canéé chí cáⁿa yā.

²Ní Jesús ngaⁿa yā ngii yā 'iiⁿyāⁿ
s'eeⁿ: 'Cuaacu níⁿnyúⁿ chí nééné
n'deē cosecha véé chí nééné n'deē
'iiⁿyāⁿ chí canéé chí 'caandiveeⁿ yā
nduudu yeⁿé Ndyuūs naati saⁿá chí
idiiⁿ ntiiⁿnyuⁿ nguéé 'yaaⁿ sa. Cáávā
chuū d'icuítu nī 'iiví Ndyuūs chí
dichó'o yā 'iiⁿyāⁿ chí caaⁿmaⁿ yā
nduudu cuaacu yeⁿé Ndyuūs ní
nadacuééⁿ yā cosecha yeⁿé Ndyuūs.
Cosecha miiⁿ ní tan'dúúca 'iiⁿyāⁿ
chí cu'téenu yā Ndyuūs. ³Ndís'tii
cueⁿe nī caati 'úú dichó'o ndís'tii
chí ndís'tii ní caⁿa nī tan'dúúca
'iiti cuúchí caⁿa tí nguaaⁿ lobos.

⁴Nguéé candéé nī bolsa ndúúcu
tuūmī, ndíí nguéé nduu morral,
ndíí nguéé ndúú ndaacuú yeⁿe
nī. Ní taachi dííⁿ nī saludar 'iiⁿyāⁿ
cuaaⁿ cyúúni, ní nguéé cuuvi 'naaⁿ
nī. ⁵Ní tanducuééⁿ va'āi chí ndaá
nī caaⁿmaⁿ nī vmnááⁿ vmnaaⁿ
'túúca: Cuneé 'iiⁿyāⁿ yeⁿe va'ái cūū
ndúúcu vaadi 'diiíⁿ. ⁶Ní nduuti chí
'iiⁿyāⁿ ní ndiicúuⁿ yā na va'ai miiⁿ,
tuu'mi ní vaadi 'diiíⁿ cunéé ndúúcu
yā. Ní nduuti chí nguéé véé 'iiⁿyāⁿ

ndiicúⁿ na va'ai miiⁿ, vaadi 'diifⁿ
 nguéé cunéé ndúúcu yā. ⁷Cueetinée
 núúⁿ nī va'āi naachí 'iiⁿyāⁿ 'cuaáⁿ yā
 ndís'tiī. Che'é nī ní cu'u nī chí téé
 yā caati 'iiⁿyāⁿ chí idiiⁿ ntiiⁿnyuⁿ
 canéé chí nduuvī 'í'vé yā. Ndís'tiī
 nguéé caⁿa nī nduu va'āi nduu va'āi.
⁸Āā tíí nūuⁿ yāāⁿ naachi cūndaa
 nī ní 'iiⁿyāⁿ mííⁿ 'cuaáⁿ yā, che'é
 nī 'āā de'é nūuⁿ chí téé yā chí che'é
 nī. ⁹Idiíⁿ nī chí índuūvā yeⁿ'é 'iiⁿyāⁿ
 chí ngiitā chí snee yā na yāāⁿ. Ní
 cuuvi nī 'iiⁿyāⁿ yeⁿ'ē naachi Ndyuūs
 ngaⁿ'a ntiiⁿnyúⁿ yā ní 'āā ndāā
 niiⁿnuúⁿ naachi snée yā. ¹⁰Naati
 'āā tíí nūuⁿ yāāⁿ naachi ndāā nī ní
 'iiⁿyāⁿ ní nguéé 'cuaáⁿ yā ndís'tiī,
 tuu'mi ní can'daa nī cuaaⁿ cyúúní
 ní caaⁿ'maⁿ nī 'túúca: ¹¹Ndíí yaācāā
 yeⁿ'ē yāāⁿ 'cūū chí caī na ca'á 'nū
 n'dáádi 'nū ti nguéé cu'teenu nī yeⁿ'é
 'nū. Naati cadíínuuⁿ nī chuū chí
 yeⁿ'ē naachi Ndyuūs ngaⁿ'a ntiiⁿnyúⁿ
 yā ní 'āā ndāā niiⁿnuúⁿ naachi
 snée nī. ¹²Úú, Jesús, ngaⁿ'á ngíí
 ndís'tiī chí nguuvi taachi Ndyuūs
 caaⁿ'máⁿ yā nuuⁿndi yeⁿ'e 'iiⁿyāⁿ,
 castigo yeⁿ'e 'iiⁿyāⁿ yeⁿ'e yāāⁿ s'tiī ní
 diitu cá ní nguéé ti chí cuuvi yeⁿ'e
 'iiⁿyāⁿ chí nguéé dindaācā yeⁿ'e yāāⁿ
 Sodomā.

**Yeⁿ'e yāāⁿ s'eeⁿ naachi 'iiⁿyāⁿ nguεε
 i'téenu yā Ndyuūs**

(Mt. 11.20-24)

¹³Caⁿ'a Jesús: De'ē chúcā ya'ai
 yeⁿ'e 'iiⁿyāⁿ yeⁿ'e yāāⁿ Corazín. De'ē
 chúcā ya'ai yeⁿ'e 'iiⁿyāⁿ yeⁿ'e yāāⁿ
 Betsaida. Ti ndúúti chí 'iiⁿyāⁿ na
 yáⁿ'āa Tiro ndúúcu 'iiⁿyāⁿ na yáⁿ'āa
 Sidón n'diichí yā vaadi n'giinu chí
 chíi nguaaⁿ ndís'tiī, 'iiⁿyāⁿ yeⁿ'e
 yáⁿ'āa s'eeⁿ 'āā 'naaⁿ ndaācādaamí

yā yeⁿ'ē nuuⁿndi yeⁿ'e yā. Ní
 ch'εetinúⁿ yā catecai yā tan'dúúca
 díínūuⁿ ní ch'εeté yā nguaaⁿ yaiyāā
 tan'dúúca costumbre yeⁿ'e 'iiⁿyāⁿ
 miiⁿ ndíí vmaaⁿ taachi chí'i yā
 chí neené yaⁿ'ai yā. ¹⁴Cáāvā chuū
 ní 'iiⁿyāⁿ yeⁿ'e yáⁿ'āa Tiro ndúúcu
 'iiⁿyāⁿ yeⁿ'e yáⁿ'āa Sidón 'duū'vī
 cá castigo yeⁿ'é yā nguéé ti yeⁿ'e
 ndís'tiī taachí ndāā nguuvi chí
 Ndyuūs caaⁿ'maⁿ yā nuuⁿndi yeⁿ'e
 'iiⁿyāⁿ. ¹⁵Ndíí'tiī, 'iiⁿyāⁿ yeⁿ'e yāāⁿ
 Capernaum, neⁿ'é nī dííⁿ nī chí
 maáⁿ nī n'gεeté nī naati caⁿ'á nī na
 infierno.

¹⁶'Iiⁿyāⁿ chí n'giindiveéⁿ yā
 nduudu yeⁿ'ē ndís'tiī ní nduudu
 yeⁿ'ē 'úú n'giindiveéⁿ yā. 'Iiⁿyāⁿ chí
 nguéé neⁿ'e yā ndís'tiī, nguεε neⁿ'e
 yā 'úú. Ní nguéé neⁿ'e yā Ndyuūs ti
 'iiⁿyāⁿ miiⁿ dichólo yā 'úú.

**Nanguεεcuunéé 'iinū ngeεcu
 ndíichí discípulos yeⁿ'é Jesús**

¹⁷Nguεεcuunéé ndu'ū 'iinū ngeεcu
 ndíichí discípulos ndúúcu vaadi
 yeenú. Ní caⁿ'a yā: N'dií, Señor,
 espíritus yeⁿ'e yāāⁿ'n'guiniūuⁿ
 n'giindiveeⁿ sa yeⁿ'e 'nū chí caaⁿ'maⁿ
 ntiiⁿnyúⁿ 'nū ndúúcu chiduuchí nī.

¹⁸Jesús caⁿ'a yā: Cuáácú 'úú ní
 inaáⁿ yāāⁿ'n'guiniūuⁿ tan'dúúca chí
 sn'daā sa yeⁿ'ē nánguuvi tan'dúúca
 'cuai. ¹⁹Ní Jesús caⁿ'a yā chíi yā
 discípulos yeⁿ'e yā: 'Úú ní teé poder
 ndís'tiī chí cunca'á nī cúú ndúúcu
 'iiti dáⁿ'āi, níicu cuchéé nī ndúúcu
 'iiⁿyāⁿ chí contra yeⁿ'e nī. Ní
 nguéé du'ū vεε cuuvi cuchéé yeⁿ'e
 ndís'tiī. Ní nguéé idiíⁿ daño ndís'tiī.
²⁰Ndíí'tiī nguéé ngii yeenú nī taachi
 caaⁿ'máⁿ nī ntiiⁿnyuⁿ yeⁿ'ē espíritus
 yeⁿ'e yāāⁿ'n'guiniūuⁿ ní n'giindiveeⁿ

ye^{ne} nī naati yeenú nī chi canéé
nguuⁿ chí dúúchí nī na libro ye^{ne}é
Ndyuūs na va'ai cheeti nguuví.

Jesús chíi yeenú yā

(Mt. 11.25-27; 13.16-17)

²¹Hora mííⁿ nūuⁿ Jesús yeenú
n'dai yā cáávā Espíritu N'dai ye^{ne}é
Ndyuūs ní ca^{na} yā: N'dií, Chiidá,
'úú ní teé gracia n'dií chí 'iiví nī
ye^{ne} va'ai cheeti nguuví ndúúcu
yā^{na} 'cúu caati snuuⁿ n'dé'ei nī
nduudú 'cūu ye^{ne} 'iiⁿ'yāⁿ chí déénu
ca yā ndúúcu 'iiⁿ'yāⁿ chí n'deēe n'dái
túúmícadíinuⁿ yā. Ní ca'á nī chí
cadíínūⁿ 'iiⁿ'yāⁿ chí ndiicúuⁿ yā chí
nguéé n'deēe cá déénu yā caati 'tíicā
ne^{ne} nī diíⁿ nī ti n'daācā.

²²N'dií Chiidá, 'āā tee nī
tanducué^{ne} 'úú. Mar 'áámá 'iiⁿ'yāⁿ
nguéé déénu yā du'ū chí 'aama
n'dya^{na} Daiya Dendyuūs, dámaaⁿ
n'dií Chiidá. Mar 'aama 'iiⁿ'yāⁿ nguéé
déénu yā du'ū chí n'dií Chiidá
dámaaⁿ 'áámá n'dya^{na} daiyá nī,
ndúúcu 'āā du'ū nūuⁿ 'iiⁿ'yāⁿ chí
Daiyá Dendyuūs ne^{ne}é yā 'cuuⁿ'míⁿ
yā.

²³Tuu'mi ní Jesús nga^{na} yā ngii
yā discípulos ye^{ne} yā: Dē'e chúúcā
n'dai ndís'tií chí ngii naaⁿ nī
dendu'ū chí ndís'tií n'gíínu nī. ²⁴'Úú
ní nga^{na} ngii ndís'tií chí neené 'yaaⁿ
profetas ndúúcu reyes chí ye^{ne} ndií
cuááⁿ vmaaaⁿ né^{ne} yā snaaⁿ yā chí
ndís'tií ínaaⁿ nī naati nguéé n'diichí
yā. Ní ne^{ne}é yā 'caandiveeⁿ yā chí
ndís'tií n'giindiveeⁿ nī naati nguéé
ch'iindiveeⁿ yā.

Sa^{na} samaritano chí n'dai

²⁵'Áámá maestro ye^{ne} ley chí
ne^{ne} sa n'diichineeⁿ sa Jesús ndaa

sa nanáaⁿ yā ní ntiinguuneeⁿ sa
Jesús: N'dií, Maestro, ¿de'e chí
cane chí dííⁿ chí ndáácā vida
cue^{ne} daā^{na}?

²⁶Jesús nan'guεεcúta^{na} yā: ¿Taacā
canéé nguuⁿ na ley ye^{ne}é chuū? ¿Dē'e
tuumicadiinuⁿ di ye^{ne} ley ye^{ne}
chuū?

²⁷Maestro ye^{ne} ley miiⁿ
nan'guεεcúta^{na} sa: 'Túúcā canéé
nguuⁿ: Diné^{ne} di Señor Ndyuūs
ye^{ne} di ndúúcu núuⁿ máⁿ staava
ye^{ne} di, ndúúcu núuⁿ máⁿ alma ye^{ne}
di, ndúúcu tanducué^{ne} fuerzas
ye^{ne} di, ndúúcu tanducué^{ne} vaadi
cadíínūⁿ ye^{ne} di. Ní diné^{ne} di
nducyaaca 'iiⁿ'yāⁿ na niiⁿnuúⁿ va'āi
ye^{ne} di tan'dúúca chí ne^{ne} di maāⁿ
di.

²⁸Jesús nan'guεεcúta^{na} yā:
N'dáácā nan'guεεcúta^{na} di. Diíⁿ
di chuū, ní cunduūchi di cue^{ne}
daā^{na}.

²⁹Sa^{na} miiⁿ ne^{ne} sa cunéé n'daāca
sa ní ca^{na} sa chíi sa Jesús: ¿Dú'ū
chí 'iiⁿ'yāⁿ chí canéé chí ne^{ne} chí
niiⁿnuúⁿ va'āi ye^{ne}é?

³⁰Tuu'mi ní Jesús miiⁿ
nán'guεεcúta^{na} ye^{ne} sa ndúúcu
'áámá cuento chí ejemplo chí 'tíicā:
'Áámá sa^{na} ngua'āi sa ye^{ne} yáāⁿ
Jerusalén miiⁿ ní cuna^{na} sa na
yáāⁿ Jericó. Taachi canúúⁿ sá yúúni
'iiⁿ'yāⁿ duucu ní sta'á yā sa^{na} miiⁿ
ní divíi yā ndií catecai sa ní ch'e^{ne}
yā sa^{na} ndií chí ya'āi ca ye^{ne} sa ní
'te'e 'téé nguéé chíi sa ní cuna^{na} yā.

³¹Tuu'mi ní 'áámá chiiduú cho'ó yā
yúúni miiⁿ ní taachi n'diichi yā sa^{na}
miiⁿ, divíi yā cuááⁿ 'diituú yúúni
ní cho'ó yā ní cue^{ne}é yā. ³²Tiicā
ntúúⁿ sa^{na} levita chí chiiduú chí
diiⁿ ntiiⁿnyuⁿ ye^{ne} nátaí cho'ó yā

naachi candífti saⁿā miiⁿ. N'diichi yā saⁿā miiⁿ ní divíi yā cuaaⁿ 'diituú yúúní. Ní cho'ó yā ní cueⁿé yā. ³³Cuayiivi ní 'áamá saⁿā yeⁿe yáⁿā Samaria cho'ó sa yúúní miiⁿ. Taachí ndaa niiⁿnuúⁿ sa naachi candífti saⁿā miiⁿ, n'diichi sa saⁿā nnee ya'āi 'iinu sa saⁿā. ³⁴Ní ndaā sa naachi candífti saⁿā miiⁿ ní idiⁿ yiicú sá naachi ya'āi ndúúcu aceite ndúúcu vino ní ch'εecu sa tíinūⁿ naachí ya'āi yeⁿē sa. Ní sn'duú sa saⁿā 'yúudū yeⁿe sa ní candēē sa saⁿā na yāāⁿ. Ní 'nuúⁿ sa 'áamá va'ai naachí cuuvi cu'neeⁿ sa saⁿā miiⁿ naachi 'iiⁿyāⁿ díⁿ yā cuidado saⁿā miiⁿ. ³⁵Chidēēve táamá nguuví, taachi neⁿe caⁿa sa tun'dáa sa na 'uūvi caadi yeⁿe bolsa ní ca'á sa saⁿā vaacu miiⁿ. Ní caⁿa sa chii sa saⁿā: N'dií, díⁿ nī cuidado saⁿā, ti 'āā taa véé nūⁿ chi díⁿ nī gastar ndúúcu sa, taachí nguεεcunee nadí'vé yeⁿe nī. ³⁶Maaⁿ ní Jesús ntiinguuneeⁿ yā saⁿā miiⁿ: Naachi 'iinū saⁿā s'eeⁿ 'chεε sá chi saⁿā chi neⁿe sa saⁿā na niiⁿnuúⁿ ya'āi chi 'nuū cá'ai chi duucu miiⁿ?

³⁷Saⁿā miiⁿ ní caⁿā sa: Saⁿā chi nnee ya'āi 'iinu sa. Tuu'mi ní Jesús miiⁿ caⁿa yā: Díi, cueⁿe di, ní diiⁿ ntúúⁿ di 'túúcā.

Jesús canée yā na vaacu Marta ndúúcu María

³⁸Cuayiivi ní cueⁿe Jesús na 'áamá yāāⁿ 'líⁿ ní ndaa yā na vaacu 'áamá n'daataá chi nguuvi tá Marta. Ní 'cuúⁿ tá chi canee yā na vaacu tá. ³⁹Ní Marta miiⁿ ní véé 'aama v'íi yā chi nguuvi tá María. Ní María miiⁿ ch'iindi tá ná ca'a Señor Jesús miiⁿ, ní n'giindiveeⁿ tá nduudu chí

chi'cueeⁿ yā. ⁴⁰Marta miiⁿ ní néené n'deēe ntiiⁿnyuⁿ idiⁿ tá ní ndaā tá nanááⁿ Jesús ní caⁿa tá: N'dií Señor, 'áá nguéé inadicádinūⁿ yeⁿé chi dámaaáⁿ n'nééⁿ v'íi 'úú chí díⁿ mandado? Cuuvi nī táⁿā ní cunnee tá 'úú.

⁴¹Jesús caⁿa yā: Dii, Marta, Marta, néené n'deēe dendu'ú chi nadicádinuuⁿ di yeⁿē dendu'ú chí idi'vaachíi. ⁴²Véé 'áamá nūⁿ dendu'ú chi n'daacā ca. Tá María miiⁿ ndeēve tá chí n'daacā ca. Ní chuū nguéé ndivíi 'iiⁿyāⁿ yeⁿē tá.

Jesús ngi'cueeⁿ yā táacā chi 'iiⁿyāⁿ cuuvi caaⁿmaⁿngua'á yā

(Mt. 6.9-15; 7.7-11)

11 'Áamá vmnéⁿēe ní Jesús ngaⁿangua'á yā 'áamá cuaaⁿ, ní taachí ch'iinu caⁿangua'á yā, discípulos yeⁿe yā caⁿa yā chii yā Jesús: N'dií Señor, ca'cuéeⁿ nī nús'uu taacá chi cuuvi caaⁿmaⁿngua'á nū tan'dúúca chí Juan chí chεédinūⁿnīⁿ chí'cueeⁿ yā discípulos yeⁿe yā.

²Tuu'mi ní Jesús caⁿa yā chíi yā discípulos yeⁿe yā: Taachí ndís'tií caaⁿmaⁿngua'á nī 'túúca caaⁿmaⁿ nī:

N'dií, chí Chiidá 'nū chí canée na va'ai cheeti nguuvi. N'daacā n'dai chí 'iiⁿyāⁿ dich'εeté yā n'dií. Cuchií tiempo chí ngaⁿa ntiiⁿnyúⁿ nī yeⁿe tanducuéⁿē. Cúúv'í tan'dúúca chí n'dií neⁿe nī tan'dúúca ná va'ai cheeti nguuvi, 'tiicá ntuūⁿ ná yáⁿāa 'cúú.

³Tée nī chí cuuvi che'é 'nū maaⁿnguuví.

⁴ Nadich'εεcú nī nuuⁿndi yeⁿé 'nū, tan'dúucā chi nús'ūū nadach'εεcú 'nū yeⁿe 'iiⁿyāⁿ chi nguεε n'daācā diíⁿ yā nduucú 'nū. Nguéé 'cuááⁿ nī chi ndaā nanaáⁿ 'nū cosas chi chεεchi ca chi diíⁿ chi diíⁿ 'nū nuuⁿndi naati cunneé nī nús'uu chi nguéé diíⁿ 'nū nuuⁿndi ní cuhéé 'nū.

⁵ Tuuⁿmi ní Jesús caⁿa yā 'áámá ejemplo. ¿Du'ú ndís'tií chi véé amigo yeⁿe nī ní caⁿ'á nī nduu vaacu amigo ná maⁿ'a yaaaⁿ ní caaⁿ'máⁿ nī: N'dií amigo, teé nī 'iinū panes yeⁿe nī 'úú, ⁶ caati 'áámá amigo yeⁿé chi canuuⁿ sa yúúni ndaā sa na vaacú nī nguéé dē'ε vεε chi ca'á chi che'e sa? ⁷ Ní 'iiⁿyāⁿ chi canúⁿ yā va'ai miiⁿ nán'guεεcútaⁿ a yā: Nguéé diíⁿ ndu'ú nī 'úú. 'Āā nduudí cheendi va'āi ní dácaiyāā yeⁿé ní candiití yā nduucú na cama. 'Úú nguéé cuuví nducueéⁿ ní teé n'dií chiiⁿ chi neⁿe nī. ⁸ Jesús ngaⁿ'á yā: 'Úú ngaⁿ'á ngií ndís'tií. 'Áará chi nguéé nducueeⁿ amigo yeⁿé sa chi ca'a yā pan saⁿ'ā miiⁿ cááva chi amigo yeⁿé sa, naati nducueeⁿ yā ní ca'a yā amigo miiⁿ ti amigo miiⁿ nguéé 'cuinaaⁿ sa chi ngiica sa n'deeε n'dái vueltas. ⁹ Ní 'úú ní ngaⁿ'á ngií ndís'tií: Cáácá nī ní Ndyuūs ní tée yā yeⁿé nī, in'nuúⁿ nī ní ndaāca nī, 'yáávi nī cheendi va'āi ní nan'guaaⁿ yeⁿé nī. ¹⁰ Nducyáácá 'iiⁿyāⁿ chi ngiica yā Ndyuūs ní Ndyuūs ca'á yā yeⁿe yā. Ní nducyáácá 'iiⁿyāⁿ chi in'nuúⁿ yā ní ínndaaca yā. Ní nducyáácá 'iiⁿyāⁿ chi yaa'vi yā cheendi va'ai, ní nan'guaaⁿ yeⁿe yā. ¹¹ Maaⁿ ní chεé ndís'tií chi véé daiya nī, ndúúti chi daiya nī caaca pan, ¿áá ca'á nī lado yeⁿe pan

'áámá túúu? O ndúúti chi caaca daiyá nī 'aama 'yaācā, ¿áá ca'a nī lado yeⁿe 'yaācā miiⁿ ní 'áámá cúú? ¹² O ndúúti chi caaca 'áámá dūtu'u, ¿áá ca'á nī lado yeⁿe dūtu'u 'áámá 'iitidaⁿ'āi? ¹³ Ndúúti chi ndís'tií chi cúnncheeⁿ nī déenu nī ca'a nī dendu'ú chi n'dáacā daiya nī, tuuⁿmi ní Chiidá nī chi canéé na va'ai cheeti nguuvu n'deēε cá cá'a yā caati cá'a yā Espíritu N'dai yeⁿé Ndyuūs 'iiⁿyāⁿ chí caaca yā chiida yú.

'Iiⁿyāⁿ s'eeⁿ ngaⁿ'a yā chi Jesús miiⁿ véé poder yeⁿe yááⁿ'nguiinūⁿ ndúúcu yā

(Mt. 12.22-30; Mr. 3.19-27)

¹⁴ Jesús miiⁿ tun'daa yā yeⁿé 'áámá saⁿ'ā 'lííⁿ 'áámá espíritu yeⁿe yááⁿ'nguiinūⁿ chi diíⁿ chi nguéé ngii ngaⁿ'ā sa. Ní taachí nan'daa espíritu yeⁿe yááⁿ'nguiinūⁿ saⁿ'ā 'díf'mī miiⁿ, ní caⁿ'a sa. Níicú 'iiⁿyāⁿ s'eeⁿ n'diichí yā chuū ní chéⁿéé yiinū yā yeⁿé. ¹⁵ Náⁿ'ā 'iiⁿyāⁿ ní caⁿ'a yā: Sáⁿ'a 'cūū ní nitun'dáa sa espíritu yeⁿe yááⁿ'nguiinūⁿ cáávā poder yeⁿé Beelzebú chi Satanas chí ngaⁿ'ā ntiiⁿ'nyuⁿ sa yeⁿe espíritus yeⁿe yááⁿ'nguiinūⁿ.

¹⁶ Tanáⁿ'a yā ní neⁿe n'diichineeⁿ yā Jesús ní ngiica yā Jesús chi diíⁿ yā 'áámá señal yeⁿé na va'ai cheeti nguuvu chi cuuvi n'diichí yā. ¹⁷ Jesús déenu yā chi nacádífnuuⁿ 'iiⁿyāⁿ s'eeⁿ ní caⁿ'a yā chii yā 'iiⁿyāⁿ s'eeⁿ: 'Áámá gobernador chi ngaⁿ'ā ntiiⁿ'nyúⁿ yā yeⁿe yááⁿ'āa naachi véé 'uuví partido yā chi nguⁿ'u 'aamá yā ndúúcu táámá yā, tuuⁿmi ní nguéé cuuvi 'naaⁿ tiempo chi 'iiⁿntyéⁿé yā. 'Tiicá ntúūⁿ naachi 'áámá familia yā ndúúti chi n'deēε nadacadífnuuⁿ yā chi

vée partido yeⁿe familia miiⁿ nguεε cuuvi nduuvidaamá yā. ¹⁸Tiicá ntúūⁿ nduuti chi yááⁿ'nguiniūⁿ 'cuuⁿ'maⁿ sa ndúúcū maaⁿ sa, ítáácā canee naachí ngaⁿ'ā ntiiⁿ'nyuⁿ sa? Caaⁿ'máⁿ nī 'úú: ¿De'ē cáávā chi ngaⁿ'a ndís'tii chi caavā yááⁿ'nguiniūⁿ chi duuchi Beelzebú chi Satanás itun'daá espíritus yeⁿe yááⁿ'nguiniūⁿ yeⁿ'é 'iiⁿ'yāⁿ? ¹⁹Nduuti chi 'úú idivií espíritus yeⁿe yááⁿ'nguiniūⁿ cáávā Beelzebú, tuuⁿ'mi ní 'iiⁿ'yāⁿ ndúúcu nī ní 'du'ū poder itun'dáa yā espíritus yeⁿe yááⁿ'nguiniūⁿ? Chiiⁿ chi diiⁿ 'iiⁿ'yāⁿ chi ndúúcu nī n'giⁿ'í yā chi nguεε 'tíicā chi ngaⁿ'a nī. ²⁰Ndúúti chi cáávā poder yeⁿ'é Ndyuūs 'úú itun'daá espíritus yeⁿe yááⁿ'nguiniūⁿ yeⁿ'é 'iiⁿ'yāⁿ, tuuⁿ'mi ní cuaacu níⁿ'nyúⁿ chi naachi Ndyuūs ngaⁿ'a ntiiⁿ'nyúⁿ yā nndaā nanááⁿ ndís'tii.

²¹Taachi saⁿ'ā dítiinú diiⁿ cuidado sa ná vaacu sa ndúúcū íngaatu, tuuⁿ'mi ní na vaacu sa canée seguro.

²²Taachí ndaa táámá saⁿ'ā chí vée fuerzas yeⁿe sa ní ichεε sa nduucú yā ní idivií sa tanducuéⁿ'ē íngaatu yeⁿ'é yā chi ngii chεetinúⁿ yā yeⁿ'e va'āi miiⁿ tuuⁿ'mi ní diiⁿ sa repartir íngaatu s'eeⁿ ndúúcū compañeros yeⁿ'ē sa.

²³'Iiⁿ'yāⁿ chi nguéeé canée yā lado yeⁿ'é, 'iiⁿ'yāⁿ miiⁿ ní canée yā contra yeⁿ'é. 'Iiⁿ'yāⁿ chi nguéeé daama díⁿ cosechar nduucú tuuⁿ'mi ní díⁿ yā tan'dúúcā chi ingéē tanducuéⁿ'ē cosecha.

Espíritu yeⁿe yááⁿ'nguiniūⁿ chi inguεεcunéé na saⁿ'ā

(Mt. 12.43-45)

²⁴Caⁿ'a Jesús: Taachí espíritu yeⁿe yááⁿ'nguiniūⁿ nacan'daa

na 'áámá saⁿ'ā, cachiica na yáⁿ'āa cuuⁿ'maⁿ naachi nguéeé ch'εetinee 'iiⁿ'yāⁿ ní in'nuūⁿ naachi cuuvi ntaavi'tuunuuⁿ ní nguéeé ndaācā. Tuuⁿ'mi espíritu miiⁿ nadicádíínuuⁿ ní ngaⁿ'a: Nanguεεcunéé na vaacú naachi chiicá. ²⁵Taachí nndaā na vaacu miiⁿ ndaācā chi saⁿ'ā miiⁿ tan'dúúcā 'áámá va'ai chi 'āā déévé n'dai ndúúcū nducuéⁿ'e na lugar yeⁿ'ē. ²⁶Tuuⁿ'mi ní espíritu miiⁿ cueⁿ'e ní in'nuūⁿ tá ndéεchē espíritus chi cunncaā ca chí cuuví maāⁿ. Ní ndaā espíritus ní ch'εetinee na saⁿ'ā miiⁿ. Cuayiivi ní n'geenu sa ngii ca ní cunncaā ca canéeé sá nguéeé ti cuááⁿ vmnaaⁿ.

Vée vaadi yeenú yeⁿe 'iiⁿ'yāⁿ chi i'téenu yā Ndyuūs

²⁷Taachí Jesús ngaⁿ'a yā dendúⁿ'u 'cūū 'áámá n'daataá 'caí yuudu tá nguuaⁿ 'iiⁿ'yāⁿ s'eeⁿ: De'ē chúúcā n'dai n'daataá chi ch'iindiyáaⁿ nī ní ntaavi tá n'dií.

²⁸Jesús ní caⁿ'a yā: N'daacā ca yeⁿ'e 'iiⁿ'yāⁿ chi n'giindiveéⁿ yā nduudu yeⁿ'é Ndyuūs, ní i'téenu yā nduudu miiⁿ.

'Iiⁿ'yāⁿ chi nguéeé n'daāca yā ngiica yā 'áámá señal

(Mt. 12.38-42; Mr. 8.12)

²⁹Taachí nduuvidaama 'iiⁿ'yāⁿ ndúúcū Jesús, Jesús tuc'a yā caⁿ'a yā nduudu miiⁿ: 'Iiⁿ'yāⁿ chí vée yā ngúúví 'cūū nééné cúnncheeⁿ yā. In'nuúⁿ yā señales naati nguéeé ndaācā táámá señal caati dámaāⁿ snaaⁿ yā señal chi diiⁿ Ndyuūs ndúúcū profeta Jonás tiempo chí 'āā chó'oo. ³⁰Tan'dúúcā Ndyuūs díⁿ yā señal ndúúcū profeta Jonás

ye^{ne} 'iiⁿ'yāⁿ na yáāⁿ Nínive, 'tiicá ntuūⁿ Saⁿ'ā chi Daiya Ndyuūs cuuvi cunéé yā lado ye^{ne} señal tiempo 'cūū. ³¹Taachi ndaa nguuvi ye^{ne} juicio chi Ndyuūs caaⁿ'máⁿ yā ye^{ne} nuuⁿ'ndi ye^{ne} 'iiⁿ'yāⁿ, n'daataá reina chi tiempo chi chó'ōo ngaⁿ'a ntiiⁿ'nyuⁿ tá ye^{ne} lado ye^{ne} sur chi caⁿ'a ta ní nducueeⁿ tá contra ye^{ne} 'iiⁿ'yāⁿ chi snée yā maaⁿ'nguuví. Ní táⁿ'ā miiⁿ ní diiⁿ tá condenar 'iiⁿ'yāⁿ chi snée yā maaⁿ'nguuvi caati táⁿ'ā miiⁿ yaⁿ'āi n'dai ngiica tá chi ne^{ne} tá ch'iindivee tá ye^{ne} vaadi deenu ye^{ne} rey Salomón. Maaⁿ ní 'muuⁿ canéé 'áámá yā chi ch'εεε ca vaadi deenu ye^{ne} yā nguéé ti rey Salomón. ³²'Iiⁿ'yāⁿ chi ch'εεtinéé na yáāⁿ Nínive ndii cuááⁿ vmnaaⁿ nducueeⁿ yā ní caaⁿ'máⁿ yā nuuⁿ'ndi ye^{ne} 'iiⁿ'yāⁿ chi snée yā maaⁿ' caati 'iiⁿ'yāⁿ ye^{ne} yáāⁿ Nínive ndaacadaamí yā ye^{ne} nuuⁿ'ndi ye^{ne} yā cáāvā nduudu ye^{ne} Ndyuūs chi caⁿ'a profeta Jonás miiⁿ. 'Tíicā caⁿ'á yā dííⁿ yā nguuvi chi Jesús caaⁿ'máⁿ yā nuuⁿ'ndi ye^{ne} 'iiⁿ'yāⁿ. 'Caandiveéⁿ nī. 'Múúⁿ ní véé 'áámá saⁿ'ā chi ch'εεε ca sa nguéé ti profeta Jonás.

'Áámá ejemplo chi tan'dúúicā 'áámá deeve ye^{ne} e cuerpo ye^{ne} e yú

(Mt. 5.15; 6.22-23)

³³Caⁿ'a Jesús: Mar 'áámá 'iiⁿ'yāⁿ nguéé cunuuⁿ n'dé'ei yā 'aama lámpara chí ngiichi ní nguéé ndúú i'nuūⁿ ra yā maaⁿ 'aama caja naati s'nuúⁿ yā na 'áámá mesa ní 'iiⁿ'yāⁿ chí cundaa yā ní snaaⁿ yā deeve miiⁿ. ³⁴Ndúútináaⁿ yú chiiⁿ chí tan'dúúicā 'aama lámpara ye^{ne} e cuerpo ye^{ne} e yú. Taachí n'daí nduutináaⁿ nī 'tiicá ntúūⁿ

n'daí cuerpo ye^{ne} é nī ní inaaⁿ chí deeve. Naati taachí nguée n'daacā nduutináaⁿ nī tan'dúúicā lámparas chí nguéé ngiichi ní 'tiicá ntúūⁿ cuerpo ye^{ne} e nī cunee ná maāiⁿ. ³⁵N'diichi nī, cundéé nī cuidado nduutináaⁿ nī chí deeve ye^{ne} e cuerpo ye^{ne} é nī chí nguéé canee nī na maāiⁿ. ³⁶'Tiicá ntúūⁿ inaaⁿ n'dááca nī ní nguéé maāiⁿ naachi canee nī nduuti chí candéε nī cuidado nduutinaaⁿ nī. Ní véé deeve nanáaⁿ nī tan'dúúicā 'áámá lámpara ngiichi ní naāⁿ nī chí deeve ye^{ne} e.

Jesús ngaⁿ'a nuuⁿ'ndi ye^{ne} e maestros ye^{ne} e ley ndúúicū 'iiⁿ'yāⁿ fariseos

(Mt. 23.1-36; Mr. 12.38-40; Lc. 20.45-47)

³⁷Taachí Jesús miiⁿ chi'inu cāⁿ'a yā chuū, 'áámá saⁿ'ā fariseo ndaa sá nanááⁿ Jesús ní di'cuífú sa Jesús chí ch'é yā ndúúicū sa. Ní cue^{ne} e yā ndúúicū sa. Ní ndaa yā na vaacu sa ní ch'εé yā na mesa. ³⁸Taachí ndaa tiempo chí che'e yā ní saⁿ'a fariseo miiⁿ n'diichi sa chí nguéé naāⁿ'nū Jesús ta'á yā, (tan'dúúicā costumbre ye^{ne} e 'iiⁿ'yāⁿ Israel) tuu'mi ní cue^{ne} e yiinu sa. ³⁹Ní Señor Jesús caⁿ'a yā chii yā saⁿ'a fariseo: Díí ndúúicū tanáⁿ'ā saⁿ'ā fariseos inadéévé nī cuāāⁿ daami vaso ndúúicū cu'u chí tan'dúúicā cuerpo ye^{ne} e nī naati cuááⁿ ch'εēti chí tan'dúúicā staava ye^{ne} é nī ndiitúú ndúúicū vaadi 'caa'va ndúúicū dendú'ū chí nguée n'daacā. ⁴⁰Ndís'tii chí ch'εechi tííⁿ nī, 'áá nguéé deenú nī chí Ndyuūs din'dái yā 'iiⁿ'yāⁿ ndúúicū staava ye^{ne} é yā ndúúicū cuerpo ye^{ne} e yā, ní ne^{ne} é yā 'iiⁿ'yāⁿ chí nadéévé cuerpo ye^{ne} é yā ndúúicū staava ye^{ne} e yā ndúúicū taanduvéé chí véε ch'εēti

cuerpo ye^{ne} yā? ⁴¹Ndís'tiī canéé chi ca'á nī limosnas ye^{ne}é nī ndúúcū nuuⁿmaⁿ staava ye^{ne}é nī caati chuū ní cosa chi n'daācā.

⁴²De'ε chúúcā ya'āi yeⁿe ndís'tiī 'iiⁿyāⁿ fariseos caati nadicádíinuⁿ nī chi n'daāca nī chi dííⁿ nī chi ngaⁿā ley ye^{ne}é Ndyuūs ti ca'a nī Ndyuūs décima chi ndiichi parte yeⁿe nducué^{ne}ē cosecha yeⁿe nī chi yiivíí ndúúcū 'iicudaáⁿ ndúúcū tanducué^{ne}ē yaātā ngaiyāā. Nguéé véé vaadī neⁿe ye^{ne}é Ndyuūs ndúúcu nī ndíí nguéé dííⁿ nī dendu'ū chi cuaacu. Canéé chi dííⁿ nī tanducué^{ne}ē chi ngaⁿā ley ye^{ne}é Ndyuūs ní dinéⁿe nī nducyaaca 'iiⁿyāⁿ ní ca'á nī décima dendu'ū.

⁴³De'ε chúúcā ya'āi yeⁿe ndís'tiī chí neⁿe nī 'cuéeté nī na silla yeⁿe 'iiⁿyāⁿ chi ngaⁿa ntiíⁿnyuⁿ yeⁿe yaācū sinagogas. Ní ndís'tiī neⁿé nī chi 'iiⁿyāⁿ dííⁿ yā saludar ndís'tiī taachi snée nī na yúúní.

⁴⁴De'ε chúúcā ya'āi yeⁿe ndís'tiī chi ngi'cueeⁿ nī ley ndúúcū 'iiⁿyāⁿ fariseos. Ndís'tiī ngaⁿa nī chi n'daacā idiíⁿ nī ní nguéé n'daacā idiíⁿ nī. Ndís'tiī ní tan'dúúcā 'áámá yáinyāⁿ chi 'iiⁿyāⁿ nguéé inaaⁿ yā ní nguéé déenu yā yeⁿe ní chiicá yā vmnááⁿ yeⁿe yáinyāⁿ, 'tiicá nī.

⁴⁵Tuu'mi ní nan'guēecútaⁿa 'áámá abogado, chi maestros yeⁿe ley. N'diī, Maestro, taachí ngaⁿa nī chuū, idiiⁿ nī chí induuvi táaⁿ 'nū.

⁴⁶Naati Jesús caⁿa yā: De'ε chúúcā ya'āi ntúūⁿ yeⁿe ndís'tiī, abogados, maestros yeⁿe ley. Ndís'tiī idiíⁿ nī n'dee cá leyes chí chēechi cá ní nga'a nī tan'dúúcā chi chēēdi chi saⁿā nguéé cuuvi candée sa. Ní ndís'tiī ní ndii mar 'áámá ta'a nī

ní nguéé ituu'ví nī chéédí miiⁿ. Ní nguéé dííⁿ nī, ní nguéé nginnee nī 'iiⁿyāⁿ.

⁴⁷De'ε chúúcā ya'āi yeⁿe ndís'tiī chi nadin'dái nī yaínyāⁿ yeⁿe saⁿā profetas chi 'āā candée yā nduudu ye^{ne}é Ndyuūs tiempo chi 'āā chó'ōo. Ní 'iiⁿyāⁿ yeⁿe ndaata ye^{ne}é nī ndii cuááⁿ vmnaaⁿ ch'iiⁿnuⁿ yā saⁿā profetas. ⁴⁸Cuaacu níⁿnyúⁿ chí ndís'tiī ní ng'iⁿi nī chi yeenú nī yeⁿe chi 'iiⁿyāⁿ yeⁿe nī ndii cuááⁿ vmnaaⁿ ti cuaacu níⁿnyuⁿ 'iiⁿyāⁿ yeⁿe ndaata yeⁿe nī ch'iiⁿnuⁿ yā saⁿā profetas ní maaⁿ ní ndís'tiī idin'dái nī yaínyāⁿ yeⁿe profetas.

⁴⁹Ní cáāvā chuū ní cáāvā chi Ndyuūs deenu yā tanducué^{ne}ē, Ndyuūs caⁿa yā 'tíicā: 'Úú dicho'ó profetas ndúúcū apóstoles ní náⁿa yā 'caaⁿnúⁿ yā 'iiⁿyāⁿ ní tanáⁿa yā can'dáa yā 'iiⁿyāⁿ ní dííⁿ yā chi 'iiⁿyāⁿ s'eeⁿ n'geenu yā ngii.

⁵⁰Ndyuūs caⁿá yā dííⁿ yā castigar 'iiⁿyāⁿ chi maaⁿ snée iⁿ'yeeⁿdí 'cūū ti 'iiⁿyāⁿ yeⁿe ndaata ye^{ne}é yā ch'iiⁿnuⁿ yā profetas ndíí tiempo taachí Ndyuūs din'dái yā íⁿ'yeeⁿdí.

⁵¹Ní ndii tiempo taachi ch'iiⁿnuⁿ yā Abel ní chingēē yuuúⁿ yeⁿe sa, ndíí taachi ch'iiⁿnuⁿ yā Zacarías miiⁿ naavtaⁿā yeⁿe nátai ndúúcū ye^{ne}é yaacu templo. Chuū ní ngaⁿā ngii ndís'tiī, caati Ndyuūs caⁿá yā diíⁿ yā castigar 'iiⁿyāⁿ chi maaⁿ snee iⁿ'yeeⁿdí 'cūū cáāvā yuuúⁿ yeⁿe 'iiⁿyāⁿ s'eeⁿ.

⁵²De'ε chúúcā ya'āi yeⁿe ndís'tiī chi 'cuééⁿ nī ley ní nguéé ca'cueeⁿ nī chi cadíínúúⁿ 'iiⁿyāⁿ vaadī deenu ye^{ne}é Ndyuūs, ní nguéé dííⁿ nī tan'dúúcā chi deenu nī chi canéé chi dííⁿ nī.

⁵³Taachí Jesús ch'iinu caⁿa yā dendu'u 'cūū, tuu'mi ní maestros yeⁿe ley ndúúcu 'iiⁿ'yāⁿ fariseos nduuvu taáⁿ yā yeⁿe Jesús ní tucá'a yā itiinguunéeⁿ yā n'dee n'dái ní caⁿa yā chíi yā Jesús.

⁵⁴Ní n'diichineeⁿ yā Jesús ndúúcu nduudu yeⁿe yā. Ní canée ngiinu yā Jesús miiⁿ chí cucáávā nduudu yeⁿe yā ní Jesús cásta'a yā vaanicadíínūⁿ yeⁿe yā ní caⁿa yā nduudu chí nguée cuaacu. Ní 'íicú cuuvi caaⁿ'máⁿ yā nuuⁿ'ndi yeⁿe Jesús.

Levadura yeⁿe 'iiⁿ'yāⁿ fariseos

12 Tuu'mi ní neené 'yaaⁿ 'iiⁿ'yāⁿ nduuvuidaama yā chí tá tii n'dee 'iiⁿ'yāⁿ miiⁿ chingúúⁿndai yā 'aamá yā taamá yā. Tuu'mi ní Jesús miiⁿ tucá'a yā caⁿa yā chíi yā discípulos yeⁿe yā: Díⁿ nī cuidado yeⁿe chí ca'cueeⁿ 'iiⁿ'yāⁿ fariseos ti tan'dúúcā levadura yeⁿe pan. Nguée díiⁿ n'daaca yā yeⁿe chí ngi'cueeⁿ yā. ²Ti nguée de'ē vee chí nin'díi naaⁿ chí nguée cuuvi nánguaaⁿ naaⁿ. Ní nguée 'áamá dendú'ū chí cánúⁿ n'de'ei chí nguée cuuvi cadíínuuⁿ yā. ³Tiicá ntúūⁿ dendu'ū chí ngaⁿ'a n'de'ei ndís'tiī, tuu'mi ní 'iiⁿ'yāⁿ ní 'caandiveeⁿ yā. Ní chííⁿ chí ndís'tiī ngaⁿ'a nī ndúúcu 'iiⁿ'yāⁿ chæti va'āi tuu'mi ní 'iiⁿ'yāⁿ caaⁿ'maⁿ yā cuuvi yā nducyáácá 'iiⁿ'yāⁿ ndíi na yaacū yeⁿe va'āi.

Du'ū dí'va'a yú

(Mt. 10.28-31)

⁴Caⁿ'a Jesús: Ndís'tiī chí n'dai nduucú, 'úú ngaⁿ'á ngíi ndís'tiī chí nguée 'va'á nī 'iiⁿ'yāⁿ chí 'caaⁿ'nuⁿ yā cuerpo yeⁿe 'iiⁿ'yāⁿ, ti 'āā ntéé cuuvi dííⁿ yā cosa chí nguée n'daacā ca

ti chuū. ⁵'Úú ní cuuví ndís'tiī du'ū chí dííⁿ 'va'á nī: Ndís'tiī ní 'va'á nī Ndyuūs chí taachí 'āā n'díi 'iiⁿ'yāⁿ, Ndyuūs cuuví dííⁿ yā 'caanuúⁿ yā 'iiⁿ'yāⁿ infierno. 'Túúca ngaⁿ'á ngíi ndís'tiī 'iiⁿ'yāⁿ miiⁿ chí dí'va'a nī.

⁶¿'Áá nguée indíicuí yā na 'uūvi 'yáádā cáávā 'uūvi taaⁿ tuūmī? Ndyuūs ní nguée ngiinaáⁿ yā mar 'áamá 'yáádá. ⁷Níicú ndíi nducyaaca yuūdū tiiⁿ ndís'tiī ndii dúúché ndúúcu Ndyuūs. Cáávā chuū nguée 'va'á ndís'tiī. ¿'Áá nguée ya'ai ca chííⁿve ndís'tiī nguée ti 'aama 'yáádá?

Yeⁿe 'iiⁿ'yāⁿ chí i'teenú yā Cristo ní ngaⁿ'a yā yeⁿe chuū nanááⁿ 'iiⁿ'yāⁿ
(Mt. 10.32-33; 12.32; 10.19-20)

⁸Caⁿ'a Jesús: 'Úú ngaⁿ'á ngíi ndís'tiī chí nducyaaca 'iiⁿ'yāⁿ chí ngaⁿ'a yā chí yeⁿe 'úú nguaaⁿ 'iiⁿ'yāⁿ 'tiicá ntúūⁿ 'úú Sáⁿ'ā chí Daiya Ndyuūs caaⁿ'máⁿ nanááⁿ ángeles yeⁿe Ndyuūs chí 'iiⁿ'yāⁿ s'eeⁿ ní yeⁿe 'úú. ⁹Nducyaaca 'iiⁿ'yāⁿ chí nguée ngaⁿ'a yā chí yeⁿe 'úú nguaaⁿ 'iiⁿ'yāⁿ 'tiicá ntúūⁿ 'úú Sáⁿ'ā chí Daiya Ndyuūs caaⁿ'máⁿ nanááⁿ ángeles yeⁿe Ndyuūs chí 'iiⁿ'yāⁿ s'eeⁿ ní nguée yeⁿe 'úú.

¹⁰Nducyáácá 'iiⁿ'yāⁿ chí caⁿ'a yā nduudu taaⁿ chí nguée n'daacā chí contra yeⁿe 'úú chí Sáⁿ'ā chí Daiya Dendyuūs, Ndyuūs nadach'æecú yā yeⁿe yā. Nducyáácá 'iiⁿ'yāⁿ chí caⁿ'á yā nduudu taaⁿ chí nguée n'daacā chí contra yeⁿe Espíritu N'dai yeⁿe Ndyuūs, Ndyuūs nguée nadach'æecú yā yeⁿe yā. Ndíi nguée ndúú iⁿ'yeeⁿdí 'cūū, ndíi nguée ndúú táámá iⁿ'yeeⁿdi chí cuchii.

¹¹Taachí 'iiⁿ'yāⁿ ndée yā ndís'tiī na yaacū sinagogas nanááⁿ 'iiⁿ'ntyéⁿe

ndúúcu jueces, nguéé nadicádíínuuⁿ nī de'ē chí nan'gueecútaⁿa nī o de'ē chí caaⁿmaⁿ nī. ¹²Espíritu N'dai yeⁿe Ndyuūs cuuvi ndís'tiī hora mííⁿ nūuⁿ de'ē chí caaⁿmaⁿ nī.

**Jesús ngi'cueeⁿ yā yeⁿē
peligro yeⁿē vaadi 'cuiica**

¹³Áámá saⁿā caⁿa sa ngii sa Jesús: N'dií, Maestro, cuuví nī 'diinú chí ntée sa vaadi n'gua'aa yeⁿē chiidá 'nū cuuvi yeⁿé.

¹⁴Jesús miiⁿ ní caⁿa yā chiī yā saⁿā: N'dii, sáⁿā, ¿du'ú s'neēⁿ 'úú vmnaaⁿ yeⁿē n'dii tan'dúúca juez chí nca'á chí cuuvi yeⁿé nī yeⁿē 'taa chí véé yeⁿē chiidá nī?

¹⁵Úú ní ngaⁿá ngii nducyáácá ndís'tiī: Cuin'diichí nī ní cundéé nī cuidado yeⁿe chí neⁿé nī yeⁿe vaadi 'cuiica caati 'iiⁿyāⁿ nguéé ndaaca yā vida cueⁿe daāⁿmaⁿ cáávā chí véé n'dee n'dái yeⁿe yā.

¹⁶Tuu'mi ní Jesús miiⁿ caⁿa yā chiī yā ejemplo 'cūū 'iiⁿyāⁿ: Áámá saⁿā 'cuiica véé yáⁿaa yeⁿē sa chí neenē n'dee chiīnu sa. ¹⁷Sáⁿā miiⁿ ní nadicádíínuuⁿ sa ní caⁿā sa: ¿Táácá dííⁿ ti nguéé cuescomate ch'ete naachi nadidaamá cosecha yeⁿé? ¹⁸Ní caⁿa sa: 'Túúca dííⁿ. Cúndeevé cuescomate yeⁿé ní ndiiⁿ taama chí ch'etē ca ní miiⁿ nadaamá tanducueⁿē cosecha yeⁿé ndúúcu dendú'ū yeⁿé. ¹⁹Tuu'mi ní caaⁿmáⁿ māaⁿ cuuví alma yeⁿé. Dii alma yeⁿé de'e chúúca n'dai dii. Néénē n'dee vee yeⁿē di chí nguáín'daí chí 'nááⁿ n'dai cuchéé. Maaⁿ ní ntaavi'tuunúūⁿ cuchéé, cu'u, ní cuuvi yéénú. ²⁰Naati Ndyuūs caⁿa yā chiī yā saⁿā: Díí saⁿā chí cheechi tiiⁿ di. Maaⁿnguiinúⁿ 'cūū

caⁿa di 'cuūví di. Ní chííⁿ chí nguáín'daí di chí vaadi 'cuiica yeⁿē di, ¿du'ū cuuvi yeⁿē? ²¹Ní Jesús ngaⁿa yā: 'Tíicā 'iiⁿyāⁿ chí nguain'dai yā chí véé yeⁿe maáⁿ yā cáávā maaⁿ yā naati 'iiⁿyāⁿ s'eeⁿ ní nguéé véé yeⁿé yā nanááⁿ Ndyuūs.

**Ndyuūs idiíⁿ yā cuidado nducyaaca
'iiⁿyāⁿ chí daiyá yā**

(Mt. 6.25-34)

²²Jesús ngaⁿa yā ngii yā discípulos yeⁿe yā: Cáávā chuū chí ngaⁿá ngii ndís'tiī. Nguéé nadicádíínuuⁿ nī yeⁿe vida yeⁿe maaⁿ nī yeⁿē chí nge'e nī cáávā vida yeⁿe nī ndii nguēe ndúú cáávā catecaí nī yeⁿē cuerpo yeⁿé nī. ²³Vida ní ya'ai ca chíí'vē nguéé ti chí nge'é nī. Ní cuerpo ní ya'ai ca chíí'vē nguéé ti catecaí nī. ²⁴Nadicádíínuuⁿ nī yeⁿe 'yaadā chí nguuvi tī cuervos. 'Yaada s'eeⁿ ní nguéé ngiīnu tī ndaata; ndíí nguéé ndúú ingii cosecha yeⁿé tī chí che'e tī; ndíí nguéé ndúú véé ra vaacú tī chí nguain'dai tī; ndíí nguéé ndúú cuescomates yeⁿe tī. Ní Ndyuūs nga'a yā chí nge'e tī. ¿Áá yaⁿ'ai ca chíí'vē ndís'tiī nguéé tí 'yaada s'eeⁿ? ²⁵¿Du'u 'áámá chéé ndís'tiī cuuví cundéé nī cuidado ní n'dee n'dái nacadiinúúⁿ nī ní ntiinee nī maⁿa metro yeⁿē chí yaacu nī? ²⁶Ndúúti chí nguēe cuuvi dííⁿ nī chuū chí 'lííⁿ ¿de'ē cúúví chí indeé nī cuidado ní n'dee n'dái nadicádíínuuⁿ nī yeⁿe dendu'ū chí n'geete cá?

²⁷Cuin'diichí nī naandā táácā n'giita. Nguéé din'dái tíínuuⁿ, ndíí nguéé ndúú idin'dái hilo. 'Úú ngaⁿá ngii ndís'tiī ti rey Salomón canúuⁿ yā catecaí yā chí n'deevé n'dai yeⁿe rey nguéé neenē

n'deevéé tan'dúúcā 'áámá naāndā s'ee". ²⁸Nduuti chi Ndyuūs nga'a yā catecai n'daacā naāndā chi maa" ní snéé cuēeti ní cavyaa" ní nti"í ní 'ii"yā" 'nee" yá"n'a yā, n'deēe cá Ndyuūs tée yā ndís'tiī ti Ndyuūs dii"n yā cuidado ye"e ndís'tiī chi dúu'vii i'téenu nī Ndyuūs. ²⁹Ndís'tiī ní nguéé in'nuú"n nī chi che'e nī o cu'ú nī. Nguéé nadicádíinu"n nī ye"e ní 'cuēetinéé 'dii"n nī. ³⁰Ti 'ii"yā" chi nguéé ye"e ndaata Israel o judíos in'nuú"n yā tanducue"e dendu'ú 'cūū. Naati ndís'tiī ni véé 'aama Chiidá nī chi 'āā déenu yā ye"e tanducue"e dendu'ú chi necesidades ye"e ndís'tiī. ³¹Vmnaán" vmnaa" ndís'tiī ní cánéé chí in'nuú"n nī Ndyuūs ní ye"e nducué"e ye"e chi Ndyuūs nga"n nti"nyú"n yā, ní 'íicú Ndyuūs tée yā ndís'tiī tánducue"e déndu'ú.

Vaadi 'cuiica chi véé na va'ai cheeti nguuvi

(Mt. 6.19-21)

³²Ca"n'a Jesús: Ndís'tiī chi tan'dúúcā 'iiti cuūchī ye"e 'tiicá nī. Nguéé 'va'á nī ti Ndyuūs Chiida yú ne"é yā tée yā ndís'tiī dendu'ú ye"e naachí nga"n nti"nyú"n yā. ³³Cuin'díicui nī chi véé ye"e nī ní ca'á nī 'ii"yā"n chi nguéé véé ye"e yā. Dii"n n'daacá nī caati cuuvi ye"e nī vaadi 'cuiica ye"e va'ai cheeti nguuvi naachi 'ii"yā"n duucu nguéé cuuvi cundaa yā, ndii nguēe nduu í'yéevē cuuvi di'tuuví ti. ³⁴Caati naachi canéé vaadi 'cuiica ye"e nī, mii"n canee staava ye"e nī chí nadicadiinu"n nī ye"e nducué"e.

Canéé chi candéé nī cuidado ye"e nducué"e

³⁵Cuēetinee chiichi n'daacā ndúúcū catecai nī. Cuēchiichi

nī paño cheēti nī 'íicú candee nī lámparas ye"e nī chí ngiichi. ³⁶Cuēetinéé ndís'tiī tan'dúúcā 'áámá sa"n'a chí snéé ngiinu sa chí ndaa patrón ye"e sa naachi n'giindivaacú 'ii"yā". Ní maa" nda'ai sa cheendi va'āi ní taachi ndaa yā chi di'cuēecú yā tuu'mí nūu"n nn'guaā"n sa ye"e yā. ³⁷De'ē chúúcā n'dai mozos chí dii"n mandado ní taachi ndaa Señor mii"n ní ndaaca yā mozos chí sндуuchí yā. Cuaacu ní"nyú"n nga"á ngí ndís'tiī chí Señor mii"n ní cuēchiichi n'daacá yā paño cheēti yā. Ní Señor mii"n ní dii"n yā chí mozos 'cuēete sa na mesa. Tuu'mi ní Señor mii"n 'cuíi yā cu'u che'e mozos. ³⁸Áará chí Señor mii"n ndaa yā ma"n'a yaaa" o taachi 'āā cuéé chideeve nguuvi ní ndaacá yā mozos chí sндуuchi sa. De'e chúúcā n'dai mozos ti sндуuchí yā. ³⁹Ndís'tiī ní cadíinu"n nī chuū. Ndúúti chí 'ii"yā"n vaacu déenu yā de'ē hora chí ndaa chí duucu, cuaacu ní"nyú"n 'cuēetí nduuchi yā ní nguéé 'cuaa"n yā chí duucu na vaacú yā. ⁴⁰Tiicá ntúū"n ndís'tiī 'cuēetinéé yaá"n nī ti hora chí nguéé inacádiinu"n nī 'úú chí Sa"n'a chí Daiyá Dendyuūs ní ndaa taama vmné"e.

Ye"e mozo chí din'daacā ndúúcū mozo chí nguēe din'daacā

(Mt. 24.45-51)

⁴¹Tuu'mi ní Pedro mii"n ní ca"n'a yā chii yā Jesús: N'díi, Señor, ¿'áa ca"n'a nī ejemplo 'cūū caavā nús'uu o caavā nducyaaca 'ii"yā"n?

⁴²Jesús mii"n ní ca"n'a yā: ¿Du'ú dueño ca'a yā nti"nyu"n chí s'nee"n yā vmnaa"n ye"e va'ai ye"e yā 'áámá mayordomo nduuti chí

ngueε ca'a sa chi che'e mozos yeⁿé yā hora chi che'e sa? ⁴³De'ε chúúcā n'dai mayordomo chi diiⁿ sa ntiiⁿnyuⁿ taachí dueño miiⁿ ní ndaa yā ní nandaaca yā mayordomo chi diiⁿ sa tan'dúúcā chi neⁿe yā. ⁴⁴Cuaacu níⁿnyúⁿ ngaⁿá ngií ndís'tií chi dueño miiⁿ ní cu'néeⁿ yā mayordomo miiⁿ chi caaⁿmaⁿ ntiiⁿnyuⁿ sa yeⁿē tanduvéé chi vεε yeⁿe yā. ⁴⁵Ndúúti chi mayordomo miiⁿ nadicádiinuuⁿ sa na staava yeⁿe sa chí dueño cuuvi 'náaⁿ yā ndaa yā tuu'mi ní tuca'a sa 'cueⁿe sa mozo ndúúcū n'daataa chi snéé caadi 'iyyū ní nge'e sa ní ng'i' sa ndúúcū amigos yeⁿe sa ní cuu'vi sa. ⁴⁶Tuu'mi ní dueño miiⁿ ní ndāa yā nguuvi chi mayordomo nguéé cānee ngíinu sa ní 'áámá hora chi nguéé déenu sa. Ní dueño miiⁿ ca'á yā castigo ch'εεε ca mayordomo miiⁿ tan'dúúcā chi Ndyuūs ca'a yā castigo 'iiⁿyāⁿ chi nguéé i'téenu yā yā. ⁴⁷Mayordomo chi deenu sa chí neⁿe dueño yeⁿe sa naati nguéé véé yaaⁿ sa ndíí nguéé ndúú diiⁿ sa chi ngaⁿa dueño yeⁿe sa cuuvi sa castigado ndúúcū neené n'deeε cuúví 'cueⁿé yā saⁿā. ⁴⁸Naati mayordomo chi nguéé déenu sa taacā neⁿe dueño yeⁿe sa chi diiⁿ sa, ní diiⁿ sa chí nguéé n'daacā chi cuuvi sa castigado, tuu'mi ní cuuvi sa castigado ndúúcū 'téé nūuⁿ cuúví cueⁿé yā saⁿā. 'Āā du'ú nūuⁿ saⁿā chí n'deeé nga'a dueño yeⁿe sa, dueño miiⁿ ní n'deēε cá caaca yā cuenta yeⁿē chi diiⁿ sa. 'Iiⁿyāⁿ chi nga'a n'deēε cá táámá yā, 'iiⁿyāⁿ miiⁿ n'deēε cá caaca yā cuenta yeⁿe chí diiⁿ taamá yā.

Véé 'áámá 'uúví taaⁿ 'iiⁿyāⁿ cáávā Jesús miiⁿ

(Mt. 10.34-36)

⁴⁹'Úú Jesús ní ndāa chí cu'neéⁿ yaⁿā ná iⁿ'yeeⁿdí 'cūū. De'ε ca neⁿé diíⁿ nduuti chí 'āā ngiichi. ⁵⁰Canéé chí 'úú 'cueenú cuuvi n'deeε n'dáí ní neⁿé chí 'cueenú cuuvi ndíí taachi 'āā cuuvi cuaacu tanducuéⁿē. ⁵¹'Áá nadicadíinuuⁿ nī chí 'úú ndaa chí ndéε vaadi 'diíⁿ 'iiⁿyāⁿ yeⁿe iⁿ'yeeⁿdí 'cūū? 'Úú ní ngaⁿá ngií ndís'tií chí nguéé cuaacu caati ndéε vaadi 'caa'va, ní 'iiⁿyāⁿ 'caa'vá yā ndúúcū táámá 'iiⁿyāⁿ. ⁵²Ndíí tiempo miiⁿ ndíí tiempo chí cuchii, nduuti chí nyuⁿ'u 'iiⁿyāⁿ na 'áámá va'āi ndúúcū vaadi 'caa'va 'cuetinéε yā, 'iinu yā ní caⁿa yā contra yeⁿē na 'uuvi yā ní 'uuvi yā ní caⁿa yā contra yeⁿē ná 'iinú yā. ⁵³Saⁿā chí véé daiya sa ní 'caa'va sa ndúúcū daiya sa, 'íícú daiya sa ní 'caa'vá sa ndúúcū chiidá sa. Ní 'áámá n'daataa nguéé cuuvi n'diichi tá daiya tá, 'íícú daiya ntúūⁿ tá nguéé cuuvi n'diichi tá cheεcu tá. Ní taⁿā indá'ā tá ní 'caa'vá yā ndúúcū dicuūnú ta, ní dicuūnú ta ní 'caa'vá yā ndúúcū táⁿā indá'a tá.

Señales yeⁿe tiempo 'cūū

(Mt. 16.1-4; Mr. 8.11-13)

⁵⁴'Tiicá ntúūⁿ ngaⁿa Jesús ngii yā 'iiⁿyāⁿ: Taachí ndís'tií inaaⁿ nī mééε chí íneeⁿ naachí ngiia 'yáⁿā, tuu'mi ní ngaⁿa nī chí 'cueeⁿ cúúví. Ní 'tíicā ngii. ⁵⁵Ní taachí ngéenu 'yúúné cuááⁿ ndiia ngaⁿa nī chí cuuvi yāāⁿ 'iicu ní ngii. ⁵⁶Ndís'tií chí 'uúví naaⁿ 'uúví cheendi nī déenu nī taaca canéé nánguuvu

ndúúcú na yaⁿá, taachi ndaā 'í'nūuⁿ
ni taachi cuuvi 'cueeⁿ cuuvi. ¿De'ē
cúúví chí nguéé déenu nī yeⁿe
señales chí inaaⁿ nī yeⁿe tiempo
'cūū?

**Diiⁿnú yiiⁿnu di tun'dáá n'dai di
ndúúcú 'iiⁿyāⁿ chí taaⁿ yā yeⁿe di**
(Mt. 5.25-26)

⁵⁷Tuu'mi ní caⁿa Jesús: ¿De'ē
cúúví chí nguéé indéē ndís'tiī
cuidado chee chí n'daācā chí dííⁿ nī?
⁵⁸Taachi caⁿá nī ndúúcú sáⁿā chí
tāāⁿ ndúúcú nī nanááⁿ juez, n'diichí
nī chí indee nī ndúúcú vi'ī cuaaⁿ
cyúúní ní dííⁿ nī chí 'cuētinéé
n'dááca nī ndúúcú vi'ī nī 'iicu
nguéé caⁿa nī nanááⁿ juez. Ní juez
miiⁿ nca'á yā ndís'tiī taā policía, ní
policía miiⁿ ní cu'nuūⁿ sá ndís'tiī
vácūū. ⁵⁹Úú ngaⁿá ngī ndís'tiī ti
nguéé nan'dáa nī vácūū neⁿe chí
nguéé 'cuiinu nadíí'vē tanducuéⁿē
chí ndiicuú nī.

**N'dáácā n'dai chí ndaacadaamí
nī yeⁿe nuuⁿndi yeⁿe nī**

13 Ndáa n'duuvi saⁿā nanááⁿ
Jesús ní caⁿa sa chíi sa
Jesús tan'dúúcā chí diiⁿ gobernador
Pilato. Ca'a yā orden chí ch'iiⁿnuⁿ
sa n'dúúví 'iiⁿyāⁿ yeⁿe yáⁿāa
Galilea ní staⁿa yā yuuúⁿ yeⁿe
'iiⁿyāⁿ s'eeⁿ ndúúcú yuuúⁿ yeⁿe 'iiti
chí 'āā 'nífⁿnúⁿ 'iiⁿyāⁿ Israel s'eeⁿ
chí ca'a yā ofrenda yeⁿe Ndyuūs.
²Jesús ní caⁿa yā chíi yā 'iiⁿyāⁿ
s'eeⁿ: ¿Áá nadicádíínuuⁿ ndís'tiī
chí 'iiⁿyāⁿ s'eeⁿ yeⁿe yáⁿāa Galilea
ch'eenu yā 'tíicā ti véé ca nuuⁿndi
yeⁿe yā nguéé ti tanáⁿā 'iiⁿyāⁿ
yeⁿe yáⁿāa Galilea? ³Úú ngaⁿá
ngí ndís'tiī: Nguéé 'tíicā. Ndúúti

chí ndís'tiī nguéé ndaacadaamí nī
yeⁿe nuuⁿndi yeⁿe nī, tuu'mi ní
nducyaaca ndís'tiī 'cuūvi ntúúⁿ nī
cueⁿe daāⁿmaⁿ. ⁴¿De'ē nadicádíínuuⁿ
ndís'tiī yeⁿe ndu'ū ndítiiⁿyu 'iinu
'iiⁿyāⁿ chí ndíí cuaaⁿ vmaaaⁿ
sndaā nduūu torre na yáāⁿ Siloé
vmnááⁿ yā ní nducyáácá yā ch'ii
yā? ¿Áá nadicádíínuuⁿ ndís'tiī chí
'iiⁿyāⁿ s'eeⁿ véé ca nuuⁿndi yeⁿe yā
nguéé ti tanáⁿā yā chí snée yā na
yáāⁿ Jerusalén? ⁵Úú ní ngaⁿá ngí
ndís'tiī chí nguéé 'tíicā. Nduuti chí
ndís'tiī ntúúⁿ nguéé ndaacadaamí
nī yeⁿe nuuⁿndi yeⁿe nī, tuu'mi ní
nducyaaca ndís'tiī 'cuūvi nī cueⁿe
daāⁿmaⁿ.

**Ejemplo yeⁿe yáⁿá yeⁿe n'guídii
yaaⁿ nguuvi chí nguéé n'gu'i'í yeⁿe**

⁶Tuu'mi ní Jesús caⁿa yā ejemplo 'cūū:
'Áámá saⁿā ní catá'āi 'áámá yáⁿá yeⁿe
'nguídii yaaⁿ nguuvi yeⁿe sa naachi
véé yáⁿāa cheeti chééⁿ yeⁿe sa. Chó'oo
tiempo ní cheⁿe sa in'nuuⁿ sa n'gu'i'í yeⁿe
yáⁿá yeⁿe sa ní nguéé ndaācā sa n'gu'i'í
yeⁿe. ⁷Tuu'mi ní caⁿa sa chíi sa 'iiⁿyāⁿ
chí dííⁿ yā ntiíⁿnyuⁿ yeⁿe yáⁿāa yeⁿe
sa: 'Áā 'iinu nduūyū chí ichíi ní nguéé
indaāca n'gu'i'í na yáⁿá 'cūū. 'Caaca nī
yáⁿá. ¿De'ē cuuvi chí yáⁿá dí'vaachi na
yáⁿāa naachi snée yáⁿá 'cūū? ⁸Naati
saⁿā chí idiíⁿ ntiíⁿnyuⁿ na yaⁿā miiⁿ
nán'guēcútaⁿā sa: N'díí, señor, 'āā
canéé rá nduuyú 'cūū ní 'úú nadidēevé
yáⁿá yeⁿe ní ca'á taavi abono yeⁿe. ⁹Ní
nduuti chí 'cuūndi n'gu'i'í yeⁿe ní n'daacā.
Nduuti chí nguéé, ní 'caaca nī.

**Jesús dííⁿ yā chí nduūvā yeⁿe
'áámá n'daataá chí neené n'guutíí**

¹⁰Nguuvi sábadu chí
ntaavi'tuunúúⁿ 'iiⁿyāⁿ Israel s'eeⁿ,

Jesús ngi'cueeⁿ yā na 'áámá yaācū sinagoga. ¹¹Miiⁿ ní canéé 'áámá n'daataá chí 'āā ndítiiⁿyu 'iinu ndúuyū chí ndii n'guuti ta cáāvā chí diiⁿ espíritu yeⁿe yáá'n'guiinūⁿ 'tíicā ndúucū ta. Ndíí mar 'áámá naaⁿ nguéé ngii ndaa cuaacū ta. ¹²Taachí Jesús n'diichí yā n'daata miiⁿ yaa'ví yā táⁿā ní caⁿa yā chíi yā táⁿā: N'díí, n'daataá, 'áá neⁿe nī chí nduuvi cuaacū nī?

¹³Jesús sn'duú yā ta'a yā vmnaaⁿ yeⁿe n'daātā miiⁿ. Tuu'mí nūⁿ ndaā cuaacu n'daataá míⁿ ní n'daataá míⁿ ní ngaⁿa yā: De'ē chúucā ch'εete Ndyuūs. ¹⁴'iⁿyāⁿ chí ngaⁿā ntiⁿnyúⁿ yā yeⁿe yaacu sinagoga nduuvi taáⁿ yā ti Jesús miiⁿ ní diyiicú yā n'daataá míⁿ nguuvi chí 'iⁿyāⁿ ntaavi'tuunúⁿ yā. Ní ngaⁿa yā ngii yā nducyaaca 'iⁿyāⁿ: Jaāⁿ nguuví nūⁿ canee chí diiⁿ 'iⁿyāⁿ ntiⁿnyuⁿ ní nguuvi s'eeⁿ 'iⁿyāⁿ cuuvi chíi yā nanááⁿ Jesús miiⁿ ní cuuvi diiⁿ yiicú yā 'iⁿyāⁿ s'eeⁿ, naati nguéé cuuvi díⁿ yā 'tíicā nguuvi chí ntaavi'túúnūⁿ 'iⁿyāⁿ.

¹⁵Tuu'mi ní Jesús nan'guεεcútaⁿa yā yeⁿe sa: Ndís'tii saⁿā 'uūví naaⁿ 'uūví cheendí nī, 'áá nguéé in'daatí ndís'tii 'iiti yeⁿe nī naachi snéé 'ii'yu tī ní ngeⁿé nī nga'a nī nuūⁿnīⁿ 'iiti nguuvi chí ntaavi'tuunúⁿ nī?

¹⁶N'daataa 'cūū ní yeⁿe ndaata yeⁿe Abraham. 'Āā ndítiiⁿyu 'iinu nduūyū ncachiichí yáá'n'guiinūⁿ táⁿā. 'áá nguéé canee chí n'daatí táⁿā miiⁿ yeⁿe ca'ai nguuvi chí ntaaví'tuunúⁿ nī?

¹⁷Taachí Jesús miiⁿ caⁿa yā chuū, taanduvée yā chí taaⁿ yā yeⁿe yā ní 'cuináⁿ yā. Nducyáácá 'iⁿyāⁿ yeⁿe yāāⁿ miiⁿya yeenú n'dai yā yeⁿe

tanducueⁿe dendu'ū chí n'geete chí diiⁿ Jesús miiⁿ.

Ejemplo yeⁿe nduuti yeⁿe yíivē ntí'yāa

(Mt. 13.31-32; Mr. 4.30-32)

¹⁸Jesús caⁿa yā: 'De'ē tan'dúucā naachí Ndyuūs ngaⁿa ntiⁿnyúⁿ yā? 'De'ē nadídaamá nduūcū?

¹⁹Tan'dúucā nduutií yeⁿe yíivē ntí'yāa chí 'áámá saⁿā ní staⁿā sa ní chíinū sa na yáⁿāa yeⁿe sa. Yaāta miiⁿ ní ch'iita tan'dúucā 'áámá yáⁿá ch'εete. 'Yáádá yeⁿe nanguuvi din'dái tī 'deεé tī na dúuⁿnē.

Ejemplo yeⁿe levadura yeⁿe pan

(Mt. 13.33)

²⁰Jesús ní caⁿa ntúūⁿ yā: 'De'ē tan'dúucā naachí Ndyuūs ngaⁿā ntiⁿnyúⁿ yā? ²¹Tan'dúucā 'aama tááⁿ levadura yeⁿe pan chí 'áámá n'daataa chistaⁿā tá nguaaⁿ 'iinū medidas harina ndíí chí nan'guiiita tanducueⁿe yāachí yéⁿe.

Cheendí va'āi 'tuucúú

(Mt. 7.13-14; 21-23)

²²Taachi Jesús canúⁿ yā yúúni chí cho'ó yā na yāāⁿ Jerusalén cueⁿé yā tanáⁿā yāāⁿ n'geete ndúucū yāāⁿ n'gaiyāā ní ngi'cueeⁿ yā 'iⁿyāⁿ. ²³Tuu'mi ní 'áámá saⁿā ndaā sa nanáāⁿ yā ní ntiinguuneeⁿ sa: N'díí, Señor, 'áá du'ví 'iⁿyāⁿ chí nnguaⁿ'ai yā? Jesús miiⁿ ní caⁿa yā chíi yā saⁿā miiⁿ: ²⁴Dííⁿ nī tanducueⁿe chí cuuvi nī chí cundaá nī cheendi va'āi 'tuucúú caati ngaⁿá ngii ndís'tii chí nééne 'yaaⁿ 'iⁿyāⁿ neⁿe yā cundaá yā cheendi va'ai 'tuucúú chí candéē naachi Ndyuūs nadanguaⁿai

yā 'iiⁿyāⁿ naati nguéé cuuvi dííⁿ yā. ²⁵Taachi 'iiⁿyāⁿ yeⁿe va'ai nducueeⁿ yā ní n'gaadí yā cheendi va'āi yeⁿe ndís'tií, tuu'mi ní ndís'tií snee nī cuaaⁿ chuva'āi. Ní dí'cuεεcú nī cheendi va'āi ní caaⁿmáⁿ nī: Señor, Señor, nn'guaáⁿ nī yeⁿe 'nū. 'Iiⁿyāⁿ yeⁿe va'ai ní nan'guεεcutaⁿa yā: Nguéé in'diichí ndís'tií ndii nguεε deenú tií ndiicá nī. ²⁶Áará chí ndís'tií ní tucá'a nī caaⁿmaⁿ nī 'tíicā: Che'é 'nū ní chí'i 'nū ndúúcu nī taachi n'dií ní chí'cueeⁿ nī 'iiⁿyāⁿ na yúúni yeⁿe yááⁿ vaacú 'nū. ²⁷'Iiⁿyāⁿ yeⁿe va'ai miiⁿ ní caaⁿmaⁿ yā cuuvi yā 'iiⁿyāⁿ s'eeⁿ: 'Úú ngaⁿ'á ngí ndís'tií ti nguéé in'diichí ndís'tií ndíí nguéé deenú tíí ndiica nī. Cueevii nī yeⁿe nducyaaca ndís'tií ti nguéé n'daācā idííⁿ nī. ²⁸Cuaacu chí ndís'tií snaaⁿ nī chiida yú s'eeⁿ Abraham, ndúúcu Isaac, ndúúcu Jacob, ndúúcu nducyaaca profetas chí ndii cuááⁿ vmnaaⁿ snée yā naachí Ndyuūs ngaⁿ'a ntiíⁿnyuⁿ. Ní ndís'tií ní 'cuεetinée nī cuááⁿ chuva'āi. Miiⁿ ní cuεεcú nī ní che'é nī 'diiⁿyúⁿ nī. ²⁹'Iiⁿyāⁿ s'eeⁿ chii yā yeⁿe nducuéⁿe cuaaⁿ yeⁿe iⁿ'yeeⁿdí 'cūú ní ndaa yā nanááⁿ Ndyuūs. Chii yā ndíí cuaaⁿ na ican'dáá 'yáⁿā, ndii cuaaⁿ na ngiiya 'yáⁿā, ndíí cuaaⁿ 'nífⁿnúⁿ, ndíí cuaaⁿ ndiia, ní 'cuεeté yā na mesa yeⁿe banquete naachí Ndyuūs ngaⁿ'a ntiíⁿnyúⁿ yā. ³⁰Tuu'mi ní náⁿā 'iiⁿyāⁿ chí n'gεete chí ngaⁿ'a ntiíⁿnyúⁿ yā maaⁿ na iⁿ'yeeⁿdí 'cūú ní cuuvi ndiicuuⁿ cá yā naachi snée Ndyuūs ní naⁿa 'iiⁿyāⁿ chí ndiicuuⁿ cá maaⁿ na iⁿ'yeeⁿdí 'cūú ní cuuvi n'gεeté yā naachi snée Ndyuūs.

Jesús cheεcú yā cáávā 'iiⁿyāⁿ yeⁿe yááⁿ Jerusalén

(Mt. 23.37-39)

³¹Nguuví 'cuú nūⁿ 'áámá chéé 'iiⁿyāⁿ fariseos ndáa yā nanááⁿ Jesús ní caⁿ'a yā: N'dií, Jesús, cueⁿe nī ti rey Herodes neⁿ'é yā 'caaⁿnúⁿ yā n'dií.

³²Naati Jesús caⁿ'a yā chíi yā 'iiⁿyāⁿ s'eeⁿ: Cunaⁿ'á nī nanááⁿ rey miiⁿ ní caaⁿmaⁿ nī cuuvi nī: N'dií rey, tan'dúúca 'yuūnéé, 'tiicá nī. Cuin'diichí nī, Jesús miiⁿ ngaⁿ'á yā 'túúca: 'Úú itun'daá espíritu yeⁿe yááⁿn'guinūⁿ yeⁿe 'iiⁿyāⁿ ní dííⁿ chí nduūvā yeⁿe 'iiⁿyāⁿ maaⁿnguuvii ndúúcu cavyaaⁿ, tuu'mi ní 'cuiinu ntiíⁿnyuⁿ yeⁿe damáíⁿ. 'Tíicā canee chí dííⁿ ná 'iīnū nguuvii. ³³Naati 'úú ní canée chí caacá cuaaⁿ cyúúni ní dííⁿ ntiíⁿnyuⁿ yeⁿe maaⁿ ndúúcu cavyaaⁿ ndúúcu damáíⁿ, caati nguéé canée chí 'cuuví 'áámá saⁿ'ā profeta ch'εete chí diiⁿ ntiíⁿnyuⁿ yeⁿe Ndyuūs 'áámá lado yeⁿe yááⁿ Jerusalén ti na yááⁿ Jerusalén chí 'caaⁿnúⁿ yā saⁿ'ā profetas.

³⁴Jesús caⁿ'a yā chíi yā 'iiⁿyāⁿ yeⁿe yááⁿ Jerusalén: Nds'tií chí 'muuⁿ n'giiⁿnuⁿ nī 'iiⁿyāⁿ profetas ní ngítuú nī 'iiⁿyāⁿ chí Ndyuūs dicho'ó yā chí ndee yā nduudu yeⁿe yā. Ní Jesús caⁿ'a yā: Neené n'deēe cuúví neⁿ'é nadaamá daiyá 'iiⁿyāⁿ yááⁿ Jerusalén miiⁿ tan'dúúca 'áámá tú'u nadaamá tí daiya tí mááⁿ ngeēchi tí, ní nguéé 'cuúⁿ nī. ³⁵Túúca caⁿ'a yā: N'diichí ndís'tií. Vaacú nī cu'néeⁿ maāⁿ. Ní ngaⁿ'á ngí ndís'tií chí 'āā ntée snaaⁿ nī 'úú ndíí ndáá tiempo chí caaⁿmaⁿ nī yeⁿe: De'e chúúca n'dai 'iiⁿyāⁿ chí

cuchii yā ndúúcu chi duuchi Señor 'iivú Ndyuūs ti 'iiⁿyāⁿ yeⁿ'é Ndyuūs.

**Jesús diiⁿ yā chi nduūvā
yeⁿ'e 'áámá saⁿā**

14 'Áámá sábadu, nguuvi chi ntaavi'túúnuuⁿ 'iiⁿyāⁿ, Jesús sndaā yā ní cheⁿ'e yā 'áámá va'ai yeⁿ'e 'áámá saⁿā fariseo chi ngaⁿ'a ntiⁿnyuⁿ sa. Ní tanáⁿā saⁿā fariseos canee ngiinu sa Jesús de'ē chi caⁿ'á yā chi diiⁿ yā. ²Tuu'mi ní ndaā nanááⁿ Jesús 'áámá saⁿā chí ngiitā ní ndiituuⁿ núúⁿmáⁿ ch'ēete sa. ³Jesús caⁿ'a yā chii yā maestros yeⁿ'e ley ndúúcu saⁿā fariseos: 'Áá 'cuaaⁿ ley miiⁿ chí cuuví diiⁿ chi nduūvā yeⁿ'e 'iiⁿyāⁿ nguuvi chí ntaavi'tuunúúⁿ yā?

⁴Saⁿā s'eeⁿ ní 'diiⁿ 'diiⁿ ch'ēetinee sa ní nguéé nan'guēecutaⁿ'a sa. Tuu'mi ní Jesús sta'á yā ta'a saⁿā chi ndiituuⁿ ní diiⁿ yā chi nduūvā yeⁿ'e saⁿā miiⁿ. Ni yaa'vi yā saⁿā chi cunaⁿ'a sa. ⁵Cuayivi ní Jesús yaa'vi yā saⁿā s'eeⁿ ní caⁿ'a yā: 'Chēē ndís'tii ndúúti chi 'áámá burro o 'áámá itiindu yeⁿ'e nī cun'dáá nuúⁿ tī na 'áámá viini ní nguéé tuu'mí nūuⁿ ntun'dáa nī 'iiti 'áará chí nguuvi chi ntaavi'tuunúúⁿ 'iiⁿyāⁿ?

⁶Saⁿā s'eeⁿ nguéé chí nan'guēecutaⁿ'a sa cucáāvā nduudu chi ngaⁿ'a yā.

**'Iiⁿyāⁿ chi invitado yā naachi
n'giindivaacu 'iiⁿyāⁿ**

⁷Taachí Jesús n'diichí yā táácā diiⁿ 'iiⁿyāⁿ chi invitados chi ndēeve yā silla yeⁿ'e mesa chi lugar chí n'daacā ca, tuu'mi ní caⁿ'a yā 'áámá ejemplo chi 'tēe nguēe dááma ndúúcu 'iiⁿyāⁿ chi diiⁿ yā invitados.

⁸Ngaⁿ'a yā 'tíicā. Taachi 'áámá 'iiⁿyāⁿ diiⁿ yā invitar dii naachi n'giindivaacu 'iiⁿyāⁿ nguéé 'cuūndi di na silla vmnááⁿ vmaaaⁿ caati cuuvi ndaa táámá 'iiⁿyāⁿ invitado chi ch'ēeté yā nguéé tī dii. Ní silla miiⁿ ní caava 'iiⁿyāⁿ miiⁿ. ⁹Ní taachí ndaa 'iiⁿyāⁿ chi ch'ēete ca yā, tuu'mi ní 'iiⁿyāⁿ chi diiⁿ yā invitar di ndaa yā nanááⁿ di ní caaⁿ'máⁿ yā cuuvi yā dii: Cu'neeⁿ di lugar 'cūū yeⁿ'e 'iiⁿyāⁿ 'cūū. Tuu'mi ní cuuví 'cuinááⁿ di ní 'cuūndi di na silla n'díi naaⁿ n'giinu. ¹⁰Taachí 'iiⁿyāⁿ diiⁿ yā invitar dii caⁿ'a di 'cuūndi di na silla ndíi naaⁿ n'giinu. Ní taachi ndaa nanááⁿ dii 'iiⁿyāⁿ chi diiⁿ yā invitar dii, tuu'mi ní caaⁿ'máⁿ yā cuuvi yā dii: Díi sáⁿ'ā chi n'dai nduucú, caaca dí cuaaⁿ 'niiⁿnuⁿ. Ní 'āā n'daacā cuuvi yeⁿ'e di nanááⁿ 'iiⁿyāⁿ chi vēeté yā na mesa. ¹¹'Iiⁿyāⁿ chí dich'ēeté maáⁿ yā táámá 'iiⁿyāⁿ ní diiⁿ yā chí ndiicuuⁿ yā. Ní 'iiⁿyāⁿ chí maaⁿ yā diiⁿ chí ndiicuuⁿ yā tááma 'iiⁿyāⁿ ní diiⁿ yā chí ch'ēeté yā.

¹²Tuu'mi ní Jesús ngaⁿ'á yā ngii yā saⁿā chí diiⁿ invitar 'iiⁿyāⁿ s'eeⁿ: Dii taachí in'nuuⁿ di chí che'e nguaiⁿ di o chí che'e nguūinū di, nguéé 'cuai di 'iiⁿyāⁿ chí n'dai ndúúcu di, ndíi nguéé ndúú ví'í rā di, ndíi nguéé ndúú 'iiⁿyāⁿ yeⁿ'e di, ndíi nguéé ndúú 'iiⁿyāⁿ na niiⁿnuúⁿ va'āi yeⁿ'e di chí 'cuíca yā caati 'iiⁿyāⁿ s'uuⁿ ní diiⁿ ntúuⁿ yā invitar dii chí che'e di nduucú yā. 'Tíicā ní nadí'v'e yā diiⁿ cáāvā chí ca'a di chí che'e yā. ¹³Naatí taachi idin'dái di 'aama comida n'dai, 'cuai dí 'iiⁿyāⁿ chí ndaachí snee yā, ndúúcu 'iiⁿyāⁿ chí nguéé ngii ngiicá yā, ndúúcu

chi ngai yó'o, ndúúcu 'iiⁿyāⁿ chi ngeenáaⁿ. ¹⁴Ní caaⁿmaⁿ 'iiⁿyāⁿ s'eeⁿ yeⁿē di: De'e chúúcā n'dai di. Ti 'iiⁿyāⁿ s'eeⁿ nguéé nteé yā dii. Naati Ndyuūs nadí'vε yā dii taachí ndaa nguuvu chi 'iiⁿyāⁿ chi n'dai nduuchí yā yeⁿē nguaaⁿ tináⁿā.

Ejemplo yeⁿe 'iiⁿyāⁿ chi che'e yā cena chi ch'εete

¹⁵Taachi 'áámá 'iiⁿyāⁿ chi véε yā na mesa miiⁿ ch'iindiveéⁿ yā chuū, caⁿa yā chii yā Jesús: De'e chúúcā n'dai chi caⁿá yā che'e yā pan naachí Ndyuūs ngaⁿa ntiiⁿnyúⁿ yā.

¹⁶Tuu'mi ní Jesús caⁿa yā ejemplo 'cūū: 'Áámá saⁿā caⁿā sa chi din'dái yā 'áámá chi che'e nguínū 'yaaⁿ 'iiⁿyāⁿ, ní idiiⁿ sa invitar n'dee n'dái 'iiⁿyāⁿ. ¹⁷Ní taachi 'āā chaa che'e nguuiⁿū yā dicho'o yā 'áámá mozo chi caⁿa sa cuuvi sa 'iiⁿyāⁿ chi ndii yā invitado: Cuchíi nī. 'Āā véé tanducuéⁿē chí che'e nguuiⁿu yú.

¹⁸Nducyaaca yā ní tucá'a yā caⁿa yā 'tíicā: Ch'εetinúⁿ nī yeⁿé. Ní 'áámá saⁿā ní caⁿā sa: Cáámá ch'iinū 'caí 'áámá finca ní cánéé chí caⁿá n'diichí finca, chiiⁿ chi ch'εetinúⁿ nī yeⁿé. ¹⁹Táámá yā ní caⁿa yā: 'Caí nyuⁿu yáandā itiindu ní neⁿé díⁿ ntiiⁿnyuⁿ ndúúcu tī. Ngiiⁿá favor. Ch'εetinúⁿ nī yeⁿé. ²⁰Táámá yā ní caⁿa yā: Cáámá ch'iinu ch'iindivaacú chi chiiⁿ nguéé cuuvi caⁿá. ²¹Taachí nguεcunéé mozo, caⁿa sa chuū chii sa 'iivi sa. Tuu'mi ní 'iivi miiⁿ nduuvu taáⁿ yā ní caⁿa yā chii yā mozo miiⁿ: Cueⁿe di cuaaⁿ ní'vεē ndúúcu cuaaⁿ cyúúni yeⁿe yáā ní candée di 'iiⁿyāⁿ ndaachí, ndúúcu 'iiⁿyāⁿ chi nguéé ngii ngiicá yā, ndúúcu 'iiⁿyāⁿ chi ngai yó'o,

ndúúcu 'iiⁿyāⁿ chi ngeenáāⁿ.

²²Sáⁿā mozo ní cueⁿē sa. Cuayiivi ní ndaā sa ní caⁿā sa chii sa 'iivi sa: N'díi, señor, 'āā díⁿ tan'dúúcā chí ngaⁿa nī ní véé cá lugar chi 'cuεētéé 'iiⁿyāⁿ na mesa. ²³Caⁿa señor miiⁿ chii yā saⁿā mozo miiⁿ: Cueⁿe di cuaaⁿ cyúúni n'gεεε ndúúcu yúúni chí véé chi neēⁿ cuááⁿ 'diitū ní di'cuútu di 'iiⁿyāⁿ chí chii yā na vaacú ní 'lícú cuuvi diituuⁿ na vaacú. ²⁴Ti 'úú ní ngaⁿá ngii ndís'tii chí mar 'áámá saⁿā chí díⁿ invitar saⁿā vmnaaⁿ nguéé 'cuúⁿ ndáa sa che'e nguuiⁿū sa nduucú na mesa yeⁿé.

'Iiⁿyāⁿ chi caⁿa yā ndúúcu Jesús canee chi 'cuéenu yā cuuvi

²⁵Cuayiivi míⁿ néené n'dee 'iiⁿyāⁿ cueⁿe yā ndúúcu Jesús. Ní Jesús miiⁿ ní caⁿa yā chii yā 'iiⁿyāⁿ s'eeⁿ 'áámá ejemplo: ²⁶Ndúúti chí 'áámá 'iiⁿyāⁿ neⁿe ca yā chiidá yā o chεεcú yā o n'daataá yeⁿe yā o daiya yā o 'dífnu yā o 'vi' yā o vida yeⁿē maáⁿ yā nguéé ti 'úú chí Jesús, nguéé cuuvi discípulo yeⁿé. ²⁷Āā du'ú nūⁿ chí caⁿa yā nduucú ní nguéé ndée yā cruz yeⁿe yā chí tan'dúúcā nducuéⁿē chí 'cueenu taavi yā cuuvi cucáávā 'úú nguéé cuuvi discípulo yeⁿé. ²⁸¿Áá chεé nūⁿ 'áámá ndís'tii taachí neⁿe nī din'dái nī 'áámá torre, ¿áá nguéé n'gεεtē nī ní ididuuché nī? ¿Áá n'deēé díⁿ nī gasto ndúúti chí tu'néé chí'vεε yeⁿe nī chí 'cuiinu din'dái nī torre yeⁿe nī? ²⁹Ní nduuti chí cu'nuúⁿ nī cimientos yeⁿē torre ní cuayiivi nguéé cuuvi din'dái nī torre yeⁿe nī, tuu'mi ní nducyaaca yā chí snaaⁿ yā 'cáiⁿnyūⁿneeⁿ yā ndís'tii. ³⁰Iiⁿyāⁿ s'eeⁿ ní caaⁿmaⁿ

yā: Sáⁿa 'cūū tucá'a sa din'dái sa ní nguéé ch'iinu di'cuinú sa. ³¹Ní Jesús ngaⁿa yā 'tíficā: ¿Du'ú rey ndúúti chí canee chí diíⁿ yā caandaá ndúúcu táámá rey, 'áá nguéé n'giindi yā ndúúcu táámá saⁿā ní ididuuché yā? Nduuti chí tunééⁿ ndiicu mil soldados ní 'iicu ndúúcu chuū nūⁿ cuuvi 'cuuⁿmaⁿ yā ndúúcu soldados chí ndiichi mil yeⁿē táámá rey. ³²Ní nduuti chí nguéé cuchee yā, taachi cuchíí yā táámá rey ndúúcu soldados yeⁿe yā chí diíⁿ yā caandaá ní canéé yaⁿai ca yā miiⁿ tuuⁿmi ní rey miiⁿ dicho'ó yā 'iiⁿyāⁿ chí candéé nduudu miiⁿ. Ní 'iicu caaca yā taama rey chí 'cuētinéé 'diiⁿ yā. Ní nguéé diíⁿ yā caandaá ndúúcu rey yeⁿe yā. ³³Tiicá ntúūⁿ. 'Āā cheé nūⁿ ndís'tii nduuti chí nguéé cu'nee nī tanducuéⁿē chí véé yeⁿe nī, nguéé cuuví cuuvi ndís'tii discípulos yeⁿé.

Jesús ngaⁿa yā yeⁿé yiima chí nguéé n'daācā sabor yeⁿē

(Mt. 5.13; Mr. 9.50)

³⁴Jesús ngaⁿa yā: Yiima ní n'dai. Nduuti chí nguéé n'daācā sabor yeⁿē, ¿de'é ca'á sabor yeⁿē? ³⁵Nguéé dichí'vē, ndii nguēē cáāvā yáⁿāa, ndii nguēē ndúú naachi véé abono, caati canangée yā yiima miiⁿ. 'Iiⁿyāⁿ chí véé veéⁿ yā, 'caandiveéⁿ yā yeⁿé.

Ejemplo yeⁿē 'ítíí cuūchí chí nindai

15 Nducyáácá saⁿā chí ínn'guēē sa yeⁿe yáⁿāa ndúúcu 'iiⁿyāⁿ nuuⁿndi ndaá yā nanááⁿ Jesús chí 'caandiveéⁿ yā nduudu yeⁿe yā. ²Cáāvā chuū 'iiⁿyāⁿ fariseos ndúúcu maestros chí ngi'cueeⁿ ley ngaⁿa yā n'de'ei yā

nguááⁿ maáⁿ yā contra yeⁿe Jesús. 'Túúca ngaⁿá yā: Jesús miiⁿ n'gúuⁿ yā chí ndaá nanááⁿ yā 'iiⁿyāⁿ chí véé nuuⁿndi yeⁿe yā. Ní 'iiⁿyāⁿ miiⁿ ngé'e yā ndúúcu yā.

³Tuuⁿmi ní Jesús miiⁿ ní caⁿa yā 'aama chí 'téé nguēē daama ndúúcu 'iiⁿyāⁿ miiⁿ. ⁴Cheé ndís'tii ndúúti chí véé 'áámá ciento 'iiti cuūchí yeⁿe nī ní nduuti chí 'áámá chee 'iiti s'uuⁿ cuuví ndái tí, ¿'áá nguéé cu'nee nī ndu'u chí cuūⁿ ngeēcú nditiiⁿyú cuuúⁿ tí na 'cuéétí? Ní caⁿá ní in'nuúⁿ nī 'iiti chí nindái míⁿ ndíí taachí ndaaca nī 'iiti miiⁿ. ⁵Ní taachí ndaaca nī 'iiti miiⁿ cun'duú nī 'iiti ná 'diimi nī ní candéé nī 'iiti cuūchí miiⁿ naachi canéé tanáⁿā 'iiti cuūchí. Ní yeenú n'dai nī. ⁶Ní taachi ndaa nī na vaacu nī, tuuⁿmi ní nadidaama nī 'iiⁿyāⁿ chí n'dai ndúúcu nī ndúúcu 'iiⁿyāⁿ na niiⁿnuúⁿ na va'ai yeⁿe nī. Ní caaⁿmaⁿ nī cuuvi nī, 'iiⁿyāⁿ s'eeⁿ: Ndís'tii cuuvi yeenú n'dai nī nduucú ní di'viicu yú tí 'āā n'daaca 'iiti cuūchí yeⁿé chí n'indaí. ⁷Tuuⁿmi ní Jesús ngaⁿá ntúūⁿ yā, 'úú ngaⁿá ngii ndís'tii: 'Tíficā véé vaādi yeenú taavi na va'ai cheeti nguuví yeⁿē 'áámá 'iiⁿyāⁿ chí véé nuuⁿndi yeⁿe yā ní ndaacadami yā yeⁿē nuuⁿndi yeⁿe yā nguéé tí yeⁿē cuūⁿ ngeēcú nditiiⁿyú cuūⁿ 'iiⁿyāⁿ chí n'dai chí nguéé canee cuumi chí ndaacadami yā yeⁿē nuuⁿndi yeⁿe yā.

Ejemplo yeⁿē 'áámá cáádí chí n'indái

⁸Ní caⁿa Jesús: Du'u 'áámá n'daataá chí véé ndiichi cáádí yeⁿē ta nduuti chí dindai tá 'áámá ¿'áá 'cuuⁿmiⁿ tá lámpara ní n'daaca tá va'āi, ní in'nuuⁿ tá ndúúcu cuidado

taanduvéé ndíí ndaācā ta tuūmī miiⁿ? ⁹Taachí ndaācā tá nadaama tá 'iiⁿyāⁿ chi n'dai ndúúcu ta ndúúcu 'iiⁿyāⁿ na niiⁿnuúⁿ va'ai yeⁿe ta ní caⁿa tá: Cuuvi yeenú nī nduucú ní di'viicu yú ti 'āā ndaācā 'áámá cáádí yeⁿe chí chindāi miiⁿ. ¹⁰Úú ngaⁿá ngíí ndís'tiī caati 'tiicá ntúūⁿ véé vaadi yeenú nguuaaⁿ ángeles yeⁿe Ndyuūs cucáāvā 'áámá 'iiⁿyāⁿ nuuⁿndi chí nandaacadaamí yā yeⁿe nuuⁿndi yeⁿe yā.

**Ejemplo yeⁿe saⁿā n'gaiyāā
pródigo chí s'neeⁿ sa chiida sa**

¹¹Jesús ngaⁿa ntúūⁿ yā ejemplo 'cūū: 'Áámá saⁿā véé 'uūvī daiya sa. ¹²Saⁿā n'gaiyāā daiya sa chí 'lífⁿ ca miiⁿ caⁿa sá chii sá chiida sa: N'diī, chiidá, téé nī parte chí ituneeⁿ 'úú yeⁿe vaādi ngua'aá yeⁿe nī. Chiida sa ní nacaⁿá yā ní nca'a yā saⁿā chí parte yeⁿe sa. ¹³Nguéé chí 'naaⁿ, saⁿā 'lífⁿ ca miiⁿ ní nadídaamá sá tanducuéⁿe déndu'ū yeⁿe sa. Ní cueⁿe yaⁿai sa táámá país. Mííⁿ ch'iinu diiⁿ sa gastar tanducuéⁿe ti diiⁿ sa nducuéⁿe chí nguēē n'daācā. ¹⁴Ní taachi ch'iinu tuūmī yeⁿe sa tanducuéⁿe chí ca'a chiida sa, ndaā 'áámá cuiicu ch'ēete na país miiⁿ. Sáⁿā miiⁿ ní ch'eenū n'dai sa chii caati nguéé chí che'e sa. ¹⁵Saⁿā miiⁿ ní ndaā sa nanááⁿ 'áámá 'iiⁿyāⁿ yeⁿe país miiⁿ. Ní caⁿa sa chí neⁿe sa diiⁿ sa ntiīⁿnyuⁿ. 'Iiⁿyāⁿ miiⁿ ní caⁿa yā chii yā saⁿa miiⁿ chí cueⁿe sa tan'dúúcā mozo yeⁿe yā ní diiⁿ sa cuidado cuūchí s'eeⁿ yeⁿe yā. ¹⁶Saⁿā miiⁿ ní nacádiinuuⁿ sa chí neⁿe sa che'e sa chí yeⁿe cuuchí s'eeⁿ caati mar 'áámá 'iiⁿyāⁿ nguéé ca'a yā de'ē vee saⁿā. ¹⁷Tuu'mi ní

n'gaācu sa ní caⁿā sa nguuaⁿ maaⁿ sa: N'deeē n'dái mozos yeⁿe chiidá chí ng'e yā pan ní neenē n'deeē chí ng'e yā vee, 'iicu 'muuⁿ 'úú ní idiíⁿ ntiīⁿnyuⁿ ní neⁿe 'cuūvi chí cuiicú. ¹⁸N'daa cá 'muuⁿ. Naⁿá n'diichí chiidá ní caaⁿmáⁿ cuuvi 'iiⁿyāⁿ: N'diī chiidá véé nuūⁿndi yeⁿe nanááⁿ Ndyuūs chí canéé na va'ai cheeti nguuvi ní nanááⁿ n'diī. ¹⁹Āā ntéé n'dai ca 'úú chí tuneeⁿ 'úú chí caaⁿmaⁿ nī chí daiya nī 'úú. Cu'neéⁿ nī 'úú tan'dúúcā 'aama mozo yeⁿe nī. ²⁰Tuu'mi ní cunaⁿā sa ndaā sa nanááⁿ chiidá sa. Taachi indái ca nndaa sa, tuu'mi ní chiida sa ní n'diichí yā saⁿā ní nnee ya'āi 'iinū yā saⁿā. Chiida sa ní cueⁿe yā ngeenu yā naachi canéé sá ní tumaⁿá yā daiyá yā ní tuu'vi yā cheendi sa. ²¹Daiya yā miiⁿ ní caⁿa sa chí sa chiida sa: N'diī, chiidá, véé nuuⁿndi yeⁿe nanááⁿ Ndyuūs chí canee na va'ai cheeti nguuvi ndúúcu nanááⁿ n'diī. 'Āā n'téé n'dai ca 'úú chí ituneeⁿ 'úú chí caaⁿmáⁿ nī chí daiya nī 'úú. ²²Naati chiida sa mííⁿ ní caⁿa yā chii yā mozos yeⁿe yā: Dii mozos, maaⁿ nch'ēetē nūu tun'dáa di tīnūuⁿ chí n'dai ca ní cu'nuúⁿ di saⁿā daiyá. Ní ca'a di chiinūta'āa cunuuⁿ ta'ā sa ndúúcu ndaacuú chí cunuuⁿ ca'ā sa. ²³Cuéⁿe di canguaiⁿ di itiindu 'lífⁿ chí 'viicheé. Ní caaⁿnuⁿ di 'iiti chí che'e 'nū. Ní diíⁿ 'nū 'viicu. ²⁴Ti sáⁿa 'cūū daiyá cueⁿe sa yaⁿai ní 'āā tan'dúúcā chí n'díí sá. Maaⁿ ní navaacunee sa ní nduuchi sa. Ní tan'dúúcā chí nindái sá ní ndaācā sa. Ní 'iiⁿyāⁿ s'eeⁿ ní yeenú taavi yā ní diíⁿ yā 'áámá 'viicu.

²⁵Ní saⁿā daiyá yā chí vmnaaⁿ canee sa cueeti. Ní taachí ndaā

níⁿnūⁿ sa ná va'ai, ch'iindiveeⁿ sa chí itiivi saⁿā flauta ní 'iiⁿyāⁿ nde'ei yā. ²⁶Tuu'mi ní saⁿā miiⁿ ní 'cai sa 'aama mozo ní itinguuneeⁿ sa mozo miiⁿ de'ē chí véé. ²⁷Mozo miiⁿ ní caⁿā sa chii sa 'iiⁿyāⁿ: 'Āā ndāā 'dīinu nī. Ní nguéé de'ē vee yeⁿē sa. Ní chiidá nī ní caⁿa ntiiⁿnyuⁿ yā chí ch'ii itiindu 'līíⁿ chí 'viiche. ²⁸Saⁿā miiⁿ ní nduuví taaⁿ sa. Nguéé 'cuuⁿ sa ndaā sa va'āi. Tuu'mi ní chiida sa miiⁿ ní cun'dáa yā va'āi ní d'icuítu yā daiya yā chí nuūⁿ ndaā sa va'āi. ²⁹Naatí saⁿā miiⁿ ní nán'guēcútaⁿā sa yeⁿe chiida sa: 'Āā 'naaⁿ ndáí idichíí'vē 'úú ndíi, ní dííⁿ tanducuéⁿē chí ngaⁿa nī ní mar 'áámá vmnēⁿēe nguéé tee nī mar 'áámá 'iiti cuūchī 'līíⁿ chí 'caaⁿnúⁿ ní dííⁿ 'viicu. Ní 'úú cuuvi yeenú ndúúⁿcū amigos yeⁿé. ³⁰Naatí taachi ndaā daiya nī sáⁿa 'cūū, 'nífⁿnuúⁿ 'tuū'vī sa tanducuéⁿē chí vaadī n'guá'āa yeⁿē sa ndúúⁿcū ndaataa s'eeⁿ chí véé saⁿā s'eeⁿ yeⁿe. Ní ngaⁿa ntiiⁿnyuⁿ nī chí mozos ch'iiⁿnúⁿ yā itiindu 'līíⁿ chí 'viicheé chí che'e sa. ³¹Tuu'mi ní chiida sa miiⁿ caⁿa yā chí yā saⁿā: Díí, daiyá, 'áámá canee di nducú ní tanducuéⁿē dendu'ū chí yeⁿé ní yeⁿē di. ³²Canéé chí dííⁿ yú 'viicu tí saⁿā 'diinu di chí 'úú nacadiínú chí tan'duucā chí 'āā ndíí sá ní nduuchí sa. 'Āā nindáa sa na vaacu yú ní maaⁿ ní ndaācā yú saⁿā.

**Ejemplo yeⁿe 'áámá patrón
chí nguéé n'daācā dííⁿ yā
ndúúⁿcū mozos yeⁿe yā**

16 Jesús ní caⁿa ntúuⁿ yā chí yā discípulos yeⁿe yā: 'Áámá dueño 'cuiica s'nééⁿ 'áámá

mayordomo yeⁿē yáⁿāa yeⁿe yā. Náⁿā mozos ndaa sa nanááⁿ dueño ní tun'dáa nuuⁿndi sa yeⁿē mayordomo miiⁿ ní ngaⁿā sa de'ē chí dííⁿ mayordomo chí nguēe n'daācā ndúúⁿcū dendu'ū chí yeⁿē dueño. ²Tuu'mi ní dueño miiⁿ ní yaa'vi yā mayordomo yeⁿe yáⁿāa ní caⁿa yā chí yā sáⁿā: N'díi, ¿de'e 'túúⁿcā n'giindiveéⁿ yeⁿe nī? Teé nī cuenta 'úú yeⁿē ntiiⁿnyuⁿ chí dííⁿ nī tí 'āā ntéé cuuví nī mayordomo. ³Saⁿā mayordomo yeⁿe yáⁿāa miiⁿ nadicádīnuuⁿ sa 'túúⁿcā: ¿Taācā dííⁿ maaⁿ caati dueño yeⁿe yáⁿāa ndivíi yā 'úú yeⁿe chí mayordomo 'úú yeⁿē ntiiⁿnyuⁿ? Nguéé ditiínú 'úú chí dííⁿ ntiiⁿnyuⁿ chí n'gii ní nduuti chí caācā limosnas, 'cuinaáⁿ. ⁴'Āā deenú de'ē chí dííⁿ ní taachi 'āā ntéé ngaⁿa ntiiⁿnyúⁿ yeⁿe mayordomo tuu'mi ní amigos yeⁿé 'cuaáⁿ yā 'úú na vaacu yā. ⁵Tuu'mi ní mayordomo miiⁿ yaa'vi sa nducyáácá 'iiⁿyāⁿ chí cándíícu yā yeⁿe dueño yeⁿe yáⁿāa yeⁿe yā ní caⁿa sa chí sa 'iiⁿyāⁿ vmnááⁿ vmnaaⁿ: ¿Áá n'deēe cándíícu di yeⁿe dueño? ⁶Saⁿā miiⁿ ní caⁿa sa: 'Úú candiicú 'áámá ciento toneles aceite. Tuu'mi ní mayordomo miiⁿ ní caⁿa sa saⁿā: Cuta'a dí caaca naachi canéé nguūⁿ yeⁿē di. Cuundi dí ní n'nee nguūⁿ di 'uūvī ngēecu ndiichí toneles aceite. ⁷Ch'iinu maaⁿ ní caⁿa sa chí sa taama saⁿā: Díí, ¿áá n'deēe cándíícu di? Saⁿā miiⁿ ní caⁿa sa: 'Úú candiicú 'áámá ciento maquilas yeⁿē trigo. Tuu'mi ní mayordomo miiⁿ caⁿa sa: Cuta'a dí caaca naachi canéé nguūⁿ yeⁿē di ní 'neeⁿ nguūⁿ di cuūuⁿ ngēecú maquilas. ⁸Tuu'mi ní dueño miiⁿ tuumicádīnuuⁿ yā

yeⁿē mayordomo chi nguée n'daacā ní chuuné listo sa ndúúcū asuntos yeⁿē sa. Ní dueño míⁿ caⁿa yā chíi yā saⁿā: Tiempo miiⁿ sáⁿā chí snée iⁿ'yeeⁿdí 'cūū nguée n'daacā sa ní neene listo ca sa ndúúcū asuntos yeⁿē sa ndúúcū vaadi 'cuiica chí véé iⁿ'yeeⁿdí 'cūū nguée ti 'iiⁿ'yāⁿ chí díⁿ yā chíiⁿ chí Ndyuūs neⁿe yā chí snée yā na dεεve.

⁹Cáāvā chuū 'úú ní ngaⁿá ngií ndís'tií: Ndúúcū vicios yeⁿe vaadi 'cuiica chí véé iⁿ'yeeⁿdí 'cūū díⁿ nī n'daacā ndúúcū 'iiⁿ'yāⁿ ti véé amigos yeⁿe nī caati taachi 'cuūvi nī 'iiⁿ'yāⁿ s'eeⁿ chí nnee nī ní ngaⁿá yā: N'dai ndís'tií 'áá cuuvi ndaa nī na va'ai chεeti nguuvi 'tíicā?

¹⁰'iiⁿ'yāⁿ chí n'daacā idiíⁿ yā ndúúcū cosas chí 'líⁿ 'tiicā ntúūⁿ n'daacā idiíⁿ yā ndúúcū cosas chí n'dee n'dái ní n'gεete. ¹¹Nduuti chí ndís'tií nguée n'daacā idiíⁿ nī ndúúcū tuūmī chí véé iⁿ'yeeⁿdí 'cūū, 'du'ú 'iiⁿ'yāⁿ cuuvi teé yā ndís'tií ntiíⁿ'nyuⁿ yeⁿ'é Ndyuūs chí ntiíⁿ'nyuⁿ yeⁿē vaadi 'cuiica chí véé chí yeⁿ'é Ndyuūs? ¹²Ndúúti chí ndís'tií nguée n'daacā idiíⁿ nī ndúúcū dendu'ū chí véé yeⁿe taamá yā, 'du'ú 'iiⁿ'yāⁿ téé yā chí véé yeⁿe nī?

¹³Mar 'áámá saⁿā nguée cuuvi diiⁿ sa mandados yeⁿe 'uūvi 'iivi sa; ti neⁿe ca sa 'aama yā nguée ti taama yā, o n'daacā ca diiⁿ sa ntiíⁿ'nyuⁿ yeⁿē 'aama yā nguée ti taama yā. Ndís'tií ní nguée cuuvi dichíⁿvē Ndyuūs nduuti chí neⁿe ca nī vaadi 'cuiica chí véé iⁿ'yeeⁿdí 'cūū.

¹⁴'iiⁿ'yāⁿ fariseos n'giindiveéⁿ ntúūⁿ yā dendu'ū chí 'túúcā ngaⁿa Jesús miiⁿ ní 'iiⁿ'yāⁿ s'eeⁿ dinéⁿe n'dai yā tuūmī ní yaa'vi neeⁿ yā

Jesús. ¹⁵Jesús miiⁿ ní caⁿa yā chíi yā 'iiⁿ'yāⁿ fariseos: Ndís'tií ní nadicádiinuuⁿ nī chí ndís'tií ní 'iiⁿ'yāⁿ n'dai ndís'tií nanááⁿ saⁿā iⁿ'yeeⁿdí 'cūū naati Ndyuūs ní n'diichí yā staava yeⁿe ndís'tií. Chíⁿ chí 'iiⁿ'yāⁿ nadicádiinuuⁿ yā chí ch'εete ca, chíiⁿ chí Ndyuūs díⁿ yā cuenta chí nguée de'ε vεε.

Jesús ngaⁿa yā chí ley ní n'daacā

¹⁶Ley yeⁿe Moisés ndúúcū chíⁿ chí chí'cueeⁿ profetas canee nanááⁿ ndís'tií ndíⁿ taachi ndaā Juan chí chεedínuūⁿnī na iⁿ'yeeⁿdí 'cūū. Ndíⁿ tiempo miiⁿ 'iiⁿ'yāⁿ caⁿa yā nduudú n'dai chí ngai yeⁿe naachí Ndyuūs ngaⁿa ntiíⁿ'nyúⁿ yā ní nducyáácá 'iiⁿ'yāⁿ neⁿe yā cu'téenu yā nduudu miiⁿ.

¹⁷Ngíⁿ'ti ca chí 'cuiinu nanguuvi ndúúcū na yáⁿāa nguée ti 'cuiīnū 'áámá letra 'líⁿ yeⁿe ley.

Jesús ngi'cueeⁿ yā yeⁿe divorcio

(Mt. 19.1-12; Mr. 10.1-12)

¹⁸Āā du'ú nūⁿ sáⁿā chí cū'neeⁿ sa n'daataá yeⁿē sa ní 'caandivaacu sá ndúúcū taama tá diiⁿ nuuⁿndí sa. Sáⁿā chí cunee sá ndúúcū n'daataá chí s'neeⁿ tá isaⁿā yeⁿē tá 'āā dinuuⁿndí ntúūⁿ sa.

Yeⁿē sáⁿā 'cuiica ndúúcū saⁿā chí nguuvi Lázaro

¹⁹Caⁿa Jesús: Tiempo chí chó'ōo canée 'áámá saⁿā 'cuiica chí 'nuuⁿ sa catecai n'dai sa ní diiⁿ sá 'viicu. Ní nge'e sa cosas chí n'dai nguuvi nguuvi. ²⁰Canée ntúūⁿ 'áámá saⁿā chí nguuvi sa Lázaro chí ngiica limosnas. Ní diitúú n'duu'vi núúⁿmáⁿ chεete sa. Ní vεe sa cheendi va'āi

yeⁿé saⁿá 'cuiica miiⁿ. ²¹ Saⁿá miiⁿ ní neⁿe sa che'e sa cosas chi ingéé yeⁿe mesa yeⁿe saⁿa 'cuiicá miiⁿ. Ndaá 'yaānā s'eeⁿ naachi véé sa ní yaā'vi née ti naachí yaāi yeⁿe Lázaro miiⁿ. ²² Cuayiivi miiⁿ ní ch'lii Lázaro. Ángeles yeⁿé Ndyuūs candéé yā Lázaro naachi canéé chiida yú Abraham na lugar paraíso chi yeⁿe 'iiⁿyāⁿ chi n'dái. Ch'ii ntúūⁿ saⁿa 'cuiica miiⁿ ní ch'iichi yā saⁿá. ²³ Taachi saⁿá 'cuiica miiⁿ ch'eenu sa chii na infierno n'diichi sa cuaaⁿ 'niiⁿnuⁿ ní n'diichi sa chiida yú Abraham ndúúcu Lázaro miiⁿ. ²⁴ Tuu'mi ní 'cai saⁿá 'cuiica miiⁿ: N'díi, chiidá Abraham, inneé ya'ai 'iinú nī 'úú, ní dich'ó nī Lázaro chi di'caandá yā tii nduuti tá'á nguaaⁿ nuūⁿnīⁿ ní cun'duú yā na ch'liiyá ní di'caanda ch'liiyá ti neené n'geenú ngii ná nguuchi yaⁿá 'cúú. ²⁵ Abraham miiⁿ ní caⁿa yā chii yā saⁿá: Díi, daiyá, n'gaacú di tí taachi canee dí iⁿyeēⁿdí miiⁿ ch'iindí ndii n'deeé n'dái chi n'daācā yeⁿe di. Lázaro miiⁿ nguéé véé yeⁿe sa naati maaⁿ ní muuⁿ ní véé 'viich'ēētífnūⁿ yeⁿe sa ní díi ní 'cuéénú dí cuuvi miiⁿ. ²⁶ Míiⁿ véé 'áámá yíívi yāⁿāa chi neene ch'ēete nguaaⁿ nús'uu ndúúcu ndís'tii. 'Iiⁿyāⁿ chí neⁿe yā chó'o yā ndii 'muuⁿ ndíi naachi snéé ndís'tii nguéé cúúvi díⁿ yā. Ndíi nguéé ndúú 'iiⁿyāⁿ chi snéé yā taa nguéé cuuví cho'o yā ní ndaá yā naachi snéé 'nū. ²⁷ Tuu'mi ní saⁿá 'cuiica míiⁿ ngaⁿá sa: N'díi, chiidá Abraham, idi'cuítú n'dii chí dich'ó nī Lázaro iⁿyeēⁿdí ndii vaacu chiidá, ²⁸ ti véé nyuⁿu 'diinú chi saⁿá miiⁿ ní Lázaro cuuvi sa 'diinú chi nguéé ndaa yā lugar 'cūú

chí 'cueenu yā cuuvi. ²⁹ Abraham miiⁿ ní caⁿa yā chii yā saⁿa: Canee nguūⁿ na libro yeⁿé Ndyuūs naachi canee nguūⁿ yeⁿe Moisés miiⁿ ndúúcu profetas ní cuuvi yā 'iiⁿyāⁿ chí 'caandiveéⁿ yā yeⁿé 'iiⁿyāⁿ s'eeⁿ. ³⁰ Tuu'mi ní saⁿá 'cuiica miiⁿ ní caⁿá sa: N'díi, chiidá Abraham, nguéé n'giindiveéⁿ yā yeⁿe yā. Ndúúti chí 'áámá 'iiⁿyāⁿ chí 'āā n'dii caⁿa yā nanááⁿ 'diinú, tuu'mi ní 'caandiveéⁿ yā yeⁿé 'iiⁿyāⁿ miiⁿ ní ndaacadaamí yā yeⁿe nuuⁿndi chí díiⁿ yā. ³¹ Abraham miiⁿ ní caⁿa yā chii yā saⁿa 'cuiica: Ndúúti chí nguéé cu'téenu yā chí canéé nguūⁿ na libro yeⁿé Ndyuūs yeⁿe Moisés ndúúcu 'iiⁿyāⁿ profetas ndíi cuááⁿ vmnaaⁿ, nguéé cu'téenu ntúuⁿ yā yeⁿé 'iiⁿyāⁿ 'cúú chí cuuvi yā 'iiⁿyāⁿ s'eeⁿ 'áará chí 'iiⁿyāⁿ 'cúú ncuééⁿ yā yeⁿe nguaaⁿ tinaⁿá.

Jesús ngi'cueeⁿ yā chí nguéé canee chí díiⁿ yú nuuⁿndi

(Mt. 18.6-7; 21-22; Mr. 9.42)

17 Jesús caⁿa yā chii yā discípulos yeⁿe yā: Cuaacu nííⁿnyúⁿ chí véé de'e cáāvā chí díiⁿ chí 'iiⁿyāⁿ dinuuⁿndi yā naati de'e chúúca ya'ai yeⁿe 'iiⁿyāⁿ chí díiⁿ yā chí taama 'iiⁿyāⁿ dinuuⁿndi yā. ² N'daacā ca chí cuuvi 'túúca ndúúcu 'iiⁿyāⁿ miiⁿ. 'Iiⁿyāⁿ s'eeⁿ caāchiichí yā 'áámá tuúu yúúú chí ingúⁿ 'iiⁿyāⁿ na daandu 'iiⁿyāⁿ miiⁿ ní 'caanuú yā 'iiⁿyāⁿ miiⁿ naachi yáānūⁿ yeⁿe nuuⁿni'yáⁿá ní nguéé cuuvi díiⁿ 'iiⁿyāⁿ miiⁿ chí taama da'caiyyā idinuuⁿndi yā.

³ Cundéé ndís'tii cuidado. Ndúúti 'díínu nī dinuuⁿndí sa contra yeⁿe 'aama nī, yaa'vi neéⁿ nī saⁿá. Ndúúti

chi ndaacadaami sa yeⁿē nuuⁿndi yeⁿē sa nadich'εεcú nī yeⁿē sa.
 4'Áará chí ndeēchē cuuvi idinuuⁿndí sa contra yeⁿe nī 'áámá nguuvi ní ndeēchē cuuvi ndaa sa nanááⁿ ndís'tiī ní caaⁿmaⁿ sa cuuvi sá ndís'tiī: Ndaacadaāmí yeⁿē nuuⁿndi yeⁿé, tuuⁿmi ní nadich'εεcú nī yeⁿē sa.

Poder yeⁿē vaadī i'teenu

5Apóstoles caⁿa yā chii yā Señor Jesús: N'diī, Señor, díⁿ nī chi nús'uu cuuvi cu'téenu cá 'nū.

6Tuuⁿmi Jesús caⁿa yā chii yā apóstoles: Ndúútí chi ndís'tiī duuⁿvi i'téenu nī, tuuⁿmi ní vaadī i'teenu yeⁿé nī ní tan'dúúccā 'áámá nduutí yeⁿē yiivē ntí'yaá. Ní cuuvi caaⁿmaⁿ nī 'tíicā ndúúccū yáⁿá: Díí yáⁿá cuvíí dí 'muuⁿ ní cueⁿe di ná nuūⁿnīⁿyáⁿá. Ní 'caandiveeⁿ yáⁿá miiⁿ yeⁿe dii.

Yeⁿe táácā cuuvi diiⁿ yú ntiīⁿnyuⁿ ndúúccū Ndyuūs 'iivu yú

7Ngaⁿa Jesús: Du'u ndís'tiī ndúútí chi veε 'áámá mozo chi di'cuúndú 'iiti o diiⁿ sa cuidado 'iiti cuūchī yeⁿe nī taachi nguεεcunée sa yeⁿe campo miiⁿ, ¿'áá hora míⁿ nūuⁿ caaⁿmaⁿ nī cuuvi nī saⁿá?: Cho'o di 'cuúndí di na mesa. 8¿'Áá nguéeⁿ vmnááⁿ vmaaⁿ caaⁿmaⁿ nī cuuvi nī mozo miiⁿ 'tíicā?: N'nuuⁿ di chi che'e nguīnu yú. Ní 'cuiinduū di yeⁿé na mesa, 'cuii di ní 'úú cu'ú che'é. 'Cuiinu che'é 'cuiinu cu'ú tuuⁿmi ní dii cuuvi ch'ée di cu'u di. 9¿'Áá aama patrón nca'a yā gracias mozo miiⁿ ti diiⁿ sa mandados chi cāⁿa patrón yeⁿē sa? Nguéeⁿ díⁿ yā 'tíicā. 10'Tiicā ntūūⁿ, ndís'tiī, taachí

'cuiinu díⁿ nī tanducueⁿē ntiīⁿnyuⁿ chí ngaⁿá Ndyuūs ndís'tiī, tuuⁿmi ní caaⁿmaⁿ nī 'tiicā: Ndyuūs, nús'uu ní mozos yeⁿe nī naati nús'uu ní díⁿ 'nū dámaāⁿ chi canee chi díⁿ 'nū.

Jesús idiíⁿ yā chi nduūvā yeⁿe ndiichi 'iiⁿyāⁿ yeⁿe ca'āi lepra chi ín'duuti yuūtē yeⁿe yā

11Taachí Jesús miiⁿ canúⁿ yā yúúní chí cueⁿe yā na yāāⁿ Jerusalén, cho'ó yā naavtaⁿā yeⁿe na 'uuví yáⁿāa chi Samaria ndúúccū Galilea. 12Ní taachí Jesús sndaā yā 'áámá yāāⁿ 'lííⁿ snée ndiichi saⁿā chí induuti yuūtē yeⁿē sa chi ndii sa ca'ai lepra. Ndaā sa nanááⁿ Jesús miiⁿ ní ch'éétíndii yaⁿai sa. 13Ní 'cai sa: N'diī, 'iivú Jesús, nnée ya'ai 'iinu nī nús'uu.

14Taachí Jesús n'diichi yā saⁿā s'eeⁿ, tuuⁿmi ní yaaⁿvi yā: Ndís'tiī, cueⁿe nī ní 'cuuⁿmiⁿ nī nanááⁿ chiiduú s'eeⁿ. Ch'íínú caⁿa Jesús ndúúccū 'cūū saⁿā s'eeⁿ ní nduuvá yeⁿe sa. 15Tuuⁿmi 'áámá chéeⁿ saⁿā s'eeⁿ taachí n'diichi yā chí 'āā nduuvá yeⁿe yā, nguεεcunée yā ní cheⁿe yā naachi canée Jesús miiⁿ ní caⁿa yuudu yā: Dε'ē chúúccā ch'εete Ndyuūs. 16Ní chiintii'yā yā nanááⁿ Jesús ní chí snaaⁿ na yáⁿāa, ní ca'a yā gracias 'iiⁿyāⁿ. Saⁿā miiⁿ ní 'áámá saⁿā yeⁿe yáⁿāa Samaria. 17Tuuⁿmi ní Jesús miiⁿ caⁿa yā: ¿'Áá nguεε ndiichi saⁿā chí nduūvā yeⁿē sa? Ta nuuⁿ sa, ¿tii snée sa? 18¿'Áá nguεε táámá yā chí canée chí caaⁿmaⁿ yā chí ch'εete Dendyuūs? Dámaāⁿ saⁿā miiⁿ chí canuuⁿ yúúní chí ca'a sa gracias.

19Tuuⁿmi ní Jesús caⁿa yā chii yā saⁿā chí ngiita miiⁿ: Nducueeⁿ dí.

Cúnaⁿā di. 'Āā nanduuva yeⁿē di caati i'téenu nī.

Yeⁿe taaca Ndyuūs ngaⁿa ntiiⁿnyúⁿ yā

(Mt. 24.23-28, 36-41)

²⁰Taachí 'iiⁿyāⁿ fariseos intínguúneeⁿ yā Jesús miiⁿ: ¿Tíí cua'a ndáá naachí Ndyuūs ngaⁿa ntiiⁿnyúⁿ yā? Jesús miiⁿ ní nan'guεεcútaⁿa yā: Naachí Ndyuūs ngaⁿa ntiiⁿnyúⁿ yā nguéé ndaa tan'dúúca 'áámá manera chi ndís'tií cunee ngiinú nī yeⁿē. ²¹Ní nguéé ndúú 'iiⁿyāⁿ caaⁿmaⁿ ra yā 'tíicā: 'Muuⁿ canee o miiⁿ canee ti Ndyuūs 'āā ngaⁿa ntiiⁿnyúⁿ yā nguaaⁿ ndís'tií.

²²Tuu'mi ní Jesús caⁿa yā chii yā discípulos yeⁿe yā: Tiempo miiⁿ ndaa nguuvu taachi ndís'tií neⁿe nī snaaⁿ nī taachi canéé Saⁿā chi Daiya Dendyuūs, naati nguéé snaaⁿ nī saⁿā miiⁿ. ²³Ní 'iiⁿyāⁿ caaⁿmaⁿ yā cuuvi yā nduudu yaadi ndís'tií: 'Muuⁿ canéé Saⁿā chi Daiya Dendyuūs, o miiⁿ canee sa. Nguéé caⁿa nī ndíí nguéé ndúú can'dáa nī 'iiⁿyāⁿ cuayiivi. ²⁴Tan'dúúca chi inaaⁿ yú chí ngéⁿé 'cuai maaⁿ nchεεté nūuⁿ ngiiyā, 'tiicá ntúūⁿ cuuvi taachi 'úú chi Saⁿā chi Daiya Dendyuūs ndaa nguuvu miiⁿ.

²⁵Naati vmnááⁿ vmnaaⁿ 'úú chi Saⁿā chi Daiya Ndyuūs ní neené 'cuenú cuuvi. Ní 'iiⁿyāⁿ chi maaⁿ snéé iⁿyeeⁿdí 'cūū díⁿ yā condenar 'úú. ²⁶Tan'dúúca chi canee tiempo chi 'āā chó'oo taachí canee saⁿā Noé iⁿyééⁿdi 'cūū, 'tiicá ntúūⁿ cuuvi tiempo yeⁿē Saⁿā chi Daiyā Dendyuūs taachi ndaa sa. ²⁷Tiempo yeⁿe Noé 'iiⁿyāⁿ s'eeⁿ ngé'e yā ngi'i

yā ní ngíindivaacu yā. Ní ca'a yā daiya yā chí ngiindivaacu ndii nguuvu chi Noé sndaá yā na arca. Tuu'mi ní chee taaⁿ cuūvi ní chiitu iⁿyeeⁿdí 'cūū ndúúca nuūⁿnīⁿ ní chíi nducyaaca 'iiⁿyāⁿ. ²⁸'Tiicá ntúūⁿ chíi tiempo chi 'āā chó'oo taachi canee saⁿa Lot iⁿyeeⁿdí 'cūū. 'iiⁿyāⁿ s'eeⁿ nge'e yā ngi'i yā. Ngai yā ní n'diicui yā. Ní ngiinú yā ní idin'dái yā vaacu yā. ²⁹Taachi can'daá saⁿā Lot miiⁿ ná yāāⁿ Sodomā chi cheeⁿ nguuchi yaⁿā ndúúca azufre chí tuūú chí ngiichi chí yeⁿe nanguuvi. Cáávā chuū chíi nducyaaca 'iiⁿyāⁿ na yāāⁿ miiⁿ. ³⁰'Tíicā cuuvi nguuvu miiⁿ taachi 'úú Saⁿā chí Daiya Dendyuūs ndaa taama vmnéⁿēe.

³¹Ní nguūvi chí ndaa, taachí 'iiⁿyāⁿ chí snée yā tíⁿ va'āi n'daacā ca chí 'iiⁿyāⁿ miiⁿ ní nguéé nch'éeⁿ yā ní cuta'a yā dendu'ú chí véé yeⁿe yā chεεtí va'āi. 'Tiicá ntúūⁿ 'iiⁿyāⁿ chí snée yā cuεeti n'daacā ca chí nguéé naⁿa yā nduvaacu yā.

³²Nan'gáácú nī tan'dúúca chí chíi n'daataa yéⁿē saⁿā Lot. ³³'Āā du'ú nūuⁿ 'iiⁿyāⁿ chí neⁿe cá yā vida yeⁿe yā nguéé ti 'úú, dindaí yā táámá vida yeⁿe yā. 'Āā du'ú nūuⁿ 'iiⁿyāⁿ chí dichí've yā 'úú ní dindaí yā vida yeⁿe maáⁿ yā cucáávā 'úú, ní nndaacá yā táámá vida yeⁿe yā.

³⁴'Úú ngaⁿá ngií ndís'tií chí nguūnū miiⁿ 'uuvu yā chí ndiiti yā na 'áámá cama, 'aama yā ní ndaā naáⁿ ní taama yā ní canee yā. ³⁵Nífcú naachí 'uuvu n'daataa daama snee ta ingúu tá, 'aama ta ní ndaā naáⁿ tá ní taama tá ní canee ta. ³⁶Naachí 'uūvi yā snée yā cuεeti, 'áámá yā nī ndaā naáⁿ yā, nífcú taama yā ní canee yā.

³⁷Taachí 'iiⁿyāⁿ s'eeⁿ ch'iindiveéⁿ yā chuū itinguuneéⁿ Jesús: Señor, ¿tíí cuuví chuū? Jesús miiⁿ ní caⁿa yā yeⁿe tiempo miiⁿ: Naachi candiití cuerpo yeⁿe tináⁿā, miiⁿ ní nduuvidaamá luutí ní che'e tī, tuuⁿmi ní cuuví chuū.

**Ejemplo yeⁿe n'daataa nguá'aa
chí cueⁿe tá nanaaⁿ juez
ndúucū 'áámá asunto**

18 Jesús caⁿa yā 'aama ejemplo chí 'téé nguéé daama yeⁿe chí 'iiⁿyāⁿ canéé chí caaⁿmaⁿngua'á yā cuéⁿé daāⁿmaⁿ nguéé ndúucū vaadí 'daandí. ²Ní caⁿa yā chí yā 'iiⁿyāⁿ s'eeⁿ ejemplo 'cūū: Canéé 'áámá juez na 'aama yáāⁿ chí nguéé 'va'a sa Dendyuūs. Ní ndíí nguéé ndúú idiiⁿ rá yā respetar 'iiⁿyāⁿ chí ch'iindiveéⁿ yā asuntos yeⁿe yā. ³Canéé ntúūⁿ na yáāⁿ miiⁿ 'áámá n'daataa nguá'aa chí ndaa yā nguuví nguuví nanááⁿ juez miiⁿ ní ngiica tá justicia juez yeⁿe 'iiⁿyāⁿ chí taaⁿ ndúucu tá. ⁴Juez miiⁿ ní nguéé 'cuuⁿ yā 'naaⁿ tiempo naati cuayiivi nadicádiinuⁿ yā: 'Áará chí nguéé 'va'á Dendyuūs ndíí nguéé ndúú idiiⁿ rá respetar 'iiⁿyāⁿ, ⁵naati n'daataa nguá'aa 'cūū néené ididú'ū ta 'úú ní maaⁿ ní caⁿá dííⁿ n'daacā ndúucū tá chí 'āā ntéé candii tá dindú'ū ta ti 'cuinu paciencia yeⁿe.

⁶Naati Señor miiⁿ caⁿa yā: 'Caandiveéⁿ ní chí ngaⁿā juez chí nguéé n'daacā táacā idiiⁿ yā. ⁷¿Áá Ndyuūs nguεε nnee ntúūⁿ yā 'iiⁿyāⁿ chí ndεeve yā, 'iiⁿyāⁿ chí caaⁿmaⁿngua'á yā ndii nguuví ndíí n'gaaⁿ ní Ndyuūs dííⁿ yā castigar 'iiⁿyāⁿ chí contra yeⁿe 'iiⁿyāⁿ chí ndεeve yā? ¿Áá cuuvi 'naaⁿ Ndyuūs

chí cunnee yā 'iiⁿyāⁿ? Nguéé 'tíicā. ⁸Úú ní ngaⁿá ngíí ndís'tii chí Ndyuūs maaⁿ nch'εeté nadanguáⁿai yā 'iiⁿyāⁿ. Naati taachi 'úú chí Saⁿā chí Daiya Dendyuūs ndaá, ¿'áá nndaaca ntúúⁿ 'iiⁿyāⁿ chí i'téenu yā Ndyuūs ná iⁿyeeⁿdí 'cūū?

**Saⁿā fariseo ndúucu saⁿā
chí inn'guεε yeⁿe yáⁿāa**

⁹Jesús caⁿa yā ejemplo 'cūū chí 'téé nguéé dáámá caava n'dúuví 'iiⁿyāⁿ chí idin'geeté maáⁿ yā ní nguéé dííⁿ yā respetar tanáⁿā 'iiⁿyāⁿ. Ní caⁿa yā: ¹⁰Na 'úuví saⁿā cheⁿe sa yáacū templo chí caaⁿmaⁿngua'á sa. 'Aama sa ní saⁿā fariseo, taama sa ní saⁿā chí inn'guεε yeⁿe yáⁿāa. ¹¹Saⁿā fariseo chí ndii sa ní 'túúcā caⁿangua'a sa: N'díí Señor, nteé gracias n'dii ti 'úú ní nguéé tan'dúucā tanáⁿā saⁿa 'cūū. 'Úú nguéé ididuucú, nguéé yáádí'yā 'úú, nguéé caⁿá ndúucū taama n'daataá chí nguεε n'daataá yeⁿe, nguéé idiiⁿ tan'dúucā chí idiiⁿ saⁿa 'cūū chí inn'guεε sa yeⁿe yáⁿāa. ¹²Úú ní nguéé nga'diiⁿnúⁿ 'uūví cuuvi 'áámá ndεete taachi caaⁿmaⁿngua'á. 'Úú ní teé décima yeⁿe tanducuéⁿe chí véé yeⁿe chí lado yeⁿe Ndyuūs chí chí tunéⁿ Ndyuūs. ¹³Naati saⁿā chí inn'guεε yeⁿe yáⁿāa yaⁿai canee sa ní nguéé neⁿe sa snaaⁿ sa nánguuví. Dámaāⁿ chí n'geⁿe sá niiⁿnuⁿ sa ní ngaⁿā sa: N'díí Ndyuūs, ya'ai 'iinu ní 'úú, ti 'úú 'iiⁿyāⁿ nuūⁿndí 'úú. ¹⁴Úú ngaⁿá ngíí ndís'tii: Sáⁿa 'cūū cūnaⁿā sá ndavaacu sa ní Ndyuūs nadich'εecú yā nuūⁿndi yeⁿe sa. Saⁿā fariseo miiⁿ nguéé 'tíicā. 'Áā du'ú nuūⁿ 'iiⁿyāⁿ chí dich'εeté maāⁿ, cuuví yā

ndicúⁿ nanááⁿ Ndyuūs. Ní 'iiⁿyāⁿ chí nguéé dich'eté maáⁿ yā 'iiⁿyāⁿ, Ndyuūs dich'eté yā 'iiⁿyāⁿ miiⁿ.

Jesús idi'viicú yā da'caiyāa

(Mt. 19.13-15; Mr. 10.13-16)

¹⁵'Iiⁿyāⁿ ní candεε yā da'caiyāa nanááⁿ Jesús ní 'iicu Jesús tuu'ví yā da'caiyāa. Taachí discípuos yeⁿe Jesús n'diichi yā chuū, yaa'vi nées yā 'iiⁿyāⁿ s'eeⁿ chí indáa yā ndúúcu dá'caiyāa. ¹⁶Tuu'mi ní Jesús yaa'vi yā discípuos yeⁿe yā ní caⁿa yā: 'Cuááⁿ nī chí dá'caiyāa chíi yā nanaáⁿ. Nguéé 'caaca taaⁿ nī caati naachí Ndyuūs ngaⁿa ntiiⁿnyúⁿ yā ní yeⁿe 'iiⁿyāⁿ chí ndiicuúⁿ yā tan'dúúca dá'caiyāa. ¹⁷Cuaacu nííⁿnyúⁿ ngaⁿá ngii ndís'tii: 'Iiⁿyāⁿ chí nguéé cu'téenu yā Ndyuūs tan'dúúca 'áamá dá'caiyāa i'téenu yā nguéé cuuví ndaa yā naachí ngaⁿa ntiiⁿnyuⁿ yā.

'Áamá saⁿa chí 'cuiica ndeē sa ndúúcu Jesús

(Mt. 19.16-30; Mr. 10.17-31)

¹⁸'Áamá saⁿa chí ngaⁿa ntiiⁿnyuⁿ sa itínguuneeⁿ sa Jesús miiⁿ: N'díí, Maestro chí n'dai, ¿de'ē cuuvi dííⁿ ní ndaācá vida cueⁿe daāⁿmaⁿ chí cuuvi yeⁿé?

¹⁹Jesús ní caⁿa yā chíi yā saⁿa: ¿De'ē cúví chí ngaⁿa di ngii di 'úú chí 'úú n'dai 'úú? Mar 'áamá 'iiⁿyāⁿ nguéé n'dai yā, dámaaⁿ Dendyuūs. ²⁰Dii ní déenu di chí canéé nguūⁿ na ley 'tíicā: Nguéé 'caāⁿnūⁿ di; nguéé caⁿa di ndúúcu táámá n'daataá chí nguεε yeⁿe di; nguεε diduucú di; nguéé caaⁿmaⁿ di nduudu yaadi ndúúcu mar 'áamá 'iiⁿyāⁿ; dinéⁿe di ch'εecu di ndúúcu chíida di.

²¹Saⁿa miiⁿ n'gueεcútaⁿa sa ní caⁿa sa: Tanducueⁿē chuū 'āā idííⁿ taachi saⁿa 'lííⁿ 'úú.

²²Taachí Jesús ch'iindiveeⁿ yā chuū, caⁿa yā chíi yā saⁿa: Véé 'áamá cosa nūuⁿ chí canéé chí diiⁿ di. N'diicui dí tanducueⁿē chí véé yeⁿe di ní ca'a di 'iiⁿyāⁿ chí nguéé yeⁿe yā, ní ndaācā chí véé vaadi 'cuiica na va'ai chεeti nguuvi chí cuuvi yeⁿe di. Ní cuchíi di ní caⁿa di nduucú.

²³Taachí saⁿa miiⁿ ch'iindiveeⁿ sá chuū, neené s'neeⁿ ndaachíi yiinú sa, ti neené 'cuiica sa. ²⁴Ní taachí Jesús n'diichi yā saⁿa miiⁿ chí neené s'neeⁿ ndaachí yiinú sa, tuu'mi ní caⁿa yā: De'ē chúúca ngíⁿii chí cundaa 'iiⁿyāⁿ chí 'cuiica naachí Ndyuūs ngaⁿa ntiiⁿnyúⁿ yā. ²⁵Ní tan'dúúca ejemplo 'cūū 'tíicā. Nguéé ngiⁿii cá yeⁿe 'áamá 'iiti camello chí ch'εete cá ti 'yúúduu chí cho'ó tī nduutinááⁿ 'iini chí cheendi va'ai 'lííⁿ nguéé ti 'aama saⁿa chí 'cuiica i'téenu sa Ndyuūs ní cundáa sa na va'ai chεeti nguuvi.

²⁶Taachi discípuos n'giindiveeⁿ yā chuū, caⁿa yā: ¿Du'ū cuuví nánguāⁿāi?

²⁷Ní Jesús caⁿa yā: Saⁿa iⁿ'yeeⁿdí 'cūū nguéé ngí diiⁿ sa chuū naati Ndyuūs cuuvi dííⁿ yā tanducueⁿē.

²⁸Tuu'mi ní Pedro miiⁿ ní caⁿa yā: Señor, cuin'dííchí nī. Nús'uu ní s'neeⁿ 'nū chí véé yeⁿé 'nū, ní cuchíi 'nū ndúúcu nī.

²⁹Jesús miiⁿ ní caⁿa yā chíi yā 'iiⁿyāⁿ s'eeⁿ: Cuaacu nííⁿnyúⁿ ngaⁿá ngii ndís'tii chí 'āā du'ú nūuⁿ 'iiⁿyāⁿ chí cu'nee yā vaacu yā, o chíidá yā, o chεécú yā, o 'díínu yā, o n'daataá yeⁿe yā, o daiya yā, cáávā chí dííⁿ yā ntiiⁿnyuⁿ yeⁿé naachí

Ndyuūs ngaⁿa ntiiⁿnyúⁿ yā, ³⁰'iiⁿyāⁿ miiⁿ n'deēe ca ndaācā yeⁿe yā ná iⁿ'yeeⁿdí 'cūū. Ní cuayiivi ní ndaacá yā vida cueⁿe daāⁿmaⁿ ná va'ai cheeti nguuvi.

Jesús ngaⁿa yā chi 'cuūvi yā

(Mt. 20.17-19; Mr. 10.32-34)

³¹Jesús cueⁿe yā 'áámá lado ndúucū ndu'ū ndiichúví discípulos yeⁿe yā ní caⁿa yā chii yā 'iiⁿyāⁿ s'eeⁿ: Maaⁿ ní caⁿ'ā yú na yāāⁿ Jerusalén ní miiⁿ cúnuuⁿ ca'a tanducuéⁿē chi profetas dingúuⁿ yā ndíí cuááⁿ vmnaaⁿ yeⁿe 'úú chi Saⁿ'ā chi Daiya Dendyuūs. ³²Ní 'iiⁿyāⁿ s'eeⁿ dííⁿ yā entregar 'úú 'iiⁿyāⁿ chi nguéé yeⁿe ndaata Israel. Ní 'iiⁿyāⁿ s'uuⁿ ní dūūchinéⁿ yā 'úú ní dííⁿ taaⁿ yā nduucú níicú ca'a neeⁿ daíⁿ yā 'úú. ³³Cuífínú 'cueⁿ'é yā 'úú ní caaⁿ'núⁿ yā 'úú naati 'cuífnū 'iinū nguuvi ní nnduūchí yeⁿe nguaaⁿ tináⁿā.

³⁴Discípulos s'eeⁿ nguéé tuumicádífnuuⁿ yā yeⁿ'é dendū'u 'cūū ti canúúⁿ n'de'ei yeⁿ'e 'iiⁿyāⁿ s'eeⁿ. Nguéé tuumicádífnuuⁿ yā de'ē chi caⁿ'a Jesús.

Jesús dííⁿ yā chi nduūvā yeⁿ'e 'áámá saⁿ'ā chi ngueenááⁿ yeⁿ'e yāāⁿ Jericó

(Mt. 20.29-34; Mr. 10.46-52)

³⁵Taachí Jesús ndaā niiⁿ'nuúⁿ yā na yāāⁿ Jericó, 'áámá saⁿ'ā ngueenááⁿ véé sa niiⁿ'nuúⁿ cyúúfní. Ngiica sá limosnas. ³⁶Sáⁿ'a 'cūū tááchí ch'iindiveeⁿ sa chí cho'ó n'deēe n'dái 'iiⁿyāⁿ, itiinguunéⁿ sá: ¿D'ē chí chii?

³⁷Ní 'iiⁿyāⁿ caⁿ'a yā chii yā saⁿ'ā chi ngueenááⁿ chí ch'óo Jesús chí yeⁿ'ē yāāⁿ Nazaret. ³⁸Tuu'mi ní saⁿ'ā

nguéénaaⁿ miiⁿ 'caí sa: N'díí Jesús, Daiya David, nneé ya'ai 'iinu ní 'úú.

³⁹'Iiⁿyāⁿ chi cueⁿ'e vmnaaⁿ yeⁿ'e Jesús ngaⁿa yā ngii yā saⁿ'ā miiⁿ chí 'āā ntéé 'cuai sa, naati saⁿ'ā miiⁿ ní n'gai yiicu ca sa: N'díí, Daiya David, nneé ya'ai 'iinu ní 'úú.

⁴⁰Tuu'mi ní Jesús miiⁿ chééndii yā ní caⁿ'a yā chi canguai yā saⁿ'a chi nguéé inaaⁿ. Taachí saⁿ'ā miiⁿ ndaā sa nanááⁿ Jesús, Jesús miiⁿ ní itiinguunéⁿ yā saⁿ'ā: ⁴¹¿De'ē neⁿ'e di chí dííⁿ ndúucū díí? Saⁿ'ā miiⁿ ní caⁿ'ā sa: Señor, dííⁿ ní chí snāⁿ.

⁴²Jesús caⁿ'a yā chii yā saⁿ'ā: Cáávā chi i'téenu di nduūvā yeⁿ'ē di.

⁴³Tuu'mí nūuⁿ snaāⁿ sa ní cuéⁿ'e sa ndúucū Jesús. Ní ngaⁿ'a sa: De'e chúucā ch'ēete Ndyuūs. Ní nducyaaca 'iiⁿyāⁿ yeⁿ'e yāāⁿ miiⁿ chí n'diichí yā chuū ní caⁿ'a yā: De'ē chúucā ch'ēete Dendyuūs.

Jesús ndúucū saⁿ'ā chi nguuvi Zaqueo

19 Taachí Jesús sndaa yā na yāāⁿ Jericó, cánúuⁿ yā yúúni ní cho'ó yā náávtaⁿ'ā yāāⁿ Jericó miiⁿ. ²Na yāāⁿ miiⁿ canee 'áámá saⁿ'ā chí 'cuiica sa chí nguuvi sa Zaqueo. Saⁿ'ā miiⁿ, ní saⁿ'ā ndíí tííⁿ yeⁿ'é 'iiⁿyāⁿ chí inn'guee yeⁿ'e impuestos yeⁿ'e yáⁿ'āa. ³Saⁿ'a miiⁿ ní neⁿ'e sa snaaⁿ sa cheé yā chí Jesús miiⁿ naati nguéé ngii inaaⁿ sa ti neené n'deēe 'iiⁿyāⁿ ti nguéé yaacu sá. ⁴Tuu'mi ní cueⁿ'e sa ngéenu sa cuááⁿ vmnaaⁿ ní cucheé sá 'áámá tiiⁿ yáⁿ'á sicómoro caati cuuvi sa snaaⁿ sa 'iiⁿyāⁿ, ti Jesús miiⁿ canee chí cho'ó yā miiⁿ. ⁵Taachí Jesús miiⁿ ndaá yā miiⁿ, n'diichí yā Zaqueo miiⁿ, ní caⁿ'a

yā chii yā saⁿā: Díí, Zaqueo, maaⁿ nch'etété nūuⁿ nch'éeéⁿ dí ti maaⁿ ní neⁿé cuneé na vaacu dí.

⁶Tuu'mí ní Zaqueo miiⁿ maaⁿ nch'etété nūuⁿ nch'eeēⁿ sa ní 'cuuⁿ sa chí cueⁿe Jesús miiⁿ ndúúcu sa na vaacu sa. Ní yeenú taavi sa. ⁷Taachí 'iiⁿyāⁿ n'diichí yā chuū, nducyaaca yā ní neené n'deēe caⁿa yā. Ní caⁿa yā chí Jesús miiⁿ ní chinndaá yā chí cunee yā ndúúcu 'aama saⁿā chí véé nuuⁿndí yeⁿé sa. ⁸Tuu'mi ní taachi ch'iindiveeⁿ Zaqueo chuū, chéendii sa nanááⁿ Jesús miiⁿ ní caⁿa sá chii sa 'iiⁿyāⁿ: Señor, 'caandiveeⁿ nī yeⁿé. Ná maⁿa chí véé yeⁿé ca'á 'iiⁿyāⁿ chí nguéeⁿ yeⁿe yā. Ndúúti chí de'ē ndivií yeⁿé 'áámá 'iiⁿyāⁿ, tuu'mi ní n'guεεcuneeⁿ cuūuⁿ tanto yeⁿe yā.

⁹Jesús caⁿa yā chii yā saⁿā: Maaⁿ ní nnguá'āi 'iiⁿyāⁿ yeⁿe va'ai Zaqueo yeⁿe nuuⁿndi yeⁿe yā ti Zaqueo miiⁿ ní yeⁿe ndaata Abraham. ¹⁰Ti 'úú chí Saⁿā chí Daiya Dendyuūs ní ndaá chí in'nuūⁿ ní 'úú nadinguaⁿá'á 'iiⁿyāⁿ chí nindáí ndúúcu nuūⁿndí yeⁿe yā.

Ejemplo yeⁿe dueño chí ca'a tuumí mozos yeⁿé yā chí cuuvi diiⁿ sa negocio

¹¹Taachí Jesús miiⁿ 'āā canée niiⁿnúⁿ yā na yāāⁿ Jerusalén, 'iiⁿyāⁿ chí ch'iindiveeⁿ yā chuū nadicádíínuuⁿ yā chí 'āā maáⁿ nūuⁿ ndaá naachi Ndyuūs ngaⁿa ntiiⁿnyuⁿ yā. Tuu'mi ní Jesús miiⁿ ní caⁿa yā 'áámá ejemplo. ¹²'Áámá saⁿā chí n'dai chí yeⁿe familia chí ngaⁿā ntiiⁿnyuⁿ cueⁿe sa na 'aama país chí yaⁿai chí cuneeⁿ sa rey yeⁿé país miiⁿ. Cueⁿe sa ní cuayiivi nguεεcuneeⁿ sa. ¹³Taachi

'āā cháá caⁿā sa, yaa'vi sa ndiichi saⁿā mozos yeⁿé sa ní ca'a sa 'áámá cáádí 'diiⁿnguāⁿ 'áámá 'áámá mozo yeⁿé sa. Ní caⁿa sa chí sa mozos: Dííⁿ ní negocio ndúúcu tuumí 'cūū nuuⁿmaⁿ neⁿe chí caⁿā. ¹⁴'Iiⁿyāⁿ yeⁿe país chí yaⁿai nguéeⁿ neⁿe yā saⁿa miiⁿ ní nguéeⁿ neⁿé yā chí cuuvi rey yeⁿé yā saⁿā. Dich'óo yā n'duuvi 'iiⁿyāⁿ chí caaⁿmaⁿ ya 'túúca: Nguéeⁿ neⁿe 'nū chí saⁿā 'cūū ní cúuvi sá rey yeⁿé nús'uu. ¹⁵Saⁿā miiⁿ chí rey chí ngaⁿa ntiiⁿnyúⁿ yā cueⁿe yā ní nguεεcuneeⁿ yā ndāā yā na vaacu yā. Dich'óo sa 'iiⁿyāⁿ chí yaa'ví yā mozos chí ca'a sa tuumí miiⁿ chí ndaa sa nanáāⁿ yā ní cuuvi cadíínuuⁿ yā, 'áá n'deēe daiyā tuumi ndaacá 'aama 'aama yā?

¹⁶Ndaa saⁿā chí vmnááⁿ vmnaaⁿ ní caⁿa sa chí sa 'iiⁿyāⁿ: N'dií, señor, yeⁿe 'aama caadi 'dííⁿnguāⁿ yeⁿe nī, daiya túumí miiⁿ diiⁿ ganar ndiichi caadi 'dííⁿnguāⁿ. ¹⁷'Iiⁿyāⁿ 'cuiica miiⁿ ní caⁿa yā chí yā mozo miiⁿ: Díí, n'daacā diiⁿ di; ní díí 'áámá mozo chí n'dai. Tan'dúúca chí n'daacā chí diiⁿ di ndúúcu chí 'téé chí téé dii maaⁿ ní díí ní caaⁿmaⁿ ntiiⁿnyuⁿ di yeⁿé ndiichi yāāⁿ.

¹⁸Cuayiivi ndaā táámá sá ní caⁿā sa: N'dií, señor, yeⁿe 'aama caadi 'dííⁿnguāⁿ yeⁿe nī, daiya tuumí miiⁿ diiⁿ ganar nyuⁿu cáádí 'dííⁿnguāⁿ.

¹⁹Tuu'mi ní caⁿa 'iiⁿyāⁿ 'cuiica miiⁿ chí yā mozo 'cūū: 'Tiicá ntuūⁿ dii ní caaⁿmaⁿ ntiiⁿnyuⁿ di yeⁿé nyuⁿu yāāⁿ. ²⁰Ndaā táámá mozo ní caⁿā sa chí sa 'iiⁿyāⁿ 'cuiica miiⁿ: N'dií, señor, ingāā tuumí yeⁿe nī chí cachíichí na pañuelo ní chí'neeⁿ n'dai. ²¹'Úú ní 'va'á n'dií ti neené cheechí n'dií chí nanguai nī cosas

naachi nguée idííⁿ nī ntiiⁿnyuⁿ
 ní ndúúcu tuūmī yeⁿé nī dííⁿ nī
 cosechar naachi nguée nīⁿnuⁿ nī ti
 yeⁿé nī. ²²Tuu'mi ní 'iiⁿyāⁿ 'cuiica
 miiⁿ caⁿa yā chii yā mozo miiⁿ:
 Díí, mozo chi nguée n'daacā idiiⁿ
 di, cáávā nduudu chi ngaⁿa di
 canee di condenado. Dii ní déenu
 di chi cheēchi 'úú ní nanangaáⁿ chi
 nguée yeⁿé nī idííⁿ cosechar chi
 nguée dííⁿ ntiiⁿnyuⁿ ti yeⁿé. ²³¿De'ē
 cúúví chí nguée s'nuūⁿ di tuūmī
 yeⁿé na banco? Maaⁿ níúcu taachi
 nindaá nī cuta'á tuūmī yeⁿé ndúúcu
 daiya. ²⁴Tuu'mi ní 'iiⁿyāⁿ 'cuiica
 caⁿa yā chii yā 'iiⁿyāⁿ s'eeⁿ chi
 snée yā miiⁿ: Divíí nī tuūmī yeⁿé
 sa ní ca'á nī saⁿa chi véé n'diichí
 caadi 'dííⁿnguāⁿ yeⁿé sa. ²⁵'Iiⁿyāⁿ
 s'eeⁿ ní caⁿa yā: N'dií, señor, saⁿā
 miiⁿ ní 'āā véé ndiichi cáádí
 'dííⁿnguāⁿ yeⁿé sa. ²⁶'Iiⁿyāⁿ 'cuiica
 nan'gueecútaⁿa yā ní caⁿa yā: 'Úú
 ní ngaⁿá ngúí ndís'tií chi 'iiⁿyāⁿ chi
 véé yeⁿe yā cuta'a cá yā chi cuuvi
 yeⁿe yā naati 'iiⁿyāⁿ chi dúú'vī vee
 yeⁿe yā 'téé chí véé yeⁿe yā ní 'iiⁿyāⁿ
 ndivíí yā yeⁿe yā. ²⁷'Tiicá ntúūⁿ,
 'iiⁿyāⁿ chi nguée neⁿe n'diichí yā chi
 táaⁿ yā nduucú, ní nguée neⁿe yā
 chí 'úú cuuvi rey yeⁿe yā, tuu'mi ní
 candée nī 'iiⁿyāⁿ s'eeⁿ nanaáⁿ 'muuⁿ
 ní 'caaⁿnuⁿ nī 'iiⁿyāⁿ 'muuⁿ.

Jesús ndáa yā na yáāⁿ Jerusalén

(Mt. 21.1-11; Mr. 11.1-11; Jn. 12.12-19)

²⁸Ch'íínú caⁿa yā chuū, Jesús
 cueⁿe yā cuááⁿ vmnaaⁿ ní cueⁿé
 yā ní ndaa yā na yáāⁿ Jerusalén.
 Cuayiivi cueⁿe ntúūⁿ discípulos
 yeⁿe yā. ²⁹Taachí ndaa nīⁿnúⁿ yā
 yeⁿe yāāⁿ Betfagé ndúúcu yāāⁿ
 Betania nīⁿnuúⁿ naachi canee yiicū

chi nguuvi Olivos, tuu'mi ní Jesús
 dichó'o yā ná 'uūví discípulos yeⁿe
 yā vmnaaⁿ yā. ³⁰Ní Jesús caⁿa
 'túúcā: Cueⁿe nī na yáāⁿ 'lírⁿ chí
 canée nīⁿnuúⁿ ní taachí cundaá
 nī yáāⁿ miiⁿ ndaacá nī 'áámá
 burro 'lírⁿ chí n'dééchiichí tī. Mar
 'áámá 'iiⁿyāⁿ 'āā cuée cunduú yā
 'iiti. N'daatí nī 'iiti ní candée nī 'iiti
 'muuⁿ. ³¹Ní nduuti chí 'áámá 'iiⁿyāⁿ
 tiinguuneeⁿ yā 'túúcā: Ndís'tií, ¿de'ē
 cúúví chí n'daatí nī 'iiti? 'Túúcā
 nan'gueecútaⁿa nī chí Señor yeⁿe
 yú ní neⁿe yā 'iiti.

³²Discípulos chí dicho'ó Jesús
 cueⁿe yā ní ndaacā yā 'iiti tan'dúúcu
 chí Jesús miiⁿ caⁿa yā. ³³Taachí
 n'daātí yā burro 'lírⁿ miiⁿ, 'iiví tī
 ní caⁿa yā chii yā 'iiⁿyāⁿ s'eeⁿ:
 ¿De'ē cúúví chí n'daatí nī burro 'lírⁿ
 yeⁿé?

³⁴Ní 'iiⁿyāⁿ s'eeⁿ ní caⁿa yā: Señor
 yeⁿe yú ní neⁿe yā 'iiti.

³⁵Tuu'mi ní candée yā 'iiti nanááⁿ
 Jesús. 'Iiⁿyāⁿ s'eeⁿ sn'dúu yā cotón
 yeⁿe yā vmnááⁿ yeⁿe tī ní Jesús
 canduú yā 'iiti miiⁿ. ³⁶Ní taachí
 Jesús cho'ó yā cyúúní miiⁿ, 'iiⁿyāⁿ
 s'uūⁿ ní ndoo yā cotón yeⁿe yā
 cuaaⁿ cyúúní míⁿ. ³⁷Taachí Jesús
 ndaa nīⁿnúⁿ yā naachi nga'ái yúúní
 míⁿ yeⁿé yiicū chí nguuvi Olivos,
 nducyáácá discípulos yeⁿe yā ní
 yeenú taavi yā. Ní tuca'á yā caⁿa
 yā chí ch'ete n'dai Ndyuūs cucáávā
 chí vaadi n'giinu chí n'diichí yā chí
 Jesús dííⁿ yā. Ní cúú díituu n'dai 'cai
 yā ti yeenu taavi yā. ³⁸Ní 'cai yā:
 De'ē chúúcā n'dai Rey chí cuchii yā
 ndúúcu chí duuchi Señor Ndyuūs.
 Ní cuneé vaadi 'diiiⁿ ná va'ai cheeti
 nguuvi. Ní caⁿá yā ndúúcu vaadi
 yeenú. De'ē ch'ete ca n'dai Ndyuūs

chi deevé n'daí yā ndúúcu poder yeⁿé yā.

³⁹Tuu'mi ní n'duuvi 'iiⁿyāⁿ fariseos chi snée yā nguaaⁿ 'iiⁿyāⁿ caⁿa yā chii yā Jesús miiⁿ: N'dií, Maestro, yaaⁿvi neeⁿ 'iiⁿyāⁿ s'eeⁿ chi nguée caaⁿmaⁿ yā tíicā.

⁴⁰Jesús miiⁿ ní nán'guεcútaⁿa yā yeⁿe fariseos ní caⁿa yā: Ndúúti chi 'iiⁿyāⁿ s'uⁿ ní 'tíicā nguée caaⁿmaⁿ yā, tuu'mi ní tuūu miiⁿ ní caaⁿmaⁿ 'tíicā.

⁴¹Taachí ndaa niiⁿnúⁿ yā chí n'diichí yā yāāⁿ Jerusalén miiⁿ, tuu'mi ní Jesús chεcú yā cucáavā 'iiⁿyāⁿ yeⁿe yāāⁿ miiⁿ ti ya'ai iinu yā caavā 'iiⁿyāⁿ s'eeⁿ. ⁴²Ní caⁿa yā 'túucā: Ndís'tií, 'iiⁿyāⁿ yeⁿe yāāⁿ Jerusalén, nduuti chi incheenaáⁿ nī yeⁿe nguuví 'cūu chi cuuvi nanguaⁿai nī tuu'mi ní 'úu cuuví teé ndís'tií vaadi 'diíⁿ. Naati maaⁿ ní Ndyuūs canuuⁿ n'de'í yā yeⁿe nī ní nguée cuuvi deenu nī. ⁴³Ti ndaa nguuvi taachí 'iiⁿyāⁿ chi taaⁿ ndúúcu nī chééndii yā núúⁿmáⁿ 'diituu yāāⁿ yeⁿe nī ní nguée cuuví cáanu nī yeⁿe yā.

⁴⁴Ní díⁿ yā chi cundεε nī ti nguεε cuchéé nī ndúúcu yā. Ní 'caaⁿnúⁿ yā nducyaaca ndís'tií ndúúcu daiyá nī, ní dituuví yā yāāⁿ Jerusalén yeⁿe nī ti 'iiⁿyāⁿ nguée deenu yā chi tiempo maaⁿ ní nguuvi chi Ndyuūs s'neéⁿ yā chi cuuvi nanguaⁿai yā.

Jesús nadideevé yā yaācū templo

(Mt. 21.12-17; Mr. 11.15-19; Jn. 2.13-22)

⁴⁵Tuu'mi ní Jesús sndaá yā na yaācū templo ní tucáa yā tun'dáa yā nducyaaca 'iiⁿyāⁿ chi n'diicui yā ní ngái ntúuⁿ yā miiⁿ. ⁴⁶Jesús caⁿa yā chii yā 'iiⁿyāⁿ s'eeⁿ: 'Túucā canée

nguūⁿ na libro yeⁿé Ndyuūs: Yáacū yeⁿé ní naachi caaⁿmaⁿngua'a 'iiⁿyāⁿ naati ndís'tií ní díⁿ nī tan'dúucā chi yiive yaava yeⁿe 'iiⁿyāⁿ chí diduucu.

⁴⁷Jesús miiⁿ nguuvi nguuvi ngí'cueeⁿ yā ná yáacū templo; naati 'iiⁿyāⁿ chiiduú n'gεεté, ndúúcu 'iiⁿyāⁿ chi ngí'cueeⁿ ley, ndúúcu 'iiⁿyāⁿ chi ngaⁿa ntiíⁿnyuⁿ yeⁿe yāāⁿ miiⁿ nduuvidaamá yā ti neⁿé yā n'diichí yā táacā chi cuuvi 'caaⁿnúⁿ yā Jesús miiⁿ. ⁴⁸Nguée indaacá yā táacā chi 'caaⁿnúⁿ yā Jesús, ti nducyáacá 'iiⁿyāⁿ s'nee veeⁿ n'daacá yā yeⁿe chí ngí'cueeⁿ Jesús miiⁿ.

Jesús ngaⁿa ntiíⁿnyúⁿ yā

(Mt. 21.23-27; Mr. 11.27-33)

20 'Áámá nguuvi taachí Jesús miiⁿ ngí'cueeⁿ yā chεeti yaācū templo ní ngí'cueeⁿ yā nduudu chí ngai yeⁿe Ndyuūs, ndaa nanááⁿ Jesús miiⁿ chiiduú n'gεεté ndúúcu maestros yeⁿe ley, ndúúcu 'iiⁿyāⁿ ndiicúu chí ngaⁿa ntiíⁿnyuⁿ yeⁿe yaācū. ²Ní ntiinguunéeⁿ yā Jesús: ¿Du'ú caⁿa ntiíⁿnyuⁿ chí ca'cueeⁿ nī dēndu'ū chí 'tuucā? O ¿du'ú 'iiⁿntyéⁿe tee yā orden chí díⁿ nī 'tíicā?

³Tuu'mi ní Jesús miiⁿ nan'guεcútaⁿa yā: 'Úú ntúuⁿ ní ntiinguuneeⁿ 'áámá ndís'tií. Nan'guεcútaⁿa nī yeⁿe: ⁴¿Dú'u ca'a orden Juan chí chεdínuūⁿniⁿ yā 'iiⁿyāⁿ? ¿Áá yeⁿe Ndyuūs o saⁿa iⁿ'yeeⁿdí 'cūu?

⁵'Iiⁿyāⁿ s'eeⁿ nduuvidaamá yā ní caⁿa yā nguaaⁿ maaⁿ yā: Ndúúti chí caaⁿmaⁿ yú chí yeⁿe Ndyuūs, Jesús miiⁿ ní cuuvi yā s'uūúⁿ: ¿De'ε cuuvi chí nguée chí'téenu nī? ⁶Nduuti chí

caaⁿmaⁿ yú chí yeⁿe saⁿā íⁿyeⁿdí
'cūū, nducyaaca 'iiⁿyāⁿ ní cuiitúú yā
s'uūūⁿ ti 'iiⁿyāⁿ s'eeⁿ nadicádíinuⁿ
yā chí cuaacu níⁿnyúⁿ Juan miiⁿ ní
'áámá profeta chí Ndyuūs dicho'ó yā.

⁷Tuuⁿmi ní 'iiⁿyāⁿ s'eeⁿ
nan'guεεcútaⁿa yā yeⁿe Jesús chí
nguéeé déenu yā tíí ndiicá yeⁿe chí
ngeedínūⁿniⁿ Juan miiⁿ. ⁸Tuuⁿmi
ní Jesús caⁿa yā chíi yā 'iiⁿyāⁿ
s'eeⁿ: Ndíí nguéeé ndúú 'úú ra cuuvi
ndís'tií du'u 'iiⁿntyéⁿe tee yā orden
'úú chí idiíⁿ chuū.

Yáⁿāa yeⁿe saⁿā chí diiⁿ cuidado díí'yú uvas

(Mt. 21.33-44; Mr. 12.1-11)

⁹Jesús tucá'a yā caⁿa yā chíi yā
'iiⁿyāⁿ s'eeⁿ 'áámá ejemplo chí 'téé
nguéeé dáámá: 'Áámá saⁿā chíinū
sa díí'yú uvas ná yáⁿāa yeⁿe sa.
Dueño miiⁿ ca'a yā n'duuvi saⁿā chí
idiíⁿ sa ntiiⁿnyuⁿ ní nadíí've yā saⁿā.
Ní chíica yā yāāⁿ vaacú yā ni cueⁿe
yā chí cuuvi 'náaⁿ yā. ¹⁰Taachí ndaā
tiempo yeⁿe cosecha yeⁿe uvas miiⁿ,
dueño miiⁿ dicho'ó yā 'aama mozo
yeⁿe yā chí cueⁿe sa cuta'a sa parte
yeⁿe cosecha chí tuneⁿ dueño
miiⁿ. 'Iiⁿyāⁿ chí idiíⁿ ntiiⁿnyuⁿ yeⁿe
yáⁿāa ch'eⁿé yā mozo ní nadich'ó
yā mozo miiⁿ. Ní nguéeé de'ē veε ca'a
yā mozo miiⁿ. ¹¹Dueño nguεεcunée
yā dicho'ó yā táámá mozo nanááⁿ
saⁿā chí idiíⁿ ntiiⁿnyuⁿ na yáⁿāa
yeⁿe yā. 'Tiicá ntúūⁿ nguéeé n'daacā
diiⁿ sa ndúúⁿcū mozo miiⁿ. Ch'éⁿé
sa saⁿa ní nadicáánu sa saⁿā miiⁿ.
Ní nguéeé de'ē veε ca'a sa saⁿā mozo
miiⁿ. ¹²Dueño yeⁿe yáⁿāa miiⁿ
nguεεcunée ntúūⁿ yā dicho'ó yā
táámá mozo nanááⁿ 'iiⁿyāⁿ chí idiíⁿ
ntiiⁿnyuⁿ na yáⁿāa yeⁿe yā naati

'nuucá'a sa saⁿa ní nadicaanu sa
saⁿā.

¹³Tuuⁿmí ní dueño yeⁿe yáⁿāa
miiⁿ caⁿa yā: ¿Táácā dííⁿ? Dicho'ó
saⁿā daiyá chí neⁿe taaví. ¿'Áá
nguéeé taachí snaaⁿ sa saⁿā diiⁿ sa
honrar saⁿā daiyá? ¹⁴'Iiⁿyāⁿ chí
idiíⁿ ntiiⁿnyuⁿ na yáⁿāa miiⁿ taachí
n'diichi sa saⁿā daiya dueño yeⁿe
yáⁿāa miiⁿ nadicádíinuⁿ sa ní caⁿa
sa chíi sa vi'í: Sáⁿa 'cuu chí cuuvi
yeⁿe sa yáⁿāa 'cūū. 'Caāⁿnuⁿ yú
saⁿā ni yáⁿāa ndúúⁿcū chí véé naaⁿ
cuuvi yeⁿe yú. ¹⁵Tuuⁿmí tun'dáa sa
saⁿā daiya dueño 'áámá lado yeⁿe
chééⁿ yeⁿe díí'yú uvas ní ch'iiⁿnuⁿ
sa saⁿā. Jesús caⁿa yā: Maaⁿ ní,
¿de'ē dííⁿ dueño yeⁿe yáⁿāa nduucú
saⁿā s'eeⁿ chí diiⁿ 'tíicā? ¹⁶Dueño
miiⁿ taachi ndaa yā ni diví yā saⁿā
chí idiíⁿ ntiiⁿnyuⁿ na yáⁿāa yeⁿe yā
ní 'caaⁿnúⁿ yā saⁿā s'eeⁿ. Ní ca'á yā
yáⁿāa miiⁿ yeⁿe yā táámá 'iiⁿyāⁿ.
Taachí 'iiⁿyāⁿ fariseos chíiⁿdivéeⁿ
yā chuū, tuuⁿmi ní caⁿa yā: N'daacā
chí Ndyuūs nguéeé 'cuaaⁿ yā chí
'tíicā.

¹⁷Jesús chíinú yā 'iiⁿyāⁿ s'eeⁿ,
ní caⁿa yā: ¿De'ē neⁿe caaⁿmaⁿ
nduudu chí canée nguūⁿ na libro
yeⁿe Ndyuūs chí 'tuucá?

Tuūu ch'εεtē chí 'iiⁿyāⁿ chí
din'dái yā va'āi miiⁿ ní sta'á
yā ní ch'εεcú yā 'áámá lado,
ní tuūu 'cúū chí tuūu ch'εεte
miiⁿ dichíí've ca ní canée tuūu
ch'εεtē yeⁿe esquina yeⁿe va'āi.

¹⁸Áa du'ú nūuⁿ 'iiⁿyāⁿ chí cun'daa
nduú yā vmnaaⁿ na tuūu 'cúū ní
caātú 'íiní yeⁿe yā. Naati 'āa du'ú
nūuⁿ 'iiⁿyāⁿ chí cun'dáa nduūu tuūu
'cúū vmnaaⁿ yeⁿe yā, 'cuíinú ndúúví
yuūni yā.

**Yeⁿe tuumī chi ca'á yā emperador
César**

(Mt. 21.45-46; 22.15-22; Mr. 12.12-17)

¹⁹Iiⁿyāⁿ chiiduú n'geeté ndúúcū maestros yeⁿe ley neⁿé yā cuta'á yā Jesús ní díⁿ yā chi preso yā naati dí'va'a yā 'iiⁿyāⁿ yeⁿe yáāⁿ miiⁿ. Tuu'mí nūⁿ tuumicádiinuuⁿ yā chi Jesús miiⁿ caⁿ'a yā ejemplo 'cūū chi 'téé nguéé dáámá ní yeⁿe yā. ²⁰Tuu'mi ní dich'ó yā 'iiⁿyāⁿ chí 'cueenuúⁿ Jesús miiⁿ. 'Iiⁿyāⁿ s'eeⁿ ní ndaacá yā táácā chi cástaⁿ'a yā nduudu Jesús miiⁿ chi Jesús cuuví caaⁿmáⁿ yā 'aama nduudu yaadi. 'Tíicā ní cuuvi dich'ó yā Jesús nanááⁿ gobernador. ²¹Chiiⁿ chí 'iiⁿyāⁿ s'eeⁿ ní ntiinguuneeⁿ yā Jesús nduudú 'cūū: N'díí, maestro, déenu nū chí ngaⁿ'a nī ní ngi'cueeⁿ nī chiiⁿ chí n'daacā. Ní nguéé díⁿ nī juzgar 'iiⁿyāⁿ tan'dúúcā chí n'gee nī chí n'daacā o nguéé, naati ngi'cueeⁿ nī yúúni yeⁿe Ndyuūs ndúúcū nduudu cuaacu. ²²Maaⁿ ní cuuví nī chuū: 'Áá n'daacā chí nadí've nū emperador César tuumī yeⁿe yáⁿ'āa o nguéé?

²³Jesús tuumicadínuuⁿ yā chí 'iiⁿyāⁿ s'eeⁿ ní nguéé n'daacā chí díⁿ yā ní caⁿ'a yā chii yā 'iiⁿyāⁿ s'eeⁿ: 'De'ē cúúví chí neⁿe nī castaⁿ'á nī nduudu yeⁿé? ²⁴Cuuⁿ'miⁿ nī 'áámá tuumī. Jesús n'diichí yā tuumī ní caⁿ'a yā: 'Du'ū naaⁿ ndēē tuumī miiⁿ? 'Du'ū chí nguuví canee ngúūⁿ naaⁿ? Tuu'mi ní saⁿ'a s'uuⁿ nan'guēcútaⁿ'ā sa: Naaⁿ emperador César cānee.

²⁵Tuu'mi ní Jesús caⁿ'a yā chii yā 'iiⁿyāⁿ s'eeⁿ: Nca'a nī tuumī emperador César miiⁿ chíⁿ chi yeⁿ'é

yā ní ca'á nī Ndyuūs chíⁿ chi yeⁿ'é yā.

²⁶Nguéé cuuvi díⁿ yā chistaⁿ'a mar 'áámá nduudu yeⁿe Jesús miiⁿ ní cheⁿ'e yiinú yā yeⁿ'ē chí nan'guēcútaⁿ'ā Jesús. Ní 'āā ntéé caⁿ'a yā mar 'áámá.

**'Iiⁿyāⁿ itinguuneeⁿ yā Jesús yeⁿ'ē chí
nduuchi tináⁿ'ā**

(Mt. 22.23-33; Mr. 12.18-27)

²⁷Cuayivi ní nduuvi 'iiⁿyāⁿ saduceos ndaa yā nanááⁿ Jesús. Saduceos nguéé s'téenu yā chí nduuchi tináⁿ'ā. Ní caⁿ'a yā chii yā Jesús: ²⁸N'díí, Maestro, Moisés dingúuⁿ yā na ley 'tíicā: Ndúúti chí 'áámá saⁿ'ā 'cuuvi sa ní cu'neeⁿ sa n'daataa yeⁿ'ē sa ní nguéé daiya tá, tuu'mi ní 'díínu sa cuuvi 'caandavaacu sa ndúúcū n'daataa miiⁿ ní 'cuundi daiya sa lado yeⁿ'e 'díínu tináⁿ'ā. ²⁹Maaⁿ ní véé ndēēchē 'díínu yā. Saⁿ'ā vmaaaⁿ míⁿ canee sa ndúúcū n'daataa yeⁿ'ē sa ní ch'ií sa. Nguéé ch'ēetinée daiya sa. ³⁰Saⁿ'ā 'díínu sa ndiichi ndii 'úúví canee sá ndúúcū n'daataa yeⁿ'ē tináⁿ'ā. 'Diinu sa miiⁿ ch'ií ntúūⁿ saⁿ'ā miiⁿ. Nguéé ch'ēetinée ntuūⁿ daiya sa. ³¹Saⁿ'ā 'diinū sa ndiichi ndii 'íínú canee ntúūⁿ sa ndúúcū n'daataa míⁿ. 'Tiicá ntúūⁿ ch'ií sa ní nguéé ch'ēetinée ntúūⁿ daiya sa. Nduu ndēēche yā ch'ēetinée yā ndúúcū n'daataa míⁿ ní ca'áámá ca'áámá yā ch'ií yā ní nguéé ch'ēetinée mar 'áámá daiya yā. ³²Cuayivi miiⁿ ní ch'ií n'daataa míⁿ. ³³Taachí ndaa nguuvi chí nduuchi 'iiⁿyāⁿ chí n'díí, 'chéé saⁿ'ā s'eeⁿ n'daataa yeⁿ'ē sa táⁿ'ā? Tí nduu ndēēche yā ch'ēetinée yā ndúúcū n'daataa míⁿ.

³⁴Tuu'mi ní Jesús miiⁿ nan'guéécútaⁿa yā yeⁿe 'iiⁿyāⁿ s'eeⁿ ní caⁿa yā: 'Iiⁿyāⁿ chi snée yā iⁿyeeⁿdí 'cūū n'giindivaacu yā ní 'iiⁿyāⁿ yeⁿe yā nga'a yā chi n'giindivaacu yā. ³⁵'Iiⁿyāⁿ chi túneeⁿ chi ndaá yā na táámá iⁿyeeⁿdī, taachi nduuchí yā yeⁿe nguaaⁿ tináⁿā, na yáⁿāa miiⁿya ní nguεε 'caandavaacu yā, ndíí nguéé ndúú chi ca'a 'iiⁿyāⁿ yeⁿe yā chi 'caandavaacu yā. ³⁶Yáⁿāa miiⁿya 'āā ntéé 'cuūvi yā ti daama yā ndúúcū ángeles. 'Iiⁿyāⁿ s'eeⁿ chi daiya Ndyuūs tí induuchi yā yeⁿe nguaaⁿ tináⁿā. ³⁷Ndíí cuaaⁿ vmnaaⁿ ndíí taachi maaⁿ Moisés miiⁿ dingúúⁿ yā yeⁿe yáⁿá 'lííⁿ chí ngiichi iteé cadíínuuⁿ yú caati tináⁿā ninduuchi yā. Ní Moisés miiⁿ ngaⁿá yā chi Señor Ndyuūs miiⁿ ní Ndyuūs yeⁿe Abraham, ndúúcū Isaac, ndúúcū Jacob. ³⁸Ti Ndyuūs ní nguéé Ndyuūs yeⁿe tináⁿā ti yeⁿe 'iiⁿyāⁿ chí sндуuchí yā. Caati nanááⁿ Ndyuūs miiⁿ nducyaaca 'iiⁿyāⁿ ní sндуuchí yā cueⁿe daāⁿmaⁿ.

³⁹Tuu'mi ní n'duuvi maestros chi ngi'cueeⁿ ley caⁿa yā chii yā Jesús miiⁿ: N'díí, Maestro, n'daacā ngaⁿa nī.

⁴⁰'Iiⁿyāⁿ s'eeⁿ 'āā ntéé neⁿe yā ntiinguuneeⁿ ca yā.

¿Du'ū 'iiⁿyāⁿ chi Cristo?

(Mt. 22.41-46; Mr. 12.35-37)

⁴¹Jesús caⁿa yā chii yā 'iiⁿyāⁿ s'eeⁿ: Ndís'tií, ítáácā chí ngaⁿa nī chi Cristo miiⁿ ní daiya David? ⁴²Maāⁿ David miiⁿ ní ngaⁿa yā na libro yeⁿé Ndyuūs chi Salmos 'túúca:

Caⁿa Señor Ndyuūs chii yā Señor yeⁿé: 'Cuundi di lado

tá cuaācū yeⁿé chi lado yeⁿe honor,

⁴³ndíí taachi 'úú cu'neéⁿ 'iiⁿyāⁿ chi enemigos chi contra yeⁿe di cuaaⁿ ndii yā ca'a di tan'dúúca chi 'aama banco 'lííⁿ.

⁴⁴Ndúúti chi David miiⁿ caⁿa yā chi Cristo miiⁿ ní Señor yeⁿe yā, ítáácā cuuvi chií chi Cristo miiⁿ ní daiya David?

Jesús ngííca nuuⁿndi yeⁿe maestros chi ngi'cueeⁿ ley

(Mt. 23.1-36; Mr. 12.38-40; Lc. 11.37-54)

⁴⁵Nducyáácá 'iiⁿyāⁿ n'giindiveéⁿ yā taachi Jesús caⁿa yā ndúúcū discípulos yeⁿe yā ní tuca'á yā caⁿa yā chuū: ⁴⁶Dííⁿ nī cuidado, ndís'tií, yeⁿé maestros chi ngi'cueeⁿ ley. 'Iiⁿyāⁿ s'eeⁿ ní neⁿe yā 'cuεeti núuⁿ yā catecai n'geēnúú yā, ní neⁿe yā chi ndís'tií ní dííⁿ nī saludar 'iiⁿyāⁿ s'eeⁿ taachi snée yā nií'veε ní neⁿé yā chí dííⁿ nī respetar 'iiⁿyāⁿ s'eeⁿ. Ní neⁿe yā 'cuεeté yā na sillas vmnááⁿ vmnaaⁿ yeⁿe honor ná yaacū sinagogas ní sillas yeⁿe honor yeⁿe 'viicu naachi ché'e yā. ⁴⁷'Iiⁿyāⁿ s'eeⁿ ní ndivíí yā va'ai yeⁿe n'daataá nguá'āa. Ní neéne n'deēe ngaⁿ'angua'á yā ní neⁿe yā chí snaaⁿ tanáⁿā 'iiⁿyāⁿ chí diíⁿ yā 'tííca. 'Iiⁿyāⁿ s'eeⁿ ní neene ch'εete ca castigo yeⁿe yā nguuvi yeⁿe juicio.

Ofrenda yeⁿe n'daataá nguá'āa

(Mr. 12.41-44)

21 Jesús snée yā na yaācu templo ní n'diichi yā chí 'iiⁿyāⁿ 'cuiica ngii yā ofrendas yeⁿe yā na cajas naachí inúūⁿ ofrendas. ²N'diichí ntúuⁿ yā 'áámá n'daataá nguá'āa chí neene ndaachí cānee

tá. Táⁿá miiⁿ ní s'nuūⁿ tá cheeti caja miiⁿ 'uūví centavos chí cobre. ³Jesús miiⁿ ní ngaⁿ'a yā ngii yā 'iiⁿyāⁿ s'eeⁿ: Cuaacu níⁿnyuⁿ 'úú ngaⁿ'á ngíⁿ ndís'tiī chí n'daataá nguáⁿá 'cūū ch'ēete ca tuūmī chíi tá, nguéé ti tanáⁿ'ā 'iiⁿyāⁿ. ⁴Tí 'iiⁿyāⁿ s'eeⁿ ní ngaⁿ'a yā yeⁿ'ē chí nngaāva yeⁿ'e yā chí cuuvi ofrenda yeⁿ'e Ndyuūs; naati n'daataá 'cūū chí neené ndaachíi canee tá ní ca'ā tá tanducuéⁿ'ē chí véé yeⁿ'e ta chí che'e tá.

Jesús nn'geeⁿ yā táámá ejemplo chí yeⁿ'e yaācá chí ntuvií

(Mt. 24.1-2; Mr. 13.1-2)

⁵Náⁿ'ā 'iiⁿyāⁿ ní ngaⁿ'a yā yeⁿ'e yaācū templo miiⁿ chí yaāva canéé ndúúcu tuūu n'dēē cheeⁿ ndúúcu adornos yeⁿ'ē regalos chí lado yeⁿ'e ofrenda. Jesús caⁿ'a yā chíi yā 'iiⁿyāⁿ s'eeⁿ: ⁶Ndís'tiī ní inaaⁿ nī dendú'ū chí 'túúcā. Ndáá nguuvi taachí nadituuví yā yaācū miiⁿ ní 'āā ntéé cūnee tuūu cuaaⁿ vmnááⁿ yeⁿ'e vi'í chí nguéé ntuuvií.

Ejemplo yeⁿ'e tiempo taachi 'āā cuéé ndaa nguuvi chí 'cuiinū íⁿ'yeēⁿdī

(Mt. 24.3-28; Mr. 13.3-23)

⁷Tuu'mi ní 'iiⁿyāⁿ s'eeⁿ ntiinguunéeⁿ yā Jesús miiⁿ: N'diī, Maestro, ítií cuaⁿ'ā cuuví chuū? ¿De'ē señal 'cuuⁿmíⁿ nī taachi 'āā cuuvi chí 'tiicā?

⁸Jesús caⁿ'a yā: Cundéé nī cuidado chí 'iiⁿyāⁿ nguéé canche'éí yā ndís'tiī caati neené n'deēé 'iiⁿyāⁿ chíí yā caaⁿ'máⁿ yā ndúúcu chí duuchí 'tííca: 'Úú chí Cristo; ní 'āā snéé nguuvi chí 'cuiinū íⁿ'yeēⁿdī. Naati ndís'tiī, nguéé caⁿ'á nī ndúúcu

yā. ⁹Ní taachí 'caandiveéⁿ nī chí véé caandaá ní 'iiⁿyāⁿ 'cuuⁿmaⁿ yā contra yeⁿ'e taama yā nguéé dí'yá nī cuuvi. Tanducuéⁿ'ē chuū canéé chí cuuvi vmnááⁿ vmnaaⁿ naati 'āā cuéé 'cuiinū íⁿ'yeēⁿdī.

¹⁰Tuu'mi ní Jesús caⁿ'a yā chíi yā 'iiⁿyāⁿ s'eeⁿ: 'Áámá nación ní 'cuuⁿmáⁿ contra yeⁿ'e taama nación ní 'iiⁿyāⁿ yeⁿ'e 'áámá país ní 'cuuⁿmáⁿ yā contra yeⁿ'e 'iiⁿyāⁿ yeⁿ'e taama país. ¹¹Ní n'deēé cuuvi nuⁿ'u taaⁿ yáⁿ'āā, ndúúcu tiempos chí 'cuūndí cuuicu, ndúúcu ca'ai taaⁿ n'deēé cuaaⁿ n'dai, ní 'iiⁿyāⁿ snaaⁿ yā dendu'ū chí vaadī n'giinu yeⁿ'e va'ai cheeti nguuvi ní dí'yá yā cuuvi.

¹²Ní taachi 'āā cuéé cuuvi tanducuéⁿ'ē dendu'ū chí 'túúccā, 'iiⁿyāⁿ ní cuiítuú yā ndís'tiī ní cuta'á yā ndís'tiī chí presos nī. Ní nca'á yā ndís'tiī 'iiⁿyāⁿ chí ngaⁿ'a ntiin'nyuⁿ yeⁿ'e yaācū sinagogas ní 'cuii yā ndís'tiī vácūū. Cuayiivi ní candéé yā ndís'tiī nanááⁿ 'iiⁿyāⁿ reyes ndúúcu gobernadores cáāvā chí ngaⁿ'a nī chí duuchí. ¹³Chuū 'cueenu ndís'tiī cuuvi ti cueⁿ'é nī nduucú ní nanááⁿ 'iiⁿyāⁿ s'eeⁿ cuuvi caaⁿ'máⁿ nī nduudu cuaacu yeⁿ'é. ¹⁴Cundéé n'daaca nī cuidado ná staava yeⁿ'e nī ní nguéé nadacádínuuⁿ nī vmnaaⁿ yeⁿ'e taacā nán'gueecútaⁿ'a nī yeⁿ'e 'iiⁿyāⁿ s'eeⁿ. ¹⁵Ti hora míⁿ nūuⁿ 'úú ní yaa'ví ndís'tiī nduudu chí caaⁿ'máⁿ nī. Ní teé ndís'tiī vaadī deenu yeⁿ'é ní 'iiⁿyāⁿ s'eeⁿ nguéé cucheé yā ndúúcu ndís'tiī, ndíí nguéé ndúú cuuvi caaⁿ'maⁿ yā contra yeⁿ'e ndís'tiī. ¹⁶Naati chíidá nī, ndúúcu 'díínu nī, ndúúcu 'iiⁿyāⁿ yeⁿ'e nī, ndúúcu amigos yeⁿ'e nī

ní caaⁿ máⁿ yā contra yeⁿe ndís'tiī chí 'iiⁿyāⁿ 'caaⁿ núⁿ yā náⁿā ndís'tiī. ¹⁷Ní nducyaaca 'iiⁿyāⁿ nguéé cuuvi n'diichí yā ndís'tiī cucááwā 'úú ti cueⁿé nī nduucú. ¹⁸Naati mar 'áámá yuūdū tiíⁿ nī nguéé cuuví ndái. ¹⁹Nduuti chí ndís'tiī ngiinū ngiinū cuchéé nī na staava yeⁿé nī ní 'cueetinéé n'daāca nī, tuu'mi ní ndáá nguuvi chí ndaaca nī vida cueⁿe daāⁿmaⁿ yeⁿe nī.

²⁰Taachi ndís'tiī snaaⁿ nī soldados nuuⁿmaⁿ ndííví yā yāāⁿ Jerusalén, tuu'mi ní cadinuuⁿ nī chí yāāⁿ Jerusalén miiⁿ 'āā ntuví. ²¹Tuu'mi ní n'daacā chí 'iiⁿyāⁿ chí snée yā na yáⁿāa Judea caⁿá yā cáánu yā cuaáⁿ yiicū. Ní 'iiⁿyāⁿ chí snée yā na yāāⁿ Jerusalén miiⁿ ní nan'dáa yā miiⁿ. Ní 'iiⁿyāⁿ chí snée yā campo nguéé nguēcunee nndaa yā na yāāⁿ Jerusalén. ²²Ti nguuvi s'eeⁿ ní nguuví chí cuchii 'cueenú yā cuuvi cááwā nuuⁿndí yā. Níicú canéé chí cuuvi cuaacu tanducuéⁿē chí canéé nguūⁿ na libro yeⁿe Ndyuūs. ²³Naati de'ē chúicā ya'āi yeⁿe n'daataá chí véé daiya tá chēti tá ndúucū n'daataá chí ngiicú da'cua'āa daiya tá nguuvi chí cáánu yā. Ní 'iiⁿyāⁿ miiⁿ néené 'cueenu yā cuuvi na yáⁿāa 'cúú. ²⁴Ní 'yááⁿ 'iiⁿyāⁿ ní 'cuuvi yā ndúucū machete 'uūví lados 'caāiⁿ taachi dííⁿ yā caandaá. Ní candē yā 'yaaⁿ 'iiⁿyāⁿ chí presos yā ní caⁿá yā ndíí nducyaaca países. Níicú yāāⁿ Jerusalén miiⁿ cūnee ndúucū 'iiⁿyāⁿ gentiles chí 'iiⁿyāⁿ chí nguéé yeⁿe ndaata Israel ní 'iiⁿyāⁿ s'eeⁿ canéé yā na yáⁿāa miiⁿ ndíí tiempo chí Ndyuūs 'cuaaⁿ yā 'iiⁿyāⁿ gentiles cuuvi yeⁿe yā.

Táacā ndaá Saⁿā chí Daiya Dendyuūs

(Mt. 24.29-35, 42-44; Mr. 13.24-37)

²⁵Tuu'mi ní Ndyuūs 'cuuⁿmiⁿ yā ndúucū vaadī n'giinu señales ná yáⁿāa, ndúucū ná 'iiⁿyu, ndúucū na 'ííⁿnyúⁿ. Néené ya'āi 'cueenu 'iiⁿyāⁿ yeⁿe tanáⁿā naciones ní nducyaaca 'iiⁿyāⁿ diiⁿya cá yā cuuvi. Ní nguéé déenu yā taacā chí idiin yā cucááwā chí 'yuudu n'dai 'cueecu nuūⁿnīⁿyāⁿā ní can'dái yaacu nuūⁿnīⁿ miiⁿ. ²⁶'iiⁿyāⁿ s'eeⁿ cuuvi cúunu yā chí 'va'á yā ndúucū dendu'ū chí ndaa vmnááⁿ yáⁿāa 'cúú ní cucááwā nducuéⁿē nanguuvi ní 'nuⁿu.

²⁷Tuu'mi ní 'iiⁿyāⁿ snááⁿ yā 'úú chí Saⁿā chí Daiya Dendyuūs chí ndaá na 'áámá meēⁿ ndúucū poder ch'ēte yeⁿé ndúucū chí dēvéⁿ n'dai yeⁿe maáⁿ cuerpo yeⁿé. ²⁸Taachí cunga'ā tanducuéⁿē chuū cu'neeⁿ diitú nī na staava yeⁿé nī tí ndaā nguuvi chí nnguaⁿāi ndís'tiī ní canéé niiⁿnuúⁿ.

²⁹'Úú ní ngaⁿá ngíí ndís'tiī 'áámá ejemplo: Cuiⁿdiichí nī yáⁿá yeⁿe n'guíídií yaaⁿ nguuvi ndúucū nducyaaca yáⁿá. ³⁰Taachí snaaⁿ nī chí 'āā ndaa tá'āa yáⁿá mííⁿ, tuu'mi ní 'āā deenú nī tí 'āā snee niiⁿnuúⁿ tiempo chí cuchii yāāⁿ. ³¹'Tiicá ntúūⁿ cuuvi taachi snaaⁿ nī dendu'ū chuū chí ngaⁿá, 'āā deenú nī chí naachí Ndyuūs ngaⁿa ntiinⁿnyúⁿ yā 'āā snee niiⁿnuúⁿ.

³²'Úú ngaⁿá ngíí ndís'tiī, chí cuaacu níⁿnyúⁿ 'iiⁿyāⁿ chí snée yā maaⁿ 'āā cuéé 'cuuví yā nenⁿe chí 'āā cuéé cuuví tanducuéⁿē chuū.

³³Nanguuvi ndúucū yáⁿāa ní chó'oo naati nduudu yeⁿé nguéé chó'oo.

³⁴Ndís'tiī ní cundēé nī cuidado chí staava yeⁿe nī nguéé nduuví

cheechí ndúúcū vicios chi véé
iⁿ'yeeⁿdí 'cūū. Nguéé nadicádiinúúⁿ
ca nī yeⁿ'e chi che'é nī o cu'ú nī
o yeⁿ'ē n'deeē yeⁿ'e vida yeⁿ'e nī
ti nguuvī miiⁿ ní dácanaāⁿ ndaa
nanááⁿ yeⁿ'e ndís'tiī. Ní canéé chi
canéé listo nī. ³⁵Ti nguuvī s'eeⁿ
ní ndaa nanááⁿ ndís'tiī ndúúcū
'iiⁿ'yāⁿ chi snée yā iⁿ'yeeⁿdí 'cūū ní
nducyaacá yā ní 'cuenú yā cuuvī tí
ndaa nguuvī s'eeⁿ tan'dúúcā 'áámá
tuūvī dácanaāⁿ índuudi. ³⁶Cueeti
nduuchí nī ní caaⁿ'maⁿ'ngua'á nī
nguuvī nguuvī chi cuuví nnguaⁿ'ai
nī yeⁿ'e dendu'ū vaadi ya'ai chi
cuchiī. Ní cuuvī ndaa nī nanááⁿ 'úú,
Saⁿ'ā chi Daiya Ndyuūs.

³⁷Nguuvī nguuvī Jesús miiⁿ
ngí'cueeⁿ yā na yáacū templo ní
n'gaaⁿ ní n'ndaa yā ná yīicū 'lííⁿ chi
nguuvī Olivos. ³⁸Ní nguuvī nguuvī
cuaaⁿ ná nguētiyaaⁿ ní nducyaaca
'iiⁿ'yāⁿ ndaa yā na yaacū templo
nanááⁿ Jesús miiⁿ chí 'caandiveéⁿ
yā nduudu yeⁿ'e yā.

**'Iiⁿ'yāⁿ chi contra Jesús ngaⁿ'a yā
táacā chi dííⁿ yā chi cuuvī cuta'á yā
Jesús**

(Mt. 26.1-5, 14-16; Mr. 14.1-
2, 10-11; Jn. 11.45-53)

22 'Āā snee nīiⁿ'nuúⁿ nguuvī
yeⁿ'e 'viicu yeⁿ'e pascua
chi 'viicu chi che'é yā pan chi nguéé
levadura yeⁿ'ē. ²Ní 'iiⁿ'yāⁿ chiiduú
n'gēeté ndúúcū maestros yeⁿ'e ley
nduuvidaamá yā ní ngaⁿ'á yā taacā
chi cuuví 'caaⁿ'núⁿ yā Jesús naati
'va'á yā 'iiⁿ'yāⁿ yeⁿ'e yááⁿ Jerusalén
miiⁿ.

³Espíritu yeⁿ'e yááⁿ'n'guiinūⁿ
sndáa na staava yeⁿ'e saⁿ'ā chi
nguuvī Judas Iscariote chi 'aama

discípulo yeⁿ'e Jesús naachi
ndiichuuvī yā. ⁴Judas miiⁿ cheⁿ'e
sa nanááⁿ chiiduú n'gēeté ndúúcū
capitanes ní yaa'vi sá 'iiⁿ'yāⁿ táacā
chi cuuví diiⁿ sa chi naca'a sa Jesús
miiⁿ 'iiⁿ'yāⁿ s'eeⁿ. ⁵'Iiⁿ'yāⁿ s'eeⁿ ní
yeenú n'dai yā ní nduuvidaamá
yā chí ca'a yā tuūmī Judas
miiⁿ. ⁶Judas sta'a sa tuūmī ní
caⁿ'a sa. Nadacádiinuuⁿ sa táacā
cuuvī nta'a sa Jesús miiⁿ na ta'a
'iiⁿ'yāⁿ s'eeⁿ manera chi 'iiⁿ'yāⁿ
yeⁿ'e yááⁿ Jerusalén miiⁿ nguéé
ntuumicadiinúúⁿ yā yeⁿ'ē.

**N'nuúⁿ yā chi che'e yā cáāvā 'víícū
yeⁿ'e pascua**

(Mt. 26.17-29; Mr. 14.12-25;
Jn. 13.21-30; I Co. 11.23-26)

⁷Ndaā nguuvī yeⁿ'e pascua, 'viicu
chi nducyaaca 'iiⁿ'yāⁿ che'e yā pan
chi nguéé levadura yeⁿ'ē. Nguuvī
miiⁿ ní 'iiⁿ'yāⁿ 'caaⁿ'núⁿ yā 'áámá
'iiti cuūchī 'lííⁿ chí sacrificio yeⁿ'e
pascua. ⁸Jesús dicho'ó yā Pedro
miiⁿ ndúúcū Juan ní caⁿ'a yā chii
yā 'uuvī yā: Cué'é nī ní n'nuúⁿ nī
naachi che'e nguīinū yú yeⁿ'e 'viicu
yeⁿ'e pascua.

⁹'Iiⁿ'yāⁿ s'eeⁿ ní caⁿ'a yā chii yā
Jesús miiⁿ: ¿Tíí neⁿ'e nī chi in'nuúⁿ
'nū chi che'e nguīinū yú?

¹⁰Jesús n'gūeécútaⁿ'a yā: Taachi
cundaa nī na yááⁿ Jerusalén miiⁿ
ndaāca nī 'áámá saⁿ'ā chi ndéε sa
'cuuti cuéé nuūⁿ'nī. Caⁿ'á nī ndúúcū
sa ndíí ná va'ai naachi ndaa sa. ¹¹Ní
caaⁿ'máⁿ nī cuuvī nī saⁿ'ā chi va'ai
yeⁿ'ē miiⁿ: N'diī, señor Maestro
yeⁿ'e yú ngaⁿ'á yā 'túucā: ¿Tíí cánéé
cuarto chi che'é nguīinū yeⁿ'e
pascua ndúúcū discípulos yeⁿ'é?
¹²Saⁿ'ā miiⁿ ní 'cuuⁿ'mīⁿ sa ndís'tiī

'áámá cuarto ch'εete yeⁿe va'āi chí ndii 'uūví piso ní 'aa véé yaāⁿ. Miiⁿ in'nuúⁿ nī chí che'e yú yeⁿe pascua.

¹³Apóstoles ní cueⁿe yā ní ndaaca yā tanducuéⁿe tan'dúúccā chí Jesús ngaⁿa yā ngii yā, ní n'nuúⁿ yā chí che'e yā yeⁿe pascua.

¹⁴Taachí ndaā snuū ca'a hora chí che'e nguiinú yā, Jesús miiⁿ ndúúccū apóstoles yeⁿe yā ch'εeté yā na mesa chí che'e nguiinú yā. ¹⁵Jesús caⁿa yā chíi yā 'iiⁿ'yāⁿ s'eeⁿ: De'e chúúccā neⁿé che'é ndúúccū ndís'tiī 'viicu yeⁿe pascua 'cūū neⁿe chí 'āā 'cuéé 'cuūví. ¹⁶Caati ngaⁿ'á ngii ndís'tiī ti 'úú ní 'āā ntéé che'é ndúúccū nī táámá 'viicu pascua ndíi taachi cuuvi cuaacu chí neⁿe caaⁿ'maⁿ yeⁿe naachí Ndyuūs ngaⁿ'a ntiīⁿnyúⁿ yā.

¹⁷Tuu'mi ní Jesús sta'á yā taza ndúúccū vino ní ca'a yā gracias Ndyuūs. Ní caⁿ'a yā chíi yā apóstoles yeⁿe yā: Cuta'á nī chuū ní cu'u nī nguuaⁿ nducyaaca nī. ¹⁸Ti 'úú ní ngaⁿ'á ngii ndís'tiī, chí 'āā ntéé cu'ú jugo yeⁿe uvas, ndii ndaā nguuvi yeⁿe naachí Ndyuūs ngaⁿ'a ntiīⁿnyúⁿ yā.

¹⁹Tuu'mi ní sta'a Jesús pan miiⁿ ní ca'a yā gracias Ndyuūs. Ní n'deé yā ní ca'a yā apóstoles ní caⁿ'a yā: Chuū chí tan'dúúccā cuerpo yeⁿe 'tíicā. Ní teé lugar 'iiⁿ'yāⁿ chí 'caaⁿ'núⁿ yā 'úú cáávā ndís'tiī. Dííⁿ nī chuū taachi n'gaacú nī yeⁿe 'úú.

²⁰Tiicá ntúūⁿ dííⁿ yā ndúúccū taza. Taachí ch'íinú che'e yā ní caⁿ'a yā: Jugo yeⁿe uvas yeⁿe taza chí cuuvi cuaacu ní chuū tan'dúúccā chí yuūūⁿ yeⁿe chí cungéē cáávā ndís'tiī.

²¹Maaⁿ ní saⁿ'ā chí naca'ā 'úú vεε sa ndúúccū yú na mesa. ²²Saⁿ'ā chí

Daiya Dendyuūs chí 'úú cuaacu nííⁿnyúⁿ caⁿ'a sa 'cuūví sa tan'dúúccā chí neⁿe Dendyuūs. De'e chúúccā ya'ai yeⁿe saⁿ'ā chí naca'ā sa 'úú.

²³Tuu'mi ní apóstoles tuc'áa yā ntiingūūneeⁿ vi'i yā: ¿Du'u ra chí diiⁿ chuū?

**Ngaⁿ'a yā nguuaⁿ maaⁿ yā:
¿Du'ū chí ch'εete ca?**

²⁴Tuu'mi ní apóstoles tuca'a yā caⁿ'a yā nguuaⁿ maaⁿ yā cheé yā chí ch'εete ca yā. ²⁵Tuu'mi ní Jesús miiⁿ caⁿ'a yā chíi yā 'iiⁿ'yāⁿ s'eeⁿ: Reyes yeⁿe tanáⁿ'ā naciones ngaⁿ'a ntiīⁿnyuⁿ yā tan'dúúccā chí 'liivi chεεchi ní 'iiⁿ'yāⁿ yeⁿe naciones ní ngaⁿ'a yā chí rey yeⁿe yā n'daacā idiíⁿ yā. ²⁶Naati nguuaⁿ ndís'tiī nguéé 'tíicā. 'Iiⁿ'yāⁿ chí ch'εete ca nguuaⁿ ndís'tiī canéé chí dííⁿ yā tan'dúúccā saⁿ'ā da'caiyāa chí diiⁿ mandados. 'Iiⁿ'yāⁿ chí ngaⁿ'a ntiīⁿnyúⁿ yā nguuaⁿ ndís'tiī canee chí dííⁿ yā tan'dúúccā 'áámá 'iiⁿ'yāⁿ chí dichí'vε 'iiⁿ'yāⁿ. ²⁷Chεε cá yā chí ch'εeté yā. ¿Áá 'iiⁿ'yāⁿ chí n'giindí yā na mesa o 'iiⁿ'yāⁿ chí n'gii chí cho'o chí cu'u? ¿Áá nguéé 'iiⁿ'yāⁿ chí n'giindi na mesa? N'diichi nī. 'Úú ní canee nguuaⁿ ndís'tiī tan'dúúccā 'iiⁿ'yāⁿ ndíicūūⁿ chí dichí'vε.

²⁸Ndís'tiī ní ch'εetinée nī nduucú nguuvi nguuvi taachi 'úú n'geenú ngii tanducuéⁿe. ²⁹Ní tan'dúúccā Chiidá tee yā 'úú naachí ngaⁿ'ā ntiīⁿnyúⁿ 'tiicá ntúūⁿ 'úú ní teé ndís'tiī 'áámá chí caaⁿ'maⁿ ntiīⁿnyúⁿ nī. ³⁰Ní ndís'tiī 'cuéeté nī na mesa nduucú chí che'é nī ní cu'ú nī naachi 'úú ngaⁿ'á ntiīⁿnyuⁿ. Ní 'cuéeté nī na sillas yeⁿe juez ní

n'diichí nī nuuⁿndi yeⁿē ndichúuví ndaata yeⁿe 'iiⁿyāⁿ Israel chi judíos.

Jesús caaⁿmaⁿ yā chi Pedro caaⁿmaⁿ yā chi nguéé deenu sa Jesús

(Mt. 26.31-35; Mr. 14.27-31; Jn. 13.36-38)

³¹Jesús yaaⁿví yā Pedro ní caⁿa yā: N'dii, Simón Pedro, Simón Pedro, cuin'diichí nī ti yááⁿnguiinūⁿ ngiicá sa yeⁿe ndís'tií chí cuuvi diiⁿ sa. N'diichineeⁿ sa ndís'tií tan'dúucā 'iiⁿyāⁿ ndáadi yā trigo 'tíicā diiⁿ sa. Ní véé permiso yeⁿe sa. ³²Naati 'úú ní ngaⁿanguaⁿá cáávā dii, Pedro, chi cu'téenu ca di. Ní taachi ndaacadaamí di yeⁿē nuuⁿndi yeⁿe di ní cu'téenu ca di tuuⁿmi ní cunnee di tanáⁿā hermanos yeⁿe di chi cu'téenu cá yā.

³³Simón caⁿa yā chii yā Jesús miiⁿ: Señor, 'āā véé yááⁿ chí caⁿá nduucú nī ndíí vácūū; ní ndúúti chí 'cuuví nī, 'úú ní 'cuuví ndúúcu nī.

³⁴Jesús caⁿa yā chii yā Pedro: Ngaⁿá ngií dii chí tusáⁿā ní nguéé 'cuai tī ndíí taanduvéé cueeⁿdiitú di 'iinū cuuvi yeⁿe 'úú chí nguéé in'diichi di 'úú.

Jesús ngaⁿa yā yeⁿe chí cuchii.

³⁵Tuuⁿmi ní Jesús itiinguunéeⁿ yā apóstoles: Taachí dicho'ó ndís'tií nguéé cándεε nī bolsa yeⁿe tuumi nī, ndíí nguéé ndúú morral yeⁿe nī, ndíí nguéé ndúú ndaacuú yeⁿe nī, ¿'áá véé de'ē vεε chí chii faltar yeⁿe nī? Apóstoles ní caⁿa yā: Nguéé de'ē vεε.

³⁶Ní Jesús caⁿa yā: Maaⁿ ní ndís'tií chí véé bolsa yeⁿe nī, candεε nī. 'Tiicá ntúūⁿ ndís'tií chí véé morral yeⁿe nī, candεε nī. Nds'tií chí nguéé 'aama machete

'uúvī lados 'caāiⁿ yeⁿe nī, n'diicuí nī cotón yeⁿe nī ní cuái nī. ³⁷Ti ngaⁿá ngií ndís'tií chí canéé chí cuuvi cuaacú tanducueⁿē chí canéé nguūⁿ yeⁿé: Ní 'iiⁿyāⁿ caⁿa yā chí véé nuūⁿndi yeⁿe 'úú tan'dúucā tanáⁿā 'iiⁿyāⁿ chí véé nuuⁿndi yeⁿe yā. Tí tanducueⁿē chí canéé nguūⁿ yeⁿe 'úú canéé chí cuuvi cuaacu.

³⁸Tuuⁿmi ní discípulos ní caⁿa yā: N'dii, Señor, íngāā na 'uuvi machete 'uúvi lados 'caāiⁿ. Jesús ní caⁿa yā: Ndúucū stíí 'āā véé.

Jesús ngaⁿanguaⁿá yā na jardín chí nguuvi Getsemaní

(Mt. 26.36-46; Mr. 14.32-42)

³⁹Cuayiivi ní can'daā Jesús tan'dúucā costumbre yeⁿe yā ní cueⁿé yā na yiicū yeⁿe Olivos. Ní discípulos yeⁿe yā cueⁿé yā ndúúcu yā. ⁴⁰Ní taachí ndaa yā na lugar miiⁿ, tuuⁿmi ní Jesús miiⁿ ní caⁿa yā chí yā discípulos yeⁿe yā: Nds'tií caaⁿmaⁿnguaⁿá nī chí yááⁿngiinūⁿ nguéé n'diichineeⁿ sa ndís'tií chí dííⁿ nī nuuⁿndi.

⁴¹Jesús ní cueⁿe yā yeⁿe discípulos yeⁿe yā tanduu naaⁿ chí naachi ndaá 'áámá tuūu chí ngii ya ní Jesús caantii'yá yā ní caⁿanguaⁿá yā. ⁴²Ní caⁿa yā: N'dii, Chiidá, ndúúti chí neⁿe nī ní diví nī yeⁿe chí canee chí 'cuenú cuuvi yeⁿe prueba 'cūū. Naati nguéé cuuví tan'dúucā chí 'úú neⁿé naati tan'dúucā chí n'dii neⁿe nī.

⁴³Ní che'enaāⁿ 'áámá ángel yeⁿē nanguuvi ní ca'á yā fuerzas Jesús miiⁿ. ⁴⁴Ti neené ya'ai Jesús miiⁿ ní ndiituu n'dai ca ngáⁿanguaⁿá yā. Ní nuuⁿni'yaaⁿ yeⁿe yā tan'dúucā yuúúⁿ chí ndii na yáⁿāa ingéé.

⁴⁵Nducueeⁿ yā naachí ngaⁿ'angua'á yā ní ndaa yā nanááⁿ discípulos yeⁿe yā ní ndaaca yā chi styaadú yā, ti discípulos ní neené ndaachi núúⁿ yā ti ya'ai yā cáávā Jesús miiⁿ. ⁴⁶Tuu'mi ní Jesús caⁿ'a yā chii yā discípulos: ¿De'ē cúuví chí styaadú ní? Nducueeⁿ ní ní caaⁿ'ma'ngua'á ní ní yáá'n'guiinūuⁿ nguéé n'diichineeⁿ sa ndís'tií chí diíⁿ ní nuuⁿ'ndi.

Sta'a yā Jesús miiⁿ ní candéé yā preso

(Mt. 26.47-56; Mr. 14.43-50; Jn. 18.2-11)

⁴⁷Taachí Jesús indée yā neené n'dee' 'iiⁿ'yāⁿ ndaa yā ní saⁿ'ā chí nguuví Judas miiⁿ chí 'áámá chéé naachí ndiichuuví discípulos yeⁿ'é yā cueⁿ'é yā vmnááⁿ yeⁿ'ē 'iiⁿ'yāⁿ s'eeⁿ ní ndaa niiⁿ'nuúⁿ yā Jesús miiⁿ chí 'neeⁿ'cheendí yā. ⁴⁸Tuu'mi ní Jesús miiⁿ ní caⁿ'a yā chii yā saⁿ'ā: Díí, Judas, ¿'áá ndúúcu 'áámá beso ínaca'a di 'úú chí Saⁿ'ā chí Daiya Ndyuūs 'iiⁿ'yāⁿ?

⁴⁹Discípulos chí snée yā ndúúcu Jesús taachí snaaⁿ yā chí cuuvi, tuu'mi ní caⁿ'a yā chii yā Jesús: N'díí, Señor, ¿'áá 'caaca taaⁿ 'nū ndúúcu machete 'uúví lados 'caāiⁿ yeⁿ'ē yú?

⁵⁰Tuu'mi ní 'áámá chéé discípulos 'nuucá'ai yā 'áámá mozo yeⁿ'ē chiiduú ch'ēeté ca ní ch'iica yā veeⁿ sa lado tá cuaácú sa. ⁵¹Ní Jesús caⁿ'a yā: 'Āā ntéé 'cuuⁿ'miⁿ dí. 'Āā snée ra yā. Ní Jesús tuu'ví yā veeⁿ sa ní nduūvā yeⁿ'ē sa. ⁵²Cuayiivi ní Jesús caⁿ'a yā chii yā chiiduú n'gēete ndúúcu soldados chí capitanes chí diíⁿ sa cuidado yaācū templo ndúúcu 'iiⁿ'yāⁿ ndicúú chí ngaⁿ'ā

ntiiⁿ'nyúⁿ yā yeⁿ'e yaācū chí ndaa yā ndúúcu Judas miiⁿ: ¿'Áá ndaa ndís'tií ndúúcu machetes 'uúví lados 'caāiⁿ ndúúcu yáⁿ'á yeⁿ'e soldados tan'dúúca chí caⁿ'a ní cutá'a ní 'áámá chí duūcū? ⁵³Taachí caneé ndúúcu ndís'tií nguuví nguuví ná yaācū templo nguéé neⁿ'é ní cuta'á ní 'úú. Naati maaⁿ ní hora 'cūú chí yeⁿ'ē ndís'tií ti hora taachí maāiⁿ miiⁿ, chííⁿ chí yáá'n'guiinūuⁿ ngaⁿ'a ntiiⁿ'nyuⁿ sa.

Pedro miiⁿ ní ngaⁿ'a sa chí nguéé in'diichi sa Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tuu'mi ní 'iiⁿ'yāⁿ s'eeⁿ sta'a yā Jesús miiⁿ ní candéé yā Jesús va'ai yeⁿ'ē chiiduú ch'ēeté ca. Pedro miiⁿ ní ndáá yaⁿ'ai sa 'iiⁿ'yāⁿ. ⁵⁵Náⁿ'ā 'iiⁿ'yāⁿ tiiví yā yaⁿ'ā náávtaⁿ'ā ch'eva'ai ní ch'ēeté yā cuaaⁿ 'diituú yaⁿ'ā miiⁿ chí dicuutú yā. Pedro miiⁿ ní ch'iīndi sa ntúuⁿ sa ndúúcu 'iiⁿ'yāⁿ s'eeⁿ.

⁵⁶Tuu'mi ní 'áámá táⁿ'ā chí cáné caadi 'iīyū, n'diichí tá Pedro miiⁿ chí vee sa 'diituú na yaⁿ'ā. Ní n'giinu n'dai tá saⁿ'ā ní caⁿ'a tá: Sáⁿ'a 'cūú ní canee sa ndúúcu 'iiⁿ'yāⁿ chí preso yā.

⁵⁷Pedro miiⁿ ní caⁿ'a sa chí sa n'daātā miiⁿ: 'Úú nguéé in'diichí 'iiⁿ'yāⁿ miiⁿ.

⁵⁸Cuayiivi miiⁿ ní 'aama saⁿ'ā n'diichi n'dai sa ní caⁿ'a sa chí sa Pedro miiⁿ: Dii, ní ndúúcu di nguaaⁿ 'iiⁿ'yāⁿ s'eeⁿ. Pedro miiⁿ ní caⁿ'a sa chí sa saⁿ'ā miiⁿ: Nguēe 'úú.

⁵⁹Cho'ōo 'áámá hora, ní táámá yā ní caⁿ'a yā: Cuaacu níⁿ'nyúⁿ sáⁿ'a 'cūú ní canéé sa ndúúcu 'iiⁿ'yāⁿ chí preso yā ti sáⁿ'a 'cūú ní yeⁿ'ē yáⁿ'āa Galilea ntúuⁿ.

⁶⁰Pedro miiⁿ ní caⁿā sa chii sa saⁿā miiⁿ: Díí, sáⁿā, nguéé deenú chi ngaⁿā di. Taachí Pedro miiⁿ 'āā cuéé 'cuinu sa caⁿa sa chúū, tusáⁿā miiⁿ ní 'cai tī. ⁶¹Tuu'mi ní Jesús miiⁿ nguεεcundíí yā ní n'diichi yā Pedro. Pedro miiⁿ nán'gaācū sa nduudu chí caⁿa Jesús miiⁿ chii yā saⁿā 'túúcā: 'Áā 'iinu cúúví caaⁿmaⁿ dí chi nguéé n'diichi di 'úú, taachi 'āā cuéé 'caí 'áámá vmnéⁿēe tusáⁿā. ⁶²Tuu'mi ní Pedro miiⁿ ní can'dáa sa cuaaⁿ va'ai, ní chεecu taaví sa ti ya'ai staava yeⁿē sa.

Saⁿā s'eeⁿ ch'eⁿe sa Jesús

(Mt. 26.67-68; Mr. 14.65)

⁶³Sáⁿā s'eeⁿ chi diiⁿ cuidado Jesús miiⁿ chíⁿnyuⁿneeⁿ sa Jesús miiⁿ ní ch'eⁿe sá 'iiⁿyāⁿ. ⁶⁴Ní n'gaadi sa nduutináaⁿ yā ndúúcū 'aama tíínuuⁿ. Tuu'mi ní ch'eⁿe sá naaⁿ Jesús ní ngaⁿa sa ngii sa 'iiⁿyāⁿ: Dii, caaⁿmaⁿ di, ¿du'ú ch'eⁿē dii?

⁶⁵Ní neene cunncaā nduudu ngii sá Jesús.

Jesús nanááⁿ 'iiⁿntyéⁿē yeⁿe yaācū templo

(Mt. 26.59-66; Mr. 14.55-64; Jn. 18.19-24)

⁶⁶Taachí chidεeve táámá nguuvi, 'yaaⁿ n'dái 'iiⁿyāⁿ ndiicūú yeⁿe yáāⁿ miiⁿ chi ngaⁿa ntiinⁿnyuⁿ yā yeⁿe yaācū, ndúúcū chiiduú n'gεεtē, ndúúcū maestros chi ngi'cueéⁿ ley miiⁿ candée yā Jesús nanááⁿ 'iiⁿntyéⁿē yeⁿe yaācū templo.

⁶⁷Mííⁿ íntiinguunééⁿ yā Jesús: ¿Áá díí chí Cristo? Jesús miiⁿ nan'guεεcutaⁿa yā yeⁿe 'iiⁿyāⁿ s'eeⁿ: Ndúúti chi caaⁿmaⁿ chí 'tíícā, ní nguéé cu'téenu nī yeⁿé. ⁶⁸Nduuti chí 'úú ntiinguunééⁿ ndís'tií,

nguéé n'guεεcutaⁿa nī yeⁿé, ndíí nguéé ndúú n'dεechi ra nī 'úú.

⁶⁹Naati hora chi cuchii ní Saⁿā chí Daiya Ndyuūs ní 'cuūndi sa lado yeⁿe honor yeⁿé Ndyuūs chí véé tanducueⁿē poder yeⁿe yā.

⁷⁰Tanducueⁿē 'iiⁿyāⁿ s'eeⁿ caⁿa yā: ¿Áá dii Daiya Dendyuūs miiⁿ? Ní Jesús ní caⁿa yā: Nds'tií maáⁿ nī ngaⁿa nī chí 'úú ní 'tíícā.

⁷¹Tuu'mi ní 'iiⁿyāⁿ s'eeⁿ ní caⁿa yā: ¿De'ē cá nduudu cuaacu yeⁿe 'iiⁿyāⁿ chí neⁿe yú? Tí maāⁿ yú chíiindiveeⁿ cuaacú yú nduudu chí caⁿa sa.

Jesús nanááⁿ gobernador Pilato

(Mt. 27.1-2, 11-14; Mr. 15.1-5; Jn. 18.28-38)

23 Tuu'mi ní nducyaaca 'iiⁿyāⁿ ní candεε yā Jesús miiⁿ nanááⁿ gobernador Pilato. ²Ní tuc'a yā caⁿa yā nuuⁿndi yeⁿē Jesús miiⁿ ní caⁿa yā: Inndaacá 'nū sáⁿa 'cūū chí diiⁿ sa chí 'iiⁿyāⁿ nguéé i'téenu yā chí ngaⁿa ley yeⁿé 'nū. Ní nguéé neⁿe sa chí nadí've 'nū yeⁿe yáⁿāa emperador César tan'dúúcā chí ngaⁿa ley yeⁿé nī. Ní sáⁿa 'cūū ní ngaⁿā sa chí maāⁿ sa chí Cristo, chí Rey yeⁿé 'nū.

³Tuu'mi ní saⁿā Pilato miiⁿ ní itiinguunééⁿ sa Jesús: ¿Áá dii chí Rey yeⁿe 'iiⁿyāⁿ Israel s'eeⁿ? Jesús nan'guεεcutaⁿa yā: N'dií ngaⁿā cuaacú nī ti 'tíícā.

⁴Pilato miiⁿ ní caⁿa yā chii yā chiiduú n'gεεtē ndúúcū 'iiⁿyāⁿ s'eeⁿ: 'Úú nguéé inndaacá mar 'áámá nuuⁿndi yeⁿe sáⁿa 'cūū.

⁵'Iiⁿyāⁿ s'eeⁿ ní diitu n'dái 'cai yā: Sáⁿa 'cūū ní idiíⁿ sa chí 'iiⁿyāⁿ n'g'éécú cheendi yā nguaaⁿ maaⁿ yā ndúúcú chí ngi'cueeⁿ yā nī

ngi'cueeⁿ yā nuuⁿ máⁿ yáⁿ āa Judea ndíí na yáⁿ āa yeⁿ ē Galilea ndii 'muuⁿ.

Jesús nanááⁿ rey Herodes

⁶Tuu'mi ní Pilato, taachi ch'iindiveéⁿ yā chi Jesús cheⁿ e yā ndii yáⁿ āa yeⁿ e Galilea, ní ntiinguuneéⁿ yā Jesús nduuti chi yeⁿ e yáⁿ āa yeⁿ e Galilea. ⁷Ní taachí Pilato ch'iindiveeⁿ sa chi Jesús miiⁿ ní yeⁿ ē yáⁿ āa Galilea yeⁿ e yáⁿ āa naachi rey Herodes ngaⁿ a ntiinyúⁿ yā, Pilato miiⁿ ngaⁿ a ntiinyúⁿ yā chi Jesús caⁿ a yā nanááⁿ rey Herodes tii canée yā na yāáⁿ Jerusalén nguuví miiⁿ.

⁸Taachí rey Herodes n'díichi sa Jesús miiⁿ, neené yeenú sa ti 'āā 'nááⁿ n'dai tiempo néⁿ é sá snaaⁿ sa Jesús. Tí néené n'deē 'nááⁿ chí ch'iindiveeⁿ sa yeⁿ ē yā ní canée ngíínú sá chí snaaⁿ sa 'áámá vaadi n'giinu chi dííⁿ Jesús miiⁿ. ⁹Néené n'deē 'naaⁿ chí ntiingūūneeⁿ sa Jesús miiⁿ, naati nguéeⁿ de'ē vee nan'guuecútaⁿ a Jesús. ¹⁰Tuu'mi ní miiⁿ canee ntuuⁿ chiiduú n'geeté ndúúⁿ cū maestros chí ngi'cuéeⁿ ley miiⁿ chí n'deē 'nááⁿ n'dai ngaⁿ a yā chí nuuⁿ ndi yeⁿ ē Jesús. ¹¹Tuu'mi ní Herodes ndúúⁿ cū soldados yeⁿ e yā chi'nuuⁿ yā 'áámá tiinūⁿ n'dái tan'dúúⁿ cā catecai rey Jesús miiⁿ ní chiiⁿ nyuⁿ neeⁿ yā Jesús miiⁿ ní cunncaā caⁿ a yā yeⁿ e Jesús miiⁿ. Cuayiivi ní dicho'o ntúuⁿ yā Jesús nanááⁿ Pilato miiⁿ. ¹²Ndíí nguuví miiⁿ tuu'mi ní Pilato ndúúⁿ cū Herodes naaⁿ n'daá n'dai yā ndúúⁿ cū vi'í ti cuááⁿ vmnaaⁿ ní nguéeⁿ n'diichi yā vi'í.

Pilato nca'a sa Jesús chí 'cuūvi

(Mt. 27.15-26; Mr. 15.6-15; Jn. 18.39-19.16)

¹³Tuu'mi ní Pilato nduuvidaamá yā chiiduú n'geeté ndúúⁿ cū 'iiⁿ ntyéⁿ e ndúúⁿ cū nducyaaca 'iiⁿ yāⁿ yeⁿ ē yāáⁿ Jerusalén miiⁿ. ¹⁴Ní caⁿ a yā chii yā 'iiⁿ yāⁿ s'eeⁿ: Ndís'tii ní ndaá nī chí 'cúúⁿ nī sáⁿ a 'cūú chí diiⁿ sa chí 'iiⁿ yāⁿ ní nguéeⁿ n'geetinéeⁿ 'diiⁿ yā ndúúⁿ cū chí ngi'cueeⁿ sa. Taachí intiinguuneéⁿ saⁿ ā nanááⁿ ndís'tii nguéeⁿ nindaācá mar 'áámá nuuⁿ ndi yeⁿ ē sa chí ngaⁿ a ndís'tii yeⁿ ē sa. ¹⁵Ndíí nguéeⁿ ndúú rey Herodes miiⁿ ndaāca yā nuuⁿ ndi yeⁿ ē sáⁿ a 'cūú chí canée chí 'cuūvi sa ti Herodes 'āā dicho'ó yā sáⁿ a 'cūú nanaáⁿ. Sáⁿ a 'cūú nguue diiⁿ sa nuuⁿ ndi ch'εεte chí 'cuūvi sa. ¹⁶Maaⁿ ní dííⁿ 'cueⁿ é saⁿ ā miiⁿ ní cuáyíívi n'deē chí saⁿ ā.

¹⁷Canée 'áámá costumbre yeⁿ é nī chí gobernador canee chí n'deēchi yā 'áámá preso 'viicu pascua ní gobernador Pilato miiⁿ ní canée yā diiⁿ yā 'tíicā. ¹⁸Nducyáácá 'iiⁿ yāⁿ 'cai yā: N'deēchii nī saⁿ ā chí ngúúvi Barrabás. Ní 'āā 'cuuvi rá sáⁿ a 'cūú.

¹⁹Barrabás miiⁿ canúúⁿ sá vácūú chí diiⁿ sa chí 'iiⁿ yāⁿ yeⁿ e yāáⁿ Jerusalén miiⁿ ní 'cuuⁿ m'íⁿ yā contra yeⁿ e gobierno ní ch'iiⁿ nuⁿ sa 'áámá tináⁿ ā. ²⁰Gobernador Pilato miiⁿ ní neⁿ e sa n'deēchi sa Jesús, ní caⁿ a sa chii sa 'iiⁿ yāⁿ s'eeⁿ taama vmnéⁿ ēe chí n'deēchi sá Jesús. ²¹Naati 'iiⁿ yāⁿ s'eeⁿ 'cai ntúuⁿ yā: Cu'néeⁿ nga'á nī saⁿ ā, cu'néeⁿ nga'á nī saⁿ ā.

²²Gobernador Pilato miiⁿ ní caⁿ a ntúuⁿ yā ndii chiiⁿ ndii 'íínú cuuvi: ¿D'ē'ē chí nguéeⁿ n'daācā ndííⁿ sáⁿ a 'cūú? 'Úú nguéeⁿ inndaācá mar 'áámá

núúⁿndí ch'εεte yeⁿē sa chi 'cuūvi sa. 'Úú ní ca'á orden chí ch'eⁿé yā sáⁿa 'cūū ní n'dεεchí sáⁿa 'cūū.

S'nééⁿnga'á yā Jesús

²³Iiⁿyāⁿ s'eeⁿ chí canndii cá yā 'cai yā chí chiica yā chí cu'neeⁿngá'āa Jesús miiⁿ. Ní 'iiⁿyāⁿ s'eeⁿ ndúúcu chiiduú n'geeté diituú n'dái ca 'cai yā. ²⁴Tuu'mi ní gobernador Pilato miiⁿ ní ca'a yā orden chí diiⁿ yā tan'dúúca chí neⁿe 'iiⁿyāⁿ s'eeⁿ. ²⁵Ní n'dεεchi yā saⁿā chí nguuvi Barrabás miiⁿ chí canúúⁿ vácūū. Sáⁿā miiⁿ ní diiⁿ sa chí 'cuuⁿmíⁿ 'iiⁿyāⁿ yeⁿe Israel contra yeⁿe gobierno ní 'niiⁿnuⁿ sa 'áámá tináⁿā. Sáⁿa 'cūū chí chiica 'iiⁿyāⁿ s'eeⁿ chí n'dεεchí yā saⁿā. Ní nca'a yā Jesús miiⁿ chí soldados cu'neeⁿnga'a sa tan'dúúca chí neⁿe 'iiⁿyāⁿ s'eeⁿ.

Yeⁿē chí cu'neeⁿnga'á yā Jesús

(Mt. 27.32-44; Mr. 15.21-32; Jn. 19.17-27)

²⁶Taachí cueⁿe yā cuaaⁿ cyúúni miiⁿ ndúúcu Jesús miiⁿ, soldados sta'á yā 'áámá saⁿā yeⁿe yáⁿāa Cirene chí nguuvi sa Simón. Saⁿā miiⁿ ní yúúni canuuⁿ sa chí cueⁿe sa cuεeti. Soldados a fuerza di'cuúftu yā Simón miiⁿ chí candée sa cruz yeⁿe Jesús miiⁿ ní cueⁿe sa cuaaⁿ daami Jesús miiⁿ.

²⁷Nééⁿé 'yaaⁿ 'iiⁿyāⁿ yeⁿe yáāⁿ Jerusalén miiⁿ cueⁿe yā n'dáa yā Jesús miiⁿ ndúúcu n'daataá chí diituu ngeecu yā ní ya'ai yā cáávā Jesús miiⁿ. ²⁸Jesús miiⁿ ní ch'íínu yā n'daataá s'ééⁿ ní caⁿa yā chii yā táⁿā s'eeⁿ: Ndís'tiī, daiya 'iiⁿyāⁿ yeⁿe yáāⁿ Jerusalén, nguéé cuεecu ní cáávā 'úú, naati cuεecu ní cáávā

maáⁿ ní ní caavā daiya ní. ²⁹Ti ndaá nguuvi chí caaⁿmaⁿ 'iiⁿyāⁿ: ¿De'ē chúúca n'dai n'daataá chí nguéé ncuuvi daiya tá ní n'daataá chí nguéé ntaavi daiya tá ní n'daataá chí nguéé daiya tá chí ca'a ta daiya tá chí chiicu? ³⁰Tuu'mi ní 'iiⁿyāⁿ s'eeⁿ tucá'a yā caⁿa yā 'tuucā: Díí yīicū cun'daá nduú ní vmnaaⁿ yeⁿé 'nū. Caⁿa ntúuⁿ yā chii yā yīicū n'gaiyāá: Cun'díí neeⁿ dí nús'uu. ³¹Caati ndúúti chí 'iiⁿyāⁿ chí taaⁿ yā 'caaca yā yáⁿá cueé chí tan'dúúca 'úú, ¿'áá nguéé caniicu cá yā 'caaca yā yáⁿá chí cuuⁿmaⁿ chí tan'dúúca ndís'tiī? 'Tíícā ngaⁿa Jesús.

³²Nguuvi miiⁿ ní candée ntúuⁿ yā na 'uuvi saⁿā chí n'giiⁿnuⁿ 'iiⁿyāⁿ chí cu'neeⁿnga'a yā saⁿā s'eeⁿ dáámá ndúúcu Jesús miiⁿ. ³³Taachí ndaa yā lugar yeⁿé 'áámá yīicū 'lííⁿ chí nguuvi Calavera, miiⁿya chí'nééⁿnga'a yā Jesús miiⁿ ndúúcu nduu 'uúvⁿ saⁿā chí n'giiⁿnuⁿ 'iiⁿyāⁿ, 'áámá sa lado ta cuaacú Jesús miiⁿ, ní táámá sá lado tá 'cueé yā. ³⁴Tuu'mi ní taachi snée yā i'neeⁿnga'á yā, Jesús miiⁿ caⁿa yā: N'dii, Chiidá, nadich'εecu ní yeⁿe saⁿā s'uuⁿ caati nguεε déénu sá de'ē chí 'túúca idiiⁿ sa. Tuu'mi ní soldados tun'dáa sa suerte na catecai Jesús chí ca'ā sa 'áámá sá ndúúcu taama sa. ³⁵Iiⁿyāⁿ yeⁿe yáāⁿ Jerusalén miiⁿ snée yā n'giinu yā níícu 'iiⁿntyéⁿé n'giiⁿnyuⁿneéⁿ yā Jesús miiⁿ. Ní ngaⁿa yā ngii yā yeⁿe Jesús: Sáⁿa 'cūū ní nadanguáⁿai sa tanáⁿā 'iiⁿyāⁿ. ¿De'ē cuuvi chí nguéé nadinguáⁿai maāⁿ sa saⁿā nduuti chí saⁿā miiⁿ chí Cristo chí Ndyuūs dicho'ó yā? ³⁶Tiicá ntúūⁿ soldados n'giiⁿnyuⁿneeⁿ sa Jesús miiⁿ. Cheⁿe

niⁿnúⁿ yā ní ca'a yā vinagre. ³⁷Ní caⁿa yā chii yā Jesús miiⁿ: Ndúúti chí díí chí Rey yeⁿe 'iiⁿ'yāⁿ Israel, nadanguáⁿ'ai maāⁿ di díí.

³⁸Ní canéé nguūⁿ na tiiⁿ cruz yeⁿe Jesús miiⁿ nduudu griego ndúúcu nduudu latín ndúúcu nduudu hebreo, chí ngaⁿ'a: Sáⁿ'a 'cūū Rey yeⁿe 'iiⁿ'yāⁿ yeⁿe ndaata Israel.

³⁹Áámá chee saⁿ'ā chí véé nuuⁿ'ndi yeⁿe sa chí ca'nééⁿ'nga'a yā 'áámá lado yeⁿe Jesús cunncaā caⁿ'a sa ní caⁿ'a sa chí sa Jesús: Ndúúti chí dii chí Cristo miiⁿ nadinguáⁿ'ai di maaⁿ di ní nadinguáⁿ'ai ntuuⁿ di nús'uu.

⁴⁰Táámá saⁿ'ā chí cu'nééⁿ'nga'a yā táámá lado yeⁿe Jesús 'caa'va sa ndúúcu sáⁿ'a 'cūū ní caⁿ'a sa chí sa saⁿ'ā: Díí 'ááa nguéé 'va'a di Ndyuūs? Dii ní dáámá condenado ndúúcu nús'uu. ⁴¹S'uúⁿ ní cuaacu níⁿ'nyúⁿ n'geenu yú ngii ti véé nuuⁿ'ndi yeⁿe yú chí nadíⁿ'vē yú nuuⁿ'ndi yeⁿe yú naati sáⁿ'a 'cūū nguéé dē'ē vee nuuⁿ'ndi dííⁿ sa.

⁴²Saⁿ'ā miiⁿ ní caⁿ'a sa chí sa Jesús miiⁿ: N'diī, Jesús, n'gaacú nī yeⁿe 'úú taachí ndaá nī naachi caaⁿ'maⁿ ntiiⁿ'nyuⁿ yeⁿe.

⁴³Tuu'mi ní Jesús miiⁿ caⁿ'a yā chí yā saⁿ'ā: Cuaacu níⁿ'nyúⁿ ngaⁿ'ā ngíí dii, ti maaⁿ ní cunee di nduucú na lugar chí nguuvi paraíso.

Jesús ch'ii yā

(Mt. 27.45-56; Mr. 15.33-41; Jn. 19.28-30)

⁴⁴Taachí chí maⁿ'a nguuvi chí maāiⁿ núúⁿ'máⁿ íⁿ'yeeⁿ'di ndíí taanduū n'gēecu 'ínú chíinū.

⁴⁵Yáⁿ'ā ní nduuvi maāiⁿ ní cortina yeⁿe yaacū templo nda'ai náávtáⁿ'ā.

⁴⁶Tuu'mi ní Jesús miiⁿ 'cai yā: N'diī, Chiidá, na ta'á nī cu'nééⁿ espíritu

yeⁿe. Ch'ínú caⁿ'a yā chuū, ní Jesús ch'ii yā.

⁴⁷Taachí saⁿ'ā chí ngaⁿ'a ntiiⁿ'nyuⁿ yeⁿe soldados romanos n'diichi sa chí chí Jesús, tuu'mi ní caⁿ'a sa: Dē'ē chúúca ch'ēete Ndyuūs. Cuaacu níⁿ'nyúⁿ sáⁿ'a 'cūū saⁿ'ā chí nguéé nuuⁿ'ndi yeⁿe sa.

⁴⁸Nducyáácá 'iiⁿ'yāⁿ chí cheⁿe yā ní n'diichi yā chí chí, nguēcundíi yā cheⁿe niⁿ'nuⁿ yā taachi cueⁿ'é yā vaacu yā. ⁴⁹Ní nducyáácá 'iiⁿ'yāⁿ chí n'diichí yā Jesús miiⁿ, ndúúcu n'daataá chí cheⁿe ndúúcu Jesús miiⁿ ndii yáⁿ'āa yeⁿe Galilea, ch'ēetinéé yaⁿ'ai yā ch'ínú yā denduū chí 'túúca.

Ch'iiichi yā Jesús

(Mt. 27.57-61; Mr. 15.42-47; Jn. 19.38-42)

⁵⁰Véé 'áámá saⁿ'ā chí n'dai ní n'daacā sa chí ngúúví sá José. Sáⁿ'ā miiⁿ ní saⁿ'ā ch'ēete yeⁿe 'iiⁿ'ntyéⁿ'ē ch'ēete yeⁿe 'iiⁿ'yāⁿ Israel. ⁵¹Saⁿ'ā miiⁿ ní yeⁿe yāⁿ Arimatea chí yáⁿ'āa yeⁿe 'iiⁿ'yāⁿ Israel. Ní saⁿ'ā nguéé ndúúvídaama sa ndúúcu tanáⁿ'ā 'iiⁿ'ntyéⁿ'ē ti nguéé canee yiinú sa ndúúcu chí dííⁿ yā. Tí saⁿ'ā miiⁿ canee ngínú sá tiempo chí Ndyuūs ndaa yā iⁿ'yeeⁿ'dí 'cūū ní ngaⁿ'a ntiiⁿ'nyúⁿ yā. ⁵²Ní cueⁿ'e sa ndaa sa nanááⁿ gobernador Pilato ní chiica sa cuerpo yeⁿe Jesús miiⁿ. ⁵³Cuayiivi taachi José ndivíi sa cuerpo yeⁿe Jesús na cruz ní ch'ēecu sa áámá sámana na cuerpo yeⁿe yā tan'dúúca costumbre yeⁿe 'iiⁿ'yāⁿ Israel ní ch'iiichi sa na 'áámá yáinyāⁿ ngai chí din'dái yā ch'ēeti yiivi yaava naachí mar 'áámá 'iiⁿ'yāⁿ nguéé nnúⁿ yā. ⁵⁴Nguuvi miiⁿ ní nguuvi viernes chí 'iiⁿ'yāⁿ

ch'iindiyaáⁿ yā tanducueⁿē cáávā 'viicu pascua ní cáávā nguuvi chi cucuⁿ chí sábadu chi nguuvi chi ntaaviⁿtuunúⁿ 'iiⁿyāⁿ Israel.

⁵⁵N'daata s'eeⁿ chí can'daa Jesús ndii na yáⁿāa Galilea, cueⁿe tá ní n'diichi tá yáinyāⁿ ní táácā canuúⁿ cuerpo yeⁿe Jesús. ⁵⁶Ní taachí n'daataá s'eeⁿ ndaa tá vaacu tá, n'nuuⁿ tá perfumes ndúúcū pomadas chi n'deévé ngeeⁿ. Ní nguuvi cuayiivi, ní nguuvi sábadu chi ntaaviⁿtuunúⁿ 'iiⁿyāⁿ tan'dúúcū chí ngaⁿa ley yeⁿe yā.

Jesús nanduuchi yā yeⁿe nguuaⁿ tináⁿā

(Mt. 28.1-10; Mr. 16.1-8; Jn. 20.1-10)

24 Nguuvi domingo chi maaⁿ ní nguuvi vmnááⁿ vmaaaⁿ yeⁿe ndeete, tyaaⁿ n'dái cueⁿe n'daataá s'ééⁿ ní cueⁿe yā ndúúcū tanáⁿā n'daataá. Candéε yā especias chí dεévé ngeéⁿ chí 'āā véé yaáⁿ yā. ²Taachí ndāa yā na yáinyāⁿ miiⁿ, 'āā ntéé tuúú ch'εeté miiⁿ na cheendi yáinyāⁿ ti canee 'aama lado. ³Tuu'mi ní taachí sndaá yā cheeti yáinyāⁿ miiⁿ, nguéé ndaacá yā cuerpo yeⁿe Jesús. ⁴Taachí n'diichi yā chuū, ní dii'yá yā chi, tuu'mi ní neééⁿ na 'uuvi saⁿā 'diituú yā ndúúcū catecai chí dεévé ngii. ⁵Ní n'daataá s'eeⁿ dii'ya n'dai yā chí ní n'diichi yā ndii na yáⁿāa. Saⁿā s'eeⁿ ní caⁿa sa: ¿Dε'ε cuuví chí in'nuúⁿ nī 'iiⁿyāⁿ chí candúúchí yā yeⁿe nguuaⁿ tináⁿā? ⁶Iiⁿyāⁿ miiⁿ ní 'āā ntéé canee yā 'muuⁿ. 'Āā nduuchi yā nguuaⁿ tináⁿā. N'gáácū nī yeⁿe nduudu chí caⁿa yā taachi canee yā ndúúcu nī na yáⁿāa Galilea taachí 'āā cuéé 'cuuvi yā. ⁷Ní Jesús

miiⁿ ní caⁿa yā chí yā ndís'tii: 'Úú Saⁿa chí Daiya Nduuús ní 'iiⁿyāⁿ canee chí nca'á yā 'úú ta'ā 'iiⁿyāⁿ chí dinuuⁿndí yā. Ní 'iiⁿyāⁿ s'eeⁿ cu'neeⁿnga'á yā 'úú; naati ndiichi ndii 'línú nguuvi 'úú nduuchi yeⁿe nguuaⁿ tinaⁿā.

⁸Tuu'mi ní n'daata s'eeⁿ n'gaacu tá yeⁿe nduudu yeⁿe Jesús miiⁿ. ⁹Ní cueⁿe tá yeⁿe yáinyāⁿ ní cunaⁿā ta ní caⁿā tá chí tá ndu'u ndiicháámá apóstoles ndúúcū tanáⁿā 'iiⁿyāⁿ chí snée yā miiⁿya. ¹⁰N'daata s'eeⁿ chí caⁿa ta chí tá apóstoles ní ta María yeⁿe yáāⁿ Magdala, ndúúcū ta Juana, ndúúcū tá María chí chεecuú Jacobo, ndúúcū tanáⁿā n'daata s'eeⁿ. ¹¹Apóstoles ní nadicadiinúúⁿ yā chí táⁿā s'eeⁿ ní loca tá cáávā chí ngaⁿa tá. Ní nguéé s'téénu yā nduudu yeⁿe tá.

¹²Tuu'mi ní Pedro miiⁿ ní ncueeⁿ sa ní cueⁿe sa ngéenu sa na yáinyāⁿ. Taachí ndaā sa, tuu'mi ní n'diichi núúⁿ sa cheeti yainyāⁿ ní 'āā dámaaⁿ sábanas canee miiⁿ. Saⁿā ní cueⁿe yiinu sá yeⁿe chí chó'oo ní cunaⁿā sa na vaacu sa.

Saⁿā s'eeⁿ ní cueⁿe sa cuaaⁿ cyúúni chí ngeⁿe cuaaⁿ na yāāⁿ Emaús

(Mr. 16.12-13)

¹³Nguuvi míⁿ nūuⁿ, 'uuvi saⁿā s'eeⁿ cueⁿe yā 'áámá yāāⁿ 'lín' chí nguuvi Emaús chí canee taanduú ndiichúúví kilómetros yeⁿe yāāⁿ Jerusalén. ¹⁴Ní taachí cueⁿe yā cuaaⁿ cyúúni ní índee yā yeⁿe tanducueⁿē dendu'ū chí chí. ¹⁵Nááⁿ chí índee yā ní itiinguuneeⁿ vi'í yā, maaⁿ Jesús miiⁿ ndaa niiⁿnúⁿ yā ní cueⁿe yā ndúúcū 'iiⁿyāⁿ s'eeⁿ. ¹⁶Taachí n'diichi yā Jesús miiⁿ nguéé

iintiinaaⁿ yā 'iiⁿ'yāⁿ. ¹⁷ Jesús caⁿ'a yā chii yā 'iiⁿ'yāⁿ s'eeⁿ: ¿De'e índee ndís'tii? ¿De'e cuuvi tátií ndaachi yiinú ní?

¹⁸ Saⁿ'ā chi nguuvi Cleofas nan'guεεcútaⁿ'a yā. ¿Áá díí, 'áámá n'dyáⁿ'ā dii chi canuuⁿ di yúúni na yááⁿ Jerusalén chi nguée déenu di de'é chií nguuvi s'eeⁿ na yááⁿ Jerusalén miiⁿ?

¹⁹ Tuu'mi ní Jesús caⁿ'a yā chii yā 'iiⁿ'yāⁿ s'eeⁿ: ¿De'é chií yááⁿ miiⁿ'ya? 'Iiⁿ'yāⁿ s'eeⁿ ní caⁿ'a yā: Jesús yeⁿ'e yááⁿ Nazaret, chi 'áámá saⁿ'ā profeta ní dííⁿ yā 'áámá ntiíⁿ'nyuⁿ n'dai ndúúcu poder. Ní dííⁿ yā n'dee n'dái vaadi n'giinu ní ngaⁿ'a yā nduudu yeⁿ'é Ndyuūs nanááⁿ Ndyuūs ní nanááⁿ nducyaaca 'iiⁿ'yāⁿ. ²⁰ Chiiduú n'gεeté ndúúcu 'iiⁿ'ntyéⁿ'ē yeⁿ'ē yú tun'dáa nuuⁿ'ndi yeⁿ'e Jesús ní nca'a yā Jesús 'iiⁿ'yāⁿ ní caⁿ'a yā chí 'cuuvi yā. Níciú s'neeⁿ'nga'á yā Jesús. ²¹ Nús'uu ní snée yúúni 'nū ní cunee ngiinú 'nū chí sáⁿ'a 'cūú ní nadinguáⁿ'ai sa 'iiⁿ'yāⁿ yeⁿ'é nación Israel chi nación yeⁿ'é 'nū. Maaⁿ ní 'iinū nguuvi chí chií chuú.

²² Ní ná nduuvi n'daataá chí chiicá yā dáámá nduucú 'nū cheⁿ'é yā tyaaⁿ na yáinyāⁿ ní cueⁿ'e yíínú 'nū. ²³ Ní ndaá yā nanaáⁿ 'nū ní caⁿ'a yā chi nguée ndaaca yā cuerpo yeⁿ'e Jesús miiⁿ. Ní n'diichí yā nduuvi ángeles chí caⁿ'a yā chii yā 'iiⁿ'yāⁿ s'eeⁿ chí Jesús miiⁿ 'āá nduuchí yā yeⁿ'e nguaaⁿ tináⁿ'ā. ²⁴ Ni cheⁿ'é n'duuvi saⁿ'ā chi chiicá nduucú 'nū na yáinyāⁿ ní ndaāca sa tan'dúúca chí ngaⁿ'a n'daataá s'eeⁿ naati nguée n'diichi sa Jesús.

²⁵ Tuu'mi ní Jesús caⁿ'a yā chii yā saⁿ'ā s'eeⁿ: De'e chúúca vaadicadínūuⁿ yeⁿ'e ndís'tii ndúúcu staava yeⁿ'e ní chí cheechi chí nguée s'téenu ní

tanducuéⁿ'ē chí caⁿ'a saⁿ'ā profetas. ²⁶ ¿Áá nguée canee nguūⁿ na libro yeⁿ'é Ndyuūs chí Cristo miiⁿ canée chí 'cuenú yā cuuvi cosas chí 'túúca ní cuayiivi mííⁿ cunaⁿ'á yā ná va'ai cheeti nguuvi?

²⁷ Tucá'a Jesús caⁿ'a yā yeⁿ'e tanducuéⁿ'ē chí canée nguūⁿ na libro yeⁿ'é Ndyuūs ndíí taachí dinguuⁿ Moisés ndúúcu chí dingúúⁿ nducyaaca profetas. Ní ngaⁿ'a Jesús yeⁿ'e chí dingúúⁿ yā yeⁿ'é Cristo ndíí cuááⁿ vmnaaⁿ yeⁿ'e chí canée chí chó'oo yeⁿ'é yā.

²⁸ Tuu'mi ní taachi ndaá yā na yááⁿ 'lín' chí cueⁿ'e yā, Jesús miiⁿ ní dííⁿ yā chí candiicá ca yā. ²⁹ Saⁿ'ā s'eeⁿ di'cuútu sa Jesús chí canee yā ndúúcu sa, ní caⁿ'a sa chí sa Jesús: N'dii cunee ní nduucú 'nū, ti cuuvi chíínū yeⁿ'e ní. 'Áá cuée cuuvi 'da'á. Tuu'mi ní Jesús cueⁿ'e yā ndúúcu saⁿ'ā s'eeⁿ cuaaⁿ cheeti va'ái ní canee yā ndúúcu sa.

³⁰ Taachí Jesús miiⁿ vee yā na mesa ní che'é yā ndúúcu 'iiⁿ'yāⁿ s'eeⁿ, tuu'mi ní sta'á yā pan ní caⁿ'angua'á yā ní ca'a yā gracias Ndyuūs caavā pan miiⁿ. Ní n'dee yā pan ní ca'a yā 'iiⁿ'yāⁿ s'eeⁿ.

³¹ Tuu'mi nūuⁿ saⁿ'ā s'eeⁿ iintiinaaⁿ sa Jesús miiⁿ, naati Jesús ndaanaáⁿ yā yeⁿ'e saⁿ'ā s'eeⁿ. ³² Ní saⁿ'ā s'eeⁿ ngaⁿ'a sa ngii sa vi'i: ¿Áá nguée chicadiinuuⁿ yú na staava yeⁿ'e yú chí ya'ai taachi snúuⁿ yú yúúni taachí índee yā ndúúcu yú, ní ngi'cueéⁿ yā nduudu yeⁿ'é Ndyuūs s'uuúⁿ?

³³ Hora mííⁿ nūuⁿ nducueeⁿ sa ní cunaⁿ'á sa na yááⁿ Jerusalén. Ní ndaaca sa ndu'ū ndiicháámá apóstoles ndúúvidaama yā ndúúcu tanáⁿ'ā 'iiⁿ'yāⁿ chí snée yā ndúúcu yā. ³⁴ 'Iiⁿ'yāⁿ s'eeⁿ ní ngaⁿ'a yā nguaaⁿ mááⁿ yā: Cuaacu níⁿ'nyúⁿ Jesús nduuchi yā

nguaaⁿ tináⁿā ní che'enaáⁿ yā yeⁿe
Simón.

³⁵Tuu'mi ní 'uuvi saⁿā s'eeⁿ ní caⁿa
yā táácā chii yúúni chí cueⁿe yā. Tii
ní iintiinaáⁿ Jesús miíⁿ taachí n'deé
yā pan.

**Jesús che'enaáⁿ yā yeⁿe discípulos
yeⁿe yā**

(Mt. 28.16-20; Mr. 16.14-18; Jn. 20.19-23)

³⁶Taachí saⁿa s'eeⁿ ngaⁿa sa chuū,
Jesús miíⁿ ní cheⁿe naáⁿ yā naavtaⁿa
'iiⁿyāⁿ s'eeⁿ ní caⁿá yā chii yā 'iiⁿyāⁿ
s'eeⁿ: Cuuví 'diiíⁿ ndúúcu ndís'tii.

³⁷Tuu'mi ní 'iiⁿyāⁿ s'eeⁿ dii'yā yā
chii ti nadicádíínuuⁿ yā chí n'diichi
yā 'aama espíritu. ³⁸Naati Jesús miiⁿ
caⁿá yā chii yā 'iiⁿyāⁿ s'eeⁿ: ¿De'ē
cúuví chí dii'yā nī chii? ¿De'ē cúuví
chí 'tíicā nadacádíínuuⁿ nī na staava
yeⁿe nī? ³⁹Cuin'diichí nī taá ndúúcu
ca'á. 'Úú maáⁿ chuū. Cuituu'ví nī
'úú. Cuin'diichí nī. 'Úú nguéé 'aama
espíritu tan'dúúcā chí nadacádíínuuⁿ
nī. 'Áámá espíritu nguéé 'iini ní nguéé
yuutē tan'dúúcā chí inaaⁿ ndís'tii chí
véé yeⁿe 'úú.

⁴⁰Taachi Jesús caⁿa yā nduudú
'cūú, chíⁿi yā ta'a yā ndúúcu ca'a yā.

⁴¹Naati 'iiⁿyāⁿ s'eeⁿ ní nguéé s'téenu
yā ti yeenú ndai yā ní ngeⁿe yiinu yā.
Ní cáávā chuū Jesús caⁿa yā chii yā
'iiⁿyāⁿ s'eeⁿ: ¿Áá nguéé de'ē ve'e muuⁿ
chí che'e yú?

⁴²Tuu'mi ní ca'a yā 'áámá tááⁿ 'yaācā
ndúúcu 'aama taaⁿ va'ai ndí'i. ⁴³Cristo
miiⁿ ní sta'a yā ní che'e yā nanááⁿ
'iiⁿyāⁿ s'eeⁿ. ⁴⁴Ní caⁿa yā chii yā 'iiⁿyāⁿ
s'eeⁿ: Ndúúdu 'cūú caⁿá taachi canéé
ndúúcu ndís'tii. Canéé chí cúuví
cuaacu tanducuéⁿē dendu'ū chí canéé
nguūⁿ yeⁿe 'úú na libro yeⁿe Ndyuūs
chí canéé nguūⁿ na ley yeⁿe Moisés

ndúúcu yeⁿe profetas ndúúcu yeⁿe
salmos.

⁴⁵Tuu'mi ní Jesucristo diiⁿ yā chí
tuumicadiinuuⁿ 'iiⁿyāⁿ s'eeⁿ chí
canéé nguūⁿ na libro yeⁿe Ndyuūs.

⁴⁶Ní caⁿa yā chii yā 'iiⁿyāⁿ s'eeⁿ:

'Tíicā canéé yeⁿe 'úú chí Cristo
'úú. 'Tíicā canee chí 'cuenú cuuvi
ní 'cuúví. Ní nduuchí yeⁿe nguaaⁿ
tináⁿā ndii chí ndii 'íínú nguuvi.
⁴⁷Ní 'iiⁿyāⁿ s'eeⁿ canéé chí caaⁿmaⁿ
yā nduudu miiⁿ chí ndaacadaami
'iiⁿyāⁿ yeⁿe nuuⁿndi yeⁿe yā
vmnaaⁿ núúⁿmáⁿ na yāāⁿ ní Ndyuūs
nadach'εécú yā nuuⁿndi yeⁿe yā
cáávā chí duuchí. Ní vmnááⁿ vmnaaⁿ
nanááⁿ 'iiⁿyāⁿ yeⁿe yāāⁿ Jerusalén.
Cuayiivi yeⁿe 'iiⁿyāⁿ yeⁿe núúⁿmáⁿ
naciones yeⁿe iⁿ'yeeⁿdí. ⁴⁸Ndís'tii
ní cuuví nī testigos yeⁿe chuū ti
n'diichí nī chuū ní canéé chí caaⁿmáⁿ
nī 'iiⁿyāⁿ. ⁴⁹Cuin'diichí nī. 'Úú
dicho'ó Espíritu N'dai yeⁿe Ndyuūs
chí caⁿā Chiidá chí ndaā nanááⁿ
ndís'tii. 'Cuεetinéé nuúⁿ nī na yāāⁿ
Jerusalén ndí chí ndaāca nī poder
yeⁿe Ndyuūs, poder chí cuchii yeⁿe
cuaaⁿ 'nífⁿnúⁿ.

Jesús cunaⁿa yā va'ai cheeti nguuvi

(Mr. 16.19-20)

⁵⁰Cheⁿe Jesús ndúúcu 'iiⁿyāⁿ
s'eeⁿ na yāāⁿ 'lííⁿ Betania ní di'viicú
yā 'iiⁿyāⁿ s'eeⁿ. ⁵¹Taachí chíinu
di'viicú yā 'iiⁿyāⁿ s'eeⁿ, cueⁿé yā
yeⁿe 'iiⁿyāⁿ s'eeⁿ ní cundaa yā va'ai
cheeti nguuvi. ⁵²Cuayiivi 'iiⁿyāⁿ
s'eeⁿ dich'εetē yā Ndyuūs ní cunaⁿa
ntuúⁿ yā na yāāⁿ Jerusalén. Ní neené
yeenu taavi yā. ⁵³Ní 'áámá cheetinéé
yā na yaācū templo ní ngaⁿá yā chí
ch'εete Ndyuūs. Ní i'téenu yā Ndyuūs.
'Tíicā chí.

NDUUDU N'DÁÍ CHÍ DÍNGÚŪⁿ APÓSTOL JUAN

N'diī ní saⁿā chi Nduudu

1 Cuááⁿ nááchí chínɡa'a 'āā ngaⁿa Dendyuūs ndúúćū Nduudu, ní Nduudu mífⁿ 'āā ngaⁿā ndúúćū Dendyuūs, ní Nduudu miiⁿ ní Dendyuūs. ²Chuū chíf naachi chínɡa'a ndúúćū Dendyuūs miiⁿ. ³Tanducuéⁿē chi vεε ní cucáāvā 'iiⁿyāⁿ miiⁿ din'dái yā chi véé. Nduuti chi nguée yā, nguée véé mar 'aama cosa chi véé. ⁴Iiⁿyāⁿ miiⁿ canée ndúúćū vida cueⁿe daāⁿmaⁿ ní vida miiⁿ ní dεεve yeⁿe 'iiⁿyāⁿ. ⁵Níćú dεεve chídεεvé na maaiⁿ, chí maaiⁿ mífⁿ 'iiⁿyāⁿ nguεε tuumicadínuuⁿ yā.

⁶Dendyuūs nidichó'o yā 'áámá saⁿā, chi nguuvi sa Juan. ⁷Saⁿā miiⁿ ndaa sa chí caⁿa sa nduudu cuaacu. Ní caaⁿmáⁿ sá nduudu cuaacu yeⁿe chi dεεve caati nducyaacá yā cu'téenu yā cáāvā saⁿā miiⁿ. ⁸Nguée saⁿā miiⁿ chi dεεve; naati chi ngaⁿā sa nduudu cuaacu yeⁿe dεεve. ⁹Chííⁿ chí nduudu cuaacu chí dεεve. Chííⁿ ngaⁿā dεεve yeⁿe nducyáácá yā chi sneé yā fⁿyeeⁿdí 'cūū.

¹⁰Iiⁿyāⁿ miiⁿ chi dεεve ní canée yā iⁿyeeⁿdí 'cūū, ní din'dái yā iⁿyeeⁿdí, ní 'iiⁿyāⁿ yeⁿe fⁿyeeⁿdí

nguée n'diichi yā 'yā. ¹¹Ndaá yā caavā ndaata yeⁿé yā 'íćú 'iiⁿyāⁿ yeⁿé yā nguée 'cuúⁿ yā chi canēe yā. ¹²Nducyáácá 'iiⁿyāⁿ chí 'cuúⁿ yā chí 'iiⁿyāⁿ miiⁿ canēe yā nduucú yā, Ndyuūs ca'a yā poder 'iiⁿyāⁿ miiⁿ chí cuuvi daiya Dendyuūs 'iiⁿyāⁿ, 'iiⁿyāⁿ chí i'téenu yā chí nguúví yā. ¹³Nguée cuuvi yā daiya yā cáāvā yuúúⁿ, ní nguée caava yuútē, ní nguée caavā isáⁿā, caati cáāvā 'iivú Ndyuūs.

¹⁴Níćú Nduudu miiⁿ ní ch'iindiyáaⁿ yā tan'dúúćā s'uuuⁿ ní canēe yā ndúúćū s'uuuⁿ. N'dái taavi yā ndúúćū favor ndúúćū nduudu cuaacu. Ní n'diichi yú poder yeⁿé yā, poder tan'dúúćā yeⁿe 'áámá n'dyáⁿā yeⁿe Chiidá yā chí Dendyuūs miiⁿ. Ndiituú taavi yā ndúúćū favor ndúúćū nduudu cuaacu. ¹⁵Juan caⁿa sa nduudu cuaacu yeⁿé yā ní 'caí sa ní ngaⁿā sa yeⁿe 'iiⁿyāⁿ 'cúú: 'Iiⁿyāⁿ chí cuchíí yā cuaaⁿ daamí ní vmaaⁿ cá yā yeⁿe 'úú caati 'āā 'naaⁿ cá yā niicu 'úú.

¹⁶Níćú nducyaaca yú ita'a yú favor ndúúćū favor yeⁿe Jesús chí ndiituú yā ndúúćū favor. ¹⁷Caati véé ley miiⁿ cucáāvā Moisés ca'a

yā naati véé favor ndúúcu nduudu cuaacu cucáávā Jesucristo ca'a yā. ¹⁸Mar 'áámá 'iiⁿyāⁿ nguéé n'diichí yā Dendyuūs miiⁿ. Jesús 'áámá n'dyáⁿā yeⁿē Chiidá yā chi canéé nduucú yā, Jesús míⁿ díⁿ yā chi 'iiⁿyāⁿ deenú yā yeⁿē Chiidá yā.

Nduudu cuaacu yeⁿe Juan chi ngeedinuūⁿnⁱ

(Mt. 3.11-12; Mr. 1.7-8; Lc. 3.15-17)

¹⁹Taachi 'iiⁿyāⁿ Israel yeⁿe yááⁿ Jerusalén dich'ó yā chiidú s'eeⁿ ndúúcu 'iiⁿyāⁿ levitas s'eeⁿ ní ndaá yā nanááⁿ Juan miiⁿ chí itiinguunéⁿ yā: ¿Díí, du'ū dii? chuū chi nduudu cuaacu chí n'gueecútaⁿā Juan. ²⁰Ní Juan miiⁿ ntumiiⁿnúⁿ yā ní nguéé cheēⁿdiitú yā ní caⁿ'a cuaacú yā: Nguéé 'úú chí Cristo.

²¹Ní natiinguunéⁿ yā saⁿ'ā: ¿Du'ū dii, tuu'mi? ¿'Áá díí profeta Elías? Ngaⁿ'ā Juan: Nguéé 'úú. Ní natiinguunéⁿ yā saⁿ'ā: ¿'Áá díí chí profeta? Ngaⁿ'ā ntúuⁿ sa: Nguéé 'úú.

²²Ngaⁿ'ā ntúuⁿ yā ngii yā saⁿ'ā: ¿Du'ū di, tuu'mi? Ní 'tíicā caaⁿ'máⁿ 'nū cuuvi 'nū 'iiⁿyāⁿ chí dich'ó yā nús'uu. ¿De'ē ngaⁿ'ā di yeⁿe maāⁿ di?

²³Tuu'mí caⁿ'a Juan: 'Úú nduudu chí caⁿ'a na yáⁿ'āa naachi nguéé ch'etinéé 'iiⁿyāⁿ: Nan'guáaⁿ nī yúúni cuaacu yeⁿē Dendyuūs, tan'dúúcā chí ngaⁿ'a profeta Isaías miiⁿ naachi canéé nguūⁿ na libro yeⁿe Ndyuūs.

²⁴Ícú 'iiⁿyāⁿ s'eeⁿ chí ndaá yā miiⁿ ní 'iiⁿyāⁿ yeⁿē fariseos. ²⁵Níicú ntiinguunéⁿ yā saⁿ'ā ní ngaⁿ'a yā ngii yā saⁿ'ā: ¿De'ē cúúví chí ngeedinúⁿnⁱ di, ndúúti chí dii nguéé Cristo dii, ní nguéé Elías dii, ní nguéé profeta 'cūú dii?

²⁶Níicú Juan nan'gueecútaⁿ'a yā yeⁿé yā ní caⁿ'a ya: 'Úú ní ngeedinúⁿnⁱ ndúúcu nuūⁿnⁱ; naati nguaaⁿ ndís'tii ní canéé 'áámá yā ní nguéé ináaⁿ ní 'iiⁿyāⁿ. ²⁷'Iiⁿyāⁿ 'cūú chí cuchii cuayiivi ní vmnaaⁿ ca yā yeⁿē 'úú. Niicu 'úú ngueε n'dai 'úú, chí cuuvi díⁿ n'daatiií yíⁿmáⁿ yeⁿe ndaacú yeⁿé yā.

²⁸Cosa 'cūú chí chíí ná yáⁿ'āa Betábara na táámá lado yeⁿe yíicú Jordán, naachi Juan chéedinuūⁿnⁱ sa 'iiⁿyāⁿ.

'Iti cuūchí yeⁿe Dendyuūs

²⁹Chi dēeve táámá nguuvi ní Juan n'diichi sa Jesús ndaá yā naachi canee sa, níicú ngaⁿ'ā sa: Cun'diichí nī. 'Íngā Jesucristo chí nguuví yā 'Íiti Cuūchí yeⁿé Dendyuūs chí nadiví yā nuūⁿndí yeⁿe 'iiⁿyāⁿ yeⁿe íⁿyeēⁿdí. ³⁰Chuū chí ngaⁿ'á yeⁿé yā: Cuchii 'áámá saⁿ'ā cuayiivi yeⁿe 'úú níicú 'āa vmnaaⁿ sa yeⁿē 'úú, caati 'āa 'naaⁿ ca sa niicu 'úú. ³¹'Úú ní nguéé n'diichí 'iiⁿyāⁿ naati deenú chí snaaⁿ 'iiⁿyāⁿ Israel 'yā. Cáávā chuū 'úú cuchíí ní ngeedinuūⁿnⁱ ndúúcu nuūⁿnⁱ.

³²Juan míⁿ ní ngaⁿ'ā sa nduudu cuaacu: 'Úú ní n'diichí Espíritu N'dai yeⁿe Dendyuūs chí cuch'ééⁿ nanguuvi tan'dúúcā paloma ní ndaa vmnaaⁿ yeⁿé yā ní canéé yā ndúúcu yā. ³³'Úú nguéé n'diichí 'iiⁿyāⁿ miiⁿ naati 'iiⁿyāⁿ chí dich'ó yā 'úú chí ngeedinuūⁿnⁱ ndúúcu nuūⁿnⁱ, 'iiⁿyāⁿ miiⁿ chí ngaⁿ'a yā ngii yā 'úú: Du'ū chí n'diichí di chí ndeε Espíritu N'dai yeⁿe Ndyuūs ní canéé yā nduucú yā, 'iiⁿyāⁿ 'cūú chí ngeedinúⁿnⁱ ndúúcu Espíritu N'dai yeⁿé Ndyuūs. ³⁴'Úú ní n'diichí

ní ngaⁿa cuaacú chi chuū chi Daiya Dendyuūs.

Discípulos chí vmnááⁿ vmaaaⁿ

³⁵Chi dæve táamá nguuvi canéé ntuūⁿ Juan ndúucū 'uuvi discípulos yeⁿé sa. ³⁶Ní inaaⁿ sa Jesús miⁿ chí cachiicá yā cuaaⁿ miⁿ. Ní ngaⁿā sa: N'diichí nī. Íngaā Jesucristo chi nguuví yā Ítí Cuūchí yeⁿé Dendyuūs.

³⁷Ndúú 'uuví discípulos yeⁿe Juan chí ch'iindiveéⁿ yā chíⁿ chí ngaⁿā sa, ní cueⁿé yā ndúucū Jesús.

³⁸Ngueecundí Jesús ní n'diichí yā chí n'dáa yā 'yā. Ní ngaⁿa yā ngii yā 'iiⁿyāⁿ s'eeⁿ: ¿DÉé in'nuuⁿ dí? Ngaⁿā 'iiⁿyāⁿ s'eeⁿ ngii yā 'yā: Rabí (nduudu míⁿ neⁿe caaⁿmaⁿ chí Maestro), ¿tíí canééⁿ vaacu dí?

³⁹Tuu'mi ngaⁿa yā ngii yā saⁿā: Cuchíí nī nícu n'diichí nī. Ní ndaa yā ní n'diichí yā tii canéé yā. Ní ch'ætinée yā nduucú yā nguuvi miⁿ caati 'āā tandúú n'gæcú cuūⁿ chíinū.

⁴⁰Ní yeⁿe 'uuví yā chí ch'iindiveéⁿ yā yeⁿé Juan ní cueⁿé yā ndúucū Jesús. 'Áámá saⁿā miⁿ ní nguuvi sa Andrés 'diinū Simón Pedro. ⁴¹Ni Andrés miⁿ nndaacá sa maaⁿ 'dínu sa Simón ní ngaⁿa sa ngii sa sáⁿā: Nndaaca 'nū Mesías miⁿ (neⁿe caaⁿmaⁿ nduudu miⁿ chí Cristo).

⁴²Ní candē sa Simón nanááⁿ Jesús. Ní taachi Jesús miⁿ n'gíinu yā saⁿā miⁿ, ní ngaⁿā yā: Díí Simón Pedro, daiya Jonás miⁿ. Mááⁿ ní cu'neeⁿ yú chí duuchi Cefas (nduudu míⁿ neⁿé caaⁿmaⁿ tuūú).

Jesús yaa'ví yā Felipe ndúucū Natanael

⁴³Chi déévé táamá nguuvi Jesús neⁿé yā caⁿa yā na yáⁿā Galílea,

ní cueⁿé yā. Ndaaca yā Felipe ní ngaⁿa yā ngii yā saⁿā: Cuchíí di nduucú.

⁴⁴Ní yááⁿ vaacú Felipe ní yeⁿé yááⁿ Betsaida ní dáámá yááⁿ vaacú sa ndúucū Andrés ndúucū Pedro.

⁴⁵Felipe míⁿ nndaaca sá Natanael, nícu ngaⁿā sa ngii sa sáⁿā: 'Áā nndaacá 'nū Jesús daiya José yeⁿe yááⁿ Nazaret. Dingúúⁿ Moisés yeⁿé 'iiⁿyáⁿ 'cūū na ley, ní dingúúⁿ profetas yeⁿe 'iiⁿyáⁿ 'cūū.

⁴⁶Ní ngaⁿa Natanael: ¿'Áá véé cosa chí n'daacā na yááⁿ Nazaret? Ní ngaⁿā Felipe miⁿ: Cuchíí di ní n'diichi di.

⁴⁷Jesús miⁿ ní n'diichí yā Natanael chí cuchí sa nanááⁿ yā. Ní ngaⁿā yā yeⁿé sa: N'díichí ní 'áámá saⁿā chí cuaacu níⁿnyúⁿ yeⁿé ndaata Israel miⁿ. Ní nguéé nginnche'ei sa 'iiⁿyāⁿ.

⁴⁸Ngaⁿa Natanael ngii sa 'iiⁿyāⁿ: ¿Tíí n'diichi di 'úú? Ní ngaⁿā Jesús ngii yā saⁿā: Taachi 'āā cuéé yaa'ví Felipe dii ní taachi canéé dí maaⁿ yáⁿá yeⁿe n'guíídií yaaⁿ nguuvi, 'āā n'diichí díí.

⁴⁹Ní nan'gueecutáⁿā Natanael miⁿ ni ngaⁿa sa ngii sa 'iiⁿyāⁿ: Maestro, n'dii chí Daiya Dendyuūs miⁿ. N'dii chí Rey yeⁿe Israel.

⁵⁰Ní ngaⁿa Jesús ngii yā saⁿā: ¿'Áá cáāvā chí ngaⁿā ngii dii chí n'diichí dii maaⁿ n'guíídií yaaⁿ nguuvi chí 'āā i'teenu di 'úú? Ch'æte n'dai ca n'diichí dí dendú'ū nguéé ti chúū.

⁵¹Ní ngaⁿā yā ngii yā saⁿā: Cuaacu níⁿnyúⁿ cuācū níⁿnyuⁿ ngaⁿā ngii dii. Ngúúví maaⁿ ní ngúúví chí cuíchií cunéé chí n'diichi di chí nanguaāⁿ nanguuvi

nífcú ángeles yeⁿé Dendyuūs miiⁿ
ní ngeé yā ní ngua'á yā nanááⁿ Saⁿā
chi Daiya Dendyuūs.

Ch'iindivaacu 'iiⁿyāⁿ yeⁿe yáāⁿ Caná

2 Chii ndii chíⁿ ndii 'íínú
nguuvi miiⁿ ní ch'iindivaacú
'áámá 'iiⁿyāⁿ na yáāⁿ Caná yeⁿe
yáⁿāa Galilea. Ní miiⁿ cánéé chεεcú
Jesús. ²Ní idiíⁿ yā invitar Jesús
ndúúcú discípulos yeⁿé yā nááchí
ch'iindivaacú 'iiⁿyāⁿ. ³Ní ch'iinu
vino yeⁿé yā. Ní chεεcú Jesús ngaⁿá
yā ngii yā Jesús: 'Āā ntéé vino yeⁿé
yā.

⁴Ní ngaⁿā Jesús ngii yā chεεcú
yā: ¿De'ē canéé yeⁿé ndúúcú dii
n'dataá? 'Āā cuéé ndaa hora yeⁿé
miⁿniiⁿyuⁿ.

⁵Chεεcú yā miiⁿ ngaⁿá yā ngii
yā saⁿā s'eeⁿ chi diiⁿ mandado: Dii
sáⁿā s'eeⁿ, diiⁿ di tan'dúúcā chi
Jesús caaⁿmán yā cuuví yā ndis'tíi.

⁶Miiⁿ snéé níyaaⁿ 'cuutií n'gεete
chi nin'dai ndúúcú tuūu chí ngeε
nuūⁿnīⁿ. 'Iiⁿyāⁿ naaⁿnú yā 'cuutií
s'eeⁿ tan'dúúcā costumbre yeⁿe
'iiⁿyāⁿ Israel. 'Aama 'aama 'cuutií
ch'εete tunéēⁿ nn'geēⁿ nduuví cuūuⁿ
ngeεcu ndii 'áámá ciento litros yeⁿe
nuūⁿnīⁿ.

⁷Ní ngaⁿa Jesús ngii yā saⁿā
chi idiíⁿ mandado: Diicuutú ní
ndúúcú nuūⁿnīⁿ 'cuutií n'gεete chí
nin'dai ndúúcú tuūu. Ní 'iiⁿyāⁿ s'eeⁿ
diicuutú yā ndiitúú n'dai ndúúcú
nuūⁿnīⁿ. ⁸Ní ngaⁿá Jesús ngii
yā saⁿā s'eeⁿ chi idiíⁿ mandado:
Tun'dáa ní naachi s'néēⁿ nuūⁿnīⁿ,
ní tun'dáa ní nuūⁿnīⁿ, ní candée ní
nanááⁿ 'iiⁿyāⁿ chí chééⁿ ndii vmnaaⁿ
yeⁿe 'viicū. Ní candée yā ch'iⁿyā
na 'iiⁿyāⁿ chí chééⁿndii vmnaaⁿ

yeⁿe 'viicū. ⁹Ní taachi 'iiⁿyāⁿ chí
chééⁿndii vmnaaⁿ yeⁿe 'viicū canéé
yiínú yā nuūⁿnīⁿ chí 'āā ndii vino
naati nguéé déénú yā tii ngiica vino
miiⁿ. Naati 'iiⁿyāⁿ chí idiíⁿ mandado
ní déénú yā caati cheⁿé yā nguai
yā nuūⁿnīⁿ. Tuu'mi ní yaa'ví yā saⁿā
chí n'giindivaacu miiⁿ. ¹⁰Ní ngaⁿá
yā ngii yā saⁿā chí n'giindivaacu:
Tanducueⁿe saⁿā miiⁿ dííncā vino
chí n'dai ca nga'a sa vmnaaⁿ 'iiⁿyāⁿ.
Ní taachi 'āā ndiitú yeⁿé yā, tuu'mi
nnga'a sa vino chí nguéé n'dai ngi'i.
Naati dii ní nnguain'dai di vino chí
n'dai ndíi maaⁿ.

¹¹Chiiⁿ ní vmnááⁿ vmnaaⁿ señal
chí diiⁿ Jesús ná yáāⁿ Caná yeⁿe
yáⁿāa Galilea. Ní ch'iⁿi yā poder
yeⁿé yā. Ní discípulos yeⁿé yā
chi'teenú sa 'yā.

¹²Cho'o chuū ní cuinaⁿá Jesús
ndúúcú chεεcú yā, ndúúcú 'díínu yā
ndúúcú discípulos yeⁿé yā na yáāⁿ
Capernaum. Ní duu'ví nguuví canéé
yā miiⁿ.

Jesús didεevé yā yáacū templo

(Mt. 21.12-13; Mr. 11.15-18; Lc. 19.45-46)

¹³Ní 'āā snee niiⁿnuúⁿ nguuví
chí ndaa 'viicū yeⁿe pascua yeⁿe
'iiⁿyāⁿ Israel, ní cucheε Jesús na yáāⁿ
Jerusalén. ¹⁴Ní ndaacá yā chεeti
cheendi chéēⁿ yáacu templo 'iiⁿyāⁿ
s'eeⁿ chí ch'εeté yā n'diicuí yā 'itiindu
ndúúcú 'iiti 'cuūchí ndúúcú palomas,
ní ndaacá yā 'iiⁿyāⁿ chí inn'daaⁿ
tuūmī. ¹⁵Taachí Jesús din'dái yā
cuerda ní dich'óo yā nducyáácá 'iiⁿyāⁿ
chuva'āi cheendi cheēⁿ yāacū templo
miiⁿ, ndúúcú 'iiti 'cuūchí s'eeⁿ ndúúcú
'itiindu s'ééⁿ. Ní ch'iinu ngéé yā tuūmī
yeⁿé 'iiⁿyāⁿ s'eeⁿ chí inn'daaⁿ tuūmī
ní chingúúⁿndaa yā mesas yeⁿé yā.

¹⁶Níicú ngaⁿa Jesús ngii yā saⁿā chi n'diicuí palomas: Diví nī chuū 'muuⁿ ni nguéé díⁿ nī va'āi yeⁿe Chiidá va'ai chi n'diicui 'iiⁿyāⁿ.

¹⁷Tuu'mí ní n'gaacu discípulos yeⁿé yā yeⁿe chi cánéé nguūⁿ na libro yeⁿe Ndyuūs chi vaādī n'diité yeⁿe vaacu di, ní di'cuiinú 'úú.

¹⁸Níicú 'iiⁿyāⁿ Israel nan'guεεcutaⁿá yā ní caⁿa yā Jesús: ¿De'ē señal chí cu'neeⁿ di nús'uū chí véé poder yeⁿe di chí diiⁿ di 'túucā?

¹⁹Nan'guεεcútaⁿā Jesús ní caⁿa yā: Nadtuuví nī yáácū templo 'cūū ní 'iinū nguuví 'úú nadācueéⁿ.

²⁰Tuu'mi caⁿa 'iiⁿyāⁿ Israel: Chæeti na 'uūví ngeεcu jaaⁿ ndúuyū chí n'dai yáácū templo 'cūū. Níicú dii, ¿áá na 'iinū nguuví neⁿe di nādācueeⁿ di?

²¹Naati Jesús caⁿa yā yeⁿe yaācū templo chí cuerpo yeⁿe maáⁿ yā.

²²Taachi Jesús nanduuchí yā yeⁿe nguuaⁿ tináⁿā tuu'mi discípulos yeⁿé yā nan'gaacú yā chí caⁿa yā chuū. Ní 'iténu yā chí canéé nguūⁿ na libro yeⁿe Dendyuūs ndúúcū nduudu chí ngaⁿa Jesús miiⁿ.

Jesús deenú yā nducyáácá saⁿā

²³Taachi Jesús canéé yā yāāⁿ Jerusalén, nguuví 'viicú yeⁿe pascua neené 'yaáⁿ yā chí'ténu yā Jesús caati 'āā n'diichí yā señales chí díⁿ yā.

²⁴Naati maaⁿ Jesús miiⁿ ní nguéé ngí chætinuúⁿ yā 'iiⁿyāⁿ s'eeⁿ caati déénú Jesús yeⁿe nducyáácá yā. ²⁵Ní nguéé neⁿé yā chí ndii 'áámá 'iiⁿyāⁿ caaⁿmaⁿ cuaacu yeⁿe saⁿā ti deenú yā de'e chí canéé ndúúcū saⁿā.

Jesús ndúúcū Nicodemo

3 Níicú canee 'áámá sáⁿā yeⁿe fariseos chí nguuví sa

Nicodemo. Saⁿā miiⁿ, saⁿā chí chééⁿndii vmnááⁿ 'iiⁿyāⁿ Israel.

²Sáⁿa 'cūū nndaa sa nanááⁿ Jesús nguuiinū miiⁿ. Níicú ngaⁿa sa ngii sá 'iiⁿyāⁿ: N'dii Maestro, déénú 'nū chí ndaa nī yeⁿé Dendyuūs chí lado yeⁿe maestro caati mar 'áámá 'iiⁿyāⁿ nguéé cuuvi díⁿ yā señales chí idiíⁿ nī ndúúti chí nguéé canee Dendyuūs ndúúcu yā.

³Jesús ní nan'guεεcútaⁿá yā ní ngaⁿa yā ngii yā saⁿā: Cuaacu níⁿnyúⁿ cuāācū niiⁿnyuⁿ ngaⁿá ngii dii, du'ū chí nguéé nguεεcundí 'cundiyaāⁿ táámá vmnéⁿēe nguéé cuuví n'diichí yā naachi 'iivú Dendyuūs ngaⁿa ntiíⁿnyúⁿ yā.

⁴Ní ngaⁿā Nicodemo ngii sa Jesús: ¿Táácā nanguεεcundí 'áámá 'iiⁿyāⁿ saⁿā ndiicúú 'cuundiyaāⁿ ntuúⁿ yā? ¿Táácā cuuví nuuⁿ ndáá ntuúⁿ yā na chæeti chæécú yā ní 'cuundiyaāⁿ ntuúⁿ yā?

⁵Jesús ngaⁿa yā ngii yā saⁿā: Cuaacu níⁿnyúⁿ cuāācū niiⁿnyuⁿ ngaⁿá ngii dii, du'ū chí nguéé 'cuundiyaāⁿ yā cáāvā nuūⁿnīⁿ ní cáāvā Espíritu N'dai yeⁿe Ndyuūs nguéé cuuvi cundáa yā naachi canéé 'iivú Dendyuūs. ⁶Du'ū chí ch'iindiyáāⁿ yeⁿe 'iiⁿyāⁿ, 'iiⁿyāⁿ canee ndúúcū. Níicú du'ū chí ch'iindiyáāⁿ yeⁿe Espíritu, espíritu canee ndúúcū. ⁷Nguéé caⁿā yiinu di chí ngaⁿá ngii dii chí nducyaaca 'iiⁿyāⁿ cánéé chí 'cuundiyaāⁿ ntuúⁿ yā taama. ⁸Yúúné ní na neⁿe miiⁿ ngéénū. Níicú n'giindiveeⁿ di chí ngeēnū. Ní nguéé déénú di tíí chíicā tíí caⁿā. 'Tíicā nducyáácá 'iiⁿyāⁿ chí 'niindiyáāⁿ yā yeⁿe Espíritu N'dai yeⁿe Ndyuūs.

⁹Ní nan'guεεcútaⁿā Nicodemo yeⁿé yā ní ngaⁿa sa ngii sa Jesús: ¿Táácā cuuví chuū?

¹⁰Nan'guεécútaⁿá Jesús ní ngaⁿá yā ngii yā sáⁿá: ¿Áá díí maestro yeⁿé 'iiⁿyāⁿ Israel ní nguée deenu dí chuú? ¹¹Cuaacu níⁿnyúⁿ cuāācū niiⁿnyuⁿ ngaⁿá ngii dii chí déenu 'nū chii chí ngaⁿa 'nū. Níícú chí n'diichí 'nū chii chí ngaⁿa cuaacu 'nū ní nguée n'diichí 'nu chii chí ngaⁿá cuaacu 'nū. Níícú nguée 'caandiveeⁿ dí chí caaⁿmaⁿ 'nū nduudu cuaacu. ¹²Nduuti chí ngaⁿá cosa chí véé iⁿyeēⁿdí 'cūū niicu nguée i'téenu dí, ¿táácā cu'téenu dí nduuti chí caaⁿmáⁿ cosa chí véé na va'ai chēeti nguūvī?

¹³Ndii 'áámá 'iiⁿyāⁿ nguée chēe yā na va'ai chēeti nguūvi nduuti chí nguée 'iiⁿyāⁿ chí ch'ēēⁿ yeⁿe va'ai chēeti nguūvi. 'Iiⁿyāⁿ miiⁿ, Sáⁿá chí Daiya Dendyuūs, chí canée na va'ai chēeti nguūvi. ¹⁴Tan'dúúccā Moisés miiⁿ chinadācuéeⁿ sa cúu na yāⁿāa cuūⁿmáⁿ naachi nguée ch'ēētínée 'iiⁿyāⁿ 'tíicā canee chí nicueēⁿ Saⁿa chí Daiyá Dendyuūs. ¹⁵Caati nducyaaca 'iiⁿyāⁿ chí cu'téenu yā 'iiⁿyāⁿ nguée cuuvi ndái yā caati cunduuchí yā cueⁿe daāⁿmaⁿ.

**'Tíicā Dendyuūs dineⁿé
yā 'iiⁿyāⁿ yeⁿe iⁿyeēⁿdí**

¹⁶Caati chuū dínéⁿe Dendyuūs 'iiⁿyāⁿ yeⁿe iⁿyeēⁿdí chí dich'ó yā 'aama n'dyáⁿā Daiya yā, caati nducyáácá 'iiⁿyāⁿ chí cu'téenu yā 'iiⁿyāⁿ nguée cuuvi ndái yā. Níícú cunduuchí yā cueⁿe daāⁿmaⁿ. ¹⁷Caati Dendyuūs ní dich'ó yā Daiyá yā iⁿyeēⁿdí chí Daiyá yā nguée diiⁿ yā juzgar 'iiⁿyāⁿ chí snée iⁿyeēⁿdí, naati chí cuchii yā nadanguáⁿai yā 'iiⁿyāⁿ yeⁿe iⁿyeēⁿdí cááva yā.

¹⁸Du'u chí i'téenu 'iiⁿyāⁿ nguée condenado yā, niicu du'u chí nguée i'téenu 'iiⁿyāⁿ 'āā condenado yā caati nguée chí'teenu chí nduuchi 'áámá n'dyáⁿā yeⁿé Chiidá yā chí Dendyuūs. ¹⁹Níícú chuú ní condenación. Chí dēeve 'cūū ndaá iⁿyeēⁿdí 'cūū naati saⁿá yeⁿe iⁿyeēⁿdí 'cūū dinéⁿe sa na maaiⁿ nguée ti chí dēeve caati diiⁿ sa chí nguée n'daacā. ²⁰Caati nducyáácá 'iiⁿyāⁿ chí díⁿ yā chí nguēe n'daacā, nguée dinéⁿe yā chí dēeve. Ní nguēe indaá yā chí dēeve miiⁿ caati nguée neⁿe yā chí cuuvi déénu 'iiⁿyāⁿ ní caaⁿmaⁿ 'iiⁿyāⁿ chí nuuⁿndí yā. ²¹Naati 'iiⁿyāⁿ chí díⁿ yā ntiⁿnyuⁿ chí n'daacā, índaá yā naachi chí dēeve caati 'iiⁿyāⁿ snáaⁿ yā ntiⁿnyuⁿ yeⁿé yā chí yeⁿé Dendyuūs.

**Juan chí ngeedínuūⁿnīⁿ ngaⁿa sa
ndúúccū Jesús táámá vmnéⁿēe**

²²Cho'ōo chúū, ndaā Jesús ndúúccū discipulos yeⁿé yā na yāⁿāa Judea. Ní cunée yā ndúúccū 'iiⁿyāⁿ s'eeⁿ. Níícú Jesús chēedinúūⁿnīⁿ yā 'iiⁿyāⁿ. ²³Ní Juan míⁿ ngeedinuūⁿnīⁿ ntúuⁿ yā na yāⁿ Enón niiⁿnuúⁿ na yaāⁿ Salim ti míⁿ neenē vee ca nuūⁿnīⁿ. Ní ndaā 'iiⁿyāⁿ ní chēedinúūⁿnīⁿ yā. ²⁴Caati Juan miiⁿ 'āā cuée cunúuⁿ yā vácūū.

²⁵Discipulos yeⁿé Juan ch'ēecu cheendí yā ndúúccū 'iiⁿyāⁿ Israel yeⁿé táácā 'iiⁿyāⁿ nduuví dēevé yā. ²⁶Níícú nndaa sá nanááⁿ Juan ní ngaⁿa sa ngii sa saⁿá: Dii, Maestro, 'iiⁿyāⁿ chí canée ndúúccū dí na táámá lado yeⁿé yíicú Jordán 'iiⁿyāⁿ chí díí caaⁿmaⁿ cuaacu dí yeⁿé yā; n'diichi dí, 'iiⁿyāⁿ miiⁿ ngeedinuūⁿnīⁿ yā. Niicu nducyáácá 'iiⁿyāⁿ ndaa yā nanááⁿ yā.

²⁷Nan'gueecútaⁿā Juan ní caⁿa sa: Nguéé cúuví cuta'a 'iiⁿyāⁿ de'ē vee nduuti chi nguéé cuchii yeⁿe va'ai cheeti nguuvi. ²⁸Ndís'tiī testigo yeⁿé chi caⁿá: 'Úú ní nguéé Cristo 'úú, caati dich'óo Dendyuūs 'úú vmnaaⁿ yeⁿé yā. ²⁹Du'ū chi véé n'daataá yeⁿe yā, 'iiⁿyāⁿ miiⁿ ní isáⁿā yeⁿé tá. Amigo yeⁿe isáⁿā miiⁿ ní 'iiⁿyāⁿ chi cánéé ndúúcu yā ní n'giindiveéⁿ yā yeⁿé yā. Yeenú taavi yā cáavā nduudu yeⁿe isáⁿā miiⁿ. 'Tíicā vaadi yeenu yeⁿé ní 'áámá ndiituú taaví ca. ³⁰'Iiⁿyāⁿ miiⁿ ní canéé chi ch'εεté yā, niicu 'úú dánduu'vi 'lííⁿ 'úú.

**'Iiⁿyāⁿ chí cuchii yā yeⁿe
va'ai cheeti nguuvi**

³¹Du'ū chí nndaā yeⁿe va'ai cheeti nguuvi ch'εεte ca yeⁿe nducyaaca 'iiⁿyāⁿ. Du'ū chi yeⁿe yáⁿāa ní yeⁿe yáⁿāa ni ngaⁿa yeⁿe cosas yeⁿe yáⁿāa. 'Iiⁿyāⁿ chí nndaā yā yeⁿe va'ai cheeti nguuvi, ch'εεte cá yā yeⁿe nducyáácá 'iiⁿyāⁿ. ³²'Iiⁿyāⁿ miiⁿ ngaⁿa cuaacú yā yeⁿe chí n'diichí yā ndúúcu chí ch'iindiveéⁿ yā ní mar 'áámá 'iiⁿyāⁿ ní nguéé neⁿé yā 'caandiveéⁿ yā nduudu cuaacu yeⁿe yā. ³³'Iiⁿyāⁿ chí n'gúuⁿ yā nduudu cuaacu yeⁿe Jesús nduuvídaamá yā ndúúcu yā ní ngaⁿa yā chí Dendyuūs miiⁿ chí cuaacu. ³⁴Du'ū chí Dendyuūs dich'óo yā, 'iiⁿyāⁿ miiⁿ ngáⁿa yā nduudu yeⁿe Dendyuūs miiⁿ, caati Dendyuūs nga'a yā 'iiⁿyāⁿ Espíritu N'dai yeⁿe Ndyuūs nguéé ndúúcu caadi. ³⁵Dendyuūs Chiida yú dinéⁿe yā Daiyá yā. Níicú tanducuéⁿe dendu'ū ca'á yā ta'ā Daiyá yā. ³⁶'Iiⁿyāⁿ chí i'téenu yā Daiya Dendyuūs miiⁿ canéé yā

ndúúcu vida cueⁿe daāⁿmaⁿ. Naati 'iiⁿyāⁿ chí nguéé i'téenu yā Daiya Dendyuūs miiⁿ nguéé snaaⁿ yā vida cueⁿe daāⁿmaⁿ miiⁿ naati caⁿá yā cuta'á yā castigo yeⁿe Dendyuūs chí diituú n'dai.

**Jesús ndúúcu n'daataá
yeⁿe yáⁿāa Samaria**

4 Tááchí Jesús ituumicádiinuⁿ yā 'tíicā chí saⁿā fariseos ch'iindiveeⁿ sa chííⁿ chí Jesús dííⁿ yā ní chí cheedinuūⁿniⁿ yā 'yaaⁿ ca 'iiⁿyāⁿ ní véé 'yaaⁿ ca discípulos yeⁿé yā nguéé ti Juan miiⁿ; ²'áará chí nguéé Jesús chí ngeedinuūⁿniⁿ yā caati discípulos yeⁿe yā ngeedinuūⁿniⁿ yā; ³Jesús s'néeⁿ yā yáⁿāa Judea ní cheⁿe ntuúⁿ yā yáⁿāa Galilea.

⁴Ní canéé chí cho'ó yā yáⁿāa Samaria. ⁵Ní ndaá yā na 'áámá yáāⁿ yeⁿe Samaria chí nguuvi Sicar, niiⁿnuúⁿ ná yáⁿāa chí ca'a Jacob yeⁿe daiya sa José. ⁶Ní mííⁿ canéé vaacunuūⁿnīⁿ yeⁿe Jacob. Jesús chicúúⁿnu yā chí ngiica yā ní chíindí yā niiⁿnuúⁿ na vaacunuūⁿnīⁿ. Ní 'āā tanduu n'geecu ndiichuuví. ⁷Ndaā 'áámá n'daataá yeⁿe yáⁿāa Samaria chí sta'a tá nuūⁿnīⁿ. Ní Jesús caⁿa yā chíi yā táⁿā: Díí n'daataá, téé dí tíí nuūⁿnīⁿ cu'ú.

⁸Discípulos yeⁿé yā cueⁿe sa yáāⁿ Sicar chí cuai sa chí che'é yā. ⁹Ní n'daataá yeⁿe yáⁿāa Samaria ngaⁿa tá ngii tá Jesús: 'Táácā chí ngiica di nuūⁿnīⁿ chí cu'u di 'úú ti díi ní 'iiⁿyāⁿ Israel díi niicu 'úú yeⁿe yáⁿāa Samaria 'úú? Saⁿā Israel s'eeⁿ ní nguéé n'diichi sa 'iiⁿyāⁿ yeⁿe yáⁿāa Samaria. ¹⁰Ní n'gueecútaⁿa

Jesús, ní nga^a yā ngii yā tá^{na}:
 Ndúúti chí n'diichi di regalo yeⁿe
 Dendyuūs miⁿ, ní du'ú chí nga^{na}
 ngii dii, tee di nuūⁿnīⁿ cu'ú, tuu'mi
 ní caaca di nuūⁿnīⁿ yeⁿé yā. Ní
 'iiⁿyāⁿ miⁿ caⁿa yā teé yā nuūⁿnīⁿ
 chí cu'u di, nuūⁿnīⁿ chí diiⁿ chí
 canduuchi 'iiⁿyāⁿ.

¹¹N'daataa míⁿ ní nga^a tá ngii tá
 Jesús: Señor, nguéé de'ē chí cuta'á
 nduucú nī tíí vaacunuūⁿnīⁿ yáanūⁿ.
 ¿Tíí cuuvi canguaí nuūⁿnīⁿ yeⁿé
 nī chí diiⁿ chí canduuchi 'iiⁿyāⁿ?
¹²¿Áá vmaⁿ ca n'dií yeⁿe chíida
 'nū Jacob? 'Iiⁿyāⁿ miⁿ din'dái yā
 vaacunuūⁿnīⁿ 'cūū cáávā nús'uu.
 'Múúⁿ sta'á yā nuūⁿnīⁿ ndúúⁿcū daiya
 yā ndúúⁿcū 'iiti yeⁿé yā.

¹³Nan'guēcútaⁿa Jesús nga^a
 yā ngii yā tá^{na}: Nducyáácá 'iiⁿyāⁿ
 chí ng'i yā nuūⁿnīⁿ 'cūū canéé chí
 cuuvi yaaca ntúⁿ yā. ¹⁴Naati du'ú
 'iiⁿyāⁿ chí cú'u yā nuūⁿnīⁿ chí 'úú
 chí ca'á, 'āā ntéé cuuvi yaacá yā.
 Nuūⁿnīⁿ chí 'úú ca'á 'iiⁿyāⁿ míⁿ,
 nuūⁿnīⁿ miⁿ tan'dúúⁿcā chí cuuvi
 nduucú yā 'áámá vaacunuūⁿnīⁿ chí
 ngáā nuūⁿnīⁿ miⁿ yeⁿé yā caavā
 vida cueⁿe daāⁿmaⁿ.

¹⁵N'daataá miⁿ ní nga^a tá ngii tá
 Jesús: Dii Señor, téé nī 'úú nuūⁿnīⁿ
 'cūū. Cu'ú ní 'aa ntéé cuuvi yaacá, ní
 'aa ntéé chíí cuta'á nuūⁿnīⁿ.

¹⁶Jesús nga^a yā ngii yā tá^{na}:
 Cuéⁿé dí ní cananguaí di isaⁿa yeⁿe
 di. Ní cuchii di ndúúⁿcū sa 'muuⁿ.

¹⁷N'guēcútaⁿa n'daataa míⁿ ní
 nga^a tá ngii tá 'iiⁿyāⁿ: Nguéé isaⁿa
 yeⁿé. Nga^a Jesús ngii yā tá^{na}:
 N'daacā chí nga^a di chí nguéé
 isaⁿa yeⁿe di. ¹⁸Caati nyuⁿu isaⁿa
 canéé ndúúⁿcū dii, ní saⁿa chí canéé
 ndúúⁿcū dii miⁿniiⁿyuⁿ nguéé isaⁿa

yeⁿe di. Chiiⁿ chuū ní nga^{na} cuaacú
 dí.

¹⁹Nga^a n'daataá ngii ta Jesús:
 N'dií Señor, deenú chí n'dií ní 'áámá
 profeta n'dií. ²⁰Chiida 'nū ní díⁿ yā
 adorar ná cuééⁿtí 'cūū naati 'iiⁿyāⁿ
 Israel chí judíos nga^{na} ntuuⁿ yā chí
 na yāāⁿ Jerusalén chí cánéé chí díⁿ
 yā adorar Ndyuūs.

²¹Ní nga^{na} Jesús ngii yā tá^{na}:
 N'daataá, cu'téénu di 'úú. Ndaā
 hora taachi ní nguéé cuéeti 'cūū
 ní nguéé yāāⁿ Jerusalén 'iiⁿyāⁿ díⁿ
 yā adorar Chiida yú. ²²Ndís'tií ní
 díⁿ nī adorar chí nguéé deenú nī.
 Nús'uū ní idiíⁿ 'nū adorar chí déenu
 'nū naati vaadī nguaⁿai ndaā lado
 yeⁿe 'áámá 'iiⁿyāⁿ chí nadanguáⁿāī
 ní yeⁿe 'iiⁿyāⁿ Israel. ²³Naati hora
 miⁿ ní cúchii nííⁿcú hora miⁿ ní
 ndaā, taachi cuaacu níⁿnyúⁿ 'iiⁿyāⁿ
 s'eeⁿ díⁿ yā adorar Dendyuūs
 Chiida yú ndúúⁿcū chideeve yeⁿé yā
 ndúúⁿcū vaadī cuaacú. Caati 'tífcā
 Chiida yú míⁿ in'nuúⁿ yā 'iiⁿyāⁿ chí
 díⁿ yā adorar 'yā ní cu'téénu yā
 'yā. ²⁴Dendyuūs ní Espíⁿitu 'yā. Ní
 'iiⁿyāⁿ cánéé chí díⁿ yā adorar 'yā
 cánéé chí díⁿ yā adorar 'yā ndúúⁿcū
 chideeve yeⁿé yā ndúúⁿcū vaadī
 cuaacu.

²⁵N'daataá míⁿ nga^a ta ngii
 ta Jesús: Deenú chí Mesías canéé
 chí ndaá chí duuchi Cristo. Taachí
 'iiⁿyāⁿ miⁿ ndaá yā, tuu'mí caaⁿmaⁿ
 yā nducuéⁿe cosas.

²⁶Ní nga^a Jesús ngii yā tá^{na}: 'Úú
 chí Cristo chí indeé ndúúⁿcú di.

²⁷Taachí indeé yā ndúúⁿcū
 n'daataá míⁿ, ndáa discípulos yeⁿe
 yā. Ní cueⁿe yíⁿú sá chí indeé yā
 ndúúⁿcū n'daataá miⁿ. Mar 'áámá
 saⁿa nguéé natiinguuneeⁿ sa Jesús:

¿De'e iⁿnuuⁿ di? ¿De'e cuuvi chi ndee di ndúucu tá? ²⁸Ní n'daataá mííⁿ ní s'neeⁿ tá 'cuuti cuéé^e yeⁿe tá ní cueⁿē tá ná yááⁿ miiⁿ. Ní caⁿ'a tá chii tá 'iiⁿyāⁿ s'eeⁿ. ²⁹Cuchií nī ní n'diichí nī 'áámá saⁿ'ā chi caⁿ'a sa chii sa 'úú tanducuéⁿē chi ndííⁿ. ¿Áá nguéé 'iiⁿyāⁿ miiⁿ chi Cristo?

³⁰Ní 'iiⁿyāⁿ s'eeⁿ can'dáa yā na yááⁿ miiⁿ. Cueⁿe yā n'diichí yā Jesús. ³¹Ní taachi cueⁿē n'daataa mííⁿ na yááⁿ tuu'mi ní discípulos yeⁿé yā ngaⁿ'a sa ngii sá Jesús: N'dií Maestro, che'é nī yuündū nduucú 'nū.

³²Ni Jesús miiⁿ ngaⁿ'a yā ngii yā saⁿ'ā s'eeⁿ: 'Úú ní véé 'áámá comida yeⁿé chi che'é. Ndís'tii nguéé déénu nī.

³³Níicú discípulos ngaⁿ'a sa ngii sa vi'i: ¿Áá ndaa 'iiⁿyāⁿ chi cuú yā chí che'é yā?

³⁴Ní ngaⁿ'a Jesús ngii yā saⁿ'ā s'eeⁿ: Comida yeⁿé chííⁿ chí cuuví dííⁿ tan'dúucā chí neⁿē 'iiⁿyāⁿ chi dich'ólo yā 'úú. Ní di'cuuinú ntiíⁿnyuⁿ yeⁿé yā. ³⁵Ngaⁿ'a ndis'tii: ¿Áá nguéé véé cá tá cuúuⁿ 'iíyū taachi ndaa tiempo yeⁿē cosecha? N'diichí nī. 'Úú ngaⁿ'á ngii ndís'tii: N'diichí nī cuaaⁿ 'niiⁿnuⁿ. Snaáⁿ nī cuéé^{tí} yeⁿé nī. 'Áá ndaa nguuvi chi dííⁿ nī cosechar. ³⁶'Iiⁿyāⁿ chi nadacuéeⁿ yā cosecha vee chii'vee yeⁿé yā. Ní véé n'g'uíⁿ yeⁿé yā chi cūnee cueⁿe daāⁿmaⁿ. Níicú 'iiⁿyāⁿ chí niinu yā ndúucú 'iiⁿyāⁿ chi nadacuéeⁿ yā cosecha ní nduu 'uuví yā yeenú taaví yā. ³⁷Caati chuū chí cuaacu nííⁿnyúⁿ chi nduudu cuaacu: 'Áámá 'iiⁿyāⁿ ní ngiínu yā ni táámá yā ní nadacuéeⁿ yā. ³⁸'Úú nidicho'ó ndís'tii ní nadacuéeⁿ nī cosecha chi

nguéé ndííⁿ nī ntiíⁿnyuⁿ. Táámá yā dííⁿ yā ntiíⁿnyuⁿ. Ní ndís'tii chi ndaa nī tuu'ví nī ntiíⁿnyuⁿ ndííⁿ yā.

³⁹Ni neené 'yaaⁿ 'iiⁿyāⁿ samaritanos yeⁿē yááⁿ miiⁿ s'teenú yā Jesús cucáávā nduudu yeⁿe n'daātāa miiⁿ chí caⁿ'a yā nduudu cuaacu: 'Iiⁿyāⁿ mííⁿ ní caⁿ'a yā chii yā 'úú tanducuéⁿē cosa chi ndííⁿ. ⁴⁰Ndaa saⁿ'ā samaritanos nanááⁿ Jesús. Di'cuútu sa 'iiⁿyāⁿ chi canée yā ndúucu sa. Ní canée yā miiⁿ 'uuvi nguuvi. ⁴¹Neené 'yaaⁿ cá yā s'teenú yā cucáávā nduudu yeⁿe Jesús. ⁴²Níicú 'iiⁿyāⁿ s'eeⁿ ngaⁿ'a yā ngii yā n'daataá miiⁿ: 'Áá ntéé cu'teenú 'nū caavā chi ch'iindiveéⁿ 'nū chi cuaacu nííⁿnyúⁿ nguéé dámaaⁿ yeⁿe chí ngaⁿ'ā di. Caati maáⁿ 'nū n'diichí 'nū ní ch'iindiveéⁿ 'nū chi cuaacu nííⁿnyúⁿ chí 'iiⁿyāⁿ 'cūū nguuvi Cristo chí inadan'guáⁿ'ai yā 'iiⁿyāⁿ yeⁿe iⁿ'yeeⁿ'dí 'cūū.

Jesús dííⁿ yā chi nduuvā yeⁿe daiya 'áámá rey

⁴³Ch'íínú 'uuvi nguuvi ní Jesús cueⁿé yā yáⁿ'āa Galilea. ⁴⁴Caati maaⁿ Jesús miiⁿ caⁿ'a cuaacú yā chí 'iiⁿyāⁿ nguéé dííⁿ yā honrar 'áámá 'iiⁿyāⁿ profeta taachi ngaⁿ'a yā yááⁿ vaacú yā. ⁴⁵Ní ndaa yā yáⁿ'āa Galilea ní 'iiⁿyāⁿ yeⁿe yáⁿ'āa Galilea miiⁿ tuu'mi di'cuúⁿ yā chí canée yā. 'Áá n'diichí yā tanducuéⁿē chí dííⁿ yā na yááⁿ Jerusalén, nguuvi yeⁿe 'viicu yeⁿe pascua, caati 'iiⁿyāⁿ s'uúⁿ cheⁿe ntuúⁿ yā 'viicu miiⁿ.

⁴⁶Ndaa ntúūⁿ Jesús na yááⁿ Caná yeⁿe yáⁿ'āa Galilea naachi din'dái yā vino ndúucú nuūⁿnī. Mííⁿ canée 'áámá rey yeⁿe yááⁿ Capernaum. Ngiiⁿ 'áámá daiya rey miiⁿ. ⁴⁷'Iiⁿyāⁿ

'cūū míⁿ ch'iindiveéⁿ yā chí ndaā Jesús yeⁿē yáⁿāa Judea na yáⁿāa Galilea. Cheⁿé yā nanááⁿ Jesús ní d'icuítu yā 'yā chí caⁿa yā n'diichí yā daiya sa chí nanduūvā yeⁿē caati 'aa cháá 'cuuvi. ⁴⁸Tuuⁿmi ní ngaⁿā Jesús ngii yā saⁿā: Ndúúti chí nguéé snaaⁿ dí señales ndúúcu milagros chí vaadí n'giinu nguéé cu'téenu di.

⁴⁹Iiⁿ'yāⁿ yeⁿe rey ngaⁿā yā ngii yā Jesús: Señor, cú'u yú caati 'āā cuéé 'cuūvi saⁿā 'lírⁿ yeⁿé.

⁵⁰Ngaⁿā Jesús ngii yā 'iiⁿ'yāⁿ: Cúnaⁿa di, daiya dí cánduuchi sa. Ní saⁿā miiⁿ ní chí'téenu sa nduudu chí caⁿā Jesús miiⁿ. Ní cuinaⁿa sa.

⁵¹Taachi 'āā ndaa niiⁿnuúⁿ vaacu sa 'iiⁿ'yāⁿ chí idiⁿ mandado yeⁿē sa candáa yā n'diichi yā saⁿā. Ní ngaⁿa yā ngii yā saⁿā: Daiyá nī miiⁿ candúúchi sa.

⁵²Tuuⁿmi ní itiinguunéeⁿ sa 'iiⁿ'yāⁿ s'eeⁿ: ¿De'ē hora naachi cuaáⁿ yeⁿē sa? Níicú ngaⁿa yā ngii yā saⁿa: 'Iicu taachi n'geecu 'áámá ní ch'iinu 'iⁿnūúⁿ miiⁿ sáⁿā.

⁵³Tuuⁿmi ní chiida saⁿā 'lírⁿ miiⁿ tuumicádífnuuⁿ yā chí hora miiⁿ chí ngaⁿa Jesús ngii yā: Daiya dí ní cánduuchi sa. Ní 'iiⁿ'yāⁿ miiⁿ ndúúcu nducyaaca familia yeⁿe yā s'téenu yā Jesús.

⁵⁴Chuū ndii 'úúví señal chí Jesús díⁿ yā cuayiivi chí ndáa yā yeⁿe yáⁿāa Judea ndii yáⁿāa Galilea.

Saⁿā chí nguεε ngii ngíicá

5 Chó'oo tanducuéⁿē cosa 'túúca. Véé 'áámá 'viicu yeⁿē 'iiⁿ'yāⁿ Israel. Níicú Jesús cuchée yā yáⁿ Jerusalén. ²Mííⁿ canée 'áámá viini ch'εεte niiⁿnuⁿ cheendi chéeⁿ, cuaaⁿ naachí indáa yā ndúúcu 'iiti cuúchi

chí n'diicui yā na yáⁿ Jerusalén. Viini ch'εεte miiⁿ nguuvi Betesda na nduudu hebreo. Véé nyuⁿu corredor nuuⁿmaⁿ ndiivi viini ch'εεte. ³Na corredor miiⁿ ndiitú ndúúcu n'deēe n'dáí 'iiⁿ'yāⁿ ngíitā; 'iiⁿ'yāⁿ n'guéenááⁿ, ndúúcu 'iiⁿ'yāⁿ chí nguéé ngii ngíicá yā, ndúúcu 'iiⁿ'yāⁿ chí nt'í'í ta'á yā o ca'a yā. 'Iiⁿ'yāⁿ miiⁿ canée ngíínú yā chí in'nuⁿ nuūⁿníⁿ. ⁴Caati vεε tiempo chí 'áámá ángel nch'éeⁿ yā níicú idi'núⁿu yā nuūⁿníⁿ chí snée ná viini ch'εεte. Ní cuayiivi 'iiⁿ'yāⁿ chí ndáa yā vmnááⁿ vmnaaⁿ chεεtí viini míⁿ nanduuva yeⁿé yā yeⁿē 'āā de'ē nūⁿ ca'āi chí ndii yā. ⁵Ní miiⁿ canée 'áámá sáⁿā ndiicú nditiⁿ'yuⁿ 'iinu ndúuyū chí ngíitā sa. ⁶Taachí Jesús n'diichí yā saⁿā chí candíití sá, níicú 'āā deenú yā chí 'āā 'naáⁿ ngíitā sa, tuuⁿmi ní ngaⁿa yā ngii yā saⁿā: ¿Áá néⁿé dí chí nduūvā yeⁿē di?

⁷Ní saⁿā chí ngíitā miiⁿ nan'guεεcútaⁿā sa yeⁿé yā: Señor, nguéé mar 'áámá saⁿā chí cu'nuūⁿ sa 'úu chééti viini taachi í'nuⁿu nuūⁿníⁿ. Caati taachí ndaá, 'āā ndáā taamá yā chεεtí viini.

⁸Ní ngaⁿa Jesús ngii yā saⁿā: Nacuéeⁿ di. Nadacuéeⁿ di yiive yeⁿē di ní cúnaⁿa di.

⁹Tuuⁿmi nūⁿ nduūvā yeⁿē sa. Ní nadacuéeⁿ sa yiive yeⁿē sa. Ní cunaⁿa sá. Ní nguuvi miiⁿ ní sábadu nguuvi chí ntaavi'tuunúⁿ 'iiⁿ'yāⁿ Israel. ¹⁰Níicú 'iiⁿ'yāⁿ Israel ngaⁿa yā ngii yā saⁿā chí 'āā nanduuvá yeⁿē sa: Caati maaⁿ ní sábadu miiⁿ, tan'dúúca chí caⁿa ley, nguéé cuuvi nandée di yiive yeⁿē di.

¹¹Ní n'guεεcútaⁿā sa yeⁿé yā: 'Iiⁿ'yāⁿ chí díⁿ yā chí nduuvā yeⁿé,

'iiⁿyāⁿ miiⁿ ní ngaⁿa yā ngii yā
'úú: Nadacuéⁿ di yiive yeⁿē di. Ní
cuinaⁿa di.

¹²Tuu'mi ní tiinguunéⁿ 'iiⁿyāⁿ
Israel saⁿā: ¿Du'ú chi 'tíicā ngaⁿā
ngii di: Nadacuéⁿ di yiive yeⁿe di,
ní cuinaⁿa di?

¹³Níicú saⁿā chi 'āā nduuvá yeⁿē
sa nguéé déénú sá du'ú 'iiⁿyāⁿ miiⁿ,
caati Jesús diví yā yeⁿe saⁿā miiⁿ.
Ní neené n'deēe 'iiⁿyāⁿ snée yā miiⁿ.

¹⁴Cuayiivi Jesús nandaacá yā saⁿā
na yáacū templo. Ní ngaⁿa Jesús
ngii yā saⁿā: Cun'díichí dí maaⁿ 'āā
nduuvá yeⁿē di. 'Aa ntéé diiⁿ di
nuuⁿndi niicu nguéé cuta'āa táamá
ca'ai chi más cā taaⁿ di.

¹⁵Tuu'mi saⁿā miiⁿ cunaⁿā sa ní
caⁿa sa chii sa 'iiⁿyāⁿ Israel chi
Jesús chi díiⁿ yā chi ndúúvā yeⁿe
sa. ¹⁶Ni cáávā chuū ní can'dáā
'iiⁿyāⁿ Israel Jesús miiⁿ chí neⁿé
sa 'caaⁿnúⁿ sa 'iiⁿyāⁿ caati díiⁿ yā
cosa chi 'tíicā miiⁿ nguuví chi
sábado chi ntaavi'túunuⁿ 'iiⁿyāⁿ.

¹⁷Jesús nan'guεεcútaⁿa yā yeⁿē
sa: Chiidá ní ndíi maaⁿ chí idiⁿ cá
yā ntiiⁿnyuⁿ. Ní 'úú idiⁿ ntiiⁿnyuⁿ
dendu'ū.

¹⁸Tuu'mi ní 'iiⁿyāⁿ Israel neⁿe
taavi sa 'caaⁿnúⁿ sa Jesús, caati
nguéé damaāⁿ chi nguéé díiⁿ yā
cumplir chi ngaⁿā na ley yeⁿe
sábado, caati ngaⁿá yā chi
Dendyuūs Chiidá yā, ní díiⁿ yā chi
nduuvídáámá yā ndúúcu Dendyuūs.

Dendyuūs dicho'ó yā Daiya yā

¹⁹Nan'guεεcutaⁿá Jesús ní ngaⁿa
yā ngii yā saⁿā: Cuaacu níⁿnyúⁿ,
cuāacū niiⁿnyuⁿ chí ngaⁿá ngíi
ndis'tii chi nguéé cuuví diiⁿ Daiyá
Dendyuūs mar 'áámá cosa dámaāⁿ

ndúúti chi nguéé n'diichí yā chi
diiⁿ Chiidá yā. Caati tanducuéⁿē
chi diiⁿ Chiidá yā, 'tiicá ntúūⁿ diiⁿ
Daiyá yā. ²⁰Caati Dendyuūs Chiidá
ní dinéⁿe yā 'úú chi Daiya yā. Ní
n'giⁿi yā 'úú tanducuéⁿe dendu'ú
chi díiⁿ yā. Niicu Chiidá n'giⁿi cá
yā 'úú ntiiⁿnyuⁿ n'geete ca nguéé tii
chuū. Níicú ndis'tii caⁿa yíínú ní
yeⁿē. ²¹Tan'dúúca Chiidá nadacuéⁿ
yā 'iiⁿyāⁿ chí 'āā n'dii ní nga'a yā
vida yeⁿé yā, 'tiicá ntúūⁿ 'úú Daiyá
yā ní nadacuéⁿ 'iiⁿyāⁿ chí 'āā n'díi
ní nga'á vida 'iiⁿyāⁿ miiⁿ chí neⁿé
nga'á. ²²Caati Chiidá nguéé díiⁿ yā
juzgar mar 'aama 'iiⁿyāⁿ naatí ca'á
yā 'úú chí Daiya yā chí díiⁿ juzgar
tanducuéⁿē. ²³Caati tanducuéⁿē
'iiⁿyāⁿ díiⁿ yā honrar 'úú chí Daiyá
yā tan'dúúca tanducuéⁿē 'iiⁿyāⁿ
díiⁿ yā honrar Chiidá. Du'ú chí
nguéé idiⁿ yā honrar 'úú chí Daiyá
Dendyuūs ní nguéé idiⁿ yā honrar
Chiidá chí dicho'ó yā 'úú.

²⁴Cuaacu níⁿnyúⁿ, cuāacū
niiⁿnyuⁿ ngaⁿá ngíi ndis'tii: 'Iiⁿyāⁿ
chí n'giindiveéⁿ yā nduudu chí
ngaⁿá, ní i'téenu yā yeⁿe 'iiⁿyāⁿ chí
dicho'ó 'úú, véé vida cueⁿe daāⁿmaⁿ
yeⁿé yā. Niicu nguéé condenado
yā. Nguéé canee yā dácaā yeⁿē chí
n'gii caati véé vida cueⁿe daāⁿmaⁿ
yeⁿé yā. ²⁵Cuaacu níⁿnyúⁿ, cuāacū
niiⁿnyuⁿ ngaⁿá ngíi ndis'tii: Cuchii
hora ní hora miiⁿ chuū taachi 'iiⁿyāⁿ
s'leeⁿ chí 'āā n'díi yā, 'caandiveéⁿ
yā nduudu yeⁿe 'úú chí Daiyá
Dendyuūs. 'Iiⁿyāⁿ chí i'teenu yā
nduudu yeⁿé cunduuchí yā cueⁿe
daāⁿmaⁿ. ²⁶Tan'dúúca Chiidá véé
vida yeⁿē maáⁿ yā, 'tiicá ntúūⁿ ca'a
yā 'úú chí Daiya yā vida yeⁿē maáⁿ.
²⁷'Tíicā ca'á yā poder 'úú chí díiⁿ

juzgar 'iiⁿyāⁿ caati 'úú Saⁿā chi Daiya Dendyuus 'úú. ²⁸Nguéé caⁿā yiinu di yeⁿē chūū, caati cuchii hora taachi nducyáácá 'iiⁿyāⁿ chi chinúu yā maaⁿ yaⁿāa 'caandiveéⁿ yā nduudu yeⁿé. ²⁹Ní nadacuéeⁿ yā yeⁿē nguaaⁿ tináⁿā. 'Iiⁿyāⁿ chi dííⁿ yā chi n'daacā, ní caⁿá yā cuneé yā ndúúcu vida cueⁿe daāⁿmaⁿ yeⁿé yā. Ní 'iiⁿyāⁿ chi nguéé n'daacā idiíⁿ yā, caⁿá yā na condenación.

**'Iiⁿyāⁿ s'eeⁿ caⁿa cuaacú
yā yeⁿē Jesús**

³⁰Ní caⁿa Jesús: 'Úú ní damaáⁿ ní nguéé deⁿē vee cuuvi dííⁿ. Tan'dúúca chi n'giindiveéⁿ, 'tíicā dííⁿ juzgar. Ní chi dííⁿ juzgar ní cuaacu caati nguéé in'nuúⁿ chi neⁿé maáⁿ naati chi neⁿe maāⁿ Chiidá chi dichó'o yā 'úú. ³¹Ndúúti chi yeⁿé māaⁿ chi ngaⁿá cuaacu ní nguéé cuaacu. ³²Táámá 'iiⁿyāⁿ chi dííⁿ yā caaⁿmaⁿ cuaacú yā yeⁿē 'úú. 'Úú ní deenú tii chí ngaⁿa yā yeⁿē 'úú chi cuaacu. ³³Ní ndís'tií ní dichó'o ní 'iiⁿyāⁿ s'eeⁿ nanááⁿ Juan. Ní Juan miiⁿ caⁿa sa nduudu cuaacu yeⁿe 'úú. ³⁴Caati 'úú nguéé itaⁿá nduudu cuaacu yeⁿē sáⁿā yeⁿe iⁿyeeⁿdí 'cūū naati ngaⁿá tanducuéⁿē chuū caati ndís'tií ní cuuvi nanguáⁿai nī. ³⁵Níicú Juan chi cheédínuūⁿniⁿ yā 'iiⁿyāⁿ miiⁿ tan'dúúca 'áámá chi deēve ngiichi ní ngíi n'gai, 'tíica yā. Ní ndís'tií ní dinéⁿe ní vaadi yeenú yeⁿé ní 'áámá tiempo ndúúcu chi deēve yeⁿé yā. ³⁶Naati 'úú ní ngaⁿá nduudu cuaacu chi ch'ēete ca chi caⁿa Juan miiⁿ caati ntiiⁿnyuⁿ chi teē Chiidá 'úú, ní chuū idiíⁿ. Tan'dúúca maāⁿ ntiiⁿnyuⁿ chi dííⁿ ní ngaⁿā nduudu cuaacu yeⁿé

chi Chiidá dichó'o yā 'úú. ³⁷Níicú maaⁿ Chiidá chi dichó'o yā 'úú ngaⁿa yā nduudu cuaacu yeⁿē 'úú. Ndís'tií mar 'áámá vmnéⁿēe nguéé n'giindiveéⁿ ní nduudu yeⁿe chiidá, ndíi nguéé ndúú n'diichí ní 'iiⁿyāⁿ taacá yā. ³⁸Ní ndis'tií ní nguéé 'áámá canée ní ndúúcu nduudu yeⁿé yā caati ndís'tií nguéé s'téenu ní chi 'úú ní 'iiⁿyāⁿ chi Dendyuūs dichó'o yā. ³⁹In'nuúⁿ ní naachi cánée nguūⁿ na libro yeⁿe Ndyuūs, níicú cadiinúúⁿ ní chi véé vida cueⁿe daāⁿmaⁿ yeⁿé nī. Ní mííⁿ ngaⁿā cuaacu yeⁿē 'úú. ⁴⁰Ndis'tií nguéé neⁿé ní chii ní nanaáⁿ tii cuūvi vida cueⁿe daāⁿmaⁿ yeⁿé nī.

⁴¹'Úú ní nguéé cutaⁿá honra yeⁿe saⁿā yeⁿe iⁿyeeⁿdí 'cūū. ⁴²Naati 'úú ideenú táacā ndís'tií ní nguéé neⁿé ní Dendyuūs. ⁴³'Úú ní cuchíi ndúúcu chi duuchi Chiidá. Ní nguéé 'cuaaⁿ ní ndís'tií 'úú. Ndúúti chi taamá yā cuchíi yā ndúúcu nduudu yeⁿe maáⁿ yā, tuuⁿmi ní 'cuaáⁿ ní 'iiⁿyāⁿ miiⁿ. ⁴⁴¿Táacā cu'téenu ndís'tií chi dííⁿ ní honrar 'áámá ní yeⁿē taamá ní ní nguéé neⁿé ní chi Dendyuūs dííⁿ yā honrar n'dií? ⁴⁵Nguéé nadacadíinuⁿ ndis'tií chi 'úú ngaⁿá nuuⁿndi yeⁿe ndís'tií nanááⁿ Chiidá. Véé 'áámá 'iiⁿyāⁿ chi ngaⁿa nuuⁿndi yeⁿe ndís'tií chi Moisés chi 'iiⁿyāⁿ chi i'téenu nī. ⁴⁶Ndúúti chi ndís'tií chi'téenu ní yeⁿe Moisés miiⁿ tuuⁿmi ní cu'téenu ní 'úú caati yeⁿē 'úú chi dingúuⁿ sa. ⁴⁷Ndúúti chi nguéé i'téenu ní chi dingúuⁿ Moisés, ¿táacā cu'téenu ní nduudu yeⁿē 'úú?

**Jesús caⁿá yā chi cheⁿé nyuⁿu mil
saⁿā**

(Mt. 14.13-21; Mr. 6.30-44; Lc. 9.10-17)

6 Cho'o cosa chuū, ní cueⁿe Jesús taama lado yeⁿē

nuuⁿniⁿyáⁿā Galilea chi nguuví ntúūⁿ Tiberias. ²Nééné n'deēe 'iiⁿyāⁿ cueⁿe yā n'dáa yā Jesús caati n'diichí yā señales yeⁿé yā chi diíⁿ yā ndúúⁿcū 'iiⁿyāⁿ chi ngiitā. ³Ní cucھے Jesús 'áámá cuēeti ní mííⁿ ch'iindí yā ndúúⁿcū discipulos yeⁿé yā. ⁴Ní chinee niiⁿnuúⁿ nguuví yeⁿe pascua yeⁿē 'iiⁿyāⁿ Israel s'eeⁿ. ⁵Tuuⁿmiⁿ n'diichi Jesús cuaaⁿ 'niiⁿnuúⁿ níⁿcú snaaⁿ yā chí n'dee n'dái 'iiⁿyāⁿ cuchí yā nanáaⁿ yā. Ní Jesús ngaⁿa yā ngii yā Felipe: ¿Tií caⁿa yú cuaí yú pan chi che'e 'iiⁿyāⁿ s'tií?

⁶Ní chuū Jesús ngaⁿa yā ti diíⁿ yā probar saⁿā miiⁿ táacā diiⁿ sá maāⁿ sa, caati Jesús maáⁿ yā deenú yā de'ē chi diíⁿ yā. ⁷Nan'guēcútaⁿa Felipe miiⁿ yeⁿé yā: Ndúúⁿcū nyuⁿu ciento caadi tuūmī chi caⁿá nguái pan nguéé tunééⁿ chí cuta'á 'iiⁿyāⁿ s'tií 'aama taaⁿ chí che'e yā.

⁸Áámá discipulo yeⁿé yā chí ngúúví Andrés chi 'dínu yā Simón Pedro, ngaⁿa sá ngii sa Jesús: ⁹Áámá saⁿā 'lííⁿ chi canee 'muuⁿ ndéé sa nyuⁿu panes cebada ndúúⁿcū na 'uuví 'yaacā n'gaiyāā. ¿De'ē tunééⁿ chuū chi che'e 'iiⁿyāⁿ s'tií?

¹⁰Tuuⁿmiⁿ ní nan'guēcútaⁿā Jesús miiⁿ ngaⁿa yā ngii yā saⁿā: Cúúví nī 'iiⁿyāⁿ s'tií ní 'cuēté núúⁿ yā. Nééné véé yuune lugar miiⁿ níⁿcú ch'ēete 'áámá número tan'duucā nyuⁿu mil saⁿā. ¹¹Ní Jesús miiⁿ sta'á yā panes miiⁿ níⁿcú taachi ngaⁿa yā ngii yā: Gracias N'dii Ndyuús, tucá'a yā ca'a yā discipulos, ní discipulos ní ca'á yā 'iiⁿyāⁿ chí ve'ēté miiⁿ. 'Tiicá ntúūⁿ diiⁿ Jesús ndúúⁿcū 'yaacā. Ní 'iiⁿyāⁿ miiⁿ sta'á yā 'yaacā. Sta'á yā

nducuéⁿē chi neⁿé yā. ¹²Taachi 'āā ntee véé chi neⁿe yā, Jesús ngaⁿa yā ngii yā discipulos yeⁿé yā: Nadicuéⁿ di nducuéⁿē tááⁿ panes chi nángaāva caati nguéé cuuvi ndái de'ē vee.

¹³Nadicuéⁿ yā tanducuéⁿē taaⁿ panes chi nángaāva. Níⁿcú chiitu ndiichúúví 'cuētēē naachi nyuⁿu pan cebada chi ningaāva naachí che'ē 'iiⁿyāⁿ s'eeⁿ. ¹⁴Taachi n'diichi 'iiⁿyāⁿ s'eeⁿ señal chi diiⁿ Jesús miiⁿ tuuⁿmi ní ngaⁿa yā ngii yā vi'i: Cuaacu níⁿnyúⁿ 'iiⁿyāⁿ 'cúú chi profeta chi canee chi ndaá yā iⁿ'yééⁿdi 'cūú.

¹⁵Taachí tuumicádíínuuⁿ Jesús chí 'iiⁿyāⁿ s'eeⁿ neⁿé yā cuta'á yā 'yā ní cu'néeⁿ yā 'yā lado yeⁿē rey tuuⁿmi ní cueⁿé máaⁿ yā na 'áámá cuēeti.

Jesús ngiica yā vmnaaⁿ nuūⁿniⁿyáⁿā

(Mt. 14.22-27; Mr. 6.45-52)

¹⁶Āā chii chíínu miiⁿ ní cueⁿe discipulos yeⁿé yā na nuūⁿniⁿyáⁿā. ¹⁷Ní chí ndaa yā 'áámá barco ní cueⁿé yā ná nuūⁿniⁿyáⁿā. Ní 'āā ntéé ndaá yā na yáāⁿ Capernaum. 'Āā chii 'da'a ní nguéé ndāā Jesús naachi snée yā. ¹⁸Ní cho'ō 'aama 'yúúné taaⁿ ní nadācúééⁿ n'dai nuūⁿniⁿyáⁿā. ¹⁹Taachí 'āā cueⁿé yā tanduu nyuⁿu candúú nyaaⁿ kilómetros, tuuⁿmi n'diichí yā chí cúchii Jesús miiⁿ. Ngiicá yā cuaaⁿ vmnaaⁿ nuūⁿniⁿ. Ní taachi 'aa cháá ndaa Jesús niiⁿnuúⁿ na barco miiⁿ discipulos diiⁿyā sá chii. ²⁰Ní Jesús ngaⁿa yā ngii yā saⁿā s'eeⁿ: Nguéé 'va'ā ndís'tií ti 'úú.

²¹Tuuⁿmiⁿ ngaⁿa sá ngii sa Jesús: Cho'ó nī cuaaⁿ chēeti barco. Yeenú n'dai sa chí sndaā Jesús na barco.

Āā nuúⁿ ndaa barco miiⁿ na yáⁿāa naachí cuéⁿē.

'Iiⁿyāⁿ in'nuúⁿ yā Jesús

²²Chi deeve táamá nguuvi ní 'iiⁿyāⁿ chi snéé yā táamá lado yeⁿe nuūⁿnīⁿyáⁿā n'diichí yā 'áamá barco nuūⁿ, barco miiⁿ chi 'āā cueⁿē discipulos. Ní n'diichí yā chi nguéé cueⁿe Jesús ndúúcu discipulos yeⁿé yā. Ní discipulos yeⁿé yā cuinaⁿá yā dámaáⁿ yā. ²³Tan'duuvi barcos yeⁿē Tiberias ndaā niⁿnuúⁿ na lugar naachi ch'eté yā chi che'é yā pan 'iicū cuayiivi chi Jesús ngāⁿa yā: Gracias n'dii Dendyuūs Chiidá. ²⁴Taachí 'iiⁿyāⁿ n'diichi yā chi nguéé Jesús miiⁿ ndíi nguéé ndúú discipulos yeⁿé yā, tuu'mi ní chi ndaá yā ch'eteti barcos. Ní cueⁿé yā na yāāⁿ Capernaum. N'nuūⁿ yā Jesús miiⁿ.

Jesús tan'dúúca yuündū chi ca'a vida

²⁵Taachí 'iiⁿyāⁿ s'eeⁿ ndaacá yā Jesús táamá lado yeⁿē nuūⁿnīⁿyáⁿā tuu'mi ní ngaⁿa yā ngii yā 'iiⁿyāⁿ: N'dii Maestro, ítíi cuaⁿa ndaá ní 'muuⁿ?

²⁶Nan'gueecútaⁿa Jesús yeⁿe yā ní ngaⁿa yā ngii yā: Ndis'tii, cuaacu níⁿnyúⁿ cuāācū niⁿnyuⁿ nguéé in'nuúⁿ nī 'úú ti n'diichí nī chi díⁿ señales naati chí teé pan, ní che'é nī ní chiitu ndis'tii. ²⁷Nguéé díⁿ nī ntiiⁿnyuⁿ yeⁿe comida chi chó'oo ti yeⁿe comida chí cunéé cueⁿe daāⁿmaⁿ, ch'et chi tee Saⁿā chi Daiya Dendyuūs ndis'tii caati Dendyuūs Chiidá ca'á yā poder Daiyá yā.

²⁸Tuu'mi ní ngaⁿa saⁿā s'eeⁿ ngii sa 'iiⁿyāⁿ: ¿Taaca díⁿ 'nū chi cuuví

díⁿ 'nū ntiiⁿnyuⁿ chi ntiiⁿnyuⁿ yeⁿé Dendyuūs miiⁿ?

²⁹Nan'gueecutáⁿā Jesús yeⁿē sa ní ngaⁿá yā ngii yā saⁿā: Chuū chi ntiiⁿnyuⁿ yeⁿe Dendyuūs miiⁿ chi cu'téenu di yeⁿē 'iiⁿyāⁿ chi Ndyuūs dichó'o yā 'iiⁿyāⁿ.

³⁰Tuu'mí ngaⁿa sa ngii sa 'iiⁿyāⁿ: ¿De'e señal chí cu'neeⁿ nī chí snaáⁿ 'nū, ní cu'téenu 'nū n'dii? ¿De'e ntiiⁿnyuⁿ idiíⁿ nī? ³¹Chiida yú ní che'é yā yuündū maná na yáⁿā naachi nguéé ch'etinéé 'iiⁿyāⁿ tan'dúúca chi canéé nguūⁿ na libro yeⁿe Ndyuūs 'tíicā: Yuündū yeⁿē nanguuvi Ndyuūs ca'á yā chi che'é 'iiⁿyāⁿ s'eeⁿ.

³²Nan'gueecutáⁿā Jesús yeⁿē sa: Cuaacu níⁿnyúⁿ, cuāācū niⁿnyuⁿ ngaⁿá ngii ndis'tii: Nguéé teé yā Moisés miiⁿ yuündū chi maná chi yeⁿē nanguuvi, naati Chiidá teé yā n'dii pan chi cuaacu níⁿnyúⁿ chí yeⁿe va'ai ch'eteti nguuvi. ³³Caati pan chi yeⁿé Dendyuūs ní 'iiⁿyāⁿ miiⁿ chi inch'eeⁿ yā yeⁿe va'ai ch'eteti nguuvi ní nga'á yā vida cueⁿe daāⁿmaⁿ yeⁿē 'iiⁿyāⁿ yeⁿeⁿ íⁿyeēⁿdí.

³⁴Tuu'mi ní ngaⁿā sa ngii sa Jesús: Señor, téé nī pan 'cūū nús'uu cueⁿé daāⁿmaⁿ.

³⁵Jesús ngaⁿa yā ngii yā saⁿā: 'Úú ní tan'dúúca pan 'tíicā 'úú ni ca'á vida cueⁿe daāⁿmaⁿ. Du'u chi chii nanaáⁿ nguéé cúúví cuicú yā. Ní du'ū chi cu'teenu 'úú 'āā ntéé cuuví yaacá yā. ³⁶Naati 'úú ni ngaⁿá ndis'tii: 'Āā n'diichí nī 'úú, níicú ndíi nguéé s'téenu nī 'úú. ³⁷Tanducuéⁿē 'iiⁿyāⁿ chi itée Chiidá 'úú, 'iiⁿyāⁿ s'tíi cuchii nanaáⁿ. Du'ū chí chii nanaáⁿ nguéé tun'daá 'iiⁿyāⁿ ch'uvai.

³⁸Caati 'úú chiicá yeⁿē na va'ai

cheete nguuvi ní nguée dífⁿ chi 'úú ne^{nl}é maáⁿ, caatí dífⁿ chi ne^{nl}e maāⁿ 'ii^{nyā} chi dichó'o yā 'úú. ³⁹Chuu chi ne^{nl}e Chiidá chi dichó'o yā 'úú, caatí 'úú ní nguée nindaí mar 'áámá ye^{nl}e tanducue^{nl}e chi tee yā 'úú. 'Úú ní nadin'duuchí tanducue^{nl}e 'ii^{nyā} ye^{nl}e nguaaⁿ tiná^{nl}a nguuvi chi 'cuiinū i^{nyee}ndí. ⁴⁰Chuū chi ne^{nl}e 'ii^{nyā} chi dichó'o yā 'úú: Nducyaaca 'ii^{nyā} chi n'diichí yā Daiya Ndyuūs, ní i'téenu yā 'ii^{nyā}, véé vida cue^{nl}e daāⁿmaⁿ ye^{nl}é yā. Niicu 'úú ní nadicue^{nl} 'ii^{nyā} s'eeⁿ nguuvi chi 'cuiinū i^{nyee}ndí.

⁴¹Tuu'mí nga^{nl}a 'ii^{nyā} Israel ye^{nl}é yā: Nguée n'daacā chi nga^{nl}a yā: 'Úú tan'dúucā pan chi cuch'ééⁿ nanguuvi, 'tíicā 'úú. ⁴²Ní nga^{nl}a yā: ¿Áá nguée sá^{nl}a 'cūū chi Jesús daiya José? Ní n'diichi yú chiidá yā ndúucū cheecú yā. ¿Taacā chi nga^{nl}a sa: 'Úú chi cuch'ééⁿ ye^{nl}e na va'ai cheeti nguuvi?

⁴³Ní Jesús nan'guuecúta^{nl}a yā ye^{nl}e sa, ní nga^{nl}a yā ngíí yā sa^{nl}a: Nguée caa^{nl}máⁿ ndís'tií nguááⁿ maáⁿ nī. ⁴⁴Mar 'áámá 'ii^{nyā} nguée cuuvi ndaá yā nanaáⁿ ndúutí chi Chiidá chi dichó'o yā 'úú nguée nndée yā 'ii^{nyā}. 'Úú nadan'duuchí yā nguuvi chi 'cuiinū i^{nyee}ndí. ⁴⁵Canée nguūⁿ na libro ye^{nl}e Ndyuūs naachi nga^{nl}a profetas 'tíicā: Dendyuūs ca'cueⁿ yā nducyaaca yā. Nducyaaca 'ii^{nyā} chi ch'iindiveéⁿ yā ye^{nl}e Chiidá ní 'āā cueéⁿ yā ye^{nl}e Chiidá, cuchíí yā nanááⁿ 'úú.

⁴⁶Mar 'áámá 'ii^{nyā} 'āā n'diichí yā Chiidá, dámaaⁿ Cristo chi ye^{nl}e Dendyuūs ti Daiyá Ndyuūs. 'ii^{nyā} 'cūū dámaaⁿ n'diichí yā Chiidá.

⁴⁷Cuaacu níf^{nyú}, cuācū nii^{nyu}

nga^{nl}a ngíí ndis'tií: Du'ū chi i'téenu yā 'úú canduuchí yā cue^{nl}e daāⁿmaⁿ. ⁴⁸'Úú tan'dúucā pan chi canduuchi, 'tíicā 'úú. ⁴⁹Chiidá nī che'é yā pan maná na yá^{nl}āa naachi nguée 'ii^{nyā} ní ch'ii yā. ⁵⁰Chuū chi pan chi cuch'ééⁿ na va'ai cheeti nguuvi caatí 'ii^{nyā} chi che'é yā ye^{nl}e nguée 'cuūvi yā. ⁵¹'Úú tan'dúucā pan chi canduuchi chi cuch'ééⁿ na va'ai cheeti nguuvi. Du'u 'ii^{nyā} chi ch'ée yā pan 'cūū, cunduuchí yā cue^{nl}e daāⁿmaⁿ. Níicú pan miiⁿ chi 'úú ca^{nl}a ní yuūtē ye^{nl}é maáⁿ. Chuū chi ca'á cáávā vida ye^{nl}é 'ii^{nyā} ye^{nl}e i^{nyee}ndí 'cūū.

⁵²Tuu'mí ní 'ii^{nyā} Israel ch'εecu cheendí sá nguaaⁿ maāⁿ sa: ¿Táacā cuuvi téé sá cuerpo ye^{nl}e sa chi che'é nū?

⁵³Tuu'mí nga^{nl}a Jesús ngíí yā sa^{nl}a: Cuaacu níf^{nyú}, cuācū nii^{nyu} nga^{nl}a ngíí ndis'tií: Nduuti chi nguée che'e nī cuerpo ye^{nl}e Sa^{nl}a chi Daiya Dendyuūs ní nduuti chi nguée cu'tú nī yuuúⁿ ye^{nl}e sa, nguεe cūnee vida cue^{nl}e daāⁿmaⁿ ndúucū nī. ⁵⁴Du'u chi che'e cuerpo ye^{nl}e ni cu'u yuuúⁿ ye^{nl}é, cunée vida cue^{nl}e daāⁿmaⁿ ndúucū. Níicú 'úú nadicue^{nl} 'ii^{nyā} s'eeⁿ nguuvi chi 'cuiinū i^{nyee}ndí. ⁵⁵Caatí cuerpo ye^{nl}é, cuaacu níf^{nyú} yuūtē chi che'e yā. Ní yuuúⁿ ye^{nl}é, cuaacu níf^{nyú} chi yuuúⁿ chi cu'u yā.

⁵⁶Du'u chí che'e cuerpo ye^{nl}é ní cu'tú yuuúⁿ ye^{nl}é cunee yā nduucú, ní 'úú cunee ndúucú yā. ⁵⁷Tan'dúucā chi Chiidá canduuchí yā ní dichó'o yā 'úú, ní 'úú canduuchí cáávā 'ii^{nyā} miiⁿ. 'Tiicá ntúūⁿ 'ii^{nyā} chi che'e yā 'úú, 'ii^{nyā} miiⁿ ní canduuchi ntúúⁿ yā cáávā 'úú. ⁵⁸Chuū pan chi

cuch'eeⁿ yeⁿē na va'ai cheeti nguuvi. Nguéé tan'dúucā pan maná chi che'ē chiidá nī miiⁿ tiempo chi 'āā ch'ó'ōo ní ch'iī yā. Du'u chi che'e pan 'cūū cunduuchí yā cueⁿe daāⁿmaⁿ.

⁵⁹ Chuū chí caⁿa Jesús na yáacū sinagoga taachi cueⁿé yā na yááⁿ Capernaum.

Nduudu yeⁿe vida cueⁿe daāⁿmaⁿ

⁶⁰ Tuu'mi n'dee n'dái discipulos yeⁿé yā taachi ch'iindiveéⁿ yā chuū ní caⁿa yā: Cheechí 'téé nduudu 'cūū. ¿Du'ū rá 'caandiveeⁿ rá?

⁶¹ Taachí déénú maāⁿ Jesús chi discipulos yeⁿé yā indeē sa nguááⁿ maāⁿ sa yeⁿe chúū tuu'mi ní ngaⁿá yā ngii yā saⁿá s'eeⁿ: ¿Áá chuū chi nguée ineéⁿ nūuⁿ ndís'tiī? ⁶² ¿De'ē ca dííⁿ ndís'tiī, taachí n'diichí nī Saⁿá chí Daiya Dendyuūs chí ch'ee sa na va'ai cheeti nguuvi naachí canéé sa vmnááⁿ vmnaaⁿ? ⁶³ Espíritu chuū chí nga'a vida yeⁿé 'iīⁿyāⁿ ní 'iīⁿyāⁿ canéé ndúucū espíritu yeⁿé yā. Yuūtē miiⁿ nguéé de'ē vee idiīiⁿ. Nduudu chí ngaⁿá ngii ndís'tiī, ní yeⁿē espíritu ní ca'a vida 'iīⁿyāⁿ. ⁶⁴ Véé n'duuvi ndís'tiī chí nguéé i'téénú nī. Caati Jesús ndíí cuaaⁿ vmnaaⁿ 'āā deenú yā du'ū 'iīⁿyāⁿ s'eeⁿ chí nguéé cu'téenu yā, nífcú du'ū 'iīⁿyāⁿ chí dííⁿ yā entregar 'iīⁿyāⁿ. ⁶⁵ Ní Jesús ngaⁿa yā: Cáávā chuū chí ngaⁿá ngii ndís'tiī, caati mar 'áámá 'iīⁿyāⁿ nguéé cuchíí yā nanaáⁿ ndúúti chí nguéé cáávā chí Dendyuūs 'cuúⁿ yā 'iīⁿyāⁿ. ⁶⁶ Ndiī tuu'mi, neené 'yaaⁿ discipulos yeⁿé yā ndaacadáámí sá ní 'āā ntéé cachiica sa ndúucū Jesús. ⁶⁷ Tuu'mí ní ngaⁿa Jesús ngii yā saⁿá chí ndiichúví: ¿Áá neⁿé nī ntuūⁿ ndís'tiī ndaacadáámí nī yeⁿé?

⁶⁸ Tuu'mi ní nan'guēcútaⁿá Simón Pedro: Señor, ¿du'u chí caⁿá ndúucū 'nū? N'diī ní canéé nī ndúucū nduudu yeⁿé vida cueⁿe daāⁿmaⁿ.

⁶⁹ Nús'uu i'téenu 'nū ní deenú 'nū chí n'diī chí Cristo, Daiya Dendyuūs chí canduuchi cueⁿe daāⁿmaⁿ.

⁷⁰ Ní Jesús nan'guēcútaⁿá yā: ¿Áá nguéé 'úú chí ndeevé ndís'tiī ndiichúví nī? Ní 'áámá chéé ndís'tiī nī yááⁿ nguīnūⁿ.

⁷¹ Ní ngaⁿa yā yeⁿe Judas Iscariote, daiya Simón caati sáⁿa 'cūū chí canee chí diiⁿ sa entregar 'iīⁿyāⁿ. Saⁿá miiⁿ 'áámá sá yeⁿē naachi ndiichúví sá.

'Diīnū Jesús nguéé i'teenú yā

7 Cho'ōo tanducuéⁿē chuū, Jesús cachiicá yā na yáⁿā Galilea. Nguéé neⁿé yā cuchiicá yā na yáⁿā Judea caati saⁿá Israel s'eeⁿ canéé ngiinu sa chí 'caaⁿnúⁿ sa Jesús. ² Ní 'āā chinee nīiⁿnuúⁿ nguuvi 'viicu yeⁿē va'āi chí 'neeⁿ n'daí yā arco yeⁿē testamento yeⁿē 'iīⁿyāⁿ Israel s'eeⁿ. ³ Tuu'mí ní ngaⁿa 'dífnu yā ngii yā 'iīⁿyāⁿ: Nan'dáa di 'múúⁿ ní cueⁿe di na yáⁿā Judea caati discipulos yeⁿē di cuuví snaaⁿ yā dendu'ū ntiīⁿnyuⁿ chí idiīⁿ di. ⁴ Caati ndiī 'áámá 'iīⁿyāⁿ nguéé dííⁿ yā 'áámá chí canúúⁿ n'de'ei. Nífcú maáⁿ yā ní neⁿé yā chí 'iīⁿyāⁿ n'diichí yā 'yā. Ndúúti chí dii chí diiⁿ di cosa chí 'tífcā tuu'mi ní 'cuuⁿmiⁿ di maāⁿ di nanááⁿ 'iīⁿyāⁿ yeⁿe iⁿ'yeeⁿdí 'cūū.

⁵ Ní mar 'áámá 'dífnu yā nguéé chí'teenú yā 'iīⁿyāⁿ. ⁶ Tuu'mí ngaⁿa Jesús ngii yā saⁿá: 'Aa ntéé véé chí 'aacu hora yeⁿé, caati tiempo yeⁿé nī 'āā canéé. ⁷ 'Iīⁿyāⁿ yeⁿē iⁿ'yeeⁿdí cuuvi n'diichí yā ndís'tiī.

Nguéé cuuvi n'diichí yā 'úú caati 'úú ní ngaⁿá cuaacú chee chi nguéé n'daacā idiiⁿ 'iiⁿyāⁿ yeⁿe iⁿyééⁿdi 'cūū. ⁸Ndís'tiī caⁿa nī 'viicu 'cūū. 'Úú ní nguée caⁿá maaⁿnguuvi, caati 'āā cuéé cunuūⁿ ca'a hora yeⁿé.

⁹Taachi ch'iinu caⁿa yā chii yā nduudú 'cūū 'díinu yā, tuuⁿmi Jesús canée ca yā yāⁿā Galilea.

Jesús cueⁿe yā 'viicu yeⁿe vaⁿāi chi 'nee n'dái yā arco yeⁿe testamento

¹⁰Taachi cueⁿé saⁿa 'díinu yā 'viicu, 'tiicá ntúūⁿ miiⁿ ní cueⁿé Jesús cuayiivi. Nguéé ch'iⁿí yā chi Jesús miiⁿ. Cheⁿe n'de'ei núuⁿ yā. ¹¹Tuuⁿmi ní saⁿa Israel s'eeⁿ ní inⁿnuuⁿ sa 'iiⁿyāⁿ na 'viicu miiⁿ. Ní ngaⁿa sa: ¿Tíí cánéé 'iiⁿyāⁿ miiⁿ?

¹²'Iiⁿyāⁿ yāāⁿ miiⁿ neené n'deēe ngaⁿa yā yeⁿé yā. N'duuví yā ngaⁿa yā: 'Iiⁿyāⁿ miiⁿ n'dai taavi yā. Ta n'duuví yā ngaⁿa yā: Nguéé, caati nginnche'éf yā 'iiⁿyāⁿ.

¹³Mar 'áámá saⁿā chí cheⁿe sa 'viicu nguéé caⁿa sa yeⁿé yā ti 'va'a sa 'iiⁿyāⁿ Israel.

¹⁴Chí maⁿā 'viicu, tuuⁿmi ní Jesús cucheé yā cheeti yáacū templo ní ch'i'cueeⁿ yā. ¹⁵Nífcú saⁿa Israel ngeⁿe yiinu sa ní ngaⁿā sa: ¿Táácā déenu sáⁿa 'cūū letras caati sáⁿa 'cūū nguée 'néé sa?

¹⁶N'guēcútaⁿa Jesús ní caⁿa yā: Chiiⁿ chí ng'i'cueeⁿ chi deenu ní nguéé yeⁿé, ti yeⁿe 'iiⁿyāⁿ chi dichó'o yā 'úú. ¹⁷Ndúuti chi 'iiⁿyāⁿ neⁿé yā dííⁿ yā voluntad yeⁿé Dendyuūs, tuuⁿmi ní deenu yā chi ng'i'cueeⁿ nduuti chi yeⁿé Dendyuūs o nduuti chi 'úú ngaⁿá yeⁿe maáⁿ. ¹⁸'Iiⁿyāⁿ chí ngaⁿa yā yeⁿe maáⁿ yā inⁿnuúⁿ yā poder yeⁿe maáⁿ yā.

Naati 'iiⁿyāⁿ chi inⁿnuúⁿ yā poder yeⁿe 'iiⁿyāⁿ chi dichó'o yā 'yā, 'iiⁿyāⁿ miiⁿ ní cuaacú yā. Ní nguéé chi nguéé cuaacu nduucú yā.

¹⁹¿Áá nguéé ca'a Moisés ndís'tiī nguéé yeⁿe ley? Ní mar áámá ndís'tiī nguéé idiíⁿ nī chí ngaⁿa ley miiⁿ. ¿De'ē cáávā chí neⁿe 'caaⁿnuⁿ ndís'tiī 'úú?

²⁰N'guēcútaⁿā 'iiⁿyāⁿ ní caⁿa yā Jesús: Yááⁿ'nguiinūūⁿ canée ndúucú di. ¿Du'ú idiiⁿ núúⁿ yiinu chí neⁿé 'caaⁿnūⁿ dii?

²¹Jesús ní n'guēcútaⁿa yā ní ngaⁿa yā ngii yā 'iiⁿyāⁿ: Dííⁿ 'áámá ntiíⁿnyuⁿ ní nducyaaca ndís'tiī ngeⁿe yiinu nī. ²²Cuaacu chí Moisés miiⁿ tee sa ley yeⁿe circuncisión ndís'tiī. (Nguéé chííⁿ yeⁿe Moisés miiⁿ chí yeⁿe chiidá nī.) Ní sábadó chí nguuvi chí 'iiⁿyāⁿ Israel ntaaviⁿtuunúúⁿ yā, ndís'tiī idiíⁿ nī circuncidar saⁿā 'lííⁿ. ²³Ndúuti chí cuaáⁿ nī chí dííⁿ yā circuncidar saⁿā 'lííⁿ nguuvi sábadó caati ley yeⁿe Moisés canée chí dííⁿ nī cumplir, ¿de'ē induuvi taaⁿ nī nduucú caati sábadó idiíⁿ chí nduūvā n'daacā yeⁿe 'áámá saⁿā? ²⁴Nguéé dííⁿ nī juzgar tan'dúucā chí nadacadíinuⁿ nī naati dííⁿ nī juzgar chí cuaacu ndúucú chí n'dái miiⁿ.

¿Áá saⁿā miiⁿ chí Cristo?

²⁵Tuuⁿmi ngaⁿa n'duuví 'iiⁿyāⁿ yeⁿe yāāⁿ Jerusalén: ¿Áá nguéé 'iiⁿyāⁿ 'cúú chí neⁿe 'caaⁿnúⁿ yā? ²⁶N'diichí nī. Jesús nguéé 'va'á yā ngaⁿa yā nanááⁿ nducyáácā 'iiⁿyāⁿ. Ní nguéé du'ú vee 'iiⁿyāⁿ ngaⁿa yā ngii yā 'yā. ¿Áá cuaacu nííⁿnyúⁿ chí 'iiⁿyāⁿ n'geete chí ngaⁿā ntiíⁿnyúⁿ yā ní déenu yā chí 'iiⁿyāⁿ 'cúú chí cuaacu nííⁿnyúⁿ chí Cristo? ²⁷'Iiⁿyāⁿ

'cúu deenu yú tíí ndiicá yā naati taachi ndiicá Cristo miiⁿ, mar 'áámá 'iiⁿyāⁿ nguée deenú yā tíí ndiicá yā.

²⁸Tuu'mi ní ngaⁿa yuudu Jesús taachí ch'i'cueeⁿ yā na yáacu templo ní ngaⁿa yā: Ndis'tií, ní 'āā n'diichí nī 'úú. Ní 'āā deenú nī tíí yāāⁿ yeⁿé. Níicú 'úú ní nguéé cuchíí yeⁿé maáⁿ, naati 'iiⁿyāⁿ chi dichó'o yā 'úú ní cuaacú yā. Ndis'tií nguéé n'diichí nī 'iiⁿyāⁿ miiⁿ. ²⁹Naati 'úú ní n'diichí 'iiⁿyāⁿ miiⁿ caati 'úú ndiicá yeⁿé yā, ní 'iiⁿyāⁿ miiⁿ dichó'o yā 'úú.

³⁰Tuu'mi ní idiíⁿ núuⁿ yiinu 'iiⁿyāⁿ chi cuta'á yā Jesús naati mar 'áámá 'iiⁿyāⁿ nguéé che'ē ta'á yā Jesús, caati 'āā cuéé ndaa hora yeⁿé yā. ³¹Níicú 'yaaⁿ n'dáí 'iiⁿyāⁿ yeⁿé 'iiⁿyāⁿ chi snéé miiⁿ chi'téenu yā Jesús. Ní ngaⁿa yā ngii yā 'iiⁿyāⁿ s'eeⁿ: Taachi ndaá Cristo miiⁿ, 'áá nguéé cuuvi dííⁿ yā más cā señales chi diíⁿ sáⁿa 'cūū?

Saⁿā fariseos dicho'ó yā policías chi sta'á yā Jesús

³²Tuu'mi ní saⁿā fariseos ch'i'indiveeⁿ sa yeⁿe 'iiⁿyāⁿ chi neené n'dee ngaⁿa yā 'túúcā yeⁿé Jesús miiⁿ. Chiiduú n'gēetē ndúúcū saⁿā fariseos dicho'ó yā policías chi cuta'a sa Jesús. ³³Tuu'mi ní Jesús ngaⁿa yā ngii yā saⁿā s'eeⁿ: 'Āā ntee 'nááⁿ cuneé ndúúcū ndis'tíí ní naⁿá n'diichí 'iiⁿyāⁿ chi dichó'o yā 'úú. ³⁴In'nuúⁿ nī 'úú ní 'āā ntéé ndaacá nī 'úú. Ní naachi 'úú caneé, ndis'tií ní nguéé cuuvi ndaa nī.

³⁵Tuu'mi ní ngaⁿa 'iiⁿyāⁿ Israel nguaaⁿ maáⁿ yā: 'Tíí cáⁿā 'iiⁿyāⁿ 'cúu chi nguéé nindaaca yú 'iiⁿyāⁿ? 'Áá caⁿá yā n'diichi 'iiⁿyāⁿ Israel chi cueⁿé yā 'muuⁿ cueⁿé yā miiⁿyā

nguaaⁿ 'iiⁿyāⁿ chi nguée yeⁿe ndaata Israel ní ca'cueéⁿ yā 'iiⁿyāⁿ miiⁿ? ³⁶¿De'ē chi ntúúⁿ ngaⁿā Jesús: In'nuúⁿ nī 'úú ní nguéé nindaaca nī 'úú; ní naachi 'úú caneé, nguéé cuuvi cundaā ndis'tií?

Yíicú yeⁿe nuūⁿnī chi canduuchi

³⁷Ngúúví chí ch'i'inū 'viicu ch'ēete miiⁿ, Jesús cheendii yā caⁿā diitú yā: Du'u chí yaaca chíi nanaáⁿ ní 'úú ca'á chí cu'u yā. ³⁸Du'ū chí i'teenu 'uú, véé vida yeⁿé yā. Ní vida canéé tan'dúúcā 'áámá yíicú nuūⁿnī chí ca'a vida cueⁿe daāⁿmaⁿ 'iiⁿyāⁿ miiⁿ. Chuū canee nguūⁿ na libro yeⁿe Dendyuūs.

³⁹Ní chuū ngaⁿá yā yeⁿe Espíritu N'dai yeⁿe Ndyuūs. 'Iiⁿyāⁿ chí cu'téenu yā Jesús canéé chí cuta'á yā Espíritu N'dai yeⁿe Ndyuūs. Ní Dendyuūs nguéé ca'a yā Espíritu N'dai yeⁿe yā ti Jesús miiⁿ ní 'āā cuéé cheⁿé yā na va'ai chēeti nguuvi.

Véé división nguaaⁿ 'iiⁿyāⁿ

⁴⁰Tuu'mí ní neené 'yaaⁿ 'iiⁿyāⁿ taachí ch'i'indiveeⁿ yā chuū ngaⁿa yā: Cuaacu níⁿnyúⁿ 'iiⁿyāⁿ 'cúu chí profeta.

⁴¹Ta n'duuví yā ngaⁿa yā: 'Iiⁿyāⁿ 'cúu chí Cristo. Naati n'duuví yā ngaⁿa yā: 'Áá yeⁿé yáⁿāā Galilea chí cánéé chí ndaa Cristo? ⁴²'Áá nguéé ngaⁿā naachi canéé nguūⁿ na libro yeⁿe Ndyuūs chí Cristo ní cuchíí yā yeⁿe ndaata yeⁿe rey David, ní yeⁿe yáāⁿ 'lííⁿ Belén, yáāⁿ chí chiica David miiⁿ?

⁴³Tuu'mí neene véé división nguaaⁿ 'iiⁿyāⁿ cucááⁿvā Jesús miiⁿ. ⁴⁴N'duuvi 'iiⁿyāⁿ neⁿe yā cuta'á

yā Jesús naati mar 'áámá saⁿā miiⁿ
nguéeé tuuⁿvi sa 'iiⁿ'yāⁿ.

**Mar 'áámá saⁿā ndii tiiⁿ
nguéeé i'téenu sa Jesús miiⁿ**

⁴⁵Policías ndaa sa nanááⁿ chiiduú
n'geeté ndúúcu saⁿa fariseos. Ní
'iiⁿ'yāⁿ s'eeⁿ ní ngaⁿ'a yā ngii yā
policías: ¿De'ē cuuvi chi nguéeé
candéé nī saⁿ'ā?

⁴⁶Policías n'gueecutáⁿ'a yā 'iiⁿ'yāⁿ:
Mar 'áámá saⁿā nguéeé ngaⁿ'a sa
tan'dúúcu chi ngaⁿ'ā 'iiⁿ'yāⁿ 'cúu.

⁴⁷Tuu'mí saⁿā fariseos n'gueecutaⁿ'a
sa policías: ¿Áá nginnche'éi yā ntúúⁿ
ndis'tii? ⁴⁸¿Áá i'teenu n'duuví 'iiⁿ'yāⁿ
chi caⁿ'ā ntiⁿ'nyuⁿ yā o saⁿ'ā fariseos
nduudu Jesús miiⁿ? ⁴⁹Iiⁿ'yāⁿ chí
nguéeé déenu yā chi canéé nguūⁿ na
ley, 'āā condenado 'iiⁿ'yāⁿ.

⁵⁰Sáⁿ'ā miiⁿ nguuvi Nicodemo
chi 'āā ndaa nanááⁿ Jesús n'gaaⁿ,
saⁿ'ā miiⁿ canée sa ndúúcu yā.
Tuu'mí ngaⁿ'a Nicodemo ngii sa
'iiⁿ'yāⁿ: ⁵¹¿Áá ley yeⁿ'ē yú cuuvi
caaⁿ'maⁿ nuuⁿndi yeⁿ'e 'iiⁿ'yāⁿ,
ndúúti chi nguéeé n'diichi di 'iiⁿ'yāⁿ,
ní 'caandiveeⁿ dí yeⁿ'e 'iiⁿ'yāⁿ ní
túúmícadíínuuⁿ di chi díⁿ yā?

⁵²Nan'gueecutáⁿ'a yā ní ngaⁿ'a
yā ngii yā saⁿ'ā: ¿Áá 'iiⁿ'yāⁿ yeⁿ'e
yáⁿ'āā Galilea ntúúⁿ dii? In'núúⁿ dí
nífcú n'diichi di chi canéé nguūⁿ na
libro yeⁿ'e Ndyuús caati yeⁿ'ē yáⁿ'āā
Galilea mar 'áámá vmnéⁿ'ēe nguéeé
can'dáā 'áámá profeta.

⁵³Ní cunaⁿ'a nducyaacá yā na
vaacu yā.

**'Áámá n'daataá chí cueⁿ'e
tá ndúúcu saⁿ'ā**

8 Jesús miiⁿ ní cueⁿ'e yā cuééti
chí nguuvi Olivos. ²Tyaaⁿ

tyaaⁿ chí dēeve táámá nguuvi ndáa
ntúúⁿ yā yaacū templo. Nuⁿ'máⁿ
yáāⁿ 'iiⁿ'yāⁿ ndaa yā nanáaⁿ yā.
Ch'iindí yā ní ca'cueéⁿ yā 'iiⁿ'yāⁿ
s'eeⁿ. ³Tuu'mi ní ndaa n'duuví
saⁿ'ā chí ngi'cueeⁿ ley ndúúcu
n'duuví saⁿ'ā fariseos. N'dée sa
nanááⁿ Jesús 'áámá n'daataá chí
cyaadu tá ndúúcu 'aama saⁿ'ā chí
'āā 'niinivaacu. Nífcú chí canee sa
chí nuuⁿ sa táⁿ'ā náávtaⁿ'ā yeⁿ'ē
'iiⁿ'yāⁿ s'eeⁿ. ⁴Ngaⁿ'a saⁿ'ā s'eeⁿ:
Maestro, n'daataá 'cūú ní tunéé 'nū
táⁿ'ā ndúúcu táámá saⁿ'ā. ⁵Naachi
cánée nguūⁿ ley yeⁿ'ē Moisés miiⁿ ní
ngaⁿ'ā chí cuíftúú 'nū n'daataá chí
'tíicā. N'dií túúmi, ¿de'e ngaⁿ'a n'dií?

⁶Chuū ngaⁿ'ā saⁿ'ā s'eeⁿ chí neⁿ'e
sá n'diichi sa táácā diiⁿ Jesús 'iicu
tun'dáá nuuⁿndi sa yeⁿ'é yā. Jesús
ní can'dii yā ní dingúuⁿ yā na yáⁿ'āā
miiⁿ ndúúcu nduutitaⁿ'á yā. Díⁿ yā
tan'dúúcu chí nguéeé ch'iindiveeⁿ
yā yeⁿ'ē 'iiⁿ'yāⁿ miiⁿ. ⁷Taachí
nitiinguunééⁿ ntuūⁿ sáⁿ'ā 'iiⁿ'yāⁿ,
tuu'mí nanguaacundii yā ni ngaⁿ'a
yā ngii yā: Du'ū ndís'tii chí nguéeé
nuuⁿndi yeⁿ'é nī, cutaⁿ'á nī vmnáāⁿ
vmnaaⁿ 'áámá túúu ní caⁿ'ā nī táⁿ'ā.

⁸Can'díí ntuūⁿ yā ní dingúuⁿ ntúúⁿ
yā ná yáⁿ'āā. ⁹Iiⁿ'yāⁿ chí ch'iindiveeⁿ
yā chuu tuumicádíínuuⁿ yā chí véé
nuuⁿndi yeⁿ'é yā. Ní ca'áámá ca'áámá
inan'daa yā, 'iiⁿ'yāⁿ ndiicúú 'āā ndíí
ná ch'iinuu maaⁿ. Nan'daa nducyáácá
yā. Ní 'aa dámaaⁿ Jesús canee yā
ndúúcu táⁿ'ā chí canéé naavtaⁿ'ā.
¹⁰Nacueeⁿ Jesús ní n'diichí yā 'āā ntéé
du'ū véé ti 'āā dámaaⁿ n'daataá miiⁿ.
Ní ngaⁿ'a yā ngii yā táⁿ'ā: Dii n'daataá,
éti canéé 'iiⁿ'yāⁿ chí tun'dáá nuuⁿndi
yā yeⁿ'ē di? ¿Áá ndii 'áámá 'iiⁿ'yāⁿ
nguee ngaⁿ'a yā nuuⁿndi yeⁿ'ē di?

¹¹N'daata mííⁿ ní ngaⁿá tá: Señor, mar 'áámá 'iiⁿyāⁿ. Tuuⁿmi ní Jesús ngaⁿá yā ngii yā táⁿá: 'Úú nguéé caaⁿmáⁿ nuuⁿndí yeⁿé di. Cunaⁿá di ní 'āā ntéé diiⁿ nuuⁿndí di.

Jesús chí dæve íⁿyeēⁿdí

¹²Cuayiivi Jesús ní ngaⁿá ntúuⁿ yā ngii yā 'iiⁿyāⁿ: 'Úú tan'dúúca dæve yeⁿe iⁿyeeⁿdí cūū, 'tíicā 'úú. Du'u chi can'daā 'úú nguéé caⁿa yā na maaiⁿ caati cunée yā ndúúcu chi dæve yeⁿé vida.

¹³Tuuⁿmi ní ngaⁿá saⁿá fariseos ngii sa Jesús: Dii ní yeⁿé maaⁿ di nduudu cuaacu chí ngaⁿá di. Nduudu chí ngaⁿá di nguéé nduudu cuaacu.

¹⁴Nan'gueécútaⁿá Jesús ngaⁿa yā ngii yā saⁿá: 'Úú ní ngaⁿá nduudu cuaacu yeⁿé maáⁿ. Nduudu chí ngaⁿá ní nduudu cuaacu miiⁿ. Deenú tíí ndiicá ní tii caⁿá. Naati ndís'tií nguéé déenu nī tíí ndiicá ní nguéé déenú nī tii caⁿá. ¹⁵Ndís'tií ní ngaⁿa nī nuuⁿndi yeⁿe iⁿyāⁿ dacaā 'iiⁿyāⁿ. Naati 'úú nguéé ngaⁿá nuuⁿndi yeⁿé mar 'áámá 'iiⁿyāⁿ. ¹⁶Ndúúti chí 'úú ngaⁿá nuuⁿndi yeⁿe iⁿyāⁿ, nduudu yeⁿé ní nduudu cuaacu chii, caati 'úú ní nguéé damaāáⁿ ti 'úú ní ndúúcu Chiidá chí dich'ó yā 'úú. ¹⁷Caati naachi canéé nguūⁿ na ley yeⁿé nī naachi ngaⁿá na 'uuvi 'iiⁿyāⁿ, chii chí nduudu cuaacu. ¹⁸'Úú chí ngaⁿá nduudu cuaacu yeⁿé māāⁿ. Ní Chiidá chí dich'ó yā 'úú ngaⁿá yā nduudu cuaacu yeⁿé.

¹⁹Tuuⁿmí ngaⁿá sáⁿá s'eeⁿ ngii sa Jesús: ¿Tíí canéé Chiida di? Nan'gueécútaⁿá Jesús: Nduuti chí nguéé 'āā n'diichi nī 'úú, ndíí nguéé

ndúú 'āā n'diichi nī Chiidá. Ndúúti chí 'āā n'diichi nī 'úú, 'tíicá ntúūⁿ 'āā n'diichi nī Chiidá.

²⁰Ndúúdu 'cūū ngaⁿá Jesús taachi canée yā naachi snúūⁿ cajas yeⁿe ofrendas. Tuuⁿmi ní taachí ngi'cueéⁿ yā cheeti yáácū templo mar 'áámá 'iiⁿyāⁿ inátuuⁿvi yā Jesús caati 'āā 'cuéé cunuūⁿ ca'a hora yeⁿé yā.

Naachi 'úú caⁿá ndís'tií ní nguéé cuuvi ndaá nī

²¹Jesús ngaⁿa ntúuⁿ yā ngii yā saⁿá: 'Úú ní caⁿá ní ndís'tií in'nuúⁿ nī 'úú. Ná nuuⁿndi yeⁿé nī 'cūūvi nī. Naachi 'úú caⁿá ndís'tií ní nguéé cuuvi ndaá nī.

²²Tuuⁿmi saⁿá Israel s'eeⁿ ngaⁿa sa: ¿Áá 'caaⁿnuⁿ maáⁿ yā 'iiⁿyāⁿ caati ngaⁿa yā: Naachi 'úú caⁿá, ndís'tií nguéé cuuvi ndaá nī?

²³Tuuⁿmi ní Jesús ngaⁿa yā ngii yā saⁿá: Ndís'tií ní yeⁿé cuaaⁿ ndiiyā ndís'tií niicu 'úú ní yeⁿé cuaaⁿ 'niiⁿnuⁿ 'úú. Ndís'tií ní yeⁿe iⁿyeeⁿdí 'cūū ndís'tií naati 'úú ní nguéé yeⁿé iⁿyeeⁿdí 'cūū 'úú. ²⁴Caavā chúū chí ngaⁿá ngii ndís'tií chí 'cuūvi nī na nuuⁿndi yeⁿe nī. Ndúúti chí nguéé cu'téenu nī chí 'úú chí Cristo miiⁿ tuuⁿmi ní na nuuⁿndi yeⁿé nī ní 'cuūvi nī.

²⁵Ni ngaⁿa sa ngii sa 'iiⁿyāⁿ: ¿Díí du'ū dii? Tuuⁿmi ní Jesús ngaⁿa yā ngii yā saⁿá: Tan'dúúca nūūⁿ chí ngaⁿá ndii cuaaⁿ vmaāⁿ, 'tíicā 'úú. ²⁶Nééne n'deē dendú'ū chí canéé chí caāⁿmáⁿ ndúúcu ndis'tií ní dííⁿ juzgar ndis'tií. 'Iiⁿyāⁿ chí dich'ó yā 'úú, 'iiⁿyāⁿ mííⁿ chí cuaacu yā. Chííⁿ chí ngiindiveéⁿ yeⁿe yā, chiiⁿ ngaⁿá na iⁿyeeⁿdí 'cūū.

²⁷'Iiⁿyāⁿ s'eeⁿ nguéé tuumicádíínuuⁿ yā chí 'iiⁿyāⁿ

miiⁿ ní ngaⁿá yā yeⁿē Chiidá yā.
²⁸Tuu'mí ngaⁿá Jesús ngii yā saⁿā:
 Taachí nadacuéeⁿ nī Saⁿā chi Daiya
 Dendyuūs, tuu'mi ní cuuvi déenu
 nī chi 'úú. Nguéé du'ū vee chi dííⁿ
 chi yeⁿē maáⁿ naati Chiidá ch'i'cueé
 yā 'úú. Ní chííⁿ chí ngaⁿá. ²⁹Ní
 'iiⁿyāⁿ chi dichó'o yā 'úú canée yā
 nduucú. Chiidá ní nguéé ch'i'neeⁿ
 yā 'úú dámaáⁿ. Naati 'úú ní dííⁿ
 tanducueⁿē chi neⁿe yā.
³⁰Taachí ngaⁿá Jesús chuū néené
 'yaaⁿ 'iiⁿyāⁿ chí'téenu yā yeⁿé yā.

Nduūdū Cuaacu chi nanguaⁿai 'iiⁿyāⁿ

³¹Tuu'mí ngaⁿá Jesús ngii yā saⁿā
 Israel seⁿe chi i'téenu sa 'yā: Ndúúti
 chí ndís'tiī cunée nī ndúúcū nduudu
 yeⁿé tuu'mi ní cuaacu chí ndís'tiī
 discípulos yeⁿé. ³²Ní n'diichí nī
 nduudu cuaacu. Ní caavā nduudu
 cuaacú miiⁿ ndís'tiī nanguáⁿai nī.
³³Nan'guēcutáⁿā saⁿā yeⁿé yā:
 Nús'uu ní ndaata yeⁿē Abraham.
 Nífcú mar 'áámá 'iiⁿyāⁿ nguéé
 dichii've nū. ¿Táácā chí ngaⁿa di
 chí ndís'tiī ní canee chí nanguáⁿai
 nī?

³⁴Jesús ní nan'guēcutáⁿa yā
 yeⁿē sa: Cuaacu níⁿnyúⁿ, cuāācū
 niiⁿnyuⁿ ngaⁿá ngii ndís'tiī chi
 nducyáácá 'iiⁿyāⁿ chí dííⁿ yā
 nuuⁿndi, 'iiⁿyāⁿ s'tiī dichii've yā
 yeⁿē nuuⁿndi. ³⁵'Iiⁿyāⁿ chí dííⁿ
 mandado yeⁿē 'iiví yā nguéé 'áámá
 ineéⁿ yā ndúúcū familia yeⁿe 'iiví
 yā naati daiya 'iiví miiⁿ ní 'áámá
 cuneéⁿ yā. ³⁶Ndúúti chí Daiyá yā
 nadinguáⁿai yā, cuaacu níⁿnyúⁿ
 chí ndís'tiī ní nínguaⁿai nī. ³⁷'Úú
 deenú chí ndís'tiī chí ndaata yeⁿé
 Abraham. Naati dinúúⁿ yiinu nī chí
 neⁿe 'caaⁿnúⁿ nī 'úú, caati nduudu

yeⁿé nguéé ngii neé ndúúcū ndís'tiī.

³⁸Chiiⁿ chí n'diichí ndúúcū Chiidá,
 chiiⁿ chí 'úú ngaⁿá. Ndís'tiī ní dííⁿ
 nī chí n'diichí nī chiidá nī.

**Ndís'tiī yeⁿē yááⁿ'nguiinūⁿ
 chí chiidá nī**

³⁹'Iiⁿyāⁿ s'eeⁿ nan'guēcutáⁿa yā
 yeⁿé yā ní ngaⁿá yā: Chiidá 'nū
 Abraham. Ngaⁿa Jesús ngii yā saⁿā:
 Nduuti chí daiya Abraham ndís'tiī
 tuu'mi ní ntiiⁿnyuⁿ yeⁿē sa idíⁿ nī.

⁴⁰Naati maaⁿ ní idinúⁿ yiinu
 nī chí 'caaⁿnuⁿ nī 'úú, caati 'úú
 saⁿā chí ngaⁿa nduudu cuaacu
 chí ch'iindiveéⁿ yeⁿē Dendyuūs.
 Abraham nguéé dííⁿ sa chuū.

⁴¹Ndís'tiī ní dííⁿ nī ntiiⁿnyuⁿ yeⁿe
 chiidá nī. Tuu'mi ní ngaⁿa sa ngii sa
 Jesús: Nús'uū nguéé ch'iindiyáⁿ 'nū
 yeⁿē daiya sa saⁿā cyúúni. Canée
 'áámá chiidá 'nū chí Dendyuūs miiⁿ.

⁴²Tuu'mi ní ngaⁿa Jesús ngii yā
 saⁿā s'eeⁿ: Ndúúti chí chiidá nī chí
 Dendyuūs miiⁿ cuaacu níⁿnyúⁿ chí
 dinéⁿe nī 'úú, caati 'úú ní yeⁿé
 Dendyuūs chiicá ní ndaá. Ní nguéé
 ndaá yeⁿé maáⁿ ti Ndyuūs maáⁿ
 yā dichó'o yā 'úú. ⁴³¿De'e cuuvi
 chí nguē n'gúúⁿ nī nduudu yeⁿé?
 Ti nguē n'giindiveéⁿ nī nduudu
 yeⁿé. ⁴⁴Ndís'tiī ní yááⁿ'nguiinūⁿ
 chiidá nī. Ndís'tiī ní neⁿé nī dííⁿ
 nī tanducueⁿē chí neⁿē chiida nī.
 Yááⁿ'nguiinūⁿ chí n'giiⁿnūⁿ 'āā
 canée núⁿ yā ndíí naachi ngaⁿā.
 Nguéé 'áámá canée yā na nduudu
 cuaacu ti nguéé nduudu cuaacu
 nduucú yā. Taachí yááⁿ'nguiinuuⁿ
 ngaⁿā sa nduudu yaadi yeⁿē maaⁿ
 sa ngaⁿa sa ti saⁿā yeⁿē nduudu
 yaadi ní chiida nduudu yaadi
 sáⁿā. ⁴⁵Naati 'úú ní ngaⁿá nduudu

cuaacu ní nguée'í'téenu nī yeⁿ'é.
 46 ¿Du'ú yeⁿ'é ndís'tií ngaⁿ'a chi
 idiíⁿ nuuⁿ'ndi? Ní nduuti chí 'úú ní
 ngaⁿ'á nduudu cuaacu, ¿de'ē chí
 nguée'í'téenu nī 'úú? 47 Du'u chí
 yeⁿ'é Dendyuūs miíⁿ nduudu yeⁿ'é
 Dendyuūs n'giindiveéⁿ yā. Chiiⁿ chí
 ndís'tií ní nguée'í'téenu nī ti
 nguée'í'téenu nī ti nguée'í'téenu nī ti

**Jesús canée yā vmnááⁿ
 vmnaaⁿ chí iⁿ'yeⁿ'é dī**

48 Tuu'mi ní nan'gueecútaⁿ'ā saⁿ'a
 Israel s'eeⁿ ní ngaⁿ'a sa ngii sa Jesús:
 ¿Áá nguée'í'téenu nī 'úú? 49 Nan'gueecútaⁿ'ā Jesús: 'Úú nguée'í'téenu
 cánée ndúúcū yááⁿ'n'guiinūⁿ?

49 Nan'gueecútaⁿ'ā Jesús: 'Úú nguée'í'téenu
 cánée ndúúcū yááⁿ'n'guiinūⁿ. 'Úú
 dííⁿ honrar Chiidá. Ndís'tií nguée'í'téenu
 nī 'úú. 50 'Úú ní nguée'í'téenu nī 'úú.
 51 Cuaacu ní n'nyúⁿ, cuāācū nī n'nyuⁿ
 ngaⁿ'á ngii ndís'tií: Du'u chí n'giindiveeⁿ
 nduudu yeⁿ'é nguée'í'téenu nī 'úú. 52 Tuu'mi ní saⁿ'a Israel s'eeⁿ
 ngaⁿ'ā sa ngii sa Jesús: Maaⁿ ní
 tuumicádifínuuⁿ nū yeⁿ'é di. Caneé
 di ndúúcū yááⁿ'n'guiinūⁿ. Abraham
 miíⁿ ní ch'ií ndúúcū profetas 'iicu
 díí ní ngaⁿ'ā di: Du'u chí n'giindiveeⁿ
 nduudu yeⁿ'é nguée'í'téenu nī 'úú. 53 ¿Áá
 vmnaaⁿ ntuūⁿ ca díi yeⁿ'é chiida yú
 Abraham chí ch'ií yā ní yeⁿ'e profetas
 chí ch'ií yā? ¿Du'ū nadacádiinuⁿ di
 chí mááⁿ dí? 54 Nan'gueecútaⁿ'ā Jesús:
 Ndúúti chí 'úú dííⁿ honrar mááⁿ tuu'mi
 ní honra yeⁿ'é ní nguée'í'téenu nī 'úú.

52 Tuu'mi ní saⁿ'a Israel s'eeⁿ
 ngaⁿ'ā sa ngii sa Jesús: Maaⁿ ní
 tuumicádifínuuⁿ nū yeⁿ'é di. Caneé
 di ndúúcū yááⁿ'n'guiinūⁿ. Abraham
 miíⁿ ní ch'ií ndúúcū profetas 'iicu
 díí ní ngaⁿ'ā di: Du'u chí n'giindiveeⁿ
 nduudu yeⁿ'é nguée'í'téenu nī 'úú. 53 ¿Áá
 vmnaaⁿ ntuūⁿ ca díi yeⁿ'é chiida yú
 Abraham chí ch'ií yā ní yeⁿ'e profetas
 chí ch'ií yā? ¿Du'ū nadacádiinuⁿ di
 chí mááⁿ dí? 54 Nan'gueecútaⁿ'ā Jesús:
 Ndúúti chí 'úú dííⁿ honrar mááⁿ tuu'mi
 ní honra yeⁿ'é ní nguée'í'téenu nī 'úú.

54 Nan'gueecútaⁿ'ā Jesús: Ndúúti
 chí 'úú dííⁿ honrar mááⁿ tuu'mi
 ní honra yeⁿ'é ní nguée'í'téenu nī 'úú.

Chiidá mííⁿ chí idiíⁿ yā honrar 'úú.
 Ní yeⁿ'e chiidá chí ngaⁿ'ā ndís'tií
 chí Dendyuūs yeⁿ'é nī. 55 Ní nguée'í'téenu
 'āā n'diichí nī 'iíⁿ'yāⁿ naati 'úú
 'āā n'in'diichí 'iíⁿ'yāⁿ. Ndúúti chí
 ngaⁿ'á chí nguée'í'téenu nī 'úú. 56 Chiidá
 nī Abraham yéénú taavi sa chí 'āā
 n'diichí sa nguuví yeⁿ'é. Ní 'āā
 n'diichí sa. Ní yéénú taavi sa.

56 Chiidá nī Abraham yéénú taavi sa
 chí 'āā n'diichí sa nguuví yeⁿ'é. Ní
 'āā n'diichí sa. Ní yéénú taavi sa.

57 Tuu'mi ní ngaⁿ'a 'iíⁿ'yāⁿ Israel
 s'eeⁿ: ¿Áá 'āā cuée'í'téenu nī 'úú.
 58 Ní ngaⁿ'a Jesús ngii yā saⁿ'a:
 Cuaacu ní n'nyúⁿ, cuāācū nī n'nyuⁿ
 ngaⁿ'á ngii ndís'tií chí 'úú vmnááⁿ
 vmnaaⁿ chí Abraham.

58 Ní ngaⁿ'a Jesús ngii yā saⁿ'a:
 Cuaacu ní n'nyúⁿ, cuāācū nī n'nyuⁿ
 ngaⁿ'á ngii ndís'tií chí 'úú vmnááⁿ
 vmnaaⁿ chí Abraham. 59 Tuu'mi ní saⁿ'a
 s'eeⁿ sta'á sa tuūu chí ca'a sa Jesús,
 naati Jesús ní canúúⁿ n'de'í yā ní nan'dáa
 yā chēeti yāacū templo ní cho'ó yā
 náavtaⁿ'á yā 'ííⁿ'yāⁿ s'eeⁿ. Ní cunaⁿ'á
 yā.

**Jesús ca'á yā vista yeⁿ'e 'áámá
 sáⁿ'ā chí n'ngueenááⁿ ndií
 taachi chí ch'iindiyááⁿ sa**

9 Níicú taachi cho'ōo Jesús ní
 n'diichí yā 'áámá saⁿ'ā chí
 n'nguee nduutináaⁿ sa ndíí taachí
 ch'iindiyáaⁿ sa. 2 Níicú discípulos
 yeⁿ'é yā ntiinguuneeⁿ yā Jesús
 ní ngaⁿ'a yā ngii yā 'iíⁿ'yāⁿ: N'dii
 Maestro, ¿du'u dínuūⁿ'ndí? ¿Áá
 chíida sa ndúúcū chēecu sa vee
 nuuⁿ'ndi yeⁿ'é yā? ¿Áá maaⁿ sa 'tíicā
 sa chí n'nguee nduutináaⁿ sa taachí
 ch'iindiyáaⁿ sa?

3 Nan'gueecútaⁿ'ā Jesús ní nguée'í'téenu
 ndúú sáⁿ'a cūū ní nguée'í'téenu chíida sa

ndúucū cheecu sa vε nuuⁿndí yeⁿé yā chi ngeēē nduutináaⁿ sa. 'Tíicā saⁿā ní 'cuuⁿ'míⁿ chi diiⁿ Déndyuūs miiⁿ nduucú yā. ⁴Cánéé chí díiⁿ ntiíⁿnyuⁿ chi idiiⁿ 'iiⁿ'yāⁿ chi dichó'ó yā 'úú neⁿe chi véé nguuví. Ndaá chi cuuvi 'da'a taachi mar 'áámá 'iiⁿ'yāⁿ ní nguéé díiⁿ yā ntiíⁿnyuⁿ. ⁵Nuuma neⁿe chí cuneé iⁿ'yeēⁿdí 'úú chi cuneé tan'dúucā dεeve yeⁿé iⁿ'yeēⁿdí 'úú.

⁶Taachí níngaⁿa yā chuū chiidaiⁿ yā na yáⁿāa níicú in'dái yā incheetí ndúucū nuuⁿniⁿ daíⁿ yā. Níicú s'néeⁿ yā ncheetí nduutináaⁿ saⁿā ngeenáaⁿ. ⁷Ní ngaⁿa yā: Cúnaⁿ'ā dí. Náaⁿnú dí nduutináaⁿ di na cheendi yíive yeⁿé Siloé. (Nduudu miiⁿ neⁿe caaⁿ'maⁿ Dich'ó Yā.) Tuuⁿ'mi ní cunaⁿ'ā sa ní naāⁿnu sa ní ngeεcundíi sa 'āā inaaⁿ sa. ⁸Tuuⁿ'mi ní 'iiⁿ'yāⁿ na nííⁿnúⁿ va'ai yeⁿé sa ndúucū 'iiⁿ'yāⁿ chí 'āā ndíí vmnaaⁿ n'diichí yā saⁿā chí ngeenáaⁿ ní ngaⁿ'a yā: ¿Áá nguéé sáⁿ'a 'cūū n'giindí ngiica limosna?

⁹N'duuví yā ngaⁿ'a yā: Sáⁿ'a 'cūū. Ta n'duuví yā ní ngaⁿ'a yā: Tan'dúucā saⁿā miiⁿ, 'tíicā saⁿ'ā. Saⁿ'ā miiⁿ ngaⁿ'a sa: 'Úú.

¹⁰Ngaⁿ'a yā ngii yā saⁿ'ā: ¿Taaca nínguaaⁿ nduutináaⁿ di?

¹¹N'gυεεcútaⁿ'ā sa ní ngaⁿ'ā sa: Saⁿ'ā chí nguuví Jesús miiⁿ din'dái sa ncheetí ní chí'neeⁿ sa nduutináaⁿ. Ní ngaⁿ'ā sa ngii sa 'úú: Cueⁿ'e di cheendi yiive nuūⁿníⁿ yeⁿé Siloé. Naaⁿ'nu dí nduutináaⁿ di. Níicú cheⁿ'é, ní naāⁿnu nduutináaⁿ, ní 'āā inaaⁿ.

¹²Tuuⁿ'mi ní ngaⁿ'a yā ngii yā saⁿ'ā: ¿Tii canéé saⁿ'ā miiⁿ? Tuuⁿ'mí ngaⁿ'ā sa: Nguéé deenú.

Fariseos itinguunéeⁿ yā saⁿ'ā ngeenaaⁿ chí 'āā nduuva yeⁿé sa

¹³Tuuⁿ'mi ní candée yā saⁿ'ā chí ngeenaáⁿ ndíí cuaaⁿ vmnaaⁿ nanáaⁿ saⁿ'ā fariseos. ¹⁴Ni sábadó miiⁿ nguuví chí ntaavi'túúnuuⁿ 'iiⁿ'yāⁿ Israel chí Jesús idin'dái yā ncheetí mííⁿ. Ní nin'guáaⁿ yā nduutináaⁿ sa. ¹⁵Tuuⁿ'mi ní ntinguuneeⁿ ntúuⁿ yā fariseos: ¿Táácā 'āā inaaⁿ di? Tuuⁿ'mi ní ngaⁿ'ā sa: S'néeⁿ yā ncheetí na nduutináaⁿ, níicú naāⁿnú. Maaⁿ ní inaaⁿ.

¹⁶Tuuⁿ'mi ní 'áámá saⁿ'ā fariseo ngaⁿ'a sa: Sáⁿ'a 'cūū ní nguéé yeⁿé Dendyuūs saⁿ'ā caati nguéé diiⁿ sa nguuví sábadó tan'dúucā chí ngaⁿ'a ley yeⁿe yú. Ta n'duuví sa ngaⁿ'a sa: ¿Táácā saⁿ'ā chí véé nuuⁿndí yeⁿé sa diiⁿ sa señales chí 'tuucā? 'Uuvi nuúⁿ díiⁿ sa vaanicadínuūⁿ yeⁿé sa. ¹⁷Ngeεcundíí ntúuⁿ sa ní ngaⁿ'a sa ngii sa saⁿ'ā chí ngeenáaⁿ sa: Díí, ¿de'é ngaⁿ'a di yeⁿé saⁿ'a chí nan'guaaⁿ nduutináaⁿ di? Saⁿ'ā miiⁿ ngaⁿ'ā sa: 'Iiⁿ'yāⁿ miiⁿ profeta.

¹⁸Saⁿ'a Israel s'eeⁿ nguéé i'téenu sa yeⁿe saⁿ'ā chí chingueēnáaⁿ sa ní inaaⁿ sa ndíí 'cai yā chiida sa ndúucū cheecu sa yeⁿé sáⁿ'ā chí 'āā inaaⁿ sa. ¹⁹Ní ntinguunéeⁿ saⁿ'ā s'eeⁿ 'iiⁿ'yāⁿ, ní ngaⁿ'ā sa: ¿Áá sáⁿ'a 'cūū daiyá nī, saⁿ'ā chí ngaⁿ'ā ndíí'tíí chí ch'iindiyáaⁿ sa 'āā ngeenáaⁿ sa? ¿Tááca chí maaⁿ inaaⁿ sa?

²⁰Nan'gυεεcutáⁿ'a yā chiida sa ndúucū cheecu sa ní ngaⁿ'a yā 'iiⁿ'yāⁿ: Déenu 'nū daiya 'nū saⁿ'á 'cūū 'āā ngeeeé nduutináaⁿ sa taachi ch'iindiyáaⁿ sa. ²¹Maaⁿ ní inaaⁿ sa. Nguéé déenu 'nū táácā inaaⁿ sa. Du'ú yā chí nin'guaaⁿ yā nduutináaⁿ

sa nús'uu nguéé déenu 'nū. Saⁿā tii 'āā 'naaⁿ sa, ntiingúúneeⁿ nī saⁿā. Saⁿā tii caaⁿmaⁿ sa yeⁿ'ē maaⁿ sa.

²²Chuū chi nan'guēcutáⁿa sa chiida sa ndúúcu chēecu sa, caati 'va'á yā 'iiⁿyāⁿ Israel s'eeⁿ. Caati 'iiⁿyāⁿ Israel s'eeⁿ 'āā indeē sa chi du'ū chi caaⁿmaⁿ chi Mesías chí Cristo miiⁿ chuū ní tun'daa yā chēeti yaācū. ²³Chii chí 'tíicā caⁿā chiida sa ndúúcu chēecu sa: Sáⁿā 'caa 'āā 'nāaⁿ sa. Ntíingúúneeⁿ nī saⁿā.

²⁴Tíicā ní 'caī ntúuⁿ yā saⁿā chí ngueenááⁿ níicú ngaⁿa yā ngii yā saⁿā: Dii, ní ca'a di honra Dendyuūs. Nús'uu deenu 'nū chí sáⁿa 'cūū véé nuuⁿndi yeⁿ'ē sa.

²⁵Tuu'mi ní nan'guēcutáⁿa sa ní caⁿā sa: Ndúúti chí nuuⁿndi yā o nguéé nuuⁿndi yā nguéé deenú. 'Áámá chí deenú chí ngueeé nduutinaáⁿ ní maaⁿ ní ināaⁿ.

²⁶Ní ngaⁿā ntúuⁿ yā ngii yā saⁿā: ¿Dé'ē dííⁿ yā ndúúcu díi? ¿Táácā 'āā inaaⁿ di?

²⁷Nan'guēcutáⁿa sa yeⁿ'é yā: 'Āā ngaⁿā ngii ndís'tii ní nguéé ch'iindiveéⁿ nī. ¿Dē'ē cúúví chí neⁿ'ē ntúuⁿ nī 'caandiveéⁿ nī? ¿Áá neⁿ'é nī ntúuⁿ ndís'tii chí cuuvi discípulos yeⁿ'é yā ndís'tii?

²⁸Ní 'caa'vá yā ndúúcu sa ní caⁿa yā: Díí, chí discípulo yeⁿ'é yā díi, naati nús'uū discípulos yeⁿ'ē Moisés nús'uu. ²⁹Nús'uu ní déenu 'nū chí Dendyuūs ní yaa'vi yā Moisés naati nguéé déenu 'nū tíí ndiica sáⁿa 'cūū.

³⁰Nan'guēcutáⁿa saⁿā miiⁿ ní caⁿa sa: Chuū ní cuaacu ní cosa chí 'āā ngeⁿ'e yiinu yú caati ndís'tii nguéé déenu nī tíí ndiicá yā ní nn'guaaⁿ yā nduutinaáⁿ. ³¹Ní

deenu yú chí Dendyuūs ní nguéé n'giindiveé yā yeⁿ'e 'iiⁿyāⁿ nuuⁿndi.

Du'ú 'iiⁿyāⁿ chí neⁿ'ē Dendyuūs níicú idiíⁿ yā chíiⁿ chí neⁿ'ē Dendyuūs, tuu'mi ní Dendyuūs mííⁿ nn'giindiveéⁿ yā yeⁿ'ē 'iiⁿyāⁿ 'cúú.

³²Ní taachi chí nga'ā iⁿ'yeeⁿdí 'cūū, nguéé ch'iindiveeⁿ yú chí mar 'áámá 'iiⁿyāⁿ nn'guaaⁿ yā nduutinaáⁿ 'iiⁿyāⁿ chí ngueenááⁿ ndíí ch'iindiyáaⁿ yā.

³³Ndúúti chí 'iiⁿyāⁿ 'cúú chí nguéé yeⁿ'é Dendyuūs 'iiⁿyāⁿ, tuu'mi ní nguéé du'ū véé cuuvi dííⁿ yā.

³⁴Nan'guēcutáⁿa 'iiⁿyāⁿ s'eeⁿ ní caⁿa yā chíi yā saⁿā: Dii ní na nuuⁿndi ch'iindiyáaⁿ di. ¿Áá díi ngi'cuééⁿ dí nús'uū? Ní tun'daa yā saⁿa chēeti yaācū.

Ngueenááⁿ yeⁿ'ē cosa chí yeⁿ'ē Espíritu

³⁵Jesús ch'iindiveéⁿ yā chí 'āā tun'daa yā saⁿā chiva'āi yaacu templo. Taachi nindaaca yā saⁿā ní ngaⁿa yā ngii yā saⁿā: ¿Áá i'téenu dí Daiya Dendyuūs miiⁿ?

³⁶Tuu'mi ní nan'guēcutáⁿa sa ní caⁿa sa: Señor, ¿du'ū mííⁿ, ní 'tíicā cu'teenú?

³⁷Ní ngaⁿa Jesús ngii yā saⁿā: In'diichi dí 'iiⁿyāⁿ ní 'iiⁿyāⁿ miiⁿ ní 'iiⁿyāⁿ chí indeé yā ndúúcu di.

³⁸Tuu'mi ní ngaⁿā sa ngii sa Jesús: Señor, cu'teenú 'ndií. Ní díiⁿ sa adorar yā.

³⁹Ní ngaⁿā Jesús: 'Úú nindaá iⁿ'yeeⁿdí 'cūū chí caaⁿmaⁿ nuuⁿndi yeⁿ'é 'iiⁿyāⁿ caati 'iiⁿyāⁿ chí nguéé inaaⁿ yā ní naáⁿ yā. Ní 'iiⁿyāⁿ chí cuuvi inaaⁿ yā cuuvi ngueenáaⁿ yā.

⁴⁰N'duuvu 'iiⁿyāⁿ fariseos chí canée yā ndúúcu yā ch'iindiveéⁿ yā chuū ní caⁿā yā Jesús: ¿Áá ngueeē ntúuⁿ nduutinaáⁿ 'nū tuu'mi?

⁴¹Tuu'mi ní ngaⁿa Jesús ngii yā saⁿā s'eeⁿ: Ndúúti ngueenáaⁿ nī nguéeⁿ nuuⁿndi yeⁿe nī. Naati maaⁿ ní ngaⁿa nī: Inaaⁿ 'nū. Chiⁿ chi nuuⁿndi yeⁿé nī 'áámá cunéeⁿ nūuⁿ.

Cuenta yeⁿé 'iiⁿyāⁿ chi véé 'iiti yeⁿe yā

10 Cuaacu níⁿnyúⁿ cuāācū niiⁿnyuⁿ ngaⁿá ngii ndís'tiī: Du'u chi nguéeⁿ indaā cuaaⁿ cheendi chēēⁿ yeⁿé 'iiti cuūchī naati nge'é yā na chēēⁿ táámá lado, tuu'mi ní 'iiⁿyāⁿ 'cūū duucú yā ní diduucú yā. ²Du'ú 'iiⁿyāⁿ chi indáa yā cuaaⁿ cheendi chēēⁿ miiⁿ, 'iiⁿyāⁿ miiⁿ ineenaⁿ yā 'iiti. ³'Iiⁿyāⁿ ineenaⁿ yā cheendi chēēⁿ ní inin'guaaⁿ yā cheendi chēēⁿ caavā 'iiⁿyāⁿ miiⁿ ní 'iití cuūchī n'giindiveéⁿ tī nduudu yeⁿé yā. Ní n'gaí yā duuchi 'iiti cuūchī yeⁿé yā. Ní n'daá tī saⁿā. ⁴Taachi intuundáa yā tanducuéⁿé 'iiti yeⁿé yā cuaaⁿ dáámí cheēⁿ candéé tī vmnaaⁿ yeⁿé tī. Nífcú 'iiti cuūchī cueⁿé tī cuayiivi 'iiví tī. Caati 'caandiveéⁿ tī nduudu yeⁿé yā. ⁵Nguéeⁿ can'dáa tī 'iiⁿyāⁿ chi nguéeⁿ 'iiví tī nífcú ngéenu tī yeⁿé yā caati nguéeⁿ 'caandiveéⁿ tī nduudu yeⁿé yā chi nguéeⁿ 'iiví tī 'iiⁿyāⁿ. ⁶Chuū cuenta chi caⁿa Jesús 'iiⁿyāⁿ ní 'iiⁿyāⁿ miiⁿ nguéeⁿ tuumicadínuuⁿ yā de'é chí caⁿā Jesús miiⁿ.

Jesús chi n'dai ca pastor yā

⁷Nguēcúndífcí ntuūⁿ Jesús ní ngaⁿa yā: Cuaacu níⁿnyúⁿ, cuāācū niiⁿnyuⁿ ngaⁿá ngii ndís'tiī: 'Úú tan'dúúccā cheendi cheēⁿ naachi cho'ō 'iiti cuūchī. ⁸Tanducuéⁿé 'iiⁿyāⁿ chí ndaá yā vmnaaⁿ yeⁿé

'úú, 'iiⁿyāⁿ s'eeⁿ ní duucu yā ní diduucúū ntúūⁿ yā. Caati nguéeⁿ ch'iindiveéⁿ yā 'iiti cuūchī miiⁿ yeⁿé yā. ⁹'Úú tan'dúúccā cheendi cheēⁿ 'úú. Du'ú 'iiⁿyāⁿ chí indaā caavā yeⁿé, ninguaⁿ'ai yā. Ní can'dáa yā. Ní nndaa ntuúⁿ yā. Ní ndaacá yā chí che'é yā.

¹⁰Duucú míⁿ taachi ndaa sa miiⁿ, iduucu sa. Ní n'giⁿ'nuⁿ sa ní nadi'tuuvi sa. 'Úú nindāa chí ca'á vida nífcú ca'á vida chí yeenú taavi yā. ¹¹'Úú 'iivi 'iiti cuūchī chí n'dai taaví. 'Iiví 'iiti cuūchī chí n'dai taaví yā, nga'á yā vida yeⁿe maáⁿ yā caavā 'iiti. ¹²'Iiⁿyāⁿ chí canee naáⁿ 'iiti cuūchī chí nguéeⁿ yeⁿé yā 'iiti ní nguéeⁿ 'iiví tī 'iiⁿyāⁿ. Taachí ináaⁿ yā yáá'yāaⁿ ngaátāa chí cuchífcí tī ní cu'néⁿ yā 'iiti cuūchī ní ngeⁿe yā ngéenu yā. Ní yáá'yāaⁿ ngaátāa cúchífcí tī miiⁿ ní cuta'á tī 'iiti cuūchī ní 'iiti cuūchī miiⁿ idi'i'yāa tī ngii ní ngéenu tī. ¹³'Iiⁿyāⁿ chí nguéeⁿ yeⁿe yā 'iiti ngéenu yā caati nguéeⁿ yeⁿé yā 'iiti. Ní nguéeⁿ idiíⁿ yā cuidado 'iiti cuūchī.

¹⁴'Úú 'iivi n'dai taavi 'iiti cuūchī. Ní canúnaáⁿ 'iiti cuūchī yeⁿé. Ní 'iiti cuūchī yeⁿé ní canúnaáⁿ tī 'úú. ¹⁵Tan'dúúccā chí Chiidá in'diichífcí yā 'úú, 'tífcā 'úú in'diichífcí Chiidá. Ní nga'á vida yeⁿé cucaava 'iiti cuūchī. ¹⁶Véé ntúūⁿ ta n'duuvi 'iiti cuūchī yeⁿé chí nguéeⁿ yeⁿe cheēⁿ chēēⁿ 'cūū 'iiti. 'Iiti miiⁿ ntúūⁿ ní cánéé chí candéé 'iiti. Ní 'caandiveéⁿ tī chí caāⁿ máⁿ nífcú 'áámá cheēⁿ nduuví tī ní 'áámá nūuⁿ 'ífcí 'iiti.

¹⁷Caavā chífcí neⁿe Chiidá 'úú caati 'úú ca'á vida yeⁿe maáⁿ chí ní nanguēcúndífcí ntuúⁿ cuta'á. ¹⁸Mar 'áámá 'iiⁿyāⁿ nguéeⁿ cuuvi

'caaⁿnúⁿ yā 'úú naati 'úú ca'á vida yeⁿe maáⁿ. Cuuví dííⁿ cu'neéⁿ vida yeⁿ'é ní cuuví dííⁿ cuta'á. Chuū mandamiento chi dííⁿ chi ngaⁿ'ā Chiidá.

¹⁹Ch'ííndi ntúūⁿ vaadi 'caa'va nguaaⁿ náⁿ'ā 'iiⁿ'yāⁿ Israel s'eeⁿ cáávā nduudúⁿ cūū. ²⁰Néénéⁿ 'yaaⁿ 'iiⁿ'yāⁿ Israel caⁿ'a yā chuū: Canée yā ndúúcu yááⁿ'nguiniūⁿ ní nguεε nndeé yā vaanicadiinúⁿ yeⁿ'é yā. ¿De'ē cúúví chí n'giindiveéⁿ nī yeⁿ'e yā?

²¹Tá n'duuví yā ní ngaⁿ'a yā: Ndúúduⁿ 'cāā ní nguéé yeⁿ'ē 'iiⁿ'yāⁿ chi canée ndúúcu yááⁿ'nguiniūⁿ. ¿Áá cúúví nán'guaaⁿ yááⁿ'nguiniūⁿ nduutinaáⁿ 'iiⁿ'yāⁿ chi nguenaáⁿ?

**'Iiⁿ'yāⁿ Israel s'eeⁿ nguéé
'cuúⁿ yā Jesús**

²²Ch'iindí 'vícú yeⁿ'ē dedicación na yāāⁿ Jerusalén tiempo chi 'iichεε. ²³Níícú Jesús cachiicá yā chεeti yaācū templo na corredor chi nguuví Salomón. ²⁴Iicu saⁿ'a Israel s'eeⁿ ní cheⁿ'e sa nduuvidaama sa nanáāⁿ yā ní caⁿ'a sa chii sa Jesús: ¿Tíí cuaⁿ'ā castaⁿ'ā dí chídεeve yeⁿ'e 'nū? Ndúúti chi díi chi Cristo miiⁿ, caaⁿ'maⁿ cuaacú dí cuuvi dí nús'uū.

²⁵Nan'guεεcútaⁿ'a Jesús yeⁿ'ē sa: 'Āā ngíí ndís'tií ní nguéé i'teenu nī. Ntiiⁿ'nyuⁿ chi dííⁿ ndúúcu chi dúúchí Chiidá, chuū ngaⁿ'ā nduudu cuaacu yeⁿ'é. ²⁶Ndís'tií nguéé i'téenu nī caati nguéé 'iiti cuúchí yeⁿ'é ndís'tií, tan'duucā 'āā ngaⁿ'á. ²⁷Iiti cuúchí yeⁿ'é n'giindiveéⁿ ti nduūdū yeⁿ'é ní 'úú in'diichí ntúūⁿ 'iiti. Ní 'iiti miiⁿ ca'ndaa tī 'úú. ²⁸'Úú ní nga'á vida cueⁿ'e daāⁿ'maⁿ yeⁿ'é tī ní nguéé 'cūúví ti. Nī mar 'áámá

'iiⁿ'yāⁿ cuuví cuta'á yā 'iiti s'eeⁿ taachí 'āā canée ta'á. ²⁹Chiidá chi tée yā 'iiⁿ'yāⁿ s'eeⁿ 'úú vmnaáⁿ yā yeⁿ'ē nducyáácá 'iiⁿ'yāⁿ. Mar 'áámá 'iiⁿ'yāⁿ cuuví cuta'á yā taachi 'āā canée ta'ā Chiidá. ³⁰'Úú ndúúcu Chiidá 'áámá núúⁿ 'nū.

³¹Tuu'mi ní sta'ā ntúūⁿ saⁿ'a Israel s'eeⁿ túūu chi neⁿ'e ca'a sa Jesús. ³²Nan'guεεcútaⁿ'a Jesús 'iiⁿ'yāⁿ: Nééné n'deēe n'daacā ntiíⁿ'nyuⁿ chí n'gi'iⁿ yeⁿ'ē Chiidá. ¿Chéé ntiíⁿ'nyuⁿ chí nguéé innée yiinú ndís'tií chi ngiitúú nī 'úú?

³³Nan'guεεcútaⁿ'ā saⁿ'a Israel s'eeⁿ ní ngaⁿ'ā sa ngii sá Jesús: Nguéé caavā ntiíⁿ'nyuⁿ n'daacā chi ngiitúú 'nū díi naati cáávā chi ngaⁿ'ā dí chí nguéé n'daacā, ní caati díi chí saⁿ'ā iⁿ'yeeⁿ'dí 'cūū ní díiⁿ di chi Dendyuūs díi.

³⁴Nan'guεεcútaⁿ'a Jesús yeⁿ'ē sa: ¿Áá nguéé cánée nguūⁿ na ley 'tíícá: 'Úú ningaⁿ'á chí ndyuūs s'eeⁿ ndís'tií? ³⁵Ndúúti chí ngaⁿ'á yā chí 'iiⁿ'yāⁿ miiⁿ ní ndyuús s'eeⁿ, 'iiⁿ'yāⁿ chí sta'á yā nduudu yeⁿ'e Dendyuūs níícú naachi cánée nguūⁿ canée chí cuuvi cuaacu. ³⁶Chiidá indεeve nuúⁿ yā 'úú ní dicho'ó yā 'úú iⁿ'yeeⁿ'dí 'cūū. ¿Áá ndís'tií ní ngaⁿ'ā nī chí nguéé n'daacā yeⁿ'é chí 'úú nduuvidaamá ndúúcu Dendyuūs caati caⁿ'á chí 'úú Daiya Dendyuūs 'úú? ³⁷Nduuti chí nguéé dííⁿ ntiíⁿ'nyuⁿ yeⁿ'ē Chiidá, nguéé cu'téenu di 'úú. ³⁸Naati ndúúti chí dííⁿ ntiíⁿ'nyuⁿ miiⁿ 'áará chí nguéé i'téenu di 'úú, cu'téenu di na ntiíⁿ'nyuⁿ chí dííⁿ. 'Iicu cuuvi deenu di ní cu'téenu di chí Chiidá canee nduucú níícú 'úú ní canée ndúúcu Chiidá.

³⁹Ní neⁿe ntuuⁿ sa cuta'a sa Jesús, naati Jesús miiⁿ ní nan'dáa yā na ta'a sa 'suuⁿ.

⁴⁰Níicú nguēcúndii yā taama lado yeⁿē yíicú Jordán na yáⁿāa miiⁿ naachi vmnááⁿ vmaaaⁿ nacheēdinúⁿníⁿ Juan. Níicú canée yā miiⁿ. ⁴¹Níicú nééné 'yaaⁿ 'iiⁿyāⁿ ndaá yā nanáaⁿ yā, ní ngaⁿá yā: Nduudu cuaacu tii Juan miiⁿ ní 'áámá señal nguéeⁿ diiⁿ sa naati tanducueⁿē chi caⁿā Juan yeⁿé yā, chuū nduudu cuaacu.

⁴²Níicú nééné 'yaaⁿ 'iiⁿyāⁿ miiⁿ ní ch'i'téenu yā Jesús na yáⁿāa miiⁿ.

Lázaro ch'i yā

11 Véé 'áámá sáⁿā ngiitā sa chi nguuvi sa Lázaro na yáⁿā Betania. Yáⁿā miiⁿ vaacú tá María nduucū vi'i tá Marta. ²Niicu tá María ní vi'i ta Lázaro. N'daataa miiⁿ ch'eendái tá aceite Jesús ní nātí'i tá ca'a yā ndúucū yuūdū tiiⁿ tá. ³Vi'i sa miiⁿ ní dich'o ta 'áámá 'iiⁿyāⁿ chi yaa'vi yā yeⁿē Jesús miiⁿ chi caⁿa yā: Señor, n'diichi nī. Saⁿā chi néⁿe nī ní ngítā sa.

⁴Taachi ch'iindiveeⁿ Jesús chuū, ní caⁿa yā: Ca'āi miiⁿ ní nguéeⁿ ca'āi chi 'cuūvi sa, naati ca'āi chi diiⁿ honrar Dendyuūs, níicú cuuví yā honrar Daiyá Dendyuūs caava ca'ai 'cūū.

⁵Niicu Jesús ní ya'āi 'iinu yā Marta ndúucū vi'i tá María ndúucū vi'i tá Lázaro. ⁶Taachi Jesús ch'iindiveeⁿ yā chi ngiitā saⁿā miiⁿ canée yā tá 'uuvi nguuvi lugar naachi canée yā. ⁷Cho'o 'uuvi nguuvi ngaⁿa Jesús ngii yā discípulos yeⁿé yā: Cuⁿu ntuuⁿ yú na yáⁿāa Judea.

⁸Ní discípulos ní ngaⁿá yā ngii yā 'iiⁿyāⁿ: N'dii Maestro, ngiituu 'iiⁿyāⁿ Israel s'eeⁿ n'dii. ¿Áa neⁿe ntúuⁿ nī caⁿā nī miiⁿ?

⁹Nan'guēcútaⁿā Jesús: ¿Áa nguéeⁿ ndeē nguuvi ndiichúví hora? 'Iiⁿyāⁿ chi chiicá yā nguuvi nguéeⁿ indeē ca'a yā tii inaaⁿ yā chí deeve yeⁿé iⁿyeeⁿdí 'cūū. ¹⁰'Iiⁿyāⁿ chí ngiica na maāiⁿ indeē ca'á yā, ti nguéeⁿ chí deeve ndúucu yā.

¹¹Caⁿa yā chuū, ní caⁿa yā chii yā 'iiⁿyāⁿ s'eeⁿ: Lázaro amigo yeⁿe yú cyaadu sa. Caⁿá nanduūchí saⁿā chi cyaadu sa.

¹²Tuu'mí caⁿá discípulos yeⁿé yā: Señor, ndúúti chi cyaadu sa ní 'āa ninguaⁿāi sa.

¹³Chuū ngaⁿā Jesús miiⁿ yeⁿē vaadi n'dii yeⁿē Lázaro níicú 'iiⁿyāⁿ s'eeⁿ ní cadínuuⁿ yā chi ngaⁿa yā chi cyaadu n'dai Lázaro. ¹⁴Tuu'mi ní Jesús caⁿa cuaacú yā: Lázaro miiⁿ ch'i sa. ¹⁵Úú ní yeenú cáávā ndís'tii chi nguéeⁿ canée miiⁿ ní 'íicú cu'téenu nī. Naati caⁿā yú n'diichi yú saⁿā.

¹⁶Tuu'mi ní caⁿā Tomás, saⁿā chi duuchi Dídimó chi Gemelo ní ngaⁿa sa ngii sa saⁿā s'eeⁿ chi discípulos ndúucū sa: Cúⁿu ntúúⁿ s'uúⁿ ní 'cuūvi yú ndúucu yā.

Jesús chí nanduuchi niicu teé yā vida yeⁿé yā

¹⁷Taachi ndaā Jesús miiⁿ ní 'āa cuūⁿ nguuví n'dii Lázaro canúúⁿ sa na cheeti yáinyāⁿ. ¹⁸Ní yáⁿ Betania 'āa niiⁿnuúⁿ ná yáⁿ Jerusalén tan'dúucā 'iinu kilómetro. ¹⁹Neené 'yaaⁿ 'iiⁿyāⁿ ndaá yā na vaacu Marta ndúucū María chí nica'á yā 'viicheetínúuⁿ n'daata s'eeⁿ yeⁿē

vi'i yā Lázaro. ²⁰Tuu'mi ní Marta miiⁿ taachí ch'iindiveéⁿ yā chí ndaā Jesús miiⁿ can'dáa yā chuva'ai ní nandaaca yā 'iiⁿyāⁿ. Naati María miiⁿ canúuⁿ yā cheeti va'ai. ²¹Ní Marta miiⁿ ní ngaⁿa yā ngii yā Jesús: Señor, ndúúti chi canée ní ndúúcu 'nū nguéé ch'ií vi'í. ²²Naati maaⁿ deenú chí tanducuéⁿe chí caaca di Dendyuūs miiⁿ ní téé yā dii.

²³Tuu'mí ngaⁿa Jesús ngii yā Marta: Nnduuchi ntuūⁿ ví'í di.

²⁴Marta ngaⁿa ta ngii ta Jesús: 'Úú ní deenú chí nduuchi ntúūⁿ sa ní nacueeⁿ sa nguuvi chi 'cuiinu iⁿ'yeēⁿdí.

²⁵Ní ngaⁿa Jesús ngii yā táⁿā: 'Úú chí nanduuchi niicu 'úú teé vida yeⁿe yā. Du'ū chi i'téénū 'úú 'aara n'díi yā, 'tíicā nduuchi yā. ²⁶Ní nducyáácá 'iiⁿyāⁿ chi véé vida yeⁿe yā chí i'téenu yā 'úú, nguéé 'cuūvi yā cueⁿe daāⁿmaⁿ. ¿Áá i'teenu di chuū?

²⁷Tuu'mi ní Marta ngaⁿa yā: I'teenú Señor. 'Úú i'teenú dii chí Cristo Daiya Dendyuūs chí ndaá ní iⁿ'yeēⁿdí 'cūū.

Cueecu Jesús taachi snée yā na yáinyāⁿ yeⁿe Lázaro

²⁸Taachi Marta ch'iinu caⁿa ta chuū cueⁿe tá ní yaa'vi n'dé'ei ta vi'í María ní ngaⁿa ta: Dii María, Maestro canee yā ní n'gai yā dii.

²⁹Taachi María ch'iindiveeⁿ ta chuū ní ncueeⁿ ta ngéeniicu tá ní ndaa ta nanááⁿ Jesús. ³⁰Jesús miiⁿ 'āā cuéé nindáa yā yaaⁿ miiⁿ. Naati canee yā miiⁿ naachi nandaaca María 'iiⁿyāⁿ. ³¹Tuu'mi ní 'iiⁿyāⁿ Israel s'eeⁿ chí snée yā na vaacu tá

ndúúcu tá ní inca'á yā 'viicheetínū María. Taachi n'diichí yā chí María miiⁿ ní nnicueeⁿ tá ngéeniicu tá, tuu'mi ní can'dáa yā cuaaⁿ chuva'āi. 'Iiⁿ'yāⁿ s'eeⁿ cueⁿe yā ndaá yā ní ngaⁿa yā: Táⁿā 'cāā ní caⁿa tá na yáinyāⁿ. Caⁿa tá cueecu ta.

³²María miiⁿ taachi ndaa ta nanááⁿ Jesús ní n'diichi ta 'iiⁿ'yāⁿ ní chiin'tiia yā tá ná ca'ā Jesús. Ní ngaⁿa ta ngii ta Jesús: Señor, ndúúti chí canee ní 'muuⁿ, ní nguéé ch'ií vi'í.

³³Tuu'mi ní taachi n'diichi Jesús miiⁿ chí ngeecu María ndúúcu 'iiⁿ'yāⁿ Israel s'eeⁿ chí ndaá yā ndúúcu María ngeecu ntuúⁿ yā ní neené yaⁿāi 'iinu Jesús ndii Espiritu yeⁿe yā. ³⁴Ní ngaⁿa yā: ¿Tíí s'neeⁿ yā saⁿā? Ní ngaⁿa yā ngii yā 'iiⁿ'yāⁿ: Señor, cuchíi ní ní n'diichí ní.

³⁵Ní cheecu Jesús. ³⁶Tuu'mi ní 'iiⁿ'yāⁿ Israel s'eeⁿ ní caⁿa yā: Cún'díichí ní tan'dúúca chí dinéⁿe yā saⁿā.

³⁷Ní n'duuví 'iiⁿ'yāⁿ s'eeⁿ ní caⁿa yā: ¿Áá nguéé ngii diiⁿ 'iiⁿ'yāⁿ 'cūū chí inin'guaáⁿ yā nduutináaⁿ 'iiⁿ'yāⁿ chí ngeenaáⁿ, nguéé cuuvi dííⁿ yā chí saⁿa 'cūū nguéé ní ch'ií sa?

Nanduuchi Lázaro yeⁿe nguuaⁿ tináⁿā

³⁸Ní Jesús neené ya'ai 'iinu ntuúⁿ yā maáⁿ yā ní ndaá yā na yáinyāⁿ. Ní yáinyāⁿ miiⁿ 'áámá yiivi yáávā. Níicú canee 'aama túūu vmnaaⁿ yeⁿe. ³⁹Ngaⁿā Jesús miiⁿ: Ndivíi ní túūu. Marta vi'í saⁿā chí ch'ií ngaⁿa ta ngii ta Jesús miiⁿ: Señor, 'āā ngeéⁿ sá. 'Āā cuúúⁿ nguuvi n'dii sa.

⁴⁰Jesús ní ngaⁿa yā ngii yā Marta: ¿Áá nguéé ngii dii chí nduuti chí cu'téénú dí tuu'mi ní n'diichi di poder yeⁿe Dendyuūs?

⁴¹Tuu'mi ní ndivíi yā tūū
naachí canéé tináⁿā. Níicú Jesús
ní n'diichí yā cuaaⁿ 'niⁿnuⁿ ní caⁿa
yā: N'dii Chiidá, 'úú ca'á gracias
n'dii Dendyuūs chí n'giindiveéⁿ ní
yeⁿé. ⁴²Úú ní deenú chí 'āā cueⁿe
daaⁿmáⁿ nūuⁿ n'giindiveéⁿ ní yeⁿé ti
cáāvā 'iiⁿyāⁿ chí snéē nanaáⁿ cuuvi
cu'téenu yā chí n'dii dicho'ó ní 'úú.

⁴³Ní ch'iinú caⁿa yā chuū néené
yuudu caⁿa yā: Lázaro, cuchii dí.

⁴⁴Saⁿā chí n'dii miiⁿ ní nan'dáa
sa. Nandéécú sá ndíi ta'ā sa ndíi ca'ā
sa ndúucū cintas tiinūuⁿ. Ndeecuú
nuuⁿmáⁿ cuerpo yeⁿē sa ndii naaⁿ
sa. Níicú pañuela canee naaⁿ sa.
Tuu'mí ngaⁿa Jesús míiⁿ 'iiⁿyāⁿ:
N'ndaatíi ní saⁿā ní 'āā naⁿā sa.

Nduuvidaamá yā chí díiⁿ yā 'caaⁿnúⁿ yā Jesús

(Mt. 26.1-5; Mr. 14.1-2; Lc. 22.1-2)

⁴⁵Néené 'yaaⁿ 'iiⁿyāⁿ Israel
s'eeⁿ chí ndaa yā ndúucū María
ní n'diichí yā chí díiⁿ Jesús miiⁿ
ch'i'teenú yā 'iiⁿyāⁿ. ⁴⁶Taná'a yā ní
cheⁿé yā nanááⁿ saⁿā fariseos ní
chii yā saⁿā s'eeⁿ chí díiⁿ Jesús miiⁿ.

⁴⁷Tuu'mi ní saⁿā chiiduú n'geeté
ndúucū saⁿā fariseos nduuvidaamá
yā ndeé yā. Ní ngaⁿa yā: ¿De'ē díiⁿ
yú? Tíi sáⁿa cūū caati neené n'deé
chí n'giⁿi sa señales nanáaⁿ yú.

⁴⁸Ndúuti chí cu'nee yú saⁿā chí
'tíica nūuⁿ nducyáácá yā ní cu'téenu
yā saⁿā. Ní ndaa saⁿā romanos ní
ndivíi yā lugar yeⁿē yáacū yeⁿē yú
ndúucū nación yeⁿē yú.

⁴⁹Áamá chéé saⁿā s'eeⁿ chí nguuvi
Caifás miiⁿ, saⁿā chí chiiduú ch'εεte
ca yeⁿē nduuyu miiⁿ caⁿa sa chíi sa
saⁿā s'eeⁿ: Ndís'tii ní nguéé du'ū veé
deenú ní. ⁵⁰Ní nguéé nacádiinúúⁿ

ní chí 'áamá saⁿā 'cuūvi sa yeⁿe
nducyaaacá yā níicú nguéé ti nación
yeⁿē yú cuuvi ndái.

⁵¹Chuū ní nguéé caⁿa yā yeⁿē maáⁿ
yā caati 'iiⁿyāⁿ miiⁿ chiiduú ch'εεté
ca yeⁿē nduuyu miiⁿ. Caⁿā cuaacú
sa chí cuchii chí 'cuūvi Jesús cáāvā
nación 'cūū. ⁵²Ní Jesús nduuvidaamá
yā nguéé damaāⁿ 'iiⁿyāⁿ nación miiⁿ
naati ndúucū tanáⁿā daiyá Dendyuūs
miiⁿ chí snéé 'muuⁿ chí snéé miiⁿ.
⁵³Tíica ndíi tuu'mi ndeé yā chí
'caaⁿnuⁿ yā Jesús.

⁵⁴Tuu'mi ní 'aa ntéé cuchiiica
nguuvi Jesús nguaaⁿ 'iiⁿyāⁿ Israel
s'eeⁿ naati cueⁿé yā na 'áamá yáāⁿ
niiⁿnuúⁿ yáⁿāa cuuⁿmáⁿ naachi
nguéé ch'εetinéé 'iiⁿyāⁿ chí nguuvi
Efraín. Ní canéé yā miiⁿ ndúucū
discípulos yeⁿé yā.

⁵⁵Ní 'viicu pascua yeⁿē 'iiⁿyāⁿ
Israel s'eeⁿ 'āā chí néé nijⁿnuúⁿ
nguuvi. Néené 'yaaⁿ yā cuchée yā
yeⁿe yáāⁿ yeⁿé yā na yáāⁿ Jerusalén,
vmnaaⁿ tiempo yeⁿē 'viicu pascua.
Ní 'iiⁿyāⁿ s'eeⁿ didéevé yā vida yeⁿé
yā tan'dúucā costumbre yeⁿé yā.

⁵⁶Ní in'nuúⁿ yā Jesús miiⁿ. Ní 'iiⁿyāⁿ
s'eeⁿ indeé yā ndúucū vi'ī naachi
canéé yā ch'εeti yaacū templo taacā
chí ngii yeⁿē ndís'tii: ¿Áá nguéé
chii Jesús 'viicu?

⁵⁷'Iiⁿyāⁿ chiiduú n'geeté ndúucū
saⁿā fariseos 'āā s'néeⁿ yā caaca
'tíicā. Ndúuti du'ū chí déenú tíi canéé
Jesús miiⁿ caaⁿmaⁿ yeⁿē chiiduú
n'geeté níicú cuta'á yā 'iiⁿyāⁿ.

Cheēndáa yā aceite Jesús na yáāⁿ Betania

(Mt. 26.6-13; Mr. 14.3-9)

12 Níicú indaa cá taaⁿ jááⁿ
nguuvi chí ndaa 'viicu yeⁿē

pascua. Ndaā Jesús yáāⁿ Betania naachi canee Lázaro, saⁿā chi 'āā ch'ií ní n'duuchí ntuūⁿ Jesús miiⁿ saⁿā yeⁿe nguaaⁿ 'iiⁿyāⁿ chi n'dii. ²Ní miiⁿ ca'a yā chi che'e nguīnū Jesús. Marta miiⁿ ní n'gii yā cu'u na mesa. Ní Lázaro miiⁿ vee sa ndúúcū Jesús na mesa. ³Tuu'mi ní sta'ā María miiⁿ 'áámá libre yeⁿe aceite perfume yeⁿe nardo nūuⁿ chi yaⁿ'ai chii'vē. Ní cheēndáa tá ca'a Jesús miiⁿ. Ní ndúúcū yuūndū tiiⁿ tá miiⁿ nadeeve tá ca'ā Jesús miiⁿ. Niicu nuuⁿ máⁿ ch'eeete cheeti va'āi cheēⁿ perfume yeⁿe aceite miiⁿ. ⁴Áámá chéé discípulo yeⁿé yā chi nguuvi Judas Iscariote chi daiya Simón chi saⁿā chi canéé chí dííⁿ sa entregar Jesús, ngaⁿ'a sa: ⁵¿De'ē cúúví chí nguéé n'diicuí yú aceite 'cūū ndúúcū ndēēchē ciento caadi canéé 'uūví ngēecu ndiichi centavo ní ca'a yú 'iiⁿyāⁿ chí nguéé yeⁿe yā?

⁶Ní caⁿ'a sa chuū ní nguéé chi ya'āi sa 'iiⁿyāⁿ chí ndaachíí snéé yā, naati cáávā chí duucu sa. Ní ndēē sa bolsa miiⁿ snúúⁿ tuūmí. ⁷Tuu'mi ní ngaⁿ'ā Jesús: 'Āā canéé 'nū tá, taachi n'dai tá chuū cáávā nguuvi chí caⁿ'á 'cuēechí. ⁸Caati 'iiⁿyāⁿ chí nguéé yeⁿe yā 'āā canee núúⁿ nī nduucú yā cueⁿe daāⁿmaⁿ, naati 'úú ní nguéé 'áámá cuneé núúⁿ nduucú nī.

Nduuvidaamá yā contra yeⁿe Lázaro

⁹Tuu'mí neenē 'yaaⁿ 'iiⁿyāⁿ yeⁿe 'iiⁿyāⁿ Israel tuumicadínuuⁿ yā chí Jesús miiⁿ ní cunéé yā na yāāⁿ Betania. Ní níndaá yā nguēē cáávā damaāⁿ chí neⁿe n'diichí yā Jesús miiⁿ ti neⁿe n'diichí yā Lázaro, saⁿ'ā chí 'āā n'dii ní nduuchi. ¹⁰Saⁿ'ā s'eeⁿ chí chiidúú n'gēetē nduuvídáama yā

chí neⁿé 'caaⁿ'nuⁿ ntúuⁿ yā Lázaro. ¹¹Ti neéné 'yaaⁿ 'iiⁿyāⁿ Israel s'eeⁿ ngeⁿe yā ní i'téenu yā Jesús miiⁿ caavā Lázaro.

Jesús ndaá yā yāāⁿ Jerusalén lado yeⁿe rey

(Mt. 21.1-11; Mr. 11.1-11; Lc. 19.28-40)

¹²Chí dēeve táámá nguuví ní neenē 'yaaⁿ 'iiⁿyāⁿ ndaá yā 'viicu taachi ch'iindiveēⁿ yā chí Jesús miiⁿ ndaa yā Jerusalén. ¹³Sta'á yā n'duuví tiicuáá yíⁿyúⁿ ní can'daa yā Jesús. Ní ndaacá yā Jesús ní 'caí yā: Hosanna. N'dái taavi 'iiⁿyāⁿ chí cuchíi yā ndúúcū chí dúúchí Señor chí Rey yeⁿe Israel ntúūⁿ.

¹⁴Ní ndaācā Jesús 'aama burro 'lííⁿ ní canduú yā 'iiti tan'dúúcā chí canéé nguūⁿ na libro yeⁿe Ndyuūs 'tíicā:

¹⁵Táⁿ'ā daiya Sión nguéé 'va'a dí.

N'díichí dí, cuchii Rey yeⁿe dí.

Canduú yā 'aama daiya burro.

¹⁶De'e ndúúcū chí 'tuucā nguéé tuumicadiinúúⁿ yā discípulos yeⁿé yā nguuvi miiⁿ. Taachi Jesús cánéé yā na va'ai cheeti nguuvi tuu'mi ní discípulos yeⁿe yā nn'gaacú yā tanducuéⁿē de'ē chí canee nguūⁿ yeⁿé yā, 'íicú dííⁿ yā de'ē ndú'ū chí 'túúcā.

¹⁷'Iiⁿyāⁿ chí canéé yā ndúúcū Jesús ngaⁿ'a cuáácú yā: Taachí yaa'ví yā Lázaro na yáinyāⁿ ní nnduuchi sa nguaaⁿ tinaⁿ'ā.

¹⁸Cáávā chuū ní n'daā 'yaaⁿ 'iiⁿyāⁿ caati n'giindiveēⁿ yā chí Jesús ní dííⁿ yā señal miiⁿ. ¹⁹Saⁿ'ā fariseos ní ngaⁿ'a sa nguaaⁿ maāⁿ sa: Inaaⁿ nī tí nguéé de'ē vee idiiⁿ nī aprovechar yeⁿe asunto 'cūū. N'díichí nī. Núúⁿmaⁿ iⁿ'yeēⁿdi ní caⁿ'ā can'dāá Jesús.

Saⁿā griegos in'nuúⁿ yā Jesús

²⁰Iicu véé 'iiⁿyāⁿ griegos chí chee yā yeⁿé 'viicū miiⁿ ní díⁿ yā adorar.

²¹'Iiⁿyāⁿ s'uúⁿ ndaá yā nanááⁿ Felipe yeⁿé yāáⁿ Betsaida chi yeⁿé yāⁿaa Galilea. Ní di'cuutú yā 'iiⁿyāⁿ, ní ngaⁿ'a yā ngii yā 'iiⁿyāⁿ: Señor, neⁿ'é nū n'diichí nū Jesús.

²²Ndaā Felipe miiⁿ ni ngaⁿ'a yā ngii yā chuū Andrés. Tuu'mi ní Andrés ndúucū Felipe ngaⁿ'a yā ngii yā Jesús.

²³Tuu'mi ní Jesús nan'güεεcutáⁿ'a yā, ní ngaⁿ'a yā ngii yā saⁿā s'eeⁿ: Hora míⁿ cuchii taachi Saⁿā chi Daiya Dendyuūs cánéé chi caⁿ'á yā na va'ai cheeti nguuvi. ²⁴Cuaacu níⁿnyúⁿ cuāācū niiⁿnyuⁿ ngaⁿ'á ngii ndís'tiī: Nduuti chí 'áámá trigo nguéé cuuvā na yāⁿaa ní 'cuūvī damaāⁿ canee. Naati ndúúti chí trigo 'cuūvī neené n'deeé nduuví trigo 'cúuⁿndī. ²⁵Du'ú chí neⁿ'e vida yeⁿ'é yā na iⁿ'yeeⁿdí 'cūū n'dái yā vida yeⁿ'e yā cueⁿ'e daāⁿmaⁿ. ²⁶Du'ú 'iiⁿyāⁿ chí dichí'íve yā 'úú ní chii yā can'daa yā 'úú, naachi 'úú chí caneeé, míⁿ ntúūⁿ snée 'iiⁿyāⁿ chí dichí'íve 'úú. Nduuti 'áámá 'iiⁿyāⁿ chí dichii've yā 'úú, Chiidá ní díⁿ yā honrar 'iiⁿyāⁿ.

**Jesús yaa'ví yā yeⁿ'é
vaadi n'gii yeⁿ'é yā**

²⁷Ní caⁿ'a Jesús: Maaⁿ ní neené ndístaⁿ'ā alma yeⁿ'é. ¿De'é caāⁿmaⁿ? N'diī Chiidá, ¿áá nadanguáⁿ'ai ní 'úú yeⁿ'e hora 'cūū? Cáāvā chuū chí cuchí hora 'cūū. ²⁸N'diī Chiidá, ch'iⁿ'i ní poder yeⁿ'e chí duuchi yeⁿ'é ní. Tuu'mi ní cuchii 'áámá nduudu yeⁿ'é nanguuvi chí ngaⁿ'a: 'Úú ní 'āā ch'iⁿ'i poder yeⁿ'é ní cuuvi 'cuuⁿmíⁿ poder yeⁿ'é ntúūⁿ taama vmnéⁿ'ēe.

²⁹'Iiⁿyāⁿ chí chinée yā miiⁿ ní ch'iindiveéⁿ yā 'áámá nduudu ní ngaⁿ'a yā: Daavi miiⁿ. Ta n'dúúvi yā ní ngaⁿ'a yā: Angel yaa'ví yā 'iiⁿyāⁿ.

³⁰Nan'güεεcutáⁿ'ā Jesús ní caⁿ'a yā: Nguéé ndaā nduudu 'cūū caavā 'úú, ti cáāvā ndís'tiī. ³¹Maaⁿ ní véé chí diiⁿ juzgar 'iiⁿyāⁿ yeⁿ'e iⁿ'yeeⁿdí 'cūū. Maaⁿ ní 'aama saⁿ'ā chí ch'εεte yeⁿ'é iⁿ'yeeⁿ'di 'cūū 'cuεεcú yā cuaaⁿ chuva'āi. ³²Ndúúti chí 'úú chí ncueéⁿ yeⁿ'é yāⁿaa 'cūū tuu'mi candéé nducyaacá yā nanáāⁿ 'úú.

³³Ní chuū ngaⁿ'a Jesús ngii yā 'iiⁿyāⁿ chí ngaⁿ'á yā de'é vaadi n'gii 'cuuví yā. ³⁴Nan'güεεcutáⁿ'ā 'iiⁿyāⁿ s'eeⁿ yeⁿ'é yā: Nús'uū ní n'giindiveéⁿ 'nū chí canéé nguūⁿ na libro yeⁿ'e Ndyuūs chí Cristo cuneé yā cueⁿ'e daāⁿmaⁿ. ¿Táácá chí ngaⁿ'ā dii, cánéé chí níncueeⁿ Saⁿ'ā chí Daiya Dendyuūs? ¿Du'ú chí Saⁿ'ā chí Daiya Dendyuūs?

³⁵Tuu'mí ngaⁿ'a Jesús ngii yā 'iiⁿyāⁿ s'eeⁿ: 'Téé nūūⁿ chí canéé chí deεve nanáāⁿ ní. Cúchiicá ní naachi canéé chí deεve neⁿ'e chí canéé chí deεve nduucú ní, ní nguéé ndaā maāíⁿ naachí canéé yā. 'Iiⁿyāⁿ chí cachiicá yā na maāíⁿ nguéé deenú yā tíí caⁿ'a yā. ³⁶Naachi canéé chí deεve ndúúcu ní cu'téenu ní chí deεve miiⁿ ní cuuvi daiya chí deεve ndís'tiī. Chuū caⁿ'a Jesús, ní cueⁿ'e yā ní canúúⁿ n'de'ei yā maāⁿ yā yeⁿ'é 'iiⁿyāⁿ s'eeⁿ.

'Iiⁿyāⁿ Israel s'eeⁿ nguéé i'téenu yā

³⁷Néené ch'iⁿ'i Jesús señaes dendu'ū nanáāⁿ 'iiⁿyāⁿ s'eeⁿ naati nguéé chí'teenú yā 'iiⁿyāⁿ. ³⁸Iicu cuuví cuaacu chí caⁿ'ā saⁿ'ā profeta Isaías naachí canéé nguūⁿ na libro yeⁿ'e Ndyuūs 'tíicá:

Señor, ¿du'ū i'teenu chí ngaⁿa
yā? ¿Du'ū n'diichi chí n'giⁿi yā
poder yeⁿe Señor?

³⁹ Cáávā chuū chí nguéé i'téenu yā
chí táámá vmnéⁿēe caⁿa Isaías
naachí ndii nguūⁿ na libro yeⁿe
Ndyuūs 'tíicā:

⁴⁰ Nan'gaadí yā nduutinaáⁿ 'iiⁿyāⁿ
s'eeⁿ ní diiⁿ chēechí yā staava
yeⁿé yā, caati nguéé inaaⁿ yā
ndúúcū nduutinaáⁿ yā, ní
nguéé deenú yā yeⁿē staava
yeⁿé yā, ndíí nguéé ndúú
cu'téenu yā, ní 'úú diyiicú
'iiⁿyāⁿ s'eeⁿ.

⁴¹ Chuū caⁿa Isaías miiⁿ taachí
n'diichi sa Dendyuūs ndúúcū poder
yeⁿé yā ní caⁿa sa yeⁿe yā ní 'āā
dinguūⁿ sa yeⁿē.

⁴² Caavā yeⁿē nducuéⁿē chuū
néené 'yaaⁿ 'iiⁿyāⁿ chí n'gēete ca
chi'téenu yā Jesús naati nguéé
ntumiiⁿnúⁿ yā chí chi'téenu yā ti
'va'a yā chí nan'daa yā yaācū cáávā
saⁿā fariseos. ⁴³ Caati neⁿé ca yā
honra yeⁿe saⁿā iⁿ'yeeⁿdí cūū, nguéé
ti honra yeⁿē Dendyuūs miiⁿ.

Nduudu yeⁿē Jesús diiⁿ juzgar saⁿā s'eeⁿ

⁴⁴ Naati Jesús ní caⁿa yuudú
yā: Du'ū chí i'téenu 'úú, nguéé 'úú
i'téenu yā ti 'iiⁿyāⁿ chí dichó'o
yā 'úú. ⁴⁵ Du'ú 'iiⁿyāⁿ chí inaaⁿ yā
'úú, inaaⁿ yā 'iiⁿyāⁿ chí dichó'o yā
'úú. ⁴⁶ 'Úú tan'dúúcā dēeve ní ndaa
iⁿ'yeeⁿdí cūū. Ní 'iicu nducyáácá
'iiⁿyāⁿ chí cu'téenu yā 'úú nguéé
cunee yā ndúúcū maáiⁿ. ⁴⁷ 'Iiⁿyāⁿ
chí n'giindiveéⁿ yā nduudu yeⁿé
ní nguéé i'téenu yā nduudu yeⁿé,
'úú nguéé dííⁿ juzgar 'iiⁿyāⁿ miiⁿ.
Caatí nguéé ndaa dííⁿ juzgar 'iiⁿyāⁿ

yeⁿe iⁿ'yeeⁿdí cūū, ti ndaa chí
nadanguaⁿáí 'iiⁿyāⁿ yeⁿe iⁿ'yeeⁿdí.

⁴⁸ Du'ū chí nguéé neⁿē 'úú, ní
nguéé n'gúuⁿ yā nduudu yeⁿé. Véé
'iiⁿyāⁿ chí dííⁿ yā juzgar 'iiⁿyāⁿ s'eeⁿ
nguuví chí 'cuiinu iⁿ'yeeⁿdí. ⁴⁹ Caati
'úú nguéé ngaⁿá yeⁿe maáⁿ. Chiidá
chí dichó'o yā 'úú, 'iiⁿyāⁿ mííⁿ teé
yā nduudu cuaacu chí ngaⁿá ní
yeⁿē chí canéé chí caaⁿmáⁿ. ⁵⁰ 'Úú
deenú chí cucáávā nduudu cuaacu
yeⁿé yā cúnduuchi yú cueⁿe
daāⁿmaⁿ. 'Tíicā ngaⁿā 'úú, tan'dúúcā
chí ngaⁿa Chiidá ngii yā 'úú.

Jesús naaⁿnú yā ca'a discípulos yeⁿé yā

13 Ní vmnááⁿ vmnaaⁿ 'viicu
yeⁿe pascua 'āā deenu
Jesús chí hora 'āā cuéé ndaa chí
cho'ó yā yeⁿe iⁿ'yeeⁿdí cūū chí ndaa
yā nanááⁿ Chiidá yā. Tan'dúúcā chí
dineⁿe Jesús 'iiⁿyāⁿ yeⁿé yā chí
snée yā iⁿ'yeeⁿdí cūū, 'āā dinéⁿe
núúⁿ yā 'iiⁿyāⁿ ndii cuááⁿ ná ch'iinu.

² Ch'íínú che'e nguuinú yā.

Yáá'n'nguuinúⁿ 'āā s'neeⁿ sa na staava
yeⁿē Judas Iscariote chí daiya
Simón chí canéé chí dííⁿ yā entregar
Jesús. ³ Déenú Jesús chí tanducuéⁿē
ní ca'a Chiidá yā ta'a daiyá yā ní
chí nan'daa yā yeⁿé Dendyuūs ní
duu'vī tiempo tuu'mí naⁿá yā nanááⁿ
Dendyuūs. ⁴ Nadacuééⁿ yā naachi chí
che'e nguuinú yā ní ndiví yā catecaí
yā. Ní sta'á yā 'aama toalla chēecu
vmnaaⁿ cuerpo yeⁿe yā. ⁵ Ní ch'iinuúⁿ
yā nuūⁿniⁿ chēeti tina ní tuc'a yā
naaⁿnu yā ca'a discípulos. Ní nat'í yā
ndúúcū toalla chí ndēecú yā.

⁶ Ndaá yā naachi canéé Simón
Pedro ní sáⁿa cūū ngaⁿa sa ngii
sa 'iiⁿyāⁿ: Señor, ¿áá n'dii ntúūⁿ
naaⁿnú ní ca'á?

⁷Nan'guεεcútaⁿā Jesús ní ngaⁿa yā ngii yā saⁿā: 'Úú ní chí dííⁿ nguéé deenu di maaⁿ naati cadíínuuⁿ di cuayivi.

⁸Ngaⁿā Pedro ngii sa 'iiⁿyāⁿ: N'dii, nguéé nááⁿnú nī ca'á mar 'áámá tiempo. Nan'guεεcútaⁿā Jesús yeⁿē sa: Nduúti chí nguεε naaⁿnú yeⁿē di nguéé 'áámá parte yeⁿē di nduucú.

⁹Tuuⁿmi ní ngaⁿa Simón Pedro: Señor, nguéé dámaāⁿ ca'á ti ndii ta'á ntúūⁿ ndúúcu tííⁿ.

¹⁰Tuuⁿmi ní ngaⁿa Jesús ngii yā saⁿā: Du'u chí chiinē nguéé neⁿē sa chí naaⁿnu sa cuerpo yeⁿe sa ti dámaāⁿ ca'a sa caati tanducuéⁿē cuerpo yeⁿē sa ní dεeve. Nds'tií ní 'āā dεevé nī 'āā ndáá rá chí nguéé nducyaaca nī.

¹¹Ti deenú yā du'u chí dííⁿ entregar 'iiⁿyāⁿ ní cáávā chííⁿ chí caⁿa yā: Nguéé nducyaaca nī dεeve nī.

¹²Taachí ch'iinu naaⁿnú yā ca'a discípulos, ní sta'á yā catecaí yā nguεεcundíí ntuúⁿ yā 'cuundi yā. Ngaⁿa yā ngii yā saⁿā s'eeⁿ: 'Áá déénú nī dε'ē chí idiíⁿ nduucú nī? ¹³Nds'tií ngaⁿa nī chí 'úú ní Maestro, chí 'úú ní Señor. N'daācā ngaⁿa nī caati 'tíicā 'úú. ¹⁴'Úú ní Señor yeⁿē nī, 'úú ní Maestro yeⁿē nī. 'Úú inaaⁿnú ca'a nī. Nds'tií canéé nī ntúūⁿ chí naaⁿnu nī 'aama nī ca'a taama nī. ¹⁵Canééⁿ chí dííⁿ chuū. Tan'dúúca chí 'úú chí dííⁿ 'tíicā nī ntúūⁿ diiⁿ ndís'tií. ¹⁶Cuaacu nííⁿnyúⁿ cuāācū nííⁿnyuⁿ ngaⁿá ngii ndís'tií: 'Iiⁿyāⁿ chí diiⁿ mandado nguéé 'āā naaⁿ ca yā chí 'iiⁿyāⁿ chí ngaⁿa ntiiⁿnyūⁿ yeⁿē yā. Ndíí nguéé ndúú 'iiⁿyāⁿ chí dicho'ó yā nguéé 'āā naaⁿ cá yā chí 'iiⁿyāⁿ chí dicho'ó

yā 'iiⁿyāⁿ. ¹⁷Nduuti chí deenu nī taanduvéé dendu'ū ní yeenu taaví nī ndúúti chí dííⁿ nī chuū.

¹⁸Nguéé ngaⁿá yeⁿē nducyaaca ndis'tií. 'Úú ní deenú 'iiⁿyāⁿ chí ndεevé. Ní 'iicu canéé chí cuuví cuaacu chí canéé nguūⁿ. Du'ū chí nge'é pan nduucú, canéé chí caⁿá yā contra yeⁿē 'úú. ¹⁹Ndíí maaⁿ 'āā ngaⁿá 'aara chí 'āā cuéé cuuvi nííⁿnyuⁿ. Taachi 'āā cho'ōo chuū cuuví cu'téenu nī chí 'úú. ²⁰Cuaacu nííⁿnyúⁿ cuāācū nííⁿnyuⁿ 'úú ngaⁿá ngii ndís'tií: 'Iiⁿyāⁿ chí 'cuáaⁿ yā 'iiⁿyāⁿ chí 'úú dicho'ó 'cuáaⁿ yā 'úú. Ní 'iiⁿyāⁿ chí 'cuáaⁿ yā 'úú 'cuáaⁿ yā 'iiⁿyāⁿ chí dicho'ó yā 'úú.

Jesús dííⁿ yā anunciar chí Judas dííⁿ yā entregar 'iiⁿyāⁿ

(Mt. 26.20-25; Mr. 14.17-21; Lc. 22.21-23)

²¹Taachí ngaⁿa Jesús chuū ya'ai 'iinú yā na espíritu yeⁿé yā ní caⁿa cuaacú yā: Cuaacu nííⁿnyúⁿ cuāācū nííⁿnyuⁿ ngaⁿá ngii ndís'tií chí 'áámá chéé ndís'tií dííⁿ nī entregar 'úú.

²²Tuuⁿmi discípulos n'gínú yā na 'áámá yā na táámá yā. Nguéé tuumicádiinúúⁿ yā du'u yeⁿē chí ngaⁿa yā. ²³'Áámá discípulo, chí nééné neⁿé Jesús, candítíí neeⁿ yā na nííⁿnúⁿ Jesús. ²⁴Simón Pedro ca'a yā señas saⁿá 'cūū ní ngaⁿa yā saⁿā chí natiingúúneeⁿ sa yeⁿē sáⁿā chí ngaⁿa Jesús. ²⁵Níicú taachi candiitíí neeⁿ yā nííⁿnúⁿ Jesús, tuuⁿmí ngaⁿá yā: Señor, 'du'ū chíí?

²⁶Nan'guεεcútaⁿā Jesús: Caⁿá di'caandá pan ní ca'á 'iiⁿyāⁿ ní 'iiⁿyāⁿ miiⁿ chííⁿ. Ní di'caandá yā pan ní ca'á yā Judas Iscariote, daiya Simón. ²⁷Ch'íínú che'e sa pan miiⁿ

ní yááⁿnguiniūⁿ ndaa sa na staava yeⁿē sa. Tuu'mí Jesús ní ngaⁿa yā ngii yā saⁿā: Chíi chí neⁿe di diiⁿ dí miiⁿ, diiⁿ núúⁿ yiiⁿnu nuuⁿ di.

²⁸Naati mar 'áámá 'iiⁿyāⁿ chí véé na mesa miiⁿ nguéé tuumicadiinúⁿ yā de'ē chúú chí 'tíicā caⁿa yā.

²⁹N'duuví yā nnacadíinuⁿ yā chí caati Judas ndéé sa bolsa chí Jesús ní 'āā ngaⁿa yā ngii yā saⁿā: Cuái di chí neⁿe yú yeⁿe 'viicu o cuica'a dí 'tē 'iiⁿyāⁿ chí ndaachíi snée yā.

³⁰Ch'iinú che'é yā pan can'daā núuⁿ Judas ch'ua'ai ní 'āā chí 'da'a.

Mandamiento chí ngāi

³¹Taachí Judas miiⁿ can'daā sa miiⁿ tuu'mi ní ngaⁿā Jesús: Maaⁿ ní canéé chí cuuvi ch'ēete Saⁿā chí Daiya Dendyuūs. Ní Dendyuūs miiⁿ canéé chí ch'ēete ndúúcu yā. ³²Ndúúti chí Dendyuūs canéé chí ch'ēete yā, 'tiicá ntúúⁿ dííⁿ yā chí ch'ēete maáⁿ yā. Ní 'cuiinu ní dííⁿ yā chí ch'ēete 'iiⁿyāⁿ.

³³N'dii daiya n'gaiyaa 'téé 'téé nuúⁿ cuneé ndúúcu ndís'tií. In'nuúⁿ ní 'úú tan'dúúca chí 'úú chí ngaⁿá ngii 'iiⁿyāⁿ Israel s'eeⁿ: Naachi 'úú caⁿá ndís'tií ní nguéé cuuvi ndaá ní. 'Tíicā ngaⁿá ndís'tií maaⁿ. ³⁴'Áámá ley ngai iteé ndís'tií chí diiⁿ yá'āi 'iinu ní vi'í 'aama ní taama ní tan'dúúca chí idiíⁿ yá'āi 'iinú ndís'tií. 'Tiicá ntúúⁿ diyá'ai 'iinú ní vi'í 'aama ní taama ní. ³⁵'Ícú chúú tuumicadiinuuⁿ nducyaaca 'iiⁿyāⁿ chí ndís'tií ní discípulos yeⁿé ndúúti chí neⁿé ní 'áámá ní taama ní.

Jesús ngaⁿa yā chí Pedro caaⁿmáⁿ yā chí nguēē n'diichí yā Jesús

(Mt. 26.31-35; Mr. 14.27-31; Lc. 22.31-34)

³⁶Tuu'mí ngaⁿā Simón Pedro ngii sa Jesús: Señor, 'tíí cáⁿa di?

Nan'guēecútaⁿā Jesús miiⁿ: Naachi 'úú caⁿá nguéé cuuvi chíi ndís'tií can'dáa ní 'úú. Naati canéé chí chíi ní can'dáa ní 'úú cuayiivi.

³⁷Tuu'mí ngaⁿā Pedro miiⁿ: Señor, 'de'ē cuuvi chí 'āā nteē cuuvi chí can'daá dii maaⁿ? Vida yeⁿé cu'neéⁿ lugar yeⁿé di.

³⁸Nan'guēecútaⁿā Jesús miiⁿ: 'Áá 'cuūvi di lado yeⁿe 'úú? Cuaacu nííⁿnyúⁿ cuāācū niiⁿnyuⁿ ngaⁿá ngii dii chí nguéé 'cai tusáⁿā taachí nguéé cueeⁿdíitū di 'úú 'iinū cuuvi vuelta.

Jesús ní tan'dúúca yúúni chí candéé 'iiⁿyāⁿ nanááⁿ Chiidá yā

14 Caⁿa Jesús: Nguéé ndii 'úúviⁿ staava yeⁿé ní. Cu'téenu ní Dendyuūs. Cu'téenu ní 'úú dendu'ū. ²Na vaacu Chiidá véé taavi naachi 'cuēetinée yú. Ndúúti chí nguéé nduudu cuaacu, tuu'mi ní 'úú nguéé caaⁿmáⁿ 'tiicā. Caⁿá nanguain'daí naachi 'cuēetinée ndís'tií. ³Ndúúti chí naⁿá ní nnguain'daí 'áámá cuaaⁿ yeⁿé ndís'tií chí 'cuēetineé ndís'tií, cuchii ntuúⁿ táámá vmnéⁿēē ní candéé māaⁿ ndís'tií. Naachí cuneé miiⁿ ndís'tií ní 'cuēetinée ní ntúúⁿ ní. ⁴Ní déénú ní naachi caⁿá mííⁿ, ní n'diichí ní yúúni.

⁵Tuu'mi ní ngaⁿa Tomás ngii sa Jesús: Señor, nguéé déenu 'nū tíí caⁿá ní. 'Táácā n'diichí 'nū yúúni?

⁶Jesús nan'guēecutáⁿa yā yeⁿe sa: 'Úú tan'dúúca yúúni, 'úú ngaⁿá nduudu cuaacu, 'úú teé vida. Nguéé du'ū vee ndaá nanááⁿ Chiidá ndúúti chí nguēē cáāvā 'úú. ⁷Ndúúti chí n'diichí ní 'úú in'diichí ní ntúúⁿ Chiidá. Ní ndii maaⁿ ní n'diichí ní 'iiⁿyāⁿ. Ní n'diichí ní ntúúⁿ 'iiⁿyāⁿ.

⁸Tuu'mí ngaⁿa Felipe miⁿ ngii sa 'iiⁿyāⁿ: Señor, 'cuuⁿmiⁿ nī Chiida yú ní 'cuēetinée 'nū ndúúcū vaadi yeenú.

⁹Jesús ní ngaⁿa yā ngii yā saⁿā: Dii Felipe, 'naaⁿ n'dái ntúúⁿ caneeé ndúúcū ndis'tií ní 'áá nguéeé nin'diichi di 'úú, Felipe? Du'ú 'iiⁿyāⁿ chi n'diichí yā 'úú, n'diichí yā Chiidá. ¿Táacā caaⁿmaⁿ di: 'Cuuⁿmiⁿ nī Chiida yú? ¹⁰¿Áá nguéeé i'téenu di chi 'úú ní caneeé ndúúcu Chiidá ní Chiidá caneeé yā nduucú? Nduudu chi ngaⁿá nanááⁿ ndis'tií nguéeé ngaⁿá yeⁿé maáⁿ ti yeⁿē Chiidá chi caneeé yā nduucú. 'Iiⁿyāⁿ miiⁿ dííⁿ yā ntiíⁿnyuⁿ. ¹¹Cu'téenu di 'úú ti 'úú caneeé ndúúcū Chiidá ní Chiidá mííⁿ caneeé yā nduucú, o cu'téenu di 'úú cáávā ntiíⁿnyuⁿ chi dííⁿ. ¹²Cuaacu nííⁿnyúⁿ cuāācū niiⁿnyuⁿ ngaⁿá ngii ndis'tií: Du'ú chi i'teenu 'úú, ní ntiíⁿnyuⁿ chi 'úú idiíⁿ, 'tiicá ntúúⁿ dííⁿ yā. Ní ch'ēete ca ntiíⁿnyuⁿ nidííⁿ yā nguéeé ti chuū caati 'úú ní caⁿá nanááⁿ Chiidá. ¹³Ní tanducuéⁿē chi caaca nī Chiidá ndúúcū chi duuchí, chuū 'úú idiíⁿ niicu Chiidá miiⁿ ní 'cuuví 'cuuⁿmiⁿ yā poder caavā 'úú. ¹⁴Ndúúti chi dē'ē chi caaca nī ndúúcū chi duuchí, 'úú ní dííⁿ.

**Jesús caⁿa yā dichó'ó yā Espíritu
N'dai yeⁿe Dendyuūs**

¹⁵Ndúúti chi neⁿe nī 'úú, dííⁿ nī chi ngaⁿa ley yeⁿé. ¹⁶'Úú di'cuúitu Chiidá ní teé yā taama yā chi teé yā poder ndis'tií. Ní cuneé yā ndúúcu nī cueⁿe daáⁿmaⁿ. ¹⁷Espíritu ngaⁿa yā vaadi cuaacu. Chiiⁿ chi nguéeé 'cuúⁿ 'iiⁿyāⁿ yeⁿe iⁿ'yeēⁿdī caati nguéeé 'iiⁿyāⁿ s'eeⁿ inaaⁿ yā ní nguéeé ntúúⁿ ní n'diichí yā Espíritu miiⁿ.

Naati ndís'tií n'diichí nī ti Espíritu miiⁿ caneeé ndúúcū ndís'tií ní cuneéé ntúúⁿ yeⁿē ndis'tií. ¹⁸Nguéeé cu'neéⁿ ndís'tií da'caiya nguá'āa. Ndaá nanaáⁿ ndis'tií. ¹⁹Τεε 'téé nūⁿ 'āā ntéé snaáⁿ iⁿ'yeēⁿdī 'úú. Ndís'tií ní snaáⁿ nī 'úú. Caati 'úú ní canduūchí, ní ndís'tií canduuchi ntuúⁿ nī. ²⁰Tuu'mí nguuvu miiⁿ ní caneeé chi n'diichí nī 'úú chi caneeé ndúúcū Chiidá. Ní ndís'tií caneeé nī nduucú. Ní 'úú caneeé ndúúcu nī. ²¹Du'ú 'iiⁿyāⁿ chi caneeé yā ndúúcū ley yeⁿé ní dííⁿ yā tan'dúúcā chi ngaⁿa ley yeⁿé, 'iiⁿyāⁿ miiⁿ chi neⁿé yā 'úú. Ní 'iiⁿyāⁿ chi neⁿé yā 'úú, Chiidá neⁿe ntúúⁿ yā 'iiⁿyāⁿ miiⁿ ní 'úú ní neⁿé ntuúⁿ 'iiⁿyāⁿ miiⁿ. Ní 'úú 'cuuⁿmiⁿ maáⁿ nanááⁿ 'iiⁿyāⁿ miiⁿ.

²²Tuu'mí ngaⁿā Judas ngii sá Jesús (nguéeé saⁿā Judas Iscariote): Señor, ¿dē'ē véé chi 'cuuⁿmiⁿ nī nanááⁿ nús'uu ní nguéeé nanááⁿ 'iiⁿyāⁿ yeⁿe iⁿ'yeēⁿdī?

²³Nan'gueēcútaⁿā Jesús ní caⁿa yā: Dú'ú 'iiⁿyāⁿ chi neⁿe yā 'úú, nduudu yeⁿé n'giindiveéⁿ yā. Ní Chiidá mííⁿ neⁿé yā 'iiⁿyāⁿ. Ní ndaá 'nū nanááⁿ yā. Ní ndaāca 'nū naachi 'cuēetinée 'nū nduucú yā. ²⁴Du'ú 'iiⁿyāⁿ chi nguéeé neⁿé yā 'úú ní nguéeé n'giindiveéⁿ yā nduudu yeⁿé. Nduudu chí n'giindiveéⁿ nī nguéeé yeⁿé caati yeⁿē Chiidá chi dichó'ó yā 'úú.

²⁵Chuū ngaⁿá taachi caneeé ndúúcū ndís'tií. ²⁶'Iiⁿyāⁿ chi téé yā poder s'uuúⁿ, 'iiⁿyāⁿ miiⁿ ní Espíritu N'dai yeⁿe Ndyuūs. Chuū chi dichó'ó Chiidá ndúúcū chi duuchí. 'Iiⁿyāⁿ mííⁿ ca'cueeⁿ yā ndís'tií tanducuéⁿē dendu'ū. Ní nin'gaacú yā ndís'tií tanducuéⁿē chi caⁿá nanááⁿ ndís'tií.

²⁷Chí cunee 'diiíⁿ cu'neéⁿ ndúúcu ndís'tií. Chí cu'neéⁿ 'diiíⁿ yeⁿ'é máaⁿ teé ndis'tií. Nguéé tan'dúúcā chí iⁿ'yeēⁿdī teē chí 'úú teé ndis'tií. Nguéé 'cuūndi daānā yeⁿ'e staava yeⁿ'é nī, ndíí nguéé ndúú 'va'a rá nī. ²⁸Ch'iindiveéⁿ nī chí 'úú ngaⁿ'á: Caⁿ'á ní cuchii ntūuⁿ nanááⁿ ndís'tií. Ndúúti chí neⁿ'é nī 'úú, tuu'mi ní cuaacu níⁿnyúⁿ chí yeenú taavi nī ti ngaⁿ'á chí caⁿ'á nanááⁿ Chiidá. Ní Chiidá vmnaaⁿ cá yā ní chí cuuvi 'úú. ²⁹Maaⁿ ní ngaⁿ'á yeⁿ'e chí cuuvi, ní 'iicu taachi chó'oo chuū cuuvi cu'téenu nī.

³⁰Āā ntéé 'yaaⁿ caⁿ'á ndúúcu ndis'tií caati ndaa saⁿ'ā chí 'iiⁿntyéⁿ'ē yeⁿ'e iⁿ'yeēⁿdī 'cūū. Ní nguéé du'ū vεε canéé yeⁿ'é yā nduucú. ³¹Iicu cuuvi cu'téenu 'iiⁿ'yāⁿ yeⁿ'e iⁿ'yeēⁿdī chí 'úú neⁿ'é Chiidá. Ní tan'dúúcā chí Chiidá ca'á yā mandamiento 'úú 'tíicā chí dííⁿ. Ncueeⁿ yú ní caⁿ'a yú maaⁿ.

**Jesús tan'dúúcā 'áámá dii'yu
dúnde'e chí cuaacu**

15 Caⁿ'a Jesús: 'Úú tan'dúúcā dii'yu dúnde'e chí cuaacu, ní Chiidá dííⁿ yā cuidado yeⁿ'e dii'yu dúnde'e. ²Tanducuéⁿ'e duuⁿnē yeⁿ'é chí nguéé dε'ē vεε n'gui'i yeⁿ'ē 'caacá yā ní divíi yā. Ní nducuéⁿ'ē duuⁿnē chí véé n'gui'i yeⁿ'ē ní didεεv'ē yā 'iicu cuuvi n'deē ca n'gui'i yeⁿ'ē. ³Ndís'tií 'āā dεεvé nī cáāvā nduudu chí ngaⁿ'á. ⁴Ndís'tií cunée nī nduucú ní 'úú cunee ndúúcu nī. Tan'dúúcā duúⁿne nguéé 'cuēetinē n'gui'i yeⁿ'ē nduūti chí nguεε canéé na dii'yu dúnde'e, 'tiicā ntūūⁿ ndis'tií nduuti chí nguéé cunée nī nduucú.

⁵'Úú tan'dúúcā dii'yu dúnde'e ní ndís'tií ní dúuⁿnē. 'Iiⁿ'yāⁿ chí canée yā nduucú ní 'úú canee nduucú yā, 'iiⁿ'yāⁿ miíⁿ neéné n'dee n'gui'i candée yā. Ndúúti chí nguéé 'úú nduucú yā ní nguéé dε'ē vεε cuuvi dííⁿ yā. ⁶Du'u 'íiⁿ'yāⁿ chí nguεε canee yā nduucú cun'dáa yā tan'dúúcā dúúⁿne chí nguéé n'gui'i yeⁿ'ē ní ntí'i. Ní 'iiⁿ'yāⁿ ita'á yā ní ngii yā na yaⁿ'ā. Ní ngiichi.

⁷Ndúúti chí canee nī nduucú, ní nduudu yeⁿ'é canee nduucú nī, caaca nī tanducuéⁿ'ē chí neⁿ'é nī ní cuuvi. ⁸Taachi candεé nī n'deē n'dáí n'gui'i yeⁿ'é nī, ní ch'iⁿ'i nī chí discípulos yeⁿ'é tuu'mi ní ndúúcu chuū ní ch'iⁿ'i nī poder Chiidá. ⁹Tan'dúúcā chí neⁿ'e Chiidá 'úú 'tiicā ntūūⁿ 'úú neⁿ'é ndís'tií. Cunee nī ndúúcu vaadi neⁿ'e yeⁿ'é. ¹⁰Ndúúti chí dííⁿ nī tan'dúúcā chí ngaⁿ'a ley yeⁿ'é, tuu'mi cunee nī ndúúcu vaadi neⁿ'e yeⁿ'é. Ní chuū tan'dúúcā chí 'úú idííⁿ nducuéⁿ'ē chí ngaⁿ'a ley yeⁿ'ē Chiidá ní canee ndúúcu vaadi neⁿ'e yeⁿ'é yā.

¹¹Dendú'ū chí 'tuucā ngaⁿ'á. Nífcú vaadi yeenú yeⁿ'é cunee nduucú nī. Ní vaadi yeenú yeⁿ'é nī diiⁿ cumplir. ¹²Chuū ley yeⁿ'é chí dineⁿ'é nī vi'í 'aama nī taama nī tan'dúúcā chí 'úú neⁿ'é ndis'tií. ¹³Mar 'áámá saⁿ'ā nguéé vaadi neⁿ'e chí ch'εete cá yeⁿ'ē chí 'cuuvi 'áámá saⁿ'ā caavā amigo yeⁿ'ē sa. ¹⁴Ndís'tií ní amigos yeⁿ'é ndís'tií ndúúti chí dííⁿ nī cosa chí 'úú ngaⁿ'á. ¹⁵Āā ntéé caaⁿ'máⁿ chí ndis'tií ní mozos yeⁿ'é ti mozos nguεε deenu sa dε'ē chí diiⁿ 'iiⁿ'yāⁿ chí ngaⁿ'a ntiíⁿnyúⁿ yā yeⁿ'ē sa. Naati ngaⁿ'á chí ndís'tií ní amigos yeⁿ'é ti tanducuéⁿ'ē chí ngiindiveéⁿ

yeⁿē Chiidá, ngaⁿá ngí ndis'tií.

¹⁶Ndís'tií nguéé ndeεve nī 'úú, naati 'úú nindeεvé ndís'tií. Ní 'neéⁿ ndís'tií caati cuuvi candée nī n'gui'i. Ní n'gui'i yeⁿe nī 'áámá cūnee. Ní tanducueⁿē chi caaca nī Chiidá ndúúcu chi duuchí, 'iiⁿyāⁿ miiⁿ ní téé yā ndís'tií. ¹⁷Chuū ní ngaⁿá ndis'tií chi dinéⁿe nī vi'í 'áámá nī táámá nī.

**'Iiⁿyāⁿ yeⁿe iⁿyeēⁿdī
nguéé n'diichi ndís'tií**

¹⁸Ndúúti chi 'iiⁿyāⁿ yeⁿe iⁿyeēⁿdī nguéé neⁿe yā ndís'tií 'āā déenu nī chi vmnááⁿ vmnaaⁿ nguéé neⁿe yā 'úú. ¹⁹Ndúúti chi canée nī ní dífⁿ nī cosas ndúúcu 'iiⁿyāⁿ yeⁿe iⁿyeēⁿdī, 'iiⁿyāⁿ yeⁿe iⁿyeēⁿdī dinéⁿe yā ndís'tií, naati ndís'tií nguéé yeⁿe iⁿyeēⁿdī ndís'tií. Ndeεvé ndís'tií vmnaáⁿ yeⁿē chi din'dái iⁿyeēⁿdī. Cáávā chuū chi iⁿyeēⁿdī nguéé neⁿe ndís'tií. ²⁰N'gaacu nī yeⁿe nduudu chi 'úú ngaⁿá ngí ndis'tií: Nguéé vmnaaⁿ ca 'iiⁿyāⁿ chi diiⁿ mandado ti 'iiⁿyāⁿ chi ngaⁿa ntiⁿnyuⁿ. Ndúúti chi 'iiⁿyāⁿ s'tíí ní can'daa yā 'úú 'tiicá ntúūⁿ can'daa yā ndís'tií. Nduuti chi dífⁿ yā tan'dúúca chi ngaⁿá 'tiicá ntúūⁿ dífⁿ yā tan'dúúca chi ngaⁿá nī. ²¹Tanducueⁿē chuū dífⁿ yā ndúúcu ndis'tií caavā chi duuchí ti nguéé n'diichí yā 'iiⁿyāⁿ chi dich'ó yā 'úú.

²²Ndúúti chi nguéé ndaa ndíí nguéé ndúú yaa'ví rá 'iiⁿyāⁿ tuu'mi 'iiⁿyāⁿ ní nguéé déenu yā chi véé nuuⁿndi yeⁿé yā. Maaⁿ ní nguéé mar 'áámá yā chi cuuvi caaⁿmaⁿ yā chi nguéé véé nuuⁿndi yeⁿe yā. ²³'Iiⁿyāⁿ chi nguéé neⁿe yā 'úú 'tiicá ntúūⁿ Chiidá mífⁿ ní nguéé neⁿe yā

'iiⁿyāⁿ. ²⁴Ndúúti chi 'úú nguéé dífⁿ nguaaⁿ yā ntiⁿnyuⁿ chi mar 'áámá 'iiⁿyāⁿ nguéé dífⁿ yā, nguéé déenu yā chi véé nuuⁿndi yeⁿe yā. Naati maaⁿ ní n'diichí yā 'úú, ní nguéé neⁿe yā 'úú ndúúcu Chiidá. ²⁵'Iicu cuuvi cuaacu nduudu chi canée nguūⁿ na ley yeⁿe yā: Nguéé de'ē caavā chi nguεε neⁿe yā 'úú.

²⁶Naati taachi ndaa yā 'iiⁿyāⁿ chi Espíritu N'dai yeⁿe Dendyuūs ní téé yā poder s'uuuⁿ. Ní 'úú ní dich'ó Espíritu N'dai chi yeⁿē Chiidá. Espíritu N'dai yeⁿe Dendyuūs ní cuaacu ní cuchii yeⁿē Chiidá. Espíritu miiⁿ caaⁿmaⁿ cuaacú yā yeⁿē 'úú. ²⁷'Iicu ndís'tií ní caaⁿmaⁿ cuaacú nī yeⁿē 'úú caati canée nī nduucú ndii cuááⁿ naachi chi ngaⁿā.

16 Caⁿa Jesús: Chuū ngaⁿá ngí ndis'tií 'iicu nguéé nduuvi taáⁿ nī. ²'Iiⁿyāⁿ ní 'cuεεcú yā ndís'tií cuaaⁿ chuva'āi yaacū. Ní taachí ndaa hora chi 'caaⁿnúⁿ yā ndís'tií, nacádiinúúⁿ yā chi n'daacā idííⁿ yā ntiⁿnyuⁿ yeⁿe Dendyuūs. ³Ní 'iiⁿyāⁿ s'tíí ní 'tíicā idííⁿ yā ti nguεε n'diichí yā Chiidá, ndii nguéé nduu 'úú ra. ⁴Maaⁿ ní ngaⁿá ngí chuū ndis'tií caati taachí ndaa hora miiⁿ n'gáacú nī ti 'úú ní 'āā caⁿá. Chuū ni nguéé caⁿá ndíí cuaaⁿ vmnaaⁿ ti 'úú canée ndúúcu ndis'tií.

**Ntiⁿnyuⁿ yeⁿē Espíritu
N'dai yeⁿe Ndyuūs**

⁵Caⁿa Jesús: Naati maaⁿ ní caⁿá n'diichí 'iiⁿyāⁿ chi dich'ó 'úú. Ní mar 'áámá ndís'tií nguéé ntiinguuneéⁿ nī 'úú: ¿Tíí caⁿa nī? ⁶Chiiⁿ chi caⁿá chi 'túúca, ní néené chii ndaachíí staava yeⁿe nī. ⁷'Úú ngaⁿá nduudu cuaacu miiⁿ: N'daacā

cáávā ndís'tiī chi caⁿá. Ndúúti chi 'úú nguéé caⁿá tuu'mi ní Espíritu N'dai yeⁿe Dendyuūs chi tée yā poder ndís'tiī nguéé ndai yā nanááⁿ ndís'tiī. Ndúúti chi 'úú caⁿá ní 'úú dicho'ó 'iiⁿyāⁿ. ⁸Taachí 'iiⁿyāⁿ miiⁿ ní ndāa yā, ní caaⁿmáⁿ yā ndúúcū 'iiⁿyāⁿ yeⁿe iⁿ'yeeⁿdī yeⁿe nuuⁿndi, ní yeⁿe vaadi cuaacu, ní yeⁿe 'iiⁿyāⁿ chi diiⁿ juzgar. ⁹Caaⁿmáⁿ yā yeⁿe nuuⁿndi chi nguéé i'téenu yā 'úú. ¹⁰Caaⁿmáⁿ yā yeⁿe vaadi cuaacu chi 'úú caⁿá nanááⁿ Chiidá ní 'āā ntéé n'diichí yā 'úú. ¹¹Caaⁿmáⁿ yā nuuⁿndi yeⁿe 'áámá 'iiⁿntyēⁿe ch'etete yeⁿe iⁿ'yeeⁿdī cūū 'āā canéé juzgado sa.

¹²Nééne n'dee dendu'ū chi véé chi cuuvi ndis'tiī naati maaⁿ ní nguēe cuuvi cūnee ná vaanicaadiinūⁿ yeⁿé nī. ¹³Taachí ndaá Espíritu yeⁿé vaadi cuaacu, 'iiⁿyāⁿ miiⁿ ní ca'cuéēⁿ yā ndís'tiī na tanducuéⁿe vaadi cuaacu. Ni nguéé caaⁿmáⁿ yā yeⁿe maáⁿ yā ti caaⁿmáⁿ yā tanducuéⁿe chi n'giindiveēⁿ yā. Ní ch'iⁿi yā ndis'tiī dē'ē chí cuchii. ¹⁴'iiⁿyāⁿ miiⁿ ní ch'iⁿi yā poder yeⁿe ti cuta'á yā poder yeⁿe 'úú ní ch'iⁿi yā ndis'tiī. Ní cuuvi cádiinúⁿ nī. ¹⁵Nducuéⁿe chi véé yeⁿe Chiidá, chuū ní yeⁿé. Cáávā chuū ngaⁿá chi Espíritu yeⁿe vaadi cuaacu cuta'á yā yeⁿe 'úú ní ch'iⁿi yā ndís'tiī. Ní cádiinúⁿ nī.

Chi ndaachí yeⁿé nī ní nduuvi vaadi yeenu

¹⁶Caⁿa Jesús: Taa 'lííⁿ ní 'āā ntéé snaáⁿ nī 'úú. Taama vmnéⁿee, taa 'lííⁿ ní snaáⁿ nī 'úú ti 'úú ní caⁿá nanááⁿ Chiidá.

¹⁷Tuu'mí caⁿa n'duuvi discípulos yeⁿé yā ngii yā 'áámá yā táámá

yā: ¿De'e chi 'tíicā ngaⁿa yā ngii yā s'uuúⁿ taaⁿ 'lííⁿ ní 'āā ntéé chinaáⁿ nī 'úú ní taama vmnéⁿee taaⁿ 'lííⁿ ní chinaáⁿ nī 'úú, ti 'úú ní caⁿá nanááⁿ Chiidá? ¹⁸Tuu'mi ní ngaⁿa yā. ¿De'e chi 'tíicā taaⁿ 'lííⁿ? Nguéé tuumicadiinuuⁿ yú.

¹⁹Ní tuumicadiinuuⁿ Jesús chi neⁿe ntiinguuneeⁿ saⁿa s'eeⁿ, ní ngaⁿa yā: ¿Áá ntíingúúneeⁿ víí nī chi 'túúccā caⁿá chíí taaⁿ 'lííⁿ ní 'āā ntéé chi naaⁿ nī 'úú, ní taama vmnéⁿee, taa 'lííⁿ ní chi naáⁿ nī 'úú? ²⁰Cuaacu níⁿnyú cuācū niiⁿnyuⁿ ngaⁿá ngii ndis'tiī: Maaⁿ ní cuēecu nī ní ya'ai nī. Ní iⁿ'yeeⁿdī ní cuuvi yeenu naati ndís'tiī ní chi n'daaⁿ chi yá'ai nī ndúúcū vaadi yeenu. ²¹N'daataá chí canee chi 'āā 'cuundiyāā daiyā tá, véé vaadi ya'ai yeⁿe ta, ti 'āā chéé ndaa hora yeⁿe tá. Taachí 'āā véé daiya tá 'āā ntéé n'gaacu tá yeⁿe vaadi ya'ai yeⁿe tá chi yeenu tá chi véé 'áámá daiya tá yeⁿe iⁿ'yeeⁿdī. ²²Tiicá ntúūⁿ ndís'tiī ní canéé vaadi ndaachíí nanááⁿ nī. Naati taama vmnéⁿee ní n'diichí ntuúⁿ ndís'tiī. Ní cuneé nī vaadi yeenu na staava yeⁿé nī. Ní mar 'áámá 'iiⁿyāⁿ ní nguéé divíí yā vaadi yeenu yeⁿé ndis'tiī.

²³Ní nguuvi miiⁿ nguéé ntiinguuneeⁿ nī du'ū vee yeⁿé. Cuaacu níⁿnyúⁿ cuācū niiⁿnyuⁿ ngaⁿá ngii ndís'tiī chi tanducuéⁿe chí caaca nī Chiidá ndúúcū chi duuchí ní Chiidá tée yā ndís'tiī. ²⁴Ndii maaⁿ nguéé du'ū vee ngiica nī ndúúcū chi duuchí. Caaca nī ní Chiidá tée yā ndís'tiī. Ní vaadi yeenu yeⁿé nī cuuvi yeenu taavi.

Jesús chicheé yā ndúúcū iⁿ'yeeⁿdī

²⁵Chuū chi ngaⁿá ndúúcū cuentas yeⁿé ndúúcū ndís'tiī. Maaⁿ ní ndaa

hora chi 'āā ntéé caⁿ'á yeⁿ'é ndis'tiī ndúúcu cuentas naati caaⁿ'máⁿ cuaacu yeⁿ'ē Chiidá. ²⁶Nguuvi miiⁿ ní caaca nī ndúúcu chi duuchí. Ní 'úú nguéé ngaⁿ'á chi 'úú nídi'cuíftú Chiidá cáávā ndis'tiī. ²⁷Maaⁿ Chiidá neené neⁿ'é yā ndís'tiī caati ndís'tiī neⁿ'é nī 'úú. Ní i'teenú nī chi 'úú chiicá yeⁿ'ē Chiidá. ²⁸Chiicá yeⁿ'ē Chiidá ní ndaá iⁿ'yeēⁿdí 'cūū. Cu'neēⁿ ntuúⁿ iⁿ'yeēⁿdī. Ní naⁿ'á n'diichí Chiidá.

²⁹Tuu'mí ngaⁿ'a discípulos yeⁿ'é yā: Cun'díichí dí maaⁿ ní ngaⁿ'ā cuaacu di nguéé ndúúcu cuentas. ³⁰Maaⁿ ní tuumicadiinúⁿ 'nū chi deenú nī tanducuéⁿ'ē dendu'ū. Ní nguéé canee ngiinú nī chi ntiinguuneeⁿ 'iiⁿ'yāⁿ n'diī. Cáávā chuū i'teenú 'nū chi chiica nī yeⁿ'é Dendyuūs.

³¹Nan'gucēcútaⁿ'ā Jesús: ¿'Áá i'téenu nī maaⁿ? ³²Cun'diichí nī. Hora miiⁿ ní cuchii. Ní 'āā ndaā chí caⁿ'ā 'muuⁿ caⁿ'ā miiⁿ ndís'tiī na vaacú nī. Ní cu'neēⁿ nūⁿ nī 'úú dámaaáⁿ. Naati nguéé canee dámaaáⁿ ti Chiidá canée yā nduucú. ³³Chuū nī ngaⁿ'á ngií ndis'tiī chi cucáávā 'úú canee 'diifⁿ nī. Iⁿ'yeēⁿdī ní 'cueenú nī cuuvi. Cuuvi ch'ēētiinú nī. 'Úú ní chichēé ndúúcu iⁿ'yeēⁿdī.

Jesús ndee yā ndúúcu Chiidá yā caavā discípulos yeⁿ'é yā

17 Chuū caⁿ'a Jesús ní n'diichí yā caaⁿ nanguuvi ní caⁿ'a yā: N'diī Chiidá, hora yeⁿ'é ní 'āā ndaā. Díⁿ nī dich'eteté nī Daiya nī. 'Tiicā ntūūⁿ 'úú chi Daiya nī cuuvi dich'eteté n'diī. ²Tan'dúúcā chi tee nī poder 'úú chi Daiya nī yeⁿ'e dē'ē

chi díⁿ nducyaaca 'iiⁿ'yāⁿ cáávā chí ca'á vida cueⁿ'e daāⁿ'maⁿ 'iiⁿ'yāⁿ chi tee nī 'úú. ³Chuū chi vida cueⁿ'e daāⁿ'maⁿ chí n'diichí yā n'diī chi 'áámá n'dyaⁿ'ā Dendyuūs chi cuaacu níⁿ'nyúⁿ chí Dendyuūs ndúúcu Jesucristo chí dich'ólo nī.

⁴'Úú ní dich'eteté n'diī na yáⁿ'āa 'cūū. 'Āā ch'iinú díⁿ ntiīⁿ'nyuⁿ chi tee nī chí díⁿ. ⁵Maaⁿ ní n'diī, Chiidá, dich'eteté nī 'úú, n'diī ndúúcu maáⁿ nī, ndúúcu poder chi canee nduucú maáⁿ taachi 'āā 'cuéé cunee iⁿ'yeēⁿdī.

⁶Ngaⁿ'a cuaacú yeⁿ'ē chi duuchi yeⁿ'é nī nanááⁿ saⁿ'ā s'eeⁿ yeⁿ'e iⁿ'yeēⁿdí 'cūū chi tee yā 'úú. Saⁿ'ā s'eeⁿ yeⁿ'é nī. Ní tee nī 'úú. Ní n'giindiveéⁿ yā nduudu yeⁿ'é nī. ⁷Maaⁿ ní déenú yā chí tanducuéⁿ'ē dendu'ū chí tee nī 'úú ní yeⁿ'é nī. ⁸Ti ndúúdu chí tee nī 'úú ní caⁿ'á nanááⁿ 'iiⁿ'yāⁿ ní 'iiⁿ'yāⁿ s'eeⁿ ní n'giindiveéⁿ yā nduudu miiⁿ. Ní deenu cuaacu yā chí chiicá nanááⁿ n'diī. Ní i'téenu yā chí n'diī dich'ólo nī 'úú.

⁹'Úú ngiicá caavā 'iiⁿ'yāⁿ s'eeⁿ. Nguéé nídi'cuíftú cáávā iⁿ'yeēⁿdī ti cáávā 'iiⁿ'yāⁿ chí tee nī 'úú, ti yeⁿ'é n'diī. ¹⁰Ní taanduvéé dendu'ū yeⁿ'é ní yeⁿ'é nī. Ní taanduvéé dendu'ū yeⁿ'é nī ní yeⁿ'é. Ní chuū ch'iⁿ'i poder yeⁿ'é.

¹¹Ní 'āā ntéé cūneé iⁿ'yeēⁿdī naati 'iiⁿ'yāⁿ s'eeⁿ snée yā iⁿ'yeēⁿdī. 'Úú ní cuchí nanááⁿ nī. N'diī Chiidá chí dēve, díⁿ nī cuidado 'iiⁿ'yāⁿ chí tee nī 'úú ndúúcu chí duuchí nī. Ní chí cuuvi 'áámá yā tan'dúúcā s'uuúⁿ ní 'áámá yú. ¹²Taachí canee ndúúcu 'iiⁿ'yāⁿ iⁿ'yeēⁿdī ní diīⁿ cuidado 'iiⁿ'yāⁿ ndúúcu chí duuchi

nī, 'iiⁿyāⁿ chi nteé nī 'úú. 'Úú ní dīiⁿ cuidado 'iiⁿyāⁿ ní mar 'áámá yā nguéé chindāi yā. 'Áámá nūuⁿ saⁿā daiya yááⁿ'nguiinūuⁿ chindai sa. Ní 'iicu naachi cánéé nguūⁿ ní cúúví cuaacu.

¹³Naati maaⁿ ní cuchiiⁿ nanáaⁿ nī. Ní ngaⁿá chuū taachi cuneeé iⁿ'yeēⁿdí 'cūū caati vaadi yeēnu yeⁿ'é canéé nduucú yā, ní cuuvi yeenú taavi yā. ¹⁴'Úú ní ca'á 'iiⁿyāⁿ nduudu yeⁿ'e nī. Iⁿ'yeēⁿdī nguéé dinéⁿe 'iiⁿyāⁿ ti nguéé yeⁿ'e iⁿ'yeēⁿdī 'iiⁿyāⁿ. 'Tiicá ntúūⁿ nguéé yeⁿ'e iⁿ'yeēⁿdī 'úú. ¹⁵Nguéé di'cuítūu chi ndiví nī 'iiⁿyāⁿ yeⁿ'e iⁿ'yeēⁿdī. Dííⁿ nī cuidado 'iiⁿyāⁿ s'eeⁿ yeⁿ'e yááⁿ'nguiinūuⁿ. ¹⁶Nguéé yeⁿ'e iⁿ'yeēⁿdī 'iiⁿyāⁿ s'eeⁿ tan'dúúca chi nguéé yeⁿ'e iⁿ'yeēⁿdī 'úú. ¹⁷Dííⁿ nī didéevé nī 'iiⁿyāⁿ cucáávā nduudu cuaacu yeⁿ'é nī. Nduudu yeⁿ'é nī ní nduudu cuaacu. ¹⁸Tan'dúúca chi dicho'ó nī 'úú iⁿ'yeēⁿdī 'tiicā ntúūⁿ dicho'ó 'iiⁿyāⁿ s'eeⁿ iⁿ'yeēⁿdī. ¹⁹Cáávā 'iiⁿyāⁿ s'eeⁿ 'úú māaⁿ didéevé maáⁿ. Ní 'iiⁿyāⁿ s'eeⁿ cuuví yā dæeve na nduudu cuaacu.

²⁰Nguéé di'cuiitūú dámaaⁿ caavā 'iiⁿyāⁿ miiⁿ ti cáávā 'iiⁿyāⁿ chi cu'téenu yā 'úú cáávā nduudu yeⁿ'e 'iiⁿyāⁿ s'eeⁿ. ²¹Ní nducyaaca yā ní 'áámá nūuⁿ cuuví yā tan'dúúca n'diī canéé nī nduucú, ní canéé nduucú nī. Níicú 'iiⁿyāⁿ s'eeⁿ ní canéé ntúūⁿ yā 'áámá nūuⁿ ndúúcu yú. Ní 'iicu cu'téenu 'iiⁿyāⁿ yeⁿ'e iⁿ'yeēⁿdī chi n'diī dicho'ó nī 'úú. ²²Ní poder chi téé nī 'úú, miiⁿ ni ca'á 'iiⁿyāⁿ. Ní 'áámá nūuⁿ cuuví yā tan'dúúca chi 'áámá nus'ūu. ²³'Úú ní ndúúcu 'iiⁿyāⁿ s'eeⁿ. Ní n'diī ní ndúúcu 'úú. Níicú 'áámá nūuⁿ chi n'daacā cuuví yā. Ní

iⁿ'yeēⁿdī ní cuuvi deenu chi dicho'ó nī 'úú ní chí dinéⁿe nī 'iiⁿyāⁿ s'eeⁿ tan'dúúca chi neⁿ'é nī 'úú.

²⁴N'diī Chiidá, 'iiⁿyāⁿ s'eeⁿ chi téé nī 'úú, neⁿ'é chi naachi 'úú cuneeéⁿ, 'iiⁿyāⁿ s'eeⁿ cūnée yā nduucú. Ní cuuvi n'diichí yā poder yeⁿ'é chi téé nī 'úú caati n'diī ní neⁿ'é nī 'úú ndiī taachi 'āā 'cuéé iⁿ'yeēⁿdī. ²⁵N'diī Chiidá chi dæeve, 'aa ntéé rá chi iⁿ'yeēⁿdī nguéé n'diichí n'diī 'úú n'diichí n'diī. Ní 'iiⁿyāⁿ s'tiī ní deenú yā chi n'diī dicho'ó nī 'úú. ²⁶'Úú ní ngaⁿá yeⁿ'e chi duuchí nī, ní caⁿá ngāⁿ'a yeⁿ'e chi duuchí nī. Níicú maaⁿ vaadi neⁿ'e chi néⁿ'e nī 'úú cuuvi cuneeé ndúúcu yā. Ní 'úú caneeé ndúúcu yā.

Sta'á yā Jesús

(Mt. 26.47-56; Mr. 14.43-50; Lc. 22.47-53)

18 Taachí Jesús caⁿá yā chuū, can'dáa yā ndúúcu discípulos yeⁿ'é yā táámá lado yíicú 'lííⁿ chi nguuvi Cedrón naachi canéé 'áámá cheēⁿ yeⁿ'e naāndā. Ní miiⁿ sndaā Jesús ndúúcu discípulos yeⁿ'é yā. ²Judas chí diiⁿ sa entregar Jesús ní n'diichi ntúūⁿ saⁿā na cheēⁿ miiⁿ ti 'āā cánéé n'deeé cuuví nduividáámá yā Jesús ndúúcu discípulos yeⁿ'é yā na cheēⁿ miiⁿ. ³Saⁿā chiiduú n'geeté ndúúcu saⁿā fariseos teé yā Judas Iscariote soldados ndúúcu policías ní Judas cueⁿ'e sa ndúúcu 'aama taaⁿ soldados ndúúcu policías. Ndaa yā na cheēⁿ miiⁿ ndúúcu lámparas, ndúúcu antorchas, ndúúcu armas. ⁴Naati Jesús chi déénú yā tanducueⁿ'e dendu'ū chí cuchii, cueⁿ'e yā ní ndaa yā nanáaⁿ 'iiⁿyāⁿ s'eeⁿ ní caⁿ'a yā: ¿Du'u in'nuúⁿ nī?

⁵Ní nan'guεεcutáⁿa sa yeⁿe yā: Jesús yeⁿē yāāⁿ Nazaret miiⁿ. Tuu'mí ngaⁿa Jesús ngíí yā 'iiⁿyāⁿ s'eeⁿ: 'Úú 'iiⁿyāⁿ miiⁿ. Canée ntúūⁿ Judas miiⁿ, saⁿā chí dííⁿ nca'a sa 'iiⁿyāⁿ. ⁶Taachí Jesús caⁿa yā: 'Úú 'iiⁿyāⁿ miiⁿ, tuu'mi ní saⁿā s'eeⁿ ndaacadaamí yā ní ch'εεtindiití yā na yāⁿāa. ⁷Nan'guεεcúnéé ntuúⁿ yā tiinguuneeⁿ yā: ¿Du'u ra in'nuúⁿ nī? Ní 'iiⁿyāⁿ s'eeⁿ ní caⁿa yā: Jesús yeⁿē yāāⁿ Nazaret miiⁿ.

⁸Nan'guεεcútaⁿā Jesús: 'Āā ngaⁿá ngíí ndís'tii chí 'úú. Nduúti chí 'úú chí in'nuúⁿ nī, 'cuáaⁿ nī chí naⁿa 'iiⁿyāⁿ s'tíí.

⁹Ní cuuvi cuaacu chí 'úú chí caⁿá: 'iiⁿyāⁿ chí teé nī 'úú, mar 'áámá yā nguéé chí ndai yā. ¹⁰Tuu'mi Simón Pedro chí ndéε sa espada ní tun'dáa sa ní 'nuūcá'ai sa ní ch'iica sa veeⁿ sa lado tá cuaacu yeⁿē sáⁿā chí diiⁿ mandado yeⁿe chiiduú ch'εete ca. Ní saⁿā miiⁿ ní nguuvi sa Malco. ¹¹Tuu'mí Jesús ngaⁿa yā ngii yā Pedro: N'nuúⁿ dí espada vaacu. Prueba chí teē Chiidá 'úú, ¿áá nguéé cánéé chí 'cuenú cuuvi yeⁿē?

Jesús nanááⁿ chiiduú ch'εeté ca

(Mt. 26.57-58; Mr. 14.53-54; Lc. 22.54)

¹²Tuu'mi ní 'iiⁿyāⁿ yeⁿē 'áámá taaⁿ soldado ndúúcu soldado chí yuudu ndúúcu policías yeⁿē 'iiⁿyāⁿ Israel s'eeⁿ ní sta'á sa Jesús ní cachiichí sa 'iiⁿyāⁿ. ¹³Ní candéε sa vmnááⁿ vmnaaⁿ nanááⁿ saⁿā chí nguuvi Anás, tii sáⁿā miiⁿ ní nchaⁿā ndiicú Caifás miiⁿ. 'Iiⁿyāⁿ miiⁿ ní chiiduú ch'εeté ca nduuyu miiⁿ. ¹⁴Ní Caifás miiⁿ ca'a sá consejo saⁿā Israel s'eeⁿ chí canéé chí 'cuūvi 'aama saⁿā cáávā 'iiⁿyāⁿ.

Pedro canée yā chuva'ai yeⁿē Anás

(Mt. 26.69-70; Mr. 14.66-68; Lc. 22.55-57)

¹⁵Ní n'daā Simón Pedro Jesús miiⁿ ní táámá discípulos. Ní chiiduú ch'εeté ca n'diichí yā discípulos miiⁿ chí sndaá sa ndúúcu Jesús corredor yeⁿē va'ai yeⁿē chiiduú ch'εeté ca miiⁿ. ¹⁶Naati Pedro miiⁿ canéé sá cuaaⁿ dáámí cheendi va'āi. Ní can'dáa taama discípulo chí chiiduú ch'εeté ca n'diichí yā 'iiⁿyāⁿ. Ní yaa'ví yā n'daataá chí canéé cheendi va'āi. Ní diiⁿyúⁿ yā Pedro míⁿ chεeti va'āi. ¹⁷Tuu'mi ní n'daataá chí diiⁿ mandado chí canéé cheendi va'āi ngaⁿa tá: ¿Áá nguéé díí ntúūⁿ 'áámá discípulo yeⁿē saⁿa 'cūū? Tuu'mí Pedro ngaⁿā sa: Nguéé 'úú.

¹⁸Ní chéendii saⁿā chí dichí'vε ndúúcu policías, saⁿā miiⁿ tiivi sa yaⁿā yeⁿe yíyū ti 'áámá 'iicheε. Saⁿā miiⁿ nga'a tavii'nu sa. Ní canéé nī ntúūⁿ Pedro ndúúcu sa. Ní chéendii sa nga'a tavii'nu sa ca'a sa.

Anás tiinguunééⁿ sa Jesús

(Mt. 26.59-66; Mr. 14.55-64; Lc. 22.66-71)

¹⁹Ní chiiduú ch'εeté cá miiⁿ nítiinguuneeⁿ sa Jesús yeⁿe discípulos yeⁿé yā ndúúcu yeⁿe chí Jesús chí'cueéⁿ yā. ²⁰Jesús nan'guεεcutáⁿa yā yeⁿē sa: 'Úú ní ngaⁿá cuaacú nanááⁿ 'iiⁿyāⁿ yeⁿe iⁿyeēⁿdí. 'Úú ní chí'cueéⁿ na yaacū sinagogas ní na yaacū templo ntúūⁿ naachí nduuvidaama nducyaaca 'iiⁿyāⁿ Israel s'eeⁿ ní nguéé de'ε vee chí ngaⁿa n'de'éeí. ²¹¿Dε'ε tíngúúnééⁿ di 'úú? Tíngúúnééⁿ dí 'iiⁿyāⁿ chí ch'iindiveéⁿ yā chí caⁿá chíí 'iiⁿyāⁿ. N'diichi nī. 'Iiⁿyāⁿ s'eeⁿ déénú yā chí caⁿá.

²²Taachí Jesús ch'iinu caⁿá yā chuū, 'áamá policía chi canéé miiⁿ ch'éⁿe sá Jesús, ní caⁿa sa: ¿Áá 'tíficā nan'gueecutáⁿa di yeⁿē chiiduu ch'ēete ca?

²³Nan'gueecútaⁿā Jesús: Ndúúti chi n'guee n'daacā chi ngaⁿá caaⁿmaⁿ di de'ē chi n'guee n'daacā chi ngaⁿá. Ndúúti chi n'daacā, ¿de'ē cuuvi chi n'geⁿē di 'úú?

²⁴Anás miiⁿ ní dichó'o sa Jesús ch'ēechiichí yā nanááⁿ saⁿā chi nguuví Caifás miiⁿ, saⁿā chi chiiduu ch'ēeté cá miiⁿ.

Pedro miiⁿ ngaⁿa sa taama vmnéⁿēe chí nguéé n'diichi sa Jesús miiⁿ

(Mt. 26.71-75; Mr. 14.69-72; Lc. 22.58-62)

²⁵Chéendii Simón Pedro miiⁿ ní nga'a tavii'nu sa saⁿā. Ní ngaⁿa yā ngii yā saⁿā: ¿Áá nguéé 'tíficā chi díf ní discípulo yeⁿé yā? Pedro cheeⁿdíftu sa ní ngaⁿā sa: Nguéé 'úú.

²⁶Áámá saⁿā chi diiⁿ mandado yeⁿē chiiduu ch'ēeté cá ní saⁿā miiⁿ ní 'iiⁿyāⁿ yeⁿe saⁿā chi chiica Pedro miiⁿ veeⁿ sa. Ngaⁿa sa ngii sa saⁿā: ¿Áá nguéé n'diichi dii ch'ēeti ch'ēēⁿ naandā miiⁿ ndúúcu yā?

²⁷Taama vmnéⁿēe ní cheeⁿdiiitú táaⁿ Pedro: Nguéé 'úú. Ní miⁿniiⁿyu miⁿniiⁿyu ní tusaⁿā chiita tí.

Jesús nanááⁿ Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Ní candée sa Jesús miiⁿ tyaaⁿ tyaaⁿ yeⁿē nanááⁿ Caifás miiⁿ ndii naachi canéé cuarto yeⁿē juzgado. Ní 'iiⁿyāⁿ s'eeⁿ ní nguéé chi ndáá yā cuaaⁿ ch'ēeti va'ai ch'ēete miiⁿ cáávā chi nguéé neⁿe yā chi cunedáámí yā nuuⁿndi taachi ch'ée yā nguiinú yeⁿē pascua. ²⁹Tuu'mi ní can'daá

Pilato chuva'ai nanááⁿ 'iiⁿyāⁿ s'eeⁿ ní caⁿa sa: ¿De'ē nuuⁿndi yeⁿē saⁿa 'cūū vee?

³⁰Nan'gueecutáⁿa yā ní caⁿá yā 'iiⁿyāⁿ: Ndúúti chi saⁿa 'cūū chi n'guee du'ū vee diiⁿ sa, nguéé teé 'nū saⁿā n'dii.

³¹Tuu'mi ní ngaⁿā Pilato ngii sa 'iiⁿyāⁿ s'eeⁿ: Cuta'á ní 'iiⁿyāⁿ. Ní n'diichí yā de'ē nuuⁿndi yeⁿe yā véé tan'dúúcā chi canéé na ley yeⁿé ní. Níicú 'iiⁿyāⁿ Israel s'eeⁿ ní caⁿa yā: Nús'uu ní nguéé cánéé chí 'caaⁿnuⁿ 'nū mar 'áámá 'iiⁿyāⁿ.

³²Ní cuuvi cuaacu chi caⁿa Jesús miiⁿ. Ní caⁿa yā chí cadiinuuⁿ 'iiⁿyāⁿ de'ē vaadi n'gii 'cuuvi yā. ³³Níiⁿnuuⁿ ndáá ntūūⁿ Pilato cuarto yeⁿē juzgado. Ní 'cái sa Jesús miiⁿ ní caⁿa yā: ¿Áá díf chi Rey yeⁿē 'iiⁿyāⁿ Israel s'eeⁿ chi judíos?

³⁴Nan'gueecútaⁿā Jesús: ¿Áá ngaⁿa dii chuū yeⁿe maāⁿ di o 'iiⁿyāⁿ 'cūū ch'iⁿi yā ní ngaⁿa yā n'dii yeⁿē 'úú?

³⁵Pilato miiⁿ ní n'gueecutáⁿa sa: ¿Áá 'úú chi saⁿa Israel 'úú? 'Iiⁿyāⁿ yeⁿe nación yeⁿē di ndúúcu chiiduu n'geeté nteé yā dii 'úú. ¿De'ē ndiíⁿ dí?

³⁶Nan'gueecútaⁿā Jesús: Cuaaⁿ naachi 'úú chi 'iiⁿntyeeⁿe nguéé canéé iⁿ'yeeⁿdí 'cūū. Ndúúti chi yeⁿē iⁿ'yeeⁿdí 'cūū naachi caaⁿmaⁿ ntiⁿnyúⁿ tuu'mi ní 'iiⁿyāⁿ chi diiⁿ mandado yeⁿé ní 'cuuⁿmaⁿ yā cáávā 'úú ni nguéé nica'á yā 'úú 'iiⁿyāⁿ Israel s'eeⁿ. Maaⁿ ní cuaaⁿ naachi 'úú chi 'iiⁿntyeeⁿe nguéé yeⁿē iⁿ'yeeⁿdí 'cūū.

³⁷Tuu'mi ngaⁿa Pilato ngii sa 'iiⁿyāⁿ: Tuu'mi, ¿áá díf chí rey miiⁿ? Nan'gueecútaⁿā Jesús: Díf ngaⁿā

di chi rey 'úú ní 'tíicā 'úú. 'Úú ní cáávā chuū ch'iindiyááⁿ, ní cáávā chuū chi ndáa iⁿ'yeeⁿdí 'cūū, caavā chi caaⁿ'maⁿ cuaacú yeⁿ'ē nduudu cuaacu. Nducyáácá 'iiⁿ'yāⁿ chi yeⁿ'ē vaadī cuaacu miⁿ, n'giindiveéⁿ yā nduudu yeⁿ'é.

Jesús canéé chí 'cuūvi yā

(Mt. 27.15-31; Mr. 15.6-20; Lc. 23.13-25)

³⁸Tuu'mí ngaⁿ'ā Pilato: ¿Chee chí vaadī cuaacu? Taachí caⁿ'a Pilato chūū ní can'dáá ntuúⁿ sa nanááⁿ 'iiⁿ'yāⁿ Israel s'eeⁿ ní caⁿ'a sa 'iiⁿ'yāⁿ Israel s'eeⁿ: 'Úú ní nguéé ndaācá mar 'áámá nuuⁿndi yeⁿ'é yā. ³⁹Naati cáávā costumbre yeⁿ'e ndís'tií ní 'úú canecúⁿmíⁿ chí ín'deēchí 'áámá saⁿ'ā chi preso sa 'viicu yeⁿ'e pascua. ¿Áá neⁿ'é nī chi in'deēchí Rey yeⁿ'ē 'iiⁿ'yāⁿ Israel s'eeⁿ?

⁴⁰Tuu'mí ní 'cai ntúūⁿ nducyaaca yā, ní ngaⁿ'a yā: Nguéé 'iiⁿ'yāⁿ 'cūū ti Barrabás. Níicú saⁿ'ā Barrabás miⁿ ní neenē duucu sa.

19 Tuu'mí ní staāa Pilato Jesús miⁿ ni ch'eⁿ'e sa 'iiⁿ'yāⁿ.

²Ní soldados ní din'dáa sa 'áámá corona yeⁿ'ē yááⁿ ní chi n'duu sá na tííⁿ yā. Ní ch'nuúⁿ sa 'áámá catecai morado 'iiⁿ'yāⁿ. ³Ní caⁿ'a sa: Néené 'nááⁿ cānee di íⁿ'yeeⁿdi, dii, Rey yeⁿ'e 'iiⁿ'yāⁿ yeⁿ'e Israel. Ní n'geⁿ'é sa 'iiⁿ'yāⁿ.

⁴Tuu'mí can'dáa ntuūⁿ Pilato ch'va'āi. Ní caⁿ'ā sa chíi sa 'iiⁿ'yāⁿ s'eeⁿ: Cuin'diichí nī, tun'daá 'iiⁿ'yāⁿ ch'va'āi niicu tuumicadiinúúⁿ nī chi nguéé n'diichí mar 'áámá nuuⁿndi yeⁿ'é yā.

⁵Ní can'daā Jesús ch'va'āi. Can'déé yā corona yeⁿ'e yááⁿ ndúúcu catecai morado yā. Ní ngaⁿ'a Pilato miⁿ: Cun'díichí nī saⁿ'ā.

⁶Taachí n'diichí yā 'iiⁿ'yāⁿ tuu'mí ní chíiduú n'geeté ndúúcu policías n'gai yiicu sa: Cu'nééⁿnga'á nī 'iiⁿ'yāⁿ. Cu'nééⁿnga'á nī 'iiⁿ'yāⁿ. Tuu'mí ngaⁿ'ā Pilato ngii yā 'iiⁿ'yāⁿ s'eeⁿ: Cuta'a ndis'tií 'iiⁿ'yāⁿ, ní cu'nééⁿnga'á nī 'iiⁿ'yāⁿ, ti 'úú ní nguéé indaacá mar 'áámá nuuⁿndi yeⁿ'e yā.

⁷Nan'gueecútaⁿ'ā 'iiⁿ'yāⁿ Israel s'eeⁿ: Nús'uū ní cánéé ley yeⁿ'é 'nū. Ní tan'dúúca chí ngaⁿ'a ley miⁿ canee chí 'cuūvi caati caⁿ'a yā chí maáⁿ yā Daiya Dendyuūs 'iiⁿ'yāⁿ.

⁸Taachí ch'iindiveeⁿ Pilato chuū dii'yā ca sá chíi. ⁹Chindáa ntuūⁿ sa cuarto yeⁿ'ē juzgado ní caⁿ'á yā chíi yā Jesús: ¿Tíí 'iiⁿ'yāⁿ dii? Naati Jesús ní nguéé caⁿ'a yā.

¹⁰Tuu'mí ní caⁿ'a Pilato Jesús: Dii, ¿áá nguēe ngaⁿ'ā di yeⁿ'é? ¿Áá nguéé deenu di chí 'úú ní cúúvi caaⁿ'maⁿ ntiⁿ'nyúⁿ chí cu'nééⁿnga'á nī dii, ní cuuvi n'teēchí ntuūⁿ dii?

¹¹Nan'gueecútaⁿ'ā Jesús miⁿ: Nguéé du'ū vee cuuvi diiⁿ di ndúúcu 'úú ndúúti chí nguéé du'ū vee ndii ca'a yeⁿ'ē di yeⁿ'ē va'ai cheeti nguuvi. 'Iiⁿ'yāⁿ chí tee yā 'úú chí preso 'úú nanáá n'dií, 'iiⁿ'yāⁿ miⁿ dich'eete ca nuuⁿndi yeⁿ'e yā.

¹²Ndíí tuu'mí ní neⁿ'e Pilato n'teēchi sa 'iiⁿ'yāⁿ. Naati 'iiⁿ'yāⁿ Israel s'eeⁿ n'gai yiicú yā ní ngaⁿ'a yā: Ndúúti chí saⁿ'á 'cūū n'teēchi di, nguéé dii amigo yeⁿ'ē César. Nducyáácá 'iiⁿ'yāⁿ chí ngaⁿ'a yeⁿ'é yā chí maáⁿ yā rey ngaⁿ'a yā contra César.

¹³Tuu'mí Pilato, taachi ch'iindiveeⁿ sa chuū, candéé sa Jesús ch'va'āi. Ní ch'iindi sa ná silla yeⁿ'e juzgado chí nguuvi Enlosado, ní nduudu

hebreo neⁿe caaⁿmaⁿ Gabata. ¹⁴Ní nguuvi chi diíⁿ yā ntiíⁿnyuⁿ yeⁿē 'viicu yeⁿē pascua, taⁿdúúca ndiichúví na nguuvi. Tuuⁿmí ngaⁿ'a Pilato 'iiⁿyāⁿ Israel s'eeⁿ: Cuinⁿdiichi ní Rey yeⁿé ní.

¹⁵Naati 'iiⁿyāⁿ s'eeⁿ 'caí yā diitú yā: Divíí ní 'iiⁿyāⁿ, divíí ní 'iiⁿyāⁿ, cuⁿnééⁿngaⁿ'á ní 'iiⁿyāⁿ. Tuuⁿmí ngaⁿ'a Pilato: ¿Áá rey yeⁿé ní chi cuⁿnééⁿngaⁿ'á ní? Tuuⁿmí nanⁿguεεcútaⁿ'ā saⁿ'ā chiiduú n'gεεté: Nguéé rey yeⁿē 'nū caati 'āā César nuúⁿ.

¹⁶Tuuⁿmí ní Pilato caⁿ'á yā Jesús miíⁿ 'iiⁿyāⁿ s'eeⁿ ní 'iicu cuⁿnééⁿngaⁿ'á yā. Ní 'iiⁿyāⁿ s'eeⁿ staⁿ'á yā Jesús miíⁿ ní candée yā 'iiⁿyāⁿ.

Cuⁿnééⁿnga'a yā Jesús ní ch'ii yā

(Mt. 27.32-44; Mr. 15.21-32; Lc. 23.26-43)

¹⁷Ní Jesús candée yā cruz yeⁿē yā. Ní canⁿdáa yā na lugar chi 'áámá lado yeⁿē yāáⁿ Jerusalén chi nguuvi Calavera chi lugar 'Iini Nga'ai Tíííⁿ, 'iicu nduudu hebreo neⁿe caaⁿmaⁿ Gólgota. ¹⁸Naachi cuⁿnééⁿngaⁿ'á yā Jesús ndúúcu taa na 'uuví yā. 'Áámá yā 'áámá 'áámá lado 'iicu Jesús miíⁿ ní naavtáⁿ'ā canuúⁿ yā. ¹⁹Ní 'neeⁿ Pilato miíⁿ 'áámá letra chi nⁿduu sá nanááⁿ cruz ní canéé nguūⁿ miíⁿ, Jesús yeⁿē yaáⁿ Nazaret, Rey yeⁿē 'iiⁿyāⁿ yeⁿē ndaata yeⁿē Israel. ²⁰Ní neené 'yaaⁿ 'iiⁿyāⁿ Israel s'eeⁿ ch'eeⁿ yā letra 'cūú ti nááchí cuⁿnééⁿngaⁿ'á yā Jesús miíⁿ niiⁿnuúⁿ na yááⁿ Jerusalén miíⁿ. Canéé nguūⁿ miíⁿ na nduudu hebreo ndúúcu nduudu griego ndúúcu nduudu latín. ²¹Ní ngaⁿ'a saⁿ'ā chiiduú n'gεεté yeⁿē 'iiⁿyāⁿ Israel s'eeⁿ ngii sa Pilato: Nguéé 'neeⁿ di Rey yeⁿē 'iiⁿyāⁿ yeⁿē

ndaata yeⁿē Israel naati maáⁿ yā ngaⁿ'a yā: 'Úú Rey yeⁿē 'iiⁿyāⁿ yeⁿē Israel 'úú.

²²Nanⁿguεεcútaⁿ'ā Pilato saⁿ'ā miíⁿ: Chiiⁿ 'neeⁿ 'āā 'neéⁿ.

²³Taachi soldados chiⁿneeⁿngaⁿ'ā sa Jesús, staⁿ'á sa catecai yā ní diíⁿ sa repartir catecai yā. Niicu 'áámá 'áámá tááⁿ catecai yā 'aama soldado. Abrigo catecai yā miíⁿ nguéé nⁿdeenyú ndii 'nííⁿnuⁿ ndíí cuaaⁿ ndiíya. ²⁴Ní caⁿ'a sa nguaaⁿ maáⁿ sa: Nguéé 'canuu cuūⁿ yú naati tunⁿdaí yú suerte yeⁿē yú nduūcū. Duⁿ'ú yeⁿē cuuvi. Ní 'iicu cuuví cuaacu naachi canee nguūⁿ chi ngaⁿ'ā:

Ncaⁿ'á yā catecai nguaaⁿ maáⁿ yā, ní na catecaí ch'íí yā suerte.

Ní soldados ní diíⁿ sa chuū.

²⁵Ní chεεcuú Jesús miíⁿ canée yā niiⁿnuúⁿ ná cruz yeⁿē Jesús ndúúcu víí chεεcuú yā chi nguuvi María chi nⁿdaataá yeⁿē Cleofas, ndúúcu María Magdalena. ²⁶Taachi nⁿdiichi Jesús chεεcú yā ndúúcu discípulos chi ya'ái 'iinú yā chi canéé niiⁿnuúⁿ tuuⁿmí ní Jesús ngaⁿ'á yā ngii yā chεεcú yā: Nⁿdií nⁿdaataá, cunⁿdííchi ní daiya ní. ²⁷Tuuⁿmí ní ngaⁿ'a yā ngii yā discípulo: Cunⁿdiichi di, 'ííngaā chεεcu di. Ndíí tuuⁿmí ní discípulo miíⁿ ní dicheεcú yā 'iiⁿyāⁿ.

Jesús ch'ii yā

(Mt. 27.45-56; Mr. 15.33-41; Lc. 23.44-49)

²⁸Choⁿ'ó tanducueⁿē chuū ní déénú Jesús chi tanducueⁿē denduⁿ'ū ní 'āā chii cuaacu. Niicu naachi canéé nguūⁿ níícu cuuvi cuaacu. Ngaⁿ'a Jesús: Yaacá.

²⁹Mííⁿ canéé 'áámá vaso ndiitu vinagre. Tuuⁿmí ní 'áámá soldado

dicuutu yā 'áámá esponja ndúúcu
vinagre. Ní chí'neeⁿ yā na áámá yáⁿá
hisopo. Ní s'neeⁿ yā na cheendi Jesús.
³⁰Taachí Jesús chí'í yā vinagre, caⁿa
yā: Ch'íínú tanducuéⁿē dendu'ū. Ní
nadicua'á yā tiiⁿ yā chí n'nééⁿ maáⁿ yā
espíritu yēⁿe yā.

**Soldado n'da'ai yā 'iini 'tiicua
Jesús ndúúcu 'aama lanza**

³¹Tuu'mi ní caati nguuví viernes chí
díⁿ yā ntiiⁿnyuⁿ yeⁿē 'viicu pascua
miiⁿ, ní 'iiⁿ'yāⁿ Israel s'eeⁿ dí'cuíútu sa
Pilato chí 'cúuⁿmāⁿ sa 'ííní ca'a saⁿā
s'eeⁿ ní candéε sa cuerpo yeⁿé yā.
Caati nguéé neⁿé sa chí canée cuerpo
yeⁿé yā na cruz nguuví sábadu miiⁿ
caatí sábadu ní nguuví ch'εete yeⁿe
'viicu pascua. ³²Ní ndaā soldados
ní ndaa sa nanááⁿ saⁿā chí vmnááⁿ
vmnaaⁿ. 'Tíicā 'cuúⁿ sa ca'a sa. 'Tíicā
'cuúⁿ ntúúⁿ sa ca'ā taama sa. ³³Naati
taachí ndaa sa nanááⁿ Jesús miiⁿ, ní
caati n'diichí yā chí 'āā n'dii Jesús
nguéé 'cuúⁿ sa ca'a yā.

³⁴Naati 'áámá soldado n'da'ai sa
tiicua Jesús ndúúcu 'aama lanza ní
can'daā yuuúⁿ ndúúcu nuúⁿniⁿ. ³⁵Iiⁿ'yāⁿ
chí n'diichí yā ngaⁿá yā nduudu
cuaacu. Níicú chíiⁿ chí ngaⁿá yā. Miiⁿ
ní cuaacu chííⁿ. 'Iicu déénu yā chí
ngaⁿá yā nduudu cuaacu níicú ndís'tii
ntúúⁿ ní cu'teenú ní. ³⁶Níicú chuū
cho'ōo ní cúúví cuaacu chí canée nguūⁿ
na libro yeⁿe Ndyuūs: Mar 'áámá 'iini
yeⁿé yā nguéé 'cúúⁿ sa. ³⁷Ní taama
naachi canée nguūⁿ ní ngaⁿā: N'diichí
yā 'iiⁿ'yāⁿ chí cho'ōo nééⁿ tiicua yā.

S'nuúⁿ yā Jesús cheeti yáinyāⁿ

(Mt. 27.57-61; Mr. 15.42-47; Lc. 23.50-56)

³⁸Cho'ōo chuū. José yeⁿē yāáⁿ
Arimatea chí 'áámá discípulo yeⁿe

Jesús n'de'ei n'de'ei nūⁿ ti 'va'a
sa 'iiⁿ'yāⁿ Israel s'eeⁿ, dí'cuíútu sa
Pilato miiⁿ chí cuuví candéε sa
cuerpo yeⁿē Jesús. Ní 'cuúⁿ Pilato
saⁿā miiⁿ. Tuu'mi ní ndaā sa ní
nativí sa cuerpo yeⁿē Jesús miiⁿ
ní candéε sa cuerpo miiⁿ. ³⁹Ndaa
ntúúⁿ Nicodemo, saⁿā chí vmnaaⁿ
indaá sá nanááⁿ Jesús miiⁿ 'aama
n'gaaⁿ, ní ndéε sa 'áámá perfume
chí ndístaⁿā perfume yeⁿē mirra
ndúúcu áloes. Ngíí tanduu 'áámá
ciento libras. ⁴⁰Sta'á yā cuerpo
yeⁿe Jesús ní ch'εécú yā ná tiinūⁿ
ndúúcu perfume miiⁿ, tan'dúúcā
costumbre yeⁿē 'iiⁿ'yāⁿ Israel s'eeⁿ
taachí n'giichí yā tinaⁿā. ⁴¹Ní lugar
miiⁿ naachi chí'neeⁿnga'a yā, miiⁿ
canée 'áámá chéēⁿ naandā. 'Íicú
cheeti chéēⁿ miiⁿ canée 'áámá
yáinyāⁿ ngai. Mar 'áámá 'iiⁿ'yāⁿ
nguéé in'nuúⁿ yā cheeti. ⁴²Cáávā chí
nguuví viernes chí chí'indiyaáⁿ yā
yeⁿe 'viicú yeⁿe pascua yeⁿē 'iiⁿ'yāⁿ
Israel s'eeⁿ, s'nuúⁿ yā cuerpo Jesús
miiⁿ cheeti yáinyāⁿ miiⁿ chí canee
niiⁿnuúⁿ.

Jesús nduuchi yā yeⁿe nguuaⁿ tináⁿā

(Mt. 28.1-10; Mr. 16.1-8; Lc. 24.1-12)

20 'Áámá domingo chí nguuví
vmnááⁿ vmnaaⁿ yeⁿe ndeetē
miiⁿ tá María Magdalena nééⁿ 'da'a
ca ndaā tá na yáinyāⁿ. Ní n'diichi
tá tuū miiⁿ chí ndiiví na yáinyāⁿ.
²Tuu'mi ní n'daataá ngéenu tá nanááⁿ
Simón Pedro ndúúcu táámá discípulo,
'iiⁿ'yāⁿ chí dinéⁿe taavi yā Jesús.
Tuu'mí ngaⁿā tá ngii tá saⁿā s'eeⁿ: 'Āā
ndiiví yā Jesús miiⁿ ná cheeti yáinyāⁿ,
ní nguéé deenu yú tíí n'nééⁿ yā 'iiⁿ'yāⁿ.

³Ní can'dāá Pedro miiⁿ ndúúcu
taama discípulo ní ndaā yā na

yáinyāⁿ. ⁴Ngéénū, ngéénū nduu 'uuví yā. Táámá discípulo diitu cá chéenu sa nguée ti Pedro, ní ndaá vmnaaⁿ sa na yáinyāⁿ. ⁵Can'díi sa ní n'diichi sa. Ní n'diichi sá chi 'aa dámaaⁿ tiinūⁿ miiⁿ snúūⁿ naati nguée chi ndaa sa cheeti yáinyāⁿ. ⁶Simón miiⁿ ní sndaā sa cheeti yáinyāⁿ. Ní n'diichi sa tiinūⁿ miiⁿ naachi snúūⁿ. ⁷Niicu pañuelo ch'etete ca tiiⁿ nguée dáámá tiinūⁿ lino. Ndéétií nduu cánée táámá cuaaⁿ. ⁸Tuu'mi ní sndaā ntúūⁿ táámá discípulo chi ndaā vmnááⁿ vmnaaⁿ ná yáinyāⁿ ní n'diichí yā ní chi'téenu yā. ⁹Tii nguée déenu yā chi canée nguūⁿ chí Jesús miiⁿ cuuví nduuchí yā yeⁿē nguaaⁿ tináⁿā. ¹⁰Ní nguēcundií discípulos na vaacu yā.

Jesús nndaaca yā María Magdalena

(Mr. 16.9-11)

¹¹Naati tá María canee ta chúva'āi yáinyāⁿ. Neené ngeecu tá. Ní di'cua'ái naaⁿ tá n'diichi tá cheeti yáinyāⁿ. ¹²Ní n'diichí tá na 'uuvi ángeles ndúúcū catecaí yā cuéé. 'Áámá ángel miiⁿ vεε yā cuaaⁿ tiíⁿ naachi canúúⁿ cuerpo Jesús miiⁿ ní táámá yā vεε yā cuaaⁿ ndiyya. ¹³Ní caⁿá yā: Díi n'daataá, ¿de'ē cúuví chí ngeecu di? Tuu'mí ngaⁿa tá: Caati candée yā Señor yeⁿé, ní nguée deenu tíi s'neeⁿ yā 'iiⁿyāⁿ.

¹⁴Taachi caⁿa tá chuū, ndaacadaami tá. Ní n'diichi ta Jesús chi canée yā miiⁿ naati nguée deenu tá chi Jesús miiⁿ. ¹⁵Tuu'mí ngaⁿa Jesús ní ngii yā táⁿā: Díi n'daataá, ¿de'ē cúuví chí ngeecu di? ¿Du'ū in'nuuⁿ di? 'Iicu n'daataá miiⁿ ní nacadínuuⁿ tá chi 'iiⁿyāⁿ 'cúū ní

'iiⁿyāⁿ chi diiⁿ cuidado yeⁿé chééⁿ yeⁿe naāndā miiⁿ. Ní caⁿa tá: Señor, ndúúti chi dii candée di 'iiⁿyāⁿ cuuvi di 'úú tíi chí'neeⁿ dí 'iiⁿyāⁿ ní 'úú ní candée 'iiⁿyāⁿ.

¹⁶Tuu'mi ngaⁿa Jesús miiⁿ: María. Nguēcundií ntúūⁿ ta ní ngaⁿā ta: Raboni. (Nduudu 'cūū neⁿe caaⁿmaⁿ, Maestro.)

¹⁷Tuu'mí ngaⁿa Jesús: Nguée tu'v'i di 'úú caati 'āā cuéé caⁿá nanááⁿ Chiidá. Naati dii, cuéⁿe di n'diichi di hermanos yeⁿe yú ní caaⁿmaⁿ di cuuvi di 'iiⁿyāⁿ: Caⁿá nanááⁿ Chiidá ní nanááⁿ Chiida yú, nanááⁿ Ndyuūs yeⁿé ní nanááⁿ Ndyuūs yeⁿé yú.

¹⁸Cheⁿe tá María Magdalena nanááⁿ discípulos ní caⁿa tá chi n'diichi tá Jesús miiⁿ. Caⁿa tá chii tá discípulos nduudu chi Jesús miiⁿ caⁿa yā chii yā táⁿā.

Jesús nndaacá yā discípulos

(Mt. 28.16-20; Mr. 16.14-18; Lc. 24.36-49)

¹⁹Chii chí nguiinū yeⁿe maāⁿ nguuvi domingo míⁿ, nguuvi vmnááⁿ vmnaaⁿ yeⁿé ndeete miiⁿ ní naachi snúūⁿ discípulos ní nduudí cheendi va'āi miiⁿ caati 'va'á yā 'iiⁿyāⁿ Israel s'eeⁿ. Ndaa Jesús miiⁿ. Ní canée yā naavtaⁿā 'iiⁿyāⁿ s'eeⁿ. Ní caⁿa yā: Cuuvi 'diíⁿ ndúúcū ndís'tií.

²⁰Taachí caⁿa yā chuū, ní ch'iⁿi yā ta'á yā ndúúcū tiicuáá yā. Ní discípulos yeenú taavi yā chí n'diichi yā Jesús. ²¹Tuu'mí ngaⁿā ntúūⁿ Jesús ngii yā 'iiⁿyāⁿ: Cuuvi 'diíⁿ ndúúcū ndís'tií. Tan'dúúcā chi dich'ó Chiidá 'úú, 'tiicá ntúūⁿ 'úú dicho'ó ndís'tií.

²²Taachí caⁿa yā chuū tiivineeⁿ yā 'iiⁿyāⁿ ní caⁿa yā: Cuta'á ni Espíritu

N'dai yeⁿé Ndyuūs. ²³Iiⁿyāⁿ chi ndís'tiī nadich'εεcú nī nuūⁿndī yeⁿé yā, ní 'āā nach'εεcu yeⁿé yā. Iiⁿyāⁿ chíí nguéé nadich'εεcu nī nuuⁿndi yeⁿé yā, 'āā nguéé nach'εεcu yeⁿé yā.

Nguéé chi'teenú Tomás

²⁴Naati Tomás 'áámá discípulo chi nguuvi Dídimó chi Gemelo nguéé cúnée sá ndúúcu saⁿā s'eeⁿ taachi Jesús miiⁿ ndaá yā. ²⁵Chíí tan'duuvu discípulos miiⁿ ngaⁿa yā ngii yā saⁿā: N'diichí 'nū Señor miiⁿ. Saⁿā miiⁿ ní ngaⁿa sa ngii sá 'iiⁿyāⁿ s'eeⁿ: 'Úú ní nguéé cu'teenú ndúúti chi nguéé n'diichí, ní nguéé tiinguú nduutitá'á naachí ch'εεchi clavos, ní tiinguú ta'á ná tiicuáá yā.

²⁶Ch'iinu niini nguuvi vεete ntúúⁿ discípulos snée yā chεeti va'āi. Mííⁿ canéé Tomás ndúúcu yā. Ní nduudí cheendi va'āi miiⁿ. Ndaa ntúúⁿ Jesús miiⁿ. Ní canúⁿ yā naavtaⁿā ní caⁿa yā: Cuuvi 'diiíⁿ ndúúcu ndís'tiī.

²⁷Tuu'mí ní Jesús ngaⁿa yā ngii yā Tomás miiⁿ: Tiingúú nduutitá'a di 'muuⁿ ní n'diichi di ta'á. Ní tiingúú ta'a di ndii 'muuⁿ ní tiingúú ta'á di tiicuáá. Ní nguéé chí nguéé cu'téenu dí, canéé chi cu'téenu dí.

²⁸Tuu'mi ní Tomás miiⁿ ní caⁿā sa: N'dii Señor yeⁿé. N'dii Dendyuūs yeⁿé.

²⁹Tuu'mi ní ngaⁿa Jesús miiⁿ: Tomás, díí ní chi'téenu di tiī n'diichi di 'úú. N'daí 'iiⁿyāⁿ chi nguéé n'diichi yā 'úú ní chi'téenu yā.

¿De'e cúúví chi véé libro 'cūú?

³⁰Ní nééné n'deēe ca señales chi chiⁿ'i Jesús nanááⁿ discípulos yeⁿé

yā chi nguéé canéé nguūⁿ na libro 'cūú. ³¹Naati chuū ní canéé nguūⁿ nífcú cuuvi cu'téenu di chi Jesús miiⁿ chi Cristo chi Daiya Dendyuūs. Ní chi cu'téenu di 'iiⁿyāⁿ ní cunee ndúúcu vida cueⁿe daāⁿmaⁿ cáávā chi duuchi yā.

Jesús ndaacá yā ndeēchē discípulos yeⁿé yā

21 Cuayiivi chi cho'oo chuū chiināāⁿ ntúúⁿ maaⁿ Jesús miiⁿ yeⁿé discípulos yeⁿé yā niiⁿnuúⁿ ná yaana nuuⁿniⁿyáⁿā chi nguuvi Tiberias ní 'túúca chiinaāⁿ yā. ²Ndidaama yā Simón Pedro ndúúcu Tomás miiⁿ chi nguuvi Dídimó chi Gemelo, ndúúcu Natanael saⁿā yeⁿe yāāⁿ Caná yeⁿé yáⁿā Galilea, ndúúcu na 'úúví saⁿā daiya Zebedeo ndúúcu táá na 'uuvi discípulos yeⁿe Jesús. ³Tuu'mí ngaⁿa Simón Pedro: Caⁿā tungaáⁿ 'yaācā. Tuu'mí ngaⁿā 'iiⁿyāⁿ s'eeⁿ ngii yā saⁿā: Caⁿā ntúúⁿ nús'uu ndúúcu di. Ní cueⁿe yā ní chindāa yā na 'áámá barco. Nguiīnū miiⁿ nguéé sta'á yā mar 'áámá ti. ⁴Chi dεeve táámá nguuvi, Jesús ní canéé yā cuaaⁿ 'diitú yā yaana nuuⁿniⁿyáⁿā naati discípulos nguéé túúmicadínuuⁿ yā chi Jesús miiⁿ. ⁵Ní caⁿa yā chii yā saⁿā s'eeⁿ: Ndís'tiī, saⁿā n'gaiyāāⁿ 'áá véé chi tungaaⁿ di chí che'e yú? Nan'guεεcutáⁿa yā yeⁿe yā: Nguéé. ⁶Tuu'mi ní ngaⁿa yā ngii yā saⁿā s'eeⁿ: Caⁿnuúⁿ ní yaana lado ta cuaacu yeⁿé barco miiⁿ ní ndaacá nī. Tuu'mi ní chiⁿnuúⁿ yā yaana tií ní 'āā ntee ngii dííⁿ yā tun'dāa yā chi neené tááⁿ n'gii 'yaācā. ⁷Tuu'mi ní discípulo chi neené diya'āi 'ínu

Jesús ngaⁿā sa ngii sa Pedro: Señor miiⁿ 'iiⁿyāⁿ s'tíi. Ní Simón Pedro, taachi ch'iindiveeⁿ sa chi Jesús miiⁿ nuⁿnuúⁿ sá catecai sa ti dámaāⁿ ngáaⁿ sa, ní chindáa sa cheeti yaana nuūⁿnīⁿyáⁿā. ⁸Ni tanduu 'uuvi discípulos ndaá yā ndúúcū barco ti nguéé dáanā yaⁿāi chi chinée yā yeⁿe yáⁿāa miiⁿ ti tandúú na cuūúⁿ ngeecu ndiichi metros. Ngíi n'daā yā yaāna yeⁿe 'yaāca. ⁹Taachi n'cheéⁿ yā yáⁿāa miiⁿ n'diichi yā n'giichi yáⁿā. Ní 'áamá 'yaācā nduú tī nanááⁿ nduucyáⁿā. Ní n'diichi yā pan. ¹⁰Tuu'mí ngaⁿa Jesús ngii yā saⁿā: Teé nī ta n'duuvu 'yaācā chí caama sta'á nī maaⁿ.

¹¹Cucheē Simón Pedro ní nandée sa yaāna na yáⁿāa miiⁿ ndiituú 'yaācā n'geeté, ngii 'áamá ciento 'uuvu ngeecu n'diichi 'íínú, ní yaāna miiⁿ nguéé chi teeⁿ n'dáá rá chi n'dee taaví 'yaācā. ¹²Tuu'mi Jesús ngaⁿa yā ngii yā saⁿā s'eeⁿ: Cuchií nī ca'diinú nī. Mar 'áamá discípulo miiⁿ nguéé tiinguuneéⁿ yā 'iiⁿyāⁿ: ¿Du'u rá díí? Ti 'āa deenú yā chi Jesús miiⁿ. ¹³Ndaā Jesús miiⁿ ní sta'á yā pan ní ca'a yā 'iiⁿyāⁿ. 'Tííca nī ntúúⁿ dííⁿ yā ndúúcū 'yaāca.

¹⁴Āa chíí 'iinu cuuvi chi n'geenaāⁿ Jesús yeⁿē discípulos yeⁿé yā taachi 'āa nnduuchi yā nguuaⁿ tináⁿā.

Ca'a di chi ch'é 'iiti cuūchī yeⁿé

¹⁵Taachi ch'iinu ca'diinú yā, Jesús ngaⁿa yā ngii yā Simón Pedro: Simón, díí daiya Jonás, ¿'áá neⁿe ca di 'úú, nguéé ti chuū? Tuu'mí ngaⁿa sa ngii sa Pedro: 'Tííca, Señor, n'dií ní déenú nī chi neⁿé n'dií. Ngaⁿa yā ngii yā saⁿā: Ca'á di 'iiti cuūchi 'lííⁿ yeⁿé chí che'é tī.

¹⁶Jesús ní ntiinguuneeⁿ ntuúⁿ yā yeⁿe saⁿā naachi ndii 'uuvi cuuvi: Simón, díí daiya Jonás, ¿'áá neⁿe di 'úú? Nan'guēecútaⁿa sa yeⁿe yā: 'Tííca, Señor, n'dií ní déenú nī chi neⁿé n'dií. Tuu'mí ngaⁿa yā ngii yā saⁿā: Ca'á dí 'iiti cuūchī yeⁿé chí che'é tī.

¹⁷Tuu'mí ngaⁿa yā ngii yā saⁿā naachi ndii chííⁿ ndii 'íínú cuuvi: Simón, dii saⁿā daiya Jonás, ¿'áá neⁿe di 'úú? Canée ndaachi yiinú Pedro chí 'āa naachi ndii chííⁿ ndii 'íínú cuuvi yaa'ví yā saⁿā: ¿'Áá neⁿe di 'úú? Tuu'mí ngaⁿa sa ngii sa 'iiⁿyāⁿ: Señor, n'dií déenú nī tanducuéⁿē dendu'ū. Maaⁿ ní deenu nī chi neⁿé n'dií. Tuu'mí ngaⁿa Jesús ngii yā saⁿā: Ca'á dí 'iiti cuūchi yeⁿé, chí che'é tī. ¹⁸Cuaacu níⁿnyúⁿ cuācū niiⁿnyuⁿ ngaⁿá ngii dii: Taachi saⁿā 'lííⁿ dii in'nuuⁿ canúúⁿ dí catecai di ní cheⁿe di naachi neⁿe di. Naati taachi 'āa cuuvi ndiicú di ndoo tá'a di ní táámá 'iiⁿyāⁿ in'nuúⁿ yā catecai di ní candée yā dii naachi nguéé neⁿē di.

¹⁹Ní chuū Jesús caⁿa yā ní ngá'a yā chí cadiinuuⁿ sa de'é vaadi n'gii diiⁿ honrar Dendyuūs miiⁿ. Ch'iinu caⁿa yā chuū, tuu'mí ngaⁿa yā ngii yā Simón Pedro: Can'dáa di 'úú.

Discípulo chi neⁿe taavi Jesús

²⁰Ngueecundí Pedro miiⁿ n'diichi sá discípulo chí dineⁿé Jesús, discípulo chí cueⁿe sa ndúúcū Jesús. Sáⁿā chí candiitínee sa 'iiⁿyāⁿ taachi 'āa caama chí che'e nguiinú yā. Ní 'āa caⁿa yā chíi yā saⁿā: Señor, ¿du'u chí canée chí diiⁿ entregar n'dií? ²¹Taachi Pedro miiⁿ

n'diichi sa discípulo miiⁿ tuu'mí
ngaⁿa yā ngii yā Jesús: Señor, ¿de'e
idiiⁿ sáⁿā tíí?

²²Tuu'mí ngaⁿā Jesús ngii yā saⁿā:
Ndúúti chi 'úú chi neⁿé chi cunee
sá ndii taachi nindaá, ¿de'é ineeⁿ di
chííⁿ? Díí can'dáa di 'úú.

²³Caāvā nduudu 'cūū
tuumicadiinuuⁿ vi'ī s'eeⁿ chi
discípulo miiⁿ nguéé canéé chi
'cuūvī sa. Naati Jesús ní nguéé caⁿá
yā chi nguéé 'cuūvī sa, naati Jesús
caⁿa yā: Ndúúti chi 'úú chi neⁿé chi

cunee sá ndii taachi nindaá, ¿de'é
ineeⁿ di chííⁿ?

²⁴Saⁿá 'cūū discípulo chi ngaⁿā
cuaacu sa yeⁿē chúū. Ní idingúuⁿ
sa chuū. Ní deenu yú chi chiiⁿ chi
ngaⁿa sa ní nduudu cuaacu ní
cuaacu níⁿnyúⁿ chi nduudu cuaacu.

²⁵Neené n'deēe n'dáí cosa chi dííⁿ
Jesús miiⁿ. Ndúúti chi canéé nguūⁿ
'áámá 'áámá cosa 'úú nadacadiinúúⁿ
chi maaⁿ rá iⁿyeēⁿdí 'cūū nguéé
tunééⁿ libros chi canéé nguūⁿ yeⁿe
chuū. 'Tíicā chií.

CHUŪ CHI DIIⁿ APÓSTOLES

Dendyuūs caⁿa yā chi
tée yā Espíritu N'dai

1 Dii Teófilo, taachí vmnááⁿ vmnaaⁿ dinguúⁿ yeⁿe di, caⁿá yeⁿe tanducuéⁿē chi 'túúcā diiⁿ Jesús ní ca'cueéⁿ yā, ²ndii nguuvi chí cunaⁿā Jesús va'ai cheeti nguuvi. Vmnááⁿ vmnaaⁿ chí cunaⁿā Jesús miiⁿ ch'íínú ca'a yā orden yeⁿé yā apóstoles caava Espíritu N'dai yeⁿe Ndyuūs. Jesús ndéevé yā ní dichó'o yā apóstoles. ³Jesús ch'eenú yā chií ní ch'ii yā. Cuayiivi taachi 'āā ch'ii yā nééné n'dee nááⁿ chííⁿ ch'iⁿi maáⁿ yā yeⁿé yā tan'dúúcā chí 'āā cuēē 'cuūvi yā vmnááⁿ apóstoles caati apóstoles cuuvi déenu yā chí cánduuchi ntuuⁿ yā. Canée yā ndúúcū apóstoles yeⁿé yā 'uuvi ngæecu nguuvi ní caⁿa yā yeⁿē chí Dendyuūs ngaⁿa ntiiⁿnyúⁿ yā. ⁴Taachí ndii dáámá yā tuu'mi ní Jesús caⁿa ntiiⁿnyúⁿ yā apóstoles. Nguéé náⁿa nī yeⁿe yāāⁿ Jerusalén naati cunee ngíínú nī yeⁿē chí caⁿa Chiida yú chí tée yā. Chuū chí 'āā ch'iindiveéⁿ nī yeⁿē 'úú. ⁵Juan cuaacu nííⁿnyúⁿ chí ndúúcū nuūⁿnīⁿ chæedinuūⁿnīⁿ sa naati ndís'tií ní cuæedinuūⁿnīⁿ nī ndúúcū Espíritu N'dai yeⁿe Ndyuūs.

Jesús cuchée yā

⁶Tuu'mi ní saⁿa chí ndúúvídáámá nitiinguunéeⁿ yā 'iiⁿ'yāⁿ ní ngaⁿá yā: Señor Jesús, ¿'áá nadicuéeⁿ ntuuⁿ nī taama saⁿā Israel chí caaⁿmaⁿ ntiiⁿnyuⁿ sa yeⁿe 'iiⁿ'yāⁿ Israel maaⁿ nguuví 'cūū? ⁷Ní ngaⁿa Jesús ngii yā 'iiⁿ'yāⁿ: Nguéé ituneeⁿ ndís'tií chí cadíínuuⁿ nī de'e tiempo o de'e nguuvi yeⁿē chuū chí Chiida yú s'neeⁿ yā na poder yeⁿe maáⁿ yā. ⁸Naati cuta'á nī poder chí diitú nī taachi 'āā ndaa Espíritu N'dai yeⁿe Ndyuūs vmnaaⁿ yeⁿé nī. Ní ndís'tií ní caaⁿmáⁿ nī nduudu cuaacu yeⁿé na yāāⁿ Jerusalén ndii nuuⁿmaⁿ yáⁿāa Judea, ndii yáⁿāa Samaria, ndii núúⁿmáⁿ iⁿ'yeēⁿdī. ⁹Ní ch'íínú caⁿa yā chuū taachi n'diichi saⁿā s'eeⁿ Jesús cuchée yā ní che'enaāⁿ sa 'iiⁿ'yāⁿ ná meēⁿ. Ní 'āā ntéé snaaⁿ saⁿa s'eeⁿ 'iiⁿ'yāⁿ. ¹⁰Ní saⁿā s'eeⁿ ní n'gíínú sá nanguuvi. Taachí 'āā cuchée Jesús, n'diichi sa na 'uuvi saⁿā chí ángel chineē ndúúcu sa ndúúcū catecai cuēē sa. ¹¹'Úuvi 'iiⁿ'yāⁿ miiⁿ ní ngaⁿa yā ngii yā saⁿā s'eeⁿ: Ndís'tií saⁿa yeⁿe yáⁿāa Galilea, ¿de'e n'gíínú nī nanguuvi? Maāⁿ Jesús chí cunaⁿa yā yeⁿe ndís'tií nanguuvi

'tíicā ndaa túuⁿ yā tan'dúúicā chí n'diichí ní 'iiⁿyāⁿ cuinaⁿá yā nanguuvi.

Ndeevē yā saⁿā lado yeⁿe Judas

¹²Can'dáa yā ná yiicū 'lííⁿ chí nguuvi Olivos chí canéé niiⁿnuⁿ ná yāāⁿ Jerusalén ní ndáá yā na yāāⁿ Jerusalén. Distancia 'cūū chí ngaⁿa ley chí cuuvi caacá yā sábadō nguuvi chí ntaaviⁿtuunuūⁿ yā. ¹³Ndaá yā na yāāⁿ miiⁿ. Chéé yā na cuarto yaacu naachi cānee Pedro, ndúúicū Jacobo, ndúúicū Juan, ndúúicū Andrés, ndúúicū Felipe, ndúúicū Tomás, ndúúicū Bartolomé, ndúúicū Mateo, ndúúicū Jacobo dáiyā saⁿā chí nguuvi Alfeo, ndúúicū Simón Zelote, ndúúicū Judas chí 'diinū Jacobo. ¹⁴Nducyáácá 'iiⁿyāⁿ s'eeⁿ ndúúicū n'daata s'eeⁿ ndúúicū María chí chæecu Jesús ndúúicū 'díinu Jesús nduuvidaamá yā ní 'áámá vaādī cadiinúúⁿ yeⁿé yā ní ngaⁿangua'á yā ní di'cuiitú yā Dendyuūs. ¹⁵Iiⁿyāⁿ chí nduuvídaama miiⁿ ngíi yā tan'dúúicā 'áámá ciento canee ndiicú yā. Hora miiⁿ nacueéⁿ Pedro naavtaⁿa yeⁿe 'iiⁿyāⁿ s'eeⁿ chí i'téenu yā Cristo ní caⁿa sa: ¹⁶Ndís'tii hermanos, canee cuuⁿmiⁿ chí cuuvi cuaacu Escritura chí Espíritu N'dai yeⁿe Ndyuūs caⁿa David cuaaⁿ vmaāⁿ ní David miiⁿ dinguúⁿ yā yeⁿe Judas. Judas miiⁿ ch'iⁿi sá du'u chí Jesús. Maaⁿ níicú chíi chita'á yā Jesús. ¹⁷Judas miiⁿ ní ndúúicū nús'uu ní diiⁿ sa ntiiⁿnyuⁿ ndúúicū nús'uu.

¹⁸Sáⁿa miiⁿ ní cái sa 'áámá tááⁿ yáⁿāa ndúúicū tuūmī yeⁿē nuuⁿndi yeⁿē sa. Ní chin'daā sa dácaā n'díi sa ní nda'ai naavtaⁿa cuerpo yeⁿē

sa ní tanducueⁿē ngeeti sa ch'iinu cān'daa. ¹⁹Nducyáácá 'iiⁿyāⁿ yeⁿe yāāⁿ Jerusalén chicadínuuⁿ yā chuū. Ní yāⁿāa miiⁿ ní 'tíicā canee chí duuchi Acéldama davaacu yeⁿé yā chí neⁿe caaⁿmaⁿ campo yeⁿē yuūúⁿ.

²⁰Ti canéé nguūⁿ na libro yeⁿe Ndyuūs naachi chí duuchi Salmos: Naachí navaacu sa míⁿ nduuví díyáái. Ndíí nguéé 'iiⁿyāⁿ chí 'cuetinée yā miiⁿ.

Níicú canéé nguūⁿ:

Cuta'a taamá yā ntiiⁿnyuⁿ yeⁿe saⁿā ndíí tiiⁿ.

²¹Iiⁿyāⁿ sáⁿā miiⁿya canee cuuⁿmiⁿ chí canéé yā ndúúicū 'nū nducueⁿe tiempo chí Señor Jesús canéé yā ndúúicū 'nū. ²²Iiⁿyāⁿ miiⁿ canee cuuⁿmiⁿ chí canéé yā ndúúicū 'nū taachi tuc'áa yā chæedinuūⁿníⁿ Juan ndíí nguuvi chí Jesús cunaⁿá yā cuaaⁿ niiⁿnuⁿ nanguuvi. 'Túúicā canee cuuⁿmiⁿ chí 'áámá yā caaⁿmaⁿ yā ndúúicū nús'uu nduudu cuaacu yeⁿē chí nduuchi Jesús ngaaⁿ tináⁿā. ²³Ní 'neeⁿ ndutá'a yā ná 'uuvi 'iiⁿyāⁿ. 'Áámá saⁿā miiⁿ ní nguuvi sa José Barsabás chí nguuvi Justo ndúúicū taama saⁿā miiⁿ chí nguuvi sa Matías. ²⁴Ní caⁿangua'á yā ní caⁿa yā: N'díi, Señor Ndyuūs, chí n'diichi ní staava yeⁿē nducyáácá yā, 'cuuⁿmíⁿ ní nús'uu 'áámá chéé sáⁿā s'ūuⁿ chí 'āā ndeévē ní. ²⁵Níicú cunee ndúúicū sa ntiiⁿnyuⁿ ndúúicū apóstoles lado yeⁿe Judas. Ní diiⁿ sa ntiiⁿnyuⁿ yeⁿē Judas ntiiⁿnyuⁿ chí nguéé diiⁿ sa cumplir cucáāvā nuuⁿndi yeⁿē sa. 'Tíicā ní Judas cūnaⁿa sa na lugar naachí tuneⁿ saⁿā. ²⁶Níicú dinguúⁿ yā na 'úúví caaca ndúúicū

'uuvī chi nguuvī 'iiⁿ'yāⁿ, José miiⁿ ndúúcu Matías. Ní tun'dáá yā 'áámá chi nguuvi Matías ní Matías miiⁿ tuneēⁿ. Ní nduuvidaama sa chí ndicháámá apóstoles chi 'iiⁿ'yāⁿ chi dichó^o Dendyuūs.

Ndaa Espíritu N'dai

2 Nducyáácá yā nduuvidaamá yā taachi ndaā nguuvi yeⁿe Pentecostés chi 'viicu yeⁿe cosecha. ²Tuu'mí nūuⁿ tucá^a ch'éecu ruuⁿ cuchii nanguuvi tan'dúúca 'áámá 'yúúné tááⁿ chí ngéenu. Ch'iindiveéⁿ yā ruuⁿ miiⁿ chí chíítú va'āi naachi snée yā miiⁿ. Ní 'iiⁿ'yāⁿ s'uúⁿ vveté yā. ³Ní che'enaāⁿ n'dee n'dai cosas tan'dúúca ch'íyā yeⁿe yaⁿā n'gaiyāā. Ní ch'εete ndúúu vmnaaⁿ yeⁿe 'iiⁿ'yāⁿ. ⁴Nícu canée yā nducyáaca yā chiitu ndúúcu Espíritu N'dai yeⁿe Ndyuūs. Nícu Espíritu N'dai miiⁿ dííⁿ yā chí tucá'a yā caⁿ'a yā táámá naaⁿ davaacu s'eeⁿ tan'dúúca nduudu chí ca'ā Espíritu N'dai miiⁿ.

⁵Tuu'mi ní na yāāⁿ Jerusalén ch'εetinée 'iiⁿ'yāⁿ yeⁿe Israel chí saⁿ'ā chí i'téenu Dendyuūs yeⁿe nducyaaca naciones yeⁿe iⁿ'yeeⁿdí 'cūu. ⁶Taachí ndaā chí 'εecu ruuⁿ mííⁿ nduuvidaamá n'dee n'dái yā ní chidáanā yeⁿe yā ti ca'áámá ca'áámá yā ch'iindiveéⁿ yā chí ngaⁿ'ā davaacu yeⁿe maáⁿ yā. ⁷Nducyáácá yā 'áámá cheⁿe yiinu yā ní 'áámá nínacadínuuⁿ yā, ní ngaⁿ'á yā: N'diichí nī, ¿'áá nguéé yeⁿe yāⁿā Galilea nducyaaca saⁿ'ā s'eeⁿ chí ngaⁿ'ā sa? ⁸¿'Taaca chííⁿ n'giindiveeⁿ yú nduudu yeⁿe yú tan'dúúca naachí ch'iindiyāā yú? ⁹Véé 'iiⁿ'yāⁿ yeⁿe país Partia, 'iiⁿ'yāⁿ país Media, país Elam,

ndúúcu 'iiⁿ'yāⁿ chí snée yā na país Mesopotamia, 'iiⁿ'yāⁿ yāⁿāa Judea, yāⁿāa Capadocia, yāⁿāa Ponto, yāⁿāa Asia, ¹⁰'iiⁿ'yāⁿ yāⁿāa Frigia ndúúcu país Panfilia, país Egipto, yāⁿāa s'eeⁿ yeⁿe Africa chí canee cuaāⁿ 'diituú 'áámá lado cuaaⁿ yeⁿe yāⁿāa Cirene, ndúúcu 'iiⁿ'yāⁿ yeⁿe yāāⁿ Roma chí snée yā miiⁿ. Tan'dúúca ntúūⁿ 'iiⁿ'yāⁿ Israel s'eeⁿ 'tiicá ntúūⁿ 'iiⁿ'yāⁿ chí 'āa maaⁿ 'iiⁿ'yāⁿ Israel. ¹¹Nícu 'iiⁿ'yāⁿ isla Creta, ndúúcu 'iiⁿ'yāⁿ país Arabia snée yā miiⁿ. Nducyaaaca yú n'giindiveeⁿ yú davaacu yeⁿe yú. Ngaⁿ'á yā yeⁿe chí ch'εete taavi cá yeⁿe Dendyuūs.

¹²Nducyaaaca yā ní 'áámá cheⁿe yeⁿe yā, ní ndiíiⁿ 'uuví yā vaanicadiinuⁿ yeⁿe yā. Ní ngaⁿ'á yā 'aamá yā ndúúcu taamá yā: ¿'D'éé neⁿe caaⁿ'maⁿ chuū? ¹³Tanáⁿ'a yā ní sta'á yā tan'dúúca 'áámá duuchi ní ngaⁿ'a yā: 'Āā chíí yā.

Chuū ngaⁿ'a Pedro vmnááⁿ vmnaaⁿ

¹⁴Tuu'mi ní Pedro mííⁿ cheendii sa ndúúcu ndiicháámá yā ní caⁿ'a yuudu sá ní ngaⁿ'a sā ngii sa 'iiⁿ'yāⁿ: Ndís'tií saⁿ'ā s'eeⁿ yeⁿe Israel ndúúcu nducyaaca chí snée yā na yāāⁿ Jerusalén. Ní cánée chí 'cuuⁿ'míⁿ ndís'tií ní tumicadínuuⁿ nī chuū. Ní 'caandiveéⁿ nī nduudu yeⁿe 'úu. ¹⁵Sáⁿ'ā s'uuⁿ nguéé cúú'ví sá tan'dúúca chí nadacadínuúⁿ ndís'tií caati maaⁿ ní n'gεecu nuuⁿ 'yáⁿ'ā. ¹⁶Chuū canée nguūⁿ na libro yeⁿe Ndyuūs naachi caⁿ'a profeta Joel chí ngaⁿ'a chí cuchii:

¹⁷Ndyuūs ní caⁿ'a yā taachi ndaā nguuvi cuayiivi chí cuchii, chí teé Espíritu yeⁿe vmnaaⁿ

nducyaacá 'iiⁿyāⁿ. Ní daiyá nī saⁿā ndúúcū daiyá nī n'daataá caaⁿmáⁿ yā nduudu yeⁿé. Ní saⁿā n'gaiyáá n'deēē nááⁿ chi 'cuuⁿmíⁿnááⁿ yeⁿé sa. Ní 'iiⁿyāⁿ ndiicúú yeⁿé nī n'deeē nááⁿ chi 'cuíⁿnu yā.

18 'Tíicā yeⁿe nguuvi miⁿ, 'úú teé Espíritu yeⁿé vmnaaⁿ yeⁿe saⁿā chí dichííⁿvē 'úú ndúúcū n'daataa chí dichííⁿvē 'úú. Ní caaⁿmaⁿ yā nduudu yeⁿé.

19 Níicú 'cuuⁿmíⁿ vaadi n'giinu yeⁿé cuaaⁿ 'niiⁿnuⁿ nanguuvi, ndúúcū señaless yeⁿé cuaaⁿ ndiyyā na yáⁿā, ndúúcū yuúúⁿ, ndúúcū yaⁿā, ndúúcū yaaⁿmi,

20 'iicu 'yáⁿā mijⁿ nduuvi maāiⁿ. Níicú 'iiyū míⁿ ndúúví yuúúⁿ, taachi 'aa cuéé ndaa nguuví yeⁿé Señor. Nguuvi miⁿ ch'ēete ní chi 'cuuⁿmiⁿ yā.

21 Níicú nducyaaca 'iiⁿyāⁿ chi caaca: Señor 'iivú, ní Ndyuūs nanguáⁿai yā.

22 Ndíⁿs'tii saⁿā yeⁿe 'iiⁿyāⁿ Israel, 'caandiveéⁿ nī nduudu 'cūú: Jesús yeⁿe yāáⁿ Nazaret ní 'áámá saⁿā chí Dendyuūs n'diichí yā chí n'daācā sa nguaaⁿ ndíⁿs'tii. Ní Dendyuūs díⁿ yā vaadi n'gíínú ndúúcū señaless ndúúcū n'tiiⁿnyuⁿ ch'ēete cáávā saⁿā miⁿ nguaaⁿ ndíⁿs'tii tan'dúúcā ndíⁿs'tii deenú nī. 23 Sáⁿa 'cūú Ndyuūs ní ca'a yā saⁿā cáávā voluntad yeⁿe maaⁿ yā tan'dúúcā chí déénú n'dai yā ndíⁿ vmnaaⁿ. Ndíⁿs'tii ní chiicá nī chí sta'á yā sáⁿa 'cūú chí'neé'nga'á yā saⁿā. Ní chí'iiⁿnúⁿ yā saⁿā cucáávā 'iiⁿyāⁿ s'eeⁿ chí nguéé n'daacā. 24 Sáⁿa 'cūú Ndyuūs nadacuéeⁿ yā saⁿā yeⁿe

nguaaⁿ tináⁿā. Sáⁿa 'cūú nguéé cuuví cunée sa nguaaⁿ tináⁿā. Cáávā chuū ní Dendyuūs nadacuéeⁿ yā saⁿā nguaaⁿ tináⁿā. 25 David caⁿa sá yeⁿe sáⁿa 'cūú:

Ti cueⁿe daāⁿmaⁿ inaáⁿ Señor 'iivú Ndyuūs vmnááⁿ yeⁿé. Ní canée yā lado yeⁿe honor, ní mar 'aamá 'iiⁿyāⁿ nguéé cuuví dí'vaachí yā 'úú.

26 Cáávā chuū caaⁿmáⁿ ndúúcū 'áámá vaadi yeenú yeⁿé staava yeⁿé ndúúcū vaadi yeenú yeⁿe cheendí. 'Iicu cuerpo yeⁿé 'intaavi'tuunúúⁿ ndúúcū chí canee ngiínú yeⁿé Ndyuūs.

27 Ti nguéé cu'néeⁿ nī alma yeⁿé na lugar Hades chí lugar yeⁿé alma. Ní nguéé 'cuaaⁿ nī 'úú chí daiyá nī 'úú chí 'iiⁿyāⁿ chí nguéé nuuⁿndi 'úú chí choó cuerpo yeⁿé.

28 Díⁿ nī chí n'diichí chí yúúni cuaacu yeⁿe vida. N'dií dích'ēeté nī vaadi yeenú 'úú ti canee nī nduucú.

29 Ndíⁿs'tii víí, cuuví caaⁿmaⁿ cuaacú ndíⁿs'tii yeⁿe chiida yú David. Ch'ii yā ní ních'ēechí yā na yáinyāⁿ. Ní yáinyāⁿ yeⁿé yā canee ndúúcú yú ndii nguuví 'cūú. 30 Saⁿa miⁿ saⁿā profeta miⁿ chí ngaⁿa nduudu yeⁿe Dendyuūs. Ní deenú sa chí Ndyuūs ngaⁿa cuaacú yā ndúúcū nduudu cuaacu chí 'áámá 'iiⁿyāⁿ chí cuchii na ndaata yeⁿé yā. Ní Dendyuūs nadacuéeⁿ yā Cristo chí 'cuundi yā na trono yeⁿé yā ní caaⁿmaⁿ n'tiiⁿnyúⁿ yā. 31 David déénu sa chí cuaaⁿ vmnaaⁿ ní caⁿa sa chí Cristo nanduuchí yā yeⁿe nguaaⁿ tináⁿā. Nguéé cunee alma yeⁿé yā na lugar Hades chí lugar

yeⁿē alma ní nguée yúute yeⁿé yā chí choo. ³²Ndyuūs nadin'duuchí yā Jesús yeⁿe nguaaⁿ tináⁿā ní cáávā 'iiⁿyāⁿ miiⁿ nducyaaca 'nū cuuví caaⁿmaⁿ 'nū nduudu cuaacu yeⁿé yā. ³³Tíicā Jesús canée yā ná yaacu na lado yeⁿe honor yeⁿe Dendyuūs ní dííⁿ yā recibir yeⁿē Chiidá yā miiⁿ yeⁿe chí caⁿā Chiidá yā chí ca'a yā Espíritu N'dai. Chuū ní Jesús teé yā ndís'tií ní inaáⁿ nī ní n'giindiveéⁿ nī. ³⁴Ti David miiⁿ nguée cucheε sa nanguuvi; ti maāⁿ sa ngaⁿa sa:

Caⁿa Señor chíí yā Señor yeⁿé:

'Cuundi dí lado yeⁿe honor,

³⁵ndíí cu'neéⁿ 'iiⁿyāⁿ chí táaⁿ yā yeⁿe di chí tun'dáá n'dai di ndúucu yā ní cunée yā na poder yeⁿē di.

³⁶Cuaacu niiⁿnyuⁿ cádiinuⁿ nducyáácá 'iiⁿyāⁿ yeⁿe ndaata Israel chí Jesús chí ndís'tií ní chí'neeⁿnga'á nī 'iiⁿyāⁿ, Ndyuūs dííⁿ yā chí Señor ní Cristo yā ní 'iiⁿyāⁿ ch'εete taavi.

³⁷Taachí ch'iindiveéⁿ yā chuū ní neéne ya'ai chíí staava yeⁿé yā. Ní caⁿa yā chíí yā 'iiⁿyāⁿ s'eeⁿ Pedro ndúúcū taa na 'uuvi apóstoles: Ndís'tií saⁿā víí, ¿de'ē dííⁿ 'nū?

³⁸Pedro miiⁿ ngaⁿa sa ngii sa 'iiⁿyāⁿ s'eeⁿ: Nguεecúndíí nī yeⁿē nuuⁿndi yeⁿé nī ní cuεedinúⁿnīⁿ ca'áámá ca'áámá nī cucáávā chí chí duuchi Jesús. Níicú Ndyuūs nadach'εecú yā nuuⁿndi yeⁿe ndís'tií; ní cuta'á nī chí tee Ndyuūs miiⁿ chí Espíritu N'dai yeⁿé yā.

³⁹Caati Espíritu N'dai caⁿā Chiida yú chí teé yā cucáávā ndís'tií ndúúcū daiya nī ní cucáávā nducyaaca 'iiⁿyāⁿ chí snée yā yaⁿai, ní cucááva nducyaaca 'iiⁿyāⁿ chí

'cuaí Señor 'iivú Ndyuūs yeⁿē yú 'iiⁿyāⁿ.

⁴⁰Pedro miiⁿ ngaⁿá yā nduudu cuaacu nanááⁿ na 'uuví yā ndúúcū n'dee taaví nduudu ní ngaⁿa díitú yā 'iiⁿyāⁿ s'eeⁿ ní ngaⁿa yā: Nanguáⁿai nī yeⁿe 'iiⁿyāⁿ chí nguée n'daacā.

⁴¹Tíicā 'iiⁿyāⁿ chí 'cuúⁿ yā nduudu yeⁿe yā chεedinúⁿnīⁿ yā, ní chí 'yaáⁿ yā nguuvi miiⁿ tan'dúúcā 'iiⁿnūⁿ mil 'iiⁿyāⁿ. ⁴²Ní 'áámá canée yā ndúúcū chí chí'cueeⁿ apóstoles ní nduuvidaama yā ní n'dee yā pan ní caⁿ'angua'á yā.

Vida yeⁿe 'iiⁿyāⁿ s'eeⁿ yeⁿe Evangelio yeⁿe Jesucristo vmnááⁿ vmmaaⁿ

⁴³Ní vaadí 'va'a níndaā nanááⁿ nducyaaca yā. Néene n'dee vaadí n'giinu ndúúcū señales chí dííⁿ apóstoles chí dich'ó Dendyuūs.

⁴⁴Ní nducyaacá yā chí i'téenu yā nduuvidaama yā. Ní nducéⁿē chí véé yeⁿé yā canée yeⁿē nducyaaca yā. ⁴⁵Ní ndiicuí yā yáⁿā yeⁿé yā ndúúcū chí veε yeⁿe yā ní nga'a yā 'téé 'téé nducyáácá 'iiⁿyāⁿ tuunu tuunu cá chí ngi'vaachí 'iiⁿyāⁿ.

⁴⁶Áámá ninduuvidaamá yā na yáacu nguuvi nguuví. Ní ninduuvidaamá yā ní yeenu taaví yā staava yeⁿé yā ndúúcū 'áámá vaanicadiinúⁿ yeⁿe yā taachi n'dee yā pan ní taachí che'é yā na vaacú yā. ⁴⁷'Iiⁿyāⁿ miiⁿ dich'εete yā Dendyuūs. Ní véé favor yeⁿé yā ndúúcū 'iiⁿyāⁿ yeⁿe yááⁿ miiⁿ. Ní Señor Ndyuūs nguuví nguuví idi'yáaⁿ yā 'iiⁿyāⁿ chí i'teenú yā 'iiⁿyāⁿ.

Saⁿā chí nguée ngii ngíicá sá ní nānduūvā yeⁿē sa

3 Pedro mííⁿ ndúúcū Juan dáámá cueⁿe yā cucheε yā na yaacú

templo cuaaⁿ nan'geecú 'ííⁿnúⁿ chíinu, hora chi caⁿangua'á yā. ²Ní ná'a yā ndéé yā 'áámá saⁿā chi ndii dúvúv sá ndíí cheeti cheecu sa. Saⁿā miiⁿ ni ngúúví ngúúví i'néeⁿ yā saⁿā cheendi yaacū chi nguuví Hermosa o N'deeveé. Saⁿa miiⁿ ngiica sa limosna 'iiⁿyāⁿ chi ngeⁿe yaacū templo. ³Sáⁿa 'cūū taachi n'diichí sa Pedro ndúúcu Juan chí chindáa yā yáacū ch'εete, chiica sá limosna 'iiⁿyāⁿ s'eeⁿ. ⁴Pedro ndúúcu Juan ch'εetinée yā chíinu yā saⁿā miiⁿ, ní caⁿ'á yā chíi yā saⁿā: Cundiiichi dí nús'uu.

⁵Tuuⁿmi ní saⁿā miiⁿ ch'íínu sa 'iiⁿyāⁿ s'eeⁿ chi canee ngíínu sá de'ē ca'á yā saⁿā. ⁶Naati Pedro miiⁿ caⁿ'á yā: Nguéé tuūmí 'dííⁿnguεe yeⁿé ni nguéé 'diiⁿnguāⁿ yeⁿé chí canéé yeⁿé chí teé dii, cucáávā Jesucristo yeⁿe yāⁿ Nazaret miiⁿ, nacuéeⁿ dī ní caaca di.

⁷Ní sta'á yā ta'á sa lado tá cuaacū sa ní nadacuéeⁿ yā saⁿā. Hora mííⁿ nūūⁿ ní ndaā dítiinu ca'a sa ndúúcu 'ííni ruundi ca'a sa. ⁸Ní caí yaacū sa, ní chéendii sá, ní chíicā sa. Sndáa sa ndúúcu Pedro ndúúcu Juan cheeti yaacū templo miiⁿ. Ngiica sá ní ngái yaacū sa ní i'téenu sá Dendyuūs. ⁹Núúⁿmáⁿ yāⁿ 'iiⁿyāⁿ n'diichí yā saⁿā chi ngiica sa ní i'téenu sa Dendyuūs. ¹⁰Ní nntíinaaⁿ yā chí saⁿā miiⁿ chí saⁿā chí n'giindi cheendi yaacū templo chí nguuví Hermosa, ní ngiica sa limosnas. Ní cheⁿe yiinu yā ní 'iiⁿyāⁿ s'eeⁿ dii'yá yā chíi chí 'tíicā nanduuvá yeⁿé sa.

**Pedro ngaⁿ'á yā na corredor
chí nguuví Salomón**

¹¹Saⁿā chí nguεe ngiica ní chí nduūvā yeⁿé sa sta'á sa Pedro

ndúúcu Juan ní nuuⁿmaⁿ yāⁿ yā ngeⁿe yiinu yā 'iiⁿyāⁿ. Ní cueⁿé yā na corredor chí nguuví Salomón chí 'áámá corredor yeⁿe yaacū ch'εete. ¹²Taachi Pedro n'diichi sa 'iiⁿyāⁿ s'uúⁿ Pedro nan'geecútáⁿa sa yeⁿé 'iiⁿyāⁿ yāⁿ: Ndís'tii saⁿā yeⁿe Israel, ¿de'ē cuuvi chí ngeⁿe yiinu ní yeⁿe chúú? O ¿de'ε cuuví chí n'gíínu ní nús'uu? ¿Áá caava chí diitú 'nū o chí n'dái 'nū chí dííⁿ 'nū chí ngíicá sáⁿa 'cūū? ¹³Ndyuūs yeⁿe saⁿ'a s'eeⁿ, Abraham ndúúcu Isaac ndúúcu Jacob ní Ndyuūs yeⁿe chíida yú, Ndyuūs dííⁿ yā honrar Daiyá yā Jesús. Ndís'tii ní ca'á ní 'iiⁿyāⁿ miiⁿ ní cheeⁿdiitú ní nanááⁿ Pilato miiⁿ taachi Pilato neⁿé yā ca'á yā libertad yeⁿé yā. ¹⁴Ndís'tii ní cheeⁿdiitú ní chí Jesús chí n'daaca yā, Jesús chí n'dai taaví yā, ní chíica ní chí canéé libre 'áámá saⁿā chí 'nííⁿnúⁿ 'iiⁿyāⁿ. ¹⁵Ní chí'iiⁿnuⁿ ní Jesús chí cā'a yā vida yeⁿe 'iiⁿyāⁿ. 'iiⁿyāⁿ miiⁿ ní nadin'dūūchí Dendyuūs 'iiⁿyāⁿ yeⁿé nguaaⁿ tináⁿā ní nús'uú caaⁿmaⁿ cuaacú 'nū yeⁿé yā. ¹⁶Sáⁿa 'cūū chí nguεe ngiica chí ndís'tii inaⁿ ní ní n'diichí ní, sáⁿa 'cūū ní ditiinú sa cucáávā chí i'téenu sa Jesús. Ndúúcu vaadi i'téenu chí ca'a Jesús, sáⁿa 'cūū 'āā nduuví n'dái sá tan'dúúca chí n'diichí nducyaacá ndis'tii.

¹⁷Naati maaⁿ ní, ndís'tii ví'í, deenú chí ndís'tii dííⁿ ní chuū cucáávā chí nguεe déenu ní tan'dúúca chí dííⁿ 'iiⁿyāⁿ s'eeⁿ chí ngaⁿ'a ntiíⁿnyúⁿ yā yeⁿé ndís'tii. ¹⁸Tíicā Dendyuūs ní snuūⁿ ca'a chí caⁿ'a yā vmnááⁿ vmnaaⁿ cáávā cheendi nducyaaca profetas chí n'dai chí caⁿ'a nduudu yeⁿe Dendyuūs yeⁿe chí Cristo

Daiyá yā. Ní cánéé chí Cristo ní 'cuenú yā cuuvi. ¹⁹Tíicā maaⁿ ní nacadíinuⁿ ní ní ndaacadáámí ní yeⁿé nuuⁿndi yeⁿé ní ní cu'téénú ní. Níicú Ndyuūs nadiví yā nuuⁿndi yeⁿé ní. Níicú ndaa tiempo chí ntaavi'tuunúⁿ ní nanááⁿ Señor 'iivú Ndyuūs. ²⁰Ndyuūs ní ndeévé yā Jesucristo ndíí vmnaaⁿ níicú caⁿa yā chí dichó'o yā Jesucristo tan'dúucā chí caⁿa yā ndíí cuááⁿ vmnaaⁿ. ²¹Cuaacu nííⁿnyúⁿ chí 'iiⁿyāⁿ miiⁿ canee cúúⁿmíⁿ chí canéé yā va'āi chēeti nguuví ndíí taachi ndáá nguuví chí Dendyuūs dííⁿ yā taanduvéé dendú'ū chí Dendyuūs caⁿá yā vmnááⁿ vmnaaⁿ cucáávā cheendi profetas yeⁿe yā. Profetas chí n'dai caⁿa yā chí cuchii ndíí cuááⁿ vmnaaⁿ. ²²Caati Moisés miiⁿ ní caⁿa yā chí yā chíida yú s'eeⁿ ndíí vmnaaⁿ: Señor Ndyuūs yeⁿé yú nadacuéeⁿ yā 'áámá profeta nguaaⁿ 'iiⁿyāⁿ yeⁿé yú tan'dúucā 'úú. Ní yeⁿé 'iiⁿyāⁿ miiⁿ 'caandiveéⁿ ní yeⁿé taanduvéé dendú'ū chí caaⁿmaⁿ yā ndúucū ndís'tií. ²³Ní cuuví chí nducyaaca yā chí nguéé 'caandiveéⁿ yā yeⁿe 'iiⁿyāⁿ profeta miiⁿ canéé chí can'dáa yā yeⁿé nguaaⁿ 'iiⁿyāⁿ.

²⁴Tanducuéⁿe profetas ní ndii tiempo yeⁿe Samuel ndii tiempo chí cuchí 'yaaⁿ n'dái yā ní caⁿa yā, ní 'āā caⁿa ntúuⁿ yā yeⁿé nguuví 'cūú. ²⁵Ndís'tií daiya profetas chí caⁿa nduudu yeⁿé Dendyuūs ní yeⁿe compromiso chí Dendyuūs caⁿa cuaacú yā ndúucū chíida yú s'eeⁿ ní caⁿa yā chí yā Abraham: Ná ndaatá yeⁿé di cuchii 'áámá saⁿā cuayiivi, caati sáⁿā miiⁿ cúúví di'viicú sa tanducuéⁿé 'iiⁿyāⁿ yeⁿe iⁿ'yeeⁿdí 'cūú. ²⁶Ndyuūs nadicuéeⁿ

yā Daiyá yā vmnááⁿ vmnaaⁿ cáávā ndís'tií. Ní dichó'ó yā 'iiⁿyāⁿ miiⁿ chí di'viicú yā ndís'tií chí 'áámá 'áámá ní ndaacadaamí ní yeⁿé nuuⁿndí yeⁿé ní.

Pedro ndúucū Juan nanááⁿ 'iiⁿntyéⁿē Concilio

4 Taachi Pedro ndúucū Juan yaaⁿví yā nanaaⁿ 'iiⁿyāⁿ miiⁿ chí nduuvadáámá yā tuuⁿmí ndaa nanááⁿ 'iiⁿyāⁿ s'eeⁿ chiiduú s'eeⁿ yeⁿé Israel ndúucū soldados ndíí tiiⁿ yeⁿé soldados chí díiⁿ cuidado yeⁿe yáacū templo yeⁿe 'iiⁿyāⁿ Israel ndúucū 'iiⁿyāⁿ saduceos chí nguéé i'teenú yā chí ndduuchí 'iiⁿyāⁿ yeⁿe nguaaⁿ tináⁿā. ²'iiⁿyāⁿ s'eeⁿ miiⁿ ya'āi chíí yeⁿe staava yeⁿé yā taachi chí'iindiveéⁿ yā chííⁿ chí Pedro ndúucū Juan caⁿa yā chí chí'cuéeⁿ yā 'iiⁿyāⁿ yááⁿ miiⁿ. Ní caⁿa yā chí Dendyuūs nadacuéeⁿ yā 'iiⁿyāⁿ s'eeⁿ yeⁿe nguaaⁿ tináⁿā cucáávā Jesús miiⁿ. ³Ch'ínū nguuví miiⁿ ní 'iiⁿyāⁿ s'eeⁿ chita'á yā Pedro ndúucū Juan ní chinuúⁿ yā saⁿa s'eeⁿ vácūú ndíí chideeve miiⁿ. ⁴Naati nguaaⁿ tanducuéⁿe yā neené 'yaaⁿ yā chí chí'iindiveéⁿ yā ní n'dee taaví yā chí chí'teenú yā, ní 'iiⁿyāⁿ s'eeⁿ ní ngii yā taandu nuuⁿu mil.

⁵Chideeve táámá nguuví miiⁿ nduuvidaaamá na yáāⁿ Jerusalén 'iiⁿyāⁿ s'eeⁿ chí ngaⁿā ntiíⁿnyuⁿ ndúucū 'iiⁿyāⁿ ndiicúú chí ngaⁿa ntiíⁿnyuⁿ yeⁿé yáacū ndúucū maestros yeⁿe ley, ⁶ndúucū chiiduú ch'ēete cá yeⁿé Israel chí nguuví Anás, ndúucū Caifás, ndúucū Juan, ndúucū Alejandro, ndúucū nducyáácá 'iiⁿyāⁿ yeⁿe familia chíiduú ch'ēete cá yeⁿe Israel. ⁷Ní

ch'iinú yā Juan ndúucū Pedro naavtaⁿā, ní ntiinguunééⁿ yā saⁿā s'eeⁿ: ¿De'ē poder, o de'ē duuchí 'iiⁿyāⁿ chi teē poder chi díⁿ ní chuū?

⁸Tuu'mi ní Pedro miiⁿ ní diituú Espíritu N'dai yeⁿe Ndyuūs 'iiⁿyāⁿ caⁿa yā chii yā saⁿa: Ndís'tií 'iiⁿyāⁿ chi ngaⁿa ntiiⁿnyúⁿ yā ndúucū 'iiⁿyāⁿ ndiicū chi ngaⁿa ntiiⁿnyúⁿ yā yeⁿe yáacū yeⁿe 'iiⁿyāⁿ Israel; ⁹ndúuti chi ndís'tií maaⁿ ní díⁿ ní juzgar nús'uu yeⁿe saⁿā chi ngiitā miiⁿ ní n'daacá nū ndúucū sa, ní sáⁿa 'cūū miiⁿ nanduuva yeⁿe sa, ¹⁰cadíinuū nducyaaca ndís'tií ndúucū nducyáacá 'iiⁿyāⁿ yeⁿe Israel miiⁿ chi sáⁿa 'cūū chi canéé sá ndúucu yú nanduuvá yeⁿe sa cucáāvā Jesucristo yeⁿe yáā Nazaret. 'Iiⁿyāⁿ miiⁿ ndís'tií ní s'nééⁿnga'ā ní 'iiⁿyāⁿ ní Dendyuūs nadicuéeⁿ yā 'iiⁿyāⁿ yeⁿe nguaaⁿ tináⁿā. ¹¹Jesús tan'dúucā tuū 'cūū chi ndís'tií 'iiⁿyāⁿ chi din'dái va'ai ní nguéé canee yiinú ní, naati maaⁿ ní Ndyuūs chi cu'néeⁿ yā tuuú 'cūū yeⁿe lado tuū ch'etē yeⁿe esquina yeⁿe va'ai. ¹²Véé dámaaⁿ 'áámá n'dyáⁿā sáⁿa 'cūū chi cuuvi nadanguáⁿai sa 'aa du'ú nūⁿ 'iiⁿyāⁿ. Neⁿe chi nguéé ndúucū 'iiⁿyāⁿ miiⁿ nguéé nínguaⁿāi yú, ti nguéé táámá 'iiⁿyāⁿ ná iⁿ'yeeⁿdí 'cūū chi nadanguáⁿai yā s'uuⁿ.

¹³Tuu'mi ní taachí n'diichi yā chi Juan ndúucū Pedro ditiinú taavi sa, nguéé di'váa sa ní cudéenu yā chi nguéé saⁿā chi deenu sa letra ti tonto sa, cheⁿe yiinú yā chií. Ní deenú yā chi saⁿā s'eeⁿ ch'etinéé sa ndúucū Jesús. ¹⁴Taachí n'diichí yā chi chéendii saⁿā chi 'āā nduuvá

yeⁿe ndúucū 'iiⁿyāⁿ s'eeⁿ nguéé ngíi ngaⁿa yā contra yeⁿe sa. ¹⁵Tuu'mi ngaⁿá 'iiⁿyāⁿ s'eeⁿ ngii yā saⁿā s'eeⁿ miiⁿ chí nacan'dáa sa nguaaⁿ 'iiⁿyāⁿ s'eeⁿ. Ní 'iiⁿyāⁿ s'eeⁿ chí ndeé yā nguaaⁿ maáⁿ yā. ¹⁶Ní ngaⁿa yā: ¿De'ē diiⁿ yú ndúucū saⁿā s'eeⁿ? Cuaacu níⁿnyúⁿ chi veē 'aama señal caavā saⁿā s'eeⁿ diiⁿ sa 'tíicā ní cadíinuū nducyaaca yā na yáāⁿ Jerusalén miiⁿ. Ní nguéé cuuvi 'cuēcutáⁿa yú yeⁿe chūū. ¹⁷Naati chi 'aa ntéé caaⁿmaⁿ sa chi 'yaaⁿ cá chuū nguaaⁿ yáāⁿ, tuu'mi ní 'iiⁿyāⁿ chi ngaⁿa ntiiⁿnyúⁿ yā yeⁿe yáāⁿ miiⁿ ngaⁿa yā: Yáá'ví yúúdu yú yeⁿe saⁿā s'eeⁿ chí 'aa ntéé caaⁿmaⁿ sa mar 'áámá yeⁿe Jesús ndii mááⁿ ndíi nguuvi chi cuchíi.

¹⁸Ní 'cai yā saⁿā s'eeⁿ ní caⁿa yúúdu yā chii yā saⁿā s'eeⁿ chi 'āā ntéé caaⁿmaⁿ sa ní 'aa ntéé ca'cuéeⁿ sa yeⁿe Jesús miiⁿ. ¹⁹Naati Pedro ndúucū Juan nán'guēcutáⁿa sa yeⁿe yā ní caⁿā sa yeⁿe yā: Canéé chí tuumicadiinuū ní nanááⁿ Dendyuūs. ¿'Áá canéé chí cu'téenu 'nū yeⁿe ndís'tií vmnááⁿ vmnaaⁿ o cu'teenú 'nū yeⁿe Dendyuūs? ²⁰Ti nguéé cuuvi chí 'aa ntéé caaⁿmáⁿ nús'uú de'e chí n'diichi 'nū o chíⁿ chí ch'iindiveéⁿ nū.

²¹Tuu'mi ní taachi yaa'vi yuudú yā saⁿā s'eeⁿ ní nadich'ó yā saⁿā s'eeⁿ cáāvā nducyáacá yā i'téenu yā Dendyuūs cucáāvā chí 'āā chíi. Ní nguéé indaacá yā mar 'áámá nuuⁿndi ch'etete yeⁿe saⁿā s'eeⁿ chí cuuvi díⁿ yā castigar saⁿā s'eeⁿ cáāvā chí 'va'á yā 'iiⁿyāⁿ yáāⁿ miiⁿ. ²²Níicú díⁿ yā 'áámá milagro ndúucū saⁿā miiⁿ chí nduūvā yeⁿe sa. Saⁿā miiⁿ 'āā ngo'o sá 'uūví ngēecu nduūyū yeⁿe sa.

**'Iiⁿyāⁿ chi i'teenu caacá yā
confianza ndúúcu ánimo**

²³Taachí 'āā nduuví yā libre cueⁿé yā nanááⁿ compañeros yeⁿé yā. Tuuⁿmi ní caⁿá yā nducueⁿé chi ncaⁿa chiiduú n'gēeté yeⁿe Israel ndúúcu 'iiⁿyāⁿ ndiicúu chi ngaⁿa ntiiⁿnyuⁿ yeⁿe yáacú. ²⁴Ní 'iiⁿyāⁿ s'eeⁿ ní taachí ch'iindiveéⁿ yā chuū, nduuvidaamá yā ní caⁿa yā ndúúcu Dendyuūs: N'díi, Señor Dendyuūs chi ch'ēete n'dai ca, n'dii 'iiⁿyāⁿ chi din'dái nī nanguuvi ndúúcu yáⁿāa ndúúcu nuūⁿnīⁿyáⁿā ndúúcu tanducueⁿé chi véé. ²⁵Caati ndúúcu cheendi David, saⁿā chi n'dii chí 'āā diiⁿ mandado yeⁿé nī ní 'āā caⁿa nī: ¿Deⁿé cuchíi chi rebelde 'iiⁿyāⁿ chi nguéé 'iiⁿyāⁿ yeⁿé ndaata Israel? Níicú 'iiⁿyāⁿ yeⁿé nācijas miiⁿ inacáiiinúúⁿ yā cosa chi nguéé dichiiⁿvē. ²⁶Nduuvidaamá reyes yeⁿé yáⁿāa 'cúu, 'íicú saⁿā n'gēete chí ngaⁿā ntiiⁿnyúⁿ yā nduuvidaamá yā contra yeⁿe Señor Dendyuūs, ndúúcu Cristo yeⁿé yā.

²⁷Maaⁿ ní cuaacu níⁿnyúⁿ chí nduuvidaamá yā Herodes ndúúcu Poncio Pilato, ndúúcu 'iiⁿyāⁿ chi nguéé 'iiⁿyāⁿ yeⁿé ndaata Israel ndúúcu 'iiⁿyāⁿ yeⁿe Israel na yáaⁿ 'cúu contra yeⁿe Jesús chi Daiya nī chi n'dai. Ní n'díi caⁿá nī ntiiⁿnyuⁿ chí díiⁿ yā. ²⁸'Iiⁿyāⁿ miiⁿ díiⁿ yā chí cuuvi tan'dúúca chí neⁿé nī vmnááⁿ vmnaaⁿ chí cuuvi 'tífca. ²⁹Maaⁿ ní n'dii Señor, n'diichí nī chí tan'dúúca chí chiiduú n'gēeté yeⁿé Israel ngaⁿa taáⁿ yā ndúúcu nús'uu. N'dii Señor, teé nī nús'uu chí idiiⁿ

mandado yeⁿé nī chí nguéé 'vaⁿá 'nū ní caaⁿmaⁿ 'nū nduudu yeⁿé nī. ³⁰Ch'íⁿí maáⁿ nī chí diitú nī chí 'iiⁿyāⁿ díiⁿ yā chí náanduūva yeⁿe 'iiⁿyāⁿ, ní díiⁿ yā señales ndúúcu vaadi n'giinu cucáāvā Daiyá nī chí Jesús chí n'dai taavi.

³¹Taachí ch'iinu caⁿánguaⁿá yā naachi nduuvidaamá yā, nuⁿu vaⁿāi miiⁿ. Ní nducyaaca yā ní chiitu Espiritu N'dai yeⁿe Ndyuūs 'iiⁿyāⁿ. Nguéé 'vaⁿá yā chí caⁿa yā nduudu yeⁿe Dendyuūs.

**Nducueⁿé chí véé yeⁿé
nducyáacá 'iiⁿyāⁿ**

³²'Iiⁿyāⁿ n'dee n'dái chí chí'téenu yā nduuvidaamá yā ní 'áámá staava yeⁿé yā, 'áámá alma yeⁿé nducyaaca yā. Mar 'áámá 'iiⁿyāⁿ nguεε caⁿa yā chí yeⁿé yā denduū chí véé yeⁿé yā ti nducueⁿé chí véé ní yeⁿé nducyáaca yā.

³³Apóstoles chí dichó^o Ndyuūs ngaⁿá yā nduudu cuaacu ndúúcu poder ch'ēete yeⁿé Señor Jesús chí nadacueéⁿ yā yeⁿe nguaaⁿ tináⁿā. Níicú favor ch'ēete taavi cá yeⁿé Dendyuūs cánéé nanááⁿ 'iiⁿyāⁿ s'eeⁿ. ³⁴Mar 'áámá 'iiⁿyāⁿ nguεε ngii 'vaachí yā. Nducyáacá 'iiⁿyāⁿ chí véé yeⁿé chiidá yā chí yeⁿe yā ndúúcu dendu'u yeⁿé yā ín'diicuí yā. Ní ndéé yā chí ndāaca yā chí n'diicuí yā chíiⁿ. ³⁵Ní 'neeⁿ yā na ca'a apóstoles chí dichó^o Dendyuūs. Ní ngaⁿá yā ca'áámá 'iiⁿyāⁿ tuunu tuunu ca ngii 'vaachí 'iiⁿyāⁿ. ³⁶Tuuⁿmi ní José, ní 'iiⁿyāⁿ chí s'neeⁿ apóstoles chí duuchi Bernabé (chí neⁿe caaⁿmaⁿ, 'Iiⁿyāⁿ chí ngaⁿa 'viich'ētínūu). José miiⁿ 'iiⁿyāⁿ yeⁿe ndaata yeⁿe levita

ní ch'iindiyáaⁿ yā na isla Chipre.
³⁷Iiⁿyāⁿ miiⁿ véé 'áamá vaadi
 ngua'aá yeⁿ'é yā. N'diicui yā ní ndéé
 yā tuumi yeⁿ'é miiⁿ, ní s'neéⁿ yā na
 ca'a apóstoles chi dichó'ó Ndyuūs.

Ananías ndúúcū Safira

5 Véé 'áamá saⁿ'ā chi nduuvu
 sa Ananías ndúúcū Safira
 n'daataa yeⁿ'é sa chi n'diicui sá
 'áamá vaadi ngua'aá yeⁿ'é sa. ²Nguéé
 tanducuéⁿ'é tuumi chi sta'a sa
 yeⁿ'e yáⁿ'āa ndéé sa, ní n'daataá
 yeⁿ'é sa chicadínúúⁿ tá chuū. Saⁿ'ā
 miiⁿ ní 'téé nūu ndéé sa chi 'neeⁿ
 sa na ca'ā apóstoles chi dichó'ó
 Dendyuūs. ³Tuu'mí ngaⁿ'ā Pedro
 miiⁿ: Díí, Ananías, ¿de'ē cuuví chi
 yááⁿ'nguiinūⁿ chistaⁿ'a sa na staava
 yeⁿ'é di, ní nguéé caⁿ'a cuaacú dí
 nanááⁿ Espíritu N'dai yeⁿ'e Ndyuūs,
 ní nguéé ndéé di tanducuéⁿ'é tuumí
 yeⁿ'é yáⁿ'āa miiⁿ? ⁴Naaⁿ chi cánéé
 ta'ā di, ¿'áá nguéé yeⁿ'é di? Ni taachi
 'āā n'diicui di, ¿'áá nguéé yeⁿ'é di
 dendu'ū? ¿De'e cúuví chí chi'neeⁿ di
 na staava yeⁿ'é di? Nguéé caⁿ'a di
 nduudu yaadi miiⁿ ná saⁿ'ā iⁿ'yeeⁿdí
 'cūū naati nanááⁿ Dendyuūs.

⁵Taachi Ananías ch'iindiveeⁿ sa
 nduudú 'cūū sndéevé sá ní ch'ií sa.
 Ní nducyááca yā chi ch'iindiveeⁿ yā
 chuū dii'yā taaví yā chií. ⁶Ní saⁿ'ā
 da'caiyāa chi s'neéⁿ miiⁿ nadicuéeⁿ
 sa 'iiⁿ'yāⁿ, ní ch'εecu sa tínūūⁿ
 'iiⁿ'yāⁿ, ní tun'dáa sa 'iiⁿ'yāⁿ chuva'āi.
 Ní ch'iichi sá 'iiⁿ'yāⁿ na panteón.

⁷Cho'oo tan'dúúcā 'iiⁿ'nūⁿ hora
 chi ndáa n'daataá yeⁿ'é sa chæti
 yaacū. Táⁿ'a 'cūū ní nguéé deenú
 tá de'ē chi chií. ⁸Tuu'mí ní Pedro
 ngaⁿ'a sa ngii sa táⁿ'ā: Cuuvi di
 'úú, ¿'áá n'deēe tuumí sta'a di yeⁿ'e

yáⁿ'āa miiⁿ chí n'diicui sa? Ní tá
 miiⁿ ní caⁿ'a tá: 'Tíicā. ⁹Pedro miiⁿ
 ngaⁿ'a sa ngii sa táⁿ'ā: ¿De'ē cáávā
 chi diiⁿ di ndúúcū isaⁿ'a yeⁿ'é di chi
 chinnche'ei dí Espíritu yeⁿ'e Señor
 'iivú Ndyuūs? N'diichí dí. 'Iiⁿ'yāⁿ chi
 cheⁿ'e chí n'guuchi isaⁿ'ā yeⁿ'é di
 sneé yā cheendi yaacū ní canéé chí
 tun'dáa ntúuⁿ yā dii. ¹⁰Tuu'mí ní chi
 nndéevé túūⁿ tá 'cūū na ca'a Pedro
 ní ch'ií tá. Taachi ndáa saⁿ'ā s'eeⁿ
 yáacū ní ndaaca sa táⁿ'a 'āā n'dii
 ntúuⁿ tá. Ní tun'dáa nī ntúuⁿ saⁿ'ā
 da'caiyāa s'eeⁿ táⁿ'ā. Ní ch'iichi sa
 táⁿ'ā niiⁿ'nuúⁿ ná yáinyāⁿ yeⁿ'é saⁿ'a
 yeⁿ'é tá. ¹¹Nducyááca 'iiⁿ'yāⁿ yeⁿ'é
 yáacū ndúúcū 'iiⁿ'yāⁿ chi ch'iindiveeⁿ
 yā chuū neené dii'yā yā chií.

N'dee taaví señal s'eeⁿ ndúúcū vaadi n'giinu s'eeⁿ

¹²Cáávā ta'a apóstoles neené
 n'dee nááⁿ señales ndúúcū
 vaadi n'giinu s'eeⁿ diíⁿ yā na
 yáāⁿ miiⁿ. Ní nducyááca yā 'áamá
 nduuvidaamá yā corredor chi
 nguuví Salomón yeⁿ'e yaacū templo
 yeⁿ'e 'iiⁿ'yāⁿ Israel. ¹³'Iiⁿ'yāⁿ chi
 nguéé nduuvidaamá yā ndúúcū
 'iiⁿ'yāⁿ yeⁿ'e yáacū 'va'á yā chi
 nduuvidaama yā nduucú yā. Naati
 'iiⁿ'yāⁿ yeⁿ'e yáāⁿ miiⁿ diiⁿ yā honrar
 'iiⁿ'yāⁿ yeⁿ'e yáacū. ¹⁴'Iiⁿ'yāⁿ chi
 i'téénú Señor 'iivú Ndyuūs chi 'yaaⁿ
 cá yā tan'dúúcā chi 'yaaⁿ sáⁿ'ā 'tiicá
 ntúuⁿ n'daataa; ¹⁵tun'dáa yā 'iiⁿ'yāⁿ
 s'eeⁿ chi ngíita miiⁿ cyuuni. Ní
 sn'duú yā 'iiⁿ'yāⁿ na cama, ní sn'duú
 yā 'iiⁿ'yāⁿ na colchones, ti taachi
 cho'o Pedro miiⁿ ní 'aa cunee 'cuutií
 yeⁿ'é Pedro miiⁿ vmnaaⁿ yeⁿ'é 'áamá
 chæ 'iiⁿ'yāⁿ s'eeⁿ. ¹⁶Níicú 'iiⁿ'yāⁿ
 yáāⁿ na niiⁿ'nuúⁿ mííⁿ neené 'yáāⁿ

yā ndaá yā yáaⁿ Jerusalén ndúúcū 'iiⁿyāⁿ chí ngiítā ndúúcū 'iiⁿyāⁿ chí sta'ā 'yúúné chí nguéé n'dāācā yeⁿe yáá'n'guiniūⁿ. Nducyáácā yā nduuva yeⁿé yā.

'Iiⁿyāⁿ s'eeⁿ can'dáa yā chí n'nuuⁿ cá'ai yā Pedro ndúúcū Juan

¹⁷Tuu'mi ní chiiduú ch'εεte ca yeⁿe Israel ndúúcū 'iiⁿyāⁿ chí snée yā ndúúcu yā chí yeⁿé saduceo s'eeⁿ chí nguéé i'téenu yā chí nduuchi 'iiⁿyāⁿ nguaaⁿ tináⁿā dííⁿ yā contra yeⁿe 'iiⁿyāⁿ s'eeⁿ. Ní dííⁿ nguéé yā.

¹⁸Ní sta'á yā apóstoles chí dichó'ó Ndyuūs ní s'nuúⁿ yā saⁿā s'eeⁿ vácūū yeⁿe yáaⁿ miiⁿ. ¹⁹Naati 'áámá ángel yeⁿe Señor 'iivú Dendyuūs miiⁿ ní nn'guaaⁿ yā cheendi vácūū miiⁿ n'gaaⁿ, ní tun'dáa yā 'iiⁿyāⁿ s'eeⁿ ní caⁿa yā: ²⁰Cunaⁿá nī, ní 'cuetíndíí nī na yáacū templo ní caaⁿmaⁿ nī tanducuéⁿé nduudu yeⁿe vida ngaí 'cūū nanááⁿ nducyaaca 'iiⁿyāⁿ yeⁿé yáaⁿ miiⁿ.

²¹Taachí ch'iindiveéⁿ yā chuū ní sndaá yā yaacū templo miiⁿ tyaaⁿ tyaaⁿ ní ca'cueeⁿ yā. 'Naaⁿ chí snée yā cheeti yaacū miiⁿ ní nduuvadáámá chiiduú ch'εεte ca yeⁿe Israel ndúúcū 'iiⁿyāⁿ chí snée nduucú yā. Ní 'cai yā 'iiⁿyāⁿ chí ngaⁿa ntiíⁿnyuⁿ ndúúcū nducyaaca 'iiⁿyāⁿ ndicúú yeⁿe 'iiⁿyāⁿ Israel. Ní dichó'ó yā soldado s'eeⁿ chí caⁿā sa na vácūū chí canguái sa 'iiⁿyāⁿ.

²²Taachi ndáā soldado s'eeⁿ nguéé indaāca sa 'iiⁿyāⁿ s'eeⁿ vácūū tuu'mi ní nguεεcundíí sa ní yaa'vi sa 'iiⁿyāⁿ s'eeⁿ. ²³Ní ngaⁿā sa: Cuaacu ní'nyúⁿ taachí ndaá 'nū, ní nduudí vácūū ní canéé candado, ní 'iiⁿyāⁿ chí snée cuidado vácūū snée yā cheendi

vácūū. Taachí nan'guaaⁿ 'nū mííⁿ, mar 'áámá 'iiⁿyāⁿ nguéé yā cheeti vácūū miiⁿ. ²⁴Taachi chiiduú ch'εεte ca yeⁿe Israel miiⁿ ndúúcū soldado ndííⁿ yeⁿe soldado s'eeⁿ chí idiiⁿ cuidado yaacū templo miiⁿ ndúúcū chiiduú n'gεεte ch'iindiveéⁿ yā nduudu 'cūū, néené nadacadíínuuⁿ yā chí chíi chuū. ²⁵Naati 'áámá 'iiⁿyāⁿ ndaá yā ní chíí yā 'iiⁿyāⁿ s'eeⁿ chuū: Cun'diichí nī, sáⁿā chí s'nuúⁿ nī vácūū miiⁿ yáacū templo snúúⁿ sa. Ní ngi'cuééⁿ sa 'iiⁿyāⁿ yáaⁿ.

²⁶Tuu'mi ní cueⁿé soldado ndíí tíiⁿ yeⁿe soldado s'eeⁿ chí dííⁿ cuidado yeⁿé yáacū ndúúcū soldado s'eeⁿ ní nguéé ndúúcū vaadi caa'va chí nguái yā saⁿā, ti 'va'á yā chí cuíítuū 'iiⁿyāⁿ yáaⁿ miiⁿ. ²⁷Taachi ndéε yā saⁿā s'eeⁿ ní dííⁿ yā presentar saⁿā s'eeⁿ nanááⁿ 'iiⁿntyéⁿe yeⁿe concilio tuu'mi ní chiiduú ch'εεte cá yeⁿe Israel miiⁿ ntiinguunééⁿ yā saⁿā s'eeⁿ.

²⁸Ní ngaⁿa yā saⁿā s'eeⁿ: ¿Áá nguéé caⁿa 'nū chíi 'nū diituú ndís'tií chí nguéé ca'cueéⁿ nī yeⁿe Jesús? Maaⁿ ní 'āā dicutúu ntúuⁿ nī na yáaⁿ Jerusalén ndúúcu nduudu náⁿá yeⁿé nī. Ní neⁿe cu'neéⁿ nī nuuⁿndi nús'uu ndúúcū nuuⁿndi yeⁿé vaadi n'gii yeⁿé sáⁿa 'cūū. ²⁹Nanguεεcútaⁿā Pedro ndúúcū apóstoles ní caⁿa yā: Caneé chí dííⁿ 'nū o cu'téenu 'nū yeⁿé Dendyuūs vmnááⁿ vmnaaⁿ chí 'cuiinu ní cu'téenu 'nū yeⁿé saⁿā iⁿ'yeeⁿdí 'cūū. ³⁰Dendyuūs yeⁿé chíida yú nadācuééⁿ yā Jesús. Ní ndís'tií ní ch'iiⁿnúⁿ nī 'iiⁿyāⁿ ní dicuái nī 'iiⁿyāⁿ ná 'áámá yáⁿá. ³¹Ndyuūs nadicuééⁿ yā Jesús lado yeⁿe honor. Ní chí'nééⁿ yā 'iiⁿyāⁿ chí

ch'εete ní Salvador chi nadach'εecu Jesús 'iiⁿyāⁿ yeⁿē nuuⁿndi yeⁿé yā. Ní chuū ní caávā chí Jesús ca'a yā 'iiⁿyāⁿ Israel chi cuuvi ndaacadáámí yā yeⁿē nuuⁿndí yeⁿé yā. Níícú Dendyuūs nadach'εecu yā nuuⁿndi yeⁿé yā. ³²Níícú nús'uū ní testigo 'nū yeⁿé yā yeⁿe cosa 'cūū ndúúcu Espírítu N'dai yeⁿe Ndyuūs. Dendyuūs miiⁿ ca'a yā Espírítu N'dai miiⁿ 'iiⁿyāⁿ chi ch'iindiveéⁿ yā yeⁿé yā.

³³Taachí 'iiⁿyāⁿ s'eeⁿ ch'iindiveéⁿ yā chuū neené nduuví taáⁿ yā ní neⁿe 'caaⁿnúⁿ yā saⁿ'ā s'eeⁿ. ³⁴Tuuⁿmi ní nguaaⁿ 'iiⁿntyéⁿē yeⁿe concilio ncueeⁿ 'áámá saⁿ'ā yeⁿé 'iiⁿyāⁿ fariseo s'eeⁿ chi nguuví sa Gamaliel, chi saⁿ'ā chí déénú taavi yeⁿē ley. Saⁿ'ā miiⁿ 'áámá sá chí neené induuví 'iiⁿyāⁿ yááⁿ sáⁿ'ā. Caⁿ'a ntiíⁿnyuⁿ sa chí can'daa apóstoles chí dichólo Ndyuūs ch'ua'ái miiⁿ 'áámá rato 'lííⁿ. ³⁵Tuuⁿmi ní caⁿ'a sa: Ndís'tií, 'iiⁿyāⁿ Israel, cuin'dííchí ní chí dííⁿ ní ndúúcu sáⁿ'a s'eeⁿ. ³⁶Caati nguuví chí 'āā chó'oo nācueeⁿ saⁿ'ā chí nguuví Teudas chí caⁿ'a sá 'iiⁿyāⁿ chí 'áámá 'iiⁿyāⁿ ch'εete. Ní nduuvídaamá 'iiⁿyāⁿ ndúúcu saⁿ'ā miiⁿ tan'dúúca cuuⁿ ciento 'iiⁿyāⁿ. Sáⁿ'a 'cūū ní ch'ii sa, ní 'iiⁿyāⁿ chí ch'iindiveéⁿ yā yeⁿē sa, tuunu tuunu ca na vaacú yā cuináⁿ yā. Mar 'áámá yā 'āā ntéé ch'εetinéé yā. ³⁷Chó'oo chúú ní nācueeⁿ Judas, saⁿ'ā yeⁿē yáⁿ'āa Galilea taachí nduuví duuché 'iiⁿyāⁿ. Ní neené 'yaaⁿ 'iiⁿyāⁿ n'dáa yā saⁿ'ā. Saⁿ'ā miiⁿ ní ch'ii ntúuⁿ sa ní nducyaaca 'iiⁿyāⁿ chí ch'iindiveéⁿ yā cueⁿe 'múúⁿ cueⁿe miiⁿ yā. ³⁸Maaⁿ ní ngaⁿ'á

ngii ndís'tií: Cuvííⁿ ní yeⁿē sáⁿ'ā s'eeⁿ. Ní 'āā snée ra sa ti ndúúti chí consejo 'cūū o ntiíⁿnyuⁿ 'cūū yeⁿe saⁿ'ā iⁿ'yeeⁿdí 'cūū tuuⁿmi ní nguéé de'ē vεε dichí'vε. ³⁹Nguéé cuuvi dííⁿ ní chí nadituuví ní chuū ndúúti chí yeⁿe Dendyuūs ní nguéé dííⁿ ní chí cuuví cuuⁿmáⁿ ní ndúúcu Dendyuūs.

⁴⁰Canee yiínú yā chí caⁿ'a sa. Ní 'cai yā apóstoles chí dichólo Dendyuūs ní cheⁿ'é yā saⁿ'ā s'eeⁿ. Ní yaaⁿvi yuudu yā saⁿ'ā s'eeⁿ chí nguéé caaⁿ'maⁿ sa yeⁿe Jesús miiⁿ. Ní n'dεεchí yā saⁿ'ā s'eeⁿ. ⁴¹Saⁿ'ā s'eeⁿ ní nan'dáa sa nguaaⁿ 'iiⁿyāⁿ concilio s'eeⁿ, ní yeenú taaví sa caati Dendyuūs 'cuúⁿ yā chí ch'εenu sa chíi cucáávā Jesús. ⁴²Nguéé i'neeⁿ naaⁿ yā chí ndii ngi'cueeⁿ yā, ní ngaⁿ'a yā yeⁿe Jesucristo miiⁿ ch'εeti yáacú templo ndúúcu ná vaacú 'iiⁿyāⁿ nguuví nguuví.

Dííⁿ yā votar ndeēchē sáⁿ'ā diáconos

6 Nguuvi miiⁿ chí'yááⁿ 'iiⁿyāⁿ s'eeⁿ chí i'téenu yā Jesús. Ch'iindiveéⁿ yā nduudú vaadi caaⁿ'va nguáaⁿ yā. 'Iiⁿyāⁿ s'eeⁿ chí griego yā caⁿ'a yā chí 'iiⁿyāⁿ Israel s'eeⁿ nguéé dííⁿ yā cuenta ndii nguεe ca'á yā nguuví nguuví n'dáátaa ngu'áā chí cuta'lá tá ch'εε chí ch'ē tá. ²Tuuⁿmi ní ndiichúúví apóstoles nadidaama yā nducyáácá 'iiⁿyāⁿ chí i'téenu yā Jesús, ní caⁿ'a yā: Nguéé n'daacā chí cu'neeⁿ 'nū chí caaⁿ'máⁿ 'nū yeⁿē nduudu yeⁿe Dendyuūs ní ca'á 'nū chí che'é 'iiⁿyāⁿ. ³Ndís'tií hermanos, in'nuúⁿ ní nguaaⁿ s'uuúⁿ ndeēchē saⁿ'ā chí n'daacā vida yeⁿe yā ní chí diítú yā ndúúcu Espírítu N'dai yeⁿe Ndyuūs ndúúcu vaadi cadínūⁿ.

Saⁿā s'eeⁿ ca^ā yú ntíⁿnyúⁿ 'cūū saⁿā. ⁴Ní nús'uū 'cuētinée 'nū caaⁿmaⁿngua^á 'nū ní 'cuētinée 'nū lado yeⁿē chi caaⁿmaⁿ 'nū nduudu yeⁿe Dendyuūs.

⁵Nducyáacá yā ní canee yiinú yā chuū. Ní dííⁿ yā votar Esteban saⁿā chi i'teenu taavi ní ndiituú ndúúcu Espíritu N'dai yeⁿe Ndyuūs, ndúúcu Felipe, ndúúcu Prócoro, ndúúcu Nicanor, ndúúcu Timón, ndúúcu Parmenas, ndúúcu Nicolás 'aama chi i'teenu yeⁿe yáāⁿ Antioquía ní maaⁿ ní 'āā saⁿā Israel.

⁶Nducyaacá yā chi'néeⁿ yā saⁿā s'eeⁿ ní cueⁿe sa nanááⁿ apóstoles chi dichóó Dendyuūs. Ní cuayíví chi caⁿangua^á yā tuu'mi ní sn'dúu yā ta'á yā vmnááⁿ yeⁿe saⁿā s'eeⁿ cáávā ntiíⁿnyūⁿ chí ca'la yā saⁿā.

⁷Níicú chií 'yaaⁿ 'iiⁿyāⁿ chí chi'teenú yā nduudu yeⁿe Dendyuūs miiⁿ. Ní 'iicu 'iiⁿyāⁿ s'eeⁿ chí i'teenú yā Jesús neené chii 'yaaⁿ taavi sá ná yáāⁿ Jerusalén. Neené 'yáāⁿ chiiduú s'úúⁿ yeⁿe Israel chí'téenu yā tan'dúúca chi 'iiⁿyāⁿ s'eeⁿ chí'téenu yā.

Sta'á yā Esteban

⁸Esteban miiⁿ ní 'áamá 'iiⁿyāⁿ chí i'teenú taavi yā níicú chi diitú yā ndúúcu poder. Ní neene n'gēete vaadi n'giinu ndúúcu señales dííⁿ yā nguaaⁿ 'iiⁿyāⁿ yáāⁿ. ⁹Tuu'mi ní tanáⁿā 'iiⁿyāⁿ chí caⁿá yā yaacū sinagoga yeⁿe yáāⁿ yeⁿe yā 'iiⁿyāⁿ chí nguuví Libertos, ndúúcu 'iiⁿyāⁿ yeⁿe yáāⁿ Cirene, ndúúcu 'iiⁿyāⁿ yeⁿe yáāⁿ Alejandría, ndúúcu dendu'ū 'iiⁿyāⁿ yeⁿe yáⁿāa Cilicia, ndúúcu 'iiⁿyāⁿ yeⁿe yáāⁿ Asia, 'iiⁿyāⁿ s'eeⁿ ch'ēcu cheendí yā

ndúúcu Esteban. ¹⁰Naati nguéé chí chéé yā ndúúcu Esteban cáávā vaadi deenu yeⁿe yā ndúúcu chii Espíritu N'dai yeⁿe Ndyuūs caⁿa chí caaⁿmaⁿ Esteban. ¹¹Tuu'mi ní n'de'ei n'de'ei caⁿa yā chí yā náⁿā 'iiⁿyāⁿ chí caaⁿmaⁿ yā chí 'āā n'giindiveéⁿ yā chí Esteban miiⁿ caⁿa yuudu yā contra Moisés ndúúcu Dendyuūs.

¹²'iiⁿyāⁿ s'eeⁿ ní chicadiinuⁿ yā chí nducyaaca 'iiⁿyāⁿ yeⁿe yáāⁿ miiⁿ ní néené ch'ēcu cheendí yā ní ndástaⁿa vaadi cadiinúúⁿ yeⁿe 'iiⁿyāⁿ ndicúú ndúúcu maestros yeⁿe ley. Ní nducyáacá 'iiⁿyāⁿ s'eeⁿ ndaacá yā Esteban, ní sta'á yā 'iiⁿyāⁿ, ní ndéé yā nanááⁿ 'iiⁿntyéⁿe concilio. ¹³Ní 'hēē yā testigos chí ngaⁿa nduudu yaadi ní ngaⁿa sa: Esteban 'cūū ní nguéé 'nēēⁿnaaⁿ sa chí ngaⁿa taaⁿ sá yeⁿe lugar 'cūū yeⁿe Dendyuūs ní contra yeⁿe ley.

¹⁴N'giindiveéⁿ 'nū chí ngaⁿa sa chí Jesús miiⁿ yeⁿe yáāⁿ Nazaret nadatuuví yā lugar 'cūū ní n'daáⁿ yā costumbre chí teē Moisés s'uúúⁿ.

¹⁵Tuu'mi ní nducyaacá 'iiⁿntyéⁿe concilio veetē yā ní n'diichí yā saⁿā miiⁿ. N'diichí yā naaⁿ sa tan'dúúca naaⁿ ángel chí saⁿā yeⁿe va'ai chēeti nguuvi chí dííⁿ ntiíⁿnyuⁿ yeⁿe Ndyuūs.

Esteban caⁿá yā yeⁿe mááⁿ yā nī chíi yā

7 Tuu'mi ní ngaⁿā chiiduú ch'ēte cá miiⁿ yeⁿe Israel: 'Áá 'tíicā chuū? ²Ní Esteban miiⁿ ní ngaⁿā sa: Ndís'tii saⁿā ví'í ndúúcu chiida yú s'tii, 'caandiveéⁿ nī yeⁿe 'úú: Chiida yú Abraham n'diichí yā Ndyuūs chí dēeve taavi ca taachi canée yā na yáⁿā Mesopotamia taachí 'āā cuéé

cuneé yā na yāāⁿ Harán. ³Ní Ndyuūs caⁿa yā chiī yā 'iiⁿyāⁿ: Can'dáa di yeⁿē yāāⁿ vaacú di ndúúcū yeⁿē 'iiⁿyāⁿ yeⁿē di, ní cuchii di na yāⁿāa chi 'cuuⁿmíⁿ dii. ⁴Tuu'mi ní Abraham miiⁿ nan'dáa yā yeⁿē ná yāⁿāa yeⁿe 'iiⁿyāⁿ s'eeⁿ yeⁿe yāⁿāa Caldea ní canée yā na yāāⁿ Harán. Cuayiivi chi ch'iī chiidá yā, tuu'mi ní Ndyuūs nadach'óo yā 'iiⁿyāⁿ miiⁿ ná yāⁿāa 'cūū naachi snée ndís'tiī maaⁿ. ⁵Tiempo miiⁿ Ndyuūs nguéeⁿ ca'a yā Abraham de'ē vee chi cuuvi yeⁿé yā yeⁿe na yāⁿāa miiⁿ, mar 'aama naachi 'canca'á yā naati caⁿa Ndyuūs chi ca'á yā cuayiivi yāⁿāa 'cūū chi yeⁿē Abraham, ní yeⁿē daiyá yā chi cuchiiica ndíi cuayiivi ca taachi 'āā cuéeⁿ daiya yā. ⁶Ní Ndyuūs ní 'túúcā caⁿa yā chii yā: Daiyá ní chi cuchii ní 'iiⁿyāⁿ chi snúúⁿ yúúni caⁿá yā yāāⁿ vaacú 'iiⁿyāⁿ. Ní 'iiⁿyāⁿ yāⁿāa miiⁿ ní cuta'á yā daiyá yā chi dichí'íve 'iiⁿyāⁿ yāⁿāa miiⁿ. Ní 'iiⁿyāⁿ yāⁿāa miiⁿ ní nguéeⁿ n'daacā ti 'cueenu yā cuuvi cheeti cuūuⁿ ciento nduūyū. ⁷Tuu'mí caⁿa Ndyuūs: 'Úú ca'á castigo 'iiⁿyāⁿ na yāⁿāa chi cuuví yā mozos yeⁿe yāⁿāa miiⁿ. Ní cuayiivi chi chó'oo chūū, ní nan'dáa yā. Níicú cu'téenu yā 'úú na lugar 'cūū ní díⁿ yā cheē chi neⁿé. ⁸Ní Ndyuūs díⁿ yā 'áámá compromiso yeⁿē circuncisión ndúúcū Abraham. Circuncisión miiⁿ 'áámá señal chi 'caacá yā na cuerpo. Ní Abraham miiⁿ véé daiyá yā chi nguuvi Isaac, ní díⁿ yā circuncidar daiyá yā Isaac nguuvi chi niini nguuvi sa. 'Tiicá ntúúⁿ Isaac ndúúcū daiyá yā Jacob, ní Jacob ndúúcū ndichúúvi daiyá yā chi saⁿā patriarcas chi chiida yú s'eeⁿ.

⁹Ní chiida yú s'eeⁿ chinn'gueé yā yeⁿe 'díinu yā José. Ní n'diicui yā 'díinu yā José miiⁿ na 'iiⁿyāⁿ yeⁿe yāⁿāa Egipto. Ní cueⁿē José na yāⁿāa Egipto naati Dendyuūs canée yā ndúúcu yā. ¹⁰Dendyuūs nadanguáⁿai yā saⁿā yeⁿe tanducueⁿē chi cheenu sa chiī na yāⁿāa Egipto. Ní Dendyuūs díⁿ yā chi rey Faraón yeⁿe yāⁿāa Egipto n'diichí yā José chí saⁿā n'dai ní saⁿā chi déenu taavi ndúúcū taanduvéé vaadí deenu chí ca'a Dendyuūs. Ní cucáávā chuū rey Faraón chi'neeⁿ yā José lado yeⁿe gobernador nanááⁿ yeⁿē yán'āa Egipto ndúúcū taanduvéé chi véé na vaacú yā.

¹¹Ndaā cuiicú ní nuuⁿmáⁿ na yāⁿāa Egipto ndúúcū yāⁿāa Canaán, ní ncheenu n'dái yā chii. Chiida yú s'eeⁿ ní nguéeⁿ índaāca yā chi che'e yā. ¹²Taachí ch'iindiveeⁿ Jacob miiⁿ chi véé trigo ná yāⁿāa Egipto, dich'óo yā daiyá yā chi chiida yú s'eeⁿ ndíi vmnááⁿ vmaaaⁿ ní cueⁿé yā 'áámá viaje. ¹³Ndiichi ndii 'úúví viaje ntiinaaⁿ sá chi José miiⁿ ní 'diinū sa cáávā chi José ch'iⁿi maāⁿ sa chi 'diinū sa. Tuu'mi ní rey Faraón miiⁿ ní n'diichí yā ti 'iiⁿyāⁿ yeⁿē José saⁿā s'eeⁿ. ¹⁴José miiⁿ ní diiⁿ sa chí ndaā chiidá sa Jacob ndúúcū nducyaaca 'iiⁿyāⁿ yeⁿē sa. 'Iiⁿyāⁿ yeⁿē sa ní ngii yā 'iiⁿnūⁿ ngæecu ndítiiⁿyu yā. ¹⁵Tíicā cueⁿē Jacob na yāⁿāa Egipto naachi ch'íi yā ndúúcū chiida yú s'eeⁿ. ¹⁶Ní cuerpo yeⁿē tináⁿā s'eeⁿ candée yā 'iiⁿyāⁿ na yāāⁿ Siquem ní ch'iichí yā 'iiⁿyāⁿ na yáinyāⁿ chi caí Abraham. Abraham miiⁿ ní ndúúcū túumi yeⁿé yā caí yā yāⁿāa miiⁿ na yāāⁿ

Siquem yeⁿē daiya saⁿā s'eeⁿ Hamor yeⁿē yáāⁿ Siquem miiⁿ.

¹⁷Ní taachi 'āā snee niiⁿnuúⁿ nguuví chi Dendyuūs dííⁿ yā chi cā'a yā chii yā Abraham, ch'iitá 'iiⁿyāⁿ Israel ní chii 'yáaⁿ yā na yáⁿāa Egipto. ¹⁸Ní nducueēēⁿ táámá rey na yáⁿāa Egipto chi nguéé in'diichí yā José. ¹⁹Ní rey miiⁿ ní nguéé n'daacā dííⁿ sa ndúúcu ndaata yeⁿe yú ndúúcu chiida yú s'eeⁿ. Ní chí cu'neeⁿ sa daiyá yā na peligro chi 'cuūvī. Ní nguéé cuuvi 'yáaⁿ yā. ²⁰Tiempo miiⁿ ní ch'iindiyáāⁿ Moisés, ní Ndyuūs n'diichí yā saⁿā 'lííⁿ chí n'daacā sa. Ch'iita sá na vaacu chiida sa 'iiⁿnuⁿ 'iiyū taaví yā saⁿā. ²¹Ní taachí chiida Moisés chí cu'néēⁿ yā saⁿa 'lííⁿ na peligro chí 'cuūvī sa, tuu'mi ní táⁿā díí daiya rey Faraón chinguāí tá saⁿā 'lííⁿ ní taaví tá saⁿā tan'dúúca 'áámá daiya tá. ²²Ní Moisés miiⁿ ní ch'eēⁿ sa yeⁿē taanduvéé vaadí deenu yeⁿē yáⁿāa Egipto. Ní diitinú taavi sa ndúúcu nduudu yeⁿē sa ndúúcu ntiiⁿnyuⁿ yeⁿē sa.

²³Taachi chii sá 'uuvi ngeecu ndúuyū, nacádiinuuⁿ sa na staava yeⁿē sa chí caⁿa sa n'diichi sa 'iiⁿyāⁿ yeⁿē sa chí saⁿā Israel miiⁿ. ²⁴Taachí n'diichí yā 'áámá saⁿa yeⁿē yáⁿāa Egipto chí ngeecu n'daacā idiiⁿ sa ndúúcu 'áámá 'iiⁿyāⁿ yeⁿē ndaata yeⁿé yā, Moisés miiⁿ ní dííⁿ yā nadanguáⁿai yā 'iiⁿyāⁿ. Ní ch'eⁿe ca yā ní 'nuucáⁿai yā saⁿā Egipto 'cūū ní ch'ii sa. ²⁵Moisés miiⁿ nacadíinuuⁿ sa chí 'iiⁿyāⁿ yeⁿē sa tuumicadiinúúⁿ yā chí Dendyuūs caⁿá yā ca'a yā libertad 'iiⁿyāⁿ s'eeⁿ cáávā taā sa. 'Iiⁿyāⁿ s'eeⁿ ní nguéé tuumicadiinúúⁿ yā

chí 'tíicā. ²⁶Táámá nguuvi miiⁿ ní Moisés cueⁿē sa naachí nguⁿu 'iiⁿyāⁿ yeⁿē sa. Neⁿe sa chí ntun'dáá n'dai yā ndúúcu paz. Ní ngaⁿa sa ngii sa 'iiⁿyāⁿ: Ndís'tii saⁿā 'diinú, nguéé 'cuuⁿmáⁿ ní, 'de'e cáávā chí nguⁿu ní ndúúcu ví'í? ²⁷'Áámá saⁿā Israel chí n'geⁿe ví'í miiⁿ chingúúⁿ ndaā sa Moisés ní nadivíi sa 'iiⁿyāⁿ 'áámá lado ní ngaⁿa sá ngii sa 'iiⁿyāⁿ: 'Du'ú s'neeⁿ n'dii tan'dúúca 'iiⁿntyéⁿē o juez nanááⁿ nús'uú? ²⁸'Áá neⁿē ní 'caāⁿnuⁿ ní 'úú tan'dúúca chí ch'iiⁿnuⁿ ní saⁿā yeⁿe yáⁿāa Egipto 'iicu? ²⁹Tááchí Moisés ch'iindiveéⁿ yā nduudú 'cūū, chéenu yā ní chindaa sa na yáⁿāa Madián. Cánéé yā tan'dúúca 'áámá sáⁿā canuuⁿ yúúní. Ní ch'iindí na 'uūvī daiyá yā.

³⁰Cho'ōo 'úúvi ngeecu ndúuyū, ní 'áámá ángel che'enaáⁿ yā yeⁿē Moisés ní 'cai yā 'iiⁿyāⁿ naachi ngiichi yaⁿa 'lííⁿ na yiicú 'lííⁿ chí nguuvi Sinaí. ³¹Moisés miiⁿ n'diichí yā ní cueⁿē yíinu yā yeⁿē chí n'diichi yā miiⁿ. Ndaa niiⁿnúⁿ yā chí cuuvi n'diichi yā. Saⁿā miiⁿ ch'iindiveéⁿ yā nduudu yeⁿē Dendyuūs miiⁿ chí ngaⁿā: ³²'Úú Ndyuūs yeⁿē chiidá ní s'eeⁿ, Ndyuūs yeⁿē Abraham, Ndyuūs yeⁿe Isaac, ní Ndyuūs yeⁿe Jacob. Moisés miiⁿ ní nééné dii'yá yā chí ndíí 'āā ntéé nēⁿe yā n'diichi yā. ³³Ní caⁿa Señor Ndyuūs chí yā 'iiⁿyāⁿ: Tun'dáá ca'a di ndaacuú yeⁿē di caati naachi canéé dí chí chéendii di nanááⁿ Dendyuūs. ³⁴Cuaacu nííⁿnyuⁿ chí n'diichí chí ch'eēnu taavi chí 'iiⁿyāⁿ yeⁿé chí snéé yā yáⁿāa Egipto. N'giindiveéⁿ chí n'gai ya'ái yā. Ní caⁿá chí nadinguaⁿái 'iiⁿyāⁿ. Maaⁿ

ní cuchíi di. 'Úú dicho'ó dii na yáⁿaa Egipto.

³⁵Moisés miiⁿ ní 'iiⁿyāⁿ chi saⁿa diiⁿ sa chi cheenú yā chuva'āi yáⁿaa miiⁿ taachi caⁿa sa: ¿Dú'ú s'neeⁿ n'dií tan'dúúcā 'iiⁿntyéⁿe o juez? Maaⁿ ní Moisés miiⁿ Ndyuūs dichó'o yā chi cuuví yā saⁿa ntyéⁿē, ní nadinguáⁿai yā 'iiⁿyāⁿ. Dendyuūs diiⁿ yā chi canéé Moisés ndúúcū nduudu yeⁿé yā cucáávā ángel chí che'enaáⁿ yā yeⁿe Moisés na yáⁿá 'lííⁿ. ³⁶Moisés cuayiivi taachi diiⁿ yā vaadi n'gíínú ndúúcū señales na yáⁿaa Egipto, na nuūⁿníⁿyáⁿā chi nguuví Cuá'ā, ní na yáⁿaa cuuⁿmáⁿ chεeti 'uuví ngeεcu ndúuyū, ní tun'dáa yā 'iiⁿyāⁿ. ³⁷Moisés miiⁿ chiiⁿ chí ngāⁿa yā ngíi yā 'iiⁿyāⁿ Israel: Señor Dendyuūs yeⁿē yú caⁿá yā s'neeⁿ yā profeta chí caaⁿmaⁿ nduudu yeⁿé yā nguaaⁿ vi'i yú. 'Iiⁿyāⁿ miiⁿ tan'dúúcā 'úú. Ní 'caandiveéⁿ nī yeⁿē 'iiⁿyāⁿ profeta miiⁿ. ³⁸Sáⁿa 'cūū Moisés 'cūū chí canee sa naati nduuvídaamá yā na yáⁿaa cuūⁿmáⁿ ndúúcū ángel chí yaaⁿvi yā saⁿā na yiicū chí nguuví Sinaí, ní canee sa ndúúcū chiida yú. Ní Dendyuūs ca'á yā nduudu yeⁿē vida chí tee sa s'uuúⁿ. ³⁹Chiida yú ní nguéé ch'iindiveéⁿ yā yeⁿē Moisés miiⁿ ní chí'neéⁿ yā saⁿā 'áámá lado, ní divíi yā vaanicadínuuⁿ yeⁿe yā, ní neⁿé yā nanguεεcúndíi yā yáⁿaa Egipto. ⁴⁰Ní caⁿá yā chii yā Aarón 'iiⁿyāⁿ chí chiida yú: Din'dái nī nús'uu dendyuūs s'eeⁿ chí cuuví caⁿa yā vmnááⁿ yeⁿe yú caati Moisés 'cūū chí tun'dáa sa nús'uu yeⁿē yáⁿaa Egipto, nguéé deenu yú dε'ē chíí ndúúcū sa. ⁴¹Tuu'mi ní din'dái

yā 'áámá ídolo 'itiindu 'lííⁿ yeⁿe 'dííⁿnguāaⁿ chí n'duúⁿ yā 'iiti nátaí ní 'caaⁿnuⁿ yā 'iiti cuúchí 'lííⁿ ní ca'a yā ídolo miiⁿ tan'dúúcā sacrificio. Ní yeenú taaví yā caavā ntiíⁿnyuⁿ yeⁿē ta'á saⁿā s'eeⁿ. ⁴²Níícú Ndyuūs chivíi yā yeⁿe 'iiⁿyāⁿ s'eeⁿ. Ní chí'neéⁿ yā 'iiⁿyāⁿ s'eeⁿ chí i'teenú yā tanducuéⁿē cosa chí véé nanguuvi tan'dúúcā 'yáⁿā ndúúcū 'iíyū, ndúúcū 'ííⁿnyúⁿ. 'Tíícá canee nguúⁿ na libro yeⁿe Ndyuūs naachi nguúⁿ profetas:

N'dií 'iiⁿyāⁿ Israel miiⁿ, ¿'áá tee nī 'úú 'iiti sacrificio chí 'āá 'nííⁿnúⁿ nī ndúúcū dendú'ú na yaⁿaa cuuⁿmáⁿ chεeti 'uuví ngeεcu ndúuyū?

⁴³Nguéé de'ē vεε tee nī 'úú. Candée nī yaācū tíínūuⁿ yeⁿē ídolo Moloc, ndúúcū 'ííⁿnyúⁿ yeⁿe ndyuūs yeⁿé nī chí nguuví Renfán, ndúúcū cosa chuū chííⁿ chí din'dái nī chí cu'téenu nī. Níícú 'úú dichó'ó ndis'tií táámá lado yeⁿe yáⁿaa Babilonia.

⁴⁴Chiida yú s'eeⁿ ní canéé yeⁿé yā na yáacū tiinūuⁿ yeⁿé Ndyuūs chí caⁿā nduucú yā na yáⁿaa cuuⁿmáⁿ. Ní caⁿa Ndyuūs chíi yā Moisés miiⁿ chí din'dái sa yáacū tiinūuⁿ tan'dúúcā chí n'diichi sa. ⁴⁵Chííⁿ yáacū tiinūuⁿ miiⁿ ní sta'a chiida yú s'eeⁿ ní candée yā ndúúcū Josué tiempo miiⁿ taachi sta'á yā yáⁿaa yeⁿe 'iiⁿyāⁿ chí nguéé 'iiⁿyāⁿ yeⁿe ndaata Israel. Ndyuūs nadacaanú yā 'iiⁿyāⁿ s'eeⁿ chí nguéé 'iiⁿyāⁿ yéⁿē ndaata Israel nanááⁿ chiida yú s'eeⁿ. Ní yaācu tíínūuⁿ snee ndúúcū yā ndii nguuví yeⁿē David miiⁿ. ⁴⁶David miiⁿ nandaāca sa

favor nanááⁿ Dendyuūs ní chiica sa chi din'dái sa yaācū ch'ēete yeⁿé Ndyuūs chi i'téénú Jacob miiⁿ. ⁴⁷Salomón nídín'dái sa yaācū ch'ēete yeⁿe Dendyuūs. ⁴⁸Naati Ndyuūs chi canée yā na va'ai chēeti nguuví, nguée canée yā na yaācu chi din'dái 'iiⁿyāⁿ ndúúcu ta'á yā, ti tan'dúúca chi ngaⁿā profeta nduudu Dendyuūs tiempo chi chó'oo:

⁴⁹Nángúúví miiⁿ chí tan'dúúca trono yeⁿé, ní yáⁿāa miiⁿ ní tan'dúúca banco yeⁿe ca'á. ¿D'éé va'āi idin'dái dí yeⁿé? ngaⁿa Señor 'iivú Ndyuūs. O ¿de'e lugar chi ntaavi/tuūnuúⁿ?

⁵⁰¿Áá nguée 'úú din'dái ndúúcu ta'á tanducuéⁿe dendu'ú?

⁵¹Chéechí tíiⁿ nī ní chēechí staava yeⁿé nī ní nduudí veéⁿ nī. Ndís'tií ní nguée díiⁿ díveéⁿ nī yeⁿe Espíritu N'dai yeⁿe Ndyuūs cueⁿe daāⁿmaⁿ. Tan'dúúca chiidá nī 'tiica ntúúⁿ ndís'tií. ⁵²¿Du'u profeta chi caⁿa nduudu yeⁿe Dendyuūs chi chiidá nī nguée can'dáa yā chi ya'ái yā 'iiⁿyāⁿ? Ní ch'i'iiⁿnuⁿ yā 'iiⁿyāⁿ chi caⁿa yā vmnááⁿ vmnaaⁿ chi cuchii 'iiⁿyāⁿ chi n'dai taavi. Ní 'iiⁿyāⁿ miiⁿ chi n'dai taavi ndís'tií ní sta'á nī 'iiⁿyāⁿ nī ch'i'iiⁿnúⁿ yā 'iiⁿyāⁿ. ⁵³Ndís'tií ní sta'á nī ley chí tee ángeles ní nguée díiⁿ nī cumplír.

⁵⁴Taachi ch'iindiveeⁿ saⁿā s'uuⁿ chuū chi caⁿa Esteban nduuví taaⁿ n'dái sa na staava yeⁿe sa ní ndiitunuúⁿ ng'éé 'diiⁿyuⁿ sa contra yeⁿe Esteban. ⁵⁵Naati Esteban miiⁿ ndiitu Espíritu N'dai yeⁿe Ndyuūs che'enaáⁿ yā nanguuvi ní n'diichi yā Dendyuūs chi neené ngii 'yáⁿā ní n'diichi yā Jesús miiⁿ chi canée yā lado yeⁿe honor yeⁿe Dendyuūs.

⁵⁶Tuu'mi ní Esteban caⁿa yā: Cuin'díichí nī, inaáⁿ nanguuvi canda'āi 'íicú Daiyá Dendyuūs canée lado yeⁿe honor yeⁿe Dendyuūs. ⁵⁷Tuu'mi ní 'iiⁿyāⁿ s'eeⁿ ní 'caí yiicú yā ní n'gaadí yā veéⁿ yā ní tanducuéⁿe yā ndaá yā nanááⁿ Esteban. ⁵⁸Ní tun'dáa yā saⁿā yáāⁿ miiⁿ ní chíítuú yā saⁿā. Ní 'iiⁿyāⁿ testigos s'neéⁿ yā cotón ná ca'a 'áamá saⁿā 'díiⁿ chi nguuvi Saulo. ⁵⁹Tuu'mi ní nga'a yā tuū Esteban. 'Iicu Esteban miiⁿ ní 'caí sá Ndyuūs ní ngaⁿā sa: Señor Jesús, nánguái nī espíritu yeⁿé.

⁶⁰Chiintii'ya sá ní 'caí yiicu sá: Señor, nguée díiⁿ cuenta nī núúⁿndí cūú yeⁿe 'iis'tií. Ní taachi caⁿā sa chuū, ní ch'ií sa.

Saulo díiⁿ sa chi 'iiⁿyāⁿ yeⁿe yaācū chéenu yā

8 Ní Saulo miiⁿ canee yiinú sa chi 'cuūví Esteban miiⁿ. Nguuvi miiⁿ n'dee n'dái 'iiⁿyāⁿ ní nduuví taáⁿ yā yeⁿe 'iiⁿyāⁿ ná yáacū chi canée yáāⁿ Jerusalén nī nducyaaca yā chi i'teenu Jesús cueⁿe 'muuⁿ cueⁿé miiⁿyā. Chéenu yā cuaaⁿ na yáⁿāa Judea ndúúcu yáⁿāa Samaria. Dámaaⁿ apóstoles chí dichó'ó Dendyuūs nguēe chéenu yā. ²Saⁿā s'eeⁿ chí n'dai nanááⁿ Dendyuūs candée sa Esteban. Ní ch'iichi sá 'iiⁿyāⁿ ní chēecu taavi sá yēⁿe yā. ³Saulo miiⁿ ní can'dáa sa 'iiⁿyāⁿ chí ngeⁿe yaācū chí n'nuūⁿ cá'ái sa 'iiⁿyāⁿ. Cheⁿe sa ndúú va'ai nduu vā'āi ní candée sa 'iiⁿyāⁿ ndí n'daataá ndí saⁿā. Ní ng'í sa 'iiⁿyāⁿ vácūú.

Caⁿa yā ndúúdu ngai na yáāⁿ Samaria

⁴'Iiⁿyāⁿ chí chéenu miiⁿ cheⁿé yā nduu yáāⁿ nduu yáāⁿ ní caⁿa

yā ndúúdu ngai yeⁿe Jesucristo chi evangelio. ⁵Tuu'mi ní Felipe miiⁿ can'dáa sa na yáaⁿ Samaria ní ngaⁿa sa yeⁿe Cristo. ⁶Ní nducyáácá 'iiⁿyāⁿ ch'iindiveéⁿ niiⁿnyúⁿ yā de'e ndu'ū chi ngaⁿā Felipe miiⁿ. Ch'iindiveéⁿ yā ní inaaⁿ yā señales chiiⁿ idiiⁿ sa. ⁷Neené 'yaaⁿ 'iiⁿyāⁿ chí snée yā ndúúcu 'yúúné chi espíritus chi nguε n'daacā yeⁿe yááⁿnguiinūⁿ taachi can'daa 'yúúné na cuerpo yeⁿe yā neéné 'cai espíritus. Ní neené 'yaaⁿ 'iiⁿyāⁿ ndúúcu ca'āi chi in'dúuví cuerpo yeⁿe yā ndúúcu 'iiⁿyāⁿ chi nguée ngíca ní nducyaacá yā nanduūvā yeⁿe yā. ⁸Iiⁿyāⁿ yeⁿe yáaⁿ miiⁿ ní yeenú taaví yā.

⁹Cánée 'áamá saⁿā chi nguuvi Simón chi déénu sa magia chi cuaaⁿ vmnaaⁿ neené diiⁿ sa na yáaⁿ miiⁿ. Ní nginnche'ei sá 'iiⁿyāⁿ na yáaⁿ Samaria. Ngaⁿā sá ngii sa 'iiⁿyāⁿ chi ch'εεte sa. ¹⁰Chi'neeⁿ veeⁿ ndii n'gaiyāa ndii n'geete yā 'iiⁿyāⁿ miiⁿ. 'Iiⁿyāⁿ s'eeⁿ ní caⁿá yā: Chuū poder ch'εεte yeⁿe Dendyuūs.

¹¹Ní s'neeⁿ veéⁿ yā yeⁿe sa ti ndúúcu artes magias yeⁿe sa neené 'nááⁿ chinnche'ei sá 'iiⁿyāⁿ. ¹²Taachi 'iiⁿyāⁿ s'eeⁿ chi'téenu yā yeⁿe Felipe miiⁿ chi ngaⁿá yā ndúúdu ngai yeⁿe chi Ndyuūs ngaⁿá yā ntiⁿnyuⁿ ní yeⁿe ndúúdu ngaí yeⁿe Jesucristo miiⁿ, tuu'mí chēēdinúⁿnīⁿ ndii n'daataá ndii sáⁿā 'iiⁿyāⁿ. ¹³S'teenú ntúúⁿ Simón. Chēēdinúⁿnīⁿ sa. 'Áamá cānee sa ndúúcu Felipe. Taachi n'diichi sa señales ndúúcu vaadi n'giinu ch'εεte chi diiⁿ Felipe miiⁿ tuu'mi ní cheⁿe yiinu sá.

¹⁴Taachi ch'iindiveéⁿ apóstoles chi dich'ó Dendyuūs chí snée yā

yáaⁿ Jerusalén chi 'iiⁿyāⁿ yeⁿe yáaⁿ Samaria i'téenu yā nduudú yeⁿe Dendyuūs miiⁿ, dichoⁿ yā Pedro ndúúcu Juan miiⁿ. ¹⁵Taachi ndaa 'iiⁿyāⁿ s'eeⁿ tuu'mi caⁿangua'á yā cáāvā 'iiⁿyāⁿ s'eeⁿ chi cuuvi diiⁿ yā recibir Espíritu N'dai yeⁿe Ndyuūs, ¹⁶ti Espíritu N'dai yeⁿe Ndyuūs miiⁿ 'āā cuéé caⁿā nanááⁿ ndii 'áamá 'iiⁿyāⁿ s'eeⁿ. Dámaaⁿ chi chēēdinúⁿnīⁿ núuⁿ yā ndúúcu chi duuchi Jesús miiⁿ. ¹⁷Apóstoles sn'duú yā ta'a yā vmnaaⁿ yeⁿe 'iiⁿyāⁿ s'eeⁿ ní diiⁿ yā recibir Espíritu N'dai yeⁿe Ndyuūs.

¹⁸Taachi Simón n'diichī sa chi cáāvā chi sn'duu tá'a apóstoles diiⁿ yā recibir Espíritu N'dai yeⁿe Ndyuūs, tuu'mi ní caⁿa sa chi ca'a sa tuumī. ¹⁹Ní caⁿā sa: Tée ntúúⁿ nī poder 'cūū 'úú ní 'āā du'ú nūⁿ chi cun'duū ta'á vmnaaⁿ yeⁿe, 'iiⁿyāⁿ miiⁿ cunéé yā ndúúcu Espíritu N'dai yeⁿe Ndyuūs.

²⁰Tuu'mi ní Pedro míⁿ caⁿa sá chii sa 'iiⁿyāⁿ: Túumī yeⁿe di 'cuiinú ndúúcu di caati nacádiinuuⁿ di chi regalo yeⁿe Ndyuūs ní ndúúcu tuumī cuai di. ²¹Nguéé ítuneeⁿ di ndíí nguéé ndúú suerte yeⁿe di na asunto 'cūū ti staava yeⁿe di nguéé n'daacā nanááⁿ Dendyuūs. ²²Ndáácadáámí dí yeⁿe nuuⁿndi yeⁿe di, ní caaca di Dendyuūs ti neⁿe Ndyuūs nadāch'εécú yā yeⁿe di chí nacádiinuuⁿ di na staava yeⁿe di. ²³Ti 'úú inaáⁿ dii ní cunee di na vaadi nguée yeⁿe di. Ní n'dēē chiichí di ndúúcu nuuⁿndi yeⁿe di.

²⁴Tuu'mi ní Simón nan'guεécútaⁿā sa yeⁿe yā ní caⁿā sa: N'dii caacá nī Señor caavā 'úú chi nadach'εécú

yā nuūⁿndi yeⁿé ti mar 'áámá chi ngaⁿa nī nguéé chiī nanááⁿ yeⁿé 'úú.

²⁵Iiⁿyāⁿ s'eeⁿ caⁿa cuaacú yā nduudu yeⁿe Ndyuūs miiⁿ. Ní caⁿ'a yā yeⁿé evangelio chi ndúúduŋgai yeⁿe Cristo. Ní cueⁿe yā ndíí nééné n'deeé yáāⁿ yeⁿe yáⁿáa Samaria. Ní ndaa ntúuⁿ yā na yáāⁿ Jerusalén miiⁿ.

**Felipe ndúúcu saⁿa yeⁿe
yáⁿáa Etiopía**

²⁶Áámá ángel yeⁿe Señor miiⁿ yaa'vi yā Felipe ní caⁿ'a yā: Nducuééⁿ dí ní cuéⁿé dí ndii cuaaⁿ ndiiya sur na yúúni chi nga'ai yeⁿé yáāⁿ Jerusalén ndii yáāⁿ Gaza. Yúúni miiⁿ ní cho'o na yáⁿáa cuūⁿmáⁿ. ²⁷Tuu'mi ní Felipe miiⁿ nducueeⁿ sá ní cueⁿe sa. Ní chó'oo chi 'áámá saⁿ'a yeⁿé yáⁿáa Etiopía canuuⁿ sa yúúni ní sáⁿá miiⁿ eunuco. Saⁿ'á miiⁿ chi idiiⁿ sá ntiiⁿnyuⁿ yeⁿe n'daataá reina chi duuchi Candace. Saⁿ'á miiⁿ ní diiⁿ sa cuidado nducuéⁿé tuūmī yeⁿe reina. Ndaa sa yáāⁿ Jerusalén miiⁿ chi diiⁿ sa chi cu'teenu sá Ndyuūs. ²⁸Nanguεεcunéⁿ sá yáāⁿ yeⁿé yā ní ch'iindī sa na carreta yeⁿé sa. Ní n'geeⁿ sa libro yeⁿe Ndyuūs naachi profeta Isaías chi caⁿ'a nduudu Dendyuūs tiempo chi chó'oo. ²⁹Ní Espíritu miiⁿ ní ngaⁿ'a yā ngii yā Felipe miiⁿ: Cueⁿe di ní ndaa niiⁿnūⁿ di na carreta 'cūū.

³⁰Ní Felipe miiⁿ cueⁿé sa chi n'geēⁿ saⁿ'a miiⁿ naachi dinguūⁿ profeta Isaías miiⁿ. Ní caⁿ'a sa: ¿Áá túúmícadīinuuⁿ nī chi n'geēⁿ nī?

³¹Saⁿ'á miiⁿ caⁿ'a sa: ¿Taacā cuuvi díiⁿ ti mar 'áámá 'iiⁿyāⁿ nguéé

ngi'cueeⁿ yā 'úú? Ní neⁿe sa chi Felipe miiⁿ caa sa ní 'cuūndī sa ndúúcu sa.

³²Naachí n'geēⁿ sa yeⁿé Escritura, chuū chi:

Tan'dúúca 'iiti cuūchī candée yā 'iiti ní 'caaⁿnúⁿ yā 'iiti. Tan'dúúca 'iiti cuūchī 'lííⁿ nguéé ngii n'gai tī taachi ngii yā duudu ti 'tíicā nguéé n'dai yā cheendi yā.

³³Caati ndiicuuⁿ yā 'iiⁿyāⁿ n'dái yā ní nguéé ca'a sa justicia yeⁿé yā; ¿du'u caaⁿmaⁿ yeⁿe ndaatá yeⁿé yā? Caati divíi 'iiⁿyāⁿ vida yeⁿé yā na iⁿ'yeēⁿdī.

³⁴Saⁿ'á eunuco nan'guεεcútaⁿ'ā sa ní caⁿ'a sa chii sa Felipe miiⁿ: Ngii cá chi cuuvi nī 'úú: ¿Du'ú yeⁿé chi caⁿ'a profeta 'túúca? ¿Áá yeⁿé maáⁿ yā o yeⁿé taama 'iiⁿyāⁿ?

³⁵Tuu'mi ní Felipe miiⁿ nan'guεεcútaⁿ'ā sa. Tucá'ā sa yeⁿé libro 'cūū ní caⁿ'a sa yeⁿé evangelio chi ndúúduŋgai yeⁿé Jesús.

³⁶Canúuⁿ yā yúúni chíí cueⁿé yā ndaa yā naachi vee nuūⁿnīⁿ. Ní caⁿ'a saⁿ'á eunuco: 'Muuⁿ ní vee nuūⁿnīⁿ. ¿De'ē cucáāvā chi nguéé cuεεdinúūⁿnīⁿ?

³⁷Felipe miiⁿ ngaⁿ'ā sa: Nduuti chi i'téénú nī ndúúcu núúⁿmáⁿ staava yeⁿé nī tuu'mí cuuvi cuεεdinuūⁿnīⁿ nī. Nan'guεεcútaⁿ'ā sa yeⁿé yā nī ngaⁿ'ā sa: I'teenú chi Jesucristo miiⁿ ní Daiyá Dendyuūs 'iiⁿyāⁿ.

³⁸Ní caⁿ'a sa chi cuéendii carreta. Nduu 'uuví yā, Felipe ndúúcu eunuco cueⁿe yā naachi véé nuūⁿnīⁿ ní cheεdinuūⁿnīⁿ sa. ³⁹Taachí cuícheε yā naachi véé nuūⁿnīⁿ Espíritu N'dai yeⁿe Ndyuūs candéē

Felipe miiⁿ. Ní saⁿā eunuco 'āā ntéé n'diichi sa saⁿā. Ní cuinaⁿā sa ní yeenú taavi sa. ⁴⁰Felipe miiⁿ ndaaca sa na yáāⁿ Azoto. Cho'o sá nduu yáāⁿ nduu yáāⁿ ndii ndaā sa yáāⁿ Cesarea ní caⁿa sa yeⁿe evangelio chi ndúúdu ngai yeⁿe Jesucristo nanááⁿ tanducueⁿe 'iiⁿyāⁿ yeⁿe yáāⁿ miiⁿ.

Saulo ndaacadaami sa yeⁿe nuūⁿndi yeⁿe sa ní i'téenu sa
(Hch. 22.6-16; 26.12-18)

9 Taachi Saulo taaⁿ sa ní yaāⁿvī yuudu sa yeⁿe chí 'cuūvī 'iiⁿyāⁿ chi i'téenu yā Señor Jesucristo, ndaa sá nanááⁿ chiidúú ch'εete cá yeⁿe 'iiⁿyāⁿ Israel. ²Ní chiica sa carta s'eeⁿ chí 'cuuⁿmiⁿ sá nanááⁿ 'iiⁿyāⁿ yeⁿe yaācu sinagogas yeⁿe yáāⁿ Damasco chí ndúúti chi ndaācā sa saⁿā o n'daataá miiⁿ yeⁿe Yúúni yeⁿe vaadi i'téenu yeⁿe Jesucristo miiⁿ cúúvī diiⁿ sa nandéε sa 'iiⁿyāⁿ chi preso yā ní nndaa yā na yáāⁿ Jerusalén. ³Taachi canúuⁿ sá yúúni mííⁿ taachi 'āā cháā ndaa sa yaāⁿ Damasco dácānaāⁿ chiia 'áámá deevé yeⁿe nanguuvi naachi canée sa. ⁴Taachí sndeεve sá ná yaⁿāa miiⁿ chi'iindiveeⁿ sa 'áámá nduudu chi ngaⁿā: Saulo, Saulo, ¿de'ε cúúvī chí n'ndaā di 'úú?

⁵Saⁿā miiⁿ ní caⁿā sa: ¿Du'ú n'diī, Señor? Tuu'mi ní ngaⁿā yā: 'Úú Jesús chi n'daā dī. Nguéé n'daacā chi diiⁿ di ti diiⁿ di tan'dúúcā 'iiti chi ca'a ca'a ti na yáⁿá cuiiⁿnyuⁿ.

⁶Saulo miiⁿ ní in'duuvi sa, ní 'va'a sa, ní caⁿa sa: Señor, ¿de'ε néⁿe nī chi dííⁿ? Señor Jesús miiⁿ ngaⁿā yā ngii yā saⁿā: Nducueⁿ dí ní cueⁿe di yáāⁿ, ní cuuví yā dii de'ε diiⁿ di.

⁷Ní 'iiⁿyāⁿ chí cuéⁿe ndúúcu Saulo neé yā n'giinu yā. N'giindiveéⁿ cuaacú yā nduudu ti nguéé du'ú vee inaaⁿ yā. ⁸Tuu'mi ní Saulo nducueⁿ sá ná yáⁿāa miiⁿ naachi chí ndεeve sá. Nán'guaaⁿ sa nduutináaⁿ sa naati nguéé inaaⁿ sa. Candéé neeⁿ yā ta'ā sa, ní ndaā sa yáāⁿ Damasco. ⁹Miiⁿ ní canee sa 'iiⁿnūⁿ nguuvi ní nguéé inaaⁿ sa, ní nguéé che'e sa, ní nguéé chí'i sa.

¹⁰Na yáāⁿ Damasco canée 'áámá saⁿā chí n'geeⁿ chí i'téenu sa Jesucristo chí nguuvi sa Ananías. Tuu'mi ní Señor Jesús miiⁿ ní caⁿa yā chii yā saⁿā na visión yeⁿe sa: Dii Ananías. Ananías miiⁿ nan'guεcutáⁿ sa: Señor, 'úú canée.

¹¹Ní Señor Jesús miiⁿ ngaⁿa yā ngii yā saⁿā: Nadacueⁿ di ní cueⁿe di yúúni chí nguuvi Cuaācú miiⁿ ní in'nuuⁿ dí vaacu Judas. Miiⁿ canée 'áámá saⁿā chí nguuvi sa Saulo ní sáⁿā yeⁿe yáāⁿ Tarso. N'diichí nī, saⁿā miiⁿ ngaⁿanguaⁿā sa. ¹²Ní Saulo miiⁿ n'diichi sa na visión yeⁿe sa 'áámá saⁿā chí nguuvi sa Ananías. Ní Ananías miiⁿ cho'o sá cuaaⁿ chεeti va'āi ní chí n'duūⁿ sá tá'a sá vmnááⁿ yeⁿe Saulo, ní ninguaāⁿ nduutináaⁿ sa. 'Tífcā n'diichi Saulo miiⁿ na visión yeⁿe sa.

¹³Naati Ananías miiⁿ nan'guεcutáⁿ sa: Señor Jesús, n'giindiveéⁿ chí neené ngaⁿa 'iiⁿyāⁿ yeⁿe sáⁿa 'cūū. Saⁿā miiⁿ ní nguéé n'daacā dííⁿ sa ndúúcu 'iiⁿyāⁿ chí i'téenu Jesucristo na yáāⁿ Jerusalén. ¹⁴Chiidúú n'gεete yeⁿe Israel ca'á yā poder Saulo miiⁿ chí cuta'a sa ní candéε sa vácūū 'iiⁿyāⁿ chí ngaⁿanguaⁿā yā ndúúcu chí duuchi Cristo.

¹⁵Señor miiⁿ ngaⁿa yā ngii yā saⁿā: Cunaⁿā di. Saⁿā miiⁿ 'úú ndeēvé saⁿā chi cāndeē sa chi duuchí nanááⁿ 'iiⁿyāⁿ s'eeⁿ chi nguéé 'iiⁿyāⁿ yeⁿe ndaata Israel ndúúcu rey s'eeⁿ ndúúcu 'iiⁿyāⁿ Israel. ¹⁶Ti 'úú 'cuuⁿmíⁿ naaⁿ sa chi cánéé chí 'cueenu sa cuuvi caavā 'úú.

¹⁷Tuu'mi ní cueⁿē Ananías ní chindaā sa va'ai ní sn'duū sa ta'a sa vmnááⁿ yeⁿē Saulo. Ní caⁿa sa: Díí, Saulo hermano, Señor Jesús miiⁿ chi che'enaáⁿ yā yeⁿē di na yúúní chí cuchii di. 'Iiⁿyāⁿ miiⁿ dichó'o yā 'úú 'íicú cuuvi nanguaāⁿ nduutináaⁿ di. Ní cuuvi cuūtū di ndúúcu Espíritu N'dai yeⁿe Ndyuūs.

¹⁸Hora miiⁿ chiiya na nduutináaⁿ sa cosa tan'dúúca dííⁿmáⁿ 'yaācā ní inguaāⁿ nduutináaⁿ sa. Nacueeⁿ sá ní cheēdinuūⁿnīⁿ sa. ¹⁹Taachi che'ē sa yuūndū miiⁿ ndaaca tiinú sa. Saulo miiⁿ cánéé sá nguuvi chi ch'etinee sa ndúúcu 'iiⁿyāⁿ s'eeⁿ chi i'teenú yā Cristo chi snée yā yáāⁿ Damasco.

Saulo ngaⁿā sa nduudu cuaacu na yáāⁿ Damasco

²⁰Cuayiivi mííⁿ chí'cueéⁿ sa yeⁿe Cristo na yaācū sinagoga. Ní ngaⁿā sa 'iiⁿyāⁿ miiⁿ chí Cristo ní Daiya Dendyuūs. ²¹Nducyáácá 'iiⁿyāⁿ chí ch'iindiveéⁿ yā cheⁿe yiinú yā ní ngaⁿā yā: ¿Áá nguéé sáⁿa 'cūú chí n'gaā'vā sa ndúúcu 'iiⁿyāⁿ chí ngaⁿāngua'á yā ndúúcu chí duuchi Cristo na yáāⁿ Jerusalén? ¿Áá nguéé cáāvā chí chí cuchii sáⁿa 'cūú chí candéé sa 'iiⁿyāⁿ 'cueē chíichí yā nanááⁿ chiiduú n'geeté yeⁿe Israel?

²²Saulo miiⁿ ditiinú taavi sa. Ní véé 'uuvi nadacádinuūⁿ 'iiⁿyāⁿ yeⁿe

Israel yeⁿē yáāⁿ Damasco. Saⁿā miiⁿ ní chí'iⁿ sá chí Jesús miiⁿ chí Cristo.

Saulo nanguáⁿai yā yeⁿe 'iiⁿyāⁿ Israel s'eeⁿ

²³Cheēnū n'deēē nguuví ní 'iiⁿyāⁿ Israel s'eeⁿ nduuvidaama yā ní nndeē yā chí 'caaⁿnuⁿ yā Saulo. ²⁴Saulo 'āā deenu sa de'ē chí neⁿe dííⁿ yā. 'Iiⁿyāⁿ s'eeⁿ ní ch'etinee yā cuidado cheendi va'ai yeⁿe pared yeⁿe yáāⁿ miiⁿ ndii nguuvi ndíí n'gaaⁿ ti cuuvi 'caaⁿnúⁿ yā sáⁿā. ²⁵Tuu'mi ní 'iiⁿyāⁿ s'eeⁿ chí i'teenú yā Cristo ní tun'dáa yā saⁿā ch'eti va'ai n'gaaⁿ. Ní s'núuⁿ yā saⁿā ch'eti 'áámá 'cuééteē. Tun'dáa yā saⁿa na tiiⁿ pared yeⁿe yáāⁿ miiⁿ i'cuáa yā saⁿā ndúúcu 'cuééteē.

Saulo na yáāⁿ Jerusalén

²⁶Taachi ndaā Saulo na yáāⁿ Jerusalén neⁿe sa nduuvidaama sa ndúúcu 'iiⁿyāⁿ s'eeⁿ chí i'téenu yā Cristo. Nducyáácá yā ní 'va'a yā saⁿā ti nguéé i'téenu yā chí i'teenú saⁿā miiⁿ. ²⁷Tuu'mi ní Bernabé ndáa yā ndúúcu sa nanááⁿ apóstoles chí dichó'o Dendyuūs. Ní chí yā 'iiⁿyāⁿ s'eeⁿ táácā n'diichi Saulo miiⁿ Señor Jesús na yúúní. Ní Señor yaa'vi yā saⁿā. Ní 'túuca caⁿā Saulo miiⁿ nduudu cuaacu yeⁿe Jesús miiⁿ na yáāⁿ Damasco, ní nguéé ndúúcu vaadi 'va'ā. ²⁸Saulo miiⁿ canee sa ndúúcu 'iiⁿyāⁿ s'eeⁿ yáāⁿ Jerusalén miiⁿ. ²⁹Caⁿa sa nduudu cuaacu yeⁿe Señor Jesús nguéé ndúúcu vaadi 'va'ā. Ní n'deeē n'dái ngaⁿā sa ndúúcu 'iiⁿyāⁿ chí nguéé ndaata Israel naati 'iiⁿyāⁿ s'uúⁿ nacádiinúúⁿ yā chí 'caaⁿnúⁿ yā Saulo. ³⁰Taachi hermanos chicádinuūⁿ yā chuū,

candée yā Saulo ndii yáāⁿ Cesarea, ní dichó'o yā saⁿā yáāⁿ Tarso.

³¹Tuu'mi ní nducyaaca yáacū canée 'dííⁿ tan'dúúca ná yáⁿāa Judea ndúúcu yáⁿāa Galilea ndúúcu yáⁿāa Samaria. Ní ng'icueeⁿ yā ná nduudu cuaacu ní chi chiicá yā ná vaadi i'teenu yeⁿē Señor Jesús miiⁿ. Ní Espírítu N'dai yeⁿe Ndyuūs miiⁿ ca'á yā vaadi diituu 'iiⁿyāⁿ s'eeⁿ, ní chi'yaaⁿ yā.

Saⁿā Eneas nanduuvá yeⁿē sa

³²Chií chúu Pedro miiⁿ ní cueⁿe yā nduu cuáāⁿ ndaa yā ntúuⁿ yā naachi snée 'iiⁿyāⁿ chi i'téenu na yáāⁿ Lida. ³³Ní ndaaca yā 'áámá saⁿā chi nguuvi sa Eneas. 'Āā nííⁿníⁿ nduūyū chi canee sa na cama. Ní saⁿā canee sa ndúúcu ca'āi chi indúuví cuerpo yeⁿe sa. ³⁴Ní caⁿa Pedro miiⁿ: Eneas, Jesucristo miiⁿ ní dííⁿ yā chi nduūvā yeⁿē di. Nacueeⁿ di ní cuta'a di yivē yeⁿē di. Hora mííⁿ nūuⁿ nacueeⁿ sá. ³⁵Nducyáácá 'iiⁿyāⁿ chi snée yā na yáāⁿ Lida ndúúcu yáāⁿ Sarón n'diichí yā sáⁿa 'cūū. 'Iiⁿyāⁿ s'eeⁿ ndaacadaamí yā ní chi'téenu yā Ndyuūs Señor.

Nadacuéⁿ yā táⁿā Dorcas yeⁿe nguaaⁿ tínáⁿa

³⁶Canée 'áámá n'daataá chi i'teenu Jesucristo na yáāⁿ Jope chi nguuvi tá Tabita chi neⁿē caaⁿmaⁿ ndúúcu dávaacu griego Dorcas. Tá 'cūū neené n'daacā dííⁿ tá ní ca'ā tá limosnas. ³⁷Nguuvi miiⁿ ní chiitā tá ní ch'ii ta. Ch'iinu naaⁿnú yā cuerpo yeⁿē táⁿā ní chin'diiti yā cuerpo yeⁿe táⁿā na 'áámá sala. ³⁸Yáāⁿ Lida miiⁿ canée niiⁿnuúⁿ ná

yáāⁿ Jope. 'Iiⁿyāⁿ s'eeⁿ chí i'téenu Jesucristo ch'iindiveeⁿ yā chi Pedro canée sá miiⁿ. Dichó'o yā na 'uuvi sáⁿā chi caⁿa sa cuuvi sa Pedro. Nguéé cuuvi 'naaⁿ di ní chií di naachi sneeⁿ nū.

³⁹Tuu'mi ní Pedro miiⁿ ní ncueeⁿ sa ní cueⁿe sa ndúúcu yā. Taachi ndaā sa miiⁿ candée yā saⁿā na sala naachi ndúúvídaama nducyaaca n'daataá nguá'āa. Ngεεcu yā ní ng'iⁿi yā ntúuⁿ yā camisas yeⁿe yā ndúúcu vestidos yeⁿé yā chi Dorcas miiⁿ din'dái tá taachí canduūchi tá. ⁴⁰Tun'dáá Pedro nducyaaca yā chuva'āi. Pedro miiⁿ chiinti'yá yā ní caⁿangua'á yā, ní nguεεcundí yā naachi canée cuerpo yeⁿē tináⁿā ní caⁿa yā: Tabita, nacuéⁿ di. Taⁿā miiⁿ ní nn'guaāⁿ tá nduutinaaⁿ tá ní taachi n'diichi tá Pedro, 'nuūⁿ ndii tá. ⁴¹Pedro miiⁿ ní ca'á sa ta'ā sa táⁿā miiⁿ ní nadacuéⁿ sa táⁿā. Tuu'mi ní ng'ai sa 'iiⁿyāⁿ chi i'téenu yā Ndyuūs miiⁿ ndúúcu n'daataá nguá'āa. Ní ch'iⁿi sa táⁿā nááⁿ 'iiⁿyāⁿ chi 'āā canduūchi ta. ⁴²Nducyáácá 'iiⁿyāⁿ yáāⁿ Jope ch'iindiveeⁿ yā chuū. Ní neené 'yaáⁿ yā s'téenu yā Señor miiⁿ. ⁴³Ní ch'ó'o chí Pedro miiⁿ canée yā 'áámá tiempo na yáāⁿ Jope na vaacu 'áámá saⁿā chi nguuvi Simón chi idicuuⁿnuⁿ sa dííⁿmánⁿ iiti.

Pedro ndúúcu Cornelio

10 Cánée 'áámá saⁿā na yáāⁿ Cesarea chi nguuvi sa Cornelio. Saⁿā miiⁿ capitán yeⁿē 'áámá taaⁿ soldado chi nguuvi Italiano. ²Saⁿā miiⁿ ní n'dai taavi sa ní i'téenu sa Dendyuūs ndúúcu nducyaaca 'iiⁿyāⁿ na vaacu sá. Saⁿā

miiⁿ nééné nga'a sa limosnas yeⁿe 'iiⁿyāⁿ chí nguá'āa yeⁿe na yáāⁿ. Cueⁿé daāⁿmaⁿ ngaⁿ'angua^a sa Ndyuūs. ³Sáⁿa 'cūū ní claro n'diichi cuaacú sa ná 'áámá visión tan'dúúcā chi n'gēecu 'iiⁿnuⁿ yeⁿē nguuvi miiⁿ. 'Áámá ángel yeⁿē Dendyuūs chindāa yā naachi cánéé sa miiⁿ. Ní ngaⁿ'a ángel ngii yā saⁿ'ā: Díí, Cornelio.

⁴Sáⁿ'ā miiⁿ ní ch'íínú cuaacú sa ndúúcū vaadi 'vaā, ní caⁿ'a sa: ¿Du'u n'dií, Señor? Ní ngaⁿ'a ángel ngii yā saⁿ'ā Cornelio: Chííⁿ chi ngaⁿ'āngua'a di ndúúcū limosnas chi nga^a di, Dendyuūs n'giindiveéⁿ yā ní nan'gaacú yā dii. ⁵Ángel ngaⁿ'a yā ngii yā Cornelio: Dicho'ó di 'iiⁿyāⁿ s'eeⁿ na yáāⁿ Jope ní diiⁿ di chí cuchii saⁿ'ā Simón chí nguuvi sa Pedro. ⁶Sáⁿ'a 'cūū ní canee sa na vaacu sáⁿ'ā chí nguuvi Simón, saⁿ'ā chí idicuíⁿnuⁿ sa dífⁿmánⁿ 'iiti. Va'ai yeⁿe saⁿ'ā miiⁿ canéé niiⁿnuúⁿ na nuūⁿnīⁿyáⁿ'ā. Saⁿ'ā miiⁿ cuuvi sa díí de'ē chí diiⁿ di.

⁷Cueⁿe ángel chí caⁿ'a yā ndúúcū Cornelio, ní cú Cornelio miiⁿ ní 'cai sa 'uuví saⁿ'ā chí diiⁿ mandado yeⁿē sa ndúúcū 'áámá soldado chí i'téénú Dendyuūs chí snéé ndúúcū sa.

⁸Dichó'o sa 'iiⁿyāⁿ s'eeⁿ yáāⁿ Jope taachī ch'íínú caⁿ'a sa tanducuéⁿē chí ch'ó'ōo.

⁹Chideεve tááma nguuvi taachí snúúⁿ yā yúúní ní taachí snee niiⁿnuúⁿ yā yáāⁿ miiⁿ Pedro miiⁿ ncheε sa tiíⁿ va'āi chí caaⁿ'maⁿngua'a sa tan'dúúcā chí n'gēecu ndichúúví nguuvi. ¹⁰Saⁿ'ā miiⁿ ndaa cuiicú sá. Ní neⁿe sa che'e sa naati nuuⁿmánⁿ ne'ē chí idin'dái yā chí che'e sa miiⁿ, n'diichi sa 'áámá visión. ¹¹N'diichi

sá nanguuvi chí candá'āi ní cuich'ééⁿ nanguuvi 'áámá cosa tan'dúúcā 'áámá tiinūuⁿ ch'εεε chí n'déé chíichí nduū cúúuⁿ esquinas cuch'ééⁿ cuaacu na yāⁿ'āa miiⁿ.

¹²Ní miiⁿ ní n'diichi sa nducyaaca naaⁿ 'iiti chí cuuúⁿ ca'a tí chí véé ná yáⁿ'āa ndúúcū nducyaaca naaⁿ cúú ndúúcū 'yaada chí véé nanguuvi.

¹³Ní ndaā 'áámá nduudu ní caⁿ'a: Díí Pedro, nducueeⁿ di, 'caaⁿ'nuⁿ di ní che'e di.

¹⁴Tuu'mi ní Pedro miiⁿ ní caⁿ'ā sa: Nguéé, Señor. Mar 'áámá chí vaatíí ndúúcū chí nguεε n'daacā, nguéé che'ē.

¹⁵Yáá'ví ntuūⁿ nduudu miiⁿ ndiichi ndii 'úúví cuuvi ní ngaⁿ'ā: Chuū chí nadindeεvé Ndyuūs miiⁿ, nguéé caaⁿ'maⁿ di yeⁿē chí vaatíí.

¹⁶Chuū ní chíi 'iiⁿnūⁿ cuuvi ní tiinūuⁿ miiⁿ cuinaⁿ'ā ntúúⁿ nanguuvi. ¹⁷Naachí Pedro miiⁿ nadācadíínuuⁿ sa yeⁿē visión de'ε chí neⁿē caaⁿ'maⁿ, tuu'mi ní 'iiⁿyāⁿ s'eeⁿ chí nadicho'ó Cornelio, 'iiⁿyāⁿ s'eeⁿ itiingúúnéeⁿ yā tíí va'ai yeⁿe Simón. Ní ndaa yā cheendi va'āi.

¹⁸Ní 'cai yā ní ntínguuneeⁿ yā: ¿Áá miiⁿ canee Simón chí nguūví sa Pedro? ¹⁹Taachi 'āā chicadíínuuⁿ Pedro yeⁿē visión chí n'diichi sa Espíritu N'dai yeⁿe Ndyuūs miiⁿ ngaⁿ'a ngii saⁿ'ā: Cun'diichí dí. 'Iiⁿnūⁿ saⁿ'ā in'nuuⁿ sá dii. ²⁰Nducueeⁿ dí ní nangua'ai di ní nguéé n'deēε nacadíínuuⁿ di chí caⁿ'ā di nduucú yā, tí 'úú dicho'ó 'iiⁿyāⁿ.

²¹Tuu'mi ní ca'āi Pedro miiⁿ ní cueⁿē sa naachí snéé 'iiⁿyāⁿ s'eeⁿ chí dicho'ó Cornelio, ní caⁿ'a sa: N'diichi ní. 'Úú saⁿ'ā chí in'nuúⁿ ní. ¿De'ē cáávā chí cuchíí ní?

²²Iiⁿyāⁿ s'eeⁿ ní caⁿ'a yā: Cornelio, capitán romano, 'áámá saⁿ'ā chi n'dái taavi ní i'téenu sa Dendyuūs. Sáⁿ'ā miiⁿ, 'iiⁿ'yāⁿ Israel s'eeⁿ déenu yā chi saⁿ'ā miiⁿ n'daacā n'dai sa. Saⁿ'ā miiⁿ ní caⁿ'a 'áámá ángel yeⁿ'ē Ndyuūs chii yā saⁿ'ā, chí neⁿ'e yā chí ndaa nī na vaacú yā ni 'caandiveéⁿ yā nduudu yeⁿ'é nī.

²³Tuuⁿ'mi ní Pedro miiⁿ 'cai yā saⁿ'ā na vaacú yā ní canee sa ndúucu yā. Chideeve táámá nguuvi miiⁿ nacueeⁿ sá ni cueⁿ'e sa ndúucu yā. Ní cueⁿ'e n'duuvi hermanos yeⁿ'e yááⁿ Jope miiⁿ ndúucu sa.

²⁴Táámá nguuvi mííⁿ ndaa yā yááⁿ Cesarea. Ní Cornelio cunee ngíínú yā. Ní 'cai yā 'iiⁿ'yāⁿ yeⁿ'e yā ndúúcū nducyaaca 'iiⁿ'yāⁿ chi amigo chi n'dai ndúucu yā ní nduuvidaama nducyaaca yā. ²⁵Taachí ndaa Pedro miiⁿ, can'daa Cornelio miiⁿ ní dííⁿ yā recibir saⁿ'ā s'eeⁿ. Chintii'yá yā na ca'a Pedro mííⁿ ní chí'téenu yā 'iiⁿ'yāⁿ. ²⁶Pedro miiⁿ nadacueéⁿ sa Cornelio miiⁿ ní caⁿ'a sá chíi sa 'iiⁿ'yāⁿ: Nacueeⁿ dí. 'Úú saⁿ'ā ntúúⁿ 'úú.

²⁷Ní neⁿ'e chí indee yā ndúucu sa ní candé yā saⁿ'ā cheeti va'āi. Néené 'yaaⁿ yā nduuvidaámá yā miiⁿ. ²⁸Ní caⁿ'ā Pedro: Ndís'tii ní deenu nī chí nguéé n'daacā chí 'áámá saⁿ'ā Israel nduuvidaámá sá o ndaa niiⁿ'nuúⁿ sá ndúúcū 'iiⁿ'yāⁿ chí nguéé 'iiⁿ'yāⁿ yeⁿ'ē ndaata Israel. Ndyuūs ní chí'iⁿ'i yā 'úú chí nguéé canéé chí caaⁿ'maⁿ yā mar 'áámá saⁿ'ā vaatí sa o chí nguéé n'daacā sa. ²⁹Taachí Dendyuūs 'cai yā 'úú, núúⁿ ndaa. Maaⁿ ní intínguuneéⁿ ndís'tii: ¿De'ē neⁿ'e ní 'úú chí cuchii? ³⁰Tuuⁿ'mi ní Cornelio caⁿ'á

yā: Maaⁿ cuūuⁿ ngūūví chí 'āā hora 'cūū nūuⁿ chí n'gēecu 'iiⁿ'núⁿ chíinū taachi 'āā cuéé ca'diinú, cucáāvā chí ngaⁿ'angua'á na vaacú. N'díí chí 'áámá saⁿ'ā. Neené ngii 'yáⁿ'ā catecai sa. ³¹Ní ngaⁿ'ā sa ngii sa 'úú: Díí Cornelio, chííⁿ chí caⁿ'angua'a di ndúúcū limosnas yeⁿ'ē di Dendyuūs n'giindiveéⁿ yā ní nan'gaacu yā.

³²Díí, dichó'o di saⁿ'ā na yááⁿ Jope ní díiⁿ di chí chíi Simón chí nguuvi Pedro miiⁿ. Saⁿ'ā miiⁿ cánéé sa na vaacu sa Simón, saⁿ'ā chí idicuúⁿ'nuⁿ dííⁿmáⁿ 'iiti. Vaacu sa niiⁿ'nuúⁿ ná nuūⁿnīⁿ'yáⁿ'ā. Taachí ndaa saⁿ'ā miiⁿ ní yaa'vi sa díí. ³³Tuuⁿ'mi ní Cornelio ngaⁿ'a yā ngii yā Pedro: Hora miiⁿ dicho'ó 'iiⁿ'yāⁿ cáávā di. N'dááca díiⁿ di chí cuchii di. Maaⁿ ndúcyaacá 'nū ní snéé 'nū 'muuⁿ ndúúcū Dendyuūs. Ní sneé 'nū chí 'caandiveéⁿ 'nū tanducueéⁿ'ē chí Dendyuūs caⁿ'á yā chíi yā díi.

³⁴Tuuⁿ'mi ní Pedro ngaⁿ'a sa ngii sa: Maaⁿ ní, 'úú tuumicadiinúⁿ chí Ndyuūs ní neⁿ'e yā nducyaaca 'iiⁿ'yāⁿ daama daama. ³⁵Nducyáácá 'iiⁿ'yāⁿ yeⁿ'ē nducyaaca yáⁿ'āa chí i'téenu yā Dendyuūs ní dííⁿ yā n'daacā ní Ndyuūs ní 'cuaáⁿ yā 'iiⁿ'yāⁿ. ³⁶Ndyuūs ní dicho'ó yā 'áámá nduudu yeⁿ'e yā nanááⁿ 'iiⁿ'yāⁿ yeⁿ'é Israel. Caⁿ'a yā nduudú ngai yeⁿ'ē evangelio ní véé vaadi 'díiíⁿ cucáāvā Jesucristo. 'Iiⁿ'yāⁿ 'cúū Señor 'iivú Ndyuūs yeⁿ'ē nducyáácá 'iiⁿ'yāⁿ. ³⁷Ndís'tii ní déenu nī nduudu chí caⁿ'a yā nuuⁿ'máⁿ yáⁿ'āa Judea. Tucá'a yā ndii yáⁿ'āa Galilea, cuayiivi chí'iiⁿu chí caⁿ'a Juan yeⁿ'e chí chēdinuūⁿ'nīⁿ yā. ³⁸Tíicā Dendyuūs tee yā Jesús yeⁿ'e yááⁿ Nazaret Espíritu N'dai

ndúúcu poder. Jesús miiⁿ ní chiica yā dííⁿ yā chí n'daacā. Ní dííⁿ yā chí nduuvā yeⁿe nducyáácá 'iiⁿ'yāⁿ chí canee yā ndúúcu espíritus yeⁿe yááⁿ'nguínūⁿ caatí Ndyuūs miiⁿ canee yā ndúúcu Jesús. ³⁹Ní nús'uū ní testigo 'nū yeⁿ'ē tanducuéⁿ'ē chí Jesús dííⁿ yā na yáⁿ'āa Judea ndúúcu na yāāⁿ Jerusalén. 'Iiⁿ'yāⁿ s'eeⁿ miiⁿ ní ch'iiⁿ'nuⁿ yā 'iiⁿ'yāⁿ. Ní ch'iⁿ'nééⁿnga'á yā 'iiⁿ'yāⁿ na 'áámá yáⁿ'á. ⁴⁰Jesús 'cūū Ndyuūs nadicuéeⁿ yā 'iiⁿ'yāⁿ yeⁿe nguuaⁿ tináⁿ'ā ndiichi ndii 'ííⁿ'núⁿ nguuvi miiⁿ ní dííⁿ yā chí che'enaáⁿ yā nguuaⁿ 'iiⁿ'yāⁿ. ⁴¹Nguéé che'enaáⁿ yā yeⁿ'ē nducyaaca 'iiⁿ'yāⁿ caati yeⁿ'ē testigo chí Dendyuūs ndεεve yā cuááⁿ vmnaaⁿ. Nús'uū ní che'éⁿ nū ní chííⁿ 'nū nduucú yā cuayiivi taachí nducueeⁿ yā yeⁿ'e nguuaⁿ tináⁿ'ā. ⁴²Ní dich'ólo yā nús'uū chí caaⁿ'máⁿ 'nū evangelio chí nduudú ngai nanááⁿ 'iiⁿ'yāⁿ. Ní ngaⁿ'a cuaacú 'nū chí Cristo miiⁿ ní s'neéⁿ Ndyuūs 'iiⁿ'yāⁿ lado yeⁿ'e Juez yeⁿ'é 'iiⁿ'yāⁿ chí nduuchi ndúúcu 'iiⁿ'yāⁿ chí n'díí. ⁴³Nducyaaca profeta s'eeⁿ chí caⁿ'a nduudú yeⁿ'e Dendyuūs caⁿ'a yā yeⁿ'e 'iiⁿ'yāⁿ miiⁿ. Nducyáácá 'iiⁿ'yāⁿ chí cu'téenu yā 'iiⁿ'yāⁿ, véé vaadí nadich'εcú nuūⁿndí yeⁿ'é yā cucaavā Jesús miiⁿ.

⁴⁴Taachi ngaⁿ'ā Pedro nduudú 'cūū, Espíritu N'dai yeⁿ'e Ndyuūs ní ndaā vmnaaⁿ yeⁿ'ē nducyaaca 'iiⁿ'yāⁿ chí ch'iindiveéⁿ yā nduudu 'cūū. ⁴⁵Ní 'iiⁿ'yāⁿ yeⁿ'e Israel chí'téenu yā chí ndaá yā ndúúcu Pedro, 'iiⁿ'yāⁿ s'eeⁿ ch'εetinéeⁿ n'giinu yā chí vmnaaⁿ yeⁿ'e 'iiⁿ'yāⁿ s'uuⁿ chí nguéé 'iiⁿ'yāⁿ yeⁿ'e ndaata Israel, Dendyuūs ca'a ntuúⁿ yā regalo yeⁿ'ē

Espíritu N'dai yeⁿ'e Ndyuūs, ⁴⁶caatí ch'iindiveéⁿ yā chí ngaⁿ'a 'iiⁿ'yāⁿ s'eeⁿ tanáⁿ'ā davaacu. Ní ngaⁿ'á yā chí ch'εεε taavi Dendyuūs. ⁴⁷Tuu'mi ní nan'guεεcútaⁿ'ā Pedro: ¿'Áá cúví chí 'āá du'ú nūūⁿ 'iiⁿ'yāⁿ chí nguéé 'cuáaⁿ yā yeⁿ'é nuūⁿníⁿ chí cuεεdinúūⁿníⁿ 'iiⁿ'yāⁿ chí dííⁿ yā recibir Espíritu N'dai yeⁿ'e Ndyuūs tan'dúúca s'uuúⁿ?

⁴⁸Ní dich'ólo yā 'iiⁿ'yāⁿ chí cuεεdinúūⁿníⁿ yā ndúúcu chí duuchi Jesús. Tuu'mi ní 'iiⁿ'yāⁿ s'eeⁿ chiica yā Pedro chí cunee yā 'áámá tiempo ndúúcu yā.

Pedro caⁿ'a yā chuū ná yaācú templo yeⁿ'e yāāⁿ Jerusalén

11 Ch'iindiveeⁿ apóstoles chí dich'ólo Dendyuūs ndúúcu hermanos chí snée yā na yáⁿ'āa Judea chí 'tiicá ntúūⁿ 'iiⁿ'yāⁿ s'eeⁿ chí nguéé 'iiⁿ'yāⁿ yéⁿ'ē ndaata Israel chí dííⁿ yā recibir nduudu yeⁿ'e Dendyuūs. ²Taachí Pedro miiⁿ cuchεε sa yāāⁿ Jerusalén, hermanos yeⁿ'e 'iiⁿ'yāⁿ Israel ch'εεcu cheendí yā ndúúcu Pedro. ³Ngaⁿ'á yā: ¿Dε'ē cúví chí sndáa di va'ai yeⁿ'e 'iiⁿ'yāⁿ chí nguéé yeⁿ'e 'iiⁿ'yāⁿ Israel, ní che'e di ndúúcu yā?

⁴Tuu'mi ní Pedro miiⁿ ní tuca'a sa chí sa 'iiⁿ'yāⁿ s'eeⁿ táácā chí. Ní caⁿ'a sa: ⁵Caneé na yāāⁿ Jope ní ngaⁿ'angua'á ní nnduúchí ní n'diichí 'áámá visión dácaā 'áámá tiinūⁿ ch'εεté cuch'ééⁿ nanguuvi n'déé chíichí nduū cúūⁿ esquinas ndaā ndii vmnááⁿ. ⁶Taachi n'diichí, nacádiinúúⁿ. Tuu'mi ní n'diichí yeⁿ'é icyáⁿ'ā 'iiti chí cuūⁿ cá'a tí ndúúcu 'iiti taaⁿ ndúúcu cúú ndúúcu 'yaada yeⁿ'ē nanguuvi. ⁷Ní ch'iindiveéⁿ

'áámá nduudu chi caⁿá chí 'úú:
 Dí Pedro, nacueeⁿ di. 'Caaⁿ'nuⁿ
 dí 'iiti, ní ch'éé dí 'iiti. ⁸Ní caⁿ'á
 chuū: Señor, nguéé; ti mar 'áámá
 chi vaatí chí nguée n'daacā che'é.
⁹Tuu'mi ní nduudu yeⁿ'ē nanguuvi
 caⁿ'a ntuūⁿ ndiichi ndii 'úúví: Chíⁿ
 chí Ndyuūs nádindeevé yā, nguéé
 caaⁿ'maⁿ di yeⁿ'ē chí vaatí. ¹⁰Chuū
 ní 'iiⁿ'nuⁿ cúúví chíi. Cuinaⁿ'ā ntūⁿ
 tanducueⁿ'ē nandéé yā cuááⁿ 'niⁿ'nuⁿ
 nanguuvi. ¹¹Ní n'diichí nī. Hora miiⁿ
 ndaaⁿ na 'iiⁿ'nuⁿ saⁿ'ā na va'āi naachi
 'úú caneé. 'Áámá 'iiⁿ'yāⁿ chí nguuvi
 Cornelio dichó'o yā saⁿ'ā yeⁿ'e
 yááⁿ Cesarea ndí naachi caneé.
¹²Ní Espíritu N'dai yeⁿ'e Ndyuūs
 ngaⁿ'a ngii 'úú chí caⁿ'á ndúúcu sa.
 Ní nguéé de'ē vee nadicádiinúúⁿ.
 Cheⁿ'é ndúúcu niyaaⁿ hermanos ní
 sndáa 'nū vaacu Cornelio. ¹³Saⁿ'ā
 miiⁿ caⁿ'a sá chíi sá nús'uú, táaca
 n'diichi sa 'áámá ángel vaacū sa
 chí cheendii yā ní cāⁿ'a yā: Dí
 Cornelio, dichó'ó dí saⁿ'ā s'eeⁿ yāāⁿ
 Jope ní diiⁿ dí chí ndaa sáⁿ'ā Simón
 chí nguuvi Pedro míⁿ. ¹⁴Saⁿ'ā
 miiⁿ ní caaⁿ'maⁿ sá nduudu chí
 nanguaⁿ'āi dii ndúúcu nducyáácá
 'iiⁿ'yāⁿ yeⁿ'e di na vaacu di. ¹⁵Ní
 taachí tucá'á caⁿ'á, ndaā Espíritu
 N'dai yeⁿ'e Ndyuūs yeⁿ'e cuaaⁿ
 'niⁿ'nuⁿ vmnaaⁿ yeⁿ'ē nducyaaca
 'iiⁿ'yāⁿ s'eeⁿ dendu'ū, tan'dúúca chí
 chíi ndúúcu s'uúúⁿ vmnááⁿ vmnaaⁿ.
¹⁶Tuu'mi ní nn'gaacū chí caⁿ'a
 Señor miiⁿ, chí caⁿ'a yā: Juan míⁿ
 ch'edinuūⁿ'níⁿ yā ndúúcu nuūⁿ'niⁿ
 naati ndís'tii ní cuéédinuūⁿ'níⁿ nī
 ndúúcu Espíritu N'dai yeⁿ'e Ndyuūs.
¹⁷Nduuti chí Dendyuūs chí ca'a yā
 regalo miiⁿ 'iiⁿ'yāⁿ tan'dúúca chí
 teé yā s'uúúⁿ chí i'teenu yú Señor

Jesucristo, ¿du'ū 'úú chí di'vaachí
 yeⁿ'ē Dendyuūs miiⁿ?

¹⁸Tuu'mi ní ch'iindiveéⁿ yā
 nduudu miiⁿ ní ch'ēetinéé 'díⁿ yā ní
 cāⁿ'a yā chí ch'ēeté yā Ndyuūs, ní
 caⁿ'a yā: 'Tiicá ntūⁿ' ca'a Dendyuūs
 'iiⁿ'yāⁿ s'eeⁿ chí nguéé 'iiⁿ'yāⁿ yeⁿ'e
 ndaata Israel chí ndaacadaamí yā
 yeⁿ'ē nuuⁿ'ndi yeⁿ'é yā ní nndaāca yā
 vida cueⁿ'e daāⁿ'maⁿ.

Yáacū yeⁿ'e yáāⁿ Antioquía

¹⁹Maaⁿ ní 'iiⁿ'yāⁿ chí cueⁿ'ē 'múúⁿ
 cueⁿ'e miiⁿ yā cucáávā chíiⁿ chí díⁿ
 'iiⁿ'yāⁿ ndúúcu Esteban, 'iiⁿ'yāⁿ miiⁿ
 cho'ó yā ndii yáⁿ'āa Fenicia, ndúúcu
 isla Chipre, ndii yaāⁿ Antioquía.
 Ní nguéé cāⁿ'a yā nduudu yeⁿ'e
 Dendyuūs ndúúcu nducyáácá 'iiⁿ'yāⁿ,
 dámaaⁿ 'iiⁿ'yāⁿ Israel s'eeⁿ caⁿ'a yā
 nduucú yā. ²⁰Nguaaⁿ 'iiⁿ'yāⁿ s'eeⁿ ni
 snéé saⁿ'ā yeⁿ'e isla Chipre yeⁿ'e yáāⁿ
 Cirene. Saⁿ'ā s'eeⁿ ní taachi ndaā sa
 yáāⁿ Antioquía yaa'vi sá 'iiⁿ'yāⁿ s'eeⁿ
 chí nguéé 'iiⁿ'yāⁿ yéⁿ'ē ndaata Israel
 dendú'ū ní caⁿ'a sa evangelio chí
 ndúúdu ngai yeⁿ'ē Señor Jesús. ²¹Ní
 ta'ā Señor 'iivú Ndyuūs miiⁿ canéé
 ndúúcu sa. Chíi 'yaaⁿ ndái 'iiⁿ'yāⁿ
 chí'téenu yā Señor miiⁿ. Ní can'dáa
 yā Señor miiⁿ.

²²Cho'oo chí 'iiⁿ'yāⁿ yeⁿ'e
 yáacū chí snéé yā yáāⁿ Jerusalén
 ch'iindiveéⁿ yā chuū. Ní dichó'o
 yā Bernabé chí caⁿ'a sa yáāⁿ
 Antioquía. ²³Sáⁿ'a 'cūū taachi ndaā
 sa ní n'diichi sa favor ch'ēete taavi
 yeⁿ'ē Dendyuūs miiⁿ, yeenú taavi
 sa. Ní chí'cueeⁿ sa chí nducyáácá
 yā 'cuetinéé yā ndúúcu nuuⁿ'maⁿ
 staava yeⁿ'é yā ndúúcu Señor 'iivú
 Dendyuūs miiⁿ. ²⁴Saⁿ'ā Bernabé miiⁿ
 ní ndai sa, ní ndiitú saⁿ'ā Espíritu

N'dai yeⁿe Ndyuūs ní i'téenu sá ndúúcū núúⁿmáⁿ staava yeⁿe sa. Chii 'yaaⁿ n'dái 'iiⁿ'yāⁿ chi'téenu yā Señor miiⁿ.

²⁵Cuayiivi miiⁿ ní cueⁿē Bernabé na yāāⁿ Tarso chi in'nuuⁿ sa Saulo miiⁿ; ní ndaācā sa saⁿā ní nandēē sa saⁿā na yāāⁿ Antioquía. ²⁶Ní nduuvidaamá yā 'áámá nduuyu na yaācū miiⁿ, ní chi'cuééⁿ yā neené 'yaaⁿ 'iiⁿ'yāⁿ. Chiiⁿ vmnááⁿ vmnaaⁿ na yāāⁿ Antioquía 'iiⁿ'yāⁿ s'eeⁿ yeⁿe yāāⁿ miiⁿ caⁿ'a yā chi duuchí cristiano s'eeⁿ, 'iiⁿ'yāⁿ chi i'teenu Cristo.

²⁷Nguuvi s'uúⁿ tanáⁿā profetas chi ngaⁿā nduudu yeⁿe Dendyuūs can'dáa yā na yāāⁿ Jerusalén. Ndaá yā na yāāⁿ Antioquía. ²⁸Nadacueeⁿ 'áámá yā chi nguuví yā Agabo ní dííⁿ yā chí inadacáadiinūⁿ 'iiⁿ'yāⁿ s'eeⁿ cáāvā Espíritu N'dai yeⁿe Ndyuūs chí ndaa 'áámá cuiicu ch'ēete núúⁿmáⁿ yáⁿāa chi véé 'iiⁿ'yāⁿ. Cho'ōo chuū nguuvi yeⁿe saⁿā Claudio. ²⁹Tuuⁿ'mi ní 'iiⁿ'yāⁿ s'eeⁿ chi i'téenu Cristo dííⁿ yā chí dicho'ó yā ofrendas yeⁿē hermanos chi snée yā yáⁿāa Judea. 'Áámá 'áámá yā tuunu tuunu ca tan'dúúcā chi cuuvi ca'á yā. ³⁰Chuū ní dííⁿ yā ní ca'á yā 'iiⁿ'yāⁿ ndiicúú. Ní 'iiⁿ'yāⁿ ndiicúú dicho'ó yā limosna ndúúcū Bernabé ndúúcū Saulo.

**Herodes 'caaⁿ'núⁿ yā Jacobo,
ní s'nuúⁿ yā Pedro vácuū**

12 Tiempo miiⁿ ní rey Herodes diiⁿ'yuⁿ ta'á yā chi neⁿe 'caaⁿ'núⁿ yā náⁿā 'iiⁿ'yāⁿ chi ngeⁿe yaācū. ²Nífcú ch'i'iiⁿ'nuⁿ rey miiⁿ ndúúcū machete chí 'caāíⁿ ndúú 'uuví lados Jacobo chí 'díinū Juan.

³N'diichí yā chi 'iiⁿ'yāⁿ Israel s'eeⁿ canee yiinú yā chuū. Dichó'o yā saⁿ'a s'eeⁿ chi cuta'ā ntúuⁿ sa Pedro dendu'ū. Nguuvi mííⁿ ní nguuvi yeⁿē pan chi nguéé yiinūⁿ levadura miiⁿ. ⁴Sta'á yā Pedro ní s'nuúⁿ yā saⁿ'ā vácuū naachi snée cuūⁿ taáⁿ soldado, 'áámá tááⁿ soldado miiⁿ cuūⁿ ngí sa. Soldado s'eeⁿ cunun'dai sa Pedro ní cho'ó yeⁿē pascua ní rey Herodes tun'dái yā saⁿ'ā. ⁵Cunun'dai sa Pedro miiⁿ chí canuuⁿ sa vácuū. 'Iiⁿ'yāⁿ chí ngeⁿe yaācū miiⁿ ngáⁿ'ánguā'á yā ní ngíicá yā Dendyuūs ndii nguuvi ndíí n'gaaⁿ cucáāvā Pedro miiⁿ.

Nanguaⁿ'ai Pedro yeⁿe vácuū

⁶Taachi neⁿe ntun'dáa Herodes miiⁿ Pedro miiⁿ, nguiinú mííⁿ nūuⁿ ní cyaadu Pedro miiⁿ naavtaⁿ'a yeⁿe 'uuví soldado s'eeⁿ. Ndēē chiichí sa ndúúcū 'uuví cadena s'eeⁿ. Saⁿ'ā s'eeⁿ chí diiⁿ cuidado vácuū mííⁿ snée sa cheendi vacūū miiⁿ. ⁷Caandiveéⁿ nī, ndaā 'áámá ángel yeⁿē Señor. Ní 'áámá dēevé canéé na vácuū. Tuuⁿ'vi yā tíicuaa Pedro ní nanduuchí yā Pedro. Ní caⁿ'a yā: Nacueeⁿ di cániicū di. Cadena s'ūuⁿ ní chivíi na ta'á sa. ⁸Tuuⁿ'mi ní ngaⁿ'a ángel miiⁿ ní ngii yā saⁿ'ā: Cu'neeⁿ di cinto yeⁿē di ní cunuūⁿ cá'a di ndaacuú yeⁿē di ní diiⁿ chiichí di cinta yeⁿē. 'Tíicā diiⁿ sa. Ní caⁿ'a yā: Nunúúⁿ dí catecai vmnaaⁿ di ní cuchíi di, ní can'daā di 'úú.

⁹Ní n'daa sa ní cueⁿe sa n'daā sa 'iiⁿ'yāⁿ. Pedro miiⁿ ní nguéé deenu sa chí cuaacu chí diiⁿ ángel miiⁿ. Nadacáadiinuⁿ sa chí 'áámá visión chí n'gííⁿ'nuⁿ sa nguaaⁿ na 'yúúduyaāⁿ yeⁿē sa. ¹⁰Cho'ó yā, yeⁿē

'áámá tááⁿ soldado s'eeⁿ, ní cho'ó yā ndii chiiⁿ ndii 'úúví tááⁿ soldado s'eeⁿ. Ní ndaa yā ná cheendi va'ái cūū chí canéé cuaaⁿ na yááⁿ miiⁿ. Chii ní nánguááⁿ mááaⁿ cheendi va'ai yeⁿé yā. Can'dáa yā ní cho'ó yā 'áámá yúúní, ní ángel miiⁿ ní chivíi yā yeⁿe yā. ¹¹Tuu'mi ní Pedro miiⁿ ní nduuchi sa. Ní caⁿā sa: Maaⁿ ní ituumicadiinúⁿ chí Ndyuūs miiⁿ nidicho'ó yā ángel yeⁿé yā ní nanguáⁿai yā 'úú yeⁿé ta'la rey Herodes. Níicú yeⁿé tanducueⁿé yááⁿ chí yááⁿ yeⁿé 'iiⁿyāⁿ Israel s'eeⁿ chí snéé ngiinu yā chí 'cuūvi 'úú.

¹²Taachí Pedro nacadíinuuⁿ yā yeⁿé chuū cueⁿé yā, ní ndaa yā na vaacu María chεecu Juan, chí ngúúví ntúūⁿ sa Marcos, naachí neení 'yaaⁿ yā snéé yā chí nduuvídáámá yā ní ngaⁿangua'á yā.

¹³Taachí di'cuεécú Pedro cheendi va'ái yeⁿe patio, can'dáa 'áámá n'daataá chí nguuví tá Rode. ¹⁴Tá 'cūū ní 'naanaveeⁿ tá nduudu yeⁿé Pedro ní chiiⁿ yeenú tá. Ní nguéé nn'guaaⁿ tá cheendi va'ái. Cunaⁿā tá ngeēnū tá chεeti va'ái ní caⁿa tá chí Pedro miiⁿ canee sa cheendi va'ái. ¹⁵'iiⁿyāⁿ s'eeⁿ ní ngaⁿá yā ngii yā táⁿā: Loca dii. Taⁿā miiⁿ dicuaācu tá saⁿā miiⁿ. Tuu'mí 'iiⁿyāⁿ s'eeⁿ caⁿa yā: Angel chí díⁿ cuidado saⁿā.

¹⁶Pedro miiⁿ ní iyaa'vi ca sá. Taachí nn'guaaⁿ yā ní n'diichi yā saⁿā dii'yá yā chí. ¹⁷Pedro miiⁿ ní dit'á sa yeⁿé yā chí 'cuεetinéé 'díⁿ cheendi yā. Ní chí sa 'iiⁿyāⁿ táácā ángel yeⁿe Señor ntun'dáa yā saⁿā vácūū. Pedro ní caⁿa sa: Díⁿ nī chí cadiinuuⁿ Jacobo ndúúcu hermanos. Pedro can'dáa sa ní cueⁿe sa taama luar.

¹⁸Chi dεεve míⁿ ní dii'yā n'dái soldado s'eeⁿ chí chíi ndúúcu Pedro.

¹⁹Herodes miiⁿ ní n'nuúⁿ yā saⁿā. Nguéé ndaaca yā saⁿā. Ch'iinu maaⁿ ní tiinguuneéⁿ yā saⁿā s'eeⁿ chí diiⁿ cuidado. Caⁿa yā chí 'cuūvi saⁿa s'eeⁿ. Cuayiivi cueⁿe Herodes miiⁿ yáⁿāa Judea ná yááⁿ Cesarea ní canee yā miiⁿ.

Ch'ii rey Herodes

²⁰Herodes miiⁿ taaⁿ n'dai yā yeⁿé 'iiⁿyāⁿ yááⁿ Tiro ndúúcu 'iiⁿyāⁿ yááⁿ Sidón. Naati 'iiⁿyāⁿ yeⁿe yááⁿ s'eeⁿ ní ndaa yā nanááⁿ rey Herodes miiⁿ chí neⁿe taaví yā chí canéé 'diiⁿ, ti chí nge'é yā chí yeⁿé yáⁿāa yeⁿe rey. Cuta'á yā tandúúcu amigo yeⁿé yā saⁿā chí nguuví Blasto chí diiⁿ cuidado va'ai yeⁿe rey, cuarto naachi cyaadú yā. Neⁿé yā chí cuuví caaⁿmaⁿ sa ndúúcu rey cááva yā. ²¹'Áámá nguuví chí diiⁿ señalado cáávā chuū, Herodes canuuⁿ yā catecai rey. Ch'iindí yā na trono yeⁿé yā ní caⁿa yā chíi yā 'iiⁿyāⁿ 'áámá nduudu. ²²Ní 'iiⁿyāⁿ yááⁿ miiⁿ 'cai yiicú yā ní caⁿa yā: Ndúúdu miiⁿ yeⁿé Dendyuūs, nguéé yeⁿe saⁿā iⁿyeedí 'cūū.

²³Hora miiⁿ ní 'áámá ángel yeⁿe Señor miiⁿ n'nuuⁿ cá'ai yā saⁿā Herodes caati nguéé caⁿa sa chí yeⁿe Dendyuūs chí ch'εete taavi chí ngaⁿa sa. Ní che'ē taavi n'dáa rey miiⁿ ní ch'ii sa.

²⁴Nduudú yeⁿé Señor Jesucristo miiⁿ ndíⁿ ch'εete ca ní 'iiⁿyāⁿ chí i'téenu ngíⁿ 'yaaⁿ cá yā.

²⁵Bernabé ndúúcu Saulo miiⁿ nndaá ntúuⁿ yā yááⁿ Jerusalén ti 'āā díⁿ yā cumplir ntiⁿnyuⁿ yeⁿé yā. Ndeē ntúuⁿ yā Juan chí nguuví Marcos.

**Bernabé ndúúcū Saulo tucaⁿá
yā viaje vmnááⁿ vmaaaⁿ**

13 Véé 'iiⁿyāⁿ profetas chi caaⁿmaⁿ nduudu yeⁿe Dendyuūs ndúúcū maestros yeⁿe yaācū yeⁿe yāāⁿ Antioquía. 'Iiⁿyāⁿ s'eeⁿ ní Bernabé, ndúúcū Simón chi nguuvi sa Niger, ndúúcū Lucio yeⁿe yāāⁿ Cirene, ndúúcū Manaén saⁿā chi dáámá chiita sá ndúúcū rey Herodes, ndúúcū Saulo. ²'Iiⁿyāⁿ s'eeⁿ ní taachí snée yā i'téenu yā Señor Jesucristo. Ní taachí 'āā cuéé che'é yā tuu'mí Espíritu N'dai yeⁿe Ndyuūs caⁿa yā: Cu'neeⁿ v'i'í nī 'āā v'i'í Bernabé ndúúcū Saulo cáāvā ntiⁿnyuⁿ chi 'úú ca'á saⁿā s'eeⁿ. ³Taachi 'āā cuéé che'é yā ní ngaⁿāngualá yā níícú sn'duúⁿ yā ta'á yā vmaaaⁿ yeⁿe saⁿā s'eeⁿ ní dííⁿ yā despedir yeⁿe sa.

**Apóstoles caⁿa yā nduudu
cuaacu na isla Chipre**

⁴Espíritu N'dai dichó'o yā 'iiⁿyāⁿ s'eeⁿ ní cueⁿé yā yāāⁿ Seleucia. Ndií miiⁿ ní cueⁿé yā na barco isla Chipre. ⁵Ndaá yā na yāāⁿ Salamina ní ngaⁿa yā nduudu yeⁿe Dendyuūs miiⁿ na yāacū sinagogas yeⁿe 'iiⁿyāⁿ Israel s'eeⁿ. Ní canéé ntúúⁿ yā ndúúcū Juan miiⁿ chí nginneé sá 'iiⁿyāⁿ. ⁶Ní ch'iinu snee yā cheⁿe yā núúⁿ máⁿ yāāⁿ yeⁿe isla Chipre ní ndaá yā na yāāⁿ Pafos, ní ndaacá yā 'áámá saⁿā Israel chi nguuvi Barjesús. Saⁿā miiⁿ saⁿā chí idin'dái magia ní profeta chi nguéé ngaⁿā nduudu cuaacu yeⁿe Dendyuūs nanááⁿ 'iiⁿyāⁿ. ⁷Saⁿā miiⁿ canéé sá ndúúcū saⁿā gobernador Sergio Paulo ní 'áámá saⁿā chi

déenu sa. Sergio Paulo miiⁿ ní 'cai sa Bernabé ndúúcū Saulo. Neⁿe sa 'caandiveeⁿ sa nduudú yeⁿe Dendyuūs. ⁸Sáⁿā Elimas (nguuvi sá neⁿe caaⁿmāⁿ davaacú cūū saⁿā chí idin'dái magia) nguéé 'cūūⁿ sa saⁿā. Neⁿe sa divíi sa chí i'teenu Sergio Paulo chi gobernador. ⁹Tuu'mi ní Saulo chi nguuvi Pablo dendú'ú, ndiituú sa ndúúcū Espíritu N'dai ní n'gíinu sa saⁿā Elimas miiⁿ. ¹⁰Pablo caⁿa sa: Dii, sáⁿā diitú yeⁿe tanducuéⁿē vaadi nginnche'éi ndúúcū nducuéⁿē chí nguεε n'daācā, daiya yāāⁿ n'guiniūⁿ ní contra yeⁿe tanducuéⁿē vaadi cuaacu. ¿Áá nguéé cu'nēēⁿ 'naaⁿ di chí di'vááchí di yeⁿe yúúⁿ ní cuaacu yeⁿe Señor Jesucristo? ¹¹Maaⁿ ní ta'ā Señor miiⁿ canee contra yeⁿe di ní cúúv'í nngueenáⁿ di. Nguéé n'díichi di 'yáⁿā 'áámá tiempo. Tuu'mí nūuⁿ chí nngueenáⁿ sa ní 'áámá chí maāi yeⁿe sa. Ní cachiica 'múúⁿ cachiiá miiⁿ sa ní in'nuūⁿ sa du'ū chí cundéé neeⁿ ta'ā sa. ¹²Tuu'mi ní gobernador Sergio Paulo n'diichi sa chí chíi, ní s'teenu sa. Ngeⁿe yíínú sá yeⁿe nduudu yeⁿe Señor Ndyuūs.

**Pablo ndúúcū Bernabé cuēⁿe yā na
yāāⁿ Antioquía yeⁿe distrito Pisidia**

¹³Pablo ndúúcū 'iiⁿyāⁿ chí ndúúcū sa cueⁿé yā na barco yeⁿe yāāⁿ Pafos ní cueⁿé yā na yāāⁿ Perge yeⁿe país Panfilia. Naati Juan miiⁿ ní cueⁿe sa yāⁿe yā na yāāⁿ Jerusalén. ¹⁴'Iiⁿyāⁿ s'eeⁿ ní cueⁿé yā yeⁿe yāāⁿ Perge ní ndaá yā yāāⁿ Antioquía yeⁿe distrito Pisidia. Ní ndaa yā na yaācu sinagoga nguuvi sábadu, 'áámá nguuvi chí ntaavi'tuunúúⁿ yā tiempo miiⁿ. Ní

ch'et'é yā na silla. ¹⁵Cuayiivi chi saⁿa ch'etete yeⁿe yācū sinagoga ch'eeⁿ sa ná libro yeⁿe ley ndúúcū ná libro yeⁿe profetas, saⁿā ch'etete dich'ó sa saⁿā s'eeⁿ chí caāⁿmāⁿ sa ní caⁿa sa: Ndís'tiī saⁿā vi'í, ndúúti chi canee 'áámá nduudu yeⁿe chí ca'cueeⁿ di 'iiⁿyāⁿ 'cūū, caaⁿmaⁿ di.

¹⁶Tuu'mi ní Pablo miiⁿ ní nacueeⁿ sa. Diīⁿ sá ndúúcū ta'a sa chí cuuvi 'diīⁿ. Ní caⁿa sa: Ndís'tiī saⁿā yeⁿe Israel ndúúcū 'iiⁿyāⁿ chí i'téénú Ndyuūs, 'caandivéⁿ nī. ¹⁷Ndyuūs yeⁿe 'iiⁿyāⁿ yeⁿe yú Israel ndéeve yā chiida yú s'eeⁿ ní diīⁿ yā chí 'iiⁿyāⁿ ch'etete. Ní 'iiⁿyāⁿ s'eeⁿ snée yā yáⁿāa Egipto tan'dúúcā 'iiⁿyāⁿ snúúⁿ yúúni. Ní Ndyuūs ndúúcū poder yeⁿe yā ndúúcū ta'á yā ní tun'dáa yā 'iiⁿyāⁿ. ¹⁸Ní taandúú 'úúví ngēecu nduūyū diīⁿ yā cuidado 'iiⁿyāⁿ na yáⁿāa cuūⁿmaⁿ. Ní chí ch'é yā taanduvéⁿ chí 'iiⁿyāⁿ s'eeⁿ diīⁿ yā. ¹⁹Ní taachí Ndyuūs diīⁿ tuuví yā ndēēchē nación yeⁿe 'iiⁿyāⁿ chí nguéé ndaata Israel na yáⁿāa Canaán, ca'á yā yáⁿāa miiⁿ chí cuuvi yeⁿe 'iiⁿyāⁿ Israel. ²⁰Cho'ó chuū cheeti cuūⁿ ciento canéé 'uūví ngēecu ndiichi ndúuyū ca'a yā juez yeⁿe yā ndii nguuvi profeta Samuel miiⁿ chí caⁿa nduudu Ndyuūs. ²¹Tuu'mi ní tiempo miiⁿ chiica yā rey ní Ndyuūs ní ca'á yā Saúl miiⁿ chí cuuvi sa rey. Cheeti 'uuvi ngēecu nduūyū Saúl miiⁿ rey miiⁿ. Saúl miiⁿ saⁿa daiya Cis, 'áámá saⁿā yeⁿe 'iiⁿyāⁿ yeⁿe Benjamín. ²²Diví yā saⁿā ní Ndyuūs nadicueeⁿ yā táámá rey chí David chí caⁿa yā nduudu cuaacu yeⁿe yā. Ní Ndyuūs ngaⁿá yā: 'Úú ndaacá David daiya Isai miiⁿ 'áámá

saⁿā tan'dúúcā chí neⁿe staava yeⁿe. Saⁿā miiⁿ ní diīⁿ sa tanducueⁿe chí neⁿe. ²³Yeⁿe ndaata sáⁿa 'cūū miiⁿ tan'dúúcā chí Ndyuūs ngaⁿa chí cā'a yā, Ndyuūs nadicueeⁿ yā Jesús yeⁿe 'iiⁿyāⁿ Israel lado yeⁿe Salvador chí 'iiⁿyāⁿ chí nadanguáⁿai yā 'iiⁿyāⁿ yeⁿe nuuⁿndi yeⁿe yā. ²⁴Taachí 'aa cuéé ndaá Jesús miiⁿ, caⁿā Juan miiⁿ chí cuēdinuūⁿniⁿ yā yeⁿe chí nducyaaca 'iiⁿyāⁿ yeⁿe Israel ndaacadaamí yā yeⁿe nuuⁿndi yeⁿe yā. ²⁵Juan miiⁿ taachi ch'iinu diīⁿ sa ntíⁿnyūⁿ yeⁿe sa, caⁿa sa: ¿Du'ú 'úú nadicádiinuūⁿ ndis'tiī? Nguéé 'iiⁿyāⁿ miiⁿ 'úú. Cundiichí nī. Cuchii 'áámá na cuaaⁿ daami 'úú ní 'úú nguéé n'daācā 'úú chí cuuvi diīⁿ n'daatií yíⁿmáⁿ naaⁿ ndaacuú yéⁿe chí cánúúⁿ ca'a.

²⁶Ndís'tiī saⁿā vi'í, daiya 'iiⁿyāⁿ yeⁿe Abraham ndúúcū 'iiⁿyāⁿ chí snée yā ndúúcū ndis'tiī chí i'téénú yā Ndyuūs, caavā ndís'tiī dich'o Ndyuūs nduudu chí nnguaⁿai 'iiⁿyāⁿ. ²⁷'Iiⁿyāⁿ chí snée yā na yāāⁿ Jerusalén miiⁿ ndúúcū nducyáácá yā chí ngaⁿā ntiīⁿnyuⁿ yeⁿe yā nguéé n'diichí yā Jesús ní nguéé nduudu yeⁿe profetas chí n'geeⁿ yā nducueⁿe nguuvi sábadó chí intaavi'tuunúúⁿ yā. Ní 'iiⁿyāⁿ s'eeⁿ diīⁿ yā condenar Jesús. ²⁸'Ícu ní nguéé ndaacá yā falta yeⁿe yā chí 'caaⁿnuⁿ yā 'iiⁿyāⁿ. Chiica 'iiⁿyāⁿ nanááⁿ Pilato miiⁿ ní 'iiⁿyāⁿ s'eeⁿ ngaⁿa yā chí Pilato 'caaⁿnúⁿ yā Jesús ní 'cuūvi yā. ²⁹Taachí ch'iinu chíi tánducueⁿe chí canéé nguūⁿ yeⁿe yā, 'iiⁿyāⁿ diví yā Jesús na yáⁿá cruz ní s'nuúⁿ yā 'iiⁿyāⁿ na yáinyāⁿ. ³⁰Ndyuūs nadicueeⁿ yā 'iiⁿyāⁿ yeⁿe nguuaⁿ tinaⁿā. ³¹Jesús

miiⁿ ch'iⁿí maáⁿ yā nééné n'deēe nguuví nanááⁿ 'iiⁿ'yāⁿ chí dáámá cuhéé yā ndúúcu yā yeⁿe yāⁿ'āa Galilea n' ndaá yā yāáⁿ Jerusalén. 'Iiⁿ'yāⁿ s'uuⁿ testigos yeⁿ'é yā nanááⁿ 'iiⁿ'yāⁿ.

³²Nús'uuⁿ ntuūⁿ ngaⁿ'á 'nū ndúúdu ngai. Chuū chí nduudu chí Ndyuūs ca'a yā chiida yú s'eeⁿ taachi Ndyuūs caⁿ'a yā chí dífⁿ yā. ³³Chuū chí Ndyuūs miiⁿ ní dicuaacú yā ní Ndyuūs dífⁿ yā cáávā s'uuúⁿ chí 'iiⁿ'yāⁿ daiyá chiida yú s'eeⁿ yeⁿ'e Israel tááchí Ndyuūs nadacueéⁿ yā Jesús miiⁿ. Chuū chí canéé nguūⁿ na libro yeⁿ'ē Ndyuūs naachi nguūⁿ salmo ndii 'úúví chí ngaⁿ'ā: Dii daiyá dii, maaⁿ nguuví 'úú n'giⁿí chí daiyá dii 'tíicā. ³⁴Ndyuūs nadacueéⁿ yā 'iiⁿ'yāⁿ yeⁿ'ē nguaaⁿ tináⁿ'ā. 'Āā ntéé nguεεcunéé choó yā. 'Túúca caⁿ'a yā: 'Úú teé dii cosa chí n'dai chí cāⁿ'a chí ca'á David. Chuū chí cuaacu. ³⁵Cáávā chuū ngaⁿ'á yā na táámá salmo: Nguéé 'cuaáⁿ nī chí Daiyá nī chí n'dai chí nguεεcunéé choó cuerpo yeⁿ'é yā. ³⁶Cuaacu nífⁿ'nyúⁿ chí David miiⁿ tááchí dichí'v'e yā 'iiⁿ'yāⁿ yeⁿ'e yā tan'dúúcā chí neⁿ'e Dendyuūs, ch'ii yā nícu ch'εεchí yā naachi ch'εεchi chiidá yā. Ní choo yā. ³⁷Naati 'iiⁿ'yāⁿ chí Dendyuūs nadacueéⁿ yā yeⁿ'e nguaaⁿ tináⁿ'ā ní nguéé choo yā. ³⁸Nadacadífnuūⁿ nī chuū, ndís'tiī saⁿ'ā ví'f. Caⁿ'a 'nū ndís'tiī nduudu yeⁿ'é Ndyuūs chí Ndyuūs nadach'εécú yā nuuⁿ'ndi yeⁿ'e nī cucáávā 'iiⁿ'yāⁿ 'cūū. ³⁹Cucáávā 'iiⁿ'yāⁿ miiⁿ Ndyuūs nadach'εécú yā nducuéⁿ'ē nuuⁿ'ndi yeⁿ'ē nducyáácá 'iiⁿ'yāⁿ chí i'téénu yā Dendyuūs. 'Iiⁿ'yāⁿ miiⁿ ní dífⁿ yā chí nduuví

n'dai dii nanááⁿ Dendyuūs, naati ley yeⁿ'e Moisés nguéé cuuví nach'εecu nuūⁿ'ndi yeⁿ'é 'iiⁿ'yāⁿ. ⁴⁰Quin'díichí nī chí nguéé chiī nanááⁿ ndís'tiī chí cánéé nguūⁿ cáávā profetas chí caⁿ'a nduudu yeⁿ'e Dendyuūs, ní canéé nguūⁿ na libro yeⁿ'e Ndyuūs:

⁴¹Quin'díichí nī ndís'tiī chí taaⁿ nī, ní ngeⁿ'e yiiⁿ'núúⁿ nī, ní 'cuuví nī; caati 'úú ní dífⁿ 'áámá ntiīⁿ'nyuⁿ neⁿ'e chí ndís'tiī snée nī iⁿ'yeeⁿ'dí 'cūū, 'Áámá ntiīⁿ'nyuⁿ chí nguéé i'téénu nī ndúúti chí du'ū 'iiⁿ'yāⁿ caaⁿ'maⁿ yā yeⁿ'e chuū.

⁴²Taachí nan'daa yā na yaācū sinagoga yeⁿ'ē 'iiⁿ'yāⁿ Israel s'eeⁿ, 'iiⁿ'yāⁿ s'eeⁿ chí nguéé yeⁿ'e ndaata Israel di'cuútu yā 'iiⁿ'yāⁿ, chí cúví dεeve táámá nguuví sábadu, nguuví chí ntaavi'tuunúúⁿ nī chí caaⁿ'máⁿ nī yeⁿ'e chuū. ⁴³Ní taachi 'āā dífⁿ yā despedir 'iiⁿ'yāⁿ yeⁿ'e yaācū sinagoga neené 'yaaⁿ 'iiⁿ'yāⁿ yeⁿ'e Israel ndúúcu 'iiⁿ'yāⁿ chí n'daacā chí 'āā maaⁿ ní 'iiⁿ'yāⁿ Israel s'eeⁿ, can'dáa yā Pablo ndúúcu Bernabé. Pablo ndúúcu Bernabé ní caⁿ'a yā 'iiⁿ'yāⁿ s'eeⁿ chí 'áámá 'cuεetinéé yā na favor ch'εete yeⁿ'é Dendyuūs.

⁴⁴Chidεeve táámá nguuví sábadu, nguuví chí ntaavi'tuunúúⁿ yā, nduuví dáámá yā n'deēe taaví 'iiⁿ'yāⁿ 'téé nuuⁿ'maⁿ yáaⁿ yā chí 'caandiveéⁿ yā nduudu yeⁿ'e Dendyuūs. ⁴⁵Naati 'iiⁿ'yāⁿ Israel s'eeⁿ taachi n'diichí yā chí n'deēe n'daí 'iiⁿ'yāⁿ miiⁿ ní ndiitū yā ndúúcu vaadī nguēē, caⁿ'a yā chí nguéé n'daacā chí ngaⁿ'ā Pablo miiⁿ. Ní caⁿ'a taáⁿ yā contra yeⁿ'é yā ní contra yeⁿ'e Dendyuūs. ⁴⁶Tuu'mi ní Pablo ndúúcu Bernabé miiⁿ caⁿ'a yā nguéé ndúúcu vaadī 'va'a caⁿ'a

yā: Ndís'tiī cuaacu níⁿnyúⁿ cánéé chí caaⁿmáⁿ 'nū ndúú^{cū} ndís'tiī nduudu yeⁿé Dendyuūs vmnááⁿ vmnaaⁿ naati ndís'tiī ní divíi nī yeⁿé veéⁿ nī. Ní túúmí^{cadiinúú} maáⁿ nī chí nguéé n'daacá nī chí tuneⁿ nī vida cueⁿe daāⁿmaⁿ. Cáávā chí dííⁿ nī, Ndyuūs nguéé teé yā ndís'tiī vida cueⁿe daāⁿmaⁿ ndís'tiī. Cuiⁿdií^{chí} nī. Nguεεcunée 'nū caⁿa ntuúⁿ 'nū ndúú^{cū} 'iiⁿ'yāⁿ s'eeⁿ chí nguéé yeⁿé ndaata Israel. ⁴⁷Caati 'tíicā chidichó^ó Señor 'iivú Ndyuūs miⁿ nús'uu, ní Ndyuūs cáⁿa yā chíi yā nús'uu:

'Úú chíⁿééⁿ ndís'tiī tan'dúú^{cā} chí^{dεε}ve yeⁿé 'iiⁿ'yāⁿ s'eeⁿ chí nguéé yeⁿe ndaata Israel, chí cuuvi caaⁿmáⁿ nī nduudu chí nanguaⁿ'āi 'iiⁿ'yāⁿ ndii núúⁿmáⁿ iⁿ'yeéⁿdí.

⁴⁸Taachí ch'iindiveéⁿ 'iiⁿ'yāⁿ s'eeⁿ chí nguéé yeⁿe ndaata Israel chuū ndiitú yā ndúú^{cū} vaadi yeenú ní caⁿa yā chí ch'εete taavi Ndyuūs cáávā nduudu yeⁿe Señor Ndyuūs miⁿ. Ní s'teenú yā nducyáácá 'iiⁿ'yāⁿ s'eeⁿ chí Ndyuūs chíⁿdεεve yā ní tee yā vida cueⁿe daāⁿmaⁿ. ⁴⁹Ní nduudu Señor miⁿ 'āā chí chiicadíⁿnuuⁿ 'iiⁿ'yāⁿ ti cheⁿe núúⁿmáⁿ yāáⁿ estado miⁿ. ⁵⁰Naati 'iiⁿ'yāⁿ Israel s'eeⁿ dííⁿ yā chí nguéé snéé 'dííⁿ yā n'daataá chí n'dai taavi chí n'dááca taavi ndúú^{cū} 'iiⁿ'yāⁿ chí ngaⁿa ntiⁿnyuⁿ yeⁿe yāáⁿ miⁿ. 'Iiⁿ'yāⁿ miⁿ ndúú^{cū} n'daataá ndúú^{cū} 'iiⁿ'ntyéⁿé nadacuéⁿ yā vaadi 'caa'va contra yeⁿe Pablo ndúú^{cū} Bernabé ní ndivíi yā 'iiⁿ'yāⁿ yeⁿé na yāáⁿ naachí snéé yā. ⁵¹Pablo ndúú^{cū} Bernabé ní n'dáádi yā iyaacá yeⁿe ca'a yā ti 'iiⁿ'yāⁿ yeⁿe yāáⁿ miⁿ ní

contra yā. Cueⁿe yā ní ndaa yā yāáⁿ Iconio. ⁵²'Iiⁿ'yāⁿ s'eeⁿ chí i'téenu yā Cristo ní yeenú taavi yā ndúú^{cū} vaadi yeenú ndúú^{cū} Espíⁿritu N'dai.

Pablo ndúú^{cū} Bernabé na yāáⁿ Iconio

14 Chíi na yāáⁿ Iconio chí Pablo ndúú^{cū} Bernabé sⁿdaa yā daama daama na yaācū sinagoga yeⁿé 'iiⁿ'yāⁿ Israel s'eeⁿ. Ní 'túú^{cā} caⁿa yā. Ní neené n'dai 'iiⁿ'yāⁿ Israel s'eeⁿ s'téenu yā. 'Tiicá ntúúⁿ 'iiⁿ'yāⁿ s'eeⁿ chí nguéé yeⁿé ndaata Israel. ²Naati 'iiⁿ'yāⁿ Israel s'eeⁿ chí nguéé i'téenu yā, n'gεεcu cheendí yā ndúú^{cū} 'iiⁿ'yāⁿ s'eeⁿ chí nguéé yeⁿé ndaata Israel ní dííⁿ yā chí 'iiⁿ'yāⁿ s'eeⁿ chí nguéé yeⁿe ndaata Israel nguéé nacadíⁿnuuⁿ yā n'daacā yeⁿe 'iiⁿ'yāⁿ chí i'téenu yā. ³Tuu'mi ní Pablo miⁿ ndúú^{cū} Bernabé 'naaⁿ n'dái ch'εetinée yā miⁿ ní Señor Jesucristo dííⁿ yā chí 'iiⁿ'yāⁿ s'eeⁿ nguéé 'va'á yā caⁿa yā yeⁿé Señor Jesucristo. Señor Jesucristo miⁿ ní chíⁿ'i yā chí nduudu cuaacu miⁿ chí nduudú yeⁿé yā yeⁿé favor ch'εete yeⁿé yā. Ní Señor miⁿ dííⁿ yā chuū ní cā'a yā poder chí Pablo ndúú^{cū} Bernabé dííⁿ yā señales ndúú^{cū} vaadi n'giinu. ⁴Níicú 'iiⁿ'yāⁿ s'eeⁿ yeⁿé yāáⁿ miⁿ ní 'uúⁿvi vaanicadíⁿnuuⁿ yeⁿé yā. Náⁿa yā ní lado yeⁿe 'iiⁿ'yāⁿ Israel s'eeⁿ ní tanáⁿ'a yā ní lado yeⁿé apóstoles chí dichó^ó Dendyuūs. ⁵'Iiⁿ'yāⁿ Israel s'eeⁿ ndúú^{cū} 'iiⁿ'yāⁿ s'eeⁿ chí nguéé yeⁿé ndaata Israel ndúú^{cū} 'iiⁿ'yāⁿ chí ngaⁿa ntiⁿ'nyūⁿ in'núúⁿ yā vaadi 'caa'va chí tun'dáa yā Pablo ndúú^{cū} Bernabé ní chí cuitúú yā 'iiⁿ'yāⁿ s'eeⁿ. ⁶Taachí chicadíⁿnuuⁿ saⁿ'ā s'eeⁿ chuū, cueⁿé yā ngeenu yā

na yáaⁿ Lистра ndúúcu yáaⁿ Derbe chi distrito yeⁿe Licaonia ndúúcu nducyaaca yáaⁿ nuuⁿmaⁿ ndiiví ná yáⁿaa. ⁷Ní miiⁿ caⁿa yā evangelio chí ndúúú ngai yeⁿe Jesucristo miiⁿ.

'Iiⁿyāⁿ caⁿa tuú yā Pablo na yáaⁿ Lистра

⁸Cánée 'áámá saⁿa yeⁿe yáaⁿ Lистра chí véé sá ti mar 'áámá fuerza yeⁿe ca'a sa. Nguéé ngiica sa ndíí ch'iindiyaaⁿ sa. ⁹Sáⁿa 'cūú ní ch'iindiveeⁿ sa chi caⁿa Pablo. Ní Pablo miiⁿ ní n'gíínu yā saⁿa miiⁿ ní nacááinúúⁿ yā yeⁿe saⁿa miiⁿ ti i'téenu sa chi cuuvi nduivā yeⁿe sa. ¹⁰Ní caⁿa yuudú yā: Nducueeⁿ cuaacú di ndúúcu ca'a di. Hora miiⁿ ní saⁿa miiⁿ nducueeⁿ sa ní chiica sa. ¹¹'Iiⁿyāⁿ chi n'diichí yā chi diiⁿ Pablo 'cai diitú yā ní caⁿa yā ndúúcu davaacu yeⁿe yáⁿaa Licaonia chi ndyuūs s'eeⁿ ndaa yā nanáaⁿ yā tan'dúúca saⁿa iⁿ'yeeⁿdí 'cūú.

¹²Caⁿa yā yeⁿe Bernabé chi Júpiter, ní Pablo miiⁿ ní Mercurio ti Pablo miiⁿ ní chindée yā nduudu. ¹³Yáacú yeⁿe Júpiter cánée ch'ua'ái yáaⁿ miiⁿ. Chiiduú yeⁿe Júpiter ndée yā itiindu s'ééⁿ ndúúcu corona s'eeⁿ yeⁿe naandā nanáaⁿ chééndí cheāⁿ yáaⁿ miiⁿ. Ní neⁿe yā 'caaⁿnúⁿ yā 'iití chi ca'a yā sacrificios. 'Tiicá ntúúⁿ n'dee taaví 'iiⁿyāⁿ yeⁿe yáaⁿ miiⁿ neⁿe yā diiⁿ yā. ¹⁴Ní naachí ch'iindiveeⁿ apóstoles Bernabé ndúúcu Pablo chuū chíín'cuuⁿ yā catecai yā tí neené ndachí ní cueⁿé yā nguaaⁿ 'iiⁿyāⁿ. Ní 'cai yā. ¹⁵Ní caⁿa yā: Ndís'tií saⁿa, 'd'é'ē cuuvi chí 'tíicā idiíⁿ ní? Nús'uú sáⁿa ntuuⁿ

nús'uu tan'dúúca ndís'tií. Ní ngaⁿa 'nū nduudu cuaacu chí diví ní yeⁿe nducuéⁿe dendu'ū ní cu'téenu ní Ndyuūs chí cánduuchi chí din'dái yā nanguuvi ndúúcu yáⁿaa ndúúcu nuuⁿníⁿyáⁿa ndúúcu nducyáacá dendu'ū chí véé. ¹⁶Nguuvi chí 'āā cho'ōo Ndyuūs s'neeⁿ yā nducyaaca 'iiⁿyāⁿ s'eeⁿ chí cáⁿa yā yúúni damaáⁿ yā. ¹⁷Nguéé s'neeⁿ yā ti nguéé cosa chí ch'iⁿi d'ú'uu 'iiⁿyāⁿ yā. Din'daacá yā. Ní teé yā cuuvi yeⁿe nanguuvi ndúúcu tiempo yeⁿe n'deē taaví n'gui'í o cosecha. Ní di'cuiitá yā staava yeⁿe yú ndúúcu vaadi yeenú ti teé yā chí neⁿe cuerpo yeⁿe yú.

¹⁸Caⁿa yā chuū, ngii n'dái naati idiíⁿ yā chí 'iiⁿyāⁿ yáaⁿ miiⁿ nguéé idiíⁿ yā sacrificio.

¹⁹Tuu'mi ní ndaā náⁿa 'iiⁿyāⁿ Israel s'eeⁿ yeⁿe yáaⁿ Antioquía ní yeⁿe yáaⁿ Iconio chí yaa'ví yā nducyáacá yā contra yeⁿe Pablo. Ní ca'a tuú yā saⁿa ní chíí n'dai yā saⁿa 'áámá lado ch'ua'ai yáaⁿ miiⁿ ní 'áacú yā chí 'āā n'dií sa. ²⁰'Iiⁿyāⁿ s'eeⁿ chí i'téenu yā Cristo ní nuuⁿmaⁿndiiví nanáaⁿ yā. Pablo miiⁿ ní nacueeⁿ sá ní nuuⁿ ndaaⁿ tuuⁿ sa na yaaⁿ miiⁿ. Ni chidēve táamá nguuvi cueⁿe sa ndúúcu Bernabé na yáaⁿ Derbe.

²¹Ní caⁿa yā evangelio chí ndúúú ngai yeⁿe Jesucristo yáaⁿ miiⁿ. Ní dííⁿ yā chí néené 'yaaⁿ 'iiⁿyāⁿ chí i'teenu. Pablo ndúúcu Bernabé nguēcunee yā yáaⁿ Lистра, yáaⁿ Iconio, ndúúcu yáaⁿ Antioquía. ²²Ní dííⁿ yā chí ditiinú yā ndúúcu vaadi i'teenu na alma yeⁿe 'iiⁿyāⁿ s'eeⁿ chí i'téenu yā Cristo ndúúcu staava yeⁿe yā.

Ní ngi'cueéⁿ yā 'iiⁿ'yāⁿ chi 'áámá cunee yā ndúúcuⁿ vaadi i'teenu. Ní caⁿ'a yā ndúúcuⁿ 'iiⁿ'yāⁿ s'eeⁿ: Cánéeⁿ chí nééneⁿ n'deēe chí cho'o núuⁿ yú maaⁿ níicú ndaá yú va'ai cheeti nguuví. ²³S'nééⁿ yā 'iiⁿ'yāⁿ ndiicúú chí saⁿ'a ndii tíiⁿ yeⁿ'ē 'áámá 'áámá yaācū ní caⁿ'angua'á yā taachi 'āa cueε ca'diinú yā. Ní s'nééⁿ yā na ta'a Señor 'iivú Ndyuūs 'iiⁿ'yāⁿ chi i'téenu.

**Nguéécundií yā ní cueⁿ'é yā yáāⁿ
Antioquía yeⁿ'e yáⁿ'āa Siria**

²⁴Cuayiivi chí cho'ó yā distrito yeⁿ'ē Pisidia ní ndaá yā yáⁿ'āa Panfilia. ²⁵Taachi caⁿ'a yā nduudu cuaacú miiⁿ na yáāⁿ Perge cunaⁿ'á yā na yáāⁿ Atalia. ²⁶Yeⁿ'e yáāⁿ miiⁿ cunaⁿ'á yā na barco na yáāⁿ Antioquía. Miiⁿ ní naachí hermanos s'eeⁿ vmnááⁿ vmnaaⁿ tucá'a yā Pablo ndúúcuⁿ Bernabé na ta'a Dendyuūs ndúúcuⁿ favor yeⁿ'e Dendyuūs cáávā ntiiⁿ'nyūⁿ chí 'āā dííⁿ yā. ²⁷Ní ndaá yā na yáāⁿ Antioquía. Ní taachi nduuvidaamá yā na yaacū caⁿ'a yā tanducueⁿ'ē cosa ch'εεε chí 'āā dííⁿ Dendyuūs ndúúcuⁿ yā. Ní táacā Dendyuūs ca'á yā permiso 'iiⁿ'yāⁿ chí nguéé yeⁿ'ē ndaata Israel chí cu'téenu yā nduudu yēⁿ'e yā. ²⁸Nááⁿ tiempo canéeⁿ yā ndúúcuⁿ 'iiⁿ'yāⁿ s'eeⁿ chí i'téenu yā Cristo.

Concilio na yáāⁿ Jerusalén

15 Tuu'mi ní náⁿ'a yā chí nndaá yā yeⁿ'ē yáⁿ'āa Judea chí'cueéⁿ yā hermanos chuū: Ndúúti chí nguéé dííⁿ di circuncidar 'iiⁿ'yāⁿ tan'dúúca chí ngaⁿ'a 'áámá ley yeⁿ'e Moisés tuu'mi ní nguéé

cuuvi nínguaⁿ'ai di. ²Pablo ndúúcuⁿ Bernabé ch'εεcu cheendí yā ndúúcuⁿ 'iiⁿ'yāⁿ yeⁿ'e yáāⁿ miiⁿ'ya ní nééneⁿ n'deēe caⁿ'a yā. Ní 'iiⁿ'yāⁿ yeⁿ'e yáāⁿ miiⁿ caⁿ'a yā chí caⁿ'a Pablo ndúúcuⁿ Bernabé ndúúcuⁿ tan'duuví 'iiⁿ'yāⁿ s'eeⁿ na yáāⁿ Jerusalén. Ní caⁿ'á yā ní tiinguuneeⁿ yā yeⁿ'ē chuū nanááⁿ 'iiⁿ'yāⁿ ndiicúú chí 'iiⁿ'yāⁿ ndíí tíiⁿ yeⁿ'e yaacū ndúúcuⁿ apóstoles chí dich'ó Dendyuūs.

³'Iiⁿ'yāⁿ s'eeⁿ yeⁿ'e yaacū ch'εetinúúⁿ yúúni yā ndúúcuⁿ 'iiⁿ'yāⁿ s'eeⁿ. Ní cho'ó yā 'iiⁿ'yāⁿ s'eeⁿ na yáⁿ'āa Fenicia ndúúcuⁿ yáⁿ'āa Samaria. Ní 'iiⁿ'yāⁿ s'eeⁿ caⁿ'a yā taacā chí i'teenu 'iiⁿ'yāⁿ s'eeⁿ chí nguéé yeⁿ'ē ndaata Israel. Ní nducyaaca hermanos miiⁿ yeenu taaví yā.

⁴Ní ndaá yā na yáāⁿ Jerusalén. Ní apóstoles ndúúcuⁿ 'iiⁿ'yāⁿ ndiicúú ndúúcuⁿ 'iiⁿ'yāⁿ yeⁿ'e yaacū miiⁿ dííⁿ yā recibir 'iiⁿ'yāⁿ s'eeⁿ. Ní 'iiⁿ'yāⁿ s'eeⁿ caⁿ'a yā tanducueⁿ'ē chí Dendyuūs dííⁿ yā ndúúcuⁿ yā. ⁵Naⁿ'a 'iiⁿ'yāⁿ yeⁿ'e fariseos chí s'teenu yā ní dííⁿ yā costumbre yeⁿ'é yā nacuéⁿ yā ní caⁿ'a yā: Canéeⁿ chí dííⁿ yú circuncidar 'iiⁿ'yāⁿ ní canee cúúⁿ'míⁿ yā dííⁿ yā chí ngaⁿ'ā ley yeⁿ'e Moisés.

⁶Ní nduuvidaamá yā apóstoles ndúúcuⁿ 'iiⁿ'yāⁿ ndiicúú chí 'iiⁿ'ntyéⁿ'e yeⁿ'e yaacū chí n'diichí yā yeⁿ'e chuū. ⁷Ní ch'iinu caⁿ'a yā n'dee n'dái, ní Pedro miiⁿ ní ncueⁿ sá ni caⁿ'ā sa: Ndís'tií, saⁿ'ā hermanos, deenú ní tan'dúúca 'āā 'naaⁿ tiempo chí Dendyuūs ndeēvé yā 'úú nguaaⁿ s'uúúⁿ ni cáávā cheendí ní 'iiⁿ'yāⁿ s'eeⁿ chí nguéé yeⁿ'ē ndaata Israel chí'iindiveéⁿ yā nduudu cuaacu ní

s'téenu yā. ⁸Ní Ndyuūs chi inaaⁿ yā staava yeⁿē yú ch'iⁿi yā chi i'téenu 'iiⁿyāⁿ s'eeⁿ. Ní ca'a yā Espíritu N'dai 'iiⁿyāⁿ s'eeⁿ chi nguéé yeⁿē ndaata Israel tan'dúúca s'uúúⁿ. ⁹Dáámá nducyaaca yú ndúúcu 'iiⁿyāⁿ s'eeⁿ ní Ndyuūs nadidεεvé yā staava yeⁿe 'iiⁿyāⁿ s'eeⁿ cáávā chi i'téenu yā. ¹⁰Maaⁿ ní ǐde'ē cáávā chi di'vaachi nī yeⁿe Ndyuūs, ní s'néeⁿ nī na tiiⁿ 'iiⁿyāⁿ s'eeⁿ chi i'téenu yā Cristo tan'dúúca 'áámá yugo chi s'uúúⁿ nguéé cuuvi candεε yú ndii nguεε chii candεε yā chiida yú s'eeⁿ dendú'ú? ¹¹Maaⁿ ní i'téenu yú cucáávā favor ch'εεte taavi yeⁿe Señor Jesús cuuví nanguaⁿāi yú dáámá dáámá ndúúcu 'iiⁿyāⁿ s'eeⁿ chi nguéé yeⁿē ndaata Israel.

¹²Tuu'mi ní nducyaaca 'iiⁿyāⁿ s'eeⁿ 'aa ntéé caⁿ'á yā mar 'áámá. Ní ch'iindiveéⁿ yā yeⁿe Bernabé ndúúcu Pablo chi caⁿ'a yā n'dee n'dái señales ndúúcu vaadi n'giinu chí Ndyuūs diíⁿ yā cáávā 'iiⁿyāⁿ miiⁿ nguááⁿ 'iiⁿyāⁿ s'eeⁿ chi nguéé yeⁿē ndaata Israel. ¹³Taachí 'iiⁿyāⁿ s'eeⁿ miiⁿ snéé diíⁿ yā tuu'mi Jacobo nan'guεεcutaⁿā sa ní caⁿ'a sa: Ndís'tii saⁿā hermanos cu'neeⁿ veeⁿ nī yeⁿé. ¹⁴Simón miiⁿ 'āā caⁿ'a sá táaca Dendyuūs vmnááⁿ vmnaaⁿ n'diichí yā 'iiⁿyāⁿ s'eeⁿ chi nguéé yeⁿē ndaata Israel ní sta'á yā 'iiⁿyāⁿ nguaaⁿ 'iiⁿyāⁿ s'eeⁿ chí 'iiⁿyāⁿ yeⁿé yā cáávā chi i'téenu yā Jesucristo. ¹⁵Ndúúcu nduudu 'cūú ní ndíí tiempo vmnaaⁿ cunee yiinú profetas chí caⁿ'a chí cuchii tan'dúúca chí cunee nguūⁿ na libro yeⁿe Ndyuūs:

¹⁶Cho'oo chúú nanguεεcúndíí ní nadin'daí va'ai yeⁿe David

chí sndεεve ní nadin'daí to'o ndiicúú, ní va'ai miiⁿ nanguεεcunee nádacuééⁿ ntuúⁿ.

¹⁷Ní tanáⁿ'a yā 'iiⁿyāⁿ n'nuuⁿ ntuúⁿ yā Señor Jesucristo, ní yeⁿē nducyaaca 'iiⁿyāⁿ chí nguéé yeⁿē ndaata Israel miiⁿ chí Dendyuūs caⁿ'a yā chí cuuvi déénu yā.

¹⁸Chuū ngaⁿ'a Señor miiⁿ chí din'dái tuuū ndεεvéé ní dendú'ú diíⁿ yā chí cadiiuuⁿ 'iiⁿyāⁿ chúú ndíí tiempo ndii cuaaⁿ vmnaaⁿ.

¹⁹Maaⁿ ní 'úú diíⁿ inacádiinúúⁿ yeⁿe chuū, chí nguéé di'vaachi yú yeⁿē 'iiⁿyāⁿ s'eeⁿ chí nguéé yeⁿe ndaata Israel chí cu'téenu yā Dendyuūs. ²⁰Mííⁿ dingúuⁿ yú yeⁿē 'iiⁿyāⁿ chí cūvii yā yeⁿē tanducuééⁿ chí yeⁿē ídolos ndúúcu yeⁿē 'áámá saⁿ'ā 'áámá n'daataá chí nguéé snee yā ndúúcu vi'i ní nguéé n'giindivaacu yā, ndíí nguéé che'é yā yuūtē yeⁿē 'áámá 'iiti chí idi'núú yā daandú tī, ndíí nguéé che'é yā ingée yā yuuúⁿ yeⁿé tī. ²¹Ndíí tiempo yeⁿē Moisés miiⁿ ní ndíí cuááⁿ vmnaaⁿ ndíí nducyáácá yááⁿ véé 'aama yā chí ngaⁿ'a yā yeⁿē Dendyuūs na yaácú sinagoga naachi n'geeⁿ yā libro yeⁿe Dendyuūs nguuví nguuví chí intaavi'tuunúúⁿ yā chí sábadu.

²²Apóstoles chí dich'ó Dendyuūs ndúúcu 'iiⁿyāⁿ ndiicúú chí ngaⁿ'a ntiíⁿnyuⁿ yeⁿe yáacu ndúúcu nducuééⁿ 'iiⁿyāⁿ na yaácú canéé yiinú yā chí n'daacā chí nínδεεve yā yeⁿē nguááⁿ yā 'uuví saⁿ'ā. Ní dich'ó yā saⁿ'ā s'eeⁿ ndúúcu Pablo ndúúcu Bernabé na yááⁿ Antioquía.

Ní ndeεve yā Judas chi nguuví sa Barsabás, ndúúcu Silas. Saⁿā s'eeⁿ n'geete sá nguuaⁿ hermanos. ²³Ní dichó'ó yā caaca ndúúcu 'iiⁿ'yāⁿ s'eeⁿ. Apóstoles ndúúcu 'iiⁿ'yāⁿ ndicúu ndúúcu hermanos níngúuⁿ yā chuu yeⁿ'ē hermano chi nguéé yeⁿ'ē ndaata Israel chi snée yā na yāāⁿ Antioquía, na yāⁿ'āa Siria, ndúúcu na yāⁿ'āa Cilicia: N'dai n'dii. ²⁴Nús'uū ní n'giindiveéⁿ 'nū chi náⁿ'a yā cueⁿ'é yā yeⁿ'é 'nū ní dííⁿ yā chi ndís'tii nguéé ch'εetinéé 'dííⁿ nī ndúúcu nduudu yeⁿ'é yā. Ní nguéé caⁿ'a ntiⁿ'nyuⁿ 'nū chi can'dáa yā. 'Iiⁿ'yāⁿ miiⁿ dííⁿ yā chí staⁿ'a yā alma yeⁿ'é nī ní chí'cueeⁿ yā chí diiⁿ circuncidar 'iiⁿ'yāⁿ ní dííⁿ yā chí ngaⁿ'a ley yeⁿ'e Moisés. ²⁵N'daacā n'dai canéé nus'ūu chí 'āā ndúúvidaama nducyáácá 'nū chí dεεve 'nū saⁿ'ā s'eeⁿ ní dichó'ó 'nū nanááⁿ ndís'tii saⁿ'a s'eeⁿ ndúúcu Bernabé ndúúcu Pablo, 'iiⁿ'yāⁿ s'eeⁿ chí neⁿ'e taavi yú. ²⁶Saⁿ'ā s'eeⁿ n'deēe cuúví cueⁿ'é yā naachi deenú yā chí vεε peligro chí 'cuúví yā cáávā Señor Jesucristo yeⁿ'ē yú. ²⁷Chííⁿ chí dichó'ó 'nū Judas ndúúcu Silas. 'Iiⁿ'yāⁿ s'eeⁿ ní 'tiicá ntúúⁿ caaⁿ'máⁿ yā chí cuuvi deenú nī. ²⁸Chuū ní n'daacā canee ndúúcu Espíritu N'dai ndúúcu nús'uu dííⁿ 'nū chí nguéé i'neeⁿ 'nū vmaⁿ ndís'tii mar 'áámá carga chí ngo'ó ca ndís'tii caati 'āā chí neⁿ'e nūuⁿ. ²⁹Nguéé tuu'ví nī cosa chí nga'á yā na ídolos ndíí nguéé yeⁿ'e yuúúⁿ ndíí nguéé yuute yeⁿ'e 'iiti chí nge'e yíícu ndíí nguéé diiⁿ nī chí cunee nī ndúúcu 'áámá 'iiⁿ'yāⁿ chí nguéé n'giindivaacu ndúúcu nī. Ndúúti chí dííⁿ nī chuū tuu'mi ní n'daacā

idiíⁿ nī. N'dáácā cho'ó nī. Chuū chí ngaⁿ'á.

³⁰Tíicā chí 'iiⁿ'yāⁿ chí dichó'ó yā cueⁿ'é na yāāⁿ Antioquía. Ní nduuvidaamá yā ndúúcu nducyaaca hermanos. Ní nica'á yā carta 'iiⁿ'yāⁿ. ³¹Taachí ch'eeⁿ yā carta miiⁿ ní yeenú taavi yā cáávā nduudu 'viich'εetinūⁿ. ³²Judas ndúúcu Silas chí profetas ntúúⁿ chí caⁿ'a nduudu yeⁿ'e Dendyuūs ní ca'a yā 'viich'εetinūⁿ ní didiitú yā hermanos ndúúcu neene n'dái nduudu. ³³Canéé yā 'áámá tiempo miiⁿ ní hermanos dííⁿ yā despedir 'iiⁿ'yāⁿ ní neⁿ'é yā chí n'daacā canéé yā chí 'cuetinéé 'dííⁿ yā ndúúcu vaadí 'diiíⁿ. Ní 'iiⁿ'yāⁿ miiⁿ nguεεcunééⁿ yā na yāāⁿ naachi snée 'iiⁿ'yāⁿ chí dichó'ó yā. ³⁴Silas miiⁿ canéé yíínu sa chí canéé sa miiⁿ. ³⁵Pablo ndúúcu Bernabé miiⁿ canee yā na yāāⁿ Antioquía. Ngí'cueéⁿ yā nduudu Dendyuūs miiⁿ ní ngaⁿ'a yā evangelio chí ndúúcu ngāi yeⁿ'e Jesucristo ndúúcu náⁿ'ā 'yááⁿ 'iiⁿ'yāⁿ.

**Pablo diví yā yeⁿ'ē Bernabé
ní cueⁿ'é yā ndii 'uuvi viaje**

³⁶Cuayiivi chí cho'ó tan'duuví nguuví, Pablo ngāⁿ'a yā ngii yā Bernabé: Nanguεεcunéé ntuūⁿ yú, caⁿ'ā yú n'diichi yú hermano s'eeⁿ yeⁿ'ē nducyaaca yāāⁿ naachí cheⁿ'e yú, ní caⁿ'a yú nduudu yeⁿ'ē Señor. Ní n'diichi yú táácā snée yā.

³⁷Ní Bernabé miiⁿ neⁿ'ē sa chí caⁿ'á Juan chí nguuví Marcos ndúúcu sa. ³⁸Naati Pablo miiⁿ ní nguéé canee yíínu sa chí candéé sa 'iiⁿ'yāⁿ chí diví yā yeⁿ'ē saⁿ'ā s'eeⁿ ndii yāⁿ'āa Panfilia. Ní 'iiⁿ'yāⁿ miiⁿ nguéé cheⁿ'é yā chí dííⁿ yā ntiⁿ'nyuⁿ. ³⁹Nguéé canéé yíínu yā

nguaaⁿ maáⁿ yā ní ndaacādaamí yā hermanos Bernabé ndúúcu Marcos ní cueⁿé yā isla Chipre na barco. ⁴⁰Pablo miiⁿ ní ndeeve sa saⁿā Silas ní náⁿā hermanos caⁿa yā chíi yā chí vaadī ch'εete yeⁿe Dendyuūs cunée ndúúcu Pablo ndúúcu Silas miiⁿ. ⁴¹Ní cuayiivi cho'ó yā yáⁿā Siria ndúúcu yáⁿā Cilicia. Ch'εetinée chíichi yā 'iiⁿyāⁿ yeⁿe yaācū.

**Timoteo cueⁿé yā ndúúcu
Pablo ndúúcu Silas**

16 Cuayiivi miiⁿ índaa sa yāáⁿ Derbe ndúúcu yāáⁿ Listra, ní caandiveéⁿ nī. Canee 'áámá saⁿā discípulo chí ch'eeⁿ chí nguuvi sa Timoteo, daiya 'áámá n'daataá 'iiⁿyāⁿ Israel chí i'téenu tá Dendyuūs, ní chíidá sa miiⁿ nguéeⁿ yeⁿe ndaata 'iiⁿyāⁿ Israel. ²Ní hermanos chí snée yā yāáⁿ Listra ndúúcu yāáⁿ Iconio ngaⁿa cuaacú yā yeⁿe sáⁿā miiⁿ chí neené n'dai sa. ³Pablo miiⁿ ní neⁿe yā chí caⁿa sa nduucú yā. Ní sta'á yā saⁿā ní díⁿ yā circuncidar saⁿā miiⁿ caavā 'iiⁿyāⁿ Israel s'eeⁿ ti déénú yā nducyaaca 'iiⁿyāⁿ yeⁿe yāáⁿ miiⁿ chí saⁿā miiⁿ daiya sa saⁿā chí nguéeⁿ yeⁿe ndaata Israel. ⁴Ní taachi cho'ó yā yāáⁿ s'eeⁿ caⁿa yā orden chí nn'gaacú yā chí caⁿa apóstoles chí caⁿa nduudu yeⁿe Dendyuūs ndúúcu 'iiⁿyāⁿ ndiicú chí ngaⁿa ntiⁿnyuⁿ yeⁿe yāacū chí snée yā na yāáⁿ Jerusalén chí díⁿ yā nducueⁿ chuū. ⁵'Iiⁿyāⁿ s'eeⁿ yeⁿe yaācū s'eeⁿ 'āā neē chíichí yā ndúúcu vaadī i'teenu. Ní ngí' yaaⁿ ca yā 'áámá nguuvi taama nguuvi.

**Pablo n'diichí yā na visión yeⁿé yā
'áámá saⁿā yeⁿe yáⁿā Macedonia**

⁶Ní cho'ó yā yáⁿā Frigia ndúúcu yáⁿā Galacia. Espiritu N'dai yeⁿe

Ndyuūs miiⁿ nguéeⁿ 'cuūⁿ chí caⁿá yā caaⁿ máⁿ yā nduudu cuaacu na yáⁿā Asia. ⁷Ndaá yā yáⁿā Misia ní neⁿe caⁿa yā yáⁿā Bitinia naati Espiritu miiⁿ nguéeⁿ 'cuūⁿ. ⁸Ní cho'ó yā 'diitúú yáⁿā Misia ní cueⁿé yā na yāáⁿ Troas. ⁹Nguiinū miiⁿ ní Pablo miiⁿ ní ch'iⁿi 'yúúdiyaaⁿ sáⁿā na yaāⁿ yeⁿe sa. Ní n'diichi sa 'áámá saⁿā yeⁿe yáⁿā Macedonia chééndii sa ní dí'cuítu sa Pablo ní caⁿa sa: Cho'ó dí yáⁿā Macedonia miiⁿ ní cunnee dí nús'uu. ¹⁰Ní Pablo miiⁿ taachi n'diichi sa na 'yúúdiyaaⁿ yeⁿe sa, cuayiivi míⁿ nacadínuuⁿ 'nū chí caⁿa 'nū yáⁿā Macedonia. Déénú 'nū chí Dendyuūs ndeevé yā nús'uu chí caaⁿ maⁿ 'nū yeⁿe evangelio chí ndúúcu ngai yeⁿe Jesucristo.

Cueⁿé yā vácū na yāáⁿ Filipos

¹¹Cheⁿé 'nū na barco yeⁿe yāáⁿ Troas ní ndaá 'nū yúúni cuaacu na isla Samotracia. Chidεeve táámá nguuvi ní ndaá 'nū yāáⁿ Neápolis. ¹²Ndii míⁿ cueⁿé 'nū na yāáⁿ Filipos chí yeⁿe 'iiⁿyāⁿ romanos ní yāáⁿ miiⁿ vmnááⁿ vmnaaⁿ yeⁿe yáⁿā Macedonia. Ní ch'εetinée 'nū 'aama tiempo yāáⁿ miiⁿ. ¹³'Áámá nguuvi sábadu chí intaavi'tuunuúⁿ yā tan'dúúca ley yeⁿé yā can'daa 'nu cuaaⁿ dáámí cheendi va'āi yeⁿe yāáⁿ miiⁿ niⁿnuuⁿ yíicú naachi caⁿ'angua'á yā ní ch'εeté 'nū. Ní caⁿa n'deeé 'nū ndúúcu n'daataá chí nduuvidaama.

¹⁴Miiⁿ canée 'áámá n'daataá chí nguuvi tá Lidia. N'diicui tá tínnūⁿ morada cua'á yeⁿe yāáⁿ Tiatira. Ní i'téenu tá Dendyuūs. Táⁿā miiⁿ ní ng'iindiveeⁿ tá. Ní Señor miiⁿ ní

nda'ai yā vaanicadiinúuⁿ yeⁿē tá chí cu'neeⁿ veeⁿ tá chi caaⁿmaⁿ Pablo.
¹⁵Ní taachí cheedinuúⁿniⁿ tá ndúúcū 'iiⁿyāⁿ yeⁿē tá, dí'cuítu tá nús'uu ní ngaⁿa tá: Ndúúti chi deenu ní chi 'úú 'áámá caneeⁿ ndúúcū Dendyuūs, cundáa ní vaacú ní 'cuēetinēe ní. Ní dí'cuítu tá nús'uu ní ch'ēetinēe 'nū. ¹⁶Taachí cueⁿe 'nū na lugar chi caⁿangua'a 'nū tuu'mi ní ndaacá 'nū 'áámá n'daata 'línⁿ chi canee tá ndúúcū espíritu yeⁿe yáá'n'guiinūⁿ chí diiⁿ adivinar. Ní ndaā tá nanáaⁿ 'nū. N'daata míⁿ néénⁿ n'deēe idiíⁿ tá ganar yeⁿē 'iivi tá ndúúcū espíritu yeⁿē chí diiⁿ adivinar. ¹⁷Tá 'cūū ní cán'daā tá Pablo ndúúcū nús'uu ní n'gai yiicu ta ní caⁿ'a tá: Saⁿ'ā s'uuⁿ ní saⁿ'ā chí dichí'vē Dendyuūs chí ch'ēete n'dai chí caneeⁿ na va'ai ch'ēeti nguuvi. Saⁿ'ā s'eeⁿ n'g'iⁿi sa yúúní chí nanguaⁿ'āi yú.

¹⁸N'daata miiⁿ diiⁿ tá 'túúcā neené 'yaaⁿ nguuvi. Pablo miiⁿ ní nguéé caneeⁿ yiinū sa ní caⁿ'a sá chí sa espíritu miiⁿ: 'Úú dicho'ó dii ndúúcū chí duuchi Jesucristo chí nan'dáa di yeⁿē tá 'tii. Ní nan'dáa espíritu miiⁿ hora miiⁿ. ¹⁹Taachí n'diichi 'iivi tá chí cueⁿe espíritu yeⁿē adivinanza chí diiⁿ tá ganar cááva yā, tuu'mi sta'á yā Pablo ndúúcū Silas. Ní candéē yā saⁿ'ā s'eeⁿ na vaacūyāáⁿ nanááⁿ 'iiⁿntyéⁿe. ²⁰Ní chíⁿ'i yā saⁿ'ā s'eeⁿ nanááⁿ 'iiⁿntyéⁿe ní caⁿ'a yā: Sáⁿ'a s'uuⁿ, 'iiⁿyāⁿ Israel s'eeⁿ díⁿ yā chí véé vaadí 'caa'va na yāáⁿ yeⁿe yú. ²¹Ní ngi'cueeⁿ yā s'uuúⁿ costumbre chí nguēe 'cuaaⁿ yú ní nguéé caneeⁿ chí diiⁿ yú, caati s'uuúⁿ ní 'iiⁿyāⁿ romanos s'uuúⁿ.

²²Ní 'iiⁿyāⁿ yeⁿe yāáⁿ miiⁿ nduuvadáama yā ndúúcū 'iiⁿntyéⁿe.

Ní 'iiⁿntyéⁿe s'eeⁿ chíín'cuúⁿ yā catecai sa ní ca'á orden yā chí 'cueⁿ'é yā saⁿ'ā ndúúcū nduucu. ²³Ch'íínú ch'eⁿ'é yā saⁿ'ā s'eeⁿ n'deeē taaví vueltas ní s'nuúⁿ yā saⁿ'ā s'eeⁿ vácūū. Ní chíi yā saⁿ'ā chíínⁿ idiíⁿ yā cuidado ch'ééndí vácūū chí dííⁿ yā cuidado n'daacā saⁿ'a s'eeⁿ. ²⁴Taachí ch'iindiveéⁿ yā chuū s'nuúⁿ yā saⁿ'ā s'eeⁿ vácūū chí yáanū ca ní snuuⁿ chíichí yā ca'a sa na cepo.

²⁵Maⁿ'a yāáⁿ míⁿ taachi Pablo ndúúcū Silas ngá'ángua'á yā ní ngiita yā canciones yeⁿ'é Dendyuūs ní 'iiⁿyāⁿ chí snúúⁿ vácūū miiⁿ ní n'giindiveéⁿ yā. ²⁶Hora miiⁿ diituú nuⁿ'u yáⁿ'āa ní cimientos yeⁿē vácūū miiⁿ ní nuⁿ'u. Ní hora míⁿ nūⁿ nducyaaca cheendi vácūū míⁿ ní nánguaāⁿ. Ní ndaatí ca'a yā ndúúcū ta'a yā nducyáácá 'iiⁿyāⁿ chí snúúⁿ vácūū. ²⁷Saⁿ'ā soldado chí caneeⁿ cuidado vácūū miiⁿ taachí nduuchi sa chí cyaadu sa, ní n'diichi sa chí sdá'āi nducyaaca cheendi vácūū. Tuu'mi ní nntun'dáa sa espada yeⁿē sa ní neⁿ'e sa 'caaⁿnuⁿ maaⁿ sa saⁿ'ā, caati nadacadíínuuⁿ sa chí 'iiⁿyāⁿ chí snúúⁿ vácūū miiⁿ cheenú yā. ²⁸Pablo miiⁿ 'cai yiicu sa ní ngaⁿ'ā sa: Nguéé diiⁿ di ndúúcū di 'tíicā. Nducyaacá 'nū snéē 'nū.

²⁹Tuu'mi ní saⁿ'ā miiⁿ ngiica sa dēēve. Chindáa sa ngeēnū sa ch'ēeti cuarto miiⁿ. Ní yinduuvi sa ní chííntii'ya sa na ca'a Pablo ndúúcū Silas. ³⁰Ní tun'dáa sa saⁿ'ā s'eeⁿ ní caⁿ'a sa: Ndís'tii Señores, 'táácā dííⁿ ní 'iicu nanguaⁿ'ái?

³¹Saⁿ'ā s'eeⁿ ní caⁿ'a sa: Cu'téénú dí Señor Jesucristo níicú nanguaⁿ'āi di ndúúcū 'iiⁿyāⁿ yeⁿē di ná vaacu di.

³²Ní caⁿa yā nduudu yeⁿe Señor saⁿā miⁿ ndúúⁿcū nducyaaca 'iiⁿ'yāⁿ ná vaacu sa. ³³Saⁿā miⁿ ní hora míⁿ nūⁿ yeⁿe yāⁿ sta'a sa 'iiⁿ'yāⁿ ní naāⁿnū sa chi ya'āi yeⁿe yā. Cuayiivi miiⁿ ní chēēdinuūⁿnīⁿ saⁿā miⁿ ndúúⁿcū nducyaaca 'iiⁿ'yāⁿ yeⁿe sa. ³⁴Ní candée sa 'iiⁿ'yāⁿ na vaacu sa ní ca'a sa chi che'e yā. Nducyááca yā navaacu sa yeenú taavi yā chi s'téenu yā Dendyuūs miiⁿ.

³⁵Chidēeve táámá nguuvi miiⁿ 'iiⁿ'ntyéⁿ'ē s'eeⁿ dich'ó yā policia chi yaa'vi sa saⁿā ní caⁿa sa: N'dēechi yā saⁿā s'eeⁿ. ³⁶Ní saⁿā soldado chi canee cuidado cheendi vácūⁿ chii sa Pablo nduudú 'cūⁿ: 'Iiⁿ'ntyéⁿ'ē yaa'vi yā 'úú chi 'úú tun'dáá ndís'tii. Maaⁿ ní cho'ó ní ní caⁿ'á ní ndúúⁿcū cuidado. ³⁷Naati Pablo miiⁿ ní ngaⁿ'a sa ngii sa 'iiⁿ'yāⁿ: Cuayiivi chí chíⁿínú chíⁿ'ēⁿe yā nús'uu nanááⁿ 'iiⁿ'yāⁿ ndíf nguéé itiinguuneéⁿ yā yeⁿe asunto miiⁿ de'ē chi caaⁿ'máⁿ nū ní candée yā nús'uu vácūⁿ, 'áá ntun'dáá n'de'él yā nús'uu, ti nús'uu 'iiⁿ'yāⁿ romanos s'uuuⁿ ní s'nuúⁿ yā nús'uu vácūⁿ?

³⁸Ní soldado s'eeⁿ ní ca'a sa chi cádiinuunⁿ 'iiⁿ'ntyéⁿ'ē. Taachí chíⁿindiveéⁿ yā chuú ní dii'yá yā chii taachi chicadiinuúⁿ yā chi romanos 'iiⁿ'yāⁿ s'eeⁿ. ³⁹Ní 'iiⁿ'ntyéⁿ'ē ndaa yā ní d'icuiitú yā 'iiⁿ'yāⁿ. Ní tun'dáa yā 'iiⁿ'yāⁿ vácūⁿ. Ní chii yā saⁿ'ā s'eeⁿ chi nan'daa sa na yāáⁿ miiⁿ. ⁴⁰Tuu'mi ní taachi nan'dáa yā vácūⁿ sndaa yā na vaacu 'áámá n'daataá chi nguuvi Lidia. Ní n'diichí yā hermanos ní chii yā 'iiⁿ'yāⁿ chi caⁿ'á yā ndúúⁿcū cuidado. Ní cunaⁿ'a yā.

Nduuvitaáⁿ yā na yāáⁿ Tesalónica

17 Cho'ó yā yāáⁿ Anfípolis, cho'ó yā yāáⁿ Apolonia ní

ndaa yā na yāáⁿ Tesalónica. Naachi véé 'áámá yaacū sinagoga yeⁿe 'iiⁿ'yāⁿ Israel s'eeⁿ. ²Ní Pablo miiⁿ ti 'áá ndii níⁿ'nuⁿ yā chēⁿ'e yā naachi snéeⁿ 'iiⁿ'yāⁿ. Ní 'iiⁿ'nuⁿ sábadó chi ntaavi'tuunúⁿ yā, caⁿ'a yā ndúúⁿcū nducyaaca yā nduudú yeⁿe Dendyuūs. ³Chí'cueeⁿ sá ní caⁿ'a sa yeⁿ'ē chi neené nguūⁿ na Escrituras. Ngaⁿ'ā sa chi canéé chi Cristo 'cuūvi yā ní nnduuchí yā nguaaⁿ tináⁿ'ā. Ní Jesús yeⁿ'e chí 'úú chí ngaⁿ'á, Jesús miiⁿ chí Cristo chí Ndyuūs dēeve yā.

⁴Náⁿ'a 'iiⁿ'yāⁿ s'eeⁿ s'téenu yā ní nduuvidaamá yā ndúúⁿcū Pablo ndúúⁿcū Silas ndúúⁿcū n'dee n'dái 'iiⁿ'yāⁿ s'eeⁿ chí nguéé yeⁿ'ē ndaata Israel chí 'iiⁿ'yāⁿ n'dai taavi, ndúúⁿcū n'dee n'dái n'daataá chí n'dái taavi, nguéé duu'vi yā. ⁵Tuu'mi ní 'iiⁿ'yāⁿ Israel s'eeⁿ chí nguéé i'téenu yā ní ngueé yā sta'á yā náⁿ'ā saⁿ'ā chí nguéé n'daac saⁿ'ā chí 'daān'di. Ní n'deeé nduuvidaamá yā ní nduuvi taáⁿ yā 'iiⁿ'yāⁿ yāáⁿ miiⁿ ní ndaa staⁿ'a vaadicadiinuunⁿ yeⁿ'é yā. Ní sta'á yā 'iiⁿ'yāⁿ yeⁿ'e vaacu Jasón. Ní neⁿ'é yā tun'dáa yā Pablo ndúúⁿcū Silas nanááⁿ 'iiⁿ'yāⁿ yāáⁿ miiⁿ.

⁶Naati nguéé nindaāca yā 'iiⁿ'yāⁿ s'eeⁿ. Candée yā Jasón ndúúⁿcū náⁿ'ā hermanos nanááⁿ 'iiⁿ'ntyéⁿ'ē yeⁿ'e yāáⁿ miiⁿ. Ní 'cai yiicú yā: Sáⁿ'ā s'ūūⁿ nidi'vaachi sā nducyáácá 'iiⁿ'yāⁿ yeⁿ'ē núúⁿ'máⁿ iⁿ'yeēⁿdí ní ndaa sa ndii 'múúⁿ. ⁷Ní Jasón miiⁿ snée yā 'iiⁿ'yāⁿ s'eeⁿ na vaacu sa. Ní nducyaaca yā nguéé idiíⁿ yā tan'dúúⁿcā chí ngaⁿ'ā César. 'Iiⁿ'yāⁿ s'eeⁿ ngaⁿ'á yā ti véé táámá rey chí Jesús.

⁸Ní 'iiⁿ'yāⁿ s'eeⁿ ndúúⁿcū 'iiⁿ'ntyéⁿ'ē yeⁿ'e yāáⁿ 'cūⁿ nduuvi taáⁿ yā taachi

ch'iindiveéⁿ yā chuū. ⁹Tuu'mi ní sta'á yā tuumi ye"ⁿé Jasón ndúúcu náⁿa yā ní n'dēechi yā 'iiⁿ'yāⁿ.

Pablo ndúúcu Silas na yáāⁿ Berea

¹⁰Tuu'mí nūuⁿ hermanos dichó'o yā Pablo ndúúcu Silas ndii yáāⁿ Berea. Ní taachí ndaá yā miiⁿ ní sndaá yā na yaacū sinagoga ye"ⁿe 'iiⁿ'yāⁿ Israel s'eeⁿ. ¹¹'Iiⁿ'yāⁿ s'uuⁿ n'daacá yā nanááⁿ Dendyuūs nguéé tan'dúúca 'iiⁿ'yāⁿ chi snée yā na yāāⁿ Tesalónica. Sta'á yā nduudu miiⁿ ndúúcu vaadi yeenú ní ch'eeⁿ yā nguuvi nguuvi Escrituras. Ne"ⁿé yā n'diichí yā, ¿áá cuaacu chi 'tíicā? ¹²Neené 'yaaⁿ yā s'téenu yā, n'daataá chi nguéé ye"ⁿe ndaata Israel chi táⁿā n'dai taavi ndúúcu néené 'yaaⁿ saⁿā. ¹³Taachi 'iiⁿ'yāⁿ Israel s'eeⁿ ye"ⁿe yáāⁿ Tesalónica chicadínuuⁿ yā chi 'iiⁿ'yāⁿ ye"ⁿe yáāⁿ Berea 'aa deenú ntúuⁿ yā ye"ⁿé nduudu ye"ⁿe Dendyuūs cáávā chi ngaⁿ'a Pablo, tuu'mi ní che"ⁿé yā miiⁿ. 'Tíicá ntúuⁿ ca'á yā vaadi 'caa'va 'yaaⁿ 'iiⁿ'yāⁿ. ¹⁴Hora mííⁿ nūuⁿ hermanos dichó'o yā Pablo ndíí na nuūⁿníⁿ'yáⁿā. Ní Silas ndúúcu Timoteo ch'ēetinée yā miiⁿ. ¹⁵'Iiⁿ'yāⁿ chí cánée chi can'dáa yā Pablo, candéε yā saⁿ'a miiⁿ na yáāⁿ Atenas. Ní Pablo ca'a sa orden 'iiⁿ'yāⁿ s'eeⁿ chi dichó'o yā Silas ndúúcu Timoteo naachí cunée sa chinúúⁿ cue"ⁿé nūūⁿ. Ní cue"ⁿé 'iiⁿ'yāⁿ s'eeⁿ.

Pablo na yáāⁿ Atenas

¹⁶Pablo miiⁿ canee ngiinu sa 'iiⁿ'yāⁿ na yáāⁿ Atenas. Ní neené ndaachi ndíí espíritu ye"ⁿé sa taachí n'diichi sa nducyaaca 'iiⁿ'yāⁿ ye"ⁿé yáāⁿ chi néené i'téenu yā ídolos.

¹⁷Caⁿ'a yā n'deeé n'dáí ná yaacū sinagoga ndúúcu 'iiⁿ'yāⁿ Israel s'eeⁿ ndúúcu 'iiⁿ'yāⁿ chi i'téenu yā chi maaⁿ ní 'iiⁿ'yāⁿ Israel. Ní nguuvi nguuvi caⁿ'a ntuúⁿ yā ndúúcu 'iiⁿ'yāⁿ chi sneé yā ni'vēē. ¹⁸Ní náⁿā 'iiⁿ'yāⁿ chi ch'eeⁿ chi neené n'dáí tíiⁿ, 'iiⁿ'yāⁿ s'eeⁿ ye"ⁿe 'iiⁿ'yāⁿ epicúreos, ye"ⁿé 'iiⁿ'yāⁿ estoicos ní n'gεεcú cheendí yā ndúúcu yā. Ní n'dúúví 'iiⁿ'yāⁿ ngaⁿ'á yā: ¿De'ε ne"ⁿé caaⁿ'maⁿ sáⁿ'a 'cūū chí tá'tií n'deéé ngaⁿ'ā sá? Ní náⁿ'a yā ní caⁿ'a yā: Ngaⁿ'ā sa tan'dúúca chi 'iiⁿ'yāⁿ chi ngaⁿ'a ye"ⁿé ndyuūs ngai. Pablo miiⁿ caⁿ'a yā ye"ⁿé evangelio chi ndúúdu ngai ye"ⁿé Jesucristo ní ye"ⁿé 'iiⁿ'yāⁿ chí nduuchí yā nguaaⁿ tináⁿā. ¹⁹Ní sta'á yā saⁿ'ā ní ndaá yā nanááⁿ 'iiⁿ'ntyé"ⁿé ndúúcu sa yiicū chi nguuvi Areópago. Ní caⁿ'a yā: ¿Áá cuuvi cádínuuⁿ nū de'ε chí ca'cueéⁿ nī chí ngai chí ngaⁿ'a nī? ²⁰Ngaⁿ'a nī dendu'ū chí n'daaⁿ ní ne"ⁿé nū cadiinuⁿ nū de'ε ne"ⁿe caaⁿ'māⁿ chuū.

²¹(Naati 'iiⁿ'yāⁿ ye"ⁿe yáāⁿ Atenas ndúúcu 'iiⁿ'yāⁿ chi snúuⁿ yúúní chí snée yā miiⁿ, nguéé tuumicadínuuⁿ yā ye"ⁿé taama naaⁿ, caati dámaaⁿ ne"ⁿe yā 'caandiveéⁿ yā ní caaⁿ'maⁿ yā cosa chí ngai.)

²²Tuu'mi ní Pablo mííⁿ chéendii sa náávtaⁿ'ā 'iiⁿ'ntyé"ⁿé yiicū chí nguuvi Areópago, ní caⁿ'a sa: Ndís'tií saⁿ'a ye"ⁿe yáāⁿ Atenas, 'úú tuumicadiinuúⁿ ye"ⁿe nī chí neené i'téenu nī ndyuūs s'eeⁿ. ²³Choó ní n'diichí lugar naachi cu'téenu nī ndyuūs s'eeⁿ ye"ⁿé nī. Ndaacá 'áamá na santo naachi canée nguūⁿ nduudu 'cūū, NDYUŪS CHI NGUÉÉ N'DIICHI YÚ. Ndyuūs chí ndís'tií

nguée n'diichí nī ní t'téenu nī,
Ndyuūs miiⁿ chí 'úú ní ngaⁿá.

²⁴Ndyuūs chí din'dái yā iⁿ'yeeⁿdī ndúúcu tanducuéⁿē chí véé iⁿ'yeeⁿdī, Señor miiⁿ chí yeⁿé yā nanguuvi ndúúcu yeⁿé na yáⁿāa miiⁿ. Ní nguée canúuⁿ yā yaācū chí nín'dai ta'ā iⁿ'yāⁿ. ²⁵Ndíí nguée ndúú chí neⁿé yā de'ē vee yeⁿe iⁿ'yāⁿ caati iⁿ'yāⁿ miiⁿ ní ca'a yā vida nducyaaca iⁿ'yāⁿ yeⁿe iⁿ'yeeⁿdī ndúúcu 'yúúné chí yíícu yā ndúúcu tanducuéⁿē dendu'ū.

²⁶Ndyuūs diiⁿ yā chí 'áámá ndaata nducyáácá iⁿ'yāⁿ chí 'cuētinée yā vmnaaⁿ yáⁿāa. Ní vmnááⁿ vmnaaⁿ dííⁿ yā señalar yáⁿāa naachi 'cuētinée yā ndúúcu tiempo chí 'cuētinée yā na yáⁿāa. ²⁷Dendyuūs s'neéⁿ yā iⁿ'yāⁿ na yáⁿāa chí n'nuúⁿ yā Dendyuūs miiⁿ ndúúti chí cuuvi ndaā niiⁿnúⁿ yā níícu ndaacá yā iⁿ'yāⁿ, 'áará chí cuaacu nííⁿnyúⁿ nguée yaⁿai canée yā yeⁿe ca'áámá ca'áámá s'uúuⁿ. ²⁸Ní cucáávā iⁿ'yāⁿ miiⁿ canduuchi yú ní inuⁿu yú ndúúcu yā ní s'uúúⁿ 'cuētinée yú ndúúcu yā. Tan'dúúcā chí caⁿa tanáⁿā iⁿ'yāⁿ poetas yeⁿé nī: Tí ndáátá yeⁿé Ndyuūs s'uúuⁿ. ²⁹Canee yú na ndaata yeⁿé Dendyuūs. Nguée cánée chí nadacadíínuuⁿ yú chí Dendyuūs miiⁿ tan'dúúcā 'dííⁿnguaaⁿ iⁿ'yāⁿ, tan'dúúcā 'dííⁿnguee iⁿ'yāⁿ, tan'dúúcā tuúú iⁿ'yāⁿ, tan'dúúcā chí saⁿā din'dái ndúúcu vaadi cadiinūuⁿ yeⁿé sa. ³⁰Tuuⁿmi ní Dendyuūs nguée dííⁿ cuenta yeⁿé tiempo yeⁿe vaadí tonto yeⁿe iⁿ'yāⁿ. Maaⁿ ní Ndyuūs ca'á yā orden nducyaaca iⁿ'yāⁿ nducuéⁿē cuaaⁿ chí iⁿ'yāⁿ ndaacadáámí yā yeⁿé nuuⁿndí yeⁿé yā. ³¹Cáávā chuū Dendyuūs

'cuuⁿmiⁿ yā 'áámá nguuvi chí dííⁿ yā juzgar iⁿ'yāⁿ yeⁿe iⁿ'yeeⁿdī ndúúcu justicia cucáávā saⁿā miiⁿ chí ndeeve. Cáávā saⁿā miiⁿ Dendyuūs dííⁿ yā chí nducyaaca iⁿ'yāⁿ deenú yā chí cuaacu chí Dendyuūs nadacuéⁿē yā saⁿā nguaaⁿ tináⁿā.

³²Taachí ch'iindiveéⁿ yā chí nnduuchi yā nguaaⁿ tináⁿā, náⁿā yā dííⁿ duuchí yā iⁿ'yāⁿ. Níícu náⁿā yā caⁿa yā: 'Áā 'caandiveeⁿ ntúuⁿ 'nū yeⁿé nī ndii táámá.

³³Pablo miiⁿ nan'daa sa naavtaⁿā yeⁿé yā. ³⁴Náⁿā yā chí'téenu yā ní nduuvidaamá yā ndúúcu Pablo miiⁿ. Nguaaⁿ iⁿ'yāⁿ miiⁿ canee 'áámá saⁿā Dionisio yeⁿé iⁿ'ntyéⁿē concilio chí nduuvidaamá yā na lugar Areópago ndúúcu 'áámá n'daataá chí nguuvi tá Dámaris, ndúúcu táámá iⁿ'yāⁿ s'eeⁿ ndúúcu iⁿ'yāⁿ miiⁿ.

Pablo na yáāⁿ Corinto

18 Cuayiivi chí chó'oo chúú Pablo miiⁿ ní nan'dáa sa yeⁿé yáāⁿ Atenas ní cueⁿe sa na yáāⁿ Corinto. ²Ní ndaacaca sa 'áámá saⁿā Israel chí nguuvi sá Aquila. Saⁿā miiⁿ yeⁿe yáⁿāa Ponto chí cáámá ndaā sa yeⁿe yáⁿāa Italia ndúúcu táⁿā sa chí nguuvi Priscila ti Claudio miiⁿ chí rey ch'ēete ní ca'a sa orden chí nan'daā nducyaaca iⁿ'yāⁿ Israel s'eeⁿ yeⁿe yáāⁿ Roma. Pablo cueⁿe sa naachi canée iⁿ'yāⁿ s'eeⁿ. ³Saⁿā miiⁿ ní dáámá diiⁿ sa ntiiⁿnyūⁿ ní canée sá ndúúcu yā. Dáámá nūu dííⁿ yā ntiiⁿnyuⁿ. Ntiiⁿnyuⁿ yeⁿe iⁿ'yāⁿ s'eeⁿ chí din'dái yā va'ai tíínuuⁿ. ⁴Ní nguuvi nguuvi sábadu miiⁿ Pablo n'dee

indeé yā na yáacū sinagoga. Ní dííⁿ yā chi nduuvidaamá yā 'iiⁿyāⁿ Israel s'eeⁿ ndúúcū 'iiⁿyāⁿ s'eeⁿ chi nguéé yeⁿē ndaata Israel lado yeⁿé yā.

⁵Taachi Silas ndúúcū Timoteo ndaá yā yeⁿē yáⁿāa Macedonia, Pablo miiⁿ 'aama canéé sá chi ngaⁿā sa nduudu yeⁿé Dendyuūs. Ní ngaⁿā sa nduudu cuaacu ní ngaⁿa sa ngii sa 'iiⁿyāⁿ Israel s'eeⁿ chi Jesús miiⁿ chi Cristo. ⁶Ní 'iiⁿyāⁿ s'eeⁿ ngaⁿá yā contra yeⁿe Pablo ní caaⁿva yā yeⁿē sa. Pablo ch'íidí sa tiinuúⁿ yeⁿē sa. Ní Pablo caⁿa sa chii sa 'iiⁿyāⁿ: Ndí's'tií ní canéé chí 'āā maáⁿ nī candíícu nī chi cuuvi ndúúcu nī. 'Úú nguéé can'diícú yeⁿē chuū. Maaⁿ ní caⁿá ndúúcū 'iiⁿyāⁿ s'eeⁿ chi nguéé yeⁿē ndaata Israel.

⁷Nandáa sa miiⁿ ní cueⁿe sa na vaacu 'áámá saⁿā chi nguuvi Justo chi i'téenu sa Dendyuūs. Vaacu sa canéé sá na niiⁿnuúⁿ na yaacū sinagoga. ⁸Níícú saⁿā Crispo saⁿā chi ndii tiiⁿ yeⁿē yáacū sinagoga s'téenu sa Señor 'iivú Ndyuūs ndúúcū nducyaacá yā na vaacu sa. Ní neené 'yaaⁿ 'iiⁿyāⁿ yeⁿe yāā Corinto miiⁿ ch'indiveéⁿ yā. Ní s'téenu yā ní chεεdinuūⁿniⁿ yā. ⁹Tuu'mi ní Señor caⁿa yā ndúúcū Pablo na 'yúúdūyaaⁿ yeⁿē sa: Nguéé 'va'a di caāⁿmāⁿ di. Nguéé cunē 'diiⁿ cheendí di. ¹⁰Caati 'úú canéé ndúúcu di ni mar 'áámá 'iiⁿyāⁿ nguéé dííⁿ n'gíínu yā ndúúcu di. Ti 'úú neené n'deeé 'iiⁿyāⁿ chi véé ní yeⁿé na yāⁿ 'cūū.

¹¹Ní canee sá miiⁿ 'áámá nduūyū canee maⁿā. Chi'cueeⁿ sa nduudu yeⁿe Dendyuūs 'iiⁿyāⁿ s'eeⁿ.

¹²Taachi saⁿā Galión canéé sá 'iiⁿntyéⁿē gobernador yeⁿe yáⁿāa

Acaya, tuu'mi ní 'iiⁿyāⁿ Israel s'eeⁿ ní nducueeⁿ yā ti nduuvidaamá yā contra Pablo. Ní candée yā saⁿā nanááⁿ silla yeⁿe juez miiⁿ. ¹³Ní caⁿa yā: Saⁿa 'cūū ngaⁿa sa chi 'iiⁿyāⁿ s'eeⁿ cu'téenu yā Dendyuūs nguéé tan'dúúcā chi ngaⁿa ley.

¹⁴Taachí Pablo miiⁿ ní tuca'a sa caⁿa sa, tuu'mí saⁿa Galión ngaⁿa sa ngii sa 'iiⁿyāⁿ Israel s'eeⁿ: Ndí's'tií 'iiⁿyāⁿ Israel s'eeⁿ, ndúúti chi 'áámá cosa chi ya'ai n'dai chii o 'áámá tinaⁿā n'dii yā tuu'mi ní cuaacu cucheé ndúúcu nī. ¹⁵Ndúútí chí vaadí tiinguuneéⁿ yeⁿē nduudu yeⁿé nī ndúúcū chi duuchi 'iiⁿyāⁿ ndúúcū yeⁿē ley yeⁿé nī, tuu'mi ní, ndí's'tií, dííⁿ nī juzgar chuū. Ti 'úú nguéé neⁿé dííⁿ juzgar chi 'túúcā.

¹⁶Tuu'mi ní tun'dáa yā 'iiⁿyāⁿ chuva'āi yeⁿe cuarto yeⁿe juez. ¹⁷Tuu'mi ní nducyaacá 'iiⁿyāⁿ chi nguéé yeⁿe ndaata Israel sta'á yā saⁿā Sóstenes chí chééndii vmnaaⁿ yeⁿē yáacū sinagoga ní ch'eⁿé yā saⁿā nanááⁿ silla yeⁿē juez. Naati Galión miiⁿ nguéé dííⁿ yā cuenta yeⁿe nducueéⁿē chuū.

¹⁸Níícú Pablo miiⁿ neené 'naaⁿ canee sa miiⁿya ní caⁿa sa hermanos: Cuidado 'cuεetinée nī. Cueⁿe sa na barco na yáⁿāa Siria ndúúcū 'áámá táⁿā chi nguuvi Priscila ndúúcū 'áámá saⁿā chi nguuvi Aquila. Vmnaáⁿ vmnaaⁿ na yāāⁿ Cencrea Pablo miiⁿ 'chiica sa yuūdú tiiⁿ sa ti 'áámá seña chi diiⁿ sa compromiso ndúúcū Dendyuūs. ¹⁹Tuu'mi ní ndaā sa yāāⁿ Efeso ní Pablo s'neeⁿ sá 'iiⁿyāⁿ miiⁿ. Ní sndaa maāⁿ sa na yáacū sinagoga miiⁿ. Ní caⁿa sa ní n'deéé ndeé sa ndúúcū 'iiⁿyāⁿ Israel s'eeⁿ. ²⁰'Iiⁿyāⁿ s'eeⁿ

di'cuíftu yā saⁿā chi 'nááⁿ cunee sa ndúúcu yā naati nguéeⁿ chii 'tuucā. ²¹Naatí yaa'vi sá 'iiⁿyāⁿ ní caⁿa sa: Cánéeⁿ chí nguεεcúndíi na yāáⁿ Jerusalén cáávā 'viicu chí cuchíi. Nguεεcunéeⁿ ntuúⁿ n'diichí ndis'tii ndúúti chí Dendyuūs neⁿe yā. Ní chiica sá yeⁿē yāáⁿ Efeso ní cueⁿe sa ná barco.

Pablo ndaá yā yāáⁿ Antioquía ní cueⁿe yā ndii chí 'iiⁿnūⁿ viaje

²²Cucheε sá na yāáⁿ Cesarea ní cheⁿe sá diiⁿ sa saludar hermanos chí caⁿá yā na yaācū. Tuu'mi ní cueⁿe sa na yāáⁿ Antioquía.

²³Canéeⁿ sá míiⁿ 'áámá tiempo. Cun'dáa sa ní cueⁿe sá na orden yeⁿē nducyaaca yáⁿāa Galacia ndúúcu yáⁿāa Frigia. Ní s'neeⁿ chiichi sa nducyaaca 'iiⁿyāⁿ chí i'téenu yā Cristo ná vaadí i'teenu.

Apolos ngaⁿá yā nduudu cuaacu na yāáⁿ Efeso

²⁴Áámá saⁿā Israel chí nguuvi sa Apolos ndáa sa yāáⁿ Efeso yeⁿe yāáⁿ vaacú sa chí nguuvi Alejandría. Saⁿā miiⁿ saⁿā chí deenú taavi sa. Neené n'dεeve nduudu yeⁿē sa ní véé valor sa chí caāⁿmāⁿ sa Escrituras chí canéeⁿ nguūⁿ. ²⁵Saⁿā miiⁿ ní 'áámá 'iiⁿyāⁿ chí 'cueéⁿ yā saⁿa yúúni yeⁿē Señor miiⁿ. Ní saⁿā miiⁿ ní diiⁿ sa ndúúcu núúⁿmáⁿ espíritu yeⁿē sa. Ní ngaⁿa sá ngí'cueéⁿ sa cuéⁿe daāⁿmaⁿ nduudu yeⁿe Dendyuūs miiⁿ, 'áará chí dámaāⁿ deenu sa yeⁿē chí chεedinuūⁿnī Juan. ²⁶Ní Apolos miiⁿ tucá'a sa caⁿa sa nguéeⁿ ndúúcu vaadí 'va'a chεeti yaācū sinagoga taachí saⁿā Aquila ndúúcu táⁿā sa Priscila

ch'iindiveéⁿ yā, s'néeⁿ vi'i yā saⁿā ní chí'cuéeⁿ cá yā saⁿā más ca yeⁿē yúúni cuaacu yeⁿē Ndyuūs. ²⁷Apolos neⁿe sa cho' sa yáⁿāa Acaya, ní hermanos ní caⁿa yā chí caⁿá sáⁿā miiⁿya. Ní hermanos dingúuⁿ yā yeⁿe 'iiⁿyāⁿ s'eeⁿ chí i'téenu yā Cristo chí 'cuaáⁿ yā saⁿā. Tuu'mi ní ndaā sa miiⁿ ní chinnee taaví sa 'iiⁿyāⁿ chí i'téenu yā cáávā favor ch'εεte yeⁿe Dendyuūs. ²⁸Ndúúcu nducueⁿē poder n'deéé ch'éécū cheendi sa ndúúcu 'iiⁿyāⁿ Israel s'eeⁿ nanááⁿ nducyaaca 'iiⁿyāⁿ s'eeⁿ ní n'giⁿi sa chí Jesús miiⁿ chí Cristo chí nndeεve Dendyuūs cáávā Escrituras.

Pablo na yāáⁿ Efeso

19 Taachí canéeⁿ Apolos miiⁿ yááⁿ Corinto, Pablo miiⁿ chí'ínú cheⁿe sa yáⁿāa yeⁿe distrito cuaaⁿ niiⁿnuúⁿ ní ndaa sá yāáⁿ Efeso. Ní ndaaca sá ndúúví saⁿā chí i'téenu yā Cristo. ²Ní caⁿa sa: ¿Áá diiⁿ di recibir Espíritu N'dai yeⁿe Ndyuūs taachí chí'teenu di? Ní 'iiⁿyāⁿ s'eeⁿ miiⁿ ní caⁿa yā: Nguéeⁿ n'giindiveeⁿ 'nū chí véé Espíritu N'dai yeⁿe Ndyuūs.

³Tuu'mi ní caⁿa sa: ¿Du'u chεedinuūⁿnī dii? 'Iiⁿyāⁿ s'eeⁿ ní cāⁿa yā: Chεedinuūⁿnī 'nū cucáávā nduudu Juan.

⁴Pablo miiⁿ ní caⁿa sa: Juan miiⁿ chεedínúⁿnī sa chí cuedínúⁿnī 'iiⁿyāⁿ yeⁿē chí indaacadaamí yā yeⁿē nuuⁿndi yeⁿe yā, ní Juan ngaⁿa sa ngii sa 'iiⁿyāⁿ chí cu'téenu yā 'iiⁿyāⁿ chí cuchii yā cuaaⁿ dáámí sá. 'Iiⁿyāⁿ 'cúu chí Cristo Jesús miiⁿ.

⁵Taachí ch'iindiveéⁿ yā chuú chεedinuūⁿnī yā ndúúcu chí

duuchi Señor Jesús miiⁿ. ⁶Taachí Pablo sn'duuⁿ ta'á yā vmnaaⁿ yeⁿe 'iiⁿyāⁿ s'eeⁿ tuu'mi ní ndaá vmnaaⁿ yeⁿe 'iiⁿyāⁿ s'eeⁿ Espíritu N'dai yeⁿe Ndyuūs. Ní caⁿa yā davaacu chi n'dááⁿ ní caⁿa yā chiiⁿ chi Dendyuūs yaa'vi yā. ⁷Saⁿā s'eeⁿ ní ngii sa tan'dúucā ndiichúví sá.

⁸Sndáá Pablo miiⁿ na yaācū sinagoga miiⁿ ní caⁿa cuaacú sá taandúú cuuví 'iiⁿnuⁿ 'iyyū, nguéé ndúucū vaadi 'va'a. Ní n'cueeⁿ sa ní ngaⁿa sa ndíí neⁿe sa chi cu'téenu yā yeⁿe chi Dendyuūs ngaⁿa yā ntiiⁿnyuⁿ. ⁹Naatí diiⁿ chεεchí náⁿa yā na staava yeⁿe yā ní nguéé chi'téenu yā. Nguéé caⁿa yā n'daacā yeⁿe yúúni yeⁿe Dendyuūs miiⁿ nanaaⁿ nducyaaca 'iiⁿyāⁿ. Ndaacadaamí Pablo yeⁿe yā ní snee viⁱ sa 'iiⁿyāⁿ chi i'teenú yā Cristo. Ngí'cueeⁿ sá nguuvi nguuvi ná escuela chi nguuvi Tiranno. ¹⁰Canéé sá taanduu 'úúvi nduúyū. 'Tíicā chi nducyaaca 'iiⁿyāⁿ chi snée yā na yáⁿāa Asia, 'iiⁿyāⁿ Israel s'eeⁿ ndúucū 'iiⁿyāⁿ s'eeⁿ chi nguéé yeⁿe ndaata Israel chi'indiveéⁿ yā nduudu yeⁿe Señor Jesús. ¹¹Dendyuūs miiⁿ dííⁿ yā vaadi n'giinu ch'εete n'dai cáāvā ta'a Pablo miiⁿ. ¹²Manera chi 'tíicā sta'á yā paños ndúucū delantales chi tuu'vi cuerpo yeⁿe Pablo ní candée yā nanááⁿ 'iiⁿyāⁿ ngiita. 'Iicu ndiiví ca'ai yeⁿe yā ndúucū 'yúúné s'eeⁿ chi nguéé n'daacā yeⁿe yááⁿn'guiinūⁿ.

¹³Tuu'mi ní náⁿā 'iiⁿyāⁿ Israel s'eeⁿ chi ngiicá yā ndíí miiⁿ ndíí 'muuⁿ chí ngaⁿa yā ndúucū espíritu chi nguéé n'daacā yeⁿe yááⁿn'guiinūⁿ neⁿe yā caaⁿmáⁿ yā chi yeⁿe Jesús

miiⁿ. Ní ngaⁿá yā: 'Úú ní caacá cáāvā Jesús miiⁿ, 'iiⁿyāⁿ chí ngaⁿa Pablo yeⁿe chi can'daā na cuerpo miiⁿ.

¹⁴Áámá saⁿā chi nguuvi Esceva véé ndεéchē daiya sa chi saⁿā s'eeⁿ. Saⁿā miiⁿ ní saⁿā Israel ní saⁿā chi ngaⁿa ntiiⁿnyuⁿ yeⁿe chiiduú s'eeⁿ yeⁿe Israel. Ní daiya sa dííⁿ yā chuū. ¹⁵Nan'guεεcútaⁿā espíritu chi nguéé n'daacā yeⁿe yááⁿn'guiinūⁿ ní caⁿá yā: 'Úú ní n'diichi Jesús miiⁿ ní deenú ntúūⁿ du'ū chi Pablo. Ndís'tii, ¿du'u ndís'tii?

¹⁶Ní 'iicu saⁿā chi canee sa ndúucu espíritu chi nguéé n'daacā cú'u sá ndúucū 'iiⁿyāⁿ s'eeⁿ, ní chíchεε sa ndúucū 'iiⁿyāⁿ s'eeⁿ ní diiⁿ ca sá ndúucū 'iiⁿyāⁿ s'eeⁿ. 'Iiⁿyāⁿ s'eeⁿ ní chéenu yā yeⁿe va'āi miiⁿ. 'Āā ntéé snúúⁿ yā catecai vmnáⁿ yā ní nca'ái yā. ¹⁷Chuū chicadiinúúⁿ nducyaaca 'iiⁿyāⁿ chi snee na yááⁿ Efeso, tan'dúucā 'iiⁿyāⁿ Israel s'eeⁿ 'tiicá ntúūⁿ 'iiⁿyāⁿ s'eeⁿ chi nguéé yeⁿe ndaata Israel. Ní nducyaaca yā dii'yá yā chii. Ní chíí ch'εete ca Señor Jesús miiⁿ.

¹⁸Neené 'yaaⁿ yā chi s'téenu yā ní ndaá yā. Ní caⁿa yā chi véé nuuⁿndi yeⁿe yā. ¹⁹Neené 'yaaⁿ 'iiⁿyāⁿ chi ch'éeⁿ yā cosas magias ndée yā libros yeⁿe yā ní chicyáⁿa yā nanááⁿ nducyaaca 'iiⁿyāⁿ. Ntun'dáa yā cuenta yeⁿe libros ní chicadiinúúⁿ yā chí ngíí 'uúvi ngeεcu ndiichi mil tuūmi yeⁿe 'dííⁿngueε. ²⁰Tíicā chii 'yaaⁿ 'iiⁿyāⁿ chi chi'teenu nduudu yeⁿe Señor 'iivú Dendyuūs miiⁿ. Ní 'áámá canéé chiichi yā nduudú Dendyuūs miiⁿ.

²¹Cho'oo chúú ní Pablo miiⁿ nacadiinu sa na staava yeⁿe sa

chi cho'ō sa na yáⁿāa Macedonia ndúúcu yáⁿāa Acaya ní cuayiivi caⁿā sa na yáāⁿ Jerusalén. Ní ngaⁿā sa: Cuayiivi chí 'āā cheⁿé yáāⁿ s'eeⁿ canee chi n'diichí ntúūⁿ yáāⁿ Roma. ²²Ní dicho'o na yáⁿāa Macedonia 'uūvī saⁿa, Timoteo ndúúcu Erasto chi cunnée yā 'iiⁿyāⁿ. Pablo miiⁿ canee sa 'áámá tiempo na yáⁿāa Asia.

'Caa'vá yā na yáāⁿ Efeso

²³Tiempo miiⁿ ch'iindī 'áámá vaadi 'caa'va ch'εete yeⁿē yúúní yeⁿe Dendyuūs miiⁿ. ²⁴Caati cunee 'áámá saⁿā chi nguuvī sa Demetrio chi din'dái sa yaācū n'gaiyāā yeⁿe imagen chi nguuvī Diana. Dámaāⁿ 'diiⁿngueε din'dái sa. Ní diiⁿ sa ganar n'dee taaví tuūmī yeⁿē ntiiⁿnyuⁿ yeⁿē sa ndúúcu saⁿā s'eeⁿ chidin'dái yā yaācū n'gaiyāā s'eeⁿ. ²⁵Demetrio míⁿ ní diiⁿ sa chí nduuvidaamá saⁿā s'eeⁿ chi idiiⁿ ntíⁿnyuⁿ miiⁿ. Caⁿa Demetrio: Ndís'tii saⁿā, déenu nī chí véé tuumī yeⁿē yú yeⁿē ntiiⁿnyúⁿ 'cūū. ²⁶Naati inaāⁿ nī ní n'giindiveéⁿ nī chí Pablo 'cūū taanduvéé diiⁿ sa chí neené n'dai 'iiⁿyāⁿ s'téenu yā. Nguéé dámaaⁿ yāāⁿ Efeso ti nuuⁿmaⁿ yáⁿāa Asia. Ní ngaⁿā sa chí nguéé dendyuūs s'eeⁿ chí din'dái yā ndúúcu ta'á yā. ²⁷Ngueε dámaāⁿ negocio yeⁿē yú chí véé peligro yeⁿē chí 'aa ntéé du'ū vεε. 'Tiicá ntúūⁿ yāacū yeⁿē imagen Diana chí ch'εete míⁿ, mar 'áámá 'iiⁿyāⁿ 'āā ntéé neⁿe yā. Ní tuca'á yā natuuví yā chí ch'εete yeⁿē Diana miiⁿ chí i'teenu nuuⁿmaⁿ nación yeⁿe yáⁿāa Asia ndúúcu núúⁿmáⁿ iⁿ'yeeⁿdí 'cūū.

²⁸Taachí ch'iindiveéⁿ yā chuū nduuvī taāⁿ yā ní 'cai yā, ngaⁿa yā:

Ch'εete n'dai tá táⁿā imagen Diana yeⁿe 'iiⁿyāⁿ yeⁿē yāāⁿ Efeso.

²⁹'Iiⁿyāⁿ yāāⁿ miiⁿ chiidáānā yeⁿé yā. Ní sta'á yā saⁿā chí nguuvī Gayo ndúúcu saⁿā chí nguuvī Aristarco ní candée yā saⁿā s'eeⁿ na teatro. Saⁿā miiⁿ ní yeⁿē yáⁿāa Macedonia ní compañeros yeⁿe Pablo. ³⁰Pablo miiⁿ neⁿe sa can'dáa sa nanáāⁿ 'iiⁿyāⁿ yāāⁿ miiⁿ naati 'iiⁿyāⁿ s'uúⁿ chí i'téenu yā Cristo nguéé 'cuúⁿ yā. ³¹Dendú'ū náⁿa 'iiⁿntyéⁿē saⁿā yeⁿe yáⁿāa Asia, saⁿā chí amigo yeⁿē Pablo dich'óo yā caaca yeⁿē chí ngaⁿá yā chí nguéé caⁿā sa na teatro. ³²Náⁿa yā n'gai yā 'áámá cosa, náⁿa yā táámá cosa ti ngiidáānā yeⁿé yā. Náⁿa yā miiⁿ ní nguéé déenu yā de'ē cáāvā nduuvidaamá yā. ³³Ní 'iiⁿyāⁿ yeⁿe Israel tun'dáa yā Alejandro nguaaⁿ 'iiⁿyāⁿ chí n'dee n'dái. 'Iiⁿyāⁿ Israel s'eeⁿ ingúúndaí yā saⁿā. Tuuⁿmi ní Alejandro míⁿ ca'á sa ndúúcu ta'á sa chí cunee 'diiⁿ. Neⁿe sa caaⁿmaⁿ sa yeⁿē maⁿ sa nanáāⁿ 'iiⁿyāⁿ yāāⁿ miiⁿ. ³⁴Taachí tuumicadiinúúⁿ yā chí saⁿa Israel saⁿa miiⁿ nducyáácá yā 'cai yā taanduu 'uuvī hora: Ch'εete n'dai imagen ndyuūs Diana yeⁿé 'iiⁿyāⁿ yeⁿē yāāⁿ Efeso.

³⁵Tuuⁿmi ní saⁿā 'iiⁿntyéⁿē chí idingúūⁿ diiⁿ sa chí 'caadi nducyaaca yā cheendi yā ní caⁿā sá: Ndís'tii saⁿā s'eeⁿ yeⁿe yāāⁿ Efeso, ¿du'u saⁿā chí nguéé deenu sa chí 'iiⁿyāⁿ yeⁿe yāāⁿ Efeso diiⁿ yā cuidado yaācū yeⁿe táⁿā ch'εete n'dai chí imagen Diana ní imagen yeⁿē tá chí ndaā yeⁿe nanguuvī? ³⁶Deenu yú chuū chí mar 'áámá 'iiⁿyāⁿ nguéé cuuvī caaⁿmáⁿ yā contra yeⁿe chuū. Ndís'tii canéé chí

'cuetinéé 'díⁿ ní inadacadiinúⁿ ní. Ní nguéé díⁿ ní de'ē vεε. ³⁷Naatí candée ní saⁿ'ā s'eeⁿ ti nguéé diiⁿ duucú sá 'áámá cosa yeⁿ'ē yáacū ndíí nguéé ndúú ngaⁿ'a rá yā chi nguεε n'daaca lado yeⁿ'e imagen dendyuūs n'daataá yeⁿ'e yú.

³⁸Nduuti chi Demetrio miiⁿ ndúú^{cū} tanáⁿ'ā 'iiⁿ'yāⁿ chi díⁿ yā ntiⁿ'nyuⁿ miiⁿ véé vaadi 'caa'va ndúú^{cū} sa o dendú'ū contra 'áámá 'iiⁿ'yāⁿ, tuu'mi ní, candée yā saⁿ'ā vaacuyāⁿ ní véé saⁿ'a 'iiⁿ'ntyéⁿ'ē. Míⁿ ní cuuvi caaⁿ'maⁿ 'áámá yā táámá yā.

³⁹Ndúúti chi ngiicá ní yeⁿ'ē táámá naaⁿ dendu'ū 'iiⁿ'ntyéⁿ'ē s'eeⁿ cuuví cāāⁿ'maⁿ yā chéé chí cuaacu. ⁴⁰Tí cáándá yeⁿ'e yú chi caaca nuuⁿ'ndí yā yeⁿ'e yú ní cadiinúⁿ yā yeⁿ'ē chí 'caí yú 'maaⁿ. Nguéé mar 'áámá nduudu chi caaⁿ'maⁿ yú yeⁿ'é chuū.

⁴¹Taachí caⁿ'á yā chuū ní díⁿ yā despedir nducyaaca yā.

Pablo cueⁿ'é yā yáⁿ'ā Macedonia ndúú^{cū} yáⁿ'ā Grecia

20 Taachí canee 'díⁿ 'iiⁿ'yāⁿ, yaa'vi Pablo miiⁿ 'iiⁿ'yāⁿ s'eeⁿ chi i'téenu yā Cristo. Ní taachí Pablo ca'a sa consejo 'iiⁿ'yāⁿ s'eeⁿ ní 'cuetinéé n'daāca yā ndúú^{cū} Dendyuūs miiⁿ. Ní diiⁿ sa despedir yeⁿ'é yā ní tu'maⁿ'á sá 'iiⁿ'yāⁿ s'eeⁿ. Tuu'mí candáa sa ní cueⁿ'ē sa yáⁿ'ā Macedonia. ²Cuayiivi míⁿ cheⁿ'e ntúⁿ sa yāⁿ s'eeⁿ chi ch'i'cueeⁿ taavi sa 'iiⁿ'yāⁿ yeⁿ'e ndúú^{dú} yeⁿ'e Dendyuūs miiⁿ ní ndaā sa yáⁿ'ā Grecia. ³Cuayiivi taachi 'āā cānee sa 'iiⁿ'nuⁿ 'iiyū miiⁿ ní cuayiivi taachí nadacadiínuuⁿ sa chi 'iiⁿ'yāⁿ Israel s'eeⁿ chi díⁿ n'gíínu yā ndúú^{cū} sa hora chi neⁿ'e sa tucáa

sa sndáa sa na barco miiⁿ na yáⁿ'āa Siria, tuu'mi ní nadacadiínuuⁿ sa chuū chi cho'o ntúⁿ sa na yáⁿ'āa Macedonia. ⁴Ní sáⁿ'ā s'ūuⁿ cheⁿ'e sá ndúú^{cū} Pablo ndii yáⁿ'āa Asia. Sáⁿ'ā s'uuⁿ ní Sópater yeⁿ'e yáāⁿ Berea, ndúú^{cū} Aristarco ní saⁿ'ā chi nguuví Segundo saⁿ'ā s'eeⁿ yeⁿ'ē yáāⁿ Tesalónica, ndúú^{cū} saⁿ'ā chi nguuví Gayo yeⁿ'e yáāⁿ Derbe, ndúú^{cū} Timoteo, ndúú^{cū} saⁿ'ā s'eeⁿ yeⁿ'e yáⁿ'āa Asia chi sáⁿ'ā Tíquico ndúú^{cū} sáⁿ'ā Trófimo. ⁵'Iiⁿ'yāⁿ s'eeⁿ néé candáa naaⁿ yā ní canéé ngíínu yā nús'uuⁿ na yāāⁿ Troas chi niiⁿ'nuúⁿ nuūⁿ'niⁿ'yáⁿ'ā. ⁶Taachi 'aa chó'oo nguuví yeⁿ'ē pan chi nguéé levadura, tuu'mi cueⁿ'é 'nū na barco yeⁿ'ē yáāⁿ Filipos. Cho'oo nyuⁿ'u nguuví ní ndaā 'nū ní nduuvidaamá 'nū ndúú^{cū} 'iiⁿ'yāⁿ s'eeⁿ yeⁿ'ē na yáāⁿ Troas. Ní ch'εetinée 'nū ndεēchē nguuví miiⁿ.

Pablo na yāāⁿ Troas

⁷Nguuví domingo vmnāáⁿ vmnaaⁿ yeⁿ'ē ndaata miiⁿ nduuvidaamá 'iiⁿ'yāⁿ s'eeⁿ chi i'téenu yā Cristo chi ndée yā pan. Pablo miiⁿ ní ngi'cueeⁿ sa 'iiⁿ'yāⁿ. Canéé chi candáa sa nguuví chi cuchii. Ní ch'i'cueeⁿ sa taanduu ndíí maⁿ'a yaaⁿ. ⁸Ní na cuarto yáacū naachi nduuvidaama yā nééné n'deēe lámparas vεε. ⁹Náá tiempo caⁿ'a Pablo miiⁿ ní 'áámá saⁿ'a 'díⁿ chi nguuví sá Eutico chí véé sá na ventana, cyaadú n'dai sa. Saⁿ'ā miiⁿ chin'dáa sa ndiichí ndii 'iiⁿ'nuⁿ piso. Taachí nadacuéⁿ yā saⁿ'ā miiⁿ ní 'āā n'dii sa. ¹⁰Tuu'mi ní nangua'āi Pablo miiⁿ ni tu'maⁿ'á yā saⁿ'ā ní can'nuu yā saⁿ'ā. Ní caⁿ'a Pablo chi yā saⁿ'ā s'uuⁿ: Nguéé 'vaá

nī. Canduuchi ntúūⁿ staava yeⁿē sa taama vmnéⁿēe. ¹¹Ch'iinu maáⁿ ní Pablo cuindáá tuuⁿ yā cuaaⁿ 'niiⁿnuúⁿ. Ní n'dee yā pan. Ní che'é yā ndúúcu yā chi candíi yā ch'icueeⁿ ntúūⁿ yā nuuⁿmáⁿ yaaⁿ ndii chidεeve. Níícú cuēⁿe yā. ¹²Candée yā saⁿá 'dííⁿ miiⁿ ní candúúchi sa. Ní yéénú n'dai yā ndúúcu 'viich'etíínūⁿ ch'εete.

**Cueⁿé yā yeⁿe yáāⁿ Troas
ndii yáāⁿ Mileto**

¹³Nús'uū ní can'dáá naaⁿ 'nū ní cueⁿe 'nū na barco na yáāⁿ Asón chi ndaacá 'nū Pablo yáāⁿ miiⁿ. Pablo miiⁿ 'āā neⁿe sa chí caaca sa na yáⁿāa. ¹⁴Taachí Pablo nduuvidaama sa nduucú 'nū na yáāⁿ Asón miiⁿ, ní cueⁿé 'nū na barco miiⁿ, ní ndaá 'nū na yáāⁿ Mitilene. ¹⁵Cueⁿé 'nū na barco miiⁿ ní chidεeve táámá nguuvi ndaa 'nū niiⁿnuúⁿ na isla Quío. Ní chidεeve táámá nguuvi chi ndaa 'nū isla Samos. Ní cueⁿé 'nū ndaa 'nū na yáāⁿ Trogilio. Ch'εetineé 'nū nguiinū miiⁿ. Chidεeve táámá nguuvi cueⁿé 'nū na barco ní ndaa 'nū yáāⁿ Mileto. ¹⁶Pablo miiⁿ nacadíínuuⁿ sa chí ch'ó'o sa yáⁿāa Asia. Canée chi cacyiinu sa chí cunee ngiinu sa nguuvi yeⁿē Pentecostés chi 'viicu yeⁿe cosecha na yáāⁿ Jerusalén ndúúti chi cuūvi.

**Pablo ngaⁿa sa nduudu cuaacu ní diiⁿ
sa despedir 'iiⁿyāⁿ yeⁿe yáāⁿ Mileto**

¹⁷Pablo dich'ó'o sa 'iiⁿyāⁿ yeⁿē yáāⁿ Mileto ndii yáāⁿ Efeso chí 'cái yā 'iiⁿyāⁿ ndiicúú chi ngaⁿa ntiíⁿnyuⁿ yeⁿē yaācū. ¹⁸Taachí ndaa 'iiⁿyāⁿ s'eeⁿ nanááⁿ Pablo, caⁿa sá chii

sa 'iiⁿyāⁿ s'eeⁿ: Ndís'tií deenú nī ti ndii nguuví vmnááⁿ vmnaaⁿ chí ndaá yáⁿāa Asia táácā diíⁿ ní canee nduucú nī tanducueⁿē tiempo. ¹⁹Diíⁿ ntiíⁿnyuⁿ yeⁿe Señor ndúúcu vaadi ndiicúúⁿ taavi. Ch'eenú chíi taanduvéé chí nguéé n'daacā chí diíⁿ 'iiⁿyāⁿ Israel s'eeⁿ nduucú. Ch'εécú níícú tun'daa nuūⁿnīⁿ nduutinaáⁿ. ²⁰Ní 'áámá ngaⁿá tanducueⁿē dendúú chí n'daacā yeⁿé nī. Ní chí'cueeⁿ nanááⁿ nducyaacá 'iiⁿyāⁿ nduu va'ai nduu va'āi. ²¹Ni caⁿá nduudu cuaacu 'iiⁿyāⁿ Israel s'eeⁿ ndúúcu 'iiⁿyāⁿ s'eeⁿ chí nguéé yeⁿē ndaata Israel yeⁿē chí ndaacādaamí yā yeⁿé nducueⁿē nuuⁿndi yeⁿé yā nanááⁿ Dendyuūs. Ní cu'téenu yā yeⁿē Señor Jesucristo yeⁿē yú. ²²Maaⁿ ní cun'diichi nī. Canée chí diíⁿ cucaava espíritu yeⁿé. Caⁿá na yáāⁿ Jerusalén ní nguéé deenú d'ε' cueēnú miiⁿ. ²³Maaⁿ deenú chí Espíritu N'dai yeⁿe Ndyuūs miiⁿ ngaⁿa yā ngii yā 'úú na nducyáácá yáāⁿ chí caⁿá cunee ngíínú chí 'cueēnú cuuví ní caⁿá vácū. ²⁴Naati mar 'áámá naaⁿ nguéé idiíⁿ cuenta ndii nguéé ndúú ya'ái 'úú vida yeⁿé maáⁿ. Canee ngiínú chí di'cuiínú ntiíⁿnyuⁿ yeⁿé, ntiíⁿnyuⁿ chí teē Señor Jesús 'úú chí caaⁿmáⁿ nduudu cuaacu yeⁿé yā yeⁿē evangelio chí ndúúúdí ngai ndúúcu vaadi yeenú. Nduūdú miiⁿ yeⁿe favor ch'εete yeⁿé Dendyuūs. ²⁵Maaⁿ ní 'caandiveéⁿ nī. 'Úú ní deenú ti mar 'áámá ndís'tií nguaaⁿ 'iiⁿyāⁿ naachí ch'ó'o ní caⁿá yeⁿe chí Dendyuūs ngaⁿa yā ntiíⁿnyuⁿ mar 'áámá nī 'aa ntéé n'diichí nī naáⁿ. ²⁶Tanducueⁿē chuū ngaⁿá ngíi ndís'tií maaⁿnguuví caati 'úú

nguéeé canee chi dííⁿ responder yeⁿē mar 'áamá nī yeⁿē tanducuéⁿē vida yeⁿē tanducuéⁿē 'iiⁿyāⁿ. ²⁷Nguéeé cheeⁿdiitú ti caⁿá tanducuéⁿē consejo yeⁿe Dendyuūs ndúúcu ndís'tií. ²⁸Tuu'mi ní cundεε nī cuidado yeⁿē maáⁿ nī ndúúcu nducyáácá 'iiⁿyāⁿ chi i'téenu yā ti Espíritu N'dai yeⁿe Ndyuūs chi'neéⁿ yā ndís'tií cáávā chi cuuvi diiⁿ nī cuidado yeⁿe 'iiⁿyāⁿ chi i'téenu Señor, 'iiⁿyāⁿ chi caⁿá yā yaacū yeⁿe Señor. Señor miiⁿ ní cai yā 'iiⁿyāⁿ ndúúcu yuuúⁿ yeⁿē maáⁿ yā. ²⁹Úú ní deenú chi cuayiivi taachí 'āā ntéé canduuchí ní ndaa 'iiⁿyāⁿ tan'dúúcā lobos nguaaⁿ ndís'tií ní dííⁿ yā chi nguéeé diiⁿ n'daāca nī ndúúcu tanducuéⁿē 'iiⁿyāⁿ.

³⁰Nguaaⁿ ndís'tií nūuⁿ nacueeⁿ sáⁿā s'eeⁿ chi ngaⁿa nduudu chi nguéeé n'daācā chi cuuvi candéé sa 'iiⁿyāⁿ s'eeⁿ chí i'téenu yā Cristo ndúúcu sa.

³¹Cáávā chuū cuin'diichi n'daaca nī. N'gáácú nī ti cheeti 'iiⁿnūⁿ nduuyū ndii nguuvi ndii n'gaaⁿ nguéeé chi'neéⁿ naáⁿ caⁿá ndúúcu nuūⁿnīⁿ nduutinaáⁿ 'áámá 'áámá ndís'tií.

³²Maaⁿ ní ndís'tií hermanos, i'neéⁿ ndís'tií yeⁿe Dendyuūs ndúúcu nduudu yeⁿē favor ch'εete taavi yeⁿé yā. Nduudu miiⁿ diitu ch'εeté chi 'cuiitá ndis'tií ní teē ndís'tií 'áámá cosa chi véé chi cuuvi yeⁿe nī ndúúcu nducyaaca 'iiⁿyāⁿ chi Dendyuūs didεevé yā. ³³Nguéeé dííⁿ nguéeé ndíí nguéeé tuumi 'dííⁿnguεε ndíí nguéeé ndúú tuumi 'dííⁿnguāaⁿ ndíí nguéeé ndúú catecai 'iiⁿyāⁿ.

³⁴Ndís'tií ní deenú nī chi ta'á dichííⁿvē 'úú ndúúcu 'iiⁿyāⁿ chi snéé nducú yeⁿē nducuéⁿē chi neⁿé nū. ³⁵Tanducuéⁿē chuū chí'cueéⁿ

ndís'tií chi diiⁿ yú ntiíⁿnyuⁿ 'túúcā. Canee chi cuuvi cunnee yú 'iiⁿyāⁿ chí ngi'vaachí. Ní nn'gaacu yú nduudu yeⁿē Señor Jesús miiⁿ chí caⁿa yā: N'dai taavi ca chi ca'a yú nguéeé ti chí cuta'ā yú.

³⁶Taachi caⁿa yā chuū chiintii'yá yā ní caⁿ'angua'á yā ndúúcu nducyaaca 'iiⁿyāⁿ s'uúⁿ. ³⁷Tuu'mi ní nducyaaca yā cheεcu taavi yā ní tú'ma'á yā Pablo, maaⁿ ní 'neeⁿ cheendi yā 'iiⁿyāⁿ. ³⁸Néené ya'ai taavi yā cáávā nduudu chi caⁿ'ā Pablo miiⁿ chí 'āā ntéé nanguεεcunee n'diichi nī naáⁿ. Ní cueⁿe yā canguu yúúni yā saⁿ'ā ndii na barco.

Pablo cueⁿe sa na yáāⁿ Jerusalén

21 Cuayiivi chi n'daā cá 'nū yeⁿē 'iiⁿyāⁿ s'eeⁿ, cueⁿe 'nū na barco ní cueⁿe 'nū yúúni cuaacu ní ndaá 'nū na isla Cos. Chidεeve táámá nguuvi cueⁿe 'nū na barco ní cho'ó 'nū na isla Rodas ní ndii yeⁿē isla miiⁿ ndaá 'nū na yaāⁿ Pátara. ²Ní ndaaca 'nū 'áámá barco chi caⁿ'a na yáⁿ'āa Fenicia, cuch'éeé 'nū cueⁿ'é 'nū na barco. ³Ní n'diichí 'nū isla Chipre chi snee lado tá 'cueēe. Ní cueⁿ'é 'nū na yáⁿ'āa Siria, ní ndii miiⁿ ndaá 'nū na yaāⁿ Tiro ti barco miiⁿ míⁿ cu'neeⁿ carga yeⁿē. ⁴Nndaacá 'nū 'iiⁿyāⁿ s'eeⁿ chi i'téenu Cristo ní canéé 'nū miiⁿ ndeēchē nguuvi. 'Iiⁿyāⁿ s'eeⁿ ní ngaⁿ'a yā ngii yā Pablo miiⁿ cáávā Espíritu N'dai yeⁿe Ndyuūs chi nguéeé caⁿ'a sa yáāⁿ Jerusalén. ⁵Taachi snuūⁿ ca'a nguuvi miiⁿ nan'dáa 'nū nducyaaca 'iiⁿyāⁿ ndaá yā chi cunee ngííⁿú yā nús'uu ndúúcu n'daataá yeⁿe yā ndúúcu

daiya yā ndii 'áámá lado yeⁿē yáāⁿ. Ní nducyaaca yā chiintii'yá yā na 'diituú nuūⁿnīⁿyáⁿā. ⁶Ní tu'maⁿa 'nū hermanos 'áámá 'nū taama 'nū ní cueⁿé 'nū na barco. Ní 'iiⁿyāⁿ s'eeⁿ ní cunaⁿa yā na vaacu yā.

⁷Nús'uū ní ch'iinu cheⁿé 'nū na barco. Cueⁿé 'nū yeⁿē yáāⁿ Tiro ní ndáa 'nū yáāⁿ Tolemaida. Ní taachí yaa'vi hermanos nús'uu ch'etineeⁿ 'nū ndúúcu yā 'áámá nguuvi. ⁸Chidēeve táámá nguuvi miiⁿ ni Pablo ndúúcu nús'uu chi snéé 'nū ndúúcu sa, can'dáa 'nū. Cueⁿé 'nū na yáāⁿ Cesarea. Ní sndāa 'nū va'āi yeⁿe Felipe chí ngaⁿa sa evangelio chi ndúúdu ngai yeⁿe Jesucristo. Felipe miiⁿ 'áámá saⁿā naachi ndēēchē diáconos. Ní canéé 'nū ndúúcu sa. ⁹Saⁿā miiⁿ cuūⁿ n'daataá n'gáiyāa daiya sa chi ngaⁿā tá chi Ndyuūs yaa'ví yā. ¹⁰Ch'etineeⁿ 'nū ndēe nguuví. Cuch'ééⁿ 'áámá saⁿā profeta chi caaⁿmaⁿ chí cuchí chí yeⁿe yáⁿāa Judea. Saⁿā miiⁿ nguuvi sa Agabo. ¹¹Saⁿā miiⁿ ní n'diichi sá nús'uū. Sta'a sá cinta yeⁿē Pablo miiⁿ ní ca'ā chiichi sá ca'a Pablo ndúúcu ta'á yā. Ní caⁿā sá: Chuū ngaⁿa Espíritu N'dai yeⁿe Ndyuūs: 'Tíicā 'iiⁿyāⁿ Israel s'eeⁿ yeⁿe yáāⁿ Jerusalén ca'ā chiichí yā saⁿa yeⁿe cinta 'cūū. Ní nca'á yā sa'ā ta'a 'iiⁿyāⁿ s'eeⁿ chí nguéé yeⁿē ndaata Israel.

¹²Taachí ch'iindiveéⁿ 'nū ndúúcu 'iiⁿyāⁿ yáāⁿ miiⁿ nducyáácá 'nū chiica 'nū Pablo miiⁿ chí nguéé cáⁿa sa yáāⁿ Jerusalén. ¹³Tuu'mi ní Pablo miiⁿ nan'guēcútaⁿā sa: ¿De'ē cúví chí ngēcú ndís'tii ní néené i'neeⁿ ya'ai nī staāvā yeⁿé? Ti 'úú ní nguéé dámaāⁿ chí 'caachiichí yā 'úú caati

canéé chí 'cuuví na yáāⁿ Jerusalén cucáāvā Jesús miiⁿ.

¹⁴Nguéé cuuvi di'cufitu 'nū 'iiⁿyāⁿ chí cu'neeⁿ 'nū 'iiⁿyāⁿ ní ngaⁿā 'nū: Cuuví tan'dúúca chí neⁿe Señor.

¹⁵Cho'oo nguúví miiⁿ cúchee 'nū na yáāⁿ Jerusalén ndúúcu dendu'ū yeⁿé 'nū. ¹⁶Ní ndaa ntúuⁿ yā ndúúcu nús'uu náⁿa yā chí i'téenu Jesucristo yeⁿe yáāⁿ Cesarea. Ní 'iiⁿyāⁿ s'eeⁿ ndéé yā nús'uu na vaacu 'áámá saⁿā chí nguuvi Mnasón chí yeⁿe isla Chipre. Saⁿā miiⁿ i'teenu sa cuaaⁿ vmnaaⁿ ní nús'uu ch'etineeⁿ 'nū ndúúcu sa.

Sta'á yā Pablo na yaacū templo

¹⁷Taachí ndaá 'nū na yáāⁿ Jerusalén, hermanos yeenú taavi yā taachi sndaa 'nū. ¹⁸Chidēeve táámá nguuvi Pablo miiⁿ cueⁿe sa ndúúcu 'nū ní snaaⁿ 'nū Jacobo ndúúcu nducyáácá 'iiⁿyāⁿ ndiicúú s'eeⁿ chí 'āā nduuvidaama yā. ¹⁹Taachi diiⁿ sa saludar 'iiⁿyāⁿ s'eeⁿ, Pablo caⁿa sá chii sa 'iiⁿyāⁿ ca'áámá ca'áámá nducuéⁿē dendu'u chí Dendyuūs diⁿ yā nguaaⁿ 'iiⁿyāⁿ s'eeⁿ chí nguéé yeⁿē ndaata Israel caavā ntiⁿnyúⁿ yā. ²⁰Taachí 'iiⁿyāⁿ s'eeⁿ ch'iindiveéⁿ yā chuū, s'téenu yā Dendyuūs ní caⁿa yā chí yā saⁿā: 'Caandiveéⁿ nī, hermanos. Véé cá 'iiⁿyāⁿ Israel s'eeⁿ chí s'téenu yā tan'duucā 'yaaⁿ millares. Ní nducyaaca yā ní neené chí'téenu yā ley yeⁿe Moisés. ²¹Naati 'āā caⁿa yā chí yā 'iiⁿyāⁿ s'eeⁿ yeⁿē ndís'tii chí ndís'tii ca'cuééⁿ nī nducyaaca 'iiⁿyāⁿ Israel s'eeⁿ chí snéé yā nguaaⁿ 'iiⁿyāⁿ s'eeⁿ chí nguéé yeⁿē 'iiⁿyāⁿ Israel. Ca'cueéⁿ nī chí 'iiⁿyāⁿ Israel s'eeⁿ nguéé cánéé chí

diíⁿ yā chi ngaⁿa ley yeⁿē Moisés ndíí nguéé diíⁿ yā circuncidar daiya yā, ndíí nguéé ndúú diíⁿ yā costumbres yeⁿe Moisés. ²²¿D'éε chií tuu'mí? Neené n'deeé 'iiⁿyāⁿ caⁿá yā ní nduuvídáámá yā taachi ch'iindiveéⁿ yā chi nndaá nī. ²³Diíⁿ dí chuū chi ngaⁿa 'nū ndúúcu dii: Véé cuūⁿ saⁿā nguaaⁿ nús'uū chí véé compromiso yeⁿē sa ndúúcu Dendyuūs. ²⁴Candéε di saⁿā s'eeⁿ. Tan'dúúca costumbre yeⁿe religión yeⁿē di, nínduuví dεévé di ndúúcu yā yeⁿe nducuéⁿē. Niicu cuayiivi nadíí'vé di saⁿā chí cuū tiiⁿ sa. Ní nducyáácá 'iiⁿyāⁿ tuumícadiiⁿúⁿ yā ti nguéé dε'ε vεε chí caⁿá yā cucaavā yeⁿē di. Ní tuumícadiiⁿúⁿ yā chí ngíicá cuaacu di ní chi diiⁿ dí chí ngaⁿa ley. ²⁵Naati 'iiⁿyāⁿ s'eeⁿ chí nguéé yeⁿe ndaata Israel chí i'téenu yā nguéé canéé chí diíⁿ yā chúū. Nús'uū ní idingúuⁿ 'nū chí nguéé du'ū chí canéé chí diiⁿ chuū. Dámaāⁿ chí nguéé cuta'á yā yuute yeⁿē 'iiti chí 'caaⁿ'núⁿ yā caavā ídolos, ndíí nguéé ndúú yuuúⁿ yeⁿē tī, ndíí nguéé ndúú yuuúⁿ yeⁿe 'iiti chí nduuchi diiⁿúⁿ yā daandu tī. Ní nguéé cánéé chí cunéé sa ndúúcu 'áámá n'daatāa chí nguéé n'daataá yeⁿē sa.

²⁶Tuu'mi ní Pablo miiⁿ nícandéε sa 'iis'uūⁿ. Ní chidεeve táámá nguuvi tan'dúúca costumbre yeⁿé yā Pablo 'āā nididεévé sa maaⁿ sa ndúúcu saⁿā s'eeⁿ. Ní sndáa yā yaacū templo chí caaⁿmáⁿ yā chí cúúnú ca'ā nguuvi yeⁿē compromiso yeⁿé yā, chí cánéé chí ca'a yā 'áámá 'aama yā ofrenda yeⁿé yā.

²⁷Taachi cánéé chí cúúnú ca'ā chí ndεēchē nguuvi, taachí 'iiⁿyāⁿ

Israel yeⁿē yáⁿāa Asia n'diichí yā Pablo cheeti yaacū templo n'gaā'vá yā ndúúcu sa. Ní diíⁿ yā chí nduuvi taáⁿ yā nducyaaca yā. Ní sta'á yā Pablo. ²⁸N'gai yiicú yā: Ndis'tii saⁿā Israel, cúnnéé nī. Sáⁿa 'cūū chí nduu cuaaⁿ ngi'cuaeⁿ sa nducyaaca 'iiⁿyāⁿ contra yāāⁿ miiⁿ ndúúcu yeⁿē contra yeⁿe ley ndúúcu yeⁿē contra yeⁿe lugar 'cūū. N'déee ca nguéé ti chuū. Ní candεε sa 'iiⁿyāⁿ chí nguéé yeⁿe ndaata Israel cheeti yaacū templo. Ní divaatí sa yaacū templo chí dεeve.

²⁹Tii cuááⁿ vmnaaⁿ ní náⁿā 'iiⁿyāⁿ n'diichí yā ndúúcu sa saⁿā chí nguuvi Trófimo yeⁿē yāāⁿ Efeso. Ní nadacádíinuⁿ yā chí Pablo miiⁿ nicandéε sa saⁿā cheeti yaacū templo. ³⁰Nducyáácá 'iiⁿyāⁿ miiⁿ n'gεεcú cheendí yā ní ch'ii dáaná yeⁿé yā. Ní din'gíínu yā ní sta'á yā Pablo miiⁿ ní tun'dáa yā saⁿa cheeti yaacū templo. Ní hora mífⁿ nūⁿ n'gaadí yā cheendi va'ai yáacū templo. ³¹Ní diiⁿnúⁿ yiinu yā chí 'caaⁿ'nuⁿ yā Pablo. 'Áámá yā caⁿa yā yeⁿē comandante, chí nducyáácá 'iiⁿyāⁿ yāāⁿ Jerusalén nguεε 'diiiⁿ snée yā. ³²Tuu'mí nūⁿ comandante sta'á yā soldado s'eeⁿ ndúúcu capitán ní chéenu yā 'iiⁿyāⁿ s'eeⁿ naachi canéé Pablo miiⁿ. Taachí nducyaaca yā n'diichí yā comandante ndúúcu soldado s'eeⁿ tuu'mi s'neeⁿnaaⁿ yā chí n'geⁿé yā Pablo miiⁿ. ³³Taachí ndaā comandante tuu'mi ní sta'á yā Pablo ní caⁿá yā orden chí chεē chiichí sá ndúúcu 'uuvi cadenas. Ní comandante tiinguuneéⁿ yā: ¿Du'urá saⁿā miiⁿ ní dε'ε vεε miiⁿ ní dε'ε idiíⁿ sa? ³⁴Naachi n'deeé n'dai

'iiⁿyāⁿ, náⁿa yā ní n'gai yā 'aama naaⁿ, náⁿa yā n'gai yā taama naaⁿ, ní 'iiⁿyāⁿ s'eeⁿ nguéé itumicádiinúúⁿ yā yeⁿē sa chi tátii n'gai yā. Ca'á yā orden chi cho'ó yā saⁿā na vácūū naachi sneé soldado s'eeⁿ. ³⁵Taachi Pablo miiⁿ cúcheε sa nandēē, candéε yā yaacū soldado s'eeⁿ saⁿā cáávā chi taāⁿ 'iiⁿyāⁿ s'eeⁿ ndúúcu sa. ³⁶Ti n'deēē n'dái 'iiⁿyāⁿ yeⁿē yaāⁿ miiⁿ cueⁿe yā cuaaⁿ dáámí saⁿā miiⁿ ní n'gai yā: 'Cuuvi sa.

**Pablo ngaⁿa sa yeⁿē maaⁿ
sa na yāāⁿ Jerusalén**

³⁷Taachí tuc'áa yā diiⁿyú yā na vácūū tuuⁿmi ní Pablo miiⁿ ngaⁿa sa ngii sa comandante: ¿Áá 'cuááⁿ nī chi caaⁿmáⁿ 'tεε ndúúcu n'dii? Ní comandante caⁿā sa: ¿Áá déénú dí davaacu griego? ³⁸¿Áá nguéé dí saⁿā yeⁿe yāⁿāa Egipto chi diiⁿ di chí nduuví taáⁿ yā 'iiⁿyāⁿ vmnaaⁿ yeⁿe nguuví miiⁿ ní tun'dáa di cuūūⁿ mil 'iiⁿyāⁿ chi duucu na yáⁿāa cuuⁿmáⁿ?

³⁹Tuuⁿmi ní caⁿā Pablo: 'Úú ní saⁿā Israel yeⁿē yāāⁿ Tarso, saⁿā yeⁿē áámá yāāⁿ ch'εεtε yeⁿe yāⁿāa Cilicia. Ngiicá nanáaⁿ nī, 'cuaaⁿ nī chi yaaⁿví 'iiⁿyāⁿ.

⁴⁰Taachí saⁿā miiⁿ ca'a sa lugar, Pablo miiⁿ chééndii sa nāndεε ní ca'a sa señal 'iiⁿyāⁿ ndúúcu ta'á sa, ní taachí 'diiiⁿ ní caⁿa sa ndúúcu davaacu hebreo. Ní caⁿā sa:

22 Ndís'tii saⁿā ní ndís'tii ví'í ndúúcu 'iiⁿyāⁿ ndicúū, 'caandivéⁿ nī chi ngaⁿá yeⁿē maáⁿ nanááⁿ ndís'tii.

²Taachí ch'iindivéⁿ yā chi ngaⁿā sa davaacu hebreo, ch'εetinéé 'diiiⁿ cá yā. Pablo miiⁿ ní caⁿā sa:

³Cuaacu níⁿnyúⁿ saⁿā Israel 'úú. Ch'iindiyaáⁿ na yāāⁿ Tarso yeⁿē yāⁿāa Cilicia, naatí ch'iitá na yaáⁿ 'cūū. Ch'εéⁿ ndúúcu maestro Gamaliel miiⁿ. Tan'dúúca chi ngaⁿā na ley yeⁿē chiida yú. 'Úú chí diíⁿ ndúúcu núúⁿmáⁿ staava yeⁿē tan'dúúca chi maaⁿ nducyaaca nī diíⁿ nī ndúúcu Dendyuūs. ⁴'Iiⁿyāⁿ chí cuéⁿē Yúúni 'cūū 'úú can'daá 'iiⁿyāⁿ miiⁿ. Ní sta'á ndii n'daataa ndíí saⁿā ní nca'á 'iiⁿyāⁿ chí cuεetinúúⁿ yā vácūū chí 'cuūvi yā. ⁵'Tiicá ntúūⁿ chiiduú ch'εεtε cá yeⁿe Israel miiⁿ testigo yeⁿē ndúúcu nducyaaca 'iiⁿyāⁿ ndiicúū. 'Tiicá ntúūⁿ 'úú sta'á carta ndúúcu orden chí 'cuuⁿmíⁿ 'iiⁿyāⁿ s'eeⁿ ní cueⁿē naachi snéé hermanos. Ní cueⁿē yāāⁿ Damasco ní cueⁿē chí candéé presos hermano s'eeⁿ ndii yāāⁿ Jerusalén. 'Tiicá ntúūⁿ 'iiⁿyāⁿ chí sneé yā miiⁿ ní cuuví yā castigados.

Pablo ngaⁿa yā taacā i'teenú yā
(Hch. 9.1-19; 26.12-18)

⁶Naatí chií taachi yúúni canuúⁿ, ndaá niiⁿnuúⁿ yāāⁿ Damasco tan'dúúca maⁿa nguuví dáácánaāⁿ nndaā 'áámá dεeve yeⁿē nanguuvi naachi 'úú caneé. ⁷Ní sndεévé ná yāⁿāa. Ní ch'iindiveéⁿ 'áámá nduudu chí ngaⁿa ngii 'úú: Saulo, Saulo, ¿dεε' cúú chí nndaā di 'úú chí nééné ya'ai 'úú? ⁸Tuuⁿmi nan'guεεcutaⁿá: ¿Du'ú n'dii, Señor? Ní caⁿa yā chí yā 'úú: 'Úú Jesús yeⁿe yāāⁿ Nazaret miiⁿ chí n'daā di 'úú ní nguéé neⁿē di n'diichi di 'úú. ⁹'Iiⁿyāⁿ chí sneé nduucú cuaacu níⁿnyúⁿ n'diichi yā dεeve miiⁿ. Ní dii'yá yā chí. Naati nguéé ch'iindiveéⁿ yā nduudu chí ngaⁿa Señor Jesús nduucú. ¹⁰Ní

caⁿá: ¿De'ē díⁿ, Señor? Señor miiⁿ ngaⁿá yā ngii yā 'úú: Nducueeⁿ dí ní cueⁿe di na yāáⁿ Damasco. Miiⁿ cadiinuⁿ di tanducuéⁿē chi canee chi diiⁿ di. ¹¹Úú ní nguéé inaáⁿ cáávā chí ch'ēedi nduutinaáⁿ yeⁿē vaadi dēve ch'ēete ca chi dēve miiⁿ. 'Iiⁿyāⁿ chi snée yā nduucú candéé nee yā ta'á ní ndaá yāáⁿ Damasco.

¹²Tuu'mi ni miiⁿ canee 'áámá saⁿā chi nguuvi Ananías, saⁿā chi diiⁿ sa tan'dúúcā chi ngaⁿa ley miiⁿ. Ní nguaaⁿ nducyaaca 'iiⁿyāⁿ Israel s'eeⁿ chi snée yā, ngaⁿá yā chi saⁿā miiⁿ n'dai taavi sa. ¹³Ndaá yā nanaáⁿ ní ndaa niiⁿnúⁿ yā ní caⁿa yā: Dii hermano Saulo, nan'guaāⁿ nduutināaⁿ di. Ní hora miiⁿ nūuⁿ n'guaaⁿ nduutinaáⁿ ní snaáⁿ. ¹⁴Saⁿā miiⁿ ní caⁿā sa: Ndyuūs yeⁿē chiida yú ndēve yā dii chí cuuvi déénú dí chí neⁿe yā. Ní cuuvi n'diichí di Jesús chi n'dai taavi. Ní 'caandiveeⁿ di chí ngaⁿa yā. ¹⁵Ti cuuví di caaⁿmaⁿ di nduudu cuaacu yeⁿé yā yeⁿē cosa chí 'aa n'diichi di ndúúcu chí 'aa ch'iindiveeⁿ di nanááⁿ nducyaaca 'iiⁿyāⁿ. ¹⁶Maaⁿ ní ¿de'ē ínee ngiinu di? Cuééndii di ní cuēdinuūⁿníⁿ di ní didēevé di dii yeⁿē nuuⁿndi yeⁿē di. Caaⁿmaⁿngua'a di nanááⁿ Señor Jesús.

Dicho'ó yā Pablo nanaaⁿ 'iiⁿyāⁿ s'eeⁿ chí nguéé yeⁿē ndaata Israel

¹⁷Túúcā chií. Taachi nanguēcúndíí na yaāⁿ Jerusalén miiⁿ ní taachí caⁿangua'á na yaācū templo n'diichí 'áámá visión, cosa tan'dúúcā chiiⁿ ch'iiⁿnú. ¹⁸Ní n'diichí 'iiⁿyāⁿ ní caⁿá yā chii yā

'úú: Diinú yiiⁿnu di ní cueenu di yeⁿe yāáⁿ Jerusalén, ti nguéé 'cúaaⁿ yā nduudu cuaacu yeⁿé. ¹⁹Úú ní caⁿá: Señor 'iiⁿyāⁿ s'eeⁿ deenú yā yeⁿē nducyáácá yā chí snúuⁿ yā yaācū sinagoga s'eeⁿ ti 'úú ní ch'íí 'iiⁿyāⁿ vácūú ní ch'eⁿé 'iiⁿyāⁿ chí i'teenú yā n'dii. ²⁰Ní taachi ch'ii Esteban saⁿā chí caⁿa nduudu cuaacu yeⁿé nī, 'úú ntúūⁿ ni canee nanáaⁿ sa. 'Úú ní 'cuúⁿ chí ch'ii sa. Ní nguain'daí cotón yeⁿe 'iiⁿyāⁿ chí ch'iiⁿnūⁿ saⁿā. ²¹Tuu'mi caⁿa Jesús chíi yā 'úú: Cuéⁿé dí, ti 'úú idicho'ó dii yáⁿái n'dai ndúúcu 'iiⁿyāⁿ s'eeⁿ chí nguéé yeⁿē ndaata Israel.

Pablo nanááⁿ comandante

²²Ní taachi 'iiⁿyāⁿ s'eeⁿ ch'iindiveeⁿ yā ndii nduudú 'cūú tuu'mi ní caⁿa yuudú yā: Divíí di sáⁿa 'cūú na yáⁿāa ti nguéé canéé chí cunduuchi sa.

²³Taachí 'cai yā ní chíín'cuuⁿ yā catecai yā ní chingée yā iyaācā na 'yúúné, ²⁴comandante chí ngaⁿa ntiiⁿnyuⁿ caⁿā sa chí cu'nuúⁿ yā Pablo vácūú. Ní caⁿā orden chí caⁿá yā tiingúúneeⁿ yā Pablo ní ch'eⁿé yā Pablo, maaⁿ niicu cadíinuⁿ yā de'ē cáávā chí n'gāi yā contra yeⁿē sa. ²⁵Taachí dichiichí yā Pablo ndúúcu yiiⁿmaⁿ, Pablo miiⁿ ní caⁿā sa capitán chí sneé yā miiⁿ: ¿'Áá canéé chí 'cueⁿé nī 'áámá saⁿā romano ndúúti chí nguéé ndaaca nī nuuⁿndi yeⁿē sa?

²⁶Taachí capitán miiⁿ ch'iindiveeⁿ sa chuū, cueⁿe sa níccú caⁿa sa yeⁿe comandante ní yaa'vi sa: N'diichí nī, ¿de'ē díⁿ nī caati sáⁿa 'cūú ní saⁿā romano sa?

²⁷Ndaa comandante ní caⁿa sa: Cuuvi di 'úú. ¿'Áá díí saⁿā romano? Pablo miiⁿ ní caⁿa yā: 'Tííca.

²⁸Nan'guεεcútaⁿā comandante:
'Úú caí māaⁿ 'úú. N'deéé tuūmī ca'á
ní ndii chíí saⁿā romano 'úú. Tuu'mi
ní Pablo miiⁿ ní caⁿa sa: 'Úú ní
ch'liindiyááⁿ na yáⁿāa romano 'tíicā.

²⁹Ní cueⁿé yā yeⁿé sa 'iiⁿyāⁿ chi
sta'a orden chi 'cueⁿé yā saⁿā.
Taachí comandante tuumicádiinuuⁿ
sa chi saⁿā romano sa, tuu'mi dii'yá
ntúuⁿ sa chií, chi dichíichí sa Pablo.

Pablo nanááⁿ concilio

³⁰Chidεeve táámá nguuvi sáⁿā
miiⁿ neⁿe sa cadíinuuⁿ sa dε'ε cáávā
chi tun'dáá nuuⁿndi 'iiⁿyāⁿ Israel
s'eeⁿ. Divíi yā cadenas yeⁿé Pablo
miiⁿ ní ca'a yā orden chi cho'ó yā
Pablo nanááⁿ chiiduú n'gεεt'é yeⁿe
Israel ndúúcu nducueⁿé 'iiⁿntyéⁿé
yeⁿe concilio. Ní tun'dáa yā Pablo
miiⁿ. Ní chiⁿi yā saⁿā nanááⁿ 'iiⁿyāⁿ
s'eeⁿ.

23 Tuu'mi ní Pablo miiⁿ
ch'íínú cuaacu sa saⁿā s'eeⁿ
yeⁿé concilio. Ní caⁿa sa: Ndís'tii
saⁿā vi'í, Ndyuūs ní ndiichí yā
taanduvéé chi 'úú dííⁿ ní nguéé dííⁿ
'uūvi staava yeⁿé yeⁿe cosa chi dííⁿ.

²Ananías, saⁿā chi chiiduú ch'εete
cá yeⁿe Israel caⁿa yā chií yā 'iiⁿyāⁿ
chi canee daama yā ndúúcu sa
chí 'cueⁿe yā cheendi sa. ³Tuu'mi
ní Pablo mííⁿ ní caⁿa sa: Ndyuūs
'cueⁿé yā dii, saⁿā chi tan'dúúca
'aama chεeti cuéε. ¿Áá diiⁿ di juzgar
'úú tan'dúúca ley miiⁿ, 'iicu nguéé
idiiⁿ di cumplir chi ngaⁿā ley, nífcú
maaⁿ ní ngaⁿā di chí 'cueⁿé yā 'úú?

⁴'Iiⁿyāⁿ chi snée yā nanááⁿ Pablo
caⁿa yā: ¿Áá chiiduú ch'εete ca yeⁿé
Dendyuūs ngaⁿā taaⁿ di ngii di 'tíicā?

⁵Pablo miiⁿ ní caⁿa sa: Ndís'tii vi'í,
'úú ní nguéé deenú chí sáⁿa 'cāa chí

chiiduú ch'εete cá yeⁿe Israel. Naati
cánée nguūⁿ. Nguéé caaⁿmaⁿ taaⁿ di
yeⁿé 'áámá saⁿā ch'εete yeⁿe Israel
yeⁿé 'iiⁿyāⁿ yeⁿé di.

⁶Tuu'mi Pablo miiⁿ tuumicádiinuuⁿ
sa chí 'áámá taaⁿ yā yeⁿé 'iiⁿyāⁿ
saduceo s'eeⁿ chí nguéé it'éénu yā
chí nanduuchi 'iiⁿyāⁿ ní táámá
táaⁿ yā yeⁿé 'iiⁿyāⁿ fariseos chí
it'éénu chí nanduuchi 'iiⁿyāⁿ. Ní 'cai
yuudu sa nanááⁿ nducyaaca 'iiⁿyāⁿ
yeⁿé concilio: Ndís'tii saⁿā vi'í, 'úú
ní saⁿā fariseo 'úú ní daiyá saⁿā
fariseo 'úú. Dííⁿ yā juzgar 'úú yeⁿé
chí canee ngíínú yā chí nadacuééⁿ
yā yeⁿé nguaaⁿ tináⁿā.

⁷Taachí caⁿa yā chuū véé 'uuvī
vaanicadiinūuⁿ yeⁿe saⁿā fariseos
ndúúcu saⁿā saduceos. Ní 'iiⁿyāⁿ
s'eeⁿ ní divíi yā 'áámá taaⁿ táámá
taaⁿ. ⁸Caati 'iiⁿyāⁿ saduceos ngaⁿā
yā chí nguéé iniduuchi 'iiⁿyāⁿ ndii
nguéé nduu ángel ra ndíi nguεe
nduu espíritus. 'Iiⁿyāⁿ fariseos
ngaⁿā yā ti véé 'tíicā. ⁹Ní n'dee
n'dái caⁿa yā 'iiⁿyāⁿ s'eeⁿ. Ní nacuééⁿ
'iiⁿyāⁿ chí déénú taavi ley lado
yeⁿé fariseos ní caⁿa yā chí chuū
chí cuaacu. Ní ngaⁿa yuudu yā:
Nguéé dε'ε vεε chí nguεe n'daacā
inndaacā 'nū yeⁿe saⁿā miiⁿ. Ndúúti
'áámá espíritu o 'áámá ángel yaa'vi
yā Pablo miiⁿ nguéé n'daacā chí
'cuuⁿmaⁿ yú ndúúcu Dendyuūs.

¹⁰Taachi véé vaadi 'caa'va chí
ch'εete ca tuu'mi ní comandante
'va'á yā chí 'caaⁿnúⁿ yā Pablo. Ní
comandante miiⁿ dicho'ó yā soldado
s'eeⁿ chí cueⁿé sa ní cuta'a sa Pablo
miiⁿ nguaaⁿ 'iiⁿyāⁿ s'eeⁿ ní candée
sa Pablo na vácū. ¹¹Táámá nguiinū
miiⁿ ndaā Señor Jesús nanááⁿ yā ní
caⁿa yā: Pablo, nguéé cu'neeⁿ duuva

di. Tan'dúúccā chi nga^{na} di nduudu cuaacu ye^{ne} e 'úú na yááⁿ Jerusalén 'tiicá ntúúⁿ caaⁿmaⁿ di ye^{ne} e 'úú na yááⁿ Roma.

'Iiⁿyāⁿ s'eeⁿ díⁿ yā compromiso chí 'caaⁿnúⁿ yā Pablo

¹²Chidεεve táámá nguuvi, náⁿā 'iiⁿyāⁿ Israel s'eeⁿ nduuvidaamá yā ni díⁿ yā compromiso chí nguéé che'e yā ndíⁿ nguéé cu'ú yā ne^{ne} e chí 'āā cuéé 'caaⁿnúⁿ yā Pablo miiⁿ. ¹³Ngo'o 'úúvi ngeecu 'iiⁿyāⁿ chi nduuvidaamá yā ye^{ne} e chúú. ¹⁴'Iiⁿyāⁿ s'uuⁿ ní che^{ne} 'é yā nanááⁿ chiidúú n'geeté ye^{ne} e Israel ndúúcu 'iiⁿyāⁿ ndiicúú ní caⁿ'a yā: Nús'uu ní nduuvidaámá 'nū ní díⁿ 'nū compromiso chí díⁿ 'nū sufrir ní nguéé du'ū veε 'nuú 'nū che'é 'nū taanduvéé ndíⁿ 'caaⁿnúⁿ 'nū Pablo. ¹⁵Maaⁿ ní ndís'tií ndúúcu 'iiⁿyāⁿ ye^{ne} e concilio, cavyaaⁿ cáácá yā nanááⁿ comandante chí candée yā Pablo ní chicuú yā nanááⁿ nús'uu. Díⁿ nī tan'dúúccā chí ne^{ne} e di tiinguuneeⁿ di cosa chí cuaacu ye^{ne} 'é yā. Niicu nús'uu, 'aa snéé ngiinú 'nū chí 'caaⁿnúⁿ 'nū saⁿ'ā taachí ndaa sa.

¹⁶Tuu'mi ní 'áámá saⁿ'ā daiya táⁿā vi'i Pablo, taachí ch'iindiveⁿ sá chí caⁿ'a yā dε'e chí díⁿ yā, che^{ne} e sa ní chí ndaa sa cheeti vácúú miiⁿ ní caⁿ'a sa chí sa Pablo miiⁿ. ¹⁷Pablo miiⁿ 'cai sa capitán ní caⁿ'a sa: Candée di saⁿ'ā 'díⁿ 'cúú nanááⁿ comandante ti canéé chí cuuvi sa 'iiⁿyāⁿ dε'ē chí deenu sa.

¹⁸Saⁿ'ā miiⁿ sta'a sa saⁿ'ā 'díⁿ ní candée sa saⁿ'ā nanááⁿ comandante ní caⁿ'a sa: Pablo chí canúúⁿ vácúú di'cuíftu sā 'úú chí candée saⁿ'ā 'díⁿ 'cúú nanááⁿ nī. Véé chí déénú sá chí caaⁿ'maⁿ sa ndúúcu nī.

¹⁹Comandante miiⁿ ní sta'á yā ta'ā sa ní cue^{ne} 'é yā taama lado ndúúcu sa ní ntiinguunéeⁿ yā saⁿ'ā: ¿Dε'ē chí cuuvi di 'úú?

²⁰Ní caⁿ'a sa chíi sá 'iiⁿyāⁿ: 'Iiⁿyāⁿ Israel s'eeⁿ ní chíi yā ní caacá yā nanááⁿ nī chí cavyaaⁿ ní candée nī Pablo nanááⁿ 'iiⁿyāⁿ ye^{ne} e concilio. 'Iiⁿyāⁿ s'eeⁿ nduuvidaamá yā ní itiingúuneeⁿ yā Pablo miiⁿ 'áámá chí cuaacu níⁿnyúⁿ ye^{ne} e sa. ²¹Naati n'dií, nguéé cu'téenu nī. Ngo'ō 'uuvi ngeecu saⁿ'ā s'eeⁿ ye^{ne} e 'iiⁿyāⁿ Israel chí 'cuεetinúú n'de'ei yā diituú cyúúfí. 'Iiⁿyāⁿ s'eeⁿ nduuvidaama yā chí díⁿ yā compromiso ní cadíínuuⁿ yā chí nguéé n'daacā chí nguéé ndúú che'e yā ndíⁿ nguéé ndúú cu'u ra yā taanduvéé ndii yā chí 'caaⁿnúⁿ yā Pablo. Maaⁿ ní listos canee yā ní canee ngíínú yā cáávā chí caaⁿ'máⁿ n'dií.

²²Tuu'mi ní comandante dichó'o sa saⁿ'a 'díⁿ chí nguéé caaⁿ'maⁿ sa cuuvi sa mar 'áámá 'iiⁿyāⁿ chí caⁿ'a sa chíi sa 'iiⁿyāⁿ ye^{ne} e chúú.

**Dichó'o yā Pablo nanááⁿ
Félix saⁿ'a gobernador**

²³Comandante miiⁿ 'cai yā na 'uuvi capitán. Ní caⁿ'á yā chíi yā saⁿ'a soldados chí nduuvidáamá sá taanduu n'geecu nuúⁿ yaaaⁿ na 'uuvi ciento soldado s'eeⁿ ndúúcu 'iiⁿnūⁿ ngeecu ndiichí soldados chí sndúúⁿ sa 'yúúdúu ndúúcu 'uuví ciento soldado chí véé lanza ye^{ne} e yā. Ní cho'ó nducyaaca yā yááⁿ Cesarea. ²⁴Ní cundiyaáⁿ nī 'iiti ti cunduú Pablo ní candée nī saⁿ'ā ndúúcu cuidado nanááⁿ Félix chí gobernador. ²⁵Ní dingúuⁿ sa 'áámá carta ndúúcu nduudú 'cúú:

26 Úú Claudio Lisias idinguúⁿ yeⁿé nī Félix saⁿā gobernador chi n'dai taavi: N'dáí nī. **27** Saⁿa 'cūū ní sta'a 'nū saⁿā caava 'iⁿyāⁿ Israel s'eeⁿ chí neⁿe 'caaⁿnuⁿ yā saⁿā. 'Úú ninguáⁿái saⁿā miiⁿ ndúúcū soldado s'eeⁿ tí deenú chí saⁿā romano saⁿā miiⁿ. **28** Ní neⁿé deenú de'ē cáávā tun'dáa yā nuuⁿndí yeⁿé sa. Candéé saⁿā nanááⁿ 'iⁿntyéⁿé yeⁿé concilio yeⁿé yā. **29** Ní táácā chí tun'dáa nuuⁿndí yā yeⁿé sa caavā ley yeⁿé yā naati mar 'áámá nuuⁿndí ch'εεte yeⁿé sa chí 'caaⁿnúⁿ yā saⁿā o cunúúⁿ sa vácūū. **30** Taachí 'úú chicadiinúúⁿ chi nduuvidaamá yā contra yeⁿé saⁿá 'cūū, hora miiⁿ dicho'ó saⁿā nanááⁿ n'diī. Ní ngaⁿá ngíí saⁿā chí tun'dáa nuuⁿndí yeⁿé sa chí chíi yā nanáaⁿ nī. Ní cuuví yā n'diī de'ē chí canée yā ndúúcu sa. N'dáácā canée nī.

31 Soldado s'eeⁿ sta'á yā Pablo tan'dúúcā chí caⁿa yā chíi yā saⁿā ní nguiinū miiⁿ candée yā saⁿā ná yāāⁿ Antípatris. **32** Chideeve táámá nguuví ní soldado chí sndúū 'yuúdūu cueⁿé yā ndúúcū Pablo ní náⁿa yā nguεεcunée yā na va'āi ch'εεte naachi canée vácūū. **33** Taachí ndaa yā 'iⁿyāⁿ s'eeⁿ na yāāⁿ Cesarea, ca'á yā carta gobernador Félix ní dííⁿ yā presentar ntúuⁿ Pablo nanááⁿ gobernador. **34** Gobernador miiⁿ ch'éeⁿ yā carta ní tiinguunéeⁿ yā: ¿Tíí yáⁿāa saⁿā? Ní tumicadínuuⁿ yā chí saⁿā ní yeⁿe yáⁿāa Cilicia. **35** Ní caⁿa yā chíi yā Pablo: Cu'neeⁿ veéⁿ yeⁿé di taachi ndaa sa chí tun'dáa nuuⁿndí yeⁿé di. Ní dicho'ó yā 'áámá saⁿā soldado chí diiⁿ cuidado saⁿā na vácū Herodes naachi diiⁿ juzgar 'iⁿyāⁿ.

**Pablo caⁿa sa yeⁿé maaⁿ
sa nanááⁿ Félix**

24 Cho'ō nyuⁿu nguuví ní ca'á chíidúú ch'εεte ca yeⁿe Israel chí nguuví Ananías ndúúcū náⁿa 'iⁿyāⁿ ndiicúū ndúúcū 'áámá saⁿā chí nguuví sa Tértulo. Saⁿā miiⁿ neené n'dεεvé indee sa. 'iⁿyāⁿ s'eeⁿ chíi yā nanááⁿ gobernador ní caaⁿmáⁿ yā contra yeⁿe Pablo miiⁿ. **2** Taachí gobernador Félix 'cai yā Pablo miiⁿ tuu'mi ní saⁿā chí nguuví Tértulo caⁿa sa nuuⁿndí yeⁿé Pablo miiⁿ ní caⁿa sa: Déenu 'nū ti cááva nī, n'diī Félix, véé vaadi yeenú 'nū ní 'āā nin'guεetinée 'nū ndúúcū vaadi 'diííⁿ ch'εεte. Néené n'deeé n'dái déndu'ū chí n'dai na yāāⁿ vaacú 'nū cáávā vaanicadiinúuⁿ n'dái yeⁿé nī. **3** N'diī, Félix chí n'dai taavi n'diī, nús'uū ní ch'iindiveéⁿ 'nū nduudu yeⁿé nī nducuéⁿé tiempo nducuéⁿé cuaaⁿ ní caⁿá 'nū Ndyuūs nadíí've n'diī cáávā chí dííⁿ nī. **4** Chí 'āā ntéé tee 'nū vaadi 'caa'va n'diī 'naaⁿ tiempo ngiicá nanááⁿ n'diī chí n'dai chí 'caandiveeⁿ nī yeⁿe 'nū ndúúcū vaadi n'dai yeⁿé nī. **5** Sáⁿa 'cūū néené itee sa vaadi 'caavā nús'uū yāāⁿ vaacú 'nū. Níicú ididáⁿa sa 'iⁿyāⁿ nguaaⁿ nducyáácá 'iⁿyāⁿ Israel s'eeⁿ chí snée yā núúⁿmáⁿ iⁿyeeⁿdi. Ní saⁿā miiⁿ ngaⁿā ntiⁿnyuⁿ sa yeⁿé 'iⁿyāⁿ chí nazarenos chí i'téenu yā Jesús. **6** Ní neⁿe ntúuⁿ sa divaatí sa yaacū templo. Sta'á 'nū saⁿā ní neⁿé 'nū cadíinuuⁿ 'nū yeⁿé sa tan'dúúcā ley yeⁿé 'nū. **7** Comandante yeⁿé 'áámá taaⁿ soldado chí nguuví Lisias ndaa sa naachi snée 'nū ní sta'a sa Pablo

ndúúcū vaadi diituú yeⁿē sa ni divíi sa Pablo na ta'á 'nū. ⁸Dicho'ó yā saⁿā s'eeⁿ chi tun'dáá nuuⁿndi yeⁿe Pablo chi ndáa sá nanááⁿ n'dií. Maaⁿ ní taachi diíⁿ nī juzgar cadíinuⁿ nī yeⁿé nducuéⁿē dendu'ū de'ē cáávā chi tun'dáá 'nū nuuⁿndi yeⁿē sa.

⁹Iiⁿyāⁿ Israel s'eeⁿ ngaⁿá yā chi 'tíicā chi caⁿa Tértulo miiⁿ. ¹⁰Tuuⁿmi ní ca'a gobernador señal Pablo chi caaⁿmaⁿ sa. Pablo miiⁿ n'guεcútaⁿā sa: 'Úú deenú ti 'āā nééné 'āā 'naaⁿ canee nī juez yeⁿē nación 'cūū. 'Úú ngaⁿá yeⁿē maáⁿ ndúúcū confianza. ¹¹Ti ní deenu nī maaⁿ taandúū ndichúúví nguuvi chí chéé na yāāⁿ Jerusalén chi cuuvi cu'teenú Dendyuūs. ¹²Nguéé ndaāca yā 'úú chi nguⁿú ndúúcū mar 'áámá 'iiⁿyāⁿ, ní nguéé dííⁿ chi n'dee n'dái 'iiⁿyāⁿ nguεε snéé 'dííⁿ yā, ní nguéé ndúú ná yāacū templo miiⁿ, ní nguéé ndúú ná yaācū sinagoga, ní nguéé na yāaⁿ 'cūū.

¹³Ní nguéé cuuví caaⁿmáⁿ yā chi chuū idiíⁿ. ¹⁴Chuū ngaⁿá ngií n'dií. Tan'dúúcā chi 'iiⁿyāⁿ s'eeⁿ ngaⁿá yā chi nguéé cuaacu, 'tíicā 'úú i'teenú Ndyuūs yeⁿē chiidá 'nū s'ééⁿ. Ní 'úú i'teenú tanducuéⁿē dendu'ū chí cánéé nguūⁿ na ley ndúúcū nduudu yeⁿē profetas chí caⁿa nduudu yeⁿe Ndyuūs. ¹⁵Véé chí cānee ngiinú 'áámá cosa yeⁿé Dendyuūs tan'dúúcā 'iiⁿyāⁿ s'eeⁿ canee ngiinú ntúuⁿ yā, chí Dendyuūs nduuchí yā 'iiⁿyāⁿ yeⁿe nguaaⁿ tinaⁿā, tan'dúúcā 'iiⁿyāⁿ chí n'dai taaví ndúúcū 'iiⁿyāⁿ chí nguεε n'dai taavi. ¹⁶Cáávā chuū cueⁿe daāⁿmaⁿ deenú chí nguéé véé nuuⁿndi na staava yeⁿé nanááⁿ Dendyuūs ndíí nguéé ndúú nanááⁿ 'iiⁿyāⁿ.

¹⁷Cho'ó 'áámá na 'uuvi nduūyū ndaá ní nga'á limosnas 'iiⁿyāⁿ vaácú ní nga'á ofrenda. ¹⁸Cunee na yaācū templo taachi náⁿā 'iiⁿyāⁿ Israel s'eeⁿ yeⁿe yáⁿāa Asia ndáácá yā 'úú ná yaācū templo ndúúcū compromiso chí nadideevé tan'dúúcā costumbre yeⁿē religión yeⁿé. Nguéé dííⁿ ndúúcū n'dee n'dái 'iiⁿyāⁿ ní nguéé n'dee n'dái 'caí 'iiⁿyāⁿ s'eeⁿ. ¹⁹'Iiⁿyāⁿ s'eeⁿ cánéé chí cuuvi yā n'dií ní caaⁿmaⁿ yā nuuⁿndi yeⁿé, ndúúti véé de'ē chí canee yā nduucú. ²⁰Ní cánéé cúúⁿmíⁿ yā chí caaⁿmáⁿ maáⁿ yā ndúúti chí nndaacá yā chí nguéé n'daacā chí dííⁿ taachí canee ndúúcū saⁿā 'iiⁿntyéⁿē concilio s'eeⁿ. ²¹Ndúúti chí chuū chí 'caí yiicú, caⁿá yeⁿē chí nduuchí yā yeⁿē nguaaⁿ tináⁿā taachí canee nanaáⁿ 'iiⁿyāⁿ s'eeⁿ. Cáávā chuū maaⁿnguuví dííⁿ yā juzgar 'úú.

²²Tuuⁿmi ní Félix ch'iindiveeⁿ yā chuū. Déenú cuaacú yā yeⁿē Yúúni cuaacu yeⁿe Ndyuūs ní s'nééⁿ ca yā chí caāⁿmāⁿ sa ní caⁿa yā: Taachí ndaa Lisias miiⁿ chí comandante 'cuiinu tuumicádiinuúⁿ yeⁿē asunto yeⁿe di.

²³Félix cho'ó yā chí yā capitán chí diíⁿ sa s'neeⁿ sa Pablo preso ní ca'a sa duu'vi libertad yeⁿē sa naati s'néeⁿ sa Pablo arrestado. Ní capitán miiⁿ cuuvi yā Pablo chí cuchí 'iiⁿyāⁿ yeⁿē sa nanááⁿ sa ndúúcū 'iiⁿyāⁿ chí dichí've yā yeⁿē sa ní ca'á yā chí neⁿe sa.

²⁴N'duuví nguuví cuayiivi ndaā Félix ndúúcū n'daataá yeⁿé yā chí nguuví Drusila chí ndaataá yeⁿē Israel. 'Caí sa Pablo ní ch'iindiveeⁿ sa yeⁿe vaadi i'teenú

yeⁿē Jesucristo. ²⁵Taachí caⁿa Pablo yeⁿē nduudu cuaacu yeⁿe chi dííⁿ yā chi nguéé n'daacā ní yeⁿē juicio chí cuchii, tuu'mi ní Félix miiⁿ dii'yā sá chii ní caⁿa sa: Cunaⁿa di maaⁿ. Ní taachí véé cuaáⁿ tuu'mi ní 'cuaf díí.

²⁶Félix canee ngíínú yā chuū chi Pablo miiⁿ ni ca'a sa tuūmī yeⁿé yā tuu'mi ní n'deēchi yā saⁿā. Caavā chuū chi neene n'deēé cuuvi 'cai yā ní ndaā sa ní ndee sa nduucú yā. ²⁷Ch'iinu 'uūvi nduuyū miiⁿ ní nan'daā Félix miiⁿ yeⁿē lado gobernador ní sndaā saⁿā chí nguuvi Porcio Festo. Naati Félix miiⁿ ní neⁿe sa cunée sa chí ch'ēete sa lado yeⁿe 'iiⁿ'yāⁿ Israel s'eeⁿ ní snuūⁿ ntuūⁿ sa Pablo vácūū.

**Pablo ngaⁿa sa chí caⁿā
sa nanááⁿ César**

25 Taachí ndaā saⁿā Festo na yáⁿāa yeⁿé yā cho'ōo 'iiⁿnūⁿ nguuvi ní cuhéé yā yeⁿē yāāⁿ Cesarea ní ndaa yā na yāāⁿ Jerusalén. ²Ní 'iiⁿ'yāⁿ chiiduú ch'ēete ca yeⁿe chiiduú n'geeté yeⁿe Israel ndúúcu 'iiⁿntyéⁿē yeⁿe 'iiⁿ'yāⁿ Israel s'eeⁿ cheⁿe yā nanááⁿ Festo miiⁿ ní ngaⁿá yā contra yeⁿe Pablo miiⁿ. Ní chiicá yā saⁿā. ³Ngaⁿá yā contra Pablo miiⁿ ní ngiica yā 'áámá favor chí nandéé yā Pablo na yāāⁿ Jerusalén. Ti 'iiⁿ'yāⁿ s'eeⁿ ní canéé listo yā ní nadicadínuuⁿ yā chí 'caaⁿnúⁿ yā saⁿā cuaaⁿ cyúúní. ⁴Naati Festo mííⁿ nan'guεεcútaⁿā sa chí Pablo miiⁿ canuuⁿ sa vácūū na yāāⁿ Cesarea ní 'úú cáámá can'daá yeⁿē yāāⁿ 'cūū. ⁵Tuu'mi ní ngaⁿā sa: Ndí's'tií chí ngii dííⁿ nī, caⁿá ní nduucú na yāāⁿ miiⁿ ní nduuti chí

vée nuūⁿndi yeⁿē saⁿá 'cūū tuu'mi caaⁿmáⁿ nī cheé nuuⁿndi yeⁿē sa.

⁶Ní canéé chí Festo cuuvi 'náaⁿ yā ndúúcu 'iiⁿ'yāⁿ s'eeⁿ tan'dúúca nííni nguuvi ndííchí nguuvi. Ní ndaa yā na yāāⁿ Cesarea. Chideεve táámá nguuvi ní Festo ch'iindí yā na silla yeⁿē juez ní caⁿá yā chí cinguai yā Pablo. ⁷Sáⁿa 'cūū taachí ndaā sa, 'iiⁿ'yāⁿ Israel s'eeⁿ chí ndaa yā yeⁿē yāāⁿ Jerusalén 'iiⁿ'yāⁿ miiⁿ nanguεεcundií yā Pablo miiⁿ ní caⁿa yā neenē n'deēe nuuⁿndi yeⁿē sa. Mar 'áámá 'iiⁿ'yāⁿ cuuvi ngaⁿa yā ch'ē chí cuaacu. ⁸Tuu'mi ní Pablo miiⁿ ní caⁿa maāⁿ sa yeⁿē sa: Nguεε nuūⁿndi yeⁿé mar 'áámá, ndii nguéé ndúú yeⁿē ley yeⁿe 'iiⁿ'yāⁿ Israel s'eeⁿ ndii nguéé ndúú yeⁿē costumbre yeⁿē yaācū templo ndíí nguéé ndúú yeⁿē rey César.

⁹Naati Festo miiⁿ neⁿe sa caⁿa sa favor yeⁿē 'iiⁿ'yāⁿ Israel s'eeⁿ. Ni nan'guεεcútaⁿā sa yeⁿē Pablo, ní caⁿā sa: 'Áá neⁿe di caⁿā di na yāāⁿ Jerusalén ní mííⁿ 'cuundicaadi yeⁿē di de'e ndu'ū miiⁿ nanááⁿ 'úú níícu cádiinuⁿ de'e falta yeⁿē di?

¹⁰Pablo miiⁿ ni caⁿa sa: Nanááⁿ saⁿā ntyeⁿē canéé na juzgado yeⁿe César naachi canéé, chí 'cuūndicaadi yeⁿé. 'Iiⁿ'yāⁿ Israel s'eeⁿ nguéé de'ē vee ndííⁿ ndúúcu yā, tan'dúúca chí n'dai deenú nī. ¹¹Caati nduuti chí de'ē chí 'áámá ch'ēētē ndííⁿ o n'niíⁿnúⁿ tinaⁿā, nguéé 'va'á chí 'cuūví. Ndúúti chí nguéé de'e vee ndííⁿ yeⁿē chí ngiica 'iiⁿ'yāⁿ s'tíí, mar 'áámá 'iiⁿ'yāⁿ nguéé cuuvi ca'a yā 'úú saⁿa s'tií. 'Úú neⁿé caⁿá caaⁿmáⁿ nanááⁿ César.

¹²Tuu'mi ní Festo miiⁿ taachí caⁿa sá chí sa saⁿā ntyeⁿe yeⁿē concilio,

ní n'gueecútaⁿā sa: Ngaⁿa ntúuⁿ
di chí naⁿa di nanááⁿ César miiⁿ
tuu'mi ní naⁿa di.

**Pablo nanááⁿ Agripa
ndúúcū Berenice**

¹³Cho'oo 'áámá nduu 'úúví
nguuvi ní rey Agripa ndúúcū táⁿā
Berenice ndaá yā yááⁿ Cesarea chí
díⁿ yā saludar Festo. ¹⁴'Naaⁿ 't'ee
ch'etinéé yā ndúúcu Festo miiⁿ
ní Festo miiⁿ caⁿa cuáácú sá rey
yeⁿē nuuⁿndi yeⁿē Pablo ní ngaⁿā
sa: 'Áámá saⁿā canúúⁿ sa vácūū
caavā Félix miiⁿ. ¹⁵Chuū chí yeⁿē
saⁿā miiⁿ. Taachí cheⁿé na yāāⁿ
Jerusalén tuu'mi ní chiiduú n'geeté
yeⁿē Israel ndúúcū 'iiⁿyāⁿ ndiicūū
yeⁿē 'iiⁿyāⁿ Israel s'eeⁿ ndaá yā
nanaáⁿ ní chiica yā chí 'úú díⁿ
condenar saⁿā. ¹⁶Nan'gueecutaⁿá
yeⁿē 'iiⁿyāⁿ s'eeⁿ. Nguéé costumbre
yeⁿē 'iiⁿyāⁿ romano s'eeⁿ chí
'caaⁿnúⁿ yā 'áámá 'iiⁿyāⁿ neⁿe chí
'āā cuéé 'cuūndicaadí yeⁿé yā ní
caaⁿmáⁿ yā yeⁿē maáⁿ yā nanááⁿ
'iiⁿyāⁿ chí ngiica nuuⁿndi yeⁿé yā.
¹⁷Nguéé chí 'naáⁿ. Nduuvidaamá yā
'muuⁿ. Chidēve táámá nguuví 'úú
ch'iindí na silla yeⁿē juez ní ca'á
orden, ní dicho'ó chí canguai saⁿā
miiⁿ. ¹⁸'Āā snéé saⁿā chí ngiica
nuuⁿndi yeⁿē sa. Nguéé caⁿa yā
mar 'áámá nuuⁿndi tan'dúúcā chí
'úú nacádiinuúⁿ. ¹⁹Ti véé vaadí
'caa'va yeⁿé yā ndúúcu sa lado yeⁿē
religión yeⁿē 'áámá Jesús chí 'āā
n'dii yā. Ní Pablo miiⁿ ngaⁿa cuaacu
sa chí nguéé n'dii yā. ²⁰'Úú nguéé
deenú d'e'ra idíⁿ yeⁿé chuū ní
tiinguūneéⁿ saⁿā miiⁿ: 'Áá neⁿe
dí chí caⁿa di na yāāⁿ Jerusalén ní
miiⁿ 'cuūndicaadí yā nuūⁿndi yeⁿē

di? ²¹Naati Pablo miiⁿ chiica sa chí
'cuetinéé ngíínú sa saⁿā Augusto ní
saⁿā miiⁿ ní cadíínuuⁿ sa nuuⁿndi
yeⁿē sa. 'Úú ní chiicá chí cu'núuⁿ yā
saⁿā vácūū neⁿe chí caⁿá dicho'ó
saⁿā nanááⁿ César Augusto.

²²Tuu'mi ní Agripa ngaⁿā sa ngii
sa Festo: 'Úú ní neⁿé 'caandiveéⁿ
yeⁿē sa. Saⁿā miiⁿ ngaⁿa sa ngii sa
saⁿā: Cavyaaⁿ ní 'caandiveeⁿ di.

²³Chidēve táámá nguuví Agripa
ndúúcū táⁿā Berenice ndaá yā
tan'dúúcā costumbre yeⁿē rey. Ní
sndaa yā naachi snéé 'iiⁿyāⁿ ndúúcū
comandante ndúúcū saⁿā n'geete
yeⁿē yāāⁿ miiⁿ. Ní Festo miiⁿ caⁿa yā
chí dicho'ó yā Pablo miiⁿ, ní caⁿá yā
nguai yā saⁿā. ²⁴Tuu'mi ní Festo miiⁿ
ní caⁿā sa: N'dii rey Agripa ndúúcū
nducyáácá ndis'tii 'iiⁿyāⁿ chí snéé ní
nduucú 'nū. 'Muuⁿ canéé sáⁿa 'cūū.
Nducyáácá 'iiⁿyāⁿ Israel s'eeⁿ yeⁿē yāāⁿ
Jerusalén ní yeⁿē yāāⁿ 'cūū ngiicá yā
nuūⁿndi yeⁿē sáⁿa 'cūū. N'gai yuudú
yā chí 'cuūvi sa. Ní 'āā ntéé cunéé sá.
²⁵Nguéé ndaacá mar 'áámá falta yeⁿē
sa chí 'cuūvi sa. Maaⁿ sa ngiica sa chí
caⁿā sa nanááⁿ yeⁿē sáⁿā Augusto
César. Ní 'úú dicho'ó saⁿā. ²⁶'Úú
nguéé d'e'ē vee chí deenú chí dingúúⁿ
yeⁿē Augusto César yeⁿé saⁿā miiⁿ.
Candéé saⁿā nanááⁿ ndis'tii ní vmnááⁿ
vmnaaⁿ nanaáⁿ n'dii saⁿā rey Agripa ti
taachí 'cuiinu tascaadí yeⁿē sa, canee
chí dingúúⁿ. ²⁷Caati deenú chí nguéé
n'daacā chí 'úú dicho'ó saⁿā ndí nguéé
cadiinuúⁿ nuūⁿndi yeⁿē sa chí diiⁿ
ngúúⁿ tandii ra.

**Pablo caⁿa sa yeⁿe maaⁿ sa
nanááⁿ rey Agripa**

26 Tuu'mi ní rey Agripa ngaⁿa
sa ngii sa Pablo: Teé lugar

chi caaⁿmaⁿ di yeⁿē maaⁿ di. Tuuⁿmi ní Pablo miiⁿ ndo^o sa ta'a sa. Tucá'a sa caⁿa sa yeⁿé maāⁿ sa: ²N'diī rey Agripa, de'ē chúúcā n'daacā chi cuuví caaⁿmáⁿ yeⁿé maāⁿ nanáaⁿ nī yeⁿē tanducuéⁿe nuuⁿndí chi ngaⁿ'a 'iiⁿyāⁿ Israel s'eeⁿ. ³N'diī ní deenú nī tanducuéⁿē costumbre ndúúcū chi itiinguuneeⁿ yeⁿē chi véé nguuaaⁿ 'iiⁿyāⁿ Israel s'eeⁿ. Ní ngiicá n'diī chi 'caandiveeⁿ nī yeⁿé ndúúcū n'dai.

Vida yeⁿē Pablo

⁴Ndii cuááⁿ vmnaaⁿ ndii saⁿā 'lín' 'úú canéé na yáāⁿ Jerusalén ndúúcū 'iiⁿyāⁿ Israel. N'diichi 'iiⁿyāⁿ Israel s'eeⁿ 'úú. ⁵'iiⁿyāⁿ s'eeⁿ ntúúⁿ déenu yā yeⁿé ndíi cuaaⁿ vmnaaⁿ. Ní nduuti chi neⁿe yā caaⁿmaⁿ cuaacu yā, canéé tan'dúúcā saⁿā fariseo chi chεεchi taavi yeⁿē religión yeⁿé 'nū ndúúcū costumbre yeⁿé 'nū. ⁶Maaⁿ ní caavā chi 'úú i'teenú chi Dendyuūs caⁿ'á yā nadacuéeⁿ yā 'iiⁿyāⁿ yeⁿe nguuaaⁿ tináⁿā tan'dúúcā chi ngaⁿ'a yā ngii yā chiida 'nū 'iiⁿyāⁿ s'eeⁿ n'gai yā 'úú nanááⁿ juez. ⁷'Iiⁿyāⁿ yeⁿe ndiichúúví daiyá yā 'iiⁿyāⁿ Israel yeⁿé 'nū i'teenú yā chi Ndyuūs caⁿ'a yā chi diiⁿ yā. Ní cáávā chuū cueⁿe daāⁿmaⁿ idiíⁿ yā ntiiⁿnyuⁿ yeⁿé Dendyuūs ndii nguuví ndii n'gaaⁿ. N'diī rey Agripa, caati cáávā chuū chi cunee ngífnú ntuúⁿ 'iiⁿyāⁿ Israel ngiicá yā yeⁿé. ⁸¿De'ē nacadiinúúⁿ nī yeⁿē chúú? ¿De'ē cuuvi chí ndís'tiī nadacadiinúúⁿ nī chi Dendyuūs nguéé cuuvi nadin'duuchí yā 'iiⁿyāⁿ yeⁿē nguuaaⁿ tináⁿā?

Pablo ditaáⁿ yā ndúúcū 'iiⁿyāⁿ

⁹'Úú ní cuaacu nífn'nyúⁿ s'teēnú chi cánéé chi n'deēe n'dái dífn

contra yeⁿe Jesús yeⁿe yáāⁿ Nazaret. ¹⁰Tiicá ntúúⁿ dífn na yáāⁿ Jerusalén. 'Úú chí 'iiⁿyāⁿ chí i'téenu Jesús vácūū. Chiiduú n'geeté yeⁿe Israel tee yā poder 'úú. Ní taachí chí 'iiⁿnúⁿ yā 'iiⁿyāⁿ, 'úú caⁿ'á ti 'tíicā. ¹¹Néené n'dee cuuvi chí 'iiⁿyāⁿ s'eeⁿ chí i'teenú na nducyáácá yaācū sinagoga na vácūū. Dífn chí 'iiⁿyāⁿ cuuví caaⁿmaⁿ yā chí nguéé i'téenu yā Jesús. Neené taaⁿ dífn ndúúcū 'iiⁿyāⁿ s'eeⁿ chí i'téenu yā Jesús. Ní can'daá 'iiⁿyāⁿ ndíi na yáāⁿ chí nguéé n'diichi.

Pablo caⁿ'a yā taacā chí i'téenu yā

(Hch. 9.1-19; 22.6-16)

¹²Taachí dífn chuū cueⁿé na yáāⁿ Damasco ní candεé caaca ndúúcū orden yeⁿē chiiduú n'geeté yeⁿe Israel. ¹³N'diī rey, taachi canuúⁿ yúúní taanduu ná maⁿ'a nguuví n'diichí 'áámá dεεve nanguuvi chí ch'εεte n'dái cá dεεve nguéé tii dééve yeⁿé 'yáⁿā. Dεévé miiⁿ ní nuuⁿmaⁿ ndiivii 'úú ndíi 'iiⁿyāⁿ chí snee yā nduucú. ¹⁴Chindεεve nducyaaca nús'úu na yáⁿā. 'Úú chí i'ndiveeⁿ 'áámá nduudu chí yaāv'í 'úú ndúucu davaacu hebreo chí ngaⁿ'ā: Saulo, Saulo, ¿de'ē cáávā n'daā di 'úú? Chééchi taavi chí diiⁿ di tan'dúúcā 'áámá 'iiti ca'a ca'a tī na yáⁿ'á cuiiⁿnyuⁿ. ¹⁵'Úú ní caⁿ'á: ¿Du'ú n'diī, Señor? Ní Señor miiⁿ ní caⁿ'a yā: 'Úú Jesús chí n'daā di. ¹⁶Naati nacuééⁿ di, ní cueendii di. Cáávā chuū che'enaááⁿ yeⁿē di. Ní cu'neéⁿ dii lado yeⁿé 'iiⁿyāⁿ ndíi tiiiⁿ chí diiⁿ ntiiⁿnyuⁿ yeⁿé ní caaⁿmaⁿ di nduudu cuaacu yeⁿe dendú'ú chí n'díichi di yeⁿe dendú'ú chí 'úú dífn chí 'cuuⁿmífn náāⁿ yeⁿē

di. ¹⁷Maaⁿ ní 'úú ní dicho'ó dii nanááⁿ 'iiⁿyāⁿ yeⁿe di ndúúcu yeⁿe 'iiⁿyāⁿ s'eeⁿ chi nguéé yeⁿe ndaata Israel. Ní taachi neⁿé yā sta'a yā dii ní 'úú nneé dii. ¹⁸Ní cuuví diiⁿ di chi 'iiⁿyāⁿ chi nguεε snaaⁿ yā ní snaaⁿ yā ní tun'dáa di 'iiⁿyāⁿ s'eeⁿ ná maáiⁿ ní naⁿá yā na dεεve. Ní tun'dáa di 'iiⁿyāⁿ yeⁿe poder yeⁿe yááⁿnguiniūⁿ ní naⁿá yā lado yeⁿe Dendyuūs. Ní ndaācā yā 'úú ní 'úú inadach'εcú nuuⁿndi yeⁿé yā ní caavā chi cu'téenu yā yeⁿé. Ní véé herencia yeⁿé yā ndúúcu 'iiⁿyāⁿ chi Dendyuūs dindεεve yā.

Pablo dííⁿ yā tan'dúúcā visión

¹⁹Cáāvā chuū, n'dii rey Agripa, nguéé dííⁿ chi cheeⁿdiitú dííⁿ n'diichí cosa yeⁿe Dendyuūs. ²⁰Naati caⁿá vmnaaⁿ vmnaaⁿ 'iiⁿyāⁿ chi snéé na yāāⁿ Damasco, ní cuayiivi caⁿá na yāāⁿ Jerusalén ndúúcu nuuⁿmaⁿ na yáⁿāa yeⁿe Judea ndúúcu 'iiⁿyāⁿ s'eeⁿ chi nguéé yeⁿe ndaata Israel chi canee cuuⁿmíⁿ yā chi ndaacadaamí yā yeⁿe nuuⁿndi yeⁿé yā nícu cu'téenu yā Dendyuūs. Ní dííⁿ yā ntiiⁿnyuⁿ chí n'daacā n'dai ní ch'iⁿí yā tanáⁿā 'iiⁿyāⁿ chi ndaacadaamí yā yeⁿe nuuⁿndi yeⁿe yā. ²¹Cáāvā chuū 'iiⁿyāⁿ Israel s'eeⁿ sta'á yā 'úú na yáacū templo ní nadacadínuuⁿ yā chi 'caaⁿnuⁿ yā 'úú. ²²Ndyuūs chinnee yā 'úú chi chéé ndíí maaⁿ ní caⁿá nduudu cuaacu ndúúcu 'iiⁿyāⁿ ndiicúū ní 'iiⁿyāⁿ chi ngaⁿa ntiiⁿnyúⁿ yā. Nguéé n'deēe cá caⁿá yeⁿe dendu'ū chi caⁿa profetas ndúúcu Moisés yeⁿé dendu'ū chi canéé chí chii. ²³Caati Cristo miiⁿ canéé chi 'cueenu yā cuuvi ní 'iiⁿyāⁿ

miiⁿ vmnááⁿ vmnaaⁿ nduuchí yā yeⁿe nguuaaⁿ tináⁿā. Ní ngaⁿa cuaacú yā yeⁿe dεεve nanááⁿ 'iiⁿyāⁿ Israel yeⁿé ndúúcu 'iiⁿyāⁿ s'eeⁿ chi nguéé yeⁿe ndaata Israel.

Pablo ngaⁿa sa Agripa chi canéé chi cu'téenu yā

²⁴Caⁿa Pablo chúú cáāvā maāⁿ sa. Festo gobernador miiⁿ ní caⁿa yuudu sa: Loco dii, Pablo. Cáāvā chi n'geeⁿ taaví dí chííⁿ chi nduuví loco di.

²⁵Naati saⁿā miiⁿ ní caⁿā sa: Nguéé loco 'úú, n'dii Festo, chi n'dai taavi. Ngaⁿá nduudu cuaacu chi n'dai. ²⁶Rey Agripa miiⁿ deenú ntúuⁿ yā chuū. 'Úú ngaⁿá nduucú yā yeⁿe tanducuéⁿē ndúúcu confianza. 'Úú nadacadiinúúⁿ chi déenu yā chuū. Nguεε chó'oo chuū ná n'de'ei. ²⁷N'dii rey Agripa, ¿áá i'téenu nī 'iiⁿyāⁿ profetas chi caⁿa nduudu yeⁿe Dendyuūs? 'Úú deenú chi i'téenu nī.

²⁸Tuu'mi ní Agripa miiⁿ caⁿa sa chii sa Pablo: 'Tεε 'tεε nūuⁿ diiⁿ di chi cu'teenú ndaacá Dendyuūs.

²⁹Pablo miiⁿ ní caⁿā sa: 'Úú ngiicá Dendyuūs ndii ta'lííⁿ o ndii ch'εete, nguéé dámaāⁿ n'dii ti 'tiicá ntúuⁿ nducyaaca 'iiⁿyāⁿ chi n'giindiveéⁿ yā yeⁿé, cuuví cu'téenu ntuuⁿ yā Ndyuūs miiⁿ tan'dúúcā 'úú, naati nguéé cuneé yā ndúúcu cadenas 'cūū.

³⁰Taachí caⁿa sa chuū ncueeⁿ rey ndúúcu gobernador ndúúcu Berenice ndúúcu 'iiⁿyāⁿ chi canéé yā ndúúcu 'iiⁿyāⁿ s'eeⁿ. ³¹Taachí 'iiⁿyāⁿ s'uuⁿ cueⁿé yā áámá lado caⁿá yā nguuaaⁿ maáⁿ yā: Mar 'áámá nuuⁿndi ch'εete nguéé véé yeⁿe sa 'cūū nguεε chi 'caaⁿnuⁿ yú saⁿā, ndíí nguéé chi caⁿa sa vácúū.

³²Níicú Agripa ngaⁿā sa ngii sa Festo: Sá 'cūū cúúví nguáⁿai sa nduuti chi nguéé caⁿā sa 'tíicā: 'Úú caⁿá nanááⁿ César.

Dicho'ó yā Pablo na yaāⁿ Roma

27 Taachí Festo ca'á yā orden chi cueⁿé 'nū na barco na yáⁿāa Italia, díⁿ yā entregar Pablo ndúúcu tanáⁿā 'iiⁿyāⁿ chi preso yā capitán chí nguuvi sa Julio. Capitán miiⁿ chí yeⁿé 'áámá taaⁿ soldados chi nguuvi Augusto. ²Cueⁿé ntúúⁿ 'nū na 'aama barco yeⁿe yāāⁿ Adramitio chi caama cáácá ní caⁿā ná cheendi va'ai s'eeⁿ yeⁿé nuūⁿnīⁿyáⁿā na yāāⁿ s'eeⁿ yeⁿe yáⁿāa Asia. Sndaá 'nū na barco ní cueⁿé 'nū. Ní canée sa ndúúcu nús'uu 'áámá saⁿā chi nguuvi Aristarco yeⁿé yáⁿāa Macedonia chi yeⁿé yāāⁿ Tesalónica. ³Táámá nguuvi ndaá 'nū cheendi va'ai yeⁿe nuūⁿnīⁿyáⁿā niiⁿnuúⁿ na yāāⁿ Sidón. Julio miiⁿ díⁿ yā ndúúcu Pablo miiⁿ tan'dúúca amigo n'dai. 'Cuúⁿ yā chi cueⁿe sa naachi canee amigos yeⁿé sa. Amigos ca'á yā chi neⁿé Pablo miiⁿ. Ní Pablo miiⁿ ntaavi'tuunúúⁿ sa. ⁴Ní cueⁿe ntúúⁿ 'nū na barco ní cho'ó 'nū cuaaⁿ ndiiya lado sur yeⁿé isla Chipre caati 'yúúné ní contra yeⁿé barco miiⁿ. ⁵Taachi cho'oo cuaacú 'nū nuūⁿnīⁿyáⁿā cueⁿé 'nū niiⁿnuúⁿ yáⁿāa Cilicia ndii yáⁿāa Panfilia. Ndaá 'nū na yāāⁿ Mira chi 'áámá yāāⁿ yeⁿé yáⁿāa Licia.

⁶Ní capitán chi ngaⁿa ntiⁿnyúⁿ yā nndaaca yā 'áámá barco yeⁿé yāāⁿ Alejandría chi naⁿā yáⁿāa Italia. Cuchéé 'nū na barco miiⁿ ní cuinaⁿa 'nū. ⁷Ní ngínū ngiinū cueⁿé 'nū na barco chí 'nááⁿ taavi n'deēe nguuví.

Ní cueⁿé 'nū ndúúcu nééné n'deēe peligro na barco niiⁿnuúⁿ ná yaāⁿ Gnido ní 'āā ntéé 'cuūⁿ 'yúúné chi caⁿá 'nū cuááⁿ vmaāⁿ. Tuu'mi ní cueⁿé 'nū na nduu 'uuvi isla, isla Salmón chi canee niiⁿnuúⁿ ndúúcu isla Creta caati nguéé 'yúúné taaⁿ miiⁿ. ⁸Níicú a fuerza díⁿ 'nū ndaá 'nū niiⁿnuúⁿ 'áámá yāāⁿ chí nguuvi Buenos Puertos ní niiⁿnuúⁿ yāāⁿ miiⁿ canéé yāāⁿ Lasea.

⁹Taachí cho'oo 'naaⁿ tiempo cueⁿé 'nū na barco ndúúcu nééné n'deēe peligro. 'Āā cho'oo nguuvi yeⁿé 'viicu chí nguéé che'é 'nū. Tuu'mi ní Pablo caⁿa yā chí yā 'iiⁿyāⁿ s'uuⁿ.

¹⁰Ní cāⁿa yā: Ndís'tii saⁿā, 'úú inaáⁿ chí 'āā nééné n'deēe peligro cueⁿé ndúúcu yú chí cuuvi ndaa yú. Nguéé dámaāⁿ carga yeⁿé barco cuuvi ndái caati ndii s'uuúⁿ cuuvi ndai yú.

¹¹Naati capitán miiⁿ ní n'giindiveéⁿ yā nduudu yeⁿé saⁿā chí ndēē barco ndúúcu saⁿā chí ngaⁿa ntiⁿnyuⁿ yeⁿé barco miiⁿ ti 'āā chí caaⁿmaⁿ 'nūū Pablo miiⁿ. ¹²N'deēe n'dái inaáⁿ yā chí 'āā ntéé n'daacā chí canee barco na cheendi va'āi yeⁿe nuūⁿnīⁿyáⁿā miiⁿ tiempo chí 'iiche. Ní n'deēe n'dái 'iiⁿyāⁿ nduuvidaamā yā chí caⁿa yā nuūⁿnīⁿyáⁿā yeⁿé miiⁿ. Ní neⁿé yā chí ndaá yā na yāāⁿ Fenice chí 'áámá cheendi va'āi yeⁿe nuūⁿnīⁿyáⁿā yeⁿe isla Creta chí canee cuaaⁿ ndiiya sur, cuaaⁿ naachi n'giiya 'yáⁿā. Ní miiⁿ cánéé tiempo chí 'iiche.

'Yúúné tááⁿ na nuuⁿnīⁿyáⁿā

¹³Ndaá 'yúúné ngíinu yeⁿé cuaaⁿ ndiiya tan'dúúca chí nacadiinuⁿ yā chí n'daāca. Candéé yā anclas cūū chí 'caanu barco miiⁿ ní cueⁿé yā

canéé diituú nuūⁿnīⁿyáⁿā nīⁿnúuⁿ isla Creta. ¹⁴Nguéé neé 'naaⁿ ndaā táámá 'yúúné taāⁿ taavi chi nguuvi Euroclidón tan'dúúcā ciclón chi contra yeⁿē barco miiⁿ. ¹⁵Taachi 'yúúné míⁿ diiⁿ chi barco 'āā ntéé cuuvi caⁿa barco miiⁿ contra yeⁿē 'yúúné, tuuⁿmi s'neeⁿ maáⁿ 'nū candéē 'yúúné barco miiⁿ naachi neⁿē. Ní nús'uu cueⁿé 'nū 'tíicā. ¹⁶Ndaá 'nū na 'áámá isla chi nguuvi Claudia naachi nguéé véé 'yúúné taāⁿ. 'Āā nééné ngíⁿi candéé yā barco 'liiⁿ vmnaaⁿ barco ch'εεte ní dichiiⁿchí yā barco 'líⁿ miiⁿ. ¹⁷Taachi 'āā chí n'daí yā dichiiⁿchí yā barco 'líⁿ ndúúcū 'ii'yū cuaaⁿ náávtaⁿā, tuuⁿmi ní 'va'á yā chi ndáa yā Sirte chi 'áámá cuaaⁿ cheeti nuūⁿnīⁿyáⁿā naachi canéé yáⁿāa dúúⁿ naachí 'āā ntéé cuuvi caaca barco miiⁿ. Tuuⁿmi di'cua'á yā tíínūⁿ yeⁿe barco miiⁿ. Tuuⁿmi ní chi 'nééⁿ yā barco miiⁿ chi cueⁿe maāⁿ ntúūⁿ. ¹⁸Ní diiⁿ 'yúúné miiⁿ chi cueⁿē barco ndúúcū peligro ti 'yúúné tááⁿ. Chidεeve táámá nguuvi tucá'a yā ndaavi yaí yā carga yeⁿē barco na nuūⁿnīⁿyáⁿā. ¹⁹Ndiichí ndii 'ííⁿnúⁿ nguuvi miiⁿ ndúúcū ta'á yā chíí yā nducuéⁿē dendú'ú chi ndεē barco na nuūⁿnīⁿyáⁿā. ²⁰Nguuvi nguuvi s'eeⁿ 'āā ntéé n'diichí 'nū 'yáⁿā ndii nguεε ndúú 'ííⁿnyúⁿ cucáávā 'yúúné tááⁿ míⁿ chi nuuⁿmaⁿ ndiiví 'nū. Tuuⁿmi 'āā ntéé nacadiinúúⁿ 'nū chi nanguáⁿai 'nū.

²¹'Āā 'nááⁿ nguuvi chi nguéé nge'é 'nū. Tuuⁿmi Pablo miiⁿ cheendii yā naavtaⁿā yeⁿé nducyaaca 'nū ní caⁿa yā: Ndúúti chi ndís'tií chí chí'téenu nī yeⁿé ní nguéé cueⁿē yú na barco yeⁿē isla Creta chi cuta'á

yú peligro miiⁿ ndúúcū dendú'ú chí dindεē yú. ²²Maaⁿ ní cuuví ndis'tií. Canee cúúⁿmíⁿ nī más cā ánimo caati nguéé mar 'áámá 'iiⁿyāⁿ chí dindaí yā vida yeⁿé yā nguaāⁿ yú, dámaaⁿ barco miiⁿ chí cuuvi ndáí. ²³Caati maaⁿ nguiinú 'cūū canéé ángel yeⁿe Dendyuūs nduucú. 'Úú ní yeⁿe Dendyuūs 'úú ní 'úú dichiiⁿvé 'iiⁿyāⁿ. ²⁴Caⁿa ángel miiⁿ chíí yā 'úú: Pablo, nguéé 'va'ā di. Canee chí cuéendii di nanááⁿ César. Nducyáácá 'iiⁿyāⁿ chí caⁿá yā na barco ndúúcu di cunduūchí 'iiⁿyāⁿ. ²⁵N'diichí nī compañeros. Cunee ngíínú nī ánimo caati 'úú i'teenú Dendyuūs. Canéé chí cuuvi tan'dúúcā chí chíí yā 'úú. ²⁶Canéé chí ca'ā naaⁿ yú na 'áámá isla.

²⁷Chii ndiichí cuūⁿ yaaⁿ níicú tan'dúúcā chí cuchíí 'nū na nuūⁿnīⁿyáⁿā chí nguuvi Adriático, ní cúchii ná maⁿa yaaⁿ ní saⁿā s'eeⁿ chí diiⁿ manejar barco chí tuumicádíínuuⁿ sa chí 'āā snee 'nū nīⁿnuúⁿ na yáⁿā. ²⁸Tuuⁿmi ní ca'a nuuⁿ sá sonda ní ndaaca sa ngii ndiicú 'ya'āa chí yáánūⁿ ní cho'ō ca talííⁿ cuaaⁿ vmnaaⁿ nnguεεcunée sa ca'a nuuⁿ ntúuⁿ sa sonda. Ndaaca ntuuⁿ sa ndítiiⁿyu 'ya'āa chí yáánūⁿ. ²⁹Va'á yā chí ca'a naáⁿ yā na 'vaachíí. Tuuⁿmi ní ca'ā nuúⁿ ya ná cuúúⁿ ancla cūū yeⁿē cuaaⁿ dáámí, cosa chí cuendii barco miiⁿ ní 'āā ntéé caaca. Ní snee ngíínú yā chí cúúv'í dεeve. ³⁰Tuuⁿmi ní saⁿā chí dííⁿ yā manejar barco ch'εeti yaaⁿ sá chí cáanu sa yeⁿē barco. Ní ca'a nuúⁿ yā barco 'lííⁿ na nuūⁿnīⁿyáⁿā. Dííⁿ yā tan'dúúcā chí cangúu yā ancla cūū yeⁿe cuaaⁿ vmnaaⁿ barco miiⁿ. ³¹Pablo miiⁿ

caⁿa yā chii yā capitán: Ndúúti chi saⁿā s'eeⁿ nguéé canee sa na barco miiⁿ ndís'tií ní nguéé cuuvi nanguaⁿai nī.

³²Tuu'mi ní soldados ch'iica sa lazo yeⁿē barco lííⁿ. Diiⁿ sá chí cueⁿe maāⁿ ní chindai.

³³Taachí caama chideeve Pablo caⁿa yā chii yā nducyáácá 'iiⁿyāⁿ chi che'é yā. Ní caⁿa yā: Maaⁿ ní ndiichi cuúúⁿ nguuvi chí 'āā ntéé ch'éé nī ní 'cuetinéé nī ndúúcu cuidado. Ní nguéé che'é nī mar 'áámá yuúndū. ³⁴Úú ngiicá ndis'tií chi ch'éé nī maaⁿ níicú véé fuerza yeⁿé nī ti mar 'áámá yuúndū tííⁿ nī nguéé cuuvi ndai.

³⁵Taachí caⁿa yā chuū, sta'á yā pan. Ca'á yā gracia Nduyūs nanááⁿ nducyaaca yā ní taachi n'deé yā pan tuc'áa yā che'é yā. ³⁶Tuu'mi ní nducyaaca yā canee cúúⁿmíⁿ yā más ca ánimo ní che'é ntuúⁿ yā.

³⁷Nducyáácá 'nū chi snúuⁿ 'nū na barco tan'dúúca 'uūví ciento canéé 'iiⁿnūⁿ ngeecu nditiíⁿyu 'áámá 'nū.

³⁸'Āā nduuví ditiinú yā. Dííⁿ yā chi nan'daa ca'ái barco miiⁿ. 'Canuúⁿ yā trigo chi ndéē barco miiⁿ na nuūⁿnīⁿyáⁿā.

Chindai barco

³⁹Taachí chideeve táámá nguuvi nguéé 'íntinaáⁿ 'nū tíí yáⁿā naachi snée 'nū naati n'diichí 'nū 'áámá lugar naachi vee 'áámá playa o yáⁿā ndúútií. Nduuvidáámá 'nū neⁿe 'nū cundaa 'nū na playa miiⁿ ndúúcu barco. ⁴⁰Ní chiica ntúuⁿ yā 'iiⁿyu yeⁿē cucáávā chi ancla cūū chí canuúⁿ na nuūⁿnīⁿyáⁿā. Tuu'mi ní cuaaⁿ dáámí barco miiⁿ nadatíí yā remos chí tan'dúúca 'áámá tabla

chi diiⁿ guiar barco miiⁿ. Ní ch'eeⁿ yā tiinūⁿ miiⁿ yeⁿé cuaaⁿ vmnaaⁿ barco miiⁿ na 'yúúné ni cueⁿé 'nū na playa chí yáⁿā ndúútií. ⁴¹Caⁿa 'naaⁿ 'nū naachi 'áámá lugar chí 'uūví nuūⁿnīⁿ ní dííⁿ yā chí ndaā barco miiⁿ na yáⁿā cuaaⁿ diituú cheeti nuūⁿnīⁿ. Dííⁿ yā chí nacan'dáa barco 'iicu cuááⁿ vmnaaⁿ yeⁿē barco miiⁿ chí canúúⁿ ca nguaaⁿ nuūⁿnīⁿ 'āā na yáⁿā canéé cheechi. Chééndii chí 'āā ntéé chiicā 'iicu cuaaⁿ dáámí barco miiⁿ neⁿe nda'ai ndúúcu fuerza yeⁿē nuūⁿnīⁿ miiⁿ. ⁴²Tuu'mi ní soldado s'eeⁿ caⁿa yā chí 'caaⁿnuⁿ yā preso s'uuⁿ níicú mar 'áámá yā nguéé cuuvi cáaⁿyuuⁿ yā nuūⁿnīⁿ níicú cunaⁿa yā na yáⁿā. ⁴³Naati capitán miiⁿ neⁿe sa dinguáⁿai sa Pablo miiⁿ. Tuu'mí chícataáⁿ yā chí neⁿe soldado s'uuⁿ. Tuu'mi ní capitán chí ngaⁿā ntiíⁿnyuⁿ caⁿá sa chí nducyáácá yā chí cuuvi 'caaⁿyuuⁿ yā nuūⁿnīⁿ níicú chí cun'daa yā vmnaāⁿ nuūⁿnīⁿ ní 'caaⁿyuuⁿ yā ní nandaá yā na yáⁿā ní nnguaⁿái yā. ⁴⁴Níicú tanáⁿa yā ní na tablas yeⁿē barco ndúúcu yáⁿá yeⁿē barco cuuvi nacan'dáa yā. 'Tíicā chii nducyááca yā nanguáⁿai yā nandaa yā na yáⁿā cuūⁿmáⁿ.

Pablo snée yā na isla Malta

28 Taachi 'āā nnguaⁿái 'nū chicadínuuⁿ 'nū isla miiⁿ nguuvi Malta. ²Iiⁿyāⁿ chí snée na isla miiⁿ dííⁿ yā tratar nús'uu n'daacā caati tiiví yā yáⁿā ní dííⁿ yā recibir nducyaaca 'nū cáávā chí 'iiche miiⁿ ndúúcu chí ngeeⁿ cúúví. ³Tuu'mi ní Pablo miiⁿ nanguáiⁿ yā nduuvi táāⁿ dúuⁿnē yáⁿá cuuⁿmaⁿ ní ch'íí yā na

yáⁿā. Ní 'áamá cúú cueⁿe tī chéénu tī caavā chi 'íí'nūuⁿ ní chēcú tī na tá'a Pablo miiⁿ. ⁴Taachi 'iiⁿyāⁿ chi snéé miiⁿyā n'diichí yā cúú can'dícu tī na ta'ā Pablo tuu'mi ní caⁿ'a yā nguááⁿ maáⁿ yā: Nduudu cuáácú sáⁿ'a 'cūū 'niiⁿ'nūⁿ sa 'iiⁿyāⁿ. 'Áará chi nanguáⁿ'āi sa na nuūⁿnīⁿ'yāⁿ'ā nguéé 'cuááⁿ chí cunduūchi sa.

⁵Naati Pablo miiⁿ ch'íidi sa cúú miiⁿ na yaⁿā. Nguéé de'ē vee dííⁿ tī ndúúcu sa. ⁶Iiⁿyāⁿ s'uuⁿ snéé ngíínú yā chi n'diichí yā chi cundiitu ta'ā sa o cundéévé sá chi 'cuūvi. 'Iiⁿyāⁿ s'ééⁿ ní ch'ēetinéé ngíínú yā de'ē cuuvi ndúúcu sa. Ní n'diichí yā chi nguē de'ē vee chíi ndúúcu sa. Tuu'mi ní na'dááⁿ yā vaanicadíínūuⁿ yeⁿ'é yā cucáávā chi n'diichí yā. Tuu'mi ní caⁿ'a yā: Pablo miiⁿ ní dēndyūūs saⁿā.

⁷Na yāāⁿ miiⁿ véé yāⁿāa yeⁿ'e 'iiⁿyāⁿ chí ngaⁿ'ā ntíⁿ'nyúⁿ yā chí ngúúví yā Publio. 'Iiⁿyāⁿ yāāⁿ miiⁿ díiⁿ yā recibir nus'uū. Ní tee yā naachi ch'ēetinéé 'nū 'iiⁿnūⁿ nguuvi. ⁸Ní chiida Publio canéé yā na cama chí ngííta yā yeⁿ'ē ca'ai 'íí'nūuⁿ ndúúcu ca'ai yuuuⁿ. Tuu'mi chí ndaā Pablo ní n'diichí yā 'iiⁿyāⁿ. Ní ch'íínú caⁿ'angua'á yā niicu s'nééⁿ Pablo miiⁿ ta'á yā cuerpo yeⁿ'é yā. Níicú nnduuva yeⁿ'é yā. ⁹Ch'íínú chí dííⁿ yā chuū tuu'mi ní cuchii tanáⁿ'a yā chí snéé yā na isla chí vee ntúúⁿ ca'ai yeⁿ'é yā. Ndaá yā naachi canéé Pablo ní nduuva ntúuⁿ yeⁿ'e yā. ¹⁰Iiⁿyāⁿ s'úúⁿ dinéⁿ'e yā nús'uu ní dííⁿ yā n'daacā nduucú 'nū. Taachi chí ndaá 'nū na barco tee yā taanduvéé cosa chí neⁿ'e 'nū.

Pablo ndaá yā na yāāⁿ Roma

¹¹Ch'ēetinééⁿ 'nū 'iiⁿnūⁿ 'iiyu miiⁿ ní cueⁿ'é 'nū na barco chí

yeⁿ'ē yāāⁿ Alejandría chí ch'ēetinéé 'áamá tiempo 'iiche na isla miiⁿ. Barco miiⁿ ní cuaaⁿ vmnaaⁿ canéé imágenes yeⁿ'e Cástor ndúúcu Pólux chí dēndyūūs s'eeⁿ yeⁿ'e 'iiⁿyāⁿ miiⁿ. ¹²Ní ndaa ntúuⁿ 'nū na yaāⁿ Siracusa ní ch'ēetinéé ntuuⁿ 'nū yāāⁿ miiⁿ na 'iiⁿnūⁿ nguuvi. ¹³Yeⁿ'e yāāⁿ miiⁿ cueⁿ'e ntúuⁿ 'nū na barco niiⁿnuuⁿ ná 'diituuⁿ nuūⁿnīⁿ'yaⁿ'ā miiⁿ. Ndaa ntúuⁿ 'nū niiⁿnuuⁿ na yaāⁿ Regio. Táamá nguuvi cuayiivi chí ndāá 'yúúné yeⁿ'ē cuaaⁿ ndiyya sur ní ndii chíiⁿ ndii 'úúví nguuvi ndaa ntúuⁿ 'nū na yāāⁿ Puteoli. ¹⁴Miiⁿ ní naachi ndaāca 'nū hermanos chí i'téenu yā Cristo di'cuítu yā nús'uu ní 'cuēetinéé 'nū ndúúcu yā ndēēchē nguuvi. Ch'iinu ní cueⁿ'e 'nū chíicá 'nū yāāⁿ Roma. ¹⁵Taachi ch'iindiveeⁿ hermano s'uuⁿ yeⁿ'é 'nū ní can'dāa yā ní dííⁿ yā recibir nús'uu ndíí yāāⁿ Apio naachi vee nii'vēē ní ndii yāāⁿ chí nguuvi Tres Tabernas. Taachí Pablo n'diichi yā 'iiⁿyāⁿ, ca'á yā gracias Ndyūūs níicú vee ca ánimo yeⁿ'e yā. ¹⁶Taachí ndaá 'nū yaāⁿ Roma, capitán díiⁿ sa entregar preso s'eeⁿ jefe. Níicú jefe miiⁿ 'cuuⁿ yā chí cunéé 'āā vi'i Pablo ndúúcu 'aama soldado chí díiⁿ sa cuidado 'iiⁿyāⁿ.

Pablo ngaⁿ'á yā nduudu cuaacu na yāāⁿ Roma

¹⁷Ch'íínú tá 'iiⁿnūⁿ nguuvi Pablo miiⁿ ní ca'á yā chí cádiinuⁿ saⁿ'ā n'geete yeⁿ'ē 'iiⁿyāⁿ Israel s'eeⁿ. Níicú taachi nduuvídaama sa Pablo miiⁿ caⁿ'á yā chíi yā saⁿ'ā: Ndís'tii vi'í, 'úú ní nguéé de'ē vee dííⁿ ndúúcu 'iiⁿyāⁿ ndíí nguéé ndúú contra yeⁿ'e costumbre yeⁿ'e chíidá yú chí yeⁿ'ē ndíí vmnaaⁿ. Ní

'iiⁿyāⁿ diiⁿ yā entregar 'úú ndíí yááⁿ Jerusalén na ta'ā saⁿā romano s'uuⁿ.
 18 Saⁿā s'eeⁿ, ní taachi tuumicadiinúúⁿ sa yeⁿ'é chi nguée nuúⁿndi ch'ēete yeⁿ'é neⁿe sa nn'dēechii sa 'úú caati nguée indaaca sa mar 'áámá nuúⁿndi yeⁿ'é chi 'cuúví. 19 Naati 'iiⁿyāⁿ Israel s'eeⁿ snée yā contra yeⁿ'é, chíí obligado chi canée chi caⁿ'á n'diichí saⁿā chi rey César. Nguée dē'ē caavā chi caacá contra 'iiⁿyāⁿ yeⁿ'é. 20 Chííⁿ chi cucáávā 'úú chiicá n'diichí ndis'tií maaⁿ níícú snaaⁿ nī, níícú ndee nduucú nī. Caati cucáávā chi canee ngiinú cosa yeⁿ'ē Israel, canee chi diiⁿ sufrir ndúúcu cadena 'cūū.

21 Tuu'mí caⁿ'a sa chii sa Pablo: Nús'uu ní nguée ndiíⁿ 'nū recibir carta yeⁿ'e yáⁿāa Judea cucáávā dii, ndíí nguée ndúú chiiⁿ ndaá mar 'áámá vi'í yú chi caaⁿmáⁿ yā nuuⁿndi yeⁿ'ē di. 22 Naati neⁿ'é 'nū 'caandiveeⁿ 'nū chí nadicadiinuuⁿ di caati cucáávā chí i'téenu dí. Nús'uu ní déenu 'nū chi nducuéⁿe cuaaⁿ ngaⁿ'a yā contra cosa chi i'téenu di.

23 Tuu'mi ndēeve yā 'áámá nguuvi ní ndaā taaví 'iiⁿyāⁿ na vaacu sa. Ní Pablo miiⁿ caaⁿ'maⁿ cuaacú yā ní chíⁿ'í yā 'iiⁿyāⁿ yeⁿ'e chi Ndyuūs ngaⁿ'a yā ntiíⁿ'nyúⁿ yā ndíí naachi ngíí ndēeve ndíí naachi ngíí 'da'a. Ní ngaⁿ'a yā nduudu cuaacu yeⁿ'é Jesús tan'dúúca chí yeⁿ'ē Moisés. 'Āā 'tííca nūⁿ yeⁿ'ē profetas chí caā nduudu yeⁿ'é Dendyuūs. 24 'Iicu náⁿ'a yā ní i'téenu yā chí caⁿ'a sa. Niicu náⁿ'a yā nguée i'téenu yā. 25 Naati nguée nduuvidaamá yā. Ní cuindaacadáámí yā naati vmnááⁿ vmaaⁿ chí cuindaacadaamí yā Pablo miiⁿ caⁿ'a sa nduudu 'cūū ndúúcu 'iiⁿyāⁿ s'eeⁿ tan'dúúca chí caⁿ'a cuaacu Espíritu

N'dai yeⁿ'e Ndyuūs cucáávā profeta Isaías ndúúcu chiidá yú. Ní cáⁿ'a Espíritu N'dai chuū:

26 Cueⁿ'e di yáaⁿ 'cūū níícú cuuvi di 'iiⁿyāⁿ: N'giindiveeⁿ di ndúúcu veeⁿ di ní nguée tuumicadiinuuⁿ di; inaaⁿ di ndúúcu nduutináaⁿ di ní nguée i'téenu di;

27 caati staava yeⁿ'e 'iiⁿyāⁿ yáaⁿ 'cūū néené chēechi, níícú nguée cuuvi tuumicadiinuuⁿ yā ndúúcu staava yēⁿ'e yā ndúúcu veéⁿ yā nguée n'dáácā ch'iindiveeⁿ yā, ndíí nguée n'giindiveeⁿ yā ndúúcu veéⁿ yā, nduutináaⁿ yā ní nnduudí maaⁿ, tí nguée chinaáⁿ yā ndúúcu nduutinaáⁿ yā, ndíí nguée nanguεcundií yā yeⁿ'ē nuuⁿndi yeⁿ'é yā caatí 'úú idiíⁿ chí nduuví n'dáí yā nanduūvā yeⁿ'é yā.

28 Maaⁿ ní cádiinúúⁿ nī chííⁿ chí Ndyuūs nadach'εcú yā nuuⁿndi yeⁿ'ē nducyáácá 'iiⁿyāⁿ s'eeⁿ chí nguée yeⁿ'ē ndaata Israel cáávā chí 'tííca 'iiⁿyāⁿ s'eeⁿ 'caandiveeⁿ yā yeⁿ'e chuū.

29 Níícú taachi caⁿ'a sa nduudu 'cūū, 'iiⁿyāⁿ Israel s'eeⁿ caⁿ'a yā. Néené n'deeé caⁿ'a yā nguaaⁿ maáⁿ yā.

30 Pablo miiⁿ ní canee yā 'uūví ndúuyū na 'áámá va'ai chí nadíí'vē yā. 'Iiⁿyāⁿ mííⁿ diiⁿ yā recibir ndúcyáácá yā chí nndaā na vaacú yā. 31 Caⁿ'á yā yeⁿ'ē chí Dendyuūs ngaⁿ'ā ntiíⁿ'nyúⁿ yā níícú chí'cueeⁿ yā yeⁿ'ē Señor Jesucristo. Caⁿ'a yā ndúúcu nducyaaca 'iiⁿyāⁿ. Mar 'áámá 'iiⁿyāⁿ nguée chíicatáaⁿ yā yēⁿ'e yā.

PABLO IDINGUÚⁿ YĀ CARTA 'CŪŪ YEⁿ'E 'IIⁿ'YĀⁿ CHI SNÉE YĀ YĀĀⁿ ROMA

**Pablo idinguúⁿ yā yeⁿ'e 'iiⁿ'yāⁿ
yeⁿ'e yaacū yeⁿ'e yāāⁿ Roma**

1 'Úú Pablo 'úú ní 'úú dichíí'vĕ
Señor Jesucristo. Ndyuūs
yaa'ví yā 'úú ni ndεεvé yā 'úú. Ní
dichó'ó yā 'úú chi cuuví apóstol chi
candéé nduudu yeⁿ'é Ndyuūs chi
nduudu yeⁿ'e evangelio yeⁿ'e chi
nanguaⁿ'ai 'iiⁿ'yāⁿ.

²Ndyuūs ní caⁿ'a yā n'dee n'dái
tiempo chi 'āā chό'oo chi ca'la yā
evangelio chí nduudu cuaacu chi
nadanguáⁿ'ai yā taachi profetas
ngaⁿ'á yā yeⁿ'ē. Ní dingúúⁿ yā na
libro yeⁿ'e Dendyuūs yeⁿ'ē chúú.

³Nduudu 'cūū chi evangelio ní
yeⁿ'e Señor Jesucristo yeⁿ'e yú
chi Daiya Dendyuūs. Cristo ní
ndāa yā iⁿ'yeeⁿdí 'cūū ndúúcu
cuerpo tan'dúúca s'uúúⁿ cáávā
na ndaata yeⁿ'ē rey David. ⁴Ní
cucááva Espíritu chi n'dai taavi
yeⁿ'e Cristo, Cristo dicuaacú yā chí
Daiyá Ndyuūs ndúúcu poder yeⁿ'é
Ndyuūs chi ch'εεte taavi ca taachi
nducuéⁿ yā yeⁿ'e nguaaⁿ tináⁿ'ā.

⁵Ní cáávā Cristo miⁿ' Ndyuūs tee
yā 'aama favor 'úú ti dicho'ó yā
'úú chi 'úú cuuvi apóstol yeⁿ'é yā
cáávā chi duuchi Cristo. Ní cáávā

chi 'úú cuuvi 'cuuⁿ'míⁿ 'iiⁿ'yāⁿ yeⁿ'e
nducuéⁿ'ē nación táácā cuuvi
cu'téenu yā Ndyuūs. Ní 'caandiveéⁿ
yā nduudu yeⁿ'e yā. ⁶Ní ndís'tií ní
yeⁿ'e 'iiⁿ'yāⁿ chi i'téenu yā Jesucristo
caati Ndyuūs yaa'ví yā ndís'tií chi
cuuvi yeⁿ'é Cristo ndís'tií.

⁷'Úú idinguúⁿ carta 'cūū yeⁿ'e
nducyáácā ndís'tií chi snée nī na
yāāⁿ Roma, ndís'tií chi Ndyuūs neⁿ'e
yā ní yaa'ví yā ndís'tií chi cuuví
yeⁿ'é yā ndís'tií. Neⁿ'é chi Ndyuūs
Chiida yú ndúúcu Señor Jesucristo
tée yā ndís'tií vaadi n'dai ca yeⁿ'é yā
ndúúcu vaadi 'diiⁿ' yeⁿ'é yā.

Pablo neⁿ'e yā caⁿ'á yā yāāⁿ Roma

⁸Vmnááⁿ vmnaaⁿ ca'á gracias
Ndyuūs cáávā Jesucristo cucáávā
nducyaaaca ndís'tií caati 'iiⁿ'yāⁿ yeⁿ'e
núúⁿ'máⁿ iⁿ'yeeⁿdí ch'iindiveéⁿ yā
tan'dúúca chi ndís'tií i'téenu ní
Jesucristo ní ngaⁿ'á yā yeⁿ'e ndís'tií.

⁹'Úú ndúúcu nuuⁿ'maⁿ staavā yeⁿ'é
dichii'vé Ndyuūs. Ní candéé nduudu
ngai yeⁿ'e evangelio yeⁿ'e Daiyá
yā. Ndyuūs deenú yā chi 'úú cueⁿ'e
daāⁿ'maⁿ nan'gaacú yeⁿ'e ndís'tií ní
taachí ngaⁿ'āngua'á ní ngaⁿ'āngua'á
cucáávā ndís'tií. ¹⁰Ní ngiicá Ndyuūs
chi nduuti chi neⁿ'é yā chi tée yā

lugar 'úu chi tiempo 'cūu cuuví ndaá nanááⁿ ndís'tií. ¹¹Neⁿe cá snaáⁿ ndís'tií ní cunneé ndís'tií ndúúcū Espíritu N'dai yeⁿé Ndyuūs chi cu'téenu cá nī ní 'íicú ndís'tií diitūu 'cuētinée nī ndúúcū chi i'téenu nī. ¹²Ní 'íicú ndís'tií ndúúcū 'úu ca'á díituu yú 'aama yú taama yú ndúúcū chi i'téenu yú ti daama daama i'téenu yú.

¹³Ndís'tií hermanos yeⁿé, neⁿé chí cádiinuuⁿ ndís'tií chi neené n'dee cuuví neⁿé chíi n'diichí ndís'tií naati ndii mááⁿ nguée ngii chí chíi. Neⁿé n'diichí ndís'tií caati tan'dúúcā chi véé n'gui'i yeⁿe cosecha 'tiicá ntúūⁿ ndís'tií cuuvi tan'dúúcā n'gui'i yeⁿe cosecha yeⁿe n'tiīⁿnyuⁿ yeⁿé caati 'tíicā véé n'gui'i yeⁿé nguaaⁿ 'iiⁿyāⁿ yeⁿe tanáⁿā naciones yeⁿe iⁿ'yeeⁿdí 'cūū. ¹⁴Ní 'úu cánée chi cunneé 'iiⁿyāⁿ chi yeⁿe ndaata yeⁿé ndúúcū 'iiⁿyāⁿ chi yeⁿe tanáⁿā naciones, 'iiⁿyāⁿ chi deenu ndúúcū 'iiⁿyāⁿ chi nguée deenū. ¹⁵Ní 'tiicá ntúūⁿ 'úu canee listo chi caaⁿmáⁿ nduudu cuaacu yeⁿe evangelio chi nanguaⁿ'ai 'iiⁿyāⁿ. Ní caaⁿmáⁿ nanááⁿ ndís'tií chi snee nī na yāāⁿ Roma.

Poder yeⁿe evangelio chí nduudu ngai yeⁿé Cristo

¹⁶Ní nguée 'cuinaáⁿ chi caaⁿmáⁿ nduudu cuaacu yeⁿe evangelio ti nduudu miiⁿ ní poder yeⁿé Ndyuūs. Ní nanguaⁿ'āi nducyáácá 'iiⁿyāⁿ chi i'téenu yā Cristo, vmnááⁿ vmaaaⁿ 'iiⁿyāⁿ chi 'iiⁿyāⁿ Israel chi judío s'eeⁿ. 'Tiicá ntúūⁿ 'iiⁿyāⁿ s'eeⁿ chi nguée yeⁿe ndaata Israel. ¹⁷Ní nduudu cuaacu yeⁿe evangelio míⁿ ní n'giⁿ'i chi Ndyuūs ní diiⁿ

yā aceptar s'uuuⁿ chi cuuvi yeⁿé yā s'uuuⁿ cáávā chi i'téenu yú Jesucristo, ni dámaaⁿ cáávā chí i'téenu yú Jesucristo. 'Tíicā canee nguūⁿ na libro yeⁿé Ndyuūs: 'Iiⁿ'yāⁿ chi Ndyuūs díⁿ yā aceptar chi cuuvi yeⁿé yā, 'cuētinée yā cucáávā chí i'téenu yā.

Núuⁿndí yeⁿe 'iiⁿ'yāⁿ chí snee yā na iⁿ'yeeⁿdí 'cūū

¹⁸Déenu yú chí Ndyuūs ca'á yā castigo chí neené díitūu nducyaaca 'iiⁿ'yāⁿ chí nguée n'daacā idiíⁿ yā ndúúcū 'iiⁿ'yāⁿ chí dinuuⁿndí yā. Ní cucáávā nuuⁿndi yeⁿé yā nguēe n'gúúⁿ chí 'iiⁿ'yāⁿ cuuví deenú yā nduudu cuaacu yeⁿé Ndyuūs. Castigo yeⁿé yā ngíicá ndí na va'ai ch'eti nguuvi. ¹⁹Ní 'iiⁿ'yāⁿ s'eeⁿ chí deenu n'dái yā cuuvi cádiinuuⁿ yā chí yeⁿe Ndyuūs caati Ndyuūs chíⁿ'í yā 'iiⁿ'yāⁿ s'eeⁿ chuū. ²⁰Dendu'ū chí yeⁿé Ndyuūs chí nguée inaaⁿ yú cuuvi déenu yú cucáávā nducuéⁿ chí Ndyuūs din'dái yā ndúúcū poder yeⁿé yā chí 'áámá canee. Ní chuū cuuví snaaⁿ 'iiⁿ'yāⁿ ndii tiempo chí Ndyuūs din'dái yā iⁿ'yeeⁿdí. Ní deenú yā chí Ndyuūs ní Ndyuūs nuuⁿmáⁿ cuaacu. Ní nguée cuuví caaⁿmáⁿ yā chí nguée cuuví n'diichí yā Ndyuūs. ²¹Iiⁿ'yāⁿ s'eeⁿ n'diichí yā Ndyuūs naati nguée chí'tēenu yā Ndyuūs miiⁿ chí ch'ete yā ní nguée ca'á yā gracias Ndyuūs. Nguée 'tíicā díⁿ yā. Naati nadicádíinuuⁿ yā yeⁿe dendu'u chí nguée dichíⁿ'v'ē chí yeⁿe maāⁿ. Ní cáávā chí necio yā ch'ētinée yā na maāⁿ. ²²Iiⁿ'yāⁿ s'eeⁿ ní ngaⁿ'a yā chí deenu ca yā naati díⁿ yā chí tonto yā. ²³Ní n'daáⁿ yā vaadī deēve ngii yeⁿé Ndyuūs

chi canduuchí yā cue^{ne} e daā^{ma}ⁿ
cáāvā santos ídolos o imágenes chi
idin'dái 'iiⁿyāⁿ, santos chi tan'dúucā
'iiⁿyāⁿ chi n'díí. 'Tíicā santos miiⁿ
ndúucū ídolos ye^{ne} e 'yáádā, ndúucū
ídolos ye^{ne} e cúu ndúucū ídolos ye^{ne} e
'iiti chi cuūuⁿ cá'a tí.

²⁴Ní cáāvā chi 'iiⁿyāⁿ s'eeⁿ ni
nguéeⁿ ne^{ne} e yā tuumicadíinuⁿ yā
ní Ndyuūs s'neeⁿ yā chi diíⁿ yā
dendú'ū chi nguéeⁿ n'daacā chi
ne^{ne} e diiⁿ cuerpo ye^{ne} é yā. Ní diíⁿ
yā ndúucū cuerpo ye^{ne} é yā nguááⁿ
maáⁿ yā dendu'ū chí vaadi 'cuíinuⁿ.

²⁵Ní diíⁿ yā 'túucā ti nguéeⁿ i'téenuⁿ
yā nduudu cuaacu ye^{ne} e Ndyuūs
ti i'téenu yā nduudu yaadi. Ní
dich'eté yā dendu'ū chi Ndyuūs
din'dái yā naati nguéeⁿ dich'eté yā
maáⁿ Ndyuūs chi din'dái yā dendu'ū.
Nducyáácá 'iiⁿyāⁿ cué^{ne} é daā^{ma}ⁿ
canéeⁿ chi dich'eté yā Ndyuūs.
'Tíicā canee chi diíⁿ yā.

²⁶Ní cáāvā chi diíⁿ yā 'tuucā
Ndyuūs diíⁿ yā ch'i'neéⁿ maáⁿ yā
'iiⁿyāⁿ chi diíⁿ yā dendu'ū chi nguéeⁿ
n'daacā chi 'cuináaⁿ yā. Ní n'daataá
s'eeⁿ nguéeⁿ caⁿá yā ndúucū saⁿa
naati caⁿá yā ndúucū n'daataá ní
diíⁿ yā tan'dúucā chi ch'i'indivaacú
yā ndúucū vi'í. ²⁷Tiicá ntúuⁿ saⁿa
s'eeⁿ nguéeⁿ caⁿá yā ndúucū n'daataá
naati caⁿá yā ndúucū saⁿa ni diíⁿ
yā tan'dúucā chi ch'i'indivaacú yā
ndúucū vi'í. Diíⁿ yā nguaaⁿ maáⁿ yā
cosas chi vaadi 'cuíinuⁿ ní sta'á yā
castigo na cuerpo ye^{ne} é yā ye^{ne} e chi
nguéeⁿ n'daacā chi diíⁿ yā.

²⁸Ní cáāvā chi nguéeⁿ ne^{ne} é yā
ntiinaáⁿ yā Ndyuūs, Ndyuūs ch'i'neéⁿ
yā 'iiⁿyāⁿ chi diíⁿ yā nducué^{ne} e chi
'iiⁿyāⁿ s'eeⁿ nadacadíinuⁿ yā chi
nguéeⁿ n'daacā. Ní diíⁿ yā cosas chi

nguéeⁿ canee chi diíⁿ yā. ²⁹'Iiⁿyāⁿ
s'eeⁿ neéⁿ e nadacadiinuⁿ yā ye^{ne} e
nducué^{ne} e chi nguéeⁿ n'daacā. Ní caⁿá
yā ndúucū n'daataá o saⁿa chi nguéeⁿ
ye^{ne} e yā. Ní neene yaadii'yá yā ní
diíⁿ yā cosas ye^{ne} e 'yáá'n'guiinuⁿ.
Ní ne^{ne} é yā dendú'ū chi nguéeⁿ ye^{ne} e
yā. Ní neene idiiⁿ yā cosa chi nguéeⁿ
n'daacā ti ne^{ne} e yā diiⁿ yā 'tíicā. Ní
neene n'nguéeⁿ yā. Ní n'giiⁿnuⁿ yā
'iiⁿyāⁿ. Ní neene n'gēecu cheendí
yā ndúucū 'iiⁿyāⁿ, ní nginnche'elí
yā 'iiⁿyāⁿ. Ní neéⁿ e nguéeⁿ n'daacā
staava ye^{ne} é yā. Ní neene n'gēecu
cheendí yā ye^{ne} e chi 'iiⁿyāⁿ diiⁿ yā
ye^{ne} e chi nguéeⁿ n'daacā. ³⁰Ngaⁿá yā
ye^{ne} e chi nguéeⁿ n'daacā ye^{ne} e taama
yā. Nguéeⁿ ne^{ne} é yā Dendyuūs. Ngaⁿá
yā nanááⁿ 'iiⁿyāⁿ ye^{ne} e s'uuuⁿ ní ngii
'cuináaⁿ 'iiⁿyāⁿ ye^{ne} e s'uuuⁿ. Maáⁿ
yā dich'eté yā 'iiⁿyāⁿ. Ní idiyaadí
taaví yā ní nadacadíinuⁿ yā cosa
chí ngai chi nguéeⁿ n'daacā. Ní nguéeⁿ
i'téenu yā ye^{ne} e ch'ēecu yā ye^{ne} e
chiida yā. ³¹Nguéeⁿ itúumicadíinuⁿ
yā, nguéeⁿ idiiⁿ yā chi ngāⁿa yā chi
diíⁿ yā. Nguéeⁿ idiné^{ne} e yā 'iiⁿyāⁿ ní
nguéeⁿ déenu yā nadach'ēecu yā
nuuⁿndi ye^{ne} e 'iiⁿyāⁿ 'áará chí ngāⁿa
yā chi nadach'ēecu yā ye^{ne} e yā. Ní
nguéeⁿ ya'ái i'inú yā 'iiⁿyāⁿ. ³²'Iiⁿyāⁿ
s'eeⁿ neéⁿ e déenu yā chí Ndyuūs
ngāⁿa yā chi canéeⁿ chi diiⁿ yā. Ní
déenu yā chi 'iiⁿyāⁿ chi nguéeⁿ diíⁿ
'tíicā, tuu'mí chí 'cuūvi yā naati
icandíicá yā chi idiiⁿ yā 'tíicā. Yeenu
taaví yā taachi inaáⁿ yā 'iiⁿyāⁿ chi
diíⁿ yā 'tíicā.

**Ndyuūs ináaⁿ yā 'iiⁿyāⁿ ye^{ne} e
nuuⁿndi ní ye^{ne} e chi cuaacu**

2 Ndís'tii amigos ye^{ne} é, 'áá
n'diichí ní de'ē chi idiiⁿ

taamá yā o 'āā du'ú nūuⁿ 'iiⁿyāⁿ? Véé nuuⁿndi yeⁿe maáⁿ yā taachi dííⁿ yā 'tíicā. Taachi n'diichí yā nuuⁿndi chi idiíⁿ taamá yā, ní maáⁿ yā dííⁿ yā 'tiicā, tuuⁿmi ní dich'eté maáⁿ yā nuuⁿndi yeⁿe yā. ²Deenu yú chi Ndyuūs dííⁿ yā cosa chi cuaacu taachi dííⁿ yā condenar 'iiⁿyāⁿ chi dííⁿ yā chi 'túucā. ³¿Áá 'aacu ní chi Ndyuūs nguéé inaaⁿ yā nuuⁿndi yeⁿe 'iiⁿyāⁿ chi idiíⁿ yā 'túucā taachi n'diichí yā nuuⁿndi yeⁿe taamá yā? Nguéé 'tíicā. ⁴¿Áá nguéé inee yiinú ní yeⁿe Ndyuūs cucáávā chi ya'ai 'iinú yā ndís'tií ní ndai yā ndúúcū ndís'tií ní tee yā ndís'tií n'dee n'dái favores yeⁿe yā ndúúcū vaadí 'diíⁿ yeⁿe yā? Ní nguéé dííⁿ ní cuenta chi Ndyuūs tee yā ndís'tií favores yeⁿe yā ní n'g'i'í yā ndís'tií taaca cuuvi ndaacadaamí ní yeⁿe nuuⁿndi chi idiíⁿ ní. ⁵Naati 'iiⁿyāⁿ chi dííⁿ yā 'túucā ní dich'echi yā staava yeⁿe yā. Ní nguéé ndaacadaamí yā yeⁿe nuuⁿndi yeⁿe yā. Cáávā chi idiíⁿ yā 'tíicā ní nduvidáámá castigo yeⁿe maáⁿ yā nguuvi taachi Ndyuūs dííⁿ yā juzgar nuuⁿndi yeⁿe yú ní tee yā castigo yeⁿe chi dííⁿ yú ndúúcū vaadí cuaacu. ⁶Ní Ndyuūs ní ca'a yā ca'áámá cā'aama 'iiⁿyāⁿ nadíí'vē yā yeⁿe chi dííⁿ yā. ⁷Ní ca'a yā vida cueⁿe daāⁿmaⁿ 'iiⁿyāⁿ chi cheé yā chi dííⁿ yā nducuéⁿe chi n'daacā, ní n'nuúⁿ yā, ní dííⁿ yā nducuéⁿe chi yeⁿe va'ai ch'eti nguuvi, ní dííⁿ yā chi honrado yā. ⁸Naati 'iiⁿyāⁿ chi neⁿe nducuéⁿe yeⁿe maáⁿ yā ní nguéé i'téenu yā nduudu cuaacu yeⁿe Ndyuūs naati dííⁿ yā nducuéⁿe chi nguéé n'daacā, Ndyuūs nguéé canee yiinú yā yeⁿe 'iiⁿyāⁿ s'eeⁿ.

Ní ca'á yā castigo 'iiⁿyāⁿ s'eeⁿ. ⁹Ní nducyáácá 'iiⁿyāⁿ chí nguéé n'daacā idiíⁿ yā canéé chi n'dee n'dái 'cuéénú yā cuuvi, vmnááⁿ vmnaaⁿ 'iiⁿyāⁿ chi yeⁿe ndaata Israel chí judíos ní cuayiivi ní 'iiⁿyāⁿ chi nguéé yeⁿe ndaata Israel. ¹⁰Naati Ndyuūs dííⁿ yā chí d'evé 'iiⁿyāⁿ ní dich'eté yā 'iiⁿyāⁿ ní ca'a yā vaadí 'diíⁿ yeⁿe nducyáácá 'iiⁿyāⁿ chí din'daacá yā, vmnááⁿ vmnaaⁿ 'iiⁿyāⁿ yeⁿe ndaata Israel ní cuayiivi 'iiⁿyāⁿ chí nguéé yeⁿe ndaata Israel.

¹¹Caati nanááⁿ Ndyuūs ní 'āā daamá nūuⁿ nducyaaca 'iiⁿyāⁿ. ¹²Ní 'iiⁿyāⁿ chí idinuuⁿndí yā chí nguéé ndúúcū ley yeⁿe Moisés miiⁿ ní cuuvi ndái yā nguéé ndúúcū ley miiⁿ. Ní 'iiⁿyāⁿ chí idinuuⁿndí yā ní ndeé yā ley yeⁿe Moisés miiⁿ tuuⁿmi ní ley miiⁿ nūuⁿ ní cuuví yā castigo. ¹³Caati nguéé cuaáⁿ Ndyuūs 'iiⁿyāⁿ chí dámaaⁿ chí n'diichí yā ley miiⁿ naati Ndyuūs cuaáⁿ yā 'iiⁿyāⁿ chí dííⁿ yā tan'dúúcā chí ngaⁿa ley miiⁿ. ¹⁴Ní taachi 'iiⁿyāⁿ chí nguéé yeⁿe ndaata Israel s'eeⁿ ní nguéé déenu yā yeⁿe ley Moisés, naati neⁿe yā cadiinúúⁿ yā dííⁿ yā cosa chí cuaacu tan'dúúcā chí ngaⁿa ley miiⁿ, 'áará chí nguéé ndúúcū ley miiⁿ véé 'aama ley yeⁿe yā chí 'āā víí cā nguaaⁿ maáⁿ yā. ¹⁵Ní ch'i'í yā cáávā chí idiíⁿ yā chí ley yeⁿe Ndyuūs tan'dúúcā chí canéé nguúⁿ na staava yeⁿe yā 'tíicā canéé. Ní chiiⁿ chí dííⁿ yā ní 'áámá prueba yeⁿe chuú ní chiiⁿ chí nadacadiinúúⁿ yā dííⁿ yā condenar maáⁿ yā o caaⁿmaⁿ cuaacu yeⁿe maáⁿ yā. ¹⁶Ní taachi ndaá nguuvi chí Ndyuūs dííⁿ yā juzgar cáávā Jesucristo miiⁿ nducyáácá 'iiⁿyāⁿ

ndúúćũ nducuéⁿē chi yeⁿe 'iⁿ'yāⁿ maāⁿ yā canúúⁿ n'de'ei na staava yeⁿé yā, tuu'mi ní Ndyuūs diiⁿ yā chuū ndúúćũ nduudu cuaacu yeⁿe yā chi nadanguaⁿ'ai 'iⁿ'yāⁿ. Chuū ní nduudu cuaacu chi 'úú Pablo ngaⁿá.

**'Iⁿ'yāⁿ Israel s'eeⁿ ndúúćũ
ley yeⁿe Moisés**

¹⁷Diiⁿ ní ngaⁿ'a di chi 'iⁿ'yāⁿ Israel di. Ní ngaⁿ'a di chi i'téénú dí ley yeⁿe Moisés ní dich'etē maāⁿ di dii. Ní dii ngaⁿ'a di chi yeⁿé Ndyuūs dii. ¹⁸¿Áá déénú di de'ε chi neⁿe Ndyuūs ní ley chi 'cuuⁿ'miⁿ di chi cuuvi in'nuuⁿ di dendu'ũ chi n'daacā ca chi diiⁿ di? ¹⁹¿Áá déénu di chi cuaacu chi cuuvi ca'cueeⁿ di 'iⁿ'yāⁿ chi ngueenááⁿ o 'iⁿ'yāⁿ chi nguéé de'ē veε deenu, ní ndεε di nduudu chi tan'dúúćā chidεeve nanááⁿ 'iⁿ'yāⁿ chi ngiica yā na maāiⁿ? ²⁰¿Áá i'teenu di chi cuuví diiⁿ di ca'cueeⁿ di 'iⁿ'yāⁿ chi tonto yā ní táácā chi ngi'cueeⁿ di da'caiyāā? ¿Ní ndúúćũ ley yeⁿe di véé nducuéⁿē chi diiⁿ chi cuuví deenu di vaadí cuaacu? ²¹Díí chi ngi'cueeⁿ di tanáⁿ'a yā, ¿de'ε cáávā chi nguéé ngi'cueeⁿ maāⁿ di dii? Díí chi ngaⁿ'a di 'iⁿ'yāⁿ chi nguéé canéé chi diduucú yā, ¿de'ē cáávā chi diduucú di? ²²Díí saⁿā o n'daataá chi ngaⁿ'a di chi 'iⁿ'yāⁿ nguéé caⁿá yā ndúúćũ isaⁿā o n'daataá chi nguéé yeⁿé yā, ¿de'ε cáávā chí maaⁿ dí caⁿ'a di ndúúćũ n'daataá o isaⁿā chi nguéé yeⁿe di? Díí chi nguéé ngii n'diichí di santos ídolos, ¿de'ē cáávā chi diduucu di vaadí 'cuiica yeⁿe yáacú yeⁿe santos ídolos? ²³Díí chi ngaⁿ'a maaⁿ di yeⁿe di chi ch'εεte di cucáávā chi canee di ndúúćũ ley yeⁿé Ndyuūs

¿de'ē cáávā chi nguéé diiⁿ di honrar Ndyuūs? 'Tiicá diiⁿ di caati nguéé diiⁿ di tan'dúúćā chi ngaⁿ'a ley chi Ndyuūs tee yā dii. ²⁴Canéé nguūⁿ na libro yeⁿé Ndyuūs 'tiicā: 'Iⁿ'yāⁿ chi nguéé yeⁿe ndaata Israel nguéé n'daacā ngaⁿ'a yā yeⁿe chi duuchi Ndyuūs. Ní chuū ni nuuⁿ'ndi yeⁿe di.

²⁵Cuaacu níⁿ'nyúⁿ chí ley yeⁿe circuncisión yeⁿe saⁿ'a Israel s'eeⁿ ní dichííⁿvē cáávā di nduuti chi diiⁿ di chi ngaⁿ'a ley yeⁿe Moisés. Ní ndúúti chi nguéé diiⁿ di chi ngaⁿ'a ley miiⁿ, tuu'mi ní canee di tan'dúúćā saⁿā chi nguéé circuncidado di. 'Tiícā canee di. ²⁶Ní ndúúti chí 'áámá saⁿā chi nguéé yeⁿe ndaata Israel ní nguéé circuncidado yā tan'dúúćā chi ngaⁿ'a ley yeⁿe Moisés, naati saⁿā miiⁿ diiⁿ sa chi ngaⁿ'a ley miiⁿ, saⁿā miiⁿ 'aara chi nguéé circuncidado sa, Ndyuūs dííⁿ yā cuenta yeⁿe saⁿā miiⁿ chí tan'dúúćā chi circuncidado, 'tiica sa. ²⁷Saⁿā chi nguéé circuncidado na cuerpo yeⁿe sa ní diiⁿ sa tan'dúúćā chi ngaⁿ'a ley, saⁿā miiⁿ diiⁿ sa condenar dii chi nguéé diiⁿ di tan'dúúćā chi ngaⁿ'a ley 'áará chí véé ley yeⁿe di ní canee circuncidado di na cuerpo yeⁿe di. ²⁸Cuaacu níⁿ'nyúⁿ nguéé nduudu cuaacu chí 'áámá saⁿā ní saⁿā Israel chí ndíí sa circuncidado ndúúćũ seña na cuerpo yeⁿe sa. Ndíí nguéé ndúú chí nduudu cuaacu chí circuncisión chí seña chí canee na cuerpo yeⁿe sa diiⁿ chí Israel sa. ²⁹Nguéé 'tiicā. Saⁿā chí cuaacu níⁿ'nyúⁿ chí saⁿā Israel miiⁿ, saⁿā miiⁿ ní saⁿā chí circuncidado na staava yeⁿe sa. Chuū ní circuncisión chí cuaacu níⁿ'nyúⁿ chí

cuaacu. Nguéé tan'dúucā chi canee nguūⁿ na ley yeⁿe sa naati chi yeⁿe Espíritu N'dai yeⁿé Ndyuūs. Saⁿā chi circuncidado na staava yeⁿe sa, Ndyuūs n'diichinee yā chi saⁿa n'dai sa. Nguéé cuuvi n'diichinee saⁿā s'eeⁿ yeⁿe iⁿ'yeeⁿdí 'cūū.

3 Tuu'mi ní ðde'ē chíí'vē cáávā chi saⁿā miiⁿ chi saⁿā yeⁿe ndaata Israel? ¿O dé'ē dichíí'vē nduuti chi saⁿā ní circuncidado sa? ²N'dáácā n'dai dichíí'vē cáávā n'dee n'dái razones. Vmnááⁿ vmnaaⁿ Ndyuūs s'neeⁿ yā nduudu cuaacu yeⁿe ley yeⁿé yā vmnaaⁿ ndís'tií chi 'iiⁿ'yāⁿ Israel. ³Ní nduuti chi náⁿā 'iiⁿ'yāⁿ Israel nandaacadaamí yā yeⁿe chi i'téenu yā, ¿'áá cucáávā chiiⁿ chí dííⁿ Ndyuūs chi nguéé dichíí'vē chiiⁿ chi Ndyuūs ngaⁿa yā chi caⁿá yā diiⁿ yā? Nguéé 'tíicā. ⁴Ndyuūs ní cuaacu ní dííⁿ yā nducueⁿē chi cuaacu naati nducyaaca 'iiⁿ'yāⁿ yeⁿe iⁿ'yeeⁿdí 'cūū ngaⁿa nduudu yaadi. Canéé nguūⁿ na libro yeⁿe Dendyuūs ní Ndyuūs ngaⁿá yā 'tíicā:

Canee chi 'cuuⁿ'miⁿ di 'iiⁿ'yāⁿ cáávā nduudu chi ngaⁿa di chí díí diiⁿ di chi cuaacu ní naachi n'diichí yā dii, deenú yā chí díí ní diiⁿ di chi cuaacu.

⁵Ní taachi diiⁿ yú cosas chi nguεε n'daacā, tuu'mi ní más ca 'cuuⁿ'miⁿ chi Ndyuūs chí cuaacu, ðde'ē cuuvi caaⁿ'maⁿ yú? ¿'Áá caaⁿ'maⁿ yú chi Ndyuūs nguéé dííⁿ yā cosas chi cuaacu taachi dííⁿ yā castigar s'uūuⁿ? Nguéé 'tíicā. ('Úú ngaⁿá tan'dúucā chi ngaⁿa 'iiⁿ'yāⁿ yeⁿe iⁿ'yeeⁿdí 'cūū.) ⁶Nduuti chi Ndyuūs nguéé dííⁿ yā tanducueⁿe chi

n'daacā, ðtáácā cuuvi diiⁿ yā juzgar nuuⁿndi yeⁿe 'iiⁿ'yāⁿ yeⁿe iⁿ'yeeⁿdí? Dííⁿ yā juzgar 'iiⁿ'yāⁿ caati dííⁿ yā tanducueⁿē chi n'daacā.

⁷Ní ndúúti chi nduudu yaadi miiⁿ yeⁿe yú dichíí'vē chi cuuvi dich'εete ca yú Ndyuūs, ðde'ē cúúvi chi Ndyuūs dííⁿ yā juzgar nuuⁿndi yeⁿe yú chi nuuⁿndi yú? ⁸¿De'ē cúúvi chí nguéé ngaⁿa yú 'tíicā? S'uúúⁿ ní diiⁿ yú cosas chi nguεε n'daacā ní cuuvi candεε cosas chi n'daacā yeⁿē. 'Tíicā ngaⁿa tanáⁿa yā chí s'uúúⁿ ngi'cueeⁿ yú 'tíicā ní nguéé n'daacā yeⁿe yú. 'Iiⁿ'yāⁿ s'eeⁿ ní canee chí condenado yā.

Nducyáácá 'iiⁿ'yāⁿ ní dinuuⁿndi yā

⁹¿De'ē tuu'mi ngaⁿa yú? ¿'Áá n'daacā ca s'uúúⁿ chí 'iiⁿ'yāⁿ Israel s'uúúⁿ nguéé ti 'iiⁿ'yāⁿ chí nguéé 'iiⁿ'yāⁿ Israel? Nguéé 'tíicā. Ndís'tií deenú ní tan'dúucā chí ngaⁿá chí s'uúúⁿ dinuuⁿndi yú tan'dúucā 'iiⁿ'yāⁿ chí nguéé yeⁿe 'iiⁿ'yāⁿ Israel dinuuⁿndí yā. Ní nducyaaca 'iiⁿ'yāⁿ dinuuⁿndí yā ní na poder yeⁿe nuuⁿndi snée yā. ¹⁰Canéé nguūⁿ na libro yeⁿe Dendyuūs 'tiicā:

Nguéé 'iiⁿ'yāⁿ chí n'dái yā, nguéé mar 'áámá yā.

¹¹Nguéé véé mar 'áámá 'iiⁿ'yāⁿ chí tuumicadínuuⁿ yā, nguéé véé mar 'áámá 'iiⁿ'yāⁿ chí in'nuúⁿ yā Ndyuūs.

¹²Nducyáácá yā ndaacadaamí yā yeⁿe Ndyuūs, nducyáácá yā dííⁿ yā cosas chí nguεε n'daacā. Nguéé 'áámá yā chí n'daacā idííⁿ yā, nguéé ndíí mar 'áámá yā.

¹³Daandú yā canéé tan'dúucā 'áámá yáinyāⁿ chí candá'ái,

'tíicā daandú yā; ní nginnche'élí yā 'iiⁿ'yāⁿ ndúúccū cheendi yā. Ní chēeti cheendí yā ní snúú tan'dúúcā chi veneno yeⁿ'ē cúú 'tíicā cheendí yā ndúúccū nduudu chi tan'dúúccā veneno, 'tíicā.

¹⁴ Dámaāⁿ ngaⁿ'á yā ndúúccū taaⁿ contra yeⁿ'e 'iiⁿ'yāⁿ ndúúccū nduudu chi nguéé n'daacā.

¹⁵ Ní neene nadacadíínuuⁿ yā chi 'caaⁿ'nuⁿ yā 'iiⁿ'yāⁿ.

¹⁶ Ní nducuéⁿ'ē cuaaⁿ naachí caⁿ'á yā, dííⁿ yā chi 'iiⁿ'yāⁿ cunnccāá 'cuenú yā cuuvi ní dituúví yā nducuéⁿ'ē dendu'ū ndúúccū vaadi cadíínnūⁿ yeⁿ'é 'iiⁿ'yāⁿ s'eeⁿ.

¹⁷ Ní nguéé déenu yā yeⁿ'e yúúní chi candē na vaadi 'diiíⁿ yeⁿ'é Ndyuūs.

¹⁸ Ní nguéé nadacadíínuuⁿ yā chi canee chi 'va'a yā Ndyuūs.

¹⁹ Maaⁿ ní s'uuúⁿ deenu yú chi tanducuéⁿ'ē chi canéé nguūⁿ na ley yeⁿ'e Moisés ní cáávā 'iiⁿ'yāⁿ chi n'gēetinee yā ndúúccū ley miiⁿ. Ní cáávā 'iiⁿ'yāⁿ s'eeⁿ 'āā ntéé caaⁿ'maⁿ yā nanááⁿ Ndyuūs chi nguēe deenu yā yeⁿ'ē. Ní 'íicú ley miiⁿ diiíⁿ chi Ndyuūs caⁿ'á yā n'diichi yā nuuⁿ'ndi yeⁿ'é nducyaaca 'iiⁿ'yāⁿ yeⁿ'e núúⁿ'máⁿ iⁿ'yeeⁿ'dī. ²⁰ Ní Ndyuūs nguéé dííⁿ yā recibir 'iiⁿ'yāⁿ cáávā chi dííⁿ yā tan'dúúccā chi ngaⁿ'a ley miiⁿ caati ley miiⁿ n'g'iⁿ'i s'uuúⁿ chi véé nuuⁿ'ndi yeⁿ'e yú nanááⁿ Ndyuūs.

Ndyuūs nadinguaⁿ'ai yā 'iiⁿ'yāⁿ caati i'téenu yā Jesucristo

²¹ Maaⁿ ní nduudu cuaacu yeⁿ'é Ndyuūs n'giⁿ'i s'uuúⁿ chi Ndyuūs dííⁿ yā recibir s'uuúⁿ manera chi 'āā

vi'í cā yeⁿ'e ley miiⁿ. Ní canéé nguūⁿ na libro yeⁿ'é ley yeⁿ'e Ndyuūs yeⁿ'e chuū naachi saⁿ'a profetas ngaⁿ'a yā nduudu cuaacu yeⁿ'e chuū. ²² Ndyuūs dííⁿ yā recibir nducyááccā 'iiⁿ'yāⁿ dámaāⁿ cáávā chi i'téenu yā Jesucristo ní nanááⁿ Ndyuūs nducyááccā 'iiⁿ'yāⁿ yeⁿ'e núúⁿ'máⁿ iⁿ'yeeⁿ'dī 'āā daamá nūuⁿ. Ndyuūs nguéé n'dáaⁿ yā. ²³ Ní nducyááccā 'iiⁿ'yāⁿ yeⁿ'e núúⁿ'máⁿ iⁿ'yeeⁿ'dī ní dinuuⁿ'ndí yā ní nguéé cuuvi dííⁿ 'iiⁿ'yāⁿ s'eeⁿ chi dēeve n'dai tan'dúúccā Ndyuūs chi dēeve n'dai. ²⁴ Naati Ndyuūs cáávā chi n'dai taaví yā dííⁿ yā recibir 'iiⁿ'yāⁿ cucáávā Jesucristo chi nadanguáⁿ'ai yā 'iiⁿ'yāⁿ. Ní Jesucristo nadí've yā nuuⁿ'ndi yeⁿ'é 'iiⁿ'yāⁿ lado yeⁿ'é 'iiⁿ'yāⁿ. ²⁵ Ní Ndyuūs dicho'ó yā Jesucristo iⁿ'yeeⁿ'dī 'cūū lado yeⁿ'e ofrenda chi ch'i'í yā caava nuuⁿ'ndi yeⁿ'e nducyááccā 'iiⁿ'yāⁿ. Ní cáávā chi ch'i'í Cristo, Cristo cuuvi nadach'ēecú yā nuuⁿ'ndi yeⁿ'e nducyaaca 'iiⁿ'yāⁿ chi i'téenu yā Jesucristo. 'Tíicā Ndyuūs ch'i'í yā 'iiⁿ'yāⁿ táácā cuuvi ndaa yā nanááⁿ Ndyuūs. Ní tiempo chi chó'oo ní Ndyuūs chi n'dai taavi ch'i'í yā 'iiⁿ'yāⁿ chi Ndyuūs dííⁿ yā cosas chi cuaacu taachi nguéé dííⁿ yā cuenta yeⁿ'e nuuⁿ'ndi yeⁿ'e 'iiⁿ'yāⁿ taachi 'āā 'cuéé dicho'ó yā Cristo. ²⁶ Ní 'tiicā ntúúⁿ tiempo 'cūū Ndyuūs cáávā chi nadach'ēecú yā nuuⁿ'ndi yeⁿ'e 'iiⁿ'yāⁿ ní ch'i'í yā chi caⁿ'á yā chi dííⁿ yā recibir 'iiⁿ'yāⁿ chí cuuvi yeⁿ'é yā 'iiⁿ'yāⁿ. 'Tíicā Ndyuūs ch'i'í yā chi cuaacu yā. Ní dííⁿ yā chi nducyááccā 'iiⁿ'yāⁿ chi i'téenu yā Cristo ní yeⁿ'e yā 'iiⁿ'yāⁿ.

²⁷ Maaⁿ ní 'dédē cúúvi chi 'iiⁿ'yāⁿ cuuvi caaⁿ'máⁿ yā chi ch'ēeté yā?

Nguéé cuuvi yā. ¿De'ē cáávā? ¿Áá cáávā chi diiⁿ yā tan'dúúccā chi ngaⁿa ley miiⁿ? Nguéé tíicā. Naati maaⁿ ní Ndyuūs diiⁿ yā recibir s'uuúⁿ dámaaⁿ cáávā chi i'teenu yú Jesucristo. ²⁸Maaⁿ ní n'diichi yú chi Ndyuūs diiⁿ yā recibir 'iiⁿyāⁿ caati cucáávā chi i'téenu yā Jesucristo ní nguéé caavā chi diiⁿ yā chi ngaⁿa ley miiⁿ.

²⁹¿Áá Ndyuūs ni dámaaⁿ Ndyuūs yeⁿe 'iiⁿyāⁿ Israel s'eeⁿ chi judíos? ¿Áá nguéé Ndyuūs ní yeⁿe 'iiⁿyāⁿ chi nguéé yeⁿe ndaata Israel? Cuaacu chi Ndyuūs ní Ndyuūs dendú^u yeⁿe 'iiⁿyāⁿ chi nguéé yeⁿe ndaata Israel. ³⁰Cuaacu chi véé 'áámá n'dyáⁿā Ndyuūs. Ní Ndyuūs diiⁿ yā recibir nducyáácá 'iiⁿyāⁿ chi i'téenu yā Cristo 'iiⁿyāⁿ chi Israel s'eeⁿ ní 'tiicá ntuūⁿ 'iiⁿyāⁿ chi nguéé yeⁿe ndaata Israel. ³¹Maaⁿ ní ¿áá cucáávā chi i'téenu yú Jesucristo chi diiⁿ yú chi nguéé 'caandiveeⁿ yú tan'dúúccā chi ngaⁿa ley miiⁿ? Ní ley miiⁿ 'āā vi'i caā yeⁿe yú. Ní nguéé dichí'vē s'uuúⁿ. Mar 'áámá naaⁿ, nguēē 'tíicā. N'giindiveeⁿ ca yú chí ngaⁿā ley miiⁿ.

Tan'dúúccā chí diiⁿ Abraham

4 ¿De'ē ngaⁿa yú yeⁿe chiida yú Abraham chi chiida ndaata yeⁿe yú? ¿De'ē nndaacá yā nanááⁿ Ndyuūs? ²Nduuti chi Ndyuūs diiⁿ yā recibir Abraham miiⁿ cáávā cosa chi diiⁿ yā, tuuⁿmi ní Abraham cuuvi caaⁿmáⁿ yā chi ch'ēete maáⁿ yā. Nguéé cuuvi caaⁿmáⁿ yā chi ch'ēete maáⁿ yā nanááⁿ Ndyuūs. ³Canéé nguūⁿ na libro yeⁿe Dendyuūs 'tíicā: Abraham i'téenu yā Ndyuūs ní cáávā chi i'téenu yā

Ndyuūs, Ndyuūs diiⁿ yā recibir Abraham miiⁿ chi yeⁿe yā 'iiⁿyāⁿ. ⁴Maaⁿ ní 'iiⁿyāⁿ chi idiⁿ ntiⁿnyuⁿ ní sta'a yā chí'vē yeⁿe ntiⁿnyuⁿ yeⁿe yā. Nguéé nadacadífnuuⁿ yā chí chí'vē yeⁿe ntiⁿnyuⁿ yeⁿe yā ní 'aama regalo naati tan'dúúccā 'áámá cosa chí can'diicú yā. ⁵Maaⁿ ní nduuti chí 'áámá 'iiⁿyāⁿ i'téenu yā Jesucristo ní nguéé cuuvi diiⁿ yā ntiⁿnyuⁿ cáávā chí cuuvi cu'téenu yā. Ní Ndyuūs diiⁿ yā recibir 'iiⁿyāⁿ nuuⁿndi chí cuuvi yeⁿe yā, tuuⁿmi ní Ndyuūs diiⁿ yā recibir 'iiⁿyāⁿ miiⁿ caati i'téenu yā Jesucristo. ⁶Tiicá ntúⁿ tiempo chí 'āā chó'oo David ngaⁿá yā 'tíicā yeⁿe chuū. N'dai saⁿā chí Ndyuūs diiⁿ yā recibir chí yeⁿe yā saⁿa. Ní saⁿā miiⁿ ní n'dai sa n'dáá rá chí nguéé idiⁿ sa ntiⁿnyuⁿ chí cuuvi yeⁿe Ndyuūs. ⁷Tíicā ngaⁿa sa:

De'e chúúccā n'dai 'iiⁿyāⁿ chí Ndyuūs nadach'ēecú yā nuuⁿndi yeⁿe yā ní diví yā nuuⁿndi yeⁿe yā chí 'āā ntéé vēē.

⁸De'ē chúúccā n'dai 'iiⁿyāⁿ chí Ndyuūs diiⁿ cuenta yā chí nguēē véé nuuⁿndi yeⁿe yā.

⁹Ní yeⁿe chí ngaⁿa David yeⁿe chí de'ē chúúccā n'dai 'iiⁿyāⁿ, ¿áá dámaaⁿ caava 'iiⁿyāⁿ Israel chí yeⁿe na circuncisión? Nguēē 'tíicā, tí cáávā 'iiⁿyāⁿ chí nguéé yeⁿe 'iiⁿyāⁿ Israel ní nguéé véé ley yeⁿe circuncisión yeⁿe yā. 'Āā ngaⁿa nū chí canéé nguūⁿ na libro yeⁿe Ndyuūs 'tíicā. Abraham i'téenu yā Ndyuūs ní cáávā chí i'téenu yā Ndyuūs, Ndyuūs diiⁿ yā recibir Abraham miiⁿ chí yeⁿe yā 'iiⁿyāⁿ. ¹⁰¿De'ē tiempo chí

Ndyuūs díⁿ yā recibir Abraham miiⁿ? ¿Áa taachi 'āā cuéé cuuvi circuncidado o cuayiivi taachi chii yā circuncidado? Ndyuūs 'āā díⁿ yā recibir 'iiⁿyāⁿ taachi 'āā cuéé cuuvi yā circuncidado. ¹¹Cuayiivi chi Abraham i'téenu yā Ndyuūs, tuu'mi ní chíí yā circuncidado. Ní chuū ní 'áamá seña chi Ndyuūs díⁿ yā recibir Abraham miiⁿ cáávā chi i'téenu yā Ndyuūs. Ní chuū ní díⁿ yā chi Abraham miiⁿ ní cuuví yā chiidaá nducyáácá 'iiⁿyāⁿ chi i'téenu yā Ndyuūs 'áará chi nguéé chíí yā circuncidado. Ní 'tíicā Ndyuūs ngaⁿá yā chi díⁿ yā recibir 'iiⁿyāⁿ chi nguéé circuncidado yā. ¹²Cuaacu chi Abraham ní chiidaá 'iiⁿyāⁿ circuncidado yā chi Israel. Naati 'tíicā chiidaá 'iiⁿyāⁿ s'eeⁿ nguéé dámaāⁿ cáávā chi circuncidado yā naati cáávā chi i'téenu yā Ndyuūs tan'dúúcā chi Abraham chi'téenu yā Ndyuūs vmnááⁿ vmnaaⁿ taachi 'āā cuéé cuuvi yā circuncidado yā.

Compromiso chi díⁿ Ndyuūs ní chii cucáávā chi chí'teenú 'iiⁿyāⁿ

¹³Ndyuūs caⁿa yā chii yā Abraham chi iⁿyeeⁿdí 'cūū cuuvi yeⁿe Abraham ndúúcū 'iiⁿyāⁿ yeⁿé yā chíí cuhii cuayiivi ní Ndyuūs caⁿa yā chii yā Abraham 'tíicā. Ní nguéé cáávā chi idiiⁿ Abraham chi ngaⁿa ley caati cáávā chi i'téenu yā Ndyuūs. Ní cáávā chi i'téenu yā Ndyuūs, Ndyuūs díⁿ yā cuenta chi saⁿā Abraham miiⁿ ní yeⁿé yā. ¹⁴Ní nduuti chi 'iiⁿyāⁿ chi véé ley yeⁿe yā ní díⁿ yā chi ngaⁿa ley miiⁿ ní cuuví yeⁿé yā chiiⁿ chi Ndyuūs caⁿa yā chi ca'a yā, tuu'mi ní nguéé

dichíí'vē yeⁿe 'iiⁿyāⁿ chi i'téenu yā Ndyuūs. Ní nguéé dichíí'vē chiiⁿ chi Ndyuūs caⁿa yā chi ca'a yā chi cuuvi yeⁿé yā cáávā chi i'téenu yā. ¹⁵Naachi véé ley, véé castigo cáávā 'iiⁿyāⁿ chi nguéé díⁿ yā chiiⁿ chi ngaⁿā. Naachi nguéé véé ley, 'iiⁿyāⁿ nguéé cuuvi díⁿ yā nuuⁿndi chi contra ley.

¹⁶Ndyuūs caⁿa yā chi ca'a yā compromiso yeⁿé yā, compromiso chi n'dai taavi 'iiⁿyāⁿ chi cuuvi yeⁿé yā cucáávā chi i'téenu yā Ndyuūs ní nguéé nadíí'vē yā yeⁿe. Ní 'tíicā seguro cānee chi Ndyuūs caⁿa yā chíí ca'a yā chi cuuvi yeⁿe nducyáácá 'iiⁿyāⁿ chi yeⁿe ndaata Israel ní nguéé dámaāⁿ caava 'iiⁿyāⁿ chi véé ley yeⁿé yā ní díⁿ yā chi ngaⁿa ley miiⁿ, naati cáávā nducyaaca 'iiⁿyāⁿ chi i'téenu yā Ndyuūs tan'dúúcā chi Abraham chi'téenu yā Ndyuūs. 'Tíicā Abraham miiⁿ ní cuuvi chiidaá nducyaaca s'uúúⁿ. ¹⁷Ní canéé nguūⁿ na libro yeⁿé Ndyuūs 'tíicā. Ndyuūs ngaⁿa yā ngii yā Abraham: Díí Abraham, 'úú idiiⁿ chíí díí cuuvi chiidaá 'yaaⁿ n'dái naciones. Ní nanááⁿ Ndyuūs chuū ní n'daacā canee, ní Abraham ní i'téenu yā Ndyuūs chi cuaacu ca'á yā vida 'iiⁿyāⁿ chi n'díí. Ní caⁿá yā din'dai yā cosas chi 'āā cuéé snaaⁿ yú.

¹⁸Abraham miiⁿ taachi 'āā cuéé de'ē vee chi cānee ngínú yā, chí'teēnu yā Ndyuūs. Ní Ndyuūs ní díⁿ yā chíí cūnee ngiinú yā yeⁿe chi Ndyuūs caⁿa yā ca'a yā chi cuuví yeⁿe yā. Ní cáávā chuū ni Abraham miiⁿ ní chíí chiidaá 'yaaⁿ n'dái naciones tan'dúúcā chi Ndyuūs 'āā ngaⁿa yā yeⁿe yā. Ní Ndyuūs ngaⁿá

yā: 'Tíicā cuuví 'yaaⁿ taavi ndaata yeⁿē dii. ¹⁹Saⁿa Abraham miiⁿ 'āā ngii sa tan'dúucā 'aama ciento nduuyū yeⁿe sa. Ni 'tiicā ntúūⁿ véé nduuyū yeⁿe Sara chi n'daata yeⁿē sa. Ní canéé yā tan'dúucā 'iiⁿyāⁿ chi n'dii caati Abraham ndúucū Sara miiⁿ nguéé ch'iindī daiya tá. 'Áará chi 'tíicā ní nguéé ch'iindī daiya yā Abraham miiⁿ chi'téenu yā Ndyuūs. ²⁰Ní nguéé dííⁿ yā 'uūví vaanicadínuūⁿ yeⁿe yā yeⁿe chi Ndyuūs caⁿa yā chi diiⁿ yā cááva yā naati chi'téenu cá yā ní véé ca confianza yeⁿé yā ndúucū Ndyuūs. Ní dich'eté yā Ndyuūs. ²¹Ní deenú n'dai yā chi Ndyuūs cuuví dííⁿ yā nducuéⁿē chi caⁿa yā chi cuuví dííⁿ yā. ²²Ni cucáávā chi Abraham i'téenu yā 'tíicā Ndyuūs dííⁿ yā chi cuuvi yeⁿé yā 'iiⁿyāⁿ.

²³Ní nduudu chi canéé nguūⁿ chi Ndyuūs ngaⁿa yeⁿe Abraham miiⁿ chi dííⁿ yā chi cuuví yeⁿé yā cáávā chi i'téenu yā Ndyuūs nguéé dámaāⁿ caavā Abraham. ²⁴'Tiicā ntúūⁿ ní cáávā s'uūuⁿ cánéé nguūⁿ. Ndyuūs dííⁿ yā recibir s'uúúⁿ chi cuuvi yeⁿé yā s'uúúⁿ chi cu'téenu yú Ndyuūs chi nadicuééⁿ yā Señor Jesucristo yeⁿe yú yeⁿe nguaaⁿ tináⁿā. ²⁵Ndyuūs dicho'ó yā Jesucristo caati ch'ii yā cucáávā nuuⁿndi yeⁿe yú. Ní nadicuééⁿ yā Jesucristo yeⁿe nguaaⁿ tináⁿā caati Ndyuūs cuuvi dííⁿ yā recibir s'uúúⁿ ní yeⁿé Ndyuūs s'uúúⁿ.

**Véé chi cuuvi yeⁿe yú taachi
Ndyuūs ngaⁿa yā chi nguéé
véé nuuⁿndi yeⁿe yú**

5 Maaⁿ ní chi Ndyuūs dííⁿ yā recibir s'uúuⁿ cáávā chi i'téenu

yú Jesucristo véé vaadi 'diiíⁿ yeⁿe yú ndúucū Ndyuūs caava Señor Jesucristo yeⁿe yú. ²Ní cáávā Señor Jesucristo ndaa yú nanááⁿ Ndyuūs. Ní Ndyuūs itée yā s'uúúⁿ dendu'ū chi n'dai taavi yeⁿé yā. Ní díítú i'téenu yú ndúucū dendu'ū chi n'dai yeⁿé yā chi itée yā s'uúúⁿ. Ní yeenú n'dai yú ní canéé ngiinu yú chííⁿ chí cuuvi yeⁿe yú na va'ai chheeti nguuvi naachi canéé Ndyuūs chi dæevé n'dai. ³Ní 'tiicā ntúūⁿ yeenú taavi yú taachi n'geenu yú ngii caati deenu yú chi taachi n'geenu yú ngii ní n'daacā ca yeⁿe yú ti véé cá paciencia yeⁿe yú. ⁴Ní taachi cuchee yú yeⁿe nducuéⁿē, tuu'mi ní deenu yú chi diiⁿ yú chi Ndyuūs neⁿe yā chi diiⁿ yú 'túucā. Ní cūnee ngiinu yú chi cuuvi yeⁿe yú chi Ndyuūs caⁿá yā téé yā s'uúúⁿ. ⁵Ní deenu yú chi cuaacu chi cuuvi yeⁿe yú chi cūnee ngiinu yú. Ní nguéé 'cuináaⁿ yú caati Ndyuūs 'āā tee yā s'uúuⁿ na staava yeⁿe yú vaadi neⁿe yeⁿé yā cucáávā Espíritu N'dai yeⁿé yā chi 'āā tee yā s'uúuⁿ.

⁶Taachi 'āā cuéé cuuvi nanguaⁿāi yú cucáávā maaⁿ yú, tuu'mi ní Ndyuūs dicho'ó yā Cristo tiempo chi neⁿe yā caati Cristo ch'ii yā cáávā 'iiⁿyāⁿ chi véé nuuⁿndi yeⁿe yā. ⁷Nguéé n'gíⁿii chi 'áámá 'iiⁿyāⁿ 'cuūvi yā cucáávā táámá 'iiⁿyāⁿ chi nguéé nuuⁿndi yeⁿe yā. Ní n'dáá rá chi 'áámá 'iiⁿyāⁿ 'cuūvi yā cáávā táámá 'iiⁿyāⁿ chi n'daāca dííⁿ yā, 'áará chi 'iiⁿyāⁿ chi cuaacu chi n'daāca yā. ⁸Ní Ndyuūs ch'iⁿí yā chi neⁿé yā s'uúúⁿ taachi dicho'ó yā Cristo iⁿ'yeeⁿdí 'cūū chi ch'ii yā cáávā s'uúúⁿ caati s'uúúⁿ véé nuuⁿndi yeⁿe yú. ⁹Maaⁿ ní Ndyuūs

diíⁿ yā recibir s'uuúⁿ cáávā Cristo chi ch'ií yā chi nadanguáⁿai yā s'uuúⁿ. Ní Ndyuūs caⁿá yā nadanguaⁿai cá yā s'uuúⁿ yeⁿe castigo cucáávā Cristo. ¹⁰Ní taachi s'uuúⁿ 'āā cuéé cuuvi n'diichi yú Ndyuūs, Ndyuūs diíⁿ yā chi cuuvi yeⁿé yā s'uuúⁿ cáávā Jesucristo chi ch'ií yā. Maaⁿ ní s'uuúⁿ ní yeⁿe Ndyuūs s'uuúⁿ ní nanguaⁿai cā yú cáávā chi Cristo cánduuchi yā ní yeⁿe yā s'uuúⁿ. ¹¹Ní yeenu ca yú nanááⁿ Ndyuūs nguéé damaāⁿ cáávā chuū ti yeⁿé Ndyuūs s'uuúⁿ cáávā Señor Jesucristo yeⁿe yú. Ní cáávā Cristo miiⁿ véé vaadi 'diiⁿ yeⁿe yú nanááⁿ Ndyuūs.

Yeⁿe saⁿā Adán ndúúcu Cristo

¹²Tíicā caati cáávā 'áámá saⁿā chi duuchi Adán ndāā nuuⁿndi iⁿ'yeeⁿdí 'cūū. Ní cáávā nuuⁿndi miiⁿ 'iiⁿyāⁿ n'dii yā. Maaⁿ ní chííⁿ chi nducyaaca 'iiⁿyāⁿ ní 'cuūvi yā caati nducyáaca yā ní dinuuⁿndi yā. ¹³Ní nuuⁿndi miiⁿ canéé iⁿ'yeeⁿdí 'cūū. Ni 'iiⁿyāⁿ idinuuⁿndí yā vmaaaⁿ chi ndāā ley yeⁿe Moisés. Ní nguéé diíⁿ yā cuenta yeⁿe nuuⁿndi taachi nguéé ley miiⁿ chi ch'iⁿi 'iiⁿyāⁿ yeⁿe nuuⁿndi. ¹⁴¿Déé yeⁿe chuū? Ndií tiempo chi canéé Adán ní dinuuⁿndi sa ndii tiempo chi canéé Moisés. Ní Moisés caⁿá yā ley miiⁿ 'iiⁿyāⁿ s'eeⁿ chi dinuuⁿndí yā ní canéé chi 'cuūvi yā. Ní ch'ií yā 'áará chi nguéé dinuuⁿndí yā tan'dúúca Adán chi nguéé n'giindiveéⁿ yā chi ngaⁿa Ndyuūs. Ní cáávā chi Adán miiⁿ dinuuⁿndí yā, chuū ch'iⁿi 'iiⁿyāⁿ chi Daiyá Ndyuūs canéé chí cúchií ní 'iiⁿyāⁿ s'eeⁿ 'caandiveéⁿ yā nduudu yeⁿé Ndyuūs.

¹⁵Ní nguéé cuuvi nduuvíidáámá cosa chi Ndyuūs tee yā s'uuúⁿ ndúúcu nuuⁿndi chi diiⁿ Adán miiⁿ. Cáávā chi 'áámá saⁿā Adán miiⁿ idinuuⁿndí yā, nducyaaca 'iiⁿyāⁿ canéé chi 'cuūvi yā caati condenado yā. Ní cáávā 'áámá saⁿā Jesucristo, Ndyuūs dátēe yā s'uuúⁿ chi nadinguaⁿái yā s'uuúⁿ ní nguéé nadíí'vé yú yeⁿé yā. Ní chuū chi tee Ndyuūs ní n'daacā ca ní cáávā n'deēe ndái 'iiⁿyāⁿ. ¹⁶Ní 'āā vi'í cā nuuⁿndi chi diiⁿ Adán yeⁿe chiiⁿ chi Ndyuūs tee yā 'iiⁿyāⁿ chi nadinguáⁿai yā 'iiⁿyāⁿ. Cuayiivi chi Adán idinuuⁿndí yā nducyaaca 'iiⁿyāⁿ ní canéé yā condenado. Maaⁿ ní Ndyuūs nadinguáⁿai yā 'iiⁿyāⁿ chi cuuvi yeⁿé yā 'iiⁿyāⁿ. Ní 'iiⁿyāⁿ s'eeⁿ nguéé nadíí'vé yā ní Ndyuūs nadinguáⁿai yā 'iiⁿyāⁿ chi n'deēe ndái nuuⁿndi idiíⁿ yā. ¹⁷Cuaacu chi 'iiⁿyāⁿ canéé chi 'cuūvi yā cáávā chi 'áámá saⁿā dinuuⁿndi sa. Ní maaⁿ ní n'daacā ca chi diiⁿ 'áámá 'iiⁿyāⁿ chi Jesucristo miiⁿ. Ni cucáávā Jesucristo miiⁿ Ndyuūs diíⁿ yā recibir 'iiⁿyāⁿ s'eeⁿ chi cuuvi yeⁿé yā. Ní 'iiⁿyāⁿ s'eeⁿ nguéé nadíí'vé yā yeⁿe chuū. 'Iiⁿyāⁿ s'eeⁿ ní véé poder yeⁿé Ndyuūs ndúúcu yā chi 'cuētínéé n'dáaca yā na vida yeⁿé yā chi ngai.

¹⁸Tíicā nducyáacá 'iiⁿyāⁿ canee condenado yā cáávā 'áámá saⁿā Adán chi dinuuⁿndí yā. Naati cáávā Jesucristo miiⁿ chi dííⁿ yā chi neⁿe Ndyuūs, Ndyuūs diíⁿ yā recibir nducyaaca 'iiⁿyāⁿ chi cuuví yeⁿé yā ní véé vida cueⁿe daāⁿmaⁿ yeⁿé yā. ¹⁹Chuū ní neⁿe caaⁿmaⁿ 'tíicā. Cáávā chi 'áámá saⁿā Adán nguéé ch'iindiveeⁿ sa nduudu chi ngaⁿa

Ndyuūs nducyaaca 'iiⁿyāⁿ snée yā maaⁿ poder yeⁿē nuuⁿndi. 'Tiicá ntúūⁿ. Cáávā chi 'áámá saⁿa Cristo ch'iindiveéⁿ yā nduudu chi ngaⁿa Ndyuūs néené 'yaaⁿ 'iiⁿyāⁿ cuuvi ndaa yā nanááⁿ Ndyuūs, ní cuuvi yeⁿé Ndyuūs 'iiⁿyāⁿ s'eeⁿ.

²⁰Ndyuūs tee yā ley miiⁿ caati 'iiⁿyāⁿ cuuvi n'diichi cá yā chi dinuuⁿndi cá yā. Ní taachi dinuuⁿndi cá yā Ndyuūs tee yā vaadí n'dai ca yeⁿe yā chí ch'εete ca chi nadanguáⁿai yā 'iiⁿyāⁿ nguéé ti nuuⁿndi miiⁿ. ²¹Maaⁿ ní cho'ó chuū caati taachi 'iiⁿyāⁿ idinuuⁿndí yā ní canée chi 'cuūvi yā cáávā poder yeⁿe nuuⁿndi. 'Tiicá ntúūⁿ vaadí n'dai ca yeⁿé Ndyuūs ndúúcu poder yeⁿé yā diiⁿ chi diiⁿ yā aceptar s'uuúⁿ chi cuuvi yeⁿé yā s'uuúⁿ ní diiⁿ chi véé vida cueⁿe daāⁿmaⁿ yeⁿe yú cucáávā Señor Jesucristo yeⁿe yú.

N'dii yú cucáávā nuuⁿndi yeⁿe yú naati canduuchi yú cucáávā Cristo

6 Maaⁿ ní ǐde'é caaⁿmāⁿ yú? ǐ'Áá dinuuⁿndi yú caati Ndyuūs cuuvi téé yā s'uuúⁿ vaadí n'dai ca yeⁿé yā? ²Nguéé diiⁿ yú 'tíicā. 'Āā ch'iī yú yeⁿe nuuⁿndi chi diiⁿ yú, ǐtáácā cuuvi 'cuεetinée chiichi yú ndúúcu nuūⁿndi chi diiⁿ yú? ³ǐ'Áá nguéé déenu ndís'tii chi nducyaaca s'uuūⁿ chi chēđinuūⁿniⁿ yú cáávā chi s'uuúⁿ ní yeⁿe Cristo s'uuúⁿ, ní véé 'aama parte yeⁿe yú ndúúcu Cristo taachi ch'iī yā? ⁴Ní caavā chí chēđinuūⁿniⁿ yú tan'dúúca chi daama ch'ēchi yú ndúúcu Cristo, ní tan'dúúca chi ch'iī yú ndúúcu yā caati cuuvi nnduuchi yú yeⁿē nguaaⁿ tináⁿā ndúúcu

Cristo. Ní tiicá ntúūⁿ véé vida ngai yeⁿe yú ti 'tíicā Cristo nduuchi yā yeⁿe nguaaⁿ tinaⁿā cáávā poder chi ch'εeté ca yeⁿe Chiida yú.

⁵Ní nduuti chi tan'dúúca chi daama cueⁿe yú ndúúcu yā taachi ch'iī yā, 'tiicá ntúūⁿ cuaacu níⁿnyúⁿ chi dáámá cunee yú ndúúcu yā. Ní nnduuchi yú tan'dúúca chí maáⁿ yā nnduuchi yā yeⁿē nguaaⁿ tináⁿā.

⁶Ní chuū ní deenu yú vida ndiicūⁿ yeⁿe yú tan'dúúca chi dáámá ca'nee'ngá'āa na cruz ndúúcu Señor Jesucristo yeⁿe yú caati vida ndiicūⁿ yeⁿe yú ndúúcu chi neⁿe chi diiⁿ yú ní canee tan'dúúca chi n'diī ndúúcu poder yeⁿe nuuⁿndi caati nguéé cuuvi caaⁿmaⁿ ntiīⁿnyuⁿ vida yeⁿe yú chi dinuuⁿndi yú.

⁷Deenu yú chi taachi 'iiⁿyāⁿ 'āā ch'iī yā 'āā ntéé cuuvi dinuuⁿndí yā.

⁸Ní nduuti chi s'uuúⁿ ní 'āā ch'iī yú dáámá ndúúcu Cristo miiⁿ, tuu'mi ní i'téenu yú chi canduuchi yú ní cunee yú ndúúcu Cristo. ⁹Deenu yú chi taachi Cristo 'āā ch'iī yā ní nnduuchi yā yeⁿe nguaaⁿ tináⁿā, 'āā ntéé ngueεcunée yā 'cuūví yā caati vaadí n'gii mífⁿ nguéé de'ē vee cuuvi diiⁿ ndúúcu yā. ¹⁰Taachi Cristo ch'iī yā, ch'iī yā 'áámá vmneⁿé nūⁿ ní cáávā nducyáácá 'iiⁿyāⁿ ni cáávā nuuⁿndi yeⁿé yā. Maaⁿ ní nnduuchi yā ní vida yeⁿe yā nnduuchi yā cáávā Ndyuūs. ¹¹'Tiicá ntúūⁿ ndís'tii diiⁿ nī cuenta chi n'dii nī ndúúcu nuuⁿndi yeⁿe nī ní maaⁿ ní canduuchi nī cáávā Ndyuūs caati ndís'tii ní yeⁿe Jesucristo ndís'tii ní Jesucristo ní Señor yeⁿe yú.

¹²Ní cáávā chuū ndís'tii nguéé ca'á nī lugar chi nuuⁿndi caaⁿmaⁿ ntiīⁿnyuⁿ yeⁿe cuerpo yeⁿe nī ti

ndís'tií dífⁿ nī nuuⁿndi tan'dúúccā chi neⁿe cuerpo yeⁿ'é nī. ¹³Ní nguéé nca'á nī cuerpo yeⁿe maaⁿ nī na poder yeⁿ'ē nuuⁿndi chi cuuvi dinuuⁿndí nī tan'dúúccā chi neⁿe cuerpo yeⁿ'é nī. Nguéé dífⁿ nī 'tíicā. Nca'á nī vida yeⁿe maáⁿ nī ndúúccū cuerpo yeⁿe maáⁿ nī maaⁿ poder yeⁿe Ndyuūs tan'dúúccā chi 'āā n'dií nī ní 'āā nnduuchí nī ndúúccū 'áámá vida ngai. Maaⁿ ní cuuvi din'daacá nī. ¹⁴Ní nuuⁿndi ní nguéé véé poder yeⁿ'ē nanááⁿ ndís'tií caati nguéé canee nī maaⁿ yeⁿ'e ley miiⁿ naati canee nī maaⁿ nducuéⁿ'ē vaadi n'dai yeⁿ'é Ndyuūs.

Yeⁿ'e ejemplo yeⁿ'e 'iiⁿ'yāⁿ chi 'áámá idííⁿ yā ntiíⁿnyuⁿ yeⁿ'é Ndyuūs

¹⁵¿Tuu'mi ní de'ē diíⁿ yú? ¿Áá diíⁿ yú nuuⁿndi caati 'āā ntéé canee yú maaⁿ ley miiⁿ naati canee yú maaⁿ dendu'ū chi n'dai taavi chi yeⁿ'é Ndyuūs? Nguεε yeⁿ'ē mar 'áámá naaⁿ. ¹⁶Ndís'tií ní deenu nī chi nduuti chi ca'á nī vida yeⁿ'e maáⁿ nī na ta'a 'áámá patrón yeⁿ'e nī ní 'áámá canee nī chi dífⁿ nī ntiíⁿnyuⁿ chi ngaⁿ'a 'iiví nī, tuu'mí ndís'tií ní esclavos ndís'tií yeⁿ'e 'iiví nī. Ní canee chí dífⁿ nī nducuéⁿ'ē chí ngaⁿ'a 'iiví nī chí dífⁿ nī. 'Tiicá ntúūⁿ nduuti chí dífⁿ nī chí ngaⁿ'a nuuⁿndi chí dífⁿ nī tuu'mi ní canee nī tan'dúúccā chí nuuⁿndi miiⁿ patrón yeⁿ'e nī. Ní cuuvi 'cuūvi nī cueⁿ'e daāⁿmaⁿ. Ní nduuti chí dífⁿ nī chí ngaⁿ'a Ndyuūs, tuu'mi ní n'daacā dífⁿ nī nanááⁿ Ndyuūs. ¹⁷Úú ní ca'á gracias Ndyuūs caava ndís'tií caati ndís'tií 'áará chí tiempo chí chó'oo ní ndís'tií esclavos yeⁿ'e nuuⁿndi ndís'tií naati maaⁿ ní ch'iindiveéⁿ

nī ndúúccū nuuⁿmaⁿ staava yeⁿ'é nī nduudu cuaacu yeⁿ'é Ndyuūs chí 'iiⁿ'yāⁿ s'eeⁿ 'āā chí'cueéⁿ yā ndís'tií. ¹⁸Ní taachi canee libre nī yeⁿ'e poder yeⁿ'e nuuⁿndi, tuu'mi ní ndís'tií dífⁿ nī nducuéⁿ'ē chí n'daacā cáávā poder yeⁿ'é Ndyuūs chí ngaⁿ'a ntiíⁿnyuⁿ yeⁿ'é nī. ¹⁹Ngaⁿ'á ndúúccū ndís'tií ndúúccū nduudu chí tuumicadiinúúⁿ nī caati ndís'tií cuuvi tuumicadiinuuⁿ cá nī. Tiempo chí chó'oo ndís'tií s'neéⁿ nī cuerpo yeⁿ'é nī cáávā nuuⁿndi ní dinuuⁿndí nī tan'dúúccā chí maaⁿ cuerpo yeⁿ'é nī neⁿ'e chí dífⁿ nī. Ní diíⁿ cá nī chí nguéé n'daacā. Maaⁿ ní 'āā 'neéⁿ nī cuerpo yeⁿ'e nī cáávā chí dífⁿ nī cosa chí n'daacā ní nducuéⁿ'ē chí dífⁿ nī, dífⁿ nī cáávā Ndyuūs.

²⁰Taachi ndís'tií canee nī maaⁿ poder yeⁿ'e nuuⁿndi, nguéé cuuvi dífⁿ nī dendu'ū chí n'daacā. ²¹Ní ¿de'ē chí n'daacā chí dífⁿ nī aprovechar yeⁿ'e nuuⁿndi chí dífⁿ nī chí ngii 'cuináaⁿ nī yeⁿ'ē? Chííⁿ chí diííⁿ chí caⁿ'á nī 'cuūvi nī cueⁿ'e daāⁿmaⁿ. ²²Naati maaⁿ ní nguéé canee nī maaⁿ poder yeⁿ'ē nuuⁿndi caati dichí'vε nī Ndyuūs chí dífⁿ nī ntiíⁿnyuⁿ yeⁿ'é Ndyuūs. Ní cuayiivi ní véé vida cueⁿ'e daāⁿmaⁿ chí yeⁿ'e nī. ²³Chí chii'vε yeⁿ'e nuuⁿndi miiⁿ ní diíⁿ chí 'iiⁿ'yāⁿ ch'ii yā cueⁿ'e daāⁿmaⁿ naati chiiⁿ chí Ndyuūs tée yā 'iiⁿ'yāⁿ s'eeⁿ ní regalo chí vida cueⁿ'e daāⁿmaⁿ ti 'iiⁿ'yāⁿ s'eeⁿ ní yeⁿ'e Jesucristo chí Señor yeⁿ'e yú.

Ejemplo yeⁿ'e 'iiⁿ'yāⁿ chí n'giindivaacu yā

7 Ndís'tií hermanos yeⁿ'é chí véé ley yeⁿ'é nī, deenu nī chí 'iiⁿ'yāⁿ canee chí 'caandiveéⁿ yā ley

miiⁿ nuuⁿ máⁿ neⁿe chí canduuchí yā. ²Maaⁿ ní ca'á 'aama ejemplo. 'Áámá n'daataá chi n'giindivaacu tá ní véé isaⁿā yeⁿe tá, n'daataá miiⁿ ní n'daataá yeⁿe isaⁿā tá tanducuéⁿē tiempo chi canduuchi sa tan'dúúcā chi ngaⁿa ley. Ní taachi ch'iī isaⁿā yeⁿe tá canee tá libre yeⁿe ley miiⁿ chi ngaⁿa yeⁿe isaⁿā yeⁿē tá. ³Naati taachi cánduuchi isaⁿā yeⁿe tá ní caⁿa tá ndúúcū táámá saⁿā, tuu'mi ní idinuūⁿndí ta. Ní nduuti chi ch'iī isaⁿā yeⁿe tá, nguéé canee yā maaⁿ ley yeⁿe 'iiⁿyāⁿ chi n'giindivaacú yā ní cuuvi 'caandavaacú yā ndúúcū táámá saⁿā ní nguéé dinuuⁿndí tá.

⁴Ní 'tiicá ntúūⁿ ndís'tiī hermanos yeⁿe chí yeⁿe Cristo, ley miiⁿ tan'dúúcā esposo yeⁿe nī chí 'āā n'díí, ní 'āā n'diī ley miiⁿ cáávā ndís'tiī. Ní maaⁿ ní cuuvi yeⁿe táámá yā ndís'tiī ní yeⁿe Cristo ndís'tiī. 'iiⁿyāⁿ miiⁿ ní nducuéⁿ yā yeⁿe nguaaⁿ tináⁿā ní cucáávā 'iiⁿyāⁿ miiⁿ dichii've yú Ndyuūs. ⁵Ní tiempo chi ch'ó'oo taachi diiⁿ yú tan'dúúcā chí neⁿe maaⁿ cuerpo yeⁿe yú tuumicadínuuⁿ yú chí véé nuuⁿndí yeⁿe yú cáávā chí ngaⁿa ley miiⁿ chí diiⁿ yú 'tíicā. Ní nuuⁿndí chí diiⁿ yú diiⁿ chí 'cuūvi yú cueⁿe daāⁿmaⁿ. ⁶Naati maaⁿ ní diiⁿ yú cuenta chí n'diī yú yeⁿe ley miiⁿ. Ní nguéé canee yú maaⁿ poder yeⁿē ley miiⁿ. Maaⁿ ní libre canee yú chí dichii've yú Ndyuūs ndúúcū vida yeⁿe yú chí ngai. Ní vida yeⁿe yú ní yeⁿe Espíritu N'dai yeⁿē Ndyuūs. Ní nguéé canee yú maaⁿ poder yeⁿe ley ndiicúū chí canéé nguūⁿ.

Nuuⁿndí chí idiīⁿ yú

⁷Maaⁿ ní ǐdēē caaⁿmaⁿ yú? ǐ'Áá ley miiⁿ chí nuuⁿndí? Nguéé yeⁿē

mar 'áámá naaⁿ. 'Úú ní nguéé n'diichí nuuⁿndí nduuti chí nguéé cáávā ley miiⁿ. Ní 'tiicá ntúūⁿ, 'úú ní nguéé deenú chí nuuⁿndí 'úú nduuti chí neⁿe dendu'ū chí véé yeⁿe tanáⁿā 'iiⁿyāⁿ nduuti chí ley miiⁿ nguéé 'tíicā ngaⁿa: Nguéé dinéⁿe nī dendu'ū chí véé yeⁿe tanáⁿā 'iiⁿyāⁿ. ⁸Ní cáávā ley miiⁿ tuumicadiīnuūⁿ nuūⁿndí miiⁿ chí cuuvi neⁿé dííⁿ tanducuéⁿē dendu'ū chí nuuⁿndí. Ní ndúúti chí nguéé cáávā ley miiⁿ, nuuⁿndí miiⁿ canéé tan'dúúcā chí n'diī. Ní nguéé deenú yeⁿē. ⁹Tiempo chí ch'ó'oo 'úú ní nadacadínuūⁿ chí n'daacā canéé nguéé ndúúcū ley miiⁿ naati taachi n'diichí ley miiⁿ, tuu'mi n'diichí nuuⁿndí, ní 'úú ní canéé tan'dúúcā chí ch'íí. ¹⁰Ní 'tíicā ley miiⁿ ch'iⁿi 'iiⁿyāⁿ táácā cuuvi cunduuchí yā cueⁿe daāⁿmaⁿ, naati cucáávā 'úú n'g'iⁿi chí idiíⁿ nuuⁿndí tuu'mi ní cuuvi 'cuūvi cueⁿe daāⁿmaⁿ. ¹¹Ní cáávā ley miiⁿ deenú chí nuuⁿndí chí dííⁿ chííⁿ chí chinnche'ei 'úú ti nguéé dííⁿ tan'dúúcā chí ch'iindiveéⁿ ley miiⁿ. Naati cáávā ley miiⁿ, deenú nuuⁿndí chí dííⁿ ní diiⁿ chí ch'iī cueⁿe daāⁿmaⁿ.

¹²Ní ley miiⁿ ní dēeve ní yeⁿe Ndyuūs. Ní mandamiento yeⁿe ley miiⁿ 'tiicá ntúūⁿ ní dēeve ní cuaacu ní n'dáácā. ¹³Tuu'mi ní ley ǐ'áá cucáávā chí n'daacā diiīⁿ chí 'úú 'cuūvi cueⁿe daāⁿmaⁿ? Nguéé 'túúcā. Nuūⁿndí chí dííⁿ, diiīⁿ chí 'úú 'cuūvi. Ní 'tíicā cuuvi deenú nuuⁿndí ti nuuⁿndí miiⁿ ch'iⁿi chí cuáácú chí nuuⁿndí cáávā ley miiⁿ chí cosa chí n'daacā. Ní cosa chí n'daacā miiⁿ ní mandamiento chí ch'iⁿi chí nguée n'daacā chí nuūⁿndí miiⁿ.

¹⁴Deenu yú chi ley miiⁿ ní yeⁿe Espíritu N'dai yeⁿé Ndyuūs. Naati 'úú ní saⁿā yeⁿe iⁿ'yeeⁿdí 'cūū. 'Úú chi dinuuⁿndí ni caneé maaⁿ poder yeⁿe nuuⁿndi chi idiíⁿ nuuⁿndi. ¹⁵'Úú nguéeⁿ deenú de'e cáávā chi diíⁿ chiiⁿ chi diíⁿ. 'Úú nguéeⁿ diíⁿ chi neⁿé diíⁿ naati diíⁿ chi nguéeⁿ neⁿé diíⁿ ti nguéeⁿ neⁿé diíⁿ. ¹⁶Ní nduuti chi nguéeⁿ neⁿé diíⁿ ní chííⁿ chí diíⁿ, tuuⁿ'mi ní deenú chi ley miiⁿ ní n'dai. ¹⁷'Tíicā nguéeⁿ 'úú chi diíⁿ, naati nuuⁿndi chi canée nduucú chííⁿ diiiⁿ chi dinuuⁿndí. ¹⁸Caati deenú chi maaⁿ 'úú chi cuerpo yeⁿé nguεε vεε mar 'áámá dendu'ū chi n'daacā. Cuaacu chi 'úú neⁿé diíⁿ chi n'daacā naati nguéeⁿ deenú táácā cuuvi diíⁿ chi n'daacā. ¹⁹Dendu'ū chi n'dai chi neⁿé diíⁿ, nguéeⁿ diíⁿ naati chi nguéeⁿ n'daacā chi nguéeⁿ neⁿé diíⁿ, chííⁿ chí diíⁿ. ²⁰Maaⁿ ní nduuti chi diíⁿ chi nguéeⁿ neⁿé diíⁿ, tuuⁿ'mi nguéeⁿ 'úú chi diíⁿ naati nuuⁿndi ndúúcū poder yeⁿé chi canée nduucú chííⁿ diiiⁿ chi dinuuⁿndí.

²¹Ní 'tíicā canee nduucú. Taachi neⁿé diíⁿ chi n'daacā miiⁿ, dámaaⁿ chi nguéeⁿ n'daacā canee nduucú. ²²Cuáácú chi neⁿé diíⁿ chiiⁿ chi ngaⁿā ley yeⁿé Ndyuūs. ²³Naati deenú chi véé táámá cosa na cuerpo yeⁿé chi nguéeⁿ neⁿé chi 'úú idiíⁿ cosa chi n'daacā tan'dúúcā chi nadacadiinúúⁿ chi diíⁿ. Chuū ní ley yeⁿe nuūⁿndí chi véé na cuerpo yeⁿé. Ní 'úú caneé tan'dúúcā preso yeⁿe ley yeⁿe nuuⁿndi. 'Tíicā 'úú.

²⁴Dé'e chúúcā nndaachíí yeⁿé maaⁿ. ¿Du'ú cuuvi nadanguáⁿ'ai 'úú yeⁿe cuerpo yeⁿé chí diiⁿ chi 'cuūví cueⁿe daāⁿmaⁿ? ²⁵Maaⁿ ní 'úú ní ncā'a gracias Ndyuūs chi dámaaⁿ

Ndyuūs cuuvi nadinguáⁿ'ai yā 'úú cáávā Jesucristo Señor yeⁿe yú. 'Úú ní dichíí'vē 'úú ley yeⁿe Ndyuūs ndúúcū núúⁿmaⁿ staāvā yeⁿé naati cuerpo yeⁿé ní neⁿe dinuuⁿndi cáávā ley yeⁿe nuuⁿndi chi canée nduucú.

Vida chi véé cáávā Espíritu N'dai yeⁿé Ndyuūs

8 Maaⁿ ní 'iiⁿ'yāⁿ s'eeⁿ chi yeⁿe Señor Jesucristo nguéeⁿ condenado yā. Ní 'iiⁿ'yāⁿ s'eeⁿ nguéeⁿ n'gεetineé yā chi diíⁿ yā chiiⁿ chi neⁿe cuerpo yeⁿe maáⁿ yā naati n'gεetineé yā tan'dúúcā chi neⁿe Espíritu N'dai yeⁿé Ndyuūs. ²Caati ley yeⁿe Espíritu N'dai yeⁿé Ndyuūs chiiⁿ diiiⁿ chi véé vida cueⁿe daāⁿmaⁿ yeⁿe 'iiⁿ'yāⁿ chi yeⁿe Jesucristo. Ní diiiⁿ chi 'úú caneé libre yeⁿe nuuⁿndi chi diiiⁿ chi ch'íí cueⁿe daāⁿmaⁿ. ³Ní Ndyuūs diíⁿ yā chiiⁿ chi nguéeⁿ cuuvi diiiⁿ ley yeⁿe Moisés miiⁿ caati 'iiⁿ'yāⁿ ní duūvá yā na cuerpo yeⁿe yā. Ní Ndyuūs diíⁿ yā condenar nuuⁿndi chi véé na cuerpo yeⁿé 'iiⁿ'yāⁿ yeⁿe iⁿ'yeeⁿdí 'cūū taachi dicho'ó yā 'áámá n'dyáⁿā Daiya yā ndúúcū cuerpo tan'dúúcā s'uúúⁿ cáávā chi divíí yā nuūⁿndí yeⁿé 'iiⁿ'yāⁿ. ⁴Ní chúú Ndyuūs diiⁿ yā cáávā chi s'uūúⁿ cuuvi ch'εetinee yú tan'dúúcā chi ngaⁿ'a ley miiⁿ ti yeⁿe Espíritu N'dai s'uúúⁿ. Ní nguéeⁿ diiⁿ yú chiiⁿ chi neⁿe maaⁿ cuerpo yeⁿe yú ti diiⁿ yú tan'dúúcā chi neⁿe Espíritu N'dai yeⁿé Ndyuūs.

⁵'Iiⁿ'yāⁿ chi n'gεetinée yā ní diíⁿ yā chi neⁿe maaⁿ cuerpo yeⁿé yā nacadiinúúⁿ yā ní diíⁿ yā dendu'ū chi neⁿé yā. 'Iiⁿ'yāⁿ chi yeⁿe Espíritu N'dai yeⁿé Ndyuūs

nadacadiinúúⁿ yā ní dííⁿ yā chi neⁿe Espíritu N'dai yeⁿe Ndyuūs. ⁶Ní 'iiⁿ'yāⁿ chi nadacadiinúúⁿ yā ní dííⁿ yā dē'ē chi cuerpo yeⁿe maáⁿ yā neⁿe, ní 'cuūvi yā cueⁿe daāⁿmaⁿ naati 'iiⁿ'yāⁿ chi nadacadiinúúⁿ yā ní dííⁿ yā dendu'ū chi neⁿe Espíritu N'dai yeⁿe Ndyuūs ní vεε vida cueⁿe daāⁿmaⁿ yeⁿe yā ní n'gēetinéé yā ndúúcū vaadi 'diiíⁿ. ⁷'Iiⁿ'yāⁿ chi nadacadiinúúⁿ yā dendu'u chi yeⁿe cuerpo yeⁿe yā, 'iiⁿ'yāⁿ s'eeⁿ ní contra yeⁿe Ndyuūs 'iiⁿ'yāⁿ ti nguéé neⁿe yā dííⁿ yā chi ngaⁿ'a ley miíⁿ, ní nguéé cuuvi dííⁿ yā. ⁸Ní cáávā chuū 'iiⁿ'yāⁿ s'eeⁿ chi dííⁿ yā tan'dúúcā chi neⁿe cuerpo yeⁿe yā Ndyuūs nguéé inee yiinú yā chííⁿ chí dííⁿ yā.

⁹Naati maaⁿ ní ndís'tiī nguéé dííⁿ ní tan'dúúcā chi neⁿe cuerpo yeⁿe maáⁿ ní naati dííⁿ ní tan'dúúcā chi neⁿe Espíritu N'dai yeⁿe Ndyuūs ti maaⁿ ní Espíritu N'dai yeⁿe Ndyuūs cánée yā ndúúcū ndís'tiī. Ní nduuti chi 'áámá 'iiⁿ'yāⁿ nguéé cánée yā ndúúcū Espíritu yeⁿe Cristo, tuu'mi ní 'iiⁿ'yāⁿ 'cūū nguéé yeⁿe Cristo 'iiⁿ'yāⁿ. ¹⁰Ní nduuti chi ndís'tiī ní yeⁿe Cristo ndís'tiī, 'áará chi cuerpo yeⁿe ní cuuvi n'diī cucáávā nuuⁿndi yeⁿe ní, tuu'mi ní canduuchí ní cáávā Espíritu N'dai yeⁿe Ndyuūs miíⁿ caati Ndyuūs dííⁿ yā aceptar ndís'tiī chi yeⁿe yā ndís'tiī. ¹¹Ní ndúúti chi cánée ní ndúúcū Espíritu N'dai yeⁿe Ndyuūs, Espíritu N'dai yeⁿe Ndyuūs chi nadacuééⁿ yā Cristo yeⁿe nguaaⁿ tináⁿā, tuu'mi ní maaⁿ Ndyuūs miíⁿ chi nadacuééⁿ yā Cristo caⁿ'a yā chi tée yā cáávā Espíritu N'dai yeⁿe Ndyuūs chi cánée nduucú ní vida ngai na cuerpo yeⁿe ní chi 'āā n'díí.

¹²Ní cáávā chuū, ndís'tiī hermanos yeⁿe, véé chi canée chi diiⁿ yú naati nguéé 'cuēetinee yú ní nguéé diiⁿ yú tan'dúúcā chi neⁿe cuerpo yeⁿe yú. ¹³Caati ndúúti chi diiⁿ yú tan'dúúcā chi neⁿe cuerpo yeⁿe maaⁿ yú, tuu'mi ní cuuvi 'cuūvi yú cueⁿe daāⁿmaⁿ. Naati nduuti chi nguéé diiⁿ yú cuenta chi diiⁿ cuerpo yeⁿe yú, tuu'mi ní cáávā Espíritu N'dai yeⁿe Ndyuūs chi canee ndúúcu yú 'cuēetinee yú.

¹⁴Ní nducyáácá 'iiⁿ'yāⁿ chi Espíritu N'dai yeⁿe Ndyuūs ngaⁿ'a yā chi cuuvi dííⁿ yā 'iiⁿ'yāⁿ s'eeⁿ ní daiya Dendyuūs 'iiⁿ'yāⁿ. ¹⁵Ní Ndyuūs 'āā tee yā s'uuúⁿ Espíritu N'dai yeⁿe yā nguéé cáávā chi diiⁿ yú ntiíⁿnyuⁿ yeⁿe yā chi dí'va'a yú ley cáávā chi condenado yú taama vmnéⁿ'ēe naati cáávā chi s'uuúⁿ ní daiya Ndyuūs s'uuúⁿ. Íícú cucáávā Espíritu N'dai yeⁿe Ndyuūs ní s'uuuⁿ ní cuuvi caaⁿ'maⁿ yú: N'diī, Ndyuūs ní Chiidá. ¹⁶Ní maaⁿ Espíritu N'dai yeⁿe Ndyuūs ngaⁿ'á yā ndúúdí cuaacu ndúúcū espíritu yeⁿe yú chi s'uuuⁿ ní daiya Dendyuūs s'uuúⁿ. ¹⁷Ní nduuti chi s'uuuⁿ ní daiyá Ndyuūs s'uuuⁿ, tuu'mi ní véé chi cuuvi yeⁿe yú chi Ndyuūs caⁿ'a yā chi tée yā s'uuúⁿ. Ní cuta'a yú chi cuuvi yeⁿe yú ndúúcū Cristo maáⁿ yā nduuti chi s'uuuⁿ ní 'cueenu yú cuuvi maaⁿ cáávā chi yeⁿe Cristo s'uuúⁿ. Cuayiivi ní véé parte yeⁿe yú ndúúcū Cristo ndúúcū vaadi dēεε n'dái taavi yeⁿe yā.

¹⁸Maaⁿ ní inadacadiinúúⁿ chí dendu'ū chi n'geenu yú ngii maaⁿ nguéé dē'ē vεε chí ch'εete nguéé tan'dúúcā dendu'ū chi dēεε ca ní ch'εete ca chi Ndyuūs 'cuuⁿ'míⁿ

yā s'uuúⁿ. ¹⁹Tanducuéⁿē yeⁿe iⁿ'yeeⁿdī chi din'dái Ndyuūs cuáácú cunee ngiinu tiempo chi cuuvi n'diichi 'iiⁿ'yāⁿ s'eeⁿ chi daiya Ndyuūs. ²⁰Caati tanducuéⁿē chi din'dái Ndyuūs ndāā nguuvi chi 'āā ntéé n'daacā. Ní nguéé cucáávā chi maāⁿ néⁿe naati cucáávā chi Ndyuūs neⁿé yā chi 'tíicā. Ní maaⁿ ní tanducuéⁿē tiempo miiⁿ ní tanducuéⁿē dendu'ú cunee ngiinu chi Ndyuūs díⁿ yā chi canéé n'daacā cáávā yeⁿē. ²¹Ní tanducuéⁿē chi din'dái Ndyuūs canéé chi natuuvíí. Naati ndāā tiempo chi nguéé natúúvíí caati véé parte yeⁿē ndúúúú libertad chí n'dai taavi chi yeⁿē 'iiⁿ'yāⁿ s'eeⁿ chi daiyá Dendyuūs. ²²Ní s'uúuⁿ ní deenu yú chi ndíí nguuvi maaⁿ tanducuéⁿē chi din'dái Ndyuūs ní n'gai ya'āi ngeecū yeⁿē tan'dúúúú 'áámá n'daataá ndúúúú vaadi ya'ai yeⁿē chi 'cundiyaáⁿ daiya tá. ²³Ní nguéé dámaāⁿ tanducuéⁿē chi din'dái Ndyuūs ní n'gái ya'āi naati 'tiicá ntúúⁿ s'uuúⁿ n'geenu yú ngii. 'Áará chi canee yú ndúúúú Espíritu N'dai yeⁿé Ndyuūs chi Ndyuūs datee yā s'uuúⁿ chi vmnááⁿ vmnaaⁿ sta'a yú yeⁿé Ndyuūs. Ní 'cueenu taavi yú cuuvi 'naaⁿ chi canéé ngiinu yú tiempo chi Ndyuūs cuta'á yā s'uúuⁿ chi daiyá Ndyuūs s'uuúⁿ. Ní nanguaⁿ'ái yā s'uúuⁿ yeⁿe cuerpo yeⁿe yú chi véé maaⁿ. Ní 'āā ntéé véé cuerpo ndíícuū yeⁿe yú naati vεε cuerpo chí ngai yeⁿe yú. ²⁴Ní s'uuúⁿ nguaⁿ'ai yú cáávā chi canee ngiinu yú chi Ndyuūs caⁿ'a yā chi téé yā s'uuúⁿ. Nduuti chi 'āā inaaⁿ yú de'ē chi canee ngiinu yú 'āā ntéé canee ngiinu yú yeⁿē. Chífⁿ chi 'āā

inaaⁿ 'iiⁿ'yāⁿ 'āā ntéé canéé ngiinu yā yeⁿē. ²⁵Naati nduuti chi canéé ngiinu yú chi 'āā cuéé snaaⁿ yú canéé chi cunee ngiinu yú ndúúúú 'víích'εetiínūⁿ.

²⁶Ní Espíritu N'dai yeⁿé Ndyuūs nnginnée yā s'uúuⁿ taachi dúuvā yú. S'uuúⁿ nguéé deenu yú táácā canéé chí caaⁿ'maⁿ'ngua'a yú tan'dúúúú chí Ndyuūs neⁿé yā, ní maaⁿ ní Espíritu N'dai yeⁿé Ndyuūs inneé yā s'uuúⁿ taachi ngaⁿ'angua'a yú nanááⁿ Ndyuūs taachi n'gai ya'ái yā ní nguéé cuuvi caaⁿ'maⁿ yú chuū ndúúúú nduudu. ²⁷Ní Ndyuūs chi n'diichí yā staava yeⁿe yú deenú yā chi nadacadiinuⁿ Espíritu N'dai yeⁿé Ndyuūs caati Espíritu N'dai yeⁿe Ndyuūs ngiica yā dámaāⁿ yeⁿe chi neⁿe Ndyuūs ní cáávā 'iiⁿ'yāⁿ chi yeⁿe Ndyuūs.

Cuchεε ca yú yeⁿe nducuéⁿē

²⁸Ní deenu yú chi Ndyuūs díⁿ yā chi tanducuéⁿē chi chó'oo yeⁿe s'uúuⁿ chí yeⁿe s'uúuⁿ ní cáávā chi n'daacā yeⁿe yú caati neⁿe yú Ndyuūs. Ní Ndyuūs yaa'ví yā 'iiⁿ'yāⁿ s'eeⁿ chi cuuvi yeⁿé yā 'iiⁿ'yāⁿ s'eeⁿ. ²⁹Ní Ndyuūs ndεεve yā 'iiⁿ'yāⁿ chi cuuvi yeⁿé yā ní divíí yā 'iiⁿ'yāⁿ s'eeⁿ lado yeⁿé yā ndii vmnááⁿ vmnaaⁿ caati 'iiⁿ'yāⁿ s'eeⁿ cuuvi daiyá yā tan'dúúúú Daiyá yā Jesucristo. Ní 'íicú Cristo chí Daiya Ndyuūs ní Daiyá yā vmnááⁿ vmnaaⁿ nguaaⁿ n'deeε n'dái ví'i yā.

³⁰Ní 'iiⁿ'yāⁿ s'eeⁿ chí Ndyuūs chínδεεve yā ndíí vmnááⁿ vmnaaⁿ Ndyuūs yaa'ví yā 'iiⁿ'yāⁿ s'eeⁿ chí cuuvi yeⁿé yā 'iiⁿ'yāⁿ s'eeⁿ. Ní yaa'ví yā 'iiⁿ'yāⁿ chí sta'á yā 'iiⁿ'yāⁿ s'eeⁿ chí cuuvi daiyá yā. Ní Ndyuūs chí

sta'la yā 'iiⁿyāⁿ s'eeⁿ chi cuuvi yeⁿé yā ní cuayiivi dich'eteté yā 'iiⁿyāⁿ s'eeⁿ.

³¹¿D'éē cuuvi caaⁿmaⁿ yú yeⁿé dendu'ū s'eeⁿ? Dámaāⁿ cuuvi caaⁿmaⁿ yú chuū. Nduuti chi Ndyuūs canée yā ndúúcu s'uuúⁿ, ¿du'ū cuchéé cūnee contra yeⁿe s'uuúⁿ? ³²Ní Ndyuūs nguéé diya'āi 'íinu yā Daiya yā cáávā s'uuúⁿ naati dich'oló yā Daiyá yā caati ch'ii Daiya yā caavā nducyaaca s'uuúⁿ. Ní nduuti chi 'tíicā dííⁿ yā ndúúcu Daiya yā, ¿'áá nguéé tee Ndyuūs tanducuéⁿē s'uuúⁿ daama ndúúcu Daiyá yā ní n'dee n'dái yeⁿē?

³³¿Dú'ū cuuvi caaⁿmaⁿ nuuⁿndi yeⁿé 'iiⁿyāⁿ chi Ndyuūs ndeēve yā? Ndyuūs maáⁿ yā dííⁿ yā aceptar 'iiⁿyāⁿ chi yeⁿé yā. ³⁴¿Dú'ū tuuⁿmi cuuvi dííⁿ yā condenar s'uuúⁿ? Cristo ní 'iiⁿyāⁿ chi ch'ii yā cáávā nuuⁿndi yeⁿe yú ní nduuchí yā yeⁿe nguaaⁿ tinaⁿā. Ni maaⁿ ní Cristo canee yā na lado yeⁿe honor yeⁿē Chiidá yā. Ní ngaⁿangua'á yā cáávā s'uuúⁿ. ³⁵¿Dú'ū cuuvi divíi yā s'uūuⁿ yeⁿe Cristo chi neⁿé yā s'uuúⁿ? ¿'Áá chiiⁿ chi n'geenu yú ngii, 'áá cuuvi nadivíi s'uūuⁿ, o dendu'ū chi diiiⁿ chi idi'vaachi yú o dendu'ū chi diiⁿ 'iiⁿyāⁿ chi 'cueenu yú cuuvi o taachi cuuví cuiica yú o taachi 'āā ntéé catecai yú o cáánda yeⁿe yú o taachi ch'iinⁿúⁿ yā s'uūuⁿ ndúúcu machete chi 'uūvi lados 'caāiⁿ? ¿'Áá cuuvi diiiⁿ nducuéⁿē chuū nadivíi s'uuúⁿ ná vaadi neⁿe yeⁿe Cristo? Nguéé cuuvi. ³⁶'Tíicā canée nguūⁿ na libro yeⁿé Ndyuūs:

Cáávā chi s'uuúⁿ ní yeⁿe di s'uuúⁿ nuuⁿmaⁿ nguuvi canee yú listo chi 'caaⁿnúⁿ yā s'uuúⁿ

cáávā di. Ní 'iiⁿyāⁿ diiⁿ cuenta yā chi s'uuúⁿ tan'dúúca 'iiti cuūchī chi caⁿá yā 'caaⁿnuⁿ yā, 'tíicā s'uuúⁿ.

³⁷Naati yeⁿe nducuéⁿē dendu'ū cuchee cá yú cáávā Cristo chi dinéⁿe yā s'uuúⁿ. ³⁸'Tíicā 'úú ní deenú chi cuaacu chi mar 'áámá 'iiⁿyāⁿ nguéé cuuvi divíi yā s'uūuⁿ yeⁿe Ndyuūs chi dinéⁿe yā s'uuúⁿ. Ndíi nguéé ndúú vaadi n'gii, ndíi nguéé ndúú chi cunduūchi yú, ndíi nguéé ndúú ángeles, ndíi nguéé ndúú espíritus chi ngaⁿa ntiⁿnyuⁿ ndúúcu poder yeⁿe espíritus, ndíi nguéé ndúú dendu'ū chi véé maaⁿ, ndíi nguéé ndúú dendu'ū chi cuchii, ³⁹ndíi nguéé ndúú yeⁿe chi véé chí na yáácú, ndíi nguéé ndúú yeⁿe chi véé ndii na yáanūⁿ, ndíi nguéé ndúú táámá naaⁿ chi véé, tanducuéⁿē chuū nguéé cuuví divíi s'uuúⁿ yeⁿe Ndyuūs chi dinéⁿe yā s'uuúⁿ caati s'uuúⁿ ní yeⁿe Jesucristo s'uuúⁿ.

Ndyuūs ndeēve yā 'iiⁿyāⁿ Israel chí judíos chi cuuvi 'iiⁿyāⁿ yeⁿe yā

9 'Úú Pablo ní ngaⁿá nduudu cuaacu ti 'úú ní yeⁿé Cristo 'úú, ní nguéé ngaⁿá nduudu yaadi. Chííⁿ chi nadacádiinúúⁿ na staava yeⁿé ní yeⁿe Espírítu N'dai yeⁿé Ndyuūs. Cáávā chuū cuaacu niⁿnyúⁿ deenú chi ngaⁿá nduudu cuaacu. ²Neené ndaachií yiinú ní neené ya'ai staava yeⁿé cáávā 'iiⁿyāⁿ yeⁿe ndaata yeⁿé, ³ndíi chí 'úú maáⁿ neⁿé chí cunee condenado 'úú ní canee 'aama lado yeⁿe Cristo nduuti chí chiiⁿ cuuví dííⁿ, ní cuuví 'cuetinéé n'daacā 'iiⁿyāⁿ yeⁿe ndaata yeⁿé, ní cuuví

yā yeⁿe Cristo 'iiⁿ'yāⁿ. ⁴Iiⁿ'yāⁿ s'eeⁿ ní yeⁿ'ē 'iiⁿ'yāⁿ yeⁿ'e ndaata Israel. Ní Ndyuūs sta'á yā 'iiⁿ'yāⁿ s'eeⁿ chi cuuvi daiyá yā. Ní Ndyuūs chí dēeve n'dáí taavi ca canée yā nguaaⁿ 'iiⁿ'yāⁿ s'eeⁿ. Ní dííⁿ yā 'áámá compromiso ndúúcu yā. Ní ca'á yā 'iiⁿ'yāⁿ s'eeⁿ ley yeⁿ'é yā chi ley yeⁿ'e Moisés. Ní 'iiⁿ'yāⁿ s'eeⁿ canée yā ndúúcu ntiⁿ'nyuⁿ yeⁿ'e yaacū ní ndúúcu compromiso yeⁿ'é Ndyuūs chi Ndyuūs caⁿ'a yā chi ca'a yā 'iiⁿ'yāⁿ s'eeⁿ. ⁵Ní 'iiⁿ'yāⁿ s'eeⁿ ní daiya chiida yú cuááⁿ vmaaⁿ ní yeⁿ'e ndaata 'iiⁿ'yāⁿ s'eeⁿ. Ní yeⁿ'e ndaata 'iiⁿ'yāⁿ s'eeⁿ Cristo ní ndaa yā ndúúcu cuerpo tan'dúúca 'iiⁿ'yāⁿ s'eeⁿ. Ní Cristo miiⁿ ní Ndyuūs, ní ch'ēete taavi yā yeⁿ'e nducuéⁿ'ē. Cueⁿ'e daaⁿ'maⁿ dich'ēete yú Ndyuūs. 'Tíicā.

⁶Úú nguéé ngaⁿ'á chi compromiso chi ngaⁿ'a Ndyuūs nanááⁿ 'iiⁿ'yāⁿ Israel chí nguéé dichíí'vē. N'daācā ca chi ngaⁿ'á chi nducyaaca 'iiⁿ'yāⁿ yeⁿ'e ndaata Israel miiⁿ cuaacu chi nguéé yeⁿ'e 'iiⁿ'yāⁿ Israel. ⁷Naati nguéé nducyaaca 'iiⁿ'yāⁿ yeⁿ'e ndaata Israel ní daiya Abraham 'iiⁿ'yāⁿ. Naati 'túúca ngaⁿ'a Ndyuūs: Dii Abraham, cáávā saⁿ'ā daiya di chi nguuvi Isaac véé 'iiⁿ'yāⁿ yeⁿ'ē di cuayiivi. ⁸Ní cáávā nduudu chi ngaⁿ'a Ndyuūs cuuvi deenú chi mar 'áámá 'iiⁿ'yāⁿ cuuvi daiya Ndyuūs cáávā chi ch'iindiyáaⁿ yā na ndaata yeⁿ'é Abraham. Nguēe 'tíicā. 'Iiⁿ'yāⁿ s'eeⁿ ní daiya Dendyuūs nduuti chi cucáávā compromiso yeⁿ'e Ndyuūs, 'iiⁿ'yāⁿ s'eeⁿ cuaacu chi daiyá Ndyuūs. ⁹Nduudú 'cūū nduudu chi canée nguūⁿ yeⁿ'ē compromiso miiⁿ chi Ndyuūs ca'a yā Abraham:

Tiempo chi ch'i'í, 'úú ndaá ní ch'i'í poder yeⁿ'é ní Sara chi n'daataá yeⁿ'ē di ní 'cuundi 'aama daiya tá.

¹⁰Ní nguéé dámaaⁿ chuū. Nduu 'uuvi daiya táⁿ'ā Rebeca miiⁿ ní cuaāchī. Ní nguuvi yā Esau ndúúcu Jacob ní yeⁿ'ē 'áámá chiida ní chiidá yā ní Isaac chi yeⁿ'e ndaata yeⁿ'e 'iiⁿ'yāⁿ vmaáⁿ vmaaⁿ yeⁿ'e yú. ¹¹⁻¹³Ní taachi daiyā Rebeca miiⁿ chi cuaāchí 'āā cuéé 'cuēetiyaáⁿ yā ní 'āā cuéé dííⁿ yā cosa chi n'daacā o cosa chi nguéé n'daacā, Ndyuūs yaa'ví yā táⁿ'ā Rebeca miiⁿ 'tíicā: Daiya di chi saⁿ'ā vmaaⁿ chí Esau dííⁿ sa servir daiya di chi saⁿ'ā chí cuchii cuayiivi chi Jacob. Ní chuū ní tan'dúúca chi canée nguūⁿ naachi Ndyuūs ngaⁿ'a yā 'tíicā: 'Úú dineⁿ'é saⁿ'a Jacob miiⁿ, naati sáⁿ'ā Esau miiⁿ 'úú nguéé neⁿ'é. Déenu yú chi canée cuaacu chi Ndyuūs cuuvi ndēeve yā 'āā du'ú nūuⁿ 'iiⁿ'yāⁿ chi neⁿ'e yā tan'duucā chi neⁿ'e yā. Ní cuuvi yaa'ví yā 'iiⁿ'yāⁿ chi neⁿ'é yā yaa'ví yā chi cuuvi yeⁿ'e yā. Ní nguéé dííⁿ yā cuenta chiiⁿ chi diiⁿ 'iiⁿ'yāⁿ chi yaa'ví yā. Ní ndēevé yā Jacob.

¹⁴¿De'ē cuuvi caaⁿ'maⁿ s'uūuⁿ yeⁿ'e chi diiⁿ Ndyuūs? ¿Áá diiⁿ Ndyuūs cosa chi nguéé cuaacu? Nguéé mar 'áámá naaⁿ. ¹⁵Ndyuūs ní caⁿ'a yā chii yā Moisés miiⁿ 'tíicā: 'Úú ní ya'ái cáávā 'iiⁿ'yāⁿ chi 'úú neⁿ'é chi caⁿ'á chí ya'ái yeⁿ'e yā; ní 'úú ya'ái 'iinú cáávā 'iiⁿ'yāⁿ chi 'úú neⁿ'é chi caⁿ'á chí ya'ái 'iinú cááva yā. ¹⁶Maaⁿ ní nguéé tan'dúúca chi 'iiⁿ'yāⁿ s'eeⁿ neⁿ'é yā o dííⁿ yā chi cuuvi yeⁿ'é Ndyuūs 'iiⁿ'yāⁿ, naati dámaaⁿ tan'dúúca chi Ndyuūs ya'ai 'iinú yā caava 'āā du'ú nūuⁿ chi neⁿ'é yā chi

cuuvi ye^{ne}é yā. ¹⁷Ní canéé nguūⁿ na libro ye^{ne}e Ndyuūs taachi Ndyuūs yaa'ví yā rey ye^{ne}e yā^{ne}aa Egipto 'tíicā: Dii Faraón, 'úú s'neéⁿ dii rey caati 'úú cuuvi 'cuu^mmíⁿ poder ye^{ne}é cucáāvā dii. Ní 'iiⁿyāⁿ ye^{ne}e núú^mmáⁿ íⁿ'yeeⁿdí cuuvi déénú yā chi duuchí ní caa^mmáⁿ yā chi duuchí. ¹⁸Ní 'tíicā diiⁿ Ndyuūs. Ya'ái yā cáāvā 'iiⁿyāⁿ s'eeⁿ chi maáⁿ yā ne^{ne}é yā, ní 'tiicá ntúūⁿ Ndyuūs dichεεchí yā staava ye^{ne}e 'iiⁿyāⁿ s'eeⁿ chi maáⁿ yā ne^{ne}é yā dichεεchí yā.

¹⁹Tuu'mi ní 'aamá nī caⁿa nī chíi nī 'úú 'tíicā: Nduuti chi 'tíicā, 'dε'ε cúúvī chi Ndyuūs ngaⁿá yā chi nuuⁿndi ní ye^{ne}e saⁿá? Ní 'dúúú cuuvi diiⁿ cosa chi contra ye^{ne}e chi Ndyuūs ne^{ne}é yā chi diiⁿ? ²⁰'Úú ní ngaⁿá ngii díí saⁿá: 'Dúúú dii chi díí cuuvi n'guεεcútaⁿa di ye^{ne}é Ndyuūs? 'Áá cuaacu chi 'áámá 'cúutii ye^{ne}e ínchεētí cuuvi caaⁿmaⁿ ndúúúú 'iiⁿyāⁿ chi din'dái yā 'cúutii miiⁿ ní caaⁿmaⁿ 'tíicā: 'Dε'ε cúúvī chi din'dái nī 'úú 'túúúú? ²¹Deenu yú chi 'iiⁿyāⁿ chi din'dái yā 'cúutii cuuvi din'dái yā ye^{ne}e incheētí tan'dúúúú chi ne^{ne}é yā din'dái yā. Cuuvi din'dái yā ye^{ne}e 'áámá taaⁿ ínchεētí 'uūvī 'cúutii, 'áámá chi yaⁿai chíí'vē nī táámá chíi nguéé yaⁿai chíí'vē.

²²Ní 'tiicá ntúūⁿ chi diiⁿ Ndyuūs. Ndyuūs ne^{ne}é yā 'cuu^mmíⁿ yā 'iiⁿyāⁿ táácā cuuvi dííⁿ yā castigar 'iiⁿyāⁿ ní ch'iⁿí yā poder ye^{ne}é yā. Ní n'dee 'nááⁿ tiempo Ndyuūs chεé yā ndúúúú vaadí ngiinu ye^{ne}é yā ndúúúú 'iiⁿyāⁿ s'eeⁿ chi nguéé n'daacá idiíⁿ yā. Ní Ndyuūs canéé chi dííⁿ yā castigar 'iiⁿyāⁿ s'eeⁿ. Ní Ndyuūs dituūvī yā 'iiⁿyāⁿ s'eeⁿ. ²³Ní

Ndyuūs ne^{ne}é yā ch'iⁿí yā s'uūūⁿ chí chεεte ca vaadí dεeve taavi ye^{ne}é yā ní nééné ya'ai 'iinú yā cááva s'uūūⁿ. Ní ndii vmnááⁿ vmnaaⁿ dííⁿ yā chi s'uúúⁿ ní véé parte ye^{ne}e yú ndúúúú yā ndúúúú dεeve taavi ca ye^{ne}é yā.

²⁴Ní Ndyuūs yaa'ví yā s'uūūⁿ chi cuuvi ye^{ne}é yā s'uūūⁿ, náⁿā s'uūūⁿ chi 'iiⁿyāⁿ Israel s'eeⁿ chi judíos s'uūūⁿ nī tanáⁿa s'uūūⁿ chi nguéé 'iiⁿyāⁿ Israel s'eeⁿ chi judíos s'uúúⁿ.

²⁵Tan'dúúúú chi canéé nguūⁿ na libro ye^{ne}é Ndyuūs naachi dingūūⁿ profeta Oseas ní Ndyuūs ngaⁿá yā 'tíicā:

'Iiⁿyāⁿ chi nguéé ye^{ne}e ndaata ye^{ne}é, 'úú yaa'ví 'iiⁿyāⁿ s'eeⁿ chi cuuvi ye^{ne}é; 'iiⁿyāⁿ chi nguéé dine^{ne}é vmnaáⁿ ti nguéé 'iiⁿyāⁿ ye^{ne}e 'úú maaⁿ ní ngaⁿá 'iiⁿyāⁿ s'eeⁿ chi neené ne^{ne}é 'iiⁿyāⁿ s'eeⁿ.

²⁶Ní lugar mííⁿ nūūⁿ naachi Ndyuūs caⁿa yā chíi yā 'iiⁿyāⁿ s'eeⁿ 'túúúú: Ndís'tii ní nguéé 'iiⁿyāⁿ ye^{ne}é ndís'tiī, mííⁿ nūūⁿ ní ngaⁿá 'iiⁿyāⁿ s'eeⁿ ní chi duuchí yā daiya Dendyuūs chí canduuchi.

²⁷Ní saⁿa profeta Isaías caⁿa sá ye^{ne}e 'iiⁿyāⁿ Israel 'tíicā: 'Áárá chí 'iiⁿyāⁿ ye^{ne}e ndaata Israel ní n'dee n'dái yā tan'dúúúú yáⁿaa ndúúúú ye^{ne}e yiicu dámaaⁿ n'duu'vi núúⁿ yā nnguaⁿai yā. ²⁸Ní Señor Ndyuūs dííⁿ yā chi cuuvi cuaacu nduudu chi 'āā caⁿa yā ye^{ne}e yáⁿaa 'cūū ní nuuⁿ dííⁿ yā nducuéⁿē. ²⁹Ní 'tíicā ngaⁿa profeta Isaías cuaaⁿ vmnaaⁿ:

Nduuti chi Señor chi ngaⁿa ntiiⁿnyúⁿ yā ye^{ne}e nducuéⁿē nguéé s'neéⁿ yā 'iiⁿyāⁿ ye^{ne}e yú ndúúúú yú, tuu'mi ní s'uúúⁿ

canee yú tan'dúucā nducyáácá
'iiⁿyāⁿ yeⁿe yááⁿ Sodoma
ndúucū yáāⁿ Gomorra chí
ch'ii yā cucáávā nuuⁿndi yeⁿe
yā. 'Tíicā s'uúúⁿ.

**Yeⁿe 'iiⁿyāⁿ Israel s'eeⁿ ní yeⁿe
nduudu cuaacu yeⁿe evangelio**

³⁰¿DÉⁿe cuuvi caaⁿmaⁿ yú tuuⁿmi?
'Tíicā cuuvi caaⁿmaⁿ yú. 'Iiⁿyāⁿ
chi nguéé yeⁿe ndaata Israel chi
judíos 'iiⁿyāⁿ s'eeⁿ nguéé inⁿnuúⁿ yā
Ndyuūs ní nguéé dííⁿ yā chi canee
n'daāca yā nanááⁿ Ndyuūs. Naati
cuayiivi mííⁿ ní 'iiⁿyāⁿ s'eeⁿ canee
n'daāca yā nanááⁿ Ndyuūs cáávā chí
i'téenu yā Ndyuūs. Ní Ndyuūs dííⁿ
yā aceptar 'iiⁿyāⁿ s'eeⁿ chi yeⁿe yā
'iiⁿyāⁿ s'eeⁿ. ³¹Nguéé 'tíicā ndúucū
'iiⁿyāⁿ chi yeⁿe ndaataá Israel.
Caneé yā ndúucū ley yeⁿe Moisés
chi cuuvi diiiⁿ chi n'daacā canee yā
nanááⁿ Ndyuūs. Ní 'áará chi neⁿe yā
canee n'daacā nanááⁿ Ndyuūs naati
nguéé cuuvi dííⁿ yā cumplir chiiⁿ
chi ngaⁿa ley miiⁿ. ³²¿DÉⁿe cúuví
chi 'tíicā? 'Tíicā canee, caati 'iiⁿyāⁿ
yeⁿe ndaata Israel nguéé n'daacā
canee yā nanááⁿ Ndyuūs cáávā
ntiiⁿnyuⁿ chi dííⁿ yā cáávā ley yeⁿe
yā, ní nguéé neⁿe yā cu'téenu yā
Jesucristo. Ní cáávā chuū 'iiⁿyāⁿ
s'eeⁿ canee tan'dúucā chi candéē
ca'a yā ná tuūu chi Jesucristo chi
diíiⁿ chí indē ca'a 'iiⁿyāⁿ. ³³Ní 'tíicā
canee nguūⁿ na libro yeⁿe Ndyuūs
yeⁿe tuūu miiⁿ:

'Úú Ndyuūs ní cu'neéⁿ na
yāāⁿ Sión 'áámá 'iiⁿyāⁿ chi
Jesucristo chi nguuvi tuūu chi
cuunde ca'a 'iiⁿyāⁿ ní tuūú
miiⁿ ní 'áámá tuūú ch'ēete chi
diíiⁿ chi cundēve 'iiⁿyāⁿ; ní

nducyáácá 'iiⁿyāⁿ chi cu'téenu
yā 'iiⁿyāⁿ miiⁿ, nguéé cuuvi
'cuináaⁿ yā.

10 Ndís'tii hermanos yeⁿe,
neⁿe ndúucū núúⁿmáⁿ
staava yeⁿe chi nducyaaca 'iiⁿyāⁿ
Israel yeⁿe ndaata yeⁿe cuuvi
nnguaⁿai yā. Ní 'úú ní ngaⁿanguaⁿá
cááva yā. ²Deenú chi cuaacu chi
'iiⁿyāⁿ yeⁿe ndaataa yeⁿe ní neⁿe
yā dich'ēete cá yā Ndyuūs naati
nguéé dííⁿ yā tan'dúucā chi neⁿe
Ndyuūs caati nguéé déenu yā táacā
cuuvi dííⁿ yā. ³Ní nguéé déenu
yā táacā Ndyuūs dííⁿ yā aceptar
'iiⁿyāⁿ chi cuuvi yeⁿe yā 'iiⁿyāⁿ. Ní
dííⁿ yā chēe chi nadacádíínuuⁿ yā
chi n'daacā. Ní nguéé neⁿe yā dííⁿ
yā tan'dúucā chi Ndyuūs neⁿe yā
chi dííⁿ yā caati n'daacā canee yā
nanááⁿ Ndyuūs. ⁴Ní taachi ndā
Cristo dííⁿ yā chi 'āā víí cā ley yeⁿe
Moisés. Ní maaⁿ ní nducyáácá 'iiⁿyāⁿ
chi i'téenu yā Cristo, 'iiⁿyāⁿ s'eeⁿ
n'daacā canee yā nanááⁿ Ndyuūs.
⁵Ní Moisés miiⁿ dinguuⁿ yā yeⁿe
'iiⁿyāⁿ chi neⁿe yā canee n'daacā
yā nanááⁿ Ndyuūs cáávā chi
dííⁿ yā chi ngaⁿa ley miiⁿ. 'Tíicā
dinguúⁿ yā: 'Iiⁿyāⁿ chi dííⁿ yā
tanducuéⁿe denduⁿū chi ngaⁿa ley
yeⁿe Moisés canduuchí yā cueⁿe
daāⁿmaⁿ cucáávā ley miiⁿ. ⁶Naati
chuū ní ngaⁿa yeⁿe 'iiⁿyāⁿ chi
canee n'daacā nanááⁿ Ndyuūs cáávā
chi i'téenu yā Jesucristo. Díí nguéé
ngaⁿa di na staava yeⁿe di 'tíicā:
¿Du'u caⁿā na va'ai chēeti nguuvi?
Taachi ngaⁿa di 'tíicā, nadicuaⁿái
di Cristo yeⁿe va'āi chēeti nguuvi.
⁷Ní nguéé caaⁿmaⁿ di na staava
yeⁿe di 'tíicā: ¿Du'ū cuuvi caⁿá yā
iⁿyeēⁿdi chí yáanuⁿ tan'dúucā chi

che^{'n}e Cristo? Taachi diiⁿ di 'tíicā, diiⁿ di chi Cristo nadacuéⁿ yā ye^{'n}ē nguaaⁿ tiná^{'n}ā. ⁸Chuū chi canee chi caa^{'n}maⁿ yú: Nduudu cuaacu ye^{'n}é Ndyuūs 'āā ni^{'n}nuúⁿ canee ye^{'n}é nī ní canee na cheendí nī ní canee na staava ye^{'n}é nī. Nduudu cuaacu mi^{'n} ní nduudu chi nga^{'n}á 'nū nanááⁿ ndís'tii cááva chi cuuvi cu'téenu nī. ⁹Nduuti chi caa^{'n}máⁿ nī ndúúcū 'ii^{'n}yāⁿ ní nga^{'n}a nī 'tíica chi Jesús mi^{'n} chííⁿ chí 'iiví nī ní i'téenu nī ndúúcū núú^{'n}máⁿ staava ye^{'n}é nī chi Ndyuūs nadicuéⁿ yā Cristo mi^{'n} ye^{'n}e nguaaⁿ tiná^{'n}ā, tuu'mi ní dí nanguá^{'n}ai di. ¹⁰Canéé chi cu'teenú nī ndúúcū núú^{'n}máⁿ staava ye^{'n}e nī ní Ndyuūs cuaá^{'n} yā ndís'tii. Canéé chi caa^{'n}máⁿ nī ndúúcū 'ii^{'n}yāⁿ ní nga^{'n}á nī chi i'téenu nī Jesucristo ní cuuvi nangua^{'n}ai nī.

¹¹Ní canéé nguūⁿ na libro ye^{'n}é Ndyuūs 'tíicā: Nducyáácá 'ii^{'n}yāⁿ chi cu'téenu yā Cristo nguéé cuuvi 'cuináⁿ yā. ¹²Nguéé n̄dáaⁿ yā 'ii^{'n}yāⁿ Israel s'eeⁿ ndúúcū 'ii^{'n}yāⁿ ye^{'n}e taná^{'n}ā naciones. Maaⁿ Señor Jesucristo mi^{'n} ní maaⁿ Señor ye^{'n}e nducyáácá 'ii^{'n}yāⁿ. Ní Señor mi^{'n} itée yā ye^{'n}e nducue^{'n}ē chi n'dai ye^{'n}é yā nducyaaca 'ii^{'n}yāⁿ chi nga^{'n}angua^{'n}á yā nanááⁿ Ndyuūs cáávā chi duuchi yā. ¹³Caati 'tíicā canéé nguūⁿ na libro ye^{'n}é Ndyuūs: Nducyáácá 'ii^{'n}yāⁿ chi nga^{'n}a yā ngii yā: “N'díí Señor Jesucristo ye^{'n}é,” ní cuuvi nangua^{'n}ai yā. ¹⁴¿Táácā cuuvi caa^{'n}máⁿ yā ndúúcū Señor mi^{'n} nduuti chi nguēe i'téenu yā 'ii^{'n}yāⁿ? ¿Ní táácā cuuvi cu'téenu yā ye^{'n}ē áámá 'ii^{'n}yāⁿ chi nguéé n'giindiveéⁿ yā ye^{'n}e yā? ¿Ní táácā cuuvi caandiveéⁿ yā nduuti chi

nguéé 'aama 'ii^{'n}yāⁿ chi caa^{'n}máⁿ yā nduudu cuaacu ye^{'n}e Ndyuūs? ¹⁵¿Ní táácā cuuvi caa^{'n}máⁿ yā nduudu cuaacu ye^{'n}é Ndyuūs mi^{'n} nduuti chi nguéé du'ū veē dicho'ó? 'Tíicā canéé nguūⁿ na libro ye^{'n}é Ndyuūs: De'ε chúúcā n'daacā chi ndaa^{'n} 'ii^{'n}yāⁿ s'eeⁿ chi candée yā nduudu cuaacu ye^{'n}e vaadi 'dii^{'n} ni nga^{'n}á yā nduudu ngai ye^{'n}é Cristo.

¹⁶Naati nguéé nducyaaca 'ii^{'n}yāⁿ i'téenu yā nduudu cuaacu ye^{'n}é Cristo. Ní tan'dúúcā chi nga^{'n}a profeta Isaías ndii cuáá^{'n} vmnaaⁿ taachi nga^{'n}a 'tíicā: N'dii Señor, ¿dú'ū i'téenu nduudu cuaacu chí nga^{'n}ā cuaacu yú? ¹⁷'Tíicā tuu'mi, 'ii^{'n}yāⁿ i'téenu yā nduudu cuaacu ye^{'n}e Jesucristo cáávā chi n'giindiveéⁿ yā nduudu mi^{'n}, ní n'giindiveéⁿ yā nduudu cuaacu ye^{'n}e Cristo.

¹⁸Naati 'úú itinguuneéⁿ ndís'tii: ¿'Áá cuaacu chi nguéé n'giindiveéⁿ yā nduudu cuaacu ye^{'n}é Ndyuūs? Cuaacu chi n'giindiveéⁿ yā. 'Tíicā canéé nguūⁿ na libro ye^{'n}é Ndyuūs: Nduudu cuaacu chi nga^{'n}a yā, nga^{'n}a yā na núú^{'n}máⁿ í^{'n}yeēⁿdī. Ní nduudu ye^{'n}e yā ní nga^{'n}a yā ní ndíí núú^{'n}máⁿ cuaa^{'n} chi ya^{'n}ai ca ye^{'n}ē í^{'n}yeēⁿdī.

¹⁹Táámá vmné^{'n}ēe itinguuneéⁿ ndís'tii: ¿'Áá nguéé díí^{'n} cuenta 'ii^{'n}yāⁿ Israel chi judíos s'eeⁿ ye^{'n}e nduudu cuaacu ye^{'n}é Ndyuūs? Moisés mi^{'n}, 'ii^{'n}yāⁿ chi vmnááⁿ vmnaaⁿ nguēεcuneeé yā ye^{'n}e chuū, ní 'tíicā canéé nguūⁿ:

'Úú ní díí^{'n} chi cuuvi nngueé nī ye^{'n}e 'ii^{'n}yāⁿ ye^{'n}e táámá nación chi nguéé véé nación ye^{'n}é Ndyuūs. 'Úú ní díí^{'n} chi

nduuví táaⁿ nī ndúúcu 'iiⁿyāⁿ
 chí nguéé yeⁿé chí yeⁿe
 táamá nación caati caⁿá dííⁿ
 cosa chí n'daacā nduucú yā.

²⁰Ní profeta Isaías miiⁿ claro ca
 chí ngaⁿá yā ndúúcu nduudú 'cūū.
 Ndyuūs ngaⁿá yā 'tíicā:

'Iiⁿyāⁿ chí nguéé n'nuúⁿ yā 'úú
 ní indaacá yā 'úú. 'Iiⁿyāⁿ chí
 nguéé itinguuneéⁿ yā yeⁿé,
 'úú ní chíⁿí maáⁿ 'úú nanáaⁿ
 yā.

²¹Ní taachi Isaías miiⁿ ngaⁿa yā
 nanáaⁿ 'iiⁿyāⁿ yeⁿe Israel, 'tíicā
 ngaⁿa yā: Ndyuūs ngaⁿa 'tíicā:
 Nguuvi nguuvi n'doó ta'á ní yaa'ví
 'iiⁿyāⁿ chí nguéé n'giindiveéⁿ yā
 nduudu yeⁿé. Ní cheechi staava
 yeⁿé yā.

'Iiⁿyāⁿ yeⁿe Israel chí nanguáⁿai yā

11 Maaⁿ ní intiínguuneéⁿ
 ndís'ti: 'Áá dííⁿ Ndyuūs
 chí s'neéⁿ yā 'iiⁿyāⁿ Israel yeⁿe
 ndaata yeⁿé yā? Nguéé dííⁿ yā 'tíicā.
 'Úú Pablo maáⁿ 'iiⁿyāⁿ yeⁿe ndaata
 Israel 'úú ní yeⁿe ndaata yeⁿe
 Abraham 'úú, ní yeⁿé 'iiⁿyāⁿ yeⁿe
 ndaata Benjamín 'úú. ²Ndii cuááⁿ
 vmnaaⁿ Ndyuūs dííⁿ yā recibir
 'iiⁿyāⁿ yeⁿe ndaata yeⁿé yā, 'iiⁿyāⁿ
 Israel chí ndeēve yā chí cuuvi yeⁿe
 yā 'iiⁿyāⁿ. Ní ndís'ti, 'Áá nguéé
 déenu nī yeⁿe chí canéé nguūⁿ na
 libro yeⁿé Ndyuūs naachi profeta
 Elías ngaⁿangua'á yā ní dí'cuiitú
 yā Ndyuūs contra yeⁿé 'iiⁿyāⁿ
 Israel? Ní caⁿa yā 'tíicā: ³N'díí
 Señor Ndyuūs, 'iiⁿyāⁿ Israel s'eeⁿ ní
 'niiⁿnúⁿ yā saⁿá profetas yeⁿé nī ní
 dituúví yā nátaí s'eeⁿ yeⁿe nī, n'dií
 Ndyuūs chí canduuchi. Ni maaⁿ
 dámaāⁿ 'úú canéé ní 'tiicá ntúūⁿ

neⁿé yā 'caaⁿnuⁿ yā 'úú. ⁴Naati
 Ndyuūs nan'guēcútaⁿa yā yeⁿe
 profeta Elías miiⁿ, 'tíicā: Canéé lado
 yeⁿé ndeēchē mil saⁿá chí nguéé
 chiintii'yá yā nanáaⁿ santo ídolo chí
 nguuvi Baal. ⁵Ní 'tiicá ntúūⁿ yeⁿe
 tiempo 'cūū canéé duu'ví 'iiⁿyāⁿ
 yeⁿe Israel chí i'téenu yā Ndyuūs ní
 Ndyuūs ndeēve yā 'iiⁿyāⁿ s'eeⁿ. Ní
 dííⁿ yā cosa chí n'dai taavi cáava
 yā. ⁶Ní nduuti chí yeⁿé Ndyuūs
 'iiⁿyāⁿ s'eeⁿ cáávā chí Ndyuūs ní diiⁿ
 n'dai taaví yā ní ndeēve yā 'iiⁿyāⁿ
 s'eeⁿ, tuu'mi ní nguéé cáávā cosa chí
 'iiⁿyāⁿ s'eeⁿ maáⁿ yā cuuvi diiⁿ yā.
 Ní ndúúti chí cáávā cosa chí 'iiⁿyāⁿ
 s'eeⁿ cuuví dííⁿ yā, tuu'mi ní nguéé
 cáávā vaadí n'dai yeⁿé Ndyuūs chí
 yeⁿé Ndyuūs 'iiⁿyāⁿ.

⁷¿DÉε ra tuu'mi? 'Iiⁿyāⁿ Israel
 nguéé ndaaca yā de'e chí in'nuúⁿ yā.
 Naati 'iiⁿyāⁿ chí Ndyuūs ndeēve yā,
 'iiⁿyāⁿ s'eeⁿ ndaaca yā. Ní tanáⁿá
 'iiⁿyāⁿ nguéé n'giindiveéⁿ yā nduudu
 yeⁿé Ndyuūs ti ndii cheechí maáⁿ
 yā 'iiⁿyāⁿ. ⁸'Tíicā canéé nguūⁿ na
 libro yeⁿé Ndyuūs: Ndyuūs dííⁿ
 yā chí nguéé tuumicádíínuuⁿ yā
 na staava yeⁿé yā dendu'ú yeⁿe
 Espíritu N'dai yeⁿé Ndyuūs; ní dííⁿ
 yā chí nduutináaⁿ yā nguéé snaaⁿ yā
 ní veéⁿ yā nguéé 'caandiveéⁿ yā. Ní
 'tíicā 'iiⁿyāⁿ Israel ndii tiempo 'cūū.

⁹'Tiicá ntúūⁿ David ngaⁿa yā:

'Viicu yeⁿe chí che'é yā ní
 nduuvi tan'dúúca tuúví cáávā
 'iiⁿyāⁿ s'eeⁿ. Ní tiempo chí
 che'é yā ndaā enemigos yeⁿé
 yā ní nadituu'ví ya 'iiⁿyāⁿ
 s'eeⁿ. Ní 'tíicā Ndyuūs cuuvi
 dííⁿ yā castigar 'iiⁿyāⁿ s'eeⁿ.

¹⁰Ní nduutináaⁿ yā tan'dúúca chí
 cuuvi nguēe chí nguéé snaaⁿ

yā. Ní dáámí yā 'áámá nūⁿ
can'díi yā cueⁿe daāⁿmaⁿ.

**Nanguaⁿai 'iiⁿyāⁿ chi
nguéeⁿ 'iiⁿyāⁿ Israel**

¹¹Maaⁿ ní itiinguuneeⁿ ndís'tiī:
Taachi 'iiⁿyāⁿ Israel s'eeⁿ candéé
ca'la yā chí cundεεve yā caati nguéeⁿ
i'téénu yā Ndyuūs, ¿'áá 'áámá
caneé chi chindεεve yā? Nguεε
'tíicā mar 'áámá naaⁿ. Naati chó'oo
chuū caati 'iiⁿyāⁿ Israel chi judíos
s'eeⁿ nguéeⁿ n'giindiveéⁿ yā nduudu
yeⁿ'é Ndyuūs. Ní 'íicú 'iiⁿyāⁿ chi
nguéeⁿ yeⁿ'e ndaata Israel cuuvi
nánguaⁿai yā. Ní diiīⁿ chi 'iiⁿyāⁿ
yeⁿ'e ndaata Israel nngueé yā yeⁿ'e
tanáⁿ'ā 'iiⁿyāⁿ ní cu'téénu cá yā
Ndyuūs. ¹²Ní caati 'iiⁿyāⁿ Israel
s'eeⁿ nguéeⁿ ch'iindiveéⁿ yā nduudu
yeⁿ'e Ndyuūs ní chó'oo chi tuneéⁿ
'iiⁿyāⁿ yeⁿ'e núúⁿmáⁿ iⁿ'yeeⁿdī chi
cuuvi cu'teenú yā Ndyuūs. Ní sta'á
yā yeⁿ'e vaadī n'dai yeⁿ'é Ndyuūs. Ní
nduuti chi 'iiⁿyāⁿ chi nguéeⁿ yeⁿ'e
ndaata Israel cuuvi cu'téénu yā
caava 'iiⁿyāⁿ yeⁿ'e ndaata Israel
nguéeⁿ ch'iindiveéⁿ yā nduudu yeⁿ'e
Ndyuūs, tuu'mi n'dee ca n'daacā
ca yeⁿ'e nducyáácá 'iiⁿyāⁿ taachi
'iiⁿyāⁿ Israel s'eeⁿ nanguεεcúndií yā
ní cu'téénu yā nduudu yeⁿ'é Ndyuūs
taama vmnéⁿ'ēe.

¹³Maaⁿ ní neⁿ'é caāⁿmáⁿ nduucú
ndís'tiī chi nguéeⁿ 'iiⁿyāⁿ Israel
ndís'tiī. Maaⁿ chi Ndyuūs dicho'ó
yā 'úú chi 'úú ní apóstol chi candεé
nduudu yeⁿ'é yā nanááⁿ 'iiⁿyāⁿ chi
nguéeⁿ Israel s'eeⁿ. Úú deenú chi
ch'εete ntiiⁿnyuⁿ yeⁿ'é. ¹⁴Ní 'úú neⁿ'é
chi 'iiⁿyāⁿ yeⁿ'e ndaata yeⁿ'é ngueé
yā yeⁿ'e ndís'tiī niicu cu'téénu yā
Ndyuūs tan'dúúcā chi ndís'tiī i'téénu

nī Ndyuūs. Ní 'íicú cuuvi nanguaⁿai
n'duuvi 'iiⁿyāⁿ yeⁿ'e ndaata yeⁿ'é
tan'dúúcā ndís'tiī nanguaⁿai nī.
¹⁵Ní taachi Ndyuūs s'neeⁿ yā 'áámá
lado 'iiⁿyāⁿ Israel s'eeⁿ diīⁿ yā
'tíicā caati nducyaaca 'iiⁿyāⁿ yeⁿ'e
iⁿ'yeeⁿdí 'cūū chi nguéeⁿ yeⁿ'e 'iiⁿyāⁿ
Israel cuuvi cunee 'diiīⁿ yā ndúúcū
Ndyuūs. ¿Táácā cuuvi yeⁿ'e 'iiⁿyāⁿ
Israel s'eeⁿ taachi Ndyuūs cuaāⁿ
ntuúⁿ yā 'iiⁿyāⁿ Israel s'eeⁿ? Ndyuūs
nca'á yā vida cueⁿe daāⁿmaⁿ yeⁿ'é
yā lugar yeⁿ'e vaadī n'gii cueⁿ'e
daāⁿmaⁿ. ¹⁶N'giindiveéⁿ nī yeⁿ'e
chuū chi caaⁿmáⁿ: Nduuti chi ca'la
yú Ndyuūs 'áámá taaⁿ yeⁿ'e masa
yeⁿ'é pan cáávā ofrenda, 'tiicá ntúūⁿ
nducuéⁿ'ē masa yeⁿ'e pan miiⁿ ní
yeⁿ'é Ndyuūs. Ní nduuti chi ca'la yú
Ndyuūs cáávā ofrenda diiⁿ'yu yeⁿ'e
yáⁿ'á, 'tiicá ntúūⁿ nducuéⁿ'ē yáⁿ'á ní
yeⁿ'é Ndyuūs. 'Tiicá ntúūⁿ Ndyuūs
di'viicú yā 'iiⁿyāⁿ yeⁿ'e ndaata Israel
caati 'āā di'viicú yā 'iiⁿyāⁿ vmnááⁿ
vmnaaⁿ yeⁿ'e ndaata yeⁿ'é yā.

¹⁷Náⁿ'á dúuⁿnē yeⁿ'e yáⁿ'á olivo
chi canée na yáⁿ'ā 'iiⁿyāⁿ, ní 'iiⁿyāⁿ
'caaca yā ní sta'á yā dúuⁿnē yeⁿ'e
yáⁿ'á olivo chi canée icyáⁿ'ā ní diīⁿ
yā chi yeⁿ'e yáⁿ'á olivo yeⁿ'é yā.
'Tíicā ndís'tiī, 'iiⁿyāⁿ chi nguéeⁿ yeⁿ'e
ndaata Israel. Ní ndís'tiī tan'dúúcā
dúuⁿnē yeⁿ'e yáⁿ'á olivo yeⁿ'e icyáⁿ'ā
miiⁿ 'tiicá nī naati maaⁿ ní véé parte
yeⁿ'é nī ndúúcū 'iiⁿyāⁿ Israel chi
tan'dúúcā yáⁿ'á olivo chi canée
yáⁿ'ā 'iiⁿyāⁿ. Ní maaⁿ ní ndís'tiī
chi nguéeⁿ yeⁿ'e ndaata Israel cuuvi
yeⁿ'é nī nducuéⁿ'ē chi n'dai taavi
yeⁿ'e 'iiⁿyāⁿ chi Israel yā. ¹⁸Maaⁿ ní
ndís'tiī chi nguéeⁿ Israel nī, nguéeⁿ
caaⁿmáⁿ nī chi ch'εete mááⁿ nī
ndís'tiī, caati nguéeⁿ 'iiⁿyāⁿ chi Israel

yā chi tan'dúúccā chi nguéé yeⁿe yáⁿá. Ní 'iiⁿyāⁿ 'caaca yā dúuⁿnē miiⁿ, 'tííca yā. Nds'ⁿtii n'gaacú nī chi nds'ⁿtii ní tan'dúúccā 'áámá dúuⁿnē 'tííccā nds'ⁿtii. Tan'dúúccā dúuⁿnē nguéé ca'a fuerzas yeⁿe diiⁿyu yeⁿe yáⁿá naati yáⁿá ca'a fuerzas yeⁿe dúuⁿnē, 'tííccā nds'ⁿtii. Cuta'á nī fuerzas yeⁿe 'iiⁿyāⁿ chi Israel yā.

¹⁹Úú nguéé deenú nduuti chi nds'ⁿtii caaⁿmáⁿ nī 'tííccā yeⁿe chuū: 'iiⁿyāⁿ ch'iicá yā dúuⁿnē s'eeⁿ caati 'úú cuuvi canee lado yeⁿe dúuⁿnē chi ch'iicá yā. 'Úú chi nguéé Israel 'úú canee lado yeⁿe 'iiⁿyāⁿ chi Israel yā. ²⁰N'daacā ngaⁿa nī naati deenú nī chi 'iiⁿyāⁿ s'eeⁿ tan'dúúccā dúuⁿnē chi ch'iicá yā, 'tiicá yā, ti nguéé i'téenu yā Cristo. Ní maaⁿ ní nds'ⁿtii tan'dúúccā dúuⁿnē yeⁿe yáⁿá miiⁿ 'tiicá nī caati i'téenu nī Cristo. Maaⁿ ní nds'ⁿtii nguεε dííⁿ nguεε nī naati cundée nī cuidado tááccā chi 'cuεetinée nī. ²¹Caati nduuti chi Ndyuūs nguéé dííⁿ yā perdonar 'iiⁿyāⁿ Israel chi nguεε i'téenu chi tan'dúúccā dúuⁿnē yeⁿe yáⁿá, nguéé dííⁿ yā nadach'εécú yā nuuⁿndi yeⁿe nds'ⁿtii chi vmnááⁿ vmnaaⁿ tan'dúúccā dúuⁿnē chi yeⁿe yáⁿá yeⁿe icyáⁿā nduuti chi nguéé candée nī cuidado tááccā chi 'cuεetineé nī. ²²Cuin'diichí nī, tuuⁿmi Ndyuūs ní neené n'dai taavi yā ndúúccū 'iiⁿyāⁿ chi i'téenu yā naati neene chεechí ntúúⁿ yā vaa. Chεechí yā ndúúccū 'iiⁿyāⁿ ti nguéé i'téenu yā. Naati Ndyuūs ní neené n'dai taavi yā ndúúccū nī nduuti chi 'áámá cuneé nī chi cu'téenu nī. Ní nduuti chi nguéé dííⁿ nī 'tuuccā, tuuⁿmi 'tiicá ntúúⁿ Ndyuūs caⁿá yā dííⁿ yā castigar nds'ⁿtii tan'dúúccā chi ch'iicá

yā dúuⁿnē yeⁿe maaⁿ yáⁿá. ²³Ní nduuti chi 'iiⁿyāⁿ Israel cu'téenu yā Cristo, tuuⁿmi ní Ndyuūs ní cuta'á yā ní nguεεcunée dííⁿ yā chi 'iiⁿyāⁿ s'eeⁿ ní táámá vmnéⁿēe canee yā tan'dúúccā 'āā dúuⁿnē yeⁿe maaⁿ yáⁿá miiⁿ 'tííca yā. Ní véé poder yeⁿe Ndyuūs chi cuuvi dííⁿ yā 'tííccā. ²⁴Ní nduuti chi nds'ⁿtii chi nguéé 'iiⁿyāⁿ Israel nds'ⁿtii, ní Ndyuūs sta'á yā nds'ⁿtii tan'dúúccā chí n'giicá yā dúuⁿnē yeⁿe táámá yáⁿá olivo yeⁿe icyáⁿā ní dííⁿ yā chi yeⁿe yáⁿá olivo yeⁿé yā, 'tííccā nds'ⁿtii maaⁿ. 'Tiicá ntúúⁿ n'dááccā n'dai ca dííⁿ Ndyuūs ndúúccū 'iiⁿyāⁿ Israel chi vmnááⁿ vmnaaⁿ tan'dúúccā dúuⁿnē yeⁿe yáⁿá yeⁿé yā, ní cuuvi dííⁿ yā chi táámá vmnéⁿēe ní yeⁿé maaⁿ yáⁿá miiⁿ.

Yeⁿe chi nanguaⁿai 'iiⁿyāⁿ Israel yeⁿe tiempo chi cuchii

²⁵Maaⁿ ní hermanos yeⁿé, neⁿé chi nds'ⁿtii cadíínúúⁿ nī chi canúúⁿ n'de'ei. Ní nguéé nadicádíínuuⁿ nī chi deenu ca nī. 'Áámá tiempo nūuⁿ 'iiⁿyāⁿ Israel dicheεchí yā staava yeⁿé yā dámaaⁿ 'naaⁿ tiempo taachi nducyaaca 'iiⁿyāⁿ chi nguéé 'iiⁿyāⁿ Israel ní Ndyuūs ndεeve yā nducyaaca 'iiⁿyāⁿ s'eeⁿ chi neⁿé yā chi cuuvi yeⁿé yā. ²⁶Ní taachi cho'oo tiempo miiⁿ nducyááccā 'iiⁿyāⁿ Israel ní caⁿa yā cu'téenu yā caati 'tííccā canée nguūⁿ na libro yeⁿé Ndyuūs:

'Iiⁿyāⁿ chi nadanguáⁿai yā 'iiⁿyāⁿ Israel chiicá yā yeⁿe yááⁿ Sión, ní divíi yā nducuéⁿē nuuⁿndi yeⁿe 'iiⁿyāⁿ yeⁿe ndaata Israel.

²⁷Ní 'úú Ndyuūs dicuaacú compromiso yeⁿé ndúúccū

'iiⁿyāⁿ s'eeⁿ, taachi 'úú nadivií nuuⁿndi yeⁿe yā.

²⁸Ní 'iiⁿyāⁿ Israel nguéé i'téenu yā nduudu cuaacu yeⁿe Ndyuūs yeⁿe chi nadanguáⁿai yā. Ní maaⁿ ní contra yeⁿé Ndyuūs 'iiⁿyāⁿ s'eeⁿ caati ndís'tií chi nguéé 'iiⁿyāⁿ Israel ndís'tií, cuuvi yeⁿé Ndyuūs ndís'tií. Ní 'áará chi 'iiⁿyāⁿ Israel s'eeⁿ nguéé i'téenu yā Cristo, Ndyuūs dineⁿé yā 'iiⁿyāⁿ s'eeⁿ caati Ndyuūs nínɛɛvé yā 'iiⁿyāⁿ s'eeⁿ chi vmnááⁿ vmnaaⁿ chi yeⁿe ndaata yeⁿé yā. ²⁹Ní Ndyuūs nguéé ndaacadaamí yā yeⁿé 'iiⁿyāⁿ s'eeⁿ chi yaa'ví yā chi cuuvi yeⁿé yā 'iiⁿyāⁿ s'eeⁿ. Ní Ndyuūs di'viicú ntúūⁿ yā 'iiⁿyāⁿ s'eeⁿ. ³⁰Ní tiempo chi chó'oo ndís'tií chi nguéé 'iiⁿyāⁿ Israel ndís'tií, nguéé n'giindiveéⁿ nī nduudu cuaacu yeⁿe Ndyuūs naati maaⁿ ní 'iiⁿyāⁿ Israel s'eeⁿ nguéé n'giindiveéⁿ yā nduudu yeⁿé Ndyuūs. Ní Ndyuūs yá'ai yā caavā ndís'tií chi nguéé i'téenu nī. ³¹Ní 'tiicá ntúūⁿ, 'iiⁿyāⁿ Israel s'eeⁿ nguéé n'giindiveéⁿ yā nduudu cuaacu yeⁿé Ndyuūs ní dííⁿ yā 'tíicā caati cuayiivi Ndyuūs cuuvi ya'ái yā cáávā 'iiⁿyāⁿ s'eeⁿ tan'dúucā chi ya'ái yā cáávā ndís'tií. ³²Ní Ndyuūs 'āā daamá nūuⁿ s'néeⁿ yā nducyaaca 'iiⁿyāⁿ chi nguéé ch'iindiveéⁿ yā nduudu yeⁿé yā cáávā chi Ndyuūs cuuvi ya'ái yā caavā nducyaaca 'iiⁿyāⁿ.

³³Dé'ε chúúcā n'deeé cá vaadi n'dai yeⁿé Ndyuūs. Dé'ε chúúcā n'deeé cá chi tuumicádíínuuⁿ yā ndúúcū chi déénu yā. S'uuúⁿ ní nguéé cuuvi caaⁿmaⁿ yú dé'ε cuuvi chi tuumicadiinúúⁿ yā 'tíicā; ní nguéé cuuvi tuumicadiinuuⁿ yú chiíⁿ chi dííⁿ yā. ³⁴Ní 'tíicā canéé nguūⁿ

na libro yeⁿé Ndyuūs: ¿Dú'ú cuuvi túúmíicádiinūūⁿ vaadi cadíínuuⁿ yeⁿe Señor Ndyuūs? ¿Dú'ú cuuvi ca'a consejo Ndyuūs? ³⁵¿Dú'ú 'iiⁿyāⁿ ca'a yā algo Ndyuūs vmnááⁿ vmnaaⁿ ní cuayiivi Ndyuūs ca'á yā tan'dúucā chi nadí'vé yā yeⁿé? ³⁶Tanducuéⁿē dendu'ú chí véé ní Ndyuūs din'dái yā ní tee yā s'uuúⁿ tanducuéⁿē. Ní cucáávā 'iiⁿyāⁿ miiⁿ véé tanducuéⁿē dendu'ú chí yeⁿé yā. Maaⁿ ní cueⁿe daāⁿmaⁿ dich'εete yú Ndyuūs. 'Tíicā.

Ca'a yú vida yeⁿe yú Ndyuūs ní dííⁿ yú tanducuéⁿē chi neⁿé yā

12 Maaⁿ ní ndís'tií, hermanos yeⁿé, cáávā chi Ndyuūs ya'ai 'iinú yā yeⁿe ndís'tií, di'cuíítūu ndís'tií chi ca'á nī vida yeⁿe maáⁿ nī tan'dúucā 'áámá ofrenda chí canduuchi nanááⁿ Ndyuūs cáávā ntiin'nyuⁿ yeⁿé Ndyuūs. Ní dííⁿ nī ntiin'nyuⁿ chí neⁿé yā chí dííⁿ nī. Chuū chí dííⁿ nī ní cuaacu chí n'dai taavi chí inee yiinú Ndyuūs. Ní canéé chí dííⁿ nī 'tíicā. ²Ní nguéé dííⁿ nī tan'dúucā chí neⁿe 'iiⁿyāⁿ yeⁿe iⁿ'yeeⁿdí 'cūū naati cuaáⁿ nī lugar Ndyuūs chí n'daáⁿ yā vaanicadíínuuⁿ yeⁿé nī ní 'tiicá ntuūⁿ n'daáⁿ yā vida yeⁿé nī. Ní 'íicú cuuví deenú nī cheé chí Ndyuūs neⁿé yā chí dííⁿ nī, cheé chí n'daacā, cheé chí cunee yiinú Ndyuūs ní cheé chí n'dai taavi ca.

³Ní cáávā chí Ndyuūs tee yā 'úú chí n'dai taavi ntiin'nyuⁿ yeⁿé yā 'úú ní ngaⁿá ngii ca'áámá ca'aama ndís'tií chí nguéé nadacádíínuuⁿ nī chí n'gεete cá ní ngo'o ca chí canéé chí nadacádíínuuⁿ nī naati nadacádíínuuⁿ nī ní n'diichí ní yeⁿe maáⁿ nī ndúúcū

chí i'téenu nī chi Ndyuūs itée yā ndís'tiī. ⁴Caati 'tíicā tan'dúúicā 'áámá cuerpo yeⁿe 'iiⁿyāⁿ chí neené n'deeé nááⁿ chí véé yeⁿe ní nguéé dáámá ntiiⁿnyuⁿ chí yeⁿe n'deeé nááⁿ yeⁿe; ⁵'tiicā ntúūⁿ s'uuúⁿ 'áará chí neéené 'yaaⁿ yú ní s'uuúⁿ ní tan'dúúicā chí 'áámá cuerpo ti yeⁿe Cristo s'uuúⁿ, 'tíicā s'uuúⁿ ní s'uuúⁿ ní tan'dúúicā chí nduuvidaama yú 'aama yú taama yú tan'dúúicā chí n'deeé nááⁿ yeⁿe 'áámá cuerpo yeⁿe maaⁿ yú, 'tíicā s'uuúⁿ.

⁶Ní Ndyuūs tee yā yeⁿe vaadi n'dai yeⁿe yā ntiiⁿnyuⁿ chí n'dááⁿ ca'áámá ca'aama s'uuúⁿ tan'dúúicā chí neⁿe yā dííⁿ yā. Ní canee chí diiⁿ yú n'dai ntiiⁿnyuⁿ yeⁿe yú. Ní nduuti chí Ndyuūs tee yā ntiiⁿnyuⁿ yeⁿe yú chí candε yú nduudu cuaacu yeⁿe yā chí tee yā s'uuúⁿ canéé chí caaⁿmaⁿ yú nduudu miíⁿ tan'dúúicā chí i'téenu yú. ⁷Ní nduuti chí Ndyuūs tee yā s'uuúⁿ ntiiⁿnyuⁿ chí nginnee yú, tanáⁿ'ā 'iiⁿyāⁿ canee chí cunnee yú n'daacā ca. Ní s'uuúⁿ chí véé ntiiⁿnyuⁿ yeⁿe yú chí ngi'cueeⁿ yú canéé chí ca'cueeⁿ yú n'daacā. ⁸S'uuúⁿ chí dííⁿ ntiiⁿnyuⁿ chí yaa'vi nées yú 'iiⁿyāⁿ chí cu'téenu cá yā canéé chí diiⁿ yú n'daacā ca. S'uuúⁿ chí véé ca yeⁿe yú chí cuuvi ca'a yú taama yā, canéé chí ca'a yú ndúúicū núúⁿmáⁿ staava yeⁿe yú. S'uuúⁿ chí ngaⁿ'a ntiiⁿnyuⁿ yeⁿe tanáⁿ'ā s'uuúⁿ canee chí nga'a ntiiⁿnyuⁿ yú n'daacā ca. S'uuúⁿ chí ca'a yú tanáⁿ'ā s'uuúⁿ chí nguéé véé necesidades yeⁿe yā canéé chí diiⁿ yú ní yeenu yú.

**Yeⁿe chí canéé chí diiⁿ yú
ti yeⁿe Cristo s'uuúⁿ**

⁹Canéé chí dineⁿe yú 'aama yú taama yú ndúúicū núúⁿmáⁿ staava

yeⁿe yú. Ní nguéé dineⁿe yú cosa chí ngeε n'daacā naati canéé chí diiⁿ yú tanducuéⁿe chí n'daacā.

¹⁰Canéé chí dineⁿe yú 'aama yú taama yú tan'dúúicā chí 'aama vi'í yú chí cuaacu chí 'áámá yuuuⁿ yú ní dineⁿe yú 'aama yú ndúúicū taama yú.

¹¹Ní n'daacā idiiⁿ ca yú ntiiⁿnyuⁿ ní nguéé 'daand'í yú ní diiⁿ yú ntiiⁿnyuⁿ yeⁿe Señor ndúúicū núúⁿmáⁿ staava yeⁿe yú ti neⁿe yú Señor yeⁿe yú.

¹²Ní cáávā chí Ndyuūs caⁿ'á yā chí téé yā s'uuúⁿ chí cuuvi yeⁿe yú canéé chí yeenu yú. Ní taachi n'geenu yú ngii canéé chí cuchée yú ngiinū ngiinū. Ní cuéⁿe daāⁿmaⁿ canéé chí caaⁿmaⁿngua'a yú.

¹³Ní canéé chí cunnee yú 'iiⁿyāⁿ chí i'téenu yā Ndyuūs ní téé yú yeⁿe necesidades chí nguéé véé yeⁿe yā. Canéé chí cuaaⁿ yú 'iiⁿyāⁿ chí dííⁿ yā visitar s'uuúⁿ.

¹⁴Canéé chí caaⁿmaⁿ yú: Dé'ε chúúicā n'dai yeⁿe 'iiⁿyāⁿ chí nguéé n'daacā idiíⁿ yā ndúúicū s'uuúⁿ. Ní ngiica yú Ndyuūs chí di'viicú yā 'iiⁿyāⁿ s'eeⁿ ní nguéé taaⁿ yú nduucú yā.

¹⁵Ní canéé chí cuuvi yeenu yú ndúúicū 'iiⁿyāⁿ chí yeenu yā. Ní canéé chí cuεεcu yú ndúúicū 'iiⁿyāⁿ chí ngeεcú yā.

¹⁶Ní 'cuεetinee yú n'daacā ndúúicū 'áámá yú taama yú. Nguéé nadacádíínuuⁿ yú yeⁿe maaⁿ yú chí ch'εeté naati ndiicúúⁿ n'dai 'cuεetinee yú ní nguéé nadacádíínuuⁿ yú yeⁿe maaⁿ yú chí s'uuúⁿ chí deenu yú.

¹⁷Nguéé nanguεεcundii yú ní diiⁿ yú cosa chí ngeε n'daacā ndúúicū

'iiⁿyāⁿ chi 'āā dííⁿ yā cosa chi nguéé n'daacā ndúúcu yú. Diiⁿ núúⁿ yiiⁿnuⁿ yú chi diiⁿ yú dámaaⁿ chi n'daacā ndúúcu nducyaaca 'iiⁿyāⁿ. ¹⁸Ní diiⁿ yú nducuéⁿē chi n'daacā chi cuuvi diiⁿ yú caati 'diiⁿ cuuvi cunee yú nguaaⁿ nducyaaca 'iiⁿyāⁿ. ¹⁹Ní ndís'tii hermanos yeⁿé chi neⁿé taavi, nguéé diiⁿ yú castigar 'iiⁿyāⁿ naati cu'neeⁿ yú nanááⁿ Ndyuūs ní nguéé cuuvi 'cuinaaⁿ yú. Ní 'íicú Ndyuūs cā'a yā castigo 'iiⁿyāⁿ. Canéé nguūⁿ na libro yeⁿé Ndyuūs 'tíicā: 'Úú chi Señor ní ngaⁿá chi 'úú ní dííⁿ castigar 'iiⁿyāⁿ yeⁿe 'úú ní nadíí'vε yā yeⁿe chi nguéé n'daacā chi dííⁿ yā. ²⁰Naati s'uuúⁿ ní diiⁿ yú tan'dúúccā chi canéé nguūⁿ na libro yeⁿé Ndyuūs 'tíicā: Nduuti chi 'iiⁿyāⁿ chi taáⁿ yā yeⁿé nī nadich'εεcú nī yeⁿe yā. Nduuti chi cuiicu yā, ca'a nī chi che'e yā. Ní nduuti chi yaaca yā, ca'á nī chi cu'u yā. Tí caati dííⁿ nī 'túúccā, tuu'mi ní dííⁿ nī chi 'cuinaáⁿ yā yeⁿe chi dííⁿ yā chi taáⁿ yā ndúúcu nī. ²¹Maaⁿ ní cucheε yú cáávā cosa chi nguεε n'daacā chi diiⁿ yú naati cucheε yú yeⁿe tanducuéⁿē chi nguεε n'daacā cáávā chi n'daacā chi idiíⁿ yú.

13 Nducyaaca yú canee chi cu'neeⁿ veeⁿ yú yeⁿe 'iiⁿntyéⁿē caati nguéé véé mar 'áámá 'iiⁿntyéⁿē chi nguéé Ndyuūs ca'á yā 'iiⁿyāⁿ chi véé lugar yeⁿé yā chi 'iiⁿntyéⁿē. Ní Ndyuūs s'neéⁿ yā nducuéⁿē 'iiⁿntyéⁿē chi véé na lugar yeⁿe yā. ²Ní 'iiⁿyāⁿ chi nguéé idiíⁿ yā chi ngaⁿa 'iiⁿntyéⁿē 'tiicá ntúūⁿ 'iiⁿyāⁿ ní contra yeⁿe chi Ndyuūs ngaⁿa ntiíⁿnyúⁿ yā. Ní 'iiⁿyāⁿ chi dííⁿ yā 'túúccā idinuuⁿndí yā ní cuuví yā condenado. ³Ní 'iiⁿyāⁿ

chi n'daacā idiíⁿ yā nguéé canee chi dííⁿva'á yā yeⁿe 'iiⁿntyéⁿē naati 'iiⁿyāⁿ chi nguéé n'daacā idiíⁿ yā 'va'á yā yeⁿe 'iiⁿntyéⁿē. ¿Áá neⁿé nī chi nguéé 'va'á nī yeⁿe 'iiⁿntyéⁿē? Dííⁿ nī chi n'daacā ní 'iiⁿntyéⁿē miiⁿ ní cuuví ngaⁿá yā chi n'daacā idiíⁿ nī, ⁴caati 'iiⁿntyéⁿē chi ngaⁿa yā ntiíⁿnyuⁿ dichíí'vε Ndyuūs cáávā chi cuuvi n'daacā yeⁿé nī. Naati nduuti chi idiíⁿ nī chi nguéé n'daacā, tuu'mi ní dííⁿva'á nī yeⁿe 'iiⁿntyéⁿē. Caati cuaacu chi 'iiⁿntyéⁿē cuuvi dííⁿ yā castigar 'iiⁿyāⁿ tii 'iiⁿntyéⁿē ní véé poder yeⁿe yā. 'Iiⁿntyéⁿē ní dichíí'vε Ndyuūs ní canéé chi dííⁿ yā dendu'ú chi cuaacu. Ní dííⁿ yā castigar 'iiⁿyāⁿ caati Ndyuūs nguéé inee yiinú yā yeⁿe 'iiⁿyāⁿ chi nguéé n'daacā idiíⁿ yā. ⁵Ní cáávā chuū canee chi 'caandiveéⁿ nī chi ngaⁿa 'iiⁿntyéⁿē nguéé dámaaⁿ caavā chi cuuví nī castigo ti cáávā deenú nī chi n'daacā chi nacadiinúúⁿ nī na staava yeⁿé nī. ⁶Ní 'tiicá ntúūⁿ caavā chúū, ca'á nī tuumí cobrador yeⁿē gobierno. 'Iiⁿntyéⁿē miiⁿ dichíí'vε Ndyuūs taachi dííⁿ yā ntiíⁿnyuⁿ yeⁿé yā.

⁷Canee yú chi ca'a yú tuumí cobrador yeⁿē gobierno. Canee yú chi ca'a yú tuumí yeⁿe yáⁿāa yeⁿe yú cobrador miiⁿ. Canee yú chi diiⁿ yú chí cu'teenu yú 'iiⁿyāⁿ 'iiⁿntyéⁿē ní diiⁿ yú estimar 'iiⁿyāⁿ s'eeⁿ. ⁸Nguéé cun'diicú nī yeⁿē mar 'áámá 'iiⁿyāⁿ nguéé du'ú vεε. Dámaaⁿ canee chi dineⁿe yú nducyaaca 'iiⁿyāⁿ. 'Iiⁿyāⁿ chi dineⁿé nducyaaca 'iiⁿyāⁿ dííⁿ yā tan'dúúccā chi ngaⁿa ley yeⁿe yú. ⁹Ní mandamiento yeⁿē ley yeⁿe yú ní chuū chiiⁿ: Nguéé caⁿá nī ndúúccū n'daata o isaⁿā chi

nguéeé yeⁿé nī. Nguéeé 'caaⁿ'núⁿ nī 'iiⁿ'yāⁿ. Nguéeé diduucú nī. Nguéeé caaⁿ'maⁿ nī nduudu yaadi yeⁿe mar 'áámá 'iiⁿ'yāⁿ. Nguéeé dinéⁿe nī dendu'ū chi véé chi yeⁿe táámá yā. Ní nducuéⁿē mandamiento 'cūū ndúúcu tanáⁿā mandamiento yeⁿē ley yeⁿe yú chi véé, ní cuuví cuaacú nduudu ní tuumicádíínuuⁿ yú na nduudú 'cūū: Dinéⁿe nī 'iiⁿ'yāⁿ niiⁿ'nuúⁿ vaacú nī tan'dúúca chi dineⁿé nī maáⁿ nī. ¹⁰Iiⁿ'yāⁿ chi dineⁿé yā 'iiⁿ'yāⁿ niiⁿ'nuúⁿ vaacú yā nguéeé cuncáā idiíⁿ yā ndúúcu yā. Ni 'tíicā. Taachi dineⁿe yú 'iiⁿ'yāⁿ diiⁿ yú tan'dúúca chi ngaⁿa ley yeⁿe yú.

¹¹N'deeé cá ní nguéeé dámaāⁿ chúū. Nadacádíínuuⁿ yú yeⁿe nguuvi s'eeⁿ chi canee yú iⁿ'yeeⁿdí 'cūū. Canéé chi 'cuεetineé ngiinu yú caati yeⁿe hora chi nguaⁿ'ai yú ní 'āā snee niiⁿ'nuúⁿ cá yeⁿe s'uuúⁿ nguéeé ti taachi caama i'téenu yú Cristo. ¹²Maaⁿ ní hora miiⁿ tan'dúúca chi 'āā chéé cuuvi dεeve ní 'āā cūchii nguuvi taachi ndaá Cristo maaⁿ. Ní nguéeé canee chi diiⁿ yú dendu'ū chi nguεε n'daacā chi diiⁿ yú tan'dúúca chi na maaíⁿ, naati n'daacā 'cuεetinee yú tan'dúúca chi canee yú na dεeve yeⁿé Ndyuūs ní n'daacā canee cáávā s'uuúⁿ. ¹³Ní 'cuεetinee yú n'daacā tan'dúúca chi canéé chi diiⁿ yú na dεeve yeⁿé Ndyuūs. Nguéeé cuuvi cuu'vi yú ní nguéeé idiiⁿ yú 'viicu yeⁿē chi che'e yú ndúúcu n'deeé n'dái ruido. Ní nguéeé 'cuáaⁿ yú caⁿ'a yú ndúúcu n'daataa o isaⁿā chi nguéeé yeⁿe yú. Ndíí nguéeé ndúú canee yú ndúúcu vicio yeⁿe yú. Nguéeé 'caaⁿ'va yú ní nguéeé nguεε yú yeⁿē táámá 'iiⁿ'yāⁿ.

¹⁴Naati 'cuεetinee yú n'daacā ní diiⁿ yú tan'dúúca chi Señor Jesucristo yeⁿe yú diíⁿ yā. Ní nguéeé diiⁿ yú tan'dúúca chi neⁿe maaⁿ cuerpo yeⁿe yú.

Nguéeé caaⁿ'maⁿ nī yeⁿē chi idiiⁿ hermano yeⁿé nī

14 Ndís'tii ní cuta'á nī nguaaⁿ ndís'tii hermanos yeⁿe yú chí duūva yā yeⁿe chi i'téenu yā; ní nguéeé néené n'deēe caaⁿ'máⁿ nī nduucú yā yeⁿe chi nadacádíínuuⁿ yā chi nguéeé ituumicádíínuuⁿ yú yeⁿē. ²Ti 'tíicā, véé 'iiⁿ'yāⁿ chi i'téenu yā Ndyuūs ní nadicádíínuuⁿ yā chi cuuvi che'é yā nducuéⁿē chi véé. Ní náⁿ'á 'iiⁿ'yāⁿ chi nguéeé i'téenu n'daacā yā ní nguéeé cuuvi che'é yā nducuéⁿē. Taachi caⁿ'á yā che'é yā níí'vēē nguéeé che'e yā yuūte cáávā religión yeⁿe yā. ³Iiⁿ'yāⁿ chi che'é yā tanducuéⁿē chi véé nguéeé cánéé chi caaⁿ'máⁿ yā yeⁿe chi nguεε ineeⁿ yiinú yā yeⁿé 'iiⁿ'yāⁿ chi nguéeé nge'é yā nducuéⁿē. Ní 'iiⁿ'yāⁿ chi nguéeé che'é yā nducuéⁿē nguéeé canéé chí n'diichí yā 'iiⁿ'yāⁿ chi che'e tanducuéⁿē chi véé caati Ndyuūs sta'á ntúuⁿ yā 'iiⁿ'yāⁿ s'eeⁿ chi cuuvi yeⁿé yā 'iiⁿ'yāⁿ. ⁴Ndís'tii, ¿du'ū ndís'tii chi n'diichí nī chi diiⁿ 'iiⁿ'yāⁿ chi dichíí'vē táámá yā? nduuti chi diíⁿ yā chi n'daacā o chi nguéeé n'daacā. Dámaāⁿ 'iiví yā canéé chi n'diichí yā 'iiⁿ'yāⁿ chi dichíí've yā. Ní n'daacā cuuvi canee caavá yā, caati Señor Ndyuūs yeⁿe yú cuuví diíⁿ yā chi canéé n'daacā yeⁿé yā caati Señor Ndyuūs véé poder yeⁿé yā chi inneé yā 'iiⁿ'yāⁿ chi dichíí've yā.

⁵Ní 'tiicá ntúūⁿ, 'áámá 'iiⁿ'yāⁿ nadacádíínuuⁿ yā chi 'áámá nguuvi

ní ch'εete ca nguéé ti táámá nguuvi. Táámá 'iiⁿyāⁿ nadacadíínuuⁿ yā chi 'āā daamá nūuⁿ nducuéⁿē nguuvi. Ní ca'áámá ca'aama nī ní canéé nī tan'dúúcā chi diitu nadicadíínuúⁿ nī. ⁶Iiⁿyāⁿ chi dííⁿ yā cuenta chi 'áámá nguuvi ní ch'εete ca nguéé ti tanáⁿā nguuvi, 'iiⁿyāⁿ miiⁿ nadicadíínuuⁿ yā 'tíicā cáávā chi dich'εeté yā Señor Ndyuūs yeⁿé yā. 'Iiⁿyāⁿ chi nadicadíínuuⁿ yā dáámá nūuⁿ nducuéⁿē nguuvi 'tiicá ntúūⁿ dííⁿ yā cáávā chi dich'εeté yā Señor Ndyuūs yeⁿé yā. Ní 'iiⁿyāⁿ chi nguéé che'é yā yeⁿe tanducuéⁿē chi véé dííⁿ yā 'túúcā cáávā chi i'téenu yā Señor ní ca'á yā gracias Ndyuūs cáávā chi che'e yā. Ní 'tiicá ntúūⁿ 'iiⁿyāⁿ chi che'é yā yeⁿe tanducuéⁿē chi véé dííⁿ yā 'túúcā cáávā chi i'téenu yā Señor ní 'tiicá ntúūⁿ ca'á yā gracias Ndyuūs cáávā chi che'e yā.

⁷Ní 'tíicā mar 'áámá s'uuúⁿ nguéé sндуuchi yú cucáávā maaⁿ yú ndíí nguéé ndúú 'cuūvi yú cucáávā maaⁿ yú. ⁸Ndúúti chi sндуuchi yú, sндуuchi yú cáávā Señor. Ní nduuti chi 'cuūvi yú, 'cuūvi yú cáávā Señor. Maaⁿ ní ndúúti chi sндуuchi yú o n'díi yú yeⁿe Señor s'uuúⁿ. ⁹Ní Cristo ch'ii yā ní nduuchi ntúúⁿ yā yeⁿe nguaaⁿ tináⁿā caati cuuví yā Señor yeⁿe tináⁿā, ní 'tiicá ntúūⁿ yeⁿē 'iiⁿyāⁿ chí sндуuchi.

¹⁰Maaⁿ ní dii, ¿de'ē cúúví chí n'díichí nuuⁿndi yeⁿe hermano yeⁿē di? ¿O dé'ē cúúví chí nguεε neⁿe di hermano yeⁿē di? 'Tíicā nducyaaca yú canee chi naⁿa yú nanááⁿ Cristo. Ní Cristo miiⁿ caⁿá yā n'diichí yā nuuⁿndi yeⁿe yú. ¹¹Canéé nguūⁿ na libro yeⁿé Ndyuūs 'tíicā:

Cuaacu níⁿnyúⁿ tan'dúúcā chi 'úú chí canduuchí, ngaⁿa

Señor Ndyuūs, nducyáácá 'iiⁿyāⁿ canéé chi cáántii'yā yā nanáaⁿ 'úú, ní nducyaaca yā canee chi caaⁿmáⁿ yā chi 'úú ní Ndyuūs 'úú.

¹²Ní 'tíicā vaa. Ca'áámá ca'aama s'uuuⁿ canee chi ca'a yú cuenta nanááⁿ Ndyuūs yeⁿe chi maaⁿ yú diiⁿ yú.

Nguéé dííⁿ nī chi hermano yeⁿé nī dinuuⁿndí yā

¹³Cáávā chuū nguéé canéé chi n'diichi yú yeⁿe chi diiⁿ hermanos yeⁿe yú. Nguéé idiíⁿ yú 'túúcā. Canéé chi nadacadíínuuⁿ nī chi nguéé idiíⁿ nī mar 'áámá naaⁿ chi hermanos yeⁿé nī nguéé cūnee yiínú yā ní cuuvá yā na nuuⁿndi. ¹⁴Maaⁿ ní chi 'úú ni yeⁿé Jesucristo 'úú, deenú chi cuaacu chi nguéé véé mar 'áámá dendu'ū chi nguéé n'daacā yeⁿē maááⁿ. Ní nduuti chi 'iiⁿyāⁿ nadacadíínuuⁿ yā chi 'áámá dendu'ū nguéé n'daacā, tuu'mi ní chuū ní cáávā 'iiⁿyāⁿ miiⁿ cuaacu chi nguéé n'daacā. ¹⁵Ní nduuti chí cáávā 'áámá dendu'ū chi che'é nī ní dííⁿ nī chi hermano yeⁿé nī cuuvi ya'ái yā, tuu'mi ní nguéé dííⁿ nī 'túúcā cáávā chi dineⁿé nī hermano yeⁿé nī. Nguéé dííⁿ nī chi cuuvi ndaí hermano yeⁿe nī cáávā 'áámá dendu'ū chi che'é nī caati Cristo ní ch'ii yā cáávā 'iiⁿyāⁿ miiⁿ. ¹⁶Nguéé dííⁿ nī cosas chi 'iiⁿyāⁿ cuuvi caaⁿmáⁿ yā yeⁿe chi ndís'tii chi nguéé n'daacā idiíⁿ nī yeⁿe chi ndís'tii deenú nī chi n'daacā. ¹⁷Naati chíⁿ chi yeⁿē Ndyuūs chi ngaⁿa ntiíⁿnyuⁿ yeⁿē nguéé yeⁿē chi nge'e yú ndúúcū chi ngi'i yú. Ndyuūs ngaⁿa ntiíⁿnyúⁿ yā

ye^{ne} dendu'ū chi cuaacu ndúúcū vaadi 'diiⁿ ndúúcū vaadi yeenú chi Espíritu N'dai ye^{ne}é Ndyuūs tee yā s'uuúⁿ. ¹⁸Ní 'iiⁿyāⁿ chi dichíⁿvē Cristo ní diíⁿ yā dendu'ū chi 'túúcā, 'iiⁿyāⁿ miiⁿ diíⁿ yā tan'dúúcā chi ne^{ne}e Ndyuūs. 'Tiicá ntuūⁿ 'iiⁿyāⁿ ye^{ne}e iⁿ'yeeⁿdí 'cūū ngaⁿa yā chi n'daacā idiiⁿ 'iiⁿyāⁿ miiⁿ.

¹⁹Maaⁿ ní 'tíicā canee chi diiⁿ yú. Canéé chi diiⁿ yú dendu'ū cáávā chi 'iiⁿyāⁿ 'cuaeⁿtinée yā ndúúcū vaadi 'diiiⁿ ní ndúúcū chi diiⁿ yú cunnee yú 'aama yú taama yú chi cuⁿtéenu ca yú ye^{ne}e Ndyuūs. ²⁰Ní nguéé ndituuví nī dendu'ū ntiⁿ'nyuⁿ chi diiⁿ Ndyuūs cáávā 'áámá dendu'ū chi ngeⁿé nī. Cuaacu chi tanducué^{ne} dendu'ū ní deeve naati nguéé n'daacā idiiⁿ yú. Nduuti chi che'e yú 'áámá dendu'ū, ní cáávā chi che'e yú tuuⁿ'mi ní diiⁿ yú chi táámá 'iiⁿyāⁿ dinuuⁿndí yā. ²¹N'daacā ca chi nguéé diiⁿ yú mar 'áámá dendu'ū chi diiⁿ chi hermano ye^{ne}e yú cuuvi dinuuⁿndí yā o diiⁿ chi nguéé i'téenu yā n'daacā. Nguéé che'e yú yuutē o nguéé ngiⁿ'i yú vino o nguéé diiⁿ yú 'áámá dendu'ū chi 'túúcā chí diiⁿ chi hermano ye^{ne}e yú nduuví duūva yā ye^{ne}e chi i'téenu yā. ²²Ní ye^{ne}e chi ndís'tiⁿ i'téenu nī ye^{ne}e chi ngaⁿ'a maáⁿ nī canéé chi i'téenu nī ye^{ne}e nanááⁿ Ndyuūs. De'e chúúcā n'dai taavi 'iiⁿyāⁿ chi staava ye^{ne}é yā nguéé diiⁿ condenar maáⁿ yā cáávā cosa chi diiⁿ yā chi nguéé n'daacā. ²³'Iiⁿyāⁿ chi che'é yā 'áámá dendu'ū ní n'dee nadicadínuuⁿ yā ye^{ne}e nduuti chi n'daacā o chi nguéé n'daacā cuuví yā condenado caati nguéé ngeⁿé yā ndúúcū núúⁿ'máⁿ staava ye^{ne}é yā. Ní nducué^{ne} chi diiⁿ

yú taachi nguéé deenu yú nduuti chi n'daacā o nguéé n'daacā, tuuⁿ'mi ní dinuuⁿndi yú.

Dinéⁿe yú 'iiⁿyāⁿ niiⁿ'nuⁿ ná vaacu yú nguéé dinéⁿe yú maáⁿ yú

15 S'uuúⁿ chi i'téenu ca yú Jesucristo canee chi cunnee yú 'iiⁿyāⁿ chi duuⁿ'vi i'téenu yā Jesucristo. Ní nguéé diiⁿ yú tan'dúúcā chi ne^{ne}e maaⁿ yú chi canee n'daacā yú. ²Ní ca'áámá ca'aama yú canéé chi diiⁿ yú chi n'daacā ndúúcū 'iiⁿyāⁿ niiⁿ'nuúⁿ vaacu yú cáávā chi n'daacā canéé yā ní cuuvi cuⁿtéenu cá yā. ³Deenu yú chi ní nguéé Cristo diíⁿ yā chi ne^{ne}e maáⁿ yā ti 'tíicā tan'dúúcā chi canéé nguūⁿ na libro ye^{ne}é Ndyuūs. Cristo ngaⁿ'á yā ye^{ne}e maáⁿ yā nanááⁿ Ndyuūs: Chííⁿ chi nguéé n'daacā chi 'iiⁿyāⁿ ngaⁿ'a ye^{ne}e di ní canéé vmnaaⁿ ye^{ne}é. ⁴Ní nducué^{ne} chi vmnááⁿ vmnaaⁿ canéé nguūⁿ na libro ye^{ne}é Ndyuūs ní canéé nguūⁿ caavā chi 'cuaeⁿtinée yú; ní cáávā chi 'áámá canee yú ndúúcū chi i'téenu yú ní cáávā chi diiⁿ animar s'uuúⁿ chi cunnee ngiinu yú ye^{ne}e chi cuuvi ye^{ne}e yú. 'Tíicā diiⁿ nduudu ye^{ne}é Ndyuūs cáávā s'uuúⁿ. ⁵Ndyuūs chi tee yā vaadi yeenú s'uuuⁿ ndúúcū chi cunnee ngiinu yú chi cuuvi ye^{ne}e yú, Ndyuūs ní innéé yā ndís'tiⁿ chi cuuvi 'diiⁿ 'diiiⁿ 'cuaeⁿtinée nī 'áámá nī ndúúcū taama nī tan'dúúcā Cristo ne^{ne}e yā chi diíⁿ nī. ⁶Tuuⁿ'mi ní nducyáácá nī tan'dúúcā chi 'áámá nī cuuvi dich'eté nī Ndyuūs chi chiidá Señor Jesucristo ye^{ne}e yú.

'Iiⁿyāⁿ candéé yā nduudu cuaacu ye^{ne}e Cristo nanááⁿ 'iiⁿyāⁿ chi nguéé ye^{ne}e ndaata Israel

⁷Ní 'tíicā 'cuaáⁿ nī ndúúcū núúⁿ'máⁿ staava ye^{ne}é nī 'áámá nī

taama nī tan'dúucā Cristo 'cuúⁿ yā s'uuúⁿ ní 'iicu cuuvi dich'εεte yú Ndyuūs. ⁸Ní chuū maaⁿ ngaⁿá ngií ndís'tií. Cristo ndaa yā iⁿ'yeeⁿdí 'cūū chi dichíí'vé yā 'iiⁿ'yāⁿ Israel s'eeⁿ ní idicuaacú yā chi Ndyuūs caⁿ'a yā chi ca'a yā chiida yú tiempo chi 'āā chó'oo. Ní 'tíicā Cristo ch'iⁿ'í yā chi Ndyuūs ní dííⁿ yā tanducueⁿ'ē chi caⁿ'a yā chi dííⁿ yā. ⁹Ní 'tiicá ntúūⁿ ndái yā cáávā chi tanáⁿ'ā 'iiⁿ'yāⁿ chi nguéé yeⁿ'e ndaata Israel cuuvi dich'εεté yā Ndyuūs caati Ndyuūs ya'āi 'iinú yā yeⁿ'e tanáⁿ'ā 'iiⁿ'yāⁿ dendú'ū. Ní 'tiicá ntúūⁿ canéé nguūⁿ na libro yeⁿ'é Ndyuūs:

Cáávā chuū 'úú ní dich'εεté n'dií Señor nguaaⁿ na nducyáácá nación, ní 'úú ní caatá canciones chi dííⁿ honrar n'dií.

¹⁰Ni táámá cuaaⁿ naachi canéé nguūⁿ na libro yeⁿ'e Ndyuūs ngaⁿ'a 'tíicā:

'Iiⁿ'yāⁿ yeⁿ'e nducyáácá nación canéé chi yeenú yā ndúucū 'iiⁿ'yāⁿ chi Ndyuūs nndeεvé yā chi cuuvi yeⁿ'é yā 'iiⁿ'yāⁿ s'eeⁿ.

¹¹Táámá cuaaⁿ yeⁿ'e libro yeⁿ'é Ndyuūs ngaⁿ'a 'tíicā:

'Iiⁿ'yāⁿ yeⁿ'e nducyáácá nación canee chi dich'εεté yā Ndyuūs, ní nducyáácá yā ngaⁿ'á yā chí n'dií Ndyuūs ní ch'εεte n'dai n'dií.

¹²Ní 'tiicá ntúūⁿ canéé nguūⁿ na libro yeⁿ'é Ndyuūs naachi profeta Isaías dingúuⁿ yā 'tíica yeⁿ'e 'iiⁿ'yāⁿ chi Ndyuūs ngaⁿ'á yā chi caⁿ'á yā chi dichó'o yā:

'Úú idifⁿ chi ndaa 'iiⁿ'yāⁿ yeⁿ'e ndaata yeⁿ'e saⁿ'ā Isaías, ní 'iiⁿ'yāⁿ miiⁿ ncuééⁿ yā chi gobernador chi caaⁿ'maⁿ

ntiiⁿ'nyuⁿ yā yeⁿ'ē nducueⁿ'ē nación. Ní véé chi 'iiⁿ'yāⁿ s'eeⁿ ní cūnee ngiinú yā nanáaⁿ yā cáávā chi caⁿ'a yā chi diiⁿ yā.

¹³Ní Ndyuūs chi ca'á yā ndís'tií chi véé chi cūnee ngiinú ní nanáaⁿ yā, neⁿ'é chi téé yā ndís'tií n'dee n'dái vaadi yeenú ndúucū vaadi 'diiⁿ, ti ndís'tií ní i'téenu ní Jesucristo. Caati cáávā poder yeⁿ'ē Espíritu N'dai yeⁿ'é Ndyuūs cuuvi cá ní cūnee ngiinu cá ní yeⁿ'e chi cuuvi yeⁿ'é ní.

¹⁴Ndís'tií hermanos yeⁿ'é, 'úú ní deenú chi cuaacu chi ndís'tií ní dííⁿ ní dendu'ū chi n'dai. Ní ndís'tií ní 'iiⁿ'yāⁿ chi deenu ndís'tií. Ní deenú ní ca'a ní consejo 'áamá ní ndúucū taama ní. ¹⁵Naati maaⁿ ní na carta 'cūū 'úú diitu idinguúⁿ n'dee n'dái cá yeⁿ'é ní yeⁿ'e dendu'ú 'cūū caati ndís'tií ní cuuvi n'gaacu ní yeⁿ'ē chi 'āā deenú ní. Chuū ní dingúuⁿ chεεchi caati Ndyuūs chí n'dai taavi nduucú ní tee yā 'úú yeⁿ'e chi n'dai taavi yeⁿ'é yā chí dííⁿ. ¹⁶Ní 'úú ní dichíí'vé Cristo 'úú nguaaⁿ 'iiⁿ'yāⁿ chi nguéé Israel yā. Ní nguaaⁿ 'iiⁿ'yāⁿ miiⁿ 'úú dííⁿ ntiiⁿ'nyuⁿ yeⁿ'ē chi ngaⁿ'á nduudu cuaacu yeⁿ'e evangelio chi nduudu ngai yeⁿ'e Jesucristo chi nadanguáⁿ'āi 'iiⁿ'yāⁿ. Ní 'tíicā cuuvi candéé 'iiⁿ'yāⁿ chí nguéé Israel yā nanáaⁿ Ndyuūs tan'dúucā chi ofrenda n'dai yā chi Ndyuūs 'cuaáⁿ yā 'iiⁿ'yāⁿ s'eeⁿ, caati Espíritu N'dai yeⁿ'é Ndyuūs s'née yā 'iiⁿ'yāⁿ s'eeⁿ cáávā ntiiⁿ'nyuⁿ yeⁿ'é Ndyuūs.

¹⁷Ni 'úú ní cáávā chi i'teenú Jesucristo, 'úú ní yeenú chi dííⁿ ntiiⁿ'nyuⁿ n'dai yeⁿ'é Ndyuūs. ¹⁸Tí 'úú ní nguéé du'ū véε ngaⁿ'á, dámaaⁿ

chíⁿ chi Cristo díⁿ yā cáāvā 'úú. Ní 'íicú 'iiⁿyāⁿ chi nguéé Israel yā cuuvi cu'téénu yā Ndyuūs. Ní chúⁿ idiíⁿ cáāvā nduudu cuaacu chi ngaⁿá ní cáāvā nducuéⁿē chi díⁿ. ¹⁹Ní 'úú ní ngāⁿa cuaacú tanducuéⁿē yeⁿe evangelio yeⁿe Cristo nducuéⁿē yāāⁿ taachí chōó ndíⁿ yāāⁿ Jerusalén ndii yáⁿāa Ilírico. Ní díⁿ ntiíⁿnyuⁿ yeⁿé ndúúⁿcū poder yeⁿe Espíritu N'dai yeⁿé Ndyuūs, ndúúⁿcū señales chi inaaⁿ yú ndúúⁿcū vaadí n'giinu. ²⁰Ní idiíⁿ ca ntiíⁿnyuⁿ caati cuuvi caaⁿmáⁿ nduudu cuaacu chi nadanguaⁿāi 'iiⁿyāⁿ ndii nducuéⁿē yāāⁿ naachi 'āa cuéé 'caandivéⁿē yā chi duuchí Cristo, caati 'úú nguéé neⁿé caaⁿmáⁿ nduudu cuaacu yeⁿe Cristo naachi táámá yā 'āa candéé yā nduudu miíⁿ ní díⁿ yā ntiíⁿnyuⁿ yeⁿe Cristo. ²¹Naati neⁿé díⁿ tan'dúúⁿcā chi canéé nguūⁿ na libro yeⁿé Ndyuūs 'tíicā:

'Iiⁿyāⁿ chi 'aa cuéé ndaa tááma yā nanáaⁿ yā chi caaⁿmáⁿ yā yeⁿe Cristo, 'iiⁿyāⁿ s'eeⁿ cuuví cadíínuuⁿ yā yeⁿé yā. Ní 'iiⁿyāⁿ chi mar 'áámá vmnéⁿēe nguéé n'giindivéⁿē yā yeⁿe Cristo ní 'caandivéⁿē yā ní cuuvi tuumicadíínuuⁿ yā yeⁿe yā.

Pablo neⁿé yā caⁿa yā na yāāⁿ Roma

²²Neené n'deeⁿ cuuví nadicadíínuúⁿ chi neⁿé chíⁿ nanááⁿ ndís'tií naati nguéé chíⁿ ndāa. ²³Naati maaⁿ ní 'āa ch'iínū ntiíⁿnyuⁿ yeⁿé na yāāⁿ s'uuⁿ. Néené n'deeⁿ nduūyú chi neⁿé ndaá n'diichí ndís'tií. ²⁴Ní neⁿé naⁿá ndii yáⁿāa España ní taachi caⁿá cyúúⁿí neⁿé n'diichí ndís'tií ní cuneé nducú

ní 'áámá tiempo nūuⁿ. Ní cuayiivi chi yeenú chi caneé ndúúⁿcū ndís'tií neⁿé chí ndís'tií cunneé ní 'úú taachi naⁿá ndii yāāⁿ Roma. ²⁵Maaⁿ ní caⁿá na yāāⁿ Jerusalén ní ndéé ofrenda chí cunneé hermanos Israel yeⁿe yú chi i'téénu yā Cristo. ²⁶Caati hermanos yeⁿe yú yeⁿe yáⁿāa Macedonia ndúúⁿcū hermanos yeⁿe yú yeⁿe yáⁿāa Acaya maáⁿ yā neⁿé yā caⁿá yā ofrenda ní nadacadíínuuⁿ n'daaca yā taachi staⁿá yā 'aama ofrenda yeⁿe tuumí nguaaⁿ yeⁿé yā chí dichó'o yā tuumi miíⁿ yeⁿe hermanos yeⁿe yú chí snée yā na yāāⁿ Jerusalén, yeⁿe hermanos chí pobre yā chí nguéé véé necesidades yeⁿe yā. ²⁷Ní 'tíicā díⁿ yā naati cuaacu nííⁿnyúⁿ hermanos canéé chí cunneé yā hermanos Israel s'eeⁿ chí pobre yā chí snée yā na yāāⁿ Jerusalén caati hermanos Israel s'uuⁿ ní 'āa diíⁿ yā chí hermanos chí nguéé Israel yā staⁿá yā yeⁿe dendú'ū chí n'dai chí yeⁿe Espíritu N'dai yeⁿé Ndyuūs. Ní cáāvā hermanos Israel yeⁿe yú 'túúⁿcā díⁿ yā hermanos chí nguéé Israel yā ndúúⁿcū chí n'deeⁿ n'dái yeⁿé yā canéé chí cunneé yā 'iiⁿyāⁿ Israel chí i'téénu yā Cristo. ²⁸Maaⁿ ní taachi 'cuiínū díⁿ asunto 'cūū ní taachi ngaⁿá ofrenda 'cūū hermanos Israel, tuuⁿmi ní naⁿá na yáⁿāa España. Ní taachi caⁿá cyúúⁿí ní ndaá na yāāⁿ yeⁿé ní, choó n'diichí ndís'tií. ²⁹Ní deenú chí taachi ndaá nanááⁿ ndís'tií seguro chí ndaá ndúúⁿcū tanducuéⁿē chí n'dai taavi chí véé chí yeⁿe nduudu n'dai yeⁿé Cristo.

³⁰Maaⁿ ní ndís'tií hermanos yeⁿé di'cuiitú ndís'tií cáāvā Señor

Jesucristo ye^{ne} yú ní cáávā Espíritu N'dai ye^{ne} é Ndyuūs chi diné^{ne} e yā s'uuúⁿ chi 'tiicá ntúūⁿ ndís'tiī caaⁿmaⁿngua'a cá nī cáávā 'úú. Ní 'úú ngaⁿangua'á chi Ndyuūs cunnée yā 'úú. ³¹Caaⁿmaⁿngua'á nī chi Ndyuūs nadanguáⁿai yā 'úú ye^{ne} e ta'a 'iiⁿyāⁿ Israel chi snée yā na yáⁿāa Judea, 'iiⁿyāⁿ chi nguéé i'téenu yā Cristo. Ní caaⁿmaⁿngua'á nī chi ntiiⁿnyuⁿ chi dííⁿ cáávā hermanos chi snée yā na yāⁿ Jerusalén, Ndyuūs inee yiinú yā ntiiⁿnyuⁿ chi dííⁿ. ³²Ní 'íicú nduuti chi Ndyuūs ne^{ne} é yā, 'úú ní yeenú taachi ndaá nanááⁿ ndís'tiī ní cuntaaviⁿtuūnúú ndúúcu ndís'tiī. ³³Ne^{ne} é chi Ndyuūs téé yā nducyaaca ndís'tiī vaadí 'diiⁿ chi 'cuētinéé 'dííⁿ nī. 'Tíicā.

Pablo dicho'ó yā, N'dai ndís'tiī, hermanos ye^{ne} é yā

16 'Úú ní ngaⁿá ngii ndís'tiī chi 'cuaáⁿ nī Febe chi hermana ye^{ne} e yú. N'daata miiⁿ dichí've yā 'iiⁿyāⁿ ye^{ne} e yáacū chi canée na yāⁿ Cencrea. ²Ní n'daacā 'cuaáⁿ nī n'daata miiⁿ ndúúcu chi duuchi Señor ye^{ne} e yú, tan'dúúca chi canée chi 'cuaáⁿ nī hermanos ye^{ne} e yú chi i'téenu yā Cristo. Ní cunnée nī n'daata miiⁿ ye^{ne} e tanducue^{ne} é chi ne^{ne} e tá ti n'daata miiⁿ neené 'yaaⁿ 'iiⁿyāⁿ chinnee tá 'iiⁿyāⁿ. 'Tiicá ntúūⁿ chinnee tá 'úú.

³Ní ndís'tiī caaⁿmaⁿ nī hermano Aquila ndúúcu n'daataá Priscila chi n'daata ye^{ne} é yā, N'daí ndís'tiī. 'Iiⁿyāⁿ s'eeⁿ idííⁿ yā ntiiⁿnyuⁿ ye^{ne} e Señor Jesucristo dáámá nduucú. ⁴'Iiⁿyāⁿ s'eeⁿ n'geenú yā ngii cáávā 'úú ndíí chi cuuvi 'cuūvi yā cáávā

chi cuuvi nadanguáⁿai yā 'úú. Ní 'úú ní ca'á 'iiⁿyāⁿ s'eeⁿ gracias. Ní nguéé dámaāⁿ 'úú, 'tiicá ntúūⁿ diiⁿ nducyaaca hermanos ye^{ne} e yú chi nguéé naⁿá yā yaacū ye^{ne} e 'iiⁿyāⁿ Israel s'eeⁿ. ⁵Ní 'iiⁿyāⁿ ye^{ne} e yaacū chi nduuvidaamá yā na vaacu táⁿā Priscila ndúúcu isáⁿā ye^{ne} é yā chi Aquila: N'daí ndís'tiī, caaⁿmaⁿ nī. Ní Epeneto amigo chi neené ne^{ne} é: N'daí dii, caaⁿmaⁿ nī. Epeneto miiⁿ saⁿa vmnááⁿ vmnaaⁿ chí'teenú sá Cristo na yáⁿā Acaya. ⁶Ní tá María chi neené diiⁿ tá ntiiⁿnyuⁿ nguaaⁿ ndís'tiī: N'daí tá, caaⁿmaⁿ nī. ⁷Ní saⁿā Andrónico ndúúcu sáⁿā Junias canée yā vácū taachi 'úú canée vácū, ní saⁿā s'eeⁿ ní n'geete nguaaⁿ 'iiⁿyāⁿ chi apóstoles. Ní saⁿā s'eeⁿ i'téenu yā Cristo vmnaaⁿ cá nícu 'úú: N'daí ndís'tiī, caaⁿmaⁿ nī.

⁸Ní sáⁿā Amplias chi neené ne^{ne} é ti ye^{ne} e Señor saⁿa miiⁿ: N'daí dii, caaⁿmaⁿ nī. ⁹Ní saⁿā Urbano chi dáámá diiⁿ sa ntiiⁿnyuⁿ ye^{ne} é Señor nduucú nū: N'daí dii, caaⁿmaⁿ nī. Ní saⁿa Estaquis chi neené ne^{ne} é: N'daí dii, caaⁿmaⁿ nī. ¹⁰Ní saⁿā Apeles chi neené ch'eenú yā chii cáávā chi i'téenu yā Cristo: N'daí dii, caaⁿmaⁿ nī. 'Tiicá ntúūⁿ nducyaaca 'iiⁿyāⁿ ye^{ne} e vaacu Aristóbulo: N'daí ndís'tiī, caaⁿmaⁿ nī. ¹¹Ní saⁿa Herodión chi ye^{ne} e yáⁿ vaacú: N'daí dii, caaⁿmaⁿ nī. Ní 'iiⁿyāⁿ chi i'téenu yā ye^{ne} e vaacu Narciso: N'daí ndís'tiī caaⁿmaⁿ nī. ¹²Ní n'daataá Trifena ndúúcu n'daataá Trifosa chi dííⁿ yā ntiiⁿnyuⁿ chi ntiiⁿnyuⁿ ye^{ne} e Señor: N'daí ndís'tiī caaⁿmaⁿ nī. Ní n'daataá Pérsida, hermana ye^{ne} é chi neené ne^{ne} é chi n'dee n'daí ntiiⁿnyuⁿ dííⁿ tá ye^{ne} e ntiiⁿnyuⁿ ye^{ne} e Señor:

N'daí tá, caaⁿmaⁿ nī. ¹³Ní saⁿā Rufo, chi saⁿā ch'εete nguaaⁿ 'iiⁿyāⁿ chi i'téenu yā Cristo ndúúcu chεecu sa chi tan'dúúca chεecu dendú'u: N'dai ndís'tiī, caaⁿmaⁿ nī. ¹⁴Ní saⁿā s'eeⁿ Asíncrito ndúúcu Flegonte ndúúcu Hermas ndúúcu Patrobas ndúúcu Hermes ndúúcu tanáⁿā hermanos chi snée yā ndúúcu yā: N'daí ndís'tiī, caaⁿmáⁿ nī. ¹⁵Tiicá ntúūⁿ saⁿa Filólogo ndúúcu n'daataá Julia ndúúcu saⁿā Nereo ndúúcu n'daataá ví'i yā, ndúúcu saⁿa Olimpás ndúúcu nducyáácá hermanos yeⁿe yú chi snée yā ndúúcu 'iiⁿyāⁿ s'eeⁿ: N'daí ndís'tiī, caaⁿmáⁿ nī.

¹⁶Maaⁿ ní nguaaⁿ maáⁿ nī chi i'téenu nī Cristo: N'daí dii, caaⁿmáⁿ nī, ní ca'á nī 'áámá beso 'áámá nī ndúúcu taama nī tan'dúúca costumbre yeⁿe nī caati néⁿe nī ví'i. Nducyáácá 'iiⁿyāⁿ yeⁿe nducyáácá yaācū: N'daí ndís'tiī ngaⁿa yā.

¹⁷Maaⁿ ní di'cuiitú ndís'tiī hermanos yeⁿe chi cundée nī cuidado yeⁿe 'iiⁿyāⁿ chi diiⁿ 'úúví vaadi cadíínūⁿ nguaaⁿ ndís'tiī. Ní dííⁿ yā chi ndís'tiī dinuuⁿndí nī. 'Iiⁿyāⁿ s'eeⁿ ní contra yeⁿe chi 'iiⁿyāⁿ ca'cueéⁿ yā ndís'tiī. Ní contra yeⁿe chí ch'éeⁿ nī. Diví nī 'iiⁿyāⁿ s'eeⁿ yeⁿe nguaaⁿ ndís'tiī. ¹⁸Caati 'iiⁿyāⁿ s'eeⁿ nguéé dichí'vεe yā Señor Jesucristo yeⁿe yú ti dííⁿ yā tan'dúúca chi neⁿe yā. Ní nginnche'éeí yā staava yeⁿe 'iiⁿyāⁿ chi ndiicúūⁿ caati ngaⁿá yā ndúúcu nduudu cúuⁿnūⁿ yeⁿe yā chi cunee ngíínu yā. ¹⁹Nducyáácá 'iiⁿyāⁿ 'āā deenú yā tan'dúúca chí ndís'tiī n'giindiveéⁿ nī nduudu yeⁿe Ndyuūs ní cáávā chuū 'úú ní yeenú. Neⁿe chi ndís'tiī listo canee nī chi dííⁿ

nī dendu'ū chi n'daacā. Nguéé chi dííⁿ nī cosa chi nguéé n'daacā. ²⁰Ní Ndyuūs chi véé nducuéⁿe vaadi 'diiíⁿ nduucú yā maaⁿ nch'εēté cu'néeⁿ yā yááⁿnguiínūⁿ miiⁿ cuaaⁿ mááⁿ ca'á nī. Neⁿe chi Jesucristo téé yā nducyáácá ndís'tiī nducuéⁿe vaadi n'dai yeⁿe yā.

²¹Saⁿa Timoteo chi dáámá idiiⁿ sa ntiíⁿnyuⁿ nduucú ndúúcu sáⁿā Lucio ndúúcu sáⁿā Jasón ndúúcu sáⁿā Sosípater chi sáⁿā s'eeⁿ yeⁿe yāāⁿ vaacú: N'daí ndís'tiī, ngaⁿá yā.

²²Ní 'úú, sáⁿā chi nguuví Tercio chi dinguúⁿ carta 'cūū cáávā Pablo: N'daí ndís'tiī, ngaⁿá ti yeⁿe Cristo s'uuúⁿ.

²³Ní 'tiicá ntúūⁿ saⁿa Gayo: N'daí ndís'tiī, ngaⁿa sa. 'Úú ní canee na vaacu sa ní nduuvidaamā yā 'iiⁿyāⁿ yeⁿe yaācū na vaacu sa. Ní sáⁿā Erasto ntúūⁿ chi sáⁿā tesorero yeⁿe yāāⁿ 'cūū, ndúúcu hermano Cuarto: N'daí ndís'tiī, ngaⁿa yā.

²⁴Neⁿe chi Señor Jesucristo yeⁿe yú di'viicú yā nducyaaca ndís'tiī. 'Tíicā.

'Cuíínū carta 'cūū ndúúcu chi dich'εete yú Ndyuūs

²⁵Maaⁿ ní dich'εete yú Ndyuūs. Ndyuūs cuuvi diiⁿ cá yā chi dítūu canee di ndúúcu chi i'téenu di tan'dúúca chí 'úú caⁿá nduudu cuaacu chi Cristo nadanguáⁿai yā ndís'tiī. Ní chí'cueéⁿ ndís'tiī yeⁿe evangelio chi nduudu ngai yeⁿe Cristo. Chuū chí ngaⁿá ní chííⁿ chi Ndyuūs snúúⁿ n'de'éeí yā ndii tiempo vmnááⁿ vmmaaⁿ chi canee iⁿyeⁿe di ní Ndyuūs ch'iⁿí yā 'úú nduudu yeⁿe Cristo. ²⁶Ní maaⁿ ní deenu yú chuū cáávā chí profetas dinguúⁿ yā na libro yeⁿe Ndyuūs yeⁿe chuū. Ní dííⁿ yā tan'dúúca

Ndyuūs ngaⁿa yā yeⁿe chuū. Ní Ndyuūs
 cuéⁿé daāⁿmaⁿ caneé yā. Ní maaⁿ ní
 Ndyuūs chiⁱ'n'í yā nduudu cuaacu yeⁿé
 Cristo nanááⁿ 'iiⁿyāⁿ yeⁿe nducuéⁿē
 naciones cáávā chi 'caandiveéⁿ yā ní
 cu'téenu yā.

²⁷ Cuéⁿé daāⁿmaⁿ canee chi
 dich'ēete yú Ndyuūs chi 'aama
 n'dyáⁿā Ndyuūs chi deenú yā
 tanducuéⁿē dendu'ū. Ní diiⁿ yú 'tíicā
 cáávā Jesucristo Señor yeⁿe yú. 'Tíicā
 diiⁿ yú.

CARTA VMNÁÁⁿ VMNAAⁿ YEⁿ'E 'IIⁿ'YĀⁿ YEⁿ'E YĀĀⁿ CORINTO

**Pablo idinguúⁿ yā carta 'cūū yeⁿ'e
'iiⁿ'yāⁿ yeⁿ'e yaacū na yāāⁿ Corinto**

1 'Úú Pablo 'úú. Dendyuūs yaa'ví
yā 'úú chi cuuvi apóstol yeⁿ'ē
Jesucristo tan'dúúcā chi Ndyuūs
neⁿ'é yā. 'Úú ndúúcū hermano
Sóstenes yaa'ví 'nū ndís'tiī. **2**'Úú
idinguúⁿ carta 'cūū yeⁿ'e 'iiⁿ'yāⁿ
chi i'téenu yā Ndyuūs, 'iiⁿ'yāⁿ chi
snée yā na yāāⁿ Corinto. 'Iiⁿ'yāⁿ
s'eeⁿ, Ndyuūs yaa'ví yā 'iiⁿ'yāⁿ chi
cuuvi yeⁿ'é yā 'iiⁿ'yāⁿ s'eeⁿ ti yeⁿ'e
Cristo Jesús. Idinguúⁿ dendu'ū yeⁿ'e
nducyaaca 'iiⁿ'yāⁿ yeⁿ'ē nducyáácá
yāāⁿ, 'iiⁿ'yāⁿ s'eeⁿ chi ngaⁿ'angua'á
yā ndúúcū Señor Jesucristo. Señor
Jesucristo miiⁿ 'iivú Ndyuūs yeⁿ'é yā
ndúúcū s'uūuⁿ. **3**Ndyuūs Chiida yú
ndúúcū Señor Jesucristo cuuvi tée
yā s'uūuⁿ cosa chí n'dáácā n'dai yeⁿ'é
yā, ní 'íícú cunée vaadi 'diiⁿ' yeⁿ'é
yā na staava yeⁿ'e yú.

**Pablo caaⁿ'maⁿ yā gracias Ndyuūs
caava chi Ndyuūs dateé yā 'iiⁿ'yāⁿ**

4Cueⁿ'é daāⁿ'maⁿ ngaⁿ'á gracias
Ndyuūs cáávā cosa chí n'daacā n'dai
yeⁿ'é Ndyuūs chi dátee yā s'uūuⁿ
chi yeⁿ'e Jesucristo. **5**Dendyuūs
dateé yā tanducuéⁿ'ē dendu'ū chi véé

yeⁿ'é yā ti maaⁿ ní ndís'tiī ní yeⁿ'e
Cristo ndís'tiī. Ní Ndyuūs chinnee
yā ndís'tiī chí caaⁿ'máⁿ nī nduudu
yeⁿ'é yā, ní teé yā ndís'tiī vaadi
deenu. **6**'Tíícā chiⁿ' chí 'úú ngaⁿ'á
nduudu cuaacu miiⁿ yeⁿ'ē Jesucristo
miiⁿ. Ní ndís'tiī n'giindiveéⁿ nī ní
diíⁿ nī 'tíícā, ní chíⁿ'íⁿ nī chí nduudu
miiⁿ chí cuaacu. **7**Ní cuuvi yeⁿ'é
nī nducueⁿ'ē chí dateé Ndyuūs, ní
ndís'tiī nguéeⁿ diiⁿ faltar mar 'áámá.
Neⁿ'é chí ndís'tiī 'cuētinéeⁿ ngiinu
nī Señor Jesucristo yeⁿ'ē yú chí
ndaa yā taama vmnéⁿ'ēe. **8**Ní Cristo
miiⁿ ní tée yā fuerzas ndís'tiī, ní
'cuētinéeⁿ nī n'daacā ndíⁿ nguuvi
chí Jesucristo ndaa ntuúⁿ yā. Ní
nguéeⁿ véé nuuⁿ'ndi yeⁿ'é nī nguuvi
chí ndaa Señor Jesucristo yeⁿ'e
yú. **9**Ndyuūs ní diíⁿ yā chí caⁿ'a yā
chí diíⁿ yā. Ní yaa'ví yā ndís'tiī chí
'cuētinéeⁿ nī ndúúcū daiyá yā chí
Señor Jesucristo yeⁿ'ē yú.

**Véeⁿ divisiones nguaaⁿ 'iiⁿ'yāⁿ
chí caⁿ'á yā na yāacū**

10Ndís'tiī hermanos yeⁿ'é, 'úú
ngiicā ndís'tiī cáávā chí duuchi Señor
Jesucristo yeⁿ'ē yú chí 'cuētinéeⁿ
ngíínú nī, ní nguéeⁿ véé divisiones
nguaaⁿ ndís'tiī. N'dáácā n'dai

'cuetinée nī ní daama daamá nī ndúúcū 'aama vaanicadiinūⁿ yeⁿe ndís'tiī chí n'daacā ndúúcū tanducuéⁿē chí diīⁿ nī. ¹¹N'duuví 'iiⁿ'yāⁿ yeⁿe familia yeⁿe n'daataá Cloé yaa'ví yā 'úú yeⁿe ndís'tiī hermanos yeⁿé. Ní ngaⁿ'á yā chí ndís'tiī n'gɛɛcu cheendí nī. ¹²Chuū chí yeⁿe chí caaⁿ'máⁿ. 'Áámá 'áámá ndís'tiī ngaⁿ'á nī yeⁿe 'áámá saⁿ'ā 'tíicā. 'Áámá yā ní ngaⁿ'a yā: 'Úú yeⁿe saⁿ'a Pablo; taamá yā ní ngaⁿ'a yā: 'Úú yeⁿe saⁿ'a Apolos; taamá yā ní ngaⁿ'a yā: 'Úú yeⁿe saⁿ'a Pedro; taamá yā ní ngaⁿ'a yā: 'Úú yeⁿe Cristo. ¹³¿Áá cuaacu chí Cristo yeⁿe yú chí 'yaaⁿ yā? Nguéé 'tíicā. ¿Áá ca'neeⁿngá'āa Pablo cáávā nuuⁿndi yeⁿe ndís'tiī? Nguéé. ¿Áá chɛɛdinuūⁿ'niⁿ nī ndúúcū chí duuchi Pablo? Nguéé 'tíicā. ¹⁴'Úú cāⁿ'a: Gracias Dendyuūs, ti 'úú chí Pablo, nguéé chɛɛdinuūⁿ'niⁿ mar 'áámá ndís'tiī. Dámaāⁿ chɛɛdínuūⁿ'niⁿ saⁿ'ā Crispo ndúúcū saⁿ'ā Gayo. ¹⁵Maaⁿ ní mar 'áámá ndís'tiī nguéé cuuvi caaⁿ'máⁿ nī chí ndɛɛdínuūⁿ'niⁿ ndúúcū chí duūchí. ¹⁶Chɛɛdinuūⁿ'niⁿ ntúúⁿ 'iiⁿ'yāⁿ yeⁿe familia yeⁿe saⁿ'ā Estéfanos. Ní yeⁿe tanáⁿ'ā 'iiⁿ'yāⁿ 'úú nguéé deenú chí ndɛɛdínuūⁿ'niⁿ du'ū ca táámá 'iiⁿ'yāⁿ. ¹⁷Cristo nguéé dichó'o yā 'úú chí cuɛɛdínuūⁿ'niⁿ 'iiⁿ'yāⁿ caati dichó'o yā 'úú chí caaⁿ'máⁿ nduudu yeⁿe evangelio chí nduudu ngai yeⁿe Cristo. 'Úú nguéé caaⁿ'máⁿ ndúúcū nduudu deenu yeⁿe saⁿ'ā yeⁿe iⁿ'yeeⁿdí 'cūū, ní 'iicu nducuéⁿē chí ngaⁿ'á ní yeⁿe poder yeⁿe Cristo chí ch'ii yā na cruz.

**Cristo miiⁿ ní poder yeⁿe
Ndyuūs ndúúcū vaadī deenu**

¹⁸'Úú deenú chí taachi 'iiⁿ'yāⁿ chí nguéé deenú yā du'ū chí Cristo miiⁿ ní n'giindiveéⁿ yā nduudu yeⁿe

cruz, 'iiⁿ'yāⁿ miiⁿ nacadínuuⁿ yā chí 'áámá cosa chí duuchi. S'uūúⁿ chí nanguaⁿ'āi yú, deenu yú chí Ndyuūs ch'iⁿ'i yā poder yeⁿe yā cucáávā nduudu yeⁿe yā. ¹⁹Naati canéé nguūⁿ na libro yeⁿe Ndyuūs ndí vmnaaⁿ chí ngaⁿ'a 'tíicā:

'Úú dituūví vaadī deenu yeⁿe 'iiⁿ'yāⁿ chí deenu, ní idiíⁿ chí nguéé dichíí'vɛ nduudu yeⁿe 'iiⁿ'yāⁿ chí deenu taavi.

²⁰¿Dɛ'ɛ dichíí'vɛ vaadī deenu yeⁿe 'iiⁿ'yāⁿ chí deenu? ¿Dɛ'ɛ dichíí'vɛ vaadī deenu yeⁿe maestro chí deenu taavi? ¿Dɛ'ɛ dichíí'vɛ vaadī deenu yeⁿe 'iiⁿ'yāⁿ chí deenu taavi ní caaⁿ'máⁿ yā ndúúcū compañeros yeⁿe yā yeⁿe cosas chí véé iⁿ'yeeⁿdí 'cūū? Ndyuūs ch'iⁿ'i yā chí vaadī deenu yeⁿe iⁿ'yeeⁿdí 'cūū ní dúú'vī vɛɛ ní nguéé dɛ'ɛ vɛɛ. ²¹'Iiⁿ'yāⁿ yeⁿe iⁿ'yeeⁿdí 'cūū nguéé cuuvi n'diichí yā Dendyuūs cucáávā vaadī deenu yeⁿe iⁿ'yeeⁿdí 'cūū. Ndyuūs canee yiinú yā ní nadanguaⁿ'ái yā 'iiⁿ'yāⁿ chí i'téenu yā nduudu cuaacu yeⁿe yā, naati tanáⁿ'ā 'iiⁿ'yāⁿ yeⁿe iⁿ'yeeⁿdí 'cūū ngaⁿ'á yā chí nduudu cuaacu miiⁿ ní tan'dúúcā 'áámá cosa chí duuchi.

²²'Iiⁿ'yāⁿ Israel s'eeⁿ chí judíos ngiicá yā señales Ndyuūs ní 'iicu 'iiⁿ'yāⁿ griegos ní in'nuuⁿ cá yā vaadī deenu yeⁿe iⁿ'yeeⁿdí 'cūū. ²³S'uūúⁿ ní ca'cuaeⁿ yú yeⁿe Cristo chí ca'nééⁿngá'ā na cruz cáávā nuūⁿndi yeⁿe nducyáácá 'iiⁿ'yāⁿ. 'Iiⁿ'yāⁿ Israel s'eeⁿ nguéé neⁿe 'caandiveéⁿ yā nduudú 'cūū, ní tanáⁿ'ā 'iiⁿ'yāⁿ sta'á yā nduudú 'cūū tan'dúúcā 'áámá cosa chí duuchi. ²⁴Nduuti chí 'iiⁿ'yāⁿ Israel s'eeⁿ o nduuti chí 'iiⁿ'yāⁿ griegos, Ndyuūs

yaa'ví yā 'iiⁿ'yāⁿ s'eeⁿ chi cuuvi yeⁿ'é yā 'iiⁿ'yāⁿ. Cristo ní poder yeⁿ'é Ndyuūs ní Cristo miiⁿ vaadi deenu yeⁿ'é Ndyuūs cucááva nducyaaca 'iiⁿ'yāⁿ. ²⁵Nduudu yeⁿ'é Ndyuūs chi 'iiⁿ'yāⁿ ngaⁿ'á yā chi cosa chí duuchi, nduudu miiⁿ nduudu déénú ca nguéé tí nduudu yeⁿ'e saⁿ'ā yeⁿ'e iⁿ'yeeⁿ'dí 'cūū. Ní cosa chi sta'á yā tan'dúucā chi duuvā yeⁿ'é Dendyuūs chíⁿ chi ditiinú ca, nguéé ti yeⁿ'e 'iiⁿ'yāⁿ yeⁿ'e iⁿ'yeeⁿ'dí 'cūū. ²⁶Ndís'tiī hermanos yeⁿ'é, nadacádiinúúⁿ nī yeⁿ'ē maáⁿ nī. Nguéé 'yaaⁿ ndís'tiī 'iiⁿ'yāⁿ chi deenu taavi, nguéé 'yaaⁿ ndís'tiī 'iiⁿ'yāⁿ ndíí tiīⁿ, ndíí nguéé 'yaaⁿ ndís'tiī 'iiⁿ'yāⁿ 'cuiica. ²⁷Ndyuūs ndεεvé yā 'iiⁿ'yāⁿ chi nguεε deenu taavi yā ní 'íicú 'iiⁿ'yāⁿ chi deenu taavi yā cuuví 'cuináⁿ yā. Ní Ndyuūs ndεεvé yā 'iiⁿ'yāⁿ yeⁿ'ē iⁿ'yeeⁿ'dí 'cūū chi véé duu'vīi fuerzas yeⁿ'é yā ní 'íicú 'iiⁿ'yāⁿ chi véé fuerza yeⁿ'é yā cuuví 'cuináⁿ yā. ²⁸Ndyuūs ndεεvé yā 'iiⁿ'yāⁿ chi nguéé du'ū vεε nanááⁿ 'iiⁿ'yāⁿ yeⁿ'ē iⁿ'yeeⁿ'dí 'cūū ní ndεεvé yā 'iiⁿ'yāⁿ chi nguéé inuuⁿndi ní ya'ai 'iinú yā 'iiⁿ'yāⁿ. Ní 'iicu Ndyuūs díⁿ yā chi nguéé dε'ε vεε cosa chi ch'εete chí 'iiⁿ'yāⁿ yeⁿ'ē iⁿ'yeeⁿ'dí 'cūū díⁿ yā. ²⁹Tíicā Ndyuūs idiíⁿ yā ti mar 'áámá 'iiⁿ'yāⁿ nguéé cuuvi dich'εeté yā 'iiⁿ'yāⁿ nanááⁿ Dendyuūs. ³⁰Tíicā Dendyuūs maáⁿ yā teé yā vida cueⁿ'e daáⁿmaⁿ yeⁿ'e ndís'tiī tí i'teenú nī Cristo Jesús. Ndyuūs dich'ó yā Jesucristo iⁿ'yeeⁿ'dí 'cūū chi cuuvi deenu yú nducueⁿ'é cááva Cristo. Ní cáávā Cristo miiⁿ nguéé nuuⁿndi yeⁿ'ē yú nanááⁿ Ndyuūs ti Cristo miiⁿ ch'ií yā na cruz cucááva nuuⁿndi yeⁿ'ē nducyaaca 'iiⁿ'yāⁿ, ní

'iicu s'uūuⁿ chi cuuvi yeⁿ'é yā s'uūuⁿ. ³¹Cáávā chuū canéé nguūⁿ na libro yeⁿ'é Ndyuūs ndíí vmaaⁿ 'tíicā: 'Iiⁿ'yāⁿ chi ngaⁿ'a chi idich'εeté maáⁿ yā 'iiⁿ'yāⁿ, nguéé n'daacā idiíⁿ yā. Dámaaⁿ canéé chi dich'εeté yā 'iivú Ndyuūs.

Ngaⁿ'a yā chí Cristo ca'nééⁿnga'á yā

2 Ndís'tiī hermanos yeⁿ'é, taachí ndāa ní canéé ndúucu nī 'tíicā caⁿ'á nduudu cuaacu yeⁿ'é Dendyuūs. Nguéé caⁿ'á nduudu miiⁿ ndúucū núúⁿmaⁿ vadicadínnūuⁿ yeⁿ'e vaadi deenu. ²Tíicā ngaⁿ'á, ti nguéé neⁿ'é caāⁿ'maⁿ táámá cosa nanááⁿ ndís'tiī, dámaaⁿ neⁿ'é caaⁿ'maⁿ yeⁿ'ē Jesucristo chi ca'nééⁿnga'á yā. ³Taachi canéé ndúucū ndís'tiī ndii cuūⁿnūⁿ 'úú; ní 'va'á 'úú; ní néené in'duuví vaa. ⁴Nguéé ngaⁿ'á nduudu miiⁿ ndúucū vaadi deenu chi cadiinuuⁿ 'iiⁿ'yāⁿ yeⁿ'ē iⁿ'yeeⁿ'dí 'cūū, naati ngaⁿ'á nduudu cuaacu miiⁿ ndúucū nduudu chi nguéé ngⁿ'iī. Ngaⁿ'á chiiⁿ chi Espíritu N'dai yeⁿ'é Ndyuūs ch'i'í yā 'úú ndúucū poder yeⁿ'é yā chí nduudu cuaacu miiⁿ ní yeⁿ'e Dendyuūs. Níicú 'iiⁿ'yāⁿ cuuvi deenú yā chí nduudu cuaacu miiⁿ ní nduudu yeⁿ'é Dendyuūs. ⁵Tíicā ngaⁿ'á ti chíⁿ chi i'teenú yú nguéé chiicā na vaanicadiinuuⁿ yeⁿ'e 'iiⁿ'yāⁿ yeⁿ'ē iⁿ'yeeⁿ'dí 'cūū ti yeⁿ'e poder yeⁿ'é Dendyuūs.

Dendyuūs díⁿ yā chi deenu 'iiⁿ'yāⁿ cucáávā Espíritu N'dai yeⁿ'e yā

⁶Taachi canéé 'nū nguaaⁿ 'iiⁿ'yāⁿ chi i'teenú yā Dendyuūs ní 'áámá canéé yā ndúucū Dendyuūs, tuu'mi ní ngaⁿ'á 'nū ndúucū nduudu ngiⁿ'iī

yeⁿe vaanicádiinūⁿ. Nguéé ti vaadi deenu chi nadacadiinúⁿ 'iiⁿ'yāⁿ yeⁿe iⁿ'yeeⁿdí 'cūū, 'iiⁿ'yāⁿ chi nguéé i'téenu yā Dendyuūs yeⁿe yú. Ndíí nguéé ti yeⁿe saⁿ'ā chi ndii tíiⁿ yeⁿe iⁿ'yeeⁿdí 'cūū chi ch'ó'oo poder yeⁿe yā. ⁷Naati ngaⁿ'á 'nū vaadi déenu yeⁿe Dendyuūs. Ní nguéé deenú 'iiⁿ'yāⁿ yeⁿe iⁿ'yeeⁿdí 'cūū vaadi deenu miiⁿ, ti Ndyuūs caⁿ'a yā vaadi deenú 'cūū chi yeⁿe maáⁿ yā vmnááⁿ vmnāⁿ chi din'dái yā iⁿ'yeeⁿdí 'cūū, ní 'iicu cuuvi nadinguáⁿ'ai yā s'uūúⁿ. ⁸Mar 'áámá 'iiⁿ'yāⁿ n'gæete yeⁿe iⁿ'yeeⁿdí 'cūū déenú yā yeⁿe vaadi deenú 'cūū, ti nduuti chi déenu yā, tuu'mi ní nguéé s'neeⁿngaⁿ'á yā Señor Jesucristo chi chiica yā yeⁿe va'ai chæeti nguūvi. ⁹Canéé nguūⁿ ndii cuááⁿ vmnāⁿ ná libro yeⁿe Ndyuūs 'tíicā:

Nducuéⁿe chi din'dái Dendyuūs ní yeⁿe 'iiⁿ'yāⁿ chí i'teenu 'iivú Ndyuūs, tanáⁿ'ā 'iiⁿ'yāⁿ yeⁿe iⁿ'yeeⁿdí 'cūū nguéé n'diichí yā Jesucristo, ndíí nguéé n'giindiveéⁿ yā yeⁿe yā, ndíí nguéé nadicadiinúⁿ yā yeⁿe dendu'ū chuū na staava yeⁿe yā.

¹⁰Ndyuūs ch'iⁿ'í yā nducuéⁿe s'uūúⁿ cucaavā Espíritu N'dai yeⁿe yā. Espíritu N'dai yeⁿe Dendyuūs ní deenú yā nducuéⁿe, ní deenú yā nducuéⁿe vaadi deenu yeⁿe Ndyuūs. ¹¹¿Du'ú 'iiⁿ'yāⁿ cuuvi deenú yā chi nadacadiinúⁿ taama 'iiⁿ'yāⁿ? Dámaaⁿ espíritu yeⁿe maáⁿ yā deēnu chi maáⁿ yā nadacadiinúⁿ yā. 'Tíicā ntúūⁿ mar 'áámá 'iiⁿ'yāⁿ nguæe cádíinuuⁿ yā chi Ndyuūs nadicadiinuuⁿ yā, ti dámaaⁿ Espíritu N'dai yeⁿe Dendyuūs deenu

yā yeⁿe Dendyuūs. ¹²S'uūúⁿ ní nguéé sta'ā yú espíritu chi yeⁿe iⁿ'yeeⁿdí ti sta'ā yú Espíritu N'dai chí cuchii yeⁿe Ndyuūs. Maaⁿ ní cuuvi deenu yú nducuéⁿe chí n'daacā n'dai ti Ndyuūs teé yā s'uūúⁿ Espíritu N'dai yeⁿe yā. ¹³Ngaⁿ'a ntúūⁿ yú yeⁿe nducuéⁿe chuū. Nguéé ngaⁿ'a yú ndúucū nduudu chi ngi'cueeⁿ 'iiⁿ'yāⁿ yeⁿe iⁿ'yeeⁿdí 'cūū. Espíritu N'dai yeⁿe Ndyuūs ca'cueeⁿ yā nducyaaca 'iiⁿ'yāⁿ chi canee ndúucū Espíritu N'dai miiⁿ.

¹⁴'Iiⁿ'yāⁿ chi nguéé i'téenu yā Jesucristo yeⁿe yú nguéé ituumicádiinuuⁿ yā dendu'ū chí yeⁿe Espíritu N'dai yeⁿe Dendyuūs, ti sta'ā yā nduudu miⁿ tan'dúucā 'áámá cosa chí duuchi. Ní nguéé cuuvi tuumicadiinúⁿ yā nduudu miⁿ ti canéé chi cadiinúⁿ yā nduudu miⁿ cáávā Espíritu N'dai yeⁿe Dendyuūs. ¹⁵'Iiⁿ'yāⁿ chi canéé ndúucū Espíritu N'dai yeⁿe Dendyuūs n'diichí yā tanducuéⁿe dendu'ū, naati 'iiⁿ'yāⁿ chi nguéé i'téenu yā Jesucristo nguéé cuuvi tuumicadiinúⁿ yā táacā idiⁿ 'iiⁿ'yāⁿ chi canee ndúucū Espíritu N'dai yeⁿe Dendyuūs. ¹⁶Canéé nguūⁿ na libro yeⁿe Ndyuūs ndíí vmnāⁿ chí ngaⁿ'a tíicā: 'Iiⁿ'yāⁿ chi nguéé i'téenu yā Jesucristo, ítáacā cuuvi deenú yā chi nadacadiinúⁿ 'iivú Ndyuūs? ¿Du'ú 'iiⁿ'yāⁿ cuuvi ca'cueeⁿ yā Ndyuūs? S'uūúⁿ chí canee yú ndúucū Espíritu N'dai yeⁿe Dendyuūs snee yú ndúucū vaanicadíinūⁿ yeⁿe Cristo chi 'iivú Ndyuūs yeⁿe yú.

S'uūúⁿ ní compañeros yeⁿe yú vi'i ní diiⁿ yú ntiiⁿnyuⁿ yeⁿe Dendyuūs

3 Ndís'tii hermanos yeⁿe, nguéé cuuvi caaⁿ'máⁿ ndúucū ndís'tii

tan'dúucā chi ndís'tií ní 'iiⁿyāⁿ
 chi 'áámá canéé ndúucú Espíritu
 N'dai yeⁿé Ndyuūs, ní 'iiⁿyāⁿ chí
 n'giindiveéⁿ yā yeⁿe yā. Naati
 caⁿá nduucú nī tan'dúucā chi
 ndís'tií daiya yeⁿé Ndyuūs ndís'tií,
 tan'dúucā chi ndís'tií 'iiⁿyāⁿ chi
 caama i'téenu yā Cristo ndís'tií.
 2 Tan'dúucā da'caiyāa chi ng'i leche
 ti 'āā cuéé cuuvi che'é yā, 'tiicā ntúūⁿ
 ndís'tií. Ca'cueéⁿ ndís'tií ndúucú
 dendu'ú nduudu chi nguéé ng'iⁿii, tí
 nguéé dííⁿ nī tan'dúucā chi ngaⁿa
 Espíritu N'dai yeⁿé Ndyuūs. 3 Naati
 tan'dúucā 'iiⁿyāⁿ yeⁿé iⁿ'yeeⁿdí cūū
 dííⁿ yā chi neⁿe maáⁿ yā, 'tíicā idiíⁿ
 nī. Ndís'tií ní 'téé ní nguⁿu nī ní
 nguéé nduuvidaamá nī. Nguéé idiíⁿ
 n'daacá nī tan'dúucā 'iiⁿyāⁿ chi
 i'téenu yā 'iivú Ndyuūs chi idiíⁿ yā,
 ti idiíⁿ nī tan'dúucā 'iiⁿyāⁿ chi nguéé
 i'teenú yā 'iivú Ndyuūs chi idiíⁿ yā
 'tíicā, ní idiíⁿ 'tíicā nī. 4 Caati náⁿā
 ndís'tií ngaⁿá nī: 'Úú ní i'teenú
 tan'dúucā chi ngaⁿa Pablo, ní táámá
 nī ngaⁿa nī: 'Úú i'teenú tan'dúucā
 chi ngaⁿa saⁿa Apolos. ¿Áá nguéé
 ngaⁿá nī tan'dúucā chi caⁿa nī
 tiempo chi 'āā chóo taachi 'āā
 cuéé cu'téenu nī Jesucristo? 5 ¿Du'ú
 saⁿa Pablo 'úú? ¿Du'ú saⁿa Apolos
 miiⁿ? ¿Áá nguéé nús'úu 'iiⁿyāⁿ chi
 dichííⁿvē Dendyuūs? Ngaⁿá 'nū
 nduudu chi ch'iⁿi Dendyuūs nús'uu
 ní ndís'tií ní i'teenú nī. 6 'Úú ngaⁿá
 nduudu yeⁿé Dendyuūs nanááⁿ
 ndís'tií ní dííⁿ tan'dúucā chí chiínú
 ndaata na staava yeⁿé nī. Sáⁿā
 Apolos miiⁿ canee sa ndúucu nī
 ní ng'i'cueeⁿ sá ndís'tií ní diíⁿ sa
 tan'dúucā chí ch'iiⁿyú sa ndaata
 miiⁿ. Dendyuūs dííⁿ yā chi 'cuiita
 ndaata miiⁿ. 7 Cáávā chuū 'iiⁿyāⁿ

chi ngaⁿa nduudu yeⁿé Dendyuūs
 o 'iiⁿyāⁿ chí ca'cueeⁿ nduudu miiⁿ
 nguéé ch'eté yā. Dámaaⁿ Ndyuūs
 chi 'cuiitá yā nduudu miiⁿ ní ch'ete
 cá yā. 8 'Iiⁿyāⁿ chi caaⁿmáⁿ yā
 nduudu miiⁿ ní 'iiⁿyāⁿ chi ca'cueeⁿ
 yā nduudu miiⁿ, 'āā daamá nūuⁿ dííⁿ
 yā ntiiⁿnyuⁿ yeⁿé Ndyuūs. Ndyuūs
 ca'á yā 'iiⁿyāⁿ miiⁿ chiiⁿ chi cuuvi
 yeⁿé yā caavā ntiiⁿnyuⁿ yeⁿe yā chí
 dííⁿ yā. 9 Nús'uu ní daama dáámá
 nuúⁿ idiíⁿ 'nū ntiiⁿnyúⁿ ndúucú
 Dendyuūs. Ndís'tií ní tan'dúucā
 'áámá campo yeⁿé Ndyuūs chí
 Ndyuūs chidi'cuiitá yā 'tíicā ndis'tií.
 Tan'dúucā 'áámá va'ai chí idin'dai
 Dendyuūs, 'tíicā ndís'tií. 10 Ndyuūs
 teé yā 'úú vaadi deenu yeⁿé yā ní
 tan'dúucā 'áámá saⁿā deenu din'dai
 sa cimientu yeⁿe va'ai, 'tíicā 'úú. 'Úú
 ngaⁿá nduudu cuaacu chí tan'dúucā
 cimientu miiⁿ chí din'dai sa. Táámá
 'iiⁿyāⁿ 'iicandíí yā ndúucú va'ai miiⁿ.
 Ca'áámá ca'aama 'iiⁿyāⁿ chí 'iicandíí
 yā nduucú canéé chí 'iicandíí yā
 ndúucú va'āi ndúucú cuidado.
 11 Mar 'áámá 'iiⁿyāⁿ nguéé cuuvi
 cu'neeⁿ yā táámá cimientu chí
 n'daaⁿ yeⁿé chí 'úú chí'neéⁿ, ti tuúú
 yeⁿé cimientu miiⁿ ní Jesucristo.
 12 'Iiⁿyāⁿ s'eeⁿ chí 'iicandíí yā vmnaaⁿ
 cimientu miiⁿ ndúucú 'dííⁿnguaaⁿ,
 o ndúucú 'dííⁿnguae, o ndúucú
 tuúu ndeē cheeⁿ, o ndúucú yáⁿá,
 o ndúucú yaāta o ndúucú 'í'voōo
 canéé chí cadiinúúⁿ yā, ti chuū chí
 ngaⁿá. 13 Nguuvi chí Jesucristo dííⁿ
 yā juzgar ntiiⁿnyuⁿ yeⁿé ca'áámá
 ca'áámá 'iiⁿyāⁿ, ní 'íicú 'iiⁿyāⁿ
 cádíínuuⁿ yā de'ē ntiiⁿnyuⁿ chiiⁿ
 yeⁿé 'áámá 'áámá yā. Ntiiⁿnyuⁿ
 miiⁿ ní canéé chí cho'ōo naavtaⁿā
 ngiichí yāⁿā ní deenu yā 'iiⁿyāⁿ

yeⁿe ntiⁿnyuⁿ yeⁿé yā. ¹⁴Nduuti chí cunee ntiⁿnyuⁿ yeⁿe 'iiⁿ'yāⁿ s'eeⁿ chí 'licandí yā vmnaaⁿ cimiento miⁿ, ntiⁿnyuⁿ chí 'āā chó'oo naavtaⁿā ngiichi yaⁿā ní nguee chiichi, tuuⁿmi ní 'iiⁿ'yāⁿ s'eeⁿ véé chí cuuvi yeⁿe yā. ¹⁵Ndúúti chí cuucu ntiⁿnyuⁿ chí 'licandí yā ndúúcu yaⁿā, tuuⁿmi ní di'cuiinú ntiⁿnyuⁿ miiⁿ. 'Iiⁿ'yāⁿ s'eeⁿ ní nanguáⁿai yā tan'dúúca 'iiⁿ'yāⁿ chí chéenu yā yeⁿe va'ai yeⁿe yā taachi ngiichi va'ai yeⁿé yā.

¹⁶¿Áá nguéé déenu ndís'tií chí i'teenú nī Jesucristo chí cuerpo yeⁿe nī ní yáacū yeⁿe Dendyuūs, ní canéé Espíritu N'dai yeⁿe Ndyuūs ndúúcu ndís'tií? ¹⁷Ndúúti chí 'áámá 'iiⁿ'yāⁿ dituuvi yā yaacū yeⁿé Ndyuūs, Ndyuūs ní di'cuiinú yā 'iiⁿ'yāⁿ miiⁿ. Yáacū yeⁿé Ndyuūs ní déeve. Ndís'tií ní yaacū yeⁿé Ndyuūs ndís'tií.

¹⁸Mar 'áámá nī ní nguéé nginche'ei maáⁿ nī ndís'tií. Taachi 'aamá ndís'tií nadacadiinuuⁿ nī chí nge'e taavi nī yeⁿe vaadi deenu yeⁿe iⁿ'yeeⁿdí 'cūū, tuuⁿmi ní canee cuuⁿmiⁿ chí díⁿ nī tan'duucā 'áámá 'iiⁿ'yāⁿ chí nguéé deenu. Ní cuuvi ndaācā vaadi deenu yeⁿé nī chí yeⁿe Dendyuūs. ¹⁹Vaadi déenu yeⁿé 'iiⁿ'yāⁿ yeⁿe iⁿ'yeeⁿdí 'cūū tan'dúúca 'áámá cosa chí duuchi nanááⁿ Ndyuūs. 'Āā canéé nguūⁿ na libro yeⁿé Ndyuūs ndíⁿ vmnaaⁿ 'tíicā: Ndyuūs díⁿ yā chí vaadi deenu yeⁿé 'iiⁿ'yāⁿ yeⁿe iⁿ'yeeⁿdí 'cūū díⁿ chí 'cuuvi 'iiⁿ'yāⁿ ní 'iiⁿ'yāⁿ miiⁿ canee yā tan'dúúca chí cundaí yā na trampa yeⁿe maáⁿ yā. ²⁰Canéé nguūⁿ ntuuⁿ táámá chí 'tuuca: 'Iivú Ndyuūs déenu yā vaanicadiinūⁿ

yeⁿé 'iiⁿ'yāⁿ chí deenu yeⁿé iⁿ'yeeⁿdí 'cūū. Nguéé de'ē veē dichí'vē chí nadacadiinūⁿ 'iiⁿ'yāⁿ s'eeⁿ. ²¹Mar 'áámá 'iiⁿ'yāⁿ nguéé cuuvi caaⁿmaⁿ yā chí dich'eté yā saⁿā iⁿ'yeeⁿdí 'cūū. Tanducuéⁿē denduⁿú ní yeⁿe ndís'tií. ²²Nduuti chí 'úú chí Pablo, o saⁿā Apolos, o saⁿā Pedro, o nduuti chí yeⁿe iⁿ'yeeⁿdí, o yeⁿe vida yeⁿe yú, o yeⁿe vaadi n'gii, o yeⁿe cosa chí 'āā veē o yeⁿe denduⁿú chí caama cuchii, tanducuéⁿē chuū ní yeⁿe ndís'tií. ²³Ní ndís'tií ní yeⁿe Cristo ndís'tií. Ní Cristo miiⁿ ní yeⁿe Dendyuūs chí cánduuchi yā cueⁿe daāⁿmaⁿ.

Ntiⁿnyuⁿ yeⁿe apóstoles

4 Ndís'tií ní didúúché nī nús'uu tan'dúúca 'iiⁿ'yāⁿ chí idiⁿ ntiⁿnyuⁿ yā yeⁿe Jesucristo. Nús'uu ní ngaⁿá 'nū nduudu cuaacu yeⁿé Ndyuūs nanaaⁿ ndís'tií. Vmnaáⁿ vmnaaⁿ ní nguéé chí cadíinuuⁿ nī naati maaⁿ ní cádiinuuⁿ nī nduudu cuaacu miiⁿ. ²'Iiⁿ'yāⁿ chí díⁿ ntiⁿnyuⁿ yeⁿe 'iivú Ndyuūs canee cuuⁿmiⁿ chí díⁿ yā cumplir tanducuéⁿe chí caaⁿmaⁿ Ndyuūs yeⁿe ntiⁿnyuⁿ chí díⁿ yā. ³Nguéé de'ē veē tuneē 'úú nduuti chí 'iiⁿ'yāⁿ díⁿ yā juzgar 'úú, o nduuti chí ndís'tií, o táámá 'iiⁿ'yāⁿ o 'úú maáⁿ n'diichí nuuⁿndi yeⁿé. ⁴Áará chí staava yeⁿé ngéé diiⁿ condenar 'úú cáávā chiiⁿ chí díⁿ, 'úú nguéé cuuvi caaⁿmaⁿ chí nguéé nuuⁿndi yeⁿé. Dámaaⁿ Señor Jesucristo díⁿ yā juzgar 'úú, ní caaⁿmaⁿ yā nuuⁿndi yeⁿé. ⁵Ndís'tií nguéé díⁿ nī juzgar 'iiⁿ'yāⁿ. Taachí ndáá Señor Jesucristo yeⁿe yú taama vmnéⁿēe tuuⁿmi 'cuuⁿmíⁿ yā tanducuéⁿē chí

cadiinuuⁿ yú 'aama 'aama yú ndii na staaava yeⁿē yú. Tiempo miiⁿ ní 'iivú Ndyuūs téē yā s'uuúⁿ chí cuuvi yeⁿē yú caavā ntiⁿnyuⁿ chí diⁿ yú. ⁶Úú ngaⁿá yeⁿē chí 'úú ndúúcū saⁿā Apolos diⁿ 'nū. Ní 'íicú ndís'tii cuuvi 'cueéⁿ nī tan'dúúcā chí cuuvi diⁿ nī tan'dúúcā chí canéé nguūⁿ ndíí vmnaaⁿ na libro yeⁿe Ndyuūs. Ndís'tii nguéé n'diichí nī 'iiⁿyāⁿ. Ní nguéé caaⁿmáⁿ nī chí 'áámá 'iiⁿyāⁿ chí ch'εεte ca yā nguéé ti táámá yā. ⁷¿DÉ'ē cuuvi chí ngaⁿa nī chí naⁿa 'iiⁿyāⁿ chí ch'εεte yā? ¿Áá nguéé tee Ndyuūs tanducuéⁿē chí vεe yeⁿé nī? ¿Dε'ē cuuvi chí ngaⁿa nī chí tanducuéⁿe chí vεe chí yeⁿé nī ní maáⁿ nī sta'á nī, ní nguéé diⁿ nī cuenta yeⁿē chiiⁿ chí tee Ndyuūs ndís'tii?

⁸Ndís'tii ní nadacadíinuuⁿ nī chí deenú nī nducuéⁿē chí yeⁿe nduudu yeⁿe Dendyuūs. Ní diⁿ nī tan'dúúcā 'iiⁿyāⁿ chí 'cuiica. Taachi nguéé ch'εetineé 'nū ndúúcū ndís'tii, tuu'mi ní ndís'tii diⁿ nī tan'dúúcā chí reyes ndís'tii. Nduuti chí ndaa tiempo chí ndís'tii caaⁿmáⁿ nī ntiⁿnyuⁿ ti rey ndís'tii, tuu'mi ní nús'uu caaⁿmaⁿ ntiⁿnyúⁿ 'nū nduucú nī. ⁹Tan'dúúcā chí 'úú nadacadíinúúⁿ, nús'uu chí apóstoles ní candéε 'nū nduudu yeⁿe Ndyuūs. Ndyuūs s'neéⁿ yā nus'ūú lugar chí ndii na n'giinú yeⁿe fila. Ní nús'uu canéé 'nū tan'dúúcā 'iiⁿyāⁿ chí niiⁿnuúⁿ cánee nguuvi chí 'cuūvi yā, ní niiⁿnuúⁿ canéé nguuvi chí ch'iiⁿnúⁿ yā nús'uu. 'Tíicā snéé nús'uu. 'Iiⁿyāⁿ yeⁿe iⁿ'yeeⁿdí 'cūū ndúúcū ángeles yeⁿē nanguuvi n'gíínu yā nús'uu. ¹⁰'Iiⁿyāⁿ yeⁿe iⁿ'yeeⁿdí 'cūū ngaⁿá yā chí nús'uu tonto 'nū ti neⁿé 'nū

Cristo, naati ngaⁿá yā ti ndís'tii ní saⁿā deenu ndís'tii. Ngaⁿá yā ti nús'uu ní 'va'á 'nū naati ndís'tii ní ditiinú nī. Ngaⁿá yā chí nús'uu ní nguéé n'dááca 'nū naati ndís'tii ní n'dááca nī. ¹¹Ndii nguuvi miiⁿ ní cuiicu 'nū ní yaaca 'nū va. Ní 'āā ntéé n'dee catécai 'nū chí n'daacā. Ní 'iiche yeⁿé 'nū. Ní 'iiⁿyāⁿ ch'eⁿé yā nús'uu. Ní diⁿ yā chí chéénú 'nū ndii míⁿ ní ndii 'múúⁿ ní nguéé vaacu 'nū. ¹²Ní diⁿ 'nū ntiⁿnyuⁿ ndúúcū ta'á 'nū chí cuuvi che'ē 'nū. Taachi 'caa'va yā yeⁿé 'nū tuu'mi ní 'iiⁿyāⁿ miiⁿ di'viicú yā nús'uu. Diⁿ yā chí nééné ch'eenu 'nū chí ní nús'uu ní chí cheé 'nū yeⁿé nducuéⁿē. ¹³Caⁿa yā cunncaā yeⁿé 'nū ní chéε 'nū ndúúcū vaadi ngiinu. Ndii nguuvi miiⁿ 'iiⁿyāⁿ nacadiinúúⁿ yā chí nús'uu tan'dúúcā dεεcúū yeⁿe iⁿ'yeeⁿdí 'cūū 'tíica nús'uu.

¹⁴Úú nguéé idinguúⁿ yeⁿe dendu'ú 'cūū yeⁿe ndís'tii caati chí cuuvi 'cuinaáⁿ nī. Yaa'ví ndís'tii yeⁿe nducuéⁿē chuū tí ndís'tii tan'dúúcā daiyá chí nééné neⁿé, 'tíicā ndís'tii. ¹⁵'Áará chí véé ndiichi mil maestros chí ngi'cueéⁿ yā ndís'tii yeⁿe Cristo, nguéé nééné 'yaa' 'iiⁿyāⁿ chí snéε yā tan'dúúcā chiidá nī. 'Úú ní tan'dúúcā chiidá nī na ndaata yeⁿé Dendyuūs, ti candéε evangelio chí nduudu cuaacu chí ngai yeⁿé Cristo nanááⁿ ndís'tii. Ní ndís'tii ní chí'téenu nī ní ch'iindiyááⁿ ntúúⁿ nī na ndaata yeⁿé Ndyuūs. ¹⁶Cáávā chíiⁿ 'úú idi'cuítú ndís'tii. Diⁿ nī tan'dúúcā chí 'úú idifⁿ.

¹⁷Cáávā chuū dicho'ó Timoteo nanááⁿ ndís'tii. Saⁿā miiⁿ tan'dúúcā daiyá, 'tíica sa. Ní saⁿa chí neⁿé. Saⁿā miiⁿ ní 'áámá canee sa ndúúcū

'iivú Ndyuūs. Saⁿā miiⁿ ní ca'cueeⁿ sa ndís'tiī yeⁿe Cristo. Ní n'gaacu nī yeⁿē tanducueⁿē chi cuuvi dííⁿ nī maaⁿ chi i'teenú nī Cristo tan'dúucā chi 'úú ngi'cueéⁿ nduu cuaaⁿ nducueⁿē yáacū va. ¹⁸Maaⁿ ní deenú chi náⁿā ndís'tiī ngaⁿa nī chi n'geete ndai maaⁿ nī. Ní nadacádíinuuⁿ nī chí 'úú ní 'aa ntéé ndaaⁿ naachi cánéé nī. ¹⁹Ndaa nuúⁿ yeⁿé ndís'tiī nduuti chí Ndyuūs neⁿé yā chi ndaa. Taachi ndaa tuuⁿmi 'úú cadiinúúⁿ yeⁿe chi 'iiⁿyāⁿ chi ngaⁿa maáⁿ yā chi n'geete yā. Cadiinúúⁿ nduuti chí 'iiⁿyāⁿ miiⁿ dííⁿ yā tan'dúucā chi Ndyuūs neⁿé yā chí dííⁿ yā. ²⁰Nducueⁿē yeⁿe naachi Ndyuūs ngaⁿa ntiⁿnyuⁿ yā nguéé dámaāⁿ yeⁿe chi ngaⁿa yā, ti chiiⁿ chí diiⁿ yā ti poder yeⁿé Ndyuūs. ²¹De'ē neⁿé ndís'tiī. ¿Áá neⁿe nī chi taachi ndaa ní dííⁿ regañar ndís'tiī, o taachi ndaa caaⁿmáⁿ nduucú ndis'tiī ndúucū vaadi néⁿé?

Ngaⁿa yā nuuⁿndi yeⁿē 'áamá saⁿa chí caⁿá yā na yaacū

5 N'giindiveéⁿ 'nū chí nguááⁿ ndis'tiī véé 'áamá saⁿā chí diiⁿ nuuⁿndi ca tí canee sa ndúucū n'daataá chí nguéé yeⁿē sa. Nguéé 'tíicā nguaaⁿ 'iiⁿyāⁿ gentiles chí nguēe i'téenu yā Jesucristo. N'giindiveéⁿ 'nū chí saⁿā miiⁿ sta'a n'daataá yeⁿē chiida sa ní canee sá ndúucū tá. ²Ní ndís'tiī ngaⁿa maáⁿ nī yeⁿe nī chí n'geete nī n'dáará chí idiíⁿ saⁿā miiⁿ nuuⁿndi 'tíicā. ¿De'ē cuuvi chí nguéé divíí nī saⁿa miiⁿ na yaacū yeⁿé Ndyuūs yeⁿē yú? ³N'dáará chí 'úú nguéé canee ndúucū ndís'tiī inacádiinúúⁿ yeⁿé ndís'tiī. 'Úú ní caaⁿmáⁿ nuuⁿndi

yeⁿe saⁿā miiⁿ yeⁿe dendú'u chí idiíⁿ sa tan'dúucā chí 'úú canee ndúucū ndís'tiī. ⁴Taachí nduuvíicā má ndís'tiī ná chí duuchi Señor Jesucristo tuuⁿmi ní poder yeⁿē Señor Jesucristo canee ndúucū ndís'tiī. Ní dííⁿ nī tan'dúucā chí 'úú canee ndúucū ndís'tiī. ⁵'Tíicā nadacádiinúúⁿ chí ndís'tiī canee cuuⁿmiⁿ chí dííⁿ nī. Divíí nī saⁿā miiⁿ nguaaⁿ ndís'tiī ti saⁿā miiⁿ ní canee sa yeⁿē na poder yeⁿe yááⁿnguiinúúⁿ. 'Tíicā castigo yeⁿē sa. Ní cuuvi cadíinuuⁿ sa yeⁿe alma yeⁿe sa. Ní cuuvi nanguaⁿai alma yeⁿē sa nguuví chí ndaa ntúúⁿ Señor Jesucristo yeⁿē yú.

⁶Nguéé n'dáacā ndís'tiī ní ngaⁿá nī chí n'dái ndís'tiī, ní véé 'iiⁿyāⁿ chí idiíⁿ yā nuuⁿndi nguaaⁿ ndís'tiī. ¿Áá nguéé deenú nī ti ta 'lííⁿ chuundi levadura ichéé ndúucū tanducueⁿē yaachi? ⁷Saⁿā miiⁿ tan'dúucā levadura 'tíicā sa. Ndis'tiī divíí nī saⁿā miiⁿ ní cūnee n'dáaca nī. Cuneé nī tan'dúucā yaachi chí nguéé levadura yeⁿē, tan'dúucā pan chí che'e yā yeⁿē pascua. 'iiⁿyāⁿ chí 'iiⁿnúⁿ yā Cristo. Ní Cristo miiⁿ ní tan'dúucā 'iiti cuūchí chí chí 'iiⁿnúⁿ yā cáávā 'viicu pascua. Cáávā s'uūⁿ ní Cristo miiⁿ ní sta'á yā lugar yeⁿē 'iiti cuūchí yeⁿe 'viicu pascua ti chí yā cucáávā s'uúúⁿ. ⁸Maaⁿ ní nguéé dich'ete yú 'viicu yeⁿe pascua miiⁿ tan'dúucā 'iiⁿyāⁿ chí véé nuuⁿndi yeⁿé yā ti nguéé yeⁿe Cristo 'iiⁿyāⁿ s'eeⁿ. Ní nguéé dich'ete yú ndúucū vaadi n'giinu na staava yeⁿē yú o ndúucū cosa chí nguéé n'daacā, ti chuū ní tan'dúucā levadura 'tíicā. Dich'ete yú pascua miiⁿ dámaāⁿ ndúucū nducueⁿē chí n'daacā na

staava yeⁿē yú ti tan'dúucā pan chi nguée levadura yeⁿē, 'tíicā canee yú.

⁹Áá dinguúⁿ yeⁿe ndís'tií chi nguée cáⁿa nī ndúucū saⁿā chi canee sa ndúucū n'daataá chi nguεe yeⁿē sa ndíi nguée cáⁿa nī ndúucū n'daataá miíⁿ.

¹⁰Úú nguée ngaⁿá chi nguée n'diichí nī sáⁿā chi véé n'daataá yeⁿē sa, o n'daataá chi véé saⁿā yeⁿē tá, o 'iíⁿ'yāⁿ chi nginnche'éei yā 'iíⁿ'yāⁿ, o 'iíⁿ'yāⁿ chi duūcú, o 'iíⁿ'yāⁿ chi i'teenú yā ídolos. Ndís'tií nguée cuuvi cuneé nī na iⁿ'yeeⁿdí cūū ní nguée n'diichí nī 'iíⁿ'yāⁿ yeⁿe iⁿ'yeeⁿdí cūū. ¹¹Naati maaⁿ ní 'āā dinguúⁿ yeⁿé ndís'tií chi nguée cáⁿa nī ndúucū 'iíⁿ'yāⁿ s'eeⁿ chi ngaⁿá yā chi hermanos yeⁿé nī ní nguée n'daacā idiíⁿ yā, ti saⁿā chi canee ndúucū n'daataá chi nguεe yeⁿe sa, o n'daataa chi canee ndúucū saⁿa chi nguεe yeⁿē tá. Ndíi nguée cáⁿa nī ndúucū 'iíⁿ'yāⁿ chi i'teenú yā ídolos. Ndíi nguée cáⁿa nī ndúucū 'iíⁿ'yāⁿ chi ngaⁿá yā nduudu yaadi, o ndúucū 'iíⁿ'yāⁿ chi nginnche'éei yā 'iíⁿ'yāⁿ, o ndúucū 'iíⁿ'yāⁿ chi ngii cuuⁿ'vi, o ndúucū 'iíⁿ'yāⁿ chi duucu. Ní nguée cheⁿé nī ndúucū 'iíⁿ'yāⁿ s'eeⁿ. ¹²¿De'ē cúuví chí 'úú n'diichí nuuⁿndi yeⁿe 'iíⁿ'yāⁿ chi nguée i'téenu yā Jesucristo yeⁿē yú? Chuū ní nguée n'tiíⁿnyuⁿ yeⁿé ti yeⁿé Dendyuūs. Ndís'tií canee chi n'diichi nī nuuⁿndi yeⁿe 'iíⁿ'yāⁿ chi caⁿá yā yaacū ndúucū nī. ¹³Jesucristo n'diichí yā nuuⁿndi yeⁿe 'iíⁿ'yāⁿ chi nguée i'téenu yā Ndyuūs. Maaⁿ ní ndís'tií divíi nī saⁿā miíⁿ nguaaⁿ ndís'tií.

**'iíⁿ'yāⁿ chi i'téenu yā Señor
Jesucristo naⁿá yā nanááⁿ juez
ndúucū vaadi 'caaⁿ'va yeⁿé yā**

6 Nduuti chi 'aama chée ndís'tií
véé vaadi 'caaⁿ'va ndúucū

taama chée ndís'tií, ¿de'ē cúuví chí caⁿá nī nanááⁿ juez yeⁿe yaāⁿ vaacú nī, ní nguée caⁿá nī nanááⁿ 'iíⁿ'yāⁿ chi chée vmaaaⁿ yeⁿe yāacū yeⁿé nī? ²¿Áá nguée deenu ndís'tií ti s'uuúⁿ chi i'teenú yú Jesucristo ndáá nguuvi chi cuuvi n'diichi yú nuuⁿndi yeⁿe 'iíⁿ'yāⁿ yeⁿe iⁿ'yeeⁿdí cūū? Nduuti chi ndís'tií caⁿá nī n'diichí nī nuuⁿndi chi idiíⁿ 'iíⁿ'yāⁿ yeⁿe iⁿ'yeeⁿdí cūū, ¿áá nguée cuuvi n'diichí nī ta 'lírⁿ nuuⁿndi yeⁿe nī chí nguaaⁿ ndís'tií? ³¿Áá nguée deenu ndís'tií chi s'uuúⁿ caⁿa yú n'diichi yú nuuⁿndi yeⁿe ángeles? Ní nduuti chi cuuvi diíⁿ yú 'tíicā tuuⁿ'mi ní cuuvi n'diichi yú dendu'ū nuuⁿndi chi véé yeⁿe yú iⁿ'yeeⁿdí cūū. ⁴Nduuti chi canée chi n'diichí nī dendu'ū vaadi 'caaⁿ'va nguaaⁿ ndís'tií, n'daacā chi caⁿá nī nanááⁿ 'iíⁿ'yāⁿ yeⁿe yaācū 'aara chi nguée 'iíⁿ'yāⁿ chí duuⁿ'vī néⁿe yā vī'ī. ⁵Ngaⁿá chuū chi cuuvi 'cuinaáⁿ nī. ¿Áá cadiinuⁿ nī chi nguée véé mar 'áamá 'iíⁿ'yāⁿ nguaaⁿ ndís'tií, mar 'áamá 'iíⁿ'yāⁿ chi nguée cuuvi n'diichí yā du'u hermano chi véé nuuⁿndi yeⁿe yā? ⁶Nduuti chi véé 'aama hermano chi deenu ca nguaaⁿ ndís'tií, ¿de'ē cúuví chí ngeⁿ'e hermanos ndúucū vaadi 'caaⁿ'va yeⁿé yā nanááⁿ 'iíⁿ'yāⁿ chi nguée i'téenu yā Señor Jesucristo yeⁿē yú?

⁷Cuaacu níⁿ'nyúⁿ nguée ng'iⁿ'i ndís'tií chi yeⁿe Ndyuūs ndís'tií ti véé vaadi 'caaⁿ'va yeⁿe 'áamá nī táamá nī ndúucū vī'ī. ¿De'ē cúuví chí nguée ichée nī nguaaⁿ ndís'tií dendu'ū chi nguεe n'daacā chi hermano diíⁿ yā nduucú nī? N'daacā n'dai chi ichée nī tanducueⁿē ní nguée caⁿá nī

nanááⁿ 'iiⁿyāⁿ cucáávā hermanos chi idiiⁿ yā ndúúcu nī. ⁸Ndís'tiī, hermanos, ní nguéé n'daacā idiiⁿ nī chi nginnche'éí nī 'áámá nī ndúúcu taama nī chi hermano yeⁿe nī.

⁹Ndís'tiī nguéé 'caandiveeⁿ nī chiiⁿ chi 'iiⁿyāⁿ ngaⁿa yā chi cuaacu ní nguéé cuaacu. ¿Áá nguéé deenu nī chi 'iiⁿyāⁿ chi nguéé idin'daacá yā nguéé ndaa yā naachí Ndyuūs ngaⁿa ntiīⁿnyúⁿ yā? Ní nguéé 'iiⁿyāⁿ s'eeⁿ ndíí nguéé 'iiⁿyāⁿ chi sta'á yā n'daataá yeⁿe taama sa, o isaⁿā yeⁿe taama ta, ní nguéé n'daataá chi n'diichi tá saⁿā chi nguéé yeⁿe tá, ní nguéé saⁿā chi n'diichi sa n'daataá chi nguéé yeⁿe sá, ndúúcu 'iiⁿyāⁿ chi i'teenu ídolos chi santos, ndúúcu saⁿā chi iduuchinéⁿ v'í sa. ¹⁰Tiicá ntúūⁿ 'iiⁿyāⁿ duucu, ndúúcu 'iiⁿyāⁿ chi neⁿe cá yā dendu'u chi véé yeⁿe taama 'iiⁿyāⁿ, ndúúcu 'iiⁿyāⁿ chí ngii cúú'v'í, ndúúcu 'iiⁿyāⁿ chi ngaⁿa taán yā yeⁿe taama 'iiⁿyāⁿ, ndúúcu 'iiⁿyāⁿ chí itá'á yā yeⁿe taama yā. Nducuéⁿe 'iiⁿyāⁿ s'eeⁿ nguéé cuuvi nndaá yā naachi Ndyuūs ngaⁿa ntiīⁿnyuⁿ yā. ¹¹Tiicá ntúūⁿ diiⁿ ndís'tiī. Dinuuⁿndí nī tiempo chi 'āā chó'oo naati maaⁿ ní Ndyuūs n'diichí yā ndís'tiī tan'dúúcā chi 'āā ntéé vee nuuⁿndi yeⁿe nī cáávā Jesucristo. Maaⁿ ní ndís'tiī ní dííⁿ nī nducuéⁿe chi n'daacā ti yeⁿe Jesucristo ndís'tiī. Ní Espíritu N'dai yeⁿe Ndyuūs yeⁿe yú canéé ndúúcu nī.

Yeⁿe chi n'daacā chi diiⁿ yú

¹²Tanducuéⁿe chi nguéé nuuⁿndi cuuvi dííⁿ, naati nducueⁿe chi n'daacā nguéé neⁿe dííⁿ, ti nguéé n'dai chi dííⁿ. Cuuvi dííⁿ tanducuéⁿe

chi neⁿe chi n'daacā, naati nguéé necio canéé yeⁿe mar 'áámá dendu'ū. ¹³Cuaacu chi yúutē chi che'e yú ní caavā cheeti yú. Cheeti yú ní neⁿe che'e yuūtē. Naati Ndyuūs dí'cuiinú yā yuūtē chi che'e yú ndúúcu cuerpo yeⁿe yú ndúúcu chi véé yeⁿe. Nguéé cuuvi caaⁿmaⁿ yú chi Ndyuūs teé yā cuerpo yeⁿe yú chi n'daataá n'diichí yā saⁿā. Ndyuūs dííⁿ yā chi s'uuúⁿ chi cuuvi yeⁿe yā ní cuerpo yeⁿe yú ní yeⁿe Dendyuūs. ¹⁴Jesucristo chi 'iivi yú, Ndyuūs nducueeⁿ yā yeⁿe nguaaⁿ tináⁿā. 'Tiicá ntúūⁿ Ndyuūs nadacueeⁿ ntúūⁿ yā s'uuúⁿ ndúúcu poder yeⁿe yā.

¹⁵¿Áá nguéé deenu ndís'tiī chi cuerpo yeⁿe nī ní yeⁿe Cristo? ¿Áá cuta'á nī 'áámá saⁿā chi yeⁿe Cristo ní dííⁿ nī chi saⁿā miiⁿ yeⁿe 'áámá n'dáátāa chi 'yaaⁿ saⁿā yeⁿe tá? Ndyuūs nguéé 'cuáaⁿ yā chi 'tíicā. ¹⁶¿Áá nguéé deenu ndís'tiī chi saⁿā chi caⁿa sa ndúúcu n'daātāa chí 'yaaⁿ saⁿā yeⁿe tá nduuvi 'aama nú yā? 'Iivú Ndyuūs ngaⁿa yā ndii cuááⁿ vmaaaⁿ naachi canéé nguūⁿ na libro yeⁿe yā 'tiicā: Naachí na'uuví yā ní nduuvi 'aama cuerpo núú yā. ¹⁷S'uuúⁿ chi i'teenu yú Jesucristo chí 'iivi yú canee yú ndúúcu dáámá espíritu chí yeⁿe Jesucristo.

¹⁸Ndís'tiī n'daataá, nguéé caⁿá nī ndúúcu saⁿā, o saⁿā nguéé caⁿá nī ndúúcu n'daataá, chi idinuuⁿndí nī ti idiiⁿ nuuⁿndí nī ndúúcu cuerpo yeⁿe maáⁿ nī. Castigo yeⁿe nuuⁿndi miiⁿ 'áámá cūnee na cuerpo yeⁿe nī. Tanáⁿa ca nuuⁿndi chí idiiⁿ nī ní nguéé contra cuerpo chí yeⁿe maáⁿ nī. ¹⁹¿Áá nguéé deenu ndís'tiī

chi cuerpo yeⁿé nī chíⁿ chí yaacū yeⁿe Espíritu N'dai yeⁿé Ndyuūs chi canéé ndúúcū ndís'tií? Ndyuūs tee yā Espíritu N'dai yeⁿe yā ndís'tií. Maaⁿ ni cuerpo yeⁿe nī nguéeé yeⁿe maáⁿ nī ti yeⁿe Espíritu N'dai chi yeⁿe Ndyuūs. Ní Ndyuūs tee yā ndís'tií Espíritu N'dai yeⁿé yā. ²⁰Chuū ní cáávā Jesucristo cáí yā ndís'tií ndúúcū 'áámá precio chi nééné yaⁿai chíi'vē. Cáávā chuū dich'etéé nī Dendyuūs ndúúcū nuuⁿmáⁿ cuerpo yeⁿe nī ti ndís'tií ní yeⁿé Ndyuūs ndís'tií.

**Pablo ca'á yā consejo 'ii'yāⁿ
chí n'giindivaacu yā**

7 Maaⁿ ní idinguúⁿ ní nan'guεεcútāⁿa yeⁿe preguntas chi dingúⁿ nī yeⁿé. N'daacā chi 'aama saⁿā nguéeé 'caandavaacu sa. ²Naati 'tíicā. Deenú chi saⁿā neⁿe sa cūnee sa ndúúcū n'daataá. Cáávā chuū n'dááca chi 'caandavaacu sá ní véé n'daataá yeⁿē sa. 'Tiicá ntúūⁿ chi 'aama n'daataá 'caandavaacu tá ní véé saⁿā yeⁿē tá. 'Tíicā ní nguéeé dííⁿ yā nuuⁿndi. ³Saⁿā ní canéé chí cun'diití sá ndúúcū n'daataá yeⁿē sa. 'Tiicá ntúūⁿ n'daata miiⁿ canéé chí cun'diití tá ndúúcū sáⁿā yeⁿē tá. ⁴N'daataá chi n'gííndivaacu tá, cuerpo yeⁿē tá nguéeé yeⁿē tá dámaāⁿ tá ti yeⁿe sa ndúúcū tá. 'Tiicá ntúūⁿ saⁿā miiⁿ. Cuerpo yeⁿē sa nguéeé yeⁿē sa dámaāⁿ sa ti yeⁿē sa ndúúcū tá. ⁵Dííⁿ nī cumplir ndúúcū n'daata yeⁿe nī o isaⁿā yeⁿé nī. Nduuti chi nduu 'uuví nī canee yiinú nī yeⁿē 'áámá tiempo chi 'áámá caaⁿmaⁿngua'á nī ní ndeeé nī ndúúcū 'iivú Ndyuūs, tuuⁿmí

chuū ní chi dííⁿ nī cumplir tiempo 'cūū. 'Cuiinū caaⁿmaⁿngua'á nī ndúúcū 'iivú Ndyuūs, tuuⁿmi ní dííⁿ nī cumplir ndúúcū isaⁿā o n'daataá yeⁿe nī. Nduuti chi nguéeé dííⁿ nī 'tuucā, tuuⁿmi ní cuuvi neⁿé nī caⁿá nī ndúúcū táámá saⁿā o n'daataá. Ní yááⁿn'guiinūⁿ n'diichínēⁿ sa ndís'tií neⁿe chi nguéeé dííⁿ nī cumplir ndúúcū isáⁿā o n'daataá yeⁿe nī. Ní cuuvi dííⁿ nī nuuⁿndi.

⁶Úú nguéeé caaⁿmáⁿ ndis'tií chíiⁿ chí dííⁿ nī, ndís'tií chí neⁿé nī 'caandavaacú nī. Nguéeé teé chuū tan'dúúcā 'áámá ley. ⁷Ti neⁿé chi nducyaaca saⁿā nguéeé 'caandavaacu sa ní cūnee sa dámaāⁿ sa tan'dúúcā chí 'úú canee, naati nguεε cuuví chí 'tíicā. 'Úú deenu chí Ndyuūs ca'á yā 'áámá 'áámá 'ii'yāⁿ chíiⁿ chí cuuvi dííⁿ yā.

⁸Úú ngaⁿá ngii saⁿā n'gaiyáa o n'daataá n'gaiyáa ndúúcū n'daataá n'guá'áa chí n'daacā chí 'ii'yāⁿ s'eeⁿ nguéeé 'caandavaacú yā ní cunee yā dámaāⁿ yā tan'dúúcā chí 'úú canee. ⁹Nduuti chí nguéeé cuuvi 'cuεetinée yā damaāⁿ yā, tuuⁿmi ní 'caandavaacú yā. Ti n'daacā chí 'caandavaacú yā ní nguéeé cūnee yā ndúúcū deseo chí saⁿā neⁿe sa n'daataá o n'daataá neⁿe tá saⁿā.

¹⁰Chuū ngaⁿá yeⁿé 'ii'yāⁿ chí n'giindivaacu yā. Saⁿā miiⁿ nguéeé divíi sa n'daataá yeⁿē sa, o táⁿā miiⁿ nguéeé divii tá isáⁿā yeⁿē tá. Chuū chí ley yeⁿe Ndyuūs. ¹¹Ndúúti chí 'áámá n'daataá divíi tá yeⁿe isaⁿā yeⁿē ta caati nguéeé yaaⁿ yiinú tá ndúúcū isaⁿā yeⁿē tá, tuuⁿmi ní 'āā ntéé 'caandavaacu tá ndúúcū taama sáⁿā. 'Tiicá ntúūⁿ saⁿā yeⁿē tá nguéeé cu'neeⁿ sá n'daataá yeⁿē sa cucáávā taama n'daataá.

¹²Maaⁿ ní chuū chí ngaⁿá ngī tanáⁿā 'iiⁿyāⁿ ni cosa tan'dúúcā chi deenú chi n'daacā cááva yā. Ní chuū ní nguée^e ley yeⁿe Ndyuūs. Nduuti chí 'áámá saⁿā chí i'teenu Ndyuūs ní n'daataá yeⁿe sa ní nguée^e i'teenu tá, tuuⁿmi nguée^e cu'neeⁿ sa n'daataá yeⁿe sa nduuti chí táⁿā miiⁿ n'daacā canee tá ndúúcu sa. ¹³Tiicá ntúūⁿ, n'daataá chí i'teenu tá ní saⁿā yeⁿe tá nguée^e i'téenu sa ní n'dááca canee tá ndúúcu sa, tuuⁿmi nguée^e cu'neeⁿ tá isaⁿā yeⁿe tá. ¹⁴Sáⁿā yeⁿe tá chí nguée^e i'téenu sa ní cuuvi yeⁿe Jesucristo saⁿā miiⁿ cucáávā n'daataá yeⁿe sa chí i'teenu tá. 'Tiicá ntúūⁿ, n'daataá chí nguée^e i'teenu tá ní cuuvi yeⁿe Jesucristo n'daataá miiⁿ cucáávā isaⁿā yeⁿe tá chí i'teenu sa. Ndúúti chí nguée^e 'tíicā, tuuⁿmi ní nguée^e cuuví yeⁿe Jesucristo daiyá yā. Naati 'tíicā, tuuⁿmi ní cuuví yeⁿe Jesucristo daiyá yā. ¹⁵Naati nduuti chí saⁿā o n'daata chí nguée^e i'téenu yā Señor Jesucristo nguée^e cūnee n'dááca saⁿā miiⁿ ndúúcu n'daataá yeⁿe sa, o n'daataá míⁿ ndúúcu isaⁿā yeⁿe tá chí i'téenu yā Señor Jesucristo, tuuⁿmi ní cuuvi divíi yā yeⁿe víi. 'Iiⁿyāⁿ chí i'téenu yā Jesucristo nguée^e a fuerza chí cunee yā ndúúcu 'iiⁿyāⁿ chí nguēe i'téenu yā Señor Jesucristo. Ndyuūs neⁿe yā chí 'iiⁿyāⁿ chí i'téenu yā Señor Jesucristo cunee n'dááca yā ndúúcu vaadi 'diiⁿ. ¹⁶Ndís'tii 'iiⁿyāⁿ chí i'téenu ní Señor Jesucristo, 'táácā cuuvi deenú ní nduuti chí cuuvi dinguáⁿai ní isaⁿā yeⁿe ní o n'daataá yeⁿe ní? Nguée^e cuuvi déenu ní chuū chí 'tíicā.

¹⁷Ndyuūs yeⁿe yú yaaⁿví yā s'uuúⁿ chí yeⁿe yā s'uuúⁿ. Ní tee yā 'áámá

'áámá s'uuúⁿ ntiiⁿnyuⁿ s'uuúⁿ chí yeⁿe yā chí ituneeⁿ s'uuúⁿ. Ní 'íicú véé ntiiⁿnyuⁿ yeⁿe Ndyuūs yeⁿe 'áámá 'áámá s'uuúⁿ. Ní canee chí 'cuetinee yú n'daacā tan'dúúcā Ndyuūs neⁿe yā chí diiⁿ yú. 'Tíicā ngaⁿa ntiiⁿnyuⁿ 'úú yeⁿe nducyáácá yáacū. ¹⁸Nduuti chí Ndyuūs yaaⁿví yā 'áámá saⁿā yeⁿe ndaata Israel chí cuuvi yeⁿe yā ní 'iiⁿyāⁿ 'āā diiⁿ yā circuncidar cuerpo yeⁿe saⁿā miiⁿ ndii chí 'líiⁿ sa tan'dúúcā chí ngaⁿa ley yeⁿe 'iiⁿyāⁿ ndaata Israel, 'āā canee sa 'tíicā. Ndúúti chí Ndyuūs yaaⁿví yā 'áámá saⁿā chí cuuvi yeⁿe yā ní saⁿā miiⁿ nguée^e yeⁿe ndaata Israel ní nguée^e diiⁿ yā circuncidar cuerpo yeⁿe saⁿā miiⁿ, 'āā canee sa 'tíicā. ¹⁹Nguée^e deⁿe vee nanááⁿ Ndyuūs nduuti chí diiⁿ yā circuncidar cuerpo yeⁿe saⁿā o nguée^e. Dámaāⁿ dichíⁿvē nduuti chí cu'teenu yú Jesucristo ní diiⁿ yú tan'dúúcā chí Ndyuūs neⁿe yā. ²⁰Tan'dúúcā chí ndís'tii 'āā canee ní taachí Ndyuūs yaaⁿví yā 'áámá 'áámá ndís'tii 'tiicá ntúūⁿ cunee ní. ²¹Taachi Ndyuūs yaaⁿví yā n'dii chí cuuvi yeⁿe yā, nduuti chí n'dii canee ní tan'dúúcā chí canee 'iiⁿyāⁿ chí canee caadi 'iiyu ní nguée^e cuuvi naⁿa yā nguée^e nacádiinúúⁿ ní deⁿe vee yeⁿe chúú. Ní nduuti chí cuuvi canee libre ndís'tii, chí diiⁿ ní ntiiⁿnyuⁿ caadi 'iiyu tuuⁿmi ní caⁿá ní. Ní cunee ní libre. ²²Taachí Ndyuūs yaaⁿví yā 'iiⁿyāⁿ chí canee caadi 'iiyu ní 'iiⁿyāⁿ miiⁿ i'téenu yā Jesucristo, 'iiⁿyāⁿ canee yā tan'dúúcā chí libre, tí canee libre yā yeⁿe nuuⁿndi yeⁿe yā. 'Iiⁿyāⁿ chí canee libre taachí Ndyuūs yaaⁿví yā 'iiⁿyāⁿ, 'iiⁿyāⁿ miiⁿ nguée^e libre

ti dichí'v'e yā Ndyuūs. ²³Iivú Ndyuūs ní cáí yā ndís'tiī ndúúcū 'áámá precio chi néené yaⁿai chii'vē ti yuúúⁿ yeⁿe daiyá yā. Maaⁿ ní ndís'tiī ní yeⁿé Ndyuūs ndís'tiī. Ní dííⁿ nī ntiiⁿnyuⁿ yeⁿé Ndyuūs. Nguéé dííⁿ nī tan'dúúcā 'iiⁿyāⁿ yeⁿe iⁿ'yeeⁿdí 'cūū chi nguεε i'téénu yā Jesucristo ngaⁿa yā chí dííⁿ nī. ²⁴Ndís'tiī hermanos yeⁿé, ca'áámá ca'áámá ndís'tiī canéé nī ndúúcū Ndyuūs. Naachi canéé nī mííⁿ canéé Dendyuūs ndúúcu nī.

²⁵Úú ca'á 'áámá consejo yeⁿé n'daataá chi nguéé n'giindivaacu tá. Deenú chi ngaⁿá tan'dúúcā chí Dendyuūs néⁿé yā, naati chuū ní nguéé ley yeⁿé yā. 'Úú Pablo 'úú chi i'teenú Ndyuūs. Ní Ndyuūs ch'iⁿí yā 'úú chiiⁿ chí 'úú dííⁿ ní ngaⁿá. ²⁶Úú nadacadiinúúⁿ chí n'daacā chí saⁿá s'eeⁿ 'cuεetinée sa damaāⁿ sa. Ti maaⁿ ní deenu yú chí ndaā tiempo chí n'geenu yú ngii. ²⁷Ndís'tiī saⁿá chí véé n'daataá yeⁿé nī, nguéé cu'neeⁿ nī táⁿá. Ndís'tiī saⁿá chí nguéé n'daataá yeⁿé nī nguéé in'nuúⁿ nī n'daataá chí cuuvi yeⁿé nī. ²⁸Nduuti chí 'áámá saⁿá chí iindivaacu sa, nguéé dinuūⁿndí sa. Nduuti chí n'daataá mííⁿ 'caandavaacú tá, nguéé dinuūⁿndí tá. 'Úú nadacadiinúúⁿ chí 'iiⁿyāⁿ chí ch'iindivaacu yā ní 'cueenu cá yā cuuvi. Nguéé neⁿé chí ndís'tiī 'cueenu cá nī cuuvi.

²⁹Chuū ngaⁿá ngii ndís'tiī hermanos yeⁿé: Nguéé 'naaⁿ tiempo 'cuεetinée yú iⁿ'yeeⁿdí 'cūū. Saⁿá chí véé n'daataá yeⁿé sa n̄diiⁿ sa ntiiⁿnyuⁿ yeⁿe 'iivú Ndyuūs vmnááⁿ vmnaaⁿ nguéé ti neⁿe n'daataá yeⁿé sa. ³⁰Nguéé dííⁿ nī cuenta yeⁿe de'ē

vεε chí chó'ōo yeⁿé nī. Nduuti chí ngeεcú nī yeⁿe 'aama tináⁿā nguéé 'naaⁿ tiempo cuεcú nī. Nduuti chí yeenú nī ti véé 'áámá 'viicu nguéé 'naaⁿ tiempo cunéé vaadi yeenú nanáaⁿ nī. Nduuti chí ngái nī tuu'mi ní ngáácú nī chí nguéé 'naa tiempo cunee. ³¹Ní ndís'tiī chí véé negocio yeⁿé nī yeⁿé cosa chí véé ná iⁿ'yeeⁿdí 'cūū, nguéé 'cuεetineé nī dámaaⁿ yeⁿe chuū, ti iⁿ'yeeⁿdí ndúúcū nducueⁿé chí vεε yeⁿé nī chó'óo.

³²Úú neⁿé chí nguéé nadacadiínuuⁿ nī yeⁿé dendu'ū chí véé. Saⁿá s'eeⁿ chí nguéé n'giindivaacu sa ndéε sa cuidado yeⁿe dendu'ū chí yeⁿé 'iivú Ndyuūs. Ní idiiⁿ sa tan'dúúcā chí neⁿé Ndyuūs. ³³Saⁿá chí n'giindivaacu sa ndéε sa cuidado yeⁿé chí véé na iⁿ'yeeⁿdí 'cūū táácā cuuvi cunee yínūu n'daataá yeⁿé sa. ³⁴'Tiicá ntūūⁿ idiiⁿ n'daataá chí n'gíindiváacu tá. 'Áámá n'daataá chí nguéé n'giindivaacu tá ndéε tá cuidado yeⁿe dendu'ū yeⁿe 'iivú Ndyuūs. Ní diiⁿ tá ndúúcū nuuⁿmaⁿ staava yeⁿé tá nducueⁿé chí neⁿe Ndyuūs. Nguéé 'tíicā idiiⁿ n'daataa chí n'giindivaacu tá. Ndéε tá cuidado yeⁿe nducueⁿé yeⁿé vaacu tá nī táácā chí cuuvi cunee yínūu isaⁿá yeⁿé tá.

³⁵Ngaⁿá ngii ndís'tiī chuū: Nguéé chí nguéé 'caandavaacú nī ti neⁿé chí ndís'tiī ní cuuvi cunee n'daaca cá nī. Neⁿé chí ndís'tiī dííⁿ nī ndúúcū nuuⁿmaⁿ staava yeⁿe nī chiiⁿ chí cuuvi dichí'v'e ca Ndyuūs. Ní cu'neéⁿ nī nducueⁿé chí véé iⁿ'yeeⁿdí 'cūū chí cuuvi nī.

³⁶Nduuti chí 'áámá saⁿá nadacadiínuuⁿ sa chí n'daacā

chi daiya sa chi n'daataa cuiinu 'caandavaacu tá ti véé nduuyu yeⁿé tá tuu'mi ní cuuvi diiⁿ sa n'daacā caava tá. Ní 'caandavaacu tá. Chuū ní nguée nuuⁿndi. ³⁷Nduuti chi táámá saⁿā miiⁿ nguée neⁿe sa chi daiya sa 'caandavaacu tá ti canée ditiinú sa na staava yeⁿé sa chi nguée neⁿe sa 'caandavaacu tá, tuu'mi ní cunee libre sa. Ní cuuví diiⁿ sa chee chí neⁿé sa. Ní diiⁿ sa cuidado táⁿā daiya sa. Ní n'daacā idiiⁿ sa. ³⁸Saⁿā chi ngaⁿa sa chi n'gīindivaacu tá, o saⁿā chi nguée neⁿe sa chi 'caandavaacu tá, nduu 'uuví saⁿā miiⁿ din'daacá sa. Naati n'daacā ca idiiⁿ saⁿā chi nguée neⁿe sa chi 'caandavaacu tá.

³⁹N'daataa chi n'gíidivaacu tá canée chi 'cuaeⁿinee tá ndúucū isaⁿā yeⁿé tá núuⁿmán neⁿe chí cándúuchi sá. Ndúuti chi 'cuūvi saⁿā yeⁿe tá tuu'mi ní cuuví 'caandavaacu tá ndúucū táámá saⁿā chi i'téenu sa Jesucristo. ⁴⁰Úú inadacádiinúú chí n'daacā ca yeⁿé tá chi 'aa ntée 'caandavaacu tá. Chuū chi ngaⁿá nguée dámaāⁿ yeⁿe chi 'úú nadicádiinúú ti tan'dúucā chi neⁿe Espíritu N'dai yeⁿé Ndyuūs.

Yeⁿe yuūtē chi 'iiⁿyāⁿ cá'a yā yeⁿé nátaí yeⁿe ídolos

8 Maaⁿ ní idinguúⁿ taama chi yeⁿe yuūtē yeⁿe 'iiti chi 'iiⁿyāⁿ 'caaⁿnúⁿ yā ní cá'a yā yuūtē miiⁿ yeⁿé nátaí cáávā ídolos. Deenu yú chi nducyaaca yú deenu yú 'tee yeⁿe chuū. 'Iiⁿyāⁿ chi nadacádiinúú yā chi deenú cá yā cuuvi dich'etē maáⁿ yā 'iiⁿyāⁿ. 'Iiⁿyāⁿ chi neⁿé yā Ndyuūs ní neⁿé yā hermanos, 'iiⁿyāⁿ

miiⁿ néⁿé yā chi tanáⁿā hermanos chi cuuvi déenu cá yā yeⁿe Ndyuūs. ²'Iiⁿyāⁿ chi nadacádiinúúⁿ yā chi deenu yā nguée tanducueⁿé deenu yā tan'dúucā chi canée chi cuuví deenu yā. ³Nduuti chi 'áámá 'iiⁿyāⁿ dinéⁿe yā Ndyuūs, tuu'mi ní Ndyuūs inaaⁿ yā 'iiⁿyāⁿ miiⁿ. ⁴Maaⁿ ní 'úú neⁿé chi cadiiinúúⁿ ní yeⁿe yuūtē chi 'iiⁿyāⁿ cá'a yā yeⁿe nátaí yeⁿe ídolos. Deenu yú chí ídolos nguée cánduuchi. Deenu yú ti 'áámá n'dyáⁿā Ndyuūs chi vee yā ní nguée ca táámá yā. ⁵'Iiⁿyāⁿ ngaⁿa yā chi néené véé cá ídolos na yāⁿāa 'cūú níicú nanguuvi váá. Ní 'iiⁿyāⁿ ngaⁿá yā chi cosa s'eeⁿ ní dendyuūs s'eeⁿ. ⁶S'uuúⁿ deenu yú chi véé 'áámá nuúⁿ Ndyuūs yeⁿé yú. Ndyuūs Chiida yú chi din'dái yā tanducueⁿé dendu'ú. Ní Ndyuūs diiⁿ yā chi cuuvi yeⁿé yā s'uuúⁿ. Véé 'áámá n'dyáⁿa 'iivú Ndyuūs yeⁿé yú chi Jesucristo. Ndyuūs Chiida yú ndúucū Jesucristo daiyá yā din'dái yā tanducueⁿé dendu'ú chi véé. Jesucristo yeⁿé yú tee yā vida yeⁿé yú cueⁿe daāⁿmaⁿ.

⁷Nguée nducyaaca 'iiⁿyāⁿ chi i'téenu yā Jesucristo deenú yā chi 'aama n'dyáⁿā Dendyuūs vee yā. Ndií maaⁿ ní náⁿa yā ní i'téenu yā chi canduuchi ídolos. Taachi 'iiⁿyāⁿ cá'a yā yuūtē yeⁿé nátaí yeⁿe ídolos, ní i'téenu yā chi ca'a yā yuūtē nátaí yeⁿé dendyuūs s'eeⁿ. Ní taachi 'iiⁿyāⁿ chi duu'ví deenú yā yeⁿe Ndyuūs cheé yā yuūtē yeⁿe nátaí s'eeⁿ, 'iiⁿyāⁿ miiⁿ nadacádiinuuⁿ yā chi véé nuuⁿndi yeⁿe yā. ⁸Ndyuūs nguée diiⁿ cuenta yā yeⁿé s'uuúⁿ nduuti chi nge'e yú yuūtē miiⁿ o nguée. Nduuti chi nge'e yú yuūtē miiⁿ nguée idiiⁿ chi n'daacā

ca yú. Nduuti chi nguée che'e yú nguée idiiⁿ chi nguée n'daacá ca yú. ⁹Ndís'tií chi déenu nī chee chi Ndyuūs neⁿé yā chi diiⁿ nī, 'caandiveéⁿ nī. Nguée diiⁿ nī de'ē vee chi 'iiⁿyāⁿ chi duuⁿvī déenu yā yeⁿe Jesucristo cuuvi nacádiínuuⁿ yā chi vee nuuⁿndi yeⁿe yā. ¹⁰Úú ngaⁿá ngī ndís'tií chi canee diituu cá nī chi i'téenu cá nī Ndyuūs. Deenú nī chi nguée véé nuuⁿndi yeⁿe nī taachi chi snée na mesa yeⁿe ní'vēē yeⁿe yaācū yeⁿe ídolos. Naati 'iiⁿyāⁿ chi duuⁿvī déenu yā yeⁿé Jesucristo cuuvi n'diichí yā ndís'tií, tuuⁿmi ní 'iiⁿyāⁿ miiⁿ chi nadacadiínuúⁿ yā chi ndís'tií 'tēe 'tēe i'téenu nī ídolos. 'Iiⁿyāⁿ miiⁿ cuuvi diiⁿ yā tan'dúúcā ndís'tií idiíⁿ nī. Caⁿá yā che'é yā yuūtē miiⁿ ní diiⁿ yā sentir chi véé nuuⁿndi yeⁿé yā. ¹¹Áará chi cuuvi che'é nī yuutē 'cūū ní nguée véé nuuⁿndi yeⁿé nī nguée neⁿé nī chi hermanos chi duuⁿvī deenú yā yeⁿé Jesucristo diiⁿ yā 'tíicā, caati nguēcúndií yā ní 'tēe 'tēe i'téenu yā ídolos. Ní 'tíicā idiíⁿ hermanos ní Cristo ch'ii yā na cruz ntúūⁿ caavā yā. ¹²Taachí diiⁿ nī 'tuucā 'tíicā idinuuⁿndí nī contra Cristo níicú contra yeⁿe hermano chi duuⁿvī déenu yā yeⁿé Jesucristo. Caati hermanos miiⁿ 'tēe 'tēe i'téenu yā ídolos, ní véé nuuⁿndi yeⁿe yā. ¹³Úú nacádiínuúⁿ yeⁿe chuū 'tíicā. Nduuti chi 'úú che'é yuūtē miiⁿ, ni 'úú diiⁿ chi hermano chi duuⁿvī deenú yā yeⁿé Jesucristo che'é yā ní véé nuuⁿndí yā, tuuⁿmi ní 'āā ntéé che'é yuūtē miiⁿ.

Pablo ca'á yā orden ti 'áámá apóstol yeⁿé Jesucristo

9 ¿Áá nguée 'úú Pablo 'áámá apóstol 'úú ní cuuvi diiⁿ nducueⁿé chi nguée nuuⁿndi? ¿Áá

nguée 'úú nnguaⁿāi 'úú? 'Úú n'diichí Señor Jesucristo yeⁿé yú. 'Úú candéé nduudu cuaacu yeⁿe Ndyuūs. Ní ndís'tií i'téenu nī nduudu miiⁿ caavā ntiíⁿnyuⁿ yeⁿé. ²Nduuti chi tanáⁿa yā nguée i'téenu yā chi 'úú apóstol 'úú, ndís'tií i'téenu nī chi cuaacu. Ndís'tií ní tan'dúúcā sello 'tiicá nī, ti i'téenu nī Señor Jesucristo. Ní deenú nī chi 'úú 'aama apóstol yeⁿe Señor Jesucristo. Ndís'tií ní yeⁿe Jesucristo caavā chi 'úú candéé nduudu miiⁿ.

³'Iiⁿyāⁿ chi itíinguuneeⁿ yā 'úú yeⁿé chi 'úú chi 'aama apóstol, 'túúcā nangueécútaⁿá yeⁿe yā. ⁴Nús'uu chi apóstoles ¿áá nguée tuneéⁿ 'nū chi ch'é 'nū ní cú'ú 'nū ndúúcū ndís'tií na vaacu ní? ⁵¿Áá nguée tuneéⁿ 'nū chi 'áámá 'áámá 'nū candéé 'nū n'daataá yeⁿe 'nū taachi caⁿa 'nū cuaaⁿ cyúúni? 'Túúcā diiⁿ tanáⁿā apóstoles, ndúúcū hermanos chi yeⁿe Jesucristo, ndúúcū hermano Pedro. ⁶Dámaāⁿ 'úú ndúúcū Bernabé diiⁿ 'nū ntiíⁿnyuⁿ cáávā chi ch'é 'nū. ⁷¿Du'ú soldado diiⁿ sa gastar tuumi caavā gastos yeⁿe sa taachi diiⁿ sa ntiíⁿnyuⁿ miiⁿ? ¿Du'ú saⁿā ngiichi sa díf'yú uvas ní 'áá nguée cuuvi ch'é sá yeⁿé? ¿Du'ú 'iiⁿyāⁿ chi diiⁿ cuidado 'áámá taaⁿ 'iiti cuūchí ní 'áá nguée cuuvi cú'ú yā leche yeⁿé 'iiti miiⁿ? ⁸Úú nguée ngaⁿá chuū tan'dúúcā chi ngaⁿa saⁿa chi ca'a orden. Ngaⁿá chuū, ti 'tíicā ngaⁿa ley yeⁿe Moisés miiⁿ. ⁹Canee nguūⁿ na libro yeⁿé Ndyuūs chi ley chi Moisés dingúúⁿ yā chi 'tíicā: Nguée cu'nuúⁿ nī yaana duutú tī chi inde'ei nuúⁿ tī nguaaⁿ trigo chi nguée cuuvi ch'é tī: ¿Áá ndēe cuidado Ndyuūs dámaāⁿ 'iiti? Nguée 'túúcā. ¹⁰Cáávā

nús'uu, ní cuaacu níⁿnyúⁿ canéé nguūⁿ 'tíicā: 'Iiⁿyāⁿ chí di'cuúndú yā 'iiti ndúúcu 'iiⁿyāⁿ chí yiinenaáⁿ yā 'iiti chí inde'ei nuúⁿ tī nguaaⁿ trigo, 'iiⁿyāⁿ s'eeⁿ ní cunee ngiínú yā cosechā yeⁿe yā. ¹¹Candéé 'nū nduudu yeⁿ'é Ndyuūs nguaaⁿ ndís'tiī taachi 'āā cuéé 'caandiveéⁿ nī nduudu miiⁿ. 'Áá nguéé téé nī nús'uu necesidades yeⁿ'é 'nū? ¹²Nduuti chí tanáⁿ'ā apóstoles cuuvi cuta'á yā necesidades yeⁿ'é yā yeⁿ'e ndís'tiī, 'áá nguéé cuuvi cuta'á 'nu necesidades yeⁿ'é 'nū dendú'ú? Nguéé caaⁿ'máⁿ 'nū chí ndís'tiī téé nī necesidades yeⁿ'é 'nū naatí chí chéé 'nū nducuéⁿ'ē dendú'ú, caati 'iiⁿyāⁿ cuuvi cut'éénu yā nduudu yeⁿ'e 'iivú Ndyuūs. ¹³'Áá nguéé déénu ndís'tiī chuū ndii tiempo chí 'aa chó'oo yeⁿ'e 'iiⁿyāⁿ chí diiⁿ ntiīⁿnyuⁿ yeⁿ'e yaacū templo? 'Iiⁿyāⁿ miiⁿ che'é yā comida yeⁿ'e yaacū. 'Tiicá ntúūⁿ, 'iiⁿyāⁿ chí diíⁿ yā ntiīⁿnyuⁿ yeⁿ'e nátai, 'iiⁿyāⁿ miiⁿ che'é ntúūⁿ yā chí véé nátai chí 'iiⁿyāⁿ ndéé yā ndaa yā nátai. ¹⁴'Tíicā ngaⁿ'a Señor 'iivú Ndyuūs yeⁿ'é 'iiⁿyāⁿ chí candéé yā nduudu yeⁿ'e evangelio chí nduudu ngai yeⁿ'é Jesucristo. 'Iiⁿyāⁿ miiⁿ 'cuetinée yā ndúúcu 'iiⁿyāⁿ chí i'téénu yā Señor Jesucristo, ní ca'á yā 'iiⁿyāⁿ s'uuⁿ chí che'é yā. ¹⁵'Úú nguéé sta'á túumī yeⁿ'é nī, ní nguéé che'é de'ē vee, ti téé túumī ndís'tiī. Nguéé dinguúⁿ chuū chí 'tíicā diíⁿ nī nduucú. N'dáácā ca yeⁿ'é chí 'cuúví ní mar 'áamá 'iiⁿyāⁿ nguéé cuuvi caaⁿ'maⁿ yā chí 'úú candéé ndúúdu cuaacu yeⁿ'e Dendyuūs cáávā chí nadí'v'e yā 'úú.

¹⁶'Áará chí ngaⁿ'á evangelio chí ndúúdu ngai yeⁿ'é Jesucristo 'úú nguéé cuuvi caaⁿ'máⁿ chí 'úú chí

ch'et'é. Canéé chí caaⁿ'máⁿ yeⁿ'é evangelio, ti cáávā chuū chíⁿ chí Ndyuūs dichó'ó yā 'úú. Nééné 'cuenú cuuvi nduuti chí nguéé caaⁿ'máⁿ yeⁿ'é evangelio. ¹⁷Ndúúti chí caaⁿ'máⁿ yeⁿ'e evangelio ti diíⁿ buscar ntiīⁿnyuⁿ miiⁿ tuu'mi ní Ndyuūs nadí'v'e yā 'úú, naati nguéé 'tíicā. Cáávā chuū canéé chí caaⁿ'máⁿ evangelio chí ndúúdu ngai yeⁿ'é Jesucristo. ¹⁸'De'é ndaacā yeⁿ'é 'úú? Nguéé de'ē vee ndaacā yeⁿ'é. Cáávā 'úú nadí'v'e yeⁿ'é chíⁿ chí ngaⁿ'á ndúúdu ngai. 'Úú caaⁿ'máⁿ nduudu ngai yeⁿ'é Jesucristo ní yeenú taavi 'úú ti nguéé cutaⁿ'á dendú'ú yeⁿ'e nī. Nguéé caaⁿ'máⁿ chí ndís'tiī tee nī 'úú de'ē vee cáávā ntiīⁿnyuⁿ yeⁿ'é 'aara chí cuaacu chí canéé chí diíⁿ nī.

¹⁹N'daacā canéé 'tíicā. Nguéé du'ú vee cuuvi caaⁿ'maⁿ ntiīⁿnyuⁿ yeⁿ'é, ti 'iiⁿyāⁿ nguéé nadí'v'e yā 'úú. 'Úú dichí'v'e nducyáácā 'iiⁿyāⁿ 'iicu cuuvi cut'éénu yā Jesucristo yeⁿ'é yú. ²⁰'Áará chí maaⁿ nguéé costumbre yeⁿ'é chí idiíⁿ tan'dúúcā chí ngaⁿ'a ley yeⁿ'é Moisés, naati taachi canéé nguaaⁿ 'iiⁿyāⁿ hebreo s'eeⁿ chí diíⁿ yā tan'dúúcā chí ngaⁿ'a ley yeⁿ'é Moisés, 'tíicā idiíⁿ dendú'ú. Idiíⁿ 'tiicā ní 'iicu 'iiⁿyāⁿ hebreo s'eeⁿ cuuvi cut'éénu yā Jesucristo. ²¹Taachi 'úú canéé ndúúcu 'iiⁿyāⁿ chí 'āā vi'i cā ley yeⁿ'é yā nguéé ti ley yeⁿ'é Moisés miiⁿ, 'úú idiíⁿ tan'dúúcā 'iiⁿyāⁿ s'eeⁿ. Naati nguéé idiíⁿ cosa chí Ndyuūs nguéé neⁿ'é yā chí 'úú diíⁿ. 'Tíicā idiíⁿ, ní 'íicú 'iiⁿyāⁿ miiⁿ cuuvi cut'éénu yā Jesucristo. ²²Taachi canéé nguaaⁿ 'iiⁿyāⁿ chí duūvā tuu'mi 'úú idiíⁿ tan'dúúcā 'aama chí

duwā, ní 'iicu cuuvi cu'téenu yā Jesucristo. Nduu cuaaⁿ naachi caⁿ'á 'úú idiiⁿ nducuéⁿē tan'dúucā chi idiiⁿ 'iiⁿ'yāⁿ s'uuⁿ. Idiiⁿ 'tíicā ní 'iicu díiⁿ chí nanguáⁿ'ai náⁿ'a yā. ²³'Úú idiiⁿ tanducuéⁿē chuū chi 'úú cuuvi caaⁿ'máⁿ nduudu yeⁿe Ndyuūs nanááⁿ 'iiⁿ'yāⁿ. Ní cuuvi cuta'a yú cosa chi n'dai chi Ndyuūs tée yā s'uūúⁿ.

²⁴ ¡Áá nguéé déenu ndís'tii yeⁿe 'iiⁿ'yāⁿ chi ngéenu yā na juego? Nducyaaca yā ngéenu yā na juego naati 'áámá núuⁿ yā chi díiⁿ yā ganar ní ndaaca regalo yeⁿe yā. Maaⁿ ní ndís'tii díiⁿ nī tan'duucā 'aama chi ngéenu yā ní díiⁿ nī ganar. 'Tíicā díiⁿ nī chiiⁿ chi Ndyuūs neⁿ'é yā, ní tunéé ndís'tii chi cuuvi yeⁿ'é nī chεε chí Ndyuūs tée yā ndís'tii. ²⁵Ca'áámá ca'aama saⁿ'ā chi ngeēnū sa nguéé cuuvi diiⁿ sa nducuéⁿē chi neⁿ'e sa. Dámaāⁿ idiiⁿ sa cosas chi n'daācā caavā sa cucáavā chi ditiinú sa. 'Tíicā idiiⁿ sa ni cuuví ndaacā sa 'áámá corona yeⁿ'e naāndā chi ngo'o yeⁿ'ē. S'uūúⁿ ní idiiⁿ cá yú tan'dúucā chí Dendyuūs neⁿ'é yā chi diiⁿ yú, ní ndaaca yú 'áámá corona chi nguéé tuví yeⁿ'ē chi Dendyuūs tée yā s'uūúⁿ. ²⁶'Úú idiiⁿ ntiⁿ'nyuⁿ yeⁿ'é Ndyuūs tan'dúucā 'áámá chi ngeenu na juego ní díiⁿ yā ganar. 'Úú idiiⁿ ntiⁿ'nyuⁿ díitū tan'dúucā 'iiⁿ'yāⁿ chi nguⁿ'ú yā ndúucū taamá yā, nguéé tan'duucā chi nguⁿ'ú yā ní ngéⁿ'é yā na 'yúúné. ²⁷'Úú idiiⁿ sufrir cáavā ntiⁿ'nyuⁿ yeⁿ'é Ndyuūs, ní diiⁿ n'dai cá ntiⁿ'nyuⁿ miiⁿ. 'Tíicā idiiⁿ, ti nguéé neⁿ'é chi cuayiivi chi caaⁿ'máⁿ nduudu cuaacu miiⁿ, Ndyuūs cuuvi caaⁿ'máⁿ yā yeⁿ'e 'úú chi nguéé n'daācā díiⁿ ntiⁿ'nyúⁿ yeⁿ'e yā.

Pablo ca'á yā consejo chi 'iiⁿ'yāⁿ nguéé canee chi i'teenú yā ídolos

10 Ndís'tii hermanos yeⁿ'é, neⁿ'é chi ndís'tii nan'gáácú nī yeⁿ'e tiempo chi 'āā chó'ōo. 'Iiⁿ'yāⁿ hebreos díiⁿ yā seguir 'áámá meēⁿ chi ngíicá nanguuvi. Ndyuūs dicho'ó yā méééⁿ miiⁿ. Ní nducyaaca 'iiⁿ'yāⁿ n'diichí yā tíi cueⁿ'ē méééⁿ miiⁿ. Ní ngíicá yā ní chó'ó yā naavtaⁿ'ā yíicú chí nuūⁿnīⁿ'yáⁿ'ā chi nguuvi Roja naachí Ndyuūs díiⁿ yā chí nduūví cuuⁿ'máⁿ 'áámá yáanūu yeⁿ'ē caavá yā. ²Nducyaaca 'iiⁿ'yāⁿ ní cueⁿ'é yā ndúucū Moisés. Ní meééⁿ miiⁿ ch'iⁿ'i yúúní 'iiⁿ'yāⁿ s'eeⁿ. Ní chó'ó yā naavtaⁿ'ā nuūⁿnīⁿ'yáⁿ'ā ndúucū Moisés miiⁿ. Chuū ní tan'dúucā chi Ndyuūs chεεdínuūⁿniⁿ yā 'iiⁿ'yāⁿ s'eeⁿ ndúucū Moisés miiⁿ. ³Nducyáácá yā che'é yā pan chi Ndyuūs dicho'o. Ní pan miiⁿ chí chiicā ndii nanguuvi. ⁴Ndyuūs ca'a yā 'iiⁿ'yāⁿ s'eeⁿ nuūⁿnīⁿ chi can'daā na tuūu, ní nducyáácá yā chi'i yā nuuⁿnīⁿ miiⁿ. Ní tuūu miiⁿ ní tan'dúucā chi Cristo miiⁿ, 'tíicā. Espíritu yeⁿ'é Cristo cueⁿ'ē ndúucū yā naachí cueⁿ'e yā. ⁵Ndyuūs nguéé canee yiinú yā tan'dúucā chi idiiⁿ n'deēe n'dai 'iiⁿ'yāⁿ ti nguéé ch'iindiveéⁿ yā yeⁿ'é Ndyuūs. Ní 'iiⁿ'yāⁿ s'eeⁿ ch'iⁿ'i yā cuaaⁿ naachi nguéé 'iiⁿ'yāⁿ na yáⁿ'āa cuūⁿ'máⁿ. ⁶Dendú'ú chuū chi chó'ōo ní 'íicú n'diichi yú, 'íicú s'uūúⁿ nguéé neⁿ'e yú yeⁿ'e dendú'ú chi nguéé n'daacā tan'dúucā 'iiⁿ'yāⁿ s'eeⁿ chí idinéⁿe yā. ⁷Cáavā chuū nguéé idiiⁿ yú 'viicu cáavā ídolos, tan'dúucā chi idiiⁿ tanáⁿ'ā 'iiⁿ'yāⁿ tiempo chi 'āā chó'ōo. Canéé nguūⁿ ndii cuááⁿ

vmnaaⁿ na libro yeⁿé Ndyuūs 'tíicā:
 'Iiⁿyāⁿ s'eeⁿ díⁿ yā 'viicu cáávā
 ídolos, ní ch'eté yā, ní che'e yā, ní
 chí'í yā ní ch'iinu chuū, ní nacueeⁿ
 yā, ní nde'ei yā. Cuayiivi ní saⁿa
 s'eeⁿ n'diichí yā n'daataa s'eeⁿ ní
 dinuuⁿndí yā. ⁸Nguéé n'diichi yú
 'áámá sáⁿā o 'aama n'daataá taachí
 'āā cuéé 'caandavaacu yú ndúúcu
 yā, tan'dúúicā chi idiíiⁿ tanáⁿā 'iiⁿyāⁿ
 s'eeⁿ. Ní cáávā nuuⁿndi yeⁿé yā, na
 'áámá nguuvi nūuⁿ n'diicu 'íinú mil
 'iiⁿyāⁿ ch'ii yā ná yáⁿāa cuūⁿmáⁿ
 naachi nguéé 'iiⁿyāⁿ. ⁹Nguéé diiⁿ
 yú chí tuuⁿví yú Ndyuūs, ti neⁿe
 yú n'diichí yú nduutí chi Ndyuūs
 díⁿ yā castigar s'uúúⁿ tan'dúúicā
 chi Ndyuūs díⁿ yā ndúúicū tanáⁿā
 'iiⁿyāⁿ. Ní Ndyuūs dich'óo yā cúú
 taaⁿ chí che'é tí 'iiⁿyāⁿ s'eeⁿ ní ch'ii
 yā. ¹⁰Ní nguéé caaⁿmaⁿ taaⁿ yú
 yeⁿe Ndyuūs tan'dúúicā chi diiⁿ
 tanáⁿā 'iiⁿyāⁿ s'eeⁿ. Cáávā chuū ní
 Ndyuūs dich'óo yā ángel yeⁿé yā ní
 ch'ii yā.

¹¹Tiempo chí 'āā ch'ó'oo ndíí
 cuááⁿ vmnaaⁿ, ch'ó'oo tanducuéⁿe
 chuū ní canéé nguūⁿ na libro yeⁿé
 Ndyuūs. Maaⁿ ní s'uúúⁿ cuuvi deenu
 yú yeⁿe 'iiⁿyāⁿ s'eeⁿ ní nguéé diiⁿ
 yú tan'dúúicā chí díⁿ yā. ¹²Cáávā
 chuū 'iiⁿyāⁿ chi nadacadiinúúⁿ yā
 chi i'teenu diitú yā Ndyuūs canee
 chi nadacadiinúúⁿ yā chee chí díⁿ
 yā, ní nguéé 'cuūvá yā na nuuⁿndi.
¹³Ndís'tií 'caandiveéⁿ nī yeⁿé.
 Mar 'áámá cosa chí nguéé n'daacā
 nguéé ndaā nanááⁿ ndís'tií nduuti
 chí nguéé ndaā nanááⁿ tanáⁿā
 ca 'iiⁿyāⁿ. Ndyuūs ní n'dai ca yā
 ndúúicū ndís'tií, ní nguéé 'cuúⁿ yā
 chí ndaā nanááⁿ ndís'tií dendu'ū chí
 nguue cuuví cuchée nī. Taachi ndāā

dendu'ū chí nguéé n'daacā nanaaⁿ
 ndís'tií Ndyuūs teé yā fuerzas
 ndís'tií chí nguéé diiⁿ nī dendu'ū chí
 nguéé n'daacā. Ní 'íicú cuuví cuchée
 nī.

¹⁴Cáávā chuū ndís'tií hermanos
 chí neⁿé taavi, divíi nī yeⁿe
 nducyaaca ídolos. ¹⁵Úú ngaⁿá
 ngii ndís'tií chí 'iiⁿyāⁿ chí deenu,
 ní ndís'tií cuuvi deenú nī yeⁿe
 chíⁿ chí ngaⁿá nduuti chí nduudu
 cuaacu o nguéé. ¹⁶Taachi diiⁿ yú
 'viicu ní che'e yú Santa Cena yeⁿe
 Señor Jesucristo ní sta'a yú taza
 chí cu'u yú vino, tuuⁿmi ní caaⁿmaⁿ
 yú gracias Ndyuūs chí di'viicú yā
 vino miiⁿ. Diiⁿ yú chuū ti maaⁿ ní
 chí'iⁿ yú chí yeⁿé Cristo s'uúúⁿ. Ní
 véé vida yeⁿe yú cueⁿe daāⁿmaⁿ
 cucáávā yuúúⁿ yeⁿé Cristo chí
 n'geeⁿ. Pan yeⁿe Santa Cena chí
 n'dee yú, n'dee yú ti maaⁿ ní yeⁿé
 Cristo s'uúúⁿ. Ní cuerpo yeⁿe yā
 ca'nééⁿngá'āa na cruz cáávā s'uúúⁿ.
¹⁷S'uúúⁿ ní 'yaaⁿ yú ní nducyaacu
 yú che'e yú yeⁿe 'áámá pan nūuⁿ.
 'Tíicā s'uúúⁿ ní tan'dúúicā 'áámá
 cuerpo nūuⁿ ti yeⁿé Cristo s'uúúⁿ.

¹⁸Cuin'diichí nī 'iiⁿyāⁿ yeⁿe
 ndaata Israel tiempo chí 'āā ch'ó'oo.
 'Iiⁿyāⁿ s'eeⁿ 'caaⁿnúⁿ yā 'iiti ní
 tee yā yuūtē vmnaaⁿ nátai yeⁿe
 Ndyuūs. Ní i'téenu yā 'iivú Ndyuūs
 yeⁿe yú. Cuayiivi ní che'é yā yuūtē
 miiⁿ. 'Tíicā 'iiⁿyāⁿ chí'í chí yeⁿé
 Ndyuūs. ¹⁹Neⁿé caāⁿmáⁿ yeⁿé yuūtē
 chí 'iiⁿyāⁿ che'é yā maaⁿ chí yeⁿe
 nátai yeⁿe ídolos. Nguéé véé poder
 yeⁿe ídolos. Nguéé véé poder yeⁿe
 yuūtē miiⁿ. ²⁰Chúú ní ngaⁿá. 'Iiⁿyāⁿ
 chí chí'iⁿnúⁿ yā 'iiti s'eeⁿ ní tee yā
 yuūtē nátai yeⁿe ídolos díⁿ yā chuū
 cáávā yááⁿnguiniūⁿ s'eeⁿ. Ní nguéé

diíⁿ yā cáávā 'iivú Ndyuūs. 'Úú nguéé neⁿé chi che'é nī yuūtē miiⁿ yeⁿe nátaī miiⁿ, nī ndís'tiī ní nguéé caⁿá nī lado yeⁿe yááⁿ'nguiniūⁿ.

²¹Ndís'tiī nguéé cuuvi cu'ú nī vino yeⁿe taza nī yeⁿe chi véé na mesa yeⁿe Santa Cena yeⁿe Jesucristo nduuti chi cu'ú nī yeⁿe chi véé na mesa yeⁿe yááⁿ'nguiniūⁿ. Nguéé cuuvi yeⁿe Ndyuūs ndís'tiī nduuti chi yeⁿe yááⁿ'nguiniūⁿ ndís'tiī.

²²¿Áá neⁿe nī 'cuuⁿ'miⁿ nī 'iivú Ndyuūs chi ca'á nī lado yeⁿe yááⁿ'nguiniūⁿ? ¿Áá ditiinú cá ndís'tiī nguéé ti 'iivú Ndyuūs ti Ndyuūs nguéé diíⁿ yā castigar ndís'tiī?

Yeⁿe chi 'iiⁿ'yāⁿ cuuvi diíⁿ yā ti i'teenú yā Jesucristo ní canee yā ndúúcu vaadi neⁿe yeⁿe Ndyuūs

²³Cuuvi diiⁿ yú tanducuéⁿe chi n'daacā, naati nguéé diiⁿ yú cosa chi nguéé n'daacā ti nguéé véé nuuⁿndi yeⁿe yú. Nguéé nducuéⁿe chi n'daacā chi diiⁿ yú nginne s'uuúⁿ chi yeⁿe Cristo. Ní dendu'ū miiⁿ chi n'daacā, nguéé n'daacā cá caavā s'uuúⁿ chi i'téenu yú 'iivú Ndyuūs.

²⁴Mar 'áámá 'iiⁿ'yāⁿ chi yeⁿe Cristo damaáⁿ yā nadacadíinuⁿ yā dendu'ū chi yeⁿe maáⁿ yā, naati nadacadíinuⁿ ntúuⁿ yā yeⁿe chi neⁿe tanáⁿ'ā 'iiⁿ'yāⁿ.

²⁵Yúútē chi 'iiⁿ'yāⁿ in'diicuí yā ní'vēé cuuvi che'é nī. Ní nguéé itínguuneeⁿ nī yeⁿe yuūtē miiⁿ. 'Tíicā diíⁿ nī ní nguéé dinuuⁿndí nī.

²⁶Ní yáⁿ'āa ndúúcu nducuéⁿe chi véé vmnaaⁿ yeⁿe ní yeⁿe 'iivú Ndyuūs.

²⁷Nduuti chi 'aama 'iiⁿ'yāⁿ chi nguéé i'téenu yā Jesucristo diíⁿ yā invitar ndís'tiī chi che'é nī ndúúcu

yā, ní nduuti chi neⁿé nī tuu'mi ní caⁿá nī ndúúcu yā. Tanducuéⁿe chi cun'duú yā na mesa ní che'é nī. Nguéé tiinguuneeⁿ nī dē'ē vee yeⁿe chi che'é nī. 'Tíicā nguée dinuuⁿndí nī. ²⁸Nduuti chi 'áámá 'iiⁿ'yāⁿ ngaⁿ'a yā ngii yā ndís'tiī chuu: Yúúte 'cūū ní canée vmnaaⁿ nátaī yeⁿe ídolos, tuu'mi ní nguéé ché'e nī yuūtē miiⁿ. Ní nguéé diíⁿ nī chi 'iiⁿ'yāⁿ miiⁿ cuuvi nadacadíinuúⁿ yā chi dinuuⁿndí nī. Ní yáⁿ'āa ndúúcu nducuéⁿe chi véé vmnaaⁿ yeⁿe ní yeⁿe 'iivú Ndyuūs. ²⁹Úú ngaⁿ'ā ngii ndís'tiī chuū. Nguéé che'é nī yuūtē miiⁿ chi yeⁿe nátaī taachi 'iiⁿ'yāⁿ ngaⁿ'a yā chi che'é nī yuūtē miiⁿ, ti 'iiⁿ'yāⁿ nadacadíinuúⁿ yā chi véé nuuⁿndí yeⁿe nī taachi che'é nī yuūtē miiⁿ. 'Úú deenú chi cuuvi che'é yuūtē miiⁿ ní nguéé idinuuⁿndí. 'Iiⁿ'yāⁿ chi duu'vī déenu yā yeⁿe Jesucristo nguéé cuuvi che'é yā. 'Túúca yúúte 'cūū, ní diíⁿ yā juzgar cosa chi nguéé ituneeⁿ yā. 'Úú deenú chi nguéé véé poder yeⁿe ídolos. 'Úú caⁿ'á, gracias Ndyuūs caava yuūtē miiⁿ, ní che'é yuūtē miiⁿ.

³⁰Ndúúti chi caⁿ'á, gracias Ndyuūs cáávā yuūtē chi che'é, ¿dē'ē cuuvi chi cunncaā ngaⁿ'a yā yeⁿe 'úú yeⁿe chi che'é? ³¹Diíⁿ nī tan'dúúca chi ngaⁿ'á. Ní nduuti chi nge'e nī, o ngii nī, o yeⁿe táámá cosa chi diíⁿ nī, ndís'tiī diíⁿ nī tanducuéⁿe cucáávā chi cuuvi dich'etē n'dai nī Ndyuūs. ³²Nguéé diíⁿ nī cosa chi 'iiⁿ'yāⁿ Israel s'eeⁿ o 'iiⁿ'yāⁿ s'eeⁿ chi nguéé ndaata Israel, o 'iiⁿ'yāⁿ s'eeⁿ chi i'téenu yā Jesucristo yeⁿe yú cuuvi nadacadíinuⁿ yā chi véé nuuⁿndi yeⁿe nī. ³³Áa tíí nūuⁿ lugar taachi 'úú canee, 'úú idíⁿ tanducuéⁿe chi

cunée yiinu 'iiⁿ'yāⁿ na lugar miiⁿ. Nguéé idiiⁿ cosa chi neⁿ'é maáⁿ, ti dííⁿ tanducuéⁿ'ē ní 'licu cuuvi nanguáⁿ'ai 'iiⁿ'yāⁿ.

11 Ndís'tii ní dííⁿ nī tan'dúúca chi 'úú idiiⁿ ti 'úú idiiⁿ tan'dúúca chi Cristo chí'cueeⁿ yā 'úú.

Yeⁿ'ē n'daata s'ééⁿ chí caⁿ'á yā yaācū

²'Úú ngaⁿ'á n'daacā yeⁿ'e ndís'tii hermanos yeⁿ'é ti n'gaacú nī yeⁿ'e 'úú, ndúúcu tanducueⁿ'ē dendu'ū. Ní dííⁿ nī tan'dúúca chi 'úú ngi'cueéⁿ ndís'tii. ³'Úú neⁿ'é chí cadíínūⁿ ndís'tii chí Cristo miiⁿ ní ngaⁿ'a ntiiⁿ'nyúⁿ yā yeⁿ'ē nducyaaca saⁿ'ā. 'Íicú saⁿ'ā ní ngaⁿ'ā ntiiⁿ'nyuⁿ sa yeⁿ'e n'daataá yeⁿ'e sa. 'Íicú Ndyuūs Chiida yú ngaⁿ'ā ntiiⁿ'nyúⁿ yā yeⁿ'e Cristo miiⁿ. ⁴Nducyáácá saⁿ'ā chí ngaⁿ'ángua'a sa o ngaⁿ'a sa nduudu yeⁿ'é Ndyuūs ndúúcu sndíiⁿ yeⁿ'ē sa chí canúúⁿ tiiⁿ sa, ngíí 'cuináaⁿ sa. ⁵Nducyáácá n'daataá chí ngaⁿ'angua'a tá o ngaⁿ'a tá nduudu yeⁿ'é Ndyuūs ní nguéé ndeecu paño yeⁿ'e tá tiiⁿ tá, ngíí 'cuináaⁿ tá ti idiiⁿ tá tan'dúúca chí ndíí tiiⁿ ta. ⁶Ndúúti chí nguéé ndeecu paño yeⁿ'e tá tiiⁿ tá tuu'mi ní cuū tá yuudū tiiⁿ tá. Nduuti chí 'aama n'dáataá ngíí 'cuináaⁿ tá chí ndíí tiiⁿ tá, tuu'mi ní canéé chí cheecu paño yeⁿ'e tá tiiⁿ tá. ⁷Saⁿ'ā ní nguéé cánéé chí caaⁿ'maⁿ sa nduudu yeⁿ'é Ndyuūs ndúúcu sndiiⁿ yeⁿ'ē sa chí canuuⁿ tiiⁿ sa, ti Ndyuūs díndái yā saⁿ'ā tan'dúúca maáⁿ yā chí caaⁿ'maⁿ ntiiⁿ'nyuⁿ sa, 'tíicā. Saⁿ'ā s'uūuⁿ, saⁿ'ā ní diiⁿ sa ntiiⁿ'nyuⁿ yeⁿ'e Ndyuūs. N'daataá nguéé 'tíicā. Idiiⁿ tá chííⁿ chí ngaⁿ'a isaⁿ'ā yeⁿ'e tá, ti saⁿ'ā miiⁿ caaⁿ'maⁿ ntiiⁿ'nyuⁿ sa

yeⁿ'ē n'daata miiⁿ. ⁸Ti Ndyuūs nguéé díndái yā saⁿ'ā yeⁿ'e n'daataá naati díndái yā n'daataá yeⁿ'e sáⁿ'ā. ⁹Ti Ndyuūs nguéé díndái yā saⁿ'ā chí dichíí'vē sa n'daataá, naati díndái yā n'daataá chí dichíí'vē tá saⁿ'ā.

¹⁰N'daataá ní canéé chí ndeecu paño yeⁿ'ē tá tiiⁿ tá ti chí'niⁿ tá chí nguéé caaⁿ'maⁿ ntiiⁿ'nyuⁿ tá. 'Tiicā ntúūⁿ ángel s'eeⁿ ní chí canuúⁿ tiinuú náaⁿ yā taachí canéé yā nanááⁿ 'iivú Ndyuūs. ¹¹Ndyuūs dííⁿ yā chí sáⁿ'ā nguéé canéé sa dāmaāⁿ sa, ndíí nguéé n'daataá canéé tá dāmaāⁿ tá. Ndyuūs diiⁿ cuenta chí saⁿ'ā ní n'daataá daama daamá yā nanaáⁿ yā ti Jesucristo chí'ii yā cucáāvⁿ nduu 'uuví 'iiⁿ'yāⁿ s'uunⁿ.

¹²Vmnááⁿ vmnaaⁿ n'daata miiⁿ ní yeⁿ'e saⁿ'ā. Maaⁿ ní saⁿ'ā chí'indiyáaⁿ sa yeⁿ'ē n'daataá naati tanducuéⁿ'ē dendu'ū ní yeⁿ'é 'iivú Ndyuūs.

¹³¿De'ē nadacadiinúuⁿ nī yeⁿ'e chuū? ¿Áá n'daacā chí n'daata caaⁿ'maⁿ'ngua'a tá ndúúcu Ndyuūs 'aara chí nguéé ndeecu paño yeⁿ'ē tá tiiⁿ tá? ¹⁴Nducyáácá 'iiⁿ'yāⁿ deenú yā chí saⁿ'ā chí n'géénūu yuūdū tiiⁿ sa ti 'cuináaⁿ sa. ¹⁵Nduuti chí n'daata n'géénūu tiiⁿ tá n'daacā yeⁿ'ē tá. Ní yuūdū tiiⁿ tá n'daacā chí in'díí tiiⁿ tá chí tan'dúúca 'áamá paño. ¹⁶Nduuti chí 'iiⁿ'yāⁿ neⁿ'e caaⁿ'maⁿ taáⁿ yā yeⁿ'e chuū, 'úú nguéé cuuvi caāⁿ'maⁿ cá yeⁿ'ē ti 'tíicā costumbre yeⁿ'ē yú. 'Tiicā ntúūⁿ costumbre yeⁿ'e nducyaaca 'iiⁿ'yāⁿ chí i'téenu yā Jesucristo.

**Cosas chí nguee n'daacā idiiⁿ
yā taachi che'é yā Santa Cena
yeⁿ'ē Señor Jesucristo**

¹⁷Maaⁿ ní 'úú idinguúⁿ yeⁿ'é ndís'tii ti nguéé n'daacā dííⁿ nī.

Taachi nduuvidaamá nī nguée n'daacā ca idííⁿ nī ti cunncāa ca idííⁿ nī. ¹⁸Úú n'giindiveeⁿ chí ndís'tiī nguée daama vaadi cadiinuuⁿ yeⁿe nī taachi nduuvidaamá nī ná yaācū. Véé 'téé chí i'teenú chí cuaacu chí chi'indiveeⁿ. ¹⁹Canée chí véé chí nduuvidaamá 'āā ví'í caā ndís'tiī chí i'téenu nī Jesucristo, ti cuuvi deenú nī cheé hermanos nguaaⁿ ndís'tiī chí 'áámá canee yā chí i'téenu cá yā. ²⁰Taachi 'āā ví'í caā nduuvidaamá nī ní che'é nī Santa Cena yeⁿe Señor Jesucristo nguée che'é nī Cena miiⁿ tan'dúucā chí Jesucristo caⁿa ntiíⁿnyúⁿ yā. ²¹Ndís'tiī nguée canee ngíínú nī taachi ndaa nducyaaca hermanos naati ca'áámá ca'aamā nī diiⁿ núúⁿ yiinu nī ní caⁿ'á nī na yāacū ní che'é nī Cena yeⁿe nī. Ní taachi ndaa tiempo chí che'é nī Santa Cena náⁿ'a nī ní cuiicu nī. Tanáⁿ'a nī ní cuu'vi nī. ²²¿D'éé chuū? ¿Áá nguée véé va'ai yeⁿe nī naachi cuuvi che'e nī ní cu'u nī? Nduuti chí nguée neⁿ'é nī repartir Cena yeⁿ'é nī, ¿d'éé cuuví chí candéé nī Cena yeⁿ'é nī cheeti yaācū? Nguée n'daacā idííⁿ nī taachi nduuvidaamá nī na yaācū yeⁿ'e 'iivú Ndyuūs. Dííⁿ nī cosa chí cuuvi 'cuiinááⁿ 'iiⁿ'yāⁿ chí nguée véé chí che'e yā. ¿D'éé neⁿ'é nī chí 'úú caaⁿ'máⁿ ndúúcū ndís'tiī yeⁿ'e chuū? ¿Áá neⁿ'é nī chí 'úú caaⁿ'máⁿ ndúúcū ndís'tiī chí n'daacā idííⁿ nī? Nguée cuuvi caaⁿ'máⁿ 'tiicā.

Chuū historia yeⁿ'e Santa Cena yeⁿ'e Señor Jesucristo

(Mt. 26.26-29; Mr. 14.22-25; Lc. 22.14-20)

²³Iivú Señor Jesucristo chíi yā 'úú chíiⁿ chí 'úú ca'cueeⁿ ndís'tiī. Nguiinū miiⁿ chí 'āā cuée nca'a

Judas Iscariote miiⁿ Jesucristo chí ndíí yā preso na ta'á 'iiⁿ'ntyéⁿ'ē, Jesús miiⁿ ní sta'a yā pan. ²⁴Ch'iinu Jesús nca'a gracias Ndyuūs cáāvā pan miiⁿ, tuu'mi ní n'deé yā pan. Ní Jesús ní caⁿ'a yā chíi yā discípulos yeⁿ'e yā: Ndís'tiī cuta'á nī ní che'e nī. Pan 'cūū chí 'úú n'deé tan'dúucā cuerpo yeⁿ'é 'tíicā. Ní cuerpo yeⁿ'é ca'á chí n'deé cucáāvā ndís'tiī. Nadiíⁿ nī chuū, ní taachi nache'é nī pan miiⁿ ní nan'gaacú nī yeⁿ'ē 'úú cueⁿ'e daāⁿmaⁿ. ²⁵Cuayiivi chí che'é nī pan 'cūū Jesús sta'a ntúuⁿ yā taza chí s'néeⁿ vino ní ngaⁿ'a yā: Vino cheeti taza 'cūū ní tan'dúucā yuúúⁿ yeⁿ'é 'tíicā. Ndúúcū yuúúⁿ yeⁿ'é idííⁿ 'áámá compromiso chí ngai. Nadiíⁿ nī chuū ní taachi nangí'í nī vino miiⁿ nan'gáácú nī yeⁿ'ē 'úú cueⁿ'e daāⁿmaⁿ. ²⁶Maaⁿ ní taachi che'é nī pan 'tíicā, ní cu'ú nī vino yeⁿ'e taza 'tíicā, tuu'mi ní chíⁿ'í nī 'iiⁿ'yāⁿ chí Jesucristo chíi yā caavā ndís'tiī. Nadiíⁿ nī Cena 'cūū ndii tiempo chí ndaa Jesucristo taama vmnéⁿ'ēe.

Yeⁿ'e táácā cuuvi che'e yú Santa Cena yeⁿ'e Señor Jesucristo

²⁷'Iiⁿ'yāⁿ chí nge'é yā pan yeⁿ'e Cena 'cūū ní ngí'í ntúuⁿ yā vino yeⁿ'e taza yeⁿ'e Santa Cena yeⁿ'e Jesucristo, canée chí canée ndúúcū staava yeⁿ'é yā dæeve nanááⁿ Dendyuūs. Nduuti chí nguée dæeve staava yeⁿ'é yā nanááⁿ Dendyuūs taachi che'é yā Cena miiⁿ, tuu'mi ní diiⁿ nuuⁿndí yā contra cuerpo yeⁿ'e Señor Jesucristo ndúúcú yuúúⁿ yeⁿ'e yā dendu'ū, ti nguée dííⁿ yā respetar Jesucristo. ²⁸Caava chúú 'áámá 'áámá 'iiⁿ'yāⁿ chí neⁿ'é yā che'é yā yeⁿ'e Santa Cena yeⁿ'e Señor

Jesucristo, canéé chi n'diichi maáⁿ yā ndúúti chí dæeve staava yeⁿé yā nanááⁿ Dendyuūs. Taachí dæeve staava yeⁿé yā nanááⁿ Dendyuūs tuuⁿmi ní cuuvi che'e yā pan yeⁿe Santa Cena yeⁿē Señor Jesucristo, ní cu'ú yā vino yeⁿe taza yeⁿē Cena 'cūū. ²⁹Iiⁿyāⁿ chi nge'é yā ní ng'i yā yeⁿe Cena yeⁿē Señor Jesucristo ní nguéé nacádiinúⁿ yā yeⁿe cuerpo yeⁿe Jesús chí ch'i caava s'uúūⁿ, Dendyuūs diíⁿ yā castigar 'iiⁿyāⁿ miiⁿ. Véé nuuⁿndi yeⁿé yā nanááⁿ 'iivú Ndyuūs. Maáⁿ yā dinuuⁿndí yā ní diiⁿ yā chí cuuví castigado yā. ³⁰Cáāvā chí diíⁿ nī 'túúcā, 'yaaⁿ n'dáí ndís'tií ní duuva nī, ní náⁿa nī ní ngúíta nī, tanáⁿā ní ch'i nī nguaaⁿ ndís'tií. ³¹Ndúúti chí s'uúúⁿ n'diichi maaⁿ yú chí n'daacā canee yú nanááⁿ Ndyuūs yeⁿē yú, Ndyuūs nguéé diíⁿ yā castigar s'uúúⁿ. ³²Taachi 'iivú Ndyuūs n'diichí yā nuuⁿndi yeⁿē yú ní nguéé dæeve staava yeⁿē yú taachi che'e yú Santa Cena yeⁿē Jesucristo, tuuⁿmi ní teé yā 'aama castigo s'uúúⁿ. Nífcú nadacadíinuuⁿ yú yeⁿe nuuⁿndi yeⁿe yú. Ní 'ífcú nguéé canee yú condenado tan'dúúcā tanáⁿā 'iiⁿyāⁿ yeⁿe iⁿ'yeeⁿdí 'cūū chí nguéé i'téenu yā 'iivú Ndyuūs.

³³Maaⁿ ní ndís'tií hermanos yeⁿé, taachi nduuvidaama nī ní che'é nī Santa Cena yeⁿe Jesucristo 'cuæstinee ngiinú nī ti ndaā tanáⁿā hermanos yeⁿé nī. ³⁴Nduuti chí 'áámá 'iiⁿyāⁿ cuicú yā, canéé chí ch'éé yā na vaacú yā. Tuuⁿmi ní nducyaaca nī nduuvidaama nī na yaacū ní che'é nī Santa Cena yeⁿe Señor Jesucristo. 'Tífcā cuuvi che'é nī pan ní ng'i nī vino ní

diíⁿ nī respetar Señor Jesucristo. Ní n'diichí Ndyuūs chí nguéé véé nuuⁿndi yeⁿé nī. Tan'dúúcā tanáⁿā chí véé 'úú caaⁿmáⁿ yeⁿē taachi ndaá ní cuneé ndúúcu nī.

**Yeⁿē nducueⁿē chí Espíritu
N'dai yeⁿé Ndyuūs téé yā s'uúúⁿ
ti yeⁿé Señor Jesucristo**

12 Maaⁿ ní 'úú neⁿé idinguúⁿ yeⁿe chí nca'a Espíritu N'dai yeⁿé Ndyuūs s'uúúⁿ. Neⁿé chí cadíinuuⁿ nī chuū. ²Ndís'tií chí nguéé 'iiⁿyāⁿ yeⁿe ndaata Israel ndís'tií, ti taachi 'āā cuéé i'teenú nī Señor Jesucristo diíⁿ nī tan'dúúcā costumbre yeⁿé nī ní s'téenu nī ídolos chí nguéé cuuví caāⁿmaⁿ. ³Neⁿé chí ndis'tií cadíinúⁿ nī chuū. 'Iiⁿyāⁿ chí canee ndúúcū Espíritu N'dai yeⁿé Ndyuūs ní ngaⁿá yā nduudu cuaacu yeⁿé Dendyuūs, nguéé cuuvi caaⁿmáⁿ yā contra yeⁿe Jesucristo. 'Iiⁿyāⁿ chí ngaⁿá yā chí Jesucristo ní 'iivú Ndyuūs yeⁿe yā, ngaⁿa yā 'túúcā ti Espíritu N'dai yeⁿé Ndyuūs diíⁿ yā chí 'túúcā chí ngaⁿa yā.

⁴Espíritu N'dai yeⁿé Ndyuūs tee yā ntiinⁿnyuⁿ s'uúúⁿ chí 'āā vi'i caā ntiinⁿnyuⁿ yeⁿē 'áámá 'áámá s'uúúⁿ. Ní tee yā poder s'uúúⁿ chí cuuvi diíⁿ yú ntiinⁿnyuⁿ miiⁿ chí 'āā vi'i caā. Niicu véé 'áámá n'dyáⁿā Espíritu N'dai yeⁿé Ndyuūs. ⁵Idiíⁿ yú ndee nááⁿ ntiinⁿnyuⁿ chí 'āā vi'i caā chí yeⁿe 'iivú Ndyuūs, naati nducyaaca ntiinⁿnyuⁿ miiⁿ ní yeⁿe 'áámá n'dyáⁿā 'iivú Ndyuūs. ⁶N'dee nááⁿ ntiinⁿnyuⁿ yeⁿe Dendyuūs véé chí idiíⁿ yú ní Ndyuūs ngínnee yā 'áámá 'áámá s'uúúⁿ. ⁷Ndyuūs tee yā Espíritu N'dai yeⁿé yā s'uúúⁿ ní Espíritu

miiⁿ nginnee s'uuúⁿ. Ní s'uuúⁿ cuuvi cunnee yú nducyaaca 'iiⁿ'yāⁿ chí i'téenu yā Señor Jesucristo chí 'iivi yú. ⁸Espíritu N'dai miiⁿ ní cunnee tanáⁿ'ā 'iiⁿ'yāⁿ chí ngaⁿ'a n'dááca yā nduudu yeⁿ'é Ndyuūs. Espiritu N'dai yeⁿ'é Ndyuūs nginnee naⁿ'a 'iiⁿ'yāⁿ chí cuuvi caaⁿ'maⁿ yā ndúúcū vaadi deenú ca. Dámaāⁿ 'áámá n'dyáⁿ'ā Espiritu N'dai miiⁿ diiⁿ chuú. ⁹Ní Espiritu N'dai miiⁿ ní nginnee nducyaaca 'iiⁿ'yāⁿ chí i'téenu cá yā Dendyuūs. Ní Espiritu N'dai nginnee náⁿ'ā 'iiⁿ'yāⁿ ní ca'á poder miiⁿ 'iiⁿ'yāⁿ s'uuⁿ chí 'iiⁿ'yāⁿ s'uuⁿ cuuvi diiⁿ yā chí nduūvā yeⁿ'é 'iiⁿ'yāⁿ chí ngiitā. ¹⁰Espiritu N'dai miiⁿ ca'á naⁿ'a 'iiⁿ'yāⁿ chí idiíⁿ yā vaadi n'giinuú ní nga'a poder náⁿ'ā 'iiⁿ'yāⁿ chí cuuvi candéé yā nduudu cuaacu yeⁿ'é Ndyuūs. Espiritu N'dai miiⁿ ní diiⁿ chí náⁿ'ā 'iiⁿ'yāⁿ cuuvi déenu yā chee 'iiⁿ'yāⁿ ngaⁿ'á yā caavā Espiritu N'dai yeⁿ'é Ndyuūs o cáávā espíritu yeⁿ'e yáá'n'guiinūⁿ. Ní Espiritu N'dai ca'a náⁿ'a yā poder chí caaⁿ'maⁿ yā n'dee náⁿ'n davaacu, ní náⁿ'a yā chí caⁿ'a yā chíⁿ chí neⁿ'e caaⁿ'maⁿ nduudu miiⁿ. ¹¹'Áámá n'dyáⁿ'ā Espiritu N'dai yeⁿ'é Ndyuūs tee yā poder 'áámá 'áámá s'uuúⁿ chí cuuvi diiⁿ yú ntiíⁿnyuⁿ yeⁿ'é yā tan'dúúcā chí néⁿ'e yā.

**S'uuúⁿ ní tan'dúúcā chí s'uuúⁿ
ní 'áámá cuerpo nūⁿ s'uuúⁿ**

¹²Tíicā véé 'áámá cuerpo yeⁿ'ē yú ní néené n'dee náⁿ'n chí véé yeⁿ'ē. Ní ndúúcū n'dee náⁿ'n chí véé yeⁿ'ē, ní yeⁿ'ē 'áámá cuerpo nūⁿ, 'túúcā. Cucáávā chí yeⁿ'e Jesucristo s'uuúⁿ, tuu'mi s'uuúⁿ ní tan'dúúcā chí s'uuúⁿ ní 'áámá cuerpo nūⁿ s'uuúⁿ. Ní

cuerpo miiⁿ ní Jesucristo miiⁿ. ¹³Ti cááva Espiritu N'dai yeⁿ'é Ndyuūs miiⁿ ngeēdinuūⁿníⁿ yú ní maaⁿ ní s'uuúⁿ ní yeⁿ'ē 'áámá cuerpo s'uuúⁿ. Nduuti chí 'iiⁿ'yāⁿ Israel chí judíos s'uuúⁿ, o 'iiⁿ'yāⁿ griegos s'uuúⁿ o 'iiⁿ'yāⁿ chí snéé caadi 'iyyu s'uuúⁿ, o 'iiⁿ'yāⁿ chí diiⁿ ntiíⁿnyuⁿ cáávā maáⁿ yā s'uuúⁿ, nducyaaca s'uuúⁿ ní yeⁿ'ē 'áámá Espiritu N'dai yeⁿ'é Dendyuūs.

¹⁴Tíicā cuerpo yeⁿ'ē yú, ní nguéé 'áámá n'dyáⁿ'ā nūⁿ ti 'yaaⁿ n'dái yeⁿ'ē. ¹⁵Ndúúti chí ca'a yú chí ngíí ngaⁿ'a ní miiⁿ ní caāⁿ'maⁿ: Caati 'úú nguéé 'áámá ta'á 'úú nguéé yeⁿ'e cuerpo yeⁿ'e yú. ¿'Áá nadacadíínuuⁿ ní chí cáávā chíiⁿ chí caⁿ'a ca'a yú, ní ca'a yú nguéé yeⁿ'e cuerpo yeⁿ'e yú? Nguéé 'tíicā. ¹⁶Ndúúti chí veeⁿ yú chí ngíí ngaⁿ'a ní miiⁿ ní caāⁿ'maⁿ: Caati 'úú ní nguéé 'áámá nduutinaaⁿ 'úú nguéé yeⁿ'e cuerpo yeⁿ'ē yú. ¿'Áá nadacadíínuuⁿ ní chí cáávā chíiⁿ chí caⁿ'a veeⁿ yú, ní veeⁿ yú nguéé yeⁿ'ē cuerpo yeⁿ'e yú? Nguéé 'tíicā. ¹⁷Nduuti chí nuuⁿmaⁿ cuerpo yeⁿ'ē yú ní 'áámá nduutinaaⁿ yú tuu'mi ní 'ítaacā cúúví 'caandiveeⁿ yú? Ní ndúúti chí nuuⁿmáⁿ cuerpo yeⁿ'ē yú ní veeⁿ yú tuu'mi ní 'ítaacā cuuvi 'táaⁿ'nuⁿ yú? ¹⁸Dendyuūs s'néeⁿ yā ca'áámá ca'áámá chí canee yeⁿ'ē cuerpo yeⁿ'ē yú na lugar naachi canee yiinú yā. ¹⁹Nduuti chí cuerpo yeⁿ'ē yú ní 'áámá parte nūⁿ 'ítíi canéé nducué^m'ē cuerpo yeⁿ'ē yú? ²⁰Tíicā Dendyuūs din'dái yā 'áámá cuerpo yeⁿ'ē yú chí n'dee náⁿ'n chí veeⁿ naati véé 'áámá cuerpo yeⁿ'ē yú. ²¹Nduuti chí nduutinaaⁿ yú chí ngíí ngaⁿ'a ní miiⁿ ní caāⁿ'maⁿ yeⁿ'e ta'á yú 'tíicā: Dii ta'á, nguéé dichí'v'ē

di. 'Tiicá ntúūⁿ tiiⁿ ra yú ni caaⁿmaⁿ yeⁿē ca'ā yú 'tiicā: Díí ca'á, nguéé dichíí'vē dii. Nguéé cuuvi 'tíicā.

²²Dendu'ū chi sné na cuerpo yeⁿe yú chi duūvā ni 'lííⁿ chi nguéé diiⁿ yú cuenta yeⁿē, chííⁿ chi neené dichíí'vē s'uuúⁿ. ²³Dendu'u chi yeⁿe cuerpo yeⁿē yú chí nacadiinuuⁿ yú chi nguéé importante, chuū ní diiⁿ yú cuidado yeⁿē tan'dúucā chí ch'ēete ca. Dendu'ū yeⁿe cuerpo yeⁿe yú chi nguéé neⁿe yú chi 'iiⁿyāⁿ n'diichi yā chi n'díi yú ndúucū catecai yú. ²⁴Taná'ā parte yeⁿe cuerpo yeⁿe yú 'āā n'daacā canee 'āā tiiní caā. Dendyuūs dííⁿ yā cuerpo yeⁿe yú ní dííⁿ yā chí cundēē ca yú cuidado yeⁿē nducuéⁿē chí nadacādiinuuⁿ yú chí nguéé importante yeⁿe cuerpo yeⁿe yú. ²⁵Chuū ní dííⁿ Dendyuūs chí nducuéⁿē parte yeⁿe cuerpo n'daacā diiⁿ ntiíⁿnyūⁿ yeⁿē cuerpo yeⁿe yú. Ní nducuéⁿē cuerpo yeⁿe yú diiⁿ yú cuidado 'áámá parte yeⁿē yú ndúucū táámá parte yeⁿe yú. ²⁶Nduuti chí diiⁿ yú cuidado yeⁿe 'áámá dendú'ū nūⁿ yeⁿe cuerpo yeⁿe yú ti diiⁿ sufrir, tuu'mi ní nuuⁿmaⁿ ch'ēete cuerpo yeⁿe yú diiⁿ sufrir. Nduuti chí dich'ēeté yā 'áámá dendu'ū yeⁿe cuerpo yeⁿē yú tuu'mi ní núúⁿmáⁿ cuerpo yeⁿe yú ní yeenú taavi.

²⁷Chuū chí caaⁿmáⁿ. Maaⁿ ní nducyaaca ndís'tii ní yeⁿe cuerpo yeⁿe Cristo Jesús. Ní ca'áámá ca'áámá nī véé parte yeⁿe cuerpo yeⁿe Cristo Jesús. ²⁸Ndyuūs tee yā ntiíⁿnyuⁿ ca'áámá ca'áámá s'uuúⁿ chí 'iteenu yú Jesucristo. Vmnaáⁿ vmnaaⁿ ca'a yā ntiíⁿnyuⁿ chí ch'ēete ca chí ntiíⁿnyuⁿ yeⁿe apóstoles

chí dichó'ó Dendyuūs. Cuayiivi ní tee yā taná'ā yú ntiíⁿnyuⁿ yeⁿe profetas chí ndēē yú nduudu yeⁿē 'iivú Ndyuūs. Cuayiivi ní tee yā taná'ā yú ntiíⁿnyuⁿ chí maestros yeⁿe nduudu yeⁿē Ndyuūs. Ní taná'ā yú Ndyuūs tee yā ntiíⁿnyuⁿ s'uuúⁿ chí diiⁿ yú vaadi n'giinu. Tuu'mi ní tee yā taná'ā yú ntiíⁿnyuⁿ chí diiⁿ yú chí induūvā yeⁿe 'iiⁿyāⁿ. Tee yā taná'ā yú ntiíⁿnyuⁿ chí cunnee yú 'iiⁿyāⁿ. Tee yā taná'ā yú ntiíⁿnyuⁿ chí caaⁿmaⁿ ntiíⁿnyuⁿ yú yeⁿe 'iiⁿyāⁿ chí cunnee yā 'iiⁿyāⁿ chí dííⁿ yā ntiíⁿnyuⁿ yeⁿe Ndyuūs. Ní teé yā ntiíⁿnyuⁿ taná'ā yú chí ngaⁿa yú n'deeé nááⁿ davaacu. ²⁹¿Áá nadacadíinuuⁿ nī chí nducyaaca yú apóstoles? ¿Áá nadacadíinuuⁿ nī chí nducyaaca yú profetas chí ndēē nduudu yeⁿe 'iivú Ndyuūs? ¿Áá nadacadíinuuⁿ nī chí nducyaaca yú maestros yeⁿē nduudu yeⁿē Ndyuūs? ¿Áá nducyaaca yú diiⁿ yú vaadi n'giinu? ³⁰¿Áá nducyaaca yú cuuvi diiⁿ yú chí nduuvā yeⁿe 'iiⁿyāⁿ? ¿Áá nducyaaca yú ngaⁿa yú n'deeé 'naaⁿ davaacu? ¿Áá nducyaaca yú cuuvi caaⁿmaⁿ yú chí neⁿe caaⁿmaⁿ táámá davaacu? Nguéé 'tíicā. ³¹Canéé chí diiⁿ yú ntiíⁿnyuⁿ yeⁿē Dendyuūs tan'dúucā chí Dendyuūs neⁿē yā chí diiⁿ yú. Ní caavā s'uuúⁿ ní ntiíⁿnyuⁿ miiⁿ ní n'daacā ca. Maaⁿ ní 'úú 'cuuⁿmíⁿ ndís'tii táacā cuuvi chí diiⁿ yú chí más cā n'daacā ca.

Yeⁿe vaadi neⁿe chí ch'ēete n'daí

13 Nduuti chí s'uuúⁿ caaⁿmaⁿ yú tan'dúucā chí ngaⁿa 'iiⁿyāⁿ chí deenu, o tan'duucā chí ngaⁿa ángeles, ní nguéé neⁿe yú

nducyaaca 'iiⁿyāⁿ, tuu'mi ní nduudu yeⁿe yú tan'duucā 'áámá cū 'lííⁿ chí n'geecu, o tan'dúucā 'áámá cu'u lata chí dí'cueécú yú. ²Ndúúti chí Ndyuūs tee yā ntiⁿnyuⁿ s'uuúⁿ chí cuuvi caaⁿmaⁿ yú dendú'ú chí cuchii, ní nduuti chí cadiinuuⁿ yú nducuéⁿe chí yeⁿe Ndyuūs chí nguεε deenu tanáⁿa yā, ní nducuéⁿe vaadī deenu chí yeⁿe iⁿ'yeeⁿdí 'cū, ní nguée neⁿe yú nducyaaca 'iiⁿyāⁿ, tuu'mi ní chiiⁿ chí diiⁿ yú nguée dichíí'vē nanááⁿ Dendyuūs. Ní nduuti chí i'teenu ca yú Dendyuūs chí cuuvi caaⁿmaⁿ yú yeⁿe 'áámá yīicū 'tíicā: N'dii yīicū, divíi ní yeⁿe 'muuⁿ, ní yīicū miiⁿ caⁿā taama lado. Ní nduuti chí nguée neⁿe yú nducyaaca 'iiⁿyāⁿ, tuu'mi ní chiiⁿ chí diiⁿ yú nguée dichíí'vē nanááⁿ Dendyuūs. ³Ndúúti chí ca'a yú nducuéⁿe chí véé yeⁿe yú 'iiⁿyāⁿ chí nguée yeⁿe yā, ní 'áará chí ca'a yú maaⁿ cuerpo yeⁿe yú chí 'iiⁿyāⁿ cuucú yā s'uuúⁿ cucáávā chí ngaⁿa yú nduudu cuaacu, ní nguée neⁿe yú nducyaaca 'iiⁿyāⁿ, tuu'mi ní nguée de'ē vεε chí diiⁿ yú chí dichíí'vē nanááⁿ Dendyuūs.

⁴Ndúúti chí s'uuúⁿ ní neⁿe yú nducyaaca 'iiⁿyāⁿ ní nguée caaⁿmaⁿ taaⁿ yú ndúucū 'iiⁿyāⁿ ní cucheε yú tanducuéⁿe tuu'mi ní neene n'dai yú. Ndúúti chí s'uuúⁿ neⁿe yú nducyaaca 'iiⁿyāⁿ ní nguée nguεε yú chiiⁿ chí naaⁿ yú chí véé yeⁿe 'iiⁿyāⁿ. Ní nguée nadacadíinuuⁿ yú chí ch'εete n'dai yú. Ní nguée maāⁿ yú caaⁿmaⁿ yú chí ch'εete n'dai maāⁿ yú. ⁵Ndúúti chí s'uuúⁿ neⁿe yú nducyaaca 'iiⁿyāⁿ nguée a fuerza diiⁿ yú dámaāⁿ chiiⁿ chí neⁿe yú.

Ní nguée nadacadíinuuⁿ yú dámaāⁿ yeⁿe maaⁿ yú, naati nginnee yú 'iiⁿyāⁿ chí dí'vaachi. Ní cucheε yú taachí 'iiⁿyāⁿ s'eeⁿ dí'vaachí yā s'uuúⁿ. Ní nguée nadacadíinuuⁿ yú yeⁿe chí nguée n'daacā. ⁶Nduuti chí s'uuúⁿ neⁿe yú nducyaaca 'iiⁿyāⁿ nguée yeenu yú taachi táámá 'iiⁿyāⁿ diiⁿ yā chí nguεε n'daacā, ti yeenu yú taachi 'iiⁿyāⁿ diiⁿ yā dendu'ú chí n'daacā. ⁷Nduuti chí s'uuúⁿ neⁿe yú nducyaaca 'iiⁿyāⁿ tuu'mi ní cuchée yú tanducuéⁿe dendu'ú chí chó'oo ndúucu yú. Ní nguée i'teenu yú tanducuéⁿe dendu'ú chí n'giindiveeⁿ yú chí 'iiⁿyāⁿ ngaⁿa yeⁿe táámá 'iiⁿyāⁿ yeⁿe chí nguée n'daacā idiíⁿ yā. Ní cunee yíinu yú nducuéⁿe chí n'daacā. Ní cucheε yú yeⁿe tanducuéⁿe dendu'ú chí diitu n'dái taachí chó'oo yeⁿe yú.

⁸Nduuti chí s'uuúⁿ neⁿe yú nducyaaca 'iiⁿyāⁿ, tuu'mi ní 'áámá canee yú ndúucū vaadī neⁿe yeⁿe Dendyuūs chí 'áámá cūneé ndúucu yú. Ndaā tiempo chí profetas chí ngaⁿa nduudu yeⁿe Dendyuūs 'āā ntée caaⁿmaⁿ yā 'tīicā. Ní 'iiⁿyāⁿ chí ngaⁿa yā n'deeé 'nááⁿ davaacu 'āā ntée caaⁿmaⁿ yā 'tīicā. Ní vaadī déenu ntúúⁿ chí 'iiⁿyāⁿ ngaⁿa ní cho'oo yéⁿe. Dámaāⁿ canee vaadī neⁿe. ⁹Maaⁿ ní caaⁿmaⁿ yú nduudu yeⁿe Dendyuūs tan'dúucā chí n'gi'í yā s'uuúⁿ naati Ndyuūs nguée ch'i'í yā s'uuúⁿ vaadī déenu yeⁿe tanducuéⁿe. ¹⁰Taachi chó'oo tanducuéⁿe dendu'ú chí canée chí cuchii tuu'mi ní deenu yú nducuéⁿe, nguée dámaāⁿ 'téé nūuⁿ.

¹¹Taachí saⁿa 'lííⁿ 'úú, ngaⁿa tan'dúucā chí ngaⁿā da'cáiyā ní nadacadíinúúⁿ tan'duucā da'cáiyā.

Taachí chi ch'εεte 'úú 'āā ntéé dííⁿ tan'dúúcā da'cáfyāa. ¹²Maaⁿ ní inaaⁿ yú tanducuéⁿē tan'dúúcā chi inaaⁿ yú chεeti 'áámá espejo yaāⁿ yáāiⁿ, ní nguéé inaaⁿ yú n'daacā. Cuayiivi miíⁿ ní n'diichi yú 'iivú Señor Jesucristo dánaaⁿ dánaaⁿ yú. Maaⁿ ní 'téé nuúⁿ deenu yú. Cuayiivi miíⁿ ní snaaⁿ yú tan'dúúcā 'iivu Señor Jesucristo n'diichí yā s'uuúⁿ. 'Tíicā snaaⁿ yú. ¹³Ná vida yeⁿe s'uuúⁿ véé 'iinū chi n'daacā. Véé chi i'teenu yú Dendyuūs, ní véé chi canee ngiinu yú chi diiⁿ Dendyuūs ndúúcu yú, ní véé chi neⁿe yú Dendyuūs. Nduu 'iinú naaⁿ chuū ní chiiⁿ chi ch'εεté n'dai, ní chííⁿ chi neⁿe yú 'iivú Dendyuūs ní neⁿe yú nducyaaca 'iiⁿyāⁿ.

Yeⁿe chi 'iiⁿyāⁿ ngaⁿa
yā táámá davaacu

14 Nducuéⁿē chi diiⁿ yú canéé chi diiⁿ yú chi n'daacā, ti neⁿe yú nducyaaca 'iiⁿyāⁿ. Véé ntiiⁿnyuⁿ ch'εεte yeⁿe Ndyuūs. Ntiiⁿnyuⁿ miíⁿ chuū chi vmnááⁿ vmnaaⁿ chi ndís'tii cuuvi neⁿe ní chi dííⁿ ní. Chííⁿ chí caaⁿmáⁿ ní nduudu cuaacu chi Ndyuūs ch'iíⁿí yā ndís'tii. ²'Áámá hermano yeⁿe yú chi ngaⁿa táámá davaacu chi n'dááⁿ chi nguéé deēnū yú, hermano miíⁿ nguéé ngaⁿa sa ndúúcu 'iiⁿyāⁿ ti ngaⁿa sa ndúúcu Ndyuūs. S'uuúⁿ nguεε n'giindiveeⁿ yú nduudu miíⁿ, naati Ndyuūs n'giindiveeⁿ yā, ní hermano miíⁿ ngaⁿa sa yeⁿe espíritu yeⁿe maaⁿ sa. ³Iiⁿyāⁿ chi ngaⁿa yā nduudu yeⁿe Ndyuūs na veedí dííⁿ yā chi hermanos chi i'téenu cá yā Ndyuūs. Ní ca'cueeⁿ yā hermanos. Ní cá'a yā

'viich'εεtíinūⁿ hermanos. ⁴Iiⁿyāⁿ chi ngaⁿa yā nduudu chi n'dááⁿ chi nguéé deenú tanáⁿ'ā 'iiⁿyāⁿ, 'iiⁿyāⁿ miíⁿ ngi'cueeⁿ maáⁿ yā. Ní 'iiⁿyāⁿ chi candéε nduudu yeⁿe Ndyuūs chí n'giindiveeⁿ tanáⁿ'a yā, 'iiⁿyāⁿ miíⁿ ngi'cueeⁿ yā tanáⁿ'a yā chi snúūⁿ yaācū.

⁵Neⁿe chi nducyaaca ndís'tii cuuvi caaⁿmáⁿ ní tanáⁿ'ā davaacu chi n'dááⁿ naati n'daacā ca chi caaⁿmáⁿ ní nduudu yeⁿe Ndyuūs na veedí ní n'giindiveeⁿ yā 'iiⁿyāⁿ. 'Iiⁿyāⁿ chi ngaⁿa yā tanáⁿ'a davaacu chi n'dááⁿ chi nguéé deenu yú, 'iiⁿyāⁿ s'eeⁿ nguéé ca'cueeⁿ yā s'uuúⁿ. Dámaāⁿ n'giindiveeⁿ yú nduuti chi táámá yā caaⁿmáⁿ yā de'ε neⁿe caaⁿmaⁿ nduudu miíⁿ. ⁶Ndís'tii hermanos yeⁿe, ndúúti chi 'úú ndáá ní caaⁿmáⁿ ndúúcu táámá davaacu chi n'dááⁿ chi nguéé n'giindiveeⁿ ní, 'táácā cuuvi cunneé ndís'tii? Naati nduuti chi caaⁿmáⁿ na veedí tuu'mi ní cuuví caaⁿmáⁿ yeⁿe cosas chi cuchii, o yeⁿe nduudu cuaacu chí n'dai chí yeⁿe Ndyuūs. Tuu'mi ní cuuvi 'cuεetinée ní tan'dúúcā chi ngaⁿa nduudu yeⁿe Ndyuūs, ní ca'cueeⁿ ndís'tii.

⁷Taachí 'iiⁿyāⁿ itii'ví yā 'áámá flauta, o tuu'ví yā 'áámá guitarra, ní nguéé n'daaⁿ tono chi itii'ví yā, o tuu'ví yā tuu'mi ní 'táácā cuuvi deenú tanáⁿ'ā 'iiⁿyāⁿ de'ε música chi itii'ví yā o tuu'ví yā? ⁸Nduuti chí 'áámá soldado itii'ví yā trompeta yeⁿe música yeⁿe caanda, ní nguεε n'dááⁿ tono chí itii'ví yā, 'táácā cuuvi deenú tanáⁿ'ā soldados ní cuundiyaáⁿ yā chí 'āā ndáá caanda? ⁹Tiicá ntúūⁿ. Nduuti chí ndís'tii ní caaⁿmaⁿ ní ndúúcu

nduudu chi nguéé deenu tanáⁿa yā
 źtáácā tuumicadiinúúⁿ yā chi ngaⁿá
 nī? Ndís'tiī ní dííⁿ nī tan'dúúcā chi
 ngaⁿá nī na 'yúúné. ¹⁰Nééné n'dee
 'nááⁿ davaacu véé iⁿ'yeeⁿ'dí' cūū. Ní
 'iiⁿ'yāⁿ cuuvi caaⁿ'máⁿ yā maaⁿ na
 nduudu yeⁿe yā nducuéⁿ'ē chi neⁿ'é
 yā ní tanáⁿ'ā 'iiⁿ'yāⁿ s'eeⁿ 'caandiveéⁿ
 yā nduudu yeⁿe yā. ¹¹Nduuti chi
 'úú nguεε n'giindiveéⁿ nduudu yeⁿe
 tanáⁿ'a 'iiⁿ'yāⁿ tuuⁿ'mi ní 'iiⁿ'yāⁿ miiⁿ
 canée yā tan'dúúcā 'áámá 'iiⁿ'yāⁿ chi
 canúúⁿ yúúní. 'Tííca ntúuⁿ, 'úú ní
 caneé tan'dúúcā 'áámá 'iiⁿ'yāⁿ chi
 canúúⁿ yúúní ti nguéé n'giindiveéⁿ
 yā nduudu yeⁿ'é. ¹²Ndís'tiī chi neⁿ'é
 nī dííⁿ nī ntiīⁿ'nyuⁿ ch'εete yeⁿ'é
 Ndyuūs, ngiicá nī Espíritu N'dai
 yeⁿ'é Ndyuūs chi téé yā ntiīⁿ'nyuⁿ
 ndís'tiī, ntiīⁿ'nyuⁿ chi cuuví ca'cuééⁿ
 nī nduudu yeⁿ'é Ndyuūs 'iiⁿ'yāⁿ. Ní
 'íícú 'iiⁿ'yāⁿ cuuvi déénu ca yā yeⁿ'e
 Ndyuūs.

¹³'Iiⁿ'yāⁿ mííⁿ chi caaⁿ'maⁿ yā
 táámá davaacu chi n'dááⁿ canée
 chi ngiicá yā Ndyuūs de'e chi
 neⁿ'ē caaⁿ'maⁿ nduudu chí caⁿ'a
 yā. Ní cuuvi caaⁿ'máⁿ yā tanáⁿ'a
 yā nduudú miiⁿ. ¹⁴Nduuti chi 'úú
 caaⁿ'máⁿ'ngua'á ndúúcū táámá
 davaacu chi n'dááⁿ ní nguéé deenú
 chííⁿ chí caaⁿ'máⁿ tuuⁿ'mi ní dámaaⁿ
 espíritu yeⁿ'é caaⁿ'maⁿ. Ní 'úú ní
 nguéé tuumicadiinúúⁿ d'ε'ε veε
 chi caaⁿ'máⁿ. ¹⁵¿De'ε dííⁿ tuuⁿ'mi?
 Caaⁿ'maⁿ'ngua'á ndúúcū nduudu
 na veedi ní espíritu yeⁿ'é ní
 túúmícadíinúúⁿ chííⁿ chi dííⁿ. Ní
 caatá ndúúcū nduudu na veedi ní
 espíritu yeⁿ'é ní túúmícadíinúúⁿ
 chííⁿ chi caatá dendu'ū. ¹⁶Ndúúti
 chi ndís'tiī caaⁿ'maⁿ'ngua'á nī
 ndúúcū táámá davaacu chi n'dááⁿ

ní ngaⁿ'á nī 'tíícā: N'dií Ndyuūs,
 gracias, ní dííⁿ nī ndúúcū espíritu
 yeⁿ'é nī, tuuⁿ'mi ní źtáácā cuuvi
 caaⁿ'maⁿ tanáⁿ'a yā chi 'tíícā chiiⁿ
 chi ngaⁿ'a nī? ¹⁷'Áará chí n'daacā
 ngaⁿ'a nī, nguéé cunnee nī 'iiⁿ'yāⁿ
 chi caⁿ'á yā yaacū. ¹⁸'Úú Pablo
 nca'á gracias Ndyuūs yeⁿ'e yú chi
 ngaⁿ'á cá n'dee 'nááⁿ davaacu chi
 n'dááⁿ ndúúcū espíritu yeⁿ'é nguεε
 ti ndís'tiī. ¹⁹Taachí ngaⁿ'á na yaacū
 n'daacā ca chí caaⁿ'máⁿ nyuⁿ'u
 nduudu na veedi chi 'úú cadiinúúⁿ
 ní 'iicu ca'cueéⁿ tanáⁿ'a yā, ti 'úú
 ngaⁿ'á ta ndiichi mil nduudu táámá
 naaⁿ davaacu chi n'dááⁿ chi nguéé
 itúúmícadíinuuⁿ tanáⁿ'a yā.

²⁰Ndís'tiī hermanos yeⁿ'é, nguéé
 nadacadíinuuⁿ nī tan'dúúcā
 dá'caiyā, o tan'dúúcā 'áámá
 da'cuá'āa chi nguéé inadacadíinuuⁿ
 yā yeⁿ'ē nuuⁿ'ndi yeⁿ'e yā 'tíícá nī.
 Maaⁿ ní nducueⁿ'ē chi dííⁿ nī ní
 nadacadíinuuⁿ nī yeⁿ'ē tan'dúúcā
 saⁿ'ā n'gεete nadacadíinuuⁿ sa.
²¹Canée nguūⁿ na libro yeⁿ'é
 Ndyuūs ndii cuááⁿ vmnaaⁿ 'tíícā:
 'Úú chi 'iivú Ndyuūs ngaⁿ'á chuū.
 'Úú dicho'ó 'iiⁿ'yāⁿ chi canúúⁿ yúúní
 chi ngaⁿ'á yā nduudu cuaacu yeⁿ'é
 ndúúcū táámá naaⁿ davaacu. Ndaa
 yā nanááⁿ 'iiⁿ'yāⁿ s'eeⁿ ní 'iiⁿ'yāⁿ
 s'eeⁿ nguéé neⁿ'é yā 'caandiveéⁿ yā
 nduudu yeⁿ'é. 'Tíícā ngaⁿ'a Ndyuūs.
²²Cáávā chiiⁿ ní Ndyuūs ca'á yā
 poder 'iiⁿ'yāⁿ chi caaⁿ'máⁿ yā n'dee
 'naaⁿ davaacu chi 'iiⁿ'yāⁿ nguéé
 tuumicadíinuuⁿ yā. Ní chííⁿ chí
 n'giⁿ'i Ndyuūs ní 'aama seña chi
 poder yeⁿ'e yā cááva 'iiⁿ'yāⁿ chi
 nguéé i'téenu yā Ndyuūs. Nguéé
 caavā s'uuúⁿ chi i'téenu yú. 'Iiⁿ'yāⁿ
 chi ca'cueéⁿ yā nduudu yeⁿ'é

Ndyuūs ní ngaⁿa yā cáávā s'uuúⁿ chi i'teenu yú nguéé ti cáávā 'iiⁿyāⁿ chi nguéé i'téenu yā Dendyuūs yeⁿē yú. ²³Ndúúti chi 'iiⁿyāⁿ chi nguéé i'téenu yā 'iivú Ndyuūs, o 'iiⁿyāⁿ chi canúúⁿ yúúni, ndaa yā na yáacū ní nduuvidaamá yā ndúucu yú ní nducyaaca yú ngaⁿa yú davaacu chí ñ'dááⁿ. ¿Áá nguéé caaⁿmáⁿ yā chi s'uuúⁿ ní loco yú? ²⁴Ndúúti chi nducyaaca nī ca'cueeⁿ nī nduudu yeⁿé Ndyuūs na veedi ní ndaa 'áámá 'iiⁿyāⁿ chæti yaacū, 'iiⁿyāⁿ chi nguéé i'téenu yā 'iivú Ndyuūs o nguéé déenu yā 'iivú Ndyuūs yeⁿē yú, tuu'mi ní 'iiⁿyāⁿ miiⁿ cuuvi diíⁿ yā sentir nuuⁿndi yeⁿé yā. Ní nadacadiinúúⁿ yā yeⁿē nuuⁿndi yeⁿé yā na staava yeⁿé yā. ²⁵Iiⁿyāⁿ miiⁿ ní cuuvi deenu yā de'ē chi maáⁿ yā nadacadiinúúⁿ yā na staava yeⁿe yā chi nguεε cuuvi n'diichí yā. Ní 'iiⁿyāⁿ miiⁿ cundiit'n'díí yā ní cu'téenu yā Ndyuūs. Ní ngaⁿá yā 'tiicā: Cuaacu níⁿnyúⁿ Ndyuūs caneé yā ndúucu ndís'tií.

**Diiⁿ n'daacá nī tanducuéⁿe
ndúucu orden**

²⁶Ndís'tií ní 'tíicā diíⁿ nī taachi nduuvidáámá nī. Naⁿa ndís'tií ní candée nī 'aama canción. Ní naⁿa nī ch'eeⁿnee listo nī chi ca'cueéⁿ nī tanáⁿa yā. Naⁿá nī ní ch'eeⁿnee listo nī chi caaⁿmáⁿ nī 'áámá nduudu cuaacu yeⁿé Ndyuūs. Naⁿá nī ní caaⁿmáⁿ nī táámá naaⁿ davaacu chí ñ'dááⁿ naati n'núúⁿ nī vmnaaⁿ vmnaaⁿ 'áámá hermano chi cuuvi caaⁿmáⁿ de'ē chi neⁿe caaⁿmaⁿ nduudu s'eeⁿ chí ñ'dááⁿ. 'Tíicā cuuvi, ní cu'téenu cá nī yeⁿē 'iivú Ndyuūs. ²⁷Damaāⁿ 'uuví o

'iinu nī 'aama 'aamá nī caaⁿmáⁿ nī ndúucu naaⁿ davaacu, nduudú chí ñ'dááⁿ, naatí táámá nī ch'eeⁿnee listo chí caaⁿmáⁿ nī de'ē neⁿé caaⁿmāⁿ nduudu s'eeⁿ chí ñ'dááⁿ. ²⁸Nduuti chí nguéé véé 'áámá yā nguaaⁿ ndís'tií chí cuuvi caaⁿmaⁿ de'ē neⁿe caaⁿmāⁿ nduudu s'eeⁿ chí ñ'dááⁿ tuu'mi 'iiⁿyāⁿ nguéé cuuvi caaⁿmáⁿ yā ndúucu davaacu chí ñ'dááⁿ naachi nduuvidaamá nī. Naati 'iiⁿyāⁿ miiⁿ cuuvi ndeé yā cúunū cúunū ndúucu Dendyuūs ndúucu davaacu chí ñ'dááⁿ. ²⁹Taachí nduuvidaamá nī, 'uuví nī o 'iinu nī candée nī nduudu cuaacu yeⁿé Ndyuūs ní ca'aama ca'aama nī caaⁿmáⁿ nī nduudu na veedi ní tanaⁿá yā nadacadiinuuⁿ yā yeⁿe nduudu chí ngaⁿa nī. ³⁰Ní nduuti Ndyuūs ní ng'iⁿi yā 'áámá ndís'tií chí véé nī 'áámá nduudu yeⁿé yā chí caaⁿmáⁿ nī, tuu'mi ní 'iiⁿyāⁿ chí candée yā nduudu miiⁿ canéé chí téé yā lugar chí caaⁿmáⁿ nī nduudu yeⁿé Ndyuūs. ³¹'Tíicā nducyaaca nī cuuvi caaⁿmáⁿ nī nduudu yeⁿé Ndyuūs ca'áámá ca'áámá nī. Tanáⁿa nī ng'iindiveéⁿ nī. Ní 'tíicā ní cuuvi déenu cá nī yeⁿé Ndyuūs ní cu'téenu cá nī yeⁿé yā. ³²'Iiⁿyāⁿ chí caaⁿmáⁿ yā nduudu yeⁿé Ndyuūs deenu yā de'ē tiempo chí caaⁿmáⁿ yā. ³³Ndyuūs neⁿé yā chí véé orden chæti yáacū yeⁿé yā ní véé vaadí 'diiⁿ. 'Tíicā ní ch'eeⁿnéé 'diíⁿ nī dendu'ú na staava yeⁿé nī. 'Tíicā cānee tanducuéⁿē yaacū yeⁿé Ndyuūs. ³⁴Taachi nduuvidáámá nī n'daataá nguéé cuuvi candée tá nduudu yeⁿe Dendyuūs, naati 'diiⁿ 'diíⁿ nuuⁿ 'cuætinéé cheendí tá. 'Tíicā canéé nguūⁿ na ley

ye^{ne} Ndyuūs. ³⁵Nduuti chi 'áámá n'daataá nguéé tuumicadínuuⁿ tá ye^{ne} nducué^{ne} chi nga^a yā cheeti yaācū, tuu^mi taachi ndaa tá ná vaacu tá cuuvi nítiinguuneeⁿ ta isa^a yā ye^{ne} tá. Nduuti chi 'áama n'daataá candē tá nduudu ye^{ne} Ndyuūs cheeti yaācū, tuu^mi 'cuináaⁿ tá.

³⁶¿Áá nguéé ne^{ne} ní 'caandiveéⁿ ní chi dinguúⁿ ye^{ne} ní? ¿Dé'ε ra tuu^mi? ¿Áá ye^{ne} ndís'tií nduudu ye^{ne} Ndyuūs o ndaā dāmáāⁿ nanááⁿ ndís'tií nduudu miiⁿ?

³⁷Nduuti chi 'áámá sa^a nguaaⁿ ndís'tií nadacadínuuⁿ sa chi cuaacu chi ntiiⁿnyuⁿ ye^{ne} sa chiiⁿ chi caa^mmaⁿ sa nduudu cuaacu ye^{ne} Ndyuūs, ní Espíritu N'dai ye^{ne} Ndyuūs ca'cueéⁿ yā sa^a miiⁿ, tuu^mi ní cuuvi deenu sa chíⁿ chi idinguúⁿ tan'dúucā chi Ndyuūs chí^mí yā 'úú. ³⁸Nduuti chi sa^a miiⁿ nguéé 'caandiveeⁿ sa nduudu ye^{ne}, tuu^mi ní ndís'tií nguéé 'caandiveéⁿ ní nduudu ye^{ne} sa.

³⁹Tíicā díⁿ ní, ndís'tií hermanos ye^{ne}. Caa^mmaⁿ ní nduudu cuaacu ní ca'á ní lugar chí 'iiⁿyāⁿ caa^mmaⁿ yā táámá davaacu chí n'dááⁿ. ⁴⁰Diiⁿ n'daacá ní tanducué^{ne} ndúúcu orden.

Jesucristo 'āā nnduuchi yā
ye^{ne} nguaaⁿ tináⁿā

15 Ndís'tií hermanos ye^{ne}, maaⁿ ní chuū nga^a cuaācū ngíí ndís'tií nduudu ye^{ne} evangelio chí ndúúdu ngai ye^{ne} Jesucristo. Chíⁿ 'āā nga^a, ní ngi'cueéⁿ ndís'tií. Ní ndís'tií ní ngiindiveéⁿ ní ní s'téenu ní. Ní 'aama canee n'daacá ní ná nduudu 'cūú. ²Cáāvā nduudu

cuaacu ye^{ne} Dendyuūs ndís'tií ní nnguá^aai ní ye^{ne} nuuⁿndi ye^{ne} ní nduuti chí 'áámá cānee na staava ye^{ne} ní chíⁿ chí ca'cueéⁿ ndís'tií. Nduuti chí ndís'tií nguéé i'teenú ní nguéé dichíí'vē nduudu miiⁿ cáāvā ndís'tií.

³Vmnááⁿ vmnaaⁿ ní chí'cueéⁿ ndís'tií chee chí más ca importante tan'dúucā chí Cristo chí'cueéⁿ yā 'úú. Chuū chiiⁿ chí Cristo ní chíⁿ yā cáāvā nuuⁿndi ye^{ne} yú tan'dúucā chí canéé nguūⁿ ndii cuááⁿ vmnaaⁿ na libro ye^{ne} Ndyuūs. ⁴Iiⁿyāⁿ ní chí'ichi yā Cristo ní cho'ōo ndii 'íínú nguuvi ní Dendyuūs nadin'duuchi yā Cristo ye^{ne} nguaaⁿ tináⁿā tan'dúucā chí canéé nguūⁿ na libro ye^{ne} Dendyuūs. ⁵Guayiivi chí Cristo nduuchi yā ye^{ne} nguaaⁿ tináⁿā sa^a Pedro n'diichi sá Cristo. Guayiivi chí cho'ōo chuū ní ndichuui apóstoles n'diichí yā Cristo.

⁶Guayiivi miiⁿ ní 'áámá tiempo nūuⁿ nyuⁿu ciento hermanos nduuvidaamá yā ní n'diichí yā Cristo chí 'āā nduuchi yā ye^{ne} nguaaⁿ tináⁿā. N'dee cá yā ye^{ne} nyuⁿu ciento hermanos sндуuchi yā ndíí maaⁿ, naati duu'ví yā n'dii yā. ⁷Guayiivi miiⁿ ní Jacobo, apóstol chí ndēē nduudu ye^{ne} Dendyuūs n'diichi ntúuⁿ yā Cristo. Ní guayiivi ní nducyaaca apóstoles n'diichí yā Cristo.

⁸Cho'ōo 'yááⁿ n'dai nguuvi ní 'úú, Pablo, n'diichi ntúúⁿ Cristo, 'áará chí 'úú nguéé intiinaáⁿ Cristo taachi cánéé yā iⁿ'yeeⁿdí 'cūú. ⁹'Úú, Pablo, nacadiinúúⁿ chí 'úú nguéé n'daacā 'úú, tan'dúucā ye^{ne} tanáⁿā apóstoles chí candēé yā nduudu ye^{ne} Ndyuūs. 'Úú nguéé canéé chí cuví apóstol

ti vmnááⁿ vmnaaⁿ can'daá 'iiⁿyāⁿ
 yeⁿe yaacū yeⁿé Dendyuūs, ti
 neⁿé chi 'iiⁿntyéⁿē ca'á yā orden
 chi 'caaⁿnúⁿ yā 'iiⁿyāⁿ chi naⁿ'á yā
 yaacū yeⁿé Ndyuūs. ¹⁰Maaⁿ ní 'úú
 'aama apóstol 'úú ti Ndyuūs díⁿ yā
 n'daacā n'dai nduucú. Caati Ndyuūs
 díⁿ yā n'daacā n'dai nduucú maaⁿ
 ní 'úú idíⁿ ntiiⁿnyuⁿ yeⁿé yā. Ní
 chíⁿ chi Ndyuūs díⁿ yā nduucú
 dichí'vē. Nguéé dámaāⁿ 'úú chi
 diiⁿ ca ntiiⁿnyuⁿ yeⁿé yā ti Ndyuūs.
 Ndyuūs chi díⁿ yā n'daacā n'dai
 nduucú ní canée yā nduucú ní
 nginneē yā 'úú. ¹¹Nguéé dē'ē vee
 ndii nduuti chi 'úú o náⁿ'a yā chi
 candee nduudu yeⁿé Ndyuūs, tí
 nús'ūū ngaⁿ'a n'ū nduudu miⁿ. Ní
 ndís'tii ní i'téenu nī nduudu miⁿ.

**'Iiⁿyāⁿ caⁿ'á yā nnduuchí
 yā yeⁿē nguaaⁿ tináⁿ'ā**

¹²Ndís'tii ní i'téenu nī chí ngaⁿ'a
 'nū chi Cristo nduuchí yā yeⁿē
 nguaaⁿ tináⁿ'ā. ¿Táacā cuuvi chí
 ngaⁿ'á nī chi nguéé nnduuchí 'iiⁿyāⁿ
 s'eeⁿ yeⁿē nguaaⁿ tináⁿ'ā? ¹³Nduuti
 chi nguéé nnduuchi 'iiⁿyāⁿ s'eeⁿ
 yeⁿē nguaaⁿ tináⁿ'ā Cristo ntúūⁿ ní
 nguéé 'āā nduuchí yā yeⁿē nguaaⁿ
 tináⁿ'ā. Ní cuerpo yeⁿe Cristo canee
 na yáinyāⁿ ndí maaⁿ. ¹⁴Ndúúti chi
 Cristo nguéé 'āā nduuchí yā yeⁿe
 nguaaⁿ tináⁿ'ā tuu'mi ní nduudu
 chi ngaⁿ'á n'ū nguéé dichí'vē. 'Tiicá
 ntúūⁿ nguéé dichí'vē chiiⁿ chi
 i'téenu n'ū yeⁿe Cristo. ¹⁵'Tiicá ntuūⁿ
 chiiⁿ chi ngaⁿ'á n'ū chi nduudu
 cuaacu yeⁿé Ndyuūs, tuu'mi ní
 nduudu yaadi nduuti chi nguéé
 'tíicā. Naati ngaⁿ'a cuaacú n'ū chi
 Ndyuūs díⁿ yā chí 'āā nduuchi
 Cristo yeⁿē nguaaⁿ tináⁿ'ā. Nduuti

chi nguéé nnduuchí tanáⁿ'ā 'iiⁿyāⁿ
 yeⁿē nguaaⁿ tináⁿ'ā 'tiicá ntuūⁿ
 nguéé 'āā nduuchí Ndyuūs Cristo
 yeⁿē nguaaⁿ tinaⁿ'ā. ¹⁶Ndúúti chi
 tanáⁿ'a 'iiⁿyāⁿ nguéé nnduuchí yā
 yeⁿē nguaaⁿ tináⁿ'ā, 'tiicá ntúūⁿ,
 Cristo nguéé 'āā nduuchí yā yeⁿē
 nguaaⁿ tináⁿ'ā. ¹⁷Nduuti chi Cristo
 nguéé 'āā nduuchí yā yeⁿē nguaaⁿ
 tináⁿ'ā nguéé dichí'vē chi i'téenu
 yú Ndyuūs. Ní s'uuúⁿ canee yú
 condenado ndúúcū nuūⁿndí yeⁿē yú.
¹⁸Nduuti chi 'tíicā, tuu'mi ní 'iiⁿyāⁿ
 chí 'āā i'téenu yā Cristo, ní maaⁿ ní
 'āā n'dii yā, 'āā chindái yā ndúúcū
 nuuⁿndí yeⁿé yā. ¹⁹Nduuti chi nguéé
 nduuchi Cristo yeⁿē nguaaⁿ tináⁿ'ā
 tuu'mi ní s'uuúⁿ chí i'teenu yú
 Cristo, núúⁿmáⁿ neⁿe chí snée yú na
 iⁿ'yeeⁿdí cūū neenē ndaachi yínu
 yú nguéé ti tanáⁿ'ā 'iiⁿyāⁿ.

²⁰Naati cuaacu chí Cristo miⁿ 'āā
 nduuchi yā yeⁿe nguaaⁿ tináⁿ'ā.
 Ní Cristo miⁿ ní 'iiⁿyāⁿ vmnááⁿ
 vmnaaⁿ chí nduuchí yā yeⁿe
 nguaaⁿ tináⁿ'a yeⁿē nducyáacá
 'iiⁿyāⁿ chí n'dí. ²¹Ti cáāvā nuuⁿndí
 yeⁿe 'áámá saⁿ'a Adán, canéé
 chí nducyaaca yú 'cuūvi yú. Ní
 cáāvā chí diiⁿ 'aama saⁿ'ā Cristo
 mífⁿ, canéé chí nduuchi yú yeⁿē
 nguaaⁿ tináⁿ'ā. ²²S'uuúⁿ ní yeⁿe
 Adán chí diiⁿ nuuⁿndí sa. S'uuúⁿ
 ní 'iiⁿyāⁿ chí diiⁿ nuuⁿndí s'uuúⁿ.
 Taachí 'iiⁿyāⁿ diiⁿ nuuⁿndí yā tuu'mi
 canee chí 'cuūvi yā. S'uuúⁿ ní yeⁿe
 Cristo s'uuúⁿ ní 'cuēti nduuchí yú.
²³Ti 'áámá 'áámá 'iiⁿyāⁿ caⁿ'á yā
 nnduuchi yā yeⁿe nguaaⁿ tináⁿ'ā
 tan'dúúcā chí itunééⁿ 'iiⁿyāⁿ. Cristo
 'āā nduuchí yā vmnááⁿ vmnaaⁿ yeⁿe
 nguaaⁿ tináⁿ'ā. Ní cuayiivi taachi
 ndaá Cristo na iⁿ'yeeⁿdí cūū taama

vmnéⁿēe, tuu'mi ní 'iiⁿyāⁿ chí n'díí chí yeⁿe Cristo, 'iiⁿyāⁿ s'eeⁿ ní caⁿá yā nnduuchi yā yeⁿe nguaaⁿ tináⁿā. ²⁴Tuu'mi ní ndaā nguuvi chí 'cuiinū iⁿyeeⁿdí 'cūū cuayiivi taachi chó'oo tanducuéⁿē chí Dendyuūs Chiida yú neⁿé yā chí chó'oo. Ní Cristo caaⁿmaⁿ ntiiⁿnyúⁿ yā yeⁿe nducyaaca 'iiⁿyāⁿ ndíí tiiiⁿ yeⁿe iⁿyeeⁿdí 'cūū ndúúⁿcū poder yeⁿe. Tuu'mi ní Cristo ncaⁿá yā Chiidá yā tanducuéⁿē chí yeⁿe chí ngaⁿa ntiiⁿnyúⁿ yā. ²⁵Ti maaⁿ ní Cristo miiⁿ canée yā tan'dúúⁿcā 'áámá Rey. Ní taachi chí cuchée yā yeⁿe tanducuéⁿē enemigo yeⁿe yā, tuu'mi ní enemigos yeⁿé yā canée yā tan'dúúⁿcā chí canée yā mááⁿ ca'a Cristo; ²⁶tuu'mi ní chí 'cuiinu enemigo yeⁿe Cristo chí vaadí n'gii. Ní Cristo chichē yā yeⁿe. ²⁷Dendyuūs 'āā ca'a yā nducueⁿē dendu'u na ta'ā Cristo ní Cristo ngaⁿa ntiiⁿnyúⁿ yā yeⁿe tanducuéⁿē. Ní nducueⁿē canee tan'dúúⁿcā chí canee maaⁿ ca'a Cristo. Cristo miiⁿ nguéeⁿ ngaⁿa ntiiⁿnyúⁿ yā yeⁿe Chiidá yā naati Chiidá yā 'āā ca'a yā Cristo tanducuéⁿē. ²⁸Taachí Cristo chēé yā yeⁿe tanducuéⁿē, tuu'mi ní Cristo, chí daiya Dendyuūs, ca'a yā nducueⁿē na ca'a Dendyuūs chí Chiidá yā. Ní Cristo miiⁿ mááⁿ yā canee yā maaⁿ poder yeⁿe Chiidá yā.

²⁹¿De'e rā tuu'mi? Nduuti chí nguéeⁿ nnduuchi 'iiⁿyāⁿ s'eeⁿ yeⁿe nguaaⁿ tináⁿā, ¿de'e cúúví chí dííⁿ yā 'iiⁿyāⁿ chí ndéédínuūⁿniⁿ yā cáávā tanáⁿā 'iiⁿyāⁿ s'eeⁿ chí n'dii? ¿De'e cáávā idííⁿ yā 'tíicā? Nduuti chí nguéeⁿ i'téenu yā chí 'iiⁿyāⁿ chí n'dii caⁿá yā nduuchi yā yeⁿe nguaaⁿ tináⁿā.

³⁰Tiicá dendu'ū. ¿De'e cúúví chí 'úú cuneé ndúúⁿcū cáándá chí 'iiⁿyāⁿ 'caaⁿnúⁿ yā 'úú ndii hora miiⁿ?

³¹Cuáácú chí nguuvi nguuvi 'iiⁿyāⁿ neⁿe 'caaⁿnúⁿ yā 'úú cucáávā chí i'teenú Cristo. Cuáácú chí yeenú, ti cáávā Señor Jesucristo chí Señor yeⁿe yú ndís'tii i'téenu ní Jesucristo ti 'úú ngaⁿá nduudu cuaacu yeⁿe Jesucristo nanááⁿ ndis'tii. ³²¿De'e chí cuuvi yeⁿé chí cuchēé yeⁿé 'iiⁿyāⁿ yááⁿ Efeso chí dííⁿ yā nduucú tan'dúúⁿcā 'iiti taaⁿ nduuti chí nguéeⁿ nduuchi 'iiⁿyāⁿ s'eeⁿ yeⁿe nguaaⁿ tináⁿā? Tuu'mi ní ngaⁿa yú 'tiicā: Che'e yú vaa, cu'u yú vaa, ti cavyaaⁿ ní 'cuūví yú.

³³Nguéeⁿ dííⁿ ní chí 'iiⁿyāⁿ canche'éeí yā ndís'tii. Nduuti chí caⁿá ní ndúúⁿcū 'iiⁿyāⁿ chí nguéeⁿ n'daacā idííⁿ yā tuu'mi ndís'tii cuuví dííⁿ ní tan'dúúⁿcā chí idiiⁿ 'iiⁿyāⁿ s'eeⁿ. Nguéeⁿ n'daacā chí dííⁿ ní 'tííca. ³⁴Nadacadíínuuⁿ ní chēé chí dííⁿ ní. Ní dííⁿ ní cosa chí n'daacā. Ní nguéeⁿ dinuuⁿndí ní. Tanáⁿā 'iiⁿyāⁿ nguéeⁿ deenú yā yeⁿe Dendyuūs. Chuū ní ngaⁿá yeⁿe ndís'tii ní cuuví 'cuinááⁿ ní.

Yeⁿe tan'dúúⁿcā chí 'iiⁿyāⁿ caⁿá yā nnduuchí yā yeⁿe nguaaⁿ tináⁿā

³⁵Nduu'ví 'iiⁿyāⁿ ní cuuvi caaⁿmáⁿ yā chuu. ¿Táácā chí 'iiⁿyāⁿ chí 'āā tináⁿā chí nnduuchí yā yeⁿe nguaaⁿ tináⁿā? Ní vee cuerpo ngai yeⁿé 'iiⁿyāⁿ s'eeⁿ, ¿táácā canée? ³⁶Ndís'tii chí ngaⁿa ní 'túúⁿcā nguéeⁿ nadacadíínuuⁿ ní yeⁿe chí ngaⁿa ní. Ndís'tii chí ngiinu ní ndaata deenú ní chí ndaata miiⁿ canée chí n'dii vmnááⁿ vmaaⁿ chí dichí'vē ní ndēé n'gui'í yeⁿe. ³⁷Ndaata

miiⁿ chi ndís'tiī ngiīnu nī. ¿Áá nguéé tan'dúúcā 'áámá planta chi cuchii, nduuti chi trigo, o nduuti chi niⁿnuⁿ, o dē'ē vee ndaata chi véé? ³⁸Dendyuūs díⁿ yā chi 'cuii ca'áámá ca'áámá ndaata miiⁿ tan'dúúcā chi neⁿe yā, ni 'āā vi'í cā ca'áámá ca'áámá yaata naaⁿ yeⁿ'ē ndaata miiⁿ. ³⁹Tíicá ntúūⁿ na iⁿ'yeeⁿdí 'cūū. Nguεε dáámá cuerpo yeⁿ'e 'iiⁿ'yāⁿ. 'Āā vi'í caā cuerpo yeⁿ'e 'iiti, 'āā vi'í caā cuerpo yeⁿ'e 'yáádá, ní 'āā vi'í caā cuerpo yeⁿ'e 'yáácā. ⁴⁰Véé cuerpo yeⁿ'e cosa s'eeⁿ chi véé nanguuvi. Ní véé cuerpo yeⁿ'e 'iiⁿ'yāⁿ chi canéé na iⁿ'yeeⁿdí 'cūū. Ní cuerpo yeⁿ'e cosa chi véé nanguuvi ní dεεve. Ní 'aa vi'í caā cuerpo chi ndεεve yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū. ⁴¹Tiicá ntúūⁿ 'yáⁿ'ā, ní 'iīyū, ní 'iīⁿnyúⁿ, ni nducyaaca ní dεεveε cá ní 'āā vi'í caā. Nguaaⁿ 'íiⁿnyuⁿ s'eeⁿ chi dεεveé, nguεε dáámá tí 'āā vi'í caā. ⁴²Tiicá ntúūⁿ cuerpo yeⁿ'e yú, ch'iī yú ní choō cuerpo yeⁿ'e yú, naati taachi nnduuchi yú yeⁿ'e nguaaⁿ tináⁿ'ā, 'āā ntéé nuuⁿndi yú. ⁴³Maaⁿ ní idinuuⁿndi yú ni 'cuináⁿ yú cáāvā cuerpo yeⁿ'e yú. Naati taachi nnduuchi yú yeⁿ'e nguaaⁿ tináⁿ'ā, tuuⁿmi ní cuerpo yeⁿ'e yú ní dεεve, ní n'daacā canéé. ⁴⁴Maaⁿ ní cuerpo yeⁿ'e yú ní yeⁿ'e iⁿ'yeeⁿdí 'cūū ni 'cuūvi yú. Ní taachi nnduuchi yú yeⁿ'e nguaaⁿ tináⁿ'ā, tuuⁿmi ní cuerpo yeⁿ'e yú ní yeⁿ'e espíritu. Nduuti chi véé cuerpo yeⁿ'e yú chi yeⁿ'e iⁿ'yeeⁿdí 'cūū, tuuⁿmi ní véé cuerpo yeⁿ'e yú chi yeⁿ'e espíritu.

⁴⁵Canéé nguūⁿ ndii cuááⁿ vmnaaⁿ na libro yeⁿ'é Dendyuūs 'tíicá: Dendyuūs din'dái yā cuerpo yeⁿ'e

saⁿ'ā Adán chi sáⁿ'ā chí cunduuchi sá vmnááⁿ vmnaaⁿ. Naati táámá Adán chí cuayiivi ní nguuvi yā Jesucristo. Ní Jesucristo miiⁿ ní yeⁿ'ē vida chi espíritu chi canduuchi. Ní Jesucristo ca'á yā vida 'iiⁿ'yāⁿ s'eeⁿ yeⁿ'e iⁿ'yeeⁿdí 'cūū chi vida chi yeⁿ'e espíritu. ⁴⁶Nadacadíinuⁿ ní yeⁿ'e chuū. Vmnááⁿ vmnaaⁿ véé cuerpo tan'dúúcā cuerpo yeⁿ'e s'uúúⁿ, ní cuayiivi véé cuerpo chi yeⁿ'e espíritu. ⁴⁷Dendyuūs din'dái yā Adán chi saⁿ'a vmnááⁿ vmnaaⁿ yeⁿ'e yaⁿ'á 'cūū. Naati saⁿ'ā cuayiivi miiⁿ chiicā sa ná va'ai cheeti nguuvi ní saⁿ'ā miiⁿ chí Jesucristo. ⁴⁸Nducyáácá 'iiⁿ'yāⁿ yeⁿ'e iⁿ'yeeⁿdí 'cūū canéé ndúúcū cuerpo tan'dúúcā 'iiⁿ'yāⁿ yeⁿ'e iⁿ'yeeⁿdí 'cūū. Nducyáácá 'iiⁿ'yāⁿ chi yeⁿ'e Cristo cuuvi canéé ndúúcū cuerpo tan'dúúcā cuerpo yeⁿ'e Jesucristo chí yeⁿ'e va'ai cheeti nguuvi. ⁴⁹Maaⁿ ní cuerpo yeⁿ'e yú tan'dúúcā cuerpo yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū. Cuayiivi ní ndaāca yú 'áámá cuerpo yeⁿ'e yú tan'dúúcā chí véé na va'ai cheeti nguuvi.

⁵⁰Maaⁿ ní chuū ngaⁿ'á ngii ndís'tiī hermanos yeⁿ'é: Ndúúcū cuerpo yeⁿ'e yú ndúúcū yuūtē yeⁿ'e ndúúcū yuūuⁿ yeⁿ'e nguéé cuuvi ndaa yú na va'ai cheeti nguuvi. Ndíi nguéé véé 'áámá cuaaⁿ dendú'ū chí nchoo ndúúcū chí nguéé nngoō. ⁵¹Quin'diichí nī. 'Úú ní ngaⁿ'á n'g'iⁿ'í ndís'tiī yeⁿ'e 'áámá cosa chí 'iiⁿ'yāⁿ nguεε deenu yā. Nguéé nducyaaca yú 'cuūvi yú. Naati Ndyuūs téé yā nducyaaca s'uúúⁿ 'áámá cuerpo chí ngai tan'dúúcā cuerpo yeⁿ'é yā chí yeⁿ'e espíritu. ⁵²Ní 'áámá tiempo 'lín

'líiⁿ nūuⁿ tan'dúúccā chi 'áámá ingaaⁿ
 'áámá ingaadi nduutinaaⁿ yú, mááⁿ
 n'cheeté nūuⁿ, ní n'daaⁿ cuerpo yeⁿē
 yú, taachi 'cuēcú trompeta chí
 ndii na 'cuiinu. Ní taachi 'cuēcú
 trompeta miiⁿ, tuu'mi ní 'iiⁿyāⁿ chi
 i'téenu yā Señor Jesucristo chi
 maaⁿ ní 'āā tináⁿā ní nducuéⁿ yā
 yeⁿē nguaaⁿ tináⁿā ndúúccū cuerpo
 ngai yeⁿé yā chi 'āā ntéé choo.
 Ní 'tiicā ntúūⁿ. S'uúúⁿ chi i'teenu
 yú Jesucristo ní canduuchi yú, ní
 n'daaⁿ cuerpo yeⁿe yú. ⁵³Cuerpo
 yeⁿe yú chí ngoō. Ní Ndyuūs canéé
 chí n'daaⁿ yā cuerpo yeⁿē yú ní
 téé yā s'uúúⁿ táámá cuerpo chí
 nguéé nchoo. Cuerpo yeⁿē yú chí
 n'gii, Ndyuūs canéé chí téé yā s'uúúⁿ
 táámá cuerpo chí 'āā ntéé ndaa
 nguuví chí 'cuūví. ⁵⁴Taachí cuerpo
 yeⁿē yú chí n'gii ní ngoo, 'āā n'daaⁿ
 cuerpo yeⁿe chí nguéé cuuvi n'gii
 ndíí nguéé cuuvi chōō. Tuu'mi cuuvi
 cuaacu chí canéé nguūⁿ ndii cuááⁿ
 vmnaaⁿ na libro yeⁿe Ndyuūs 'tíicā:
 Vida cueⁿe daāⁿmaⁿ miiⁿ ní chicheé
 yeⁿē vaadi n'gii miiⁿ ti 'āā ntéé ch'ii
 'iiⁿyāⁿ. ⁵⁵Vaadi n'gii ni 'āā chó'ōo.
 ¿Táácā cuuvi cuchéé vaadi n'gii
 yeⁿe 'iiⁿyāⁿ chí nguéé cuuví 'cuūví
 yā? ¿Táácā cuuví diiⁿ vaadi n'gii miiⁿ
 tan'dúúccā chí 'áámá 'iiti chí nga'a
 tī 'iiⁿyāⁿ ní n'gii yā? Nguéé cuuvi.
⁵⁶Nuuⁿndi miiⁿ chí diiⁿ yú, chííⁿ chí
 tee lugar vaadi n'gii, ní n'gii yú. Ní
 vaadi n'gii miiⁿ diiⁿ tan'dúúccā chí
 nga'a tī 'iiⁿyāⁿ ní n'gii yā. Ley miiⁿ
 chííⁿ chí diiⁿ chí 'iiⁿyāⁿ deenu yā
 chí véé nuuⁿndi yeⁿe yā. ⁵⁷Nca'a
 yú gracias Ndyuūs, ti nginneé yā
 s'uúúⁿ chí ichéé yú yeⁿe nducuéⁿe
 chí yeⁿē yááⁿn'guiinūuⁿ cáávā
 Señor Jesucristo yeⁿē yú. ⁵⁸Cáávā

chuū ndís'tii hermanos yeⁿé chí
 neⁿe taaví, 'cuēetinééⁿ n'daaca nī
 ndúúccū chííⁿ chí i'téenu nī. Ní nguéé
 n'daaⁿ chííⁿ chí i'téenu nī. Ní cueⁿe
 daāⁿmaⁿ dííⁿ nī ntiiⁿnyuⁿ yeⁿe
 Señor Jesucristo yeⁿē yú. Ní deenú
 nī chí ntiiⁿnyuⁿ miiⁿ ní véé chííⁿvē.

Yeⁿe ofrenda caavā hermanos

16 Maaⁿ ní neⁿé caaⁿmáⁿ
 ndís'tii yeⁿe ofrenda yeⁿé
 nī chí ca'a nī 'iiⁿyāⁿ chí i'téenu yā
 Jesucristo cáávā 'iiⁿyāⁿ ndaachíí
 snée yā ní nguéé dendu'u yeⁿē.
 Dííⁿ nī tan'dúúccā chí 'úú ngaⁿ'á
 ngii 'iiⁿyāⁿ yeⁿe tanáⁿā yáacū s'eeⁿ
 na yáⁿāa Galacia. ²Tíicā dííⁿ nī.
 Nguuví vmnááⁿ vmnaaⁿ yeⁿé ndēētē
 chí domingo miiⁿ, ca'áámá ca'áámá
 ndís'tii ní cu'néeⁿ nī 'āā víí caā
 parte yeⁿé nī chí tunééⁿ Ndyuūs chí
 yeⁿe nducuéⁿ chí Ndyuūs tee yā
 ndís'tii. Ní ndís'tii ca'a nī ofrenda
 yeⁿé nī na ta'a 'iiⁿyāⁿ chí ngaⁿ'a
 ntiiⁿnyuⁿ yeⁿe yáacū. Ní taachi
 'úú ndaa nguéé canéé chí ca'a nī
 ofrenda yeⁿe nī. ³Ní taachi ndaa,
 'úú dicho'ó 'iiⁿyāⁿ chí ndis'tii neⁿéⁿ
 chí candéé yā ofrenda yeⁿé nī ndíí
 yáāⁿ Jerusalén. 'Iiⁿyāⁿ miiⁿ candéé
 yā carta yeⁿé ndúúccū ofrenda yeⁿe
 nī. ⁴Nduuti chí 'úú canéé chí caⁿ'á
 yáāⁿ Jerusalén tuu'mi 'iiⁿyāⁿ s'eeⁿ
 caⁿ'á yā nduucú.

Pablo caⁿ'a yā chí caⁿ'á yā yaāⁿ s'eeⁿ

⁵Canéé chí cho'ó na yáⁿāa
 Macedonia. Ní taachi cho'ó na
 yáⁿāa miiⁿ cuayiivi ní ndaa na yáāⁿ
 Corinto ní cuneé ndúúccū ndís'tii.
⁶Neⁿé chí cūnēe ndúúccū ndís'tii
 tiempo chí 'iichéé. Ní cuayiivi ní
 ndís'tii cuuvi caⁿ'á nī nduucú 'téé

nūuⁿ naachi 'úú naⁿá cuaaⁿ cyúúní.
 7Nguéé neⁿé n'diichí ndís'tií taachi
 cho'ó yááⁿ vaacú nī, naati canéé
 ngiinú chi ndaa n'diichí ndís'tií
 'áámá tiempo nduuti chi Ndyuūs tée
 yā lugar 'úú. 8Naati cuneé na yááⁿ
 Efeso ndii tiempo yeⁿe 'viicu yeⁿe
 Pentecostés. 9Miiⁿ ní véé n'dee ca
 ntiiⁿnyuⁿ chi diíⁿ. Ní yááⁿ Efeso miiⁿ
 tan'dúúcā 'áámá cheendi va'āi chi
 ch'ēete n'dai ni ndeēvéé n'dai caavā
 'úú, ti véé cá ntiiⁿnyuⁿ chi diíⁿ. Miiⁿ
 ntúúⁿ neene vee 'iiⁿyāⁿ chi induuví
 táaⁿ yā yeⁿé.

10Ndúúti chi ndaa saⁿā Timoteo
 nanááⁿ ndís'tií, canéé chi diíⁿ nī
 recibir saⁿā miiⁿ tan'dúúcā 'áámá saⁿā
 chi diíⁿ ntiiⁿnyuⁿ sa yeⁿé Ndyuūs, ti
 saⁿā miiⁿ ní idiiⁿ sa ntiiⁿnyuⁿ yeⁿé
 Ndyuūs tan'dúúcā 'úú. 11Mar 'áámá
 ndís'tií nguéé diíⁿ nī ndúúcu Timoteo
 tan'dúúcā chi saⁿā chi nguee n'daacā,
 ní nguéé deenu sa. Cuaviivi taachi
 dicho'ó nī Timoteo miiⁿ cuaaⁿ cyúúní,
 dicho'ó nī saⁿa miiⁿ ndúúcu n'dai.
 Caneé ngiinú chi ndaa sa ndúúcu
 tanáⁿā hermanos nanááⁿ 'úú.

12'Úú neⁿé chi hermano Apolos
 ndaa sa nanááⁿ ndís'tií taachi ndaa
 tanáⁿā hermanos. Apolos miiⁿ nguéé
 neⁿe sa ndaa sa maaⁿ, naati ndaa sa
 nanááⁿ ndís'tií taachi véé yaaⁿ sa.

Pablo diíⁿ yā saludar hermanos

13'Cuéete n'daacá nī ndúúcu cuidado.
 Ní 'cuēetinéé n'daacá nī ndúúcu
 chi i'téenu nī chi yeⁿe Ndyuūs.
 Ní tan'dúúcā saⁿā n'geete diíⁿ yā
 ní 'tífcā diíⁿ nī. Ní cunéé diitú nī.
 14Tanducuéⁿe chi diíⁿ nī, ní diíⁿ nī ti
 neⁿe nī Ndyuūs.

15Ndís'tií ní deenú nī chi 'iiⁿyāⁿ
 yeⁿe va'āi saⁿa Estéfanos s'téenu yā

Jesucristo vmnááⁿ vmaaaⁿ taachi
 snee yā na yáⁿāa Acaya. 'Úú yaa'ví
 ndís'tií chi 'iiⁿyāⁿ s'eeⁿ neⁿé yā diíⁿ
 yā ntiiⁿnyuⁿ chi nginneé nducyaaca
 'iiⁿyāⁿ chi i'téenu yā Señor Jesucristo
 yeⁿe yú. 16'Úú ngiicá ndís'tií
 hermanos yeⁿé, chi 'caandiveéⁿ nī
 yeⁿe chi ngaⁿā 'iiⁿyāⁿ s'eeⁿ yeⁿe
 va'ai Estéfanos ní cunneé nī 'áámá
 'áámá 'iiⁿyāⁿ chí idiiⁿ ntiiⁿnyuⁿ yeⁿé
 Dendyuūs. 17Yeenú chi ndaa hermano
 Estéfanos ndúúcu hermano Fortunato
 ndúúcu hermano Acaico. N'daacā chi
 canéé yā ndúúcu nī na lugar yeⁿé.
 18'Iiⁿyāⁿ s'eeⁿ ní nduūvi n'dai yā na
 espíritu yeⁿé ní caⁿá yā nduūvi n'dai
 yā na espíritu yeⁿe nī dendú'ú. Canéé
 chi diíⁿ nī aceptar tanáⁿā 'iiⁿyāⁿ chi
 diíⁿ yā tan'dúúcā 'iiⁿyāⁿ s'eeⁿ.

19'Iiⁿyāⁿ yeⁿe yaacū yeⁿe yāⁿāa
 Asia dicho'ó yā saludos yeⁿé nī: N'dai
 nī, ngaⁿa yā. Saⁿa Aquila ndúúcu
 n'daataá Priscila ndúúcā 'iiⁿyāⁿ yeⁿe
 yaacū chi snee yā ndavaacú yā
 dicho'ó yā saludos yeⁿe nī: N'dai nī,
 ngaⁿa yā. 20Nducyáacá hermanos
 ní dicho'ó yā saludos yeⁿe nī: N'dai
 nī, ngaⁿa yā. Ndís'tií ní caaⁿmaⁿ nī
 'tífcā yeⁿe hermanos: N'dai yā, ngaⁿa
 nī. Ní ca'á nī ta'a nī taachi diíⁿ nī
 saludar hermanos ti ndís'tií ní neⁿé nī
 Dendyuūs.

21'Úú Pablo dinguúⁿ carta miiⁿ
 ndúúcu ta'á, ní: N'dai nī, ngaⁿá.

22Nduuti chi 'áámá saⁿā nguéé
 idinéⁿe yā Señor Jesucristo yeⁿe yú
 'āa cuuvi yā condenado. Niiⁿnuⁿ niiⁿnuⁿ
 canee tiempo chi Señor Jesucristo
 yeⁿe yú cuuvi ndaa ntúuⁿ yā.

23Ní Señor Jesucristo yeⁿe yú tée
 yā ndís'tií nducuéⁿe chi n'daacā
 yeⁿe yā. 24'Úú neⁿé ndís'tií ti ndís'tií
 ní yeⁿe Cristo Jesús ndís'tií. 'Tífcā.

CARTA CUAYIIVI YEⁿE 'IIⁿ'YĀⁿ CHI SNÉE YĀ YĀĀⁿ CORINTO

Pablo idinguúⁿ yā carta 'cūū yeⁿe
'iiⁿ'yāⁿ yeⁿe yaacū na yāāⁿ Corinto

1 'Úú Pablo 'úú. Ní Ndyuūs neⁿé
yā chi 'úú cuuvi 'áámá apóstol
chi candéé nduudu cuaacu yeⁿé
Jesucristo. 'Úú ndúúcu Timoteo chi
hermano yeⁿe yú idinguúⁿ carta
'cūū yeⁿe 'iiⁿ'yāⁿ yeⁿe yāāⁿ Corinto
chi caⁿá yā yāacū yeⁿe 'iivú
Ndyuūs, ní yeⁿé nducyaaca 'iiⁿ'yāⁿ
chi i'teenú yā Jesucristo, 'iiⁿ'yāⁿ chi
snée yā na núúⁿmáⁿ yáⁿāa yeⁿe
Acaya. ²Ndyuūs Chiida yú ndúúcu
Señor Jesucristo cuuvi tée yā s'uuúⁿ
cosa chi n'daacā yeⁿé yā ní 'íicú
cunéé vaadī 'diiiⁿ yeⁿé yā na staava
yeⁿe yú.

Pablo ch'eenú yā chii

³Dich'εete yú Ndyuūs ti néené
n'dai Ndyuūs Chiida yú chi Chiida
Señor Jesucristo yeⁿé yú. Ndyuūs
Chiida yú ya'ai 'iinú yā s'uuúⁿ ní tee
yā 'viich'εetínūⁿ s'uuúⁿ. ⁴Ndyuūs
yeⁿe yú itee yā 'viich'εetínūⁿ
núⁿs'uu yeⁿe tanducuéⁿé chi n'geenú
'nū ngii ti núⁿs'uu ní cuuvi ca'á 'nū
dáámá 'viich'εetínūⁿ 'iiⁿ'yāⁿ chi
n'geenú yā ngii ndúúcu dáámá
'viich'εetínūⁿ chi Ndyuūs tee

yā núⁿs'uu. ⁵Núⁿs'uu ní n'geenú 'nū
ngii n'dee ca cáavā chi idiíⁿ 'nū
ntiiⁿnyuⁿ yeⁿe Señor Jesucristo.
Ní Señor Jesucristo tee ca yā
'viich'εetínūⁿ núⁿs'uu. ⁶Maaⁿ ní,
nduuti chi n'geenú 'nū ngii, chuu
ní cáavā ndís'tiī cuuvi cuta'á nī
'viich'εetínūⁿ yeⁿé Ndyuūs ní
cuuvi nnguaⁿ'ai nī. Ní nduuti chi
Ndyuūs tee yā núⁿs'uu 'viich'εetínūⁿ,
chuū ní cáavā ndís'tiī cuuvi cuta'á
nī 'viich'εetínūⁿ yeⁿé Ndyuūs, ní
cuuvi nnguaiⁿ'ai nī. 'Tiicá ntúūⁿ
ndís'tiī cuuvi cuchéé nī nducuéⁿé
chi n'geenu nī ngii tan'dúúca chi
núⁿs'uu n'geenú 'nū ngii. ⁷Ní canee
ngiinú 'nū yeⁿe ndís'tiī chi cunee
n'daaca nī. Ti deenú 'nū ti taachi
ndís'tiī n'geenu nī ngii tan'dúúca
núⁿs'uu 'tiicá ntúūⁿ Ndyuūs tee yā,
'viich'εetínūⁿ ndís'tiī tan'dúúca chí
tee yā núⁿs'uu.

⁸Ní ndís'tiī hermanos yeⁿé 'nū.
Neⁿé 'nū chi cadiinuuⁿ nī yeⁿe
tanduvéé vaadī caa'va chi cho'ō
nuúⁿ 'nū na yáⁿāa yeⁿe Asia. Chíⁿ
chí ch'eenu taaví 'nū chii ní néené
n'dee ca, ní nadicadiinúúⁿ 'nū chi
nguée fuerzas yeⁿé 'nū chi cuchéé
'nū yeⁿe nducuéⁿé ti cuuví 'cuūvi
'nū. ⁹Nacadiinúúⁿ 'nū chí ca'á yā

orden chi 'cuūvi 'nū naati chuū ní chīi chí ch'iⁿi nús'uu chi cu'téenu cá 'nū Ndyuūs chi nadacuéeⁿ yā 'iiⁿyāⁿ yeⁿe nguaaⁿ tináⁿā. Ní nguēe i'téenu 'nū yeⁿe maáⁿ 'nū. ¹⁰Tíicā Ndyuūs nadanguáⁿai yā nús'uu yeⁿe peligro chi 'āā chééⁿ 'cuūví 'nū. 'Tiicā ntúūⁿ cunee ngiinu 'nū Ndyuūs chi nadanguáⁿai yā nús'uu yeⁿe nducuéⁿe chi n'geenú 'nū ngii ní yeⁿe chí ch'ēete n'dai. ¹¹Ní ndís'tiī ní nginneē ntúūⁿ nī nús'uu ti ngaⁿanguāⁿā nī caavā nús'uu. Caati ndúútí chí 'yááⁿ ca hermanos ngaⁿanguaⁿá yā yeⁿe 'nū, tuu'mi ní ca'á yā gracias Ndyuūs, ti Ndyuūs dííⁿ yā n'dai ca cáávā nús'uu.

Pablo chi'naaⁿ yā chi ndaá yā na yááⁿ Corinto

¹²Ní yeenú 'nū ti deenú 'nū na staava yeⁿe 'nū chi chiiⁿ chi idiíⁿ 'nū ní cáávā 'iiⁿyāⁿ yeⁿe iⁿ'yeeⁿdí 'cuū. Ní n'daacā dííⁿ 'nū. Ní n'daacā dííⁿ 'nū cáávā ndís'tiī. Ndyuūs chi n'dai taavi chínneē yā nús'uu chi 'túucā din'daacá 'nū. Chuū nguéé cuuvi dííⁿ 'nū cáávā vaadi deenu yeⁿe maáⁿ 'nū. ¹³Chííⁿ chí dinguúⁿ 'nū yeⁿe ndís'tiī ní ndís'tiī ní cuuvi 'cueéⁿ nī ní intiinaáⁿ nī. Cunee ngíínú 'nū chi túúmíicádiinúúⁿ nī nducuéⁿe. ¹⁴Tan'dúucā chi ndís'tiī túúmíicádiinúúⁿ nī 'téé maaⁿ naati taachi ndaa Señor Jesucristo taama vmnéⁿēe tuu'mí ndís'tiī cuuvi yeenú nī cáávā nús'uu tan'dúucā chi cuuvi yeenú 'nū cáávā ndís'tiī.

¹⁵Caati véé confianza yeⁿe 'nū ndúucū ndís'tiī, vmnááⁿ vmaaⁿ nadacádiinúúⁿ chí chīi ní ndaá ní caneé nduucú nī 'áámá tiempo ní cuayiivi ndaá taama vmnéⁿēe ní

cunee nduucú nī chi cuuvi yeenu cá nī. ¹⁶Nadacádiinúúⁿ chí cho'ó yaá'ví ndís'tiī taachi caⁿá na yáⁿāa Macedonia. Ní cuayiivi mííⁿ taachi n'daá yáⁿāa Macedonia miíⁿ tuu'mi ní nandaa ntuúⁿ yaa'ví ndís'tiī ní cunee ndúucū nī. Ní taachi can'daá yeⁿe nī, ndís'tiī cuuvi cunnee nī 'úú ndúucū necesidades yeⁿe caati caⁿá yáⁿāa Judea. ¹⁷Tíicā nadacádiinúúⁿ chí dííⁿ. 'Úú nguéé dííⁿ tan'dúucā 'iiⁿyāⁿ chí dííⁿ yā tan'dúucā chí maáⁿ yā neⁿe yā. Ní ngaⁿa yā: Júūⁿ, júūⁿ chuū chí dííⁿ, ní cuayiivi ngaⁿá yā chí nguéé dííⁿ yā ti dííⁿ yā tan'dúucā chí neⁿe yā. ¹⁸Naatí Ndyuūs deenú yā nduudu chí ngaⁿá 'nū chí nguéé ngaⁿá 'nū tíicā idiíⁿ 'nū ní cuayiivi nguéé idiíⁿ 'nū 'tíicā. ¹⁹Ti taachi 'úú ndúucū saⁿā Silvano ndúucū Timoteo candéé 'nū nduudu cuaacu yeⁿe Señor Jesucristo chí Daiya Dendyuūs nguéé ngaⁿá 'nū chí Jesucristo miíⁿ ngaⁿá yā chí júūⁿ 'tíicā, ní cuayiivi nguéé 'tíicā dííⁿ yā. Cristo ní ngaⁿá yā ní dííⁿ yā tanducuéⁿe dendu'ū chí cuaacu. ²⁰Ti Cristo miíⁿ ngaⁿá yā chí 'tíicā, yeⁿe nducuéⁿe chí Ndyuūs Chiida yú caⁿá yā chí tee yā 'iiⁿyāⁿ ndúucū s'uuúⁿ chí i'téenu yú Ndyuūs. Cáávā chuū idich'ēete yú Ndyuūs ti cucáávā Cristo caⁿa yú chí 'tiicā. ²¹Ní Chiida yú dííⁿ yā chí ndís'tiī ndúucū nús'uu cunee diitu ca yú ndúucū chí i'teenu yú yeⁿe Cristo. Ní Ndyuūs nadideevé yā s'uuúⁿ chí dííⁿ yú ntiíⁿnyuⁿ yeⁿe yā. ²²Ndyuūs tee yā s'uuúⁿ 'áámá sello yeⁿe yā na cuerpo yeⁿe yú ti yeⁿe yā s'uuúⁿ. Tee yā Espíritu N'dai yeⁿe yā na staava yeⁿe yú. Ní cáávā Espíritu N'dai yeⁿe yā deenu yú chí cuuvi

yeⁿe yú chiiⁿ chi Ndyuūs caⁿa yā
chi téé yā s'uuúⁿ.

²³Nguéé cueⁿé yáāⁿ Corinto ti
neⁿé yaaⁿ'vi neéⁿ ndís'tiī ní nguéé
neⁿ'é caaⁿ'vá cucáávā chi 'cuētinéé
yā'ai nī. Maaⁿ ní Ndyuūs deenú yā
staava yeⁿ'é ní testigo yeⁿ'é. ²⁴Nguéé
neⁿ'é 'nū caaⁿ'máⁿ 'nū ntiiⁿ'nyuⁿ yeⁿ'é
nī yeⁿ'ē chiiⁿ chi canee chi i'téenu
nī ti 'āā canee diitú nī ndúúcu chi
i'téenu nī. Naati neⁿ'é 'nū cunneé
'nū ndís'tiī. Nús'uu diiⁿ 'nū ntiiⁿ'nyuⁿ
ndúúcu ndís'tiī ní cuuvi yeenú nī.
Ní ndís'tiī snéé n'daaca nī caavā chi
i'teenú nī Jesucristo.

2 'Úú nadicádiinúúⁿ māaⁿ chi
nguéé ndaaⁿ nanááⁿ ndís'tiī chi
cuuvi ndaachi nī. ²'Úú nguēe neⁿ'é
ndaá nanááⁿ ndís'tiī nduuti chi 'úú
idiiⁿ chi ngii ndaachi yiinú ndís'tiī.
¿De'ē cúuví chi diiⁿ chi ngii ndaachi
yiinú ndís'tiī ti nguéé du'ū chi
cuuvi tee yā 'úú vaadi yeenú nduuti
chi ndaachi yiinú ndís'tiī? ³Chuū
idinguúⁿ yeⁿ'é ndís'tiī ti taachi ndaaⁿ
nguéé cu'neeⁿ ndaachi nuúⁿ cucáávā
ndís'tiī ti ndís'tiī cuuvi tee nī 'úú
vaadi yeenú. Véé 'viich'etiinúúⁿ
'cúú nanááⁿ nducyáácá ndís'tiī chi
vaadi yeenú chi véé yeⁿ'é, maaⁿ
vaadi yeenú miiⁿ cunéé ndúúcu
nducyaaca nī. ⁴Ní taachi dinguúⁿ
yeⁿ'é ndís'tiī neené di'vaachi 'úú ndii
ná staava yeⁿ'é ndíí tuunu cheēcú.
Nguéé diiⁿ 'tuucā ti cu'neeⁿ ndaachi
yiinú ndis'tiī ti neⁿ'é chi ndís'tiī
cuuvi déenu nī chi neené neⁿ'ē taavi
cá ndís'tiī.

**Ndyuūs nadach'εεcú yā
nuuⁿndi yeⁿ'é 'iiⁿ'yāⁿ**

⁵Ndúútí chi 'aama 'iiⁿ'yāⁿ diiⁿ
yā 'aama cosa chi véé de'ē cáávā

chi cu'neeⁿ ndaachi yiinú náⁿ'ā
ndís'tiī 'úú ntúúⁿ cu'neeⁿ ndaachi
yiinú 'úú ndúúcu nducyáácá ndís'tiī
dendu'ū 'téé nūuⁿ. 'Úú nguéé neⁿ'é
caaⁿ'máⁿ yeⁿ'e 'iiⁿ'yāⁿ miiⁿ chi
véé cá nuuⁿndi yeⁿ'é yā yeⁿ'ē chi
dinuuⁿndi yā. ⁶Deenú ntúúⁿ chi
n'deē cá ndís'tiī 'āā n'diichí nī
nuuⁿndi yeⁿ'é yā ní nadacádiinúúⁿ
chi 'āā véé castigo yeⁿ'ē 'iiⁿ'yāⁿ miiⁿ,
ní nguéé diiⁿ nī más ca ndúúcu
'iiⁿ'yāⁿ miiⁿ. ⁷Maaⁿ ní canéé chi
nca'á nī 'viich'εεtínūuⁿ 'iiⁿ'yāⁿ 'cúú
ní nadach'εεcú yā yeⁿ'e 'iiⁿ'yāⁿ 'cúú
ní nguéé neené taaⁿ cu'neeⁿ ndaachi
yiinú yā. ⁸Caavā chuū chi ngaⁿ'á chí
ndis'tiī 'cuuⁿ'miⁿ nī chi dinéⁿ'e ca nī
'iiⁿ'yāⁿ 'cúú. ⁹Níicu taachi idinguúⁿ
chuū yeⁿ'e ndís'tiī yeⁿ'e 'iiⁿ'yāⁿ 'cúú
neⁿ'é cadiiinúúⁿ ní n'diichí nduuti
chi ndís'tiī ní diiⁿ nī ndúúcu yā
tan'dúúca chi 'āā ngaⁿ'á ngii ndís'tiī
na carta yeⁿ'é. ¹⁰'Úú dendú'ū caⁿ'á
inadich'εεcú nuuⁿndi yeⁿ'e 'āā de'ē
nūuⁿ 'iiⁿ'yāⁿ chi ndís'tiī nadich'εεcú
yā nuuⁿndi yeⁿ'é yā. Ní taachi 'úú
nadich'εεcú yeⁿ'é yā, ní 'túuca diiⁿ
cucáávā ndís'tiī ní nanááⁿ Cristo.
¹¹Nduuti chí diiⁿ yú 'túúca tuuⁿ'mi ní
yááⁿ'nguiniūuⁿ nguéé cuuvi cuchée
sa yeⁿ'ē yú ti deenu yú de'ē chi
ginnc'he'ei sá.

**Pablo nguēe yeenú yā chi
ndaá yā na yáāⁿ Troas**

¹²Taachi cueⁿé cuaaⁿ cyuuni ní
ndaá na yáāⁿ Troas chi caaⁿ'máⁿ
nduudu yeⁿ'e evangelio yeⁿ'e Cristo,
tuuⁿ'mi ní Ndyuūs nn'guaáⁿ yā yáāⁿ
miiⁿ tan'dúúca chi nn'guaaⁿ 'iiⁿ'yāⁿ
'áámá cheendi va'āi. 'Tíicā diiⁿ
Ndyuūs cucaavā 'úú chi caaⁿ'máⁿ
nduudu yeⁿ'ē evangelio. ¹³Ní neené

nadacadiinúúⁿ na staava yeⁿé ti nguéé nndaácá saⁿá Tito, hermano yeⁿé yú. Cáávā chuū dííⁿ despedir 'iiⁿyāⁿ yeⁿe yáāⁿ miiⁿ ní chiicá ni cueⁿé na yáⁿāa Macedonia.

**Chæe yú yeⁿe nducueⁿé
ti yeⁿe Cristo s'uuúⁿ**

¹⁴Úú ní ca'á gracia Ndyuūs caati Ndyuūs caⁿá yā nduucú 'nū 'āā tíí nūⁿ lugar naachi caⁿá 'nū caati nús'uu cuuvi cheé 'nū yeⁿe nducueⁿé cucáávā s'uuúⁿ ní yeⁿe Cristo s'uuúⁿ. Níicú Ndyuūs dííⁿ yā cáávā nús'uu chi deenu 'nū yeⁿé Cristo chi cuuvi caaⁿmáⁿ 'nū yeⁿe Cristo nanááⁿ nducyaaca 'iiⁿyāⁿ yeⁿe núúⁿmáⁿ iⁿ'yeeⁿdī. Ní 'iiⁿyāⁿ cuuvi deenú yā yeⁿé Cristo dendú'ū. Ní chuū ní tan'dúúccā 'áámá cosa chi n'dēēvee ngééⁿ chi véé nducueⁿé yáāⁿ naachi cueⁿé 'nū. ¹⁵S'uuúⁿ tan'dúúccā 'áámá cosa chi n'dēēvee ngééⁿ chi incienso nanááⁿ Dendyuūs. 'Tíicā s'uuúⁿ chi i'teenu yú Cristo. 'Tiicā ntúūⁿ s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ní caⁿá yā na va'ai chæeti nguuví. Ní nanááⁿ 'iiⁿyāⁿ chi nguéé i'téenu yā ní caⁿá yā ná vaadí n'gii cueⁿe daāⁿmaⁿ, ¹⁶s'uuúⁿ tan'dúúccā 'áámá cosa chi ngééⁿ chi n'díí chí 'āā nteē n'dáaca, 'tíicā s'uuúⁿ nanááⁿ 'iiⁿyāⁿ chi nguéé i'téenu yā Jesucristo. Ní chuū ch'iⁿi chi caⁿá yā 'cuuvi yā cueⁿe daāⁿmaⁿ. Ní s'uuúⁿ ní tan'dúúccā 'áámá cosa chi n'dēēvee ngééⁿ ti véé vida yeⁿé. 'Tíicā s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ni caⁿá yā na va'ai chæeti nguuví. ¿Dú'ū cuuvi díiⁿ yeⁿe chuū 'tuucā? ¹⁷Nús'uu ní nguéé caaⁿmáⁿ 'nū nduudu cuaacu

yeⁿé Ndyuūs chi 'iiⁿyāⁿ nadíí've yā nús'uu, tan'dúúccā chi díiⁿ n'deēe n'dáí 'iiⁿyāⁿ. Naati Ndyuūs dich'óo yā nús'uu ní nús'uu ní caaⁿmáⁿ 'nū nduudu miiⁿ ndúúccū núúⁿmáⁿ staava yeⁿé 'nū. Ní Ndyuūs inaáⁿ yā nús'uu ti díiⁿ 'nū tan'dúúccā chi Cristo neⁿé yā chi díiⁿ 'nū, ti yeⁿé Cristo nús'uu.

Yeⁿé Nduudu Ngai yeⁿé Ndyuūs

3 Taachi dinguúⁿ 'nū chuu, ¿'áá nadacadiinúúⁿ nī chi nús'uu caaⁿmaⁿ cá 'nū chi n'daacā idiíⁿ 'nū? O ¿'áá canee chi ndeé 'nū taama carta chi ndéē recomendación, nanááⁿ ndís'tií, o 'áámá carta chi dinguúⁿ nī chi ngíicā nī recomendación yeⁿé nī tan'dúúccā chi ndeē tanáⁿā 'iiⁿyāⁿ? Nguæe 'tíicā. ²Ndís'tií ní tan'dúúccā carta yeⁿé 'nū 'tíicā ndís'tií ti yeⁿé Cristo ndís'tií. Ní ndís'tií tan'dúúccā chi carta yeⁿé 'nū chi canéé nguūⁿ na staava yeⁿé 'nū 'tíicā ndís'tií. Ní 'íicú nducyáácá 'iiⁿyāⁿ cuuvi 'cueeⁿ yā níicú cadíinuuⁿ yā chi ndís'tií i'téenu nī Jesucristo. ³Ní nducyáácá 'iiⁿyāⁿ deenú yā chi ndís'tií ní tan'dúúccā 'áámá carta chi dingúúⁿ Cristo ní tee yā nús'uu 'tiicā ndís'tií cáávā ntiⁿ'nyuⁿ yeⁿe Cristo chi díiⁿ 'nū nanááⁿ ndís'tií. Carta miiⁿ nguéé cánéé nguūⁿ ndúúccū tinta ndíí nguéé ndúú tan'dúúccā chi Ndyuūs díiⁿ nguúⁿ yā ley na tabla yeⁿe tuū ti Espíritu N'dai yeⁿé Ndyuūs chi canduuchi dinguūⁿ carta 'cūū staava yeⁿé yú.

⁴Ní seguro chi Ndyuūs ndæeve yā ndís'tií ní véé 'viichæetiinūⁿ yeⁿé 'nū caati Jesucristo innee yā 'úú. Ní deenú chi dichíí've Ndyuūs ndúúccū

ntiiⁿnyuⁿ n'daacā chi diiⁿ cucááva Cristo. ⁵Nguéé nadacadiinúúⁿ 'nū chi cuuvi cundee yú cuidado yeⁿe nducuéⁿē chi diiⁿ yú. Ndyuūs nginnee yā nús'uu ní tée yā poder nús'uu ní cuuvi diiⁿ 'nū nducuéⁿē.

⁶Ndyuūs tee yā nús'uu ntiiⁿnyuⁿ chi candéé 'nū táámá compromiso yeⁿé yā chí ngai. Ní compromiso chí ngai miiⁿ nguéé yeⁿe ley yeⁿe yú chi canéé nguūⁿ ti yeⁿe Espíritu N'dai yeⁿé Dendyuūs. Nduudu yeⁿe ley yeⁿe yú diiⁿ chi condenado s'uuúⁿ ní 'cuūvi yú naati Espíritu N'dai miiⁿ itee vida cueⁿe daāⁿmaⁿ s'uuúⁿ.

⁷Ley yeⁿé yú chi Ndyuūs dinguúⁿ yā na tabla yeⁿe tuūu nanááⁿ Moisés ní dichí'íve chi deenu yú chi véé nuuⁿndi yeⁿe yú, ní chindai yú. Ní taachi ndaā ley miiⁿ chi dēeve n'dai ca yeⁿé Ndyuūs tuu'mi ní ngii na naaⁿ Moisés miiⁿ. Ní 'iiⁿyāⁿ yeⁿe Israel nguéé cuuvi n'diichí yā naaⁿ Moisés miiⁿ cáávā chi neené dēeve ngii naáⁿ yā, naati dēevé miiⁿ na naáⁿ yā 'āā ntuūvi. ⁸Taachi ndaā ley miiⁿ ní dēevé cá ngii ní ch'ó'oo dēeve yeⁿé 'áá nguéé cuuvi ch'ēete n'dái cá ngii ntiiⁿnyuⁿ yeⁿe Espíritu N'dai yeⁿé Ndyuūs nguéé ti ntiiⁿnyuⁿ yeⁿe ley miiⁿ? ⁹Ní nduuti chí ntiiⁿnyuⁿ yeⁿe ley miiⁿ chi dēevé n'dai ní diiⁿ condenar 'iiⁿyāⁿ chí ndai yā, tuu'mi ní 'áá nguéé más cā ch'ēete taavi cá ngii ntiiⁿnyuⁿ yeⁿé nduudu yeⁿé Ndyuūs ndúúú Espíritu N'dai ti diiⁿ yā aceptar 'iiⁿyāⁿ nguéé ti ley miiⁿ? 'Tífcā váá. ¹⁰Caati 'aara chí dēevé n'dai ley miiⁿ nguéé dēevé chiiⁿ chi cuuvi tan'dúúú cá chi dēevé n'dai ca yeⁿé Ndyuūs. Maaⁿ ní ley miiⁿ canee tan'dúúú cá chi nguéé dēevé n'dai. ¹¹Caati chí ley miiⁿ chí dēevé

ní cunee 'áámá tiempo nūⁿ tuu'mi ní chuunee dēevé taavi cá nduudu yeⁿé Ndyuūs chíⁿ chí 'áámá cūnee.

¹²Cáávā chuū deenú 'nū chi compromiso chí ngai canéé cueⁿe daāⁿmaⁿ ní 'tífcā cuuvi. Maaⁿ ní caaⁿmaⁿ 'nū nduudu ngai yeⁿé Ndyuūs ní nguéé 'va'a 'nū mar 'áámá. ¹³Nguéé diiⁿ 'nū tan'dúúú cá chí diiⁿ Moisés taachi sндуú yā 'áámá velo naáⁿ yā ti 'iiⁿyāⁿ Israel nguéé cuuvi snáaⁿ yā naaⁿ Moisés miiⁿ cucáávā dēeve yeⁿe Ndyuūs chí canéé na náaⁿ yā. Dēevé miiⁿ nguéé chíⁿ 'naaⁿ. ¹⁴Ní 'iiⁿyāⁿ Israel s'eeⁿ nguéé tuumicadiinúúⁿ yā yeⁿe dēevé chí canéé náaⁿ Moisés miiⁿ. Ndií nguuví 'cūū taachi 'iiⁿyāⁿ Israel s'eeⁿ ch'eeⁿ yā compromiso ndiicúū miiⁿ, nguēe cuuvi deenú yā caati canéé yā tan'dúúú cá chí canéé 'aama velo na naáⁿ yā. Velo miiⁿ Cristo diiⁿ chí ch'ó'oo yeⁿé. ¹⁵Ndií nguuví 'cūū taachí 'iiⁿyāⁿ s'eeⁿ 'cueeⁿ yā ley yeⁿe Moisés, cunee velo miiⁿ ti nan'gaadí vaanicadiinúūⁿ yeⁿe yā. ¹⁶Ní ndii taachi cu'téenu yā Señor Jesucristo Daiyá Dendyuūs tuu'mi ní velo miiⁿ ní cuavii. ¹⁷Señor miiⁿ ní Espíritu yeⁿe Cristo. Ní naachi véé Espíritu miiⁿ yeⁿe Señor miiⁿ tuu'mi ní 'iiⁿyāⁿ canéé libre yā. ¹⁸Maaⁿ ní cáávā chuū nducyaaca yú nguéé snee yú tan'dúúú cá chí véé 'áámá velo na naaⁿ yú. Maaⁿ ní 'iiⁿyāⁿ n'diichi yā dēeve yeⁿe Señor Jesucristo yeⁿe yú na vida yeⁿe yú ti s'uuúⁿ tan'dúúú cá 'áámá espejo, 'tífcā s'uuúⁿ. Ní taachi n'diichi yú Señor Jesucristo yeⁿé yú tuu'mi ní n'daaⁿ vida yeⁿe yú chí cuuvi tan'dúúú cá vida yeⁿé Cristo. Ní cūnee ngiinu yú chí n'daaⁿ vida

yeⁿe yú tan'dúucā chi ch'εete ca dεeve vida yeⁿē Señor Jesucristo yeⁿē yú. Chuū chi idiiⁿ Espíritu yeⁿe Cristo cáávā s'uuúⁿ.

4 Deenu yú chi Señor Jesucristo tee yā s'uuúⁿ cosas chi n'dai ca. Cáávā chuū díⁿ 'nū ntiiⁿnyuⁿ yeⁿé yā ní caaⁿmaⁿ 'nū nduudu cuaacu yeⁿé yā ní nguεε cuuvi cúunū 'nū. ²Maaⁿ ní nguεε díⁿ 'nū cosas chi nguεε n'daacā chi cuuvi snááⁿ 'iiⁿyāⁿ, cosa chi díⁿ 'nū chi 'cuináaⁿ 'nū nanááⁿ 'iiⁿyāⁿ. Ní nguéé cachiicá 'nu nginnche'él 'nū 'iiⁿyāⁿ. Ní nguéé ndastaⁿá 'nū nduudu cuaacu yeⁿé Ndyuūs ndúucū nduudu yaadi. 'Tíicā idiiⁿ 'nū ní caaⁿmaⁿ 'nū dámaāⁿ nduudu cuaacu yeⁿé Dendyuūs ní cuuvi deenú nducyaaca 'iiⁿyāⁿ, ní Dendyuūs n'diichí yā nús'uu. ³Nduuti chi 'iiⁿyāⁿ nguéé ituumicádiinuuⁿ yā nduudu cuaacu chi ngaⁿá 'nū tuuⁿmí ní 'iiⁿyāⁿ miiⁿ nguéé i'téenu yā Señor Jesucristo yeⁿē yú ní cuuvi ndái yā. ⁴'Iiⁿyāⁿ nguéé i'téenu yā Señor Jesucristo caati ndyuūs yeⁿē iⁿ'yeeⁿdí 'cūū chi yááⁿnguiinūⁿ n'gaadi sá ná vaadi cadiinúⁿ yeⁿe yā, caati yaaⁿnguiinūⁿ nguéé n'gúúⁿ sá chi n'diichí yā dεeve yeⁿe Dendyuūs. Maaⁿ ní 'iicu 'iiⁿyāⁿ nguéé snaaⁿ yā dεevé n'dai yeⁿe nduudu yeⁿe Cristo chí dεeve. Ní s'uuúⁿ taachí inaaⁿ yú Cristo miiⁿ inaaⁿ yú Ndyuūs. ⁵Ní taachi ngaⁿá 'nū nduudu yeⁿe Dendyuūs nguéé ngaⁿá 'nū nduudu yeⁿe maá 'nū ti ngaⁿá 'nū chi Jesucristo miiⁿ ní Señor yeⁿē yú. Tii nús'uu ní dichíⁿ've 'nū ndís'tii cucáávā chi Cristo neⁿé yā nducyaaca 'iiⁿyāⁿ. ⁶Ní taachi Ndyuūs din'dái

yā iⁿ'yeeⁿdí ngaⁿa yā 'tíicā: Yeⁿe naachí maaiⁿ miiⁿ canéé dεeve. Maaⁿ Ndyuūs miiⁿ ní díⁿ yā chi dεeve miiⁿ canéé na staava yeⁿé 'nū. Ní ndúucū dεeve miiⁿ cuuvi deenú 'nū vaadi deenu yeⁿé Ndyuūs chí n'dai taavi ca. Ní nús'uu n'diichí 'nū dεeve yeⁿé Ndyuūs taachi n'diichí 'nū naaⁿ Jesucristo miiⁿ.

Vida yeⁿé 'iiⁿyāⁿ chi i'téenu yā Jesucristo

⁷Ní nduudu cuaacu yeⁿe Ndyuūs chi i'téenu 'nū canéé na staava yeⁿe 'nū tan'dúucā tesoro 'tíicā. Ní 'áará chi cuerpo yeⁿé 'nū tan'dúucā 'cuutí yāⁿaa chi nguεε dεevéé, nús'uu ch'iⁿ'í 'nū cáávā ntiiⁿnyuⁿ chí díⁿ 'nū chí poder chí cānee nduucú 'nū ní ch'εete ca ní yeⁿé Ndyuūs. Ní nguéé yeⁿē nús'uu. ⁸'Áará chí nduū cuaaⁿ n'geenú 'nū ngii mar 'áámá naāⁿ nguéé diⁿ chí dúúⁿ'va 'nū. 'Áará chí n'dee n'ááⁿ inadacádiinúⁿ 'nū deenú cheε chí díⁿ 'nū. ⁹'Áará chí 'iiⁿyāⁿ ní n'daa yā chí neⁿe 'caaⁿnúⁿ yā nús'uu Dendyuūs canee yā nduucú 'nū. 'Áará chí 'iiⁿyāⁿ cun'dáa yā nús'uu na yāⁿaa nguεε 'cuuvi 'nū. ¹⁰'Áā tíⁿ nūⁿ cuááⁿ naachi caⁿá 'nū cueⁿe daāⁿmaⁿ canee na staava yeⁿé 'nū chí cuuvi 'cuuví 'nū tan'dúucā chí ch'iⁿ Señor Jesucristo yeⁿe yú. Ní 'íicú 'iiⁿyāⁿ cuuvi n'diichí yā chí Jesucristo nadanguáⁿai yā nús'uu. Ní cuuvi deenú yā chí Jesucristo canduuchí yā. ¹¹Ní nducuéⁿe tiempo chí sндуuchí 'nū na iⁿ'yeeⁿdí 'cūū deenú 'nū chí cuuvi 'cuuví 'nū cucáávā chí nús'uu díⁿ 'nū ntiiⁿnyuⁿ yeⁿe Cristo. Ní 'íicú 'iiⁿyāⁿ cuuvi n'diichí yā chí poder yeⁿe Cristo

Jesús canéé ndúúcū nús'uu. ¹²Tíicā ní vaadi n'gii diiⁿ ntiiⁿnyuⁿ yeⁿē na vida yeⁿé 'nū 'tiicā ntuūⁿ vida cueⁿe daāⁿmaⁿ diiⁿ ntiiⁿnyuⁿ yeⁿē na vida yeⁿé ndís'tiī.

¹³Tíicā canéé nguūⁿ na libro yeⁿé Ndyuūs ndii cuááⁿ vmnaaⁿ: 'Úú i'teenú, ní cáávā chiiⁿ chi ngaⁿá. Ni 'tiicā ntúūⁿ nús'uu i'téenu 'nū ní cáávā chuū ngaⁿá 'nū. Ní daama chí'téenu 'nū ndúúcu yā. ¹⁴Caati deenu yú chí 'iiⁿyāⁿ chí nadacuéeⁿ yā Señor Jesucristo yeⁿe nguaaⁿ tinaⁿā, 'iiⁿyāⁿ miiⁿ nadacuéeⁿ ntúūⁿ yā s'uuúⁿ yeⁿe nguaaⁿ tináⁿā. Ní Dendyuūs candéé yā nús'uu ndúúcū ndís'tiī nanááⁿ Jesucristo.

¹⁵Nducuéⁿe chí diiⁿ 'nū ní cucáávā chí ndís'tiī cuuvi cuta'á nī tanducuéⁿē chí n'dai. Ní 'íicú n'deeé 'nááⁿ 'iiⁿyāⁿ cuuvi cuta'á yā cosa chí n'dai yeⁿé Dendyuūs. Ní n'deeé n'dái 'iiⁿyāⁿ cuuvi caaⁿmaⁿngua'á yā, ní ca'a yā gracia, Dendyuūs, ní cuuvi ch'ēete cá yā Dendyuūs chí dēeve taavi ca.

¹⁶Cáávā nducuéⁿē chuū nguéé ngii cúunu yú 'aara chí cuerpo yeⁿe yú n'gii nééⁿ nguuvi nguuvi naati Dendyuūs téé yā fuerzas s'uuúⁿ nguuvi nguuvi. ¹⁷Níicú chuū chí n'geenú yú ngii na iⁿ'yeeⁿdí 'cūū nguéé ch'ēete ní nuuⁿ nūuⁿ chó'ōo, ní diiⁿ cáávā s'uuúⁿ chí véé yeⁿe yú 'aama lugar chí n'dēeve n'dai ca ní n'deēē ca chí 'áámá cunee cueⁿe daāⁿmaⁿ. ¹⁸Maaⁿ ní nguēē diiⁿ yú cuenta yeⁿe dendu'ū chí inaaⁿ yú ti chífⁿ chí inaaⁿ yú ní ngo'o yéⁿē. Naati chífⁿ chí nguéé inaaⁿ yú cunee cueⁿe daāⁿmaⁿ.

5 Maaⁿ ní deenu yú chí cuerpo yeⁿe yú 'cuiinu ti tan'dúúca

'áámá va'ai chí nguéé 'áámá cūnee 'tíicā cuerpo yeⁿe yú naati Ndyuūs idin'dái yā 'aama va'āi yeⁿe yú ná va'ai chēeti nguuvi chí 'áámá cūnee. Ní nguéé saⁿā yeⁿe iⁿ'yeeⁿdí 'cūū din'dái sa ndúúcū ta'a sa va'ai miiⁿ. ²Maaⁿ ní chí n'dai yiinu yú ti nééné neⁿé yú n'daaⁿ yú cuerpo yeⁿe yú ní snee yú na va'ai chēeti nguūvi ndúúcū cuerpo ngai ní dēeve chí yeⁿe va'ai chēeti nguuvi. ³Nguuvi miiⁿ ní Ndyuūs ca'á yā chí téé yā 'aama cuerpo ngai yeⁿe yú chí tan'dúúca chí 'aama vestido. Ní Ndyuūs nguéé cuuvi ndaacá yā s'uuúⁿ chí nguéé chí dēeve cuerpo yeⁿe yú. ⁴Neⁿe chí snée yú na iⁿ'yeeⁿdí 'cūū na va'ai yeⁿe yú chí cuerpo yeⁿe yú, nandái yiinu yú ti n'geenu yú ngii. Nguéé cucaavā chí neⁿe yú chí cuerpo ndiicúū yeⁿe yú 'cuūvi naati neⁿe yú chí Ndyuūs téé yā chí caadí na cuerpo yeⁿe yú chí ngai chí tan'dúúca chí catecai ngai yú. Ní 'iicú cuerpo ndiicúū yeⁿe yú yeⁿē iⁿ'yeeⁿdí 'cūū ní 'cuiinu ti snée yú ndúúcū cuerpo chí ngai ní véé vida cueⁿe daāⁿmaⁿ yeⁿe yú. ⁵Ní cáávā chuū ní Ndyuūs chí'indiyāāⁿ yā yeⁿe yú cuerpo chí ngai ní tee yā Espíritu N'dai yeⁿe yā s'uuúⁿ chí cuuvi deenu yú chí cuaacu chí tee yā chuū chí cuuvi yeⁿe yú.

⁶Tíicā rā va, cueⁿe daāⁿmaⁿ véé confianza yeⁿe yú ndúúcū Dendyuūs. Deenu yú chí neⁿe chí snée yú na iⁿ'yeeⁿdí 'cūū ndúúcū cuerpo ndiicúū yeⁿe yú nguéé cuuvi cunee yú ndúúcū Señor yeⁿe yú na va'ai chēeti nguuvi. ⁷Maaⁿ ní chiiⁿ chí diiⁿ yú, diiⁿ yú ti i'teenu yú Jesucristo ní nguéé idiiⁿ yú cucáávā chí n'diichi yú cosa chí

yeⁿē iⁿyeēⁿdí 'cūū. ⁸Íícu vee confianza yeⁿē yú. Neⁿe yú caⁿa yú yeⁿē vaacu yú chi cuerpo ndiicū yeⁿe yú ní cunee yú ndúúcu cuerpo ngai yeⁿe yú na va'ai cheeti nguuví ndúúcu Señor yeⁿē yú. ⁹Cáávā chuū neⁿe yú diiⁿ yú cueⁿe daāⁿmaⁿ chiiⁿ chi Ndyuūs neⁿé yā chi diiⁿ yú nduuti chi snée yú na va'āi yeⁿe yú na iⁿyeēⁿdí 'cūū o nduuti chi snée yú na va'āi yeⁿe yú na va'āi cheeti nguuví ndúúcu Señor Jesucristo. ¹⁰Ti 'tíicā nducyaaca yú canee chi naⁿa yú nanááⁿ juez chi Cristo ní 'íícu ca'aama ca'aama s'uuúⁿ cuuvi cuta'ā yú chuu chi cuuvi yeⁿē yú tan'dúúca chi diiⁿ yú ntiiⁿnyuⁿ yeⁿé yā neⁿe chi snee yú na cuerpo ndiicū yeⁿe yú na iⁿyeēⁿdí 'cūū, nduuti chi ntiiⁿnyuⁿ chi n'daacā o nguēē n'daacā.

Nduudu cuaacu yeⁿe vaadi 'diiiⁿ

¹¹Nús'uu ní deenú 'nū chi Señor Jesucristo caⁿá yā n'diichí yā nducyaaca 'iiⁿyāⁿ. Ní neⁿé 'nū díⁿ 'nū n'daacā. Ní cáávā chuū ní nús'uu diitu díⁿ 'nū nducuéⁿē chi ch'iⁿí 'nū 'iiⁿyāⁿ chi ngaⁿá 'nū nduudu cuaacu yeⁿe Señor Jesucristo. Ndyuūs déenu yā chiiⁿ chi díⁿ 'nū ní cunee ngiinú 'nū chi ndís'tii cuuvi déenu ní chuū dendu'ū. ¹²Nguéé ngaⁿá 'nū taama vmnéⁿēe yeⁿe vida yeⁿé 'nū nanááⁿ ndís'tii naati ca'á 'nū 'áámá lugar ndís'tii ti cuuvi caaⁿmáⁿ ní chi n'daacā idifⁿ 'nū. Ngaⁿá 'nū nduudu cuaacu nanááⁿ ndís'tii. Maaⁿ ní 'íicu ndís'tii cuuvi nan'guēecútáⁿa ní yeⁿe 'iiⁿyāⁿ chi itiinguuneéⁿ ní, 'iiⁿyāⁿ chi ngaⁿa yā yeⁿe maáⁿ yā chi n'daacā yā tan'dúúca chi tanáⁿā 'iiⁿyāⁿ snaaⁿ yā, ní 'iiⁿyāⁿ miiⁿ nguéé

nacádiinúúⁿ yā yeⁿē chíⁿ chi vee na staava yeⁿé yā. ¹³Ní nduuti chi nadacadiinúúⁿ ní chi nús'uu tan'dúúca loco nús'uu, 'tíicā ngaⁿá 'nū ní díⁿ 'nū chi Ndyuūs ní ch'eté yā nanááⁿ ndís'tii. Ní nduuti chí nguéé loco 'nū ní cáávā chi díⁿ 'nū ntiiⁿnyuⁿ yeⁿe Ndyuūs cucáávā ndís'tii. ¹⁴Jesucristo ngaⁿa ntiiⁿnyuⁿ yeⁿé 'nū ti neⁿé yā nús'uu. Deenu yú chi cuaacu chi 'áámá saⁿa chi Cristo ch'ii sa, ní cucáávā saⁿā miiⁿ ní tan'dúúca chi nducyaaca 'iiⁿyāⁿ ní ch'ii. ¹⁵Tíicā Cristo ch'ii yā cucáávā nducyaaca 'iiⁿyāⁿ maaⁿ ní 'iiⁿyāⁿ chi snée yā na iⁿyeēⁿdí 'cūū. 'Iiⁿyāⁿ s'eeⁿ 'āā ntéé snée yā cucáávā vida yeⁿe maáⁿ yā caati snée yā yeⁿe Jesucristo chi ch'ii yā ní nduuchi ntuuⁿ yā yeⁿe nguaaⁿ tináⁿā cucáávā 'iiⁿyāⁿ. ¹⁶Maaⁿ ní cáávā chuū chi chó'oo nús'uu nguéé inaáⁿ 'nū 'téé yeⁿē 'iiⁿyāⁿ tan'dúúca tanáⁿā 'iiⁿyāⁿ yeⁿē iⁿyeēⁿdí 'cūū. Tiempo chi 'āā chó'oo nús'uu inaáⁿ 'nū Cristo ndúúcu yeⁿē chi díⁿ yā taachi canee yā na iⁿyeēⁿdí 'cūū naati maaⁿ ní nguēē inaáⁿ 'nū 'tíicā. Inaáⁿ 'nū chi Cristo ní Ndyuūs. ¹⁷Tíicā ní 'iiⁿyāⁿ chi i'téenu yā Cristo ní yeⁿé Cristo. Ní 'iiⁿyāⁿ miiⁿ 'áámá 'iiⁿyāⁿ ngai. Cosas chi díⁿ yā vmnaaⁿ nguéé díⁿ yā maaⁿ ti nducuéⁿē chí díⁿ yā ní yeⁿe vida ngai yeⁿe yā.

¹⁸Ní tanducueⁿē chúú ní Ndyuūs díⁿ yā. Cucáávā Cristo miiⁿ ní Ndyuūs díⁿ yā chi s'uuúⁿ ní yeⁿé yā s'uuúⁿ ní nguéé contra yeⁿe yā s'uuúⁿ. Ní Ndyuūs ngaⁿa ntiiⁿnyuⁿ yā yeⁿé 'nū chi caaⁿmáⁿ 'nū nduudu yeⁿé yā chi 'iiⁿyāⁿ na iⁿyeēⁿdí 'cūū cuuví yeⁿé yā 'iiⁿyāⁿ. ¹⁹Tíicā canee

chi caaⁿ máⁿ 'nū nduudu cuaacu yeⁿe Cristo chi 'iiⁿ yāⁿ s'eeⁿ cuuvi yeⁿé yā 'iiⁿ yāⁿ. Ní cucáávā Cristo miiⁿ Ndyuūs dííⁿ yā chi véé vaadī 'diiⁿ nguaaⁿ 'iiⁿ yāⁿ nduucú yā. Ní nguéé dííⁿ Ndyuūs cuenta yeⁿe nuuⁿndi yeⁿe 'iiⁿ yāⁿ s'eeⁿ. Nícu Ndyuūs tee yā nús'uu ntiiⁿnyuⁿ chi caaⁿ máⁿ 'nū nduudú 'cūū yeⁿé yā chi vaadī 'diiⁿ. ²⁰Maaⁿ ní 'tíicā ndaaⁿ 'nū nanááⁿ ndís'tiī ndúúcū nduudu yeⁿe Cristo ní caaⁿ máⁿ 'nū nduudu miiⁿ na lado yeⁿe Ndyuūs. Ní tan'dúúcā chi Cristo ngaⁿá yā chi ndaacadaamí nī, cáávā chuū nús'uu ngiicá 'nū ndís'tiī cááva Cristo chi ndaacadaamí nī yeⁿe nuuⁿndi yeⁿé nī ní 'íicú véé vaadī 'diiⁿ yeⁿe ndís'tiī ndúúcū Ndyuūs. ²¹Cristo nguéé dinuuⁿndí yā mar 'áámá. Caati cucáávā s'uūūⁿ Ndyuūs dííⁿ cuenta yā ní dííⁿ yā tan'dúúcā chi Cristo dinuuⁿndí yā. Ní 'íicú taachi yeⁿe Cristo s'uūúⁿ Ndyuūs n'diichí yā s'uūúⁿ chi nduuví n'dai vida yeⁿe yū nanáaⁿ yā.

6 'Tiicá ntúūⁿ nús'uu dííⁿ 'nū ntiiⁿnyuⁿ tan'dúúcā chi ntiiⁿnyuⁿ chi neⁿe Ndyuūs. Ngiiicá 'nū ndís'tiī chi cutaⁿá nī vaadī n'dai chi itée Ndyuūs chi vaadī n'dai chi Ndyuūs ch'iⁿí yā s'uūúⁿ. ²Caati 'tíicā Ndyuūs ngaⁿa yā. Ní canéé nguūⁿ na libro yeⁿé yā:

'Úú ch'iindiveéⁿ nduudu yeⁿé nī tiempo chi n'daacā. Ní chinneé ndís'tiī nguuvi chí nanguaⁿái nī.

Nguuvi 'cūū ní 'áámá nguuvi chi cuuvi n'dai cáávā ndís'tiī, nguuvi 'cūū ní nguuvi chi cuuvi nanguaⁿai nī.

³Maaⁿ ní nguéé dííⁿ 'nū mar 'áámá cosa chi di'vaachí 'iiⁿ yāⁿ ti 'iiⁿ yāⁿ

cuuvi caaⁿ máⁿ yā chi ntiiⁿnyuⁿ yeⁿe Ndyuūs chi dííⁿ 'nū nguéé n'daacā. ⁴Naati dííⁿ 'nū nducuéⁿe ntiiⁿnyuⁿ miiⁿ chi n'daacā ti neⁿé 'nū ch'iⁿí 'nū nducyáácá 'iiⁿ yāⁿ chi ntiiⁿnyuⁿ chi dííⁿ 'nū ní yeⁿe Ndyuūs. Ní cucáávā ntiiⁿnyuⁿ miiⁿ chi cheé 'nū yeⁿe nducuéⁿe chi ch'eenú 'nū chiī nguuvi nguuvi. Ní néené n'deēe dendu'ū chííⁿ chí di'vaachi nús'uu ndúúcū chi veε necesidades yeⁿé 'nū ndúúcū vaadī 'caa'va. ⁵Ní ch'eⁿé yā nús'uu chí cu'néeⁿ yā nús'uu na vacūū. Ní neené 'yaaⁿ 'iiⁿ yāⁿ nduuvidaamá yā yeⁿe chi neⁿe 'cueⁿe yā nús'uu. Ní dííⁿ 'nū n'deēe n'dái ntiiⁿnyuⁿ chi néené díítū. Ní cho'ōo 'nááⁿ nguuvi chi nguéé cheetiyaadú 'nū, ní nguéé che'e 'nū va. ⁶Níicú nducuéⁿe dendu'ū chuū ní ch'iⁿí 'nū 'iiⁿ yāⁿ chi vida yeⁿé 'nū ní n'daacā. Ní ch'iⁿí 'nū chi deenú 'nū nduudu cuaacu yeⁿé Ndyuūs. Ní dííⁿ 'nū ntiiⁿnyuⁿ miiⁿ ndúúcū vaadī ngiīnū ní ndúúcū vaadī n'dai. Ní dííⁿ 'nū nducuéⁿe cucáávā Espíritu N'dai yeⁿé Ndyuūs canee nduucú 'nū. Dííⁿ 'nū túúcā ti cuaacu nííⁿnyúⁿ dineⁿé 'nu nducyaaca 'iiⁿ yāⁿ. ⁷Ní ngaⁿá 'nū nduudu cuaacu cucáávā poder yeⁿe Ndyuūs chi canee nduucú 'nū ní caavā chi n'daacā canee 'nū nanááⁿ Ndyuūs. 'Tíicā dííⁿ 'nū. Ní dííⁿ 'nū defender nús'uu ndúúcū vaadī cuaacu. Ndúúcū vaadī cuaacu miiⁿ ní tan'dúúcā chi ndéé 'nū 'áámá machete chí 'uūvi lados 'caāiⁿ ní dííⁿ 'nū defender nús'uu nduucú. 'Tíicā dííⁿ 'nū. ⁸Ní náⁿá 'iiⁿ yāⁿ ngaⁿá yā chí n'dái 'nū ní tanáⁿa yā ngaⁿá yā chi nguéé n'dái 'nū. Ní náⁿā 'iiⁿ yāⁿ ngaⁿá n'daaca yeⁿé 'nū ní tanáⁿa yā nguéé ngaⁿa n'daaca

yeⁿé 'nū. 'Áámá tiempo ní díⁿ yā tratar nduucú 'nū tan'dúucā chi ngaⁿá 'nū nduudu yaadi ní taama tiempo tan'dúucā chi ngaⁿá 'nū chi cuaacu. ⁹Ní 'áámá tiempo 'iiⁿyāⁿ díⁿ yā tan'dúucā chi nguéeⁿ n'diichí yā nús'uu 'tíicā díⁿ yā, ní táámá tiempo díⁿ yā tan'dúucā chi nús'uu amigos yeⁿé yā, 'tíicā díⁿ yā. Ní n'dee n'dái tiempo cuuví 'cuūvi 'nū ní nguéeⁿ 'cuūvi 'nū. Ní tee yā nús'uu 'áámá castigo chi neené díítū n'dee n'dái tiempo naati nguēe 'caaⁿnúⁿ yā nús'uu. ¹⁰Áára chí di'vaachí yā nús'uu, nús'uu ní yeenú 'nū. 'Áára chí pobre nús'uu, díⁿ 'nū ntiiⁿnyuⁿ ni n'dee n'dái 'iiⁿyāⁿ véé vaadi 'cuiica yeⁿé yā. 'Áára chí nguéeⁿ dēⁿ véé yeⁿé 'nū nducuéⁿé chí véé ní yeⁿé 'nū.

¹¹Ndís'tii hermanos yeⁿe yú yeⁿe yāāⁿ Corinto, dingúúⁿ 'nū nduudu yeⁿé 'nū yeⁿe nducuéⁿé chí véé tan'dúucā chí véé ca. Ní nduudu miiⁿ cachiica yeⁿé staava yeⁿé 'nū ti neⁿé 'nū ndís'tii. ¹²Nús'uu ch'iⁿí 'nū nducuéⁿé chí canee na staava yeⁿé 'nū naati ndís'tii nguéeⁿ díⁿ nī 'túucā nduucú 'nū ti nguéeⁿ ch'iⁿí nī nús'uu chí neⁿé nī nús'uu ndúucú núúⁿmáⁿ staava yeⁿé nī. ¹³Nús'uu ngiica 'nū ndís'tii tan'dúucā 'áámá chiida ngiica yā daiya yā 'tíicā ngiica 'nū ndís'tii ti cuuví dinéⁿe nī nús'uu ndúucú núúⁿmáⁿ staava yeⁿé nī. Ní ndís'tii cuuví caaⁿmáⁿ nī nduudu cuaacu yeⁿé nducuéⁿé tan'dúucā chí nús'uu díⁿ 'nū ndúucu nī.

Cuerpo yeⁿe yú miiⁿ ní yáacū yeⁿé Ndyuūs chí canduuchi

¹⁴Ndís'tii, nguéeⁿ caⁿá nī ndúucú 'iiⁿyāⁿ chí nguéeⁿ i'téenu yā

Jesucristo ti nguéeⁿ cuuvi díⁿ nī dáámá ntiiⁿnyúⁿ ndúucu yā. Ní díⁿ nī tan'dúucā 'áámá yunta chí nguēe daamá tī, 'tíicā díⁿ nī. ¿Áá cuuví cuuvi dáámá chí n'daācā ndúucú chí nguēe n'daācā? O ¿áá daama canee chí dēve ndúucú chí maāiⁿ? Nguéeⁿ cuuvi. ¹⁵¿Áá cuuvi nduuvidaamá Cristo ndúucú Satanás? O ¿áá daama vé parte yeⁿe 'iiⁿyāⁿ chí i'téenu yā Cristo ndúucú 'iiⁿyāⁿ chí nguéeⁿ i'téenu yā Cristo? Nguéeⁿ cuuvi. ¹⁶¿Áá nduuvidaama templo yeⁿe Ndyuūs ndúucú ídolos? Nguéeⁿ cuuvi. Cuerpo yeⁿe ndís'tii ní yaacū yeⁿé Ndyuūs. Ndyuūs maáⁿ yā ngaⁿa yā na libro yeⁿé yā 'tíicā:

'Úú Ndyuūs canee nduucú 'iiⁿyāⁿ yeⁿé ní cachiicā nguaaⁿ 'iiⁿyāⁿ yeⁿé. 'Úú ní cuuvi Ndyuūs yeⁿé yā ní 'iiⁿyāⁿ cuuvi 'iiⁿyāⁿ yeⁿé.

¹⁷Cáava chuū Ndyuūs ngaⁿá yā ní canee nguūⁿ 'tíicā:

Nan'dáa nī nguaaⁿ 'iiⁿyāⁿ s'eeⁿ ní divíi nī yeⁿe 'iiⁿyāⁿ s'eeⁿ. 'Tíicā ngaⁿa Señor 'iivú Ndyuūs. Nguéeⁿ tuu'ví nī dendu'ū chí vaatíi. Ní 'iicu 'úú Ndyuūs díⁿ aceptar ndís'tii.

¹⁸Ní 'úú Ndyuūs cuuví Chiidá nī. Ní ndís'tii cuuvi daiyá ndís'tii, 'tíicā ngaⁿa 'iivú Ndyuūs caati nducuéⁿé poder chí véé ní yeⁿé yā.

7 'Tiicā ndís'tii hermanos yeⁿé chí neené neⁿé. Nducuéⁿé chuū ní promesa chí Ndyuūs téé yā s'uūuⁿ. Cáávā chuū canee ntúuⁿ chí díⁿ yú ndúucú cuerpo yeⁿé yú ní ndúucú espíritu yeⁿé yú nducuéⁿé chí n'daacā 'iicu ní dēve yú. Ní

nguéé diiⁿ yú mar 'áamá cosa chi nguéé n'daacā ti vee nuūⁿndī yeⁿē yú. Ní neⁿé chi canduuchi yú na iⁿ'yeeⁿdí 'cūū canee chi diiⁿ yú chi deeve ca yú tan'dúucā chi neⁿe Ndyuūs. 'Tíicā diiⁿ yú ti 'va'a yú Ndyuūs.

'Iiⁿ'yāⁿ chi i'teenú yā Cristo na yāāⁿ Corinto nanguεεcunée yā dīn'daacá yā

²Maaⁿ ní ngiica 'nū ndís'tiī chi 'cuāaⁿ nī nduudu yeⁿé 'nū na staava yeⁿé nī. Nús'uū nguεε diiⁿ daño 'nū yeⁿē mar 'áamá nī, ndíf nguéé diiⁿ 'nū chi diiⁿ nuuⁿndí nī ndíf nguéé nginnche'íi 'nū mar 'áamá 'iiⁿ'yāⁿ. ³Úú nguεε ngaⁿ'á chuū ti diiⁿ condenar ndís'tiī chi nguéé n'daacā nī. Naati tan'dúucā chi ngaⁿ'á vmnáāⁿ vmnaaⁿ, neⁿé taavi ndís'tiī. Ní canee yú tan'dúucā chi daama snée yú. 'Tiicā ntúūⁿ ní canduuchi yú daama vida yeⁿē yú na iⁿ'yeeⁿdí 'cūū ní dáámá 'cuūvi yú. ⁴Vee 'viich'étéiinúúⁿ n'dai yeⁿé ndúucu nī ní yeenú yeⁿe nī. Ní maaⁿ ní ndúucū nducuéⁿē chi ch'eenú chii nguéé di'vaachi 'úú ti néené vée vaadi yeenú yeⁿé.

⁵Ní ndíf tiempo taachi ndaā 'nū na yāⁿ'āa Macedonia nguéé ntaavi'tuūnuúⁿ cuerpo yeⁿé 'nū naati n'geenú 'nū ngíi nducuéⁿē cuaaⁿ. Ní nguⁿ'u 'iiⁿ'yāⁿ nduucú 'nū ní di'va'á 'nū na staava yeⁿé 'nū. ⁶Naati Ndyuūs chi ca'a yā 'viich'εetífínūⁿ 'iiⁿ'yāⁿ chi chicuūnú, maaⁿ Ndyuūs ní tee yā 'viich'εetífínūⁿ nús'uu taachi ndaā saⁿ'ā Tito hermano yeⁿé 'nū. ⁷Nguéé dámaāⁿ caavā chi ndaā saⁿ'ā Tito miiⁿ ti cáāvā chi chiiⁿ sá chi ndís'tiī

ca'a nī 'viich'εetífínūⁿ saⁿ'ā miiⁿ. Ní saⁿ'ā miiⁿ yaa'vi sá nús'uu chi ndís'tiī neené neⁿé nī n'diichi nī nús'uu, ní neene dindaachí nī yeⁿé 'nū ndii ná stááva yeⁿé nī. Ní neené neⁿé nī diiⁿ nī nducuéⁿē chi 'úú neⁿé chi diiⁿ nī. Ní cucáāvā chíiⁿ ní yeenú taavi ca.

⁸Vmnáāⁿ vmnaaⁿ diiⁿ sentir yeⁿe carta chi dinguúⁿ yeⁿé nī. 'Aara chi s'neeⁿ ndaachi yiinu nī cáāvā carta miiⁿ. Maaⁿ ní nguéé diiⁿ sentir yeⁿe chi dinguúⁿ yeⁿé nī. Vmnaaⁿ vmnaaⁿ nduuti chi s'neeⁿ ndaachí núúⁿ nī, deenú chi carta miiⁿ diiⁿ chí ch'εetinée ndaachí ní 'áamá tiempo nūūⁿ. ⁹Maaⁿ ní vée vaadi yeenú yeⁿé. Nguéé cucáāvā chi s'neeⁿ ndaachi núúⁿ nī naati s'neeⁿ ya'ai 'iinú nī taanduvée ní ndaacadaami nī yeⁿe nuuⁿndi chi diiⁿ nī. Ní ndís'tiī s'neeⁿ ndaachí nī tan'dúucā chi Ndyuūs neⁿe yā chi diiⁿ nī ní 'íicú nús'uu nguéé diiⁿ 'nū mar 'áamá chi cuuvi ndái nī cucáāvā nús'uu. ¹⁰Caati chíiⁿ chi diiⁿ Ndyuūs chi inee ya'ai 'iinú yú ní diiiⁿ chi ndaacadaami yú yeⁿe nuuⁿndi yeⁿe yú ní nnguaⁿ'ai yú. Ní 'íicú cáāvā chuū nguéé diiⁿ yú chi cunée ya'āi 'íinu yú yeⁿe chi nadacadaami yú yeⁿē nuuⁿndi yeⁿe yú. 'Iiⁿ'yāⁿ chi nguéé i'téenu yā Ndyuūs ní ndaachi canee yā na iⁿ'yeeⁿdí 'cūū ní 'cuūvi yā cueⁿe daāⁿmaⁿ. ¹¹Naati ndís'tiī cucheē nī chi inée ndaachí nī. N'diichi nī maaⁿ ntiiⁿ'nyuⁿ yeⁿe vaadi ndaachi táácā idiiiⁿ na vida yeⁿé nī. 'Áá diiiⁿ chi nadacadiinúúⁿ ní n'daacā yeⁿe nuuⁿndi chi diiⁿ nī ní caaⁿ'máⁿ nī chi nguεε n'daacā idiíⁿ ní? 'Áá diiiⁿ chi ndís'tiī nguéé canee yiinu nī yeⁿe chíiⁿ chi diiⁿ ní? 'Áá 'va'á ní cucááva

nuuⁿndi chi dííⁿ ní? Cuayiiivi ní neⁿé ní n'diichí ní 'úú ní neⁿé ní chi ca'a castigo yeⁿe 'iiⁿ'yáⁿ chi dinuuⁿndí yā. Ní yeⁿe nducueⁿé chuū ch'iⁿí ní ndúúcu chiiⁿ chi dííⁿ ní chi ndís'tií dííⁿ ní chííⁿ chí n'daacā. ¹²Tíicā taachi dinguúⁿ carta miiⁿ yeⁿe ndís'tií, nguéé dinguúⁿ cáávā 'iiⁿ'yāⁿ chi dinuuⁿndi o cáávā 'iiⁿ'yāⁿ chi ch'eenú yā chii caavā nuuⁿndi miiⁿ. Dinguúⁿ yeⁿe ní ti ndís'tií cuuvi deenú ní chi nús'uu ní n'giⁿ'í nū chi véé cuidado yeⁿé 'nū ndúúcu ndís'tií nanááⁿ Dendyuūs. ¹³Ní cáávā chuū sta'á 'nū 'viich'etíínūⁿ yeⁿé ndís'tií. Nguéé dámaāⁿ chi sta'á 'nū 'viich'etíínūⁿ yeⁿé ndís'tií naati saⁿ'ā Tito miiⁿ diiⁿ sá chi yeenú taaví 'nū taachi yaa'vi sá nús'uū yeⁿé ní tan'dúúca ndís'tií dííⁿ ní ndúúcu sa. Ní yeenú taavi sā. ¹⁴Úú ngaⁿ'á ngii saⁿ'ā Tito miiⁿ chi ndís'tií ní n'daacā ní ní 'caandiveéⁿ ní nduudu yeⁿe carta miiⁿ. Ní nguεε 'cuinaáⁿ cucáávā chi ngaⁿ'á 'tuucā yeⁿé ní ti 'tíicā dííⁿ ní. Nducuéⁿé chi ngaⁿ'á 'nū ndúúcu ndís'tií ní nduudu cuaacu. 'Tiicā ntuūⁿ nduudu chi ngaⁿ'á 'nū ngii 'nū Tito miiⁿ yeⁿé ndís'tií ní chiiⁿ chi n'giindiveéⁿ ní nduudu yeⁿe carta miiⁿ ní 'tíicā dííⁿ ní. ¹⁵Tiicā ntúūⁿ Tito miiⁿ dineⁿ'e cá sa ndís'tií taachi nan'gaācu sa yeⁿe ndís'tií tan'dúúca ndís'tií ch'iindiveéⁿ ní nduudu yeⁿe ná dííⁿ ní 'tuucā. Ní ndís'tií ní 'cuúⁿ ní saⁿ'ā miiⁿ ní din'daacā ní caatí 'va'a ní. ¹⁶Cáávā chuū véé 'viich'etíínúⁿ yeⁿé ndúúcu ndís'tií yeⁿe tanducuéⁿé dendu'ū chi dííⁿ ní.

'Iiⁿ'yāⁿ ca'á yā n'dee n'dai ofrenda

8 Ndís'tií, hermanos yeⁿé, maaⁿ ní caaⁿ'máⁿ 'nū ndís'tií ti

deenú ní yeⁿe vaadi n'dai ch'ete yeⁿé Dendyuūs ní táacā chi dííⁿ 'nū ntiíⁿnyuⁿ yeⁿe na nducuéⁿé yaacu yeⁿé Ndyuūs chi snee na nducuéⁿé yáⁿ'āa yeⁿe Macedonia. ²Aara chi 'iiⁿ'yāⁿ s'eeⁿ yeⁿe yáacu s'eeⁿ diitū n'dái n'geenú yā ngii cucáávā chi chóóo yeⁿe yā yeenú taavi cá yā. Ní 'áará chi pobre yā ca'á yā n'dee n'dái ofrenda tan'dúúca chi 'áamá 'iiⁿ'yāⁿ chi 'cuiica, 'tíicā dííⁿ yā caava hermanos chi snée yā na yáⁿ'āa Judea. ³Úú ngaⁿ'á nduudu cuaacu yeⁿé yā. Ndúúcu núuⁿmáⁿ staava yeⁿé yā ca'á yā ofrenda, ní ca'á yā nducuéⁿé chi cuuví yeⁿe yā. Ní ndii ca'á yā más cā chi cuuví yeⁿe yā. ⁴Caⁿ'a diitū yā ndúúcu 'nū chi 'cuaaⁿ 'nū ofrenda chi 'áamá ayuda yeⁿe chi cuuvi yeⁿe hermanos yeⁿe yú chi nguéé véé yeⁿe yā ní ca'á 'nū hermanos s'uuúⁿ. ⁵Ní dííⁿ yā más cā chi cunee ngiinú 'nū chi dííⁿ yā. Vmnááⁿ vmnaaⁿ ca'á yā vida yeⁿe maáⁿ yā na ta'a Señor Jesucristo yeⁿe yú. Ní cuayiiivi, tan'dúúca chi Ndyuūs neⁿé yā chi dííⁿ yā, 'iiⁿ'yāⁿ s'eeⁿ tée yā vida yeⁿé yā nús'uu chi dííⁿ yā ntiíⁿnyuⁿ cáávā nús'uu. ⁶Nducuéⁿé chuū vmnááⁿ vmnaaⁿ cuuví 'nū Tito ní dicho'ó 'nū saⁿ'ā chi caaⁿ'maⁿ yā yeⁿe ofrendá yeⁿé ndís'tií. 'Tiicā ntúūⁿ maaⁿ ní dicho'ó 'nū Tito chi 'cuiinu ntiíⁿnyuⁿ miiⁿ ní cut'á sa ofrenda yeⁿé ní chi ntiíⁿnyuⁿ chi n'dai taavi chi yeⁿé Ndyuūs. ⁷Ní ndís'tií ní tan'dúúca chi 'cuiicá ní 'tiicā ní ti i'téenu cá ní Ndyuūs. Ní ngaⁿ'a cá ní nduudu cuaacu, ní déenu cá ní. Ní nééne neⁿé ní cunnee ní nús'uu, ní neⁿé ní nús'uu. Maaⁿ ní neⁿé 'nū chi ndís'tií ní ca'a cá ní ofrenda yeⁿé ní ní

din'dai ca ntiⁿnyúⁿ 'cūū chi cunneé nī hermanos yeⁿe yú.

⁸Úú nguéé ca'á orden yeⁿé chuū. Dámaāⁿ neⁿé chi deenú nī tan'dúúcā chi diiⁿ tanáⁿā hermanos yeⁿe yáⁿāa yeⁿe Macedonia ní 'ífcú cuuvi deenú chi cuaacu chi ndís'tiī dinéⁿe nī Ndyuūs caavā ofrenda chi ca'á nī. ⁹Ní ndís'tiī ní 'āā deenú nī chéé chí vaadi n'dai taavi ca yeⁿé Señor Jesucristo yeⁿē yú. Cristo miiⁿ 'āā 'cuiicá yā naati dífⁿ yā chi pobre yā cucáāvā chi néⁿe yā s'uuuⁿ. Ní 'ífcú ndís'tiī cuuvi cuta'á nī vaadi 'cuiica yeⁿé yā cáāvā Cristo chi dífⁿ yā chi pobre yā.

¹⁰Ní yeⁿē ofrenda 'cūū 'úú yaa'vi neéⁿ ndís'tiī chuū. N'daacā ca chi 'cuiinú nī chεε chi dífⁿ nī nduuyu chi 'āā chó'oo. Ndís'tiī ní vmnááⁿ vmaāⁿ 'iiⁿyāⁿ chi dífⁿ yā 'tuucā nī 'tíicā ní neⁿé chi di'cuiinú nī yeⁿe ofrenda miiⁿ nguuvi chi cuchii.

¹¹Maaⁿ ní dífⁿ nī 'tiicā ní di'cuiinú nī ntiⁿnyuⁿ yeⁿe nī chi 'āā neⁿé nī tan'dúúcā chi cuchii nī diiⁿ nī ndii cuááⁿ vmaāⁿ. Ní ca'á nī ofrenda chεε chi cuuvi dífⁿ nī. ¹²Ní nduuti chi 'áámá ndís'tiī cuaacu níⁿnyúⁿ neⁿé nī ca'a nī ofrenda, tuu'mi ní Ndyuūs dífⁿ yā aceptar ofrenda yeⁿé nī ní diiⁿ cuenta yā yeⁿē chi véé yeⁿé nī nguéé yeⁿe chi nguéé véé yeⁿé nī.

¹³Úú nguéé neⁿé chi ndís'tiī ca'á nī más cā ofrenda chi cuuvi nī nī 'āā ntéé véé necesidades yeⁿé nī cucáāvā chi inneé nī náⁿā hermanos. ¹⁴Maaⁿ ní véé ca yeⁿé nī ní cuuvi dífⁿ nī completar ofrenda yeⁿé nī ní ca'á nī 'iiⁿyāⁿ chi nguéé véé yeⁿé yā. Ní cunnee nī 'iiⁿyāⁿ. Ní cuuvi ca'á nī daamá nduucú yā.

Cuayiivi ní taachi nguéé véé yeⁿé nī ní 'iiⁿyāⁿ s'eeⁿ vεε ca yeⁿé yā, 'iiⁿyāⁿ s'eeⁿ cuuvi téε yā ofrenda yeⁿé nī ní téε yā ofrenda ndís'tiī. Ní nginee yā ndís'tiī. 'Tíicā ca'á nī daama ndúúcu yā. ¹⁵'Tíicā canee nguūⁿ na libro yeⁿe Ndyuūs ndii cuááⁿ vmaāⁿ: 'Iiⁿyāⁿ chi véé cá yeⁿé yā nguéé nacaāva yeⁿé yā. 'Iiⁿyāⁿ chi duū'vi vεε yeⁿé yā nguéé chii faltar yeⁿé yā.

Yeⁿé saⁿā Tito ndúúcū compañeros yeⁿé yā

¹⁶Maaⁿ ní 'úú ca'á gracias Ndyuūs ti Ndyuūs chi'neéⁿ yā na staava yeⁿe Tito chí neⁿe yā cunnee cá yā ndís'tiī tan'dúúcā chi nús'uū dífⁿ 'nū. ¹⁷Ní neⁿé yā dífⁿ yā tan'dúúcā chi ngaⁿá 'nū nduucú yā yeⁿē ndís'tiī. Ní nééné neⁿé yā nginee yā ndís'tiī caati neⁿé yā n'diichí yā ndís'tiī.

¹⁸Ní dicho'ó 'nū ndúúcū Tito miiⁿ táámá hermano yeⁿe yú ní nducyáácá 'iiⁿyāⁿ yeⁿe nducyáácá yaācū ngaⁿá yā chi hermano miiⁿ ní neené n'dai diiⁿ sa ntiⁿnyuⁿ. Ní ngaⁿa sa nduudu cuaacu yeⁿe evangelio chi nduudú ngai yeⁿe Jesucristo. ¹⁹Nguéé damāāⁿ chuū idiiⁿ saⁿā miiⁿ ti nducyáácá 'iiⁿyāⁿ yeⁿe nducyáácá yāacū s'eeⁿ naachi caⁿá 'iiⁿyāⁿ chi i'teenú yā Señor Jesucristo yeⁿē yú nndéévé yā saⁿā miiⁿ chi caⁿa sa ndúúcū nús'uū caati cuuvi cunnee sa nús'uū ndúúcū ofrenda chi cuuvi cunnee hermanos. Ní 'ífcú hermanos cuuvi yā dich'εete cá yā Señor yeⁿē yú. Ní cuuvi 'cuuⁿmíⁿ 'nū hermanos chi ndís'tiī neⁿé nī cunneé nī hermanos. ²⁰'Tíicā ní 'iiⁿyāⁿ nguéé cuuvi caaⁿmaⁿ neeⁿ yā nús'uū yeⁿe chi dífⁿ

'nū ndúúcu ofrenda miiⁿ chi cuta'á
'nū yeⁿe hermanos. ²¹Ní 'tíicā neⁿé
'nū diiⁿ 'nū nducueⁿe n'daacā nanááⁿ
Ndyuūs ní 'tíicā ntúuⁿ nanááⁿ
nducyáácá 'iiⁿyāⁿ.

²²Maaⁿ ní dicho'ó 'nu taama
hermano yeⁿe yú ndúúcu Tito miiⁿ.
Ní 'āā diiⁿ 'nū probar hermano
miiⁿ n'deee n'dái naaⁿ ni ch'iⁿí
saⁿā miiⁿ n'deee n'dái naaⁿ chi
neⁿe sa nginnee sa nús'uu. Maaⁿ ní
saⁿa miiⁿ neenē neⁿe sa nginnee
sa ndís'tiī ti vee 'viich'ēetiinūⁿ
ca yeⁿé 'nū ndúúcu ndís'tiī. ²³Ní
ndúúti chi 'áámá 'iiⁿyāⁿ ítiinguuneeⁿ
yā yeⁿe saⁿā Tito miiⁿ tuu'mi
ní ndís'tiī caaⁿmáⁿ nī chi saⁿā
miiⁿ compañero yeⁿé. Ní diiⁿ sa
ntiiⁿnyuⁿ dáámá nduucú ní diiⁿ sa
ntiiⁿnyuⁿ chí dichí'vē ndís'tiī. O
nduuti chi ítiinguuneeⁿ yā yeⁿe
tanáⁿā hermanos chi dicho'ó tuu'mi
ní ndís'tiī caaⁿmaⁿ nī chi 'iiⁿyāⁿ
yeⁿé nducyaaca yaācū s'eeⁿ dicho'ó
yā hermanos s'eeⁿ. Ní hermanos
ní dich'ēetē cá yā Cristo yeⁿé yú.
²⁴Ca'á nī ofrenda yeⁿé nī ní 'tíicā
cuuvi deenú 'iiⁿyāⁿ yeⁿe yaacu s'eeⁿ
chi dineⁿé nī hermanos chi dicho'ó.
Ndís'tiī ní 'cuuⁿmiⁿ nī nducyáácá
'iiⁿyāⁿ cáāvā ofrenda yeⁿé nī chi
cuaacu niiⁿnyúⁿ neⁿé nī hermanos.
Ní nús'uu deenú 'nū chi caⁿá nī
diiⁿ nī 'tíicā. Ní yeenú 'nū cucáāvā
ndís'tiī. Ní 'iiⁿyāⁿ cuuvi deenú yā
chiiⁿ chi ngaⁿá yeⁿe nī ní cuaacu.

Ofrenda cáāvā hermanos yeⁿe yú

9 Ndís'tiī hermanos yeⁿé nguéé
caneē chi dinguúⁿ yeⁿé ndís'tiī
yeⁿe ofrenda chi nga'a nī hermanos
chi ítēenu yā Jesucristo yeⁿé yú.
²Úú tuumicadiinúⁿ chi ndís'tiī

neⁿé nī cunneé nī hermanos. Ní
yeenú cucáāvā ndís'tiī taachi 'úú
yaa'ví 'iiⁿyāⁿ yeⁿe yáⁿāa yeⁿé
Macedonia yeⁿé ndís'tiī chi sneé nī
na yáⁿāa Acaya táácā idiīⁿ nī. Ní
'úú yaa'ví 'iiⁿyāⁿ s'eeⁿ chi ndís'tiī
caneē yaaⁿ nī ndii nduuyu chi
chó'oo chi nginneé nī hermanos
yeⁿé yú. Ní maaⁿ ní n'deee 'nāáⁿ
hermanos yeⁿe yáⁿāa Macedonia
neⁿé yā nginneé yā hermanos
cáāvā chi ndís'tiī caⁿá nī chi ca'a
nī ofrenda yeⁿé nī. ³Ni cáāvā chuū
dicho'ó Tito ndúúcu 'uuvi hermanos.
Ní nguéé cúuví chó'oo 'áámá cosa
chi nguéé cuaacu yeⁿé nī yeⁿé chi
'úú yaa'ví 'iiⁿyāⁿ s'eeⁿ yeⁿe tan'dúúcu
chi ndís'tiī n'daacā diiⁿ nī yeⁿé
ofrenda 'cūū. Ní ndís'tiī 'cuēeti yaáⁿ
nī ofrenda yeⁿe nī chi cunneé nī
hermanos. ⁴Nguéé deenú nduuti chi
naⁿa 'iiⁿyāⁿ yeⁿe yáⁿāa Macedonia
caⁿá yā nduucú. Ní taachi ndaá 'nū
nanááⁿ ndís'tiī nguéé véé yaáⁿ nī
ndúúcu ofrenda yeⁿé nī. Ní nús'uu
cuuvi 'cuinaáⁿ 'nū ti yaa'ví 'nū
hermanos yeⁿé yáⁿāa Macedonia ti
véé 'viich'ēetíinuuⁿ ch'ēete yeⁿé 'nū
nduucú nī. Ní ndís'tiī cuuvi 'cuinaáⁿ
nī dendú'ū. ⁵Ní caavā chííⁿ 'úú
nadícadíinúⁿ chi chíicá hermanos
chi chíi yā vmnááⁿ vmaaaⁿ nanááⁿ
ndís'tiī ní cunee yā nduucú nī. Ní
'íicú ndís'tiī ca'a nī ofrenda yeⁿe
nī hermanos chi dicho'ó. Níicú
cuuvi cunneé nī hermanos yeⁿe
yáⁿāa Judea ndúúcu ofrenda yeⁿe
nī, ofrenda miiⁿ chi ngaⁿa nī chi
ca'a nī. 'Tíicā níicú 'cuēeti yaáⁿ nī
ndúúcu ofrenda yeⁿe nī ní ch'iⁿí nī
'iiⁿyāⁿ s'eeⁿ chi cuaacu chi neⁿé nī
ca'á nī ofrenda yeⁿe nī. Ní nguéé a
fuerza canee chi ca'á nī ofrenda.

⁶Maaⁿ ní ndís'tii ní n'gaacú ní yeⁿ'ē chuū chí caaⁿ'máⁿ. 'Iiⁿ'yāⁿ chi duuⁿ'vī cá ngiinu yā cuta'á yā duuⁿ'vī ca cosecha yeⁿ'é yā ní 'iiⁿ'yāⁿ chi n'deeé ca ngiinu yā cuta'á yā n'deeé cá cosecha yeⁿ'é yā. ⁷Ca'áamá cá'áamá nī ca'á nī ofrenda yeⁿ'é nī tan'duucā chi nacádiinuⁿ nī chi díⁿ nī na staava yeⁿ'e nī. Nguéé ca'á nī nduuti chi nguéé neⁿ'e nī, ní nguéé a fuerza ca'a nī. Ndyuūs neⁿ'é yā 'iiⁿ'yāⁿ chi ca'a yā ofrenda yeⁿ'é yā tí yeenú yā chi ca'á yā. ⁸Ní Ndyuūs ní cuuví téé yā ndís'tii n'deeé cá yeⁿ'e nducuéⁿ'ē chi n'dai taavi ca. Ní 'tíicā ndís'tii ní cuuvi 'cuūndī necesidades yeⁿ'é nī. Ní cuuvi cunneé nī hermanos ndúúcū nducuéⁿ'ē necesidades yeⁿ'é yā. ⁹Ní canéé nguūⁿ na libro yeⁿ'é Ndyuūs ndii cuááⁿ vmnaaⁿ 'tíica:

Nduuti chí 'iiⁿ'yāⁿ ca'á yā n'deeé cá yeⁿ'e 'iiⁿ'yāⁿ chi pobre yā; tuuⁿ'mi ní vee ca yeⁿ'e maáⁿ yā chi cuuvi ca'á yā 'iiⁿ'yāⁿ ní 'áamá cāneé yā 'tíicā.

¹⁰Ní Ndyuūs chí nga'á yā ndaata chi 'iiⁿ'yāⁿ cuūnu yā ndaata miiⁿ, nga'a ntúúⁿ yā pan chi che'é yā. Maaⁿ ní Ndyuūs miiⁿ téé yā ndaata ndís'tii nducuéⁿ'ē chi cuūnu nī. Ní díⁿ yā chi véé ca cosecha yeⁿ'e ntiⁿ'nyuⁿ chi n'daacā chi díⁿ nī.

¹¹'Tiicá ntúūⁿ ndís'tii cuuvi cuta'á nī yeⁿ'e nducuéⁿ'ē vaadi 'cuiica ní 'íicú cuuvi ca'a cá nī ofrenda yeⁿ'e nī. Ní cucáavā nús'uu, ca'a yā ofrenda yeⁿ'é nī hermanos, tuuⁿ'mi ní hermanos ngaⁿ'á yā: Ndyuūs nadíⁿ've n'dii cáavā ofrenda miiⁿ.

¹²Ní ndúúcū ofrenda yeⁿ'e nī chi ca'a nī nguéé damāāⁿ ca'á nī ti véé yeⁿ'ē hermanos naati díⁿ nī

chi hermanos ca'a yā n'deeé cá gracias Ndyuūs. ¹³Ní 'íicú hermanos dich'εεté yā Ndyuūs nduuti chi ndís'tii ch'iⁿ'í nī hermanos chi i'téenu nī nduudu cuaacu yeⁿ'e Cristo. 'Tiicá ntúūⁿ hermanos dich'εεté yā Ndyuūs ti ndís'tii ca'a cá nī ofrenda yeⁿ'é nī cáavā hermanos miiⁿ ní caavā tanáⁿ'ā hermanos. ¹⁴'Tiicá ntúūⁿ hermanos ngaⁿ'angua'á yā caavā ndís'tii. Ní dineⁿ'e cá yā ndís'tii. 'Tíicā díⁿ yā tí Ndyuūs s'neéⁿ yā na staava yeⁿ'é nī chi ndís'tii díⁿ nī cosa chi n'daacā. ¹⁵Maaⁿ ní ca'a yú gracias Ndyuūs ti tee yā s'uuúⁿ nducuéⁿ'ē chi vaadi n'dai ca yeⁿ'e yā chi ch'εεte taavi cá chi nguéé cuuvi caaⁿ'maⁿ yú yeⁿ'ē nducuéⁿ'ē.

Pablo caaⁿ'máⁿ yā chi cuaacu chi apóstol yā yeⁿ'e Señor Jesucristo

10 'Úú Pablo di'cuiitú ndís'tii chuū. 'Úú ní ndiicuúⁿ ní véé cá paciencia yeⁿ'é ní tan'dúúcā Cristo ngaⁿ'a yā, 'tíicā ngaⁿ'á. 'Iiⁿ'yāⁿ ngaⁿ'a yā yeⁿ'e 'úú chi 'úú 'aama saⁿ'ā ndiicuúⁿ taachi caneé nduucú ndís'tii ní naati nguéé caneé nduucú ndís'tii tuuⁿ'mi ní cheechí yaaⁿ'vī ndís'tii. ²'Úú di'cuiitú ndís'tii chi díⁿ n'daacá nī ti taachi ndaá n'diichí ndís'tii nguéé canee chi caaⁿ'máⁿ nduudu cheechi ndúúcū ndís'tii. Náⁿ'ā 'iiⁿ'yāⁿ ní ngaⁿ'á yā yeⁿ'é 'nū chi nús'uu díⁿ 'nū ntiⁿ'nyuⁿ yeⁿ'e Ndyuūs tan'dúúca chi neⁿ'é 'nū díⁿ 'nū. 'Úú vee yaáⁿ chi nandaācā 'iiⁿ'yāⁿ s'eeⁿ ní caaⁿ'maⁿ taáⁿ nduucú yā. ³Cuaacu chi neⁿ'e chi nús'uu ní 'iiⁿ'yāⁿ yeⁿ'e iⁿ'yeeⁿ'dí 'cūú nús'uu díⁿ 'nū ntiⁿ'nyuⁿ yeⁿ'e Ndyuūs. Nguéé díⁿ 'nū ntiⁿ'nyuⁿ

cucáāvā chi véé chi cuuvi ye^{ní}é 'nū na i^{ní}yee^{ní}dí 'cūū tan'dúúacā chi diiⁿ taná^{ná} 'a 'ii^{ní}yāⁿ ye^{ní}é i^{ní}yee^{ní}dí 'cūū chi nguéé i'téenu yā Cristo. ⁴Caati ntiiⁿnyuⁿ chi diiⁿ 'nū nguéé diiⁿ 'nū ndúúcu vaadi deenu ye^{ní}e i^{ní}yee^{ní}dí 'cūū tí diiⁿ 'nū ndúúcu poder ye^{ní}é Ndyuūs. Ní Ndyuūs nginneé yā s'uuúⁿ chi cuuvi dituúví 'nū dendu'ū chi ye^{ní}e enemigo ye^{ní}é 'nū chi yááⁿ'n'guinūⁿ miiⁿ. ⁵Tíicā chuū cuuvi diiⁿ 'nū. Dituuví 'nū nducué^{ní}ē vaanicadiínūⁿ ye^{ní}e 'ii^{ní}yāⁿ chi contra ye^{ní}é Ndyuūs. Ní 'íicu 'ii^{ní}yāⁿ cuuví nadacadiínúⁿ yā ye^{ní}e Cristo ní cuuví cu'téenu yā ye^{ní}e yā. ⁶Maaⁿ ní taachi ndís'tiiⁿ n'giindiveéⁿ nī nduudu chí nga^{ná}á tuu'mi ní nús'uu canee yaáⁿ 'nū chi diiⁿ 'nū castigar nducyáácá nī chi nguéé n'giindiveéⁿ nī nduudu chi nga^{ná}á.

⁷Ndís'tiiⁿ ní n'diichí nī dendu'u chi véé tan'duucā chi cánéé. Ní ndúútí chi 'áámá yā ye^{ní}e ndís'tiiⁿ deenú yā chi seguro chi ye^{ní}e Cristo 'ii^{ní}yāⁿ miiⁿ, tuu'mí canee cúúⁿmíⁿ yā chi nadacadiínuuⁿ yā chi nús'uū ntúūⁿ ní ye^{ní}e Cristo nús'uu. Tan'dúúca yā 'tiicá ntúūⁿ nús'uu. ⁸Áará chi 'úú Pablo nga^{ná}á chi 'úú ch'εεté 'úú na ntiiⁿnyuⁿ ye^{ní}e Señor Jesucristo nguéé 'cuinaáⁿ cáāvā chi caaⁿmáⁿ 'túúca. Deenú 'nū chi Señor ye^{ní}é yū tée yā nús'uu ntiiⁿnyuⁿ chi diiⁿ 'nū ndúúcu poder ye^{ní}é yā ti ndís'tiiⁿ cuuvi cu'téenu ca nī Ndyuūs, ní nguéé cáāvā chi diiⁿ chi nguéé i'téenu nī Ndyuūs. ⁹Úú nguéé ne^{ní}é chi ndís'tiiⁿ nadacadiínuuⁿ nī chi dingúúⁿ carta ye^{ní}é nī cucaavā chi candíí ndís'tiiⁿ chí 'va'á nī. ¹⁰'Ii^{ní}yāⁿ nga^{ná}á yā chi cartas ye^{ní}é chí nguúⁿ ní neené ditiinu nduudu ye^{ní}é ní

taachi canee nanááⁿ ndís'tiiⁿ ní 'úú ní duūvā 'úú. Ní nduudu chi nga^{ná}á ní nguéé de'ε véé ye^{ní}é. ¹¹Ne^{ní}é chi 'ii^{ní}yāⁿ chi nga^{ná}á yā 'túúca ye^{ní}é, cadíínuuⁿ yā chuū. 'Túúca tan'dúúca chi dinguuⁿ 'nū na cartas ti ya'ai canee 'nū ye^{ní}e nī, 'tiicá ntúūⁿ taachi ndaá 'nū nanááⁿ ndís'tiiⁿ nga^{ná}á 'nū ndúúcu yā ní dáámá diiⁿ 'nū ndúúcu yā.

¹²Nguéé caaⁿmáⁿ 'nū chi nduuidaamá 'nū ndúúcu taná^{ná} yā chí nga^{ná}á yā chí maáⁿ yā ní n'gεεté yā. 'Ii^{ní}yāⁿ s'eeⁿ nga^{ná}á yā tan'dúúca chí tonto yā tí dicaadi maáⁿ yā ndúúcu 'áámá yā táámá yā hermanos. ¹³Nús'uu ní nguεε caaⁿmáⁿ 'nū ye^{ní}e ndúúcu^{ní}e chí n'gεεte chí nguéé candéé 'nū cuidado ye^{ní}é. Ndyuūs chí 'i'í yā nús'uu naachi cuuvi cuchicá 'nū ní diiⁿ 'nū ntiiⁿnyuⁿ ye^{ní}é yā. Ní chí 'i'í yā chí nús'uu cho'ó 'nū nanááⁿ ndís'tiiⁿ chí snéé na yááⁿ Corinto. ¹⁴Cáāvā chuū ní deenú 'nū chí nguéé cue^{ní}é 'nū mar 'áámá yá^{ní}āa nduuti chí Ndyuūs nguéé chí 'i'í yā nús'uu chí ca^{ná} 'nū miiⁿya. Ní cáāvā chuū ndaá 'nū nanááⁿ ndís'tiiⁿ ní candéé 'nū nduudu cuaacu chí nduudu ngai ye^{ní}é Señor Jesucristo ye^{ní}é yú. ¹⁵Nguéé nga^{ná}á 'nū chí n'gεεte ntiiⁿnyuⁿ ye^{ní}e táámá yā tan'dúúca chí nús'uu diiⁿ 'nū ntiiⁿnyuⁿ ye^{ní}é yā. Dámaāⁿ nga^{ná}á 'nū ye^{ní}é ntiiⁿnyuⁿ chí diiⁿ 'nū. Cunee ngiinú 'nū chí ndís'tiiⁿ cu'téenu cá ní ní nús'uu cuuvi diiⁿ 'nū ntiiⁿnyuⁿ chí más cā ch'εεte ca nguaaⁿ ndís'tiiⁿ, naati dámaāⁿ diiⁿ 'nū ntiiⁿnyuⁿ naachi Ndyuūs chí 'i'í yā nús'uu chí diiⁿ 'nū. ¹⁶Cuayiivi miiⁿ ní ne^{ní}é 'nū ca^{ná} 'nū táámá cuaaⁿ chí táámá lado

yeⁿē ndís'tiī chi cuuvi caaⁿ máⁿ 'nū nduudu cuaacu yeⁿé Ndyuūs. Ní nguéé cánéé chí caaⁿ máⁿ yeⁿē ntiīⁿnyuⁿ yeⁿe táámá yā tan'dúúcā chi nús'uu dííⁿ 'nū ntiīⁿnyuⁿ yeⁿé yā.

¹⁷Ní nduuti chí 'áámá 'iiⁿyāⁿ neⁿé yā caaⁿ máⁿ yā yeⁿe cosa chí ch'εεte ca tuu'mi ní canee chí caaⁿ máⁿ yā chí Ndyuūs dííⁿ yā chíiⁿ chí ch'εεte ca. ¹⁸Nduuti chí Ndyuūs deenu yā chí 'áámá 'iiⁿyāⁿ ní n'daacā idiíⁿ yā tuu'mi ní cuaacu. Nduuti chí maáⁿ yā ngaⁿa yā chí n'daacā chí dííⁿ yā tuu'mi ní 'du'u deenu chí cuaacu?

Pablo ndúúcū 'iiⁿyāⁿ chí ngaⁿá chí apóstoles 'iiⁿyāⁿ ní nguéé cuaacu

11 Neⁿé chí ndís'tiī cuchéé nī yeⁿé 'aara chí nadacadiinúúⁿ nī yeⁿé chí duuchi ngaⁿá nduucú nī. ²Caati 'úú ní neⁿé ndís'tiī tan'duucā chí Ndyuūs neⁿé yā ndís'tiī. Ní 'úú ngaⁿá ngii ndís'tiī chí yeⁿe Jesucristo yeⁿē yú chí ndís'tiī caⁿá nī lado yeⁿé Cristo. Ní neⁿé chí ndís'tiī cunéé nī nanááⁿ Ndyuūs. Ní tan'dúúcā 'áámá n'daataá chí cuífnú chí caⁿa 'caandavaacu tá ndúúcū 'áámá saⁿá nuūⁿ. 'Tíicā ndís'tiī nanááⁿ Ndyuūs. ³Ní 'úú 'va'á cáávā ndís'tiī. Caati tan'dúúcā chí 'áámá cúú chinnche'éí tī táⁿā Eva ndúúcū nduudu yaadi yeⁿé tī chí nduudu yeⁿe yááⁿnguiniuūⁿ, 'tiicá ntúūⁿ 'iiⁿyāⁿ cannche'éí yā ndís'tiī níicú divíi yā vaadi cadiinúúⁿ yeⁿé nī ní nguéé dineⁿé nī Jesucristo ndúúcū nuuⁿmaⁿ staava yeⁿé nī. ⁴Caati ndís'tiī ca'á nī lugar 'āā du'ú nuūⁿ 'iiⁿyāⁿ chí caaⁿ máⁿ yā nduudu chí n'dááⁿ yeⁿe Jesucristo yeⁿē yú nguéé tan'dúúcā nduudu cuaacu chí caⁿa 'nū nanááⁿ ndís'tiī. Ní ndís'tiī ní

n'giindiveéⁿ nī yeⁿē taama espíritu chí n'dááⁿ ní nguéé n'giindiveéⁿ nī yeⁿe Espíritu N'dai yeⁿe Ndyuūs chí sta'á nī yeⁿe Ndyuūs taachi ngaⁿa 'nū nduudu cuaacu nanááⁿ ndís'tiī. Ní ch'iindiveéⁿ nī nduudu chí n'dááⁿ chí ngaⁿá yā yeⁿe chí nadinguáⁿai yā. Nguéé tan'dúúcā nduudu cuaacu chí nús'uu caⁿá 'nū nguaaⁿ ndís'tiī. Ní yeenú nī yeⁿē chuū. ⁵'Úú nadacadiinúúⁿ chí nguéé n'gεεte ca tanáⁿā 'iiⁿyāⁿ chí ngaⁿá yā chí apóstoles naati nguεε 'tíicā. N'dááⁿ yā nduudu yeⁿe Cristo ní ndís'tiī cu'teenú nī yeⁿe yā. ⁶'Áará chí nguεε caⁿá nduudu cuaacu yeⁿe Cristo ndúúcū nduudu deenu ca, deenú ca yeⁿē nduudu chí ngaⁿá. 'Tíicā chíiⁿí 'nū ndís'tiī yeⁿē nducueⁿé ntiīⁿnyuⁿ chí dííⁿ 'nū nguááⁿ ndís'tiī.

⁷O nguéé n'daacā dííⁿ chí ngaⁿá nduudu cuaacu yeⁿé Cristo nanááⁿ ndís'tiī ní nguéé nadíf've nī 'úú caavā ntiīⁿnyuⁿ chí dííⁿ. Nguéé nadicadiinúúⁿ yeⁿē maáⁿ naati neⁿé chí ndís'tiī cuuvi n'gεεtē nī. ⁸'Úú ní nguéé chita'á tuumi yeⁿe 'iiⁿyāⁿ yeⁿe tanáⁿā yaacū cucáávā chí cuuvi dííⁿ ntiīⁿnyuⁿ yeⁿé Cristo nguaaⁿ ndís'tiī. ⁹Ní neⁿe chí canee ndúúcū ndís'tiī ní véé necesidades yeⁿé tuu'mi ní hermanos yeⁿe yú ndaá yā yeⁿe yáⁿāa Macedonia ní tee yā 'úú chíiⁿ chí nguεε vεε yeⁿé. 'Tíicā nguéé di'vaachí mar 'áámá ndís'tiī caavā necesidades yeⁿé ní nguéé ndaá di'vaachí ndís'tiī tiempo chí cuchii. ¹⁰Nené seguro chí nduudu cuaacu yeⁿe Cristo canee nduucú. Ní 'íicú mar 'áámá 'iiⁿyāⁿ cuuvi dííⁿ yā chí nguεε cuuvi caaⁿ máⁿ nduudu cuaacu miiⁿ na

núuⁿ máⁿ yáⁿ āa Acaya caati nguéeⁿ sta'á tuumí cáávā ntiiⁿnyuⁿ chí dííⁿ.
 11 ¿De'ē cáávā chí caaⁿ máⁿ 'túúca? ¿Áá cáávā chí nguéeⁿ neⁿ é ndís'tií? Nguéeⁿ 'tíicā. Nduuūs deenú yā chí neené neⁿ é ndís'tií.

12 Ní ntiiⁿnyúⁿ chí dííⁿ canéeⁿ chí dííⁿ naati nguéeⁿ cuta'á tuu'mi yeⁿ e ntiiⁿnyuⁿ chí dííⁿ. Ní 'íicú 'iiⁿyāⁿ chí neⁿ e caaⁿ máⁿ yā chí ntiiⁿnyuⁿ yeⁿ é yā chí dáamá ndúúcu ntiiⁿnyuⁿ chí dííⁿ 'nū nguéeⁿ lugar chí cuuvi caaⁿ máⁿ yā chí 'tíicā ti sta'á yā tuumi yeⁿ e ntiiⁿnyuⁿ chí dííⁿ yā.
 13 'iiⁿyāⁿ miiⁿ nguéeⁿ apóstoles yeⁿ e Cristo ti apóstoles chí falso yā. Ní nginnche'í yā 'iiⁿyāⁿ ní dííⁿ yā tan'dúúca chí maāⁿ yā apóstoles yeⁿ e Jesucristo chí candé yā nduudu yeⁿ é Cristo.
 14 Ní nguéeⁿ nadacadíinuⁿ yú yeⁿ e chí vee ca apóstoles chí falso yā na iⁿ yeeⁿ dí 'cūū. Maaⁿ yááⁿ 'nguiniūⁿ mííⁿ ní diiⁿ sa chí maāⁿ sa ní tan'dúúca 'áamá ángel yeⁿ e Nduuūs. 'Tíicā diiⁿ sa.
 15 Cáávā chuū ní nguéeⁿ cosa chí ch'ete chí 'iiⁿyāⁿ dííⁿ yā ntiiⁿnyuⁿ yeⁿ e yááⁿ 'nguiniūⁿ tan'dúúca chí ntiiⁿnyuⁿ yeⁿ é Nduuūs. Taachí 'cuiinu iⁿ yeeⁿ dí 'cuū caⁿ á yā cuta'a yā chí cuuvi yeⁿ é yā.

Pablo neéné ch'eenú yā chí cáávā chí apóstol yeⁿ e Jesucristo

16 Maaⁿ ní taama vmnéⁿ ee neⁿ é caaⁿ máⁿ ndúúcu ndís'tií ní nguéeⁿ nadacadíinuⁿ nī chí 'úú ngaⁿ á tan'dúúca chí 'aama chí loco yā, ti ngaⁿ á chí ch'eté maāⁿ. Ní 'aara chí nadacadíinuⁿ nī yeⁿ é 'tíicā, ¿áá 'tíicā 'caandiveéⁿ nī yeⁿ é?
 17 'Úú nguéeⁿ caⁿ á chuū chí Señor Jesucristo yeⁿ e yú yaa'ví yā 'úú chí

caⁿ á 'tíicā. Caati caⁿ á tan'dúúca 'aama chí loco 'tíicā caⁿ á. Ní 'íicú māaⁿ cuuvi caaⁿ máⁿ chí dich'eté 'úú.
 18 Ní ndeee ndái 'iiⁿyāⁿ ngaⁿ á yā yeⁿ e maāⁿ yā chí ch'ete yā cucáávā chíⁿ chí dííⁿ yā na iⁿ yeeⁿ dí 'cūū. Ní maaⁿ ní 'úú ntúūⁿ ngaⁿ á chí 'úú ní ch'eté maāⁿ.
 19 Ní ndís'tií ní nadacadíinuⁿ nī chí deenu cá nī ní chicheé nī yeⁿ e 'iiⁿyāⁿ chí ngaⁿ á yā chí maāⁿ yā ch'eté yā tan'dúúca chí loco yā, ní yeenú yā.
 20 Ní chicheé nī yeⁿ é 'iiⁿyāⁿ s'eeⁿ ní chí indiveéⁿ nī yeⁿ e yā ní dííⁿ nī tan'dúúca chí 'iiⁿyāⁿ s'eeⁿ ngaⁿ á yā chí a fuerza dííⁿ nī. Ní tan'dúúca chí s'neéⁿ yā 'áamá trampa 'tíicā dííⁿ yā ndúúcu ndís'tií. Ní ndiichí yā ndís'tií tan'dúúca 'iiⁿyāⁿ chí nguéeⁿ du'ú vee 'tíicā ndís'tií. Ní caaⁿ máⁿ yā chí ch'ete maāⁿ yā. Ní ch'eⁿ é yā naaⁿ nī. Ní cuchéé nī yeⁿ e nducuéⁿ ē.
 21 Nús'uu nguéeⁿ cuuvi dííⁿ 'nū ndúúcu nī 'tíicā 'aara chí nadacadiiⁿúúⁿ nī chí n'daacā dííⁿ yā ndúúcu nī 'tíicā. Maaⁿ ní 'áará chí 'cuinaaⁿ yeⁿ e chí caaⁿ máⁿ, 'tíicā caaⁿ máⁿ. Nús'uu dííⁿ 'nū chí duūva 'nū ní 'iicu cuuvi dííⁿ 'nū ntiiⁿnyuⁿ yeⁿ é 'nū. Maaⁿ ní caaⁿ máⁿ tan'dúúca chí loco 'úú. Ní 'úú ní caaⁿ máⁿ chí ch'ete maāⁿ yeⁿ e ntiiⁿnyuⁿ chí dííⁿ tan'dúúca chí tanáⁿ ā 'iiⁿyāⁿ chí ngaⁿ a yā chí ch'eté yā maāⁿ yā cáávā ntiiⁿnyuⁿ chí dííⁿ yā.
 22 ¿Áá 'iiⁿyāⁿ hebreos 'iiⁿyāⁿ s'eeⁿ? 'Tiicá ntúūⁿ 'úú. ¿Áá 'iiⁿyāⁿ s'eeⁿ yeⁿ e ndaata Israel? 'Tiicá ntúūⁿ 'úú. ¿Áá 'iiⁿyāⁿ s'eeⁿ yeⁿ e ndaataá Abraham? 'Tiicá ntúūⁿ 'úú.
 23 ¿Áá 'iiⁿyāⁿ s'eeⁿ 'iiⁿyāⁿ chí idiiⁿ ntiiⁿnyuⁿ yeⁿ e Cristo? Deenú chí caaⁿ máⁿ tan'dúúca 'iiⁿyāⁿ chí

loco yā taachi caaⁿ máⁿ 'tiicā. Úú idíⁿ más ca ntiíⁿnyúⁿ yeⁿe Cristo nguéé ti 'iiⁿyāⁿ s'eeⁿ. Ní canéé taavi yaātū na cuerpo yeⁿé chi ch'eⁿé yā 'úú. Neené n'dee cuuví cheⁿé vácūū. Ní neené n'dee cuūví chí 'āā cháā 'caaⁿnúⁿ yā 'úú. ²⁴Ní cho'ó nyuⁿu cuuvi chi 'iiⁿyāⁿ Israel s'eeⁿ ch'eⁿé yā ndiicu ndíitiⁿnyuⁿ cuūⁿ vuelta 'úú ndúúcu cuarta. ²⁵Ní cho'ó 'iinū tiempo chi ch'eⁿé yā 'uu ndúúcu nduucu. Ní 'áámá cuuvi nūⁿ chíítuú yā 'úú. Ní cho'ó 'iinū cuuvi chi chechi barco naachi cueⁿé na nuūⁿnīⁿyáⁿā. Ni 'áámá vmnéⁿēe cánéé nguaaⁿ nuūⁿnīⁿyáⁿā núúⁿmáⁿ yaaⁿ núúⁿmáⁿ nguuvi. ²⁶N'dee n'dái cuūví cachiicá ní n'diichi peligros yeⁿé, peligros yeⁿe yíicú, ndúúcu peligros cáávā 'iiⁿyāⁿ chí duucu yā, ndúúcu peligros nguaaⁿ 'iiⁿyāⁿ yeⁿe yāāⁿ yeⁿé ní yeⁿe 'iiⁿyāⁿ yeⁿe táámá yāāⁿ, ndúúcu peligros taachi cánéé ná yāāⁿ n'geete, ní taachi caneé na yāⁿāa cuūⁿmáⁿ naachi nguéé ch'etinéé 'iiⁿyāⁿ, ní taachi cachiicá na barco vmnaaⁿ nuūⁿnīⁿyáⁿā. Ní chó'oo peligros yeⁿé taachi caneé nguaaⁿ 'iiⁿyāⁿ chi ngaⁿa yā chi hermanos yeⁿe nūⁿ ní nguéé 'tíica yā. ²⁷Úú dííⁿ ntiíⁿnyuⁿ chí néené díitū ndúúcu vaadí 'caaⁿva ní chicuūnū 'úú. Ní n'dee taaví nguiinū nguéé chií cyaadú, ní cho'oo n'dee taaví cuuvi chí ch'eenú chií ti 'āā ntéé cheⁿé ní 'āā ntéé chí'í nuūⁿnīⁿ va. Ní 'āā 'iiche yeⁿé ní nguéé catecaí.

²⁸Ní 'āā vi'í cā yeⁿe nducuéⁿē chuū chí chó'oo na cuerpo yeⁿé, vee más cā denduū ti nguuvi nguuvi candéé cuidado yeⁿé nducyáácá 'iiⁿyāⁿ yeⁿe nducyáácá yaacū. ²⁹Ní

nduuti chí 'áámá 'iiⁿyāⁿ duūvá yā ní 'úú ntūūⁿ dííⁿ tan'dúúca chí duūva 'úú. Ni nduuti chí 'áámá 'iiⁿyāⁿ dííⁿ yā chí taama 'iiⁿyāⁿ dinuuⁿndí yā, 'úú ntūūⁿ n'geenú ngii ní 'cuináaⁿ 'úú, ní nduuvi taáⁿ. ³⁰Maaⁿ ní nduuti chí canéé chí dich'etéé yeⁿē maáⁿ, tuuⁿmí dich'etéé yeⁿē maáⁿ yeⁿe nducuéⁿē chí chó'oo yeⁿé níicu 'cuuⁿmíⁿ ti duūva 'úú. ³¹Dendyuūs chí Chiidá Señor Jesucristo yeⁿē yú ní n'dai taavi cá yā cueⁿe daāⁿmaⁿ. Ndyuūs ní deenú yā chí nguéé ngaⁿá nduudu yaadi. ³²Chó'oo chí taachi caneé na yāāⁿ Damasco chí gobernador chí maaⁿ poder yeⁿe rey Aretas, gobernador miiⁿ s'neeⁿ yā soldados na cheendi va'āi s'eeⁿ chí n'geete yeⁿē yāāⁿ Damasco miiⁿ caati neⁿe sa cuta'a sa 'úú ní candee sa 'úú chí preso 'úú. ³³Naati hermanos yeⁿē yú s'nuúⁿ yā 'úú cheeti 'áámá 'cuééte cheete ní dicua'ái yā 'úú na 'áámá ventana yeⁿe ncheēti yeⁿe yāāⁿ miiⁿ ní 'tíicā ca'ái na ta'a soldado s'eeⁿ caati yāāⁿ miiⁿ ní nuuⁿmaⁿ ndiivi canéé ncheēti chí yaacū tan'dúúca coral.

Visión yeⁿe Pablo ndúúcu chí n'diichí yā

12 Cuaacu níⁿnyúⁿ chí nguée deē vee n'daacá chí caaⁿmáⁿ yeⁿē 'úú maáⁿ chí 'úú ch'etéé 'úú. N'dáaca ca chí 'úú caaⁿmáⁿ yeⁿe n'dee nááⁿ chí canéé chí snaáⁿ yeⁿe Señor Jesucristo ní yeⁿe chí canúúⁿ n'de'ei chí n'giⁿí yā 'úú. ²Quayivi chí i'teenú Cristo chó'oo ndiichi cúuⁿ nduuyúú chí n'diichí 'áámá visión tan'dúúca chí chíinú. Ní 'aama 'iiⁿyāⁿ candéé yā 'úú ndii va'āi cheeti nguuvi. Nguéé deenú

nduuti chi candée yā cuerpo yeⁿé o nguée. Dámaaⁿ Ndyuūs deenú yā chuū. ³Naati chíí ní nguée deenú nduuti chi cueⁿé ndúúcū cuerpo yeⁿé o nguée ndúúcū cuerpo yeⁿé naati dámaaⁿ Ndyuūs deenú yā táácā cueⁿé. ⁴Úú deenú chi candée yā 'úú ní cueⁿé ndii paraíso chi va'ai chēeti nguuvi. Ní 'úú n'giindiveⁿ nduudu chi nguée tan'duucā nduudu yeⁿe 'iiⁿyāⁿ yeⁿe iⁿ'yeeⁿdí 'cūū ti yeⁿe Ndyuūs. Nguée vée permiso chi cuuvi caaⁿmáⁿ yeⁿe chi n'giindiveⁿ. ⁵Úú cuuvi caaⁿmáⁿ chi 'úú ní ch'ēete maáⁿ yeⁿe chi Ndyuūs díⁿ yā nduucú. 'Úú nguée caaⁿmáⁿ yeⁿe maáⁿ chi ch'ēete maáⁿ. Dámaaⁿ caaⁿmáⁿ chi duūvā 'úú. ⁶Áará chi caaⁿmáⁿ chi 'úú ch'ēete maáⁿ nguée caaⁿmáⁿ tan'dúúcā chi zonzo 'úú ti caaⁿmáⁿ nduudu cuaacu yeⁿé naati nguée caaⁿmáⁿ 'tíicā ti nguée neⁿé chi mar 'áámá 'iiⁿyāⁿ nadacadíinuⁿ yā chi 'úú ch'ēete ca 'úú. Neⁿé chi 'iiⁿyāⁿ miiⁿ nadacadíinuⁿ yā yeⁿe 'úú tan'dúúcā chi n'diichí yā 'úú, ní n'giindiveⁿ yā nduudu yeⁿé.

⁷Chuū chi Cristo ch'iⁿí yā 'úú ní 'áámá visión chi ch'ēete ni dēeve taavi ca. Ní Cristo tee yā 'úú 'áámá ya'ai na cuerpo yeⁿé chi 'áámá canée ní tan'dúúcā chi 'áámá yááⁿ chi cata'āi na cuerpo yeⁿé. Ní chíi tan'dúúcā chi yááⁿn'guiinuⁿ s'neeⁿ sa yááⁿ miiⁿ chi neⁿe sa chí 'cúeenú cuuvi. Ní Ndyuūs tee yā permiso chi 'úú canee ndúúcū dolor miiⁿ cáávā chi nguée cuuvi caaⁿmáⁿ yeⁿe maáⁿ chi ch'ēete 'úú. ⁸Ní 'iīnū cuuvi chíicā Señor Jesucristo yeⁿe yú chi divíi yā vaadi ya'ái 'cūū yeⁿé. ⁹Naati Señor yeⁿe yú ngaⁿá yā ngii

yā 'úú 'tíicā: Vaadi neⁿe yeⁿé ní tūneeⁿ di ní nguée más ca neⁿe ní ti chuū. Ní poder yeⁿé chuū chi n'giⁿi cá taachí 'iiⁿyāⁿ chi duūva cuerpo yeⁿé yā. Maaⁿ ní cucáávā chi yaa'ví Señor 'úú 'túúcā, 'úú yeenú ti 'úú duūvā 'úú ti Cristo cuuvi 'cuuⁿmíⁿ yā poder yeⁿé yā ti canee yā na cuerpo yeⁿé. ¹⁰Cáávā chuū ní yeenú ti duūvā. Ní yeenú 'aara chi 'iiⁿyāⁿ ngaⁿa taaⁿ yā yeⁿé, ní nguée vée necesidades yeⁿé, ní 'iiⁿyāⁿ díⁿ yā chi n'geenú ngii. Ní yeⁿe dendú'ū díítūu chi cho'ōo yeⁿé ní n'geenú ngii nducuéⁿe chuū cáávā Cristo. 'Tíicā rā va. Taachi duūvā cuerpo yeⁿé tuu'mi ní más ca ditiīnu 'úú.

Pablo nadacadiinuⁿ cá yā yeⁿe 'iiⁿyāⁿ yeⁿe yaacū yeⁿe yāáⁿ Corinto

¹¹'Úú deenú chi ngaⁿá tan'dúúcā chi loco 'úú taachi ngaⁿá yeⁿe maáⁿ naati ndís'tiī díⁿ ní chi a fuerza canee chi caaⁿmáⁿ yeⁿe maáⁿ ti ndís'tiī nguée ngaⁿá ní yeⁿé 'túúcā. N'daacā ca chi ndís'tiī caaⁿmaⁿ n'dááca ní yeⁿé. 'Úú nguée duu'ví 'úú yeⁿe tanáⁿā 'iiⁿyāⁿ chi ngaⁿá yā chi apóstoles ní nguée 'tíicā 'aara chi 'úú nguée dē'ē vee 'úú. ¹²Ní taachi canee nducú ní ch'iⁿí ndís'tiī chi cuaacu chi 'úú 'áámá apóstol yeⁿe Jesucristo 'úú ndúúcū vaadi n'giinu ch'ēete chí díⁿ ní ndúúcū ntiiⁿnyuⁿ ch'ēete chí díⁿ ní nduūcū vaadi n'giinu n'dai chí díⁿ. ¹³Dē'ē vee chí nguée díⁿ ndúúcu ndis'tiī taachi canee ndúúcu ní tan'dúúcā chí díⁿ ndúúcū nducyaaca 'iiⁿyāⁿ yeⁿe tanáⁿā yaacū. 'Āā daamá nūuⁿ idíⁿ nduucú ní. Deenú chí nguée ngiicā ndís'tiī chí cunee ní 'úú caavā necesidades

ye^{ne}. Maaⁿ ní nadich'eecú nī ye^{ne}é caavā falta 'cūū ti nguéé diiⁿ daamá ndúúcu nī.

¹⁴Maaⁿ ní vee yaáⁿ chi ndaá nanááⁿ ndís'tiī ndiichi ndii 'íínú cuuvi, ní taachi ndaá nguéé di'vaachí ndís'tiī. Ní nguéé ne^{ne}é de'ē véé ye^{ne}e nī chi maáⁿ nī in'nuúⁿ nī naati 'úú ne^{ne}é ndís'tiī. Deenu yú chi 'iiⁿyāⁿ chi chiidá yā canéé chí in'nuúⁿ yā necesidades ye^{ne}é daiyá yā, nguéé ti daiyá yā in'nuúⁿ yā necesidades ye^{ne}é chiidá yā. ¹⁵Ni 'úú dííⁿ gastar tuūmī ye^{ne}é chi dííⁿ ntiin'nyuⁿ cáávā ndís'tiī ní ndíí chi cuūnū 'úú cáávā almas ye^{ne}e nī níícu 'cuēetinéé n'daacá nī. Áará chí ne^{ne}e cá ndís'tiī ní nguéé ti ndís'tiī ne^{ne}é nī 'úú.

¹⁶Ní 'áará chí 'úú nginneé ndís'tiī, náⁿā 'iiⁿyāⁿ nguuaⁿ ndís'tiī chí deenú yā chí nguéé sta'á tuumi ye^{ne}é nī, ngaⁿá yā chí 'úú nginnche'éí 'iiⁿyāⁿ s'eeⁿ. ¹⁷¿Áá nginnche'éí ndís'tiī cucáávā 'iiⁿyāⁿ s'eeⁿ chí dicho'ó nanááⁿ ndís'tiī? Nguēe 'tíicā. ¹⁸Úú chiicá saⁿā Tito chí naⁿá yā. Ní dicho'ó Tito ndúúcu táámá hermano ye^{ne}e yú nanááⁿ ndís'tiī. ¿Áá cuaacu chí Tito miiⁿ chinnche'éí yā ndís'tiī? Nguēe 'tíicā. O ¿áá cuaacu chí 'úú ndúúcu 'iiⁿyāⁿ miiⁿ nguéé dííⁿ 'nū dáámá ntiin'nyuⁿ nguuaⁿ ndís'tiī ní nguéé ndúúcu dáámá sentido ye^{ne}é 'nū? Nguēe 'tíicā.

¹⁹Maaⁿ ní ndís'tiī, ¿áá nadacadiinuⁿ nī chí ngaⁿá 'nū chí chííⁿ chí dííⁿ 'nū ní cuaacu caatí chí idiíⁿ 'nū defender ntiin'nyuⁿ ye^{ne}é 'nū? Nguéé 'tíicā. Ngaⁿá 'nū nanááⁿ Ndyuūs nduudú 'cūū cáávā chí nús'uu ní ye^{ne}é Jesucristo. Ní

nducue^{ne}é chí dííⁿ 'nū, dííⁿ 'nū ti ndís'tiī hermanos chí ne^{ne}é 'nū cuuvi cu'téenu cá nī Ndyuūs. ²⁰Ni 'úú nī 'va'á ti taachi ndaá nanááⁿ ndís'tiī 'úú nguéé ndaācá chí ndís'tiī dííⁿ nī tan'dúúca chí 'úú ne^{ne}é chí dííⁿ nī. Ní ndís'tiī nguéé ndaāca nī 'úú tan'dúúca chí ne^{ne}é nī chí 'úú idiíⁿ tí canéé chí 'caa'vá ndúúcu ndís'tiī. Ní ndaācá ndís'tiī tan'dúúca chí nguéé canéé chí 'cuēetineé nī. Ní ndaācá chí véé nguuaⁿ ndís'tiī 'iiⁿyāⁿ chí n'gēecu cheendí yā, ndúúcu 'iiⁿyāⁿ chí ne^{ne}é yā cosas tan'dúúca chí véé ye^{ne}e taama yā ndúúcu 'iiⁿyāⁿ chí nduuvi taáⁿ yā. Ní 'iiⁿyāⁿ s'eeⁿ chí 'caa'vá yā ndúúcu táámá hermano ní maáⁿ yā divii yā ye^{ne}é yā ti ne^{ne}é yā ngaⁿá yā chí ch'ete maáⁿ yā. Ní 'iiⁿyāⁿ ngaⁿá yā contra ye^{ne}e taama yā. Ní 'iiⁿyāⁿ néené ne^{ne}e caaⁿmaⁿ yā ye^{ne}é chí diiⁿ taama yā. Ní 'iiⁿyāⁿ ngaⁿá yā chí maáⁿ yā ní ch'eté yā, ní nguéé véé vaadi 'diííⁿ nguuaⁿ ndís'tiī. ²¹Ni 'va'á chí 'cuinaáⁿ nanááⁿ Ndyuūs cáávā ndís'tiī taachi ndaá nanááⁿ ndís'tiī taama vmné^{ne}é. Ní taachi canéé ndúúcu nī ngii ya'āi 'iinú ye^{ne}é 'yááⁿ ndís'tiī chí dinuuⁿndí nī ní nguéé nadaacadaamí nī ye^{ne}e nuuⁿndí nī chí dííⁿ nī ye^{ne}e chí ne^{ne}e cuerpo ye^{ne}e nī. Ní dííⁿ nī cosas chí nguēe n'daacā. Chííⁿ ní dííⁿ nī chí sáⁿā sta'a sa n'daataá ye^{ne}e táama saⁿā.

Pablo dingúūⁿ diitú yā ye^{ne}e 'iiⁿyāⁿ ye^{ne}e yáāⁿ Corinto ní ngaⁿá yā: N'dai ndís'tiī

13 Chuū ní ndii 'íínú cuuvi chí caⁿá ndaá nanááⁿ ndís'tiī ní taachi ndaá nduuti chí 'iiⁿyāⁿ caaⁿmaⁿ nuuⁿndí ye^{ne}é

táámá 'iiⁿ'yāⁿ canéé chi véé 'uūví o 'iinū testigo ndúúcu yā. Ní cunee n'daacā nduudu miíⁿ tan'dúúca chi canéé nguūⁿ na libro yeⁿ'é Ndyuūs. ²Áā ngaⁿ'á cuááⁿ vmnaaⁿ taachi cānee nduucú nī ndúúcu 'iiⁿ'yāⁿ chi dinuuⁿndí yā ní ndúúcu nducyaaca nī. Maaⁿ ní chi canee ya'ái yeⁿ'ē ndís'tiī dinguúⁿ taama vmnéⁿ'ēe yeⁿ'e chúū tan'dúúca chi ngaⁿ'á cuaaⁿ vmnaaⁿ nanááⁿ ndís'tiī. Taachi ndaa nanááⁿ ndís'tiī taama vmnéⁿ'ēe n'diichí nuuⁿndí yeⁿ'ē nducyaaca hermanos. ³Ní 'úú idiíⁿ ti ndís'tiī cadiinuuⁿ nī nduuti chi Cristo yeⁿ'ē yú ch'iⁿ'í yā 'úú nduudu chi ngaⁿ'á o nguéé. Ní Cristo yeⁿ'e yú nguéé duūvā taachi dííⁿ yā tratar nduucú nī. Caⁿ'á yā ch'iⁿ'í yā chi dítiiⁿ yā nguéé ti ndís'tiī. ⁴Cuáácú chi 'iiⁿ'yāⁿ ch'iⁿ'ééⁿnga'á yā Cristo tan'dúúca chi Cristo ní 'aama 'iiⁿ'yāⁿ chi duuvā, naati maaⁿ ní Cristo miiⁿ canduuchi yā yeⁿ'ē nguaaⁿ tináⁿ'ā cucáávā poder yeⁿ'é Ndyuūs. 'Tiicá ntúūⁿ nús'uu ní yeⁿ'e Cristo. Nús'uu ní duūvā 'nū naati poder yeⁿ'e Ndyuūs canee ndúúcu 'nū. Ní cáávā chuū cuuví n'diichi 'nū nuuⁿndí yeⁿ'é nī ní dichí'vé 'nū ndís'tiī.

⁵Maaⁿ ní ndís'tiī n'diichi maáⁿ nī nduuti chi ndís'tiī 'āā canee diitú nī ndúúcu chi i'téenu nī yeⁿ'ē Cristo. N'diichi maáⁿ nī chí cuaacu chi i'téenu nī. ¿Áá nguéé déenu ndís'tiī nduuti chi Cristo canee nduucú nī o nguéé? Ní nduuti chi cuaacu chi nguéé i'téenu nī cáávā nuuⁿndí yeⁿ'é nī tuuⁿ'mi ní nguéé yeⁿ'é Ndyuūs ndís'tiī. ⁶Neⁿ'é chi ndís'tiī cadiinúuⁿ nī chi nús'uu ní dichii'vé 'nū Ndyuūs ní ti yeⁿ'é Ndyuūs nús'uu. Nguéé falso 'nū. ⁷Maaⁿ ní ngaⁿ'angua'á 'nū

Ndyuūs caavā ndís'tiī chi ndís'tiī nguéé dinuuⁿndí nī yeⁿ'e mar 'áámá chi nguéé n'daacā. Neⁿ'é 'nū chi ndís'tiī ní dííⁿ nī nducuéⁿ'ē chi n'daacā. Nguéé ti cuuvi 'cuuⁿ'míⁿ 'nū chi dííⁿ 'nū ntiiⁿ'nyuⁿ chi n'daacā. 'Iiⁿ'yāⁿ ní cuuvi n'diichí yā ntiiⁿ'nyuⁿ yeⁿ'é 'nū, ní caaⁿ'máⁿ yā chi nguéé n'daacā idiíⁿ 'nū. Dámaāⁿ neⁿ'é 'nū chi ndís'tiī din'daacá nī. ⁸Nús'uu ní nguéé de'ē vee dííⁿ 'nū chi contra yeⁿ'e nduudu cuaacú naati nducueⁿ'ē chi dííⁿ 'nū ní yeⁿ'ē nduudu cuaacu miiⁿ. ⁹Cáávā chuū nús'uu ní yeenú taaví 'nū taachi duūva 'nū ní taachi ndís'tiī ditiinú nī ndúúcu chi i'téenu nī. Ní ngaⁿ'angua'a cá 'nū ní ngiicá 'nū Ndyuūs chi ndís'tiī cuuvi dííⁿ nī chi n'daacā n'dai ní 'cuetinee nī tan'dúúca chi Jesucristo neⁿ'é yā chi dííⁿ nī. ¹⁰Idingúuⁿ 'nū yeⁿ'e ndís'tiī vmnaaⁿ taachi 'āā cuéé ndaa 'nū nanááⁿ ndís'tiī caati taachi ndaa 'nū nanááⁿ ndís'tiī nguéé cheechi caaⁿ'máⁿ ndúúcu nī cucáávā poder chi Señor Jesucristo tee yā 'úú. Ní Señor yeⁿ'ē yú tee yā poder 'úú caavā chi ndís'tiī ní cuuvi cu'téenu cá nī nguéé caava chi cuuvi ndái nī.

¹¹Maaⁿ ní 'cuiinū carta yeⁿ'é. Ní na carta yeⁿ'é ní ngaⁿ'á ti n'dai taavi ndís'tiī ní dííⁿ nī chi 'cuetinee n'daacā nī ndúúcu vaadi 'diiⁿ na vida yeⁿ'e nī. Níicú cunee nī ndúúcu dáámá vaanicadiinūⁿ yeⁿ'é nī ní Ndyuūs chi véé vaadi 'diiⁿ yeⁿ'e yā ní dinéⁿ'e yā ndís'tiī Ndyuūs miiⁿ canee nduucú nī. ¹²Ní nguaaⁿ maáⁿ nī dííⁿ nī saluda 'áámá nī ndúúcu taamá nī. Caaⁿ'máⁿ nī chi n'dai hermano yeⁿ'é nī ní túú'ví nī cheendi hermano yeⁿ'é nī tan'dúúca costumbre yeⁿ'é nī ti yeⁿ'é Ndyuūs ndís'tiī. ¹³Nducyáácá 'iiⁿ'yāⁿ chi i'teenú

yā Jesucristo yeⁿe yú dichó'o yā saludos
na carta 'cūū yeⁿé nī ní ngaⁿ'á yā: N'dai
ndís'tiī.

¹⁴Ní neⁿ'é chi Señor Jesucristo
téé yā ndís'tiī vaadī n'dai taavi

yeⁿ'é yā. Ní vaadī neⁿe yeⁿ'é
Ndyuūs ní Espíritu N'dai yeⁿ'é
Ndyuūs canéé nduucú nī. Chuū
carta chi 'úú Pablo dinguúnⁿ yeⁿe nī.
'Tíicā chii.

CARTA YEⁿE 'IIⁿ'YĀⁿ YEⁿE YĀⁿ'ĀA GALACIA

Pablo idinguúⁿ yā carta 'cūū
yeⁿe 'iiⁿ'yāⁿ chí caⁿ'á yā yaacū
s'eeⁿ na yāⁿ'āa Galacia

1 'Úú Pablo 'úú ni 'úú 'áámá
apóstol chí dich'ó'ó Ndyuūs.
Mar 'áámá saⁿ'ā nguéé dich'ó'o
sa 'úú chí 'úú ngaⁿ'á nduudu yeⁿ'é
Ndyuūs, ndíi nguéé ndúú ndēeve
sá 'úú, ti Ndyuūs Chiida yú ndúú'cū
Señor Jesucristo dich'ó'o yā 'úú. Ní
Chiida yú nadacuéeⁿ yā Jesucristo
yeⁿ'ē nguaaⁿ tináⁿ'ā. ²Nducyaaca vi'i
yú s'tiī chí 'cuēetinée yā yāāⁿ miiⁿ
ndúú'cū 'úú, idinguúⁿ carta 'cūū yeⁿ'e
ndís'tiī chí i'téenu nī Jesucristo ní
caⁿ'á nī yaacū s'eeⁿ na yaⁿ'āa Galacia.
³Neⁿ'é chí Chiida yú ndúú'cū Señor
Jesucristo yeⁿ'ē yú tée yā s'uuúⁿ
dendú'ū chí n'dai. Ní ndís'tiī canee nī
ndúú'cū vaadi 'diiⁿ chí Ndyuūs itée
yā s'uuúⁿ. ⁴Jesucristo miiⁿ ca'a yā
vida yeⁿ'e maáⁿ yā cucáávā nuuⁿndi
yeⁿ'e yú. Maaⁿ ní nadanguáⁿ'ai
yā s'uuúⁿ yeⁿ'e dendu'ū chí nguéé
n'daacā chí véé iⁿ'yeeⁿ'dí 'cūū. 'Tíicā
neⁿ'e Ndyuūs Chiida yú. ⁵Cueⁿ'e
daāⁿ'maⁿ canee Ndyuūs ndúú'cū
dēeve yeⁿ'é yā. Nducyáácá 'iiⁿ'yāⁿ
canee chí dich'ēete cá yā Ndyuūs chí
dēeve cueⁿ'e daāⁿ'maⁿ. 'Tíicā.

Nguéé véé táámá nduudu yeⁿ'e
chí Cristo nanguáⁿ'ai yā s'uuúⁿ

⁶Neené nge'e yiinú chí ndís'tiī
neené niiⁿ'nuúⁿ nūuⁿ idivíi nī yeⁿ'e
Ndyuūs chí n'gai yā ndís'tiī, ní yeⁿ'e
cosas chí n'dai ca chí Cristo tee yā
ndís'tiī. Ní n'giindiveéⁿ nī nduudu
chí nguéé cuaacu yeⁿ'ē táámá 'iiⁿ'yāⁿ
chí ngaⁿ'a nduudu miiⁿ tan'dúú'cā
chí táámá evangelio. ⁷Cuaacu chí
nguéé véé táámá evangelio chí
nduudu yeⁿ'e Dendyuūs naati véé
n'dúú'vī yā chí idi'vaachí yā ndís'tiī.
Ní neⁿ'e yā n'daaⁿ yā evangelio chí
nduudu ngai yeⁿ'e Cristo. ⁸Aara
chí s'uuúⁿ o 'áámá ángel chí ndaa
yeⁿ'e va'ai chēēti nguuvī ngaⁿ'a yā
táámá evangelio chí n'daaⁿ nguéé
tan'dúú'cā chí caⁿ'a 'nū chíi 'nū
ndís'tiī, tuuⁿ'mi 'iiⁿ'yāⁿ s'eeⁿ cuuvī
yā condenado. ⁹'Āā caⁿ'á chuū
maaⁿ ní neⁿ'é caaⁿ'maⁿ ntuúⁿ táámá
vmnéⁿ'ēe: Nduuti chí 'áámá 'iiⁿ'yāⁿ
caaⁿ'maⁿ yā táámá evangelio chí
n'daaⁿ nguéé tan'dúú'cā chí caⁿ'a
'nū chíi 'nū ndís'tiī, tuuⁿ'mi ní 'iiⁿ'yāⁿ
s'eeⁿ cuuvī yā condenado.
¹⁰Taachi ngaⁿ'á chuū, 'dē'e
inadacadíínuuⁿ nī nduucú? Nguéé
neⁿ'é chí cunee yiinú nī yeⁿ'é caati

ne^{ne}é chi Ndyuūs cunee yiinú yā ye^{ne}é. O ǵ'áá canee chi 'úú idííⁿ chi cunee yíínūu sa^{na} iⁿ'yee^{ne}dí 'cūū? Nduuti chi 'úú idííⁿ chiiⁿ ti inee yíínūu sa^{na} iⁿ'yee^{ne}dí 'cūū, tuu^mi ní nguéé idííⁿ ntiiⁿnyuⁿ ye^{ne}é Cristo.

Taacā chí chii Pablo apóstol

¹¹'Úú nga^{na}á cuaacu ní ngii ndís'tií hermanos ye^{ne}é. Nduudu ngai chí evangelio ye^{ne}é Jesucristo chí 'úú nga^{na}á, nguéé ye^{ne}é mar 'áámá sa^{na} ye^{ne}e iⁿ'yee^{ne}dí 'cūū. ¹²Ti 'úú nguéé sta'á nduudu miiⁿ ye^{ne}e sa^{na}, ndíí nguéé ndúú ch'eeéⁿ ye^{ne}é mar 'áámá sa^{na} caati Jesucristo chí'iⁿi yā 'úú nduudu cuaacu ye^{ne}é yā.

¹³Ndís'tií chí'iindiveéⁿ nī tan'dúúca chí 'úú i'teenú tiempo chí ch'ó'oo ní canee ch'eechí na religión ye^{ne}e 'iiⁿyāⁿ judíos chí Israel. Ní deenú nī taacā chí dííⁿ. Ní dííⁿ chí dícaānú 'iiⁿyāⁿ chí i'téenu yā Jesucristo ti ca^{na}á yā na yaācū ye^{ne}é Ndyuūs. Ní dííⁿ chuū ti ne^{ne}é can'daá 'iiⁿyāⁿ s'eeⁿ ye^{ne}e nducyáácá yaācū ye^{ne}é Ndyuūs ti ne^{ne}é d'icuiinú 'iiⁿyāⁿ s'eeⁿ. ¹⁴Ní chí'teenú más ca ye^{ne}e religión ye^{ne}e 'iiⁿyāⁿ chí ndaata ye^{ne}e Israel s'eeⁿ nguaaⁿ nducyaaca yā chí dáamá ndaata ye^{ne}é ndúúcu yā ti ne^{ne}é dííⁿ nducue^{ne}é tan'dúúca chí dííⁿ 'iiⁿyāⁿ ndiicūú chí 'āā n'díí. ¹⁵Naatí Ndyuūs ndeēve yā 'úú taachi 'āā cuéé 'cuundiyaáⁿ. Ní taachi ndaa tiempo chí Ndyuūs ne^{ne}e yā, Ndyuūs yaa'ví yā 'úú cáávā chí ne^{ne}é yā 'úú chí 'úú ng'iindiveéⁿ nduudu ye^{ne}é yā ní cu'teenú Ndyuūs. ¹⁶Ní Ndyuūs yaa'ví yā 'úú ye^{ne}é Daiyá yā Jesucristo chí 'úú i'teenú 'yā, ti 'úú ní caa^m máⁿ nduudu ye^{ne}e Cristo nguaaⁿ 'iiⁿyāⁿ

gentiles, 'iiⁿyāⁿ chí nguεε ye^{ne}e ndaata Israel. Ndíí tuu^mi nguéé tiinguuneéⁿ mar 'aama sa^{na} ye^{ne}e nduudu ye^{ne}é Cristo. ¹⁷Ndíí nguéé ndúú ndaá na yāāⁿ Jerusalén chí intiinguuneéⁿ apóstoles chí dich'ó'ó Ndyuūs vmnaaⁿ chí dich'ó'ó yā 'úú, naati 'úú che^{ne}é na yá^{na} Arabia. Ní cuayiiivi miiⁿ ní nguεεcuneeⁿ na yāāⁿ Damasco.

¹⁸Cuayiiivi chí cho'ó 'iinū nduūyū ndii tiempo chí 'āā i'teenú Jesucristo tuu^mi ní cue^{ne}é yāāⁿ Jerusalén tuu^mi n'diichí Pedro tí 'āā cuéé n'diichí sa^{na}. Ní canee ndúúcu sa ndíitiiⁿyuⁿ nguuvi. ¹⁹Yāāⁿ miiⁿ nguéé n'diichí táámá apóstol chí dich'ó'ó Ndyuūs. Dámaāⁿ n'diichí Jacobo sa^{na} 'diinū Jesús miiⁿ. ²⁰Chuū idinguúⁿ ye^{ne}e ndís'tií. 'Cuiⁿdíichí ndís'tií. 'Úú nguéé nga^{na}á nduudu yaadi ti Ndyuūs n'diichí yā 'úú ní deenú yā chí cuaacu nga^{na}á.

²¹Cuayiiivi ní ndaá na yā^{na}ā ye^{ne}e Siria ndúúcu yā^{na}ā Cilicia. ²²'Iiⁿyāⁿ ye^{ne}e yā^{na}ā Judea chí cue^{ne}é yā na yaācū naachi nge^{ne}é yā ye^{ne}e Cristo nguéé iitiinaáⁿ yā 'úú ti nguéé in'diichí yā 'úú. ²³'Iiⁿyāⁿ s'eeⁿ dámaāⁿ ng'iindiveéⁿ yā ye^{ne}é 'úú cuááⁿ vmnaaⁿ 'tíicā, 'iiⁿyāⁿ chí can'dáa yā s'uúúⁿ ti ne^{ne}é yā d'icuiinú yā s'uúúⁿ maaⁿ ní nga^{na} yā nduudu cuaacu ye^{ne}e Jesucristo. Cuááⁿ vmnaaⁿ nguéé ne^{ne}é yā chí 'iiⁿyāⁿ i'téenu yā nduudu cuaacu ye^{ne}e Jesucristo. ²⁴Ní ye^{ne}é chúú 'iiⁿyāⁿ s'eeⁿ dich'eté yā Ndyuūs caavā chí maaⁿ ní 'úú i'teenú Jesucristo.

Taná^{na} apóstoles dííⁿ yā aceptar Pablo chí 'áámá apóstol ndúúcu yā

2 Cho'oo ndiichi cúūuⁿ nduuyúú chí 'úú che^{ne}e ntuúⁿ yāāⁿ

Jerusalén. Cheⁿé ndúúⁿcū saⁿā Bernabé chi compañero yeⁿé ndúúⁿcū saⁿā Tito. ²Ní ndaaⁿ ti Ndyuūs ch'iⁿi yā 'úú chi canéé chi caⁿá. Vmnaáⁿ vmnaaⁿ caⁿá nanááⁿ apóstoles chi n'gēete yeⁿe yaācū miiⁿ. Ní chíí 'iiⁿyāⁿ s'eeⁿ taacā chi ngaⁿá nduudu ngai yeⁿe Cristo nanááⁿ 'iiⁿyāⁿ gentiles chi nguéé yeⁿe ndaata Israel. Chuū dííⁿ chí 'iiⁿyāⁿ s'eeⁿ cu'téenu yā chi dichí'vē ntiiⁿnyuⁿ yeⁿe Ndyuūs chi dííⁿ nguaaⁿ 'iiⁿyāⁿ gentiles. Ni apóstoles n'gēete nguéé caⁿa yā chi nguéé 'cuúⁿ yā 'úú. ³Ní apóstoles n'gēete ní canee yiinú yā ndúúⁿcū nduudu chi ngaⁿá. Ni saⁿā Tito chi saⁿā griego chi canéé sa nduucú, nguéé canee chi cuuví circuncidar Tito tan'dúúⁿcā chi ngaⁿa ley yeⁿe 'iiⁿyāⁿ Israel s'eeⁿ ti nguéé yeⁿe ndaata Israel. ⁴Chuū dííⁿ ti naachi nduuvidaama yú chí ndaaⁿ n'dé'í 'iiⁿyāⁿ chi dííⁿ yā tan'dúúⁿcā chi hermanos yeⁿe yú 'yā, naati nguéé 'tíicā. Ní ndaa yā chí n'diichí yā s'uuúⁿ caati 'āā cuéé dííⁿ yú tan'dúúⁿcā chi ngaⁿā ley yeⁿe circuncisión ti s'uuúⁿ ní yeⁿe Cristo s'uuúⁿ ní dííⁿ yú chi ngaⁿa Cristo. Neⁿé yā chi dííⁿ yú tan'dúúⁿcā chi ngaⁿa ley yeⁿe Moisés miiⁿ. ⁵Nús'uu ní nguéé dííⁿ 'nū tan'dúúⁿcā chi 'iiⁿyāⁿ s'eeⁿ neⁿé yā yeⁿe ley yeⁿe circuncisión caati neⁿé 'nū chi nduudu cuaacu chí 'āā ngaⁿá 'nū yeⁿe evangelio yeⁿe Señor Jesucristo, ní 'áámá cūnēe ndúúⁿcū ndís'tii. 'Tíicā dííⁿ 'nū.

⁶Apóstoles n'gēete yeⁿe yaācū miiⁿ nguéé de'ē vε más cā ca'cueéⁿ yā 'úú yeⁿe chí 'úú caaⁿ máⁿ. 'Áará chí n'gēete n'dai yā nguéé de'ē vεe tuneⁿ 'úú ti Ndyuūs neⁿe yā

nducyaaca 'iiⁿyāⁿ 'āā daamá nūⁿ. ⁷Apóstoles n'gēete yeⁿe yaācū 'āā deenú yā chí Ndyuūs dich'o'ó yā 'úú. 'Úú, Pablo, ngaⁿá nduudu ngai yeⁿe Cristo nanááⁿ 'iiⁿyāⁿ chí nguéé yeⁿe ndaata Israel. 'Tiicá ntúūⁿ deenú yā chí Ndyuūs dich'o'ó yā Pedro chí ngaⁿá yā nduudu ngai yeⁿe Cristo nguaaⁿ 'iiⁿyāⁿ yeⁿe ndaata Israel. ⁸Ti Ndyuūs yeⁿe yú ní nginnee yā Pedro miiⁿ chí ngaⁿa nduudu cuaacu yeⁿe yā nguaaⁿ 'iiⁿyāⁿ Israel s'eeⁿ chí dííⁿ yā tan'dúúⁿcā chí ngaⁿā ley yeⁿe circuncisión. Maaⁿ Señor miiⁿ nginnee yā 'úú chí caaⁿ máⁿ nduudu yeⁿe yā nguaaⁿ 'iiⁿyāⁿ chí nguéé yeⁿe ndaata Israel. Ní nguéé véé ley yeⁿe circuncisión yeⁿe yā.

⁹Apóstoles n'gēete yeⁿe yaācū chí Jacobo ndúúⁿcū Pedro ndúúⁿcū Juan ní deenu ntúūⁿ yā chí Ndyuūs din'daacá yā nduucú chí 'úú idiíⁿ ntiiⁿnyuⁿ yeⁿe apóstol nguaaⁿ 'iiⁿyāⁿ chí nguéé yeⁿe ndaata Israel. Tuu'mi ní sta'á yā tá'á cuaacú 'nū ní nduuvidaama nduudu yú nanááⁿ Ndyuūs ti 'úú ndúúⁿcū Bernabé ní caaⁿ máⁿ 'nū nduudu cuaacu yeⁿe Jesucristo nanááⁿ 'iiⁿyāⁿ gentiles ní 'iiⁿyāⁿ s'eeⁿ nanááⁿ 'iiⁿyāⁿ yeⁿe ndaata Israel. ¹⁰Ní ngaⁿá yā ngii yā nús'uu chí n'gáácú 'nū yeⁿe hermanos chí véé necesidades yeⁿe yā. 'Úú ntúūⁿ ní ngaⁿá, 'tíicā.

Pablo caⁿa cheechi yā ndúúⁿcū Pedro

¹¹Ndaá 'nū na yáāⁿ Antioquía ní taachí ndaa Pedro miiⁿ na yáāⁿ Antioquía 'úú ní caⁿa cheēchí ndúúⁿcū sa yáāvēnaaⁿ sa nanááⁿ 'iiⁿyāⁿ s'eeⁿ ti Pedro miiⁿ nguéé idiíⁿ sa tan'dúúⁿcā chí deenu sa chí canee chí dííⁿ sa. ¹²Ti taachi 'āā

cuéé ndaa saⁿá s'eeⁿ chi dichólo Jacobo yeⁿé yááⁿ Jerusalén, Pedro miiⁿ ní che'é sa ndúúcu 'iiⁿyāⁿ gentiles chi hermanos yeⁿe yú. Ní taachi ndaa saⁿá s'eeⁿ tuuⁿmi áā ntéé che'e sa ndúúcu 'iiⁿyāⁿ gentiles chi hermanos yeⁿe yú ti 'va'a sá yeⁿé 'iiⁿyāⁿ yeⁿé sa chi yeⁿé ndaata Israel chi díⁿ yā tan'dúúca chi ngaⁿa ley yeⁿe circuncisión. ¹³Ní tanáⁿá hermanos chi yeⁿé ndaata Israel díⁿ yā tan'dúúca chi ídiiⁿ Pedro miiⁿ. 'Tiicá ntúūⁿ Bernabé díⁿ yā chi maaⁿ ní 'āā ntéé che'é yā ndúúcu 'iiⁿyāⁿ gentiles. 'Tiicá nducyaaca yā díⁿ yā 'áará chi deenú yā chi n'daacā chi che'é yā ndúúcu 'iiⁿyāⁿ gentiles. ¹⁴Taachi n'diichí chi 'iiⁿyāⁿ s'eeⁿ nguéé din'daacā yā ti nguéé che'é yā ndúúcu 'iiⁿyāⁿ gentiles chi hermanos yeⁿe yú tan'dúúca chi ngaⁿa nduudu cuaacu yeⁿe Cristo, tuuⁿmi ní 'úú Pablo caⁿá chi Pedro miiⁿ nanááⁿ nducyaaca yā 'túúca: Díí chi saⁿá Israel, díí chí maaⁿ ní nguéé díⁿ di tan'dúúca chi ngaⁿa ley yeⁿe Israel ti maaⁿ ní i'téenu di Cristo, táacā cúúví chí nguéé che'e di ndúúcu hermanos yeⁿe yú chi 'iiⁿyāⁿ gentiles ní díⁿ di chi 'iiⁿyāⁿ s'eeⁿ nadacadínnuⁿ yā chi cánéé chí díⁿ yā tan'dúúca chi ngaⁿa ley yeⁿe 'iiⁿyāⁿ Israel chi judíos.

'Iiⁿyāⁿ Israel s'eeⁿ dáámá yā ndúúcu tanáⁿá 'iiⁿyāⁿ yeⁿe iⁿ'yeeⁿdí 'cūū nánguaⁿai yā caavā chi i'téenu yā Jesucristo

¹⁵Ní s'uúúⁿ ní 'iiⁿyāⁿ Israel s'uúúⁿ ti 'tíicā ch'etiyáaⁿ yú ní nguéé díⁿ nuuⁿndí yú daama tan'dúúca chi díⁿ tanáⁿá 'iiⁿyāⁿ gentiles chi nguéé

yeⁿe ndaata yeⁿe yú. ¹⁶Ní s'uúúⁿ chi 'iiⁿyāⁿ Israel deenu yú chi Ndyuūs nguéé nadach'εεcú yā nuuⁿndi yeⁿe yú ti idiiⁿ yú dámaaⁿ chi ngaⁿa ley yeⁿe yú. 'Tiicá ntúūⁿ Ndyuūs nguéé nadach'εεcú yā nuuⁿndi yeⁿe nducyaaca 'iiⁿyāⁿ yeⁿe iⁿ'yeeⁿdí 'cūū ti díⁿ yā dámaaⁿ tan'dúúca chi ngaⁿa ley yeⁿe Moisés. Ndyuūs nadach'εεcú yā nuuⁿndi yeⁿe 'iiⁿyāⁿ chi i'téenu yā Jesucristo. Cáávā chuū s'uúúⁿ ní i'teenu yú Jesucristo ní Ndyuūs nadach'εεcú yā nuuⁿndi yeⁿe yú. Ti cucáávā ley yeⁿe yú mar 'áámá 'iiⁿyāⁿ chi díⁿ yā chi ngaⁿa ley miiⁿ cuuví yā perdonado, ti nguéé nadach'εεcú ley miiⁿ nuuⁿndi yeⁿé yā.

¹⁷S'uúúⁿ ní i'téenu yú Jesucristo chi Jesucristo miiⁿ nadach'εεcú yā nuuⁿndi yeⁿe yú. 'Tíicā s'uúúⁿ ní ch'iⁿi yú chi dinuuⁿndi yú tan'dúúca tanáⁿá 'iiⁿyāⁿ yeⁿe iⁿ'yeeⁿdí 'cūū. Maaⁿ ní, 'áá cuaacu chi Cristo nginneé yā s'uúúⁿ ti idinuuⁿndi yú? Nguéé 'tíicā. ¹⁸Nduuti chi s'uúúⁿ nadi'tuuvi yú 'áámá cosa chi ley yeⁿe yú ní 'cuiinuu ní nadin'dái ntúūⁿ yú ley miiⁿ chi n'giindiveeⁿ yú yeⁿé, tuuⁿmi ní dinuuⁿndi yú. ¹⁹Vmnááⁿ vmnaaⁿ idiiⁿ yú tan'dúúca chi ngaⁿa ley yeⁿé yú naati nguéé ngii idiiⁿ yú nducuéⁿé yeⁿé. Ní ley miiⁿ díⁿ condenar s'uúúⁿ. Ní canee yú tan'dúúca 'iiⁿyāⁿ chi 'āā ví'í cā yeⁿé ley yeⁿe yú. Cáávā chuū ní maaⁿ ní ch'etinéé yú tan'dúúca chi neⁿe Ndyuūs. Ní Ndyuūs nadach'εεcú yā yeⁿé yú yeⁿe nuuⁿndi yeⁿe yú. Ní cáávā chuū cunduuchi yú cueⁿe daāⁿmaⁿ. ²⁰Taachi ca'neeⁿngaⁿá yā Cristo, tuuⁿmi ní cánéé tan'dúúca

chi 'úú ntúúⁿ ca'neeⁿnga'á nduucú yā. Maaⁿ ní nguéé idííⁿ tan'dúúcā chi 'úú neⁿé ti idííⁿ chiiⁿ chi neⁿé Jesucristo ti Jesucristo chi daiya Dendyuūs canéé yā na staava yeⁿé. Ní maaⁿ ní 'úú canduuchí ti i'teenú Daiyá Ndyuūs miiⁿ. Cristo miiⁿ dinéⁿe yā 'úú ní ca'a maáⁿ yā vida yeⁿe maáⁿ yā ní ch'ií yā caavā 'úú. ²¹Úú nguéé cuta'á vaadi n'dai yeⁿe Ndyuūs tan'dúúcā 'áámá cosa chiduuchi. Nduuti chi ley miiⁿ cuuví nach'εεcú nuuⁿndi yeⁿe yú tuuⁿmi ní nguéé ch'ií Cristo cucáávā s'uuúⁿ.

¿Áá i'teenu yú ley miiⁿ o
i'teenu yú Cristo?

3 Ndís'tií 'iiⁿyāⁿ yeⁿe yáⁿáa Galacia, de'ε chúúcā chεεchi tííⁿ nī. ¿Dú'ú chi nche'ei ndís'tií chi maaⁿ ní nguéé n'giindiveéⁿ nī nduudu cuaacu? Ngaⁿá nduudu cuaacu nanááⁿ ndís'tií ní ndís'tií déénu nī chi iiⁿyāⁿ chi'neeⁿnga'á yā Jesucristo na cruz cucáávā nuuⁿndi yeⁿe nducyaaca 'iiⁿyāⁿ. ²Chuū neⁿé chi 'cuuvi nī 'úú: ¿Áá sta'á nī Espíritu N'dai yeⁿé Ndyuūs cucáávā chi dííⁿ nī tan'dúúcā chi ngaⁿā ley yeⁿé Moisés, o cucáávā chi n'giindiveéⁿ nī nduudu cuaacu yeⁿé Ndyuūs ní i'téenu nī? ³¿De'ε chúúcā chεεchi tííⁿ nī? Áá i'téenu nī nduudu yeⁿé Ndyuūs nī sta'á nī Espíritu N'dai yeⁿé Ndyuūs. Maaⁿ ní neⁿé nī ndúúcū fuerzas yeⁿe maáⁿ nī dííⁿ nī tan'dúúcā chi ngaⁿa ley caati Ndyuūs cuuvi n'diichí yā chi n'daacā idííⁿ nī. ⁴Áá ch'eenu taaví nī chií cucáávā chi i'téenu nī Cristo. Maaⁿ ní chuū nguéé dichíí'vē ndís'tií, nduuti chi nadacadaamí nī yeⁿe

yā. Áá deenú chi dichíí'vē ndís'tií nduuti chi 'cuetinéé nī ndúúcū Cristo. ⁵Ndyuūs tee yā ndís'tií Espíritu N'dai yeⁿé Ndyuūs ní dííⁿ yā vaadi n'giinu nguaaⁿ ndís'tií. ¿Áá dííⁿ Ndyuūs chuū caati ndís'tií 'āā dííⁿ nī tan'duucā chi ngaⁿa ley? Nguεε 'tíicā. Ndyuūs dííⁿ yā vaadi n'giinu nguaaⁿ ndís'tií caati i'téenu nī nduudu cuaacu yeⁿé yā.

⁶Ndii cuááⁿ vmnaaⁿ nduudu yeⁿé Ndyuūs ngaⁿa yeⁿe Abraham chi 'āā n'dii. Abraham chi'téenu yā Ndyuūs ní Ndyuūs dííⁿ cuenta yā chi'téenu Abraham ní nadach'εεcú yā nuuⁿndi yeⁿé yā. ⁷Cáávā chuū deenu nī chi 'iiⁿyāⁿ chi i'téenu yā nduudu yeⁿé Ndyuūs, cuaacu nííⁿnyúⁿ ní yeⁿe ndaata Abraham, caati i'téenu yā tan'dúúcā chi'téenu Abraham miiⁿ. ⁸Ndii cuaaⁿ vmnaaⁿ canéé nguūⁿ na libro yeⁿe Ndyuūs chi Ndyuūs caⁿá yā nadach'εεcú yā nuuⁿndi yeⁿe 'iiⁿyāⁿ gentiles chi nguéé yeⁿe ndaata Abraham o Israel nduuti chi i'téenu yā Ndyuūs. Chuū Ndyuūs ngaⁿá yā ngii yā Abraham ndii tiempo chi 'āā ch'ó'oo, vmnaaⁿ chi dííⁿ yā. 'Tíicā ngaⁿa Ndyuūs ndúúcū Abraham: 'Úú caaⁿmáⁿ chi di'viicú 'iiⁿyāⁿ yeⁿe nuuⁿmáⁿ íⁿyeēⁿdí nduuti chi cu'téenu yā 'úú tan'dúúcā chi díí i'téenu di 'úú. ⁹Tan'dúúcā Abraham chi'téenu yā Ndyuūs ní Ndyuūs ca'a yā Abraham vaadi n'dai yeⁿé yā ní 'tiicá ntúúⁿ Ndyuūs ca'a yā vaadi n'dai yeⁿé yā nducyáácá 'iiⁿyāⁿ chi cu'téenu yā Ndyuūs.

¹⁰Nducyáácá 'iiⁿyāⁿ chi nadacadíínuuⁿ yā na staava yeⁿe yā chi Ndyuūs nadach'εεcú yā nuuⁿndi yeⁿe yā ti dííⁿ yā tan'dúúcā chi

ngaⁿa ley miiⁿ 'iiⁿyāⁿ s'eeⁿ nan'dai yā ní cánéé yā condenado, ti mar 'áámá 'iiⁿyāⁿ cuuvi dííⁿ yā nducuéⁿē chi ngaⁿa ley miiⁿ. Canéé nguūⁿ ndii cuááⁿ vmnaaⁿ na libro yeⁿé Ndyuūs 'tíicā: 'Iiⁿyāⁿ chi nguéé dííⁿ yā tanducuéⁿē chi canéé nguūⁿ na ley yeⁿe Moisés chii yā condenado. ¹¹S'uuúⁿ ní deenu yú chi Ndyuūs nguéé nadach'εécú yā nuuⁿndi yeⁿé 'iiⁿyāⁿ caava chi diiⁿ yā chi ngaⁿa ley ti 'tíicā canéé nguūⁿ na libro yeⁿé Ndyuūs: Ndyuūs nadach'εécú yā nuuⁿndi yeⁿé 'iiⁿyāⁿ chi i'téénu yā ní ca'a yā 'iiⁿyāⁿ s'eeⁿ vida cueⁿe daāⁿmaⁿ. ¹²Ní ley yeⁿe Moisés miiⁿ ní nguéé ngaⁿa chi 'iiⁿyāⁿ cu'téénu yā Jesucristo caati 'tíicā canéé nguūⁿ na libro yeⁿe Dendyuūs ndii cuááⁿ vmnaaⁿ: 'Iiⁿyāⁿ chi diiⁿ tanducuéⁿē dendu'ū chi ngaⁿa ley miiⁿ 'cuεetinée yā ndúúcu vida cueⁿe daāⁿmaⁿ.

¹³Cucáávā ley miiⁿ deenu yú chi diiⁿ yú nuuⁿndi ní canee yú condenado. Ní nguéé canee yú condenado cáávā ley miiⁿ ti Jesucristo dííⁿ yā tan'dúúccā chí canéé yā condenado. Ní sta'á yā lugar yeⁿe nducyaaca 'iiⁿyāⁿ chi véé nuuⁿndi yeⁿé yā ní can'diicú yā na cruz. 'Tíicā canéé nguūⁿ na libro yeⁿé Ndyuūs: Condenado taanduvéé 'iiⁿyāⁿ chi ch'ii tí can'diicú yā na 'áámá yáⁿá. ¹⁴Chuū chí chii. Maaⁿ níicú 'iiⁿyāⁿ gentiles cuuvi diiⁿ yā recibir vaadi n'dai yeⁿé Dendyuūs tan'dúúccā Ndyuūs ca'a yā ndúúcu Abraham, ni chi ca'a yā nducyaaca 'iiⁿyāⁿ gentiles chi i'téénu yā Jesucristo. Íicú s'uuúⁿ ndúúcu 'iiⁿyāⁿ gentiles chi i'teenu yú Jesucristo cuta'a yú Espíritu N'dai yeⁿe

Ndyuūs chi Ndyuūs ca'a yā chi ca'a yā 'iiⁿyāⁿ.

**Ley yeⁿe Moisés ndúúcu
compromiso chi Ndyuūs ca'a yā**

¹⁵Ndíst'ii hermanos yeⁿé, n'diichí nī tan'dúúccā 'aama ejemplo yeⁿe 'iiⁿyāⁿ yeⁿe iⁿ'yeeⁿdí 'cūū tan'dúúccā chí idiíⁿ yā taachi véé papel chí cuaacu yeⁿe 'áámá compromiso yeⁿé yā. Caneé ngiinú yā ní dinguúⁿ yā 'aama papel chí cuaacu. Maaⁿ ní chí canéé nguūⁿ ní cuaacu chí mar 'áámá 'iiⁿyāⁿ nguεε nadivíi yā ndíí nguéé ndúú íintiinee ra yā chiiⁿ chí canéé nguūⁿ. ¹⁶Tíicā ntúūⁿ, Ndyuūs ndii vmnááⁿ vmnaaⁿ ca'a yā promesa Abraham ndúúcu nducyaaca 'iiⁿyāⁿ ndaata yeⁿe yā chí cuchií cuayiivi. Canéé nguūⁿ na libro yeⁿe Ndyuūs 'tíicā: Nguéé ngaⁿa yeⁿé ndaata chi n'dee n'dái yeⁿe Abraham tan'dúúccā chí 'yaaⁿ yā ti ngaⁿa tan'dúúccā chí yeⁿe 'aama 'iiⁿyāⁿ yeⁿe Abraham ní 'iiⁿyāⁿ miiⁿ chí Jesucristo. ¹⁷Chuū ngaⁿá cuaacu yeⁿe compromiso chí idi'cuaacu yā cáávā Cristo: Ndyuūs dííⁿ yā 'áámá compromiso ndúúcu Abraham chí canéé nguūⁿ. Cho'oo cuūⁿ ciento canee ndiicú ndíichí nduuyū ní Ndyuūs ca'a yā ley Moisés. Ley miiⁿ nguéé cuuvi divíi 'aama lado compromiso yeⁿe Ndyuūs chí ca'a yā vmnááⁿ vmnaaⁿ ní diiⁿ chí nguéé dichíí'vε compromiso yeⁿé yā. ¹⁸Ndúúti chí Ndyuūs tée yā chí cuuvi yeⁿé yú cáávā chí diiⁿ yú tan'dúúccā chí ngaⁿa ley miiⁿ tuu'mi ní 'āā ntéé tée yā chí cuuvi yeⁿé yú cáávā compromiso. Ndyuūs ca'a yā Abraham chí cuuvi yeⁿé yā cáávā compromiso chí dííⁿ yā ndúúcu yā.

¹⁹¿De'ē dichíí'vε ley tuu'mi? Ndyuūs ca'a yā 'iiⁿyāⁿ ley miiⁿ chí cuuvi deenu yú chí véé nuuⁿndi

yeⁿe yú. Ní ley miiⁿ canee ndii tiempo chí ndaā Cristo Daiya Dendyuūs iⁿ'yeeⁿdí 'cūū. Cristo miiⁿ 'iiⁿ'yāⁿ yeⁿe compromiso chi Ndyuūs caⁿa yā chí ca'a yā. Ndyuūs dich'ó yā ángeles chí ca'a yā ley Moisés. Moisés miiⁿ ní saⁿā chí canee naavtaⁿā yeⁿ'é 'iiⁿ'yāⁿ ndúú^{cū} Ndyuūs. ²⁰Taachi Ndyuūs ca'á yā compromiso ndúú^{cū} Abraham, nguéé cānee 'aama saⁿā naavtaⁿā yeⁿ'é yā ndúú^{cū} Abraham, nguéé ti tan'dúú^{cā} Moisés miiⁿ.

Yeⁿe chí diiⁿ ley yeⁿe Moisés

²¹¿Áá ley miiⁿ contra compromiso yeⁿe Dendyuūs? Nguéé 'tíicā. Nduuti chí Ndyuūs cuuvi ca'a yā 'áámá ley chí cuuvi ca'a vida cueⁿe daāⁿmaⁿ 'iiⁿ'yāⁿ, tuu'mi ní 'āā ntéé vee nuuⁿndi yeⁿ'é 'iiⁿ'yāⁿ caavā ley miiⁿ. ²²Naati canéé nguūⁿ na libro yeⁿ'é Ndyuūs chí nducyáácá 'iiⁿ'yāⁿ véé nuuⁿndi yeⁿ'e yā ti nguéé diiⁿ yā cumplir ley miiⁿ. Cáávā chuū canéé chí i'téenu yú Jesucristo ní Ndyuūs cuuvi téé yā s'uuúⁿ vida cueⁿe daāⁿmaⁿ cucáávā compromiso miiⁿ.

²³Taachi 'āā cuéé ndaā Jesucristo caavā chí cuuvi cu'téenu yú Jesucristo, tuu'mi ní ch'etinéé yú maaⁿ poder yeⁿ'e ley. 'Tíicā ch'etinéé yú ndíí tiempo chí Ndyuūs dich'ó yā Jesucristo na iⁿ'yeeⁿdí 'cūū ní 'íicú cuuvi cu'téenu yú Jesucristo. ²⁴Ley miiⁿ canee tan'dúú^{cā} criada yeⁿ'e s'uuúⁿ chí diiⁿ cuidado s'uuúⁿ ndíí tiempo chí ndaā Cristo. Maaⁿ ní cucáávā chí i'téenu yú Jesucristo tuu'mi ní Ndyuūs nadich'εécú yā nuuⁿndi yeⁿ'e yú. ²⁵Ní taachi ndaā Jesucristo miiⁿ ní i'teenu yú 'yā, nguéé canee yú maaⁿ

poder yeⁿ'e ley miiⁿ chí ley miiⁿ nguéé diiⁿ cuidado s'uuúⁿ.

²⁶Maaⁿ ní nducyaaca yú ní daiya Dendyuūs s'uuúⁿ caavā chí i'teenu yú Jesucristo. ²⁷Caati nducyaaca yú chí ch'edínuūⁿni ti i'teenu yú Jesucristo, s'uuúⁿ ní canee yú tan'dúú^{cā} chí véé vestido ngai yeⁿ'é yú ní canee yú tan'dúú^{cā} Jesucristo ti yeⁿ'é yā s'uuúⁿ. 'Tíicā s'uuúⁿ.

²⁸Maaⁿ ní nguéé de'ē vee ndíí nduuti chí s'uuúⁿ ní 'iiⁿ'yāⁿ yeⁿ'e ndaata Israel, o 'iiⁿ'yāⁿ yeⁿ'e ndaata griego, o criada chí yeⁿ'é 'áámá patrón, o 'iiⁿ'yāⁿ chí libre yā, o saⁿā o n'daataá ti nducyaaca s'uuúⁿ ní tan'dúú^{cā} 'áámá s'uuúⁿ nūuⁿ cucáávā chí i'teenu yú Jesucristo ní yeⁿ'é Cristo s'uuúⁿ. ²⁹Ndúú^{ti} chí s'uuúⁿ ní yeⁿ'é Cristo s'uuúⁿ tuu'mi ní s'uuúⁿ ní yeⁿ'e ndaata Abraham s'uuúⁿ, ní véé chí cuuvi yeⁿ'e yú yeⁿ'é compromiso ti 'tíicā Ndyuūs caⁿa yā ndúú^{cū} Abraham chí téé yā s'uuúⁿ.

4 Maaⁿ ní neⁿ'é caaⁿ'máⁿ chuū ndís'tií yeⁿ'e 'áámá saⁿā n'gaiyāá chí véé chí cuuvi yeⁿ'e sa. Taachi saⁿā 'lífⁿ sa canee sa tan'dúú^{cā} 'aama mozo ni idiⁿ' sa chíiⁿ chí ngaⁿā 'iiⁿ'yāⁿ chí ch'etinéé yā ná vaacu sa. 'Áará chí vee chí cuuvi yeⁿ'e sa nducuéⁿ'ē. ²Saⁿā 'lífⁿ sa canee sa ndúú^{cū} 'iiⁿ'yāⁿ chí diiⁿ cuidado yeⁿ'é sa ní ndúú^{cū} 'iiⁿ'yāⁿ chí ngaⁿ'a ntiⁿ'nyuⁿ yeⁿ'e nducuéⁿ'ē chí yeⁿ'é sa. 'Tíicā canee sa ndii tiempo chí ngaⁿā chíida sa ní véé nduuyu yeⁿ'é sa. Tuu'mi ní 'iiⁿ'yāⁿ ca'a yā nducuéⁿ'ē chí cuuvi yeⁿ'é sa. ³'Tiicá ntúūⁿ s'uuúⁿ Taachi nguéé deenu yú yeⁿ'e Cristo, tuu'mí ní canee yú tan'dúú^{cā} n'gaiyāá yú chí nguéé iincheenaⁿ yú. Ní canee yú

maaⁿ poder yeⁿe ley yeⁿe yú ní diiⁿ
 yú chi ngaⁿá ley yeⁿe yú ndúúcū
 costumbre yeⁿe yú. ⁴Taachi snuūⁿ
 ca'ā nguuvi miiⁿ Ndyuūs dichó'o
 yā Daiya yā iⁿyeeⁿdí'cūū. Ní
 chi'indiyáaⁿ yā yeⁿe'ē 'áámá n'daataá
 chi yeⁿe'ē ndaata Israel, yeⁿe'ē 'iiⁿyāⁿ
 chi diíⁿ yā chí ngaⁿa ley yeⁿe
 Moisés. ⁵Ní saⁿā miiⁿ ní ndaā sa
 ní nadanguáⁿai sa s'uuúⁿ chí 'iiⁿyāⁿ
 Israel s'eeⁿ chi snéé yú ndúúcū ley
 yeⁿe'ē Ndyuūs ndúúcū 'iiⁿyāⁿ gentiles
 ndúúcū costumbres yeⁿe'ē yā, 'iiⁿyāⁿ
 s'eeⁿ chi nguéé yeⁿe'ē ndaata Israel,
 níícú nducyaaca yú cuuvi daiya sa
 s'uuúⁿ.

⁶Maaⁿ ní nducyaaca s'uuúⁿ ní
 daiya Ndyuūs s'uuúⁿ. Ní Ndyuūs
 dicho'ó yā Espíritu yeⁿe'ē Daiya
 yā chi Cristo na staava yeⁿe yú.
 Espíritu miiⁿ chí'íⁿ chí diíⁿ chi cuuvi
 caaⁿmaⁿ yú 'tíicā: N'dii Ndyuūs
 Chiidá. ⁷Maaⁿ ní s'uuúⁿ nguéé
 tan'dúúcā mozos s'uuúⁿ ti daiyá
 Dendyuūs s'uuúⁿ. Ní ndúúti chi
 daiyá yā s'uuúⁿ tuu'mí Ndyuūs caⁿa
 yā ca'a yā s'uuúⁿ chi cuuvi yeⁿe yú
 tan'dúúcā chi ngaⁿa yā ti i'teenu yú
 Cristo.

**Pablo idiíⁿ yā cuidado yeⁿe
 'iiⁿyāⁿ chi i'téenu Jesucristo**

⁸Vmnááⁿ vmnaaⁿ taachi nguée
 n'diichí nī Ndyuūs, ndís'tií chi
 nguéé yeⁿe'ē 'iiⁿyāⁿ yeⁿe'ē ndaata
 Israel díⁿ nī ntiíⁿnyuⁿ caavā ídolos
 chi nguéé dendyuūs s'eeⁿ. ⁹Maaⁿ
 ní chi n'diichí nī Ndyuūs o más cā
 n'daacā chi caaⁿmáⁿ chi Ndyuūs
 chi n'diichí yā ndís'tií chi yeⁿe'ē
 yā taacā chi maaⁿ ní nguécúndii
 ntúúⁿ nī ní neⁿe'ē nī díⁿ nī dendúú
 cosas chi nguéé cuuvi nanguaⁿai

yú. Dé'ē cuuvi chi neⁿe'ē nī cunée nī
 tan'duucā 'áámá mozo yeⁿe'ē cosas
 chi 'tíicā. ¹⁰Ndís'tií ní di'viicú nī
 nguuvi s'eeⁿ, ndúúcū 'iiyū, ndúúcū
 tiempo, ndúúcū nduūyū ti neⁿe'ē
 nī caⁿá nī favor yeⁿe'ē Ndyuūs.

¹¹Ndís'tií hermanos yeⁿe'ē, 'va'á yeⁿe
 ndís'tií ti nguéé dichí'vē nduudu
 cuaacu chi ngaⁿá nguaaⁿ ndís'tií.

¹²Ndís'tií hermanos yeⁿe'ē di'cuiitú
 nī chi diíⁿ nī tan'dúúcā chi 'úú
 idiíⁿ, ní divíi nī yeⁿe'ē ley ti 'úú
 divíi yeⁿe'ē ley miiⁿ ti neⁿe'ē díⁿ
 tan'dúúcā ndís'tií chi nguéé deenú
 nī ley. Taachí ngaⁿá nduudu cuaacu
 nguaaⁿ ndís'tií, ndís'tií ní din'dái
 nī nduucú. ¹³Ndís'tií deenu nī chi
 vmnááⁿ vmnaaⁿ chi'cueéⁿ ndís'tií
 nduudu yeⁿe'ē Ndyuūs ní ngíitā
 'úú. ¹⁴Ndís'tií nguéé taanduvéé díⁿ
 nī nduucú chi nguéé neⁿe'ē nī 'úú
 cáávā ca'ai chi canuuⁿ 'úú chi idiíⁿ
 sufrir. Ní 'cuuⁿ nī 'úú ní sta'a nī 'úú
 tan'dúúcā chi 'úú 'áámá ángel yeⁿe'ē
 Dendyuūs chi ndaā nanááⁿ ndís'tií.
 Ní sta'á nī 'úú tan'dúúcā chi 'úú ní
 Cristo 'úú. ¹⁵¿Dé'ē cuuvi chi maaⁿ
 ní nguéé yeenú nī nduucú ní nguéé
 neⁿe'ē nī 'úú? 'Úú ngaⁿá nduudu
 cuaacu chi vmnááⁿ vmnaaⁿ neⁿe'ē
 nī 'úú ti nduuti chí cuuvi tun'dáa nī
 nduutinaáⁿ nī maáⁿ nī chi téé nī 'úú.
¹⁶Maaⁿ ní 'áá enemigo yeⁿe'ē nī 'úú ti
 ngii chéechí ndís'tií nduudu cuaacu.
¹⁷Véé 'iiⁿyāⁿ chi ndaā nguaaⁿ
 ndís'tií chi ngaⁿá yā chi neⁿe'ē yā
 ndís'tií naati nguée n'daacā idiíⁿ yā.
 Neⁿe'ē yā chi ndaacadáámí ndís'tií
 yeⁿe'ē nduudu cuaacu ní 'caandiveéⁿ
 nī yeⁿe'ē 'iiⁿyāⁿ. ¹⁸N'dáácā chi 'iiⁿyāⁿ
 ngaⁿa yā chi neⁿe'ē yā ndís'tií nduuti
 chí díⁿ yā chi n'daacā ndúúcu nī. Ní
 'iiⁿyāⁿ s'eeⁿ ní díⁿ yā 'túúcā nguéé

dámaāⁿ taachi 'úú caneé nguaaⁿ ndís'tiī. ¹⁹Ndís'tiī hermanos yeⁿ'é, ndís'tiī tan'dúúcā daiyá 'tíicā ndís'tiī. Ti taachi ngaⁿ'á nduudu cuaacu nanááⁿ ndís'tiī, 'úú díiⁿ sufrir tan'dúúcā 'aama n'daataa diiⁿ tá sufrir taachi ch'iindiyaāⁿ dacadá'āa. 'Tíicā idiíⁿ ndii tiempo chi i'téenu nī Jesucristo ní yeⁿ'é yā ndís'tiī. 'Tíicā idiíⁿ sufrir taama vmne^m'ēe ti neⁿ'é chi ndís'tiī ch'iⁿ'í nī chi cuaacu níiⁿnyúⁿ i'téenu nī Cristo. ²⁰Maaⁿ ní neⁿ'é cuneé ndúúcu ndís'tiī ní cunnee ndís'tiī ti nguéé deenú táácā cuuvi díiⁿ nduucú ndís'tiī taachi yaⁿ'ái caneé yeⁿ'e nī.

'Áámá ejemplo chi historia yeⁿ'ē n'daataa Agar ndúúcu n'daataa Sara

²¹Ndís'tiī chi neⁿ'é nī canee nī ndúúcu ley yeⁿ'e Moisés, 'cuuvi nī 'úú: ¿Áá nguéé déenu nī chi ngaⁿ'a ley miiⁿ? ²²Canee nguūⁿ na libro yeⁿ'é Ndyuūs chi Abraham ní véé 'uūvi daiya yā. 'Aama daiya yā ní yeⁿ'e táⁿ'ā chi canee caadi 'iīyū. Ní táámá daiya yā ní yeⁿ'ē n'daataa yeⁿ'e yā chi nguéé criada. ²³Daiya yā chi yeⁿ'e táⁿ'ā chi canee caadi 'iīyū ch'iindiyaāⁿ sa ti Abraham neⁿ'e yā daiya yā. Naati táámá daiya táámá n'daataá chi n'daataá yeⁿ'é yā, ch'iindiyaāⁿ sa cucáávā compromiso chi díiⁿ Ndyuūs. Ní maaⁿ níicú chiī compromiso chí caⁿ'a Ndyuūs chí ca'a yā daiya Abraham. ²⁴Chuū ní 'áámá historia ní 'áámá comparación yeⁿ'e táⁿ'ā criada miiⁿ ndúúcu táⁿ'ā chi n'daataa yeⁿ'e Abraham. Ndyuūs díiⁿ yā contratar cucáávā nduu 'uuvi cosas chi Ndyuūs cānee yiinú yā chi diiⁿ yā. Táⁿ'ā criada miiⁿ

ní nguuvi tá Agar ní 'áámá seña tan'dúúcā chi Ndyuūs cānee yiinú yā ní ca'a yā ley Moisés miiⁿ na 'cuēeti Sinaí. Nducyaaaca 'iiⁿ'yāⁿ chi caneé yā maaⁿ poder yeⁿ'e ley miiⁿ tan'dúúcā criada yeⁿ'e ley 'tíica yā. Ní tan'dúúcā criada Agar ndúúcu daiyá yā canee caadi 'iīyū, 'tíica yā. ²⁵Ndyuūs ch'iⁿ'í yā s'uuúⁿ chi Agar miiⁿ ní 'áámá seña tan'dúúcā chi 'cuēeti Sinaí na yáⁿ'āa Arabia 'tíica yā. 'Tiicā ntúūⁿ táámá seña tan'dúúcā 'iiⁿ'yāⁿ Israel s'eeⁿ chi ye'e yáāⁿ Jerusalén ti 'iiⁿ'yāⁿ yeⁿ'e yáāⁿ Jerusalén miiⁿ canee yā maaⁿ poder yeⁿ'e ley yeⁿ'e Moisés. Ní canee yā tan'dúúcā criados yeⁿ'ē ley miiⁿ. ²⁶Naati Ndyuūs ch'iⁿ'í yā s'uuúⁿ chi n'daataa chi nguuvi Sara chi nguéé criada ní 'áámá seña tan'dúúcā chí yáāⁿ Jerusalén chí ngai chí canee na va'ai cheēti nguuvi. Ní yáāⁿ yeⁿ'e nducyaaaca yú chi i'teenu yú Jesucristo. ²⁷Canee nguūⁿ ndii cuááⁿ vmnaaⁿ na nduudu yeⁿ'é Ndyuūs, 'tiicā:

Ndís'tiī n'daata s'eeⁿ chi nguéé chiīndi daiyá nī cuuvi yeenu taavi nī. Ní 'cuai nī ní caaⁿ'máⁿ nī ndúúcu vaadi yeenú 'aara chi nguéé véé daiya nī. Ti ndís'tiī chi libre chi nguéé daiyá nī cuuvi más ca daiyá nī nguéé ti n'daataa criada chí véé daiyá yā yeⁿ'e isaⁿ'ā yeⁿ'é nī.

²⁸Ndís'tiī hermanos yeⁿ'é, 'tíicā s'uuúⁿ tan'dúúcā daiya chí nguuvi Isaac chí yeⁿ'ē Abraham ndúúcu Sara 'tíicā s'uuúⁿ. Ní Ndyuūs tee yā compromiso s'uuúⁿ ti 'tiicā Ndyuūs ngaⁿ'a yā chí ca'a yā Abraham miiⁿ daiyá yā Isaac miiⁿ tí Isaac miiⁿ

ní ye^{ne}é compromiso, 'tíicā s'uuúⁿ.
²⁹'Tíicā tiempo chi 'āā ch'ó'ōo
 Ndyuūs idííⁿ yā chi sa^{na} daiya
 criada chi daiya Abraham caati
 ne^{ne}e yā daiya yā, daiya criada miiⁿ
 can'dáa sa sa^{na} daiya Sara caati
 daiya Sara ndúú^{cū} Abraham ní
 ye^{ne}e compromiso chi diiⁿ Ndyuūs
 ndúú^{cū} Abraham. 'Tíicā maaⁿ ní,
 'iiⁿyāⁿ chi cānee yā maaⁿ poder
 ye^{ne}e ley ye^{ne}e Moisés ní nguéé
 ye^{ne}e Señor Jesucristo. 'Iiⁿyāⁿ s'eeⁿ
 can'dáa yā s'uuúⁿ ní dííⁿ yā chi diiⁿ
 yú sufrir ti i'teenu yú Jesucristo.
 Ní canée yú ndúú^{cū} Espíritu N'dai
 ye^{ne}é Ndyuūs cáávā compromiso
 ye^{ne}é yā. ³⁰Naati canée nguūⁿ na
 libro ye^{ne}é Ndyuūs ndii cuááⁿ
 vmnaaⁿ 'tíicā: Cuaaⁿ chuva'āi í'neēⁿ
 tá^{na} chi canée caadi 'iiyū ndúú^{cū}
 daiya tá ti nguéé dē'ε vεε chi
 tuneⁿ daiya tá^{na} chi canée caadi
 'iiyū ye^{ne}e chi cuuvi ye^{ne}e sa^{na} chi
 daiya tá^{na} Sara chi libre. ³¹Ndís'tii
 hermanos ye^{ne}é, cáávā chuū s'uuúⁿ
 ní nguéé tan'dúú^{cā} chi daiya tá^{na}
 chi canée caadi 'iiyū s'uuúⁿ, ti s'uuúⁿ
 tan'dúú^{cā} chi daiya tá^{na} chi libre
 'tíicā s'uuúⁿ.

**Cunée diitū yú ndúú^{cū} chi
 i'teenu yú ti libre yú**

5 Maaⁿ ní Cristo nadanguáⁿai
 yā s'uuúⁿ ye^{ne}e maaⁿ poder
 ye^{ne}e ley. Caavā chūū 'cuεtinée
 n'daaca yú caati i'teenu yú Cristo.
 Ní nguéé nguεεcunée yú ní diiⁿ yú
 tan'duucā chi nga^{na} ley. Ní nguéé
 canee yú tan'dúú^{cā} 'iiⁿyāⁿ chi canée
 caadi 'iiyū.

²Ndís'tii 'caandiveéⁿ nī. 'Úú,
 Pablo, nga^{na}á ngii ndís'tii. Nduuti
 chi ndís'tii sa^{na} ca'a nī lugar chí

'iiⁿyāⁿ dííⁿ yā circuncidar ndís'tii
 tuu'mi ni nguéé cuuvi cuta'á nī
 ye^{ne}e vaadi n'dai chi Cristo ne^{ne}é
 yā tée yā ndís'tii. ³Nga^{na}á ntuūⁿ
 chi nducyaaca sa^{na} chi canée sá
 circuncidado canée chi diiⁿ sa
 cumplir nducué^{ne}e chi nga^{na} ley
 miiⁿ. ⁴Nduuti chi nadacadíinuⁿ
 nī chi ndís'tii nanguá^{na}ai nī ye^{ne}e
 nuuⁿndi ye^{ne}e nī cucáávā ley miiⁿ
 tuu'mi ní 'āā divíi nī Cristo 'áámá
 lado. Ní Cristo miiⁿ nguéé tée yā
 ndís'tii dendú'ū chi n'dai ca ye^{ne}e
 yā cucáávā chi dine^{ne}e cá yā s'uuúⁿ.
⁵Ti s'uuúⁿ chi i'teenu yú Jesucristo
 canée yú ndúú^{cū} Espíritu N'dai
 ye^{ne}é Ndyuūs chi nginneⁿ s'uuúⁿ.
 Ní canee ngiinu yú chi nguéé véé
 nuuⁿndi ye^{ne}e yú nanááⁿ Ndyuūs.
⁶S'uuúⁿ chi sa^{na} s'uuúⁿ nguéé
 dichí'vε nduuti chi 'iiⁿyāⁿ dííⁿ yā
 circuncidar s'uuúⁿ o nguéé. Chuū
 dichí'vε chi i'teenu yú Jesucristo.
 Ní cáávā chuū ne^{ne}e yú 'iiⁿyāⁿ.

⁷Nguuvi chi ch'ó'ōo ndís'tii n'daacā
 i'téenu nī Jesucristo naati maaⁿ ní
 nguεε 'tíicā. ¿Du'ú di'vaachi ye^{ne}e
 nī chi nguεε n'giindiveéⁿ nī nduudu
 cuaacu ye^{ne}é Cristo? ⁸Ndyuūs nguéé
 dí'vaachi yā ndís'tii ti Ndyuūs miiⁿ
 yaa'ví yā ndís'tii chi cuuvi ye^{ne}é yā
 ndís'tii. ⁹'Iiⁿyāⁿ chi di'vaachi yā
 ndís'tii ní tan'duucā ta 'lín ch'úúndí
 levadura chí nadicué^{ne} tanducué^{ne}
 yaāchi, 'tíicā yā. ¹⁰Véé confianza
 ye^{ne}é ndúú^{cū} Señor Jesucristo
 ní 'úú ní deenú chi ndís'tii nguéé
 n'giindiveéⁿ nī nduudu ye^{ne}e 'iiⁿyāⁿ
 chí di'vaachi yā ndís'tii. Ndyuūs dííⁿ
 yā castigar 'āā du'ú nūuⁿ 'iiⁿyāⁿ chí
 di'vaachi ndís'tii.

¹¹Ndís'tii hermanos ye^{ne}é, nduuti
 chi ndíí maaⁿ 'úú nga^{na}á chi

saⁿā gentiles canee chi canéé circuncidado tuu^mi ní 'iiⁿ'yāⁿ Israel chí judío s'eeⁿ nguéé can'dáa yā 'úú chi ya'āi 'úú. Nguéé 'tíicā. 'Iiⁿ'yāⁿ Israel s'eeⁿ can'dáa yā 'úú ti 'úú ngaⁿ'á chi Jesucristo nadanguáⁿai yā 'iiⁿ'yāⁿ ti ch'ii yā na cruz cáávā nuuⁿndí yeⁿ'é yā. ¹²N'daacā chi 'iiⁿ'yāⁿ chi di'vaachi yā ndís'tii divíi yā yeⁿ'ē nguaaⁿ ndís'tii.

¹³Ndís'tii hermanos yeⁿ'é, Ndyuūs yaa'ví yā s'uuúⁿ ní nguéé canée yú maaⁿ poder yeⁿ'e ley ti libre yú. Maaⁿ ní chi libre yú nguéé diiⁿ yú dendu'ū chi neⁿ'e yú yeⁿ'e cosas chi véé iⁿ'yeeⁿdí, naati dineⁿ'e yú 'aama yú ndúú^c taama yú. Ní cunnee yú vi'í cucáávā chi neⁿ'e yú vi'í. ¹⁴S'uuúⁿ cuuvi diiⁿ yú nducueⁿ'ē chi ngaⁿ'a ley ndúú^ti chí diiⁿ yú tan'dúú^cā chí ngaⁿ'a 'tíicā: Dinéⁿ'e yú nducyaaca 'iiⁿ'yāⁿ tan'duucā chi dinéⁿ'e yú maāⁿ yú. ¹⁵Ndúú^ti chi nguéé neⁿ'e yú 'aama yú taama yú tuu^mi ní diiⁿ yú tan'dúú^cā chi che'e yú 'aama yú taama yú; cuin'diichi yú ti cuuvi ituuvi yú 'aama yú taama yú.

Lo que chi neⁿ'e yú diiⁿ yú ndúú^cā chi neⁿ'e Espíritu N'dai yeⁿ'e Ndyuūs chi diiⁿ yú

¹⁶'Caandiveéⁿ nī chuū chi ngaⁿ'á: Canee yú chí 'cuæti chiicá yú tan'dúú^cā chi Espíritu N'dai yeⁿ'é Ndyuūs ch'iⁿ'i s'uuúⁿ. Ní nguéé diiⁿ yú tan'dúú^cā chi neⁿ'e cuerpo yeⁿ'ē yú. ¹⁷Ti chíⁿ chí neⁿ'e cuerpo yeⁿ'e yú chí diiⁿ yú nguéé tan'dúú^cā chi neⁿ'e Espíritu N'dai yeⁿ'é Ndyuūs chí diiⁿ yú. Ní Espíritu N'dai yeⁿ'é Ndyuūs ndúú^cā chi neⁿ'e diiⁿ cuerpo yeⁿ'e yú nguéé neⁿ'e 'aama

taama na staava yeⁿ'ē yú. Chíⁿ chí nguéé cuuvi diiⁿ yú ní chíⁿ chí neⁿ'e yú diiⁿ yú. ¹⁸Nduuti chí s'uuuⁿ idiⁿ yú tan'dúú^cā chí ch'iⁿ'i Espíritu N'dai yeⁿ'é Ndyuūs s'uuuⁿ tuu^mi ní nguéé canee yú maaⁿ poder yeⁿ'e ley.

¹⁹Ti nuuⁿndí yeⁿ'e cuerpo chí 'iiⁿ'yāⁿ diiⁿ yā ní inaaⁿ yú, ní chúú: 'iiⁿ'yāⁿ chí n'giindivaacú yā ngaⁿ'á yā ndúú^cā n'daataa o saⁿ'ā yeⁿ'e taama yā. Saⁿ'ā da'caiyā caⁿ'á sa ndúú^cā 'áámá n'daataá chí duuchi née sa taⁿ'ā. 'Iiⁿ'yāⁿ chí díⁿ yā dendu'ū chí nguéé n'daacā, 'iiⁿ'yāⁿ s'eeⁿ ní nguéé nadacadíⁿūⁿ yā taacā chí díⁿ yā. ²⁰'Iiⁿ'yāⁿ i'teenú yā ídolos ndúú^cā cosas chí nguéé Ndyuūs ndúú^cā nducueⁿ'ē chí diiⁿ 'iiⁿ'yāⁿ chí yeⁿ'e chín^gaa^tu. 'Iiⁿ'yāⁿ nduuvitaáⁿ yā ní n'dí^te yā. Ní taáⁿ yā ní in'nuúⁿ yā vaadi 'caa'va. 'Iiⁿ'yāⁿ 'i'nuⁿ cheendí yā ní 'iiⁿ'yāⁿ díⁿ yā chí véé divisiones nguaaⁿ vi'í yā. Ní díⁿ yā chí véé vaadi 'caa'va. ²¹'Iiⁿ'yāⁿ neⁿ'é yā cosas tan'dúú^cā chí véé yeⁿ'ē tanáⁿ'a yā. Ní 'iiⁿ'yāⁿ n'giiⁿ'núⁿ yā 'iiⁿ'yāⁿ. Ní 'iiⁿ'yāⁿ chí cúú'ví ndúú^cā 'iiⁿ'yāⁿ chí n'dee n'dái nge'e ní idiⁿ'n yā dendú'ū chí nguéé n'daacā chí tan'dúú^cā chuū. 'Úú ní ngaⁿ'á ngii ndís'tii chí divíi nī yeⁿ'e dendu'ū chuū tan'dúú^cā chí 'āā ngaⁿ'á nguuvi chí 'āā cho'ōo. 'Iiⁿ'yāⁿ chí idiⁿ'n yā s'tuucā nguéé de'ē vεe cuuvi yeⁿ'é yā naachi Ndyuūs ngaⁿ'a ntiiⁿ'nyúⁿ yā.

²²Naati nduuti chí 'cuæti chiicá yú tan'dúú^cā chí ch'iⁿ'i Espíritu N'dai yeⁿ'é Ndyuūs s'uuuⁿ tuu^mi ní dineⁿ'e yú 'iiⁿ'yāⁿ. Ni yeenú taavi yú. Ní canéé vaadi 'diiiⁿ na staava yeⁿ'e yú. Ní cuchæ yú yeⁿ'e tanducueⁿ'ē

chi n'geenu yú ngii. Ní din'daaca yú ndúúcu vīi ní diiⁿ yú nducué^{n̄}ē chi n'dai ndúúcu vīi. Ní 'áámá canee yú ndúúcu chi i'teenu yú. ²³Ní canee yú ndiicúúⁿ. Ní diiⁿ yú cuidado chi diiⁿ yú cosas chi n'daacā. Espíritu N'dai ye^{n̄}é Ndyuūs nginnee s'uuúⁿ chi diiⁿ yú nducué^{n̄}ē chuū chí n'daacā. Ní ley ye^{n̄}e Moisés miiⁿ nguéé nga^{n̄}a chi nguéé cuuvi diiⁿ yú s'túúca. ²⁴S'uuúⁿ chi 'āā i'teenu yú Señor Jesucristo ye^{n̄}e yú nguéé diiⁿ yú tan'duucā chi ne^{n̄}e cuerpo ye^{n̄}e yú. Ní canee yú tan'dúúca chi 'āā ca'nee^{n̄}nga^{n̄}ā yú nducue^{n̄}ē chi nguéé n'daacā chi ne^{n̄}e diiiⁿ cuerpo ye^{n̄}e yú, 'tíicā canee yú. ²⁵Nduuti chi candúúchí yú ndúúcu Espíritu N'dai ye^{n̄}é Ndyuūs tuu'mi ní canéé chi 'cuεeti chiicá yú tan'dúúca chi n'gi^{n̄}i Espíritu N'dai ye^{n̄}é Ndyuūs s'uuúⁿ. ²⁶Nguéé canéé chi din'geete yú chi véé vaadi 'caa'va nguaaⁿ s'uuúⁿ. Ní nguéé nguee yú 'aama yú taama yú.

**S'uuúⁿ cunnee yú 'aama
yú ndúúcu taama yú**

6 Ndís'tii hermanos ye^{n̄}é chi diiⁿ ní tan'dúúca chi ch'i^{n̄}i Espíritu N'dai ye^{n̄}é Ndyuūs, nduuti chi 'áámá hermano ye^{n̄}e yú 'āā diiⁿ yā nuu^{n̄}ndi ndís'tii canéé chí cunnee nī hermano miiⁿ. Diiⁿ n'daacā nī ndúúcu yā. Ní ch'i^{n̄}i nī hermano miiⁿ cheē nuu^{n̄}ndi chi diiⁿ yā caati cuuvi nguεecúndi yā ye^{n̄}e nuu^{n̄}ndi ye^{n̄}e yā. Ndís'tii ntúū^{n̄} 'cuεetinée nī cáácá nī ndúúcu cuidado ti nguéé dinuu^{n̄}ndí nī. ²Cunnee yú 'aama yú taama yú ní ya'āi 'iinu yú hermanos caava dendu'ū vaadi ya'āi chi ye^{n̄}ē 'aama yú taama yú. 'Tíicā ní diiⁿ yú

tan'dúúca chi Cristo ca^{n̄}a ntiiⁿnyúⁿ yā s'uuúⁿ.

³Nduuti chí 'áámá sa^{n̄}ā nadacadínuuⁿ sa chí neenē ch'εete sa ní nguεε 'tíicā, sa^{n̄}ā miiⁿ nginnche'éi máaⁿ sa sa^{n̄}ā. ⁴Ca'áámá ca'aama s'uuúⁿ ní canee chí tuumicádínuuⁿ yú nducué^{n̄}ē chí diiⁿ yú. Tuu'mi ní cuuvi yeenu yú ti n'daacā cosas chí diiⁿ yú. Ní nguéé nadacadínuuⁿ yú ye^{n̄}ē ntiiⁿnyuⁿ ye^{n̄}ē taama 'ii^{n̄}yāⁿ táacā chí diiⁿ yā. ⁵Caati ca'áámá ca'aama s'uuúⁿ canee chí cucheε yú ye^{n̄}e nducué^{n̄}ē chí chó'oo ye^{n̄}ē maaⁿ yú ní diiⁿ yú cuenta ye^{n̄}ē maaⁿ yú ye^{n̄}e chí diiⁿ yú nguéé ye^{n̄}ē taamá yā.

⁶'ii^{n̄}yāⁿ chí n'geēⁿ nduudu ye^{n̄}é Ndyuūs canéé chí cunnee yā taná^{n̄}ā 'ii^{n̄}yāⁿ chí ngi'cueeⁿ nduudu miiⁿ.

⁷Ndís'tii nguéé canee chí canche'éi nī maaⁿ nī. Ndyuūs n'diichí yā ndís'tii ní nguéé cuuvi canche'éi nī Ndyuūs. Nducué^{n̄}ē cosa chí idiiⁿ sa^{n̄}ā tan'dúúca chí cúunū sa, ní chíiⁿ ntúū^{n̄} cúta'ā sa cosecha ye^{n̄}ē sa. ⁸Nduuti chí diiⁿ yú tan'dúúca chí ne^{n̄}e cuerpo ye^{n̄}ē yú chí dinuu^{n̄}ndi yú tuu'mi ní dindai yú ní canee yú tan'dúúca 'áámá cosecha chí ngiīnū chí ngo'oo ye^{n̄}ē. Naati nduuti chí diiⁿ yú cosas chí ch'i^{n̄}i Espíritu N'dai ye^{n̄}é Ndyuūs s'uuúⁿ tuu'mi ní Espíritu N'dai ye^{n̄}é Ndyuūs tée yā s'uuúⁿ vida cue^{n̄}e daā^{n̄}maⁿ. Ní dendu'ū tan'dúúca cosecha ye^{n̄}ē chí diiⁿ yú tée yā s'uuúⁿ. ⁹Cáávā chuū nguéé canee chí cuuvi 'daān'di yú chí diiⁿ yú nducue^{n̄}ē chí n'daacā. ti ndaá nguuvi ye^{n̄}ē chí cuuvi cuta'a yú cosecha ye^{n̄}ē chí n'daacā idiiⁿ yú nduuti chí nguéé cúunū

yú. ¹⁰Tan'dúúcā chi véé yaaⁿ yú din'daāca yú ndúúcū nducyaaca 'iiⁿyāⁿ. 'Tiicá ntúūⁿ din'daāca ca yú ndúúcū hermanos yeⁿe yú chi i'téenu yā Jesucristo.

Consejo yeⁿe Pablo ndúúcū saludos yeⁿe 'iiⁿyāⁿ

¹¹N'diichí nī 'téé cheete 'áámá caaca dinguúⁿ yeⁿe nī ndúúcū ta'á. ¹²'Iiⁿyāⁿ s'eeⁿ chi ngaⁿ'a yā ndís'tiī chi canéé chi cuuví nī circuncidado, 'iiⁿyāⁿ s'eeⁿ dííⁿ yā 'túúcā, ti neⁿ'é yā caⁿ'á yā favor yeⁿe 'iiⁿyāⁿ judíos chi Israel chi yeⁿe circuncisión chi canéé ndúúcū ley yeⁿe yā. Ní nguéé neⁿ'é yā chí 'cueenu yā cuuvi cáávā Jesucristo chí ch'iī yā na cruz. ¹³Saⁿ'a Israel s'eeⁿ chí 'āā circuncidado yā ní mar 'áámá yā nguéé cuuvi dííⁿ yā tanducuéⁿe chi canéé nguūⁿ na ley yeⁿ'é yā. Neⁿ'é yā chí ndís'tiī saⁿ'ā cuuví nī circuncidado. Ní 'iiⁿyāⁿ s'eeⁿ cuuvi yeenú yā ní ngaⁿ'á yā chí dich'εete yā maaⁿ yā 'iiⁿyāⁿ tí ndís'tiī ntúūⁿ dííⁿ nī tan'duucā chí dííⁿ yā, ní candεε nī marca yeⁿe circuncisión na cuerpo yeⁿe nī. ¹⁴'Úú nguéé neⁿ'é caaⁿ'máⁿ chí ch'εete yeⁿe mar 'áámá dendu'ū yeⁿ'ē iⁿ'yeeⁿdí 'cūū. Neⁿ'é caaⁿ'máⁿ chí Jesucristo chí yā na cruz caava nuuⁿndi yeⁿ'ē nducyáácá

'iiⁿyāⁿ. Taachi Cristo ch'iī yā na cruz, 'tíicā tan'duucā chí cuerpo yeⁿ'é chí iī ntúūⁿ. 'Tiicá ntúūⁿ ní caavā 'úú nducuéⁿ'ē chí yeⁿ'e iⁿ'yeeⁿdí canee tan'duucā chí n'díí.

¹⁵Maaⁿ ní s'uuúⁿ saⁿ'ā chí i'teenu yú Señor Jesucristo yeⁿ'e yú nguéé dichí'vē nduuti chí véé marca yeⁿ'e circuncisión na cuerpo yeⁿ'e yú o nguéé. Chuū ní dichí'vē chí 'iiⁿyāⁿ ngai s'uuúⁿ ní véé vida ngai yeⁿ'e yú tan'dúúcā chí nuuⁿmaⁿ chí iindiyāāⁿ ntúūⁿ yú táámá.

¹⁶Nducyaaca yú chí 'cuēeti chiicá yú tan'dúúcā chí chí'í ndís'tiī tuu'mi ní Ndyuūs tée yā vaadi 'diiíⁿ na staava yeⁿ'e yú. Ní Ndyuūs ya'ai 'iinú yā caavā ndís'tiī. Ní nducyaaca s'uuúⁿ chí i'teenu yú Jesucristo, s'uuúⁿ ní yeⁿ'é ndaata yeⁿ'e Ndyuūs chí cuaacu nííⁿnyúⁿ ndaata yeⁿ'e 'iiⁿyāⁿ Israel chí judíos.

¹⁷Ndíí maaⁿ ndíí cuaaⁿ chí cuchii nguéé neⁿ'é chí mar 'áámá 'iiⁿyāⁿ dííⁿ nndú'u yā 'úú, caati 'úú ndéé yaātū na cuerpo yeⁿ'é naachi 'iiⁿyāⁿ ch'eⁿ'é yā 'úú, ti 'úú idiíⁿ ntiíⁿnyuⁿ yeⁿ'ē Señor Jesucristo yeⁿ'ē yú.

¹⁸Ndís'tiī hermanos yeⁿ'é, Señor Jesucristo yeⁿ'e yú canéé yā nduucū nī ní cueⁿ'e daāⁿmaⁿ itée yā ndís'tiī nducuéⁿ'ē chí n'daacā n'dai yeⁿ'é yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ EFESO

**Pablo idinguúⁿ yā carta 'cūū
yeⁿe 'iiⁿ'yāⁿ chi naⁿ'á yā
yaācū na yāāⁿ Efeso**

1 'Úú Pablo 'úú, ní 'úú apóstol
yeⁿe Señor Jesucristo caavā
chi 'tíicā neⁿe Ndyuūs chi dich'óo
yā 'úú. 'Úú idinguúⁿ carta 'cūū yeⁿe
nducyaaca 'iiⁿ'yāⁿ chi snée yā na
yāāⁿ Efeso, 'iiⁿ'yāⁿ chi yeⁿe Ndyuūs
ní i'téenu yā Señor Jesucristo.
²Ndyuūs Chiida yú ndúú^cū Señor
Jesucristo yeⁿe yú nginneé yā
ndís'tii ní tée yā cosas chi n'daacā
n'dai, ní tée yā ndís'tii vaadī 'diíⁿ
yeⁿ'é yā.

**Yeⁿe dendu'ū chi n'daacā n'dai chi
Cristo ca'á yā 'iiⁿ'yāⁿ yeⁿ'é yā**

³Nducyaaca yú canee chi dich'etē
yú Ndyuūs chi Chiidā Señor
Jesucristo. Maaⁿ ní caavā chi s'uuúⁿ
ní yeⁿe Cristo s'uuúⁿ, Ndyuūs tée yā
s'uuúⁿ dendú'ū yeⁿ'é yā chi n'dai taavi
ca yeⁿe nducuéⁿē chi n'dai tan'dúú^cā
chi s'uuúⁿ snee yú na va'ai chēeti
nguuvi. ⁴Ní 'tíicā Ndyuūs nadidēevé
yā s'uuúⁿ chi cuuvi yeⁿ'é yā s'uuúⁿ ní
cuuvi yeⁿe Cristo s'uuúⁿ ndíí taachi
'āā'cuéé dín'dái yā iⁿ'yeēⁿdi. Ní
nduuví n'dai yú ní i'teenū n'daacā yú
Cristo ní nguéé véé nuuⁿndi yeⁿe yú

nanáaⁿ yā. ⁵Ní Ndyuūs 'āā deenú yā
chiiⁿ chi neⁿ'é yā dííⁿ yā cáāvā chi
neⁿ'é yā s'uuúⁿ. Cáāvā chi neⁿ'é yā chi
cuuvi yeⁿ'é yā s'uuúⁿ, sta'á yā s'uuúⁿ
chi cuuvi daiyā yā s'uuúⁿ cucáāvā
Cristo Jesús. ⁶Cucáāvā chuū cueⁿe
daāⁿmaⁿ dich'etē taavi yú Ndyuūs
chi itée yā s'uuúⁿ dendu'ū chi ch'etē
n'dai yeⁿ'é yā caati maaⁿ ní s'uuúⁿ ní
yeⁿe Cristo s'uuúⁿ. Ndyuūs dííⁿ yā
recibir s'uuúⁿ caati neⁿe taavi cá
yā Cristo. ⁷Ní cáāvā Ndyuūs neⁿe
taavi cá yā nducyaaca yú dich'óo yā
Daiya yā chi ch'ií yā cáāvā s'uuúⁿ.
Ní Ndyuūs nadich'etē yā nuuⁿndi
yeⁿe yú cáāvā yuūuⁿ yeⁿ'é Cristo. Ní
cáāvā chi Ndyuūs 'tíicā neⁿ'é yā s'uuúⁿ
itée yā dendu'ū chi n'daacā yeⁿ'é yā.
⁸Níicú Ndyuūs ch'iíⁿ yā s'uuúⁿ chi
neⁿe taavi cá yā s'uuúⁿ. Ní dííⁿ yā chi
deenu yú taanduvéé vaadī n'dai yeⁿ'é
yā ní tuumicadíínuuⁿ yú nducuéⁿē.
⁹Ní Ndyuūs 'āā dííⁿ yā chiiⁿ chi neⁿ'é
yā dííⁿ yā. Ní dííⁿ yā chí n'diichi yú
chiiⁿ chi canúúⁿ n'de'ei yeⁿ'é yā ndii
cuááⁿ vmnaaⁿ cucááva Cristo. ¹⁰Ní
chuū chi canuuⁿ n'de'ei yeⁿ'é Ndyuūs
chi Ndyuūs caⁿ'a yā chi diíⁿ yā chi
cuuvi taachi ndaa tiempo yeⁿ'ē,
Ndyuūs caⁿ'a yā chi dííⁿ yā chi Cristo
ngaⁿ'a ntiiⁿ'nyúⁿ yā yeⁿe nducuéⁿē
chi snée nanguuvi ndúú^cū chi snée

ná yáⁿāa. Ní Ndyuūs caⁿá yā chi nduuvidaamā tanducuéⁿē dendu'ū nanáⁿ Cristo.

¹¹Ndyuūs díⁿ yā chi nducuéⁿē chi chó'oo ní chó'oo tan'dúucā chi neⁿe yā. Ní Ndyuūs ndeēv^e yā s'uuúⁿ ndii cuááⁿ vmnaaⁿ nífcú chi cuuvi yeⁿe yú cosas chi caⁿa yā chi tée yā s'uuúⁿ, caati s'uuúⁿ ní yeⁿe Cristo s'uuúⁿ. ¹²Ní Ndyuūs 'tíicā díⁿ yā ti neⁿe yā chi nús'uu ní ch'iⁿí 'nū vaadi dēeve ca yeⁿe Ndyuūs nanááⁿ 'iiⁿyāⁿ ti nús'uu ní yeⁿe 'iiⁿyāⁿ Israel nús'uu chi vmnááⁿ vmnaaⁿ i'téenu 'nū Cristo. ¹³Chuū dendú'ū ní yeⁿe ndís'tiī chi nguéeⁿ yeⁿe 'iiⁿyāⁿ Israel s'eeⁿ ti taachi ch'iindiveéⁿ nī nduudu cuaacu yeⁿe evangelio chi ndúúú ngai yeⁿe Cristo chi nadanguaⁿaī ndís'tiī ní s'téenu nī yeⁿe. Tuu'mi ní canéé 'áámá sello yeⁿe Ndyuūs ndúúcu nī. Ní sello miiⁿ ní Espíritu N'dai yeⁿe Ndyuūs chí 'áámá compromiso chi Ndyuūs caⁿa yā chi tée yā s'uuúⁿ ndífcú cuááⁿ vmnaaⁿ. ¹⁴Ní Espíritu N'dai yeⁿe Ndyuūs ní 'áámá seña chi cuta'a yú chi cuuvi yeⁿe yú chiiⁿ chi Ndyuūs caⁿa yā chi tée yā chi cuuvi yeⁿe yú. Ní Ndyuūs yaa'vi yā s'uuúⁿ chi cuuvi yeⁿe yā s'uuúⁿ. Taachi ndaa nguuvi chi neⁿe Ndyuūs, Ndyuūs caⁿá yā díⁿ yā chi s'uuúⁿ tan'dúucā maáⁿ yā 'tíicā s'uuúⁿ. Ní Espíritu N'dai yeⁿe Ndyuūs ní 'áámá seña yeⁿe chuū. Ní 'ífcú nducyaaca yú ndúúcu 'iiⁿyāⁿ chi cuuvi cu'téenu yā Cristo cuuvi nadich'ēete yú Ndyuūs cucáávā chi ch'ēté n'dai yā.

Pablo ngiicá yā Ndyuūs chi ca'á yā vaadi deenu 'iiⁿyāⁿ chi cu'téenu yā Cristo

¹⁵Cucaaⁿ chuū, taachi 'úú Pablo ch'iindiveéⁿ chi ndís'tiī i'téenu

nī Señor Jesucristo ní dinéⁿe nī nducyaaca 'iiⁿyāⁿ chi i'téenu yā Señor Jesucristo 'iivú Ndyuūs, ¹⁶tuu'mi ní nguéeⁿ ngí 'daandí chi ca'á gracias Ndyuūs cucáávā ndís'tiī. Ní taachi ingaacú yeⁿe ndís'tiī, tuu'mi ní ngaⁿangua'á cucáávā ndís'tiī. ¹⁷Ní ngiicá Ndyuūs yeⁿe Señor Jesucristo yeⁿe yú chi Ndyuūs miiⁿ chi Chiida yú chi dēeve taavi ca, ní ngiicá Ndyuūs chi tée yā ndís'tiī vaadi deenu yeⁿe Espíritu N'dai yeⁿe Ndyuūs, ní 'ífcú cuuvi déenu cá nī ní 'iintiinaáⁿ nī chíⁿ chí neⁿe Ndyuūs. ¹⁸Ní ngiicá Ndyuūs chi díⁿ yā chi cuuvi déenu nī ní cadíinuⁿ nī chēe chi cūnee ngiinu yú chi Ndyuūs tée yā s'uuúⁿ, ti ndeēve yā s'uuúⁿ. Ní deenu nī dē'ē chúúca n'dai ca ní dēeve ca chi cuuvi yeⁿe nī chi Ndyuūs ca'á yā 'iiⁿyāⁿ chi yeⁿe yā. ¹⁹Ní ngiicá Ndyuūs chi cuuvi deenu nī chi poder chi ch'ēete taavi ca chi yeⁿe Ndyuūs. Ní nguéeⁿ mar 'áámá dendu'ū chi Ndyuūs nguēe cuuvi díⁿ yā. Ní Ndyuūs díⁿ yā ntiíⁿnyuⁿ caavā s'uuúⁿ chi i'teenu yú 'iiⁿyāⁿ. Maaⁿ ní díⁿ yā ntiíⁿnyuⁿ ndúúcu poder yeⁿe yā cáávā s'uuúⁿ, ní ch'iⁿí yā poder yeⁿe yā chí ch'ēete ní ndúúcu fuerzas yeⁿe yā. ²⁰Tíicā Ndyuūs ch'iⁿi yā maaⁿ poder yeⁿe yā taachi nadicuéⁿ yā Cristo yeⁿe nguaaⁿ tináⁿā. Ní s'néeⁿ yā Cristo na va'ai chēeti nguuvi ní Cristo ch'iindí yā lado tá cuaacu yeⁿe Ndyuūs chiidá yā chi lado yeⁿe honor. ²¹Ní ca'á yā Cristo nducuéⁿē poder tan'dúucā 'áámá 'iiⁿntyéⁿē chi caaⁿmaⁿ ntiíⁿnyúⁿ yā yeⁿe tanáⁿā 'iiⁿntyéⁿē ndúúcu yeⁿe nducyáácá 'iiⁿyāⁿ chí ngaⁿa ntiíⁿnyúⁿ yā

ndúúcu yeⁿē nducuéⁿē poder chi véé yeⁿe nducyaaca patrón chi ngaⁿa ntiiⁿnyúⁿ yā. Ní Cristo ní más ca ch'εete ca yeⁿe nducuéⁿē chi véé chi cuuvi caaⁿmaⁿ yú yeⁿē, nguéé dámaāⁿ yeⁿē chi véé mááⁿ, 'tiicá ntúūⁿ yeⁿe nducuéⁿē chi cuchii. ²²Ní Ndyuūs s'néeⁿ yā tanducuéⁿē dendu'ū maaⁿ poder yeⁿe Cristo. Ní Ndyuūs s'néeⁿ yā Cristo lugar más cā ch'εete. Ní Cristo miiⁿ tan'duucā chi tiíⁿ yā yeⁿe nducyaaca 'iiⁿyāⁿ chi i'téenu yā ní cáⁿa yā yaacū yeⁿe Cristo, 'tíicā Cristo miiⁿ. ²³'Iiⁿyāⁿ chi i'téenu yā Cristo ní nducyaaca 'iiⁿyāⁿ s'eeⁿ ní tan'duucā cuerpo yeⁿé Cristo, 'tíicā yā. Ní cuaacu nducyaaca 'iiⁿyāⁿ s'eeⁿ ní yeⁿe Cristo. Ní Cristo miiⁿ ní n'daacā taavi yā ní canée yā yeⁿe tanducuéⁿē dendu'ū ndúúcu tanducuéⁿē cuaaⁿ.

Ndyuūs nadanguáⁿai yā s'uuúⁿ ti neⁿé yā nducyaaca 'iiⁿyāⁿ

2 Nguuvi chi ch'ó'oo ndís'tiiⁿ dinuuⁿndí nī ní sneé nī tan'dúúca 'iiⁿyāⁿ chi n'dí caavā nducuéⁿē dendu'ū chi díⁿ nī chi nguεε n'daacā. Naati maaⁿ ní Ndyuūs tee yā ndís'tiiⁿ vida cueⁿe daāⁿmaⁿ dáamá ndúúcu Cristo caati nadacuéⁿē yā Cristo yeⁿe nguuaⁿ tináⁿā. ²Ní nguuvi chi ch'ó'oo ndís'tiiⁿ díⁿ nī nuuⁿndi ní dinuuⁿndí nī ndúúcu tanáⁿā 'iiⁿyāⁿ yeⁿe iⁿyeeⁿdí cūū. Ní díⁿ nī tan'dúúca chi neⁿe espíritu chi nguéé n'dai. Espíritu miiⁿ nī yááⁿnguiinūⁿ ní espíritu chi canée na 'yúúné nī ngaⁿā ntíⁿnyúⁿ yeⁿe iⁿyeeⁿdí ní ngaⁿā ntíⁿnyúⁿ yeⁿe nducyaaca 'iiⁿyāⁿ chi nguéé

n'giindiveéⁿ yā nduudu yeⁿé Ndyuūs. ³Ní nducyaaca s'uuúⁿ 'tíicā díⁿ yú nguuvi chi ch'ó'oo ní díⁿ yú tan'dúúca chi neⁿe yú ní díⁿ yú tan'dúúca chi neⁿe cuerpo yeⁿe yú ní tan'dúúca chi nadicadiinuuⁿ yú. Ní cáavā chuū nducyaaca yú canée chí cuta'a yú ndúúcu tanáⁿā 'iiⁿyāⁿ castigo chi diitu n'dái chi ca'a Ndyuūs 'iiⁿyāⁿ chi dinuuⁿndí yā. ⁴Naati Ndyuūs ní néené ya'āi 'iinu cá yā nducyaaca 'iiⁿyāⁿ ní neⁿe taavi cá yā s'uuúⁿ. ⁵Ní 'áará chí n'dii yú cucáavā chi dinuūⁿndi yú Ndyuūs itée yā vida cueⁿe daāⁿmaⁿ yeⁿé yú dáamá dáamá ndúúcu Jesucristo caati nadacuéⁿē yā Cristo yeⁿe nguuaⁿ tináⁿā. Maaⁿ ní ninnguaⁿai yú caavā chi Ndyuūs ní n'dai taavi cá yā ní neⁿe cá yā s'uuúⁿ. ⁶Ndyuūs díⁿ yā chi nanduuchí yā s'uuúⁿ dáamá dáamá ndúúcu Cristo ti s'uuúⁿ ní yeⁿé Cristo s'uuúⁿ. Ní 'tiicá ntúūⁿ díⁿ yā chi s'uuúⁿ tan'dúúca chí snee yú ná va'ai cheeti nguuvi ndúúcu Jesucristo 'tíicā s'uuúⁿ. ⁷Ní Ndyuūs díⁿ yā 'tuucā chi cuuvi 'cuuⁿmiⁿ cá yā s'uuúⁿ nguuvi chi cuchii tan'dúúca chi dineⁿe taavi cá yā s'uuúⁿ ndúúcu n'dee n'dái dendu'ū chi n'dai taavi chi itée yā s'uuúⁿ, ti yeⁿe Cristo Jesús s'uuúⁿ. ⁸Ní cucáavā chi Ndyuūs ní neⁿe taavi cá yā s'uuúⁿ, ndís'tiiⁿ ní ninnguaⁿai nī tí i'téenu nī Cristo. Nds'tiiⁿ nguéé díⁿ nī mar 'áamá chi nanguaⁿai nī naati Ndyuūs chi datée yā vida cueⁿe daāⁿmaⁿ yeⁿé nī. ⁹Ní nguéé nanguaⁿai nī cucáavā ntiiⁿnyuⁿ chí díⁿ nī caati nguéé cuuvi caaⁿmáⁿ nī chí ch'εete n'dái nī maáⁿ nī cucáavā chí díⁿ nī. ¹⁰Taachi Ndyuūs

nadinguáⁿai yā s'uuúⁿ dííⁿ yā chi s'uuúⁿ ní yeⁿ'e Jesucristo s'uuúⁿ ní cuuvi dííⁿ yú ntiíⁿnyuⁿ chi n'daacā. Ndyuūs 'āā ch'iindiyaáⁿ yā ntiíⁿnyuⁿ chi canéé chí dííⁿ yú ndii cuááⁿ vmnaaⁿ.

**Véé vaadi 'diiíⁿ yeⁿ'ē yú
cucáávā Cristo**

¹¹Maaⁿ ní n'gaacú nī tan'dúúccā chi sneé nī nguuvi chi 'āā chó'ōo. Ndís'tií ní nguéé 'iiⁿyāⁿ yeⁿ'e ndaata Israel naati 'iiⁿyāⁿ gentiles ndís'tií. Ní 'iiⁿyāⁿ yeⁿ'e ndaata Israel dííⁿ yā circuncidar ca'áámá ca'áámá saⁿ'ā ní caacá yā 'áámá seña na cuerpo yeⁿ'e saⁿ'ā s'eeⁿ. Ní canéé na cuerpo yeⁿ'e saⁿ'ā s'eeⁿ seña 'cūū chi saⁿ'ā s'eeⁿ ní yeⁿ'e ndaata yeⁿ'é Ndyuūs. Cáávā chuū 'iiⁿyāⁿ yeⁿ'e ndaata Israel nguuví yā maáⁿ yā 'iiⁿyāⁿ circuncidado yā, ní caⁿ'a yā yeⁿ'ē ndís'tií chi nguuví nī 'iiⁿyāⁿ chi nguéé ndíí nī circuncidado, ní caⁿ'a yā yeⁿ'e nī chi nguéé 'iiⁿyāⁿ yeⁿ'e Ndyuūs ndís'tií. ¹²Ní tiempo miiⁿ ní ndís'tií nguéé déenu nī yeⁿ'e Cristo, ní canéé nī tan'dúúccā 'iiⁿyāⁿ chi canúúⁿ yúúní. Ní nguéé ndís'tií yeⁿ'e 'iiⁿyāⁿ Israel ndís'tií. Ndyuūs nndeεve yā 'iiⁿyāⁿ chi cuuvi yeⁿ'é yā 'iiⁿyāⁿ. Nguéé véé 'áámá parte yeⁿ'é nī ndúúccū 'iiⁿyāⁿ chi nndeεvé yā ní ca'á yā compromisos ndúúccū promesas nduucú yā. Ndís'tií ch'εetinée nī na iⁿ'yeeⁿdí 'cūū nguéé ndúúccū de'ē vεε chi canee ngiinú nī chi cuuvi yeⁿ'é nī. Ní nguéé ch'εetinée nī ndúúccū Ndyuūs ndís'tií. ¹³Ndís'tií chi yaⁿ'ai canéé nī yeⁿ'e Ndyuūs cuááⁿ vmnaaⁿ naati maaⁿ ní 'āā nduuvidaamá nī nduucú yā caavā chi ch'ii Cristo

cucáávā nuuⁿndi yeⁿ'e yú. Ní maaⁿ ní ndís'tií ní yeⁿ'é Cristo ndís'tií. ¹⁴Ní cáávā Cristo miiⁿ véé vaadi 'diiíⁿ yeⁿ'e yú. Ní Cristo dííⁿ yā chi 'iiⁿyāⁿ yeⁿ'e ndaata Israel ndúúccū 'iiⁿyāⁿ chi nguéé yeⁿ'ē ndaata Israel nduuvidaamá yā tan'dúúccā 'áámá raza nūuⁿ. Ní Cristo miiⁿ divíi yā vaadi 'caa'va chi canéé nguaaⁿ 'iiⁿyāⁿ Israel s'eeⁿ ndúúccū taná'ⁿā 'iiⁿyāⁿ s'eeⁿ chi nguéé 'iiⁿyāⁿ Israel yā. Vaadi 'caa'va ch'εete mííⁿ chi cu'néeⁿ yā ní tan'dúúccā 'áámá chεēti náávtaⁿ'a 'iiⁿyāⁿ s'eeⁿ, 'tíicā. ¹⁵Ní cucáávā chi Cristo maáⁿ yā ch'ii yā tuu'mi ní divíi yā ley yeⁿ'e 'iiⁿyāⁿ Israel ndúúccū mandamientos yeⁿ'ē ndúúccū reglas yeⁿ'ē. Cristo mííⁿ dííⁿ yā chi naachi nduu 'uuvi clase yeⁿ'e 'iiⁿyāⁿ nadáámá yā ní véé 'áámá clase nūuⁿ 'iiⁿyāⁿ, ní 'iiⁿyāⁿ s'eeⁿ ní yeⁿ'e Cristo. 'Tíicā diiíⁿ Cristo chi véé vaadi 'diiíⁿ. ¹⁶Tíicā diiíⁿ Cristo taachi ch'ii yā na cruz. Ní dííⁿ yā chi 'āā nteε véé vaadi 'caa'va nguaaⁿ 'iiⁿyāⁿ s'eeⁿ. Ní dííⁿ yā chi véé vaadi 'diiíⁿ nguaaⁿ 'iiⁿyāⁿ s'eeⁿ ndúúccū Ndyuūs. 'Tíicā Cristo dííⁿ yā chi véé 'áámá clase nūuⁿ 'iiⁿyāⁿ.

¹⁷Cristo ndaá yā na iⁿ'yeeⁿdí 'cūū ní maaⁿ ní cuuvi deenú nī yeⁿ'ē vaadi 'diiíⁿ, ndís'tií chi nguéé 'iiⁿyāⁿ yeⁿ'e ndaata Israel chi yaⁿ'ai ch'εetinée nī yeⁿ'e Cristo. 'Tiicá ntúúⁿ cuuvi deenú 'iiⁿyāⁿ yeⁿ'ē ndaata Israel chi ch'εetinée niiⁿ'nuⁿ yā. ¹⁸Ní cucáávā Cristo miiⁿ nducyaaca yú nduuti chi 'iiⁿyāⁿ Israel s'uuúⁿ o nguéé 'iiⁿyāⁿ Israel s'uuúⁿ, nducyaaca yú, cucáávā Cristo miiⁿ cuuvi cundáa yú nanááⁿ Ndyuūs Chiida yú ndúúccū 'áámá Espíritu N'dai yeⁿ'é Ndyuūs. ¹⁹Ní ndís'tií chi

nguéé yeⁿe ndaata Israel chi ndaata yeⁿe Ndyuūs, maaⁿ ní 'āā ntéé 'iiⁿ'yāⁿ chi snúúⁿ yā yúúní ndís'tiī ní snée nī na yáⁿ'āa chi nguéé yeⁿe nī. Maaⁿ ní dáámá snée nī ndúúcū 'iiⁿ'yāⁿ chi yeⁿe Ndyuūs. Ní ndís'tiī ní yeⁿe ndaata yeⁿe nducyaaca 'iiⁿ'yāⁿ chi yeⁿe Dendyuūs. ²⁰Ní ndís'tiī ní tan'dúúcā 'áámá va'ai ch'ēete taavi ca chi 'iiⁿ'yāⁿ din'dái yā 'tíicā ndís'tiī. Ní yeⁿe va'ai ch'ēete miīⁿ Cristo miīⁿ ní tan'dúúcā tuū ch'ēete yeⁿe esquina, 'tíica yā. Ní apóstoles chi candéé yā nduudu yeⁿe Ndyuūs ndúúcū profetas chi ngaⁿ'a yā nduudu yeⁿe Ndyuūs 'iiⁿ'yāⁿ s'eeⁿ ní tan'dúúcā tuū yeⁿe cimientó yeⁿe va'āi miīⁿ, 'tiicá yā. Ní ndís'tiī ní tan'dúúcā tuū vmnaaⁿ tuū ch'ēete yeⁿe esquina, 'tiicá nī. ²¹Ní vmnaaⁿ tuū ch'ēete yeⁿe esquina chi Cristo miīⁿ nducuéⁿe tuū ní yeⁿe va'āi ch'ēete chi din'dái Cristo. Ní Cristo díiⁿ yā chi ndaacā canee nducuéⁿe na lugar yeⁿe cucáávā chi dichíí'vē Ndyuūs. Ní Cristo díiⁿ yā chi va'āi ch'ēete taavi ca ní 'áámá templo yeⁿe 'iivú Ndyuūs. ²²'Tiicá ntúūⁿ, ndís'tiī chi yeⁿe Cristo nduuvidaamá nī ndúúcū tanáⁿ'ā 'iiⁿ'yāⁿ chi yeⁿe Cristo ní tan'dúúcā 'áámá va'ai naachi Ndyuūs canee yā cucáávā Espíritu N'dai yeⁿe yā, 'tíicā nducyaaca 'iiⁿ'yāⁿ chi yeⁿe Cristo.

Ndyuūs dichó'o yā Pablo chi ngaⁿ'a yā evangelio chí nduudu ngai yeⁿe Jesucristo nanááⁿ 'iiⁿ'yāⁿ chi nguéé yeⁿe ndaata Israel

3 Cáávā chuū 'úú Pablo canee preso ná vácūū ti dichíí'vē 'úú Jesucristo ní ngaⁿ'á nduudu cuaacu

yeⁿe yā cucáávā ndís'tiī chi nguee yeⁿe 'iiⁿ'yāⁿ yeⁿe ndaata Israel. Ní ngaⁿ'angua'á cáávā ndís'tiī. ²Cuaacu nííⁿ'nyúⁿ 'āā deenú nī chi Ndyuūs chi n'dai taavi cá yā dichó'o yā 'úú chi ngaⁿ'á ngii ndís'tiī chi Ndyuūs neⁿe taavi cá yā ndís'tiī. ³Ndyuūs ch'iⁿ'í yā 'úú dendu'ū yeⁿe yā chi canúúⁿ n'de'ei ní díiⁿ yā chi deenú chi canúúⁿ n'de'ei tan'dúúcā chi 'āā dinguúⁿ yeⁿe nī ndúúcū duū'vī nduudu. ⁴Ní taachi ndís'tiī ch'ēéⁿ nī caacá 'cūū chídinguúⁿ tuu'mi ní cuuvi deenú nī chi 'úú deenú chiīⁿ chi canúúⁿ n'de'ei yeⁿe Ndyuūs, chiīⁿ chi yeⁿe Jesucristo. ⁵Ní tiempo chi 'āā chó'oo Ndyuūs nguéé ch'iⁿ'í yā mar 'áámá 'iiⁿ'yāⁿ nduudu yeⁿe yā chi canúúⁿ n'de'ei naati tiempo miīⁿ Ndyuūs ch'iⁿ'í yā chuū apóstoles chi didéevé yā yeⁿe nuuⁿ'ndi yeⁿe yā ndúúcū profetas chi ngaⁿ'a nduudu yeⁿe yā cucáávā Espíritu N'dai yeⁿe yā. ⁶Ní chuū chi canúúⁿ n'de'ei cáávā nduudu cuaacu chí nduudu ngai yeⁿe Jesucristo. 'iiⁿ'yāⁿ chi nguéé yeⁿe ndaata Israel chi yeⁿe Jesucristo, 'iiⁿ'yāⁿ s'eeⁿ ní cuuvi yeⁿe yā dáámá dáámá ndúúcū chi cuuvi 'iiⁿ'yāⁿ yeⁿe Israel. Ní dáámá canee yā ndúúcū 'iiⁿ'yāⁿ Israel. Ní sneé yā tan'dúúcā 'áámá cuerpo yeⁿe Cristo. Ní véé 'áámá parte yeⁿe yā yeⁿe compromiso chi Ndyuūs díiⁿ yā. ⁷Ní 'úú nguéé n'daaca ca 'úú naatí Ndyuūs tee yā privilegio 'úú chi caaⁿ'máⁿ nduudu yeⁿe yā cucáávā poder yeⁿe yā. ⁸Ní 'úú chí 'líiⁿ chuundí nguaaⁿ nducyáácá 'iiⁿ'yāⁿ chi yeⁿe Ndyuūs naati Ndyuūs tee yā 'úú privilegio 'cūū chí 'úú ngaⁿ'á nduudu cuaacu yeⁿe yā nanááⁿ 'iiⁿ'yāⁿ chi nguéé yeⁿe

ndaata judíos chi Israel. Ní nga^{ná} nduudu cuaacu ye^{ní} n'dee n'dái vaadí 'cuiica taavi ca ye^{ní} e Cristo. Ní nguéé cuuvi diíⁿ yú cuenta ye^{ní} e vaadí 'cuiica miiⁿ. ⁹Ní nga^{ná} nduudu cuaacu ye^{ní} é yā. Ní 'íicú nducyaaca 'iiⁿ'yāⁿ cuuvi deenu yā tan'dúucā Ndyuūs ca^{ná} yā diíⁿ yā ye^{ní} e chi canúⁿ n'de'ei ye^{ní} é yā. Ní Ndyuūs chi din'dái yā nducué^{ní} e chi véé ní chi'neeⁿ n'de'ei yā chuū nducué^{ní} e tiempo chi 'āā chó'ōo. ¹⁰Ní 'tíicā diíⁿ Ndyuūs caati maaⁿ ní nducyáácá chi canée na va'ai chæeti nguuvi chí nga^{ná} ntiíⁿnyuⁿ o chi 'iiⁿ'ntyé^{ní} e cuuvi n'diichi nducué^{ní} e vaadí deenu ye^{ní} é Ndyuūs cucáávā vaadí n'giinu ye^{ní} é Ndyuūs chi diíⁿ yā ndúúcū 'iiⁿ'yāⁿ ná iⁿ'yeeⁿdí 'cūū, 'iiⁿ'yāⁿ chi i'téenu yā Cristo ní ca^{ná} yā yāacū ye^{ní} é yā. ¹¹Ní 'túúcā diíⁿ Ndyuūs ti tan'dúucā chi ne^{ní} é yā diíⁿ yā ndii vmnááⁿ vmnaaⁿ. Ní diíⁿ yā chi cuaacu ye^{ní} e cucáávā Jesucristo chi 'iivi yú. ¹²Ní caavā chi s'uuúⁿ ní ye^{ní} e Cristo s'uuúⁿ ní cáávā chi i'teenu yú Jesucristo, cuuví ndaā yú nanááⁿ Ndyuūs ndúúcū confianza. ¹³Cáávā chuū 'úú di'cuíftúu ndís'tií chi nguéé cuuvi ngáaⁿ nī caaavā chi 'úú n'geenú ngii ti chuū chi n'geenú ngii ní cosa chi n'daacā chi cuuví ndís'tií ní canee chi yeenú nī.

Cristo ne^{ní} é yā nducyaaca 'iiⁿ'yāⁿ

¹⁴Ní caaavā chuū 'úú ca'á gracias Ndyuūs ní 'úú ní ngiintii'yá nanááⁿ Ndyuūs Chiidá Señor Jesucristo ye^{ní} é yú. ¹⁵Ndyuūs ní Chiida nducyaaca yú ní cuaacu Chiida nducyaaca 'iiⁿ'yāⁿ ye^{ní} é yā chi snéé nanguuvi, 'tiicá ntúūⁿ nducyaaca 'iiⁿ'yāⁿ

ye^{ní} é yā chi snéé iⁿ'yeeⁿdí 'cūū. ¹⁶Caⁿ'angua'á ní ngiicá Ndyuūs Chiida yú chi ye^{ní} é nééné n'dee n'dái chi n'daacā ye^{ní} é yā ní tée yā ndís'tií fuerza na staava ye^{ní} é nī chi ditiinú nī cucáávā Espíritu N'dai ye^{ní} é yā. ¹⁷Ní ngiicá Ndyuūs chi Cristo canée yā na staava ye^{ní} é nī cáávā chi i'téenu nī Cristo. Ní 'íicú ndís'tií snee diitú nī ndúúcū vaadí ne^{ní} e ye^{ní} e Cristo. Ní snee nī tan'dúucā chi véé dií'yu na yáⁿ'āa ye^{ní} é 'áámá yáⁿ'á. 'Tíicā cunée vaadí ne^{ní} e ye^{ní} é Cristo na staava ye^{ní} é nī. 'Tíicā snee nī. ¹⁸Tuu'mí ndís'tií ndúúcū nducyaaca 'iiⁿ'yāⁿ chi i'téenu yā Cristo n'daacā cuuvi cádiinuuⁿ nī ye^{ní} é chi vaadí ne^{ní} e ye^{ní} é Cristo ní tan'dúucā Cristo ne^{ní} é taavi cá yā nducyaaca 'iiⁿ'yāⁿ. ¹⁹Ní ngiicá Ndyuūs chi ndís'tií ní cádiinuuⁿ nī chæé chí vaadí ne^{ní} e ye^{ní} é Cristo, 'áará chí ch'æete taavi ca chi nguéé cuuvi deenu yú nducué^{ní} e ye^{ní} é. Ní ngiicá chi staava ye^{ní} e ndís'tií ní canee diitú ndúúcū nducué^{ní} e chi n'daacā n'dai taavi caavā chí ndís'tií ní ye^{ní} e Ndyuūs ndís'tií.

²⁰Ní Ndyuūs ye^{ní} e yú cuuvi diíⁿ yā tanducué^{ní} e ní n'deē ca cuuvi diíⁿ ya ní nguéé tí chi ngiica yú o chí tuumicádiinuuⁿ yú. Tan'dúucā chi n'dee n'dái idiíⁿ yā cucáávā poder ye^{ní} é yā 'tíicā idiíⁿ yā ntiíⁿnyuⁿ ye^{ní} é yā ndúúcū s'uuúⁿ. ²¹Maaⁿ ní nducué^{ní} e tiempo ní cue^{ní} e daāⁿmaⁿ canée Ndyuūs chi ch'æete taavi ca ní deēve taavi cá yā nanááⁿ 'iiⁿ'yāⁿ chi ca^{ná} yā yāacū ye^{ní} é yā. 'Tiicá ntúūⁿ nanááⁿ Cristo.

**Nduuvidaama yú cucáávā
Espíritu N'dai yeⁿé Ndyuūs**

4 'Úú Pablo chi preso caneeé vácúū caati dííⁿ ntiíⁿnyuⁿ yeⁿé 'iivú Ndyuūs. Ní 'úú díⁿcuiitú ndís'tií chi n'daacā n'dai dííⁿ nī nducuéⁿē tan'dúúcā Ndyuūs neⁿé yā chi dííⁿ nī caati yaa'ví yā ndís'tií chi cuuvi yeⁿe yā. ²'Úú ngiicá chi 'cuētinée nī chi maáⁿ nī ndiicúúⁿ nī. Ní dííⁿ nī nducuéⁿē ndúúcū 'viich'ēstíínūⁿ ndúúcū 'aama nī taama nī ni cucheé nī yeⁿe nducuéⁿē ti dinéⁿe nī 'áámá nī taama nī. ³Ní cucáávā Ndyuūs itée yā vaadí 'diiíⁿ yeⁿé yā chi dííⁿ chi nduuvidaamá nī, 'úú ngiicá chi cueⁿe daāⁿmaⁿ dííⁿ nī nducuéⁿe chi cuuví nī chi nduuvidaamá nī caati Espíritu N'dai yeⁿé Ndyuūs nginneé yā ndís'tií. ⁴Véé 'áámá cuerpo nūⁿ ndúúcū 'áámá nūⁿ Espíritu N'dai yeⁿé Ndyuūs. 'Tiicá ntúūⁿ Ndyuūs yaa'ví yā s'uúúⁿ chi cuuvi yú yeⁿé yā ní ndúúcū 'áámá nūⁿ chi cunee ngiinu yeⁿe yú. ⁵Ní véé 'áámá nūⁿ Señor Jesucristo chí 'áámá nūⁿ 'iiⁿyāⁿ chi i'teenu yú, ní véé 'áámá nūⁿ chi duuchi chi ngeēdínuūⁿ nī 'iiⁿyāⁿ. ⁶Véé 'áámá nūⁿ Ndyuūs chi Chiidá nducyáácá 'iiⁿyāⁿ ní 'iivú Ndyuūs miíⁿ ngaⁿ'a ntiíⁿnyúⁿ yā yeⁿe nducuéⁿē. Ní dííⁿ yā ntiíⁿnyuⁿ cucáávā nducueⁿē, ní caneeé yā ndúúcū nducuéⁿē.

⁷Naati Ndyuūs tee yā ca'áámá ca'áámá s'uúúⁿ vaadí n'dai yeⁿé yā cáávā ntiíⁿnyuⁿ yeⁿe yú tan'dúúcā chi deenú yā chi cuuvi dííⁿ yú, ní ntiíⁿnyuⁿ miíⁿ ní chííⁿ chi tee Cristo ca'áámá ca'áámá s'uúúⁿ. ⁸Nífcú caneeé nguūⁿ na libro yeⁿé Ndyuūs ndii cuááⁿ vmnaaⁿ 'tíicā:

Chichēē yā yeⁿe enemigos yeⁿe yā ní cuicheé yā ná va'ai cheeti nguuvi, ní candée yā n'deeē n'dái 'iiⁿyāⁿ yeⁿé yā chi snúuⁿ yā vácúū, ní cá'á yā regalos 'iiⁿyāⁿ s'eeⁿ yeⁿé yā.

⁹¿DÉē neⁿe caaⁿmaⁿ nduudú 'cūū chiiⁿ chi cheé yā? Nduudú 'cūū neⁿe caaⁿmaⁿ chi vmnááⁿ vmnaaⁿ 'iiⁿyāⁿ miíⁿ caⁿ'á yā 'áámá cuaaⁿ yáánūⁿ ca chi cheeti yáⁿāa. ¹⁰'Iiⁿyāⁿ chí cá'ā miíⁿ maáⁿ 'iiⁿyāⁿ miíⁿ cucheé yā cuaaⁿ naachí yaacu taavi ca chí va'ai cheeti nguuvi caati maáⁿ yā cuuvi caneeé yā tanducuéⁿē dendú'ū cuaaⁿ. ¹¹Ní itée yā ca'áámá ca'áámá s'uúúⁿ ntiíⁿnyuⁿ chi cuuvi dííⁿ yú. Itée yā naⁿ'a yú ntiíⁿnyuⁿ yeⁿe apóstoles chi candēē yú nduudu yeⁿe Ndyuūs. Ní itée yā naⁿ'a yú ntiíⁿnyuⁿ chi caaⁿmaⁿ yú nduudu chi sta'a yú yeⁿé Ndyuūs. Ní itée yā ntiíⁿnyuⁿ naⁿ'a yú chi ngaⁿ'a yú nduudu chi nanguaⁿ'ai 'iiⁿyāⁿ. Ní itée yā ntiíⁿnyuⁿ naⁿ'a yú chi candēē yú nduudu yeⁿé yā na yaācū. Ní itée yā naⁿ'a yú ntiíⁿnyuⁿ chi maestro yeⁿe nduudu yeⁿé yā. ¹²'Tíicā dííⁿ Ndyuūs chi chí'cueéⁿ yā nducyaaca 'iiⁿyāⁿ chi i'téenu yā Cristo ní 'íicú 'iiⁿyāⁿ s'eeⁿ cuuvi dííⁿ yā ntiíⁿnyuⁿ chi tunéeⁿ yā. Ní nducyaacá yā chi yeⁿé cuerpo yeⁿe Cristo cuuvi cul'téenu cá yā Ndyuūs. ¹³Ní nducyaaca s'uúúⁿ ní cuuvi nduuvidaama yú ti maaⁿ ní s'uúúⁿ ní tan'dúúcā chi 'aama yú ndúúcū chi i'teenu yú ní ndúúcū chi deenu yú yeⁿe Cristo chi Daiya Dendyuūs. Ní nguuvi nguuvi cuuvi díitū ca yú ndúúcū chi i'teenu yú ndúúcū vaanicadiinūⁿ yeⁿe yú ndíí tiempo chi s'uúúⁿ din'daaca yú ní

tan'dúucā Cristo 'tíicā s'uúúⁿ. ¹⁴Āā ntéé diiⁿ yú tan'dúucā da'caiyāā diíⁿ yā chi ch'iindiveéⁿ yā yeⁿe 'aamá yā taamá yā chi ca'cueéⁿ yā cosa chi n'dááⁿ ní diíⁿ yā tan'dúucā chi 'yúúné candéé 'iiⁿyāⁿ 'múúⁿ miiⁿ. Ní nguéé canéé chi i'téénu yú nduudu yeⁿe 'iiⁿyāⁿ chi nginnche'éeí yā s'uúúⁿ. 'Iiⁿyāⁿ s'eeⁿ neⁿé yā candéé yā s'uúúⁿ lado yeⁿé yā chi i'téénu yú chiiⁿ chi nguéé cuaacu. ¹⁵Nguéé diiⁿ yú 'túucā naati canee chi caaⁿmaⁿ yú nduudu cuaacu yeⁿé Ndyuūs ti neⁿe yú 'iiⁿyāⁿ ndúucū núúⁿmáⁿ staava yeⁿe yú. Ní cuuvi cu'teenu ca yú ní diiⁿ yú nducuéⁿē chi n'daacā tan'dúucā chi diiⁿ Cristo chi tiiíⁿ 'áámá cuerpo yeⁿe nducyaaca yú. Ní s'uúúⁿ tan'dúucā cuerpo yeⁿé yā, 'tíicā s'uúúⁿ. ¹⁶Ní nducyaaca yú ní canee yú maaⁿ poder yeⁿe Cristo chi tiiíⁿ nducyaaca yú. Ní canee yú n'daacā na lugar chi tuneéⁿ yú ti yeⁿé Cristo s'uúúⁿ. Ní nducuéⁿē coo yeⁿe cuerpo yeⁿé yā n'daacā n'dai snéé ní 'áámá 'áámá coo ní inuⁿu tan'dúucā chi canéé chi diiⁿ. 'Tíicā s'uúúⁿ chi yeⁿe Cristo canee chí diiⁿ yú n'tiiⁿnyuⁿ chí tuneéⁿ yú cáávā chi n'giita yú, ní ditiinu yú, ní dineⁿe yú nducyaaca 'iiⁿyāⁿ.

**Véé vida ngai yeⁿe 'iiⁿyāⁿ
chi yeⁿe Cristo**

¹⁷Maaⁿ ní 'úú ngaⁿá cáávā Señor Jesucristo ní ngaⁿá chi din'daacá nī. Nguéé 'cuætinée nī tan'duucā tanáⁿā 'iiⁿyāⁿ chi nguæe i'téénu yā Ndyuūs. 'Iiⁿyāⁿ s'eeⁿ nadacadíínuuⁿ yā yeⁿe dendu'ū chi nguæe dichí'vē. ¹⁸Ní chiiⁿ chi nadacadíínuuⁿ yā ní yeⁿé ná maáiⁿ. 'Iiⁿyāⁿ s'eeⁿ nguéé véé vida cueⁿe daāⁿmaⁿ yeⁿé yā

chi Ndyuūs ca'á yā 'iiⁿyāⁿ chi yeⁿé yā ti 'iiⁿyāⁿ s'eeⁿ canéé yā ndúucū staava yeⁿé yā chí chææchi. Ní cáávā chuū 'iiⁿyāⁿ s'eeⁿ canéé yā chi nguéé deenú yā Ndyuūs. ¹⁹'Iiⁿyāⁿ s'eeⁿ 'āā ntéé diíⁿ yā sentir chi cuuvi 'cuinaáⁿ yā caavā nuuⁿndi chi diíⁿ yā. Ní diíⁿ yā tan'dúucā chi véé vicio yeⁿe yā. Ní diíⁿ yā nducuéⁿē dendu'ū chi nguæe n'daacā. Ní nguéé nadacadíínuuⁿ yā yeⁿe chi diíⁿ yā. ²⁰Naati ndís'tií nguéé 'tiicā ch'éeⁿ nī yeⁿe Cristo. ²¹Nduuti chi cuaacu chi ch'iindiveéⁿ nī nduudu yeⁿe Cristo ní Cristo chi'cueéⁿ yā ndís'tií ní i'téénu nī nduudu cuaacu chi yeⁿé Cristo, tuu'mi ní nduudu cuaacu yeⁿé yā cūnee ndúucu nī. ²²Maaⁿ ní 'āā ntéé diíⁿ nī tan'dúucā chi diíⁿ nī vmnaaⁿ chi i'téénu nī. Divii nī yeⁿe nducuéⁿē chi diíⁿ nī tiempo chi chó'oo caati chuū nginnche'éeí ndís'tií ndúucū nducuéⁿē chi neⁿe chi diíⁿ nī chi nguéé n'daacā. ²³Ndís'tií ní canee chi nadíngai nī espíritu yeⁿé nī ndúucū vaanicadíínuuⁿ yeⁿe maáⁿ nī. ²⁴Ní canéé chi cuta'á nī vida ngai yeⁿe Cristo tan'dúucā chi 'áámá vestido ngai ní cunúuⁿ nī vestido ngai. Ní diíⁿ nī nducuéⁿē tan'dúucā chi Ndyuūs neⁿé yā chi diíⁿ nī. Ní 'tíicā vida yeⁿe maáⁿ nī ní cuaacu níⁿnyúⁿ chí n'daacā ní dæeve.

²⁵Cáávā chuū nguéé caaⁿmáⁿ nī nduudu yaadi. Ca'áámá ca'áámá s'uúúⁿ ní caaⁿmaⁿ yú nduudu cuaacu ndúucū nducyaaca 'iiⁿyāⁿ na niiⁿnuúⁿ va'āi. Caati s'uúúⁿ ní yeⁿé 'áámá cuerpo nūuⁿ ti yeⁿe Cristo s'uúúⁿ.

²⁶Ní nduuti chi nduuvi taáⁿ nī, nguéé ca'a nī lugar chi vaadi taaⁿ

ye^{ne} nī diiiiⁿ chi dinuuⁿndí nī. Ní nguéeⁿ 'naaⁿ tiempo nduuví taáⁿ nī.

²⁷Nguéeⁿ ca'á nī mar 'áamá lugar yááⁿnguiniūⁿ chi cuuvi tuuⁿvi sa vida ye^{ne} nī.

²⁸Ní ndís'tií chi diduucú nī 'āā ntéé diduucú nī. Díⁿ nī ntiiⁿnyuⁿ n'daacā caati véé ye^{ne} nī. Ní 'íicú cuuvi ca'á nī 'iiⁿyāⁿ chi pobre yā chi nguéeⁿ véé ye^{ne} yā.

²⁹Nguéeⁿ caaⁿmáⁿ nī nduudu yaadí 'yāa, dámaāⁿ caaⁿmáⁿ nī nduudu chí n'daacā chi diiⁿ chi cu'téenu cá yā nī diiⁿ chi cunneeⁿ nī 'iiⁿyāⁿ chi 'caandiveéⁿ yā nduudu ye^{ne} nī. ³⁰Ndís'tií nguéeⁿ díⁿ nī dendu'ū chi cuuví ndaachií Espíritu N'dai ye^{ne} Ndyuūs ti maaⁿ Espíritu ye^{ne} Ndyuūs miiⁿ chi véé ye^{ne} yú ní diiiiⁿ chi sellado nī chi ye^{ne} Ndyuūs s'uúúⁿ. Ní diiiiⁿ chi cuuvi cuaacu chi Ndyuūs nadanguáⁿai yā s'uúúⁿ.

³¹Ní ndís'tií 'āā ntéé cuneé nī ndúucū vaadí taaⁿ, ní nguéeⁿ díⁿ nī chi nguéeⁿ ne^{ne} nī 'iiⁿyāⁿ, ndíí nguéeⁿ 'cuaí taáⁿ nī, ndíí nguéeⁿ caaⁿmáⁿ nī dendu'ū chi nguéeⁿ n'daacā ye^{ne} taamá yā, ndíí nguéeⁿ díⁿ nī ye^{ne} taama yā cosas chi nguéeⁿ n'daacā.

³²Caati diiⁿ n'daacá nī ní diya'ai 'íinu nī 'aamá nī taamá nī vi'í, ní nadích'εecú nī nuuⁿndi ye^{ne} nī ye^{ne} 'áamá nī taamá nī vi'í tan'dúucā Ndyuūs nadāch'εecú yā nuuⁿndi ye^{ne} nī ti ye^{ne} Cristo ndís'tií.

Táacā canee chi 'cuεetinéé 'iiⁿyāⁿ chi daiya Ndyuūs

5 Cuaacu chi ndís'tií ní daiya Dendyuūs ndís'tií. Maaⁿ ní cáánu nī díⁿ nī tan'dúucā Ndyuūs díⁿ yā. ²Ní dinéⁿ nī nducyaaca 'iiⁿyāⁿ tan'dúucā Cristo dinéⁿ yā

s'uúúⁿ ní ca'á maáⁿ yā vida ye^{ne} maáⁿ yā cáávā s'uúúⁿ. Ní díⁿ yā tan'dúucā chi maáⁿ yā nī 'áamá 'íiti cuūchí chi 'iiⁿyāⁿ díⁿ yā 'caaⁿnúⁿ yā 'iiti chi ofrenda ye^{ne} yā ní ca'á yā nátai nanááⁿ Ndyuūs. Ní Cristo maáⁿ yā ofrenda chi n'deεve nguéeⁿ nanááⁿ Ndyuūs. Ní yeenu Ndyuūs ndúucū ofrenda miiⁿ chi Cristo miiⁿ.

³Maaⁿ ní chi ndís'tií ní ye^{ne} Ndyuūs ndís'tií nguéeⁿ canee chí caaⁿmáⁿ nī mar 'áamá ye^{ne} nuuⁿndi chí saⁿā n'diichi sa n'daataá. Ní nguéeⁿ canee chí caaⁿmáⁿ nī ye^{ne} táamá dendu'ū chí nguεε n'daacā ní nguéeⁿ deεve, ndíí nguεε dínngueé nī ye^{ne} chí véé chí ye^{ne} taamá yā. ⁴Ndíí nguéeⁿ canee chí caaⁿmáⁿ nī dendu'ū chí cuuvi 'cuinaáⁿ nī, ndíí nguéeⁿ caaⁿmáⁿ nī nduudu tonto o nduudu chí nguéeⁿ n'daacā, caati nducué^{ne} chuū ní nguéeⁿ n'daacā ye^{ne} nī. Naati ndís'tií ní canee chí caaⁿmáⁿ nī Ndyuūs 'tíicā:

Gracias n'dii Ndyuūs. ⁵Ní ndís'tií 'āā deenu nī chí saⁿā chí caⁿa sá ndúucū n'daataá chí nguéeⁿ ye^{ne} sa o n'daataá chí caⁿa tá ndúucū saⁿā chí nguéeⁿ ye^{ne} ta, o 'iiⁿyāⁿ chí diiⁿ dendu'ū chí nguéeⁿ n'daacā o 'iiⁿyāⁿ chí dínngueé yā ye^{ne} chí véé ye^{ne} taama yā ti tanducué^{ne} chuū ní tan'dúucā chí i'téenu yā santos ídolos. Nducyáácá 'iiⁿyāⁿ s'eeⁿ ní nguéeⁿ véé parte ye^{ne} yā naachi Cristo ndúucū Ndyuūs ngaⁿa ntiíⁿnyúⁿ yā. ⁶Nguéeⁿ ca'á nī lugar chí caaⁿmaⁿ 'iiⁿyāⁿ chí cannche'íi yā ndís'tií ndúucū nduudu chí tonta ti ngaⁿá yā chí cuuvi díⁿ nī nducué^{ne} chí nguεε n'daacā. Caati cáávā nducué^{ne} chuū ní Ndyuūs díⁿ yā diituu cá castigar 'iiⁿyāⁿ s'eeⁿ

chi nguée n'giindiveéⁿ yā nduudu yeⁿe Ndyuūs. ⁷Ní ndís'tiī nguée nduuvidaamá nī ndúúcu 'iiⁿ'yāⁿ s'eeⁿ ní nguée díⁿ nī mar 'áámá chi díⁿ yā.

⁸Ndís'tiī ní tiempo chi 'āā chó'ōo ch'etinee nī ndúúcu yááⁿ'nguiinūⁿ na maāiⁿ, naati maaⁿ ní chi ndís'tiī ní yeⁿ'ē Señor Jesucristo, ndís'tiī canée nī na chideeve yeⁿe Señor miⁿ. Ní maaⁿ ní cueti chiicá nī na chideeve miⁿ tan'dúúca chi ndís'tiī ní daiyá Ndyuūs ndís'tiī.

⁹Ní chuū 'iiⁿ'yāⁿ díⁿ yā taachi snée yā chideeve yeⁿ'é Ndyuūs. Tanducuéⁿ'ē chi n'daacā ndúúcu tanducuéⁿ'ē chí cuaacu díⁿ yā. Ní ch'iⁿ'í yā na vida yeⁿ'e maáⁿ yā chi n'daacá yā. Chuū ní tan'dúúca n'gui'i yeⁿ'e yáⁿ'á ti n'gui'i yeⁿ'ē chideeve miⁿ ní 'tíicā. ¹⁰Ní caanú nī díⁿ nī ca'cueeⁿ nī nducuéⁿ'ē chi Ndyuūs neⁿ'é yā chi díⁿ nī. ¹¹Ní ndís'tiī nguée díⁿ nī mar 'áámá chi nguée dichíⁿ'vē ndúúcu 'iiⁿ'yāⁿ chi chiicá yā na maāiⁿ naati caaⁿ'máⁿ nī 'iiⁿ'yāⁿ chi chiicá yā na maāiⁿ chée chi nguée n'daacā chi díⁿ yā nanááⁿ Dendyuūs. ¹²S'uuúⁿ cuuvi 'cuinaaⁿ yú nduuti chi caaⁿ'maⁿ yú yeⁿ'e dendu'ū nuuⁿndi ch'ēete chi 'iiⁿ'yāⁿ díⁿ yā taachi din'dé'ei yā. ¹³Ní taachi ngaⁿ'á nī 'iiⁿ'yāⁿ s'eeⁿ yeⁿ'e tanducuéⁿ'ē chi nguée n'daacā chí díⁿ yā tuuⁿ'mi ní canée na chideeve. Ní Ndyuūs ch'iⁿ'í yā 'iiⁿ'yāⁿ nducuéⁿ'ē tan'dúúca chi díⁿ yā, ti 'āā ntée canúúⁿ n'de'ei. ¹⁴Canée nguūⁿ na libro yeⁿ'é Ndyuūs. Cáávā chuū ní Ndyuūs ngaⁿ'a yā 'tíicā :

Ndís'tiī 'iiⁿ'yāⁿ chi ch'iⁿ;
nadacuéⁿ nī yeⁿ'e nguaaⁿ
tináⁿ'ā, ní 'íicú Cristo chí

chideeve ní tée yā chideeve ndís'tiī.

¹⁵Cáávā chuū ndís'tiī ní nadacadínuuⁿ n'daacá nī yeⁿ'e chi díⁿ nī. Nguée díⁿ nī tan'duucā chi ndís'tiī 'iiⁿ'yāⁿ zonso ndís'tiī naati díⁿ nī tan'duucā chi ndís'tiī 'iiⁿ'yāⁿ deenu ndís'tiī. ¹⁶Ní díⁿ nī aprovechar tiempo chi véé yeⁿ'é nī chi din'daacá nī caati tiempo 'cūū 'iiⁿ'yāⁿ díⁿ yā dendu'ū chi nguée n'daacā. ¹⁷Nguée díⁿ nī tan'dúúca 'iiⁿ'yāⁿ chi nguée tuumicadínuuⁿ yā ti zonso yā naati diiⁿ'núú yiiⁿ'nuⁿ nī maaⁿ níicú tuumicadínuuⁿ nī chee chi Ndyuūs neⁿ'é yā chi díⁿ nī. ¹⁸Nguée cuuvi cuuⁿ'ví nī ti diiⁿ' chí cuuvi ndái nī, naati itée nī lugar chi Espíritu N'dai yeⁿ'é Ndyuūs cuuvi cūnee nduucú nī. ¹⁹Ní ndeé nī 'áámá nī ndúúcu taama nī ndúúcu salmos, ndúúcu himnos, ndúúcu canciones chi ngaⁿ'a yeⁿ'é Ndyuūs. Ní ngiitá nī ní dinéⁿ'e nī Señor Jesucristo yeⁿ'ē yú ndúúcu núúⁿ'máⁿ staava yeⁿ'é nī. ²⁰Ní cueⁿ'e daāⁿ'maⁿ nca'á nī gracias Ndyuūs Chiida yú ndúúcu chí dúúchí Señor Jesucristo yeⁿ'ē yú caava nducuéⁿ'ē chí véé.

Yeⁿ'e vida yeⁿ'e familia s'eeⁿ chí yeⁿ'e Jesucristo

²¹Nguée dich'ēetē nī maáⁿ nī. Dinéⁿ'e nī vi'i 'áámá nī ndúúcu taama nī caati 'āā díⁿ nī respetar Ndyuūs.

²²Ní ndís'tiī táⁿ'ā chí ch'iindivaacu canee chí 'caandiveéⁿ nī yeⁿ'e isaⁿ'ā yeⁿ'é nī tan'dúúca chí ch'iindiveéⁿ nī nduudu yeⁿ'é Ndyuūs ti isaⁿ'ā yeⁿ'é nī tan'duucā 'iiví nī, 'tíicā sa. ²³Caati isaⁿ'ā yeⁿ'é nī ní tan'dúúca tiiⁿ yeⁿ'e familia, 'tíicā sa. 'Tiicá

ntúūⁿ tan'dúúcā Cristo ní tiiⁿ
 'iiⁿyāⁿ chi i'téenu yā 'yā, Cristo
 ntúūⁿ 'iiⁿyāⁿ chi nadanguáⁿai yā
 nducyaaca 'iiⁿyāⁿ chi i'téenu yā 'yā.
 Ní nducyáácá 'iiⁿyāⁿ chi i'téenu yā
 Cristo, 'iiⁿyāⁿ s'eeⁿ tan'duucā cuerpo
 yeⁿe Cristo, 'tiicá yā. ²⁴Ní tan'duucā
 'iiⁿyāⁿ chi i'téenu yā Cristo canee
 yā maaⁿ poder yeⁿe Cristo 'tiicá
 ntúūⁿ táⁿā canee tá maaⁿ poder
 yeⁿe isaⁿā yeⁿe tá ní canee chi
 'caandiveeⁿ tá yeⁿē sa.

²⁵Ní ndís'tii chi isaⁿā chí
 ch'iindivaacu canee chi neⁿé nī
 n'daataá yeⁿé nī tan'duucā Cristo
 neⁿé yā 'iiⁿyāⁿ yeⁿe yaacu yeⁿé yā.
 Ní Cristo nca'a maáⁿ yā vida yeⁿe
 maáⁿ yā ní ch'ii yā cáávā 'iiⁿyāⁿ
 chi yeⁿé yā. ²⁶Ní 'tíicā ch'ii Cristo
 caati s'uúúⁿ cuuvi 'iiⁿyāⁿ yeⁿé yā
 s'uúúⁿ caavā ntiin'nyuⁿ chi dííⁿ yā.
 Ní Cristo didεεvé yā 'iiⁿyāⁿ cucáávā
 nuūⁿnīⁿ ní cucáávā nduudu yeⁿé
 yā. ²⁷Ní Cristo candée yā 'iiⁿyāⁿ
 chí yeⁿé yā nanááⁿ Ndyuūs. Ní
 'iiⁿyāⁿ s'eeⁿ ní ngii n'gai ní dεeve
 yā. Ní nguée falta yeⁿé yā, ndíí
 nguée véé mar 'áámá nuuⁿndi yeⁿé
 yā, ndíí nguée 'áámá dendu'ū chi
 nguée cuaacu na vida yeⁿé yā, ndíí
 nguée véé mar 'áámá dendu'ū chi
 'túúcā. Ní 'iiⁿyāⁿ chi yeⁿé yā ní
 núúⁿmáⁿ yā ní yeⁿé Cristo. Ní nguée
 véé mar 'áámá chi nguée n'daacā
 yeⁿé 'iiⁿyāⁿ s'eeⁿ. ²⁸Ní isaⁿā chí
 ch'iindivaacú canée chí dinéⁿe
 sa n'daataá yeⁿē sa tan'dúúcā chi
 neⁿe sa maaⁿ sa cuerpo yeⁿe sa,
 'tíicā n'daataá yeⁿē sa. Ní saⁿa chi
 dinéⁿe sa n'daataá yéⁿē sa neⁿe
 maaⁿ sa saⁿā. ²⁹Nguée véé mar
 'áámá 'iiⁿyāⁿ chi nguée neⁿé maáⁿ
 yā cuerpo yeⁿé yā, naati nga'a

maáⁿ yā chiiⁿ chi n'daacā chi cuuvi
 yeⁿé yā. Ní maáⁿ yā dííⁿ yā cuidar
 cuerpo yeⁿe maáⁿ yā. 'Tiicá ntúūⁿ
 Cristo dinéⁿe yā ní dííⁿ yā cuidar
 nducyaaca 'iiⁿyāⁿ chi i'téenu yā 'yā.
³⁰'Tíicā dííⁿ Cristo ti 'iiⁿyāⁿ s'eeⁿ chi
 yeⁿé yā ní tan'dúúcā cuerpo yeⁿé
 yā 'tíicā 'iiⁿyāⁿ s'eeⁿ. Ní s'uúúⁿ ní
 tan'dúúcā 'áámá parte yeⁿe cuerpo
 yeⁿe Cristo 'tíicā s'uúúⁿ. ³¹Ní 'tiicá
 ntúūⁿ saⁿā i'neeⁿ sa chεecu sa
 ndúúcū chiida sa ní nduuvidaama
 sa ndúúcū n'daataá yeⁿē sa ní nduu
 'uuví yā nduuvidaamá yā ní dííⁿ yā
 tan'dúúcā chi 'áámá cuerpo nūⁿ.
³²Chuū ní 'áámá vaadi cuaacu na
 libro yeⁿé Ndyuūs, ní ngaⁿá ngíí
 ndís'tii yeⁿe chuū. Nduudu miiⁿ
 ngaⁿā yeⁿe Cristo ndúúcū 'iiⁿyāⁿ
 chi i'téenu yā Cristo ní yeⁿé yā
 'iiⁿyāⁿ s'eeⁿ. ³³Maaⁿ ní neⁿé caaⁿmáⁿ
 ca'áámá cā'aama ndís'tii chi saⁿā
 chí 'nínívaacu, canee chi neⁿe
 nī n'daataá yeⁿe nī tan'dúúcā chi
 neⁿé nī maáⁿ nī. Ní ndís'tii n'daataá
 canée chi dinéⁿe nī isaⁿā yeⁿé nī nī
 'caandiveeⁿ nī yeⁿe sa.

6 Ndís'tii da'caiyá chi i'téenu nī
 Cristo, canee chi 'caandiveeⁿ
 nī yeⁿe chiidá nī caati chuū chí
 cosa chí n'daacā chí dííⁿ nī. ²Ní
 mandamiento yeⁿe Ndyuūs chi
 vmnááⁿ vmnaaⁿ chi Ndyuūs teé yā
 compromiso yeⁿē ní chuū: Cu'téenu
 nī chiidá nī ndúúcū chεecú nī, ³ní
 'iicu nduuti chi dííⁿ nī 'tíicā cuuvi
 yeenu nī níicú cuneé nī na iⁿ'yeeⁿdí
 'cūū n'dee n'dái nduuyu.

⁴Ní ndís'tii saⁿā chí véé daiyá
 nī, nguée dííⁿ nī chi nduuvi taaⁿ
 daiyá nī naati di'cuuitá nī daiya nī
 ní yaa'ví nī daiya nī taachi nguée
 din'daacā ní ca'cuéeⁿ nī daiyá nī

yeⁿe Señor Jesucristo caati cuuvi cu'téenu yā yeⁿ'é yā.

⁵Ní ndís'tiī 'iiⁿyāⁿ chi diiⁿ ntiīⁿnyuⁿ ndúúcu 'iiví nī, 'caandiveéⁿ nī yeⁿ'e 'iiví nī chi véé na iⁿ'yeeⁿdí 'cūū. Ní diíⁿ nī respetar 'iiví nī ní 'va'á nī yeⁿ'e yā. Ní diíⁿ nī ntiīⁿnyuⁿ yeⁿ'e yā ndúúcu núúⁿmáⁿ staava yeⁿ'e nī. Ní diíⁿ nī nducuéⁿ'ē ntiīⁿnyuⁿ yeⁿ'é yā tan'duucā chí diíⁿ nī caavā Cristo. ⁶Ní diíⁿ nī n'dai ntiīⁿnyuⁿ yeⁿ'é yā nguéé dáamáāⁿ taachi 'iiví nī inaáⁿ yā ndís'tiī caati n'daacā caneeé nī ndúúcu yā. Naati diíⁿ nī ntiīⁿnyuⁿ yeⁿ'é yā tan'dúúca chi ntiīⁿnyuⁿ yeⁿ'e Cristo chí diíⁿ nī ní ndúúcu núúⁿmáⁿ staava yeⁿ'é nī. Chuū ní chiiⁿ chi Ndyuūs neⁿ'é yā chí diíⁿ nī. ⁷Ní dinéⁿ'e nī din'daacā nī ntiīⁿnyuⁿ yeⁿ'e yā tan'dúúca chí ntiīⁿnyuⁿ yeⁿ'e Señor Jesucristo chí diíⁿ nī, nguéé tan'dúúca chí ntiīⁿnyuⁿ yeⁿ'e 'iiⁿyāⁿ yeⁿ'é iⁿ'yeeⁿdí 'cūū. ⁸Ní nducyááca nī ní déénu nī nduuti chí 'iiⁿyāⁿ chí diíⁿ ntiīⁿnyuⁿ caadi 'iiyu o nduuti chí 'iiⁿyāⁿ libre yā nducyááca yā cuta'á yā yeⁿ'e Señor Jesucristo chí 'iivi yú chííⁿ chí téé yā 'iiⁿyāⁿ caavā ntiīⁿnyuⁿ ndaacā chí diíⁿ yā.

⁹Ní ndís'tiī chí 'iiví yeⁿ'e 'iiⁿyāⁿ, 'tiicá ntúūⁿ din'daacā nī ndúúcu 'iiⁿyāⁿ chí dichíí'vē ndís'tiī. Nguéé caaⁿmáⁿ nī chí caⁿ'á nī 'cueⁿ'é nī 'iiⁿyāⁿ chí dichíí'vē ndís'tiī. N'gaacu nī chí ndís'tiī ndúúcu 'iiⁿyāⁿ chí dichíí'vē ndís'tiī ní snée nī na poder yeⁿ'e 'iivú Señor Jesucristo chí caneeé na va'ai cheeti nguuví. Ní 'āā daamá nūūⁿ nducyááca 'iiⁿyāⁿ nanááⁿ Señor Jesucristo yeⁿ'é yā.

**Armas yeⁿ'e Espíritu N'dai
yeⁿ'é Ndyuūs cáava 'iiⁿyāⁿ
chí i'téenu yā Ndyuūs**

¹⁰Maaⁿ ní ndís'tiī hermanos yeⁿ'é diíⁿ nī chí ditiinú 'cuētinée

nī nanááⁿ Señor Jesucristo yeⁿ'e yú ndúúcu nducuéⁿ'ē poder chí véé yeⁿ'é Cristo. ¹¹Ní cuuví diíⁿ nī defender maáⁿ nī ndúúcu nducuéⁿ'ē armadura chí tan'dúúca armadura catecai soldados chí Ndyuūs dátee yā s'uuúⁿ chí yeⁿ'e Cristo. Ní 'íicú cuuvi cuhéé nī yeⁿ'e nducuéⁿ'ē dendu'ū chí diíⁿ yááⁿ'nguiinūūⁿ taachi ngínnc'he'ei sa ndís'tiī. ¹²Nguéé 'cuuⁿ'maⁿ yú contra 'iiⁿyāⁿ chí nguéé n'daacā naati 'cuuⁿ'maⁿ yú ní contra fuerzas yeⁿ'e espíritus chí nguéé n'daacā chí caneeé na 'yúúné ndúúcu espíritus chí 'iiⁿntyéⁿ'ē yeⁿ'é tanáⁿ'ā espíritus chí ca'a orden yeⁿ'e espíritus chí nguéé n'dai ndúúcu nducuéⁿ'ē yeⁿ'e iⁿ'yeeⁿdí chí caneeé na maaíⁿ chí yeⁿ'e yááⁿ'nguiinūūⁿ. ¹³Cáávā chuū tan'dúúca 'áámá soldado cuta'a sa catecai yeⁿ'e soldado ní maaⁿ ní cuta'á nī nducuéⁿ'ē armadura chí tan'dúúca catecai nī chí Ndyuūs dátee yā ndís'tiī. Ní 'íicú cuuvi cuhéé nī contra enemigo nguuví taachi ndaa nanááⁿ nī nducuéⁿ'ē dendu'ū chí nguēe n'daacā. Ní taachi chichee nī yeⁿ'e nducuéⁿ'ē chí nguéé n'daacā ndí chí 'cuiinū, tuu'mi ní cuuvi 'cuētinée diitú nī ndúúcu chí i'téenu nī. ¹⁴Ní caneeé diitú nī ndúúcu armadura yeⁿ'é Ndyuūs. Cáávā caandaá 'tiicá ntúūⁿ ndís'tiī cuta'á nī cinturón ní chiichi cuneeé cinturón yeⁿ'é nī chí armadura yeⁿ'e Ndyuūs chí vaadi cuaacu. Ní véé fuerzas yeⁿ'é nī. Ní diiⁿ n'daacā nī caati caneeé diitú nī. 'Tiicá ntúūⁿ ndís'tiī cuta'á nī chaleco cūū yeⁿ'e Ndyuūs chí vaadi cuaacu. Ní caneeé chí diíⁿ nī nducuéⁿ'ē chí n'daacā caati cuuvi diíⁿ nī proteger pecho

maáⁿ nī yeⁿe nducuéⁿē chi nguεε n'daacā chí dardos yeⁿe enemigo. ¹⁵Tiicá ntúūⁿ ndís'tiī snúúⁿ ca'a nī zapatos chi yeⁿé Ndyuūs chí yeⁿē vaadī 'diiíⁿ. Ní 'cuetinéeⁿ listo nī chi caaⁿmaⁿ nī 'iiⁿyāⁿ nduudu cuaacu yeⁿe Jesucristo ní 'íicú cuuvi cunéeⁿ vaadī 'diiiⁿ yeⁿé yā. ¹⁶Tiicá ntúūⁿ ndís'tiī sta'á nī escudo yeⁿé Ndyuūs chí vaadī i'teenu. Ní 'íicú díitú caneeⁿ nī ndúucū chí i'téenu nī. Ní diíⁿ nī protejer maáⁿ nī yeⁿe dardos chí ngiichi yeⁿe yááⁿ'nguiinūⁿ. Ní yááⁿ'nguiinūⁿ nguéeⁿ cuuvi cuchéeⁿ sá yeⁿe ndís'tiī ndúucū cosas yeⁿe sa chí nguéeⁿ n'daacā. ¹⁷Tiicá ntúūⁿ ndís'tiī sta'á nī cachucha cūⁿ yeⁿe Ndyuūs chí vaadī nguaⁿ'ai yeⁿé nī chí diiⁿ protejer tiíⁿ nī. Ní n'gáácú nī chí Jesucristo nadanguáⁿ'ai yā ndís'tiī ní itée yā fuerzas ndís'tiī chí nguéeⁿ 'va'á nī ní nguéeⁿ véé 'uuvi vaanicádiinuuⁿ yeⁿé nī. 'Tiicá ntúūⁿ ndís'tiī sta'á nī espada yeⁿe Ndyuūs chí Espíritu N'dai yeⁿé Ndyuūs. Ní Espíritu N'dai yeⁿe Ndyuūs ndúucū Nduudu Cuaacu yeⁿé Ndyuūs inneé yā ndís'tiī chí nguéeⁿ n'giindiveéⁿ nī nduudu yeⁿe yááⁿ'nguiinūⁿ naati yááⁿ'nguiinūⁿ caⁿ'a sa caanu sa yeⁿé nī. ¹⁸Ní cueⁿe daāⁿmaⁿ caaⁿmaⁿngua'á nī yeⁿē tanducuéⁿē chuū. Ní cueⁿe daāⁿmaⁿ di'cuiitú nī Ndyuūs cucáávā Espíritu N'dai yeⁿé yā, ní ngiicá nī caati cuuvi cuta'á nī yeⁿē poder yeⁿe Ndyuūs. Ní 'íicú cuuvi diíⁿ nī nducuéⁿē chuū. Ní canee listo nī. Ní nguéeⁿ cuuvi cúunu nī. Ní caaⁿmaⁿngua'á nī caavā nducyaaca 'iiⁿyāⁿ chí i'téenu yā Ndyuūs. ¹⁹Ní caⁿ'angua'á nī caavā 'úú dendu'ū ti Ndyuūs

tée yā nduudu yeⁿé yā 'úú taachi ngaⁿ'á nduudu cuaacu yeⁿé yā. Ní 'íicú 'úú cuuvi caaⁿmaⁿ nduudu miiⁿ ndúucū valor caati 'iiⁿyāⁿ cuuvi déenu yā nduudu chí ngaⁿ'á táácā chí cuuvi nanguáⁿ'ai 'iiⁿyāⁿ, nduudu chí caneeⁿ n'de'ei cuááⁿ vmnaaⁿ. ²⁰Ndyuūs yeⁿe yú ní dichó'o yā 'úú tan'dúucā chí 'úú embajador yeⁿé yā 'úú chí 'úú caaⁿmaⁿ nduudu cuaacu yeⁿé yā. Ní cááva chuū ní 'úú ní preso 'úú ní maaⁿ canuúⁿ vácū. Ní ndís'tiī ní caⁿ'angua'á nī caavā 'úú chí 'úú cuuvi caaⁿmaⁿ nduudu cuaacu miiⁿ ndúucū valor tan'dúucā chí 'úú caneeⁿ chí caaⁿmaⁿ.

Saludos yeⁿe Pablo naachi ch'iinū carta 'cuū

²¹Hermano Tíquico, chí neⁿe nducyaaca s'uúúⁿ, ní n'daacā diiⁿ sa ntiíⁿnyuⁿ yeⁿe Señor Jesucristo nduucú. Ní saⁿ'ā miiⁿ caaⁿmaⁿ sa ndúucū ndís'tiī yeⁿe 'úú ní yeⁿē chí 'úú idiíⁿ. ²²Cáávā chuū dicho'ó hermano Tíquico nanááⁿ ndís'tiī ti caaⁿmaⁿ sa táácā snéeⁿ nū ní 'iicu diiⁿ sa chí diituu 'cuetinéeⁿ nī na staava yeⁿé nī.

²³Maaⁿ ní 'úú neⁿé chí Ndyuūs Chiida yú ndúucū Señor Jesucristo yeⁿe yú ca'á yā nducyaaca hermanos yeⁿé vaadī 'diiíⁿ na staava yeⁿé yā. Ní neⁿé chí Ndyuūs diíⁿ yā chí ndís'tiī cu'téenu cá nī Ndyuūs, ní dineⁿe cá nī nducyaaca 'iiⁿyāⁿ. ²⁴Ní neⁿé chí Ndyuūs ca'á yā vaadī n'dai yeⁿé yā nducyaaca 'iiⁿyāⁿ chí cuaacu ní'nyúⁿ neⁿé yā Señor Jesucristo yeⁿe yú. Ní 'áamá neⁿé yā, ní nguéeⁿ n'daáⁿ yā. 'Tiicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ FILIPOS

Taachi Pablo canúⁿ yā vácūⁿ
idingúⁿ yā yeⁿe 'iiⁿ'yāⁿ yeⁿe
yāāⁿ Filipos, 'iiⁿ'yāⁿ chi
i'téenu yā Jesucristo

1 'Úú Pablo ndúúcū Timoteo
ní nús'uu ní dichí'f'v'e 'nū
Jesucristo. Maaⁿ ní idinguúⁿ 'nū
carta 'cūū yeⁿe nducyáácá
hermanos chi i'téenu yā Jesucristo
ndúúcū obispos chi saⁿā ndíí tiiⁿ
yeⁿe 'iiⁿ'yāⁿ chi i'téenu yā Jesucristo
ndúúcū diáconos chi nginneé yā
obispos, nducyaaca yā chi snee
yā na yāāⁿ Filipos. ²Neⁿ'é 'nū chí
Ndyuūs Chiida yú ndúúcū Señor
Jesucristo yeⁿe yú tée yā ndís'tií
yeⁿe vaadi n'dai taavi yeⁿ'é yā ní
'cuætinée nī ndúúcū vaadi 'diíⁿ
yeⁿ'é Ndyuūs.

Pablo ngaⁿ'angua'á yā cáávā
'iiⁿ'yāⁿ chi i'téenu yā Jesucristo

³'Úú nca'á gracias Ndyuūs yeⁿ'ē
yú ca'áámá ca'áámá vuelta taachi
n'gaacu yeⁿe ndís'tií. ⁴Ní taachi
caⁿ'anguā'á, nducuéⁿ'ē tiempo
caⁿ'anguā'á yeⁿe nducyaaca ndís'tií
ndúúcū vaadi yeenú. ⁵Caati
ndís'tií ní nduucú ní dáámá diíⁿ yú
ntiiⁿ'nyuⁿ ti inneé nī 'úú chi 'úú

candéé nduudu yeⁿ'e evangelio
chí nduudu ngai yeⁿ'e Cristo, ndii
nguuvi chi i'téenu nī Jesucristo ndíí
maaⁿ. ⁶Ní deenú chi seguro canee
chiiⁿ chi yeⁿ'e Ndyuūs ti Ndyuūs
chi tuca'á yā diíⁿ yā ntiiⁿ'nyuⁿ
n'daacā n'dai na vida yeⁿ'e ndís'tií
ní idiíⁿ yā chi ndís'tií 'cuætinée
nī diíⁿ nī ntiiⁿ'nyuⁿ chi n'daacā
nguuvi nguuvi ndíí nguuvi chí ndaa
Jesucristo taama vmnéⁿ'ēe. ⁷Ní
'tíicā chi n'dai chi 'úú nacádiinúúⁿ
chuū yeⁿ'ē nducyaaca ndís'tií caati
neⁿ'é taavi ndís'tií. Ní nducyaaca
ndís'tií ní véé parte yeⁿ'é nī nduucú
yeⁿ'e nducuéⁿ'ē chi n'dai taavi chí
Ndyuūs itée yā s'uuúⁿ. Ní ndís'tií
nginneé nī 'úú 'áará chí canuúⁿ
vácūū o 'áará chí canee nanááⁿ
'iiⁿ'yāⁿ 'iiⁿ'ntyéⁿ'ē 'úú ní ngaⁿ'á
nduudu cuaacu yeⁿ'ē nduudu ngai
yeⁿ'é Cristo chí cuaacu chí 'tíicā.
⁸Ní Ndyuūs yeⁿ'e yú ní deenú yā
chí 'úú neⁿ'é ndís'tií tan'dúúcā chí
Cristo neⁿ'é yā s'uuúⁿ. ⁹Ní 'úú ngiicá
Ndyuūs chí ndís'tií cuuvi dinéⁿ'e
ca nī nducyaaca 'iiⁿ'yāⁿ. Ní cuuvi
deenu cá nī yeⁿ'ē nduudu cuaacu
ní cuuvi nadacadíinuuⁿ n'daāca nī
yeⁿ'ē nducuéⁿ'ē chí cuaacu. ¹⁰Caati
cuuví ndæve nī nducuéⁿ'ē tiempo

chéé chí n'daacā taavi ca. Ní 'tíicā cuuvi 'cuētinéé nī n'daacā n'dai. Ní taachi ndaa Jesucristo taama vmnéⁿēe nguéé véé mar 'áámá nuuⁿndi yeⁿé nī. ¹¹Ní neⁿé chí Jesucristo ndaacá yā ndís'tiī chí 'cuētinéé n'daacá nī cucáāvā poder yeⁿe Cristo ní dííⁿ nī ntiiⁿnyuⁿ yeⁿe evangelio chí nduudu ngai yeⁿe Cristo. Ní 'íicú nducyaaca 'iiⁿyāⁿ cuuvi caaⁿmáⁿ yā chí ch'ēete taavi Ndyuūs. Ní dííⁿ yā honrar Ndyuūs.

Cáāvā 'úú vida yeⁿé ní Cristo

¹²Maaⁿ ní ndís'tiī hermanos yeⁿé, neⁿé chí cadíinuⁿ nī chí tanducuéⁿē chí ch'eenú chíi ní dííⁿ chí 'yaaⁿ ca 'iiⁿyāⁿ ngíi n'giindiveéⁿ yā nduudu cuaacu chí ngai yeⁿe Cristo. ¹³Tíicā chíi chí taanduvéé soldados chí dííⁿ ntiiⁿnyuⁿ na palacio yeⁿe César ndúúcu taanduvéé 'iiⁿyāⁿ, nducyaaca yā deenu yā chí 'úú caneé preso na vácūū cucáāvā chí dííⁿ ntiiⁿnyuⁿ yeⁿe Cristo. ¹⁴Ní nééné 'yaaⁿ hermanos chí i'téenu yā Señor Jesucristo taachi cadíinuⁿ yā chí caneé vácūū nguéé di'va'á yā naati neⁿé yā caaⁿmaⁿ cá yā nduudu ngai chí nduudu cuaacu yeⁿe Ndyuūs ndúúcu confianza nanááⁿ Cristo miiⁿ.

¹⁵Cuaacu chí náⁿa yā ní ngaⁿ'a yā nduudu ngai yeⁿe Cristo cáāvā chí dingueéé yā yeⁿé ní cáāvā chí neⁿe yā 'caa'va yā nduucú. Ní tanáⁿ'a yā ní ngaⁿ'á yā nduudu ngai miiⁿ ti cuaacu chí neⁿé yā dííⁿ yā ní neⁿé yā cunnee yā 'úú. ¹⁶Naati 'iiⁿyāⁿ s'eeⁿ vmnaaⁿ nguēē ngaⁿ'a yā nduudu ngai yeⁿe Cristo ndúúcu nuuⁿmaⁿ staava yeⁿé yā naati dííⁿ

yā chí 'iiⁿyāⁿ caⁿ'a yā ndúúcu yā. Dííⁿ yā ti neⁿé yā chí 'úú ní ngueéé yeⁿé yā. Ní cadíinuⁿ yā chí dííⁿ yā chí 'úú n'geenú ngii ca taachi canuúⁿ vácūū. ¹⁷Ní 'iiⁿyāⁿ cuayiivi ní ngaⁿ'á yā nduudu ngai miiⁿ ti neⁿé yā 'úú. Ní deenú yā chí Ndyuūs tee yā 'úú ntiiⁿnyuⁿ yeⁿé yā chí ngaⁿ'á nanááⁿ 'iiⁿntyéⁿē táácā chí dííⁿ ntiiⁿnyuⁿ yeⁿé Ndyuūs ní ngaⁿ'á nduudu cuaacu yeⁿe evangelio chí nduudu ngai yeⁿe Cristo. ¹⁸Naati ¿de'ē ituneeⁿ? 'Āā 'tuucá nūuⁿ nduuti chí 'iiⁿyāⁿ caaⁿmáⁿ yā nduudu ngai miiⁿ ndúúcu nuuⁿmáⁿ staava yeⁿé yā o cáāvā chí nguéé neⁿé yā 'úú, nducyaacá yā ngaⁿ'a yā nduudu ngai yeⁿe Cristo. Ní cáāvā chuū 'úú ní yeenú, ní yeenú taavi cá.

¹⁹Caati deenú chí yeⁿe nducuéⁿē chí ch'óo yeⁿé, n'daacā cuuvi yeⁿé caati ndís'tiī ní ngaⁿ'angua'á nī cáāvā 'úú. Ní Jesucristo nginneé yā 'úú cucáāvā Espíritu yeⁿé yā. ²⁰Ní maaⁿ chuū chí neⁿé chí dicuaacu chí cuuvi dííⁿ. Nguéé 'cuinaáⁿ yeⁿē mar 'áámá naaⁿ naati ngaⁿ'á nduudu ngai yeⁿe Cristo cueⁿe daāⁿmaⁿ ndúúcu nducuéⁿē confianza tan'dúúca chí dííⁿ maaⁿ, 'tiicá ntūūⁿ cuuvi dííⁿ cueⁿe daāⁿmaⁿ. Ní 'íicú 'iiⁿyāⁿ cuuvi n'diichi cá yā Cristo chí ch'ēete ca yā cucáāvā 'úú, 'áará chí 'úú cunduūchí o 'áará chí 'úú 'āā n'díí. ²¹Ní cucaavā 'úú, vida yeⁿé ní Cristo níicú nduuti chí 'cuūví 'āā dííⁿ ganar caati 'úú caneé ndúúcu Cristo. ²²Ní nduuti chí candíí ca cuneé ca na iⁿ'yeeⁿdí 'cūū ndúúcu cuerpo yeⁿé, tuu'mi ní cuuvi dííⁿ ca ntiiⁿnyuⁿ yeⁿe Señor Jesucristo yeⁿē yú. Ní candéé nduudu yeⁿe yā nanááⁿ 'iiⁿyāⁿ níicú 'iiⁿyāⁿ cuuvi

cu'téenu yā Ndyuūs. Maaⁿ ní nguéé deenú de'ē chi n'daacā ca chi ndeévé cáávā 'úú ²³caati 'úú canuúⁿ nguaaⁿ nduu 'uuví vaanicadínūⁿ. Ní neⁿ'é chí 'cuúví ní'ícú caⁿ'á cunēe ndúú'cū Cristo caati deenú chi neené n'daacā caavā 'úú. ²⁴Naati cáávā ndís'tiī ní n'daacā ca chi 'úú cuneé ca na cuerpo yeⁿ'é 'tē 'tēé ndúú'cū ndís'tiī. ²⁵Seguro caneé maaⁿ yeⁿ'e chuū. Ní deenú ti 'úú cuneé ca 'tē 'tēé ndúú'cū ndís'tiī caati ndís'tiī cuuvi 'cuētinée nī n'daacā ca ní yeenu taaví nī caati i'téenu nī Ndyuūs. ²⁶'Túú'cā cuneé 'tē 'tēé ndúú'cū ndís'tiī ní taachi ndaá nanááⁿ ndís'tiī tuu'mi ní ndís'tiī cuuvi yeenu cá nī nduucú ti s'uúúⁿ ní yeⁿ'e Cristo s'uúúⁿ.

²⁷Di'cuuítú ndís'tiī chi dámaāⁿ diiⁿ núú yiiⁿnuⁿ nī chi 'cuētinée n'daacā nī taanduvéé chi n'daacā tan'dúú'cā chi ngaⁿ'a nduudu n'dai yeⁿ'e Cristo. Ní'ícú ndúú'ti chí ndaá n'diichí ndís'tiī o ndúú'ti chí caneé yaⁿ'ai yeⁿ'é ndís'tiī neⁿ'é 'caandiveéⁿ yeⁿ'é ndís'tiī. Neⁿ'é chí 'iiⁿ'yāⁿ cuuví yaaⁿ'vī yā 'úú yeⁿ'é ndís'tiī chí ndís'tiī ní n'daacā sneé nī. Ní nduuvidaamá nī ndúú'cū 'áámá espíritu nūⁿ ndúú'cū 'áámá vaanicadínūⁿ yeⁿ'é nī. Ní 'áámá dííⁿ nī ntiíⁿ'nyuⁿ yeⁿ'é Ndyuūs ní ngaⁿ'á nī nduudu ngai yeⁿ'e Cristo chí evangelio caati 'iiⁿ'yāⁿ cuuvi cu'téenu yā Cristo. ²⁸Neⁿ'é 'caandiveéⁿ yeⁿ'é nī chí nguéé di'va'á nī mar 'áámá yeⁿ'é 'iiⁿ'yāⁿ chí contra yeⁿ'e nī. Caati chuū ní 'áámá seña yeⁿ'é yā chí nguéé i'téenu yā Cristo ní caⁿ'á yā infierno. Naati chuū ní 'áámá seña yeⁿ'é nī chí ndís'tiī ní cuuví ninguaⁿ'ái nī yeⁿ'e infierno caati chuū ní yeⁿ'é Ndyuūs. ²⁹Ní

Ndyuūs dííⁿ yā 'áámá favor ndúú'cū ndís'tiī caati nguéé dámaāⁿ chí cu'téenu nī Cristo naati canée chí 'cueenú nī cuuvi caavā chí i'téenu nī Cristo. ³⁰Ní ndís'tiī ndúú'cū 'úú 'āā daamá nūⁿ snée yú chí n'geenu yú ngii cucáávā chí ngaⁿ'a yú nduudu cuaacu yeⁿ'é Cristo. Ndís'tiī 'āā n'diichí nī cuááⁿ vmnaaⁿ tan'dúú'cā chí dííⁿ ntiíⁿ'nyuⁿ ní ch'eenú chíi. Ní maaⁿ ní n'giindivééⁿ ntúuⁿ nī tan'dúú'cā chí dííⁿ ntiíⁿ'nyuⁿ ní tan'dúú'cā chí n'geenú ngii.

Cristo ní ndiicúúⁿ yā ní cuayiiivi chich'eetē yā

2 Ndís'tiī hermanos yeⁿ'é, nduuti chí Cristo dííⁿ yā animar ndís'tiī ní nduuti chí Cristo tee yā 'viich'ēetínūⁿ ndís'tiī ti neⁿ'é yā ndís'tiī ní nduuti chí Espíritu N'dai yeⁿ'é Ndyuūs canée yā ndúú'cū ndís'tiī ní nduuti chí neⁿ'é nī nducyaaca 'iiⁿ'yāⁿ ní ya'ai 'íínú nī 'iiⁿ'yāⁿ tuu'mi ní 'tíicā dííⁿ nī. ²Dííⁿ nī chí cuuvi yeenú taavi cá caati snée nī 'túú'cā. N'dáácā 'cuētinée nī ndúú'cū 'aama vaadi cadínūⁿ yeⁿ'é nī. Ní neⁿ'é nī dáámá nūⁿ 'aama nī ndúú'cū taama nī tan'dúú'cā Cristo neⁿ'é yā s'uúúⁿ. Ní 'tiicá ntúúⁿ neⁿ'é nī vi'í 'aama nī ndúú'cū taama nī. Ní nduuvidaamá nī ndúú'cū 'áámá espíritu yeⁿ'é nī ndúú'cū 'áámá staava yeⁿ'é nī. ³Ní nguéé dííⁿ nī dendu'ū chí neⁿ'e maáⁿ nī o caavā chí neⁿ'é nī ch'ēete maáⁿ nī caati ndiicúúⁿ 'cuētinée nī. Maaⁿ ní ca'áámá ca'aamá nī canée chí nadacadínūⁿ nī yeⁿ'e hermanos yeⁿ'é nī chí neéné n'dai ca hermanos yeⁿ'é nī nguéé ti maáⁿ nī. ⁴Ní mar 'áámá nī nguéé n'nuúⁿ nī dendu'ū chí

cuuví yeⁿē maáⁿ nī caati n'nuúⁿ nī ntúuⁿ dendu'u chi n'daacā chi cuuvi yeⁿe tanáⁿā hermanos yeⁿé nī.

⁵Ní nguaaⁿ ndís'tiī ní tan'dúúcā chi Cristo nadacadíínuuⁿ yā yeⁿē maáⁿ ya 'tiicá ntúuⁿ ndís'tiī canee chi nadacadíínuuⁿ nī yeⁿe maaⁿ nī. ⁶Ní n'dáá rá chí Cristo miiⁿ ti Ndyuūs 'yā, Cristo nguéé 'āā fuerza dííⁿ yā chi cuuvi daamá yā ndúúcū Ndyuūs Chiidá yā. ⁷Naati Cristo s'neeⁿ yā chi ch'εete yeⁿé yā tanducuéⁿe chi canéé na va'ai chεeti nguuvi. Ní tan'dúúcā s'uúúⁿ 'tiicá yā. Ní tan'dúúcā 'áámá saⁿā chi dichí'vē 'iiⁿ'yāⁿ, 'tiicā núúⁿ yā. Ní ch'iindiyáaⁿ yā tan'dúúcā 'áámá saⁿa yeⁿē iⁿ'yeeⁿdí 'cūū. ⁸Ní taachi canee yā tan'dúúcā saⁿa na iⁿ'yeeⁿdí 'cūū ndiicúúⁿ n'dai dííⁿ yā ní ch'iindiveéⁿ yā taanduvée chi ngaⁿā Chiidá yā chi canéé na va'ai chεeti nguuvi. 'Áará chí ch'ii yā na cruz, ch'iindiveéⁿ yā nduudu yeⁿe Chiidá yā ní ca'á yā lugar 'iiⁿ'yāⁿ s'eeⁿ chi 'caaⁿ'núⁿ yā 'iiⁿ'yāⁿ. ⁹Ní cáávā chi diiⁿ Jesús, Ndyuūs dííⁿ yā chi Jesús ní ch'εete cundaá yā na va'ai chεeti nguuvi. Ní Ndyuūs ca'á yā 'áámá chi duuchí yā chi ch'εete n'dai nguéé ti tanáⁿā 'iiⁿ'yāⁿ yeⁿe iⁿ'yeeⁿdí 'cūū. ¹⁰Ní nducyáácá yā canéé chi caanti'i'ya yā taachi 'caandiveéⁿ yā chi duuchi Jesús miiⁿ. 'Tiicá ntúuⁿ nducyaacá yā chi snee yā na va'ai ch'εeti nguuvi. 'Tiicá ntúuⁿ nducyaaca yā chi snee yā na yáⁿā. 'Tiicá ntúuⁿ nducyaaca yā chi snee yā na infierno. ¹¹'Tiicá ntúuⁿ canee chi caaⁿ'maⁿ cuaacú yā chi Jesucristo miiⁿ ní 'iivú Ndyuūs. Ní caaⁿ'maⁿ cuaacú yā chi nééné ch'εete n'dai Ndyuūs chi Chiida yú.

'Iiⁿ'yāⁿ chi i'téenu yā Cristo ní tan'duucā chi deeve yeⁿe iⁿ'yeeⁿdí 'cūū 'tiicá yā

¹²Maaⁿ ní ndís'tiī hermanos yeⁿé chi neⁿe taaví, tan'dúúcā chi cueⁿe daāⁿmaⁿ i'téenu nī nduudu yeⁿé Ndyuūs taachi canee ndúúcū ndís'tiī, maaⁿ ní i'téenu nī taachi 'āā yaⁿ'ai canee yeⁿé ndís'tiī. Maaⁿ ní 'va'á nī Ndyuūs. Ní ndís'tiī dííⁿ n'daacá nī ti Ndyuūs nadinguáⁿ'ai yā ndís'tiī ní dííⁿ n'daacá nī ndúúcū cuidado yeⁿe nducuéⁿē. ¹³Cuaacu chi Ndyuūs dííⁿ yā chi ndís'tiī neⁿé nī dííⁿ nī nducuéⁿē chi n'daacā. Ní Ndyuūs cunnee yā ndís'tiī chí dííⁿ nī. Ní 'cuiinú nī chiiⁿ chí dííⁿ nī tan'dúúcā chí neⁿé yā chííⁿ chí n'daacā n'dai.

¹⁴Maaⁿ ní ndís'tiī dííⁿ nī nducuéⁿē ní nguéé cueēⁿdiitú nī ndíí nguéé 'cuuⁿ'máⁿ nī. ¹⁵Ní ndúúti chí dííⁿ nī 'tuucā mar 'áámá 'iiⁿ'yāⁿ nguéé cuuvi caaⁿ'máⁿ yā nuuⁿndi yeⁿé nī o nguéé n'daacā idiíⁿ nī caati deenú yā chí ndís'tiī daiyá Dendyuūs ndís'tiī. Ní nguéé véé nuuⁿndi yeⁿé nī nguaaⁿ 'iiⁿ'yāⁿ chí nguéé i'téenu yā Ndyuūs ní nguéé n'daacā idiíⁿ yā. Ní tan'dúúcā 'áámá 'ííⁿ'nyúⁿ ngíí yáⁿā taachi maāiⁿ 'tiicá nī. ¹⁶Ní candeeⁿ nī nduudu cuaacu yeⁿe Cristo nanááⁿ 'iiⁿ'yāⁿ ti nduudu miiⁿ diiⁿ chí 'iiⁿ'yāⁿ cuuvi cunduuchí yā cueⁿe daāⁿmaⁿ caati 'úú ní cuuvi yeenu taavi nguuvi chí ndaa Cristo taama vmnéⁿē. Ní deenú chí nguéé tandii rá dííⁿ ndu'ú 'úú ndíí nguéé nduu tandii rá dííⁿ ntiiⁿ'nyuⁿ yeⁿé Ndyuūs nguaaⁿ ndís'tiī. ¹⁷Ndúúti chí nca'á vida yeⁿe maáⁿ ní ch'ii caavā ntiiⁿ'nyuⁿ yeⁿé Ndyuūs,

tuu'mi ní cáávā chi 'āā itéenu nī Ndyuūs ní dííⁿ nī ntiíⁿnyuⁿ yeⁿ'é yā, tanducuéⁿē chuū ní tan'dúúcā 'áámá ofrenda nanááⁿ Ndyuūs 'tíicā. Ní 'úú ní yeenú, ní cuuvi yeenú ndúúcu nī. ¹⁸Tiicá ntúūⁿ cáávā chuū ndís'tií cuuvi yeenú nī. Ní cuuvi yeenú ntúūⁿ nī nduucú.

Yeⁿ'ē hermano Timoteo ndúúcu hermano Epafrodito

¹⁹Nduuti chi Señor Jesucristo neⁿ'é yā chi 'úú idiíⁿ chiiⁿ chi nadacadíínuúⁿ chi dííⁿ, tuu'mi ní caⁿ'á dicho'ó Timoteo nanááⁿ ndís'tií nguuvi chi cuchii. Maaⁿ níicú cuuvi yeenú taachi cadiinúúⁿ ní cuuvi deenú táácā snee ndís'tií. ²⁰Ti nguéé véé táámá compañero yeⁿ'é chi dáámá nadacadíínuuⁿ sa nduucú tan'dúúcā Timoteo miiⁿ. Ní n'daacā idiíⁿ sa cuidado yeⁿ'é ndís'tií. ²¹N'dee n'dái 'iiⁿyāⁿ i'nuúⁿ yā chi n'daacā yeⁿ'ē maáⁿ yā ní nguéé dííⁿ yā dendu'ū chi ntiíⁿnyuⁿ yeⁿ'e Cristo Jesús. ²²Naati ndís'tií ní deenú nī yeⁿ'e Timoteo chi n'daacā canee sa yeⁿ'e nducuéⁿē. Ní deenú nī chi saⁿ'a miiⁿ tan'dúúcā daiyá chi dichí'vē sa 'úú, 'tíicā sa taachi ngaⁿ'á nū evangelio chí nduudu ngai yeⁿ'é Cristo. ²³Sáⁿ'a 'cūū nadacadíínuúⁿ chi dicho'ó saⁿ'ā nanááⁿ ndís'tií naati neⁿ'é cadiinuúⁿ vmnaaⁿ táácā 'cuenú asuntos yeⁿ'é núúⁿ niiⁿyūⁿ. ²⁴Maaⁿ ní véé confianza yeⁿ'é ndúúcu Ndyuūs chi núúⁿ niiⁿyūⁿ cuuví ndaá maáⁿ ní n'diichí ndís'tií.

²⁵Ní nadicadíínuúⁿ ntúūⁿ chi dicho'ó yeⁿ'e ndís'tií hermano Epafrodito. Saⁿ'ā miiⁿ idiíⁿ sa ntiíⁿnyuⁿ nduucú ní diiⁿ sá luchar

nduucú. Saⁿ'ā miiⁿ ndís'tií maáⁿ nī dicho'ó nī saⁿ'ā nanaáⁿ chi cuuvi cunnee sa 'úú ndúúcu necesidades yeⁿ'é. ²⁶Saⁿ'ā miiⁿ neené neⁿ'e sa n'diichi sa nducyaaca ndís'tií ní neené nadacadíínuuⁿ sa yeⁿ'e ndís'tií caati ndís'tií n'giindiveéⁿ nī chí ngíitā sa. ²⁷Cuaacu níⁿnyúⁿ chí néené ya'ai chiitā sa ti 'āā cháa 'cuūví sa. Naati Ndyuūs ní ya'āi 'iinú yā saⁿ'ā ní nguéé dámaaⁿ saⁿ'ā miiⁿ caati ndúúcu 'úú ti 'úú nguēe cunee ndaāchī yiinú cá de'ē ca chí canéé yeⁿ'é. ²⁸Ní cáávā chuū neⁿ'e cá dicho'ó saⁿ'ā Epafrodito nanááⁿ ndís'tií ní ndís'tií cuuvi yeenú nī taachi snaaⁿ nī taama vmnéⁿ'ēe saⁿ'ā. Ní 'tiicā ntúūⁿ 'úú nguéé nadacadíínuuⁿ ndaachí yeⁿ'é nī. ²⁹Ní taachi ndaa sa nanááⁿ ndís'tií, 'cuáaⁿ nī Epafrodito ndúúcu vaadi yeenú caati saⁿ'ā miiⁿ hermano yeⁿ'é nī ti i'téenu sa Señor Jesucristo yeⁿ'e yú. Ní dííⁿ nī honrar tanáⁿ'a yā chí dííⁿ yā ntiíⁿnyuⁿ yeⁿ'é Ndyuūs tan'dúúcā saⁿ'ā miiⁿ. ³⁰Caati 'áará chí néené chíitā sa nī 'āā cháa 'cuūví sa cucáávā chí diiⁿ sa ntiíⁿnyuⁿ yeⁿ'ē Cristo, nguéé nadacadíínuuⁿ sa yeⁿ'e vida yeⁿ'e maāⁿ sa ndúúcu peligro chí cuuvi 'cuūví sa caati dichí'vē sa 'úú. Ní diiⁿ sa ntiíⁿnyuⁿ yeⁿ'é chí ndís'tií maáⁿ nī neⁿ'é nī dííⁿ nī naati nguēe cuuvi dííⁿ nī.

Pablo yaa'ví yā contra yeⁿ'e 'iiⁿyāⁿ Israel chí necio yeⁿ'e ley yeⁿ'é yā

3 Maaⁿ ní ndís'tií hermanos yeⁿ'é ngaⁿ'á ngii ndís'tií chí canéé chí cuuvi yeenú nī ti yeⁿ'e Señor Jesucristo ndís'tií. Ní cáávā 'úú nguéé de'ē vée chí di'vaachi

'úú taachi dingúúⁿ yeⁿe ndís'tiī táámá vmnéⁿēe chi cuuvi yeenu nī, ti canéé chí dííⁿ nī cáávā chi cho'ōo n'dai yeⁿé nī. ²Ndís'tiī ní dííⁿ nī cuidado yeⁿe 'iíⁿyāⁿ chi tan'dúúcā 'yaānā ti 'tiicá yā ti neⁿé yā circuncidar cuerpo yeⁿe saⁿa chi nguéé saⁿā Israel sa. Nguéé n'daacā dííⁿ yā chi nadacadíínuuⁿ yā chi canee chí díí yā circuncidar cuerpo yeⁿe saⁿā s'eeⁿ. ³Ní cuaacu nííⁿnyúⁿ s'uuúⁿ ní tan'dúúcā chí 'āā circuncidado s'uuúⁿ caati s'uuúⁿ dich'εete yú Ndyuūs ndúúcu espíritu yeⁿe maāⁿ yú. Ní s'uuúⁿ ní yeenu yú ti yeⁿe Señor Jesucristo s'uuúⁿ. Ní nguéé véé confianza yeⁿe yú yeⁿe tan'dúúcā chí 'āā circuncidado cuerpo yeⁿe yú. ⁴Ní 'úú dendú'ú cuuví cuneé ndúúcu confianza na vida yeⁿé nanááⁿ 'iíⁿyāⁿ tí 'úú canéé circuncidado. Ní nguεε vεε mar 'áámá 'iíⁿyāⁿ chí cuuvi nadacadíínuuⁿ cá yā yeⁿe nducuéⁿē chuū ndúúcu confianza tan'dúúcā chí cuuvi 'úú. ⁵Caati taachi chíí nííⁿníⁿ nguuvi chí ch'iidiyááⁿ 'iíⁿyāⁿ dííⁿ yā circuncidar 'úú ní 'caacá yā seña na cuerpo yeⁿé tan'dúúcā chí dííⁿ yā ndúúcu nducyaaca saⁿā 'lílⁿ yeⁿe ndaata Israel chí judíos. Ní 'úú ní yeⁿe 'iíⁿyāⁿ Benjamín 'úú. Ní 'úú ní saⁿa yeⁿe 'iíⁿyāⁿ hebreo o Israel 'úú ndíí taachi ch'iindiyaáⁿ caati chíidá ní saⁿā hebreo yā. Ní 'úú ní saⁿa fariseo 'úú ní dííⁿ ndúúcu núúⁿmáⁿ staava yeⁿé chííⁿ chí ngaⁿa ley yeⁿe 'iíⁿyāⁿ yeⁿe ndaata yeⁿé. ⁶Ní 'úú ní neené necio 'úú chí dííⁿ ntiiⁿnyuⁿ yeⁿe yaacū yeⁿe ndaata yeⁿé. Ní 'úú i'nuuⁿca'ái 'iíⁿyāⁿ chí ngeⁿe yaacū yeⁿe 'iíⁿyāⁿ chí i'téenu yā Cristo. Ní dííⁿ nducuéⁿē

chí ngaⁿa ley yeⁿe yú. Ní 'iíⁿyāⁿ nguéé cuuvi caaⁿmáⁿ yā chí véé nuuⁿndi yeⁿé. ⁷Naati nducuéⁿē chuū chí nadacadíínuuⁿ chí cosas chí ch'εete chí neené dichííⁿvε caavā 'úú, ní nducuéⁿē dendu'ú yeⁿé 'āā chí'neéⁿ. Ní maaⁿ ní dichííⁿvε 'úú chí i'teenú Jesucristo. ⁸Ní nguéé nadacadííuuⁿ cá yeⁿe nducuéⁿē dendu'ú yeⁿé chí 'úú chí'neéⁿ tí dííⁿ cuenta chí dindaí nducuéⁿē dendu'ú yeⁿé cáávā chí n'dai taavi ca chí maaⁿ ní i'teenú Jesucristo chí 'iivú. Ní dííⁿ cuenta chí nducuéⁿē dendu'ú yeⁿé ní tan'dúúcā yaacāa, 'tíicā vεε, cáávā chí n'daáⁿ nducuéⁿē dendu'ú yeⁿé cáávā chí i'teenú Cristo. Ní sta'á Cristo tan'dúúcā chí 'iivú 'tíica yā . ⁹Ní 'tíicā idiíⁿ tí maaⁿ ní 'úú ní yeⁿe Cristo 'úú. Maaⁿ ní canee n'daacā nanááⁿ Ndyuūs. Nguéé cucáávā chí neⁿé canee n'daacā nanááⁿ Ndyuūs cucáávā ley miíⁿ naati cucáávā chí i'teenú Cristo. Ní 'úú ní n'daacā ca 'úú nanááⁿ Ndyuūs caati neⁿé Jesucristo. ¹⁰Níicú 'úú ní dámaāⁿ neⁿe chí 'úú snaáⁿ Cristo ní canee cuuⁿmiⁿ chí canee ndúúcu maaⁿ poder chí diiíⁿ chí nduuchi Cristo yeⁿe nguaaⁿ tináⁿā. Níicú cuuví daamá nduucú yā chí 'cuenú cuuvi tan'dúúcā chí Cristo ch'eenú yā chíí ndíí cuuví 'cuuvi tan'dúúcā Cristo chí'í yā. ¹¹Ní 'tiicá ntúúⁿ 'úú cuuvi deenú chí 'āā cuuví nduuchi yeⁿé nguaaⁿ tináⁿā.

Diiⁿ yú luchar cáávā premio chí Ndyuūs caⁿa yā tée yā s'uuúⁿ

¹²'Úú nguéé neⁿé caaⁿmáⁿ ndís'tiī chí 'āā tuneéⁿ tanducuéⁿe chuū caati 'āā cuéé ndaa n'daacā 'úú. Naati 'úú candíí cá cuááⁿ vmmaaⁿ

ndúúcū chi i'teenú ní ngiínú ndíí taanduvéé tuneéⁿ yeⁿe premio chi cuuvi yeⁿé. Ní vmnááⁿ vmnaaⁿ Cristo miíⁿ dííⁿ yā chi 'úú ní yeⁿé yā 'úú, caati cuuvi cuta'á premio miíⁿ. ¹³Ní ndís'tií hermanos yeⁿé, 'úú māⁿ nguéé nacadíínuúⁿ chi 'āā tuneéⁿ dendú'u 'cūū. Naati chuū idiíⁿ chi cuuvi naáⁿ nducuéⁿe chi 'āā dííⁿ nguuvi chi chó'oo. Ní dííⁿ chi cuuvi tuneé nducuéⁿe chi cuuvi yeⁿé nguuvi chi cuchii. ¹⁴Ní 'íícú 'úú cuuvi dííⁿ nducuéⁿe caati cuuvi dííⁿ ganar vida cueⁿe daāⁿmaⁿ chi premio chi cuuvi yeⁿé chi cūneé na va'ai cheeti nguuvi ndúúcū Ndyuūs. Ndyuūs chi canéé na va'ai cheeti nguuvi yaa'ví yā s'uúúⁿ chí dátee yā s'uúúⁿ chi cuuvi yeⁿe yú vida cueⁿe daāⁿmaⁿ caati s'uúúⁿ ní yeⁿé Cristo s'uúúⁿ.

¹⁵Ní nducyaaca yú chí n'daacā snéé yú ndúúcū chi i'teenú yú, canee cuuⁿmiⁿ chi nadacadíínuuⁿ yú 'tíicā chi nguéé tuneéⁿ yú. Ní nduuti chi tanáⁿa ndís'tií nguéé nadacadíínuuⁿ nī 'tíicā, tuu'mi ní Ndyuūs ní 'cuuⁿmiⁿ yā ndís'tií cheē chi cuaacu. ¹⁶Níicú chuū ní néené neⁿe cunéé chí dáámá nūⁿ cadíínuuⁿ yú n'daacā ní 'cuetinee yú n'daacā ndúúcū chi 'āā deenu yú yeⁿé Ndyuūs.

¹⁷Ndís'tií hermanos yeⁿé dííⁿ nī tan'dúúcā chi 'úú idiíⁿ. Ní nadacadíínuuⁿ n'dai nī yeⁿe 'iiⁿyāⁿ chi 'cuetinee n'daacá yā tan'dúúcā chi ch'iⁿí nū 'iiⁿyāⁿ ní 'tiicā ntūūⁿ ch'iⁿí nū ndís'tií. ¹⁸Ní néené n'deece cuuví caⁿá ndís'tií chi véé 'yaaⁿ taavi 'iiⁿyāⁿ chi neⁿé yā dííⁿ yā tan'dúúcā chi maáⁿ yā neⁿé yā. Ní nguéé neⁿe yā Cristo chi maáⁿ yā

ch'ií yā na cruz. Maaⁿ ní ngaⁿá chuū taama vmnéⁿēe ní néené ya'āi 'iinu ndíí chi ngēcú yeⁿé. ¹⁹Ní cáávā 'iiⁿyāⁿ s'eeⁿ ndaā tiempo chí ndái yā. 'Iiⁿyāⁿ s'eeⁿ ní dámaāⁿ neⁿé yā n'nuuⁿ yā chi che'e yā ndúúcū nducuéⁿe chi neⁿe yā. Ní dich'ēete maáⁿ yā 'iiⁿyāⁿ taachi canee chi 'cuinaáⁿ yā caavā chi dííⁿ yā. 'Iiⁿyāⁿ s'eeⁿ dámaāⁿ nadacadíínuuⁿ yā yeⁿe nducuéⁿe vicio chi véé iⁿyeeⁿdí 'cūū. ²⁰Naati s'uúúⁿ chi yeⁿe Cristo ní yāāⁿ vaacu yú ní va'ai cheeti nguuvi. Ní snéé ngiinu yú Señor Jesucristo yeⁿe va'ai cheeti nguuvi chi ndaa yā taama vmnéⁿēe ní nadinguáⁿáí yā s'uúúⁿ. ²¹Ní taachi Cristo ndaa yā, tuu'mi ní n'dááⁿ yā cuerpo yeⁿe yú chi cuerpo ndúúcū nuūⁿndí ndii cuerpo ngai yeⁿe yú chí tan'dúúcā cuerpo yeⁿé yā chi deēve n'dai, 'tíicā cuerpo s'uúúⁿ. Ní 'tíicā Cristo caⁿa yā chí dííⁿ yā ndúúcū dáámá poder yeⁿé maáⁿ yā chí yeⁿé chí ngaⁿa ntiiⁿnyuⁿ yā yeⁿe taanduvéé chí véé.

**Canee chi yeenu yú nducuéⁿe
tiempo ti s'uúúⁿ ní yeⁿe Cristo s'uúúⁿ**

4 Maaⁿ ní ndís'tií hermanos yeⁿé chí neⁿé cáávā nducuéⁿe chuū neené neⁿé n'diichí ndís'tií. Ndís'tií ní dííⁿ nī chí 'úú ní yeenu ní véé premio yeⁿé tan'dúúcā chí corona yeⁿé caati ndís'tií ní i'téenu nī Jesucristo. Canee diitú nī ndúúcū chí i'téenu nī yeⁿe 'iivu yú chí Cristo. 'Úú yaa'ví ndís'tií 'tíicā ti neⁿé taavi ndís'tií.

²'Úú di'cuítú táⁿa Euodias ní di'cuítú táⁿa Síntique chí dííⁿ yā chí dáámá nūⁿ cuuví vaanicadíínuuⁿ yeⁿé yā tan'dúúcā

chi canee chi diiⁿ hermanos chi i'téenu yā Señor Jesucristo yeⁿē yú. ³Ní di'cuítú n'dií, saⁿā chi 'áámá canee nduucú na ntiíⁿnyuⁿ chi cúnnee nī n'daataá hermanas chi díⁿ yā ntiíⁿnyuⁿ nduucú. N'daataá s'eeⁿ ní dichí'vε yā 'úú naachi 'úú ngaⁿá nduudu ngai yeⁿé Cristo chi nadanguáⁿai yā nducyaaca 'iiⁿyāⁿ. Ní cúnnee nī saⁿā Clemente ndúúcu tanáⁿa yā chi nginneé yā 'úú ní 'iiⁿyāⁿ s'eeⁿ chi duuchí yā ní canéé nguūⁿ na libro yeⁿé Ndyuūs naachi canéé nguūⁿ chi dúúchí nducyáácá 'iiⁿyāⁿ chi canduuchí yā cueⁿe daāⁿmaⁿ.

⁴Ndíⁿs'tií canéé chi yeenú nī nducuéⁿē tiempo caati ndís'tií ní yeⁿe Señor Jesucristo ndís'tií. Ní 'tíicā caaⁿmáⁿ ntuúⁿ taama vmnéⁿēe chi canee chi cuuví yeenú nī. ⁵Ní nducyaaca 'iiⁿyāⁿ cuuvi snaáⁿ yā ndís'tií chi 'iiⁿyāⁿ n'dái taavi ndís'tií. Ní ndís'tií deenú nī chí niiⁿnuúⁿ canee Señor Jesucristo yeⁿē yú.

⁶Ní nguéé de'ε vεε nadicadínuuⁿ nī yeⁿe tanducuéⁿē. Ní taachi caaⁿmaⁿnguaⁿá nī cuuví nī Ndyuūs nducuéⁿē chi neⁿé nī. Ní taachi caacá nī Ndyuūs cucáávā chiiⁿ chi neⁿé nī ní ca'a ntuúⁿ nī gracias Ndyuūs. ⁷Tuu'mi ní Ndyuūs tée yā vaadí 'diiⁿ yeⁿé yā chí ch'εεte ca chi nguéé cuuvi tuumicadínuuⁿ nī yeⁿē. Níicú vaadí 'diiⁿ miiⁿ ní nguáín'dai nī na staava yeⁿé nī ndúúcu vaanicadínuuⁿ yeⁿé nī caati ndís'tií ní yeⁿe Cristo ndís'tií.

Nadacadínuuⁿ nī yeⁿe nducuéⁿē chi n'daacā

⁸Ní ndís'tií ní yeⁿe nducuéⁿē dendú'ū nadacadínuuⁿ nī yeⁿe

nducuéⁿē chi nduudu cuaacu, ní yeⁿe nducuéⁿē chí n'dai chi diiⁿ yú respetar, ní yeⁿe nducuéⁿē vaadí cuaacu, ní yeⁿe nducuéⁿē chí deεve, ní yeⁿe nducuéⁿē chi neⁿe Ndyuūs chi nadacadínuuⁿ nī, ní yeⁿe nducuéⁿē chi 'iiⁿyāⁿ deenu n'dái yā chi n'daacā. Ní nadacadínuuⁿ nī yeⁿe tanducuéⁿē chi n'daacā ca chi cuuví nī caaⁿmáⁿ nī yeⁿe 'tíicā, de'ε chúúca n'daacā chuū.

⁹Níicú díⁿ nī dendu'ū chí ch'eeⁿ nī yeⁿé tan'dúúca chi chí'í ndís'tií. Ní díⁿ nī tan'dúúca chi chíindiveéⁿ nī yeⁿé chí n'geeⁿ ndís'tií ní tan'dúúca chí n'diichí nī chí 'úú idifⁿ. Díⁿ nī nducuéⁿē chuū. Ndyuūs chí canee ndúúcu vaadí 'diiⁿ yeⁿé yā ní canéé yā ndúúcu ndís'tií ndúúcu vaadí 'diiⁿ yeⁿé yā.

'Iiⁿyaⁿ yeⁿe yáāⁿ Filipos ca'a yā ofrendas Pablo

¹⁰Uú ní yeenú taavi ti yeⁿé Señor Jesucristo ní caati ndís'tií ní 'āā n'gaacu ntúuⁿ nī ní nadicadínuuⁿ nī yeⁿē 'úú. Deenú chí ndís'tií 'āā n'gaacú nī yeⁿe tiempo chí ch'ó'oo naati nguéé cuuvi cunnee nī 'úú, 'áára chí neⁿé nī. ¹¹Ní 'úú nguéé ngaⁿá ndís'tií yeⁿē chí nguεε vée yeⁿé caati maaⁿ ní 'āā deenú chí cuuvi yeenú ndúúcu de'ε chí vée yeⁿé. ¹²Ní 'āā deenú táácā chí díⁿ taachi pobre 'úú, ní 'āā deenú táácā chí díⁿ taachi vée cá yeⁿé. Ní 'āā deenú ntúuⁿ táácā chí cunee ndúúcu 'āā de'ε nūuⁿ chí cúchii yeⁿé, nduuti chí vée cá chí che'ε o nduuti chí nguéé vée chí che'ε, o nduuti chí vée taavi ca yeⁿé o nduuti chí nguéé de'ε vεε yeⁿé. Ní yeⁿē taanduvéé chuū ní deenú táácā cuuvi díⁿ.

13Ní 'úú ní cuuvi dííⁿ tanducuéⁿē chi cho'ō yeⁿé caati Cristo itée yā fuerzas 'úú. 14Ní ndís'tiī ní n'daacā idiíⁿ ní chi chinnee ní 'úú taachi n'geenú ngii.

15Ní ndís'tiī 'iiⁿyāⁿ yeⁿe yáāⁿ Filipos deenu n'daacá ní taachi cho'ó na yáⁿāa Macedonia ní tuca'á cāⁿa nduudu yeⁿe Cristo chi nadanguáⁿai yā 'iiⁿyāⁿ na yáⁿāa Macedonia miiⁿ. Deenú ní chi taachi can'daá cueⁿé chi dámaāⁿ ndís'tiī chi yeⁿé yaācū Filipos tee ní 'úú tuumi chi ofrenda yeⁿe yaācū yeⁿé ní chi nnee ní 'úú. 16Ní taachi 'úú caneé na yáāⁿ Tesalónica, ndís'tiī ní tee ní 'áámá 'uūví cuuvi ayuda ndúúⁿcū tuumī taachi 'āā véé necesidades yeⁿé. 17Nguéé dámaāⁿ nacadíínuúⁿ yeⁿe chi cuta'á de'e tuumī chi ndís'tiī tée ní 'úú naati neⁿé chi snāⁿ chi cuuvi véé cá yeⁿe ndís'tiī, chiiⁿ chi Ndyuūs caⁿá yā tée yā ndís'tiī cucáāvā chi ndís'tiī nnee ní 'úú. 18'Úú ní yaa'ví ndís'tiī chi 'āā sta'á nducuéⁿē chi tee ní 'úú ní ngo'o ca cáāvā necesidades yeⁿé. Ní maaⁿ ní chi sta'á yeⁿe hermano Epafrodito dendu'ū ofrenda chi dicho'o ndís'tiī. Ndúúⁿcū chuū ní véé cá yeⁿé. Ní nducuéⁿē ofrenda

chi dicho'o ndís'tiī 'úú, ní chuū ní 'áámá ofrenda chi n'dai taavi nanááⁿ Dendyuūs. Ní tan'dúúⁿcā 'áámá ofrenda chi ca'á ní Ndyuūs, tíicā ofrenda yeⁿé ní. Ní ofrenda miiⁿ cosas chi Ndyuūs neⁿe taavi yā. 19Ní maaⁿ ní Ndyuūs yeⁿé yú tée yā ndís'tiī nducuéⁿē dendu'ū chi necesidades yeⁿé ní yeⁿé vaadi 'cuiica n'dai chi véé yeⁿé yā chi n'dee taavi ca. Chuū ní Ndyuūs dííⁿ yā ti s'uuúⁿ ní yeⁿé Cristo Jesús s'uuúⁿ. 20Maaⁿ ní caaⁿmaⁿ yú chi Ndyuūs Chiida yú, ni ch'εete ca ní ndēēvē n'dáí cá caati cueⁿe daāⁿmaⁿ 'tiicá yā.

'Cuiinū carta miiⁿ ndúúⁿcū saludos

21Maaⁿ ní ngaⁿá ndúúⁿcū nducyaaca ndís'tiī chi i'téenu ní Jesucristo: N'dai ní, ngaⁿá. Hermanos yeⁿé yú chi cané nduucú: N'dai ndís'tiī, ngaⁿa yā. 22Ní nducyáácá 'iiⁿyāⁿ chi snée yā 'muuⁿ nduucú ní i'téenu yā Cristo: N'dai ndís'tiī, ngaⁿa yā. 'Tiicá ntúūⁿ 'iiⁿyāⁿ chi snée na va'ai yeⁿe César chi emperador yeⁿe Roma: N'dai ndís'tiī, ngaⁿá yā.

23Ní Jesucristo yeⁿe yú itée yā nducyaaca ndís'tiī nducuéⁿē chi n'dai taavi ca yeⁿé yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ COLOSAS

Pablo idinguúⁿ yā yeⁿe 'iiⁿ'yāⁿ chi naⁿ'a yāacū na yāāⁿ Colosas

1 'Úú Pablo 'úú ní 'úú apóstol yeⁿe Señor Jesucristo caati 'tíicā neⁿ'é Ndyuūs. ²'Úú ní ndúucū hermano Timoteo idinguúⁿ carta 'cūū yeⁿe 'iiⁿ'yāⁿ chi yeⁿe Ndyuūs ní i'téenu yā Jesucristo, 'iiⁿ'yāⁿ chi snée yā na yāāⁿ Colosas. Neⁿ'é chi Ndyuūs Chiida yú tée yā ndís'tiī vaadi n'dai ca yeⁿ'é yā ndúucū vaadi 'diiⁿ' yeⁿ'é yā.

Pablo ngaⁿ'angua'á yā caava 'iiⁿ'yāⁿ chi i'téenu yā Jesucristo

³Taachi ngaⁿ'angua'á nū, 'úú ndúucū Timoteo cueⁿ'e daāⁿ'maⁿ ca'á nū gracias Ndyuūs Chiidá Señor Jesucristo yeⁿ'e yú caavā ndís'tiī. ⁴'Tíicā díiⁿ nū ti caati náⁿ'ā hermanos yeⁿ'e yú ndaá yā nanááⁿ nús'uu 'āā yaa'ví yā yeⁿ'ē ndís'tiī tan'dúucā chi i'téenu nī Cristo Jesús ní tan'dúucā chi dineⁿ'e nī nducyáácá 'iiⁿ'yāⁿ chi yeⁿ'e Ndyuūs. ⁵Chuū ní cucáāvā chí snée ngiinú nī chiiⁿ chi cuuvi yeⁿ'é nī chi Ndyuūs nguáin'dai yā na va'ai chēeti nguuvi cáāvā ndís'tiī. Ní 'āā ch'iindiveéⁿ nī nduudu cuaacu chi yeⁿ'é Cristo.

Ní nduudu cuaacu miiⁿ ní cuuvi nanguaⁿ'ai 'iiⁿ'yāⁿ ní véé chi cuuvi yeⁿ'é nī. ⁶Ní nduudu miiⁿ ní 'iiⁿ'yāⁿ ngaⁿ'á yā nanááⁿ ndís'tiī, ní maaⁿ ní 'iiⁿ'yāⁿ ngaⁿ'á yā nanááⁿ 'iiⁿ'yāⁿ chi snee núúⁿ máⁿ iⁿ'yeēⁿdī. Ní tan'dúucā 'áámá cosecha chi véé n'gui'i yeⁿ'ē, 'tíicā nduudu miiⁿ caati n'giita nduudu miiⁿ. 'Tiicá ntūūⁿ nduudu miiⁿ 'cuiita na staava yeⁿ'e ndís'tiī ndii nguuvi chí ch'iindiveéⁿ nī yeⁿ'ē. Ní tuumicadínuuⁿ cá nī chēē chi cuaacu yeⁿ'e vaadi n'dai yeⁿ'e Ndyuūs yeⁿ'ē yú chi Ndyuūs tee yā s'uuúⁿ ní taacā Ndyuūs dineⁿ'é yā s'uuúⁿ. ⁷Chuū ní ch'éeⁿ nī yeⁿ'e saⁿ'ā Epafra chi saⁿ'ā chi neené neⁿ'e yú. Ní dáámá nginnee sa s'uuúⁿ. Ní 'áámá canee sa na ntiiⁿ'nyuⁿ yeⁿ'é Cristo. Ní diiⁿ sa ntiiⁿ'nyuⁿ yeⁿ'e Cristo nguaaⁿ ndís'tiī. ⁸Saⁿ'ā miiⁿ ní ndaa sa nanááⁿ nús'uu ní ngaⁿ'a cuaacu sa yeⁿ'e ndís'tiī. Ní ngaⁿ'a sa chí ndís'tiī dineⁿ'é nī 'iiⁿ'yāⁿ caati Espíritu N'dai yeⁿ'é Ndyuūs canee yā ndúucū ndís'tiī.

⁹Ní cáāvā chuū ntūūⁿ nús'uu ndii tiempo chí ch'iindiveéⁿ nū yeⁿ'e ndís'tiī nguéé s'neeⁿ naaⁿ nū caⁿ'angua'á nū caavā ndís'tiī. Ngiiicá nū chí maaⁿ Ndyuūs chíⁿ'í yā ndís'tiī nducueⁿ'ē

chi neⁿé yā chi díⁿ nī. Ní ngiicá 'nū Ndyuūs chi Espíritu N'dai yeⁿé Ndyuūs téé yā ndís'tii nducuéⁿe vaadi deenu ndúucū vaanicadínūⁿ chi yeⁿé Ndyuūs. ¹⁰Ngaⁿangua'á 'nū chi ndís'tii cuuvi 'cuētinéé n'daacá nī nanááⁿ Jesucristo ti yeⁿé yā s'uuúⁿ. Ní cueⁿe daāⁿmaⁿ díⁿ nī tan'dúucā chi neⁿe Señor yeⁿe yú. Ní 'íicú véé n'gui'i yeⁿé nī yeⁿe tanducuéⁿe chi n'daacā chi idiíⁿ nī. Ní cuuvi 'cueēⁿ ca nī yeⁿe vaadi deenu chí yeⁿe Dendyuūs. ¹¹Ngicá 'nū Ndyuūs chi téé yā ndís'tii poder yeⁿé yā chí ch'ēte ca chí cuuvi díⁿ nī ntiíⁿnyuⁿ yeⁿé nī ndúucū poder chi yeⁿé Ndyuūs. Ní 'íicú ndúucū paciencia cuuvi cuchéé nī yeⁿe tanducuéⁿe chi 'iiⁿyāⁿ díⁿ yā ndúucū nī. Ní yeenú nī. ¹²Ní ndís'tii canéé chi ca'á nī gracias Ndyuūs Chiida yú caati Ndyuūs díⁿ yā ndúucū yú chí véé parte yeⁿe yú naachi cuuvi yeⁿe yú ndúucū 'iiⁿyāⁿ s'eeⁿ chi i'téenu yā Cristo. Ní caⁿa yā chi téé yā s'uuúⁿ chi cuuvi yeⁿe yú ndúucū 'iiⁿyāⁿ s'eeⁿ chi yeⁿé yā taachi ndaa yú na lugar chí dēve ca naachi Ndyuūs ngaⁿa ntiíⁿnyuⁿ yā yeⁿé. ¹³Canéé chi ca'á nī gracias Ndyuūs caati nadanguáⁿai yā s'uuúⁿ yeⁿe saⁿā chi ngaⁿa ntiíⁿnyuⁿ yeⁿe maafⁿ. Ní Ndyuūs dicho'ó yā s'uuúⁿ naachi canéé Jesucristo chí ngaⁿa ntiíⁿnyuⁿ yā. Jesucristo ní Daiyá Ndyuūs chi Ndyuūs neⁿe taaví yā. ¹⁴Níicú Jesucristo cuaf yā s'uuúⁿ ndúucū precio chi yuúúⁿ yeⁿé yā taachi ch'ií yā na cruz cucáávā s'uuúⁿ. Ní cáávā chuū Ndyuūs nadach'ēcú yā s'uuúⁿ yeⁿe nuūⁿndi yeⁿe yú.

**Chi nduuvidaama yú ndúucū
Ndyuūs cucáávā chi Cristo ch'ií yā**

¹⁵Jesucristo ní tan'dúuca Ndyuūs chiida yú chí nguéé inaaⁿ yú, 'tiicá

yā. Ní Cristo miiⁿ 'āā canéé yā vmnááⁿ vmnaaⁿ chi din'dái yā núúⁿmáⁿ íⁿ'yeeⁿdi. ¹⁶Ní Ndyuūs yeⁿe yú ndúucū Cristo miiⁿ din'dái yā tanducuéⁿe dendu'ū chí véé. Din'dái yā tanducuéⁿe dendu'ū chí véé nanguuvi. 'Tiicá ntúúⁿ na yáⁿāa yeⁿé chí inaaⁿ yú ndúucū yeⁿé chí nguéé inaaⁿ yú. N'dáá rá chí véé ángeles chí yeⁿe Ndyuūs ndúucū ángeles chí yeⁿe yááⁿnguiinūⁿ chí ngaⁿā ntiíⁿnyuⁿ na 'yúúné ndúucū 'iiⁿntyéⁿe chí ngaⁿá yā ntiíⁿnyuⁿ yeⁿé naciones na íⁿ'yeeⁿdí 'cūū ndúucū 'iiⁿntyéⁿe ndúucū poder yeⁿe yā, tanducuéⁿe ní Cristo miiⁿ din'dái yā ní 'iivi yeⁿe tanducuéⁿe. ¹⁷Cristo miiⁿ ní ngaⁿa ntiíⁿnyuⁿ yā yeⁿe tanducuéⁿe dendu'ū. Ní Cristo miiⁿ díⁿ yā chí tanducuéⁿe dendu'ū chí véé canéé lugar yeⁿé ndúucū orden. ¹⁸Ní Cristo miiⁿ ní tíⁿ yā yeⁿe cuerpo chí yaācū yeⁿe yā chí nducyaaca 'iiⁿyāⁿ chí i'téenu yā Cristo. Ní ca'á yā vida 'iiⁿyāⁿ chí yeⁿe cuerpo yeⁿé yā. Ní Cristo miiⁿ vmnááⁿ vmnaaⁿ 'iiⁿyāⁿ chí nduuchí yā yeⁿé nguaaⁿ tináⁿā, caati lugar chí vmnááⁿ vmnaaⁿ cuuvi yeⁿé yā yeⁿe nducuéⁿe dendu'ū chí véé. ¹⁹Ní Ndyuūs Chiida yú neⁿé yā chí Cristo miiⁿ canéé yā ndúucū nducuéⁿe poder chí yeⁿé Ndyuūs. ²⁰Ní cucáávā Cristo miiⁿ Ndyuūs Chiida yú neⁿé yā díⁿ yā chí cuuvi yeⁿé Cristo tanducuéⁿe dendu'ū taama vmnéⁿēe tan'dúucā tanducuéⁿe chí véé vmnááⁿ vmnaaⁿ na va'ai chēti nguuvi. 'Tiicá ntúúⁿ cuuvi yeⁿé yā tanducuéⁿe chí véé na íⁿ'yeeⁿdí 'cūū. Ní díⁿ yā chí véé vaadi 'diifⁿ cáávā yuúúⁿ yeⁿé Jesucristo chí can'daā taachi ch'ií yā na cruz.

²¹Ní tiempo chi 'āā ch'óōo ndís'tiī ní tan'dúúca 'iiⁿ'yāⁿ chi snúuⁿ yā yúúni 'tíicā ndís'tiī. Ní nguεε deenú nī Ndyuūs caati díⁿ nī cosas chi nguéé 'n'daāca. Ní ndís'tiī ní contra yeⁿe Ndyuūs ndís'tiī. Ní nguéé 'n'daaca staava yeⁿ'é nī. Naati maaⁿ ní Ndyuūs nch'εécú yā nuuⁿndi yeⁿe ndís'tiī. Maaⁿ ní amigos yeⁿ'é Ndyuūs ndís'tiī. ²²Ní díⁿ yā chi nduuvidaamá nī ndúúcu Ndyuūs cáávā chi cuerpo yeⁿe Jesucristo ch'ii na cruz. Ní Jesucristo ch'ii yā caavā s'uuúⁿ chi ndaa yā ndúúcu s'uuúⁿ nanááⁿ Ndyuūs Chiida yú. Ní Cristo ch'iⁿ'í yā chi s'uuúⁿ ní yeⁿ'é Ndyuūs s'uuúⁿ ní dεεve vida yeⁿ'ē yú. Níicu 'āā ntéé caaⁿ'maⁿ Ndyuūs chi véé nuuⁿndi yeⁿe yú. ²³Maaⁿ ní canee chi i'téenu 'n'daacá nī nduudu cuaacu ní cunee diitú nī ndúúcu chi i'téenu nī chi yeⁿ'e Cristo. Ní cu'téenu cá nī nduudu cuaacu yeⁿ'e Jesucristo chi ch'iⁿ'i ch'éé chi cuuvi yeⁿ'e yú ní yeⁿ'ē chi cunee ngiinu yú. Ní nguéé divii nī yeⁿ'e nduudu cuaacu yeⁿ'e Jesucristo ti 'n'daacā canee nī nanáaⁿ yā ní cunee ngiinu cá nī. Nduudu cuaacú 'cūū yeⁿ'e Jesucristo miiⁿ maaⁿ ní 'iiⁿ'yāⁿ s'eeⁿ cheⁿ'e yā candεε yā chí cuuvi yeⁿ'ē nducyáácá 'iiⁿ'yāⁿ chi snéé na iⁿ'yeeⁿ'dí 'cūū. Ní nduudu cuaacu miiⁿ chiiⁿ chi 'úú Pablo ngaⁿ'a caati 'tíicā ntiⁿ'nyuⁿ yeⁿ'é.

**Pablo nginneé yā 'iiⁿ'yāⁿ
chi yeⁿ'e Jesucristo**

²⁴Maaⁿ ní yeenú taaví yeⁿ'ē chi n'geenú ngii cucáávā ndís'tiī chi i'téenu nī nduudú 'cūū. Ní 'tíicā maaⁿ ní yeenú taaví chi 'cuenú cuuvi na cuerpo yeⁿ'é tan'dúúca

chi ch'eenú chiī Cristo na cuerpo yeⁿ'e yā cucáávā 'iiⁿ'yāⁿ chi i'téenu yā 'iiⁿ'yāⁿ ní yeⁿ'e cuerpo yeⁿ'e yā. Ní 'tíicā díⁿ cumplir vaadī ya'ai yeⁿ'e Cristo cucáávā 'iiⁿ'yāⁿ yeⁿ'e yā. ²⁵Ndyuūs tee yā ntiⁿ'nyuⁿ 'cūū yeⁿ'é chi díⁿ ntiⁿ'nyuⁿ yeⁿ'e yaacú yeⁿ'é yā. Ní díⁿ ntiⁿ'nyuⁿ yeⁿ'e Ndyuūs nguaaⁿ ndís'tiī chi nguéé yeⁿ'ē ndaata Israel caati 'tíica cuuvi cuaacu nduudu yeⁿ'e Ndyuūs chi ngaⁿ'a ndii cuááⁿ vmnaaⁿ. ²⁶Ní nduudú 'cūū nguéé deenú 'iiⁿ'yāⁿ caati canúúⁿ 'n'de'ei ndii tiempo chi 'āā 'cuéé 'iiⁿ'yāⁿ iⁿ'yeeⁿ'dí 'cūū, naati maaⁿ ní chuū ch'iⁿ'i Cristo nanááⁿ 'iiⁿ'yāⁿ yeⁿ'é yā. ²⁷Níicú Ndyuūs neⁿ'é yā chi nducyáácá 'iiⁿ'yāⁿ chi yeⁿ'é yā, 'iiⁿ'yāⁿ chi Israel s'eeⁿ yā ndúúcu 'iiⁿ'yāⁿ chí nguéé Israel s'eeⁿ yā, nducyaaca yā cuuvi deenú yā vaadī 'cuiica yeⁿ'ē chi canúúⁿ 'n'de'ei. Chuū ní secreto miiⁿ. Cristo canee yā ndúúcu ndís'tiī chi nguéé 'iiⁿ'yāⁿ Israel yā. Ní ndúúcu Cristo miiⁿ snee ngiinú nī chi caⁿ'á nī na va'ai chεeti nguuvi.

²⁸Nús'uu ní ngaⁿ'á 'nū nduudu cuaacu yeⁿ'é Cristo nanááⁿ nducyaaca 'iiⁿ'yāⁿ. Ní nducuéⁿ'ē ngi'cueéⁿ 'nū 'iiⁿ'yāⁿ ndúúcu vaadi deenu caati cuuvi deenú 'n'daacá yā nduudu cuaacu yeⁿ'é Ndyuūs. Ní cuuvi yeⁿ'é Cristo 'iiⁿ'yāⁿ ní 'n'daacā canee yā nanááⁿ Jesucristo. ²⁹Ní cáávā chuū 'úú idiⁿ' ntiⁿ'nyúⁿ 'cūū, ní díⁿ diitú taavi nducuéⁿ'ē tiempo ndúúcu nducuéⁿ'ē poder chi Ndyuūs itée yā 'úú.

2 'Úú neⁿ'é chi ndís'tiī cadíinuⁿ nī chi díitú díⁿ ntiⁿ'nyuⁿ caavā ndís'tiī ní cáávā 'iiⁿ'yāⁿ chi snéé na yáāⁿ Laodicea, ní cáávā 'iiⁿ'yāⁿ chi

nguée n'diichi tandii yā naáⁿ. ²Neⁿé chi nducyáácá 'iⁿyāⁿ s'eeⁿ ndúúcū ndís'tiī cuuvi diitú nī ndúúcū staava yeⁿ'é nī. Ní nguée 'va'á nī. Ní dáámá nadacadíínūⁿ nī, ni dineⁿ'é nī 'aamá nī taama nī. Ní deenu cá nī yeⁿ'e nducuéⁿ'ē vaadi cuaacu, ní diituu caneé nī ndúúcū chi i'téenu nī. Ní 'íicú cuuvi deenu cá nī chiiⁿ chi Ndyuūs cunuūⁿ n'de'él yā chi yeⁿ'e maaⁿ Jesucristo miiⁿ. Ní 'íicú cuuvi diituu cá nī ndúúcū chi i'téenu nī yeⁿ'e Jesucristo. ³Caati ndúúcū Cristo miiⁿ tanducuéⁿ'ē chi véé yeⁿ'ē vaadi deenu ndúúcū vaadi cadiinuuⁿ ní yeⁿ'é yā ndúúcū nducueⁿ'ē cosa chi cunúúⁿ n'de'ei yeⁿ'e nducyáácá 'iⁿyāⁿ. ⁴Ní nducuéⁿ'ē chuū ngaⁿ'á chi nguée du'ū vεε canche'ei ndís'tiī ndúúcū nduūdū yaadi yeⁿ'é yā. ⁵Ní chuū ngaⁿ'á caati 'áará chi nguεε caneé ndúúcū ndís'tiī cuuvi deenú nī chi nadacadíínúúⁿ taavi yeⁿ'e ndís'tiī. Ní yeenú taavi 'úú taachi n'giindiveéⁿ chi n'daacā idiiⁿ nī ní díituu caneé nī ndúúcū nduudu cuaacu yeⁿ'e Cristo chi i'téenu nī.

⁶Maaⁿ ní tan'dúúcā chi i'téenu nī Señor Jesucristo yeⁿ'ē yú 'tiicá ntúúⁿ ndís'tiī chi yeⁿ'é Cristo canée chi n'geetinée n'daacā nī cáávā Señor Jesucristo yeⁿ'ē yú nginnee yā ndís'tiī. ⁷Ní canée chi diiⁿ n'daacā nī ndúúcū nducuéⁿ'ē caati cu'téenu cá nī Jesucristo. Ní cu'téenu cá nī nguuvi nguuvi tan'dúúcā chi ch'eēⁿ ndís'tiī. Ní nguée ndaacadaamí nī yeⁿ'e chi i'teenú nī. Ní cuéⁿ'é daāⁿmaⁿ ngaⁿ'á nī, gracias Ndyuūs ti yeⁿ'é yā ndís'tiī.

**Yeⁿ'é vida ngai yeⁿ'é 'iⁿyāⁿ
chi yeⁿ'e Cristo**

⁸Maaⁿ ní dííⁿ nī cuidado ndís'tiī yeⁿ'e maáⁿ nī chí mar 'áámá saⁿ'ā

nguée castaⁿ'a sa ndís'tiī caavā vaanicadíínúūⁿ ch'εeté yeⁿ'ē sa ndúúcū nduudu yaadi yeⁿ'ē sa. Ní nguée canche'ei sa ndís'tiī caati nduudu yeⁿ'ē sa chí sta'a sa yeⁿ'e vaanicadíínúūⁿ yeⁿ'e 'iⁿyāⁿ ní yeⁿ'e costumbre yeⁿ'é 'iⁿyāⁿ yeⁿ'é iⁿ'yeeⁿdī. Ndíí nguée sta'a sa yeⁿ'ē vaanicadíínúūⁿ yeⁿ'é Cristo.

⁹Caati nducuéⁿ'ē chi véé ní yeⁿ'e Ndyuūs ndúúcū daiya yā Jesucristo. Jesucristo miiⁿ ní Ndyuūs 'yā ní dáámá yā ndúúcū chiidá yā. 'Tíica yā. ¹⁰Ní nducuéⁿ'ē chi véé ní yeⁿ'e ndís'tiī caati ndís'tiī ní yeⁿ'e Cristo ndís'tiī. Jesucristo miiⁿ ní ndíí tiiⁿ yā yeⁿ'e tanducuéⁿ'ē 'iⁿyāⁿ ní yeⁿ'e tanducuéⁿ'ē 'iⁿntyéⁿ'ē yeⁿ'e tanducuéⁿ'ē nación ní yeⁿ'e tanducuéⁿ'ē poder yeⁿ'e yááⁿ'nguiinúūⁿ chi véé na iⁿ'yeeⁿdí 'cūū. ¹¹Ndís'tiī nguée 'iⁿyāⁿ circuncidado yā na cuerpo yeⁿ'é yā. Naati cáávā chi ndís'tiī ní yeⁿ'e Jesucristo ndís'tiī, Cristo ní dííⁿ yā cuenta chi ndís'tiī tan'dúúcā 'iⁿyāⁿ chí circuncidado yā ndís'tiī taachi Jesucristo nadanguáⁿ'ai yā ndís'tiī yeⁿ'e poder yeⁿ'e nuūⁿndi chi véé na cuerpo yeⁿ'é nī. ¹²Ní taachi ch'εedinuūⁿ'niⁿ yā ndís'tiī, tuuⁿ'mi ní canée nī tan'dúúcā chí ch'εεchi nī na yáinyāⁿ ndúúcū Cristo ní canée nī tan'dúúcā chi nadacuéⁿ'ē nī yeⁿ'ē nguaaⁿ tináⁿ'ā ndúúcū Cristo. 'Tíica rá váá caati i'téenu nī poder yeⁿ'e Ndyuūs chi diiⁿ chi nacueeⁿ Jesucristo yeⁿ'ē nguaaⁿ tináⁿ'ā. ¹³Ní tiempo chí ch'ó'oo espíritu yeⁿ'e ndís'tiī ní ndii cucáávā nuuⁿndi chí dííⁿ nī. Ní nguée ndís'tiī 'iⁿyāⁿ circuncidado yā ndís'tiī. Naati maaⁿ ní Ndyuūs tee yā vida

cueⁿe daaⁿmaⁿ ndís'tii dáámá dáámá ndúúcu Cristo ti Ndyuūs nadanch'εεcú yā yeⁿē tanducuéⁿē nuuⁿndi yeⁿé nī. ¹⁴Cuááⁿ vmaaaⁿ canee yú ndúúcu nducuéⁿē cuenta yeⁿe nuuⁿndi yeⁿe yú ti nguεε diiⁿ yú tan'dúúca chi ngaⁿa ley yeⁿé Ndyuūs. Ní cáávā ley miiⁿ ní cuenta yeⁿe nuuⁿndi yeⁿe yú diiⁿ condenar s'uuúⁿ. Naati Cristo nadí'vε yā 'áámá vmnéⁿēe cuenta yeⁿe nuuⁿndi yú taachi ch'iī yā na cruz cáávā s'uuúⁿ. Ní cáávā chi ch'iī yā cáávā s'uuúⁿ ní tan'dúúca chi nadatuūví yā ley miiⁿ ti nguéé cuuvi condenar s'uuúⁿ. ¹⁵Ní taachi Cristo ch'iī yā na cruz cuchéε yā yeⁿe nducuéⁿē 'iiⁿntyéⁿē yeⁿe espíritu chi nguéé n'daacā ndúúcu poder yeⁿé yā. Ní diíⁿ yā chi 'cuinaaⁿ espíritu s'eeⁿ nanááⁿ nducyáácá espíritus. Ní Cristo ch'iⁿí yā nducyáácá 'iiⁿyāⁿ chi chéε yā yeⁿe espíritus.

In'nuúⁿ nī nducuéⁿē chi yeⁿē va'ai cheeti nguuvi

¹⁶Maaⁿ ní nguéé nacadínuuⁿ nī yeⁿe 'iiⁿyāⁿ chi diíⁿ yā condenar ndís'tii caavā dendu'ū chi nguéé chi nge'é nī ndúúcu chi ngi'i nī o ndúúcu yeⁿē chi diíⁿ nī taachi véé 'viicu s'eeⁿ ndúúcu 'viicu yeⁿe 'iīyū ngai ndúúcu 'viicu yeⁿe sábadu chí nguuvi chi ntaaví'tuunúⁿ 'iiⁿyāⁿ. ¹⁷Nducuéⁿē 'viicu ndúúcu chi diíⁿ 'iiⁿyāⁿ ní ch'iⁿí yeⁿe Cristo chi cuchii, naati nducuéⁿē chuū cuaacu nííⁿnyúⁿ ngaⁿā chi yeⁿe Cristo miiⁿ. ¹⁸Nguéé nadacadínuuⁿ nī yeⁿe 'iiⁿyāⁿ chi diíⁿ yā condenar ndís'tii caati ngaⁿa yā chí n'diichí yā visiones. 'Iiⁿyāⁿ s'eeⁿ nadacadínuuⁿ yā chi n'gεete maáⁿ yā caavā cosas

chi n'diichí yā. 'Iiⁿyāⁿ s'eeⁿ ngaⁿa yā chi canee chi ndiicuúⁿ nī maáⁿ nī ní dich'εeté nī ángeles. 'Iiⁿyāⁿ s'eeⁿ diíⁿ yā cosas chi nguéé deenú yā yeⁿē ní n'gεete maáⁿ yā caavā chi nadacadínuuⁿ yā yeⁿe cosas chi candεε yeⁿē maaⁿ tiíⁿ yā. ¹⁹'Iiⁿyāⁿ s'eeⁿ nguéé canee yā ndúúcu nduudu cuaacu yeⁿé Jesucristo. Cristo miiⁿ ní tiiiⁿ yeⁿe cuerpo yeⁿé yā chi 'iiⁿyāⁿ chi i'téenu yā 'yā. Ní Cristo miiⁿ ní diíⁿ yā chi nducuéⁿē 'iiⁿyāⁿ yeⁿé yā ní n'giita yā caati i'téenu cá yā yeⁿé yā. Ní Cristo miiⁿ diíⁿ yā chi nducyaaaca 'iiⁿyāⁿ yeⁿé yā canee yā tan'dúúca chi nduuvi daamá yā tan'dúúca cuerpo yeⁿe yú nduuvidaama yeⁿē ndúúcu 'iini ndíi nduū. 'Tíicā diíⁿ Cristo tan'dúúca chi neⁿe Ndyuūs.

²⁰Maaⁿ ní ndís'tii 'āā ch'iī nī taachi ch'iī Jesucristo. Ní canee nī libre yeⁿe reglas yeⁿe iⁿyeeⁿdí 'cūū. Maaⁿ ní, ¿d'éε cuuvi chi n'gεetinéé ndís'tii tan'dúúca chi yeⁿe iⁿyeeⁿdí 'cūū ndís'tii? ¿D'éε cuuvi chi i'téenu nī reglas yeⁿē iⁿyeeⁿdí 'cūū chi ngaⁿa 'tíicā? ²¹Nguéé tuu'ví nī chuū, nguéé che'é nī cosa 'cūū, ní nguéé cuta'á nī cosa 'cūū na ta'á nī. ²²Ní reglas miiⁿ chííⁿ chi 'iiⁿyāⁿ din'dái yā ní chííⁿ chí ca'cueeⁿ yā 'iiⁿyāⁿ. Nducuéⁿē reglas 'cūū nguéé dichí'vε caati Ndyuūs ca'á yā 'iiⁿyāⁿ cosas caati cuuvi che'é yā yeⁿē. ²³Cuaacu chi 'iiⁿyāⁿ sta'á yā reglas miiⁿ tan'dúúca chi ch'iⁿí chi yeⁿē vaadi deenu yeⁿé 'iiⁿyāⁿ. Reglas miiⁿ ch'iⁿí chi yeⁿē religión chi ngaⁿā chi 'iiⁿyāⁿ canee chí dich'εeté yā ángeles. Ní reglas miiⁿ ch'iⁿí chí 'iiⁿyāⁿ canee chí ndiicuúⁿ yā maáⁿ yā ní ch'iⁿí chi 'iiⁿyāⁿ canee chí

'cueenú yā cuuvi na cuerpo yeⁿe yā. Naati nguée dichí'vē mar 'áamá regla yeⁿe chí diiⁿ ayudar 'iiⁿyāⁿ caati nguēe dinuuⁿndí yā tan'dúúcā chí neⁿe diiⁿ cuerpo yeⁿe yā.

3 Maaⁿ ní chí ndís'tií ní 'āā nduuchí ní yeⁿe nguaaⁿ tináⁿā dáámá ndúúcū Jesucristo, ndís'tií in'nuúⁿ nī dendu'ū chí yeⁿe va'ai cheeti nguuvi naachi Cristo veé yā lado yeⁿe honor yeⁿe Ndyuūs chí lado tá cuaacú yā. ²Ní nadacadíinuⁿ nī yeⁿe nducueⁿe chí yeⁿe Ndyuūs ní nguée yeⁿe nducueⁿe chí véé iⁿyeeⁿdí 'cūū. ³Tíicā ndís'tií ní chí nī dáámá ndúúcū Cristo ní caneé nī tan'duucā chí chí cuerpo yeⁿe nī. Maaⁿ ní canúúⁿ n'de'ei vida yeⁿe nī ndúúcū Cristo nanááⁿ Ndyuūs. ⁴Maaⁿ vida yeⁿe yú ní cuaacu chí Cristo. Ní taachi ndaa Cristo taama vmnéⁿēe tuu'mi ní s'uuúⁿ ndaa yú nduucú yā ní véé parte yeⁿe yú nduucú yā na va'ai cheeti nguuvi.

Yeⁿe vida ndiicúū yeⁿe yú ní yeⁿe vidā ngai yeⁿe yú

⁵Maaⁿ ní diiⁿ yú cuenta chí chí cuerpo yeⁿe yú ní 'āā ntéé diiⁿ yú nuuⁿndi. N'diichí nī, véé nuuⁿndi nguaáⁿ nī. Neⁿé nī 'áamá saⁿā o 'aama n'daataá chí nguée yeⁿe nī. Ní neⁿé nī díⁿ nī cosa chí nguée yeⁿe Ndyuūs. Ní neⁿé nī n'diichí nī 'áamá n'daataá o 'áamá sáⁿā chí nguée yeⁿe nī. Ní neⁿé nī dendu'ū chí nguée yeⁿe nī. 'Tiicā nī. Ní caneé nī tan'dúúcā chí i'téenu nī ídolos chí imágenes. ⁶Nducueⁿe chuū ní nuuⁿndi. Ní Ndyuūs díⁿ yā castigar nducyáácá 'iiⁿyāⁿ chí nguée díⁿ yā tan'dúúcā chí ngaⁿa yā. ⁷Tíicā 'āā

dinuuⁿndí ndís'tií tiempo chí 'āā chó'oo. ⁸Maaⁿ ní 'āā ntéé díⁿ nī nuuⁿndi. Nguée ditaáⁿ nī, nguée caaⁿmaⁿ taáⁿ nī. Nguée díⁿ nī cosas chí nguēe n'daācā 'aamá nī ndúúcū taamá nī. Nguée caaⁿmáⁿ nī 'iiⁿyāⁿ chíⁿ chí nguée n'daāca chí maáⁿ yā díⁿ yā. Nguée caaⁿmáⁿ nī mar 'áámá nduudu chí nguée n'daācā.

⁹Nguée caaⁿmáⁿ nī nduudu yaadi 'aama nī ndúúcū taama nī. Nguée díⁿ nī 'túúcā caati 'āā dicuenta nī tan'dúúcā chí 'āā chíⁿ cuerpo yeⁿe nī ndúúcū nducueⁿe chí nguée n'dáāca chí 'āā díⁿ nī. ¹⁰Ní maaⁿ ní cuerpo yeⁿe nī ní tan'dúúcā cuerpo chí ngai chí Ndyuūs din'dái yā. Ní nguuvi nguuvi díⁿ yā chí ndís'tií cuuvi nī tan'dúúcā Ndyuūs, 'tiicā nī. Ní 'íicú Ndyuūs díⁿ yā chí cuuvi deenu cá nī yeⁿe Ndyuūs.

¹¹Caati nanááⁿ Jesucristo miiⁿ nguée de'ē veē nduuti chí 'iiⁿyāⁿ nguée yeⁿe ndaata 'iiⁿyāⁿ Israel o 'iiⁿyāⁿ chí yeⁿe ndaata 'iiⁿyāⁿ Israel. Nguée de'ē veē nduuti chí 'iiⁿyāⁿ ní circuncidado yā o nguée circuncidado yā. Nguée de'ē veē nduuti chí 'iiⁿyāⁿ tan'dúúcā chí snéé yúúní, o nduuti chí 'iiⁿyāⁿ tan'dúúcā chí 'iiti 'cueeti. Nguée de'ē veē nduuti chí 'iiⁿyāⁿ chí dichí'vē 'iivi yeⁿe yā, o 'iiⁿyāⁿ chí snéé libre yā. Dámaaⁿ dichí'vē chí 'iiⁿyāⁿ s'eeⁿ ní yeⁿe Cristo ní Cristo caneé yā nduucú yā.

¹²Ndís'tií ní yeⁿe Ndyuūs ndís'tií. Ní Ndyuūs dineⁿe yā ndís'tií ní nndæeve yā ndís'tií chí cuuvi yeⁿe yā ndís'tií. Maaⁿ ní ndís'tií caneé chí diya'ái nī 'iiⁿyāⁿ ní din'daāca cá nī. Nguée dich'eté nī maáⁿ nī naati díⁿ nī nducueⁿe ndúúcū vaadi ndiicúúⁿ.

¹³Ní nginneé nī 'aamá nī taama nī. Ní cucheé nī yeⁿe nducuéⁿē. Ní nadach'εécú nī 'iⁿyaⁿ chí díⁿ yā 'áámá falta ndúúcu nī. Ní tan'dúúca chí Cristo nadach'εécú yā nuuⁿndi yeⁿé nī, 'tiicá ntúúⁿ nadach'εécú nī yeⁿe 'aama nī ndúúcu taama nī. ¹⁴Nguaaⁿ nducuéⁿē chí díⁿ nī, dineⁿe taavi cá nī 'iⁿyaⁿ ti taachi díⁿ nī 'túúca caneé nī tan'dúúca chí nduuvidaama nī yeⁿē nducuéⁿē chí véé. Ní díⁿ nī cumplir nducuéⁿē dendu'ū. ¹⁵Ní vaadi 'diiⁿ chí Ndyuūs itée yā ndís'tiī na staava yeⁿé nī caneé chí ch'iⁿi ndís'tiī nducuéⁿē chí díⁿ nī caati Ndyuūs yaa'ví yā nducyáácá ndís'tiī chí cuuvi yeⁿé nī vaadi 'diiⁿ miiⁿ. Ní nducyáácá nī ní caneé nī tan'dúúca 'áámá cuerpo nūuⁿ, 'tiicá nī. Maaⁿ nī ca'á nī gracias Ndyuūs caavā chuū.

¹⁶Ní 'áámá canéé n'daacā na staava yeⁿé nī nducuéⁿē nduudu cuaacu chí n'daacā taavi ní yeⁿe Ndyuūs. Ca'cueéⁿ nī ní ch'iⁿi nī 'áámá nī taama nī ndúúcu nducuéⁿē vaadi deenu. Ngiitá nī salmos ndúúcu himnos ndúúcu canciones chí ngaⁿā yeⁿé Ndyuūs. Ní ndúúcu núúⁿmáⁿ staava yeⁿé nī nca'á nī gracias Ndyuūs. ¹⁷Níⁿícú nducuéⁿē cosa chí diiⁿ nī 'áará chí caaⁿmáⁿ nī o díⁿ nī ntiiⁿnyuⁿ, díⁿ nī nducuéⁿē caavā Señor Jesús ní nca'á nī gracias Ndyuūs Chiida yú cáavā Cristo.

**Tan'dúúca chí caneé chí diiⁿ
yú ti yeⁿe Cristo s'uúúⁿ**

¹⁸Ndís'tiī n'daataá chí 'nínívaacu, cu'teenú nī yeⁿe isaⁿā yeⁿé nī caati 'tíicā caneé chí díⁿ nī ti yeⁿé Ndyuūs ndís'tiī. ¹⁹'Tiicá ntúúⁿ isaⁿa

yeⁿé yā, dinéⁿe nī n'daataá yeⁿé nī ní nguée nduuvi taáⁿ nī ndúúcu n'daataá yeⁿé nī. ²⁰Ndís'tiī daiyá yā chí yeⁿe Cristo 'caandiveeⁿ nī yeⁿe chiidá nī ní cheecu nī yeⁿe tanducuéⁿē caati 'tíicā neⁿe Ndyuūs. ²¹Ní ndís'tiī chí véé daiyá nī, nguée díⁿ nī chí nduuvi táaⁿ daiyá nī caati cuayiivi ní nguée cu'téenu yā chee chí caaⁿmáⁿ nī yeⁿe yā. ²²Ndís'tiī chí dichíí'vē 'iⁿyaⁿ, 'caandiveeⁿ nī yeⁿē tanducuéⁿē chí ngaⁿā 'iiví nī yeⁿē iⁿ'yeeⁿdí 'cūū. Nguée díⁿ nī tan'dúúca chí neⁿé yā dámaaⁿ taachi nanáaⁿ yā ndís'tiī. Ní 'iiví nī cuuvi deenú yā chí n'daacā idiíⁿ nī, naati díⁿ nī nducuéⁿē ntiiⁿnyuⁿ ndúúcu núúⁿmáⁿ staava yeⁿé nī. Ní 'va'á nī Ndyuūs. ²³Ní tanducuéⁿē chí díⁿ nī, díⁿ nī ndúúcu núúⁿmáⁿ staava yeⁿé nī. Ní díⁿ nī ntiiⁿnyuⁿ miiⁿ tan'dúúca chí ntiiⁿnyuⁿ yeⁿé Ndyuūs ní nguée ntiiⁿnyuⁿ yeⁿē 'iiví nī. ²⁴Ní ndís'tiī deenú nī chí cuuvi cuta'á nī yeⁿe chí véé yeⁿé nī chíⁿ chí tée Cristo ndís'tiī. Cuaacu chí ndís'tiī dichíí'vē nī Jesucristo ní cuaacu níⁿnyuⁿ Cristo ní 'iiví nī. ²⁵Ní 'iⁿyaⁿ chí nguée n'daacā idiíⁿ yā caⁿā yā cuta'á yā ná díⁿ'vē yā yeⁿē chí díⁿ yā chí nguée n'daacā. Ndyuūs 'āā daamá nūuⁿ díⁿ yā tratar ndúúcu nducyáácá 'iⁿyaⁿ.

4 Ndís'tiī patrones chí véé mozos yeⁿé nī, díⁿ nī chí cuaacu ndúúcu chí n'daacā ndúúcu mozos yeⁿé nī. N'gaacú nī chí véé 'iiví nī chí canéé na va'ai cheeti nguuvi.

²Nducuéⁿē tiempo caaⁿmaⁿngua'á nī ní 'cueti nduuchí nī. Ní ca'á nī gracias Ndyuūs. ³Caaⁿmaⁿngua'á ntuúⁿ nī yeⁿē nús'uu ti Ndyuūs tée

yā lugar nús'uu chi cuuvi caaⁿ máⁿ 'nū nduudu cuaacu yeⁿé yā. Ní nduudu miiⁿ ní yeⁿe Cristo. Ní nguéé déénu 'iiⁿ yāⁿ naati maaⁿ ní ngaⁿa 'nū nduudu miiⁿ. Ní cucááⁿ vā nduudu miiⁿ maaⁿ 'úú canuúⁿ vácūú ndúúⁿ cādēna 'cūū. ⁴Caaⁿ maⁿ nguaⁿá nī cááⁿ vā 'úú chi cuuvi caaⁿ máⁿ n'daacā nduudu miiⁿ tan'dúúⁿ cā chi canéé chi caaⁿ máⁿ.

⁵Maaⁿ ní ndís'tiī 'cuētinéé n'daacā nī ndúúⁿ cū 'iiⁿ yāⁿ chi nguéé i'téénu yā Ndyuūs. Dííⁿ nī n'daacā nducuéⁿ e tiempo. ⁶Cuéⁿ é daāⁿ maⁿ caaⁿ máⁿ nī chí n'daacā ndúúⁿ cū nduudu n'dai. Ní canéé chí déénu nī táácā chi cuuvi nan'guēēcutaⁿ á nī ca'áámá ca'áámá 'iiⁿ yāⁿ.

'Cuiinu carta miiⁿ ndúúⁿ cū saludos

⁷Hermano Tíquico chi neⁿe yú, 'áámá canee sa chi diiⁿ sa ntiīⁿ nyuⁿ yeⁿé Jesucristo ní diiⁿ sa dáámá ntiīⁿ nyuⁿ nduucú. Saⁿā miiⁿ cuuvi sa ndís'tiī tan'dúúⁿ cā chi 'úú canee ní diíⁿ. ⁸Ní cááⁿ vā chiiⁿ dicho'ó Tíquico nanááⁿ ndís'tiī caati cuuvi sa ndís'tiī táácā n'gēētinéé 'nū. Ní tēe sa 'viich'ēētíinūⁿ na stava yeⁿé nī. ⁹Ní dicho'ó ntūūⁿ hermano Onésimo, saⁿā chi neⁿe yú, ní 'áámá canee sa chi diiⁿ ntiīⁿ nyuⁿ yeⁿé Ndyuūs. Ní yeⁿe 'áámá chēē ndís'tiī. Hermanos s'eeⁿ yaa'ví yā ndís'tiī tanducuéⁿ e chi dííⁿ 'nū 'muuⁿ.

¹⁰Saⁿā Aristarco chi canuúⁿ vácūú nduucú idich'ó sa: N'dai ndís'tiī. 'Tiicá ntūūⁿ dicho'o saⁿā Marcos chi dácūú saⁿā Bernabé. Ní ndís'tiī 'āā sta'á nī orden chi 'cuaaⁿ nī hermano Marcos miiⁿ nduuti chi ndaa sa nanááⁿ ndís'tiī. ¹¹'Tiicá ntūūⁿ Jesús chi nguuví Justo dicho'o sa: N'dai

ndís'tiī. Dámaāⁿ saⁿā s'uuⁿ chi yeⁿé ndaata 'iiⁿ yāⁿ Israel ní i'téénu yā Jesucristo diiⁿ yā ntiīⁿ nyuⁿ nduucú yeⁿé naachi Ndyuūs ngaⁿa ntiīⁿ nyúⁿ yā. Saⁿā s'uuⁿ ntēe ca yā 'viich'ēētíinūⁿ 'úú. ¹²Saⁿā Epafras ntūūⁿ chi diiⁿ ntiīⁿ nyuⁿ yeⁿe Cristo ní yeⁿe 'áámá chēē ndís'tiī dicho'o sa: N'dai ndís'tiī. Saⁿā miiⁿ neené ngaⁿ anguaⁿá sa yeⁿe ndís'tiī chi ndís'tiī 'áámá canee nī ndúúⁿ cū chi i'téénu nī níicú chi dámaāⁿ neⁿé nī diiⁿ nī tanducuéⁿ e tan'dúúⁿ cā chi Ndyuūs neⁿe yā chi diiⁿ nī. ¹³'Úú ngaⁿá nduudu cuaacu yeⁿe Epafras miiⁿ. Neené inadacadíinuuⁿ sa yeⁿé ndís'tiī ndúúⁿ cū 'iiⁿ yāⁿ chi snéé yā na yāāⁿ Laodicea ndúúⁿ cū yāāⁿ Hierápolis. ¹⁴Saⁿā Lucas chi doctor chi neⁿe yú ndúúⁿ cū saⁿā Demas dicho'ó yā: N'dai ndís'tiī, ngaⁿá yā.

¹⁵Maaⁿ ní ndís'tiī dicho'ó nī: N'dai ndís'tiī, ngaⁿá nī hermanos chi snéé na yāāⁿ Laodicea. Dicho'ó nī: N'dai ndís'tiī, n'daataá Ninfas ndúúⁿ cū 'iiⁿ yāⁿ chi i'téénu yā Jesucristo ní nduuvidaamā yā na vaacu tá chi yaācū yeⁿé yā. ¹⁶Ní taachi 'cuiinū n'gēēⁿ nī carta 'cūū nguaaⁿ ndís'tiī dicho'ó nī carta 'cūū 'iiⁿ yāⁿ yeⁿe yāāⁿ Laodicea chi 'cueéⁿ yā na yaacū yeⁿé yā. Ní canee chi 'cueéⁿ nī ntūūⁿ 'áámá carta chi dicho'ó 'iiⁿ yāⁿ yeⁿe yāāⁿ Laodicea. ¹⁷Ní ndís'tiī cuuvi nī saⁿā Arquipo chi 'úú caaⁿ máⁿ 'tíicā: Díí Arquipo, diiⁿ di cuidado chi diiⁿ n'daacā di ní 'cuiinu di ntiīⁿ nyuⁿ yeⁿe Señor chi Señor tee yā díí.

¹⁸'Úú, Pablo, dinguúⁿ saludos 'cūū ndúúⁿ cū ta'á ndúúⁿ cū letras yeⁿé. N'gaacú nī yeⁿé chi canuúⁿ vácūū. Neⁿé chi Ndyuūs itēe yā vaadí n'dai yeⁿé yā. 'Tíicā cuuvi.

CARTA VMNÁÁⁿ VMNAAⁿ YEⁿE 'IIⁿ'YĀⁿ YEⁿE YĀĀⁿ TESALÓNICA

Pablo ndúúcu compañeros yeⁿé yā idinguúⁿ yā carta 'cūū yeⁿe 'iiⁿ'yāⁿ yeⁿe yaācū na yāāⁿ Tesalónica

1 'Úú, Pablo, idinguúⁿ carta 'cūū ndúúcu saⁿ'a Silvano ndúúcu saⁿ'ā Timoteo yeⁿe hermanos yeⁿe yú chi caⁿ'á yā na yaācū yeⁿe yāāⁿ Tesalónica, 'iiⁿ'yāⁿ chi yeⁿé Ndyuūs Chiida yú nícú yeⁿé Señor Jesucristo. Neⁿé 'nū chi Ndyuūs Chiida yú ndúúcu Señor Jesucristo tée yā ndís'tiī nducuéⁿ'ē vaadi n'dai yeⁿé yā, ní vaadi 'diiⁿ'n yeⁿé yā canee na staava yeⁿé nī.

'Iiⁿ'yāⁿ yeⁿe yāāⁿ Tesalónica din'daacá yā ní diitu i'téenu yā Jesucristo

2 Ca'á 'nū gracias nanááⁿ Ndyuūs cáāvā nducyaaca ndís'tiī ní taachi caaⁿ'maⁿ'ngua'á 'nū inin'gáácú 'nū yeⁿe ndís'tiī. **3** Ní taachi ngaⁿ'angua'á 'nū nanááⁿ Ndyuūs Chiida yú, ngaⁿ'angua'á 'nū yeⁿe ntiⁿ'nyuⁿ chi díⁿ'n nī caati i'téenu cá nī ní chí neⁿ'e cá nī nducyaaca 'iiⁿ'yāⁿ ní chí nginnee yā 'iiⁿ'yāⁿ. Ní cuchéé nī yeⁿe tanducuéⁿ'ē. Ní 'áámá canee nī ndúúcu chi i'téenu nī caati cūnee ngiinú nī chi Señor Jesucristo yeⁿ'ē yú caⁿ'á yā tée yā

chiiⁿ chi cuuvi yeⁿé nī. **4** Ndís'tiī, hermanos yeⁿé 'nū, Ndyuūs neⁿé yā ndís'tiī. Ní deenú 'nū chi Ndyuūs ndeeve yā ndís'tiī chi ndís'tiī cuuvi yeⁿé yā ndís'tiī. **5** Taachi ngaⁿ'a 'nū nduudu cuaacu yeⁿé Ndyuūs nanááⁿ ndís'tiī nguεε dámaaⁿ ngaⁿ'á 'nū nduudu miiⁿ ndúúcu nduudu yeⁿé 'nū ti ndúúcu poder yeⁿ'ē Espíritu N'dai yeⁿé Ndyuūs. Ní deenú 'nū chi nduudu cuaacu miiⁿ ní cuaacu. Ndís'tiī ní deenú nī du'u saⁿ'ā nús'uu taachi canee 'nū ndúúcu ndís'tiī ní táácā díⁿ'n 'nū caati maáⁿ nī cuuvi 'cuεetinée n'daaca nī.

6 Ní ndís'tiī ní 'āā diiⁿ nī tan'dúúcā chi nús'uu díⁿ'n 'nū ní tan'dúúcā chi diiⁿ Señor Jesucristo yeⁿ'ē yú. Ní i'téenu nī nduudu cuaacu yeⁿé Ndyuūs. Ní yeenú nī ndúúcu vaadi yeenú chi Espíritu N'dai yeⁿé Ndyuūs tee yā ndís'tiī 'áará chí ch'eenú nī chiī cucáāvā chi i'téenu nī. **7** Ní cucáāvā chi díⁿ'n nī 'tuucā nducyáácá 'iiⁿ'yāⁿ chi i'téenu yā Señor Jesucristo, 'iiⁿ'yāⁿ yeⁿe núúⁿ'máⁿ yáⁿ'āa Macedonia ndúúcu núúⁿ'máⁿ yáⁿ'āa Acaya cuuvi cuta'á ndís'tiī tan'dúúcā 'áámá ejemplo ní díⁿ'n yā tan'dúúcā chi díⁿ'n nī. **8** Ní ndís'tiī diiⁿ nī chi tanáⁿ'ā 'iiⁿ'yāⁿ

cuuvi déénu yā nduudu cuaacu yeⁿe Señor. Nguεε dámaaⁿ 'iiⁿ'yāⁿ yeⁿe yáⁿ'āa Macedonia ndúúcu 'iiⁿ'yāⁿ yeⁿe yáⁿ'āa Acaya naati 'iiⁿ'yāⁿ yeⁿe nducuéⁿ'ē cuaāⁿ 'āā deenú yā chi ndis'tiī i'téénu nī Ndyuus. Ní nguεε canéé chi caaⁿ'maⁿ cá 'nū de'ē vεε yeⁿe nī ti n'daacā i'téénu nī. ⁹Ní nducyaaca 'iiⁿ'yāⁿ ngaⁿ'a yā nús'uu yeⁿe visita yeⁿ'é 'nu taachi canéé 'nū nguaaⁿ ndís'tiī. Ní ngaⁿ'a yā tan'dúúca chi ndís'tiī s'néeⁿ nī ídolos caavā chi cu'téénu nī Ndyuūs chí canduuchi, Ndyuūs chí cuáácú chi Ndyuūs. Ní tuca'á nī díⁿ nī ntiiⁿ'nyuⁿ yeⁿ'é Ndyuūs. ¹⁰Tiicá ntúūⁿ ngaⁿ'a yā chi ndís'tiī cūnee ngiinú nī chi Jesucristo chí Daiya Ndyuūs ní ndaa yā taama vmnéⁿ'ēe yeⁿ'ē va'ai chεeti nguuvi. Ndyuūs nada'cueeⁿ yā Jesús miiⁿ yeⁿ'ē nguaaⁿ tináⁿ'ā. Nífcú Jesucristo miiⁿ ní 'iiⁿ'yāⁿ chí nadanguáⁿ'ai yā s'uuúⁿ yeⁿ'ē castigo chí neené díftúu yeⁿ'e tiempo chí cuchíi.

Ntiiⁿ'nyuⁿ chí díiⁿ Pablo naachi canéé yā na yāāⁿ Tesalónica

2 Ndís'tiī, hermanos yeⁿ'e yú, deenú nī chí tiempo chí canéé 'nū nguaaⁿ ndís'tiī chí nguεε tandiī rá díⁿ 'nū ntiiⁿ'nyuⁿ yeⁿ'é Ndyuūs. ²'Āā deenú nī chí 'āā cueⁿ'é 'nū yāāⁿ Filipos vmnaaⁿ chí ndaaⁿ 'nū nanááⁿ ndís'tiī. Ní déénu nī chí 'iiⁿ'yāⁿ miiⁿ'ya nguεε n'daacā díⁿ yā nduucú 'nū. Ní ngaⁿ'a taáⁿ yā yeⁿ'é 'nū chí ch'eenú 'nū chíi. Nífcú taachi ndaaⁿ 'nū nanááⁿ ndís'tiī, nguεε 'va'á 'nū chí caaⁿ'máⁿ 'nū nduudu cuaacu chí ngai yeⁿ'e Cristo 'áará chí deenú 'nū chí vεε cá 'iiⁿ'yāⁿ chí contra yeⁿ'e nús'uu, 'iiⁿ'yāⁿ chí nguéé n'daacā

díⁿ yā nduucú 'nū. ³Caati deenú 'nū chí ngaⁿ'á 'nū nduudu cuaacu miiⁿ nguéé ndúúcu vaanicadínuuⁿ yeⁿ'é 'nū chí nguéé n'daacā ndíi nguéé ndúú nginnche'éi 'nū 'iiⁿ'yāⁿ. ⁴Naati Ndyuūs n'diichí ya vida yeⁿ'é 'nū chí n'daacā n'geetineé 'nū. Ní tee yā ntiiⁿ'nyuⁿ nús'uu chí caaⁿ'máⁿ 'nū nduudu cuaacu yeⁿ'é chí cuuvi nanguáⁿ'ai 'iiⁿ'yāⁿ yeⁿ'e nuuⁿndi yeⁿ'é yā. Ní nguεε díⁿ 'nū ntiiⁿ'nyuⁿ miiⁿ chí cūnee yíinū 'iiⁿ'yāⁿ naati díⁿ 'nū chíiⁿ chí neⁿ'e Ndyuūs chí snaaⁿ yā nducuéⁿ'ē chí vεε na staava yeⁿ'e yú. ⁵Ní ndís'tiī deenú nī chí nguéé ngaⁿ'á 'nū nduudu cuaacu miiⁿ ndúúcu n'dee n'dái nduudu chí n'dai taavi chí cūnee yiinú nī yeⁿ'é 'nū. Ní nguéé ngaⁿ'á 'nū cáávā chí díⁿ 'nū ganar tuūmī. Ndyuūs ní deenú yā yeⁿ'é 'nū yeⁿ'e chí díⁿ 'nū. ⁶Mar 'áámá vmnéⁿ'ēe díⁿ 'nū ntiiⁿ'nyuⁿ yeⁿ'é Ndyuūs caavā chí 'iiⁿ'yāⁿ cuuvi caaⁿ'máⁿ yā chí n'geeté 'nū. Ní nguéé nanááⁿ ndís'tiī, ndíi nguεε nduu nanááⁿ tanáⁿ'a yā. Ní deenú 'nū chí cuuvi ch'iⁿ'í 'nū 'iiⁿ'yāⁿ chí ch'εete maáⁿ 'nū caati Cristo dich'ó yā nús'uu chí díⁿ 'nū ntiiⁿ'nyuⁿ yeⁿ'e apóstoles ní candéé 'nū nduudu yeⁿ'é yā. ⁷Naati 'tíicá díⁿ 'nū ndúúcu nī tan'dúúca chí ndís'tiī da'cai yā dai yá 'nū. Niicu tan'dúúca chí díⁿ 'áámá n'daataá ndúúcu dai yá yā taachi idi'cuiitá yā ní díⁿ yā cuidado dai yá yā, 'tíicá díⁿ 'nū ndúúcu nī. Ní n'daacā ngaⁿ'á 'nū ndúúcu nī ndúúcu vaadi n'giinu. ⁸Ní 'tíicá neⁿ'e cá 'nū ndís'tiī chí neⁿ'é 'nū tee 'nū ndís'tiī nguéé dámaaⁿ nduudu cuaacu yeⁿ'é Ndyuūs, naati 'tíicá ntúūⁿ neⁿ'é 'nū 'cuuví 'nū cáávā ndís'tiī caati 'āā neⁿ'e taavi cá 'nū

ndís'tiī. ⁹Ndís'tiī hermanos yeⁿe yú, n'gaacu nī yeⁿē ntiiⁿnyuⁿ chi diiⁿ cá 'nū nī ngaⁿá 'nū nduudu cuaacu yeⁿé Ndyuūs nanááⁿ ndís'tiī. Ní diíⁿ 'nū ntiiⁿnyuⁿ ndúúcu ta'á 'nū ndíí nguuvī ndíí n'gaaⁿ cáávā chi véé necesidades yeⁿé 'nū. Ní nguéé di'vaachí 'nū ndís'tiī yeⁿē dé'ē vee. ¹⁰Ní ndís'tiī ní testigos yeⁿé 'nū. 'Tiicá ntúūⁿ Ndyuūs ní testigo yeⁿé 'nū tan'dúúca chi 'cuēetinee n'daacá 'nū ní diíⁿ 'nū dendu'ū chi cuaacu taachi caneé 'nū nguaaⁿ ndís'tiī chi i'téenu nī Señor Jesucristo. Ní nguéé mar 'áámá 'iiⁿyāⁿ cuuvi caaⁿmaⁿ yā chi nguéé n'daacā diíⁿ 'nū. ¹¹Ní 'tiicá ntúūⁿ ndís'tiī deenú nī tan'dúúca chi diíⁿ 'nū ndúúcu ca'áámá ca'áámá ndís'tiī. Ní diíⁿ 'nū tan'dúúca chi nús'uu ní chiidá nī nī ndís'tiī ní daiyá 'nū ní tee 'nū consejo ndís'tiī ndúúcu 'viich'etífnūⁿ. ¹²Ní ch'iⁿi 'nū ndís'tiī tan'dúúca chi cuuvi n'gēetinee n'daacá nī nanááⁿ Ndyuūs caati ndís'tiī ní yeⁿé Ndyuūs ndís'tiī. Ní Ndyuūs ní yaa'ví yā ndís'tiī chi cuuvi ndaa nī naachi Ndyuūs ngaⁿa ntiiⁿnyúⁿ yā. Ní véé nducuéⁿē cosas chí n'dai yeⁿé nī. ¹³Níicú cáávā nducuéⁿē chuū cueⁿe daāⁿmaⁿ ní ca'á 'nū gracias Ndyuūs caati taachi ndís'tiī ní ch'iinniveéⁿ nī nduudu yeⁿé Ndyuūs chi ngaⁿá 'nū nanááⁿ ndís'tiī, ch'i'téenu nī nduudu miiⁿ chi nduudu yeⁿé Ndyuūs ní nguéé nduudu chi yeⁿe 'iiⁿyāⁿ. Ní cuaacu chi nduudu miiⁿ ní yeⁿé Ndyuūs caati diiⁿ ntiiⁿnyuⁿ na vida yeⁿé ndís'tiī chi i'téenu nī. ¹⁴Ndís'tiī, hermanos yeⁿé 'nū. Dáámá cho'o yeⁿe ndís'tiī taachi n'geenú nī ngii cucáávā chi diiⁿ 'iiⁿyāⁿ Israel chi paisanos yeⁿé nī ndúúcu nī. Chó'ōo

ntúūⁿ yeⁿe 'iiⁿyāⁿ chi naⁿá yā yaācū naachi 'iiⁿyāⁿ i'téenu yā Jesucristo na yáⁿāa Judea caati 'tíicā diiⁿ 'iiⁿyāⁿ Israel chi paisanos yeⁿé yā ndúúcu yā. ¹⁵Maaⁿ 'iiⁿyāⁿ paisanos chi 'iiⁿyāⁿ Israel ch'iiⁿnuⁿ yā Señor Jesucristo yeⁿē yú tan'dúúca chi diíⁿ yā ndúúcu profetas chi ngaⁿá yā nduudu cuaacu yeⁿé Ndyuūs tiempo chi 'āā chó'ōo. Ní 'iiⁿyāⁿ s'eeⁿ can'dáa yā s'uuúⁿ ní diiⁿ chi n'geenu yú ngii. Ní nguéé diiⁿ yā chiiⁿ chi Ndyuūs neⁿé yā chi diíⁿ yā ní contra yā nducyaaca 'iiⁿyāⁿ. ¹⁶Ní taachi neⁿé 'nū ngaⁿá 'nū nduudu cuaacu nanááⁿ 'iiⁿyāⁿ chi nguéé yeⁿe ndaata yeⁿé yā caati cuuví nnguaⁿ'ai yā, 'iiⁿyāⁿ s'eeⁿ chi paisanos yeⁿé nī nguéé n'guúⁿ yā chi ngaⁿá 'nū. 'Tíicā nī véé cá nuuⁿndi yeⁿé yā. 'Tíicā diíⁿ yā maaⁿ naati cuayiivi Ndyuūs caⁿá yā chi ca'a yā 'iiⁿyāⁿ s'eeⁿ 'áámá castigo chi neené diitūu ca.

**Pablo neⁿé yā caⁿá yā taama
vmnéⁿēe ní n'diichí yā 'iiⁿyāⁿ
yeⁿe yāāⁿ Tesalónica**

¹⁷Ndís'tiī hermanos yeⁿe yú 'áará chí maaⁿ ní yaⁿ'ai snée 'nū yeⁿe ndís'tiī ní nguéé cuuvi naáⁿ 'nū ndís'tiī nadacadiinúⁿ 'nū yeⁿe ndís'tiī. Néené neⁿé 'nū cunée 'nū ndúúcu ndís'tiī ní n'diichí 'nū ndís'tiī. ¹⁸Ní diíⁿ 'nū nducuéⁿē chi cuuví 'nū ti cuuvi ndaa 'nū nanááⁿ ndís'tiī. Ni 'úú Pablo 'naaⁿ tiempo canee listo chi naⁿá naati yááⁿ'nguiinūⁿ diiⁿ sa chi nguēe cuuvi ndaa. ¹⁹¿De'ē cáávā chi snée ngiinu 'nū ní yeenú 'nū? Snée ngiinu 'nū ní yeenú 'nū ti cuuvi candéé 'nū ndís'tiī nanááⁿ Jesucristo taachi

ndaa yā taama vmnéⁿēe. ²⁰Cuaacu nííⁿnyúⁿ chi ndís'tií chi i'téenu nī ní diíⁿ chi néené yeenúⁿ 'nū cáávā chi dííⁿ 'nū ntiiⁿnyuⁿ yeⁿ'é Ndyuūs nguaaⁿ ndís'tií.

3 Ní taachi 'āā ntéé cuhéé 'nū chi nguéé ndaa 'nū nanááⁿ ndís'tií, tuu'mi ní nadicadíínuuⁿ 'nū chi n'daacā chi maáⁿ 'nū n'geetineeⁿ 'nū na yāáⁿ Atenas. ²Ní dichó'ó 'nū Timoteo chi hermano yeⁿ'ē yú chi cuuvi n'diichi sa ndís'tií taacā snée nī. Saⁿ'ā miiⁿ 'āā diíⁿ sa ntiiⁿnyuⁿ yeⁿ'é Ndyuūs daama nduucúⁿ 'nū ní ngaⁿ'a sa nduudu cuaacu yeⁿ'é Cristo chi diíⁿ chi nadinguáⁿ'ai 'iiⁿyāⁿ. Saⁿ'ā miiⁿ ní cuuví cūnnee sa ndís'tií ní téé sa 'viich'etíínuuⁿ ndís'tií. Ní cuuví cūnee diitu cá nī ndúúcū chi i'téenu nī. Cáávā chuū dichó'ó 'nū Timoteo. ³Nguee neⁿ'é 'nū chi ndís'tií ndaacadaamí nī yeⁿ'e Jesucristo chi guee i'téenu nī Jesucristo cucáávā chi n'geenú nī ngii. 'Āā deenú nī chi canee chi 'cuenú nī cuuvi caati i'téenu nī Jesucristo. ⁴Ní cuaacu taachí ch'etineeⁿ 'nū ndúúcū ndís'tií chiiⁿ 'nū ndís'tií chi ndaa tiempo chi canéé chi 'cuenú yú cuuvi tan'dúúcā chi chó'oo yeⁿ'é nī. Chuū ní ndís'tií déenu nī. ⁵Ní cáávā chuū taachi 'āā ntéé cheé chi nguéé n'giindiveéⁿ yeⁿ'é ndís'tií cho'ó hermano Timoteo chi 'úú cuuvi deenú táácā snée nī ndúúcū chi i'téenu nī. Caati 'úú 'va'á chi yááⁿ'nguiniūⁿ diíⁿ chi nguéé i'téenu nī ní maaⁿ ní nguéé dichí'vē ntiiⁿnyuⁿ chi 'āā diíⁿ 'nū nguaaⁿ ndís'tií.

⁶Naati maaⁿ ní Timoteo chi chiica sá yeⁿ'e ndís'tií chi snee na

yāáⁿ Tesalónica ndaā sa nanaáⁿ 'nū. Ní yaa'vi sa nús'uuⁿ chi n'daacā n'dai snee nī ti i'téenu nī Ndyuūs. Ní ngaⁿ'a ntúūⁿ sā chi neⁿ'e nī nducyaaca 'iiⁿyāⁿ. Ní yaa'vi sa nús'uu chi cueⁿ'e daāⁿmaⁿ n'gaacu nī yeⁿ'é 'nū ní neⁿ'é nī nús'uu. Ní néené neⁿ'é nī n'diichi nī nús'uu. Ní nús'uu neⁿ'e ntúūⁿ 'nū n'diichi 'nū ndís'tií. ⁷Ní ndís'tií hermanos yeⁿ'é 'nū cucáávā chi n'giindiveéⁿ 'nū yeⁿ'ē ndís'tií chi díítū canee nī ndúúcū chi i'téenu nī yeⁿ'e Señor Jesucristo yeⁿ'e yú maaⁿ ní véé 'viich'etíínuuⁿ yeⁿ'é 'nū yeⁿ'ē tanducuéⁿ'ē chi ch'eenú 'nū chii. ⁸Ní snéé 'nū tan'dúúcā chi véé vida ngai yeⁿ'é 'nū ti n'giindiveéⁿ 'nū chí n'daacā n'dai canee nī maaⁿ chi ndís'tií ní yeⁿ'e Señor Jesucristo ndís'tií. ⁹Maaⁿ ní gracias cuuvi nca'á 'nū Ndyuūs Chiida yú cucáávā ndís'tií ní cucáávā chi ndís'tií dííⁿ nī chi yeenu taaví 'nū taachi ngaⁿ'angua'á 'nū caavā ndís'tií ndúúcū Ndyuūs Chiida yú. ¹⁰Ní ngaⁿ'angua'á 'nū ndíí nguuvi ndii n'gaaⁿ chi Ndyuūs dííⁿ yā chi ndaá 'nū naachi snée nī. Níícú cūnnee 'nū ndís'tií níícú cuuvi cu'téenu cá nī yeⁿ'e Señor Jesucristo yeⁿ'e yú.

¹¹Neⁿ'é 'nū chi Ndyuūs Chiida yú ndúúcū Señor Jesucristo yeⁿ'e yú cūnnee yā nús'uu caati cuuvi ndaa 'nū nanááⁿ ndís'tií. ¹²Ní Señor Jesucristo yeⁿ'e yú cūnnee yā ndís'tií caati cuuvi neⁿ'e cá nī nducyáácā 'iiⁿyāⁿ. Ní dineⁿ'e taavi cá nī tan'dúúcā nús'uu neⁿ'e taavi cá 'nū ndís'tií. ¹³Ní Ndyuūs cuuvi cūnnee yā ndís'tií chi 'áámá canéé vaadí neⁿ'e yeⁿ'é yā na staava yeⁿ'é nī. Ní nguéé véé nuuⁿ'ndi yeⁿ'é nī. Ní

canéé dæeve staava yeⁿé nī nanááⁿ
Ndyuūs Chiida yú taachi ndaa
Señor Jesucristo yeⁿé yú ndúúcu
nducyáácá 'iiⁿyāⁿ chi i'téenu yā 'yā.

**Yeⁿé tan'dúúca chi Ndyuūs
neⁿé yā chi 'cuæetinee yú**

4 Maaⁿ ní di'cuíftu ca 'nū ndís'tiī
hermanos yeⁿe yú ní ngiicá
'nū ndís'tiī nanááⁿ Jesucristo chi diíⁿ
nī chuū. Tan'dúúca chi ca'cueéⁿ 'nū
ndís'tiī táacá chi cuuvi n'gæetineeⁿ
nī tan'dúúca Ndyuūs neⁿé yā, 'tíicā
'āā diíⁿ nī. Ní 'tiicá ntúūⁿ diiⁿ cá nī
cueⁿe daāⁿmaⁿ ní ngo'o cá diíⁿ nī.

²Ndís'tiī ní deenú nī tan'dúúca
chí ch'cueeⁿ 'nū nanááⁿ ndís'tiī
caati Ndyuūs dicho'ó yā nús'uu.
³Ní Ndyuūs neⁿé yā chi ndís'tiī
n'gæetinéé n'daacá nī. Ní nducuéⁿ
chi diíⁿ nī, diíⁿ nī ti yeⁿé Ndyuūs
ndís'tiī. Ní nguéé caⁿ'á nī ndúúcu
'iiⁿyāⁿ chi nguéé isaⁿ'a o n'daataá
yeⁿé nī. ⁴Ní ca'áámá ca'aama
ndís'tiī chi saⁿ'ā canee chi déenu
nī tan'dúúca chi cuuvi cuta'á nī
n'daataá yeⁿé nī ní caandavaacú nī.
Ní canee n'daacá nī ndúúcu n'daataá
yeⁿé nī. Ní dinéⁿe nī n'daataá yeⁿé
nī. ⁵Nguéé diiⁿ nī cosa chi nguéé
n'daacā ndúúcu cuerpo yeⁿé tá
tan'dúúca chi diiⁿ tanáⁿ'ā 'iiⁿyāⁿ chi
nguéé yeⁿé ndaata 'iiⁿyāⁿ Israel,
'iiⁿyāⁿ chi nguéé déenu yā Ndyuūs.
⁶Ní mar 'áámá yú chi sáⁿ'ā nguéé
caⁿ'a sa ndúúcu n'daataá chi nguéé
yeⁿe sa o n'daataá nguéé caⁿ'a tá
ndúúcu 'áámá isáⁿ'ā chi nguéé yeⁿe
tá caati Señor Jesucristo yeⁿé yú
ca'á yā 'iiⁿyāⁿ miiⁿ 'áámá castigo
chí ch'æete caavā nuuⁿndi chi 'tíicā
yeⁿé yā. Ní yeⁿé chuū 'āā n'diichi
yú na vida yeⁿe hermanos yeⁿe yú

chi diíⁿ yā 'túúca chi nginnche'í
yā hermano yeⁿé yā. Ní nguéé
n'daacā chuū. ⁷'Tíicā Ndyuūs yaa'ví
yā s'uuúⁿ chi cuuvi yeⁿé yā s'uuúⁿ
cáavā chi diiⁿ yú nducuéⁿé chi
n'daacā nguéé caavā chi diiⁿ yú
cosas chi nguéé n'daacā. ⁸'Tíicā
'iiⁿyāⁿ chi nguéé diíⁿ yā tan'dúúca
chi ngi'cueéⁿ 'nū. Ndís'tiī nguéé
idi'vaachí yā mar 'áámá 'iiⁿyāⁿ.
Dámaāⁿ di'vaachí yā Ndyuūs caati
Ndyuūs téé yā Espiritu N'dai yeⁿé
yā s'uuúⁿ. ⁹Úú nguéé canee chi
dinguúⁿ yeⁿé ndís'tiī tan'dúúca
chi canee chi neⁿé nī nducyaaca
'iiⁿyāⁿ chi yeⁿe Cristo chi hermanos
yeⁿé yú. Deenú chi Ndyuūs maáⁿ
yā ngi'cueéⁿ yā ndís'tiī tan'duucā
chi canee chi dineⁿ'é nī 'áámá nī
ndúúcu taama nī. ¹⁰Cuáácú chi
neⁿ'é nī nducyaaca hermanos yeⁿé
yú chi snéé na yáⁿ'āa Macedonia
naati maaⁿ ní di'cuíftu caⁿ'a 'nū
chi dinéⁿe ca nī hermanos yeⁿe nī.
¹¹Ngíicá 'nū chi ch'æetinéé n'daacá
nī nguaaⁿ nducyaaca nī ndúúcu
vaadí 'diiíⁿ. Ní diíⁿ nī ntiin'nyuⁿ yeⁿé
maáⁿ nī ndúúcu ta'á nī tan'dúúca
chi n'giⁿ'i 'nū ndís'tiī. ¹²Ní diíⁿ nī
'tuucā caati 'iiⁿyāⁿ chi nguæe i'téenu
yā Jesucristo yeⁿe yú cuuvi diíⁿ yā
respetar ndís'tiī ní véé necesidades
yeⁿé nī.

**Yeⁿé chi ndaa Jesucristo
taama vmnéⁿ'æe**

¹³Ndís'tiī hermanos yeⁿé 'nū,
nguéé neⁿ'é 'nū chi nguéé cadífnuuⁿ
nī yeⁿe chi cuchii yeⁿe 'iiⁿyāⁿ chi
n'díí caati nguéé cuuvi ndaachii
nuuⁿ nī tan'dúúca tanáⁿ'ā 'iiⁿyāⁿ chi
nguéé cunee ngiinú yā chí ndaa
Jesucristo taama vmnéⁿ'æe. ¹⁴Ní

'tíicā tan'duucā chi i'teenu yú chí Jesucristo ch'ii yā ní nduuchí yā yeⁿē nguaaⁿ tináⁿā, 'tiicá ntúūⁿ i'teenu yú chí taachi Ndyuūs dicholó yā Jesucristo taama vmnéⁿēe, Cristo miiⁿ ní ndee yā ndúúcu yā nducyaaca 'iiⁿyāⁿ chi 'āā n'díí ní 'āā i'téenu yā Señor Jesucristo yeⁿē yú. ¹⁵Ní cáāvā chuū yaa'ví nū ndís'tiī chuū tan'dúúicā chí Señor chí'cueeⁿ yā nús'uu. S'uuúⁿ chí canduuchi yú ní canee yú na iⁿ'yeeⁿdí' cūū ndíí ndaa Señor yeⁿē yú nguéé candáánaaⁿ yú yeⁿe 'iiⁿyāⁿ chí 'āā n'díí. ¹⁶Caati maaⁿ Señor Jesucristo yeⁿe yú nchééⁿ yā yeⁿē va'ai chēeti nguuvi taachí Ndyuūs ca'á yā orden. Ní ángel chí ch'ēete ca ní caaⁿmáⁿ yā ní dí'cuēecú yā trompeta yeⁿé Ndyuūs. Ní 'iiⁿyāⁿ s'eeⁿ chí 'āā n'díí chí chí'téenu yā Jesucristo taachi 'iiⁿyāⁿ s'eeⁿ snée yā iⁿ'yeeⁿdí' cūū ní snuuⁿ yā maaⁿ yáⁿāā, 'iiⁿyāⁿ s'eeⁿ vmnááⁿ vmnaaⁿ nduuchí yā yeⁿē nguaaⁿ tináⁿā. ¹⁷Tuu'mi ní s'uuúⁿ chí sндуuchi yú chí snee yú na iⁿ'yeeⁿdí' cūū, Cristo mííⁿ cuta'á yā s'uuúⁿ na 'yúúné. Ní ndaa yú na meēⁿ ndúúcu tanáⁿa yā chí 'āā n'díí, ní nducyaaca yú ní dáámá ndaa yú nanááⁿ Jesucristo na 'yúúné. 'Tíicā ní 'áámá cūnee yú ndúúcu Señor yeⁿē yú. ¹⁸Níicú cáāvā chííⁿ chí nca'a ní 'viich'ētíínūⁿ 'áámá ní taama ní ndúúcu nduudu 'cūū.

5 Ndís'tiī hermanos yeⁿé 'nū, nguéé canee chí dinguúⁿ nū yeⁿe ndís'tiī yeⁿe chēē fecha o de'ē tiempo nduuti chí tiempo 'iiche o 'íí'nūⁿ taachi ndaa Señor Jesucristo taama vmnéⁿēe. ²'Āā deenu n'daacá ní chí nguuvi chí ndaa Señor

Jesucristo ní nguuvi chí nguéé du'ū vee deenu. Hora miiⁿ tan'dúúca hora yeⁿe n'gaaⁿ chí ndaa 'áámá duucu chí 'iiⁿyāⁿ nguéé déenu yā. ³Níicú taachi 'tíicā ngaⁿa 'iiⁿyāⁿ: Maaⁿ ní véé vaadi 'diiíⁿ ndúúcu yú ní seguro chí n'daacā canee yú tuu'mi dácanaaⁿ ní ndaa nanááⁿ yeⁿé 'iiⁿyāⁿ s'eeⁿ tiempo chí dí'cuiinú yā 'iiⁿyāⁿ. Ní tiempo miiⁿ ndaa tan'dúúicā chí ndaa vaadi ya'āi ngii yeⁿe 'áámá n'daataa taachi 'cuundiyaāⁿ daiya tá. Ní yeⁿe tiempo miiⁿ 'iiⁿyāⁿ s'eeⁿ ní nguéé cuuvi nánguaⁿai yā yeⁿē. ⁴Naati ndís'tiī hermanos yeⁿé nguéé canee ní tan'duucā chí nguéé deenú ní yeⁿe chuū, ní ndaa tiempo miiⁿ tan'dúúicā tiempo chí ndaa 'áámá chí duucu. ⁵Ní nducyaaca s'uuúⁿ ní yeⁿe deeve s'uuúⁿ ní s'uuúⁿ yeⁿe nguuvi s'uuúⁿ. Nguéé yeⁿe n'gaaⁿ s'uuúⁿ ndíí nguéé yeⁿe na maāiⁿ s'uuúⁿ. ⁶Ní cáāvā chuū nguéé ch'ēetinee yú tan'dúúicā chí 'cuēeti yaadu yú tan'dúúicā tanáⁿā 'iiⁿyāⁿ chí nguēe cūnee ngiinú yā Señor Jesucristo yeⁿe yú naati 'cuēeti nduuchi yú, níicú cadiinuuⁿ yú. ⁷'Iiⁿyāⁿ chí cyaadu ní cyaadú yā n'gaaⁿ. Ní 'iiⁿyāⁿ chí ngii cúú'ví, ní cuuvi cúú'ví yā n'gaaⁿ. ⁸Naati s'uuúⁿ chí yeⁿē nguuvi s'uuúⁿ ní 'cuēetinéé yaaⁿ yú nguuvi chí ndaa Señor yeⁿe yú. Ní diiⁿ yú cuidado s'uuúⁿ chí 'aama canee yú lado yeⁿé Ndyuūs cucáāvā chí i'teenu yú. Ní canee chí neⁿe yú nducyaaca 'iiⁿyāⁿ. Ní diiⁿ yú tan'dúúicā 'áámá soldado dííⁿ yā defender mááⁿ yā ndúúcu armadura yeⁿé yā. Ní canee yú cūnee ngiinú yú nguuvi chí Ndyuūs nadanguáⁿai yā s'uuúⁿ yeⁿe castigo. Ní chuū ní tan'dúúicā 'aama soldado sta'á yā

cachucha yeⁿe cūū yeⁿé yā ní dííⁿ yā defender tiíⁿ yā nduúcū. ⁹Ní Ndyuūs nguéé yaa'ví yā s'uuúⁿ chi cuuvi yeⁿé yā s'uuúⁿ caati téé yā s'uuúⁿ castigo chi díftū naati caati nadanguáⁿai yā s'uuúⁿ yeⁿe castigo cucáávā Señor Jesucristo yeⁿe yú. ¹⁰Nífcú Jesucristo ch'ii yā na cruz cucááva s'uuúⁿ caati maaⁿ ní cuuvi caⁿa yú 'cuuetinée yú nduucú yā taachi ndaa yā 'áará chí n'gëetinée yú na iⁿyeedí cūū o 'áará chí 'āā ch'ii yú. ¹¹Ní cáávā chuū ndís'tií ní nca'á nī 'viich'ëetíínūⁿ ndís'tií ní dí'cuíftū nī 'aamá nī ndúúcū taamá nī tan'dúúcā chi maaⁿ 'āā idiíⁿ nī 'aamá nī ndúúcū taamá nī.

Pablo nca'á yā consejo hermanos chi yeⁿe yāāⁿ Tesalónica

¹²Ní dí'cuiitū nū ndís'tií chi 'caandiveéⁿ nī yeⁿe 'iiⁿyāⁿ chi diíⁿ ntiíⁿnyuⁿ yeⁿé Ndyuūs nguaaⁿ ndís'tií caati 'iiⁿyāⁿ miiⁿ ngaⁿa ntiíⁿnyúⁿ yā ní itée yā consejo ndís'tií. 'Iiⁿyāⁿ s'eeⁿ ní 'iiⁿyāⁿ chi Ndyuūs dich'ó yā nanááⁿ ndís'tií.

¹³Ní canee chi n'giindiveéⁿ nī ní dineⁿe cá nī 'iiⁿyāⁿ s'eeⁿ cucáávā chi dííⁿ yā ntiíⁿnyuⁿ yeⁿé Ndyuūs. Maaⁿ ní 'cuuetinée n'daacá nī 'aamá nī ndúúcū taama nī ndúúcū vaadi 'diiíⁿ.

¹⁴Ní dí'cuiitu cá 'nū ndís'tií hermanos yeⁿe yú chi dííⁿ nī chuū tan'dúúcā chi idinguúⁿ 'nū. Caaⁿmáⁿ nī cuuví nī 'iiⁿyāⁿ chi nguéé neⁿe diíⁿ ntiíⁿnyuⁿ ní cunnee nī 'iiⁿyāⁿ chi 'va'a. Ní ca'á nī 'viich'ëetíínūⁿ yeⁿe 'iiⁿyāⁿ chi duūvá yā. Ní canéé chi véé paciencia yeⁿé nī ndúúcū nducyaaca 'iiⁿyāⁿ.

¹⁵Ní n'diichí nī chi din'daacá nī ndúúcū 'iiⁿyāⁿ chi nguéé din'daacá yā nduucú nī. Naati 'tífcā diíⁿ núⁿú yiiⁿnuⁿ nī chi din'daacá nī 'áamá nī ndúúcū taamá nī ndúúcū nducyaaca 'iiⁿyāⁿ.

¹⁶Nducuéⁿe tiempo ní yeenú nī. ¹⁷Cueⁿe daāⁿmaⁿ ngaⁿ'angua'á nī. ¹⁸Nífcú ca'á nī gracias Ndyuūs caava nducuéⁿe chi cho'ō nuúⁿ nī caati 'tífcā neⁿé Ndyuūs yeⁿe yú chi dííⁿ nī ti maaⁿ ní i'téenu nī Cristo Jesús.

¹⁹Nguee diíⁿ nī chi nguéé n'giindiveéⁿ nī nduudu yeⁿe Espíritu N'dai yeⁿé Ndyuūs. ²⁰Ní nguéé diíⁿ nī despreciar nduudu yeⁿé Ndyuūs chi ngaⁿa 'iiⁿyāⁿ, nduudu chi Espíritu N'dai yeⁿé Ndyuūs ca'a yā 'iiⁿyāⁿ. ²¹N'diichínee nī nducuéⁿe dendu'ū nduuti chi n'daacā o nguéé. Nífcú cuta'á nī yeⁿe nducuéⁿe chi n'daacā ní din'daacá nī. ²²Ní divíi nī yeⁿe nducuéⁿe chi n'diichi nī chi nguéé n'daacā.

²³Ní maaⁿ ní Ndyuūs yeⁿe yú tee yā vaadi 'diiíⁿ s'uuúⁿ ní dideevé n'daacá yā ndís'tií. Ní candée yā cuidado ndís'tií ndúúcū espíritu yeⁿé nī ndúúcū alma yeⁿé nī ndúúcū cuerpo yeⁿé nī ndúúcū nducuéⁿe vida yeⁿé nī. Ní 'ífcú 'iiⁿyāⁿ cuuvi caaⁿmáⁿ yā chi nguée véé mar 'áamá nuuⁿndi yeⁿé nī taachi ndaa Señor Jesucristo yeⁿe yú taama vmnéⁿee na iⁿ'yéedí cūū. ²⁴Nífcú Ndyuūs chi yaa'ví yā ndís'tií chi cuuvi yeⁿé yā ndís'tií dííⁿ yā chi véé confianza yeⁿe yú ndúúcu yā. Ní Cristo miiⁿ ntúúⁿ dííⁿ yā cumplir nducuéⁿe chi ngaⁿa yā chi cuuvi diíⁿ yā.

Pablo ca'a yā saludos 'ii"yāⁿ
 ní ne"é yā chi Ndyuūs ca'a
 yā cosas n'dai ye"é yā

²⁵Ndís'tii hermanos ye"e yú
 nga"angua'a ndís'tiī cáávā nús'uu.

²⁶Caa"má"n nī nducyaaca
 hermanos ye"e yú: N'dai ndís'tiī.
 Ní ituu'ví nī cheendi yā taachi
 dií"n nī saludar hermanos ye"e yú

tan'dúúicā costumbre ye"e yú ti
 ye"e yú Ndyuūs.

²⁷'Úú ndúúicū poder ye"e Señor
 nga"á ngii chi 'cueé"n nī carta 'cūū
 nanáá"n nducyaaca hermanos ye"e
 yú.

²⁸Ne"é chi Señor Jesucristo ye"ē
 yú téé yā ndís'tiī nducue"e cosas
 chí n'daacā taavi ca ye"é yā. 'Tíicā
 cuuvi.

CARTA CUAYIIVI YEⁿE 'IIⁿ'YĀⁿ YEⁿE YĀĀⁿ TESALÓNICA

**Pablo ndúúcū compañeros yeⁿé
yā idinguúⁿ yā carta 'cūū yeⁿe
'iiⁿ'yāⁿ yeⁿe yāāⁿ Tesalónica,
'iiⁿ'yāⁿ chi i'téenu yā Ndyuūs**

1 'Úú Pablo idinguúⁿ carta 'cūū
ndúúcū hermano Silvano
ndúúcū hermano Timoteo. Ní
idinguúⁿ yeⁿe hermanos chi caⁿá
yā na yaācū yeⁿe yāāⁿ Tesalónica.
Ní hermanos ní yeⁿe Ndyuūs Chiida
yú ní yeⁿe Señor Jesucristo yeⁿe
yú. ²Neⁿé chi Ndyuūs Chiida yú
ndúúcū Señor Jesucristo cuuvi téé
yā ndís'tiī cosas chí n'daacā n'dai
yeⁿé yā ndúúcū vaadi 'diiíⁿ yeⁿe yā.

**Ndyuus caⁿá yā diíⁿ yā juzgar 'iiⁿ'yāⁿ
chi véé nuuⁿndi yeⁿé yā taachí
ndaa Cristo taama vmnéⁿéē**

³Ndís'tiī hermanos yeⁿe yú,
cueⁿe daāⁿmaⁿ canéé chi ca'á 'nū
gracias Ndyuūs cucáāvā ndís'tiī
caati n'daacā chi diíⁿ 'nū 'tíicā.
Caati deenú 'nū chi nguuvi nguuvi
ca'áámá ca'áámá ndís'tiī ní i'téenu
ca nī ní neⁿe cá nī nducyaaca nī
'aamá nī ndúúcū taama nī. ⁴Nífcú
taachi ngaⁿá 'nū ngii 'nū hermanos
yeⁿe yú yeⁿe ndís'tiī, tuuⁿmi ngaⁿá
'nū chi yeenu 'nū caati ch'etinéé

n'daacá nī nducyaaca nī chi caⁿá nī
na yaācū yeⁿé Ndyuūs yeⁿe yú, ní
cáāvā chi ndís'tiī ní ch'iⁿí nī ndúúcū
nducuéⁿe chi n'geenú nī ngii ní
ndúúcū cosas chi díftūu chi ch'óōo
yeⁿé nī chi véé paciencia yeⁿé nī.
Ní n'daacā i'teenú nī. ⁵Ní chuū ní
cuaacu ch'iⁿí chi Ndyuūs ní diíⁿ yā
juzgar 'iiⁿ'yāⁿ ndúúcū vaadi cuaacu
caati Ndyuūs diíⁿ yā chi ndís'tiī
ch'iⁿí nī chi n'dai taaví nī chi cuuvi
ndaa nī naachi Ndyuūs ngaⁿa
ntiiⁿnyúⁿ yā. Ní cáāvā chuū chíⁿ
chi ndís'tiī ní n'geenú nī ngii.

⁶Caati n'daacā nduucú Ndyuūs
chi Ndyuūs nadíⁿvē 'iiⁿ'yāⁿ chi idiíⁿ
chí ndís'tiī n'geenú nī ngii ndúúcū
chi 'cuenú yā cuuvi. ⁷Tiempo
taachi Señor Jesucristo miiⁿ ngiicá
yā yeⁿe va'ai ch'etii nguuvi ndúúcū
ángeles yeⁿé yā ndúúcū poder yeⁿe
yā, tuuⁿmi ní 'iiⁿ'yāⁿ s'eeⁿ ndaa yā
ná nguuchi yaⁿā. Ní tiempo miiⁿ
Ndyuūs teé yā ndís'tiī chí 'āā ntéé
'cuenú nī cuuvi. 'Tiicá ntúūⁿ ní
teé ya nús'uu chi 'āā ntéé 'cuenú
'nū cuuvi. ⁸Ní ndaa yā chí ca'a yā
castigo 'iiⁿ'yāⁿ chi nguéé n'diichí
yā Ndyuūs ndúúcū 'iiⁿ'yāⁿ chi nguéé
n'giindiveéⁿ yā nduudu cuaacu yeⁿe
evangelio yeⁿe Señor Jesucristo

yeⁿe yú chi nadanguáⁿai yā 'iiⁿyāⁿ.
⁹Iiⁿyāⁿ s'eeⁿ ní cuuvi yā castigados
 ní cueⁿe daāⁿmaⁿ Ndyuūs di'cuiinú
 yā 'iiⁿyāⁿ s'eeⁿ ní Ndyuūs s'neeⁿ yā
 'iiⁿyāⁿ s'eeⁿ yaⁿai yeⁿé yā. Ní nguéeⁿ
 cuuvi n'diichí yā naaⁿ Ndyuūs. Ndíí
 nguéeⁿ ndúú cuuvi n'diichí yā deeve
 taavi ca yeⁿé yā ndúúcū poder yeⁿé
 yā. ¹⁰Ní tiempo chi ndaa Jesucristo
 miⁿ nducyaaca 'iiⁿyāⁿ chi 'āā
 i'téenu yā Jesucristo ní caⁿa yā
 dich'eté yā Ndyuūs. Ní 'iiⁿyāⁿ s'eeⁿ
 ntúúⁿ caⁿa yā dich'eté yā Ndyuūs
 caati i'téenu nī nduudu cuaacu yeⁿé
 Ndyuūs chi ngaⁿa 'nū nanááⁿ nī. Ní
 'iiⁿyāⁿ s'eeⁿ ngeⁿe yiiⁿnuⁿ yā.

¹¹Ní cáāvā chuū cueⁿe daāⁿmaⁿ
 ngaⁿangua^á 'nū caavā ndís'tií. Ní
 ngiicá 'nū Ndyuūs yeⁿe yú chí diiⁿ
 cuenta yā chi ndís'tií ní n'daacā ti
 yaa'ví yā ndís'tií chi cuuvi yeⁿé yā
 ndís'tií. Ní ngiicá 'nū Ndyuūs chí dííⁿ
 yā ndúúcū ndís'tií ndúúcū poder
 yeⁿé yā chí ndís'tií ní cuuvi dííⁿ nī
 nducuéⁿe chí n'daacā. Ní cuuvi dííⁿ
 nī cumplir ntiiⁿnyuⁿ n'dai chí dííⁿ nī
 cáāvā chí i'téenu nī Jesucristo. ¹²Ní
 'iicu 'iiⁿyāⁿ cuuvi dich'eté yā Señor
 Jesucristo yeⁿe yú cáāvā chíiⁿ chí
 diiⁿ ndís'tií. Ní 'iiⁿyāⁿ s'eeⁿ dich'eté
 yā ndís'tií caati Ndyuūs yeⁿe yú
 ndúúcū Señor Jesucristo nginneé yā
 ndís'tií.

Yeⁿé 'áámá 'iiⁿyāⁿ chí dinuuⁿndi yā

2 Maaⁿ ní hermanos yeⁿe
 di'cuiitú 'nū ndís'tií chí
 cūnee ngiinú nī yeⁿe tiempo chí
 nindaa Señor Jesucristo ní yeⁿe
 taachi nduuvidaama yú ndúúcu yā.
²Di'cuiitú 'nū chí nguéeⁿ na'daaⁿ nī
 chííⁿ chí nadacádíínuuⁿ nī. Nguéeⁿ
 diiⁿ 'va'á nī yeⁿe chí 'iiⁿyāⁿ ngaⁿ'á

yā chí Cristo 'āā ndaa yā taama
 vmnéⁿēe ti ngaⁿ'á yā tan'dúúcā chí
 cáāvā Espíritu N'dai yeⁿé Ndyuūs,
 naati nguéeⁿ 'tíicā. Ndíí nguéeⁿ ndúú
 'va'a nī yeⁿe táámá nduudu chí
 n'giindiveéⁿ nī yeⁿe chuū. Ndíí
 nguéeⁿ ndúú caavā carta chí sta'á
 nī chí tan'dúúcā chí dinguúⁿ 'nū
 yeⁿe nī naati nguéeⁿ 'tíicā. Ní yeⁿe
 nducuéⁿe chuū ní chíiⁿ chí ngaⁿ'á
 chí 'āā ndaa Señor Jesucristo yeⁿe
 yú, nguéeⁿ 'va'á nī. ³Nguéeⁿ ca'á nī
 lugar 'iiⁿyāⁿ chí cuuvi canche'éí
 yā ndís'tií mar 'áámá vmnéⁿēe.
 Vmnaaⁿ chí ndaa tiempo chí cuuvi
 nindaa Jesucristo taama vmnéⁿēe,
 'iiⁿyāⁿ na iⁿ'yeeⁿdí 'cūū canéé chí
 ndaacadaamí yā yeⁿe Señor ní
 canee yā contra yeⁿe Señor. Tuu'mi
 ní ndaa 'áámá Saⁿ'ā Nuunⁿdi,
 saⁿ'ā chí Ndyuūs ngaⁿ'á yā chí 'āā
 condenado sa ní caⁿa sa infierno.
⁴Saⁿ'ā miⁿ ní caaca taaⁿ sa ní
 contra nducuéⁿe chí yeⁿé Ndyuūs
 ndúúcū nducuéⁿe chí 'iiⁿyāⁿ i'téenu
 yā. Saⁿ'ā miⁿ ní dich'etete sa maaⁿ sa
 nguéeⁿ tan'dúúcā tanáⁿ'á 'iiⁿyāⁿ. Ní
 ndaa sa cuaaⁿ chēeti yaacū templo
 yeⁿé Ndyuūs ní 'cuūndí sa. Ní máaⁿ
 sa sta'a sa lugar yeⁿé Ndyuūs. Ní diiⁿ
 sa máaⁿ sa chí cu'téenu 'iiⁿyāⁿ saⁿ'ā.
 Ní diiⁿ sa tan'dúúcā Ndyuūs saⁿ'ā.

⁵¿Áá nguéeⁿ n'gaacú nī ndís'tií
 yeⁿe tiempo chí canéé nduucú nī
 ní caⁿ'á chíi ndís'tií nduudú 'cūū?

⁶Maaⁿ ní 'āā deenú nī de'e idiíiⁿ
 chí 'āā 'cuéeⁿ ndaa saⁿ'ā miⁿ caati
 cuuvi ndaa saⁿ'ā miⁿ taachi ndaa
 tiempo yeⁿe sa chí ndaa sa. ⁷Niicu
 maaⁿ poder yeⁿe nuuⁿndi chí idiíiⁿ
 chí 'iiⁿyāⁿ dinuuⁿndí yā ní 'āā ngii.
 Chííⁿ chí diiⁿ chí Saⁿ'ā Nuunⁿdi
 nguéeⁿ cuuvi 'cuuⁿmiⁿ sa maaⁿ sa

chi Saⁿā Nuuⁿndi. ⁷Tííca rā vaa ndii tiempo chi 'iiⁿyāⁿ chi diiⁿ chi nguéé cuuvi 'cuuⁿmiⁿ Saⁿā Nuuⁿndi, 'iiⁿyāⁿ miiⁿ caⁿá yā tāámá lado. ⁸Tuuⁿmi ní ndaa Saⁿā Nuuⁿndi ní 'iiⁿyāⁿ cuuvi n'diichí yā saⁿā níícu Señor Jesucristo caⁿá yā 'caaⁿnúⁿ yā Saⁿā Nuuⁿndi ndúúcu 'yúúné chi candaā yeⁿe cheendí yā ní di'cuiinú yā Saⁿā Nuuⁿndi miiⁿ ndúúcu deevé yeⁿé yā taachi nndaa yā. ⁹Ní Saⁿā Nuuⁿndi miiⁿ ndaa sa ndúúcu n'dee n'dái poder yeⁿe Satanás chi yááⁿnguiniūⁿ. Ní diiⁿ sa vaadi n'giinu ndúúcu milagros chi nguéé vaadi cuaacu. ¹⁰Ní ndúúcu nducuéⁿé chi nguéé n'daacā idiin sa ntiinⁿnyuⁿ yeⁿé sa ní nginnche'ei sa 'iiⁿyāⁿ caati cuuvi diiⁿ sa ganar 'iiⁿyāⁿ lado yeⁿé yā, 'iiⁿyāⁿ chi caⁿá yā infierno. Ni chó'oo nducuéⁿé chuú caati 'iiⁿyāⁿ nguéé neⁿé yā 'caandiveéⁿ yā nduudu cuaacu yeⁿé Ndyuūs, nduudu chi diiⁿ chi ninguáⁿai yā. ¹¹Níícu cucáávā chi diiⁿ yā 'túúca, Ndyuūs caⁿá yā diiⁿ yā ndúúcu 'iiⁿyāⁿ s'eeⁿ chi cu'téenu yā nduudu yaadi yeⁿe Saⁿā Nuuⁿndi. ¹²Ní nducyáácá 'iiⁿyāⁿ chi nguéé neⁿé yā cu'téenu yā nduudu cuaacu caati neⁿe ca yā cosas chi nguéé n'daacā ní cuuví yā condenado.

Ndyuūs ndeévé yā nducyaaca 'iiⁿyāⁿ chi nadanguáⁿai yā 'iiⁿyāⁿ

¹³Níícu ndís'tii hermanos yeⁿe yú, Señor neⁿé yā ndís'tii. Ní nús'uu ní cuéⁿé daāⁿmaⁿ ca'á nū gracias Ndyuūs cucáávā ndís'tii caati Ndyuūs ndeévé yā ndís'tii vmnááⁿ vmnaaⁿ chi cuuvi nadanguáⁿai yā ndís'tii cucáávā Espíritu N'dai yeⁿé yā. Espíritu N'dai yeⁿé Ndyuūs

miiⁿ ní cuuvi dideeve ndís'tii caati ndís'tii cuuvi cu'téenu nī nduudu cuaacu yeⁿé Ndyuūs. ¹⁴Ní Ndyuūs yaa'ví yā ndís'tii chi cuuvi yeⁿé yā ndís'tii cucáávā nduudu cuaacu yeⁿé yā chi n'giindiveéⁿ nī ní diiⁿ chi cuuví nanguáⁿai nī. Ní nduudu cuaacu miiⁿ nús'uu ngaⁿá 'nū nanááⁿ ndís'tii. Ní Ndyuūs neⁿé yā chi ndís'tii tunéeⁿ nī chi cuuví canee nī tan'dúúca Señor Jesucristo yeⁿe yú.

¹⁵Tííca maaⁿ ní 'cuetinéé n'daacá nī ndúúcu chi i'téenu nī. N'gaacú nī yeⁿe chi ngi'cueéⁿ 'nū ndís'tii taachi sneé 'nū nduucú nī ní yeⁿé chi idinguúⁿ 'nū yeⁿé nī. ¹⁶Maaⁿ Señor Jesucristo yeⁿé yú ndúúcu Ndyuūs Chiida yú dinéⁿé yā s'uuúⁿ caati Ndyuūs ní n'dai taavi. Ní cueⁿe daāⁿmaⁿ itée yā s'uuúⁿ 'viich'etítínūⁿ ní cānee ngiinu yú vaadi n'dai taavi yeⁿé Ndyuūs chi Ndyuūs caⁿa yā chi tée yā s'uuúⁿ. ¹⁷Neⁿé chi Ndyuūs ní tée yā 'viich'etítínūⁿ ndís'tii na staava yeⁿé nī ní tée yā fuerzas n'dís'tii caati ndís'tii ní cuuvi diiⁿ nī nducuéⁿé chi n'daacā ní caaⁿmaⁿ nī dámaaⁿ nduudu chi n'daacā.

Caaⁿmaⁿngua'á nī caavā nús'uu

3 Maaⁿ ní yeⁿe nducuéⁿé, ndís'tii hermanos yeⁿé 'nū caaⁿmaⁿngua'á nī cucáávā nús'uu chi niiⁿnúúⁿ nūⁿ cuuvi candéⁿé 'nū nduudu cuaacu yeⁿé Ndyuūs na núúⁿmaⁿ caaⁿ. Ní 'iiⁿyāⁿ cuuvi cu'téenu yā nduudu cuaacu miiⁿ ní cuuvi diiⁿ yā chiiⁿ chi Ndyuūs neⁿé yā tan'dúúca chi ndís'tii diiⁿ nī. ²Caaⁿmaⁿngua'á nī ntúúⁿ chi cuuví nadanguáⁿai 'nū yeⁿe 'iiⁿyāⁿ chi nguéé n'daacā

idiíⁿ yā chi perverso yā caati nguéé nducyaaca 'iiⁿ'yāⁿ i'téénu yā Señor Jesucristo. ³Naati Señor Jesucristo ní dámaāⁿ n'daacā díⁿ yā ní nducueⁿē tiempo nginneé yā ndís'tií chi 'áámá canee nī ndúúcū chi i'téénu nī. Ní candεε yā cuidado ndís'tií yeⁿe dendu'ū chi nguεε n'daacā. ⁴Ní v'éé 'viich'εεtínūⁿ yeⁿ'é 'nū ndúúcū Señor ndúúcū ndís'tií caati ndís'tií ní idiíⁿ nī nducueⁿē chi caⁿ'a 'nū nduucú nī chi canee chi díⁿ nī ní 'tíicā caⁿ'á nī díⁿ nī. ⁵Neⁿ'é 'nū chi Señor Jesucristo cunneé yā ndís'tií chi cuuvi deenú nī na staava yeⁿ'é nī dε'ε chi vaadī neⁿ'e yeⁿ'é Ndyuūs. Ní cuuví yeⁿ'e nī maāⁿ 'viich'εεtínūⁿ chi yeⁿ'e Cristo. Ní cuuvi cucheé nī yeⁿ'e tanducueⁿē chi cuchii.

Canee chi díiⁿ yú ntiíⁿnyuⁿ

⁶Maaⁿ ní ndís'tií hermanos yeⁿ'e yú, itée 'nū orden ndís'tií ndúúcū chi dúúchí Señor Jesucristo chi divíⁿ nī yeⁿ'e hermanos yeⁿ'e yú chi nguéé neⁿ'é yā díⁿ yā ntiíⁿnyuⁿ ní nguéé díⁿ yā tan'dúúcā chi nús'uu chi'cueéⁿ 'nū 'iiⁿ'yāⁿ. ⁷Ndís'tií ní deenú nī tan'dúúcā chi cánéé chi ch'εεtineé nī. Ní díⁿ nī ntiíⁿnyuⁿ tan'dúúcā chi díⁿ 'nū taachi sneé 'nū ndúúcu nī ní díⁿ 'nū ntiíⁿnyuⁿ. ⁸Ní nguéé sta'á 'nū pan yeⁿ'e mar 'áámá ndís'tií chi nguéé cáⁿ 'nū. Naati 'tíicā díⁿ 'nū. Díⁿ 'nū ntiíⁿnyú ndii nguuvi ndíí n'gaaⁿ chi nguéé di'vaachí 'nū mar 'áámá ndís'tií. ⁹Ní 'áará chí cuuvi ngiicá ndis'tií chi téé nī necesidades yeⁿ'é 'nū nguεε díⁿ 'nū 'tíicā. Idiíⁿ 'nū ntiíⁿnyúⁿ chi neⁿ'é 'nū cu'neéⁿ 'nū cáávā 'áámá ejemplo nanááⁿ ndís'tií caati cuuvi díⁿ nī

tan'dúúcā chi díⁿ 'nū. ¹⁰Ní taachi ch'εεtineé 'nū ndúúcū ndís'tií caⁿ'a 'nū nduucú nī nduudú 'cūū. 'Iiⁿ'yāⁿ chi nguéé neⁿ'é yā díⁿ yā ntiíⁿnyuⁿ nguéé che'é yā. ¹¹Ch'iindiveéⁿ 'nū chi duu'vi 'iiⁿ'yāⁿ chiicá yā nguaaⁿ ndís'tií nguéé chiicá n'daacā yā ti nguéé idiíⁿ yā ntiíⁿnyuⁿ ní neené n'deeé n'dái díⁿ yā cosas chi nguéé dichí'vε. ¹²'Iiⁿ'yāⁿ chi díiⁿ 'tíicā, ca'á 'nū orden ní di'cuútu 'nū 'iiⁿ'yāⁿ ndúúcū chi duuchi Señor Jesucristo yeⁿ'e yú chi díⁿ yā ntiíⁿnyuⁿ ndúúcū vaadī yeenú. Níicú díⁿ yā ganar cáávā gastos yeⁿ'é yā.

¹³Ndís'tií hermanos yeⁿ'é 'nū nguéé cánéé chi cuuvi 'daan'dí nī chi díⁿ nī dendu'ū chi n'daacā. ¹⁴Ndúútí chi 'áámá 'iiⁿ'yāⁿ nguéé cu'neeⁿveéⁿ yā nduudu chí idinguúⁿ 'nū na carta 'cūū, n'diichí nī du'u chi 'iiⁿ'yāⁿ miiⁿ ní nguéé díⁿ nī dε'ε vεε ndúúcu yā. 'Tíicā ní cuuvi 'cuináaⁿ yā. ¹⁵Ní nguéé díⁿ nī ndúúcu yā tan'dúúcā chi contra yeⁿ'é nī naati ca'á nī consejo 'iiⁿ'yāⁿ miiⁿ tan'dúúcā chi 'díínu nī 'iiⁿ'yāⁿ.

Yeⁿ'e vaadī n'dai yeⁿ'é Ndyuūs

¹⁶Neⁿ'é chi maaⁿ Señor Jesucristo chi vεε vaadī 'diiíⁿ yeⁿ'é yā cueⁿ'e daāⁿmaⁿ itée yā ndís'tií vaadī 'diiíⁿ nducueⁿē tiempo ní nducueⁿē cuaaⁿ. Señor miiⁿ ní cunéé yā ndúúcū nducyaaca ndís'tií.

¹⁷'Ú Pablo idinguúⁿ nduudu 'cūū yeⁿ'e carta 'cūū ndúúcū ta'á ní canéé letra yeⁿ'é. 'Tíicā dinguúⁿ ní 'tíicā díⁿ firmar nducueⁿē cartas yeⁿ'é. ¹⁸Neⁿ'é chi Señor Jesucristo yeⁿ'e yú téé yā nducyáacá ndís'tií nducueⁿē vaadī n'dai yeⁿ'é yā. 'Tíicā cuuvi.

CARTA VMNÁÁⁿ VMNAAⁿ YEⁿE SAⁿĀ TIMOTEO

1 'Úú Pablo 'úú. Ní 'úú apóstol yeⁿe Señor Jesucristo caati Ndyuūs ndúúcū Señor Jesucristo dichó'o yā 'úú. Ní snéé ngiinu yú 'iiⁿyāⁿ miiⁿ yeⁿe yú chi nadanguáⁿai yā s'uuúⁿ. ²'Úú ngiicá compañero yeⁿé chi idingúuⁿ yā carta 'cūū yeⁿe dii Timoteo chi saⁿā chi cuaacu níⁿnyúⁿ i'téenu sa Señor Jesucristo yeⁿé yú. Ní alumno yeⁿé. Ní tan'dúúcā chi daiyá 'tíicā di. Neⁿé chi Ndyuūs chiida yú ndúúcū Señor Jesucristo yeⁿé yú tée yā dii vaadi n'dai yeⁿé yā ndúúcū vaadi ya'ai 'iinú yeⁿé yā. Ní tée yā dii vaadi 'diiⁿ yeⁿé yā.

**Ngaⁿá yā yeⁿe 'iiⁿyāⁿ chi
nguée n'daācā ngi'cueeⁿ yā**

³Dii, Timoteo, 'úú neⁿé chi cūnee di yāāⁿ Efesio tan'dúúcā chi 'āā yaa'ví dii taachi cueⁿé yāⁿāa Macedonia ti véé 'iiⁿyāⁿ chi chi'cueeⁿ doctrina chi n'dááⁿ. Yaa'vi di 'iiⁿyāⁿ s'eeⁿ chi nguée ngi'cueeⁿ doctrina chi n'dááⁿ. ⁴Ní yaa'vi di 'iiⁿyāⁿ yeⁿe yāāⁿ miiⁿ chi nguée 'caandiveéⁿ yā yeⁿe cuentos yeⁿé yā chi falsos. Ndíí nguée ndúú 'caandiveéⁿ yā nduudu chi chi'cueeⁿ 'iiⁿyāⁿ ndiicúū. Nduudu

miiⁿ ní nguée dichí'vē. Dámaāⁿ diiiⁿ chi 'iiⁿyāⁿ ch'εecu cheendí yā ní nguée nginnee 'iiⁿyāⁿ tan'dúúcā chi Ndyuūs neⁿé yā. Caati Ndyuūs dichó'o yā orden chi 'iiⁿyāⁿ ngi'cueeⁿ yā cáāvā chi tanáⁿā 'iiⁿyāⁿ cuuvi cu'téenu cá yā Ndyuūs.

⁵Ní ngaⁿa yú tan'dúúcā Ndyuūs neⁿé yā taachi ngi'cueeⁿ yú ndúúcū vaadi neⁿe chí ngíicá ná staava yeⁿé yú chi Ndyuūs 'āā didεévē yā. Tanducueⁿé ní diiⁿ yú ndúúcū vaanicadínnuⁿ yeⁿe yú chi ndεεε. Ní i'teenu yú Ndyuūs ndúúcū núúⁿmáⁿ staava yeⁿé yú. ⁶Naⁿa 'iiⁿyāⁿ ndaacadaamí yā yeⁿé nduudu yeⁿé Ndyuūs ní ngiindiveéⁿ yā nduudu chi nguée dichí'vē. Ní n'gεecu cheendí yā. Ní cuuvi ndái yā. ⁷'Iiⁿyāⁿ s'eeⁿ ní neⁿé yā ca'cueeⁿ yā ley yeⁿé Ndyuūs naati nguée tuumicadínnuⁿ yā nduudu chi ngaⁿa yā, ndíí nguée ndúú nduudu chi ca'cueeⁿ yā 'áará chí díⁿ yā tan'dúúcā chi déenu yā tanducueⁿé. ⁸S'uuúⁿ ní deenu yú chi ley yeⁿe Moisés ní n'dai ndúúti chi cu'téenu n'daāca yú yeⁿé. ⁹Deenu yú chi ley miiⁿ nguée dámaāⁿ caavā 'iiⁿyāⁿ chi din'daacá yā naati caavā 'iiⁿyāⁿ chi nguée diiⁿ yā tan'dúúcā

chí ngaⁿā ley, caavā 'iiⁿyāⁿ chí nguéeⁿ n'giindiveéⁿ yā chíiⁿ chí ngaⁿā ley, níicú caavā 'iiⁿyāⁿ chí nguéeⁿ n'daacā, caavā 'iiⁿyāⁿ chí idinuuⁿndi, caavā 'iiⁿyāⁿ chí nguéeⁿ díiⁿ yā respetar Ndyuūs ndíi nguéeⁿ díiⁿ yā respetar religión, ní caavā 'iiⁿyāⁿ chí n'giiⁿnúⁿ yā chēecú yā o chíidá yā, ní cáávā 'iiⁿyāⁿ chí n'giiⁿnúⁿ yā 'iiⁿyāⁿ. ¹⁰Ley miiⁿ ní caavā saⁿā chí caⁿa sa ndúúcu n'daataá o n'daataá chí caⁿa tá ndúúcu saⁿā ní nguéeⁿ yeⁿe yā viⁱ ní cáávā saⁿā chí caⁿa sa ndúúcu saⁿa chí duuchineeⁿ sa ndúúcu sa chí viⁱ, ní cáávā 'iiⁿyāⁿ chí duucú yā 'iiⁿyāⁿ caati cuuvi dichíiⁿve yā táámá 'iiⁿyāⁿ ní cáávā 'iiⁿyāⁿ chí indeē ndúúdu yaadi, ní caavā 'iiⁿyāⁿ chí ngaⁿa yā chí cuaacu chíiⁿ chí ngaⁿa yā ní n'gai yā: “Por Dios”, chí 'tíicā, ní nguéeⁿ 'tíicā. Ní ley miiⁿ ní caavā 'iiⁿyāⁿ chí ngi'cueéⁿ yā nducueⁿē chí nguéeⁿ n'daacā ní nguéeⁿ tan'dúúca Ndyuūs chí'cueeⁿ yā 'iiⁿyāⁿ. ¹¹Naati chuū chí ngi'cueeⁿ chí nduudu n'dai yeⁿe evangelio ní n'dēēve n'dai chí nanguaⁿāi 'iiⁿyāⁿ, ní yeⁿé Ndyuūs chí n'dai taavi. Ní Ndyuūs dichí'ó yā 'úú chí caaⁿmáⁿ nduudu miiⁿ.

**Caaⁿmaⁿ yú, gracias Ndyuūs
ti ya'ai 'iinú yā s'uuúⁿ**

¹²Úú ní caⁿá gracias Señor Jesucristo yeⁿē yú chí itée yā fuerzas 'úú chí díiⁿ ntiⁿnyuⁿ yeⁿé yā. Ní s'neéⁿ yā 'úú tan'dúúca 'áámá 'iiⁿyāⁿ chí véé valor yeⁿé yā. Ní s'neéⁿ yā 'úú na ntiⁿnyuⁿ yeⁿé yā. ¹³Ní vmnááⁿ vmnaaⁿ chí Jesucristo yaa'ví yā 'úú chí cuuvi yeⁿé yā, 'úú ní neené caaⁿmaⁿ taáⁿ yeⁿe Jesucristo ní cachiicá can'dáá 'iiⁿyāⁿ

chí i'téenu yā Jesucristo ti neⁿé i'nuuⁿ cá'ai 'iiⁿyāⁿ. Ní caneeⁿ taaⁿ contra Jesucristo. Naati Ndyuūs ya'ai 'iinú yā 'úú 'áará chí díiⁿ 'túúca taachi 'áá cuéeⁿ cu'teenú 'iiⁿyāⁿ, ní nguéeⁿ deenú de'ē cáávā chí díiⁿ 'tíicā. ¹⁴Ní Señor díiⁿ n'dai cá yā nduucú, ní 'úú i'teenú Jesucristo, ní neⁿé Jesucristo caati maaⁿ ní 'úú ní yeⁿé Jesucristo 'úú.

¹⁵Ní nduudu 'cūū ní nduudu cuaacu chí Cristo Jesús ndaá yā i'nyééⁿdi 'cūū chí nadanguáⁿai yā nducyaaca 'iiⁿyāⁿ caati idinuuⁿndí yā, ní n'dái taavi chí nducyaaca 'iiⁿyāⁿ cu'téenu yā nduudú 'cūū. Ní deenú chí 'úú ní ch'ēete cá nuuⁿndi yeⁿé nguéeⁿ ti tanáⁿa yā. ¹⁶Naati cucáávā chí véé nuuⁿndi yeⁿe 'úú Ndyuūs ya'ai 'iinú yā 'úú caati Señor Jesucristo chí'iⁿí yā 'úú tanducueⁿē vaadi n'dái taavi yeⁿé yā, 'úú chí ch'ēete cá nuuⁿndi yeⁿé. 'Tíicā ní Ndyuūs véé paciencia yeⁿé yā nduucú vmnááⁿ vmnaaⁿ ní s'neéⁿ yā 'úú chí 'úú tan'dúúca 'áámá ejemplo yeⁿe tanáⁿā 'iiⁿyāⁿ chí cuayiivi caⁿá yā cu'téenu yā Cristo ní véé vida cueⁿe daāⁿmaⁿ yeⁿe yā. ¹⁷Cáávā nducueⁿē chuū cueⁿe daāⁿmaⁿ ca'a yú Ndyuūs honra ní dich'ēete ca yú Ndyuūs chí rey chí 'áámá canee cueⁿe daāⁿmaⁿ ní nguéeⁿ n'gii yā. Ní maaⁿ ní nguéeⁿ cuuvi snaaⁿ yú Ndyuūs chí 'áámá n'dyáⁿā Dendyuūs yeⁿe yú. 'Tíicā rā vaa.

¹⁸Maaⁿ ní, díi Timoteo chí tan'dúúca daiyá, i'neéⁿ encargo 'cūū ndúúcu díi. Ní encargo 'cūū chíiⁿ chí tiempo chí 'áá chó'óo 'iiⁿyāⁿ profetas caⁿa yā yeⁿē di yeⁿē chí caⁿá di díiⁿ di. Maaⁿ ní cuchééⁿ di yeⁿē tanducueⁿē ní díiⁿ di tan'dúúca

chi diiⁿ 'áámá soldado chi nguⁿu n'daacā sa. 'Tíicā diiⁿ di tan'dúucā chi profetas caⁿa yā yeⁿ'ē di tiempo chi 'āā ch'ó'oo. ¹⁹Dii ní cu'téenu n'daacā di ní diiⁿ n'daacā di ndúucū vaanicadínūuⁿ yeⁿ'ē di chí n'dai. Náⁿ'ā 'iiⁿ'yāⁿ ni nguéé diiⁿ n'daacā yā caati vaanicadínūuⁿ yeⁿ'é yā ní nguéé n'dai. Ní cáāvā chuū nguéé i'téenu yā Señor Jesucristo maaⁿ ní canéé yā tan'dúucā chi yaⁿ'ai yeⁿ'e Ndyuūs. ²⁰Túucā ch'ó'oo yeⁿ'e saⁿ'ā Himeneo ndúucū saⁿ'ā Alejandro ní 'úú deenú chí canéé yā a cuenta yeⁿ'e yáá'n'guiniūuⁿ maaⁿ. Ní 'íicú cuuvi deenú yā chi 'āā ntéé cuuvi caaⁿ'máⁿ yā ní nguéé diiⁿ yā ofender Ndyuūs yeⁿ'e yú.

Yeⁿ'e chí cuuvi caaⁿ'maⁿ'ngua'a yú

2 Vmnaáⁿ vmnaaⁿ ngiicá dii Timoteo chi caaⁿ'maⁿ'ngua'a di cáāvā nducyáácá 'iiⁿ'yāⁿ ní ca'a di gracias Ndyuūs cáāvā nducyáácá 'iiⁿ'yāⁿ. ²Ní canee cuuⁿ'miⁿ chi caaⁿ'maⁿ'ngua'a di cáāvā saⁿ'ā reyes níicú cáāvā nducyáácá 'iiⁿ'yāⁿ 'iiⁿ'ntyéⁿ'ē caati cuuvi 'cuæetinee yú n'daacā ní nguéé ndúucū vaadi 'caa'va ti 'cuæetinee yú ndúucū vaadi 'diiⁿ. Ní diiⁿ yú tanducuéⁿ'ē tan'dúucā chi Ndyuūs neⁿ'é yā chi diiⁿ yú. Ní 'cuæetinée yú n'daacā yeⁿ'e nducuéⁿ'ē ndúucū 'iiⁿ'yāⁿ. ³Ti chuū ní n'daacā nanááⁿ Ndyuūs ní inéé yiinūu taaví yā taachí diiⁿ yú 'tíicā. Ndyuūs yeⁿ'ē yú nadanguáⁿ'ai yā s'uuúⁿ. ⁴Ní neⁿ'é yā chi nducyaaca 'iiⁿ'yāⁿ ninguaⁿ'ai yā ní tuumicadínūuⁿ yā chéé chí nduudu cuaacu yeⁿ'é Ndyuūs. ⁵Deenu yú chi véé 'áámá Ndyuūs. Ní véé 'áámá 'iiⁿ'yāⁿ chi caaⁿ'máⁿ yā na lugar

yeⁿ'ē yú nanááⁿ Ndyuūs. Ní 'iiⁿ'yāⁿ miⁿ ní Saⁿ'ā chi Daiyá yā chi Señor Jesucristo yeⁿ'ē yú. ⁶Ní Jesucristo ca'á yā vida yeⁿ'e maáⁿ yā chi ch'ii yā cáāvā chi nadí'Ve yā nuuⁿ'ndi yeⁿ'ē nducyáácá 'iiⁿ'yāⁿ ní 'iiⁿ'cu cuuvi nadinguáⁿ'ai yā nducyaaca 'iiⁿ'yāⁿ. Chuū ní Cristo diiⁿ yā tiempo chi n'daacā 'íicú 'cuuⁿ'miⁿ yā chi Ndyuūs neⁿ'é yā chi nducyaaca 'iiⁿ'yāⁿ cuuvi ninguaⁿ'āi. ⁷Ní cáāvā chuū Ndyuūs dich'ó'oo yā 'úú chi 'úú cuuvi apóstol yeⁿ'é yā. Ní 'úú ca'cueéⁿ 'iiⁿ'yāⁿ nduudu cuaacu yeⁿ'é Ndyuūs nanááⁿ 'iiⁿ'yāⁿ gentiles chi nguéé yeⁿ'ē ndaata 'iiⁿ'yāⁿ Israel. 'Úú ngaⁿ'á nduudu cuaacu yeⁿ'é Ndyuūs ní 'íicú 'iiⁿ'yāⁿ cuuvi cu'téenu yā. Nguéé ngaⁿ'á nduudu yaadi.

⁸Neⁿ'é chi ndii nducuéⁿ'ē cuaaⁿ nducyáácá 'iiⁿ'yāⁿ cááⁿ'máⁿ'ngua'a yā ndúucū nuuⁿ'maⁿ staava yeⁿ'é yā chi dæeve. Ní nguéé nduuvi taáⁿ yā, ndíí nguéé ndúú 'cuuⁿ'maⁿ yā. ⁹Ní 'tiicá ntúūⁿ n'daataá canéé chí cunúu yā catecai yā chi n'daacā chi nguéé yaⁿ'āi ca chii'Ve ní nguéé neenē n'dæeveé. Ní nguéé canéé chí dich'æete yā maáⁿ yā. Ní nguéé diiⁿ yā 'aama peinada tíiⁿ yā chi nguéé n'daacā. Ní nguéé snuuⁿ yā vmnaaⁿ cuerpo yeⁿ'é yā ndee n'dái 'díí'nguāaⁿ ndíí nguéé ndúú perlas. Ní nguéé cunúuⁿ yā tiinūuⁿ chi yaⁿ'ai chí'vē. ¹⁰Naati n'daata s'eeⁿ canee chi din'daaca yā nanááⁿ 'iiⁿ'yāⁿ tan'dúucā chi Ndyuūs neⁿ'e yā ní tan'dúucā chi canee chi diiⁿ nducyaaca n'daataá chi cuaacu chi i'téenu yā iivú Ndyuūs. ¹¹Ní n'daataá s'eeⁿ canee chi n'geeⁿ yā chííⁿ chi n'giindiveeⁿ yā ní cuneé yā chi ndiicúuⁿ yā. ¹²Nguéé neⁿ'é

chi n'daataá ca'cueeⁿ yā saⁿā cheeti yaacū ní nguéeⁿ cunee yā lado yeⁿe 'iiⁿntyéⁿē chi caaⁿmaⁿ ntiⁿnyuⁿ yā yeⁿe saⁿā. Ní nguéeⁿ canée chi caaⁿmaⁿ n'daataá s'eeⁿ cheeti yaacū. ¹³Caati Ndyuūs vmnāáⁿ vmnaaⁿ din'dái yā saⁿā Adán ní cuayiivi miiⁿ ní din'dái yā n'daataá Eva. ¹⁴Ní yááⁿn'giinūⁿ nguéeⁿ chinnche'ei sa Adán miiⁿ naati chinnche'ei sa n'daataá Eva miiⁿ ní dinuuⁿndi tá. ¹⁵De'ē chúucā n'dai 'áámá n'daataá chi véé daiyá tá. Cuuvi nguáⁿai tá nduuti chi 'áámá cunee tá ndúucū chi i'teenu tá, ní nduuti chi dinéⁿe tá nducyaaca 'iiⁿyāⁿ. Ní ch'iⁿi tá chi yeⁿe Ndyuūs, ní diiⁿ ta cosas chi seria.

**Yeⁿe tan'dúucā chi canee
chi diiⁿ saⁿā chi obispo**

3 Chuū chi ngaⁿá maaⁿ ní cuaacu. 'Āā du'ú nūⁿ saⁿā chi neⁿe sa cuuvi sa obispo ní cundee sa cuidado yeⁿe 'iiⁿyāⁿ yeⁿe yaacū canee sa chi diiⁿ sa ntiⁿnyuⁿ chí n'daacā. ²Ní cáávā chuū saⁿā chí diiⁿ sa ntiⁿnyuⁿ yeⁿe obispo canee chi 'cuetinee sa n'daacā caati 'iiⁿyāⁿ s'eeⁿ nguéeⁿ cuuvi caaⁿmáⁿ yā chi véé nuuⁿndi yeⁿé yā. Ní saⁿā miiⁿ, sáⁿā chi 'áámá nūⁿ n'daataá yeⁿé sa. Ní saⁿā miiⁿ canée cuuⁿmiⁿ chi serio sa ní diiⁿ sa cueⁿe daāⁿmaⁿ ntiⁿnyuⁿ chi n'daacā ndúucū orden. Saⁿā miiⁿ canee chi 'cuaaⁿ sa na vaacu sa 'iiⁿyāⁿ chi canúⁿyáⁿ yúyúní. Ní canee chi ca'cueeⁿ sa n'dai. ³Saⁿā miiⁿ nguéeⁿ cuuvi 'cúú'ví sá ní nguéeⁿ in'nuuⁿ sa vaadi 'caa'va chi 'caa'va sa. Ndí nguéeⁿ ndúú neⁿe sa diiⁿ sa ganar tuūmí manera chi nguéeⁿ n'daacā cáávā vicio yeⁿe sa. Sáⁿā

obispo miiⁿ canee chi diiⁿ sa 'tíicā. Canee chi manso sa ní nguéeⁿ neⁿe sa 'cuuⁿmaⁿ sa ndúucū 'iiⁿyāⁿ, ndí nguéeⁿ ndee sa 'aama vicio yeⁿe tuūmí. ⁴Saⁿā miiⁿ canee chi ngaⁿā ntiⁿnyuⁿ sa chi n'daacā na vaacu sa ní diiⁿ sa chi daiya sa 'caandiveeⁿ yā yeⁿe sa ní daiya sa díⁿ yā respetar chiidá yā. ⁵Ní ndúúti chi 'áámá saⁿā nguéeⁿ déenu sa caaⁿmaⁿ ntiⁿnyuⁿ sa na vaacu sa tuuⁿmi ní 'táácā cuuvi diiⁿ sa cuidado yeⁿe dendu'ū chi yeⁿe yáacū yeⁿé Ndyuūs? ⁶Saⁿā obispo miiⁿ nguéeⁿ canee sa tan'dúucā 'áámá saⁿā chi caama i'téenu sa Jesucristo caati cuuvi nacádiínuuⁿ sa chi ch'εete maaⁿ sa ti nguéeⁿ dinuuⁿdi sa tan'dúucā chi diiⁿ yááⁿn'giuinūⁿ. ⁷Ní saⁿā obispo miiⁿ canee ntúūⁿ chi din'daacā sa nanááⁿ 'iiⁿyāⁿ chi nguεe i'téenu yā Señor Jesucristo yeⁿe yú caati 'iiⁿyāⁿ s'eeⁿ díⁿ yā honrar saⁿā miiⁿ. Ní 'íicú saⁿā obispo miiⁿ nguéeⁿ cúúví cunee sa ndúucū vaadi 'cuiinuú chi ca'a sa lugar chi nginnche'ei yááⁿn'giuinūⁿ saⁿā miiⁿ.

**Yeⁿe chi canée chi diiⁿ
saⁿā chi diáconos**

⁸Maaⁿ ní ngaⁿá yeⁿe saⁿā diáconos chi cūnnee sa ndúucū ntiⁿnyuⁿ yeⁿe yáacū. 'Tiicá ntúūⁿ saⁿa sa diáconos canee chí diiⁿ sa ntiⁿnyuⁿ chi n'daacā ndúucū orden. Ní canée cuuⁿmiⁿ chi saⁿā serio sa. Ní canée chí diiⁿ sa cumplir chiiⁿ chi ngaⁿā sa. Saⁿā miiⁿ ní nguéeⁿ cuuvi 'cúú'ví sá. Ndí nguéeⁿ ndúú neⁿe sa diiⁿ sa ganar tuūmí manera chi nguéeⁿ n'daacā cáávā vicio yeⁿe sa. ⁹Saⁿā diácono canée chí deenu sa n'daacā n'dai nducuéⁿē

enseñanza yeⁿē chi i'teenu sa yeⁿe chi Ndyuūs chi'cueéⁿ yā s'uuúⁿ. Ní canee sa ndúúcu vaanicadínūⁿ yeⁿē sa chi deeve. ¹⁰Saⁿā diácono ní saⁿā chi 'iiⁿyāⁿ 'āā n'diichí yā chi n'daacā chi diiⁿ sa. Ní nduuti chi nguéeⁿ véé falta yeⁿē sa tuu'mi ní cuuvi diiⁿ sa ntiiⁿnyuⁿ yeⁿe saⁿā diáconos. ¹¹Níicú 'tiicá ntúūⁿ n'daataá yeⁿe saⁿā diácono canee chi táⁿā seria ta ní din'daacā tá. Nguéeⁿ canee chi caaⁿmaⁿ tá yeⁿe 'iiⁿyāⁿ. Ní canee chi din'dáacaā tá yeⁿe tanducuéⁿē chi diiⁿ tá. ¹²Níicú saⁿā diácono miiⁿ ní saⁿā chi 'áámá nūⁿ n'daataá yeⁿē sa. Ní canee chi ngaⁿā ntiiⁿnyuⁿ sá chi n'daacā na vaacu sa ní diiⁿ sa chi daiya sa n'giindiveéⁿ yā yeⁿē sa. ¹³Caati saⁿā miiⁿ chi diiⁿ n'daacā ntiiⁿnyuⁿ yeⁿe diácono, saⁿā miiⁿ diiⁿ sa ganar lugar yeⁿe 'iiⁿyāⁿ chi honrado yā. Ní véé cá confianza yeⁿē sa chi cuuvi caaⁿmaⁿ sa yeⁿe Señor Jesucristo tan'dúúca chi i'téenu sa yeⁿē nduudu yeⁿé yā.

Yeⁿe chi 'iiⁿyāⁿ nguéeⁿ deenú yā chi yeⁿe Ndyuūs

¹⁴Cunee ngiinú chi ndaa nuúⁿ n'diichí dii naati maaⁿ ní chuū idinguúⁿ yeⁿē di. ¹⁵Ní nduuti chi nguéeⁿ ndaa nuúⁿ tuu'mi cuuvi tuumicádínūⁿ di táácā chi cuuvi 'cuεetinée 'iiⁿyāⁿ s'eeⁿ taachi i'téenu yā ní yeⁿé Ndyuūs 'iiⁿyāⁿ s'eeⁿ. Caati nducyaaca s'uuúⁿ chi i'teenu yú Señor Jesucristo ní yeⁿé Ndyuūs s'uuúⁿ. Ní s'uuúⁿ ní yáacū yeⁿe Ndyuūs chi canduuchi, 'tíicā s'uuúⁿ. Ní s'uuúⁿ tan'dúúca cimientu ndúúcu pilar yeⁿe yáacū, 'tíicā s'uuúⁿ ti ngaⁿa yú nduudu cuaacu

yeⁿé Ndyuūs nanááⁿ nducyáácá 'iiⁿyāⁿ. ¹⁶Níicú mar 'áámá 'iiⁿyāⁿ nguéeⁿ cuuvi caaⁿmaⁿ yā yeⁿe enseñanzas yeⁿé Ndyuūs yeⁿē yú chi nguéeⁿ ch'εete taavi ca, enseñanzas chi Ndyuūs chi'cueéⁿ yā s'uuúⁿ:

Ndyuūs yeⁿe yú ndaá yā na iⁿyeeⁿdi 'cūū ndúúcu cuerpo tan'dúúca s'uuúⁿ. Ní chiⁿi Espiritu N'dai yeⁿé Ndyuūs chi Cristo ní cuaacu yā. Ní ángeles yeⁿē va'ai chεeti nguuvi n'diichí yā Cristo. Ní 'iiⁿyāⁿ candéé yā nduudu cuaacu yeⁿé Cristo nanááⁿ 'iiⁿyāⁿ yeⁿe tanducuéⁿē país yeⁿē iⁿyeeⁿdí 'cūū. Ní 'iiⁿyāⁿ yeⁿe tanducuéⁿē cuaaⁿ yeⁿe iⁿyeeⁿdí 'cūū ní chi'téenu yā Cristo. Ní Cristo cunaⁿa ntuúⁿ yā na va'ai chεeti nguuvi.

Yeⁿe 'iiⁿyāⁿ chi nguéeⁿ 'áámá cunee yā ndúúcu chi i'téenu yā

4 Espiritu N'dai yeⁿé Ndyuūs ngaⁿa cuaacu yeⁿē nguuvi chi cuchii taachi ngaⁿa chí naⁿa 'iiⁿyāⁿ caⁿa yā ndaacadaamí yā yeⁿē nduudu cuaacu ní cu'neeⁿveéⁿ yā nduudu yeⁿe espíritus chi nginnche'ei 'iiⁿyāⁿ, espíritus chi ngi'cueeⁿ cosas chi nguéeⁿ cuaacu. Ní yááⁿnguiniūⁿ dich'ó sa espíritus. ²Ní 'iiⁿyāⁿ s'eeⁿ 'caandiveéⁿ yā nduudu yeⁿe 'iiⁿyāⁿ chi ngaⁿá yā chi i'téenu yā Ndyuūs yeⁿē yú, ní nguéeⁿ cuaacu. Ní caⁿá yā n'giindiveéⁿ yā nduudu yeⁿe 'iiⁿyāⁿ chi ngaⁿa nduudu yaadi. Níicú 'iiⁿyāⁿ chi nguεε n'daacā idifⁿ yā canee yā ndúúcu vaanicadínūⁿ yeⁿé yā chi nguéeⁿ n'daacā. Ní nguéeⁿ

ya'ái yā yeⁿe chi diíⁿ yā taachi diíⁿ yā cosas chi nguéeⁿ n'daacā. ³Iiⁿyāⁿ s'eeⁿ nguéeⁿ n'guuⁿ yā chi ch'iindivaacu 'iiⁿyāⁿ. Ní nguéeⁿ n'guuⁿ yā chi nge'e 'iiⁿyāⁿ tanducuéⁿe chi nge'e yú. Deenu yú chi Ndyuūs din'dái yā tanducuéⁿe chi nge'e yú. Cáávā chi nducyáácá 'iiⁿyāⁿ chi i'téenu yā Ndyuūs ndúucū 'iiⁿyāⁿ chi deenú yā nduudu cuaacu yeⁿe yā cuuvi che'é yā tanducuéⁿe. Ní nducyaaca 'iiⁿyāⁿ chi che'é yā canee chi caaⁿmáⁿ yā gracias Ndyuūs cáávā chí che'e yā. ⁴Deenu yú chi nducuéⁿe chi din'dái Ndyuūs chi che'e yú ní n'daacā. Ní 'iiⁿyāⁿ nguéeⁿ canee chi cu'neeⁿ yā 'áámá lado mar 'áámá caati canéé chi cuta'á yā ní caaⁿmáⁿ yā gracias Ndyuūs. ⁵Caati tanducuéⁿe dendu'ú 'cūū ní n'daacā ní 'iiⁿyāⁿ cuuvi che'é yā chuū ti Dendyuūs ngaⁿá yā 'tíicā yeⁿe na libro yeⁿe yā. Maaⁿ ní ngiica yú Ndyuūs chi Ndyuūs diíⁿ yā bendecir chuū chi che'e yú.

'Iiⁿyāⁿ idiiⁿ ntiiⁿnyuⁿ yā chí n'dai yeⁿe Jesucristo

⁶Nduuti chi dii, Timoteo, ca'cueeⁿ dí dendu'ú 'cūū nanááⁿ 'iiⁿyāⁿ chi i'téenu Señor Jesucristo tuu'mi ní dichí'vē ca di Señor Jesucristo. Ní taachi ca'cueeⁿ di nduudu n'dái 'cūū yeⁿe Jesucristo ní 'cuætimee di tan'dúucā chi ngaⁿa nduudú 'cūū tuu'mi ní idiiⁿ di chi dii maaⁿ di chi n'giindiveeⁿ di nduudu yeⁿe di ní cu'téenu ca di yeⁿe Ndyuūs. ⁷Nguéeⁿ cu'neeⁿveeⁿ di yeⁿe cuentos zonzos chi yeⁿe íⁿyeeⁿdí, cuentos chi nguéeⁿ ngíicá yeⁿe Ndyuūs caati nguéeⁿ dichí'vē chi caaⁿmaⁿ yú chuū nanááⁿ 'iiⁿyāⁿ. Ní tanducuéⁿe

chi diiⁿ di, cueⁿe daāⁿmaⁿ diiⁿ di tan'dúucā Ndyuūs neⁿe yā chi diiⁿ di. ⁸Deenu yú chi taachi diiⁿ yú ejercicios cáávā cuerpo yeⁿe yú taaⁿ 'lííⁿ chuundi dichí'vē s'uuúⁿ. Níicú taachí diiⁿ yú chííⁿ chí neⁿe Ndyuūs tanducuéⁿe dichí'vē yú caati diiⁿ yú chi n'daacā cáávā s'uuúⁿ nguuvi s'eeⁿ chi canee yú iⁿyeeⁿdí 'cūū níicú cucáávā nguuvi chi cuchíi. ⁹Nduudú 'cūū ní cuaacu chí cuaacu, níicú nducyáácá 'iiⁿyāⁿ canéé chi cu'téenu yā nduudú 'cūū. ¹⁰Ní cáávā nduudú 'cūū ní diiⁿ yú ntiiⁿnyuⁿ. Ní n'geenu yú ngii ti 'iiⁿyāⁿ ngaⁿa taáⁿ yā yeⁿe yú. 'Tíicā chó'oo yeⁿe yú caati i'teenu yú Jesucristo ní canéé ngiinu yú Ndyuūs chi canduuchi chí cuuvi nadanguáⁿai yā nducyaaca 'iiⁿyāⁿ ní nadanguáⁿai yā nducyaaca 'iiⁿyāⁿ chi i'téenu yā 'yā.

¹¹Níicú dííⁿ, Timoteo, 'úú ngaⁿá chi canee chi ca'cueeⁿ di nduudú 'cūū. ¹²Nguéeⁿ 'cuaaⁿ di lugar chi 'iiⁿyāⁿ nguéeⁿ neⁿe yā dii cucáávā chi duū'vi nguuví yeⁿe di. Din'daacā di ndúucū tanducuéⁿe chi diiⁿ di, ye'e chi ngaⁿa di, yeⁿe chi diiⁿ di. Ní dine'e di nducyáácá 'iiⁿyāⁿ. Ní diitu canee di ndúucū chi i'téenu di. Ní diiⁿ di chi vida yeⁿe di ní n'daacā nanááⁿ nducyáácá 'iiⁿyāⁿ. Ní vida yeⁿe di canee tan'dúucā 'áámá ejemplo. ¹³Níicú 'naaⁿ tiempo chi 'āā cuéeⁿ ndaá nanááⁿ di 'cueeⁿ di libro yeⁿe Ndyuūs nanááⁿ 'iiⁿyāⁿ. Ní yaa'vi di 'iiⁿyāⁿ chi 'caandiveeⁿ yā nduudu yeⁿe Ndyuūs. Ní ca'cueeⁿ di 'iiⁿyāⁿ tanducuéⁿe chi yeⁿe Ndyuūs neⁿe chi ndaá. ¹⁴Ní diiⁿ di tanducuéⁿe chi cuuvi di yeⁿe ntiiⁿnyuⁿ chi Ndyuūs tee yā dii

taachi saⁿā chi 'cuaeⁿ nduudu yeⁿe Ndyuūs ngaⁿá yā yeⁿe chi diiⁿ di. Ní saⁿā chi ngaⁿa ntiⁿnyuⁿ yeⁿe yāacū s'núuⁿ yā ta'a yā ná tiiⁿ di cáávā chi cho'ó yā dii chi diiⁿ di ntiⁿnyuⁿ yeⁿe Ndyuūs.

¹⁵Canéé chí diiⁿ di nducuéⁿe chi ngaⁿá dii ní diiⁿ di tan'dúucā chi 'āā 'cuaeⁿ di. Ní 'íicú 'iiⁿyāⁿ cuuvi deenú yā chi cu'téenu ca di nguuvi nguuvi. ¹⁶Ní díí, Timoteo, cundéé di cuidado yeⁿe maaⁿ di, ní yeⁿe tanducuéⁿe chi diiⁿ di, ní yeⁿe chi ca'cuaeⁿ di 'iiⁿyāⁿ. Caati nduuti chi diiⁿ di 'túucā nadinguáⁿai maaⁿ di dii ndúucū 'iiⁿyāⁿ chi n'giindiveéⁿ yā nduudu yeⁿe di.

Yeⁿe tan'dúucā chi cuuvi diiⁿ di ndúucū 'iiⁿyāⁿ chi i'téenu yā Ndyuūs

5 Nguéé diiⁿ di reprender mar 'áámá saⁿā ndiicúū naati ca'a di consejo saⁿā miiⁿ tan'dúucā chi chiida di. Ní diiⁿ di tratar ndúucū saⁿā da'caiyāá tan'dúucā chi saⁿā s'eeⁿ ní 'díínū di. Ní canéé chí diiⁿ di nducuéⁿe chi n'daacā. ²Ní diiⁿ di tratar ndúucū n'daacā ndiicúū tan'dúucā chi cheecu di. Ní diiⁿ di tratar ndúucū taⁿā dá'caiyāa tan'dúucā chi ví'i di. Ní canéé chí diiⁿ di tanducuéⁿe n'daacā ndúucū 'iiⁿyāⁿ.

³Ní innee di n'daacā nguá'āa chi cuaacu níⁿnyuⁿ véé necesidades yeⁿe yā. ⁴Naati nduuti chi n'daacā nguá'āa véé daiya tá o daiya yiinu tá da'caiyāa s'ééⁿ canéé chí din'daacá yā ní canéé chí diiⁿ cumplir obligaciones yeⁿe yā ndúucū 'iiⁿyāⁿ yeⁿe familia yeⁿe yā. Ní da'caiyāa s'ééⁿ ní canéé chí diiⁿ yā cosas chi n'daacā cáávā cheecu

yā ndúucū chiidá yā ní cáávā chi neⁿe ca yā chiidá yā ndúucū cheecu yā caati chuū ní cosa chi n'daacā, ní cosa chi Ndyuūs neⁿe yā chi da'caiyāa s'ééⁿ diiⁿ yā. ⁵Ní nduuti chi cuaacu níⁿnyuⁿ chi n'daacā nguá'āa ní dámaaⁿ ta, canéé chí i'téenu tá Ndyuūs ndúucū confianza ní caaⁿmaⁿngua'a tá nanááⁿ Ndyuūs ndii nguuvi ndii n'gaaⁿ. ⁶Ní nduuti chi n'daacā nguá'āa diiⁿ tá tan'dúucā chi maaⁿ tá neⁿe tá, 'áará chi canduūchi tá caneé tá tan'dúucā chi n'dii tá nanááⁿ Ndyuūs. ⁷Tiicá ntúúⁿ ca'cuaeⁿ di nducuéⁿe chuū nanááⁿ 'iiⁿyāⁿ yeⁿe yaacū ní tanáⁿā 'iiⁿyāⁿ nguéé cuuvi caaⁿmáⁿ yā chi véé nuuⁿndi yeⁿe yā. ⁸Nduuti chi 'iiⁿyāⁿ s'eeⁿ nguéé candee yā cuidado yeⁿe 'iiⁿyāⁿ yeⁿe familia yeⁿe yā ndúucū cheecu yā ndúucū chiidá yā tuuⁿmi ní 'iiⁿyāⁿ s'eeⁿ ndaacadaamí yā yeⁿe chi i'téenu yā ní ndii cunncāa cā nguéé ti 'iiⁿyāⁿ chi nguee i'téenu yā.

⁹Cuuvi dingúūⁿ di na lista yeⁿe n'daacā nguá'āa ca'áámá n'daacā nguá'āa chi 'āā ngii tá 'iinu ngeecu 'áámá nduūyū ní 'áámá nūuⁿ isaⁿā nduūcū ta. ¹⁰Ní n'daacā nguá'āa miiⁿ canee chi 'āā ch'etinee n'daacā tá ní taaví n'daacā tá daiya tá. Ní canéé chí n'guuⁿ tá na vaacu tá 'iiⁿyāⁿ chi snúuⁿ yā yúúní, ní 'āā naaⁿnu tá ca'ā 'iiⁿyāⁿ chí i'téenu yā Ndyuūs tan'dúucā costumbre yeⁿe 'iiⁿyāⁿ yeⁿe ndaacā yeⁿe yā. Ní chinnee ta'ā tá 'iiⁿyāⁿ chi ngiitā, ní diiⁿ tá 'āā de'é nūuⁿ ntiⁿnyuⁿ chi n'daacā.

¹¹Nguéé dingúūⁿ di na lista yeⁿe n'daacā nguá'āa 'áámá n'daacā nguá'āa naⁿa chi nguéé nduuyu

yeⁿe tá caati cuuvi neⁿe ta 'caandavaacu tá ní nguée neⁿe tá diiⁿ tá ntiiⁿnyuⁿ yeⁿe Cristo. ¹²Ní cuayiivi miiⁿ ní n'daataá nguá'aa miiⁿ véé culpa yeⁿe tá chi nguée diiⁿ tá cumplir compromiso yeⁿe tá chi diiⁿ tá ntiiⁿnyuⁿ yeⁿe Cristo. ¹³Ní más cā cuuvi diiⁿ n'daataá nguá'aa s'eeⁿ. Íícú cuuvi 'daān'dí ntúūⁿ ta taachi ngeⁿē tá 'áámá va'ai táámá va'ai. Níícú nguée dámaaⁿ chi 'daān'dí tá ti neenē neⁿe nandē tá yeⁿe 'iiⁿyāⁿ ndúúcū nduudu chi nguée cánéé chi caaⁿmaⁿ tá ní diyaādí ta. Ní caⁿa tá miiⁿ caⁿa tá 'muuⁿ ní diiⁿ tá cosas chi nguée ituneⁿ táⁿā. ¹⁴Cáávā chuū neⁿé chi n'daataá nguá'aa chi da'caiyā ta 'caandivaacu tá ni taavi tá daiya tá ní caaⁿmaⁿ ntiiⁿnyuⁿ tá na vaacu tá. 'Tíicā ní 'iiⁿyāⁿ chi nguée i'téenu yā Ndyuūs nguée caaⁿmaⁿ cúnncā yā yeⁿē tá. ¹⁵Caati n'duuví n'daataá nguá'aa chi da'caiya tá 'āā ndaacadaami tá yeⁿē Cristo ní cueⁿe tá lado yeⁿe yáán'n'guiinūⁿ.

¹⁶Ní nduuti chi 'áámá n'daataá o saⁿā chi i'téenu yā Jesucristo yeⁿē yú ní vee n'daataá nguá'aa chi 'iiⁿyāⁿ yeⁿé yā, canéé chí ca'á yā n'daataá nguá'aa deē chi neⁿe tá. 'Tíicā ní nguée canéé chi ca'a 'iiⁿyāⁿ yeⁿe yaācū n'daataa nguá'aa miiⁿ. 'Tíicā ní cúví ca'a 'iiⁿyāⁿ yeⁿe yaācū tanáⁿā n'daataá nguá'aa chi cuaacu níⁿnyúⁿ chi véé necesidades yeⁿe tá.

¹⁷Maaⁿ ní saⁿā s'eeⁿ chi ngaⁿa ntiiⁿnyuⁿ n'dai yeⁿe yaācū ndúúcū saⁿā chi ca'cueeⁿ nduudu yeⁿe Ndyuūs ndúúcū saⁿā chi candē nduudu yeⁿe Ndyuūs cuuvi cuta'a sa honor chi doble yeⁿe 'iiⁿyāⁿ s'eeⁿ

yeⁿe yaācū. ¹⁸'Tíicā canéé nguūⁿ na libro yeⁿe Ndyuūs ndii cuááⁿ vmaāⁿ. Nguée cu'nūu di yaānā duutu 'yúúdūu o 'itiindu chí inde'ei nuúⁿ tí nguaaⁿ trigo ní 'íicú cuuvi che'ē tí yeⁿē. Ní canéé nguūⁿ táámá. Saⁿā chi nídiⁿ ntiiⁿnyuⁿ cuuvi cuta'ā sa chiiⁿvē yeⁿē sa.

¹⁹Nguée cu'téenu di 'iiⁿyāⁿ chi ngaⁿa yā yeⁿe saⁿā chi ngaⁿa ntiiⁿnyuⁿ yeⁿe yaācū nduuti chi nguée véé 'uuví ndúú 'iinu testigos yeⁿé yā. ²⁰Naati canee chí diiⁿ di reprender nanááⁿ nducyáácá 'iiⁿyāⁿ yeⁿe yaācū 'iiⁿyāⁿ chi nadinuuⁿndí yā. Ní 'íicú tanáⁿā 'iiⁿyāⁿ ní dí'va'á yā. ²¹Maaⁿ ní 'úú Pablo ngaⁿá ngii dii Timoteo chuū nanááⁿ Dendyuūs ní nanááⁿ Señor Jesucristo ní nanááⁿ ángeles chí Ndyuūs ndeēve yā. Diiⁿ di nducuéⁿē chuū ní nguée nadacadínuuⁿ di chí 'áámá yā chí ch'εεε cá yā nguée tí táámá yā. Ní 'āā daamá nūuⁿ diiⁿ di ndúúcū nducyaaca 'iiⁿyāⁿ. ²²Nguée ndeēve nuuⁿ di 'áámá saⁿā chí caaⁿmaⁿ ntiiⁿnyuⁿ sa yeⁿe yaācū nduuti chí nguée n'diichi di saⁿā miiⁿ 'naaⁿ tiempo. Ní nguée véé 'áámá parte yeⁿē di ndúúcū saⁿā miiⁿ taachi dinuuⁿndi sa. Diví di yeⁿe nducuéⁿē chí nguée n'daacā ní nguée dinuuⁿndí maāⁿ di.

²³Maaⁿ ní taachi ya'āi chēeti di nguée cu'u di dámaaⁿ nuūⁿnīⁿ caati cuuvi cu'u di 'téé vino. Ní taama vmnéⁿēe chí ya'āi cuerpo yeⁿē di cu'u di 'téé vino.

²⁴Ní nuuⁿndi chí diiⁿ náⁿā 'iiⁿyāⁿ, ní deenu yú tí n'diichi yú vmaāⁿ chí ndaā nguuvi chí Ndyuūs n'diichi yā nuuⁿndi yeⁿe yú. Níícú nguée deenu yú nuuⁿndi chí diiⁿ tanáⁿā

'iⁿyāⁿ naati cuayiivi míⁿ taachi n'diichi Ndyuūs nuuⁿndi yeⁿe yú tuuⁿmi ní snaaⁿ yú nuuⁿndi yeⁿé yā. ²⁵Tiicá ntúūⁿ snaaⁿ yú nducuéⁿē chi n'daacā chi diiⁿ 'iⁿyāⁿ. Ní 'áará chí nguéé inaaⁿ yú maaⁿ chiiⁿ chi n'daacā chi diíⁿ yā cuayiivi ní Ndyuūs idiíⁿ yā chi cadiinuuⁿ yú táácā yeⁿé 'iⁿyāⁿ s'eeⁿ.

6 Nducyaaca 'iⁿyāⁿ chi i'téenu yā Jesucristo chi diiⁿ ntiiⁿnyuⁿ yeⁿe criado o criada ni 'áamá canee yā na ntiiⁿnyuⁿ yeⁿē 'iivi yā chi esclavo yā, canee yā tan'dúucā chi véé 'áamá yugo na daandú yā. Ní 'iⁿyāⁿ esclavos canee chi diiⁿ ca yā respetar 'iivi yā. Níicú 'iivi yā nguéé cuuvi cunncaā caaⁿmaⁿ yā yeⁿe Señor Jesucristo yeⁿe yú ndíi nguéé ndúú yeⁿē chi ca'cueeⁿ yú. ²Ní saⁿā esclavos chi i'téenu sa ní véé 'iivi sa chi 'tiicá ntúūⁿ i'téenu yā, canee chi diiⁿ ca sa respetar 'iivi sa tan'dúucā chi 'aama 'iivi sa chi nguéé i'téenu yā. Naati canee chi diiⁿ sa servir más cā 'iivi sa chi i'téenu yā caati 'iivi sa ní hermano ndúucū sa caati yeⁿé Ndyuūs nduu 'uuví yā. Ní hermanos neⁿe sa 'iivi sa. Tanducuéⁿē dendu'ū dii, Timoteo, ngi'cueeⁿ di ní ngaⁿa dí.

'iⁿyāⁿ chi i'téenu yā Jesucristo ní véé vaadi yeenú yeⁿé yā

³Níicú nduuti chi 'áamá 'iⁿyāⁿ ngi'cueeⁿ yā táámá nduudu chí n'dááⁿ ní nguéé tan'dúucā nduudu n'dai yeⁿē Señor Jesucristo, ndíi nguéé ndúú tan'dúucā nduudu yeⁿé Ndyuūs chí ngi'cueeⁿ yú yeⁿē chí 'cuéetinee yú n'daacā tan'dúucā chí Ndyuūs neⁿe yā chí diiⁿ yú, ⁴tuuⁿmi ní 'iⁿyāⁿ miiⁿ ní

nadacadínuuⁿ yā chí maaⁿ yā ch'eteté yā, ní nguéé de'ē vee deenu yā. 'Iⁿyāⁿ miiⁿ ní ch'eeu cheendí yā. Ní diíⁿ yā chí náⁿā 'iⁿyāⁿ nguⁿuⁿ yā ní ngué'ei yā ní caa'vá yā ní ngaⁿa taáⁿ yā yeⁿe 'iⁿyāⁿ. Ní 'iⁿyāⁿ miiⁿ diíⁿ yā chí náⁿā 'iⁿyāⁿ nguéé véé 'viich'etíínūuⁿ ndúucū tanáⁿā 'iⁿyāⁿ. ⁵Ní 'iⁿyāⁿ miiⁿ diíⁿ yā chí nducyaaca 'iⁿyāⁿ dámaaⁿ n'geecu cheendí yā, ní nguéé n'daacā nadacadínuuⁿ yā. Ní nguéé deenú yā nduudu yeⁿe Cristo. 'Iⁿyāⁿ miiⁿ nadacadínuuⁿ yā chí diíⁿ yā ganar tuumí caati chí'téenu yā ní ngaⁿa yā nduudu yeⁿe Cristo. Divíi dí yeⁿe tanducuéⁿē 'iⁿyāⁿ chí 'tíicā. ⁶Deenu yú chí 'iⁿyāⁿ chí i'téenu yā Jesucristo canee n'daacá yā ndúucū chí vee yeⁿé yā ní yeenú yā. Chiiⁿ chí i'téenu yā ní tan'dúucā vaadi 'cuiica ca yeⁿé yā. 'Tíica rā vaa. ⁷Deenu yú chí nguéé de'ē vee ndēē yú taachi ch'iindiyāā yú iⁿ'yeeⁿdí 'cūū. Ní nguéé de'ē vee ntúūⁿ candēē yú yeⁿē iⁿ'yeeⁿdí 'cūū taachi 'cuūvī yú. ⁸Neⁿe chí snee yú iⁿ'yeeⁿdí 'cūū nduuti chí véé chí nge'e yú ndúucū catecai yú, ní ndúucū chuū nūuⁿ cānee chí yeenu yú. ⁹Caati 'iⁿyāⁿ chí neⁿé yā 'cuiicá yā taachi yááⁿ'guinūuⁿ n'diichi neeⁿ sa 'yā cuuvi diíⁿ yā dendú'ū chí nguēe n'daacā. Ní canee yā ndúucū vicio zongo yeⁿé yā chí nguēe n'daacā. Ní nguéé dichí'vē. Ní diiⁿ chí dinuuⁿndí yā níicú diiⁿ chí caⁿ'á yā infierno. ¹⁰Chíⁿ chí diiⁿ chí 'iⁿyāⁿ dinuuⁿndí yā ní chuū. 'Iⁿyāⁿ neⁿe cá yā tuūmī. Ní in'nuuⁿ cá yā tuūmī chí 'āā ntéé véé tiempo chí cu'téenu yā. Ní mááⁿ yā diíⁿ yā chí ya'āi n'geenu taaví yā ngii.

**Yeⁿe chi cuuvi din'daacá
yú maaⁿ chi i'teenu yú**

¹¹Maaⁿ ní dii, Timoteo, saⁿá chi yeⁿe Ndyuūs dii, diví di yeⁿe nducuéⁿe chuū chi nguē n'daacā. Ní diiⁿ di nducuéⁿe chi n'daacā. Dich'ēete di Ndyuūs ní cu'téenu ca di. Din'é ca di nducyaaca 'iiⁿyāⁿ ní diiⁿ di nducuéⁿe ndúucū paciencia. Ní canee di ndúucū staava yeⁿe di chi n'dai. ¹²Ní taachi 'cueenu di cuuvi cáávā chi i'téenu di Ndyuūs canee diitu di ndúucū chi i'téenu di yeⁿe Ndyuūs yeⁿe yú. Ní diitu diiⁿ di caati chi cuuvi yeⁿe di vida cueⁿe daāⁿmaⁿ chi cuuvi cuta'a di yeⁿe Ndyuūs ti Ndyuūs yaa'ví yā dii chi cuuvi yeⁿe yā dii. Ní dii 'āā ngaⁿa di chi i'téenu di Ndyuūs nanááⁿ 'yaaⁿ ndáí 'iiⁿyāⁿ. ¹³Maaⁿ ní 'úú yaa'ví dii nanááⁿ Ndyuūs chi testigo yeⁿe yú, Ndyuūs chi itée yā vida yeⁿe nducuéⁿe chi véé, ní nanááⁿ Jesucristo chi 'āā ngaⁿa yā nduudu cuaacu yeⁿe Ndyuūs chiidá yā nanááⁿ gobernador Poncio Pilato. ¹⁴'Úú yaa'ví dii chi 'caandiveeⁿ di ní diiⁿ di nducuéⁿe chi ca'á orden yeⁿe di. Ni nguéé n'daaⁿ orden yeⁿe caati nguéé neⁿe chi 'iiⁿyāⁿ caaⁿmáⁿ yā contra yeⁿe di caavā cosa chi diiⁿ di. Diiⁿ di 'tíicā ndii tiempo chi ndaa Señor Jesucristo yeⁿe yú táámá vmnéⁿēe. ¹⁵Níicú tiempo taachi Ndyuūs neⁿe yā, Ndyuūs caⁿá yā dicho'ó yā Jesucristo chí n'dai taavi nanááⁿ 'iiⁿyāⁿ taama vmnéⁿēe. Ní Cristo miiⁿ maáⁿ yā ní 'áámá n'dyáⁿá 'iiⁿyāⁿ nūuⁿ chi ngaⁿa ntiⁿnyuⁿ yā yeⁿe nducueⁿe chi véé, ní Rey chi ch'ēete taavi ca nguéé ti tanáⁿā reyes. Ní 'iivi yú chi ch'ēete taavi ca nguéé ti tanáⁿā saⁿā chi 'iivi. ¹⁶Dámaāⁿ Ndyuūs miiⁿ ní 'áámá canduuchí yā

cueⁿe daāⁿmaⁿ. Ní canduuchí yā ná chidēeve chi nguéé cuuvi indaa mar 'áámá 'iiⁿyāⁿ. Ní nguéé n'diichi mar 'áámá 'iiⁿyāⁿ Ndyuūs miiⁿ ndíi nguéé cuuvi snaaⁿ ra yā. Maaⁿ ní cueⁿe daāⁿmaⁿ canee cuuⁿmiⁿ yú dich'ēete yú Ndyuūs ti tanducuéⁿe poder chi véé ní yeⁿe yā. 'Tíicā rā vaa.

¹⁷Maaⁿ ní dii, Timoteo, cuuvi di 'iiⁿyāⁿ cuiica chi nguéé nadacádíinuⁿ yā chi ch'ēete ndáí yā. Ní nguéé cunee ngiinū yā yeⁿe chi véé yeⁿe yā caati cosa chi nguéé seguro chi 'áámá cūnee ndúucu yā. N'dáácā ca nduuti chi 'iiⁿyāⁿ 'seeⁿ cu'téenu yā Ndyuūs chi canduuchi ní Ndyuūs ca'á yā n'dee ndáí dendu'tu yeⁿe nducuéⁿe chi vee caati cuuvi cuta'a yú ní yeenu yú. ¹⁸Níicú díi yaa'ví di 'iiⁿyāⁿ cuiica chi din'daacá yā ní díiⁿ yā n'dee tááví ntiⁿnyuⁿ chi n'daacā. 'Íicú canee listo yā chi cuuvi ca'a yā tanáⁿā 'iiⁿyāⁿ chi nguéé véé yeⁿe yā ní innee yā 'iiⁿyāⁿ 'seeⁿ. ¹⁹Tíicā cuuvi yeⁿe 'iiⁿyāⁿ 'seeⁿ vaadi 'cuiica yeⁿe yā chi vida cueⁿe daāⁿmaⁿ chi Ndyuūs caⁿá yā chi ca'a yā 'iiⁿyāⁿ yeⁿe yā.

**Pablo ca'á yā últimas órdenes
Timoteo ti 'cuiinū carta maaⁿ**

²⁰Díiⁿ, Timoteo, cundée di n'daacā cuidado yeⁿe encargo chi 'iiⁿyāⁿ 'āā tee yā dii. Nguéé cu'neeⁿveeⁿ di n'dee ndáí nduudu chi ngaⁿa 'iiⁿyāⁿ yeⁿe cosa yeⁿe iⁿ'yeeⁿdí 'cūū o yeⁿe nduudu chi nguéé dichí'vē o yeⁿe chi ngaⁿa 'iiⁿyāⁿ chi nduudu deenu ní nguéé 'tíicā. ²¹'Iiⁿyāⁿ 'seeⁿ ndáácadaami yā yeⁿe nduudu cuaacu yeⁿe Ndyuūs ní maáⁿ yā ní nguéé i'téenu yā nduudu cuaacu yeⁿe Ndyuūs. Maaⁿ ní 'úú neⁿe chi Ndyuūs tée yā dii tanducuéⁿe chi n'daacā. 'Tíicā cuuvi.

CARTA CUAYIIVI YEⁿE TIMOTEO

1 'Úú Pablo 'úú ni 'úú apóstol yeⁿe Jesucristo caati Ndyuūs neⁿé yā chi 'úú cuuvi apóstol yeⁿé yā, ní dichó'o yā 'úú. Ní chuū chi Ndyuūs diiⁿ yā ní tan'dúúcā chi ngaⁿa yā chi ca'a yā vida cueⁿe daāⁿmaⁿ nducyaaca 'iiⁿyāⁿ chi yeⁿe Jesucristo. ²'Úú dinguúⁿ carta 'cūū yeⁿe di, Timoteo, chi tan'dúúcā daiyá 'tíicā dii caati neⁿé taavi dii. Neⁿé chi Ndyuūs chiida yú ndúúcū Señor Jesucristo yeⁿe yú tée yā dii cosas chi n'dai, ní ya'āi 'iinú yā dii, ní tée yā dii vaadi 'diiⁿ na staava yeⁿe di.

Caaⁿmaⁿ di nduudu yeⁿe Cristo nanááⁿ 'iiⁿyāⁿ

³Maaⁿ ní ca'á Ndyuūs gracias caavā chi 'úú dichii'vé Ndyuūs ndúúcū vaanicadínūuⁿ yeⁿé chi n'daacā tan'dúúcā chi diiⁿ 'iiⁿyāⁿ yeⁿe yú tiempo chi 'āā ch'ó'oo. Ní ndii nguuvi ndii n'gaaⁿ taachi ngaⁿanguā'a, 'úú ca'á Ndyuūs gracias, ní cueⁿe daāⁿmaⁿ 'úú ngaⁿanguā'a caavā dii, Timoteo. ⁴Nééné neⁿé snaáⁿ dii, Timoteo, taachi n'gaacú yeⁿe nuūⁿniⁿ nduutinááⁿ di taachi caneé 'áámá lado yeⁿe di. Ní taachi cuuvi n'diichí dii tuu'mi ní yeenú taaví.

⁵Ní n'gaacú chi i'téenu di Ndyuūs ndúúcū núúⁿmaⁿ staava yeⁿe di. Vmnaaⁿ chi i'teenu di Jesucristo táⁿā Loida chi chicuⁿu di ní táⁿā Eunice cheecu di i'téenu yā Jesucristo. Maaⁿ ní seguro caneé chi cuaacu chi dii ntúūⁿ i'téenu di.

⁶Cáávā chi i'téenu di Ndyuūs neⁿé chi n'gaacu di chi cuéⁿé daāⁿmaⁿ diiⁿ di ntiiⁿnyuⁿ chi Ndyuūs 'āā teé yā dii ndíí tiempo chi 'úú sn'duū ta'á vmnaaⁿ tiiⁿ di. ⁷Ndyuūs nguéé 'āā teé yā s'uuúⁿ 'áámá staava yeⁿe yú chi 'va'ā yú naati 'āā teé yā s'uuúⁿ 'áámá staava yeⁿe yú chi véé poder yeⁿe yú. Ní 'íicú cuuvi dinéⁿe yú nducyaaca 'iiⁿyāⁿ. Ní cuuvi nadicadínūuⁿ yú n'daacā. ⁸Maaⁿ ní nguéé 'cuináaⁿ di chi caaⁿmaⁿ di nduudu cuaacu yeⁿe Señor Jesucristo yeⁿe yú nanááⁿ 'iiⁿyāⁿ. Ndíí nguéé ndúú 'cuináaⁿ di yeⁿe 'úú caati canuúⁿ vácūū cáávā chi ngaⁿá nduudu cuaacu yeⁿe Cristo. Naati n'daacā ca diiⁿ di chi cuché di yeⁿe nducuéⁿe chi 'cueenu di cuuvi ntúūⁿ cáávā chí ngaⁿa di nduudu yeⁿe Cristo chí nadanguáⁿāi 'iiⁿyāⁿ chi n'giindiveéⁿ yā yeⁿe di. Diiⁿ di tanducuéⁿe ndúúcū fuerzas chi Ndyuūs itée yā dii. ⁹Ndyuūs nadinguáⁿai yā

s'uuúⁿ ní yaa'ví yā s'uuúⁿ chi diiⁿ yú ntiíⁿnyuⁿ yeⁿe yā chí n'daacā. Nguéé nadinguáⁿai yā s'uuúⁿ cáávā ntiíⁿnyuⁿ chi diiⁿ yú chí n'daacā. Naati Ndyuūs díⁿ yā 'túúcā ndúúcū s'uuúⁿ ti 'túícā neⁿe yā diiⁿ yā. Níícú neené neⁿe yā s'uuúⁿ. Ní maaⁿ ní s'uuúⁿ 'āā nduuví daama yú ndúúcū Cristo Jesus. Níícú Ndyuūs neⁿe yā s'uuúⁿ cuááⁿ vmnaaⁿ chi 'āā cuéé iⁿ'yeeⁿdí. ¹⁰Maaⁿ ní Ndyuūs ch'iⁿ'í yā chí neⁿe taaví yā nducyaaca 'iiⁿ'yāⁿ taachi dich'ó yā Jesucristo yeⁿe yú iⁿ'yeeⁿdí cūū. Jesucristo ní 'iiⁿ'yāⁿ miiⁿ chi nadanguáⁿai yā s'uuúⁿ. Ní nduudu cuaacu yeⁿe evangelio chi yeⁿe vida yeⁿe Cristo ch'iⁿ'i s'uuúⁿ chi nguéé 'aama 'cuūví yú. Níícú cáávā chi nadanguáⁿai yā s'uuúⁿ cuuvi cunduuchi yú cueⁿe daāⁿmaⁿ.

¹¹Níícú Ndyuūs nideevé yā 'úú chi caaⁿmáⁿ nduudu cuaacu yeⁿe yā ní dich'ó yā 'úú lado yeⁿe apóstol yeⁿe yā chi 'úú caaⁿmáⁿ nduudu cuaacu yeⁿe yā nanááⁿ 'iiⁿ'yāⁿ chi nguéé yeⁿe ndaata Israel. ¹²Níícú cáávā chi 'úú apóstol yeⁿe yā tanducuéⁿe n'geenú ngii chi canuúⁿ vácūū. Ní nguéé ngii 'cuinaáⁿ caati deenú du'ū chi Cristo chi i'teenú. Ní deenú chi cuaacu chi Cristo miiⁿ ní véé poder yeⁿe yā chi diiⁿ cuenta yā yeⁿe nducuéⁿe ntiíⁿnyuⁿ chi tee yā 'úú ndíí nguuvi chi díⁿ yā juzgar nducyaaca 'iiⁿ'yāⁿ.

¹³Dii, Timoteo, diiⁿ di ndúúcū nduudu chi serio nducuéⁿe tan'dúúcā chi 'úú ch'i'cueéⁿ dii. Ní cunée di n'daacā ndúúcū chi i'teenú di Diné^me di nducyaaca 'iiⁿ'yāⁿ caati mááⁿ ní s'uuúⁿ ní yeⁿe Jesucristo s'uuúⁿ. ¹⁴Ní cundee di cuidado chi

diiⁿ di ntiíⁿnyuⁿ chi Ndyuūs téé yā dii. Ní tee di lugar chí Espíritu N'dai yeⁿe Ndyuūs chi canee ndúúcū yú cunnee yā dii.

¹⁵Dii ní deenu di chi nducyaaca 'iiⁿ'yāⁿ chi i'téenu yā Jesucristo chi yeⁿe yáⁿāa Asia, 'iiⁿ'yāⁿ s'eeⁿ chi canee yā nducú nguuvi chi chó'oo, maaⁿ ní ndaacadaamí yā yeⁿe 'úú. Ní nguaaⁿ 'iiⁿ'yāⁿ s'eeⁿ canée saⁿā Figelo ndúúcū saⁿa Hermógenes. ¹⁶Naati 'iiⁿ'yāⁿ yeⁿe familia yeⁿe saⁿā Onesíforo nguéé 'cuináⁿ yā 'úú yeⁿe chi canuúⁿ vácūū. Saⁿā miiⁿ ndaa sa n'diichi sa 'úú chi nnee sa 'úú. Neⁿe chi Señor Jesucristo ca'á yā vaadí ya'ai yeⁿe yā saⁿā miiⁿ ndúúcū 'iiⁿ'yāⁿ yeⁿe familia yeⁿe sa. ¹⁷Nguéé diiⁿ saⁿā Onesíforo tan'dúúcā chi diiⁿ tanáⁿa yā caati taachi canée sa na yāāⁿ Roma neené na'nuūⁿ sa 'úú ndíí taachi nndaacā sa 'úú. ¹⁸Neⁿe chi Ndyuūs ya'ai 'iinú yā saⁿā miiⁿ nguuvi chi Señor Jesucristo yeⁿe yú díⁿ yā juzgar 'iiⁿ'yāⁿ yeⁿe iⁿ'yeeⁿdí cūū. Ní dii ní neené n'dai deenú di tan'dúúcā chi chinnee sa s'uuúⁿ taachi sneé yú na yāāⁿ Efeso.

'Aámá soldado yeⁿe Señor Jesucristo chi din'dáaca sa

2 Díí, Timoteo, chi tan'dúúcā daiyá, cuta'a di fuerzas yeⁿe nducuéⁿe vaadí n'dai chi cuuvi yeⁿe yú caati maaⁿ ní yeⁿe Jesucristo s'uuúⁿ. ²Ní tanducuéⁿe chi n'giindiveeⁿ di yeⁿe 'úú chi ngaⁿá nanááⁿ n'dee n'dái 'iiⁿ'yāⁿ, chuū ní ca'cueeⁿ di saⁿā s'eeⁿ chi i'téenu sa chi 'áámá cūnee sa n'daacā ndúúcū chi i'téenu sa, ní saⁿā s'eeⁿ ní cuuvi ca'cueeⁿ sa tanáⁿa 'iiⁿ'yāⁿ.

³Ní taachi canee chi 'cueenu dí cuuvi tuu'mi ní n'geenu di ngii tan'dúucā 'áámá soldado chi n'daacā sa. 'Tíicā diiⁿ di caati dii ní 'áámá soldado yeⁿe Señor Jesucristo.

⁴Deenu di tan'dúucā chi 'áámá soldado chi canéé na servicio nguéé diiⁿ sa tan'dúucā tanáⁿā saⁿā chi nguéé canee na servicio caati canee sa diiⁿ sa cumplir tanducuéⁿē chi ngaⁿa comandante yeⁿē sa.

⁵Tiicá ntúūⁿ. 'Iiⁿyāⁿ chi caⁿá na cancha nguéé cuuvi cuta'a yā mar 'áámá premio nduuti chi nguéé diiⁿ yā cumplir reglas yeⁿē. ⁶Tiicá ntúūⁿ. 'Iiⁿyāⁿ chi diiⁿ ntiiⁿnyuⁿ na campo yeⁿé yā cuuvi cuta'á yā caavā maáⁿ yā cosecha yeⁿé yā chi vmnááⁿ vmaāⁿ. ⁷Dii, Timoteo, nadacádíinūⁿ di yeⁿē chi ngaⁿá níicú Señor yeⁿē yú diiⁿ yā chi cadíinuⁿ di tanducuéⁿē.

⁸N'gáácú dí ti Jesucristo yeⁿē yú ní yeⁿē ndaata yeⁿē David 'iiⁿyāⁿ, ní nduuchi yā yeⁿē nguaaⁿ tináⁿā. 'Túucā ngaⁿā nduudu cuaacu chi nadinguáⁿāi 'iiⁿyāⁿ. ⁹Níicú cáávā chi ngaⁿá nduudu cuaacu yeⁿé yā neene n'geenú ngii ní canuúⁿ vácūú ndúucū cadenas tan'dúucā chi 'iiⁿnúⁿ 'iiⁿyāⁿ naati nduudu yeⁿé Ndyuūs nguéé cuuvi 'cueē chiichí ndúucū cadenas. ¹⁰Ní cáávā nducuéⁿē chuū 'úú cuheé yeⁿe tanducuéⁿē chi n'geenú ngii caavā 'iiⁿyāⁿ chi Ndyuūs nndæeve yā chi cuuvi yeⁿé yā 'iiⁿyāⁿ. Ní 'íicú 'iiⁿyāⁿ s'eeⁿ cuuvi cu'téenu yā Ndyuūs. Ní Ndyuūs cuuvi nadanguaⁿai yā 'iiⁿyāⁿ yeⁿe nuuⁿndi yeⁿé yā cáávā Jesucristo. Ní 'iiⁿyāⁿ s'eeⁿ cuuvi ndaaca yā vida n'dai chi vida cueⁿe daāⁿmaⁿ.

¹¹Nduudú 'cūú ní cuaacu chi ngaⁿa 'iiⁿyāⁿ:

Nduuti chi diiⁿ yú cuenta chi 'āā n'diī yú ndúucū Cristo tuu'mi ní diiⁿ yú cuenta chi cunduuchi ntuūⁿ yú ndúucu yā.

¹²Tiicá ntúūⁿ. Nduuti chi n'geenū yú ngii cááva yā ndúucū nducuéⁿē dendu'ū tuu'mi ní caaⁿmaⁿ ntiiⁿnyuⁿ yú ndúucu yā. Ní nduuti chí cueeⁿdiitu yú yeⁿe Cristo tuu'mi ní Cristo caⁿá yā caaⁿmaⁿ yā chi s'uúúⁿ nguéé yeⁿé yā s'uúúⁿ.

¹³Nduuti chi n'daaⁿ yú ní nguéé 'aama canee yú ndúucū chi i'teenu yú yeⁿe Jesucristo tuu'mi ní Jesucristo nguéé n'daaⁿ yā ti 'tíica yā ní 'áámá canee yā caati Cristo miiⁿ nguéé cuuvi cueeⁿdiitú yā yeⁿē maáⁿ yā.

¹⁴Maaⁿ ní dii, Timoteo, n'gaacú di yeⁿe nducuéⁿē dendu'ū. Yaa'vi di 'iiⁿyāⁿ s'eeⁿ nanááⁿ 'iivú Ndyuūs yeⁿē yú chi canéé chi diiⁿ yā 'túucā. Yaa'vi di 'iiⁿyāⁿ s'eeⁿ chi nguéé cuuvi 'cuuⁿmáⁿ yā ndúucū cheendí yā caati nduudu yeⁿé yā nguéé dichí'vē. Nduudu s'eeⁿ dámaaⁿ diiⁿ chi tanáⁿā 'iiⁿyāⁿ nadacádíinuⁿ ca yā yeⁿe chi ch'iindiveéⁿ yā yeⁿe nduudu yeⁿé yā. ¹⁵Ní dí diiⁿ di tanducuéⁿē chi n'daacā chi cuuvi di caati taachi ndaa di nanááⁿ Dendyuūs cuuvi di 'cuuⁿmiⁿ di chi n'daacā diiⁿ di ntiiⁿnyuⁿ yeⁿé yā. Ní n'daacā ngi'cueeⁿ di nduudu cuaacu yeⁿé Ndyuūs nanááⁿ 'iiⁿyāⁿ. Ní nguéé cuuvi 'cuináaⁿ di nanááⁿ Ndyuūs. ¹⁶Diví di yeⁿe 'iiⁿyāⁿ chi ngaⁿa n'deeé n'dái nduudu chi nguéé

dáamá ndúúcu nduudu cuaacu yeⁿé Ndyuūs caati nguée dichíí'vē. 'Iiⁿyāⁿ chi ngaⁿ'a yā 'túúca diiⁿ cá yā nuuⁿndi. ¹⁷Níicú nduudu chi nguée n'daacā chi 'iiⁿyāⁿ s'eeⁿ ca'cueéⁿ yā 'iiⁿyāⁿ ní ngéenu tan'dúúca chi ca'ai gangrena ní tan'dúúca chi nge'e 'áamá n'daa. 'Tíicā diiⁿ nduudu yeⁿe saⁿ'ā Himeneo ndúúcu saⁿ'ā Fileto. ¹⁸Sáⁿ'ā s'eeⁿ ní divíi yā yeⁿ'ē nduudu cuaacu ní ngaⁿ'a yā chi 'iiⁿyāⁿ nguée nnduuchí yā yeⁿ'ē nguaaⁿ tináⁿ'ā. Ní náⁿ'ā 'iiⁿyāⁿ 'āā ntéé i'téenu yā nducuéⁿ'ē nduudu cuaacu. ¹⁹Naati chíiⁿ chi Ndyuūs 'āā diiⁿ yā mar 'áamá 'āā ntéé cuuvi nadin'núⁿ'u yā. Ní 'āā canéé nguūⁿ na libro yeⁿ'é yā ní chiichi canéé tan'dúúca 'áamá sello. 'Tíicā nduudu miiⁿ: Señor Jesucristo yeⁿ'ē yú deenú yā du'u 'iiⁿyāⁿ chi yeⁿ'é yā. Níicú nducyaaca 'iiⁿyāⁿ chi ngaⁿ'a yā chi yeⁿ'e Señor yeⁿ'e yú canéé chi divíi yā yeⁿ'e nuuⁿndi.

²⁰Taachi caⁿ'a yú cuaaⁿ chæeti va'ai chí ch'æete taavi ca n'diichi yú nguée dámaaⁿ platos ndúúcu 'cuūtu yeⁿ'e d'íiⁿnguaaⁿ o d'íiⁿnguee naati n'diichi yú ntúūⁿ 'cuūtu yeⁿ'ē yáⁿ'á ní yeⁿ'ē ínchæetí. N'duuvi 'cuūtu 'iiⁿyāⁿ cuta'á yā cáávā ntiinⁿnyuⁿ especiales ní náⁿ'ā 'cuūtu ní 'iiⁿyāⁿ sta'á yā chi 'cuíi yā cosas chi nguée dichíí'vē. ²¹Ní taachi 'aama yú neⁿ'e yú diiⁿ yú ntiinⁿnyuⁿ yeⁿ'e Señor Jesucristo yeⁿ'ē yú canee chi 'cuætinéé n'daacā yú ní divíi yú yeⁿ'e tanducuéⁿ'ē chi nguée dichíí'vē. 'Tíicā diiⁿ yú maaⁿ níicú cuuvi diiⁿ yú 'āā de'é nūuⁿ ntiinⁿnyuⁿ chi n'daacā.

²²'Tiicá ntúūⁿ. Dii, Timoteo, divíi di yeⁿ'e vicios yeⁿ'e saⁿ'ā

n'gaiyāā. Cunée di n'daacā ní diiⁿ di tanducuéⁿ'ē chi n'daacā. Cu'téenu ca di Ndyuūs, dinéⁿ'e di nducyaaca 'iiⁿyāⁿ, ní cunée di ndúúcu vaadi 'diiⁿ ndúúcu nducyáacá 'iiⁿyāⁿ chi Ndyuūs nadidæevé yā yeⁿ'ē nuuⁿndi yeⁿ'é yā. Ní maaⁿ ní ngaⁿ'angua'á yā ndúúcu 'iiⁿyāⁿ chi yeⁿ'e Señor Jesucristo yeⁿ'e yú. ²³Ní dii, Timoteo, nguée diiⁿ di cuenta yeⁿ'e 'iiⁿyāⁿ chi n'dee n'dái neⁿ'é yā caaⁿ'máⁿ yā ndúúcu dii ndúúcu nduudu chi zonza caati nguæe déenu yā. 'Āā déenu di chi naachi 'cuiinū nduudu miiⁿ ní ndaacā vaadi 'ca'va.

²⁴Deenu di chi mar 'áamá 'iiⁿyāⁿ chi dichíí'væ Señor Jesucristo yeⁿ'e yú nguée cánéé chi 'cuuⁿ'máⁿ yā ndúúcu 'iiⁿyāⁿ naati canéé chí ndíicúuⁿ yā ndúúcu nducyaaca 'iiⁿyā. Ní canee chi ngi'cueeⁿ n'dáacá yā. Ní canee chi diiⁿ yā tanducuéⁿ'ē ndúúcu paciencia. ²⁵Ní canee chi díiⁿ di componer 'iiⁿyāⁿ chi yáadi'yāā ndúúcu núúⁿ'máⁿ staava yeⁿ'e di. Ní 'iiⁿyāⁿ miiⁿ canee chi cūnee ngiinú yā chi Ndyuūs n'daáⁿ yā vida yeⁿ'e 'iiⁿyāⁿ rebelde caati cuuvi deenú yā nduudu chi cuaacu. ²⁶'Tíicā ní 'iiⁿyāⁿ s'eeⁿ canéé yā tan'dúúca chi cyaadú yā níicú cuayiivi ní canduuchí yā ní 'íicú cuuvi ngeenu yā tan'duucā chi díiⁿ yā cuáⁿ'ai yā yeⁿ'e trampa yeⁿ'e yááⁿ'nguiinūⁿ. Ní nguée preso yā yeⁿ'e yááⁿ'nguiinūⁿ chi yááⁿ'nguiinūⁿ cuuvi diiⁿ sa chiiⁿ chi neⁿ'e sa nduucú yā. Ní maaⁿ ní 'iiⁿyāⁿ cuuvi díiⁿ yā chíiⁿ chí neⁿ'e Ndyuūs.

Tan'dúúca chi 'iiⁿyāⁿ caⁿ'á yā díiⁿ yā nguuvi chí cúchii

3 Dii, Timoteo canee chi déenu ntúūⁿ di chuū. Gnuuvi chi

cuchii véé cosas chi ngíⁿi. ²Iiⁿyāⁿ ní neⁿé yā maáⁿ yā 'iiⁿyāⁿ ní dinéⁿe taavi yā tuūmí. Ní caaⁿmáⁿ yā chi neené n'geete maaⁿ yā ní nacádíínuuⁿ yā chi neené n'daacā maáⁿ yā, ní nguéé n'daacā dináⁿ yā yeⁿe tanáⁿā 'iiⁿyāⁿ. Ní ngii taaⁿ yā contra yeⁿe Ndyuūs. Ní nguéé n'giindiveéⁿ yā yeⁿe chiidá yā ndúucū chæcú yā. Ní nguéé ngaⁿa yā 'tíicā: N'dii Ndyuūs, gracias. Ní nguéé n'giindiveéⁿ yā yeⁿe nduudu cuaacu yeⁿe Ndyuūs. ³Ní nguéé dinéⁿe yā 'iiⁿyāⁿ tan'dúucā chi canéé chi dineⁿé yā 'iiⁿyāⁿ, ndíi nguéé ndúú ya'āi 'iinⁿ yā 'iiⁿyāⁿ. Caaⁿmáⁿ yā nuuⁿndi yeⁿe 'iiⁿyāⁿ ní nguéé 'tíicā. Ní nguéé diíⁿ yā chi n'daacā caati neⁿé yā caⁿá yā ndúucū n'daataa ó saⁿā chi nguéé yeⁿé yā. Ní neené taaⁿ yā. Ní nguéé cuuvi n'diichí yā cosa chi n'daacā. ⁴Néené neⁿe yā vaadi 'caaⁿva ndúucū 'iiⁿyāⁿ. Nguéé 'vaⁿa yā 'āā de'é nūuⁿ chi diíⁿ yā ndúucū 'iiⁿyāⁿ Ní neené nadacadíínuuⁿ yā chi n'dæve maáⁿ yā. Néené neⁿe yā diiⁿ yā taanduvéé vicio chi véé iⁿyeéⁿdi 'cūū. Ní nguéé nadacadíínuuⁿ yā yeⁿe Ndyuūs. ⁵Néené n'giⁿi yā chi i'téenu yā Ndyuūs naati nguéé diíⁿ yā chiiⁿ chi ngaⁿa nduudu cuaacu yeⁿe Ndyuūs. Díí, Timoteo, divíi di yeⁿe 'iiⁿyāⁿ chi 'tíicā. ⁶Caati náⁿā saⁿā s'eeⁿ ní ngeⁿe yā ndúú va'ai nduu va'ai yeⁿe n'daataá chi nguéé diiⁿ n'daacá yā. Ní ca'cueeⁿ sa nduudu chi nguéé n'daacā. Ní n'daataa s'ééⁿ nguéé cuuvi ndaacadaamí yā yeⁿe nuuⁿndi yeⁿé yā. ⁷N'daataa s'eeⁿ ní nguuvi nguuvi n'geeⁿ yā nduudu miiⁿ naati nguéé cuuvi tuumicadíínuuⁿ yā nduudu

miiⁿ. ⁸Ní iiⁿyāⁿ s'eeⁿ chi diiⁿ 'tíicā ní contra yeⁿe nduudu cuaacu yeⁿe Ndyuūs. Ní tan'dúucā chi diiⁿ saⁿā ngaatúū Janes ndúucū Jambres taachi contra yeⁿe Moisés tiempo chi 'āā chó'oo, 'tíicā maaⁿ ní 'iiⁿyāⁿ s'eeⁿ nguéé n'daacā nadicadíínuuⁿ yā. Ní nguéé cuaacu chi i'téenu yā Ndyuūs. ⁹Ní 'iiⁿyāⁿ s'eeⁿ nguéé cuuvi 'cueeⁿ cá yā caati nducyaaca 'iiⁿyāⁿ deenú yā táacā idiiⁿ 'iiⁿyāⁿ s'eeⁿ chi tonto yā tan'dúucā chi 'tiicá ntúūⁿ deenú nducyaaca 'iiⁿyāⁿ taacā chi diiⁿ ngaatúū Janes ndúucū Jambres tiempo chi 'āā chó'oo.

**Cuááⁿ ná ch'iinu ní Pablo dingúūⁿ
yā carta 'cūū yeⁿe Timoteo**

¹⁰Díí, Timoteo, 'āā diiⁿ di nducueⁿé tan'dúucā chi ch'i'cueéⁿ dii. Ní tan'dúucā chi 'úú canéé n'daacā, 'tiicá ntúūⁿ cunee di n'daacā. Ní diiⁿ di tanducueⁿé tan'dúucā chi 'úú diíⁿ nducueⁿé cáávā chi i'teenu yú Ndyuūs. 'Tíicā diiⁿ di. Ní i'téenu di tan'dúucā chi 'úú i'teenú. Ní ya'ai i'inu di 'iiⁿyāⁿ ní dineⁿe di nducyaaca 'iiⁿyāⁿ. Ní cucheé di yeⁿe nducueⁿé. Tan'dúucā chi diíⁿ 'tiicá ntúūⁿ diiⁿ di. ¹¹Ní deenu di tanducueⁿé chi ch'eenú chii cáávā chi diiⁿ 'iiⁿyāⁿ nduucú ní táacā chi ch'eenú na yáāⁿ Antioquía ndúucū yáāⁿ Iconio ndúucū yáāⁿ Lистра. Ní chicheé tanducueⁿé chi ch'eenú chii naati Señor Jesucristo yeⁿe yú ní nadangúáⁿai yā 'úú yeⁿe nducueⁿé chúū. ¹²Tíicā ní cuaacu. Nducyaaca 'iiⁿyāⁿ chi neⁿé yā 'cuetinéé n'daacā vida yeⁿé yā cááva Jesucristo ní caⁿá yā 'cuenú yā cuuvi. ¹³Naati 'iiⁿyāⁿ chi nguéé n'daacā ní ginnche'í yā 'iiⁿyāⁿ.

Dach'εεte dách'εεte cá dííⁿ yā. Ní nginnche'εί yā tanáⁿā 'iiⁿyāⁿ ní ndíí maáⁿ yā nginnche'εί yā 'iiⁿyāⁿ.

¹⁴Naati dii, Timoteo, canee n'daacā di yeⁿe chi ch'eeⁿ di caati cuaacu níⁿnyúⁿ chí deenu di chi cuaacu ní deenu di du'ú 'iiⁿyāⁿ s'eeⁿ chi ch'cueeⁿ di 'túúcā. ¹⁵Ndíí taachi 'lííⁿ dii chicadíínuuⁿ di yeⁿe nduudu yeⁿe Ndyuūs. Ní cáávā nduudu miiⁿ chi ca'cueeⁿ di cuuvi cadíínuuⁿ di táácā cuuvi ninguaⁿāi di cáávā chi i'téenu di Señor Jesucristo. ¹⁶Ní nducuéⁿe chi canéé nguūⁿ na libro yeⁿe Ndyuūs cucáávā Espíritu N'dai yeⁿe Ndyuūs ní dichíí'vē chi ca'cueeⁿ yú 'iiⁿyāⁿ ní cuuvi yú 'iiⁿyāⁿ chεε chi nguéé n'daacā chi dííⁿ yā. Ní cuuvi yú 'iiⁿyāⁿ táácā chi cuuvi dín'daacá yā. Ní ca'cueeⁿ yú táácā chi 'iiⁿyāⁿ cuuvi 'cuεεtinéé n'daacā yā nanááⁿ Ndyuūs. ¹⁷Caati 'iiⁿyāⁿ chi yeⁿeⁿ Ndyuūs ní dichíí'vε yā Ndyuūs ní cuuvi dííⁿ yā nducuéⁿe ntiíⁿnyuⁿ chi n'daacā.

4 'Úú yaa'ví dii nanááⁿ Ndyuūs ní nanááⁿ Señor Jesucristo. 'Iiⁿyāⁿ miiⁿ caⁿá yā chi ndaa yā taama vmnéⁿēe tan'dúúccā rey. Ní ndaa yā ní dííⁿ yā juzgar 'iiⁿyāⁿ chi sндуuchí ndúúccū 'iiⁿyāⁿ chi 'āā n'dii caatí ngaⁿa ntiíⁿnyúⁿ yā yeⁿe nducuéⁿe naachi ngaⁿa ntiíⁿnyúⁿ yā. ²Ní 'úú yaa'ví dii chi ngaⁿa di nduudu cuaacu yeⁿe Cristo nanááⁿ 'iiⁿyāⁿ. Ní caaⁿmaⁿ di nducuéⁿe tiempo chi cuuví diiⁿ di ní 'aara chi tiempo chi nguéé cuuvi diiⁿ di ní diiⁿ di. Caaⁿmaⁿ yuudu di caati 'iiⁿyāⁿ cuuvi cu'téenu yā. Ní caaⁿmaⁿ dí nanááⁿ 'iiⁿyāⁿ chi dinuuⁿndí yā chi 'āā ntéé dinuuⁿndí yā 'tíicā. Ní ca'a di consejo 'iiⁿyāⁿ, ní ca'cueeⁿ

di 'iiⁿyāⁿ. Ní diiⁿ di tanducuéⁿe ndúúccū n'dai, ní ca'cueeⁿ di nduū 'cuaaⁿ. ³'Tíicā diiⁿ di caati ndaa tiempo chi 'iiⁿyāⁿ nguéé caandiveéⁿ yā nduudu chí n'dai. Naati caⁿá yā in'nuúⁿ yā n'dee n'dái maestros chi ca'cueeⁿ yā 'iiⁿyāⁿ tan'dúúccā chi neⁿé yā caandiveéⁿ yā. Ní tan'dúúccā vaanicadíínuuⁿ yeⁿe maáⁿ yā 'tíicā neⁿe yā chi ca'cueeⁿ yā. ⁴Ní ndaacadaamí yā yeⁿe nduudu cuaacu ní nguéé caandiveéⁿ yā yeⁿe. Ní caandiveéⁿ yā cuentos chi nguéé n'daacā. ⁵Naati dii ní canee chi candéε di cuidado yeⁿe tanducuéⁿe dendu'ú tanducuéⁿe tiempo. Ní cuchéε di yeⁿe nducuéⁿe chi 'cueenu di cuuvi. Diiⁿ di ntiíⁿnyuⁿ yeⁿe Ndyuūs ní caaⁿmaⁿ di nduudu yeⁿe Ndyuūs chi diiⁿ chi nguaⁿāi 'iiⁿyāⁿ. Canéé chi diiⁿ di cumplir ntiíⁿnyuⁿ chi Ndyuūs tee yā dii.

⁶'Úú deenú chi ca'a vida yeⁿe cáávā Cristo ní 'iiⁿyāⁿ caⁿá yā caaⁿnuⁿ yā 'úú. 'Āā canéé ntiíⁿnyuⁿ nguuvi chi 'cuúví. ⁷Naati deenú chí dííⁿ ntiíⁿnyuⁿ yeⁿe tan'dúúccā 'áámá soldado chí idiiⁿ sa caandaá n'daacā. 'Tíicā dííⁿ. Ch'iiⁿú ntiíⁿnyuⁿ yeⁿe ní 'áámá canéé n'daacā ndúúccū chi i'teenú yeⁿe Ndyuūs. ⁸Cáávā chuū cunee ngiinú 'aama corona chi Señor Jesucristo chí juez chí diiⁿ nducuéⁿe chí cuaacu, caⁿá yā chí tée yā 'úú ndúúccū 'iiⁿyāⁿ chí yeⁿe yā, 'iiⁿyāⁿ s'eeⁿ chí n'daacā idííⁿ yā. 'Tíicā cuuvi nguuvi chí Cristo ndaa yā taama vmnéⁿēe. Ní nguéé tée yā corona dámaāⁿ 'úú naati ca'a yā corona nducyáácā 'iiⁿyāⁿ chí neⁿé yā Jesucristo ní cūnee ngiinú yā Jesucristo ní neⁿé yā chí ndaa Jesucristo taama vmnéⁿēe.

**Pablo ca'á yā instrucciones
ca'áamá cā'aama 'ii''yā'**

⁹Dii, Timoteo, dii' n'úú' yii''nu di chi chií di n'diichi di 'úú. ¹⁰Sa''ā Demas mii' ní ndaacadaamí sá ye''e 'úú caati ne''e ca sa cosas chi véé i''yee'dí 'cūú ní che''ē sa yáā' Tesalónica. Sa''ā Cresente che''ē sa yá''ā Galacia ní sa''ā Tito che''ē sa yá''ā Dalmacia. ¹¹Dámaā' Lucas canee sa nduucú maa'. Ní yaa'vi di Marcos chi ca''a sa ndúú'cū dii. Ní candēē di sá''ā ndúú'cū di caati Marcos cuuvi cunnee ca sá 'úú na nti''nyu' chi dí'. ¹²'Úú 'āā dicho'ó sa''ā Tíquico na yáā' Efeso. ¹³Ní taachi cuchii di, nandéē di cotón ye''é chi s'neé' na vaacu sa''ā Carpo na yáā' Troas. Nandéē di ntúú' libros ye''é ndúú'cū caaca chi ne''e nii''nyú'.

¹⁴Sa''ā Alejandro chí 'viichi cūú ní nééné n'deeé cosas chi nguéé n'daacā dii' sa nduucú. Ndyuūs ca''á yā nadí'Ve yā sa''ā caavā tanducué''ē chi nguēē n'daacā dii' sa nduucú. ¹⁵Cundéē di cuidado ye''e sa''ā mii' caati neené taa' nga''a sa ye''e chi ngi'cuee' yú ti contra ye''e chi ngi'cuee' yú.

¹⁶Vmnaá' vmnaa' taachi 'úú che''é nanaa' juez mar 'áámá 'ii''yā' nguéé che''e yā nduucú naati nducyaaca 'ii''yā' diví yā ye''e 'úú. 'Úú ngiicá nanáá' Ndyuūs chi nadach'ēccú yā nuu''ndi ye''e 'iis'tií. ¹⁷Naati Señor nginneé yā 'úú ní teé yā fuerzas 'úú cáávā chi 'úú ngii nga''á nduudu cuaacu ye''é yā nanáá' 'ii''yā' chi nguéé

ye''ē ndaata 'ii''yā' Israel, nduudu chi dii' chi nngua''āi 'ii''yā'. Ní 'íicú nducué''ē 'ii''yā' s'ee' cuuvi 'caandiveé' yā nduudu cuaacu ye''é Ndyuūs. Ní 'tíicā Señor ye''e yú nadanguá''ai yā 'úú ye''e 'ii''yā' s'ee'. Ní chuū ní tan'dúú'cā chi ninguá''ai yā 'úú ye''e cheendi 'yáí'yāa' cuá'āa. 'Tíicā dí' yā nduucú. ¹⁸Níicú Señor Jesucristo ní nadangua''ai yā 'úú ye''e tanducué''ē cosas chi nguēē n'daacā chi 'ii''yā' ne''é yā dii' yā nduucú. Ní Señor Jesucristo candēē yā cuidado ye''e vida ye''é chi cuuvi na''á na va'ai chēeti nguuvi naachi nga''a nti''nyú' yā. Señor Jesucristo mii' ní dich'ēete yú 'ii''yā' cue''e daā''ma'. 'Tíicā.

**'Cuiinū carta ndúú'cū saludos
ndúú'cū vaadi n'dai ye''e Ndyuūs**

¹⁹Lado ye''é: N'dái yā nga''á, caa''ma' di ta''ā Prisca ndúú'cū isa''ā tá chi Aquila ndúú'cū 'ii''yā' ye''e familia ye''e sa''ā Onesíforo. ²⁰Sa''ā Erasto canee sá na yáā' Corinto. Ní sa''ā Trófimo chi ngiitā sa, 'úú s'neé' sa''ā na yáā' Mileto. ²¹Maa' ní dii' n'úú' yii''nu di cuchii dí n'diichi di 'úú taachi 'āā 'cuéé ndaa tiempo chi 'iiche. Sa''ā Eubulo ndúú'cū sa''ā Pudente ndúú'cū sa''ā Lino ndúú'cū n'daataá Claudia ndúú'cū nducyaaca vi' yú: N'dái ndís'tií nga''á yā.

²²Ne''é chi Señor Jesucristo ye''e yú canee yā ndúú'cū dii hermano ye''é níicú Ndyuūs téé yā dii ye''é nducué''ē chi n'dai ye''é yā. 'Tíicā cuuvi.

CARTA YEⁿ'E SAⁿĀ TITO

1 'Úú Pablo chi apóstol yeⁿ'é Señor Jesucristo ní díⁿ ntiiⁿnyuⁿ yeⁿ'é Ndyuūs. Ndyuūs dichó'o yā 'úú chi cuuvi inneé 'iiⁿyāⁿ s'eeⁿ chi Ndyuūs nndεεve yā chi cuuvi yeⁿ'é yā 'iiⁿyāⁿ s'eeⁿ caati cu'teenu cá yā yeⁿ'e religión yeⁿ'e yú. ²Ní cūnee ngiinú yā ndúúcu s'uúúⁿ chi Ndyuūs téé yā vida cueⁿ'e daāⁿmaⁿ s'uúúⁿ chi Ndyuūs caⁿ'a yā chi ca'a yā 'iiⁿyāⁿ chi yeⁿ'e yā vmnááⁿ vmnaaⁿ chi 'āā cuéé cūnee iⁿ'yeeⁿdí 'cūū. Ndyuūs miiⁿ ní nguéé cuuvi caaⁿ'máⁿ yā nduudu yaadi. ³Ní taachi ndaa tiempo chi neⁿ'e Ndyuūs, Ndyuūs chiⁿ'i yā nduudu cuaacu yeⁿ'é yā cucáāvā 'iiⁿyāⁿ chi ngaⁿ'a nduudu cuaacu yeⁿ'é yā. Maaⁿ ní Ndyuūs yeⁿ'e yú chi nadanguáⁿ'ai yā s'uúúⁿ dichó'o yā 'úú chi ngaⁿ'á nduudu cuaacu yeⁿ'é yā. ⁴Maaⁿ ní dingúúⁿ carta 'cūū yeⁿ'é dii, Tito. Ni cuaacu níⁿ'nyúⁿ díⁿ ní tan'dúúcā daiyá chi ngaⁿ'á nduudu cuaacu nanááⁿ dii, nduudu chi i'teenu yú. Neⁿ'é chi Ndyuūs chiida yú ndúúcu Señor Jesucristo yeⁿ'e yú chi nadanguáⁿ'ai yā s'uúúⁿ itéé yā dii nducuéⁿ'ē chi n'dai taavi yeⁿ'é yā ní ya'ai i'inu yā dii. Ní tan'dúúcā chi ya'ai i'inú Ndyuūs 'iiⁿyāⁿ 'tiicā ntúūⁿ diiⁿ di. Ní Ndyuūs téé yā dii vaadi 'diifⁿ yeⁿ'é yā.

Ntiiⁿnyuⁿ yeⁿ'e Tito na yáⁿ'āa Creta

⁵Ní cáāvā ntiiⁿnyuⁿ chi canee chi diiⁿ di 'úú chi'neéⁿ dii na isla Creta. Canéé chi dicuaacú di cosas chi nguεε n'daacā. Ní cu'neeⁿ dí 'iiⁿyāⁿ n'gεεε chi ngaⁿ'a ntiiⁿnyúⁿ yā yeⁿ'ē nducuéⁿ'ē yaācū na 'áámá 'áámá ciudad. 'Úú dichó'o dii chi diiⁿ di ntiiⁿnyuⁿ 'cūū. ⁶Ní 'iiⁿyāⁿ chi ndεεve dí canee chi 'cuεetinéé n'daaca yā manera chi nguéé cuuvi caaⁿ'maⁿ tanáⁿ'ā 'iiⁿyāⁿ chi véé nuuⁿndi yeⁿ'é yā. Ní véé 'áámá nūūⁿ n'daataa yeⁿ'e yā. Ní daiyá yā canéé chí i'téénu yā Ndyuūs, ní nguéé da'caiyāa chi travieso yā chi nguéé n'daacā idiiⁿ yā, ní nguéé da'caiyāa chí yaadi'yāa. ⁷'Iiⁿyāⁿ chi díⁿ yā ntiiⁿnyuⁿ yeⁿ'é Ndyuūs canee chi candeé yā cuidado yeⁿ'e ntiiⁿnyuⁿ yeⁿ'é Ndyuūs. Ní cáāvā chuū 'iiⁿyāⁿ s'eeⁿ canee chi 'cuεetinéé n'daaca yā. Nguéé cuuvi 'iiⁿyāⁿ chi necio yā, ní nguéé 'iiⁿyāⁿ chi nduuvi taáⁿ yā, ndíí nguéé ndúú 'iiⁿyāⁿ chi ngii cuu'ví yā va ní in'nuuⁿ yā vaadi 'caa'va. Ní nguéé cuuvi 'iiⁿyāⁿ chi neⁿ'é yā diiⁿ yā ganar tuūmī cáāvā ntiiⁿnyuⁿ chi díⁿ yā chi nguéé n'daacā. ⁸Naati 'tíicā canee chi díⁿ yā. Canéé chi díⁿ yā recibir na

vaacú yā 'iiⁿyāⁿ chi canúⁿ yúⁿí. Canéé chi neⁿe yā chi dinⁿdaaca yā ní nⁿdaacā nadacadíⁿnuuⁿ yā yeⁿe nducuéⁿē chi caⁿá yā diⁿ yā, ní diⁿ yā chiⁿ chi cuaacu. Ní dēēve vida yeⁿe yā, ní nguéé canee chi taamá yā ca'a yā consejo 'iiⁿyāⁿ. ⁹Ní cundéé nⁿdaaca yā nduudu cuaacu yeⁿé Ndyuūs chi chⁿééⁿ yā ní 'túicā cuuvi caⁿcueéⁿ yā nduudu cuaacu miⁿ. Ní cuuvi diⁿ yā cuchéé yā ndúúⁿcū 'iiⁿyāⁿ chi contra yeⁿe nduudu cuaacu ní cuuvi chⁿiⁿí yā 'iiⁿyāⁿ sⁿeeⁿ chi nduudu cuaacu miⁿ ní cuaacu.

¹⁰Neene nⁿdáí 'iiⁿyāⁿ nguaaⁿ 'iiⁿyāⁿ judíos sⁿeeⁿ nguéé neⁿe yā cuⁿtéénu yā nduudu cuaacu miⁿ. 'iiⁿyāⁿ sⁿeeⁿ ngaⁿá yā cosas chi nguéé dichííⁿvē ní nginncheⁿéí yā 'iiⁿyāⁿ. ¹¹Canee chi diⁿ yú chi 'iiⁿyāⁿ sⁿeeⁿ nguéé cuuvi candēē yā nduudu yeⁿé yā caati ndástaⁿá yā vaadi cadíⁿnūⁿ yeⁿé 'iiⁿyāⁿ. Ní diⁿ yā chi nducyaaca 'iiⁿyāⁿ yeⁿe 'áámá va'āi yeⁿé táámá va'āi cuⁿtéénu yā nduudu yeⁿé yā. Ní ngiⁿcueéⁿ yā cosas chi nguéé nⁿdaacā cucáávā chi neⁿé yā diⁿ yā ganar tuūmí manera chi nguéé nⁿdaacā.

¹²Ní 'áámá saⁿā yeⁿe isla Creta chi profeta yeⁿe yāāⁿ miⁿ ngaⁿa sa 'túúⁿcā yeⁿe 'iiⁿyāⁿ yeⁿe yāāⁿ vaacú sa. Ngaⁿa sa chi 'iiⁿyāⁿ yeⁿe yāⁿāa Creta ní nééné yaadí yā, ní nééné tááⁿ yā, ní nééné 'daanⁿdí yā, ní nééné nⁿdeēe nge'e yā. ¹³Ní saⁿā miⁿ ní ngaⁿa sa nduudu cuaacu yeⁿe 'iiⁿyāⁿ. Níicú cáávā chuū canee chi yaaⁿvi dí 'iiⁿyāⁿ sⁿeeⁿ ndúúⁿcū nduudu chēēchi caati cuuvi cuⁿtéénu nⁿdaacá yā nduudu cuaacu miⁿ. ¹⁴Ní nguéé diⁿ yā cuenta yeⁿe nduudu yeⁿe 'iiⁿyāⁿ judíos

chi nginncheⁿéí yā 'iiⁿyāⁿ ndúúⁿcū nduudu chi maáⁿ yā nadacadíⁿnuuⁿ yā ní ngaⁿa yā. Ndíí nguéé nⁿgiindiveéⁿ yā orden chi ngaⁿa 'iiⁿyāⁿ sⁿeeⁿ chi ndaacadaamí yā yeⁿé nduudu cuaacu yeⁿé Ndyuūs.

¹⁵Ní 'iiⁿyāⁿ chi Ndyuūs didēēvē yā staava yeⁿé yā chí dēēve nacadíⁿnuuⁿ yā dámaāⁿ yeⁿe denduⁿū chi dēēve ní sta'á yā nducuéⁿē tanⁿdúúⁿcā chi dēēve. Naati 'iiⁿyāⁿ chi nguéé iⁿtéénu yā Ndyuūs nadacadíⁿnuuⁿ yā yeⁿe cosas chi nguéé nⁿdaacā. Ní mar 'áámá cosa ní nguéé dēēve yeⁿe 'iiⁿyāⁿ miⁿ. 'Tiicá ntúúⁿ ní vaanicadíⁿnūⁿ yeⁿé yā ní nguéé dēēve. Ní nducuéⁿē chi véé na staava yeⁿé yā ní nguéé dēēve. Ndíí nguéé ndúú chi inadacádíⁿnuuⁿ yā chí dēēve. ¹⁶'iiⁿyāⁿ sⁿeeⁿ ngaⁿa yā chi nⁿdiichí yā Ndyuūs naati denduⁿū chi diⁿ yā chⁿiⁿí chi nguéé cuaacu. 'iiⁿyāⁿ sⁿeeⁿ nguéé neⁿé yā 'iiⁿyāⁿ ní nguéé neⁿé yā diⁿ yā chi ngaⁿa 'iiⁿyāⁿ. Nguéé nⁿdaacā yā. Ní nguéé dichííⁿvē chi diⁿ yā mar 'áámá cosa chi nⁿdaacā.

Canéé chi caⁿcueeⁿ di denduⁿū chi cuaacu

2 Díí, Tito, nducuéⁿē chi caaⁿmaⁿ di canee chi caaⁿmaⁿ di ndúúⁿcū nduudu cuaacu yeⁿé Ndyuūs. ²Yaaⁿvi di saⁿā ndiicúⁿ chi ngaⁿa ntiⁿnyuⁿ yeⁿe yaacū naachi 'iiⁿyāⁿ iⁿtéénu yā Jesucristo chi canéé chí serio yā. Ní canéé chí nadacádíⁿnuuⁿ yā nⁿdai ní nguéé diⁿ yā denduⁿū chi nguēē nⁿdaacā. Canéé chi cuⁿtéénu yā dámaāⁿ nduudu cuaacu yeⁿé Ndyuūs ní dinéⁿe yā nducyaaca 'iiⁿyāⁿ. Ní canéé chi cuchéé yā yeⁿe nducuéⁿē

ndúúcū paciencia. ³Tiicá ntúūⁿ yaa'vi di n'daataa s'eeⁿ chi ngeⁿe yā na yaacū yeⁿé 'iiⁿyā chí i'téenu yā Jesucristo chi 'cuëtinéé n'daaca yā tan'dúúcā 'iiⁿyāⁿ ðeeve chi yeⁿé Ndyuūs. Nguéé caaⁿmáⁿ yā yeⁿé mar 'áámá 'iiⁿyāⁿ chí nduudu yaadi ní nguéé cuu'ví yā va. Ní canee chi diiⁿ n'daacá yā caati tanáⁿā 'iiⁿyāⁿ cuuvi cuta'á yā ejemplo yeⁿé n'daataa s'eeⁿ. ⁴Ní 'íicú cuuvi ca'cueéⁿ yā tanáⁿā n'daataa da'cáiyā tan'dúúcā chi canéé chi dinéⁿe yā isaⁿā yeⁿé yā ní dinéⁿe ntúūⁿ yā daiya yā. ⁵Ní n'daataa s'eeⁿ cuuvi nadacadíinuuⁿ yā chεe chi n'daacā ní diiⁿ yā chuū. Ní diiⁿ yā nducuéⁿē chi neⁿe Ndyuūs. Ní din'dai cá yā na vaacú yā ní n'giindiveéⁿ yā isaⁿā yeⁿe yā. 'Tíicā ní mar 'áámá 'iiⁿyāⁿ nguéé cuuvi cunncaā caaⁿmaⁿ yā yeⁿé nduudu yeⁿé Ndyuūs.

⁶Tiicá ntúūⁿ yaa'vi di saⁿā n'gaiyā chi nadacadíinuuⁿ yā n'daacā vmaaⁿ chi diiⁿ yā ðe'ē vεε. ⁷Ní díí, Tito, diiⁿ di n'daacā nducuéⁿē chi diiⁿ di ní 'íicú 'iiⁿyāⁿ cuuvi cuta'á yā vida yeⁿé di tan'dúúcā 'áámá ejemplo. Ní taachi ca'cueeⁿ di 'iiⁿyāⁿ, diiⁿ di ndúúcū núúⁿmáⁿ staava yeⁿé di ní canee di serio di. ⁸Ní ca'cueeⁿ di ndúúcū nduudu chi n'daacā ní 'iicu mar 'áámá 'iiⁿyāⁿ nguéé cuuvi caaⁿmáⁿ yā ðe'ē vεε yeⁿe chi ngaⁿa di. Ní 'iiⁿyāⁿ chi contra yeⁿé di cuuvi 'cuinaáⁿ yā caati nguéé cuuvi caaⁿmáⁿ yā mar 'áámá contra yeⁿé di.

⁹Ní yaa'vi dí 'iiⁿyāⁿ chi 'áámá canee chi diiⁿ yā ntiiⁿnyuⁿ, canéé chi n'giindiveéⁿ yā nducuéⁿē yeⁿé

'iiví yā. Ní cunee yiinú yā yeⁿe nducuéⁿē yeⁿé 'iiví yā. Ní nguéé canee chi nguεcútaⁿá yā yeⁿe 'iivi yā. ¹⁰Ní nguéé canéé chi diduucú yā yeⁿé 'iivi yā naati canee chi diiⁿ n'daacá yā ndúúcū 'iivi yā ní ch'i'í yā chí dámaaⁿ diiⁿ yā cosas chí n'daacā cáávā 'iivi yā. Ní 'íicú ndúúcū nducuéⁿē chí diiⁿ yā cuuvi ch'i'í yā 'iivi yā ní 'iiví yā cuuvi caaⁿmaⁿ n'daacá yā yeⁿe nduudu cuaacu yeⁿé Ndyuūs chí nanguaⁿāi yú.

¹¹Ndyuūs ch'i'í yā chí díneⁿe yā nducyaaca 'iiⁿyāⁿ. Ní ch'i'í yā vaadi n'dai taavi yeⁿé yā caati cuuvi nadanguáⁿai yā nducyaaca 'iiⁿyāⁿ. ¹²Níicú vaadi n'dai taavi yeⁿé Ndyuūs ngi'cueeⁿ s'uúúⁿ chí canee chí divíi yú yeⁿe nducuéⁿē chí nguε n'daacā ndúúcū nducuéⁿē vicio chí véé iⁿ'yeeⁿdí 'cūū chí neⁿe yú diiⁿ yú. Ní canee chí nadacadiinuuⁿ yú n'daacā yeⁿe nducuéⁿē vnnááⁿ chí diiⁿ yú. Ní 'cuëtinéé n'daaca yú ní diiⁿ yú tanducuéⁿē chí neⁿe Ndyuūs 'naaⁿ chí canee yú iⁿ'yeeⁿdí 'cūū. ¹³Ní vaadi n'dai taavi yeⁿé Ndyuūs ngi'cueeⁿ s'uúúⁿ chí 'cuëtinéé n'giiⁿnu yú nguuví ch'εete taachi Cristo dííⁿ yā cumplir nduudu chí ngaⁿa yā. Ní taama vnnéⁿē ndaa ntúūⁿ Jesucristo yeⁿe yú chí Ndyuūs chí ch'εete taavi ca chí nadanguáⁿai yā s'uúúⁿ. ¹⁴Ní ca'á yā vida yeⁿe maáⁿ yā chí ch'i yā cáávā s'uúúⁿ chí nadanguáⁿai yā s'uúúⁿ yeⁿe nducuéⁿē nuuⁿndi yeⁿé yú. Ní nadidεevé yā s'uúúⁿ yeⁿe nducuéⁿē nuuⁿndi chí diiⁿ yú chí cuuvi yeⁿé yā s'uúúⁿ. Ní 'íicú 'áámá cunee yú diiⁿ yú ntiiⁿnyuⁿ chí n'daacā.

¹⁵Nducuéⁿē chuū ní canee chi ca'cueeⁿ di. Ní ca'a di orden ti dii tan'dúucā 'iiⁿntyéⁿē dii. Cunnee di 'iiⁿyāⁿ chi dí'vaachí yā. Ca'a di consejo 'iiⁿyāⁿ chi nguεε n'daacā idiiⁿ yā. Din'daacá di yeⁿe nducuéⁿē caati mar 'áámá 'iiⁿyāⁿ cuuvi cunncaā caaⁿmáⁿ yā yeⁿē di.

Yeⁿe chi canéé chi diiⁿ 'iiⁿyāⁿ chi i'téenu yā Señor Jesucristo yeⁿe yú

3 Cúuví dí 'iiⁿyāⁿ chi i'téenu yā Señor Jesucristo chi n'gaacu yā chí canéé maaⁿ poder yeⁿe gobernador ndúucū tanáⁿā 'iiⁿntyéⁿē ní canee chi n'giindiveeⁿ yā yeⁿe yā. Ní āā vεε yaáⁿ yā chi dííⁿ yā nducuéⁿē ntiíⁿnyuⁿ chi n'daacā. ²Ní nguéé canéé chi caaⁿmaⁿ taaⁿ yā yeⁿe mar 'áámá 'iiⁿyāⁿ. 'Tíicā canee chi 'cuεetinéé 'dííⁿ yā ndúucū 'iiⁿyāⁿ ní din'dai yā ndúucu yā. Ní canéé chí ch'iⁿi yā tanáⁿā 'iiⁿyāⁿ ndúucū tanducuéⁿē chi dííⁿ yā ndúucu yā chi maaⁿ yā ndiicuuⁿ yā.

³Tiicá ntúūⁿ s'uuúⁿ tiempo chi chóo taachi tonto yú ní nguéé n'giindiveeⁿ yú nduudu yeⁿé Ndyuūs ní nguéé n'daacā idiiⁿ yú. Ní canee yú tan'dúucā saⁿa esclavo caati yeⁿe chi neⁿe cuerpo yeⁿe yú ní diiⁿ yú ndúucū nducuéⁿē vicio yeⁿe chi véé, 'tíicā diiⁿ yú. Ní diiⁿ taáⁿ yú, ní neⁿe ca yú cosas tan'dúucā chi véé yeⁿē tanáⁿā 'iiⁿyāⁿ. Ní nguéé neⁿe yú 'iiⁿyāⁿ. Ndíí nguéé ndúú neⁿé yā s'uuúⁿ. Ní nguéé neⁿe yú 'aama yú taama yú. ⁴Naati taachi Cristo chi n'dai taaví yā ní neⁿé yā nducyaaca 'iiⁿyāⁿ ndaa yā nanáaⁿ yú, Cristo chi nadanguáⁿai yā s'uuúⁿ, ⁵tuu'mi

ní nadanguáⁿai yā s'uuúⁿ. Nguéé nadanguáⁿai yā s'uuúⁿ cáávā chi diiⁿ yú cosas chi n'daacā naati caati ya'āi 'iinú yā s'uuúⁿ ní nadanguáⁿai yā s'uuúⁿ caavā chi naaⁿnú yā s'uuúⁿ. Ní chuū neⁿe caaⁿmaⁿ chi ch'iindiyaaⁿ yú ndúucū vida ngai cucáávā Espíritu N'dai yeⁿé Ndyuūs. Ní Espíritu miiⁿ tee yā s'uuúⁿ 'áámá vida chí ngāi. ⁶Ní 'tíicā cuuvi cucáávā Señor Jesucristo yeⁿe yú chi nadanguáⁿai yā s'uuúⁿ, Ndyuūs tee yā núúⁿmáⁿ ch'εεte Espíritu N'dai yeⁿe yā s'uuúⁿ. ⁷Ní cucáávā Ndyuūs ca'á yā nducuéⁿē chi n'dai yeⁿé yā, dííⁿ yā chi s'uuúⁿ nguεε 'iiⁿyāⁿ nuuⁿndi yú nanáaⁿ yā ti didεεvé yā s'uuúⁿ. Ní maaⁿ ní diiⁿ yā aceptar s'uuúⁿ ní ca'á yā chi tée yā s'uuúⁿ vida cueⁿe daāⁿmaⁿ chi cuuvi yeⁿe yú. Ní cunee ngiiⁿnuⁿ yú vida 'cūū chi cuuvi yeⁿe yú.

⁸Nduudú 'cūū chi ngaⁿá ní nduudu cuaacu ní 'áámá cūnee. Neⁿé chi diitū cunee di ndúucū nduudu 'cūū ní diitu caaⁿmaⁿ di va. Ní 'íicú nduudú 'cūū cūnee 'iiⁿyāⁿ chi i'téenu yā Ndyuūs, ní 'iiⁿyāⁿ s'eeⁿ caⁿá yā diiⁿ yā ntiíⁿnyuⁿ chí n'daacā. Nduudú 'cūū ní n'daacā ní dichíí'vε 'iiⁿyāⁿ. ⁹Nguéé cu'neeⁿveeⁿ di nduudu chi nguéé dichíí'vε chi n'dee n'dái chi n'guεεcútaⁿā 'iiⁿyāⁿ. Ní nguéé cu'neeⁿveeⁿ ca di nduudu chi canéé nguūⁿ yeⁿe 'iiⁿyāⁿ yeⁿe ndaata yeⁿe di. Ndíí nguéé ndúú cu'neeⁿveeⁿ di yeⁿe 'iiⁿyāⁿ chi nguúⁿ yā yeⁿē nduudu yeⁿe ley. Nduudú 'cūū nguéé dε'ε vεε ní nguéé dichíí'vε. Naati cu'neeⁿveeⁿ cá di nduudu cuaacu yeⁿé Ndyuūs.

¹⁰Nduuti chi 'áámá 'iiⁿyāⁿ dííⁿ yā chi véé divisiones nguaaⁿ 'iiⁿyāⁿ

yeⁿe yaācū yeⁿe 'iiⁿyāⁿ chi i'téenu yā Cristo, yaa'vi di 'iiⁿyāⁿ miiⁿ 'áamá cuuvi o 'uūvi cuuvi. Ní ndúúti chi nguéé n'giindiveéⁿ yā yeⁿe di tuu'mi ní tun'dáa di 'iiⁿyāⁿ miiⁿ yeⁿe yaācū. ¹⁴Deenu di chi 'iiⁿyāⁿ miiⁿ nguéé n'daacā vaanicadínūⁿ yeⁿe yā ní dinuuⁿndí yā. Ní nuuⁿndí chi díⁿ yā ní caaⁿmaⁿ chi condenado yā.

**Pablo ca'cueéⁿ yā Tito yeⁿe
chi canee chi díⁿ yā**

¹²Taachi dicho'ó hermano Artemas o hermano Tíquico nanááⁿ di, diiⁿ di chi diiⁿnúúⁿ yiiⁿnu di chiī di naachi canee na yáāⁿ Nicópolis caati neⁿé cūneé yáāⁿ miiⁿ tiempo chi 'iiche. ¹³Cunnee di Zenas chi abogado ndúúcū Apolos chi caⁿá yā na

yúúni. Ní ca'a di 'iiⁿyāⁿ s'uuⁿ nducuéⁿe necesidades yeⁿe yā cáāvā viaje yeⁿe yā caati nguéé diiⁿ yā falta mar 'áamá. ¹⁴Ní yaa'vi di hermanos yeⁿe yú chi i'téenu yā Jesucristo chí 'cueeⁿ yā taacā chi canee chi din'daacā yā nducuéⁿe tiempo ní cunnee yā 'iiⁿyāⁿ chi véé necesidades yeⁿe yā caati 'tíicā dichí'vē vida yeⁿe yā.

**'Cuiinū carta ndúúcū saludos
ndúúcū vaadi n'dai yeⁿe Ndyuūs**

¹⁵Nducyaaca hermanos chi snée yā nduucú: N'dai dii, ngāⁿ'a yā. Ní díí ngāⁿ'a di: N'dai yā, nducyaaca 'iiⁿyāⁿ chi i'téenu yā Ndyuūs, hermanos chi dineⁿe yú 'iiⁿyāⁿ. Neⁿé chi Ndyuūs téé yā ndís'tiī nducuéⁿe chi n'dai taavi yeⁿe yā. 'Tíicā cuuvi.

CARTA YEⁿE SAⁿĀ FILEMÓN

¹Úú Pablo, saⁿā chi canuúⁿ vácūū cáávā chi dííⁿ ntiíⁿnyuⁿ yeⁿē Jesucristo. Úú ndúúⁿcū hermano Timoteo idingúⁿ 'nū carta 'cūū yeⁿē dii Filemón chi nééné neⁿe 'nū dii compañero yeⁿe yú ví'ī chi dáámá idiíⁿ yú ntiíⁿnyuⁿ ndúúⁿcū ví'ī. ²Ní idinguúⁿ yeⁿe 'iiⁿyāⁿ chi yeⁿe yaācū chi nduuvidaamá yā ná vaacu di ní yeⁿē hermana Apia ní yeⁿē hermano Arquipo chi diiⁿ sa luchar nduucú 'nū na ntiíⁿnyuⁿ chi diiⁿ 'nū. ³Neⁿé chi Ndyuūs chiida yú ndúúⁿcū Señor Jesucristo téé yā ndís'tií nducuéⁿē dendu'ū chi n'dai taavi yeⁿé yā ndúúⁿcū vaadí 'diíiⁿ.

Filemón dinéⁿe yā 'iiⁿyāⁿ ni i'téenu yā Ndyuūs

⁴Cueⁿe daāⁿmaⁿ 'úú ca'á gracias Ndyuūs taachi n'gaacú yeⁿe di 'naaⁿ chi ngaⁿ'ānguá'á. ⁵Caati hermanos yeⁿe yú ngaⁿ'a yā yeⁿe di tan'dúúⁿcā chi neⁿe di Señor Jesucristo yeⁿe yú ndúúⁿcū nducyaaca 'iiⁿyāⁿ chi yeⁿé Jesucristo, ní tan'dúúⁿcā chi i'téenu di Señor Jesucristo. ⁶Úú ngiicá Ndyuūs caava 'iiⁿyāⁿ chi i'téenu yā caati candē di nduudu cuaacu yeⁿé Jesucristo nanáⁿ yā. Ní ngiicá chi cuuvi tuumicadínuuⁿ yā yeⁿe tanducuéⁿē chi n'daacā chi

Jesucristo itée yā s'uuúⁿ. ⁷Ní 'úú yeenu taavi ní véé 'viich'etínūⁿ yeⁿé caati dinéⁿe di nducyaaca 'iiⁿyāⁿ. Ní ca'la di consuelo 'iiⁿyāⁿ chi i'téenu yā Ndyuūs.

Pablo ngiicá yā 'áamá favor caavā esclavo Onésimo

⁸Áará chí cuuví dicho'ó orden yeⁿē di caati 'úú apóstol 'úú chí candéé nduudu yeⁿé Ndyuūs, ⁹naati neⁿé di'cuiitú dii cucáávā chi neⁿe yú Cristo. Úú Pablo 'āā ndiicúú maaⁿ ní canuúⁿ vácūū cucáávā chi dííⁿ ntiíⁿnyuⁿ yeⁿe Cristo. ¹⁰Ní ngiicá 'áamá favor caavā Onésimo chi tan'dúúⁿcā daiyá cucáávā chi i'téenu sa nduudu cuaacu yeⁿé Ndyuūs chi 'úú ngaⁿ'á taachi canuúⁿ vácūū.

¹¹Tiempo chi chó'oo sáⁿ'a 'cūū 'áamá esclavo yeⁿē di. Ní chéenu sa yeⁿē di. Ní nguéé de'ē vee dichí'vē sa dii naati maaⁿ ní dichí'vē sa dii tan'dúúⁿcā chi dichí'vē sa 'úú. ¹²Úú dicho'ó sáⁿ'a 'cūū nanááⁿ dii. Dii ní 'cuáaⁿ di sáⁿ'a 'cūū tan'dúúⁿcā chi maáⁿ 'úú. ¹³Úú neⁿé chi cunee sa nduucú caati cuuvi sa dichí'vē sa 'úú lado yeⁿē di neⁿe chi canuúⁿ vácūū cucáávā chi idiíⁿ ntiíⁿnyuⁿ yeⁿé Ndyuūs. ¹⁴Naati nguéé de'ē vee

neⁿé chi a fuerza canee chi diiⁿ di nduuti chi nguéé neⁿe di. Naati neⁿé chi dii cunee yiinū di. Neⁿé chi diiⁿ di 'áámá favor nduucú, nguéé 'aama cosa chi d'cuuitú dii naati cosa chí maaⁿ di neⁿe di diiⁿ di. ¹⁵Nééné dīví sa yeⁿe di 'áámá tiempo nūuⁿ caati cuuvi cuta'a di saⁿá 'cūū chi dichí'vē sa dii cueⁿe daāⁿmaⁿ. ¹⁶Naati maaⁿ ní nguéé cuta'a di saⁿá 'cūū tan'dúúcā esclavo chi 'áámá cānee sa dichí'vē sa dii naati tan'dúúcā chi 'aama saⁿā n'daacā ca, nguéé ti 'aama esclavo caati maaⁿ ní Onésimo 'cūū 'áámá hermano yeⁿe yú chi neené neⁿé 'nū. 'Úú neⁿé taavi hermano Onésimo naati dii canee chi dinéⁿe taavi ca di saⁿā. Nguéé dámaāⁿ chi saⁿā esclavo naati chi hermano yeⁿe yú ti saⁿā miiⁿ ntūūⁿ ní yeⁿe Señor Jesucristo yeⁿe yú.

¹⁷Maaⁿ ní nduuti chi dii sta'a di 'úú chi compañero yeⁿe di tuu'mi ní 'cuuaⁿ di Onésimo tan'dúúcā chi 'úú nūuⁿ. ¹⁸Ní nduuti chi vεe chi nguεε n'daacā idiiⁿ sa ndúúcu di o nduuti chi can'dífcu sa yeⁿe di tuu'mi ní cu'neeⁿ dí cuenta yeⁿē 'úú. ¹⁹'Úú maáⁿ idinguúⁿ carta yeⁿe di ndúúcū ta'á ní ndúúcū letra yeⁿé. 'Úú nadii'vε yeⁿē di. Nguéé canee chi 'cuuví dii ti maaⁿ vida yeⁿē di can'diicu di yeⁿé

cáávā chi caⁿá nduudu cuaacu yeⁿē di. ²⁰Maaⁿ ní dii Filemón, d'cuíftu ca dii chi diiⁿ di favor 'cūū nduucú chi 'cuuaⁿ di Onésimo caati s'uuúⁿ hermanos yeⁿe yú vi'i cucáávā chi i'téenu yú Señor Jesucristo. Tée di 'viich'εεtínūⁿ na staava yeⁿé tan'dúúcā hermano yeⁿe yú vi'i chi yeⁿe Cristo.

²¹Maaⁿ ní idinguúⁿ yeⁿē di ti seguro cānee chi n'giindiveeⁿ di nduudu yeⁿé. 'Úú ní deenú chi idiiⁿ di ní n'daacā ca idiiⁿ di nguéé ti chi ngiicá dii. ²²Ní taachi 'úú ndaá cu'neeⁿ yaaⁿ di 'aama cuarto yeⁿé. Cunee ngiinú chi Ndyuūs caⁿá yā diiⁿ yā chiiⁿ chi ngaⁿangua'á ní cáávā 'úú ní Ndyuūs neⁿe yā chi chíí ní n'diichí ndís'tií.

'Cuiinū carta ndúúcū saludos ndúúcū vaadí n'dai yeⁿe Jesucristo

²³Saⁿā Epafras chi yeⁿe Jesucristo ní compañero yeⁿé ní canee sa vácūū nduucú: N'dai di, ngaⁿa sa. ²⁴Tiicá ntūūⁿ hermanos Marcos ndúúcū Aristarco ndúúcū Demas ndúúcū Lucas, hermanos chi diiⁿ yā dáámá ntiiⁿnyuⁿ nduucú: N'dai di, ngaⁿá yā.

²⁵Neⁿé chi Señor Jesucristo yeⁿe yú tée yā vaadí n'dai yeⁿé yā nducyaaca ndís'tií. 'Tíicā cuuvi.

CARTA YEⁿE 'IIⁿ'YĀⁿ HEBREOS

Ndyuūs dichó'o yā daiyá yā chi
caaⁿ máⁿ yā lado yeⁿé yā

1 Tiempo chi 'āā chó'ōo, Ndyuūs caⁿa yā n'deeē cūūví tiempo ndúúcu neenē n'deeē nááⁿ taachi profetas chi candéē yā nduudu yeⁿe Ndyuūs ngaⁿá yā lado yeⁿé yā. **2** Ní maaⁿ ní tiempo 'cūū Ndyuūs dichó'o yā daiyá yā Jesucristo chi ngaⁿá yā ndúúcu s'uuúⁿ. Ní Ndyuūs ndúúcu daiyá yā din'dái yā tanducuéⁿē chi véé ní Ndyuūs ca'á yā tanducuéⁿē chi yeⁿē daiyá yā. **3** Ní daiyá Dendyuūs miiⁿ ní ngíí n'gai yā yeⁿē chidēēvé n'dai yeⁿé Ndyuūs. Ní tan'dúúca Ndyuūs miiⁿ 'āā 'tiicá nūuⁿ daiyá yā. Daiyá yā ní ndúúcu nduudu chi ngaⁿa yā, dííⁿ yā chi tanducuéⁿē dendu'ū snéé na lugar yeⁿē. Ní cuayiivi chi daiyá yā dííⁿ yā chi nadach'ēcú yā yeⁿe 'iiⁿ'yāⁿ yeⁿe nuuⁿndi yeⁿé yā tuu'mi ní ch'iindí yā ná va'ai ch'ēeti nguuvi na lado tá cuaacú chiidá yā chi lado yeⁿe honor. Ndyuūs miiⁿ ní poder chi ch'ēete ca yeⁿē tanducuéⁿē poder.

**Daiya Ndyuūs ní ch'ēete
ca nguéé ti ángeles**

4 Ní daiya Dendyuūs ní neenē ch'ēete ca nguéé ti ángeles. Ní chi

duuchí yā ndúúcu chi véé yeⁿé yā ní neenē ch'ēete ca nguéé ti ángeles. **5** Caati mar 'áámá vmnéⁿēē nguéé caⁿa Ndyuūs ndúúcu mar 'áámá ángel tan'dúúca chi ngaⁿa yā ndúúcu daiyá yā Jesucristo:

Díí ní daiyá; maaⁿ ca'á vida
yeⁿé nī.

Ní nguéé caⁿa yā ndúúcu mar 'áámá ángel 'tíicā:

'Úú ní chiida di 'úú; niicu díí ní daiyá dii. **6** Ní taachi Ndyuūs dichó'o yā 'áámá n'dyaⁿā daiyá yā iⁿ'yeeⁿdí 'cūū ngaⁿa yā 'tíicā:

Nducyaaca ángeles yeⁿé Ndyuūs canéé chi dich'ēetē yā daiya Ndyuūs. **7** Ní Ndyuūs ngaⁿa yā yeⁿe ángeles yeⁿe yā 'tíicā:

'Úú dííⁿ chi ángeles yeⁿé ní tan'dúúca espíritu s'eeⁿ, 'tiicá yā. Ní dííⁿ chi ángeles dichíí'v yā 'úú. Ní tan'dúúca 'áámá nguuchi yaⁿā 'tíicā ángeles yeⁿé. **8** Naati Ndyuūs ngaⁿá yā yeⁿe daiya yā Jesucristo 'tíicā:

Dii Ndyuūs, trono yeⁿe di ní 'áámá cūnee. Ní ngaⁿa ntiⁿ'nyuⁿ di yeⁿē tanducuéⁿē ndúúcu vaadi cuaacu.

9 Dii ní neⁿe di cosas chi cuaacu, ní nguéé neⁿe di ch'ēe chi nguéé

cuaacu. Cucáávā chuū Ndyuūs yeⁿe di chí chiida di ní tee yā dii vaadi yeenu taavi nguéé ti ca'a yā 'iiⁿyāⁿ chí yeⁿé nī. ¹⁰Tiicá ntúūⁿ Ndyuūs ngaⁿa yā yeⁿe daiyá yā Jesucristo:

Díí, Señor, ndii cuááⁿ vmnaaⁿ s'núuⁿ di cimientó yeⁿe iⁿ'yeeⁿdí 'cūū, ní din'dái di nanguuvi ndúúⁿcū ta'a di.

¹¹Iⁿ'yeeⁿdi ndúúⁿcū nánguuví ní dí'cuiinu naati díí 'áámá cūnee di. Ní tanducuéⁿe chuū cuuvi ndiicūū tan'dúúⁿcā catecaí yú, 'tíicā ndiicūū.

¹²Ní dííⁿ nī n'cánnduu nī nducuéⁿe tan'dúúⁿcā 'iiⁿyāⁿ dííⁿ yā chí n'cánnduu yā catecaí yā. Ní n'ndaaⁿ di nducuéⁿe tan'dúúⁿcā 'iiⁿyāⁿ n'ndaaⁿ yā catecaí yā. Naati dii Jesucristo daiyá Ndyuūs 'āā daamá nūuⁿ canee di nduuyu nduuyu. Ní 'áámá cūnee di cueⁿe daāⁿmaⁿ. ¹³Ndyuūs nguéé caⁿ'á yā mar 'áámá ángel mar 'áámá vmnéⁿe tan'dúúⁿcā chí ngii yā daiyá yā Jesucristo 'tíicā:

'Cuūndi di lado ta cuaācū ndíí 'úú dííⁿ chí nducyaacá yā chí taáⁿ yā yeⁿe di canee yā maaⁿ ca'a di tan'dúúⁿcā 'áámá banco 'líf 'tíica yā chí cheé dí yeⁿé yā.

¹⁴Nducyaacá ángeles ní espíritu s'eeⁿ chí dííⁿ yā ntiiⁿnyuⁿ yeⁿé Ndyuūs. Ní Ndyuūs dich'óo yā ángeles chí innee yā 'iiⁿyāⁿ na iⁿ'yeeⁿdí 'cūū chí Ndyuūs nadinguáⁿai yā.

Canéé chí dííⁿ yú cuidado yeⁿe chí Ndyuūs nadanguáⁿai yā s'uuúⁿ

2 Ní cucáávā chí Cristo nadanguáⁿai yā s'uuúⁿ canéé

chí candee yú cuidado yeⁿé nduudu cuaacu chí n'giindiveeⁿ yú ti nguéé i'neeⁿ yú cucáávā nduudu chí n'ndaaⁿ ní maaⁿ ní nguéé caⁿ'a yú táámá yúúⁿi. ²Nduudu cuaacu chí 'āā ngaⁿ'a ángeles ní nduudu chí ch'iⁿi nanááⁿ 'iiⁿyāⁿ chí cuaacu ní'nyúⁿ chí nduudu cuaacu. Ní 'iiⁿyāⁿ chí nguéé n'giindiveeⁿ yā nduudu cuaacu miiⁿ ní véé nuuⁿndi yeⁿé yā 'āā cūnee yā na castigo caati 'tíicā cuuvi. ³Ní maaⁿ ní 'táácā cuuví nanguaⁿ'āi s'uuúⁿ yeⁿe castigo nduuti chí nguéé dííⁿ yú cuidado yeⁿe chí nadanguáⁿai yā s'uuúⁿ? Vmnááⁿ vmnaaⁿ Señor Jesucristo ngaⁿ'á yā chí nadanguáⁿai yā 'iiⁿyāⁿ. Cuayiivi miiⁿ ní 'iiⁿyāⁿ chí ch'iindiveeⁿ yā nduudu miiⁿ dííⁿ yā chí'í yā s'uuúⁿ ndúúⁿcū pruebas chí nduudu miiⁿ ní nduudu cuaacu. ⁴'Tiicá ntúūⁿ tiempo maaⁿ Ndyuūs chí'í yā s'uuúⁿ chí cuaacu chí nduudu miiⁿ ní cuaacu caati dííⁿ yā señas ndúúⁿcū vaadi n'giinu chí ch'εεε. Ní chí'í yā poder yeⁿé yā ní dííⁿ yā milagros. Ní ca'a yā n'dee n'dái ntiiⁿnyuⁿ yeⁿé Espiritu N'dai yeⁿé yā 'iiⁿyāⁿ chí yeⁿe yā caati 'tíicā neⁿé yā dííⁿ yā.

Jesucristo ch'iindiyáaⁿ yā tan'dúúⁿcā 'áámá saⁿ'ā yeⁿe iⁿ'yeeⁿdí

⁵Ndyuūs nguéé cuuvi s'neéⁿ yā chí ángeles miiⁿ ngaⁿ'á yā ntiiⁿnyuⁿ yeⁿe iⁿ'yeeⁿdí chí cuayiivi caⁿ'á yā din'dái yā. Ní yeⁿe iⁿ'yeeⁿdí miiⁿ chí'í chí ngaⁿ'a yú. ⁶Nguéé dííⁿ yā 'tíicā. Ná libro yeⁿe Ndyuūs chí canéé nguūⁿ ní 'áámá yā ngaⁿ'a yā 'tíicā:

N'dii, Ndyuūs, 'dédé chí saⁿ'ā s'eeⁿ chí snéé na iⁿ'yeeⁿdí 'cūū

chi nan'gaacu nī yeⁿē sa?
 ¿Déē chi saⁿā s'eeⁿ chi snēē
 na iⁿyeeⁿdí cūū chi díⁿ nī
 cuidado yeⁿe saⁿā s'eeⁿ?

⁷ Ta 'líⁿ tiempo nūⁿ n'dii,
 Ndyuūs, s'néeⁿ nī saⁿā Daiyá
 nī chi nguéeⁿ ch'ēete cá yā
 tan'dúuca ángeles. Ní teé
 nī saⁿā daiyá nī chi ch'ēeté
 yā ndúucū honra yeⁿé yā
 tan'dúucā chi saⁿā rey 'tíica
 yā. Ní chi'néeⁿ nī saⁿa miiⁿ
 chi caaⁿmaⁿ ntiiⁿnyuⁿ yā yeⁿe
 tanducuéⁿē chi nadin'dái nī.

⁸ Ní s'néeⁿ nī tanducuéⁿē dendu'ū
 maaⁿ ta'á yā.

Ní 'tíica rā va ti Ndyuūs s'néeⁿ yā
 tanducuéⁿē dendu'ū chi saⁿā miiⁿ
 caaⁿmáⁿ yā ntiiⁿnyuⁿ yeⁿē. Maaⁿ nī
 nguéeⁿ inaaⁿ yú chi saⁿā miiⁿ ngaⁿa
 ntiiⁿnyúⁿ yā yeⁿe tanducuéⁿē.

⁹ Naati maaⁿ ní snaaⁿ yú chi Ndyuūs
 díⁿ yā chi Jesucristo nguéeⁿ ch'ēete
 yā tan'dúucā ángeles dúú'ví tiempo
 nūⁿ. Ní Ndyuūs neene ya'ai 'iinú yā
 'iiⁿyāⁿ yeⁿe iⁿyeeⁿdí cūū chi neⁿé
 yā chi Jesucristo ch'ii yā lugar yeⁿe
 nducyaaca yú. Maaⁿ ní véé dēevé
 yeⁿe Jesucristo ní véé honra yeⁿé
 yā cucáavā chí ch'ii yā na cruz.

¹⁰ Ní Ndyuūs din'dái yā
 tanducuéⁿē dendu'ū ní díⁿ yā
 cuidado yeⁿē. Ní n'daacā diiⁿ
 Ndyuūs taachi diiⁿ chi Jesucristo
 miiⁿ ní saⁿā perfecto yā chí chichéé
 yā yeⁿe nducuéⁿē chi n'geenu yā
 ngii. Ní Ndyuūs n'diichí yā chí
 n'daacā idíⁿ yā. 'Tíicā diiⁿ Ndyuūs
 caati cuuvi yeⁿé yā n'dee n'dái
 daiyá yā. Ní cuuvi ca'a yā 'iiⁿyāⁿ
 s'eeⁿ parte chi cuuvi yeⁿé yā
 ndúucū vaadi dēeve n'dai yeⁿé yā.
 Jesucristo ní saⁿā chi nadanguáⁿai

yā 'iiⁿyāⁿ yeⁿe iⁿyeeⁿdí cūū. ¹¹ Ní
 Jesucristo ní didēevé yā 'iiⁿyāⁿ
 yeⁿe nuuⁿndi yeⁿé yā ní 'iiⁿyāⁿ
 chí ndúúví dēevé yā ní tan'dúucā
 Jesucristo miiⁿ. Véé 'áamá nūⁿ
 chiida nducyaaca 'iiⁿyā. Cáavā chuū
 Jesucristo nguéeⁿ 'cuinaáⁿ yā chí
 caaⁿmáⁿ yā chí 'iiⁿyāⁿ s'eeⁿ ní v'í
 yā. ¹² Ní 'tíicā Jesucristo ngaⁿá yā
 ngii yā 'iiⁿyāⁿ s'eeⁿ ní canéé nguūⁿ:

N'dii Ndyuūs, 'úú caaⁿmáⁿ yeⁿé
 n'dii nanááⁿ hermanos yeⁿé
 ní caátá himnos chí cantos
 chí ngaⁿá chí ch'ēeté nī
 nanááⁿ 'iiⁿyāⁿ yeⁿé nī taachi
 nduvidaamá yā. ¹³ Taama
 vmnéⁿēe Jesucristo caⁿa yā
 'tiicā:

'Úú ní canéé confianza yeⁿé
 ndúucū Ndyuūs.

Ní táamá caⁿa yā:

'Muuⁿ canéé ndúucū daiyá chí
 Ndyuūs tee yā 'úú.

¹⁴ 'Tíicā, 'iiⁿyāⁿ yeⁿe 'áamá
 familia ní 'áamá yuūtē yeⁿé yā
 ní 'áamá yuūⁿ ntúūⁿ va. Ní 'tiicā
 ntúūⁿ Jesucristo miiⁿ ch'iindiyáaⁿ
 yā ndúucū cuerpo ndúucū yuūⁿ
 tan'dúucā s'uuúⁿ. Ní 'tiicā ntúūⁿ
 Jesucristo ch'ii yā caati cuuvi
 di'cuuinú yā yááⁿnguiniūⁿ caavā
 chí diiⁿ sa chí nducyaaca yú ní n'gii
 yú. ¹⁵ 'Tiicā ntúūⁿ Jesucristo díⁿ yā
 chí nguéeⁿ 'va'a yú yeⁿe tiempo chí
 'cuuvi yú. ¹⁶ Cuaacu chí Jesucristo
 nguéeⁿ ndaá yā nanááⁿ ángeles chí
 chinnee yā ángeles naati nanááⁿ
 'iiⁿyāⁿ yeⁿe ndaata yeⁿe Abraham
 cáavā chí nadanguáⁿai yā 'iiⁿyāⁿ.
¹⁷ Cáavā chuū Jesucristo canéé chí
 ch'iindiyáaⁿ yā tan'dúucā nducyaaca
 hermanos yeⁿé yā ní 'íicú maáⁿ yā
 cuuvi cūnéé yā chiidúú ch'ēete ca

chi 'áámá cānee yeⁿe ntiⁿnyuⁿ yeⁿe Ndyuūs. Ní ya'ai 'iinú yā 'iiⁿyāⁿ. Ní 'íicú cuuvi nadach'ēēcú yā nuuⁿndi yeⁿe 'iiⁿyāⁿ ti nadí'v'e yā nducuéⁿē nuuⁿndi yeⁿe 'iiⁿyāⁿ. ¹⁸Ní Jesucristo maáⁿ yā ch'eenú yā chií ní chichēe yā taachi ndaá yááⁿ'nguiinūⁿ chí n'diichineeⁿ sa 'yā. Ní cáávā chuū maaⁿ ní Jesucristo cuuvi cūnee yā 'iiⁿyāⁿ s'eeⁿ taachi n'geenú yā ngii ní nadanguáⁿ'ai yā 'iiⁿyāⁿ s'eeⁿ yeⁿe yááⁿ'nguiinūⁿ taachi ndaa sa n'diichineeⁿ sa 'iiⁿyāⁿ s'eeⁿ.

**Jesucristo ní ch'ēete taavi
cá yā nguéé ti Moisés**

3 Ndís'tií, hermanos yeⁿe yú chi Cristo didēév'e yā ní ndís'tií ntúūⁿ Ndyuūs yaa'ví yā ndís'tií chi cuuvi yeⁿe yā. Maaⁿ ní nadicádíinuⁿ n'dai nī yeⁿe Jesucristo chi apóstol chi dichó'o Ndyuūs ti Jesucristo miiⁿ ní chiiduú ch'ēete cá yeⁿe 'iiⁿyāⁿ chi i'téenu yā Jesucristo tan'dúucā s'uuúⁿ. ²Jesucristo miiⁿ 'áámá caneé yā ndúucū Ndyuūs ní dííⁿ yā tanducuéⁿē dendu'ū. Ní dííⁿ yā tanducuéⁿē dendu'ū chi Ndyuūs dineⁿé yā. Ní tan'dúucā Moisés din'daacá yā ntiⁿnyuⁿ chi Ndyuūs ca'a yā, 'tiicá ntúūⁿ Jesucristo din'daacá yā tanducuéⁿē ntiⁿnyuⁿ yeⁿe va'ai yeⁿe Ndyuūs chi Ndyuūs ca'a yā. ³Ní 'áámá 'iiⁿyāⁿ chi din'dái yā 'aama va'āi ní ch'ēete cá yā nguéé ti va'āi miiⁿ. 'Tíicā Jesucristo ní ch'ēete taavi cá yā nguéé ti Moisés. ⁴Deenu yú chi véé 'iiⁿyāⁿ chi din'dái yā ca'áámá cā'aama va'āi naati Ndyuūs din'dái yā nducuéⁿē dendu'ū chi véé. ⁵Moisés miiⁿ dichí'v'e yā Ndyuūs

ní n'dáaca taavi idiiⁿ sa ntiⁿnyuⁿ yeⁿe vaacu Ndyuūs. Ní Moisés dííⁿ yā ntiⁿnyuⁿ chi ngaⁿ'a yā nduudu yeⁿe Ndyuūs chi Ndyuūs caⁿ'a yā chi caaⁿ'máⁿ yā cuayiivi. ⁶Naati Cristo chi daiyá Dendyuūs ní 'áámá dííⁿ yā ntiⁿnyuⁿ ti 'iiⁿyāⁿ ndii tííⁿ yā yeⁿe vaacu Dendyuūs. Ní s'uuúⁿ tan'dúucā vaacu Ndyuūs 'tíicā s'uuúⁿ nduuti chi canéé diitu yú ndúucū chi i'teenu yú. Ní yeenu yú ndúucū chi cuuvi yeⁿe yú ndíí tiempo chi 'cuūvi yú.

**Véé tiempo chi ntaavi'tuunūⁿ
'iiⁿyāⁿ chi yeⁿe Ndyuūs**

⁷Ní chuū Espíritu N'dai yeⁿe Ndyuūs ngaⁿ'a yā 'túucā naachi canéé nguūⁿ na libro yeⁿe Ndyuūs: Maaⁿnguuvu miiⁿ nduuti chi ndís'tií 'caandiveéⁿ nī nduudu yeⁿe Ndyuūs: ⁸Nguéé dichēechí nī staava yeⁿe nī chí ditaáⁿ nī tan'dúucā chí dííⁿ 'iiⁿyāⁿ tiempo chí 'āā chó'oo taachi 'iiⁿyāⁿ s'eeⁿ dííⁿ yā n'diichineeⁿ yā Ndyuūs ndúucū nuuⁿndi chí dííⁿ yā na yáⁿ'āa cuuⁿmáⁿ naachi nguéé ch'ēetinéé 'iiⁿyāⁿ. ⁹Ní Ndyuūs ngaⁿ'á yā ngii yā 'iiⁿyāⁿ: Tiempo chí chó'oo na yáⁿ'āa cuuⁿmáⁿ naachi nguéé ch'ēetinéé 'iiⁿyāⁿ, 'iiⁿyāⁿ s'eeⁿ yeⁿe ndaata yeⁿe nī n'diichinééⁿ ntúuⁿ yā 'úú 'áará chí n'diichí yā nducuéⁿē chí 'úú dííⁿ ndúucu yā 'naaⁿ chí 'uūvi ngēecu nduuyū. ¹⁰Ní cáávā chuū 'úú, Ndyuūs, ditaáⁿ ndúucū 'iiⁿyāⁿ s'eeⁿ. Ní 'túucā ngaⁿ'á ngii 'iiⁿyāⁿ s'eeⁿ: Ndis'tií, nducuéⁿē tiempo

nguée n'daacā nadacadíínuuⁿ
nī na staava yeⁿé nī. Ní nguéeⁿ
n'diichí nī yúúní yeⁿé.

¹¹ Ní cáāvā chi diiⁿ 'iiⁿyāⁿ s'eeⁿ 'úú
ní nguéeⁿ canee yiinú yeⁿe
yā ní caⁿa 'túúca: Cuáácú
chí 'iiⁿyāⁿ s'eeⁿ nguéeⁿ cuuvi
ndaa yā naachi canéeⁿ chí
ntaavi'tuunúⁿ 'iiⁿyāⁿ yeⁿe
ndaata yeⁿé nī.

¹² Maaⁿ ní ndís'tiī, hermanos
yeⁿé, cundée nī cuidado chi nguéeⁿ
'áámá ndís'tiī chí nguéeⁿ n'daacā
staava yeⁿé nī chí nguéeⁿ i'téenu nī
ní nguéeⁿ divíi nī yeⁿé Ndyuūs chí
canduuchi. ¹³ Ní ndís'tiī ní yaa'ví
nī ví'i nī 'áámá nī taama nī nguuvi
nguovi taachi maaⁿnguovi ní 'íícú
mar 'áámá ndís'tiī nguéeⁿ dicheechí
nī staava yeⁿé nī cáāvā nuuⁿndi
chí nginnche'ēi ndís'tiī. ¹⁴ Ní véé
'áámá cuaaⁿ yeⁿé yú ndúúcu Cristo
nduuti chí s'uuúⁿ ní 'áámá canee
yú ndúúcu chí i'téenu yú vmnááⁿ
vmnaaⁿ yeⁿe Cristo ndíí tiempo chí
'cuúvi yú.

¹⁵ Tíicā canéeⁿ nguúⁿ na libro yeⁿé
Ndyuūs:

Nguéeⁿ dicheechí nī staava yeⁿé
nī chí ditaáⁿ nī tan'dúúca chí
diiⁿ 'iiⁿyāⁿ na yáⁿāa cuūⁿmáⁿ
naachi nguéeⁿ ch'etinéé
'iiⁿyāⁿ tiempo chí ch'óó
taachi n'diichineeⁿ yā 'úú chí
Ndyuūs. ¹⁶ ¿Du'ú 'iiⁿyāⁿ chí
ch'iindiveéⁿ yā nduudu yeⁿé
Ndyuūs ní cuayiivi nduuvitaáⁿ
yā? 'Túúca diiⁿ nducyaaca
'iiⁿyāⁿ chí cueⁿé yā ndúúcu
Moisés yeⁿe yáⁿāa Egipto.
Nducyaacá yā nduuvitaáⁿ yā.
¹⁷ ¿Du'ú 'iiⁿyāⁿ chí Ndyuūs
nguéeⁿ yiinú yā nduucú yā

'uūvi ngeecu nduuyu? 'Túúca
nguee yiinú yā ndúúcu 'iiⁿyāⁿ
chí dinuuⁿndí yā ní ch'ti yā na
yáⁿāa cuūⁿmáⁿ naachi nguéeⁿ
ch'etinéé 'iiⁿyāⁿ. ¹⁸ ¿Du'ú
'iiⁿyāⁿ chí Ndyuūs ngaⁿá yā
caavā maaⁿ chí duuchí yā
chí 'iiⁿyāⁿ s'eeⁿ nguéeⁿ cuuvi
cundaa yā lugar naachi
ntaavi'tuunúⁿ 'iiⁿyāⁿ yeⁿe
yā? 'Túúca ngaⁿá yā yeⁿe
'iiⁿyāⁿ chí nguéeⁿ n'giindiveéⁿ
yā nduudu yeⁿe yā. ¹⁹ Maaⁿ ní
deenu yú ti 'iiⁿyāⁿ s'eeⁿ nguéeⁿ
cuuvi cundaa yā lugar yeⁿe
Ndyuūs ti nguéeⁿ i'téenu yā
Ndyuūs.

4 Maaⁿ ní Ndyuūs tee yā
promesa s'uuúⁿ chí cuuvi
cundaa yú lugar yeⁿé yā ní cuuvi
ntaavi'tuunúⁿ yú ndúúcu Ndyuūs.
Canéeⁿ chí candee yú cuidado
caati 'aatī 'aama chéeⁿ ndís'tiī nguéeⁿ
cucheé nī tanducueⁿé dendu'ú ní
nguéeⁿ cuuvi cundaa nī lugar miiⁿ.
² Caati 'iiⁿyāⁿ yeⁿé Jesucristo ndéeⁿ
yā nduudu cuaacu yeⁿé Jesucristo
nanááⁿ s'uuúⁿ, 'tiicā ntúúⁿ nanááⁿ
'iiⁿyāⁿ s'eeⁿ chí ch'ti yā na yáⁿāa
cuuⁿmáⁿ naachi nguéeⁿ ch'etinéé
'iiⁿyāⁿ. Ní nguéeⁿ dichí'vē nduudu
cuaacu yeⁿé Ndyuūs nguaaⁿ 'iiⁿyāⁿ
s'eeⁿ ti taachi ch'iindiveéⁿ yā
nduudu miiⁿ nguéeⁿ s'téenu yā yeⁿé.
³ Naati s'uuúⁿ chí i'teenu yú nduudu
miiⁿ, s'uuúⁿ ní cuuvi ndaa yú naachi
caⁿa Ndyuūs chí ntaavi'tuunúⁿ yú
ndúúcu yā. 'Tíicā ngaⁿa Ndyuūs na
libro yeⁿé yā naachi canéeⁿ nguūⁿ:
Cáāvā chí dííⁿ 'iiⁿyāⁿ s'eeⁿ 'úú
nguéeⁿ yiinú yeⁿe yā. Ní
cuaacú ngaⁿá nduudu
ndúúcu maááⁿ chí duuchí.

Nguéé cuuvi ndaa yā nduucú na lugar yeⁿé naachi ntaavi'tuunuúⁿ.

Ní Ndyuūs d'icuiinú yā ntiiⁿnyuⁿ yeⁿé yā taachi din'dái yā iⁿ'yeeⁿdí 'cūū. ⁴Ní 'áámá cuaaⁿ yeⁿé libro yeⁿé Ndyuūs naachi canéé nguūⁿ ní ngaⁿ'a yeⁿé ndíí chí ndeēchē nguuvi chi ntaavi'tuunúⁿ 'iiⁿ'yāⁿ:

Ndyuūs ní ndíí chí ndeēchē nguuvi ntaavi'tuunúⁿ yā yeⁿé tanducuéⁿē ntiiⁿnyuⁿ yeⁿé yā. ⁵Ní canee táámá vmneⁿ'ēe na libro yeⁿe Ndyuūs 'tíicā:

'iiⁿ'yāⁿ s'eeⁿ nguéé cuuvi cūndaa yā ní ntaavi'tuunúⁿ yā nduucú. ⁶Maaⁿ ní véé n'duuvi 'iiⁿ'yāⁿ chi canéé chi cundaa yā na lugar naachi ntaavi'tuunúⁿ 'iiⁿ'yāⁿ. Naati 'iiⁿ'yāⁿ chi vmnááⁿ vmaaⁿ n'giindiveéⁿ yā nduudu cuaacu miiⁿ nguéé sndaá yā ti nguéé s'téenu yā Ndyuūs. ⁷Taama vmnéⁿ'ēe Ndyuūs s'neéⁿ yā 'áámá nguuvi ní ngaⁿ'a yā chi nguuvi ní maaⁿnguuvi. Ní Ndyuūs ngaⁿ'a yā yeⁿé nduudu miiⁿ cuayiiⁿ taachí 'āā chó'oo chuū. 'Āā 'naaⁿ tiempo nguuvi chi David ngaⁿ'a sa yeⁿ'ē. Ní 'tíicā canéé nguūⁿ na libro yeⁿé Ndyuūs yeⁿé nguuvi miiⁿ:

Maaⁿnguuvi nduuti chi ndís'tiī 'caandiveéⁿ nī nduudu chi Ndyuūs ngaⁿ'á yā: Nguéé dicheechí nī staava yeⁿ'é nī. ⁸Ní nduuti chi saⁿ'ā Josué chi saⁿ'ā ndíí tiiiⁿ yeⁿe 'iiⁿ'yāⁿ Israel s'eeⁿ cuuvi sa

ca'a sa 'iiⁿ'yāⁿ Israel s'eeⁿ chí ntaavi'tuunúⁿ yā tuu'mi ní Ndyuūs nguéé canee chi caaⁿ'máⁿ yā taama vmnéⁿ'ēe yeⁿé táámá nguuvi. ⁹Maaⁿ ní cáávā chuū véé chi ntaavi'tuunúⁿ 'iiⁿ'yāⁿ chi yeⁿé Ndyuūs. ¹⁰Ní 'iiⁿ'yāⁿ chi sndaá yā naachi Ndyuūs ntaavi'tuunúⁿ yā 'āā ntéé idiiⁿ yā ntiiⁿnyuⁿ tan'dúúicā chi Ndyuūs 'āā ntéé idiiⁿ yā ntiiⁿnyuⁿ. ¹¹Maaⁿ ní canéé chí d'icuítu yú chi cuuvi cūndaa yú lugar naachi ntaavi'tuunúⁿ yú ní 'aatii tanáⁿ'ā yú diiⁿ yú chi nguéé i'téenu yú tan'dúúicā 'iiⁿ'yāⁿ s'eeⁿ chi nguéé chi'téenu yā.

¹²Ní nduudu cuaacu yeⁿ'é Ndyuūs ní canduuchi ní neené ditiinú. Ní vee ca 'caāiⁿ yeⁿ'ē nguéé ti 'áámá machete chi 'caāiⁿ nduu 'uuví lados. 'Tíicā nduudu cuaacu yeⁿ'é Ndyuūs. Ndaā na coo yeⁿe cuerpo yeⁿe yú naachi canee alma yeⁿe yú ndúúicū espíritu yeⁿe yú ndíí túútē yeⁿe yú. Ní déenu chee chi tumicadínuuⁿ yú ndúúicū chee chi neⁿe yú diiⁿ yú chi ngiicā yeⁿe staava yeⁿe yú. ¹³Nguéé de'ē vee chi véé chi cuuvi cunúúⁿ n'de'ei yeⁿ'é Ndyuūs. Ndyuūs din'dái yā tanducuéⁿ'ē dendu'ū chi véé ní inaáⁿ yā nducuéⁿ'ē tan'dúúicā chi canee nanáaⁿ yā. Ní canéé chí ca'a yú cuenta yeⁿe vida yeⁿe yú taachi ndaa yú nanáaⁿ yā.

**Jesús ni chiiduú ch'εete
taavi ca yeⁿe yú**

¹⁴Jesús chi daiyá Dendyuūs ní chiiduú ch'εete taavi ca yeⁿe yú. Ní cunaⁿ'a yā va'ai cheeti nguuvi ní

ndaá yā nanááⁿ Ndyuūs. Ní cáávā chuū canee chí 'áámá canee yú ndúúcū chí i'teenu yú Ndyuūs. ¹⁵Ní chiiduú ch'εete taavi ca yeⁿe yú ya'ai i'inú yā s'uúúⁿ taachi n'geenu yú ngii caati Jesús miiⁿ ní ch'eenú yā chii tanducuéⁿē tan'dúúcā s'uúúⁿ naati nguéé dinuuⁿndí yā mar 'áámá vmnéⁿēe. ¹⁶Ní cáávā chuū cuuvi ndaa yú nanááⁿ trono yeⁿé Ndyuūs yeⁿe yú ndúúcū confianza ti dineⁿé yā s'uúúⁿ. Ní 'íicú Ndyuūs cuuvi ya'ai i'inú yā yeⁿe s'uúúⁿ ní cunnee yā s'uúúⁿ taachi, véé necesidades yeⁿe yú. Ní itée yā s'uúúⁿ denduⁿū chí n'daacā n'dai yeⁿé yā.

5 Tiempo chí ch'ó'oo 'iiⁿyāⁿ chí snée yā iⁿ'yeeⁿdí 'cūū ndεεvέ yā ca'áámá cā'aama chiiduú ch'εete chí canée chí díⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúⁿ yā 'iiti chí candεε 'iiⁿyāⁿ s'eeⁿ ti ofrenda caavā nuuⁿndi yeⁿé yā. ²Ní chiiduú ch'εete ca ní dinuuⁿndí yā tan'dúúcā nducyáácā 'iiⁿyāⁿ. Ní cáávā chuū véé paciencia yeⁿé yā ndúúcū 'iiⁿyāⁿ chí tonto ní ndúúcū 'iiⁿyāⁿ chí dinuuⁿndí yā. ³Ní chiiduú ch'εete ca cáávā chí dinuuⁿndi yā canée chí 'caaⁿnúⁿ yā 'iiti chí ofrenda yeⁿe maáⁿ yā cáávā nuuⁿndi yeⁿe maáⁿ yā tan'dúúcā chí díⁿ tanáⁿā 'iiⁿyāⁿ cáávā nuuⁿndi yeⁿé yā.

⁴Ní mar 'áámá saⁿā cuuví díiⁿ sa nombrar maaⁿ sa lado yeⁿé chiiduú ch'εete ca cáávā chí maáⁿ sa neⁿe sa ti Ndyuūs yaa'ví yā saⁿā chí cuuvi chiiduú ch'εete ca chí díiⁿ sa ntiiⁿnyuⁿ yeⁿé yā tan'dúúcā chí yaa'ví yā saⁿā Aarón chí cuuvi chiiduú ch'εete ca tiempo chí 'āá ch'ó'oo. ⁵Tiicá ntúūⁿ ch'ó'oo yeⁿe

Cristo. Cristo miiⁿ nguéé díⁿ yā nombrar maáⁿ yā chí cuuvi chiiduú ch'εete ca. Ndyuūs yaa'ví yā Cristo chí cuuvi chiiduú ch'εete ca. Ní 'tíicā canée nguūⁿ na libro yeⁿé Ndyuūs:

Dii ní daiyá, 'úú ní chiida di ní cuaacu chí díi ní daiyá.

⁶Ngaⁿa ntúūⁿ táámá ni canée nguūⁿ na libro yeⁿé Ndyuūs 'tíicā:

Díi ní daiyá ní cuéⁿé daāⁿmaⁿ canee di chiiduú ch'εete ca. Tan'dúúcā chí tiempo chí 'āá ch'ó'oo chiiduú ch'εete ca chí nguuvi Melquisedec 'tiicá ní ti yeⁿé ndaata yeⁿé yā. ⁷Ní taachi Jesús canee yā iⁿ'yeeⁿdí 'cūū caⁿ'angua'á yā nanááⁿ Ndyuūs chiidá yā ní ngaⁿa yā: N'díi Ndyuūs díⁿ ní chíiⁿ chí neⁿé ní. Ní 'cai diitú yā neⁿe chí cheécú yā: N'díi, Ndyuūs, cuuvi nadanguáⁿai ní 'úú chí nguéé 'cuúví nduuti chí neⁿé ní díⁿ ní 'tíicā. Ní Ndyuūs ch'iindiveéⁿ yā nduudu yeⁿe Jesús taachi ngaⁿ'angua'á yā ti dich'εeté yā Ndyuūs. Ní Ndyuūs ca'á yā fuerzas Jesús. ⁸Ní 'áará chí Jesús miiⁿ ní daiyá Dendyuūs ch'eeⁿ yā cáávā dendú'ū chí canée chí ch'eenú yā chíi ní ch'iindiveéⁿ yā yeⁿe nducuéⁿē. ⁹Ní taachi Ndyuūs n'diichineéⁿ yā Jesús, Jesús miiⁿ ní díⁿ yā nducuéⁿē chí neⁿe Ndyuūs. Ní 'íicú Jesús miiⁿ cuuví yā nadanguáⁿai yā nducyaaca s'uúúⁿ chí n'giindiveeⁿ yú yeⁿe yā. ¹⁰Ní Ndyuūs díⁿ yā chí Jesús cuuvi chiiduú

ch'εετε ca tan'dúucā tiempo chi ch'ó'oo chiiduú ch'εετε ca chi nguuvu Melquisedec, 'tiicá yā.

Véé peligro yeⁿe yú chi ngaⁿa yú chi 'āā ntéé i'teenu yú Jesucristo

¹¹Maaⁿ ní véé cá chi neⁿ'é 'nū caaⁿ'máⁿ 'nū yeⁿe Melquisedec chi chiiduú ch'εετε ca naati ngii n'dái caaⁿ'máⁿ 'nū yeⁿ'ē ti ndís'tiī ní nguéé ituumicadiinuuⁿ nī. ¹²'Āā ch'ó'oo tiempo chi ndís'tiī 'āā s'téenu nī ní maaⁿ ní ndís'tiī canéé chí ca'cueéⁿ nī 'iiⁿ'yāⁿ naati ndíí maaⁿ 'āā neⁿ'é nī taama vmnéⁿ'ēe chi 'áámá 'iiⁿ'yāⁿ ca'cueéⁿ yā ndís'tiī denduū chi vmnááⁿ vmnaaⁿ yeⁿ'é Ndyuūs. Ní ndís'tiī ní 'āā débil nī. Ní tan'dúucā dacuá'āa chi neⁿ'e leche ní nguéé neⁿ'e comida chi ditiinú, 'tiicá nī. ¹³Ní 'iiⁿ'yāⁿ chi dámaaⁿ ngi'i leche ní tan'dúucā dacuá'āa 'tiicá yā. Ní nguéé deenú yā de'ē chi n'daacā o de'ē chi nguéé n'daacā. ¹⁴Ní comida chí ditiinu ní che'é 'iiⁿ'yāⁿ n'geēté chi 'āā deenú yā in'nuú yā chéé chí n'daacā o chéé chi nguéé n'daacā caati 'tíicā costumbre yeⁿ'é yā chi dííⁿ yā.

6 Maaⁿ ní i'téenu ca yú ní 'caandiveeⁿ ca yú cosas chi chεechi chi 'iiⁿ'yāⁿ ca'cueéⁿ yā s'uúúⁿ. Ní nguéé neⁿ'e yú 'caandiveeⁿ yú taama vmnéⁿ'ēe tan'dúucā chi ngi'cueéⁿ yā s'uúúⁿ ndii vmnááⁿ vmnaaⁿ taachi cáámá i'teenu yú nduudu cuaacu yeⁿ'é Cristo. Ní nguéé ngaⁿa yú táámá vmnéⁿ'ēe chi s'neeⁿ yú ntiiⁿ'nyuⁿ yeⁿ'e yú chi nguéé n'daacā chí dííⁿ chi 'cuūvi yú ti maaⁿ ní i'teenu yú Jesucristo. ²Ní nguéé ca'cueeⁿ ca yú yeⁿ'ē chi

ngeedínuūⁿ ní, ní nguéé yeⁿ'ē chi s'nuuⁿ yú ta'a yú nanááⁿ tííⁿ 'iiⁿ'yāⁿ, ní nguéé yeⁿ'ē chi nduuchí 'iiⁿ'yāⁿ chi yeⁿ'e Cristo yeⁿ'ē nguaaⁿ tináⁿ'ā, ní nguéé yeⁿ'ē nguuvu chi Cristo dííⁿ yā juzgar nducyaaca 'iiⁿ'yāⁿ.

³Ca'cueeⁿ ca yú más cā yeⁿ'e chi i'téenu yú yeⁿ'e Cristo. Ní chuū ní dííⁿ yú nduuti chi Ndyuūs neⁿ'e yā.

⁴Ní 'de'ē yeⁿ'e 'iiⁿ'yāⁿ chi 'āā sta'á yā dεeve chi Cristo, ní sta'á yā cosas chi n'dai taavi chi Cristo ca'a yā, ní 'āā sta'á yā Espíritu N'dai yeⁿ'e Cristo, ⁵ní deēnú yā nduudu cuaacu chí n'dai chí yeⁿ'é Ndyuūs ndúucū poder chi yeⁿ'e táámá iⁿ'yeeⁿdi chi cuchii? ⁶Ní nduuti chi 'iiⁿ'yāⁿ s'eeⁿ ndaacadaamí yā yeⁿ'e Cristo ní dinuuⁿndí yā, nguéé cuuvi dííⁿ yā ndaa yā nanááⁿ Cristo chi nadach'εεcú yā nuuⁿndi yeⁿ'é yā, tí 'iiⁿ'yāⁿ s'eeⁿ dííⁿ yā tan'dúucā chi s'nééⁿnga'á yā daiyá Ndyuūs miiⁿ taama vmnéⁿ'ēe. Ní dííⁿ yā chi Cristo miiⁿ 'cuiináaⁿ yā nguaaⁿ 'yááⁿ n'dái 'iiⁿ'yāⁿ. ⁷Ndyuūs dííⁿ yā ndúucū 'iiⁿ'yāⁿ s'eeⁿ tan'dúucā chi dííⁿ yā ndúucū yáⁿ'āa taachi n'dee cuuvi ngeeⁿ cuūvi vmnááⁿ yáⁿ'āa ni yáⁿ'āa sta'á nuūⁿnīⁿ miiⁿ 'áámá 'áámá vmnéⁿ'ēe chi ngeeⁿ cúuvi. Ndyuūs ca'á yā yáⁿ'āa miiⁿ cosecha chi n'dai 'iiⁿ'yāⁿ chí ngiínú yā ndaataá. ⁸Naati nduuti chi yáⁿ'āa miiⁿ ní ngii yááⁿ yeⁿ'ē ndúucū yaata chi nguéé dichí'vē tuu'mi ní nguéé dichí'vē. Ní Ndyuūs nguéé ca'á yā cosecha n'dai yeⁿ'ē níicú cuayiivi 'iiⁿ'yāⁿ ní 'neeⁿ yáⁿ'a yā yáⁿ'āa miiⁿ.

Véé chi cuuvi yeⁿ'e yú chi nnee s'uúúⁿ chi 'áámá cunee yú

⁹Maaⁿ ní 'áará chi ngaⁿ'á 'nū 'tíicā yeⁿ'e ndís'tiī, hermanos, deenu 'nū chi véé cosas chi n'dai taavi ca yeⁿ'é

ní ti ye^{ne} Cristo ndís'tií ní Ndyuūs nadanguá^{ai} yā ndís'tií. ¹⁰Ndyuūs dámaāⁿ dííⁿ yā dendu'ū chí cuaacu. Nn'gaacú yā ye^{ne} ntiíⁿnyuⁿ chí dííⁿ ní ní táácā nneé ní hermanos ye^{ne} yú caati dine^{ne} ní hermanos chí i'téenu yā Jesucristo. Ní 'tíicā ní dííⁿ ní nguuví nguuví. ¹¹Maaⁿ ní ne^{ne} 'nū chí ca'áámá ca'áámá ndís'tií daamá nūⁿ idííⁿ ní ndúúcu nūúⁿ máⁿ staava ye^{ne} ní tan'dúúcu chí dííⁿ ní taachi cáámá i'téenu ní. Ní dííⁿ ní ndíí tiempo chí ch'íi ní. Ní 'tíicā cuuvi cuaacu chí véé chí cuuvi ye^{ne} ní. ¹²Nguéé ne^{ne} 'nū chí nduuví 'daan'di ní naati ne^{ne} 'nū chí din'daacá ní tan'dúúcu tanáⁿ a cā 'iiⁿ yāⁿ chí i'téenu yā. Ní cunee ngiinú yā ye^{ne} vaadí n'dai chí Ndyuūs ca'á yā 'iiⁿ yāⁿ s'eeⁿ chí Ndyuūs ngaⁿ á yā chí cuuvi ye^{ne} yā 'iiⁿ yāⁿ s'eeⁿ.

¹³Āā 'náán tiempo chí chó'ōo Ndyuūs dííⁿ yā 'áámá compromiso ndúúcu Abraham ní Ndyuūs ngaⁿ á yā cáávā chí duuchi maáⁿ yā chí 'tíicā caⁿ á yā dííⁿ yā caati nguéé cá táámá 'iiⁿ yāⁿ chí ch'ēete cá yā ti Ndyuūs. ¹⁴Ní caⁿ a yā: Díí, Abraham, cuaacu níⁿnyúⁿ di'viicú díí ní dííⁿ chí cuuvi n'dee n'dái daiyá 'iiⁿ yāⁿ ye^{ne} di cuaaⁿ naachi cuchíi. ¹⁵Abraham cūnee ngiinú yā compromiso ye^{ne} Ndyuūs ndúúcu vaadí ngiinú ní tunée yā compromiso chí Ndyuūs caⁿ a yā chí ca'á yā Abraham miiⁿ. ¹⁶Maaⁿ ní taachi 'iiⁿ yāⁿ ye^{ne} iⁿ yeeⁿ dí' cūú ngaⁿ á yā chí cuaacu níⁿnyúⁿ caⁿ á yā dííⁿ yā, ngaⁿ á yā “Por Dios” cucáávā 'áámá yā chí ch'ēete cá yā nguéé ti 'iiⁿ yāⁿ s'eeⁿ. Níicú taachi 'iiⁿ yāⁿ s'eeⁿ ngaⁿ á yā chí 'tíicā caⁿ á

yā dííⁿ yā cáávā 'iiⁿ yāⁿ miiⁿ chí ch'ēete ca tuuⁿ mi ní nguéé véé más cā chí cuuvi caaⁿ máⁿ yā ye^{ne}. ¹⁷Ní 'tíicā Ndyuūs ne^{ne} yā chí 'iiⁿ yāⁿ s'eeⁿ ye^{ne} Abraham chí cuaacu níⁿnyúⁿ dííⁿ yā cumplir compromiso ye^{ne} yā. Ní nguéé n'daaⁿ mar 'áámá nduudu ye^{ne} yā. Ní cáávā chuū ngaⁿ á yā cucáávā chí duuchi maáⁿ yā. ¹⁸Ní cáávā chuū véé 'úúví dendu'ū chí nguéé cuuvi n'daaⁿ. Ndyuūs ní nguéé cuuvi cu'neéⁿ yā táámá cosa lugar ye^{ne} 'uuví compromiso ye^{ne} Ndyuūs ndúúcu chí ngaⁿ á yā chí caⁿ á yā dííⁿ yā cáávā chí duuchi maáⁿ yā. Ndyuūs nguéé cuuvi caaⁿ máⁿ yā nduudu yaadi. Ní ndúúcu compromiso ye^{ne} yā, Ndyuūs tee yā s'uúúⁿ 'viich'etínūⁿ chí ch'ēete ye^{ne} yú caati s'uúúⁿ n'nuuⁿ yú Ndyuūs ní i'téenu yú 'yā ní ye^{ne} chí Ndyuūs tée yā chí cuuvi ye^{ne} yú. ¹⁹Chííⁿ chí i'téenu yú cáávā alma ye^{ne} yú ní tan'dúúcu 'áámá ancla ye^{ne} barco ti i'nēēⁿ dííⁿ barco chí 'āā ntéé ínuⁿ. 'Tíicā s'uúúⁿ ndúúcu chí i'téenu yú cuuvi ndáá níⁿnuⁿ yú nanááⁿ Ndyuūs. ²⁰Jesucristo 'āā ndaá yā nanááⁿ Ndyuūs vmnááⁿ vmaaⁿ ye^{ne} s'uúúⁿ. Ní maaⁿ ní cááva yā cuuvi ndaa yú nanááⁿ Ndyuūs. Ní maaⁿ ní Jesucristo miiⁿ ní chiiduú chí ch'ēete ca ye^{ne} yú chí 'áámá cūnee ná ntiíⁿnyuⁿ miiⁿ. Ní tan'dúúcu chiiduú chí ch'ēete ca Melquisedec chí 'áámá cūnee ná ntiíⁿnyuⁿ 'āā tiicá nūⁿ Jesucristo.

Ye^{ne} Jesús chí chiiduú chí ch'ēete ca tan'dúúcu Melquisedec chí chiiduú chí ch'ēete ca

7 'iiⁿ yāⁿ Melquisedec ní rey ye^{ne} yááⁿ Salem ní chiiduú

ch'εεte ca ye^{ne} Ndyuūs chí ch'εεte n'dai. Tiempo chi 'āā 'nāáⁿ ch'ó'ōo, sa^{na} Abraham ní taachi cuchí sa chi che^{ne} sa ná caandaá naachi ch'iiⁿnuⁿ sa reyes, sa^{na} Abraham miiⁿ ndaaca sa nanááⁿ chiiduú ch'εεte ca Melquisedec ní Melquisedec di'viicú yā Abraham. ²Ní Abraham miiⁿ ní caā sa Melquisedec 'áámá ndiichí parte ye^{ne} nducué^{ne} chí divíi yā ye^{ne} 'iiⁿyāⁿ ye^{ne} reyes cucááⁿvā caāndāa. Ní chi duuchi chí Melquisedec vmnāáⁿ vmnaaⁿ ne^{ne} caaⁿmáⁿ rey chí ye^{ne} vaadi cuaacu. Ní cuayivi ní ne^{ne} caaⁿmáⁿ rey ye^{ne} yāáⁿ Salem, ní chi duuchí yā ne^{ne} caāⁿmaⁿ rey ye^{ne} vaadi 'diiⁿ. ³Nguéé canee nguūⁿ chεe chí chεεcú Melquisedec, chεē chí chiidá yā ndíi nguéé ndúú ye^{ne} 'iiⁿyāⁿ ye^{ne} yā ye^{ne} chí chiicá yā. Nguéé canee nguūⁿ ye^{ne} tiempo chí ch'iiⁿndiyāaⁿ yā ndíi nguéé ndúú ye^{ne} tiempo chí ch'ii yā. Ní cucááⁿvā chuū Melquisedec miiⁿ tan'dúúca daiyá Ndyuūs 'tiicá yā ti 'áámá chiiduú ch'εεte ca chí 'áámá cūneeⁿ na ntiⁿnyuⁿ cue^{ne} daāⁿmaⁿ.

⁴Maaⁿ ní nadacádíinuⁿ ní chí ch'εεte n'dai sa^{na} Abraham 'cūū. Abraham ca'a yā 'áámá ndiichi parte ye^{ne} nducué^{ne} chí divíi yā ye^{ne} reyes taachi cuⁿu yā na caāndaá. ⁵'Tíicā ngaⁿā ley ye^{ne} Ndyuūs chí Moisés dingúⁿ yā: Nducyaaca chiiduú chí ye^{ne} ndaata ye^{ne} 'iiⁿyāⁿ Leví canéé chí cuta'á yā ndíichí parte ye^{ne} nducué^{ne} chí véé ye^{ne} nducyáácá 'iiⁿyāⁿ chí ye^{ne} Abraham ní ye^{ne} 'iiⁿyāⁿ ye^{ne} ndaata ye^{ne} yā, ti 'iiⁿyāⁿ Leví miiⁿ ní ye^{ne} ndaata Abraham. ⁶Naati

chiiduú ch'εεte ca Melquisedec miiⁿ ní nguéé ye^{ne} 'iiⁿyāⁿ Leví naati sta'á yā ndíichí parte ye^{ne} Abraham. Ní Abraham miiⁿ ní sa^{na} chí Ndyuūs diⁿ yā compromiso ndúúcu sa chí véé chí cuuvi ye^{ne} sa. Ní chiiduú ch'εεte ca Melquisedec di'viicú yā Abraham. ⁷Maaⁿ ní Melquisedec chí di'viicú yā Abraham ní ch'εεte cá yā nguéé ti Abraham chí di'viicú yā 'yā. ⁸Maaⁿ ní 'iiⁿyāⁿ Leví chí ita'á yā chí ndiichí parte ye^{ne} nducué^{ne} chí véé ye^{ne} yú, ní 'iiⁿyāⁿ chí caⁿá yā 'cuuvi yā. Naati canéé nguūⁿ na libro ye^{ne} Dendyuūs 'tíicā chí chiiduú ch'εεte ca Melquisedec chí sta'á yā ndiichi parte ye^{ne} 'iiⁿyāⁿ ní nguéé ngaⁿā chí ndíi yā. ⁹Ní chuū ní ne^{ne} caaⁿmāⁿ chí taachi Abraham ca'á yā ndiichi parte ye^{ne} yā chíiduú ch'εεte ca Melquisedec, maaⁿ tiempo nūuⁿ 'iiⁿyāⁿ ye^{ne} Leví chí ye^{ne} ndaata Abraham ní 'iiⁿyāⁿ chí sta'á yā ntúūⁿ chí ndiichi parte ye^{ne} yā. 'Tiicá ntúūⁿ ca'a yā chí ndiichi parte ye^{ne} yā chíiduú ch'εεte ca Melquisedec. ¹⁰Ní 'áará chí sa^{na} Leví miiⁿ 'āā cuéé 'cuundiyaāⁿ sa, Abraham miiⁿ diⁿ yā chuū cááⁿvā 'iiⁿyāⁿ ye^{ne} yā chí 'āā cuéé 'cuundiyaāⁿ yā taachi ndaācā sa chíiduú ch'εεte ca Melquisedec cuaaⁿ na yúúni, ní ca'á yā chí ndiichi parte miiⁿ.

¹¹Maaⁿ ní 'iiⁿyāⁿ s'eeⁿ ye^{ne} ndaata Israel sta'á yā ley ye^{ne} yā ye^{ne} chíiduú s'eeⁿ chí ye^{ne} ndaata Leví. Ní 'iiⁿyāⁿ Leví s'eeⁿ ní ye^{ne} ndaata Aarón. Ní nduuti chí 'iiⁿyāⁿ Leví s'eeⁿ cuuvi diⁿ yā chí nducyaaca 'iiⁿyāⁿ cuuvi 'cuεetinéé n'daacá yā ní nguéé nuuⁿndi ye^{ne} yā, 'de'ē cááⁿvā chí ne^{ne} yā táámá

chiiduú ch'ette ca chí 'āā vi'í cā ní nguéé yeⁿē ndaata chiiduú Aaron? Naati tan'dúucā chiiduú ch'ette ca Melquisedec, 'tíicā yā. ¹²Caati naachi n'ḏaaⁿ yā chiiduú ch'ette ca yeⁿē táámá ndaata yeⁿe 'iiⁿ'yāⁿ Israel 'tíicā ntúūⁿ canee chi n'ḏaa yā ley. ¹³Ná libro yeⁿé Ndyuūs 'tíicā canéé nguūⁿ yeⁿe Señor yeⁿe yú. Señor ní yeⁿē táámá 'iiⁿ'yāⁿ chi nguéé díⁿ yā ntiiⁿ'nyuⁿ yeⁿe chiiduú chi díⁿ ntiiⁿ'nyuⁿ yeⁿē nátai naachi 'caaⁿ'núⁿ yā 'iiti cáávā yeⁿe ofrenda yeⁿe Ndyuūs. ¹⁴Nducyaaca 'iiⁿ'yāⁿ ní déenu yā chi Señor Jesucristo yeⁿē yú ch'iindiyáaⁿ yā yeⁿē 'iiⁿ'yāⁿ yeⁿe Judá. Ní Moisés nguéé ngaⁿ'a yā de'ē vee yeⁿe 'iiⁿ'yāⁿ yeⁿe Judá taachi cāⁿ'a yā yeⁿe chiiduú yeⁿe ndaata yeⁿé yā.

¹⁵Ní neené cuaacu ca canee taachi ndaa táámá chiiduú chí tan'dúucā chiiduú ch'ette ca Melquisedec, 'tíicā yā. ¹⁶Ní táámá chiiduú miiⁿ nguéé díⁿ yā ntiiⁿ'nyuⁿ yeⁿē chiiduú cáávā ley chi ngaⁿ'a chi chiiduú miiⁿ canee chi cuuvi yeⁿe 'iiⁿ'yāⁿ yeⁿe ndaata yeⁿe chiiduú. Naati táámá chiiduú miiⁿ díⁿ yā ntiiⁿ'nyuⁿ yeⁿē chiiduú cáávā chi véé vida cueⁿe daāⁿ'maⁿ yeⁿé yā ní véé poder yeⁿé yā. ¹⁷'Tíicā canee nguūⁿ na libro yeⁿé Ndyuūs naachi Ndyuūs ngaⁿ'á yā yeⁿe yā 'tíicā:

Díⁿ ní 'áámá chiiduú chi cueⁿé daāⁿ'maⁿ 'áámá cūnee na ntiiⁿ'nyuⁿ. Tan'dúucā chiiduú ch'ette ca Melquisedec 'tíicā nī. ¹⁸Maaⁿ ní ley yeⁿe Moisés ní nguéé ley yeⁿē maaⁿ caati nguéé dichí'vē. ¹⁹Ley yeⁿe Moisés nguéé cuuvi díⁿ chi 'iiⁿ'yāⁿ 'cuetinéé n'daaca yā

chi nguéé nuuⁿndi yeⁿé yā. Naati maaⁿ ná lugar yeⁿē ley miiⁿ véé 'viich'etifínūⁿ chi n'daacā ca chi cuuvi yeⁿē yú chi Ndyuūs tee yā s'uúⁿ. Ní cáávā chuū ndaa yú nanááⁿ Ndyuūs.

²⁰Ní Ndyuūs, cáávā chi duuchi maáⁿ yā, caⁿ'a yā chí díⁿ yā chí Jesucristo chiiduú ch'ette ca. Tanáⁿ'ā ca chiiduú díⁿ yā ntiiⁿ'nyuⁿ tan'dúucā chí ngaⁿ'a reglas yeⁿe 'iiⁿ'yāⁿ nguéé cáávā mar 'áámá nombre yeⁿé Ndyuūs. Naati yeⁿē táámá chiiduú ch'ette ca chí Jesucristo, Ndyuūs ngaⁿ'á yā yeⁿe Jesucristo ndúucū chí duuchi maáⁿ yā chí canéé yā 'áámá chiiduú ch'ette ca. ²¹'Tíicā canéé nguūⁿ na libro yeⁿé Ndyuūs naachi Ndyuūs ngaⁿ'a yā yeⁿē taama yā:

Señor Ndyuūs ngaⁿ'á yā ndúucū chí duuchi maáⁿ yā ní nguéé n'ḏaaⁿ yā chí ngaⁿ'a yā. Díⁿ ní cueⁿé daāⁿ'maⁿ canéé dí chí díⁿ ní 'áámá chiiduú díⁿ tan'dúucā chiiduú ch'ette ca Melquisedec 'tíicā di. ²²Maaⁿ ní cucáávā chí Ndyuūs díⁿ yā chuū, Jesús ní díⁿ yā chí seguro canee compromiso yeⁿé Ndyuūs. Ní n'daacā ca nguéé tí chí vmnááⁿ vmaaⁿ chí yeⁿé 'iiⁿ'yāⁿ s'eeⁿ. ²³'Tíicā dendú'ū neené 'yaaⁿ chiiduú vee naati nguéé ch'etinée yā ndúucū ntiiⁿ'nyuⁿ caati ch'ií yā. ²⁴Naati Jesucristo miiⁿ nguéé ch'ií yā tí 'áámá canee yā. Ní nguéé ca'á yā táámá 'iiⁿ'yāⁿ ntiiⁿ'nyuⁿ chí yeⁿé yā. ²⁵Maaⁿ ní Jesucristo cuuvi nadanguáⁿ'ai yā cueⁿe

daaⁿmaⁿ nducyáacá 'iⁿyāⁿ
chi ndaa yā nanááⁿ Ndyuūs
cáávā Jesucristo miiⁿ. Nífcú
Jesucristo miiⁿ canduuchí
yā cueⁿe daaⁿmaⁿ ní
ngaⁿangua^a yā cáávā 'iⁿyāⁿ
s'eeⁿ chi yeⁿé yā.

²⁶Tífcā Jesús miiⁿ ní chiiduú
ch'εete ca chi itée yā necesidades
yeⁿe yú. Ní deeve yā. Ní nguée díⁿ
yā cosas chi nguée n'daacā. Ní
nguée díⁿ yā mar 'áámá nuuⁿndi.
Jesucristo miiⁿ 'āā víí ca yā yeⁿe
'iⁿyāⁿ chi dinuuⁿndí yā. Ní cueⁿé
yā yaācu cá nguée tí nanguuvi.
²⁷Ní Jesucristo chi chiiduú
ch'εete ca nguée canée chí díⁿ yā
tan'dúucā tanáⁿā chiiduú n'gεete
ca chi 'caaⁿnúⁿ yā 'iiti nguuvi
nguuvi cáávā nuuⁿndi yeⁿe maáⁿ
yā ní cuayiivi cáávā nuuⁿndi yeⁿe
tanáⁿā ca 'iⁿyāⁿ. Jesús miiⁿ 'áámá
vmnéⁿēe díⁿ yā chuū taachi nca'a
vida yeⁿe maáⁿ yā taachi ch'ií yā
cáávā nuuⁿndi yeⁿe yú. ²⁸Cáávā ley
yeⁿe Moisés 'iⁿyāⁿ i'néeⁿ yā chiiduú
n'gεete ca chi 'iⁿyāⁿ chi véé nuuⁿndi
yeⁿé yā. Chó'oo 'naaⁿ tiempo ní
cuayiivi ní Ndyuūs ngaⁿá yā cáávā
chi duuchi maáⁿ yā chi daiyá yā ní
chiiduú ch'εete ca chi díⁿ yā chiiⁿ
chi Ndyuūs neⁿé yā chi díⁿ yā. Ní
'áámá cūnee yā cueⁿe daaⁿmaⁿ.

Jesucristo ní abogado yeⁿé táámá compromiso

8 Chuū chi caⁿa 'nū ní ch'εete
ca yeⁿe tanducuéⁿē chi ngaⁿá
'nū chi 'tífcā. Chiiduú ch'εete ca
yeⁿe yú chi Jesucristo ní veé yā ná
va'ai cheeti nguuvi na lado yeⁿé
honor yeⁿe trono yeⁿé Ndyuūs chí
canée na va'ai cheeti nguuvi. ²Ní

Jesucristo díⁿ yā ntiiⁿnyuⁿ yeⁿé
chiiduú ch'εete ca na yaācū na
va'ai ch'εete nguuvi chi cuaacu
níⁿnyúⁿ chí yeⁿé Ndyuūs. Ní 'iⁿyāⁿ
s'eeⁿ nguée din'dái yā yaācū miiⁿ ti
Señor Jesucristo maáⁿ yā din'dái yā.
³'Iⁿyāⁿ s'neéⁿ yā ca'áámá cā'aama
chiiduú ch'εete ca chi canée chí
ca'á yā ofrenda ní 'caaⁿnúⁿ yā 'iiti
cáávā nuuⁿndi yeⁿé 'iⁿyāⁿ. Cáávā
chuū Jesucristo canée chi véé yeⁿé
yā chi cuuvi ca'a yā chi vida yeⁿe
maáⁿ yā. ⁴Ní ndúúⁿ chí Cristo
miiⁿ cunée yā iⁿ'yeeⁿdí 'cūū nguée
cuuvi chiiduú yā caati véé chiiduú
s'eeⁿ chi nga'a yā ofrendas nanááⁿ
Ndyuūs tan'dúucā chi ngaⁿa ley
yeⁿe Moisés. ⁵Ní chiiduú s'eeⁿ ní
díⁿ yā ntiiⁿnyuⁿ yeⁿé yā ní díⁿ yā
tan'dúucā ntiiⁿnyuⁿ yeⁿe yaācū chí
canée na va'ai ch'εeti nguuvi. Deenú
'nū chí díⁿ yā copiar ntiiⁿnyuⁿ yeⁿé
Ndyuūs ti taachi Moisés neⁿé yā
din'dái yā yaācū chí va'ai tífñūⁿ,
Ndyuūs caⁿa yā chí yā Moisés ní
ngaⁿa yā:

Dii, Moisés, candée nī cuidado
yeⁿé tanducuéⁿē chí díⁿ di.
Ní díⁿ di tan'dúucā chí chíⁿí
díⁿ taachi canee di na cuééⁿ.
⁶Naati Cristo chí chiiduú
ch'εete ca yeⁿe yú díⁿ yā
ntiiⁿnyuⁿ chí ch'εete taavi ca
nguée ti yeⁿe chíiduú n'gεete ca
yeⁿé iⁿ'yeeⁿdí 'cūū caati Ndyuūs
díⁿ yā compromiso chí Cristo
canée yā naavtaⁿā yeⁿe 'iⁿyāⁿ
yeⁿe iⁿ'yeeⁿdí 'cūū ndúucū
Ndyuūs. Maaⁿ ní s'uuúⁿ cuuvi
ndaa yú nanááⁿ Ndyuūs cáávā
Cristo miiⁿ. Ní compromiso miiⁿ
ní ch'εete ca tí yeⁿe tanducuéⁿē
chí n'daacā taavi ca.

⁷Ní nduuti chí compromiso chi vmnááⁿ vmaaⁿ chi yeⁿé Ndyuūs ní n'daacā taavi ca tuu'mi ní nguéé canee chí díⁿ yā ndiichí ndii 'úúví compromiso. ⁸Naati Ndyuūs n'diichi yā chí nguéé n'daacā díⁿ 'iiⁿyāⁿ tiempo chí 'āā chó'ōo. Ní ngaⁿá yā ngii yā 'iiⁿyāⁿ s'eeⁿ tan'dúúccā chí canéé nguūⁿ na libro yeⁿé yā 'tíicā:

'Tíicā ngaⁿa Señor: Tiempo chí cuchii 'úú ní díⁿ 'áámá compromiso ngaī ndúúccū 'iiⁿyāⁿ yeⁿe ndaata Israel ní ndúúccū 'iiⁿyāⁿ yeⁿe ndaata Judá.

⁹Nguεε idiíⁿ tan'dúúccā chí díⁿ ndúúccū chiidá yā taachi divíi 'iiⁿyāⁿ yeⁿe yāⁿāa Egipto. 'Iiⁿyāⁿ s'uuⁿ nguéé díⁿ yā tan'dúúccā chí 'úú yaa'ví 'iiⁿyāⁿ s'uuⁿ. Ní cáāvā chuū nguéé díⁿ cuenta yeⁿé yā.

¹⁰Cuayiivi chí chó'ōo nguuvi s'eeⁿ ní maaⁿ ní chuū chí compromiso ngaī chí caⁿá díⁿ ndúúccū 'iiⁿyāⁿ yeⁿe nación Israel. Ngaⁿa Señor: Cu'neéⁿ leyes yeⁿé na vaanicadínūuⁿ yeⁿé yā ní dinguúⁿ leyes yeⁿé na staava yeⁿé yā. Ní 'úú cuuvi Ndyuūs yeⁿé yā, ní 'iiⁿyāⁿ s'eeⁿ cuuvi 'iiⁿyāⁿ yeⁿé.

¹¹Ní mar 'áámá yā canee chí ca'cueéⁿ yā 'iiⁿyāⁿ yeⁿe nación yeⁿé yā 'tíicā. Nds'tii n'diichi ní Señor miiⁿ, caati nducyáácá yā ní n'diichi yā 'úú ndíí 'iiⁿyāⁿ chí ngaⁿā ntiíⁿnyúⁿ yā ndii taná'ā 'iiⁿyāⁿ.

¹²Ní 'úú ní nadach'εécú nuuⁿndi chí díⁿ yā ní 'āā ntéé nn'gaacú nuuⁿndi yeⁿé yā. ¹³Ní Ndyuūs ngaⁿa yā yeⁿe compromiso

chí ngai tí caati compromiso chí vmnááⁿ vmaaⁿ ní 'āā ndiicúu tuu'mi ní deenu yú chí dendú'ū chí 'āā ndiicúu ní 'āā nuúⁿ 'cuiinu.

Yeⁿe yáacū na iⁿyeeⁿdí 'cūū ní yeⁿe yáacū na va'ai cheeti nguuvi

9 Cuáacú chí véé reglas yeⁿe compromiso chí vmnááⁿ vmaaⁿ ndúúccū yaacū chí 'iiⁿyāⁿ s'eeⁿ din'dái yā naachi dich'εεte yā Ndyuūs. ²Din'dái yā yaacū yeⁿe tíínūuⁿ ndúúccū 'uuví cuartos. Cuarto chí vmnááⁿ vmaaⁿ ní nguuvi Lugar Dεεve. Ní cheeti cuarto miiⁿ véé 'áámá candelero ndúúccū 'áámá mesa, ní vmaaⁿ mesa véé pan chí ofrenda yeⁿé Ndyuūs. ³Ná cuarto chí yaānūuⁿ táámá lado yeⁿe cortina yeⁿe tíínūuⁿ nguuvi Lugar Dεεve N'dai Ca Yeⁿé Ndyuūs. ⁴Na cuarto miiⁿ véé 'áámá nátaī yeⁿe 'diiⁿnguāⁿ naachi chiiduú ch'εεte ca ngíⁿí yā cúⁿúyaa. Ní míⁿ canéé 'áámá caja chí yeⁿe compromiso. Nducuéⁿe lados yeⁿe caja miiⁿ ní candúúu 'diiⁿnguāⁿ vmnááⁿ yeⁿe. Cheeti caja miiⁿ véé chííté yeⁿe 'diiⁿnguāⁿ ní miiⁿ snúūⁿ pan chí nguuvi maná. Ní cheeti caja ntúūⁿ canéé nduucu chí nanguaaⁿnu chí yeⁿe Aarón ndúúccū 'úúví tablas yeⁿé tuūu naachi canéé nguūⁿ ley chí díⁿ Ndyuūs. ⁵Vmaaⁿ caja miiⁿ canéé 'uūví querubines tan'dúúccā ángeles ndúúccū ngεechí yā. Ní miiⁿ Ndyuūs canéé yā. Ní canéé 'cutií yeⁿe ngεechí yā yeⁿe vmaaⁿ cuaaⁿ naachi Ndyuūs nadich'εécú yā nuuⁿndi yeⁿe nducyaaca 'iiⁿyāⁿ. Maaⁿ ní yeⁿé chuū nguéé cuuvi caaⁿmáⁿ yeⁿe tanducuéⁿe maaⁿ.

⁶Tíicā chiiduú s'eeⁿ idiíⁿ yā nducuéⁿē. Nguuvi nguuvi chiiduú s'eeⁿ ngéⁿe yā na cuarto vmnááⁿ vmaaaⁿ ní dííⁿ yā ntiiⁿnyuⁿ yeⁿé yaacū yeⁿé Ndyuūs. ⁷Ní na cuarto chi yaānūⁿ miiⁿ chi ndii 'úúví dámaāⁿ chiiduú ch'εεte ca indaá yā 'áámá vmaneⁿéé nūⁿ ca'áámá ca'áámá nduuyū. Ní canéé chí candéé yā yuūúⁿ yeⁿe 'iiti chi ca'a yā ofrenda Ndyuūs cáávā nuuⁿndi yeⁿé yā ní cáávā nuuⁿndi yeⁿé tanáⁿā 'iiⁿyāⁿ. ⁸Espíritu N'dai yeⁿé Ndyuūs chí'iⁿí yā s'uúúⁿ chí nguéé cuuvi ndaa yú nanááⁿ Ndyuūs néⁿé chí canéé yaacū yeⁿe tíínūⁿ caati yaacu tíínūⁿ miiⁿ ní yeⁿe compromiso chí vmnááⁿ vmaaaⁿ. ⁹Ní nducuéⁿē chuū chí dííⁿ chiiduú s'eeⁿ ní canee tan'dúúca 'áámá ejemplo yeⁿé tiempo yeⁿe yú. Chiiduú s'eeⁿ ní ca'a yā ofrendas nanááⁿ Ndyuūs ndúúcu 'iiti chí n'giiⁿnúⁿ yā cáávā ofrendas yeⁿé nuuⁿndi yeⁿé yā. Chuū ní neⁿē caaⁿmaⁿ chí ofrendas ndúúcu 'iiti chí n'giiⁿnúⁿ yā ní ca'a yā Ndyuūs nguéé cuuvi diiⁿ chí staava yeⁿe 'iiⁿyāⁿ s'eeⁿ ní dεεve neⁿe chí 'tíicā chí nga'a yā ofrendas nanááⁿ Ndyuūs. ¹⁰'Iiⁿyāⁿ s'eeⁿ dich'εεtē yā Ndyuūs dámaāⁿ ndúúcu cosas chí che'é yā ndúúcu cosas chí cu'u yā ndúúcu chiiⁿ chí dííⁿ yā chí cuuvi dεεvé yā staava yeⁿé yā. Nducuéⁿē chuū ní reglas chí dííⁿ yā ní canee chí dííⁿ yā 'tíicā ndii tiempo chí Ndyuūs n'daaⁿ yā dendu'ū yeⁿē.

¹¹Cristo ní 'āā ndāa yā iⁿ'yeeⁿdí 'cūū. Ní maaⁿ ní Cristo miiⁿ ní chiiduú ch'εεte ca yeⁿe dendú'ū chí n'dai taavi ca. Ní yaacū naachi Cristo dííⁿ yā ntiiⁿnyuⁿ ní ch'εεte

taavi ca ní n'daacā ca nguéé ti yaacū yeⁿe tíínūⁿ chí yeⁿé iⁿ'yeeⁿdí 'cūū. Ní 'iiⁿyāⁿ s'eeⁿ nguéé n'dái yā yaacū chí ch'εεte ca. ¹²Ní Cristo ndāa yā chεeti yáacū ndíi cuarto yaānūⁿ chí nguuvi Lugar Dεεve N'dai Ca Yeⁿé Ndyuūs. Nguéé sndéé yā ndúúcu yuuúⁿ yeⁿe 'iiti chí chivo o daiyā vaca chí n'giiⁿnuⁿ yā naati ndúúcu yuuúⁿ yeⁿe maāⁿ yā. Ní 'tíicā sndāa yā dámaāⁿ 'aama vmaneⁿēe na Lugar Dεεve N'dai Ca Yeⁿé Ndyuūs cáávā nducyaaca 'iiⁿyāⁿ. Ní maaⁿ ní nadanguáⁿ'ai yā s'uúúⁿ chí cuuvi yeⁿé yā s'uúúⁿ cueⁿe daāⁿmaⁿ. ¹³Cuáácú chí yuūūⁿ yeⁿe itiindu ndúúcu yuūūⁿ yeⁿe chí chivo ndúúcu yaiyāā yeⁿe daiya vaca chí 'āā ngiichi vmaaaⁿ nátaí ní chiiduú s'eeⁿ ch'leeⁿ ndái yā vmaaaⁿ 'iiⁿyāⁿ chí véé nuuⁿndi yeⁿé yā ti yuūúⁿ cuuvi nadivεεve 'iiⁿyāⁿ cáávā ley yeⁿé yā. ¹⁴Ní chuū ní cuaacu. Maaⁿ ní nééné n'daacā ca chí cuuvi diiⁿ yuūúⁿ yeⁿe Cristo nguéé ti yuūúⁿ yeⁿé 'iiti. Cucáávā Espíritu N'dai yeⁿé Ndyuūs chí canduuchi cueⁿé daāⁿmaⁿ, Cristo dííⁿ yā ofrecer cuerpo yeⁿe maāⁿ yā chí 'iiⁿyāⁿ s'eeⁿ 'caaⁿnúⁿ yā yā cáávā ofrenda yeⁿé Ndyuūs, ofrenda chí n'daacā yeⁿē. Ní yuūúⁿ yeⁿe Cristo ní cuuvi didεεve staava yeⁿē yú yeⁿe nducuéⁿē chí nadacadíínuuⁿ yú chí nguéé n'daacā. Ní 'íicú cuuvi s'uúúⁿ ní dichí'vē yú Ndyuūs chí canduuchi.

¹⁵Cáávā chí Jesucristo dííⁿ yā 'áámá compromiso chí ngai, Jesucristo canéé yā naavtáⁿā yeⁿe 'iiⁿyāⁿ yeⁿe iⁿ'yeeⁿdí 'cūū ndúúcu Ndyuūs. Ní maaⁿ ní cuuvi ndaa yú nanááⁿ Ndyuūs. Ní cáávā

chi ch'iī Cristo, Cristo ní cuuvi nadach'εεcú yā nuu"ndi ye"e 'ii"yā"n chi cuneé yā máá"n compromiso chi vmnáá"n vmnaa". Ní 'ii"yā"n chi Ndyuūs yaa'ví yā chi cuuvi ye"é yā, 'ii"yā"n s'ee"n cuuvi cuta'a yā chi cuuvi ye"é yā chi 'áámá cūnee chi Ndyuūs ca'á yā 'ii"yā"n cucáávā Cristo. ¹⁶Taachí 'ii"yā"n s'nee"n yā escrito ye"e herencia ye"é yā chi ca"n a yā ca'a yā taamá yā, 'ii"yā"n mii"n canee chi 'cuūvi yā vmnáá"n vmnaa"n chi dichí'vē chii"n chi canéé nguū". Chuū ní tan'dúucā 'áámá compromiso chi dí"n yā. ¹⁷'ii"yā"n chi s'nee"n escrito ye"e herencia ye"é yā chi ca"n á yā ca'a yā taama yā, nguéé dichí'vē escrito ye"é yā ne"e tiempo chi canduuchí yā. Naati taachi 'āā n'dii yā tuu'mi ní dichí'vē chuū. Ní tan'dúucā 'áámá compromiso chi dí"n yā 'tíicā escrito mii". ¹⁸Ní 'tíicā chí"n chi dichí'vē compromiso chi dii"n Ndyuūs vmnáá"n vmnaa"n nduuti chi véé yuūú"n ti ch'ii"n nū"n yā 'iiti. ¹⁹Moisés ca"n a sa chii sá nducyaaca mandamiento ye"e ley. Cuayiivi ní 'ii"yā"n caa"n nū"n yā 'iiti ní Moisés sta'a sa yuūú"n ye"e daiya vaca ndúucū yuūú"n ye"e chivo ní ndásta"n a sa nuū"n nī"n ndúucū yuūú"n. Cuayiivi ní sta'á sa yuūú"n ndúucū duūdū 'iiti cuūchī ndúucū 'áámá yaatā chi duuchi hisopo. Ní s'neé"n yā yuūú"n vmnaa"n libro ye"e ley ní vmnaa"n ye"e nducyaaca 'ii"yā"n dendú'ū. ²⁰Ní nga"n á Moisés 'tíicā: Chuū ní yuūú"n chí 'áámá sello ye"e chí cuuvi cuaacu compromiso chi Ndyuūs ca'a yā orden chi ndí'stīi canee chí dí"n nī 'tíicā. ²¹'Tiicā ntúū"n Moisés s'nee"n sa yuūú"n mii"n vmnaa"n ye"e

yaācū ye"e tíinū"n ní vmnaa"n ye"e tanducué"ē dendu'ū chí itunee"n na nti"nyu"n ye"é Ndyuūs. ²²Cuaacu chi tan'dúucā chí nga"n á ley 'téé 'téé nguéé nducué"ē ní yuūú"n dii"n chí canéé deεve nducué"ē. Ní Ndyuūs nguéé nadich'εεcú yā 'ii"yā"n ye"e nuu"ndi ye"é yā nduuti chí nguéé ndúucū yuūú"n ye"e 'iiti chí 'caa"n nū"n chiiduú s'ee".

Jesucristo ca'á yā maa"n cuerpo ye"é yā chí 'ii"yā"n s'ee"n 'caa"n nū"n yā 'yā lado ye"e ofrenda

²³'Tíicā nducué"ē dendú'ū ye"e i"yee"n dí' cūū canéé chí ndúúvī deεve ndúucū yuūú"n ye"e 'iiti. 'Téé 'téé nduuvi deεve tan'dúucā deεve na va'ai chεeti nguuvi. 'Tiicā ntúū"n cuuvi ndaa yú na va'ai chεeti nguuvi nduuti chí deεve yú ndúucū yuūú"n ye"e táámá yā chí Cristo chí ch'εete taavi ca nguéé ti ndúucū yuūú"n ye"e 'iiti. ²⁴Cristo nguéé cue"é yā sndaa yā na 'áámá yaacū chí deεve taavi ca chí nin'dái sa"n á ye"e i"yee"n dí' cūū. Yaācū ye"e i"yee"n dí' cūū 'tεe 'téé tan'dúucā yaācū chí deεve taavi ca chí cuaacu ní"nyú"n chí yaācū ye"é Ndyuūs. Cristo cue"é yā sndaa yā na va'ai chεeti nguuvi ní mii"n canee yā nanáá"n Ndyuūs lado ye"e s'uuú"n. ²⁵Sa"n á chiiduú ch'εete ca ye"e i"yee"n dí' cūū chí ye"e ndaata judíos chí Israel nduuyu nduuyu ndaa yā na Lugar Deεve N'dai Ca ndí"n ná yaānū"n ye"e yaācū ye"e Ndyuūs ní ca'á yā Ndyuūs ofrenda chí yuūú"n ye"e 'iiti, ní nguéé yuūú"n ye"é yā chí ca'a yā. Naati Cristo ca'á yā vida ye"e maá"n yā caavā ofrenda 'áámá vmne"éé nū"n. ²⁶Nduuti chí Cristo

canee chi diíⁿ yā tan'dúucā chi idiíⁿ chiiduú ch'εete ca tuu'mi ní canéé chi 'cuūvi yā n'deeē n'dái cuuvi ndíí tiempo chi Ndyuūs din'dái yā iⁿ'yeeⁿdí 'cūū ndíí chi 'cuiinū íⁿ'yeeⁿdí. Naati nguéeé diíⁿ Cristo 'tíicā. Caati tiempo chi Ndyuūs s'neéⁿ yā ní Jesucristo 'áámá vmneⁿ'éeē nūuⁿ ch'ií yā ní ndāa yā nanááⁿ Ndyuūs chi nadach'εecú yā nuuⁿndi yeⁿ'ē nducyaaca 'iiⁿ'yāⁿ cucáávā chi ca'a maáⁿ yā cuerpo yeⁿ'é yā chi 'iiⁿ'yāⁿ s'eeⁿ n'giiⁿ'núⁿ yā 'yā cáávā ofrenda. ²⁷Tiicā ntúūⁿ nducyaaca 'iiⁿ'yāⁿ yeⁿ'e iⁿ'yeeⁿdí 'cūū canee chi 'cuūvi yā 'áámá vmnéⁿ'ēē. Níicú cuayivi ní Cristo caⁿ'á yā n'diichí yā nuuⁿndi yeⁿ'e 'iiⁿ'yāⁿ s'eeⁿ. ²⁸Ní 'tíicā Cristo 'áámá vmnéⁿ'ēē ca'á yā cuerpo yeⁿ'e maáⁿ yā cáávā ofrenda chi nadich'εecú yā nuuⁿndi yeⁿ'e nducyaaca 'iiⁿ'yāⁿ. Ní taachi caⁿ'á yā ndaa yā taama vmnéⁿ'ēē nguéeé ndaa yā cucáávā chi caⁿ'á yā nadíí've yā nuuⁿndi yeⁿ'e nducyaaca 'iiⁿ'yāⁿ. Naati caⁿ'á yā nadanguáⁿ'ai yā nducyaaca s'uuúⁿ chi canéé ngiinu yú chi ndaa yā ndiichi ndii 'úúví cuuvi. Ndaa yā chi nadanguáⁿ'ai yā s'uuúⁿ.

10 Ní ley yeⁿ'e Moisés ní tan'dúucā 'daaⁿ'nú nūuⁿ 'tíicā ti nguéeé 'áámá cūnee. Ní nguéeé dáámá dáámá ndúucū nducueⁿ'ē vaadí cuaacu chi n'daacā chi cuchii. Ti cáávā chi ngaⁿ'a ley miiⁿ 'iiⁿ'yāⁿ s'eeⁿ nduuyu nduuyu 'caaⁿ'núⁿ yā 'iiti cáávā ofrenda cucáávā nuuⁿndi yeⁿ'é yā. Ní cáávā chuū, 'táácā cuuvi ley miiⁿ diiíⁿ chi 'iiⁿ'yāⁿ s'eeⁿ canéé n'daaca yā nanááⁿ Ndyuūs? ²Ti nduuti chi ley miiⁿ diiíⁿ chi 'iiⁿ'yāⁿ s'eeⁿ canee n'daaca yā nanááⁿ

Ndyuūs ní nguéeé nuuⁿndi yeⁿ'é yā nanááⁿ Ndyuūs, tuu'mi ní 'āā ntéeé 'caaⁿ'núⁿ yā 'iiti cáávā nuuⁿndi yeⁿ'é yā. Ní nguéeé nadacadífnuuⁿ yā yeⁿ'e chí chidεεvé yā yeⁿ'e nuuⁿndi yeⁿ'é yā. ³Ní 'tíicā diiíⁿ ley miiⁿ. Taachi n'giiⁿ'núⁿ yā 'iiti nduuyu nduuyu tuu'mi ní nan'gáácú yā yeⁿ'e nuuⁿndi yeⁿ'é yā. ⁴Ti ndúucū yuūúⁿ yeⁿ'e 'itííndú ndúucū yuūúⁿ yeⁿ'e chivo 'iiⁿ'yāⁿ s'eeⁿ nguéeé cuuvi didεεvé yā yeⁿ'e nuuⁿndi yeⁿ'é yā. ⁵Ní cucáávā chuū taachi ndaa Cristo na iⁿ'yeeⁿdí 'cūū ngaⁿ'á yā ngii yā yeⁿ'e nduudu yeⁿ'é Ndyuūs chi canéé nguūⁿ 'tíicā:

Díí, Ndyuūs, nguéeé neⁿ'e di chi 'iiⁿ'yāⁿ 'caaⁿ'nuⁿ yā 'iiti lado yeⁿ'e ofrenda ndíí nguéeé ndúú chi ca'á yā 'iiti cáávā ofrenda yeⁿ'e di naati din'dái di 'áámá cuerpo yeⁿ'é chi ch'iindiyaáⁿ.

⁶Ní nguéeé neⁿ'e di ofrendas yeⁿ'e chi nguuchí yā cuerpo yeⁿ'e 'iiti nátaí, ní nguéeé yeⁿ'e chi 'caaⁿ'núⁿ yā 'iiti cáávā chi Ndyuūs nadach'εecú yā nuuⁿndi yeⁿ'é yā.

⁷Dii Ndyuūs, 'úú ndaa iⁿ'yeeⁿdí 'cūū chi cuuvi dííⁿ cheē chi neⁿ'e di chi dííⁿ caati 'tíicā canéé nguūⁿ yeⁿ'e 'úú na libro yeⁿ'e Ndyuūs naachi canéé nguūⁿ ley. ⁸Vmnaáⁿ vmnaaⁿ ngaⁿ'a Cristo: Dii Ndyuūs nguéeé neⁿ'e di ní nguéeé yeenú di ndúucū ofrendas yeⁿ'e chi n'giiⁿ'núⁿ yā 'iiti, ní nguéeé yeⁿ'e 'iiti chi tee yā dii. Ndíí nguéeé ndúú yeⁿ'e chi n'giiⁿ'núⁿ yā 'iiti ní ngiichí yā yuūtē yeⁿ'e 'iiti cáávā chi nadach'εecú di nuuⁿndi

yeⁿé yā. 'Tíicā ngaⁿa Cristo 'áará chí 'iiⁿyāⁿ s'eeⁿ díⁿ yā tan'dúucā chí ngaⁿa ley miⁿ yeⁿé ofrenda chí canéé chí ca'á yā Ndyuūs. ⁹Ní cuayiivi ngaⁿá Cristo: Dii, Ndyuūs, 'úú ndaá na iⁿyeeⁿdí 'cūū chí cuuvi díⁿ cheē chí neⁿe dí chí díⁿ. Maaⁿ ní nducuéⁿē chuū neⁿe caaⁿmaⁿ 'tíicā. Ndyuūs diví yā 'áámá lado ofrenda yeⁿe 'iiti chí 'iiⁿyāⁿ s'eeⁿ ch'iiⁿnúⁿ yā. Ní na lugar yeⁿe ofrenda miⁿ Ndyuūs ca'á yā Cristo chí ch'ii yā. ¹⁰Maaⁿ ní Ndyuūs didēvé yā s'uuúⁿ cáávā Jesucristo díⁿ yā nducuéⁿē chí Ndyuūs neⁿé yā chí diiⁿ yā. Ní 'áámá vmnéⁿee nūⁿ Jesucristo ca'á yā cuerpo yeⁿe maáⁿ yā cáávā ofrenda chí 'iiⁿyāⁿ s'eeⁿ n'giiⁿnúⁿ yā 'yā cáávā nuuⁿndi yeⁿe nducyáácá 'iiⁿyāⁿ.

¹¹Ca'áámá cā'aama chiidūū judío chí Israel nguuví nguuví díⁿ yā ntiiⁿnyuⁿ ní cheendii yā ní nga'á yā ofrenda dáámá daama nūⁿ nééné n'deēe cuúví 'áará chí ofrenda miⁿ chí n'giiⁿnúⁿ yā 'iiti nguéé cuuvi diví nuuⁿndi yeⁿe 'iiⁿyāⁿ mar 'áámá vmnéⁿee. ¹²Naati Jesucristo 'áámá vmnéⁿee nūⁿ ca'á yā maaⁿ cuerpo yeⁿé yā chí 'iiⁿyāⁿ s'eeⁿ n'giiⁿnúⁿ yā 'yā caavā ofrenda yeⁿe nuuⁿndi yeⁿe nducyáácá 'iiⁿyāⁿ. Ní cuayiivi cueⁿé yā na va'ai cheeti nguuví ní ch'iindí yā na lado yeⁿe honor yeⁿé Ndyuūs chí lado tá cuaacu. ¹³Maaⁿ ní Jesucristo canee ngiinú yā chí ndaa tiempo chí Ndyuūs idifⁿ yā chí nducyaaca 'iiⁿyāⁿ chí contra yeⁿé yā canéé

yā maaⁿ ca'á Jesucristo tan'dúucā chí 'áámá banco 'líⁿ 'tiicá yā chí Jesucristo cuchéé yā yeⁿe yā. ¹⁴Ní cáávā chí Cristo ca'á yā cuerpo yeⁿe maáⁿ yā chí 'iiⁿyāⁿ s'eeⁿ n'giiⁿnúⁿ yā 'yā 'áámá vmnéⁿee nūⁿ cáávā ofrenda tuuⁿmi ní Cristo díⁿ yā chí dáámá cuuvi deévé 'iiⁿyāⁿ ti nadach'εεcú yā nuuⁿndi yeⁿé yā. Ní 'iiⁿyāⁿ s'eeⁿ ní yeⁿe Ndyuūs cueⁿe daaⁿmaⁿ. ¹⁵Ní Espíritu N'dai yeⁿé Ndyuūs ngaⁿa ndúucu yú chí nducuéⁿē chuū ní cuaacu. Vmnááⁿ vmnaaⁿ ngaⁿa Ndyuūs chuū:

¹⁶Chuū chí díⁿ prometer chí díⁿ caavā yā cuayiivi chí ch'óo nguuví s'eeⁿ, ngaⁿa Ndyuūs. Cu'neéⁿ ley yeⁿé na staava yeⁿé yā. Ní dinguúⁿ ley yeⁿé na vaanicadínūⁿ yeⁿé yā.

¹⁷Ní cuayiivi ngaⁿá yā: 'Āā ntéé nan'gaacú nuuⁿndi yeⁿé yā ní nguéé nducuéⁿē chí díⁿ yā chí nguéé n'daacā. ¹⁸Níicú taachi Ndyuūs nadich'εεcú yā nuuⁿndi yeⁿé 'iiⁿyāⁿ s'eeⁿ tuuⁿmi ní 'āā ntéé canéé chí ca'á yā ofrendas chí 'caaⁿnúⁿ yā 'iiti cáávā nuuⁿndi yeⁿe yā.

Canéé chí nan'gaacu yú yeⁿe Ndyuūs yeⁿe yú

¹⁹'Tíicā ní hermanos yeⁿé maaⁿ ní cuuvi nandaa yú nanááⁿ Ndyuūs na cuarto chí Dēeve N'dai Ca na yaacū yeⁿé Ndyuūs ti véé 'viich'εetínūⁿ yeⁿé yú nanááⁿ Ndyuūs cáávā yuúúⁿ yeⁿe Señor Jesucristo. ²⁰Ní Jesucristo nn'guaaⁿ yā 'áámá yúúni chí n'dai ní canduuchi taachi chí nteeⁿ yā tীনūⁿ yeⁿe yaacū. Tীনūⁿ miⁿ ní neⁿe caaⁿmaⁿ chí tan'dúucā cuerpo yeⁿe maáⁿ Cristo taachí ch'ii

yā, 'tíicā va. Maaⁿ ní cuuvi ndaa yú na cuarto chi yaānuuⁿ nanááⁿ Ndyuūs caavá yā. ²¹Ní Jesucristo ní chiiduú ch'etete ca yeⁿe yú ní díiⁿ yā ntiiⁿnyuⁿ yeⁿe yaācū yeⁿe Ndyuūs. ²²Maaⁿ ní canéé chí indaa yú nanááⁿ Ndyuūs ndúúcu nūⁿmáⁿ staava yeⁿe yú ní 'áámá canee yú ndúúcu chi i'téenu yú. Cristo miiⁿ 'āā didēevē yā staava yeⁿe yú yeⁿe nuuⁿndi yeⁿe yú caati nguéé nadacadíínuuⁿ ca yú yeⁿe castigo yeⁿe nuuⁿndi chi díiⁿ yú. Ní nadidēeve yā cuerpo yeⁿe yú ndúúcu nuūⁿnīⁿ dēeve. ²³Maaⁿ ní díiⁿ yú chi 'áámá canee yú ndúúcu chi ngaⁿa yú chi i'téenu yú caati deenu yú chi Ndyuūs caⁿá yā díiⁿ yā cumplir compromiso yeⁿe chi caⁿa yā chi tēe yā s'uuúⁿ. ²⁴Ní s'uuúⁿ canéé chí inadacádíínuuⁿ yú táacā cuuvi cunnee yú 'aama yú taama yú ní dineⁿe yú 'aama yú taama yú ní díiⁿ yú dendu'ū chi n'daacā. ²⁵Ní nguéé díiⁿ yú chi nguéé nduuvidaama yú ch'eti yaācū tan'dúúca chi díiⁿ náⁿa yā. Naati ca'a yú consejo 'aama yú taama yú caati deenu yú chi nguuvi chi ndaa Cristo taama vmnéⁿēe 'āā snee niiⁿnuúⁿ.

²⁶Ní nduuti chi idiⁿ yú nuuⁿndi caati maaⁿ yú neⁿe yú cuayiivi chi 'āā deenu yú nduudu cuaacu yeⁿe Ndyuūs tuuⁿmi ní 'āā ntee véé taama ofrenda chi cuuvi ca'a yú Ndyuūs cáavā nuuⁿndi yeⁿe yú chi Ndyuūs divíi yā nuuⁿndi yeⁿe yú. ²⁷Dámaāⁿ 'va'a yú neⁿe chi cunee ngiinu yú yeⁿe chi cuchii. Cristo caⁿá yā n'diichi yā nuuⁿndi yeⁿe yú ní ndúúcu yaⁿā ingiichi chi cuucu tanducuéⁿe 'iiⁿyāⁿ chi contra yeⁿe

Ndyuūs. ²⁸Deenu yú yeⁿe 'iiⁿyāⁿ chi nguéé díiⁿ yā cuenta yeⁿe ley yeⁿe Moisés. Nduuti chi véé 'uuví o 'iinū 'iiⁿyāⁿ chi ngaⁿa nduudu cuaacu yeⁿe falta yeⁿe yā tuuⁿmi ní ch'ii 'iiⁿyāⁿ miiⁿ. Ní nguéé ya'ai 'iiⁿyāⁿ s'eeⁿ taachi ch'ii yā.

²⁹Maaⁿ ní nadacadíínuuⁿ yú yeⁿe 'iiⁿyāⁿ s'eeⁿ chi nguéé díiⁿ yā cuenta yeⁿe yuúúⁿ yeⁿe Cristo chí cuuví dēeve 'iiⁿyāⁿ s'eeⁿ. 'Iiⁿyāⁿ s'eeⁿ ngaⁿa taāⁿ yā yeⁿe Espíritu N'dai yeⁿe Ndyuūs. ¿De'ē chúúca n'dee ca castigo véé yeⁿe 'iiⁿyāⁿ s'eeⁿ?

³⁰Deenu yú chi Señor ní ngaⁿa yā 'tíicā: 'Úú canéé chí ca'á castigo 'iiⁿyāⁿ. 'Úú idiⁿ chi 'iiⁿyāⁿ nadíi've yā chiiⁿ chi díiⁿ yā chi nguéé n'daacā. Chuū dendu'ū ngaⁿa Señor miiⁿ: Señor miiⁿ caⁿá yā n'diichi yā nuuⁿndi yeⁿe 'iiⁿyāⁿ yeⁿe yā. ³¹De'ē chúúca ya'āi yeⁿe yú. Néené 'va'a yú chi ndaa yú nanááⁿ Ndyuūs chi cānduuchi chi díiⁿ yā castigar s'uuúⁿ nduuti chi nguéé n'daacā idiⁿ yú.

³²Maaⁿ ní n'gaacú nī yeⁿe nguuvi s'eeⁿ chi 'āā chó'oo chi caama n'diichí nī ní s'téenu nī Jesucristo, ní cuayiivi chi ch'ee nī ch'eenu nī chii yeⁿe tanducuéⁿe dendu'ū cucáavā chi díiⁿ nī luchar yeⁿe chi i'téenu nī. ³³Náⁿa nī ch'eenú nī chii ní 'cuináaⁿ nī taachi 'iiⁿyāⁿ sta'á yā ndís'tii ní ngaⁿa taāⁿ yā yeⁿe ndís'tii ní ch'eⁿe yā ndís'tii nanááⁿ n'dee n'dáí 'iiⁿyāⁿ. Ní taachi 'tíicā díiⁿ yā ndúúcu naⁿā hermanos yeⁿe yú neⁿe nī 'cuenú nī cuuvi nduucú yā. ³⁴Ní taachi náⁿā hermanos ch'eenú yā chii chi canéé yā vácū, ndís'tii ní ya'ái nī hermanos s'eeⁿ. Ní taachi 'iiⁿyāⁿ sta'á yā nducuéⁿe chi véé yeⁿe nī ndís'tii ní chichee nī

yeⁿe nducuéⁿē. Ní yeenú nī caati deenú nī chí véé chí cuuvi yeⁿé nī chí n'dai taavi ca ná va'ai cheeti nguuvi chí cueⁿe daaⁿmaⁿ 'áamá cūnee yeⁿe nī. ³⁵Maaⁿ ní nguéeé dí'vaachí nī ti nguéeé véé confianza yeⁿé nī ndúucū Ndyuūs caati ndúucū chí i'téenu nī cuuvi dííⁿ nī ganar cosas chí n'daacā taavi ca. ³⁶Ní ndís'tií ní canéeé chí cuhéé nī yeⁿe nducuéⁿē ní dííⁿ nī nducuéⁿē chí Ndyuūs neⁿé yā chí dííⁿ nī. Ní 'íicú cuuvi cuta'á nī yeⁿe chí véé yeⁿé nī chí Ndyuūs caⁿa yā chí téé yā ndís'tií. ³⁷Canéeé nguūⁿ na libro yeⁿé Ndyuūs 'tíicā:

'Āā ntee 'nááⁿ tiempo ní Señor chí canéeé chí ndaa ní ndaa yā. Ní 'āā ntéeé cuuví 'nááⁿ yā.

³⁸Ní ngaⁿa yā 'tíicā:

'Iiⁿyāⁿ chí yeⁿé ní deevé yā tí i'téenu yā 'úú ní canduuchí yā cueⁿe daaⁿmaⁿ. Ní nduuti chí 'aama yā ndaacadaamí yā yeⁿé tuu'mi ní 'úú nguéeé yeenú yeⁿe yā. ³⁹Maaⁿ ní s'uuúⁿ ní nguéeé tan'dúucā 'iiⁿyāⁿ chí ndaacadaamí yā yeⁿe Cristo ní chindai yā. Nguéeé 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿai yā s'uuúⁿ.

Yeⁿe chí i'teenu yú Jesucristo

11 Cáávā chí i'teenu yú Ndyuūs deenu yú chí seguro chí cuta'a yú yeⁿé chí canee ngiinu yú. Ní deenu yú chí cuuvi cuaacu yeⁿe dendu'ū chí nguéeé inaaⁿ yú. ²Ní tiempo chí 'āā chó'oo 'iiⁿyāⁿ ngaⁿá yā chí 'iiⁿyāⁿ chí dííⁿ yā ntiiⁿnyuⁿ yeⁿe Ndyuūs ní ndááca yā nanááⁿ Ndyuūs ti i'téenu yā Ndyuūs.

³Ní deenu yú cucáávā chí i'teenu yú Ndyuūs, chí chíiⁿ chí inaaⁿ yú ní cáávā chí Ndyuūs din'dái yā íⁿ'yeeⁿdi ní nguéeé de'ē vee.

⁴Ní cáávā chí saⁿā Abel ní i'téenu sa Ndyuūs, ca'a sa 'áamá ofrenda chí n'daacā ca nguéeé ti saⁿa Caín miiⁿ. Ní Ndyuūs n'diichí yā chí ofrenda yeⁿe Abel miiⁿ ní n'daacā ca ní sta'á yā ofrenda miiⁿ. Ní Ndyuūs n'diichí yā chí Abel ní n'daacā sa. Ní cáávā chí Abel i'téenu sa Ndyuūs 'áará chí chíiⁿ saⁿā miiⁿ ndíí maaⁿ ní ngaⁿa 'iiⁿyāⁿ yeⁿe vaadi i'téenu yeⁿé sa.

⁵Cáávā chí saⁿā Enoc i'téenu sa Ndyuūs, nguéeé chíiⁿ sa ti Ndyuūs candéeé yā saⁿā miiⁿ na va'ai cheeti nguuvi. 'Iiⁿyāⁿ yeⁿé yā 'āā ntéeé ndaacá yā saⁿā miiⁿ ti Ndyuūs candéeé yā saⁿā miiⁿ nduucú yā. Canéeé nguūⁿ na libro yeⁿe Ndyuūs 'tíicā: Taachi 'āā cuéeé candéeé Ndyuūs saⁿā miiⁿ, Ndyuūs canee yiinú yā chí idiiⁿ sa. ⁶Mar 'áamá 'iiⁿyāⁿ nduuti chí nguéeé i'téenu yā Ndyuūs, Ndyuūs nguéeé cunee yiinú yā 'iiⁿyāⁿ. Nduuti chí 'iiⁿyāⁿ neⁿé yā ndaa yā nanááⁿ Ndyuūs canee chí cu'téenu yā chí véé Ndyuūs. Ní Ndyuūs caⁿa yā chí ca'a yā chí véé chí cuuvi yeⁿé 'iiⁿyāⁿ chí n'nuúⁿ yā Ndyuūs.

⁷Ní cáávā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chí caⁿá yā dííⁿ yā. 'Áará chí nguéeé inaaⁿ sa cosas miiⁿ n'giindiveeⁿ sa nduudu yeⁿé Ndyuūs ní din'dái sa 'áamá arca chí barco ch'eteé ní 'íicú cuuví nanguáⁿāi 'iiⁿyāⁿ yeⁿé sa na vaacú sa. 'Túucā Noé díiⁿ sa condenar 'iiⁿyāⁿ yeⁿe

iⁿ'yeeⁿdí 'cūū caati i'téenu sa Ndyuūs. Ní Ndyuūs didεεvé yā Noé chi cuuvi yeⁿ'é yā caati i'téenu sa Ndyuūs.

⁸Ní cáāvā saⁿā Abraham i'téenu sa Ndyuūs, ch'iindiveeⁿ sa nduudu yeⁿ'e Ndyuūs taachi Ndyuūs yaa'ví yā Abraham. Ní yaa'ví yā saⁿā chi canéé chí caⁿa sa táámá yáⁿāa chi caⁿa Ndyuūs chi cuuvi yeⁿ'ē sa. Ní s'neeⁿ sa yāāⁿ vaacú sa ní cuéⁿ'e sa. Ní nguéé déénu sá tíí ndíí caⁿa sa. ⁹Ní cáāvā chi Abraham i'téenu sa Ndyuūs, canee sa na yáⁿāa chi Ndyuūs caⁿa yā chi ca'a yā. Ní miiⁿ canee sa tan'dúúca 'iiⁿ'yā chi canúúⁿ yúúní. Ní canúúⁿ sá va'āi tíínūⁿ ndúúcu daiya sa chi Isaac ndúúcu Jacob. Ní 'āā daamá nūⁿ cuuvi yeⁿ'é yā yeⁿ'ē chí cuuvi yeⁿ'e Abraham miiⁿ. ¹⁰Abraham miiⁿ ní cūnee ngíínu sa yāāⁿ chi Ndyuūs 'āā dindái yā tan'dúúca chi Ndyuūs nadacádíínuuⁿ yā. Yāāⁿ miiⁿ chi 'áámá cūnee cimientu yeⁿ'ē ní va'ai cheeti nguuvi.

¹¹Ní cáāvā chi Sara i'téenu tá Ndyuūs, ní ditiínú ca tá chi taavi tá daiya tá. Sta'a tá poder yeⁿ'e Ndyuūs ní ch'iindí daiya tá taachi 'āā ndiicúu ta ti i'téenu tá chi Ndyuūs dííⁿ yā cumplir nduudu chi ngaⁿa yā. ¹²Ní 'tíicā Abraham miiⁿ 'āā ndiicúu ca yā chi cuuvi chiidá yeⁿ'e daiyá yā. Ní n'daataa yeⁿ'é yā chí Sara miiⁿ 'āā ndiicúu ca ntúuⁿ tá. Naati ná 'iiⁿ'yāⁿ yeⁿ'é yā ichii n'dee n'daí 'iiⁿ'yāⁿ tan'dúúca 'ííⁿ'nyúⁿ yeⁿ'e nanguuvi ní tan'dúúca yáⁿāa ndútúú chi véé cuaaⁿ 'diitúú yíicú chi s'uúúⁿ nguéé ngii iduuche yú.

¹³Nducyaca 'iiⁿ'yāⁿ s'eeⁿ ch'ii yā naati i'téenu yā Ndyuūs. Nguéé sta'á

yā cosas chi Ndyuūs caⁿa yā chi ca'a yā naati i'téenu yā ní n'diichi chi yaⁿ'ái yā cosas chi Ndyuūs caⁿa yā chí ca'a yā. Ní yeenú yā. Ní 'iiⁿ'yāⁿ s'eeⁿ ngaⁿa yā chii yā nducyáácá 'iiⁿ'yāⁿ chi tan'dúúca 'iiⁿ'yāⁿ chi snúúⁿ yúúní, 'tiicá yā 'naaⁿ tiempo chi snée yā iⁿ'yeeⁿdí 'cūū. ¹⁴Ní nducyaaca 'iiⁿ'yāⁿ chi ngaⁿ'á yā 'tíicā ch'iⁿ'i yā chi in'nuúⁿ yā táámá nación chí n'dai chí cuuvi yeⁿ'e yā. ¹⁵Ní nduuti chi nn'gaacú yā yeⁿ'e yáⁿāa naachi chiicá yā tuu'mi ní cuuvi nguεεcunée yā ní ndaa yā na yáāⁿ miiⁿ. ¹⁶Naati 'iiⁿ'yāⁿ s'eeⁿ neⁿ'é yā táámá nación chi n'daacā ca chí yeⁿ'ē va'ai cheeti nguuvi. Ní cáāvā chuū Ndyuūs nguéé 'cuináⁿ yā taachi 'iiⁿ'yāⁿ s'eeⁿ ngaⁿa yā 'tíicā: N'dii Ndyuūs ní Ndyuūs yeⁿ'ē yú. Ndyuūs 'āā véé yaāⁿ yā 'áámá yāāⁿ chi cuuvi yeⁿ'e 'iiⁿ'yāⁿ s'eeⁿ.

¹⁷Ní cáāvā chi Abraham miiⁿ i'téenu yā Ndyuūs, n'giindiveéⁿ yā yeⁿ'e Ndyuūs taachi Ndyuūs n'diichinéⁿ yā Abraham. Ní Abraham ní caⁿ'á yā ca'á yā daiyá yā Isaac cáāvā lado yeⁿ'e ofrenda chi 'caaⁿ'núⁿ yā daiyá yā. Ní canee listo yā chí ca'á yā 'áámá n'dyaⁿ'ā daiyá yā lado yeⁿ'e ofrenda miiⁿ 'áará chí Ndyuūs ca'á yā 'áámá compromiso chí 'tíicā: ¹⁸Díí, Abraham, cáāvā daiya di Isaac 'úú ní teé dii n'dee n'daí taavi cuuvi ndaata yeⁿ'e di. ¹⁹Ní Abraham miiⁿ tuumicádíínuuⁿ yā chí Ndyuūs cuuví nadacuéⁿ yā 'iiⁿ'yāⁿ s'eeⁿ yeⁿ'ē nguaaⁿ tináⁿ'ā. Ní Abraham déénu sa chí Ndyuūs cuuvi nadacuéⁿ yā daiya sa yeⁿ'ē nguaaⁿ tináⁿ'ā, naati nguéé ch'ii sa. Abraham miiⁿ candée sa daiya sa na vaacú sa.

²⁰Ní cáávā chi Isaac i'téenu sa Ndyuūs, ngaⁿa sa chi caⁿa sa di'viicú sa daiya sa Jacob ndúúcú saⁿā Esaú. Ní ngaⁿā sa yeⁿe cosas n'dai chi cuchii. ²¹Ní cáávā chi Jacob i'téenu sa Ndyuūs, taachi 'āā cháā 'cuuvi sa di'viicu sa ca'áámá ca'áámá daiya yeⁿē daiya José. Ní cuayiivi ní dich'εεεε sá Ndyuūs neⁿe chí staā sa in'daacúu yeⁿē sa. Ní yiin'diicúneeⁿ sa na in'daacúu yeⁿē sa. ²²Ní cáávā chi José i'téenu sa Ndyuūs taachi 'āā cháā 'cuuvi sa ngaⁿa sa yeⁿe tiempo chi 'iiⁿyāⁿ yeⁿe ndaata Israel nan'dáa yā ná yáⁿāa Egipto. Ní yaaⁿvi sa 'iiⁿyāⁿ yeⁿe chi canéé chi diíⁿ yā ndúúcú 'iini yeⁿe sa taachi tináⁿā sa.

²³Ní cáávā chi i'téenu yā Ndyuūs chiida sa ní chεεcu sa Moisés, taachi ch'iindiyaāⁿ Moisés miiⁿ chinuundé'ei yā saⁿā lííⁿ miiⁿ na 'iinu 'iiyū. N'diichi yā daiyá yā chi Moisés miiⁿ saⁿā lííⁿ sa neené n'dεεvεε sa. Nguéé di'vá'a yā yeⁿe orden yeⁿe rey chi canéé chi 'caaⁿnúⁿ yā saⁿā lííⁿ miiⁿ. ²⁴Cáávā chi Moisés i'téenu sa Ndyuūs, ní tááchí ch'εētē sa nguéé 'cuūⁿ sa chi 'iiⁿyāⁿ ngaⁿá yā chi Moisés ní daiya n'daataa daiyá rey yeⁿe yāⁿāa Egipto. ²⁵Naati Moisés miiⁿ neⁿe sa 'cueenu ca sá cuuvi ndúúcú 'iiⁿyāⁿ chi yeⁿe Ndyuūs. Ní nguéé 'cuūⁿ sa chi yeenú sa 'áámá tiempo ndúúcú vaadi yeenú chi dinuuⁿndi sa. ²⁶Ní Moisés miiⁿ nadacádíínuuⁿ sa chi n'daacā ca chi 'cueenu sa cuuvi tan'dúúcā chi ch'eenu Cristo chií na yáⁿāa 'cúú ní nguéé ti chi cuuví yeⁿe sa tanducuéⁿē vaadi 'cuiica chi véé na yáⁿāa Egipto. Ní 'tíicā nacádíínuuⁿ sa caati deenu sa

chi Ndyuūs caⁿá yā ca'a yā chi véé chi cuuvi yeⁿe sa. ²⁷Ní cáávā chi Moisés i'téenu sa Ndyuūs, nan'dáa sa yeⁿe yáⁿāa Egipto ní nguéé 'va'a sa chi nduuvi taaⁿ rey. Ní dítu canee sa chi i'téenu sa Ndyuūs tan'dúúcā chi n'diichi sa Ndyuūs 'áará chi nguéé inaaⁿ sa Ndyuūs.

²⁸Ní cáávā chi Moisés i'téenu sa Ndyuūs s'neeⁿ sa orden yeⁿe 'viicu pascua chi 'iiⁿyāⁿ canéé chí s'neéⁿ yā yuúúⁿ yeⁿe 'iiti cuūchí na cheendí va'ai yeⁿé yā caati taachi ndaa ángel chi n'giiⁿnuⁿ yā nducyaaca da'caiyāa saⁿā chi vmnááⁿ vmnaaⁿ, nguéé cuuvi 'caaⁿnúⁿ yā da'caiyāa chi yeⁿé ndaata yeⁿé Israel. ²⁹Ní cáávā 'iiⁿyāⁿ yeⁿe ndaata Israel i'téenu yā Ndyuūs, chicho'ó yā naavtaⁿā yeⁿe mar chi nguuvi Rojo ní ngiicá yā ndii yáⁿāa cuūⁿmáⁿ. Ní cuayiivi ní taachi cho'o 'iiⁿyāⁿ s'eeⁿ yeⁿe yáⁿāa Egipto tuuⁿmi ní chi'i nuūⁿnīⁿ 'iiⁿyāⁿ ní nducyaaca yā ch'ií yā ti nduuvidaāⁿmáⁿ nuūⁿnīⁿ.

³⁰Ní cáávā 'iiⁿyāⁿ yeⁿe ndaata Israel i'téenu yā Ndyuūs, cheⁿe yā nuuⁿmaⁿ ndiivi chεētí yeⁿe yáāⁿ Jericó ndeēchē nguuvi. Tuuⁿmi ní ch'iinu miiⁿ ní chínδεεve chεētí yeⁿe yáāⁿ miiⁿ. ³¹Ní cáávā chi Rahab i'téenu tá Ndyuūs, ní 'áará chi cueⁿe tá ndúúcú saⁿā s'eeⁿ, nguéé ch'ii tá ndúúcú 'iiⁿyāⁿ s'eeⁿ yeⁿe yáāⁿ yeⁿe tá chi nguéé i'téenu yā Ndyuūs; ti n'daata miiⁿ ní sta'a tá saⁿā s'eeⁿ yeⁿe Israel. Ní n'daacā idiiⁿ tá ndúúcú saⁿā s'eeⁿ chi 'díííⁿ 'díííⁿ ndaá yā nguaaⁿ 'iiⁿyāⁿ yeⁿe tá chi cuuvi deenú yā táácā canee 'iiⁿyāⁿ yeⁿe tá.

³²Maaⁿ ní 'de'ē cá cuuví caaⁿmáⁿ ndís'tii? Nguéé véé tiempo chi cuuví

ndís'tií ye^{ne} sa^{na} Gedeón ní ye^{ne} sa^{na} Barac, ní ye^{ne} sa^{na} Sansón, ní ye^{ne} sa^{na} Jefté, ní ye^{ne} sa^{na} David, ní ye^{ne} sa^{na} Samuel, ní ye^{ne} sa^{na} profetas chi candee nduudu ye^{ne} Ndyuūs. ³³Nducyaaca 'ii^{nyā} s'eeⁿ ní cáávā chi i'téenu yā Ndyuūs idií caandá yā ní cucheé yā ye^{ne} ná^{na} países. Ní n'daacā nga^{na} ntií^{nyu} yā ye^{ne} taná^{na} yāāⁿ. Ní tuneéⁿ yā chí Ndyuūs nga^{na} yā chíⁿ chí ca'a yā. Ní diíⁿ yā chi nduūdi cheendi 'yá^{nyā} cuá^{aa}. ³⁴Ní ya^{na} chi diitu n'dái ngiichi nguéeⁿ cuuvi 'tuuví 'ii^{nyā} s'eeⁿ chi i'téenu yā Ndyuūs. Ní n'géenu yā ye^{ne} 'ii^{nyā} chi ne^{ne} yā 'caa^{nu} yā yā ndúú^{cū} machete chi 'caāⁿ ndúú 'uuvi lados. Ní 'áará chi duúvā yā ditiinú yā. Ní taachi diiⁿ caandá yā ní ditiinú yā chí 'caa^{nu} yā. Ní chee yā ye^{ne} n'dee n'dái soldados ye^{ne} enemigos ye^{ne} yā. ³⁵Ní cáávā chi n'daataa s'eeⁿ i'téenu yā Ndyuūs, nta'á yā tiná^{na} chi n'dii ye^{ne} familia ye^{ne} yā taachi 'āā nduuchí yā ye^{ne} nguaaⁿ tiná^{na}. Ní ná^{na} 'ii^{nyā} ch'éenu yā chii ní ch'ii yā. Ní nguéeⁿ 'cūuⁿ yā chi nngua^{ai} yā ti ne^{ne} yā n'diichí yā táámá vida chi n'daacā ca. ³⁶Ná^{na} yā ní 'ii^{nyā} s'eeⁿ duuchí yā ye^{ne} yā ní ch'e^{ne} yā 'ii^{nyā}. Ní ná^{na} yā ní 'ii^{nyā} s'eeⁿ ch'eē chiichí yā ndúú^{cū} cadenas ní che^{ne} yā vácū. ³⁷Ní ná^{na} yā ní 'ii^{nyā} s'eeⁿ ca'a tuúú yā 'ii^{nyā} ní ch'ii yā. Ní ná^{na} yā ní 'ii^{nyā} s'eeⁿ n'deé yā nduu 'uuvi taaⁿ yā ndúú^{cū} cierra. Ní ná^{na} yā 'ii^{nyā} s'eeⁿ n'gii^{nu} yā 'ii^{nyā} ndúú^{cū} machete chi 'úúvi lados 'caāⁿ. Ná^{na} yā ní ch'eē chiicá yā ndíⁿ 'muuⁿ ndí miiⁿ ndúú^{cū} catecai yā ye^{ne} iiti cuūchí ní ye^{ne} dii^{ma} chivo. Ní

pobre yā ní ch'eenú yā chii. Ní nguéeⁿ din'daacá 'ii^{nyā} s'eeⁿ ndúú^{cū} yā. ³⁸Ní 'ii^{nyā} chi ch'eenú yā chii cáávā chi i'téenu yā Ndyuūs, 'ii^{nyā} ye^{ne} í^{nyee}ndí nguéeⁿ n'daacā ca chi cuuvi cūneé yā ndúú^{cū} yā. 'Ii^{nyā} chi i'téenu yā nge^{ne} yā 'muuⁿ nge^{ne} yā miiⁿ ní tan'dúú^{cā} 'ii^{nyā} chi nguéeⁿ vaacú yā, 'tiicá yā. Chiicá yā yá^{na} cuu^{ma} naachi nguéeⁿ ch'etinéé 'ii^{nyā}. Ní chiicá yā na cuéétí ní ná yiivi yáávā ye^{ne} iiti o yiivi yá^{na} naachi 'cuéetinée yā. ³⁹Cáávā chi 'ii^{nyā} s'eeⁿ chi i'téenu yā Ndyuūs, n'dai yā ndúú^{cū} nducué^{ne} chi Ndyuūs 'cūuⁿ yā chi n'geenu yā ngii ndí tiempo chi ch'ii yā. 'Āā cuéé cuta'a yā chi cuuvi ye^{ne} yā chi Ndyuūs ca^{na} yā chí ca'a yā, ⁴⁰caati Ndyuūs nadacádíinuⁿ yā chí ca^{na} yā diiⁿ yā chí n'daacā ca cááva yā ní cáávā s'uuúⁿ. 'Ii^{nyā} s'eeⁿ nguéeⁿ cuuvi cuta'á yā chí cuuvi ye^{ne} yā ndí tiempo chí s'uuúⁿ cuuvi cuta'a yú chí cuuvi ye^{ne} yú.

Cue^{ne} daā^{ma} snaaⁿ yú ye^{ne} Jesús

12 Maaⁿ ní deenu yú cáávā vida ye^{ne} n'dee n'dái 'ii^{nyā} chí ch'ii yā ti ch'í^{nyā} yā s'uuúⁿ táácā cuuvi cu'teenu ca yú Ndyuūs. Ní cáávā chuū canee chí cū'neeⁿ yú tanducué^{ne} dendu'ū chí di'vaachi s'uuúⁿ ndúú^{cū} nuu^{ndi} chí diiⁿ yú caati nuu^{ndi} míⁿ diiⁿ chí cuuvi ndai yú. Ní caānu yú ndúú^{cū} ngiīnū carrera ye^{ne} vida ye^{ne} yú chí Ndyuūs itée yā s'uuúⁿ. ²Ní cue^{ne} daā^{mā} snaaⁿ yú Jesús ti díⁿ yā chí cuuvi i'téenu yú 'yā. Ní díⁿ yā chí n'daacā ca cuuvi cu'teenu yú. Jesucristo ní ch'eenú yā chii taachi ch'ii yā na cruz. Ní nguéeⁿ díⁿ yā

cuenta chi 'cuinaáⁿ yā cucáávā chi ch'ii yā tan'dúucā chi n'giiⁿnuⁿ yā 'iiⁿyāⁿ caati deenú yā chi yeenú yā cuayiivi ti cuuví nadanguáⁿai yā 'iiⁿyāⁿ. Maaⁿ ní vée yā na lado yeⁿe honor yeⁿe trono yeⁿe Ndyuūs.

³Ndís'tii, nadacadíinuⁿ nī tan'dúucā Jesucristo chi ejemplo yeⁿe yú. Ch'eenú yā chiī cucáávā 'iiⁿyāⁿ s'eeⁿ chi dinuuⁿndí yā. Ní 'íicú ndís'tii nguéeⁿ cuuvi 'daandí nī ní nguéeⁿ s'neéⁿ nī chiiⁿ chi i'téenu nī. ⁴Ndís'tii ní 'āā chichεε nī ndúucū nuūⁿndí ní nguéeⁿ ch'eenú nī chii ndíí chi 'āā n'dii nī. ⁵¿'Āā nguéeⁿ n'gaacú ndís'tii consejo chi Ndyuūs ca'á yā ndís'tii chi daiyá yā? Canéeⁿ nguūⁿ na libro yeⁿé Ndyuūs 'tíicā:

Díí, daiyá, nguéeⁿ nadacadíinuⁿ nī chi nguéeⁿ de'ē vee taachi Ndyuūs dííⁿ yā castigar ndís'tii caati cuuvi deenú nī chi nguéeⁿ n'daacā idiíⁿ nī. Ní nguéeⁿ ndaacadáámí nī yeⁿé yā taachi dííⁿ yā castigar ndís'tii.

⁶Señor yeⁿe yú yaa'vineéⁿ yā nducyáácá 'iiⁿyāⁿ chi neⁿé yā ní dííⁿ yā castigar nducyaaca 'iiⁿyāⁿ chi sta'á yā chi cuuvi daiyá yā. ⁷Maaⁿ ní cuchée nī castigo chi Ndyuūs itée yā ndís'tii ti Ndyuūs ní chiidá nī. Taachi n'geenú nī ngii tuu'mi ní deenú nī chi dííⁿ yā ndúucū ndís'tii tan'dúucā chi ndís'tii ní daiyá yā. 'Tíicā dííⁿ yā. ¿Dú'ū daiyá yā vee chi chiidá yā nguéeⁿ idiíⁿ yā castigar? ⁸Nduuti chi Ndyuūs nguéeⁿ dííⁿ yā castigar ndís'tii tan'dúucā chi dííⁿ yā castigar nducuéⁿē daiyá yā, tuu'mi

ní ndís'tii nguéeⁿ maaⁿ daiyá yā ti ndís'tii ní daiyá yeⁿe táámá yā. Ní nguéeⁿ daiya Dendyuūs ndís'tii. ⁹Ní 'tiicá ntúūⁿ chiida yú chi yeⁿe iⁿ'yeeⁿdí cūū dííⁿ yā castigar s'uuúⁿ tan'dúucā chi neⁿé yā. Ní s'uuúⁿ ní dinéⁿe yú chiida yú. N'daacā ca chi dííⁿ yú chiiⁿ chi neⁿe Ndyuūs chi canéeⁿ na va'ai chεeti nguuvi ní sндуuchi yú. ¹⁰Chiida yú chi yeⁿé iⁿ'yeeⁿdí cūū dííⁿ yā castigar s'uuúⁿ dúu'vī nduuyū nūuⁿ tan'dúucā chi tumicadíinuⁿ yā chi n'daacā caavā s'uuúⁿ. Ndyuūs yeⁿe yú ní dííⁿ yā castigar s'uuúⁿ ti cuáácú chí n'dai caavā s'uuúⁿ ti s'uuúⁿ ní cuuvi din'dai ca yú tan'dúucā chi Ndyuūs ní n'dai cá yā. ¹¹Cuaacu chi nguéeⁿ yeenu yú taachi téé yā castigo s'uuúⁿ naati yá'ai yú. Cuayiivi ní 'iiⁿyāⁿ chi tuumicádíinuⁿ yā yeⁿé castigo yeⁿé yā ni véeⁿ chi n'daacā yeⁿe castigo. 'Iiⁿyāⁿ s'eeⁿ din'daacā cá yā ní canéeⁿ 'diiⁿ vida yeⁿé yā.

Véeⁿ peligro yeⁿé yú nduuti chi nguéeⁿ n'giindiveeⁿ yú nduudu yeⁿé Ndyuūs

¹²Maaⁿ ní Ndyuūs 'āā tee yā castigo ndís'tii ní maaⁿ ní cuta'á nī fuerzas ndúucū ta'á nī ní dicuaacú nī duūⁿntii'yá nī chi ndicuūnū.

¹³Cachiicá nī ná yúúní cuaacu maaⁿ ní 'íicú cuuvi nanduūvā yeⁿé nī ca'a nī chi ndíí dúúvā yeⁿe nī.

¹⁴Maaⁿ ndís'tii ní dííⁿ nī chi 'diiíⁿ 'cuεetinée nī ndúucū nducyaaca 'iiⁿyāⁿ. Ní dííⁿ nī nducuéⁿē chi n'daacā ca caati deeve canéeⁿ vida

yeⁿé nī. 'Iiⁿyāⁿ chi nguéeé d̄eeve vida yeⁿé yā nguéeé cuuvi n'diichí yā Señor Ndyuūs. ¹⁵Cundée nī cuidado chi mar 'áámá ndís'tii nguéeé diví nī yeⁿe Ndyuūs ti nguéeé cuuvi inneé yā ndís'tii. Ní nguéeé cúúví cunee 'aamá nī nguaaⁿ ndís'tii chi tan'dúúćā 'áámá dii'yu yaātā yaāa chi diiⁿ daño yeⁿe nducuéⁿē dii'yu yaātā. 'Tíícā cuuvi diiⁿ daño 'áámá nī tan'dúúćā chi veneno nguaaⁿ ndís'tii. ¹⁶Candée nī cuidado chi mar 'áámá ndís'tii nguéeé caⁿá nī ndúúćū n'daataa o saⁿā chi nguéeé yeⁿe nī. Ní nguéeé diíⁿ nī cuenta yeⁿe nducuéⁿē chi yeⁿé Ndyuūs. 'Tíícā diiⁿ saⁿā Esaú ti cáávā 'áámá comida nūuⁿ n'diicuí sá chi cuuvi yeⁿe sa ti saⁿā vmnaaⁿ. ¹⁷Ní ndís'tii deenú nī yeⁿe saⁿā Esaú taachi neⁿe sa cuta'a sa yeⁿe chiidá sa chi cuuvi yeⁿē sa ti saⁿā daiya vmnaaⁿ, naati nguéeé 'cuūⁿ chiida sa. Ní Esaú chēēcū taavi sá ní n'huuⁿ sa manera chi nduuvi n'daacā chi 'āā diiⁿ sa naati nguéeé ndaācā n'daaca sa.

¹⁸Maaⁿ ní ndís'tii nguéeé ndāa nī na yiicū chi ngiichi chi diíⁿ nī sentir ngiichi miiⁿ, tan'dúúćū chi diiⁿ 'iiⁿyāⁿ Israel tiempo chi 'āā ch'ó'ōo. Ndíí nguéeé diíⁿ nī sentir maāiⁿ, ndíí nguéeé ndúú meēeⁿ, ndíí nguéeé ndúú 'áámá cheeⁿ cúúví díftūu. ¹⁹Ní nguéeé n'giindiveéⁿ nī chi ch'ēēcū trompeta miiⁿ ní nguéeé nduudu yeⁿé Ndyuūs chi caⁿa yā ndúúćū 'iiⁿyāⁿ s'eeⁿ. Taachí 'iiⁿyāⁿ s'eeⁿ ch'iindiveéⁿ yā nduudu yeⁿe Ndyuūs chiica yā Ndyuūs chi 'āā ntéé caaⁿmaⁿ cá yā 'iiⁿyāⁿ s'eeⁿ. ²⁰'Tíícā ngaⁿa yā ti nguéeé cuuvi chēe yā chi Ndyuūs ngaⁿa n'tiiⁿnyuⁿ yā ti 'tíícā: Ndúúti chi 'áámá 'iiti

nindaá ti na yiicū 'cūū canee chi cuiitúú yā 'iiti ní 'caaⁿnúⁿ yā 'iiti. ²¹Ní maaⁿ Moisés miiⁿ ní taachi n'diichí yā yiicū 'cūū ní ch'iindiveéⁿ yā nducuéⁿē, 'tíícā ngaⁿá yā: Nééné 'va'á ní yiin'duuvi 'úú.

²²Maaⁿ ní nguéeé 'tíícā ti ndís'tii ndaa nī 'áámá yiicū chi nguuvi Sión chi yāāⁿ yeⁿe Ndyuūs chi cánduuchi chí yāāⁿ Jerusalén chí va'ai chēeti nguuvi naachi n'dee n'dái miles ángeles snée yā. ²³Ní nduvidaamá yā chi dich'etéé yā Ndyuūs. Ní miiⁿ canee nducyaaca 'iiⁿyāⁿ chi daiyá Ndyuūs. Ní chi duuchí yā canéé nguūⁿ na libro yeⁿē va'ai chēeti nguuvi. Nducyaaca nī ndaa nī nanááⁿ Ndyuūs chi diíⁿ yā juzgar nducyáácá 'iiⁿyāⁿ. Ní ndís'tii chi yeⁿē iⁿ'yeeⁿdí 'cūū ní ndaa nī nanááⁿ espíritu s'eeⁿ yeⁿe 'iiⁿyāⁿ chi d̄eeve ca chi Ndyuūs diíⁿ yā chi nguéeé nuuⁿndi yeⁿé yā.

²⁴Ní ndaa nī nanááⁿ Jesucristo chi abogado chi canúuⁿ yā naavtaⁿā compromiso chí ngai chi yeⁿé Ndyuūs ndúúćū 'iiⁿyāⁿ. Ní ndaa nī nanááⁿ Cristo chi chingée yā yuúúⁿ yeⁿé yā cucáávā s'uúúⁿ. Yuúúⁿ yeⁿe Cristo ní n'daacā ca nguéeé ti yuúúⁿ yeⁿe Abel. Ndúúćū yuúúⁿ yeⁿe Cristo, Ndyuūs nadich'ēcú yā nuuⁿndi yeⁿe 'iiⁿyāⁿ. Naati cáávā 'díínu Abel ch'iⁿ'núⁿ Abel tuuⁿmi ní Ndyuūs ca'a yā castigo 'díínu Abel.

²⁵Ní cáávā nducuéⁿē chuū candēe nī cuidado chi n'giindiveéⁿ nī nduudu yeⁿe Ndyuūs chi ngaⁿá yā ngii yā ndís'tii. 'Iiⁿyāⁿ s'eeⁿ chi nguéeé ch'iindiveéⁿ yā nduudu yeⁿe Cristo taachí snée yā iⁿ'yeeⁿdí 'cūū nguéeé nguaⁿáí yā yeⁿē nuuⁿndi yeⁿé yā. Ní 'tēe cá s'uúúⁿ chi cuuvi

nguaⁿāi yú nduuti chi ndaacadaami yú yeⁿé Cristo chi canee na va'ai cheeti nguuvi ní ngaⁿá yā ndúúcū s'uuúⁿ yeⁿe chi cuchii. ²⁶Tiempo chi ch'óo taachi Ndyuūs ngaⁿá yā yeⁿe yīcū nuⁿu yáⁿāa. Maaⁿ ní Ndyuūs ngaⁿá yā 'tíicā: Taama vmnéⁿēe inuⁿú yáⁿāa ndúúcū nanguuvi. ²⁷Maaⁿ ní taachi ngaⁿa Ndyuūs taama vmnéⁿēe nūⁿ deenu yú chi nducuéⁿē chi din'dái Ndyuūs ní caⁿá yā din'núⁿu yā ní divíi yā. Ní nducuéⁿē chi nguéé din'núⁿu yā ní cūnee. ²⁸Canéé chí ca'a yú gracias Ndyuūs caati véé yāⁿ yeⁿe yú, lugar naachi Ndyuūs ngaⁿa ntiinⁿyuⁿ yā. Ní nguéé cuuvi nuⁿu lugar miⁿ. Canee chi dich'εεε yú Ndyuūs ní i'teenu yú Ndyuūs. Ní 'va'a yú yeⁿé yā ní diiⁿ yú tan'dúúcā chi neⁿe yā. ²⁹Ndyuūs yeⁿe yú tan'dúúcā 'áámá nguuchi yáⁿā chí dituúvī nducuéⁿē chi nguéé n'daacā. Tiicá yā.

Yeⁿé chi diiⁿ yú chi cunee
yiinuú Ndyuūs

13 Canéé chi dineⁿe yú 'aama yú taama yú caati hermanos s'uuúⁿ ní yeⁿe Cristo s'uuúⁿ. ²Nan'gaacu yú chi canee chi ca'a yú va'āi yeⁿe yú 'iiⁿyāⁿ chi canúⁿ yúúní. N'duuvī yā ní diíⁿ yā 'túúcā ní sta'á yā va'ai yā ángeles ní nguéé déenu yā chi ángeles.

³Nan'gaacu yú yeⁿe 'iiⁿyāⁿ chi snúⁿ yā vácū. Diiⁿ yú cuenta chi s'uuúⁿ snuūⁿ yú vácū nduucú yā. Nan'gaacu yú yeⁿe 'iiⁿyāⁿ chi n'geenú yā ngii na cuerpo yeⁿé yā ní diiⁿ yú cuenta chi s'uuúⁿ ní n'geenu yú ngii na cuerpo yeⁿe yú nduucú yā.

⁴Diiⁿ yú respetar 'iiⁿyāⁿ chi n'giindivaacú yā ti nguéé dinuuⁿndí yā. 'Iiⁿyāⁿ chi n'giindivaacú yā canee chi caⁿá yā dámaāⁿ ndúúcū isaⁿā o n'daataá yeⁿé yā. Ndyuūs ní n'diichí yā nuuⁿndi yeⁿe 'iiⁿyāⁿ chi véé nuuⁿndi yeⁿé yā ndúúcū 'iiⁿyāⁿ chi n'giindivaacú yā ní caⁿá yā ndúúcū táámá n'daataá o saⁿā.

⁵Nguéé dineⁿe yú tuūmī naati yeenú yú ndúúcū chi véé chi yeⁿe yú ti Ndyuūs ngaⁿá yā 'tíicā: 'Úú nguéé cu'neeⁿ ndís'tií ní nguéé diíⁿ abandonar ndís'tií. ⁶Ní 'tíicā cuuvi caaⁿmaⁿ cuaacu yú ndúúcū confianza:

Señor ní nginnee yā 'úú. 'Úú nguéé 'va'á yeⁿe chi 'iiⁿyāⁿ cuuvi diíⁿ yā nduucú.

⁷Nan'gaacú nī yeⁿe 'iiⁿyāⁿ n'gεεε yeⁿe yaacū chi ngaⁿa ntiinⁿnyúⁿ yā nanááⁿ ndís'tií ní ngaⁿá yā ngii yā ndís'tií nduudu cuaacu yeⁿé Ndyuūs. Nadacadíínuuⁿ nī táaca 'iiⁿyāⁿ s'eeⁿ diíⁿ yā ní n'gεεtineé yā ní ch'ii yā. Maaⁿ ní candéε nī cuidado chi diíⁿ nī tan'dúúcā 'iiⁿyāⁿ n'gεεε chi i'téenu yā Ndyuūs diíⁿ yā ti 'iiⁿyāⁿ s'eeⁿ ejemplo yeⁿé nī.

⁸Jesucristo miⁿ ní 'āā 'tiicá nūⁿ tan'duucá yā 'iicu, 'tiicá ntúuⁿ yā maaⁿnguuvī. 'Āā 'tiica nuúⁿ yā cueⁿe daāⁿmaⁿ. ⁹Cuin'diichí nī ndís'tií. Nguéé 'caandiveéⁿ nī ndúúdú 'naⁿa chi n'dááⁿ ndúúcū yeⁿé chi che'e yú. N'daacā ca chi staava yeⁿé nī canéé n'daacā chi cuuvi cuta'á nī fuerzas yeⁿé nducuéⁿē chi n'dai taavi chí Ndyuūs itée yā ndís'tií. Staava yeⁿé 'iiⁿyāⁿ nguéé diiⁿ aprovechar nduuti chí chiindiveéⁿ yā nduudu n'dááⁿ ndúúcū yeⁿe chí che'e yú.

¹⁰Deenu yú chi chiiduú s'eeⁿ chi dííⁿ yā ntiíⁿnyuⁿ yeⁿe yaácū yeⁿé yā nguéé cuuvi che^é yā yuūtē yeⁿe nátaí yeⁿe 'iiti chi ch'iiⁿnúⁿ yā cáávā ofrenda yeⁿe yú ti ofrenda yeⁿe yú ní 'āā víí caā ti i'teenu yú Jesucristo. Ní Jesucristo miiⁿ ní ch'ii yā chi lado yeⁿe ofrenda yeⁿe yú.

¹¹Chiiduú ch'ēete ca yeⁿe judíos chi Israel s'eeⁿ taachi ch'iiⁿnúⁿ yā 'iiti cáávā ofrenda yeⁿe nuūⁿndí candée yā yuūúⁿ yeⁿé 'iiti cheeti cuarto chi nguuvi Dēēve naati cuerpo yeⁿe 'iiti miiⁿ ní ngiichí yā 'áámá lado yeⁿe yāā yeⁿé yā. ¹²Ní 'tiicá ntūúⁿ Jesucristo ch'ii yā cuaaⁿ dáámí cheendi va'āi yeⁿe yāā Jerusalén ní 'íicú cuuvi dēēvé yā 'iiⁿyāⁿ yeⁿe nuuⁿndi yeⁿé yā ndúúcū yuuúⁿ yeⁿe maáⁿ yā. ¹³Maaⁿ ní caⁿ'a yú tan'dúúcā chi cueⁿe Jesús 'áámá lado yeⁿe yāā ní 'cueenu yú cuuvi tan'dúúcā chi ch'eenú yā chiiⁿ ní cuuvi 'cuinaaⁿ yú tan'dúúcā chi 'cuinaáⁿ yā. ¹⁴Caati nguéé véé 'áámá yāā chi 'áámá cūnee cáávā s'uuúⁿ naati in'nuuⁿ yú 'áámá yāā ch'ēete chi 'áámá cūnee chi véé tiempo chi cuchii. ¹⁵Ní cáávā chuū canee yú chi dich'ēete yú Ndyuūs cucáávā Jesucristo. Ní taachi dich'ēete yú Ndyuūs chuū ní ofrenda chi canee chi ca'a yú Ndyuūs. Ní canéé chi ca'a yú gracias Ndyuūs cáávā Jesucristo ndúúcū nduudu yeⁿe yú.

¹⁶Nguéé cuuvi 'náaⁿ nī chi din'daacá nī ní nnee nī 'aamá nī taamá nī caati chuū ní ofrenda yeⁿé nī chi 'túúcā Ndyuūs neⁿe yā.

¹⁷Cu'neeⁿveéⁿ nī nduudu yeⁿé 'iiⁿyāⁿ chi ngaⁿ'a ntiíⁿnyuⁿ yeⁿé nī. Cu'téenu nī yeⁿé yā chi ngaⁿ'a yā caati 'iiⁿyāⁿ s'eeⁿ dííⁿ yā cuidado

yeⁿe staava yeⁿé nī. 'Iiⁿyāⁿ s'eeⁿ canéé chi nca'á yā cuenta nanááⁿ Ndyuūs yeⁿe ntiíⁿnyuⁿ chi dííⁿ yā. Dííⁿ núúⁿ yiiⁿnu nī chi ngaⁿ'a yā caati yeenú yā dííⁿ yā ntiíⁿnyuⁿ yeⁿé yā. Ti nduuti chi nguéé dííⁿ nī 'túúcā nguéé yeenú yā ní nguéé dííⁿ nī aprovechar yeⁿe ntiíⁿnyuⁿ chi dííⁿ yā cáávā ndís'tií.

¹⁸Maaⁿ ní caaⁿ'maⁿngua'á nī cáávā nús'uu ti nadacadiinúúⁿ 'nū n'daacā na staava yeⁿé 'nū ní neⁿé 'nū 'cuetinéé n'daacá 'nū yeⁿe nducuéⁿe dendu'ū. ¹⁹Úú ngiicá ndís'tií chi taachi ngaⁿ'angua'á nī, ngiicá nī Ndyuūs chi téé yā lugar 'nū chi niíⁿnuúⁿ nūuⁿ cuuví nandaá ní cuneé ndúúcū ndís'tií.

Di'viicú yā ndís'tií ní dicho'ó yā, n'dai ndís'tií

²⁰Maaⁿ ní Ndyuūs ní yeⁿe vaadi 'diiíⁿ, maaⁿ Ndyuūs miiⁿ nadin'duuchí yā Jesucristo yeⁿe yú yeⁿe nguaaⁿ tináⁿ'ā chi Jesucristo miiⁿ Pastor chi ch'ēete n'dai chi dííⁿ yā cuidado s'uuúⁿ chi tan'dúúcā 'iiti cuūchí yeⁿé yā. Ní Jesucristo yeⁿe yú ndúúcū yuūúⁿ yeⁿé yā dííⁿ yā chi 'áámá cūnee compromiso chi Ndyuūs dííⁿ yā ndúúcū 'iiⁿyāⁿ. ²¹Neⁿ'é chi Ndyuūs yeⁿe vaadi 'diiíⁿ téé yā ndís'tií nducuéⁿe chi n'dai yeⁿé yā chi nguéé yeⁿé nī. Ní cuuvi n'dai nī ti ndís'tií cuuvi dííⁿ nī chiiⁿ chi neⁿé Ndyuūs chi dííⁿ nī. Ní neⁿ'é chi Ndyuūs dííⁿ yā cáávā nducyaaca yú nducuéⁿe chi neⁿé yā dííⁿ yā cáávā Jesucristo. Caⁿ'a yú chi ch'ēete ca canéé Cristo ní n'dēēve ngii yā cuéⁿ'é daāⁿ'maⁿ cueⁿe daāⁿ'maⁿ. 'Tíicā. ²²Ndís'tií hermanos yeⁿé ngiicá ndís'tií chí cuheé nī

ndúúcū nduudu chi ngi'cueéⁿ ti nguéé 'yaaⁿ idinguúⁿ na carta miiⁿ yeⁿé ndís'tiī. ²³Yaa'ví ndís'tiī chi cadiinúúⁿ nī chi Timoteo hermano yeⁿē yú 'āā ntéé canee sa vácūū. Ní ndúúti chi niiⁿnuⁿ niiⁿnuⁿ ndaa sa nanáaⁿ 'úú tuu'mi 'úú ní candéé saⁿā taachi ndaá nanááⁿ ndís'tiī ní n'diichí ndís'tiī.

²⁴Maaⁿ ní caaⁿ'máⁿ nī 'iiⁿ'yāⁿ chi ngaⁿ'a ntiiⁿnyuⁿ yeⁿé nī ndúúcū nducyaaca 'iiⁿ'yāⁿ chi i'téenu yā Jesucristo: N'daí ndís'tiī, caaⁿ'máⁿ nī. 'Iiⁿ'yāⁿ yeⁿ'e país Italia: N'daí ndís'tiī, ngaⁿ'a yā.

²⁵Neⁿé chi Ndyuūs téé yā nducyaaca ndís'tiī nducuéⁿē vaadi n'dai yeⁿé yā. 'Tíicā cuuvi.

CARTA YEⁿE SANTIAGO

Santiago idingúⁿ yā yeⁿe 'iiⁿyāⁿ
chi s'nééⁿ 'muuⁿ s'nééⁿ miiⁿ

1 'Úú Santiago 'úú ni 'úú idiíⁿ
ntiiⁿnyuⁿ yeⁿe Ndyuūs ní yeⁿe
Señor Jesucristo. Idingúⁿ carta
'cūū ní dicho'ó: Ndaí ndís'tiī ndúú^{cū}
'iiⁿyāⁿ yeⁿe ndu'ū ndiichúúvī tribus
chi familias chi yeⁿe ndaata Israel
chi s'nééⁿ 'muuⁿ chi s'nééⁿ miiⁿ ndii
núúⁿmáⁿ íⁿyeⁿdī.

Ndyuūs ca'á yā vaadi deenu
'iiⁿyāⁿ s'eeⁿ chi i'téenu yā 'yā

²Ndís'tiī hermanos yeⁿé, canéé
chi yeenú nī taachi ndaā n'dee
n'dái chi idi'vaachí yeⁿe nī. ³Caati
déenu nī chuū chi taachi ndaā
n'dee n'dái chi idi'vaachí yeⁿe nī ni
n'daacá idiíⁿ nī, ch'iⁿí nī chi i'téenu
nī Jesucristo ní ch'iⁿi ntúuⁿ nī chi
cuuvi cuchéⁿ nī yeⁿe tanducuéⁿ
ndúú^{cū} paciencia. ⁴Ní canéé chi
candéé nī cuidado chi cuchéⁿ nī
yeⁿe nducuéⁿ chi di'vaachi ndís'tiī
ní cuuvi 'cuētínéⁿ n'daacá nī ní
diiⁿ cá chí n'daaca nī. Ni 'āā véé
nducuéⁿ necesidades yeⁿé nī. Ní
Ndyuūs téé yā ndís'tiī cosas chi
n'dai yeⁿé yā.

⁵Ndúúti chi 'áamá ndís'tiī deenú
nī chi nguéé deenú nī tuu'mi ní

canéé chí caacá nī Ndyuūs chi itée
yā vaadi deenu. Ndyuūs ca'a yā
n'dee n'dái vaadi deenu yeⁿé yā
nducyáacá 'iiⁿyāⁿ. Ní nguéé n'gaa'vá
yā ndúú^{cū} 'iiⁿyāⁿ yeⁿe chi n'deē
vueltas caaca yā Ndyuūs. ⁶Canéé
chí caacá nī Ndyuūs ní cu'téenu
nī Ndyuūs chi ca'á yā téé yā
ndís'tiī. Taachi nguéé cu'téenu nī
chi Ndyuūs nguéé ca'á yā ca'a yā
chiiⁿ chi ngiicá nī tuu'mi ní ndís'tiī
tan'dúú^{cā} nuuⁿnīⁿyáⁿā taachi olas
yeⁿe indéé yaacū chi candéé 'yúúné
cuuaⁿ lácūū cuuaⁿ lácā, 'tíicā
ndís'tiī. ⁷'Áamá 'iiⁿyāⁿ chi ngiica
yā Ndyuūs ní nguéé cu'téenu yā
chi Ndyuūs ca'á yā téé yā de'ē vεε,
tuu'mi ní 'iiⁿyāⁿ miiⁿ nguéé cūnee
ngínú yā chi Ndyuūs ca'á yā téé
yā 'iiⁿyāⁿ de'ē vεε. ⁸'Iiⁿyāⁿ miiⁿ
véé 'uūvī vaanicadíínūⁿ yeⁿé
yā. Maaⁿ ní neⁿé yā diiⁿ yā 'áamá
cosa, cuayiivi ní taama cosa. 'Iiⁿyāⁿ
miiⁿ nguéé canéé yā ndúú^{cū} 'áamá
vaanicadíínūⁿ yeⁿe yā.

⁹Ní hermano yeⁿe yú chi nguéé
ch'εεε ca ní canéé chi yeenú yā
taachi Ndyuūs nginneé yā 'iiⁿyāⁿ.
¹⁰'Iiⁿyāⁿ chi 'cuiicá yā canéé chi
yeenú yā taachí Ndyuūs dííⁿ yā chi
nguéé 'cuiicá yā. 'Iiⁿyāⁿ chi 'cuiica
miiⁿ ní tan'dúú^{cā} naandā yeⁿe

yaātā chi 'cuiinu, 'tiicá yā. ¹¹Taachi can'dáa 'yá'ā ní 'áámá 'l'nūuⁿ tuu'mi ní t'í yaatā ní naāndā ye^{n'e} chingééⁿ ní 'āā ntee véé naandā ti ch'liinu. 'Tiicá ntūuⁿ 'iiⁿ'yāⁿ chi 'cuiica ní 'cuiinú yā ndúucū vaadi 'cuiica ye^{n'e} yā.

Canéé chí cucheé yú ye^{n'e} nducué^{n'e}

¹²Dé'ē chúicā yeenu 'iiⁿ'yāⁿ chi ichéé yā tanducué^{n'e} taachi n'geenu yā ngii. Taachi cheé yā ye^{n'e} tanducué^{n'e} tuu'mi ní Ndyuūs téé yā 'iiⁿ'yāⁿ chi canduuchí yā cue^{n'e} daāⁿmaⁿ. 'Tíicā Ndyuūs ngaⁿ'á yā chi caⁿ'á yā ca'a yā 'iiⁿ'yāⁿ vida cue^{n'e} daāⁿmaⁿ tan'dúucā chi 'aama corona ye^{n'e} 'iiⁿ'yāⁿ chi diné^{n'e} yā Ndyuūs. ¹³Taachi ndaā nanááⁿ ndís'tií cosa chí diiⁿ chí di'vaachí ndís'tií chi ne^{n'e} ní diiⁿ ní chi nguεε n'daācā, nguéé canéé chí nadacadíínuuⁿ ní chi Ndyuūs dííⁿ yā chuū caati mar 'áámá 'iiⁿ'yāⁿ cuuvi di'vaachí yā ye^{n'e} Ndyuūs chi Ndyuūs dííⁿ yā cosa chi nguεε n'daācā. Ndíí nguéé ndúú cuuvi dinuuⁿndí Ndyuūs. Ndíí nguéé ndúú Ndyuūs di'vaachí yā ye^{n'e} 'iiⁿ'yāⁿ chí dííⁿ yā cosa chí nguéé n'daācā. ¹⁴Taachi 'iiⁿ'yāⁿ inadicadíínuuⁿ yā chí maáⁿ yā ne^{n'e} yā diiⁿ yā cosa chí nguεε n'daacā tuu'mi ní véé nuuⁿndi ye^{n'e} yā ní dííⁿ yā chí nguεε n'daacā. ¹⁵Ní taachi dííⁿ yā chiiⁿ chí ne^{n'e} yā diiⁿ yā chí nguéé n'daacā tuu'mi ní dinuuⁿndí yā. Ní taachi ch'εete ca nuuⁿndi miíⁿ tuu'mi ní 'cuiinū ní diiⁿ chí 'cuūvi yā cue^{n'e} daāⁿmaⁿ.

¹⁶Ndís'tií hermanos ye^{n'e} chí ne^{n'e} taaví. Nguéé ca'a ní lugar 'iiⁿ'yāⁿ chí cannche'éí yā ndís'tií chí dinuuⁿndí ní. ¹⁷Nducué^{n'e} chí n'daacā ní dεeve

chí Ndyuūs itée yā s'uuúⁿ chiiⁿ ní ngíicá cuaaⁿ 'niⁿ'nuⁿ. Chiiⁿ ní ye^{n'e} Ndyuūs. Ndyuūs din'dái yā tanducué^{n'e} dεeve ye^{n'e} nanguuvi. Ndyuūs nguéé n'daaⁿ yā tan'dúucā 'áámá 'daaⁿ'nūⁿ chí n'daaⁿ. ¹⁸Ní Ndyuūs tee yā vida s'uuúⁿ cáávā chí i'teenu yú nduudu cuaacu ye^{n'e} yā. Ní dííⁿ yā tan'dúucā chí maáⁿ yā ne^{n'e} yā diiⁿ yā. Ní 'íicú s'uuúⁿ chí i'teenu yú, tan'dúucā 'áámá cosecha chí vmnááⁿ vmnaaⁿ ye^{n'e} nducué^{n'e} chí din'dái yā 'tíicā s'uuúⁿ.

Ye^{n'e} vaadi cuaacu ye^{n'e} Ndyuūs

¹⁹Maaⁿ ní ndís'tií hermanos chí ne^{n'e} taaví 'aama 'aamá ní canee chí 'cuεetinéé yaáⁿ ní chí 'caandiveéⁿ ní naati nguéé maaⁿ n'cheεté caaⁿ'máⁿ ní. Ní nguéé maaⁿ n'cheεte nūuⁿ nduuví taáⁿ ní. ²⁰'Iiⁿ'yāⁿ chí induuvi taáⁿ yā nguéé n'daacā dííⁿ yā ye^{n'e} chí vaadi cuaacu ye^{n'e} Ndyuūs. ²¹Ní cáávā nducué^{n'e} chí chuū canee chí divíi ní ye^{n'e} tanducué^{n'e} chí nguεε n'daācā chí nadacadíínuuⁿ ní. Ní nguéé dííⁿ ní cosa chí nguεε ndaacā. Ní 'caandiveéⁿ ní nduudu cuaacu chí i'téenu ní ní canee na staava ye^{n'e} ní. Ní ndiicuuⁿ ní. Ní véé poder ye^{n'e} nduudu cuaacú 'cūū chí cuuvi dinguáⁿ'ai alma ye^{n'e} ní.

²²Naati canéé chí dííⁿ ní chiiⁿ chí ngaⁿ'ā nduudu cuaacu miíⁿ. Nguéé dámaaⁿ chí 'caandiveéⁿ ní ní nguεε diiⁿ ní. Ní nguéé cannche'éí maáⁿ ní ndís'tií. ²³Nduuti chí 'áámá 'iiⁿ'yāⁿ n'giindiveéⁿ yā nduudu cuaacu miíⁿ ní nguéé dííⁿ yā chí chiiⁿ chí ngaⁿ'ā tuu'mi ní 'iiⁿ'yāⁿ miíⁿ tan'dúucā 'áámá 'iiⁿ'yāⁿ chí inaáⁿ yā maáⁿ yā na 'aama espejo, 'tiicá yā. ²⁴Inaáⁿ yā maáⁿ yā tan'duucá yā 'tíicā.

Ní cuayiivi nguéeé nn'gaacu yā tan'duucá yā 'áará chi n'diichí yā maáⁿ yā na 'áamá espejo. ²⁵Naati 'iiⁿyāⁿ chi nn'gaacú yā chiiⁿ chi n'giindiveéⁿ yā ní nadacádíínuuⁿ n'daacá yā yeⁿe ley chi nduudu cuaacu miiⁿ yeⁿe Ndyuūs, tuu'mi ní nduudu cuaacu miiⁿ cuuví nadinguáⁿāi 'iiⁿyāⁿ. Ní 'iiⁿyāⁿ miiⁿ canéé chi 'caandiveeⁿ cá yā nguuvi nguuvi. Ní nguéeé dámaaⁿ n'giindiveéⁿ yā naati dííⁿ yā chiiⁿ chi ngaⁿā, tuu'mi ní cuuvi yeenú yā ndúúcu chi dííⁿ yā.

²⁶Ní nduuti chi 'aama ndís'tií ngaⁿá ni chi i'téenu nī Ndyuūs ní nguéeé candéé nī cuidado yeⁿe chi ngaⁿá nī tuu'mi ní nginnche'ei maáⁿ nī ndís'tií. Ní nguéeé dichí'ívé chi ngaⁿá nī chi i'téenu nī Ndyuūs. ²⁷'Iiⁿyāⁿ chi neené i'téenu yā ní didéevē staava yeⁿe yā ní nguéeé véé nuuⁿndi yeⁿe yā nanááⁿ Ndyuūs chiida yú ní 'tíicā dííⁿ yā. Nginneé yā da'cáiyāa nguá'āa ndúúcu n'daataá nguá'āa taachi n'geenu yā ngii. Ní 'iiⁿyāⁿ miiⁿ ní nguéeé dííⁿ yā cosas yeⁿe iⁿ'yeeⁿdí 'cūū chi nguéeé n'daacā.

'Cuaáⁿ nī nducyaaca 'iiⁿyāⁿ chi daama daamá nūūⁿ 'iiⁿyāⁿ

2 Ndís'tií hermanos yeⁿe chi maaⁿ ní i'téenu nī Señor Jesucristo yeⁿe yú chi deevé ngii yeⁿe yā, ndís'tií canéé chí dííⁿ nī chi 'āā dáámá daamá nūūⁿ nducyaaca 'iiⁿyāⁿ nanááⁿ nī. ²N'diichí nī. Taachi ndaá 'áamá 'iiⁿyāⁿ nguaaⁿ ndís'tií taachi nduuvidaamá nī ní 'iiⁿyāⁿ miiⁿ canúúⁿ nduu tá'a yā 'áamá chi ntá'āa yeⁿe 'dííⁿnguāaⁿ ní n'daacā catecai

yā, ní 'tiicá ntúūⁿ ndaá táamá 'iiⁿyāⁿ chi ndaachíí yā ní ndiicúū catecai yā, ³ní neⁿe cá nī 'iiⁿyāⁿ chi n'daacā catecaí yā, ní ngaⁿá nī ngii nī 'iiⁿyāⁿ mii: N'dií cun'dií nī lugar chi n'daacā ca; ní ngaⁿá nī ngii nī saⁿā chi ndaachíí: N'dií cuééndiinú nī cuaaⁿ la'tií o 'cundíí nī na yiive, ⁴tuu'mi ní nguéeé dííⁿ nī chi dáámá daamá nūūⁿ 'iiⁿyāⁿ nguaaⁿ ndís'tií. Ní n'diichí nī 'iiⁿyāⁿ s'eeⁿ chee chi n'daacā, ní nguéeé n'daacā chiiⁿ chi nadacádíínuuⁿ nī.

⁵Ndís'tií hermanos yeⁿe chi neⁿe taavi, 'caandiveéⁿ nī chiiⁿ chi ngaⁿá. Ndyuūs ndéevé yā 'iiⁿyāⁿ yeⁿe iⁿ'yeeⁿdí 'cūū chi pobre yā chi cuuvi 'cuiicá yā ndúúcu chi i'téenu yā. Ní véé chi cuuvi yeⁿe yā naachi Ndyuūs caaⁿ máⁿ ntiíⁿnyúⁿ yā ti chuū Ndyuūs ngaⁿá yā chi ca'á yā nducyaaca 'iiⁿyāⁿ chi neⁿe yā Ndyuūs. ⁶Maaⁿ ní ndís'tií maáⁿ nī s'néeⁿ nī 'iiⁿyāⁿ chi ndaachíí yā chi nguéeé véé yeⁿe yā ná lugar chi nguéeé n'daacā. 'Áá nguéeé 'iiⁿyāⁿ 'cuiica chí idi'vaachí yā ndís'tií ní icandéé yā ndís'tií nanááⁿ 'iiⁿntyéⁿe? ⁷'Áá nguéeé 'iiⁿyāⁿ s'eeⁿ chi cunncaā ngaⁿa yā yeⁿe chi duuchi yeⁿe Cristo chí n'daacā? Ní Cristo yeⁿe yú yaa'ví yā ndís'tií chi cuuvi yeⁿe yā ndís'tií.

⁸Nduuti chi ndís'tií cuaacu nííⁿnyúⁿ dííⁿ nī tanducuéⁿe chi ngaⁿa ley yeⁿe Ndyuūs chi 'tíicā canéé nguūⁿ na libro yeⁿe yā: Dinéⁿe di 'iiⁿyāⁿ niiⁿnuuⁿ vaacu di tan'dúúca chi neⁿe di maaⁿ dī, tuu'mi ní n'daacā idiiⁿ dī. ⁹Ní ndúúti chi ndís'tií nguéeé dáámá daamá nūūⁿ dinéⁿe nī nducyaaca 'iiⁿyāⁿ tuu'mi ní dinuuⁿndi nī. Ní nguéeé dííⁿ

nī tan'dúucā chi nga^{na} ley ye^{ne}é Ndyuūs. Ley miiⁿ n'giⁿⁱ chi ndís'tiī ní véé nuu^{ndi} ye^{ne}é nī. ¹⁰Ní ndúútí chi 'áámá 'iiⁿⁱyāⁿ nguéé dííⁿ yā chi nga^{na} 'áámá 'lííⁿ chuundi ye^{ne}e ley ye^{ne}é Ndyuūs tuu^{mi} ní caneeé yā tan'dúucā chi nguéé dííⁿ yā mar 'áámá chi nga^{na} ley miiⁿ. ¹¹Ndyuūs chi nga^{na} yā 'tíicā: Nguéé ca^{na}á di ndúucū n'daataá o sá^{na} chi nguéé ye^{ne}e di, Ndyuūs miiⁿ 'tiicá ntúūⁿ nga^{na} yā: Nguéé 'caa^{nu}n di 'iiⁿⁱyāⁿ. Maaⁿ ní nduuti chi 'aama 'iiⁿⁱyāⁿ nguéé ca^{na}á yā ndúucū n'daataá o sa^{na} chi nguéé ye^{ne}e yā naati ch'iiⁿⁱnúⁿ yā 'iiⁿⁱyāⁿ 'āā nguéé dííⁿ yā chi nga^{na} ley ye^{ne}é Ndyuūs. ¹²Ní ndís'tiī ní canee chi caa^{na}máⁿ nī n'daacā ní din'daacá nī tan'dúucā chi nga^{na} ley ye^{ne}é Ndyuūs ti ley miiⁿ n'diichi s'uúúⁿ. Ní ley miiⁿ diiíⁿ chi cuuvi nanguá^{na}āi s'uúúⁿ. ¹³'Iiⁿⁱyāⁿ chi nguéé ne^{ne}e ya'ai 'iinú yā 'iiⁿⁱyāⁿ 'tiicá ntúūⁿ Ndyuūs nguéé ne^{ne}e ya'ai 'iinú yā 'iiⁿⁱyāⁿ s'eeⁿ taachi n'diichí yā nuu^{ndi} ye^{ne}é yā. 'Iiⁿⁱyāⁿ chi ya'ai 'iinú yā 'iiⁿⁱyāⁿ ichée yā taachi Ndyuūs n'diichí yā nuu^{ndi} ye^{ne}é nducyaaca 'iiⁿⁱyāⁿ.

'Iiⁿⁱyāⁿ chi i'téenu yā Ndyuūs dííⁿ yā ntiiⁿnyuⁿ ye^{ne}é Ndyuūs

¹⁴Ndís'tiī hermanos ye^{ne}é, ¿de'ē dichíí'vē 'áámá 'iiⁿⁱyāⁿ chi nga^{na} yā chi i'téenu yā Jesucristo ní nguéé dííⁿ yā cosas chi n'daacā? ¿Áá cuuvi nangua^{na}ai yā nduuti chi nga^{na} yā chi i'téenu yā 'tíicā? ¹⁵Maaⁿ ní nadacadíinuⁿ yú ye^{ne}e 'áámá hermano o hermana ye^{ne}e yú chi nguéé véé catecai yā ní nguéé véé chi che'e yā. ¹⁶Nduuti chi n'diichi yú hermano o hermana miiⁿ ní

nga^{na} yú ngii yú 'yā: Dii cue^{ne}e di ndúucū vaadi 'diiíⁿ. Nan'guēecundii di ní che'e di. Ní nguéé ca'a yú hermano o hermana miiⁿ ye^{ne}e yú chi che'é yā o catecai caavā chi dííⁿ yā tapar, tuu^{mi} ní, ¿de'ē chíí'vē chi nga^{na} yú ngii yú hermano o hermana ye^{ne}e yú 'tíicā? ¹⁷Ní 'tiicá ntúūⁿ ye^{ne}e chiiⁿ chi i'teenu yú Ndyuūs. Nduuti chi 'áámá 'iiⁿⁱyāⁿ nguéé din'daacá yā cáávā chi i'téenu yā Cristo tuu^{mi} ní chííⁿ chí i'téenu yā tan'duucā chi cosa chi n'díí.

¹⁸Nduuti chi 'áámá yā nga^{na} yā ngii yā s'uúúⁿ 'tíicā: Díí nga^{na} di chi i'téenu di Ndyuūs naati 'úú idiíⁿ nduce^{ne}é chi n'daacā. 'Úu nga^{na} ngii 'iiⁿⁱyāⁿ miiⁿ: Dii ch'iⁿⁱ di 'úú tan'dúucā chi cuuvi cu'téenu yú Ndyuūs ní nguéé n'daacā cuuvi diiⁿ yú. 'Úú ch'iⁿⁱ dii chi i'teenu Ndyuūs caavā chi n'daacā idiíⁿ. ¹⁹Áā i'téenu di chi véé 'áámá n'dyá^{na} Ndyuūs. N'daacā chi i'téenu di 'tíicā. 'Tiicá ntúūⁿ 'yááⁿnguiinuⁿ i'téenu sa ní n'duuvi sa ti 'va'ā sa. ²⁰Díí 'iiⁿⁱyāⁿ chi cheechí tiiíⁿ chi nguéé ne^{ne}e di cu'téenu di. Nduuti chi 'áámá 'iiⁿⁱyāⁿ i'téenu yā Ndyuūs ní nguéé din'daacá yā tuu^{mi} ní dííⁿ yā tan'dúucā chi nguéé i'téenu yā. Ní vaadi i'teenu ye^{ne}é yā cūnee tan'dúucā chi n'díí 'tíicā cuneeé. ²¹Maaⁿ ní nadacadíinuⁿ ní ye^{ne}e tiempo chi 'āā ch'ó'oo ye^{ne}e chiida yú chi nguuvi Abraham chi ye^{ne}e ndaata ye^{ne}e yú. Ndyuūs inadach'ecú yā nuu^{ndi} ye^{ne}é yā cáávā ntiiⁿnyuⁿ chi dííⁿ yā taachi ca'á yā daiyá yā Isaac lado ye^{ne}e ofrenda nanááⁿ na nátaī cáávā chi 'caa^{nu}núⁿ yā daiyá yā naati nguéé ch'ii sa. ²²¿Áá nguéé deenú nī chi

Abraham i'téenu yā Ndyuūs ní ch'i'í yā 'ii'nyā' chi i'téenu yā caavā chii' chi dí' yā? Ní Abraham néené i'téenu yā Ndyuūs caavā chi dí' yā. ²³Ní chi' cuaacu chi canéé nguū' na libro ye' é Ndyuūs 'tíicā: Abraham s'téenu yā Ndyuūs ní Ndyuūs ní dí' yā cuenta chi Abraham ní n'daaca yā. Ní Ndyuūs sta'á yā Abraham chi cuuvi ye' é yā cáavā chi i'téenu yā Ndyuūs. Ní 'ii'nyā' s'ee' nga'á yā chi Abraham mii' ní amigo ye' é Ndyuūs.

²⁴Maa' ní cuuvi n'diichí nī chi Ndyuūs cuta'á yā 'ii'nyā' chi cuuvi ye' é yā nguéé dámaā' caava chi i'téenu yā 'yā naati 'tiicā ntúū' caavā chi din'daāca yā. ²⁵Tiicā ntúū' tá'ā Rahab chi ndúucu tá 'yaa' sa'ā, Ndyuūs ní dí' yā cuenta ye' e tá chi n'daacā tá. Ní Ndyuūs sta'á yā tá'ā chi cuuvi ye' é yā caava chi n'daacā dii' tá. N'daata mii' 'cuu' tá sa'ā s'ee' chi ndāā n'de'ei n'de'ei sa'ā chi Ndyuūs dich'o' yā. Ní tá'ā mii' dich'o' tá sa'ā s'ee' táámá yúuní taachi véé peligro ye' ē sa. ²⁶Ní tan'dúucā cuerpo ye' e yú taachi nguéé canéé espíritu ye' e yú ndúucū ní n'díí, 'tiicā ntúū' taachi i'téenu yú Ndyuūs ní nguéé n'daacā idii' yú, chii' chi i'téenu yú cunéé tan'dúucā chi n'díí.

Ye' e chiiya yú

3 Ndís'ti' hermanos ye' é nguéé canéé chi cuuví 'yaa' maestros ye' e yaacū nguaa' ndís'ti'. Deenú nī chi Ndyuūs diitu n'diichí yā nuu'ndi ye' e maestros mii' nguéé ti ndís'ti'. ²Nducyaacu yú idii' yú n'dee n'dái faltas. Ní nduuti chi 'áámá 'ii'nyā' nguéé caa'mán' yā

mar 'áámá falta tuu'mi ní 'ii'nyā' mii' ní neené n'daacā. Ní cuuvi nga'á ntii'nyu' yā ye' e nuu'ma' cuerpo ye' e maán' yā. ³Cuin'diichí nī. Cu'nuū' yú frenos naa' 'yúúdūu ní cu'téenu tí ye' e yú. Ní nuu'ma' cuerpo ye' e tí cuuvi dii' tan'dúucā chi ne' e yú. ⁴Maa' ní nadacadíinuū' yú ye' e barco. 'Áará chí ch'εete ní 'yúúné taa' ngéenu ní 'ii'nyā' cuuvi dii' yā manejar barco mii' cáavā 'áámá yá'á 'líí' ye' ē barco mii' chi canúú' ch'εeti nuū'ní'yá'ā. Ní barco mii' ngiicā naachi ne' é yā. ⁵Tiicā ntúū' chiiya yú. 'Áará chí 'áámá chí 'líí' chí ye' e cuerpo ye' e yú naati nga' a yú ye' ē n'dee n'dái cosas chí n'gεete ndúucū chiiya yú. Ní cuin'diichí nī ta 'líí' chuundí ya'ā cuuvi caacyá'ā 'áámá icyá'ā ch'εete. ⁶Ní chiiya yú tan'dúucā 'áámá nguuchi ya'ā 'tíicā chiiya yú. Ní tanducué'ē tan'dúucā 'áámá i'nyee'di chí ndiituú ndúucū nducué'ē chí n'gεe n'daacā, 'tíicā cuerpo ye' e yú cáavā chiiya yú. Ní dii' chí núú'mán' cuerpo ye' e yú véé nuu'ndi ye' ē. Ní tan'dúucā infierno chí ngiichi ya'ā 'tíicā dii' chí chiiya yú. Ní ya'ā mii' ní dii' tan'dúucā chí ngiichi nducué'ē vida ye' e yú 'naa' chí canee yú i'nyee'dí 'cūū. ⁷Ca'áámá ca'áámá naa' 'iiti chí véé i'nyee'dí 'cūū ye' ē 'iiti 'yúúdūu, ye' ē 'yaada, ye' ē cúú, 'iiti chí snúū' ch'εeti nuū'ní'yá'ā ní nducyaaca tí sa'ā cuuvi dii' sa amansar ní 'āā dii' sa amansar 'iiti s'ee'. ⁸Naati mar 'áámá 'ii'nyā' nguéé cuuvi dii' yā chí amansar chiiya maán' yā. Nga' a yú cosas chí nguéé n'daacā 'aara chí nguéé ne' e yú. Ní ndúucū chiiya yú nga' a yú n'dee

n'dái chi nguéé n'daacā yeⁿe 'iiⁿ'yāⁿ. Ní diiⁿ yú chi cuuvi 'cuūvi yā. ⁹Ní ndúúcu maaⁿ chiya yú dich'εete yú Ndyuūs chiida yú ní ngaⁿ'a taaⁿ yú yeⁿe 'iiⁿ'yāⁿ chi Ndyuūs din'dái yā chi tan'dúúca maáⁿ Ndyuūs 'tiicá din'dái yā 'iiⁿ'yāⁿ. ¹⁰Yeⁿe maaⁿ cheendi ntúuⁿ yú ngaⁿ'a yú chi Ndyuūs n'daacá yā ní ngaⁿ'a taaⁿ yú ndúúcu 'iiⁿ'yāⁿ. Ndí's'tiī hermanos yeⁿ'é, nguéé canéé chi cuuvi 'tíicā. ¹¹¿Áá yeⁿ'é 'áámá nduutinaaⁿ nuūⁿnīⁿ can'dáā nuūⁿnī yaāa ndúúcu nuūⁿnīⁿ yaādī? Nguéé cuuvi. ¹²Ndí's'tiī hermanos yeⁿ'é, ¿áá cúvī 'áámá yáⁿ'á yeⁿe n'guiidīi yááⁿ nguuvi cuuvi aceitunas yeⁿ'é? Nguéé cuuvi. O 'aama yáⁿ'á lífⁿ yeⁿe uvas ááá cuuvi n'guiidīi yááⁿ nguuvi cuuvi yeⁿ'é? Nguéé cuuvi. 'Tiicá ntúuⁿ yeⁿ'é 'aama ndúútínaaⁿ nuūⁿnīⁿ nguéé cuuvi can'dáā nuūⁿnīⁿ diini ndúúcu nuūⁿnīⁿ yaadi.

Yeⁿe vaadi deenu chi cuaacu níⁿ'nyúⁿ chi vaadi deenu

¹³Nduuti chi véé saⁿ'ā chi cadiinuuⁿ sa ní chi deenu nguaaⁿ ndí's'tiī canéé chí cuuⁿ'miⁿ sa 'iiⁿ'yāⁿ chi cuaacu chi deenu sa ní ndiicuuⁿ sa cáávā nduudu n'dai yeⁿ'é sa ndúúcu ntiīⁿ'nyuⁿ n'daacā chi diiⁿ sa. ¹⁴Naati nduuti chi véé vaadi nguéé chi ch'εete ndúúcu vaadi 'caaⁿ'va na staava yeⁿ'é nī ní ndí's'tiī ní nadacádíínuuⁿ nī na staava yeⁿ'é nī chi caⁿ'á nī diiⁿ nī nducuéⁿ'é caavā maáⁿ nī dífⁿ nī aprovechar, tuuⁿ'mi ní nguéé cuuvi nadacádíínuuⁿ nī chi n'gεete nī. Ndíí nguéé cuuvi caaⁿ'máⁿ nī nduudu yaadi chi contra yeⁿ'é nduudu cuaacu. ¹⁵Ní vaadi deenú 'cūū yeⁿ'é nī nguéé

vaadi deenu chi yeⁿ'é Ndyuūs naati vaadi deenú 'cūū ní yeⁿ'e iⁿ'yeeⁿ'dí 'cūū ní yeⁿ'e chi nadacádíínuuⁿ yā ní yeⁿ'é yááⁿ'n'guiinuuⁿ. ¹⁶Naachi 'iiⁿ'yāⁿ chí dínngueé yā ní dífⁿ yā nducuéⁿ'é caava maáⁿ yā neⁿ'é yā dífⁿ yā aprovechar, tuuⁿ'mi ní miiⁿ canéé 'iiⁿ'yāⁿ chi nguéé véé orden yeⁿ'é yā. Ní dífⁿ yā tanducuéⁿ'é dendu'ū chi nguéé n'daacā. ¹⁷Naati 'iiⁿ'yāⁿ chí véé vaadi deenu yeⁿ'é yā chí yeⁿ'e Ndyuūs, tuuⁿ'mi ní vmnááⁿ vmnaaⁿ canéé chí ch'εetinéé n'daacā yā ndúúcu vida yeⁿ'é yā chí deene. Cuayiiivi ní dífⁿ yā chí véé vaadi 'diiíⁿ. Ní ndiicúuⁿ yā, ní amigo yā. Ní ya'ai 'iinú yā ndúúcu 'iiⁿ'yāⁿ ní dámaā dífⁿ yā tanducuéⁿ'é chí n'daacā. 'Áā daamá nūuⁿ 'cuaaⁿ yā nducyaaca 'iiⁿ'yāⁿ. Ní nguéé nadacádíínuuⁿ yā yeⁿ'é chí nguéé ndaacā, ní nguéé dífⁿ yā dendu'ū chí nguéé n'daacā. ¹⁸Ní 'iiⁿ'yāⁿ chí dífⁿ yā chí véé vaadi 'diiíⁿ ní dífⁿ yā tan'dúúca chí cuuⁿ'nú yā ndaata yeⁿ'e nducuéⁿ'é chí cuaacu. 'Tíicā dífⁿ yā. Ní n'gui'í yeⁿ'é nducueⁿ'é chí cuaacu ní vaadi cuaacu.

Yeⁿe ndí's'tiī amigos yeⁿ'e 'iiⁿ'yāⁿ chí nguéé i'téenu yā Jesucristo

4 ¿Tíí ngiica cosas chí caandaá chí 'tíica nguⁿ'ú nī nguaaⁿ maáⁿ nī? Ngiicā yeⁿ'e ná vaanicadíínnūⁿ yeⁿ'e maáⁿ nī ti neⁿ'e nī diiⁿ nī cosas chí nguéé n'daacā. ²Ndí's'tiī neⁿ'é nī cosas ní nguéé véé yeⁿ'e nī. Ní cáávā chuū neⁿ'é nī 'caaⁿ'núⁿ nī 'iiⁿ'yāⁿ. Neⁿ'é nī dendu'ū chí inaáⁿ nī ní nguéé cuuvi cuta'á nī. Ní cáávā chuū nguⁿ'ú nī ní dífⁿ nī caandaá. Ní nguéé ndaacā nī chíiⁿ chí neⁿ'é nī ti nguéé ngiicá

nī Ndyuūs de'ē chi neⁿe nī. ³Ní taachi ndís'tiī ngiicá nī Ndyuūs de'ē chi neⁿe nī, Ndyuūs nguéé téē yā chiiⁿ chi neⁿe nī ti ngiicá nī dámaāⁿ caavā maáⁿ nī caati cuuvi yeenuⁿ nī. Ní nguéé n'daacā chi ngiica nī 'tíicā. ⁴Ndís'tiī 'iiⁿ'yāⁿ chi nguéé 'áámá cunee nī ndúucū chi i'téenu nī, ¿'áá nguéé deenu ndís'tiī chi taachi caⁿ'á nī ndúucū 'iiⁿ'yāⁿ chi nguéé i'téenu yā Jesucristo ní dííⁿ nī dendu'ū chi yeⁿ'e iⁿ'yeeⁿ'dí' cūū tuu'mi ní canee nī enemigos yeⁿ'é Ndyuūs? 'Tiicá nī. ⁵¿'Áá nadacádíínuuⁿ ndís'tiī chi dííⁿ nī chi nguéé dichíí'vē nduudu yeⁿ'e libro yeⁿ'é Ndyuūs naachi canee nguūⁿ 'tíicā?: Ndyuūs s'neeⁿ yā Espiritu N'dai yeⁿ'é yā cheeti staava yeⁿ'e yú. Ní Espiritu miiⁿ ní neⁿ'e ca chi s'uuúⁿ canee yú dámaāⁿ yeⁿ'e Ndyuūs s'uuúⁿ. ⁶Naati Ndyuūs nginnée yā s'uuúⁿ ní itée yā s'uuúⁿ vaadī n'dai yeⁿ'é yā s'uuúⁿ. Canee nguūⁿ na libro yeⁿ'é Ndyuūs 'tíicā: Ndyuūs nguéé caⁿ'á yā lado yeⁿ'e 'iiⁿ'yāⁿ chi idin'geete maáⁿ yā naati ca'a yā vaadī n'dai yeⁿ'é yā 'iiⁿ'yāⁿ ndiicúúⁿ. ⁷'Tíicā canee chi s'neeⁿ nī vida yeⁿ'e maáⁿ nī na ta'á Ndyuūs. Nguéé ca'á nī lugar yáá'n'guiinūuⁿ chi ngaⁿ'a ntiiⁿ'nyuⁿ sa yeⁿ'e ndís'tiī ní yáá'n'guiinūuⁿ ní cuēvii sá yeⁿ'é nanááⁿ ndís'tiī. ⁸Ndaá nī nanááⁿ Ndyuūs ní Ndyuūs ní chí nndaa ntúúⁿ yā nanááⁿ ndís'tiī. Ndís'tiī 'iiⁿ'yāⁿ nuuⁿ'ndíí nadidēevé nī vida yeⁿ'é nī. Ndís'tiī chi véé 'uūvi vaanicadíínuuⁿ yeⁿ'é nī, nadidēevé nī staava yeⁿ'é nī. ⁹Ndís'tiī 'iiⁿ'yāⁿ nuuⁿ'ndíí di'vaachi maáⁿ nī ní cuēcú nī ní ya'āi 'iinú nī yeⁿ'é chi diiⁿ nī. Nguéé canee chi n'gíí'nyuⁿ nī naati canee chi cuēcú nī. Nguéé

canee chi yeenuⁿ nī naati canee chi di'vaachi maaⁿ nī. ¹⁰Ní 'cuēetinée ndiicuuⁿ nī nanááⁿ Señor yeⁿ'e yú ní Señor yeⁿ'é yú ní dííⁿ yā chi n'geete nī.

Yeⁿ'é chi n'diichi yú nuūⁿndi yeⁿ'e hermanos yeⁿ'e yú

¹¹Ndís'tiī hermanos yeⁿ'é, nguéé caaⁿ'maⁿ cúnncaa nī yeⁿ'é 'aama nī taama nī hermanos yeⁿ'e yú. 'Áá du'ú ndís'tiī chí ngaⁿ'a contra 'áámá hermano yeⁿ'e yú o n'diichi nī nuuⁿndi yeⁿ'e hermano yeⁿ'e yú, ndís'tiī ngaⁿ'a ntúúⁿ cúnncaa nī contra ley yeⁿ'é Ndyuūs ní n'diichi nī yeⁿ'e ley miiⁿ. Ní naachi n'diichí nī yeⁿ'e ley miiⁿ tuu'mi ní dííⁿ nī ntiiⁿ'nyuⁿ yeⁿ'e juez ní nguéé dííⁿ nī chi ngaⁿ'a ley miiⁿ. ¹²Dámaāⁿ vε 'áámá n'dyáⁿ'ā chi Ndyuūs chi ca'á yā ley miiⁿ ní 'tiicá ntúúⁿ Ndyuūs ní juez. Maáⁿ yā cuuvi nadinguáⁿ'ai yā 'iiⁿ'yāⁿ o cuuvi di'cuiinú yā 'iiⁿ'yāⁿ. Maaⁿ ní ndís'tiī, ¿du'u ndís'tiī chi n'diichí nī de'ē idiiⁿ táámá 'iiⁿ'yāⁿ?

Nguéé deenu yú de'e chi cuuvi ndúucu yú ndii cavyaaⁿ

¹³Maaⁿ ní 'caandiveéⁿ nī nduudu chi ngaⁿ'á ngii ndís'tiī chi ngaⁿ'a nī 'tíicā. Maaⁿnguuvii o cavyaaⁿ caⁿ'á táámá yāⁿ nī canee miiⁿ 'áámá nduūyū, ní dííⁿ negocio ní dííⁿ ganar. ¹⁴Ndís'tiī ní nguéé de'ē vε déenu nī chi de'ē cuuvi cavyaaⁿ. ¿De'ē vida yeⁿ'e ndís'tiī? Vida yeⁿ'é nī ní tan'dúucā 'áámá meēeⁿ chi ngo'oó 'áámá nch'ēēté ní n'giinu. ¹⁵Ndís'tiī ní canee chi caaⁿ'máⁿ nī 'tíicā. Nduuti chi Ndyuūs neⁿ'é yā chi cunduūchí tuu'mi ní dííⁿ chuū o dííⁿ cháá. ¹⁶Naati nguéé dííⁿ nī

'tíicā. Ndís'tií ngaⁿá nī yeⁿe cosas n'geete chi dííⁿ nī. Ní yeenú nī yeⁿe nducuéⁿe 'cūū chi ngaⁿa nī chí n'geete. Ní nguéeⁿ n'daacā chi dííⁿ nī 'tíicā. ¹⁷Iiⁿyāⁿ chi déenu yā yeⁿe chi cuuvi dííⁿ yā chi n'daacā ní nguéeⁿ idiíⁿ yā chuū tuuⁿmi ní dinuuⁿndí yā.

**Yaa'ví 'iiⁿyāⁿ chi 'cuiica
chi candéé yā cuidado**

5 'Caandiveeⁿ ndís'tií 'iiⁿyāⁿ chi 'cuiica. Cuεεcú nī ní 'cuai nī caati 'cuenú nī cuuvi denduⁿū chi díítūū chi cuchii nanááⁿ yeⁿe ndís'tií. ²Vaadí 'cuiica yeⁿé nī ní nchōō ní catecai n'daí nī n'dáá ní che'é tī. ³Ní 'dííⁿnguāāⁿ ndúúⁿcū 'dííⁿnguεε yeⁿé nī ní che'e yáⁿāa. Ní chiiⁿ chi nche'e yáⁿāa miiⁿ ní canéé tan'dúúⁿcā 'áámá lado yeⁿe testigo chi caaⁿmaⁿ contra yeⁿé nī. Ní chiiⁿ chi diiⁿ tan'dúúⁿcā chi cacyáⁿā cuerpo yeⁿé nī nduucū yaⁿā. Ní vaadí 'cuiica yeⁿé nī ní nguáinⁿdaí nī ní maaⁿ ní tiempo chí cuuví 'cuiinu íⁿyeēⁿdí. ⁴N'diichí nī. 'Āā cuéé nadíⁿ've nī 'iiⁿyāⁿ chi dííⁿ yā ntiíⁿnyuⁿ ní sta'á yā cosecha yeⁿé nī. Ní chííⁿvē miiⁿ canéé tan'dúúⁿcā 'áámá testigo contra yeⁿe ndís'tií. 'Iiⁿyāⁿ s'eeⁿ ní 'caí yā contra yeⁿe ndís'tií ní Señor chi ngaⁿa ntiíⁿnyúⁿ yā yeⁿe nducyáác 'iiⁿyāⁿ 'āā n'giindiveéⁿ yā chiiⁿ chi 'caí yā. ⁵Ndís'tií 'iiⁿyāⁿ 'cuiica, maáⁿ nī ch'εetineé nī ndúúⁿcū tanducuéⁿe chi neⁿé nī ní yeenú nī. Ní dicheeté nī cáávā nguuvi chi 'cuuví nī tan'dúúⁿcā chi dííⁿ nī ndúúⁿcū 'áámá cuuchí chi cuuvi 'viiché tī níicú ndaa 'áámá nguuvi chi 'caaⁿnúⁿ nī 'iiti miiⁿ. ⁶Ní ndís'tií 'āā dííⁿ nī

condenar saⁿā chi n'dai ní 'iiⁿyāⁿ s'eeⁿ n'giíⁿnúⁿ yā saⁿā. Ní nguéeⁿ diiⁿ sa mar 'áámá chi nadanguáⁿai sa maaⁿ sa.

**Yeⁿe 'viich'εetííⁿnuⁿ yeⁿe yú
ní yeⁿe chi ngaⁿangua'a yú**

⁷Ní cáávā nducuéⁿe ngaⁿá ndís'tií hermanos yeⁿé canéé chí dííⁿ nī nducuéⁿe ndúúⁿcū vaadí 'diiíⁿ nanááⁿ nī ní nanááⁿ Señor yeⁿe yú ndii tiempo chi ndaa yā taama vmnéⁿēe. Cuin'diichí nī. 'Iiⁿyāⁿ chi dííⁿ yā ntiíⁿnyuⁿ yeⁿe campo canee chi cūnee ngíínú yā chi ndaācā n'daacā cosecha yeⁿe yā. Ní cūnee ngíínú n'dai yā chi cueeⁿ cuuvi vmnááⁿ vmnaaⁿ. Ní taachi cho'ōo chí cueeⁿ cúuvi cuayiivi tuuⁿmi ní cuta'á yā cosecha yeⁿe yā. ⁸Tiicá ntúúⁿ ndís'tií véé paciencia yeⁿé nī ní canee diitú nī ndúúⁿcū chí i'téenu nī na staaⁿ yeⁿé nī caati tiempo chí ndaa Señor yeⁿe yú 'āā snee niiⁿnuúⁿ. ⁹Ní ndís'tií hermanos yeⁿé nguéeⁿ caaca nuuⁿndi nī 'aama nī contra taama nī ní nguéeⁿ cuuvi n'diichi Ndyuūs nuuⁿndi 'cūū chí yeⁿe nī. Ndyuūs chí juez ní niiⁿnuúⁿ nūūⁿ ndaa yā. ¹⁰Maaⁿ ní hermanos yeⁿé nadacádíínuuⁿ nī yeⁿe tiempo chí 'āā chó'ōo tan'dúúⁿcā chí diiⁿ profetas chí candεε yā nduudu yeⁿé Ndyuūs ní n'dee n'dáí ch'eenú yā chíi. Ní véé paciencia yeⁿé yā. Tan'dúúⁿcā chí dííⁿ yā 'tiicá ntúúⁿ canee chí dííⁿ nī. ¹¹Deenu yú chí yeenú profetas s'eeⁿ taachi ch'eenú yā chíi. Ndís'tií ní ch'iindiveéⁿ nī yeⁿe saⁿā Job ní tan'dúúⁿcā chí véé ca paciencia yeⁿe sa taachi ch'eenú sa chíi. 'Āā n'diichí nī ntúúⁿ tan'dúúⁿcā Señor yeⁿe yú dííⁿ yā

cáavā saⁿā Job miiⁿ taachi ch'iinu ch'eenu sa chii. Maaⁿ ní Señor yeⁿe yú ní néené neⁿé yā s'uuúⁿ ní néené ya'ai yā s'uuúⁿ.

¹²Ní yeⁿe tanducuéⁿē hermanos yeⁿé, nguéé caaⁿmaⁿ nī de'ē chi neⁿe diíⁿ nī ndúúcu nduudu “por Dios” chi caⁿá nī diíⁿ nī 'tíicā o nguéé caⁿá nī diíⁿ nī 'tíicā. Ní nguéé caaⁿmaⁿ nī “caavā nanguuvi”, ndíí nguéé ndúú cáavā “iⁿyeeⁿdí 'cūū”, ndíí nguéé ndúú caavā táámá naaⁿ. Dámaāⁿ caaⁿmaⁿ nī, “tíicā idiíⁿ” o “nguéé 'tíicā idiíⁿ” caati Ndyuūs nguéé cuuvi diíⁿ yā condenar ndís'tií.

¹³Ndúúti chi 'áámá chee ndís'tií chi n'geenu nī ngii, canéé chí caaⁿmaⁿngua'á nī Ndyuūs. Nduuti chi canee 'áámá 'iiⁿyāⁿ chi diyeenu, cánéé chí caatá yā chi Ndyuūs ní ch'eté yā. ¹⁴Nduuti chi 'áámá chee ndís'tií ní ngíita nī canéé chí yaa'ví nī 'iiⁿntyéⁿē yeⁿe yaacū chi cuchíí yā ní 'cuεndáa yā aceite na cuerpo yeⁿé 'iiⁿyāⁿ miiⁿ chi ngíita yā ní caaⁿmaⁿngua'á yā nanááⁿ Señor Jesucristo yeⁿe yú cáavā 'iiⁿyāⁿ miiⁿ chi ngíita yā.

¹⁵Ní taachi ngaⁿangua'á nī, i'téenu nī chi Jesucristo cuuvi diíⁿ yā chí nduūvā yeⁿe 'iiⁿyāⁿ chí ngiitā, ní Señor Jesucristo miiⁿ ní nadicuéeⁿ yā 'iiⁿyāⁿ chí ngiitā ní nduūvā yeⁿé yā. Ní nduuti chi véé nuuⁿndi yeⁿé

yā Señor Jesucristo nadach'εécú yā nuuⁿndi yeⁿe yā. ¹⁶Cáavā chuū ní caaⁿmaⁿ nī nuuⁿndi chi diíⁿ nī contra hermanos yeⁿé nī ní cuuvi nī hermanos. Ní caaⁿmaⁿngua'á nī 'áámá nī táámá nī ní cuuvi nduūvā yeⁿé nī. 'Iiⁿyāⁿ chi n'dai taavi taachi caaⁿmaⁿngua'á yā véé poder yeⁿe Ndyuūs na staava yeⁿé yā taachi caaⁿmaⁿngua'á yā. ¹⁷Deenu yú chi saⁿā Elías chi profeta ní 'áámá saⁿā tandúúca s'uuúⁿ 'tíicā sa. Taachi caⁿangua'a sa chi chiica sa Ndyuūs chi diíⁿ yā chi nguéé cueeⁿ cuūvi tuu'mi ní nguéé cheeⁿ cuūvi vmaaⁿ yáⁿā 'iinu nduūyū canéé maⁿā.

¹⁸Ní cuayiivi miiⁿ ní caⁿangua'a ntúuⁿ sa táámá vmnéⁿēe chi cueeⁿ cuūvi ní cheeⁿ cuūvi vmaaⁿ yáⁿā ní chii taavi cosecha yeⁿé.

¹⁹Maaⁿ ní ndís'tií hermanos yeⁿé, nduuti chi 'áámá ndís'tií ngíí divíi nī yeⁿé nduudu cuaacu ní táámá yā idiíⁿ yā chi 'iiⁿyāⁿ miiⁿ nanguεecunée yā ní i'téenu yā nduudu cuaacu, ²⁰tuumi ní canéé chi cadíinuⁿ nī chuū. 'Áámá 'iiⁿyāⁿ chi diíⁿ yā chí táámá 'iiⁿyāⁿ chí dinuuⁿndi yā nacuecúndii yā ní cuvíi yā yeⁿé nuuⁿndi yeⁿé yā, tuu'mi ní 'iiⁿyāⁿ vmaaⁿ nadanguáⁿai yā alma chi n'dii yeⁿé taamá yā. Ní diíⁿ chi Ndyuūs nadach'εécú yā ndee n'dái nuuⁿndi yeⁿé yā. 'Tíicā cuuvi.

CARTA VMNÁÁⁿ VMNAAⁿ YEⁿE SAN PEDRO

Pedro idingúuⁿ yā carta 'cūū
yeⁿē hermanos chi i'téenu
yā Jesucristo hermanos chi
s'nééⁿ 'muuⁿ chi s'nééⁿ miiⁿ

1 'Úú Pedro 'úú ni 'úú 'áámá
apóstol yeⁿe Jesucristo. Ní
Cristo dichó'o yā 'úú chi 'úú candé
nduudu cuaacu yeⁿe Ndyuūs. 'Úú
idingúuⁿ carta 'cūū yeⁿe 'iiⁿ'yāⁿ chi
i'téenu yā Señor Jesucristo ní nguéé
chií ch'ëetinée yā na yáāⁿ yeⁿe yā tí
cheⁿe 'nééⁿ 'múúⁿ cheⁿe 'nééⁿ miiⁿ
yā ndii yáⁿ'āa yeⁿe Ponto, yeⁿe
Galacia, yeⁿe Capadocia, yeⁿe Asia,
ndúucū Bitinia. ²Ní idinguúⁿ yeⁿe
ndís'tií, 'iiⁿ'yāⁿ chi Ndyuūs ndeēve
yā tan'dúucā chi Ndyuūs deenú
yā chi caⁿ'a yā diiⁿ yā ndíí vmnááⁿ
vmnaaⁿ. Ní Espíritu N'dai yeⁿe
Ndyuūs ní nadideēvé yā ndís'tií
cáávā chi n'giindiveéⁿ nī yeⁿe yā ní
cáávā yuuúⁿ yeⁿe Señor Jesucristo
chi nadideēvé yā ndís'tií. Neⁿ'é chi
Ndyuūs téé yā ndís'tií n'dee n'dái
vaadi n'dai yeⁿe yā ní vaadi 'diiⁿ
cuuvi ch'ëete nguuaⁿ ndís'tií.

³Dich'ëete ca yú Ndyuūs chi
chiida Señor Jesucristo caati nééne
ya'ai iinú yā s'uuúⁿ chi dííⁿ yā chi
ch'iindiyáāⁿ ngai yú. Chuū dííⁿ yā

caati nadacuéeⁿ yā Jesucristo yeⁿē
nguuaⁿ tináⁿ'ā. Maaⁿ ní cucáávā
Ndyuūs tee yā s'uuúⁿ 'áámá vida
ngai yeⁿe yú ní véé esperanza
yeⁿe yú. ⁴Ní cūnee ngiinu yú
yeⁿe tanducuéⁿ'ē vaadi n'dai yeⁿē
Ndyuūs chi Ndyuūs ngaⁿ'á yā chi
tée yā s'uuúⁿ chi cuuvi yeⁿe yú.
Ní Ndyuūs nanguáin'dai yā cáávā
s'uuúⁿ chiiⁿ chi cuuvi yeⁿe yú na
va'ai cheeti nguuvi naachi nguéé
cuuvi chōō. Ní nguéé cuuví 'cuae,
ndíí nguéé cúuví ch'ó'oo yeⁿē. ⁵Ní
chuū chi Ndyuūs nguáin'dai yā
ní cáávā ndís'tií ti ndís'tií i'téenu
nī Jesucristo. Ní Ndyuūs dííⁿ yā
cuidado ndís'tií ndúucū poder yeⁿē
yā 'naaⁿ chi cūnee ngiinú nī chi
nadanguáⁿ'ai yā ndís'tií chi cuuvi
déenu nī yeⁿe chuū tiempo chi
cuchií.

⁶Ní canee chi yeenú nī yeⁿe
chuū 'aara chi dindaachí nī duu'vi
tiempo nūuⁿ 'naaⁿ chi n'geenú nī
ngii n'dee n'dái cosas chí ngii.
⁷Cáávā chi i'téenu nī Jesucristo
vaadi i'téenu yeⁿ'é nī ní tan'dúucā
'dííⁿ'nguāⁿ, 'tífcā. Ní 'iiⁿ'yāⁿ canéé
chi n'diichineeⁿ 'dííⁿ'nguāⁿ ndúucū
yaⁿ'ā caati cuuvi deenú yā chi
dámaāⁿ 'dííⁿ'nguāⁿ. Ní 'tiicā

ntúūⁿ vaadī i'téenu yeⁿé nī 'iiⁿyāⁿ canéé chí n'diichíneeⁿ yā. Ní vaadī i'téenu yeⁿé nī nduuti chi ichéé yeⁿe tanducuéⁿē taachi 'iiⁿyāⁿ n'diichíneeⁿ yā yeⁿē, tuu'mi ní cuaacu chi i'téenu nī ní 'áámá cūnee vaadī i'téenu yeⁿé nī nguéé ti 'díⁿnguāⁿ chí n'giinu. Cuayiivi taachi ndaá Jesucristo tuu'mi ní dich'εεté yā ndís'tiī ní díⁿ yā honrar ndís'tiī ní díⁿ yā chí n'dεεvé ngii ndís'tiī cáávā chí n'daacā ca i'téenu nī Jesucristo.

⁸'Áará chí nguéé n'diichí yā Jesucristo dineⁿé nī 'iiⁿyāⁿ. Ní i'téenu nī 'iiⁿyāⁿ 'áará chí nguéé inááⁿ nī 'iiⁿyāⁿ. Maaⁿ ní neené yeenu nī ndúúcu vaadī yeenu chí ch'εεte taavi ca. Ní nguéé véé nduudu yeⁿé nī chí cuuvi caaⁿmáⁿ nī yeⁿē. ⁹Ní neⁿé nī tunééⁿ nī nguuvi chí Ndyuūs nadanguáⁿai yā almas yeⁿe nī. Ní cáávā chuū chí i'téenu ca nī Ndyuūs.

¹⁰Tiempo chí 'āā ch'óōo 'iiⁿyāⁿ profetas chí candée yā nduudu yeⁿé Ndyuūs neené n'dai n'nuuⁿ yā yeⁿe chí Ndyuūs nadanguáⁿai yā 'iiⁿyāⁿ. Ní itínguuneeⁿ yā yeⁿe chuū. Profetas ní 'iiⁿyāⁿ chí ngaⁿá yā yeⁿe chí Ndyuūs caⁿá yā chí téé yā ndís'tiī yeⁿe chí n'dai taavi ca yeⁿé yā. ¹¹Ní profetas ní neⁿé yā deenu yā yeⁿe tiempo 'cūū ní táácā cuuvi ch'óōo yeⁿe tiempo 'cūū taachi Cristo 'cúeenú yā cuuvi ní cuchεε yā. Ní cuayiivi cuchii chí dεεvé ngii yeⁿé Cristo caati Espíritu yeⁿe Cristo chí canee ndúúcu profetas 'āā chíⁿí yā profetas yeⁿe chuū. ¹²Naati Ndyuūs chíⁿí yā profetas chí tiempo yeⁿe Cristo yeⁿe chí ngaⁿa yā nguéé cuuvi n'diichí

profetas naati ndís'tiī ní 'āā n'diichí nī. Profetas ngaⁿá yā nduudu cuaacu yeⁿe chí cuchii naati ndís'tiī 'āā n'giindiveéⁿ nī chí 'āā ch'óōo chíⁿ chí caⁿa yā. Ní cáávā 'iiⁿyāⁿ chí ngaⁿá yā ngii yā ndís'tiī nduudu cuaacu chí Jesús nadanguáⁿai yā 'iiⁿyāⁿ ndúúcu poder yeⁿē Espíritu N'dai yeⁿé Ndyuūs. Ní Ndyuūs dich'óo yā Espíritu N'dai yeⁿé yā yeⁿē va'ai cheeti nguuvi nanááⁿ s'uúúⁿ. Ní nducuéⁿē chuū ní ángeles maáⁿ yā neⁿe yā snaaⁿ yā dendu'ū.

Ndyuūs yaa'ví yā 'iiⁿyāⁿ chí cuuvi yeⁿé yā ní n'daacā ca cuuvi yā

¹³Maaⁿ ní cáávā nducuéⁿē chuū nadacadínuuⁿ nī n'daacā yeⁿe chí caⁿa nī díⁿ nī ní 'cuεetinéé n'daacá nī. Ní cunee ngiinú nī dámaaⁿ yeⁿe nducuéⁿē chí n'dai taavi chí Señor Jesucristo caⁿá yā téé yā ndís'tiī taachi ndaa yā taama vmnéⁿē. ¹⁴Ndís'tiī ní 'caandiveéⁿ nī nduudu yeⁿé Ndyuūs ti daiya Ndyuūs ndís'tiī. Ní nguéé díⁿ nī tan'dúúca chí díⁿ nī nducuéⁿē chí neⁿe maáⁿ nī taachi 'āā cuéé n'diichí nī Ndyuūs. ¹⁵Maaⁿ ní 'cuεetinéé n'daacā nī chí nguéé véé nuuⁿndi yeⁿé nī caati Ndyuūs chí yaa'ví yā ndís'tiī chí cuuvi yeⁿé yā ndís'tiī ní dεεve yā. ¹⁶Canéé nguūⁿ na libro yeⁿé Ndyuūs 'tíicā: Canéé chí díⁿ n'daacá nī chí dεεve nī caati 'úú, Ndyuūs, ní dεεve 'úú.

¹⁷Nduuti chí ndís'tiī ní ngaⁿá nī chí Ndyuūs ní chiidá nī ní caacá nī Ndyuūs chí cunee yā ndís'tiī, canéé chí 'cuεetinéé n'daacá nī ní 'va'a nī Ndyuūs neⁿe chí cunee nī iⁿ'yeeⁿdí 'cūū. Ndyuūs yeⁿe yú 'āā daamá nūuⁿ n'guúⁿ yā

nducyaaca 'iiⁿyāⁿ. Ní n'diichí yā ca'áámá cáaama yā tan'dúúccā chi ch'ēetineé yā ndúúccū ntiⁿnyuⁿ chi díⁿ yā. ¹⁸Deenú nī chi Ndyuūs nadanguáⁿai yā ndís'tiⁱ yeⁿe vida chi nguéeⁿ n'daācā chi sta'á nī yeⁿe 'iiⁿyāⁿ yeⁿe ndaata yeⁿé nī. Ní n'dááccā ca deenú nī chi nadí'vē yeⁿe chi nadanguáⁿai yā ndís'tiⁱ. Nguéeⁿ cuái yā ndúúccū dendu'ū chí nchōō tan'duuccā 'díⁿnguāⁿ o 'díⁿnguē. ¹⁹Naati Ndyuūs nadanguáⁿai yā ndís'tiⁱ ndúúccū yuūⁿ chí yaⁿai chí'vē ti yuūⁿ yeⁿe Cristo. Cristo ní ca'a yā maáⁿ yā cuerpo caavā ofrenda chi 'iiⁿyāⁿ s'eeⁿ 'caaⁿnúⁿ ya 'yā. Ní Cristo miiⁿ tan'dúúccā 'áámá 'iiti cuūchī chi nguéeⁿ n'gai tī ní nguéeⁿ de'ē vee ndíⁱ yeⁿe tī, 'tííca yā. ²⁰Ní Ndyuūs ndēevé yā Cristo chi maáⁿ yā cuerpo yeⁿé yā cuuvi ofrenda ndíⁱ vmnááⁿ vmnaaⁿ taachi 'āā cuéeⁿ din'dái yā iⁿyeⁿéⁿ 'cūū. Naati maaⁿ ní nguuvi s'eeⁿ Ndyuūs ch'iⁿi yā Cristo nanááⁿ ndís'tiⁱ ní caavā ndís'tiⁱ. ²¹Ní cucáávā Cristo miiⁿ ní ndís'tiⁱ i'téenu nī Ndyuūs chi nadacuéeⁿ yā Cristo yeⁿéⁿ nguaaⁿ tináⁿā. Ní Ndyuūs dich'ēeté yā Cristo ndúúccū honor. Ní ndís'tiⁱ 'āā i'téenu nī Ndyuūs ní cūnee ngiinú nī yeⁿéⁿ chí Ndyuūs caⁿa yā chí tée yā ndís'tiⁱ chí cuuvi yeⁿéⁿ nī.

²²Maaⁿ ní chí 'āā i'téenu nī nduudu cuaacu yeⁿéⁿ Cristo cucáávā Espíritu N'dai yeⁿéⁿ Ndyuūs 'āā didēevé nī staava yeⁿéⁿ nī chí dineⁿé nī hermanos yeⁿe yú. Canéeⁿ chí dineⁿéⁿ taavi cá nī 'aama nī taama nī hermanos ndúúccū staava yeⁿéⁿ nī chí dēeve. ²³Ndís'tiⁱ ní 'āā ch'iindiyáaⁿ nī taama vmnéⁿēe

nguéeⁿ yeⁿéⁿ 'iiⁿyāⁿ yeⁿéⁿ iⁿyeⁿéⁿ dí 'cūū chí 'cuūvi yā naati yeⁿe nduudu yeⁿéⁿ Ndyuūs, nduudu chí canduuchi ní 'áámá cūnee cueⁿe daāⁿmaⁿ. ²⁴Caati canéeⁿ nguūⁿ na libro yeⁿéⁿ Ndyuūs 'tííca:

Tanducuéⁿéⁿ 'iiⁿyāⁿ yeⁿe iⁿyeⁿéⁿ dí 'cūū ní tan'dúúccā yaātā ní tanducuéⁿéⁿ chí n'gēete ca yeⁿéⁿ 'iiⁿyāⁿ ní tan'dúúccā naāndā yeⁿe yaātā, 'tííca yā. Yaātā miiⁿ ní tī'í ní naandā miiⁿ ní n'geeⁿ,

²⁵naati nduudu cuaacu yeⁿéⁿ Ndyuūs ní 'áámá cūnee cueⁿe daāⁿmaⁿ.

Ní nduudu cuaacú 'cūū yeⁿe evangelio chíⁿ chí candéeⁿ 'iiⁿyāⁿ nanááⁿ ndís'iⁱ.

2 Maaⁿ ní cáávā chuū divíi ní 'áámá lado nducuéⁿéⁿ chí díⁿ nī chí nguéeⁿ n'daācā ní nguéeⁿ canche'éeⁿ nī. Ndíⁱ nguéeⁿ caaⁿmáⁿ nī dendu'ū chí nguēeⁿ cuaacu. Ndíⁱ nguéeⁿ ndúú díⁿ n'gueeⁿ nī yeⁿéⁿ taama 'iiⁿyāⁿ. Ndíⁱ nguéeⁿ ndúú ngaⁿa nī nduudu yaadī yeⁿéⁿ 'iiⁿyāⁿ. ²Ní ndís'tiⁱ tan'dúúccā chí dacua'aá chí caama 'niindiyááⁿ ní neⁿe leche, 'tííca ndís'tiⁱ. Díⁿ nī ní neⁿéⁿ nī leche chí nduudu n'dai yeⁿéⁿ nduudu cuaacu. Ní cuuvi cu'téenu cá nī ndúúccū nduudú 'cūū tan'dúúccā dacua'aá cuuvi 'cuiitá yā ndúúccū leche n'dai. ³Tííca cuuvi díⁿ nī nduuti chí cuaacu níⁿnyúⁿ n'diichíneeⁿ nī Señor Jesucristo chí n'dai yā.

Jesucristo ní tan'dúúccā tuūu ch'ēete chí canduuchi

⁴Ndís'tiⁱ canéeⁿ chí ndaa níⁿnuúⁿ nī nanááⁿ Señor Jesucristo ti tan'dúúccā

'áamá tuūu ch'εete chí canduuchi
'tiicá nī. 'Iiⁿyāⁿ yeⁿe iⁿyeeⁿdí
'cūū nguéé 'cuúⁿ yā tuuú miiⁿ ti
nadacadíínuuⁿ yā chí nguéé dichí'vē
naati Ndyuūs ndεeve yā tuūu miiⁿ chí
yaⁿai chí'vē chí Cristo. ⁵Ní ndís'tií
ntúúⁿ tan'dúúcā tuūu cánduuchi
'tiicá nī ti Ndyuūs 'āā teé yā ndís'tií
vida ngai. Ca'a nī lugar Ndyuūs
chí cuta'á yā vida yeⁿe ndís'tií ní
din'dái yā yeⁿe cuerpo yeⁿe ndís'tií
'áamá yaācū yeⁿe Espíritu N'dai
yeⁿe Ndyuūs. Ní ndís'tií canéé
chí dííⁿ nī ntiiⁿnyuⁿ yeⁿe chiiduú
yeⁿe yaacú 'cūū ní ca'á nī ofrendas
nanááⁿ Ndyuūs ndúucū chí duuchi
Jesucristo, ofrendas chí Ndyuūs
cuuvi 'cuáaⁿ yā. ⁶Ní 'tíicā canéé nguūⁿ
na libro yeⁿe Ndyuūs cáāvā chuū:

Quin'diichí nī. 'Úú Ndyuūs cu'neéⁿ
yāāⁿ Sión 'áamá tuūu ch'εete
yeⁿe cimientu yeⁿe esquina
yeⁿe yaācū. Tuūu miiⁿ n'dεevé
ní yaⁿai chí'vē. 'Iiⁿyāⁿ chí
i'téenu yā Señor yeⁿe yú chí
tuūu ch'εete miiⁿ nguéé cuuvi
'cuinaáⁿ yā yeⁿe Señor yeⁿe yú.

⁷Ní tuūu miiⁿ ní neené véé chii'vē
cucáāvā ndis'tií chí i'téenu nī Cristo
naati nguéé 'tíicā tuūu miiⁿ nanááⁿ
'iiⁿyāⁿ chí nguéé i'téenu yā. 'Tíicā
canéé nguūⁿ na libro yeⁿe Ndyuūs:

Tuūu mííⁿ nūuⁿ chí 'iiⁿyāⁿ chí
din'dái yā yaācū nguéé 'cūūⁿ
yā ti nadacadíínuuⁿ yā chí
nguéé dichí'vē. Tuuú 'cūū nūuⁿ
ní tuūu chεete yeⁿe cimientu
yeⁿe esquina.

⁸Ní canéé nguūⁿ na libro yeⁿe
Ndyuūs táámá chí 'tíicā:

Tuuú 'cūū ní dííⁿ chí cuundí ca'a
'iiⁿyāⁿ nī tuūu mííⁿ chiiⁿ chí
cundεeve 'iiⁿyāⁿ.

Cuaacu chí indéé ca'a yā ti nguéé
n'giindiveéⁿ yā nduudu cuaacu ní
Ndyuūs dííⁿ yā chí 'tíicā canee chí
dííⁿ 'iiⁿyāⁿ s'eeⁿ.

Yeⁿe 'iiⁿyāⁿ chí yeⁿe Ndyuūs

⁹Ndís'tií ní yeⁿe 'iiⁿyāⁿ chí
Ndyuūs ndεevé yā. Ndís'tií ní
chiiduú yeⁿe Ndyuūs chí Rey.
Ndís'tií ní yeⁿe ndaata dεevé.
Ndís'tií ní yeⁿe Ndyuūs ndís'tií.
'Tíicā dííⁿ Ndyuūs caati ndís'tií
cuuvi caaⁿmáⁿ nī chí ch'εete n'dai
chí dííⁿ Ndyuūs. Ndyuūs n'gai yā
ndís'tií yeⁿe na maaiⁿ ní ndaá nī
nanáaⁿ yā ná déévé chí n'dεevé
n'dai yeⁿe maáⁿ yā. ¹⁰Ndís'tií ní
tiempo chí chó'oo ní nguéé yeⁿe
Ndyuūs ndís'tií naati maaⁿ ní 'tiicá
nī. Tiempo chí chó'oo Ndyuūs nguéé
ya'ai 'iinú yā ndís'tií naati maaⁿ ní
'tíicā déenu nī chí Ndyuūs ya'ai 'iinú
yā ndís'tií ti yeⁿe Ndyuūs ndís'tií.

**'Iiⁿyāⁿ chí 'áamá dííⁿ yā
ntiiⁿnyuⁿ yeⁿe Ndyuūs**

¹¹Ndís'tií hermanos yeⁿe chí
neⁿe taavi, 'úú idi'cuiitú ndís'tií chí
tan'dúúcā 'iiⁿyāⁿ chí snúúⁿ yúúní
'tiicá nī neⁿe chí snéé nī iⁿyeeⁿdí
'cūū ndís'tií. Nguéé dííⁿ nī nuuⁿndi
tan'dúúcā chí neⁿe cuerpo yeⁿe
nī chí dííⁿ nī caati chiiⁿ chí neⁿe
cuerpo yeⁿe nī ní cueⁿe daāⁿmaⁿ
contra yeⁿe chí neⁿe staaava yeⁿe
nī. ¹²Cueetinéé n'daaca nī nguaaⁿ
'iiⁿyāⁿ chí nguéé i'téenu yā nduudu
cuaacu yeⁿe Ndyuūs. Ní 'áará chí
ngaⁿá 'iiⁿyāⁿ s'eeⁿ contra yeⁿe
ndís'tií tan'dúúcā chí ndís'tií ní
'iiⁿyāⁿ chí nguéé n'daacā, 'iiⁿyāⁿ
s'eeⁿ ní cuuvi snaaⁿ yā ntiiⁿnyuⁿ chí
n'daacā ca chí idiíⁿ nī. Ní cuuvi

'caaⁿmáⁿ yā chi ch'εete ca Ndyuūs nguuvi chi Ndyuūs ndaa yā taama vmnéⁿēē ní nnguāi yā cuenta yeⁿe nuūⁿndi yeⁿe yú.

¹³Canée chi díⁿ nī tan'dúúcā chi ngaⁿā 'iiⁿntyéⁿē 'āā du'ú nūuⁿ chi véé nduuti chi saⁿā rey o chí 'iiⁿntyéⁿē ch'εete. Ní n'daacā canee nī nanáaⁿ yā caavā chi ndís'tiī ní yeⁿe Señor Ndyuūs yeⁿe yú ndís'tiī. ¹⁴Ní díⁿ nī chi ngaⁿa 'iiⁿyāⁿ 'iiⁿntyéⁿē chi Ndyuūs s'neéⁿ yā miiⁿ caati 'iiⁿntyéⁿē cuuvi ca'a yā castigo 'iiⁿyāⁿ chi nguéeⁿ n'daacā idiíⁿ yā ní cuuvi caaⁿmáⁿ yā chi ch'εeté 'iiⁿyāⁿ chi n'daacā idiíⁿ yā. ¹⁵Ti chuū ní chiiⁿ chi Ndyuūs neⁿé yā chi díⁿ nī. Ní cáávā chi ndís'tiī din'daacā nī, 'iiⁿyāⁿ chi zonso yā ní nguéeⁿ deenu yā nguéeⁿ cuuvi caaⁿmáⁿ yā dē'ē vεε contra yeⁿe ndís'tiī.

¹⁶Ní 'cuεetinée nī tan'dúúcā 'iiⁿyāⁿ chi canée libre yā. Nguéeⁿ díⁿ nī chiiⁿ chi nguεε n'daacā cucáávā chi canée libre nī, ní ngaⁿā nī chi cuuvi díⁿ nī 'túúcā. N'daacā ca chi 'cuεetinée n'daacā nī ti ndís'tiī 'iiⁿyāⁿ chi 'áámá canee chi dichíⁿvē Ndyuūs. ¹⁷Ní díⁿ nī honrar nducyaaca 'iiⁿyāⁿ. Ní dinéⁿe nī nducyaaca hermanos yeⁿe yú. 'Va'á nī Ndyuūs ní díⁿ nī honrar emperador chi 'iiⁿntyéⁿē.

Yeⁿe chi Cristo n'geenu yā ngii chi ejemplo yeⁿe yú

¹⁸Ndís'tiī 'iiⁿyāⁿ criados chi chíⁿvē, díⁿ nī respetar patrón yeⁿé nī ní díⁿ nī tan'dúúcā chi ngaⁿa patrón yeⁿe nī, nguéeⁿ dámaāⁿ patrón yeⁿé nī chi din'daacā ní n'dai yā naati patrón yeⁿé nī chi nguéeⁿ din'daaca yā ní taaⁿ yā.

¹⁹Caati n'daacā ca chi cuchεε nī taachi n'geenu nī ngii cáávā cosas chi nguéeⁿ n'daacā chi díⁿ 'iiⁿyāⁿ chi contra yeⁿé nī. Ní cuchεε nī ti deenu nī chi n'daacā idiíⁿ nī. ²⁰'Tíicā Ndyuūs neⁿe yā chi díⁿ nī. ²⁰¿Dē'ē ch'εete chuū nduuti chi n'geenú nī ngii ti véé nuuⁿndi yeⁿé nī nī 'tíicā castigo yeⁿé nī, ní ichée nī? Nguéeⁿ ch'εete chuū. Naati nduuti chi n'geenu nī ngii ti n'daacā idiíⁿ nī ni ngiinū ngiinū cuchεε nī tuu'mi ní Ndyuūs nadi'viicú yā ndís'tiī. ²¹Ní yaa'ví yā ndís'tiī caavā chi díⁿ nī 'tíicā. Cristo 'āā ch'eenú yā chii cáávā s'uuúⁿ ní s'neéⁿ yā 'áámá ejemplo yeⁿe yú. Ní s'uuúⁿ canée chi 'tíicā nūuⁿ díⁿ yú tan'dúúcā chi díⁿ yā. ²²Cristo miiⁿ nguéeⁿ díⁿ yā mar 'áámá chuundi 'liiⁿ nuuⁿndi ní nguéeⁿ chinnche'éeⁿ yā mar 'áámá. ²³Ní taachí 'iiⁿyāⁿ s'eeⁿ ngaⁿa taáⁿ yā yeⁿe Cristo, Cristo miiⁿ nguéeⁿ ngaⁿa taáⁿ yā yeⁿe yā. Ní taachi 'iiⁿyāⁿ s'eeⁿ díⁿ yā chi Cristo ya'ai ch'eenú yā chii nguéeⁿ caⁿā cúnncā yā yeⁿe yā. Naati cūnee ngiinú yā nanáaⁿ Ndyuūs chi cuaacu chí Ndyuūs caⁿā yā n'diichi yā nuuⁿndi yeⁿe 'iiⁿyāⁿ s'eeⁿ. Ní Ndyuūs díⁿ yā cosa chi cuaacu. ²⁴Cristo maáⁿ yā candεε yā nuuⁿndi yeⁿe yú na cuerpo yeⁿe maáⁿ yā taachi ch'ii yā na cruz. Ní 'íicú s'uuúⁿ ní cuuvi díⁿ yú tan'dúúcā chi n'dii yú yeⁿe nuuⁿndi yeⁿe yú. Ní maaⁿ ní 'cuεetinee yú yeⁿe nducuéⁿē chi n'daacā. Ní 'āā nnduuvá yeⁿē yú yeⁿe castigo yeⁿe nuūⁿndi yeⁿe yú cáávā chi Cristo naca'ái yā cáávā nuuⁿndi yeⁿe yú. ²⁵Tiempo chi ch'ó'oo s'uuúⁿ ní tan'dúúcā 'iiti cuūchi chi nindai tī 'tíicā s'uuúⁿ

naati maaⁿ ní ndaa yú nanááⁿ
Cristo chi candée yā cuidado s'uuúⁿ
tan'duucā 'áámá pastor. Cristo ní
candée yā cuidado alma yeⁿe yú.

Yeⁿe 'iiⁿyāⁿ chí 'níndívaacu chí
canéé chí 'caandiveéⁿ yā yeⁿe ví'i

3 'Tiicá ntúūⁿ ndís'tií n'daataá
chí 'níndívaacu tá, canéé
chí diíⁿ nī chí ngaⁿ'ā isaⁿ'ā yeⁿe nī.
Ní nduuti chí isaⁿ'ā yeⁿe nī nguée
i'téenu sa Cristo, cuuvi cu'téenu
sa Cristo cáávā n'daataá yeⁿe sa
tí n'daacā n'geetinée tá. 'Áará chí
nguée ngaⁿ'ā ta mar 'áámá nduudu
yeⁿe Cristo tuu'mi ní cuuvi cu'téenu
sa Cristo. ²Caati n'diichi sa chí
n'daataá yeⁿe sa yeⁿe nducuéⁿe
chí idiíⁿ tá ní n'daacā ní diiⁿ tá
respetar isaⁿ'ā tá. ³Ní n'daataá
chí n'dai tá chí véé isaⁿ'ā yeⁿe tá
nguée canéé chí sta'a tá cosas ní
s'nuuⁿ tá cosas miiⁿ na cuerpo yeⁿe
tá chí diiⁿ chí n'dævæ maaⁿ tá. Ní
nguée neené n'dævéé diiⁿ tá tiiⁿ tá
o sta'a tá cosas yeⁿe 'diiⁿnguāⁿ o
catecai chí ya'ai chí'vē chí snee
tá chí cuuvi dich'eté maaⁿ tá táⁿ'ā.
⁴Naati n'dævéé chí yeⁿe tá canee
chí cūnee yeⁿe maaⁿ tá ní canéé
chí n'dævæ tá ndúúcū espíritu yeⁿe
tá chí ndiicúúⁿ. Ní canee 'diiⁿ tá.
Chuū ní dichí'vē nanááⁿ Ndyuūs.
⁵Caati tiempo chí chó'oo 'tíicā idiíⁿ
n'daataa s'eeⁿ chí yeⁿe Ndyuūs,
n'daataa chí i'téenu ca Ndyuūs ní
s'teenu tá chí ngaⁿ'ā isaⁿ'ā yeⁿe tá.
⁶Ní táⁿ'ā Sara 'tiicá ntúūⁿ diiⁿ tá.
S'teenu tá isaⁿ'ā yeⁿe tá chí nguuvi
Abraham. Ní ngaⁿ'ā tá isaⁿ'ā yeⁿe
tá: N'dii ní señor yeⁿe. Maaⁿ ní
ndís'tií cuuvi dííⁿ nī tan'dúúcā chí
ndís'tií daiya Sara ndís'tií nduuti

chí n'daacā idiíⁿ nī ní nguée 'va'á nī
yeⁿe mar 'áámá.

⁷Ní 'tiicá ntúūⁿ ndís'tií saⁿ'ā chí
véé n'daataá yeⁿe nī. 'Cuētinée
nī ndúúcū tá ní dííⁿ nī respetar
n'daataá yeⁿe nī. Ní diíⁿ nī honrar
n'daataá yeⁿe nī tan'dúúcā chí
deenu nī chí n'daacā ti n'daataa
miiⁿ nguée véé fuerzas yeⁿe tá
tan'dúúcā 'áámá saⁿ'ā. Ní 'tiicá ntúūⁿ
Ndyuūs yeⁿe vaadi n'dai yeⁿe yā
ca'a yā vida yeⁿe tá daama daama
tan'dúúcā chí tee yā ndís'tií saⁿ'ā. Ní
ndís'tií saⁿ'ā dííⁿ nī 'túúcā ní nguée
du'ū vee chí di'vaachí ndís'tií yeⁿe
chí diíⁿ nī taachi ngaⁿ'angua'á nī.

Yeⁿe chí n'geenu yú ngii
caavā chí n'daacā idiíⁿ yú.

⁸Ní yeⁿe nducuéⁿe canéé chí
dáámá nūuⁿ nadacadínuuⁿ nī
nducyaaca ndís'tií ní dáámá nūuⁿ
nadacadínuuⁿ nī na staava yeⁿe
nī. Dinéⁿe nī 'aama nī taama nī
tan'dúúcā chí cuáácú chí vi'í nī. Ní
ya'ai 'iinú nī 'aamá nī taama nī. Ní
diiⁿ chí ndiicúúⁿ nī 'aamá nī ndúúcū
taama nī. ⁹Taachi 'iiⁿyāⁿ nguée
n'daacā idiíⁿ yā ndúúcū nī nguée
idiíⁿ nī chí nguée ndaacā ndúúcū
yā. Ní taachi 'iiⁿyāⁿ nguée n'daacā
caaⁿ'máⁿ yā yeⁿe nī nguée cunncaā
caaⁿ'máⁿ nī yeⁿe yā. Ndaacā ca
dííⁿ nī ní caaⁿ'máⁿ nī ndúúcū 'iiⁿyāⁿ
s'tií ní di'viicú nī 'iiⁿyāⁿ s'tií. 'Tíicā
Ndyuūs cuuvi di'viicú yā ndís'tií.
Ndyuūs yaa'ví yā ndís'tií chí cuuvi
yeⁿe yā ti dííⁿ yā 'tíicā nduucú
nī. ¹⁰Canéé nguūⁿ na libro yeⁿe
Ndyuūs 'tíicā:

'Iiⁿyāⁿ chí neⁿe chí yeenú yā
ndúúcū vida yeⁿe yā ní neⁿe
yā chí véé nduuyu yeⁿe yā, 'āā

ntéé canéé chi caaⁿ máⁿ yā dendu'ū chi nguéé n'daacā. Ní nguéé caaⁿ máⁿ yā nduudu yaadi. ¹¹Canéé chi diví yā yeⁿe nducueⁿē chi nguéé n'daacā ní dámaāⁿ dííⁿ yā chi n'daacā. Canéé chí neⁿé yā vaadi 'diiíⁿ ní dííⁿ yā nducueⁿē chi véé vaadi 'diiíⁿ yeⁿe yā. ¹²Señor Ndyuūs yeⁿe yú maáⁿ yā 'iiⁿyāⁿ chi din'daacá yā. Ní cueⁿe daāⁿmaⁿ n'giindiveéⁿ yā chi 'iiⁿyāⁿ s'eeⁿ ngaⁿanguaⁿá yā. Ní Señor yeⁿe yú ní contra yeⁿe 'iiⁿyāⁿ chi nguéé n'daacā idiíⁿ yā.

¹³¿Du'ú 'iiⁿyāⁿ chi'nuucá'ai yā ndís'tií nduuti chi ndís'tií nducueⁿē tiempo dííⁿ nī chi n'daacā? Nguéé dííⁿ yā 'tíicā. ¹⁴Ní nduuti chi ndís'tií n'geenu nī ngii cáávā chi n'daacā idiíⁿ nī tuu'mi ní yeenú nī. Nguéé dííⁿ 'va'a nī yeⁿe mar 'áamá 'iiⁿyāⁿ ní nguéé dí'yáá nī cuuvi. ¹⁵Canéé chí dich'eté nī Cristo na staava yeⁿé nī ní 'cuaáⁿ nī lugar Cristo chi 'iiví nī. Ní canéé listo nī chi cuuvi nan'gueecútaⁿá nī 'āā du'ú nūuⁿ 'iiⁿyāⁿ chi intiinguuneeⁿ ndís'tií 'tíicā: Ndís'tií de'ē cáávā chi cūnee ngínú nī yeⁿe Ndyuūs yeⁿé nī. Ní taachi nan'gueecutaⁿá nī yeⁿe yā dííⁿ nī chi ndiicúúⁿ n'dai nī. Ní dííⁿ nī respetar 'iiⁿyāⁿ. ¹⁶Cueetinéé n'daacā nī chi nguéé véé chi nadacadíinuⁿ nī yeⁿe chi nguéé n'daacā chi dííⁿ nī. Ní 'iiⁿyāⁿ chi cunncaā ngaⁿa yā yeⁿe chi n'daacā chi dííⁿ nī caavā chi i'téenu nī Cristo, cuuvi 'cuináⁿ yā cáávā chi ngaⁿá yā. ¹⁷N'dáacā ca chi 'cueenu yú cuuvi cáávā cosas chi n'daacā

idiiⁿ yú nduuti chi Ndyuūs neⁿé yā 'tíicā, nguéé ti cáávā cosas chi nguéé n'daacā idiiⁿ yú.

¹⁸Cristo miiⁿ maáⁿ yā ch'eenú yā chíi chi ch'ií yā cáávā nuuⁿndi yeⁿe yú ní 'áamá vmnéⁿēe ch'ií Cristo cáávā nuuⁿndi yeⁿe nducyaaca 'iiⁿyāⁿ, ní nguéé nuuⁿndi yeⁿé yā. Ní ch'ií yā caati cuuvi candéε ya s'uúúⁿ nanááⁿ Ndyuūs. Cuáácú ch'ií cuerpo yeⁿé yā naati espíritu yeⁿé yā nduuchi. ¹⁹Ní espíritu yeⁿe Cristo cuayiivi chi ch'ií yā cheⁿe yā ní caⁿa yā nduudu cuaacu yeⁿé Ndyuūs nanááⁿ espíritu s'eeⁿ yeⁿe 'iiⁿyāⁿ s'eeⁿ chi n'dií. Ní espíritu s'eeⁿ ní preso yā na lugar yeⁿe espíritu s'eeⁿ. ²⁰Espíritu s'eeⁿ ní yeⁿe 'iiⁿyāⁿ chi nguéé ch'iindiveéⁿ yā Ndyuūs 'áamá tiempo chi 'āā chó'oo. Ní Ndyuūs canee ngínú yā ní 'diiíⁿ canéé yā chi 'iiⁿyāⁿ s'eeⁿ ndaacadaamí yā yeⁿe nuuⁿndi yeⁿe yā 'naaⁿ tiempo chi saⁿá Noé din'dái sa 'áamá arco chí barco ch'εete. Ní cheeti barco miiⁿ n'duuví 'iiⁿyāⁿ, dámaāⁿ niiní yā, ní nguⁿai yā yeⁿe nuūⁿnīⁿ. ²¹Ní nuūⁿnīⁿ miiⁿ ní tan'dúicā nuūⁿnīⁿ chi ngeedínuūⁿnīⁿ yú chi nanguaⁿāi s'uúúⁿ. 'Tíicā nuuⁿniⁿ miiⁿ. Taachi ngeedínuūⁿnīⁿ yú nguéé caavā chi naaⁿnu cuerpo yeⁿe yú naati cáávā chi 'áamá compromiso yeⁿe yú nanááⁿ Ndyuūs. Ní n'daacā diiⁿ yú chuū ndúicū núúⁿmáⁿ staava yeⁿe yú. Ní Ndyuūs nadanguáⁿai yā s'uúúⁿ chi i'teenu yú Cristo cáávā Cristo nducueeⁿ yā yeⁿe nguaaⁿ tináⁿā. ²²Ní Cristo miiⁿ cunaⁿá yā na va'ai cheeti nguuvi ní maaⁿ canee yā lado yeⁿe honor yeⁿe Ndyuūs chi lado tá cuaacu. Ní Cristo ngaⁿa ntiíⁿnyúⁿ

yā yeⁿⁱé ángeles ndúúcu 'iiⁿⁱntyéⁿⁱē ní yeⁿⁱē poderes chi véé.

**Canee chi dichíⁿⁱve yú
Ndyuūs tanⁿⁱdúúca chi Ndyuūs
tee yā fuerzas s'uuúⁿⁱ**

4 Tanⁿⁱdúúca Cristo ch'eenú yā chií ní dííⁿⁱ yā sentir na cuerpo yeⁿⁱé yā 'tiicá ntúúⁿⁱ ndís'tií canéé chi cuta'á nī fuerzas yeⁿⁱé nī cáávā tiempo chi caⁿⁱá nī 'cuenú nī cuuvi. Maaⁿⁱ ní 'iiⁿⁱyāⁿⁱ s'eeⁿⁱ chí ch'eenú yā chií ní dííⁿⁱ yā sentir na cuerpo yeⁿⁱé yā 'āā ntéé neⁿⁱé yā dinuuⁿⁱndi yā. ²Ní ndíí maaⁿⁱ ndís'tií canee chi dííⁿⁱ nī tanducuéⁿⁱē chi neⁿⁱe Ndyuūs chi dííⁿⁱ nī tanducuéⁿⁱē nguuví yeⁿⁱe nī. Ní nguéé dííⁿⁱ nī tanⁿⁱdúúca chi maaⁿⁱ cuerpo yeⁿⁱé nī neⁿⁱe chi dííⁿⁱ nī. ³Tiempo chi 'āā chó'oo ní dííⁿⁱ yú tanⁿⁱdúúca 'iiⁿⁱyāⁿⁱ chi nguéé yeⁿⁱe ndaata Israel chi nguéé i'téenu yā Ndyuūs. Tiempo miiⁿⁱ ní dííⁿⁱ yú cosas chi nguéé n'daacā. Ní dííⁿⁱ yú nuuⁿⁱndi tanⁿⁱdúúca chi neⁿⁱe cuerpo yeⁿⁱe yú chi dííⁿⁱ yú. Ní 'cuūⁿⁱvi yú ní cho'o nee che'e yú taachi véé fiesta yeⁿⁱē chi che'e yú. Ní cu'u ca yú vino. Ní s'teenu yú santo s'eeⁿⁱ chi ídolo s'eeⁿⁱ. ⁴Iiⁿⁱyāⁿⁱ s'eeⁿⁱ chi nguéé i'téenu yā Cristo, ¿De'ē cáávā chi nadacadíínuuⁿⁱ yā chi ndís'tií nguéé nduuvídamá nī ndúúcu yā, ní nguéé idiíⁿⁱ nī ndúúcu yā cosas chi nguéé n'daacā? Ní chííⁿⁱ chi 'iiⁿⁱyāⁿⁱ s'eeⁿⁱ ní cunncaā ngaⁿⁱa yā yeⁿⁱé nī. ⁵Iiⁿⁱyāⁿⁱ s'eeⁿⁱ canéé chi nga'a yā cuenta yeⁿⁱe vida yeⁿⁱe maáⁿⁱ yā nanááⁿⁱ Cristo chi dííⁿⁱ yā juzgar nducyaaca 'iiⁿⁱyāⁿⁱ, 'iiⁿⁱyāⁿⁱ chi canduuchi ndúúcu 'iiⁿⁱyāⁿⁱ chi n'díí. ⁶Ní cáávā chuū Cristo ngaⁿⁱá yā nduudu cuaacu yeⁿⁱe maáⁿⁱ yā nanááⁿⁱ

espíritus yeⁿⁱe 'iiⁿⁱyāⁿⁱ chi n'díí caati espíritus yeⁿⁱé yā cuuvi canduuchi tanⁿⁱdúúca chi Ndyuūs canduuchí yā. Ní Ndyuūs n'diichí yā nuuⁿⁱndi yeⁿⁱé 'iiⁿⁱyāⁿⁱ s'eeⁿⁱ taachi ch'etinee yā iⁿⁱyeeⁿⁱdí 'cūū tanⁿⁱdúúca chi n'diichí yā nuuⁿⁱndi yeⁿⁱe nducyáácá 'iiⁿⁱyāⁿⁱ chi snee yā iⁿⁱyeeⁿⁱdi 'cūū.

⁷'Āā cháā snee niⁿⁱnuúⁿⁱ nguuví chi 'cuiinu tanducuéⁿⁱē dendu'ū. Ní cáávā chuū 'cuetinee n'daacā nī ní 'āā de'é ora nūuⁿⁱ ní cuuvi caaⁿⁱmaⁿⁱngua'á nī. ⁸Ní yeⁿⁱē tanducuéⁿⁱē dineⁿⁱe cá nī 'aama nī taama nī caati taachi dineⁿⁱe cá nī tuuⁿⁱmi ní inadich'εεcú nī nuuⁿⁱndi yeⁿⁱē 'áámá nī taama nī. ⁹Cuaáⁿⁱ nī 'áámá nī taama nī na vaacu nī ní nguéé 'cuεεcu cheendí nī. ¹⁰Ní ca'áámá ca'aama nī ní dííⁿⁱ nī servir taamá nī ndúúcu n'tiíⁿⁱnyuⁿⁱ chi Ndyuūs itée yā chi dííⁿⁱ nī. Ní canéé chi dííⁿⁱ n'daacā nī n'tiíⁿⁱnyuⁿⁱ yeⁿⁱé nī chi Ndyuūs itée yā ca'aama ca'aamá nī ti Ndyuūs itée yā ndís'tií nducuéⁿⁱē chi n'dai taavi yeⁿⁱe yā. ¹¹Nduuti chi 'áámá nī candεε nī nduudu cuaacu canéé chí ngaⁿⁱá yā nduudu cuaacu yeⁿⁱé Ndyuūs. Nduuti chi 'aamá nī dííⁿⁱ nī n'tiíⁿⁱnyuⁿⁱ yeⁿⁱe yaácū canéé chi dííⁿⁱ yā ndúúcu nducuéⁿⁱē fuerzas yeⁿⁱé yā chi Ndyuūs ca'a yā 'iiⁿⁱyāⁿⁱ miiⁿⁱ. Ní yeⁿⁱe tanducuéⁿⁱē chi ndís'tií dííⁿⁱ nī canéé chi dííⁿⁱ nī chi cuuvi dich'eté nī Ndyuūs cucáávā Jesucristo. Ní yeⁿⁱé Ndyuūs chí ngíí dεεve yeⁿⁱe yā ní vee poder yeⁿⁱé yā tanducuéⁿⁱē tiempo. 'Tíica yā.

**Canéé chi n'geenu yú ngii
ti yeⁿⁱe Cristo s'uuúⁿⁱ**

¹²Ndís'tií hermanos chi neⁿⁱé taavi nguéé nadacadíínuuⁿⁱ nī chi cosa

chi díttūu nguéé canéé chí chó'oo yeⁿé nī taachi 'iiⁿyāⁿ n'diichineeⁿ cá yā ndís'tiī chi ya'ai n'geenu nī ngii ti canéé chí chó'oo yeⁿé nī 'tíicā. ¹³Naati canéé chí cuuvi yeenú nī taachí n'geenu nī ngii tan'dúucā Cristo ch'eenú yā chii. Ní cuayiivi cuuvi yeenú cá nī taachi Cristo ndaa yā taama vmnéⁿēe ní 'cuuⁿmíⁿ yā chi ch'εεε n'dai ngiichí yā tan'dúucā dεεve ngiichí ch'εεε.

¹⁴Nduuti chi 'iiⁿyāⁿ n'gaa'vá yā ndúucu nī cucáávā chi i'téenu nī Cristo tuu'mi ní yeenú nī. Espíritu N'dai yeⁿé Ndyuūs chí dεεvé ngii canéé ndúucū ndís'tiī. 'Áará chí 'iiⁿyāⁿ s'eeⁿ cunncaā ngaⁿa yā yeⁿe Cristo, ndís'tiī ní dííⁿ nī honrar Cristo. ¹⁵Ní nduuti chi 'áámá chéé ndís'tiī n'geenu nī ngii 'úu nguéé neⁿé chi 'cuenú nī cuuvi caati ch'iíⁿnúⁿ nī 'iiⁿyāⁿ o ididuucú nī o nguéé dííⁿ nī tan'dúucā chi ngaⁿā ley yeⁿé Ndyuūs chi ch'εεε ca.

¹⁶Ní nduuti chi 'áámá chεε ndís'tiī n'geenu nī ngii cáávā chi i'téenu nī Cristo nguéé cuuvi 'cuinaáⁿ nī naati canee chi dich'εεé nī Ndyuūs caati 'iiⁿyāⁿ ngaⁿa yā chí díí ní yeⁿe Cristo dii.

¹⁷Áā ndaa tiempo chi Cristo caⁿá yā n'diichi yā nuuⁿndi yeⁿe 'iiⁿyāⁿ ní vmnááⁿ vmnaaⁿ caⁿá yā n'diichí yā nuuⁿndi yeⁿe 'iiⁿyāⁿ chí i'téenu yā 'iiⁿyāⁿ. Ní nduuti chí vmnááⁿ vmnaaⁿ n'diichí yā nuuⁿndi yeⁿe yú, 'táácā cuuvi yeⁿé 'iiⁿyāⁿ chí nguéé i'téenu yā nduudu cuaacu yeⁿé Ndyuūs cuayiivi taachi n'diichi Cristo nuuⁿndi yeⁿe yā? ¹⁸Ní nduuti chí ngí'ii chí 'iiⁿyāⁿ chí n'dai cuuvi nanguaⁿai yā, 'd'é'ē cuuví ndúucū 'iiⁿyāⁿ chí nguéé n'daacā dííⁿ yā ní

ndúucū 'iiⁿyāⁿ chí dinuuⁿndí yā ní nguéé i'téenu yā? ¹⁹Ní 'tíicā canee chí diiⁿ yú. Taachi n'geenu yú ngii caavā chí Ndyuūs neⁿé yā chí diiⁿ yú 'tíicā, canéé chí diiⁿ yú nducuéⁿē chí n'daacā. Ní canéé chí nga'a yú vida yeⁿe yú na ta'a Ndyuūs caati Ndyuūs din'dái yā s'uuúⁿ ní 'indεε yā cuidado s'uuúⁿ. Ndyuūs ní dííⁿ yā chíiⁿ chí ngaⁿa yā chí caⁿa yā diiⁿ yā.

Yeⁿé 'iiⁿyāⁿ chí i'téenu yā Ndyuūs

5 'Úú Pedro ca'á consejo 'iiⁿntyéⁿē yeⁿe yaacū chí snéé nguaaⁿ ndís'tiī. 'Úú 'tiicá ntúūⁿ 'iiⁿntyéⁿē 'úú. 'Úú ngaⁿá yeⁿe Cristo tan'dúucā chí ch'eenú yā chíi ti n'diichí nduucū nduutinaáⁿ maáⁿ. Ní 'tiicá ntúūⁿ véé parte yeⁿé vaadi dεεve ngii chí Ndyuūs 'cuuⁿmíⁿ yā s'uuúⁿ cuayiivi. ²Ndís'tiī 'iiⁿntyéⁿē yeⁿe yaacū, idiíⁿ nī ntiíⁿnyuⁿ yeⁿé nī tan'dúucā 'áámá pastor chí indεε yā cuidado yeⁿe 'iiti cuūchī. 'Tíicā dííⁿ nī ndúucū 'iiⁿyāⁿ chí yeⁿé Ndyuūs chí caⁿá yā yaacū naachi ndís'tiī ní 'iiⁿntyéⁿē. Nguéé dííⁿ nī ntiíⁿnyuⁿ yeⁿe nī chí canéé chí dííⁿ nī naati dííⁿ nī ti maáⁿ nī neⁿe nī diiⁿ nī caati 'tíicā neⁿe Ndyuūs. Nguéé dííⁿ nī caavā chí cuta'á nī tuūmī naati dííⁿ nī ndúucū nuuⁿmaⁿ staava yeⁿé nī chí n'dai. ³Nguéé dííⁿ nī ndúucū 'iiⁿyāⁿ chí maaⁿ cuidado yeⁿé nī tan'dúucā chí ndís'tiī ní 'iiví yeⁿé yā naati 'cuεetinéé n'daacá nī níicú 'iiⁿyāⁿ cuuvi n'diichí yā ndís'tiī ní dííⁿ yā tan'dúucā chí ndís'tiī dííⁿ nī. ⁴Ní 'íicú taachi ndaa Jesucristo chí 'iiⁿyāⁿ chí ndíí tiiíⁿ chí ícandεε yā cuidado yeⁿe 'iiⁿyāⁿ yeⁿé yā tan'dúucā 'áámá pastor chí

ndii tiiⁿ chí ícandee yā cuidado
'iiti yeⁿé yā, tuu'mi ní ndís'tiī cuuvi
cuta'á ní 'áamá corona chi nguéeé
'cuinu deevé yeⁿē. Nguéeé corona
yeⁿe yaātā chi ituuvií.

⁵Tiicá ntúūⁿ ndís'tiī saⁿā
da'caiyāā canéeé chí díiⁿ nī tan'dúúca
chi ngaⁿa 'iiⁿntyeⁿē yeⁿe yaācū.
Nducyaaca nī canéeé chí ndiicuuⁿ
nī ní cunnee nī 'aama nī taama nī
caati canéeé nguūⁿ na libro yeⁿé
Ndyuūs 'tíicā:

Ndyuūs nguéeé neⁿe yā 'iiⁿyāⁿ
chi nacadínuuⁿ yā chí maáⁿ
yā ch'ēete yā naati ca'á yā
nducuéⁿē chí n'dai yeⁿe yā
'iiⁿyāⁿ chí ndiicúúⁿ.

⁶Maaⁿ ní nducyaaca ndís'tiī ndiicúúⁿ
n'dai 'cuēetinée nī maaⁿ poder yeⁿé
Ndyuūs ti Ndyuūs cuuvi dich'ēeté yā
ndís'tiī tiempo chí neⁿé yā. ⁷Ca'á nī
nducueⁿē cuidado chí díttū yeⁿe
nī na ta'a Cristo caati Cristo candeeé
yā cuidado yeⁿe ndís'tiī.

⁸Canéeé listo nī ní nguéeé
'cuētiyaadú nī. Cundée nī cuidado
chí n'daacā 'cuēetinée nī ti
yááⁿ'nguiniūⁿ miiⁿ chí contra yeⁿe
nī chíicá sá ní n'diichi sa ndii 'muuⁿ
ní ndii miiⁿ. Ní tan'dúúca 'áamá
'yáiⁿyāⁿ cuá'áá n'gai tī ní cachiicá
tī ní i'nuúⁿ tī du'u chí cuuvi che'é
tī 'tíica díiⁿ yááⁿ'nguiniūⁿ miiⁿ.

⁹Nguéeé ca'a nī lugar yááⁿ'nguiniúⁿ
'cūū naati 'áamá cūnee nī ndúúcu
chí i'téenu nī. Ní déenu nī chí
'āā daamá nūūⁿ n'geenu yú ngii
tan'dúúca nducyaaca hermanos chí
s'néeⁿ yā na núúⁿ máⁿ íⁿyeⁿdī tī
i'téenu yā Cristo. ¹⁰Ní cuayiivi chí
ch'eenú nī chíi duu'vi tiempo nūūⁿ

tuu'mi ní Ndyuūs díiⁿ yā chí ndeeve
canéeé vida yeⁿe nī. Ní diituú caneeé
nī ndúúcu chí i'téenu nī Ndyuūs. Ní
Ndyuūs ca'á yā fuerzas yeⁿe nī ní
díiⁿ yā chí seguro caneeé nī ndúúcu
chí i'téenu nī. Maaⁿ Ndyuūs miiⁿ ní
teé yā nducueⁿē chí n'dai. Ní maáⁿ
yā yaa'ví yā s'uuúⁿ chí cuuvi yeⁿé
yā s'uuúⁿ cáávā chí véé parte yeⁿe
yú ndúúcu deeve ngii ch'ēete yeⁿé
yā caati s'uuúⁿ ní yeⁿe Cristo s'uuúⁿ.
¹¹Caaⁿmaⁿ yú chí Ndyuūs ní ch'ēete
n'dai yā ní yeⁿé yā véé nducueⁿē
poder chí véé ní cueⁿe daāⁿmaⁿ
cueⁿe daāⁿmaⁿ 'tíicā.

**'Cuinu carta miiⁿ ní yaa'vi
yā 'iiⁿyāⁿ chí n'daí ndís'tiī**

¹²Téé nūūⁿ idinguúⁿ carta 'cūū
yeⁿē ndís'tiī ní hermano Silvano
nginnee sa 'úú. Nadicádiinúúⁿ chí
Silvano miiⁿ ní hermano chí n'dai
taavi. 'Úú teé consejo ndís'tiī chí
seguro caneeé ndís'tiī chí nducueⁿē
chí Ndyuūs itée yā ndís'tiī yeⁿe
vaadi n'dai yeⁿé yā ní yeⁿé nī ti
neⁿé yā ndís'tiī. Maaⁿ ní 'cuēetinée
n'daacā nī ní diituu caneeé nī ní
cuchée nī yeⁿe tanducueⁿē chūū.

¹³Iiⁿyāⁿ yeⁿe yaācū chí caneeé na
yāāⁿ Babilonia chí Ndyuūs didēevé
yā tan'dúúca s'uuúⁿ: N'daí ndís'tiī,
ngaⁿa yā. 'Tiicá ntúūⁿ Marcos
chí tan'dúúca daiyá: N'daí ndís'tiī,
ngaⁿa sa. ¹⁴Ndís'tiī hermanos:
N'daí nī, ngaⁿa nī 'aama nī taama
nī ti neⁿé nī 'aama nī taama nī ti
yeⁿé Cristo ndís'tiī. Ní Ndyuūs tée
yā vaadi 'diiⁿ yeⁿé yā nducyaaca
ndís'tiī chí yeⁿe Cristo. 'Tíicā
cuuvi.

CARTA CUAYIIVI YEⁿE SAN PEDRO

Pedro idinguúⁿ yā carta 'cūū yeⁿe
'iiⁿyāⁿ chi i'téenu yā Cristo

1 'Úú Simón Pedro 'úú ní 'úú
ní apóstol yeⁿe Jesucristo.
Ní candéé nduudu yeⁿe Ndyuūs
ti Ndyuūs dich'óo yā 'úú. Ní 'úú
dichíí'vē Jesucristo. Dinguúⁿ carta
'cūū yeⁿe 'iiⁿyāⁿ chi 'āā i'téenu n'dai
yā Jesucristo tan'dúúcā nú'suu.
'Tíicā diiⁿ Ndyuūs ndúúcū Salvador
chi Jesucristo ti cuaacu yā. ²'Úú
neⁿé chi ndís'tiī cuta'á nī nducueⁿe
vaadi n'dai ndúúcū vaadi 'diiⁿ chi
Ndyuūs téē yā ndís'tiī, ní cáávā
chi deenū n'daacá nī yeⁿe Ndyuūs
chiida yú ndúúcū Jesucristo yeⁿe
yú.

Yeⁿe vida yeⁿe 'iiⁿyāⁿ chi
i'téenu yā Jesucristo

³Ndyuūs cáávā poder yeⁿe yā
'āā tee yā s'uúúⁿ tanducueⁿe caati
cuuvi 'cuēetinéé n'daāca yú ní cuuvi
dich'ēete yú Ndyuūs. Ní 'tíicā cuuvi
diiⁿ yú ti deenu yú Jesucristo chi
ch'ēete maáⁿ yā ní dííⁿ yā vaadi
n'giinu. Ní Jesucristo yaa'ví yā
s'uúúⁿ chi cuuvi yeⁿe yā s'uúúⁿ. ⁴Ní
Cristo 'āā tee yā s'uúúⁿ promesas
chí n'dēevéé n'dai ní ng'ēete ca. Ní
cucáávā promesas miiⁿ ndís'tiī ní

cuuvi cuta'á nī yeⁿe vida ngai chí
yeⁿe Ndyuūs. Ní cuuvi nnguaⁿ'ai
nī yeⁿe nuuⁿndi yeⁿe iⁿ'yeeⁿdí 'cūū,
nuūⁿndi chi maaⁿ cuerpo yeⁿe yú
neⁿe chi diiⁿ yú. ⁵Maaⁿ chi i'téenu
nī Jesucristo candéé nī cuidado chi
n'daacā ca 'cuēetineé nī. Ní taachi
n'daacā ca 'cuēetineé nī tuu'mi ní
ca'cueéⁿ nī caati cuuvi deenu cá
nī. ⁶Ní taachi déénú cá nī tuu'mi
ní ngaⁿ'a ntiíⁿnyuⁿ nī yeⁿe maaⁿ
cuerpo yeⁿe nī. Ní taachi dííⁿ nī
chi ngaⁿ'a ntiíⁿnyuⁿ nī yeⁿe maaⁿ
cuerpo yeⁿe nī tuu'mi ní cuchēe
nī yeⁿe maaⁿ cuerpo yeⁿe nī. Ní
taachi cuchēe nī yeⁿe maaⁿ cuerpo
yeⁿe nī tuu'mi ní dííⁿ nī tan'dúúcā
chi Ndyuūs neⁿé yā chi dííⁿ nī. ⁷Ní
taachi 'āā dííⁿ nī tan'dúúcā chi
Ndyuūs neⁿé yā chi dííⁿ nī tuu'mi
ní dineⁿé nī 'áámá nī taama nī. Ní
taachi dineⁿé nī 'áámá nī taama nī
tuu'mi ní 'áámá dineⁿe nī 'iiⁿyāⁿ.
⁸Ní yeⁿe tanducueⁿe chuū, nduuti
chi ndís'tiī dííⁿ nī ní n'dai n'dai dííⁿ
nī tuu'mi ní cuuvi dííⁿ nī ntiíⁿnyuⁿ
yeⁿe Señor Jesucristo yeⁿe yú. Ní
dichíí'vē nī Señor yeⁿe yú. Ní chuū
diiⁿ chi dichíí'vē chí deenu n'daāca
cá nī Señor Jesucristo yeⁿe yú. ⁹Ní
nduuti chi 'áámá nī nguéé dííⁿ nī
tanducueⁿe chuū tuu'mi ní ndís'tiī

ní tan'dúúcā 'áámá 'iiⁿ'yāⁿ chi ngeenááⁿ 'tiicá nī ti nguéé cuuvi snaaⁿ nī chí yaⁿ'ai. Ní nguéé n'gaacu nī chí nduuvi deeve nī yeⁿ'e nuuⁿ'ndi yeⁿ'e nī chí dííⁿ nī cuááⁿ vmaaaⁿ taachi caama i'téenu nī Jesucristo. ¹⁰Maaⁿ ní ndís'tiī hermanos yeⁿ'é cáávā nducuéⁿ'ē chuū candēe cá nī cuidado chi 'aama canéé n'daaca nī ndúúcu chi i'téenu nī. Ní canee nī seguro chi Ndyuūs yaa'ví yā ndís'tiī chí cuuvi yeⁿ'é yā ndís'tiī. Ní ndeévé yā ndís'tiī. Ní nduuti chí dííⁿ nī dendu'ū chí 'túúcā tuu'mi ní 'āā ntéé de'ē cáávā chí dííⁿ nī nuuⁿ'ndi. ¹¹Ní taachi dííⁿ nī 'túúcā Jesucristo tée yā lugar ndís'tiī chí cuuvi ndaa nī naachi canee Señor Jesucristo chí nadanguaⁿ'ai yā s'uuúⁿ ní naachi cuéⁿ'é daāⁿ'maⁿ ngaⁿ'a ntiíⁿ'nyuⁿ yā yeⁿ'ē.

¹²Ní cáávā chuū 'úú cueⁿ'e daāⁿ'maⁿ idiíⁿ chí ndís'tiī n'gaacu nī yeⁿ'ē tanducuéⁿ'ē chuū 'áará chí deenú n'dai nī yeⁿ'ē. Ní n'geetinéé n'daaca nī ní n'giindivééⁿ n'daaca nī nduudu cuaacu yeⁿ'é Ndyuūs. ¹³'Úú nadacááíinúúⁿ chí n'daāca ca neⁿ'e chí canduuchi cá chí 'tíicā dííⁿ chí ndís'tiī cuuvi nan'gaacu nī yeⁿ'e tanducuéⁿ'ē chuū. ¹⁴Señor Jesucristo yeⁿ'e yú 'āā chíⁿ'í yā 'úú, Pedro, 'tíicā. 'Āā ntéé 'nááⁿ canduuchí ní 'cuúví. ¹⁵'Tiicá ntúūⁿ idiíⁿ chí ndís'tiī n'gaacu nī cuéⁿ'é daāⁿ'maⁿ yeⁿ'e dendu'u 'cūū taachi 'āā n'díí.

**'Iiⁿ'yāⁿ n'diichí yā deeve
ngii yeⁿ'e Cristo**

¹⁶Chííⁿ chí nús'uu ca'cueéⁿ 'nū ndís'tiī yeⁿ'e Señor Jesucristo yeⁿ'e yú chí ndaa ntuúⁿ yā ndúúcu poder

yeⁿ'é yā nguéé yeⁿ'e vaanicadínnūⁿ yeⁿ'e 'iiⁿ'yāⁿ yeⁿ'e iⁿ'yeeⁿ'dí 'cūū. 'Tíicā nús'uu 'āā n'diichí 'nū ndúúcu nduutinaáⁿ maáⁿ 'nū Señor Jesucristo yeⁿ'e yú chí neené ch'εεε. ¹⁷Ní n'diichí 'nū chí Cristo ní neené ch'εεε yā taachi Ndyuūs chiida yú dich'εεé yā Jesucristo ní ca'a yā Cristo chí deévé taavi ngii yā. Caati Ndyuūs chí deeve ngii ca ngaⁿ'á yā yeⁿ'e Cristo ní n'giindivééⁿ 'nū nduudú 'cūū. Chuū caⁿ'a Ndyuūs: Sáⁿ'a 'cūū chí daiyá chí neⁿ'e taaví ní 'úú néené yeenú yeⁿ'ē daiyá. ¹⁸Ní nús'sūū maáⁿ 'nū chí iindivééⁿ 'nū nduudu 'cūū chí chiica yeⁿ'e va'ai cheeti nguuvi taachi cueⁿ'é 'nū ndúúcu Jesucristo na yiicū chí duuchi N'deévé N'dai.

¹⁹Maaⁿ ní cu'téenu cá 'nū chí nduudu cuaacu chí 'iiⁿ'yāⁿ profetas candēe yā tiempo chí 'āā chó'oo ní cuaacu. N'daacā ca chí ndís'tiī i'neeⁿ'veéⁿ nī nduudú 'cūū. Nduudú 'cūū tan'dúúcā 'áámá chideeve chí ngii yaⁿ'ā na 'áámá cuaaⁿ chí maāⁿ. 'Tíicā yeⁿ'ē, ní chideeve ní ngii ndii tiempo chí ndaa nguuvi ní can'daā 'ííⁿ'nyúⁿ chí nguuvi 'yuudi chí nduudu cuaacu ní canee na staava yeⁿ'é nī. ²⁰Neⁿ'é chí ndís'tiī vmnááⁿ vmaaaⁿ nadacadínnūⁿ nī yeⁿ'e chuū. Mar 'áámá nduudu yeⁿ'e libro yeⁿ'é Ndyuūs chí ngaⁿ'ā yeⁿ'e 'áámá dendu'ū chí cuchii ndís'tiī nguéé dámaāⁿ maáⁿ nī cuuvi deenú nī yeⁿ'ē. ²¹Ní nduudu cuaacu chí ngaⁿ'a profetas tiempo chí chó'oo nguéé ngaⁿ'a yā yeⁿ'e chí nadacadínnūⁿ yā maáⁿ yā naati Espíritu N'dai yeⁿ'é Ndyuūs yaa'ví yā profetas nduudu cuaacu chí caⁿ'a yā. Ní nduudu yeⁿ'é yā ngiica yeⁿ'é

Ndyuūs ti 'áámá dífⁿ yā ntiiⁿnyuⁿ yeⁿé Ndyuūs.

Yeⁿé 'iiⁿyāⁿ chi nguéeⁿ ca'cueéⁿ yā nduudu cuaacu yeⁿé Ndyuūs

2 Tiempo chi chó'oo nguaaⁿ 'iiⁿyāⁿ Israel véé 'iiⁿyāⁿ profetas chi nguéeⁿ ngaⁿa yā nduudu cuaacu yeⁿé Ndyuūs. 'Tiicá ntúūⁿ tiempo maaⁿ caⁿa n'dai maestros yeⁿe yaacū nguaaⁿ ndís'tií chi nguéeⁿ caaⁿmáⁿ yā nduudu cuaacu yeⁿé Ndyuūs. Ní candéé n'de'ei yā nduudu chi nguéeⁿ cuaacu chi diiⁿ chi nguéeⁿ i'téenu ní Cristo. Ní 'iiⁿyāⁿ s'eeⁿ caaⁿmáⁿ yā contra yeⁿe Jesucristo chi nadanguáⁿai yā 'iiⁿyāⁿ. Ní chííⁿ chi dífⁿ yā diiⁿ chi 'iiⁿyāⁿ s'eeⁿ niiⁿnuuⁿ niiⁿnuúⁿ nūūⁿ cuiinú maáⁿ yā. ²Áará chi nguéeⁿ 'tíicā chiiⁿ chi ngaⁿa 'iiⁿyāⁿ s'eeⁿ 'yaaⁿ 'iiⁿyāⁿ ní 'caandiveéⁿ yā yeⁿe 'iiⁿyāⁿ s'eeⁿ. Ní dífⁿ yā chi nguéeⁿ n'daacā tan'dúúcā chi diiⁿ 'iiⁿyāⁿ s'eeⁿ. Ní nguéeⁿ n'daacā ngaⁿa 'iiⁿyāⁿ s'eeⁿ yeⁿe yúúni cuaacu chi evangelio chi nduudu ngai yeⁿe Jesucristo. ³Ní 'iiⁿyāⁿ s'eeⁿ ca'cueéⁿ yā nduudu chi ngiica yeⁿe chi maáⁿ yā nadacadíinuⁿ yā ti neⁿé yā tuumí chi ndís'tií ca'á ní 'iiⁿyāⁿ s'eeⁿ. Áā 'naaⁿ tiempo chi Ndyuūs 'āā n'diichí yā nuuⁿndi yeⁿé yā ní 'āā ngaⁿá yā chi 'iiⁿyāⁿ s'eeⁿ 'āā condenado yā.

⁴Deenu yú chi Ndyuūs nguéeⁿ nadich'écú yā yeⁿe ángeles chi dinuuⁿndí yā naati s'neéⁿ yā cuaaⁿ chuva'ai na infierno ní s'neéⁿ yā naachi maafⁿ. Ní dichiichí yā ángeles ndúúcū cadenas. Ní ángeles cūnee yā miiⁿ ndii nguuvi chi Cristo caⁿá yā n'diichi yā nuuⁿndi. ⁵Ní

deenu yú chi Ndyuūs 'āā idi'cuiinú yā iⁿyeⁿdí 'cūū ndúúcū 'iiⁿyāⁿ yeⁿé taachi dífⁿ yā chi chee cúuvi vmnááⁿ iⁿyeⁿdí ndúúcū 'iiⁿyāⁿ chi nguéeⁿ n'daacā idiíⁿ yā. Ndyuūs dámaaⁿ nadinguaⁿai yā saⁿa Noé chi candéé sa nduudu cuaacu yeⁿé Ndyuūs ndúúcū táámá ndeēchē 'iiⁿyāⁿ. Tanaⁿa cá yā ní ch'ií yā. ⁶Tiicá ntúūⁿ Ndyuūs dífⁿ yā condenar 'iiⁿyāⁿ yeⁿe yáāⁿ Sodoma ndúúcū yaāⁿ Gomorra. Ní di'cuiinú yā yáāⁿ s'eeⁿ chi nduuví yāiyāā cáāvā chi dicho'ó yā nguuchi yáⁿā vmaaaⁿ yáāⁿ s'eeⁿ. Ní 'íicú Ndyuūs s'neeⁿ yā ejemplo 'cūū chi 'iiⁿyāⁿ chi cuchii cuayiivi, ní nguéeⁿ n'daacā idiíⁿ yā, cuuvi deenú yā táácā cuuvi chó'oo yeⁿe yā. ⁷Naati Ndyuūs nadanguaⁿai yā yeⁿe yáāⁿ s'eeⁿ saⁿa Lot chi saⁿā n'dai, saⁿā chi ch'leenu sa chii caavā chi diiⁿ 'iiⁿyāⁿ chi nguéeⁿ n'daacā. ⁸Ní Lot miiⁿ chi n'dai sa canéé sá nguaaⁿ 'iiⁿyāⁿ s'eeⁿ. Ní nguuvi nguuvi n'diichi sa ní n'giindiveeⁿ sa nducuéⁿé chi dífⁿ yā chi nguéeⁿ n'daacā. Ní n'geenu sa ngii na staava yeⁿé sa. ⁹Ní nduuti chi Ndyuūs dífⁿ yā 'túúcā tiempo chi 'āā chó'oo 'tiicá ntúūⁿ Ndyuūs deenú yā táácā chi nadanguáⁿai yā 'iiⁿyāⁿ chi i'téenu yā Ndyuūs yeⁿe 'iiⁿyāⁿ chi nguéeⁿ n'daacā idiíⁿ yā chí n'diichineeⁿ yā 'iiⁿyāⁿ yeⁿe yā. 'Tiicá ntúūⁿ Ndyuūs deenú yā táácā ca'á yā testigo 'iiⁿyāⁿ chi nguéeⁿ n'daacā ndí taachi ndaa nguuvi chi n'diichí yā nuuⁿndi yeⁿe nducyaaca 'iiⁿyāⁿ.

¹⁰'Tiicá Ndyuūs ca'a yā castigo 'iiⁿyāⁿ chi dífⁿ yā nuuⁿndi tan'dúúcā chi neⁿe cuerpo yeⁿé yā. Ní nguéeⁿ n'giindiveeⁿ yā nduudu cuaacu

ye^{ne} e 'iivú Ndyuūs. 'Iiⁿ'yāⁿ s'eeⁿ ní nguéeé 'va'á yā chi caaⁿ'maⁿ yā cosas chi nguee ndaacā yeⁿe 'iiⁿ'ntyéⁿ'ē. Ní nguéeé 'va'á yā yeⁿ'ē mar 'áámá. Ní dííⁿ yā nducuéⁿ'ē nuuⁿ'ndi chi neⁿ'e yā. ¹¹Ní ángeles nguéeé 'tíicā yā. 'Áará chi ditiinu cá yā nguéeé ti 'iiⁿ'ntyéⁿ'ē s'eeⁿ ti taachi ndaá yā nanááⁿ Señor Jesucristo yeⁿ'e yú nguéeé cuncnáⁿ ngaⁿ'a ángeles contra yeⁿ'e 'iiⁿ'ntyéⁿ'ē s'eeⁿ. ¹²'Iiⁿ'yāⁿ s'eeⁿ dííⁿ yā tan'dúucā 'yúudu taáⁿ dííⁿ tī ní nguéeé nadacadíinuⁿ tī. 'Tíicā dííⁿ yā. Ní tan'dúucā 'iiti taaⁿ chi 'iiⁿ'yāⁿ n'nuúⁿ yā ní n'giiⁿ'núⁿ yā 'iiti, 'tíicā 'iiⁿ'yāⁿ s'eeⁿ. Ní cuncnáⁿ ngaⁿ'a yā yeⁿ'e dendu'ū chi nguéeé ituumicadíinuⁿ yā. Ní 'cuūví yā tan'dúucā 'áámá 'iiti taaⁿ. ¹³Ní 'iiⁿ'yāⁿ s'eeⁿ ní ch'eenú yā chii caati 'āā dííⁿ yā chi tanáⁿ'a yā ch'eenú yā chii. Maaⁿ ní yeenú yā chi dinuuⁿ'ndí yā tan'dúucā chi neⁿ'e cuerpo yeⁿ'é yā. Ní nduuti chi 'iiⁿ'yāⁿ s'eeⁿ caⁿ'á yā ndúucu nī ní che'é yā ndúucu nī taachi véé 'viicu yeⁿ'e nī tuuⁿ'mi ní nadacadíinuⁿ yā chi nginnche'éeí yā ndís'tii. Ní chuū ni cosa chi cuuvi 'cuinaáⁿ yā yeⁿ'ē.

¹⁴'Iiⁿ'yāⁿ s'eeⁿ taachi n'diichí yā 'áámá n'daataá neⁿ'é yā caⁿ'á yā ndúucū n'daataá miiⁿ. Dámaāⁿ neⁿ'é yā dinuuⁿ'ndi yā ní nginnche'éeí yā 'iiⁿ'yāⁿ chi debil staava yeⁿ'é yā chi dinuuⁿ'ndí yā. 'Iiⁿ'yāⁿ s'eeⁿ deenu n'dai yā na staava yeⁿ'é yā chi neⁿ'é yā dendu'ū chi nguéeé n'daacā. Ní Ndyuūs ngaⁿ'a yā yeⁿ'e yā 'tíicā: De'e chúú cá ya'ai yeⁿ'é yā tī condenado yā. ¹⁵'Iiⁿ'yāⁿ s'eeⁿ diví yā yeⁿ'e yúúni cuaacu yeⁿ'e Ndyuūs ní chiicá yā yúúni chí neⁿ'e maáⁿ yā. Dííⁿ yā tan'dúucā chi dííⁿ profeta Balaam

chi daiya saⁿ'ā Beor. Tiempo chi chó'oo Balaam miiⁿ neⁿ'e sa dííⁿ sa ganar tuumí yeⁿ'e chi nguéeé n'daacā chi dííⁿ sa. ¹⁶Ní taachi cueⁿ'e sa ndúucū burro yeⁿ'e sa, burro yeⁿ'e sa ngaⁿ'á tī ndúucū nduudu yeⁿ'e 'iiⁿ'yāⁿ ní dííⁿ tī reprender saⁿ'ā Balaam miiⁿ yeⁿ'e nuuⁿ'ndi chi dííⁿ sa. Ní 'āā ntéé dííⁿ sa nuuⁿ'ndi miiⁿ tiempo miiⁿ.

¹⁷Ní 'iiⁿ'yāⁿ s'eeⁿ ní tan'dúucā vaacu nuūⁿ'nī díyaai 'tiicá yā. Tan'dúucā meēⁿ chi candéε 'yúúné taaⁿ 'tiicá yā. 'Iiⁿ'yāⁿ s'eeⁿ ní condenado yā ní caⁿ'á yā cho'ó yā naachi diituu n'dái maaⁿ'n. Ní miiⁿ canee yā cueⁿ'e daāⁿ'maⁿ. ¹⁸'Iiⁿ'yāⁿ s'eeⁿ ní ngaⁿ'a yā nduudu n'geete chi nguéeé dichí'vē. Ní ndúucū vicio yeⁿ'e yā, ndúucū nducuéⁿ'ē nuuⁿ'ndi chi neⁿ'e cuerpo yeⁿ'e yā, 'iiⁿ'yāⁿ s'eeⁿ ní neⁿ'e yā dííⁿ yā chi tanáⁿ'ā 'iiⁿ'yāⁿ chi 'āā nduuvideεv yā ní 'āā ntéé caⁿ'á yā ndúucū 'iiⁿ'yāⁿ chi dinuuⁿ'ndi yā ní tanáⁿ'a yā neⁿ'é yā nanguεεcúndii ntuúⁿ yā ní dinuuⁿ'ndi yā taama vmnéⁿ'ēe. ¹⁹'Iiⁿ'yāⁿ s'eeⁿ chi nginnche'éeí yā 'iiⁿ'yāⁿ ngaⁿ'á yā chi ca'á yā 'iiⁿ'yāⁿ s'eeⁿ chi libre yā. 'Iiⁿ'yāⁿ s'eeⁿ maáⁿ yā ní canéé yā prisioneros yeⁿ'e nuuⁿ'ndi chi dííⁿ yā. Ní ca'áámá ca'aama 'iiⁿ'yāⁿ chi nguéeé libre yā ní canéé yā maaⁿ poder nuuⁿ'ndi ní nguéeé cuuvi cucheε yā yeⁿ'ē. ²⁰Ní 'iiⁿ'yāⁿ chi i'téenu yā Señor Jesucristo yeⁿ'e yú ní yeⁿ'é yā, ní Cristo 'āā nadanguáⁿ'ai yā 'iiⁿ'yāⁿ yeⁿ'e nducuéⁿ'ē chi nguéeé n'daacā yeⁿ'e iⁿ'yeeⁿ'dí 'cūū. Ní cuayiivi miiⁿ nduuti chi 'iiⁿ'yāⁿ nanguεεcunée yā taama vmnéⁿ'ēe ní dííⁿ yā dendu'ū nuuⁿ'ndi chi yeⁿ'e iⁿ'yeeⁿ'dí

'cūū tuu'mi ní cunnáā ca canee yā nguéé ti tiempo chi 'āā cuéé i'téenu yā Jesucristo. ²¹N'dáácā ca chi 'iiⁿyāⁿ s'eeⁿ nguéé n'diichí yā yúúni cuaacu yeⁿé Ndyuūs ti taachi 'āā n'diichí yā yúúni cuaacu tuu'mi ní ndaācādaamí yā yeⁿe ley yeⁿé Ndyuūs chi Ndyuūs ca'a yā 'iiⁿyāⁿ s'eeⁿ. ²²Ní cho'oo yeⁿe 'iiⁿyāⁿ s'eeⁿ tan'dúúca chi ngaⁿa 'áámá nduudu cuaacu 'tíicā: 'Yaānā nguεεcunée ti che'e ti chí ndaāchi tī ní cuuchí chi 'iiⁿyāⁿ naaⁿnú yā chi dεεve tī ní nguεεcunée ti ngeⁿe tī nguεεcundāa tī nguaaⁿ nuūⁿnīⁿ ncheētí.

Jesucristo ndaá yā taama vmnéⁿēe

3 Ndís'tiī hermanos yeⁿé chi neⁿe taaví, carta 'cūū ní ndii chíí ndii 'úúví chi idinguúⁿ yeⁿe nī. Ní na 'uuví carta chi idinguúⁿ yeⁿe ndís'tiī, neⁿé dííⁿ chi nadacadíínuuⁿ nī yeⁿe nducuéⁿēe chi dεεv' n'dai. Ní teé consejo ndís'tiī chi n'gaacú nī yeⁿe nducuéⁿēe chi idinguúⁿ. ²Neⁿé chi n'gaacu nī yeⁿe tiempo chi chó'oo yeⁿe profetas chi dεεve ní ngaⁿa yā nduudu cuaacu. Ní n'gaacú nī yeⁿe tiempo maaⁿ yeⁿe mandamiento yeⁿe Señor chi nadanguáⁿai yā s'uuúⁿ. Mandamiento yeⁿé yā ní apóstoles chi'cueeⁿ yā ndís'tiī.

³Ní vmnááⁿ vmnaaⁿ nadacadíínuuⁿ nī yeⁿe chuū chí nguuvi s'eeⁿ chi 'cuiinū iⁿyeⁿéⁿdí 'cūū. Véé 'iiⁿyāⁿ chi duuchinéeⁿ yā yeⁿe nducuéⁿēe chi yeⁿé Ndyuūs. Ní 'iiⁿyāⁿ s'eeⁿ dííⁿ yā nuuⁿndi tan'duucā chi maáⁿ yā neⁿe yā. ⁴Ní ngaⁿá yā: ¿Tíí cánéé promesa chi ngaⁿa chi Cristo canéé chi ndaa yā táámá vmnéⁿēe? Ndii

tiempo chi 'āā chó'oo taachi ch'iī 'iiⁿyāⁿ yeⁿe ndaata yeⁿe yú. 'Āā daamá nuuⁿ canéé tanducuéⁿēe ndíí taachi Ndyuūs din'dái yā iⁿyeⁿéⁿdí. ⁵Iiⁿyāⁿ chi ngaⁿá yā 'tíicā nguéé neⁿe yā dííⁿ yā cuenta yeⁿe tiempo chi 'naaⁿ tiempo chi chó'oo. Tiempo miiⁿ Ndyuūs ngaⁿá yā ní ndúúcu nduudu yeⁿé yā din'dái yā nánguuvi ndúúcu iⁿyeⁿéⁿdí 'cūū. Ní iⁿyeⁿéⁿdí 'cūū can'daā ná nuūⁿnīⁿ. Ní iⁿyeⁿéⁿdí 'cūū canee na lugar yeⁿé cáávā nduudu yeⁿé Ndyuūs. ⁶Ní iⁿyeⁿéⁿdí yeⁿe tiempo chi chó'oo ní chiituú nuūⁿnīⁿ ní ndai naāⁿ yeⁿé cáávā chi cheeⁿ taaⁿ cúúví. ⁷Ní nanguuvi ndúúcu yáⁿāa chi véé maaⁿ Ndyuūs ca'á yā orden yeⁿé chi canéé chí candéé yā cuidado yeⁿé ndii tiempo chi cuucu ndúúcu yaⁿā. Ní taachi ngiichi yáⁿāa miiⁿ tuu'mi ní Ndyuūs n'diichí yā nuuⁿndi yeⁿé 'iiⁿyāⁿ. Ní Ndyuūs dííⁿ yā chi 'cuiinū 'iiⁿyāⁿ chi nguéé n'daacā.

⁸Maaⁿ ní ndís'tiī hermanos yeⁿé chi neⁿé taavi, nguéé cuuvi naáⁿ nī chi nanááⁿ Ndyuūs 'áámá nguuvi ní tan'dúúca chi 'áámá mil nduūyū ní 'áámá mil nduūyū ní tan'dúúca chi 'áámá nguuvi. 'Tíicā canéé nanááⁿ Ndyuūs. ⁹Ní Señor Jesucristo yeⁿé yú nguéé cuuvi 'naa yā yeⁿe chi ngaⁿa yā chi diiⁿ yā tan'dúúca chi nadacadíínuuⁿ tanáⁿā saⁿā. Naati Ndyuūs ni véé paciencia yeⁿe yā ndúúcu s'uuúⁿ caati nguéé neⁿé yā chi 'aama yú cuuvi ndai yú ti neⁿé yā chi nducyaaca s'uuúⁿ ni ndaacadaami yú yeⁿé nuuⁿndi yeⁿe yú.

¹⁰Ní nguuvi chi ndaa Señor Jesucristo taama vmnéⁿēe, nguuvi miiⁿ ndaa tan'dúúca chi 'ááma

duucu chi indáá n'gaaⁿ. Ní nguéeé canéeé ngiinu yú ye^{ní}ē nguuvi 'cūū taachi Ndyuūs nadi'tuūví yā nanguuvi yuudu n'dái 'cuēecú. Ní tanducué^{ní}ē chi véé nanguuvi ní cuūcū ní 'cuiinū ndúúcū ngiichi ya^{ní}ā chi 'ii^{ní}nuⁿ taaⁿ. Ní yá^{ní}āa ntúūⁿ va ndúúcū tanducué^{ní}ē dendu'ū ní cuūcū.

¹¹Deenu yú chi tanducué^{ní}ē dendu'ū chí 'túúcā 'cuiinu tuví. Ní źtáácā cuuvi 'cuēetinée ní? Nds'tií canee chi ca'á nī núúⁿmaⁿ staava ye^{ní}ē nī na ta'a Ndyuūs ní dich'ēetē nī Ndyuūs. Ní 'cuēetineé nī dámaāⁿ tan'dúúcā chi Ndyuūs ne^{ní}ē yā.

¹²Tíicā 'cuēetineé nī 'naaⁿ chi canee ngiinu yú ndii nguuvi chi ndaā Señor Jesucristo taama vmné^{ní}ē. Ní diiⁿ yú nducué^{ní}ē ntiin'nyuⁿ ye^{ní}ē Señor caati niiⁿnuúⁿ niiⁿnuuⁿ cuuvi ndaa yā. Nguuvi chi ndaa yā nánguuvi ní cuūcū ní 'cuiinu ndúúcū tanducué^{ní}ē chi véé ye^{ní}ē. Ní 'cuiinu ntuvíí cáávā nguuchi ya^{ní}ā.

¹³Naati s'uuúⁿ ní canéeé ngiinu yú chi snaaⁿ yú 'áámá nanguuvi chí ngai ndúúcū 'áámá i^{ní}yeē^{ní}dí chí ngai naachi véé dámaāⁿ nducué^{ní}ē chi cuaacu ní nducué^{ní}ē ní n'daacā n'dai. 'Tíicā Ndyuūs nga^{ní}á yā chi tée yā s'uuúⁿ.

¹⁴Ní cáávā chuū ndís'tií hermanos chi ne^{ní}é taavi, 'naaⁿ tiempo chi cunee ngiinú nī dendu'ú 'cūū candee cá nī cuidado chi 'diiⁿ 'diiⁿ 'cuēetineé nī ní nguéeé dinuuⁿndí nī. Ní 'tíicā nguéeé véé culpa ye^{ní}ē nī nanááⁿ Ndyuūs taachi Cristo

ndaa yā. ¹⁵Diíⁿ nī cuenta chi Señor Jesucristo ye^{ní}ē yú ndúúcū ngiinū n'dái diíⁿ yā ndúúcū yú caati ne^{ní}ē yā chi nangua^{ní}ai yú. 'Tiicá ntúūⁿ Pablo, hermano ye^{ní}ē yú chi neené ne^{ní}ē yú, 'āā dinguúⁿ yā ye^{ní}ē ndís'tií 'áámá carta ndúúcū vaadi deenu chi Ndyuūs nca'á yā Pablo miiⁿ. ¹⁶Ní Pablo miiⁿ nga^{ní}á yā ye^{ní}ē nducué^{ní}ē 'cūū ndúúcū vaadi deenu ye^{ní}ē Ndyuūs na nducyáácá carta chí dinguúⁿ yā. Ní na^{ní}a carta ye^{ní}ē yā duū'vi dendú'ū ní ng'í^{ní} n'dái chí cuuvi déenu yú. Ní 'ii^{ní}yāⁿ chi nguéeé deenu yā ndúúcū 'ii^{ní}yāⁿ chí duu'vi i'téenu yā nguéeé nga^{ní}á yā nduudu cuaacu ye^{ní}ē dendu'ū chí ngii ní ye^{ní}ē 'tēē chí canéeé nguūⁿ. Ní caavā chí nga^{ní}á yā chí nguéeé cuaacu ní diíⁿ yā chí canéeé chí ntuuví maáⁿ yā.

¹⁷Naati ndís'tií hermanos ye^{ní}ē chí ne^{ní}é taavi, 'āā deenú nī dendu'ú 'cūū. Cundée nī cuidado chí nguéeé 'caandiveé^{ní} nī nduudu ye^{ní}ē 'ii^{ní}yāⁿ chí nguéeé diíⁿ yā chí nga^{ní}a ley ye^{ní}ē Ndyuūs ii^{ní}yāⁿ chí candee yā ndís'tií lado ye^{ní}ē yā ti ndís'tií nguéeé 'cuēetinée n'daacā ndúúcū chí i'téenu nī.

¹⁸Maaⁿ ní ndís'tií cu'téenu cá nī Señor Jesucristo ye^{ní}ē yú chí nadanguá^{ní}ai yā s'uuúⁿ. Ní itée yā s'uuúⁿ nducué^{ní}ē chí n'dai taavi ye^{ní}ē yā ndúúcū vaadi deenu ye^{ní}ē yā. Nga^{ní}a yú chí Jesucristo miiⁿ ní ch'ēete cá yā maaⁿ ndúúcū nguuvi chí cúchií ní cue^{ní}ē daāⁿmaⁿ. 'Tíicā cuuvi.

CARTA VMNÁÁⁿ VMNAAⁿ YEⁿ'E SAN JUAN

Nduudu cuaacu yeⁿ'e
vida cueⁿ'e daāⁿmaⁿ

1 Chiiⁿ chí ndii vmnaaⁿ, chiiⁿ chí ch'iindiveéⁿ 'nū, chiiⁿ chí n'diichí 'nū ndúúcu nduutináaⁿ 'nū, chiiⁿ chí n'gíínú 'nū, níícú chiiⁿ chí tuu'vi 'nū ndúúcu ta'á 'nū chiiⁿ ní Nduudu yeⁿ'ē vida cueⁿ'e daāⁿmaⁿ. ²Ch'iⁿ'i yā ní naáⁿ 'nū chiiⁿ chí vida cueⁿ'e daāⁿmaⁿ. Níícú n'diichí 'nū ní caaⁿmaⁿ cuaacu 'nū, ní yaa'vi 'nū yeⁿ'ē vida cueⁿ'e daāⁿmaⁿ chí canéé ndúúcu chiidá yā. Ní chiidá yā ch'iⁿ'i yā nús'uu vida cueⁿ'e daāⁿmaⁿ miiⁿ. ³Chiiⁿ chí n'diichí 'nū ní ch'iindiveéⁿ 'nū, chííⁿ chí ngaⁿ'á 'nū yeⁿ'e vida caati ndis'tíi ní canee cúú'miⁿ ní chí nduuvidaama ní ndúúcu nús'uu. Níícú cuaacu nííⁿnyúⁿ nduuvidaama yú ndúúcu chiida yú ní ndúúcu daiya yā Jesucristo. ⁴Cosa chuu ní dingúⁿ 'nū yeⁿ'é ndis'tíi caati vaadi yeenú yeⁿ'é ní cuuvi cuaacu cá.

Dendyuūs ní dæeve ngii

⁵Chuū ní nduudu chí ch'iindiveéⁿ 'nū yeⁿ'é yā. Chííⁿ chí ngaⁿ'a 'nū chí Dendyuūs ní chidæeve. Níícú mar 'áámá maāiⁿ nguéé ndúúcu

yā. ⁶Ndúúti chí s'uuúⁿ ngaⁿ'ā yú chí ndiidaama yú ndúúcu yā níícú na maaiⁿ cachiica yú tuu'mí nduudu yaadi ngaⁿ'ā yú, níícú nguéé idiiⁿ yú chí ngaⁿ'a nduudu cuaacu. ⁷Nduuti chí cachiica yú na chidæeve tan'dúúcā chí Jesucristo canéé yā na chidæeve tuu'mi ní nduuvidaama yú 'aama yú ndúúcu taama yú. Yuuúⁿ yeⁿ'e Jesucristo daiya Dendyuūs inaaⁿnu yā s'uuúⁿ yeⁿ'ē tanducuéⁿ'ē nuuⁿndi yeⁿ'e yú. ⁸Nduuti chí ngaⁿ'ā yú chí nguéé nuuⁿndi yú maāⁿ yú nginnche'ei yú s'uuúⁿ ní nguéé canee nduudu cuaacu ndúúcu yú. ⁹Nduuti chí natúmiiⁿnu yú nuuⁿndi yeⁿ'ē yú tuu'mí Jesucristo miiⁿ ní n'daí yā ní diíⁿ yā dácaā chí caaⁿmáⁿ yā ní nguéé n'daáⁿ yā caati nadach'æecú yā nuuⁿndi yeⁿ'ē yú. Níícú naaⁿnú yā s'uuúⁿ yeⁿ'é tanducuéⁿ'ē nuuⁿndi yeⁿ'e yú. ¹⁰Nduuti chí ngaⁿ'ā yú chí nguéé nuuⁿndi yú tuu'mi ní idiiⁿ yú chí Jesucristo ngaⁿ'a yā nduudu yaadi, níícú nduudu yeⁿ'é yā nguéé canéé ndúúcu yú.

Cristo ní caaⁿmáⁿ yā lado yeⁿ'e yú

2 Ndís'tíi daiya n'gaiyáá, chuū dingúⁿ yeⁿ'e ndís'tíi caati

nguée idííⁿ nī nuuⁿndi. Níícú nduuti chi 'áámá yā dííⁿ yā nuuⁿndi véé táámá yā chi Jesucristo chi neené n'dai chi caaⁿmaⁿ yā yeⁿe yú ndúúcu Ndyuūs chiida yú. ²Níícú Jesucristo ca'á maáⁿ yā vida yeⁿe maaⁿ yā ní ch'ií yā cucáávā nuuⁿndi yeⁿe yú. 'Iicu nguée dámaaⁿ yeⁿe s'uuúⁿ naati cucáávā nuuⁿndi yeⁿe 'iiⁿyāⁿ yeⁿe núúⁿmaⁿ iⁿ'yeeⁿdí.

³Chuū chi deenu nús'uū chí n'diichí 'nū 'yā ndúúti chi dííⁿ 'nū tan'dúúca chí ngaⁿa ley yeⁿé yā. ⁴Du'ū chí ngaⁿa chí n'diichí yā 'iiⁿyāⁿ ní nguée dííⁿ yā tan'dúúca chí ngaⁿa ley yeⁿé yā tuu'mi ní nduudu yaadi chí ngaⁿa yā. Níícú nguée cánée nduudu cuaacu ndúúcu yā. ⁵Du'ū chí n'giindiveeⁿ nduudu yeⁿe yā cuaacu níⁿnyúⁿ cánée n'dai vaadi neⁿe yeⁿe Dendyuūs ndúúcu yā. Chiiⁿ chí deenu yú chí canee yú nduucú yā. ⁶Du'ū chí ngaⁿa chí canee nduucú yā, cánée chí cuchíicá tan'dúúca chí cáchiicá yā.

Ley chí ngai

⁷Ndís'tií vi'í, nguée dinguúⁿ mar 'áámá ley chí ngai, tii ley ndiicúú chí 'āā canee ndíí cuaaⁿ vmnaaⁿ, ley ndiicúú ní ndúúdu chí ch'iindiveeⁿ nī ndíí cuaaⁿ vmnaaⁿ. ⁸Dinguúⁿ táámá vmnéⁿee ley ngai yeⁿé ndís'tií chí cuaacu chí nduucú yā ní nduucú nī. Caati maáíⁿ mííⁿ 'āā cho'ōo níícú chideeve mííⁿ ní cuaacu ní ngiichi.

⁹Du'ū chí ngaⁿa chí cachiica na chideeve ní nguée ngíí n'diichi vi'í, tuu'mi ní 'iiⁿyāⁿ miiⁿ cáchiica núúⁿ yā na maáíⁿ ndíí maaⁿ. ¹⁰Du'ū chí neⁿe vi'í cánée ná chideeve ní nguée idíí yā chí cundee ca'a yā

yeⁿe taamá yā. ¹¹Naati du'ū chí nguée ngii n'diichí yā vi'í cánée ná maáíⁿ níícú cachiica ná maáíⁿ, ní nguée deenú yā tíí cuaaⁿ cachiicá yā caati chí maáíⁿ miiⁿ ní nguée dííⁿ chí inaaⁿ yā.

¹²Dinguúⁿ yeⁿe ndís'tií daiya n'gaiyáa, caati nuuⁿndi yeⁿé nī ních'eeu caávā chí dúúchí Jesucristo. ¹³Dinguúⁿ yeⁿe ndís'tií chíida s'éeⁿ caati 'āā n'diichí nī 'iiⁿyāⁿ ndii cuááⁿ vmnaaⁿ. Dinguúⁿ yeⁿe ndís'tií saⁿā ngaiyáa caati cucheé nī ndúúcu chí nguée n'daacā. Dinguúⁿ yeⁿe ndís'tií daiya n'gaiyáa caati 'āā n'diichí nī chíida yú. ¹⁴Úú dinguúⁿ yeⁿe ndís'tií chíida s'éeⁿ caati 'āā n'diichí nī 'iiⁿyāⁿ chí canee ndíí cuaaⁿ vmnaaⁿ. Dinguúⁿ yeⁿe ndís'tií saⁿā ngaiyáa caati ditiinú nī. Níícú nduudu yeⁿe Dendyuūs chí cánée nduucú nī níícú cucheé nī ndúúcu chí nguée n'daacā.

¹⁵Nguée dinéⁿe nī iⁿ'yeeⁿdí ndíí nguée dendu'ū chí véé na iⁿ'yeeⁿdí. Du'ū chí dineⁿe iⁿ'yeeⁿdí vaadi neⁿe yeⁿe Dendyuūs nguée canée nduucú yā. ¹⁶Caati tánducueⁿe chí véé na iⁿ'yeeⁿdí chí neⁿe cuerpo yeⁿe yú ndúúcu chí neⁿe nduutináaⁿ yú, níícú vaadi inguee yeⁿe vida yeⁿe iⁿ'yeeⁿdí ní nguée yeⁿe chíida yú, tii ní yeⁿe iⁿ'yeeⁿdí. ¹⁷Iⁿ'yeeⁿdí nínch'ōo ndúúcu taanduvée yeⁿe ndúúcu vaadi neⁿe chí nguée n'daacā. Naati du'ū 'iiⁿyāⁿ chí dííⁿ yā chí neⁿe Dendyuūs, 'iiⁿyāⁿ miiⁿ cunee yā cueⁿe daāⁿmaⁿ.

Yeⁿe nduudu cuaacu ní yeⁿe nduudu yaadi

¹⁸Ndís'tií daiya n'gaiyáa, 'āā chéé 'cuiinu hora tan'dúúca chí ndís'tií

ch'iindiveéⁿ nī yeⁿe chí anticristo miiⁿ ní ndaa yā. 'Tiicá ntúūⁿ chí caama véé chí n'dee n'dái 'iiⁿyāⁿ ní ngaⁿá yā chí anticristo yā. Tii ní cucáāvā chí s'uuúⁿ deenu yú chí 'āā chéé 'cuiinu hora. ¹⁹'Iiⁿyāⁿ s'eeⁿ can'dáa yā yeⁿe yú naati nguéé yeⁿe yú yā. Nduuti chí yeⁿe yú 'áámá canée yā nduucū yú naati can'dáa yā ní cueⁿé yā. Ní chííⁿ ní cuuⁿmíⁿ chí iiⁿyāⁿ s'eeⁿ ní nguéé yeⁿe yú yā.

²⁰Naati ndís'tií ní véé yeⁿé nī chí ca'ā Espíritu N'dai yeⁿé Ndyuūs. Ní ndís'tií nin'diichí nī tanducueⁿē dendu'ū. ²¹Nguéé idinguúⁿ yeⁿe ndís'tií tan'dúuca chí nguéé deenú nī nduudu cuaacu, ti idinguúⁿ tan'dúucā chí 'āā deenú nī ti nguéé véé ndii 'áámá nduudu yaadi chí yeⁿe nduudu cuaacu.

²²¿Du'ū chí yaadi mííⁿ? 'Iiⁿyāⁿ chí ngaⁿá yā chí nguéé Jesús chí Cristo ní yaadi yā. 'Iiⁿyāⁿ s'eeⁿ chí anticristo chí caaⁿmáⁿ yā chí nguéé i'téenu yā Dendyuūs chiida yú ndúucū daiyá yā. ²³Du'ū chí nguéé i'téenu yā daiyá yā ní nguéé canée yā ndúucū chiidá yā. Du'ū chí i'téenu yā daiyá yā canée yā ndúucū chiidá yā.

²⁴Tuu'mi ní chííⁿ chí ch'iindiveéⁿ nī ndíí vmnaaⁿ 'tíicā canee cúuⁿmíⁿ chí canée ndúucū ndís'tií. 'Tiicá ntúūⁿ ndís'tií ní yeⁿe daiyá yā ní yeⁿe chiida yú cueⁿe daāⁿmaⁿ.

²⁵Chuū compromiso chí dííⁿ yā ndúucū nús'uu chí cunee yú ndúucū vida cueⁿe daāⁿmaⁿ.

²⁶Dinguúⁿ chuū yeⁿe ndís'tií chí yeⁿé 'iiⁿyāⁿ chí nginnche'éei yā ndís'tií. ²⁷Naati chííⁿ chí yeⁿe Espíritu N'dai yeⁿé Ndyuūs chí

ndís'tií sta'á nī yeⁿé yā, chuū canée ndúucū ndís'tií. Nguéé canee cúuⁿmíⁿ chí du'ū veé iiⁿyāⁿ cal'cueeⁿ yā ndís'tií, naati Espíritu N'dai yeⁿé Ndyuūs maáⁿ yā ngi'cuéeⁿ yā ndís'tií nducueⁿē dendu'ū. 'Tíicā chuū ní nduudu cuaacu, nguéé nduudu yaadi. Tan'dúucā chí chí'cueeⁿ yā ndís'tií, 'túucā canée diitú nī ndúucū nduudu miiⁿ.

²⁸Maaⁿ ndís'tií daiya n'gaiyáa, cunee nī chí yeⁿé nī caatí taachi Cristo ndaa yā véé nduudu yeⁿe yú nduucú yā. Ní nguéé 'cuiináⁿ yú nanáaⁿ yā taachi ndaa yā. ²⁹Ndúuti chí ndís'tií déenu nī chí Cristo miiⁿ ní n'dai yā, 'tíicā ntúūⁿ deenu ndís'tií chí du'ū chí diiⁿ chí n'daacā ch'iindiyáāⁿ táamá yeⁿé yā.

'Iiⁿyāⁿ s'eeⁿ chí daiyá Dendyuūs

3 Cun'díichí ndís'tií vaadi néⁿe chí tee chiida yú s'uuúⁿ chí yaa'vi yā s'uuúⁿ chí daiyá Dendyuūs s'uuúⁿ. Cáāvā chuū chí iⁿyéeⁿdí nguéé in'diichi s'uuúⁿ caati nguéé in'diichi Cristo. ²Ndís'tií chí neⁿe taaví, maaⁿ ní daiya Dendyuūs s'uuúⁿ. Ní nguéé ngii yā s'uuúⁿ táácā chí cūnee yú. Caati deenu yú taachi ndaa yā 'iiⁿyāⁿ miiⁿ ní tan'dúuca yā 'tíicā ntúūⁿ s'uuúⁿ, caati n'diichi yú 'iiⁿyāⁿ taacá yā. ³Du'ū chí canee ngíínú yā chuū ní nadεévé yā tan'dúucā chí Ndyuūs miiⁿ ní dεévé yā.

⁴Du'ū chí idiiⁿ nuuⁿndi nguéé dííⁿ yā tanducueⁿē chí ngaⁿa ley. Níicú nuuⁿndi ní chíiⁿ chí nguéé diiⁿ yā chí ngaⁿa ley. ⁵Ndís'tií déenu nī chí Dendyuūs ní ndaa yā chí divíi yā nuuⁿndi yeⁿe yú. Níicú nguéé véé nuuⁿndi yeⁿé yā. ⁶Du'ū chí

yeⁿé yā nguéé idiiⁿ nuuⁿndi. Du'ū chi idiiⁿ nuuⁿndi nguéé n'diichí yā 'iiⁿyāⁿ. ⁷Ndís'tií daiya n'gaiyáa nguéé canche'etí nī mar 'áámá 'iiⁿyāⁿ. Du'ū chi idiiⁿ dendu'ū chí n'daacā tuu'mi ní n'dai tan'dúucā 'iiⁿyāⁿ miiⁿ ní n'daí yā. ⁸Du'ū chi idiiⁿ nuuⁿndi ní yeⁿe yáá'n'guinūⁿ caati yáá'n'guinūⁿ diiⁿ nuuⁿndi sa ndii vmnaaⁿ. Cáávā chuū ndaá daiya Dendyuūs cucáávā chí nadituuví yā chí diiⁿ yáá'n'guinūⁿ.

⁹Du'ū chí ch'iindiyáaⁿ yā taama vmnéⁿēe ní yeⁿe Dendyuūs ní nguéé idiiⁿ yā nuuⁿndi caati ndaata yeⁿé Ndyuūs canéé ndúucu yā. Ní nguéé ngii dííⁿ yā nuuⁿndi caati ch'iindiyáaⁿ yā taama vmnéⁿēe ní yeⁿé Dendyuūs. ¹⁰Níicú chuū chí n'giⁿi cheε chí daiya Dendyuūs. Níicú n'giⁿi cheε chí daiya yáá'n'guinūⁿ. Du'ū chí nguéé idiiⁿ n'daacā ní nguéé neⁿe vi'í, ní nguéé yeⁿe Dendyuūs.

Dineⁿe yú 'aama yú taama yú

¹¹Chuū ní nduudu cuaacu yeⁿé Ndyuūs chí ndís'tií ch'iindiveéⁿ nī ndii vmnaaⁿ, chí dineⁿe yú 'aama yú ndúucū taama yú. ¹²Nguéé tan'dúucā saⁿá Caín chí yeⁿé yáá'n'guinūⁿ. Saⁿá ch'iiⁿnuⁿ sá 'diinū sa. ¿Íicú dēē cáávā chí ch'iiⁿnuⁿ sá 'diinū sa? 'Tíicā diiⁿ sa caati chííⁿ chí maaⁿ sa diiⁿ sa ní nguéé n'daacā. Níicú chíiⁿ chí diiⁿ 'diinū sa ní n'daacā.

¹³Ndís'tií vi'í, 'áá nguéé n'diichí nī chí 'iiⁿyāⁿ yeⁿe íⁿyeeⁿdí nguéé neⁿé yā ndís'tií. ¹⁴Āā cho'ō yú vaadi n'gii ní 'āā n'g'eetinéⁿ yú ndúucū vida cueⁿe daāⁿmaⁿ. S'uuúⁿ déenu yú ti neⁿe yú vi'í yú. Du'ū chí nguéé

neⁿe vi'í, 'iiⁿyāⁿ miiⁿ cánéé vaadi n'gii ndúucu yā. ¹⁵Du'ū chí nguéé n'diichí vi'í 'caaⁿnúⁿ yā 'iiⁿyāⁿ. Níicú deenu yú chí 'iiⁿyāⁿ chí n'giiⁿnuⁿ 'iiⁿyāⁿ nguéé canéé vida cueⁿe daāⁿmaⁿ ndúucu yā. ¹⁶Ní ndúucū chuū n'diichí yú vaadi néⁿe, caati ch'ii Jesús cáávā s'uuúⁿ. 'Tiicā ntúūⁿ s'uuúⁿ canee chí 'cuūvi yú lado yeⁿé vi'í yú. ¹⁷Naati du'ū chí véé yeⁿé tanducuéⁿé chí véé yeⁿe iⁿyeeⁿdí 'cūū níicú naáⁿ yā vi'í yā chí nguéé yeⁿé yā, ní nguéé neⁿe yā ca'á yā 'iiⁿyāⁿ, ¿táácā cūnee vaadi neⁿe yeⁿe Dendyuūs nduucú yā? ¹⁸Ndís'tií daiya n'gaiyáa, nguéé dineⁿe yú ndúucū nduudu yeⁿe yú ndúucū chí caaⁿmaⁿ yú naati ndúucū ntiiⁿnyuⁿ chí diiⁿ yú ndúucū vaadi cuaacu.

Véé confianza yeⁿe yú nanááⁿ Ndyuūs

¹⁹Ndúucū chuū ní deenu yú chí vaadi cuaacu ní ndúucu yú. Níicú staava yeⁿe yú seguro canéé nanááⁿ yā. ²⁰Ndúuti chí staava yeⁿe yú caaⁿmaⁿ nuuⁿndi yeⁿe yú, ch'εete cá Dendyuūs nguéé ti staava yeⁿe yú. Níicú déenu yā nducuéⁿé dendu'ū. ²¹Ndís'tií chí neⁿé, ndúuti chí staava yeⁿe yú nguéé caaⁿmaⁿ nuuⁿndi yeⁿe yú tuu'mi ní véé confianza yeⁿe yú ndúucū Dendyuūs. ²²Nducuéⁿé chí caaca yú Ndyuūs, itée yā yeⁿe yú caati diiⁿ yú chí ngaⁿa ley yeⁿé yā níicú idiiⁿ yú cosa chí n'daacā nanááⁿ yā. ²³Chúú chí ley yeⁿé yā, chí i'teenu yú chí duuchi daiyá yā Jesucristo, ní dineⁿé yú 'aama yú ndúucū taama yú, tan'dúucā chí ngaⁿá yā nduucú yú. ²⁴Du'ū chí diiⁿ

chi ngaⁿa ley yeⁿé yā canéé ndúúcū Ndyuūs, nícu Dendyuūs canee yā ndúúcū. Ní chuū chi deenu yú chi 'áámá cūnéé yā ndúúcu yú cáávā Espírítu N'dai yeⁿé yā chi tee yā s'uuúⁿ.

Yeⁿe Espírítu N'dai yeⁿé Ndyuūs ní yeⁿe espírítu chi contra yeⁿe Cristo

4 Ndís'tií chi neⁿé, nguéé cu'téenu nī tanducuéⁿē espírítu naati n'díichineeⁿ nī tanducuéⁿē espírítu cheé chi yeⁿe Dendyuūs caati nééné 'yaaⁿ 'iiⁿyāⁿ nguéé ngaⁿa yā nduudu cuaacu yeⁿe Dendyuūs. ²Caati 'tíicā ní cuuvi deenú nī Espírítu chi yeⁿe Dendyuūs 'yā. Tanducuéⁿē espírítu chí ntúmiⁿnuⁿ chi Jesucristo ní ndaá yā iⁿ'yeeⁿdí 'cūū ní yeⁿe Dendyuūs. ³Niicu tanducuéⁿē espírítu chi nguéé ntúmiⁿnuⁿ chí Jesucristo ní ndaá yā iⁿ'yeeⁿdí tan'dúúcā s'uuúⁿ nguéé yeⁿe Dendyuūs 'yā. Chíⁿ chí espírítu yeⁿē anticristo. 'Āā ch'iindiveéⁿ nī yeⁿē espírítu yeⁿe anticristo chí cánéé chí ndaa ni maaⁿ 'āā canéé iⁿ'yeeⁿdí 'cūū.

⁴Ndís'tií ní daiyá yeⁿe Dendyuūs ndís'tií. Níicú 'āā chicheé nī yeⁿe espírítu chí canéé iⁿ'yeeⁿdí 'cūū chí espírítu yeⁿe anticristo caati 'iiⁿyāⁿ chí canéé ndúúcu nī ch'εεtε cá yā nguéé ti espírítu chí canéé iⁿ'yeeⁿdí 'cūū. ⁵Ní espírítus ní yeⁿe iⁿ'yeeⁿdí 'cūū, caavā chíⁿ chí ngaⁿá yā yeⁿe iⁿ'yeeⁿdí. Ní 'iiⁿyāⁿ yeⁿe iⁿ'yeeⁿdí n'giindiveéⁿ yā yeⁿē. ⁶S'uuúⁿ ní yeⁿé Dendyuūs s'uuúⁿ. Du'u chí n'diichí Dendyuūs n'giindiveéⁿ yā yeⁿe yú. Du'u chí nguéé yeⁿe Dendyuūs, nguéé n'giindiveéⁿ yā

yeⁿe yú. Caati ndúúcū chúū ní n'diichi yú Espírítu yeⁿe nduudu cuaacu ní espírítu chí nguéé yeⁿe nduudu cuaacu.

Ndyuūs ní vaadi neⁿe

⁷Ndís'tií chí neⁿe taaví, dineⁿē yú 'aama yú taama yú caati vaadi neⁿe ní yeⁿe Dendyuūs. Nducyáácá 'iiⁿyāⁿ chí ya'āi 'íínú yā 'iiⁿyāⁿ ní yeⁿe Dendyuūs 'iiⁿyāⁿ miⁿ, ní n'diichi yā Dendyuūs. ⁸Du'u chí nguéé idinéⁿe yā 'iiⁿyāⁿ nguéé in'diichí yā Dendyuūs, ti Dendyuūs ní vaadi neⁿe. ⁹Níicú chuū chí ch'iⁿí yā nanáaⁿ yú ní vaadi neⁿe yeⁿe Dendyuūs. Níicú chuū chí Dendyuūs dichó'o yā 'áámá n'dyáⁿā daiya yā iⁿ'yeeⁿdí 'cūū caati cuuvi 'cuεeti nduuchi yú cáávā 'iiⁿyāⁿ míⁿ. ¹⁰Níicú chuū ní chíⁿ chí canéé vaadi neⁿe. Nguéé chí s'uuúⁿ chí dinéⁿe yú Dendyuūs miⁿ, ti Dendyuūs míⁿ chí idinéⁿe yā s'uuúⁿ, níicú dichó'o yā daiyá yā chí ch'ií yā lado yeⁿe yú cucáávā nuūⁿndí yeⁿe yú.

¹¹Ndís'tií chí neⁿé, ndúúti chí 'tíicā neⁿe Dendyuūs s'uuúⁿ 'tiicá ntúūⁿ s'uuúⁿ canéé chí dinéⁿe yú 'aama yú taama yú. ¹²Mar 'áámá 'iiⁿyāⁿ nguéé n'diichí yā Dendyuūs. Ndúúti chí idinéⁿe yú 'aama yú taama yú, Dendyuūs ní canéé yā ndúúcu yú. Níicú vaadi neⁿe n'daacā n'dai canéé ndúúcu yú. ¹³Ndúúcū chuū ní deenu yú chí canee yú nduucú yā ní 'iiⁿyāⁿ miⁿ nduucú yā s'uuúⁿ cáávā chí tee yā Espírítu N'dai yeⁿé Ndyuūs s'uuúⁿ. ¹⁴S'uuúⁿ in'diichí yú ní ngaⁿa yú nduudu cuaacu chí chiida yú dichó'o yā daiya yā. Ní daiya

yā nadangáⁿai yā 'iⁿyāⁿ yeⁿe tanducuéⁿē nuuⁿndi chí véé yeⁿe yā yeⁿē iⁿyeéⁿdí 'cūū. ¹⁵Du'ū chí intúmiⁿnuⁿ chí Jesús ní daiyá Dendyuūs 'yā, Dendyuūs canée yā nduucú yā, ní 'iⁿyāⁿ miⁿ canée yā ndúúⁿcū Dendyuūs.

¹⁶Níicú s'uuúⁿ nin'diichi yú ní i'teenu yú chéé chí vaadi neⁿe chí Dendyuūs dineⁿé yā s'uuúⁿ. Vaadi neⁿē míⁿ ní Dendyuūs. Níicú 'iⁿyāⁿ chí neⁿé yā nducyaaca 'iⁿyāⁿ ní yeⁿe Dendyuūs 'iⁿyāⁿ. Níicú Dendyuūs canée yā nduucú yā. ¹⁷Ní chuū ní vaadi neⁿe chí n'dai taavi chí véé yeⁿe yú. Níicú véé nduudu yeⁿe yú nduucú yā nguuvi chí ndaa juicio. Tan'dúúⁿcā 'iⁿyāⁿ miⁿ 'tíicā ntúúⁿ s'uuúⁿ canée yú iⁿ'yeēⁿdī.

¹⁸Vaadi neⁿé ní nguéé vaadi 'va'ā. Naati chíⁿ chí n'dáacā taavi yeⁿe vaadi neⁿe i'neéⁿ 'áámá lado vaadi 'va'ā ti vaadi 'va'a ngí chí 'cuináaⁿ yú. Du'ū chí 'va'a nguéé canée vaadi neⁿē n'daacā ndúúⁿcū.

¹⁹S'uuúⁿ ní idinéⁿe yú 'yā ti 'iⁿyāⁿ miⁿ dinéⁿe yā s'uuúⁿ vmaaaⁿ.

²⁰Du'ū chí ngaⁿ'a: 'Úú idineⁿé Dendyuūs, níicú nguéé in'diichí yā vi'i yā, ní yaadi yā. Caati dú'u chí nguéé idinéⁿe yā vi'i chí n'diichí yā, 'táacā cuuvi dinéⁿe yā Dendyuūs chí nguéé in'diichí yā? ²¹Níicu s'uuúⁿ ní canee yú ndúúⁿcū ley yeⁿé yā. Du'u chí idinéⁿe Dendyuūs, 'tiicá ntúúⁿ idinéⁿe yā vi'i yā.

S'uuúⁿ cuuvi cuchéé yú yeⁿe iⁿ'yeēⁿdī

5 Nducyáacá yā chí i'téenu yā chí Jesús chí Cristo miⁿ tuu'mi ní ch'iindiyáaⁿ yā táámá yeⁿé Dendyuūs. Nducyáacá yā chí dinéⁿe yā chiida yú, idinéⁿe ntúúⁿ

yā 'iⁿyāⁿ chí daiyá yā. ²Ndúúⁿcū chuū ní deenu yú chí idinéⁿe yú 'iⁿyāⁿ s'eeⁿ chí daiya Dendyuūs miⁿ taachi idinéⁿe yú Dendyuūs ní diiⁿ yú chí ngaⁿ'a ley yeⁿe yā. ³Caati chuū chí vaadi neⁿe yeⁿe Dendyuūs chí s'uuúⁿ ní diiⁿ yú chí ngaⁿ'a ley yeⁿe yā. Ní ley yeⁿe yā nguéé cosa chí 'cuinaaⁿ yú yeⁿē. ⁴Nducyáacá yā chí ch'iindiyáaⁿ táámá ní yeⁿé Dendyuūs ní cuuvi cuchéé yā yeⁿe iⁿ'yeēⁿdī. Ní chuū chí diiⁿ chí cuchéé yú yeⁿe iⁿ'yeēⁿdī, ní chuū chí i'teenu yú Dendyuūs. ⁵¿Du'ū chí cuuvi cuchéé yeⁿe iⁿ'yeēⁿdī? 'Iiⁿyāⁿ chí i'téenu yā chí Jesús ní daiyá Dendyuūs 'yā ní cuchéé yā.

Nduudu cuaacu yeⁿe Daiyá Ndyuūs

⁶Ní chuū ní Jesucristo chí ndaa ndúúⁿcū nuūⁿnⁱ ndúúⁿcū yuuúⁿ. Nguéé dámaaⁿ ndúúⁿcū nuūⁿnⁱ caati ndúúⁿcū nuūⁿnⁱ ndúúⁿcū yuuúⁿ. Ní Espíritu N'dai yeⁿé Ndyuūs ngaⁿ'ā nduudu cuaacu yeⁿe yā caati Espíritu miⁿ ní vaadi cuaacu. ⁷Caati 'iinu yā ngaⁿ'a yā nduudu cuaacu na va'ai cheeti nguuvi, Dendyuūs chiida yú ndúúⁿcū Nduudu ndúúⁿcū Espíritu N'dai yeⁿé Ndyuūs. Níicú naachi ndii 'iinú yā vee 'áámá núúⁿ yā. ⁸Véé 'iinu yā chí ngaⁿ'a yā nduudu cuaacu ná iⁿ'yeēⁿdī 'cūū ní Espíritu N'dai yeⁿé Ndyuūs ndúúⁿcū nuūⁿnⁱ ndúúⁿcū yuuúⁿ. Ní naachi ndúúⁿ 'iinu yā ní véé 'áámá núúⁿ yā. ⁹Ndúúⁿti chí cu'teenu yú nduudu cuaacu yeⁿé 'iⁿyāⁿ yeⁿe iⁿ'yeēⁿdí 'cūū ch'εεε ca nduudu cuaacu yeⁿé Dendyuūs nguéé ti 'iⁿyāⁿ miⁿ. Caati chúú chíⁿ chí nduudu cuaacu yeⁿé Dendyuūs, Ndyuūs ngaⁿ'á yā nduudu cuaacu

yeⁿe daiyá yā. ¹⁰Du'ū chí i'teenu daiyá Dendyuūs véé nduudu cuaacu ndúúcu maāⁿ. Du'ū chí nguéé i'teenu Dendyuūs, díⁿ yā chí Dendyuūs ní yaadi yā caati nguéé i'téenu yā nduudu cuaacu chí Dendyuūs chiida yú ngaⁿ'á yā yeⁿ'ē Daiyá yā. ¹¹Níícu chuū chí nduudu cuaacu ní chuū chí Dendyuūs téé yā vida cueⁿe daāⁿmaⁿ s'uuúⁿ. Níícu vida cueⁿe daaⁿmáⁿ 'cūū ní yeⁿ'ē daiya yā. ¹²Du'ū chí i'teenu daiya yā véé vida cueⁿe daāⁿmaⁿ yeⁿ'e yā. Du'ū chí nguéé yeⁿ'e daiya yā nguéé véé vida cueⁿe daāⁿmaⁿ yeⁿ'é yā.

Ch'iinū carta ndúúcu consejos

¹³Chuū ní dinguúⁿ yeⁿ'e ndís'tiī chí i'téenu nī chí Cristo ní daiyá Dendyuūs caati maaⁿ ní cuuvi cádíínuuⁿ nī chí véé vida cueⁿe daāⁿmaⁿ yeⁿ'é nī. Níícu cu'téenu nī chí Cristo ní daiyá Dendyuūs miiⁿ.

¹⁴Ní chuū ní confianza chí véé yeⁿ'e yú ndúúcu yā. Nduuti chí s'uuúⁿ caaca yú 'yā tan'dúúca chí neⁿ'é yā chí caaca yú 'yā 'iiⁿ'yāⁿ miiⁿ n'giindiveéⁿ yā yeⁿ'ē yú. ¹⁵Nduuti chí deenu yú chí n'giindiveéⁿ yā yeⁿ'e yú yeⁿ'e tanducuéⁿ'ē chí caaca yú 'yā, tuu'mi ní 'āā deenu yú chí itée yā s'uuúⁿ chiiⁿ chí 'āā chiica yú 'yā.

¹⁶Du'ū chí n'diichi chí dinuuⁿndí vi'i nuuⁿndi chí nguéé

yeⁿ'e vaadi n'gii, canéé chí caacá yā Dendyuūs chí Dendyuūs ca'á yā vida cueⁿe daāⁿmaⁿ yeⁿ'é yā. Ngaⁿ'á yeⁿ'e 'iiⁿ'yāⁿ chí nguéé dinuuⁿndí yā yeⁿ'e vaadi n'gii. Véé nuuⁿndi chí yeⁿ'e vaadi n'gii. Ní yeⁿ'e chuū nguéé caacá chí caacá nī yeⁿ'e 'iiⁿ'yāⁿ chí diiⁿ nuuⁿndí yeⁿ'e vaadi n'gii. ¹⁷Tanducuéⁿ'ē chí nguéé yeⁿ'e nduudu cuaacu ní nuuⁿndi, naati véé nuuⁿndi míⁿ chí nguéé yeⁿ'e vaadi n'gii.

¹⁸'Āā deenu yú du'u 'iiⁿ'yāⁿ chí ch'iindiyáaⁿ yā táámá ní yeⁿ'e Dendyuūs ní nguéé idinuuⁿndí yā. 'Iiⁿ'yāⁿ miiⁿ candéé yā cuidado yeⁿ'e maáⁿ yā. Ní yááⁿ'n'guinūuⁿ nguéé cuuvi tuneéⁿ 'iiⁿ'yāⁿ miiⁿ.

¹⁹Déenu yú ti yeⁿ'e Dendyuūs s'uuúⁿ, ní tanáⁿ'ā 'iiⁿ'yāⁿ yeⁿ'e iⁿ'yeēⁿdí caneé yā lado yeⁿ'e yááⁿ'n'guinūuⁿ.

²⁰Déenu yú ti daiya Dendyuūs miiⁿ ní ndaá yā. Ní tee yā chí cadiinuⁿ yú, ní 'íícu n'diichi yú 'iiⁿ'yāⁿ chí cuaacu yā. Ní s'uuúⁿ ní yeⁿ'é 'iiⁿ'yāⁿ chí cuaacu yā ní yeⁿ'e daiya Dendyuūs chí Jesucristo. Dendyuūs miiⁿ ní 'iiⁿ'yāⁿ chí cuaacu, 'iiⁿ'yāⁿ chí véé vida cueⁿe daāⁿmaⁿ yeⁿ'é yā. ²¹Ndís'tiī daiyá cundéé nī cuidado ti nguéé cu'téenu nī santos ídolos. 'Tíicā cuuvi.

CARTA CUAYIIVI YEⁿE SAN JUAN

Yeⁿe nduudu cuaacu ní
yeⁿē vaadi neⁿe

¹Úú Juan chi saⁿā chi ngaⁿa
ntiiⁿnyuⁿ yeⁿe yaācū idinguúⁿ
yeⁿē n'daataá chí Ndyuūs ndεεve
yā ndúúcū daiya yā chi cuaacu
nífⁿnyúⁿ neⁿé. Ní nguéé 'úú dámaáⁿ
neⁿé ti 'tiicá ntúūⁿ nducyáácá yā
chi n'diichí yā nduudu cuaacu. ²Ní
cáavā chi véé vaadi cuaacu yeⁿe yú
ní caavā nduudu cuaacu chi canéé
ndúúcu yú, 'áámá cūnee tandíí
ndúúcu yú. ³Neⁿé chi canéé ndúúcū
ndís'tii vaadi n'dai yeⁿé Ndyuūs
ndúúcū vaadi ya'ai 'iinu yeⁿe yā
ndúúcū 'diiⁿ yeⁿe Dendyuūs chiida
yú ndúúcū Señor Jesucristo chí
daiya Dendyuūs chi chiida yú.
Tanducuéⁿē chuū canéé ndúúcu
ní ndúúcū nduudu cuaacu ndúúcū
vaadi neⁿē.

⁴Āā 'áámá yeenú caati chí
nindaācá daiya di chí dífⁿ yā chiiⁿ
chi cuaacu tan'dúúcā s'uuúⁿ chi sta'a
yú ley yeⁿē chiida yú. ⁵Maaⁿ ní
idi'cuítú n'dii n'daatā chí dinéⁿe
yú 'áámá yú táámá yú. Chuū nguéé
tan'dúúcā chí idinguúⁿ 'áámá ley
ngaī caati ley yeⁿē yú chífⁿ chí
caneé ndíí cuaaⁿ vmnaaⁿ. ⁶Nífcú
chuū chí vaadi neⁿe ní chiiⁿ chí

cachiica yú tan'dúúcā chí caaⁿmaⁿ
ley yeⁿe yā. Ley yeⁿe yā ní chuū
chí cachiicá ní ndúúcū vaadi neⁿe
tan'dúúcā chí n'giindiveéⁿ ní ndíí
cuaaⁿ vmnaaⁿ.

'Iiⁿyāⁿ chí nginnche'éí yā 'iiⁿyāⁿ

⁷N'deeé n'dái 'iiⁿyāⁿ 'āā
nginnche'éí yā 'iiⁿyāⁿ na iⁿ'yeeⁿdí
'cūū. Nguéé natumiiⁿnúⁿ yā chí
Jesucristo ní ndaá yā tan'dúúcā
s'uuúⁿ. 'Iiⁿyāⁿ chí 'tífcā nginnche'éí
yā, 'tiicá ntúūⁿ anticristo yā.
⁸Cundéé ní cuidado yeⁿē maáⁿ ní
ní nguéé dindai yú tanducuéⁿē
ntiiⁿnyuⁿ chí diiⁿ yú ti s'uuúⁿ ní
cuuvi cuta'a yú tanducuéⁿē chí
yeⁿe yú.

⁹Du'ū chí dífⁿ nuuⁿndi ní nguéé
'áámá canéé yā ndúúcū nduudu
cuaacu yeⁿe Cristo, nguéé yeⁿe
Dendyuūs 'iiⁿyāⁿ. Du'ū chí 'aama
canéé ndúúcū nduudu cuaacu yeⁿē
Cristo, tuu'mí 'iiⁿyāⁿ miiⁿ ní yeⁿe
chiida yú Dendyuūs ndúúcū daiya
yā. ¹⁰Du'ū chí ndaa vaacú ní chí
nguéé ngaⁿa nduudu cuaacú 'cūū
nguéé 'cuaáⁿ ní chí cunée yā na
vaacú ní. Ní nguéé caaⁿmaⁿ ní,
n'daacā chí ndaá yā va'āi yeⁿe ní.
¹¹Du'ú 'iiⁿyāⁿ chí ngaⁿá yā 'iiⁿyāⁿ
miiⁿ chí n'daacā chí ndaá yā va'āi

ye^{n'}é yā tuu'mi ní induuvidáámá yā
ndúúcū 'ii^{n'}yāⁿ chí idiiⁿ chi nguéé
n'daacā.

Ch'iinu carta maaⁿ

¹²Áámá véé cá ye^{n'}é chi ne^{n'}é
dinguúⁿ ye^{n'}e ndís'tiī ní nguéé ne^{n'}é
dinguúⁿ na caaca 'cūū ndúúcū

tinta, caati ne^{n'}é chi n'diichí ndís'tiī
ní caa^{n'}máⁿ ndúúcu nī ní ndís'tiī
nduucú. Níícú vaadī yeenú ye^{n'}e yú
ní cúúví cuaacu.

¹³Véé daiya tá ye^{n'}e n'daataá chi
Ndyuūs indεεvé yā tá^{n'}ā. Daiya tá
idicho'ó yā: N'dai n'diī, nga^{n'}a yā.
'Tíicā cuuvi.

CARTA NDÍÍ 'IINŪ YEⁿE SAN JUAN

Yeⁿe saⁿā Gayo chi n'dai

¹Úú Juan, saⁿā chi ngaⁿa ntiⁿnyuⁿ yeⁿe yáacū idinguúⁿ carta 'cūū yeⁿe saⁿā Gayo chi cuaacu níⁿyúⁿ neⁿe taaví saⁿā.

²Díí saⁿā Gayo chi neⁿé, 'úú neⁿé chi cáávā maaⁿ di tanducuéⁿē chi véé yeⁿē di ní n'dai taavi. Níícú véé vaadī 'viichéé yeⁿē di tan'dúúccā chi alma yeⁿe di véé vaadī 'viichéé yeⁿē. ³Nduudu cuaacu chi neene yeenú taachi ndaā vi'í yú chi caⁿa yā nduudu cuaacu yeⁿē di chi n'daācā diiⁿ di, tan'dúúccā chi 'áámá idiⁿ di chiⁿ chi cuaacu. ⁴Nguéé ch'etete ca vaadī yeenu yeⁿé chi ch'iindiveéⁿ chí daiyá dííⁿ yā chiⁿ chi cuaacu.

⁵Dii chi neⁿé, tanducuéⁿē chi diiⁿ di, n'daacā n'dai diiⁿ di ndúúccū vi'í yú ndúúccū 'iiⁿyāⁿ chi ngiica ná yúúní. ⁶Iiⁿyāⁿ miiⁿ ngaⁿá yā nduudu cuaacú yeⁿe vaadī neⁿe yeⁿe di nanááⁿ 'iiⁿyāⁿ chi snūūⁿ yaācū. Nduuti chi cunnéé dí 'iiⁿyāⁿ tan'dúúccā chi canéé chi diiⁿ di ní tan'dúúccā chi neⁿe Dendyuūs chi diiⁿ di, tuuⁿmi ní n'daacā idiⁿ di. ⁷Caati 'iiⁿyāⁿ cueⁿéé yā 'muuⁿ cueⁿéé yā miiⁿ cucáávā chi neⁿé yā caaⁿmáⁿ yā yeⁿe Cristo. Nguéé

dé'ē vεε sta'á yā yeⁿē 'iiⁿyāⁿ chi nguéé yeⁿe ndaata yeⁿé yā. ⁸S'uuúⁿ ní canee chi 'cuaaⁿ yú 'iiⁿyāⁿ s'tíí. Níícú cuuvi cunée yā ndúúccū yú 'iiⁿyāⁿ chí idiⁿ yā ntiⁿnyuⁿ yeⁿe vaadī cuaacu.

Saⁿa Diótrefes nguéé n'daacā diiⁿ sa

⁹Úú nidinguúⁿ yeⁿē 'iiⁿyāⁿ yeⁿe yaācū caati Diótrefes nguéé 'cuaaⁿ sa nús'uu ti néⁿé sa caaⁿmaⁿ ntiⁿnyuⁿ sá yeⁿé yā. ¹⁰Cáávā chuū taachi 'úú chi ndaā tuuⁿmi ní nin'gaacú tanducuéⁿē chi diiⁿ sáⁿā miiⁿ. Taatiⁿ caⁿā sa yeⁿe s'uuúⁿ ndúúccū nduudu taaⁿ chi nguéé n'daacā taatiⁿ 'caā'vā sa contra yeⁿe s'uuúⁿ. Ní nguéé yeenú sá ndúúccū dendu'ū. Nguéé n'guuⁿ sa vi'í yú. Ní nguéé neⁿe sa chi tanáⁿa yā chi 'cuaaⁿ yā vi'í yā. Níícú tun'dáa sa 'yā chεeti yaācū.

¹¹Díí chi neⁿé, nguéé diiⁿ di chiⁿ chi n'diichi di chi nguéé n'daacā. Diiⁿ di chi n'daacā. Du'ū chi din'daacā ní yeⁿē Dendyuūs. Du'ū chi nguéé n'daacā nidiⁿ ní nguéé n'dííchí Dendyuūs.

Saⁿa Demetrio, n'daacā idiⁿ sa

¹²Nducyáácá yā ngaⁿá yā nduudu cuaacu yeⁿe saⁿā Demetrio. 'Áā

'tiicá nūⁿ nduudu cuaacu n'giⁿi
 vida yeⁿé yā. 'Tiicá ntúūⁿ s'uuúⁿ
 ngaⁿa yú ndúúúⁿ cuaacu yeⁿe yā.
 Ní ndís'tiī deenú ni chí ngaⁿā yú
 nduudu cuaacu yeⁿé yā.

Ch'iinū carta maaⁿ

¹³Nééné v'éé yeⁿé chi neⁿé
 dinguúⁿ yeⁿe ndís'tiī naati ngu'éé
 neⁿé dinguúⁿ ndúúúⁿ tinta ndúúúⁿ
 pluma.

¹⁴Caati neⁿé n'diichí ndís'tiī núúⁿ
 niiⁿyūⁿ ní caaⁿmáⁿ ndúúúⁿ di ní
 ndís'tiī nduucú.

¹⁵Diiíⁿ canéé ndúúúⁿ di.
 Amigos yeⁿe s'uuúⁿ dichó'o
 yā: N'daí n'diī, ngaⁿa yā. Dii
 dichó'o di: N'daí ndís'tiī, yeⁿe
 amigos yeⁿe s'uuúⁿ taachi yaa'vi
 di 'iiⁿyāⁿ ca'áámá ca'áámá yā
 caavā chi duuchí Cristo. 'Tíicā
 cuuvi.

CARTA YEⁿE JUDAS

**Judas idinguúⁿ carta 'cūū
yeⁿe 'iiⁿyāⁿ chi Ndyuūs yaa'ví
yā chi cuuvi yeⁿé yā**

¹Úú saⁿā Judas ní saⁿā chi dichí'vē Jesucristo. 'Úú 'diinú Jacobo ní 'úú idinguúⁿ carta 'cūū yeⁿe 'iiⁿyāⁿ s'eeⁿ chi Ndyuūs chiida yú dinéⁿe yā ní didεεvé yā. Ní Cristo yaa'ví yā 'iiⁿyāⁿ s'eeⁿ chi cuuvi yeⁿé yā. Ní Cristo candéé yā cuidado 'iiⁿyāⁿ s'eeⁿ cáāvā chi yeⁿé yā 'iiⁿyāⁿ s'eeⁿ. ²Neⁿé chi Ndyuūs téé yā ndís'tiī n'deeé cá yeⁿé yā yeⁿe vaadi ya'ai ní yeⁿé vaadi 'diiⁿ ní yeⁿé vaadi neⁿe caati cuuvi 'yaaⁿ nducuéⁿē chuū nguaaⁿ ndís'tiī.

**Yeⁿé 'iiⁿyāⁿ chi nguéé ngaⁿā
nduudu cuaacu**

³Ndís'tiī hermanos yeⁿé chi neⁿe taaví, neené neⁿé idinguúⁿ yeⁿe ndís'tiī yeⁿé chi Ndyuūs nadanguáⁿai yā s'uuúⁿ. Maaⁿ ní cadiinuúⁿ chi canee chi idinguúⁿ carta 'cūū yeⁿe ní caati cuuvi yaa'ví ch'εechi ndís'tiī chi canéé chi diíⁿ ní luchar n'dai cáāvā chiiⁿ chi i'téénu ní Ndyuūs. Ndyuūs 'áámá vmnéⁿēe ca'á yā vaadi i'téénu yeⁿé yā 'iiⁿyāⁿ chi yeⁿé yā. ⁴Náⁿā 'iiⁿyāⁿ chi nguéé yeⁿé Ndyuūs ní nduuvidaamā yā

ndúúcū ní. Ndíí nguéé deenú ní chuū. 'Iiⁿyāⁿ s'eeⁿ ní nguéé n'daacā. Ní canéé nguūⁿ na libro yeⁿé Ndyuūs ndii cuááⁿ vmnaaⁿ yeⁿé yā 'tíicā: Condenado yā ní 'cuūvi yā. Ní 'iiⁿyāⁿ s'eeⁿ dámaāⁿ sta'á yā nduudu cuaacu yeⁿé Ndyuūs chi tanáⁿā 'iiⁿyāⁿ nguéé cuuvi tuumicádíinuⁿ yā yeⁿe chi maáⁿ yā diiⁿ yā chi nguéé n'daacā. 'Iiⁿyāⁿ s'eeⁿ ngaⁿā yā contra yeⁿe Ndyuūs yeⁿe yú chi 'áámá n'dyáⁿā Ndyuūs chi 'iivu yú, ní contra yeⁿe Señor Jesucristo yeⁿe yú dendú'ū.

⁵Áará chi 'āā deenú ní yeⁿé Señor 'iivú Ndyuūs taachi nadanguáⁿai yā 'iiⁿyāⁿ Israel ní divíi yā 'iiⁿyāⁿ s'eeⁿ yeⁿe yáⁿāa Egipto, neⁿé chi ndís'tiī n'gaacú ní chuū. Cuayiivi mííⁿ Ndyuūs di'cuiinú yā 'iiⁿyāⁿ na yáⁿāa miiⁿ, 'iiⁿyāⁿ chi nguéé s'téénu yā 'yā. ⁶Ní n'gaacú ní yeⁿe ángeles chi nguéé diíⁿ yā tan'dúúcā chi Ndyuūs ngaⁿa ntiíⁿnyuⁿ yā ángeles miiⁿ. Ní Ndyuūs canéé chí divíi yā yeⁿe lugar yeⁿé yā. Maaⁿ ní Ndyuūs s'néeⁿ yā ángeles chi presos yeⁿé yā na maaiⁿ chi yáanuⁿ. Miiⁿ canee yā ndíí chiichi yā ndúúcū cadenas chi 'áámá canee ndii tiempo chi Ndyuūs n'diichí yā nuuⁿndi yeⁿe ángeles miiⁿ. ⁷Ní n'gaacú ní yeⁿe

yáaⁿ Sodoma ndúúcū yáaⁿ Gomorra ndúúcū yáaⁿ chi snéé cuaaⁿ 'diituú. 'Tiicá ntúūⁿ nguéé n'daacā idiiⁿ 'iiⁿyāⁿ yeⁿe yáaⁿ s'eeⁿ tan'dúúcā chi diiⁿ ángeles. 'Iiⁿyāⁿ s'eeⁿ ní cueⁿé yā ndúúcū n'daataá o isaⁿā chi nguéé yeⁿé yā. Ní n'daataā nguaaⁿ n'daataá yā induuchineeⁿ tá n'daataa ndúúcū vi'i. Ní saⁿā nguaaⁿ saⁿā yā induuchinéeⁿ sa saⁿā ndúúcū vi'i. 'Iiⁿyāⁿ s'eeⁿ cáávā castigo yeⁿe yā 'áámá cunée yā cueⁿe daāⁿmaⁿ na nguuchi yaⁿā. Ní chuū ni ch'iⁿ'i s'uuúⁿ chi cuuvi ch'óo yeⁿe yú nduuti chi diiⁿ yú chi nguéé n'daacā.

⁸Tiicá ntúūⁿ nguuvi nguuvi saⁿā s'eeⁿ n'gíinu sa tan'dúúcā chi taachi cyaadu sa yeⁿe dendú'ū chi cuuvi diiⁿ sa chi dinuuⁿndi sa ndúúcū maaⁿ cuerpo yeⁿe sa. Ní nguéé neⁿe sa chi Ndyuūs ngaⁿa ntiⁿnyuⁿ yā yeⁿe sa. Ní cunncaā ngaⁿa yā yeⁿe 'iiⁿntyéⁿe chi diiⁿ ntiⁿnyuⁿ yeⁿé Ndyuūs. ⁹Ní nguéé 'tíicā diiⁿ ángel Miguel chí ndíí tiiⁿ taachi diiⁿ caandaá ndúúcū yáá'n'guiinūⁿ ní ngaⁿa yā yeⁿe cuerpo yeⁿe Moisés. Angel Miguel miiⁿ nguéé díⁿ yā condenar yáá'n'guiinūⁿ miiⁿ ní nguéé cuuvi ngaⁿa taáⁿ yā chi yáá'n'guiinūⁿ chi cuuvi condenado yā. Dámaāⁿ ngaⁿa yā 'túúcā. Señor ní díⁿ yā repretter dii yeⁿe nuuⁿndi chi diiⁿ di. ¹⁰Saⁿā s'eeⁿ ní nguéé n'daacā ngaⁿa sa yeⁿe dendú'ū chi nguéé deenu sa. Ní taachi saⁿā s'eeⁿ yeⁿe chi maaⁿ sa deenu sa ngaⁿa sa tuuⁿmí ní canee sa tan'dúúcā chi 'iiti s'eeⁿ chi maaⁿ ti deenu ti. 'Tíicā saⁿā s'eeⁿ. Dendú'ū miiⁿ ní diiⁿ chi dituuví maāⁿ saⁿā s'eeⁿ.

¹¹De'e chúuca ya'ai yeⁿe saⁿā s'eeⁿ caati dámaāⁿ chi neⁿe sa diiⁿ sa tan'dúúcā chi diiⁿ saⁿā Caín. Ní saⁿā s'eeⁿ cáávā chi neⁿe sa tuūmī, dinuuⁿndi sa tan'dúúcā chi diiⁿ saⁿā Balaam. Ní ch'iī sa caati nguéé diiⁿ sa chi ngaⁿa Ndyuūs, tan'dúúcā saⁿā Coré chi nguéé diiⁿ sa chi ngaⁿa Ndyuūs taachi nguéé ch'iindiveeⁿ sa chi ngaⁿa Moisés. ¹²Maaⁿ ní 'iiⁿyāⁿ chi 'tíicā, taachi nduuvidaamá yā ní che'é yā ní cu'ú yā ndúúcū ndís'tii taachi véé 'viicu ná va'ai yeⁿé nī yeⁿe chi dineⁿé nī 'áámá nī taama nī, tuuⁿmí ní chuū ní cosa chi cuuvi 'cuináaⁿ nī. 'Iiⁿyāⁿ s'eeⁿ nguéé 'va'á yā yeⁿe mar 'áámá. Dámaāⁿ candee yā cuidado yeⁿe maáⁿ yā. 'Iiⁿyāⁿ s'eeⁿ tan'dúúcā meēⁿ chi nguéé nuūⁿnīⁿ yeⁿe chi cueeⁿ cuuvi ní tan'dúúcā 'yúúné candéé 'muuⁿ ni candéé miiⁿ 'tíica yā. 'Iiⁿyāⁿ s'eeⁿ tan'dúúcā yáⁿá chi nguéé véé n'gui'i yeⁿe 'tíica yā. Ní yáⁿá miiⁿ ní nguéé dichí'vē caati nguéé n'gui'i yeⁿe ní n'dii tan'dúúcā tiempo yeⁿe 'iichee. Ní 'iiⁿyāⁿ tiicú yā yáⁿá miiⁿ ndii díf'yú. 'Tíicā 'iiⁿyāⁿ s'eeⁿ. ¹³'Iiⁿyāⁿ s'eeⁿ ní tan'dúúcā nuūⁿnīⁿyáⁿā chi ngii yú yaacu ndúúcū ngii yáⁿ inaaⁿ cucáávā 'yúúné taaⁿ. Ní nducueⁿé chi nguéé n'daacā chi diiⁿ yā yeⁿe chi cuuvi 'cuinaáⁿ yā ní tan'dúúcā ngii yáⁿ inaaⁿ yeⁿe nuūⁿnīⁿ miiⁿ chi inaaⁿ yú 'táácā idíⁿ yā. 'Iiⁿyāⁿ s'eeⁿ ni tan'dúúcā 'íⁿnyúⁿ chi ngíicá, 'tíica yā. Ndyuūs nguáín'dai yā 'áámá lugar yeⁿe 'iiⁿyāⁿ s'eeⁿ chi díftuu taavi ca maāⁿ ndii yaānūⁿ naachi canée yā cueⁿe daāⁿmaⁿ. ¹⁴'Tiicá ntúūⁿ, saⁿa Enoc chí ndíí ná ndēēchē ngiini familia yeⁿe saⁿa

Adán, ní Enoc miiⁿ cáávā Espíritu N'dai yeⁿé Ndyuūs caⁿa sa chii sa 'iiⁿyāⁿ yeⁿe dendu'ū chi cuchíi yeⁿé yā. Ní caⁿa sa 'tíicā: Cuin'diichí nī Señor Jesucristo miiⁿ ní cuchii yā ndúúcu n'dee n'dái mil 'iiⁿyāⁿ chi i'téenu yā 'yā. ¹⁵Señor Jesucristo ndaa yā chi n'diichí yā nuuⁿndi yeⁿe nducyaaca 'iiⁿyāⁿ. Ní caaⁿmaⁿ yā chi condenado yā nducyaaca 'iiⁿyāⁿ nuuⁿndi chi nguéé i'téenu yā 'yā caavā nducuéⁿe nuuⁿndi chi díiⁿ yā ndúúcu nduudu chi ngaⁿa yā chi nguéé n'daacā chi contra Ndyuūs. ¹⁶'iiⁿyāⁿ s'eeⁿ ní néené n'gεεcu cheendí yā tan'dúúca chi 'téé nūuⁿ taáⁿ yā ní ngaⁿá yā yeⁿe chi nguéé neⁿé yā yeⁿe chi táámá yā idiiⁿ yā. Ní díiⁿ yā chi nguεε n'daacā caati maáⁿ yā neⁿe yā. Ní ndúúcu nduudu chi n'gεete ngaⁿá yā yeⁿe taamá yā chi ch'εeté yā taachi 'iiⁿyāⁿ s'eeⁿ neⁿé yā diiⁿ yā aprovechar dendu'ū cáávā maáⁿ yā.

Judas ngaⁿa yā yeⁿe chi 'iiⁿyāⁿ chi yeⁿe Cristo canéé chí díiⁿ yā

¹⁷Ndís'tii, hermanos chi neene neⁿé, maaⁿ ní neⁿé chi ndís'tii ní n'gaacu nī yeⁿe nduudu chi apóstoles yeⁿe Señor Jesucristo yeⁿe yú taacā chi caⁿa yā. ¹⁸Tíicā caⁿa yā chii yā ndís'tii: Taachí 'āā canéé niiⁿnuúⁿ nguuvi chí ndaa Señor Jesucristo taama vmnéⁿēe tuuⁿmi ní 'iiⁿyāⁿ s'eeⁿ ní diduuchineéⁿ yā yeⁿe nī ndúúcu tanducuéⁿe chi yeⁿe Ndyuūs. Ní nducuéⁿe chi 'iiⁿyāⁿ s'eeⁿ neⁿé yā díiⁿ yā chi nguεε n'daacā, chuū ní díiⁿ yā. ¹⁹'iiⁿyāⁿ s'eeⁿ ní divíi yā yeⁿe nguaaⁿ ndís'tii. 'Iiⁿyāⁿ s'eeⁿ ní

dinuuⁿndí yā tan'dúúca chi neⁿe yā ní nguéé canéé Espíritu N'dai yeⁿé Ndyuūs ndúúcu yā.

²⁰Maaⁿ ní ndís'tii hermanos yeⁿé chi neene neⁿé, cu'téenu cá nī nguuvi nguuvi yeⁿe vaadi i'teenu chi Ndyuūs itée yā ndís'tii. Taachi caaⁿmaⁿnguaⁿá nī díiⁿ nī ndúúcu poder yeⁿe Espíritu N'dai yeⁿé Ndyuūs. ²¹Cuεetineeⁿ nī ni díiⁿ nī nducuéⁿe ndúúcu vaadi neⁿe chi Ndyuūs itée yā ndís'tii 'naaⁿ chi cūnee ngiinú nī nguuvi chi Señor Jesucristo yeⁿe yú chí n'dai taavi caⁿá yā téé yā vida cueⁿe daāⁿmaⁿ ndís'tii.

²²Ndís'tii n'dee cá ngaⁿa nī ndúúcu 'iiⁿyāⁿ chi nguéé n'daacā i'téenu yā.

²³Ní 'tíicā nadanguáⁿai nī 'iiⁿyāⁿ s'eeⁿ yeⁿe chi nguéé i'téenu yā tan'dúúca chi tun'dáa nī 'iiⁿyāⁿ nguááⁿ nguuchi yaⁿā, 'tíicā díiⁿ nī. Ya'ai 'iinú nī yeⁿe tanáⁿā 'iiⁿyāⁿ naati díiⁿ nī ndúúcu cuidado, ndíi nguéé cuuvi caⁿa nī ndúúcu yā chi dinuuⁿndí nī.

Judas ngaⁿanguaⁿá yā ní dich'εeté yā Ndyuūs

²⁴Maaⁿ ní 'úú chíⁿneéⁿ ndís'tii na ta'a Ndyuūs chi cuuvi candee yā cuidado yeⁿe ndís'tii chi nguéé dinuuⁿndí nī. Ní Jesucristo cuuvi 'cuuⁿmíⁿ yā nanááⁿ Ndyuūs chi dεeve ngii n'dai ndís'tii chi nguéé nuuⁿndi yeⁿé nī. Ní neene yeenu nī. ²⁵Dich'εete yú Ndyuūs chí 'áámá n'dyáⁿā Ndyuūs chí deenu nducuéⁿe ní nadanguáⁿai yā s'uúúⁿ cáávā Señor Jesucristo chí 'iivi yú. Caati yeⁿé yā ní véé dεevé ngii n'dai ndúúcu n'gεete n'dai ndúúcu poder ch'εete n'dai ndúúcu poder yeⁿe 'iiⁿntyéⁿe yeⁿé yā nguuvi chí chóó ndúúcu nguuvi maaⁿ ní cuéⁿé daāⁿmaⁿ. 'Tíicā cuuvi.

APOCALIPSIS, NDUUDU CHÍ CH'IⁿI NDYUŪS YEⁿ'E JESUCRISTO

Yeⁿ'e chi Jesucristo ch'íⁿi yā

1 Na libro 'cūū canéé nguūⁿ chuū chi ch'íⁿi Jesucristo. Ní Ndyuūs ch'íⁿi yā Jesucristo chuū caati 'cuuⁿ míⁿ yā 'iiⁿyāⁿ chi dich'íⁿvē Ndyuūs dendú'ū chi 'āā ntéé 'nāáⁿ chi ndaa yeⁿ'ē. Ní Jesucristo ch'íⁿi yā chuū Juan chi dich'íⁿvē Ndyuūs cááavā 'áámá ángel chi dich'ó'o yā nanááⁿ yā. ²Juan miiⁿ caⁿ'a cuaacu yā nduudu cuaacu yeⁿ'e tanducuéⁿ'ē chi n'diich'í yā. Chuū ní nduudu cuaacu yeⁿ'e Ndyuūs. Ní chuū ní nduudu cuaacu chí Jesucristo ch'íⁿi yā Juan miiⁿ.

³Dé'ε chúúⁿcā yeenú 'iiⁿyāⁿ chi n'geeⁿ yā libro 'cūū chi yeⁿ'é Ndyuūs. Ní dé'ε chúúⁿcā yeenú 'iiⁿyāⁿ s'uuuⁿ chi n'giindivéⁿ'ē yā nduudu yeⁿ'e libro 'cūū ní i'téénu yā yeⁿ'e chí ngaⁿ'ā, ti ngaⁿ'ā yeⁿ'e dendu'ū chí cuchii ti tiempo miiⁿ chi canee chi chó'oo 'āā snee niiⁿ'nuúⁿ.

Juan idinguúⁿ yā yeⁿ'e 'iiⁿyāⁿ yeⁿ'e ndu'u ndéechē yaācū.

⁴Úú Juan idinguúⁿ cartas yeⁿ'e 'iiⁿyāⁿ yeⁿ'e ndéechē yaācū chi snéé na yáⁿ'āa Asia. Neⁿ'é chi Ndyuūs tée yā ndís'tii dendú'ū chi n'dai yeⁿ'é

yā ndúúⁿcū vaādí 'diiiⁿ yeⁿ'é yā. Ní Ndyuūs ní 'áámá canee yā tiempo chi chó'oo, ní maaⁿ ní 'tíica yā, ní caⁿ'á yā ndaa yā. Maaⁿ ní neⁿ'é chi yeⁿ'e ndu'u ndéechē espíritus chi snée yā nanááⁿ trono yeⁿ'é Ndyuūs, espíritus tée yā ndís'tii vaadí n'dai yeⁿ'e Ndyuūs. ⁵Ní 'tiicá ntúūⁿ neⁿ'é chi Cristo tée yā ndís'tii vaadí n'dai yeⁿ'é yā, Jesucristo chi cuéⁿ'é daāⁿmaⁿ ngaⁿ'a cuaacu yā. Ní Cristo miiⁿ ní daiyá Ndyuūs ní 'iiⁿyāⁿ chi vmnááⁿ vmnaaⁿ nacueeⁿ yā yeⁿ'e nguuaⁿ tináⁿ'ā. Ní ngaⁿ'a ntiiⁿnyúⁿ yā yeⁿ'e nducyáácá reyes chi véé iⁿ'yeeⁿdí 'cūū. Ní Cristo dinéⁿ'e yā s'uuúⁿ ní nadeēv'ē yā s'uuúⁿ yeⁿ'e nuuⁿndi yeⁿ'e yú ndúúⁿcū yuuúⁿ yeⁿ'e maáⁿ yā. ⁶Ní Cristo díⁿ yā chi s'uuúⁿ reyes s'uuúⁿ ní chiiduú s'uuúⁿ chi dich'iiⁿvē yú Ndyuūs chi chiidá yā. Maaⁿ ní vaadí dēeve ngii ní yeⁿ'é yā ndúúⁿcū nducuéⁿ'ē poder chi yeⁿ'é yā cuuvi yeⁿ'é yā cueⁿ'e daāⁿmaⁿ. 'Tíicā.

⁷Cuin'diich'í nī. Cristo miiⁿ cuchii yā nguááⁿ meēⁿ ní nducyáácá 'iiⁿyāⁿ cuuvi snaaⁿ yā ndúúⁿcū 'iiⁿyāⁿ s'eeⁿ chi dich'ó'oo tíicūā Cristo ndúúⁿcū machete chi 'uūvi lados 'caāiⁿ. Ní nducyaaca 'iiⁿyāⁿ yeⁿ'e

nducyaaca yáāⁿ yeⁿe iⁿ'yeeⁿdí 'cūū
cueēcú yā taachi n'diichí yā Cristo.
'Tííca rā va. Cuaacu níⁿ'nyúⁿ chí
'tííca.

⁸Señor Ndyuūs chi véé
tanducuéⁿe poder dendu'ū yeⁿe
yā chi 'áámá caneé yā tiempo chi
chó'ōo, ní maaⁿ ní 'tííca yā, ní caⁿ'á
yā ndaa yā, Señor miiⁿ ngaⁿ'a yā:
'Úú chí 'iiⁿ'yāⁿ vmnááⁿ vmnaaⁿ 'úú,
ní 'úú ndíí cuááⁿ naachí 'cuiinu
'úú. Tan'dúúca letras A ndii Z yeⁿe
alfabeto 'tííca 'úú.

**Yeⁿe chi Juan n'diichí yā
Cristo chi dēeve n'dai taavi yā
ndii túúⁿnúⁿ ngii 'yáⁿ'a yā**

⁹'Úú apóstol Juan 'úú ní hermano
yeⁿe ndís'tii. Ní caati 'úú ní yeⁿe
Jesús 'úú, 'úú dáámá ch'eenú chii
ndúúcu ndis'tii ní dáámá nduucú nī
yeⁿe naachi Ndyuūs ngaⁿ'a ntiⁿ'nyúⁿ
yā, ní dáámá nduucú nī yeⁿe vaadi
'diiíⁿ chi Jesucristo itée yā s'uuúⁿ.
'Úú canéé preso 'úú na isla Patmos
cáávā chi candéé nduudu cuaacu
yeⁿe Ndyuūs ní ngaⁿ'á nduudu
cuaacu yeⁿe Jesucristo. ¹⁰Ní taachi
'úú caneé miiⁿ 'áámá domingo
chó'ōo chi 'úú ní caneé maaⁿ poder
yeⁿe Espíritu N'dai yeⁿe Ndyuūs.
Ní ch'iindiveéⁿ 'áámá nduudu
ch'ēete cuaaⁿ daamí tan'dúúca
chi n'gēcú 'áámá trompeta. ¹¹Ní
'tííca ngaⁿ'ā ngii 'úú: 'Úú 'iiⁿ'yāⁿ chí
vmnááⁿ vmnaaⁿ 'úú, 'úú ndíí cuááⁿ
naachí 'cuiinu 'úú. Tan'dúúca letras
A ndii Z yeⁿe alfabeto 'tííca 'úú.
Dii, Juan, idingúuⁿ di na 'áámá
libro cosa chí inaaⁿ di ní dichó'o
di libro miiⁿ nanááⁿ 'iiⁿ'yāⁿ yeⁿe
ndu'u ndēēchē yaācú chí sneē na
yáⁿ'āa Asia. Yáacú s'eeⁿ ní yeⁿe

yáāⁿ Efeso, ní yeⁿe yáāⁿ Esmirna,
ní yeⁿe yáāⁿ Pérgamo, ní yeⁿe yáāⁿ
Tiatira, ní yeⁿe yáāⁿ Sardis, ní yeⁿe
yáāⁿ Filadelfia, ndúúcu yeⁿe yáāⁿ
Laodicea.

¹²Tuu'mi ní 'úú nan'guaacúndii ní
n'diichí du'ū chí yaā'vi 'úú. Taachi
n'diichi cuaaⁿ daamí n'diichí ndēēchē
candeleros yeⁿe 'dííⁿ'nguāⁿ. ¹³Ní
náávtaⁿ'a yeⁿe ndu'u candeleros
miiⁿ 'áámá yā cheendii yā tan'dúúca
'aama saⁿ'ā daiyá 'iiⁿ'yāⁿ iⁿ'yeeⁿdí
'cūū. Canúuⁿ yā 'áámá catecai chí
ngee yā chí ndaa ndii ná daandu
ca'a yā. Ní ndéé chiichí 'áámá cinta
yeⁿe 'dííⁿ'nguāⁿ cuaaⁿ 'níⁿ'núⁿ yā.
¹⁴Ní tííⁿ yā ndúúcu yundutiⁿ yā ní
cuéē tan'dúúca duudu 'iiti cuūchí
cuéé, ní 'tiicá ntūūⁿ cuéē tan'dúúca
yaāⁿ. Ní nduutináaⁿ yā tan'dúúca
'áámá nguuchi yaⁿ'ā. ¹⁵Ní ca'a yā
tan'dúúca cūū cuááⁿ chí ndís'tii 'āā
ngiichí nī chēeti 'áámá horno ní
dēevé diiⁿ nī. Ní nduudu yeⁿe yā
ní tan'dúúca chí n'gēcú 'yaa n'dái
yíícu. ¹⁶Ní ndēe yā na ta'a cuaacú
yā ndēēchē 'ííⁿ'nyúⁿ. Ní na cheendí
yā miiⁿ canéé 'áámá machete chí
'caāiⁿ nduu 'uuví lados. Ní núúⁿ'māⁿ
naaⁿ yā ngíí n'gāi tan'dúúca chí
n'gāi 'yáⁿ'ā taachi néené íniguaaⁿ
nááⁿ.

¹⁷Ní taachi 'úú snaáⁿ 'iiⁿ'yāⁿ miiⁿ
sndēevé na ca'a yā tan'dúúca chí
ch'íí. Ní 'iiⁿ'yāⁿ miiⁿ s'neéⁿ yā ta'a
cuaacú yā vmnaaⁿ yeⁿe 'úú ní caⁿ'a
yā chí yā 'úú: Nguéé 'va'a di. 'Úú
chí vmnááⁿ vmnaaⁿ, 'úú ndíí cuaaⁿ
naachí 'cuiinu 'úú. ¹⁸'Úú 'áámá
canduuchí. Cuáácú ch'ii naati
cuiⁿ'diichí nī maaⁿ ní 'úú canduuchí
cueⁿe daāⁿ'maⁿ 'tííca. 'Úú ní ndēé
llaves yeⁿe vaadi n'gii chí yeⁿe

lugar naachi snéé 'iiⁿyāⁿ chi n'díí ní nguéé chí'téenu yā Ndyuūs. ¹⁹Maaⁿ ní dii dingúuⁿ di dendu'ū chi 'túúcā chi n'diichi di ndúúcū dendu'ū chi 'túúcā ndúúcū dendu'ū chi ndaa cuayiivi. ²⁰Maaⁿ ní 'úú n'g'iⁿ'í dii de'e neⁿe caaⁿmaⁿ ndeēchē 'iiⁿnyúⁿ miiⁿ chi n'diichi di na ta'ā cuaacú ní yeⁿe chi ndeēchē candeleros yeⁿe 'diiⁿnguāāⁿ miiⁿ. Ndu'u ndeēchē 'iiⁿnyúⁿ miiⁿ chí du'ū ndeēchē 'iiⁿyāⁿ chi ndíí tiiⁿ yeⁿe ndu'ū ndeēchē yaācū miiⁿ. Ní ndu'ū ndeēchē candeleros chí n'diichí di chííⁿ chí ndeēchē yáacū miiⁿ.

Juan idingúuⁿ yā carta 'cūū yeⁿe 'iiⁿyāⁿ yeⁿe yāāⁿ Efeso

2 Díí, Juan idingúuⁿ di chuū yeⁿe 'iiⁿyāⁿ chí ndíí tiiⁿ yeⁿe yáacū yeⁿe yāāⁿ Efeso. 'Iiⁿyāⁿ chí ndeé yā ndu'u ndeēchē 'ííⁿnyúⁿ na tá'ā cuaacú yā ní chiicá yā nguuaⁿ ndeēchē candeleros yeⁿe 'dííⁿnguāāⁿ, 'iiⁿyāⁿ miiⁿ ngaⁿ'á yā dendu'ū chí 'túúcā: ²'Úú ní deenú ntiⁿnyuⁿ chí diiⁿ di. Deenú chí díítū n'dái diiⁿ dí ntiⁿnyuⁿ ní véé paciencia nanáaⁿ di. Ní deenú chí ichēe di yeⁿe 'iiⁿyāⁿ chí nguēe n'daācā idiíⁿ yā. Ní deenú ntúūⁿ chí ndeē di cuidado yeⁿe 'iiⁿyāⁿ chí ngaⁿ'a chí apóstoles ní nguéé 'tiicá yā. Ní dii deenu di chí 'iiⁿyāⁿ s'eeⁿ nguéé apóstoles 'iiⁿyāⁿ. Ní deenu di chí yaadi yā. ³Ní dii véé paciencia nanáaⁿ di ní n'geenu di ngii. Ní diiⁿ di n'dee n'dái ntiⁿnyuⁿ cáāvā 'úú. Ní nguéé chicúuⁿnuⁿ di yeⁿe dendu'ū. ⁴Naati véé 'téé contra yeⁿe di. Nguéé dineⁿe di 'úú tan'dúúcā chí vmnááⁿ vmaaⁿ dineⁿe ca di. ⁵Ní cáāvā chuū nn'gáacú dí yeⁿe chí

diiⁿ di chí nguéé dineⁿe ca di 'úú ní ndaacadaami di yeⁿe. Ní dineⁿe ca di 'úú tan'dúúcā chí diiⁿ di vmnááⁿ vmaaⁿ. Ní nduuti chí nguéé 'túúcā diiⁿ di, 'úú ní ndāa niiⁿnuúⁿ ní divíí candelero yeⁿe di yeⁿe naachi snéé. ⁶Ní chuū chí véé favor yeⁿe di. Nguéé inee yiinu di ntiⁿnyuⁿ chí diiⁿ 'iiⁿyāⁿ yeⁿe grupo yeⁿe Nicolaítas. Ní 'úú ntúūⁿ nguēe neⁿ'é chí diiⁿ yā. ⁷'Iiⁿyāⁿ chí véé veéⁿ yā 'caandiveeⁿ yā chí ngaⁿ'ā Espíritu N'dai yeⁿ'é Ndyuūs ngii 'iiⁿyāⁿ yeⁿe yáacū s'eeⁿ. 'Úú ngaⁿ'á chí 'iiⁿyāⁿ chí cuchéé yā yeⁿe dendu'ū, 'úú ca'á 'iiⁿyāⁿ s'eeⁿ chí che'é yā n'gui'í yeⁿe yá'á yeⁿe vida cueⁿe daāⁿmaⁿ chí cánéé naavtaⁿ'ā yeⁿe paraíso chí jardín yeⁿe Ndyuūs.

Juan idingúuⁿ yā carta 'cūū yeⁿe 'iiⁿyāⁿ yeⁿe yāāⁿ Esmirna

⁸Díí, Juan, idingúuⁿ di yeⁿe 'iiⁿyāⁿ chí ndíí tiiⁿ yeⁿe 'iiⁿyāⁿ yeⁿe yáacū yeⁿe yāāⁿ Esmirna. Dendu'u chí 'túúcā ngaⁿ'á 'iiⁿyāⁿ chí vmnááⁿ vmaaⁿ ndii chí 'cuiinu, 'iiⁿyāⁿ chí 'āā n'dii yā ní maaⁿ ní 'āā canduuchi ntuúⁿ yā. ⁹'Úú deenú ntiⁿnyuⁿ chí diiⁿ di. Deenú chí n'geenu di ngii ndúúcū dendu'ū chí chēechí n'dai yeⁿe di. Deenú chí nguéé de'ē vee yeⁿe di naati cuaacu níⁿnyúⁿ chí 'cuiica di. 'Úú deenú yeⁿ'ē chí 'iiⁿyāⁿ chí ngaⁿ'á yā chí judíos yā chí Israel ya ní nguéé dííⁿ yā tan'dúúcā chí 'iiⁿyāⁿ judíos yā. Ní deenú chí 'iiⁿyāⁿ s'eeⁿ nguéé n'daacā ngaⁿ'á yā yeⁿe di. Ní 'iiⁿyāⁿ s'eeⁿ ní yeⁿe yááⁿn'guiniūⁿ. ¹⁰Nguéé 'va'a di yeⁿ'ē dendú'ū chí canee chí 'cueenu di cuuvi. 'Caandiveeⁿ di yeⁿ'é. Yááⁿn'guiniūⁿ cutá'a sa náⁿ'ā

ndís'tií ní cu'nuuⁿ sa 'iiⁿ'yāⁿ vácū^u
caati n'diichineeⁿ sa nducyaaca
ndís'tií. Ní canee chi 'cuenúⁿ nī
cuuvi ndiichí nguuvi. Naati 'áámá
canee nī ndúú^ucū^u chi i'téenu nī ndii
chi 'cuú^uvī nī ní 'úú^u teé ndís'tií 'áámá
corona chi vida cueⁿ'e daāⁿmaⁿ.
11 'Iiⁿ'yāⁿ chi vééⁿ veéⁿ yā 'caandiveéⁿ
yā chi ngaⁿ'ā Espíⁿritu N'dai yeⁿ'é
Ndyuūs ngii 'iiⁿ'yāⁿ s'eeⁿ yeⁿ'e yáacū^u
s'eeⁿ. 'Iiⁿ'yāⁿ chi cuchéⁿe yā yeⁿ'e
tanducuéⁿ'ē dendu^u nguééⁿ cuuvi
'cuenúⁿ yā cuuvi yeⁿ'ē ndii 'úú^uvī
vaadi n'gii chi infierno.

**Juan idingú^u'n yā carta 'cū^u yeⁿ'e
'iiⁿ'yāⁿ yeⁿ'e yāāⁿ Pérgamo**

12 Díí, Juan, idingú^u'n di ntú^u'n
'iiⁿ'yāⁿ ndíí tiiⁿ chi yeⁿ'e 'iiⁿ'yāⁿ yeⁿ'e
yáacū^u yeⁿ'e yāāⁿ Pérgamo: Chuū^u
ngaⁿ'á 'iiⁿ'yāⁿ chi vééⁿ machete chi
'uú^uvī lados 'caāⁿ'i. 13 Chuū^u ngaⁿ'a
yā. 'Úú^u ní deenúⁿ tanducuéⁿ'ē chi
diiⁿ di. Deenúⁿ chi canee di naachi
yááⁿ'n'guiniūⁿ ngaⁿ'a ntiⁿ'nyuⁿ sa.
Ní 'áaráⁿ chí 'tíicāⁿ 'áámá canee di
lado yeⁿ'é nguééⁿ ndaacádaami di
yeⁿ'e chi i'téenu di 'úú^u. Ní 'tiicá
ntú^u'n diiⁿ di nguuvi chi ch'ó^o
taachi nguaaⁿ ndís'tií 'iiⁿ'yāⁿ s'eeⁿ
ch'iiⁿ'núⁿ yā saⁿ'ā Antipas chi 'áámá
caⁿ'ā sa nduudu cuaacu yeⁿ'é na yāāⁿ
naachi canee yááⁿ'n'giiniūⁿ. 14 Naati
vééⁿ nduuvī dendu^u yeⁿ'e chi
contra yeⁿ'ē di. Na yāāⁿ Pérgamo
chi yāāⁿ yeⁿ'e di vééⁿ nguaaⁿ ndís'tií
náⁿ'ā 'iiⁿ'yāⁿ chi nguééⁿ neⁿ'é yā
s'neéⁿ yā yeⁿ'e chi i'téenu yā chi
'cueⁿ Balaam. Ní Balaam miiⁿ
'iiⁿ'yāⁿ chí chi'cueéⁿ yā saⁿ'ā Balac
táácā cuuvi diiⁿ sa chi 'iiⁿ'yāⁿ yeⁿ'e
Israel dinuuⁿndí yā. Ní 'iiⁿ'yāⁿ s'eeⁿ
yeⁿ'e Israel dinuuⁿndí yā taachi

che'é yā dendu^u yeⁿ'e chi 'iiⁿ'yāⁿ
cáávā ofrenda ca'a yā náⁿai yeⁿ'e
santos chi ídolos, ní taachi caⁿ'á
yā ndúú^ucū^u 'aama n'daataaⁿ o 'aama
isáⁿ'ā chi nguééⁿ yeⁿ'é yā. 15 Ní 'tiicá
ntú^u'n vééⁿ nguaaⁿ ndís'tií 'iiⁿ'yāⁿ
chi nguééⁿ neⁿ'é yā s'neeⁿ yā yeⁿ'e
chi i'téenu yā chi ca'cueéⁿ yā yeⁿ'e
'iiⁿ'yāⁿ yeⁿ'e grupo yeⁿ'e nicolaítas.
Ní 'úú^u nguééⁿ inee yiinúⁿ yeⁿ'e chuū^u.
16 Ndaacadáámí dí yeⁿ'e nducuéⁿ'ē
chuū^u. Nduuti chi nguééⁿ diiⁿ di
'túú^ucā ndaa nuúⁿ naachi canee di
ní 'cuuⁿ'máⁿ ndúú^ucū^u 'iiⁿ'yāⁿ s'eeⁿ
ndúú^ucū^u machete chi 'uú^uvī lados
'caāⁿ'i chi canééⁿ cheendí. 17 'Iiⁿ'yāⁿ
chi vééⁿ veéⁿ yā 'caandiveéⁿ yā chi
ngaⁿ'ā Espíⁿritu N'dai yeⁿ'é Ndyuūs
ngii 'iiⁿ'yāⁿ s'eeⁿ yeⁿ'e yáacū^u
s'eeⁿ. 'Iiⁿ'yāⁿ chi cuchéⁿe yā yeⁿ'e
tanducuéⁿ'ē 'úú^u ní ca'á 'iiⁿ'yāⁿ s'eeⁿ
pan chi duuchi maná chi canúúⁿ
n'de'ei. Ní ca'á 'iiⁿ'yāⁿ s'eeⁿ 'áámá
tuū^u cuééⁿ naachi canééⁿ nguūⁿ
'áámá chi duuchi chi ngai. Mar
'áámá 'iiⁿ'yāⁿ nguééⁿ deenúⁿ yā chi
duuchi miiⁿ, dámaāⁿ 'iiⁿ'yāⁿ chi
cuta'á yā tuū^u cuééⁿ miiⁿ deenúⁿ yā
chi duuchi miiⁿ.

**Juan idingú^u'n yā carta 'cū^u
yeⁿ'e 'iiⁿ'yāⁿ yeⁿ'e yāāⁿ Tiatira**

18 Díí, Juan, idingú^u'n di yeⁿ'e
'iiⁿ'yāⁿ ndíí tiiⁿ yeⁿ'e 'iiⁿ'yāⁿ yeⁿ'e
yáacū^u yeⁿ'e yāāⁿ Tiatira: Daiyá
Ndyuūs chi vééⁿ nduutináaⁿ yā
tan'dúú^ucā nguuchi yaⁿ'ā ni ca'a
yā tan'dúú^uca cū^u cuaaaⁿ chi dεεvέ
n'dai ngaⁿ'á yā 'tíicā. 19 Úú^u deenúⁿ
nducuéⁿ'ē chi diiⁿ di. Deenúⁿ chi
dineⁿ'e di 'úú^u, chi i'téenu di 'úú^u, ní
dichiiⁿ've di 'úú^u. Ní vééⁿ paciencia
nanáaⁿ di. Deenúⁿ chi maaⁿ díⁿ nī

ntiiⁿnyuⁿ chi n'deeē n'dáí nguéé ti ntiⁿnyuⁿ yeⁿ'é nī chi vmaāⁿ.
20Naati véé duū'vī dendú'ū contra yeⁿ'ē di. Ndís'tiī ní 'cuaáⁿ nī táⁿā Jezabel chi ngaⁿ'a tá chi chíⁿ chi ngaⁿ'a tá ní nduudu cuaacu yeⁿ'é Ndyuūs. Nginnche'ei tá 'iiⁿyāⁿ chi dichíí'vē 'úú ndúú'cū chí ngí'cueeⁿ tá. Ní ngaⁿ'a tá chí 'iiⁿyāⁿ cuuvi caⁿ'á yā ndúú'cū n'daataá o isaⁿ'ā chi nguéé yeⁿ'é yā ní cuuvi ch'éē yā dendu'ū chi 'iiⁿyāⁿ s'eeⁿ cáávā ofrenda ca'a yā nátai yeⁿ'e santos chi ídolos. **21**'Úú ní ca'á lugar táⁿā miiⁿ chi ndaacadaami tá yeⁿ'e chi diiⁿ tá chí nguéé n'daacā naati nguéé 'cuūⁿ ta ndaacadaami tá yeⁿ'e nducuéⁿ'ē chí diiⁿ tá chi nguéé n'daacā. Ní neⁿ'e tá chi tanáⁿ'ā 'iiⁿyāⁿ dinuuⁿndí yā ndúú'cū tá.
22Maaⁿ ní 'úú dííⁿ chi neéné ngiitā tá miiⁿ ní nducyáácá isaⁿ'ā chí dííⁿ yā tan'dúú'cā chí ngí'cueeⁿ tá neenē 'cueenu yā cuuvi. 'Tíicā maaⁿ ní dííⁿ ndúú'cū nducyáácá yā nduuti chí nguéé ndaacadáámí yā yeⁿ'e chí ngí'cueeⁿ n'daataá míⁿ. **23**Tiicā ntúūⁿ 'úú ní 'caāⁿ'núⁿ nducyaaca 'iiⁿyāⁿ chí dííⁿ yā tan'dúú'cā chí chí'cueeⁿ tá. Ní nducyaaca 'iiⁿyāⁿ yeⁿ'e nducyáácá yaācū caⁿ'á yā cadíínuuⁿ yā chí 'úú chí n'diichí dē'ē vεε chí 'iiⁿyāⁿ nadicadíínuuⁿ yā ndii na staava yeⁿ'é yā. Ní 'úú nadii'vε ndís'tiī tuunu tuunu ca dendu'ū chí dííⁿ nī. **24**Chuū ngaⁿ'á ngii ndís'tiī ndúú'cū tanáⁿ'ā 'iiⁿyāⁿ chí i'téenu yā Ndyuūs ní chí snéē yā na yāāⁿ Tiatira chí nguéé dííⁿ yā tan'dúú'cā chí ngí'cueeⁿ táⁿā miiⁿ. Ní nguéé déenu nī dē'ē chí nuuⁿ'ndi s'eeⁿ chí ch'εete chí yeⁿ'e yááⁿ'nguiinūⁿ. Tan'dúú'cā chí ngaⁿ'a

náⁿ'ā 'iiⁿyāⁿ 'úú ngaⁿ'á chí nguéé cu'neéⁿ táámá dendú'ū chí díí'tūu nanááⁿ ndís'tiī. **25**Naati chííⁿ chí 'āā véé yeⁿ'é nī cundeéⁿ nī cuidado yeⁿ'ē ndii 'úú nindaá nanááⁿ nī. **26**'Iiⁿyāⁿ chí cuchéε yā yeⁿ'e tanducuéⁿ'ē dendu'ū ní nguuvi nguuvi dííⁿ yā tan'dúú'cā 'úú neⁿ'é ndíí cuaaⁿ ná n'giinu, 'úú ní ca'á ntiⁿnyuⁿ 'iiⁿyāⁿ s'eeⁿ chí 'iiⁿntyéⁿ'ē yeⁿ'e nducuéⁿ'ē naciones. **27**Ní caⁿ'a ntiⁿnyúⁿ yā yeⁿ'e 'iiⁿyāⁿ s'eeⁿ tan'dúú'cā chiidá tee yā poder 'úú chí 'úú ngaⁿ'a ntiⁿnyúⁿ yeⁿ'e nducuéⁿ'ē naciones ndúú'cū 'áámá nduucu cūū yeⁿ'é. Ní ndúú'cū nduucu cūū miiⁿ 'cueⁿ'é naciones chí chicheiyei tan'dúú'cā chí naciones ní 'aama vaso yeⁿ'e yáⁿ'āa chí 'cueēēⁿ. **28**Ní 'iiⁿyāⁿ chí cuchεε yā yeⁿ'e tanducuéⁿ'ē 'úú ní ca'á 'iiⁿyāⁿ miiⁿ 'ííⁿnyúⁿ yeⁿ'e nguεetiyaan. **29**'Iiⁿyāⁿ chí véé veéⁿ yā 'caandiveéⁿ yā chí ngaⁿ'ā Espiritu N'dai yeⁿ'é Ndyuūs ngii 'iiⁿyāⁿ s'eeⁿ yeⁿ'e yaācū s'eeⁿ.

Juan idingúuⁿ yā carta 'cūū yeⁿ'e 'iiⁿyāⁿ yeⁿ'e yāāⁿ Sardis

3 Díí Juan, idingúuⁿ di yeⁿ'e 'iiⁿyāⁿ ndíí tiiⁿ yeⁿ'e 'iiⁿyāⁿ yeⁿ'e yāacū yeⁿ'e yāāⁿ Sardis: Chuū ngaⁿ'a Cristo chí véé ndēēchē espíritus yeⁿ'e Ndyuūs ndúú'cū ndēēchē 'ííⁿnyúⁿ s'eeⁿ. 'Úú deenú chíiⁿ chí diiⁿ di. Ní deenú chí 'áará chí 'iiⁿyāⁿ s'eeⁿ deenú yā dii cáávā cosas chí diiⁿ di ti cánduuchi di naati nanááⁿ 'úú dii canéé dí tan'dúú'cā chí n'díí di cucáávā nuuⁿ'ndi yeⁿ'e di. **2**Nandúú'chí dí. Cunéé díitū di ní cu'téenu ca di yeⁿ'e cosas chí véé caati vmaāⁿ nguéé diiⁿ di cuidado yeⁿ'e

nducuéⁿē. Cu'téenu ca di ní nguéé cuuvi cho'ōo yeⁿē chi véé chi yeⁿe di. Ní 'úú n'diichí ntiⁿnyuⁿ chi diiⁿ di. Ní nguéé n'daacā ca nanááⁿ Ndyuūs. ³N'gaacú di yeⁿe chi n'giindiveeⁿ di chi 'iiⁿyāⁿ ch'i'cueeⁿ yā dii. Maaⁿ ní diiⁿ di tan'dúúcā chi 'cueeⁿ di ní ndaacadaami di yeⁿe chi diiⁿ di chi nguéé n'daacā. Ní nduuti chi nguéé diiⁿ di cuidado tuu'mi ní 'úú ndaá tan'dúúcā 'áámá chi duucu ní nguéé cadíínuuⁿ di hora chí ndaá nanááⁿ dii. ⁴Véé duu'vi 'iiⁿyāⁿ nguaaⁿ ndís'tií chi snée yā na yāáⁿ Sardis, 'iiⁿyāⁿ chi nguéé dinuuⁿndí yā tan'dúúcā tanáⁿā 'iiⁿyāⁿ chi dinuuⁿndí yā. 'Iiⁿyāⁿ s'eeⁿ caⁿá yā nduucú ndúúcū catecai cuéé yā ti 'iiⁿyāⁿ s'eeⁿ ní n'dai taaví yā chí cuuvi 'tíicā ndúúcu yā. ⁵'Iiⁿyāⁿ chi cuchéé yā yeⁿe tanducuéⁿē nndaāca yā catecai cuéé yā. Ní 'úú nguéé nadatuūví chi duuchi yā naachi canéé nguūⁿ na libro yeⁿe vida cueⁿe daāⁿmaⁿ. Ní 'úú ní caaⁿmáⁿ chi duuchí yā nanááⁿ chiidá ní nanááⁿ ángeles dendú'ú. ⁶'Iiⁿyāⁿ chi véé veéⁿ yā 'caandiveéⁿ yā chíⁿ chi ngaⁿā Espíritu N'dai yeⁿé Ndyuūs ngii 'iiⁿyāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cūū yeⁿe 'iiⁿyāⁿ yeⁿe yāáⁿ Filadelfia

⁷Díí, Juan, idingúuⁿ ntúūⁿ di yeⁿe 'iiⁿyāⁿ ndii tiiⁿ yeⁿe 'iiⁿyāⁿ yeⁿe yaācū yeⁿe yāáⁿ Filadelfia. Dendu'ú chi 'túúcā ngaⁿá 'iiⁿyāⁿ chi dæve taavi ca yā ní cuaacu yā. 'Iiⁿyāⁿ miiⁿ chi ndéé yā llave yeⁿe David, 'iiⁿyāⁿ miiⁿ taachi nn'guaaⁿ yā puerta mar 'áámá 'iiⁿyāⁿ nguéé cuuvi nn'gaadí yā. Ní taachi nn'gaadí yā 'tiicá ntúúⁿ mar

'áámá 'iiⁿyāⁿ nguéé cuuvi nn'guaaⁿ yā. ⁸'Úú n'diichí tanducuéⁿē chi diiⁿ di. 'Úú n'neeⁿ cucááavā di 'áámá cheendi va'āi chi maaⁿ ní cánda'āi ní mar 'áámá 'iiⁿyāⁿ nguéé cuuvi nn'gaadí yā cheendi va'āi miiⁿ. 'Áará chi véé duu'vi fuerzas yeⁿe di ch'iindiveeⁿ di nduudu cuaacu yeⁿé ní nguéé ndaacadaami di yeⁿé. ⁹'Caandiveeⁿ di yeⁿé. 'Iiⁿyāⁿ s'eeⁿ ní yeⁿe yááⁿnguiinūūⁿ ti ngaⁿá yā nduudu yaadi. Ngaⁿá yā chi 'iiⁿyāⁿ judíos yā chi Israel yā ní nguéé 'túúcā dííⁿ yā tan'dúúcā 'iiⁿyāⁿ judíos yā. Cuin'diichi di. 'Úú idifⁿ chi 'iiⁿyāⁿ s'eeⁿ ní ndaá yā nanaaⁿ di ní caantii'yā yā nanááⁿ ca'a di ní cu'téenu yā dii. Ní 'iiⁿyāⁿ s'eeⁿ cuuvi cadíínuuⁿ yā chi 'úú ní neⁿé dii. ¹⁰Dii ní ndæ di cuidado yeⁿe nuuⁿndi chi ngaⁿá yeⁿe chi cuchéé di, ní cuchéé di. Ní cáávā chuū 'úú ndæé cuidado yeⁿe dii yeⁿe tiempo chi cuchii chi caaⁿmaⁿ ndaá cosas chi n'diichineeⁿ yā dii. Ní cosas miiⁿ ndaa yeⁿe 'iiⁿyāⁿ chi snée yā núúⁿmáⁿ iⁿyeéⁿdí. Ní n'diichineéⁿ nducyaaca 'iiⁿyāⁿ chi s'neeⁿ yā na iⁿyeéⁿdí 'cūū. ¹¹Cuin'diichi di. Niiⁿnuⁿ ndaá nanááⁿ dii. Cundéé ca di cuidado yeⁿē chi véé yeⁿe di ní mar 'áámá 'iiⁿyāⁿ cuuvi cuta'á yā corona chi cuuvi yeⁿe di. ¹²'Iiⁿyāⁿ chi cuchéé yā yeⁿe tanducuéⁿē, 'úú idifⁿ chi 'iiⁿyāⁿ s'eeⁿ 'áámá canéé yā na yaācū yeⁿé tan'dúúcā 'áámá pilar yeⁿe yaācū yeⁿe Ndyuūs, 'tíica yā. Ní 'āā ntéé can'daa yā yeⁿe yaācū miiⁿ. Ní 'úú idingúuⁿ ncheeté yā chí dúúchí Ndyuūs yeⁿé ndúúcū chi duuchi yeⁿe yāáⁿ yeⁿe Ndyuūs yeⁿé. Ní yāáⁿ miiⁿ nguuvi Jerusalén chí ngai chí ndaá yeⁿe va'ai cheeti

nguuvi ní yeⁿe Ndyuūs yeⁿé.

¹³Iiⁿ'yāⁿ chi véé veéⁿ yā 'caandiveéⁿ yā chi ngaⁿ'ā Espíritu N'dai yeⁿé Ndyuūs ngii 'iiⁿ'yāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cūū yeⁿe 'iiⁿ'yāⁿ yeⁿe yāāⁿ Laodicea

¹⁴Díí, Juan, idingúuⁿ di yeⁿe 'iiⁿ'yāⁿ ndii tíiⁿ yeⁿe 'iiⁿ'yāⁿ yeⁿe yaācū yeⁿe yāāⁿ Laodicea: Nduudú 'cūū ní yeⁿe 'iiⁿ'yāⁿ chi nguuví yā Amén chi neⁿe caaⁿ'maⁿ chí cuaacu yā. 'Iiⁿ'yāⁿ miiⁿ chi testigo yā ní ngaⁿ'a cuaacu yā cueⁿe daāⁿ'maⁿ. 'Iiⁿ'yāⁿ miiⁿ ní yeⁿé yā tanducuéⁿ'ē chi Ndyuūs din'dái yā. ¹⁵Úú deenú tanducuéⁿ'ē chi diiⁿ di. Ní díí canee dí tan'dúúⁿcā chi nguéé ndúú 'iiⁿ'nūⁿ di ndíí nguéé ndúú 'iiche di. De'e chúúⁿcā n'daacā cáávā dii ndúúⁿtí chí 'iiⁿ'nūⁿ di o 'iiche di. ¹⁶Cáávā chi dii ní cuūtū di, ní nguéé 'iiⁿ'nūⁿ di, ndíí nguéé ndúú 'iiche di, 'úú ní dííⁿ ndúúⁿcū di tan'dúúⁿcā chi caachí dii yeⁿ'ē na cheendí ti dii tan'dúúⁿcā chi nuūⁿnīⁿ daaíⁿ dii, ní 'tíficā dííⁿ. ¹⁷Díí ní 'túúⁿcā ngaⁿ'a di chi 'cuiica di ní nguéé de'e vee neⁿe di ti neenē n'deēe dendúⁿ'ū yeⁿe di véé. Naati díí nguéé deenu di chi nguéé de'e vee yeⁿe di. Ní ndaachí canée di caati canée di tan'dúúⁿcā chi díí ní pobre di ní nguéé catecai di, ní ngeenáaⁿ di. 'Tíficā canée di. ¹⁸Úú ní teé consejo dii. Cuai di yeⁿe 'úú 'dííⁿ'nguāⁿ chi 'iiⁿ'yāⁿ din'dái yā cáávā nguuchi yaⁿ'ā ní 'ífcú cuuvi cuaacu chi 'cuiica di. Ní cuai di catecai cuéē chi cuⁿ'nuuⁿ di cuerpo yeⁿe maaⁿ di ní nguéé cuuvi 'cuináaⁿ di caavā chi nguéé catecai di. Ní cuai di yiicū ní cuⁿ'neeⁿ di

na nduutináaⁿ di ní 'ífcú cuuvi snaaⁿ di. ¹⁹Úú yaaⁿ'vineé nducyaaca 'iiⁿ'yāⁿ chi idineⁿ'é ní dííⁿ castigar 'iiⁿ'yāⁿ s'eeⁿ. Maaⁿ ní canée chi nndáácádáámí dí yeⁿe chi diiⁿ di chi nguéé n'daacā. Ní serio canee di ndii staava yeⁿe di. ²⁰Cuin'diichi di. 'Úú ní canee cheendi va'āi ní 'cuai 'iiⁿ'yāⁿ. Nduuti chi 'áámá 'iiⁿ'yāⁿ 'caandiveéⁿ yā nduudu yeⁿ'é ní nn'guaaⁿ yā cheendi va'āi caavā 'úú, tuuⁿ'mi ní 'úú cho'ó cuaaⁿ cheeti va'āi ní n'diichí 'iiⁿ'yāⁿ miiⁿ. Ní che'é ndúúⁿcū yā ní 'iiⁿ'yāⁿ miiⁿ che'é yā nduucú. ²¹Iiⁿ'yāⁿ chi cucheē yā yeⁿ'e tanducuéⁿ'ē dendu'ū 'úú ní calá lugar yeⁿ'e yā chi 'cuúndí yā ndúúⁿcū 'úú na trono yeⁿ'é tan'dúúⁿcā chí 'úú chicheé yeⁿ'e tanducuéⁿ'ē dendu'ū ní ch'iindí ndúúⁿcū chiidá na trono yeⁿ'é yā. ²²Iiⁿ'yāⁿ chi véé veéⁿ yā 'caandiveéⁿ yā chi ngaⁿ'ā Espíritu N'dai yeⁿ'é Ndyuūs ngii nducyaaca 'iiⁿ'yāⁿ yeⁿe yaācū s'eeⁿ.

Nducyaáacá yā chí snée yā na va'ai cheeti nguuví dich'eté yā Ndyuūs

4 Chó'oo dendu'ū chi 'túúⁿcā ní cuayiivi ní 'úú n'diichí cuaaⁿ nííⁿ'núⁿ ní miiⁿ canée 'áámá cheendi va'āi yeⁿ'e va'ai cheeti nguuví chi canée candá'āi. Ní ch'iindiveéⁿ 'áámá nduudu chi tan'dúúⁿcā chi n'gæecu trompeta. Ní nduudu miiⁿ dáámá ndúúⁿcū nduudu chi ch'iindiveéⁿ vnnááⁿ vnnaaⁿ. Ní nduudu miiⁿ ní caⁿ'a nduucú 'tíficā: Dii cucheē dí 'múúⁿ ní 'úú ní 'cuuⁿ'míⁿ dii dendu'ū chi cuchii cuayiivi.

²Hora mííⁿ nūⁿ 'úú canee maaⁿ poder Espíritu N'dai yeⁿ'é Ndyuūs ní n'diichí 'áámá trono na va'ai

cheeti nguuvi. Ní Ndyuūs véé yā na trono miiⁿ. ³Iiⁿyāⁿ chi véé yā na trono miiⁿ ní núúⁿmáⁿ cuerpo yeⁿé yā naáⁿ yā tan'dúú^{cā} 'áámá tuūu chi 'áámá ngíí n'gai tan'dúú^{cā} tuūu jaspe ndúú^{cū} tuūu sardio. 'Tíí^{cā} cuerpo yeⁿé yā. Ní nuuⁿmaⁿ ndiivíí cuaaⁿ 'diituú trono miiⁿ canee 'áámá cun'gúúⁿndí tan'dúú^{cā} color yeⁿe tuūu esmeralda. ⁴Ní nuuⁿmaⁿ ndiivíí cuááⁿ 'diituú trono miiⁿ n'diíchí ndiicu cuūuⁿ tronos yeⁿe 'iiⁿntyéⁿé s'eeⁿ naachi véé yā. Ní nducyáá^{cá} yā véé catecaí yā chi cueé. Ní nducyáá^{cá} yā snúúⁿ tííⁿ yā 'áámá corona yeⁿe 'dííⁿnguāⁿ. ⁵Ní yeⁿe trono chi naavtaⁿā can'dáā 'cuai ndúú^{cū} dēeve ndúú^{cū} nduudu. Ní nanááⁿ trono miiⁿ canéé ndúú^{cū} ndēēchē yaⁿā ngiichi chi ndēēchē espíritus yeⁿe Ndyuūs. ⁶Ní canéé ntúúⁿ nanááⁿ trono miiⁿ 'áámá cosa tan'dúú^{cā} nuūⁿníⁿyáⁿā tan'dúú^{cā} 'áámá vidrio chi ngii dēeve n'dai. Ní naavtaⁿā yeⁿe trono miiⁿ ní nuuⁿmaⁿ ndiivii cuaaⁿ 'diituú yeⁿe trono miiⁿ snéé cuūuⁿ 'iiⁿyāⁿ yeⁿé va'ai cheeti nguuvi chi snéé 'yaaⁿ n'dái nduutináaⁿ yā ndii cuááⁿ vmnaaⁿ yā ndii cuááⁿ daamí yā. Ní ndiituú nduutináaⁿ yā núúⁿmáⁿ ch'ete cuerpo yeⁿé yā. ⁷Iiⁿyāⁿ yeⁿe va'ai cheeti nguuvi chi vmnááⁿ vmnaaⁿ tan'dúú^{cā} 'áámá 'yáíⁿyāⁿ cuááⁿ 'tiicá yā. Ndií chííⁿ ndii 'uuví yā tan'dúú^{cā} 'áámá itiindu 'lírⁿ 'tiicá yā. Ní 'iiⁿyāⁿ ndii chííⁿ ndii 'iinú miiⁿ véé naáⁿ yā tan'dúú^{cā} naáⁿ 'iiⁿyāⁿ 'tíí^{cā} yā. Ní ndii chííⁿ ndii cuūúⁿ 'iiⁿyāⁿ ní tan'dúú^{cā} 'íyāa chi nge'e tí na 'yúúné 'tiicá yā. ⁸Ní nduu cuūuⁿ 'iiⁿyāⁿ s'eeⁿ ní véé niyaaⁿ ngeechi yā 'áámá 'aamá yā

ní núúⁿmáⁿ cuááⁿ 'diituú yā ní cuaaⁿ nááⁿ ngeechi yā ní ndiitúú nduuti náaⁿ yā. Nguéé intaavi'tuunuúⁿ yā ndíí nguéé ndúú nguuvi ndíí nguéé ndúú n'gaaⁿ chi caⁿa yā:

Dē'ē chúú^{cā} dēeve yā, dē'ē chúú^{cā} dēeve yā, dē'ē chúú^{cā} dēeve yā, Señor Ndyuūs, chi véé tanducuéⁿé poder yeⁿé yā. 'Iiⁿyāⁿ chi canéé ndii vmnááⁿ vmnaaⁿ 'iiⁿyāⁿ chi maaⁿ canéé yā, ní 'iiⁿyāⁿ chí canéé chí ndaa yā.

⁹Ní ca'áámá ca'áámá vmnéⁿéé chi 'iiⁿyāⁿ s'eeⁿ dich'eté yā 'iiⁿyāⁿ miiⁿ chi véé yā na trono miiⁿ ní dííⁿ yā honrar 'iiⁿyāⁿ miiⁿ ní ca'á yā gracias 'iiⁿyāⁿ miiⁿ chi candúú^{chí} yā cueⁿe daāⁿmaⁿ 'tíí^{cā} diiⁿ yā. ¹⁰Ndu'u ndiicú cuūuⁿ 'iiⁿntyéⁿé candiitín'díí yā nanááⁿ 'iiⁿyāⁿ miiⁿ chi véé yā na trono miiⁿ ní dich'eté yā 'iiⁿyāⁿ chi 'áámá canéé yā cueⁿe daāⁿmaⁿ. Ní 'iiⁿyāⁿ s'eeⁿ s'neeⁿ yā coronas yeⁿe yā nanááⁿ trono miiⁿ ní caⁿa yā 'túú^{cā}:

¹¹Díí Señor chi Ndyuūs yeⁿe yú, díí ní n'dai taavi di chi dich'eté yā dii, ní dííⁿ yā honrar dii, ní ngaⁿá yā chi tanducuéⁿé poder ní yeⁿe di caati dii ní din'dái di tanducuéⁿé dendu'ú chi véé. Ní cáávā chi maaⁿ di neⁿe di din'dái di tanducuéⁿé dendu'ú, 'tíí^{cā} diiⁿ di.

Libro ndúú^{cū} 'iiti cuūchí

5 Ní n'diíchí na ta'a cuaacú yā 'iiⁿyāⁿ chi véé yā na trono miiⁿ 'áámá libro chi tan'dúú^{cā} 'áámá rollo caaca naachi canéé nguūⁿ cuááⁿ cheeti ndii cuaaⁿ dáámí. Ní

libro miiⁿ nduudi ndúúcu ndeēchē sellos. ²Ní n'diichí 'áámá ángel chí véé poder yeⁿé yā. Ní yuudu n'dái 'cai yā ní caⁿ'a yā 'túúcā. ¿Dú'ú chí n'dai taavi ca chí cuuvi nn'guaaⁿ libro 'cūú ní ndiví sellos chí nduudí?

³Naati mar 'áámá 'iiⁿ'yāⁿ yeⁿe va'ai cheeti nguuvi ndíí nguéé mar 'áámá 'iiⁿ'yāⁿ yeⁿe iⁿ'yeeⁿ'dí 'cūú ndíí nguéé ndúú mar 'áámá 'iiⁿ'yāⁿ chí canúúⁿ maaⁿ yáⁿ'āa cuuvi nan'guaáⁿ yā libro miiⁿ ndíí nguéé ndúú cuuvi n'diichí yā libro miiⁿ. ⁴Ní 'úú Juan neené cheēcu taaví ti nguéé ndaaca yā mar 'áámá 'iiⁿ'yāⁿ chí n'dai taavi cá yā chí cuuvi nan'guaaⁿ yā libro miiⁿ ní 'cueeⁿ yā yeⁿ'ē. Ndíí nguéé ndúú cuuvi snaaⁿ yā libro miiⁿ.

⁵Tuu'mi ní 'áámá 'iiⁿ'ntyéⁿ'ē caⁿ'a yā chí yā 'úú: Díí nguéé cuēecu dí. Cuin'díichí dí. Jesucristo chí duuchi 'yáíⁿ'yāⁿ cuáⁿ'áá, chí yeⁿ'e ndaata yeⁿ'e 'iiⁿ'yāⁿ Judá chí yeⁿ'e 'iiⁿ'yāⁿ yeⁿ'e ndaata David, 'iiⁿ'yāⁿ miiⁿ chicheé yā yeⁿ'e tanducuéⁿ'ē ní cuuví nan'guaáⁿ yā libro miiⁿ ní cuuvi cáánteéⁿ yā ndu'u ndeēchē sellos.

⁶Tuu'mi ní n'diichí chí naavtaⁿ'ā yeⁿ'e trono miiⁿ ní naavtaⁿ'ā yeⁿ'e ndu'u cuúuⁿ 'iiⁿ'yāⁿ miiⁿ ní naavtaⁿ'ā yeⁿ'e 'iiⁿ'ntyéⁿ'ē s'eeⁿ n'diichí 'áámá 'iiⁿ'yāⁿ chí nguuvi 'iiti cuūchí chí chééndii yā. Ní n'diichí chí véé seña na cuerpo yeⁿ'e yā chí 'iiⁿ'yāⁿ ch'iⁿ'núⁿ yā 'yā. Ní 'iiⁿ'yāⁿ chí nguuvi 'iiti cuūchí miiⁿ véé ndeēchē duuⁿ'níⁿ'níⁿ yā ní ndeēchē nduutináⁿ yā chí ndeēchē espíritus yeⁿ'é Ndyuūs chí Ndyuūs dicho'ó yā n'úú'máⁿ íⁿ'yeeⁿ'dí. ⁷'Iiⁿ'yāⁿ miiⁿ ní cueⁿ'é yā ní ndaá yā ní sta'á

yā libro miiⁿ yeⁿ'e ta'ā cuaácú yā 'iiⁿ'yāⁿ chí véé yā na trono miiⁿ.

⁸Ní taachi sta'á yā libro miiⁿ ní ndúú cuúuⁿ 'iiⁿ'yāⁿ miiⁿ ndúúcu ndiicú cuúuⁿ 'iiⁿ'ntyéⁿ'ē chintii'yá yā nanááⁿ 'iiⁿ'yāⁿ chí nguuvi 'iiti cuūchí miiⁿ. Ní ca'áámá ca'áámá 'iiⁿ'ntyéⁿ'ē s'eeⁿ candee yā arpas yeⁿ'e yā. Ní ndeé yā chíite yeⁿ'e 'dííⁿ'nguāⁿ ndiituú ndúúcu cúⁿ'úyaa. Ní 'yaaⁿ'miⁿ yeⁿ'e cúⁿ'úyaa miiⁿ chííⁿ chí ngaⁿ'anguá'āa 'iiⁿ'yāⁿ na iⁿ'yeeⁿ'dí 'cūú, 'iiⁿ'yāⁿ chí yeⁿ'e Ndyuūs. ⁹Ní chíitá yā 'áámá canto chí ngai chí 'tíicā:

Díí ní n'dai taavi dí chí cuta'a dí libro miiⁿ ní cáánteⁿ dí sellos yeⁿ'ē caati 'iiⁿ'yāⁿ ch'iⁿ'núⁿ yā díi. Ní díi cáávā yuúúⁿ yeⁿ'e dí cái dí nús'úú chí cuuví 'nū yeⁿ'e Ndyuūs nús'uu. Ní nús'uu ní yeⁿ'e nducyáácá raza yeⁿ'e 'iiⁿ'yāⁿ, ní yeⁿ'ē tanducuéⁿ'ē idioma ní yeⁿ'ē tanducuéⁿ'ē yááⁿ, ní yeⁿ'e tanducuéⁿ'ē nación. 'Tíicā nús'uu.

¹⁰Ní díi ní din'dái dí nús'uu ní díiⁿ dí chí reyes nús'uu, ní díiⁿ dí chí chíiduú nús'uu cucáávā Ndyuūs yeⁿ'e yú. Ní 'iicú cuuvi caaⁿ'maⁿ ntiⁿ'nyuⁿ 'nū nanááⁿ 'iiⁿ'yāⁿ yeⁿ'e iⁿ'yeeⁿ'dí 'cūú.

¹¹Ní cuaaⁿ 'nííⁿ'núⁿ n'diichí ní ch'iindiveéⁿ nduudu yeⁿ'ē 'yaaⁿ n'dái ángeles chí snée yā cuaaⁿ 'diituú yeⁿ'e trono miiⁿ ní yeⁿ'e nduú cuúuⁿ 'iiⁿ'yāⁿ miiⁿ, ní yeⁿ'e 'iiⁿ'ntyéⁿ'ē s'eeⁿ. Ní ángeles ní n'dee n'dái yā chí ngii yā ndiichí millares ndii chííⁿ cuuvi millares ndúúcu millares ndúúcu millares. ¹²Ní yuudu n'dai caⁿ'a nducyaaca s'eeⁿ:

'Iiⁿyāⁿ chi nguuvi 'iiti cuūchī
 chi 'iiⁿyāⁿ ch'iiⁿnúⁿ yā ní n'dai
 taavi cá yā chi nducyaaca
 'iiⁿyāⁿ dich'etē yā. 'Iiⁿyāⁿ
 miiⁿ sta'á yā tanducuéⁿē
 denduⁿ poder ndúúcū
 tanducuéⁿē vaadi 'cuiica
 ndúúcū tanducuéⁿē vaadi
 deenu ndúúcū tanducuéⁿē
 fuerzas ndúúcū tanducuéⁿē
 honra ndúúcū tanducuéⁿē
 vaadi dēve ngí ndúúcū chi
 nducyaaca 'iiⁿyāⁿ dich'etē yā
 'iiⁿyāⁿ miiⁿ.

¹³Ní ch'iindiveéⁿ ntuúⁿ nduudu
 yeⁿe nducyaaca chi snéé na va'ai
 chēeti nguuvī ndúúcū nducyaaca
 chi snéé vmaāⁿ yāⁿāa 'cūū ndúúcū
 nducyaaca chi snéé maaⁿ yāⁿāa
 ndúúcū nducyaaca chi snéé ná
 nuūⁿnīⁿyāⁿā, nducyaaca chi véé
 yeⁿe nducueⁿē chi véé ní ngiita yā
 'tíicā:

Cueⁿe daāⁿmaⁿ cueⁿe daāⁿmaⁿ
 dich'etē 'nū dii ní díiⁿ 'nū
 honrar dii. Ní caⁿa 'nū chi
 vaadi dēve ngii ndúúcū
 poder ní yeⁿé 'iiⁿyāⁿ chi
 véé yā na trono miiⁿ ní yeⁿé
 'iiⁿyāⁿ chi nguuvī 'iiti cuūchī.

¹⁴Ní ndu'u cuūuⁿ 'iiⁿyāⁿ s'eeⁿ ní
 caⁿa yā: Tíicā cuuvi. Ní ndu'u
 ndiichi cuūuⁿ 'iiⁿntyéⁿē chintii'yā
 yā ní s'téenu yā 'iiⁿyāⁿ chi 'áámá
 canéé yā cueⁿe daāⁿmaⁿ.

Yeⁿe ndēēchē sellos

6 Cuayiivi ní ndiichí taachi
 'iiⁿyāⁿ chi nguuvī 'iiti cuūchī
 nan'guáaⁿ yā 'áámá chéé sello yeⁿe
 chi naachi ndēēchē sello yeⁿe libro
 miiⁿ. Ní ch'iindiveéⁿ nduudu yeⁿe
 'áámá chéé 'iiⁿyāⁿ yeⁿe chi cuúⁿ

yā chi canduuchi. Ní neené diitūu
 n'gai yā tan'dúúcā daavi ní caⁿa yā:
 Cuchí di ní n'diichi di.

²Úú ní n'diichí ní míⁿ cánéé
 'yúudūu cuéē ndúúcū 'áámá saⁿā
 candúu sa 'iiti miiⁿ. Ní ndēe sa
 'áámá arco na ta'a sa. Ní ca'a yā
 'áámá corona saⁿā miiⁿ ní can'daā
 sa chi 'cuuⁿmiⁿ sa. Ní diiⁿ sa chí
 cuchee sa yeⁿe enemigo yeⁿe sa.

³Ní taachi 'iiⁿyāⁿ chi nguuvī
 'iiti cuūchī nan'guaaⁿ yā ndii chíⁿ
 ndii 'úúví sello yeⁿe libro miiⁿ
 ch'iindiveéⁿ nduudu yeⁿe ndii chíⁿ
 ndii 'uuvī 'iiⁿyāⁿ chí naachi cuúⁿ
 yā, ní caⁿa yā: Cuchí di ní n'diichi
 di.

⁴Tuu'mi ní n'diichí. Can'daā táámá
 'yúudūu chi cuá'a tī ndúúcū 'áámá
 saⁿā candúu sa 'iiti miiⁿ. Ní saⁿā
 miiⁿ sta'a sa 'áámá machete chí
 ch'ēete chí 'uūví lados 'caāiⁿ chi
 táámá yā ca'a sa. Ní saⁿā miiⁿ ndēe
 sa poder chi diitūu miiⁿ chí diví
 sa vaadi 'diíiⁿ yeⁿe iⁿyeeⁿdí 'cūū ní
 'íicú 'iiⁿyāⁿ yeⁿe iⁿyeeⁿdí 'cūū caⁿá
 yā 'caaⁿnúⁿ yā 'áámá yā taama yā.

⁵Ní taachi 'iiⁿyāⁿ chi nguuvī 'iiti
 cuūchī nan'guaaⁿ yā ndii chíⁿ ndii
 'ínú sello ch'iindiveéⁿ nduudu yeⁿe
 ndii chíⁿ ndii 'ínú 'iiⁿyāⁿ miiⁿ chí
 caⁿa yā 'túúcā: Cuchí di ní n'diichi
 di. Ní n'diichí 'áámá 'yuūdūu cuáiⁿ.
 Ní saⁿā chí candúu sa 'yuūdūu miiⁿ
 ndēe sa 'áámá cūū caadi na ta'a sa.
⁶Ní ch'iindiveéⁿ nduudu naavtáⁿā
 yeⁿe na cuūuⁿ 'iiⁿyāⁿ s'eeⁿ chí
 caⁿa 'tíicā: 'Áámá kilo yeⁿe trigo ní
 nditiiⁿyuⁿ caadi, ní 'iiⁿnū kilos yeⁿe
 cebada ní nditiiⁿyuⁿ caadi. Nguéé
 diiⁿ di daño yeⁿe aceite, ndíí nguéé
 ndúú yeⁿe vino ti nduu 'uuvī naaⁿ
 ní nduuví ndēee n'dái.

⁷Ní taachi 'iiⁿyāⁿ chi nguuvi 'iiti cuūchī miiⁿ nan'guaaⁿ yā ndii chííⁿ ndíí cúūⁿ sello miiⁿ ch'iindiveéⁿ nduudu yeⁿe 'iiⁿyāⁿ chi ndii chííⁿ ndíí cúūⁿ 'iiti miiⁿ chi caⁿ'a 'túúcā: Cuchíí di ní n'diichi di.

⁸N'diichí ní snaáⁿ 'áámá 'yúúdūu cuaaaⁿ d̄eevé ndúúcū saⁿ'ā chi cundúu sa 'yúúdūu miiⁿ. Saⁿ'ā miiⁿ ní nguuvi sa vaadī n'gii. Ní cuaaⁿ daami sa cuchíí taama saⁿ'ā chi mensajero yeⁿe vaadī n'gíí chí tá'āa ní nguain'dai almas yeⁿe 'iiⁿyāⁿ chi n'díí. Tuu'mi ní 'iiⁿyāⁿ ca'á yā poder saⁿ'ā s'eeⁿ yeⁿe 'áámá cuarto parte yeⁿe yáⁿ'āa yeⁿe iⁿ'yeeⁿdí 'cūū chi saⁿ'ā s'eeⁿ diiⁿ sa caandaá s'eeⁿ. Ní 'íícú ch'iíⁿnūⁿ sa 'iiⁿyāⁿ ndúúcū machete chi 'uūví lados 'caāíⁿ ní ndúúcū 'áámá vaadī cuiicu ní ndúúcū ca'ai ní ndúúcū 'iiti taaⁿ. Ní 'tíícā saⁿ'ā s'eeⁿ ch'iíⁿnūⁿ sa 'iiⁿyāⁿ.

⁹Ní taachi 'iiⁿyāⁿ chi nguuvi 'iiti cuūchī nan'guaaⁿ yā ndii chííⁿ ndii nyuⁿ'u sello miiⁿ, n'diichí mááⁿ nátaí ní n'diichí almas yeⁿe 'iiⁿyāⁿ chi n'díí. Ní 'iiⁿyāⁿ ch'iíⁿnūⁿ yā 'iiⁿyāⁿ s'eeⁿ cáávā chi ngaⁿ'á yā nduudu cuaacu yeⁿe Ndyuūs ní cáávā chi ngaⁿ'a cuaacú yā yeⁿe Ndyuūs. ¹⁰Ní almas yeⁿe 'iiⁿyāⁿ s'eeⁿ yuudu n'dái 'caí yā ní caⁿ'a yā: N'dii Señor chi véé tanducuéⁿ poder yeⁿe nī, n'dii chi d̄eeve nī ní cuaacú nī, ñndíí d̄e' tiempo caⁿ'á nī n'diichí nī nuuⁿndi yeⁿe 'iiⁿyāⁿ chi snée yā iⁿ'yeeⁿdí 'cūū ní dííⁿ nī castigar 'iiⁿyāⁿ s'eeⁿ cáávā chi ch'iíⁿnūⁿ yā núsuu?

¹¹Ní 'iiⁿyāⁿ miiⁿ ca'á yā 'áámá 'áámá yā catecai cuéé yā. Ní 'iiⁿyāⁿ miiⁿ ngaⁿ'á yā 'tíícā: Ndís'tií ní ntaavi'tuunúúⁿ nī 't̄e 't̄éé cá ndíí taachi 'iiⁿyāⁿ yeⁿe iⁿ'yeeⁿdí 'cūū

'caaⁿ'núⁿ yā tanáⁿ'ā ca 'iiⁿyāⁿ chi diiⁿ ntiíⁿnyúⁿ yeⁿe Cristo, 'iiⁿyāⁿ chi hermanos yeⁿ'é nī. Ní canéé chi 'cuūvi yā tan'dúúcā ndís'tií chííⁿ.

¹²Ní n'diichí 'iiⁿyāⁿ chi nguuvi 'iiti cuūchī taachi nan'guaaⁿ yā ndii chííⁿ ndii niyaaⁿ sello miiⁿ. Ní n'diichí chi díítūu n'dái nuⁿ'u yáⁿ'āa yeⁿ'ē iⁿ'yeeⁿdí 'cūū. N'diichí 'yáⁿ'ā miiⁿ chíí tan'dúúcā chi cuáiⁿ catecai yā chi cuáiⁿ yeⁿe luto. Ní 'iiyū miiⁿ ní nduuví cua'āa tan'dúúcā yuūúⁿ.

¹³Ní 'ííⁿnyúⁿ s'eeⁿ yeⁿe nanguuvi ní sn'daā ndii na yáⁿ'āa. Ní tan'dúúcā chi ingéé táá n'guíí yáⁿ'á yeⁿe n'guíídii taachi ndaā 'áámá 'yúúné tááⁿ 'tíícā sn'daā 'ííⁿnyúⁿ s'eeⁿ. ¹⁴Ní nanguuvi ní ch'iíⁿu yeⁿ'ē ní nduuvi 'lííⁿ tan'dúúcā chi n'geēcu yú 'áámá caaca. Ní 'áámá 'áámá yiicū ndúúcū 'áámá 'áámá isla ní nuⁿ'u yeⁿe na lugar yeⁿ'ē. ¹⁵Ní 'iiⁿyāⁿ yeⁿ'ē iⁿ'yeeⁿdí 'cūū, reyes ndúúcū 'iiⁿyāⁿ chí ch'ēete ndúúcū 'iiⁿyāⁿ 'cuiica ndúúcū 'iiⁿyāⁿ comandantes ndúúcū 'iiⁿyāⁿ chí véé poder yeⁿ'é yā ndúúcū 'iiⁿyāⁿ chí 'áámá dííⁿ yā ntiíⁿnyuⁿ yeⁿ'ē iiví yā ndúúcū 'iiⁿyāⁿ chí libre yā, nducyáácá yā ch̄eeti núúⁿ n'de'ei yā na yiivi yáávā ní nguááⁿ na tuūu yeⁿ'ē yiicū. ¹⁶Ní 'iiⁿyāⁿ s'eeⁿ caⁿ'a yā chíi yā icyáⁿ'ā ndúúcū tuūu: Ndís'tií icyáⁿ'ā ndúúcū tuūu, cun'dáá nduú nī vmnaaⁿ yeⁿ'ē nús'uu ní cunūúⁿ n'dé'ei nī nús'uu yeⁿ'ē nanááⁿ Ndyuūs chí véé yā na trono miiⁿ ní yeⁿ'ē castigo chí neené díitūu n'dai chí Jesucristo chí nguuvi 'iiti cuūchí t̄eé yā nús'uu.

¹⁷Caati 'āa ndaā nguuvi ch'ēete miiⁿ taachi Ndyuūs ca'a yā castigo 'iiⁿyāⁿ s'eeⁿ ní ñDu'ū cuuvi cuchéé castigo 'cūū?

Yeⁿé 'iiⁿyāⁿ chi señalado yā
yeⁿe tribus yeⁿe 'iiⁿyāⁿ Israel

7 N'diichí dendú'ū chi 'túúcā,
ní cuayiivi 'úú n'diichí cuūⁿ
ángeles chi chééndii yā ndu'u cuuúⁿ
esquinas yeⁿé iⁿyeeⁿdí 'cūū. Ní
ángeles s'eeⁿ índεenee yā ndii chííⁿ
ndii cuuúⁿ 'yúúné yeⁿe yáⁿā 'cūū.
Ní 'íicú 'yúúné s'eeⁿ nguéé chéenū
diituú na yáⁿā ndíí nguéé ndúú
vmnaaⁿ mar 'áámá nuūⁿiⁿyáⁿā,
ndíí nguéé ndúú vmnaaⁿ mar 'áámá
yáⁿā. ²Ní n'diichí ntuúⁿ táámá
ángel chi cuchii yā naachi can'daa
'yáⁿā. Ní ndεε yā na ta'a yā 'áámá
sello yeⁿé Ndyuūs chí canduuchi.
Ní ángel miiⁿ yúúúú n'dái ngaⁿa
yā ndu'u cuūⁿ ángeles chi sta'á
yā poder chi ditiinú yā chi dííⁿ yā
daño na yáⁿā 'cūū ndúúúú ná
nuuⁿiⁿyáⁿā.

³Ní ángel miiⁿ ngaⁿá yā 'túúcā:
Ndís'tií ángeles, nguéé dííⁿ nī daño
yeⁿe yáⁿā 'cūū, ndíí nguéé ndúú
yeⁿe nuūⁿiⁿyáⁿā, ndíí nguéé ndúú
yeⁿe yáⁿā ndíí taachi s'nuúⁿ 'nū
'áámá sello yeⁿe Ndyuūs na nchéetē
'iiⁿyāⁿ chi dichíí'vē Ndyuūs yeⁿe yú.

⁴Ní ch'iindiveeⁿ chi duuchi
'iiⁿyāⁿ chi chií sellado yā ní ngii
yā 'áámá ciento 'uūvī ngεécú
cuūⁿ mil 'iiⁿyāⁿ chi 'iiⁿyāⁿ yeⁿe
nducuéⁿē tribus yeⁿe ndaata yeⁿe
'iiⁿyāⁿ Israel. ⁵'Iiⁿyāⁿ yeⁿe tribu
yeⁿe ndaata saⁿā Judá ní ndíí yā
sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Rubén
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Gad ní ndíí yā sellado yā
ndiichúúví mil. ⁶'Iiⁿyāⁿ yeⁿe tribu
yeⁿe ndaata saⁿā Aser ní ndíí yā

sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Neftalí
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Manasés ní ndíí yā sellado yā
ndiichúúví mil. ⁷'Iiⁿyāⁿ yeⁿe tribu
yeⁿe ndaata saⁿā Simeón ní ndíí yā
sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā Leví
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Isacar ní ndíí yā sellado yā
ndiichúúví mil. ⁸'Iiⁿyāⁿ yeⁿe tribu
yeⁿe ndaata saⁿā Zabulón ní ndíí
yā sellado yā ndiichúúví mil. 'Iiⁿyāⁿ
yeⁿe tribu yeⁿe ndaata saⁿā José
ní ndíí yā sellado yā ndiichúúví
mil. 'Iiⁿyāⁿ yeⁿe tribu yeⁿe ndaata
saⁿā Benjamín ní ndíí yā sellado yā
ndiichúúví mil.

**Nducyáácá 'iiⁿyāⁿ chi
véé catecai cuéé yā**

⁹Cuayiivi ní n'diichí n'dee
n'dái 'iiⁿyāⁿ yeⁿe tanducuéⁿē
nación, yeⁿe tanducuéⁿē raza, yeⁿe
'iiⁿyāⁿ yeⁿe tanducuéⁿē daveedi
ndúúúú tanducuéⁿē davaacu chi
n'dááⁿ, yeⁿe tanducuéⁿē yááⁿ yeⁿe
tanducuéⁿē 'iiⁿyāⁿ chi véé na
iⁿyeeⁿdí 'cūū. Ní nducyaaca 'iiⁿyāⁿ
s'eeⁿ chééndii yā nanááⁿ trono miiⁿ
ní nanááⁿ 'iiⁿyāⁿ chi nguuvi 'iiti
cuūchī. Ní mar 'áámá 'iiⁿyāⁿ nguéé
cuuvi didúúché yā. Nducyáácá
yā véé catecai yā cuéé ní ndée yā
yiiⁿnyúⁿ na ta'á yā. ¹⁰Ní nducyáácá
yā 'cai yā yiicú yā ní caⁿa yā 'tíicā:

Ndyuūs chi véé yā na trono miiⁿ
ndúúúú Cristo chi nguuvi 'iiti
cuūchī nadanguáⁿ'ai yā s'uúúⁿ.

¹¹Ní nducyaaca ángeles s'eeⁿ
ní ch'εete yā núúⁿmáⁿ 'diituú

yeⁿe trono miiⁿ ndúúcu
ndu^u ndiicú cuúuⁿ 'iiⁿntyéⁿē
ndúúcu ndu^u cuúuⁿ 'iiⁿyāⁿ
s'eeⁿ. Ní nducyaaca yā
candiitín'dii yā nanááⁿ 'iiⁿyāⁿ
chi véε yā na trono miiⁿ ní
dich'εεté yā Ndyuūs. ¹²Ní
'tíicā caⁿa yā:

'Tíicā va. Di'chεεte yú Ndyuūs
chi εεve ngii yā chí deenu
yā tanducuéⁿē dendu^u chi
véé. Caⁿa yú gracias Ndyuūs.
Ní diiⁿ yú honrar 'iiⁿyāⁿ. Ní
nducuéⁿē poder ndúúcu
nducuéⁿē fuerzas ní yeⁿe
yā. Ní 'tíicā canéé Ndyuūs
yeⁿe yú cueⁿe daāⁿmaⁿ cueⁿe
daāⁿmaⁿ. 'Tíicā.

¹³Cuayiivi ní 'áámá 'iiⁿntyéⁿē
nan'gueεcútaⁿa yā ní itiinguuneéⁿ
yā 'úú: ¿Dú'u rá 'iiⁿyāⁿ chi véé
catecai cuéε yā ní tíf chiicá yā?

¹⁴Ní 'úú ní ngaⁿá: N'dii, Señor,
deenú nī yeⁿe yā. Tuu'mi ní
'iiⁿntyéⁿē miiⁿ caⁿa yā: 'iiⁿyāⁿ s'eeⁿ
ní chiica yā yeⁿē chi ch'eenu taaví
yā chiī ní 'āā deevé yā catecai yā
ndúúcu yuuⁿ yeⁿe Cristo chi
nguuvi 'iiti cuūchī. ¹⁵Ní cáávā chuū
'iiⁿyāⁿ s'eeⁿ snéε yā nanááⁿ Ndyuūs
chi véε yā na trono yeⁿé yā. Ní
dichíí'vε yā Ndyuūs ndii nguuvi
ndii n'gaaⁿ na yáacū yeⁿe yā. Ní
'iiⁿyāⁿ chi véε yā na trono miiⁿ ní
canéé yā miiⁿ ní candεé yā cuidado
nducyaaca 'iiⁿyāⁿ s'eeⁿ. ¹⁶Ní 'iiⁿyāⁿ
s'eeⁿ 'āā ntéé cuuvi cuicú yā, ní
'āā ntéé cuuvi yaācá yā. Ní 'āā ntéé
cundāā yaⁿā vmnaaⁿ yeⁿe yā ndíí
nguéeé ndúú cuuvi cuucu 'iiⁿyāⁿ
ndúúcu yaⁿā. ¹⁷Caati 'iiⁿyāⁿ chi
nguuvi 'iiti cuūchī chi véε yā na
trono miiⁿ ní dííⁿ yā cuidado 'iiⁿyāⁿ

s'eeⁿ tan'dúúcā chi 'iiⁿyāⁿ s'eeⁿ ní
'iiti cuūchī yeⁿé yā. 'Tíicā dííⁿ yā.
Ní can'dáá naaⁿ yā ní 'cuuⁿmíⁿ yā
'iiⁿyāⁿ s'eeⁿ naachí candaā nuūⁿnīⁿ
yeⁿe vida cueⁿe daāⁿmaⁿ. Ní
Ndyuūs nadidεεvé yā tanducuéⁿē
nuūⁿnīⁿ nduutināaⁿ yā.

**Sello chi ndii chííⁿ ndíí ndεēchē
ndúúcu incensario yeⁿe 'dííⁿnguāaⁿ**

8 Ní taachi 'iiⁿyāⁿ chi nguuvi
'iiti cuūchī nan'guaaⁿ yā ní
divíi yā ndii chííⁿ ndíí ndεēchē
sellos miiⁿ yeⁿe libro miiⁿ tuu'mi ní
chó'oo tan'dúúcā maⁿa hora chí chiī
'diiíⁿ canéé na va'ai chεeti nguuvi.
²Tuu'mi ní n'diichí chi ndu^u ndεēchē
ángeles chi chééndii yā nanááⁿ
Ndyuūs. Ní ángeles sta'á yā 'áámá
trompeta 'áámá 'aamá yā yeⁿe
'iiⁿyāⁿ miiⁿ chi ca'á yā trompetas.
³Ní cuayiivi táámá ángel chi ndεe
yā 'áámá incensario yeⁿe 'dííⁿnguāaⁿ
ní ndaa yā nanááⁿ nátai yeⁿe
'dííⁿnguāaⁿ ní chééndii yā miiⁿ. Ní
ángel miiⁿ ní sta'á yā n'deeε n'dái
cúⁿúyaa. Ní ca'á yā cáávā ofrenda
dáámá ndúúcu chi ngaⁿ'angua'á yā
'iiⁿyāⁿ chi yeⁿé Ndyuūs. Ní s'néeⁿ
yā incienso nanááⁿ nátai yeⁿe
'dííⁿnguāaⁿ chi canéé nanááⁿ trono
miiⁿ. ⁴Ní 'yááⁿmíⁿ yeⁿē cúⁿúyaa
chí canéé na ta'a ángel miiⁿ ndúúcu
yeⁿe chi ngaⁿ'angua'a 'iiⁿyāⁿ yeⁿe
iⁿ'yeēⁿdí 'cūū chi yeⁿe Ndyuūs
ní dáámá cucheε nanááⁿ Ndyuūs.
⁵Tuu'mi ní ángel miiⁿ sta'á yā
incensario yeⁿe 'dííⁿnguāaⁿ chiitú
yā ndúúcu nduucyaⁿā yeⁿe nátai
miiⁿ. Ní chingée yā vmnaaⁿ yáⁿāa
yeⁿe iⁿ'yeeⁿdí 'cūū. Ní ndaa daavi
chi diituu n'gεεcūū ndúúcu deεve
yeⁿe 'cuai ndúúcu chi 'nuⁿu yáⁿāa.

Yeⁿe trompetas

⁶Ní ndu'u ndeēchē ángeles chi ndée yā trompetas ch'etinéé yááⁿ yā chi di'cuεécú yā trompetas yeⁿé yā.

⁷Ní ángel chi vmnááⁿ vmnaaⁿ di'cuεécú yā trompeta yeⁿe yā ní chingéē vmnaaⁿ yáⁿáa yuūuⁿ ndúúcu nguuchi yaⁿá ndístáⁿá ndúúcu yuūúⁿ. Ní chiichi 'iinū parte yeⁿe yáⁿáa yeⁿe iⁿ'yeeⁿdí 'cūū ndúúcu 'iinū parte yeⁿe yáⁿá chi véé. Dáámá chiichi ndúúcu 'iinū parte yeⁿe yáⁿá ndúúcu nducuéⁿē yaātā cueēe yéⁿē.

⁸Tuu'mi ní ndii chííⁿ ndii 'úúví ángel di'cuεécú yā trompeta yeⁿe yā ní n'diichí 'áámá cosa tan'dúúca 'áámá yiicū ch'eté chí ngiichi chí 'áámá 'iiⁿyāⁿ chεécú yā yeⁿe va'ai cheeti nguūvi. Ní sndaā vmnaaⁿ yeⁿe nuūⁿníⁿyáⁿá. Ní yeⁿē iⁿ'yeeⁿdí 'cūū ná 'iinū parte yeⁿe nuūⁿníⁿyáⁿá nduuvi yuúúⁿ. ⁹Ní ch'ii 'áámá 'iinū parte yeⁿe 'iiti chí véé cheeti nuūⁿníⁿyáⁿá miiⁿ ndúúcu 'iinū parte yeⁿe nducuéⁿē barcos chí chiica vmnaaⁿ nuūⁿníⁿyáⁿá ní ntūvíí.

¹⁰Tuu'mi ní ángel ndii chííⁿ ndii 'iinū miiⁿ di'cuεécú yā trompeta yeⁿe yā ní sndaā 'áámá 'ííⁿnyúⁿ ch'εete ca yeⁿē nanguuvi tan'dúúca 'áámá tááⁿ yáácá chí ngiichi. Ní sndaā vmnaaⁿ yeⁿe 'iinū parte yeⁿē yíícú s'eeⁿ ndúúcu nuūⁿníⁿ chí can'daā chí véé na iⁿ'yeeⁿdí 'cūū. ¹¹Ní 'ííⁿnyúⁿ ch'εete ca miiⁿ ní chí duuchi Ajenjo chí neⁿe caaⁿmaⁿ chí yaaá. Ní 'iinū parte yeⁿe nuūⁿníⁿ yeⁿe yiicū ndúúcu nuūⁿníⁿ chí can'daā ní nduūvi Ajenjo chí yaaá.

Ní neené 'yaaⁿ 'iiⁿyāⁿ ch'ii yā chí chíⁿ yā nuūⁿníⁿ miiⁿ tí neené yaaá nuūⁿníⁿ miiⁿ.

¹²Tuu'mi ní ángel ndii chííⁿ ndii cuūuⁿ di'cuεécú yā trompeta yeⁿe yā ní 'iinū parte yeⁿe 'yáⁿá nca'ái ndúúcu 'iinū parte yeⁿē 'ííyū ndúúcu 'iinū parte yeⁿe 'ííⁿnyúⁿ. Ní 'íícú 'iinū parte yeⁿe dendu'u chí 'túuca ní chii maāiⁿ. Ní nguéé canuuⁿ dεeve yeⁿē na 'iinū parte yeⁿe nguuvi. 'Tiicá ntúūⁿ n'gaaⁿ.

¹³Tuu'mi ní n'diichí 'áámá ángel tan'dúúca 'íí'yāa ní n'giindiveéⁿ chí n'gai yā naachi cueⁿe yā naavtaⁿá nanguuvi. Ní ngaⁿa yuúú yā 'tíicā: De'ē chúúca ya'ái, de'ē chúúca ya'ái, de'ē chúúca ya'ái yeⁿé 'iiⁿyāⁿ chí snée yā na yáⁿáa yeⁿe chí cuuvi taachi tá'iiⁿ ángeles caⁿá yā di'cuεécú yā trompetas yeⁿé yā.

9 Cuayiivi ní n'diichí ndíí nyuⁿu ángel miiⁿ di'cuεécú yā trompeta yeⁿe yā ní n'diichí 'áámá 'ííⁿnyúⁿ chí chiicā nanguuvi ní chiya na yáⁿáa. Ní 'áámá 'iiⁿyāⁿ ndée yā llave yeⁿe abismo chí 'áámá yiive yáⁿáa ch'εeté chí nan'guāāⁿ yáaⁿnūuⁿ n'dái. Ní 'áámá ángel chí nguéé n'daacā ca'a yā llave miiⁿ na ta'a 'ííⁿnyúⁿ miiⁿ. ²Ní ángel miiⁿ n'guaaⁿ yā yiive yáⁿáa ní can'dáá 'yaaⁿmiⁿ yeⁿē tan'dúúca 'yaaⁿmiⁿ chí can'daā yeⁿē 'áámá horno ch'εete. Ní 'yaaⁿmiⁿ miiⁿ chí can'daā yeⁿē yiivé miiⁿ ní diiⁿ chí nduuvi maāiⁿ na 'yáⁿá ndúúcu 'yúúné. ³Ní yeⁿē 'yaaⁿmiⁿ miiⁿ can'daā langostas na yáⁿáa. Ní 'iiti s'eeⁿ ní taáⁿ tí, ní chingaá tí. Ní tan'dúúca 'iiti dáⁿái díⁿ tí, 'tíicā cuuvi díⁿ tí. ⁴Ní 'iiⁿyāⁿ dich'óo yā langostas chí nguéé díⁿ tí daño yeⁿē yaātā chí véé

na yaⁿāa ndúúcu mar 'áámá naaⁿ
 chi yaātā cueeé ndíí mar 'áámá
 yaⁿá, naati dámaāⁿ cuuvi dííⁿ tī
 dañó 'iiⁿyāⁿ chi nguéé ndee yā sello
 yeⁿe Ndyuūs ná ncheeté yā. ⁵Naati
 caⁿá yā chii yā langostas chi nguéé
 cuuvi 'caaⁿnúⁿ tī 'iiⁿyāⁿ s'eeⁿ naati
 cuuvi dííⁿ tī chí 'cueenu yā cuuvi
 chi ya'ai cá yā cheeti nyúⁿú 'ííyú. Ní
 dííⁿ tī chi ya'ai cá yā tan'dúúca chi
 ya'ai ca 'iiⁿyāⁿ taachi cá'a 'iiti daⁿāī
 'iiⁿyāⁿ. ⁶Ní nguuvi s'eeⁿ ní 'iiⁿyāⁿ
 yeⁿe iⁿ'yeeⁿdí 'cūū in'nuúⁿ yā taacā
 chi cuuvi 'cuūví yā tī neⁿe yā chi
 'cuūví yā, naati nguéé cuuvi 'cuūví
 yā.

⁷Ní langostas miiⁿ ní tan'dúúca
 'aama 'yúúduu chi canee listo tī
 chi 'cuuⁿmáⁿ tī 'tíicā langostas
 miiⁿ. Na tííⁿ tī cánduū cosa
 tan'dúúca corona yeⁿe 'dííⁿnguāⁿ.
 Ní naáⁿ tī ní tan'dúúca nááⁿ 'iiⁿyāⁿ.
⁸Ní yuūdūū tííⁿ tī tan'dúúca
 yuūdūū tííⁿ n'daataá. Ní 'diiⁿ'yuⁿ
 tī tan'dúúca 'diiⁿ'yuⁿ 'yáíⁿyāⁿ
 cuáⁿáá. ⁹Ní snúⁿ cuerpo yeⁿe tī
 catecai tan'dúúca catecai cūū chi
 armadura cūū yeⁿe soldado. Ní
 n'gégécú ngeechi tī tan'dúúca chi
 n'gēecu 'yaaⁿ n'dái carros ndúúcu
 'yaaⁿ n'dái 'yúúduu chi ngéenu tī
 ndee tī carro yeⁿe tī tan'dúúca
 chi ngéenu tī cueⁿe tī neⁿe chí
 'cuuⁿmáⁿ yā. ¹⁰Ní véé nduucudaⁿai
 tī tan'dúúca nduucudaⁿai 'iiti daⁿāī
 ní vee 'iini ch'ēete na nduucudaⁿai
 tī. Ní ndúúcu 'iini ch'ēete yeⁿe
 nduucudaⁿai tī chi dííⁿ tī dañó chi
 ch'eenu yā chii cheeti nyúⁿú 'ííyú.
¹¹Ní canéé 'áámá ángel ndíí tiiⁿ
 yeⁿe 'iiti s'eeⁿ, chííⁿ chí ángel yeⁿe
 yiive yáⁿāa miiⁿ. Ní ángel miiⁿ chi
 duuchi Abadón na nduudu hebreo,

ní Apolión ná nduudu griego chi
 neⁿe caaⁿmaⁿ 'iiⁿyāⁿ chi nada'tuūví
 tanducuéⁿē.

¹²Maaⁿ ní chó'oo 'áámá vaadi
 ya'āi chi canéé chi chó'oo naati véé
 na 'uūví vaadi ya'āi chi canéé chi
 cho'oo.

¹³Tuu'mi ní ndii chííⁿ ndii niyaaⁿ
 ángel miiⁿ idi'cuēcú yā trompeta
 yeⁿe yā ní ch'iindiveéⁿ 'áámá
 nduudu chi cuchii naavtaⁿā yeⁿe
 chi cuūⁿ nííⁿniⁿ tī chi adorno yeⁿe
 nátaí yeⁿe 'diiⁿnguāⁿ chi canéé
 nanááⁿ Ndyuūs naachi dich'ēeté yā
 Ndyuūs. ¹⁴Ní nduudu miiⁿ caⁿa
 chii ndii niyaaⁿ ángel miiⁿ chi ndeé
 yā trompeta yeⁿe yā: Dii, ángel,
 n'daatíí di ndu'u cuūⁿ ángeles
 chi snée i'yúú yā niiⁿnuúⁿ na yíicú
 ch'ēete chí nguuvi Eufrates.

¹⁵Ní nín'daatíí yā ndú'ū cuūⁿ
 ángeles s'eeⁿ caati cuuvi 'caāⁿnuⁿ yā
 'iinū parte yeⁿe 'iiⁿyāⁿ yeⁿe iⁿ'yeeⁿdí
 'cūū. Ní canéé listo yā hora yeⁿe.

¹⁶Ní ch'iindiveéⁿ chi cheē dúúché
 yā soldados chi sndúu sa 'yuūdūu
 chí ngii sa tan'dúúca 'uuví ciento
 millones.

¹⁷Ní 'tíicā n'diichí 'yuūdūu s'eeⁿ
 taachi 'úú, Juan, cueⁿe ndúúcu
 espíritu yeⁿe. Ní 'iiⁿyāⁿ chi sndúu
 yā 'yúúduu s'éeⁿ véé catecai yā chi
 armadura yeⁿe pecho yeⁿe yā ní
 color cuáⁿā tan'dúúca chi nguuchi
 yaⁿā ndúúcu color cueeé nanguuvi
 ndúúcu color cuaaáⁿ. Ní 'yúúduu
 s'eeⁿ ní tííⁿ tī tan'dúúca tííⁿ 'yáíⁿyāⁿ
 cuáⁿáá. Ní na cheendí tī ican'daa
 nguuchi yaⁿā ndúúcu 'yaaⁿmiⁿ
 ndúúcu azufre. ¹⁸Ní yeⁿe 'iinū naaⁿ
 dendu'ū s'túúca chi can'daa yeⁿe
 cheendí tī ní 'áámá 'iinū parte yeⁿe
 'iiⁿyāⁿ yeⁿe iⁿ'yeeⁿdí 'cūū ch'ii yā

ndúúcū nguuchi yáⁿā miiⁿ ndúúcū
'yaaⁿmiⁿ miiⁿ ndúúcū azufre miiⁿ.

¹⁹Ní chi ditiinú yeⁿe 'yúúdüu
s'ééⁿ canúúⁿ cheendí tī ndúúcū
nduucudaⁿai tī ti nduucudaⁿai tī
miiⁿ ní yaaaⁿ ní tan'dúúcā tíiⁿ cúú,
'tíicā nduucudaⁿai tī. Ní ndúúcū
cheendí tī ndúúcū nduucudaⁿai tī
dííⁿ tī dañó 'iiⁿyāⁿ s'eeⁿ.

²⁰Tanáⁿā 'iiⁿyāⁿ yeⁿe iⁿ'yeeⁿdí
'cūū chi nguéé ch'ii yā yeⁿe daños
nguéé ndaācādaamí yā yeⁿe
dendu'ū chi dííⁿ yā chi nguéé
n'daacā. Ní i'téenu yā espíritu yeⁿe
yááⁿ'nguiniūⁿ ndúúcū santos ídolos
yeⁿe 'dííⁿnguāⁿ ndúúcū santos
ídolos yeⁿe 'dííⁿnguee ndúúcū
santos ídolos yeⁿe cúú cuaaáⁿ
ndúúcū santos ídolos yeⁿe tuūu
ndúúcū santos ídolos yeⁿe yáⁿá.
Dendu'ū santos ídolos nguéé cuuvi
inaaⁿ, ní nguéé cuuvi n'giindiveéⁿ,
ndíí nguéé cuuvi ngiicá. ²¹Ní 'iiⁿyāⁿ
s'eeⁿ 'tiicá ntúúⁿ nguéé ndaācādaamí
yā yeⁿe chí n'giiⁿ'núⁿ yā 'iiⁿyāⁿ, ndíí
nguéé ndúú yeⁿe ngaatu chi dííⁿ yā,
ndíí nguéé ndúú yeⁿe chi caⁿ'á yā
ndúúcū isaⁿ'ā o n'daataá chi nguéé
yeⁿe yā, ndíí nguéé ndúú yeⁿe chi
duucu yā.

Yeⁿe ángel ndúúcū libro 'lííⁿ

10 Cuayiivi ní n'diichí 'áámá
ángel chi véé n'dee n'dái
poder yeⁿe yā. Ní chiicá yā yeⁿe
va'ai cheeti nguuvi ní chiíyá yā.
Ní véé catecaí yā yeⁿe meēeⁿ. Ní
vmnaaⁿ tííⁿ yā canéé cuuⁿ'gúúⁿndí
yeⁿe nanguuvi. Ní naáⁿ yā
tan'dúúcā ðeeve yeⁿe 'yáⁿā, 'tíicā
ngii naáⁿ yā. Ní ca'á yā ní tan'dúúcā
columnas chi nguuchi yaⁿā. ²Ní na
ta'á yā ndeē yā 'áámá libro 'lííⁿ chi

canda'āi. Ní ángel miiⁿ s'neeⁿ yā ca'á
yā lado ta cuaacú yā vmnaaⁿ na
nuūⁿniⁿ'yáⁿā. Ní s'neeⁿ yā ca'á yā
lado tá 'cuae yā vmnaaⁿ na yáⁿāa.

³Tuuⁿmi ní yuudu n'dái 'caí yā
tan'dúúcā chi n'gai 'áámá 'yáíⁿyāⁿ
cuá'áá. Ní ch'íínú 'caí yā ní ndeēchē
daavi ní caⁿ'ā ndúúcū nduudu yeⁿe.

⁴Taachí ch'íínú ngaⁿ'ā ndu'ū ndeēchē
daavi mííⁿ 'úú ní canéé listo chi
dinguúⁿ chiiⁿ chi n'diichí taachi
ch'iindiveeⁿ 'áámá nduudu yeⁿe ná
va'ai cheeti nguuvi chí caⁿ'a chii 'úú:
Nguéé dinguuⁿ di nduudu chi ngaⁿ'ā
ndu'u ndeēche daavi miiⁿ naati
canúúⁿ n'de'ei di na staava yeⁿe di
nduudu miiⁿ.

⁵Ní ángel miiⁿ chi n'diichí chi
chéendii vmnaaⁿ na nuūⁿniⁿ'yáⁿā
ndúúcū vmnaaⁿ na yáⁿāa ch'éé yā
ta'a yā lado ta cuaacú yā ndíí
nanguuvi. ⁶Ní dííⁿ yā 'áámá
compromiso ní ngaⁿ'a yā: “Por
Dios”, Ndyuūs chi canduuchi cueⁿe
daāⁿmaⁿ, Ndyuūs chí din'dái yā
nánguuvi ndúúcū tanducuéⁿe
dendu'ū chi vee yeⁿe, ndúúcū yáⁿāa
ndúúcū tanducuéⁿe dendu'ū chi
vee yeⁿe, ndúúcū nuuⁿniⁿ'yáⁿā
ndúúcū tanducuéⁿe dendu'ū chi
vee yeⁿe. Ní ángel miiⁿ caⁿ'a yā:
'Āā ntéé tiempo chi cuuvi 'naaⁿ.

⁷Ti nguuvi taachi ndii chííⁿ ndii
ndeēchē ángeles ní tucá'a yā 'cuaeⁿcú
yā trompetas yeⁿe yā tuuⁿmi ní
chiiⁿ chi Ndyuūs cunee n'de'éí yā
ní 'cuiinu. Ní Ndyuūs tucá'a yā dííⁿ
yā tanducuéⁿe chi ngaⁿ'a yā ngii
yā 'iiⁿyāⁿ profetas chi dichíí've yā
Ndyuūs.

⁸Tuuⁿmi ní nduudu chi ch'iindiveeⁿ
ndii nanguuvi caⁿ'a ntúúⁿ yā
ndúúcū 'úú táámá vmneⁿ'ee ní caⁿ'a

'tíficā: Dii, Juan, cueⁿe di ní cuta'a di libro 'lírⁿ chi ngaadi chi ángel miiⁿ ndéé yā na ta'á yā, ángel chi chééndii yā vmnaaⁿ na nuūⁿniⁿyáⁿā ndúúⁿcū vmnaaⁿ na yáⁿāa.

⁹Ní cheⁿé nanááⁿ ángel miiⁿ ní caⁿá chíí ángel: Díí, ángel, tee di libro 'lírⁿ 'úú. Ní teé yā libro 'lírⁿ 'úú. Ní ángel miiⁿ caⁿ'a yā chíiyā 'úú: Cuta'a di ní ché'é dí libro 'lírⁿ. Ní cuuvi yaadi na cheendi di tan'dúúⁿcā n̄dii' naati nduūⁿvī yaāá ná cheēti di.

¹⁰Tuuⁿ'mi ní sta'á libro 'lírⁿ mííⁿ chi canéé na ta'a ángel miiⁿ ní che'é. Ní chíi yaadi cheendí tan'dúúⁿcā n̄dii'. Taachi 'āa ch'íínú che'é ní nduūⁿvī yaāá yeⁿe cheēti. ¹¹Angel miiⁿ ní nííⁿnúúⁿ nūuⁿ ngaⁿ'a yā ngii yā 'úú: Díí, Juan, taama vmnéⁿ'ēe canéé chí caaⁿ'maⁿ di nduudu cuaacu yeⁿ'é Ndyuūs yeⁿ'ē n'dee n'dái 'iiⁿ'yāⁿ ndúúⁿcū 'yaaⁿ n'dái naciones ndúúⁿcū 'yaaⁿ taavi 'iiⁿ'yāⁿ chi ngaⁿ'a davaacu s'eeⁿ chi n̄dááⁿ ní ndúúⁿcū reyes.

**'Uuvi 'iiⁿ'yāⁿ chi ngaⁿ'a
yā nduudu cuaacu**

11 Tuuⁿ'mi ní ángel miiⁿ tee yā 'aama taaⁿ nduu 'úú ti tan'dúúⁿcā 'áámá nduucu chi dicaadí yā, 'tíficā. Ní ángel miiⁿ ngaⁿ'a yā ngii yā 'úú: Cuééndii di ní dícaadí dí yáacū yeⁿ'e Ndyuūs ndúúⁿcū nátaí. Ní diduuche di cheeti yaacū 'iiⁿ'yāⁿ chi i'téenu yā Ndyuūs. ²Naati chuba'āi yeⁿ'e yáacū na patio miiⁿ nguéé dícaadí dí miiⁿ ti chíiⁿ ní caⁿ'á 'iiⁿ'yāⁿ chi nguéé i'téenu yā Ndyuūs. 'Iiⁿ'yāⁿ s'eeⁿ ní 'caanca'a yā nducuéⁿ'ē yááⁿ miiⁿ chi yeⁿ'é Ndyuūs 'uūⁿvī ngeécú 'uūⁿvī 'iiⁿ'yāⁿ. ³Ní ngaⁿ'á yā 'tíficā. 'Úú ní dicho'ó 'uūⁿvī 'iiⁿ'yāⁿ chi ngaⁿ'a cuaacú yā yeⁿ'é,

chi caaⁿ'máⁿ yā nduudu cuaacu yeⁿ'é 'áámá mil canee 'uūⁿvī ciento ndúúⁿcū 'iinu ngeecu nguuvi. Ní catecai yā ní 'iiⁿ'yāⁿ chi luto yā.

⁴Ná 'uūⁿvī 'iiⁿ'yāⁿ s'eeⁿ chi ngaⁿ'a cuaacu yeⁿ'é, 'iiⁿ'yāⁿ s'eeⁿ ní tan'dúúⁿcā 'uūⁿvī yáⁿ'á yeⁿ'e olivas ndúúⁿcū 'uūⁿvī candeleros chi snéé nanááⁿ Señor chi 'iivi yeⁿ'e yáⁿ'āa.

⁵Ní nduuti chi 'áámá 'iiⁿ'yāⁿ neⁿ'e yā dííⁿ yā dañó 'uuvi 'iiⁿ'yāⁿ chi ngaⁿ'a cuaacu yeⁿ'é tuuⁿ'mi ní can'dáá nguuchi yaⁿ'ā na cheendi 'uūⁿvī 'iiⁿ'yāⁿ ní ch'iinū 'iiⁿ'yāⁿ chi contra yeⁿ'e yā. Ní 'tíficā cuuvi 'iiⁿ'yāⁿ chi neⁿ'é yā dííⁿ yā dañó 'uuvi 'iiⁿ'yāⁿ s'eeⁿ, canéé chí 'cuūⁿvī yā ndúúⁿcū nguuchi yaⁿ'ā. ⁶Uuvi 'iiⁿ'yāⁿ chi caaⁿ'maⁿ cuaacu yeⁿ'é ni véé poder yeⁿ'e yā chí cuuvi nn'gaadí yā nanguuvi ní 'íícú nguéé cueⁿ cúúvī 'naaⁿ tiempo chí ngaⁿ'á yā nduudu cuaacu yeⁿ'é Ndyuūs. Ní cuuví yā dííⁿ ntúuⁿ yā chí nuuⁿ'niⁿ nduuvi yuūúⁿ. Ní dííⁿ yā chí ndáá n'dee n'dái ca'ai yeⁿ'e 'iiⁿ'yāⁿ yeⁿ'e iⁿ'yeeⁿ'dí 'cūū, ní dííⁿ yā chuū 'āā de'é nūuⁿ tiempo taachi neⁿ'e yā. ⁷Ní cuayiivi taachi 'cuiinu caaⁿ'máⁿ yā nduudu cuaacu yeⁿ'é Ndyuūs tuuⁿ'mí 'iiti taaⁿ chí nguuvi monstruo ní can'dáa tí yeⁿ'e yiive yáⁿ'āa ní dííⁿ caandaá tí ndúúⁿcū 'uuvi 'iiⁿ'yāⁿ s'eeⁿ. Ní cuchēe tí yeⁿ'e yā ní 'caaⁿ'núⁿ tí 'uuvi 'iiⁿ'yāⁿ s'eeⁿ. ⁸Ní cuerpo yeⁿ'e 'uūⁿvī tináⁿ'ā s'eeⁿ cunéé na yúúni yeⁿ'e yááⁿ ch'ēete miiⁿ chí dáámá yááⁿ miiⁿ naachi 'iiⁿ'yāⁿ ca'nééⁿnga'á yā Señor Jesucristo yeⁿ'e yú na cruz. Ní ndúúⁿcū táámá nduudu yááⁿ ch'ēete miiⁿ tan'dúúⁿcā yááⁿ Sodoma o yáⁿ'āa Egipto tí 'iiⁿ'yāⁿ chí nguéé n'daacā ch'ēetinée yā miiⁿ. ⁹Ní 'iiⁿ'yāⁿ yeⁿ'e

yáaⁿ s'eeⁿ ndúúcu 'iiⁿyāⁿ ndaataa s'eeⁿ ndúúcu 'iiⁿyāⁿ yeⁿe n'dee n'dái davaacu chi n'dáaⁿ ndúúcu 'iiⁿyāⁿ yeⁿe 'naaⁿ naciones caⁿá yā n'diichi yā 'uúvī cuerpo chi tináⁿā yeⁿe 'iiⁿyāⁿ chi n'diī chéeti na 'íínú nguuvī canéé maⁿa. Ní 'iiⁿyāⁿ s'eeⁿ nguéé 'cuaáⁿ yā chi 'iiⁿyāⁿ 'cuεεchi yā cuerpos yeⁿe tináⁿā yeⁿe 'iiⁿyāⁿ chi n'díí miiⁿ. ¹⁰Ní 'iiⁿyāⁿ chi ch'εetinée yā na yáⁿāa ní neené cuuvi yeenú yā chi n'díí nduu 'uúvī profetas. Ní dííⁿ yā 'viicu. Ní dicho'ó yā regalos yeⁿe 'aamá yā taama yā caati 'uuvī profetas chi ngaⁿa nduudu cuaacu yeⁿé Ndyuūs dííⁿ yā chi 'iiⁿyāⁿ s'eeⁿ nééné ch'eenu yā chii. ¹¹Naati cuayiivi chi chó'oo 'iinu nguuvī canéé maⁿa Ndyuūs nadacuéeⁿ yā nduu 'uuvī 'iiⁿyāⁿ s'eeⁿ yeⁿe nguaaⁿ tináⁿā. Ní nducyaaca 'iiⁿyāⁿ di'va'a yā yeⁿe chi n'diichi yā. ¹²Ní cuayiivi mííⁿ 'uuvī 'iiⁿyāⁿ s'eeⁿ ch'iindiveéⁿ yā 'áámá nduudu yuudu n'dái yeⁿe ná va'ai chéeti nguuvī chi caⁿā: Ndí's'tiī, cuchée nī 'muuⁿ. Ní 'iiⁿyāⁿ s'eeⁿ ní cuchée yā na va'ai chéeti nguuvī na 'áámá meēⁿ. Ní 'iiⁿyāⁿ s'eeⁿ chi taaⁿ yā yeⁿe yā n'diichí yā chuū. ¹³Ní hora mííⁿ nūuⁿ 'nuⁿu taaⁿ yáⁿāa ní 'áámá ndiichi parte yeⁿe yáaⁿ miiⁿ chi n'daā ní ndēēchē mil 'iiⁿyāⁿ ch'ii yā taachi n'nuⁿu yáⁿāa miiⁿ. Tanáⁿa yā ní dí'vá'a yā ní dich'εeté yā Ndyuūs chi canéé na va'ai chéeti nguuvī.

¹⁴Chó'oo ndii 'uuvī vaadi yáⁿāi naati ní ndii chííⁿ ndii 'iinu miiⁿ ndaa núúⁿ.

Yeⁿe ángel chí di'cuεécú yā ndíí ndēēchē trompeta

¹⁵Ní ndii chííⁿ ndii ndēēchē ángel miiⁿ di'cuεécú yā trompetas yeⁿe yā

ní ch'iindiveéⁿ 'naaⁿ nduudu yuudu na va'ai chéeti nguuvī chi ngaⁿā:

Maaⁿ ní Señor Ndyuūs yeⁿe yú ndúúcu Cristo ní vεε poder yeⁿé yā tiempo maaⁿ chi caaⁿmaⁿ ntiiⁿnyuⁿ yā cueⁿe daāⁿmaⁿ yeⁿe nducuéⁿē 'iiⁿntyéⁿē yeⁿe iⁿyeeⁿdī ndúúcu naachi ngaⁿa ntiiⁿnyuⁿ yā ti nducuéⁿē ní yeⁿe Cristo maaⁿ. ¹⁶Tuuⁿmi ní ndu'u ndiicú cuūⁿ 'iiⁿntyéⁿē chi vée yā na trono yeⁿe yā nanááⁿ Ndyuūs ch'εeti ndiitin'díí yā ndúúcu naaⁿ yā na yáⁿāa nanááⁿ Ndyuūs ní dich'εeté yā Ndyuūs. ¹⁷Ní ngaⁿa yā:

N'diī Señor Ndyuūs chi vée tanducuéⁿē dendu'ū poder yeⁿe nī, n'diī chi canéé nī tiempo maaⁿ ní canéé nī tiempo ndíí vmnaaⁿ ní canéé nī ndíí tiempo chi cuchii. Teé 'nū gracia n'diī, Ndyuūs, ti n'diī ní sta'á nī poder chi yeⁿé nī chí ch'εete n'dai. Ní n'diī ngaⁿa ntiiⁿnyúⁿ nī maaⁿ.

¹⁸Ní maaⁿ ní ndaa tiempo chi dituúvī nī 'iiⁿyāⁿ s'eeⁿ chi idituuvī yā iⁿyeeⁿdī. 'iiⁿyāⁿ yeⁿe naciones chi nguéé i'téenu yā ní nduuvī taáⁿ yā ti ndaā nguuvī chi ca'á nī castigo yeⁿe 'iiⁿyāⁿ s'eeⁿ ní hora chi cuuvi n'diichí nī nuuⁿndi yeⁿe tináⁿā s'ee. Ní ca'á nī premio 'iiⁿyāⁿ profetas chi dichíí'vε n'diī ní ngaⁿā yā nduudu cuaacu yeⁿé nī. Ní ca'á nī nducyáácá 'iiⁿyāⁿ chi neⁿe yā n'diī ndúúcu 'iiⁿyāⁿ chi dich'εeté yā n'diī, 'iiⁿyāⁿ chi ngaⁿa ntiiⁿnyúⁿ yā ndúúcu

taná'a 'ii'nyā'n, nducyáácá
'ii'nyā'n chi i'téenu yā Ndyuūs.

¹⁹Tuu'mi ní 'áámá yā n'guaa' yā cheendi va'ái ye'ne yáacū ye'ne Ndyuūs, yáacū chi canéé na va'ai cheeti nguuvi. Ní míi'n canéé arca chi caja naachi canéé compromiso ye'ne Ndyuūs. Ní canéé cheeti yáacū mii'n. Ní n'diichí 'cuāi ndúúcu n'dee n'dái ruido ndúúcu daavi n'nu'u na yá'aa ndúúcu 'aama cúúvi yuū'n.

N'daataa ndúúcu 'iiti dragón

12 Tuu'mi ní véé 'áámá seña chi néené ch'ete chi ch'i'ni na va'ai cheeti nguuvi. N'diichí 'áámá n'daataá chi canuu' tá catecai tan'dúúca 'yá'ā. Ní 'ii'nyu' mii'n ní canéé maa'n ca'a tá. Ní canū'n tii'n tá 'áámá corona ndúúcu ndichuuvi 'ii'nyu'. ²Ní hora míi'n nū'n ní cuuvi 'cuundi'yāā'n daiya tá ní 'cāi yiicu tá ndúúcu vaadi ya'ai chi cuuvi 'cuundi'yāā'n daiya tá. Neené ch'eenu tá chií ní 'āā'cuéé 'cuundi'yāā'n daiya tá. ³Ní níi'nuú'n nū'n véé táámá seña chi néené ch'ete chi ch'i'ni nanguuvi. N'diichí 'áámá 'iiti cuá'aa chi ch'ete ca chi nguuvi dragón. Ní véé ndeēchē tíi'n tī ní ndiichí duu'nii'ní'n tī. Ní canduu tíi'n tī ndeēchē coronas 'áámá 'áámá ca'áámá cā'aama tíi'n tī. ⁴Ní dragón mii'n ndúúcu ndúúcuda'ni tī díi'n tī chín'daā na 'iinu parte ye'ne 'ii'nyú'n ye'ne nanguuvi ní chiya ndii na yá'aa. 'Iiti dragón mii'n chéendii tī nanáā'n n'daataá chí 'cuundi'yāā'n daiya tá ní 'íicú cuuvi che'é tī daiya tá mii'n taachi 'cuundi'yāā'n. ⁵Tuu'mi ní n'daataá mii'n ní ch'ii'ndiyāā'n 'áámá sa'nā 'líi'n. Sa'nā 'líi'n mii'n canéé chi diituu caa'nma'n nti'nyu' sa

ye'ne tanducué'ē naciones ye'ne i'nyeē'di ndúúcu 'áámá nduucu cūū. Ní níi'nuú'n nū'n 'áámá yā sta'a yā sa'nā 'líi' míi'n ní cuna'á yā ndúúcu dacuá'aa mii'n na va'ai cheeti nguuvi naachi canéé Ndyuūs chi véé yā na trono ye'ne yā. ⁶N'daata mii'n ní chéénū ta na yá'aa cuū'ma'n naachi nguéé ch'etinéé 'ii'nyā'n ní mii'n nū'n Ndyuūs din'dái yā 'áámá lugar cáávā tá'ā mii'n. Ní mii'n Ndyuūs ca'á yā chi che'e tá 'áámá mil canee 'uūvi ciento nduuyu canéé 'iinū ngeecu nguuvi.

⁷Cuayiivi ní véé 'aama caandaá ch'ete na va'ai cheeti nguuvi. Angel Miguel chi nga'a nti'nyu' ndúúcu ángeles ye'é yā 'cu'u yā contra ye'ne 'iiti dragón. Ní 'iiti dragón mii'n ndúúcu ángeles ye'ē tī 'cu'u tī ndúúcu ángel Miguel mii'n. ⁸Naati 'iiti dragón mii'n nguéé díi'n tī ganar caandaá ch'ete mii'n. Ní 'āā ntéé véé lugar cááva tī na va'ai cheeti nguuvi. ⁹'Áámá 'ii'nyā'n ch'ecú yā 'iiti dragón mii'n ndúúcu nducyaaca ángeles ye'ē tī ndíi i'nyeē'dí 'cūū. 'Iiti dragón mii'n chi ch'ete ní 'iiti cúú mii'n ndíi vmnáā'n vmnaa'n chi yáá'n'guinū'n chi Satanás. 'Iiti cúú mii'n ní chinnche'éi tī nún'má'n í'nyeē'dí.

¹⁰Tuu'mi ní ch'iindiveé'n 'áámá nduudu chí diitūū n'dai ye'ne na va'ai cheeti nguuvi chi nga'a 'tíicā: Maa'n ní ndaā tiempo chí Ndyuūs ye'ne yú nadangúā'ni yā 'ii'nyā'n ye'ne yā. Ní ch'i'ni yā poder ye'ne yā chí rey yā. Ní nga'a nti'nyú'n yā ye'ne tanducué'ē dendu'ū ye'ne yā. Ní Cristo ch'i'ni yā chí 'ii'ntyé'ne yā caati sa'nā mii'n chí Satanás chí ca'a sa nuu'ndi ye'ne hermanos

ye^{ne} yú ndíí ngúúví ndíí n'gááⁿ
 nanááⁿ Ndyuūs, 'iiⁿyāⁿ ch'εεcú yā
 saⁿā miiⁿ ndii va'ai cheeti nguuvu
 ndii na yáⁿāa. ¹¹Ní hermanos ye^{ne}
 yú chicheé yā ye^{ne} yááⁿn'guiinūⁿ
 cáávā yuūⁿ ye^{ne} Cristo chi nguuvu
 'iiti cuūchī, ní cáávā chi ngaⁿá yā
 nduudu cuaacu ye^{ne} Ndyuūs, ní
 cáávā chi nguéé 'va'á yā ye^{ne} e vida
 ye^{ne} maáⁿ yā chi ch'ii ya cáávā
 Señor Jesucristo ye^{ne} e yú. ¹²Ndís'tii
 chi canéé na va'ai cheeti nguuvu
 yeenú nī, naati de'ε chūúcā ya'āi
 ye^{ne} nducyaaca chi snéé na yáⁿāa
 'cūū ndúúcu nducyaaca chi snéé na
 nuūⁿnīⁿyáⁿā caati yááⁿn'guiinūⁿ
 ndaa sa nanáaⁿ yā. Ní neené taaⁿ sa
 ti deenu sa chí 'āā ntéé cuuvi 'naaⁿ
 sa na iⁿ'yeeⁿdī.

¹³Taachi 'iiti dragón miiⁿ ní
 chicadínuuⁿ tī chi 'āā candiití tī
 ndíí na yáⁿāa, che^{ne} e tī can'dáa tī
 n'daataá chi ch'iiⁿndiyáāⁿ daiya tá
 chi 'cueenu tá cuuvi. ¹⁴Naati 'áámá
 yā ca'a yā n'daata miiⁿ uūví ngeεchi
 tá tan'dúúca ngeεchi 'íí'yāa chi
 ch'εete ca. Ní 'iicú cuuvi caavā tá
 nanguuvi ní caⁿa tá lugar ye^{ne} e tá
 naachi nguéé 'iiⁿyāⁿ. Ní yaⁿ'ai canee
 tá ye^{ne} e 'iiti cúu chi yááⁿn'guiinūⁿ.
 Ní 'iiⁿyāⁿ ca'á yā chi che'e tá 'iinū
 ndúuyū canéé maⁿa. ¹⁵Ní cúu miiⁿ
 tun'dáa tī na cheendi tī n'dee n'dái
 nuūⁿnīⁿ tan'dúúca nuūⁿnīⁿ ye^{ne} e
 'áámá yífcú. Ní nuūⁿnīⁿ miiⁿ ní
 nduuvu yífcú chí cuuvi candēē táⁿā
 miiⁿ tī 'tíicā ne^{ne} e cúu miiⁿ. ¹⁶Naati
 yáⁿāa miiⁿ chinnee n'daataá mííⁿ
 tī n'da'ai tan'dúúca 'iiⁿyāⁿ n'da'ái
 yā cheendí yā ní yáⁿāa mííⁿ chí'i
 nuūⁿnīⁿ miiⁿ ní cheēnū nuūⁿnīⁿ
 miiⁿ cheeti yáⁿāa, nuūⁿnīⁿ chí 'iiti
 dragón miiⁿ tun'dáa tī ndúúcu

cheendí tī. ¹⁷Ní ndúúcu chuū 'iiti
 dragón miiⁿ neené taaⁿ n'dái tī
 ndúúcu n'daataa mííⁿ ní ché^{ne}
 tī cuⁿ'ú tī ndúúcu tanáⁿā 'iiⁿyāⁿ
 ndaata ye^{ne} e n'daataa miiⁿ, 'iiⁿyāⁿ
 chí dííⁿ yā chí ngaⁿ'a mandamiento
 ye^{ne} e Ndyuūs. Ní 'áámá canee
 yā ndúúcu nduudu cuaacu ye^{ne} e
 Jesucristo.

Ye^{ne} e uūví 'iiti taaⁿ chi nguuvu monstruo

13 Tuu'mi ní taachi chééndíí
 vmnaaⁿ yáⁿāa ndúúti
 ye^{ne} e nuūⁿnīⁿyáⁿā miiⁿ n'diichí chí
 can'daa 'áámá 'iiti chí ch'εete taavi
 ca ye^{ne} e nuuⁿnīⁿyáⁿā. 'Iiti miiⁿ ní
 nguuvu monstruo ní véé ndeēchē tííⁿ
 tī ndúúcu ndiichi duuⁿniiⁿníⁿ tī. Ní
 vmnaaⁿ 'áámá 'aama duuⁿniiⁿníⁿ
 tī sndúūⁿ 'áámá corona. Ní canee
 nguūⁿ ca'áámá cā'aama tííⁿ tī chí
 duuchi chí nguéé inee yífnū
 Ndyuūs. ²'Iiti chí monstruo chí
 ch'εete mííⁿ chí n'diichí ní tan'dúúca
 'iiti chí leopardo, 'tiicā tī. Ca'a tī
 ní tan'dúúca ca'a oso, 'tíicā ca'a tī.
 Cheendí tī ní tan'dúúca cheendi
 'yáíⁿyāaⁿ cu'áá, 'tíicā cheendí tī.
 'Iiti dragón miiⁿ ca'á tī poder ye^{ne} e
 tī ndúúcu trono ye^{ne} e tī na ta'a 'iiti
 monstruo chí ch'εete miiⁿ chí ngaⁿ'a
 ntiiⁿnyúⁿ tī. ³Ní n'diichí chí 'áámá
 chéé tííⁿ 'iiti monstruo chí ch'εete
 taavi ca ní tan'dúúca chí nca'āi
 'áámá 'iiti chí n'díí ní nduūvā ye^{ne} e
 tī, 'tíicā 'áámá tííⁿ tī. Ní nducyáácá
 'iiⁿyāⁿ ye^{ne} e iⁿ'yeeⁿdí 'cūū néené
 che^{ne} e yiinú yā ye^{ne} e chuū. Ní cue^{ne}
 yā ndúúcu 'iiti monstruo miiⁿ. ⁴Ní
 nducyaacá yā s'téenu yā 'iiti dragón
 miiⁿ cáávā chí ca'á tī poder ye^{ne} e tī
 táámá 'iiti chí monstruo chí ch'εete

taavi ca. Ní 'iiⁿyāⁿ 'tiicá ntúūⁿ chí'téenu yā 'iiti monstroo miiⁿ. Tuuⁿmi ní caⁿa yā: ¿Du'u véé poder yeⁿé tan'dúucā 'iiti monstroo 'cūū? ¿Du'u cúuví 'cuuⁿmaⁿ ndúúcuⁿ 'iiti monstroo 'cūū ní cucheε ndúúcuⁿ 'iiti 'cūū?

⁵Ní 'iiti dragón ca'á tī poder 'iiti monstroo miiⁿ chí caaⁿmaⁿ tī dendu'ū chí ch'εεte. Ní cunncaā ngaⁿa tī contra yeⁿe Ndyuūs. Ní dí'tiinuū tī chí ngaⁿa ntiinⁿnyuⁿ tī 'túucā chééti 'uūví ngeεcu 'uūví 'iyyū. ⁶Ní 'tíicā idiinⁿ 'iiti monstroo. Ní cunncaā ngaⁿa tī contra yeⁿe Ndyuūs ní ngaⁿa tī cunncaā contra yeⁿe chí duuchi Ndyuūs ní contra yeⁿe va'ai chεeti nguuvi naachi Ndyuūs ch'εetinée yā ní contra yeⁿe 'iiⁿyāⁿ chí snée yā ndúúcuⁿ Ndyuūs. ⁷Ní 'tiicá ntúūⁿ 'iiti dragón ca'á tī poder 'iiti monstroo miiⁿ chí dííⁿ tī vaadi 'caa'va ndúúcuⁿ 'iiⁿyāⁿ chí yeⁿé Ndyuūs ndíí chí chεε tī ndúúcuⁿ 'iiⁿyāⁿ s'eeⁿ. Ní ca'á tī poder 'iiti monstroo chí ngaⁿa ntiinⁿnyuⁿ tī yeⁿe tanducuéⁿé raza yeⁿe 'iiⁿyāⁿ yeⁿe tanducuéⁿé yāáⁿ ndúúcuⁿ yeⁿe tanducuéⁿé davaacu ndúúcuⁿ yeⁿe tanducuéⁿé nación. ⁸Ní nducyáácá 'iiⁿyāⁿ chí snée yā na yāⁿaa cu'téenu yā 'iiti monstroo miiⁿ. 'Tíicā néⁿe Ndyuūs. Ní nguéé canée nguūⁿ chí duuchi 'iiⁿyāⁿ s'eeⁿ na libro yeⁿe vida cueⁿe daāⁿmaⁿ chí yeⁿe 'iiⁿyāⁿ chí duuchi 'iiti cuūchī. Ní 'iiⁿyāⁿ s'eeⁿ ch'iiⁿnúⁿ yā Cristo ndii tiempo chí Ndyuūs din'dái yā iⁿyeēⁿdí.

⁹Nduuti chí 'áámá 'iiⁿyāⁿ véé vééⁿ yā 'caandivééⁿ yā nduudu 'cūū.

¹⁰'Iiⁿyāⁿ chí can'daa yā 'iiⁿyāⁿ chí cuuvi preso yā, 'tiicá ntúūⁿ maáⁿ yā canée chí cuuvi preso yā. 'Iiⁿyāⁿ chí

n'giiⁿnuⁿ yā 'iiⁿyāⁿ ndúúcuⁿ machete 'uūví lados 'caāiⁿ canée chí 'cuuvi ntúūⁿ yā 'tíicā. Ní caāvā chuū 'iiⁿyāⁿ chí yeⁿé Ndyuūs canée chí véé 'viicheε'tífnūūⁿ ndúúcuⁿ yā ní canée chí i'téenu yā Ndyuūs.

¹¹Quayiiⁿ ní n'diichí táámá 'iiti monstroo chí ch'εεte ca chí can'dáa tī nguaaⁿ yáⁿaa miiⁿ. Véé 'uūví duuⁿniⁿniⁿ tī tan'dúucā 'áámá duuⁿniⁿniⁿ 'iiti cuūchī 'tiicá tī. Ní 'iiti monstroo ndii 'uūví indeé tī tan'dúucā 'áámá 'iiti dragón. ¹²Ní véé tanducuéⁿé poder yeⁿe 'iiti monstroo chí ndii 'uuvi chí ch'εεte taavi ca tan'dúucā poder yeⁿé 'iiti monstroo ch'εεte ca chí vmnaaⁿ. Ní dííⁿ tī chí 'iiⁿyāⁿ yeⁿé iⁿ'yeeⁿdí 'cūū ní cu'téenu yā 'iiti vmnááⁿ vmnaaⁿ chí 'iiti monstroo chí naca'ái tī ní nduūvá yeⁿé tī. ¹³Ní 'iiti chí monstroo chí ndii 'uūví dííⁿ tī vaadi n'giinu ch'εεte n'dai. Dííⁿ tī chí can'daa yāⁿaa yeⁿé nanguuvi ndíí vmnaaⁿ yāⁿaa 'cūū ní n'dee n'dái 'iiⁿyāⁿ n'diichí yā chuū. ¹⁴Ní caavā vaadi n'giinu chí dííⁿ tī taachi cheendií tī nanááⁿ 'iiti monstroo chí vmnááⁿ vmnaaⁿ chí téé tī lugar chí dííⁿ tī 'túucā, tuuⁿmi ní chinnche'éei tī 'iiⁿyāⁿ chí ch'εetinée yā iⁿ'yeeⁿdí 'cūū. Ní ca'a tī orden 'iiⁿyāⁿ s'eeⁿ chí din'dái yā 'áámá santo ídolo tan'dúucā 'iiti monstroo chí nca'ái tī ndúúcuⁿ machete 'uūví lados 'caāiⁿ ní cunduuchi tī chí cuuvi santo yeⁿe yā. ¹⁵Ní 'iiti monstroo chí vmnááⁿ vmnaaⁿ ní ca'á tī poder 'iiti monstroo chiiⁿ ndíí 'uuví tī chí ca'á tī vida santo 'iiti ídolo miiⁿ. Ní 'íicú 'iiti santo tī cuuvi 'caaⁿmaⁿ tī ní dííⁿ tī chí 'cuūví nducyáácá 'iiⁿyāⁿ chí nguéé i'téenu yā 'iiti santo miiⁿ. ¹⁶Ní

cuayiiivi ní 'iiti monstruo chi ndii 'uūví ní dífⁿ tí ntúūⁿ chi nducyaaca 'iiⁿyāⁿ chi ngaⁿa ntiⁿnyúⁿ yā ndúúcu tanáⁿā 'iiⁿyāⁿ ndúúcu 'iiⁿyāⁿ chi 'cuiica ndúúcu 'iiⁿyāⁿ pobre yā ndúúcu 'iiⁿyāⁿ chi libre yā ní ndúúcu 'iiⁿyāⁿ chi 'áámá dichíⁿve yā 'iivi yā, 'iiti monstruo miiⁿ dífⁿ tí chi nducyaaca yā canéé chi ndée yā 'áámá sello na ta'a cuaacú yā o ncheeté yā. ¹⁷Ní dífⁿ ntúūⁿ tí 'tíicā. Mar 'áámá 'iiⁿyāⁿ nguéé cuuvi cuái yā o n'diicui yā nduuti chi nguéé ndée yā sello yeⁿe 'iiti monstruo ndii 'uūví o chi duuchí tí o número yeⁿe chi duuchí tí. ¹⁸Ní chuū ní 'iiⁿyāⁿ chi déénu yā cuuvi dífⁿ yā. 'Iiⁿyāⁿ chi déénu yā caⁿá yā ngaⁿa duuchi yā chi dúuchí 'iiti monstruo ndíí 'uūví miiⁿ tí número miiⁿ ní lado yeⁿe chi duuchi 'áámá saⁿá. Ní número miiⁿ ní ngii jaāⁿ ciento canduū 'iinu ngeecu jaaⁿ.

Ngiitá 'iiⁿyāⁿ chi 'áámá ciento canéé 'uūví ngeecu cuūⁿ mil yeⁿe chí nanguaⁿai yā

14 Cuayiiivi ní n'diichí 'iiⁿyāⁿ chi nguuvi 'iiti cuūchí chi chééndii yā ná yiicū chi nguuvi Sión. Ní nduucú yā canéé 'áámá ciento 'uūví ngeecu cuūⁿ mil 'iiⁿyāⁿ chi ndée yā chi duuchí yā ndúúcu chi duuchi chiidá yā chi canee nguūⁿ ncheeté yā. ²Ní ch'iindiveéⁿ 'áámá nduudu chí ngeⁿē na va'ai chēeti nguuvi. Ní nduudu miiⁿ tan'dúúca chi yuūdū n'geete chi chí yā n'dai nuūⁿnīⁿ o tan'dúúca chi n'geecu 'áámá daavi ch'ēete; ní nduudu miiⁿ ní tan'dúúca chi n'geecu n'dee n'dái arpas chi idi'cueēcū 'iiⁿyāⁿ. 'Tíicā nduudu

miiⁿ. ³Ní 'iiⁿyāⁿ chi n'dee n'dái miiⁿ chi snée yā nanááⁿ trono miiⁿ ní nanááⁿ ndu'u cuūⁿ 'iiⁿyāⁿ miiⁿ ní nanááⁿ 'iiⁿntyéⁿē miiⁿ ní ngiitá yā 'áámá canto chi ngai. Ní mar 'áámá 'iiⁿyāⁿ nguéé ngii n'geeⁿ yā canto miiⁿ, dámaāⁿ ndu'u chi 'áámá ciento 'uūví ngeecu cuūⁿ mil 'iiⁿyāⁿ chí Ndyuūs nadanguáⁿai yā nguaaⁿ 'iiⁿyāⁿ yeⁿe iⁿyeedíⁿ cūū. ⁴Ní 'iiⁿyāⁿ s'leeⁿ chi saⁿá chi nguéé ngaⁿá yā ndúúcu mar 'áámá n'daataa ní nguéé n'giindivaacú yā. Ní caⁿá yā ndúúcu 'iiⁿyāⁿ chi nguuvi 'iiti cuūchí 'āá tífⁿ nūuⁿ cuaaⁿ naachi caⁿá yā. Ní 'iiⁿyāⁿ s'leeⁿ Ndyuūs yaaⁿví yā chi cuuvi yeⁿe yā yeⁿe nducyaaca 'iiⁿyāⁿ. Ní 'iiⁿyāⁿ s'leeⁿ 'iiⁿyāⁿ chí vmnááⁿ vmnaaⁿ chí ch'ií yā cáávā chí dífⁿ yā ntiⁿnyuⁿ yeⁿé Ndyuūs ní yeⁿe 'iiⁿyāⁿ chí duuchi 'iiti cuūchí. ⁵'Iiⁿyāⁿ s'leeⁿ nguéé ngaⁿá yā mar 'áámá nduudu yaadi ní nguéé véé nuuⁿndi yeⁿe yā nanááⁿ trono yeⁿe Ndyuūs.

Yeⁿe chí ngaⁿá 'iinū ángeles

⁶Tuuⁿmi ní n'diichí tááma ángel ngaá yā naavtaⁿā nanguuvi. Ní ángel miiⁿ ní ndée yā nduudu chí canéé cueⁿe daāⁿmaⁿ chí nduudu ngai chí nanguaⁿai 'iiⁿyāⁿ. Ní ngaⁿá yā nduudu ngai miiⁿ nanááⁿ nducyaaca 'iiⁿyāⁿ yeⁿe iⁿyeedíⁿ cūū, nanááⁿ nducuéⁿē naciones ndúúcu nducuéⁿē tribus yeⁿe 'iiⁿyāⁿ ndúúcu nducyaaca davaacu yeⁿe tanducuéⁿē 'iiⁿyāⁿ ndúúcu nducyaaca 'iiⁿyāⁿ chí snée yā na yáⁿāa cūū. ⁷Ní ángel miiⁿ caⁿá yā ndúúcu 'áámá nduudu díftū: Ndís'tií 'va'á ní Ndyuūs, dich'ēeté ní 'iiⁿyāⁿ tí 'āā ndaa hora chí dífⁿ yā

juzgar nducyaaca 'iiⁿ'yāⁿ. Dich'εεtē nī 'iiⁿ'yāⁿ chi din'dái yā nanguuvi ndúúcu yáⁿ'āa ndúúcu nuūⁿ'niⁿ'yáⁿ'ā ndúúcu naachí icān'daa nuūⁿ'niⁿ.

⁸Ní n'diichí taama ángel can'dáa yā ángel miiⁿ ní ngaⁿ'á yā: Yáāⁿ Babilonia 'āā ntuūvii. Yáāⁿ Babilonia chi yáāⁿ ch'εete miiⁿ 'āā ntuūvii ti 'iiⁿ'yāⁿ yeⁿe yáāⁿ miiⁿ ní dííⁿ yā chi tanáⁿ'ā 'iiⁿ'yāⁿ yeⁿe nducuéⁿ'ē nación dinuuⁿ'ndi cá yā ní caⁿ'á yā ndúúcu n'daataa ó isaⁿ'ā chi nguéé yeⁿ'é yā ti dííⁿ yā nuuⁿ'ndi tan'dúúca chi diiⁿ 'iiⁿ'yāⁿ s'eeⁿ.

⁹Ní cuayiivi ní n'diichí ndii 'línú ángel miiⁿ can'dáa yā ángel s'eeⁿ ní caⁿ'a yuudu yā: Nduuti chi 'áámá 'iiⁿ'yāⁿ cu'téenu yā 'iiti monstruo miiⁿ ndúúcu 'iiti santo chi dáámá ndúúcu 'iiti miiⁿ ni 'iiⁿ'yāⁿ ndée yā sello yeⁿ'é tī nchεtē yā o na ta'á yā, ¹⁰canéé chi cuta'á yā neené taaⁿ castigo chi Ndyuūs caⁿ'á yā ca'a yā 'iiⁿ'yāⁿ miiⁿ. Ní castigo miiⁿ tan'dúúca 'áámá copa diituu ndúúcu vaadi taaⁿ yeⁿe Ndyuūs. 'Tíicā va. Ní castigo miiⁿ ní chiiⁿ chi 'iiⁿ'yāⁿ s'eeⁿ cuuvi yá'ái yeⁿ'é yā ndúúcu nguuchi yáⁿ'ā ní ndúúcu tuū chi nguuvi azufre chi nguuchi yaⁿ'ā ní cuuvi chó'oo chuū nanááⁿ ángeles yeⁿ'é Ndyuūs ní nanááⁿ 'iiⁿ'yāⁿ chi duuchi 'iiti cuūchi. ¹¹Ní 'yááⁿ'míⁿ yeⁿ'ē nguuchi yáⁿ'ā miiⁿ chi castigo miiⁿ ngεε cueⁿ'e daāⁿ'maⁿ yeⁿ'e lugar chi n'geenu yā ngii. Ní 'iiⁿ'yāⁿ s'eeⁿ chi n'geenú yā ngii ní i'téenu yā 'iiti monstruo miiⁿ chí ch'εete taavi ca ndúúcu 'iiti chi santo yeⁿ'é tī. Ní ndéé yā seña yeⁿ'é chi duuchi ti na cuerpo yeⁿ'é yā. 'Iiⁿ'yāⁿ s'eeⁿ nguéé ntaavi'tuunuúⁿ yā yeⁿ'e chi ya'ái yā ndíí nguéé nguuvi ndíí nguéé

n'gaaⁿ. ¹²Ní cáávā chuū 'iiⁿ'yāⁿ chi yeⁿ'e Ndyuūs ní n'giindiveéⁿ yā mandamiento yeⁿ'é yā ní 'áámá canéé yā chi i'téenu yā Cristo ní canéé chi vεε paciencia yeⁿ'e yā.

¹³Cuayiivi ní 'úú ch'iindiveéⁿ 'áámá nduudu yeⁿ'e va'ai chεeti nguuvi chi ngaⁿ'a ngii 'úú 'tíicā: Díí, Juan, dingúuⁿ di chuū. De'ē chúúca yeenu 'iiⁿ'yāⁿ chi caⁿ'á yā 'cuūvi yā tiempo 'cūú ndíí tiempo chi cuchii, 'iiⁿ'yāⁿ chi i'téenu yā Señor. Ní 'tíicā cuuvi ngaⁿ'a Espíritu N'dai yeⁿ'é Ndyuūs. Ní 'iiⁿ'yāⁿ s'eeⁿ ntaavi'tuunuúⁿ yā yeⁿ'e ntiinⁿ'yuⁿ yeⁿ'é yā ní candéé yā ndúúcu yā yeⁿ'e chi díí yā.

Cosecha yeⁿ'e yáⁿ'āa 'cūú

¹⁴Cuayiivi miiⁿ ní n'diichí 'áámá meēⁿ cueé. Ní 'áámá 'iiⁿ'yāⁿ vεε yā vmnaaⁿ meēⁿ miiⁿ ní tandúúca Jesucristo chi duuchi Sáⁿ'ā chi Daiya 'Iiⁿ'yāⁿ yeⁿ'e iⁿ'yeeⁿ'dí 'cūú. Canduu tííⁿ yā 'áámá corona yeⁿ'e 'dííⁿ'nguāaⁿ ní na ca'á yā ní ndée yā 'áámá hoz chi 'caāiⁿ. ¹⁵Ní n'diichí táámá ángel can'dáa yā yeⁿ'e yaācū miiⁿ yeⁿ'e Ndyuūs ní yuudu caⁿ'a yā ndúúcu 'iiⁿ'yāⁿ chi vεε yā na meéⁿ miiⁿ. 'Cáácá dí cosecha ndúúcu hoz yeⁿ'e di ti maaⁿ ní 'āā tiempo yeⁿ'e chi diiⁿ di cosechar ti cosecha yeⁿ'ē yáⁿ'āa miiⁿ 'āā n'daacā.

¹⁶Nííⁿ'nuúⁿ nūuⁿ 'iiⁿ'yāⁿ chi vεε yā na meēⁿ miiⁿ ch'iicá yā cosecha yeⁿ'e yā chi canéé na yáⁿ'āa ní nta'á yā.

¹⁷Tuuⁿ'mi ní táámá ángel can'dáa yā yeⁿ'e yaācū miiⁿ chiiⁿ canéé na va'ai chεeti nguuvi. Ní 'tiicá ntúúⁿ ángel miiⁿ ndée yā 'áámá hoz chi 'caāiⁿ. ¹⁸Ní táámá ángel chi

candéé yā cuidado yeⁿe nguuchi yaⁿā vmaaⁿ nátaī yeⁿe yaācū miiⁿ can'dáa yā yeⁿe nátaī ní caⁿa yuudu yā ángel chi ndeē yā hoz chí 'caāiⁿ. Dii 'caaca di ndúúcu hoz 'caāiⁿ yeⁿe di duuⁿnē 'lííⁿ yeⁿe yáⁿá 'lííⁿ miiⁿ ndúúcu n'gui'i chi uvas chi canéé na yáⁿāa ní cuta'a di uvas miiⁿ ti n'guí'í yeⁿe 'āā n'daacā maaⁿ.

¹⁹Tuu'mi ní ángel miiⁿ ndúúcu hoz 'caāiⁿ yeⁿe yā chi'ica yā duuⁿ'ne 'lííⁿ yeⁿe yáⁿá chi snéé ndúúcu n'gui'i uvas yeⁿe chi canee vmaaⁿ yáⁿá. Ní nta'á yā n'gui'i uvas ní s'néeⁿ yā n'gui'i uvas miiⁿ na trapiche naachi cuta'á yā nuūⁿnīⁿ uvas miiⁿ chi vino. Ní trujal miiⁿ ní tan'dúúca castigo chi ch'ete n'dai chi Ndyuūs caⁿ'a yā chí ca'a yā 'iiⁿ'yāⁿ. ²⁰Ní trapiche naachi cuta'á yā nuūⁿnīⁿ yeⁿe uvas miiⁿ canéé 'áámá lado yeⁿe yāāⁿ miiⁿ. Ní yeⁿe trapiche can'dáa n'dee n'dái yuūⁿ chí yaacu. Ní yuūⁿ miiⁿ tan'dúúca 'áámá yíícu ch'ete yuūⁿ chi ngii caadi 'iinū ciento kilómetros yeⁿe. Ní yaacu n'dái indáá ndii na freno yeⁿe 'yúudū.

Angeles ndúúcu tá ndeēchē yá'āi

15 Cuayiivi ní n'diichí táamá señal na va'ai chēti nguuvi chí ch'ete n'dai ní cheⁿe yiinú yeⁿe. Ní véé ndeēchē ángeles ndúúcu ndeēchē chi cuuvi 'nuucá'ai chí 'cuiinu. Ní ndúúcu ndeēchē chi cuuvi 'nuucá'ai chí 'cuiinu, ndúúcu chuú nūⁿ 'cuiinū tiempo chi Ndyuūs nduuvi taáⁿ yā.

²Tuu'mi n'diichí 'áámá nuūⁿnīⁿ'yáⁿā chi tan'dúúca vidrio ndístaⁿ a ndúúcu nguūchí yáⁿā. Ní 'iiⁿ'yāⁿ s'eeⁿ chi chéé yā cuⁿu yā

ndúúcu 'iiti monstruo miiⁿ ndúúcu 'iiti chi santo yeⁿe tī ndúúcu 'iiⁿ'yāⁿ chi canéé chi duuchí tī ní número yeⁿe tī na cuerpo yeⁿe yā, 'iiⁿ'yāⁿ chi ichéé yā yeⁿe 'iiⁿ'yāⁿ s'eeⁿ chééndii yā niiⁿnuūⁿ ná nuūⁿnīⁿ'yáⁿā chi vidrio miiⁿ, ní ndeē yā arpas chi Ndyuūs ca'a yā 'iiⁿ'yāⁿ s'eeⁿ. ³Ní chiitá yā canto yeⁿe Moisés, chi saⁿ'ā chi dichí'íve sa Ndyuūs. Ní chiitá yā canto yeⁿe 'iiⁿ'yāⁿ chi nguuvi 'iiti cuūchī. Ní 'tíicā nduudu chi chiitá yā:

Dii Señor Ndyuūs chi véé tanducuéⁿe dendu'ū poder ndúúcu di. N'geete taavi ca dii ní ngeⁿe yiinú yú yeⁿe tanducuéⁿe dendu'ū chi dii di. Dii rey yeⁿe tanducuéⁿe nación ní yúúni yeⁿe di ní cuaacu.

⁴Díí, Señor, ¿du'ū nguéé 'va'ā dii? ¿Du'ū nguéé caaⁿ'maⁿ chi dii ní neené ch'ete dii ti dámaaⁿ dii chi deēve di? Ní ndaa 'iiⁿ'yāⁿ yeⁿe tanducuéⁿe naciones nanááⁿ dii chi dich'eté yā dii caati nducyáácá 'iiⁿ'yāⁿ n'diichi yā chi dii di tanducuéⁿe dendu'ū chi cuaacu ní n'daacā n'dai.

⁵Ní cuayiivi ní n'diichí chi nanguaaⁿ cheendi va'āi yeⁿe yāacū chi canéé na va'ai chēti nguuvi, ní chēti yaācū miiⁿ, miiⁿ canéé cuarto chí yaānū naachi canéé tuū ch'eté chi canéé nguūⁿ ley yeⁿe Moisés. ⁶Ní yeⁿe yaācū miiⁿ can'dáa ndeēchē ángeles. Ní ndeē yā ndu'ū ndeēchē chí n'nuu cá'ai yā. Ní véé catecai yā yeⁿe tiinūⁿ chi nguuvi lino chí cuéē ní deēve. Ní n'deē

chiichí niiⁿ nuⁿ yā ndúúcu cinta yeⁿe dííⁿ nguāⁿ. ⁷Núúⁿ máⁿ chēetí nūⁿ 'áámá 'iiⁿ yāⁿ naachi na cuuúⁿ yā ní ca'a yā ndu'u ndēēchē ángeles ndēēchē 'cuutíí yeⁿe 'dííⁿ nguāⁿ ca'áámá ca'áámá yā 'áámá 'cuutíí chi ndiitúu yeⁿe castigo chi neene taaⁿ chi yeⁿe Ndyuūs chi canduuchi cueⁿe daāⁿ maⁿ. ⁸Ní yaācū miiⁿ ndiitúu 'yaaⁿ miⁿ chi can'daā yeⁿe vaadí ch'ēete taavi ca yeⁿe Ndyuūs ní yeⁿe poder yeⁿe yā. Ní mar 'áámá 'iiⁿ yāⁿ cuuví cundaa yā na yaācū miiⁿ ndíí taachi ch'ó'oo ndēēchē vaadí ya'ai chi ndée ndu'u ndēēchē ángeles.

Ndeēchē 'cuutíí yeⁿe vaadí ya'ai

16 Tuuⁿ mi ní ch'iindiveéⁿ 'áámá nduudu neene díítúu chi can'daā yeⁿe yaacu miiⁿ ní ngaⁿ'a ngii ndu'u ndēēchē ángeles miiⁿ: Ndís'tií ángeles, cueⁿé nī ní n'daaviyai nī vmnaaⁿ yáⁿ'āa yeⁿe chi snúūⁿ chēeti 'cuutíí yeⁿe nī chi castigo chi neené díítúu chi Ndyuūs ca'á yā 'iiⁿ yāⁿ.

²Ní ángel vmnááⁿ vmnaaⁿ cheⁿe yā n'daaviyai yā chi snúūⁿ 'cuutíí yeⁿe yā vmnaaⁿ yáⁿ'āa ní vmnaaⁿ nducyaaca 'iiⁿ yāⁿ chi ndée yā sello yeⁿe 'iiti monstruo na cuerpo yeⁿe yā, 'iiⁿ yāⁿ chi i'téenu yā 'iiti santo yeⁿe tí. Ní can'dáa n'dúú'ví n'gēete chi neené ya'ai na cuerpo 'iiⁿ yāⁿ s'eeⁿ.

³Tuuⁿ mi ní ndii chííⁿ ndii 'uūví ángel miiⁿ n'daaviyai yā 'cuutíí yeⁿe yā vmnaaⁿ nuūⁿ nīⁿ yáⁿ'ā ní nduuví yuuúⁿ tan'dúúⁿ cā yuuúⁿ yeⁿe 'aama tináⁿ'ā. Ní tanducuéⁿ 'e 'iiti chi sduuchí chēeti nuūⁿ nīⁿ yáⁿ'ā miiⁿ ch'ii tí.

⁴Ní ndii chííⁿ ndii 'íínú ángel miiⁿ n'daaviyai yā 'cuutíí yeⁿe yā vmnaaⁿ yeⁿe yíícú ní vmnaaⁿ yeⁿe naachi can'daā nuūⁿ nīⁿ miiⁿ. Ní nducuéⁿ 'e nuūⁿ nīⁿ miiⁿ nduuví yuuúⁿ. ⁵Ní niiⁿ nuúⁿ nūⁿ ch'iindiveéⁿ ángel yeⁿe nuūⁿ nīⁿ miiⁿ chí ngaⁿ'a yā: Dii Señor, 'āa canéé dí cuááⁿ vmnaaⁿ, ní canee di maaⁿ. Dii ní cuaacu di ti n'diichi di nuūⁿ ndí 'iiⁿ yāⁿ s'eeⁿ. ⁶Ní 'tíicā diiⁿ di caati 'iiⁿ yāⁿ s'eeⁿ ní ch'iiⁿ núⁿ yā 'iiⁿ yāⁿ yeⁿe di ndúúcu 'iiⁿ yāⁿ chí 'áámá dííⁿ yā ttiíⁿ nyuⁿ yeⁿe di ndúúcu 'iiⁿ yāⁿ chí caⁿ'a nduudu cuaacu yeⁿe di. Ní maaⁿ ní dii nca'a di yuuúⁿ yeⁿe nuūⁿ nīⁿ miiⁿ chí cu'ú yā caati 'tíicā chí n'daacā chí cu'ú yā yuūuⁿ miiⁿ cucáávā chí diiⁿ yā chí nguéé n'daacā.

⁷Ní ch'iindiveéⁿ nduudu yeⁿe 'áámá yeⁿe nátai chí ngaⁿ'a ngii Ndyuūs, ní ngaⁿ'a: Dii, Ndyuūs, chí véé tanducuéⁿ 'e dendu'ū poder ndúúcu di, cuaacu níⁿ nyúⁿ n'diichi di nuūⁿ ndí yeⁿe 'iiⁿ yāⁿ. Ní diiⁿ di chí cuaacu ní n'dai taavi.

⁸Ní n'diichí ndíí cuūuⁿ ángel miiⁿ n'daaviyai yā 'cuutíí yeⁿe yā vmnaaⁿ yeⁿe yáⁿ'ā. Ní ca'á yā poder yáⁿ'ā miiⁿ chí 'neeⁿ yáⁿ'ā 'iiⁿ yāⁿ ndúúcu 'yáⁿ'ā yeⁿe. ⁹Ní nducyaaca 'iiⁿ yāⁿ ní chiichí yā ndúúcu 'iiⁿ nūⁿ taáⁿ yeⁿe 'yáⁿ'ā miiⁿ. Ní neené taaⁿ ya'ai yeⁿe yā. Ní cunncaā caⁿ'a yā yeⁿe chí duuchi Ndyuūs chí véé poder yeⁿe yā yeⁿe ndēēchē cá'ai 'cūū. Naati 'iiⁿ yāⁿ s'eeⁿ nguéé ndaacadaamí yā yeⁿe nuūⁿ ndí yeⁿe yā ní nguéé dich'ēetē yā Ndyuūs.

¹⁰Ní n'diichí ndii nyuⁿ ángel miiⁿ n'daaviyai yā 'cuutíí yeⁿe yā vmnaaⁿ yeⁿe trono yeⁿe 'iiti monstruo miiⁿ ní vmnaaⁿ yeⁿe tanducuéⁿ 'e chí

ngaⁿá ti ntiiⁿnyuⁿ yeⁿé ní canéé ná 'áámá maáiⁿ. Ní 'iiⁿyāⁿ s'eeⁿ ní cheⁿenéé yā chiiya yā cáávā chi ya'ai yā. ¹¹Ní 'iiⁿyāⁿ s'eeⁿ cunncaā caⁿa yā yeⁿe Ndyuūs chi canée yā na va'ai cheeti nguuvu cucáávā chi ya'ai yeⁿe yā ndúúcū n'duu'vi yeⁿé yā. Ní nguéé nandaacadaamí yā yeⁿe nuuⁿndi yeⁿe yā.

¹²Tuuⁿmi ní ndii chíⁿ ndii niyaaⁿ ángel miiⁿ n'daaviyaí yā 'cuutíí yeⁿé yā vmaaⁿ yíicú ch'εete chi nguuvu Eufrates ní nuūⁿniⁿ yeⁿe yíicú ch'εete miiⁿ ntiⁱ. Ní n'guaāⁿ 'aama yúúni ní 'iicu 'iiⁿyāⁿ reyes cuuvi cuchii yā cuaaⁿ naachi can'daā 'yáⁿā na yúúni miiⁿ.

¹³Tuuⁿmi ní n'diichí chí can'daā 'iinū espíritus yeⁿe yááⁿn'guiinūⁿ chi tan'dúúcā sapo, 'tíicā espíritus. Ní can'daā yeⁿé cheendi 'iiti dragón miiⁿ ní yeⁿé cheendi 'iiti monstruo chi ch'εete taavi cá ti ní yeⁿe cheendi profeta chi ngaⁿa yā chi yeⁿe Ndyuūs 'yā, ní nguéé ngaⁿa yā nduudu cuaacu yeⁿe maáⁿ yā. ¹⁴Espíritus ndúúcū espíritus yeⁿe yááⁿn'guiinūⁿ ní díⁿ yā señas yeⁿe vaadi n'giinu. Ní cueⁿe yā nanááⁿ nducyáácá reyes yeⁿé núúⁿmaⁿ iⁿ'yeeⁿdí 'cūū chi nadaama yā 'iiⁿyāⁿ s'eeⁿ chi cuuvi 'cuuⁿmaⁿ yā nguuvu chi ch'εete chi yeⁿé Ndyuūs chi véé nducuéⁿé dendu'u poder yeⁿe yā. ¹⁵Ní Cristo ngaⁿá yā. Cuin'diichí nī. 'Úú ní cuchíí tan'dúúcā 'áámá chíduucu. De'ē chúúcā n'dai 'iiⁿyāⁿ chi sндуuchí yā ní snúuⁿ yā catecai yā ní nguéé 'cuetinée yā chi chiica yā chi yuucú yā chi 'iiⁿyāⁿ s'eeⁿ inaáⁿ yā ní 'íicú cuuvi 'cuináⁿ yā. ¹⁶Ní espíritus nduuvidaami yā reyes yeⁿe yáⁿā na 'áámá lugar

chi nguuvu Armagedón na davaacu hebreo.

¹⁷Tuuⁿmi ní ndii chíⁿ ndii ndeēchē ángel miiⁿ n'daaviyaí yā 'cuutíí yeⁿe yā na 'yúúné. Ní yeⁿe yáacū miiⁿ chi canéé na va'ai cheeti nguuvu miiⁿ can'daā 'áámá nduudu neene díítūu lado yeⁿe trono miiⁿ chí ngaⁿá 'túúcā: Áā tunééⁿ nducuéⁿé.

¹⁸Tuuⁿmi ní véé 'cuaī ndúúcū nduudu s'eeⁿ ndúúcū daavi ndúúcū chi diituu n'dái n'nuⁿu yáⁿā. Ní ch'εete ca nguéé ti tan'dúúcā chi cunee ndii tiempo chi 'iiⁿyāⁿ canée yā iⁿ'yeeⁿdí 'cūū. ¹⁹Ní yáāⁿ ch'εete chi yáāⁿ Babilonia miiⁿ chii 'iinū taaⁿ ní nducuéⁿé yáāⁿ yeⁿé iⁿ'yeeⁿdí 'cūū ní sndεεve. Ní Ndyuūs nn'gáácú yā yeⁿe yáāⁿ ch'εete chi yáāⁿ Babilonia miiⁿ. Ní ca'á yā 'iiⁿyāⁿ chi canéé na yáāⁿ s'eeⁿ chi cu'ú yā vino yeⁿé yā chi vino yeⁿe vaadi taaⁿ yeⁿé Ndyuūs. Ní vino miiⁿ chi ca'á yā ní castigo chi neené díítūu. ²⁰Ní tanducuéⁿé yáⁿā islas ndúúcū tanducuéⁿé yíicū n'gεete ní ndáá inaaⁿ. ²¹Ní yeⁿe nanguuvi ní ndεεve n'dee n'dái yuúúⁿ chi neené diituu vmaaⁿ 'iiⁿyāⁿ yeⁿe iⁿ'yeeⁿdí. 'Áámá áámá yuúuⁿ miiⁿ n'gii tan'dúúcā 'uúvī ngeεecu kilos. Ní 'iiⁿyāⁿ yeⁿe iⁿ'yeeⁿdí caaⁿmaⁿ taáⁿ yā yeⁿé Ndyuūs cáávā yeⁿe vaadi ya'ai miiⁿ yeⁿe yuúuⁿ ti castigo yeⁿé vaadi ya'ai miiⁿ ní néené díítūu.

Nuuⁿndi taavi yeⁿe 'áámá n'daataá chi néené caⁿa tá ndúúcū saⁿā s'eeⁿ

17 Tuuⁿmi ní 'áámá ángel naachi ndeēche yā chi ndée yā ndu'u ndeēchē 'cuutíí ndáa yā nanááⁿ 'úú, ní caⁿa yā chii yā 'úú: Dii, Juan cuchíí di nducú ní 'úú ní

'cuuⁿmíⁿ dii castigo chi ch'εete ca chi cuchii vmnaaⁿ 'áámá ndaataá chi véé cá saⁿá yeⁿē ta. N'daataá miiⁿ ní véé yā vmnaaⁿ nuūⁿniⁿyāⁿā s'eeⁿ. ²Saⁿá reyes yeⁿe iⁿ'yeeⁿdí 'cūū cueⁿé yā ndúúⁿcū n'daataá miiⁿ ní n'geetinée yā ndúúⁿcū n'daataá miiⁿ. Ní nducyaaca 'iiⁿyāⁿ chi snée yā na yāⁿāa cueⁿé yā ndúúⁿcū n'daataá ó isaⁿā chi nguéeⁿ yeⁿe yā tan'dúúⁿcā chi cuuⁿví yā ndúúⁿcū vino yeⁿe tá yeⁿē chi dinuuⁿndi cá yā 'tíicā.

³Ní 'úú canée maáⁿ poder Espíritu N'dai yeⁿé Ndyuūs ní ángel miiⁿ candée yā 'úú na yāāⁿ cuuⁿmáⁿ naachi nguéeⁿ ch'εetinéeⁿ 'iiⁿyāⁿ. Ní míⁿ n'diichí 'áámá n'daataá candúu tá 'áámá monstruo cuá'a tī chi ch'εete ca. Ní néené n'deēe chi duuchi chi contra yeⁿe Ndyuūs s'néeⁿ nguūⁿ na cuerpo yeⁿe 'iiti miiⁿ. Ní véé ndeεche tíⁿ tī ní véé ndiichi duuⁿniiⁿníⁿ tī. ⁴Ní n'daataá chi candúu ta monstruo cuá'a tī ní canuuⁿ tá vestido chi morado ndúúⁿcū cuá'ā. Ní véé adorno yeⁿē tá chi 'díⁿnguāⁿ ndúúⁿcū tuūu chi néené yaⁿai chíⁿvē ndúúⁿcū perlas. Ní ndεε tá ná ta'a tá 'aama taza yeⁿe 'díⁿnguāⁿ chi diituú ndúúⁿcū denduⁿū chi nguεε n'daacā chi nuūⁿndī vaatii ndúúⁿcū chi dendúⁿū yeⁿe chi cueⁿe tá ndúúⁿcū saⁿā s'eeⁿ chi nguéeⁿ yeⁿe tá. ⁵Ní canée nguūⁿ 'áámá chi duuchi ná nchεetē tá chi canúúⁿ n'de'ei chi neⁿe caaⁿmaⁿ chi 'túúⁿcā. Yāāⁿ Babilonia ch'εete chi chεεcuú nducyaaca n'daataá chi caⁿá yā ndúúⁿcū saⁿā chi nguéeⁿ yeⁿe yā ndúúⁿcū nducuéⁿē cosas chí nguéeⁿ n'daacā na iⁿ'yeeⁿdí 'cūū chi diiⁿ 'iiⁿyāⁿ s'eeⁿ. ⁶Ní 'úú chicadiinúúⁿ chi n'daata miiⁿ ní cuuⁿví tá caati

cu'u ta yuūⁿ yeⁿe 'iiⁿyāⁿ chi n'díi yā ti yeⁿe Ndyuūs ní yeⁿe 'iiⁿyāⁿ chí ngaⁿá yā nduudu cuaacu yeⁿe Cristo. Ní taachi n'diichí chuū cueⁿe yiinú yeⁿē. ⁷Tuuⁿmi ní ángel chi ndεε yā 'úú ngaⁿa yā ngii yā 'úú: ¿De'ē cúúví chí ngeⁿe yinu dí yeⁿe chuū? 'Úú ní cuuví dii chi canúúⁿ n'de'ei yeⁿē n'daataá miiⁿ ndúúⁿcū yeⁿe monstruo ch'εete chi ndεé tī ndaataá miiⁿ, monstruo miiⁿ chí véé ndeēchē tíⁿ tī ní ndiichi duuⁿniiⁿníⁿ tī. ⁸'Iiti monstruo chi n'diichí di ní 'áámá tī chi ndii tiempo vmnaaⁿ canduuchí tī naati maaⁿ ní 'āā ntéeⁿ tī, naati 'iiti miiⁿ cáámá canée chí can'daá tī na yivvée yeⁿe yāⁿāa vmnááⁿ vmnaaⁿ chí caⁿá tī di'cuiinú tī. Ní 'iiⁿyāⁿ chí snée yā na yāⁿāa ní nguéeⁿ snéeⁿ chí duuchí yā na libro yeⁿe vida cueⁿe daāⁿmaⁿ ndíf taachi Ndyuūs din'dái yā iⁿ'yeeⁿdí. 'Iiⁿyāⁿ s'eeⁿ ní ngeⁿe yiinú yā taachi n'diichí yā 'iiti miiⁿ chí vmnaaⁿ canduuchí tī naati maaⁿ ní 'āā ntéeⁿ tī. 'Āā chíⁿ tī naati nnguaacunée tī ndaá tī.

⁹Ní yeⁿē chúú véé cá chi cuuvi déenu 'iiⁿyāⁿ. Ndu'u ndeēchē tíⁿ tī ní chíⁿ tan'dúúⁿcā chí ndeēchē yīicū ch'εete naachi n'daataá miiⁿ ní véé yā vmnaaⁿ yeⁿē. ¹⁰Ní véé ndeēchē reyes. Nyuⁿu reyes ní chíⁿ yā. Maaⁿ ní 'áámá rey miiⁿ ní ngaⁿa ntiⁿnyuⁿ yā yeⁿe 'iiⁿyāⁿ chí véé maaⁿ. Ní táámá rey ní canée chí ndaá yā. Ní taachi ndaá rey miiⁿ chí ndu'u chi ndeēchē nguéeⁿ 'naaⁿ tiempo canée yā iⁿ'yeeⁿdí. ¹¹Ní táámá 'iiti monstruo chí vmnaaⁿ canduuchí tī ní maaⁿ ní 'āā ntéeⁿ tī chíⁿ tī ní 'iiti miiⁿ chí rey miiⁿ ní nduvidáámá tī ndúúⁿcū ta ndeēché tī. Ní cuayiivi ní

rey miiⁿ caⁿá yā cuuvi ndai yā chi vaadi n'gii yeⁿe ndii 'uūvi cuuvi chi infierno.

¹²Ní ndu'u ndiichi duuⁿniiⁿíⁿ tī chi n'diichi di chíⁿ chí ndu'ū ndiichi reyes chi 'āā cuéé cuta'á yā poder yeⁿé yā naachi ngaⁿā ntiⁿnyúⁿ yā. Taachi cuta'á yā poder ní chi cuuvi reyes ndúú^cū 'iiti monstruo miiⁿ 'áámá hora nūⁿ.

¹³Ní reyes s'eeⁿ ní dáámá nūⁿ vaanicadíinūⁿ yeⁿé yā. Ní ca'a yā poder yeⁿé yā ndúú^cū fuerzas yeⁿe yā na ta'a 'iiti monstruo miiⁿ. ¹⁴Ní reyes ní 'cuuⁿmaⁿ yā ndúú^cū 'iiⁿyāⁿ chí nguuvi 'iiti cuūchī naati 'iiⁿyāⁿ miiⁿ chí nguuvi 'iiti cuūchī cuchée yā yeⁿe reyes. Ní Señor ch'ēete ca ní 'iivi nducyaaca 'iiⁿyāⁿ señores ní rey ch'ēete ca yeⁿe nducyaaca reyes. Ní 'iiⁿyāⁿ s'eeⁿ chi canée yā ndúú^cū 'iiⁿyāⁿ miiⁿ ní Ndyuūs yaa'ví yā 'iiⁿyāⁿ s'eeⁿ chi cuuvi yeⁿé yā. Ní Ndyuūs ndēevé yā 'iiⁿyāⁿ s'eeⁿ chi yeⁿé yā. Ní 'iiⁿyāⁿ s'eeⁿ ní 'aama canee yā ndúú^cū chi i'téenu yā Ndyuūs.

¹⁵Ní ángel miiⁿ caⁿa yā chii yā 'úú: Nuūⁿníⁿyáⁿā s'eeⁿ chí n'diichi di naachi véé n'daataá chi caⁿa tá ndúú^cū saⁿa s'eeⁿ, nuūⁿníⁿyáⁿā s'eeⁿ ní chíⁿ chí yāāⁿ s'eeⁿ ndúú^cū n'dee n'dái 'iiⁿyāⁿ ndúú^cū 'iiⁿyāⁿ chí ngaⁿa n'dee n'dái davaacu chi n'dááⁿ ndúú^cū naciones. ¹⁶Ní ndu'ū ndiichi duuⁿniiⁿíⁿ tī chi véé yeⁿe monstruo miiⁿ, nguéé neⁿe n'daataa mífⁿ. Ní cuta'a tī nducuéⁿē yeⁿe n'daataa miiⁿ. Ní diví tī catecai n'daataa miiⁿ ní s'neeⁿ táⁿā chí yuucúū tá. Ní che'é tī yuūtē yeⁿe tá. Ní 'neeⁿ yaⁿā n'daataa miiⁿ ndúú^cū nguuchi yaⁿā. ¹⁷Caati Ndyuūs s'neeⁿ

yā na staava yeⁿe reyes chí díⁿ yā 'túú^cā tan'dúú^cā chí Ndyuūs neⁿé yā chí díⁿ yā. Ní ndiichi duuⁿniiⁿíⁿ tī nduvidaamí tī ní ca'á tī poder yeⁿé tī na ta'a 'iiti monstruo miiⁿ chí caaⁿmaⁿ ntiⁿnyúⁿ tī. Ní 'túú^cā díⁿ tī chí cuuvi cuaacu nduudu chí ngaⁿa Ndyuūs. ¹⁸Ní n'daataá chí n'diichi di chíⁿ chí yāāⁿ ch'ēete chí caaⁿmaⁿ ntiⁿnyuⁿ yeⁿe nducyaaca reyes chí snée yā ná iⁿyeēⁿdí.

Yáāⁿ Babilonia ntuūvii

18 Ní cuayiivi miiⁿ ní n'diichí táámá ángel chí ngiicá yā yeⁿe na va'ai ch'ēeti nguuvi ní véé poder ch'ēete yeⁿé yā. Ní yáⁿā miiⁿ canée dēeve ndúú^cū dēeve yeⁿe ángel miiⁿ. ²Ní 'cai yiicú yā ní caⁿa yā: Yáāⁿ chí ch'ēete nituūvii, yáāⁿ Babilonia chí ch'ēete ní nituūvii. Ní maaⁿ ní ch'ēetinee espíritus yeⁿe yáāⁿngiinūⁿ ndúú^cū espíritus chí nguéé n'daacā. Ní n'dee n'dái 'yaada chí vaatí snée tī yáāⁿ miiⁿ, 'yaada chí ní nguéé 'iinéé yiinú yā 'iiti. ³Caati n'daataa miiⁿ chí yáāⁿ Babilonia miiⁿ ní ca'a tá vino chí vaadi taaⁿ yeⁿe tá nducyaaca 'iiⁿyāⁿ ní cu'ú yā vino miiⁿ chíⁿ chí yeⁿe chí dinuuⁿndi tá. Ní reyes yeⁿe iⁿ'yeeⁿdí 'cūū cueⁿé yā na yáāⁿ miiⁿ ní dinuuⁿndí yā. Ní 'iiⁿyāⁿ yeⁿe iⁿ'yeeⁿdí 'cūū díⁿ yā negocios chí 'cuiica yā cucáāvā poder yeⁿe vaadi 'cuiica yeⁿe tá.

⁴Tuu'mi ní ch'iindiveéⁿ táámá nduudu yeⁿe va'ai ch'ēeti nguuvi chí ngaⁿa 'túú^cā: Ndíⁿtíi, 'iiⁿyāⁿ yeⁿé, nan'daa ní yeⁿe yáāⁿ miiⁿ caati nguéé díⁿ ní nuuⁿndi ndúú^cū tá. Ní nguéé cuta'á ní yeⁿe vaadi yá'āi yeⁿe tá. ⁵Tí núúⁿndí yeⁿe

tá n'dee n'dái chi ndaā ndii na va'ai cheeti nguuvi. Ní Ndyuūs nin'gaacu yā yeⁿe chi diiⁿ tá chí nguéé n'daacā. ⁶Ní ndís'tiī dííⁿ nī ndúúcū tá tan'dúúcā chi diiⁿ tá nduucú nī. Ní ca'á nī táⁿā miiⁿ 'uūví vueltas yeⁿe chí tee tá ndís'tiī. Ní didiitú nī ndúúcū vino yeⁿe taza yeⁿe tá ndúúcū vino chi 'uūví veces ditiinúú yeⁿe chí tee tá ndís'tiī. ⁷Ní dííⁿ nī chí 'cueenu taavi tá cuuvi ní cuuvi yá'ai yeⁿe tá n'dee cá tan'dúúcā chi maaⁿ tá dich'ete maaⁿ ta táⁿā ndúúcū chí véé cá chí sta'a tá cáávā maaⁿ tá. Ní 'tíicā nacadiinuuⁿ tá maaⁿ tá na staava yeⁿe tá. 'Muuⁿ caneé ní 'úú véé tan'dúúcā 'aama reina véé yā. Nguéé n'daata nguá'āa 'úú. Ní nguēé 'cweenú cuuvi. ⁸Ní yāāⁿ Babilonia, cáávā chí diiⁿ tá 'túúcā, n'dee n'dái vaadi yá'āi ní ndaā vmnaaⁿ yeⁿe tá na 'áámá nguuvi nūuⁿ, chííⁿ chí cuuvi yá'ai yeⁿe 'iiⁿ'yāⁿ s'eeⁿ. Ní 'cuūvi yā ní chēēcu yā chí ya'ai yā. Ní cuiicu yā ní cuūcu 'iiⁿ'yāⁿ s'eeⁿ ndúúcū nguuchi yáⁿā ti Señor Ndyuūs miiⁿ ní véé poder yeⁿe yā chí ch'ēete taavi ca ní ngaⁿá yā chí condenado yā.

⁹Ní reyes yeⁿe yáⁿāa 'cúū chí cueⁿé yā ndúúcu tá ní dinuuⁿndí yā ndúúcu tá, ní n'dee n'dái véé yeⁿe yā ti dííⁿ yā tan'dúúcā chí diiⁿ tá. Reyes miiⁿ cuéécú yā ní yuudu n'dái cuēcú yā taachi snaaⁿ yā táⁿā miiⁿ chí cuūcu tá ní snaaⁿ yā 'yaaⁿ'miⁿ yeⁿe tá. ¹⁰Ní 'va'á yā yeⁿe tá cáávā castigo yeⁿe tá ní cuééndii yā yaⁿ'ai yeⁿe tá ní caaⁿ'máⁿ yā: De'e chúcā ya'ái díí, de'e chúca ya'ái díí n'daataá chí yāāⁿ Babilonia chí ch'ēete chí véé poder ch'ēete yeⁿe, ti

cheeti 'áámá miníⁿ'yúⁿ nūuⁿ ndaā castigo yeⁿe di.

¹¹Ní 'iiⁿ'yāⁿ chí dííⁿ yā negocio na iⁿ'yeeⁿ'dí 'cūū cuēcú yā ní yuudu n'dái cuēcú yā cáávā yāāⁿ Babilonia miiⁿ. Ní ya'ai yā cáávā yāāⁿ miiⁿ ti nguéé véé mar 'áámá 'iiⁿ'yāⁿ chí cuuvi cuái yā yeⁿe mercancia chí ndēe yā. ¹²Mar 'áámá 'iiⁿ'yāⁿ nguéé cuaí yā yeⁿe chí ndēe yā chí 'dííⁿ'nguāⁿ ndúúcū 'dííⁿ'nguēe, ndúúcū tuū chí yaⁿ'ai chííⁿ'vē, ndúúcū perlas ndúúcū tiinūuⁿ n'dai ca chí nguuvi lino, ndúúcū tiinūuⁿ seda, ndúúcū tiinūuⁿ n'dai ca chí cuáā ndúúcū tiinūuⁿ n'dai ca chí morado, ndúúcū tanducuéⁿ'ē clase yeⁿe yáⁿ'á chí yuūdū ngééⁿ, ndúúcū cosas yeⁿe marfil, ndúúcū nducuéⁿ'ē cosas yeⁿe yáⁿ'á chí yaⁿ'ai chííⁿ'vē ndúúcū cūū cuááⁿ, ndúúcū cūū, ndúúcū tuū mármol, ¹³ndúúcū canela, ndúúcū especias chí yuudu ngééⁿ, ndúúcū cúⁿ'úyaa, ndúúcū unguento chí nguuvi mirra ndúúcū perfumes chí dēeve ngééⁿ, ndúúcū vino, ndúúcū aceite, ndúúcū harina fino, ndúúcū trigo. Ní ndēé yā ntūūⁿ 'iiti s'eeⁿ yeⁿe carga ndúúcū 'iiti cuūchí s'eeⁿ, ndúúcū 'yuūdūu s'eeⁿ, ndúúcū carros, ndúúcū 'iiⁿ'yāⁿ chí esclavos. ¹⁴Ní 'iiⁿ'yāⁿ s'eeⁿ chí dííⁿ yā negocios miiⁿ ngaⁿá yā yeⁿe yāāⁿ ch'ēete miiⁿ: Tanducuéⁿ'ē cosas yeⁿe chí nguéé n'daacā n'dai chí neⁿe 'iiⁿ'yāⁿ yeⁿe yāāⁿ 'āā ntéé véé. Ní nducuéⁿ'ē chí vaadi 'cuiica ndúúcū cosas chí n'dai taavi yeⁿe yāāⁿ miiⁿ 'āā ntéé véé. Ní 'āā ntéé cuuvi nndaāca yā tanducuéⁿ'ē dendu'ū yeⁿe.

¹⁵Ní 'iiⁿ'yāⁿ chí dííⁿ yā negocios ndúúcū 'iiⁿ'yāⁿ yeⁿe yāāⁿ ch'ēete

miiⁿ, chíiⁿ chi diiⁿ chi 'cuiicá yā.
 'Iiⁿyāⁿ s'eeⁿ cuēetindíí yaⁿái yā ti
 'va'a yā yeⁿe castigo yeⁿe yāāⁿ miiⁿ.
 Ní cuēcú yā ní yuudu n'dai 'cuai
 yā. ¹⁶Ní ngaⁿa yā: Dē'ē chúicā
 ya'ai yeⁿe yāāⁿ Babilonia ch'ēete
 ti tan'dúicā 'áámá n'daataá chi véé
 vestido yeⁿe tiinūⁿ lino chi yaⁿai
 chíí'vē ndúicū tíinūⁿ chi cuá'ā
 ndúicū morado. Ní véé adorno
 yeⁿe tá chi 'díi'nguāⁿ ndúicū
 tuūu chi yaⁿai chíí'vē ndúicū
 perlas. ¹⁷Ní chēeti 'áámá hora nūuⁿ
 tanducuéⁿē vaadi 'cuiica yeⁿe
 yāāⁿ miiⁿ ní ch'iinu. Ní nducyaaca
 'iiⁿyāⁿ capitanes chi ngaⁿa ntiⁿnyuⁿ
 yeⁿe barcos ti díiⁿ yā negocios
 cucáāvā barcos yeⁿe yā ní ndúicū
 nducyaaca 'iiⁿyāⁿ chi caⁿá yā na
 barcos, ndúicū nducyaaca 'iiⁿyāⁿ
 chi díiⁿ yā ntiⁿnyuⁿ yeⁿe barcos,
 nducyaaca 'iiⁿyāⁿ miiⁿ ní chēetindii
 yaⁿai yā. ¹⁸Ní taachi n'diichí yā
 'yaaⁿmiⁿ yeⁿe nguuchi yaⁿā yeⁿe
 yāāⁿ miiⁿ 'cai yiicú yā: ¿Chēe táámá
 yāāⁿ tan'dúicā yāāⁿ 'cūū?

¹⁹Ní 'iiⁿyāⁿ s'eeⁿ ní s'neéⁿ yā
 iyaácá vmnaaⁿ tíiⁿ yā ní chēcú yā.
 Ní yuudu n'dai chēcú yā. Ní 'caí yā:
 Dē'ē chúicā ya'ai, dē'ē chúicā ya'ai
 yeⁿe yāāⁿ ch'ēete miiⁿ. Ní nducyaaca
 'iiⁿyāⁿ chi véé barco yeⁿe yā vmnaaⁿ
 nuūⁿnīⁿyáⁿā ní 'cuíca yā cáāvā
 vaadi 'cuiica yeⁿe yāāⁿ miiⁿ, chēeti
 'áámá hora nūuⁿ ch'iinu yāāⁿ ch'ēete
 miiⁿ ndúicū chi véé yeⁿe.

²⁰Naati ndís'tiī chi canéé na
 va'ai chēeti nguuví ndúicū ndís'tiī
 chí apóstoles, ndúicū ndís'tiī chi
 ngaⁿa nduudu yeⁿe Ndyuūs ní
 ndúicū nducyaaca 'iiⁿyāⁿ chi yeⁿe
 Ndyuūs, nducyáácá nī yeenú nī
 yeⁿe yāāⁿ miiⁿ ti Ndyuūs caⁿ'a yā

chi condenado yāāⁿ miiⁿ. Ní Ndyuūs
 díiⁿ yā justicia yeⁿe ndís'tiī.

²¹Tuu'mi ní ángel chi neené
 ditiinú yā sta'á yā 'áámá tuūu ch'ēete
 chi tan'dúicā 'áámá tuūu ch'ēete
 yeⁿe molino. Ní canuúⁿ yā tuūu miiⁿ
 na nuūⁿnīⁿyáⁿā ní ngaⁿá yā. 'Tíicā:
 Ní diitu dituuví yā yāāⁿ Babilonia
 chi yāāⁿ ch'ēete miiⁿ ní 'āā ntéé
 cuuvi n'diichí yā yāāⁿ miiⁿ. ²²Ní 'āā
 ntéé n'giindiveeⁿ yā na yúúni yeⁿe
 yāāⁿ miiⁿ música yeⁿe 'iiⁿyāⁿ chi
 dī'cuēcú yā arpas, ndúicū música
 yeⁿe 'iiⁿyāⁿ músicos, ndúicū música
 yeⁿe 'iiⁿyāⁿ chi i'tiiví yā flautas,
 ndúicū 'iiⁿyāⁿ chi dī'cuēcú yā
 trompetas. Ní nguée véé 'iiⁿyāⁿ chi
 idiiⁿ ntiⁿnyuⁿ na yāāⁿ miiⁿ. Ní nguéeⁿ
 n'giindiveeⁿ yā chi 'cuēecu tuūu
 yeⁿe molino na yāāⁿ miiⁿ. ²³Āā ntéé
 n'diichí yā chideēve yeⁿe lámparas
 yeⁿe yāāⁿ miiⁿ. Āā ntéé n'giindiveeⁿ
 yā ruido yeⁿe 'viicú chi diiⁿ 'iiⁿyāⁿ
 chi n'giindivaacú yā. 'Áará chi 'iiⁿyāⁿ
 yeⁿe yāāⁿ miiⁿ ní díiⁿ yā negocios ní
 ch'ēete n'dai ca poder yeⁿe yā nguée
 ti tanáⁿa yā yeⁿe iⁿ'yeeⁿdí 'cūū, ní
 'iiⁿyāⁿ yeⁿe yāāⁿ miiⁿ ní chinnche'í
 yā 'iiⁿyāⁿ yeⁿe tanáⁿā naciones
 ndúicū dendu'ū yeⁿe vaadi ngaatu
 chi díiⁿ yā.

²⁴Ní na yāāⁿ ch'ēete miiⁿ 'iiⁿyāⁿ
 nndaāca yā yuūuⁿ yeⁿe 'iiⁿyāⁿ
 chi ngaⁿá yā nduudu cuaacu
 yeⁿe Ndyuūs ndúicū yuūuⁿ yeⁿe
 'iiⁿyāⁿ chí yeⁿe Ndyuūs ndúicū
 yuūuⁿ yeⁿe nducyáácá 'iiⁿyāⁿ yeⁿe
 iⁿ'yeeⁿdí 'cūū chi ch'iī yā.

19 Cuayiivi miiⁿ ní ch'iindiveeⁿ
 'áámá nduudu chi ch'ēete
 n'dai yeⁿe na va'ai chēeti nguuvi
 chi yeⁿe neéné 'yaaⁿ n'dai 'iiⁿyāⁿ. Ní
 ngaⁿa yā:

Aleluya. Dich'εete yú Ndyuūs ti nadanguáⁿai yā s'uuúⁿ. Ní vaadi dεeve n'gii ndúúcū tanducuéⁿē poder ní yeⁿe Ndyuūs yeⁿe yú.

² Caati Ndyuūs n'diichí yā nuuⁿndí yeⁿe 'iiⁿ'yāⁿ ndúúcū nduudu cuaacu chí n'dai. Ngaⁿ'á yā chi n'daataá chi cueⁿe tá ndúúcū saⁿ'á s'eeⁿ ní condenado tá ti n'daataa mífⁿ ní diiⁿ tá chi 'iiⁿ'yāⁿ yeⁿe yáⁿ'āa cūū ní dinuuⁿndi yā cáávā chi nééné dinuuⁿndi tá. Ndyuūs ca'a yā castigo táⁿ'ā miiⁿ caati ngée tá yuūuⁿ yeⁿe 'iiⁿ'yāⁿ chi dichíⁿ'vε yā Cristo taachi ch'iiⁿ'nuⁿ tá 'iiⁿ'yāⁿ s'eeⁿ.

³ Ní ndee n'dái 'iiⁿ'yāⁿ ngaⁿ'a ntúuⁿ yā: Aleluya. Dich'εete yú Ndyuūs. 'Yaaⁿ'miⁿ yeⁿe n'daataá miiⁿ chi cuucu yaⁿ'ā táⁿ'ā 'áámá chεε 'yaaⁿ'miⁿ yeⁿe tá chi castigo yeⁿe tá cueⁿ'e daāⁿmaⁿ.

⁴ Ní ndu'u ndiicú cuūuⁿ 'iiⁿ'ntyéⁿē ndúúcū ndu'u cuūuⁿ 'iiⁿ'yāⁿ ch'eēndiitfⁿdii yā nanááⁿ Ndyuūs chi véε yā na trono yeⁿ'é yā ní nducyaaca yā ndúúcū naánⁿ yā na yáⁿ'āa chi'téenu yā Ndyuūs ní caⁿ'a yā 'tíicā: Aleluya. Dích'εete yú Ndyuūs.

⁵ Ní ch'iindiveéⁿ 'áámá nduudu yeⁿe trono miiⁿ chi ngaⁿ'a 'tíicā: Nducyáácá nī canéé chi dich'εetε nī Ndyuūs yeⁿe yú. Ndís'tii chi ngaⁿ'a ntiiⁿ'nyúⁿ nī ndúúcū tanáⁿ'a nī, nducyaaca nī chi dichíⁿ'vε nī Ndyuūs ní 'va'á nī yeⁿe yā.

'Viicu yeⁿ'ē chi ch'iindivaacú 'iiⁿ'yāⁿ chi nguuvi 'iiti cuūchí

⁶ Ní táámá vmnéⁿ'ēe ch'iindiveéⁿ 'áámá nduudu yeⁿ'ē ndee n'dái

'iiⁿ'yāⁿ tan'dúúcā chi n'gεεcú naachí 'yaaⁿ n'dái nuūⁿnī ní tan'dúúcā chi n'gεecu diituu n'dái daavi. Ní ngaⁿ'a yā:

Aleluya. Dich'εete yú Ndyuūs ti Señor yeⁿe yú, Ndyuūs yeⁿe yú chí véé tanducuéⁿē dendu'ū poder nduucú yā 'āā ngaⁿ'a ntiiⁿ'nyúⁿ yā yeⁿe tanducuéⁿē dendu'ū.

⁷ Maaⁿ ní yeenu taavi yú ní véé vaadi yeenú nanáaⁿ yú ní caⁿ'a yú chí ch'εete taavi ca Ndyuūs ti ndaā tiempo chí 'iiⁿ'yāⁿ chí nguuvi 'iiti cuūchí ní 'caandavaacú yā. Ní n'daataá yeⁿ'e yā 'āā véé yaaⁿ tá. N'daataá miiⁿ ní nducyaaca 'iiⁿ'yāⁿ chí i'téenu yā Cristo.

⁸ Ní ca'á yā n'daataa yeⁿ'e yā 'áámá vestido chí yeⁿ'e lino chí yaⁿ'ai chíⁿ'vε chí dεeve ní cuéē.

Ní tiinūuⁿ lino miiⁿ ní chíⁿ'f chí vida chí n'dai taavi yeⁿ'é 'iiⁿ'yāⁿ chí yeⁿ'é Ndyuūs.

⁹ Tuuⁿ'mi ní ángel chí candée yā 'úú caⁿ'a yā chíi yā 'úú. Díí, Juan, dingúuⁿ di 'tíicā: De'ε chúúcā n'dai cáávā 'iiⁿ'yāⁿ s'eeⁿ chí 'áámá 'caí yā 'iiⁿ'yāⁿ s'eeⁿ chí cuchíí yā naachi 'iiⁿ'yāⁿ chí nguuvi 'iiti cuūchí 'caandavaacú yā ní 'iiⁿ'yāⁿ s'eeⁿ che'e nguuiⁿ yā yeⁿ'e 'viicu miiⁿ. Ní ángel miiⁿ caⁿ'a yā chíi yā 'úú: Nduudú 'cūū ní yeⁿ'é Ndyuūs ní cuaacu.

¹⁰ Ní 'úú chiintii'yá na ca'a ángel miiⁿ chí dich'εetε ángel miiⁿ. Ní caⁿ'a yā: Nguéé 'tíicā diiⁿ di. 'Úú ntúūⁿ dichíⁿ'vε Ndyuūs tan'dúúcā díí ndúúcū hermanos yeⁿ'ē di

dichí'vè ní Ndyuūs ní nga^{'a} ní nduudu cuaacu ye^{'e} Jesucristo. Dii, cu'téenu di Ndyuūs. Ní 'ii^{'yā} chi nga^{'a} yā nduudu cuaacu ye^{'e} Cristo ní nga^{'á} yā cáávā chi Ndyuūs ch'i^{'í} yā 'ii^{'yā} s'ee^{'n} chii^{'n} chi nga^{'á} yā.

Ye^{'e} 'áámá 'ii^{'yā} chi canduú yā 'yuūdūu cuéē

¹¹Tuu'mi ní n'diichí chi canda'āi va'ai cheeti nguuvi ní candáá 'áámá 'yuūdūu cuéē. Ní Cristo chi canduú yā 'yuūdūu mii^{'n} chi duuchí yā ní 'Áámá N'daacā N'dai yā ní Cuaacú yā. Ní 'ii^{'yā} mii^{'n} ní dií^{'n} yā tanducué^{'ē} chi cuaacu taachi dií^{'n} yā caandaá ní n'diichí yā nuu^{'ndi} ye^{'e} 'ii^{'yā} s'ee^{'n}. ¹²Ní nduutinaá^{'n} yā mii^{'n} ní tan'dúucā nguuchi ya^{'ā}, 'tíicā nduutinaá^{'n} yā. Ní canéé n'dee n'dái coronas na tíi^{'n} yā. Ní canéé nguū^{'n} 'áámá chi duuchi yā chi mar 'áámá 'ii^{'yā} nguéé n'diichí yā. Dámaā^{'n} 'ii^{'yā} mii^{'n} deenú yā de'ē chi duuchí yā. ¹³Ní catecaí yā chi canuu^{'n} yā ndiituu^{'n} yúúú^{'n}. Ní chi duuchí yā ní Nduudu ye^{'e} Ndyuūs. ¹⁴Ní cuaa^{'n} daamí yā ní n'dáa n'dee n'dái soldados ye^{'e} va'ai cheeti nguuvi ndúúcū catecaí yā chi lino chi ya^{'ai} chí'vē chi cuéē ní deeve. Ní soldado canduú ntúú^{'n} yā 'yuūdūu cuéē ye^{'e} yā. ¹⁵Ní na cheendí Cristo can'daā 'áámá machete nduu 'uūvī lados 'caāi^{'n}. Ní ndúúcū chuū n'nuū cá'ai yā 'ii^{'yā} ye^{'e} naciones. Tuu'mi ní caa^{'ma} n'tii^{'nyú} yā diituu^{'n} ye^{'e} naciones ndúúcū 'áámá nduucu cūū. Ní ngii ca'a yā lugar chi 'ii^{'yā} s'ee^{'n} sta'á yā vino chi nuū^{'ni} ye^{'e} n'g'u'i' uvas chi 'ii^{'yā} dinde'éi yā ndúúcū ca'á

yā. Ní Cristo ca'a yā 'ii^{'yā} s'ee^{'n} chi cu'u yā vino mii^{'n} chi castigo ye^{'e} vaadi taa^{'n} ye^{'e} Ndyuūs chi véé tanducué^{'ē} poder chi véé ní ye^{'e} yā. ¹⁶Ní canéé nguū^{'n} na vestido ye^{'e} yā ní na 'dii^{'má} yā chi duuchí 'cūū: Rey ch'εεε ye^{'ē} nducué^{'ē} reyes chi véé, Señor 'iiví yā ch'εεε ye^{'e} nducyaaca señores 'iivi chi véé.

¹⁷Ní cuayiví nūū^{'n} n'diichí 'aama ángel cheendii yā vmnaa^{'n} 'yá^{'ā}. Ní ángel mii^{'n} yuudu n'dái n'gai yā ní ca^{'a} yā chii yā nducyaaca 'iiti chi ngaá tí nánguuví: Ndís'tii 'iiti s'ee^{'n} cuchíi ní ní nduuvidaamá ní chi che^{'e} nguui^{'n} ní chi ye^{'e} 'viicu ye^{'e} Ndyuūs chi ch'εεε. ¹⁸Cuchíi ní ní che'é ní yuute ye^{'e} reyes ndúúcū yuute ye^{'e} capitanes ndúúcū yuute ye^{'e} sa^{'ā} chi véé ca fuerzas ye^{'e} yā ndúúcū yuute ye^{'e} 'yuūdūu ní ye^{'e} nducyaaca 'ii^{'yā} chi sндуú yā 'yuūdūu ndúúcū yuutē ye^{'e} nducyáácá 'ii^{'yā}, 'ii^{'yā} chi libre yā ní 'ii^{'yā} chi esclavo yā, 'ii^{'yā} chi nga^{'a} n'tii^{'nyu} ndúúcū taná^{'ā} 'ii^{'yā}.

¹⁹Tuu'mi ní n'diichí 'iiti monstruo chi ch'εεε ca ndúúcū reyes ye^{'e} i^{'nyee} d'í cūū ndúúcū soldados ye^{'e} yā chi nduuvidaamá yā ndúúcū 'iiti mii^{'n} chi dií^{'n} yā caandaá ndúúcū 'ii^{'yā} chi canduú yā 'yuūdūu cuéē mii^{'n} ndúúcū soldados ye^{'e} yā. ²⁰Ní 'ii^{'yā} mii^{'n} chi canduú yā 'yuūdūu cuéē mii^{'n} sta'á yā monstruo mii^{'n} chi 'iiti preso tí. 'Tiicá ntúū^{'n} sta'á yā chi preso sa 'áámá sa^{'ā} chi nga^{'a} sa chi profeta sa, ní nguéé profeta sa. Naati sa^{'ā} mii^{'n} dii^{'n} sa señas ndúúcū vaadi n'gínūu ní chinche'éi yā 'ii^{'yā} chi canéé ndúúcū sello ye^{'e} tí na cuerpo ye^{'e} yā. Ní i'téenu yā

'iiti santo ye^{ne}é tī. Níicú nduu 'uuví sa chi preso sa, 'iiⁿyāⁿ miiⁿ sta'á yā nduu 'uuví sa ne^{ne}e chi canduuchi sa ní chin'dáá nuúⁿ yā nduu 'uuví sa na nuúⁿnīⁿyáⁿā ye^{ne}e ngiichi yaⁿā chi ngiichi ndúú^cū tuūu chi azufre. ²¹Áámá yā ndúú^cū machete 'uuvi lados 'caāiⁿ chi canéé na cheendí yā chi canduú yā na 'yuūdūu cuéé ch'iⁿíⁿnúⁿ yā tanáⁿā soldados ye^{ne}e 'iiti monstruo. Ní nducyaaca 'yáádá che'é tī nducuéⁿē yuūtē ye^{ne}e soldados ní chiitu 'yáádá s'éeⁿ ye^{ne}e yúútē ye^{ne}e yā.

Ye^{ne}e mil nduūyū

20 Cuayiivi ní n'diichí 'áámá ángel chi cuch'éeⁿ yā ye^{ne}e va'ai cheeti nguuvi ní ndéé yā na ta'a yā llave ye^{ne}e yiive yáⁿāa ndúú^cū 'áámá cadena ch'ete ca. ²Ní ángel miiⁿ sta'á yā 'iiti dragón chi cúú miiⁿ chi canéé tī ndii tiempo chi ch'ó'oo chi nguuvi diablo o yááⁿnguiniūⁿ chi Satanás. Ní ángel miiⁿ dichíichí yā 'iiti dragón miiⁿ ndúú^cū cadena ch'ete ca. Ní canéé tī 'tíicā cheeti 'áámá mil nduūyū. ³Ní ángel miiⁿ chin'dáá nuúⁿ yā 'iiti dragón miiⁿ na yiive yáⁿāa naachi canee chiichí tī. Ní nan'gaadí yā cheendi va'ai ye^{ne}ē. Ní s'neéⁿ yā 'áámá sello vmnaaⁿ cheendi va'ai miiⁿ. Ní 'iiti dragón miiⁿ 'āā ntéé cuuvi cannche'éí tī 'iiⁿyāⁿ ye^{ne}e naciones ndíí 'cuiinu 'áámá mil nduūyū. Ní cuayiivi ní canéé chi n'daatií yā 'iiti dragón miiⁿ 'áámá tiempo 'lííⁿ nūuⁿ.

⁴Ní cuayiivi ní n'diichí tronos ní 'iiⁿyāⁿ véé yā na tronos. Ní 'áámá 'iiⁿyāⁿ ca'á yā poder 'iiⁿyāⁿ s'eeⁿ chi dííⁿ yā juzgar 'iiⁿyāⁿ. Ní n'diichí

almas ye^{ne}e 'iiⁿyāⁿ ndiitaá daandu yā ti caⁿa cuaacú yā ye^{ne}e Jesucristo. Ní caⁿa ntúuⁿ yā nduudu cuaacu ye^{ne}é Ndyuūs. 'Iiⁿyāⁿ s'eeⁿ nguéé ch'i'téenu yā 'iiti monstruo miiⁿ, ní nguéé ch'i'téenu yā 'iiti santo ye^{ne}é tī. Ndíí nguéé ndúú ca'a yā lugar 'iiti monstruo miiⁿ chi s'neéⁿ tī sello ye^{ne}é tī ncheeté yā o ta'á yā. Ní 'iiⁿyāⁿ s'eeⁿ ch'etinduuchí ntuuⁿ yā ní ngaⁿa ntiíⁿnyúⁿ yā dáámá ndúú^cū Cristo cheeti 'áámá mil nduūyū. ⁵Chuū miiⁿ ní vmnááⁿ vmnaaⁿ chi 'iiⁿyāⁿ s'eeⁿ nanduuchí ntuuⁿ yā naati tanáⁿā 'iiⁿyāⁿ chi n'díí yā nguéé nduuchí ntúuⁿ yā ndíí chi ch'ó'oo 'áámá mil nduūyū miiⁿ. ⁶De'e chúú^cā yeenú 'iiⁿyāⁿ chí ye^{ne}é Ndyuūs, 'iiⁿyāⁿ chi vmnááⁿ vmnaaⁿ caⁿá yā ch'etinduuchí ntuuⁿ yā ye^{ne}ē nguaaⁿ tináⁿā. Maaⁿ ní ndii chííⁿ ndii 'úúví cuuvi 'cuūvi 'iiⁿyāⁿ nguéé véé poder ye^{ne}e chi tuneéⁿ 'iiⁿyāⁿ s'eeⁿ chi 'cuūvi yā. Ní 'iiⁿyāⁿ s'eeⁿ ní cuuvi chiiduú s'eeⁿ ye^{ne}e Ndyuūs ní ye^{ne}e Cristo ní caaⁿmaⁿ ntiíⁿnyúⁿ yā dáámá ndúú^cū Cristo cheeti 'áámá mil nduūyū.

⁷Ní taachi ch'iinu 'áámá mil nduūyū miiⁿ n'daatií yā yááⁿnguiniūⁿ chí ndíchiichi sa ní cuhée sá ye^{ne}e yiivéé chi vácūū naachi canéé sa. ⁸Ní caⁿa sa chiica sa chi cannche'ei sa 'iiⁿyāⁿ ye^{ne}e naciones ye^{ne}e núúⁿmáⁿ íⁿyeéⁿdí chi 'iiⁿyāⁿ s'eeⁿ caⁿá yā lado ye^{ne}ē sa. Ní cannche'ei sa rey Gog ndúú^cū yááⁿ Magog chi yááⁿ ye^{ne}e yā. Ní nadidáámá sá nducyaaca 'iiⁿyāⁿ chi dííⁿ sa caandaá. Ní 'iiⁿyāⁿ s'eeⁿ ndúú^cū sa ní ndee n'dái yā tan'dúú^cā yaⁿā ndúú^tíi ye^{ne}ē yíicú. ⁹Ní 'iiⁿyāⁿ s'eeⁿ cue^{ne}é yā

nuuⁿmaⁿ iⁿ'yeeⁿdí ní cuaaⁿ diituu ní nuuⁿmaⁿ ndiivi yeⁿe campamento yeⁿe 'iiⁿ'yāⁿ chi yeⁿ'é Ndyuūs ní yeⁿ'e yááⁿ Jerusalén chi Ndyuūs neené neⁿ'e. Ní Ndyuūs dichó'ó yā chi chingéé nguuchi yaⁿ'ā yeⁿ'ē na va'ai cheeti nguuvi. Ní 'iiⁿ'yāⁿ s'eeⁿ ngiichi ndúúcu nguuchi yaⁿ'ā miiⁿ ní dí'cuuinú yā. ¹⁰Ní yááⁿ'n'guiinūⁿ miiⁿ chi diablo chi chinnche'ei sá 'iiⁿ'yāⁿ, 'áámá yā chin'dáánuúⁿ yā saⁿ'ā miiⁿ ndii nuūⁿnīⁿ'yáⁿ'ā chi ngiichi ndúúcu tuūu azufre naachi 'āā chin'dáánuúⁿ yā 'iiti monstro miiⁿ ndúúcu profeta chi nguéé caⁿ'a yā nduudu cuaacu. Ní 'cuenú yā cuuvi na lugar miiⁿ ndii nguuvi ndíi n'gaaⁿ. Ní cueⁿ'e daāⁿmaⁿ ní 'cuenú yā cuuvi.

**Cristo n'diichí yā nuuⁿndi
yeⁿ'e 'iiⁿ'yāⁿ taachi ch'iindí
yā na trono cuéé yeⁿ'e yā**

¹¹Cuayiivi ní n'diichí 'áámá trono chi ch'ēete ní cuéé ní 'áámá 'iiⁿ'yāⁿ véé yā na trono miiⁿ. Ní na yáⁿ'āā ndúúcu nanguuvi cueⁿ'e yeⁿ'ē nanáaⁿ yā. 'Āā ntéé mar táámá lugar naachi cuuví cuéetineē na yáⁿ'āā ndúúcu nanguuvi. ¹²Ní n'diichí 'iiⁿ'yāⁿ s'eeⁿ chí n'dii yā, tináⁿ'ā chi n'gēete yā chi ngaⁿ'a ntiiⁿ'nyuⁿ yā ndúúcu tanáⁿ'ā tináⁿ'ā. Nducyaaaca yā ní cheetindii yā nanááⁿ Ndyuūs. Ní Ndyuūs nan'guaáⁿ yā libros yeⁿ'e yā. Ní nan'guaáⁿ yā táámá libro chí libro yeⁿ'e vida cueⁿ'e daāⁿmaⁿ. Ní Ndyuūs n'diichí yā nuuⁿndi yeⁿ'e tináⁿ'ā s'eeⁿ yeⁿ'é dendu'ū chi canéé nguūⁿ na libro s'eeⁿ tan'dúúca chí dííⁿ yā. ¹³Ní 'iiⁿ'yāⁿ chí ch'ii yā nguaaⁿ nuūⁿnīⁿ'yáⁿ'ā ní nan'dáa yā. Ní tanáⁿ'ā chí snúú yā na lugar

yeⁿ'e 'iiⁿ'yāⁿ chí n'díí ní nan'dáa yā. Ní Cristo n'diichí yā nuuⁿndi yeⁿ'e ca'áámá ca'aamá yā tan'dúúca chí dííⁿ yā. ¹⁴Tuu'mi ní vaadí n'gii ndúúcu lugar yeⁿ'ē ndúúcu 'iiⁿ'yāⁿ chí n'díí yeⁿ'e 'áámá yā cannuúⁿ yā ná nuūⁿnīⁿ'yáⁿ'ā chí ngiichi. Ní nuūⁿnīⁿ'yáⁿ'ā chí ngiichi miiⁿ, chííⁿ chí ndíí 'úúví vaadí n'gii ní yeⁿ'é 'iiⁿ'yāⁿ chí n'díí yā. ¹⁵'Áámá 'iiⁿ'yāⁿ chin'dáa nuuⁿ yā na nuūⁿnīⁿ'yáⁿ'ā chí ngiichi miiⁿ nducyáácá 'iiⁿ'yāⁿ chí nguéé canee n'guūⁿ chí duuchi yeⁿ'e yā na libro yeⁿ'e vida cueⁿ'e daāⁿmaⁿ.

**Yeⁿ'e va'ai cheeti nguuvi ngai
ndúúcu iⁿ'yeeⁿdí ngai**

21 Maaⁿ ní n'diichí táámá va'ai cheeti nguuvi chí ngai ndúúcu 'áámá yáⁿ'āā chí ngai ti va'ai cheeti nguuvi chí vmnááⁿ vmnaaⁿ miiⁿ ndúúcu yáⁿ'āā chí vmnááⁿ vmnaaⁿ miiⁿ ní chó'ōo yeⁿ'ē. Ní 'tiicá ntúūⁿ 'āā ntéé véé nuūⁿnīⁿ'yáⁿ'ā. ²Ní 'úú, Juan, n'diichí yáāⁿ chí dēve chí yáāⁿ Jerusalén chí ngai chí chiicā yeⁿ'e na va'ai cheeti nguuvi naachi canéé Ndyuūs. Ní yáāⁿ miiⁿ ní yēve taaví tan'dúúca 'aama n'daataá chí caama 'caandavaacu tá ní dēve idiiⁿ tá ndúúcu tá cáávā novio yeⁿ'e tá. ³Ní ch'iindiveéⁿ 'áámá nduudu ch'ēete yeⁿ'e na va'ai cheeti nguuvi chí caⁿ'a 'túúca: Cuin'diichí ní maaⁿ. Va'ai yeⁿ'e Ndyuūs ní canee ndúúcu 'iiⁿ'yāⁿ s'eeⁿ ní Ndyuūs canéé yā nguaaⁿ 'iiⁿ'yāⁿ s'eeⁿ. Ní Ndyuūs canéé yā ndúúcu 'iiⁿ'yāⁿ s'eeⁿ. Ní 'iiⁿ'yāⁿ s'eeⁿ ní cuuvi 'iiⁿ'yāⁿ yeⁿ'é yā. Ní maááⁿ Ndyuūs miiⁿ ní cuuvi Ndyuūs yeⁿ'é yā. ⁴Ndyuūs didēvé yā nuūⁿnīⁿ

nduutinaáⁿ yā yeⁿe nduutinaáⁿ
 'iiⁿyāⁿ s'eeⁿ. 'Āā ntéé cuuvi 'cuūvi yā.
 'Āā ntéé cuuvi ya'ai ca yā ní 'āā ntéé
 cuεεcu yā. 'Āā ntéé cuuvi 'cueenú yā
 cuuvi ti dendú'ú yeⁿe cuááⁿ vmnaaⁿ
 'āā chó'oo.

⁵Tuu'mi ní 'iiⁿyāⁿ chi véé yā
 na trono miiⁿ ní caⁿa yā: Ndí's'tiī
 n'diichí nī. 'Úú ní dííⁿ tanducuéⁿē
 dendu'ú chi nduuví ngai. Ní 'iiⁿyāⁿ
 miiⁿ caⁿa yā chii yā 'úú: Dii,
 Juan, dingúúⁿ di nduudu s'eeⁿ ti
 nduudu s'eeⁿ ní nduudu cuaacu. Ní
 nducyaaca 'iiⁿyāⁿ cuuvi cu'téenu yā
 nduudu s'eeⁿ.

⁶Cuayivi caⁿa yā chii yā 'úú
 'tíicā: 'Úú dīn'daí nducuéⁿē. 'Úú ní
 yeⁿe cuaaⁿ naachi ínga'ā ní ndíí
 cuaaⁿ ná 'cuiinu tan'dúucā letras
 A ndíí Z yeⁿe alfabeto. 'Iiⁿyāⁿ chi
 yaaca yā 'úú ní ca'á nuūⁿnīⁿ chi cu'u
 yā tanducuéⁿē chi neⁿé yā ní nguéé
 nadí'íve yā cáávā nuūⁿnīⁿ miiⁿ chi
 vida cueⁿe daāⁿmaⁿ. ⁷'Iiⁿyāⁿ chi
 cuchéé yā yeⁿe tanducuéⁿē 'úú ní
 ca'á tanducuéⁿē chuū chi cuuvi
 yeⁿé yā. Ní 'úú cuuvi Ndyuūs yeⁿe
 yā ní 'iiⁿyāⁿ s'eeⁿ ní cuuvi daiyá.

⁸Naati 'iiⁿyāⁿ chí 'va'a yā ndúucū
 'iiⁿyāⁿ chí nguéé i'téenu yā o 'iiⁿyāⁿ
 chí nguéé neⁿe yā 'iiⁿyāⁿ, ndúucū
 'iiⁿyāⁿ chí n'gi'iiⁿnúⁿ yā 'iiⁿyāⁿ,
 ndúucū 'iiⁿyāⁿ chí caⁿ'á yā ndúucū
 n'daataá o isaⁿ'ā chí nguéé yeⁿe yā,
 ndúucū 'iiⁿyāⁿ chí nadiiⁿ dendu'ú
 yeⁿe ngaatu, ndúucū 'iiⁿyāⁿ chí
 i'téenu yā santos chí ídolos, ndúucū
 'iiⁿyāⁿ chí yaadí yā, nducyaaca
 'iiⁿyāⁿ s'eeⁿ ní canéé chí caⁿ'á yā
 nuūⁿnīⁿyáⁿ chí ngiichi ndúucū
 yaⁿ'ā ní ndúucū tuūu azufre. Chuū
 ní chiiⁿ chí ndii 'uūví cúúví 'cuūvi
 yā.

Yeⁿe yāā Jerusalén chí ngai

⁹Tuu'mi ní ndaā nanááⁿ 'úú 'áámá
 cheε ángel naachi ndeēche yā chí véé
 'cuūtií yeⁿé yā, 'cuūtií s'eeⁿ ndúucū
 ndeēchē vaadi ya'ai yeⁿe cuaaⁿ na
 'cuiinu. Ní caⁿ'a yā chii yā 'úú: Díí,
 Juan, cuchíí di 'muuⁿ ni 'úú 'cuiⁿmíⁿ
 dii du'u chí novia chí n'daataá yeⁿe
 'iiⁿyāⁿ chí nguuvi 'iiti cuūchí.

¹⁰Ní chuū ní yeⁿe chí n'diichí
 taachi caneé maaⁿ poder yeⁿe
 Espíritu N'dai yeⁿé Ndyuūs. Angel
 candéε yā 'úú naachi véé 'áámá
 yiicū ch'εete ní yaacu. Ní ch'iⁿ'í yā
 'úú yāā ch'εete ní dεeve chí nguuvi
 Jerusalén chí cuch'ééⁿ yeⁿe na va'ai
 chεeti nguuvi yeⁿe nanááⁿ Ndyuūs.

¹¹Yāāⁿ miiⁿ ní dεevé ngii ndúucū
 yeⁿé Ndyuūs chí dεevé ngii. Ní dεevé
 ngii yeⁿe yāāⁿ miiⁿ ní tan'dúucā
 'áámá tuūu chí yaⁿ'ai chí'ívé chí
 tan'dúucā tuūu jaspe chí dεevé
 tan'dúucā cristal. ¹²Ní véé 'áámá
 ncheēti nuuⁿmaⁿ ndiivi na yāāⁿ
 miiⁿ ndúucū ndichúúví cheendi
 va'āi ch'εete yeⁿé. Ní véé ndichúúví
 ángeles 'áámá 'áámá yā ní
 nguaindaí yā 'áámá 'áámá cheendi
 va'āi ch'εete miiⁿ. Ní chí duuchi
 chí canéé nguūⁿ vmnaaⁿ ca'áámá
 ca'áámá cheendi va'ai ch'εete miiⁿ
 ní 'áámá yeⁿe chí duuchi yeⁿe chí
 ndu'u ndichúúví tribus yeⁿe 'iiⁿyāⁿ
 chí Israel chí judíos. ¹³Ní véé 'iinū
 cheendi va'āi n'gεete 'áámá 'áámá
 lado yeⁿé yāāⁿ miiⁿ. Cuaaⁿ naachi
 can'daā 'yáⁿ'ā vεe 'iinū cheendi
 va'āi. Ní cuaaⁿ na 'niiⁿ'nuⁿ véé 'iinū
 cheendi va'āi, ní cuaaⁿ ndiiyā véé
 'iinū cheendi va'āi, ní cuááⁿ na
 ngiia 'yáⁿ'ā véé 'iinū cheendi va'āi.
¹⁴Ní cimientu yeⁿe yāāⁿ miiⁿ véé

ndichúúví tuūu chi cimientu yeⁿē. Ní chi duuchi yeⁿe ndu'u ndichuuví apóstoles yeⁿe 'iiⁿ'yāⁿ chi duuchi 'iiti cuūchī, 'áámá 'áámá chi duuchí yā canéé nguūⁿ vmnaaⁿ 'áámá 'áámá tuūu miiⁿ.

¹⁵Ní ángel miiⁿ chi ngāⁿ'a yā ndúúú 'úú ndéε yā 'áámá tááⁿ ndúú yeⁿe 'dííⁿ'nguāⁿ chi dicaadí yā yááⁿ miiⁿ ndúúú cheendi va'āi ch'εete miiⁿ yeⁿē ndúúú ncheētī miiⁿ yeⁿē.

¹⁶Ní yááⁿ miiⁿ ní cuadrada ní chi ch'ee'nuu dáámá nūuⁿ ndúúú chi ch'eēnūu. Ní ángel miiⁿ ní dicaadí yā yááⁿ miiⁿ ndúúú nduu yeⁿe 'dííⁿ'nguāⁿ. Ní caadi yeⁿe yááⁿ miiⁿ ní 'uūví mil canéé uūví cientos kilómetros yeⁿē. Ní chí ch'ee'nuu miiⁿ ní chi ch'eēnūu ní chi yaacu yeⁿe yááⁿ miiⁿ 'āā daamá nūuⁿ. ¹⁷Ní ángel miiⁿ dicaadí yā nancheētī miiⁿ. Ní ngíí 'iinū ngεecu cuūⁿ metros chi ángel miiⁿ dicaadí yā. Ní caadí miiⁿ ní dáámá ndúúú caadí yeⁿe chi caadí 'iiⁿ'yāⁿ chi snee iⁿ'yeeⁿdí 'cūū.

¹⁸Ní ncheētī miiⁿ ní chin'dai ndúúú tuūu jaspe. Ní yááⁿ miiⁿ ní chin'dai yeⁿe dámaāⁿ 'dííⁿ'nguāⁿ puro. Ní tan'dúúú chi 'nááⁿ vidrio dεeve, 'tíicā yááⁿ miiⁿ. ¹⁹Cimiento yeⁿe ncheētī miiⁿ ndíí adornado ndúúú tanducuéⁿē tuūu chí yaⁿ'ai chíí'vē. Cimiento chí vmnááⁿ vmnaaⁿ miiⁿ ní yeⁿe tuūu jaspe, ndii chííⁿ ndii 'uūví miiⁿ ní yeⁿe tuūu zafiro, ndii chííⁿ ndii 'ínú miiⁿ ní yeⁿe tuūu ágata ní ndii chííⁿ ndii cuūⁿ miiⁿ ní yeⁿe tuūu esmeralda. ²⁰Ndii chííⁿ ndii nyuⁿ'u miiⁿ ní yeⁿē tuūu ónice, ní ndii chííⁿ ndii niyaaⁿ miiⁿ ní yeⁿē tuūu cornalina, ní ndii chííⁿ ndii ndéēchē ní yeⁿe tuūu

crisolito, ní ndii chííⁿ ndii niiⁿ'niⁿ ní yeⁿe tuūu berilo, ní ndii chííⁿ ndii nuuⁿ ní yeⁿe tuūu topacio, ní ndii chííⁿ ndii ndiichi ní yeⁿe tuūu crisoprasa, ní ndii chííⁿ ndicháámá ní yeⁿe tuūu jacinto, ní ndii chííⁿ ndichúúví ní yeⁿe tuūu amatista. ²¹Ní ndu'u ndichúúví cheendi va'āi n'gεete miiⁿ ní ndiichúúví perlas. Ní ca'áámá ca'áámá cheendi va'āi ch'εete miiⁿ ní 'áámá perla nūuⁿ. Ní yúúní ch'εete yeⁿe yááⁿ miiⁿ dámaāⁿ 'dííⁿ'nguāⁿ puro ní dinááⁿ tan'dúúú vidrio dεeve.

²²Ní 'úú nguéé n'diichí mar 'áámá yaācū na yááⁿ miiⁿ ti Señor chi Ndyuūs chi véé tanducuéⁿē dendu'ū poder yeⁿe yā ndúúú 'iiⁿ'yāⁿ chi nguuví 'iiti cuūchī miiⁿ, 'iiⁿ'yāⁿ s'uuuⁿ chi Ndyuūs chi yaācū yeⁿe yááⁿ miiⁿ. ²³Ní yááⁿ miiⁿ nguéé neⁿe 'yáⁿ'ā ndíí nguéé ndúú 'iiyū chi dεeve yeⁿē ti Ndyuūs chi dεeve ngii ní dεeve yeⁿe yááⁿ miiⁿ, ní 'iiⁿ'yāⁿ chi duuchi 'iiti cuūchī ní dεeve yeⁿe yááⁿ miiⁿ. ²⁴Ní 'iiⁿ'yāⁿ chi nadanguaⁿ'ai yā yeⁿe naciones chiicá yā ná dεeve yeⁿe yááⁿ miiⁿ. Ní reyes yeⁿe yáⁿ'āa 'cūū ndéε yā ch'εete yeⁿe maáⁿ yā ndúúú honra yeⁿe maáⁿ yā nduucú yā ndii yááⁿ miiⁿ. ²⁵Ní cheendi va'ai n'gεete yeⁿe yááⁿ miiⁿ nguéé nduudi núúⁿ'máⁿ nguuví. Ní 'āā ntéé véé n'gaaⁿ miiⁿ. ²⁶Ní 'iiⁿ'yāⁿ s'eeⁿ yeⁿe naciones yeⁿe iⁿ'yeeⁿdí 'cūū ní ndéε yā yeⁿē chi ch'εete ndúúú honor yeⁿe naciones yeⁿé yā. ²⁷Nguéé cuuvi cundaā na yááⁿ miiⁿ dendu'ū chi nguéé dεeve, ndúúú 'iiⁿ'yāⁿ chi diiⁿ yā chi nguéé n'daacā, ndúúú 'iiⁿ'yāⁿ chi ngaⁿ'a yā nduudu yaadi. Dámaāⁿ cundaā 'iiⁿ'yāⁿ chi canéé nguūⁿ chi duuchi

yā na libro yeⁿe vida cueⁿe daāⁿmaⁿ chi ndéε 'iiⁿyāⁿ chi nguuvⁱ 'iiti cuūchī.

22 Tuu^mi ní ángel miiⁿ ch'iⁿi yā 'úú 'áámá yíícú dεεve naachi canéé nuūⁿnīⁿ yeⁿe vida cueⁿe daāⁿmaⁿ. Nuūⁿnīⁿ miiⁿ ní dεεvé tan'dúúca cristal ní ican'daā yeⁿe trono yeⁿe Ndyuūs ndúúcu trono yeⁿe 'iiⁿyāⁿ chi nguuvⁱ 'iiti cuūchī. ²Ní náávtaⁿa yeⁿe yúúní ch'εete yeⁿe yāāⁿ miiⁿ ní nduu 'úúví lado yeⁿe yíícú mííⁿ cáta'ai yáⁿá yeⁿe vida cueⁿe daāⁿmaⁿ chi ngii ndu^u ndichúúví naaⁿ n'guiⁱ. Ní ca'aama 'íyú ní ngii 'áámá 'áámá naaⁿ n'guiⁱ yeⁿe. Ní tá'á yáⁿá miiⁿ chíⁿ chi diiⁿ chi nduūvā yeⁿe vaadi ya'ai yeⁿe naciones. ³Áā ntéé véé mar 'áámá dendu^u miiⁿ chi Ndyuūs caⁿa yā chi condenado chi canéé na yāāⁿ miiⁿ. Trono yeⁿe Ndyuūs ndúúcu trono yeⁿe 'iiⁿyāⁿ chi nguuvⁱ 'iiti cuūchī canéé na yāāⁿ miiⁿ. Ní 'iiⁿyāⁿ chi dichíí'vε Ndyuūs canéé yā miiⁿ. ⁴Ní 'iiⁿyāⁿ s'eeⁿ ní snaáⁿ yā naáⁿ Ndyuūs ní canéé nguūⁿ chi duuchi Ndyuūs nchεete yā. ⁵Ní nguéé cuuvⁱ n'gaaⁿ yāāⁿ miiⁿ. 'Iiⁿyāⁿ s'eeⁿ chi n'geetinée yā miiⁿ nguéé neⁿé yā mar 'áámá dεεve yeⁿe lámpara ní nguéé dεεve yeⁿe 'yáⁿā caati 'iivú Ndyuūs ngíí dεεve yā. Ní 'iiⁿyāⁿ s'eeⁿ caaⁿmaⁿ ntiiⁿnyuⁿ yā cueⁿe daāⁿmaⁿ cueⁿe daāⁿmaⁿ tan'dúúca reyes.

Tiempo taachi cuchíí Jesucristo ní 'āā canéé niiⁿnuúⁿ

⁶Cuayivi miiⁿ ní ángel caⁿ'á yā chii yā 'úú: Nduudú 'cūū ní nduudu cuaacu. Ní 'iiⁿyāⁿ cuuvi cu'téenu yā nduudu miiⁿ. Señor chi

maaⁿ Ndyuūs yeⁿe espíritus yeⁿe 'iiⁿyāⁿ profetas chi Ndyuūs ndεεvé yā, maáⁿ yā dicho'ó yā ángel yeⁿe yā chi ángel 'cuuⁿmíⁿ yā 'iiⁿyāⁿ chi dichíí'vε Ndyuūs dendu^u chi 'āā canéé chi chó'oo ní 'āā snee niiⁿnuúⁿ.

⁷Jesús ngaⁿ'á yā ngii yā ndís'tiī. 'Caandiveéⁿ nī. 'Úú ní ndaá nuuⁿ. Dε'ε chúúca yeenu 'iiⁿyāⁿ chi 'caandiveéⁿ yā nduudu cuaacu yeⁿe Ndyuūs, nduudu chi canéé nguūⁿ na libro 'cūū.

⁸'Úú, chi Juan, ch'iindiveéⁿ ní n'diichí dendu^u chi 'túúca. Ní cuayivi chi n'diichí ní ch'iindiveéⁿ chuū, candiitin'dií ná ca'a ángel chi ch'iⁿi yā 'úú dendu^u chi 'túúca chi neⁿé i'teenú ángel miiⁿ.

⁹Naati ángel miiⁿ caⁿ'a yā chii yā 'úú: Nguéé diiⁿ di 'tííca. 'Úú ntúūⁿ dichii'vε Ndyuūs tan'dúúca dii ndúúcu hermanos yeⁿe di chi ngaⁿ'á yā nduudu cuaacu yeⁿe Ndyuūs ndúúcu nducyáácá yā chí 'caandiveéⁿ yā nduudu cuaacu chi canéé nguūⁿ na libro 'cūū. Díí, cu'téenu di Ndyuūs.

¹⁰Ní ángel miiⁿ ní caⁿ'a ntúūⁿ yā chii yā 'úú: Nguéé cunuuⁿ n'dé'ei di nduudu cuaacu yeⁿe Ndyuūs chi canéé nguūⁿ na libro 'cūū caati tiempo yeⁿe dendu^u chi 'túúca 'āā snee niiⁿnuúⁿ. ¹¹Maaⁿ ní cu'néeⁿ nī 'iiⁿyāⁿ chi nguεε n'daacā idiíⁿ yā chi 'tííca dííⁿ yā. 'Tiicá ntúūⁿ 'iiⁿyāⁿ chi nadacadiinúúⁿ yā yeⁿe dendu^u chi nguεε n'daacā, cu'néeⁿ nī chi 'tííca dííⁿ yā. 'Iiⁿyāⁿ chi din'daacá yā, cu'néeⁿ nī chi dííⁿ yā 'tííca. 'Iiⁿyāⁿ chi 'áámá dííⁿ yā ntiiⁿnyuⁿ yeⁿe Ndyuūs cu'néeⁿ nī chi 'aama dííⁿ yā 'tííca.

¹²Caandiveéⁿ nī chiiⁿ chi caⁿa Jesús. 'Úú ní núúⁿ nūuⁿ ndaá. Ní ndéé premios chi caⁿá ca'á 'áámá 'áámá 'iiⁿyāⁿ premios chi tuneé yā yeⁿé ntiiⁿnyuⁿ chi yeⁿe yā. ¹³'Úú ní 'iiⁿyāⁿ vmnááⁿ vmaaaⁿ ndíí naachi 'cuiinu. 'Úú ní caneé naachi chinga'ā ndíí cuayiivi chí 'cuiinū tan'dúuca letras yeⁿe alfabeto A ndíí Z, 'tíicā 'úú, ngaⁿa Jesús.

¹⁴De'e chúucā yeenu 'iiⁿyāⁿ s'eeⁿ chi nandεεvé yā catecai yā caati cuuvi cuta'á yā n'gui'i yeⁿé yáⁿá yeⁿe vida, ní cuuví cundaa yā cheendi va'ai yeⁿe yāāⁿ miiⁿ ní cho'ó yā cuaaⁿ cheētī va'ai cheeti nguuvi. ¹⁵Naati cuaaⁿ daami yāāⁿ miiⁿ ch'εetinée 'iiⁿyāⁿ chi nguéé chi'téenu yā Ndyuūs ndúúcū 'iiⁿyāⁿ chí ngaatu, ndúúcū 'iiⁿyāⁿ chí caⁿá yā ndúúcū ndaataá o isaⁿā chi nguéé yeⁿé yā, ndúúcū 'iiⁿyāⁿ chí n'giiⁿnúⁿ yā 'iiⁿyāⁿ, ndúúcū 'iiⁿyāⁿ chí i'téenu yā santos o ídolos ndúúcū nducyáácá 'iiⁿyāⁿ chí neⁿé yā nginnche'éei yā 'iiⁿyāⁿ ní ngaⁿa yā nduudu yaadi.

¹⁶'Úú Jesús idicho'ó ángel yeⁿé chi caaⁿmaⁿ cuaacú yā yeⁿe nducuéⁿe cosas chí 'túucā nanááⁿ ndís'tii chí 'iiⁿyāⁿ yeⁿe yaacū s'eeⁿ. 'Úú ní 'iiⁿyāⁿ vmnááⁿ vmaaaⁿ yeⁿe ndaata yeⁿe David 'úú. 'Úú ní 'ííⁿnyúⁿ chí ngíí dεεve nguεetiyyaⁿ.

¹⁷Espíritu N'dai yeⁿé Ndyuūs ndúúcū 'iiⁿyāⁿ s'eeⁿ chí yeⁿé Ndyuūs ngaⁿa yā 'tíicā: Ndís'tii

cuchíi nī. Ní 'āā du'ú nūuⁿ 'iiⁿyāⁿ chí n'giindiveéⁿ yā nduudu yeⁿé ní canéé chí caaⁿmaⁿ yā: Cuchíi nī. Ní n'dií chí yaaca nī cuchíi nī. Cuchíi nī ndúúcū 'āā du'ú nūuⁿ 'iiⁿyāⁿ chí neⁿé yā. Cuchíi nī ní cu'u nī yeⁿe nuūⁿnīⁿ yeⁿe vida cueⁿe daāⁿmaⁿ. Ní nguéé dε'ε vεε cünd'i'i yeⁿé nī nuūⁿnīⁿ yeⁿe vida cueⁿe daāⁿmaⁿ.

¹⁸'Úú ngaⁿá ngii nduudu cuaacu ca'áámá ca'áámá 'iiⁿyāⁿ chí n'giindiveéⁿ yā nduudu yeⁿe dendú'ú chí canéé chí cuchii chí canéé nguūⁿ na libro 'cūū. Nduuti chí 'áámá yā cu'neeⁿ ca n'deēe nduudú nguéé ti chí canéé nguūⁿ na libro 'cūū Ndyuūs ca'á yā 'iiⁿyāⁿ miiⁿ castigo yeⁿe yā yeⁿe nducuéⁿe vaadi ya'ai chí canéé nguūⁿ na libro 'cūū. ¹⁹Ní nduuti chí 'áámá 'iiⁿyāⁿ divíi yā naⁿa nduudu yeⁿé Ndyuūs yeⁿe dendú'ú chí cuchii chí canéé nguūⁿ na libro 'cūū, 'tíicā ntúūⁿ Ndyuūs nadivíi yā parte chí cuuvi yeⁿe yā yeⁿe libro yeⁿe vida cueⁿe daāⁿmaⁿ ndúúcū parte chí cuuvi yeⁿé yā yeⁿe yāāⁿ chí dεεve yeⁿe chí canéé nguūⁿ na libro 'cūū.

²⁰'Iiⁿyāⁿ chí ngaⁿa cuaacú yā dendu'ú chí 'túucā, 'iiⁿyāⁿ miiⁿ ngaⁿa yā: Cuaacu níⁿnyuⁿ chí 'āā cuchii nuúⁿ. 'Tíicā cuuvi. Cuchíi nī Señor Jesucristo.

²¹Ní maaⁿ ní Señor Jesucristo yeⁿe yú téé yā ndís'tii nducuéⁿe chí n'daacā yeⁿé yā, ní caneé yā ndúúcū ndís'tii. 'Tíicā cuuvi.